

Alkitab

Bahasa Toba

Kejadian

1 ¹ (I.) Di mula ni mulana ditompa Debata langit dohot tano on.

² (II.) Dung i tarulang ma tano i gabe halongonan jala holom di atas lung i, dung i mangareapreap ma Tondi ni Debata di atas ni angka aek.

³ Dung i mangkuling ma Debata ninna: Jadi ma ho na tiur! Jadi tiur ma tutu.

⁴ Nunga denggan na tiur i diida Debata, jadi dibahen Debata ma parsirangan ni na tiur sian na holom.

⁵ Dung i digoar Debata ma na tiur i arian, goar ni na holom i borngin. Dung i bot ma ari, torang ma ari muse, i ma ari parjolo.

⁶ (III.) Dung i mangkuling muse ma Debata: Jadi ma ho hajangkajang di parsitongaan ni angka aek bahen parsirangan ni aek tu aek.

⁷ Jadi dipauli Debata ma hajangkajang i, asa disirang aek angka na di toru ni hajangkajang sian aek angka na di ginjang ni hajangkajang i, gabe manjadi ma songon i.

⁸ Dung i digoar Debata ma hajangkajang i langit. Dung i bot ma ari, torang ma ari muse, i ma ari paduahon.

⁹ Dung i ninna Debata ma: Marpungu ma hamu aek, angka na di toru ni langit i tu

sada inganan, asa tarida na mahiang! Gabe manjadi ma songon i.

¹⁰Dung i digoar Debata ma na mahiang i tano, ia parpunguan ni angka aek laut digoar. Jadi nunga denggan diida Debata.

¹¹Dung i ninna Debata ma: Dipantumburhon tano i ma duhutduhut dohot suansuanan, na marparbuehon boni, hau angka na marparbuehon bonina di bagasan tudos tu mansamna be di tano on, gabe manjadi ma songon i.

¹²Jadi dipantubuhon tano i ma duhutduhut dohot suansuanan, na marparbuehon bonina tudos tu mansamna dohot hau na marparbuehon bonina di bagasan, tudos tu mansamna. Dung i nunga denggan diida Debata.

¹³Jadi bot ma ari, torang ma ari muse, i ma ari patoluhon.

¹⁴(IV.) Dung i mangkuling muse ma Debata: Jadi ma hamu angka panondang di hajangkajang ni langit i, bahen parsirangan ni arian sian borngin, gabe tanda paboa titik ni padan dohot angka ari dohot angka taon.

¹⁵Jala gabe panondang angka i di hajangkajang ni langit i, asa dipatiur tano on; dung i manjadi ma songon i.

¹⁶Dung i dipauli Debata ma dua panondang angka na bolon; panondang na bolon, pangguruan ni arian, dohot panondang na

metmet, pangguruan ni borngin, ro di angka bintang.

¹⁷Dung i dibahen Debata ma nasida tu hajangkajang ni langit i, asa disondangi tano on.

¹⁸Jala manggomgomi arian dohot borngin, jala bahen parsirangan ni na tiur sian na holom. Dung i nunga denggan diida Debata.

¹⁹(V.) Jadi bot ma ari, torang ma ari muse, i ma ari paopathon.

²⁰Dung i mangkuling muse ma Debata: Dipantubuhon angka aek i ma gulokgulok na marhosa, angka na manjirir, jala marhabangan ma angka pidong di atas tano on martongatonga langit.

²¹Dung i ditompa Debata ma angka dengke na balga dohot nasa na marhosa, angka na manjiriri di bagasan aek, masiboan mansamna ro di nasa pidong angka na masiboan mansamna. Jadi nunga denggan diida Debata.

²²Dung i dipasupasu Debata ma nasida, ninna ma: Marpinompari ma hamu, asa lam torop jala gohi hamu ma angka aek ni laut, lam torop ma dohot angka pidong di atas tano on.

²³Jadi bot ma ari, torang ma ari muse; i ma ari palimahon.

²⁴(VI.) Dung i mangkuling muse ma Debata: Dipantubuhon tano i ma hosa angka na mangolu masiboan mansamna: Angka dorbiala

dohot gulokgulok dohot binatang masiboan mansamna, gabe manjadi ma songon i.

²⁵Dung i dipauli Debata ma angka binatang ni tano on masiboan mansamna, dohot angka dorbia masiboan mansamna, dohot gulokgulok ni tano on masiboan mansamna. Jadi nunga denggan diida Debata.

²⁶(VII.) Dung i mangkuling muse ma Debata: Tole ma, itatempa ma jolma, tumiru rupanta, tudos tu pangalahonta, asa dirajai dengke angka na di laut, dohot pidong angka na martongatonga langit, dohot angka dorbia, ro di sandok tano on nang sude gulokgulok, angka na manjirir di atas tano on.

²⁷Jadi ditempa Debata ma jolma i tumiru rupana, rupana ditiruanhon Debata laho manompa ibana, baea dohot boruboru nasida ditempa.

²⁸Dung i dipasupasu Debata ma nasida, ninna Debata ma tu nasida: Marpinompari ma hamu, asa sopar hamu, jala gohi hamu sandok tano on, jala patunduk hamu; jala raja i hamu dengke angka na di laut dohot pidong angka na martongatonga langit ro di sude binatang, angka na manjirir di atas tano on.

²⁹Dung i ninna Debata ma: Boti ma i, nunga hulehon tu hamu nasa suansuanan na marparbuehon boni di sandok tano on, ro di sude hau angka na marparbue sisuanon, bahen panganonmuna ma i.

³⁰Alai anggo tu sude angka binatang ni tano on dohot tu angka pidong na martongatonga langit, ro di sude na manjirir di atas tano on, angka na marhosa di bagasan: Bulung ni angka suansuanan (hulehon) bahen panganonna, gabe manjadi ma songon i.

³¹Dung i ditilik Debata ma sude na tinompana i, jadi nunga denggan situtu. Dung i bot ma ari, torang ma ari muse, i ma ari paonomhon.

2¹(I.) Asa sun ma langit dohot tano on ro di isina sudena.

²Jadi dung sun dibahen Debata jadijadianna i di ari papituhon, maradian ma Ibana di ari papituhon sian nasa ulaonna, na binahenna i.

³Dung i dipasupasu Debata ma ari papituhon i, jala diparbadiai, ala na maradian Ibana disi sian nasa jadijadianna, na tinompa ni Debata laho pasunhon.

⁴(II.) Songon i ma panjadijadi ni langit dohot tano, di na tartompa angka i, di ari panompaon ni Debata Jahowa di tano dohot langit.

⁵Tagan so adong dope di tano on nasa ramba, jala tagan so martumbur dope nasa bulungbulung di ladang, ai ndang dope diparo Debata Jahowa udan tu tano on, jala ndang adong dopejolma na mangula tano i.

⁶Alai martimpul ma uap sian tano on, gabe dibornohi sandok sisik ni tano on.

⁷ Dung i dijadihon Debata Jahowa ma jolma i sian orbuk ni tano on jala diullushon tu bagasan bungbung ni igungna hosa hangoluan i, gabe martondi na mangolu jolma i.

⁸(III.) Dung i dipungka Debata Jahowa ma sada porlak di Eden tartungkan habinsaran, jadi tusi ma dibahen jolma na jinadihonna i.

⁹ Dung i dipantubuhon Debata Jahowa ma sian tano i nasa hau, angka na denggan idaon, jala tabo panganon, ro di hau hangoluan na di parsitongaan ni porlak i, nang hau parbinotoan ni na denggan dohot na roa.

¹⁰ Dung i ruar ma sada batang aek sian Eden i, asa dibornohi porlak i, manirpang ma sian i gabe opat batang aek bolon.

¹¹ Goar ni parjolo: Pison, na mangaliati sandok tano Hevila, panombangan sere disi.

¹² Jala meram situtu sere ni na saluat i. Jumpang do huhut disi landus dohot batu soham.

¹³ Ia goar ni batang aek paduahon: Gihon, na mangaliati sandok tano Kus.

¹⁴ Ia goar ni batang aek patoluhon: Hidekel (Tigris), na mamolus tungkan habinsaran sian Assur. Ia batang aek paopathon, i ma Euprat.

¹⁵ Dung i ditogihon Debata Jahowa ma jolma i paojakkon ibana tu porlak Eden i, asa dipaulaula jala diramoti.

¹⁶(IV.) Dung i dipatik Debata Jahowa ma jolma i, ninna ma: Jadi do panganonmu sian nasa hau di bagasan porlak on.

¹⁷Alai anggo sian hau parbinotoan ni na denggan dohot na roa, ndang jadi panganonmu; ai sadari dipangan ho sian i, sai na mate do ho.

¹⁸(V.) Dung i ninna Debata Jahowa ma: Nandang jadi punjung jolma i; hubahen ma di ibana sada pangurupina bahen donganna.

¹⁹Ai dung sun dijadihon Debata Jahowa sian tano i nasa binatang di ladang ro di sude pidong angka na martongatonga langit, ditogihon ma i tu si Adam, asa diida manang beha goaranna; jala ia i dibahen si Adam goar ni nasa na marhosa laos i do goarna.

²⁰Jadi dibahen si Adam ma goar ni nasa pahanpahanan ro di pidong angka na martongatonga langit dohot nasa na manggulmit di tano on. Alai anggo di si Adam ndang adong jumpang pangurupi bahen donganna.

²¹Dung i tarlalap modom ma si Adam dibahen Debata Jahowa, jadi dienet ma sada sian rusukna, jala dilangkophon sibuk tu pambuatanna i.

²²Dung i dipauli Debata Jahowa rusuk na binuatna i sian si Adam, bahen boruboru, jala ditogu ibana tu si Adam.

²³Dung i ninna si Adam ma: On do sahali holiholi sian angka holiholingku, jala sibuk

sian sibukku; goaron ma ibana: Jolma ni baa, ala sian baa ibana binuat.

²⁴Dibahen i tadingkonon ni baa do amana dohot inana mandongani jolmana, jadi sada sibuk nasida.

²⁵Marsaemara do nasida duansa, si Adam dohot jolmana i, jala ndang maila nasida.

3¹ (I.) Alai ulok do na umbisuk sian nasa na manggulmit di ladang, angka na jinadihon ni Debata Jahowa, jadi didok ma mandok boruboru i: Atehe tongon do didok Debata, na so jadi panganonmuna sian saluhut hau angka na di porlak on?

²Dung i ninna boruboru i ma mandok ulok i: Jadi do panganonnami sian parbue ni hau angka na di porlak on.

³Alai anggo sian parbue ni hau, na di parsitongaan ni porlak i didok Debata do: Unang pangan hamu sian i, jala unang jama hamu, asa unang mate hamu.

⁴Dung i ninna ulok i ma mandok boruboru i: Nandang na tutu hamu mate.

⁵Ai diboto Debata do, sadari dipangan hamu sian i, tonggor ma matamuna, gabe doshon Debata hamu umboto na denggan dohot na roa.

⁶Dung i sai dipanotnoti boruboru i ma parbue ni hau i dibahen dengganna panganon jala pia matana marnida, jala tau manunggul roha tu hapistaran hau i, jadi diputikkon sian

parbuena i jala dipangan, dilehon ma dohot tu sinondukna sian i, gabe dipangan.

⁷Dung i tonggor ma matanasida na dua, diboto ma na marsaemara nasida, gabe disomoti ma bulung ni hau ara bahen sabuknasida.

⁸(II.) Dung i dibege nasida ma soara ni Debata Jahowa, na medangedang di porlak i di haroro ni alogo mareak bot ari, gabe martabuni ma si Adam dohot jolmana i di holangkolang ni hau angka na di porlak i maradophon bohi ni Debata Jahowa.

⁹Dung i joujou ma Debata Jahowa di si Adam, ninna ma mandok ibana: Didia do ho?

¹⁰Jadi ninna si Adam ma: Hubege nian suaram di porlak i, gabe mabiar ahu, ai marsaemara do ahu, umbahen na martabuni ahu.

¹¹Dung i ninna Debata ma: Ise na paboahon tu ho, na marsaemara i ho? Nda tung dipangan ho sian hau na hupatikkon i mangorai panganonmu?

¹²Dung i ninna si Adam ma: Boruboru na nilehonmu bahen donganku, i do na mangalehon tu ahu sian hau i, gabe hupangan.

¹³Dung i ninna Debata Jahowa ma tu boruboru i: Boasa songon i bahenonmu? Jadi ninna boruboru i ma: Ulok i do paotooto ahu, gabe hupangan.

¹⁴Dung i ninna Debata Jahowa ma tu ulok i: Ala dibahen ho songon i gumodang ma torungku tu ho sian tu nasa pahanpahanan dohot sian tu nasa na manggulmit di ladang. Butuham na ma jururhononmu, jala orbuk panganonmu saleleng di ngolum.

¹⁵Jala bahenonku ma parbadaanmu dohot boruboru i, ro di pinomparmu tu Pinomparna. Ibana mangalisathon ulum, gabe pargutonmu tambihulna.

¹⁶Dung i ninna ma mandok boruboru i: Ganda situtu bahenonku parniahapanmu saleleng gabegabebean ho; bernit taononmu laho manubuhon anakkonmu, sinondukmu na ma ihutanmu, jala ibana mangarajai ho.

¹⁷Jala didok ma tu si Adam: Ala ditangihon ho soara ni jolmam, gabe dipangan ho sian hau na hupatikkon i, mandok: Unang pangan sian i, hona torungku ma tano on ala ho, porsuk ma ahaponmu manganhon gogona saleleng di ngolum.

¹⁸Pantubuhononna ma huhut di ho angka duriduri dohot duhutduhut na marsuga, angka ingkau rata ni ladang i na ma panganonmu.

¹⁹Ingkon hir hodokmu manganhon sipanganonmu, paima mulak ho gabe tano, pambuatanmu hian, ai tano do ho, jala tu tano do ho mulak sogot.

²⁰Dung i dibahen si Adam ma goar ni jolmana i: Hawa (hangoluan), ala ibana ina ni nasa na mangolu.

²¹ Dung i dipauli Debata Jahowa ma bobak bahen abit ni si Adam dohot jolmana i, jala dialithon tu nasida.

²² (III.) Dung i ninna Debata Jahowa ma: Ida ma, nunga doshon Sada sian Hami si Adam, umboto na denggan dohot na roa. On pe, asa unang didungdungkon tanganna mamutikkon huhut sian hau hangoluan jala dipangan gabe mangolu salelenglelengna.

²³ Jadi dipabali Debata Jahowa ibana sian porlak Eden, asa diula tano pambuatanna i.

²⁴ Jadi dilele ma si Adam i, jala dipaipahon angka kerubim tungkan habinsaran ni porlak Eden i marpodang sidua baba marjimburjimbur, asa dijaga dalan tu hau hangoluan.

4¹ (I.) Dung i sampur ma si Adam dohot si Hawa, jolmana i, jadi gabegabebean ma ibana, ditubuhon ma si Kain, jala ninna ma: Nunga maruli ahu sada baoa sian Jahowa.

² Dung i diulahi ma manubuhon si Abel anggina i; gabe parmahan birubiru ma si Abel, alai siula hauma anggo si Kain.

³ Dung i di laonlaon ni ari, diboan si Kain ma sian parbue ni haumana bahen pelean tu Jahowa.

⁴ Jadi dohot ma si Abel mamboan sian buhabaju ni birubiruna dohot sian tabotabona. Jadi lomo ma roha ni Jahowa mamereng si Abel dohot na pinelehonna i.

⁵Alai anggo si Kain dohot na pinelehonna i, ndang dibereng. Jadi pusu ma roha ni si Kain jala rupi bohina.

⁶Dung i ninna Jahowa ma mandok si Kain: Boasa tung pusu roham, jala boasa rupi bohim?

⁷Nda songon on do? Molo na denggan diula ho i ma hadirgakon ni bohi; alai molo so diula ho na denggan, mangonggop dosa i di lambung pintu mangkalungunhon ho, alai ingkon ho mangarajaisa.

⁸(II.) Dung i mangkatai ma si Kain dohot si Abel, anggina i. Alai dung ro di hauma nasida, hehe ma si Kain dompak si Abel anggina i, jala dibunu ibana.

⁹Jadi ninna Jahowa ma tu si Kain: Didia do si Abel anggim i? Nandang huboto, ninna, tung ahu ma siparorot anggingki?

¹⁰Alai ninna Jahowa ma: Aha do na binahenmi? Maungaung do sian tano i mudar ni anggim sahat tu Ahu.

¹¹Onpe gumodang ma torungku tu ho asa tu tano i, na pangangang babana jumalo mudar ni anggim sian tanganmi.

¹²Molo diula ho tano i, ndang be lehononna gogona tu ho, mompasompas jala madoado na ma ho di tano on.

¹³Dung i ninna si Kain ma mandok Jahowa: Nandang be tarsesa dosangki dibahen balgana.

¹⁴Ndi, nunga dipabali Ho ahu sadari on sian tano on, jadi martabuni na ma ahu

maradophon Bohim, gabe mompasompas jala madoado na ma ahu di tano on. Jadi manang ise na jumpangan ahu, bunuonna ma ahu.

¹⁵Alai ninna Jahowa ma mandok ibana: Antong manang ise pe na mambunu si Kain, pitu lompit abulonna. Dung i dibahen Jahowa ma sada tanda tu si Kain, asa unang dibunu manang ise na jumpangan ibana.

¹⁶Dung i manginsurut ma si Kain sian Bohi ni Jahowa laho maringan tu tano Nod, na tungkan habinsaran sian porlak Eden.

¹⁷(III.) Dung i sampur ma si Kain dohotjolmana, jadi gabegabean ma ibana, jala ditubuhon si Hanok. Dung i dipungka ma sada sosor dibahen ma goar ni sosor i Hanok, mangihuthon goar ni anakna i.

¹⁸Dung i ditubuhon si Hanok ma si Irad; si Irad manubuhon si Mehuyael; si Mehuyael manubuhon si Metusael; si Metusael manubuhon si Lamek.

¹⁹Alai anggo si Lamek dua dojolmana dibuat, goar ni na sada si Ada, goar ni paduahon si Zilla.

²⁰Dung i ditubuhon si Ada ma si Jabal, ibana do ompu ni sude angka na mangingani undungundung dohot na marpinahan.

²¹Ia goar ni anggina i si Jubal, ibana do ompu ni sude angka sipiltik hasapi dohot sordam.

²²Si Zilla pe ditubuhon do si Tubal Kain, pande ni sude angka sipauli tombaga dohot bos; ia iboto ni si Tubal Kain si Naema do.

²³Dung i ninna si Lamek ma tu jolmana na dua i, si Ada dohot si Zilla: Bege hamu ma soarangku, hamu ale jolma ni si Lamek! Pinggol hamu ma torsangkon! Sai na bunuonku do sada baoa ala ni bugangki, jala sada dolidoli ala ni bosarhon.

²⁴Ai molo pitu hali abulon ia si Kain, ingkon pitupulu hali pitu abulon anggo si Lamek.

²⁵(IV.) Dung i sampur ma si Adam muse dohot jolmana i, jadi ditubuhon ma anak sada, dibahen ma goarna si Set, ai nunga disolukkon Debata tu ahu sada tubu na asing, singkat ni si Abel, na binunu ni si Kain, ninna.

²⁶Tubu ma dohot anak ni si Set sada, dibahen ma goarna si Enos. Uju i ma dipungka halak pajoujou goar ni Jahowa.

5¹(I.) On ma buku ni angka sundut ni si Adam, di ari panompaon ni Debata di si Adam, tudos tu rupa ni Debata ibana ditompa.

²Baoa dohot boruboru nasida ditompa, jala dipasupasu nasida, jala dibahen goarnasida jolma, di ari panompaonnasida i.

³(II.) Jadi dung saratus tolupulu taon mangolu si Adam, tubu ma anakna, tudos tu rupana, songon pangalahona, dibahen ma goarna si Set.

⁴Ia umur ni si Adam, dungkonsa ditubuhon si Set ualu ratus taon do, jala ditubuhon anak dohot boru.

⁵Jadi sia ratus tolupulu taon ma sandok umur ni si Adam mangolu, dung i mate ma ibana.

⁶Dung saratus lima taon leleng ni si Set mangolu, ditubuhon ma si Enos.

⁷Ia leleng ni si Set mangolu, dung ditubuhon si Enos, ualu ratus pitu taon do, jala ditubuhon anak dohot boru.

⁸Jadi sia ratus sampulu dua taon ma sandok umur ni si Set, dung i mate ma ibana.

⁹Dung siapulu taon leleng ni si Enos mangolu, ditubuhon ma si Kenan.

¹⁰Ia leleng ni si Enos mangolu, dung ditubuhon si Kenan, ualu ratus sampulu lima taon do, jala ditubuhon anak dohot boru.

¹¹Jadi sia ratus lima taon sandok umur ni si Enos, dung i mate ma ibana.

¹²Dung pitupulu taon leleng ni si Kenan mangolu, ditubuhon ma si Mahalaleel.

¹³Ia leleng ni si Kenan mangolu dung ditubuhon si Mahalaleel ualu ratus opatpulu taon do, jala ditubuhon anak dohot boru.

¹⁴Jadi sia ratus sampulu taon ma sandok umur ni si Kenan, dung i mate ma ibana.

¹⁵Dung onompulu lima taon leleng ni si Mahalaleel mangolu, ditubuhon ma si Jared.

¹⁶Ia leleng ni si Mahalaleel mangolu, dung ditubuhon si Jared, ualu ratus tolupulu taon, jala ditubuhon anak dohot boru.

¹⁷Jadi ualu ratus siapulu lima taon sandok umur ni si Mahalaleel, dung i mate ma ibana.

¹⁸Dung saratus onompulu dua taon leleng ni si Jared mangolu, ditubuhon ma si Henok.

¹⁹Ia leleng ni si Jared mangolu, dung ditubuhon si Henok, ualu ratus taon, jala ditubuhon anak dohot boru.

²⁰Jadi sia ratus onompulu dua taon sandok umur ni si Jared, dung i mate ma ibana.

²¹Dung onompulu lima taon leleng ni si Henok mangolu, ditubuhon ma si Metusalah.

²²Jadi dung ditubuhon si Metusalah i, sai marparange, mardonganhon Debata ma si Henok tolu ratus taon lelengna, jala ditubuhon anak dohot boru.

²³Jadi tolu ratus onompulu lima taon sandok umur ni si Henok.

²⁴Jala sai marparange, mardonganhon Debata ma si Henok, dung i ndang disi be ibana, ai dialap Debata do ibana.

²⁵Dung saratus ualupulu pitu taon leleng ni si Metusalah mangolu, ditubuhon ma si Lamek.

²⁶Ia leleng ni si Metusalah mangolu, dung ditubuhon si Lamek, pitu ratus ualupulu dua taon do, jala ditubuhon anak dohot boru.

²⁷Jadi sia ratus onompulu sia taon sandok umur ni si Metusalah, dung i mate ma ibana.

²⁸Dung saratus ualupulu dua taon leleng ni si Lamek mangolu, ditubuhon ma sada anak.

²⁹Dung i dibahen ma goarna si Noak, ninna ma: On ma mangapul hita di ulaonta dohot di haloloja ni tanganta di tano on, na hona toru ni Jahowa.

³⁰Ia leleng ni si Lamek mangolu, dung ditubuhon si Noak, lima ratus siapulu lima taon do, jala ditubuhon anak dohot boru.

³¹Jadi pitu ratus pitupulu pitu taon sandok umur ni si Lamek, dung i mate ma ibana.

³²Dung lima ratus taon umur ni si Noak, ditubuhon ma si Sem, si Ham dohot si Japet.

6¹ (I.) Jadi dung mamungka lam torop jolma i di tano on, jala tubuan boru nasida.

²Diririt angka anak ni Debata ma boru ni jolma, ala na uli do nasida, jala dibuat bahen jolmanasida guru pamillitnasida.

³Jadi ninna Jahowa ma: Ndang be uhum on ni Tondingku jolma i di haliluonnasida, ai roha daging do ibana, jala saratus duapulu taon na ma umurna.

⁴Adong ma uju i angka Nepilim (pandobo) di tano on. Ai dung ditopot angka anak ni Debata angka boru ni jolma, adong ma huhut tubunasida, i ma angka na begu, angka baoa na tarbarita sian na rob.

⁵Alai dung diida Jahowa, nunga lam deak hajahaton ni jolma di tano on, jala sai na

jat na ma sude tubutubu dohot pingkiran ni rohanasida gonop ari.

⁶Jadi disolsoli Jahowa ma rohana, ala tinompana i jolma di tano on, jala lungun rohana.

⁷Dung i ninna Jahowa ma: Ripashononku ma sian tano on jolma na hutompa i, ro di pinahan dohot na manjirir, ro di pidong angka na martongatonga langit, ai nunga husolsoli bagingku ala na hutompa i nasida.

⁸Alai asi do roha ni Jahowa ianggo marnida si Noak.

⁹(II.) On ma pinompar ni si Noak: Jolma na bonar jala na daulat roha do si Noak i maradophon donganna magodang, sai marparange mardonganhon Debata do si Noak i.

¹⁰Dung i ditubuhon si Noak ma anak tolu, si Sem, si Ham dohot si Japet.

¹¹Alai nunga marjea ianggo tano i maradophon Debata, jala nunga gok hajahaton tano i.

¹²Dung i ditingkir Debata ma tano i, jala ida ma, nunga marjea: Ai tung saluhut na mardaging paroa pangalahona di tano i.

¹³(III.) Jadi ninna Debata ma tu si Noak: Nunga ro ajal ni nasa na mardaging maradophon Ahu, ai nunga gok hajahaton tano on dibahen nasida. Onpe ripashononku ma nasida rap dohot tano on.

¹⁴Bahen ma di ho sada parau sian hau goper (marantibane), bahen ma marbilut parau i jala puli sian bagasan dohot sian balian.

¹⁵Songon on ma singana bahenonmu: Tolu ratus elak unjur ni parau i, limapulu elak bohagna, jala tolupulu elak timbona.

¹⁶Bahen tartungkan ginjang sada pandiloan ni parau i, saelak timbona: Alai anggo pintu ni parau i tu lambungna bahen, jala tolu lampis bilutna bahen, sada di toru, sada di tongatonga, jala sada di ginjang.

¹⁷Ai ida, paroongku ma tu tano on aek na sumar laho mangaripashon nasa na mardaging, na marhosa hangoluan di bagasan, angka na di toru ni langit, asa tos hosa ni saluhut na di tano on.

¹⁸Alai pajongjongonku ma padanhu dohot ho, bongotanmu ma parau i, ho dohot angka anakmu dohot jolmam dohot jolma ni angka anakmi rap dohot ho.

¹⁹Jala pamasuk ma tu bagasan parau i sapasang be sian nasa na mangolu, sian nasa na mardaging, tunggal dohot boruboru, asa mangolu rap dohot ho.

²⁰Sian pidong masiboan mansamna, sian pinahan pe masiboan mansamna, sian nasa na manjirir di tano i, masiboan mansamna; sapasang be sian luhutna ro tu ho, asa mangolu.

²¹ Alai buat di ho sian nasa sipanganon, angka na tarpangan, jala papungu tu ho bahen bohalmu dohot bohalnasida.

²² Dung i dibahen si Noak ma sude, songon na tinonahon ni Debata tu ibana, songon i dibahen.

7 ¹ (I.) Dung i ninna Jahowa ma tu si Noak: Bongot i ma parau i, ho dohot sude isi ni bagasmu, ai ho do huida na bonar maradophon Ahu di na sansundut on.

² Buat ma di ho pitu pasang be, tunggal dohot boruboruna sian nasa pinahan na ganjing; alai anggo sian pinahan na so ganjing sapasang be, tunggal dohot boruboruna.

³ Sian pidong pe, angka na martonga langit, pitu pasang be, tunggal dohot boruboruna, asa adong tinggal boni mangolu di sandok tano on.

⁴ Ai pitu ari nari paroongku ma udan tu tano on opatpulu ari opatpulu borngin lelengna, asa huripashon sian tano on nasa na mangolu, na hutompa i.

⁵ Jadi dibahen si Noak ma sude, songon na tinonahon ni Jahowa tu ibana.

⁶ Alai onom ratus taon ma umur ni si Noak di na ro i aek na sumar i tu tano on.

⁷ Dung i dibongoti si Noak ma parau i rap dohot anakna dohot jolmana, ro di jolma ni angka anakna i di jolo ni aek na sumar i.

⁸Sian pinahan angka na ganjing dohot sian pinahan na so ganjing dohot sian pidong dohot sian nasa na manjirir di tano on.

⁹Angka ro be marpasangpasang mandapothon si Noak, tu bagasan parau i, tunggal dohot boruboru, songon na tinonahon ni Debata tu si Noak i.

¹⁰(II.) Jadi dung salpu na pitu ari i, ro ma aek na sumar tu tano on.

¹¹Paonomratus taonhon di ngolu ni si Noak i, di bulan sipahadua di ari sampulupitu, apala di na sadari i marbuhalbuhal ma sude angka mual ni lung godang, mungkap ma dohot angka pandiloan ni langit.

¹²Jadi masa ma udan tipotipo tu tano on opatpulu ari opatpulu borngin lelengna.

¹³Apala di na sadari i do bongot si Noak tu parau i rap dohot angka anakna, si Sem, si Ham dohot si Japet, dohot jolmana dohot na tolu jolma ni angka anakna i.

¹⁴Nasida dohot binatang marragam masiboan mansamna, dohot angka pinahan masiboan mansamna dohot sude angka na manjirir di tano on masiboan mansamna, dohot sude angka pidong masiboan mansamna, sude pidong na marende dohot na marhabong.

¹⁵Angka ro be marpasangpasang tu si Noak, tu bagasan parau i, sian nasa na mardaging, angka na marhosa hangoluan di bagasan.

¹⁶Angka na bongot i, sai marpasang be do ro sian nasa na mardaging, songon na tinonahon ni Debata tu ibana. Dung i dihinsu Jahowa ma sian pudina.

¹⁷(III.) Jadi ro ma aek na sumar tu tano on opatpulu ari, gabe lam binsat ma aek i, jala dihindathon parau i sian tano on tu ginjang.

¹⁸Dung i lam mangalantap ma aek i jala sumar situtu di tano on, gabe meapeap parau i di atas aek i.

¹⁹Jadi lam binsat situtu ma aek i di tano on gabe disalpui sude dolok, angka na timbo na di toru ni sandok langit i.

²⁰Sampululima elak aek i tumimbo sian dolok, angka na sinalpuanna.

²¹Jadi tos ma hosa ni nasa na mardaging, na manjirir di tano on, ro di pidong dohot pinahan dohot binatang, ro di sude na manggulmit di tano on, ro di jolma sudena.

²²Mate ma sude na marhosa hangoluan di bagasan igungna, sian sude angka na di darat.

²³Jadi ripas ma nasa na adong di tano on, sian jolma ro di pinahan, ro di gulokgulok ro di pidong na martongatonga langit, ripas do saluhutna sian tano on; holan si Noak tading angkup ni na rap dohot ibana di bagasan parau i.

²⁴Dung i sai mangalantap ma aek i di tano on maningtingi saratus limapulu ari lelengna.

8¹ (I.) Dung i diingot Debata ma si Noak dohot sude binatang ro di sude pinahan, angka na rap dohot ibana di bagasan parau i. Jadi dipabolushon Debata ma alogo tu tano i, asa moru aek i.

² Dipolpol ma dohot angka mual ni lung i dohot angka pandiloan ni langit, jala dihomat udan tipotipo sian langit i.

³ Jadi lam moru ma aek i sian tano on, salpu saratus limapulu borngin, nunga lam moru angka aek i.

⁴ Asa dung jumpang ari sampulu pitu di bulan sipahapitu, sangkot ma parau i di punsu ni dolok Ararat.

⁵ Dung i sai lam tu moruna aek i ro di bulan sipahasampulu; di artia di bulan sipahasampulu tarida ma angka punsu ni dolok.

⁶ (II.) Salpu muse opatpulu borngin, diungkap si Noak ma pandiloan ni parau na binahenna i.

⁷ Dipalua ma sada sigak, sai mulahulak do i, paima marsik aek i sian tano on.

⁸ Dung i dipalua ma sian ibana sada darapati, asa diida manang naung marsik aek i sian sisik ni tano on.

⁹ Alai ndang jumpang darapati hasonggopan ni palak ni patna, jadi mulak ma tu ibana, tu bagasan parau i, ai mangalantap dope aek i di sisik ni sandok tano on. Jadi disurdukkon si

Noak ma tanganna, jala ditangkap darapati i manait tu ibana, tu bagasan parau i.

¹⁰Dung i dipaima pitu borngin nari, diulahi ma paluahon sada darapati sian parau i.

¹¹Mareak bot ari mulak ma darapati i tu ibana, jala ida ma, sada bulung ni hau jetun na rata di tuktukna. Jadi diboto si Noak ma naung marsik aek i sian tano on.

¹²Dung i dipaima pitu borngin nari, asa dipalua muse sada darapati, alai ndang be mulak tu ibana.

¹³(III.) Dung i paonomratussadataonhon, di artia di bulan sipahasada, marsik situtu ma aek i sian tano on. Jadi diungkap si Noak ma tarup ni parau i, gabe diida ma naung mahiang sisik ni tano on.

¹⁴Jumpang ari duapulu pitu di bulan sipahadua, mahiang ma tano i.

¹⁵Jadi ninna Debata ma mandok si Noak:

¹⁶Ruar ma ho sian parau i, ho dohot jolmam dohot angka anakmu dohot jolma ni anakmu rap dohot ho.

¹⁷Paruar ma rap dohot ho nasa binatang sian nasa na mardaging, angka pidong dohot pinahan dohot nasa na manjirir di tano i, asa rodot nasida, jala lam torop di tano on.

¹⁸Jadi ruar ma si Noak rap dohot anakna dohot jolmana dohot jolma ni angka anakna i.

¹⁹Ruar ma sian parau i dohot sude binatang, sude gulokgulok dohot sude pidong, sude na manjirir di tano on masiboan mansamna be.

²⁰(IV.) Dung i dipajok si Noak ma sada langgatan di Jahowa, jala dibuat sian nasa pinahan na ganjing dohot sian nasa pidong na ganjing bahen pelean situtungon, pelehononna di langgatan i.

²¹Jadi dung dianggo Jahowa uap na hushus i, ninna Jahowa ma di bagasan rohana: Ndang be ulahanku manorui tano on ala jolma i, ai na jat do pingkiran ni roha ni jolma sian sietehetehonna; jala ndang be ulahanku mangaragehon nasa na mangolu, songon na hubahen i.

²²Onpe, saleleng adong tano on, ndang jadi mansohot saburon dohot gotilon, ari ngali dohot ari las, ari logo dohot rondo ni ari, arian dohot borngin.

9¹(I.) Dung i dipasupasu Debata ma si Noak dohot angka anakna, ninna ma mandok nasida: Gabe ma hamu, asa sopar, jala gohi hamu ma tano on.

²Marhabiaran jala jimbolongan ma marnida hamu sude binatang di tano on, ro di sude pidong angka na martongatonga langit dohot nasa na manjirir di tano on, ro di dengke ni laut sudena, sahat tu tanganmu ma nasida.

³Nasa na manggulmit, na mangolu bahen panganonmuna, sahat tu hamu ma i sudena hulehon, songon bulung rata.

⁴Alai unang pangan hamu juhut, molo di bagasan dope hosana, mandok mudarna i.

⁵Tongon do, sai luluhononku do mudarmuna marguru tu hosamuna i; sai luluhononku do sian tangan ni nasa binatang dohot sian tangan ni jolma; sian tangan ni baoa donganna i luluhononku hosa ni jolma i.

⁶Manang ise na mandurushon mudar ni jolma, durushonon ni jolma ma mudarna; ai tudos tu rupa ni Debata jolma i ditompa Debata.

⁷Alai gabe ma anggo hamu asa sopar, lam rarar ma hamu di tano on, jala lam sopar disi.

⁸(II.) Dung i ninna Debata ma mandok si Noak dohot tu anakna angka na rap dohot ibana, botima i:

⁹Ida ma anggo Ahu, pahotonku ma padanhu tu hamu ro di pinomparmuna sogot.

¹⁰Dohot tu nasa na marhosa na mangolu angka na rap dohot hamu, angka pidong, pinahan dohot nasa binatang ni tano on, angka na rap dohot hamu, sian luhut angka na ruar sian parau ro di sude pahanpahanan ni tano on.

¹¹Pahotonku ma padanhu dohot hamu, paboa na so jadi be ripashonon ni aek na sumar nasa na mardaging, huhut paboa na so masa be aek na sumar i mangaripashon tano on.

¹²Dung i ninna Debata ma: On ma tanda ni padan na hubahen i tu hamu dohot tu nasa na marhosa na mangolu, angka na rap dohot hamu ro di salelenglelengna:

¹³ Halibutonganki, na hubahen i di ombun, i ma tanda ni padanhu dohot tano on.

¹⁴ Onpe, molo huparo ombun tu tano on, sai tarida ma halibutongan i di ombun.

¹⁵ Jadi ingotonku ma padan na hubahen i tu hamu dohot tu nasa na marhosa na mangolu, ro di sude na mardaging, paboa na so pamasaonku be aek na sumar i mangaripashon nasa na mardaging.

¹⁶ Sai bahenonku do halibutongan i tu ombun, asa hubereng ibana marningot padan salelenglelengna binahen ni Debata tu nasa na marhosa na mangolu, tu nasa na mardaging, na di tano on.

¹⁷ Dung i ninna Debata ma tu si Noak: On ma tanda ni padan na hupahot tu nasa na mardaging, na di tano on.

¹⁸ (III.) Langgo anak ni si Noak, angka na ruar sian parau i, on do: Si Sem, si Ham dohot si Japet. Alai anggo si Ham ama ni si Kanaan do i.

¹⁹ Na tolu i do anak ni si Noak, jala sian nasida do raratjolma i tu sandok tano on.

²⁰ Dung i dipungka si Noak ma sada porlak anggur, ai paruma do ibana.

²¹ Dung i diinum ma deba anggur i jadi mabuk, gabe dipasalang ibana di tongatonga ni undungundungna.

²² Jadi diida si Ham, ama ni si Kanaan, parsamaraon ni amana, gabe dipaboa ma tu hahana na dua i na di balian.

²³Dung i dibuat si Sem dohot si Japet sada ulos, jala diampehon tu abaranasida na dua, dung i mardalan pudi ma nasida laho manghungkupi parsaemaraon ni amanasida, bohinasida pe tundal do, asa unang diida parsaemaraon ni amanasida i.

²⁴Dung tarjolma si Noak sian mabukna jala diboto na binahen ni anakna sianggian i tu ibana.

²⁵Jadi ninna ma: Hona bura ma si Kanaan, jampurut ni angka naposo ni angka hahana ma ibana.

²⁶Angkup ni didok ma: Pinuji ma Jahowa, Debata ni si Sem, jala naposona ma anggo si Kanaan.

²⁷Dipararat Debata ma ia si Japet, asa maringan ibana di bagasan undungundung ni si Sem, jala naposona ma anggo si Kanaan i.

²⁸Ia leleng ni si Noak mangolu, dung aek na sumar i tolu ratus limapulu taon do.

²⁹Jadi sia ratus limapulu taon ma sandok umur ni si Noak, dung i mate ma ibana.

10¹(I.) On do angka sundut ni anak ni si Noak: Si Sem, si Ham dohot si Japet jala tubuan anak be do nasida, dungkonsa aek na sumar i.

²Angka anak ni si Japet: Si Gomer, si Magog, si Madai, si Javan, si Tubal, si Mesek dohot si Tiras.

³Ia anak ni si Gomer i: Si Askenas, si Ripat dohot si Togarma.

⁴Ia anak ni si Javan i: Si Elisa, si Tarsis, si Kittim dohot si Dodanim.

⁵Sian nasida rarat angka bangso tu pulopulo mangihuthon luatna be dohot pangkulingna dohot margana dohot bangsona.

⁶(II.) Ia anak ni si Ham: Si Kus, si Mizraim, Put dohot si Kanaan.

⁷Ia anak ni si Kus i: Si Seba, Hevila, Saptu, Raama dohot Saptika. Ia anak ni si Raama i: Si Seba dohot si Dedan.

⁸Alai ia si Kus manubuhon si Nimrod, na mamungka marsiajar ulubalang di tano on.

⁹Parburu na begu ibana maradophon Jahowa. Ala ni do didok halak: Parburu na begu maradophon Jahowa, doshon si Nimrod.

¹⁰Ia mula ni harajaonna i, i ma Babel, Erik, Akkad dohot Kabne, angka na di luat Sinear.

¹¹Sian luat i borhat muse si Assur, jala dipungka huta Ninive dohot Rehobot Ir dohot Kala.

¹²Angkup ni Resen, di holangkolang ni Ninive dohot Kala, i ma huta na bolon.

¹³Dung i ditubuhon si Mizraim ma halak Lud, halak Anam, halak Lehab dohot halak Naptu.

¹⁴Dohot halak Patrus, dohot halak Kaslu, haroroan ni halak Palistim dohot Kaptor.

¹⁵Ia si Kanaan ditubuhon ma si Sidon, anak buhabajuna i dohot si Het.

¹⁶Dohot si Jebusi, si Amori, si Girgasi.

¹⁷Dohot si Hevi, si Arki dohot si Sini.

¹⁸Dohot si Arvadi, si Zemari, si Hamati, dung salpu i marserak ma angka marga ni halak Kanaan.

¹⁹Ia parbolatan ni halak Kanaan, olat ni Sidon ro di Gerar tolhas tu Gaza, ro di Sodom dohot Gomorra dohot Adma dohot Zeboim, tolhas tu Lasa.

²⁰I ma anak ni si Ham mangihuthon margana dohot pangkulingna, di angka luatna dohot bangsonasida be.

²¹(III.) Jadi tubuan anak ma dohot si Sem, ibana do ama ni sude anak ni si Heber, anggi ni si Japet, hahana i.

²²Ia anak ni si Sem: Si Elam, si Assur, si Arpaksad, si Lud dohot si Ram.

²³Ia anak ni si Ram i: Si Us, si Hul, si Geter dohot si Mas.

²⁴Ia si Arpaksad manubuhon si Sela; ia si Sela manubuhon si Heber.

²⁵Ia di si Heber tubu dua anak; goar ni na sada Peleg, ala di angka arina sirang tano on; ia goar ni anggina i si Joktan.

²⁶Ia si Joktan manubuhon si Almodad, si Salep, si Hazarmavet, si Jerah.

²⁷Dohot si Hadoram, si Usal, si Dikla.

²⁸Dohot si Hobal, si Abimael, si Seba.

²⁹Dohot si Opir, si Hevila dohot si Jobab. I ma sude anak ni si Joktan.

³⁰Ia inganannasida olat ni Mesa sahat ro di Separ, tu dolok na tungkan habinsaran.

³¹I ma angka anak ni si Sem mangihuthon margana dohot pangkulingna di angka luatna dohot bangsonasida be.

³²I ma pinompar ni anak ni si Noak mangihuthon marganasida di bangsona be; jala sian nasida marserak angka bangso di tano on, dungkonsa aek na sumar i.

11 ¹(I.) Saragam do pangkuling masa di sandok tano on jala sada do hata.

²Jadi di na marbungkasan nasida sian habinsaran, jumpang nasida ma tano pea di luat Sinear, gabe maringan nasida disi.

³Dung i masipandohan ma nasida: Tole, tatopa ma tano bahen tano takko, jala masak situtu itatutung i. Jadi tano na minasakna i dipangke bahen batu jala barerang dipangke nasida bahen rapot.

⁴Dung i angka dipandok nasida ma: Tole, tapungka ma sada hutanta, jala tapajokkon sada tungkup, sungkot ro di langit punsuna, tabahen ma baritanta, asa unang marserak hita tu liat portibi on.

⁵Jadi tuat ma Jahowa marnida huta dohot tungkup i, na pinauli ni angka anak ni jolma.

⁶Dung i ninna Jahowa ma: Ida ma sada do bangso jala sada pangkuling di nasida sude, jala nunga dipungka nasida paulihon angka i. Onpe tung so hasundatan nasida paulihon saluhut na sinangkapnasida i.

⁷Tole, tuat ma Hita jala tagaor pangkulingnasida disi, asa unang be diantusi sahalak pangkuling ni donganna.

⁸Jadi dipaserak Jahowa ma nasida sian i tu liat portibi on, gabe mansohot nasida paulihon huta i.

⁹Dibahen i didok goarna Babel, ala disi do digaor Jahowa pangkuling ni sandok isi ni tano on, jala sian i dipaserak Jahowa nasida tu liat portibi on.

¹⁰(II.) On do angka sundut ni si Sem. Marumur saratus taon ma si Sem, jadi ditubuhon ma si Arpaksad, dua taon dung salpu aek na sumar i.

¹¹Ia leleng ni si Sem mangolu, dung ditubuhon si Arpaksad i lima ratus taon do, jala ditubuhon anak dohot boru.

¹²Marumur tolupulu lima taon si Arpaksad, jadi ditubuhon ma si Sela.

¹³Ia leleng ni si Arpaksad mangolu, dung ditubuhon si Sela opat ratus tolu taon do, jala ditubuhon anak dohot boru.

¹⁴Marumur tolupulu taon si Sela, jadi ditubuhon ma si Heber.

¹⁵Jadi dung ditubuhon si Heber, mangolu dope si Sela opat ratus tolu taon, jadi ditubuhon anak dohot boru.

¹⁶Marumur tolupulu opat taon si Heber, jadi ditubuhon ma si Peleg.

¹⁷ Jadi dung ditubuhon si Peleg mangolu dope si Heber opat ratus tolupulu taon, jala ditubuhon anak dohot boru.

¹⁸ Marumur tolupulu taon si Peleg, jadi ditubuhon ma si Reu.

¹⁹ Jadi dung ditubuhon si Reu mangolu dope si Peleg dua ratus sia taon, jala ditubuhon anak dohot boru.

²⁰ Marumur tolupulu dua taon si Reu, jadi ditubuhon ma si Serug.

²¹ Jadi dung ditubuhon si Serug, mangolu dope si Reu dua ratus pitu taon, jala ditubuhon anak dohot boru.

²² Marumur tolupulu taon si Serug, jadi ditubuhon ma si Nahor.

²³ Jadi dung ditubuhon si Nahor, mangolu dope si Serug dua ratus taon, jala ditubuhon anak dohot boru.

²⁴ Marumur duapulu sia taon si Nahor, jadi ditubuhon ma si Tara.

²⁵ Jadi dung ditubuhon si Tara mangolu dope si Nahor saratus sampulu sia taon, jala ditubuhon anak dohot boru.

²⁶ (III.) Marumur pitupulu taon si Tara, jadi ditubuhon ma si Abram, si Nahor dohot si Haran.

²⁷ On do angka sundut ni si Tara: Ditubuhon si Tara do si Abram, si Nahor dohot si Haran. Alai si Haran manubuhon si Lot.

²⁸Alai mate do si Haran jumolo sian si Tara amana i, di tano hatubuanna i, di Ur di luat Kasdim.

²⁹Dung i mambuat boru ma si Abram dohot si Nahor; goar ni jolma ni si Abram si Sarai, ia goar ni jolma ni si Nahor si Milka, boru ni si Haran, ama ni si Milka dohot si Jiska.

³⁰Alai na hol do anggo si Sarai, ndang adong tubuna.

³¹Dung i diarahon si Tara ma si Abram, anakna i dohot si Lot, anak ni si Haran, pahompuna i, dohot si Sarai, parumaenna, jolma ni si Abram anakna i, jadi bungkas ma nasida sian Ur di luat Kasdim, asa laho tu tano Kanaan, jadi sahat ma nasida tu Haran, laos maringan disi.

³²Jadi dung dua ratus lima taon umur ni si Tara, mate ma ibana di Haran.

12¹(I.) Dung i ninna Jahowa ma mandok si Abram: Bungkas ma ho sian tano hagodanganmu dohot sian hatubuanmu dohot sian bagas ni amam tu tano sipatuduhononku tu ho.

²Hubahen pe ho gabe bangso na bolon, jala pasupasuonku ma ho, jala pabalgaonku goarmu, asa gabe pasupasu ho.

³Jala pasupasuonku angka na mamasumasu ho, jala toruanku angka na mamburai ho, jala dapotan pasupasu marhitehite ho saluhut angka bangso ni tano on.

⁴Jadi bungkas ma si Abram, songon na nidok ni Jahowa tu ibana, bungkas ma dohot si Lot udur dohot ibana. Marumur pitupulu lima taon si Abram, di na bungkas i ibana sian Haran.

⁵Dung i diarahon si Abram ma si Sarai, jolmana i dohot si Lot, anak ni hahana i ro di sude na sinamotsamotnasida, dohot jolma, angka na tinuhornasida di Haran, jadi bungkas ma nasida laho tu tano Kanaan. Jadi dung tolhas nasida ro di tano Kanaan.

⁶Diliati si Abram ma tano i sahat tu inganan ni si Sikem, ro di tombak More, nunga di tano i hian halak Kanaan i, didapot.

⁷Dung i ro ma Jahowa, diida si Abram, didok ma: Tu pinomparmu ma lehononku tano on. Jadi dipajok disi sada langgatan di Jahowa na niidana i.

⁸Dung i borhat ma ibana sian i tu sada dolok na tungkan habinsaran ni Betel, jala dipagohon undungundungna, tungkan hasundutan ni Betel, jala tungkan habinsaran ni Ai; jadi dipauli ma disi sada langgatan di Jahowa, jala dipajoujou goar ni Jahowa.

⁹Dung i bungkas muse si Abram laho dompak dangsina.

¹⁰(II.) Alai masa ma haleon di tano i, jadi tuat ma si Abram tu tano Misir, asa maisolat ibana disi, ai haleon potir do di tano i.

¹¹ Jadi mandapothon tano Misir i ibana, ninna ma mandok si Sarai, jolmana i: Huboto do, boruboru na uli rupa do ho.

¹² Onpe, molo diida halak Misir ho, dohononnasida ma: Jolmana do on, gabe bunuonnasida ahu, ianggo ho pangoluonnasida do.

¹³ Ua dok ma, ibotongku ho, asa sonang ahu ala ho, jala mangolu hosangku ala ho.

¹⁴ Jadi dung tolhas si Abram ro di tano Misir, dipaberengbereng halak Misir ma boruboru i, ai na uli situtu do ibana.

¹⁵ Dohot angka panuturi ni raja Firaun paberengbereng ibana, jala dipapujipuji ibana tu raja Firaun; jadi diboan ma boruboru i tu bagas ni raja Firaun.

¹⁶ Dipadenggan ma uhumna tu si Abram, ala ni angkora i, gabe adong ma di ibana angka birubiru, lembu, halode, angka naposo baa dohot boruboru, dohot halode boruboru dohot angka unto.

¹⁷ Alai dihonahon Jahowa ma angka haporsuhon bolon tu raja Firaun dohot tu donganna sajabu ala hata ni si Sarai, jolma ni si Abram i.

¹⁸ Jadi dijou raja Firaun ma si Abram, didok ma; dia do na binahenmi tu ahu? Boasa so dipaboa ho tu ahu jolmam ibana hape?

¹⁹ Boasa dohononmu: Ibotongku ibana? Jadi naeng buatonku ibana bahen jolmangku. On pe, na, jolmam, buat ma, dung i laho ma ho.

²⁰Dung i didokkon raja Firaun ma angka naposona bahen donganna pataruhon ibana dohot jolmana dohot sude na di ibana i.

13¹(I.) Jadi nangkok ma si Abram sian Misir, ibana dohot jolmana dohot sude na di ibana rap dohot si Lot tu Kanaan pardangsina.

²Alai mamora situtu do si Abram di pinahan, perak dohot di sere.

³Dung i didatdati ma dalanna sian dangsina sahat ro di Betel, ro di hajongjongan ni undungundungna di mulana, di holangkolang ni Betel dohot Ai.

⁴Tu hajongjongan ni langgatan na binahenna disi parjolo, jala dipajoujou si Abram disi goar ni Jahowa.

⁵(II.) Alai si Lot pe, na udur mardalan dohot si Abram, marbirubiru do, jala marlombu jala marundungundung.

⁶Jadi ndang tarparmudu tano i nasida, ianggo tung tampak maringan, ai tung na godang do artanasida, jadi ndang tarbahen be top nasida maringan.

⁷Dung i sai adong bada di tongatonga ni sipormahan pinahan ni si Abram dohot sipormahan pinahan ni si Lot. Halak Kanaan i pe dohot halak Perisi maringan uju i di tano i.

⁸Jadi ninna si Abram ma tu si Lot: Ua unang adong bada di tongatonganta dohot di tongatonga ni parmahan ni pinahanta be, ai na sabutuha do hita.

⁹Nda di jolom do sandok tano on? Ua sirang ma ho sian ahu! Ia tu hambirang ho, tu siamun ahu; ia tu siamun ho tu hambirang ahu.

¹⁰Jadi manatapnatap ma si Lot manangkasi sude angka luat humaliang Jordan, ai angka tano tangkasan do i luhut, tagan so diripashon Jahowa dope Sodom dohot Gomorra, sobokkon porlak ni Jahowa, sobokkon tano Misir tolhas ro di Zoar.

¹¹Jadi dipillit si Lot ma di ibana sude angka luat humaliang Jordan, borhat ma ibana tungan habinsaran. Asa sirang ma nasida na marsabutuha i.

¹²Si Abram maringan di tano Kanaan, ianggo si Lot maringan di angka huta ni luat i, jala dibahen undungundungna tolhas ro di Sodom.

¹³Alai halak na jahat jala pardosa situtu isi ni Sodom i maradophon Jahowa.

¹⁴(III.) Jadi ninna Jahowa ma mandok si Abram, dung sirang si Lot i sian ibana: Ua tatap ma sian ingananmon dampak utara dohot dampak dangsina dohot dampak habinsaran dohot dampak hasundutan.

¹⁵Ai sandok tano na tinatapmi lehononku ma tu ho dohot tu pinomparmu ro di salelenglelengna.

¹⁶Jala bahenonku do pinomparmu sobokkon orbuk ni tano toropna, molo tung habilangan

jolma orbuk ni tano on, habilangansa ma dohot pinomparmi.

¹⁷Borhat ma ho, liati ma tano i mangihuthon unjurna dohot bohagna, ai tu ho do lehononku.

¹⁸Jadi dipaunsat si Abram ma undungundungna laho ma ibana maringan tu tombak Mamre na di Hebron, jala dipajokkon disi sada langgatan di Jahowa.

14¹(I.) Dung i di angka ari uju si Amrapel raja ni Sinear, Ariok raja ni Ellasar, Kedor-Laomor raja ni Elam dohot Tidal raja ni angka bangso parbegu.

²Dipungka nasida ma hamusuon tu si Bera raja ni Sodom, dohot tu si Birsaraja ni Gomorra, si Sinab raja ni Adma, dohot tu si Semeber raja ni Zeboim, dohot tu raja sian Bela, i ma Zoar.

³Mardomu ma nasida luhut tu rura Siddim, i ma laut sira nuaeng.

⁴Nunga pola sampulu dua taon lelengna dioloi nasida patu tu si Kedor-Laomor, alai pasampulutulutaonhon mangose ma nasida.

⁵Jadi pasampuluopattaonhon ro ma si Kedor-Laomor dohot angka raja donganna i dipantaluhon ma halak Repaim di luat Asterot-Karnaim, dohot halak Susim di luat Ham dohot halak Emim, na di adaran Kiriataim.

⁶Dohot halak Hori di Seir doloknasida tolhas ro di adaran Elaparan, na marbalokkon halongonan.

⁷Dung i mulak ma nasida ro di mual Eumispat, i ma Kades, jala dipapatu sandok luat ni halak Amalek ro di halak Amori, na maringan di Hazon-Tamar.

⁸Dung i borhat ma raja ni Sodom dohot raja ni Gomorra dohot raja ni Adma dohot raja ni Zeboim dohot raja ni Bela, i ma Zoar, marodor be ma nasida laho marmusu di rura Siddim.

⁹Dompak si Kedor-Laomor, raja ni Elam, dohot si Tidal, raja ni angka bangso parbegu, dohot si Amrapel raja ni Sinear, dohot si Ariok raja ni Ellasar; opat raja alo ni na lima i.

¹⁰Alai mansai lan do angka lupaklupak barerang di rura Siddim i. Jadi maporus ma raja ni Sodom dohot Gomorra, angka margunopan ma tusi, ianggo angka na teba i maporus do tu dolok.

¹¹Jadi dibuat nasida ma sandok ugasan ni Sodom dohot Gomorra, ro di sude sipanganonna, laho ma nasida.

¹²Diboan nasida ma dohot si Lot, anak ni haha ni si Abram, ro di ugasanna, ai di Sodom do ibana maringan, laos laho ma nasida.

¹³(II.) Dung i ro sada halak na maporus i, dipaboa ma barita i tu si Abram, halak Heber i, na maringan di tombak Mamre, ginomgom ni si Amori anggi ni si Eskol dohot Aner, angka janji ni si Abram do nasida.

¹⁴Jadi dung dibege si Abram barita i naung tarboan anakna i, diparsinjatai ma naposona, angka na somal, tolu ratus sampulu ualu halak, angka na tubu di bagasan jabuna, dieak ma musu i tolhas ro di Dan.

¹⁵Dung i disagi ma angka naposona mangarampok musu i bornginna i, jala ditaluhon nasida dung i dilele nasida tolhas ro di Hoba, na tungkan hambirang ni Damaskus.

¹⁶Jadi mulak ma diboan saluhut ugasan, dohot do si Lot anakna i, ro di ugasanna, angka boruboru dohot halak na torop i mulak diboan.

¹⁷(III.) Jadi dung mulak si Abram sian na marporang i dompak si Kedor-Laomor dohot angka raja donganna i, ruar ma raja ni Sodom manomunomu ibana tu rura Sawe i ma rura ni raja i.

¹⁸Alai anggo si Melkisedek, raja ni Salem diboan sagusagu dohot anggur; malim ni Debata na mamunjungi do ibana.

¹⁹Dung i dipasupasu ma si Abram, ninna ma: Na pinasupasu do ho, ale Abram, ditumpak Debata na mamunjungi, sigomgom langit dohot tano on.

²⁰Jala pinuji ma Debata na mamunjungi, na pasahathon angka musim tu tanganmu, jadi dilehon si Abram ma tu ibana saparsampulu sian luhutna.

²¹ Dung i ninna raja ni Sodom i ma mandok si Abram: Nanggojolma i lehon di ahu, ianggo ugasan i buat ma di ho!

²² Alai ninna si Abram ma tu raja ni Sodom i: Nunga pola maruari ahu tu Jahowa, Debata na mamunjungi, sigomgom langit dohot tano on:

²³ Molo tung hubuat sian nasa na di ho nanggo sada tali ro di ihot ni sipatu, asa unang tardok ho sogot: Ahu do pamora si Abram.

²⁴ Holan na pinangan ni angka dolidoli dohot jambar ni si Aner Eskol dohot Mamre, angka na mandongani ahu, itenang dibuat nasida turpuknasida i.

15¹ (I.) Dung salpu angka jamita ondeng ro ma hata ni Jahowa tu si Abram marhitehite alatan, ninna ma: Unang ho mabiar ale Abram. Ahu do lombulombum, upam mansai balga.

² Alai ninna si Abram ma: Oe ale Tuhan Jahowa, aha ma lehononmu di ahu? Sai na punu do ahu, si Elieser na sian Damaskus na ma sitean bagashu.

³ Angkup ni ninna si Abram: Ndi, ndang adong pinomparhu dilehon ho, jala ida, anak na tubu di bagasan jabungku na ma sitean ahu.

⁴ Dung i ro ma hata ni Jahowa mandok tu ibana: Nandang ibana tumean ho, na ruar sian butuham, ibana tumean ho.

⁵Dung i ditogihon Tuhan i ibana ruar tu balian, jala ninna: Ua tailihon ma dompak langit i jala bilangi angka bintang, molo habilangan ho angka i. Dung i didok muse tu ibana: Songon i ma pinomparmu sogot.

⁶Jadi porsea ma si Abram di Jahowa, gabe hatigoranna do i dietong Jahowa.

⁷(II.) Dung i didok ma tu ibana: Ahu do Jahowa, na paruarhon ho sian Ur ni halak Kasdim, mangalehon tu ho tano on bahen teanteananmu.

⁸Alai ninna si Abram ma: Ale Tuhan Jahowa, di aha ma tandaonku paboa ahu tumeansa.

⁹Dung i ninna Tuhan i ma mandok ibana: Buat ma di Ahu sada lombu na marumur tolu taon dohot sada hambing na marumur tolu taon dohot sada birubiru tunggal na marumur tolu taon dohot anduhur sada dohot anak ni darapati sada.

¹⁰Jadi diboan ma i sude di Tuhan i, angka dipardostonga ma i, dung i martoradan be ma dibahen; alai anggo pidong i ndang dibola.

¹¹Dung i marsonggopan ma angka pidong panoro tu angka juhut pelean i, alai diosikkon si Abram ma angka pidong i.

¹²Jadi dung manihir mata ni ari, tarnenep modom ma si Abram, gabe songgop ma tu ibana hasonggoton dohot haholomon bolon.

¹³Dung i ninna ma mandok si Abram: Unang so diboto ho, paisolat do sogot pinomparmi di tano na so golatna, jala parhatobanonna

nasida, jala paporsukporsuhonna arga opat ratus taon.

¹⁴Alai bangso na marhatobanhon nasida pe uhumonku do; dung i ruar ma nasida mantat ugasan godang.

¹⁵langgo ho topotonmu do angka ompum mardamedame, tanomon do ho dung sarimatua.

¹⁶Dung i paopatsunduthon mulak ma nasida, ai ndang dope sun hinajahat ni halak Amori.

¹⁷Jadi dung mate mata ni ari, jala holom marimpotimpot, ida ma, martimus ma sada pamurunan, jala disola sada sipusipu na gara holangkolang ni angka tanggotanggo.

¹⁸Di ari na sasada i marpadan ma Jahowa dohot si Abram, ninna ma: Tu pinomparmu do lehononku tano on olat ni batang aek Misir sahat ro di batang aek na bolon, i ma batang aek Euprat.

¹⁹Tano na niinganen ni halak Keni dohot halak Kenizi dohot halak Kadmoni.

²⁰Dohot halak Het dohot halak Perisi dohot halak Repaim.

²¹Dohot halak Amori dohot halak Kanaan i dohot halak Girgasi dohot halak Jebusi.

16¹(I.) Alai anggo si Sarai, jolma ni si Abram, ndang adong ditubuhon di ibana; alai adong do sada hatobanna, boru Misir, na margoar si Hagar.

²Dung i ninna si Sarai ma mandok si Abram, boti ma i: Nunga disundati Jahowa ahu

mangintubu, ua topot ma hatobanku, anggiat maruli ahu sian ibana. Jadi ditangihon si Abram ma soara ni si Sarai.

³Dung i dibuat si Sarai,jolma ni si Abram i, si Hagar boru Misir i, dilehon ma tu si Abram, sinondukna i bahen jolmana, dung diingani si Abram tano Kanaan i sampulu taon lelengna.

⁴Dung i ditopot ma si Hagar i, jadi gabegabean ma ibana. Dung diida naung gabegabean ibana, tingka ma rohana mida soranganna i.

⁵Dung i ninna si Sarai ma tu si Abram: Marsapata tu ho do ahu! Hulehon hatobanku parjolmaonmu, hape dung diida naung gabegabean ibana, gabe pis matana mida ahu. Jahowa ma manguhum hita.

⁶Alai ninna si Abram ma mandok si Sarai: Ida ma, guru di ho do hatobanmu, lomo ni roham bahen tu ibana. Jadi dipaposi si Sarai uhumna tu hatobanna i, gabe laho lintun sian jolona.

⁷(II.) Alai jumpang suruan ni Jahowa ibana di lambung ni sada mual di halongonan, di lambung mual di dalan laho tu Sur.

⁸Didok suruan i ma: Sian dia ho, jala tu dia ho ale Hagar, hatoban ni si Sarai? Na lintun do ahu sian jolo ni si Sarai, soranganki, ninna.

⁹Dung i ninna suruan ni Jahowa ma mandok ibana: Mulak ma ho tu soranganmu, paunduk ma roham mangoloi ibana.

¹⁰Angkup ni didok suruan ni Jahowa tu ibana: Patoroponku situtu ma pinomparmu, gabe ndang habilangan sogot dibahen hinatoropna.

¹¹Dung i ninna suruan ni Jahowa muse tu ibana: Ida ma, naung gabegabean ho, jala tubuan anak ho, bahenonmu ma goarna si Ismael, ai nunga ditangihon Jahowa hinadangolmu.

¹²Jala jolma sobokkon hije ibana sogot. Tanganna mangalo sude jolma jala tangan ni sude jolma mangalo ibana; jala marpagaran ibana di jolo ni angka donganna sabutuha sasudena.

¹³Jadi dibahen si Hagar ma goar ni Jahowa, na mangkatai dohot ibana: Ho do Debata na manatap ahu, ai ninna do: Marnida dope ahu tagamon, dung huida Ibana?

¹⁴Ala ni digoar ma sumur i: Sumur Lakhai-Roi, na di holangkolang ni Kades dohot Bared.

¹⁵Dung i ditubuhon si Hagar ma anak sada di si Abram, jadi dibahen si Abram ma goar ni anakna, na tinubuhon ni si Hagar i, Ismael.

¹⁶Marumur ualupulu onom taon si Abram di na tinubuhon ni si Hagar si Ismael i di si Abram.

17¹(I.) Jadi dung marumur siapulu sia taon si Abram, diida ma ro Jahowa na mandok tu ibana: Ahu do Debata, na sun

hinagogo; sai marparange di jolongku ma ho, jala daulat roham!

²Asa hupahot padanhu dohot ho, jala hupatorop situtu ho.

³Jadi manungkap ma si Abram. Dung i mangkatai Debata muse dohot ibana:

⁴Ilanggo Ahu, ida ma, nunga hot padanhu dohot ho, jala torop angka bangso marompu tu ho sogot.

⁵Ala ni ndang be si Abram goarmu dohonon, si Abraham ma goarmu, ai nunga hupabangkit ho gabe ompu ni torop angka bangso.

⁶Jala sopar situtu ho tumpahanku, jala pabangkitonku ho gabe ompu parsadaan ni angka bangso, jala marroan sian ho angka raja.

⁷Sai pahotonku do padanhu tu ho dohot tu pinomparmu sogot marsundutsundut, gabe padan salelenglelengna, paboa Ahu gabe Debatam dohot Debata ni pinomparmu sogot.

⁸Jala lehononku tu ho dohot tu pinomparmu sogot tano paisolatanmu nuaeng, i ma sandok tano Kanaan bahen partohapan salelenglelengna, jala Debatanasida Ahu.

⁹Angkup ni didok Debata tu si Abraham: Ho pe, sai ingot ma padan na hubahen i, ho dohot pinomparmu sogot marsundutsundut.

¹⁰(II.) On do padan siingotonmuna, na hubahen i tu ho dohot tu pinomparmu sogot: Ingkon sunaton do nasa baoa sian hamu.

¹¹ Ingkon sunatonmuna do sibuk ni sibursiburmuna bahen tanda ni padanhu dohot hamu.

¹² Ia anak sunatonmuna ma molo marumur ualu borngin, nasa baoa pinomparmuna na tubu di jabum dohot na tinuhor ni hepeng sian nasa halak sileban na so sian pinomparmu.

¹³ Ingkon sunaton do na tubu di jabum dohot na tinuhor ni hepengmu, asa padan na salelengnilelengna do padanhu na di sibukmuna i.

¹⁴ Ia baoa parhulup, na so tarsunat sibuk ni sibursiburna ripashononhon do ibana sian bangsona, ala diose padanhu.

¹⁵ (III.) Dung i didok Debata muse tu si Abraham: Ndang be si Sarai dohononmu goar ni jolmam, si Sarah ma goarna.

¹⁶ Ai pasupasuonku ibana, jala lehononku ma di ho anak sada nang sian ibana, jala pasupasuonku ibana gabe angka bangso; gari raja ni angka bangso marroan sian ibana sogot.

¹⁷ Jadi manungkap ma si Abraham jala mengkel, didok ma di bagasan rohana: Tung tubuan anak ma jolma sisaratus taon jala manubuhon ma tagamon si Sarah, na marumur siapulu taon?

¹⁸ Dung i ninna si Abraham ma tu Debata: Asal mangolu si Ismael maradophon Ho!

¹⁹ Jadi ninna Debata ma: Tongon do, ingkon tubuhonon ni si Sarah, jolmam

anak sada di ho, bahen ma goarna si Isak; pahotonku do padanhu dohot ibana, padan na salelenglelengna, ro di pinomparna sogot.

²⁰Taringot tu si Ismael pe, nunga hutangihon ho, ida ma, nunga hupasupasu ibana, tumpahanku ma ibana gabe, asa torop situtu ibana. Sampulu dua raja tubuna, jala bangso na bolon ibana bahenonku.

²¹Alai anggo padanhu pahotonku dohot si Isak, situbuhonon ni si Sarah di ho, taon i songon on.

²²Jadi dung sun Debata mangkatai dohot ibana, manaek ma Debata sian si Abraham.

²³(IV.) Dung i dibuat si Abraham ma si Ismael, anakna i dohot sude anak angka na tubu di jabuna ro di sude na tinuhor ni hepengna, nasa baoa, pangisi ni jabu ni si Abraham, jala disunati sibuk ni sibursiburnasida, laos di ari pangkataianna, songon na nidok ni Debata tu ibana.

²⁴Ia umur ni si Abraham di na tarsunat i sibuk ni sibursiburna i siapulu sia taon do.

²⁵Alai anggo umur ni si Ismael, anakna i, sampulu tolu taon do, di na tarsunat i sibuk ni sibursiburna i.

²⁶Laos di ari na sasada i do tarsunat si Abraham dohot si Ismael anakna i.

²⁷Ro di nasa baoa, pangisi ni jabuna, na tubu di jabuna dohot na tinuhor ni hepeng sian halak sileban, tarsunat do i rap dohot ibana.

18¹(I.) Dung i diida si Abraham ma Jahowa di tombak Mamre, tongon hundul ibana di baba pintu ni undungundungna, di parngiar ni ari.

²Dung i manaili ma ibana, gabe diida ma tolu halak jongjong di jolona. Jadi dung diida marlojong ma ibana manomunomu nasida sian baba pintu ni undungundungna, jala dipatungki tu tano.

³Dung i ninna ma: Molo asi roham marnida ahu, ale Tuhanku, sai unang laos i naposomon.

⁴Ua binoan aek i otik, asa diburi hamu totmuna, jala mangunsande hamu di toru ni hau on.

⁵Asa huboan sagusagu santopik, gabe togar rohamuna, dung i tulus hamu, ai ala ni do umbahen na ro hamu tu lambung ni naposomuna on. Jadi ninna nasida ma: Bahen ma songon na nidokmu.

⁶Dung i humalaput ma si Abraham tu undungundungna, mandapothon si Sarah, ninna ma: Halaputi ma ne niitak arga tolu bale, dogili bahen sagusagu!

⁷Marlojong ma ianggo si Abraham manopot inganan ni lembu, jala dibuat anak ni lembu sada na mokmok, jala na uli, dilehon ma tu naposo, na humalaput paulihon i.

⁸Dung i diboan si Abraham ma susu na nialhotan dohot susu na tata dohot anak ni lembu na pinauli i, jala dipampeakkon

tu jolonasida; jongjong ma ianggo ibana di lambungnasida, di toru ni hau i, jadi mangan ma nasida.

⁹(II.) Dung i ninna nasida ma tu ibana: Didia do si Sarah, jolmami? Di undungundung indi do, ninna.

¹⁰Dung i didok ma: Sai na mulak do Ahu tu ho taon i songon on, ida adong ma anak ni si Sarah, jolmami. Dohot ma si Sarah umbegesa sian balik ni pintu ni undungundung, hajongjonganna i.

¹¹Alai nunga pola sarimatua be si Abraham dohot si Sarah, nunga pola montok si Sarah marningot hasomalan ni boruboru hian.

¹²Jadi mengkel ma si Sarah di bagasan rohana, ninna ma: Dung matua pe ahu hape, asa adong di ahu silas ni roha, ubanon dohot rajangku?

¹³Dung i ninna Jahowa ma tu si Abraham: Boasa ma tung parengkelan ni si Sarah hatangki ninna do: Tung na tutu ma ulaning ahu manubuhon, dung matua ahu?

¹⁴Adong do huroha, na so tarpatupa Jahowa? Sai na mulak do Ahu manopot ho taon i songon on, jala adong ma anak sada di si Sarah.

¹⁵Jadi ninna si Sarah ma mansoadahon: Ndang na mengkel ahu, ai na mabiar do ibana; alai ninna Jahowa ma: Ndangana, ai na mengkel do ho tutu.

¹⁶(III.) Dung i hehe ma sian i na tolu baoa i, ditondong ma dompak Sodom; jadi dipataru si Abraham ma nasida.

¹⁷Dung i ninna Jahowa ma: Tung pamorso ma Ahu maradophon si Abraham taringot tu na naeng bahenonku?

¹⁸Sai na gabe bangso na balga jala na sangap do si Abraham sogot, jala dapotan pasupas marhitehite ibana nasa bangso di tano on.

¹⁹Ai hutanda do ibana, sai na tonaanna muse angka anakna dohot pinomparna di pudina, asa diingot nasida dalan ni Jahowa mangulahon hatigoran dohot uhum, asa dipatolhas Jahowa tu si Abraham na pinarbagabagana tu ibana.

²⁰Dung i didok Jahowa ma: Maungaung do angguhangguk badar sian Sodom dohot Gomorra, ai manahatang do dosanasida i.

²¹Na tuat ma Ahu, asa huida manang na sun hinajahat ni na niulanasida i, hombar tu angguhangguk na tolhas i tu Ahu, molo ndang, gabe huboto.

²²Dung i manirpang ma sian i na dua baoa i mardalan dompak Sodom; alai jongjong dope ianggo si Abraham di jolo ni Jahowa.

²³Dung i dipajonok si Abraham, jala ninna ma: Tung ripashononmu ma na tigor rap dohot parjahat?

²⁴Atek tung adong limapulu halak, angka na tigor di bagasan huta i, tung ripashononmu

ma i, ndang olananmu huta i ala na limapulu na tigor i, angka na di bagasan i.

²⁵Dao ma i sian Ho mangulahon sisongon i: mambunu na tigor rap dohot parjahat; tung sobokkon parjahat ma na tigor i? Palias ma i sian Ho, tung na so uhum ma bahenon ni Siuhumi liat portibi on?

²⁶Jadi ninna Jahowa ma: Molo tung jumpang Ahu di bagasan huta Sodom limapulu halak, angka na tigor, sai ma olanangku na saluat i ala nasida.

²⁷Dung i ninna si Abraham ma mangalusi: Sombangu ale Tuhan, nunga sapala hum ahu mamungka mangkatai dohot Ho; atek pe orbuk jala sirabun ahu.

²⁸Ua tung moru lima halak sian na limapulu angka na pintor i, tung ripashononmu ma luhut huta i ala ni na lima i? Jadi ninna ma: Ndang ripashononku molo tung jumpang Ahu disi opatpulu lima.

²⁹Dung i diulahi si Abraham muse dope mandok tu Ibana, ninna ma: Ua tung opatpulu jumpang disi! Jadi ninna Jahowa ma: Ndang hahuaonku nasida ala ni na opatpulu i.

³⁰Dung i ninna si Abraham ma: Ua unang tung tarrimas Ho, ale Tuhan, ala hudatdati mandok: Atek tung jumpang disi tolupulu! Jadi ninna Jahowa ma: Ndang hahuaonku nasida, molo tung jumpang Ahu tolupulu disi.

³¹Dung i ninna si Abraham ma: Ida ma, nunga sapala hum ahu mamungka mandok tu

Tuhanki: Ua tung jumpang disi duapulu. Jadi ninna Jahowa ma: Ndang ripashononku ala ni na duapulu i.

³²Jadi ninna si Abraham ma: Unang tung tarrimas Ho, ale Tuhanki, ala na mandok ahu dope holan sahali on: Atek tung jumpang disi sampulu? Jadi ninna Jahowa ma: Ndang ripashononku nasida ala ni na sampulu i.

³³Jadi dung sun Jahowa mangkatai dohot si Abraham, laho ma Ibana, mulak ma dohot si Abraham tu ingananna.

19¹(I.) langgo surusuruan na dua halak i tolhas ma bodarina i tu huta Sodom; alai hundulhundul di harbangan ni Sodom i si Lot. Jadi dung diida si Lot nasida, hehe ma ibana manomunomu nasida, dipatungkap ma bohina tu tano.

²Dung i ninna ma: Ua tuli ma hamu angka tuanku tu bagas ni naposomuna on, marborngin ma hamu jala buri hamu patmuna, sogot pe manogot i tulusi hamu dalamuna i. Alai ninna nasida ma: Ndangana, sai marborngin di alaman on do hami.

³Dung i sai diparajarajai si Lot ma nasida, jadi tuli ma nasida sian ibana, dibongoti ma bagasna. Dung i dipauli ma sipanganon nasida, dilompa ma dohot sagusagu na so niigaran, jadi mangan nasida.

⁴Alai ndang dope laho modom nasida, nunga dihaliangi pangisi ni huta Sodom jabu i, tole

dakdanak ro di na matua, tung tumpu do nasida sude.

⁵Sai joujou nasida mandok tu si Lot: Didia do baoa i angka na ro tu ho saborngin on? Togihon nasida ruar tu hami on, asa hutanda hami nasida.

⁶Dung i ruar ma si Lot mandapothon nasida tu balian pintu, jala dihinsu pintu i di pudina.

⁷Dung i ninna ma: Sombangu di hamu, ale angka dongan, unang bahen hamu na so uhum.

⁸Ida ma adong do dua borungku, angka na so habubuhan dope, ua i ma hutogihon tu ruar, hulehon tu hamu, bahen hamu ma tu nasida lomo ni rohamuna, asal unang dibahen hamu manang aha tu halak on, ai ala ni do umbahen na marlinggom nasida tu bagashu.

⁹Alai ninna nasida ma: Pajonok ma tuson! Angkup ni didok nasida ma: Sasada ibana do na ro maisolat, jala sai naeng manguhumi ibana. On pe, umposi ma bahenonnami tu ho, asa tu nasida. Jadi dionjar nasida ma halak si Lot i, ditahopi ma naeng mangaloha pintu i.

¹⁰Jadi disurdukkon angka baoa i tangannasida manait si Lot i tu nasida, masuk tu jabu, jala dihinsu ma pintu i.

¹¹Langgo baoa angka na di jolo pintu ni bagas i, dipapitung surusuruan i do, tole dakdanak ro di na magodang, gabe loja nasida mandadapi pintu i.

¹²(II.) Dung i ninna na dua baoa i ma mandok si Lot: Adong dope dison manang ise helam, manang anakmu, manang borum? Manang na songon diham di huta on, togihon ma nasida ruar sian inganan on.

¹³Ai naeng mangaripashon huta on do hami, ala na gogo angguhangguknasida tu jolo ni Jahowa, jala disuru Jahowa do hami mangaripashon huta i.

¹⁴Jadi ruar ma si Lot i, asa mangkatai dohot helana i, angka na mangoro boruna i, ninna ma: Hehe ma hamu ruar sian huta on, ai ripashonon ni Jahowa ma huta on. Alai diengkelengkel angka helana i do ibana.

¹⁵Dung i mamungka buhabuha ijuk ari manogot i, didasdasi angka suruan i ma si Lot, ninna ma: Hehe ma ho, boan ma jolmam dohot borum na dua i naung disi, asa unang ripas dohot ho binahen ni hajahaton ni huta on.

¹⁶Alai sai dipagelegele langkana, jadi ditangkup baoa i ma tanganna dohot tangan ni jolmana dohot tangan ni boruna na dua i dibahen pangolanion ni Jahowa di ibana, ditogihon nasida ma ibana jala dipaulon tu balian ni huta i.

¹⁷Jadi dung ro di balian tinogihonnasida i, ninna na sahalak ma: Palua ma hosam, unang bereng dompak pudim, jala unang ngongong ho di sandok rura on, tu dolok ma ho maporus, asa unang ripas ho.

¹⁸Alai ninna si Lot ma mandok nasida:
Ndangana, manomba ahu di Ho ale Tuhanku.

¹⁹Ida ma, nunga sapala jumpangan asi
ni roha naposomon maradophon Ho, sai
pagodang ma asi ni roham na binahenmu tu
ahu laho pangoluhon hosangku. Alai ndang
tarbahen ahu malua ianggo tung tu dolok an,
atek tung dapot hamagoan i ahu, tung mate
ahu maon.

²⁰Ua bereng, jonok do huta an bahen
haporusan, jala metmet do; ua tusi ma ahu
loas maporus, nda na metmet do i nian? Asal
mangolu hosangkon.

²¹Dung i ninna suruan i ma mandok ibana:
Taringot tu hata ondeng pe tataponku do ho,
ndang ripashononku huta na nidokmi.

²²Halaputi ma ne maporus tusi, ai ndang
tarbahen Ahu mambahen manang dia, paima
tolhas ho tusi. Ala ni do umbahen Zoar huta i
digoar halak.

²³Nunga pola binsar mata ni ari di tano on,
di na sahat i si Lot tu Zoar.

²⁴(III.) Dung i diparo Jahowa ma udan
barerang dohot api tu Sodom dohot tu
Gomorrah, sian Jahowa, sian banua ginsang.

²⁵Jadi dipabalik Tuhan i ma angka huta
i dohot na saluat i humaliang, ro di sude
pangisi ni angka huta i dohot suansuanan ni
tano i.

²⁶Dung i manaili ma jolmana i dompak pudi,
gabe batu sira ibana.

²⁷ Alai borhat do anggo si Abraham sogot manogot i tumopot hajongjonganna i di jolo ni Jahowa.

²⁸ Dung i ditatap ma dompak Sodom dohot Gomorra dohot dompak sude tano na humaliang i. Jadi diida ma martimpul timus sian tano i, songon timus ni pamurunan.

²⁹ Dung i laho mangaripashon Debata di angka huta ni rura i, diingot Debata ma si Abraham, ditogihon ma si Lot sian parsitongaan ni hamagoan laho mangago angka huta na niinganen ni si Lot najolo.

³⁰ (IV.) Dung i nangkok ma si Lot sian Zoar laho maringan tu dolok rap dohot boruna na dua i, ai mabiar do ibana maringan di Zoar, gabe diingani ma sada liang, ibana dohot boruna na dua i.

³¹ Dung i ninna boruna sihahaan i mandok sianggian i: Nunga matua amanta, jala ndang adong be baa di tano on na ro tu hita, songon hasomalan di liat portibi on.

³² Tole, tapainumhon ma anggur tu amanta, jala taparangkupi ibana modom, asa tapangolu pinompar sian amanta.

³³ Jadi dipainumhon nasida ma anggur tu amanasida i di na saborngin i. Dung i ro sihahaan i diparangkupi ma amana i, ndang pamotoanna laho modom dohot laho hehe boruna i.

³⁴ Manogotna i ninna sihahaan i ma tu sianggian i: Nunga huparangkupi damang i

na borngin, talehon ma dohot saborngin on anggur inumonna, asa laho ho mangangkupi ibana, asa tapangolu pinompar sian amanta.

³⁵Jadi dilehon nasida ma di na saborngin i anggur inumon ni amanasida. Dung i hehe ma sianggian i diparangkupi ma ibana, ndang pamotoanna laho modom dohot laho hehe boruna i.

³⁶Jadi gabegabea be ma boru ni si Lot i duansa sian amanasida.

³⁷Dung i ditubuhon sihaan i ma anak sada, dibahen ma goarna Moab, ibana do ompu ni halak Moab rasirasa nuaeng.

³⁸Dohot sianggian i manubuhon anak sada, dibahen ma goarna Ben-Ammi, ibana do ompu ni halak Amon rasirasa nuaeng.

20¹(I.) Dung i bungkas ma si Abraham sian i tu tano na tungkan dangsina laho maringan tu holangkolang ni Kades dohot Sur, gabe maisolat ibana di Gerar.

²Jadi didok si Abraham ma taringot tu si Sarah, jolmana i: Ibotongku ibana. Jadi disuru si Abimelek, raja ni Gerar i mangalap si Sarah.

³Alai ro ma Debata paipihon tu si Abimelek bornginna i, ninna ma tu ibana: Ida ma, marutang hosa ma ho ala boruboru na binuatmi, ai naung marharajaan do ibana.

⁴Alai ndang dope jumonok si Abimelek tu ibana, jadi ninna ma: Ale Tuhan, tung bunuonmu ma dohot halak na tigor?

⁵Nda didok ibana do tu ahu: Ibotongku boruboru i? Boruboru ipe didok do: Ibotongku ibana. Asa ia hubahen pe songon i, tobok ni rohangku do, jala bontor ni tanganku.

⁶Dung i ninna Debata ma paipihon tu ibana: Ahu pe, huboto do sian tobok ni roham do dibahen ho songon i, umbahen huambat ho antong unang mardosa dompak Ahu; ala ni do umbahen so huloas ho jumama boruboru i.

⁷On pe, paulak ma jolma ni baoa i, ai panurirang do ibana, jala tangiangkononna do ho, asa mangolu ho. Ala molo so dipaulak ho, boto ma, sai na mate do ho dohot sude na di ho i.

⁸(II.) Jadi dipasogot si Abimelek ma hehe manogotna i, dijou ma sude angka naposona, jala dipajojor ma sude hata ondeng tu pinggolnasida, jadi mabiar situtu ma angka jolma i.

⁹Dung i dijou si Abimelek ma si Abraham i, ninna ma tu ibana: Aha do na binahenmu tu hami, jala aha dosangku tu ho, umbahen diparo ho dosa bolon tu ahu dohot tu na hugomgomi? Angka pambahenan, na so jadi bahenon, dibahen ho tu ahu.

¹⁰Angkup ni didok si Abimelek tu si Abraham: Aha ma diida ho, ala dibahen ho songon i?

¹¹Jadi ninna si Abraham ma: Ala ninna rohangku do, atek tung so adong biar mida

Debata di huta on, gabe bunuonnasida ahu maon ala hata jolmangki.

¹²Jala tongon huhut ibotongku ibana, boru ni damang, alai ndada tubu ni dainang, gabe jolmangku ibana.

¹³Alai dung sai maotaot ahu sian bagas ni damang, didokkon Debata, jadi hudok ma tu ibana: On ma tanda ni holong ni roham, sibahenonmu tu ahu: Manang tu dia pe hita sahat, dok ma taringot tu ahu: Ibotongku ibana.

¹⁴Jadi dipambuat si Abimelek ma birubiru dohot lombu dohot angka naposo baoa dohot boruboru, jala diparlehon tu si Abraham, dipaulak tu ibana dohot si Sarah, jolmana i.

¹⁵Dung i ninna si Abimelek ma: Ida ma tanongki di jolomi, ingani ma lomo ni roham!

¹⁶Alai anggo tu si Sarah ninna do: Ida ma nunga hulehon tu ibotom saribu rupia, i ma pardenggan tu ho dohot tu sude donganmu, asa lias ho maradophon sudena i.

¹⁷Dung i martangiang ma si Abraham tu Debata. Jadi dipamalum Debata ma si Abimelek dohot jolmana dohot angka naposona boruboru, gabe tubuan anak ma nasida.

¹⁸Ai tarhinsu situtu dibahen Jahowa bortian ni isi ni bagas ni si Abimelek sudena, ala hata si Sarah jolma ni si Abraham.

21 ¹(I.) Dung i ditatap Jahowa ma si Sarah, songon na nidokna i, jala

dibahen Jahowa tu si Sarah songon na pinarbagana i.

²Ai gabegabean ma si Sarah, jala ditubuhon anak sada di si Abraham, di hatutuana i, tongon di tingki, na nidok ni Debata tu ibana.

³Dung i dibahen si Abraham ma goar ni anakna i, na tubu di ibana, tinubuhon ni si Sarah, si Isak.

⁴Dung i paulubornginhon, disunat si Abraham ma si Isak, anakna i, songon na tinonahon ni Debata tu ibana.

⁵Marumur saratus taon do si Abraham di na tubu i si Isak anakna i.

⁶Jadi ninna si Sarah ma: Siparengkelon do dibahen Debata tu ahu; nasa na umbegesa parengkelanna do ahu.

⁷Angkup ni didok do: Tung ise ma na hum marbagahon di si Abraham, si Sarah pasusuhon anak? Ai nunga hutubuhon anak sada di hatutuana i.

⁸Jadi dung lam balga posoposo i, jala sirang susu, marharoan bolon ma si Abraham, di ari na sirang susu i si Isak.

⁹(II.) Dung i sai diida si Sarah ma anak ni si Hagar, boru Misir i, na tinubuhonna di si Abraham, mangarehei.

¹⁰Jadi didok ma tu si Abraham: Pabali ma hatoban on rap dohot anakna i, ai ndang manean anak ni hatoban on rap dohot si Isak anakki.

¹¹ Alai sogo situtu do roha ni si Abraham di hata i, ala ni anakna i.

¹² Alai ninna Debata ma tu si Abraham: Unang sogo roham taringot tu dakdanak i dohot taringot tu hatobanmu; tangihon ma sude na nidok ni soara ni si Sarah tu ho, ai marhitehite si Isak do targoar di ho pinompar.

¹³ Anak ni hatobanmi pe bahenonku do gabe bangso, ala pinomparmu ibana.

¹⁴ Jadi dipasogot si Abraham ma manogotna i hehe, dibuat ma sagusagu dohot aek satabutabu, dilehon ma i tu si Hagar, dipasandangkon ma tu abarana, dung i dipalaho ibana rap dohot dakdanak i. Jadi laho ma ibana, hape lilu do di halongonan Berseba.

¹⁵ Jadi dung suda aek sian tabutabu i dipapeak ma dakdanak i tu toru ni ramba metmet.

¹⁶ Dung i dipaholang ibana laho hundul arga sansinior sian i, ai ninna do: Nandang tarpaidaida ahu dakdanak i laho mate. Jadi sai hundul ibana tondong sian i, huhut dipangiar soarana jala tumatangis.

¹⁷ (III.) Jadi ditangihon Debata ma soara ni dakdanak i, joujou ma suruan ni Debata sian banua ginjang di si Hagar, ninna ma mandok ibana; aha di ho ale Hagar? Unang ho mabiar, ai nunga ditangihon Debata soara ni dakdanak i sian hapeahanna i.

¹⁸Hehe ma ho, pahehe ma dakdanak i jala togu ibana dohot tanganmu ai bahenonku do ibana gabe bangso na bolon.

¹⁹Dung i dipatonggor Debata ma mata ni si Hagar, gabe diida ma sada mual. Jadi laho ma ibana manggohi tabutabu i dohot aek, jala dipainum dakdanak i.

²⁰Dung i ditumpak Debata ma dakdanak i magodang, laos maringan ibana di halongonan, diula ma parsioron.

²¹Jadi maringan ibana di halongonan Elaparan, gabe dibuat inana i ma sada boru Misir bahenjolmana.

²²(IV.) Dung i ro ma uju i hata ni si Abimelek dohot si Pikol, partogi ni angka paranganna i mandok tu si Abraham: Sai didongani Debata do ho di sude na niulam.

²³On pe, mangmangkon ma dison tu Debata: Molo tung marmihimmihim ho tu ahu, manang tu angka anakku, ro di pinomparhu sogot! Nda maruhum na denggan ho tu ahu dohot tu tano paisolatanmu, marningot uhum na denggan na hubahen i tu ho.

²⁴Jadi ninna si Abraham ma:
Humangmangkon pe.

²⁵Alai disarita si Abraham do si Abimelek ala sumur, na nirampas ni angka naposo ni si Abimelek.

²⁶Dung i ninna si Abimelek ma: Nandang pamotoanku manang ise na mambahen

songon i; ho pe antong, ndang dialualuhon ho tu ahu, jala ndang dung hubege, nda sadari on.

²⁷ Jadi dipambuat si Abraham ma birubiru dohot lombu, jala di parlehon tu si Abimelek, jadi marbulan be ma nasida na dua.

²⁸ Dung i dipapulik si Abraham ma pitu anak ni birubiru.

²⁹ Jadi ninna si Abimelek ma tu si Abraham: Tu aha ma anak ni birubiru na pitu on, angka na pinapulikmon?

³⁰ Dung i ninna si Abraham ma: Sai jalo ma na pitu anak ni birubiru on sian tanganku bahen sitindangingku, paboa ahu sihali sumur on.

³¹ Ala ni do umbahen margoar Berseba (sumur parbulanan) huta i, ala disi marbulan nasida na dua i.

³² Asa marpadan ma nasida di Berseba. Dung i hehe ma si Abimelek dohot si Pikol, partogi ni paranganna i, asa mulak nasida tu tano ni halak Palistim.

³³ Dung i disuan si Abraham ma angka hau ara di Berseba, jala dipajoujou disi goar ni Jahowa, Debata saleleng ni lelengna.

³⁴ Jadi na nia leleng si Abraham maisolat di tano ni halak Palistim.

22¹ (I.) Jadi dung salpu angka jamita ondeng, diunjuni Debata ma si Abraham, ninna ma mandok ibana: Jo Abraham! Dison do ahu, ninna.

²Dung i ninna ma: Buat ma anakmu na sasada i, haholongan ni roham, si Isak i, jala togihon ibana tu tano Moria, jala pelehon ibana disi bahen pelean situtungan tu sada dolok, sipaboaonku tu ho.

³Jadi dipasogot si Abraham ma hehe manogotna i, dipalanoi halodena, jala diarahon dua halak naposona rap dohot si Isak, anakna i, jala ditahai soban manutungi pelean i, dung i borhat ma ibana laho tu dolok, na nidok ni Debata tu ibana.

⁴Patoluarihon manaili ma si Abraham, jadi ditatap ma dolok i.

⁵Dung i ninna si Abraham ma tu angka naposona i: Dison ma hamu mangulon rap dohot halode i, alai anggo ahu dohot dakdanak i, laho ma hami tu sadu i, jala ia dung martangiang hami, mulak hami tu hamu on.

⁶Jadi dibuat si Abraham ma soban tu pelean situtungan i diampehon ma tu si Isak, anakna i. Alai ibana do maniop api dohot raut sada, jadi rap mardalan ma nasida na dua i.

⁷Dung i ninna si Isak ma tu si Abraham amana i: Atehe, ale amang, ninna! Dison do ahu ale anaha, ninna. Dung i ninna si Isak ma: Nunga dison api dohot soban, alai didia do birubiru bahen pelean situtungan i?

⁸Jadi ninna si Abraham ma: Sai pilliton ni Debata di Ibana sada birubiru bahen pelean

situtungon, ale anaha. Jadi rap mardalan ma nasida na dua i.

⁹Jadi dung sahat nasida tu dolok, na nidok ni Debata tu ibana, dipauli si Abraham ma disi sada langgatan, jala disusun soban i, ditali dohot si Isak anakna i, jala diampehon ibana tu ginjang ni langgatan i, tu atas soban i.

¹⁰Dung i dipatoltol si Abraham ma tanganna mambuat raut i laho maneate anakna i.

¹¹Dung i dijou suruan ni Jahowa ma ibana sian banua ginjang, ninna ma: Jo Abraham, Abraham! Dison do ahu, ninna.

¹²Jadi ninna suruan i ma: Unang laho tanganmu tu dakdanak i, jala unang bahen manang aha tu ibana, ai nunga huboto dihabiari ho do Debata, jala ndang diolani ho anakmu na sasada i maradophon Ahu.

¹³Jadi manaili ma si Abraham, gabe diida ma birubiru tunggal sada di pudina, rais tandukna di dangka dupang ni hau metmet; jadi laho ma si Abraham dibuat ma birubiru tunggal i, jala dipelehon bahen pelean situtungon, singkat ni anakna i.

¹⁴Dung i dibahen si Abraham ma goar ni pamelean i: Jahowa Jireh (Jahowa manatap); ala ni didok halak rasirasa nuaeng: Di dolok ni Jahowa tataponna.

¹⁵(II.) Dung i dijou suruan ni Jahowa ma si Abraham paduahalihon sian banua ginjang.

¹⁶Didok ma: Nunga pola huarahon diringku, ninna Jahowa, ala dibahen ho songon i, jala ndang diolani ho anakmu na sasada i:

¹⁷Sai pasupasuonku ma ho, jala patoroponku situtu pinomparmu, sobokkon bintang angka na di langit, jala sobokkon rihit, angka na di topi ni laut, jala teanon ni pinomparmu sogot huta ni angka musuna.

¹⁸Jala martua sogot saluhut bangso ni tano on marhitehite pinomparmu, ala ditangihon ho soarangku.

¹⁹Dung i mulak ma si Abraham tu angka naposona, jadi borhat ma nasida, asa tampak laho tu Berseba, ai maringan di Berseba do si Abraham.

²⁰(III.) Jadi dung salpu angka jamita ondeng, ro ma barita mandok tu si Abraham: Ida ma, nunga tubuan anak dohot si Milka di si Nahor, anggim i.

²¹Si Us, buhabajuna dohot si Bus anggina i dohot si Kemuel, ompu ni halak Ram.

²²Dohot si Kesed dohot si Haso dohot si Pildas dohot si Jidlap dohot si Betuel.

²³Alai anggo si Betuel tumubuhon si Rebekka. Na ualu halak i do ditubuhon si Milka di si Nahor, anggi ni si Abraham i.

²⁴Dohot hatobanna, pinarjolmana i, na margoar si Reuma do tubuan anak: Si Teba, Gaham, Tahas dohot Maaka.

23¹(I.) Ia umur ni si Sarah saratus duapulu pitu taon do, i ma leleng ni si Sarah mangolu.

²Dung i mate ma si Sarah di Kiryat-Arba, i ma Hebron di tano Kanaan. Jadi ro ma si Abraham mangandungi si Sarah, jala ditatangisi.

³(II.) Dung i hehe ma si Abraham sian na paadopadop na matena i, dipangkulingi ma angka anak ni si Het ninna:

⁴Halak na hinomit jala paisolat do ahu di tongatongamuna on, sai lehon hamu ma di ahu parbandaan hapunjungan di tongatongamuna on, asa hutanom na matengki, na hupaadopadop on.

⁵Jadi ninna angka anak ni si Het ma mangalusi si Abraham:

⁶Tangihon ma hatanami on, ale tuan, raja na pinabangkit ni Debata do ho di tongatonganami on, tanom ma na matem tu parbandaannami, tinodo ni roham. Nandang adong manang ise hami on na mangorai ho mananom na matem tu parbandaanna.

⁷Dung i hehe ma si Abraham, jala disomba bangso ni luat i, i ma angka anak ni si Het.

⁸Jadi mangkatai ma ibana dohot nasida, ninna ma: Molo lomo rohamuna tanomonku na matengku, na hupaadopadop i, tangihon hamu ma hatangkon, jala ondihon hamu ahu tu si Epron, anak ni si Zohar.

⁹Asa dilehon tu ahu liangna Makpelah na di duru ni haumana, sai dilehon ma i tu ahu manang sadia pe argana, bahen parbandaan hapunjungan di tongatongamuna on.

¹⁰Ai maringan di tongatonga ni angka anak ni si Het do si Epron i. Jadi ninna si Epron, marga Het i ma mangalusi si Abraham, patubegehon tu angka anak ni si Het i, tu sude angka na marmeang muli sian bahal ni hutana i, botima:

¹¹Ndang songon i, ale tuangku, tangihon ma hatangkon: Hulehon ma tu ho hauma i ro di liang na di bagasan, tu ho ma hulehon maradophon angka anak ni bangsongku hulehon tu ho; tanom ma na matem tusi.

¹²Jadi marsomba ma si Abraham maradophon isi ni luat i.

¹³Dung i ninna ma tu si Epron, dibege angka isi ni luat i: Aut ni olo ho tumangihon hatangkon, sai jalo ma sian ahu hepeng silehononku tuhor ni hauma i, asa hutanom tusi na matengku.

¹⁴Alai ninna si Epron ma mangalusi si Abraham:

¹⁵Sai tangihon ma hatangkon, ale tuangku: Hauma paropatratu ringgitan, sadia ma i di hita? Sai tanom ma na matem tusi.

¹⁶Jadi ditangihon si Abraham ma si Epron i, didasingkon ma hepeng na nidok ni si Epron i, binege ni angka anak ni si Het, siopatratu ringgit hian.

¹⁷Jadi saut ma hauma ni si Epron, na di Makpelah, tondong ni Mamre, hauma i dohot liang i di bagasan ro di sude hau, angka na di hauma i, angka na hinangkamna i humaliang.

¹⁸Gabe si Abraham nampunasa di jolo ni angka anak ni si Het ro di sude angka na marmeang muli sian bahal ni hutana i.

¹⁹(III.) Dung i ditanom si Abraham ma si Sarah, jolmana i tu liang ni hauma Makpelah, tondong ni Mamre, i ma Hebron na di tano Kanaan.

²⁰Asa sahat ma tu si Abraham hauma i dohot liang na di bagasan bahen parbandaan hapunjungan sian angka anak ni si Het.

24¹(I.) Alai nunga ubanon si Abraham, nunga sahat sarimatua ibana, jala na pinasupasu ni Jahowa do si Abraham di sasudena i.

²Dung i didok si Abraham ma mandok naposona, sintua ni bagasna i, siramoti sasude na di ibana: Ua ampehon ma tanganmu tu toru ni gontingkon.

³Asa hupamangmangkon ho tu Jahowa, Debata sigomgom langit dohot tano on, paboa na so tupa buatonmu sian boru ni halak Kanaan, na humomit ahu bahenjolma ni anakki.

⁴Ingkon laho ho tu tano hagodanganki dohot hatubuanki mangaririt bahenjolma ni anakki, si Isak.

⁵ Jadi ninna naposona i ma mandok ibana: Beha ia so ra boruboru i mangihuthon ahu tu tano on, jadi do togihononku anakmi mulak tu tano, tininggalhonmi?

⁶ Dung i didok si Abraham ma mandok ibana; jaga ho, so tung ditogihon ho anakki mulak tusi.

⁷ Sai suruon ni Jahowa, Debata, sigomgom langit i suruanna tu jolom laho tusi mangaririt bahenjolma ni anakki, ai Ibana do manogihon ahu ruar sian bagas ni damang dohot sian tano hatubuanki, jala didok mandok ahu, pola diuarihon tu ahu, ninna: Tu pinomparmi do lehononku tano on.

⁸ Alai molo tung so ra boruboru i mangihuthon ho, malua do ho sian uarimon na tu ahu i, asal unang ditogihon ho anakki mulak tusi.

⁹ Jadi diampehon naposo i ma tanganna tu toru gonting ni si Abraham, indukna i, jala dimangmangkon hata i tu ibana.

¹⁰ (II.) Dung i dibuat naposo i ma sampulu unto sian unto ni rajana i, jala laho ibana; diboan dohot ugasan ni rajana i marragamragam di na borhat i ibana laho tu Mesopotamia tu huta ni si Nahor.

¹¹ Dung i dipaulon ma angka unto i di balian ni huta i, di lambung ni sada sumur mareak bodari, di tingki haroro ni angka partuaek.

¹² Jadi ninna ma: Ale Jahowa Debata ni si Abraham, indukhi, sai tomutomuhon ma tu

ahuh sadari on, sai bahen ma asi roha tu si Abraham, indukhi.

¹³Ida ma, jongjong do ahuh di lambung sumur on, jala ruar ma angka boru ni isi ni huta on laho manahui aek.

¹⁴Onpe, ia hudok mandok sada boruboru i: Ua paeleng hudonmi, asa minum ahuh, gabe dohononna: Inum ma na, hupasobur pe dohot angka untom, i ma nian na tinurpukkonmu tu naposom si Isak, asa hutanda disi, paboa naung dibahen Ho asi ni roha tu rajangki.

¹⁵Jadi ndang dope tolhas hatana i didok, ida ma nunga ruar si Rebekka, tubu ni si Betuel, anak ni si Milka, jolma ni si Nahor, haha ni si Abraham, jala sumandang panguhatanna.

¹⁶Jala na uli utus rupa ni boruboru i, namarbaju, jala na so dung tumanda baoa; mijur ma ibana tu sumur i manggohi panguhatanna, dung i nangkok ibana.

¹⁷Jadi marlojong ma naposo i mandapothon ibana, ninna ma: Ua lehon aek i otik inumonku sian panguhatanmu.

¹⁸Jadi didok boruboru i ma: Inum ma, ale rajanami na! Dung i humalaput ma ibana paijurhon panguhutanna i tu tanganna, painumhon ibana.

¹⁹Jadi dung sun ibana dipainum, ninna ma: Hutahui pe dohot di angka untom, paima sombu uasna.

²⁰Jadi humalaput ma ibana mangusehon panguhatanna i tu parsoburan i, jala diulahi

marlojong tu sumur i manahui singkop, di sude angka untona i ditahui.

²¹ Alai longang ma bajoi mida ibana, sai sip do, paima ditanda manang na ditumpak Jahowa langkana i, manang ndang.

²² Jadi dung sun marsobur angka unto i, dibuat bajoi ma sada tintin sere, satonga hati dokdokna, jala dua leang sere tu tanganna parsampulutailan.

²³ Dung i didok ma: Atehe, boru ni ise do ho? Ua paboa di ahu; siat do hami di bagas ni amanta i marborngin?

²⁴ Jadi ninna ma mandok ibana: Boru ni si Betuel do ahu, anak ni si Milka, tinubuhonna i di si Nahor.

²⁵ Angkup ni didok boruboru i tu ibana: Galagala ni eme pe dohot gagaton, godang do di hami, parbornginan pe adong do.

²⁶ Jadi dipaunduk bajoi ma ibana, huhut marsomba tu Jahowa.

²⁷ Jala ninna ma: Pinuji ma Jahowa, Debata ni si Abraham, rajangki, ndang dialang asina dohot hasongtion ni rohana tu rajangki; Jahowa do tongon manogihon ahu di dalan tu bagas ni haha ni rajangki.

²⁸ Dung i maringkat ma boruboru i laho paboahon angka hata ondeng tu bagas ni inana.

²⁹ Adong do huhut sada iboto ni si Rebekka, si Laban goarna. Jadi marlojong ma si Laban tu balian manjumpangkon bajoi tu sumur i.

³⁰Dung diida tintin i dohot leang angka na di pargolongan ni ibotona i, jala dung dibege angka hata ni si Rebekka, ibotona i, na mandok: Songon on do hata ni bajoi tu ahu, jadi tolhas ma ibana tu bajoi, ida ma jongjong dope ibana di lambung ni angka unto, mardonokkon sumur i.

³¹Dung i didok ma: Beta hita muli, ho na pinasupasu ni Jahowa, boasa tung jongjong di balian on ho? Nunga pola hupadiri bagas i bahen inganan ni angka unto i.

³²Jadi ditogihon ma bajoi tu jabu, diharhari ma hohos ni angka unto i, jala dilehon galagala ni eme dohot gagaton tu angka unto i, dohot aek pamuri ni patna dohot pat ni angka donganna i.

³³Dung i dibahen ma sipanganon tu jolona. Alai ninna ibana ma: Ndang na mangan ahu, nda jolo tolhas hudok angka hatangkon. Antong dok ma, ninna.

³⁴Jadi ninna ma: Naposo ni si Abraham do ahu.

³⁵Jala mansai ditumpak Jahowa rajangki, gabe timbul ibana, jala dilehon tu ibana birubiru dohot lombu, perak dohot sere, naposo baea dohot naposo boruboru, angka unto dohot halode.

³⁶Angkup ni ditubuhon si Sarah,jolma ni rajangki sada anak di ibana di hatutuanasida i, tusi do dilehon sude nadi ibana i.

³⁷ Dung i moruari ahu dibahen rajangki, ninna do: Ndang na jadi buatonmu sian boru ni halak Kanaan, na humomit ahu, bahen jolma ni anakki.

³⁸ Ingkon laho ho tu bagas ni damang, tumopot donganku samarga, mambuat jolma ni anakki.

³⁹ Alai ningku do nian tu rajangki: Beha ia so olo boruboru i mangihuthon ahu?

⁴⁰ Jadi ninna ibana mandok ahu: Sai suruon ni Jahowa, na hupaolooloi i suruanna mandongani ho manumpak langkam, asa dialap ho jolma ni anakki sian donganku dohot sian bagas ni damang.

⁴¹ Ia dung tolhas ho tu donganki, hape ndang olo nasida mangalehon boruboru i tu ho, disi pe asa malua ho sian na niuarihonmu tu ahu.

⁴² Jadi tolhas ma ahu sadari on tu sumur on, gabe hudok ma: Ale Jahowa, Debata ni rajangki, si Abraham, aut ni olo Ho manumpak langkangkon, na hulangkahon i!

⁴³ Ida ma ahu na jongjong di lambung sumur on, patupa ma songon on: Ia ruar sada namarbaju manahui, gabe hudok mandok ibana: Ua lehon di ahu otik aek inumonku sian panguhatanmu.

⁴⁴ Jadi didok ibana nian tu ahu: Inum ma na, dohot pe di untom hutahui, i ma nian jolma na tinurpukkon ni Jahowa tu anak ni rajangki.

⁴⁵ Nandang dope tolhas hudok hata i di bagasan rohangku, ida ma, nunga ruar si Rebekka sumandang panguhatanna, jala mijur ibana tu sumur i manahui, jadi hudok ma tu ibana: Ua lehon ahu minum.

⁴⁶ Jadi humalaput ma ibana paijurhon panguhatanna i, sian abarana, ninna ma: Minum ma ho, hupasobur pe dohot angka untomon. Asa minum ma ahu, jala dohot do angka unto i dipasobur.

⁴⁷ Dung i, husungkun ma ibana, ningku do: Atehe boru ni ise do ho? Jadi ninna ibana ma: Boru ni si Betuel do, anak ni si Nahor, tinubuhon ni si Milka di ibana. Dung i hubahen ma sada tintin tu igungna dohot angka leang tu pargolanganna.

⁴⁸ Dung i hupaunduk ahu marsomba tu Jahowa, jala hupuji Jahowa, Debata ni si Abraham, rajangki, na patongonhon langkangkon laho mambuat boru ni haha ni rajangki di anakna i.

⁴⁹ Onpe molo olo hamu mambahen asi dohot burju ni roha tu rajangki, ba, paboa hamu di ahu, molo ndang, antong paboa hamu di ahu, asa hutondong tu siamun manang tu hambirang.

⁵⁰ Jadi ninna si Laban dohot si Betuel ma mangalusi: Na ro sian Jahowa do hata i, ndang tardok hami tu ho na roa manang na denggan.

⁵¹ Ndi, di jolomi do si Rebekka i, buat ma ibana jala langka, asa gabejolma ni anak ni rajam ibana, songon na nidok ni Jahowa.

⁵² Jadi dung dibege naposo ni si Abraham hatanasida i, marsomba ma ibana tu Jahowa.

⁵³ Dung i diparungkar naposo i ma angka ugasan perak dohot sere dohot angka ulos, jala diparlehon tu si Rebekka, tu ibotona dohot tu inana i pe dilehon do angka ugasan na arga.

⁵⁴ Dung i mangan jala minum nasida, ibana rap dohot angka donganna sauduran, jala marborngin nasida. Dung i hehe ma nasida manogotna i, jala ninna ibana ma: Paborhat hamu ma ahu tu rajangki.

⁵⁵ Alai ninna ibotona dohot inana i ma: Ua tading nian si betet i di hami, arga sampulu borngin nari, salpu ni jadi ho mardalan.

⁵⁶ Jadi ninna ibana ma tu nasida: Unang tiopi hamu ahu, nunga ditumpak Jahowa langkanku; paborhat hamu ahu, asa laho ahu tumopot rajangki.

⁵⁷ Dung i ninna nasida ma: Antong hujou hami ma si betet i, asa itasungkun hatana i.

⁵⁸ Jadi dijou nasida ma si Rebekka, didok ma tu ibana: Atehe olo do ho mandongani bayo on? Jadi ninna ibana ma: Laho pe ahu.

⁵⁹ Asa dipaborhat nasida ma si Rebekka, ibotonasida i rap dohot na parorot ibana dohot naposo ni si Abraham, ro di angka donganna sauduran.

⁶⁰Jadi dipasupasu nasida ma si Rebekka, jala didok tu ibana: Gabe ma ho ale ito marriburibu loksa, jala mandapot di pinomparmu ma bahal ni angka musuna.

⁶¹Dung i borhat ma si Rebekka dohot angka radingna, marsihundul be ma nasida di unto mangihuthon baoa i. Asa laho ma naposo i mamboan si Rebekka.

⁶²(III.) Alai ro muli do ianggo si Isak sian na manopot sumur Lakhai-Roi, ai tano na tungkan dangsina do diingani.

⁶³Dung i marhira bodari ruar do si Isak tu ladang martangiang, gabe manatapnatap ibana, jadi diida ma ro angka unto.

⁶⁴Manatapnatap ma dohot si Rebekka, jadi diida ma si Isak, gabe manimbung ibana sian unto i.

⁶⁵Dung i ninna ma mandok naposo i: Ise do halak an na mardalandalan di ladang i manjumpangkon hita? I ma rajangki, ninna naposo i. Jadi dibuat nasida ma tujungtujung manghungkupi bohina i.

⁶⁶Dung i dipajojor naposo i ma tu si Isak sude hata angka na niulana i.

⁶⁷Jadi ditogihon si Isak ma si Rebekka tu undungundung ni si Sarah, inana i, dibuat ma si Rebekka bahenjolmana, jala holong rohana di ibana. Jadi sabam ma roha ni si Isak di panading ni inana i.

25¹(I.) Dung i diulakkon si Abraham ma mambuat boru, na margoar si Keturah.

²Na manubuhon di ibana: Si Zimran dohot si Joksan dohot si Medan dohot si Midian, si Isbak dohot si Sua.

³Ia si Joksan manubuhon: Si Seba dohot si Dedan. Alai anggo angka anak ni si Dedan: halak Assusim dohot si Letusim dohot si Leummim.

⁴Ia angka anak ni si Midian: Si Epah, si Eper, si Hanok, si Abida dohot si Elda. I ma angka anak ni si Ketura sudena.

⁵Dung i dilehon si Abraham ma sude na di ibana i tu si Isak.

⁶Alai anggo tu angka anak ni jolmana panoroni i, dilehon si Abraham angka silehonlehon, dung i dipajae nasida sian si Isak anakna i tu tano na tungkan habinsaran, tagan mangolu dope ibana.

⁷(II.) Ia leleng ni si Abraham mangolu saratus pitupulu lima taon do.

⁸Dung i tos ma hosana, jala mate sarimatua si Abraham, dung mahap rohana di hangoluan on, jadi dipapungu ibana tu angka ompuna.

⁹Dung i ditanom si Isak dohot si Ismael, angka anakna i, ibana tu liang Makpelah, tu hauma ni si Epron, anak ni si Zohar, marga Het, na tungkan habinsaran ni Mamre.

¹⁰Tu hauma, na tinuhor ni si Abraham sian angka anak ni si Het; disi do tartanom si Abraham dohot si Sarah jolmana i.

¹¹ Jadi dung mate si Abraham, dipasupasu Debata ma si Isak, anakna i; alai maringan di lambung sumur Lakhai-Roi do si Isak i.

¹²(III.) Angka on do pinompar ni si Ismael, anak ni si Abraham, tinubuhon ni si Hagar, boru Misir, hatoban ni si Sarah, di si Abraham:

¹³Jala on do goar ni angka anak ni si Ismael mangihuthon partubunasida: Nabaiot buhabaju ni si Ismael, dung i Kedar, Abdeel, Mibsam.

¹⁴Misma, Duma, Masa.

¹⁵Hadad, Tema, Jetur, Napis dohot Kademah.

¹⁶I ma angka anak ni si Ismael, jala i ma angka goarnasida mangihuthon hutana dohot parsaroanna be, sampulu dua raja, parserahan ni marganasida.

¹⁷Ia leleng ni si Ismael mangolu saratus tolupulu pitu taon do, dung i tos ma hosana, jala mate ibana, jadi dipapungu ma ibana tu angka ompuna.

¹⁸Olat ni huta Hevila sahat ro di Sur na marbalokkon Misir dohot Assur diingani nasida; tungkan habinsaran ni angka donganna i ibana ojak.

¹⁹(IV.) On ma angka pinompar ni si Isak, anak ni si Abraham. Si Abraham tumubuhon si Isak.

²⁰Jala marumur opatpulu taon si Isak di na binuatna i si Rebekka, boru ni si Betuel, isi ni Ram i, iboto ni si Laban, isi ni Ram i, bahen jolmana.

²¹ Dung i digogo si Isak ma tumangiangkonjolmana i tu Jahowa, ai na hol do ibana; jadi ditangihon Jahowa tangiangna, gabegabean ma si Rebekkajolmana i.

²² Dung i masitunjangan ma posoposo i di bortianna. Jadi ninna si Rebekka ma: Molo songon i hape boasa songon on ahu? Dung i laho ma ibana manungkunhonsa tu Jahowa.

²³ Jadi ninna Jahowa ma tu ibana: Dua do bangso di bortianmi, jala dua marga sirang sian boltokmi, jala gumogo na samarga martimbangkon na sada nari, jala mandapot di siampudan do sihahaan i.

²⁴ Jadi dung jumpang hasasangana i manubuhon, ida ma, linduat do di boltokna i.

²⁵ Jadi ruar ma na parjolo i, rara do ibana, hira na marulos imbulu sandok dagingna i, jadi dibahen ma goarna si Esau.

²⁶ Dung songon i, ruar ma anggina i, ditiop ma tambihul ni si Esau, jadi dibahen ma goarna si Jakkob. Onompulu taon ma umur ni si Isak di na tubu i nasida.

²⁷ (V.) Jadi dung balga dakdanak i, marsiajar parburuon dohot parumaon ia si Esau; alai anggo si Jakkobjolma na daulat marroha do, maringan di angka undungundung.

²⁸ Dihasiani si Isak do si Esau i, ala giot pamanganna mangan na binuru; alai hasian ni si Rebekka do ianggo si Jakkob.

²⁹Dung i mangalompa sipanganon ma si Jakkob, jadi ro ma si Esau, sian harangan, jala mansai loja ibana.

³⁰Jadi ninna si Esau ma mandok si Jakkob: Ua husohali ma sian na rara i, ai nunga mansai loja ahu. Ala ni do umbahen margoar Edom ibana.

³¹Alai ninna si Jakkob ma: Gadis ma tu ahu sadari on sahala sihahaan!

³²Jadi ninna si Esau ma: Antong na laho mate na ma ahu, tu dihangku sahala sihahaan i?

³³Dung i ninna si Jakkob ma: Antong mangmangkon ma tu ahu sadari on! Jadi dimangmangkon tu ibana; jala digadis sahalana sihahaan i tu si Jakkob.

³⁴Dung i dilehon si Jakkob ma tu si Esau sagusagu dohot hadio na nilompana i; jadi mangan jala minum ibana, dung i hehe ma ibana laho muli. Asa marsineang ma roha ni si Esau di sahala sihahaan i.

26¹(I.) Dung i masa ma muse haleon di tano i, di balik ni haleon parjolo i, na masa uju di ngolu ni si Abraham, jadi bungkas ma si Isak tu Gerar mandapothon si Abimelek, raja ni halak Palistim.

²Dung i ditopot Jahowa ma ibana, didok ma: Unang ho tuat tu tano Misir, sai ingani ma tano sipaboakonku tu ho.

³Maisolat ma ho di tano on, asa hudongani ho, jala hupasupasu ho; ai tu ho dohot tu

pinomparmu lehononku sogot sandok tano on, jala pahotonku ma uari, na huuarihon i tu si Abraham, amami.

⁴Jala patoroponku do pinomparmi, songon bintang angka na di langit, jala lehononku ma tu pinomparmi sandok tano on, jala dapotan pasupasu sogot saluhut bangso ni tano on marhitehite Pinomparmi.

⁵Ala na tinangihon ni si Abraham soarangki, jala diradoti uhumhu, angka tonangku, angka patikku dohot podangku.

⁶(II.) Asa maringan di Gerar ma si Isak i.

⁷Alai ia usouso halak, isi niluat i taringot tu jolmana, gabe didok ma: Ibotongku do ibana, ai mabiar do ibana mandok, jolmangku do i, asa unang dibunu isi ni luat i ibana, ala ni si Rebekka, ai na uli rupa do ibana.

⁸Hape dung na nia leleng ibana disi, mandulo ma si Abimelek, raja ni halak Palistim sian pandiloan, gabe diida ma si Isak margait dohot si Rebekka jolmana i.

⁹Jadi dijou si Abimelek ma si Isak, ninna ma: Antong jolmam do ibana hape, boasa ma tung dohononmu: Ibotongku ibana? Jadi ninna si Isak ma mandok ibana: Atek tung mate ahu maon humongkop ibana, ninna rohangku.

¹⁰Dung i ninna si Abimelek ma: Boasa ma tung songon i bahenonmu tu hami? Oti knari diparangkupi sada sian bangso i jolmam modom, gabe parohon dosa ho tu hami.

¹¹ Dung i ditingtingkon si Abimelek ma tu saluhut parripena i, ninna ma: Manang ise na mangkaori bayo on dohot jolmana i, ingkon marutang hosa ibana.

¹² Dung i mangordang ma si Isak di tano i, jadi jumpangsa ma di na sataon i lompit saratus, ai dipasupasu Jahowa do ibana.

¹³ Jadijolma na sangap ibana, gabe lam timbul situtu.

¹⁴ Torop ma birubiruna dohot lombuna, torop dohot naposona. Jadi mangiburu ma halak Palistim mida ibana.

¹⁵ Disosopi halak Palistim ma sude sumur, angka na hinali ni naposo ni amana, di ngolu ni si Abraham, amana i, jala digohi dohot tano.

¹⁶ Pola dohot si Abimelek mandok tu si Isak: Bungkas ma ho sian lambungnami on, ai sumangap situtu do ho sian hami.

¹⁷ Jadi bungkas ma si Isak sian i, mangulon ma ibana di rura Gerar, laos disi ibana maringan.

¹⁸ Dung i diulahi si Isak mangkali sumur angka na hinali uju di ngolu ni si Abraham, amana i, angka na sinosopan ni halak Palistim, dung mate si Abraham, jala dibahen goarna mangihuthon goar, angka na binahen ni amana i nahinan.

¹⁹ Mangkali dohot angka naposo ni si Isak di rura i, gabe jumpang nasida disi sada sumur (aek mual) na mangolu.

²⁰Alai dibadai angka parmahan na sian Gerar ma angka parmahan ni si Isak, ninna ma: Hami do nampuna aek on. Jadi dibahen ma goar ni Sumur i: Esek (parbadaan), ala na dibadai nasida ibana disi.

²¹Dung i dihali nasida ma sada sumur na asing, ipe diguluti nasida do, jala dibahen ma goarna Sitna (pargulutan).

²²Jadi bungkas ma ibana sian i, dihali muse sada sumur na asing, ndang marbadai nasida ala ni, jadi dibahen ma goarna Rehobot (ingan na lambas), ai nunga dipalambas Jahowa di hita ninna, jala sopar hita di tano on tumpahanna.

²³Dung i bungkas ibana sian i nangkok tu Berseba.

²⁴(III.) Bornginna i ro ma Jahowa manopot ibana, didok ma: Ahu do Debata ni si Abraham, amami, unang ho mabiar, ai dongananku jala pasupasunku do ho, jala patorponku pinompamu ala ni si Abraham naposongki.

²⁵Jadi dipauli ma disi sada langgatan, jala dipajoujou goar ni Jahowa, dipahembang ma disi undungundungna, jala dihali naposo ni si Isak disi sada sumur.

²⁶(IV.) Dung i diebati si Abimelek ibana sian Gerar dohot si Ahuzat, alealena i dohot si Pikol, partogi ni paranganna.

²⁷Alai ninna si Isak ma mandok nasida: Boasa ro hamu manopot ahu, hasomoran ni

rohamuna, jala dipabungkas hamu ahu sian lambungmuna i.

²⁸Jadi ninna nasida ma: Tandap do huida hami, didongani Jahowa ho, dibahen i hudok hami: Ua marbulan be ma hita, tabahen ma janjinta.

²⁹Na so tupa bahenonmu tu hami na jat, songon hami, ndang huhahua hami ho, holan uhum na denggan hubahen hami tu ho, jala mardamedame ho bungkas hupasombu hami. On pe na pinasupasu ni Jahowa do ho nuaeng.

³⁰Dung i dihobas si Isak ma panganonnasida, jadi mangan jala minum nasida.

³¹Dung i manogotna i sogot be ma nasida hehe, jala masipabulanan nasida. Dung i dipaborhat si Isak ma nasida, gabe laho ma nasida mardamedame.

³²Sadarina i ro ma angka naposo ni si Isak paboahon tu ibana taringot tu sumur na hinalinasida i, angka ninna ma tu ibana: Nunga jumpangan aek hami.

³³Jadi dibahen ma goarna: Seba (parbulanan), ala ni do umbahen margoar huta i Berseba (sumur parbulanan) rasirasa nuaeng.

³⁴(V.) Jadi dung marumur opatpulu taon si Esau, dibuat ma si Judit, boru ni si Beer, marga Het dohot si Basemat, boru ni si Elon marga Het, bahen jolmana.

³⁵Alai marsak do roha ni si Isak dohot si Rebekka dibahen nasida.

27

¹(I.) Jadi dung lam matua si Isak, rambon na matana, gabe dijou ma si Esau, anakna sihahaan i, ninna ma mandok ibana: Ale amang! Dison do ahu, ninna mangalusi ibana.

²Dung i ninna si Isak ma: Ida ma, nunga matua ahu, ndang huboto ari hamamatengku.

³On pe, buat ma ulaulam, parnangkatanmu dohot siormu, jala laho ma ho tu harangan, buru ma di ahu sada juhut ramba.

⁴Jala pauli di ahu tipak sipanganon lomo ni rohangki, dung i boan tu ahu, asa hupangan, asa dipasupasu tondingku ho, tagan so mate dope ahu.

⁵Alai dibege si Rebekka do pandok ni si Isak tu si Esau anakna i. Jadi borhat ma si Esau tu harangan marburu juhut ramba, siboanonna.

⁶Dung i ninna si Rebekka ma tu si Jakkob anakna i: Boti ma i, nunga hubege pandok ni amam tu si Esau, hahami, ninna do:

⁷Boan di ahu sada juhut ramba, jala pauli tipak sipanganon lomo ni rohangki, asa hupangan, asa hupasupasu ho di jolo ni Jahowa, tagan so mate dope ahu.

⁸On pe, ale amang, tangihon ma soarangkon taringot tu na hudokkon tu ho.

⁹Laho ma ne ho tu jampalan ni birubiru, jala alap di ahu sian i anak ni hambing tunggal dua, angka na halaeanna, asa hupauli bahen sipanganon ni amam, silomo ni rohana.

¹⁰Ho ma mamboan i tu amam, asa dipangan, asa ho dipasupasu, tagan so mate dope ibana.

¹¹Alai ninna si Jakkob ma tu si Rebekka, inana i: Ida ma, rabuton do dahahang, si Esau i, ianggo ahujolma na limus do.

¹²Atek tung dijama damang ahu maon, jadi songon na paotootohon ibana ahu di rohana, gabe parohon torutoru ahu tu ahu, ndada pasupasu.

¹³Dung i ninna inana i ma mandok ibana: Tu ahu pe torutoru na tu ho i, ale amang, asal ditangihon ho soarangki, laho ma ho, sai alap ma di ahu.

¹⁴Jadi laho ma ibana mangalap, jala diboan tu inana i. Dung i dipauli inana i ma sipanganon, silomo ni roha ni amana i.

¹⁵Dung i dipambuat si Rebekka ma angka ulos ni si Esau, anakna sihahaan i, angka na ummuli, angka na pineopna di jabu, jala diuloshon tu si Jakkob, anakna siampudan i.

¹⁶Alai anggo tu tanganna dohot tu rungkungna, na so mapol i, dilangkophon do bobak ni anak ni hambing tunggal i.

¹⁷Dung i dilehon ma sipanganon na tabo i dohot sagusagu na pinaulina i tipak tu tangan ni si Jakkob, anakna i.

¹⁸Jadi ditopot ma amana i, didok ma: O ba, ale amang! Dison do ahu ninna. Ise do ho ale anaha?

¹⁹Dung i ninna si Jakkob ma mandok amana i: Ahu ma si Esau, buhabajum, nunga hupauli songon na nidokmi tu ahu; ua hehe ma ho hundul, jala pangan sian na huburu on, asa ditumpak tondim ahu.

²⁰Alai ninna si Isak ma mandok anakna i: Beha do pambahenmi, ale anaha, umbahen na sai tibu dapotan ho? Jahowa Debatam do manjumpangkon i tu ahu, ninna.

²¹Jadi ninna si Isak ma mandok si Jakkob: Pajonok ma tuson, ale anaha, asa hudadapi ho, manang na tutu anakku si Esau ho, manang ndang.

²²Dung i dipajonok si Jakkob ma tu si Isak amana i. Jadi dung dijama ibana, didok ma: Langgo soara i, soara ni Jakkob do, alai anggo tangan i, tangan ni si Esau do.

²³Laos so ditanda do ibana, ai jabuton do tanganna i, songon tangan ni si Esau, hahana i, jadi dipasupasu ma ibana.

²⁴Dung i ninna si Isak ma: Ho do tutu anakku, si Esau i? Ahu ma tutu, ninna.

²⁵Dung i ninna si Isak ma: Antong boan ma tu lambungkon, ale anaha, asa hupangan sian na binurum, asa ditumpak tondingku ho. Jadi dipajonok ma tu lambungna, gabe mangan ibana, diboan dohot anggur tu ibana, gabe diinum.

²⁶Dung i ninna si Isak, amana i ma mandok ibana: Ua pajonok ma, jala umma ahu, ale anaha!

²⁷ Jadi dipajonok ma, jala diumma amana i; jadi dianggo si Isak ma uap ni angka ulosna i, jala dipasupasu ibana, ninna ma: Ida ma, sobokkon uap ni jampalan na pinasupasu ni Jahowa, uap ni anakki.

²⁸ Sai dilehon Debata ma tu ho nambur na sian banua ginjang, dohot tano na marmiak, asa godang emem dohot anggur.

²⁹ Ingkon mangoloi tu ho ma angka bangso jala marsomba tu ho angka marga. Sai ho ma raja ni angka haham, jala marsomba tu ho angka anak ni inam. Hona bura ma angka na mamburai ho, jala dapotan pasupasu angka na mamasumasu ho.

³⁰ Jadi dung sun si Isak mamasumasu si Jakkob i, jala ipe ruar ibana sian lambung ni si Isak, amana i, ro ma soluk si Esau hahana i sian parburuonna.

³¹ Ibana pe, tipak ma dipauli sipanganon, jala diboan tu amana, jala didok mandok amana i: Hehe ma ho, ale amang, jala pangan sian na binuru ni anakmi, asa ditumpak tondim ahu.

³² Jadi ninna si Isak, amana i ma mandok ibana: Ise do ho? Si Esau, anak buhabajum do ahu, ninna.

³³ Jadi tarsonggot situtu ma si Isak, didok ma: Antong ise do parburu ondeng, na mamboan binuruna i tu ahu, gabe hupangan i, tagan so ro ho, jala nunga hupasupasu ibana? Nunga sahat tu ibana pasupasu i.

³⁴ Jadi dung dibege si Esau angka hata ni amana i, dipangiar ma soarana mangangguk badar, jala habot situtu rohana, didok ma mandok amana i: Sai pasupasu ma dohot ahu, ale amang!

³⁵ Alai ninna amana i ma: Nunga ro anggim, angka dibahen mambuat pasupasum.

³⁶ Leak ma dibahen goarna si Jakkob, ai nunga dua hali ahu dirupa: Nunga dibuat hian sahalangku sihahaan, pasupasu na di ahu hian pe, nunga dibuat. Dung i didok ma: Beha, ndang adong be dipeop ho pasupasu di ahu?

³⁷ Dung i ninna si Isak ma mangalusi si Esau: Ida ma, nunga hupabangkit ibana gabe rajam, jala nunga hupadapot tu ibana sude angka hahana bahen naposona; nunga hutumpakhon eme dohot anggur tu ibana. Aha dope bahenonku tu ho, ale amang?

³⁸ Dung i ninna si Esau ma mandok amana i: Ai holan sasada i do pasupasum, ale amang? Sai pasupasu ma dohot ahu, ale amang! Jadi dipangiar si Esau ma soarana tumatangis.

³⁹ Dung i ninna si Isak, amana i ma mangalusi ibana: Antong, ndang marmiak tano ingananmi sogot, jala ndang dapotan nambur sian banua ginjang.

⁴⁰ Jala podangmu hangoluhononmu, jala mandapot di anggim ho. Alai molo sai marungkil ho, sai na runtunonmu do augana sian rungkungmu sogot.

⁴¹ (II.) Dung i sogo situtu ma roha ni si Esau mida si Jakkob i, ala pasupasu, na pinasupasuhon ni amana i tu ibana, gabe ninna si Esau ma di bagasan rohana: Lam jonok na ma angka ari parandungan ni damang, ai bunuonku ma anggingku, si Jakkob i.

⁴² Hape tarbortik ma tu si Rebekka angka hata ni si Esau, anakna sihahaan i, jadi disuru ma manjou si Jakkob, anakna siampudan i, ninna ma mandok ibana: Ida ma, nunga ditahi haham si Esau i martubolhon pambahenmi, naeng bunuonna ho.

⁴³ On pe, ale anaha, sai tangihon ma soarangkon: Borhat ma ho laho lintun tu Haran, manopot si Laban, ibotongki.

⁴⁴ Sorang tu ibana ma ho manang piga ari on lelengna, paima mombun rimas ni haham.

⁴⁵ Paima mulak rohana mida ho, jala dihalupahon na binahenmi tu ibana; dung i husuru pe mangalapi ho sian i. Boasa ma tung agoan sinuantunas na dua simardung ahu di na sadari?

⁴⁶ Dung i ninna si Rebekka ma mandok si Isak: Marmahapmahap ahu di hangoluan, dibahen angka boru Het i; molo dohot muse si Jakkob mambuat sian angka boru Het i bahenjolmana, songon angka indi on, boru ni isi ni tano on, boasa ingkon di hangoluan on be ahu?

28¹ (I.) Dung i dijou si Isak ma si Jakkob, jala dipasupasu ibana, didok ma manonai ibana: Unang buat sian angka boru Kanaan bahen jolmam.

²Borhat ma ho laho tu Padang-Aram, tu jabu ni si Betuel, ama ni inam, sian i ma buat bahen jolmam, sian angka boru ni si Laban, iboto ni inam.

³Sai gabe ma ho jala torop dipasupasu Debata na sun hinagogo i, asa torop bangso marompu tu ho.

⁴Sai dilehon ma tu ho dohot tu pinomparamu pasupasu na tu si Abraham i, asa ho manean tano paisolatanmu, na nilehon ni Debata tu si Abraham i.

⁵Jadi diparbohat si Isak ma si Jakkob i, asa laho ibana tu Padang-Aram, tu si Laban, anak ni si Betuel, halak Ram i, iboto ni si Rebekka, ina ni si Jakkob dohot si Esau.

⁶(II.) Jadi dung diida si Esau, naung dipasupasu si Isak si Jakkob i, jala dipaborhat ibana tu Padang-Aram, mangalap jolmana sian i, jala na nioraanna i, di na pinasupasuna i ibana, mambuat sian boru Kanaan, bahen jolmana.

⁷Jala naung ditangihon si Jakkob hata ni amana dohot inana laho tu Padang-Aram.

⁸Diida si Esau huhut sogo do roha ni si Isak, amana i mida boru Kanaan.

⁹Jadi laho ma si Esau tumopot si Ismael, jala dibuat si Mahalat, boru ni si Ismael, anak ni si

Abraham, iboto ni si Nabaiot bahen jolmana, imbang ni angka jolmana hian.

¹⁰(III.) Alai borhat do anggo si Jakkob sian Berseba laho tu Haran.

¹¹Jadi tolhas ma ibana tu sada parbornginan, gabe marborngin ibana disi, ai nunga mate mata ni ari. Dung i dipambuat ma angka batu na disini bahen halang ni uluna, laos modom ibana disi.

¹²Dung i marnipi ma ibana, diida ma sada tangga, na pinagohon tu tano, tolhas ro di langit ia ujungna, jadi ida ma, sai marnaek mijur sian i angka surusuruan ni Debata.

¹³Jongjong di ginjangna anggo Jahowa, jala ninna do: Ahu do Jahowa, Debata ni ompum si Abraham dohot Debata ni si Isak, ia tano pinodomanmon lehononku ma tu ho dohot tu pinomparmu.

¹⁴Jala sobokkon orbuk ni tano on sogot torop ni pinomparmu, jala angka rarat ma hamu tu hasundutan dohot tu habinsaran dohot tu utara dohot tu dangsina, jala dapotan pasupasu sogot nasa marga na di tano on marhitehite ho do pinomparmi.

¹⁵Ida ma, sai dongananku jala ramotanku do ho manang tu dia pe ho mangalangka, jala togihononku do ho mulak tu tano on; ai ndang tadingkononku ho, nda jolo sahat hubahen na huparbaga i tu ho.

¹⁶(IV.) Dung i tarsunggul ma si Jakkob sian na modom i, jadi didok ma: Inganan ni Jahowa do on hape, so pamotoanku.

¹⁷Jadi mabiar ma ibana, ninna ma: Na songkal situtu do inganan on, ndang tarbahen so on bagas ni Debata, jala baba pintu ni langit.

¹⁸Dung i hehe ma si Jakkob sogot manogotna i, dibuat ma batu pinarhalanguluna i, jala dipajongjong bahen partinandaan, jala diusehon miak tu ginjangna.

¹⁹Dung i dibahen ma goar ni inganan i Betel (bagas ni Debata), Lus do goar ni huta i anggo na sai laon.

²⁰Dung i marbagabaga ma si Jakkob, ninna do: Molo didongani jala diramoti Debata ahu di dalan na hudalani on, jala dilehon di ahu sagusagu sipanganon dohot ulos siporuloshononhon.

²¹Jala marsonangsonang ahu mulak ditogihon tu bagas ni damang, sai Jahowa ma Debatanku.

²²Jala batu na hupajongjong on bahen partinandaan, i ma gabe bagas ni Debata, jala sude na nilehonmu tu ahu parsampuluonku ma i tu Ho.

29¹(I.) Dung i dilangkahon si Jakkob ma patna laho tu tano ni halak habinsaran.

²Dung i manatapnatap ma ibana, gabe diida ma sada sumur di jampalan, jala mangulon di lambungna angka birubiru tolu parduan,

ai sian sumur i do dipasobur halak angka birubiru i. Alai batu bolon langkop ni sumur i.

³Sai marpungu tusi somal sude angka parduan i, asa digulang nasida batu langkop ni sumur i pasoburhon angka birubiru i, dung i dipasuang muse batu i tu baba ni sumur i.

⁴Dung i ninna si Jakkob ma mandok nasida: Sian dia hamu, ale dongan? Jadi ninna nasida ma: Sian Haran do hami.

⁵Dung i didok ma mandok nasida: Ditanda hamu do si Laban, anak ni si Nahor? Hutanda hami do, ninna nasida.

⁶Dung i ninna ibana mandok nasida: Mardamedame do ibana? Jadi ninna nasida ma: Marsonangsonang do; jala ida. Si Rahel, boruna i ma na mangadu birubiru an.

⁷Dung i didok si Jakkob ma: Ida ma, ginjang dope ari, ndang dope jumpang tingki papunguhon pinahan; pasobur hamu birubiru i, dung i aduadu hamu pajampalhonsa.

⁸Jadi ninna nasida ma: Nda jolo marpungu sude angka parduan i, ndang tarbahen hami manggulang batu, langkop ni sumur i laho pasoburhon birubiru i.

⁹Mangkatai dope ibana dohot nasida, nunga ro si Rahel mangadu birubiru ni amana i, ai ibana do parmahan.

¹⁰Alai dung diida si Jakkob si Rahel i, boru ni si Laban, iboto ni inana i, ro di birubiru ni si Laban, tulangna i, dipajonok si Jakkob ma,

jala digulang batu, langkop ni sumur i, dung i dipasobur birubiru ni tulangna i.

¹¹ Dung i diumma si Jakkob ma si Rahel i, jala dipangiar soarana tumatangis.

¹² Dung i dipaboa si Jakkob tu si Rahel, bere ni amana i ibana, anak ni si Rebekka. Jadi marlojong ma si Rahel paboahon tu amana.

¹³ Asa dung dibege si Laban barita ni si Jakkob, anak ni ibotona i, marlojong ma ibana manomunomu, dihaol ma ibana jala diumma, dung i ditogihon ibana tu jabuna. Jadi dipajojor si Jakkob ma tu si Laban sude angka hata ondeng.

¹⁴ Dung i ninna si Laban ma mandok ibana: Antong holiholingu jala sibukku do ho hape! Jadi disi ma ibana arga sabulan lelengna.

¹⁵ (II.) Dung i ninna si Laban ma mandok si Jakkob: Tung sibasabasam ma mangula di ahu, ala dung berengku ho? Paboa ma di ahu manang aha upam!

¹⁶ Alai dua do boru ni si Laban, goar ni sihahaan si Lea, goar ni sianggian si Rahel.

¹⁷ Alai odapon do mata ni si Lea, uli do anggo bohi dohot rupa ni si Rahel i.

¹⁸ Jadi solo ma roha ni si Jakkob mida si Rahel i, didok ma: Hupangulahon pe ho pitu taon on mambuat si Rahel, borum siampudan i.

¹⁹ Jadi ninna si Laban ma: Tagonan tu ho ibana hulehon, asa tu halak na asing, inganhon ma ahu.

²⁰Asa mangula ma si Jakkob pitu taon mambuat si Rahel, jala sobokkon pitu ari do i di rohana, dibahen holong ni rohana mida ibana.

²¹(III.) Dung i ninna si Jakkob ma mandok si Laban: Lehon ma tu ahu jolmangki, ai nunga jumpang padanta i, asa hutopot ibana.

²²Jadi dipapungu si Laban ma sude isi ni huta i mangalehon mangan.

²³Alai dung bodari, dibuat ma boruna si Lea, jala diboan tu si Jakkob, gabe i ma ditopot.

²⁴Dung i dilehon si Laban ma tu ibana si Zilpa, naposona boruboru bahen rading ni si Lea boruna i.

²⁵Alai manogotna i, ida ma, si Lea do hape, jadi ninna si Jakkob mandok si Laban: Boasa tung songon i bahenonmu tu ahu? Nda si Rahel do na hubuat umbahen hupangulahon ho, boasa tung paotootoonmu ahu?

²⁶Jadi ninna si Laban ma: Ndang songon i hasomalan di luatnami on, tung jumolo pamulihon sianggian sian sihahaan.

²⁷Jabuhon maon pitu borngin on, asa hulehon di ho dohot sianggian i, molo dipangulahon ho ahu pitu taonnari.

²⁸Jadi dibahen si Jakkob ma songon i, dijabuhon ma pitu borngin. Dung i dilehon si Laban ma tu ibana boruna si Rahel i, bahen jolmana.

²⁹Dung i dilehon si Laban ma tu si Rahel, boruna i, si Bilha, naposona i, bahen radingna.

³⁰Dung i ditopot si Jakkob ma dohot si Rahel, jala humolong rohana di si Rahel, asa di si Lea, jala dipangulahon si Laban pitu taonnari.

³¹(IV.) Alai dung diida Jahowa, tung na so hahua si Lea i, marhangoluan ma ibana dibahen, alai na hol do anggo si Rahel i.

³²Jadi gabegabean ma si Lea, ditubuhon ma anak sada, dibahen ma goarna si Ruben; ai ninna do: Ala nunga ditatap Jahowa dangolhi, ai holong ma nuaeng roha ni sinondukki di ahu.

³³Dung i tumagam haroan muse ibana, jala ditubuhon anak sada, jala ninna: Ala naung ditangihon Jahowa, tung na so hahua ahu, dibahen jadi dilehon tu ahu dohot Anak on, gabe dibahen ma goarna si Simeon.

³⁴Dung i tumagam haroan muse ibana, jala ditubuhon anak sada, ninna ma: Bali tu ahu ma nuaeng sinondukki, ai nunga tolu anakna hutubuhon; ala ni dibahen ma goarna si Lepi.

³⁵Dung i tumagam haroan muse ibana, jala ditubuhon anak sada, gabe ninna ma: Pujionku ma Jahowa anggo sahali on; ala ni dibahen ma goarna si Juda (sipujion); dung i mansohot ma ibana mangintubu.

30¹(I.) Alai dung diida si Rahel, na so tubuan anak ibana di si Jakkob, mangiburu ma ibana di hahana i, didok ma tu si Jakkob: Patupa anak di ahu, molo so adong, mate ma ahu.

²Jadi tarrimas ma si Jakkob mida si Rahel i, ai ahu do huroha singkat ni Debata, nda ibana do tumiop parbue ni bortianmi?

³Alai ninna si Rahel ma, ida ma, ndi radingku si Bilha, ibana ma topot, asa ditubuhon tu ampuanku, gabe maruli dohot ahu marhite sian ibana.

⁴Jadi dilehon ma tu ibana si Bilha, radingna i, bahenjolmana, gabe ditopot si Jakkob ma.

⁵Jadi gabegabebean ma si Bilha, jala ditubuhon anak sada di si Jakkob.

⁶Dung i ninna si Rahel ma nunga dapotan uhum ahu dibahen Debata, ditangihon dohot soarangki, jala dilehon di ahu anak sada; ala ni dibahen ma goarna si Dan.

⁷Dung i tumagam haroan muse si Bilha, rading ni si Rahel i, jala ditubuhon anak paduahon di si Jakkob.

⁸Jadi ninna si Rahel ma: Angka parsirangguton ni Debata huparsirangguthon dohot dahahang i, gabe monang ahu, jadi dibahen ma goarna si Naptali.

⁹Jadi dung diida si Lea, naung mansohot ibana mangintubu, dibuat ma si Zilpa radingna i, mangalehon ibana tu si Jakkob bahenjolmana.

¹⁰Asa ditubuhon si Zilpa, rading ni si Lea i anak sada di si Jakkob.

¹¹Dung i ninna si Lea ma: Nunga ro tua i, jadi dibahen ma goarna si Gad.

¹²Dung i ditubuhon si Zilpa, rading ni si Lea i anak paduahon di si Jakkob.

¹³Jadi ninna si Lea ma: Tuangki antong! Ai parhatuaon ni angka boruboru i ma ahu, jadi dibahen ma goarna si Aser.

¹⁴Dung i di na masa gotilon laho ma si Ruben tu balian, gabe jumpangsa ma angka dudaim (bahen dorma) di tonga ni hauma, jala diboan tu si Lea inana i. Dung i ninna si Rahel ma mandok si Lea: Ua lehon ahu deba sian angka dudaim ni anakmu.

¹⁵Jadi ninna si Lea ma mandok ibana: Na hurang dope huroha di roham binuatmi roha ni sinondukki, dohot do angka dudaim ni anakki naeng buatonmu? Jadi ninna si Rahel ma: Antong di lambungmu ma ibana modom saborngin on ali ni angka dudaim ni anakmi.

¹⁶Jadi dung muli si Jakkob sian hauma bodarina i, ditomutomu si Lea ma ibana, ninna ma: Tu ahu do ho ro, ai nunga hutuhor ho ali ni angka dudaim ni anakki. Jadi rap modom nasida di na saborngin i.

¹⁷Dung i ditangihon Debata ma si Lea, gabegabean ma ibana, jala ditubuhon anak palimahon di si Jakkob i.

¹⁸Jadi ninna si Lea ma: Nunga dilehon Debata upangku, ala na hulehon i radingku tu sinondukki, jadi dibahen ma goarna si Isasar.

¹⁹Dung i tumagam haroan muse si Lea i, jala ditubuhon anak paonomhon di si Jakkob.

²⁰Jadi ninna si Lea ma: Silua na denggan disiluahon Debata tu ahu. Inganhonon ni sinondukku ma ahu sahali on, ai nunga hutubuhon di ibana onom anak, jadi dibahen ma goarna si Zebulon.

²¹Dung i ditubuhon ma boru sada, jala dibahen goarna si Dina.

²²(II.) Alai diingot Debata muse si Rahel, jala ditangihon pangidoanna, dibungka ma bortianna i.

²³Jadi tumagam haroan ibana, jala ditubuhon anak sada, ninna ma: Nunga didaek Debata haurahonku.

²⁴Jadi dibahen ma goarna si Josep, ninna ma: Sai ditambahi Jahowa ma tu ahu anak sada nari!

²⁵(III.) Jadi dung ditubuhon si Rahel si Josep i, ninna si Jakkob ma mandok si Laban: Paborhat ma ahu, asa laho ahu tumopot ingananku dohot tanongku.

²⁶Lehon ma angka jolmangki dohot angka tubungku, angka na husamothon sian hamu, asa laho ahu, ai diboto hamu do parulangku, na hupangulahon i hamu.

²⁷Jadi ninna si Laban ma mandok ibana: Sai maruli ma ahu mangido asi ni roham! Ai patar do ditanda rohangku naung dipasupasu Jahowa ahu ala ho.

²⁸Bohoi tu ahu upam silehononku, ninna.

²⁹Dung i didok si Jakkob ma mandok ibana: Hamu pe, diboto hamu do parulangku di

hamu dohot panjadi ni pinahanmuna saleleng ahu patureturehon.

³⁰Ai otik do adong di hamu, tagan so ro ahu, nunga manjarar gabe deak, jala dipasupasu Jahowa hamu marhite sian ahu. On pe, sadihari pe pangulahononku dohot isi ni bagashi?

³¹Jadi ninna si Laban ma: Antong aha ma lehononku tu ho? Dung i ninna si Jakkob ma: Ndang manang aha lehononmu di ahu, molo dipatupa hamu hatangkon tu ahu, ulahanku ma marmahan pinahanmuna i.

³²Bolusonku ma sadari on sude pungan ni birubirumuna, ba papulik hamu ma sian i sude pinahan na marrintik dohot siganding, ro di sude na birong sian angka anak ni birubiru i; na marrintik dohot sibolang sian angka hambing pe, i ma gabe upangku.

³³Asa hatigoranki tumindangi ahu sogot, molo ro hamu tumingkir upangki: Sude na so marrintik, jala na so sibolang sian angka hambing i, jala na so birong sian angka anak ni birubiru i, na tinangko ma i molo di ahu.

³⁴Jadi ninna si Laban ma: Antong songon na nidokmi ma tutu!

³⁵Dung i dipapulik ma di na sadari i hambing tunggal angka na marrintik dohot angka sibolang, ro di sude hambing boruboru angka na marrintik dohot angka sibolang, sude angka na marsoar na bontar dohot sude na

birong sian angka birubiru i, dung i dipasahat ma tu tangan ni angka anakna i.

³⁶Dung i dibahen si Laban ma partoluarian holangkolangna dohot si Jakkob. Asa diparmahan si Jakkob ma punguan birubiru ni si Laban angka na tading i.

³⁷Alai dibuat si Jakkob ma dangka ni hau meang dohot anturmangan dohot andulpak, jala dilangkati margollotgollot.

³⁸Dung i dipampeakkon ma dangka angka na nilangkatanna i tu parsoburan ni angka birubiru i, asa dipaadopadop, asa marbaringin nasida di na marsobur i.

³⁹Jadi marlambe ma angka birubiru maradophon angka dangka i, gabe ditubuhon ma na marrintik angka sibolang dohot siganding.

⁴⁰Dung i dipapulik si Jakkob ma angka anak ni birubiru i, jala didompakkon angka birubiru i tu na marrintik dohot na birong sian pinahan ni si Laban. Dung i pulik ma dibahen inganan ni pinahanna i, ndang be saor dibahen tu pinahan ni si Laban.

⁴¹Alai molo rumogon birubiru, angka na umbolon i, dipampeakkon si Jakkob ma muse angka dangka i tu angka parsoburan i, gabe dipaadopadop laho marjantan.

⁴²Alai molo ro birubiru, angka na marpengpeng, ndang dibahen. Jadi di si Laban ma angka na marpengpeng i, alai angka na bolon i di si Jakkob do.

⁴³Jadi mamora bulung ma si Jakkob, torop ma angka birubiruna dohot naposona boruboru dohot baoa, angka unto dohot halode.

31 ¹(I.) Dung i tarbortik ma tu si Jakkob hatahata ni angka anak ni si Laban, angka na mandok: Nunga diahuti si Jakkob sinamot ni amanta sasudena, jala marharoroan sian na di amanta i do hamoraonna on sudena.

²Bohi ni si Laban pe, ndang songon na sai laon be dampak ibana, diida si Jakkob.

³Dung i ninna Jahowa ma mandok si Jakkob: Mulak ma ho tu tano ni angka ompum, tu tano hagodanganmu, hudongani pe ho.

⁴Jadi disuru si Jakkob ma manjou si Rahel dohot si Lea tu panjampalan pungan ni birubiruna i.

⁵Jala didok ma mandok nasida: Nunga huida bohi ni amanta i, ndang be songon na sai laon dampak ahu; alai didongani Debata ni damang i do ahu.

⁶Jala diboto hamu do, nasa gogongku hubahen mangulahon amanta i.

⁷Alai sai dipaotooto amanta i do ahu, jala sampulu hali diuba upangki; alai ndang diloas Debata ibana mangago ahu.

⁸Molo didok ibana songon on: Angka na marrintik ma upam, jadi angka na marrintik i dipantubuhon sude birubiru i. Alai molo didok

songon on: Angka sibolang i ma upam, jadi angka sibolang dipantubuhon, sude birubiru i.

⁹Asa Debata do mangarampas sinamot ni amanta i, jala dilehon tu ahu.

¹⁰Ai huida do di bagasan nippingku, di tingki harorongom ni angka pinahan i, angka tunggal na marrintik dohot sibolang dohot siganding mangangkati angka birubiru i.

¹¹Jadi didok surusuruan ni Debata ma mandok ahu di bagasan nippingku: Jo Jakkob! Dison do ahu, ningku.

¹²Dung i ninna ibana ma: Ua pameong jolo matam jala ida, angka na marrintik, jala sibolang, jala siganding sude birubiru tunggal angka na mangangkati angka birubiru boruboru, ai nunga huida sude na binahen ni si Laban i tu ho.

¹³Ahu do Debata uju na di Betel i, uju na miniahanmu disi partinandaan i, jala dibagabaga i ho Ahu. On pe, borhat ma ho, bungkas sian tano on, jala mulak tu tano hagodanganmi.

¹⁴Dung i ninna si Rahel dohot si Lea ma mangalusi ibana: Apala adong be tagamon jambar, manang ugasan siteanonnam i di jabu ni amanta i.

¹⁵Nda sobokkon halak na pulik marga na ma hami di rohana? Ai digadis do hami, jala nunga sun dipangan dohot tuhornami.

¹⁶Ai nasa hamoraon na nirampas ni Debata sian amanta i, hita dohot anakta i hian

do nampunasa. On pe, bahen ma sude na tinonahon ni Debata tu ho.

¹⁷Jadi hehe ma si Jakkob, dipahundul ma angka anakna dohot jolmana tu angka unto.

¹⁸Diboan ma dohot pinahanna luhut ro di nasa ugasanna, na niomona i, pinahan hapunjunganna pe, na sinamotsamotna i di Padang-Aram laho tumopot si Isak, amana i tu tano Kanaan.

¹⁹Alai laho manggustingi imput ni birubiruna i anggo si Laban, jadi ditangko si Rahel ma angka terapim (Debata hidup) ni amana i.

²⁰Asa dipalungun si Jakkob ma roha ni si Laban, halak Ram i, ala so dipaboa tu ibana na laho lintun i ibana.

²¹Asa lintun ma si Jakkob, diboaan dohot sude na di ibana i, borhat ma ibana laho manaripari batang aek i, dung i ditondong ma dompak dolok Gilead.

²²(II.) Patolubornginhon adong ma na mamaritahon tu si Laban naung lintun i si Jakkob.

²³Jadi diarahon si Laban ma angka hahaanggina i mangeahi ibana, parpituarian pe, asa dapotsa ibana di dolok Gilead.

²⁴Alai ro ma Debata bornginna i paipihon tu si Laban, halak Ram i, ninna ma mandok ibana: Jaga ho! So tung ditongkari ho si Jakkob i.

²⁵Asa dapot si Laban ma si Jakkob i, ai dipagohon si Jakkob do undungundungna

di dolok i; si Laban pe dipagohon do undungundungna di dolok Gilead rap dohot angka hahaanggina i.

²⁶Dung i ninna si Laban ma mandok si Jakkob: Dia do na binahenmi? Tole dipalungun ho rohangki, tole diboan ho angka borungku, hira tabantaban do nasida na dapot podang?

²⁷Boasa tung marsibuni ho laho lintun, so martinading hata ho tu ahu, asa hupataru ho nian, hugondanggondangi hamu nian, paboa godang ni rohangku.

²⁸So manang diloas ho ahu mangumma angka pahompungku dohot angka borungku; asa na oto do pambahenmi.

²⁹Tuk do nian gogo ni tanganku mambahen uhum na roa tu hamu; alai na ro do na borngin nantuari hata ni Debata ni amamuna tu ahu, ninna do: Jaga ho! So tung ditongkari ho si Jakkob i.

³⁰On pe, ia na naeng laho ho ala na malungun ho di bagas ni amamu, boasa ma tung tangkoonmu angka debatanku?

³¹Dung i ninna si Jakkob ma mangalusi si Laban: Dibahen na mabiar do ahu, ai ninna rohangku do: Atek tung rampasonmu maon angka borumi sian ahu.

³²Alai molo tung jumpang ho angka debatami, di manang ise, marutang hosa ma ibana; asa sungkapi hamu ma di jolo ni angka donganta on; molo adong manang aha ugasanmu di ahu, buat di ho. Alai ndang

pamotoan ni si Jakkob na tinangko ni si Rahel do i hape.

³³Jadi dibongoti si Laban ma undungundung ni si Jakkob dohot undungundung ni si Lea dohot undungundung ni rading na dua i, alai ndang adong jumpangsa. Dung i ruar ma ibana sian undungundung ni si Lea mambongoti undungundung ni si Rahel.

³⁴Alai nunga dibuat si Rahel hian angka terapim i, jala dibahen tu toru ni palano ni unto, asa dihunduli. Jadi disungkapi si Laban ma undungundung i luhutna, hape ndang adong jumpangsa.

³⁵Jadi ninna si Rahel ma tu amana i: Unang tung tarrimas roha ni tuanku, ala so tarbahen ahu hehe maradophon ho, ai masa do di ahu hasomalan ni boruboru. Asa didiori pe, laos so jumpangsa angka terapim i.

³⁶Jadi tarrimas ma si Jakkob, dibadai ma si Laban i, ninna si Jakkob ma mangalusi si Laban i: Aha ma pangalaosingku, aha ma dosangu umbahen piription hamu mangeahi ahu?

³⁷Nunga disungkapi hami ugasanku saluhutna, aha ma jumpang hamu sian nasa ugasan ni jabum? Peakkon ma tu jolo ni angka donganki dohot donganmi, asa diuhumi nasida hita na dua.

³⁸Nunga pola duapulu taon, sai di lambungmu do ahu, ndang dung tarposo birubirumu, manang hambingmu, jala

ndang dung hupangan hambing tunggal ni birubirumuna.

³⁹Nandang dung hutaruhon tu ho na sinoro ni binatang sai hualii do i; sai dipangido ho do sian ahu na tinangko ni halak nang arian nang borngin.

⁴⁰Ia arian las ni ari manganhon ahu, ia borngin ngali ni ari do, jala ndang tarnono matanku.

⁴¹Na duapulu taon on sai di jabum do ahu mangulahon hamu, sampulu opat taon mangomo borum na dua i, jala onom taon mangomo angka pinahanmu; alai sampulu hali dipauba hamu upangki.

⁴²Aut unang didongani Debata ni damang i ahu, Debata ni si Abraham, jala na hinabiaran ni si Isak, ra tung palahoonmu boti ahu; alai ditatap Debata do pardangolanki dohot halojaon ni tanganku, gabe dipinsang hamu na borngin nantuari.

⁴³(III.) Jadi ninna si Laban ma mangalusi si Jakkob: Borungku do angka boruboru i, jala anakku do angka anak i, jala pinahanku angka pinahan i, jala sude na niidam, ahu nampunasa; asa hahuaonku ma sadari on angka borungkon, manang anaknasida, angka na tinubuhonnasida i.

⁴⁴On pe, tole tabahen ma padan, ahu dohot ho, i ma sitindanginta sogot.

⁴⁵Jadi dibuat si Jakkob ma sada batu, jala dipajongjong bahen partinandaan.

⁴⁶Dung i ninna si Jakkob ma mandok angka donganna i: Papungu hamu ma angka batu. Jadi dipambuat nasida ma angka batu mambahen panggupunggu, laos mangan nasida disi di atas panggupunggu i.

⁴⁷Dung i dibahen si Laban ma goarna: Jegar-Sahaduta; alai Galed goarna dibahen si Jakkob.

⁴⁸Dung i ninna si Laban ma: Punggupunggu on ma sitindanginta sadari on, ala ni do umbahen margoar Galed;

⁴⁹Dohot Mispa, ai ninna do: Sai ditatap Jahowa ma hita, ia dung sirang hita!

⁵⁰Molo diarsahi ho angka borungki, manang mambuat boru bahen imbang ni angka borungki, ndang adongjolma di lambungta, alai Debata do sitindanginta.

⁵¹Angkup ni didok si Laban mandok si Jakkob: Ida ma, panggupunggu on dohot partinandaan on na huojakkon i parbolatanta.

⁵²Punggupunggu on dohot partinandaan on sitindangi, paboa na so jadi laosanku panggupunggu on mandapothon ho, hamu pe, ndang jadi laosanmu panggupunggu on dohot partinandaan on mandapothon ahu laho mangago.

⁵³Debata ni si Abraham dohot Debata ni si Nahor, Debata ni amanasida pe manguhum hita. Jadi marbulan ma si Jakkob tu Na hinabiaran ni amana si Isak i.

⁵⁴Dung i dipelehon si Jakkob ma sada pelean di dolok i, dipio ma dohot angka donganna i mangan sagusagu. Jadi dung sun nasida mangan sagusagu, laos marborngin di dolok i nasida.

⁵⁵Torang ni arina i dipasogot si Laban ma hehe, jala diumma angka pahompuna dohot angka boruna i, jala dipasupasu nasida; dung i laho muli ma si Laban tu ingananna hian.

32¹(I.) Alai si Jakkob pe ditulus ma dalanna, jadi dijumpangkon angka surusuruan ni Debata ibana.

²Asa dung diida si Jakkob nasida, ninna ma: Parduan ni parangan ni Debata do on, jadi dibahen ma goar ni adian i Mahanaim.

³(II.) Dung i disuru si Jakkob ma angka suruanna jumolo manopot si Esau, hahana i, tu tano Seir, tu luat Edom.

⁴Ditonai ma nasida, ninna do: Songon on ma dok hamu tu rajangki. Si Esau i: Songon on do hata ni si Jakkob, naposomi: Na hinomit di lambung ni si Laban do ahu na sai laon rasirasa nuaeng.

⁵Jadi marlombu ahu, marhalode, marbirubiru, jala marnaposo baoa dohot boruboru, gabe husuru paboahon i tu rajangki, asa asi roham marnida ahu.

⁶Dung i mulak ma angka suruan i tu si Jakkob, angka didok ma: Nunga sahat hami tu haham, tu si Esau i, ibana pe, nunga ro

manjumpangkon ho, jala opat ratus halak donganna.

⁷Jadi mabiar situtu ma si Jakkob i, jala tahuton rohana, dibagi ma angka donganna i dohot angka birubiru i, angka lembu dohot angka halode mambahen dua parduan.

⁸Ai ninna rohana do: Molo pajumpang si Esau dohot parduan na sada, jala dibunu, gabe malua parduan na tading i.

⁹Dung i ninna si Jakkob ma: Iale Jahowa, Debata ni daompung si Abraham, dohot Debata ni damang si Isak! Didok Ho do mandok ahu: Mulak ma ho tu tano hatubuanmu, asa hutumpak ho.

¹⁰Mametmethu do ahu nian manjalo sude angka asi ni roham dohot sude hasintongan, angka na binahenmi tu naposomon. Ai mardongan tungkothon hutaripari batang aek Jordan on na jolo, ia nuaeng nunga gabe dua parduan ahu.

¹¹Sai palua ma ahu sian tangan ni dahahang, si Esau i, ai mabiar do ahu mida ibana, atek tung ro ibana maon mambunu ahu, ina i ro di angka dakdanak.

¹²Alai didok Ho do: Sai tumpahanku do ho jala sobokkon horsik ni laut bahenonku pinomparmu, angka na so habilangan dibahen hinadeakna.

¹³Laos marborngin disi do ibana sabornginna i; dung i dipambuat ma nasa na

dapot tanganna bahen sileanlean tu si Esau, hahana i:

¹⁴Dua ratus hambing boruboru, jala duapulu hambing tunggal, dua ratus birubiru boruboru, jala duapulu birubiru tunggal.

¹⁵Tolupulu unto panusuan rap dohot anakna, opatpulu lembu jala sampulu jonggi, duapulu halode boruboru rap dohot anakna sampulu.

¹⁶Dung i dipasahat ma tu tangan ni angka naposona, pulik be saparduan, jala didok ma mandok angka naposona i: Pajolo hamu ma taripar, jala marholangkolang bahen hamu saparduan.

¹⁷Dung i ditonai ma parjolo i, ninna: Molo pajumpang ho dohot dahahang si Esau i, jala disungkun ho, naposo ni ise do ho, jala tu dia ho laho, jala ise nampuna on angka na di jolomon?

¹⁸Dohononmu ma: Si Jakkob naposomi do nampunasa, silehonlehonna do i, tinongosna tu rajanku, si Esau i, jala ida, ihut dohot ibana di pudinami.

¹⁹Suang songon i ditonahon dohot tu na paduahon i dohot tu na patoluhon i dohot tu sude angka na mangadu angka parduan i, ninna ma: Hatangkon ondeng ma dok hamu tu si Esau, molo tung pajumpang hamu dohot ibana:

²⁰Ihut di pudinami dohot si Jakkob naposomi, i ma dok hamu! Ai ninna rohana do: Padengganonku do rohana marhitehite

silehonlehon, na niadu di jolongku, dung i pe asa idaonku bohina, anggiat mira bohina marnida ahu.

²¹ Jadi taripar ma silehonlehon i di jolona; marborngin di parsaroan ianggo ibana sabornginna i.

²² (III.) Dung i hehe ma ibana bornginna i, dipangarahon ma jolmana na dua i dohot naposona boruboru na dua i dohot anakna na sampulu sada i, laho manaripari hatariparan Jabok.

²³ Jadi ditogihon ma nasida patariparhon di batang aek i, dipataripar ma nasa na di ibana i.

²⁴ Tading ma holan si Jakkob, jadi ro ma sada halak marsiranggut dohot ibana ro di buha siang ari.

²⁵ Alai dung diida, ndang leak tunduksa si Jakkob, disoro ma soitna, jadi ngendul ma soit ni si Jakkob i dibahen parsiranggutonnasidai.

²⁶ Dung i ninna Ibana ma: Palua ma Ahu, ai nunga buha siang ari. Alai ninna si Jakkob ma: Nandang hupalua Ho, nda jolo dipasupasu Ho ahu.

²⁷ Dung i ninna Baoa i mandok Ibana: Ise do goarmu? Si Jakkob do, ninna.

²⁸ Jadi ninna Baoa i ma: Nandang be si Jakkob dohonon goarmu, si Israel na ma, ai dialo ho do Debata dohot jolma, jala monang ho do.

²⁹ Dung i manungkun ma si Jakkob, jala ninna: Ua paboa ma goarmu? Alai ninna Ibana

ma: Boasa ma tung sungkunsungkunanmu goarhu? Dung i dipasupasu ibana disi.

³⁰Jadi dibahen si Jakkob ma goar ni parsiranggutan i Peniel; ai nunga tangkas huida apala Bohi ni Debata, jala malua tondingki.

³¹Dung i di na sinalpuanna i Peniel i, binsar ma mata ni ari di ibana, hape mengkatengkat ibana dibahen soitna.

³²Ala ni do umbahen so dipangan halak Israel urat doldol rasirasa nuaeng, ala disoro pardomuan ni soit ni si Jakkob i.

33¹(I.) Dung i manatapnatap ma si Jakkob, jadi diida ma ro si Esau, jala opat ratus halak donganna sauduran. Jadi disagihon ma angka anakna tu si Lea dohot tu si Rahel dohot tu naposo boruboru na dua i.

²Tu jolo ma dibahen boruboru na dua i rap dohot anaknasida i, tu pudinasida i si Lea dohot anakkonna, parpudi sahali anggo si Rahel rap dohot si Josep.

³Dung i mardalan di jolonasida ma anggo ibana, jala dipatungkaptungkap ibana tu tano pitu hali, paima tolhas ibana tu hahana i.

⁴Dung i marlojong ma si Esau manjumpangkon ibana, dihaol ma rungkungna i, jala diumma ibana, jadi tangis be nasida.

⁵Dung i manaili ma si Esau, gabe diida ma angka ina i rap dohot angka dakdanak i, gabe didok ma: Ise do angka donganmu an? I ma

angka dakdanak, angka na niasihon ni Debata tu naposomon, ninna.

⁶Dung i jumonok ma naposo boruboru na dua i, nasida dohot angka anakkonnasida, manungkapnungkap ma nasida marsomba.

⁷Jumonok ma dohot si Lea rap dohot anakkonna i angka na marsomba be; dung i jumonok ma si Josep dohot si Rahel marsomba be.

⁸(II.) Dung i ninna si Esau ma: Tu aha bahenonmu sude pungan angka na jumpang ahu nangkin? Mangalap asi ni roha ni rajangku do i tu ahu, ninna.

⁹Alai ninna si Esau ma: Godang do anggo i di ahu, ale anggia, di ho ma na di ho hian.

¹⁰Dung i ninna si Jakkob ma: Ndangana, molo sapala asi roham mida ahu, sai jalo ma silehonlehonki sian tanganku; ai songon na marnida bohi ni Debata do ahu, na marnida bohim ahu, jala sorta ho tu ahu.

¹¹Sai jalo ma pasupasungku, na binoan i tu ho, ai asi do roha ni Debata di ahu, jala singkop do sude di ahu. Jadi dung sai dielehelekkon tu ibana, gabe dijalo ma.

¹²Dung i didok si Esau ma: Beta ma hita mardalan, ahu pe di jolom.

¹³Alai ninna si Jakkob ma mandok ibana: Diboto rajangku do, mardongan posoposo dohot birubiru dohot lembu angka panusuan ahu, molo mahudushu binahen, nanggo sadari, angka mate ma sude pinahan i.

¹⁴Sai jumolo ma rajangku mardalan Sian naposona on; ianggo ahu, hupanangetnanget pe marguru tu pangalangka ni pinahan angka na di jolongki dohot marguru tu langka ni angka dakdanak i, paima tolhas ahu tu Seir tumopot rajangki.

¹⁵Jadi ninna si Esau ma: Beha ia hutadingkon deba sian angka dongankon bahen donganmu? Alai ninna si Jakkob ma: Tu aha ma i pola? Asal jumpangan asi ni roha ahu, ale rajanami.

¹⁶Jadi mulak ma si Esau di na sadari i tu Seir.

¹⁷(III.) Alai anggo si Jakkob borhat laho tu Sukot, dipauli ma jabuna sada, jala dibahen angka bara ni pinahanna, ala ni do umbahen margoar Sukot adian i.

¹⁸Jadi tolhas ma si Jakkob mardamedame tu huta Sikem, na di tano Kanaan, di na ro i ibana sian Padang-Aram, di adopan ni huta i ibana marsaro.

¹⁹Dung i dituhor ma hauma santurpuk, hajongjongan ni undungundungna i, sian angka anak ni si Hemor, ama ni si Sikem mararga saratus rupia.

²⁰Dung i dipajongjong disi langgatan sada, dibahen ma goarna: Di Debata ni halak Israel na gogo i.

34¹(I.) Alai laho ma ianggo si Dina, boru ni si Lea, na tinubuhonna di si Jakkob, martandang tu angka boru, isi ni banua i.

²Jadi diida si Sikem, anak ni si Hemor, marga Hevi, raja ni luat i ibana, jala digogoi.

³Solo situtu rohana di si Dina, boru ni si Jakkob i, jala lomo rohana mida boruboru na bajar i, gabe didok ma hatana mambuat roha ni boruboru na bajar i.

⁴Dung i ninna si Sikem na mandok si Hemor, amana i: Sai buat ma di ahu namarbaju on bahen jolmangku.

⁵Dung i tarbortik ma tu si Jakkob, naung pinarotakrotak ni si Sikem si Dina, boruna i, jala di ladang angka anakna i marmahan pinahanna, jadi sip ma si Jakkob, paima ro nasida.

⁶Dung i ruar ma si Hemor, ama ni si Sikem i tumopot si Jakkob, naeng mangkatai dohot ibana.

⁷Ro ma dohot angka anak ni si Jakkob sian ladang. Jadi marsak jala tarrimas situtu angka baa i, dung dibege nasida barita ni haurahon, binahen ni si Sikem tu Israel, naung pinarotakrotakna i boru ni si Jakkob, tung na so jadi do bahenon songon i.

⁸Dung i mangkatai ma si Hemor dohot nasida, ninna ma: Solo do roha ni anakku, si Sikem di borumuna i; ua lehon hamu nasida tu ibana bahen jolmana!

⁹Martondong ma hita: Lehon hamu borumuna di hami, borunami pe buat hamu di hamu.

¹⁰Di lambungnami on ma hamu maringanan; guru di hamu ma tano na di jolomuna i; ingani jala liati hamu marboniaga mambuat laba di hamu.

¹¹Dung i didok si Sikem ma mandok ama ni si Dina dohot tu angka ibotona i: Sai asi ma rohamuna di ahu hulehon pe gurudokmuna.

¹²Gumodang pe pangido hamu tuhorna dohot silehonlehon, sai na lehononku do, gurudokmuna i, asal dilehon hamu boru i tu ahu bahen jolmangku.

¹³(II.) Jadi tanding ma dibahen angka anak ni si Jakkob mangalusi si Sikem dohot si Hemor amana i, ala na pinarotakrotakna i si Dina, ibotonasida i.

¹⁴Didok nasida ma mandok ibana: Ndang haoloan hami hata i, mangalehon ibotonami tu halak na marhulup, ai haurahon do i di hami.

¹⁵Alai huoloi hami pe hamu, molo olo hamu sunaton nasa baa di hamu, songon hami.

¹⁶Hulehon hami pe borunami tu hamu, hubuat hami pe dohot borumuna di hami, gabe tampak ingananta, jala sada bangso hita.

¹⁷Alai molo so diunduk hamu hatanami, mangoloi sunaton, buatonnami ma borunami, dung i bungkas hami.

¹⁸Jadi lomo ma roha ni si Hemor dohot si Sikem, anakna i umbege hatanasida i.

¹⁹Ndang pola marpaimaan dolidoli i patupahon hata i, ai solo do rohana di boru ni si Jakkob, jala ibana na sumangap sian sude pinompar ni amana.

²⁰Jadi ditopot si Hemor dohot si Sikem anakna i partungkoan ni hutanasida i, asa marhata dohot angka baoa, isi ni hutanasida i, ninna ma:

²¹Naeng maraleale angka halak on dohot hita italoas ma nasida mangingani tano on, asa diliati marboniaga, ai lambas do tano i di jolonasida humaliang; tabuat pe borunasida bahen jolmanta, talehon dohot borunta di nasida.

²²Alai ingkon marsunat hita nasa baoa, songon nasida angka na tarsunat be, asa olo nasida maringan di lambungta on, jala sada bangso dohot hita.

²³Nda guru di hita ma pinahan dohot sude sinamotnasida i? Antong sai itaoloi ma pinangido ni rohanasida i, asa maringan nasida di lambungta on.

²⁴Jadi diunduk nasida ma hata ni si Hemor dohot si Sikem, anakna i, sude nasida angka na marmeang muli sian bahal ni hutana i; marsunat ma sude baoa, isi ni huta i.

²⁵Dung i patoluarihon, di na bernit i diae nasida, masiboan podangna ma na dua anak ni si Jakkob, si Simeon dohot si Lepi, iboto ni si Dina i, dirampok ma huta i na so pangiriman, jala dibunui nasa baoa.

²⁶Dibunu ma dohot si Hemor dohot si Sikem, anakna i, ditampuli dohot podang, dung i diboan ma si Dina sian bagas ni si Sikem, jadi laho nasida.

²⁷Dung i ditahopi angka anak ni si Jakkob ma angka na tartihami, jala ditaban duduk huta i, ala na pinarotakrotakna i ibotonasida i.

²⁸Didaek ma angka birubiru dohot lembu dohot halodenasida i ro di sude na di bagasan huta dohot na di balian.

²⁹Ro di sude ugasannasida dohot sude posoposo, tolejolmanasida diboan, jala dipupusi nasa ugasan na di bagasan jabu.

³⁰Dung i didok si Jakkob ma mandok si Simeon dohot si Lepi: Dilitohi hamu ma antong parnidaanku pabauhon baritangku tu isi ni tano on, tu halak Kanaan dohot Perisi, so manang piga bilanganta; molo marhara nasida di donganna mangalo hita, gabe bunuonna ma ahu, jadi ripur ahu dohot na hupompar.

³¹Alai ninna nasida ma: Tung tama ma doshon sibabijalang ibotonami bahenonna?

35¹(I.) Dung i ninna Debata ma mandok si Jakkob: Borhat ma ho laho nangkok tu Betel, ingani ma disi, jala pauli disi sada langgatan di Debata, na niidam, di na maporus i ho maradophon si Esau, hahami.

²Jadi didok si Jakkob ma mandok donganna sabagas dohot tu sude donganna i: Pambolongkon hamu ma debata sileban,

angka na pineopmuna i, manguras ma hamu jala salini hamu ulosmuna i.

³Beta ma hita nangkok tu Betel, asa hupauli disi sada langgatan di Debata, na mangalusi ahu di ari hagogotanki, jala didongani ahu di dalan na hudalani i.

⁴Jadi diparlehon be ma tu si Jakkob sude debata sileban, angka na di tangannasida i, ro di antinganting angka na di pinggolnasida i, dung i ditabunihon si Jakkob ma i tu toru ni hau ara na di lambung ni Sikem.

⁵Dung i borhat ma nasida, ditahuti Debata ma angka huta na humaliang nasida i, asa unang dilele angka anak ni si Jakkob.

⁶Jadi tolhas ma si Jakkob tu huta Lus na di tano Kanaan i, i ma Betel i, ibana dohot sude donganna sauduran.

⁷Dung i dipauli ma disi langgatan sada, dibahen ma goar ni hajongjonganna: Elbetel, ala na niidana i disi Debata, di na maporus i ibana maradophon hahana i.

⁸Dung i mate ma si Debora panarusan ni si Rebekka na jolo; jadi ditanom ma ibana di toru ni hariara, tungkan dangsina ni Betel, gabe dibahen ma goarna; hariara Bahut (parandungan).

⁹(II.) Dung i diulahi Debata pataridahon Ibana tu si Jakkob, dung ro ibana sian Padang-Aram, jala dipasupasu ibana.

¹⁰Jadi didok Debata ma mandok ibana: Si Jakkob do goarmu, alai ndang be si Jakkob, si

Israel na ma dohonon goarmu. Jadi margoar si Israel na ma ibana.

¹¹ Dung i ninna Debata ma mandok ibana: Ahu do Debata, pargogo na so hatudosan! Gabe ma ho jala matorop mabue; bangso sada, jala parluhutan ni angka bangso marharoroan sian ho, jala angka raja ruar sian gontingmu.

¹² Jala tano naung hulehon tu si Abraham dohot tu si Isak, lehononku ma tu ho dohot tu pinomparmu sogot lehononku tano i.

¹³ Dung i manaek ma Debata sian lambungna, sian inganan pangkataianna i dohot si Jakkob.

¹⁴ Jadi dipajongjong si Jakkob ma sada partinandaan sian batu di inganan pangkataianna i dohot Debata, diusehon ma tu atasna pelean siinumon, diusehon dohot miak tu ginjangna.

¹⁵ Dung i dibahen si Jakkob ma goar ni inganan pangkataianna i dohot Debata, Betel.

¹⁶ (III.) Dung i borhat ma nasida sian Betel, adong dope arga sangombasnari mardalan asa sahat tu Eprata, mangintubu ma disi si Rahel, mansai maol ibana mangintubu.

¹⁷ Jadi di na maol i ibana mangintubu, ninna sibaso i ma mandok ibana: Unang ho mabiar, ai sai gomgomonmu do nang anakmon.

¹⁸ Alai di na laho tos hosana, ai mate do ibana, dibahen ma goarna Benoni; alai anggo amana manggoar ibana si Benjamin.

¹⁹Asa mate ma si Rahel, jala tartanom di dalan laho tu Eprata, i ma Betlehem.

²⁰Dung i dipajongjong si Jakkob ma partinandaan sada di atas tanomanna i. I ma partinandaan di tanoman ni si Rahel rasirasa nuaeng.

²¹(IV.) Dung i borhat ma si Israel, jala dipahembang undungundungna i di bariba ni Migdol-Eder.

²²Jadi dung diingani si Israel tano i, laho ma si Ruben marjolmahon si Bilha,jolma ni amana i, jala tarbortik do i tu si Israel. Alai sampulu dua do anak ni si Jakkob.

²³Ia anak ni si Lea: Si Ruben, buhabaju ni Jakkob, si Simeon, si Lepi, si Juda, si Isasar dohot si Zebulon.

²⁴Ia anak ni si Rahel: Si Josep dohot si Benjamin.

²⁵Ia anak ni si Bilha, rading ni si Rahel: Si Dan dohot si Naptali.

²⁶Ia anak ni si Zilpa, rading ni si Lea: Si Gad dohot si Aser. I ma anak ni si Jakkob, angka na tubu di ibana di Padang-Aram.

²⁷(V.) Dung i sahat ma si Jakkob tu si Isak, amana i, tu Mamre, tu Kiryat-Arba, i ma Hebron, paisolatan ni si Abraham dohot si Isak.

²⁸Ia umur ni si Isak saratus ualupulu taon do.

²⁹Dung i tos ma hosa ni si Isak, jala mate ibana saur matua, jala mahap di hangoluan

on, gabe dipapungu ma ibana tu angka ompuna jala ditanom si Esau dohot si Jakkob, angka anakna i, ibana.

36¹ (I.) On ma angka pinompar ni si Esau, i ma si Edom.

² Dibuat si Esau ma angka jolmana sian boru Kanaan: Si Ada, boru ni si Elon, marga Het dohot si Aholibama, boru ni si Ana, pahompu ni si Zibeon, marga Hevi.

³ Dohot si Basemat, boru ni si Ismael, iboto ni si Nabaiot.

⁴ Dung i ditubuhon si Ada ma di si Esau si Elipas, ia si Basemat manubuhon si Reguel.

⁵ Ditubuhon si Aholibama ma si Jehus, si Jalam dohot si Kora. I ma anak ni si Esau, angka na tubu di ibana di tano Kanaan.

⁶ Dung i diboan si Esau ma angka jolmana, angka anakna dohot angka boruna dohot sude isi ni bagasna i ro di sude ugasanna dohot pinahanna dohot sinamotna, angka na sinamotsamotna i di tano Kanaan, gabe bungkas ibana tu sada tano paholangkon sian si Jakkob anggina i.

⁷ Ai magodangku do sinamotnasida i, ianggo tung tampak nasida maringan, jala ndang tarparmudu tano paisolatanna i nasida, dibahen hinadeak ni pinahannasida.

⁸ Jadi maringan di dolok Seir ia si Esau, i ma si Edom.

⁹ On ma angka pinompar ni si Esau, ompu ni halak Edom di dolok Seir.

¹⁰On ma goar ni angka anak ni si Esau: Elipas, anak ni si Ada, jolma ni si Esau; Reguel, anak ni si Basemat, jolma ni si Esau.

¹¹Ia angka anak ni si Elipas, on ma: Teman, Omar, Zepo, Gatam dohot si Kenas.

¹²Dohot do si Timna diparjolma si Elipas, anak ni si Esau i, gabe ditubuhon ma si Amalek di si Elipas. I ma angka anak ni si Ada, jolma ni si Esau.

¹³Alai angka anak ni si Reguel on do: Si Nahat, si Zerah, si Samma dohot si Missa. I ma angka anak ni si Basemat, jolma ni si Esau.

¹⁴Ia angka anak ni si Aholibama, boru ni si Ana, pahompu ni si Zibeon, jolma ni si Esau, angka na tinubuhonna di si Esau: Si Jehus, si Jalam dohot si Kora.

¹⁵On do angka induk sian angka anak ni si Esau. Sian angka anak ni si Elipas, buhabaju ni si Esau: Induk Teman, induk Omar, induk Zepo, induk Kenas.

¹⁶Induk Kora, induk Gatam, induk Amalek. I ma angka induk sian si Elipas di tano Edom, i ma angka anak ni si Ada.

¹⁷Jala on ma angka anak ni si Reguel, anak ni si Esau: Induk Nahat, induk Zerah, induk Samma, induk Missa. I ma angka induk sian si Reguel di tano Edom. I ma angka anak ni si Basemat, jolma ni si Esau.

¹⁸On ma angka anak ni si Aholibama, jolma ni si Esau: induk Jehus, induk Jalam, induk

Kora. I ma angka induk sian Aholibama, boru ni si Ana, jolma ni si Esau i.

¹⁹I ma angka anak ni si Esau, jala i ma angka induk nasida. Ibana ma Edom i.

²⁰(II.) On ma angka anak ni si Seir, marga Hori, angka isi ni tano i hian: Si Lotan, si Sobal, si Zibeon, si Ana.

²¹Si Dison, si Ezer dohot si Disan. I ma angka induk ni halak Hori, angka anak ni si Seir ni tano Edom.

²²Alai angka anak ni si Lotan, on do: Si Hori dohot si Heman; ia iboto ni si Lotan si Timna do.

²³Jala on do angka anak ni si Sobal: Alpan, Manahat, Ebal, Sepo dohot si Onam.

²⁴Ia angka anak ni si Zibeon, on do: Aia dohot Ana. I ma si Ana, na jumpangan angka mual aek rangat di halongonan, di na pinarmahanna i angka halode ni si Zibeon, amana i.

²⁵Jala on do angka anak ni si Ana: Si Dison dohot si Aholibama, boru ni si Ana.

²⁶Jala on do angka anak ni si Dison: Hemdan, Esban, Itran dohot Heran.

²⁷Ia angka anak ni si Ezer on do: Bilhan, Sapan dohot Akan.

²⁸Ia angka anak ni si Disan, on do: Us dohot Aran.

²⁹I ma angka induk ni halak Hori: Induk Lotan, induk Sobal, induk Zibeon, induk Ana.

³⁰Induk Dison, induk Ezer, induk Disan. I ma angka induk ni halak Hori, mangihuthon hainduhonnasida be di tano Seir.

³¹(III.) Jala on do angka raja, na mangarajai di tano Edom, tagan so adong dope raja na gumomgom halak Israel:

³²Si Bela, anak ni si Beor gumomgom Edom, ia goar ni hutana Dinhaba.

³³Jadi dung mate si Bela, bangkit raja singkatna si Jobab, anak ni si Zerah sian Bozra.

³⁴Jadi dung mate si Jobab, bangkit raja singkatna si Husam sian tano ni halak Teman i.

³⁵Jadi dung mate si Husam soluk ma mangarajai si Hadad, anak ni Bedad, na manaluhon halak Midian di ladang Midian ni halak Moab, ia goar ni hutana Apit.

³⁶Jadi dung mate si Hadad, soluk ma raja singkatna si Samla sian huta Masreka.

³⁷Jadi dung mate si Samla, soluk ma raja singkatna si Saul sian Rehobot, na martopihon batang aek i.

³⁸Jadi dung mate si Saul, soluk ma raja singkatna si Baal-Hanan, anak ni si Akbor.

³⁹Jadi dung mate si Baal-Hanan, anak ni si Akbor i, soluk ma raja singkatna si Hadad, ia goar ni hutana Pahu, ia goar ni jolmana Mehetabel, boru ni si Matret, tubu ni si Mezahap.

⁴⁰Jala on do goar ni angka induk sian si Esau mangihuthon sundutnasida dohot inganannasida dohot goarnasida: induk Timna, induk Alpa, induk Jete.

⁴¹Induk Aholibama, induk Ela, induk Pinon.

⁴²Induk Kenas, induk Teman, induk Mibzar.

⁴³Induk Magdiel, induk Iram. I ma angka induk ni halak Edom mangihuthon inganannasida di tano ginomgomnasida i. I ma si Esau ompu ni halak Edom.

37¹(I.) Alai anggo si Jakkob maringan di tano, paisolatan ni amana na jolo, di tano Kanaan i.

²On do angka jamita ni pinompar ni si Jakkob: Marumur sampulu pitu taon si Josep, asa paihutihut pinahan ibana rap dohot angka hahana i, sai dongan ni angka anak ni si Bilha dohot si Zilpa, angkajolma ni amana i dolidoli i, sai dipatolhas si Josep do baritanasida angka na roa tu amanasida i.

³Alai holongan do roha ni si Israel di si Josep, asa di angka anakna sasudena, ai dung pe matua ibana, asa ditubuhon, jala dibahen di ibana sada baju sampuborna na ganjang.

⁴Jadi dung diida angka hahana i, holongan do hape roha ni amanasida mida ibana, asa mida sude angka hahana i, jadi sogo rohanasida mida ibana, ndang apala basar be pangkulingnasida tu ibana.

⁵ (II.) Angkup ni marnipi ma si Josep, jala dipaboa nipina i tu angka hahana i; jadi lam ganda sogo ni rohanasida i mida ibana.

⁶ Ai didok si Josep do mandok nasida; ua tangihon hamu jolo nippingkon:

⁷ Huipi mangarahuti tibalán hita di tonga ni hauma, jadi hehe ma tibalanku, laos jongjong, jomba be do angka tibalánmuna humaliang marsomba tu tibalanku.

⁸ Jadi ninna angka hahana i mandok ibana: Tung ho ma bangkit rajanami di roham, mangarajai hami? Jadi lam tamba muse sogo ni rohanasida i mida ibana, ala ni nipina dohot ala ni hatana i.

⁹ Dung i diipi muse sada nipi na asing, ipe dipaboa do tu angka hahana i, ninna ma: Ida ma, huipi dope sada nipinari; ai ida ma, mata ni ari dohot bulan dohot bintang sampulu sada marsomba tu ahu.

¹⁰ Alai dung dipaboa nipina tu amana dohot tu angka hahana i, hona hata ma ibana dibahen amana, ninna ma mandok ibana: Nipi aha ma nipimi? Ingkon ro ahu dohot inam dohot angka haham, manungkap tu tano marsomba tu ho, di roham?

¹¹ Jadi hosom ma roha ni angka hahana i mida ibana; alai anggo amana i sai dipeop rohana do hata i.

¹² (III.) Dung i laho ma angka hahana i marmahan birubiru ni amanasida i di lambung Sikem.

¹³Jadi ninna si Israel ma tu si Josep: Nda di lambung ni Sikem do angka hahami marmahan? Ro ma ho, asa husuru ho manopot nasida. Jadi ninna si Josep ma: Dison do ahu.

¹⁴Dung i didok si Jakkob ma mandok ibana: Antong laho ma ho maningkir angka hahami manang na sonang nasida, sonang dohot angka pinahan i, dung i mulak ho mamboan barita i tu ahu. Jadi disuru si Jakkob ma ibana sian rura Hebron, asa ditopot tu Sikem.

¹⁵Jadi jumpang na sahalak ma ibana, di na lilu ibana di ladang, gabe disungkun baoa i ibana, ninna ma: Aha do na niluluanmu?

¹⁶Angka dahahang i do na hulului, ninna; ua paboa di ahu, manang didia nasida marmahan!

¹⁷Jadi ninna baoa i ma: Nunga munsat nasida sian on, ai hubege hatanasida: Beta ma hita laho tu Dotan. Jadi diihuthon si Josep ma angka hahana i, gabe jumpangsa nasida di Dotan.

¹⁸Jadi dung ditatap nasida ibana, tagan so sahat dope ibana tu nasida, nunga martuptup hian nasida, mambunu ibana.

¹⁹Asa masipandohan ma nasida: Ida hamu ma, nunga ro indi an, pangguruan ni angka nipi.

²⁰On pe, beta ma hita, asa itabunu ibana, dung i itadabu ibana tu godung sada, tadok

pe, binatang manoro ibana, asa taida lapatan ni angka nipina i.

²¹ Alai dung dibege si Ruben hata i, dipalua ma ibana sian tangannasida, ninna ma: Unang ma tabunu hosana.

²² Angkup ni ninna si Ruben mandok nasida: Unang durushon hamu mudar, dabu hamu ibana tagonan tu godung, na di halongonan on, unang mangonai tangan hamu tu ibana. Alai naeng paluaonna ibana sian tangannasida, asa dipaulak ibana tu amana.

²³ Jadi dung tolhas si Josep tu lambung ni angka hahana i, diosari nasida ma bajuna, baju sampuborna na ganjang i, na pinangkena i.

²⁴ Dung i ditangkup nasida ibana, jala didabu ibana tu godung, alai rumar godung i ndang marisi aek.

²⁵ Dung i hundul ma anggo nasida mangan sagusagu. Dung i manatapnatap ma nasida, gabe diida ma marudurudur halak Ismael ro sian Gilead rap dohot untonasida, angka na mangusung pamurpuri, miak na hushus dohot haminjon, angka na laho tuat tu tano Misir palangkahonsa.

²⁶ Jadi ninna si Juda ma tu angka hahaanggina i: Aha ma labanta, molo itabunu angginta i, jala itaporso mudarna i?

²⁷ Beta, itagadis ma ibana tu halak Ismael an, asa unang mangonai tangan hita tu ibana,

ai angginta jala sibukta ibana, jadi ditangihon angka hahaanggina ibana.

²⁸Dung i di na mamolus angka partigatiga, halak Midian i, dienet nasida ma si Josep sian godung i tu ginjang, jala digadis si Josep arga duapulu rupia tu halak Ismael, angka na mamboan si Josep tu tano Misir.

²⁹Dung i mulak ma si Ruben tu godung i, hape ndang be di bagasan godung i didapot si Josep, jadi disansani ma angka ulosna.

³⁰Dung i mulak ma ibana tu angka anggina i, ninna ma: Nandang be disi dakdanak i, tu dia na ma ahu?

³¹(IV.) Dung i dibuat nasida ma baju ni si Josep i, diseat nasida ma sada hambing tunggal, jala diguluhon bajubaju i tu mudar i.

³²Dung i ditongoshon ma baju sampuborna na ganjang i, asa diboan tu amanasida, angka ninna ma manonahon: Na jumpang hami do on, ua tanda, manang baju ni anakmu do i, manang ndang.

³³Alai ditanda ibana ma i, gabe didok ma: Baju ni anakku do i! Nunga dipolgak binatang ibana, nunga tutu disoro si Josep i.

³⁴Dung i disansani si Jakkob ma angka ulosna i, jala dibahen ulos hori tu gontingna, sai tumatangis ibana sipatsipat ni ari marningot anakna i.

³⁵Dung i hehe be ma sude angka anakna dohot boruna, mangapul ibana nian; alai ndang olo ibana apulon nasida, ninna ma: Na

laho na ma ahu manurun tumopot anakki tu Sheol (parbeguan) ala ni arsakkon; jadi sai ditatangisi amana i ibana.

³⁶Alai digadis halak Midian i do ibana tu tano Misir, tu si Potipar, naposo ni si Firaun, sintua ni angka hupas.

38¹(I.) Tuat ma uju i si Juda tumadingkon angka hahaanggina i, dipagohon ma undungundungna i jonok tu lambung ni sada halak Adullam margoar si Hira.

²Jadi diida si Juda ma disi sada boru ni halak Kanaan, si Sua goarna, dibuat ma i jala ditopot.

³Jadi marhangoluan ma ibana, jala ditubuhon anak sada, dibahen ma goarna si Er.

⁴Dung i gabegabean muse ibana, jala ditubuhon anak sada, dibahen ma goarna si Onan.

⁵Dung i gabegabean muse ibana jala ditubuhon anak sada, dibahen ma goarna si Sela. Alai di huta Aksib do si Juda di hatutubuna i.

⁶Dung i dibuat si Juda ma boru bahenjolma ni si Er, buhabajuna i, si Tamar do goarna.

⁷Alai na jahat do si Er, buhabaju ni si Juda i, maradophon Jahowa, jadi dibunu Jahowa ibana.

⁸Dung i ninna si Juda ma mandok si Onan: Topot majolma ni haham, jala pagodang, mambahen rindang di haham.

⁹Alai dung diboto si Onan, ndada ibana nampuna pinompar, ia ditopot pe jolma ni hahana i, jadi tu tano ma gogo ni dagingna dibolongkon, asa unang marrindang hahana i dibahen.

¹⁰Alai sogo do roha ni Jahowa di pambahenna i, jadi dibunu ma dohot ibana.

¹¹Dung i didok si Juda ma tu si Tamar, parumaenna i: Songon i ma hamu mabalu tinggal di bagas ni amanta, paima magodang anakku, si Sela i, ai ninna rohana do, atek tung mate dohot ibana, songon angka hahana i. Jadi laho ma si Tamar, jala diingani bagas ni amana i.

¹²(II.) Dung i di laonlaon ni ari, mate ma boru ni si Sua, jolma ni si Juda. Jadi dung sabam roha ni si Juda, nangkok ma ibana tumopot angka sigusting imbulu ni birubiruna, tu Timna, ibana dohot si Hira alealena sian Adullam.

¹³Jadi dibaritahon halak ma tu si Tamar, ninna do: Ida ma, na laho do simatuam doli nangkok tu Timna manggusting imbulu ni birubiruna.

¹⁴Dung i diosari boruboru i ma angka ulos habaluonna i, disaongsaongkon ma abit tujung i laho hundul tu harbangan ni huta Enaim, na di lambung dalan tu Timna, ai nunga balga diida si Sela, hape ndang dilehon ibana tu si Sela bahen jolmana.

¹⁵ Jadi dung diida si Juda ibana, diambang ma boruboru sibabijalang ibana, ai disaongsaongi do bohina.

¹⁶ Dung i didapothon si Juda ma boruboru i tu pinggol ni dalan i, ninna ma: Ua loas ma ahu ro tu ho, ai ndang diboto parumaenna hape nasida. Jadi ninna nasida ma: Aha ma ugasanmu lehononmu tu ahu, asa ro ho tu ahu?

¹⁷ Jadi ninna ibana ma: Hutongos pe di ho sada hambing tunggal sian pagaran. Antong lehon ma tu on sindorna, paima ditongos ho, ninna nasida.

¹⁸ Jadi ninna ibana ma: Aha ma sindor lehononku tu ho? Jadi ninna nasida ma: Ba, tintin pijormi dohot horungkorungmi dohot tungkot na di tanganmi. Jadi dilehon ma i tu nasida, dung i ditopot ma nasida, jadi gabegabean ma nasida sian ibana.

¹⁹ Dung i hehe ma nasida laho muli, dipasae ma abit tujung i, jala dialithon muse angka ulos habaluonna i.

²⁰ Dung i ditongoshon si Juda ma hambing tunggal i marhite sian alealena, halak Adullam i, tumobus sindor sian tangan ni boruboru i, hape ndang didapot disi.

²¹ Jadi disungkuni ma isi ni luat i: Atehe hamu, didia do boruboru sibabijalang i, na hundulhundul di Enaim, di pinggol ni dalan i? Alai ninna nasida ma: Nandang adong boruboru sibabijalang, huida hami dison.

²²Dung i mulak ma ibana tu si Juda, ninna ma: Ndang jumpang ahu nasida; jala didok angka isi ni luat i huhut: Ndang adong dison boruboru sibabijalang.

²³Jadi ninna si Juda ma: Di ibana ma i tusi, asal unang gabe haurahonta; ida ma, hutongos do nian hambing tunggal on, alai ndang jumpang ho angkora i.

²⁴Hape salpu arga tolu bulan, tarbortik ma tu si Juda: Tardege pinggol ni dalan do si Tamar, parumaenmi, nunga pola gabegabean ibana dibahen sibabijalangonna i. Jadi didok si Juda ma: Boan hamu nasida tu on, asa sinoksohan nasida.

²⁵Jadi dung diboan halak nasida, marsuruan ma nasida manopot simatuana doli mandok: Sian baa, nampuna angka indi on ahu gabegabean, ua tanda hamu, manang ise nampuna tintin pijor on dohot horungkorung on dohot tungkot on!

²⁶Jadi ditanda si Juda ma ugasan i, gabe didok ma: Pintoran do hape nasida, asa ahu; ai ala na so hulehon i nasida tu si Sela, anakki. Alai ndang be diparjolma ibana nasida.

²⁷(III.) Jadi dung jumpang hatotoras ni emena, gabe linduat do di bortianna.

²⁸Tole manubuhon nasida, surduk na sada tangan, gabe ditangkup sibaso i, jala dirahuti dohot bonang na rara, ninna ma: On do na parjolo ruar.

²⁹Hape dung ditait tanganna i mulak, ruar ma anggina i; jadi didok sibaso i ma: Boasa ma tung songon i pamuntasmu? Jadi dibahen ma goarna si Peres.

³⁰Dung i ruar ma anggina i, na martali bonang na rara i di tanganna, jadi dibahen ma goarna si Zerah.

39¹(I.) Alai anggo si Josep tarboan do tuat tu Misir, gabe ro ma si Potipar, wakil ni raja Firaun, sirajai angka naposona halak Misir, manuhor ibana sian halak Ismael, angka na patuathon ibana tusi.

²Sai didongani Jahowa do si Josep i, gabejolma na martua ibana, sai di bagas ni rajana, halak Misir i ibana.

³Jadi dung diida rajana i na nidonganen ni Jahowa ibana, jala ditumpak Jahowa sude mula ni tanganna i.

⁴Jadi lomo ma roha ni rajana i mida si Josep, gabe parhaladona ibana; jala dipabangkit ibana gabe siramoti jabuna, jala sude na di ibana i, dipasahat do tu tangan ni si Josep.

⁵Jadi olat ni na pinabangkitna i ibana bahen siramoti jabuna, ro di sude na di ibana i, dipasupasu Jahowa ma bagas ni halak Misir i ala ni si Josep, manjadi do ditumpak Jahowa sasude na di ibana i, di jabu dohot di balian.

⁶Tung sude na di ibana i dipasahat do tu tangan ni si Josep, agia aha pe ndang dipabotoboto rohana, nda holan sagusagu na

pinanganna i. Alai uli do anggo rupa dohot bohi ni si Josep i.

⁷(II.) Jadi dung salpu angka jamita ondeng solo ma roha ni jolma ni rajana i mida si Josep, didok ma: Angkupi ma ahu modom.

⁸Alai manjua ma si Josep, didok ma mandok jolma ni rajana i: Ida ma, ndang agia aha dibotoboto rajanku di jabu on, dungkon ni ahu, jala sude na di ibana i, tu tanganku do dipasahat.

⁹Ndang adong manang ise na umbalga di jabu on sian ahu, jala ndang adong na so dipadapot tu ahu, dungkon ni ho, ala jolmana ho; tung olo ma ahu mambahen jea na sai godang, asa mardosa ahu maradophon Debata?

¹⁰Alai sai songon i do hatana tu si Josep ariari, na so ditangihon ibana do modom di lambungna manang rap dohot nasida.

¹¹Hape laho ma si Josep di na sadari tu jabu mangula ulaonna, tongon ndang adong manang ise isi ni jabu i disi.

¹²Jadi disoro boruboru i ma ulosna i, ninna ma: Angkupi ma ahu modom! Alai ditadingkon si Josep ma ulosna di tangannasida, laos maporus ibana tu balian.

¹³Jadi dung diida nasida naung tinadingkonna ulosna di tangannasida laos maporus ibana tu balian.

¹⁴Gabe dijou nasida ma angka isi ni bagasna i, ninna ma mandok angka nasida: Ida hamu

ma, diboan ibana do halak Heber i tu hita, mambahen haurahon di hita. Ro do ibana tu ahu, naeng angkupanna ahu modom, gabe hupangiar soarangku joujou.

¹⁵Jadi dung dibege ibana, hupangiar soarangku joujou, gabe ditadingkon ma ulosna i di lambungki, laho maporus ibana tu balian.

¹⁶Dung i dipasombu nasida ma ulos ni si Josep di lambungnasida, paima ro rajana i muli.

¹⁷Dung i dihatahon ma hatanasida ondeng tu ibana, ninna ma: Ro do nangkin tu ahu hatoban halak Heber i, na binoanmi tu hami naeng mambahen haurahon di ahu.

¹⁸Alai dung hupangiar soarangki joujou, gabe ditadingkon ma ulosna i di lambungki, jala maporus ibana tu balian.

¹⁹Jadi dung dibege raja ni si Josep hata, ni jolmana i, angka na pinaboana i tu ibana mandok: Songon na hudok i dibahen naposom tu ahu, gabe tarrimas situtu ma ibana.

²⁰Jadi ditangkup raja ni si Josep i ma ibana, dipasahat ma ibana tu bagas hurungan ni angka na hinurungkon ni raja i, asa laos di hurungan i ibana.

²¹Alai didongani Jahowa do si Josep i, jala asi rohana mida ibana, dipadenggan dohot roha ni siramoti hurungan i mida ibana.

²²Dipasahat siramoti hurungan i ma tu tangan ni si Josep sasude angka na tarhurung di bagas hurungan i, ro di sude sibahenon disi, ingkon si Josep paturehon.

²³Ndang agia aha be diradoti siramoti hurungan i, naung pinasahatna i tu tangan ni si Josep, ala didongani Jahowa ibana, jala ditumpak manjadi na niulana i.

40¹(I.) Jadi dung salpu angka jamita ondeng, mardosa ma sitahu anggur ni raja ni Misir i dohot silompa sagusagu dompak tuannasida, raja ni Misir i.

²Jadi muruk situtu raja Firaun mida naposona na dua i, mida sintua ni angka sitahu anggur dohot mida sintua ni angka silompa sagusagu.

³Gabe dipasahat nasida tu hurungan, tu jabu ni sintua ni angka hupas pangaramoti, tu hurungan panahatan ni si Josep.

⁴Dung i dipasahat sintua ni angka hupas i ma nasida tu si Josep, asa diramoti nasida.

⁵Jadi dung na nia leleng nasida di hurungan i, marnipi ma nasida duansa di na saborngin, pulik be do nipinasida i; marlapatan be do nipinasida i, nipi ni sitahu anggur dohot silompa sagusagu ni raja ni Misir i, angka na di hurungan i.

⁶(II.) Dung i manogotna i ditopot si Josep ma nasida, gabe diida ma nasida margondok ni roha.

⁷Jadi disungkun si Josep ma naposo ni raja Firaun i, angka na rap dohot ibana di hurungan di jabu ni indukna i, ninna ma: Boasa songon na surbit bohimuna idaon sadari on?

⁸Jadi ninna nasida ma tu ibana: Marnipi do hami, hape ndang adong sijujursa. Jadi ninna si Josep ma tu nasida: Nda mandapot di Debata do angka panjujungon? Ua pajojor hamu ma tu ahu.

⁹Dung i dipajojor sintua ni angka sitahu anggur nipina i tu si Josep, ninna mandok ibana: Huida di bagasan nippingku, hau anggur sangkambona di jolongku.

¹⁰Tolu do ranting ni na sangkambona i, angka na martunas i, jala mangerbangi bungana, matoras dohot parbuena.

¹¹Jala di tanganku do panginuman ni raja Firaun i, jala hupambuat angka parbue i, jala huporoi tu panginuman ni raja Firaun, dung i hulehon panginuman i tu tangan ni raja i.

¹²Jadi ninna si Josep ma tu ibana: On do lapatanna: Na tolu ranting i, tolu ari do i.

¹³Di bagasan tolu ari on dope, pabangkiton ni raja Firaun ho, jala pasuongonna ho tu tohonanmi hian, jala lehononmu muse panginuman i tu tangan ni raja i, songon na somal na jolo uju sitahu anggurna ho.

¹⁴Alai ia dung sonang ho sai ingot ahu, asi roham di ahu, taringothon ahu tu raja Firaun, asa diparuar ahu sian bagas on.

¹⁵ Ai na tarpangus do ahu sian tano ni halak Heber, jala dison pe, ndang adong hubahen agia aha, alana umbahen dabuhononna ahu tu hurungan on.

¹⁶ Jadi dung diida sintua ni angka silompa sagusagu, denggan do panjujurna i, gabe didok ma tu si Josep: Ahu pe, huhunti do di bagasan nipingku tolu hirang martinditindi marisi sagusagu di atas ulungku.

¹⁷ Langgo hirang parginjang i marisi ragamragam ni sipanganon ni raja Firaun, pinajadijadi ni pangalompa, hape ro angka pidong manurbingi sian hirang na di atas ulungki.

¹⁸ Jadi ninna si Josep ma mangalusi: On do lapatanna: Na tolu hirang i, tolu ari do i.

¹⁹ Di bagasan tolu ari on dope, pisikkonon ni raja Firaun ma ulum sian ho, jala gantungonna badanmu tu hau, gabe panganon ni angka pidong sibukmu sian ho.

²⁰ (III.) Tole patoluarihon, jumpang ma ari hatutubu ni raja Firaun, gabe dibahen ma sipanganon di saluhut naposona, dipanangkok ma ulu ni sintua ni angka sitahu anggur dohot ulu ni sintua ni angka silompa sagusagu tu tongatonga ni angka naposona i.

²¹ Jadi dipasuang ma sintua ni angka sitahu anggur tu ulaonna hian, asa dilehon muse panginuman i tu tangan ni raja Firaun.

²²Alai anggo sintua ni angka silompa sagusagu, digantung do, songon na jinujur ni si Josep tu nasida.

²³Alai ndang diingot sintua ni angka sitahu anggur i be si Josep, tung dihalupahon do ibana.

41 ¹(I.) Jadi dung salpu boho dua taon, marnipi ma raja Firaun jongjong ibana di pasir ni batang aek.

²Dung i diida ma nangkok sian batang aek i pitu lembu, angka na uli rupa jala na mokmok, angka na manjampali di arung.

³Dung i soluk ma nangkok pitu lembu na asing sian batang aek i, angka na roa rupa, jala na marniang, didapothon ma tu lambung ni lembu, angka na di pasir ni batang aek i.

⁴Dung i dipolgak lembu angka na roa rupa, jala na marniang i ma na pitu lembu angka na uli rupa, jala na mokmok i. Dung i tarsunggul ma raja Firaun i.

⁵Dung i tarnono muse matana, gabe marnipi paduahalihon, diida ma tubu pitu kambiur sangkambona, angka na porngis jala na denggan.

⁶Dung i soluk ma diida tubu pitu kambiur angka na lambang, jala antinganon dibahen alogo sian habinsaran.

⁷Jadi dipolgak kambiur angka na lambang i ma na pitu kambiur, angka na balga, jala na porngis i. Jadi tarsunggul ma raja Firaun i, jala diida ma, nipi do i hape.

⁸(II.) Manogotna i holso situtu ma rohana i. Jadi disuru ma mangalapi saluhut pangarunding dohot paralamat angka na di tano Misir i; dung i diaturhon raja Firaun ma nipina i tu nasida: Alai ndang adong sian nasida na malo manjursu di raja Firaun i.

⁹Dung i mangkuling ma sintua ni angka sitahu anggur, ninna ma mandok raja Firaun i: Marningot ma ahu sadari on di dosangku.

¹⁰Uju na tarrimas i raja Firaun mida hami naposona, gabe dipasahat ahu rap dohot sintua ni angka silompa sagusagu tu hurungan, na di jabu ni sintua angka hupas.

¹¹Jadi marnipi ma hami di na saborngin, ahu dohot ibana, pulik be do lapatan ni nipinami.

¹²Jadi adong ma disi dongannami sada dolidoli, marga Heber, naposo ni sintua ni angka hupas i, tu ibana ma huaturhon hami, gabe dijujur ma nipinami be, marguru tu nipinami be lapatanna.

¹³Jadi ia songon i panjurnu tu hami, laos songon i do songgop: Ia ahu mulak tu tohonanku hian, targantung do anggo donganku.

¹⁴Dung i disuru raja Firaun ma mangalapi si Josep, jadi hatop ma dipalua nasida ibana sian hurungan i, dinabung ma misena, jala disingkati angka ulosna, gabe ditopot ma raja Firaun i.

¹⁵Dung i ninna raja Firaun ma mandok si Josep: Adong do sada nippingku, hape ndang

adong sijujursa. Alai hubege baritam, didok halak: Ia adong dibege ho nipi, malo do ho manjujursa.

¹⁶Dung i ninna si Josep ma mangalusi raja Firaun: Ndada ahu nian, Debata do paboahon hasonangan tu raja Firaun i!

¹⁷Dung i ninna raja Firaun ma mandok si Josep: Ida ma, huipi do, ahu jongjong di pasir ni batang aek i.

¹⁸Jadi huida ma rungkar sian batang aek i pitu lembu, angka na mokmok, jala na uli rupa, angka na manggagat tu arung.

¹⁹Dung i soluk ma rungkar huida pitu lembu na asing, angka na marniang jala na roa rupa situtu, ndang adong tudosan ni roana i huida di sandok tano Misir.

²⁰Dung i dipolgak na pitu lembu angka na marniang jala na roa i ma na pitu lembu parjolo, angka na mokmok i.

²¹Sahat pe angka i tu butuhana i dipolgak, laos so tanda do naung ro di butuhana i, laos roa do rupanasida, songon na di mulana i. Jadi tarsunggul ma ahu.

²²Dung i huida muse di bagasan nippingku, tubu pitu kambiur sangkambona, angka na porngis jala na denggan.

²³Dung i soluk ma tubu huida pitu kambiur na asing angka na lambang, jala na rohor dibahen alogo sian purba.

²⁴Jadi dipolgak na pitu kambiur, angka na lambang i ma na pitu kambiur angka na

denggan i. Nunga nian hupaboa luhutna tu angka pangarunding, alai ndang adong nanggo sada na malo manjujur di ahu.

²⁵(III.) Dung i ninna si Josep ma tu raja Firaun: Sada do pandok ni na dua nipi ni raja Firaun; dipaboa Debata do tu raja Firaun, na naeng pamasaonna.

²⁶Na pitu lembu angka na denggan i, pitu taon do i; na pitu kambur, angka na denggan i, laos pitu taon do i; sada do tahe lapatan ni nipi i.

²⁷Na pitu lembu angka na marniang, jala na roa i, angka na runkar i ihut tu bongka ondeng, pitu taon do i; na pitu kambur, angka na lambang jala na rohor binahen ni alogo sian purba, boaboa ni pitu taon haleon do i.

²⁸I ma hata na hupaboa i tu raja Firaun: Dibalumba Debata do tu raja Firaun, na naeng pamasaonna.

²⁹Ida ma, masa ma pitu taon hadumaon bolon di sandok tano Misir.

³⁰Ihut ma tusi muse masa pitu taon haleon, gabe lupa ma sude hadumaon i di tano Misir; jadi pansing ma tano i bahenon ni haleon i.

³¹Nandang be botoon ni halak hadumaon ni tano i bahenon ni haleon na soluk i, ai tung na pitor situtu do i.

³²Angkup ni, umbahen na pola dua hali marnipi raja Firaun, paboa gomos ni boaboa

na sian Debata, jala tibuna pamasaon ni Debata.

³³On pe, didiori raja Firaun ma sada halak na pantas jala na pistar marroha, sipabangkitonna patotahon tano Misir i.

³⁴Didokkon raja i ma ibana pabangkithon angka sintua di tano i mangidohon saparlima sian tano Misir di na pitu taon hadumaon i.

³⁵Asa dipapungu nasida sude sipanganon saleleng angka taon hadumaon, angka na ro on, asa dipagukguk hian eme marpandapotan tu raja Firaun, pajopon ni angka huta bahen sipanganon sogot.

³⁶Asa adong hian bahen bohal ni tano i tumagam na pitu taon haleon i, angka na songgop sogot tu tano Misir, asa unang mate so mangan, isi ni tano i.

³⁷(IV.) Denggan ma hata i di roha ni raja Firaun dohot di roha ni angka naposona sudena.

³⁸Jadi ninna raja Firaun ma mandok angka naposona i: Tung tagamon ma jumpang hitajolma songon ibana, na niinganen ni Tondi ni Debata?

³⁹Dung i didok raja Firaun ma tu si Josep: Dung dipabotohon Debata tu ho sudena i, ndang adong jolma na umpantas marroha jala na umpistar sian ho.

⁴⁰Sahat tu ho ma bagashu, guru dokmu ma sandok bangsongki; holan habangsa harajaon i ma husurunganku sian ho.

⁴¹ Angkup ni ninna raja Firaun mandok si Josep: Ida ma, nunga hupasahat tu ho sandok tano Misir on.

⁴² Dung i diumpat raja Firaun ma tintinna sian tanganna, jala disolukkon tu tangan ni si Josep, dilehon dohot surta na bontar bahen abitna dohot sampesampena, dibahen dohot horungkorung sere tu rungkungna.

⁴³ Dung i dipahundul ibana tu huretana paidua huhut martingting i di jolona: Marsomba ma hamu! Asa sahat tu ibana ma sandok tano Misir.

⁴⁴ Dung i ninna raja Firaun ma mandok si Josep: Ahu do nian raja Firaun, alai ndang na jadi hindaton ni manang ise tanganna manang patna di sandok tano Misir, nda lomo roham.

⁴⁵ Jadi dibahen raja Firaun ma goar ni si Josep: Zopenat Paneah (sipangolu portibi on), jala dilehon tu ibana si Asnat, boru ni si Potipera, malim di huta On, bahenjolmana. Dung i borhat ma si Josep mangaliati tano Misir i.

⁴⁶ Tolupulu taon do umur ni si Josep di na jongjong i ibana di jolo ni si Firaun, raja ni Misir i. Asa borhat sian jolo ni raja Firaun ma si Josep i, laho mangaliati sandok tano Misir.

⁴⁷ Jadi mansai gukguk parbue ni tano i di na pitu taon hadumaon i.

⁴⁸ Dung i dipapungu si Josep ma nasa goargoar ni sipanganon ni na pitu taon

i, angka na di tano Misir i, jala disimpan sipanganon i tu angka huta, gogo ni hauma na humaliang ganup huta, dibahen tu bagasan.

⁴⁹Jadi sobokkon rihit na di pasir ni laut hagogodang ni eme na pinagukguk ni si Josep i, pola dipasohot muse mamilangi, ai ndang be habilangansa.

⁵⁰(V.) Dung i tubu ma dua anak di si Josep, tagan so ro dope taon haleon i, angka na tinubuhon ni si Asnat, boru ni si Potipera, malim di huta On.

⁵¹Dibahen si Josep ma goar ni buhabajuna i: Si Manasse, ai lupa do ahu, dibahen Debata di sude pardangolanki, ro di bagas ni damang i sudena, ninna.

⁵²Dibahen goar ni na paduahon i: Si Epraim: Ai gabe do ahu ditumpak Debata di tano pardangolanki, ninna.

⁵³Jadi dung salpu na pitu taon hadumaon i di tano Misir.

⁵⁴Mamungka ma ro na pitu taon haleon, songon na nidok ni si Josep hian, gabe haleonon ma saluhut luat ni halak; alai anggo di sandok tano Misir, adong do sipanganon.

⁵⁵Dung i haleonon ma muse dohot sandok tano Misir i, jadi mangalualu tu raja Firaun ma na torop i mangido sipanganon. Alai ninna si Firaun ma mandok sude isi ni Misir: Si Josep ma topot hamu, na nidokna i ma bahen hamu.

⁵⁶ Jadi dung haleonon saluhut luat ni halak, diungkap si Josep ma sude sopo parpeopan eme, digadisi ma i tu halak Misir, ai tung na potir situtu do haleon i di tano Misir.

⁵⁷ Dung i angka ro ma isi ni sude luat tu tano Misir, manuhori sipanganon sian si Josep; ai tung na potir situtu do haleon i di sandok tano on.

42¹ (I.) Alai dung diida si Jakkob, adong eme di tano Misir, ninna ma mandok angka anakna i: Boasa sai masiberengan hamu?

² Dung i didok ma: Adong hubege eme di tano Misir, tuat ma hamu tusi margalas di hita sian i, asa mangolu hita, gabe unang mate.

³ Jadi tuat ma angka haha ni si Josep na sampulu halak i laho margalas eme sian tano Misir.

⁴ Alai anggo si Benjamin, anggi ni si Josep i, ndang dipaborhat si Jakkob rap dohot angka hahana i, ai ninna do: Atek tung beha adong marana.

⁵ Dung i sahat ma angka anak ni si Israel margalas rap dohot angka pargalas na asing, ai di tano Kanaan pe nunga masa haleon.

⁶ (II.) Alai si Josep do pangarajai di luat i, ibana do sigadisi eme tu sude isi ni tano i. Asa dung sahat angka haha ni si Josep i, manungkap ma nasida tu tano, marsomba tu ibana.

⁷ Jadi dung diida si Josep angka hahana i, gabe ditanda ma nasida, alai mangindung ma ibana maradophon nasida, jala didok hata na horas tu nasida, ninna ma mandok nasida: Sian dia hamu ro? Jadi didok nasida ma: Sian tano Kanaan do, naeng manuhor sipanganon.

⁸ Asa ditanda si Josep do angka hahana i, alai anggo ibana ndang ditanda nasida.

⁹ Jadi diingot si Josep ma nipi, angka na niipina taringot tu nasida, gabe didok ma mandok nasida: Pangkahap do hamu naeng mangarigop bungbung ni tano on; umbahen na ro hamu.

¹⁰ Alai ninna nasida ma mandok ibana: Ndangana ale rajanami! Na ro manuhor sipanganon do angka naposomon.

¹¹ Anak ni sahalak do hami sudena, na burju do hami, ndang dung pangkahap angka naposomon.

¹² Alai ninna si Josep ma mandok nasida: Ndangana, naeng mangarigop bungbung ni tano on do hamu umbahen na ro.

¹³ Jadi ninna nasida ma: Sampulu dua do nian hami angka naposomon, angka na martinodohon, anak ni sada halak di tano Kanaan, tading di lambung ni amanta ianggo siampudan i sadari on, alai anggo na sada ndang disi be.

¹⁴ Dung i ninna si Josep ma mandok nasida: I ma na hudok i tu hamu: Pangkahap do hamu!

¹⁵On ma pangujianku tu hamu: Songon sintongna mangolu raja Firaun, molo tagamon meret hamu sian on, nda jolo ro anggimuna siampudan i tuson.

¹⁶Suru hamu ma sahalak sian hamu, mangalap anggimuna i, tu hurungan ma anggo hamu, asa huuji hatamuna i, manang na adong haburjuon di hamu; alai molo soada i, songon sintongna mangolu raja Firaun, pangkahap do hamu.

¹⁷Jadi dipatop ma nasida tu sada hurungan tolu ari lelengna.

¹⁸Alai jumpang patoluarihon, ninna si Josep ma mandok nasida: Boti ma bahen hamu, asa mangolu hamu, ai huhabiari do Debata.

¹⁹Molo halak na burju hamu, sahalak ma sian hamu tading tarhurung di hurunganmuna on, laho ma ianggo hamu, manaruhon eme i, sipanganon ni hamu na sapanganan.

²⁰Dung i boan hamu ma anggimuna siampudan i tu ahu, asa hinahaporseaan hatamuna i, jala unang mate hamu. Jadi dibahen nasida ma songon i.

²¹Alai masisolsolan ma nasida: Tongon do, pardosa do hita tu angginta i, ai itaida do ponjot ni rohana i, uju diparajarajai hita, alai ndada itatangihon; ala ni do umbahen na ro tu hita hagogotan on.

²²Jadi ninna si Ruben ma mangalusi nasida: Nda hudok hian do tu hamu: Unang mardosa hamu tu dakdanak i, alai ndang ditangihon

hamu hatangki; asa sapata ni mudarna i huhut manginona tu hita.

²³Alai ndang diboto nasida tung diantusi si Josep hata i, ai marsipadas hata do si Josep mangangkupi nasida.

²⁴Dung i mangkatai ditundali si Josep ma nasida, laos tangis diulahi muse mandompakkon nasida, mangkulingkon nasida, ditangkup ma sian nasida si Simeon marningot ibana di adopannasida.

²⁵Dung i didokkon si Josep ma ision panuhuhannasida i dohot eme, jala paulahon peraknasida tu panuhuhanna be, jala lehonon tu nasida bohal di dalan, jadi dibahen ma songon i tu nasida.

²⁶(III.) Dung i dipampeakkon nasida ma emenasida i tu halodenasida i, jadi borhat ma nasida sian i.

²⁷Hape diungkap na sahalak ma panuhuhanna di parbornginan mangalehon gagaton tu halodena, gabe diida ma perakna i, talpe di siboanonna i.

²⁸Jadi didok ma mandok angka donganna i: Mulak do hepengku, ida hamu ma huhut di siboanonkon, gabe marseto ma rohanasida jala mabiar situtu, angka didok be ma tu donganna: Aha do on ulaning, na binahen ni Debata tu hita.

²⁹Dung i tolhas ma nasida tu tano Kanaan, tu si Jakkob, amanasida i, dialualuhon ma

tu ibana luhutna na masa i tu nasida, angka ninna ma:

³⁰Poran di pangkuling ni raja ni tano i tu hami, songon pangkahap mangkahapi tano i hami, di rohana.

³¹Alai na burju do hami, i do hudok hami tu ibana, ndang dung pangkahap hami.

³²Sampulu dua do hami, anak ni amanta, angka na martinodohon; ndang disi be ianggo na sada, di lambung ni amanta dope ianggo siampudan i, di tano Kanaan.

³³Jadi didok raja ni tano i ma mandok hami: Botima i, asa huboto manang na burju hamu: Tading ma sada sian hamu di lambungkun, boan hamu ma panganon ni na di huta, mardalan ma hamu!

³⁴Dung i boan hamu ma anggimuna siampudan i tu ahu, asa huboto, ndada pangkahap hamu, na burju do hamu hape; hulehon pe donganmuna on tu hamu, datdati hamu margalasi tu tano on.

³⁵Tole nasida mangarungkari panuhuhannasida i, gabe diida be ma puro parhepenganna di panuhuhanna be. Jadi dung diida nasida dohot amanasida i angka parhepengannasida i, mabiar ma nasida.

³⁶Dung i ninna si Jakkob, amanasida i, mandok nasida: Na punu ma ahu bahenonmuna! Si Josep ndang be disi, si Simeon pe, ndang be disi, dohot do si

Benjamin naeng buatonmuna! Luhutna i marpungu tu ahu.

³⁷Alai ninna si Ruben ma mandok amana i: Anakku na dua i ma bunu, molo tung so mulak ibana huboan tu ho; tu tanganku ma ibana pasahat, sai na mulak ibana tu ho boanonku.

³⁸Alai ninna ibana ma: Ndang jadi tuat anakku rap dohot hamu, ai nunga mate hahana i, sasada ibana na ma tading; atek tung beha adong parmaraanna di dalam sibolusonmuna i, jadi tu toru ni situmandok na ma ahu na ubanon on taruhononmuna, bahenon ni dokdok ni roha. (42-39) Alai lam marpotir ma haleon di tano i.

43¹(I.) Jadi dung suda dipangan nasida eme,

²(43-1b) na binoannasida i sian tano Misir, mangkuling ma amanasida mandok tu nasida: Sai ulahi hamu ma margalas di hita otik sipanganon.

³(43-2) Jadi ninna si Juda ma mangalusi ibana: Mansai gomos situtu do hata ni raja i tu hami: Na so tupa idaonmuna be bohingkon, nda udur hamu dohot anggimuna i, ninna.

⁴(43-3) Asa ia dipaborhat ho angginami rap dohot hami, tuat pe hami margalas sipanganon di ho.

⁵(43-4) Alai molo so dipaborhat ho ibana, ndang tuat hami, ai nunga pola didok raja i mandok hami: Na so tupa idaonmuna be

bohingkon, nda udur anggimuna i dohot hamu.

⁶(43-5) Dung i ninna si Israel ma: Boasa dibahen hamu na roa tu ahu, pola paboanmuna tu raja i, adong dope anggimuna i?

⁷(43-6) Jadi didok nasida ma: Sai disungkunsungkuni raja i do taringot tu hami dohot taringot tu pomparannami, ninna do: Mangolu dope amamuna? Adong dope anggimuna i? Jadi hupajojor hami tu ibana, marguru tu panungkunna i; sian dia do botoonnami dohononna boanonnami angginami tuat?

⁸(43-7) Dung i ninna si Juda ma mandok si Israel amana i: Loas ma dakdanak i borhat rap dohot ahu, asa borhat hami mardalan, jala mangolu hita, unang mate, nang hami, nang ho, nang angka anakkonami.

⁹(43-8) Ahu ma mangkangkungi ibana, sian tanganku pangidoonmu ibana; marsapata tu ahu ma ho saleleng ahu mangolu, molo tung so mulak ibana huboan tu ho, jala hupajongjong tu jolom.

¹⁰(43-9) Ai unang togang hami, nunga pola mulak hami dua hali tagamon.

¹¹(43-10) Dung i ninna si Israel, amanasida i, mandok nasida: Molo boti, bahen hamu songon on: Buat hamu ma parbue angka na ummarga, tubu ni tano on mambahen tu panuhuhanmuna, bahen silehonlehon tu raja

i: Saotik miak na hushus, dohot situak ni loba saotik dohot pamurpuri dohot haminjon dohot barangan dohot tapus.

¹²(43-11) Silompit dua ma boan hamu ianggo hepeng i, padohot hepeng na peak talpe di siboanonmuna i: Atek tung beha lilu ibana.

¹³(43-12) Boan hamu ma dohot anggimuna i, borhat ma hamu mangulahi manopot raja i.

¹⁴(43-13) Sai asi ma roha ni Debata, pargogo na so hatudosan i di hamu maradophon raja i, asa diloas borhat hahamuna na tading i dohot si Benjamin rap dohot hamu. Alai anggo ahu, songon halak na punu na ma ahu.

¹⁵(43-14) Asa dibuat nasida ma angka silua ondeng dohot hepeng i silompit, angkup ni si Benjamin; dung i borhat ma nasida laho tuat tu tano Misir manopot tu jolo ni si Josep.

¹⁶(43-15) (II.) Jadi dung diida si Josep udur do nasida dohot si Benjamin, gabe didokkon ma siramoti bagasna i: Togihon ma halak i tu bagas, jala potongi sipotongon i, jala hobas i, ai ingkon mangan halak on rap dohot ahu di hos ni ari.

¹⁷(43-16) Dung i dipatupa naposo i ma, songon na nidok ni si Josep i, ditogihon ma halak i tu jabu ni si Josep.

¹⁸(43-17) Alai mabiar ma halak i, ala tinogihonna i nasida tu jabu ni si Josep, angka ninna ma: Hata hepeng, na tarihut

tu siboanonta na jolo do ulaning, umbahen ditogihon hita tu jabu on, asa manggiling hata tu hita dohot mandobo hita, marhatobanhon hita dohot mambuat halodenta i.

¹⁹(43-18) Dung i dipajonok nasida ma tu baoa siramoti bagas ni si Josep i, angka dipangkulingi nasida ma ibana di baba pintu ni bagas i.

²⁰(43-19) Angka ninna nasida ma: Santabi ale rajanami, na tuat do hami nenganon margalas sipanganon.

²¹(43-20) Hape dung sahat hami tu parbornginan, jala huungkap hami siboanonnamami, gabe disi do sintong hepengnamami be, talpe di ginjang, jadi mulak do i huboan hami.

²²(43-21) Huboan hami dohot hepeng na asing manuhor sipanganon; ndang huboto hami manang ise na mambahen hepengnamami tu siboanonnamami.

²³(43-22) Alai ninna baoa i ma: Dame ma di hamu, unang hamu mabiar! Debatamuna dohot Debata ni amamuna mangalehon arta na buni tu siboanonmuna i; sahat tu ahu do hepengmuna i. Dung i diparuar ma si Simeon tu nasida.

²⁴(43-23) Dung i ditogihon ma nasida tu jabu ni si Josep, dilehon ma dohot aek, asa diburi nasida patnasida i, jala didabu gagaton tu halodenasida i.

²⁵ (43-24) Dung i diparade nasida ma silehonlehon i tumagam haroro ni si Josep di hos ni ari, ai nunga tarbortik tu nasida, mangan sagusagu nasida disi.

²⁶ (43-25) (III.) Jadi dung ro si Josep tu bagas, diboan nasida ma tu ibana silehonlehon na di tangannasida i tu jabu, manungkap ma nasida tu tano, marsomba ibana.

²⁷ (43-26) Dung i disungkun si Josep ma manang na sonang do nasida, jala ninna ma: Hipas do amanta, na matua i, na nidokmuna i? Mangolu dope ibana?

²⁸ (43-27) Jadi didok nasida ma: Hipas do naposom, amanta i, mangolu dope ibana. Jadi manungkap ma nasida marsomba ibana.

²⁹ (43-28) Dung i manaili ma si Josep, gabe diida ma si Benjamin, anggina i, donganna saina, didok ma: On do anggimuna siampudan na nidokmuna i tu ahu? Dung i ninna si Josep muse: Asi ma roha ni Debata di ho, ale anaha!

³⁰ (43-29) Dung i humalaput ma si Josep laho, dibahen sihol ni rohana mida anggina i, jadi marhor ma iluna, gabe laho ma ibana tu bilutna, asa tangis disi.

³¹ (43-30) Dung marsuap ibana, ruar ma ibana muse dipatomos ma rohana, didok ma: Boan hamu ma sagusagu i!

³² (43-31) Dung i diboan nasida ma pulik be di ibana dohot di nasida, dohot di halak Misir,

angka na mangan rap dohot ibana. Ai ndang na jadi mangan sagusagu halak Misir rap dohot halak Heber, ai pantang do i di halak Misir.

³³(43-32) Dung i dipatording ma parhundulnasida di adopan ni si Josep, asa tanda sihahaan dohot siampudan, gabe longang be ma nasida.

³⁴(43-33) Dung i dihindati parhobas i ma angka sipanganon hasurungan sian jolo ni si Josep tu jolonasida. Alai lima hali nasa jambar ni donganna sudena, jambar ni si Benjamin, jadi minum ma nasida, jala bosur rap dohot ibana.

44¹(I.) Dung i didokkon si Josep ma siramoti bagasna i, ninna ma: Gohi ma panuhuhan ni angka halak on dohot sipanganon, marguru tu na tarusung nasida jala bahen ma hepeng nasida be, talpe tu bibir ni panuhuhanna be.

²Jala bahen ma panginumanki, panginuman perak i, talpe di panuhuhan ni siampudan i rap dohot hepeng tuhor ni eme i. Jadi dibahen ma, songon na nidok ni si Josep.

³Torang ari manogotna i, dipaborhat ma nasida rap dohot halodenasida i.

⁴Jadi dung ruar nasida sian huta i, ndang sadia holang dope nasida, gabe didok si Josep ma mandok siramoti bagasna i: Borhat ma ho, haru eahi ma ne halak ondeng, jala ia dung dapot ho nasida, dok ma tu nasida:

Boasa tung dibahen hamu na jat balos ni na denggan?

⁵Nda dibuat hamu panginuman dohot partondungan ni tuangku? Na roa do na binahenmuna i.

⁶Jadi dung dapotsa nasida, gabe dipandok ma tu nasida angka hata ondeng.

⁷Jadi ninna nasida ma mandok ibana: Boasa ma tung songon i angka pangkulingmi, ale rajanami? Sitongka do ianggo di angka naposomon mangulahon, songon na nidokmu ondeng.

⁸Ida ma, gari hepeng na jumpang hami, talpe di bibir ni panuhuhannami, huboan hami do mulak tu ho sian tano Kanaan; songon dia ma antong panangkonami di perak manang sere sian bagas ni rajanta i?

⁹Ia tung jumpang panginuman di manang ise sian angka naposomon, ingkon mate ibana; angkup ni, dohot do hami gabe hatoban ni raja i.

¹⁰Alai ninna ibana ma: Antong songon na nidokmuna i ma tutu: Ia tung jumpang di manang ise, i ma gabe hatobanhu, alai lias do ianggo hamu.

¹¹Jadi hapogan ma nasida paijurhon siboanonna be tu tano, asa diungkap be siboanonna.

¹²Dung i didiori ma, mamungka di sihahaan, jozor sahat ro di sianggian; gabe jumpang ma panginuman i di siboanon ni si Benjamin.

¹³Jadi diparribak nasida ma ulosnasida i, dipausungkon be ma harungna tu halodena i, asa mulak nasida tu huta.

¹⁴Dung i ditopot si Juda dohot angka hahaanggina i tu bagas ni si Josep, ai disi dope ibana, jadi manungkap be ma nasida tu tano di jolona.

¹⁵Alai ninna si Josep ma mandok nasida: Apala dia do na binahenmuna on? Nda diboto hamu hian na malo martondung do jolma songon ahu on.

¹⁶Jadi didok si Juda ma: Aha ma dohononnami di ho, ale rajanami? Beha ma pandoknami, mamintori dirinami? Nunga jumpang Debata hajahaton ni angka naposomon. Ida ma, hatoban ni raja i na ma hami luhutna, hami ro di sibuat panginuman i.

¹⁷Alai ninna si Josep ma: Sitongka do di ahu mangulahon sisongon i; baa sibuat panginuman i, i ma hatobanku; ianggo hamu, nangkok ma hamu tu amamuna mardamedame.

¹⁸(II.) Dung i jumonok ma si Juda tu lambungna, didok ma: Sombanku di ho, ala rajanami, loas ma naposomon mandok hata sada tu pinggol ni raja i, sai unang marpiarpiar rimasmu tu naposom, ai doshon raja Firaun i do ho!

¹⁹Sungkunsungkun do raja i tu angka naposom, didok do: Adong dope amamuna, manang dongan sabutuha.

²⁰Jadi hudok hami ma tongon tu raja i: Adong dope amanami naung matua, jala sada anak siampudanna, tubuna dung matua, jala nunga mate hahana i, jala sasadasa tinggal na saina, jala haholongan ni amana ibana.

²¹Dung i nimmu do mandok angka naposom: Boan hamu ma ibana tuat tu ahu, asa dinolnol matangku ibana.

²²Jadi hudok hami do nian tu raja i: Ra ndang tartadingkon dakdanak i amana i: Atek tung mate amana maon, tung sura ditadingkon.

²³Alai nimmu do mandok angka naposom: Molo so tuat anggimuna siampudan i, rap dohot hamu, ndang be jadi idaonmuna bohingkon.

²⁴Jadi nangkok ma hami tu naposom, damang i, gabe hupaboa hami ma tu ibana angka hata ni raja i.

²⁵Dung i ninna damang ma: Ulahi hamu ma margalas otik sipanganonta.

²⁶Alai hudok hami ma: Nandang tarbahen hami tuat; alai molo angginami siampudan i dongannami, tuat pe hami; ai ndang tarbereng hami bohi ni raja i, molo so angginami siampudan i dongannami.

²⁷ Jadi ninna naposom, damang i, mandok hami: Diboto hamu do, dua do tubu ni jolmangku.

²⁸ Ruar do anggo na sada sian ahu, gabe hudok: Tongon tahe nunga diparsisiga binatang ibana, jala rasirasa nuaeng, ndang huida ibana.

²⁹ Molo dibuat hamu dohot on annon sian jolongku, gabe adong marana, jadi tu toru ni situmandok na ma ahu na ubanon i taruhononmuna, bahenon ni hinamago.

³⁰ On pe, molo sahat ahu tu naposom, damang i, hape ndang dohot dakdanak i, jala sisadari do hosanasida na dua i.

³¹ Tongon tahe molo diida, ndang disi dakdanak i, mate ma ibana; alai hami angka naposomon do patuathon naposom, amanta na ubanon i, tu toru ni situmandok, bahenon ni dokdok ni roha.

³² Ai ahu naposomon do mangkangkungi dakdanak i tu damang i, ningku do: Molo so hupaulak ibana tu ho, sai mardosa ma ahu tu damang i saleleng mangolu.

³³ On pe, ua ahu, naposomon ma tading dison, gabe hatoban ni raja i, singkat ni dakdanak i, asa nangkok dakdanak i, rap dohot angka hahana i.

³⁴ Ai beha ma pambahenku nangkok tu damang i, so udur dohot dakdanak i? Nandang hapanotnotan ahu hinamago na songgop tu damang i.

45¹ (I.) Jadi ndang tartaon si Josep be sihol ni rohana maradophon sude angka na jongjong di lambungna, gabe dijouhon ma: Paruar hamu ma sude halak sian lambungkun! Jadi ndang adong manang ise na jongjong di lambungna, di na pinatandahon ni si Josep ibana tu angka hahana i.

²Dung i dipangiar ma soarana tumatangis, pola dibege halak Misir, ro di isi ni bagas ni raja Firaun umbegesa.

³Dung i ninna si Josep ma mandok angka hahana i: Ahu do si Josep, mangolu dope amanta i? Jadi ndang haalusan angka hahana i ibana, ai tarhatotong do rohanasida mida bohina i.

⁴Dung i ninna si Josep ma mandok angka hahana i: Ua pajonok hamu ma tu lambungkun; gabe dipajonok nasida ma. Jadi ninna ibana ma: Ahu do si Josep, anggimuna, na ginadismuna i tu tano Misir.

⁵On pe, unang mabiar hamu, jala unang serbeng matamuna, ala ginadismuna i ahu tuson, ai mangarade hangoluanmuna, umbahen disuru Debata ahu parjolomuna.

⁶Ai padua taon on dope masa haleon di tano on, alai lima taonnari dope na so masa saburon manang gotilon.

⁷Alai disuru Debata do ahu parjolomuna, pajophon di hamu ebaeba di tano on dohot pangoluhon hamu, mambahen haluaon bolon.

⁸On pe, ndada hamu marsuru ahu tuson, Debata do, dipabangkit do ahu gabe ama ni raja Firaun, dohot gabe induk ni sandok bagasna, jala pangarajai di sandok tano Misir.

⁹Asa pahatop hamu ma ne nangkok tu damang i, paboa hamu ma tu ibana: Songon on do tona ni anakmu, si Josep: Dipabangkit Debata do ahu gabe raja ni sandok tano Misir; tuat ma ho mandapothon ahu, unang togangtogangon.

¹⁰Maringan di tano Gosen ma ho, asa jonok di lambungku, ho dohot anakmu dohot angka pahompum, ro di birubirum dohot lombum dohot nasa na di ho.

¹¹Ahu do marmuduhon ho disi, ai lima taonnari dope haleon on, asa unang raparan ho dohot isi ni bagasmu, ro di sude na di ho.

¹²Antong matamuna dohot mata ni anggingki, si Benjamin i, marnidasa, paboa apala pamanganku manonahon hata i tu hamu.

¹³Paboa hamu ma tu damang i sude hasangaponku di tano Misir, ro di sude na niidamuna i. Pahatop hamu ma ne tuat tuson rap dohot amanta.

¹⁴Dung i dihaol ma rungkung ni si Benjamin, anggina i huhut tangis, si Benjamin i pe, sai tumatangis do mangkaol rungkungna.

¹⁵Dung i diumma si Josep ma sude angka hahana i huhut tumatangis be; dung pe salpu i, asa mangkatai angka hahana i dohot ibana.

¹⁶(II.) Dung i tarbortik ma barita i tu bagas ni raja Firaun, angka ninna do: Nunga ro angka haha ni si Josep; jadi denggan ma roha ni raja Firaun dohot angka naposona i.

¹⁷Dung i ninna raja Firaun ma mandok si Josep: Dok ma tu angka hahami, songon on ma bahen hamu: Sorati hamu ma angka halodemuna i, borhat ma hamu, asa gira sahat hamu tu tano Kanaan.

¹⁸Dung i boan hamu ma amamuna dohot ripemuna mandapothon ahu, asa hulehon tu hamu na dumenggan di tano Misir, asa dipangan hamu miak ni tano on.

¹⁹Antong sahat tu ho ma i, bahen hamu ma songon on: Buat hamu ma sian tano Misir angka hureta hundulan ni anakkonmuna dohot jolmamuna i, boan hamu dohot amamuna ro tuson.

²⁰Jala unang habot rohamuna mida ugasanmuna i, ai gok di hamu do na denggan ni sandok tano Misir on.

²¹(III.) Jadi dibahen angka anak ni si Israel ma songon i, diparlehon si Josep ma angka hureta tu nasida marningot pandok ni raja Firaun, dilehon tu nasida dohot bohal di dalan.

²²Diganupi nasida abit sasalin be, alai anggo tu si Benjamin tolu ratus rupia dohot lima salin abit dilehon.

²³Ditongoshon ma angkup ni di amana i sorat sampulu halode tunggal, angka na mangusung na dumenggan i sian tano Misir,

dohot sampulu halode boruboru, angka siusung eme, sagusagu dohot sipanganon di amana i di tongan dalan.

²⁴Asa dipaborhat ma angka hahana i, gabe laho nasida; alai ninna do mandok nasida: Unang marbadai hamu di tongan dalan.

²⁵Jadi nangkok ma nasida sian tano Misir, gabe sahat nasida tu tano Kanaan, tu si Jakkob, amanasida i.

²⁶Jadi dibaritahon nasida ma tu ibana, angka ninna ma: Mangolu dope si Josep, jala ibana do sigomgom saluhut tano Misir; alai diparotootoi roha ni si Jakkob do i, ai ndang dihaporseai hatanasida i.

²⁷Alai dung dihatahon nasida tu ibana sude hata ni si Josep, angka na tinonahonna i tu nasida, diida dohot hureta, angka na tinongoshon ni si Josep mangusung ibana, gabe tarhilas ma tondi ni si Jakkob, amanasida i.

²⁸Dung i ninna si Israel ma: Taho ma i, mangolu dope hape si Josep anakki! Borhat ma ahu, asa huida ibana, tagan so mate dope ahu.

46¹(I.) Asa borhat ma si Israel dohot sude na di ibana i. Jadi dung sahat ibana ro di Berseba, gabe dipelehon ma angka pelean tu Debata ni amana si Isak i.

²Dung i didok Debata ma tu si Israel marhitehite pangungkapon bornginna i, ninna

ma: Jo, ale Jakkob, Jakkob! Dison do ahu ninna ibana.

³Dung i ninna ma: Ahu do Debata. Debata ni amam, unang ho mabiar tuat tu tano Misir; ai gabe bangso na bolon do ho tumpahanku disi.

⁴Hudongani pe ho tuat tu tano Misir, jala sai na togihononku do ho nangkok sogot, ingkon si Josep do mangampehon tanganna tu matam.

⁵Dung i borhat ma si Jakkob sian Berseba, jala ditogihon angka anak ni si Israel ma si Jakkob, amanasida i, dohot angka anakonnasida ro di jolmanasida, di hureta, angka na tinongos ni raja Firaun mamboan ibana.

⁶Diboan ma dohot pinahannasida, ro di sinamotnasida, angka na sinamotsamotnasida i di tano Kanaan, jadi sahat ma nasida tu tano Misir. Si Jakkob ro di sude pinomparna i.

⁷Angka anakna dohot angka pahompuna, angka boruna dohot angka pahompuna boruboru, ro di sude pinomparna, diboan tu tano Misir rap dohot ibana.

⁸(II.) Jala on ma angka goar ni anak ni si Israel, angka na tolhas tu tano Misir i: Si Jakkob dohot angka anakna i: Buhabaju ni si Jakkob, i ma si Ruben.

⁹Angka anak ni si Ruben: Si Hanok, si Pallu, si Hezron dohot si Karmi.

¹⁰Angka anak ni si Simeon: Si Jemuel, si Jamin, si Ohad, si Jakin, si Zohar dohot si Saul, tubu ni boru Kanaan.

¹¹Angka anak ni si Lepi: Si Gerson, si Kohat dohot si Merari.

¹²Angka anak ni si Juda: Si Er, si Onan, si Sela, si Peres dohot si Jara. Alai anggo si Er dohot si Onan mate do di tano Kanaan. Ia anak ni si Peres: Si Hezron dohot si Hamul.

¹³Angka anak ni si Isasar: Si Tola, si Pua, si Job dohot si Simron.

¹⁴Angka anak ni si Zebulon: Si Sered, si Elon dohot si Jalel.

¹⁵I ma pinompar ni si Lea, angka na tinubuhonna di si Jakkob di Padang-Aram, angkup ni si Dina, boruna i. Sude nasida, angka anakna dohot boruna, tolupulu tolu halak do.

¹⁶Angka anak ni si Gad: Si Sipion, si Haggi, si Suni, si Esbon, si Eri, si Arodi dohot si Areli.

¹⁷Angka anak ni si Aser: Si Innah, si Isha, si Ishi, si Beeria dohot si Jara, ibotonasida i; ia angka anak ni si Beeria: Si Heber dohot si Malkiel.

¹⁸I ma pinompar ni si Zilpa, na nilehon ni si Laban tu si Lea, boruna i, asa na sampulu onom halak i do ditubuhon ibana di si Jakkob.

¹⁹Angka anak ni si Rahel,jolma ni si Jakkob: Si Josep dohot si Benjamin.

²⁰Ia tubu ni si Josep di tano Misir, angka na tinubuhon ni si Asnat, boru ni si Potipera,

malim di huta On di ibana: Si Manasse dohot si Epraim.

²¹ Angka anak ni si Benjamin: Si Bela, si Beker, si Asbel, si Gera, si Naaman, si Ehi, si Roseh, si Muppin, si Hupim dohot si Ared.

²² I ma pinompar ni si Rahel, angka na tinubuhonna di si Jakkob, sampulu opat halak saluhutna.

²³ Ia anak ni si Dan: Si Husim.

²⁴ Angka anak ni si Naptali: Si Jazeel, si Guni, si Jeser dohot si Shillem.

²⁵ I ma pinompar ni si Bilha, na nilehon ni si Laban tu si Rahel, boruna i, asa na pitu halak i tinubuhonna di si Jakkob.

²⁶ Sudejolma, angka na tolhas tu tano Misir rap dohot si Jakkob, angka na ruar sian gontingna, so padohotjolma ni angka anak ni si Jakkob, onompulu onom halak saluhutna.

²⁷ Ia anak ni si Josep angka na tubu di ibana di tano Misir, dua halak do, asa boho pitupulu halak pinompar ni si Jakkob saluhut, angka na tolhas i tu tano Misir.

²⁸ (III.) Dung i disuru si Jakkob ma si Juda pajolohon manopot si Josep, asa didokkonro tu Gosen; jadi tolhas ma nasida tu tano Gosen.

²⁹ Dung i dipasang si Josep ma huretana laho nangkok tu Gosen manjumpangkon si Israel, amana i. Jadi dung masipaidaan nasida, dihaol si Josep ma rungkungna, huhut sai tumatangis.

³⁰Dung i ninna si Israel ma mandok si Josep: Agia tung nuaeng ahu mate, asal dung huida bohim, laos mangolu dope ho hape.

³¹Alai ninna si Josep ma mandok angka hahana i dohot tu isi ni bagas ni amana i: Nangkok ma ahu paboahonsa tu raja Firaun, jala dohononku ma tu ibana: Nunga ro angka hahaanggingku dohot isi ni bagas ni damang i, na di tano Kanaan na sai laon, mandapoti ahu.

³²Angka halak sipormahan birubiru do nasida, ai pardorbialaon do diula nasida, jala diboan nasida do birubirunasida dohot lombunasida, ro di sude na di nasida i.

³³On pe, molo dijou raja Firaun i hamu, jala didok: Aha do ulaonmuna i?

³⁴Songon on ma dok hamu: Halak pardorbialaon do angka naposomon sian sietehetehonnami rasirasa nuaeng, songon i hami, nang ompunami, asa anggiat dipaian hamu di tano Gosen, ai marbiasbias do halak Misir mida halak sipormahan birubiru.

47¹(I.) Dung i laho ma si Josep mamaritahon tu raja Firaun, ninna ma: Nunga ro damang dohot angka hahaanggingku, ro di birubiru dohot lombunasida, ro di sude na di nasida i sian tano Kanaan, nunga pola sahat nasida di tano Gosen.

²Dung i diarahon si Josep ma lima halak sian hahaanggina i, tu jolo ni raja Firaun.

³Jadi didok raja Firaun i ma mandok hahaanggina i: Aha do ulaonmuna i? Jadi ninna nasida ma mandok raja Firaun: Siparmahan birubiru do angka naposomon, songon i hami, nang sian ompunami.

⁴Angkup ni, didok nasida tu raja Firaun: Naeng maisolat hami di tano on, umbahen na ro, ai ndang adong jampalan ni birubiru ni angka naposom, ala posi ni haleon di tano Kanaan. On pe, sai loas ma angka naposom mian di tano Gosen.

⁵Jadi ninna raja Firaun ma mandok si Josep: Nunga ro hape amanta dohot hahaanggim mandapoti ho.

⁶Di jolomi do tano Misir on, di tano na dumenggan i ma paojak amanta dohot angka hahaanggim; di tano Gosen ma nasida mian. Ia adong diboto ho sian nasidajolma na pantas, pabangkit ma nasida gabe induk ni angka siramoti pinahanku sudena.

⁷Dung i diarahon si Josep ma si Jakkob, amana i, mamboan ibana tujolo ni raja Firaun, jadi dipasupasu si Jakkob ma raja Firaun i.

⁸Dung i ninna raja Firaun i ma mandok si Jakkob: Piga taon ma lelengmu mangolu?

⁹Jadi ninna si Jakkob ma mandok raja Firaun: Saratus tolupulu taon ma leleng ni paisolatanki. Otik jala porsuk do ariari ni ngolungku, jala ndang dieak ariari ni ngolu ni angka daompung, di paisolatannasida i.

¹⁰Dung i dipasupasu si Jakkob ma raja Firaun i, dung i ruar ma ibana sian jolo ni raja i.

¹¹Dung i dipahot si Josep ma inganan ni amana dohot angka hahana i, jala dilehon partaliannasida di tano Misir, di tano na dumenggan sahali di luat Ramses, songon na tinonahon ni raja Firaun i.

¹²Jadi diparmudu si Josep ma amana dohot angka hahana i ro di sude pangisi ni bagas ni amana i, marguru tu torop ni anakonna be.

¹³(II.) Alai ndang adong sipanganon di sandok tano i, ai na potir situtu do haleon i, malas be do isi ni tano Misir dohot tano Kanaan, dibahen haleon i.

¹⁴Asa dipagukguk si Josep ma nasa hepeng na jumpang ni tano Misir dohot ni tano Kanaan, tuhor ni eme, na ginalasnasida i; dung i ditaruhon si Josep ma hepeng i tu bagas ni raja Firaun.

¹⁵Jadi dung suda hepeng di tano Misir dohot di tano Kanaan, ro be ma sude isi ni Misir manopot si Josep, angka ninna ma: Nia sipanganon di hami on! Boasa ma tagonan mate hami di jolomon, ala naung suda hepeng?

¹⁶Jadi ninna si Josep ma: Boan hamu ma pahanpahananmuna tuson, asa hulehon tu hamu eme ali ni pinahanmuna i, molo naung suda hepeng i.

¹⁷ Jadi dipamboan nasida ma pinahannasida i tu si Josep, gabe dilehon si Josep ma tu nasida sipanganon ali ni angka hoda dohot birubiru dohot lombu dohot halode. Asa diparmudu ibana nasida na sataon i, ali ni saluhut pinahannasida i.

¹⁸ Jadi dung salpu na sataon i, ro ma nasida tu ibana paduataonhon angka ninna ma mandok ibana: Ndang tarporso hami tu ho ale rajanami, ndada holan perak i naung suda, pinahannami pe, nunga sahat ro di raja i sudena, ndang adong be tading, nda holan dagingnami dohot golatnami.

¹⁹ Boasa na tagonan mate hami paidaidaonmu, hami dohot golatnami? Ambati ma hami sandiri dohot golatnami ali ni sipanganon, asa mangadop di raja Firaun hami dohot golatnami, jala lehon boni, asa mangolu hami, unang mate, jala unang tarulang tano i.

²⁰ Asa dituhor si Josep ma sandok tano Misir di raja Firaun, ai digadisi halak Misir do haumana be, dibahen potir ni haleon i, gabe raja Firaun ma nampuna tano i.

²¹ Dung i disagihon ma angka situasi natorop i tu angka huta sian partalpahan ni tano Misir na sada tu na sada nari.

²² Holan hauma ni angka malim, ndang dituhor ibana, ai partalian ni malim do i sian raja Firaun, asa mangan nasida sian partaliannasida, na nilehon ni raja Firaun tu

nasida; ala ni do umbahen so targadis nasida golatnasida i.

²³Dung i ninna si Josep ma mandok angka na torop i: Ida ma, nunga huambat hamu dohot golatmuna i sadari on di raja Firaun; na! Boni on di hamu, bonihon hamu ma i tu tano i.

²⁴Alai songon on ma taringot tu gogona i: Lehon hamu ma saparlima di raja Firaun, na opat bagian nari ma di hamu, bahen boni tu hauma i dohot bahen panganonmuna, ro di angka isi ni jabumuna, bahen sipanganon ni anakkonmuna huhut.

²⁵Jadi ninna nasida ma: Ho do na pangolu hami, sai asi ma roham, ale rajanami, marnida hami, sai hatoban ni raja Firaun i ma hami luhutna.

²⁶Laos patik ma i, dibahen si Josep rasirasa nuaeng, taringot tu tano ni halak Misir, saparlima di raja Firaun; holan tano ni angka malim sambing na so raja Firaun nampunasa.

²⁷(III.) Asa maringan di tano Misir ma Israel, di luat Gosen, mandapot di nasida ma i, jadi marpinompari ma nasida, gabe sopar situtu.

²⁸Dung i mangolu si Jakkob sampulu pitu taonnari di tano Misir, asa saratus opatpulu pitu taon ma umur ni si Jakkob.

²⁹Jadi dung marhira jumpang ajal ni si Israel, ditonahon ma anakna. Si Josep, ninna ma mandok ibana: Molo asi roham mida ahu

ampehon ma tanganmu tu toru ni soithon, paboa na olo ho mambahen asi ni roha dohot hasintongan tu ahu, na so tupa tanomonmu ahu di tano Misir on.

³⁰Ingkon rap ahu modom dohot angka daompung, dibahen i ingkon boanonmu ahu sian tano Misir on, jala tanomonmu ahu di porbandaannasida. Jadi ninna si Josep ma: Hubahen pe songon na nidokmi.

³¹Alai ninna ibana ma: Antong uarihon ma tu ahu! Jadi diuarihon ma tu ibana. Dung i marsomba ma si Israel dompak julu on ni podomanna i.

48¹(I.) Jadi dung salpu angka jamita ondeng, tarbortik ma tu si Josep: Ida ma, marsahit do amanta. Jadi diarahon ma anakna na dua i: Si Manasse dohot si Epraim.

²Jadi dung tarbortik tu si Jakkob, adong na mandok: Ida ma, nunga ro anakmu si Josep manopot ho, gabe dipatogar si Israel ma dirina, hundul ma ibana di podomanna.

³Dung i ninna si Jakkob ma mandok si Josep, boti ma i: Huida do Debata, pargogo na so hatudosan di huta Lus, di tano Kanaan, jala dipasupasu ahu.

⁴Jala ninna do mandok ahu: Ida ma, hutumpahi pe ho marpinompar, jala hupatorop pe ho, hubahen pe ho gabe abalan ni angka bangso, jala lehononku do tano on tu pinomparmu sogot, bahen partohapannasida salelenglengna.

⁵Nuaeng pe, anakmu na dua i, na tubu di ho di tano Misir, tagan so ro dope ahu mandapoti ho tu tano Misir on: Si Epraim dohot si Manasse, ahu ma nampuna nasida, sobokkon si Ruben dohot si Simeon.

⁶Alai anakmu angka na tubu dungkon ni, ho ma nampunasa, goar ni angka hahanasida i ma panggoarhononna di partaliannasida.

⁷Ai di na ro i ahu sian Padang-Aram, mate do si Rahel di tano Kanaan, di dalam mardonokkon huta Eprata, laos hutanom do ibana disi, di dalam laho tu Eprata, i ma Betlehem.

⁸(II.) Dung i dibereng si Israel ma angka anak ni si Josep, jala didok ma: Ise do angka nasida on?

⁹Jadi ninna si Josep ma mandok amana i; anakku do nasida, angka na nilehon ni Debata di ahu dison. Jadi didok si Jakkob ma: Ua togu nasida tu lambungkon, asa hupasupasu nasida.

¹⁰Ai nunga rambon mata ni si Israel dibahen torasna, ndang be torang ibana marnida. Jadi dipajonok ma na dua i tu ibana, gabe diumma ma nasida, jala dihaol.

¹¹Dung i ninna si Israel ma mandok si Josep: Nunga huida bohim, so hirimhirim ni rohangku jala ida ma, dohot do pinomparamu dipaidahon Debata tu ahu.

¹²Dung i ditogu si Josep ma nasida sian ampuanna, jala manungkap ibana tu tano di jolona.

¹³Dung i dibuat si Josep ma nasida duansa, si Epraim di siamunna, tondong ni sihambirang ni si Israel, jala si Manasse di sihambirangna, tondong ni siamun ni si Israel, jala dipajonok nasida tu ibana.

¹⁴Alai dipatoltol si Israel ma tanganna siamun laho mangampehon tu ulu ni si Epraim, atek pe ibana siampudan, jala tanganna sihambirang tu ulu ni si Manasse, dituntun rohana do mambahen songon i tanganna i, atek pe si Manasse sihaahan.

¹⁵Dung i dipasupasu si Israel ma si Josep, ninna ma: Debata, ni hinabiaran ni angka daompung, si Abraham dohot si Isak, angka na marparange di jolona, Debata siparmahan ahu saleleng ahu adong rasirasa sadari on.

¹⁶Suruan, na palua ahu sian nasa parmaraan, i ma mamasumasu dakdanak na dua on, sai tarbarita ma goarhu marhitehite nasida, ro di goar ni angka daompung si Abraham dohot si Isak, sai sobokkon dengke ma hinadeaknasida di pusoran ni tano on.

¹⁷Alai dung diida si Josep, na niampehon ni amana tanganna siamun i tu ulu ni si Epraim, sogo ma rohana marnida, gabe ditiop ma tangan ni amana i paunsathon sian ulu ni si Epraim tu ulu ni si Manasse.

¹⁸Jadi didok si Josep ma mandok amana i: Ndang songon i, ale amang, ai on do sihahaan, ampehon ma tanganmu siamun tu uluna.

¹⁹Alai manjua do amana i, ninna ma: Tangkas do i huboto, ale anaha! Ibana pe gabe bangso do sogot, balga do nang ibana; alai sai na umbalga do anggina i sogot sian ibana, jala pinomparna i sogot abalan ni angka bangso.

²⁰Jadi dipasupasu ma nasida di na sadari i, ninna ma: Marhitehite ho do mamasumasu si Israel, dohonon ni halak ma: Dibahen Debata ma ho, songon si Epraim dohot songon si Manasse! Jadi jumolo ma si Epraim dibahen maradophon si Manasse.

²¹Dung i ninna si Israel ma mandok si Josep: Ida ma, na mate ma anggo ahu, alai sai donganan ni Debata do hamu, sai pasuangonna do hamu tu tano ni ompumuna.

²²Langgo ahu, nunga hulehon di ho tano i santurpuk hasurunganmu sian angka haham, na hubuat sian halak Amori marhitehite podangku dohot siorhu.

49¹(I.) Dung i dijou si Jakkob ma angka anakna i, ninna ma: Marluhut ma hamu, asa hupaboa tu hamu na masa sogotsogot ni ari tu hamu.

²Sange ma hamu marpungu, jala tangihon hamu ma, ale angka anak ni si Jakkob!

Tangihon hamu ma hata ni si Israel, amamuna i.

³Ale Ruben, ho do buhabajungku, gogongku jala bungabunga ni hagabeonku, parhasurungan di hamuliaon dohot parhasurungan di gogo nian.

⁴Alai songon parbullak ni aek do ho ala ni; ndang be marhasurungan ho, ai dipanaek ho do podoman ni amam, diramuni ho do i uju na pinanaekmi tongon podomanki.

⁵Ale Simeon dohot Lepi, angka na martinodohon; senjata hajungkaton do podangnasida i.

⁶Sai unang ma saor rohangku tu tahitahinasida, sai unang sauduran hasahalonku (tondingku) tu parluhutannasida i; ai mangasahon piri pirinasida dibunui do angka jolma i, jala ditangkai angka lombu mangasahon jungkat ni rohanasida.

⁷Marjea ma muruknasida i, ala mambahen uhum gogo dohot piri pirina, ala jorbutna. Saginonku ma nasida tu tongatonga ni pinompar ni Jakkob, jala paserahonku nasida tu tongatonga ni pinompar ni Israel.

⁸Ale Juda, ho do tongon sipujion ni angka hahaanggim! Pampe tu tangkuhuk ni angka musum sogot tanganmu, marsomba tu ho do angka anak ni amam.

⁹Anak ni singa do si Juda. Manaek binahen ni sorosoro do ho ale anaha! Manggompang do ibana jala dipapodom, songon singa

tunggal dohot songon singa boruboru; tung
ise ma na hum manunggul ibana?

¹⁰Ndang na meret tungkot harajaon sian si
Juda, manang paruhum sian holangkolang
ni patna paima ro si Shilo, jala Ibana do
ihuthonon ni angka bangso.

¹¹Tambatonna ma halodena i tu bona ni
hau anggur dohot anak ni halodena boruboru
tu ranting ni hau anggur na denggan;
taptaponna ma ulosna tu anggur, jala tu gota
ni hau anggur sampesampena.

¹²Rumara sian anggur do matana, jala
sumaksak sian susu ia ngingina.

¹³Langgo si Zebulon, di topi laut do
ibana maringan, di labuan ni angka parau,
marbalokkon Sidon.

¹⁴Langgo si Isasar halode sipir holiholi do,
na manggompang tu holangkolang ni angka
parduan.

¹⁵Dung diida denggan do hape pangulonan i
jala lomak tano gabe dipaunduk ma abarana
laho mamorsan, jadi halak parrodi ma ibana.

¹⁶Langgo si Dan manguhum bangsona
sogot, sobokkon marga ni Israel i sadasada.

¹⁷Doshon ulok di pinggol ni dalan do si
Dan sogot, doshon ulok dari tahe di topi ni
dalan balobung, mamarguti angka tambihul
ni hoda, asa tunggaling tu pudi jolma na
mangkunduli.

¹⁸Hatuaonmi do na huhalungunhon, ale
Jahowa!

¹⁹Ianggo si Gad onjaron ni sapanggungan parbajo sogot, alai leleonna do nasida muse.

²⁰Sian si Aser ro sagusagu hataboanna, jala ibana mangalehon sipanganon hasoloan ni raja.

²¹Ursa tini na gompis ianggo si Naptali, na mangalehon bagabaga na denggan.

²²Anak ni hau na marparbue ianggo si Josep, anak ni hau na marparbue di topi mual, dijangkit angka rantingna do dorpi.

²³Digitihi angka partembak ibana, jala disiorhon angka sumbia dompak ibana, jala dipaburuburu ibana.

²⁴Alai sai toltol do anggo siorna i, jala gogo do botohon ni tanganna i, pinargogo ni tangan ni Ulubalang ni si Jakkob, marhitehite goar ni Sipormahan, Partanobatoan ni si Israel.

²⁵Sian Debata ni amam, sai tumpahanna do ho, jala sian Pargogo na so hatudosan, sai pasupasuonna do ho, marhitehite pasupasu sian banua ginjang, marhitehite pasupasu sian lung, na gistang di toru, marhitehite pasupasu sian bagot panusuan dohot hagabeon ni bortian.

²⁶Disalpui angka pasupasu ni amam do angka pasupasu ni angka daompung sian na robi sahat ro di partalpahan ni angka dolokdolok sian mulamula; sai songgop ma angka i tu ulu ni si Josep dohot tu sisigatan ni Nasir (na pinillit) ni angka hahaanggina.

²⁷ Tudoshon gompul panoro do ianggo si Benjamin; manganhon sorosoro ibana manogotna i, jala marbagi tabantaban ibana bodarina i.

²⁸ (II.) I ma sude marga ni Israel na sampulu dua i, jala i do na pinaboa ni amanasida tu nasida laho mamasumasu nasida; pulik be do pamasumasuna i laho mamasumasu nasida be.

²⁹ Dung i martona ma ibana, didok ma mandok nasida: Papunguon tu bangsongku nama anggo ahu; tanom hamu ma ahu tu lambung ni angka daompung, tu liang na di hauma ni si Epron, marga Het i.

³⁰ Tu liang na di hauma Makpelah, tondong ni Mamre di tano Kanaan, na tinuhor ni si Abraham rap dohot hauma na sian si Epron, marga Het i, bahen parbandaan hapunjungan.

³¹ Tusi do tartanom si Abraham dohot si Sarah, jolmana i; tusi do tartanom si Isak dohot si Rebekka, jolmana i; jala tusi do hutanom dohot si Lea.

³² Hauma i dohot liang i na di bagasan, na tinuhor do i sian anak ni si Het.

³³ Jadi dung sahat angka tona ni si Jakkob tu angka anakna i, dipapungu ma patna tu podomanna i, jadi tos ma hosana, gabe pinapungu ibana tu bangsona.

50¹ (I.) Dung i tinggang ma si Josep tu bohi ni amana i, sai ditatangisi ibana huhut diumma.

²Dung i ditonai si Josep ma angka naposona, angka datu i, asa dihapuri amana i. Jadi dihapuri angka datu i ma si Israel.

³Jadi opatpulu ari ma lelengna diula nasida, ai na sai leleng do somal ariari pangkapuron. Jadi sai ditatangisi halak Misir ibana pitupulu borngin lelengna.

⁴Jadi dung salpu angka ari pangandunganna i gabe didok si Josep ma tu isi ni bagas ni raja Firaun: Molo tung asi rohamuna mida ahu, sai patolhas hamu ma hatangkon tu pinggol ni raja Firaun:

⁵Dipatolon damang i do ahu, ninna: Ida ma, na mate ma anggo ahu; ingkon di tanoman, na huhali di ahu, di tano Kanaan i, tusi ma tanomonmu ahu. On pe, loas nangkok, asa hutanom damang, dung i mulak ahu.

⁶Dung i ninna raja Firaun ma: Nangkok ma ho, tanom ma amanta i, songon naung niuarihonmu.

⁷Jadi nangkok ma si Josep laho mananom amana i; nangkok dohot sude naposo ni raja Firaun rap dohot ibana, ro di sintua ni bagasna i dohot sude angka sintua ni tano Misir i.

⁸Ro di sude isi ni bagas ni si Josep dohot angka hahaanggina i, ro di isi ni bagas ni amana i; holan angka anakkonnasida dohot birubirunasida dohot lombunasida tading di tano Gosen.

⁹Nangkok ma udur dohot ibana nang angka hureta, nang angka parsihundul, tung na torop situtu do nasida na sauduran i.

¹⁰Jadi dung sahat nasida ro di pardegean Atad, na di bariba ni Jordan, digogo nasida ma disi mangondasi, arga pitu borngin lelengna diandungi si Josep amana i.

¹¹Jadi dung diida isi ni tano i, halak Kanaan i, pangondason na di pardegean Atad i, angka ninna ma: Hinamago bolon maon di halak Misir. Ala ni do umbahen Abel Misraim goar ni pangulonon i didok halak, na di bariba ni Jordan.

¹²Dung i dipatupa angka anak ni si Israel ma tu ibana, songon naung tinonahonna i tu nasida.

¹³Diusung angka anakna i ma ibana tu tano Kanaan, jala ditanom ibana di liang ni hauma Makpelah, tondong ni Mamre, na tinuhor ni si Abraham rap dohot hauma i sian si Epron, marga Het i, bahen parbandaan hapunjungan.

¹⁴(II.) Jadi dung ditanom nasida amana i, mulak ma si Josep tu tano Misir, ibana dohot angka hahaanggina i, dohot sude angka na nangkok rap dohot ibana mananom amana i.

¹⁵Alai mabiar do angka hahaanggi ni si Josep, dung mate amanasida i, angka ninna nasida ma: Atek tung beha dihosom si Josep hita maon, gabe dipasudol tu hita sude na roa, na itabahen i tu ibana.

¹⁶ Jadi martona ma nasida tu si Josep, ninna: Hata ni amanta tu hami, tagan so mate dope ibana:

¹⁷ Songon on ma dok hamu tu si Josep: Sai marpamuati ma roham di hajahaton ni hahaanggim dohot di dosanasida i, ai tung na roa do na binahennasida i tu ho; on pe, sai marpamuati ma roham di hajahaton ni angka naposo ni Debata ni amanta i! Alai tangis do anggo si Josep, dung didok nasida songon i tu ibana.

¹⁸ Dung i laho dohot angka hahaanggina i, marsinggang ma nasida tu jolona, angka ninna ma: Ida ma hami on, naposom ma hami.

¹⁹ Dung i ninna si Josep ma mandok nasida: Unang hamu mabiar, ai nda guru di Debata do nang ahu?

²⁰ Na jat do nian tutu tahi ni rohamuna dompak ahu, alai na denggan do hapatean ni dibahen Debata, patupahon songon na niidamuna sadari on, laho pangoluhon bangso na bolon.

²¹ On pe, unang mabiar hamu, ahu ma marmuduhon hamu dohot anakkonmuna i. Dung i diapul ma nasida pasabamhon rohanasida.

²² (III.) Jadi maringan di tano Misir ma si Josep, ibana dohot isi ni jabu ni amana i, jala mangolu si Josep saratus sampulu taon lelengna.

²³Jadi sanga diida si Josep pinompar ni si Epraim ro di sundut patoluhon; angka anak ni si Mahir pe, tubu ni si Manasse, tu ampuan ni si Josep do ditubuhon.

²⁴Dung i didok si Josep ma tu angka hahaanggina i: Na mate ma anggo ahu, alai sai tingkiron ni Debata do hamu sogot, jala togihononna hamu ruar sian tano on tu tano na niuarihonna i tu si Abraham, si Isak dohot tu si Jakkob.

²⁵Dung i dipatolon si Josep ma angka anak ni si Israel, ninna ma: Sai na tingkiron ni Debata do hamu sogot, ingkon boanonmu ma dohot holiholingku sian on!

²⁶Jadi mate ma si Josep marumur saratus sampulu taon, gabe dihapuri nasida ibana, jala dipamasuk ibana tu bagasan batang di tano Misir.

Keluaran

1 ¹ (I.) On ma goargoar ni halak Israel, angka na ro tu tano Misir udur dohot si Jakkob; ro be do nasida dohot donganna sajabu.

² Si Ruben, Simeon, Lepi dohot Juda.

³ Isasar, Zebulon dohot Benjamin.

⁴ Dan dohot Naptali, Gad dohot Aser.

⁵ Jadi saluhut hosa angka na ruar sian gonting ni si Jakkob pitupulu halak do; alai anggo si Josep, nunga di tano Misir hian.

⁶ Dung i mate ma si Josep dohot sude hahaanggina i dohot sandok na sansundut i.

⁷ Dung i lam torop mabue ma anak ni Israel, marpinompari nasida, jala lam deak, jala lam marhuaso situtu, pola gok tano i dibahen nasida.

⁸ (II.) Alai bangkit ma muse sada raja na imbaru gumomgom Misir, na so tumanda si Josep.

⁹ Jadi didok ma tu bangsona: Ida ma, nunga gabe sada bangso halak Israel, tumorop jala gumogo sian hita.

¹⁰ Tole ma, itabisuki ma nasida, asa unang be lam ganda; atek tung beha tubu hamusuon, jadi dohot nasida maon marbalik gabe satahi dohot musunta jala mangalo hita, jala haruar sian tano on.

¹¹ Jadi dipabangkit ma angka mandur mangarodi nasida, asa dipaporsukporsuk nasida marhitehite ulaon na dokdok; gabe dipauli ma huta Pitom dohot Ramses bahen parpeopan ni ugasan ni raja Firaun.

¹² Hape lam dipaporsukporsuk nasida, lam torop nasida jala rarat, gabe lam tahuton nasida mida halak Israel.

¹³ Jadi gogo ma dibahen halak Misir marhatobanhon halak Israel.

¹⁴ Jadi marsingkor ma diahap nasida dibahen renge ni ulaon, pauli tano liat bahen tano takko dohot dibahen nasa ulaon di balian ro di sude ulaonnasida na asing, na niulanasida sian utang na so tarjua.

¹⁵ (III.) Dung i ninna raja ni Misir ma tu angka sibaso ni halak Heber, goar ni na sada Sipra, goar ni na sada nari Pua.

¹⁶ Ninna ma: Molo diurupi hamu boru ni halak Heber laho mangintubu, jala diida hamu di atas sapa paridian, molo tung baoa bunu hamu, alai molo boruboru atenang pangolu hamu.

¹⁷ Alai mabiar do angka sibaso i mida Debata, jadi ndang dibahen nasida songon na nidok ni raja ni Misir i tu nasida, dipangolu nasida do angka posoposo baoa.

¹⁸ Jadi ditonahon raja ni Misir i ma angka sibaso, didok ma tu nasida: Boasa tung songon i bahenonmuna, tung dipangolu hamu angka posoposo baoa?

¹⁹Jadi ninna angka sibaso i ma tu raja Firaun: Ndang songon boru Misir anggo boru Heber, ai togap do nasida, ndang dope ro sibaso i tumopot nasida, nunga sahat ditubuhon.

²⁰Jadi ala ni ditumpak Debata ma angka sibaso i, lam tamba ma bangso i, jala tongam situtu.

²¹Jadi ala dihabiaru angka sibaso i Debata, gabe dibahen ma angka bagas di nasida.

²²Dung i dipatik raja Firaun ma sandok na nirajaanna, ninna ma: Nasa posoposo baoa tu batang aek Nil ma danggurhon hamu, alai nasa parompuan pangolu hamu.

2¹ (I.) Dung i adong ma sada halak sian pomparan ni si Lepi jala dibuat sada boru Lepi bahen jolmana.

²Dung i gabegabean ma jolmana i, jala ditubuhon anak sada. Jadi dung diida mansai uli rupana, ditabunihon ma ibana tolu bulan lelengna.

³Alai dung so tarbunihonsa be, dibuat ma sada poti sian arung, jala dipauli huhut didamari, dung i dipeakkon posoposo i tu bagasan, ditaruhon ma i tu bagasan arung na di pasir ni batang aek i.

⁴Alai jongjong ia ibotona i manatapnatap, asa diboto manang beha bahenonna tu ibana.

⁵Dung i tuat ma boru ni raja Firaun naeng maridi di bagasan batang aek i: Sai mardalandalan di pasir ni aek i anggo angka

naposona boruboru. Jadi dung diida poti na metmet i di tongatonga ni arung i, gabe disuru ma naposona mangalap.

⁶Jadi dung diungkap, diida ma posoposo i jala ida ma sai tumatangis posoposo i, jadi asi ma rohana mida ibana, ninna ma: Sian angka posoposo ni halak Heber do on.

⁷Dung i ninna ibotona i ma tu boru ni raja Firaun: Beha ia laho ahu manjou sada inaina panusuan sian boru ni halak Heber, asa dipasusu posoposo i di ho?

⁸Jadi ninna boru ni raja Firaun ma tu ibana: Antong laho ma ho. Jadi laho ma angkora i, jala dijou ina ni posoposo i.

⁹Dung i ninna boru ni raja Firaun i ma tu ibana: Boan ma posoposo on jala pasusu di ahu, hulehon pe upam. Jadi dibuat inaina i ma posoposo i, jala dipasusu.

¹⁰Jadi dung magodang posoposo i, ditaruhon ma tu boru ni raja Firaun gabe diain ma i bahen anakna, jala dibahen goarna si Musa, ai sian aek do ibana huenet, ninna.

¹¹(II.) Dung i di angka ari i, dung magodang si Musa, ruar ma ibana tumopot angka hahaanggina i, asa diida pardangolannasida. Jadi diida ma sada halak Misir, na mambalwali sada halak Heber sian hahaanggina i.

¹²Dung i dibereng ma humaliang, jadi dung diida, ndang adongjolma disi, gabe dibunu ma halak Misir i, jala dipanguspangus ibana tu horsik.

¹³Ruar muse ibana di ari paduahon, jadi ida ma, dua halak Heber marbadai. Jadi ninna ma tu parsala i: Boasa balbalanmu donganmon?

¹⁴Alai ninna bayo i ma: Ise pabangkit ho bahen sintua dohot panguhum di hami? Naeng bunuonmu ahu huroha, songon na binunum isi ni Misir i? Jadi mabiar ma si Musa, ninna ma: Tongon do, nunga tarbortik hata i.

¹⁵Sar ma barita i tu raja Firaun, jadi dilului ma si Musa naeng bunuonna. Alai lintun ma si Musa sian jolo ni raja Firaun, mangulon ma ibana di tano Midian, hundul ibana di lambung ni sada sumur.

¹⁶Alai pitu do boru ni malim di Midian, angka na ro manahui, asa digohi parsoburan, laho pasoburhon birubiru ni amanasida.

¹⁷Alai ro ma angka parmahan mangonjaronjar nasida. Jadi hehe ma si Musa mangurupi nasida jala dipasobur birubirunasida i.

¹⁸Ia dung sahat nasida tu si Reguel, amanasida i, ninna ibana ma: Boasa tung songon i tibu hamu muli sadari on?

¹⁹Jadi didok nasida ma: Adong tahe sada halak Misir, na palua hami sian tangan ni angka parmahan i, huhut sai ditahui di hami jala dipasobur angka birubiru i.

²⁰Dung i didok ma tu angka boruna i; alai didia ibana? Boasa tung tading baoa i bahenonmuna? Jou hamu ibana, asa mangan sagusagu.

²¹ Jadi mangoloi ma si Musa maisolat di halak i, gabe dilean ma boruna si Zippora bahenjolma ni si Musa.

²² Ditubuhon ma sada anak, dibahen ma goarna si Gerson, ai paisolat do ahu di tano na pulik, ninna.

²³ (III.) Dung i di laonlaon ni ari, mate ma raja ni Misir. Alai sai manganguhi ma halak Israel dibahen renge ni ulaonnasida, jala sahat ma angguhangguknasida i tu jolo ni Debata sian parhatobanan i.

²⁴ Dung i ditangihon Debata ma angguhangguknasida i, jala diingot padanna tu si Abraham, si Isak dohot si Jakkob.

²⁵ Jadi ditatap Debata ma halak Israel i, jala ditanda nasida.

3¹ (I.) Alai diparmahan si Musa do birubiru ni si Jetro, simatuana i, malim di Midian, jala diadu angka birubiru i salpu halongonan i, sahat ro di dolok ni Debata, i ma dolok Horeb.

² Dung i diida ma suruan ni Jahowa di bagasan api na marnalanala di tongatonga ni ramba. Dung i dibereng ma, jadi diida marsigorgor api di bagasan ramba i, alai ndang olo suda ramba i dipangan.

³ Jadi ninna si Musa ma: Ua laho ma ahu jumonok tahe, asa huida halongangan bolon on, ala ni aha umbahen so mosok ramba i.

⁴Alai dung diida Jahowa ibana ro naeng manilik, joujou ma Debata sian tongatonga ni ramba i, ninna ma mandok ibana: Jo Musa, Musa! Dison do ahu, ninna.

⁵Dung i ninna ma: Unang jumonok ho tuson, tanggali ma sipatum sian patmu, ai tano na badia do hajongjonganmon.

⁶Dung i ninna muse: Ahu do Debata ni ompum, Debata ni si Abraham, Debata ni si Isak dohot Debata ni si Jakkob. Jadi dihungkupi si Musa ma bohina, ai mabiar do ibana mamereng Debata.

⁷Dung i ninna Jahowa ma: Nunga tangkas huida pardangolan ni bangsongku na di tano Misir i, jala nunga hutangihon angguhangguknasida i maradophon angka na pasosaksosak nasida; ai nunga huboto parniahapannasida i.

⁸Ala ni umbahen tuat Ahu paluahon nasida sian tangan ni halak Misir, jala paruarhon nasida sian tano on tu tano na denggan jala na lambas, tu tano habaoran ni susu dohot situak ni loba, tu tano inganan ni halak Kanaan dohot Het i dohot Amori dohot Perisi dohot Hevi dohot Jebusi.

⁹On pe, ida ma, nunga sahat angguhangguk ni halak Israel tu Ahu, nunga huida huhut pangarupaon, na binahen ni halak Misir tu nasida.

¹⁰On pe, laho ma ho, suruonku ma ho tumopot raja Firaun, asa di paruar ho bangsongku, halak Israel i sian Misir.

¹¹Alai ninna si Musa ma mandok Debata: Ise ma ahu pola, tung dapothononku raja Firaun i, tung paruaronku halak Israel sian Misir?

¹²Alai ninna Ibana ma: Hudongani pe ho, jala on ma tandam paboa Ahu marsuru ho: Ia dung diparuar ho bangso i sian Misir, oloanmuna ma Debata di lambung dolok on.

¹³Dung i ninna si Musa ma mandok Debata: Ida ma, ia dung sahat ahu di halak Israel, jala hudok tu nasida: Debata ni ompumuna marsuru ahu tu hamu, gabe didok nasida maon tu ahu: Ise do goarna? Beha ma dohononku tu nasida?

¹⁴(II.) Dung i ninna Debata ma tu si Musa: Ahu nuaeng Ahu sogot. Dung i ninna muse: Songon on do dohononmu tu halak Israel: Jahowa marsuru ahu tu hamu.

¹⁵Angkup ni didok Debata tu si Musa: Songon on do dohononmu tu halak Israel: Jahowa, Debata ni ompumuna, Debata ni si Abraham, Debata ni si Isak dohot Debata ni si Jakkob marsuru ahu tu hamu; i do goarhu ro di salelenglelengna jala goar parningotan di Ahu marsundutsundut.

¹⁶Laho ma ho, paluhut ma angka sintua ni Israel, jala dok ma tu nasida: Jahowa, Debata ni ompumuna na huida i, Debata ni si Abraham, Isak dohot Jakkob, mandok: Nunga

ditatap rohangku hamu, dohot na binahenna tu hamu di Misir.

¹⁷Nunga pola hudok: Sai paruaronku do hamu sian pardangolan Misir, tu tano ni halak Kanaan, dohot Het i, Amori. Perisi, Hevi, dohot Jebusi, tu tano habaoran ni susu dohot situak ni loba.

¹⁸Sai tangihononnasida do soaram, dung i laho ma ho dohot angka sintua ni halak Israel tumopot raja ni Misir, jala dohononmuna tu ibana: Jahowa, Debata ni halak Heber manjumpangkon hami. On pe, ua loas ma hami mardalan tu halongonan partoluarian, asa hupele hami Jahowa Debatanami.

¹⁹Alai nunga huboto hian, ndang loason ni raja sian Misir hamu mardalan, nang marhitehite tangan na gogo.

²⁰Alai patoltolonku ma tanganku, asa huhonahon tu Misir sude halongangan, angka sibahenonku di tongatonganasida, jala dung songon i paluaonna ma hamu.

²¹Dapotan asi ni roha pe bangso on sian halak Misir bahenonku, asa ia ruar nasida, unang ruar lumang boti.

²²Mangido ma ganup boruboru sian hombar bagasna dohot sian soranganna angka ulaula perak dohot ulaula sere dohot ulos, angka siampehononmuna tu anakmuna dohot tu borumuna, sintahanmuna sian Misir ma i.

4¹ (I.) Dung i ninna si Musa ma mangalusi:
Ida ma, ra tung ndang porsea nasida di

ahu, jala ndang tangihononna soarangki, dohononnasida ma tagamon: Nandang tutu diida ho Jahowa.

²Jadi ninna Jahowa ma tu ibana: Aha do i na di tanganmi? Tungkot do i, ninna.

³Dung i ninna Jahowa ma: Reongkon ma i tu tano! Jadi direongkon ma tu tano, gabe ulok ma i, jadi maporus ma si Musa maradophon ulok i.

⁴Alai ninna Jahowa ma tu si Musa: Surdukkon ma tanganmi, jala tangkup ihurna. Jadi disurdukkon ma tanganna manangkupsa, jadi sumuang gabe tungkot di bagasan tanganna.

⁵Porsea ma nasida bahenon ni, paboa naung diida ho Jahowa, Debata ni ompunasida, Debata ni si Abraham, Debata ni si Isak dohot Debata ni si Jakkob.

⁶Angkup ni didok Jahowa tu ibana: Ua surukkon tanganmi tu bagasan gedekgedekmi. Jadi disurukkon ma tanganna tu bagasan gedekgedekna, jala dienet muse, ida ma, nunga puruon tanganna, mamontar songon hapur.

⁷Dung i ninna Jahowa muse: Ulahi surukkon tanganmi tu gedekgedekmi, jadi diulahi tanganna tu gedekgedekna, jala dung dienet muse sian gedekgedekna, ida ma, nunga sumuang, songon sibukna hian.

⁸Molo so porsea nasida di ho, jala ndang ditangihon soara ni tanda parjolo i, sai

porsea do nasida bahenon ni soara ni tanda paduahon i.

⁹Alai molo so porsea nasida dohot di tanda paduahon on jala ndang ditangihon soaram, tahui ma aek sian batang aek i, jala usehon tu tano na mahiang, gabe mudar ma aek na binuatmi sian batang aek i, dung ro di na mahiang i.

¹⁰Alai ninna si Musa ma tu Jahowa: Iale Tuhanku, ianggo ahu ndangjolma parhata ahu, nang olat ni nantuari, nang olat ni nantuarisada, nang olat ni dung mangkatai Ho dohot naposom, ai dokdok do pamanganku jala hallang dilangku.

¹¹Dung i ninna Jahowa ma tu ibana: Tung ise ma mambahen marpamanganjolma i? Tung ise mambahen na ngungu manang na nengel, manang na marnida, manang na mapitung? Nda Ahu, Jahowa do?

¹²On pe, laho ma ho, hudongani pe pamanganmi, hupodahon pe tu ho sidohononmu.

¹³Dung i ninna si Musa muse: Iale Tuhan, ua suru ma manang ise lomo ni roham!

¹⁴Jadi tarrimas situtu ma Jahowa mida si Musa, didok ma: Nda disi do si Aron, hahami, marga Lepi, huboto do pande ibana mangkatai, ida ma huhut, ipe ruar ibana manjumpangkon ho, ia dung ho diida, las ma rohana di bagasan.

¹⁵ Dung i pangkulingi ma ibana, jala tuturhon angka hata i tu pamanganna, hudongani pe pamanganmu dohot pamanganna, hupodahon pe tu hamu sibahenonmuna.

¹⁶ Ibana pe singkatmu mandok tu bangso i, ibana hira pamanganmu, jala ho hira Debatana.

¹⁷ Tiop ma dohot tungkot on di bagasan tanganmu, hitehitem mambahen angka tanda i muse.

¹⁸ (II.) Dung i laho ma si Musa, mulak tu si Jetro, simatuana i, didok ma tu ibana: Ua loas ma ahu laho, asa mulak ahu tu hahaanggingku, angka na di Misir, asa huida, manang na mangolu dope nasida. Dung i ninna si Jetro ma tu si Musa: Laho ma ho mardamedame.

¹⁹ Dung i ninna Jahowa ma tu si Musa di Midian: Laho ma ho mulak tu Misir, ai nunga mate sude halak, angka na tumahi hosam.

²⁰ Jadi diboan si Musa ma jolmana dohot angka anakna, jala dipahundul nasida tu halode, asa mulak tu tano Misir. Ditiop si Musa huhut tungkot ni Debata di bagasan tanganna.

²¹ Dung i ninna Jahowa muse tu si Musa: Ingot ma di hamumulakmu tu tano Misir patupahon luhut halongangan, di jolo ni raja Firaun, angka na hupasahat tu tanganmu. Alai anggo Ahu patangkangonku ma rohana, asa unang diloas bangso i laho.

²²Dung i dohononmu ma tu raja Firaun: Songon on do hata ni Jahowa: Anakku sihahaan do Israel.

²³Alai hatangku tu ho: Loas ma anakku laho, asa dioloi Ahu. Molo tung manjua ho mangaloas ibana, ida ma, sai bunuonku do anak buhabajum.

²⁴Hape di tongan dalan dung sahat tu parbornginan, ro ma Jahowa manoro ibana, naeng mambunu.

²⁵Jadi dibuat si Zippora ma sada batu na tajom, jala disunat sibursibur ni anakna, jala direongkon tu lambung patna, jala ninna ma: Pangoli mudar do ho di ahu.

²⁶Jadi dipalua Jahowa ibana. Alai didok pe: Pangoli mudar, ala parsunaton i do.

²⁷(III.) Dung i ninna Jahowa ma tu si Aron: Laho ma ho manjumpangkon si Musa tu halongonan; jadi laho ma ibana, gabe pajumpang nasida di lambung dolok ni Debata, jala diumma ibana.

²⁸Jadi dipaboa si Musa ma tu si Aron sude hata ni Jahowa, na marsuru ibana dohot sude tanda, angka na tinonahonna tu ibana.

²⁹Jadi laho ma si Musa dohot si Aron, jala dipaluhut nasida ma sude angka sintua ni halak Israel.

³⁰Dung i dihatahon si Aron ma sude hata, angka na pinaboa ni Jahowa tu si Musa, jala dipatupa ma angka tanda di jolo ni bangso i.

³¹ Jadi porsea ma bangso i; jala dung dibege nasida panatap ni Jahowa di halak Israel, na tinatapna i pardangolannasida, mangunduk be ma nasida jala marsomba.

5¹ (I.) Dung i ditopot si Musa dohot si Aron ma raja Firaun didok ma: Boti tona ni Jahowa, Debata ni Israel: Loas ma laho bangsongki, asa marpesta nasida di Ahu di halongonan.

²Dung i ninna raja Firaun ma: Ise do Jahowa, tung ingkon tangihononku soarana mangaloas laho Israel? Nandang hupabotoboto Jahowa, Israel pe ndang huloas laho.

³Dung i ninna nasida ma: Na pajumpang do hami dohot Debata ni halak Heber, ua loas ma hami laho partoluarian tu halongonan, asa mamele hami tu Jahowa, Debatanami, asa unang dihonahon tu hami begu antuk manang podang.

⁴Dung i ninna raja ni Misir i ma tu nasida: Ia ho ale Musa dohot Aron, boasa tung lolaanmuna bangso i sian ulaonnasida? Laho ma hamu tumopot rodimuna.

⁵Angkup ni didok raja Firaun ma: Ida ma madeakku gariada bangso i di tano on, lam pasadionmuna nasida sian rodinasida.

⁶Ala ni dilehon raja Firaun ma di na sadari i parenta tu angka mandur dohot tu angka juaratulis di tongatonga ni bangso i, ninna ma:

⁷ Nandang jadi be lehononmuna durame tu bangso i mambahen tano takko, songon siap ari; nasida sandiri ma laho papungupungu durame.

⁸ Alai anggo bilangan ni tano takko, angka na binahennasida songon siap ari, tong do pangidoonmuna sian nasida, unang orui hamu sian i, ai angka sigurbak ulu do nasida, umbahen manganguhi nasida mandok: Laho ma hami mamele tu Debatanami.

⁹ Ingkon parengeon ulaon tu nasida, asa adong siulaonnasida, asa unang dipatangitangi hatahata gapgap.

¹⁰ Jadi ruar ma angka mandur ni bangso i dohot angka juaratulisna, angka didok nasida ma tu natorop i: Songon on do parenta ni raja Firaun: Nandang jadi be lehonon durame tu hamu.

¹¹ Hamu ma laho mangalului durame di hamu, manang didia jumpang hamu; alai ndang jadi moru anggo sian ulaonmuna.

¹² Jadi mampar ma na torop i tu sandok tano Misir papungupungu panabian singkat ni durame.

¹³ Jadi sai disosaksosak angka mandur i nasida, angka ninna ma: Pasun hamu ulaonmuna songon siap ari, songon uju na adong durame.

¹⁴ Jadi hona balbal ma angka sintua ni halak Israel, angka na pinabangkit ni mandur ni raja Firaun tu nasida, angka ninna ma: Boasa

so dipasidung hamu bilanganmuna tano takko songon siap ari, nang nantuari nang sadari on?

¹⁵(II.) Jadi ditopot angka sintua ni halak Israel ma raja Firaun, manganguhi ma nasida ninna: Boasa ma tung songon i bahenonmu tu angka naposom?

¹⁶Ndang be maruli durame angka naposom, sai bahen hamu tano takko, angka ninna mandok hami! Jala ida ma, hona linsing angka naposom, gabe dapotan dosa bangsom.

¹⁷Alai ninna raja i ma: Angka sigurbak ulu do hamu tongon, umbahen sai didok hamu: Loas ma hami laho mamele tu Jahowa.

¹⁸On pe, laho ma hamu, mangula ma hamu, ianggo durame ndang be lehonon tu hamu, alai sai lehon hamu bilangan ni tano takko i.

¹⁹Jadi diida angka sintua ni halak Israel ma sorimagonasida i, ala didok: Ndang jadi oruanmuna sian tano takko pinaulimuna songon siap ari.

²⁰Dung i di na ruar i nasida sian jolo ni raja Firaun, didapot nasida ma si Musa dohot si Aron, angka na jongjong mandapothon nasida.

²¹Angka didok ma tu nasida: Sai Jahowa ma marlulu dampak hamu dohot manguhum, ala binahenmuna hami hasomorani ni raja Firaun dohot angka naposona i mangalehon podang tu tangannasida mambunu hami.

²²Jadi mulak ma si Musa tumopot Jahowa, jala didok ma: Ale Tuhan, boasa ma tung paporsuhonmu bangso on? Boasa ma tung suruhononmu ahu tuson?

²³Ai olat ni dung bongot ahu tumopot raja Firaun mangkatai marhitehite goarmi, ganda do jahatna tu bangso on, jala ndang dipalua Ho bangsom.

6¹ (I.) Dung i ninna Jahowa ma tu si Musa: Idaonmu ma annon sibahenonku tu raja Firaun, ai marhitehite tangan na gogo loasonna ma hamu laho, jala marhitehite tangan na gogo onjaronna hamu sian tanona.

²Angkup ni didok Debata ma tu si Musa: Ahu do Jahowa, ninna.

³Jala hupapatar Ahu tu si Abraham, tu si Isak, dohot tu si Jakkob, margoar Debata na sun hinagogo, alai ndang dipabotoboto nasida ianggo goarhu Jahowa.

⁴Hupahot do huhut padanhu tu nasida, mangalehon tu nasida tano Kanaan, tano paisolatannasida.

⁵Jala nunga hutangihon angguhangguk ni halak Israel, angka na pinarhatoban ni halak Misir, jala marningot Ahu di padanhu.

⁶Dibahen i paboa ma tu halak Israel: Ahu do Jahowa, jala paruaronku do hamu sian angka ulaon rodi ni halak Misir, jala paluaonku do hamu sian parhatobanonnasida, jala tobusonku do hamu marhitehite tangan na toltol dohot marhitehite angka uhum godang.

⁷ Jala ainonku do hamu gabe bangsongku, Ahu gabe Debatamuna; asa diboto hamu, Ahu do Jahowa, Debatamuna, na paruar hamu sian ulaon rodi ni Misir.

⁸ Asa hutogihon hamu tu tano naung humangmangkon lehononku tu si Abraham, si Isak dohot tu si Jakkob. Lehononku ma i bahen partalianmuna, Ahu do Jahowa.

⁹ Dung i dipaboa si Musa ma songon i tu halak Israel. Alai ndang ditangihon nasida si Musa dibahen hagogotan ni tondi dohot dibahen ulaon na renge i.

¹⁰ Jadi didok Jahowa ma tu si Musa, ninna ma:

¹¹ Topot ma, dok ma tu Firaun, raja ni Misir, asa diloas halak Israel ruar sian tanona.

¹² Alai ninna si Musa ma di jolo ni Jahowa: Ida ma, gari halak Israel ndang ditangihon ahu, didia ma tagamon tangihonon ni raja Firaun ahu? Jala pardila na hallang do ahu.

¹³ Jadi didok Jahowa ma tu si Musa dohot tu si Aron jala dilehon parenta dohononnasida tu halak Israel dohot tu Firaun, raja ni Misir, asa diparuar halak Israel sian tano Misir.

¹⁴ (II.) On ma angka horongna marompuompu. Angka anak ni si Ruben, buhabaju ni si Israel: si Hanok dohot si Pallu, Hezron dohot Karmi; i ma angka ompu Sian si Ruben.

¹⁵ Ia angka anak ni si Simeon: Jemuel, Jamin, Ohad, Jakin, Zohar dohot Saul, anak

ni boru Kanaan; i ma angka ompu sian si Simeon.

¹⁶Ia angka goar ni anak ni si Lepi mangihuthon ompunasida be: si Gerson, Kohat dohot Merari; ia umur ni si Lepi saratus tolupulu pitu taon lelengna.

¹⁷Ia angka anak ni si Gerson: Libui dohot Simeu mangihuthon ompunasida be.

¹⁸Ia angka anak ni si Kohat: Amram, Isebar, Hebron dohot Usiel; ia umur ni si Kohat saratus tolupulu tolu taon lelengna.

¹⁹Ia angka anak ni si Merari: Mahli dohot Musi. I ma angka ompu ni si Lepi mangihuthon partubuna.

²⁰Alai dibuat si Amram ma si Jokhebed, namboruna i bahen jolmana, gabe ditubuhon ma di ibana si Aron dohot si Musa. Ia umur ni si Amram saratus tolupulu pitu taon lelengna.

²¹Ia angka anak ni si Isebar: Kora, Nepeg dohot Sikri.

²²Ia angka anak ni si Usiel: Misael, Elzapan dohot Sitri.

²³Alai dibuat si Aron ma si Eliseba, boru ni si Aminadab, iboto ni si Nahason bahen jolmana; jala ditubuhon di ibana si Nadab dohot si Abihu, si Eleasar dohot si Itamar.

²⁴Ia angka anak ni si Kora: Asir, Elkana dohot Abiasap; i ma angka ompu ni halak Kora.

²⁵Alai anggo si Eleasar, anak ni si Aron, dibuat do sada sian angka boru ni si Putiel

bahen jolmana, jala ditubuhon di ibana si Pinehas; i ma angka horong ni halak Lepi marompuompu mangihuthon marganasida be.

²⁶I ma si Aron dohot si Musa, na pinangkulingan ni Jahowa mandok tu nasida: Togihon hamu ma halak Israel ruar sian tano Misir mangihuthon pungan nasida be.

²⁷Nasida ma angka na mandok tu Firaun, raja sian Misir, asa ditogihon nasida halak Israel ruar sian Misir, i ma si Musa dohot si Aron.

²⁸Jadi di na sadari i dipangkulingi Jahowa si Musa di tano Misir.

²⁹Didok Jahowa ma tu si Musa: Ahu do Jahowa, patolhas ma tu Firaun, raja ni Misir, sude hata na hutonahon tu ho.

³⁰Alai ninna si Musa ma di jolo ni Jahowa: Ida ma, pardila na hallang do ahu, didia ma tagamon tangihonon ni Firaun i ahu.

7¹(I.) Alai ninna Jahowa ma tu si Musa: Ida ma, nunga hupabangkit ho gabe Debata ni raja Firaun, ia si Aron, hahami gabe panurirangmu.

²Hatahononmu ma sude hata na hutonahon tu ho, jala si Aron hahami paboahon tu raja Firaun, asa diloas halak Israel ruar sian tanona.

³Alai anggo Ahu, patangkangonku ma roha ni raja Firaun, asa hupatorop angka tanda dohot halongangan di tano Misir.

⁴Jala ndang tangihonon ni raja Firaun hamu, asa huampehon tanganku tu Misir, jala huparuar angka punguanku, i ma bangsongku, halak Israel i sian tano Misir marhitehite uhum angka na balga.

⁵Asa tung diboto halak Misir, Ahu do Jahowa, molo hupatoltol tanganku tu atas Misir, jala huparuar halak Israel sian tongatonganasida.

⁶Jadi dibahen si Musa dohot si Aron ma, songon na tinonahon ni Jahowa tu nasida, songon i dibahen nasida.

⁷Alai ualupulu taon ma umur ni si Musa, ia umur ni si Aron ualupulu tolu taon, di na mangkatai nasida dohot raja Firaun.

⁸Dung i ninna Jahowa ma tu si Musa dohot tu si Aron songon on:

⁹Molo didok raja Firaun mandok hamu: Patupa hamu sada halongangan, jadi dohononmu ma tu si Aron: Buat ma tungkotmi, jala timpalhon tu jolo ni raja Firaun, gabe ulok ma i.

¹⁰Dung i ditopot si Musa dohot si Aron ma raja Firaun, jala dibahen nasida ma songon na tinonahon ni Jahowa, ditimpalhon si Aron ma tungkotna i tu jolo ni raja Firaun dohot tu jolo ni angka naposona, gabe ulok ma i.

¹¹Dung i ditonahon raja Firaun ma ro dohot angka partondung dohot angka parsibalik mata. Jadi dohot ma nasida, angka parsibalik mata ni Misir mambahen songon i marhitehite tabasnasida.

¹²Dipantimpalhon be ma tungkotna, gabe ulok ma angka i; alai dibondut tungkot ni si Aron ma tungkotnasida i.

¹³Jadi tangkang ma roha ni raja Firaun, jala ndang ditangihon nasida, songon na nidok ni Jahowa hian.

¹⁴(II.) Dung i ninna Jahowa ma tu si Musa: Na tangkang do roha ni raja Firaun, dijua do mangaloas laho bangso i.

¹⁵Laho ma ho sogot manogot i tumopot raja Firaun; ida ma na ruar do ibana tu aek, dapothon ma ibana tu pasir ni batang aek i, jala tiop ma di bagasan tanganmu tungkot na gabe ulok i.

¹⁶Jala dok ma tu ibana: Jahowa, Debata ni halak Heber marsuru ahu tumopot ho mandok tu ho: Loas ma bangsongku laho, asa disomba Ahu di halongonan; alai ida ma, ndang ditangihon ho rasirasa nuaeng.

¹⁷Boti didok Jahowa: Botoonmu ma sian tanda on, paboa Ahu do Jahowa: Ida ma, lipathononku ma tungkot na di bagasan tanganku tu aek na di bagasan batang aek i, jadi muba ma i gabe mudar.

¹⁸Jadi mate ma dengke na di bagasan batang aek i, jala bau batang aek i, jala gialan halak Misir manginum aek sian batang aek i.

¹⁹Dung i ninna Jahowa ma tu si Musa: Dok ma tu si Aron: Buat ma tungkotmi, jala patoltol tanganmi tu atas aek angka na di tano Misir, tu atas ni angka batang aek di

nasida, tu atas ni angka halian aek, tu atas ni angka ambar dohot tu atas ni saluhut angka parpunguan aek, asa gabe mudar saluhut, gabe mudar di sandok tano Misir, nang di bagasan poting, nang di bagasan panguhatan.

²⁰Jadi dibahen si Musa dohot si Aron ma, songon na tinonahon ni Jahowa, dihindat ma tungkot i tu ginjang, jala dilipathon tu aek, na di bagasan batang aek i di jolo ni raja Firaun dohot di jolo ni angka naposona, jadi muba ma sude aek na di bagasan batang aek i, gabe mudar.

²¹Jadi rage ma dengke, angka na di bagasan batang aek i jala bau batang aek i, jala ndang tarinum halak Misir aek na sian batang aek i, ai gabe mudar do i di sandok tano Misir.

²²Alai angka parsibalik mata ni Misir pe dibahen do songon i marhitehite tabasnasida, jadi laos tangkang ma roha ni raja Firaun, jala ndang ditangihon nasida, songon na nidok ni Jahowa hian.

²³Dung i humusor ma raja Firaun laho muli tu jabuna, laos so mangilala rohana, nang disi.

²⁴Alai saluhut halak Misir mangkali aek siinumon humaliang batang aek i, ai ndang tarinum nasida aek na sian batang i.

²⁵Pola gok pitu borngin lelengna, dung dilipati Jahowa badan i.

8¹ (I.) Dung i ninna Jahowa ma tu si Musa: Laho ma ho tumopot raja Firaun, jala dok ma tu ibana: Boti tona ni Jahowa: Loas ma laho bangsongki, asa disomba nasida Ahu.

² Alai molo dijua ho mangaloas laho, ida ma, toruanku ma sandok gongomanmu marhitehite angka tohuk.

³ Asa gumamang batang aek i dibahen tohuk, angka na manjangkiti jala bongot tu jabum dohot tu bilut podomanmu ro di hasurmu dohot tu bagas ni angka naposom dohot tu bangsom dohot tu tatarangmi dohot tu pangananmu.

⁴ Jangkitan ni angka tohuk ma ho dohot bangsom ro di angka naposom.

⁵ Dung i ninna Jahowa ma tu si Musa: Dok ma tu si Aron: Patoltol ma tanganmu dohot tungkotmu tu ginjang ni angka batang aek, angka halian aek dohot tu ginjang ni angka ambar panangkokkon angka tohuk tu tano Misir.

⁶ Jadi dipatoltol si Aron ma tanganna tu ginjang ni aek angka na di Misir, gabe nangkok ma angka tohuk jala ditutup tano Misir.

⁷ Dung i dibahen angka parsibalik mata ma huhut songon i marhitehite tabasnasida, gabe dipanangkok ma angka tohuk di tano Misir.

⁸ Dung i dijou raja Firaun ma si Musa dohot si Aron, didok ma: Martangiang ma hamu tu Jahowa, asa dipadao angka tohuk i sian ah

dohot sian bangsongku, huloas bangso i, asa mamele nasida tu Jahowa.

⁹Dung i ninna si Musa ma tu raja Firaun: Guru dokmu ahu, andigan ma ondihononku ho dohot angka naposom dohot bangsom asa diragehon angka tohuk i sian ho dohot sian angka jabum, holan di bagasan batang aek i tading.

¹⁰Jadi ninna raja i ma: Antong marsogot ma. Songon na nidokmi ma ninna si Musa, asa tung ditanda ho, ndang adong manang ise songon Jahowa Debatanami.

¹¹Ingkon munsat angka tohuk i sian ho dohot sian angka bagasmu dohot sian angka naposom dohot sian bangsom; holan di bagasan batang aek i tading.

¹²Jadi ruar ma si Musa dohot si Aron sian jolo ni raja Firaun, dung i manganguhi ma si Musa tu Jahowa ala hata tohuk, angka na pinarona tu raja Firaun.

¹³Jadi dibahen Jahowa ma songon na nidok ni si Musa, marriagean ma angka tohuk i sian angka bagas, sian angka alaman dohot sian angka ladang.

¹⁴Jadi dipagugun nasida ma angka bangke i margugugun, gabe bau ma tano i.

¹⁵Alai dung diida raja Firaun nunga lumumbang, gabe dipatangkan ma rohana, jala ndang ditangihon hatanasida, songon na nidok ni Jahowa hian.

¹⁶(II.) Dung i ninna Jahowa ma tu si Musa:
Dok ma tu si Aron: Patoltol ma tungkotmi,
jala lipathon tu orbuk ni tano i, asa gabe
rongit ranggas ma i di sandok tano Misir.

¹⁷Jadi dibahen nasida ma songon i, dipatoltol
si Aron ma tanganna tumiop tungkotna, jala
dilipathon tu orbuk ni tano i, gabe rongit
ranggas ma i dijolma dohot di pinahan; nasa
orbuk ni tano i manjadi rongit ranggas di
sandok tano Misir.

¹⁸Angka parsibalik mata pe dibahen ma
songon i marhitehite tabasnasida, parohon
angka rongit ranggas nian, hape ndang
tarjadisa. Jadi disonggopi angka rongit
ranggas i majolma dohot pinahan.

¹⁹Jadi ninna angka parsibalik mata ma tu
raja Firaun: Jadijadian ni Debata do i. Alai
laos tangkang do anggo roha ni raja Firaun,
jala ndang ditangihon hatanasida, songon na
nidok ni Jahowa hian.

²⁰(III.) Dung i ninna Jahowa ma tu si Musa:
Pasogot ma manogot i hehe mandapothon tu
jolo ni raja Firaun; ida ma, ruar do ibana laho
tu aek, dok ma tu ibana: Songon on do tona
ni Jahowa: Loas ma bangsongku laho, asa
disomba nasida Ahu.

²¹Ai molo so loasonmu bangsongku laho, ida
ma paroону ma dompak ho dohot dompak
angka naposom dohot dompak bangsom
dohot dompak angka bagasmu angka
gulomitgulomit, asa gok gulomitgulomit

angka bagas ni halak Misir dohot tano inganannasida i.

²²Marhasurungan ma bahenonku di ari na sasada i anggo tano Gosen inganan ni bangsongki, na so tupa adong disi gulomitgulomit, asa ditanda ho, paboa Ahu, Jahowa di tongatonga ni tano i.

²³Patindangonku ma haluaon di holangkolang ni bangsongku dohot bangsomu; marsogot ma masa tanda i.

²⁴Jadi dibahen Jahowa ma songon i; ro ma marhulalan angka gulomitgulomit tu bagas ni raja Firaun dohot tu bagas ni angka naposona, ro di sandok tona Misir; tung siap do tano i dibahen angka gulomitgulomit i.

²⁵Jadi dijou raja Firaun ma si Musa dohot si Aron, jala didok ma: Laho ma hamu mamele tu Debatamuna di tano on.

²⁶Alai ninna si Musa ma: Ndang jadi songon i bahenon, ai pantang ni halak Misir pelehononnami tu Jahowa Debatanami; ida ma, ia hupelehon hami pantang ni halak Misir di jolonasida, nda dangguran nasida ma hami dohot batu?

²⁷Loas ma hami mardalan tu halongonan partoluarian mamele tu Jahowa, Debatanami, songon na nidokna i tu hami.

²⁸Jadi ninna raja Firaun ma: Antong huloas pe hamu laho, asa mamele hamu tu Jahowa, Debatamuna, di halongonan, asal unang

madaohu hamu laho, jala tangiangkon hamu ahu.

²⁹Dung i ninna si Musa ma: Ida ma, ruar ma ahu sian lambungmon, jala martangiang pe ahu tu Jahowa, asa dipadao marsogot angka gulomitgulomit i sian Firaun, sian angka naposona dohot sian bangsona, asal unang be dipaotooto Firaun hami, so loasonna bangso i laho mamele tu Jahowa.

³⁰Jadi ruar ma si Musa sian lambung ni Firaun, jala martangiang ibana tu Jahowa.

³¹Jadi dibahen Jahowa ma songon na nidok ni si Musa, dipadao ma gulomitgulomit i sian Firaun, sian angka naposona dohot sian bangsona, ndang tading nanggo sada.

³²Hape dipatangakang raja Firaun do rohana, nang sahali on, jala ndang diloas laho bangso i.

9¹ (I.) Dung i ninna Jahowa ma tu si Musa: Laho ma ho tumopot Firaun jala dok ma tu ibana: Songon on do tona ni Jahowa, Debata ni halak Heber: Loas ma bangsongku laho, asa disomba nasida Ahu.

²Ai molo manjua ho mangaloas nasida laho, sai gogo bahenonmu maniopi nasida.

³Ida ma, mangonai ma tangan ni Jahowa tu pinahanmu na di ladang tu angka hoda, halode, unto, lombu dohot tu angka birubiru, hona bondil na rahat situtu.

⁴Jala marhasurungan pamelok ni Jahowa di pinahan ni halak Israel sian pinahan ni halak

Misir, ndang adong mate sian sandok pinahan ni halak Israel, nanggo sada.

⁵Dung i dibuhul Jahowa ma tingkina, marsogot ma, ninna bahenon ni Jahowa na nidokna ondeng tu tano i.

⁶Jadi marsogotna i dibahen Jahowa ma songon i: Marragean ma sandok pinahan ni halak Misir, alai sian pinahan ni halak Israel, ndang adong mate nanggo sada.

⁷Jadi disuru Firaun ma maningkir, jala ida ma, ndang adong mate sian pinahan ni Israel, nanggo sada. Alai laos tangkang anggo roha ni Firaun, jala ndang diloas laho bangso i.

⁸(II.) Dung i ninna Jahowa ma tu si Musa dohot tu si Aron: Gomaki hamu ma sirabun sian tataring, gok tanganmuna, jala disampakkon si Musa ma i dompak langit di jolo ni Firaun.

⁹Asa gabe orbuk do i tu sandok tano Misir, jala songgop tujolma dohot tu pinahan, gabe baro na mapultak, gabe ngenge na birong di sandok tano Misir.

¹⁰Jadi digomahi nasida ma sirabun sian tataring, jala didapothon tu jolo ni Firaun, gabe disampakkon si Musa ma i dompak langit, manjadi baro ma i, ngenge na birong angka na mapultak di jolma dohot di pinahan.

¹¹Jadi ndang tarbahen angka parsibalik mata jongjong di jolo ni si Musa, dibahen angka baro i, ai baro on do nang angka parsibalik mata dohot sude halak Misir.

¹²Alai dipatangkan Jahowa do anggo roha ni Firaun; jadi ndang ditangihon hatanasida, songon na nidok ni Jahowa hian tu si Musa.

¹³(III.) Dung i ninna Jahowa ma tu si Musa: Pasogot ma manogot mandapothon tu jolo ni Firaun, jala dok ma tu ibana: Songon on do tona ni Jahowa, Debata ni halak Heber: Loas ma bangsongku laho, asa disomba nasida Ahu.

¹⁴Ai anggo sahali on tongosonku ma saluhut torutorungku tu roham dohot tu angka naposom dohot tu bangsom, asa tung ditanda ho, na so adong songon Ahu on di sandok tano on.

¹⁵Ai patoltolonku ma nuaeng tanganku jala honahononku ma tu ho dohot tu bangsom begu antuk, asa tung siap ho sian tano on.

¹⁶Ala ni do antong umbahen na hupatindang ho, asa hupataridahon tu ho gogongku, jala asa tung tarbarita Goarhu di liat portibi on.

¹⁷Sai datdatanmu dope mangalo bangsongki, ndang loasonmu nasida laho?

¹⁸Ida ma, marsogot songon on paroonku ma udan ambolas na por situtu, na so dung masa songon i di tano Misir, olat ni ari haoojakna rasirasa nuaeng.

¹⁹On pe suru ma papunguhon pinahanmu ro di sude ugasanmu na di ladang; nasajolma dohot pinahan na jumpang di ladang, so pinapungu tu jabu, ia dapot ditinggang ambolas i nasida, rage ma i.

²⁰Manang ise sian angka naposo ni Firaun na mabiar mida hata ni Jahowa diluahon ma angka naposona dohot pinahanna tu jabu.

²¹Alai manang ise na so marateatehon hata ni Jahowa, dipasombu ma angka naposona dohot pinahanna di ladang.

²²Dung i ninna Jahowa ma tu si Musa: Patoltol ma tanganmu dompak langit, asa ro udan ambolas tu sandok tano Misir, honajolma dohot pinahan ro di nasa suansuanan di tano Misir.

²³Jadi dipatoltol si Musa ma tungkotna dompak langit, gabe diparo Jahowa ma ronggur dohot udan ambolas, sumiksaksiksak huhut hilap tu tano on. Jadi diparo Jahowa ma udan ambolas tu tano Misir.

²⁴Alai ro udan ambolas mardongan api na marhimpalhimpal di tonga ni ambolas i, na por situtu, ndang dung songon i masa di sandok tano Misir, olat ni dung gabe bangso Misir i.

²⁵Jadi ditinggang udan ambolas i ma sandok na di ladang di sandok tano Misir, sianjolma ro di pinahan ro di nasa suansuanan di ladang ditinggang udan ambolas i jala digashon ma sude hau di ladang.

²⁶Holan di tano Gosen, na niingan ni halak Israel, ndang masa udan ambolas.

²⁷(IV.) Dung i disuru Firaun ma manjou si Musa dohot si Aron, jala didok tu nasida: Nunga mardosa ahu anggo sahali on; na tigor

do Jahowa, alai anggo ahu dohot bangsongki halak parjahat do.

²⁸ Martangiang ma hamu tu Jahowa, nunga sae masa angka soara ronggur ni Debata dohot udan ambolas i, huloas pe hamu laho, asa unang be hamu tinggal dison.

²⁹ Jadi didok si Musa ma tu ibana: Disi ruar ahu sian huta i, paherbangonku ma tanganku dampak Jahowa; mansohot ma angka soara ronggur, jala ndang be ro udan ambolas, asa tung ditanda ho, gok di Jahowa do tano on.

³⁰ Alai anggo ho dohot angka naposom, huboto hian do na so mabiar hamu maradophon Debata Jahowa.

³¹ Ilanggo hori dohot eme dapotsa ditinggang, ai boltok do ia eme, bibi ia hori.

³² Alai anggo singkoru eme dohot hadio ndang ditinggang, ai umpudi do i.

³³ Dung i ruar ma si Musa sian lambung ni Firaun tu balian huta, jala dipaherbang tanganna dampak Jahowa, jadi mansohot ma angka soara ni ronggur dohot ambolas, udan i pe ndang be use tu tano i.

³⁴ Alai dung diida Firaun naung mansohot udan dohot ambolas dohot angka soara ni ronggur dipatanggang rohana, ibana nang naposona.

³⁵ Jadi laos tangkang roha ni Firaun, jala ndang diloas laho halak Israel songon na nidok ni Jahowa hian marhitehite si Musa.

10¹ (I.) Dung i ninna Jahowa ma tu si Musa: Laho ma ho tumopot Firaun, ai nunga hupatangkan rohana dohot roha ni angka naposona, asa hupatupa angka tandangkan di tongatongana.

²Asa dipajojor ho sogot tu pinggol ni anakmu dohot pahompum, na hubahen i di Misir dohot tandangu angka na hupatindang di tongatonganasida, asa tung diboto hamu, Ahu do Jahowa.

³Jadi laho ma si Musa dohot si Aron tumopot Firaun, jala didok ma tu ibana: Songon on do tona ni Jahowa, Debata ni halak Heber: Sadia leleng on juaonmu paundukkon roham maradophon Ahu? Loas ma laho bangsongku, asa disomba nasida Ahu.

⁴Alai molo manjua ho mangaloas bangsongku laho, ida ma paroongku ma marsogot angka sihapor tu gomgomani.

⁵Asa ditutup sihapor i sisik ni tano i, pola ndang tarida tano i jala panganonna ma ebaeba ni na malua, na tading di hamu sian udan ambolas i, jala gagatonna ma saluhut hau, angka na martumbur di hamu di ladang.

⁶Jala gohan ni sihapor ma bagasmu dohot angka bagas ni saluhut naposom dohot angka bagas ni sandok halak Misir; na so dung songon i diida angka amam dohot angka ompum olat ni ari, dung adong nasida di tano on rasirasa sadari on. Dung i humusor ma si Musa jala ruar sian lambung ni Firaun.

⁷ Dung i didok angka naposo ni Firaun ma tu ibana: Sadia leleng on sambil on ni bayo on hita? Loas ma laho halak i, asa disomba nasida Jahowa, Debata nasida i; ndang dope mamoto roham naung mago Misir?

⁸ Jadi mulak ma si Musa dohot si Aron diboan tu jolo ni Firaun, gabe didok raja i ma tu nasida: Laho ma hamu, somba hamu ma Jahowa, Debatamuna i! Ise do tahe angka na laho i?

⁹ Dung i didok si Musa ma: Saluhut hami naeng laho angka dakdanaknami dohot na tuatanami, udur dohot anaknami dohot borunami, birubirunami dohot lombunami, ai pesta ni Jahowa masa di hami.

¹⁰ Jadi didok raja i ma tu nasida: Songon pangaloashu di hamu dohot di posoposomuna laho, songon i ma pandongani ni Jahowa di hamu. Ida ma, nda na jat do tahi ni rohamuna?

¹¹ Nandang songon i ua hamu angka baoa ma laho jala marsomba tu Jahowa, ai i do na pinangidomuna hian. Jadi dipabali ma nasida sian adopan ni Firaun.

¹² Dung i ninna Jahowa ma tu si Musa: Patoltol ma tanganmu dompak tano Misir ala angka sihapor, asa manaek nasida tu tano Misir, jala digagat nasa suansuanan ni tano i, nasa na tinebahon ni udan ambolas i.

¹³ Jadi dipatoltol si Musa ma tungkotna tu ginjang ni tano Misir, gabe diparo Jahowa ma

alogo sian purba tu tano i manipat sadari savorngin lelengna; tole manogotna i diboan alogo sian purba ma angka sihapor.

¹⁴Jadi manaek ma angka sihapor tu sandok tano Misir jala songgop tu sandok gomgoman Misir mansai torop, ndang dung songon i tudosanna sihapor na sai laon, nang sogot.

¹⁵Ai tung ditutup do sisik ni sandok tano i, pola holom tano i dibahen, gabe digagat ma sude suansuanan ni tano i ro di sude parbue ni hau, angka na tinebahon ni ambolas i, jadi ndang adong tading agia aha na rata di hau dohot di suansuanan ni ladang di sandok tano Misir.

¹⁶Jadi humalaput ma Firaun manjou si Musa dohot si Aron, jala didok ma: Nunga mardosa ahu dompak Jahowa, Debatamuna i dohot dompak hamu.

¹⁷On pe, sai marpamuati ma roham di dosangki sahali on dope, jala martangiang ma hamu tu Jahowa, Debatamuna, asa dipadao sian ahu holan hamatean on na ma.

¹⁸Jadi ruar ma si Musa sian lambung ni Firaun, jala martangiang tu Jahowa.

¹⁹Jadi, dipasuhar Jahowa ma alogo sian hasundutan mansai pur, gabe dilualua ma angka sihapor jala direongkon tu laut arung, ndang adong tading sihapor nanggo sada di sandok gomgoman Misir.

²⁰Alai dipatangkan Jahowa do roha ni Firaun, jala ndang diloas laho halak Israel i.

²¹ (II.) Dung i didok Jahowa ma tu si Musa: Patoltol ma tanganmu dompak langit asa masa na holom marimpotimpot tu tano Misir, pola dadapdadapjolma dibahen na holom.

²² Jadi dipatoltol si Musa ma tanganna dompak langit, gabe masa ma na holom marimpotimpot di sandok tano Misir tolu borngin lelengna.

²³ Nandang diida manang ise donganna, jala ndang hehe manang ise sian ingananna, na tolu borngin i. Alai anggo di sandok halak Israel torang do di inganannasida.

²⁴ Jadi dijou Firaun ma si Musa, jala didok ma: Laho ma hamu, marsomba ma hamu tu Jahowa, holan birubirumuna dohot lombumuna tading di bara, alai anggo anakkonmuna itenang mardalan rap dohot hamu.

²⁵ Alai ninna si Musa ma: Ingkon lehononmu do tu tangannami dohot angka pelean sipotongon dohot pelean situtungon, sipelehononnami tu Jahowa, Debatanami.

²⁶ Asa ingkon dohot do pinahannami mardalan rap dohot hami, ndang tading nanggo sada tambirik, ai sian i do buatonnami laho marsomba tu Jahowa, Debatanami; jala ndang huboto hami manang aha sisombahononnami tu Jahowa, paima sahat hami ro disi.

²⁷ Alai dipatangakang Jahowa do roha ni Firaun, gabe ndang olo ibana mangaloas nasida laho.

²⁸ Dung i ninna Firaun i ma tu si Musa: Laho ma ho sian lambungkon, jaga ho, unang be huida ho, ai sadari idaonmu bohingkon, ingkon mate ho bunuon.

²⁹ Jadi didok si Musa ma: Songon na nidokmi ma, ndang be idaonku bohim.

11 ¹ (I.) Dung i didok Jahowa ma tu si Musa: Sada nari dope uhum i paroonku tu Firaun dohot tu Misir, dung i loasonna ma hamu laho sian i; ndada asal loasonna sudena, lam onjaronjaronna do hamu sian i.

² Antong dok ma tu pinggol ni bangso i, asa dipangido be baoa dohot boruboru sian alealena be angka ulaula perak dohot ulaula sere.

³ Nunga disosoi Jahowa hian halak Misir marasi ni roha di bangso i. Si Musa pe halak na sangap situtu do di tano Misir, diida angka naposo ni Firaun diida na torop i.

⁴ Dung i ninna si Musa ma: Songon on do hata ni Jahowa: Marhira tonga borngin ruar ma Ahu umbolus tongatonga ni Misir.

⁵ Jadi mate ma nasa buhabaju di tano Misir, sian buhabaju ni Firaun, na hundul di habangsana hian, ro di buhabaju ni hatoban boruboru na di pudi ni pandudaan dohot sude buhabaju ni pinahan.

⁶Jadi masa ma angguk badar di sandok tano Misir, na so dung masa songon i na sai laon, nang sogot pe.

⁷Alai anggo di sude halak Israel ndang mahua nanggo biangna sada, songon ijolma ro di pinahan, asa tung ditanda hamu pamelok ni Jahowa di halak Israel sian halak Misir.

⁸Dung i tuat ma saluhut angka naposomon tumopot ahu, jala sombaonnasida ma ahu mandok: Ruar ma ho dohot sandok bangso na sahat tu ho; dung salpu songon i ruar ma ahu. Jadi ruar ma si Musa sian lambung ni Firaun piription situtu.

⁹Alai ninna Jahowa hian ma tu si Musa; ndang tagamon tangihonon ni Firaun hamu, asa tung torop halongangan angka sibahenonku di tano Misir.

¹⁰Jadi nunga dibahen si Musa dohot si Aron sude angka halongangan on di jolo ni Firaun. Alai dipatanggang Jahowa do roha ni Firaun, gabe ndang diloas halak Israel laho sian tanona.

12¹(I.) Dung i didok Jahowa hian ma tu si Musa dohot tu si Aron di tano Misir songon on.

²Bulan on ma parmulaan manjujur angka bulan di hamu, i ma sipahasada di hamu sian angka bulan ni na sataon:

³Dok hamu ma tu sandok luhutan ni Israel songon on: Di ari sampulu di bulan on, dibuat

be ma sada anak ni birubiru marguru tu torop ni ripe na marsaompu, sada birubiru ganup ripe.

⁴Alai molo maotikku na saripe so sudasa anak ni birubiru sada, dibuat ma i rap dohot hombar bagasna, na jumonok tu jabuna, marguru tu bilangan ni jolma, etongan tu sada birubiru marguru tu na tarpangansa be.

⁵Alai ingkon anak ni birubiru tunggal na so marlindang, marumur sataon. Sian anak ni birubiru dohot sian hambing buatonmuna.

⁶Jala ingkon paradeonmuna do i ro di ari sampuluopat di bulan on. Dung i seaton ni sandok luhutan ni Israel ma i mareak bot ari.

⁷Dung i buatonnasida ma sian mudar i jala daishononna tu na dua tiang parhinsuhinsuan dohot tu tohang ni angka bagas, parmanganonnasida i.

⁸Asa panganonnasida ma juhut na pinanggang tu api di na saborngin i, mardongan sagusagu na so niigaran dohot ingkau paet panganonnasida.

⁹Na so tupa tata panganonmuna i, manang na nilompa di bagasan aek, ingkon panggangon tu api do, uluna ro di haehaena dohot butuhana.

¹⁰Jala ndang jadi tebahononmuna sian i ro di manogotna i. Tu api do mosokkononhon ebaebana ro di manogotna i.

¹¹Songon on do pangalahomuna laho manganhon: Gontingmuna marhohos,

patmuna marsipatu, jala tungkotmuna di bagasan tanganmuna, marpanilu ma hamu manganhon; ai Paska ni Jahowa do i.

¹²Ai bolusonku ma di na saborngin i tano Misir, jala bunuonku sandok buhabaju di tano Misir, sianjolma ro di pinahan, jala bahenonku ma angka uhum tu saluhut debata ni Misir, Ahu, Jahowa i.

¹³Jadi mudar i ma gabe partinandaanmuna di bagas angka na niinganamuna i, molo huida mudar i, laosanku ma hamu, asa unang masa tu hamu uhum hamagoan, di na huhonahon tu tano Misir.

¹⁴Bahen parningotanmuna ma ari sadari on jala pestahononmuna ma i marulaon tu Jahowa, gabe patik salelenglelengna ma i ro di pinomparmuna parulahononmuna.

¹⁵Panganonmuna ma sagusagu na so niigaran manipat pitu ari lelengna, di ari parjolo daehonmuna igarigar sian bagasmuna ai sai na siaphononhon do sian Israel manang ise na manganhon na niigaran sian ari parjolo ro di ari papituhon.

¹⁶Pansangon ma di ari parjolo luhutan na badia, di ari papituhon pe marluhutan na badia ma hamu: Nandang jadi bahenon agia aha ulaon disi, nda holan sipanganonna be na jadi hobason di hamu.

¹⁷Sai ingot hamu ma angka sagusagu na so niigaran, ai di ari na sasada i do hutogihon angka punganmuna ruar sian tano Misir; asa

sai ingot hamu ari na sasada i bahen patik salelelelengna ro di pinomparmuna.

¹⁸Di bulan sipahasada, di ari sampulu opat mareak bot ari, panganonmuna ma sagusagu na so niigaran ro di ari duapulu sada i bodarina i.

¹⁹Manipat na pitu ari lelelengna, unang ma jumpang igarigar di bagasmuna. Ai sai siaphononhon do sian luhutan Israel manang ise na manganhon na niigaran, manang halak na buro manang isi ni tano i ibana.

²⁰Sandok na so jadi hamu manganhon sagusagu na niigaran; pangan hamu ma di sandok ingananmuna sagusagu na so niigaran.

²¹Dung i dipio si Musa ma saluhut sintua ni Israel jala didok tu nasida: Pillit jala togu hamu ma di hamu angka anak ni birubiru i marguru tu torop ni ripemuna jala seat hamu Paska i.

²²Dung i buat hamu ma sarahutan sanggul, jala sornophon hamu tu mudar na di parbontaran i, jala daishon hamu tu tohang dohot tu na dua tiang sian mudar na di parbontaran i; alai unang ruar agia ise sian hamu sian pintu ni jabuna paima torang ari.

²³Ai mamolus ma Jahowa laho mambunu halak Misir. Jadi ia dung diida mudar di tohang dohot di tiang na dua i, gabe laosan ni Jahowa ma pintu i, ndang loasonna pangago i bongot tu jabumuna laho mambunu.

²⁴Antong ingot hamu ma hata i, gabe patik di ho dohot di angka anakmu ro di salelenglelengna.

²⁵Jala ia dung sahat hamu tu tano silehonon ni Jahowa tu hamu, songon na nidokna i, sai radoti hamu ma ulaon on.

²⁶Jala ia didok angka anakmuna tu hamu: Ulaon aha do on di hamu?

²⁷Dohononmuna ma: Pelean Paska do i di Jahowa, na nilaosanna i angka bagas ni halak Israel di Misir, di na binununa i halak Misir, alai dipalua anggo bagasta. Jadi dipaunduk bangso i ma nasida jala marsomba.

²⁸Dung i laho ma halak Israel jala dibahen nasida ma songon na tinonahon ni Jahowa tu si Musa dohot tu si Aron, songon i ma dibahen nasida.

²⁹(II.) Jadi marhira tonga borngin, dibunu Jahowa ma nasa buhabaju di tano Misir, sian buhabaju ni Firaun na hundul di habangsana hian, ro di buhabaju ni na tarhurung, na di bagas hurungan dohot nasa buhabaju ni pinahan.

³⁰Jadi hehe ma Firaun bornginna i, ibana dohot nasa naposona ro di sude halak Misir, gabe masa ma andung bolon di Misir, ai ndang adong bagas na so adong na mate di bagasan.

³¹Jadi dijou raja i ma si Musa dohot si Aron laos bornginna i, ninna ma: Borhat ma hamu ruar sian tongatonga ni bangsongki, nang

hamu, nang halak Israel; laho ma hamu marsomba tu Jahowa, songon na nidokmuna i.

³²Boan hamu ma dohot birubirumuna dohot lombumuna, songon na nidokmuna i, laho ma hamu, jala pasupas hamu ma dohot ahu.

³³Jadi dionjaronjar halak Misir ma bangso i pahatophon ruar nasida sian tano i, ai angka ninna do: Mate hami maon luhutna.

³⁴Jadi diusung bangso i ma na niitakna, tagan so diigari, ditompi be balanga panggorengan.

³⁵Jadi dibahen halak Israel ma songon na nidok ni si Musa, dipangido hian ma sian halak Misir angka ulaula perak dohot ulaula sere dohot angka ulos.

³⁶Alai nunga disosoi Jahowa hian halak Misir marasi ni roha di bangso i gabe dilehon pinangidonasida i hira tabantaban do i diboan nasida sian halak Misir.

³⁷Asa borhat ma halak Israel sian Ramses tu Sukot arga onom ratus ribu halak toropna mardalan pat, so padohot angka dakdanak.

³⁸Torop ma dohot halak sileban nangkok rap dohot nasida, ro di angka birubiru dohot lembu dohot pinahan mansai godang.

³⁹Dung i dilompa nasida ma na niitak, na binoannasida sian Misir bahen sagusagu na so niigaran, ai ndang niigaran hian, ai na nionjaronjar do nasida sian Misir, jadi ndang

sanga nasida, sipanganon na asing pe ndang adong dihobas.

⁴⁰Ia leleng ni halak Israel maringan di Misir, opat ratus tolupulu taon do.

⁴¹Jadi dung salpu ma opat ratus tolupulu taon i, boho ma di ari na sasada i, ruar ma sandok pungan ni Jahowa sian tano Misir.

⁴²Parulahononhon ma borngin na sasada on di Jahowa, ala tinogihonna i nasida ruar sian tano Misir; parningotan di Jahowa ma borngin na sasada i parulahonon ni sandok halak Israel ro di pinomparnasida sogot.

⁴³(III.) Dung i ninna Jahowa ma tu si Musa dohot tu si Aron: On ma patik ni Paska: Na so tupa halak na buro manganhon sian i.

⁴⁴Alai nasa hatoban, na tinuhor ni hepeng, dung disunati hamu, jadi ma panganonna sian i.

⁴⁵Halak paisolat dohot sipangan gaji pe, ndang jadi manganhon sian i.

⁴⁶Di bagasan jabu ma i panganon; ndang jadi boanonmu sian juhut i ruar sian jabu tu alaman, jala ndang jadi ponggolhononhon holiholina nanggo sada.

⁴⁷Ingkon sandok luhutan Israel mambahen songon i.

⁴⁸Alai molo adong halak na buro sorang tu ho, jala naeng radotanna Paska i tu Jahowa, ingkon sunatonna jolo nasa baoa na sorang tu ibana; dung pe i asa jadi jumonok ibana laho mangaradoti, asa sobokkon isi ni tano i

hian ibana; alai nasa na so sinunat ndang jadi manganhon sian i.

⁴⁹Sada patik ma di isi ni tano hian dohot di halak na buro, na manginsur di tongatongamuna.

⁵⁰Jadi saluhut halak Israel mambahen songon i, hombar tu na tinonahon ni Jahowa tu si Musa dohot tu si Aron, songon i dibahen nasida.

⁵¹Asa di ari na sasada i ma ditogihon Jahowa halak Israel ruar sian tano Misir, marguru tu puguannasida.

13¹ (I.) Dung i didok Jahowa ma tu si Musa, songon on:

²Parbadi ai di Ahu nasa buhabaju, na parjolo ruar sian bortian di halak Israel, dijolma dohot di pinahan, Ahu do nampunasa.

³Jadi didok si Musa ma tu bangso i: Ingot hamu ma ari sadari on, haruruarmuna sian Misir, sian bagas parhatobanan, ai marhitehite tangan na gogo diparuar Jahowa hamu sian i, so tung dipangan hamu na niigaran.

⁴Sadari on do hamu ruar di bulan Abib.

⁵Ia dung sahat hamu ditogihon Jahowa tu tano ni halak Kanaan dohot Het i dohot Amori dohot Hevi dohot Jebusi tano naung minangmangkonna tu angka ompum mangalehon tu hamu tano habaoran ni susu dohot situak ni loba, sai radoti hamu ma ulaon i di bulan on.

⁶Pitu ari ma panganonmuna sagusagu na so niigaran di ari papituhon i ma pesta di Jahowa.

⁷Sagusagu na so niigaran ma panganonmuna na pitu ari i; ndang jadi dapot idaon di hamu igarigar, jala ndang jadi dapot idaon di hamu igarigar di sandok gomgomanmu.

⁸Paboaonmu ma tu anakmu di ari na sasada i songon on: Ala ni na binahen ni Jahowa di ahu, di na ruar i ahu sian Misir.

⁹Asa bahen partinandaan di bagasan tanganmu ma i, jala bahen parningotan di adopan ni matam, asa tung di bagasan pamanganmu patik ni Jahowa, paboa Jahowa manogihon ho ruar sian tano Misir marhitehite tangan na gogo.

¹⁰Dibahen i radoti ma patik on di hajujumpang ni tingkina martaontaon.

¹¹Ia dung sahat ho diboan Jahowa tu tano ni halak Kanaan, songon na minangmangkonna tu ho dohot tu angka ompum, jala nunga sahat dilehon tu ho.

¹²Pasahatonmu ma tu Jahowa, nasa anak na parjolo ruar sian bortian ro di nasa buhabaju di pinahan, angka na di ho, ia tunggal, Jahowa do nampunasa.

¹³Alai nasa buhabaju sian halode, tobusonmu ma dohot anak ni birubiru; alai molo so ditobus ho, punokkon rungkungna;

nasa buhabaju sian jolma pe di angka anakmi, tobusonmu do.

¹⁴Jala molo disungkun anakmu ho sogot, aha do on? Dohononmu ma tu ibana: Marhitehite tangan na gogo ditogihon Jahowa hami ruar sian Misir, sian bagas parhatobanan.

¹⁵Ai uju dipatangkan Firaun rohana manjua mangaloas hami laho, jadi dibunu Jahowa ma nasa buhabaju ni tano Misir, sian buhabaju ni jolma ro di buhabaju ni pinahan: Ala ni do hupelehon tu Jahowa nasa buhabaju tunggal; alai nasa buhabaju di angka anakku hutobus do.

¹⁶Jala bahen partinandaan di bagasan tanganmu do i, jala bahen parningotan di holangkolang ni matam, paboa naung marhitehite tangan na gogo Jahowa paruarhon hami sian Misir.

¹⁷(II.) Jadi dung diloas Firaun bangso i laho, ndada ditogihon Debata nasida sian dalan tu tano ni halak Palistim, atek pe jumonok nian sian i, ai ninna roha ni Debata do: Atek tung sumolsol dirina maon bangso i, ia diida nasida hamusuon, gabe mulak nasida maon tu Misir.

¹⁸Dibahen i mangaliat bangso i ditogihon Debata sian dalan tu halongonan mangihutihut laut arung. Jadi marsinjata be halak Israel nangkok sian tano Misir.

¹⁹Diboan si Musa huhut holiholi ni si Josep, ai pola do dipatolon halak Israel hian, ninna

do: Sai na tingkiron ni Debata hamu; boan hamu ma dohot holiholingku sian on.

²⁰Jadi borhat ma nasida sian Sukot, jala marsaro di Etham, di partalpahan ni halongonan.

²¹Jala Jahowa mardalan di jolonasida, ia arian marhitehite ombun na marsijongjong manogihon nasida di dalan i, ia bornginna i marhitehite api na marsijongjong manulu nasida, asa tarbahen nasida mardalan arian dohot borngin.

²²Ndang dung morot sian jolo ni bangso i ombun na marsijongjong arian dohot api na marsijongjong bornginna i.

14¹ (I.) Dung i ninna Jahowa ma tu si Musa songon on:

²Dok ma tu halak Israel, asa mamedu nasida jala marsaro tondong ni Pi-Hakiroth, di holangkolang ni Migdol dohot laut, tondong ni Baal Zephon, apala tondong ni ma nasida marsaro mardonokkon laut.

³Jadi dohonon ni Firaun ma taringot tu halak Israel: Nunga lilu nasida di tano i, nunga dihapit halongonan i nasida.

⁴Jadi patangkongonku ma roha ni Firaun, asa dilele nasida, asa marmulia Ahu di Firaun dohot di sandok paranganna, asa ditanda halak Misir, Ahu do Jahowa. Jadi dibahen nasida ma songon i.

⁵Jadi dung tarbortik tu raja ni Misir naung lintun bangso i, gabe muba ma roha ni Firaun

dohot roha ni angka naposona i maradophon Israel, angka didok nasida ma: Boasa tung tabahen songon i tung italoas halak Israel laho malua sian rodinta.

⁶Jadi dipasang ma huretana, jala diarahon bangsona.

⁷Dipambuat ma huhut onom ratus hureta angka na pinillit dohot nasa hureta na di Misir dohot tolu halak be parmusu di atas ni saluhutna.

⁸Ai dipatangkan Jahowa do roha ni Firaun, raja ni Misir, asa dilele halak Israel, angka naung ruar marhitehite tangan na timbul.

⁹Jadi dilele halak Misir ma nasida, gabe dapotsa ma nasida marsaro mardonokkon laut; nasa hoda, hureta ni Firaun ro di parsihundulna dohot paranganna mardonokkon Pi-Hakiroth do, tondong ni Baal Zephon.

¹⁰Jadi dung jumonok Firaun, gabe manatap ma halak Israel, jadi ida ma, halak Misir mangeahi nasida, gabe mabiar situtu nasida. Jadi manganguhi ma halak Israel tu Jahowa.

¹¹Angka didok nasida ma tu si Musa: Dibahen na so adong tanoman di Misir huroha, umbahen ditogihon ho hami laho mate di halongonan? Boasa tung songon i bahenonmu tu hami, tung togihononmu hami ruar sian Misir?

¹²Nda hudok hami hian tu ho di Misir songon on: Pasombu ma hami diparhatoban halak

Misir, ai dengganan diparhatoban halak Misir hami, sian na mate di halongonan.

¹³Jadi didok si Musa ma tu bangso i: Unang hamu mabiar, marsihohot ma rohamuna, jala ida hamu hamuliaon ni Jahowa, sibahenonna tu hamu sadari on; ai halak Misir, angka na niidamuna sadari on, ndang be idaonmuna nasida ro di salelenglelengna.

¹⁴Jahowa do marporang humongkop hamu, asal hohom hamu.

¹⁵(II.) Dung i didok Jahowa ma tu si Musa: Boasa sai manganguhi ho tu Ahu? Dokkon ma halak Israel, asa borhat nasida.

¹⁶Alai anggo ho hindat ma tungkotmi, jala patoltol tanganmu tu atas laut, jala patolak, asa dibolus halak Israel tongatonga ni laut i, mardalan di na mahiang.

¹⁷Alai anggo Ahu ida ma patangkangonku ma roha ni halak Misir, asa dieahi nasida halak Israel; asa marmulia Ahu di Firaun dohot di sandok paranganna, di huretana dohot di angka parsihundulna.

¹⁸Asa tung ditanda halak Misir, Ahu do Jahowa, ia dung marmulia Ahu di Firaun, di huretana dohot di angka parsihundulna.

¹⁹Dung i borhat ma suruan ni Debata, na mardalan di jolo ni pungan ni Israel, jala laho ibana tu pudinasida, hehe ma dohot ombun na marsijongjong sian jolonasida, jala jongjong tu pudinasida.

²⁰Jadi sahat ma tu holangkolang ni parsaroan ni halak Misir dohot parsaroan ni Israel. Jadi holom ma ombun i sambariba, jala manondangi borngin na sambariba nari, gabe ndang masipadonohan be nasida manipat saborngin i.

²¹Dung i dipatoltol si Musa ma tanganna tu atas laut, gabe mabaor laut i dibahen Jahowa marhitehite alogo na pur sian purba manipat saborngin i pahiang laut i, gabe tolak ma angka aek i.

²²Jadi bongot ma halak Israel tu tongatonga ni laut di na mahiang i, jadi hira dorpi angka aek i di siamun dohot di hambirangnasida.

²³Dung i dieahi halak Misir i nasida, jala bongot sian pudinasida, nasa hoda ni Firaun, angka huretana dohot angka parsihundulna tu tongatonga ni laut.

²⁴Jadi marhira torang ari, dibereng Jahowa ma tu parangan ni halak Misir sian api dohot ombun na marsijongjong, gabe guntur ma parangan ni halak Misir i.

²⁵Jala diantuk angka galapang ni huretanasida, gabe maol ditogu. Dung i didok halak Misir ma: Maporus ma hita maradophon Israel, ai Jahowa dongannasida mangalo halak Misir.

²⁶Dung i didok Jahowa ma tu si Musa: Patoltol ma tanganmu tu atas laut, asa sumuang angka aek i lingkup tu halak

Misir, tu angka huretana dohot tu angka parsihundulna.

²⁷ Jadi dipatoltol si Musa ma tanganna tu atas laut, gabe sumuang ma laut i tu dalanna hian mareak torang ari, gabe maporus ma halak Misir manjumpangkon aek i gabe ditunggalingkon Jahowa ma halak Misir tu tongatonga ni laut.

²⁸ Ai sumuang ma angka aek i jala dilungkupi angka hureta dohot angka parsihundul ro di sude parangan ni Firaun, angka na mangihuthon nasida tu bagasan laut, ndang adong teba sian nasida nanggo sada.

²⁹ Alai anggo halak Israel mardalan di na mahiang, di tongatonga ni laut i jala gabe dorpi di nasida angka aek i di siamun dohot di sihambirangnasida.

³⁰ Asa dipalua Jahowa di na sadari i halak Israel sian tangan ni halak Misir, gabe diida halak Israel ma mate halak Misir i di topi laut i.

³¹ Jadi dung diida halak Israel tangan na timbul, na binahen ni Jahowa tu halak Misir, gabe mabiar ma bangso i mida Jahowa, jala porsea nasida di Jahowa dohot di si Musa, naposona i.

15¹ (I.) Dung i diendehon si Musa dohot halak Israel ma ende on di Jahowa, angka didok nasida ma songon on: Marende ma ahu tu Jahowa, ai marmulia situtu Ibana;

hoda dohot parsihundulna diusophon tu bagasan laut.

²Jahowa do hatogaonku dohot pujipujianku jala manjadi hatuaonku. Ibana do Debatangku; pasangaponku ma Ibana. Debata ni damang do Ibana, patimbulonku ma Ibana.

³Jahowa do Ulubalang bolon, Jahowa do Goarna.

⁴Angka hureta ni Firaun ro di paranganna diusophon do tu bagasan laut. Parsihundul angka na pinillitna dilonongkon do tu bagasan laut arung.

⁵Angka lung do manghungkupi nasida; lonong do angka nasida tu toru, songon batu.

⁶Tangan siamunmi, ale Jahowa, marmulia di bagasan hagagoon; tangan siamunmu, ale Jahowa, mangaropuhi musu i.

⁷Jala marhitehite hinatimbul ni hasangaponmu disiaphon Ho angka na mangalo Ho; dilaluhon Ho parpiarpiar ni rimasmu mansudahon nasida songon durame.

⁸Marhitehite pallongos ni igungmu marlintonglintong angka aek i; marsijongjong angka galumbang, songon dorpi; mangibulibul ma angka lung di tongatonga ni laut.

⁹Dung i ninna musu i ma: Leleonku, tangkuponku ma nasida, bagionku ma taban; sombu ma rohangku mida nasida, umpatonku ma podangku, siaphonon ni tanganku ma nasida.

¹⁰Diombushon Ho hosam, gabe dilungkupi laut nasida, angka lonong ma nasida songon simbora tu bagasan aek angka na tongam.

¹¹Ise ma songon Ho, ale Jahowa di tongatonga ni angka debata? Ise ma songon Ho marmulia di bagasan habadiaon, na songkal marpujipujian, na mambahen halongangan?

¹²Dung dipatoltol Ho tanganmu siamun, dibondut tano i nasida.

¹³Ditogihon Ho marhitehite asiasim bangso na pinaluam on; dipatolhas Ho nasida marhitehite hatogaonmu tu bagasan inganan ni habadiaonmu.

¹⁴Dibege angka bangso barita i, gabe angka dotdot nasida, manimbasmimbasm ma halak Palistim.

¹⁵Tarsonggot ma uju i angka raja ni Edom, angka hitir ma raja ni Moab; tahuton ma sude isi ni Kanaan.

¹⁶Sai madabu ma tu nasida songgotsonggot dohot hatahuton; tarhatotong ma nasida, songon batu dibahen hinatimbul ni tanganmu, paima taripar bangsom, ale Jahowa; paima taripar bangsom, na tinobusmu.

¹⁷Sai pamasuk ma nasida, jala lopokkon nasida tu dolok partalianmi, haojahan ni ingananmi na pinaulim, ale Jahowa; tu habadiaon, na pinajok ni tanganmu, ale Tuhan.

¹⁸Jahowa do Raja ro di salelenglelengna.

¹⁹Ai bongot tu bagasan laut do hoda ni Firaun dohot angka huretana ro di parsihundulna, jadi dipasuang Jahowa ma angka aek ni laut i mangalungkupi nasida; alai anggo halak Israel mardalan di na mahiang do nasida di tongatonga ni laut.

²⁰Dung i ditiop si Meryam boru panurirang, iboto ni si Aron odap sada di bagasan tanganna, jala ruar sude angka boruboru marudurudur mangihuthon ibana masitiop odapna be.

²¹Jadi marende taripar ma si Meryam tu nasida; marende ma hamu tu Jahowa, ai marmulia situtu do Ibana; hoda dohot parsihundulna diusophon tu bagasan laut.

²²(II.) Dung i didokkon si Musa ma halak Israel borhat sian laut arung, asa mardalan nasida tu halongonan Sur; jadi mardalan ma nasida tolu ari di bagasan halongonan i, ndang jumpangan aek nasida.

²³Dung i sahat ma nasida tu Mara; alai ndang tarinum nasida aek sian Mara, ai na paet do i; ala ni do umbahen margoar Mara.

²⁴Jadi marmungutmungut ma bangso i dompak si Musa, ninna ma: Aha na ma siinumonnami?

²⁵Dung i manganguhi ma si Musa tu Jahowa, gabe dipatuduhon Jahowa ma tu ibana sada hau, na nireongkonna tu aek, jadi tonggi ma aek i. Disi, ma dibahen tu nasida

sada patik dohot uhum, jala disi ma nasida diunjuni.

²⁶Jala didok ma: Molo burju ditangihon ho soara ni Jahowa Debatam, jala diulahon ho na tigor di rohana, jala dipinggol ho angka patikna, jala diradoti ho sude angka uhumna: Ndang pamasaonku tu ho nanggo sada sahit, angka na hupamasa tu Misir, ai Ahu do Jahowa pandaonim.

²⁷Dung i sahat ma nasida tu Elim, adong do disi mual sampulu dua, jala pitupulu harambir, gabe marsaro ma nasida disi di lambung aek i.

16¹(I.) Dung i borhat ma nasida sian Elim, gabe sahat ma sandok luhutan ni halak Israel tu halongonan Sin na di holangkolang ni Elim dohot Sinai di ari sampulu lima di bulan sipahadua, dung ruar nasida sian tano Misir.

²Jadi marmungutmungut ma sandok luhutan ni halak Israel dompak si Musa dohot dompak si Aron di halongonan i.

³Didok halak Israel ma tu nasida: Tung so mate hami dibunu tangan ni Jahowa di tano Misir, di na hundul hami di lambung hudon angka na marisi juhut, di na bosur hami mangan sagusagu; ai ditogihon hamu hami ruar tu halongonan on laho mambunu sandok luhutan on anturaparon.

⁴Dung i ninna Jahowa ma tu si Musa: Ida ma paroonku ma tu hamu udan sagusagu

sian banua ginjang, asa ruar bangso i jala dipapungu sae sadarina i, asa huunjuni nasida manang turuton nasida patikki manang ndang.

⁵Alai jumpang paonomarihon, paulionnasida ma na binoannasida i, gabe silompit ma i martimbangkon na pinapungunasida siap ari.

⁶Dung i didok si Musa dohot si Aron ma tu sude halak Israel: Bodari on ma botoonmuna Jahowa paruarhon hamu sian tano Misir.

⁷Sogot manogot idaonmuna ma hasangapon ni Jahowa, ai nunga di bege Ibana parungutungutonmuna dompak Jahowa. Ai tung ise ma hami pola umbahen tung marmungutmungut hamu dompak hami?

⁸Angkup ni didok si Musa ma: Molo dilehon Jahowa juhut panganonmuna bodari on jala butongan mangan sagusagu manogotna i, ala naung dibege Jahowa parungutungutonmuna, na marmungutmungut i hamu dompak Ibana, ai tung ise ma anggo hami pola? Ndada dompak hami hamu marmungutmungut, dompak Jahowa do.

⁹Dung i didok si Musa ma tu si Aron: Dok ma tu sandok luhutan ni halak Israel: Pajonok hamu ma tu jolo ni Jahowa, ai nunga dibege parungutungutonmuna.

¹⁰Jadi di na mangkatai si Aron tu sandok luhutan ni halak Israel, humusor ma nasida mamereng dompak halongonan, jala ida ma,

tarida ma hasangapon ni Jahowa di bagasan ombun i.

¹¹ Dung i ninna Jahowa ma tu si Musa songon on:

¹² Nunga hubege parungutunguton ni halak Israel, dok ma tu nasida songon on: Marhira bodari panganonmuna ma juhut, jala manogotna i butongan hamu mangan sagusagu, asa tung diboto hamu, Ahu do Jahowa Debatamuna i.

¹³ Jadi dung bodari, ro ma marhulalan angka lote, tung ditutup do parsaroan i, jala manogotna i marpeahan nambur humaliang parsaroan i.

¹⁴ Jadi dung manaek nambur na marpeahan i, ida ma adong ma rarak di sisik ni halongonan i songon batu ni botik na tata metmetna dohot hibulna.

¹⁵ Jadi dung diida halak Israel, angka didok be ma tu donganna; Manhu? (Aha do i?) Ai ndang diboto nasida manang aha i. Alai ninna si Musa ma tu nasida: I ma sagusagu na nilehon ni Jahowa tu hamu bahen sipanganon.

¹⁶ (II.) Boti ma hata na tinonahon ni Jahowa: Papungu hamu sian i ganup marguru tu tukna panganonna, sasolup sasahalak, marguru tu bilangan ni toropmuna; ganup mambuat marguru tu isi ni undungundungna be.

¹⁷ Jadi dibahen halak Israel ma songon i, adong na papungu godang, adong na papungu otik.

¹⁸Alai dung disolupi, gabe ndang adong lobian na papungu godang, jala ndang hurangan na papungu otik; ganup marguru tu na tarpangansa, dipapungu nasida.

¹⁹Dung i didok si Musa ma tu nasida: Manang ise pe, unang dihirahon sian i tu marsogot.

²⁰Alai ndang ditangihon nasida hata ni si Musa, adong do deba marhirahon sian i tu marsogot, jadi gulokon ma i jala bau, gabe tarrimas ma si Musa tu nasida.

²¹Alai dipapungu nasida ma sian i ganup sogot, marguru tu na tarpangansa be; alai disi las ari, gabe malala ma.

²²Jumpang paonomarihon, silompit ma dipapungu nasida sagusagu i, dua solup tu na sahalak. Jadi ro ma sude induk ni bangso i laho paboahon tu si Musa.

²³Jadi didok si Musa ma tu nasida: I do tona ni Jahowa antong. Marsogot do ari Sabbat, paradianan siparbadiaan di Jahowa: Pamasak hamu hian ma sipamasahonmuna, jala lompah hamu hian silompaonmuna; alai na lobi, pasimpan hamu ma bahen sipanganon marsogot.

²⁴Jadi dipasimpan nasida ma i tu marsogot, songon na tinonahon ni si Musa, gabe ndang olo bau manang gulokon di bagasan.

²⁵Dung i ninna si Musa ma: Pangan hamu ma i sadari on, ai ari paradianan ni Jahowa

do sadari on; ndang adong jumpang hamu di ladang.

²⁶ Onom ari lelengna papunguonmuna ma i, alai ari papituhon i ari paradianan do i, ndang adong jumpang disi.

²⁷ Alai tole papituarihon ruar do deba sian bangso i naeng papunguhon, hape ndang adong jumpangsa.

²⁸ Jadi ninna Jahowa ma tu si Musa: Sadia leleng on juaonmuna mangaradoti angka tonangku dohot patikku?

²⁹ Ida hamu ma, nunga dilehon Jahowa ari paradianan i tu hamu; ala ni Ibana mangalehon tu hamu di ari paonomhon sagusagu sidua ari; asa mian hamu di ingananmuna be; unang adong ruar nanggo sahalak sian ingananna di ari papituhon i.

³⁰ Jadi maradian ma bangso i di ari papituhon i.

³¹ Jadi Manna ma goarna dibahen halak Israel, ianggo rupana songon boni ni hatumbar, saksak, jala daina songon sagusagu na tinanggulean.

³² Dung i didok si Musa ma: On do hata na tinonahon ni Jahowa: Gohi hamu ma sasolup sian i sipajopon tu pinomparmuna sogot, asa diida nasida sagusagu na hupapanganhon tu hamu di halongonan, di na huparuar hamu sian tano Misir.

³³ Jadi ninna si Musa ma tu si Aron: Buat ma sada tapongan, jala bahen tusi Manna gok

sasolup, jala pajongjong tu jolo ni Jahowa, sipajopon di pinomparmuna.

³⁴Songon na tinonahon ni Jahowa tu si Musa, dipajongjong si Aron ma i tu jolo ni poti parpadanan i bahen parningotan.

³⁵Leleng ni opatpulu taon ma dipangan halak Israel Manna i, paima sahat nasida tu tano siinganannasida: Paima sahat nasida tu parbalohan ni tano Kanaan, sai Manna do dipangan nasida.

³⁶Ia sasolup (homer), saparsampulu ni saampang (epah) ma i.

17¹ (I.) Dung i borhat ma sandok luhutan ni halak Israel sian halongonan Sin, marguru tu pandokkon ni Jahowa pardalanonnasida i, gabe marsaro nasida di Rapidim; alai ndang adong aek siinumon ni bangso i disi.

²Jadi dibadai bangso i ma si Musa, angka didok ma: Lehon hamu aek siinumonnami! Jadi didok si Musa ma tu nasida: Boasa ahu badaannmuna? Boasa unjunanmuna Jahowa?

³Alai uasan di aek bangso i disi, gabe marmungutmungut nasida dompak si Musa, didok ma: Boasa tung paruaronmu hami sian Misir laho mambunu hami dohot anakkonnamiro di pinahannami dibahen uas?

⁴Jadi manganguhi ma si Musa tu Jahowa, ninna ma: Aha ma bahenonku tu bangso on? Otik nari dangguronnasida ma ahu dohot batu.

⁵Jadi didok Jahowa ma tu si Musa: Bolus ma sian jolo ni bangso i, jala arahon deba sian angka sintua ni Israel bahen donganmu, jala boan ma tungkotmu, na nilipathonmu tu batang aek i, dung i laho ma ho.

⁶Ida ma, jongjong ma Ahu disi di jolom di atas ni sada dolok batu di Horeb, lipati ma dolok batu i, gabe ruar ma sian i aek siinumon ni bangso i. Jadi dibahen si Musa ma songon i di adopan ni angka sintua ni Israel.

⁷Jadi dibahen ma goar ni hajongjongan i Massa (pangunjunan) dohot Meriba (parbadaan), ala ni bada ni halak Israel, jala ala ni niunjunannasida Jahowa, na nidokna i: Di tongatonganta ulaning do Jahowa manang ndang?

⁸(II.) Dung i ro ma Amalek, jala marmusu dompak Israel di Rapidim.

⁹Dung i didok si Musa ma tu si Josua: Pilliti ma di hita angka baoa, jala borhat ma ho mandopangi Amalek; jongjong ma ianggo Ahu marsogot di punsu ni dolokdolok, patioptiop tungkot ni Debata di bagasan tanganku.

¹⁰Jadi dibahen si Josua ma, songon na nidok ni si Musa tu ibana laho mandopangi Amalek; alai anggo si Musa dohot si Aron dohot si Hur nangkok do nasida tu punsu ni dolokdolok i.

¹¹Jadi saleleng dipaherbang si Musa tanganna tu ginjang, monang ma Israel,

alai molo dipalenduk tanganna, monang ma Amalek.

¹²Alai ngaolan ma tangan ni si Musa, gabe dibuat nasida ma batu sada, dibahen ma tu toruna, asa hundul ibana tusi; ro ma si Aron dohot si Hur tumungkol tanganna sambariba be; gabe hot ma tanganna i, paima mate mata ni ari.

¹³Jadi dipatunduk si Josua ma Amalek dohot bangsona marhite sian baba ni podang.

¹⁴Dung i didok Jahowa ma tu si Musa: Surathon ma i tu sada buku bahen parningotan, jala pasingothon ma tu pinggol ni si Josua, ai sai na siaphononku ma barita ni Amalek sian toru ni langit.

¹⁵Dung i dipauli si Musa ma sada langgatan, dibahen ma goarna: Jahowa Nissi (Jahowa partonggolhu).

¹⁶Angkup ni didok ma: Sintak tangan di atas habangsa ni Jahowa: Hamusuon tihus ma di Jahowa dompak Amalek marsundutsundut.

18¹(I.) Jadi dung dibege si Jetro, malim di Midian, simatua doli ni si Musa, sude na binahen ni Debata tu si Musa dohot tu Israel bangsona i, na pinaruar ni Jahowa halak Israel sian Misir.

²Jadi diboan si Jetro, simatua doli ni si Musa, ma si Zippora, jolma ni si Musa, na sinuruna i mulak.

³Rap dohot anakna na dua i, goar ni na sada si Gerson, ai ninna do: Paisolat do ahu di tano ni halak na pulik.

⁴Goar ni na sada nari si Elieser, ai Debata ni damang do pangurupingku, jala dipalua ahu sian podang ni Firaun.

⁵Jadi sahat ma si Jetro, simatua doli ni si Musa dohot angka anakna dohot jolmana tu si Musa, tu halongonan, tu parsaroanna di lambung dolok ni Debata.

⁶Dung i ditonahon ma tu si Musa: Nunga ro ahu, simatuam doli si Jetro tumopot ho udur dohot jolmam dohot anaknana dua i.

⁷Jadi ruar ma si Musa manjumpangkon simatuana i, dipaunduk ma ibana di jolona, jala diumma ibana; jadi dung masisungkunan nasida taringot tu sonangna, gabe masuk ma nasida tu undungundung i.

⁸Dung i dipajojor si Musa ma tu simatuana sude na binahen ni Jahowa tu Firaun dohot tu halak Misir ala ni halak Israel, ro di sude hasusaan na mangonai tu nasida di tongan dalan dohot na pinalua ni Jahowa nasida.

⁹Jadi las ma roha ni si Jetro ala sude na denggan i, na binahen ni Jahowa tu Israel, na pinaluana i nasida sian tangan ni halak Misir.

¹⁰Dung i ninna si Jetro ma: Pinuji ma Jahowa, na paluahon hamu sian tangan ni halak Misir dohot sian tangan ni Firaun; tung dipalua bangsona sian pandondon ni tangan ni halak Misir.

¹¹ Nuaeng pe huboto, tumongam hape Jahowa sian nasa angka debata, ai hata na hinajungkathonnasida lingkup tu nasida.

¹² Dung i dibuat si Jetro, simatua doli ni si Musa ma sada pelean situtungon dohot angka pelean sipotongon di Debata. Jadi ro ma si Aron dohot saluhut sintua ni Israel laho mangan sagusagu rap dohot simatua doli ni si Musa di jolo ni Debata.

¹³ (II.) Tole marsogotna i hundul ma si Musa laho manguhum bangso i, gabe jongjong ma bangso i di lambung ni si Musa sian manogotna ro di botari.

¹⁴ Alai dung diida simatua doli ni si Musa sude na binahenna i tu bangso i, ninna ma: Hata dia do i na binahenmu tu bangso i? Boasa sasada ho hundul, jala sandok bangso i jongjong di jolomu sian manogot ro di botari?

¹⁵ Jadi didok si Musa ma tu simatuana doli: Na ro do bangso i tumopot ahu laho manungkun uhum sian Debata.

¹⁶ Ai molo adong parhataannasida, ro do nasida tu ahu, gabe huuhumi nasida be jala hupabotohon angka patik ni Debata dohot angka podana.

¹⁷ Jadi didok simatua doli ni si Musa ma tu ibana: Ndang denggan na binahenmi.

¹⁸ Mandate ho maon, nang ho, nang bangso on na di jolomon, ai madokdokhu ulaon on di ho, ndang tarula anggo sasada ho.

¹⁹On pe tangihon ma soarangkon, huparrohai pe ho, asa didongani Debata ho. Ho ma mandapothon Debata singkat ni bangso i, jala ho ma pasahathon angka hata i tu Debata.

²⁰Jala pasingothon tu nasida angka patik dohot angka poda, jala pabotohon tu nasida dalan sidalanannasida i dohot ulaon siulaonnasida i.

²¹Alai anggo ho lulu i ma sian sandok bangso i baoa angka na marsihohot marroha, angka na mangkabiari Debata, baoa parroha na sintong, angka na mangkagigihon pangomoan na so turut, i ma pabangkit bahen induk gumomgom nasida marsasaribu, marsasaratus, marlimalimapulu, jala marsasampulu.

²²Asa nasida tongtong manguhumi bangso i; alai nasa hata na balga, tu ho ma diboan nasida, anggo nasa hata metmet nasida ma manguhumi, asa paneang siulaonmu, molo nasida donganmu mangusung.

²³Molo dibahen ho songon i, jala ro tona ni Debata tu ho manolopi, jadi manahan ma ho mangkajongjongkon, muli ma dohot sandok bangso on tu ingananna be mardamedame.

²⁴Jadi ditangihon si Musa ma soara ni simatuana doli, jala dipatupa sude na nidokna i.

²⁵Dung i dipillit si Musa ma baoa angka na marsihohot sian sandok Israel, jala

dipabangkit nasida bahen induk ni bangso i gumomgom marsasaribu, marsasaratus, marlimalimapulu jala marsasampulu.

²⁶Asa nasida tongtong manguhumi bangso i, anggo hata na maol, tu si Musa ma boannonnasida, alai anggo hata metmet, nasida do manguhumisa.

²⁷Dung i diloas si Musa ma simatuana doli laho, gabe mulak ma ibana tu tanona.

19¹(I.) Patolubulanhon dung ruar halak Israel sian tano Misir, di ari na sasada i sahat ma nasida tu halongonan Sinai.

²Ai borhat do nasida sian Rapidim, gabe sahat nasida tu halongonan Sinai, laos marsaro nasida di halongonan i; disi do marsaro Israel tondong ni dolok i.

³Dung i nangkok ma si Musa tumopot Debata. Jadi dijouhon Jahowa ma tu ibana sian dolok i, ninna ma: Songon on ma dohononmu tu pinompar ni si Jakkob, paboanmu tu halak Israel.

⁴Nunga diida hamu, na hubahen i tu halak Misir, na huboan i hamu hira di atas ni habong ni pidong raja wali pasahat hamu tu Ahu.

⁵On pe molo ditangihon hamu soarangku, jala diradoti hamu padan na hubahen i, jadi hasianku ma hamu sian nasa bangso, ai gok di Ahu do liat portibi on.

⁶Manjadi harajaon malimmalim ma hamu di Ahu, jala bangso na badia. I ma angka hata sidohononmu tu halak Israel.

⁷ Jadi ro ma si Musa, dijou ma angka sintua ni bangso i, jala diaturhon tu jolonasida sude angka hata ondeng, angka na tinonahon ni Jahowa tu ibana.

⁸ Jadi sahata ma sandok bangso i mangalusi, angka didok nasida ma: Saluhut na pinaboa ni Jahowa, bahenonnami ma. Jadi mulak ma si Musa mamboan angka hata ni bangso i tu Jahowa.

⁹ Dung i didok Jahowa ma tu si Musa: Ida ma, na ro ma Ahu tumopot ho di bagasan ombun manorop, asa dibege bangso i molo mangkatai Ahu dohot ho, asa porsea nasida dohot di ho ro di salelenglelengna. Jadi dipaboa si Musa ma angka hata ni bangso i tu Jahowa.

¹⁰ Dung i didok Jahowa ma tu si Musa: Laho ma ho tumopot bangso i, jala urasi nasida sadari on dohot marsogot asa ditaptap nasida ulosnasida.

¹¹ Asa diri nasida di ari patoluhon, ai patoluarohon tuat ma Jahowa di jolo ni sandok bangso i tu punsu ni dolok Sinai.

¹² Jala bahen parbolatan ni bangso i humaliang, nimmu ma: Jaga hamu, so tung dinangkohi hamu dolok i, manang manjama bonana i. Manang ise na jumama dolok i, ingkon mate ibana.

¹³ Nandang jadi dais tusi tangan ni manang ise, ingkon dangguron manang tullangon ibana mate; nang pinahan, nang jolma, ndang jadi

pangoluon. Alai molo marsaringar soara ni sarune, jadi ma nangkohannasida dolok i.

¹⁴Dung i tuat ma si Musa sian dolok i tumopot bangso i, jala diurasi bangso i, jala ditaptap nasida ma ulosnasida be.

¹⁵Dung i ninna si Musa ma tu bangso i: Diri ma hamu tumagam ari patoluhon, unang ma jumonok manang ise tu jolmana.

¹⁶(II.) Tole patoluarohon, disi torang ari, masa ma angka soara ronggur dohot hilap dohot ombun manorop di atas dolok i, jala soara ni sarune mansai gogo, gabe tarsonggot ma sandok bangso na di parsaroan i.

¹⁷Dung i ditogihon si Musa ma bangso i ruar sian parsaroan laho manjumpangkon Debata, jala angka jongjong nasida solhot di bona ni dolok i.

¹⁸Jadi martimus ma sandok dolok Sinai maradophon Jahowa na tuat tu atasna di bagasan api, jala manaek timusna i songon timus ni pamurunan, gabe humuntal situtu sandok dolok i.

¹⁹Jadi dung lam ganda situtu gogo ni soara ni sarune, mangkatai ma si Musa, gabe dialusi Debata ibana marsoara ronggur.

²⁰Alai dung tuat Jahowa tu dolok Sinai, tu punsu ni dolok i, dijou Jahowa ma si Musa tu punsu ni dolok i, gabe nangkok ma si Musa.

²¹Dung i didok Jahowa ma tu si Musa: Tuat ma ho, tingtingkon ma tu bangso i, asa unang ditahopi nasida handang i laho mandapothon

Jahowa, naeng idaonna, gabe marmatean maon torop sian nasida.

²²Angka malim pe, angka na jumonok tu Jahowa, ingkon manguras nasida, asa unang diragehon Jahowa nasida.

²³Alai ninna si Musa ma tu Jahowa: Ndang tarbahen bangso i nangkok tu dolok Sinai, ai nunga dihatindangkon Ho tu hami, nimmu do: Handang i dolok i jala parbadiai ibana.

²⁴Dung i didok Jahowa ma tu ibana: Laho ma ho tuat; alai nangkok ho muse rap dohot si Aron; alai anggo angka malim dohot bangso i, unang ditahopi nasida handang i laho mandapothon Jahowa, asa unang rage nasida.

²⁵Jadi tuat ma si Musa mandapothon bangso i, jala dipaboa ma tu nasida.

20¹(I.) Dung i diaturhon Debata ma sude angka hata on, ninna ma:

²Ahu do Jahowa Debatam, na paruarhon ho sian tano Misir, sian bagas parhatobananmu.

³Ndang jadi marangkup Ahu adong Debatam.

⁴Ndang jadi bahenonmu di ho ganaganaan, manang sumansuman dia na di banua ginja nang di tano on, ro di na di bagasan aek na di toru ni tano.

⁵Ndang jadi ho marsomba tu nasida, manang oloanmu nasida, ai Ahu do Jahowa Debatam, Debata parrimas, na mangaluluhon hajahaton ni amaama tu angka anakna ro di

sundut patoluhon dohot paopathon, angka na sogo roha di Ahu.

⁶Alai asi do rohangku di angka na marriburibu, angka na mangkaholongi Ahu, angka na mangaradoti angka patikku.

⁷Ndang jadi dohononmu goar ni Jahowa Debatam, anggo sian neang ni roha, ai sai na hona toru ni Jahowa do manang ise na mandok goarna sian neang ni rohana.

⁸Ingot hamu ma ari Sabbath laho pabadiahonsa.

⁹Onom ari ma hamu mulaulaon, jala bahenonmu nasa ulaonmu.

¹⁰Alai anggo ari papituhon i, ari paradianan ni Jahowa Debatam do i. Ndang jadi bahenonmu disi agia aha ulaon, nang ho manang anakmu, manang borum, manang naposom lahilahi, manang naposom boruboru, ro di pinahanmu, nang na sorang tu ho, di bagasan hutam.

¹¹Ai di na onom ari do ditompa Jahowa langit dohot tano dohot laut dohot nasa isina, dung i maradian ma Ibana di ari papituhon i. Dibahen i do umbahen na dipasupasu Jahowa ari paradiananna i jala diparbadiai.

¹²Ingkon pasangaponmu natorasmu, asa leleng ho mangolu di tano, na nilehon ni Jahowa Debatam tu ho.

¹³Unang ho mambunu.

¹⁴Unang ho mangalangkup.

¹⁵Unang ho manangko.

¹⁶Unang ho olo sitindangkon gabus maralohon donganmu.

¹⁷Ndang jadi haliangan ni roham bagas ni donganmu. Nandang jadi haliangan ni rohamjolma ni donganmu, manang naposona baoa manang naposona boruboru, manang lombuna, manang hodana, manang dia peugasan ni donganmu.

¹⁸(II.) Jadi sandok bangso i marnida dohot umbege angka soara ronggur dohot hilap dohot soara ni sarune i dohot dolok na martimus i. Jadi dung diida bangso i, lumindak ma nasida jongjong mandaodao.

¹⁹Angka didok ma tu si Musa: Ho ma angkupnami mangkatai, hutangihon hami pe, unang Debata mangkulingi hami, atek tung mate hami maon.

²⁰Alai ninna si Musa ma tu bangso i: Unang hamu mabiar, ai mangunjuni hamu do Debata umbahen na ro, asa di jolomuna biar mida Ibana, asa unang mardosa hamu.

²¹Jadi jongjong ma bangso i mandaodao; alai anggo si Musa didapothon do tu na holom, na niinganen ni Debata.

²²(III.) Dung i ninna Jahowa ma tu si Musa: Songon on do dohononmu tu halak Israel: Nunga diida hamu, na hupangkulingi i hamu sian banua ginjang.

²³Dibahen i ndang jadi marangkup Ahu bahenonmu debatam, manang angka debata

sian perak manang angka debata sian sere pe.

²⁴Langgatan sian tano sada bahenonmu di Ahu, bahen pamelean ni angka peleanmu situtungan dohot pelean hamauliateon, angka birubirumu dohot angka lombumu pelehononmu disi. Ai ia disi hupajok inganan parningotan di goarhu, tusi do topotonku ho jala pasupasunku ho.

²⁵Alai molo naeng bahenonmu di Ahu sada langgatan sian batu, unang pauli sian batu na nidakdak, ai molo mangonai bosim tusi, gabe ramun maon.

²⁶Jala unang martangga ho manaek tu langgatanku, asa unang mullop na niabitanmu maradophon ibana.

21 ¹(I.) Jala on do uhum, angka siaturhononmu tu jolonasida.

²Molo dituhor ho sada hatoban baoa marga Heber, onom taon ma lelengna mangadop, alai anggo papitutaonhon ingkon malua boti ibana.

³Molo panangkarnangkar ibana ro panangkarnangkar ibana ruar; molo marripe ibana ro, rap malua ibana dohot ripena.

⁴Alai molo marripe ibana dibahen indukna, gabe ditubuhon anak manang boru di ibana, indukna i ma nampuna ripena dohot tubuna, holan ibana sandiri malua.

⁵Alai molo sada hata ni hatoban i mandok: Holong do rohangku di indukhu, di jolmangku

dohot di angka anakkonku, tagonan unang malua ahu.

⁶Togihonon ni indukna ma ibana tu Debata patindangonna ma ibana tu pintu manang tu tiang, dung i turaon ni indukna ma pinggolna dohot turatura, jadi hatobanna ma ibana salelenglelengna.

⁷Alai molo digadis manang ise boruna bahen hatoban, ndang jadi malua, songon halulua ni hatoban baoo.

⁸Molo sogo roha ni indukna mida ibana, jala ndang marsinonduk mangan dibahen, ingkon tobuson ma i; alai anggo tung tu bangso sileban ndang guru rohana manggadis, ala naung diose padanna tu nasida.

⁹Alai molo tu anakna nasida maroroan dibahen, uhum parboruon na ma bahenonna tu nasida.

¹⁰Molo boruboru na asing dibuat bahen imbangna, ndang jadi oruanna sipanganonna, parulosonna dohot pargansionna.

¹¹Molo so dibahen uhum na tolu ondeng tu nasida, malua boti nasida, ndang sitobus.

¹²(II.) Molo adong manang ise na mangompongjolma, pola mate, ingkon marutang hosa ibana.

¹³Alai molo so diburu hian, tung Debata tardok patongonhon ibana tu tanganna so pangkirimanna, Ahu pe patuduhon haporusanna tu ho.

¹⁴Alai molo piripirion manang ise dompak donganna, marbisuk pamununa di ibana, saratonmu ma ibana sian lambung ni langgatanku laho mambunu ibana.

¹⁵Manang ise na mambunu amana manang inana, ingkon marutang hosa ibana.

¹⁶Manang ise na mamangus jolma jala digadis, manang jumpang di tanganna dope, ingkon marutang hosa ibana.

¹⁷Manang ise na mamburai amana manang inana, ingkon marutang hosa ibana.

¹⁸Molo marbadai angka baoa, gabe dipungkulhon ma sada batu tu alona manang ditinju ibana, alai ndang pola mate, asal peak di podomanna.

¹⁹Ia dung hehe muse ibana gabe mardalani di balian martungkottungkot, jadi lias ma na mambunu i, asal digarar halolahanna dohot upa pandaoni paima malum situtu.

²⁰Manang ise na mangompongi hatobanna baoa manang boruboru, gabe mate na niomponganna i, ingkon abulonna do.

²¹Alai molo tung mangolu sadari manang dua ari nari ndang abulonna, ai hepengna na ma i.

²²Molo marbadai angka baoa, gabe tarsamar boruboru na humunti pagar, pola hatektehan sanggul, alai ndang nian mahua anggo hosana, ingkon marutang hepeng ma ibana, marguru tu pandok ni harajaan ni boruboru i tu ibana, jala lehononna tu angka panguhum.

²³Alai molo sanga mate, ingkon hosa do abul ni hosa.

²⁴Mata do abul ni mata, ipon do abul ni ipon, tangan do abul ni tangan, pat do abul ni pat.

²⁵Mabortu ma abul ni na mabortu, bugang do abul ni bugang, na punil abul ni na punil.

²⁶Molo dilipat manang ise mata ni hatobanna baoa manang boruboru, pola sega matana, ingkon paluaonna boti, abul ni matana i.

²⁷Suang songon i molo diropangkon ngingi ni hatobanna baoa manang boruboru, ingkon paluaonna boti abul ni iponna i.

²⁸(III.) Molo adong baoa manang boruboru ditambing sada jonggi, pola mate ibana, ingkon mate dangguron do jonggi i dohot batu, jala ndang jadi panganon sibukna, alai lias ma ianggo nampuna lombu i.

²⁹Alai molo panambing hian jonggi i sian na sai laon, diboto nampunasa i huhut, hape ndang diramoti, gabe dibunu jonggi ma baoa manang boruboru, ingkon mate dangguron jonggi i dohot batu, bunuon ma dohot nampunasa.

³⁰Alai molo pardenggan uhum marobo tu ibana, ingkon lehononna do partobus singkat ni hosana, marguru tu pangarobo ni uhum tu ibana godangna.

³¹Laos uhum bongka ondeng do bahenon tu ibana, molo anak manang boru ditambing jonggi i.

³²Alai molo hatoban baa manang boruboru ditambing lombu i, tolupulu ringgit ma lehonon ni nampunasa tu induk somangnasida i, jala ingkon mate dangguron ia jonggi i.

³³Molo adong manang ise patalak sada godung, manang tung dihali sada godung, hape ndang dilangkopi, gabe madabu ma tusi sada lombu manang halode.

³⁴Ingkon abulon ni nampuna godung i do, hepeng ma pasuangonna tu nampunasa, alai di ibana ma ianggo bangkena.

³⁵Molo ditambing jonggi ni na sahalak jonggi ni donganna, pola mate, gadisonnasida ma jonggi na mangolu i, jala parduaonna tuhorna, jonggi na mate i pe parduaonnasida do.

³⁶Alai anggo binoto hian na sai laon panambing jonggi i, hape ndang diramoti nampunasa, ingkon alianna do jonggi abul ni jonggi, di ibana ma anggo na mate i.

22¹(I.) Molo ditangko manang ise sada jonggi manang birubiru, laos dipotong manang digadis, ingkon uhum pangalimai ma gararonna ia jonggi, uhum pangopati gararonna ia birubiru.

²Molo dapot tartangkup panangko i laho mangarut nian, gabe hona balbal ibana pola mate, ndang siabulon mudarna.

³Alai molo naung sanga hatorangan ari panangko i, abulon ma mudarna. Ingkon

gararon ni panangko i luhutna; molo so adong di ibana gadison ma ibana ala tinangkona i.

⁴Molo dapot di tanganna na tinangko i laos mangolu, silompit ma gararonna sian lombu ro di halode dohot birubiru.

⁵Molo dipagagathon manang ise pinahanna tu hauma manang tu porlak anggur ni na asing, tung dipalua songon i pinahanna tusi, ingkon na dumenggan ni haumana dohot porlak anggurna gararhononna.

⁶Molo rarat api gabe dapotsa handang, laos dipangan bunbunan manang eme na jongjong dope, ingkon gararon ni na pagalak api i do.

⁷Molo dipalumehon manang ise tu donganna hepengna manang barangbarangna, gabe diarut sian jabuna, silompit ma gararon ni panangko, molo tung dapot.

⁸Alai molo so dapot panangko i, boanon ma nampuna bagas i tu jolo ni Debata, atik tung beha laos ibana paganjang tanganna tu ugasan ni donganna.

⁹Taringot tu nasa hata jahajaha, ala jonggi, ala halode, ala birubiru, ala ulos, ala manang aha pe na mago, gabe didok na mandok: Ahu do nampuna on, tu jolo ni angka panguhum boanon hatanasida be, silompit dua ma gararon ni panjoha tu alona ginorahon ni panguhum.

¹⁰Molo dipalumehon manang ise tu donganna sada halode manang jonggi, manang birubiru, manang pinahan dia pe,

gabe mate ma i, manang mabugang, manang diolat halak, ndang adong na marnidasa.

¹¹Ingkon mangmang tu Jahowa ma uhum di tongatonganasida na dua, atik tung beha tanganna laho tu ugasan ni donganna; ingkon jaloon ni nampunasa do, jala ndang gararon ni alona i.

¹²Alai molo tung ditangko panangko sian ibana, ingkon gararonna do i tu nampunasa.

¹³Molo tung digotil binatang, ingkon boanonna do tandana bahen sitindangi, ndang gararonna anggo na ginotil i.

¹⁴Molo diinjam sahalak sian donganna manang aha, gabe mabugang manang mate, ndang diida nampunasa, ingkon gararonna do i.

¹⁵Alai molo tung diida nampunasa, ndang gararonna; molo tung paneoa ibana disi, seoana i do singkatna.

¹⁶(II.) Molo didormai manang ise namarbaju na so oroan dope jala diangkupi modom, ingkon pintor lehononna bolina tusi jala buatonna bahen jolmana.

¹⁷Alai molo manjua situtu amana mangalehon boruna tu ibana, timbangonna ma hepeng marguru tu godang ni boli ni namarbaju.

¹⁸Ndang jadi pangoluon boruboru na marhapandean.

¹⁹Ingkon bunuon do manang ise na pasaorsaor ibana modom tu pinahan.

²⁰Ingkon siaphononhon do manang ise na mamele debata sileban, nda holan tu Jahowa ibana mamele.

²¹Ndang jadi sosahanmu halak dagang manang rupaonmu ibana; ai halak dagang do nang hamu na jolo di tano Misir.

²²Ndang jadi rupaon boruboru na mabalu manang anak lumanglumang.

²³Molo tung dirupa ho nasida, gabe manganguhi nasida tu Ahu, sai na tangihononku do angguhangguknasida i.

²⁴Jadi marpiarpia ma rimashu, jala bunuonku hamu marhitehite podang, gabe mabalu jolmamuna, gabe anak lumanglumang ia angka anakmuna.

²⁵Molo dipasali ho hepeng tu bangsongki, tu na pogos di lambungmi, unang ho songon halak sijalo bunga ni hepeng sian ibana, unang bahen marbunga hepengmu tu ibana.

²⁶Molo sindor dijalo ho ulos ni donganmu, ingkon paulahonmu tu ibana jumolo asa sundut mata ni ari.

²⁷Ai ulosna do bulusanna manangkas tu hulingkulingna, tung tudia ma ibana modom? Molo tung manganguhi ibana tu Ahu, sai tangihononku di ibana, ai parasi ni roha do Ahu.

²⁸Ndang jadi buraanmu Debata, jala ndang jadi pulasanmu induk di bangsom.

²⁹Ndang jadi tiopanmu lobilobi ni emem manang anggurmu. Ingkon tu Ahu lehononmu anak buhabajum.

³⁰Suang songon i bahenonmu taringot tu lombum dohot angka birubirum. Pitu ari lelengna di lambung ni inana; di ari paualuhon i tu Ahu ma i lehononmu.

³¹Ingkon halak na badia ma hamu di Ahu. Dibahen i ndang jadi panganonmuna juhut na ginotil ni binatang di ladang, ingkon tu jolo ni biang do timpalhononhon.

23¹(I.) Ndang jadi pararatonmu barita gapgap, jala unang paherbang tanganmu rap dohot parjahat, gabe sitindangkon hageduhon.

²Ndang jadi paihutonmu tahi torop laho manjahati, jala ndang jadi parpanguluanmu hata bada, manang manolopi hata torop laho papeolhon uhum.

³Na pogos pe ndang jadi ampinanmu di pargulutanna.

⁴Molo jumpang ho lombu ni musum, manang halodena lilu, ingkon mulak toghononmu tu ibana.

⁵Molo diida ho halode ni halak na mangkagigihon ho mandate dibahen soratna, ndang jadi pasombuonmu peak, ingkon paheheonmu do i rap dohot binoanna.

⁶Ndang jadi pailingonmu uhum tu halak na pogos hasolhotonmu di pargulutanna i.

⁷ Sai paholang ma ho sian hata gapgap, jala ndang jadi mate bunuonmu halak na lidang dohot na tigor, ai ndang olo Ahu mamintori halak parjahat.

⁸ Nandang jadi jaloonmu silehonlehon, ai papitung mata ni halak angka na tonggor hian nian anggo silehonlehon, jala dipapeol parhataan ni halak partigor.

⁹ Nandang jadi hilangonmu halak dagang, ai diboto hamu do roha ni halak dagang ala halak dagang nang hamu na jolo di tano Misir.

¹⁰ (II.) Onom taon padodot saburanmu tanomi, jala papunguonmu gogona.

¹¹ Alai anggo papitutaonhon ingkon ulangonmu ma, jala patalunonmu, asa panganon ni angka na pogos sian bangsom, jala na tinebahon nasida jadi ma panganon ni binatang di ladang. Suang songon i do bahenonmu tu porlak anggurmumu dohot tu hau jetunmu.

¹² Onom ari ma lelengmu mangula ulaonmu, alai anggo di ari papituhon i ingkon maradian ma ho, asa maradian jonggim dohot halodem, maradian dohot anak ni hatobanmu dohot halak dagang pahosahon.

¹³ Sai radoti hamu ma sude na hupaboa i tu hamu. Nandang jadi paingotingotonmuna goar ni angka debata sileban, jala ndang jadi begeon sian pamanganmu.

¹⁴ Tolu hali di na sataon ho marari raya di Ahu.

¹⁵Ingkon radotanmu ma ari raya ni sagusagu angka na so niasoman, pitu ari ma lelengna panganonmu sagusagu na so niasoman, songon naung hutonahon tu ho, pola hubuhu bulan Abib, ai di bulan i do ho ruar sian Misir. Alai ndang jadi idaonmu bohingkon so marisi pelean tanganmu.

¹⁶Nang ari raya gotilon ni angka patumonaan ni na niulam, na sinaburmu di ladang. Nang ari raya hasisimpul ni suansuanan di ujung ni taon, ia dung dipapungu ho na niulam sian ladang.

¹⁷Tolu hali di na sataon ingkon ro nasa baoa sian ho tu jolo ni Tuhan Jahowa.

¹⁸Nandang jadi pelehononmu mudar ni pelean tu Ahu mardongan sagusagu na niasoman, jala ndang jadi peopon tu manogot tabotabo sian pelean ari raya tu Ahu.

¹⁹Ingkon boanonmu do patumonaan sian tanomi masuk tu bagasan jabu ni Jahowa, Debatam. Nandang jadi lompakonmu anak ni hamingmu di bagasan aek ni susu ni inana.

²⁰(III.) Ida ma, sai suruonku do Suruan sada di jolom, asa diramoti ho di tongan dalan, jala ditogihon ho sahat tu inganan naung hupadiri di ho.

²¹Sai jamoti ma dirim di adopanna, jala tangihon ma soarana, unang tung alo hamu ibana; ai ndang marpamuati rohana di angka pangalaosionmuna i, ai di bagasan dirina do Goarhu.

²²Alai molo ditangihon ho soarana sian nasa roham, jala dipatupa ho sude na hudok i, jadi Ahu mangalo angka alom, jala Ahu manosak angka na manosaknosak ho.

²³Molo mardalan Suruanki di jolom, jala ditogihon ho masuk tu tano ni halak Amori, Het i, Perisi, Kanaan, Hevi dohot Jebusi, jala Ahu mangaripashon nasida.

²⁴Ndang jadi ho marsomba tu debatanasida, jala ndang jadi oloanmu nasida, jala ndang jadi bahenonmu, songon na binahennasida i, ingkon rendephononmu situtu nasida, jala ropuhanmu situtu ganaganaan angka na pinajoknasida.

²⁵Alai ingkon oloanmuna do Jahowa Debatamuna i, jadi pasupasuwonna ma sagusagum dohot tapianmu, jala pasalpuonku angka sahitsahit sian tongatongamuna.

²⁶Ndang jadi adong na hatektehan sanggul, nang na hol di tanomu; sai na gohanku do bilangan ni ariarim.

²⁷Sai suruonku do panonggotingku di jolom, jala godoranku do nasa bangso sitopotonmi, jala bahenonku do maporus nasa musum maradophon ho.

²⁸Jala suruonku ma angka uhum hamagoan di jolomi, asa dipabali halak Hevi, Kanaan dohot Het sian jolom.

²⁹Ndang di bagasan sataon nasida pabalionku sian jolom, asa unang gabe

halongonan tano i, ganda maon dohot binatang di harangan pasarisaronmu.

³⁰Di laonlaon ni ari pe pabalionku nasida sian jolom, paima lam sopar ho, jala disoluk ho tano i.

³¹Jala bahenonku ma parbalohan ni tanomu sian laut arung sahat ro di laut ni halak Palistim, jala sian halongonan sahat ro di batang aek i (Euprat). Ai pasahatonku do angka pangisi ni tano i tu tanganmuna, asa dipabali ho nasida sian jolom.

³²Ndang jadi angkupanmu nasida manang debatanasida marpadan.

³³Ndang jadi loasonmu nasida maringan di tanomu, asa unang mardosa ho dompak Ahu elaonnasida; ai molo tung oloanmu debatanasida i, sai na gabe jorgong do i di ho.

24¹(I.) Dung i didok Jahowa ma tu si Musa: Nangkok ma hamu mandapothon Jahowa, ho dohot si Aron, Nadab dohot Abihu, ro di na pitupulu halak sintua ni Israel, mandaodao ma hamu marsomba Ahu.

²Sasada si Musa pe jumonok mandapothon Jahowa, alai anggo nasida ndang jadi jumonok, bangso i pe ndang jadi nangkok rap dohot ibana.

³Dung i ro ma si Musa, jala dipajojor tu bangso i saluhut hata ni Jahowa dohot sude angka uhum. Jadi sahata ma sandok bangso i

mangalusi, didok nasida ma: Sude hata angka na pinaboa ni Jahowa, sai bahenonnami do.

⁴Jadi disurathon si Musa ma sude hata ni Jahowa, jala dipasogot manogotna i, dipauli ma sada langgatan di bona ni dolok i dohot sampuludua tiang parningotan marguru sian na sampuludua marga ni Israel.

⁵Dung i disuru ma angka dolidoli sian halak Israel, asa dipelehon nasida angka pelean situtungan dohot mamotongi lembu bahen angka pelean hamauliateon di Jahowa.

⁶Dung i dibuat si Musa ma mudar i satonga, jala dibahen tu bagasan angka saoran; alai anggo mudar na satonganari, tu langgatan i do dipispishon.

⁷Dung i dibuat ma pustaha parpadanan i, jala dijaha tu pinggol ni natorop i. Jadi didok nasida ma: Sude na nidok ni Jahowa, sai bahenonnami do, jala tangihononnami do.

⁸Dung i dibuat si Musa ma mudar i, jala dipispishon tu na torop i, jala ninna ma: Ida ma, on ma mudar ni parpadanan i, naung pinahot ni Jahowa tu hamu ala saluhut hata ondeng.

⁹(II.) Jadi nangkok ma si Musa dohot si Aron, si Nadab dohot Abihu ro di na pitupulu sintua ni halak Israel i.

¹⁰Jadi diida nasida ma Debata ni Israel; ia sidegean ni patna, songon mata intan na rata riongna, jala songon rupa ni langit jumpa puasa bintang.

¹¹ Jala ndang disurdukkon tanganna mangkahua angka sintua ni halak Israel. Jadi dung diida nasida Debata mangan dohot minum ma nasida.

¹² (III.) Dung i ninna Jahowa ma tu si Musa: Nangkok ma ho mandapothon Ahu tu dolok on, disi ma ho, asa hulehon tu ho angka batu na marsurat dohot patik ro di uhum, angka naung husurati, sipodahononmu tu nasida.

¹³ Jadi hehe ma si Musa dohot si Josua parhaladona i, gabe nangkok ma si Musa tu dolok ni Debata.

¹⁴ Jala didok ma tu angka sintua i: Tading dison ma anggo hamu, paima mulak hami tu hamu. Antong si Aron dohot si Hur do di lambungmuna on; manang ise na marparkaro, tu nasida ma diboan.

¹⁵ Jadi dung sahat si Musa tu punsu ni dolok i, gabe dihungkupi ombun i ma dolok i.

¹⁶ Jadi mangulon ma hamuliaon ni Jahowa di punsu ni dolok Sinai, jala dihungkupi ombun i dolok i onom ari lelengna; tole papituarihon dijou ma si Musa sian bagasan ni ombun i.

¹⁷ Jala songon api na marjilam rupa ni hamuliaon ni Jahowa di punsu ni dolok i, diida halak Israel.

¹⁸ Jadi masuk ma si Musa tu bagasan ombun i laho nangkok tu dolok i gabe didolok i ma si Musa opatpulu ari opatpulu borngin lelengna.

25¹ (I.) Dung i ro ma hata ni Jahowa tu si Musa, ninna ma.

²Paboa ma tu halak Israel mamboan tu Ahu silehonlehon, bahen pelean; sian ganup baoa na lomo roha, buatonmuna silehonlehon tu Ahu.

³Alai on do silehonlehon, angka sibuatanmuna sian nasida: sere, perak dohot tombaga.

⁴Tole abit sian bonang na rata langit dohot na rara dohot na merham, nang hain bontar na halus dohot imbulu ni hambing.

⁵Tole angka bobak ni birubiru tunggal, angka na tinubar, tole bobak ni pitudar dohot hau pinasa.

⁶Tole miak tu parpalitoan, miak na hushus pangkeon laho mamiahi dohot manutung daupa.

⁷Tole angka mata intan simata unam dohot landus pangkeon tu baju epod dohot tu tutup andora.

⁸Jala ingkon bahenonnasida di Ahu sada inganan na badia, asa maringan Ahu di tongatonganasida.

⁹Sandok songon na hupatuduhon i tu ho, tiruan ni inganan dohot tiruan ni sude angka parhohasna, ingkon songon i bahenonmuna.

¹⁰(II.) Alai bahenonnasida ma sada poti sian hau pinasa, tonga tolu asta unjurna, jala tonga dua asta bohangna, laos tonga dua asta ia timbona.

¹¹Ingkon lampisonmu ma i dohot sere na pita, sian bagasan dohot sian ruar

lampisonmu, jala bahenonmu do bibirna marlaislais sere humaliang.

¹²Jala tompaonmu ma tusi opat langgu sere, angka sibahenonmu tu suhina na opat i; dua langgu di na sambariba be.

¹³Jala bahen ma haluhalu sian hau pinasa, ipe lampisonmu do i dohot sere.

¹⁴Jala surakkon ma haluhalu i tu bagasan langgu, angka na lohot di poti i laho mangusung poti i.

¹⁵Alai ingkon pasombuon do angka haluhalu i di bagasan angka langgu ni poti i, ndang jadi eneton sian i.

¹⁶Jala pamasuhonmu tu bagasan poti i surat parjanjian, silehononku tu ho.

¹⁷Ingkon bahenonmu huhut sada langkop pardenggan sian sere na pita; tonga tolu asta unjurna, jala tonga dua asta bohangna.

¹⁸Ingkon bahenonmu huhut dua kerubim sian sere sangkimpal na tinopa, bahenonmu do i tu na dua tampahan ni langkop pardenggan i.

¹⁹Jala bahen ma kerubim na sada tu tampahan na sada jala kerubim na sada nari tu tampahanna na sada nari; tubu sian bagasan langkop pardenggan i tolpus tu duru bahenonmuna angka kerubim i di na dua tampahanna.

²⁰Jala paherbangon ni angka kerubim habongna na dua i sian ginjang asa dihungkupi habongna i langkop pardenggan

i, jala padompak be bohinasida, dompak langkop pardengganan i bohi ni angka kerubim mamereng.

²¹ Dung i bahenonmu ma langkop pardengganan i tu ginjang ni poti i, jala pamasuhonmu ma tu bagasan poti i surat parjanjian silehononku tu ho.

²² Jadi disi ma topotonku ho, asa mangkatai Ahu dohot ho sian ginjang ni langkop pardengganan i sian holangholang ni kerubim na dua i, angka na di ginjang ni poti parpadanan i taringot tu sude sitonahononku tu ho, paboaonmu tu halak Israel.

²³ (III.) Ingkon bahenonmu dohot sada meja sian hau pinasa; dua asta unjurna, jala saasta bohagna, jala tonga dua asta timbona.

²⁴ Jala lampisonmu ma i dohot sere na pita, jala bahenonmu martopi sere humaliang.

²⁵ Jala bahenonmu tusi sada lais santopap bidangna humaliang, jala bahen laisna i martopi sere pinariponipon humaliang.

²⁶ Jala bahen tusi opat langgu sere, sibahenonmu tu suhina na opat i, angka na di patna na opat i.

²⁷ Ingkon jonok di toru ni lais bahenon angka langgu i bahen panuruhan ni haluhalu laho mangusung meja i.

²⁸ Sian hau pinasa ma bahenonmu haluhalu i, jala lampisonmu dohot sere, i ma pangkeon mangusung meja i.

²⁹Jala bahenonmu ma pingganna dohot saoanna dohot hondina dohot mangkukna, bahen pangusean ni tuak tangkasan ma i; sian sere na pita ma i paulionmu.

³⁰Jala ingkon peakkononmu tongtong di meja i sagusagu na marhadohoan maradophon Ahu.

³¹(IV.) Ingkon bahenonmu huhut sada parpalitoan sian sere na pita, sangkimpal parpalitoan i topaonmu, ro di badanna, dangkana dohot butuhana, hansingna dohot bungana bahenon sian i.

³²Jala ingkon onom dangka ruar sian lambungna, tolu dangka sian na sambariba ni parpalitoan i, jala tolu dangka sian na sambariba nari.

³³Martolu butuha, songon bunga ni buapala ganup dangkana i bahenon, mardongan hansing dohot bunga; laos songon i do bahenon tu na onom dangka i, angka na ruar sian parpalitoan i.

³⁴Alai ingkon opat do butuha ni parpalitoan i bahenon, songon bunga ni buapala mardongan hansing dohot bunga.

³⁵Jala sahansing be di toru ni na dua dangkana, angka na ruar sian i; suang songon i sahansing be di toru ni dangkana na dua, angka na ruar sian i; suang muse sahansing be di toru ni dangkana na dua, angka na ruar sian i, gabe onom dangka ruar sian badan ni parpalitoan i.

³⁶Ai ingkon ruar sian i do angka hansingna dohot dangkana; luhutna i sian sangkimpal sere na pita do i.

³⁷Jala bahenonmu do pitu palitona, angka sibahenon tu ginjang, asa marsinondang angka i tu jolo.

³⁸Panurturna pe dohot pangintopina sian sere na pita do.

³⁹Sian satalenta sere na pita bahenonmu luhutna i, ro di parhohasna sudena i.

⁴⁰Jala ingot ma mambahensa tudos tu tiruan na niidam di dolok i.

26¹(I.) Ia undungundung i ingkon bahenonmu do sian sampulu rimberimbe, sian bonang na nidua, jala na rata langit, jala na rara jala na merham, margombaran kerubim bahenonmu sitonunhonon ni parpunsa.

²Ia unjur ni sada rimberimbe ingkon duapulu ualu asta do, ia bidangna opat asta; sisada suhat do saluhut angka rimberimbe i.

³Limalima ma angka rimberimbe i padomuon, nasada tu donganna.

⁴Jala bahenonmu do angka tali sangkutan na rata tu bibir ni rimberimbe parjolo i apala di pardomuanna, laos songon i do bahenonmu di bibir ni rimberimbe paduahon i bahen pardomuan paduahon.

⁵Ingkon limapulu tali sangkutan bahenonmu tu rimberimbe na sada, jala limapulu tali sangkutan bahenonmu di ujung ni rimberimbe

i, apala di pardomuanna paduahon; ingkon masijaloan do angka tali sangkutan, na sada tu donganna.

⁶Jala bahenonmu do limapulu haithait sere laho patunggomhon angka rimberimbe i, na sada tu donganna, asa manjadi undungundung sada.

⁷Bahenonmu ma huhut rimberimbe sian imbulu ni hambing bahen langitlangit di atas ni undungundung i; sampulu sada rimberimbe sisongon i bahenonmu.

⁸Ia unjur ni sada rimberimbe tolupulu asta do, jala bidangna opat asta; sisada suhat do rimberimbe na sampulu sada i.

⁹Jala padomuonmu pulik na lima rimberimbe, laos songon i pulik na onom rimberimbe, jala lompitonmu rimberimbe paonomhon, tongon di jolo ni undungundung i.

¹⁰Jala bahenonmu limapulu tali sangkutan di bibir ni rimberimbe na sada parduru apala di pardomuanna, jala limapulu tali sangkutan di bibir ni rimberimbe na sada nari, di pardomuanna paduahon.

¹¹Jala bahenonmu do limapulu haithait tombaga, jala haithononhon ma angka haithait i tu angka tali sangkutan i laho padomuhon undungundung i gabe sada.

¹²Alai anggo lobilobi ni rimberimbe sian langitlangit ni undungundung i, na satonga

lobilobi ni rimberimbe i, laos gantung di pudi ni undungundung i.

¹³Jala saasta di na sambariba, jala saasta di na sambariba nari sian lobilobi di unjur ni angka rimberimbe ni undungundung i; ingkon duansa gantung di lambung ni undungundung i bahen pangondingina angkup be di lambung.

¹⁴Jala bahenonmu do di atas langitlangit ni undungundung i salampis sian bobak ni birubiru tunggal na tinubar, di atas ni muse salampis sian bobak ni pitudar.

¹⁵(II.) Bahenonmu ma huhut angka papan sian hau pinasa bahen dorpi ni undungundung i, angka sipajongjongon.

¹⁶Sampulu asta ganjang ni papan i, jala tonga dua asta bidang ni sada papan.

¹⁷Ingkon mardua pasi ganup papan, baris be tu donganna; ingkon songon i ma bahenonmu saluhut papan angka na tu undungundung i.

¹⁸Jala songon on do bahenonmu papan tu undungundung i: Ingkon duapulu papan sambariba tungkan dangsina.

¹⁹Alai ingkon bahenonmu do opatpulu ojahan perak di toru ni na duapulu papan i, dua be ojahan di toru ni sada papan, marguru tu pasina na dua i.

²⁰Di na sambariba nari ni undungundung i pe, tungkan utara laos bahenon do duapulu papan.

²¹Nang na opatpulu ojahanna perak, dua be ojahan di toru ni sada papan.

²²Alai di tampahan ni undungundung tungkan hasundutan, onom papan bahenonmu.

²³Jala dua papan bahenonmu di na dua suhi ni undungundung, di tampahanna parpudi.

²⁴Ingkon dua lampis ma i sian toru mardomu di ginjang marhitehite sadu langgu, songon i ma duansa di na dua suhi i.

²⁵Jadi ualu papan disi mardongan ojahanna perak sampulu onom toropna, dua be di toru ni sada papan.

²⁶Jala bahenonmu do angka ransangna sian hau pinasa, lima tu angka papan di na sambariba ni undungundung i.

²⁷Jala lima ransang tu angka papan di na sambariba nari ni undungundung i, jala lima ransang tu angka papan ni undungundung di tampahan parpudi ni tungkan hasundutan.

²⁸Jala ransang partonga na di dos tonga ni angka papan, ingkon torus sian suhi na sada tu suhi na sada nari.

²⁹Jala lampisonmu do angka papan i dohot sere, sabongna pe sian sere do bahenonmu, asa tusi pinabongot angka ransang; angka ransang i pe lampisonmu dohot sere.

³⁰Dung i pajongjongonmu ma undungundung i tudos tu tiruan na niidam di dolok i.

³¹(III.) Dung i bahenonmu ma sada rimberimbe sian bonang na rata langit, jala na tinubar, jala na merham dohot sian hain

na halus na nidua, margombaran kerubim bahenonmu sitonunhonon ni parpunsu tusi.

³²Dung i hirehononmu ma i tu opat tiang sian hau pinasa angka na nilampis dohot sere, jala marhaithait sere, jongjong di atas opat ojan perak.

³³Alai bahenonmu do rimberimbe i tu toru ni haithait. Dung i pamasuk hamu ma tu bagasan rimberimbe i poti parpadanan, gabe rimberimbe i ma parholangan di hamu, di holangholang ni na badia dohot na songkal sahali.

³⁴Ingkon langkophononmu ma langkop pardenggan i tu atas poti parpadanan di bagasan na songkal sahali.

³⁵Alai anggo meja i tu balian ni rimberimbe bahenonmu, jala tondong ni meja i parpalitoan i di na sambariba ni undungundung i tungkan dangsina, asa tungkan utara ma bahenonmu meja i.

³⁶Bahenonmu ma huhut sada rimberimbe tutup ni pintu ni undungundung i sian bonang na rata langit dohot na tinubar dohot na merham dohot sian bonang na bontar na nidua sitonunon ni parpunsu.

³⁷Bahenonmu ma dohot lima tiang sian hau pinasa tu rimberimbe i, angka silampisonmu dohot sere jala marhaithait sere; tumpaonna ma huhut lima ojahanna sian tombaga.

27 ¹(I.) Dung i bahenonmu ma sada langgatan sian hau pinasa, lima asta

unjurna jala lima asta bohagna, asa maropat suhi langgatan i jala tolu asta timbona.

²Martanduk ma bahenonmu di suhina na opat i; songon na tubu sian i angka tandukna jala lampisonmu do i dohot tombaga.

³Bahenonmu ma dohot angka parsirabunanna dohot siuksiukna dohot mangkuk pamispisan dohot garpuna dohot parapiapianna; sian tombaga ma paulionmu saluhut ulaulana i.

⁴Bahenonmu ma huhut sada handanghandangna sian tombaga marpangalaho songon na niangit, jala ingkon bahenonmu huhut tu jala i opat langgu sian tombaga tu suhina na opat i.

⁵Ingkon bahenonmu do handanghandang i tu toru ni sidegedegean humaliang langgatan i sahat ro di parsitongaan ni langgatan i.

⁶Dung i bahenonmu ma angka haluhalu tu langgatan i, haluhalu sian hau pinasa angka silampisonmu dohot tombaga.

⁷Dung i pabongotonmu ma angka haluhalu i tu bagasan angka langgu, gabe marhaluhalu ma langgatan i angkup be laho mangusung.

⁸Rumar di bagasan bahenonmu langgatan i sian angka papan, songon naung pinatuduhon ni Jahowa tu ho di dolok, songon i do bahenonmu.

⁹(II.) Ingkon bahenonmu ma dohot sada alaman ni undungundung i di na sambariba tungkan dangsina, marrimberimbe sian

bonang na bontar na nidua, saratus asta ganjangna di na sambariba.

¹⁰Jala duapulu tiangna jala duapulu ojahanna sian tombaga, ianggo haithait ni angka tiang ro di ransangransangna perak do.

¹¹Songon i dohot di na sambariba tungkan utara ingkon marrimberimbe do, saratus asta unjurna jala duapulu tiangna jala ojahanna na duapulu i sian tombaga alai anggo haithait ni tiang i ro di ransangransangna perak do.

¹²Alai anggo bohang ni alaman i tungkan hasundutan marrimberimbe silimapulu asta be ganjangna, sampulu tiangna jala sampulu ojahanna.

¹³Ia bohang ni alaman di na sambariba tungkan habinsaran laos limapulu asta do.

¹⁴Jadi sampulu lima asta rimberimbe di na sambariba haroroan i, tolu tiangna jala tolu ojahanna.

¹⁵Di na sambariba nari pe laos sampulu lima asta rimberimbe i, tolu tiangna jala tolu ojahanna.

¹⁶Alai di pintu tungkan alaman pe, ingkon adong do sada rimberimbe, duapulu asta ganjangna sian bonang na rata langit na rara tinubar dohot na merham dohot sian hain na halus na nidua sitonunhonon ni parpunsa tusi mardongan opat tiang dohot opat pat ojahanna.

¹⁷Luhut angka tiang ni alaman humaliang ingkon mardomu do marhite sian

rangsang perak dohot haithait sian perak, alai anggo patna ingkon sian tombaga do.

¹⁸Ia unjur ni alaman i ingkon saratus asta do, bohagna limapulu asta, timbona lima asta, paulion sian bonang na nidua, alai anggo pat ni tiang i ingkon tombaga do.

¹⁹(III.) Luhut ulaula angka na pinangke di undungundung i mangaradoti ulaon marragamragam, ro di sude angka labangna dohot labang tu alaman i, ingkon sian tombaga do.

²⁰Alai anggo ho dohononmu huhut halak Israel asa diboan be tu ho miak jetun na niduda jala na tinapis bahen miak palito asa tongtong galak palito i.

²¹Ingkon di bagasan undungundung parluhutan, di ruar ni rimberimbe, na mangolat poti parpadanan i pasangan ni Aron dohot angka anakna palito i olat ni bodari sahat ro di manogotna i di adopan ni Jahowa. I ma aturan na hot salelenglelengna di halak Israel ro di pinomparnasida i.

28¹(I.) Dung i dohononmu ma Aron hahami, rap dohot angka anakna ruar sian tongatonga ni halak Israel ro jumonok tu ho, asa ibana mangaradoti tohonan malim di Ahu, i ma Aron dohot angka anakna: Nadab, Abihu, si Eleasar dohot si I tamar.

²Dung i bahenonmu ma pangkean angka na badia di Aron hahami bahen hamuliaon dohot pajagarhon.

³Ingkon dohononmu ma tu sude halak angka na pistar marroha, angka naung Ahu manggohi rohana dohot tondi hapistaran, asa nasida paulihon angka pangkean di Aron laho pabadihon ibana, asa ibana gabe malim di Ahu.

⁴Alai on do pangkean angka sipaulionnasida: sada tutup andora, sada baju epod, sada baju parbalian, sada baju parbagasan na niangit, sada tumpal dohot sada hohos; ingkon nasida paulihon pangkean angka na badia di Aron hahami dohot di angka anakna, asa ibana gabe malim di Ahu.

⁵Ingkon buatonnasida sere dohot bonang na rata langit, na tinubar jala na merham dohot hain na halus.

⁶(II.) Ia baju epod i ingkon paulionnasida do sian sere dohot sian bonang na rata langit, na tinubar jala na merham dohot sian hain na halus na nidua sitonunhonon ni parpunsa.

⁷Ingkon mardua pangabaraan epod i bahenonna sipatunggomon di tampahanna be.

⁸Hohos ni epod i pe ingkon sisada hapandean do dohot baju i jala mardomu tusi, paulion sian sere dohot sian bonang na rata langit, na tinubar jala na merham dohot sian hain na halus na nidua.

⁹Dung i ingkon buatonmu ma dua mata intan Unam jala uhirhononmu tusi goargoar ni anak ni Israel na sampuludua i.

¹⁰Onom goarnasida di mata intan na sada, jala goar na onom nari tu mata intan paduahon mangihuthon partubunasida.

¹¹Songon panguhirhon ni halak pandakdak batu, angka na manguhir tintin sahap panguhironna di goar ni angka anak ni Israel tu mata intan na dua i, jala marbibir sere humaliang.

¹²Dung i bahenonmu ma na dua mata intan i tu na dua pangabaraan ni epod i bahen batu parningotan di angka anak ni Israel, asa usungon ni Aron di atas abarana na dua i goargoarnasida di adopan ni Jahowa bahen parningotan.

¹³Ingkon bahenonmu huhut angka haithait sere.

¹⁴Paulionmu muse dua rante sian sere na pita, dos ganjangna, ingkon songon tali na nidua hapandeanna masijaloan jala haithononhon tu haithait i.

¹⁵Angkup ni bahenonmu ma sada tutup andora paruhuman, suang songon hapandean ni baju epod bahenonmu tonunhonon ni parpunsa tusi sere, bonang na rata langit, na tinubar jala na merham dohot hain na halus na nidua.

¹⁶Ingkon maropat suhi do i bahenon, jala dua lampis, sanjongkal ginjangna jala sanjongkal bidangna.

¹⁷Jala ingkon gohanmu do i dohot opat rinte batu intan. Di rinte parjolo: Batu intan sardis, topasion, samarados.

¹⁸Di rinte paduahon: Batu intan rubin, sapire, diaman.

¹⁹Di rinte patoluhon: Batu intan opal, akat, ametist.

²⁰Di rinte paopathon: Batu intan krisolit, Unam dohot jaspis; jala ingkon marihot sere angka rintena i bahenon.

²¹Jala ingkon jojor angka batu i mangihuthon partording ni na sampulu dua goar ni anak ni Israel, angka siuhirhonon ni halak pandakdak batu, pulik be goarna i mangihuthon na sampuludua marga ni Israel.

²²Ingkon bahenonmu huhut tu tutup andora angka rante dos ganjangna, songon tali na nidua hapandeanna sian sere na pita.

²³Bahenonmu huhut tu tutup andora i dua tintin sere jala bahenonmu na dua tintin i tu na dua tampahan ni tutup andora i.

²⁴Ingkon bahenonmu na dua rante na nidua sian sere tu bagasan tintin na dua i angka na di tampahan ni tutup andora i.

²⁵Alai anggo na dua ujung ni na dua rante na nidua i ingkon haithononmu do i tu na dua haithait jala patunggomonmu do i tu pangabaraan ni baju epod patondong be.

²⁶Ingkon bahenonmu muse dua tintin sere na asing jala lohothononmu do i tu na dua tampahan ni tutup andora, apala di pangkilimanna na tungkan baju epod i dingkan bagasan.

²⁷Bahenonmu muse dua tintin sere na asing jala lohothononmu do i tu na dua pangabaraan ni baju epod tungkan toru tongon di pardomuanna, di atas hohos ni baju epod.

²⁸Ingkon pudunhononhon muse tutup andora i rap dohot tintinna marhite sian bonang na rata langit tu tintin ni baju epod, asa hopos tu hohos ni baju epod jala unang tarbahen sirang tutup andora sian baju epod.

²⁹Jadi songon i ma usungon ni Aron goargoar ni anak ni Israel di atas parateateanna di bagasan tutup andora ni paruhuman, molo laho masuk ibana tu bagasan inganan na badia i bahen parningotan tongtong di adopan ni Jahowa.

³⁰Dung i bahenonmu ma tu bagasan tutup andora paruhuman: Urim dohot Tummim (hatiuron dohot hasintongan), asa di atas parateatean ni Aron do i laho masuk ibana tu adopan ni Jahowa; ingkon songon i tongtong paboanboanon ni Aron uhum ni halak Israel di atas parateateanna di adopan ni Jahowa.

³¹Ingkon bahenonmu huhut baju parbalian di atas baju epod, sandok sian bonang na rata langit do i ditonun.

³²Jala parrungkunganna i di parsitongaanna, ingkon martopi na tinonun do i humaliang, songon topi ni baju partahanan, asa unang olo maribak.

³³Jala bahenonmu do tu rambuna humaliang angka parbue ni dalimo sian bonang na rata langit, na tinubar jala na merham, bahenon huhut marsolotan angka giringgiring sere humaliang.

³⁴Sai marsorinsorin do sada giringgiring sere dung i sada parbue ni dalimo humaliang di rambu ni baju parbalian i.

³⁵Ingkon solukkonon ni Aron bajubaju i laho marulaon ibana, asa tarbege soara ni giringgiring, molo masuk ibana tu bagasan inganan na badia i di adopan ni Jahowa dohot molo ruar ibana muse asa unang mate ibana.

³⁶Ingkon bahenonmu huhut sada sangkalia sian sere na pita, jala uhirhononmu tu bagasan songon panguhiron sahap: Habadiaon di Jahowa!

³⁷Jala palohotonmu do i marhite sian tali bonang na rata langit tu tumpal i, asa lohote di jolo ni tumpal ma i.

³⁸Asa di pardompahan ni Aron ma sangkalia i, asa Aron mamboan pardenggan ni nasa ugasan na badia, angka naung pinarbadian ni halak Israel marhite sian peleannasida, ingkon tongtong sangkalia i di pardompahanna, asa jumpangan asi ni roha halak Israel di adopan ni Jahowa.

³⁹Alai anggo baju parbagasan i ingkon paulionmu do i sian hain na halus, bahenonmu muse sada tumpal sian hain na halus; alai anggo hohosna ingkon angiton ni parpuns do i.

⁴⁰(III.) Di angka anak ni Aron pe ingkon paulionmu do angka baju parbagasan, tole angka hohos dohot tumpal bahen hamuliaon dohot pajagarhon.

⁴¹Ingkon solukkononmu do i tu Aron hahami dohot tu angka anakna, dung i miahanmu ma nasida jala gohanmu tangannasida pabadiahon nasida, asa nasida gabe malim di Ahu.

⁴²Angkupni bahen ma di nasida saraoal sian hain na bontar manghungkupi dagingna unang manangkas, olat ni ulu ni tot sahat ro di gonting ganjangna.

⁴³Ingkon pangkeon ni si Aron dohot angka anakna saraoal i laho masuk nasida tu undungundung parluhutan i, nang molo jumonok nasida tu langgatan laho marhalado di inganan na badia i, asa unang mangonai torutoru tu nasida gabe ingkon mate nasida. I ma aturan na hot salelenglelengna di halak Israel ro di pinomparnasida i.

29¹(I.) Jala on do parturena bahenonmu tu nasida laho pasahathon tohonan tu nasida mangaradoti hamalimon di Ahu: Ingkon buatonmu sada jonggi naposo dohot dua birubiru tunggal na so marlindang.

²Tole muse roti na so niasoman dohot sagusagu na so niasoman na marsaor miak dohot juada na so niasoman na marsapu miak; sian itak na lamot bahenonmu luhutna i.

³Dung i bahenonmu ma angka i tu bagasan sada hirang, laos di bagasan hirang do angka i pelehononmu rap dohot jonggi naposo i dohot na dua birubiru tunggal i.

⁴Dung i dohononmu ma si Aron dohot angka anakna ro jumonok tu pintu ni undungundung parluhutan i, laos didionmu ma nasida dohot aek.

⁵Dung i buatonmu ma angka pangkean i jala solukkononmu tu Aron, baju parbagasan, baju parbalian, baju epod dohot tutup andora, jala ingkon hohosanmu do ibana dohot hohos ni baju epod.

⁶Dung i bahenonmu ma tumpal i tu atas uluna, jala lohothononmu sangkalia habadiaon tu tumpal i.

⁷Dung i buatonmu ma miak pamiahion, jala usehononmu tu atas uluna asa mamiahi ibana.

⁸Dokkononmu ma huhut angka anakna ro jumonok, jala solukkononmu tu nasida baju parbagasan i.

⁹Jala ingkon hohoshononmu tu nasida hohos i, tu Aron dohot tu angka anakna i, jala palohotonmu tumpal i tu ulunasida, i ma tanda paboa nasida mangaradoti hamalimon

ro di salelenglelengna; ingkon laos gohanmu ma tangan ni Aron dohot angka anakna i.

¹⁰Dung i dohononmu ma mamboan jonggi na poso i jumonok tu adopan ni undungundung parluhutan i, asa diampehon Aron dohot anakna i tangannasida tu atas ulu ni jonggi i.

¹¹Dung i seatonmu ma jonggi i di adopan ni Jahowa mardonokkon pintu ni undungundung parluhutan i.

¹²Dung i buatonmu ma deba sian mudar ni jonggi i jala daishononmu do i marhite sian jarijarim tu angka tanduk ni langgatan i; alai anggo sandok mudar na tinggal i usehononmu do i tu pantar ni langgatan i.

¹³Dung i buatonmu ma nasa pultahan panaputi ni raoanna dohot hirehire na ampe tu ateate dohot tu pia na dua i ro di pultahan na lohote tusi, ingkon laos tutungonmu ma i bahen daupa di atas langgatan i.

¹⁴Alai anggo sibuk ni jonggi i, hulingkulingna dohot napana ingkon suda do i tutungonmu dohot api di balian ni parsaroan i, i ma gabe pelean pardosaon.

¹⁵Dung i buatonmu ma sada birubiru tunggal, jala dohononmu si Aron dohot angka anakna mangampehon tangannasida tu atas ulu ni birubiru tunggal i.

¹⁶Dung i seatonmu ma birubiru tunggal i jala buatonmu mudarna, laos pispishononmu ma i tu langgatan i humaliang.

¹⁷Dung i saheanmu ma birubiru tunggal i, jala burionmu raoanna dohot patna, jala patoponmu ma i tu na margoarna dohot tu uluna.

¹⁸Jala tutungonmu di atas langgatan sandok birubiru tunggal i bahen daupa; pelean situtungon ma i di Jahowa, uap na hushus ni pelean api tu Jahowa ma i.

¹⁹Dung i buatonmu ma birubiru tunggal na sada nari, jala ia dung diampehon Aron dohot angka anakna i tangannasida tu atas ulu ni birubiru tunggal i.

²⁰Seatonmu ma birubiru tunggal i, jala buatonmu deba sian mudarna jala bahenonmu ma i tu pinggol ni Aron dohot tu pinggol siamun ni angka anakna, dohot tu ina ni tanganna siamun, dohot tu ina ni patna siamun; dung i pispishononmu ma mudar i tu langgatan i humaliang.

²¹Dung i buatonmu ma deba sian mudar na di atas langgatan i dohot sian miak pamiahion i, jala pispishononmu ma i tu Aron dohot tu angka pangkeanna, tu angka anakna dohot tu angka pangkean ni anakna, asa badia Aron dohot angka pangkeanna, badia dohot angka anakna ro di pangkean ni angka anakna rap dohot ibana.

²²Dung i buatonmu ma pultahan sian birubiru tunggal i dohot ihurna ro di pultahan panaputi ni raoanna, nang hirehire na ampe tu ateate dohot pia na dua i rap dohot

pultahan na lohот tusi ro di hae jolo dingkan
siamun; ai birubiru tunggal sahatsahat ni
tohonan ma i.

²³Angkupni buatonmu ma sangkimpal roti
dohot sada sagusagu na marsaor miak dohot
sada timpatimpa sian bagasan hirang isian
roti na so niasoman, na di adopan ni Jahowa.

²⁴Jala ampehononmu ma luhutna i tu tangan
ni Aron dohot tu tangan ni angka anakna
i jala tatingtatingonmu ma i bahen pelean
tatingan di adopan ni Jahowa.

²⁵Dung i buatonmu ma i sian tangannasida,
jala tutungonmu bahen daupa di atas
langgatan dongan ni pelean situtungon bahen
uap na hushus di adopan ni Jahowa, bahen
pelean api tu Jahowa ma i.

²⁶Dung i buatonmu ma andora sian birubiru
tunggal sahatsahat ni tohonan tu Aron jala
tatingtatingonmu ma i bahen pelean tatingan
di adopan ni Jahowa, ingkon i ma gabe
parjambaranmu.

²⁷Ingkon songon i urasonmu andora
pelean tatingan dohot hae jolo bahen pelean
tatingan, na tinating jala na hinindat sian
birubiru sahatsahat ni tohonan na di Aron
dohot di angka anakna i.

²⁸(II.) Ingkon manjadi uhum na hot ma
i di Aron dohot di angka anakna ro di
salelenglelengna turpukna sian halak Israel,
ai pelean tatingan do on; ingkon pelehonon
ni halak Israel do pelean tatingan i sian

angka pelean hamauliateon, pinelehonnasida i bahen pelean tatingan di Jahowa.

²⁹Ia pangkean ni Aron angka na badia i, ingkon sahat tu angka anakna ma i dung salpu ibana, pangkeonnasida ma i uju laho mamiahi nasida pasahathon tohonan i tu nasida.

³⁰Ingkon pitu ari lelengna pangkeonna pangkean i manang ise sian angka anak ni Aron bangkit malim singkatna, asa jadi ibana masuk tu undungundung parluhutan i laho marhalado di inganan na badia i.

³¹Ingkon buatonmu ma birubiru tunggal sahatsahat ni tohonan i, jala lompakonmu juhutna di bagasan inganan na badia i.

³²Dung i ingkon panganon ni Aron dohot angka anakna i ma juhut ni birubiru tunggal i rap dohot roti angka na di bagasan hirang i mardonokkon pintu ni undungundung parluhutan i.

³³Asa ingkon laos panganonnasida do pelean na mambahen pardenggan di nasida laho pasahathon tohonan tu nasida dohot pabadiahon dirinasida i; alai na so tupa anggo halak ruar manganhon sian i, ai na badia do i.

³⁴Molo tung adong na lobi sian juhut sahatsahat ni tohonan i manang sian roti sahat ro di manogotna i, ingkon tutungonmu do na lobi i di bagasan api; ndang jadi panganon ni manang ise, ai na badia do i.

³⁵Ingkon songon i do bahenonmu tu Aron dohot tu angka anakna i, sandok songon na hutonahon i tu ho: Ingkon pitu ari lelengna pasahatonmu tohonan i tu nasida.

³⁶(III.) Angkup ni ingkon ganup ari seaton sada lombu bahen pelean pardosaon pasimpul pardenggan i; ingkon urasonmu huhut langgatan pameleanna marhite sian pelean pardenggan pinelehonmu di atasna, dung i miahonmu ma langgatan i laho pabadihonsa.

³⁷Ingkon pitu ari lelengna pelehononmu pelean pardenggan di langgatan i pabadihonsa, asa tung manjadi na badia sahali; manang ise ma naeng jumonok tu langgatan i, ingkon na badia do.

³⁸Alai ingkon on do pelehononmu di atas langgatan i: dua anak ni birubiru sisataon be tongtong ganup ari.

³⁹Sada birubiru pelehononmu manogotna i, jala birubiru na sada nari pelehononmu marhira bodari.

⁴⁰Jala dongan ni anak ni birubiru parjolo i bahenonmu sasolup itak marsaor miak na tinutu arga sabale; angkup ni sapansung tuak anggur bahen pelean siinumon.

⁴¹Ia anak ni birubiru na sada nari sipelehononmu marhira bot ari, suang songon pamelehonmi di pelean sipanganon dohot siinumon manogotna i pamelehonmi disi bahen uap na hushus dohot pelean situtungan di Jahowa.

⁴²I ma pelean situtungan na tongtong di pinomparmuna mardonokkon pintu ni undungundung parluhutan i di adopan ni Jahowa, tusi do huhut ro Ahu monopot hamu asa mangkatai ahu dohot ho disi.

⁴³(IV.) Tusi ma Ahu ro marluhut rap dohot halak Israel jala hamuliaonki pabadiahon inganan i.

⁴⁴Ahu huhut pabadiahon undungundung parluhutan i rap dohot langgatan i; Ahu huhut pabadiahon si Aron dohot angka anakna gabe malim di Ahu.

⁴⁵Ahu huhut maringan di tongatonga ni halak Israel, asa Ahu gabe Debatanasida.

⁴⁶Asa tung diboto nasida, Ahu do Jahowa, Debatanasida i, naung manogihon nasida ruar sian tano Misir, asa maringan Ahu di tongatonganasida; Ahu, Jahowa, Debatanasida i.

30¹(I.) Ingkon paulionmu huhut sada langgatan panutungan daupa; ingkon sian hau pinasa paulionmu i.

²Saasta unjurna jala saasta bohangna, maropatsuhi tahe, jala dua asta timbona; ingkon ruar sian i huhut angka tandukna.

³Jala ingkon lampisonmu do i dohot sere na pita, nang tutupna, nang dorpina humaliang dohot angka tandukna; ingkon bahenonmu huhut marbibir humaliang sian sere na pita.

⁴Ingkon bahenonmu muse dua langgu sere di toru ni bibirna i; ingkon bahenonmu do

i tahe di suhina na dua i angkup be, bahen panuruhan ni haluhalu, asa dapot usungon ni halak langgatan i.

⁵Angka haluhalu i pe ingkon bahenonmu do sian hau pinasa jala lampisonmu dohot sere.

⁶Jala pajongjongonmu do langgatan i di adopan ni rimberimbe, na mangolat poti panindangion i, di adopan ni langkop pardenggan i na di atas ni panindangion i, asa tusi Ahu ro marluhut rap dohot ho.

⁷Ingkon manutung daupa angka na hushus di atasna Aron ganup sogot, ganup mangisi palito i ibana ingkon manutung daupa ibana.

⁸Nang laho mamasang palito i Aron mareak bot ari, ingkon tongtong manutung daupa ibana di adopan ni Jahowa paingotingoton nang pinomparmuna.

⁹Na so tupa hamu mamelehon di atasna daupa sileban, manang pelean situtungan, manang pelean sipanganon, manang mangusehon pelean siinumon tusi.

¹⁰Ingkon Aron mambahen pardenggan di atas tandukna sahali sataon marhite sian mudar ni pelean pardosaon; i ma tutu ingkon sahali sataon ibana mambahen pardenggan di atasna paingotingoton ni pinomparmuna; ai na badia sahali do ibana di Jahowa.

¹¹(II.) Angkup ni didok Jahowa tu si Musa songon on:

¹²Molo dibilangi ho torop ni sandok halak Israel mangihuthon bilangannasida i, ingkon

ganup nasida mangalehon partobus ni hosana di Jahowa uju na binilangan nasida, asa unang songgop tu nasida torutoru uju na binilangan nasida.

¹³On do tama lehonon ni ganup na masuk tu bilangan: satonga sekkel lehononna mangihuthon sekkel di inganan na badia; sasekkel mararga duapulu gera; na satonga sekkel i ingkon gabe pelean tatingan di Jahowa.

¹⁴Manang ise naung binilangan olat ni na marumur duapulu taon tu ginjang, ingkon lehononna do pelean tatingan tu Jahowa.

¹⁵Halak na mora ndang jadi gandaanna, jala halak na pogos ndang jadi oruanna mangalehon sisatonga sekkel i bahen pelean tatingan tu Jahowa bahen partobus ni hosanasida i.

¹⁶Ingkon buatonmu perak partobus i sian halak Israel, asa lehononmu muse pature ulaon di undungundung parluhutan i, bahen parningotan di halak Israel di adopan ni Jahowa bahen pardenggan di tondimuna i.

¹⁷(III.) Dung i ro muse ma hata ni Jahowa tu Musa songon on:

¹⁸Ingkon bahenonmu huhut sada tong tombaga, ojahanna pe ingkon tombaga do bahen parburian, jala bahenonmu do i di holangholang ni undungundung parluhutan i dohot langgatan, jala bahenonmu do aek tu bagasan.

¹⁹Asa anggo Aron dohot angka anakna i ingkon aek sian i buatonna mamburi tangan dohot patnasida.

²⁰Molo masuk nasida tu bagasan undungundung parluhutan i, ingkon jolo marburi nasida, asa unang mate nasida; suang songon i molo jumonok nasida tu langgatan i naeng marhalado laho manutung pelean situtungan bahen daupa tu Jahowa.

²¹Ingkon jolo burianna tanganna dohot patna, asa unang mate nasida. I ma gabe uhum na hot di nasida ro di saleleng ni lelengna paingotingoton ni pinomparnasida huhut marsundutsundut.

²²Dung i ro muse hata ni Jahowa tu Musa songon on:

²³Alai anggo ho, buat ma di ho pamurpuri na dumenggan i, i ma: Pultak ni haminjon lima ratus sekkel boratna dohot ulumamis satongana, i ma duaratus limapulu sekkel dohot hasior laos dua ratus limapulu sekkel boratna.

²⁴Tole muse hau teja lima ratus sekkel mangihuthon sekkel di inganan na badia i dohot miak sian hau Jetun sabale.

²⁵Ingkon bahenonmu sian i miak pamiahion na badia, miak pulungpulungan na sinaor mangihuthon hapandean ni pande daon, miak pamiahion na badia ma i.

²⁶Ingkon miakkononmu ma i tu undungundung parluhutan i dohot tu poti parpadanan i.

²⁷Nang meja i ro di ulaulana sudena, tole parpalitoan rap dohot ulaulana, nang langgatan pardaupaan.

²⁸Tole muse langgatan pamelean ni pelean situtungan ro di ulaulana sudena dohot tong parburian ro di ojahanna.

²⁹Ingkon songon i bahenonmu pabadiahon angka i, asa gabe sun badia, ganup na manjama angka i ingkon gabe badia do.

³⁰Aron pe ro di angka anakna ingkon miahonmu do jala urasonmu nasida gabe malim di Ahu.

³¹Dung i dohononmu ma tu halak Israel, songon on: Ingkon miak pamiahion na badia maon di Ahu ingoton ni pinomparmuna.

³²(IV.) Nandang jadi usehononhon miak i tu daging ni manang ise jolma hian, parmasakna pe ndang jadi pasumanonmu, ai miak na badia do i, dibahen i ingkon badia do i di hamu.

³³Manang ise na pasuman parmasakna, manang tung diusehon tu halak sileban ingkon siap ibana bahenon sian bangsona.

³⁴(V.) Dung i ro muse hata ni Jahowa tu Musa: Buat ma di ho pamurpuri angka na hushus, gota ni haminjon, bungalawang, meang dohot daupa mamolin dos be do boratna.

³⁵Dung i bahenonmu ma sian i bahen miak daupa mangihuthon hapandean ni pande daon, saor ansim, pita dohot badia.

³⁶Dung i tutuonmu ma sian i mansai lamot jala bahenonmu sian i tu adopan ni poti parpadanan i di bagasan undungundung parluhutan i, asa ro Ahu manopot ho tusi; i ma na badia sahali di hamu.

³⁷Ia daupa sibahenonmu i, ndang jadi tiruonmu parmasakna di hamu sandiri; ingkon badia do i di ho lehonon tu Jahowa.

³⁸Manang ise na manuman parmasakna, asa paanggoanggoonna, ingkon siap do ibana bahenon sian bangsona.

31 ¹(I.) Dung i ro muse ma hata ni Jahowa tu si Musa songon on:

²Ida ma, nunga hujou sahalak na margoar Bezaleel, anak ni si Uri, i ma anak ni si Hur sian marga Juda.

³Nunga pola hugoki rohana dohot Tondi ni Debata marhapistaran, marhapandean dohot marparbinotoan di bagasan saluhut ulaon i.

⁴Mamingkiri hapandean na sumurung mamandei sere, perak dohot tombaga.

⁵Huhut manguhir dohot mamijor batu intan, mamandei hau pe mambahen hapandean marragamragam.

⁶Ianggo Ahu, ida ma nunga pola hubahen donganna, i ma Oholiab, anak ni si Ahisamakh, sian marga Dan; tu bagasan roha ni saluhut halak na pande, nunga hulehon

roha hapandean, asa nasida mangulahon
sude na hutonahon tu ho:

⁷Tole undungundung parluhutan i, tole poti
parpadanan i, ro di langkop pardenggan na
di atasna i dohot sude ulaula di undungundung
i.

⁸Tole muse meja i ro di ulaulana, tole
parpalitoan sian sere na pita ro di ulaulana
sudena dohot langgatan panutungan daupa.

⁹Tole langgatan pamelean ni pelean
situtungan ro di ulaulana sudena, nang tong
parburian dohot ojahanna.

¹⁰Tole angka pangkean tohonan dohot
pangkean angka na badia di malim Aron, tole
pangkean ni angka anakna laho mangaradoti
hamalimon.

¹¹Tole muse miak pamiahion i dohot daupa
sian pamurpuri na hushus situtungan di
ingan na badia; hombar tu sandok na
hutonahon i tu ho bahenon nasida.

¹²(II.) Dung i ro muse ma hata ni Jahowa tu
si Musa songon on:

¹³Dok ma tu halak Israel: Ingkon
ingotonmuna do ari paradiananku: Ai i do
tanda ni parpadanan di Ahu dohot di hamu
ro di pinomparmuna, asa tung diboto hamu,
Ahu do Jahowa na pabadiahon hamu.

¹⁴Dibahen i sai ingot hamu ma ari Sabbath
i, ai na badia do i di hamu; manang ise na
mangaramuni ari Sabbath i, ingkon marutang
hosa ibana: Ai manang ise na mangula

ulaon disi, ingkon siap bahenon hosana sian tongatonga ni bangsona.

¹⁵Ingkon onom ari lelengna mangula halak; alai anggo ari papituhon i, ari Sabbath paradianan na badia ma i di Jahowa; manang ise na mangula ulaon di ari Sabbath, ingkon marutang hosa ibana.

¹⁶Dibahen i ingkon ingoton ni halak Israel ari Sabbath i, nang pinomparnasida laho pabadiahon ari Sabbath i, padan na hot ma i ro di salelenglelengna.

¹⁷Ari Sabbath i ma tutu manjadi tanda di Ahu dohot di halak Israel ro di salelenglelengna. Ai di bagasan na onom ari ditompa Jahowa langit dohot tano on; alai anggo di ari papituhon i maradian ma Ibana jala dipasonang dirina.

¹⁸Jadi dung sun Jahowa mangkatai dohot si Musa di atas dolok Sinai, dilehon ma tu ibana dua lei batu panuratan ni panindangion naung tarsurat marhite sian jarijari ni Debata.

32¹(I.) Alai dung diida bangso i lelengna, asa tuat Musa sian dolok i, marluhut ma bangso i manopot Aron, ninna ma mandok ibana: Hehe ma ho, bahen ma di hami Debata, angka na manguluhon hami; ai ndang huboto na marhua hami manang si Musa on, baoa na manogihon hami ruar sian tano Misir.

²Dung i didok Aron ma mandok nasida: Tanggali hamu ma antinganting sere, angka na di pinggol ni jolmamuna, anakmuna dohot

borumuna, jala pamboan hamu ma angka i tu ahu.

³Jadi sandok bangso i masitanggal antingantingna sere, angka na di pinggolnasida be, jala dipamboan do i tu Aron.

⁴Dung i dijalo ibana ma angka i sian tangannasida, laos disinga ma rupana dohot panurat, i ma disuman mambahen sada lombu tuangan. Dung i didok nasida ma: On ma Debatamu, ale Israel! Naung manogihon ho ruar sian tano Misir.

⁵Jadi dung diida Aron lombu i laos dipajok ma sada langgatan di adopanna, jala martingting ma Aron mandok: Marsogot ma ari raya di Jahowa.

⁶Dung i dipasogot nasida ma manogotna i hehe, laos dipelehon ma angka pelean situtungan, diboan huhut angka pelean hamauliateon, dung i hundul be ma bangso i marmanganan dohot marminuman, hehe muse nasida laho manontori.

⁷(II.) Dung i ro ma hata ni Jahowa tu Musa: Laho ma ho tuat! Ai nunga marroha mago bangsomi, na tinogihonmu ruar sian tano Misir.

⁸Tibuna i nasida manimbil sian dalan naung hupatuduhon tu nasida! Nunga dibahen nasida di nasida sada lombu tuangan, nunga pola marsomba dohot mamele nasida tusi, jala nunga pola didok: On ma Debatamu, ale

Israel! Angka naung manogihon ho ruar sian tano Misir.

⁹Dung i ro muse hata ni Jahowa tu Musa: Nunga mananda rohangku di bangso on, jala ida ma, tung na tangkang do roha ni bangso on.

¹⁰Nuaeng pe, loas ma Ahu, asa marsigorgor rimashu mangonai tu nasida jala huripashon nasida, asa ho hubahen gabe bangso na bolon.

¹¹Alai marhuraja ma anggo Musa di adopan ni Jahowa, Debatana, ninna ma: Boasa ma tung marsigorgor rimasmu, ale Jahowa mida bangsom naung tinogihonmu ruar sian tano Misir marhite sian hagagoon godang dohot marhite sian tangan na marhuaso?

¹²Boasa ma tung dohonon ni halak Misir songon on: Mambahen nasida marhinamago, umbahen ditogihon nasida ruar, asa bunuonna nasida di dolok, jala ripashononna nasida sian atas tano on? Marpangulah i ma roham sian parpiarpiar ni rimasmu, sai marpamuati ma roham taringot tu jea na naeng pasonggoponmu tu bangsom.

¹³Sai marningot ma roham di Abraham, di Isak dohot di Jakkob, angka naposomi, nunga pola maruari Ho tu dirim marbagahon tu nasida: Ahu patorophon sogot pinomparmuna, songon bintang angka na di langit, jala sandok tano on naung huparbagabaga i,

ingkon lehononku do i tu pinomparmuna,
bahen partalianna ro di salelenglelengna.

¹⁴Jadi marpamuati ma roha ni Jahowa
taringot tu hinamago naung nilumbahonna
naeng bahenonna tu bangsona.

¹⁵(III.) Dung i humusor ma Musa jala tuat
sian dolok i huhut patioptiop di bagasan
tanganna na dua lei panindangion i, angka na
tarsurat angkup be di bulungna na dua i.

¹⁶Jadijadian ni Debata do lei na dua i,
surat i pe, surat ni Debata sandiri do i, na
niuhirhonna tu lei na dua i.

¹⁷Jadi dung dibege Josua soara ni bangso
i marsuraksurak, ninna ma mandok Musa:
Soara ni halak na tongtang do i di bagasan
parsaroan i.

¹⁸Alai ninna Musa ma: Ndada soara ni
suraksurak boaboa ni hamonangan manang
hataluan, soara ni halak na marende taripar
do i anggo na hubege.

¹⁹Alai dung jonok ibana tu parsaroan i,
jala diida lombu i dohot tortor marhaliang,
marsigorgor situtu ma rimas ni Musa, laos
ditimpalhon ma sian tanganna lei na dua i,
gabe mabola do i di bonandolok i.

²⁰Dung i dibuat ma lombu naung
pinaulinasida i, jala ditutung di bagasan api,
laos diduda mansai lamot, jala disirsirhon tu
aek, jala didokkon halak Israel minum sian i.

²¹Dung i ninna Musa ma mandok Aron:
Aha huroha na binahen ni bangso on tu ho,

umbahen paroonmu dosa na sai balga tu atasna?

²²Dung i ninna Aron ma: Unang tung marsigorgor rimas ni Tuanku tu ahu! Ai ditanda ho do roa ni bangso on marharohaon.

²³Angka didok nasida do mandok ahu: Bahen di hami debata, angka na manguluhon hami, ai ndang huboto hami manang na marhua si Musa on, baoa na manogihon hami ruar sian tano Misir.

²⁴Jadi ningku ma tutu mandok nasida: Manang ise na marsere, ditanggali ma i, jala dilehon tu ahu, dung i hutimpalhon ma i tu bagasan api, gabe ruar ma lombu on.

²⁵Jadi dung diida Musa naung gabe hijang bangso i, ai nunga dipahijong si Aron bahen haurahon maradophon halak alonasida i.

²⁶Jadi jongjong ma Musa di bahal ni parsaroan, laos ninna ma: Ro be ma tu ahu manang ise na mangalehon dirina tu Jahowa! Jadi marpungu ma tu lambungna saluhut halak Lepi.

²⁷Dung i ninna Musa ma tu nasida: Songon on do hata ni Jahowa, Debata ni Israel: Dibahen be ma podangna tu gontingna, dung i ulahulak hamu na sian harbangan on tu harbangan adui di parsaroan i, ingkon dibunu be ma ganup donganna dohot alealena dohot tondongna.

²⁸Jadi dibahen halak Lepi ma hombar tu hata ni si Musa, gabe marragean ma sian bangso i di na sadari i arga tolu ribu halak.

²⁹Ai nunga didok si Musa hian: Ingkon urasonmuna dirimuna sadari on di Jahowa! Ingkon ganup mangalo anakna, nang donganna, asa maruli pasupasu hamu sadari on sian Jahowa.

³⁰(IV.) Tole manogotna i, didok Musa ma mandok bangso i: Mansai balga do dosa na binahenmuna i! On pe nangkok ma anggo ahu manopot Jahowa, anggiat tung dapot ahu pardengganan taringot tu dosamuna i.

³¹Jadi dung mulak si Musa tu lambung ni Jahowa, ninna ma: Iale isuang! Nunga mardosa godang bangso on, ala naung binahennasida di nasida angka debata sian sere.

³²Nuaeng pe, sai marpamuati ma roham mida dosanasida i, alai molo so tarbahen, haru sesa nama dohot goarhu sian pustaha naung sinuratmi.

³³Alai ro ma hata ni Jahowa tu Musa: Manang ise naung mardosa dompak Ahu, goar ni do sesaonku sian pustahangku.

³⁴On pe laho ma ho, togihon ma bangso i tu tano naung hupaboa i tu ho; ida ma, ingkon Suruanki mardalan manguluhon ho! Alai ia dung jumpang ari pangaluluhonku, luluhononku ma tu nasida dosanasida i.

³⁵ Jadi ditorui Jahowa ma bangso i ala naung binahennasida lombu i na pinauli ni Aron.

33 ¹ (I.) Dung i ro muse hata ni Jahowa tu Musa: Laho ma ho, borhat sian on, ho dohot bangso naung tinogihonmu ruar sian tano Misir laho tu tano naung pola huuarihon tu Abraham, Isak dohot Jakkob, uju hudok: Tu pinomparmu tano i lehononku.

² Husuru pe Suruanku manguluhon ho, hupabali pe anggo halak Kanaan, Amori, Het i, Perisi, Hevi dohot Jebusi:

³ Ibana pe manogihon hamu tu tano habaoran ni susu dohot situak ni loba; ndang tarbahen anggo Ahu nangkok di tongatongamuna, ai bangso na tangkang marroha do ho, atik tung siap ho maon bahenonku di tongan dalan.

⁴ Jadi dung dibege bangso i hata na horas i, gondok ma rohanasida, jala ndang adong nanggo sahalak na mamangke pangkeanna hian.

⁵ Alai nunga didok Jahowa hian hatana anggo tu Musa, patolhasonna tu halak Israel: Bangso na tangkang marroha do hamu, nanggo satongkin Ahu nangkok di tongatongamuna, ingkon siaphononku do hamu. On pe ditanggali be ma pangkeanna sian ibana, asa huboto manang aha sibahenonku tu ho.

⁶ Jadi ditanggali halak Israel ma pangkeannasida be mandaodao sian dolok Horeb.

⁷ (II.) Alai anggo Musa dibuat ma undungundung i, jala dipajongjong ma i di balian holang sian parsaroan i, jala digoar ma i undungundung parluhutan. Dung i manang ise na naeng mangalului Jahowa, ingkon ruar Ibana tu undungundung parluhutan i na di balian ni parsaroan i.

⁸ Jadi molo jumpa ruar Musa laho manopot undungundung i, hehe be sandok bangso i, laos jongjong ganup di pintu ni undungundungna be, dituluthon nasida ma Musa sian pudi, paima masuk ibana tu bagasan undungundung i.

⁹ Ia dung masuk Musa tu bagasan undungundung i, tuat ma ombun na marsijongjong i, laos jongjong di bagasan pintu ni undungundung, jala mangkatai Jahowa dohot Musa.

¹⁰ Jadi sandok bangso i marnida ombun na marsijongjong i jongjong di bagasan pintu ni undungundung i, gabe hehe be ma sandok bangso i, laos marsomba nasida ganup di pintu ni undungundungna be.

¹¹ Dung i mangkatai ma Jahowa dohot Musa adop bohi be, songon sada baoa na mangkatai dohot alealena; dung i mulak ma Musa tu parsaroan i, alai anggo parhaladona Josua, anak ni Nun dolidoli i, ndang morot sian tongatonga ni undungundung i.

¹² Dung i ninna Musa ma tu Jahowa: Ida ma, nunga didok Ho mandok ahu: Togihon ma

bangso on nangkok, alai ndang dipabotohon
Ho tu ahu manang ise na naeng suruhononmu
donganku, nunga nian didok Ho: Ahu
mananda ho pola ro di goar! Jala nunga
jumpangan asi ni roha ho maradophon Ahu.

¹³Nuaeng pe, molo tutu naung jumpangan
asi ni roha ahu maradophon Ho, ua pabotohon
ma tu ahu dalammu, asa tung tangkas Ho
hutanda, paboa naung jumpangan asi ni roha
ahu maradophon Ho; jala ida ma parripem do
bangso on.

¹⁴Dung i ninna Jahowa ma: Ingkon Bohingku
donganmu mardalan, asa hutogihon ho tu
hasonangan.

¹⁵Alai ninna Musa ma tu Jahowa: Molo so
tongtong Bohimi manguluhon hami, unang
nian togihon hami nangkok sian on.

¹⁶Ai tung marhite sian aha ma dapot
tandaon, paboa naung jumpangan asi ni roha
ahu maradophon Ho, ahu dohot parripem
on? Nda marhite sian na nidonganamu hami
mardalan, paboa marhasurungan ahu dohot
parripem on maradophon nasa bangso angka
na di atas tano on?

¹⁷(III.) Dung i ninna Jahowa ma tu Musa:
Nang hata on na nidokmu ondeng, bahenonku
do i, ala naung jumpangan asi ni roha ho
maradophon Ahu, jala Ahu mananda ho pola
ro di goar.

¹⁸Dung i ninna Musa ma: Ua pataridahon
ma tu ahu hamuliaonmi!

¹⁹Alai ninna Jahowa ma: Ahu pabolushon saluhut hatuaonku sian jolo ni bohim, jala Ahu manjouhon Goar ni Jahowa di adopanmu; na martalup ni roha do Ahu sogot di halak naung tinalupan ni rohangku; jala na marasi ni roha do Ahu sogot di halak naung niasian ni rohangku.

²⁰Angkup ni didok Jahowa: Ndang tarbahen ho anggo tung marnida apala Bohingkon, ai ndang tarbahen manang isejolma hian marnida Ahu, laos mangolu ibana.

²¹Angkup ni didok Jahowa: Ida ma, adong sada hajongjongan mardonokkon Ahu, ingkon disi ho jongjong di atas dolok batu!

²²Jadi dung mamolus hamuliaonku, bahenonku ma ho tu bagasan sada rigat ni dolok batu i, laos hungkuphononku tanganku tu ho paima salpu Ahu mamolus.

²³Ia dung hupatait tanganku, idonmu ma Ahu sian pudi; alai anggo apala Bohingkon ndang jadi idon ni manang ise!

34¹(I.) Dung i ninna Jahowa ma tu Musa: Dakdak ma di ho dua lei batu angka na suman tu parjolo i, asa Ahu manurathon tusi hata angka naung tarsurat di lei parjolo i, angka binolahonmi.

²Ingkon hobas ma ho sogot manogot i, asa sogot ho nangkok tu dolok Sinai, laos jongjong disi ho di adopanku, di punsu ni dolok i.

³Jala ndang jadi nanggo sahalak nangkok rap dohot ho, jala ndang jadi tarida nanggo sahalak di atas ni sandok dolok i; birubiru pe manang lembu ndang jadi manjampal mardonokkon dolok on.

⁴Dung i didakdak Musa ma dua lei batu, na suman tu parjolo i, jala dipasogot ibana manogotna i hehe asa nangkok tu dolok Sinai, songon na tinonahon ni Jahowa tu ibana, laos diboan ma na dua lei batu di bagasan tanganna.

⁵Jadi tuat ma Jahowa di bagasan sada ombun, laos jongjong Ibana disi di lambungna, huhut joujou marhitehite Goar ni Jahowa.

⁶Jadi mamolus ma Jahowa sian adopan ni Musa huhut Ibana joujou: Jahowa, Jahowa do Debata na talup jala na asi roha, lambat tarrimas, jala godang denggan basana dohot habonaronna.

⁷Na pahothon denggan basana i pola marriburibu sundut jala marpamuati rohana mida hajahaton, pangalaosion dohot dosa, alai ndang loasonna malua sian uhum anggo halak parsala, sai na luluhononna do hajahaton ni amaama tu angka anakna dohot pahompuna ro di sundut patoluhon dohot paopathon.

⁸Jadi hapogan ma Musa manungkap tu tano laos marsomba.

⁹Huhut mandok: Molo sapala jumpangan asi ni roha ahu maradophon Ho, ale Tuhan, ua sauduran ma Tuhan i mardalan di tongatonganami! Ai bangso na tangkang marroha do bangso on, alai sai marpamuati ma roham di hajahatonnami dohot di dosanami, sai bahen ma hami parjambaranmu.

¹⁰(II.) Dung i ninna Jahowa ma: Ida ma, Ahu mambahen padan di adopan ni sandok bangso on; Ahu mambahen halongangan, angka na so dung masa di sandok tano on dohot di tongatonga ni saluhut angka bangso parbegu, ingkon sandok bangso donganmi marnida jadijadian ni Jahowa, ai na songkal sahali do i na naeng bahenonku tu ho.

¹¹Antong pajop ma di bagasan roham na hutonahon i tu ho sadari on. Ida ma, Ahu pe pabalihon maradophon ho halak Amori, Kanaan, Het i, Perisi, Hevi dohot Jebusi.

¹²Sai jaga ma dirim, na so tupa marpadanpadan ho tu halak isi ni tano sisoluhonmu, asa unang gabe jorgong nasida di tongatongami.

¹³Ingkon lohaonmuna do langgatannasida i, ingkon segaanmuna ajiajiannasida, jala tabaonmuna sombaonnasida i.

¹⁴Ai ndang jadi ho marsomba tu Debata sileban; ai targoar do Jahowa Parlulu, ala Debata Parlulu do Ibana.

¹⁵Na so tupa bahenonmu padan tu halak isi ni tano i, ia marmainan nasida mangihuthon debatanasida i, manang mamele nasida tu debatanasida i, gabe diela ho asa panganonmu sian pelean na pinelehonna i.

¹⁶Ndang jadi buatonmu sian borunasida bahenjolma ni anakmu, atik tung marmainan borunasida maon mangihuthon debatanasida i, gabe tarela dohot anakmu maon marmainan mangihuthon debatanasida.

¹⁷Ndang jadi bahenonmu di ho angka debata tuangan.

¹⁸Ingkon tongtong ho marari raya sagusagu na so niasoman. Ingkon pitu ari lelengna panganonmu sagusagu na so niasoman, songon na hutonahon i tu ho di tingki naung binuhul bulan Abib; ai di bulan Abib do ho ruar sian Misir.

¹⁹Nasa buhabaju Ahu do nampunasa, nang nasa buhabaju tunggal sian pinahanmu, nang lombu, nang birubiru.

²⁰Alai anggo buhabaju ni halode ingkon tobusonmu do i marhite sian birubiru; alai molo so ditobus ho ingkon ponggolhononmu do rungkungna. Nasa buhabaju ni angka anakmu ingkon tobusonmu do i. Alai ndang jadi idaonmu Bohingkon so marisi pelean tanganmu.

²¹Ingkon onom ari lelengmu mangula, alai anggo di ari papituhon i ingkon maradian ho;

di tingki masa ni paninggalaon pe nang di gotilon, ingkon maradian ho.

²²Ari raya sipitu borngin i pe ingkon ingotonmu do, boanonmu ma disi patumonaan ni na niulam; tole muse ari raya hasisimpul ni suansuanan di ujung ni taon.

²³Tolu hali di na sataon, ingkon ro nasa baoa sian ho tu adopan ni Tuhan Jahowa, Debata ni Israel.

²⁴Ia dung hupabali angka bangso parbegu maradophon ho, jala hupalambas tano ingananmu, ndang jadi nanggo sahalak mangkaliangi tanom saleleng ho nangkok naeng marnida Bohi ni Jahowa Debatam sitolu hali i di bagasan sataon.

²⁵Ndang jadi durushononmu mudar ni pelean tu Ahu mardongan sagusagu na niasoman; jala ndang jadi marborngin peopon tu manogot anggo pelean di ari raya Paska.

²⁶Ingkon taruhononmu do patumonaan sian tanomi tu jabu ni Jahowa, Debatam. Ndang jadi lompakonmu anak ni hambingmu di bagasan aek ni susu ni inana.

²⁷Dung i ninna Jahowa ma tu Musa: Surathon ma angka hata on, ai marguru tu angka hata on do padan na hubahen i tu ho dohot tu Israel.

²⁸Jadi sai disi ma Musa rap dohot Jahowa pola opatpulu ari opatpulu borngin lelengna, ndang mangan sagusagu ibana jala ndang

minum aek. Dung i disurathon Ibana ma sude hata ni padan i, hata na sampulu i tu lei batu.

²⁹(III.) Jadi di na tuat i Musa sian dolok Sinai, huhut patioptiop na dua lei panindangion di bagasan tanganna di na tuat i ibana sian dolok i, alai ndang diboto Musa naung marsinondang sisik ni bohina i, ala naung mangkatai ibana dohot Jahowa.

³⁰Jadi dibereng Aron dohot sude halak Israel ma Musa, hape ida ma, nunga marsinondang sisik ni bohina, gabe mabiar nasida ro jumonok tu ibana.

³¹Jadi dijou Musa ma nasida, gabe mulak nasida tu ibana, Aron dohot sude induk ni luhutan i, laos mangkatai ma Musa dohot nasida.

³²Jadi dung songon i ro ma jumonok sude halak Israel; gabe dipatolhas Musa ma tu nasida sude hata na pinaboa ni Jahowa tu ibana di dolok Sinai.

³³Jadi dung tolhas hata i dihatahon Musa tu nasida, dibahen ma sada pangkuphupi tu bohina.

³⁴Alai molo masuk muse Musa tu adopan ni Jahowa naeng mangkatai dohot Ibana dipasisi ma pangkuphupi i paima ruar ibana muse. Jadi dung ruar ibana dihatahon ma tu halak Israel hata na tinonahon tu ibana.

³⁵Jadi diida halak Israel ma bohi ni Musa, pola marsinondang sisik ni bohi ni Musa, gabe dipasuang Musa ma pangkuphupi i tu bohina,

paima masuk ibana muse mangkatai dohot Jahowa.

35¹ (I.) Dung i dipaluhut Musa ma sandok luhutan ni halak Israel, jala ninna ma mandok nasida: On do hata angka na tinonahon ni Jahowa siulahononmuna.

²Ingkon onom ari lelengmu mangula ulaon, alai anggo ari papituhon i, ari Sabbat paradianan na badia ma i di Jahowa. Manang ise na mangula ulaon di ari na sasada i, ingkon marutang hosa ibana.

³Ndang jadi hamu mangopan api di bagasan sude ingananmuna anggo di ari Sabbat i.

⁴Dung i didok Musa ma tu sandok luhutan ni halak Israel songon on: On do hata na tinonahon ni Jahowa tu hamu:

⁵Jalo hamu na sian hamu silehonlehon bahen pelean tatingan di Jahowa, ganup sian lomo ni rohana mamboan pelean tatingan di Jahowa: sere, perak dohot tombaga.

⁶Tole abit sian bonang na rata langit dohot na rara dohot na merham, nang hain bontar na halus dohot imbulu ni hambing.

⁷Tole bobak ni birubiru tunggal angka na tinubar, tole bobak ni pitudar dohot hau pinasa.

⁸Tole miak tu parpalitoan, miak na hushus pangkeon laho mamiahi dohot manutung daupa.

⁹Tole angka mata intan unam dohot simata landus bahenon tu baju epod dohot tu tutup andora.

¹⁰Jala manang ise na pantas marroha di tongatongamuna, ingkon ro be mangulahon sandok na tinonahon ni Jahowa:

¹¹Pauli inganan na badia i rap dohot undungundungna, langitlangitna, haithaitna, papanna, ransangransangna, angka tiangna dohot ojahanna.

¹²Tole poti parpadanan i rap dohot haluhaluna, langkop pardenggan i dohot rimberimbe.

¹³Tole meja i rap dohot haluhaluna ro di sandok ulaulana ro di roti na marhadohoan.

¹⁴Tole parpalitoan i bahen panondang i ro di ulaulana, angka palitona dohot miak tu palito i.

¹⁵Tole muse langgatan pardaupaan i rap dohot haluhaluna, nang miak pamiahion dohot pamurpuri bahen daupa na hushus ro di rimberimbe tutup ni pintu laho masuk tu inganan na badia i.

¹⁶Tole langgatan pamelean ni pelean situtungan rap dohot handanghandangna sian tombaga, angka haluhaluna dohot sandok ulaulana, tong parburian dohot ojahanna.

¹⁷Tole rimberimbe tu alaman i rap dohot tiangna dohot ojahanna; nang rimberimbe tutup ni bahal haroroan tu alaman i.

¹⁸Tole angka labang tu inganan na badia i dohot tu alaman i rap dohot angka talina.

¹⁹Tole angka pangkean tohonan laho marhalado di inganan na badia i, angka pangkean ni malim Aron na badia i rap dohot pangkean ni angka anakna laho mangaradoti hamalimon.

²⁰(II.) Dung i ruar ma sandok luhutan ni halak Israel sian adopan ni Musa.

²¹Jadi ro be ma ganup na tarsunggul rohana dohot ganup na martondi na girgir, diboan be ma pelean tatingan tu Jahowa pangkeon tu ulaon pauli undungundung parluhutan i dohot tu sandok ulaon siradotan disi dohot tu pangkean angka na badia i.

²²Jadi ro be ma, angka baoa dongan ni angka parompuan, sude tahe angka na girgir marroha, diboan be ma leangna dohot antingantingna dohot tintinna dohot horunghorungna, ro di ulaula sere marragamragam, jala ganup mamelehon sere bahen pelean tatingan tu Jahowa.

²³Manang ise pe na umpeop abit sian bonang na rata langit dohot na rara dohot na merham, nang hain bontar na halus dohot imbulu ni hambing, tole bobak ni birubiru tunggal angka na tinubar dohot bobak ni pitudar, diboan be ma i.

²⁴Manang ise na umpeop perak manang tombaga diboan be ma i guguan na bahen pelean tatingan tu Jahowa; jala manang

ise na umpeop hau pinasa ditaruhon be ma i pangkeon tu sandok ulaon tohonan marragamragam.

²⁵Nang saluhut inaina angka na torang marroha mangganti be do dohot tanganna sandiri, jala diboan be na ginantina i, abit sian bonang na rata langit dohot na rara dohot na merham, nang hain bontar na halus.

²⁶Jala nasa parompuan angka na tarsunggul rohana jala na marhapistaran, mangganti imbulu ni hambing ma nasida.

²⁷Alai anggo angka induk i, diboan be ma mata intan unam dohot simata landus bahenon tu baju epod dohot tu tutup andora.

²⁸Tole muse parmurpuri dohot miak tu parpalitoan dohot miak na hushus pangkeon laho mamiahi dohot manutung daupa.

²⁹Nasa baoa dohot parompuan sian halak Israel angka na tarsunggul rohana be gabe girgir mamboan silehonlehon manumpak ulaon marragamragam, na tinonahon ni Jahowa marhite sian si Musa, sibahenon ni halak Israel bahen pelean tu Jahowa.

³⁰(III.) Dung i ro ma hata ni Musa tu halak Israel: Ida hamu ma, nunga pola dijou Jahowa sahalak na margoar Bezaleel, anak ni si Uri, i ma anak ni si Hur sian marga Juda.

³¹Nunga pola digohi Tondi ni Debata rohana i marhapistaran, marhapandean dohot marparbinotoan mangaradoti saluhut ulaon i.

³²Asa dipingkiri rohana hapandean na sumurung laho mamandei sere, perak dohot tombaga.

³³Huhut manguhir dohot mamijor batu intan, mamandei hau pe mambahen hapandean marragamragam.

³⁴Angkup ni nunga dibasabasahon Jahowa hamaloon tu bagasan rohana mangajari halak na asing, ibana dohot si Oholiab, anak ni si Ahisamakh sian marga Dan.

³⁵Nunga digohi Jahowa rohanasida dohot hapistaran laho mambahen hapandean marragamragam, mamandei hau, mamunsa dohot mangangit abit sian bonang na rata langit, na rara dohot na merham, nang hain bontar na halus, tole hapandean ni partonun, asa dibahen nasida hapandean marragamragam, jala dipingkirpinkingiri rohanasida hapandean angka na sumurung.

36¹(I.) Jadi tole ma Bezaleel dohot Oholiab ro di sude baoa angka na pistar marroha, angka naung maruli rohana hapistaran dohot hapandean sian Jahowa, marmulahon mambahen hapandean marragamragam mangaradoti tohonan di inganan na badia i, hombar tu saluhutna na tinonahon ni Jahowa.

²Ai nunga dijou Musa hian Bezaleel dohot Oholiab ro di sude baoa angka na pistar marroha, angka naung maruli rohana hapistaran sian Jahowa, nang sude naung

tarsunggul rohana ro jumonok mangaradoti ulaon i.

³Jadi dibuat nasida ma sian adopan ni Musa saluhut pelean tatingan, angka naung binoan ni halak Israel manumpak ulaon mangaradoti tohonan di inganan na badia i, asa paulionna; alai sai didatdati nasida dope ganup sogot mamboan silehonlehon guguan lomo ni rohana i tu Musa.

⁴Jadi ro be ma sude pande, angka na mangula sandok ulaon di inganan na badia i, ganup sian ulaon na niulanasida be.

⁵Didok nasida be ma tu Musa songon on: Magodanku do guguan na binoan ni bangso i, lobi sian na tarpangke hasea tu ulaon tohonan i, naung tinonahon ni Jahowa sibahenon i.

⁶Jadi didokkon Musa ma martingting tu sandok parsaroan i, songon on: Unang be didatdati hita on, nang baoa nang parompuan mangalehon guguan manumpak ulaon pauli inganan na badia i! Jadi dipasohot bangso i ma mamboan.

⁷Ai nunga tung singkop ulaula tu sandok ulaon sipaulion i, marlobilobi gariada.

⁸(II.) Jadi tole ma sude halak na pistar marroha, angka siula ulaon i pauli undungundung i, i ma sampulu rimberimbe sian bonang na nidua, na rata langit, na rara jala na merham, margombaran kerubim, hapandean na binahen ni parpunsu.

⁹Ia unjur ni rimberimbe i sadasada duapulu ualu asta do, ia bidangna opat asta; sisada suhat do saluhut angka rimberimbe i.

¹⁰Limalima angka rimberimbe i dipadomu, na sada tu donganna.

¹¹Dibahen huhut angka tali sangkutan na rata tu bibir ni rimberimbe parjolo i apala di pardomuanna, laos songon i muse dibahen di bibir ni rimberimbe paduahon i bahen pardomuan paduahon.

¹²Limapulu tali sangkutan dibahen tu rimberimbe na sada, jala limapulu tali sangkutan muse dibahen di ujung ni rimberimbe i, apala di pardomuanna paduahon; jadi masijaloan ma angka tali sangkutan, na sada tu donganna.

¹³Dibahen muse ma limapulu haithait sere laho patunggomhon angka rimberimbe i, na sada tu donganna, i ma manjadi sada undungundung.

¹⁴Dibahen muse ma angka rimberimbe sian imbulu ni hambing bahen langitlangit di atas ni undungundung i; sampulu sada rimberimbe sisongon i dibahen.

¹⁵Ia unjur ni rimberimbe sadasada tolupulu asta do jala bidangna opat asta; sisada suhat do rimberimbe na sampulu sada i.

¹⁶Jala dipatunggom pulik na lima rimberimbe i, laos songon i pulik rimberimbe na onom nari.

¹⁷ Dibahen muse ma limapulu tali sangkutan di bibir ni rimberimbe na sada parduru apala di pardomuanna, jala limapulu tali sangkutan di bibir ni rimberimbe na sada nari, di pardomuanna paduahon.

¹⁸ Dibahen muse ma limapulu haithait tombaga laho padomuhon undungundung i gabe sada.

¹⁹ Dibahen muse ma di atas langitlangit ni undungundung i salampis sian bobak ni birubiru tunggal na tinubar, di atas ni muse salampis sian bobak ni pitudar.

²⁰ Dibahen muse ma angka papan sian hau pinasa bahen dorpi ni undungundung i, angka sipajongjongon do.

²¹ Sampulu asta ganjang ni papan i, jala tonga dua asta ia bidang ni sada papan.

²² Mardua pasi ganup papan, baris be tu donganna, songon i do dibahen saluhut papan angka na masuk tu undungundung i.

²³ Jala songon on do dibahen parmasuk ni angka papan tu undungundung i: Duapulu papan sambariba tungkan dangsina.

²⁴ Dibahen do huhut opatpulu ojanan perak di toru ni na duapulu papan i, dua be ojanan di toru ni sada papan, marguru tu pasina na dua i.

²⁵ Di na sambariba nari ni undungundung i pe, tungkan utara dibahen muse duapulu papan.

²⁶Nang na opatpulu ojahanna perak, dua be ojan di toru ni sada papan.

²⁷Alai di tampahan ni undungundung tungkan hasundutan, onom papan dibahen.

²⁸Dibahen muse papan dua nari di na dua suhi ni undungundung i, di tampahanna parpudi.

²⁹Jadi dua lampis ma i sian toru mardomu di ginjang pinadomu ni sada langgu; songon i ma dibahen duansa di na dua suhi i.

³⁰Jadi ualu papan ma disi mardongan ojahanna perak sampulu onom toropna, dua be di toru ni sada papan.

³¹Dibahen muse ma angka ransangransang sian hau pinasa, lima tu angka papan di na sambariba ni undungundung i.

³²Laos lima ransangransang tu angka papan di na sambariba nari ni undungundung i, laos lima ransangransang tu angka papan ni undungundung i di tampahanna parpudi tungkan hasundutan.

³³Dibahen ma huhut ransangransang partonga na di dos tonga ni angka papan, torus sian suhi na sada tu suhi na sada nari.

³⁴Dilampis muse ma angka papan i dohot sere, sabongna pe sian sere do dibahen, asa tusi pabongoton angka ransangransang; angka ransang i pe dilampis do dohot sere.

³⁵Dipauli muse ma sada rimberimbe sian bonang na rata langit, jala na tinubar, jala na merham dohot sian hain na halus na

nidua, margombaran kerubim do i dibahen, tinonunhon ni parpunsu tusi.

³⁶Dung i dihirehon ma i tu opat tiang sian hau pinasa angka na nilampis dohot sere, jala marhaithait sere, jala dituang tusi opat ojarah perak.

³⁷Dipauli muse ma sada rimberimbe bahen tutup ni pintu ni undungundung i sian bonang na rata langit dohot na tinubar dohot na merham dohot sian bonang na bontar na nidua, tinonunhon ni parpunsu.

³⁸Dibahen muse ma lima tiang rap dohot haithaitna; dilampis muse ma angka uluna nang rungkungna dohot sere, jala ditumpa lima ojahanna sian tombaga.

37 ¹(I.) Dung i Bezaleel sandiri ma paulihon poti i sian hau pinasa, tonga tolu asta unjurna, jala tonga dua asta bohangna, laos tonga dua asta dohot timbona.

²Dung i dilampis ma poti i dohot sere na pita, sian bagasan dohot sian ruar, jala dibahen huhut bibirna marlaislais sere humaliang.

³Ditumpa huhut tusi opat langgu sere tu suhina na opat i, dua langgu di na sambariba be.

⁴Dibahen muse ma haluhalu sian hau pinasa, jala dilampis do i dohot sere.

⁵Disurukkon ma haluhalu i tu bagasan langgu angka na lohok di poti i, laho mangusung poti i.

⁶Dibahen muse ma sada langkop pardenggan sian sere na pita, tonga tolu asta unjurna, jala tonga dua asta bidangna.

⁷Dibahen muse ma dua kerubim sian sere sangkimpal na tinopa, dibahen do i tu na dua tampahan ni langkop parpadanan i.

⁸Kerubim na sada tu tampahan na sada, jala kerubim na sada nari tu tampahanna na sada nari; tubu sian bagasan langkop pardenggan i tolpus tu duru dibahen angka kerubim i di na dua tampahanna.

⁹Jala dipaherbang angka kerubim i ma habongna na dua i sian ginjang, asa dihungkupi habongnasida langkop pardenggan i, jala padompak be bohinasida, dompak langkop pardenggan i bohi ni angka kerubim i mamereng.

¹⁰(II.) Dipauli muse ma sada meja sian hau pinasa, dua asta unjurna, jala saasta bidangna, jala tonga dua asta timbona.

¹¹Dilampis ma i muse dohot sere na pita, jala dibahen martopi sere humaliang.

¹²Dibahen muse ma tusi sada lais santopap bidangna humaliang, dibahen muse laisna i martopi sere pinariponipon humaliang.

¹³Jala ditumpa tusi opat langgu sere, angka na binahenna tu suhina na opat i, angka na di patna na opat i.

¹⁴Jonok di toru ni lais i do angka langgu i bahen panuruhan ni haluhalu laho mangusung meja i.

¹⁵Sian hau pinasa ma angka haluhalu i dibahen, jala dilampis ma i dohot sere, i ma pangkeon mangusung meja i.

¹⁶Dipauli ma huhut ulaula sipangkeon di atas meja i: angka pingganna, saoanna, hondina dohot mangkukna, bahen pangusean ni tuak tangkasan ma i; sian sere na pita do i dipauli.

¹⁷(III.) Dipauli muse ma sada parpalitoan sian sere na pita, sangkimpal parpalitoan i ditopa, ro di badanna, dangkana dohot butuhana, hansingna dohot bungana.

¹⁸Onom dangka ruar sian lambungna, tolu dangka, sian na sambariba ni parpalitoan i, jala tolu dangka sian na sambariba nari.

¹⁹Martolu butuha, songon bunga ni buapala ganup dangkana i, mardongan angka hansing dohot bunga; laos songon i do dibahen tu na onom dangka i, angka na ruar sian parpalitoan i.

²⁰Alai opat do butuha ni parpalitoan i, songon bunga ni buapala mardongan hansing dohot bunga.

²¹Jala sahansing be di toru ni na dua dangkana angka na ruar sian i; suang songon i sahansing be di toru ni dangkana na dua, angka na ruar sian i; suang muse sahansing be di toru ni dangkana na dua, angka na ruar sian i; gabe onom dangka ruar sian badan ni parpalitoan i.

²²Ruar do sian i angka hansingna dohot dangkana, luhutna i sian sangkimpal sere na pita i do dipauli.

²³Dipauli muse ma pitu palitona rap dohot panurturna dohot pangintopina sian sere na pita.

²⁴Sian satalenta sere na pita parpalitoan i dipauli, ro di parhohasna i sudena.

²⁵(IV.) Dipauli muse ma langgatan pardaupaan sian hau pinasa, saasta unjurna, jala saasta bohangna, maropat suhi tahe, jala dua asta timbona, ruar huhut sian i angka tandukna.

²⁶Jala dilampis do i dohot sere na pita, nang tutupna, nang dorpina humaliang dohot angka tandukna; dibahen do i huhut marbibir humaliang sian sere na pita.

²⁷Dibahen muse dua langgu sere di toru ni bibirna i di lambungna na dua i angkup be, bahen panuruhan ni haluhalu, asa dapot usungon ni halak langgatan i.

²⁸Alai sian hau pinasa haluhalu i dipauli, jala dilampis do i dohot sere.

²⁹Dipamasak huhut miak pamiashian na badia i dohot daupa sian pamurpuri na so sinaor, mangihuthon hapandean ni pande daon.

38¹(I.) Dung i dipauli muse ma langgatan pamelean ni pelean situtungon sian hau pinasa, lima asta unjurna, laos lima asta

bohangna, asa maropat suhi do, jala tolu asta timbona.

²Dibahen ma huhut opat tandukna di suhina na opat i, songon na tubu sian i angka tandukna, jala dilampis do i dohot tombaga.

³Dipauli ma huhut sude ulaula tu langgatan i: parsirabunanna, siuksiukna, mangkuk pamispisanna, garpuna dohot parapiapianna; sian tombaga do dipauli saluhut ulaulana i.

⁴Dibahen ma huhut tu langgatan i sada handanghandang sian tombaga, marpangalaho songon jala na niangit di toru ni sidegedegean humaliang langgatan i sahat ro di parsitongaan ni langgatan i.

⁵Ditumpa huhut opat langgu tu suhina na opat i mardomu tu handanghandang tombaga i bahen panuruhan ni angka haluhalu.

⁶Dipauli ma angka haluhalu i sian hau pinasa, jala dilampis do i dohot tombaga.

⁷Dung i dipabongot ma angka haluhalu i tu bagasan langgu angka na di lambung ni langgatan i, asa dapot usungon ni halak langgatan i marhite sian i; rumar do langgatan i dibahen sian angka papan.

⁸Dipauli muse ma tong parburian i sian tombaga, ojahanna pe tombaga do, sian angka sorminan pinangke ni parompuan angka na marpungu di lambung pintu ni undungundung parluhutan i marhaladoi.

⁹(II.) Dipauli muse ma alaman ni undungundung i di na sambariba tungkan

dangsina, tole muse angka rimberimbe ni alaman i sian bonang na bontar na nidua, saratus asta ganjangna.

¹⁰Tole tiangna na duapulu i dohot ojahanna na duapulu i sian tombaga; alai anggo haithait ni angka tiang i ro di ransangransangna perak do.

¹¹Suang songon i di na sambariba tungkan utara laos marrimberimbe do, saratus asta unjurna, tole tiangna dohot ojahanna duapulu be do sian tombaga; alai anggo haithait ni angka tiang i ro di ransangransangna perak do.

¹²Alai anggo bohong ni alaman i tungkan hasundutan, limapulu asta ganjang ni rimberimbe i, sampulu tiangna, laos sampulu ojahanna; alai anggo haithait ni angka tiang i ro di ransangransangna perak do.

¹³Ia bohong ni alaman i na tungkan habinsaran laos limapulu asta do.

¹⁴Jadi sampulu lima asta rimberimbe i di na sambariba haroroan i, tolu tiangna laos tolu ojahanna.

¹⁵Di na sambariba nari pe laos suang songon i do; gabe dos di na dua bariba ni pintu haroroan tu alaman i ganjang ni rimberimbe i sampulu lima asta be, tolu tiangna laos tolu ojahanna.

¹⁶Saluhut rimberimbe ni alaman i humaliang sian hain na halus na nidua do.

¹⁷Ia ojahan ni angka tiang i tombaga do, alai anggo haithait ni angka tiang i dohot ransangransangna perak do; ia angka uluna na nilampis do dohot perak; alai anggo ransangransangna perak do, angka na mardomu tu tiang ni alaman i.

¹⁸Alai anggo rimberimbe tutup ni pintu ni alaman i hapandean ni parpunsu do i pinaulina sian bonang na rata langit, na tinubar dohot na merham dohot sian hain na halus na nidua, duapulu asta ganjangna, lima asta timbona dohot bidangna mangihuthon suhatsuhat ni angka rimberimbe ni alaman i.

¹⁹Tiangna na opat i dohot ojahanna na opat i sian tombaga do; alai anggo haithaitna dohot ransangransangna sian perak, anggo ulu ni angka tiang i nilampis do dohot perak.

²⁰Saluhut labang tu inganan na badia i dohot tu alaman i humaliang sian tombaga do.

²¹(III.) On do aturan ni saluhut na pinalaho pauli inganan na badia i, undungundung parluhutan i, na binilangan, nidokkon ni Musa, binilangan ni halak Lepi angka na marpandapotan tu Itamar, anak ni malim Aron.

²²Asa si Bezaleel, anak ni Uri, i ma anak ni Hur, marga Juda patupahon saluhutna na tinonahon ni Jahowa tu Musa.

²³Ia donganna mangulai i ma Oholiab, anak ni Ahisamakh, marga Dan; pande do ibana

mandakdak batu, manguhir dohot mamunsa bonang na rata langit, na tinubar dohot na merham, nang pauli hain na halus.

²⁴Saluhut sere na suda pinangkena tu sandok ulaon pauli inganan na badia i, i ma sere guguan bahen pelean tatingan duapulu sia talenta do dohot pitu ratus tolupulu sekkel mangihuthon sekkel di inganan na badia.

²⁵Ia godang ni perak na ginugu ni luhutan na binilangan saratus talenta dohot saribu pitu ratus pitupulu lima sekkel, mangihuthon sekkel di inganan na badia.

²⁶Sabeka sasahalak, i ma satonga sekkel mangihuthon sekkel di inganan na badia sian saluhutjolma na masuk bilangan olat ni na marumur duapulu taon tu ginjang, i ma onom ratus ribu dohot tolu ribu lima ratus limapulu halak toropna.

²⁷Suda do saratus talenta perak laho manuang angka ojahan ni inganan na badia dohot angka ojahan ni rimberimbe, boho saratus talenta, sasatalenta tu sada ojahan.

²⁸Alai sian na saribu pitu ratus pitupulu lima sekkel perak i dipauli do angka haithait tu angka tiang i, jala dilampis angka uluna tole angka langguna ditumpa sian i.

²⁹Ia godang ni guguan tombaga bahen pelean tatingan pitupulu talenta dohot dua ribu opat ratus sekkel dokdokna.

³⁰Dipauli sian i angka ojahan ni pintu undungundung parluhutan i, tole langgatan

tombaga dohot handanghandang tombaga na masuk tusi ro di saluhut ulaula tu langgatan i.

³¹ Tole muse angka ojahan ni alaman i humaliang dohot ojahan ni bahal ni alaman i ro di sude labang tu inganan na badia i dohot sude labang tu alaman i humaliang.

39¹ (I.) Dipauli nasida huhut angka pangkean tohonon laho marhalado di inganan na badia i sian bonang na rata langit, na tinubar dohot na merham; dipauli huhut pangkean na badia angka sisolukknonon ni si Aron, songon na tinonahon ni Jahowa hian tu Musa.

² Dipauli ma baju epod i sian sere dohot sian bonang na rata langit, na tinubar jala na merham dohot sian hain na halus na nidua.

³ Dinanggari nasida ma sere i gabe purada laos diirisi ma i manjadi bonang, asa dapot tonunhonon ni parpunsu saor tu bonang na rata langit, na tinubar dohot na merham, saor muse tu hain na halus.

⁴ Dibahen nasida huhut dua pangabaraan di baju epod i, jala dipatunggom di tampahanna be.

⁵ Tole muse hohos ni epod i, sisada hapandean do i dohot baju i laos mardomu tusi, jadijadian sian sere dohot sian bonang na rata langit, na tinubar jala na merham dohot sian hain na halus na nidua songon na tinonahon ni Jahowa tu si Musa.

⁶Dung i dipabongot nasida ma angka batu intan unam angka na nirusuk dohot tali sere, jala diuhirhon tusi songon uhiran sahap goargoar ni anak ni Israel na sampuludua i.

⁷Dung i dibahen nasida ma angka batu intan i tu na dua pangabaraan ni baju epod i, bahen batu parningotan di angka anak ni Israel, songon na tinonahon ni Jahowa tu si Musa.

⁸Dibahen nasida huhut tutup andora i, suang songon hapandean ni baju epod ditonunhon parpunsa tusi sere, bonang na rata langit, na tinubar jala na merham dohot hain na halus na nidua.

⁹Maropat suhi do i dibahen jala dua lampis, sanjongkal ganjangna jala sanjongkal bidangna.

¹⁰Jala digohi nasida do i dohot opat rinte batu intan. Di rinte parjolo: batu intan sardis, topasion dohot samarados.

¹¹Di rinte paduahon: batu intan rubin, sapire dohot diaman.

¹²Di rinte patoluhon: batu intan opal, akat, dohot ametist.

¹³Di rinte paopathon: batu intan krisolit, Unam dohot jaspis; jala marihot sere angka rinte i dibahen humaliang.

¹⁴Jala jozor angka batu i mangihuthon partording ni na sampuludua goar ni anak ni Israel, angka na niuhirhon ni halak pandakdak batu, pulik be goarna i, mangihuthon na sampuludua marga ni Israel.

¹⁵Dung i dibahen nasida huhut tu tutup andora i angka rante dos ganjangna, songon tali nidua hapandeanna sian sere na pita.

¹⁶Dibahen nasida huhut ihot sere dohot dua tintin sere, dibahen muse na dua tintin i tu na dua tampahan ni tutup andora i.

¹⁷Jala dibahen nasida do na dua rante na nidua sian sere tu bagasan tintin na dua i, angka na di tampahan ni tutup andora i.

¹⁸Alai anggo na dua ujung ni na dua rante na nidua i dihaithon nasida do i tu haithait na dua i jala dipatunggom do i tu pangabaraan ni baju epod i patondong be.

¹⁹Dibahen nasida muse dua tintin sere na asing, jala dilohothon do i tu na dua tampahan ni tutup andora i, apala di pangkilimanna na tungkan baju epod i dingkan bagasan.

²⁰Dibahen muse dope dua tintin sere na asing, jala dilohothon do i tu na dua pangabaraan ni baju epod i tungkan toru tongon di pardomuanna, di atas hohos ni baju epod i.

²¹Jadi dipudunhon nasida ma tutup andora i rap dohot tintinna marhite sian bonang na rata langit tu tintin ni baju epod, asa hopos tu hohos ni baju epod i, jala unang tarbahen sirang tutup andora sian baju epod, songon na tinonahon ni Jahowa tu Musa.

²²Dipauli muse ma baju parbalian di toru ni baju epod i, sandok sian bonang na rata langit do i ditonun.

²³Jala parrungkunganna i di parsitongaanna, jala martopi na tinonun parrungkungan i humaliang, songon topi ni baju partohonan, asa unang olo maribak.

²⁴Dibahen nasida huhut tu rambuna humaliang angka parbue ni dalimo sian bonang na rata langit, na tinubar jala na merham huhut na nidua.

²⁵Dibahen nasida huhut angka giringgiring sian sere na pita, i ma disolothon tu holangholang ni angka parbue ni dalimo humaliang di rambu ni baju parbalian i.

²⁶Sai marsorinsorin do sada parbue ni dalimo dung i sada giringgiring tuk humaliang, sisolukknononhon do i laho marulaon na badia songon na tinonahon ni Jahowa tu Musa.

²⁷Dipauli nasida huhut angka baju parbagasan sian hain na halus, sipangkeon ni Aron dohot angka anakna i.

²⁸Tole muse tumpal ni sintua ni malim sian hain na bontar ro di angka talitali ni malim sian hain na bontar do, saraoalna pe sian hain na bontar na nidua do.

²⁹Hohos i pe dipauli do i sian hain na nidua dohot sian bonang na rata langit, na tinubar dohot na merham, hapandean ni parpunsa do i, songon na tinonahon ni Jahowa tu Musa.

³⁰Dibahen nasida huhut sangkalia i, tumpal habadiaon i sian sere na pita jala diuhirhon tusi, songon panguhiron sahap: Habadiaon di Jahowa!

³¹ Jala dilohothon tusi tali bonang na rata langit, asa dipadomu tu tumpal i sian ginjang songon na tinonahon ni Jahowa tu Musa.

³² (II.) Jadi songon i ma hasusun ni sandok ulaon pauliuli inganan na badia i, undungundung parluhutan i; dibahen halak Israel do antong sude hombar tu na tinonahon ni Jahowa, songon i dibahen nasida.

³³ Dung i diboan nasida ma inganan na badia i tu Musa, i ma: undungundung i ro di sude ulaulana, angka haithaitna, papanna, ransangransangna, tiangna dohot ojahanna.

³⁴ Tole muse langitlangitna sian bobak ni birubiru tunggal na tinubar, tole muse sian bobak ni pitudar, tole muse rimberimbe bahen tutupna i.

³⁵ Tole muse poti panindangion i ro di haluhaluna dohot langkop pardenggan i.

³⁶ Tole muse meja i ro di sude ulaulana dohot sagusagu na marhadohoan.

³⁷ Tole muse parpalitoan sian sere na pita i ro di angka lampuna, aturanna ro di sude ulaulana dohot miak tu palito i.

³⁸ Tole muse langgatan sere i, miak pamiahion i, daupa na hushus i ro di rimberimbe bahen tutup ni pintu ni undungundung i.

³⁹ Tole muse langgatan tombaga i ro di handanghandang tombaga angka na masuk tusi, haluhaluna ro di sude parhohasna, tong parburian i ro di ojahanna.

⁴⁰Tole muse angka rimberimbe ni alaman ro di angka tiangna dohot ojahanna, nang rimberimbe tutup ni bahal ni alaman i, ro di angka talina, labangna dohot sude ulaula mangaradoti ulaon di bagasan inganan na badia i, undungundung parluhutan i.

⁴¹Tole muse angka pangkean tohonan laho marhalado di bagasan inganan na badia i, angka pangkean na badia di malim Aron dohot angka pangkean di angka anakna laho mangaradoti hamalimon.

⁴²Luhutna i hombar tu hata na tinonahon ni Jahowa tu si Musa, laos songon i dipasidung halak Israel sandok ulaon i.

⁴³Dung i ditingkir Musa ma sandok ulaon i, gabe ida ma, nunga sun dibahen nasida; songon na tinonahon ni Jahowa tu Musa laos songon i dibahen nasida. Dung i dipasupasu Musa ma nasida.

40¹(I.) Dung i ro ma hata ni Jahowa tu si Musa, songon on:

²Di artia bulan sipahasada ingkon pajongjongonmu inganan na badia, undungundung parluhutan i.

³Ingkon bahenonmu tu bagasan ni poti panindangion i, jala hungkupanmu poti i dohot rimberimbe.

⁴Ingkon boanonmu huhut meja i tu bagasan, jala patordingonmu sipatordingon hian di atasna; boanonmu huhut parpalitoan i tu bagasan jala pasangonmu angka palitona.

⁵Ingkon pajongjongonmu huhut langgatan pardaupaan sian sere di adopan ni poti panindangion i, jala tipak gantunganmu rimberimbe tutup ni pintu ni inganan na badia i.

⁶Alai anggo langgatan pamelean ni pelean situtungan ingkon pajongjongonmu do di jolo pintu ni inganan na badia i, undungundung parluhutan i.

⁷Ia tong parburian i ingkon pajongjongonmu do di holangholang ni undungundung parluhutan i dohot langgatan i, laos bahenonmu aek tu bagasan.

⁸Dung i pajongjongonmu ma rimberimbe ni alaman i humaliang, gantunganmu dohot rimberimbe tutup ni bahal ni alaman i.

⁹Dung i buatonmu ma miak pamiahion i jala miakkon tu inganan na badia i dohot tu sude ugasan na di bagasanna i, jala urasonmu do i ro di sude ulaulana, asa gabe na badia angka i.

¹⁰Ingkon miahannu dohot langgatan pamelean ni pelean situtungan ro di sude ulaulana, jala urasonmu langgatan i, asa langgatan i gabe na badia sahali.

¹¹Ingkon miahannu dohot tong parburian i ro di ojahanna jala urasonmu do i.

¹²Dung i boanonmu ma Aron dohot angka anakna i ro jumonok tu pintu ni undungundung parluhutan i, jala didionmu nasida dohot aek.

¹³Dung i solukkononmu ma tu Aron angka pangkean na badia i, jala miahannu ibana, jala urasonmu, asa ibana mangaradoti hamalimon di Ahu.

¹⁴Boanonmu huhut angka anakna ro jumonok, jala solukkononmu tu nasida angka baju na marhadohoan.

¹⁵Laos miahannu ma dohot nasida, songon na miniahannu amanasida i, asa nasida mangaradoti hamalimon di Ahu; ia pamiahion na tu nasida i ingkon manjadi tanda hamalimon do i salelenglelengna ro di pinomparnasida sogot.

¹⁶(II.) Jadi dipatupa si Musa ma sude songon na tinonahon ni Jahowa tu ibana songon i do dibahen.

¹⁷Saut ma di artia bulan sipahasada paduataonhon dung ruar sian Misir dipajongjong nasida inganan na badia i.

¹⁸Jadi dung dipajongjong Musa sandiri inganan na badia i, dibahen dohot angka ojahanna jala dipamasuk tusi angka papanna, dibahen muse ransangransangna jala dipajongjong angka tiangna.

¹⁹Jala dipaherbang angka rimberimbe ni undungundung i tu atas inganan na badia i, jala dipeakkon tutup ni undungundung i tu atasna, songon na tinonahon ni Jahowa tu si Musa.

²⁰Dung i dibuat ma lei panindangion i jala dipeakkon tu bagasan poti i, disurukkon ma

dohot haluhalu i tu poti i dibahen muse ma langkop pardengganan i tu atas ni poti i.

²¹ Dung i diboan ma poti i tu bagasan inganan na badia i jala digantungkon rimberimbe i bahen tutup ni poti panindangion i, songon na tinonahon ni Jahowa tu Musa.

²² Dung i dipajongjong ma meja i tu bagasan undungundung parluhutan i di lambung inganan na badia i tungkan utara di balian ni rimberimbe i.

²³ Jala dipatording di atasna sipatordingon hian, i ma sagusagu di adopan ni Jahowa, songon na tinonahon ni Jahowa tu Musa.

²⁴ Dipajongjong ma dohot parpalitoan i tu bagasan undungundung na badia i tondong ni meja i di lambung inganan na badia i tungkan dangsina.

²⁵ Dipagalak ma dohot angka palito i di adopan ni Jahowa, songon na tinonahon ni Jahowa hian tu Musa.

²⁶ Dipajongjong muse ma langgatan sere i tu bagasan undungundung parluhutan i di jolo ni rimberimbe i.

²⁷ Jala di tutung di atasna daupa na hushus marragamragam songon na tinonahon ni Jahowa hian tu Musa.

²⁸ Digantungkon ma dohot rimberimbe tutup ni pintu laho tu inganan na badia i.

²⁹ Alai anggo langgatan pamelean ni pelean situtungan dipajongjong do i di pintu haroroan tu inganan na badia i,

undungundung parluhutan i, jala dipelehon di atasna pelean situtungan dohot pelean sipanganon, songon na tinonahon ni Jahowa hian tu si Musa.

³⁰Dipajongjong dohot tong parburian i di holangholang ni undungundung parluhutan i dohot langgatan i, laos dibahen tusi aek parburian.

³¹Asa laos aek sian i buaton ni si Musa. Si Aron dohot angka anakna i mamburi tangannasida dohot patnasida.

³²Molo masuk nasida tu bagasan undungundung parluhutan i, jala molo ro nasida jumonok tu langgatan i, ingkon jolo marburi nasida, songon na tinonahon ni Jahowa hian tu si Musa.

³³Dipajongjong muse ma rimberimbe ni alaman i humaliang inganan na badia i dohot langgatan i, jala digantungkon rimberimbe tutup ni bahal ni alaman i. Jadi sun ma sandok ulaon i dipasidung si Musa.

³⁴(III.) Dung i ro ma ombun i manghungkupi undungundung parluhutan i, jala hamuliaon ni Jahowa manggohi inganan na badia i.

³⁵Pola ndang tarbahen si Musa laho bongot tu bagasan undungundung parluhutan i, ai sai mangulon do ombun i di atasna, jala hamuliaon ni Jahowa manggohi inganan na badia i.

³⁶Molo tung manaek ombun i sian atas inganan na badia i, borhat ma halak Israel i mardalan, manulus sandok dalannasida i.

³⁷Alai molo so manaek ombun i, ndang borhat nasida, sahat ro di ari hananaekna i.

³⁸Ai sai di atas ni inganan na badia i ombun ni Jahowa ia arian jala api do di atasna ia bornginna i dipaidaida sandok pinompar ni Israel di sude dalannasida i.

I mamat

1 ¹ (I.) Dung i dijou Jahowa ma si Musa jala ro ma hata ni Jahowa tu ibana sian undungundung parluhutan i songon on:

² Paboa ma tu halak Israel jala dok ma tu nasida: Tung sura adong sada jolma sian hamu na naeng mamelehon sada pelean tu Jahowa, ingkon sian pinahan do, sian lombu manang sian birubiru pelehononmuna peleanmuna i.

³ Tung sura sada pelean situtungan naeng pelehononna sian lombu, ingkon jonggi na so marlindang pelehononna, ingkon boanonna do i sahat tu pintu ni undungundung parluhutan i, asa jumpangan asi ni roha ibana di adopan ni Jahowa.

⁴ Dung i ampehononna ma tanganna tu ulu ni pelean situtungan i, asa dapotan asi ni roha ibana bahen pardenggan di ibana.

⁵ Dung i potongonna ma lombu naposo i di adopan ni Jahowa; jala ingkon boanon ni angka malim, angka anak ni Aron ma mudar i jala pispishononna mudar i tu langgatan i humaliang, na di jolo ni pintu ni undungundung parluhutan i.

⁶ Dung i bobakanna ma pelean situtungan i, laos disahei ma i marponggolpongol.

⁷Dung i mangopan api ma angka anak ni malim Aron di atas langgatan i, jala diampehon soban tu atas api i.

⁸Dung i ingkon jozor ampehonon ni angka anak ni Aron, angka malim i ma angka ponggolponggolna, uluna dohot pultahanna tu atas soban dohot api na di atas ni langgatan i.

⁹Alai anggo raoanna dohot bitisna ingkon burianna di bagasan aek, dung i tutungon ni malim i ma saluhutna i di atas langgatan i bahen pelean situtungon, bahen pelean api, bahen uap na hushus di Jahowa.

¹⁰(II.) Tung sura naeng pelehononna sada pelean situtungon sian pinahan na metmet, sian anak ni birubiru manang sian haming, ingkon tunggal na so martihas do pelehononna.

¹¹Ingkon potongonna do i di adopan ni Jahowa, di lambung ni langgatan tungan utara; jala ingkon pispishonon ni angka anak ni si Aron, angka malim i ma mudarna tu langgatan i humaliang.

¹²Dung i ingkon saheanna do i marponggolponggol jala sirangonna uluna dohot pultahanna, jala ingkon jozor do i ampehonon ni malim tu atas soban dohot api na di atas ni langgatan i.

¹³Alai anggo raoanna dohot bitisna ingkon burianna di bagasan aek, dung i ingkon pelehonon ni malim saluhutna i jala tutungonna di atas langgatan bahen pelean

situtungon, i ma pelean api, uap na hushus di Jahowa.

¹⁴(III.) Alai tung sura naeng pelehonna sada pelean situtungon di Jahowa sian pidong, ingkon pelehonna do i sian anduhur tabu manang sian anak ni darapati.

¹⁵Ingkon boanon ni malim do i tu langgatan i, jala pulosonna uluna laos tutungonna do i di atas langgatan i jala patirisonna mudarna tu dorpi ni langgatan i.

¹⁶Alai padaonna do anggo buriranna, imputna jala timpalhononna do i tu lambung ni langgatan tungan habinsaran, tu partangkalan i.

¹⁷Dung i saheonna ma i di pamungkurina, alai ndang jadi ponggolhononna, dung i tutungon ni malim ma i di atas langgatan tu hau na di atas api bahen pelean situtungon, i ma pelean api, uap na hushus di Jahowa.

2¹(I.) Tung sura manang ise naeng mamelehon sada pelean sipanganon tu Jahowa, ingkon itak na lamot buatonna peleanna jala usehononna tusi miak jala ampehononna tusi haminjon.

²Dung i boanonna do i tu angka anak ni si Aron, angka malim i; dung i buaton ni sada sian nasida sian i sampohul, sian itak, sian miak dohot sandok haminjon i, ingkon tutungon ni malim i ma i bahen pelean parningotan di atas ni langgatan i, gabe pelean api, uap na huhus di Jahowa.

³Alai na teba i sian pelean sipanganon i, jambar ni si Aron dohot angka anakna ma i, i ma na badia sahali sian angka pelean api di Jahowa.

⁴Alai tung sura naeng pelehononmu sada pelean sipanganon naung minasak di tataring, ingkon buatonmu do gaburgabur na so niasoman mardongan miak dohot sagusagu na so niasoman marsapu miak.

⁵Alai tung sura peleanmi sada pelean sipanganon sian na ginoreng di balanga, ingkon sian itak na lamot na so niasoman do marsaor miak.

⁶Ingkon parpongolanmu do i jala usehononmu tusi miak, asa manjadi pelean sipanganon do i.

⁷Alai tung sura peleanmi sada pelean sipanganon sian na nilompa di bagasan hudon, ingkon sian itak na lamot do i marsaor miak bahenon.

⁸Ingkon boanonmu do pelean sipanganon na pinaulim sian angka ondeng di Jahowa, boanonmu do i tutu tu malim i, asa ibana muse mamboan tu langgatan i.

⁹Jala ingkon buaton ni malim i sian pelean sipanganon jambar parningotan jala tutungonna do i di atas langgatan, i ma pelean api, uap na hushus di Jahowa.

¹⁰Alai na tinggal i sian pelean sipanganon, i ma gabe jambar ni si Aron dohot angka

anakna, i ma na badia sahali sian angka pelean api tu Jahowa.

¹¹ Nasa pelean sipanganon na naeng pelehononmuna tu Jahowa, ndang jadi asom bahenon, ai nasa na asom manang situak ni loba, ndang jadi tutungonmuna sian i bahen pelean api tu Jahowa.

¹² Anggo bahen pelean patumonaan jadi do boanonmuna angka i tu Jahowa, alai ndang jadi anggo tutungon di atas langgatan, bahen uap na hushus.

¹³ Nasa pelean sipanganon tahe, ingkon mardongan sira do bahenonmu, na so tupa tartinggal bahenonmu sian peleanmu sipanganon sira parjanjian tu Debatam; dibahen i ingkon mardongan sira sude peleanmu pelehononmu.

¹⁴ (II.) Alai molo naeng ho mamelehon pelean sipanganon sian patumonaan tu Jahowa, ingkon boanonmu do biur ni eme na nirondang di bagasan api, na niduda bahen pelean sipanganon sian patumonaan.

¹⁵ Ingkon bahenonmu huhut tusi miak jala ampehononmu tu atasna haminjon, i ma gabe pelean sipanganon.

¹⁶ Dung i ingkon tutungon ni malim ma jambar parningotan sian eme na nidugudugu dohot sian miakna rap dohot sandok haminjon i bahen pelean api di Jahowa.

3¹ (I.) Alai tung sura sada pelean hamauliateon, naeng pelehononna sian

lombu, manang jonggi manang boruboru, na so tupa marlindang pelehonna di adopan ni Jahowa.

²Ingkon ampehonna tanganna tu ulu ni peleanna i, laos potongonna do i di jolo pintu ni undungundung parluhutan i, jala ingkon pispishonon ni angka anak ni si Aron, angka malim i, anggo mudarna tu langgatan i humaliang.

³Ingkon pelehonna sian pelean hamauliateon bahen pelean api tu Jahowa, i ma pultahan na manghungkupi raoanna, ro di sandok pultahan na di bagasan i.

⁴Tole muse piana na dua i dohot pultahan na lohohot tusi na di lansonikna, tole muse hirehire na dalhop tu ateate, mangihut tu piapia buatonna.

⁵Dung i ingkon tutungon ni angka anak ni si Aron ma i di atas langgatan bahen pelean situtungon di atas soban dohot api; i ma gabe pelean api, uap na hushus di Jahowa.

⁶(II.) Alai tung sura sian pinahan na metmet peleanna i bahen pelean hamauliateon tu Jahowa, nang tunggal, nang boruboru, ingkon na so marlindang do pelehonna.

⁷Molo sada anak ni birubiru naeng pelehonna, ingkon boanonna do i tu adopan ni Jahowa.

⁸Dung i ingkon ampehonna tanganna tu ulu ni peleanna i, jala potongonna do i di jolo ni undungundung parluhutan i; alai anggo

mudarna ingkon pispishonon ni angka anak ni si Aron do i tu langgatan i humaliang.

⁹Dung i ingkon pelehononna sian pelean hamauliateon i bahen pelean api tu Jahowa, i ma pultahanna, sandok ihurna, sigotaponna jonok tu hau tanggurungna, tole muse pultahan pangkuphupi ni raoanna ro di sandok pultahan na di bagasan i.

¹⁰Tole muse piana na dua i dohot pultahan na lohohot tusi na di lansonikna, tole muse hirehire na dalhop tu ateate mangihut tu piapia buatonna.

¹¹Ingkon tutungon ni malim ma i di atas langgatan bahen sipanganon ni pelean api tu Jahowa.

¹²(III.) Tung sura hambing peleanna, ingkon boanonna do i tu adopan ni Jahowa.

¹³Dung i ampehononna ma tanganna tu uluna jala potongonna do i di jolo ni undungundung parluhutan i; ingkon pispishonon ni angka anak ni si Aron anggo mudarna tu langgatan i humaliang.

¹⁴Ingkon boanonna huhut sian peleanna bahen pelean api tu Jahowa, i ma pultahan pangkuphupi ni raoanna, ro di sandok pultahan na di bagasan i.

¹⁵Tole muse piana na dua i dohot pultahan na lohohot tusi na di lansonikna, tole muse hirehire na dalhop tu ateate mangihut tu piapia buatonna.

¹⁶Ingkon tutungan ni malim do i di atas langgatan bahen sipanganon ni pelean api, gabe uap na hushus; nasa pultahan Jahowa do nampunasa.

¹⁷Uhum na hot ma on salelenglelengna ro di pinomparmuna di sude ingananmuna i: Sandok na so tupa panganonmuna pultahan manang mudar.

4¹(I.) Dung i ro ma hata ni Jahowa tu si Musa, songon on:

²Pasahat ma tu halak Israel hata on: Molo tung naung mardosa manang ise ala liluna dompak manang dia sian patik ni Jahowa, gabe diulahon manang aha na so jadi ulaonna nian.

³Tung sura malim naung miniahan nian mardosa, mambahen gasip tu bangso i, ingkon pelehonna ala ni dosana naung niulahonna i sada anak ni lembu na so marlindung tu Jahowa bahen pelean pardosaan.

⁴Ingkon boanonna lembu i tu pintu ni undungundung parluhutan i, tu adopan ni Jahowa, jala ampehononna tanganna tu ulu ni lembu i jala potongonna lembu i di adopan ni Jahowa.

⁵Dung i buaton ni malim naung miniahan i ma sian mudar ni lembu i jala boanonna do i tu bagasan undungundung parluhutan i.

⁶Dung i sornophonon ni malim ma jarijarina tu bagasan mudar i jala pistikkonna sian

mudar i pitu hali di adopan ni Jahowa, tungkan jolo ni rimberimbe ni inganan na badia i.

⁷Ingkon bahenon ni malim i huhut sian mudar i tu angka tanduk ni langgatan panutungan daupa na hushus di adopan ni Jahowa, di bagasan undungundung parluhutan i; dung i sandok mudar na teba i sian lembu i, ingkon usehononna do i tu pantar ni langgatan pamelean ni pelean situtungan, na di jolo pintu ni undungundung parluhutan i.

⁸Alai anggo sandok pultahan ni lembu pelean pardosaon i buatonna do sian i, tole pultahan pangkuphupi ni raoanna ro di sandok pultahan na di bagasan i.

⁹Tole muse piana na dua i dohot pultahan na lohut tusi na di lansonikna, tole muse hirehire na dalhop tu ateate mangihut tu piapia buatonna.

¹⁰Suang songon na binuatna i sian jonggi pelean hamauliateon, jala ingkon tutungan ni malim do i di atas langgatan pamelean ni pelean situtungan.

¹¹Alai anggo bobak ni lembu i rap dohot sandok sibukna, ro di uluna dohot bitisna, raoanna dohot napana.

¹²Sandok lembu i tahe ingkon boanonna tu balian ni parsaroan i, tu sada inganan na ias, parpunguan ni sirabun, jala suda tutungonna

do i di atas soban di bagasan api, ingkon di atas parpunguan ni sirabun tutungonna.

¹³(II.) Alai tung sura sandok luhutan Israel naung mardosa sian liluna, hape buni do hata i maradophon mata ni luhutan i, gabe diulahon nasida manang aha na maralo dompak sada sian patik ni Jahowa, na so jadi nian ulahononna, gabe sala nasida.

¹⁴Hape patar muse tu luhutan i dosa naung niulahonna i, ingkon sandok luhutan i mamelehon sada anak ni lembu bahen pelean pardosaan, jala boanonna do i tu jolo ni undungundung parluhutan i.

¹⁵Dung i ampehonon ni angka sintua ni luhutan i tangannasida tu ulu ni lembu i di adopan ni Jahowa, laos potongonna lembu i di adopan ni Jahowa.

¹⁶Dung i boanon ni malim naung miniahan i ma deba sian mudar ni lembu i tu bagasan undungundung parluhutan i.

¹⁷Dung i sornophonon ni malim ma jarijarina tu bagasan mudar i, jala pistikkonna pitu hali di adopan ni Jahowa tungan jolo ni rimberimbe i.

¹⁸Ingkon bahenonna huhut deba sian mudar i tu angka tanduk ni langgatan i na di adopan ni Jahowa di bagasan undungundung parluhutan i, jala sandok mudar na teba i usehononna do i tu pantar ni langgatan pamelean ni pelean situtungan, na di jolo pintu ni undungundung parluhutan i.

¹⁹Alai anggo sandok pultahanna ingkon buatonna sian i jala tutungonna di atas langgatan i.

²⁰Ingkon bahenonna tu lombu i, suang songon na binahenna i tu lombu pardosaon i, ingkon songon i bahenon ni malim i, asa mambahen pardenggan di nasida, gabe marpamuati rohana di nasida.

²¹Ingkon boanonna lombu i tu balian ni parsaroan, tutungonna disi, suang songon panutungna di lombu parjolo i; i ma gabe pelean pardosaan di luhutan i.

²²(III.) Tung sura naung mardosa sada induk, jala diulahon manang aha na maralo tu patik ni Jahowa Debatana, tung diulahon sian liluna na so jadi ulahononhon, gabe marsala ibana.

²³Ia dung patar di ibana dosana naung niulahonna i, ingkon boanonna sada hambing tunggal na so marlindung bahen pelean.

²⁴Dung i ampehononna ma tanganna tu ulu ni hambing tunggal i, laos potongonna do i di inganan pamotongan ni pelean situtungon di adopan ni Jahowa; i ma gabe pelean pardosaan.

²⁵Dung i buaton ni malim i ma deba sian mudar ni pelean pardosaon i marhitehite jarijarina, jala bahenonna do i tu angka tanduk ni langgatan pamelean ni pelean situtungon, ia mudar na teba i usehononna

do tu pantar ni langgatan pamelean ni pelean situtungan.

²⁶Alai anggo sandok pultahanna ingkon tutungonna do i di atas langgatan, suang songon pultahan ni pelean hamauliateon; ingkon songon i pardenggananna ala ni dosana bahenon ni malim, gabe marpamuati rohana di ibana.

²⁷(IV.) Alai tung sura mardosa sahalak situasi na torop, isi ni luat i sian liluna, gabe diulahon manang aha na maralo tu patik ni Jahowa, na so jadi ulahononhon, gabe marsala ibana.

²⁸Ia dung patar di ibana dosana naung niulahonna i, ingkon boanonna sada hambing boruboru na so marlindang bahen peleanna ala ni dosana naung niulahonna i.

²⁹Dung i ampehononna tanganna tu ulu ni pelean pardosaon i, jala potongonna do i di inganan ni pelean situtungan.

³⁰Dung i buaton ni malim ma deba sian mudarna i marhitehite jarijarina, jala bahenonna do i tu angka tanduk ni langgatan pamelean ni pelean situtungan, jala mudarna na teba i usehononna tu pantar ni langgatan i.

³¹Alai anggo sandok pultahanna ingkon buatonna do i, songon pambuatna di pultahan ni pelean hamauliateon, jala tutungan ni malim do i di atas langgatan, bahen uap na hushus ni Jahowa; ingkon songon i

pardenggananna ala ni dosana bahenon ni malim, gabe marpamuati rohana di ibana.

³²Alai tung sura sada anak ni birubiru binoanna bahen pelean pardosaan, ingkon boanonna do sada boruboru na so marlindung.

³³Dung i ampehononna ma tanganna tu ulu ni pelean pardosaon i, laos potongonna ma i bahen pelean pardosaan apala di inganan pamotongan ni pelean situtungon.

³⁴Dung i buaton ni malim ma deba sian mudar ni pelean pardosaon i marhitehite jarijarina, jala bahenonna do i tu angka tanduk ni langgatan pamelean ni pelean situtungon, jala sandok mudar na teba i usehononna do tu pantar ni langgatan i.

³⁵Alai anggo sandok pultahanna buatonna do, suang songon na binuatna pultahan ni anak ni birubiru sian pelean hamauliateon, ingkon tutungon ni malim do i di atas langgatan bahen pelean api di Jahowa; ingkon songon i do pardenggananna ala ni dosa naung niulahonna i, asa marpamuati rohana di ibana.

5¹(I.) Tung sura mardosa manang ise, tung dibege soara bura, laos ibana sitindangina, manang marnidasa, manang umbotosa, hape ndang dipabotohon, ingkon mangonai torutoru tu ibana.

²Manang tung sura dijama sahalak manang aha na ramun, nang bangke ni binatang na ramun, nang bangke ni pinahan na ramun,

naung bangke ni gulokgulok na ramun, hape ndang diboto, ingkon ramun dirina jala naung marsala ibana.

³Manang tung sura dijama manang ise haramunon nijolma na asing manang haramunon dia pe goarna, gabe ramun ibana bahenon ni, hape ndang pamotoanna jolo, gabe diboto muse, naung marsala ibana disi.

⁴Manang tung sura marsumpa manang ise, gabe tarsor bibirna mandok soara laho mangulahon na jat manang mangulahon na denggan; taringot tu saluhut tahe, molo tarsor jolma i marsumpa, hape buni do sian ibana, gabe diboto muse marsala do ibana taringot tusi.

⁵Ia dung marsala ibana taringot tusi, ingkon topotanna do naung mardosa ibana taringot tusi.

⁶Dung i boanonna ma dibahen salana tu Jahowa, ala ni dosana naung binahenna i, sada boruboru sian pinahan metmet, sada anak ni birubiru, manang sada hambing, bahen pelean pardosaan; ingkon malim i mambahen pardenggananna alani dosana.

⁷Alai tung sura so tuk gogona pasingkophon sada birubiru, ingkon boanonna dibahen salana ala ni dosa naung niulahonna i dua anduhur tabu manang dua anak ni darapati tu Jahowa, na sada bahen pelean pardosaan, na sadanari bahen pelean situtungan.

⁸Jala boanonna do i tu malim, asa ibana mamelehon parjolo i bahen pelean pardosaan, ingkon pulosonna uluna tungkan tangkuhukna, alai ndang laos sirangonna.

⁹Dung i pispishononna deba sian mudar ni pelean pardosaan tu dorpi ni langgatan, ia mudar na tinggal i ingkon patirisonna tu pantar ni langgatan i; i ma gabe pelean pardosaan.

¹⁰Tole muse na paduahon i, ingkon bahenonna gabe pelean situtungan, songon, uhumna hian; ingkon songon i pardenggananna bahenon ni malim ala ni dosa naung niulahonna i, asa marpamuati rohana disi.

¹¹Tung sura so tuk gogona mangalehon nanggo dua anduhur tabu manang dua anak ni darapati, ingkon boanonna bahen peleanna ala naung mardosa ibana saparsampulu sian saepa itak na lamot bahen pelean pardosaan; alai ndang jadi bahenonna tusi miak manang ampehononna tusi haminjon; ai pelean pardosaan do i.

¹²Ingkon boanonna do i tu malim, asa malim i mambuat sian i sampohul bahen jambar parningotan, jala tutungonna do i di atas langgatan bahen pelean api di Jahowa, i ma gabe pelean pardosaan.

¹³Ingkon songon i pardenggananna bahenon ni malim ala ni dosa naung niulahonna marhite sian sada angka ondeng, asa

marpamuati rohana disi; na lobi i ingkon gabe jambar ni malim do suang songon pelean sipanganon i.

¹⁴(II.) Dung i ro muse hata ni Jahowa tu si Musa, ninna ma.

¹⁵Tung sura adong sahalak na mangorui deba sian ugasan naung pinarbadian tu Jahowa, gabe mardosa sian liluna, ingkon boanonna do bahen peleana parsalaan tu Jahowa sada birubiru tunggal na so marlindang marguru tu pangasam ni malim godang ni sekkel perak mangihuthon sekkel di inganan na badia bahen pelean parsalaan.

¹⁶Jala manang sadia na nioruanna binahen ni dosana sian ugasan na badia i, ingkon pasuangonna do i jala ambaanna saparlima tusi; ingkon lehononna tu malim, asa malim i mambahen pardenggananna marhite sian birubiru tunggal peleana parsalaan, asa marpamuati rohana di ibana.

¹⁷Tung sura mardosa manang ise, gabe diulahon manang aha na maralo tu patik ni Jahowa, na so jadi bahenonna nian, hape ndang diboto, gabe marsala dirina, ingkon mangonai torutoru tu ibana.

¹⁸Ingkon boanonna tu malim sada birubiru tunggal na so marlindang marguru tu pangasam ni malim bahen pelean parsalaan; asa malim i mambahen pardenggananna ala haliluonna, naung lilu i ibana so diboto, asa marpamuati rohana di ibana.

¹⁹I ma gabe pelean parsalaan, ala naung marsala ibana tu Jahowa.

6¹ (5-20) (III.) Dung i ro muse hata ni Jahowa tu si Musa, songon on:

²(5-21) Tung sura mardosa manang ise gabe mangalaosi ibana mangalo parenta ni Jahowa, tung diporso do na pinajophon ni donganna tu ibana, manang na pinalumehonna, manang na nirampasna, manang na binuatna sian gogo sian donganna.

³(5-22) Manang na jumpangsa na mago, gabe diporso muse, pola ditolon na tutu laho paotootohon taringot tu manang aha tau parbingkasan tu dosa na binahen ni jolma.

⁴(5-23) Asa tung sura mardosa ibana songon i, gabe marsala dirina, ingkon pasuangonna do ugasan naung nirampasna i manang na niangatanna i sian donganna, manang naung pinalumehonna i tu ibana, manang ugasan naung mago jumpangsa.

⁵(5-24) Manang aha pe tahe naung pola sinumpahonna laho paotootohon, ingkon pasuangonna do luhutna, jala ambaanna saparlina tusi; ingkon lehononna do i tu nampunasa hian di ari pamelehonna di pelean parsalaan.

⁶(5-25) Ingkon boanonna huhut bahen peleanna parsalaan tu Jahowa sada birubiru tunggal na so marlindang, marguru tu pangasam ni malim bahen pelean parsalaan tu malim.

⁷ (5-26) Asa malim i muse mambahen pardenggananna di adopan ni Jahowa, asa marpamuati rohana di ibana taringot tu sasude na niulana mambahen marsala dirina.

⁸ (6-1) (I.) Dung i ro muse hata ni Jahowa tu si Musa songon on:

⁹ (6-2) Dok ma tu Aron dohot tu angka anakna i songon on: On do patik taringot tu pelean situtungon: Ia pelean situtungon i ingkon tongtong galak di panutunganna, di atas langgatan i manipat sabornginna i sahat ro di manogot; ingkon tongtong galak tahe api i di atas langgatan i.

¹⁰ (6-3) Ingkon solukkonon ni malim i ma bajuna dohot saraoalna rap sian hain na bontar tu dagingna jala buatonna do sirabun ni pelean situtungon i, dung suda dipangan api di atas langgatan i, jala usehononna do i di lambung langgatan i.

¹¹ (6-4) Dung i ingkon tanggalanna muse pangkeanna i jala solukkononna angka pangkean na asing, jala boanonna sirabun i tu balian ni parsaroan tu sada inganan na ias.

¹² (6-5) Ia api na galak di atas langgatan i, na so tupa mintop; ingkon pagalahon ni malim ganup sogot soban di atasna jala patordingonna di atasna pelean situtungon, jala tutungonna di atasna pultahan ni angka pelean hamauliateon.

¹³ (6-6) Ingkon tongtong galak api i di atas langgatan, na so tupa mintop.

¹⁴(6-7) (II.) Jala on do patik taringot tu pelean sipanganon: Ingkon angka anak ni Aron do mamelehonsa di adopan ni Jahowa di atas langgatan i.

¹⁵(6-8) Ingkon sahalak sian nasida mambuat sampohul sian i, sian itak ni pelean sipanganon i dohot sian miakna dohot sandok haminjon na di atas ni pelean sipanganon i, ingkon tutungonna do i di atas langgatan bahen daupa na hushus, jambar parningotan di Jahowa.

¹⁶(6-9) Alai anggo na lobi sian i ingkon panganon ni si Aron dohot angka anakna i: Ingkon na so niasoman do panganonna di inganan na badia; di alaman ni undungundung parluhutan i do panganonnasida.

¹⁷(6-10) Nandang jadi masahonna mardongan asom; jambarnasida ma i na hulehon sian pelean api angka na tu Ahu; ingkon na badia sahali do i, suang songon pelean pardosaan dohot parsalaan.

¹⁸(6-11) Nasa baoa di tongatonga ni pinompar ni si Aron, jadi do manganhon sian i: I ma gabe uhum saleleng ni lelengna ro di pinomparmuna sian pelean api angka na tu Jahowa; manang ise na manjama angka i, ingkon badia hian ibana.

¹⁹(6-12) (III.) Dung i ro muse hata ni Jahowa tu si Musa, songon on:

²⁰(6-13) On do pelean sipelehonon ni si Aron dohot angka anakna i tu Jahowa

di ari panahatan ni pamiahion tu nasida:
Saparsampulu epah itak na lamot bahen
pelean sipanganon ariari, satongana
manogotna i, na satonganari bodarina i.

²¹ (6-14) Di bagasan balanga mardongan
miak do paulionna, ingkon tangkas ginoreng
boanonmu; dung i ponggolponggol ni pelean
sipanganon i pelehononmu bahen uap na
hushus di Jahowa.

²² (6-15) Ingkon malim naung miniahan
singkatna i sian angka anakna mambahen
songon i; i ma gabe uhum na hot
salelenglelengna: Sandok ingkon tutungon di
Jahowa do i.

²³ (6-16) Ai nasa pelean sipanganon
pinelehon ni malim, ingkon suda do i
tutungon, ndang jadi anggo panganon.

²⁴ (6-17) (IV.) Dung i ro muse hata ni Jahowa
tu si Musa, songon on:

²⁵ (6-18) Paboa ma tu si Aron dohot tu
angka anakna i: On do patik taringot tu angka
pelean pardosaan: Di inganan paneatan ni
pelean situtungon i, seaton dohot pelean
pardosaan di adopan ni Jahowa, i ma na badia
sahali.

²⁶ (6-19) Malim na mamelehon pelean
pardosaon i laos i do manganhon; ingkon di
inganan na badia i do panganonna, di alaman
ni undungundung parluhutan i.

²⁷ (6-20) Manang ise na manjama sibuk
ni pelean i, ingkon badia hian ibana; jala

manang ise na mamistikkon sian mudarna i tu sada pangkean, ingkon sionsionna do na tarpistik i di inganan na badia i.

²⁸(6-21) Ia hudon tano pangalompaaanna i, ingkon taporon do; alai tung sura di bagasan hudon tombaga dilompa, ingkon tangkas do i usaonna jala lusoanna di bagasan aek.

²⁹(6-22) Nasa baoa di tongatonga ni angka malim mangan sian pelean i, ai na badia sahali do i.

³⁰(6-23) Alai anggo nasa pelean pardosaan anggo pola tarboan sian mudarna i tu bagasan undungundung parluhutan i bahen pardenggan, ndang jadi panganonna di inganan na badia i, ingkon tutungonna do i di bagasan api.

7¹(I.) Jala on do patik taringot tu pelean parsalaan, ingkon na badia sahali do i.

²Apala di inganan paneatan di pelean situtungan, seaton dohot pelean parsalaan, jala mudarna i pistikkononhon tu langgatan i humaliang.

³Jala sandok tabotabona, ingkon pelehononhon do, ro di ihurna dohot pultahan panaputi ni raoanna.

⁴Tole muse piana na dua i dohot pultahan na lohote tusi na di lansonikna, tole muse hirehire na dalhop tu ateate mangihut tu pia buatonna.

⁵Ingkon tutungan ni malim do i di atas langgatan bahen pelean api di Jahowa; i ma gabe pelean parsalaan.

⁶Nasa baoa di tongatonga ni angka malim jadi do mangan sian i; ingkon di inganan na badia i do panganonna; ai na badia sahali do i.

⁷Ingkon songon pelean pardosaan do nang pelean parsalaan; sisada patik do na dua i; ingkon malim na mambahen pardenggan marhite sian i do nampunasa.

⁸Laos malim i do nampuna bobak ni pelean situtungan na pinelehonna sian manang ise.

⁹Nang saluhut pelean sipanganon na pinarmasak di atas tatarang manang dipanggang manang digoreng di bagasan balanga, ingkon malim na mamelehon i do nampunasa.

¹⁰Tole muse nasa pelean sipanganon manang mardongan miak manang mahiang, ingkon saluhut anak ni si Aron nampunasa, dos be nasida disi.

¹¹(II.) On ma patik taringot tu pelean hamauliateon, na pinelehon ni halak tu Jahowa.

¹²Tung sura adong manang ise naeng mamelehon sada pelean pujipujian, ingkon pelehonna bahen dongan ni pelean pujipujian sagusagu angka na so niasoman mardongan miak, dohot timbatimba na

marsapu miak dohot gaburgabur na nirondang saor miak.

¹³Alai dongan ni sagusagu i pelehonna do roti na niasoman bahen peleanna, bahen dongan ni peleanna pujipujian mandok mauliate ni rohana.

¹⁴Dung i pelehonna sada sian sandok pelean i bahen pelean tatingan tu Jahowa; ingkon malim na mamispishon mudar ni pelean hamauliateon i nampunasa pelean i.

¹⁵Ia sibuk ni pelean pujipujian mandok mauliate ni rohana, ingkon suda panganon di ari pamelehonna i, ndang jadi adong tinggal sian i tu marsogot.

¹⁶Tung sura sada pelean bagabaga, manang silehonlehon sian lomona naeng pelehonna, ingkon di ari pamelehonna i suda panganonna peleanna i, tung sura adong tinggal sian i, marsogotna i ma suda panganonna.

¹⁷Alai molo adong tinggal sian juhut pelean i, pola tu ari patoluhon, ingkon tutungon do i di bagasan api.

¹⁸Tung sura adong manang ise na manganhon sian juhut pelean hamauliateon ni rohana di ari patoluhon, ndang tarhalomohon Debata peleanna i; halak na mamelehon pe, ndang marsaulihonsa, gabe hagigian do i balik, manang ise na manganhon sian i, ingkon mangonai torutoru tu ibana.

¹⁹Angkup ni juhut naung dais tu manang aha na ramun, ndang jadi panganon, ingkon tutungon do i di bagasan api; alai anggo taringot tu juhut i jadi do panganon ni manang ise na niuras dagingna i.

²⁰Alai manang ise na mangan sian juhut pelean hamauliateon, jambar ni Jahowa hian, hape tarramun dope ibana, ingkon siaphononhon hosana sian tongatonga ni bangsona.

²¹Tung sura adong manang ise na manjama manang aha na ramun, manangjolma na ramun manang pinahan na ramun, manang dia na ramun na asing tau hagigian, hape mangan do ibana sian juhut pelean hamauliateon, jambar ni Jahowa hian, ingkon siaphononhon dojolma i sian tongatonga ni bangsona.

²²(III.) Dung i ro muse hata ni Jahowa tu si Musa songon on:

²³Dok ma tu halak Israel songon on: Nandang jadi panganonmuna agia aha pultahan sian lombu manang birubiru manang haming.

²⁴Alai anggo pultahan sian bangke ni pinahan manang sian na ginotil ni binatang, jadi do pangkeon tu ulaon marragamragam; alai na so tupa do anggo panganonmuna sian i.

²⁵Ai manang ise na manganhon pultahan sian pinahan na pinelehon bahen pelean api tu Jahowa, ingkon siaphononhon do hosana

sian tongatonga ni bangsona manang ise na manganhon sian i.

²⁶Ndang jadi huhut panganonmuna manang aha mudar di saluhut ingananmuna i, nang mudar sian pidong nang mudar sian pinahan.

²⁷Manang ise na mangan mudar, ingkon siaphononhon ibana sian tongatonga ni bangsona.

²⁸(IV.) Dung i ro muse hata ni Jahowa tu si Musa songon on:

²⁹Dok ma tu halak Israel songon on: Manang ise na naeng mamelehon pelean hamauliateon ni rohana tu Jahowa, ingkon ibana sandiri mamboan peleanna tu Jahowa sian pelean hamauliateon ni rohana i.

³⁰Ingkon tanganna sandiri tahe mamboan pelean api tu Jahowa, i ma pultahan rap dohot andora boanonna bahen pelean teateaan di adopan ni Jahowa.

³¹Dung i tutungon ni malim i ma pultahan di atas langgatan, alai anggo andoranai jambar ni si Aron dohot angka anakna ma i.

³²Nang hae jolo siamun ingkon lehononmuna do tu malim bahen pelean tatingan sian pelean hamauliateon ni rohamuna.

³³Manang ise tahe sian angka anak ni si Aron mamelehon mudar ni pelean hamauliateon rap dohot pultahanna, ingkon hae jolo siamun gabe jambarna.

³⁴Ai andora pelean teateaan dohot hae jolo pelean tatingan, nunga hubuat sian halak

Israel, sian angka pelean hamauliateon ni rohanasida, jala nunga hulehon angka i tu malim Aron dohot tu angka anakna, gabe aturan na hot salelenglelengna sian halak Israel.

³⁵On do jambar na badia tu si Aron dohot tu angka anakna i sian angka pelean api tu Jahowa, olat ni ari dung pinabangkitna i nasida mangaradoti hamalimon di Jahowa.

³⁶Laos Jahowa tahe mandokkon lehonon do i tu nasida di ari miniahanna i nasida sian halak Israel bahen aturan di pinomparnasida i ro di salelenglelengna.

³⁷I ma patik taringot tu pelean situtungon, pelean sipanganon, pelean pardosaan, pelean parsalaan, pelean pasahathon tohonan dohot pelean hamauliateon.

³⁸Na tinonahon ni Jahowa tu si Musa di atas dolok Sinai di ari uju na nidokkonna i halak Israel mamelehon angka peleannasida tu Jahowa di halongonan Sinai.

8¹(I.) Dung i ro muse hata ni Jahowa tu si Musa songon on:

²Buat ma si Aron rap dohot angka anakna i, ro di angka pangkean dohot miak pamiahion, tole muse sada lombu bahen pelean pardosaan, dua birubiru tunggal dohot sada hirang na marisi sagusagu na so niasoman.

³Jala paluhut ma sandok luhutan i tu jolo pintu ni undungundung parluhutan i.

⁴Jadi dibahen si Musa ma songon na nidokkon ni Jahowa tu ibana, dipaluhut ma luhutan i tu jolo pintu ni undungundung parluhutan i.

⁵Dung i ninna si Musa ma tu luhutan i: On do hata na tinonahon ni Jahowa bahenonta.

⁶Dung i didokkon Musa ma ro jumonok si Aron dohot angka anakna i, laos dididi ma nasida di bagasan aek.

⁷Dung i disolukkon ma tu ibana baju parbagasan i jala dihooshon tu ibana hohos i, disolukkon muse tu ibana baju parbalian i jala disampesampehon tu atasna baju epod i, laos dihooshi do i dohot hohos ni baju epod i, asa tangkas ibana marhohos.

⁸Dung i dibahen ma tu atasna tutup andora i, jala dirusuk tu tutup andora i Urim dohot Tummim.

⁹Dung i diampehon ma tumpal i tu atas uluna, jala dilohothon tu tumpal i tu pardompahanna sangkalia sere i, i ma tumpal habadiaon, songon na tinonahon ni Jahowa tu si Musa.

¹⁰(II.) Dung i dibuat si Musa ma miak pamiahion i, laos dimiahi ma inganan na badia i ro di nasa isina, asa pabadiahonsa.

¹¹Dung i dipistikkon deba miak i tu langgatan i pitu hali, laos dimiahi ma langgatan i ro di sude ulaulana, tole tong parburian i rap dohot ojahanna laho pabadiahonsa.

¹²Dung i diusehon miak pamiahion i tu atas ulu ni si Aron mamiahi ibana pabadiahonsa.

¹³Didokkon si Musa muse ro jumonok angka anak ni si Aron jala disolukkon tu nasida angka baju parbagasan, jala dibahen marhohos gontingnasida i, jala ditalitalihon angka tumpal i tu nasida, songon na tinonahon ni Jahowa hian tu si Musa.

¹⁴Dung i didokkon ma boanon sada lombu naposo bahen pelean pardosaan; jadi diampehon si Aron dohot angka anakna i ma tangannasida tu atas ulu ni lombu pelean pardosaon i.

¹⁵Dung i diseat si Musa ma i jala dibuat mudarna i didaishon deba sian i marhitehite jarijarina tu angka tanduk ni langgatan i humaliang, asa manguras langgatan i; anggo mudar na teba i diusehon ma tu pantar ni langgatan i laho pabadiahonsa mambahen pardenggan di atasna.

¹⁶Dung i dibuat ma sandok pultahan panaputi ni raoan dohot hirehire na ampe tu ateate dohot pia na dua i ro di pultahan na lohohot tusi, laos ditutung si Musa ma i di atas langgatan i.

¹⁷Alai anggo lombu i ro di hulingkulingna, juhutna dohot napana suda do i ditutung dohot api di balian ni parsaroan i, songon na tinonahon ni Jahowa tu si Musa.

¹⁸Dung i didokkon ma boanon jumonok birubiru tunggal i bahen pelean situtungon,

gabe diampehon si Aron dohot angka anakna i tangannasida tu ulu ni birubiru tunggal i.

¹⁹Dung i diseat si Musa ma birubiru i jala dipispishon mudar i tu langgatan i humaliang.

²⁰Dung i disahei ma birubiru i, laos ditutung si Musa ma uluna dohot ponggolponggolna ro di pultahanna.

²¹Ias ma diburi anggo raoanna dohot patna di bagasan aek; dung i ditutung si Musa ma sandok birubiru i di atas langgatan i. I ma gabe pelean sipotongon bahen uap na hushus, sada pelean api tu Jahowa, songon na tinonahon ni Jahowa hian tu si Musa.

²²(III.) Didokkon muse ma boanon jumonok birubiru tunggal na sadanari, i ma birubiru sahatsahat ni tohonan; jadi diampehon si Aron dohot angka anakna i ma tangannasida tu ulu ni birubiru i.

²³Dung i diseat si Musa ma i jala dibuat deba sian mudarna i jala dibahen do i tu pinggol siamun ni si Aron dohot tu ina ni tanganna siamun dohot tu ina ni patna siamun.

²⁴Didokkon muse ma ro jumonok angka anak ni si Aron, gabe dibahen si Musa deba sian mudar i tu pinggolnasida siamun dohot tu ina ni tangannasida siamun dohot tu ina ni patnasida siamun; jala mudar na lobi i dipistikkon si Musa do tu langgatan i humaliang.

²⁵Dung i dibuat ma pultahanna dohot ihurna ro di sandok pultahan panaputi ni raoanna

dohot hirehire na ampe tu ateate dohot pia na dua i ro di pultahan na lohот tusi dohot hae jolo siamun.

²⁶Dibuat muse sian hirang isian ni sagusagu na so niasoman na di adopan ni Jahowa sada sagusagu na so niasoman dohot sangkimpal roti na marsaor miak dohot sada timbatimba, jala diampehon do i tu atas sandok pultahan i dohot tu atas hae jolo siamun.

²⁷Dipasahat ma luhutna i tu tangan ni si Aron dohot tu tangan ni angka anakna i, laos dipateatea do i bahen pelean teateaan di adopan ni Jahowa.

²⁸Dung i dibuat si Musa muse luhutna i sian tangannasida, jala ditutung ma i di atas langgatan bahen pelean situtungon; i ma pelean sahatsahat ni tohonan, bahen uap na hushus, pelean api ma i di Jahowa.

²⁹Dung i dibuat si Musa ma andora i jala dipateatea ma i bahen pelean teateaan di adopan ni Jahowa sian birubiru tunggal pelean sahatsahat ni tohonan, i ma gabe jambar ni si Musa, songon na tinonahon ni Jahowa hian tu si Musa.

³⁰Dung i dibuat si Musa ma deba sian miak pamiahion dohot sian mudar na di atas langgatan i, jala dipispishon ma i tu si Aron, tu angka pangkeanna, tu angka anakna dohot tu pangkean ni angka anakna i, asa pabadiahon si Aron dohot pangkeanna rap dohot angka anakna dohot pangkean ni angka anakna i.

³¹ Dung i ninna si Musa ma tu si Aron dohot tu angka anakna i: Lompa hamu ma juhut i di jolo pintu ni undungundung parluhutan i, laos disi ma pangan hamu juhut i rap dohot roti na di bagasan hirang isian ni pelean sahatsahat tohonan i, songon na tinonahonna i tu ahu uju na didok: Ingkon panganon ni si Aron dohot angka anakna i do i.

³² Alai anggo na tinggal i sian juhut dohot sian roti i, ingkon suda do i tutungonmuna di bagasan api.

³³ Angkup ni ndang jadi ruar hamu sian pintu ni undungundung parluhutan i pitu ari lelengna, sahat ro di ari hasisimpul ni angka ari sahatsahat ni tohonan tu hamu, ai ingkon pitu ari lelengna pasahathon tohonan i tu hamu.

³⁴ Suman tu naung binahen di arian, songon i do ditonahon Jahowa hian bahenon mambahen pardenggan tu hamu.

³⁵ Asa ingkon tading hamu di jolo pintu ni undungundung parluhutan i arian dohot borngin pitu ari padodot, jala ingkon radotanmuna do tohonan tu Jahowa, asa unang mate hamu, ai songon i do tinonahonna tu ahu.

³⁶ Jadi diulahon si Aron dohot angka anakna i ma sude hata i, angka naung tinonahon ni Jahowa hian marhite sian si Musa.

9¹ (I.) Tole paualuarihon, dijou si Musa ma si Aron dohot angka anakna i ro di angka sintua ni Israel.

²Dung i ninna ma tu si Aron: Buat ma di ho sada anak ni lembu bahen pelean pardosaan dohot sada birubiru tunggal bahen pelean situtungon, unang marlindung duansa, jala boan ma i tu adopan ni Jahowa.

³Dung i dohononmu ma tu halak Israel songon on: Buat hamu ma sada hambing tunggal bahen pelean pardosaan dohot sada anak ni lembu dohot sada anak ni birubiru marumur sataon be, jala unang marlindung duansa bahen pelean situtungon.

⁴Tole muse sada jonggi dohot sada birubiru tunggal bahen pelean hamauliateon, pelehononhon di adopan ni Jahowa, tole muse sada pelean sipanganon na marsaor miak; ai sadarion ma idaonmuna Jahowa.

⁵Dung i dipamboan nasida ma, na nidokkon ni si Musa tu jolo pintu ni undungundung parluhutan i, ro huhut jumonok sandok luhutan i, laos jongjong di adopan ni Jahowa.

⁶Dung i ro ma hata ni si Musa: On ma hata na tinonahon ni Jahowa sibahenonmuna, asa idaonmuna hamuliaon ni Jahowa.

⁷Dung i didok si Musa ma mandok si Aron: Ro ma ho jumonok tu langgatan, jala pelehon ma peleanmi pardosaan dohot peleanmi situtungon mambahen pardengganamu di ho sandiri dohot di bangso i. Dung i pasahat

ma pelean ni bangso i manguras dohot nasida, songon na tinonahon ni Jahowa.

⁸Dung i jumonok ma si Aron tu langgatan i, jala diseat anak ni lembu i bahen pelean pardosaan di ibana sandiri.

⁹Dung i diboan angka anak ni si Aron ma mudar i tu ibana, disornophon ibana ma jarijarina tu bagasan mudar i, jala didaishon tu angka tanduk ni langgatan i, ianggo mudar na tinggal i diusehon do tu pantar ni langgatan i.

¹⁰Alai anggo pultahanna dohot piana ro di hirehire na ampe tu ateate sian pelean pardosaan i, ditutung ma i di atas langgatan, songon na tinonahon ni Jahowa tu si Musa.

¹¹Alai anggo sibukna dohot hulingkulingna suda ditutung di balian ni parsaroan i.

¹²Dung i diseat ibana ma pelean situtungan i, anggo mudarna i diboan angka anak ni si Aron ma tu ibana, laos dipistikkon ma i tu langgatan i humaliang.

¹³Diboan nasida ma dohot pelean situtungan i marponggolpongol ro di uluna tu ibana, asa tutungonna di atas langgatan.

¹⁴Jadi dung diburi ibana raoanna dohot patna, laos ditutung ma i di ginjang ni pelean situtungan i di atas langgatan.

¹⁵(II.) Dung i diboan ma dohot pelean ni situan na torop i, dibuat ma dohot hambing tunggal i bahen pelean pardosaan manguras

bangso i, diseat ma i bahen pelean pardosaan suang songon parjolo i.

¹⁶Dung i dipelehon ma muse pelean situtungan i, hombar tu aturan pamelehonna hian.

¹⁷Dipelehon ma dohot pelean sipanganon i, dibuat ma sian i sanggolom, laos ditutung ma i di atas langgatan, pulik sian pelean situtungan sian manogotna i.

¹⁸Dung i diseat ma jonggi i dohot birubiru tunggal i bahen pelean hamauliateon manguras bangso i; diboan angka anak ni si Aron ma mudar i tu ibana, laos dipispishon ma i tu langgatan i humaliang.

¹⁹Alai anggo pultahan sian jonggi i dohot sian birubiru tunggal i, ro di ihurna dohot pultahan panapti ni raoanna ro di pia dohot hirehire na ampe tu ateate.

²⁰Luhut pultahan i diampehon nasida tu atas andora ni pelean i, laos ditutung ibana ma sandok pultahan i di atas langgatan.

²¹Alai anggo andora i dohot hae jolo siamun diteatea si Aron ma i bahen pelean teateaan di adopan ni Jahowa, songon na tinonahonna tu si Musa.

²²(III.) Dung i dipaherbang si Aron ma tanganna tu atas ni bangso i, asa mamasumasu nasida. Jadi dung tolhas dipelehon pelean pardosaan, pelean situtungan dohot pelean hamauliateon i, tuat ma ibana.

²³Dung i masuk ma si Musa dohot si Aron tu bagasan undungundung parluhutan i. Ruar muse sian i, dipasupasu nasida ma bangso i. Jadi sandok bangso i ma marnida hamuliaon ni Jahowa.

²⁴Ai ruar ma sada api sian adopan ni Jahowa, jala suda dipangan pelean situtungon dohot pultahan na di atas langgatan i. Jadi dung diida sandok bangso i pangalahona, marolopolop ma nasida, laos manungkap tu tano.

10¹(I.) Dung i ro ma angka anak ni si Aron, si Nadab dohot si Abihu, dibuat be ma saoran pardaupaanna, jala dibahen api tu bagasan, diampehon huhut daupa tu atasna, laos diboan ma api sileban tu adopan ni Jahowa, na so tinonahonna tu nasida.

²Jadi ruar ma api sian adopan ni Jahowa, jala suda nasida dipangan, gabe mate nasida di adopan ni Jahowa.

³Dung i ro ma hata ni si Musa tu si Aron: I ma hata naung nilumbahon ni Jahowa hian uju na nidokna: Ingkon gabe badia Ahu marhite sian halak, angka na jumonok tu Ahu, asa marmulia Ahu di adopan ni sandok bangso i; laos hohom boti do anggo si Aron.

⁴Dung i dijou si Musa ma si Misael dohot si Elsapan, angka anak ni si Usiel, amanguda ni si Aron, jala ninna ma mandok nasida: Ro ma hamu jumonok, usung hamu ma anggimuna i sian inganan na badia tu balian ni parsaroan.

⁵Jadi ro ma nasida jumonok, laos diusung ma bangkenasida i rap dohot pangkeannasida tu balian ni parsaroan i, songon na nidokkon ni si Musa.

⁶Dung i ninna si Musa ma tu si Aron, tu si Eleasar dohot tu si Itamar, angka anakna i: Unang hamu manggorbangi ulumuna, manang manansani pangkeanmuna, asa unang mate hamu, huhut parohon rimasna tu sandok luhutan i; alai anggo hahaanggimuna i, sandok halak Israel i tahe, jadi do tumatangis ala api naung pinagalak ni Jahowa.

⁷Ndang jadi ruar sian pintu ni undungundung parluhutan i anggo hamu, asa unang mate hamu, ai nunga sahat tu hamu miak pamiahion sian Jahowa. Jadi dibahen nasida ma hombar tu hata ni si Musa.

⁸(II.) Dung i ro ma hata ni Jahowa tu si Aron songon on:

⁹Ndang jadi inumonmu anggur manang siinumon na horas, ho rap dohot angka anakmu, uju bongot hamu tu undungundung parluhutan i, asa unang mate hamu. I ma uhum na hot salelenglelengna ro di pinomparmuna.

¹⁰Asa torang diboto hamu manirang na badia sian na ronsam, dohot na ramun sian na ganjing.

¹¹ Asa diboto hamu huhut mangajarhon tu halak Israel sude uhum, angka na niaturhon ni Jahowa tu nasida marhite sian si Musa.

¹² (III.) Dung i ro ma hata ni si Musa tu si Aron, tu si Eleasar dohot tu si Itamar, anakna angka na tinggal i: Buat hamu ma pelean sipanganon na tading i sian pelean api tu Jahowa, pangan hamu ma i so mardongan asom di lambung langgatan i, ai na badia sahali do i.

¹³ Alai ingkon di bagasan inganan na badia i do i panganonmuna, ai i do parjambaranmu dohot parjambaran ni angka anakmu sian angka pelean api tu Jahowa, ai songon i do hatana tu ahu.

¹⁴ Tole muse andora ni pelean siteateaan dohot hae jolo ni pelean sitatingan, jadi do panganonmuna di inganan na badia, ho rap dohot angka anakmu dohot borum. Ai parjambaranmu dohot parjambaran ni angka anakmu do i, nilehon sian angka pelean hamauliateon pinelehon ni halak Israel.

¹⁵ Ia hae jolo ni pelean sitatingan dohot andora ni pelean siteateaan, ingkon boanon do i rap dohot pelean api dohot pultahan, asa diteatea bahen pelean siteateaan di adopan ni Jahowa. I ma gabe uhum na hot salelenglelengna di ho dohot di angka anakmu, songon na tinonahon ni Jahowa.

¹⁶ Dung i digogo si Musa ma mangalului hambing tunggal ni pelean pardosaon i, hape

ida ma, nunga suda ditutung. Jadi tarrimas
ma si Musa mida si Eleasar dohot si Itamar,
angka anak ni si Aron na tinggal i, ninna ma:

¹⁷Boasa so dipangan hamu pelean
pardosaon i di inganan na badia i ai na badia
sahali do i, naung binasabasahonna tu hamu,
asa diuras hamu luhutan i sian hajahatonna
mambahen pardenggan tu nasida di
adopan ni Jahowa.

¹⁸Ida ma, ndang sahat mudarna i diboan
tu bagasan inganan na badia i; ingkon
di bagasan inganan na badia i do i nian
panganonmuna, songon na hudokkon i.

¹⁹Dung i ro ma hata ni si Aron tu si Musa:
Ida ma, nunga dipelehon nasida sadarion
peleannasida pardosaan, dohot peleannasida
situtungon di adopan ni Jahowa, jala nunga
songgop songon i tu ahu, lam panganonku
muse ma sadarion sian pelean pardosaon i?
Tung denggan ma i tagamon di adopan ni
Jahowa?

²⁰Jadi dung dibege si Musa hata i, sonang
ma rohana.

11 ¹(I.) Dung i ro muse hata ni Jahowa tu
si Musa dohot tu si Aron, didok ma tu
nasida:

²Dok hamu ma tu halak Israel songon on:
On do pinahan angka na jadi panganonmuna
sian saluhut pinahan angka na di atas tano
on.

³Nasa pinahan na martambirik jala bola dua tambirikna i huhut marngalu, i ma na jadi panganonmuna.

⁴Alai ndang jadi panganonmuna sian angka na marngalu sambing dohot sian angka na marbola tambirikna sambing, songon: Unto, ai marngalu do i nian, alai ndang marbola anggo tambirikna, dibahen i ingkon ramun do i di hamu.

⁵Tole muse landuk, ai marngalu do i nian, alai ndang marbola anggo tambirikna, dibahen i ingkon ramun do i di hamu.

⁶Tole muse ampodi, ai marngalu do i nian, alai ndang marbola anggo tambirikna, dibahen i ingkon ramun do i di hamu.

⁷Tole muse babi, ai marbola do nian anggo tambirikna, alai ndang marngalu, dibahen i ingkon ramun do i di hamu.

⁸Nandang jadi hamu manganhon sian sibukna, bangkena pe ndang jadi jamaonmuna, ai ramun do i di hamu.

⁹Angka on do na jadi panganonmuna sian saluhut angka na di bagasan aek: Nasa na marhapihapi jala na marsisik di bagasan aek, di bagasan laut dohot di bagasan angka sunge, i ma na jadi panganonmuna.

¹⁰Alai nasa na so marhapihapi jala na so marsisik di bagasan laut manang di bagasan sunge, sian saluhut na manginsir di bagasan aek dohot sian saluhut namangolu di bagasan aek i ingkon hagigian do i di hamu.

¹¹ Ingkon hagigian do i tutu di hamu; ndang jadi hamu manganhon sian sibukna, ingkon marbiasbias hamu mida bangkena i.

¹² Saluhut tahe na so marhapihapi jala na so marsisik di bagasan aek, ingkon hagigian do i di hamu.

¹³ Ingkon marbiasbias rohamuna mida angka pidong on, ndang jadi panganonmuna, ai hagigian do i, songon: Pidong raja wali, lali bangar, honong bosi.

¹⁴ Tole lali lopak dohot lali lapuk ro di mansammansamna.

¹⁵ Tole muse pidong sigak ro di mansammansamna.

¹⁶ Tole muse pidong unto, langkupa, sihungkung, lali piuan ro di mansammansamna.

¹⁷ Tole muse sipauk, soro aek dohot ampapaluan.

¹⁸ Tole muse situbiak, onggang dohot silogologo.

¹⁹ Tole muse siboru tasik, sibarung ro di mansammansamna, nang lompong dohot ariprip.

²⁰ Nasa na manjirir sian angka na marhabong na mardalan maropat pat, ingkon hagigian do i di hamu.

²¹ Alai na jadi do panganonmuna angka on sian saluhut na manjirir na marhabong, na mardalan maropat pat, i ma angka na marhaehae di atas ni patna, angka na

pinangkena manimbungnimbung di atas tano i.

²²Angka on do na jadi panganonmunasian i: Nasa mansam sihapor, i ma hapor gundong, hapor suhat dohot hapor hole ro di mansammansamna be.

²³Alai nasa na manjirir na asing sian angka na marhabong, na maropat pat, ingkon hagigian do i di hamu.

²⁴Ingkon gabe ramun do hamu bahenon ni; manang ise na manjama bangkena i, ingkon ramun do ibana sahat ro di bodari.

²⁵Jala manang ise na mangusung sian bangkena i, ingkon sunsionna pangkeanna, jala ingkon ramun ibana sahat ro di bodari.

²⁶Dibahen i nasa pinahan na marbola tambirikna, alai ndang bola dua tambirikna i jala ndang marngalu, ingkon ramun do i di hamu; manang ise na manjama angka i, ingkon ramun ibana.

²⁷Jala saluhut na mangojakkon tanganna mardalan sian nasa binatang na maropat pat i mardalan, ingkon ramun do di hamu; manang ise na manjama bangkena i, ingkon ramun do i sahat ro di bodari.

²⁸Jala manang ise na mangusung bangkena i, ingkon sunsionna do pangkeanna, jala ingkon ramun ibana sahat ro di bodari: Luhutna i ingkon ramun do i di hamu.

²⁹(II.) Nang angka on, sian na manjirir di atas tano on, ingkon ramun do i di hamu

songon: Padidit, bagudung dohot boraspati ro di mansammansamna.

³⁰Tole mindoran, robar, ilik, pelang dohot sirajaodong.

³¹Angka i ma na ramun di hamu sian saluhut na manjirir; manang ise na manjama angka i dung mate, ingkon ramun ibana sahat ro di bodari.

³²Jala saluhut na tininggang ni bangkena i, ingkon ramun do i, nang saluhut ulaula sian hau, manang pangkean, manang hulingkuling manang tangki pe; saluhut ulaula tahe angka na pinangke tu ulaonna, ingkon rondamon do i tu aek, jala ingkon ramun do i sahat ro di bodari; dung i ias do i muse.

³³Nasa ulaula sian tano liat, tung sura madabu tu bagasanna sian angka bangke i, saluhut isina i ingkon ramun do i, jala ingkon taponon do ulaula i.

³⁴Nasa panganon, angka na pinangan, tung sura saor aek sisongon i tusi, ingkon ramun do i; jala saluhut siinum na niinum sian nasa ulaula sisongon i, ingkon ramun do i.

³⁵Angkup ni nasa tininggang ni bangke sisongon i, ingkon ramun do i, nang tataring, nang hudon, ingkon bolahononhon do, ai na ramun do i, ingkon ramun do i nang di hamu.

³⁶Alai anggo pansur manang sumur manang tobat, ingkon pansing do i; alai tahe manang ise na manjama bangke na disi, ingkon ramun do i di ibana.

³⁷ Tung sura madabu bangke sisongon i tu boni marragamragam, na naeng saburhononhon, tong do ias anggo i.

³⁸ Alai tung sura dibahen aek tu boni i, hape madabu muse bangke sisongon i tusi, ingkon ramun do i di hamu.

³⁹ Tung sura mate garam sian pinahan na jadi panganonmuna hian nian, manang ise na manjama bangkena, ingkon ramun do ibana sahat ro di bodari.

⁴⁰ Angkup ni manang ise na manganhon sian bangkena i, ingkon sunsionna do pangkeanna, jala ingkon ramun do ibana sahat ro di bodari; suang songon i do manang ise na mamboan bangkena i, ingkon sunsionna pangkeanna, jala ingkon ramun ibana sahat ro di bodari.

⁴¹ Jala saluhut gulokgulok na manginsir di atas tano i, ingkon hagigian do i, ndang jadi panganon!

⁴² Saluhut tahe na manginsir marhite sian butuhana, tole saluhut na manjurur na maropat pat ro di saluhut sitorop pat, nang saluhut gulokgulok na manginsir di atas tano i. Ndang jadi panganonmuna, ai hagigian do i.

⁴³ Unang gabe hagigian dirimuna marhite sian saluhut gulokgulok na manginsir, jala unang gabe ramun dirimuna bahenon ni, asa unang gabe marlindang hamu bahenon ni.

⁴⁴ Ai Ahu do Jahowa, Debatamuna i; dibahen i ingkon parbadiaanmuna dirimuna, asa gabe angka na badia hamu, ai na badia do

Ahu. Dibahen i ndang jadi ramunanmuna dirimuna i marhite sian saluhut gulokgulok na manginsir di atas tano i.

⁴⁵Ai Ahu do Jahowa, naung manogihon hamu ruar sian tano Misir, asa Ahu gabe Debatamuna; dibahen i ingkon gabe angka na badia do hamu, ai na badia do Ahu.

⁴⁶I ma patik taringot tu pinahan, taringot tu angka pidong dohot taringot tu saluhut na mangolu, na manginsir di bagasan aek ro di sude na mangolu, na manjirir di atas tano i.

⁴⁷Asa tung diboto hamu parsirang ni na ramun sian na pansing, dohot parsirang ni pinahan na jadi panganon sian pinahan na so jadi panganon.

12¹(I.) Dung i ro ma hata ni Jahowa tu si Musa songon on:

²Hatahon ma tu halak Israel songon on: Molo gabegabebean sada parompuan jala ditubuhon sada anak, ingkon ramun ibana pitu ari lelengna, suang songon di ari haramunon ni hasomalanna hian, ingkon ramun ibana.

³Tole paualuarihon ingkon sunaton do sibuk ni hulup ni dakdanak i.

⁴Alai anggo parompuan i ingkon tinggal dope di jabu tolupulu tolu ari lelengna pasalpu mudar pangiasanna; ndang jadi jamaonna manang aha na badia, jala ndang jadi masuk ibana tu bagasan inganan na badia i, paima salpu angka ari haramunonna.

⁵Alai tung sura boruboru tinubuhonna i, ingkon dua minggu lelengna ibana ramun, suang songon di hasomalanna hian; jala ingkon tinggal dope ibana di jabu onompulu onom ari lelengna, pasalpu mudar pangiasanna i.

⁶Ia dung salpu angka ari pangiasanna ala anak manang boru, ingkon boanonna ma sada anak ni birubiru na marumur sataon bahen pelean situtungan dohot sada anak ni darapati manang sada anduhur tabu bahen pelean pardosaan, boanonna tu pintu ni undungundung parluhutan tu malim i.

⁷Malim i muse mamelehon pelean i di adopan ni Jahowa mambahen pardenggananna, asa ias nasida sian mudar hasomalanna i. I ma patik taringot tu parompuan na manubuhon anak manang boru.

⁸Alai tung sura so dapot tanganna sada anak ni birubiru, ingkon buatonna ma dua anduhur tabu manang dua anak ni darapati, na sada bahen pelean situtungan jala na sadanari bahen pelean pardosaan, asa ingkon malim i mambahen pardenggananna, asa laos ias nasida.

13¹(I.) Dung i ro ma hata ni Jahowa tu si Musa dohot tu si Aron songon on:

²Tung sura tubu di hulingkuling ni daging ni sada jolma bosar manang butir manang riapriap na olo gabe puru di hulingkuling ni dagingna, ingkon boanon jolma i tu malim

Aron, manang tu sada sian angka anakna, naung gabe malim.

³Ia dung ditangkasi malim i sahiti na di hulingkuling ni dagingna i, pola nunga mamontar imbulu di iposiposna i, jala honul rupa ni iposipos i idaon martimbangkon hulingkuling ni dagingna hian, i ma tandana paboa puru do i; ia dung ditangkasi malim i songon i, ramun ma jolma i dohononna.

⁴Alai tung sura pe mamontar riapriap di hulingkuling ni dagingna i, hape ndang pola honul idaon martimbangkon hulingkuling i, jala imbuluna pe ndang pola mamontar, ingkon hurungkonon ni malim do jolma na mariposipos i pitu ari lelengna.

⁵Tole papituarihon ingkon ulahan ni malim i manangkasi muse; molo tongtong iposipos i diida matana, ndang pola rarat iposipos i di hulingkuling i, ingkon ulahan ni malim i mangkurungkon ibana pitu ari lelengna.

⁶Molo dung diulahi malim i paduahalihon manangkasi papituarihon, hape ida ma, nunga lam surut iposipos i, ndada ganda raratna di hulingkuling i, ingkon ias ma ibana dohonon ni malim i, ai baro sambing do i; asal sunsion ni jolma i pangkeanna, laos ias ma ibana.

⁷Alai tung sura lam bagas manggagat tu hulingkuling baro i, dung ditangkasi malim i ibana mandokkon ias nian; ingkon ulahan ni malim i paduahalihon manangkasi.

⁸Ia dung ditangkasi malim i, hape ida ma, nunga lam manggagat tu hulingkuling baro i, ingkon ramun ma ibana dohonon ni malim i, ai puru do i tutu.

⁹Tung sura adong tanda ni puru i tarida di sada jolma, ingkon boanon ibana tu malim.

¹⁰Molo dung ditangkasi malim i, hape ida ma, adong do tutu bosar na mamontar di hulingkuling i, pola mamontar dohot imbulu i dibahen, jala tubu sibuk na so hasea di bagasan bosar i.

¹¹I ma tandana paboa puru naung lelung di hulingkuling ni dagingna; dibahen i ingkon ramun ibana dohonon ni malim i, ndang jadi hurungkononna ibana, ai nunga andar ramun ibana.

¹²Alai tung sura pamosari ni puru i dope di hulingkuling i, jala ditutup puru i sandok hulingkuling ni jolma na hona i sian pakpak uluna sahat ro di palak ni patna, nasa na dapot tangkasan ni malim i.

¹³Ia dung ditangkasi malim i, hape ida ma, nunga pola ditutup puru i sandok dagingna, ingkon ias jolma na hona i dohonon ni malim i, ala mamontar sandok dagingna i, ai na ias do ibana.

¹⁴Alai tung sura tarida sibuk na so hasea di dagingna di ari panangkasionna i, ingkon ramun do ibana.

¹⁵Ia dung diida malim i sibuk na so hasea i, ingkon ramun ibana dohononna: Ai sibuk na so hasea i do ramun, i ma puru i.

¹⁶Alai tung sura matapu muse sibuk na so hasea i gabe muba pola mamontar, ingkon rojolma i tu jolo ni malim.

¹⁷Ia dung ditangkasi malim i ibana, hape ida ma, nunga pola mamontar iposipos i, ingkon ias ma jolma na hona i dohonon ni malim i; ai ias do ibana tutu.

¹⁸Tung sura tubu baro di hulingkuling ni daging ni sada halak, hape malum do muse.

¹⁹Hape tubu muse di iposiposna i bosar na mamontar, manang riapriap tarbontar rara, ingkon tangkasan ni malim ma ibana.

²⁰Ia dung ditangkasi malim i ibana, hape ida ma, honul do rupana martimbangkon hulingkuling na asing, pola mamontar dohot imbuluna dibahen, ingkon ramun do ibana dohonon ni malim i; ai tanda ni puru do i naung tubu di bagasan baro i.

²¹Alai ia dung ditangkasi malim i ibana, hape ida ma, ndang pola mamontar imbulu i di bagasan, jala ndang pola honul martimbangkon hulingkuling na asing, lam surut do tahe, ingkon hurungkonon ni malim ibana pitu ari lelengna.

²²Hape tung sura lam manggagat tu hulingkuling i, ingkon ramun do ibana dohonon ni malim i; ai tanda ni puru do i.

²³Alai tung sura tongtong riapriap i ndang lam rarat, iposipos ni baro i do i, ingkon ias dojolma i dohonon ni malim i.

²⁴Manang tung sura hona tutung hulingkuling ni daging ni sada jolma, ia dung malum tubu muse di iposiposna i riapriap tarbontar rara, manang bontar sambing pe.

²⁵Ia dung ditangkasi malim i, hape ida ma, nunga pola mamontar imbulu i dibahen jala honul rupana, puru ma i na tubu sian iposipos ni na matutung i; dibahen i ingkon ramun ibana dohonon ni malim i, ai tanda ni puru do i.

²⁶Alai ia dung ditangkasi malim i ibana, hape ida ma, ndang mamontar imbulu di iposiposna i jala ndang honul martimbangkon hulingkuling na asing, jala nunga lam surut, ingkon hurungkonon ni malim i ma ibana pitu ari lelengna.

²⁷Tole papituarohon ingkon tangkasan ni malim i ma ibana; tung sura lam manggagat tu hulingkuling i, ingkon ramun ma ibana dohonon ni malim i, ai bogas ni puru do i.

²⁸Alai tung sura tongtong riapriap i, ndang lam manggagat tu hulingkuling i, lam surut do tahe, i ma tandana paboa bosar ni na hona tutung sambing do i, ingkon ias do ibana dohonon ni malim i; ai iposipos ni na hona tungtung i do i.

²⁹Tung sura lotupon baoa manang parompuan di uluna manang di janggutna.

³⁰Jadi ro malim manangkasi, hape ida ma, honul do rupana martimbangkon hulingkuling, na asing, jala targorsing ia obukna, jala rangkak, ingkon ramun ma ibana dohonon ni malim i, ai puru do lotup i di ulu manang di janggut.

³¹Alai ia dung ditangkasi malim lotup i, hape ida ma, ndang pola honul rupana martimbangkon hulingkuling na asing, jala ndang adong obukna na birong disi, ingkon hurungkonon ni malim i do jolma na lotupon i pitu ari lelengna.

³²Tole papituarihon ingkon tangkasan ni malim i ma lotup i, hape ida ma, ndang pola rarat lotup i jala ndang adong na gorsing disi, jala ndang honul rupa ni lotup i martimbangkon hulingkuling na asing.

³³Ingkon gorbangonna ma uluna, alai ndang jadi hona gorbang anggo lotup i, jala ingkon hurungkonon ni malim i jolma na lotupon i paduahalihon pitu ari lelengna.

³⁴Tole papituarihon ingkon tangkasan ni malim ma lotup i, hape ida ma, ndang rarat lotup i tu hulingkuling jala ndang honul rupana martimbangkon hulingkuling na asing, ingkon ias ma jolma i dohonon ni malim, asal sunsion ni jolma i pangkeanna, laos ias ma ibana.

³⁵Alai tung sura lam manggagat lotup i di hulingkuling, dung ias ibana didok malim i.

³⁶ Ditangkasi malim i ibana muse, hape ida ma, nunga lam rarat lotup i di hulingkuling, ndang jadi be pola usoan ni malim, manang na gorsing obukna; ai na ramun do ibana.

³⁷ Alai tung sura tongtong lotup i diida matana, jala martumbur obuk na birong disi, naung malum ma lotup i, nunga iasjolma i, ias ma ibana huhut dohonon ni malim.

³⁸ Tung sura marriapriap hulingkuling ni daging ni sada baoa manang parompuan marbolang idaon.

³⁹ Dung i ditangkasi malim, gabe ida ma, jumpangsa riapriap tarlangan di hulingkuling ni dagingnasida i, riapriap sambing do i na tubu di hulingkulingna, jala ias dojolma i.

⁴⁰ Tung sura marurus obuk ni ulu ni sada baoa pola palpal, na ias do ibana.

⁴¹ Tung sura marurus obukna tungkan bohina, pola salaksahon ibana, na ias do ibana.

⁴² Alai tung sura tubu di palpalna dingkan pudi, manang dingkan jolo, lotup tarbontar rara, puru ma i na tubu di palpalna dingkan pudi manang dingkan jolo.

⁴³ Dibahen i ingkon tangkasan ni malim ibana, hape ida ma, ia jumpangsa bosar na tarbontar rara di palpalna dingkan pudi manang dingkan jolo, idaon songon rupa ni puru di hulingkuling ni daging.

⁴⁴ Jolma na puruon ma ibana tutu jala na ramun ibana; ingkon ramun ibana huhut

dohonon ni malim i, ala bosar na di atas uluna i.

⁴⁵Antong manang ise jolma i na puruon naung andap, ingkon sansanan do pangkeanna jala manangkas uluna jala tutuponna sisungutna, jala ingkon jouhononna: Na ramun, na ramun!

⁴⁶Antong manang ise jolma na ramun ibana ala ramun tutu; ingkon punjung ibana maringan, ingkon di balian ni parsaraon ingananna i.

⁴⁷(II.) Tung sura adong ringkorang ni puru lohот di sada ulos manang sian imbulu ni birubiru manang sian hapas.

⁴⁸Manang lohот di torna manang di ipahan, sian hapas manang sian imbulu ni birubiru, manang lohот di hulingkuling manang di aha pe hapandean sian hulingkuling.

⁴⁹Tung sura tarrata manang rara ringkorang na lohот i di ulos manang di hulingkuling, di torna manang di ipahan, manang di sandok ulaula na sian hulingkuling, ringkorang ni puru do i tutu; dibahen i ingkon tangkasan ni malim do i.

⁵⁰Ia dung diida malim ringkorang i, ingkon simpanonna do ulos na hona i pitu ari lelengna.

⁵¹Ia dung ditangkasi papituarihon, hape lam rarat do ringkorang i di ulos, di torna manang di ipahan, di hulingkuling manang di sandok hapandean na pinauli sian hulingkuling,

ringkorang ni puru na manggagat ma i tutu, ramun do i.

⁵²Ingkon suda tutungonna ulosi manang torna manang ipahan sian imbulu ni birubiru manang sian hapas, manang ulaula dia pe sian hulingkuling, halohotan ni ringkorang i, ai puru na manggagat do i, ingkon suda do i tutungon di bagasan api.

⁵³Alai tung sura diida malim ndang rarat hape ringkorang i di ulos, di torna manang di ipahan, manang di ulaula dia pe na sian hulingkuling.

⁵⁴Ingkon dohonon ni malimjolma i manunsi barang halohotan ni ringkorang i, dung i simpanonna ma i paduahalihon pitu ari lelengna.

⁵⁵Molo diida malim ringkorang i, dung hona sunsi, hape ida ma, ndang mubaru ni ringkorang i idaon, jala nang so ganda raratna, ramun do i; ingkon suda do i tutungonmu di bagasan api, ai naung panggagatanna do i di ruar manang di bagasan.

⁵⁶Alai tung sura ditangkasi malim i muse, hape ida ma, nunga manoksang halohotan ni ringkorang i, dung hona sunsi, ingkon sansananna do i sian ulos manang sian hulingkuling, sian torna manang sian ipahan pe.

⁵⁷Alai tung sura tong dope tarida di ulos, di torna manang di ipahan manang di ulaula dia

pe sian hulingkuling, puru na manggagat ma i, ingkon suda tutunganmu barang halohotan ni ringkorang i di bagasan api.

⁵⁸Alai anggo ulos, torna manang ipahan manang dia tahe ulaula sian hulingkuling, anggo dung longkang ringkorang i dung hona sunsi, ingkon sunsion paduahalihon, asa laos ias.

⁵⁹I ma patik taringot tu ringkorang ni puru na lohote di ulos, sian imput ni birubiru manang sian hapas, na lohote di torna manang di ipahan manang di ulaula dia pe sian hulingkuling, mandokkon na ias do i manang na ramun.

14¹ (I.) Dung i ro ma hata ni Jahowa tu si Musa songon on:

²Ingkon on do patik tu halak na puruon di ari pangurasanna; ingkon boanon ibana tu adopan ni malim.

³Dung i ingkon ruar malim i tu balian ni parsaroan; ia dung ditangkasi malim i, hape ida ma, nunga malum diida ringkorang ni puru ni halak na puruon i.

⁴Ingkon dohonon ni malim i ma halak na puruon i mambuat dua pidong na mangolu na ganjing bahen pangurasanna, tole dohot hau ares dohot bonang na rara dohot sanggul Hissop.

⁵Dung i dohonon ni malim i ma halak maneat pidong na sada di atas ni sada hudon sian tano na marisi, aek mual.

⁶Dung i ingkon buatonna ma pidong na mangolu i ro di hau ares, bonang na rara i dohot sanggul Hissop, rap sornophononna ma i dohot pidong na mangolu i tu bagasan mudar ni pidong na tarseat i di atas aek mual.

⁷Dung i ingkon pistihanna ma pitu hali jolma na mangido urason sian puruna i; laos diurasi ma ibana jala dipalua pidong na mangolu i habang tu ladang.

⁸Alai ingkon sunsion ni jolma na niurasan i angka pangkeanna jala ingkon gorbanganna sandok obukna jala tangkas ibana maridi di bagasan aek, asa ias ibana; dung i jadi ma ibana masuk tu parsaroan i; alai ingkon tinggal ibana di balian ni undungundung i pitu ari lelengna.

⁹Tole papituarihon ingkon gorbangonna ma sandok obuk ni uluna, ro di janggutna dohot salibonna, asa targorbang sandok obukna; ingkon sunsionna huhut pangkeanna, jala didionna dagingna di bagasan aek, asa ias ibana.

¹⁰Tole paualuarihon ingkon buatonna dua anak ni birubiru na so marlindang, dohot sada birubiru sisataon na so marlindang, angkup ni tolu parsampulu itak na lamot bahen pelean sipanganon, jala dogilonna tusi miak arga satakkar godangna.

¹¹Dung i ingkon pajongjongon ni malim na mangurasi ma jolma na niurasan i rap dohot

angka pelean i di adopan ni Jahowa, di jolo pintu ni undungundung parluhutan i.

¹²Dung i buaton ni malim i ma anak ni birubiru na sada jala pelehonna bahen pelean parsalaan rap dohot na satakkar miak i, jala tatingtatingonna do i bahen pelean tatingan di adopan ni Jahowa.

¹³Dung i seatonna ma anak ni birubiru di inganan paneatan ni pelean pardosaan dohot pelean situtungan, i ma di inganan na badia i; ai suang songon pelean pardosaan do, pelean parsalaan i, malim i do nampunasa: Na badia sahali do i.

¹⁴Dung i buaton ni malim i ma deba sian mudar ni pelean parsalaan i, laos bahenon ni malim i ma i tu suping ni pinggol siamun ni jolma na niurasanna i dohot tu ina ni tanganna siamun dohot tu ina ni patna siamun.

¹⁵Dung i buaton ni malim i ma deba sian miak na satakkar i, jala usehononna do i tu tangan hambirang ni malim i sandiri.

¹⁶Dung i sornophonon ni malim i ma jarijari ni tanganna siamun tu bagasan miak na di tanganna hambirang i, jala pistikkonna dohot jarijarina sian miak i pitu hali di adopan ni Jahowa.

¹⁷Jala miak na tading i di bagasan tanganna, ingkon bahenon ni malim i do i tu suping ni pinggol siamun ni jolma na niurasanna i dohot tu ina ni tanganna siamun dohot tu ina

ni patna siamun di atas isian ni mudar pelean parsalaan i.

¹⁸Alai anggo miak na tinggal i dope di bagasan tangan ni malim i, ingkon bahenonna do i tu ulu ni jolma na niurasanna i, asa malim i mambahen pardenggananna di adopan ni Jahowa.

¹⁹Ingkon padirion ni malim i ma muse pelean pardosaan, asa mambahen pardenggan di jolma na niurasanna i sian haramunonna, dung i seatonna ma pelean situtungan i.

²⁰Ingkon pelehonon ni malim i ma pelean situtungan dohot pelean sipanganon di atas langgatan i, asa malim i mambahen pardenggananna, gabe ias ibana.

²¹Alai tung sura jolma na pogos ibana, gabe ndang tuk bahenonna, ingkon buatonna ma sada anak ni birubiru bahen pelean parsalaan huhut bahen pelean tatingan, mambahen pardenggananna; buatonna huhut saparsampulu itak na lamot jala dogilonna tusi miak bahen pelean sipanganon rap dohot satakkar miak.

²²Angkup ni dua anduhur tabu manang dua anak ni darapati, hombar tu na tarbuatsa, na sada sian i bahen pelean pardosaan jala na sadanari bahen pelean situtungan.

²³Ingkon boanonna do i paualuarihon bahen pangurasanna tu malim, tu jolo pintu ni undungundung parluhutan i, tu adopan ni Jahowa.

²⁴Dung i buaton ni malim i ma anak ni birubiru i bahen pelean parsalaan rap dohot miak na satakkar i, ingkon tatingtatingon ni malim i do i bahen pelean tatingan di adopan ni Jahowa.

²⁵Dung i seatonna ma anak ni birubiru i bahen pelean parsalaan, jala buaton ni malim i deba sian mudar ni pelean parsalaan jala bahenonna do i tu suping ni pinggol siamun ni jolma na niurasanna i dohot tu ina ni tanganna siamun dohot tu ina ni patna siamun.

²⁶Jala sian miak i ingkon usehonon ni malim i deba tu bagasan tangan hambirang ni malim sandiri.

²⁷Dung i pistikkonon ni malim i ma dohot jarijari ni tanganna siamun sian miak na di tanganna hambirang, pitu hali di adopan ni Jahowa.

²⁸Dung i bahenon ni malim i ma sian miak na di bagasan tanganna i tu suping ni pinggol siamun ni jolma na niurasanna i dohot tu ina ni tanganna siamun dohot tu ina ni patna siamun di atas isian ni mudar pelean parsalaan i.

²⁹Alai anggo miak na tinggal i dope di bagasan tangan ni malim i, ingkon bahenonna do i tu ulu ni jolma na niurasanna i, bahen pardenggananna di adopan ni Jahowa.

³⁰Dung i pelehononna ma na sada sian anduhur tabu i, manang sada sian anak ni darapati i, marguru tu na dapot tanganna.

³¹Sian na dapot tanganna tutu, na sada bahen pelean pardosaan jala na sadanari bahen pelean situtungon rap dohot pelean sipanganon, asa ingkon malim i mambahen pardengganen ni jolma na niurasanna i di adopan ni Jahowa.

³²I ma patik taringot tu jolma naung puruon, na so tuk buatonna na patut bahen pangurasanna.

³³(II.) Dung i ro ma hata ni Jahowa tu si Musa dohot tu si Aron songon on:

³⁴Molo dung sahat hamu tu tano Kanaan, silehononku tu hamu bahen partalianmu, jala tung sura Ahu parohon sahit puru tu bagasan sada jabu di tano partalianmuna i.

³⁵Ingkon ro jolma nampuna jabu i pabotohonsa tu malim i, dohononna ma: Rupa adong do, disura rohangku tarida ringkorang ni puru di jabungku.

³⁶Dung i ingkon dohonon ni malim i ma jolma i mangarumari bagas i, jumolo asa ro malim i naeng manangkasi ringkorang i, asa unang ramun luhut barang na di bagasan jabu i; dung songon i, asa masuk malim i manangkasi jabu i.

³⁷Ia dung ditangkasi ringkorang i, hape ida ma, adong do tutu ringkorang i lohok di

dorpi ni jabu i, tarrata manang rara turikna, lumondut idaon sian dorpi hian.

³⁸Dung i ruar ma malim i sian jabu i tungkan pintu ni jabu i, laos hinsuonna ma jabu i pitu ari lelengna.

³⁹Tole papituarihon ingkon ulahan ni malim i ro manangkasi, hape ida ma, nunga lam rarat ringkorang i di dorpi ni jabu i.

⁴⁰Dung i dohonon ni malim i ma halak mandungkir angka batu halohotan ni ringkorang i, bolongkononna do i tu balian huta tu inganan na ramun.

⁴¹Dung i dohononna ma mangkishis jabu i di bagasan humaliang, jala orbuk pangkishisan i, ingkon bolongkononna tu balian huta i, tu inganan na ramun.

⁴²Dung i buatonna ma angka batu na asing, jala solukkononna bahen singkat ni batu nidungkirna i, jala buatonna ma hapur na asing bahen sampang ni jabu i.

⁴³Alai tung sura manguahi ro ringkorang i jala tubu di jabu i, dung didungkirjolma angka batu i, jala dung dihisish jabu i jala dung nisampang muse dohot hapur.

⁴⁴Ingkon ro muse malim i manangkasi, hape ida ma, nunga lam rarat ringkorang di jabu i, i ma tandana paboa puru na manggagat do i di bagasan jabu, jadi ramun ma i.

⁴⁵Dibahen i ingkon lohaon ma bagas i, angka batuna dohot parhauna ro di sandok hapur

sampang ni jabu i, jala ingkon paruaron do i tu balian huta tu inganan na ramun.

⁴⁶Jala manang ise na masuk tu bagasan jabu i saleleng tarhinsu jabu i, ingkon ramun ibana sahat ro di bodari.

⁴⁷Jala manang ise na modom di bagasan jabu i, ingkon sunsionna angka ulosna; jala manang ise na mangan di bagasan jabu i, ingkon sunsionna angka ulosna.

⁴⁸Alai molo dung masuk malim i manangkasi, hape ida ma, ndang lam manggagat ringkorang i di jabu i dung disampang jabu i dohot hapur, jadi ingkon dohonon ni malim i ma na ias jabu i, ai nunga pate ringkorang i.

⁴⁹Dung i buaton ni malim ma laho manguras bagas i dua pidong dohot hau ares dohot bonang na rara dohot sanggul Hissop.

⁵⁰Dung i seatonna ma pidong na sada di atas hudon tano na marisi aek mual.

⁵¹Dung i buatonna ma hau ares dohot sanggul Hissop dohot bonang na rara dohot pidong na mangolu i, rap sornophononna ma i tu bagasan mudar ni pidong naung sineatna i dohot tu bagasan aek mual i; dung i pistikkononna ma tu jabu i pitu hali.

⁵²Songon i ma pangurasina di jabu i marhite sian mudar ni pidong dohot aek mual rap dohot pidong na mangolu i ro di hau ares, sanggul Hissop dohot bonang na rara.

⁵³ Dung i paluaonna ma pidong na mangolu i tu balian huta, asa habang tu ladang, asa mambahen pardenggan tu jabu i, asa laos ias.

⁵⁴ I ma patik taringot tu ringkorang ni puru marragamragam dohot taringot tu lotup.

⁵⁵ Dohot taringot tu ringkorang ni puru di angka ulos dohot di bagas.

⁵⁶ Dohot taringot tu bosar, baro dohot riapriap.

⁵⁷ Asa mangajarhon manang di ari dia na ramun manang aha, jala di ari dia na ias. I ma patik taringot tu sahiti puru i.

15¹ (I.) Dung i ro ma hata ni Jahowa tu si Musa dohot tu si Aron songon on:

² Hatahon hamu ma tu halak Israel songon on: Molo somal marnipinipi daging ni sada baoa, gabe ramun ibana binahen ni parnipinipionna.

³ Jala ondo haramunonna binahen ni parnipinipionna: Molo sai mabaor bonina sian dagingna binahen ni parnipinipionna, manang poltong pe dagingna binahen ni parnipinipionna, tong do gabe haramunonna.

⁴ Nasa lage na pinodoman ni halak na somal marnipinipi ramun do i, ro di nasa ugasan na hinundulanna i ingkon ramun do i.

⁵ Jala manang ise na manjama lagena, ingkon sunsionna do angka ulosna jala tangkas ibana maridi di bagasan aek, jala ingkon ramun ibana sahat ro di bodari.

⁶Jala manang ise na hundul tu ugasan naung hinundulan ni halak na somal marnipinipi, ingkon sunsionna do angka ulosna jala tangkas ibana maridi di bagasan aek, jala ingkon ramun ibana sahat ro di bodari.

⁷Jala manang ise na manjama daging ni halak na somal marnipinipi i, ingkon sunsionna ulosna jala tangkas ibana maridi di bagasan aek jala ingkon ramun ibana sahat ro di bodari.

⁸Tung sura dais tijur ni halak na somal marnipinipi tu sada halak na ias, ingkon sunsionna do angka ulosna jala tangkas maridi di bagasan aek, jala ingkon ramun sahat ro di bodari.

⁹Tole palano naung dung hinundulan ni halak na somal marnipinipi, ingkon ramun do i.

¹⁰Jala manang ise na manjama manang aha naung dung pinangkena i, ingkon ramun do ibana sahat ro di bodari; jala manang ise na mamboan ugasan sisongon i, ingkon sunsionna angka ulosna jala tangkas ibana maridi di bagasan aek, jala ingkon ramun ibana sahat ro di bodari.

¹¹Jala manang ise na jinama ni halak na somal marnipinipi i, so jolo marburi tanganna di bagasan aek, ingkon sunsionna do angka ulosna jala tangkas ibana maridi di bagasan aek, jala ingkon ramun ibana sahat ro di bodari.

¹²Jala tung sura dijama halak na somal marnipinipi sada guriguri sian tano, ingkon taponon do i; alai anggo nasa guriguri sian hau ingkon burion do i di bagasan aek.

¹³Jala tung sura malum parnipinipionna hilalaon ni jolma na somal marnipinipi i, ingkon bilanganna pitu ari sahat ro di ari pangurasanna, jala ingkon sunsionna angka ulosna jala tangkas dagingna maridi di bagasan aek mual, asa ias ibana.

¹⁴Tole paualuarohon, ingkon buatonna ma dua anduhur tabu manang dua anak ni darapati, ingkon boanonna do i tu adopan ni Jahowa, tu jolo pintu ni undungundung parluhutan, jala lehononna do i tu malim.

¹⁵Dung i pelehonon ni malim ma i, na sada bahen pelean pardosaan, na sadanari bahen pelean situtungon; ingkon malim i mambahen pardenggananna di adopan ni Jahowa ala parnipinipionna i.

¹⁶Tung sura sabar boni ni sada baoa, ingkon didionna sandok dagingna di bagasan aek, jala ramun ibana sahat ro di bodari.

¹⁷Jala nasa ulos dohot nasa hulingkuling na sap bonina i, ingkon sunsionna do i di bagasan aek jala ramun ibana sahat ro di bodari.

¹⁸Jala tung sura modom sada parompuan di lambung ni sada baoa pola sabar bonina, ingkon rap maridi nasida di bagasan aek, jala ramun nasida sahat ro di bodari.

¹⁹(II.) Tung sura sada parompuan marsahithon pantang ni abitna ingkon pulik ibana pitu ari le lengna di bagasan haramunonna; jala manang ise na manjama ibana, ingkon ramun ibana sahat ro di bodari.

²⁰Jala nasa ugasan hapeahanna i sale leng pulik nasida, ramun do i; nasa ugasan hinundulanna pe ramun do.

²¹Jala manang ise na manjama lagna i, ingkon sunsionna do angka ulosna jala tangkas ibana maridi di bagasan aek, jala ramun ibana sahat ro di bodari.

²²Jala manang ise na manjama ugasan naung hinundulanna i, ingkon sunsionna angka ulosna jala tangkas ibana maridi di bagasan aek, jala ramun ibana sahat ro di bodari.

²³Jala tung sura adong manang aha peak di atas lagna manang di ugasan naung hinundulanna i, manang ise na manjama ugasan i, ingkon ramun ibana sahat ro di bodari.

²⁴Jala tung sura modom sada baoa rap dohot nasida, gabe dais haramunonna tu baoa i, ingkon pitu ari le lengna ibana ramun, jala ramun sandok lage hapeahanna i.

²⁵Jala tung sura nania le leng sada parompuan marsahithon pantang ni abitna, ndada holan di tingki haramunonna hian, manang lumeleng masa haramunonna sian pantang ni abitna hasomalanna hian,

ingkon ramun nasida suang songon di tingki haramunon hasomalanna hian.

²⁶Sandok lage hapeahanna i saleleng haroro ni darona i, ingkon suang songon lage haramunonna hian; jala saluhut ugasan hinundulanna i, ingkon ramun do i suang songon haramunon hasomalanna hian.

²⁷Jala manang ise na manjama angka i ingkon ramun ibana; dibahen i ingkon sunsionna angka ulosna, jala tangkas ibana maridi di bagasan aek, jala ingkon ramun ibana sahat ro di bodari.

²⁸Jala tung sura malum haramunonna i hilalaonna, ingkon bilanganna dope pitu ari, salpu ni pe asa ias nasida.

²⁹Tole paualuarihon, ingkon buatonna dua anduhur tabu manang dua anak ni darapati, laos boanonna ma i tu malim tu jolo pintu ni undungundung parluhutan i.

³⁰Dung i pelehonon ni malim i ma na sada bahen pelean pardosaan, jala na sadanari bahen pelean situtungon, jala malim i mambahen pardenggananna di adopan ni Jahowa, ala haramunon ni pantang ni abitna.

³¹Ingkon songon i paholonganmuna halak Israel sian haramunonnasida i, asa unang mate nasida di bagasan haramunonnasida i, molo tung diramuni nasida ingananku na di tongatonganasida i.

³²I ma patik taringot tu halak na marnipinipi dohot taringot tu halak na sabar bonina, pola ramun ibana bahenon ni.

³³Dohot taringot tu parompuan na marsahithon pantang ni abitna hian ro di baoa na marnipinipi taringot tu baoa tahe dohot taringot tu parompuan dohot taringot tu baoa na modom di lambung ni parompuan na ramun.

16¹(I.) Dung i ro ma hata ni Jahowa tu si Musa, dung mate anak ni si Aron na dua i, uju jumonok nasida tu adopan ni Jahowa, gabe mate nasida.

²Dung i ninna Jahowa ma tu si Musa songon on: Paboa ma tu si Aron, hahami, asa unang tongtong ibana masuk tu bagasan inganan na badia i, tu pudi ni rimberimbe sahat tu adopan ni langkop pardenggan na di atas ni poti i, asa unang mate ibana; ai di bagasan ombun do Ahu patar tarida di atas langkop pardenggan i.

³Ingkon marhite sian on do si Aron masuk tu inganan na badia i: Marhite sian sada anak ni lembu bahen pelean pardosaan dohot marhite sian sada birubiru tunggal bahen pelean situtungon.

⁴Ingkon solukkononna ma baju parbagasan na badia i sian haen na halus dohot saraoal sian haen na halus manangkas di dagingna, jala ingkon hohoshononna hohos hori tu gontingna, jala martalitali sian haen na halus.

Luhutna i angka pangkean na badia do i, dibahen i ingkon jolo tangkas ibana maridi di bagasan aek, asa solukkononna angka i tu dagingna.

⁵(II.) Dung i buatonna ma sian luhutan ni halak Israel dua hambing tunggal bahen pelean pardosaan dohot sada birubiru tunggal bahen pelean situtungon.

⁶Dung i pelehonon ni si Aron ma lombu i bahen pelean ala ni dosana sandiri, asa mambahen pardenggan di ibana sandiri dohot di isi ni jabuna.

⁷Dung i buatonna ma na dua hambing tunggal i, jala pajongjongonna do i di adopan ni Jahowa, di jolo pintu ni undungundung parluhutan i.

⁸Dung i dabuon ni si Aron ma tondung taringot tu hambing tunggal na dua i, rujiruji na sada di Jahowa jala rujiruji na sadanari di Asasel (Sibolis).

⁹Dung i pelehonon ni si Aron ma hambing tunggal na hona rujiruji di Jahowa, bahen pelean pardosaan.

¹⁰Alai anggo hambing tunggal na hona rujiruji di Asasel, ingkon songon i mangolu pajongjongonna di adopan ni Jahowa, asa mambahen pardenggan marhite sian i, dung i paluaonna ma i di Asasel tu halongonan.

¹¹Dung i pelehonon ni si Aron ma lombu pelean i ala ni dosana sandiri, asa mambahen

pardenggan di ibana sandiri dohot di isi ni jabuna, ingkon seatonna ma lombu pelean i ala ni dosana sandiri.

¹²Dung i buatonna ma sada saoran pardaupaan gok dohot gara ni api sian langgatan, na di adopan ni Jahowa jala gok tanganna duansa daupa na hushus na lamot tinutu, jala boanonna do i tu pudi ni rimberimbe sahat tu adopan ni langkop pardenggan.

¹³Jala ingkon peakkononna do daupa i tu atas api di adopan ni Jahowa, asa dihungkupi ombun ni daupa i langkop pardenggan i na di atas ni poti isian ni panindangion i, asa unang mate ibana.

¹⁴Dung i buatonna ma deba sian mudar ni lombu i jala pistikkononna dohot jarijarina tu adopan ni langkop pardenggan i dingkan habinsaran, pola ingkon pitu hali songon i pistikkononna sian mudar i dohot jarijarina tu adopan ni langkop pardenggan i.

¹⁵Dung i seatonna ma hambing tunggal pelean i ala ni dosa ni bangso i, jala boanonna deba mudarna tu pudi ni rimberimbe i sahat ro di adopan ni langkop pardenggan i, jala bahenonna mudarna i suang songon na binahenna taringot tu mudar ni lombu i, ingkon pistikkononna do i tu atas ni langkop pardenggan i dohot tu jolo ni langkop pardenggan i.

¹⁶Asa ingkon songon i bahenonna pardenggan di inganan na badia i ala ni haramunon ni halak Israel dohot ala ni pangalaosionnasida di saluhut dosanasida i; suang songon i bahenonna tu undungundung parluhutan i na maringan rap dohot nasida ti tongatonga ni haramunonnasida i.

¹⁷Nanggo sahalak pe ndang jadi adong di bagasan undungundung parluhutan i, molo masuk ibana mambahen pardenggan di bagasan inganan na badia i, paima ruar ibana muse; ingkon songon i bahenonna pardenggan di ibana sandiri dohot di isi ni jabuna ro di sandok luhutan Israel.

¹⁸Ia dung haruar ibana mandapothon langgatan na di adopan ni Jahowa, ingkon bahenonna huhut pardenggananna; ingkon buatonna deba sian mudar ni lembu i dohot sian mudar ni hambing tunggal i, jala bahenonna tu tanduk ni langgatan i humaliang.

¹⁹Jala ingkon pistikkononna dohot jarijarina sian mudar i pitu hali tu langgatan i, asa urasanna jala parbadiaanna sian haramunon ni halak Israel.

²⁰(III.) Ia dung marujung dibahen pardenggan i manguras inganan na badia i dohot undungundung parluhutan i dohot langgatan i, ingkon dohononna ma mamboan hambing tunggal na mangolu i.

²¹ Dung i ampehonon ni si Aron ma tanganna duansa tu ulu ni hambing tunggal na mangolu i paporsanhon tu ibana saluhut hajahaton ni halak Israel dohot saluhut pangalaosionnasida i di saluhut dosanasida i jala ampehononna do angka i tu ulu ni hambing tunggal i, dung i suruhononna ma sahalak naung hobas hian manogu hambing tunggal i tu halongonan.

²² Asa hambing tunggal i mamorsan saluhut hajahatonnasida i tu tano na lingling, dung i paluaonna ma hambing tunggal i di halongonan.

²³ Dung i masuk ma si Aron tu bagasan undungundung parluhutan i jala tanggalanna ma pangkean sian hain na lamoti, na sinolukkonna di na laho masuk ibana tu inganan na badia i, laos tinggalhononna disi.

²⁴ Dung i didionna ma dagingna dohot aek di inganan na badia i, jala solukkonna ma pangkeanna ariari; dung i ruar ma ibana, laos hobasonna ma pelean situtungon di ibana sandiri dohot pelean situtungon di bangso i, asa mambahen pardenggan di ibana sandiri dohot di bangso i.

²⁵ Langgo tabotabo ni pelean pardosaan ingkon tutungonna do i di atas langgatan.

²⁶ Alai anggojolma na manogunogu birubiru tunggal tu Asasel, ingkon sunsionna ma angka ulosna jala tangkas didionna dagingna dohot aek, dung i pe asa jadi ibana masuk tu parsaroan i.

²⁷ Ia lombu pelean pardosaon i dohot hambing pelean pardosaon i, naung pola binoanna mudarna i tu bagasan inganan na badia i mambahen pardenggan, ingkon boanon ni halak do i tu balian ni parsaroan jala suda tutungonna dohot api, tole hulingkulingna, sibukna dohot napana.

²⁸ Jala jolma na manutung angka i, ingkon sunsionna do angka ulosna jala tangkas didionna dagingna dohot aek; ia dung songon i jadi ma ibana masuk tu parsaroan i.

²⁹ (IV.) Ingkon gabe patik do on di hamu ro di salelenglelengna: Di bulan sipahapitu di ari sampulu, ingkon paunduhonmuna rohamuna, jala ndang jadi ulaonmuna manang aha ulaon, nang hamu isi ni tano i hian, nang halak dagang na maisolat di tongatongamuna.

³⁰ Ai di ari na sasada i do dibahen malim pardenggan di hamu, manguras hamu, ingkon taruras hamu sian saluhut dosamuna di adopan ni Jahowa.

³¹ Dibahen i ingkon gabe ari Sabbat paradianan na bolon do i di hamu jala ingkon paunduhonmuna rohamuna i; patik ma i di hamu ro di salelenglelengna.

³² Alai anggo pardenggan sisongon i, ingkon malim naung tangkas miniahan ni Jahowa mambahensa dohot naung tangkas pinabangkit ni halak mangaradoti hamalimon singkat ni amana, jala ingkon solukkononna

do pangkean na halus, i ma pangkean angka na marhadohoan.

³³Jala ingkon songon i bahenonna pardenggan manguras inganan na badia i ro di undungundung parluhutan i dohot langgatan i; bahenonna huhut pardenggan manguras angka malim ro di sandok bangso luhutan i.

³⁴Jadi i ma gabe patik di hamu ro di salelenglelelengna, ingkon bahenon pardenggan manguras halak Israel sian dosanasida sahali sataon. Jadi dibahen nasida ma hombar tu na tinonahon ni Jahowa tu si Musa.

17¹ (I.) Dung i ro ma hata ni Jahowa tu si Musa songon on:

²Paboa tu si Aron dohot tu angka anakna ro di sandok halak Israel, dohononmu ma tu nasida: On do hata na tinonahon ni Jahowa, ninna do:

³Manang ise sian pinompar ni Israel na maneat sada jonggi manang anak ni birubiru manang hambing boruboru di bagasan parsaroan manang di balian.

⁴Jala ndang diboan pinahan i tu jolo pintu ni undungundung parluhutan i, asa pelehononhon nian sian i bahen pelean tu Jahowa di adopan ni inganan ni Jahowa: Mudarna i ingkon marsapata tujolma na mandurushon mudar i, jala ingkon

siaphononhonjolma i sian tongatonga ni bangsona.

⁵Dibahen i ingkon boanon ni halak Israel do peleannasida angka na naeng pelehonna di ladang, boanonna ma tutu tu Jahowa, tu jolo pintu ni undungundung parluhutan i, tu malim i, asa dipelehon angka i bahen pelean hamauliateon tu Jahowa.

⁶Jala ingkon pistikkonon ni malim mudar i tu langgatan ni Jahowa di jolo pintu ni undungundung parluhutan i, jala ingkon tutungonna tabotabona bahen uap na hushus di Jahowa.

⁷Jala ndang jadi be nasida mamelehon peleannasida i tu angka begu, angka na niihuthonnasida marhite sian parmmainanon; ingkon gabe patik na hot ma i salelenglelengna di nasida marsundutsundut.

⁸Dibahen i ingkon dohononmu ma tu nasida: Manang ise sian pinompar ni Israel manang sian halak dagang, angka na maisolat di tongatonganasida mamelehon sada pelean situtungan manang pelean sipotongon.

⁹Hape ndang diboan tu jolo pintu ni undungundung parluhutan i, asa mamelehon di Jahowa nian, ingkon rendephononhonjolma sisongon i sian bangsona.

¹⁰(II.) Jala manang ise sian pinompar ni Israel manang sian halak dagang, angka na maisolat di tongatongamuna, molo tung mangan mudar ni manang aha

ibana, ingkon Bohingku sandiri mangalo
jolma na manganhon mudar i, jala ingkon
Ahu maniaphon ibana sian tongatonga ni
bangsona.

¹¹ Ai hosa ni sibuk i di bagasan mudar do i,
jala nunga pola Ahu mangalehoni di hamu
di atas langgatan, asa bahen pardenggan
di tondimuna, ai mudar i do mambahen
pardenggan marhite sian tondi na di
bagasan i.

¹² Ala ni umbahen Ahu mandok tu halak
Israel: Manang ise pe sian hamu ndang jadi
panganonna mudar; nang halak dagang na
maisolat di tongatongamuna, ndang jadi
panganonna mudar.

¹³ Jala manang ise sian halak Israel, nang
sian halak dagang angka na maisolat di
tongatongamuna, tung sura dapotsa diburu
juhut harangan manang sada pidong na
ganjing panganon, ingkon durushononna
mudarna jala hungkupanna do i dohot tano.

¹⁴ Ai hosa ni nasa sibuk i ma mudarna, di
bagasan mudarna do i. Ala ni umbahen pola
Ahu mandok tu halak Israel: Nandang jadi
panganonmuna mudar ni manang dia daging,
ai hosa ni nasa sibuk i ma mudarna; asa
manang ise na manganhon mudar i ingkon
siaphononhon ibana.

¹⁵ Angkup ni manang ise na manganhon na
mate garam, manang juhut soroan, nang
halak isi ni tano i hian, nang halak dagang,

ingkon sunsionna angka ulosna jala tangkas ibana maridi di bagasan aek, jala ingkon ramun ibana sahat ro di bodari, asa ias muse.

¹⁶Alai tung sura so disunci angka ulosna, manang ndang tangkas maridi dagingna, ingkon manginona tu ibana do hajahatonna i.

18¹(I.) Ro muse ma hata ni Jahowa tu si Musa songon on:

²Hatahon ma tu halak Israel jala dohononmu ma tu nasida: Ahu do Jahowa, Debatamuna i!

³Ndang jadi tiruonmuna pambahenan ni halak di tano Misir paisolatanmuna najolo, jala ndang jadi tiruonmuna pambahenan ni halak di tano Kanaan, hasahatanmuna tu joloan on togihononku, jala ndang jadi ihuthononmuna adatnasida i.

⁴Ingkon radotanmuna do angka uhumhu jala ingkon ingotonmuna angka parentangku, asa marparange hamu hombar tusi, ai Ahu do Jahowa, Debatamuna i.

⁵Dibahen i ingkon radotanmuna angka parentangku dohot angka uhumhu; manang isejolma na mangulahon angka i, mangolu ma ibana marhite sian i, ai Ahu do Jahowa!

⁶(II.) Manang ise pe baoa ndang jadi jumonok ibana tu sada parompuan sihasolhotanna, naeng mangabia, ai Ahu do Jahowa.

⁷Ndang jadi patedehonmu na niabitan ni amangmu manang inangmu; ai inangmu do ibana, dibahen i ndang jadi pagodangonmu.

⁸Ndang jadi pagodangonmu jolma ni amangmu, ala naung sampur amangmu tu nasida.

⁹Ndang jadi olionmu ibotom tubu ni amangmu manang inangmu, na tubu di bagasan jabu manang di ruar, ndang jadi patedehonmu na niabitanna.

¹⁰Ndang jadi olionmu pahompum boru, tubu ni anakmu manang borum, ndang jadi patedehonmu na niabitanna, ai hapantanganmu do nasida.

¹¹Ndang jadi olionmu boru ni jolma ni amangmu, tinubuhon ni amangmu, ai ibotom do nasida jala hapantanganmu do nasida.

¹²Ndang jadi olionmu namborum, ai sisada mudar dohot amangmu do nasida.

¹³Ndang jadi olionmu pariban ni inangmu, ai sisada mudar do nasida dohot inangmu.

¹⁴Ndang jadi ramunanmu podoman ni hahaanggi ni amangmu, laho sampur tu jolmana, ai inangmu do nasida.

¹⁵Ndang jadi pagodangonmu parumaenmu, ai jolma ni anakmu do nasida, ala ni umbahen so jadi patedehonmu na niabitanna.

¹⁶Ndang jadi rampasonmu jolma ni hahaanggim, ala naung sampur tu hahaanggim.

¹⁷Ndang jadi olionmu sada parompuan rap rodot boruna; jala ndang jadi buatonmu pahompum, tubu ni anakna manang tubu ni

boruna bahen jolmam, ai sisada mudar do hamu, ai haurahon bolon do i.

¹⁸Ndang jadi buatonmu sada parompuan rap dohot anggina bahen jolmam, asa patubu pangiburuon, ala sampur ho dohot imbangna, tagan di ngoluna dope.

¹⁹(III.) Ndang jadi ho sampur tu jolmam uju marsahithon pantang ni abitna nasida.

²⁰Jala ndang jadi angkupanmu modom jolma ni donganmu, gabe ramun ho maon marhite sian nasida.

²¹Jala ndang jadi pasahatonmu nanggo sahalak sian pinomparmu laho mamelehon tu Molok, asa unang ramun bahenonmu Goar ni Debatam, ai Ahu do Jahowa.

²²Ndang jadi parjolmaonmu baoa songon parompuan, ai hagigian do i.

²³Angkup ni ndang jadi ho sampur manang tu pinahan dia, gabe ramun ho bahenon ni; jala parompuan pe ndang jadi sampur tu pinahan, ai hagigian bolon do i.

²⁴Ndang jadi ramunanmuna dirimuna marhite sian saluhutna i, ai marhite sian pambahenan sisongon i tarramun do bangso parbegu, angka sipabalionku maradophon hamu.

²⁵Jadi tarramun ma tano i, gabe ingkon marlulu Ahu dompak tano i ala hajahatonna, asa diutahon tano i angka jolma pangisina i.

²⁶Dibahen i sai radoti hamu ma angka parentangku dohot uhumhu jala unang

ulahon hamu nanggo sada sian saluhut biasbias ondeng, nangjolma isi ni tano i hian, nang halak dagang na maisolat di tongatongamuna.

²⁷ Ai saluhut angka biasbias ondeng, nunga diulahon isi ni tano i hian, angka na jumolo sian hamu, gabe tarramun tano i dibahen.

²⁸ Asa unang dohot hamu diutahon tano i, tung sura tarramun dibahen hamu, suang songon na niutahonna bangso parbegu angka na jumolo sian hamu.

²⁹ Ai manang ise na mangulahon nanggo sada sian angka biasbias ondeng, ingkon siaphononhon do hosana i sian tongatonga ni bangsona.

³⁰ Dibahen i radoti hamu ma siradotanmuna maradophon Ahu, na so tupa hamu mangulahon nanggo sada sian adat hagigian, angka na niulahon ni halak na jumolo sian hamu, asa unang tarramun dirimuna marhite sian i; ai Ahu do Jahowa, Debatamuna i!

19¹ (I.) Dung i ro muse ma hata ni Jahowa tu si Musa songon on:

² Hatahon ma tu sandok luhutan ni halak Israel hata on: Ingkon badia hamu, ai na badia do Ahu, Jahowa, Debatamuna i!

³ Ingkon ganupjolma pasangaphon inana dohot amana, jala ingkon radotanmuna angka ari Sabbathu, ai Ahu do Jahowa, Debatamuna i!

⁴Jala ndang jadi hamu mandompakkon angka ajiajian, jala ndang jadi hamu mambahen angka debata tuangan di hamu, ai Ahu do Jahowa, Debatamuna i!

⁵Jala tung sura hamu mamelehon sada pelean hamauliateon tu Jahowa, ingkon sian lomo ni rohamuna hamu mamelehon i.

⁶Alai ingkon laos di ari pamelehonmuna dohot marsogotna i hamu manganhon pelean i, alai anggo na tinggal i ro di ari patoluhon, ingkon tutungonmuna do i tu bagasan api.

⁷Tung sura adong na manganhon sian i di ari patoluhon, hagigian do i, ndang tarhalomohon.

⁸Jala manang ise na manganhon sian i, ingkon manginona tu ibana hajahatonna, ala na niramunanna habadiaon ni Jahowa, jala ingkon siaphononhon hosana sian tongatonga ni bangsona.

⁹(II.) Molo digotil hamu parbue ni tanomuna, ndang jadi suda gotilonmu duru ni haumamu jala ndang jadi jomputonmuna na marpisikpisik di panabianmuna.

¹⁰Parbue ni hau anggurmu pe ndang suda gotilonmu, jala unang pola papungupungu parbue na marpisikpisik di porlak anggurmu; ingkon pasombuonmu do i di halak na pogos dohot di halak dagang, ai Ahu do Jahowa, Debatamuna i!

¹¹ Nandang jadi hamu manangko, jala ndang jadi hamu margabus, jala ndang jadi hamu masipaotootoan.

¹² Jala ndang jadi hamu manolon na tutu marhitehite Goarhu, asa unang marlea bahenonmu Goar ni Debatam, ai Ahu do Jahowa.

¹³ Nandang jadi rupaonmu donganmu manang doboonmu ugasanna, jala ndang jadi pagoonmu upa ni halak pangula, pola sahat ro di manogot.

¹⁴ Nandang jadi buraanmu halak na nengel jala ndang jadi bahenonmu partuktuhan di jolo ni halak na mapitung, ingkon habiaranmu do Debatamu, ai Ahu do Jahowa.

¹⁵ Nandang jadi papeolonmu uhum di paruhuman, ndang jadi hamu marnidanida bohi, palea halak na pogos, pasangap halak na sangap, ingkon marhite sian hatigoran uhumonmu donganmu.

¹⁶ Nandang jadi ho mangalap manaruhon hata mangkata donganmu sabangso, jala ndang jadi ho hehe manindangi dompak mudar ni donganmu, ai Ahu do Jahowa.

¹⁷ Nandang jadi hosomonmu donganmu di bagasan roham, alai ingkon marsipaingot ho tu donganmu, asa unang manean dosa ho ala ibana.

¹⁸ Nandang jadi baloshononmu na jahat, jala ndang jadi marsunisunian roham tu anak ni

bangsom, ingkon haholonganmu donganmu
jolma songon dirim, ai Ahu do Jahowa.

¹⁹Ingkon radotanmuna do angka uhumhu;
ndang jadi loasonmu pinahanmu tu na pulik
mansam marbaringin, jala ndang jadi mardua
ragam boni saburhononmu tu haumam jala
ndang jadi pangkeonmu ulos na mardua
mansam bonangna.

²⁰Tung sura sampur sada baoa tu sada
parompuan sonduhan naung oroan nian, alai
ndang haru ditobus dope, manang ndang
haru malua dope sian parhatobanan, ingkon
rap linsingan do, alai ndang jadi mate nasida
bunuon, ala so haru malua dope nasida.

²¹Alai ingkon boanon ni baoa i sada
birubiru tunggal di Jahowa tu jolo pintu ni
undungundung parluhutan i, bahen pelean
parsalaanna urasna.

²²Jala ingkon malim i mambahen
pardenggananna marhite sian birubiru
tunggal pelean parsalaan i di adopan ni
Jahowa, ala dosa na binahenna i, jadi
marpamuati ma roha ni Jahowa mida dosa na
binahenna i.

²³(III.) Ia dung masuk hamu tu bagasan
tano i jala disuan hamu angka hau
marragamragam tau sipanganon parbuena,
ingkon hira na marhulup parbuena etongon
ni rohamuna; ingkon tolu taon lelengna
marhulup etongon ni rohamuna, ndang jadi
panganonmuna.

²⁴Alai anggo paopattaonhon ingkon badia saluhut parbuena i tau pujipujian tu Jahowa.

²⁵Tole muse palimataonhon jadi ma panganonmuna parbuena i, asa lam tamba parbuena i di hamu; ai Ahu do Jahowa, Debatamuna i!

²⁶Ndang jadi panganonmuna manang aha na marsaor mudar. Ndang jadi ulahononmuna partondungon manang parsibalikmataon.

²⁷Ndang jadi marjambulan obuk ni ulum gorbangonmu, jala ndang jadi gansipanmu ujung ni janggutmu.

²⁸Ndang jadi garianganmu dagingmu ala na mate ho, jala ndang jadi marsurat dagingmu marhite sian bosi na ginarahon, ai Ahu do Jahowa.

²⁹Ndang jadi ramunanmu borum mangapoi mangulahon parmainanon, asa unang marmainan isi ni tano i, gabe gok hajahaton tano i.

³⁰Ingkon radotanmuna do ari Sabbathu, jala pasangap hamu ingananku na badia i; ai Ahu do Jahowa.

³¹Ndang jadi hamu marbalik tu halak pangarunding manang tu halak partondung, ndang jadi hamu marsungkun tu nasida, asa unang ramun hamu bahenonnasida; ai Ahu do Jahowa, Debatamuna i.

³²Ingkon hehe ho laos jongjong maradophon halak na ubanon, jala ingkon pasangaponmu

do halak na tuatua, jala ingkon marhabiaran ho maradophon Debatam; ai Ahu do Jahowa.

³³Tung sura maisolat sahalak dagang di lambungmu di tanomuna i, ndang jadi rupaonmu ibana.

³⁴Songon sahalak sian hamu na tubu di tano i, ingkon songon i do nang halak dagang di tongatongamuna, ingkon haholonganmu do ibana songon dirim, ai halak dagang do nang hamu na jolo di tano Misir; ai Ahu do Jahowa Debatamuna i!

³⁵Ndang jadi dabuonmuna uhum na geduk di paruhuman i, manang marhite sian asta, manang marhite sian timbangan, manang marhite sian solup.

³⁶Ingkon hatian na sintong dohot batu timbangan na sintong dohot solup na sintong dohot bale na sintong masa di hamu; ai Ahu do Jahowa, Debatamuna i, na manogihon hamu ruar sian tano Misir.

³⁷Dibahen i radoti hamu ma saluhut parentangku dohot uhumhu, jala ulahon hamu angka i; ai Ahu do Jahowa.

20¹ (I.) Dung i ro muse hata ni Jahowa tu si Musa songon on:

²Ingkon dohononmu ma tu halak Israel: Manang ise pe sian halak Israel nang sian halak dagang, angka na maisolat di Israel, tung sura dipelehon sian pinomparna tu Molok, ingkon marutang hosa ibana, ingkon

halak isi ni tano i mandangguri ibana mate dohot batu.

³Ahu sandiri pe manuju Bohingku mangalojolma sisongon i jala maniaphon ibana sian tongatonga ni bangsona, ala naung nilehonna sian pinomparna tu Molok, asa paramunhon ingananku na badia i dohot paleahon Goarhu na badia i.

⁴Tung sura pe dipaula isi ni tano i hira na so diidajolma sisongon i, uju na mamelehon ibana sian pinomparna tu Molok, asa unang nian bunuonna ibana.

⁵Ahu sandiri ma manuju Bohingku mangalojolma sisongon i dohot mangalo donganna samarga, Ahu huhut maniaphon ibana sian tongatonga ni bangsona rap dohot sude na mangihuthon parmainanonna, angka na marmainan mangihuthon ibana tu Molok.

⁶Tung sura marbalik manang ise marsungkun tu halak pangarunding, manang tu halak partondung, asa mangihuthon parmainanonnasida, ingkon Ahu manuju Bohingku mangalojolma sisongon i dohot maniaphon ibana sian tongatonga ni bangsona.

⁷Dibahen i ingkon parbadiaanmuna dirimuna, asa gabe angka na badia i hamu, ai Ahu do Jahowa, Debatamuna i.

⁸Jala ingkon radotanmuna angka parentangku dohot mangulahon angka i; ai Ahu do Jahowa, na pabadiahon hamu.

⁹Manang ise na mamburai amana manang inana, ingkon marutang hosa ibana; ala naung binuraanna amana manang inana; ingkon marsapata tu ibana sandiri mudarna i.

¹⁰Tung sura adong manang ise na mangalangkupjolma ni manang ise, ala naung nilangkupannajolma ni donganna i, ingkon rap marutang hosa do pangalangkupdohot na nilangkup.

¹¹Tung sura adong manang ise na pagodangjolma ni amana, gabe diramuni podoman ni amana i, ingkon rap marutang hosa nasida duansa; ingkon marsapata tu nasida sandiri mudarnasida i.

¹²Tung sura adong manang ise na pagodangkon parumaenna, ingkon rap marutang hosa duansa, ala hagigian bolon na niulana; ingkon marsapata tu nasida sandiri mudarnasida i.

¹³Tung sura adong sada baoa na marjolmahon baoa, songon parompuan, duansa nasida mangulahon biasbias, ingkon rap marutang hosa do; marsapata tu nasida sandiri mudarnasida i.

¹⁴Tung sura adong manang ise mambuat sada parompuan rap dohot inana bahenjolmana, biasbias bolon do i, ingkon rap tutungon di bagasan api nasida tolunsa, asa unang mian biasbias i di tongatongamuna.

¹⁵Tung sura adong sada baoa na sampur tu pinahan, ingkon marutang hosa do ibana, pinahan i pe ingkon bunuon do.

¹⁶Tung sura adong sada parompuan jumonok tu pinahan naeng sampur tusi, ingkon rap bunuonmu do parompuan i dohot pinahan i, ingkon rap marutang hosa do, marsapata tu nasida sandiri do mudarna i.

¹⁷Tung sura adong sada baoa na marjolmahon ibotona, tubu ni amana manang tubu ni inana, gabe ditilik na niabitanna, jala parompuan i muse manilik na niabitan ni baoa i, haurahon bolon do i; ingkon siap nasida bahenon di adopan ni donganna sabangso, ala naung niramunanna ibotona, ingkon manginona tu ibana hajahatonna.

¹⁸Tung sura adong sada baoa na sampur tu jolmana uju marsahithon pantang ni abitna, tung dipatedek na niabitanna jala lomo dohot parompuan i disi, ingkon siaphononhon nasida duansa sian tongatonga ni bangsona.

¹⁹Ndang jadi ho sampur tu pariban ni inangmu manang tu namborum, ai na mangaleai parsabutuhaon do i, ingkon manginona tu nasida hajahatonnasida i.

²⁰Tung sura adong sada baoa na sampur tu jolma ni amangtuana, i ma na mangaramuni podoman ni amangtuana; ingkon manginona tu nasida dosanasida i, ingkon mate punu do nasida.

²¹ Tung sura adong sada baa na mangarampas jolma ni hahangina, haramunon bolon do i ingkon mate punu do nasida, ala naung niramunanna podoman ni hahangina i.

²² (II.) Antong radoti hamu ma saluhut parentangku dohot saluhut uhumhu, jala ulahon hamu angka i, asa unang hamu diutahon tano hasahatanmuna sogot togihononku, asa maringan hamu disi.

²³ Jala ndang jadi hamu mangihuthon tu hasomalan ni bangso parbegu, angka sipabalionku maradophon hamu, ai luhutna i nunga diulahon anggo nasida, umbahen marbiasbias Ahu mida nasida.

²⁴ Ala ni umbahen naung pola hudok tu hamu: Ingkon teanonmuna tanonasida i, Ahu tahe marbasabasahonsa tu hamu, bahen teanteananmuna, tano habaoran ni susu dohot situak ni loba. Ahu do Jahowa, Debatamuna i, na papulik hamu sian angka bangso.

²⁵ Dibahen i ingkon sirangonmuna pinahan na ganjing sian na ramun dohot pidong na ganjing sian na ramun, asa unang gabe ramun dirimuna marhite sian pinahan, manang pidong manang marhite sian saluhut na manjirir di atas tano i, naung hapapulik paboa ramun do i di hamu.

²⁶ Dibahen i ingkon gabe badia hamu di Ahu, ai na badia do Ahu, Jahowa, na papulik hamu

sian angka bangso, asa gabe bangsongku hamu.

²⁷Tung sura adong sada baoa manang sada parompuan di tongatongamuna gabe pangarunding manang partondung, ingkon marutang hosa nasida; ingkon mate nasida dangguran dohot batu; marsapata tu nasida sandiri mudarnasida i.

21 ¹(I.) Dung i ro muse ma hata ni Jahowa tu si Musa songon on: Dok ma tu angka malim, angka anak ni si Aron, jala paboa ma tu nasida: Ndang jadi ramunan ni malim i dirina taringot tu jolma na mate di tongatonga ni bangsona.

²Dungkon ni taringot tu sibukna na sumolhot tu ibana; taringot tu inana dohot amana, taringot tu anakna, boruna dohot anggina.

³Taringot tu ibotona namarbaju di lambungna dope, na so marharajaan dope, jadi ramunanna dirina anggo taringot tusi.

⁴Nandang jadi ramunanna dirina ala marjujungan ibana di tongatonga ni bangsona laho palea ibana.

⁵Nandang jadi marjambulan obuk ni uluna gorbangonna jala ndang jadi gansipanna ujung ni janggutna manang rarihonna dagingna.

⁶Ingkon gabe badia nasida di Debatanasida i jala ndang jadi marlea bahenonna Goar ni Debatanasida i, ai nasida do mamelehon angka pelean api tu Jahowa, bahen sagusagu

lomo ni roha ni Debatanasida, dibahen i ingkon gabe badia do nasida.

⁷Ndang jadi nasida marjolmahon parompuan sibabijalang manang naung mambolongkon dirina, nang parompuan naung pinaulak ni baoana, ndang jadi parjolmaonna, ai badia di Debatana do malim i.

⁸Dibahen i ingkon parbadiaanmu ibana ala ibana mamelehon sagusagu lomo ni roha ni Debatam; ingkon badia ibana di ho, ai na badia do Ahu, Jahowa na pabadiahon hamu.

⁹Tung sura dipungka boru ni sada malim marmainan, na palea amana ibana disi, ingkon suda tutungan parompuan i di bagasan api.

¹⁰(II.) Alai anggo sintua ni malim di tongatonga ni hahaanggina, naung pola niusehon miak pamiahion i tu uluna, jala naung pinabangkit asa solukkononna pangkean angka na marhadohoan i, ndang jadi patedehonna uluna, jala ndang jadi sansananna pangkeanna.

¹¹Jala ndang jadi jumonok ibana tu halak na mate, jala ndang jadi ramunanna dirina taringot tu amana manang taringot tu inana pe.

¹²Jala ndang jadi ibana ruar sian inganan na badia i, jala ndang jadi marlea bahenonna habadiaon ni Debatana, ai nunga pola sahat tu ibana miak pamiahion i, ai Ahu do Jahowa!

¹³Ingkon sada parompuan namarbaju buatonna bahenjolmana.

¹⁴Ndang jadi buatonna anggo parompuan na mabalu, manang naung pinaulak, manang naung mambolongkon dirina, manang sibabijalang; ingkon sada parompuan namarbaju sian bangsona buatonna bahenjolmana.

¹⁵Asa unang marlea bahenonna pinomparna di tongatonga ni bangsona, ai Ahu do Jahowa, na pabadianon ibana.

¹⁶(III.) Dung i ro muse hata ni Jahowa tu si Musa, ninna ma:

¹⁷Hatahon ma tu si Aron songon on: Manang ise na sian pinomparmu marsundutsundut na martihas dagingna, ndang jadi jumonok ibana laho mamelehon sagusagu lomo ni roha ni Debatana.

¹⁸Ai nasa baoa na martihas dagingna ndang jadi jumonok, baoa na mapitung manang na pangpang, manang dalnat igungna, manang maganjangku ruasna sambariba.

¹⁹Manang baoa na maponggol patna manang tanganna.

²⁰Manang na gurdung manang na tiarapon manang na paloon matana, manang na rasaon manang na gurapon manang baruton.

²¹Nasa baoa na martihas tahe dagingna sian pinompar ni malim Aron, ndang jadi jumonok laho mamelehon angka pelean api tu Jahowa; ala martihas dagingna i ndang jadi jumonok

ibana laho mamelehon sagusagu lomo ni roha ni Debatana.

²²Jadi do nian ibana mangan sian sagusagu lomo ni roha ni Debatana, nang sian na songkal sahali, nang sian na badia i.

²³Alai ndang jadi ro ibana sahat tu rimberimbe i, jala ndang jadi jumonok ibana tu langgatan, ala na martihas i dagingna, asa unang marlea dibahen ingananku na badia i; ai Ahu do Jahowa na pabadiahon nasida.

²⁴Dung i dipasahat si Musa ma hata i tu si Aron dohot tu angka anakna i dohot tu sude halak Israel.

22¹ (I.) Dung i ro muse hata ni Jahowa tu si Musa songon on:

²Paboa ma tu si Aron dohot tu angka anakna i, asa tangkas rohana mangaramoti dirina maradophon na badia di halak Israel, na pinarbadiaannasida di Ahu, asa unang marlea dibahen nasida Goarhu na badia i; ai Ahu do Jahowa.

³Antong paboa ma tu nasida: Manang ise sian sandok pinomparmuna marsundutsundut, ro jumonok laho mangaradoti ulaon na badia, na pinarbadian ni halak Israel di Jahowa, tongon di haramunonna; ingkon siaphononhonjolma i sian adopanku, ai Ahu do Jahowa.

⁴Manang ise sian pinompar ni si Aron na puruon manang marnipinipi dagingna, ndang jadi ibana mangan sian na pinarbadian

saleleng so malum dihilala; laos songon i do manang ise na manjama manang aha na ramun binahen ni bangke, manang tung sabar boni ni manang ise.

⁵Manang tung dijama manang ise manang aha na manjirir, na paramunhon ibana, manang halak na paramunhon ibana, ro di sude na tau paramunhon ibana.

⁶Manang ise tahe na manjama sisongon i, ingkon ramun ibana sahat ro di bodari, jala ndang jadi ibana mangan sian na pinarbadian, ingkon jolo didionna dagingna di bagasan aek.

⁷Ia dung mate mata ni ari ias ma ibana, dung i jadi ma panganonna sian na pinarbadian, ai sipanganonna hian do i.

⁸Na mate garam dohot juhut soroan ndang jadi panganonna, asa unang paramunonna dirina binahen ni; ai Ahu do Jahowa.

⁹Dibahen i ingkon radotannasida pangoloion tu Ahu, asa unang dapotan dosa nasida marhite sian i, laos mate maon binahen ni, tung sura marlea binahenna i, ai Ahu do Jahowa, na pabadihon nasida.

¹⁰(II.) Angkup ni halak ruar pe ndang jadi panganonna na pinarbadian, nang halak na manompang di malim, nang anak gajianna, ndang jadi mangan sian na badia.

¹¹Alai tung sura adong sahalak tinuhor ni malim i dohot perakna sandiri, jadi do anggo i

mangan sian i; nang halak na tubu di bagasan jabuna, jadi do mangan sian sagusaguna.

¹²Alai anggo boru ni malim, ia dung gabe ripe ni halak ruar, ndang jadi ibana mangan sian pelean tatingan na pinarbadian.

¹³Alai anggo boru ni malim naung mabalu manang pinaulak, jala ndang marpinompar, gabe mulak nasida sumuang tu jabu ni amana, i ma na jadi mangan sian sagusagu ni amana, suang songon uju di haposoonna; alai anggo sandok halak ruar ndang jadi mangan sian i.

¹⁴Alai manang ise na mangan sian na pinarbadian i binahen ni liluna, ingkon patambonna saptarima godangna, jala paulahonna tu malim na pinarbadian i.

¹⁵Asa unang marlea dibahen nasida na pinarbadian ni halak Israel bahen pelean tatingan tu Jahowa;

¹⁶Asa unang dapotan hajahaton nasida dohot hasalaan, ala pinanganna na pinarbadiannasida; ai Ahu do Jahowa na pabadian nasida.

¹⁷(III.) Dung i ro muse hata ni Jahowa tu si Musa songon on:

¹⁸Dok ma tu si Aron ro di angka anakna ro di sandok halak Israel, dohononmu ma tu nasida: Manang ise pe sian pinompar ni halak Israel manang sian halak dagang pe di tongatonga ni halak Israel, molo naeng ibana mamelehon peleanna marguru tu saluhut

bagabaganasida, jala marguru tu sandok silehonlehon sian lomonasida i, angka na naeng pelehononna tu Jahowa bahen pelean situtungan.

¹⁹Asa tung jumpangan asi ni roha hamu, ingkon tunggal na so martihas buatonna sian lombu, manang anak ni birubiru manang hambing.

²⁰Saluhut tahe na martihas ndang jadi pelehononmuna, ai ndang dapotan asi ni roha hamu marhite sian i.

²¹Tung sura adong sahalak na mamelehon sada pelean hamauliateon tu Jahowa naeng manggarar bagabagana, manang bahen pelean lomo ni rohana, ingkon buatonna sian lombu manang birubiru na so martihas, asa dapotan asi ni roha ibana, na so tupa tahe martihas.

²²Molo tung mapitung manang maponggol holiholina manang mabugang manang darangon manang gurapon manang baro on, i ma angka na so jadi pelehononmuna tu Jahowa, jala ndang jadi lehononmuna sian i tu Jahowa bahen pelean situtungan di atas langgatan i.

²³Alai anggo jonggi manang birubiru na maganjangku ruasna manang majempekk, jadi do nian hobasonmu bahen pelean sian lomo ni roham, alai anggo tung manggarar bagabaga ndang tarhalomohon Jahowa.

²⁴Tole pinahan na pinaias binahen ni na tartambing manang tarlisat manang dironton manang dihorot, ndang jadi pelehononmuna tu Jahowa, jala ndang jadi bahenonmuna songon i di tanomuna i.

²⁵Nang sian tangan ni halak sileban ndang jadi sian angka sisongon i pelehononmuna bahen sagusagu lomo ni roha ni Debatamuna, ai busukna do di bagasan nasida gabe tihasma do i, gabe ndang dapotan asi ni roha hamu marhite sian i.

²⁶Dung i ro muse hata ni Jahowa tu si Musa songon on:

²⁷Molo tubu sada anak ni lombu manang anak ni birubiru manang anak ni hambing, ingkon pitu ari lelengna pasombuonmu rap dohot inana, tole pauualuarihon manang lobi sian i, jadi ma i pelehononhon bahen pelean situtungan tu Jahowa.

²⁸Alai ndang jadi rap seatonmuna di bagasan sada ari lombu manang birubiru rap dohot anakna.

²⁹Alai tung sura naeng pelehononmuna sada pelean pujipujian tu Jahowa, antong pelehon hamu ma i asa dapotan asi ni roha hamu.

³⁰Ingkon laos di ari na sasada i do i panganonmuna, ndang jadi marlobilobi sian i tu marsogot, ai Ahu do Jahowa.

³¹Dibahen i ingkon radotanmuna angka tonangku, asa mangulahon angka i, ai Ahu do Jahowa.

³²Asa unang marlea dibahen hamu Goarhu na badia i, asa tung badia Ahu di tongatonga ni halak Israel; ai Ahu do Jahowa, na pabadiahon hamu.

³³Jala Ahu naung manogihon hamu ruar sian tano Misir, asa Ahu gabe Debatamuna i, Ahu Jahowa.

23¹(I.) Dung i ro muse hata ni Jahowa tu si Musa songon on:

²Paboa ma tu halak Israel, jala dohononmu ma tu nasida: On ma ari raya ni Jahowa, angka sitingtingkononmuna, gabe parluhutan na badia, i ma angka ari raya di Ahu.

³Onom ari lelengna ingkon mangula ulaon ho, alai anggo ari papituhon i ari Sabbath paradianan, ari parluhutan na badia; nanggo sada ulaon ndang jadi ulahononmu disi, ai ari Sabbath di Jahowa do i di saluhut ingananmuna.

⁴(II.) Alai angka on do ari raya di Jahowa, ari parluhutan na badia, angka sitingtingkononmuna di tingkina be binuhul hian:

⁵Di bulan sipaha sada di ari sampulu opat mareak bodari, disi ma ari raya Paska ni Jahowa.

⁶Tole di ari sampulu lima bulan i, disi ma ari raya sagusagu na so niasoman di Jahowa; ingkon pitu ari lelengna hamu manganhon sagusagu na so niasoman.

⁷Di ari parjolo ingkon ari parluhutan na badia di hamu, nanggo sada ulaon ariari ndang jadi ulahononmuna disi.

⁸Ingkon pitu ari padodot hamu mamelehon pelean situtungan di Jahowa; tole di ari papituhon i ingkon ari parluhutan na badia, nanggo sada ulaon ariari ndang jadi ulahononmuna disi.

⁹Dung i ro muse hata ni Jahowa tu si Musa songon on:

¹⁰Paboa ma tu halak Israel jala dohononmu ma tu nasida: Ia dung sahat hamu tu tano, silehononku tu hamu, jala sanga hamu manggotil gogona i, ingkon boanonmuna ma tibalán parjolo sian patumonaanmuna i tu malim.

¹¹Ingkon malim i muse manatingnating tibalán i di adopan ni Jahowa, asa dapotan asi ni roha hamu; alai marsogotna i pe dung ari Sabbath ingkon tatingan ni malim i.

¹²Jala di ari panatingnatinganmuna di tibalán i, ingkon pelehononmuna sada anak ni birubiru na so martihas na marumur sataon bahen pelean situtungan di Jahowa.

¹³Rap dohot peleana sipanganon: Dua parpulan itak na lamot na nidogil dohot miak bahen pelean situtungan, uap na hushus di Jahowa, tole dohot sada pelean siinumon sian anggur saparopat hin.

¹⁴Jala ndang jadi panganonmuna sagusagu manang tipatipa manang dahanon na

niitak sahat ro di ari pamboanmuna di pelean tu Debatamuna; i ma uhum na hot salelenglelengna di pinomparmuna di sandok ingananmuna i.

¹⁵(III.) Dung i ingkon bilanganmuna ma olat ni ari dung Sabbath i, olat ni ari pamboanmuna tahe di tibalán tatingan pitu ari Sabbath boho.

¹⁶Sahat ro di ari dung salpu ari Sabbath papituhon i, boho limapulu ari bilanganmuna, asa pelehononmuna sada pelean sipanganon na imbaru di Jahowa.

¹⁷Ingkon boanonmuna tahe sian ingananmuna be dua sagusagu bahen pelean tatingan, sian dua parpulu itak na lamot na niasoman, na minasak bahen patumonaan di Jahowa.

¹⁸Jala ingkon pelehononmuna dongan ni sagusagu i pitu anak ni birubiru, angka na so martihas na marumur sataon dohot sada lombu na bajar dohot dua birubiru tunggal; luhutna i ingkon gabe pelean situtungan di Jahowa rap dohot pelean sipanganon dohot siinumon, bahen pelean situtungan, uap na hushus di Jahowa.

¹⁹Ingkon pelehononmuna huhut sada hambing tunggal bahen pelean pardosaan dohot dua anak ni birubiru na marumur sataon, bahen pelean hamauliateon.

²⁰Ingkon tatingon ni malim ma angka i rap dohot sagusagu patumonaan bahen pelean tatingan di adopan ni Jahowa rap dohot anak

ni birubiru na dua i; ingkon badia di Jahowa ma i jala jambar ni malim.

²¹ Ingkon tingtingkononmuna do ari na sasada i, ingkon ari parluhutan na badia do i di hamu; nanggo sada ulaon ariari ndang jadi ulahononmuna disi; patik na hot salelenglelengna ma i di pinomparmuna di saluhut ingananmuna i.

²² Molo digotil hamu parbue ni tanomuna, ndang jadi suda gotilonmuna duru ni haumamu, jala ndang jadi suda jomputonmu na marpiskipisik di panabianmuna, ingkon tinggalhononmu do i di halak na pogos dohot di halak dagang; ai Ahu do Jahowa, Debatamuna i.

²³ (IV.) Dung i ro muse hata ni Jahowa tu si Musa songon on:

²⁴ Paboa ma tu halak Israel songon on: Di bulan sipaha pitu di artia, ingkon marari raya paradianan hamu disi, ari parningotan di parsaruneon, ari parluhutan na badia.

²⁵ Nanggo sada ulaon ariari ndang jadi ulahononmuna disi, ingkon pelehononmuna do sada pelean situtungan di Jahowa.

²⁶ (V.) Dung i ro muse hata ni Jahowa tu si Musa songon on:

²⁷ Tole di ari sampulu di bulan sipaha pitu i, i ma ari raya pardenggan, i ma ari parluhutan na badia di hamu, ingkon paunduhonmuna rohamuna disi dohot mamelehon sada pelean situtungan di Jahowa.

²⁸Nanggo sada ulaon ndang jadi ulahononmuna di ari na sasada i, ai ari raya pardenggan do i mambahen pardenggan di hamu di adopan ni Jahowa, Debatamuna i.

²⁹Ai manang ise na so paunduk rohana di ari na sasada i, ingkon siaphononhon do i sian tongatonga ni bangsona.

³⁰Jala manang ise na mangula nanggo sada ulaon di ari na sasada i, ingkon Ahu mangago halak sisongon i sian tongatonga ni bangsona.

³¹Nanggo sada ulaon ndang jadi ulahononmuna disi; ingkon patik na hot salelenglelengna ma i di saluhut pinomparmuna di saluhut ingananmuna i.

³²Ingkon ari Sabbath paradianan ma i di hamu, jala ingkon paunduhonmuna rohamuna di ari sia di bulan na sasada i mareak bodari; ingkon sian bodari sahat tu bodari marsogotna i hamu maradian di ari Sabbathmu.

³³(VI.) Dung i ro muse hata ni Jahowa tu si Musa songon on:

³⁴Paboa ma tu halak Israel songon on: Di ari sampulu lima di bulan sipaha pitu, disi ma ari raya parlapelapean di Jahowa, pitu ari lelengna.

³⁵Di ari parjolo do ari parluhutan na badia; nanggo sada ulaon ariari ndang jadi ulahononmuna disi.

³⁶Ingkon pitu ari padodot hamu mamelehon pelean situtungan di Jahowa; tole

pauualuarihon, ingkon ari parluhutan na badia di hamu, jala pelehononmuna pelean situtungan di Jahowa, i ma mata ni ari raya i, nanggo sada ulaon ariari ndang jadi ulahononmuna disi.

³⁷I ma angka ari raya di Jahowa, ingkon tingtingkononmuna do i bahen ari parluhutan na badia laho mamelehon tu Jahowa angka pelean api, pelean situtungan, pelean sipanganon, pelean sipotongan dohot pelean siinumon, ganup di arina be.

³⁸So padohot angka ari Sabbath di Jahowa jala so padohot angka silehonlehonmuna dohot bagabagamuna dohot sude silehonlehonmuna sian lomo ni rohamuna, angka na nilehonmuna tu Jahowa.

³⁹Dibahen i di ari sampulu lima di bulan sipaha pitu, ia dung dipapungu hamu gogo ni tano i, ingkon bahenonmuna ari raya i di Jahowa, pitu ari lelengna; di ari parjolo do ari paradianan, di ari paualuhon i pe ingkon ari paradianan do.

⁴⁰Jala ingkon buatonmuna di hamu di ari parjolo parbue ni hau angka na denggan, angka bulung ni harambir, angka dangka ni hau na rugun, angka ampolu, jala marlas ni roha hamu di adopan ni Jahowa, Debatamuna i, pitu ari lelengna.

⁴¹Ingkon bahenonmuna ari raya i di Jahowa pitu ari lelengna di bagasan sataon; patik na

hot salelenglelengna ma i di pinomparmuna;
di bulan sipaha pitu ingkon marari raya hamu.

⁴²Ingkon pitu ari lelengna hamu maringan di
bagasan angka parlapelapean; nasa na tubu
di halak Israel, ingkon maringan di bagasan
angka undungundung.

⁴³Asa tung diboto pinomparmuna, paboa
Ahu mambahen halak Israel maringan
di bagasan angka undungundung, uju Ahu
manogihon nasida ruar sian tano Misir; ai Ahu
do Jahowa, Debatamuna i.

⁴⁴Dung i dipaboa si Musa ma tu halak Israel
angka ari raya ni Jahowa.

24¹(I.) Dung i ro muse ma hata ni
Jahowa tu si Musa songon on:

²Dokkon ma halak Israel, asa diboan nasida
tu ho miak Jetun na niduda jala na tinapis
bahen miak palito, asa tongtong galak palito
i.

³Ingkon di ruar ni rimberimbe na mangolat
poti parpadanan i di bagasan undungundung
parluhutan hobason ni si Aron palito i olat ni
bodari sahat ro di manogotna i di adopan ni
Jahowa. I ma aturan na hot salelenglelengna
di pinomparmuna i.

⁴Alai ingkon di atas parpalitoan sian sere
na pita hobasonna tongtong angka palito i di
adopan ni Jahowa.

⁵Ingkon buatonmu huhut itak na lamot, jala
masahanmu ma sian i sampulu dua sagusagu,
ganup sagusagu i dua parpulan.

⁶Jala ingkon peakkononmu do i bahen dua timbunan, onomonom sada timbunan di atas meja sian sere na pita di adopan ni Jahowa.

⁷Jala ingkon bahenonmu di atas ni ganup timbunan daupa na pita bahen pelean parningotan di roti i, i ma sada pelean api di Jahowa.

⁸Ingkon gonop ari Sabbath do i hobasonna tongtong di adopan ni Jahowa sian halak Israel bahen padan salelenglelengna.

⁹Jala ingkon jambar ni si Aron dohot angka anakna do i, sipanganonnasida do i di bagasan inganan na badia i, ai i ma apala na badia sahali di ibana sian angka pelean api na tu Jahowa, aturan na hot salelenglelengna do i.

¹⁰(II.) Dung i ruar ma anak ni sada boru Israel, alai halak Misir do anggo amana, di tongatonga ni halak Israel; jadi marbadai ma anak ni boru Israel i dohot sahalak Israel di parsaroan.

¹¹Jadi diinsahi anak ni boru Israel i ma Goar ni Jahowa, laos mamburai ibana. Dung i diboan nasida ma ibana tu jolo ni si Musa; ia goar ni inana i ma si Selomit, boru ni si Dibri sian marga Dan.

¹²Dung i dibahen nasida ma ibana tu bagasan hurungan, paima tangkas uhum dabuonnasida hombar tu hata ni Jahowa.

¹³Dung i ro ma hata ni Jahowa tu si Musa songon on:

¹⁴Togihon ma halak pamuraili tu balian ni parsaroan i, jala saluhut halak na umbege pamuraionna i, ingkon mangampehon tangannasida tu atas uluna, laos sandok luhutan i mandangguri ibana mate dohot batu.

¹⁵Jala ingkon dohononmu ma tu halak Israel: Manang ise pe na mamburai Debatana, ingkon manginona tu ibana dosana i.

¹⁶Jala manang ise na manginsahi Goar ni Jahowa, ingkon marutang hosa ibana, ingkon sandok luhutan i mandangguri ibana mate dohot batu, nang halak dagang, nang halak isi ni tano i hian, molo tung diinsahi Goar ni Jahowa, ingkon marutang hosa ibana.

¹⁷(III.) Manang ise na mangompongi donganna jolma, pola mate, ingkon marutang hosa ibana.

¹⁸Manang ise na mangompongi mate pinahan ni halak na asing, ingkon abulonna do i, pinahan singkat ni pinahan.

¹⁹Manang ise na mamukpuhi donganna jolma, suang songon na binahenna bahenon tu ibana.

²⁰Bugang abul ni bugang, mata abul ni mata, ipon abul ni ipon; manang sahitsahit dia tahe binahenna tu donganna jolma, ingkon suang songon i bahenon tu ibana.

²¹Asa manang ise na mangompongi mate pinahan, ingkon abulonna do i; alai manang

ise na mambunujolma, ingkon marutang hosa ibana.

²²Ingkon sisada uhum di hamu, di halak dagang, suang songon di halak isi ni tano hian; ai Ahu do Jahowa Debatamuna i.

²³Dung i dipatolhas si Musa ma hata i tu halak Israel, jadi ditogihon nasida ma halak panginsahi i ruar tu balian ni parsaroan jala mate ibana didangguri dohot batu. Asa dibahen halak Israel ma songon na tinonahon ni Jahowa tu si Musa.

25¹(I.) Dung i ro ma hata ni Jahowa tu si Musa di dolok Sinai songon on:

²Paboa ma tu halak Israel jala dohononmu ma tu nasida: Ia dung masuk hamu tu tano, silehononku tu hamu, ingkon pataluonmu do tano i marparadianan Sabbath di Jahowa.

³Ingkon onom taon lelengna saburonmu ladangmu jala onom taon lelengna paiasasonmu ranting ni hau anggurmu dohot papunguhon angka parbuena.

⁴Alai anggo di taon papituhon, ingkon marparadianan Sabbath do tano i, i ma Sabbath di Jahowa, ndang jadi saburonmu disi ladangmu manang paiasonmu ranting ni hau anggurmu.

⁵Alai anggo sagak, na tubu dung salpu gotilon, ndang jadi gotilonmu, angka parbue ni hau anggurmu na so pinaiasmu i pe ndang jadi tapuonmu, ala taon paradianan Sabbath di tano i do i.

⁶Inggon gogo ni tano i di taon paradianan Sabbath i, ingkon gabe sipanganon di hamuna, di ho tahe dohot di naposom baoa dohot parompuan dohot di halak gajianmu dohot di donganmu sajabu, nang di halak dagang na manginsua di lambungmi.

⁷Di pinahanmu dohot di binatang na di tanomu; sandok gogo ni tano i tahe ingkon gabe sipanganon.

⁸(II.) Dung i bilanganmu ma di ho pitu taon paradianan Sabbath, i ma pitu hali pitu taon, asa leleng ni na pitu taon paradianan Sabbath gabe opatpulu sia taon toropna.

⁹Ingkon mangkuling ma bahenonmu soara ni sarune tingting di bulan sipaha pitu di ari sampulu, ingkon di ari pardenggan tahe mangkuling bahenonmuna soara ni sarune tingting di sandok tanomuna i.

¹⁰Ingkon parbadiaanmuna do taon palimapuluhon jala tingtingkononmuna haluaon di tano i tu saluhut halak pangisina; ingkon gabe taon parolopolopon do i di hamu, jala ingkon mulak hamu ganup tu partalianna, mulak huhut ganup tu donganna hian.

¹¹Taon parolopolopon do tahe di hamu taon palimapuluhon i; ndang jadi hamu manabur disi jala ndang jadi hamu manggotil sagakna, jala ndang jadi tapuonmuna parbue ni hau anggur na so pinaias i rantingna.

¹²Ai taon parolopolopon do i, ingkon badia do i di hamu ingkon panganonmuna disi gogo ni ladang na tubu boti.

¹³Ia di taon parolopolopon i, ingkon mulak tu ganup partalianna hian.

¹⁴(III.) Dibahen i tung sura digadis hamu manang aha tu donganmu manang tinuhormu tahe sian tangan ni donganmu, ndang jadi hamu masiangatan sama dongan.

¹⁵Ingkon marguru tu bilangan ni taon dung salpu taon parolopolopon tuhoronmu do i sian donganmu; ingkon marguru tu bilangan ni taon pambuatmu di gogona, gadisonna do i muse tu ho.

¹⁶Marguru tu torop ni taon ingkon pagandaonmu panuhorna, jala marguru tu otik ni taon, ingkon paoruonmu do panuhorna, ai bilangan ni pambuatmu di gogo ni tano i huhut ginadisna tu ho.

¹⁷Dibahen i ndang jadi masiangatan hamu sama dongan, alai ingkon marhabiaran hamu mida Debatamu; ai Ahu do Jahowa, Debatamuna i.

¹⁸Dibahen i ingkon patupaonmuna angka aturanku jala radotanmuna angka uhumhu, asa marparange hamu hombar tusi, asa marsonangsonang hamu maringan di tano i.

¹⁹Ingkon lehonon ni tano i parbuena asa singkop panganonmuna, jala marsonangsonang hamu maringan disi.

²⁰Jala tung sura dohononmuna: Tung aha ma panganonnamu di taon papituhon i, ai ndang jadi hami manabur, jala ndang jadi hami papunguhon gogo ni tanonami?

²¹Ingkon dohononku ma pasupasungku songgop tu hamu di taon paonomhon i, asa tubuhononna gogona di hamu singkop tolu taon.

²²Asa molo manabur hamu di taon pauluhon, ingkon panganonmuna sian parbue na musang i sahat ro di taon pasiahon sahat ro di haroro ni parbue na imbaru tahe, ingkon panganonmuna na musang.

²³Dibahen i ndang jadi gadisonmuna tano i sipatepate, ai Ahu do nampuna tano i, halak dagang do anggo hamu jala paisolat di lambungki.

²⁴Asa di sandok tano partalianmuna i, ingkon masuk sitobus di tano i.

²⁵Tung sura lam marpogos donganmu, gabe digadis deba sian partalianna, gabe ro donganna na sumolhot tu ibana, ingkon tobusonna na ginadis ni donganna i.

²⁶Alai tung sura adong sahalak na so tangkas mardongan tau panobus, hape lam dapot tanganna do na singkop bahen partobusna:

²⁷Ingkon etonganna angka taon panggadisna, jala na lobi sian hepeng i ingkon paulahonna tu jolma panggadisanna i, asa mulak ibana tu partalianna.

²⁸Alai tung sura ndang singkop dapot tanganna, asa paulahonna tu ibana, barang na ginadisna i, ingkon tinggal do i gomgomon ni halak panuhor, paima jumpang taon parolopolopon; alai anggo di taon parolopolopon malua boti do i gabe mulak ibana tu partalianna.

²⁹Tung sura adong sahalak naung manggadis jabuna di bagasan huta na marparik, jadi do tobusonna dung boho sataon panggadisna i; i ma buhulna tartobussa.

³⁰Alai tung sura so ditobus dung boho na sataon i, ingkon pate bagas na di bagasan huta na marparik di panuhor ro di pinomparna, ndang jadi mulak nang di taon parolopolopon.

³¹Alai anggo angka bagas na di sosor mamungka, angka na so marparik dope humaliang, ingkon doshon ladang ni luat i do i etongan, masuk do tobusonna, jala ingkon mulak boti di taon parolopolopon.

³²Alai anggo taringot tu huta ni halak Lepi, angka bagas tahe di bagasan huta partaliannasida i, ingkon tongtong do masuk tobuson ni halak Lepi.

³³Tung sura adong manang ise na so manobus manang aha sian halak Lepi, ingkon mulak boti bagas na ginadis i manang huta ni partalianna pe anggo di taon parolopolopon; ai angka bagas di bagasan huta ni halak Lepi,

i do partaliannasida i di tongatonga ni halak Israel.

³⁴Alai anggo tano upa parik humaliang hutanasida i, ndang jadi gadison, ai partaliannasida do i ro di salelenglelengna.

³⁵(IV.) Tung sura lam marpogos donganmu, lam surut tahe parbohalon di lambungmu, ingkon tolonganmu do ibana, nang halak dagang nang halak paisolat ibana, asa mangolu ibana di lambungmu.

³⁶Ndang jadi buatonmu sian ibana bunga ni hepeng manang parlabaan na torbang, ingkon mabiar do ho mida Debatam, asa mangolu donganmu di lambungmu.

³⁷Ndang jadi paanakkononmu hepengmu mambuat bunga, manang pasalihononmu emem mambuat parlabaan sian i.

³⁸Ai Ahu do Jahowa, Debatamuna i, naung manogihon hamu ruar sian tano Misir, naeng marbasabasahon tu hamu tano Kanaan, asa Ahu gabe Debatamuna.

³⁹(V.) Tung sura lam marpogos donganmu di lambungmu, pola mangadop ibana tu ho, ndang jadi dohononmu ibana mangula ulaon ni hatoban.

⁴⁰Ingkon songon halak gajian manang panginsua ibana di lambungmu, jala mangunduk tu ho, sahat ro di taon parolopolopon.

⁴¹Dung i ingkon malua boti ibana sian ho, ibana tahe rap dohot anakonna, jala ingkon

mulak ibana tu donganna hian, mulak huhut tu partalian ni ompuna.

⁴²Ai nang nasida angka naposongku do, angka naung hutogihon ruar sian tano Misir; dibahen i ndang jadi gadison nasida, songon panggadis ni halak di hatoban.

⁴³Ndang jadi maporanhua pangarajaionmu di ibana, ai ingkon habiaranmu do Debatam.

⁴⁴Molo naeng ho marhatoban baoa manang parompuan, ingkon tuhoronmu do i sian bangso parbegu, angka na humaliang hamu; ai holan sian nasida do na jadi tuhoronmu hatoban baoa manang parompuan.

⁴⁵Nang sian angka anak ni halak dagang, angka na maisolat di tongatongamuna, jadi do tuhoronmuna sian nasida dohot sian pinomparnasida na di lambungmuna, angka na tubu di bagasan tanomuna, nasida do na jadi gabe hatobanmuna.

⁴⁶Jadi do huhut nasida gabe teanteanan di anakmuna, dung salpu hamu, bahen ugasan siteanon, gabe hatobannasida ro di saleleng ni lelengna; alai anggo hahaanggimuna, halak Israel i, ndang jadi marporanhua pangarajaion ni ganup tu donganna.

⁴⁷Tung sura lam naek sorga sahalak dagang manang panginsua di lambungmi, hape lam marpogos ia donganmu di lambungna, pola mandingding ibana tu halak dagang, panginsua na di lambungmi manang tu pinompar ni halak dagang i.

⁴⁸Ingkon masuk do tobuson ibana dung ginadisna dirina; ingkon sahalak sian hahaanggina manobus ibana.

⁴⁹Manang amangtuana, manang anak ni amangtuana na jadi manobus ibana, manang sihasolhotanna na asing pe ingkon tobusonna ibana; manang ia dapotan pangomoan tanganna, ingkon ibana manobus dirina.

⁵⁰Alai ingkon jolo marpopar ibana dohot halak na manuhor ibana, olat ni taon panuhorna di ibana sahat ro di taon parolopolopon, jala ingkon marguru tu bilangan ni taon taksiron hepeng panuhorna i, hira halak gajian ariari di lambungna.

⁵¹Tung sura torop dope angka taon i, ingkon marguru tusi godang ni hepeng panuhorna hian paulahonna masuk partobusna.

⁵²Alai molo otik nama tinggal taonna, paima jumpang taon parolopolopon, ingkon etongonna do i; marguru tu bilangan ni taonna ingkon paulahonna hepeng partobusna i.

⁵³Ingkon songon halak gajian ibana di lambungna sian taon na sada tu taon muse, jala ndang jadi maporanhua pangarajaionna mida ibana di adopan ni matam.

⁵⁴Alai tung sura ndang dapotsa tobusonna dirina marhite sian i, ingkon malua boti ibana di taon parolopolopon rap dohot angka anakkonna.

⁵⁵ Ai angka naposongku do halak Israel, naposongku ma tutu angka naung hutogihon ruar sian tano Misir. Ahu do Jahowa, Debatamuna i.

26 ¹ (I.) Nandang jadi hamu paulihon di hamu ajiajian manang ganaganaan, jala ndang jadi hamu pajongjongkon di hamu tiang bahen parningotan manang batu bahen panombanombaan di tanomuna, laho marsomba tusi; ai Ahu do Jahowa, Debatamuna i.

² Ingkon radotanmuna do angka ari Sabbathu, jala marmulia bahenonmuna ingananku na badia i; ai Ahu do Jahowa.

³ Molo marparange hamu di bagasan angka aturanku jala diradoti hamu angka tonangku dohot patupahon angka i.

⁴ Jadi lehononku ma tu hamu udan di tingki halehetanna, jala lehonon ni tano i ma gogona, hau di ladang pe lehononna ma parbuena.

⁵ Jadi tuk ma partaonanmuna sian tingki pardegeon sahat tu tingki panapuon di parbue ni anggur, boti muse tu tingki panaburon. Jadi panganonmuna ma sagusagumuna maradu bosuran, jala marsonangsonang hamu maringan di tanomuna i.

⁶ Jala bahenonku ma marhasonangan tano i, asa sonang hamu modom, jala ndang adong panonggoti nanggo sahalak; jala Ahu maniaphon angka binatang na rahat sian

tano i, podang i pe ndang be jadi pasusasusa tanomuna i.

⁷Ingkon leleanmuna do angka musumuna i, asa marragean nasida di adopanmuna bahenon ni podang.

⁸Ingkon lima halak sian hamu mangalele saratus, jala saratus halak sian hamu mangalele saloksa, ingkon marragean musumuna di adopanmuna marhite sian podang.

⁹Jala marpanatap ma Ahu tu hamu, jala tumpahanku ma hamu matorop mabue, asa pahothon padanhu tu hamu.

¹⁰Jala panganonmuna ma eme na musang, jala paruaronmuna ma eme na musang i ala eme na imbaru i.

¹¹Jala pajongjongonku ma ingananku di tongatongamuna, jala ndang marbiasbias rohanku mida hamu.

¹²Jala Ahu mardalani di tongatongamuna, jala Ahu gabe Debatamuna, jala hamu gabe bangsongku.

¹³Ahu do Jahowa, Debatamuna i, naung manogihon hamu ruar sian tano Misir, asa unang be hamu hatobannasida, jala nunga Ahu mamonggolhon hau ni augamuna, jala Ahu mambahen marsihohot langkamuna.

¹⁴(II.) Alai tung sura ndang ditangihon hamu Ahu, jala ndang diulahon hamu sude angka tona on.

¹⁵Jala tung sura ditoishon rohamuna angka aturanku jala marbiasbias rohamuna mida angka uhumhu, gabe ndang diulahon hamu sude angka tonangku, lam diose hamu tahe padan na hubahen i.

¹⁶Ahu pe antong bahenonku ma tu hamu songon on: Marlulu ma Ahu dompak hamu marhite sian hasonggoton, sahit tiarap dohot panepane, pola lotop matamuna bahenonna jala malampot ateatemuna; magopo sambing bonimuna saburhononmuna, ai suda do i panganon ni musumuna.

¹⁷Ahu huhut pahasorhon Bohingku mangalo hamu, asa tunduk hamu bahenon ni musumuna, jala halak na mangkagigihon hamu manggomgomi hamu, gabe ripe maporus hamu, atik pe so adong na mangalele hamu, nanggo sahalak.

¹⁸Tung sura laos ndang ditangihon hamu dope Ahu, lompit pitu hali dope pinsangonku hamu ala ni dosamuna i.

¹⁹Laos Ahu ma pajepolhon hajungkaton ni gogomuna, jala Ahu mambahen langitmuna hira gabe bosi jala tanomuna i hira gabe tombaga.

²⁰Asa tung magopo sambing halojaonmuna, jala ndang be lehonon ni tanomuna gogona, angka hau di ladang pe ndang be lehononna parbuena.

²¹Tung sura laos mangalo dope hamu dompak Ahu jala ndang olo hamu

manangihon Ahu, lompit pitu hali dope
torungku tu hamu, hombar tu dosamuna i.

²²Pamasaongku ma di tongatongamuna
binatang na rahat sian harangan na
mambahen hamu punu dohot mangago
pinahanmuna dohot paoruhon bilanganmuna
dohot mambahen tarulang angka dalanmuna
i.

²³Tung sura laos so olo dope hamu
mangkangoluhon pinsangpinsang na sian
Ahu, laos mangalo dope hamu dompak Ahu.

²⁴Toltol ma dohot rohangku mangalo hamu,
lompit pitu hali ma panoruingku tu hamu ala
ni dosamu.

²⁵Ahu sandiri parohon mangalo hamu
podang partubolon mangaluluhon padan na
hubahen i: Tung sura marpungupungu hamu
di bagasan angka hutamuna i, tongosonku
ma begu antuk di tongatongamuna, jala
pasahatonku hamu tu bagasan tangan ni
musu.

²⁶Ia dung huponggolhon tungkot parbohalan
sian hamu, gabe sampulu parompuan
marmasak rotimuna di bagasan sada
liang parmasahan, pola martimbangan
paulahonnasida sagusagumuna i, laos
panganonmuna do nian, alai ndang butong.

²⁷Tung sura laos so ditangihon hamu dope
Ahu marhite sian i, tong dope hamu mangalo
dompak Ahu.

²⁸Toltol ma dohot rohangku mangalo hamu marhite sian rimas na marsigorgor, jala lompit pitu hali dope hamu toruanku, ala ni dosamuna i.

²⁹Ingkon laos hamu manganhon sibuk ni anakmuna sandiri dohot sibuk ni borumuna i.

³⁰Laos Ahu mangarumpakkon angka joro parsantianmuna dohot maniaphon angka tiang panombanombaanmuna, jala Ahu mangareongkon bangkemuna tu atas ponggolponggol ni ajiajianmuna, laos marbiasbias ma rohangku mida hamu.

³¹Jala tarulang ma bahenonku hutamuna gabe halongonan, jala lohaonku ma angka ingananmuna na badia i, jala ndang be lomo rohangku manganggo uap na hushus sian hamu.

³²Ahu ma tutu mangulang tano i, pola tarhatotong ala ni musumuna, angka na maringan disi.

³³Alai anggo hamu paserahonku ma tu tongatonga ni angka bangso parbegu, laos Ahu patioptiop podang na niumpat mangeak hamu sian pudi, asa gabe halongonan tanomuna i jala tarulang angka hutamuna i.

³⁴Disi ma sombu roha ni tano i di angka Sabbath hatalunanna, saleleng tarulang tahe, uju hamu di tano ni musumuna; disi ma tutu marari Sabbath hatalunan tano i, jala sombu rohana di angka Sabbath hatalunanna i.

³⁵ Saleleng halongonan tahe marari Sabbat hatalunan tano i, ala so tarbahensa marari Sabbat hatalunan, saleleng hamu maringan disi.

³⁶ Ia tujolma angka na tinggal i sian hamu patubonku ma roha hagodoron di tano ni musunasida i, asa paderes ni sada bulung mangalele nasida, asa maporus nasida songon halak na nieak ni podang, jala marragean nasida, atik pe soada na mangalele nanggo sahalak.

³⁷ Jala martinggangan hamu ganup binahen ni donganna, hira na nieak ni podang, hape so adong na mangeak nanggo sahalak; jala ndang manahan hamu jongjong di adopan ni musumuna.

³⁸ Ingkon mago hamu di tongatonga ni angka bangso parbegu, jala suda hamu panganon ni tano ni musumuna i.

³⁹ Alai angka na tinggal i sian hamu ingkon mandate do binahen ni hajahatonna di angka luat ni musumuna; angka hajahaton ni ompunasida pe, ingkon manginona tu nasida umbahen mandate nasida.

⁴⁰ (III.) Alai molo tung diundukkon nasida hajahatonnasida i dohot hajahaton ni ompunasida i, na manggunturi i nasida dompak Ahu, jala dipatangkan rohana mangalo Ahu.

⁴¹ Alana huhut umbahen hehe dohot Ahu mangalo nasida dohot mamboan nasida tu

tano ni angka musunasida, anggiat tung dipaunduk rohanasida na so tarsunat i, jala dihalomohon torutoru ala hajahatonnasida.

⁴²Jadi marningot ma Ahu di padan na hubahen i tu si Jakkob, si Isak dohot tu si Abraham, marningot Ahu huhut di tano i.

⁴³Alai anggo tano i, dung ditinggalhon nasida, halomohononna ma ari Sabbath hatalunanna, ala tarulang do i binahennasida, nasida sandiri pe halomohononna do torutoru ala hajahatonnasida i, ala naung tinoisanna i tutu angka uhumhu jala marbiasbias rohana mida angka aturanku.

⁴⁴Alai nang tung sura pe naung sahat nasida tu tano ni musunasida i, ndang bolongkononku nasida situtu manang marbiasbias Ahu mida nasida, anggo tung maniaphon nasida situtu laho manguba padan na hubahen i tu nasida; ai Ahu do Jahowa, Debatanasida i.

⁴⁵Ingotonku ma huhut tu nasida padan na hubahen i tu ompunasida parjolo, uju na hutogihon nasida ruar sian tano Misir di adopan ni angka bangso parbegu, asa Ahu gabe Debatanasida; Ahu Jahowa i tutu.

⁴⁶I ma angka aturan dohot uhum dohot patik, angka na pinatindang ni Jahowa parjanjianna tu halak Israel di dolok Sinai marhite sian tangan ni si Musa.

27 ¹(I.) Dung i ro ma hata ni Jahowa tu si Musa songon on:

²Paboa ma tu halak Israel jala dok ma tu nasida: Tung sura manang ise naeng marbagabaga hasurungan, ingkon marguru tu pangasammu di angka jolma i gararonna tu Jahowa.

³Ia pangasammu di baoa na marumur duapulu taon sahat ro di onompulu taon, ingkon asamonmu ibana limapulu sekkel perak marguru tu sekkel na di inganan na badia i.

⁴Alai tung sura parompuan ibana, ingkon asamonmu tolupulu sekkel.

⁵Molo marumur lima taon jolma i sahat ro di duapulu taon, ingkon asamonmu ibana duapulu sekkel, molo baoa, alai molo parompuan sampulu sekkel do.

⁶Molo marumur ibana sabulan sahat ro di lima taon, ingkon asamonmu ibana lima sekkel perak, molo baoa, alai molo parompuan tolu sekkel perak asamonmu.

⁷Tung sura onompulu taon umur ni jolma i manang lobi sian i, ingkon asamonmu ibana sampulu lima sekkel, molo baoa, sampulu sekkel molo parompuan.

⁸Alai tung sura mapogoshu ibana manggarar pangasammu, ingkon ro ibana tu jolo ni malim i, asa malim i mangasam ibana; alai ingkon marguru tu na dapot tangan ni halak na marbagabaga i asamon ni malim i ibana.

⁹Alai tung sura pinahan do i na tarpelehon bahen pelean tu Jahowa, nasa na pinelehon ni halak sian i na badia do i di Jahowa.

¹⁰Ndang jadi singkaton manang pasambaran, na denggan singkat ni na roa manang na roa singkat ni na denggan; alai tung sura naeng sambaran ni manang ise, pinahan singkat ni pinahan, ingkon duansa badia di Jahowa.

¹¹Alai tung sura pinahan na ramun do i na so jadi pelehononhon bahen pelean tu Jahowa, ingkon boanon do pinahan i tu adopan ni malim i.

¹²Ingkon malim i muse mangasam pinahan i, manang na denggan manang na roa, jala ingkon pangasam ni malim i do na lalu.

¹³Alai tung sura manang ise naeng manobussa, ingkon patambaonna saparlimana sian pangasammu hian.

¹⁴Tung sura manang ise pabadiahon bagasna bahen inganan na badia di Jahowa, ingkon asamon ni malim do i, manang na denggan manang na roa; ia songon i pangasam ni malim i disi, laos songon i do hot.

¹⁵Alai tung sura halak na pabadiahon i naeng manobus jabuna, ingkon patambaonna saparlima perak lobi sian pangasammu, jadi ibana ma nampuna jabu i.

¹⁶Tung sura manang ise pabadiahon di Jahowa santurpuk sian partalianna, ingkon

asamonmu do i hombar tu bonina; molo sada
ampang bonina ingkon mararga limapulu
sekkel perak.

¹⁷Molo olat ni taon parolopolopon ibana
pabadiahon ladangna, ingkon hombar tu
pangasammu do hot.

¹⁸Alai tung sura dung salpu taon
parolopolopon i, ibana pabadiahon ladang
i, ingkon timbangan ni malim argana
marguru tu taon angka na tinggal i sahat
tu taon parolopolopon, dung i oruanna ma
pangasamna i.

¹⁹Alai tung sura jolma na pabadiahon ladang
i naeng manobus muse, ingkon patambaonna
saparlima perak pangasammu hian, asa hot
di ibana.

²⁰Alai tung sura ndang naeng tobusonna
ladang i, lam digadis tahe ladang i tu halak
na asing, ndang tartobus be i.

²¹Ia dung malua ladang i di taon
parolopolopon, ingkon badia ma i di Jahowa,
suang songon ladang na hona harom, ingkon
gabe partalian ni malim do i.

²²Tung sura manang ise pabadiahon tu
Jahowa santurpuk hauma na nidondonna na
so golatna hian.

²³Ingkon etongan ni malim tu ibana hepeng
pangasammu sahat ro di taon parolopolopon,
dung i lehononna ma di na sadari i hepeng
pangasammu i, na badia di Jahowa do i.

²⁴Dapot taon parolopoloapon, ingkon mulak hauma i tu pandondonanna hian, tu jolma nampuna golat i.

²⁵Alai nasa pangasammu ingkon marguru tu sekkel na di inganan na badia i: Duapulu gera, i ma sada sekkel.

²⁶(II.) Holan buhabaju ni pinahan naung Jahowa hian nampunasa ala buhabaju, ndang jadi bagabagahonon ni manang ise, nang lombu, nang birubiru, badia hian do i di Jahowa.

²⁷Alai tung sura pinahan na ramun do i, ingkon tobusonna do i marguru tu pangasammu, jala ambaonna dope tusi saparlimana, alai tung sura so ditobus, jadi ma gadisonna marguru tu pangasammu.

²⁸Alai tahe nasa naung hona harom, naung hinaromhon ni manang ise tu Jahowa sian nasa ugasanna, nang jolma, manang pinahan, manang sian golatna pe, ndang jadi gadisonna manang tobusonna; ai nasa naung hona harom na badia sahali do i di Jahowa.

²⁹Nasa naung hona harom tahe, nang sian jolma, ndang jadi tobuson, ingkon marutang hosa do.

³⁰(III.) Nasa parpulan gogo ni tano i, nang sian boni di ladang, nang sian parbue ni hau, Jahowa tu nampunasa, ingkon badia di Jahowa do i.

³¹ Alai tung sura manang ise naeng manobus manang aha sian parpuluanna, ingkon ambaonna tusi saparlimana.

³² Jala nasa parpuluhan sian lombu manang birubiru, sian saluhut na tinudu ni batahi, ganup pasampuluhon tahe, ingkon badia di Jahowa do i.

³³ Ndang pola jolo tangkasan manang na uli manang na roa, jala ndang jadi pasambaronna; alai tung sura manang ise naeng manambarhon, ingkon gabe rap badia do, na sinambarhon dohot sambarna i, ndang jadi tobuson.

³⁴ I ma tona, angka na tinonahon ni Jahowa tu si Musa di dolok Sinai, pasahatonna tu halak Israel.

Bilangan

1 ¹ (I.) Dung i ro muse hata ni Jahowa tu si Musa di halongonan Sinai, di bagasan undungundung parluhutan i, di artia bulan sipaha dua, paduataonhon dung ruar nasida sian tano Misir, ninna ma:

² Surathon ma bilangan ni sandok luhutan ni Israel marmargamarga, marompuompu, marsasahalak nasa baoa tahe.

³ Olat ni na marumur duapulu taon dohot lobi sian i, nasa baoa sialo musu di Israel, ingkon bilanganmuna nasida mangihuthon parduaannasida, ho dohot si Aron.

⁴ Jala ingkon adong donganmuna sasahalak sian ganup marga, i ma gabe ihutan di nasida na samarga.

⁵ Jala on do goargoar ni angka baoa na jongjong mandongani hamu: Sian marga Ruben: Si Elizur, anak ni si Sedeur.

⁶ Sian Simeon: Si Selumiel, anak ni si Zurisaddai.

⁷ Sian Juda: Si Nahason anak ni si Aminadab.

⁸ Sian Isasar: Si Netaneel, anak ni si Zuar.

⁹ Sian Zebulon: Si Eliab, anak ni si Helon.

¹⁰ Sian angka anak ni si Josep, sian Epraim: Si Elisama, anak ni si Amihud; sian Manasse: Si Gamaliel, anak ni si Pedazur.

¹¹ Sian Benjamin: Si Abidan, anak ni si Gidion i.

¹² Sian Dan: Si Ahieser, anak ni si Amisaddai.

¹³ Sian Aser: Si Pagiel, anak ni si Okran.

¹⁴ Sian Gad: Si Eliasap, anak ni si Deuel.

¹⁵ Sian Naptali: Si Ahira, anak ni si Enan.

¹⁶ I ma halak angka na tarpio tu parluhutan i, angka induk marmargamarga, dohot marompuompu; angka ihutan marsasaribu halak di Israel do nasida.

¹⁷ (II.) Dung i dipapulik si Musa dohot si Aron ma angka baoa i, angka napola ginoar.

¹⁸ Laos sandok luhutan i paluhuthon nasida di artia bulan sipaha dua, asa dipasurathon partubuna be marmargamarga dohot marompuompu dohot marsasahalak baoa, olat ni na marumur duapulu taon dohot lobi sian i.

¹⁹ Hombar tu na tinonahon ni Jahowa tu si Musa, laos dibilangi ma nasida di halongonan Sinai.

²⁰ Ia bilangan ni pinompar ni si Ruben, anak buhabaju di Israel, mangihuthon partubunasida marmargamarga, marompuompu, marsasahalak pe, nasa baoa na marumur duapulu taon dohot lobi sian i, nasa baoa sialo musu.

²¹ Angka na tarbilang sian marga Ruben opatpulu onom ribu lima ratus halak toropna.

²² Ia bilangan ni pinompar ni si Simeon, mangihuthon partubunasida

marmargamarga, marompuompu,
marsasahalak pe, nasa baoa na marumur
duapulu taon dohot lobi sian i, nasa baoa
sialo musu.

²³Angka na tarbilang sian marga Simeon
limapulu sia ribu tolu ratus halak toropna.

²⁴Ia bilangan ni pinompar ni si
Gad, mangihuthon partubunasida
marmargamarga, marompuompu,
marsasahalak pe, na marumur duapulu taon
dohot lobi sian i, nasa baoa sialo musu.

²⁵Angka na tarbilang sian marga Gad
opatpulu lima ribu onom ratus limapulu halak
toropna.

²⁶Ia bilangan ni pinompar ni si
Juda mangihuthon partubunasida,
marmargamarga, marompuompu,
marsasahalak pe, na marumur duapulu taon
dohot lobi sian i, nasa baoa sialo musu.

²⁷Angka na tarbilang sian marga Juda
pitupulu opat ribu onom ratus halak toropna.

²⁸Ia bilangan ni pinompar ni si
Isasar mangihuthon partubunasida,
marmargamarga, marompuompu
marsasahalak pe, na marumur duapulu taon
dohot lobi sian i, nasa baoa sialo musu.

²⁹Angka na tarbilang sian marga Isasar
limapulu opat ribu opat ratus halak toropna.

³⁰Ia bilangan ni pinompar ni si
Zebulon mangihuthon partubunasida
marmargamarga, marompuompu,

marsasahalak pe, na marumur duapulu taon dohot lobi sian i, nasa baoa sialo musu.

³¹Angka na tarbilang sian marga Zebulon limapulu pitu ribu opat ratus halak toropna.

³²Ia bilangan ni pinompar ni si Josep, i ma sian Epraim mangihuthon partubunasida marmargamarga, marompuompu, marsasahalak pe, na marumur duapulu taon dohot lobi sian i, nasa baoa sialo musu.

³³Angka na tarbilang sian marga Epraim opatpulu ribu lima ratus halak toropna.

³⁴Ia bilangan ni pinompar ni si Manasse mangihuthon partubunasida marmargamarga, marompuompu, marsasahalak pe, na marumur duapulu taon dohot lobi sian i, nasa baoa sialo musu.

³⁵Angka na tarbilang sian marga Manasse tolupulu dua ribu dua ratus halak toropna.

³⁶Ia bilangan ni pinompar ni si Benjamin mangihuthon partubunasida marmargamarga, marompuompu, marsasahalak pe, na marumur duapulu taon dohot lobi sian i, nasa baoa sialo musu.

³⁷Angka na tarbilang sian marga Benjamin tolupulu lima ribu opat ratus halak toropna.

³⁸Ia bilangan ni pinompar ni si Dan mangihuthon partubunasida marmargamarga, marompuompu, marsasahalak pe, na marumur duapulu taon dohot lobi sian i, nasa baoa sialo musu.

³⁹Angka na tarbilang sian marga Dan onompulu dua ribu pitu ratus halak toropna.

⁴⁰Ia bilangan ni pinompar ni si Aser mangihuthon partubunasida marmargamarga, marompuompu, marsasahalak pe, na marumur duapulu taon dohot lobi sian i, nasa baoa sialo musu.

⁴¹Angka na tarbilang sian marga Aser opatpulu sada ribu lima ratus halak toropna.

⁴²Ia bilangan ni pinompar ni si Naptali mangihuthon partubunasida marmargamarga, marompuompu, marsasahalak pe, nasa baoa sialo musu.

⁴³Angka na tarbilang sian marga Naptali limapulu tolu ribu opat ratus halak toropna.

⁴⁴I ma sudejolma na tarbilang, angka na binilang ni si Musa dohot si Aron rap dohot induk ni Israel na sampulu dua halak i, ganup nasida ihutan di nasida na saompu.

⁴⁵Asa saluhut angka na tarbilang sian halak Israel marompuompu, olat ni na marumur duapulu taon dohot lobi sian i, nasa baoa sialo musu di Israel.

⁴⁶Luhut angka na tarbilangi tahe onom ratus tolu ribu lima ratus limapulu halak toropna.

⁴⁷(III.) Alai anggo halak Lepi, nasida na samarga marompuompu, ndang masuk tu bilangannasida.

⁴⁸Ai nunga didok Jahowa hian tu si Musa songon on:

⁴⁹Holan marga Lepi ndang jadi bilanganmu, jala ndang jadi papunguon toropnasida i di tongatonga ni halak Israel.

⁵⁰Ingkon pabangkitonmu tahe halak Lepi patureture joro panindangion i ro di sude ulaulana dohot angka na masuk tusi; ingkon nasida do mangusung undungundung i ro di sude ulaulana, jala nasida marhalado disi, laos marsaro humaliang undungundung i.

⁵¹Ia jumpa borhat undungundung i, ingkon halak Lepi do manduduk; jala ia jumpa mangulon undungundung i, ingkon halak Lepi muse pajongjongkon; tung sura jumonok halak sileban tusi, ingkon marutang hosa ibana.

⁵²Ingkon marsaro dohot halak Israel, ganup di parsaroanna be, jala ganup mardonokkon partonggolna mangihuthon parduaan ni paranganna.

⁵³Alai anggo halak Lepi, ingkon marsaro humaliang undungundung panindangion i, asa unang mangonai rimas na marpiarpiar tu luhutan ni halak Israel; dibahen i ingkon radotan ni halak Lepi do siradotan i di undungundung panindangion i.

⁵⁴Dung i dibahen halak Israel ma hombar tu saluhut na tinonahon ni Jahowa tu si Musa, laos songon i dibahen nasida.

2¹(I.) Dung i ro ma hata ni Jahowa tu si Musa dohot tu si Aron songon on:

²Ingkon marsaro halak Israel ganup mardonokkon partonggolna, partinandaan ni nasida marompuompu, jala ingkon marsaro nasida tondong ni undungundung parluhutan i humaliang.

³Dungkon habinsaran ingkon marsaro marga Juda rap dohot partonggolna dohot paranganna, jala si Nahason, anak ni si Aminadab, ihutan ni halak Juda.

⁴Jala paranganna angka naung tarbilangi pitupulu opat ribu onom ratus halak toropna.

⁵Jala di lambungna ingkon marsaro marga Isasar, jala si Netaneel, anak ni si Zuar, ihutan ni halak Isasar.

⁶Jala paranganna angka naung tarbilangi limapulu opat ribu opat ratus halak toropna.

⁷Tole muse marga Zebulon, jala si Eliab, anak ni si Helon, ihutan ni halak Zebulon.

⁸Jala paranganna angka naung tarbilangi limapulu pitu ribu opat ratus halak toropna.

⁹Jadi luhut angka na tarbilangi sian parsaroan Juda saratus ualupulu onom ribu opat ratus halak toropna, angka na masuk tu paranganna, jala ingkon nasida manguluhon.

¹⁰Dingkan dangsina ingkon marsaro partonggol ni marga Ruben, rap dohot paranganna, jala si Elizur, anak ni si Sedeur, ihutan ni halak Ruben.

¹¹Jala paranganna angka naung tarbilangi opatpulu onom ribu lima ratus halak toropna.

¹²Jala di lambungna ingkon marsaro marga Simeon, jala si Selumiel, anak ni si Zurisaddai, ihutan ni halak Simeon.

¹³Jala paranganna angka naung tarbilangi limapulu sia ribu tolu ratus halak toropna.

¹⁴Tole muse marga Gad, jala si Eliasap, anak ni si Rehuel, ihutan ni halak Gad.

¹⁵Jala paranganna angka naung tarbilangi opatpulu lima ribu onom ratus limapulu halak toropna.

¹⁶Jadi luhut angka na tarbilangi sian parsaroan Ruben saratus limapulu sada ribu opat ratus limapulu halak toropna, angka na masuk tu paranganna; jala ingkon parduan paidua nasida laho borhat.

¹⁷Dung salpu nasida ingkon borhat undungundung parluhutan i rap dohot parsaroan ni halak Lepi di tongatonga ni angka parsaroan suang songon parpeakna marsaro, laos songon i nasida borhat, ganup di ingananna be mardonokkon partonggolna.

¹⁸(II.) Dingkan hasundutan ingkon marsaro partonggol ni marga Epraim rap dohot paranganna jala si Elisama, anak ni si Amihud, ihutan ni halak Epraim.

¹⁹Jala paranganna angka naung tarbilangi opatpulu ribu lima ratus halak toropna.

²⁰Jala di lambungna ingkon marsaro marga Manasse, jala si Gamaliel, anak ni si Pedazur, ihutan ni halak Manasse.

²¹ Jala paranganna angka naung tarbilangi tolupulu dua ribu dua ratus halak toropna.

²² Tole muse marga Benjamin, jala si Abidan, anak ni si Gidion i induk nasida i.

²³ Jala paranganna angka naung tarbilangi tolupulu lima ribu opat ratus halak toropna.

²⁴ Jala luhut angka na tarbilangi sian parsaroan Epraim saratus ualupulu ribu saratus halak toropna, angka na masuk tu paranganna; jala ingkon parduan paitolu nasida laho borhat.

²⁵ Dingkan utara ingkon marsaro partonggol ni marga Dan rap dohot paranganna, jala si Ahiezer, anak ni si Amisaddai ihutan ni halak Dan.

²⁶ Jala paranganna angka naung tarbilangi onompulu dua ribu pitu ratus halak toropna.

²⁷ Jala di lambungna ingkon marsaro marga Aser, jala si Pagiél, anak ni si Okran, ihutan ni halak Aser.

²⁸ Jala paranganna angka naung tarbilangi opatpulu sada ribu lima ratus halak toropna.

²⁹ Tole muse marga Naptali, jala si Ahira, anak ni si Enan, ihutan ni halak Naptali.

³⁰ Jala paranganna angka naung tarbilangi limapulu tolu ribu opat ratus halak toropna.

³¹ Jala luhut angka na tarbilangi sian parsaroan Dan saratus limapulu pitu ribu onom ratus; jala ingkon parpudi nasida laho borhat mangihuthon tu partonggolna.

³²I ma saluhutna angka na tarbilang sian halak Israel marompuompu, saluhut angka na tarbilang tahe di bagasan parsaroan mangihuthon parduanna be onom ratus tolu ribu lima ratus limapulu halak toropna.

³³Alai anggo halak Lepi ndang dibilangi di tongatonga ni halak Israel, hombar tu na tinonahon ni Jahowa hian tu si Musa.

³⁴Jadi dibahen halak Israel ma saluhut songon na tinonahon ni Jahowa tu si Musa, laos songon i ma parpeaknasida marsaro mangihuthon partonggolna be, songon i dohot haboborhatnasida, ganup marmargamarga dohot marompuompu.

3¹ (I.) On do partubu ni pinompar ni si Aron dohot si Musa di ari uju na martona Jahowa tu si Musa di dolok Sinai.

²Jala on do goargoar ni angka anak ni si Aron: Anak buhabajuna si Nadab, dung i si Abihu, si Eleasar dohot si Itamar.

³On do goargoar ni anak ni si Aron, angka na miniahan gabe malim, angka naung pinabangkit mangaradoti hamalimon.

⁴Alai nunga mate punu anggo si Nadab dohot si Abihu di adopan ni Jahowa, uju na binoannasida api sileban tu adopan ni Jahowa di halongonan Sinai; alai anggo si Eleasar dohot si Itamar saut do mangaradoti hamalimon di adopan si Aron, amanasida i.

⁵Dung i ro ma hata ni Jahowa tu si Musa songon on:

⁶Dokkon ma ro jumonok marga Lepi jala pajongjong nasida di adopan ni malim si Aron, asa marhalado nasida di ibana.

⁷Asa diradoti nasida siradotanna hian di nasida sandiri dohot di sandok luhutan i di adopan ni undungundung parluhutan i, mangaringkoti ulaon di undungundung i.

⁸Laos nasida patureturehon angka ulaula di undungundung parluhutan i dohot patureture di halak Israel laho mangaradoti ulaon di undungundung i.

⁹Jala ingkon pasahatonmu halak Lepi bahen dongan ni si Aron dohot angka anakna i, ai angka nasida do naung binasabasahon tu ibana sian halak Israel.

¹⁰Alai anggo si Aron dohot angka anakna i, ingkon pabangkitonmu do, asa nasida mangaradoti hamalimonnasida i; alai tung sura jumonok halak sileban marulaon, ingkon marutang hosa ibana.

¹¹(II.) Dung i ro muse hata ni Jahowa tu si Musa songon on:

¹²Ida ma, nunga hubuat anggo halak Lepi sian tongatonga ni halak Israel bahen singkat ni nasa anak buhabaju sian halak Israel; asa Ahu do nampuna halak Lepi.

¹³Ai nasa anak buhabaju, Ahu do nampunasa; olat ni ari dung Ahu mambunu nasa anak buhabaju di tano Misir, nunga huparbadiai hian di Ahu nasa anak buhabaju

di Israel sian jolma ro di pinahan tahe, ingkon Ahu do nampunasa, ai Ahu do Jahowa.

¹⁴Dung i ro muse hata ni Jahowa tu si Musa di halongonan Sinai.

¹⁵Bilangi ma angka anak ni si Lepi marompuompu dohot marmargamarga, nasa baoa olat ni na marumur sabulan dohot lobi sian i, ingkon bilanganmu do nasida.

¹⁶Jadi tole ma si Musa mamilangi nasida hombar tu hata ni Jahowa, songon naung tinonahonna i.

¹⁷Jala angka on do goar ni angka anak ni si Lepi: Si Gerson, si Kohat dohot si Merari.

¹⁸Alai anggo goargoar ni angka anak ni si Gerson marmargamarga on do: Si Libni dohot si Simeï.

¹⁹Ia angka anak ni si Kohat marmargamarga: Si Amram, si Isebar, si Hebron dohot si Usiel.

²⁰Ia angka anak ni si Merari marmargamarga: Si Mahli dohot si Musi. I ma marga ni halak Lepi marompuompu.

²¹Sian pinompar ni si Gerson ro marga ni halak Libni dohot marga ni halak Simeï; i ma marga sian pinompar ni si Gerson.

²²Ia torop ni bilangannasida i, nasa baoa olat ni na marumur sabulan dohot lobi sian i pitu ribu lima ratus halak toropna.

²³Ia pinompar ni si Gerson, ingkon marsaro di pudi ni undungundung i tungkan hasundutan.

²⁴Jala ingkon si Eliasap, anak ni Lael, ihutan ni pinompar ni si Gerson.

²⁵Ingkon angka anak ni si Gerson do panahatan ni undungundung parluhutan i, i ma abit rimberimbena di bagasan dohot di langitlangitna dohot rimberimbe tutup ni pintu haroroan tu undungundung parluhutan i.

²⁶Tole rimberimbe ni alaman dohot rimberimbe tutup ni pintu haroroan tu alaman na humaliang undungundung i dohot humaliang langgatan, ro di talina angka na masuk tu ulaonna be.

²⁷Sian pinompar ni si Kohat ro marga ni halak Amram dohot marga ni halak Isebar dohot marga ni halak Hebron dohot marga ni halak Usiel; i ma angka marga sian pinompar ni si Kohat.

²⁸Ia bilangan ni nasa baoa olat ni na marumur sabulan dohot lobi sian i ualu ribu onom ratus halak toropna, angka na marhalado di bagasan inganan na badia i.

²⁹Ia pinompar ni si Kohat, ingkon marsaro di lambung ni undungundung i tungkan dangsina.

³⁰Jala ingkon si Elisapan, anak ni si Usiel, ihutan ni pinompar ni si Kohat.

³¹Ingkon nasida do panahatan ni poti i, meja i, parpalitoan i, angka langgatan i dohot ulaula angka na badia i, angka na pinangke

marulaon na badia, ro di rimberimbe rap dohot sude ulaulana.

³²Alai ihutan ni angka induk ni halak Lepi, i ma si Eleasar, anak ni malim Aron; ibana do panahatan ni halak, angka na marhalado di inganan na badia i.

³³Sian pinompar ni si Merari ro marga ni halak Mahli dohot marga ni halak Musi; i ma angka marga sian pinompar ni si Merari.

³⁴Ia torop ni bilangannasida i, nasa baoa olat ni na marumur sabulan dohot lobi sian i onom ribu dua ratus halak toropna.

³⁵Ingkon si Zuriel, anak ni si Abihail, ihutan ni pinompar ni si Merari, jala ingkon marsaro nasida di lambung ni undungundung i tungkan utara.

³⁶Jala ingkon anak ni si Merari panahatan ni angka papan ni undungundung i ro di ransangransangna, angka tiangna, angka pat ni tiang i, ro di nasa ulaulana dohot sude na masuk tu ulaonna i.

³⁷Angkup ni angka tiang ni alaman humaliang rap dohot angka patna, labangna dohot talina.

³⁸Alaijolma angka na marsaro di adopan ni undungundung i tungkan habinsaran, di adopan ni undungundung parluhutan i tungkan purba, i ma si Musa. Si Aron dohot angka anakna i, asa nasida mangaradoti ulaon di inganan na badia i laho marhalado di

halak Israel; tung sura jumonok halak sileban marulaon, ingkon marutang hosa ibana.

³⁹Bilangan ni halak Lepi luhutna, angka na binilang ni si Musa dohot si Aron, hombar tu hata ni Jahowa, mangihuthon margana be, nasa baoa olat ni na marumur sabulan dohot lobi sian i duapulu dua ribu halak toropna.

⁴⁰(III.) Dung i ro ma hata ni Jahowa tu si Musa: Bilangi ma nasa anak buhabaju di tongatonga ni halak Israel, olat ni na marumur sabulan dohot lobi sian i, jala buat huhut bilangan ni goargoarnasida i.

⁴¹Dung i buatonmu ma di Ahu halak Lepi bahen singkat ni nasa baoa buhabaju di tongatonga ni halak Israel, ai Ahu do Jahowa; jala pinahan ni halak Lepi bahen singkat ni nasa buhabaju di tongatonga ni pinahan ni halak Israel.

⁴²Dung i dibilang si Musa ma, songon na tinonahon ni Jahowa tu ibana, nasa anak buhabaju di tongatonga ni halak Israel.

⁴³Jadi dapot ma bilangan ni goargoar ni nasa anak buhabaju, olat ni na marumur sabulan dohot lobi sian i duapulu dua ribu dua ratus pitupulu tolu halak toropna tarbilang.

⁴⁴Dung i ro ma hata ni Jahowa tu si Musa songon on:

⁴⁵Buat ma halak Lepi bahen singkat ni nasa anak buhabaju di tongatonga ni halak Israel, jala pinahan ni halak Lepi bahen singkat ni

pinahannasida, asa Ahu nampuna halak Lepi;
ai Ahu do Jahowa.

⁴⁶Angkup ni hepeng partobus ni sidua ratus
pitupulu tolu halak, angka na ganda sian
anak buhabaju ni halak Israel martimbangkon
torop ni halak Lepi i.

⁴⁷Ingkon buatonmu do limalima sekkel
tobus ni sasahalak mangihuthon sekkel di
inganan na badia i, duapulu gera sasekkel.

⁴⁸Jala ingkon lehononmu do perak partobus
ni halak angka na ganda i tu si Aron dohot tu
angka anakna i.

⁴⁹Jadi dibuat si Musa ma perak partobus
i sian halak angka na ganda i, angka na
tinobus ni halak Lepi.

⁵⁰Sian buhabaju ni halak Israel do binuatna
perak i saribu tolu ratus onompulu lima
sekkel, marguru tu sekkel di inganan na
badia.

⁵¹Dung i dilehon si Musa ma perak partobus
i tu si Aron dohot tu angka anakna, hombar
tu na tinonahon ni Jahowa tu si Musa.

4¹(I.) Dung i ro ma hata ni Jahowa tu si
Musa dohot tu si Aron songon on:

²Buat ma bilangan ni angka anak ni si
Kohat sian tongatonga ni angka anak ni Lepi
marmargamarga dohot marompuompu.

³Olat ni na marumur tolupulu taon dohot lobi
sian i sahat ro di limapulu taon umurna, nasa
baoa na tau masuk tu ulaon, asa mangaradoti
ulaon di bagasan undungundung parluhutan i.

⁴On do tahe ulaon tohonan ni angka anak ni si Kohat di bagasan undungundung parluhutan, i ma na badia sahali.

⁵Molo borhat parsaroan i, ingkon ro si Aron dohot angka anakna paijurhon rimberimbe i, jala balutonna tusi poti panindangion i.

⁶Ingkon bahenonna muse tu atasna salampis bobak ni pitudar, pahembangonna muse tusi sada tutup sian hain na rata langit situtu, dung i bahenonna ma haluhaluna tusi.

⁷Ingkon pahembangonna huhut tu meja hapeahan ni sagusagu na marhadohoan sada tutup sian hain na rata langit situtu, jala peakkononna tu atasna angka pinggan, saoran, hondi dohot mangkuk pangusean ni tuak tangkasan, jala sagusagu ariari ingkon peak di atasna.

⁸Ingkon pahembangonna huhut tu atasna tutup sian hain ma merham, bahenonna muse tusi salampis bobak ni pitudar, dung i bahenonna tusi angka haluhaluna.

⁹Dung i buatonnasida ma sada tutup sian hain na rata langit bahen pamaluti ni parpalitoan rap dohot palitona dohot panurturna, pangintopina ro di sude parmiahanna, angka na masuk tu ulaonna be.

¹⁰Ingkon balutanna parpalitoan i ro di sude ulaulana tu bobak ni pitudar salampis, dung i ampehononna tu sada ruarua.

¹¹Tu atas langgatan sian sere pe ingkon pahembangonnasida sada tutup sian haen na

rata langit, jala tutuponna muse dohot bobak ni pitudar, jala bahenonna tusi haluhaluna.

¹²Ingkon buatonnasida ma nasa ulaula tohonan, angka na pinangkenasida di bagasan inganan na badia i jala balutanna do i tu haen na rata langit, jala tutuponna do i muse dohot bobak ni pitudar, jala ampehononna tu atas ni ruarua.

¹³Ingkon paiasonna huhut langgatan i sian sirabun, jala pahembangonna tu atasna sada haen na tinubar.

¹⁴Dung i bahenonna ma tu atasna saluhut ulaulana, angka na pinangkena marhalado di atasna, i ma angka parapiapian, garpu, siuksiuk dohot mangkuk pamispisan ro di sude ulaula tu langgatan i, jala ingkon balutanna do i tu bobak ni pitudar jala bahenonna tusi haluhaluna.

¹⁵Ia dung sidung dibaluti si Aron dohot angka anakna i inganan na badia i ro di sude ulaula di inganan na badia i, uju naeng borhat parsaroan i, ingkon bongot ma angka anak ni si Kohat laho mangusung; alai ndang jadi jamaonnasida na badia i, ingkon mate nasida tung sura. I ma angka siusungan ni angka anak ni si Kohat sian undungundung parluhutan i.

¹⁶Alai anggo si Eleasar, anak ni malim Aron ma panahatan ni ulaon tohonan patureture miak tu parpalitoan, tole pamurpuri bahen daupa na hushus, tole pelean sipanganon

ariari dohot miak pamiahion, tohonan patureture sandok undungundung i ro di nasa isina, nang inganan na badia i ro di angka ulaulana.

¹⁷Dung i ro ma hata ni Jahowa tu si Musa dohot tu si Aron songon on:

¹⁸Ndang jadi loasonmuna rendep marga ni pinompar ni si Kohat sian tongatonga ni halak Lepi!

¹⁹Ingkon on do bahenonmuna tu nasida, asa mangolu nasida, jala unang mate, tung sura ro nasida jumonok manjama na badia sahali: Ingkon si Aron dohot angka anakna masuk tu bagasan dohot patongonhon tu ganup nasida ulaonna be dohot siusungonna.

²⁰Alai ndang jadi masuk tu bagasan anggo nasida naeng marnida pamalutina di inganan na badia i, asa unang mate nasida.

²¹(II.) Dung i ro muse hata ni Jahowa tu si Musa songon on:

²²Buat ma huhut bilangan ni angka anak ni si Gerson marompuompu dohot marmargamarga.

²³Olat ni na marumur tolupulu taon dohot lobi sian i sahat ro di limapulu taon umurna bilanganmu nasida nasa baoa na tau masuk tu ulaon, asa mangaradoti ulaon di bagasan undungundung parluhutan i.

²⁴On do tahe ulaon tohonan ni angka pinompar ni si Gerson, sibahenonna dohot siusungonna.

²⁵Ingkon nasida mangusung angka rimberimbe ni undungundung i, ro di undungundung parluhutan i tahe, rimberimbe langitlangitna dohot bobak ni pitudar pangkuphupina sian ginjal ro di rimberimbe tutup ni pintu haroroan tu undungundung parluhutan i.

²⁶Ro di angka rimberimbe ni alaman dohot rimberimbe tutup ni pintu laho tu alaman na humaliang undungundung dohot langgatan i, ro di angka talina dohot sude ulaula ni tohonannasida i, luhut tahe angka sibahenon disi, ingkon patupaonnasida do.

²⁷Hombar tu hata ni si Aron dohot angka anakna i tahe, ingkon radotan ni angka anak ni si Gerson sandok ulaon tohonan i, taringot tu sandok siusungonnasida dohot siulaonnasida; jala ingkon hamu pasahathon tu nasida, asa diringkoti sandok siusungonnasida i.

²⁸On do tahe ulaon tohonan ni pinompar ni angka anak ni si Gerson di bagasan undungundung parluhutan i, jala siradotannasida i, ingkon marpandapotan tu si Itamar, anak ni malim Aron.

²⁹(III.) Angka anak ni si Merari pe marmargamarga dohot marompuompu, ingkon bilanganmu do.

³⁰Olat ni na marumur tolupulu taon dohot lobi sian i sahat ro di limapulu taon umurna bilanganmu nasida, sude baoa angka na tau

masuk tu pargansion laho mangaradoti ulaon tohonan di undungundung parluhutan i.

³¹Jala on do pasahaton siusungonnasida taringot tu sandok ulaon tohonannasida i di bagasan undungundung parluhutan i: angka papan ni undungundung, angka ransangransangna, angka tiangna rap dohot patna.

³²Angkup ni angka tiang ni alaman humaliang rap dohot patna, labangna dohot talina, ro di sude ulaulana ro di nasa na masuk tu tohonannasida i; pola ingkon goaronmuna mamilangi angka ulaula i pasahathon tu ganup siusungonna be.

³³On do tahe ulaon tohonan ni pinompar ni angka anak ni si Merari taringot tu saluhut siulaonnasida di bagasan undungundung parluhutan i, marpandapotan tu si Itamar, anak ni malim Aron.

³⁴(IV.) Jadi tole ma si Musa dohot si Aron ro di angka induk ni luhutan i mamilangi angka anak ni si Kohat marmargamarga dohot marompuompu.

³⁵Olat ni na marumur tolupulu taon dohot lobi sian i sahat ro di limapulu taon umurna, sude baa angka na tau masuk tu ulaon i, asa mangaradoti ulaon di bagasan undungundung parluhutan i.

³⁶Jala jolma angka na tarbilang marmargamarga dua ribu pitu ratus limapulu halak toropna.

³⁷I do jolma angka na tarbilang sian pinompar ni si Kohat, sude jolma angka na marhalado di bagasan undungundung parluhutan i, angka naung binilang ni si Musa dohot si Aron, hombar tu hata ni Jahowa marhite sian si Musa.

³⁸Tarbilang do huhut angka anak ni si Gerson marmargamarga dohot marompuompu.

³⁹Olat ni na marumur tolupulu taon dohot lobi sian i, sahat ro di limapulu taon umurna, sude jolma angka na tau masuk tu pargansion mangaradoti ulaon di bagasan undungundung parluhutan i.

⁴⁰Jala jolma angka na tarbilang marmargamarga dohot marompuompu dua ribu onom ratus tolupulu halak toropna.

⁴¹I do jolma angka na tarbilang sian pinompar ni si Gerson, sude jolma angka na marhalado di bagasan undungundung parluhutan i, angka naung binilang ni si Musa dohot si Aron, hombar tu hata ni Jahowa.

⁴²Tarbilang do huhut angka anak ni si Merari marmargamarga dohot marompuompu.

⁴³Olat ni na marumur tolupulu taon dohot lobi sian i, sahat ro di limapulu taon umurna, sude jolma angka na tau masuk tu pargansion mangaradoti ulaon di bagasan undungundung parluhutan i.

⁴⁴Jala jolma angka na tarbilang marmargamarga tolu ribu dua ratus halak toropna.

⁴⁵I dojolma angka na tarbilang sian pinompar ni si Merari, angka naung binilang ni si Musa dohot si Aron, hombar tu hata ni Jahowa marhite sian si Musa.

⁴⁶Sudejolma na tarbilang, angka naung binilang ni si Musa dohot si Aron ro di angka induk ni Israel sian halak Lepi marmargamarga dohot marompuompu.

⁴⁷Olat ni na marumur tolupulu taon dohot lobi sian i sahat ro di limapulu taon umurna, nasa baoa angka na masuk mangula ulaon tohonan dohot ulaon mangusung di bagasan undungundung parluhutan i.

⁴⁸Luhut angka na tarbilang i ualu ribu limaratus ualupulu halak toropna.

⁴⁹Hombar tu hata ni Jahowa tarbilang nasida marhite sian si Musa, patongonhon ganup tu ulaon tohonanna dohot tu siusungonna; jala i do pamilangionna, na tinonahon ni Jahowa tu si Musa.

5¹(I.) Dung i ro muse hata ni Jahowa tu si Musa songon on:

²Dokkon ma halak Israel, asa dipabali nasida sian parsaroan saluhut halak na puruon dohot na somal marnipinipi ro di sude halak na ramun binahen ni bangke.

³Nang baoa, nang parompuan, ingkon pabalionmuna do tu balian ni parsaroan i, asa unang diramuni nasida parsaroannasida i, alamaringan Ahu di tongatongamuna.

⁴Jadi dibahen halak Israel ma songon i, dipabali ma nasida tu balian ni parsaroan i, hombar tu hata ni Jahowa tu si Musa, songon i ma dibahen halak Israel.

⁵(II.) Dung i ro muse hata ni Jahowa tu si Musa songon on:

⁶Paboa ma tu halak Israel: Tung sura sahalak baoba, manang parompuan naung mambahen nanggo sada sian angka dosa nijolma, asa manjahati dompak Jahowa, laos marsala tu dirina jolma sisongon i.

⁷Ingkon topotanna ma dosana, angka naung binahenna i, jala ingkon pasuangonna ugasan i tu nampunasa hian, jala ambaanna tusi saparlimana, gararonna tu halak parutanganna i.

⁸Alai tung sura so adong di baoba i panean sihasolhotanna panjaloan utang i, ingkon tu Jahowa gararon utang i, bahen jambar ni malim, angkup ni birubiru tunggal pardenggan i, na mambahen pardenggan tu ibana.

⁹Luhut pelean tatingan pe sian saluhut na pinarbadian ni halak Israel, angka na binoannasida tu malim, ingkon malim i nampunasa.

¹⁰Jala manang ise na pabadihon manang aha, laos ibana do nampunasa; jala manang ise na mangalehon tu malim manang aha, laos ibana do nampunasa.

¹¹ (III.) Dung i ninna Jahowa muse tu si Musa songon on:

¹² Paboa ma tu halak Israel songon on: Tung sura dituhas sada baoa jolmana tardege pinggol ni dalan palea baoa i.

¹³ Nunga pola sampur baoa na asing tu nasida, alai ndang dapot diida sinondukna i, marsibuni nasida tarramun, jala ndang adong sitindangi dompak nasida, manang dapot tartangkup nasida.

¹⁴ Tung sura songgop tu ibana tondi pangiburuon, gabe mangiburu ibana mida jolmana, ala naung tutu tarramun nasida; manang songgop pe tondi pangiburuon tu ibana gabe mangiburu ibana mida jolmana, hape ndang tutu nian tarramun nasida.

¹⁵ Jadi ingkon boanon ni baoa i ma jolmana tu jolo ni malim, boanonna huhut peleana taringot tu nasida, saparsampulu epah itak dahanon; alai ndang jadi dogilonna tusi miak, jala ndang jadi bahenonna daupa tusi; ai pelean sipanganon pangiburuon do i, pelean sipanganon parningotan, pasingothon hajahaton.

¹⁶ Dung i toguon ni malim i ma nasida, asa pajongjongkon di adopan ni Jahowa.

¹⁷ Dung i buaton ni malim i ma sian aek na badia di bagasan guriguri tano, buatonna huhut orbuk sian pantar ni undungundung i jala bahenonna do i tu bagasan aek i.

¹⁸Dung i pajongjongon ni malim i ma parompuan i di adopan ni Jahowa, songon i manangkas uluna, jala lehononna tu tanganna pelean sipanganon parningotan, i ma pelean sipanganon pangiburuon, jala ingkon di bagasan tangan ni malim i aek na paet na parohon torutoru.

¹⁹Dung i patolonon ni malim ma parompuan i, huhut dohononna tu nasida: Molo tung so sampur ho tu manang ise jala molo tung so tutu tardege pinggol ni dalan ho gabe tarramun, lias ma ho sian torutoru hinorhon ni aek na paet on.

²⁰Alai molo tutu ho tardege pinggol ni dalan gabe tarramun jala sampur ho tu baoa na asing di balik ni sinondukmu.

²¹Ingkon patolonon ni malim ma parompuan i marhitehite sumpa burabura on; laos dohonon ni malim ma tu parompuan i: Sai dibahen Jahowa ma ho gabe panginonaan ni bura dohot torutoru di tongatonga ni bangsom, asa marpuhungan gontingmu bahenon ni Jahowa, jala busungon ia butuham.

²²Ingkon masuk ma aek on na parohon torutoru tu bagasan butuham, asa busungon butuham dibahen jala puhung gontingmu! Dung i dohonon ni parompuan i ma Amen, Amen!

²³Dung i ingkon suraton ni malim i ma angka bura i tu pustaha sambulung, jala apusanna muse dohot aek na paet i.

²⁴Dung i painumhononna muse tu parompuan i aek na paet i na parohon torutoru, asa masuk tu bagasan butuhana aek na parohon torutoru i gabe jea bolon.

²⁵Dung i ingkon buaton ni malim ma sian tangan ni parompuan i pelean sipanganon pangiburuon, jala tatingtatingonna pelean sipanganon i di adopan ni Jahowa, laos pelehononna ma i di atas langgatan.

²⁶Dung i pohulon ni malim i ma sampohul sian pelean sipanganon bahen parningotanna jala suda do i tutungonna di atas langgatan, dung i painumhononna ma anggo aek i tu parompuan i.

²⁷Ia dung dipainumhon aek i tu nasida, molo tung na tutu tarramun nasida jala marlea sinondukna i dibahen, ingkon masuk ma tu bagasan nasida aek na parohon torutoru gabe jea bolon, gabe busungon butuhana jala puhung gontingna, jala parompuan i gabe panginonaan ni bura di tongatonga ni bangsona.

²⁸Alai tung sura ndang tarramun parompuan i, lias do nasida tahe ndang mangonai torutoru tu nasida, tarbahensa do marhangoluan tu joloan on.

²⁹I ma patik taringot tu pangiburuon, tung sura tardege pinggol ni dalan sada parompuan na marharajaan, gabe tarramun.

³⁰Manang tung sura songgop tu sada baoa tondi pangiburuon, gabe mangiburu ibana mida jolmana, ingkon pajongjongonna jolmana i di adopan ni Jahowa, jala bahenon ni malim i tu nasida sandok hombar tu patikon.

³¹Jadi ingkon lias ma anggo baoa i sian hajahaton, alai anggo tu parompuan i, ingkon manginona ma hajahatonna i.

6¹(I.) Dung i ro muse hata ni Jahowa tu si Musa songon on:

²Paboa ma tu halak Israel angka hata on: Tung sura sada baoa manang parompuan marbagabaga hasurungan, bagabaga ni halak Nasir, naeng pasahathon dirina tu Jahowa.

³Ingkon paholangonna dirina sian anggur dohot siinumon na horas, jala ndang jadi inumonna tuak na pang manang na hona raru, jala ndang jadi inumonna sandok aek ni parbue ni anggur jala ndang jadi panganonna parbue ni anggur nambura tinapu manang na jinomur.

⁴Saleleng masa bagabaga hanasironna ndang jadi panganonna agia aha na pinauli sian hau anggur, nang sian batuna manang langkatna.

⁵Saleleng masa bagabaga hanasironna ndang jadi dais raut parnabung tu uluna;

saleleng so gok dope ariari hanasironna
tu Jahowa, ingkon badia ibana, ingkon
pasombuonna ganjang obuk ni uluna i.

⁶Saleleng masa ariari ni hanasironna tu
Jahowa ndang jadi ibana jumonok tu halak na
mate.

⁷Ndang jadi ramunanna dirina nang ala ni
bangke ni amana manang inana, anggina
manang ibotona pe, ai bagabaga hanasiron tu
Debatana do di atas uluna.

⁸Saleleng ariari ni hanasironna, badia do
ibana di Jahowa.

⁹Tung sura mate satongkin sahalak di
lambungna so pangkirimanna, tarramun
ma ulu hanasironna i; dibahen i ingkon
gorbangonna uluna di ari pangurasanna;
di ari papituhon tahe ingkon gorbangonna
uluna.

¹⁰Tole paualuarihon ingkon boanonna dua
anduhur tabu manang dua anak ni darapati tu
malim, tu pintu ni undungundung parluhutan
i.

¹¹Ingkon hobason ni malim ma na sada
bahen pelean pardosaon, jala na sadanari
bahen pelean situtungon, asa mambahen
pardenggananna, ala naung mardosa ibana
binahen ni bangke i, asa parbadiaanna uluna
di ari na sasada i.

¹²Asa diparata muse ariari hanasironna
binagabagahonna tu Jahowa, ingkon
boanonna huhut sada anak ni birubiru na

marumur sataon bahen pelean parsalaan. Alai ndang be masuk tu etongan anggo angka ari parjolo i, ala naung tarramun hanasironna i.

¹³Jala on do patik tu halak Nasir: Ia dung gok ariari hanasironna i boanon ma ibana tu pintu ni undungundung parluhutan i.

¹⁴Ingkon boanonna huhut peleanna tu Jahowa, sada anak ni birubiru tunggal na marumur sataon na so martihas bahen pelean situtungan dohot sada anak ni birubiru boruboru na marumur sataon, na so martihas, bahen pelean pardosaan, jala sada birubiru tunggal na so martihas bahen pelean hamauliateon.

¹⁵Tole muse sahirang na marisi sagusagu na so niasoman sian itak na lamot na nidogil dohot miak dohot timpatimpa na so niasoman na marsapu miak rap dohot peleanna sipanganon dohot siinumon.

¹⁶Dung i boanon ni malim ma i jumonok tu adopan ni Jahowa laos hobasonna bahen peleanna pardosaan dohot situtungan.

¹⁷Dung i pelehononna ma birubiru tunggal i bahen pelean hamauliateon tu Jahowa rap dohot hirang na marisi sagusagu na so niasoman; ingkon pelehonon ni malim i huhut peleanna sipanganon dohot siinumon.

¹⁸Dung i ingkon gorbangon ni halak Nasir i ma ulu hanasironnasida i, di jolo pintu ni undungundung parluhutan i, dung i ingkon buatonna ma obuk ni ulu hanasironna i jala

bahenonna tu atas api na di toru ni pelean
hamauliateon i.

¹⁹Dung i buaton ni malim i ma sian birubiru
tunggal i hae jolo naung nilompa i dohot
sada sagusagu na so niasoman sian hirang
i dohot sada timpatimpa na so niasoman
jala ampehononna do i tu tangan ni halak
Nasir i duansa, dung ginorbanganna obuk ni
hanasironna.

²⁰Dung i ingkon tatingtatingon ni malim ma
i bahen pelean tatingtatingon di adopan ni
Jahowa; na badia di malim ma i rap dohot
andora pelean tatingan dohot hae jolo pelean
tatingan i. Dung salpu i jadi ma minum
anggur halak Nasir i.

²¹I ma patik tu halak Nasir, naung
marbagahon peleanna tu Jahowa ala ni
hanasironna, lobi sian na dapot tanganna
hian; hombar tu bagabagana naung
binagabagahonna i, ingkon songon i do
bahenonna hombar tu patik ni hanasironna i.

²²(II.) Dung i ro muse ma hata ni Jahowa tu
si Musa songon on:

²³Patolhas ma hatangkon tu si Aron
dohot tu angka anakna i: Ingkon songon
on do dohononmuna tu halak Israel, laho
mamasumasu nasida:

²⁴Sai dipasupasu jala diramoti Jahowa ma
ho!

²⁵Dipasondangkon Jahowa ma Bohina tu ho,
jala asi rohana mida ho!

²⁶Didompakkon Jahowa ma Bohina tu ho jala dipasaorhon ma dame tu tondim!

²⁷Ingkon songon i ma ampehononnasida Goarhu (Jahowa) tu halak Israel, asa Ahu mamasumasu nasida.

7¹ (I.) Jadi dung jumpang ari hasisidungna naung pinajongjong ni si Musa undungundung i, naung miniahanna dohot naung pinarbadiaanna ro di saluhut ulaulana, sun miniahanna dohot pinarbadiaanna nang langgatan i ro di sandok ulaulana.

²Jadi diboan angka induk ni Israel, angka ihutan marompuompu, nasida angka induk marmargamarga, angka na manguuluhon halak na tarbilangi.

³Diboan nasida ma tutu angka peleannasida i tu adopan ni Jahowa: Onom hureta marhulambu dohot sampulu dua lembu, duadua induk sada hureta jala salombu be ganup induk, jala diboan nasida do i jumonok tu adopan ni undungundung i.

⁴Dung i ro muse hata ni Jahowa tu si Musa songon on:

⁵Jalo ma luhutna i sian nasida, asa masuk angka i tu ulaon di undungundung parluhutan i, jala pasahat ma i tu halak Lepi, tu ganup hombar tu ulaonna be.

⁶Jadi dijalo si Musa ma angka hureta dohot lembu i jala dipasahat ma i tu halak Lepi.

⁷ Dua hureta dohot opat lumbu dipasahat tu angka anak ni si Gerson, hombar tu ulaonnasida i.

⁸ Jala opat hureta dohot ualu lumbu dipasahat tu angka anak ni si Merari, hombar tu ulaonnasida i, marpandapotan tu si Itamar, anak ni malim Aron.

⁹ Alai anggo tu angka anak ni si Kohat, ndang agia aha dilehon, ala nasida panahatan ni ulaon di inganan na badia i, ingkon usungonnasida do i di abarana.

¹⁰ Jadi laos dipelehon angka induk i ma peleanna be laho pasahathon langgatan i di ari uju pamiahanna, laos diboan angka induk i do peleannasida i jumonok tu adopan ni langgatan i.

¹¹ Dung i ninna Jahowa ma tu si Musa: Ingkon sasahalak induk i di arina be mamboan peleanna laho pasahathon langgatan i.

¹² (II.) Jala na mamelehon peleanna di ari parjolo, i ma si Nahason, anak ni si Aminadab, sian marga Juda.

¹³ Ia peleanna i sada saolan perak, saratus tolupulu sekkel dokdokna; sada mangkuk pamispisan sian perak, pitupulu sekkel dokdokna, marguru tu sekkel di inganan na badia i; duansa i gok dohot itak na lamot, na nidogil dohot miak bahen pelean sipanganon.

¹⁴ Sada saolan sian sere sampulu sekkel dokdokna, gok daupa.

¹⁵Sada anak ni lombu, sada birubiru tunggal, sada anak ni birubiru na marumur sataon bahen pelean situtungon.

¹⁶Sada hambing tunggal bahen pelean pardosaon.

¹⁷Dua lombu, lima birubiru tunggal, lima hambing tunggal dohot lima anak ni birubiru ma marumur sataon bahen pelean hamauliateon. I ma pelean ni si Nahason, anak ni si Aminadab.

¹⁸Di ari paduahon mamelehon Natanael, anak ni si Zuar, ihutan ni halak Isasar.

¹⁹Pelean pinelehonna i i ma sada saolan perak, saratus tolupulu sekkel dokdokna; sada mangkuk pamispisan sian perak, pitupulu sekkel dokdokna, marguru tu sekkel di inganan na badia i; duansa i gok dohot itak na lamot, na nidogil dohot miak bahen pelean sipanganon.

²⁰Sada saolan sian sere sampulu sekkel dokdokna, gok daupa.

²¹Sada anak ni lombu, sada birubiru tunggal, sada anak ni birubiru na marumur sataon bahen pelean situtungon.

²²Sada hambing tunggal bahen pelean pardosaon.

²³Dua lombu, lima birubiru tunggal, lima hambing tunggal dohot lima anak ni birubiru, na marumur sataon bahen pelean hamauliateon. I ma pelean ni si Natanael, anak ni si Zuar.

²⁴Di ari patoluhon mamboan peleanna ihutan ni halak Zebulon, i ma si Eliab, anak ni si Helon.

²⁵Pelean binoanna i, i ma sada saolan perak, saratus tolupulu sekkel dokdokna; sada mangkuk pamispisan sian perak, pitupulu sekkel dokdokna, marguru tu sekkel di inganan na badia i; duansa i gok dohot itak na lamot, na nidogil dohot miak, bahen pelean sipanganon.

²⁶Sada saolan sian sere sampulu sekkel dokdokna, gok daupa.

²⁷Sada anak ni lombu, sada birubiru tunggal, sada anak ni birubiru na marumur sataon bahen pelean situtungon.

²⁸Sada hambing tunggal bahen pelean pardosaon.

²⁹Dua lombu, lima birubiru tunggal, lima hambing tunggal dohot lima anak ni birubiru, na marumur sataon bahen pelean hamauliateon. I ma pelean ni si Eliab, anak ni si Helon.

³⁰Di ari paopathon mamboan peleanna ihutan ni halak Ruben, i ma si Elizur, anak ni si Sedeur.

³¹Pelean binoanna i i ma sada saolan perak, saratus tolupulu sekkel dokdokna; sada mangkuk pamispisan sian perak, pitupulu sekkel dokdokna, marguru tu sekkel di inganan na badia i; duansa i gok dohot itak

na lamot, na nidogil dohot miak bahen pelean sipanganon.

³²Sada saolan sian sere sampulu sekkel dokdokna, gok daupa.

³³Sada anak ni lombu, sada birubiru tunggal, sada anak ni birubiru, na marumur sataon bahen pelean situtungon.

³⁴Sada hambing tunggal bahen pelean pardosaon.

³⁵Dua lombu, lima birubiru tunggal, lima hambing tunggal dohot lima anak ni birubiru, na marumur sataon bahen pelean hamauliateon. I ma pelean ni si Elizur, anak ni si Sedeur.

³⁶Di ari palimahon mamboan peleana ihutan ni halak Simeon, i ma si Selumiel, anak ni si Zurisaddai.

³⁷Pelean binoanna i i ma sada saolan perak, saratus tolupulu sekkel dokdokna; sada mangkuk pamispisan sian perak, pitupulu sekkel dokdokna, marguru tu sekkel di inganan na badia i; duansa i gok dohot itak na lamot, na nidogil dohot miak bahen pelean sipanganon.

³⁸Sada saolan sian sere sampulu sekkel dokdokna, gok daupa.

³⁹Sada anak ni lombu, sada birubiru tunggal, sada anak ni birubiru, na marumur sataon bahen pelean situtungon.

⁴⁰Sada hambing tunggal bahen pelean pardosaon.

⁴¹ Dua lembu, lima birubiru tunggal, lima hambing tunggal dohot lima anak ni birubiru, na marumur sataon bahen pelean hamauliateon. I ma pelean ni si Selumiel anak ni si Zurisaddai.

⁴² Di ari paonomhon mamboan pelean ihutan ni halak Gad, i ma si Eliasap, anak ni si Deuel.

⁴³ Pelean binoanna i i ma sada saon perak, saratus tolupulu sekkel dokdokna; sada mangkuk pamispisan sian perak, pitupulu sekkel dokdokna, marguru tu sekkel di inganan na badia i; duansa i gok dohot itak na lamot, na nidogil dohot miak bahen pelean sipanganon.

⁴⁴ Sada saon sian sere, sampulu sekkel dokdokna, gok daupa.

⁴⁵ Sada anak ni lembu, sada birubiru tunggal, sada anak ni birubiru na marumur sataon bahen pelean situtungon.

⁴⁶ Sada hambing tunggal bahen pelean pardosaon.

⁴⁷ Dua lembu, lima birubiru tunggal, lima hambing tunggal dohot lima anak ni birubiru na marumur sataon bahen pelean hamauliateon. I ma pelean ni si Eliasap, anak ni si Deuel.

⁴⁸ Di ari papituhon mamboan pelean ihutan ni halak Epraim, i ma si Elisama, anak ni si Amihud.

⁴⁹Pelean binoanna i i ma sada saosan perak, saratus tolupulu sekkel dokdokna; sada mangkuk pamispisan sian perak, pitupulu sekkel dokdokna, marguru tu sekkel di inganan na badia i; duansa i gok dohot itak na lamot, na nidogil dohot miak bahen pelean sipanganon.

⁵⁰Sada saosan sian sere sampulu sekkel dokdokna, gok daupa.

⁵¹Sada anak ni lombu, sada birubiru tunggal, sada anak ni birubiru, na marumur sataon bahen pelean situtungon.

⁵²Sada hambing tunggal bahen pelean pardosaon.

⁵³Dua lombu, lima birubiru tunggal, lima hambing tunggal dohot lima anak ni birubiru na marumur sataon bahen pelean hamauliateon. I ma pelean ni si Elisama, anak ni si Amihud.

⁵⁴Di ari paualuhon mamboan peleana ihutan ni halak Manasse, i ma si Gamaliel, anak ni si Pedazur.

⁵⁵Pelean binoanna i i ma sada saosan perak, saratus tolupulu sekkel dokdokna; sada mangkuk pamispisan sian perak, pitupulu sekkel dokdokna, marguru tu sekkel di inganan na badia i; duansa i gok dohot itak na lamot, na nidogil dohot miak bahen pelean sipanganon.

⁵⁶Sada saosan sian sere sampulu sekkel dokdokna, gok daupa.

⁵⁷ Sada anak ni lombu, sada birubiru tunggal, sada anak ni birubiru, na marumur sataon bahen pelean situtungon.

⁵⁸ Sada hambing tunggal bahen pelean pardosaon.

⁵⁹ Dua lombu, lima birubiru tunggal, lima hambing tunggal dohot lima anak ni birubiru, na marumur sataon bahen pelean hamauliateon. I ma pelean ni si Gamaliel, anak ni si Pedazur.

⁶⁰ Di ari pasiahon mamboan peleana ihutan ni halak Benjamin, i ma si Abidan, anak ni si Gidion i.

⁶¹ Pelean binoanna i, i ma sada saoan perak, saratus tolupulu sekkel dokdokna; sada mangkuk pamispisan sian perak, pitupulu sekkel dokdokna, marguru tu sekkel di inganan na badia i; duansa i gok dohot itak na lamot, na nidogil dohot miak bahen pelean sipanganon.

⁶² Sada saoan sian sere sampulu sekkel dokdokna, gok daupa.

⁶³ Sada anak ni lombu, sada birubiru tunggal, sada anak ni birubiru, na marumur sataon bahen pelean situtungon.

⁶⁴ Sada hambing tunggal bahen pelean pardosaon.

⁶⁵ Dua lombu, lima birubiru tunggal, lima hambing tunggal dohot lima anak ni birubiru, na marumur sataon bahen pelean

hamauliateon. I ma pelean ni si Abidan, anak ni si Gidion i.

⁶⁶Di ari pasampuluhon mamboan peleanna ihutan ni halak Dan, i ma si Ahieser, anak ni si Amisaddai.

⁶⁷Pelean binoanna i, i ma sada saoan perak, saratus tolupulu sekkel dokdokna; sada mangkuk pamispisan sian perak, pitupulu sekkel dokdokna, marguru tu sekkel di inganan na badia i; duansa i gok dohot itak na lamot, na nidogil dohot miak, bahen pelean sipanganon.

⁶⁸Sada saoan sian sere sampulu sekkel dokdokna, gok daupa.

⁶⁹Sada anak ni lombu, sada birubiru tunggal, sada anak ni birubiru na marumur sataon bahen pelean situtungon.

⁷⁰Sada hambing tunggal bahen pelean pardosaon.

⁷¹Dua lombu, lima birubiru tunggal, lima hambing tunggal dohot lima anak ni birubiru na marumur sataon bahen pelean hamauliateon. I ma pelean ni si Ahieser, anak ni si Amisaddai.

⁷²Di ari pasampulusadahon mamboan peleanna ihutan ni halak Aser, i ma si Pagiël, anak ni si Okran.

⁷³Pelean binoanna i, i ma sada saoan perak, saratus tolupulu sekkel dokdokna; sada mangkuk pamispisan sian perak, pitupulu sekkel dokdokna, marguru tu sekkel di

ingan na badia i; duansa i gok dohot itak na lamot, na nidogil dohot miak bahen pelean sipanganon.

⁷⁴Sada saon sian sere sampulu sekkel dokdokna, gok daupa.

⁷⁵Sada anak ni lombu, sada birubiru tunggal, sada anak ni birubiru na marumur sataon bahen pelean situtungon.

⁷⁶Sada hambing tunggal bahen pelean pardosaon.

⁷⁷Dua lombu, lima birubiru tunggal, lima hambing tunggal dohot lima anak ni birubiru na marumur sataon bahen pelean hamauliateon. I ma pelean ni si Pagiell, anak ni si Okran.

⁷⁸Di ari pasampulu duahon mamboan peleanna ihutan ni halak Naptali, i ma si Ahira, anak ni si Enan.

⁷⁹Pelean binoanna i, i ma sada saon perak, saratus tolupulu sekkel dokdokna; sada mangkuk pamispisan sian perak, pitupulu sekkel dokdokna, marguru tu sekkel di inganan na badia i; duansa i gok dohot itak na lamot, na nidogil dohot miak bahen pelean sipanganon.

⁸⁰Sada saon sian sere sampulu sekkel dokdokna, gok daupa.

⁸¹Sada anak ni lombu, sada birubiru tunggal, sada anak ni birubiru na marumur sataon bahen pelean situtungon.

⁸²Sada hambing tunggal bahen pelean pardosaon.

⁸³Dua lombu, lima birubiru tunggal, lima hambing tunggal dohot lima anak ni birubiru na marumur sataon bahen pelean hamauliateon. I ma pelean ni si Ahira, anak ni si Enan.

⁸⁴(III.) On do pelean laho pasahathon langgatan di ari pamiahionna sian angka ihutan ni Israel sampulu dua saon perak, sampulu dua mangkuk pamispisan sian perak, sampulu dua saon sere.

⁸⁵Saratus tolupulu sekkel perak dokdok ni saon i sadasada, jala pitupulu sekkel dokdok ni mangkuk pamispisani sadasada, asa dokdok ni saluhut perak tu angka ulaula i dua ribu opat ratus sekkel marguru tu sekkel di inganan na badia i.

⁸⁶Sampulu dua saon sere, angka na gok daupa, sampulu sekkel dokdokna sadasada, marguru tu sekkel di inganan na badia i, asa dokdok ni saluhut sere tu angka saon i saratus duapulu sekkel.

⁸⁷Saluhut pinahan bahen pelean situtungon, i ma sampulu dua lombu, sampulu dua birubiru tunggal, sampulu dua anak ni birubiru na marumur sataon rap dohot pelean sipanganon dohot sampulu dua hambing tunggal bahen pelean pardosaon.

⁸⁸Ia torop ni angka pinahan bahen pelean hamauliateon, i ma duapulu opat anak ni

lombu, onompulu birubiru tunggal, onompulu hambing tunggal, onompulu anak ni birubiru na marumur sataon. I ma angka pelean laho pasahathon langgatan i, dung sidung dimiahi.

⁸⁹Dung i di na masuk si Musa tu bagasan undungundung parluhutan i, naeng mangkatai dohot Jahowa, sai tangkas do dibege soara ni Jahowa, na mangkatai dohot ibana sian langkop pardenggan, na di atas ni poti panindangion i di holangholang ni kerubim na dua i, sian i mangkatai Jahowa tu ibana.

8¹(I.) Dung i ro ma hata ni Jahowa tu si Musa songon on:

²Paboa ma tu si Aron hatangkon: Molo dipagalak ho angka palito i, ingkon tu jolo ni parpalitoan i marsinondang palito na pitu i.

³Jadi dibahen si Aron ma songon i; tungkan jolo ni parpalitoan i do dipagalak angka palitona, hombar tu tona ni Jahowa tu si Musa.

⁴Songon on do parpaulina di parpalitoan i sian sere na pita sangkimpal ditopa badanna ro di bungana, hombar tu tiruan na pinatuduhon ni Jahowa tu si Musa, songon i do dipauli parpalitoan i.

⁵(II.) Dung i ro muse hata ni Jahowa tu si Musa songon on:

⁶Arahon ma halak Lepi sian tongatonga ni halak Israel jala urasi ma nasida.

⁷Alai songon on do bahenonmu tu nasida laho mangurasi nasida: Ingkon pistikkononmu

tu nasida aek pangurasion sian dosa, jala ingkon gorbangonna sandok dagingnasida i, jala sunsionna pangkeanna, huhut mangurasi dirina.

⁸Dung i ingkon buatonnasida ma sada anak ni lembu rap dohot itak na lamot na nidogil dohot miak bahen pelean sipanganon; dung i ingkon buatonmu ma anak ni lembu sadanari bahen pelean pardosaon.

⁹Dung i dohononmu ma halak Lepi ro jumonok tu adopan ni undungundung parluhutan i, ingkon paluhutonmu huhut sandok luhutan ni halak Israel.

¹⁰Dung i dohononmu muse halak Lepi ro jumonok tu adopan ni Jahowa, dung i ingkon ampehonon ni halak Israel tangannasida tu halak Lepi.

¹¹Dung i ingkon patogutoguon ni si Aron ma halak Lepi di adopan ni Jahowa, hira sada pelean tatingan sian halak Israel, asa tau nasida mangaradoti ulaon ni Jahowa.

¹²Dung i ingkon ampehonon ni halak Lepi ma tangannasida tu ulu ni angka lembu i, ingkon hobasonna na sada bahen pelean pardosaon, jala na sadanari bahen pelean situtungon di Jahowa mambahen pardenggan tu halak Lepi.

¹³Dung i ingkon pajongjongonmu halak Lepi di adopan ni si Aron dohot angka anakna i, laos patogutoguonmu nasida bahen pelean tatingan di Jahowa.

¹⁴Asa ingkon papulihonmu halak Lepi sian tongatonga ni halak Israel, asa Ahu nampuna halak Lepi.

¹⁵Dung songon i, ingkon masuk ma halak Lepi, asa marulaon nasida di bagasan undungundung parluhutan i; ingkon songon i nasida urasonmu, jala patogutoguonmu bahen pelean tatingan.

¹⁶Ai silehonlehon tu Ahu do nasida sian tongatonga ni halak Israel; ai singkat ni nasa anak buhabaju sian halak Israel do nasida hubuat di Ahu.

¹⁷Ai Ahu hian do nampuna nasa anak buhabaju di tongatonga ni halak Israel, nang sianjolma, nang sian pinahan, olat ni ari dung Ahu mambunu nasa anak buhabaju di tano Misir, nunga huparbadi ai hian nasida di Ahu.

¹⁸Jala nunga hubuat halak Lepi singkat ni nasa anak buhabaju di tongatonga ni halak Israel.

¹⁹Jala nunga hubasabasahon halak Lepi bahen dongan ni si Aron dohot angka anakna i sian tongatonga ni halak Israel, asa diradoti ulaon ni halak Israel di bagasan undungundung parluhutan i dohot mambahen pardenggan tu halak Israel, asa unang masa begu di tongatonga ni halak Israel, molo ro nasida jumonok tu inganan na badia i.

²⁰Dung i dibahen si Musa dohot si Aron dohot sandok luhutan ni halak Israel ma songon i tu halak Lepi, hombar tu sandok na tinonahon ni Jahowa tu si Musa taringot tu halak Lepi, laos songon i ma dibahen halak Israel tu nasida.

²¹Dung i diuras halak Lepi ma dirina be sian dosa jala disunci pangkeanna be, laos ditogutogu si Aron nasida bahen pelean tatingan di adopan ni Jahowa, asa si Aron mambahen pardenggan tu nasida laho manguras dirinasida i.

²²Dung songon i masuk ma halak Lepi laho mangaradoti ulaon nasida i di bagasan undungundung parluhutan i di adopan ni si Aron dohot angka anakna i, songon na tinonahon ni Jahowa tu si Musa, taringot tu halak Lepi, songon i do dibahen tu nasida.

²³(III.) Dung i ro muse ma hata ni Jahowa tu si Musa songon on:

²⁴On do na tama siingoton ni halak Lepi: Olat ni na marumur duapulu lima taon dohot lobi sian i, ingkon masuk ibana tu pargansion marulaon di undungundung parluhutan i.

²⁵Alai olat ni na marumur limapulu taon malua ma nasida sian ulaon tohonan, ndang jadi be marulaon nasida.

²⁶Jadi do nian urupanna angka anggina marulaon di undungundung parluhutan i, mangaradoti siradotan i, alai ndang be jadi nasida tohonan di ulaon i. Ingkon songon

i bahenonmu tu halak Lepi, taringot tu siradotannasida i.

9¹ (I.) Dung i ro muse hata ni Jahowa tu si Musa di halongonan Sinai, di taon paduahon, dung ruar nasida sian tano Misir, di bulan sipaha sada, ninna ma:

²Ingkon marulaon Paska halak Israel di tingkina naung binuhul hian.

³Di ari sampulu opat bulan on mareak bodari, ingkon hobasonmuna do i di tingkina naung binuhul hian; ingkon hombar tu sude aturanna dohot patikna do i hobasonmuna.

⁴Dung i didokkon si Musa ma halak Israel marulaon Paska.

⁵Jadi saut ma nasida marulaon Paska di ari sampulu opat di bulan sipaha sada mareak bodari di halongonan Sinai; sandok songon na tinonahon ni Jahowa tu si Musa, songon i do dibahen halak Israel.

⁶(II.) Alai tahe adong do deba baoa angka na ramun, binahen ni bangke ni jolma, jadi ndang tarbahen nasida marulaon Paska di ari na sasada i; laos ro ma nasida tu adopan ni si Musa dohot si Aron di ari na sasada i.

⁷Laos didok nasida ma tu ibana: Na ramun do hami dibahen bangke ni jolma, boasa ma tung ummuba ia hami, so jadi hami mamboan pelean tu Jahowa di tingkina naung binuhul di tongatonga ni halak Israel?

⁸Dung i ninna si Musa ma tu nasida: Paima hamu dison, asa jolo hubege manang aha dohonon ni Jahowa taringot tu hamu.

⁹Dung i ro ma hata ni Jahowa tu si Musa songon on:

¹⁰Hatahon ma tu halak Israel hatangkon: Tung sura tarramun manang ise di hamu manang di pinomparmuna sogot binahen ni bangke manang di pardalanan na dao ibana, ingkon tarbahen ibana do marulaon Paska di Jahowa.

¹¹Ingkon di bulan sipaha dua, di ari sampulu opat mareak bodari nasida marulaon Paska, ingkon panganon nasidai mardongan sagusagu na so niasoman dohot ingkau paet.

¹²Ndang jadi tebahononhon sian i ro di manogotna i, jala ndang jadi ponggolhononhon holiholina nanggo sada; ingkon hombar tu sandok aturan ni Paska, nasida marulaon Paska.

¹³Alai tahe manang ise na ias jala ndang di pardalanan ibana, hape sundat ibana marulaon Paska, ingkon siaphononhon ibana sian tongatonga ni bangsona, ala na so binoanna pelean tu Jahowa di tingkina naung binuhul hian, ingkon manginona tu ibana dosana i.

¹⁴Tung sura manginsua di tongatongamuna sada halak dagang, na naeng marulaon Paska di Jahowa, ingkon ulahononna do i hombar tu aturan dohot patik ni Paska hian; ingkon

sisada uhum do i di hamu, dos di halak dagang songon di isi ni tano i hian.

¹⁵(III.) Dung i di ari uju pinajongjongna undungundung i dihungkupi ombun i ma undungundung panindangion i, jala olat ni bodari sahat ro di manogotna i, sai mangulon ombun i di atas ni undungundung i idaon songon rupa ni api.

¹⁶Sai songon i do tongtong ombun i manghungkupisa, alai anggo bornginna i, idaon songon rupa ni api.

¹⁷Jadi disi manaek ombun i sian atas ni undungundung i, borhat ma halak Israel mardalan, tole muse mangulon ombun i manang di inganan dia, laos disi ma marsaro nang halak Israel.

¹⁸Asa marguru tu hata ni Jahowa borhat halak Israel, jala marguru tu hata ni Jahowa nasida marsaro; saleleng mangulon ombun i di atas undungundung i marsaro nasida.

¹⁹Molo pola nania leleng ombun i mangulon di atas undungundung i, sai diradoti halak Israel do siradotannasida hian tu Jahowa, jala ndang borhat nasida.

²⁰Suang songon i do nang jumpa so sadia leleng ombun i mangulon di atas undungundung i; asa marguru tu hata ni Jahowa nasida marsaro, jala marguru tu hata ni Jahowa nasida borhat muse.

²¹Tung sura holan sian bodari sahat ro di manogotna i ombun i mangulon, tole

manogotna i manaek ombun i, borhat ma dohot nasida, nang arian, nang borngin, molo manaek ombun i, borhat ma nasida.

²²Tung sura dua ari, manang sabulan, manang lumeleng sian i ombun i mangulon di atas undungundung i, marsaro ma dohot halak Israel, ndang borhat nasida; alai molo manaek ombun i, borhat ma nasida.

²³Hombar tu hata ni Jahowa tahe nasida marsaro jala hombar tu hata ni Jahowa nasida borhat muse, asa diradoti nasida siradotanna hian tu Jahowa, hombar tu hata ni Jahowa marhite sian si Musa.

10¹ (I.) Dung i ro muse hata ni Jahowa tu si Musa songon on:

²Bahen ma di ho dua sarune sian perak, ingkon sian sangkimpal perak do i topaonmu jala ingkon marhite sian i paluhutonmu luhutan i, jala dohononmu borhat angka parsaroan i.

³Molo tung duansa sarune i dipalu, ingkon marluhut ma sandok luhutan i tu lambungmu di adopan ni pintu ni undungundung parluhutan i.

⁴Molo holan sada sarune i mangkuling, ingkon marluhut ma tu lambungmu angka induk, angka ihutan ni halak Israel marriburibu.

⁵Alai molo marsoara toletole sarune i, ingkon tole ma borhat parsaroan angka na marsaro tungan habinsaran.

⁶Molo marsoara toletole sarune i paduahalihon, ingkon borhat parsaroan angka na marsaro tungkan dangsina; ingkon jolo marsoara toletole sarune i, asa jadi borhat nasida.

⁷Alai molo naeng paluhuton luhutan i ingkon pola sangombas mangkuling sarune i, unang marsoara toletole.

⁸Ingkon angka anak ni si Aron, angka naung bangkit malim mamalu sarune i; i ma aturan na hot di hamu dohot di pinomparmuna ro di salelenglelengna.

⁹Tung sura borhat hamu tu parporangan di tanomuna i mangalo musumuna na manosaknosak hamu, ingkon marsoara toletole hamu marsarune, taringotanna ma hamu di adopan ni Jahowa, Debatamuna i, jala paluaonna hamu sian musumuna i.

¹⁰Suang songon i di ari halalas ni rohamuna, di angka ari rayamuna pe naung binuhul hian dohot di poltak ni bulan, ingkon paluonmu do angka sarune i laho pasahathon peleanmuna situtungan dohot peleanmuna hamauliateon, asa mambahen parningotan di hamu di adopan ni Debatamuna; ai Ahu do Jahowa, Debatamuna i.

¹¹(II.) Tole paduataonhon, di bulan sipaha dua, di ari duapulu, manaek ma ombun i sian atas ni undungundung panindangion i.

¹²Dung i borhat ma halak Israel mangihuthon jojornasida i mardalan sian

parhorsihan Sinai, gabe mangulon ombun i muse di halongonan Elaparan.

¹³Jadi borhat ma parjolo i marguru tu hata ni Jahowa marhite sian si Musa.

¹⁴Borhat tahe jumolo partonggol ni parsaroan ni halak Juda rap dohot parduaannasida i jala ihutan ni parduaanna i, i ma si Nahason, anak ni si Aminadab.

¹⁵Jala ihutan ni parduaan ni marga ni halak Isasar, i ma si Natanael, anak ni si Zuar.

¹⁶Jala ihutan ni parduaan ni marga ni halak Zebulon, i ma si Eliab, anak ni si Helon.

¹⁷Dung i diloha ma undungundung i, jadi borhat ma angka anak ni si Gerson dohot si Merari, angka na mangusung undungundung i.

¹⁸Dung i borhat ma partonggol ni parsaroan Ruben rap dohot parduaannasida, jala ihutan ni parduaanna i, i ma si Elizur, anak ni si Sedeur.

¹⁹Jala ihutan ni parduaan ni marga ni halak Simeon, i ma Selumiel, anak ni si Zurisadai.

²⁰Jala ihutan ni parduaan ni marga ni halak Gad, i ma si Eliasap, anak ni si Deuel.

²¹Dung i borhat ma huhut halak Kohat i, angka na mangusung habadiaon i, asa sanga parjolo i pajongjongkon undungundung i, paima ro nasida.

²²Dung i borhat ma partonggol ni parsaroan ni halak Epraim, rap dohot parduaannasida

i jala ihutan ni parduaannasida i, i ma si Elisama, anak ni si Amihud.

²³Jala ihutan ni parduaan ni marga ni halak Manasse, i ma si Gamaliel, anak ni si Pedazur.

²⁴Jala ihutan ni parduaan ni marga ni halak Benjamin, i ma si Abidan, anak ni si Gidion i.

²⁵Dung i borhat ma partonggol ni parsaroan ni halak Dan, rap dohot parduaannasida i, i ma panimpuli di sandok parsaroan, jala ihutan ni parduaanna i, i ma si Ahieser, anak ni si Amisaddai.

²⁶Jala ihutan ni parduaan ni marga ni halak Aser, i ma si Pagiel, anak ni si Okran.

²⁷Jala ihutan ni parduaan ni marga ni halak Naptali, i ma si Ahira, anak ni si Enan.

²⁸I ma parture ni haborhatan ni halak Israel rap dohot parduaannasida i, sai songon i do nasida borhat.

²⁹(III.) Dung i ro ma hata ni si Musa tu si Hobab, anak ni si Reguel, halak Midian, simatua doli ni si Musa: Na tole ma hami borhat tu inganan naung pinorbagabaga ni Jahowa hian: Ahu mangalehonsa tu hamu ninna; antong rap ma hita mardalan, marjambar na denggan pe ho bahenonnami, ai nunga diparbaga Jahowa na denggan tu Israel.

³⁰Alai ninna ibana ma mangalusi: Ndang olo ahu mardalan rap dohot hamu, naeng mulak ma ahu tu luathu dohot tu hahaanggingku.

³¹ Alai ninna si Musa ma: Ua unang tadingkon hami, ai tangkas do diboto ho manang ingkon didia parsaroan na denggan di halongonan i, ingkon ho nian hira gabe matanami.

³² Molo tung mardalan ho rap dohot hami, jala ro na denggan i, na naeng bahenon ni Jahowa tu hami, ingkon bahenonnami huhut na denggan i tu ho.

³³ Jadi borhat ma nasida sian dolok ni Jahowa tolu ari mardalan daona, jala poti parpadanan ni Jahowa mardalan di jolonasida, tolu ari mardalan daona, mangalului pangulonon di nasida.

³⁴ Jala ombun ni Jahowa di atasnasida arian, molo borhat nasida sian parsaroan.

³⁵ (IV.) Ia naeng borhat poti i, ninna si Musa ma martangiang: Hehe ma Ho, ale Jahowa, asa tung marserak angka musum jala maporus angka na mangkagigihon Ho maradophon Bohim.

³⁶ Jala ia jumpa mangulon poti i, ninna ma martangiang: Sai mulak ma Ho, ale Jahowa tu halak Israel na marriburibu loksa toropna!

11 ¹ (I.) Dung i ndang piga dan manggogo ma bangso i marmungutmungut, pola sahat tu pinggol ni Jahowa. Jadi dung dibege Jahowa songon i marsigorgor ma rimasna, pola galak di tongatonganasida api sian Jahowa mansudahon partalpahan ni parsaroan i.

²Dung i mangangguhi ma bangso i tu si Musa, jadi martangiang ma si Musa tu Jahowa, gabe mintop ma api i.

³Jadi dibahen ma goar ni inganan i Tabera, ala naung marsigorgor api ni Jahowa di tongatonganasida.

⁴(II.) Tole ma muse manombo hisaphisap ni halak gambalgambal na di tongatonganasida dohot do halak Israel mangulahi tumatangis, angka ninna ma: Ise ulaning mangalehon juhut panganonnami?

⁵Sai dipaingotingot rohanami do dengke, angka na hupangan hami di Misir so pola marpanuhor, tole angka ansimun, jelok, ingkau rata, baoang na rara dohot baoang hian.

⁶Alai anggo nuaeng tung dipahiang do ateatenami, ndang adong agia aha diida matanami, nda holan Manna i.

⁷Alai anggo Manna i songon boni katumbar balgana jala songon pultak ni haminjon do rupana.

⁸Dung i mulakulak ma bangso i mardalan papungupunguhon Manna i, laos diduda ma i jala ditutu jala dilompa di bagasan hudon manang mambahen sagusagu sian i, jala daina songon dai ni sagusagu na ginoreng dohot miak.

⁹Molo madabu nambur i bornginna i tu parsaroan i, madabu ma dohot Manna i tu atasna.

¹⁰(III.) Jadi dung dibege si Musa bangso i tumatangis be marompuompu, ganup di pintu ni undungundungna, gabe marpiarpiar situtu ma rimas ni Jahowa; sogo dohot roha ni si Musa marnidasa.

¹¹Dung i ninna si Musa ma tu Jahowa: Boasa tung songon i toruanmu naposomon? Jala boasa tung so jumpangan asi ni roha ahu di adopanmu, umbahen tung ampehononmu tu ahu siusungon ni sandok bangso on?

¹²Hea ahu hian marhangoluan sandok bangso on, manang tung ahu manubuhon nasida, umbahen dohononmu tu ahu: Ingkon ho mangabing nasida di bagasan ampuanmu, songon pangusung ni ama pangintubu di posoposona sahat tu tano naung niuarihonmu tu ompunasida i.

¹³Tung sian dia ma dapot ahu juhut laho mangalehon tu sandok bangso on? Ai tumatangis nasida di adopanku, huhut mandok: Lehon tu hami juhut panganonnam!

¹⁴Ndang tarusung sasada ahu be sandok bangso on, madokdokhu do i di ahu.

¹⁵Molo tung songon i bahenonmu tu ahu, tagonan nama ahu bunu, molo tung maruli asi ni roha ahu di adopanmu, asa unang be hupaidaida soro ni aringkon.

¹⁶Dung i ro ma hata ni Jahowa tu si Musa songon on: Papungu ma tu Ahu pitupulu halak sian sintua ni halak Israel, angka na tangkas tinandam nasida hian sintua ni bangso i

dohot panuturina, dung i arahon ma nasida tu undungundung parluhutan i, asa jongjong nasida disi rap dohot ho.

¹⁷Dung i tuat ma Ahu laos mangkatai dohot ho disi; dung i buatonku ma sian Tondi na songgop tu ho, jala ampehononku tu nasida, asa nasida donganmu mangusung sianjuon di bangso i, asa unang be sasada ho mangusungsa.

¹⁸Dung i dohononmu ma tu bangso i: Manguras ma hamu tu marsogot, asa panganonmuna juhut, ai nunga pola sahat partangisonmuna i tu pinggol ni Jahowa, uju na nidokmuna i: Ise ulaning mangalehon juhut panganonnami? Ai marsonangsonang do hami di Misir? Dibahen i lehonon ni Jahowa ma tu hamu juhut, asa panganonmuna.

¹⁹Ndada holan sadari panganonmuna, manang dua ari, jala ndada holan lima ari, manang sampulu ari, manang duapulu ari pe lelengna.

²⁰Ingkon pola boho sabulan lelengna, asa maradu ruar musengani sian igungmuna, jala maradu gialan hamu disi, ala naung marlea dibahen hamu Jahowa, na di tongatongamuna i, pola nunga tumatangis hamu di adopanna huhut mandok: Boasa tung ruar hita sian Misir?

²¹Dung i ninna si Musa ma: Pola onom ratus ribu halak parhantarahantar torop ni bangso na pinasahatmu tu ahu, hape lam nimmu do:

Lehononku ma juhut tu nasida, asa singkop panganon nasida boho sabulan lelengna.

²²Ingkon potongon huroha angka birubiru dohot lombu, asa singkop di nasida? Manang tung ingkon papungupunguon luhut dengke sian laut, asa singkop di nasida?

²³Alai ro ma hata ni Jahowa tu si Musa: Na hurang gogo do huroha tangan ni Jahowa? Alai tahe ingkon idaonmu nuaeng manang na sintong hatanku tu ho manang ndang.

²⁴(IV.) Dung i ruar ma si Musa, laos dipatolhas ma tu bangso i angka hata ni Jahowa, jala dipapungu pitupulu halak sian angka sintua ni bangso i jala dipajongjong nasida humaliang undungundung i.

²⁵Dung i tuat ma Jahowa di bagasan ombun i laos mangkatai dohot ibana, jala dibuat sian Tondi na songgop tu ibana, jala dilehon tu na pitupulu halak sintua i; jadi dung mangulon Tondi i di atasnasida manurirangi ma nasida, alai dungkon ni ndang be di didatdati.

²⁶Alai tinggal dope dua halak di parsaroan, goar ni na sada si Eldad, jala goar ni na sadanari si Medad, mangulon huhut Tondi i di atasnasida, ai dohot do nasida masuk tu angka na tarsurat i, alai dung ruar nasida tu undungundung i, gabe manurirangi nasida di bagasan parsaroan i.

²⁷Dung i marlojong ma sada dolidoli paboahon barita i tu si Musa: Si Eldad dohot si Medad manurirangi di bagasan parsaroan.

²⁸Dung i ro ma alus ni si Josua, anak ni si Nun, parhalado ni si Musa olat i haposoonna, ninna ma: Ale tuanku Musa, orai ma nasida!

²⁹Alai ninna si Musa ma mandok ibana: Tung tama ma ho mangiburu mandingkani ahu? Anggiat nian dipangido rohangku sandok bangso ni Jahowa manurirangi, jala dibasabasahon Jahowa Tondina songgop tu atasnasida.

³⁰Dung i marpungu ma muse si Musa tu parsaroan i, ibana tahe rap dohot angka sintua ni Israel.

³¹(V.) Dung i borhat ma sada alogo sian Jahowa na mamboan angka lote sian laut, jala dipandabuhon tu parsaroan i, hira sadari mardalan daona tu sadaon jala sadari mardalan daona muse tu sadaan, humaliang parsaroan i, arga dua asta timbona sian tano i.

³²Jadi hehe ma bangso i papungupunguhon angka lote i manipat sadarina i manipat borngin pe dohot manipat sadari marsogot; jala manang ise na papunguhon na ummotik, sampulu homer pinapunguna, laos dijomur nasida do i humaliang parsaroan i.

³³Hape uju dihilhil nasida dope juhut i, tagan so suda dope disohali, nunga marpiarpiar muruk ni Jahowa mida bangso i, rahat situtu do pamunu ni Jahowa di nasida.

³⁴Dung i dibahen nasida ma goar ni pangulonon i angka tanoman ni hahisapon, ala disi tartanom bangso na hisapan i.

³⁵Dung i borhat ma bangso i sian angka tanoman ni hahisapon tu Hazerot, laos tinggal di Hazerot i nasida.

12¹(I.) Dung i marmungutmungut ma si Miryam dohot si Aron dompak si Musa, ala jolmana boru Kus i, na binuatna i; ai boru Kus i do na binuatna i bahen jolmana.

²Jadi ninna nasida ma: Tung holan marhite sian si Musa do huroha Jahowa mandok hatana? Nda dohot do marhite sian hami Ibana mandok hatana? Jadi dibege Jahowa ma hata i.

³Alai jolma na mardangol situtu do si Musa, gabe lumambok ibana sian saluhut jolma na di atas tano on.

⁴(II.) Dung i tompu ma ro hata ni Jahowa tu si Musa dohot tu si Aron dohot tu si Miryam: Ruar ma anggo hamu na tolu mandapothon tu undungundung parluhutan i! Jadi ruar ma nasida tolunsa.

⁵Dung i tuat ma Jahowa di bagasan ombun na marsijongjong, laos jongjong di pintu ni undungundung i jala dijou ma si Aron dohot si Miryam, gabe ruar ma nasida na dua.

⁶Dung i ninna Jahowa ma: Tangihon hamu ma angka hatangkon: Tung sura adong manang ise sian hamu panurirang ni Jahowa, Ahu papatarhon diringku tu ibana marhite

sian pangungkapon, manang marhite sian nipi Ahu mandok hata tu ibana.

⁷ Alai ndang songon i anggo naposongku si Musa, tung di sandok bagashu do ibana haposan.

⁸ Tung pamangan tu pamangan do Ahu mangkatai dohot ibana, tung adop bohi be do, ndada marhite sian hata hulingkulingan, tung rupa ni Jahowa sandiri do na niidana. Boasa tung so dihabiari rohamuna mandok hata ungutungut dompak naposongku si Musa?

⁹ (III.) Dung i marsigorgor ma rimas ni Jahowa mida nasida, laos laho marhalindo.

¹⁰ Ombuni pe manginsurut do sian atas undungundung i, jala ida ma, nunga puruon si Miryam mamontar songon itak; humusor ma dohot si Aron mandompakkon si Miryam, jala ida ma, nunga puruon ibana.

¹¹ Dung i ninna si Aron ma tu si Musa: Iale tuanku, unang nian painonahon tu hami dosa i, ala na tarpaoto hami mambahen dosa sisongon i.

¹² Unang tung ibana songon silumaksaijur naung satonga suda dagingna di haruruarna sian bortian ni inana!

¹³ Dung i mangangguhi ma si Musa tu Jahowa, ninna ma: O ale Debata, sai pamalum ma nasida!

¹⁴ Dung i ninna Jahowa ma tu si Musa: Tung sura marsitijur amana i tu bohina, nda ingkon tarurak ibana pitu ari lelengna? Dibahen i

ingkon tarhurung ibana pitu ari lelengna di balian ni parsaroan i, dung ipe asa jadi jangkonon ibana muse.

¹⁵Jadi tarhurung ma si Miryam pitu ari lelengna di balian ni parsaroan i, sundat dohot situan na torop i borhat, paima dijangkon muse si Miryam.

¹⁶Dung i borhat ma bangso i sian Hazerot jala marsaro nasida di halongonan Elaparan.

13¹(I.) Dung i ro muse ma hata ni Jahowa tu si Musa songon on:

²Suru ma di ho baoa, angka na mangkahapi tano Kanaan, na naeng basabasahononku tu halak Israel; sian ganup marga marompuompu suruhononmu sahalak, luhutna i ingkon induk do di tongatonganasida.

³Dung i disuru si Musa ma nasida sian halongonan Elaparan, hombar tu hata ni Jahowa, saluhut baoa i induk do di tongatonga ni halak Israel.

⁴Jala on do goargoarnasida: si Sammua, anak ni si Sakur sian marga Ruben.

⁵Si Sapat, anak ni si Hori sian marga Simeon.

⁶Si Kaleb, anak ni si Jepune sian marga Juda.

⁷Si Igeal, anak ni si Josep sian marga Isasar.

⁸Si Hosea, anak ni si Nun sian marga Epraim.

⁹Si Palti, anak ni si Rapu sian marga Benjamin.

¹⁰Si Gaddiel, anak ni si Sodi sian marga Zebulon.

¹¹Si Gaddi, anak ni si Susi sian marga Josep, i ma sian marga Manasse.

¹²Si Ammiel, anak ni si Gemali sian marga Dan.

¹³Si Setur, anak ni si Mikhael sian marga Aser.

¹⁴Si Nakbi, anak ni si Vopsi sian marga Naphtali.

¹⁵Si Geuel, anak ni si Mahi sian marga Gad.

¹⁶I ma goargoar ni baoa, angka na sinuru ni si Musa mangkahapi tano i; alai anggo si Hosea, anak ni si Nun, digoar si Musa do si Josua.

¹⁷Jadi di na sinuru ni si Musa nasida laho mangkahapi tano Kanaan i, ninna ma mandok nasida: Ingkon nangkok hamu tu tano na tungkan dangsina, nangkok muse hamu tu dolok.

¹⁸Dung i tangkasi hamu ma manang songon dia pangalaho ni tano i ro di bangso na maringan disi, manang na marhuaso manang na gale, manang na otik manang na torop.

¹⁹Jala manang songon dia pangalaho ni tano, na niingananna i, manang na denggan manang na roa, jala manang songon dia pangalaho ni huta, angka na niinganannasida

i, manang adaran manangkas, manang na gonting angka huta i.

²⁰Nang mansam ni tano i, manang na napu manang na tungil, manang na tubuan hau, manang ndang. Antong pir ma tondimuna, boan hamu huhut sian parbue ni tano i. Alai tongon masa angka ari panapuon di patumonaan ni parbue ni anggur.

²¹(II.) Dung i nangkok ma nasida jala dihahapi tano i olat ni halongonan Sin sahat ro di Rehob, di dalan laho tu Hamat.

²²Nangkok nasida huhut tu tano tungkan dangsina, gabe sahat nasida tu Hebron; disi do si Ahiman, si Sesai dohot si Talmai, angka anak ni si Enak, didapot nasida. Alai anggo Hebron pitu taon jumolo dipungka sian Zoan di Misir.

²³Dung i sahat nasida muse tu rura Eskol, gabe ditallik nasida disi saraungan parbue ni anggur, pola dipausungkon hallungan ni dua halak marhaluhalu, tole muse angka parbue ni hau dalimo dohot hau ara.

²⁴Laos targoar inganan i rura Eskol, ala parbue ni anggur saraungan, na tinallik ni halak Israel disi.

²⁵Jadi dung salpu opatpulu ari, mulak ma nasida sian na mangkahapi tano i.

²⁶(III.) Jadi mardalan ma nasida mandapothon si Musa dohot si Aron ro di sandok luhutan ni halak Israel tu halongonan Elaparan, tu Kades, jala mamboan barita

tu nasida dohot tu sandok luhutan i, huhut patuduhon tu nasida parbue ni tano i.

²⁷Dung i dipajojor nasida ma tu si Musa, angka ninna ma: Nunga sahat hami tu tano, sihapannami sinurumi, tano habaoran ni susu dohot situak ni loba tutu, jala on do parbuena.

²⁸Alai tung na marhuaso situtu do anggo bangso na maringan di tano i, angka hutana pe na gonting situtu do jala na bolon, tole huhut angka anak ni si Enak huida hami disi.

²⁹Halak Amalek maringan di tano tungan dangsina, jala halak Het, Jebusi dohot Amori maringan di dolok, jala halak Kanaan maringan di topi laut dohot mardonokkon Jordan.

³⁰Alai anggo si Kaleb nian paposhon roha ni bangso i di adopan ni si Musa, ninna ma: Denggan hita nangkok manoluk tano i, ai tarpapatu hita do i.

³¹Alai ro ma hala ni baoa angka na nangkok rap dohot ibana mandok: Ndang tarbahen hita nangkok mandopang bangso i, ai gumogo do i sian hita.

³²Dung i dipararat nasida ma barita na roa taringot tu tano na hinahapannasida i, ninna do mandok halak Israel i: Tano na hubolus hami laho mangkahapi nian, tano na rahat do i manganhon pangisina, jala sandok bangso na huida hami disi, angka baoa na ganjang situtu do.

³³Huida hami huhut disi halak ulubalang na bolon situtu, angka anak ni si Enak, pinompar ni ulubalang, hira sihapor do anggo hami di rohanami, laos songon i nang di rohanasida.

14¹(I.) Dung i sandok luhutan i pangiar soarana be mangangguhi jala tumatangis bangso i manipat sabornginna i.

²Dung i marmungutmungut ma sude halak Israel dompak si Musa dohot dompak si Aron, jala sandok luhutan i mandok hatana be tu nasida: Tung so mate hami nian uju di tano Misir dope hami, manang mate dope hami nian di halongonan on!

³Boasa tung togihonon ni Jahowa hami tu tano on, asa marragean hami bahenon ni podang, jala jolmanami dohot ianakhonnami ripe tabanon? Nda tagonan nian hami mulak tu Misir?

⁴Dung i masipandohan ma ganup tu donganna: Itapampe ma sahalak bahen ihutan, asa mulak hita tu Misir!

⁵Dung i manungkap ma si Musa dohot si Aron tu tano di adopan ni sandok parluhutan ni halak Israel.

⁶Alai anggo si Josua, anak ni si Nun dohot si Kaleb, anak ni si Jepune, angka na dohot mangkahapi tano i, manansani ulosnasida be.

⁷Ninna huhut mandok sandok luhutan ni halak Israel: Ia tano naung huliati hami laho mangkahapi, tano na denggan sahali do i.

⁸Molo lomo roha ni Jahowa mida hita, sai na tolhas do hita togihononna tu tano i, jala basabasahononna do i tu hita, tano habaoran ni susu dohot situak ni loba do i.

⁹Alai na so tupa manggunturi hamu dompak Jahowa, jala ndang jadi hamu tahuton mida bangso isi ni luat i, ai hira sagusagu do nasida sohalanta; nunga sumurut pandingini sian nasida, alai Jahowa do pandingini di hita, unang tahuton hamu mida nasida!

¹⁰Jadi sahata ma sandok luhutan i mandok, ingkon mate nasida dangguran dohot batu. Alai tahe marsinondang ma hamuliaon ni Jahowa di bagasan undungundung parluhutan i, sude halak Israel marnidasa.

¹¹(II.) Dung i ninna Jahowa ma tu si Musa: Sadia leleng on insahan ni bangso on Ahu? Jala sadia lelengna i ndang olo nasida porsea di Ahu, binahen ni sude tanda angka na hubahen di tongatongana?

¹²Toruangku nama nasida marhite sian begu antuk jala rendephononku nasida, jala bahenonku ho gabe bangso na balga, jala na gumogo sian nasida.

¹³Dung i ninna si Musa ma tu Jahowa: Begeon ni halak Misir ma barita i, ai nunga ditogihon Ho bangso on ruar sian tongatonganasida marhitehite hagogoonmu.

¹⁴Paboaonnasida huhut hata i tu halak isi ni tano on, angka naung umbegesa tutu Ho, ale Jahowa, di tongatonga ni bangso on, nunga

pola adop bohi be Ho, ale Jahowa diida, jala ombunmu marsijongjong di atasnasida, jala Ho mardalan di jolonasida marhite sian ombun na marsijongjong ia arian, jala marhitehite api na marsijongjong ia borngin.

¹⁵Tung sura bunuonmu nuaeng bangso on, songon sahalak, jadi dohonon ni bangso parbegu, angka naung umbege baritami ma songon on:

¹⁶Ala na so tuk gogo ni Jahowa manogihon bangso on tu bagasan luat, naung niuarihonna tu nasida, umbahen dipotongi nasida di bagasan halongonan.

¹⁷Nuaeng pe, sai marmulia ma gogo ni Tuhan i songon naung nidok ni hatam, ai nimmu do:

¹⁸Na lambas do roha ni Jahowa jala parasi roha godang, na marpamuati do rohana mida hajahaton dohot pangalaosion, alai ndang loasonna malua sian uhum anggo halak parsala, sai na luluhononna do hajahaton ni amaama tu angka anakna ro di sundut patoluhon dohot paopathon.

¹⁹Antong sai marpamuati ma roham mida hajahaton ni bangsom, hombar tu hinagodang ni asi ni roham, ala naung sapala marpamuati roham mida bangsom olat ni Misir dope rasirasa nuaeng.

²⁰(III.) Dung i ninna Jahowa ma: Nunga marpamuati rohangku ala pangidoanmu.

²¹ Alai tahe, songon sintongna mangolu Ahu, ingkon gok hamuliaon ni Jahowa sogot liat portibi on.

²² Ai saluhut baoa, angka na sanga marnida hamuliaonku dohot tanda angka na hubahen i di Misir dohot di halongonan, hape nunga pola sanga sampulu hali diunjuni nasida Ahu, jala ndang ditangihon nasida soarangku.

²³ Na so tupa idaonna nasida tano naung huuarihon nian tu ompunasida i, sude tahe angka naung manginsahi Ahu, ndang jadi idaonna tano i.

²⁴ Alai anggo naposongku si Kaleb, ala tondi na asing diparrohahon ibana jala marsihohot rohana mangihuthon tu Ahu, boanonku ma anggo ibana masuk tu tano na niebatanna i, jala pinomparna manean tano i.

²⁵ Alai anggo halak Amalek dohot Kanaan maringan do di rura; dibahen i humusor na hamu marsogot jala borhat hamu mulak tu halongonan di dalam laho tu laut arung.

²⁶ Dung i ro muse hata ni Jahowa tu si Musa dohot tu si Aron songon on:

²⁷ Sadia leleng on paanjuanjuonku luhutan na jahat on, angka na marmungutmungut dompak Ahu? Nunga tangkas hubege ungutungut ni halak Israel, angka na niungutunguthon nasida dompak Ahu.

²⁸ Dibahen i paboa ma tu nasida: Songon sintongna mangolu Ahu, ninna Jahowa,

ingkon bahenonku do tu hamu songon naung nidokmuna i binege ni pinggolhon.

²⁹Ingkon di bagasan halongonan on do marragean bangkemuna i, jala saluhut hamu angka na tarbilang marguru tu sandok bilanganmuna i, olat ni na marumur duapulu taon dohot lobi sian i, angka na marmungutmungut dompak Ahu.

³⁰Na so tupa hamu masuk tu tano naung pola husumpahon nian, ingkon bahen ingananmuna nian, dungkon ni si Kaleb, anak ni si Jepune tahe dohot si Josua, anak ni si Nun.

³¹Alai anggo dakdanakmuna, angka na nidokmuna i ripe tabanon, ingkon nasida do togihononku sahat tusi, asa ditanda nasida tano na tinoishon ni rohamuna i.

³²Alai anggo dagingmuna sandiri, ingkon marragean do di halongonan on.

³³Jala angka anakmuna ingkon gabe parmahan do di halongonan opatpulu taon lelengna, asa manginona tu nasida parmainanonmuna i, paima sun siap bangkemuna di halongonan.

³⁴Marguru tu bilangan ni na opatpulu ari i hamu mangkahapi tano i, sadari gabe sataon, asa opatpulu taon lelengna manginona tu hamu hajahatonmuna i, asa tung ditanda hamu hansitna, molo Ahu manadingkon hamu.

³⁵Ahu, Jahowa tahe naung mandok i: Ingkon songon i bahenonku tu sandok luhutan na jahat on, angka na marluhut mangalo Ahu; ingkon di bagasan halongonan on nasida sun siap jala marmatean disi.

³⁶Jala baoa angka na sinuru ni si Musa laho mangkahapi tano i, angka na mulak muse mambahen marmungutmungut sandok luhutan i dompak ibana, asa pararat barita na roa taringot tu tano i.

³⁷Jadi marmatean ma tutu baoa angka na pararat barita na roa taringot tu tano i, hona torutoru di adopan ni Jahowa.

³⁸Alai anggo si Josua, anak ni si Nun dohot si Kaleb, anak ni si Jepune mangolu do i tinggal sian baoa, angka na laho mangkahapi tano i.

³⁹Dung i dipatolhas si Musa ma angka hata i tu sandok halak Israel, gabe marsak situtu bangso i.

⁴⁰(IV.) Dung i dipasogot nasida ma hehe manogotna i jala nangkok nasida tu punsu ni dolok, ninna ma: Ida ma, dison do hami, naeng nangkok do hami tu inganan naung nidok ni Jahowa hian, ai nunga mardosa hami!

⁴¹Alai ninna si Musa ma: Boasa tung songon i pangalaosionmuna di hata ni Jahowa? Ndang tagamon marantu hamu.

⁴²Sai unang ma hamu nangkok, ai ndang di tongatongamuna anggo Jahowa, asa unang tung talu hamu maradophon musumuna i.

⁴³Ai halak Amalek dohot Kanaan do disi di Adopanmuna i, gabe marragean hamu maon bahenon ni podang, ai ala naung ditundali hamu Jahowa, ndang tagamon donganan ni Jahowa hamu.

⁴⁴Hape dituntun nasida do nangkok tu punsu ni dolok i mangoloi jungkat ni rohana; alai anggo poti parpadanan ni Jahowa dohot si Musa, ndang morot sian tongatonga ni parsaroan i.

⁴⁵Jadi tuat ma halak Amalek dohot Kanaan, angka na maringan di atas dolok i, laos ditaluhon ma nasida jala dipaundarundar sahat ro di Horma.

15¹ (I.) Dung i ro muse hata ni Jahowa tu si Musa songon on:

²Patolhas ma tu halak Israel hatangkon: Ia dung sahat hamu tu tano siinganamuna i, na naeng basabasahononku tu hamu.

³Tung sura naeng hobasonmuna sada pelean api di Jahowa: Pelean situtungan manang pelean sipotongon, asa marbagabaga hasurungan, manang pelean sian lomo ni roha, manang di ari rayamuna laho mambahen tu Jahowa sada uap na hushus sian lembu manang sian birubiru.

⁴Manang ise na naeng mamelehon peleana tu Jahowa, ingkon boanonna do saparpuluan

itak na lamot na nidogil dohot saparopat Hin miak bahen pelean sipanganon.

⁵Ingkon boanonmu huhut anggur bahen pelean siinumon saparopat Hin dongan ni pelean situtungon manang pelean sipotongon, dongan ni ganup anak ni birubiru tahe.

⁶Alai anggo dongan ni sada birubiru tunggal, ingkon hobasonmu do dua parpulan itak na lamot na nidogil dohot miak sapartolu Hin bahen pelean sipanganon.

⁷Ingkon boanonmu huhut anggur bahen pelean siinumon sapartolu Hin, ingkon pelehononmu do i tu Jahowa bahen uap na hushus.

⁸Tung sura naeng pelehononmu sada anak ni lembu bahen pelean situtungon manang pelean sipotongon, marbagabaga hasurungan manang bahen pelean hamauliateon tu Jahowa.

⁹Ingkon boanonmu huhut dongan ni anak ni lembu i tolu parpulan itak na lamot na nidogil dohot miak satonga Hin bahen pelean sipanganon.

¹⁰Ingkon boanonmu huhut anggur bahen pelean siinumon satonga Hin, i ma sada pelean api bahen uap na hushus di Jahowa.

¹¹Ingkon songon i bahenon ni halak di ganup lembu manang di ganup birubiru tunggal manang di ganup birubiru boruboru manang di haming pe.

¹²Marguru tu bilangan ni pelean na pinelehonmuna i, ingkon songon i bahenonmuna di ganup pelean mangihuthon bilanganna.

¹³Nasa halak isi ni tano i hian, ingkon songon i bahenonna laho mamelehon sada pelean api bahen uap na hushus di Jahowa.

¹⁴Jala tung sura maisolat sahalak dagang di lambungmuna manang tung maringan ibana di tongatongamuna marsundutsundut, gabe naeng hobasonna sada pelean api bahen uap na hushus di Jahowa, suang songon na binahenmuna i, ingkon songon i bahenonna.

¹⁵Ingkon sisada aturan do sandok luhutan i, di hamu dohot di halak na maisolat; aturan na hot salelenglelengna do i di pinomparmuna marsundutsundut, suang songon hamu, ingkon songon i nang halak dagang di adopan ni Jahowa.

¹⁶Ingkon sisada patik jala sisada uhum di hamu dohot di halak dagang na maisolat di tongatongamuna i.

¹⁷(II.) Dung i ro muse hata ni Jahowa tu si Musa songon on:

¹⁸Patolhas ma tu halak Israel hatangkon: Ia dung sahat hamu tu tano, hasahatanmuna muse Ahu manogihon tusi.

¹⁹Jala tole hamu manganhon sian sagusagu gogo ni tano i, ingkon pelehononmuna sada pelean tatingan tu Jahowa.

²⁰Bahen patumonaan ni itak na niudi, ingkon pelehononmuna do sada sagusagu bahen pelean tatingan; suang songon pelean tatingan sian pardegean, ingkon songon i do i tatingonmuna.

²¹Ingkon lehononmuna do tu Jahowa sian patumonaan ni itakmuna na niudi bahen pelean tatingan di pinomparmuna marsundutsundut.

²²Jala tung sura lilu hamu gabe ndang diulahon hamu luhut tona on, angka na pinaboa ni Jahowa tu si Musa.

²³Tung luhut do naung tinonahon ni Jahowa tu hamu marhite sian si Musa, olat ni ari dung dipungka Jahowa martona dohot tu joloan on di pinomparmuna marsundutsundut.

²⁴Tung sura buni maradophon mata ni luhutan i masa sada haliluan, ingkon hobason ni sandok luhutan i sada anak ni lembu bahen pelean situtungon, gabe uap na hushus di Jahowa, rap dohot peleanna sipanganon dohot peleanna siinumon hombar tu aturan i; tole muse sada hambing tunggal bahen pelean pardosaan.

²⁵Ingkon songon i pardengganen bahenon ni malim tu sandok luhutan ni halak Israel, asa salese dosanasida i, ai sada haliluon do i; ingkon nasida tahe mamboan peleannasida bahen pelean api tu Jahowa huhut bahen peleannasida pardosaan di adopan ni Jahowa, ala haliluonnasida i.

²⁶Jadi salese ma dosa ni sandok luhutan ni halak Israel, nang dosa ni halak dagang na maisolat di tongatongamuna, ai haliluan di sandok bangso i do i.

²⁷Jala tung sura sahalak mambahen dosa ala liluna, ingkon boanonna do sada hambing boruboru na marumur sataon bahen pelean pardosaan.

²⁸Ingkon malim i mambahen pardenggan di halak na lilu, molo mardosa ibana sian liluna di adopan ni Jahowa, ingkon bahenonna do pardenggananna, asa salese dosana i.

²⁹Ingkon sisada patik do di hamu, nang di halak Israel isi ni tano i hian, nang di halak dagang na maisolat di tongatongamuna, molo marsala ibana sian liluna.

³⁰Jala tung sura sahalak mambahen dosa sian jungkatna, nang halak isi ni tano i hian ibana, nang halak dagang. Jahowa do na niinsahanna disi, dibahen i ingkon siaphononhon halak sisongon i sian tongatonga ni bangsona.

³¹Ala naung marlea binahenna hata ni Jahowa jala na niosena tonana, ingkon siaphononhonjolma sisongon i, ingkon manginona tu ibana do hajahatonna i!

³²(III.) Jadi uju di halongonan halak Israel i, jumpang nasida ma sada baoa na marsobansoban, tongon di ari Sabbat.

³³Jadi halak na marnida ibana marsobansoban mamboan ibana tu si

Musa dohot tu si Aron dohot tu sandok luhutan i.

³⁴Dung i dihurungkon nasida ma ibana tu bagasan hurungan, ai ndang dope andar diboto nasida uhum sidabuon tu ibana.

³⁵Dung i ro ma hata ni Jahowa tu si Musa: Ingkon marutang hosa do baoa i; ingkon sandok luhutan i mandangguri ibana dohot batu di balian ni parsaroan.

³⁶Jadi sandok luhutan i manogihon ibana ruar tu balian ni parsaroan, laos didangguri nasida ibana mate dohot batu, songon na tinonahon ni Jahowa hian tu si Musa.

³⁷(IV.) Dung i ro muse hata ni Jahowa tu si Musa songon on:

³⁸Pasahat ma tu halak Israel hatangkon: Ingkon bahenonnasida di nasida angka rambu di ujung ni sampesampenasida marsundutsundut, jala ingkon bahenonnasida tu rambu i sada tali bonang na rata langit.

³⁹Jala on do lapatan ni rambu i, asa paberengberengonmuna do i huhut pasingothon tu hamu saluhut tona ni Jahowa, asa diulahon hamu angka i, asa unang dipaihut hamu elaela ni rohamuna manang matamuna, pola tung marmainan hamu marhite sian i.

⁴⁰Asa tung diingot jala diulahon hamu saluhut tonangku, gabe angka na badia hamu di Debatamuna i.

⁴¹ Ahu do Jahowa, Debatamuna i, na manogihon hamu ruar sian tano Misir, asa Ahu gabe Debatamuna; Ahu ma tutu Jahowa, Debatamuna i.

16¹ (I.) Dung i marbulan ma si Kora, anak ni si Isebar, tubu ni si Kohat, anak ni si Lepi rap dohot si Datan dohot si Abiram, angka anak ni si Eliab dohot si On, anak ni si Pelet, pinompar ni si Ruben tolunsa.

² Hehe ma nasida mamingkasi bada dompak si Musa rap dohot dua ratus limapulu baoa sian halak Israel, angka induk ni luhutan i, angkajolma na tarpis tu parrapotan, pola tarbarita nasida.

³ Jadi marluhut ma nasida mangalo si Musa dohot si Aron, angka ninna ma mandok nasida: Malobihu do pambahen ni hamu na dua; ai sandok luhutan i, angka na badia do luhutna, jala di tongatonganasida do Jahowa; boasa tung patimbotimboonmuna dirimuna gumomgom huria ni Jahowa?

⁴ Jadi dung dibege si Musa hata i, manungkap ma ibana tu tano.

⁵ Laos ninna ma tu si Kora dohot tu sude donganna saparbulanan: Marsogot ma pabotohonon ni Jahowa manang ise jujungan pinabangkitna, jala na badia, asa jadi jumonok tu Ibana; jala manang ise na pinillit ni Jahowa, i ma na jadi jumonok tu Ibana.

⁶On ma bahen hamu, si Kora dohot sude donganna saparbulanan tahe: Buat hamu ma di hamu angka saolan panutungan daupa.

⁷Dung i bahen hamu ma api tu bagasan, jala ampehon hamu tu atasna daupa di adopan ni Jahowa marsogot songon on; jadi manang ise na pinillit ni Jahowa, i ma na badia; pambahenmu do tahe na malobihu, hamu pinompar ni si Lepi!

⁸Dung i ro ma hata ni si Musa tu si Kora: Ua tangihon ma hatangkon, hamu pinompar ni si Lepi!

⁹Maotikku dope huroha di rohamu, naung pinapulik ni Debata ni Israel hamu sian luhutan Israel, asa hamu nian jumonok tu Ibana, mangaradoti ulaon di inganan ni Jahowa jala jongjong di adopan ni luhutan, marhalado di nasida?

¹⁰Nunga tutu ho diloas jumonok rap dohot sude hahaanggim, i ma halak Lepi donganmu, hape lam naeng lahangamuna huhut hamalimon.

¹¹Tongon tahe, ho dohot sandok donganmu saparbulanan, nunga marsatahi tahe hamu mangalo Jahowa; ai ise nian anggo si Aron, umbahen marmungutmungut hamu dompak ibana?

¹²Dung i disuru si Musa ma suruanna manjou si Datan dohot si Abiram, angka anak ni si Eliab; alai ninna nasida ma: Ndang olo hami nangkok tusi!

¹³Maotikku dope huroha di roham naung tinogihonmu hami ruar sian tano habaoran ni susu dohot situak ni loba, asa mate hami bunuonmu di halongonan? Lam naeng dope huroha pabangkitonmu dirim gabe pangarajai di hami?

¹⁴Jagar do hami ditogihon ho tu tano habaoran ni susu dohot situak ni loba, tole dilehon ho tu hami hauma na tangkas di aek dohot porlak anggur bahen partalian! Beha so nda tung dohot mata ni angka baoa on pulsihanmu? Nandang olo hami nangkok tusi!

¹⁵Jadi marsigorgor situtu ma rimas ni si Musa, laos ninna ma tu Jahowa: Sai unang ma marpanatap roham tu peleannasida sipanganon! Nanggo sada halode, ndang dung hubuat sian nasida, jala ndang dung huparoa uhumhu tu manang ise sian nasida.

¹⁶Dung i ninna si Musa ma tu si Kora: Anggo marsogot ingkon ro ho rap dohot sandok donganmu saparbulanan tu adopan ni Jahowa, ho, nasida dohot si Aron.

¹⁷Dung i ganup hamu, ingkon buatonna be saoanna panutungan daupa jala ampehononna tu atasna daupa, dung i boanonna jumonok ganup saoanna pardaupaan tu adopan ni Jahowa, i ma gabe dua ratus limapulu saoan pardaupaan, ho pe dohot si Aron mamboan be pardaupaanna.

¹⁸Jadi ganup mambuat pardaupaanna be jala dibahen api tu bagasanna, diampehon

muse daupa tu atasna, jala jongjong nasida di pintu ni undungundung parluhutan i, nang si Musa dohot si Aron.

¹⁹Nunga dipaluhut si Kora hian sandok luhutan i tu pintu ni undungundung parluhutan i mangalo nasida. Dung i tarida ma hamuliaon ni Jahowa tu sandok luhutan i.

²⁰(II.) Dung i ro ma hata ni Jahowa tu si Musa dohot tu si Aron songon on:

²¹Paholang hamu ma dirimuna sian tongatonga ni luhutan on, asa suda nasida hurendephon di bagasan satongkin.

²²Jadi manungkap be ma si Musa dohot si Aron tu tano huhut mandok: Iale Debata! Ho do Debata ni angka tondi ni nasa sibuk! Ala mardosa sahalak, tung rimasanmu ma sandok luhutan i?

²³Dung i ro ma hata ni Jahowa tu si Musa songon on:

²⁴Patolhas ma hatangkon tu luhutan i: Lumindak ma hamu sian humaliang ni undungundung ni si Kora, si Datan dohot si Abiram.

²⁵Dung i hehe ma si Musa mardalan mandapothon si Datan dohot si Abiram, jala angka sintua ni Israel mangihuthon ibana.

²⁶Dung i ro ma hatana tu luhutan i songon on: Ua lumindak ma hamu sian lambung undungundung ni angka baoa na jahat on, jala unang jama hamu agia aha sian

ugasannasida i, asa unang dohot hamu direndephephon di bagasan sandok dosanasida i!

²⁷ Jadi lumindak be ma nasida sian lambung ni undungundung ni si Kora, si Datan dohot si Abiram humaliang. Jadi ruar ma si Datan dohot si Abiram laos jongjong di pintu ni undungundungnasida i rap dohot jolmanasida, angka anaknasida dohot posoposonasida.

²⁸ Dung i ninna si Musa ma: Marhite sian on ma tandaonmuna, paboa tutu Jahowa marsuru ahu laho mangulahon sude angka ulaon on, paboa ndang tubutubu ni rohangku sandiri:

²⁹ Molo songon hamamate ni halak siap ari hamamate ni halak on. Jala songgop tu nasida hinamago, suang songon tu halak siapari, na so sinuru ni Jahowa ma ahu tutu.

³⁰ Alai molo dijadihon Jahowa na so dung dumatangi, tung dipangangang tano i babana jala dibondut nasida ro di sude ugasannasida i, laos songon i mangolu nasida tuat tu parbeguan, jadi botoonmuna ma naung mangaleai Jahowa do angka baoa on.

³¹ Jadi dung sidung angka hata ondeng dihatahon, angka rigat ma tano i di torunasida.

³² Pintor dipangangang tano i ma babana jala dibondut nasida, ro di jabunasida dohot sude jolma, angka na paihut roha ni si Kora ro di sude ugasannasida i.

³³ Jadi songon i mangolu nasida tuat tu parbeguan ro di sude ugasannasida i, laos dihungkupi tano i nasida; jadi mago ma nasida sian tongatonga ni huria i.

³⁴ Jadi sandok halak Israel angka na humaliang nasida maporus be umbege angguknasida i, ai ninna nasida do: Atik tung dohot hami maon bonduton ni tano i!

³⁵ Ruar huhut api sian Jahowa gabe suda dipangan na dua ratus limapulu baia i, angka naung mamelehon daupa.

³⁶ (17-1) (I.) Dung i ro muse hata ni Jahowa tu si Musa songon on:

³⁷ (17-2) Dokkon ma si Eleasar, anak ni malim Aron, asa dipapungupungu angka pardaupaan i sian holangholang ni turanggong i, jala ditirihon api i, ai na badia do angka ulaula i.

³⁸ (17-3) Ia angka pardaupaan ni halak na mardosa on, pola manginona tu hosanasida i, ingkon topaon ni halak do i gabe pamaluti lampishononhon tu langgatan; ai nunga pola angka i diboan tu adopan ni Jahowa, dibahen i nunga gabe badia, ingkon gabe tanda huhut di halak Israel.

³⁹ (17-4) Jadi dibuat malim Eleasar ma angka pardaupaan tombaga, angka naung binoan ni halak naung pinangan ni api, laos ditopa ma i bahen pamaluti ni langgatan.

⁴⁰ (17-5) Bahen parningotan di halak Israel, asa unang be hum jolma sileban, na so

sian pinompar ni si Aron jumonok naeng manutung daupa di adopan ni Jahowa, jala asa unang marjea ibana songon si Kora dohot donganna saparbulanan, songon naung nilumbahon ni Jahowa hian tu ibana marhite sian si Musa.

⁴¹ (17-6) (II.) Tole marsogotna i marmungutmungut muse ma sandok luhutan ni halak Israel dompak si Musa dohot si Aron ninna ma: Hamu do naung mambunu bangso ni Jahowa.

⁴² (17-7) Jadi dung marluhut huria i tu lambung ni si Musa dohot si Aron humusor ma nasida dompak undungundung parluhutan i, jadi ida ma, nunga dihungkupi ombun i undungundung i, jala tarida hamuliaon ni Jahowa.

⁴³ (17-8) Jadi ro ma si Musa dohot si Aron tu adopan ni undungundung parluhutan i.

⁴⁴ (17-9) Jadi ro ma hata ni Jahowa tu si Musa songon on:

⁴⁵ (17-10) Lumindak ma hamu sian tongatonga ni huriaon, asa suda nasida hurendephon di bagasan satongkin! Jadi manangkap ma nasida na dua tu tano.

⁴⁶ (17-11) Dung i didok si Musa ma tu si Aron: Buat ma pardaupaan i jala bahen tu bagasan ni i api sian atas langgatan, jala ampehon tusi daupa, haru silu ma ho laho mandapothon huria i mambahen pardenggananna, ai nunga pola ruar rimas na

marpiarpiar sian adopan ni Jahowa, nunga pola mamungka rahat begu masa i.

⁴⁷(17-12) Dung i dibuat si Aron ma pardaupaan i, songon na nidokkon ni si Musa i, laos marlojong ma ibana tu tongatonga ni huria i, hape ida ma, nunga pola mamungka rahat begu masa i di tongatonga ni bangso i, gabe ditutung ma daupa i, asa mambahen pardenggan tu bangso i.

⁴⁸(17-13) Jadi jongjong ma ibana di holangholang ni halak naung mate dohot na mangolu, gabe mansohot ma begu masa i.

⁴⁹(17-14) Alai anggo halak naung mate binahen ni begu masa i sampulu opat ribu pitu ratus halak toropna, so padohot angka na mate paihuthon tahi ni si Kora.

⁵⁰(17-15) Dung i mulak ma si Aron tu si Musa tu pintu ni undungundung parluhutan i, laos mansohot ma anggo begu masa i.

17¹(17-16) (III.) Dung i ro muse ma hata ni Jahowa tu si Musa songon on:

²(17-17) Patolhas ma hatangkon tu halak Israel jala buat sian nasida sada tungkot sian ganup marga, sian angka induk nasida marompuompu, gabe sampulu dua tungkot, jala ingkon surathononmu goar ni ganup tu tungkotna be.

³(17-18) Alai anggo goar ni si Aron ingkon surathononmu tu tungkot ni si Lepi, ai di ganup induk marompuompu sada be tungkot i.

⁴(17-19) Ingkon peakkononmu do angka i tu bagasan undungundung parluhutan i di adopan ni poti panindangion i, tusi Ahu somal manopot hamu.

⁵(17-20) Jadi manang isejolma na hupilliti, tungkotna i ma marbunga, asa tung hupasohot parungutunguton ni halak Israel ala Ahu, na marmungutmungut i nasida dompak hamu.

⁶(17-21) Jadi dipatolhas si Musa ma hata i tu halak Israel, gabe sude induk nasida i mangalehon tungkotna be tu ibana ganup induk marompuompu sada be tungkot i, gabe sampulu dua tungkot, tungkot ni si Aron di tongatonga ni tungkot nasida i.

⁷(17-22) Dung i dipeakkon si Musa ma angka tungkot i di adopan ni Jahowa di bagasan undungundung panindangion i.

⁸(17-23) Tole manogotna i, di na masuk si Musa tu bagasan undungundung panindangion i, ida ma, nunga marbunga tungkot ni si Aron na di marga Lepi, nunga tutu martumbur jala marbunga na mangerbang jala marparbue na matoras.

⁹(17-24) Dung i diboan si Musa ma sude tungkot i ruar sian adopan ni Jahowa tu adopan ni sude halak Israel, asa diida nasida, laos dibuat nasida ma ganup tungkotna be.

¹⁰(17-25) Dung i ro ma hata ni Jahowa tu si Musa: Boan ma mulak anggo tungkot ni si Aron tu adopan ni poti panindangion i, asa

dipajop disi bahen tanda di angka anak na somal manggunturi, asa tung marhaujungan ungutungutnasida i ala Ahu, asa unang mate nasida.

¹¹ (17-26) Dung i dibahen si Musa ma songon i, songon na tinonahon ni Jahowa tu ibana, songon i ma dibahen.

¹² (17-27) Dung i ro ma hata ni halak Israel tu si Musa songon on: Ida ma, na marragean ma hami, na mago ma hami, tung saluhut do hami mago!

¹³ (17-28) Manang ise na hum jumonok tu undungundung ni Jahowa mate do i, tung ingkon luhut do hami rendep tagonan?

18 ¹ (I.) Dung i ro ma hata ni Jahowa tu si Aron: Ia ho dohot angka anakmu ro di pinompar ni amangmu rap dohot ho, ingkon tu hamu do manginona hajahaton dompak habadiaon, ingkon manginona tu ho dohot tu angka anakmu rap dohot ho hajahaton dompak hamalimonmuna.

² Nang angka hahaanggim sian marga Lepi, marga ni amangmu, ingkon boanonmu do jumonok rap dohot ho, asa nasida mandongani ho dohot marhalado di ho; alai anggo ho dohot angka anakmu rap dohot ho ingkon di adopan ni undungundung panindangion i do.

³ Ingkon ringkotannasida do manumpak siradotanmu dohot siradotan di sandok undungundung i; alai ndang jadi jumonok

nasida tu ulaula di inganan na badia, manang tu langgatan, asa unang rap mate, nang nasida nang hamu.

⁴Ingkon mandongani ho do nasida, asa mangaradoti siradotan di undungundung parluhutan i di saluhut ulaon tu undungundung i; alai anggo halak sileban ndang jadi jumonok tu hamu.

⁵Antong radoti hamu ma siradotan di inganan na badia i dohot siradotan di langgatan, asa unang be mangonai rimas na marpiarpiar tu halak Israel.

⁶Jala ida ma, nunga Ahu mambuat halak Lepi, hahaanggimuna i sian tongatonga ni halak Israel; silehonlehon tu hamu do umbahen pinasahat nasida tu Jahowa, asa radotanna ulaon di undungundung parluhutan i.

⁷Alai anggo ho dohot angka anakmu rap dohot ho, ingkon radotanmuna do hamalimonmuna i taringot tu saluhut ulaon di langgatan i dohot di bagasan, sahat tu rimberimbe i; ingkon radotanmuna do tohonan i, ai silehonlehon na hulehon do tu hamu tohonan hamalimonmuna i; alai manang ise halak sileban na ro jumonok, ingkon marutang hosa do.

⁸(II.) Dung i ro muse hata ni Jahowa tu si Aron: langgo Ahu, ida ma, nunga hulehon tu ho angka pelean tatingan na tu Ahu hian siradotanmu; saluhut tahe na pinarbadian

ni halak Israel, nunga hulehon bahen parjambaran tu ho dohot tu angka anakmu, gabe patik na hot ro di salelenglelengna.

⁹On do tahe jambarmu sian na badia sahali, sian pelean api: Saluhut peleannasida, i ma saluhut peleannasida sipanganon dohot saluhut peleannasida pardosaan dohot saluhut peleannasida parsalaan, angka na binoannasida tu Ahu, i ma gabe na badia sahali di ho dohot di angka anakmu.

¹⁰Ingkon di bagasan inganan na badia sahali do i panganonmuna; nasa baoa tahe, jadi do manganhon sian i, ingkon badia do i di ho!

¹¹Ingkon jambarmu huhut pelean tatingan silehonlehon nasida i, ro di saluhut pelean hian sian halak Israel; nunga hulehon angka i tu ho, tu angka anakmu dohot tu angka borum na rap dohot ho bahen patik na hot salelenglelengna; nasa na niuras di bagasan jabum jadi do manganhon sian i.

¹²Nasa miak dohot anggur na dumenggan i ro di eme, angka patumonaanna i, silehonon nasida hian tu Jahowa, nunga hulehon tu ho.

¹³Nasa patumonaan sian gogo ni tanonasida i, sibonanonna hian tu Jahowa, ingkon ho do nampunasa; manang ise na niuras di bagasan jabum, jadi do manganhon sian i.

¹⁴Nasa naung hona harom di Israel, ingkon ho nampunasa.

¹⁵Nasa buhabaju, sian nasa sibuk siboanonna hian tu Jahowa, nang sian jolma manang pinahan, ingkon ho nampunasa; alai tahe ingkon tobusonmu do anggo buhabaju sian jolma, dohot buhabaju sian pinahan na ramun pe ingkon tobusonmu do.

¹⁶Anggo taringot tu partobusna, ingkon jolo marumur sabulan, asa jadi tobusonmu, hombar tu pangasammu, arga lima sekkel perak marguru tu sekkel di inganan na badia, i ma duapulu gera.

¹⁷Alai anggo anak buhabaju ni lombu, manang birubiru manang hambing ndang jadi tobusonmu, ai angka na badia do i; jala mudarna i ingkon pistikkononmu do tu langgatan, jala tabotabona ingkon tutungonmu do i bahen pelean api, bahen uap na hushus di Jahowa.

¹⁸Alai anggo sibukna, ingkon ho nampunasa, suang songon andora pelean tatingan i jala songon hae jolo siamun, ingkon ho nampunasa.

¹⁹Saluhut pelean tatingan sian ugasan na badia, angka na tinating ni halak Israel di Jahowa, nunga hulehon tu ho, tu angka anakmu dohot tu angka borum na rap dohot ho bahen uhum na hot salelenglelengna, i ma sada parjanjian sira na hot salelenglelengna di adopan ni Jahowa, di ho dohot di pinomparmu rap dohot ho.

²⁰Dung i ro muse hata ni Jahowa tu si Aron: Ndang jadi maruli partalian ho di tanonasida i, manang margolat ho di tongatonganasida; ai Ahu do partalianmu dohot teanteanonmu di tongatonga ni halak Israel.

²¹(III.) Alai anggo tu halak Lepi, ida ma, nunga hulehon saluhut parpulan di Israel bahen teanteananna, bahen parjambaran upa ni ulaonnasida, na niulanasida i, tohonan di undungundung parluhutan i.

²²Dibahen i ndang jadi be jumonok anggo halak Israel tu undungundung parluhutan i, asa unang dapotan dosa, laos mate nasida.

²³Ingkon halak Lepi tahe mangaradoti ulaon tohonan di undungundung parluhutan i, ingkon manginona tu nasida hajahatonnasida i; patik na hot salelenglelengna do i ro di pinomparmuna, ndang jadi maruli partalian nasida di tongatonga ni halak Israel.

²⁴Ai parpulan ni halak Israel, angka na tinatingnasida i tu Jahowa bahen pelean tatingan, nunga hulehon tu halak Lepi bahen partalianna; ala ni do umbahen naung hudok tu nasida: Ndang jadi maruli partalian nasida di tongatonga ni halak Israel.

²⁵Dung i ro ma hata ni Jahowa tu si Musa songon on:

²⁶Ingkon patolhasonmu do hatangkon tu halak Lepi: Molo dibuat hamu sian halak Israel parpulan, angka naung hulehon tu hamu sian nasida bahen partalianmuna,

ingkon tatingonmuna sian i pelean tatingan tu Jahowa, parpuluhan tahe sian parpuluhan.

²⁷Jala etongan do tu hamu pelean tatingonmuna i, hira songon eme sian pardegean jala songon anggur na marlobilobi sian pangilangan.

²⁸Ingkon songon i tatingonmuna huhut pelean tatingan tu Jahowa sian nasa parpuluhanmuna, angka na binuatmuna sian halak Israel; pelean tatingan sisongon i tu Jahowa, ingkon lehononmuna do tu malim Aron.

²⁹Sian nasa silehonlehon tu hamu, ingkon tatingonmuna do pelean tatingan marragamragam di Jahowa, sian nasa na dumenggan disi, na tau parbadiaanna sian i.

³⁰Ingkon dohononmu ma tu nasida: Molo tatingonmuna na dumenggan i sian i, ingkon etongan do i tu halak Lepi, suang songon parbue na dapot sian pardegean dohot songon parbue na dapot sian pangilangan.

³¹Jadi do huhut panganonmuna sian i di saluhut inganan, nang hamu, nang pinomparmuna i, ai upamuna do i, parjambaran sian ulaonmuna di bagasan undungundung parluhutan i.

³²Jala ndang dapotan dosa hamu marhite sian i, molo tatingonmuna sian i na dumenggan i bahen pelean tatingan, jala ndang jadi ramunanmuna ugasan naung

pinarbadian ni halak Israel, asa unang mate hamu.

19¹ (I.) Dung i ro muse hata ni Jahowa tu si Musa dohot tu si Aron songon on:

²On ma aturan ni patik, na tinonahon ni Jahowa, ninna do: Dokkon ma halak Israel asa ditogu nasida tu ho sada lombu boruboru na rara na so marlindung manang martihas, jala na so dung hapampean ni auga.

³Jala pasahat hamu ma i tu malim Eleasar, asa ditogu lombu i tu balian ni parsaroan, laos disi ma diseat di adopanna.

⁴Dung i ingkon sornophonon ni malim Eleasar ma jarijarina mambuat sian mudarna i, jala pistikkonna sian mudar i dompak undungundung parluhutan i pola pitu hali.

⁵Dung i suda ma tutungonna lombu i di adopanna ro di bobakna, sibukna, tole mudarna ro di napana, ingkon tutungonna do.

⁶Dung i ingkon buaton ni malim i ma hau ares dohot sanggul Hissop dohot bonang na rara, laos timpalhononna ma i tu tongatonga ni pamurunan di lombu i.

⁷Dung i ingkon sunion ni malim i ma pangkeanna jala didionna dagingna di bagasan aek, dung i jadi ma ibana masuk tu parsaroan, alai ingkon ramun malim i sahat ro di bodari.

⁸Halak na manutung lombu i pe, ingkon sunionna pangkeanna dohot aek jala

didionna dagingna di bagasan aek, laos ramun ibana sahat ro di bodari.

⁹Dung i ingkon papunguon ni sada baoa naung niuras sirabun sian lombu i, jala usehononna do i di balian ni parsaroan tu inganan na pansing, asa dipajop disi pangkeon tu luhutan ni halak Israel mambahen aek pangurason; ai pelean pardosaan do i.

¹⁰Halak na papunguhon sirabun sian lombu i pe, ingkon sunsionna do pangkeanna jala ramun ibana sahat ro di bodari. I ma gabe aturan na hot salelenglelengna di halak Israel dohot di halak dagang na maisolat di tongatonganasida.

¹¹(II.) Manang ise na manjama halak naung mate, manang bangke ni sada jolma, ingkon ramun ibana pitu ari lelengna.

¹²Ingkon urasonna ma dirina sian dosa marhite sian aek i di ari patoluhon dohot di ari papituhon, asa ias ibana muse; alai molo tung so diuras dirina sian dosa i di ari patoluhon dohot di ari papituhon, ndang tarbahensa ias.

¹³Manang ise na manjama halak naung mate, manang bangke ni sada jolma, hape ndang olo ibana manguras dirina sian dosa i, inganan ni Jahowa do na niramunanna disi, ingkon siaphononhon jolma sisongon i sian tongatonga ni Israel, ala so pinistikkon tu ibana aek pangurason i, tong do ibana ramun saleleng lohot dope haramunonna di ibana.

¹⁴On do huhut patikna: Tung sura mate sada jolma di bagasan sada undungundung, jadi manang ise na masuk tu bagasan undungundung i, jala manang ise na di bagasan undungundung i hian, ingkon ramun ibana pitu ari lelengna.

¹⁵Songon i nasa isian na tedek na so marlangkop na nirahutan, ramun do i.

¹⁶Jala manang ise na manjama di ladang sada halak na mate, binahen ni podang, manang bangke ni sada jolma manang holiholina manang hinamborna, ingkon ramun ibana pitu ari lelengna.

¹⁷Ingkon buaton ni halak do di jolma na ramuni sian sirabun ni pelean pardosaon na tinutung i, jala usehononna tusi aek na mangolu di bagasan sada guriguri.

¹⁸Dung i buaton ni sada baoa na ias ma sanggul Hissop jala sornophononna tu bagasan aek i, laos pistihanna ma undungundung i ro di sude ulaula dohot jolma angka na di bagasan; dohot tahe jolma na manjama holiholi ni na mate manang halak na binunu manang halak na mate boti manang hinambor.

¹⁹Alai ingkon pistihan ni halak na ias i do halak na ramuni di ari patoluhon dohot di ari papituhon, jala urasanna ibana sian dosana di ari papituhon, sunsionna huhut pangkeanna jala maridi ibana di bagasan aek, gabe ias ibana bodari.

²⁰Alai manang ise baa na ramun, hape ndang olo ibana manguras dirina sian dosana, ingkon siaphononhon ibana sian tongatonga ni huria i, ai habadiaon ni Jahowa do na niramunanna disi, ala so pinistikkon aek pangurason i tu ibana, laos ramun ma ibana.

²¹Ingkon i ma gabe aturan na hot salelenglelengna di nasida; jolma na mamistikkon aek pangurason i pe, ingkon sunsionna do pangkeanna; jala manang ise na manjama aek pangurason i, ingkon ramun ibana sahat ro di bodari.

²²Jala manang aha pe na jinama ni halak na ramuni, ingkon ramun do i; jala manang ise na manjama halak na ramuni, ingkon ramun ibana sahat ro di bodari.

20¹(I.) Dung i sahat ma halak Israel, sandok luhutan i tahe tu halongonan Sin di bulan sipaha sada, laos mangulon ma bangso i di Kades; mate ma disi ia si Miryam, laos tartanom disi.

²Dung i hurangan aek ma na sahuria i, dibahen i marrongoman ma nasida ro manopot si Musa dohot si Aron.

³Dung i dipungka halak situan na torop i ma bada tu si Musa, angka ninna ma: Tung so tos hosanami nahinan rap dohot hahaangginami di adopan ni Jahowa.

⁴Boasa tung patogitogionmuna huria ni Jahowa tu halongonan on, asa mate

marambolongan hami disi rap dohot dorbianami?

⁵Jala boasa tung togihononmuna hami nangkok sian Misir, mamboan hami tu inganan na roa on, tu tano na so tarula on, so manang adong jumpang hau ara manang hau anggur manang hau dalimo, gari aek inumon ndang adong jumpang?

⁶Dung i laho ma si Musa dohot si Aron sian adopan ni huria i tu pintu ni undungundung parluhutan i, laos manungkap nasida tu tano. Dung i tarida ma hamuliaon ni Jahowa di nasida.

⁷(II.) Jadi ro ma hata ni Jahowa tu si Musa songon on:

⁸Buat ma tungkot i jala paluhut ma huria i, ho dohot hahami si Aron, dung i pangkulingi hamu ma dolok batu di adopan ni matanasida i, asa lehononna aek sian ibana; ingkon paruaronmu di nasida aek sian dolok batu i, asa lehononmu minum huria i ro di dorbianasida i.

⁹Dung i dibuat si Musa ma tungkot i sian adopan ni Jahowa, songon na tinonahonna i tu ibana.

¹⁰Dung i dipaluhut si Musa dohot si Aron ma huria i tu jolo ni dolok batu i, jala ninna ma mandok nasida: Ua tangihon ma hatangkon, hamu ale panggunturi! Tagamon do ulaning tarparuar hami sian dolok batu on aek siinumonmuna?

¹¹ Dung i dipatoltol si Musa ma tanganna jala dilombuti dolok batu i dohot tungkotna pola dua hali, jadi ruar ma aek mansai godang, gabe minum be huria i ro di dorbiasida.

¹² Alai ro ma hata ni Jahowa tu si Musa dohot tu si Aron: Ala na so hinaporseaanmuna Ahu, pabadihon Ahu nian di adopan ni halak Israel, dibahen i ndang be hamu manogihon huriaon sahat tu tano naung hubasabasahon tu nasida nian.

¹³ I ma aek Meriba, ala disi di badai halak Israel Jahowa, jala Ibana pabadihon dirina di tongatonganasida.

¹⁴ (III.) Dung i disuru si Musa ma angka suruanna sian Kades manopot raja ni halak Edom mandok: Songon on do hata ni anggim halak Israel: Diboto ho do nasa haporsuhon naung huae hami.

¹⁵ Na tuati ompunami tu tano Misir, jala nania leleng hami maringan di Misir, jala na pinaporsukporsuk ni halak Misir hami dohot ompunami.

¹⁶ Jadi manganguhi ma hami tu Jahowa, gabe ditangihon Ibana soaranami jala disuru sada surusuruan, jala ditogihon hami ruar sian Misir, jala ida ma, di Kades do hami nuaeng, i ma sada huta apala di partalpanan ni tanom.

¹⁷ Ua loas ma hami mamolus sian luatmu! Unang pe hami mardalan sian ladangmu manang sian porlak anggurmu, jala ndang

olo hami minum aek sian sumur; dalan na bolon i do tulusonnami, unang pe manimbil tu siamun manang tu hambirang, paima salpu hubolus hami luatmu.

¹⁸Alai ninna raja ni Edom i ma tu ibana: Nandang jadi bolusonmu luathu, sai na ruar do ahu mandopang ho marhite sian podang.

¹⁹Dung i ro ma hata ni halak Israel tu ibana: Dalan na bolon sambing bolusonnam, tung sura minum hami sian tapianmi, hami nang pinahannami, ingkon gararonnami do i, ndada masisindir hami, asal naeng mamolus mardalan pat.

²⁰Alai ninna ibana ma: Nandang jadi bolusonmu! Laos ruar raja ni halak Edom manjumpangkon nasida manguluhon paranganna mansai godang, angka na tang be marsinjata.

²¹Asa songon i ma panjua ni halak Edom mangaloas halak Israel mamolus sian luatna, jadi mamedu ma halak Israel pasiding ibana.

²²(IV.) Dung i borhat ma nasida sian Kades, gabe sahat ma sandok huria ni halak Israel tu dolok Hor.

²³Dung i ro ma hata ni Jahowa tu si Musa dohot tu si Aron di bona ni dolok Hor, mardonokkon partalpahan ni luat Edom, ninna ma:

²⁴Papunguon ma anggo si Aron tu bangsona, ndang jadi ibana masuk tu tano naung

hulehon tu halak Israel, ala na nilaosanmuna hatangu di lambung aek Meriba.

²⁵Arahon ma si Aron dohot si Eleasar, anakna i, jala togihon nasida nangkok tu dolok Hor.

²⁶Dung i tanggali ma sian si Aron pangkeanna, jala solukkon ma i tu si Eleasar, anakna i, ai ingkon disi papunguon anggo si Aron tu bangsona, laos mate.

²⁷Jadi dibahen si Musa ma songon na tinonahon ni Jahowa, nangkok ma nasida tolunsa tu dolok Hor di adopan ni sandok huria i.

²⁸Dung i ditanggal si Musa ma sian si Aron pangkeanna i jala disolukkon ma i tu si Eleasar, anakna i. Dung i laos mate ma disi anggo si Aron di punsu ni dolok i. Alai tuat ma muse anggo si Musa dohot si Eleasar sian dolok i.

²⁹Jadi dung diida sandok huria i naung monding anggo si Aron, gabe ditatangi sandok pinompar ni Israel ma si Aron, pola tolupulu ari lelengna.

21 ¹(I.) Jadi dung dibege si Arad, raja ni halak Kanaan na maringan di tano tungkan dangsina, naung ro halak Israel sian dalan laho tu Atarim, gabe diporang ibana ma halak Israel, pola diboan deba sian nasida dapot tartangkup.

²Dung i marbagabaga ma halak Israel tu Jahowa, ninna ma: Molo tung pasahatonmu

bangso on tu bagasan tanganku, ingkon haromhononku ma angka hutanasida i.

³Jadi ditangihon Jahowa ma soara pangidoan ni Israel, dipasahat ma halak Kanaan tu nasida, gabe diharomhon Israel ma nasida ro di hutanasida i, jala dibahen ma goar ni inganan i Horma.

⁴(II.) Jadi borhat ma nasida sian dolok Hor manulus dalan dompak laut arung, asa mangaliat pasiding luat ni halak Edom gabe murhing ma roha ni bangso i di tongan dalan.

⁵Dung i marmungutmungut ma bangso i dompak Debata dohot dompak si Musa: Boasa tung togihononmuna hami nangkok sian Misir, asa mate hami di halongonan on huroha? Ai so manang adong sagusagu manang aek dison, jala nunga ginegine ateatenami mida sagusagu na giakgiak on.

⁶Dung i ditongos Jahowa ma tu tongatonga ni bangso i angka ulok tulung api, angka na mamarguti bangso i, gabe marmatean mansai torop sian Israel.

⁷Dung i ro be ma bangso i manopot si Musa, angka ninna ma: Nunga mardosa hami, ala na marmungutmungut hami dompak Jahowa dohot dompak ho; martangiang ma ho tu Jahowa, asa dipadao sian hami ulok tulung api i. Jadi martangiang ma si Musa mangondihon bangso i.

⁸Dung i ro ma hata ni Jahowa: Bahen ma di ho sada ulok tulung api jala sangkothon

ma i tu hau partonggol, ia adong manang ise na hona pargut jala dibereng tusi, ingkon mangolu ibana.

⁹Jadi disuman si Musa ma sada ulok sian tombaga, jala disangkothon ma i tu hau partonggol; jala ia adong manang ise na pinargut ni ulok i jala dibereng dompak ulok tombaga i, laos mangolu ma ibana.

¹⁰(III.) Dung i borhat ma halak Israel sian i jala marsaro di Obet.

¹¹Dung i borhat muse nasida sian Obet jala marsaro di bona ni dolok Abarim di halongonan, tondong ni Moab, tungkan habinsaran.

¹²Borhat muse nasida sian i jala marsaro martopihon sunge Zered.

¹³Borhat muse nasida sian i jala marsaro di bariba i sunge Arnon na mardalan di halongonan, na marharoroan sian partalpahan ni halak Amori; ai Arnon i do parbolatan ni Moab, di holangholang ni Moab dohot Amori.

¹⁴Ala ni do umbahen tarsurat di bagasan buku parporangan ni Jahowa: Mardonokkon Waheb di Supa dohot mardonokkon angka sunge ni Arnon.

¹⁵Tole muse hapuasan ni angka sunge, angka na mabaor tungkan inganan Ar, jala mandiori di partalpahan ni Moab.

¹⁶Borhat muse nasida sian i tu Beer (sumur); i ma sumur i, na nidok ni Jahowa

tu Musa: Papungu ma bangso i, asa Ahu mangalehon aek inumon tu nasida.

¹⁷Uju i ma diendehon halak Israel hata ni ende on: "Binsat ma ho, ale sumur, marende taripar ma hamu!

¹⁸I ma sumur na hinali ni angka induk, na saut nidungkir ni halak na sangap sian bangso i marhite sian tungkot harajaon, marhite sian angka tungkotnasida i tahe." Dung i borhat muse nasida sian halongonan tu Matana.

¹⁹Jala sian Matana tu Nahaliel, jala sian Nahaliel tu Bamot.

²⁰Jala sian Bamot tu rura na di ladang ni Moab na patondong dohot punsu ni Pisga, panatapan tungkan halongonan.

²¹(IV.) Dung i disuru Israel ma angka suruanna manopot si Sihon, raja ni halak Amori, mandok tu ibana:

²²Ua loas ma hami mamolus sian luatmu! Unang pe hami manimbil tu ladang manang tu porlak anggur; jala ndang olo hami minum aek sian sumur; dalan na bolon i do tulusonnami, paima salpu hubolus hami luatmu.

²³Alai ndang diloas si Sihon halak Israel i mamolus sian luatna, pola dipaluhut si Sihon sandok bangsona jala ruar mandopang Israel tu halongonan; jadi dung sahat ibana tu Jahas, tole ma ibana marporang dompak Israel.

²⁴Alai ditaluhon Israel do ibana marhite sian baba ni podang, laos disoluk ma luatna olat ni Arnon sahat tu Jabok, sahat tu halak Amon; ai tung na gonting do partalpahan ni halak Amon.

²⁵Dung i dipapatu Israel ma sude angka huta i, laos maringan Israel di saluhut huta ni halak Amori, di Hesbon, dohot di sude sosorna humaliang.

²⁶Ai Hesbon do huta ni si Sihon, raja ni halak Amori, ai nunga jolo diporang ibana raja ni halak Moab, jala dilaum sian ibana sandok tanona sahat ro di Arnon.

²⁷Ala ni do umbahen didok angka parende aling: Beta hita tu Hesbon, asa hona pauli jala pinagonting huta ni si Sihon.

²⁸Ai ruar do api sian Hesbon, nala ni api sian huta ni si Sihon, i ma na mansudahon Ar di Moab, ro di angka tuan nampuna dolokdolok ni Arnon.

²⁹Marjea ma ho, ale Moab! Nunga mago ho, ale bangso na marsomba tu Kamos! Tung dipasahat ibana do anakna angka naung malua nian jala tarboan do angka boruna tu si Sihon, raja ni halak Amori.

³⁰Jala nunga hupatunduk hami nasida, nunga mago Hesbon sahat ro di Dibon; jala nunga hutaban hami nasida sahat ro di Nopal, pola ro di Medeba.

³¹Jadi maringan ma Israel di tano ni halak Amori.

³²Dung i disuru si Musa ma halak laho mangkahapi Jaser, laos dipapatu nasida ma angka sosorna, jala dipabali halak Amori, angka na maringan disi.

³³Dung i mamedu ma nasida jala nangkok manulus dalan tu Basan; jadi ruar ma si Og, raja di Basan, manjumpangkon nasida manguluhon sandok bangsona laho marporang di Edrei.

³⁴Dung i ro ma hata ni Jahowa tu si Musa: Unang ho mabiar mida ibana, ai nunga Ahu pasahathon ibana tu bagasan tanganmu ro di bangsona dohot luatna, ingkon bahenonmu tu ibana, suang songon na binahenmi tu si Sihon, raja ni halak Amori na maringan na jolo di Hesbon.

³⁵Jadi dipapatu nasida ma ibana ro di angka anakna dohot sandok bangsona, nanggo sahalak tahe ndang tading di ibana, laos disoluk nasida ma tanona i.

22¹(I.) Dung i borhat muse halak Israel jala marsaro di angka adaran ni Moab di bariba ni Jordan, tondong ni Jeriko.

²Jadi dung diida si Balas, anak ni si Zippor, saluhut naung binahen ni Israel tu halak Amori.

³Godoron situtu ma Moab maradophon bangso i, ala bolonna, jala tahuton Moab mida halak Israel i.

⁴Dung i ro ma hata ni Moab tu angka sintua ni Midian: Suda ma nuaeng dilaton ni

bangso on saluhut na humaliang hita, songon pandilati ni jonggi di tumburtumbur di ladang. Alai si Balas, anak ni si Zippor uju i raja di Moab.

⁵Dung i disuru ibana ma angka suruanna manopot si Bileam, anak ni si Beor, tu Petor na martopihon (Euprat) di bagasan luat ni angka anak ni bangsona, asa dijou nasida ibana, ninna ma: Ida ma, nunga ruar sada bangso sian Misir, ida ma, pola ditutup sandok tano i, nunga pola marsaro nasida patondong dohot ahu.

⁶Nuaeng pe sai ro ma ho, bura i ma di ahu bangso on, ai gumogo do nasida sian ahu, anggiat tung dapot tartaluhon ahu bangso i, laos onjaronku do i sian luaton, ai nunga tangkas huboto, manang ise na pinasupasum dapotan pasupasu, jala manang ise na binuraanmi hona bura do.

⁷Jadi mardalan ma angka sintua ni Moab dohot angka sintua ni Midian jala upa pangarundigon di bagasan tangannasida, laos sahat ma nasida tu si Bileam jala dipatolhas tu ibana angka hata ni si Balas.

⁸Dung i ro ma hatana tu nasida: Marborngin ma hamu dison saborngin on, asa hulehon alus tu hamu, marguru tu hata ni Jahowa tu ahu. Jadi tading ma angka induk ni Moab di lambung ni si Bileam.

⁹Dung i ro ma Debata manopot si Bileam, ninna ma: Ise do angka baa on na rap dohot ho?

¹⁰Dung i ninna si Bileam ma tu Debata: Si Balas, anak ni si Zippor, raja ni Moab marsuru suruanna manopot ahu.

¹¹Ida ma, nunga ruar sada bangso sian Misir jala ditutup sandok tano i, ninna, nuaeng pe, sai ro ma ho mamburai bangso i di ahu, anggiat tung dapot ahu porangonku ibana, laos onjaronku ibana.

¹²Alai ninna Debata ma tu si Bileam: Ndang jadi ho mardalan udur dohot nasida, jala ndang jadi buraanmu bangso i, ai na pinasupasu do i.

¹³Dung i hehe ma si Bileam manogotna i, laos didok ma tu angka induk ni si Balas: Muli ma hamu tu tanomuna, ai manjua do Jahowa mangaloas ahu mardalan udur dohot hamu.

¹⁴Dung i borhat ma angka induk ni Moab, jala sahat nasida tu si Balas, angka ninna ma: Manjua do si Bileam mardalan udur dohot hami.

¹⁵(II.) Dung i diulahi si Balas dope marsuru angka induk tumorop jala marmuliaan sian parjolo i.

¹⁶Jadi dung sahat nasida tu si Bileam, ninna nasida ma tu ibana: Songon on do hata ni si Balas, anak ni si Zippor: Sai unang olo ho sundatan mardalan manopot ahu!

¹⁷ Ai tung na marsangap situtu do ho bahenonku, jala manang aha pe sidohononmu tu ahu, sai bahenonku do i. Antong sai ro ma ho, jala bura i di ahu bangso on!

¹⁸ Alai ninna si Bileam ma mangalusi angka naposo ni si Balas: Tung sura pe gok jabuna perak dohot sere dilehon si Balas tu ahu, ndang halaosan ahu hata ni Jahowa, Debatangku, mangulahon hata na metmet manang na balga.

¹⁹ Nuaeng pe na tading ma hamu dison, nang saborngin on, asa huboto, manang dia dope hata ni Jahowa tu ahu.

²⁰ Dung i ro ma Debata bornginna i manopot si Bileam jala ninna ma mandok ibana: Ala naung ro angka baoa i manjou ho, antong hehe ma ho mardalan udur dohot nasida, alai holan hata sipaboaonku tu ho do na jadi bahenonmu.

²¹ Tole manogotna i hehe ma si Bileam jala dipalanoi halodena boruboru jala mardalan ibana udur dohot angka induk ni Moab.

²² Alai marpiarpiar ma rimas ni Jahowa ala mardalan ibana, jala jongjong suruan ni Jahowa di tongan dalan naeng mangalo ibana. Alai marsihundul di halodena anggo ibana, jala dua halak naposona donganna.

²³ Dung i diida halode i ma suruan ni Jahowa jongjong di tongan dalan marpodang sintak di bagasan tanganna, jadi manimbil ma halode i

sian dalam laho tu ladang; alai sai dilombuti si Bileam ma halode i paulakkon tu dalam nian.

²⁴Dung i jongjong ma suruan ni Jahowa di dalam na sompit di holangholang ni angka porlak anggur, jala parik do angkupangkup be.

²⁵Jadi dung diida halode i suruan ni Jahowa, dihapithon ma ibana tu parik, gabe tardugus pat ni si Bileam tu parik, gabe didatdati ma mangalombuti halodena i.

²⁶Dung i mardalan ma suruan ni Jahowa dumao dope jala jongjong tu inganan na sompit situtu, na so adong dalam parhusoranna tu siamun manang tu hambirang.

²⁷Dung diida halode i suruan ni Jahowa pola somsam di toru ni si Bileam halode i, jadi marpiarpiar ma rimas ni si Bileam, gabe dilombuti halode i dohot tungkotna.

²⁸Dung i dibungka Jahowa ma baba ni halode i, gabe didok ma tu si Bileam: Aha ma na hubahen tu ho, umbahen lombutanmu ahu nunga pola tolu hali?

²⁹Dung i ninna si Bileam ma tu halode i: Ala naung pininggilanmu rohangku, tung sura adong podang di bagasan tanganku, ingkon bunuonku do ho nuaeng.

³⁰Dung i ro ma hata ni halode i mangalusi si Bileam: Nda ahu do nian halodem, naung hinundulanmu olat ni dung ho nampuna ahu rasirasa sadarion? Tung dung ma somal ahu

mambahen songon i tu ho? Jadi ninna si Bileam ma: Nandang nian.

³¹ Dung i dipatonggor Jahowa ma mata ni si Bileam, asa diida suruan ni Jahowa jongjong di tongan dalan marpodang sintak di bagasan tanganna; jadi dipaunduk si Bileam ma ibana, laos marsomba manungkap tu tano.

³² Dung i ro ma hata ni suruan ni Jahowa mandok tu ibana: Boasa tung lombutanmu halodem, nunga pola tolu hali? Ida ma, Ahu do ruar naeng mangalo ho, ai pate tu hamagoan do dalan i di jolongku.

³³ Balik do halode i jumolo marnida Ahu, gabe manimbil maradophon Ahu pola tolu hali; tung sura so manimbil halode i maradophon Ahu, sai ho do bunuonku, alai anggo halode i pangoluonku do.

³⁴ Dung i ninna si Bileam ma tu suruan ni Jahowa: Nunga mardosa ahu, alai ndada huboto ho jongjong di dalan naeng mangambat ahu. Nuaeng pe molo sogo roham, asa mulak ahu.

³⁵ Dung i ninna suruan ni Jahowa ma tu si Bileam: Mardalan ma ho udur dohot angka baoa i; alai ingkon holan hata sipaboaonku tu ho, i do hatahononmu. Jadi mardalan ma si Bileam udur dohot angka induk ni si Balas.

³⁶ (III.) Jadi dung dibege si Balas naung ro si Bileam, ruar ma ibana manomunomu ibana sahat ro di huta ni Moab na martopihon Arnon, apala di partalpahan ni luatna.

³⁷ Dung i ninna si Balas ma tu si Bileam:

Nda nunga husuru suruanku manopot ho mangalapi ho nian? Boasa so pintor ro ho tu ahu? Dirimpu roham huroha na so tarpasangap ahu ho, songon patutna?

³⁸ Dung i ninna si Bileam ma mangalusi si Balas: Ida ma nunga ro ahu nuaeng manopot ho? Nuaeng pe tung tarbahen ahu ma mandok manang aha? Hata na niampehon ni Debata tahe tu bagasan pamanganku, ingkon i do hatahononku.

³⁹ Dung i mardalan ma si Bileam udur dohot si Balas, gabe sahat nasida tu Kiryat-Huzzot.

⁴⁰ Dung i dipelehon si Balas ma angka lembu dohot birubiru, jala ditongoshon jambar todoan tu si Bileam dohot tu induk, angka na rap dohot ibana.

⁴¹ Tole manogotna i diarahon si Balas ma si Bileam manogihon ibana nangkok tu atas angka tombak ni Baal, asa sian i ditatap sandok bangso i.

23¹ (I.) Dung i ninna si Bileam ma tu si Balas: Pajongjong ma di ahu dison pitu langgatan, jala padiri di ahu dison pitu lembu dohot pitu birubiru tunggal.

² Jadi dibahen si Balas ma hombar tu hata ni si Bileam; jadi duansa, si Balas dohot si Bileam, mamelehon sada lembu dohot sada birubiru tunggal, di atas ni ganup langgatan.

³ Dung i ninna si Bileam ma tu si Balas: Pajonok ma jongjong tu lambung ni pelean

situtungonmi, asa laho ahu, anggiat tung
ditomutomu Jahowa ahu, manang hata dia
pinapatarna tu ahu, i do paboaonku tu ho.
Dung i laho ma ibana tu sada robean.

⁴Dung i pajumpang ma Debata dohot
si Bileam, laos didok ma mandok Ibana:
Nunga pola hupajongjong pitu langgatan jala
hupelehon sada lombu dohot sada birubiru
tunggai di ganup langgatan i.

⁵Dung i diampehon Jahowa ma sada hata tu
bagasan pamangan ni si Bileam, huhut didok:
Mulak ma ho tu si Balas, jala songon on do
dohononmu!

⁶Jadi dung mulak ibana tu rajai, ida ma,
jongjong dope ibana di lambung pelean
tinutungna i rap dohot sude induk ni Moab.

⁷Dung i dipungka si Bileam ma mandok
tonggona: Nunga pola disuru si Balas, raja
sian Moab suruanna mangalapi ahu sian Ram,
sian angka dolok tungkan habinsaran, ninna
do: Sai ro ma ho, bura i di ahu Jakkob! Sai ro
ma ho mamulasi Israel!

⁸Beha ma pambahenku mamburai halak
na so binuraan ni Debata? Jala beha ma
pambahenku mamulasi halak na so pinulasan
ni Jahowa?

⁹Ai sian punsu ni angka dolok batu tartatap
ahu ibana, jala sian angka dolokdolok
huranapi ibana; ida ma, i ma sada bangso
na punjung maringanan, jala ndang masuk

bilangan tu tongatonga ni angka bangso parbegu.

¹⁰Tung ise ma na tuk mamilangi orbuk ni Jakkob dohot torop ni saparopat sian Israel? Ingkon songon hamamate ni halak na tigor on nian hamamate ni hosangkon, jala ajalhu songon ajalna i!

¹¹Dung i didok si Balas ma tu si Bileam: Aha do na binahenmu tu ahu? Laho mamburai angka musungku do umbahen na husuru mangalapi ho, hape ida ma, sai didatdati ho do mamasumasu nasida.

¹²Dung i ninna si Bileam ma mangalusi: Nda tama ingkon ingoton ni rohangku hata na niampehon ni Jahowa tu bagasan pamanganku laho mangkatahon?

¹³(II.) Dung i ninna si Balas ma tu ibana: Ua, beta hita tu inganan na asing, asa dapot ho tataponmu nasida sian i; alai asal partalpahanna idaonmu, ndang jadi anggo tung sandok bangsona ranapanmu; sai bura i ma i di ahu sian i!

¹⁴Dung i diarahon ma ibana tu ladang ni halak parjaga, tu atas punsu ni Pisga, jala dipajongjong muse pitu langgatan, jala dipelehon sada lombu dohot sada birubiru tunggal di atas ni ganup langgatan i.

¹⁵Dung i ninna si Bileam ma tu si Balas: Pajonok ma jongjong tuson tu lambung pelean situtungonmi, laho ma anggo ahu tu adui manomunomu Jahowa.

¹⁶Dung i pajumpang ma Jahowa dohot si Bileam, jala diampehon hatana tu bagasan pamanganna, ninna ma: Mulak ma ho tu si Balas, jala ingkon songon on dohononmu.

¹⁷Jadi dung mulak ibana mandapothon si Balas, ida ma, laos jongjong dope ibana di lambung pelean tinutungna i rap dohot angka induk ni Moab. Dung i ninna si Balas ma mandok ibana: Aha do hata ni Jahowa tu ho?

¹⁸Dung i dipungka ibana ma mandok tonggona, ninna ma: Hehe ma ho, ale Balas, jala tangihon: Patinggil ma pinggolmu tumangihon angka panindangionkon, ho ale anak ni si Zippor!

¹⁹Anggo Debata ndadajolma tung olo margabus, ndada Ibana anak ni jolma manisial, tung solsolanna dirinal! Tung tagamon ma dohononna hatana, so pasautonna? Manang tung dohononna manang aha so hajongjongkononna?

²⁰Ida ma, nunga didokkon ahu mamasumasu, ai molo Ibana mamasumasu, tung beha ma bahenonku manundatil?

²¹Ndang adong diida Ibana hajahaton di Jakkob jala ndang adong diida hangaluton di Israel. Jahowa Debatana do donganna, jala soara ni sarune mangolophon Rajai di tongatongana.

²²Nunga ditogihon Debata nasida ruar sian Misir, jala songon doras ni badak tunggal do ibana mardalan.

²³Ai ndada marguna parsibalikmataon anggo mangalo Jakkob, jala ndada marguna pangarundongan mangalo Israel. Jumpang do sogot tingkina, dohonon ma disi tu Jakkob dohot tu Israel: Manang aha naung binahen ni Debata.

²⁴Ida ma, hehe do sogot bangso i songon singa boruboru, jala padirgahonna dirina songon singa jantan. Ndang tagamon olo manggompang, nda jolo manganhon juhut soroan, jala sopsoponna mudar ni angka na binununa.

²⁵Dung i ninna si Balas ma tu si Bileam: Molo tung na so tarbahen ho mamburai nasida, ba unang sai datdati mamasumasu nasida.

²⁶Dung i ninna si Bileam ma mangalusi si Balas: Nda nunga hudok hian tu ho songon on: Manang aha sidohonon ni Jahowa, i do bahenonku?

²⁷Dung i ninna si Balas ma tu si Bileam: Beta hita, asa hutogihon ho tu inganan na asing, anggiat tung lomo roha ni Debata, asa buraanmu nasida di ahu sian i.

²⁸Dung i diarahon si Balas ma muse si Bileam tu punsu ni Peor, panatapan tungkan halongonan.

²⁹Jadi ninna si Bileam ma tu si Balas: Pajongjong ma di ahu dison pitu langgatan, jala padiri di ahu dison pitu lembu dohot pitu birubiru tunggal.

do rajana sian Agag, jala marmulia situtu harajaonna i sogot.

⁸Nunga ditogihon Debata ibana ruar sian Misir, jala songon doras ni badak tunggal ibana mardalan. Ingkon suda ma panganonna angka bangso parbegu alona i, jala ropuhanna holiholinasida jala ponggolhononna angka sumbianasida.

⁹Nunga marsinggang ibana huhut manggompang songon singa jantan, jala songon singa boruboru; tung ise ma na hum manungguli ibana? Dapotan pasupasu ma manang ise na mamasumasu ho, jala hona bura manang ise na mamburai ho.

¹⁰(II.) Jadi marpiarpiar ma rimas ni si Balas dompak si Bileam, pola ditopaptopap tanganna, jala didok si Balas mandok si Bileam: Laho mamburai angka musungku ho nian umbahen jinou, hape ida ma, sai didatdati ho do mamasumasu nasida, nunga pola tolu hali.

¹¹Nuaeng pe hatop ma ho maporus mulak tu ingananmu hian! Disangkap rohangku do nian naeng marmulia situtu ho bahenonku; alai ida ma, nunga diambat Jahowa hamuliaon sian ho.

¹²Jadi ninna si Bileam ma tu si Balas: Nda nunga hudok hian nang tu surusuruan, angka na sinurum manopot ahu songon on:

¹³Tung sura pe gok jabuna perak dohot sere dilehon si Balas tu ahu, ndang halaosan ahu

hata ni Jahowa, laho mambahen na denggan manang na roa sian roharohangku sandiri; hata sipaboanon ni Jahowa tu ahu, ingkon i do hatahononku.

¹⁴Nuaeng pe, ida ma, na laho ma anggo ahu mulak tu bangsongku, dibahen i loas ma ahu manurirangkon hian tu ho taringot tu sibahenon ni bangso on tu bangsom on di ujung ni angka ari.

¹⁵Dung i dipungka ma muse mandok tonggona: On ma pangungkapon sian si Bileam, anak ni si Beor, pangungkapon tahe sian baoa naung tonggor matana!

¹⁶Pangungkapon sian jolma naung somal umbege angka hata ni Debata dohot na umboto parbinotoan di Natumimbul, naung marnida parmataon ni Nasunhinagogo, jolma naung tungkap jala tarbungka matana.

¹⁷Sai na idaonku do Ibana, alai ndang dope anggo nuaeng; sai na tataponku do Ibana, alai ndang dope anggo tung jonok: Binsar do sogot sada bintang sian Jakkob jala hehe do sada tungkot harajaon sian Israel; papatuonna ma angka luat ni Moab jala patunduhonna sandok pinompar ni si Set.

¹⁸Soluhonna ma ia Edom, jala gabe partalian ni musuna anggo Seir, alai lam marhuaso ma anggo Israel.

¹⁹Marharoroan sian Jakkob ma Sipangarajai, jala siaphononna pasipasi sian huta i.

²⁰Jadi dung diida ibana halak Amalek, gabe dipungka ma tonggona mandok: Parmulaan ni angka bangso parbegu do nian Amalek, alai ujungna do tu hamagoan!

²¹Jadi dung diida ibana halak Keni, gabe dipungka ma tonggona mandok: Gonting do nian ingananmu jala dipaojak ho asarmu di atas dolok batu:

²²Alai ingkon ro do sogot na mangulang Keni, paima ro muse Assur mamboan ho tu habuangan.

²³Dung i dipungka ibana muse tonggona mandok: Ue! Tung ise ma tarbahen mangolu, molo dipamasa Debata sisongon i?

²⁴Alai ro muse angka hopal sian pasir ni halak Kittim, patunduhonna ma Assur dohot Heber muse; alai ibana sandiri pe ingkon tu hamagoan do.

²⁵Dung i borhat ma si Bileam, laos mardalan asa mulak ibana tu ingananna hian: Si Balas pe ditulus do dalanna i.

25¹(I.) Dung i maringan ma Israel di Sitim, alai dipungka halak situasi na torop i ma marmainan tu boru ni halak Moab.

²Angka na manggokkon bangso i uju mamele nasida tu debatanasida i, laos mangan juhut tibaltibal ma bangso i, huhut marsomba tu debatanasida i.

³Jadi marsigantung ma Israel tu Baal-Peor, gabe marpiarpiar ma rimas ni Jahowa mida Israel.

⁴Dung i ro ma hata ni Jahowa tu si Musa:
Tangkup ma sude induk ni bangso i jala
gantungkan nasida bahen pardenggan tu
Jahowa di adopan ni mata ni ari, asa anggiat
mombun parpiarpiar ni rimas ni Jahowa mida
Israel.

⁵Dung i ninna si Musa ma tu angka
panguhum di Israel, ganup ma hamu
mambunu halakna, angka na marsigantung
tu Baal-Peor.

⁶Dung i ida ma, ro sahalak sian halak
Israel, laos diboan tu angka hahaanggina
sada boru Midian di adopan ni si Musa dohot
di adopan ni sandok huria ni halak Israel,
tongon angka tumatangis nasida di jolo pintu
ni undungundung parluhutan i.

⁷Alai dung diida si Pinehas, anak ni si
Eleasar, tubu ni malim Aron songon i, hehe
ma ibana sian tongatonga ni huria i, huhut
patioptiop sada hujur di bagasan tanganna.

⁸Laos diihuthon ma halak Israel i masuk tu
bagasan bilut podoman jala sahali ditullang
nasida duansa, baoa Israel i dohot parompuan
i torus na niabitanna be. Jadi tongkinnai
mansohot ma begu masa i sian halak Israel.

⁹Ia torop nijolma angka na mate binahen ni
begu masa i duapulu opat ribu halak do.

¹⁰(II.) Dung i ro ma hata ni Jahowa tu si
Musa songon on:

¹¹Ia si Pinehas, anak ni si Eleasar, tubu ni
malim Aron, nunga dipaombun ibana rimashu

mida halak Israel, di na hinamokmokkonna murukku di tongatonganasida, umbahen so sun siap hubahen halak Israel di bagasan murukku.

¹²Dibahen i paboa ma tu ibana: Ida ma, Ahu marbasabasahon tu ibana padan hadameon na hubahen i.

¹³Ingkon ibana do, ro di pinomparna dung salpu ibana, jujungan ni padan hamalimon ro di salelenglelengna, upana ala dihamurukkon ulaon ni Debatana, jala dibahen pardenggan tu halak Israel.

¹⁴Alai anggo goar ni baoa sian Israel na mate binunu i rap dohot boru Midian, i ma si Simri, anak ni si Salu, sada induk ni marga Simeon marompuompu.

¹⁵Jala goar ni boru Midian na mate binunu i, i ma si Kosbi, boru ni si Zur, sada ihutan ni angka marga marompuompu di Midian.

¹⁶Dung i ro muse hata ni Jahowa tu si Musa songon on:

¹⁷Ingkon marmusu hamu dompak halak Midian jala patunduk hamu nasida.

¹⁸Ai nasida jumolo marmusu dompak hamu marhite sian angka nasida, na niangkalannasida i hamu taringot tu Peor dohot taringot tu si Kosbi, ibotonasida i, boru ni sada induk di Midian, na binunu apala di ari hararagat ni begu masa i ala Peor.

26¹(I.) Jadi dung mansohot begu masa i, ro muse hata ni Jahowa tu si Musa

dohot si Eleasar, anak ni malim Aron, songon on:

²Surathon ma bilangan ni sandok luhutan ni halak Israel, olat ni na marumur duapulu taon dohot lobi sian i marompuompu, nasa baoa sialo musu di Israel.

³Dung i mangkatai ma si Musa dohot malim Eleasar tu nasida di adaran Moab di topi ni Jordan, tondong ni Jeriko, ninna ma:

⁴Olat ni na marumur duapulu taon dohot lobi sian i, ingkon bilangan do, songon na tinonahon ni Jahowa tu si Musa dohot tu halak Israel, angka naung ruar sian tano Misir.

⁵Si Ruben do anak buhabaju ni Israel; angka anak ni si Ruben i ma: Si Hanok, marharoroan sian ibana halak Hanok i; si Pallu haroroan ni halak Pallu i.

⁶Si Hezron haroroan ni halak Hezron i; si Karmi haroroan ni halak Karmi.

⁷I ma pinompar ni halak Ruben, jala bilangannasida opatpulu tolu ribu pitu ratus tolupulu halak toropna.

⁸Ia anak ni si Pallu, i ma si Eliab.

⁹Jala angka anak ni si Eliab, i ma: Si Nemuel, si Datan dohot si Abiram. I ma si Datan dohot si Abiram, angka na tarpio tu huria i, i ma angka na mamingkasi bada dompak si Musa dohot si Aron di tongatonga ni halak na saparbulanan dohot si Kora, uju manjahati nasida dompak Jahowa.

¹⁰Jadi dipangangang tano i babana, laos dibondut nasida rap dohot si Kora di na mate halak sisaparbullan i, uju suda dipangan api dua ratus limapulu halak toropna laos gabe panjoraannasida.

¹¹Alai ndang mate anggo angka anak ni si Kora.

¹²Angka anak ni si Simeon marompuompu: Si Nemuel haroroan ni halak Nemuel i; si Jamin haroroan ni halak Jamin i; si Jakin haroroan ni halak Jakin i.

¹³Si Zerah haroroan ni halak Zerah i; si Saulus haroroan ni halak Saul i.

¹⁴I ma pinompar ni halak Simeon, duapulu dua ribu dua ratus halak toropna.

¹⁵Angka anak ni si Gad marompuompu: Si Zepon haroroan ni halak Zepon i; si Haggi haroroan ni halak Haggi; si Suni haroroan ni halak Suni.

¹⁶Si Osni haroroan ni halak Osni; si Eri haroroan ni halak Eri.

¹⁷Si Arod haroroan ni halak Arodi; si Areli haroroan ni halak Areli.

¹⁸I ma pinompar ni halak Gad, bilangannasida do opatpulu ribu lima ratus halak toropna.

¹⁹Ia angka anak ni si Juda, i ma: Si Er dohot si Onan; alai mate do anggo si Er dohot si Onan di tano Kanaan.

²⁰Angka anak ni si Juda marompuompu: Si Sela haroroan ni halak Selani; si Peres

haroroan ni halak Perisi; si Zerah haroroan ni halak Zerah i.

²¹Ia angka anak ni si Peres: Si Hezron haroroan ni halak Hezron i; si Hamul haroroan ni halak Hamul i.

²²I ma pinompar ni halak Juda jala bilangannasida pitupulu onom ribu lima ratus halak toropna.

²³Ia angka anak ni si Isasar marompuompu: Si Tola haroroan ni halak Tolai; si Pua haroroan ni halak Pua.

²⁴Jahsub haroroan ni halak Jashub i; Simron haroroan ni halak Simron i.

²⁵I ma pinompar ni halak Isasar jala bilangannasida onompulu opat ribu tolu ratus halak toropna.

²⁶Ia angka anak ni si Zebulon marompuompu: Si Sered haroroan ni halak Sered i; si Elon haroroan ni halak Elon; si Jahlel haroroan ni halak Jahlel.

²⁷I ma pinompar ni halak Zebulon jala bilangannasida i onompulu ribu lima ratus halak toropna.

²⁸Ia angka anak ni si Josep marompuompu: Si Manasse dohot si Epraim.

²⁹Ia angka anak ni si Manasse: Si Mahir haroroan ni halak Mahir; si Mahir huhut manubuhon si Gilead haroroan ni halak Gilead i.

³⁰On do angka anak ni si Gilead. Si Ieser haroroan ni halak si Ieser i; Helek haroroan ni halak Helek i.

³¹Si Asriel haroroan ni halak Asriel; si Sikem haroroan ni halak Sikem i.

³²Si Semida haroroan ni halak Semida i, si Heper haroroan ni halak Heper i.

³³Alai anggo si Zelapehat, anak ni si Heper ndang tubuan anak holan boru do, angka na margoar: Si Mala, si Noah, si Hoglah, si Milka dohot si Tirza.

³⁴I ma pinompar ni si Manasse jala bilangannasida i limapulu dua ribu pitu ratus halak toropna.

³⁵On do angka anak ni si Epraim marompuompu: Si Sutelah, haroroan ni halak Sutelah i; si Beker haroroan ni halak Beker i; si Tahan haroroan ni halak Tahan i.

³⁶On do angka anak si Sutelah: Si Eran haroroan ni halak Erani.

³⁷Jala on do pinompar ni halak Epraim jala bilangannasida i tolupulu dua ribu lima ratus halak toropna. I ma angka anak ni si Josep marompuompu.

³⁸Angka anak ni si Benjamin marompuompu: Si Bela haroroan ni halak Bela; si Asbel haroroan ni halak Asbel; si Ahiram haroroan ni halak Ahiram i.

³⁹Si Sheshupam haroroan ni halak Sheshupam i; si Hupham haroroan ni halak Hupham i.

⁴⁰Ia angka anak ni si Bela: Si Ared dohot si Naaman, haroroan ni halak Ared dohot Naaman i.

⁴¹On do pinompar ni si Benjamin marompuompu jala bilangannasida i opatpulu lima ribu onom ratus halak toropna.

⁴²On do angka anak ni si Dan marompuompu: Si Suham haroroan ni halak Suham i. I ma angka pinompar ni Dan marompuompu.

⁴³Jala bilangan ni saluhut halak Suham i onompulu opat ribu opat ratus halak toropna.

⁴⁴Ia angka anak ni si Aser marompuompu: Si Innah haroroan ni halak Jimnai; si Isvi haroroan ni halak Isvi i; si Beria haroroan ni halak Beria.

⁴⁵Ia angka anak ni si Beria: Si Heber haroroan ni halak Heber i; si Malkiel haroroan ni halak Malkieli.

⁴⁶Ia goar ni boru ni si Aser, i ma si Zerah.

⁴⁷On do pinompar ni angka anak ni si Aser, jala bilangannasida i limapulu ribu opat ratus halak toropna.

⁴⁸Ia angka anak ni si Naptali marompuompu: Si Jahrel haroroan ni halak Jahrel; si Guni haroroan ni halak Guni.

⁴⁹Si Jeser haroroan ni halak Jeser i; si Shillem haroroan ni halak Shillem i.

⁵⁰I ma pinompar ni si Naptali marompuompu jala bilangannasida i opatpulu lima ribu opat ratus halak toropna.

⁵¹ I ma bilangan ni halak Israel sudena onom ratus sada ribu pitu ratus tolupulu halak toropna.

⁵² (II.) Dung i ro muse hata ni Jahowa tu si Musa songon on.

⁵³ Ingkon tu halak on do bagion tano i bahen partalianna marguru tu bilangan ni goargoar.

⁵⁴ Molo torop halak bilanganna, ingkon pagandaonmu partalianna, molo otik paotihonmu huhut partalianna; ganup tahe marguru tu bilanganna lehonon partalianna.

⁵⁵ Alai tahe ingkon marhite sian rujiruji bagion tano i, ingkon marguru tu goargoar ni marga marompu ompu nasida maruli partalian.

⁵⁶ Ingkon marguru tu rujiruji sagion partalianna be manang na torop bilanganna, manang na otik.

⁵⁷ Jala on do bilangan ni halak Lepi marompuompu: Si Gerson haroroan ni halak Gerson i; si Kohat haroroan ni halak Kohat i; si Merari haroroan ni halak Merari.

⁵⁸ Jala on do pinompar ni si Lepi: Pinompar ni halak Libni, pinompar ni halak Hebron i, pinompar ni halak Mahli, pinompar ni halak Musi, pinompar ni halak Kora i. Alai anggo si Kohat manubuhon si Amram.

⁵⁹ Ia goar ni jolma ni si Amram, i ma si Jokhebed, boru ni si Lepi, na tinubuhon ni si Lepi di Misir. Si Jokhebed muse manubuhon di

si Amram: Si Aron, si Musa dohot si Miryam, ibotonasida i.

⁶⁰Ia tabu ni si Aron muse: Si Nadab, si Abihu, si Eleasar dohot si Itamar.

⁶¹Alai tibu do mate anggo si Nadab dohot si Abihu, uju na binoannasida i api sileban tu adopan ni Jahowa.

⁶²Ianggo toropnasida luhutna, duapulu tolu ribu halak sudena baoa, olat ni na marumur sabulan dohot lobi sian i; ndang dohot nasida tarbilang tu tongatonga ni halak Israel, ala so maruli partalian nasida di tongatonga ni halak Israel.

⁶³On do bilangan ni halak Israel, angka na binilang ni si Musa dohot malim Eleasar di adaran Moab, martopihon Jordan, tondong ni Jeriko.

⁶⁴Jala di tongatonga ni saluhutna i ndang adong nanggo sahalak sian angka na binilang ni si Musa dohot malim Aron na jolo, angka na mamilangi halak Israel uju di halongonan Sinai i.

⁶⁵Ai nunga dilumbahon Jahowa hian tu nasida: Ingkon mate nasida di halongonan! Jadi ndang adong teba sian nasida nanggo sahalak, nda holan si Kaleb, anak ni si Jepune dohot si Josua, anak ni si Nun.

27¹(I.) Dung i ro ma jumonok angka boru ni si Zelapehat, anak ni si Heper, i ma anak ni si Gilead, i ma anak ni si Mahir, i ma anak ni si Manasse, sian marga Manasse,

anak ni si Josep. Alai on do goargoar ni angka boruna: Si Mala, si Noah, si Hoglah, si Milka dohot si Tirza.

²Laos jongjong ma nasida tu adopan ni si Musa dohot malim Eleasar dohot tu adopan ni angka induk dohot tu adopan ni sandok huria i di pintu ni undungundung parluhutan i, ninna ma:

³Nunga mate anggo amanami di halongonan, alai ndang dohot ibana di tongatonga ni halak na saparbulanan, angka na manjahati dompak Jahowa, angka na paihuthon tahi ni si Kora, ala ni dosana sandiri do umbahen mate ibana, so martinading anak.

⁴Boasa tagonan ingkon pidom goar ni amanami sian tongatonga ni bangsona, ala so martinading anak ibana? Ua lehon huhut di hami partalian di tongatonga ni hahaanggi ni amanami!

⁵Dung i diboan si Musa ma hatanasida i tu adopan ni Jahowa.

⁶Jadi ro ma hata ni Jahowa tu si Musa songon on:

⁷Sintong do pangidoan ni angka boru ni si Zelapehat; ingkon lehononmu tu nasida teanteanan di tongatonga ni hahaanggi ni amanasida i, ingkon sahat tu nasida do lehononmu partalian ni amanasida i.

⁸Ingkon dohononmu huhut tu halak Israel songon on: Tung sura mate manang ise so

martinading anak, ingkon sahat teanteananna tu angka boruna lehononmuna.

⁹Alai tung sura so adong boruna, ingkon lehononmuna do teanteananna tu hahaanggina.

¹⁰Tung sura so adong nang hahaanggina, ingkon lehonon teanteananna tu hahaanggi ni amana.

¹¹Jala tung sura so adong hahaanggi ni amana, ingkon lehonon do teanteananna tu donganna sabutuha na sumolhot tu ibana, donganna samarga, asa nasida manean. Ingkon i ma gabe patik ni uhum di halak Israel, songon na tinonahon ni Jahowa hian tu si Musa.

¹²Dung i ro ma hata ni Jahowa mandok tu si Musa: Nangkok ma ho tu atas ni dolok Abarim on, jala tatap ma tano naung hulehon i tu halak Israel.

¹³(II.) Ia dung diida ho tano i, ingkon papunguon ma dohot ho tu bangsom, suang songon si Aron hahami, dipapungu.

¹⁴Ala na nilaosanmuna hatangku di halongonan Zin, uju na mamingkasi bada huria i, uju parbadiaanmuna nian Ahu marhite sian aek i di adopan ni matanasida i. I ma aek Meriba mardonokkon Kades di halongonan Zin.

¹⁵Dung i ninna si Musa ma tu Jahowa songon on:

¹⁶Ingkon pabangkiton ni Jahowa, Debata ni angka tondi ni nasa daging nian sada halak manguluhon huria i.

¹⁷Ibana nian masuk dohot ruar di adopannasida, laos ibana manogihon nasida masuk dohot ruar, asa unang luhutan ni Jahowa, songon birubiru na so marparmahan.

¹⁸Dung i ro muse hata ni Jahowa tu si Musa: Arahon ma bahen donganmu si Josua, anak ni si Nun, sahalak naung maruli Tondi tu bagasan rohana, jala ampehon ma tanganmu tu ibana.

¹⁹Dung i pajongjong ma ibana di adopan ni malim Eleasar dohot di adopan ni sandok huria i, jala lehon parenta tu adopan ni matanasida i.

²⁰Ingkon lehononmu huhut sian sahalam tu ibana, asa sandok huria ni halak Israel tumangihon ibana.

²¹Dung i ingkon jongjong ibana di adopan ni malim Eleasar, asa ibana manungkun Jahowa taringot tu ibana marhitehite uhum ni Urim di adopan ni Jahowa; ingkon marguru tu hatana nasida ruar dohot masuk, ibana tahe ro di sude halak Israel rap dohot sandok huria i.

²²Dung i dibahen si Musa ma, songon na tinonahon ni Jahowa tu ibana, diarahon ma si Josua, jala dipajongjong ibana di adopan ni malim Eleasar dohot di adopan ni sandok huria i.

²³ Laos diampehon ma tanganna tu ibana jala ditonai ibana, hombar tu na pinaboa ni Jahowa marhite sian si Musa.

28 ¹ (I.) Dung i ro muse hata ni Jahowa tu si Musa songon on:

² Pasahat ma tonangku tu halak Israel jala paboa tu nasida: Ia pelean tu Ahu hira sagusagungku bahen pelean api, uap na hushus di Ahu, ingkon radotanmuna do i laho mamboan jumonok tu Ahu di tingkina naung binuhul hian.

³ Jala dohononmu ma tu nasida: On do pelean api na patut sipelehononmuna tu Jahowa: Dua anak ni birubiru na marumur sataon, na so marlindang ganup ari bahen pelean situtungan na tongtong.

⁴ Birubiru na sada ingkon manogotna i pelehononmu, jala birubiru na sada ingkon marhira bodari pelehononmu.

⁵ Tole saparsampulu epah itak na lamot bahen pelean sipanganon, ingkon dogilon dohot miak na tinutu saparopat Hin.

⁶ I ma pelean situtungan na tongtong, naung pinelehon i di dolok Sinai, i ma pelean api bahen uap na hushus di Jahowa.

⁷ Tole muse peleanna siinumon saparopat Hin di ganup anak ni birubiru; ingkon di bagasan inganan na badia i do usehononhon pelean siinumon sian anggur di Jahowa.

⁸ Ilanggo anak ni birubiru na sadanari, ingkon pelehononmu do i mareak bodari, suang

songon pelean sipanganon manogotna i, jala suang songon peleanna siinumon i, i ma pelean api, uap na hushus di Jahowa.

⁹(II.) Alai anggo di ari Sabbath ingkon dua anak ni birubiru na marumur sataon, jala na so marlindang dohot dua parsampulu itak na lamot, bahen pelean sipanganon na nidogil dohot miak rap dohot peleanna siinumon.

¹⁰I ma pelean situtungan di ganup ari Sabbath, di balik ni pelean situtungan na tongtong i rap dohot peleanna siinumon.

¹¹(III.) Tole muse di artia ganup bulan ingkon pelehononmuna sada pelean situtungan di Jahowa: Dua anak ni lembu, sada birubiru tunggal, pitu anak ni birubiru na marumur sataon, angka na so martihas.

¹²Jala tolu parsampulu itak na lamot bahen pelean sipanganon, nidogil dohot miak, dongan ni ganup anak ni lembu, jala dua parsampulu itak na lamot bahen pelean sipanganon nidogil dohot miak, dongan ni sada birubiru tunggal.

¹³Jala saparsampulu itak na lamot bahen pelean sipanganon nidogil dohot miak, dongan ni ganup anak ni birubiru. I ma pelean situtungan bahen uap na hushus, sada pelean api di Jahowa.

¹⁴Jala peleanna siinumon ingkon on do: Satonga Hin anggur dongan ni ganup anak ni lembu, sapartolu Hin dongan ni ganup birubiru tunggal, jala saparopat Hin dongan

ni ganup birubiru. 1 ma pelean situtungan di ganup poltak ni bulan manipat taon.

¹⁵Angkup ni pelehononhon do sada hambing tunggal bahen pelean pardosaon di Jahowa di balik ni pelean situtungan na tongtong i, rap dohot peleana siinumon.

¹⁶(IV.) Alai di ari sampulu opat bulan sipaha sada, disi ma Paska di Jahowa.

¹⁷Jala di ari sampulu lima bulan i masa ari raya; ingkon pitu ari lelengna panganon sagusagu na so niasoman.

¹⁸Di ari parjolo ma pansangon luhutan na badia; ndang jadi bahenonmuna agia aha ulaon ariari disi.

¹⁹Ingkon pelehononmuna huhut pelean api bahen pelean situtungan di Jahowa: Dua anak ni lombu, sada birubiru tunggal dohot pitu anak ni birubiru na marumur sataon, angka na so jadi martihas.

²⁰Rap dohot peleana sipanganon sian itak na lamot nidogil dohot miak; tolu parpuluhan dongan ni ganup anak ni lombu jala dua parpuluhan dongan ni birubiru tunggal pelehononmuna.

²¹Saparpuluhan be pelehononmuna dongan ni ganup anak ni birubiru na pitu i.

²²Tole muse sada hambing tunggal bahen pelean pardosaon mambahen pardenggan di hamu.

²³Ingkon pelehononmuna do angka i di balik ni pelean situtungan manogotna i, naung gabe pelean situtungan manongtong do i.

²⁴Hombar tusi ingkon pelehononmuna ariari na pitu ari i sagusagu bahen pelean api, uap na hushus di Jahowa di balik ni pelean situtungan na tongtong i do i pelehononmuna rap dohot peleanna siinumon i.

²⁵Anggo di ari papituhon i, ingkon pansangonmuna ma luhutan na badia di hamu; ndang jadi ulahononmuna disi agia aha ulaon ariari.

²⁶(V.) Tole muse di ari patumonaan, molo dipelehon hamu pelean sipanganon na imbaru di Jahowa dung boho angka minggumuna i, ingkon pansangonmuna do sada luhutan na badia di hamu: Nandang jadi ulahononmuna disi agia aha ulaon ariari.

²⁷Ingkon pelehononmuna disi dua anak ni lembu, sada birubiru tunggal, pitu anak ni birubiru na marumur sataon bahen pelean situtungan, uap na hushus di Jahowa.

²⁸Rap dohot itak na lamot na nidogil dohot miak bahen pelean sipanganon: Tolu parpulan di ganup anak ni lembu, dua parpulan di ganup birubiru tunggal.

²⁹Jala sada parpulan di ganup anak ni birubiru na pitu i.

³⁰Sada hambing tunggal bahen pardenggan di hamu.

³¹ Pelehononmuna do angka i di balik ni pelean situtungon na tongtong i rap dohot peleanna sipanganon; ingkon na so martihas do angka i di hamu rap dohot peleanna siinumon i.

29¹ (I.) Di artia di bulan sipaha pitu ingkon pansangon di hamu sada luhutan na badia, ndang jadi ulahononmuna disi agia aha ulaon ariari, ai ari raya parsaruneon do i di hamu.

² Ingkon pelehononmuna disi sada anak ni lembu, sada birubiru tunggal, pitu anak ni birubiru na marumur sataon, angka na so martihas bahen pelean situtungon, uap na hushus di Jahowa.

³ Rap dohot itak na lamot na nidogil dohot miak bahen pelean sipanganon: Tolu parpuluhan dongan ni anak ni lembu i, dua parpuluhan dongan ni birubiru tunggal i.

⁴ Jala saparpuluhan dongan ni ganup birubiru na pitu i.

⁵ Angkup ni muse hambing tunggal sada bahen pelean pardosaon, mambahen pardenggan di hamu.

⁶ Di balik ni pelean situtungon di poltak ni bulan rap dohot peleanna sipanganon ro di pelean situtungon na tongtong i rap dohot peleanna sipanganon ro di peleanna siinumon tahe hombar tu uhumna hian, bahen uap na hushus, pelean api tu Jahowa.

⁷ (II.) Tole di ari sampulu di bulan sipaha pitu i, ingkon pansangon di hamu sada luhutan na badia, ingkon paunduhonmuna rohamuna disi, nanggo sada ulaon, ndang jadi ulahononmuna disi.

⁸ Ingkon pelehononmuna disi sada anak ni lombu, sada birubiru tunggal, pitu anak ni birubiru na marumur sataon, angka na so martihas bahen pelean situtungon, uap na hushus di Jahowa.

⁹ Rap dohot itak na lamot na nidogil dohot miak bahen pelean sipanganon: Tolu parpuluhan dongan ni lombu i, dua parpuluhan dongan ni birubiru tunggal i.

¹⁰ Jala saparpuluhan dongan ni ganup anak ni birubiru na pitu i.

¹¹ Tole muse sada hambing tunggal bahen pelean pardosaon, di balik ni pelean pardosaon bahen pardenggan ro di pelean situtungon na tongtong i rap dohot pelean sipanganon dohot pelean siinumon.

¹² (III.) Tole muse di ari sampulu lima bulan sipaha pitu i ingkon pansangonmuna di hamu sada luhutan na badia, nanggo sada ulaon ariari ndang jadi ulahononmuna disi, ingkon marari raya di Jahowa hamu pitu ari lelengna.

¹³ Ingkon pelehononmuna disi sampulu tolu anak ni lombu, dua birubiru tunggal, sampulu opat anak ni birubiru na marumur sataon, angka na so jadi martihas bahen pelean

situtungon, sada pelean api, uap na hushus di Jahowa.

¹⁴Rap dohot itak na lamot na nidogil dohot miak bahen pelean sipanganon: Tolu parpulan di ganup anak ni lombu na sampulu tolu i, dua parpulan di ganup birubiru tunggal na dua i.

¹⁵Jala saparpulan di ganup anak ni birubiru na sampulu opat i.

¹⁶Tole muse sada hambing tunggal bahen pelean pardosaon, di balik ni pelean situtungon na tongtong i rap dohot peleanna sipanganon dohot peleanna siinumon.

¹⁷Tole muse di ari paduahon i sampulu dua anak ni lombu, dua birubiru tunggal, sampulu opat anak ni birubiru na marumur sataon, angka na so martihas.

¹⁸Rap dohot peleanna sipanganon dohot peleanna siinumon, dongan ni angka anak ni lombu, angka birubiru tunggal dohot angka anak ni birubiru marguru tu bilanganna be, hombar tu uhumna hian.

¹⁹Tole sada hambing tunggal bahen pelean pardosaon, di balik ni pelean situtungon na tongtong i rap dohot peleanna sipanganon dohot peleanna siinumon.

²⁰Tole muse di ari patoluhon sampulu sada anak ni lombu, dua birubiru tunggal, sampulu opat anak ni birubiru, angka na so martihas.

²¹Rap dohot peleanna sipanganon dohot peleanna siinumon, dongan ni angka lombu,

angka hambing tunggal dohot angka anak ni birubiru, marguru tu bilanganna be, hombar tu uhumna hian.

²²Angkup ni muse sada hambing tunggal bahen pelean pardosaon, di balik ni pelean situtungan na tongtong i rap dohot peleanna sipanganon dohot siinumon.

²³Tole muse di ari paopathon sampulu anak ni lombu, dua birubiru tunggal, sampulu opat anak ni birubiru na marumur sataon, angka na so martihas.

²⁴Rap dohot peleanna sipanganon dohot peleanna siinumon, dongan ni angka lombu, angka birubiru tunggal dohot angka anak ni birubiru marguru tu bilanganna be, hombar tu uhumna hian.

²⁵Angkup ni sada hambing tunggal bahen pelean pardosaon, di balik ni pelean situtungan na tongtong i rap dohot peleanna sipanganon dohot peleanna siinumon.

²⁶Tole muse di ari palimahon sia anak ni lombu, dua birubiru tunggal, sampulu opat anak ni birubiru, angka na so martihas.

²⁷Rap dohot peleanna sipanganon dohot peleanna siinumon, dongan ni angka anak ni lombu, angka birubiru tunggal dohot angka anak ni birubiru marguru tu bilanganna be, hombar tu uhumna hian.

²⁸Angkup ni sada hambing tunggal bahen pelean pardosaon, di balik ni pelean

situtungan na tongtong i rap dohot peleanna sipanganon dohot peleanna siinumon.

²⁹Tole muse di ari paonomhon ualu anak ni lembu, dua birubiru tunggal, sampulu opat anak ni birubiru na marumur sataon, angka na so martihas.

³⁰Rap dohot peleanna sipanganon dohot peleanna siinumon dongan ni angka anak ni lembu, angka birubiru tunggal dohot angka anak ni birubiru, marguru tu bilanganna be, hombar tu uhumna hian.

³¹Angkup ni sada hambing tunggal bahen pelean pardosaon di balik ni pelean situtungan na tongtong i rap dohot peleanna sipanganon dohot peleanna siinumon.

³²Tole muse di ari papituhon pitu anak ni lembu, dua birubiru tunggal, sampulu opat anak ni birubiru na marumur sataon, angka na so martihas.

³³Rap dohot peleanna sipanganon dohot peleanna siinumon, dongan ni angka anak ni lembu i, angka birubiru tunggal dohot angka anak ni birubiru, marguru tu bilanganna be, hombar tu uhumna hian.

³⁴Angkup ni sada hambing tunggal bahen pelean pardosaon, di balik ni pelean situtungan na tongtong i rap dohot peleanna sipanganon dohot peleanna siinumon.

³⁵Tole muse di ari pauluhon, ingkon disi ma mata ni ari raya i, nanggo sada ulaon ariari, ndang jadi ulahononmuna disi.

³⁶Alai ingkon pelehononmuna disi sada anak ni lembu, sada birubiru tunggal, pitu anak ni birubiru na marumur sataon, angka na so martihas bahen pelean situtungon, pelean api uap na hushus di Jahowa.

³⁷Rap dohot peleanna sipanganon dohot peleanna siinumon, dongan ni anak ni lembu i, dongan ni birubiru tunggal i dohot dongan ni angka anak ni birubiru, marguru tu bilanganna be, hombar tu uhumna hian.

³⁸Angkup ni sada hambing tunggal bahen pelean pardosaon, di balik ni pelean situtungon na tongtong i rap dohot peleanna sipanganon dohot peleanna siinumon.

³⁹I ma pelean angka sipelehononmuna tu Jahowa di angka ari rayamuna, di balik ni angka bagabagamuna dohot silehonlehonmuna sian lomo ni roha bahen angka pelean situtungon, angka pelean sipanganon, angka pelean siinumon dohot angka pelean hamauliateon di hamu.

⁴⁰(30-1) (I.) Dung i dipatolhas si Musa ma tu halak Israel saluhut naung tinonahon ni Jahowa tu ibana.

30¹ (30-2) Dung i ro ma hata ni Musa tu angka induk ni halak Israel marmargamarga, ninna ma: On do hata naung tinonahon ni Jahowa:

²(30-3) Tung sura naung marbagabaga sahalak tu Jahowa manang marjanji, pola naung manolon ibana ingkon oromon ni

rohana manang aha, na so tupa ubaonna
hatana, ingkon hombar tu saluhut na ruar
sian pamanganna bahenonna.

³(30-4) (II.) Alai tung sura sada parompuan
marbagabaga tu Jahowa, manang marjanji,
ingkon oromon ni rohana manang aha tagan
namarbaju dope di jabu ni amana.

⁴(30-5) Hape tarbege ma bagabagana
manang janjina taringot tu sioromon ni
rohana i tu amana, laos dihasiphon amana i,
ingkon hot ingotonna nasa bagabagana dohot
nasa janjina taringot tu sioromon ni rohana i.

⁵(30-6) Alai molo pintor mangunangi amana
i di ari dung dibege nasa bagabagana manang
janjina taringot tu sioromon ni rohana i,
ndang jadi hot ingotonna; marpamuati dohot
roha ni Jahowa di nasida, ala mangunangi
amana i di nasida.

⁶(30-7) Alai tung sura naung mardongan
saripe nasida, hape marutang bagabaga
manang tarsor pamanganna marjanji taringot
tu sioromon ni rohana i.

⁷(30-8) Jala dibege sinondukna i do nian,
molo laos dihasiphon do i di ari uju binegena
i, ingkon hot do ingotonna bagabagana dohot
janjina taringot tu sioromon ni rohana i.

⁸(30-9) Alai molo mangunangi sinondukna i
di nasida di ari dung dibege, gabe sinondukna
i mansoadahon bagabagana hian manang
janji naung tarsor sian pamanganna taringot

tu sioromon ni rohana i, jadi marpangulahi ma roha ni Jahowa mida nasida.

⁹(30-10) (III.) Alai anggo bagabaga ni sada parompunan na mabalu manang naung binolongkon, nasa naung jinanjihonna taringot tu sioromon ni rohana, ingkon hot do ingotonna.

¹⁰(30-11) Alai tung sura di bagasan jabu ni sinondukna dope ibana marbagabaga manang marjanji, pola marsumpa taringot tu sioromon ni rohana i.

¹¹(30-12) Jala dibege sinondukna do i nian, laos dihasiphon ndang diorai nasida, ingkon hot ingoton nasa bagabagana dohot nasa janji naung jinanjihonna taringot tu sioromon ni rohana.

¹²(30-13) Alai molo disoadahon sinondukna do i di ari dung binegena, nasa naung ruar sian pamanganna, nang bagabagana, nang janjina taringot tu sioromon ni rohana i, ndang jadi hot ingotonna, ala naung disoadahon sinondukna i do i, jala marpangulahi roha ni Jahowa mida nasida.

¹³(30-14) Nasa bagabaga tahe dohot nasa sumpa taringot tu sioromon laho paundukkon roha, tarbahen sinondukna do pahothon, tarbahen sinondukna do pahothon, tarbahen sinondukna huhut mansoadahon.

¹⁴(30-15) Alai molo tongtong sip sinondukna i sian na sadari tu ari muse, na pahothon do ibana di saluhut bagabagana dohot di saluhut

janjina taringot tu sioromonnai; hot ma tutu ingoton angka i, ala na sipi ibana di ari dung binegena i.

¹⁵(30-16) Alai tung sura naeng soadahononna angka i dung binegena i, ingkon manginona tu ibana do hajahatonna i.

¹⁶(30-17) I ma angka uhum na tinonahon ni Jahowa tu si Musa taringot tu baoa martimbangkonjolma; taringot tu amaama martimbangkon boruna saleleng namarbaju dope di bagasan jabu ni amana.

31¹(I.) Dung i ro muse ma hata ni Jahowa tu Musa songon on:

²Ingkon martubol halak Israel bahenonmu tu halak Midian, dung salpu i ingkon papunguon ma ho tu bangsom.

³Jadi ninna si Musa ma tu bangso i songon on: Pillit hamu ma sian hamu baoa angka na laho marporang mandopang halak Midian mangalaluhon partubolan ni Jahowa tu halak Midian.

⁴Sasaribu halak sian ganup marga, sian sandok marga ni Israel tahe paborhatonmuna laho marporang.

⁵Jadi tarpillit ma sian halak Israel na marriburibu, sasaribu halak sian ganup marga, gabe sampulu dua ribu halak angka na pinillit tu parporangan.

⁶Jadi dipaborhat si Musa ma nasida saribu halak sian ganup marga tu parporangan,

nasida dohot si Pinehas, anak ni malim Eleasar tu parporangan, huhut patioptiop angka ulaula na badia dohot angka sarune na marsoara toletole.

⁷Jadi marporang ma nasida dompak halak Midian, songon na tinonahon ni Jahowa tu si Musa, jala diraserasehon nasida do nasa baoa.

⁸Angkup ni halak angka na marragean i dibunu nasida huhut angka raja sian Midian, i ma: Si Evi dohot si Rekem dohot si Zur dohot si Hur dohot si Reba, na lima raja ni halak Midian, nang dohot si Bileam, anak ni si Beor dibunu nasida do marhitehite podang.

⁹Laos dapot diboan halak Israel angka parompuan ni halak Midian dohot dakdanaknasida; ditaban duduk huhut sandok dorbiasida, ugasannasida dohot artanasida.

¹⁰Jala saluhut hutanasida ro di sude ingananna dohot parbentenganna, suda do disurbu dohot api.

¹¹Laos diboan nasida do nasa tabantaban nasa rampasan sianjolma dohot pinahan.

¹²Jala diboan nasida do tu si Musa dohot tu malim Eleasar dohot tu huria ni halak Israel angka na dapot tartangkup dohot ugasan rampasan ro di tabantaban tu parsaroan, tu adaran Moab martopihon Jordan, tondong ni Jeriko.

¹³(II.) Dung i ruar ma si Musa dohot malim Eleasar dohot sude induk ni huria i manomunomu nasida tu balian ni parsaroan i.

¹⁴Dung i tarrimas situtu ma si Musa mida partogi ni angka parangan i, mida angka induk ni sisaribu halak dohot sisaratus halak, angka na ro mulak sian parporangan.

¹⁵Dung i ninna si Musa ma tu nasida: Boasa tung pangoluonmuna sude parompuan nasida i?

¹⁶Ida ma, angka nasida do gabe parbingkasan marbalik sian Jahowa mangihuthon tu Peor tinuturan ni si Bileam, gabe ro begu masa tu huria ni Jahowa.

¹⁷Dibahen i bunu hamu ma nasa dakdanak baoa dohot nasa parompuan, naung dung sampur tu sada baoa bunu hamu.

¹⁸Alai anggo nasa dakdanak boruboru, angka na so dung sampur tu sada baoa, pangolu hamu ma di hamu.

¹⁹Alai anggo hamu, ingkon marsaro hamu di balian ni parsaroan pitu ari lelengna; manang ise naung mambunu jolma jala manang ise naung manjama jolma na binunu i, ingkon urasonmuna dirimuna sian dosa di ari patoluhon dohot di ari papituhon, nang hamu nang sude jolma na dapot binoanmuna i.

²⁰Jala nasa pangkean dohot nasa ulaula sian hulingkuling dohot nasa hapandean sian

imput ni hambing dohot nasa ulaula hau,
ingkon urasonmuna do.

²¹Dung i ro ma hata ni malim Eleasar
mandok tu halak parporang, angka naung
mulak sian parporangan: On do patik ni uhum
naung tinonahon ni Jahowa tu si Musa:

²²Langgo sere, perak, tombaga, bos, seng
dohot simbora.

²³Ro di saluhut na manahan di bagasan
api, ingkon pabolushononmuna sian bagasan
api, asa pita, alai ingkon urusan do huhut
sian ramunna marhite aek pangurasion; alai
nasa na so manahan di bagasan api, ingkon
pabolushononmuna do sian aek.

²⁴Ingkon sionsionmuna huhut
pangkeanmuna di ari papituhon i, asa
laos ias hamu, ipe asa jadi hamu masuk tu
parsaroan i.

²⁵(III.) Dung i ro muse hata ni Jahowa tu si
Musa songon on:

²⁶Surathon ma godang ni tabantaban dohot
rampasan sian jolma dohot pinahan, ho dohot
malim Eleasar ro di angka induk ni huria i
marompuompu.

²⁷Dung i bagi dua ma bahenonmu
tabantaban i, satonga di halak parporang,
angka na borhat tu tongtangan, na
satonganari di sandok huria i.

²⁸Dung i ingkon papulihonmu ma guguan
di Jahowa sian halak parporang i, angka na
borhat tu tongtangan, sada sian lima ratus

nang sian jolma, lombu, halode dohot sian birubiru.

²⁹Ingkon sian na satonga di nasida buatonmu jala lehononmu tu malim Eleasar bahen pelean tatingan tu Jahowa.

³⁰Alai anggo sian na satonga na di halak Israel, ingkon buatonmu sada sian na limapulu, nang sian jolma, lombu, halode, dohot birubiru, sian sandok pinahan jala lehononmu tu halak Lepi, angka na mangaradoti ulaon di undungundung ni Jahowa.

³¹Jadi dibahen si Musa dohot malim Eleasar ma, songon na tinonahon ni Jahowa tu si Musa.

³²Jadi godang ni tabantaban, so padohot tabantaban na so marhosa, angka na tinaban ni halak parporang i: Onom ratus pitupulu lima ribu birubiru.

³³Pitupulu dua ribu lombu.

³⁴Onompulu sada ribu halode.

³⁵Ia torop ni parompuan, angka na so dung sampur tu baoa tolupulu dua ribu halak toropna.

³⁶Jadi bilangan ni na satonga, jambar ni halak na borhat tu tongtangan, i ma tolu ratus tolupulu pitu ribu lima ratus birubiru.

³⁷Jadi guguan na di Jahowa sian angka birubiru onom ratus pitupulu lima birubiru.

³⁸Jala sian na tolupulu onom ribu lombu pitupulu dua guguan na di Jahowa.

³⁹Jala sian na tolupulu ribu lima ratus halode, onompulu sada guguan tu Jahowa.

⁴⁰Jala sian na sampulu onom ribu hosa ni jolma, tolupulu dua jolma guguan tu Jahowa.

⁴¹Dung i dipasahat si Musa ma guguan i bahen pelean tatingan, jambar ni Jahowa tu malim Eleasar, songon na tinonahon ni Jahowa tu si Musa.

⁴²Ia na satonganari na binuat ni si Musa sian halak parporang i, nilehonna tu halak Israel.

⁴³Na satonganari jambar ni huria i, laos tolu ratus pitupulu tolu ribu lima ratus birubiru.

⁴⁴Tolupulu onom ribu lembu.

⁴⁵Tolupulu ribu lima ratus halode.

⁴⁶Dohot sampulu onom ribu hosa ni jolma.

⁴⁷Dung i dibuat si Musa ma sian na satonga jambar ni halak Israel i sada sian limapulu, nang sian jolma, nang sian pinahan, jala dilehon do i tu halak Lepi, angka na mangaradoti ulaon di undungundung ni Jahowa, songon na tinonahon ni Jahowa hian tu si Musa.

⁴⁸(IV.) Dung i ro ma jumonok tu si Musa angka partogi ni parangan marriburibu, angka induk ni sisaribu halak dohot sisaratus halak.

⁴⁹Jala didok nasida ma tu si Musa: Nunga dibilangi angka naposom torop ni halak parporang angka na marpandapotan tu hami, jala ndang mago nanggo sahalak.

⁵⁰Ala ni umbahen na huboan hami pelean tu Jahowa, ganup sian na dapot tanganna sian ulaula sere, leang di pat dohot di pargolongan, nang tintin dohot sibong dohot simata landus, asa mambahen pardenggan tu tondinami di adopan ni Jahowa.

⁵¹Dung i dibuat si Musa dohot malim Eleasar ma sere i sian nasida, luhut ulaula na marhapandean marragamragam.

⁵²Jadi saluhut sere pelean tatingan, na binoannasida tu Jahowa sampulu onom ribu pitu ratus limapulu sekkel dokdokna, sian angka induk sisaribu halak dohot sisaratus halak.

⁵³Angka baoa parporang pe ganup marrintahan be do.

⁵⁴Dung i dibuat si Musa dohot malim Eleasar ma sere i sian induk ni sisaribu halak dohot sisaratus halak, jala diboan do i tu bagasan undungundung parluhutan i bahen parningotan di halak Israel di adopan ni Jahowa.

32¹(I.) Alai anggo pinompar ni si Ruben dohot si Gad pardorbiala na godang situtu do, gabe diida nasida ma tano Jaser dohot tano Gilead, jadi ida ma, inganan na denggan do i di halak parpinahan.

²Dung i ro ma halak si Gad dohot Ruben mandok hatanasida tu si Musa dohot tu malim Eleasar dohot tu angka induk ni huria i, ninna ma:

³Ia Atarot, Dibon, Jaser, Nimra, Hesbon, Eleale, Sebam, Nebo dohot Beon.

⁴Tano naung pinapatu ni Jahowa di adopan ni huria Israel, tano na denggan do i di halak parpinahan, jala pardorbia do angka naposom.

⁵Angkup ni didok nasida: Molo maruli asi ni roha hami di adopanmu, nilehon ma nian tano on tu angka naposom bahen partalianna, unang nian hami taripar tu bariba ni Jordan.

⁶Alai ninna si Musa ma tu halak Gad dohot tu halak Ruben: Tung tama ma hahaanggimuna laho tu parporangan, ia hamu naeng tinggal dison marsonangsonang?

⁷Boasa tung pagangguganguonmuna roha ni halak Israel, asa unang taripar nasida tu tano naung nilehon ni Jahowa tu nasida?

⁸Suang songon i do na binahen ni amamuna, uju husuru nasida sian Kades-Barnea laho mangkahapi tano i.

⁹Jadi dung nangkok nasida sahat tu rura Eskol jala dihahapi tano i, gabe dipaganggugangu nasida roha ni halak Israel, pola manjua nasida masuk tu tano, naung nilehon ni Jahowa tu nasida.

¹⁰Pola marsigorgor rimas ni Jahowa di ari na sasada i, jala maruari ibana mandok:

¹¹Ndang jadi be baoa angka naung hutogihon nangkok sian tano Misir olat ni na marumur duapulu taon dohot lobi sian i marnida tano naung huuarihon tu si Abraham,

si Isak dohot si Jakkob! Ala ndang marsihohot rohanasida mangihuthon Ahu.

¹²Dungkon ni si Kaleb, anak ni si Jepune halak si Kenizi dohot si Josua, anak ni si Nun, ala marsihohot anggo rohanasida mangihuthon Jahowa.

¹³Jadi marpiarpiar ma rimas ni Jahowa mida Israel, gabe maotaot nasida didokkon di halongonan opatpulu taon lelengna, paima sun siap na sansundut i na mangulahon hajahatan di adopan ni Jahowa.

¹⁴Jala ida ma, hamu do nuaeng soluk singkat ni amamuna i, sada sundut halak pardosa, naeng manambai dope huroha, parpiarpiar ni rimas ni Jahowa dompak Israel.

¹⁵Ai tung sura marbalik hamu sian Ibana, lumeleng dope pasombuonna bangso on di halongonan, jala mago do sandok bangso on bahenonmuna.

¹⁶Dung i ro ma nasida jumonok mandapothon ibana huhut didok: Asal naeng paulihon angka pondokpondok di pinahannami hami dison dohot huta pungaonnami di angka anakkon nami.

¹⁷Alai hatop pe anggo hami mangkontas manguluhon halak Israel, paima sahat nasida huboan hami tu ingananna; ingkon angka anakkon nami tinggal di bagasan huta, angka na gonting i maradophon isi ni tano i hian.

¹⁸Ndang naeng mulak anggo hami tu jabunami, nda jolo disoluk halak Israel ganup partalianna be.

¹⁹Ai ndada naeng sapartalian hami dohot nasida di bariba ni Jordan adui, ia dung sahat partaliannami tu hami di bariba ni Jordan tungkan habinsaran.

²⁰(II.) Dung i ninna si Musa ma tu nasida: Molo dibahen hamu songon i, molo mangkontas hamu di adopan ni Jahowa laho tu parporangan.

²¹Antong taripari hamu ma Jordan di adopan ni Jahowa, sude hamu angka na tang marsinjata, paima sun dipabali Ibana angka musuna sian adopanna.

²²Jala patu tano i di adopan ni Jahowa, dung salpu i jadi do hamu mulak, gabe lias hamu sian sala maradophon Jahowa dohot Israel, jala ingkon tano on gabe partalianmuna di adopan ni Jahowa.

²³Alai molo so dibahen hamu songon i, ida ma, mardosa ma hamu dompak Jahowa, jala boto hamu ma, ingkon manginona tu hamu dosamuna i.

²⁴Antong punga hamu ma angka huta di anakkonmuna dohot pondokpondok di birubirumuna, alai patupa hamu huhut hata na ruar sian pamanganmunai.

²⁵Dung i ninna halak Gad dohot Ruben ma mandok si Musa: Ingkon bahenon ni angka naposom do hombar tu tona ni tuantai.

²⁶Anakkonnami, jolmanami, ugasannami ro di sandok pinahannami, ingkon tading dison di bagasan angka huta ni Gilead.

²⁷Alai anggo hami, angka naposomon, ingkon taripar sude tang marsinjata be tu parporangan di adopan ni Jahowa, songon naung nidok ni tuantai.

²⁸Jadi ro ma tona ni si Musa taringot tu nasida mandok tu malim Eleasar dohot tu si Josua, anak ni si Nun dohot tu sude induk ni halak Israel marmargamarga.

²⁹Ninna si Musa ma tahe tu nasida: Molo taripar halak Gad dohot Ruben rap dohot hamu tu bariba ni Jordan, sude halak angka na tang be tu parporangan di adopan ni Jahowa, jala naung patu tano i maradophon hamu, ingkon lehononmuna ma tu nasida tano Gilead bahen partalianna.

³⁰Alai tung sura ndang taripar halak angka na tang marsinjata rap dohot hamu, ingkon marpartalian nasida di tongatongamuna di tano Kanaan.

³¹Jadi ro ma alus ni halak Gad dohot Ruben mandok: Manang aha naung nidok ni Jahowa tu angka naposomon, ingkon songon i bahenonnami.

³²Ingkon tang be hami marsinjata taripar di adopan ni Jahowa tu tano Kanaan jala hot di hami partaliannami di bariba ni Jordan.

³³Jadi dilehon si Musa ma tu halak Gad, tu halak Ruben dohot tu satonga marga

Manasse, anak ni si Josep, harajaon ni si Sihon, raja ni halak Amori dohot harajaon ni si Og, raja ni Basan, tano i tahe ro di angka huta di sandok partalpahanna humaliang.

³⁴Dung i dipauli halak Gad ma huta Dibon, Atarot dohot Aroer.

³⁵Tole Atarot Sopan, Jaser dohot Jogbehah.

³⁶Tole Betnimra, dohot Betharan, angka huta na gonting dohot pondokpondok di birubiru.

³⁷Ro muse halak Ruben paulihon Hesbon, eleale, Kiriataim.

³⁸Ro muse Nebo dohot Baal Meon, angka na dipaimbar ia goarna, tole dohot Sibna, jala di paimbar do goar ni huta angka na pinaulina i.

³⁹Dung i laho ma angka anak ni si Mahir, anak ni si Manasse, tu Gilead, laos dipapatu do i jala dipabali halak Amori na disi.

⁴⁰Dung i dilehon si Musa ma Gilead tu si Mahir, anak ni si Manasse, laos maringan ibana disi.

⁴¹Alai anggo si Jair, anak ni si Manasse, laho do i papatuhon angka sosor, laos dibahen goarna angka sosor ni si Jair.

⁴²Laho do nang si Nobah, jala dipapatu Kenat rap dohot angka sosorna, jala digoar do i Nobah mangihuthon goarna i.

33¹(I.) On do angka pangulonon ni halak Israel, angka naung ruar sian tano Misir rap dohot parangannasidai, marpandapotan tu si Musa dohot si Aron.

²Dung i disurathon si Musa ma haruruarnasida dohot pangulonannasida i hombar tu hata ni Jahowa, jala on do angka pangulonannasida i, dung ruar nasida.

³Borhat do nasida sian Ramses di bulan sipaha sada, di ari sampulu lima bulan sipaha sadai, manogotna i dung salpu Paska borhat ma halak Israel marhite sian tangan na timbul di adopan ni sude halak Misir.

⁴Tole anggo halak Misir mananom sude anak buhabaju, angka naung mate dibunu Jahowa tu tongatonganasida; mangonai uhum Jahowa huhut tu angka debatanasida i.

⁵Jadi dung borhat halak Israel sian Ramses, marsaro ma nasida di Sukot.

⁶Borhat muse nasida sian Sukot jala marsaro di Etham, na di partalpahan ni halongonan i.

⁷Borhat muse nasida sian Etham jala mamedu dompak Pihakiro, tondong ni Baal Zephon jala marsaro nasida di adopan ni Migdol.

⁸Borhat muse nasida sian Pihakiro jala taripar nasida di tongatonga ni laut tu halongonan jala mardalan nasida tolu ari daona di bagasan halongonan Etham jala marsaro nasida di Mara.

⁹Borhat muse nasida sian Mara jala sahat tu Elim; di Elim do sampulu dua mual dohot pitupulu harambir, laos marsaro nasida disi.

¹⁰Borhat muse nasida sian Elim jala marsaro martopihon laut arung.

¹¹Borhat muse nasida sian laut arung jala marsaro di halongonan Sin.

¹²Borhat muse nasida sian halongonan Sin jala marsaro di Dopka.

¹³Borhat muse nasida sian Dopka jala marsaro di Alus.

¹⁴Borhat muse nasida sian Alus jala marsaro di Rapidim; hurangan aek siinumon bangso i disi.

¹⁵Borhat muse nasida sian Rapidim jala marsaro di halongonan Sinai.

¹⁶Borhat muse nasida sian halongonan Sinai jala marsaro di lambung tanoman ni halak angka na hisapan.

¹⁷Borhat muse nasida sian tanoman ni halak angka na hisapan jala marsaro nasida di Hazerot.

¹⁸Borhat muse nasida sian Hazerot jala marsaro di Ritma.

¹⁹Borhat muse nasida sian Ritma jala marsaro di Rimmon Peres.

²⁰Borhat muse nasida sian Rimmon Peres jala marsaro di Libna.

²¹Borhat muse nasida sian Libna jala marsaro di Resa.

²²Borhat muse nasida sian Resa jala marsaro di Kehelata.

²³Borhat muse nasida sian Kehelata jala marsaro mardonokkon Seper.

²⁴ Borhat muse nasida sian Seper jala marsaro di Harada.

²⁵ Borhat muse nasida sian Harada jala marsaro di Makelot.

²⁶ Borhat muse nasida sian Makelot jala marsaro di Tahat.

²⁷ Borhat muse nasida sian Tahat jala marsaro di Tara.

²⁸ Borhat muse nasida sian Tara jala marsaro di Mitka.

²⁹ Borhat muse nasida sian Mitka jala marsaro di Hasmona.

³⁰ Borhat muse nasida sian Hasmona jala marsaro di Moserot.

³¹ Borhat muse nasida sian Moserot jala marsaro di Bene Jaakan.

³² Borhat muse nasida sian Bene Jaakan jala marsaro di Hor-Gidgad.

³³ Borhat muse nasida sian Hor-Gidgad jala marsaro di Jobata.

³⁴ Borhat muse nasida sian Jobata jala marsaro di Abrona.

³⁵ Borhat muse nasida sian Abrona jala marsaro di Esion Geber.

³⁶ Borhat muse nasida sian Esion Geber jala marsaro di halongonan Zin, i ma Kades.

³⁷ Borhat muse nasida sian Kades jala marsaro marbonahon dolok Hor di partalpahan ni Edom.

³⁸ Dung i nangkok ma malim Aron tu atas ni dolok Hor, nidokkon ni hata ni Jahowa, laos

mate disi, di taon opatpulu dung ruar halak Israel sian Misir, di artia bulan sipaha lima.

³⁹Jala marumur saratus duapulu tolu taon si Aron, uju na mate ibana di dolok Hor.

⁴⁰Uju i ma tarbortik barita i tu halak Kanaan, tu raja Arad, na maringan di tano Kanaan tungkan dangsina, naung ro halak Israel.

⁴¹Borhat muse nasida sian dolok Hor jala masaro di Salmona.

⁴²Borhat muse nasida sian si Salmona jala marsaro di Punon.

⁴³Borhat muse nasida sian Punon jala marsaro di Obet.

⁴⁴Borhat muse nasida sian Obet jala marsaro di dolok Abarim di partalpahan ni Moab.

⁴⁵Borhat muse nasida sian dolok Abarim jala marsaro di Dibon-Gad.

⁴⁶Borhat muse nasida sian Dibon-Gad jala marsaro di Almon Diblataim.

⁴⁷Borhat muse nasida sian Almon Diblataim jala marsaro di dolok Abarim di adopan ni Nebo.

⁴⁸Borhat muse nasida sian dolok Abarim jala marsaro di adaran Moab martopihon Jordan, tondong ni Jeriko.

⁴⁹Jala marsaro nasida martopihon Jordan olat ni Betjesimot sahat ro di Abel Sitim di adaran Moab.

⁵⁰(II.) Dung i ro ma hata ni Jahowa tu si Musa di adaran Moab martopihon Jordan, tondong ni Jeriko, ninna ma:

⁵¹Pasahat ma tu halak Israel hatangkon: Ia dung ditaripari hamu Jordan masuk tu tano Kanaan.

⁵²Ingkon pabalionmuna sude isi ni tano i hian sian adopanmuna, jala ingkon bolaonmuna nasa ganaganaannasida sian batu; nang ganaganaannasida tuangan ingkon segaanmuna do, jala nasa tombaknasida ingkon lohaonmuna do.

⁵³Laos ingkon hamu manean tano i jala maringan disi; ai nunga hulehon tano i tu hamu, asa soluhonmuna i.

⁵⁴Jala ingkon bagionmuna tano i di hamu marmargamarga marhite sian rujiruji; molo torop halak bilanganna, ingkon pagandaonmu partalianna, molo otik, paotihonmuna huhut partalianna; manang dia tahe na tinudu ni rujiruji i di ganup, ingkon i do partalianna; marguru tu margamuna marompuompu, maruli partalian hamu.

⁵⁵Alai tung sura so dipabali hamu isi ni tano i hian sian adopanmuna, angka pasipasina sian nasida tinebahonmuna i, ingkon gabe basir di bagasan matamuna jala gabe turatura di bagasan gontingmuna, jala sosahannasida ma hamu di tano na niinganamuna i.

⁵⁶Jadi suman songon na sinangkap ni rohangku naeng bahenonku tu nasida, bahenonku do tu hamu.

34¹ (I.) Dung i ro muse hata ni Jahowa tu si Musa songon on:

²Ingkon pasahatonmu ma hatangkon tu nasida: Molo dung masuk hamu tu tano Kanaan, on do tano i, na gabe partalianmuna, tano Kanaan i tahe ro di parbalohanna.

³Hamu do nampuna tano sambariba tungkan dangsina tutu olat ni halongonan Zin mardonokkon Edom, asa parbalohanmuna tungkan dangsina olat ni ujung ni laut sira tungkan habinsaran.

⁴Dung i mamedu ma parbalohan dangsina i sahat tu robean Akrabim jala taripar tu Zin jala nangkok tungkan dangsina ni Kades-Barnea, ruar sian i muse tu Hazar-Adar, jala taripar sian i muse tu Azmon.

⁵Mamedu muse parbalohanna sian Azmon tu sunge Misir, jala partalpahanna marbalokkon laut.

⁶Ia parbalohanna tungkan hasundutan (laut), ingkon laut na bolon i do parbalohanna di hamu; i ma parbalohan na tungkan hasundutan.

⁷Ia parbalohanna tungkan utara, ingkon mangoriori sian laut na bolon sahat ro di dolok Hor.

⁸Sian dolok Hor muse ingkon gistang sahat ro di Hamat, asa partalpahan ni tano i sahat tu Zedad.

⁹Ruar muse parbalohan i sian i sahat tu Sipron, asa partalpahanna sahat tu Hazor-Enan. I ma parbalohanmuna tungkan utara.

¹⁰Ia parbalohanmuna sambola tungkan habinsaran olat ni Hazor-Enan sahat ro di Sepam.

¹¹Tuat muse parbalohan i sian Sepam tu Ribla tungkan habinsaran sian Ain, tuat muse parbalohan i pola dolos tu pasir ni tano Kineret tungkan habinsaran.

¹²Dohot muse parbalohan i sahat tu Jordan, jala partalpahanna martopihon laut sira. I ma gabe tanomuna mangihuthon parbalohanna humaliang.

¹³Dung i ro ma hata ni si Musa mandok tu halak Israel: I ma tano i sibagionmuna marhite sian rujiruji, na tinonahon ni Jahowa lehononna tu na sia marga dohot tu na satonga marga Manasse.

¹⁴Ai nunga maruli partalian be anggo marga ni halak Ruben marompuompu dohot marga ni halak Gad marompuompu ro di satonga marga Manasse.

¹⁵Na dua marga dohot na satonga marga, nunga maruli partalian di baribaon di Jordan, tondong ni Jeriko tungkan habinsaran.

¹⁶(II.) Dung i ro muse hata ni Jahowa tu si Musa songon on:

¹⁷On do goargoar ni baoa angka na marbagi tano i tu hamu: malim Eleasar, dohot si Josua, anak ni si Nun.

¹⁸Angkup ni ingkon buatonmuna do sada induk sian ganup marga laho marbagi tano i.

¹⁹Jala on do goargoar ni angka baoa i: si Kaleb, anak ni si Jepune sian marga Juda.

²⁰Si Semuel, anak ni si Amihud, sian marga Simeon.

²¹Si Elidad, anak ni si Kilson, sian marga Benjamin.

²²Si Bukki, anak ni si Jogal i, induk sian marga Dan.

²³Si Hanniel, anak ni si Epod, sian pinompar ni si Josep, induk sian marga Manasse.

²⁴Si Kemuel, anak ni si Siptan, induk sian marga Epraim.

²⁵Si Elizapan, anak ni si Parnak, induk sian marga Zebulon.

²⁶Si Paltiel, anak ni si Azan, induk sian marga Isasar.

²⁷Si Ahihud, anak ni si Selomi, induk sian marga Aser.

²⁸Si Pedahel, anak ni si Amihud, induk sian marga Naptali.

²⁹I ma baoa angka na tinonahon ni Jahowa, ingkon bagionna tano Kanaan i di halak Israel.

35¹ (I.) Dung i ro muse hata ni Jahowa
tu si Musa di adaran Moab, martopihon
Jordan, tondong ni Jeriko, ninna ma:

² Dokkon ma halak Israel i, asa dilehon nasida
angka huta sian partalian hapunjunganna be
tu halak Lepi, bahen inganannasida.

³ Lehonon huhut tu halak Lepi tano upa parik
humaliang hutanasida i bahen panjampalan;
asa angka huta i gabe inganan di nasida jala
angka panjampalan i di dorbiasida dohot di
pinahannasida marragamragam.

⁴ Alai angka upa parik ni huta, angka
silehononmuna tu halak Lepi, ingkon sian
balian ni parik ni huta i suhatan saribu asta
humaliang.

⁵ Ingkon suhatanmuna sian balian ni parik i
sambariba tungkan habinsaran dua ribu asta
dohot sambariba tungkan dangsina dua ribu
asta dohot sambariba tungkan hasundutan
dua ribu asta dohot sambariba tungkan utara
dua ribu asta, asa huta i di porsitongaanna;
ingkon i ma upa parik ni angka huta i.

⁶ Alai angkup ni huta angka silehononmuna
tu halak Lepi, i ma na onom huta haporusan,
angka silehononmuna, asa maporus tusi
halak sibunujolma, lehononmuna dope tu
nasida opatpulu dua huta.

⁷ Jadi torop ni sude huta angka
silehononmuna tu halak Lepi opatpulu
ualu huta rap dohot upa parikna.

⁸Ingkon sian partalian ni halak Israel do lehononmuna angka huta i, gumodang do sian halak na gumodang partalianna, jala ummotik sian halak na otik partalianna; ganup marguru tu partalianna na sinagihon tu ibana, lehononna sian angka hutana tu halak Lepi.

⁹(II.) Dung i ro muse hata ni Jahowa tu si Musa songon on:

¹⁰Patolhas ma hatangkon tu halak Israel: Ia dung ditaripari hamu Jordan masuk tu tano Kanaan.

¹¹Ingkon papulihonmuna di hamu angka huta na tau bahen huta haporusan di hamu, asa tarbahen maporus tusi halak sibunu jolma, so pangkirimanna.

¹²Asa angka huta i bahen haporusan di hamu maradophon jolma parlulu, asa unang mate halak sibunu jolma i so jolo sanga jongjong ibana di adopan ni luhutan paruhuman.

¹³Jala sian huta angka na pinatongonmuna, ingkon onom gabe huta haporusan di hamu.

¹⁴Ingkon tolu huta patongononmuna di baribaon ni Jordan, jala tolu huta patongononmuna di tano Kanaan: Ingkon gabe huta haporusan do i.

¹⁵Na onom huta i ingkon gabe haporusan nang di halak Israel, nang di halak dagang, nang di halak paisolat di tongatongamuna,

asa tarbahren maporus tusi manang ise na mambunu jolma so pangkirimanna.

¹⁶(III.) Tung sura manang ise mambunu jolma marhite sian ulaula bosi, pola mate, sibunu jolma ma ibana tutu, ingkon marutang hosa do halak pamunui.

¹⁷Manang tung sura mate jolma i dibunu marhite sian batu na di tanganna tau pamunu hian, sibunu jolma ma ibana tutu, ingkon marutang hosa halak pamunui.

¹⁸Manang tung sura mate jolma i dibunu marhite sian panggado hau na di bagasan tanganna, tau pamunu hian, sibunu jolma ma ibana tutu, ingkon marutang hosa halak pamunui.

¹⁹Ingkon jolma parlulu hian mambunu halak pamunui, manang didia pe ibana dapotsa, jadi ma bunuonna ibana.

²⁰Manang tung sura ditentu jolma i sian hosom ni rohana, manang dituntun maninggankon manang aha tu ibana pola mate.

²¹Manang tung sura dipastap ibana ala naung musuna hian pola mate, ingkon marutang hosa jolma pamastapi, ai sibunu jolma do ibana; ingkon jolma parlulu hian mambunu halak pamunui, manang didia ibana dapotsa.

²²Alai tung sura ndada sian sangkapna hian jala ndada ala musuna hian umbahren

ditenju ibana manang ditinggangkon tu ibana manang aha, ndada sian tuntunna hian.

²³Manang tung sura ditinggangkon batu tu ibana, tau pamunu hian, so botobotoanna, pola mate jolma i, alai ndada musuna hian, jala ndada disangkap hian hamagoanna.

²⁴Ingkon luhutan i manguhum jolma pamunui dohot jolma parlulu i, hombar tu angka uhumon.

²⁵Ingkon luhutan i paluahon jolma pamunui sian tangan ni jolma parlulu i, ingkon luhutan i manogihon ibana mulak tu huta haporusanna hian; ingkon disi do ibana maringan, paima mate sintua ni malim, naung miniahan marhite sian miak na badia.

²⁶Alai tung sura ruar jolma pamunui salpu sian parbalohan ni huta haporusanna hian.

²⁷Laos dapot jolma parlulu i ibana di ruar ni parbalohan ni huta haporusanna i, gabe dibunu parlulu i ma halak pamunui, ndang marutang mudar ibana.

²⁸Ai ingkon tinggal hian ibana di bagasan huta haporusanna i, paima mate sintua ni malim, alai dung mate sintua ni malim, jadi ma jolma pamunui mulak tu huta partalianna hian.

²⁹Luhutna i ingkon gabe patik ni uhum di hamu marsundutsundut di saluhut huta ingananmuna i.

³⁰Manang ise na mambunu jolma, ingkon bunuon ma pamunui, dung binege hata ni

angka sitindangi; alai anggo holan sada do sitindangi ndang masuk maralus dompakjolma i pola marutang hosa uhumon.

³¹Jala ndang jadi jaloonmuna hepeng partobus ni hosa ni halak sibunu jolma, na marutang hosa hian, ingkon saut do ibana bunuon.

³²Jala ndang jadi jaloonmuna hepeng partobus sian jolma naung maporus tu huta haporusanna, mangaloas ibana mulak maringan di tanona hian, jumolo sian na mate sintua ni malim i.

³³Unang tung ramuni hamu tano na niinganamuna i, ai mudar i do paramunhon tano i, jala ndang dapot padengganon tano i, ala ni mudar naung nidurushon disi, nda holan marhite sian mudar ni jolma na mandurushon.

³⁴Dibahen i unang ramuni hamu tano na niinganamuna i, pola dohot Ahu maringan di tongatongana; ai Ahu do Jahowa na maringan di tongatonga ni halak Israel.

36¹(I.) Dung i ro ma jumonok angka induk marompuompu sian pinompar ni halak Gilead, anak ni si Mahir, anak ni si Manasse, sian pinompar ni si Josep, laos didok nasida ma hatana di adopan ni si Musa dohot di adopan ni angka induk, ihutan ni halak Israel marompuompu, ninna nasida ma:

²Nunga martona Jahowa tu tuanku (Musa), ingkon lehononmuna tano i tu halak Israel bahen partalian marhite sian rujiruji; jala nunga ditonahon Jahowa hian tu tuanku, ingkon lehonon partalian ni si Zelapehat, dongannamii, tu angka boruna.

³Tung sura muli nasida tu sada sian angka marga ni halak Israel, gabe bali partaliannasida i sian partalian ni ompunami, jala ditambahon tu partalian ni marga hamulianna i, gabe moru jambar partaliannami.

⁴Tole muse taon parolopolopon di halak Israel jadi tambahononna ma partaliannasida tu partalian ni marga hamuliannasida i, jadi moru ma sian partalian ni marga ni ompunami partaliannasida i.

⁵Dung i ro ma hata ni si Musa tu halak Israel, nidokkon ni Jahowa songon on: Sintong do hata ni marga ni halak Josep.

⁶On do tahe hata na tinonahon ni Jahowa taringot tu angka boru ni si Zelapehat, ninna do: Guru lomo ni rohanasida do muli tu manang ise, alai ingkon muli nasida tu dongan samarga ni amanasida i.

⁷Asa unang bali partalian ni halak Israel sian marga na sada tu marga na asing; ai ingkon ganup sian halak Israel mangihutihut partalian ni marga ni ompuna.

⁸Asa ganup boru na manean partalian sian angka marga ni halak Israel, ingkon muli do

nasida tu sada halak sian pinompar ni marga ni amanasida i, asa laos halak Israel manean ganup di partalian ni ompuna.

⁹Asa unang bali partalian ni marga na sada tu marga na asing; ingkon ganup marga ni halak Israel mangihutihut partalianna be.

¹⁰(II.) Hombar tu na tinonahon ni Jahowa tu si Musa, songon i ma dibahen angka boru ni si Zelapehat.

¹¹Ai muli do si Mala, si Tirza, si Hoglah, si Milka dohot si Noah, angka boru ni si Zelapehat tu angka anak ni amangudana.

¹²Muli ma nasida tutu tu pinompar ni halak Manasse, anak ni si Josep, jadi hot ma partaliannasida i di marga ni pinompar ni amana.

¹³I ma luhutna patik ni uhum, angka na tinonahon ni Jahowa marhite sian si Musa tu halak Israel di adaran Moab martopihon Jordan, tondong ni Jeriko.

Ulangan

1 ¹ (I.) On do hata, angka na pinaboa ni si Musa tu sandok Israel di bariba ni Jordan di halongonan, di adaran tondong ni laut arung, di holangholang ni Elaparan, Topel, Laban, Hazerot, dohot Disahab:

² Sampulu sada ari mardalan daona sian Horeb mangihutihut dolok Seir sahat ro di Kades-Barnea.

³ Masa ma di taon paopatpuluhon, di artia bulan Li ro ma hata ni si Musa tu halak Israel, hombar tu saluhut na tinonahon ni Jahowa tu ibana patolhasonna tu nasida.

⁴ Dung tinaluhonna si Sihon, raja ni halak Amori na maringan di Hesbon dohot si Og, raja di Basan, na maringan di Astarot mardonokkon Edrei.

⁵ Di bariba ni Jordan, di tano Moab dipungka si Musa pajojorhon patikon, ninna ma:

⁶ Ro do hata ni Jahowa, Debatanta i mandok tu hita uju di lambung Horeb, ninna do: Nunga sae lelengna hamu maringan di lambung dolok on.

⁷ Borhat ma hamu mamedu, asa sahat hamu tu dolok ni halak Amori dohot tu sude halak hombar balokna di adaran, di atas dolok dohot di angka rura dohot di tano sambola tungkan dangsina dohot martopihon laut, di

tano ni halak Kanaan dohot di Libanon, sahat ro di sunge na bolon i ma sunge Euprat.

⁸Ida ma, nunga Ahu marbasabasahon tano i di jolomuna, asa bongotan jala soluhanmuna tano naung niuarihon ni Jahowa hian tu ompumuna i, tu si Abraham, si Isak dohot si Jakkob, lehononna tu nasida dohot tu pinomparnasida i.

⁹(II.) Jadi ningku ma tu hamu uju i songon on: Ndang tarbahren sasada ahu mangusung hamu.

¹⁰Ai nunga dipatorop Jahowa, Debatamuna i hamu, jala ida ma, nunga hira bintang di langit toropmuna sadarion.

¹¹Sai ditambahi Jahowa Debata ni ompumuna i ma bilanganmuna marriburibu tumorop sian nuaeng, jala dipasupasu ma hamu, songon na pinarbagabagana hian tu hamu.

¹²Tung beha ma panahanku sasada ahu mangusung halojaon hangaluton dohot parbadaan sian hamu?

¹³Pillit hamu di hamu baoa angka na pistar jala na pantas marroha jala naung tartanda burju marparange sian ganup marga, asa hupabangkit nasida gabe indukmuna.

¹⁴Jadi didok hamu ma mangalusi ahu: Denggan do hata na pinaboami sibahenonnami.

¹⁵Dung i hubuat ma angka indukmuna marmargamarga, baoa angka na pistar jala naung tangkas tartanda, laos hupabangkit

nasida bahen induk di hamu, induk sisaribu halak dohot sisaratus halak dohot silimapulu halak dohot sisampulu halak, ro di angka panuturimuna marmargamarga.

¹⁶Ro huhut hatangku uju i tu angka panguhum di hamu songon on: Tangkas tangitangi hamu parhataan ni hahaanggimuna i jala uhum hasintongan dabu hamu tu ganup na marhahamaranggi dohot tu halak dagang.

¹⁷Ndang jadi marmiak ni bohi hamu di paruhuman, suang songon halak na balga halak na metmet tangitangionmuna, ndang jadi tahuton hamu mida manang ise, ai Debata do nampuna paruhuman; alai tung sura adong hata na mamaolhu risihonmuna, ingkon tu ahu boanonmuna, asa ahu manulingkitsa.

¹⁸Laos hutonahon ma uju i tu hamu nasa hata angka sibahenonmuna.

¹⁹(III.) Dung i borhat ma hita sian Horeb jala itaootaoti sandok halongonan na bolon jala na jorbut i, naung niidamuna i tahe di dalan laho tu dolok Amori, songon na tinonahon ni Jahowa. Debatanta i tu hita, gabe sahat hita tu Kades-Barnea.

²⁰Dung i ningku ma mandok hamu: Nunga sahat hamu tu dolok Amori, na naeng lehonon ni Jahowa, Debatanta i, tu hita.

²¹Ida ma, nunga dilehon Jahowa, Debatamu tano i di adopanmu; dibahen i borhat ma ho, tean ma tano i, songon naung pinarbagabaga

ni Jahowa Debata ni ompumu hian; unang ho mabiar jala unang ho godoron!

²²Dung i ro ma hamu sudena jumonok tu ahu, jala didok hamu: Tole itasuru ma baoa parjolonta, asa dihahapi nasida tano i di hita, laos mamboan barita tu hita taringot tu dalan sibolusonta dohot taringot tu huta angka simasukanta.

²³Jadi denggan hata i di rohangku, laos hubuat sian hamu sampulu dua halak, sasahalak sian ganup marga.

²⁴Dung i borhat ma nasida nangkok tu dolok, jala sahat nasida muse tu rura Eskol, laos dihahapi ma i.

²⁵Diboan nasida huhut di bagasan tangannasida sian parbue ni tano i, laos dipatuat tu hita huhut mamboan barita tu hita, angka ninna ma: Na denggan sahali do tano naung binasabasahon ni Jahowa, Debatanta i tu hita.

²⁶Alai ndang olo hamu nangkok, lam manggunturi do hamu dompak hata ni Jahowa, Debatamuna i.

²⁷Jala marmungutmungut hamu di bagasan undungundungmuna i, pola didok hamu: Sian gigi ni rohana hape umbahen ditogihon Jahowa hita ruar sian tano Misir, asa pasahathon hita tu bagasan tangan ni halak Amori laho maniaphon hita.

²⁸Tung beha ma pambahenta hita nangkok? Ai nunga malala ateatenta i dibahen angka

hahaangintai, na nidokna i: Sada bangso na umbolon jala na tumimbul sian hita do i; angka hutanasida pe balga do jala pinatogu sahat ro di langit; adong huhut huida hami disi halak pinompar ni Enak.

²⁹Jadi ningku ma uju i tu hamu: Unang hamu godoron, jala unang mabiar hamu mida nasida!

³⁰Ai Jahowa, Debatamuna i mardalan di jolomuna, Ibana sandiri marporang humongkop hamu, sandok songon na binahenna i tu hamu di Misir di adopan ni matamuna.

³¹Nang di halongonan naung niidamuna i, naung niompa ni Jahowa, Debatamu do ho, songon pangompa ni baoa di anakna manondong saluhut dalan, naung nidalamanmuna i, nunga pola sahat hamu tu inganan on.

³²Alai atik pe songon i hatangku, tong do ndang porsea hamu di Jahowa, Debatamuna i.

³³Ibana sandiri nian mardalan di adopanmuna mandiori di hamu inganan bahen pangulonamuna i, bornginna i di bagasan api patuduhon tu hamu dalan sidalamanmuna i, jala arianna i di bagasan ombun.

³⁴(IV.) Alai dung dibege Jahowa soara ni hatahatamuna i, marpiarpiar ma rimasna, pola maruari Ibana mandok:

³⁵Na so tupa idaon ni nanggo sahalak sian angka baia na sansundut na roa on tano na denggan i, naung pola huarahon nian mangalehon tu ompunasida i.

³⁶Dungkon ni si Kaleb, anak ni si Jepune, ibana masuk marnida, tu ibana dohot tu pinompama ma lehononku tano naung nidegena i, ala marsihohot rohana mangihuthon tu Jahowa.

³⁷Mida Ahu pe marronirimas do Jahowa, ala hamu, pola ninna: Ho pe ndang jadi masuk tusi.

³⁸Alai anggo si Josua, anak ni si Nun, na marhalado di adopanmi, ingkon masuk ma anggo ibana tusi, papir ma tondina i, ai ingkon ibana marbagi tano i bahen partalian ni Israel.

³⁹Anakkonmuna pe, angka naung nidokmuna i ripe pupuson nasida dohot anakmuna, angka na so umboto dope sadarion na denggan manang na roa, nasida ma saut masuk tusi, jala tu nasida do i lehononku bahen teanteannana.

⁴⁰Alai borhat ma anggo hamu mardalan dampak halongonan di dalam laho tu laut arung.

⁴¹Dung i ro ma hatamuna mangalusi ahu: Nunga mardosa hami dampak Jahowa, alai na naeng nangkok hami marporang hombar tu saluhut naung tinonahon ni Jahowa, Debatanta i tu hita; sanga hamu ganup

manandang podangna be, jala hobas hamu naeng nangkok tu dolok i.

⁴²Dung i ro ma hata ni Jahowa tu ahu: Dok ma tu nasida: Nandang jadi hamu nangkok jala ndang jadi hamu marporang, ai ndada Ahu di tongatongamuna i, asa unang tung talu hamu maradophon musumuna i.

⁴³Jadi hupasahat hata i nian tu hamu, hape ndang ditangihon hamu, lam manggunturi hamu dompak hata ni Jahowa jala manjahati, laos nangkok hamu tu dolok.

⁴⁴Dung i ruar ma halak Amori na maringan di dolok i manjumpangkon hamu, laos dilotongi hamu, songon pangalotongi ni harinuan, laos ditaluhon nasida hamu di Seir sahat ro di Horma.

⁴⁵Jadi dung mulak hamu jala tumatangis di adopan ni Jahowa, ndang olo Jahowa tumangihon soaramuna i, jala ndang dipaeleng pinggolna i tu hamu.

⁴⁶Jadi tinggal hamu di Kades na nia lelung, suang songon ari tinggalmuna na jolo disi.

2¹(I.) Dung i mamedu ma hita jala mardalan tu halongonan di dalam laho tu laut arung, songon naung pinaboa ni Jahowa hian tu ahu gabe italiati tor Seir na nia lelung.

²Dung i ro ma hata ni Jahowa tu ahu songon on:

³Nunga sae lelungna hamu mangaliati tor on, mamedu ma hamu dompak utara!

⁴Paboa ma tu bangso on: Bolusonmuna ma nuaeng parbalohan ni hahamuna, i ma pinompar ni si Esau, angka na maringan di Seir, mabiar ma nasida tagamon mida hamu, dibahen i ingkon ramotanmuna situtu dirimuna.

⁵Ndang jadi masisindir hamu marmusu dompak nasida, ai anggo sian tanonasida i ndang lehononku tu hamu nanggo santopap, ai nunga hulehon tor Seir tu pinompar ni si Esau bahen partalianna.

⁶Ia sipanganon ingkon tuhoronmuna do sian nasida, asa jadi hamu mangan, tapiian pe ingkon tuhoronmuna do sian nasida asa jadi hamu minum.

⁷Ai nunga dipasupasu Jahowa, Debatam ho di saluhut ulaon ni tanganmu. Ibana do manarihon ho saleleng mardalan di halongonan na bolon on; nunga pola opatpulu taon lelengna sai didongani Jahowa, Debatam do ho, ndang hurangan ho di manang aha.

⁸Jadi dung salpu itabolus hahantai, i ma pinompar ni si Esau, angka na maringan di Seir, di dalam laho tu adaran, olat ni Elat dohot Esion Geber, gabe mamedu hita muse umbolus dalam tu halongonan Moab.

⁹Dung i ro muse hata ni Jahowa tu ahu: Ndang jadi hagogotan Moab bahenonmu, jala ndang jadi masisindir hamu marmusu dompak nasida, ai anggosian tanona ndang adong lehononku bahen partalianmu; ai

nunga hulehon Ar tu pinompar ni si Lot bahen partalianna.

¹⁰Anggo di na robi halak Emi maringan disi, i ma sada bangso na bolon na torop jala na marhuaso, songon halak Enak.

¹¹Taretong nasida huhut tu halak Repaim, suang songon halak Enak, jadi digoar halak Moab do nasida halak Emi.

¹²Di Seir pe maringan do na jolo halak Hori, gabe ro pinompar ni si Esau manoluk tanona i, jala siap nasida dibahen, laos nasida maringan disi singkatna, suang songon na binahen ni Israel tu tano partalianna, na nilehon ni Jahowa tu nasida.

¹³Nuaeng pe borhat ma hamu jala taripari hamu sunge Zered. Jadi itataripari ma sunge Zered i.

¹⁴Alai anggo lelengna hita mardalan sian Kades-Barnea sahat ro di na manaripari sunge Zered hita, tolupulu ualu taon do, paima sun siap sandok sundut halak parmusu sian tongatonga ni parsaroan i, songon naung niuarihon ni Jahowa hian tu nasida.

¹⁵Tole huhut tangan ni Jahowa mangalo nasida laho maniaphon nasida sian tongatonga ni parsaroan i, paima sun siap nasida.

¹⁶Jadi dung songon i siap sude halak parmusu, mate tahe sian tongatonga ni bangso i.

¹⁷Ro muse hata ni Jahowa tu ahu songon on:

¹⁸Ingkon bolusonmu sadarion parbalohan ni Moab mardonokkon Ar.

¹⁹Jadi jonok ma ho masidolosan dohot Amon. Nandang jadi hagogotan nasida bahenonmu jala ndang jadi masisindir ho marmusu dampak nasida, ai anggo sian tano ni halak Amon ndang adong lehononku tu ho bahen partalianmu; ai nunga hulehon tano i tu pinompar ni si Lot, bahen partalianna.

²⁰Nang luat i taretong do i tu halak Repaim, ala halak Repaim maringan disi na jolo, jadi digoar halak Amon ma nasida halak Samsumi.

²¹I ma sada bangso na bolon, na torop jala na marhuaso suang songon halak Enak; alai direndephon Jahowa do nasida di adopannasidai, laos dionjar halak Amon nasida, gabe nasida maringan disi singkatna.

²²Songon naung binahen ni Jahowa marhite sian pinompar ni si Esau, angka na maringan di Seir, uju siniaphonna halak Hori maradophon nasida, asa nasida manoluk tano i, laos maringan disi singkatna rasirasa sadarion.

²³Suang songon i halak Awi, angka na maringan di sosor sahat ro di Gaza, gabe ro halak Kreta, angka naung bungkas sian Kreta maniaphon nasida, laos maringan disi singkatna.

²⁴(II.) Borhat ma hamu mardalan jala taripari hamu ma sunge Arnon! Ida ma, nunga Ahu pasahathon tu bagasan tanganmu si Sihon, raja sian Hesbon, halak Amori, rap dohot tanona; punga hamu ma manoluk tanona dohot marmusu dompak ibana.

²⁵Apala sadarion ma Ahu mamungka mangalehon roha hagodoron dohot biar mida ho, tu angka bangsona di toru ni sandok langit i; molo sahat dibege nasida baritam, ingkon raion jala rianon nasida maradophon ho.

²⁶Dung i husuru ma angka suruan sian halongonan Kadermat manopot si Sihon, raja sian Hesbon, mandok hata hadameon nian songon on:

²⁷Ua loas ma ahu mamolus sian luatmu, dalan na bolon do ihutihutongku, unang pe ahu manimbil tu siamun manang tu hambirang.

²⁸Sipanganon i ingkon marpanuhor gadisonmu tu ahu, asa mangan ahu; aek pe songon i ingkon marpanuhor do lehononmu tu ahu, asa inumonku; asal mardalan pat ahu mamolus sian luatmu.

²⁹Suang songon na binahen ni pinompar ni si Esau tu ahu, angka na maringan di Seir, nang halak Moab angka na maringan di Ar, paima tolhas hutaripari Jordan sahat tu tano naung binasabasahon ni Jahowa, Debatanami tu hami.

³⁰Alai ndang olo si Sihon, raja sian Hesbon, mangaloas hita mamolus sian luatna; ai nunga ditangkangi Jahowa, Debatamu tondina jala dipajogal ia rohana, ala naeng pasahatonna ibana tu bagasan tanganmu, songon na andar sadarion.

³¹Dung i ro ma hata ni Jahowa tu ahu: Ida ma, nunga hupungka pasahathon si Sihon rap dohot tanona di adopanmu, dibahen i punga hamu ma manoluk tanona bahen partalianmuna.

³²Dung i ruar ma si Sihon manjumpangkon hita tu Jahas, ibana dohot sandok bangsona, naeng marmusu.

³³Alai dipasahat Jahowa, Debatanta i, ibana di adopanta, gabe itataluhon ibana rap dohot angka anakna dohot sandok bangsona.

³⁴Jadi patu ma itabahen uju i sude hutana jala itaharomhon ganup huta, angka baoa, parompuan dohot dakdanak, nanggo sahalak ndang teba italoas.

³⁵Holan pinahan i tahe italaum di hita ro di tabantaban sian huta angka na itapapatu.

³⁶Olat ni Aroer na martopihon sunge Arnon ro di huta angka na martopihon sunge i, sahat ro di Gilead, ndang adong nanggo sada huta na so tarpapatu hita dibahen toguna; tung saluhutna do dipasahat Jahowa, Debatanta i tu bagasan tanganta.

³⁷Holan tu tano ni halak Amon ndang jumonok ho ro di sandok luat na martopihon

sunge Jabok dohot huta angka na di atas tor ro di sude naung nioraan ni Jahowa, Debatanta i hian.

3¹ (I.) Dung i muse mamedu hita jala nangkok sian dalan tu Basan; jadi ruar ma si Og, raja sian Basan manjumpangkon hita, ibana rap dohot sandok bangsona, naeng marmusu di Edrei.

²Dung i ro ma hata ni Jahowa tu ahu; unang ho mabiar mida ibana, ai nunga Ahu pasahathon ibana tu bagasan tanganmu rap dohot sandok bangsona dohot tanona, ingkon bahenonmu tu ibana, songon naung binahenmi tu si Sihon, raja ni halak Amori, na maringan di Hesbon.

³Jadi dipasahat Jahowa, Debatanta i ma tutu nang si Og, raja sian Basan rap dohot sandok bangsona tu bagasan tanganta, gabe saut patu ibana itabahen, nanggo sahalak ndang adong teba sian ibana.

⁴Itapapatu ma tutu uju i saluhut hutana, ndang adong nanggo sada huta na so tarrampas sian nasida, onompulu huta ro di sandok luat Argob, gomgoman ni si Og di Basan.

⁵Luhutna i angka huta na gonting do, marparik batu na timbo do, marharbangan jala marransangransang, so padohot angka huta na so marparik mansai torop.

⁶Itaharomhon do saluhutna i, suang songon na itabahen tu si Sihon, raja sian Hesbon,

harom binahen ganup huta, baoa, parompuan dohot dakdanak.

⁷Alai anggo sandok pinahan dohot tabantaban sian angka huta i italaum do di hita.

⁸Jadi itabuat uju i tano na di bariba ni Jordan sian tangan ni na dua raja Amori, olat ni sunge Arnon sahat ro di dolok Hermon.

⁹(Halak Sidon tahe manggoar Hermon i Sirion, jala halak Amori manggoar ibana Senir.)

¹⁰Saluhut huta di adaran ro di sandok Gilead dohot sandok Basan sahat ro di Salka dohot Edrei, huta angka na masuk tu gomgoman ni si Og di Basan.

¹¹Ai holan si Og, raja sian Basan, teba sian pasipasi ni halak Repaim; ida ma, anggo podomanna, podoman bosi tahe, nda di Rabba ni halak Amon do i? Sia asta unjurna jala opat asta bohangna mangihuthon asta ni sada baoa.

¹²(II.) I ma tano i na itasoluk uju i olat ni Aroer na martopihon sunge Arnon; jadi satonga sian tor Gilead ro di angka hutana nunga hulehon hian tu halak Ruben dohot halak Gad.

¹³Alai na lobi sian Gilead ro di sandok Basan, gomgoman ni si Og i, hulehon do tu na satonga marga Manasse, sandok luat Argob di sandok Basan, i ma na targoar tano ni halak Repaim.

¹⁴Si Jair, anak ni si Manasse mambuat sandok luat Argob, sahat ro di parbalohan ni halak Gesur i dohot Maakat i, jala digoar do Basan i angka sosor ni si Jair mangihuthon goarna sandiri rasirasa sadarion.

¹⁵Anggo tu si Mahir hulehon do Gilead.

¹⁶Jala tu halak Ruben dohot Gad hulehon do olat ni Gilead sahat ro di sunge Arnon (parsitongaan ni sunge i do partalpahanna) sahat muse tu sunge Jabok, parbalohan ni halak Amon.

¹⁷Angkup ni tano adaran dohot Jordan parbalohanna olat ni Kineret sahat ro di laut di adaran, i ma laut sira di toru ni robean ni Pisga tungkan habinsaran.

¹⁸Dung i hudok ma uju i tu hamu songon on: Nunga dilehon Jahowa, Debatamuna i tano on tu hamu bahen partalian, dibahen i ingkon tang marsinjata be hamu nasa sialo musu taripar manguluhon hahaanggimuna, i ma halak Israel i.

¹⁹Holan angka jolmamuna, anakkonmuna dohot dorbiamuna (ai huboto pardorbiala na godang do hamu) ingkon naung nilehon tu hamu.

²⁰Paima marhasonangan dibahen Jahowa hahaanggimuna i, suang songon hamu, asa dohot nasida manoluk tano, silehonon ni Jahowa, Debatamuna i tu nasida di bariba ni Jordan; dung i jadi ma mulak ganup tu partalianna be, naung hulehon tu hamu.

²¹ (III.) Hudok mā huhut uju i tu si Josua songon on: Nunga matam sandiri marnida saluhut naung binahen ni Jahowa, Debatamuna i, tu na dua raja on, suang songon i bahenon ni Jahowa tu saluhut harajaon, angka sitopotonmu.

²² Unang hamu mabiar mida nasida, ai Jahowa, Debatamuna sandiri marporang humongkop hamu.

²³ Dung i marhuraja ahu uju i tu Jahowa mangido:

²⁴ Ale Tuhan Jahowa! Nunga tutu dipungka Ho patuduhon tu naposom hatimbulonmu dohot tanganmu na gogoi; ai tung Debata dia ma di banua ginjang manang di tano on na tarbahensa patupahon songon jadijadianmi dohot songon hagogoonmi?

²⁵ Ua loas ma ahu taripar, asa huida tano na denggan i na di bariba ni Jordan, tor na denggan on rap dohot Libanon.

²⁶ Alai marronirimas do Jahowa mida ahu, ala hamu, gabe ndang ditangihon tangiangki, lam ninna Jahowa do mandok ahu: Nunga sae di ho! Unang be datdati hatam mandok tu Ahu taringot tu hata on!

²⁷ Nangkok ma ho tu punsu ni Pisga jala ranapi ma tano i tungkan hasundutan, tungkan utara, tungkan dangsina dohot tungkan habinsaran, jala tatap ma i dohot matam, ai ndang tarbahen ho tariparanmu Jordan on.

²⁸Dung i dokkon ma si Josua, asa pir tondina i jala marsihohot, ai taripar do anggo ibana manguluhon bangso on, jala ibana marbagihon tano naung niidam bahen partaliannasida.

²⁹Jadi tinggal ma hita di rura, tondong ni Betpeor.

4¹(I.) Nuaeng pe, ale Israel, sai tangihon ma aturan dohot uhum, angka na hupodahon tu hamu, sibahenonmuna, asa mangolu hamu jala masuk hamu tu tano siteanonmuna i, na nilehon ni Jahowa, Debata ni ompumuna i tu hamu.

²Ndang jadi ambaanmuna tu hata naung hutonahon i tu hamu, jala ndang jadi oruanmuna sian i, ingkon radotanmuna do angka tona ni Jahowa Debatamuna i, naung hutonahon i tu hamu.

³Nunga matamuna sandiri marnida, na binahen ni Jahowa tu Baal-Peor, ai manang ise na mangihuthon tu Baal-Peor, nunga direndephon Jahowa, Debatamu, ibana sian tongatongamu.

⁴Alai anggo hamu, angka na marsihohot tu Jahowa, Debatamuna i, mangolu do saluhutna sadarion.

⁵Ida ma, nunga hupodahon tu hamu angka aturan dohot uhum, songon na tinonahon ni Jahowa, Debatanku tu ahu, asa bahenonmuna songon i di tano simasukanmuna i bahen partalianmuna.

⁶Antong radoti jala ulahon hamu ma angka i, ai i do gabe hapistaranmuna dohot hapantasonmuna di adopan ni angka bangso; ia dung dibege nasida saluhut angka aturan on, gabe dohononnasida ma: Bangso na pistar sahali jala na pantas marroha do bangso na bolon on!

⁷Ai tung tu bangso na bolon dia ma songon i jonok angka Debata, songon Jahowa, Debatanta i, manang piga hali pe hita pajoujou Ibana?

⁸Ai tung di bangso na bolon dia ma adong aturan dohot uhum na tigor, songon sandok patikon, na hulehon di adopanmuna sadarion?

⁹Antong ramoti ma dirim jala parhamaol situtu tondim, asa unang lupa roham di jamita, angka naung niida ni matam, asa unang tallus sian roham saleleng ho mangolu, jala ingkon pabotohononmu do angka i tu angka anakmu dohot tu angka pahompum.

¹⁰Di ari uju na jongjong ho di adopan ni Jahowa, Debatam, di Horeb, uju na nidok ni Jahowa tu ho: Paluhut ma bangso i di Ahu, asa Ahu patubegehon tu nasida hatangku, angka siparateatehononnasida, asa marhabiaran nasida mida Ahu saleleng mangolu nasida di tano on, asa diajarhon huhut tu angka anakkonnasida.

¹¹Jadi ro ma hamu jumonok laos jongjong di bona ni dolok, jala dolok i marsigorgor di bagasan api sahat ro di parsitongaian ni

langit, masa huhuf disi parhobot ni ombun dohot haholomon marimpotimpot.

¹²Dung i ro ma hata ni Jahowa tu hamu sian tongatonga ni api; dibege hamu do nian anggo soara ni hata, alai ndang adong diida hamu anggo rupa, holan soara i do.

¹³Dung i dibaritahon Ibana ma tu hamu padan binahenna, naung tinonahonna tu hamu ulahononmuna, i ma hata na sampulu i, laos disurathon do i tu dua lei batu.

¹⁴Jala ahu didokkon Jahowa uju i mangajarhon tu hamu angka aturan dohot patik, angka sibahenonmuna di tano sitopotonmuna taripar tusi bahen partalianmuna.

¹⁵(II.) Antong tangkas situtu ma ramoti hamu rohamuna, ai ndang diida hamu agia aha rupa di ari uju Jahowa mandok hatana tu hamu di atas Horeb sian tongatonga ni api.

¹⁶Asa unang laos hamu mangago dirimuna, hamu tahe mambahen di hamu ganaganaan na niuhir manang na tinuang, sumansuman ni baoa manang parompuan.

¹⁷Manang sumansuman ni sandok pinahan na di tano on, manang sumansuman ni sandok pidong na marhabong, na habang di toru ni langit.

¹⁸Manang sumansuman ni sandok gulokgulok na manjirir di tano i, manang sumansuman ni sandok dengke di bagasan aek na di toru ni tano.

¹⁹Jala na so tupa manaili matam dompak langit paberengbereng mata ni ari dohot bulan dohot angka bintang ro di sandok parangan di langit tahe, gabe olo ho elaelaonna asa marsomba tusi dohot mangoloi, angka naung tinurpukkon ni Jahowa, Debatam nian tu saluhut bangso, angka na di toru ni sandok langit.

²⁰Alai anggo hamu nunga pola Jahowa mambuat dohot manogihon hamu ruar sian liang bosu, sian Misir tahe, asa hamu gabe bangso parjambaranna, songon na andar sadarion.

²¹Nunga pola tarrimas situtu Jahowa mida ahu ala hatahatamuna i, pola maruari Ibana na so jadi ahu manaripari Jordan, jala na so jadi ahu masuk tu tano na denggan i, na naeng lehonon ni Jahowa Debatam tu ho bahen partalianmu.

²²Ingkon mate ahu tahe di tano on, ndang jadi anggo ahu manaripari Jordan, alai anggo hamu tariparanmuna do i jala soluhonmuna tano na denggan i.

²³Antong tangkas ma ramoti hamu dirimuna, asa unang tung dihalupahon hamu padan na binahen ni Jahowa, Debatamuna i tu hamu, unang hamu mambahen di hamu ganaganaan, sumansuman ni manang aha pe, songon naung nioraan ni Jahowa Debatam ho.

²⁴ Ai api na mangallang do Jahowa, Debatam, sada Debata parlulu.

²⁵ Molo dung sanga hamu maranak jala marpahompu, nunga pola sanga matua hamu di tano i, hape laos hamu mangago dirimuna, hamu tahe mambahen ganaganaan, sumansuman ni manang aha, jala diulahon hamu sogo ni roha ni Jahowa, Debatamu, asa pahehe rimasna.

²⁶ Jouonku ma sadarion langit dohot tano gabe sitindangi mangalo hamu, asa gira situtu hamu mago sian tano, na naeng soluhonmuna nuaeng bahen partalianmu, dung ditaripari hamu Jordan i; ndang tagamon sadia lelung hamu maringan disi, ai ingkon rendep situtu hamu.

²⁷ Jadi marserak ma hamu di tongatonga ni angka bangso bahenon ni Jahowa, gabe otik na ma bilangan ni jolma tinggal sian hamu di tongatonga ni angka bangso parbegu, haambolonganmuna i tinogihon ni Jahowa.

²⁸ Jadi oloanmuna ma disi angka debata sileban, jadijadian ni tangan ni jolma, hau tahe dohot batu, angka na so marnida manang marbinege, manang mangan manang manganggo pe.

²⁹ (III.) Alai ia dilului hamu olat ni Jahowa, Debatamu, sai jumpang ho do Ibana, molo tung dilului hamu Ibana sian nasa rohamu dohot sian nasa ateatemu.

³⁰Ia dung targogot ho jala manginona tu ho sude angka hata on, mulak ma roham di ujung ni angka ari tu Jahowa, Debatam, jala tangihononmu soarana.

³¹Ai Debata na marasi roha do Jahowa, Debatamu, ndang tagamon tadingkononna ho, manang agoonna ho, jala ndang tagamon halupahononna padan naung binahenna i tu angka ompum, pola maruari Ibana tu nasida.

³²Ua usouso ma ho di angka ari na robi, angka na jumolo sian ho, olat ni ari uju Debata manompa jolma di atas tano on, sian ujung ni langit na sada tu ujung ni langit na asing, manang dung ma masa hata songon i balga, manang tarbege na tudos tusi?

³³Manang dung adong sada bangso na umbege soara ni Debata mangkatai sian tongatonga ni api, songon naung binegem i nian, hape tong do mangolu?

³⁴Manang dung ma Debata marsangkap naeng ro mambuat di Ibana sada bangso sian tongatonga ni bangso na asing marhite sian pangunjunan, angka tanda, angka halongangan dohot marhitehite hamusuon, huhut marhitehite tangan na gogo dohot botohon na toltol dohot marhite sian songgotsonggot angka na bolon, hombar tu saluhut naung binahen ni Jahowa, Debatamuna i tu hamu di Misir di adopanmuna?

³⁵Nunga tung tangkas dipatuduhon anggo tu ho, tama do botoonmu Jahowa do Debata, jala dungkon ni Ibana ndang adong.

³⁶Nunga pola dipatubegehon tu ho soarana sian banua ginjang naeng mangajari ho, jala dipataridahon tu ho apina na sai balga di atas tano on, hatana pe nunga pola dibege ho sian tongatonga ni api.

³⁷Ala naung hinaholonganna i angka ompumu, gabe dipillit ma pinomparna dung salpu nasida, jala ditogihon Ibana ho ruar sian Misir marhite sian Bohina, marhite sian gogona na godang i.

³⁸Asa pabalionna sian partalianna bangso angka na umbolon jala na gumogo sian ho di adopanmu, asa mamboan ho tu tanonasida i na naeng lehononna tu ho bahen partalianmu, songon na andar sadarion.

³⁹Antong ingkon botoonmu sadarion jala tangkas parateatehononmu marhatutuhon Jahowa do Debata di langit na di ginjang dohot di tano na di toruon, jala dungkon ni Ibana ndang adong be.

⁴⁰Dibahen i ingkon ramotanmu angka aturanna dohot tonana, angka na hutonahon i tu ho sadarion, asa marhasonangan ho dohot angka anakmu dung salpu ho, jala asa lelung ho mangolu di tano, na nilehon ni Jahowa Debatam tu ho salelung ho mangolu.

⁴¹(IV.) Dung i dipapulik si Musa ma tolu huta di bariba ni Jordan tungkan habinsaran.

⁴²Asa tarbahren maporus tusi halak sibunu jolma, naung mambunu donganna so tinuntunna, jala ndada dihosom ibana hian na sai laon, asa maporus ibana tu sada sian angka huta i, asa laos mangolu hosana:

⁴³I ma Bezer di halongonan, di tano na hornop, di tongatonga ni halak Ruben; tole muse Ramot di Gilead di tongatonga ni halak Gad; tole muse Golan di Basan di tongatonga ni halak Manasse.

⁴⁴Jala on do patik naung niaturhon ni si Musa di adopan ni halak Israel.

⁴⁵On do angka panindangion dohot angka aturan dohot uhum, angka naung pinatolhas ni si Musa tu halak Israel, dung ruar nasida sian Misir.

⁴⁶Di bariba ni Jordan, di rura tondong ni Betpeor, di tano ni si Sihon, raja ni halak Amori na maringan di Hesbon, naung tinaluhon ni si Musa dohot halak Israel, dung ruar nasida sian Misir.

⁴⁷Laos disoluk nasida tanona rap dohot tano ni si Og, raja sian Basan, duansa tahe raja ni halak Amori na di bariba ni Jordan tungkan habinsaran.

⁴⁸Olat ni Aroer na martopihon sunge Arnon, jala sahat ro di dolok Sirion, i ma Hermon.

⁴⁹Tole muse sandok adaran di bariba ni Jordan, tungkan habinsaran sahat ro di laut na di adaran di bona ni dolok Pisga.

5¹ (I.) Dung i dipaluhut si Musa ma sandok halak Israel, ninna ma mandok nasida: Tangihon ma, ale Israel, aturan dohot uhum, angka sipaboaonku tu pinggolmuna sadarion, guruhon jala parateatehon hamu ma angka i laho patupahon.

²Nunga pola Jahowa, Debatanta i mambahen padan tu hita di Horeb.

³Ndada tu angka amanta Jahowa mambahen padan on, tu hita do, tu hita on angka na dison nuaeng, tu luhut hita angka na mangolu.

⁴Pola adop bohi be Jahowa mandok hatana tu hita di atas dolok sian tongatonga ni api.

⁵Ahu do uju i jongjong di holangholang ni Jahowa dohot hamu laho pabotohon tu hamu hata ni Jahowa; ai mabiar do anggo hamu maradophon api, jala ndang nangkok hamu tu atas dolok i, jadi ninna Ibana ma:

⁶Ahu do Jahowa, Debatam, na manogihon ho ruar sian tano Misir, sian bagas parhatobananmu.

⁷Ndang jadi marangkup Ahu adong Debatam.

⁸Ndang jadi bahenonmu di ho ganaganaan, manang sumansuman dia na di banua ginjang, nang di tano on, ro di na di bagasan aek na di toru ni tano.

⁹Ndang jadi ho marsomba tusi manang oloanmu angka i; ai Ahu do Jahowa Debatam, Debata parrimas, na mangaluluhon hajahaton ni amaama tu angka anakna, ro di sundut

patoluhon dohot paopathon, angka na sogo roha di Ahu.

¹⁰Alai asi do rohangku di angka na marriburibu, angka na mangkaholongi Ahu, angka na mangaradoti angka patikku.

¹¹Ndang jadi dohononmu Goar ni Jahowa, Debatam, anggo sian neang ni roha, ai sai na hona toru ni Jahowa do manang ise na mandok Goarna sian neang ni rohana.

¹²Ingot hamu ma ari Sabbath i laho pabadiahonsa, songon na tinonahon ni Jahowa, Debatam tu ho.

¹³Onom ari ma lelengmu mulaulaon jala radotanmu nasa sibahenonmu.

¹⁴Alai anggo ari papituhon i, ari Sabbath (paradianan) ni Jahowa, Debatam do i, ndang jadi radotanmu disi agia aha ulaon, nang ho, manang anakmu manang borum, manang naposom lahilahi, manang naposom boruboru, ro di pinahanmu, nang na sorang tu ho di bagasan hutam, asa maradian naposom lahilahi dohot naposom boruboru suang songon ho.

¹⁵Ai tama ingkon ingotonmu naposo do ho na jolo di tano Misir, gabe ditogihon Jahowa, Debatam ho ruar sian i marhite sian tangan na gogo dohot botohon na toltol; ala ni do umbahen didokkon Jahowa Debatam ho pabadiahon ari Sabbath i.

¹⁶Ingkon pasangaponmu do natorasmu, songon na tinonahon ni Jahowa, Debatam

tu ho, asa lelung ho mangolu jala asa marhasonangan ho di tano, na nilehon ni Jahowa Debatam tu ho.

¹⁷ Unang ho mambunu.

¹⁸ (5-17b) Unang ho mangalangkup.

¹⁹ (5-17c) Unang ho manangko.

²⁰ (5-17d) Unang ho olo sitindangkon gabus maralohon donganmu.

²¹ (5-18) Nandang jadi haliangan ni rohamjolma ni donganmu, jala ndang jadi haliangan ni roham bagas ni donganmu, manang haumana manang naposona baosa manang naposona boruboru, manang lombuna manang hodana, manang dia pe ugasan ni donganmu.

²² (5-19) I ma hata i, angka na hinatahon ni Jahowa tu sandok luhutanmuna i di atas dolok sian tongatonga ni api, ombun dohot na holom marimpotimpot mardongan soara na gogo, jala ndang ditambahi manang aha, jala disurathon do angka hata i tu dua lei batu, jala dilehon do i tu ahu.

²³ (5-20) (II.) Alai dung dibege hamu soara i sian tongatonga ni haholomon, jala marsigorgor dolok i di bagasan api, ro ma hamu jumonok tu ahu, sude indukmu tahe marmargamarga dohot sintuamu.

²⁴ (5-21) Jala didok hamu, ida ma, nunga dipataridahon Jahowa, Debatanta i tu hita hamuliaonna dohot hatimbulonna, jala nunga dipatubegehon tu hita soarana sian

tongatonga ni api, jala nunga itaida sadarion, pola Debata mandok hatana tu jolma i, hape tong do mangolu.

²⁵(5-22) Nuaeng pe, boasa tagonan ingkon mate hita? Ai suda hita panganon ni api na bolon on, tung sura pabegebegeonta dope soara ni Jahowa, Debatanta i, ingkon mate hita.

²⁶(5-23) Ai tung ise ma sian nasa sibuk naung umbege soara ni Debata na mangolu i mandok hatana sian tongatonga ni api songon hita, hape tong do mangolu?

²⁷(5-24) Ho ma tahe laho jumonok huhut umbege saluhut sidohonon ni Jahowa, Debatanta i, jala ho muse paboahon tu hami saluhut na pinaboa ni Jahowa, Debatanta i tu ho, ingkon tangihononnam i jala patupaonnam i do.

²⁸(5-25) Jadi dung dibege Jahowa soara ni hatamuna i, angka na nidokmuna i tu ahu, gabe didok Jahowa ma tu ahu: Nunga hubege soara ni hata ni bangso on, angka na pinaboanasida tu ho; denggan do sude na nidoknasida i.

²⁹(5-26) Ise ulaning mangalehon tu nasida, asa tongtong marroha sisongon i nasida marhabiaran tu Ahu dohot mangaradoti saluhut tonanku saleleng mangolu nasida, asa marhasonangan nasida dohot pinomparnasida i ro di salelenglelengna!

³⁰ (5-27) Laho mā ho, paboa ma tu nasida:
Muli ma hamu tu undungundungmuna be!

³¹ (5-28) Alai anggo ho, ingkon jongjong
ho dison, di lambungkon, asa Ahu paboahon
tu ho saluhut tona, angka aturan dohot
uhum, angka sipodahononmu tu nasida, asa
diulahon nasida angka i di tano silehononku
tu nasida bahen partalianna.

³² (5-29) Antong ringkoti hamu ma
mangulahon, songon na tinonahon ni
Jahowa, Debatamuna i tu hamu, unang hamu
manimbil tu siamun manang tu hambirang!

³³ (5-30) Marparange ma hamu di bagasan
saluhut dalan naung tinonahon ni Jahowa,
Debatamuna i tu hamu, asa mangolu hamu
jala marhasonangan hamu, jala leleng hamu
mangolu di tano siteanonmuna i.

6¹ (I.) Alai on do tona, aturan dohot
uhum, angka naung tinonahon ni Jahowa,
Debatamuna i, podahononhon tu hamu, asa
ulahononmuna di tano sisoluhonmuna i, dung
taripar hamu tusi.

² Asa marhabiaran ho tu Jahowa, Debatam
jala diradoti ho saluhut aturanna dohot
tonana, angka naung hutonahon tu ho,
songon i ho nang anakmu nang pahompum
saleleng ho mangolu, asa tung hupaganjang
umurmu.

³ Antong tangihon ma i, ale Israel,
jala ringkoti mangulahon angka i, asa
marhasonangan ho, jala asa lam torop situtu

hamu, songon naung pinorbagabaga ni Jahowa Debata ni angka ompum tu ho, di tano habaoran ni susu dohot situak ni loba.

⁴Tangihon ma, ale Israel, anggo Jahowa Debatanta i, Jahowa Sasadasa do.

⁵Jala ingkon haholonganmu Jahowa, Debatam sian nasa roham dohot sian nasa ateatem dohot sian nasa gogom.

⁶Jala ingkon parateatehononmu luhut hata on, angka na hutonahon tu ho sadarion.

⁷Jala ingkon gogoonmu mangajarhon angka i tu angka anakmu, jala taringotanmu angka i, molo hundulhundul ho di bagasan jabum, manang mardalani ho di pardalanan, manang laho modom pe ho, nang dung hehe muse.

⁸Jala ingkon rahuthononmu angka i bahen partinandaan di atas tanganmu, jala bahen parningotan di holangholang ni matam.

⁹Jala ingkon surathononmu angka i tu tohang ni jabum dohot tu panggumbanganmu.

¹⁰Ia dung masuk ho ditogihon Jahowa, Debatam, tu tano na niuarihonna tu ompum, tu si Abraham, si Isak dohot si Jakkob mangalehon tu ho huta, angka na bolon dohot na denggan, angka na so pinungkam.

¹¹Tole bagas angka na gok dohot na denggan marragamragam, angka na so niisianmu dohot sumur angka na so hinalianmu, tole porlak anggur dohot hau Jetun angka na so sinuanmu, jala mangan ho sian i pola bosuran.

¹²Sai marjaga ma ho di dirim, asa unang dihalupahon roham Jahowa, naung manogihon ho ruar sian tano Misir, sian bagas parhatobananmu.

¹³Tama ingkon habiaranmu Jahowa, Debatam, jala oloanmu Ibana jala maruari ho tu Goarna.

¹⁴Ndang jadi ihuthononmuna angka debata sileban, sian debata ni bangso angka na humaliang hamu.

¹⁵Ai Debata parrimas do Jahowa, Debatam, di tongatongamu, asa unang marpiarpiar rimas ni Jahowa, Debatam, mida ho, gabe siaphononna ho maon sian sisik ni tano on.

¹⁶Ndang jadi unjunanmuna, Jahowa Debatamuna i, songon naung niunjunanmuna Ibana di Massa.

¹⁷Ingkon burju hamu mangaradoti angka tona ni Jahowa, Debatamuna i, ro di panindangionna dohot aturanna, angka naung tinonahonna tu ho.

¹⁸Asa ulahononmu na tigor dohot na denggan di adopan ni Jahowa, asa marhasonangan ho, jala asa masuk ho jala teanonmu tano na denggan i naung niuarihon ni Jahowa tu angka ompum.

¹⁹Ingkon Ibana mangeak saluhut musim sian adopanmu, songon naung pinorbagabaga ni Jahowa hian.

²⁰(II.) Tung sura sungkunsungkun on ni anakmu ho sogot songon on: Dia do

parmulaan ni angka panindangion, aturan dohot uhum, angka na tinonahon ni Jahowa, Debatanta i tu hamu?

²¹ Jadi dohononmu ma tu anakmu: Hatoban ni si Firaun do hami na jolo di Misir, gabe ditogihon Jahowa hami ruar sian Misir marhite sian tangan na gogo.

²² Jala dibahen Jahowa do tanda dohot halongangan angka na bolon jala na rahat di Misir, tu si Firaun dohot tu sandok isi ni bagasna di adoptannami.

²³ Alai anggo hami ditogihon Ibana do ruar sian i, asa boanonna hami masuk jala lehononna tu hami tano naung niuarihonna tu ompunami.

²⁴ Ala ni umbahen ditonahon Jahowa uju i tu hami ulahononnami sude angka uhumon, marhabiaran tu Jahowa, Debatanami, asa marhasonangan hami ariari jala tongtong hami pangoluonna, songon na andar sadarion.

²⁵ Manjadi hatigoran do i huhut di hami, molo huringkoti hami mangulahon sandok uhumon di adoptan ni Jahowa, Debatanta i, songon naung tinonahonna tu hami.

7¹ (I.) Ia dung diboan Jahowa, Debatam ho masuk tu tano sitopotonmi bahen partalianmu, jala dung torop angka bangso parbegu pinabalina maradophon ho, i ma halak Het i, Girgasi, Amori, Kanaan, Perisi, Hevi dohot Jebusi, pitu bangso angka na tumorop jala na gumogo sian ho.

²Jala ia dung dipasahat Jahowa, Debatam nasida maradophon ho, taluhononmu nasida, ingkon haromhononmu nasida, ndang jadi marpadanpadan ho tu nasida, jala ndang jadi asiasianmu nasida.

³Jala ndang jadi ho martondong tu nasida, borum ndang jadi lehononmu tu anakna, jala boruna ndang jadi buatonmu di anakmu.

⁴Ai marbalik sian Ahu do anakmu elaonna, asa oloanna angka debata sileban, jadi marsigorgor ma rimas ni Jahowa mida hamu, jala gira hamu agoonna.

⁵Ingkon songon on do bahenonmu tu nasida: Ingkon lohaonmuna do angka langgatannasida, jala ingkon taporanmuna do angka ajiajiannasida, ingkon tabaonmuna do angka sombaonnasida jala ingkon suda tutungonmuna di bagasan api angka ganaganaannasida.

⁶Ai bangso na badia do anggo ho di Jahowa, Debatam, nunga ho pinillit ni Jahowa, Debatam sian nasa bangso angka na di tano on, gabe bangso hapunjunganna.

⁷Ndada ala tumorop hamu sian angka bangso na asing, umbahen dihaholongi Jahowa hamu jala dipillit hamu, ai hamu do apala na ummetmet sian nasa bangso.

⁸Tung sian holong ni roha ni Jahowa do mida hamu, asa dipahot Ibana huhut uari, naung pola niuarihonna tu ompumuna, umbahen ditogihon Jahowa hamu ruar marhite sian

tangan na gogo, jala ditobus ho sian bagas parhatobanan, sian si Firaun, raja sian Misir.

⁹Dibahen i tama ingkon botoonmu, Jahowa do Debatam, Ibana do Debata na sintong jala na bonar, na pasintong padan dohot asi ni roha tu halak, angka na mangkaholongi Ibana dohot tu angka na mangaradoti tonana, pola marriburibu sundut.

¹⁰Ibana huhut marlulu tu halak angka na mangkagigihon Ibana, marsibalik tahe bohina sandiri, asa agoonna; ndang maralangalang rohana mamaloshon jalojalo hajahaton ni halak na mangkagigihon Ibana.

¹¹Antong radoti hamu ma angka tona, aturan dohot uhum, angka na hutonahon tu ho sadarion, asa ulahononmu angka i.

¹²(II.) Jadi molo tung ditangihon hamu angka uhumon, diparangehon jala diulahon hamu angka i, jadi pasintongon ni Jahowa, Debatam ma tu ho padan dohot asi ni roha, naung niuarihonna tu ompumu.

¹³Haholonganna ma ho jala pasupasuonna jala patoroponna ho; pasupasuonna huhut parbue ni bortianmu dohot parbue ni tanomi, emem, anggurmu, miakmu jala sinur tumpahanna lombum dohot birubirum di tano naung niuarihonna tu angka ompum, lehononna tu ho.

¹⁴Dapotan pasupasu ma ho lobi sian saluhut angka bangso; ndang adong di tongatongamu

nannggo sahalak baa manang parompuan na so gabe, nang di pinahanmu.

¹⁵Jala padaoon ni Jahowa ma sian ho nasa parsahiton, jala ndang loasonna mangonai tu ho nannggo sada sian sude begu masa na rahat di Misir, angka na tinandam, mangonai do angka i anggo tu sude halak na mangkagigihon ho.

¹⁶Ingkon suda panganonmu saluhut bangso angka sipasahaton ni Jahowa, Debatam tu ho, ndang jadi maralangalang roham mida nasida jala ndang jadi oloanmu debatanasida i, ai gabe jorgong do i di ho.

¹⁷Alai tung sura dohononmu di bagasan roham: Tumorop do angka bangso parbegu on sian ahu, beha ma pambahenna tung ahu pabalihon nasida?

¹⁸Unang ma ho tahuton mida nasida; sai dipaingotingot roham ma tongtong naung binahen ni Jahowa, Debatam, tu si Firaun dohot tu sude halak Misir!

¹⁹Paingotingot pangunjunan angka na bolon, angka naung niida ni matam sandiri, tole angka tanda dohot halongangan, ro di tangan na gogo, jala botohon na toltol, pinamasa ni Jahowa, Debatam manogihon ho ruar. Suang songon i bahenon ni Jahowa, Debatam tu saluhut bangso, angka na hinabiaranmu nuaeng.

²⁰Tongoson ni Jahowa, Debatam huhut angka uhum hamagoan tu tongatonganasida,

paima rendep dibahen jolma angka na tinggal dope jala na martabuni maradophon ho.

²¹ Unang tung godoron roham maradophon nasida, ai Jahowa Debatam do di tongatongamu, Ibana do Debata na timbul jala na songkal.

²² Jahowa, Debatam huhut mangarendephon nangetnanget angka bangso parbegu maradophon ho; ndang tarbahen sahali siap nasida bahenonmu, asa unang lam ganda binatang di harangan pasarisarionmu.

²³ Ingkon Jahowa, Debatam pasahathon nasida di adopanmu, marhagodoron godang nasida bahenonna, paima sun siap nasida.

²⁴ Angka rajanasida pe pasahatonna do tu bagasan tanganmu, asa siaphononmu goarnasida sian toru ni langit; ndang adong na manahan di adopanmu nanggo sahalak, paima rendep nasida bahenonmu.

²⁵ Angka ajiajian ni debatanasida, ingkon suda tutungonmu di bagasan api, ndang jadi mangapian roham di perak manang di sere na lohот disi, naeng buatonmu di ho, asa unang tarjorgong ho bahenon ni, ai hagigian ni Jahowa, Debatam do i.

²⁶ Dibahen i ndang jadi boanonmu hagigian i tu bagasan jabum, asa unang hona harom ho, suang songon ugasanna hian; ingkon marbiasbias situtu roham di ugasan sisongon i jala hagigihononmu, ai naung hona harom do i.

8¹ (I.) Sude patik, angka na hutonahon tu ho sadarion, ingkon ringkotanmuna do i mangulahon, asa mangolu, hamu jala torop, jala masuk hamu tu tano siteanonmuna i, naung niuarihon ni Jahowa tu angka ompumuna i.

²Ingkon ingotonmu huhut saluhut dalam naung tinogihon ni Jahowa, Debatam ho na opatpulu taon on di halongonan, asa Ibana paserep roham, mangunjuni ho, asa tung tanda manang aha na di bagasan roham, manang na radotanmu angka tonana, manang ndang.

³Ibana tutu paserep roham, Ibana huhut mangaranapi ho, Ibana muse mangalehon ho mangan Manna, na so tinandam hian, manang tinanda ni angka ompum; asa Ibana pabotohon tu ho, ndada holan sagusagu hangoluan nijolma, mangolu do tahejolma i sian ganup hata na ruar sian pamangan ni Jahowa.

⁴Pangkeanmu pe ndang olo buruk di dagingmu na opatpulu taon i, patmu pe ndang olo marpurapura.

⁵Antong sai tandai ma i di bagasan roham marhatopothon, na niajaran ni Jahowa, Debatam ho, songon amaama na mangajari anakna.

⁶Dibahen i tama ingkon radotanmu angka patik ni Jahowa, Debatam, asa marparange ho di angka dalanna marhabiaran mida Ibana.

⁷ Ai Jahowa, Debatam manogihon ho tu tano na denggan, tu tano na marbatang aek, marmual dohot martao, angka na mabaor di rura dohot di dolok.

⁸ Sada tano hatubuan ni eme, jagung, hau anggur, hau ara dohot dalimo, tano na marmiak Jetun, jala na marsituak ni loba.

⁹ Sada tano, na so pola marhangaluton panganonmu rotim disi, jala ndang hurangan ho di manang aha; sada tano batuna do bosi jala sian dolokdolokna tarhali ho tombaga.

¹⁰ Ia dung mangan ho jala bosuran, ingkon pujionmu di Jahowa, Debatam, ala ni tano na denggan, naung nilehonna i tu ho.

¹¹ (II.) Antong ramoti ma dirim, asa unang lupa roham di Jahowa, Debatam, gabe ndang diradoti ho angka tonana i, uhumna dohot aturanna, angka na hutonahon i tu ho sadarion.

¹² Asa unang ia dung mangan ho jala bosuran, jala dipauli ho angka bagas na uli diingani ho.

¹³ Tole lombum dohot birubirum lam sinur do jala ganda perak dohot sere di ho, ganda huhut saluhut na di ho.

¹⁴ Hape lam dipaginjang ho roham jala lupa ho di Jahowa Debatam, na manogihon ho ruar sian tano Misir, sian bagas parhatobanan.

¹⁵ Ibana manogunogu ho di halongonan na bolon jala na jorbut, inganan ni ulok tulung api dohot naga dohot hala, tano hasang huhut

na so marisi aek; Ibana tahe paruarhon di ho aek sian dolok batu na pir sahali.

¹⁶Ibana mangalehon ho mangan Manna di halongonan, na so tinanda ni angka ompum, asa Ibana paserep roham dohot mangunjuni ho, asa marhasonangan ho bahenonna di ujung.

¹⁷Asa unang dohononmu di bagasan roham: Gogongku sandiri dohot huaso ni tanganku mangomo di ahu hamoraon on.

¹⁸Ingkon paingotingoton ni roham tahe Jahowa, Debatam, ai Ibana do na mangalehon gogo tu ho mangomo angka arta i, asa pahothon padanna naung niuarihonna tu angka ompum, songon na andar sadarion.

¹⁹Alai tung sura lupa roham di Jahowa, Debatam, jala diihuthon ho angka Debata sileban huhut mangoloi jala marsomba tusi, hatindangknonku hian ma tu hamu sadarion, ingkon mago situtu hamu.

²⁰Songon bangso parbegu, angka naung niago ni Jahowa maradophon hamu, suang songon i hamu mago, ala so ditangihon hamu soara ni Jahowa, Debatamuna i.

9¹(I.) Tangihon ma, ho ale Israel, tole ma ho sadarion manaripari Jordan laho masuk dohot papatuhon bangso, angka na umbolon jala gumogo sian ho dohot huta na bolon, angka na pinagonting sahat ro di langit.

²Sada bangso na bolon jala na timbo, i ma pinompar ni si Enak, angka naung tinandam jala naung binegem i baritana, songon on: Tung ise ma manahan jongjong maradophon pinompar ni si Enak?

³Ingkon botoonmu huhut sadarion, Jahowa Debatam, Ibana sandiri taripar manguluho ho, hira api na mangallang; Ibana maniaphon nasida jala Ibana patundukkon nasida di adopanmu, gabe pabalionmu nasida sian partalianna jala gira agoonmu nasida, songon naung pinorbagabaga ni Jahowa hian tu ho.

⁴Ia dung dionjar Jahowa, Debatam nasida sian adopanmu, ndang jadi dohononmu di bagasan roham: Ala ni hatigoranku do umbahen ditogihon Jahowa ahu masuk laho manean tano on; hape nian ala ni hajahaton ni angka bangso parbegu on, umbahen dionjar Jahowa nasida maradophon ho.

⁵Ndada ala ni hatigoranmu sandiri manang binahen ni burju ni roham, umbahen masuk ho laho manean tanonasida i; ai ala ni hajahaton ni angka bangso parbegu on, umbahen dionjar Jahowa, Debatam nasida maradophon ho, huhut asa pahothon hata naung niuarihon ni Jahowa tu angka ompum, tu si Abraham, si Isak dohot si Jakkob.

⁶Ingkon botoonmu tahe, ndada ala ni hatigoranmu sandiri, umbahen dilehon Jahowa, Debatamu tu ho tano na denggan on

bahen partalianmu, ai bangso na tangkang do ho marroha.

⁷(II.) Sai ingot ma, unang tung halupahon na pinahehemi rimas ni Jahowa, Debatam di halongonan, olat ni ari dung haruar ho sian tano Misir sahat hamu ro di inganan on, sai manggunturi do hamu dompak Jahowa.

⁸Di Horeb dope nunga dipahehe hamu rimas di Jahowa, pola naeng agoon ni Jahowa hamu ala ni rimasna mida hamu.

⁹Jadi dung manaek ahu tu dolok i laho manjalo lei batu na dua i, lei parpadanan, naung binahen ni Jahowa tu hamu, pola tinggal ahu di atas dolok i opatpulu ari opatpulu borngin lelengna, so mangan sagusagu ahu manang minum aek.

¹⁰Dung i dilehon Jahowa ma tu ahu na dua lei batu, angka na sinuratan marhite sian jarijari ni Debata, jala di atasna tarsurat saluhut hata, angka naung hinatahon ni Jahowa tu hamu di atas dolok sian tongatonga ni api uju di ari parluhutan i.

¹¹Dung salpu na opatpulu ari opatpulu borngin, dilehon Jahowa ma tu ahu na dua lei batu, i ma lei parjanjian.

¹²Dung i ro ma hata ni Jahowa tu ahu: Hehe ma ho, hatop ma ho tuat sian on, ai nunga marroha mago bangsomi, naung tinogihonmu ruar sian Misir. Tibunai nasida manimbil sian dalan naung hutonahon i tu nasida, nunga

dibahen nasida di nasida sada ganaganaan na tinuang.

¹³Dung i ro muse hata ni Jahowa tu ahu songon on: Nunga huida pangalaho ni bangso on, jala ida ma, tung na tangkang do roha ni bangso on!

¹⁴Loas ma Ahu, asa tung hurendephon nasida, asa pesan goarnasida sian toru ni langit il! Asa hubahen ho gabe bangso na gumogo jala na umbolon sian bangso on.

¹⁵Jadi dung humusor ahu jala tuat ahu sian dolok, na marsigorgor di bagasan api, jala na dua lei parjanjian di bagasan tanganku na dua i.

¹⁶Jadi hubereng ma, gabe ida ma, nunga mardosa hamu dompak Jahowa, Debatamuna i, nunga dibahen hamu di hamu sada lombu tuangan; tibunai tutu hamu manimbil sian dalan, na tinonahon ni Jahowa tu hamu!

¹⁷Jadi hutangkup ma na dua lei batu i jala hureongkon do i sian bagasan tanganku na dua i jala hutapori do i di adopanmuna.

¹⁸Dung i hutinggangkon ma ahu di adopan ni Jahowa, suang songon parjolo i, opatpulu ari opatpulu borngin lelengna, ndang mangan sagusagu ahu manang minum aek, ala ni saluhut dosamuna, angka naung binahenmuna i laho mangulahon sogo ni roha ni Jahowa, asa pahehehon rimasna.

¹⁹Ai gari ahu mabiar do maradophon parpiarpiar ni rimas, naung hinarimashon ni

Jahowa tu hamu, naeng agoonna hamu; alai ditangihon Jahowa do ahu nang sahalion.

²⁰Mida si Aron pe tarrimas situtu do Jahowa, naeng agoonna ibana, alai martangiang ahu mangondihon nang si Aron uju i.

²¹Alai anggo dosamuna i, i ma anak ni lombu naung binahenmuna i, hubuat ma i jala humosokkon do i di bagasan api, laos hutapori ma i jala hududa lamot maradu gabe orbuk jala husirsirhon orbukna i tu aek na mabaor sian dolok.

²²(III.) Marsigorgor muse rimas ni Jahowa dipahehe hamu uju di Tabera, di Massa dohot di angka tanoman hahisapon.

²³Tole muse uju na sinuru ni Jahowa hamu sian Kades-Barnea, ninna do: Nangkok ma hamu jala soluk hamu ma tano i naung hulehon tu hamu, hape dialo hamu do hata ni Jahowa, Debatamuna i, jala ndang porsea hamu di Ibana, jala ndang ditangihon hamu soarana.

²⁴Ai manggunturi do hamu dompak Jahowa olat ni ari dung hutanda hamu.

²⁵Jadi hutinggangkon ma ahu di jolo ni Jahowa opatpulu ari opatpulu borngin lelengna, sai tongtong do ahu manangkap ala naung nidok ni Jahowa naeng agoonna hamu.

²⁶Dung i martangiang ma ahu tu Jahowa, ningku ma: Iale Tuhan Jahowa! Sai unang ma ago bangsom dohot partalianmu naung tinobusmu marhitehite hatimbulonmu, naung

tinogihonmu ruar sian tano Misir marhite sian tangan na gogo!

²⁷Sai ingot ma angka naposom, si Abraham, si Isak dohot si Jakkob! Unang ma Ho manaili dampak hatangkangon ni bangso on dohot dampak hajahatonna dohot dampak dosana.

²⁸Asa unang dohonon ni halak isi ni tano haruarannami tinogihonmi: Ala na so tarbahen Jahowa manogihon nasida masuk tu tano naung pinarbagabagana i tu nasida, jala ala ni gigina mida nasida, umbahen ditogihon nasida ruar, asa bunuonna nasida di halongonan.

²⁹Hape nian nasida do bangsom dohot partalianmu naung tinogihonmu ruar marhite sian hagogoonmu na godang i dohot marhite sian botohonmu na toltoli.

10¹(I.) Uju i ro ma hata ni Jahowa mandok tu ahu: Dakdak ma di ho dua lei batu, songon parjolo i jala nangkok ma ho mandapothon Ahu tu atas dolok, jala bahen di ho sada poti sian hau.

²Asa Ahu sandiri muse manurathon tu lei batu i hata angka na di lei batu parjolo i, angka na tinaporanmi, dung i bahenonmu ma angka i tu bagasan poti i.

³Jadi hubahen ma sada poti sian hau maranti jala hudakdak dua lei batu songon parjolo i, dung i nangkok ahu tu dolok, jala lei batu na dua i di bagasan tanganku.

⁴Dung i disurathon Ibana ma tu lei, songon panurathonna parjolo, hata na sampulu i, angka na hinatahon ni Jahowa tu hamu di atas dolok sian tongatonga ni api, uju di ari parluhutan, laos dilehon Jahowa angka batu i tu ahu.

⁵Dung i humusor ma ahu jala tuat sian dolok i jala hupeakhon angka lei tu bagasan poti naung hupauli, asa laos disi, songon na tinonahon ni Jahowa tu ahu.

⁶Borhat ma anggo halak Israel sian Beerot-Bene-Jakan tu Mosera; disi do mate si Aron laos tartanom disi, jala anakna si Eleasar bangkit malim singkatna.

⁷Borhat muse nasida sian i tu Gudgoda, jala sian Gudgoda tu Jobata, i ma tano na marbatang aek.

⁸Uju i ma dipapulik Jahowa marga Lepi, asa nasida mangusung poti parpadanan ni Jahowa huhut jongjong di adopan ni Jahowa marhalado di Ibana dohot mamasumasu marhitehite Goarna, rasirasa sadarion.

⁹Dibahen i ndang maruli partalian manang teanteanan anggo halak Lepi rap dohot hahaanggina; Jahowa do tahe teanteannanna, songon naung pinorbagabaga ni Jahowa, Debatam hian tu nasida.

¹⁰Jongjong ma anggo ahu di atas dolok i, suang songon di angka ari na jolo, opatpulu ari opatpulu borngin lelengna, jala ditangihon

Jahowa do ahu nang sahalion, ndada naeng agoon ni Jahowa ho.

¹¹ Dung i ninna Jahowa ma tu ahu: Hehe ma ho laho borhat manguluhon bangso i, asa sahat nasida jala disoluk tano naung huarohon hian tu ompunasida, naeng lehononku tu nasida.

¹² (II.) Nuaeng pe, ale Israel, aha do na pinangido ni Jahowa, Debatam sian ho, nda asal marhabiaran ho tu Jahowa, Debatam, jala marparange ho di saluhut dalanna, huhut marroha haholongon mida Ibana dohot mangoloi Jahowa, Debatam sian nasa roham dohot sian nasa ateatem!

¹³ Huhut asa radotanmu angka tona ni Jahowa dohot aturanna, angka na hutonahon tu ho sadarion mambahen hasonanganmu.

¹⁴ Ida ma, guru di Jahowa Debatam do nian langit ni langitan, nang tano on ro di nasa isina.

¹⁵ Hape holan mida angka ompum do Jahowa marlomo ni roha, mangkaholongi nasida; jala pinomparnasida i do dipillit dung salpu nasida, i ma hamu, sian nasa bangso, songon na andar sadarion.

¹⁶ Antong sunati hamu ma hulup ni rohamuna i, jala unang be tangkangi hamu tangkuhukmuna i.

¹⁷ Ai Jahowa, Debatamuna i, Ibana do Debata ni angka debata, jala Tuhan ni angka tuan, Ibana Debata na sun timbul,

na sun gogo jala na songkal sahali, na so marnidanida bohi jala na so olo manjalo silua.

¹⁸Ibana huhut pasintong uhum tu na sopot so marama dohot tu parompuan na mabalu, Ibana huhut mangkaholongi halak dagang, naeng mangalehon tu nasida sipanganon dohot paruloson.

¹⁹Dibahen i hamu pe ingkon haholonganmuna do halak dagang, ai halak dagang do nang hamu na jolo di tano Misir.

²⁰Ingkon marhabiaran ho tu Jahowa, Debatam, ingkon Ibana oloanmu, jala marsitiopan roham di Ibana jala marsumpa ho tu Goarna.

²¹Ibana do pujipujionmu, jala Ibana do Debatam naung mambahen angka habalgaon dohot halongangan humongkop ho, angka naung niida ni matam sandiri.

²²Pitupulu halak sambing angka ompum tuat tu Misir, hape anggo nuaeng nunga ditumpak Jahowa, Debatam ho, songon angka bintang di langit toropna.

11 ¹(I.) Dibahen i ingkon haholonganmu do Jahowa Debatam, jala radotanmu pangoloion tu Ibana, angka aturanna pe, angka uhumna dohot tonana saleleng ho mangolu.

²Jala ingkon tandaonmuna sadarion (ai ndada tu anakmuna, angka na so sanga mananda manang marnida, ahu mandok

soara) pangajaran ni Jahowa, Debatamuna i dohot hatimbulonna dohot tanganna na gogoi dohot botohonna na toltoli.

³Tole angka tanda dohot halongangan, angka na binahenna i di parsitongaan ni Misir, tu si Firaun, raja sian Misir dohot tu sandok tanona.

⁴Tole muse na binahenna i tu parangan ni halak Misir, tu angka hodana dohot tu huretana, angka na nilingkupan ni galumbang ni laut arung, uju nasida mangeak hamu, gabe mago nasida dibahen Jahowa, rasirasa sadarion.

⁵Tole muse na binahenna i tu hamu di halongonan, paima sahat hamu tu inganan on.

⁶Tole muse na binahenna i tu si Datan, dohot si Abiram, angka anak ni si Eliab, pinompar ni si Ruben, na pinangangang ni tano i babana laos mamondut nasida rap dohot jabunasida, angka undungundungna dohot saluhut sinamotna, na pinaihutihut ni patna na sai laon di tongatonga ni sandok halak Israel.

⁷Ai matamuna sandiri do marnida nasa jadijadian ni Jahowa na bolon, angka na binahenna i.

⁸Dibahen i sai radoti hamu ma sandok tona, na hutonahon i tu ho sadarion, asa marsihohot rohamuna jala masuk hamu tu

tano siteanonmuna i, laho taripar tusi do hamu nuaeng maneansa.

⁹Jala asa leleng hamu mangolu di tano, naung niuarihon ni Jahowa tu angka ompumuna i, lehononna tu nasida dohot tu pinomparnasida i, tano habaoran ni susu dohot situak ni loba do i.

¹⁰(II.) Ai tano sitopotonmuna i laho manean, ndada marpangalaho songon tano Misir, haruaranmuna i, ia dung disaburhon ho bonim tusi, patmu dibahen ho manirami, songon porlak paringkauan.

¹¹Alai anggo tano sitopotonmuna taripar tusi laho manean, tano na mardolok do i jala na marrura, mangkangoluhon aek udan do i sian langit.

¹²Tano na sinarihon ni Jahowa, Debatam do i, tongtong do mangaranapi mata ni Jahowa, Debatam tusi sian mula ni taon ro di ujungna.

¹³Molo tung tinggil rohamuna manangihon tonanku, angka na hutonahon i tu hamu sadarion, mangkaholongi Jahowa, Debatamuna i, dohot mangoloi Ibana sian nasa rohamuna dohot sian nasa ateatemuna.

¹⁴Ahu ma mangalehon udan tu tanomuna di tingki halehetanna, udan di bulan sipaha pitu dohot udan di bulan sipaha sada, asa tarpapungu ho emem dohot anggurmu dohot miakmu.

¹⁵Ahu huhut patubuhon di duhutduhut di ladangmu, hangoluan ni pinahanmu, asa mangan ho jala bosuran.

¹⁶Dibahen i ramoti hamu ma dirimuna, asa unang tarela rohamuna laos marbalik hamu, jala dioloi hamu angka debata sileban, huhut marsomba tusi.

¹⁷Jadi marpiarpiar rimas ni Jahowa maon mida hamu, gabe Ibana mangkinsu langit i maniopi udan, tano i pe ndang lehononna gogona, gabe tibu hamu mago sian tano na denggan i, na nilehon ni Jahowa tu hamu.

¹⁸(III.) Antong sai parateatehon hamu ma angka hatangkon jala pamasuk hamu tu rohamuna jala rahuthon hamu angka i bahen partinandaan di atas tanganmuna, jala bahen parningotan di holangholang ni matamuna.

¹⁹Jala ajarhon hamu angka i tu angka anakmuna, taringoti hamu angka i, molo hundulhundul ho di bagasan jabum manang mardalani ho di pardalanan, manang laho modom pe ho, nang dung hehe muse.

²⁰Jala ingkon surathononmu angka i tu tohang ni jabum dohot tu panggumbanganmu.

²¹Asa leleng hamu mangolu nang pinomparmuna i di tano naung niuarihon ni Jahowa tu angka ompumuna i, lehononna tu nasida, songon leleng ni angka ari ni langit lelengmuna tahe di atas tano on.

²²Ai tung sura marsihohot rohamuna mangaradoti sandok patikon, na hutonahon i

tu hamu laho mangulahonsa, mangkaholongi Jahowa, Debatamuna i, marparange di saluhut dalanna jala marsitiopan tu Ibana.

²³Ingkon pabalion ni Jahowa do saluhut bangso parbegu on maradophon hamu, asa hamu manoluk bangso angka na umbolon, jala na gumogo sian hamu.

²⁴Nasa tano na nidege ni palak ni patmuna, ingkon hamu nampunasa, olat ni halongonan dohot Libanon, olat ni sunge i, i ma sunge Euprat, sahat ro di laut tungkan hasundutan, i ma parbalohan ni tanomuna.

²⁵Ndang adong nanggo sahalak na manahan jongjong di adopanmuna; lehonon ni Jahowa, Debatamuna i ma roha hagodoron dohot biar mida hamu tu sandok tano sidegean ni patmuna i, songon naung pinarbagabagana i hian tu hamu.

²⁶(IV.) Ida ma, ahu papillithon di adopanmuna sadarion pasupasu dohot torutoru:

²⁷Pasupasu tahe, molo tung ditangihon hamu angka tona ni Jahowa, Debatamuna i, angka na hutonahon i tu hamu sadarion.

²⁸Alai torutoru tahe, tung sura so ditangihon hamu angka tona ni Jahowa, Debatamuna i, gabe manimbil hamu sian dalan na hutonahon i tu hamu sadarion, lam diihuthon hamu angka debata sileban, angka na so tinandamuna i.

²⁹Ia dung sahat ho, ditogihon Jahowa, Debatam masuk tu tano sitopotonmuna i bahen partalianmu, ingkon hatahononmu pasupasu i di atas dolok Gerizim, jala torutoru i di atas dolok Ebal.

³⁰Nda duansa do i di bariba ni Jordan dingkan ujung ni dalan tungkan hasundutan di tano ni halak Kanaan, na maringan di adaran, tondong ni Gilgal mardonokkon tombak More.

³¹Ai tariparanmuna nama Jordan laho masuk manean tano, naung nilehon ni Jahowa, Debatamuna i tu hamu bahen partalianmuna, laos maringan hamu disi.

³²Dibahen i sai ringkoti hamu ma mangulahon saluhut aturan dohot uhum, angka na hutonahon i tu hamu sadarion.

12¹(I.) On do aturan dohot uhum, angka na tama ringkotanmuna mangulahon di tano na nilehon ni Jahowa, Debata ni angka ompum, tu ho bahen partalianmu, saleleng hamu mangolu di atas tano on.

²Ingkon panepneponmuna situtu sude inganan pamelean tu debata sileban di bangso parbegu, angka sisoluhonmuna, nang di atas dolok manang di atas robean, manang di toru ni saluhut hau na rata.

³Ingkon lohaonmuna do angka langgatannasida i, jala taporanmuna ajiajiannasida, jala suda tutungonmuna sombaonnasida dohot api jala tahaonmuna

do angka ganaganaan, sumansuman ni Debatanasida, ingkon pidomhononmuna goarnasida sian inganan i.

⁴Ndang jadi bahenonmuna songon i tu Jahowa, Debatamuna i.

⁵(II.) Ingkon di inganan sipilliton ni Jahowa, Debatamuna i, sian saluhut margamuna umpajokkon Goarna tusi bahen ingananna, ingkon disi tahe luluanmuna Ibana jala sitopotonmuna.

⁶Tusi huhut boanonmuna angka peleanmuna situtungan dohot peleanmuna sipotongon dohot parpulanmuna i dohot pelean sitatingan sian tanganmuna, angka bagabagamuna dohot peleanmuna sian lomo ni roha, ro di anak buhabaju sian lombumuna dohot sian birubirumuna.

⁷Ingkon disi huhut hamu mangan di adopan ni Jahowa, Debatamuna i, jala marlas ni roha hamu mida saluhut na niradotan ni tanganmuna, songon i hamu, songon i dohot isi ni bagasmuna, angka na pinasupasuhon ni Jahowa, Debatam tu ho.

⁸Ndang jadi bahenonmuna disi hombar tu saluhut na itabahren sadarion dison, ganup tahe mambahen lomo ni rohana be.

⁹Ai ndang dope sahat hamu rasirasa nuaeng tu paradianan, manang tu partalian, silehonon ni Jahowa, Debatam tu ho.

¹⁰Alai magira ma tariparanmuna Jordan jala maringan hamu di tano na binasabasahon ni

Jahowa, Debatamuna i bahen partalianmuna, jala pasonangonna ma hamu maradophon saluhut musumuna humaliang, asa marsonangsonang hamu maringan.

¹¹ Ia dung dipillit Jahowa, Debatamuna i, sada inganan di Ibana bahen inganan ni Goarna i, ingkon tusi ma boanonmuna saluhut naung hutonahon i tu hamu: Angka peleanmuna situtungan dohot angka peleanmuna sipotongon, angka parpulauanmuna, angka pelean sitatinganmuna ro di sude ugasan na pinillit, garar ni bagabagamuna, angka na binagabagahonmuna tu Jahowa.

¹² Jala ingkon marlas ni roha hamu di adopan ni Jahowa, Debatamuna i, songon i hamu dohot angka anakmuna, angka borumuna, angka naposomuna baoa dohot parompuan, ro di halak Lepi, angka na maringan di bagasan hutamuna i, ai ndang maruli parjambaran manang partalian anggo nasida rap dohot hamu.

¹³ Ingkon ramotanmu dirim, na so tupa pelehononmu angka peleanmu situtungan di ganup inganan na denggan di roham.

¹⁴ Ingkon di inganan sipilliton ni Jahowa di tongatonga ni sada sian angka margamu, ingkon disi do pelehononmu angka peleanmu situtungan, jala ingkon disi do bahenonmu manang aha na hutonahon i di ho.

¹⁵Alai jadi do huhut guru sandok sombu ni roham seatonmu jala panganonmu juhut, hombar tu pasupasu ni Jahowa, Debatam, na nilehonna i tu ho di bagasan saluhut ingananmu; halak na ramun dohot na ias, jadi do manganhon sian i, suang songon hije manang ursa.

¹⁶Holan mudar i tahe ndang jadi panganonmuna, ingkon tu tano do i usehononhon songon aek.

¹⁷Ndang jadi hamu manganhon di bagasan hutamuna i parpuluhan sian ememu manang sian anggurmu, manang sian miakmu, manang anak buhabaju sian lombum manang sian birubirum, ro di sude ugasan garar ni bagabagam, angka naung binagabagahonmu ro di peleanmu sian lomo ni roha dohot pelean sitatingan sian tanganmu.

¹⁸Ingkon di adopan ni Jahowa, Debatam do panganonmu angka i, di inganan sipilliton ni Jahowa, Debatam, di Ibana, songon i ho nang anakmu dohot borum, ro di naposom baoa dohot parompuan dohot halak Lepi, na maringan di bagasan hutam, ingkon marlas ni roha ho di adopan ni Jahowa, Debatam, mida saluhut na niradotan ni tanganmu.

¹⁹Jaga dirim, na so tupa marlea roham mida halak Lepi, saleleng mangolu ho di atas tanomi.

²⁰(III.) Alai tung sura dipalambas Jahowa, Debatam parbalohan ni tanomi, songon

naung pinarbagabagana hian tu ho, gabe nimmu ma: Naeng mangan juhut ahu, ala hisapan roham naeng mangan juhut, jadi do panganonmu juhut sandok guru sombu ni roham.

²¹ Alai tung sura holang sian ho inganan naung pinillit ni Jahowa, Debatam, paojakkon Goarna disi, jadi do seatonmu sian lombum manang sian birubirum, angka na nilehon ni Jahowa tu ho, songon naung hutonahon i tu ho, jala mangan ma ho di bagasan hutam, sandok guru sombu ni roham.

²² Tongon tahe songon papangan ni halak di hije dohot di ursa, jadi do songon i panganonmu i; halak na ias dohot na ramun, jadi do rap mangan sian i.

²³ Asal marsihohot roham unang mangan mudar, ai mudar i do hosa; dibahen i ndang jadi panganonmu hosai i rap dohot sibukna.

²⁴ Nandang jadi panganonmu mudar i, ingkon tu tano do i usehononmu songon aek.

²⁵ Nandang jadi panganonmu i, asa marhasonangan ho dohot pinomparmu dung salpu ho, molo diulahon ho lomo ni roha ni Jahowa.

²⁶ Alai anggo peleanmi angka na badia i sipelehononmu hian, ro di angka bagabagami, ingkon buatonmu jala boanonmu do i tu inganan naung pinillit ni Jahowa.

²⁷ Ingkon hobasonmu anggo angka peleanmu situtungon, sibukna dohot mudarna

di atas langgatan ni Jahowa, Debatam;
ia mudar ni angka peleanmu sipotongon
ingkon usehononmu do i tu atas langgatan ni
Jahowa, Debatam, alai anggo sibukna jadi do
panganonmu.

²⁸Sai paingotingot jala tangihon sude
hata on, angka na hutonahon tu ho, asa
marhasonangan ho dohot pinomparamu dung
salpu ho ro di salelenglelengna, molo tung
diulahon ho na denggan dohot na tigor di
roha ni Jahowa, Debatam.

²⁹(IV.) Ia dung sun siap dibahen Jahowa,
Debatam maradophon ho bangso parbegu,
angka sitopotonmi laho manean nasida, jala
ia dung ditean ho nasida, laos maringan ho di
tanonasida i:

³⁰Sai ramoti ma dirim, asa unang tung
tarjorgong ho mangihuthon tu nasida, dung
siap nasida maradophon ho, jala unang
usouso ho taringot tu debatanasida gabe
nimmu: Songon pangoloi ni angka bangso
parbegu on di debatanasida, suang songon i
do nang ahu bahenonku.

³¹Ndang jadi bahenonmu songon i di
Jahowa, Debatam, ai saluhut biasbias ni
Jahowa na hinagigihon ni rohana dibahen
nasida do i tu debatanasida i; ai gari
anaknasida dohot borunasida, suda do i
ditutung nasida di bagasan api umpele
debatanasida i.

³²(13-1) (l.) Sandok hata naung hutonahon i tu hamu, ingkon ringkotan ni rohamuna do laho mangulahon; ndang jadi ambaanmuna tusi, jala ndang jadi huranganmuna sian i.

13¹(13-2) Tung sura hehe di tongatongamuna sada panurirang manang halak siparnipi, pola dilehon tu ho sada tanda manang halongangan.

²(13-3) Ro do huhut antong tanda dohot halongangan, naung pinaboana i hian tu ho, ninna do: Beta hita mangihuthon tu debata sileban, angka na so tinandamuna i na sai laon jala marsomba hita tusi!

³(13-4) Nandang jadi tangihononmu hatahata ni panurirang sisongon i manang halak siparnipi sisongon i; ai na mangunjuni hamu do Jahowa, Debatamuna i, naeng botoonna manang na tutu hamu mangkaholongi Jahowa, Debatamuna i sian nasa ro hamuna dohot sian nasa ateatemuna.

⁴(13-5) Ingkon Jahowa, Debatamuna i tama ihuthononmuna jala marhabiaran tu Ibana, huhut mangaradoti angka tonana jala tumangihon soarana, huhut marpangoloion dohot marparsigantungan tu Ibana.

⁵(13-6) Alai anggo panurirang manang halak siparnipi sisongon i, ingkon marutang hosa do, ala mangela ibana marbalik sian Jahowa, Debatamuna i, naung manogihon hamu ruar sian tano Misir, jala naung manobus ho sian bagas parhatobanan, ala naeng pasimbilonna

ho sian dalan naung tinonahon ni Jahowa, Debatam tu ho, ingkon dalananmu; ingkon songon i paholonganmu hajahaton i sian tongatongamu.

⁶(13-7) (II.) Tung sura anggim sandiri, donganmu saina, manang anakmu, manang borum, manang jolmam tuanlaenmu, manang alealem hasudungan ni roham, mangela ho marsibuni mandok songon on: Beta hita mangoloi debata sileban, angka na so tinandam, manang na so tinanda ni angka ompum pe.

⁷(13-8) Sian angka debata ni bangso, angka na humaliang hamu, angka na jonok tu ho, manang na holang sian ho, sian ujung ni tano na sada sahat ro di ujung ni tano na sadanari.

⁸(13-9) Nandang jadi oloanmu pinangidona i jala ndang jadi tangihononmu ibana; ndang jadi moralangalang roham mida ibana, jala ndang jadi asianmu manang tabunihononmu ibana.

⁹(13-10) Ingkon bunuonmu ibana, tanganmu sandiri tahe tama parjolo mangonai laho mambunu ibana, ipe asa tangan ni sandok bangso i.

¹⁰(13-11) Ingkon mate ibana dangguran ni halak dohot batu, ala diunjuni rohana mangela ho marbalik sian Jahowa, Debatam, na manogihon ho ruar sian tano Misir, sian bagas parhatobanan.

¹¹ (13-12) Ingkon sandok Israel umbegesa, asa laos mabiar nasida, jala unang be didatdati mambahen hajahaton sisongon i di tongatongamu.

¹² (13-13) (III.) Tung sura dibege ho barita ni sada huta sian huta angka na nilehon ni Jahowa, Debatam di ho, bahen ingananmu, didok halak:

¹³ (13-14) Nunga ruar deba baoa, angka halak parroha Belial sian tongatongamu, jala nunga pola diela marbalik halak isi ni hutanasida i, ninna do: Beta hita asa itasomba debata sileban, angka na so tinandamuna i na sai laon.

¹⁴ (13-15) Ingkon sungkunsungkunonmu jala risihanmu jala tangkas sulingkitanmu pangalahona; hape ida ma, hasintongan do hata i, jala andar do masa biasbias i di tongatongamu.

¹⁵ (13-16) Ingkon hamu do mambunu isi ni huta sisongon i marhite sian baba ni podang, ingkon haromhononmu ia huta i rap dohot sude isina dohot pinahanna marhite sian baba ni podang.

¹⁶ (13-17) Tole sandok ugasan tabantaban ingkon papunguonmu do i tu tongatonga ni onan, laos tutungonmu ma huta i ro di sandok tabantabanna di bagasan api bahen pelean situtungon tu Jahowa, Debatamu, asa gabe timbunan batu ro di salelenglelengna; ndang jadi be paulion huta i.

¹⁷ (13-18) Na so tupa adong agia aha lohottu tanganmu sian na hona harom i, asa anggiat marpangulahi roha ni Jahowa sian parpiarpiar ni rimasna jala dilehon tu ho asi ni roha jala marpangulahi rohana mida ho jala dipatorop ho, songon na niuarihonna tu angka ompum.

¹⁸ (13-19) Tung sura ditangihon ho soara ni Jahowa, Debatam, laho mangaradoti saluhut tonana, angka na hutonahon i tu ho sadarion laho mangulahon na tigor di roha ni Jahowa, Debatam.

14¹ (I.) Angka anak na niain ni Jahowa, Debatamuna i do hamu; dibahen i ndang jadi garianganmuna dagingmuna, jala ndang jadi nabunganmuna salibon ni matamuna i, ala ni salahak naung mate.

² Ai bangso na badia do ho di Jahowa, Debatam, jala nunga dipillit Jahowa ho, asa ho gabe bangso hapunjunganna sian saluhut bangso, angka na di atas tano on.

³ (II.) Nandang jadi panganonmu manang aha na ramun sihabiasnonhon.

⁴ On do tahe pinahan na jadi panganonmuna: lembu, birubiru dohot haming.

⁵ Ursa, hije, sipan, bedu, badak ursa piutpiut.

⁶ Ro di nasa pinahan na martambirik, jala bola dua tambirikna i huhut marngalu, i ma na jadi panganonmuna.

⁷ Alai ndang jadi panganonmuna sian angka na marngalu sambing dohot sian angka na

marbola tambirikna sambing, songon: unto, ampodi, dohot landuk; ai marngalu do angka i nian, alai ndang marbola anggo tambirikna, dibahen i ingkon ramun do i di hamu.

⁸Tole muse babi, ai marbola do nian anggo tambirikna, alai ndang marngalu, dibahen i ingkon ramun do i di hamu. Nandang jadi hamu manganhon sian sibukna, bangkena pe ndang jadi jamaonmuna.

⁹Angka on do na jadi panganonmuna, sian saluhut angka na di bagasan aek: nasa na marhapihapi jala na marsisik, i ma na jadi panganonmuna.

¹⁰Alai nasa na so marhapihapi jala na so marsisik, ndang jadi panganonmuna i; ingkon ramun do i di hamu.

¹¹Nasa pidong na ganjing jadi do panganonmuna.

¹²Alai ndang jadi panganonmuna anggo angka pidong on: pidong raja wali, isuisu dohot honong bosi.

¹³Tole lali lopak, lali lapuk dohot lali bangar ro di mansammansamna.

¹⁴Tole muse sigak ro di mansammansamna.

¹⁵Tole muse pidong unto, langkupa, sihungkung lali piuan ro di mansammansamna.

¹⁶Tole muse sipauk, ampapaluan dohot situbiak.

¹⁷Tole muse onggang, silogologo dohot soro aek.

¹⁸Tole muse siboru tasik, sibarung ro di mansammansamna, nang lompong dohot ariparip.

¹⁹Tole muse nasa na manjirir sian angka na marhabong, ingkon ramun do i di hamu, ndang jadi panganonmuna angka i.

²⁰Nasa pidong na ganjing jadi do panganonmuna.

²¹Ndang jadi panganonmuna manang aha na mate garam; tu halak dagang na maringan di bagasan hutam, jadi do i lehononmu, asa panganonna manang gadisonna tu halak sileban; ai bangso na badia do anggo ho, di Jahowa, Debatam. Ndang jadi lompaonmu anak ni hambing di bagasan aek ni susu ni inana.

²²(III.) Ingkon burju do lehononmu parpulan sian nasa gogo ni tano, boni sinaburhonmi, sian saluhut na tubu di tanomi ganup taon.

²³Jala ingkon mangan ho di adopan ni Jahowa, Debatam, di inganan na pinillitna bahen inganan ni Goarna disi, mangan ho tutu sian parpulan ni emem, anggurmu, miakmu dohot anak buhabaju ni lombum dohot birubirum, asa marsiajar ho marhabiaran tu Jahowa, Debatam saleleng ho mangolu.

²⁴Alai tung sura madaohu dalan i di roham, pola ndang tarusung ho siboanonmu i, ala madaohu di roham inganan naung pinillit ni Jahowa, Debatam bahen ojanan ni Goarna

disi, ala naung dipasupasu Jahowa Debatam ho:

²⁵Jadi do i tobusonmu marhite sian perak, tungkusonmu muse perak i di bagasan tanganmu, asa laho ho tu inganan naung pinillit ni Jahowa, Debatam di Ibana.

²⁶Perak i ma lehononmu singkat ni saluhut na pinangido ni roham, singkat ni lombu, birubiru, anggur, siinumon na horas jala singkat ni saluhut na pinangido ni roham, dung i mangan ma ho disi, di adopan ni Jahowa, Debatam, jala marlas ni roha ho rap dohot donganmu sajabu.

²⁷Alai mida halak Lepi, na maringan di bagasan hutam, ndang jadi marlea roham; ai ndang maruli bagian manang partalian ibana rap dohot ho.

²⁸Dung salpu tolutolu taon ingkon paruaronmu nasa parpulan ni gogo ni tanomi di taon na sasada i, jala pajoponmu do i di bagasan hutam.

²⁹Jadi ingkon ro halak Lepi, ala so maruli bagian manang partalian ibana rap dohot ho, ro dohot halak dagang, dakdanak na sopot so marama dohot parompuan na mabalu di bagasan hutam, asa nasida mangan jala bosuran, asa dipasupasu Jahowa, Debatam ho di bagasan saluhut jadijadian ni tanganmu na niulami.

15¹(I.) Dung salpu pitupitu taon ingkon bahenonmu taon haluaon.

²Ingkon songon on do pangalaho ni taon haluaoni: Ganup halak parutangan, na pautang donganna, ndang jadi tungguonna donganna manang hahaanggina; ai nunga pola ditingtingkon halak taon haluaon di Jahowa.

³Anggo halak dagang jadi do tungguonmu; alai manang aha ugasanmu di hahaanggim, ingkon salesean ni tanganmu do i.

⁴Tung na so tupa adong di tongatongamuna halak na pogos, ai buas do pasupasun ni Jahowa ho di tano silehonon ni Jahowa, Debatam tu ho soluhonmu bahen partalianmu.

⁵Asal ditangihon ho situtu soara ni Jahowa, Debatam, huhut mangaringkoti mangulahon sandok tona on, angka na hutonahon tu ho sadarion.

⁶Ai pasupasun ni Jahowa, Debatam do ho, songon naung pinarbagana i hian tu ho, jadi pasalionmu torop angka bangso parbegu, alai ndang marsali anggo ho; jala gomgomamu torop angka bangso parbegu, alai anggo ho ndang jadi rajaannasida.

⁷Tung sura adong di tongatongamu sahalak na pogos sian hahaanggim di bagasan sada sian angka hutam, di tanomi, silehonon ni Jahowa, Debatam tu ho, ndang jadi papironmu roham jala ndang jadi tutuponmu tanganmu maradophon donganmu na pogos i.

⁸Ingkon ringgas ho mamuhai tanganmu di ibana jala buas ho pasali ibana pasingkophon di ibana marguru tu godangna na hurang di ibana.

⁹Sai ramoti dirim, asa unang tubu pingkiran na jahat di bagasan roham, mandok songon on: Nunga lam jonok taon papituhon, i ma taon haluaon, gabe murhing pamerengmu mida donganmu na pogos i, laos sundat ho mangalehon tu ibana, gabe alualuhononna ho tu Jahowa, gabe dapotan dosa ho.

¹⁰Ingkon buas lehononmu ibana, unang pola marmurukmuruk roham di na mangalehoni ho tu ibana; ai ala ni do pasupasun ni Jahowa, Debatam do ho di saluhut ulaonmu dohot di saluhut na jinama ni tanganmu.

¹¹Ai ndang tagamon mansadi adong halak na pogos di tongatonga ni tano i, ala ni do umbahen hutonahon tu ho songon on: Ingkon ringgas ho mamuhai tanganmu mangalehon donganmu na targogot jala na pogos di bagasan tanomi.

¹²(II.) Tung sura mangadop di ho donganmu sahalak Heber baoa manang parompuan, ingkon onom taon lelengna ibana mangula di ho, tole papitutaonhon ingkon paluaonmu boti ibana sian lambungmu.

¹³Jala tung sura dipalua ho ibana boti sian lambungmu, ndang jadi rumar boti ibana paluaonmu.

¹⁴Ingkon buas pangalehonmu tu ibana sian birubirum dohot sian pardegeanmu dohot sian pangilanganmu anggur, sian luhut naung pinasupasuhon ni Jahowa, Debatam tu ho, lehononmu ibana.

¹⁵Ingkon paingotingotonmu, hatoban do nang ho najolo di tano Misir, gabe ditobus Jahowa, Debatam ho, ala ni do umbahen hutonahon tu ho hata on sadarion.

¹⁶Alai tung sura dohononna mandok ho: Ndang dipangido rohangku naeng malua ahu ruar sian lambungmu ala holong rohana mida ho dohot mida isi ni jabum, ai sonang rohana di lambungmu.

¹⁷Ingkon buatonmu ma sada sigirik jala turaonmu pinggolna di lambung pintu, jadi hatobanmu ma ibana ro di salelenglelengna; tu hatobanmu parompuan pe laos songon i do bahenonmu.

¹⁸Unang pola dok roham ala paluaonmu ibana boti sian lambungmu, ai silompit sian gaji ni halak sipangan gaji pinangulahonna ho onom taon lelengna, jadi pasupasuhon ni Jahowa, Debatam ma ho, di saluhut na niulam.

¹⁹(III.) Nasa anak buhabaju, na tubu di tongatonga ni lombum dohot birubirum, ingkon parbadiaanmu do i di Jahowa, Debatam; ndang jadi pangkeonmu mangula anggo anak buhabaju ni lombum, jala ndang

jadi gustingonmu imbulu ni anak buhabaju ni birubirum.

²⁰Ingkon di adopan ni Jahowa, Debatam do i panganonmu ganup taon di inganan sipilliton ni Jahowa, songon i ho dohot isi ni bagasmu.

²¹Alai tung sura adong lindangna, mengkat do i manang mapitung manang martihas na roa dia na asing, ndang jadi pelehononmu i tu Jahowa, Debatam.

²²Ingkon panganonmu do i di bagasan hutam, suang songon hije manang ursa, nang halak na ramun manang na ias pe.

²³Alai anggo mudarna na so tupa panganonmu, ingkon tu tano do i usehononmu, songon aek.

16¹(I.) Sai ingot hamu ma bulan Abib, asa marulaon Paska ho di Jahowa, Debatam, ai apala di bulan Abib ditogihon Jahowa, Debatam ho ruar sian Misir bornginna i.

²Ingkon seatonmu di ari raya Paska lombu dohot birubiru di Jahowa, Debatam di inganan sipilliton ni Jahowa bahen inganan ni Goarna disi.

³Ndang jadi panganonmu sagusagu na niasoman di ari raya Paska i; ingkon pitu ari lelengna panganonmu disi sagusagu na so niasoman, sagusagu pardangolan, ai mardangoldangol do ho ruar sian tano Misir, asa dipaingotingot roham saleleng ho mangolu ari haruruarmu sian tano Misir.

⁴Dibahen i ndang jadi dapot idaon di ho igarigar di sandok parbalohanmu pitu ari lelengna, jala ndang jadi marborngin sian pinahan na sineatmi di bodari ni ari parjolo sahat ro di manogotna i.

⁵Ndang jadi seatonmu Paska i di bagasan sada sian hutam, angka silehonon ni Jahowa, Debatam tu ho.

⁶Ingkon di inganan sipilliton ni Jahowa, Debatam, bahen inganan ni Goarna disi, seatonmu Paska i di bodari marhira manihir mata ni ari, di tingki haruruarmu sian Misir.

⁷Ingkon pangganganmu jala panganonmu do i di inganan sipilliton ni Jahowa, Debatam di Ibana, manogotna i jadi do ho mardalan mulak tu undungundungmu hian.

⁸Ingkon onom ari lelengna panganonmu sagusagu na so niasoman, tole papituarihon jumpang ma mata ni ari raya di Jahowa, Debatam, ndang jadi ulaonmu disi nanggo sada ulaon.

⁹(II.) Ingkon pitu minggu bilanganmu di ho; olat ni dung mamungka madabu sasabi tu eme, pungaonmu ma mamilangi na pitu minggu i.

¹⁰Dung i marari raya minggu ma ho di Jahowa, Debatam, marguru tu pangalehon ni tanganmu di pelean sian lomo ni roha silehononmu, hombar tu pamasumasu ni Jahowa, Debatam di ho.

¹¹ Ingkon marlas ni roha ho di adopan ni Jahowa, Debatam, songon i ho dohot anakmu dohot borum dohot naposom baoa dohot naposom parompuan dohot halak Lepi na di bagasan hutam, ro di halak dagang dohot dakdanak na tading di lampin dohot parompuan na mabalu na di tongatongami, di inganan sipilliton ni Jahowa, Debatam, bahen inganan ni Goarna disi.

¹² Sai dipaingotingot roham ma hatoban do ho na jolo di Misir, asa ingkon radotanmu jala ulahononmu angka aturan on.

¹³ (III.) Ingkon marari raya parlapelapean ho pitu ari lelengna, ia dung dipapungu ho parbue sian pardegeanmu dohot sian pangilanganmu.

¹⁴ Jala ingkon marlas ni roha ho di ari rayamu, songon i ho dohot anakmu dohot borum dohot naposom baoa dohot naposom parompuan dohot halak Lepi dohot halak dagang dohot dakdanak na tading di lampin dohot parompuan na mabalu di bagasan angka hutamu.

¹⁵ Ingkon pitu ari lelengna ho marari raya di Jahowa, Debatam di inganan sipilliton ni Jahowa; ai pasupasun ni Jahowa, Debatam ma ho di saluhut gogo ni tanomu dohot di saluhut ulaon ni tanganmu, dibahen i ingkon marlas ni roha situtu ho.

¹⁶ Ingkon tolu hali di bagasan sataon ro nasa baoa di tongatongamu tu adopan ni Jahowa

Debatam, di inganan sipilliton ni Jahowa, i ma di ari raya sagusagu na so niasoman dohot di ari raya minggu dohot di ari raya parlapelapean, jala ndang jadi rumar boti ro manang ise tu adopan ni Jahowa.

¹⁷Ganup tahe marguru tu na tarlehon tanganna, hombar tu pasupasu naung nilehon ni Jahowa, Debatam tu ho.

¹⁸(IV.) Ingkon pabangkitonmu di ho angkajolma bahen panguhum dohot panuturi di saluhut harbanganmu, angka silehonon ni Jahowa, Debatam tu ho di tongatonga ni angka margam, asa nasida mandabu uhum hasintongan tu bangso i.

¹⁹Ndang jadi papeolonmu uhum, ndang jadi ho marnidanida bohi, jala ndang jadi jaloonmu silua, ai sisip do papitung mata ni halak na pistar jala pabalikbalik parhataan ni halak na tigor.

²⁰Hatigoran, hatigoran ma tutu ingkon eahanmu, asa mangolu ho jala teanonmu tano silehonon ni Jahowa, Debatam tu ho.

²¹Ndang jadi pajongjongonmu di ho manang sian hau dia sumansuman ni sombaon Asera jonok tu langgatan ni Jahowa, Debatam sibahenonmu di ho.

²²Ndang jadi huhut pajongjongonmu di ho tiang panombanombaan, na hinagigihon ni Jahowa, Debatam.

17¹(I.) Ndang jadi pelehononmu tu Jahowa, Debatam lombu manang

birubiru na martihas manang na marsahit
dia pe; ai marbiasbias do roha ni Jahowa,
Debatam disi.

²Tung sura adong jumpang di tongatongami
di bagasan sada sian hutam, angka silehonon
ni Jahowa, Debatam tu ho sada baoa manang
parompuan, na mangulahon sogo ni roha ni
Jahowa, Debatam mangose padan binahenna
i.

³Tung laho ibana mangoloi angka debata
sileban jala marsomba tusi, tu mata ni
ari manang tu bulan, manang tu sandok
parangan di langit, na so hutonahon i.

⁴Tarbortik dohot tu ho, pola dibege
pinggolmu, ingkon tangkas do i sulingkitanmu,
jadi ida ma, sintong situtu do hape hata i
masa biasbias sisongon i di Israel.

⁵Ingkon ruar toguonmu baoa manang
parompuan na mambahen hajahaton
sisongon i tu balian ni harbanganmu,
jala baoa manang parompuan sisongon i
danggurannasida dohot batu asa mate.

⁶Molo dua manang tolu halak
mangkatindangkon hata i, ingkon saut
ma bunuonna halak na marutang hosa hian;
alai anggo holan sahalak sitindangi ndang
jadi bunuon ibana.

⁷Ingkon tangan ni angka sitindangi jumolo
mangonai laho mambunu ibana, dung i
muse tangan ni sandok bangso i, asa tung
siaphononmu hajahaton i sian tongatongami.

⁸(II.) Tung sura mamaolhu risihanmu sada parkaro di paruhuman taringot tu na masibunuan hosa manang na masigulutan, manang na masibugangan, manang dia tahe hatahata parsalisian masa di harbanganmu, ingkon borhat ma ho jala nangkok tu inganan sipilliton ni Jahowa, Debatam di Ibana.

⁹Ingkon topotonmu ma tu adopan ni angka malim, halak Lepi dohot tu panguhum pandapotan di tingki uju i jala sungkunonmu uhum, asa nasida paboahon tu ho hata patik i.

¹⁰Jala ingkon bahenonmu do hombar tu hata sipaboaonnasida tu ho sian inganan naung pinillit ni Jahowa, ingkon ringkotanmu huhut mangualahon hombar tu saluhut na pinodahonnasida tu ho.

¹¹Hombar tu hata ni patik na pinodahonnasida, jala hombar tu uhum sipaboaonnasida tu ho, ingkon bahenonmu; ndang jadi ho manimbil sian hata na pinaboanasida tu ho tu siamun manang tu hambirang.

¹²Tung sura adong sada halak na mambahen songon i mangasahon hajungkaton, ndang ditangihon hata ni malim na jongjong disi marulaon tu Jahowa, Debatam manang hata ni panguhum pandapotan i pe, ingkon marutang hosa baoa sisongon i, asa tung siap bahenonmu hajahaton i sian Israel.

¹³Ingkon sandok bangso i umbegesa, asa mabiar nasida jala unang be mangulahon hajungkaton.

¹⁴(III.) Ia dung masuk ho tu tano, silehonon ni Jahowa, Debatam tu ho, asa soluhonmu laos maringan disi, gabe ro hatam mandok: Naeng pabangkitonku sada raja gumomgom ahu, suang songon saluhut bangso parbegu, angka na humaliang ahu.

¹⁵Ingkon pabangkitonmu gumomgom ho sada raja sipilliton ni Jahowa, Debatam di Ibana; ingkon sian tongatonga ni hahaanggim pabangkitonmu sada raja gumomgom ho; ndang jadi pabangkitonmu gumomgom ho halak na pulik bangso, na so sian hahaanggim.

¹⁶Alai na so tupa patoropon ni rajai di ibana angka hoda, jala ndang jadi togihononna bangso i mulak tu Misir, ala naeng patorophon hodana, ai nunga pola didok Jahowa tu hamu: Na so tupa be hamu mulak sian dalan on.

¹⁷Angkup ni ndang jadi patoroponna angka jolmana, asa unang manimbil rohana; perak pe dohot sere ndang jadi pagukguhonna di ibana.

¹⁸Ia dung hundul ibana di atas habangsa ni harajaonna i, ingkon uhalonna di ibana hata ni patikon tu sada buku di adopan ni angka malim dohot halak Lepi.

¹⁹Ingkon patik i tongtong donganna jala pajahajahaonna saleleng mangolu ibana,

asa marsiajar ibana marhabiaran tu Jahowa, Debatana, asa radotanna sude hata ni patikon dohot angka aturan on, laho patupahon angka i.

²⁰Asa unang dipaginjang rohana mangastaasta angka hahaanggina, jala unang ibana manimbil sian tona i tu siamun manang tu hambirang, asa leleng ibana mangolu jumujung harajaonna i, ibana dohot angka anakna di tongatonga ni Israel.

18¹(I.) langgo angka malim, halak Lepi, sandok marga Lepi tahe, ndang jadi maruli bagian manang partalian rap dohot Israel; angka pelean api tu Jahowa jala parjambaranna, i do panganonnasida.

²Alai ndang jadi maruli partalian ibana di tongatonga ni hahaanggina, ai Jahowa sandiri do partalianna, songon naung pinarbagabagana i hian.

³Ingkon on do tahe uhum siingoton ni bangso i tu angka malim sian halak angka na mamelehon pelean, manang lombu, manang birubiru, ingkon lehononna tu malim hae bona, hurumna na dua i dohot butuha bolon.

⁴Tole patumonaan sian emem, anggurmu, miakmu ro di patumonaan sian imbulu ni birubirum ingkon lehononmu tu ibana.

⁵Ai nunga dipillit Jahowa, Debatam ibana di Ibana sian saluhut angka margam, asa ibana jongjong marulaon marhite sian Goar ni

Jahowa, ibana dohot angka anakna saleleng mangolu.

⁶Tung sura ro sahalak Lepi sian sada ni angka hutam, sian sandok Israel paisolatanna i, jala ro ibana sian nasa ringkot ni rohana tu inganan naung pinillit ni Jahowa.

⁷Asa marulaon ibana marhite sian Goar ni Jahowa, Debatana, suang songon saluhut hahaanggina i ma halak Lepi, angka na jongjong disi di adopan ni Jahowa.

⁸Ingkon songon bagian ni halak na asing bagianna panganonnasida; angkup ni bagianna sian ugasan na ginadisna tu angka ompu.

⁹(II.) Ia dung masuk ho tu tano silehonon ni Jahowa, Debatam tu ho, ndang jadi ho marsiajar mangulahon maniru biasbias na niulahon ni angka bangso on.

¹⁰Na so tupa adong jumpang di tongatongamu sahalak na pabolushon anakna manang boruna sian api, manang halak pangarunding manang sijujur ari, manang sitabasi ulok manang parsibalik mata.

¹¹Manang sibahen panutupi, manang partondung, manang na manungkun begu ni na mate.

¹²Ai marbiasbias situtu do roha ni Jahowa mida saluhut halak, angka na mangulahon sisongon i, jala ala ni biasbias angka sisongon i pabalion ni Jahowa, Debatam ma angka bangso i maradophon ho.

¹³Ingkon sun denggan do anggo mardonganhon ho Jahowa, Debatam.

¹⁴Ai bangso parbegu angka sisoluhonmu, somal do nasida patangitangi hatahata ni sijujur ari dohot pangarunding; alai ndang songon i pangalehon ni Jahowa, Debatam anggo tu ho.

¹⁵(III.) Panurirang sada, songon ahu on patindangon ni Jahowa, Debatam sian tongatongami, sian angka hahaanggim; Ibana tama tangihononmuna.

¹⁶Hombar tu saluhut naung pinangido ni roham sian Jahowa, Debatam di Horeb, uju di ari parluhutan i, nimmu do: Nandang be tarpabegebege ahu soara ni Jahowa, Debatanku, jala ndang be tarpaidaida ahu api na bolon on, asa unang mate ahu.

¹⁷Dung i ro ma hata ni Jahowa tu ahu: Denggan do hata na nidoknasida i.

¹⁸Ahu ma tutu patindangkon sogot di nasida sada Panurirang sian tongatonga ni hahaangginasida i, songon ho, jala Ahu mangalehon angka hatanku tu bagasan pamanganna, gabe hatahononna tu nasida saluhut na hutonahon i tu Ibana.

¹⁹Jadi manang ise na so olo tumangihon hatangki, angka sihatahononna di bagasan Goarhu, ingkon Ahu mangaluluhonsa tu Ibana.

²⁰(IV.) Alai tung sura adong, sada panurirang na paginjang rohana mangkatahon sada

hata di bagasan Goarhu, so Ahu mandokkon hatahononna, manang panurirang na mangkatai marhite sian goar ni angka debata sileban, ingkon marutang hosa panurirang sisongon i.

²¹ Alai tung sura dohononmu di bagasan roham: Sian dia dapot tandaonnami hata na so hinatahon ni Jahowa?

²² Tung sura mangkatahon panurirang i marhite sian Goar ni Jahowa hape ndang songgop hata i jala ndang ro, i ma hata na so hinatahon ni Jahowa; mangasahon hajungkaton panurirang i umbahen dihatahon, ndang jadi mabiar ho mida ibana.

19 ¹ (I.) Ia dung sun siap dibahen Jahowa, Debatam angka bangso parbegu, nampuna tano silehonon ni Jahowa, Debatam tu ho, gabe soluhonmu tanonasida i, jala ingananmu hutanasida dohot bagasnasida i:

² Ingkon papulihonmu di ho tolu huta di tongatonga ni tanomi, silehonon ni Jahowa, Debatam tu ho bahen partalianmu.

³ Ingkon parhornoponmu dalanmu tusi, jala bagi tolu bahenonmu parbalohan ni tanomi, silehonon ni Jahowa, Debatam tu ho bahen partalianmu, asa maporus tusi ganup sibunu jolma.

⁴ Jala on do patik taringot tu sibunu jolma i, jadi ma maporus tusi asa laos mangolu ibana: Manang ise naung mambunu donganna so

pangkirimanna, jala ndada dihosom ibana hian na sai laon.

⁵Songon on rupani, masuk ibana tu tombak rap dohot donganna naeng manaba hau, gabe dialbangkon tangkena naeng manaba hau i nian, hape pinsir mata ni tangke i sian songkirna, gabe hona donganna laos mate, jadi ma ibana maporus tu sada sian angka huta i, asa laos mangolu ibana.

⁶Asa unang dilele parlulu i jolma pamunui, ala mohop ateatena, gabe dapotsa ditangkap ala madaohu dalam i, laos dibunu ibana maon, hape nian ndada patut dope uhum hamatean mangonai tu ibana, ala so dihosom ibana hian na sai laon.

⁷Ala ni umbahen hutonahon tu ho songon on: Ingkon papulihonmu di ho tolu huta.

⁸Jala tung sura lam mangonjar parbalohanmu bahenon ni Jahowa, Debatam, songon naung niuarihonna hian tu angka ompum, jala saut dilehon tu ho sandok tano, naung pinarbagabagana lehononna tu angka ompum.

⁹Molo tung diringkoti ho mangulahon sandok tona on, na hutonahon tu ho sadarion, mangkaholongi Jahowa, Debatam dohot marparange di angka dalanna saleleng ho mangolu, ingkon ambaanmu dope di ho tolunari huta i angkup ni na tolu huta ondeng.

¹⁰Asa unang tardurus mudar na so marpipot di tongatonga ni tanomi, silehonon ni Jahowa,

Debatam tu ho bahen partalian, asa unang marsapata tu ho mudar i.

¹¹Alai tung sura naung magigi hian manang ise mida donganna, pola ibana digopgop jala dibajo ibana, jala dibunu ibana pola tos hosana mate, hape sanga ibana maporus tu sada sian angka huta i.

¹²Ingkon suruan ni angka sintua di hutana i suruanna mangalapi ibana sian i, jala pasahatonna ibana tu tangan parlulu, asa mate ibana dibunu.

¹³Ndang jadi moralangalang roham mida ibana, ingkon purpurhononmu do sapata ni mudar na so marpipot sian Israel, asa marhasonangan ho.

¹⁴(II.) Ndang jadi paorotonmu talutuk sian hauma ni donganmu, angka na binahen ni ompu na jolo di bagasan partalianmu, siteanonmu di tano silehonon ni Jahowa, Debatam di ho bahen partalianmu.

¹⁵Ndang masuk anggo holan sahalak hehe sitindangi mangalo, manang ise taringot tu manang aha hajahaton manang dosa, angka naung binahenna, ingkon tinindangkon ni dua manang tolu halak sitindangi, asa hot hata i.

¹⁶Tung sura hehe sahalak sitindangi pargapgap mangalo manang ise naeng mangkatindangkon panundalion dompak ibana.

¹⁷Ingkon jongjong na dua halak i, angka na marparsalisian di adopan ni Jahowa, di

adopan ni malim dohot panguhum, angka na mangarajai disi.

¹⁸Dung i tangkas ma sulingkiton ni angka panguhum hata i, gabe ida ma, andar do sitindangkon gabus do sitindangi i, sipaotooto do nialushonna dampak donganna i.

¹⁹Jadi ingkon bahenonmuna tu ibana suang songon na sinangkap ni rohana naeng bahenonna tu donganna, asa tung siap bahenonmu hajahaton i sian tongatongamu.

²⁰Asa dibege halak na asing pangalahona i, anggiat mabiar nasida, jala unang be didatdati mangulahon hajahaton sisongon i di tongatongamu.

²¹Ndang jadi moralangalang roham mida ibana: Ingkon hosa abul ni hosa, mata abul ni mata, ipon abul ni ipon, tangan abul ni tangan, pat abul ni pat.

20¹(I.) Molo ruar ho naeng marporang dampak angka musim, gabe diida ho hoda dohot hureta dohot parangan na tumorop sian ho, unang ho mabiar maradophon nasida, ai Jahowa Debatam do donganmu, Ibana naung manogihon ho nangkok sian tano Misir.

²Ia dung lam jonok hamu tu tongtangan, ingkon ro ma jumonok malim i huhut mandok tu bangso i.

³Jala dohononna ma tu nasida; tangihon ma, ale Israel, na tole ma hamu sadarion manahopi tongtangan mangalo musimuna

i; unang godoron rohamuna jala unang tahuton hamu jala unang tarsonggot hamu maradophon nasida!

⁴Ai Jahowa, Debatamuna i mardalan rap dohot hamu, naeng marporang dompak musumuna i humongkop hamu, mangalehon parantuon tu hamu.

⁵Angka panuturi pe ingkon dohononna ma tu bangso i songon on: Manang ise naung pajongjong bagas na imbaru, hape ndang dope dibongoti, jadi do ibana muli tu jabuna, asa unang mate ibana di humusuon i, gabe halak na asing mangingani jabuna i.

⁶Jala manang ise naung mamungka sada porlak anggur, hape ndang sanga dope anggo manganhon parbuena, jadi do muli ibana tu jabuna, asa unang mate ibana di humusuon i, gabe halak na asing manganhon parbuena i.

⁷Jala manang ise na maroroan, ndang haru dialap dope, jadi do ibana muli tu jabuna, asa unang mate ibana di hamusuon, gabe halak na asing mambuat parompuan i bahenjolmana.

⁸Ingkon datdatan ni angka panuturi dope mandok hatana tu bangso i songon on: Manang ise na tahuton jala godoron rohana, jadi do ibana muli tu jabuna, asa unang dohot roha ni donganna malala dibahen, songon rohana sandiri.

⁹Ia dung sidung angka panuturi i mandok hatana tu bangso i, ingkon dohononna ma

angka partogi ni parangan manguluhon bangso i.

¹⁰(II.) Molo jonok ho mangarongom sada huta laho mamereng dampak huta i, ingkon uahononmu tusi hata pardemahan.

¹¹Molo tung hata demak dialushon tu ho jala diungkap pargumbanganna di ho, jadi sandok bangso isi ni huta i ingkon mangoloi rodim jala marpandapotan tu ho.

¹²Alai tung sura so mangoloi mardemak nasida tu ho, tagonan naeng marmusu dampak ho, ingkon tungkumonmu ma huta i.

¹³Jadi ia dung dipasahat Jahowa, Debatam huta i tu bagasan tanganmu, ingkon mate tampulonmu saluhut baoa isi ni huta i dohot podang.

¹⁴Alai anggo angka parompuan dohot dakdanak dohot pinahan ro di sandok ugasan na di huta i, sandok tabantabanna, jadi do laumonmu di ho jala panganonmu tabantaban sian musum, angka naung pinasahat ni Jahowa, Debatam tu ho.

¹⁵Ingkon songon i do bahenonmu tu saluhut huta angka na holang situtu sian ho, angka na so sian huta ni angka bangso parbegu on.

¹⁶Alai anggo sian isi ni angka huta ni angka bangso parbegu on, angka silehonon ni Jahowa, Debatam tu ho, bahen partalianmu, ndang jadi pangoluonmu nanggo sada na marhosa.

¹⁷Ingkon sun siap nasida bahenonmu, halak Het i, Amori, Kanaan, Perisi, Hevi dohot Jebusi, songon na tinonahon ni Jahowa Debatam tu ho.

¹⁸Asa unang nasida mangajarhon tu hamu mangulahon hombar tu saluhut biasbias, angka na binahennasida pasangap debatanasida i, asa unang mardosa hamu tu Jahowa, Debatamuna i.

¹⁹Tung sura ingkon pola leleng tungkumonmu sada huta mandopang huta i laho papatuhon nian, ndang jadi agoonmu hau na disi, pola ditaba ho angka i marhite sian tangkem, ai tarbahen ho do mangan sian parbuena, ala ni ndang jadi tabaonmu; ai apala doshonjolma anggo hau di ladang tarbahensa laho maradophon ho tu bagasan partanobatoan.

²⁰Alai anggo hau naung binotom hian, ndada hau sipanganon parbuena, jadi do agoonmu jala tabaonmu jala pangkeonmu bahen hubu dompak huta i na marmusu dompak ho, paima patu huta i dibahen ho.

21 ¹(I.) Tung sura jumpang sahalak na mate tartodos di tano, silehonon ni Jahowa, Debatam tu ho bahen partalianmu, bustang di ladang, ndang binoto manang ise na mambunu ibana.

²Ingkon ruar angka sintua dohot panguhum di ho, asa manuhati holangna tu huta angka

na humaliang hapeahan ni jolma na mate tartodos i.

³Jadi manang huta dia na jumonok tu na mate, ingkon buaton ni angka sintua ni huta i sada anak ni lombu, na so dung pinangke dope maninggala, jala na so dung dope hapampean ni auga.

⁴Dung i ingkon togutoguon ni angka sintua ni huta i anak ni lombu i tuat tu sada sunge na tongtong mabaor, na so dung niula dope pasirna manang tarsabur, ingkon ponggolhononhon disi rungkung ni anak ni lombu i martopihon sunge i.

⁵Dung i ingkon ro jumonok angka malim i ma pinompar ni halak Lepi; ai nunga dipillit Jahowa, Debatam nasida bahen parhaladona, dohot mamasumasu marhitehite Goar ni Jahowa, jala marguru tu pandoknasida do marhasunan nasa parsalisian dohot badabada.

⁶Jala sude sintua ni huta i, angka na jumonok tu hapeahan ni halak na mate, ingkon buriannasida tangannasida i di atas ni lombu na pinonggolan rungkungna i martopihon sunge i.

⁷Ingkon dohononnasida huhut songon on: Ndada tangannami mandurushon mudar on, jala ndada matanami marnidasas.

⁸Bahen pardenggan ma on di bangsom Israel naung tinobusmu, ale Jahowa! Sai unang ma manginona mudar na so marpipot

i di tongatonga ni bangsom Israel! Jadi dapotan pardenggan ma nasida lias sian mudar i.

⁹Ingkon songon i do purpurhononmu sapata ni mudar na so marpipot sian tongatongami, ai ingkon ulahononmu do hatigoran di adopan ni Jahowa.

¹⁰(II.) Molo borhat ho laho marporang dompak angka musum, jala Jahowa, Debatam pasahathon musum tu bagasan tanganmu, gabe adong tarboan sian nasida dibahen ho.

¹¹Jadi diida ho di tongatonga ni angka na tarboan i sada parompuan na uli rupa gabe solo roham di nasida, laos dibuat ho nasida bahen jolmam.

¹²Ingkon boanonmu nasida masuk tu bagasan jabum, ingkon gorbangonna uluna jala buatonna sisilonna.

¹³Dung i osaronna ma ulos pinangkena di na tarboan i nasida, laos maringan ma nasida di bagasan jabum huhut mananangisi amana dohot inana sabulan lelengna; dung salpu songon i jadi ma topotonmu nasida gabe harajaanna jala nasida gabe jolmam.

¹⁴Alai tung sura ndang be lomo roham di nasida, ingkon palahoonmu nasida, jadi ma topotonna guru lomo ni rohana, na so tupa gadisonmu nasida, manang marhatobanhon nasida, ala naung sampur ho tu nasida.

¹⁵Tung sura marsiduadua manang ise, parompuan na sada tuanlaenna, na

sadanari dihagigihon, gabe rap tubuan anak, parompuan tuanlaenna dohot na hinagigihonna, jala na hinagigihon i do nampuna anak buhabaju i.

¹⁶Ia dung jumpang ari pangalehonna di teanteanan tinadingkonna i tu angka anakna, ndang tarbahensa pabangkithon gabe anak buhabajuna tubu ni jolma tuan laenna i, saleleng mangolu anak buhabaju ni jolmana na hinagigihonna i.

¹⁷Ingkon tolopanna do anak tubu ni na hinagigihon i do anak buhabajuna, ingkon lehononna tu ibana dua bagian sian saluhut ugasan pineopna i, ai ibana do patumonaan ni hagogoonna, ibana huhut nampuna uhum sahala ni sihahaan.

¹⁸(III.) Tung sura adong di manang ise sada anak na so mangoloi ajar jala na tarboan rohana, ndang ditangihon soara ni amana manang inana, diajar nasida pe ibana, laos so ditangihon do nasida.

¹⁹Ingkon tangkupon ni amana dohot inana ma ibana jala toguonna ibana ruar tu adopan ni angka sintua ni hutana i dohot tu pargumbangan ni hutana i.

²⁰Dung i dohononnasida ma tu angka sintua ni hutana i: Anaknami on ndang mangoloi ajar jala tarboan rohana, ndada ditangihon soaranami, halak pargadombus dohot parminum do ibana.

²¹ Jadi ingkon dangguran ni saluhut baa isi ni hutana i ibana dohot batu, asa mate ibana; ingkon songon i siaphononmu hajahaton i sian tongatongam, asa sandok Israel umbegesa, anggiat mabiar nasida.

²² Tung sura manang ise mambahen dosa, umbahen patut ibana marutang hosa, gabe saut ibana tarbunu, pola targantung ibana tu hau.

²³ Nandang jadi pola sanga marborngin bangkena i gantung di hau i, ingkon tanomonmu ibana di ari na sasada i, ai na hona bura ni Debata do halak na targantung; dibahen i ndang jadi ramunanmu tanomi, na nilehon ni Jahowa, Debatam tu ho bahen partalianmu.

22¹ (I.) Nandang jadi paida daonmu lombu manang birubiru ni hahaanggim laho lilu sian puguanna, laos dipadao ho matam sian i, ingkon toguonmu do i mulak tu donganmu.

² Tung sura pe ndang solhot donganmu tu ho, manang na so tinandam ibana, ingkon pamasuhonmu do i tu bagasan bara ni pinahanmu, asa di lambungmu do i paima usouso donganmu disi, dung i ingkon pasuargonmu tu ibana.

³ Suang songon i do bahenonmu nang taringot tu halodena, laos songon i bahenonmu taringot tu ulosna, laos songon i bahenonmu nang taringot tu saluhut ugasan

na mago, na mago sian donganmu, manang aha pe na jumpang ho, ndang tarbahen ho padaonmu matam sian i.

⁴Ndang jadi paidaidaonmu halode ni donganmu manang lombuna martinggangan di tongan dalan, laos padaonmu matam sian i, ingkon paheheonmu do i rap dohot ibana.

⁵Ndang jadi marpangkean baoa ia parompuan, jala ndang jadi marpangkean parompuan ia baoa; ai manang ise na mangulahon sisongon i, hagigian ni Jahowa Debatam do i.

⁶Tung sura talpe jumpang ho sada asar ni pidong di tongan dalan manang di atas hau dia manang manangkas di tano, maranak poso manang marisi pira, laos inana i mamodomhon anakna manang pirana, ndang jadi buatonmu inana rap dohot angka anakna.

⁷Ingkon paluaonmu do inana, jadi do buatonmu anggo angka anakna, asa marhasonangan ho jala leleng mangolu.

⁸Molo pajongjong bagas na imbaru ho, ingkon bahenonmu do handanghandang humaliang tarup ni bagasmu, asa unang ampehononmu utang mudar tu jabum, tung sura madabu halak sian i.

⁹Ndang jadi mardua ragam boni saburhononmu tu porlak anggurmu, asa unang mago parbue ni boni na sinaburhonmi rap dohot parbue ni porlak anggur hian.

¹⁰Ndang jadi bahenon marsaauga maninggala lombu dohot halode.

¹¹Ndang jadi pangkeonmu ulos na mardua mansam bonangna, sian imput ni birubiru rap dohot hori.

¹²Ingkon bahenonmu di ho angka rambu tu na opat suhi ni sampesampem, na pinangkem manghungkupi dagingmu.

¹³(II.) Tung sura mambuat boru sada baoa, pola sanga sampur nasida, hape magigi ibana muse di nasida.

¹⁴Dung i dipatubutubu gasana jala diparoaroa baritana tu halak, ninna do: Nunga nian hubuat parompuan on bahen jolmangu, hape dung hutopot nasida, gabe ndang jumpang ahu di nasida tanda ni habajuonna.

¹⁵Jadi ingkon boanon ni ama dohot ina ni boruboru i ma boruna, rap dohot tanda ni habajuonna tu adopan ni sintua ni huta i tu partungkoan.

¹⁶Dung i dohonon ni ama ni boruboru i ma tu angka sintua i: Nunga hupamuli nian borungkon tu baoa on bahen jolmana, gabe magigi ibana disi.

¹⁷Jala ida ma, lam dipatubutubu ibana gasana, ninna do: Ndang jumpang ahu di borumon tanda ni habajuonna; hape dison do tanda ni habajuon ni borungkon! Dung i ingkon pahembangonnasida ma ulosna borngin di adopan ni angka sintua ni huta i.

¹⁸Dung i ingkon buaton ni angka sintua ni huta i ma baoa i, laos pungkulonnasida ma ibana.

¹⁹Jala dandoonna ma ibana saratus rupia, lehononnasida ma i tu ama ni boruboru i, ala diparoaroa tu halak goar ni sada boruboru namarbaju di Israel, jala ingkon hot do nasida jolmana, na so tupa bolongkononna nasida saleleng mangolu ibana.

²⁰Alai tung sura sintong hatana i, ndang jumpang tutu tanda ni habajuonna di parompuan i.

²¹Ingkon toguon do parompuan i tu balian pintu ni jabu ni amana, jala dangguran ni halak donganna sahuta do nasida dohot batu, asa mate, ala naung mangulahon haurahon nasida di Israel, tung marmainan nasida di bagasan jabu ni amana; asa tung siap bahenonmu hajahaton sian tongatongami.

²²(III.) Tung sura tardapot sada baoa maruhum na jat tu sada parompuan naung marharajaan, ingkon rap mate do nasida bunuon, nang baoa nang parompuan donganna maruhum na jati; asa tung siap bahenonmu hajahaton sian tongatonga ni Israel.

²³Tung sura adong sada boruboru namarbaju, naung oroan ni sada baoa, hape pajumpang nasida dohot sada baoa na asing di huta i, laos maruhum na jat nasida.

²⁴Ingkon duansa nasida toguon tu balian bahal ni huta i, jala dangguran nasida dohot batu, asa mate; boruboru i ala so mangangguhi nasida atik pe di bagasan huta; baoa i ala ginogoanna jolma ni donganna; asa tung siap bahenonmu hajahaton sian tongatongamu.

²⁵Alai tung sura pajumpang di ladang baoa i dohot boruboru naung oroan i, laos digogoi nasida maruhum na jat, holan sasada baoa na maruhum na jati marutang hosa.

²⁶Alai ndang jadi hahuaonmu anggo boruboru i, ala soada diulahon boruboru i dosa tu hamatean; ai songon sada halak na hehe mangalo donganna, laos diputus hosana, suman tusi do hata on.

²⁷Ai di ladang do nasida jumpangsa, mangangguhi pe boruboru naung oroan i, hape ndang adong nanggo sahalak na tarbahren mangurupi nasida.

²⁸Tung sura pajumpang sada baoa dohot sada boruboru namarbaju na so oroan dope, laos ditangkap nasida jala digogoi nasida maruhum na jat didapot halak.

²⁹Ingkon lehonon ni baoa na maruhum na jat dohot parompuan i limapulu rupia tu ama ni boruboru i, ingkon laos buatonna nasida bahen jolmana, ala naung ginogoanna i nasida, na so tupa bolongkononna nasida saleleng mangolu ibana.

³⁰(23-1) (I.) Nandang jadi pagodangon ni manang ise jolma ni amana, ala naung sampur amana i tu nasida.

23¹(23-2) Ilanggo halak na tarlisat, manang na pinaias ndang jadi masuk tu huria ni Jahowa.

²(23-3) Anak gampang pe ndang jadi masuk tu huria ni Jahowa; nang sundut na pasampuluhon ndang jadi masuk tu huria ni Jahowa.

³(23-4) Halak Amon pe manang Moab ndang jadi masuk tu huria ni Jahowa, nang sundut na pasampuluhon ndang jadi masuk sian nasida tu huria ni Jahowa ro di saleleng lelengna.

⁴(23-5) Ala so ditomutomuhon nasida tu hamu sagusagu manang aek di dalan, uju ruar hamu sian Misir, lam diupai tahe mangalo hamu si Bileam, anak ni si Beor sian Petor di Padang Ram, asa buraanna hamu.

⁵(23-6) Alai ndang olo Jahowa Debatam manolopi hata ni si Bileam, lam dipabalik Jahowa, Debatam bura i gabe pasupasu di ho, ala holong roha ni Jahowa, Debatam mida ho.

⁶(23-7) Nandang jadi luluanmu hadameonnasida manang hasonanganna saleleng ho mangolu ro di salelenglelengna.

⁷(23-8) Nandang jadi marbiasbias roham anggo mida halak Edom, ai haham do ibana; ndang jadi marbiasbias roham nang mida

halak Misir, ai halak dagang do ho na jolo di tanona.

⁸(23-9) Pinomparnasida na tubu patolusunduthon, jadi do i masuk tu huria ni Jahowa.

⁹(23-10) (II.) Molo borhat ho tu parporangan laho mangalo dompak musim, ingkon ramotanmu dirim maradophon nasa hajahaton.

¹⁰(23-11) Tung sura adong di tongatongamu sahalak na ramun, ala bolong bonina bornginna i, ingkon ruar ibana tu balian ni parsaroan, jala ndang jadi ulahanna masuk tu parsaroan i.

¹¹(23-12) Ia dung marhira bodari ingkon didionna dagingna di bagasan aek, ia dung mate mata ni ari, jadi ma ibana masuk tu parsaroan i.

¹²(23-13) Ingkon adong huhut di ho di balian ni parsaroan sada inganan sitopotonmu laho haduru.

¹³(23-14) Angkup ni angka sinjatam ingkon adong di ho sada siuksiuk, asa ia laho ho haduru ingkon pangkeonmu do i mangkali godunggodung, jala hungkupanmu muse ginagatmu.

¹⁴(23-15) Ai Jahowa, Debatam mardalandalan di tongatonga ni parsaroanmu laho paluahon ho sian parmaraan laho pasahathon anggo musim tu ho. Dibahen i ingkon badia do parsaroanmu, asa

unang adong idaonna di tongatongami tau haurahon, asa unang manginsurut Ibana sian lambungmu.

¹⁵(23-16) (III.) Nandang jadi pasahatonmu sada hatoban mulak tu tangan ni indukna, dung sapala maporus ibana tu ho tumadingkon indukna.

¹⁶(23-17) Pasombu ibana maringan di lambungmu di tongatongamu, di inganan pinillitna i di bagasan sada sian angka hutam, marguru tu lomo ni rohana, ndang jadi rupaonmu ibana.

¹⁷(23-18) Nandang jadi adong sian boru ni halak Israel na pasahathon dirina mangulahon parmainanon, jala ndang jadi adong anak ni halak Israel na pasahathon dirina mangulahon parmainanon.

¹⁸(23-19) Nandang jadi boanonmu upa parmainanon, manang hepeng tuhor ni sada biang masuk tu joro ni Jahowa, Debatam bahen garar ni bagabaga manang dia; ai marbiasbias do roha ni Jahowa, Debatam mida duansa.

¹⁹(23-20) Nandang jadi jaloонmu bunga sian donganmu, manang bunga ni hepeng, manang bunga ni sipanganon, manang bunga ni ugasan dia pe, na somal marbunga dibahen halak.

²⁰(23-21) Anggo sian halak sileban jadi do jaloонmu bunga, alai anggo tu donganmu ndang jadi bahenonmu marbunga manang

aha, asa pasupasun ni Jahowa Debatam ho di saluhut na jinama ni tanganmu, di tano sitopotonmi bahen partalianmu.

²¹ (23-22) Tung sura naung marbagabaga, ho tu Jahowa, Debatam, ndang jadi ho marlemba manggararsa; ai sai na tungguon ni Jahowa, Debatam do i sian ho, jala gabe dosa do i di ho, tung sura.

²² (23-23) Alai tung sura unang nian ho marbagabaga ndang dosa i di ho.

²³ (23-24) Alai anggo hata naung puas sian pamanganmu, ingkon ingotonmu do i jala ulahononmu, songon naung pinorbagabagam tu Jahowa, Debatam sian lomo ni roham, pola naung pamanganmu marbagabagahon.

²⁴ (23-25) Molo masuk ho tu bagasan porlak anggur ni donganmu, jadi do panganonmu parbue ni anggur guru sombu ni roham, maradu mahap ho; alai ndang jadi bahenonmu tu hadanghadanganmu nanggo sada.

²⁵ (23-26) Molo mamolus ho sian hauma ni donganmu sigotilon, jadi do gotilonmu biurna dohot tanganmu, alai ndang jadi pola sabihononmu sasabim tu hauma ni donganmu.

24¹ (I.) Tung sura sada baoa mambuat sada parompuan bahenjolmana, hape marsogo ni roha ibana muse mida nasida, ala adong jumpangsa di nasida manang aha tau tihasma, ingkon suratonna di nasida sada

surat sirang jala lehononna do i tu bagasan tangannasida, laos palahoonna nasida sian jabuna.

²Ia dung ruar nasida sian jabuna i, laos laho gabejolma ni halak na asing.

³Hape magigi muse dohot baoa na asing i mida nasida, laos disurathon di nasida sada surat sirang, jala dilehon tu tangannasida i jala dipalaho nasida sian jabuna; manang tung sura mate baoa na asing i, naung mambuat nasida bahenjolmana:

⁴Ndang tarbahen harajaanna parjolo i, naung marsuru nasida mulak, mambuat nasida muse naeng gabejolmana, dung gabe ramun nasida, ai marbiasbias do roha ni Jahowa disi, jala ndang jadi mardosa bahenonmu tano naung nilehon ni Jahowa, Debatam tu ho bahen partalianmu.

⁵Tung sura sada baoa nambura mangalapjolmana, ndang jadi borhat ibana tu parporangan, jala ndang jadi dais tu ibana manang aha ulaon rodi, ingkon malua ibana patureture bagasna sataon lelengna, asa marlas ni roha ibana rap dohotjolmana, na binuatna i.

⁶(II.) Ndang jadi jaloona bahen singkoram batu pandudaan partoru manang parginjang, ai hira hosa ni halak sandiri jinalona disi bahen singkoram.

⁷Tung sura adong jumpang sada baoa na mamangus sahalak sian angka hahaanggina,

sian halak Israel tahe, laos diparhatoban ibana manang digadis, ingkon marutang hosa pamangus sisongon i, asa tung siap bahenonmu hajahaton sian tongatongami.

⁸Ramoti dirim taringot tu sahiti puru, mangaringkoti situtu mangulahon saluhut hombar tu na pinodahon ni angka malim dohot halak Lepi tu hamu; songon na hutonahon i tu nasida, ingkon songon i do ringkotanmuna mangulahon.

⁹Sai ingot ma na binahen ni Jahowa, Debatam tu si Miryam, di tongan dalan, uju na ruar i hamu sian Misir!

¹⁰Tung sura dipautang ho donganmu di manang aha, ndang jadi ho masuk tu bagasan jabuna laho manjalo singkoram sian ibana.

¹¹Ingkon tinggal ho jongjong di balian, jala baoa na pinautangmi ruar mandapothon ho, mamboan singkorami tu balian.

¹²Alai tung sura baoa na pogos ibana, ndang jadi ho laho modom rap dohot singkoram nilehonna i.

¹³Ingkon pasuargonmu tu ibana singkorami, disi mate mata ni ari, asa modom ibana marbulusan di bagasan ulosna sandiri, jala pasupasunya ho, ingkon gabe hatigoranmu do i di adopan ni Jahowa, Debatam.

¹⁴N dang jadi rupaonmu anak gajian na mardangoldangol jala na pogos, manang sian hahaanggim manang sian halak dagang na

maringan di tanomi, di bagasan sada sian angka hutam.

¹⁵Ingkon jalojalo ganup ari lehononmu upana, jumolo asa mate ni ari, ala marsiak bagi ibana jala upana i do na pinarbaga ni rohana, unang pola sanga joujou ibana tu Jahowa mangalualuhon ho gabe dosa do i di ho.

¹⁶Ndang jadi marutang hosa amaama ala angka anakna, angka anak i pe ndang jadi marutang hosa ala amana, ingkon ganup ala dosana sandiri mate.

¹⁷Ndang jadi papeolonmu uhum tu halak dagang dohot tu dakdanak na sopot so marama, jala ndang jadi buatonmu ulos ni parompuan na mabalu bahen singkoram.

¹⁸Ingkon paingotingoton ni roham tahe, hatoban do ho na jolo di Misir, hape nunga ditobus Jahowa, Debatam ho sian i, ala ni do umbahen hudokkon ho mangulahon sisongon i.

¹⁹Tung sura naung sun digotil ho sigotilonmi di haumam, hape lupa ho di sada tibalán tinggal di haumam, ndang jadi ho mulak mangalapsa, ingkon halak dagang, dakdanak na sopot so marama dohot parompuan na mabalu nampunasa, asa pasupasun ni Jahowa, Debatam ho di saluhut ulaon ni tanganmu.

²⁰Ia dung suda dijungkiti ho parbue ni hau jetunmu, ndang jadi ulahanmu mandiori

angka dangkana; ingkon halak dagang, dakdanak na sopot so marama dohot parompuan na mabalu nama nampunasa.

²¹ Ia dung suda ditapu ho parbue ni porlak anggurmu, ndang jadi ulahanmu manjomputi; halak dagang, dakdanak na sopot so marama dohot parompuan na mabalu nama nampunasa.

²² Ingkon paingotingoton ni roham do, hatoban do nang ho na jolo di tano Misir; ala ni do umbahen hudokkon ho mangulahon sisongon i.

25¹ (I.) Tung sura marparsalisian dua baoa, ingkon boanon do nasida tu adopan ni paruhuman pauhumhonsa, ingkon pintoran ma halak partigor, jala toruan do halak parjahat.

² Tung sura patut hona pungkul halak parjahat i, ingkon dohonon ni panguhum ibana marsinggang, asa hona pungkul ibana di adopanna marguru tu hajahatonna godangna.

³ Opatpulu hali do na jadi ibana pungkulon, unang ganda, asa unang sai didatdati mamungkul ibana lobi sian i, atik tung magodangku maon pungkulpungkuli, gabe marlea donganmu di adopanmu.

⁴ Nandang jadi huntamonmu baba ni horbo, uju mardege ibana.

⁵ (II.) Molo tampak maringan halak na marhahamaranggi, hape mate sahalak sian

nasida ndang tubuan anak, ndang jadi pamulion parompuan, jolma ni halak na mate bahen jolma ni halak ruar, ingkon anggina i do mareakkon nasida bahen jolmana pajongjongkon pomparan di hahana.

⁶Ia anak buhabaju na tinubuhonna i ingkon marpanggoarhon goar ni amana na mate, asa unang pidom goarna i sian Israel.

⁷Alai tung sura ndang lomo roha ni baoa i pagodangkon jolma ni hahana i, ingkon nangkok jolma ni hahana i tu harbangan ni huta i mandapothon angka sintua huhut mandok: Manjua do anggingki pajongjongkon goar ni hahana di Israel, ndang olo ibana mangabia ahu.

⁸Dung i ingkon jouon ni angka sintua ni huta i ma ibana huhut mangapoi ibana; hape molo tong dipirhon rohana i mandok: Ndang lomo rohangku mangabia nasida.

⁹Ingkon ro ma jumonok jolma ni hahana i tu lambungna di adopan ni angka sintua i, laos tanggalanna ma sipatuna sian patna jala tijuranna bohina, huhut dohononna mangalusi: Ingkon songon i do bahenon tu baoa, na so olo pajongjong pomparan tu hahana.

¹⁰Jala ingkon dohonon ni halak goarna di Israel: Jabu ni halak naung tinanggalan sipatuna.

¹¹(III.) Molo marparsalisian dua baoa sama donganna, gabe ro tahop jolma ni na sahalak

naeng paluahon sinondukna sian tangan ni na mambunu ibana, gabe disoro tanganna laos ditiop na niabitanna.

¹²Ingkon gotaponmu tangan ni parompuan i, ndang jadi moralangalang roham.

¹³N dang jadi mardua batu timbangan ho peoponmu di bagasan hajutmu, sada na balga jala sada na metmet.

¹⁴N dang jadi mardua ampang ho di bagasan jabum, sada na balga sada na metmet.

¹⁵Ingkon marbatu timbangan na botul jala na sintong ho, ingkon marampang na botul jala na sintong ho, asa lelung ho mangolu di tano, silehonon ni Jahowa, Debatam tu ho.

¹⁶Ai marbiasbias do roha ni Jahowa, Debatam mida ganup jolma na mangulahon sisongon i, mida ganup jolma tahe na mangulahon hageduhon.

¹⁷(IV.) Ingkon paingotingoton ni roham do uhum na binahen ni halak Amalek tu ho di tongan dalan, uju na ruar i hamu sian Misir.

¹⁸Na niambatambatna i ho di tongan dalan jala binununa sian ho luhut halak na mandate angka na ro sian pudi, uju na maheu ho jala loja, gabe so marhabiaran ibana tu Debata.

¹⁹Ia dung marhasonangan ho, dibahen Jahowa, Debatam maradophon sude angka musum humaliang di tano silehonon ni Jahowa, Debatam tu ho bahen partalianmu, ingkon siaphononmu ma parningotan di

halak Amalek sian toru ni langit; ndang jadi halupahononmu.

26¹ (I.) Ia dung masuk ho tu tano, silehonon ni Jahowa, Debatam tu ho bahen partalianmu, dung disoluk ho tano i laos maringan disi.

²Ingkon buatonmu ma sian patumonaan ni sandok parbue ni tano i, na dapot ho sian tanomi, naung nilehon ni Jahowa, Debatam tu ho, jala pamasuhonmu do i tu bagasan amfang, jala boanonmu do i tu inganan sipilliton ni Jahowa, Debatam bahen inganan di Goarna.

³Dung i ingkon topotonmu ma malim di angka ari uju i, jala dohononmu tu ibana: Na pabotohon ma ahu sadarion di adopan ni Jahowa, Debatam, naung masuk ahu tu tano, naung niuarihon ni Jahowa hian tu angka ompunami, lehononna tu hami.

⁴Dung i ingkon buaton ni malim i ma hirang i sian tanganmu jala peakkononna do i di adopan ni langgatan ni Jahowa, Debatam.

⁵Dung i dohononmu ma hatam mandok songon on di adopan ni Jahowa, Debatam: Halak Ram na madoado do anggo damang, dung i tuat ibana tu Misir, laos mardagangdagang disi, mardongan otikjolma, hape gabe bangso na bolon, na gogo jala na torop bilanganna ibana disi.

⁶Alai ro ma halak Misir mambahen na so uhum tu hami, jala dirupa hami, jala diampehon ulaon na poran tu hami.

⁷Jadi manganguhi ma hami tu Jahowa, Debata ni ompunami, gabe ditangihon Jahowa do soaranami jala marpanatap rohana di pardangolan, hangaluton dohot hagogotan na huahap hami.

⁸Dung i ditogihon Jahowa ma hami ruar sian Misir marhite sian tangan na gogo dohot marhite sian botohon na toltol dohot marhite sian hasonggoton bolon, mardongan angka tanda dohot halongangan.

⁹Jala diboan hami sahat tu inganan on, jala dibasabasahon tu hami tano on, tano habaoran ni susu dohot situak ni loba.

¹⁰Nuaeng pe, ida ma, ahu mamboan patumonaan ni parbue ni tano, na nilehonmi tu ahu, ale Jahowa! Laos tinggalhononmu ma ampangi di adopan ni Jahowa, Debatam jala marsomba ho di adopan ni Jahowa, Debatam.

¹¹Jala ingkon marlas ni roha ho mida sude na denggan naung nilehon ni Jahowa, Debatam tu ho dohot tu isi ni bagasmu; songon i ho ro di halak Lepi dohot halak dagang na di tongatongami.

¹²(II.) Ia dung sun dipapungu ho sandok parpulan ni gogo ni tanomu di taon patoluhon, i ma taon parpulan, jala ia dung dilehon ho tu halak Lepi, tu halak dagang, tu dakdanak na sopot so marama dohot tu

parompuan na mabalu, asa mangan nasida di bagasan angka hutam jala bosuran.

¹³Ingkon dohononmu ma di adopan ni Jahowa, Debatam: Nunga hupaholang ugasan na badia sian jabu i, angkup ni nunga hulehon tu halak Lepi, tu halak dagang, tu dakdanak na sopot so marama dohot tu parompuan na mabalu, hombar tu sandok tonami, naung tinonahonmu tu ahu, ndang hulaosi nanggo sada sian angka tonami, jala ndang huhalupahon.

¹⁴Ndang adong na hupangan sian i uju di hinamagongku, jala ndang adong hubuati sian i laho paramunhon, jala ndang adong hulehon sian i bahen boan ni na mate. Nunga hutangihon soara ni Jahowa, Debatangku, nunga hubahen sandok hombar tu na tinonahonmi tu ahu.

¹⁵Sai manatap ma Ho sian ingananmu na badia i, sian banua ginjang i, sai pasupasu huhut bangsom Israel dohot tano naung nilehonmu tu hami, songon naung niuarihonmu tu ompunami, tano habaoran ni susu dohot situak ni loba.

¹⁶(III.) Apala sadarion ma Jahowa, Debatam manonahon tu ho, ingkon ulahononmu angka aturan on dohot uhum, ingkon radotanmu jala ulahononmu angka i sian nasa roham dohot sian nasa ateatem.

¹⁷Nunga diparbaga ho sadarion ingkon Jahowa do Debatam, jala ingkon marparange

ho di angka dalanna, jala ingkon radotanmu angka aturanna, angka tonana dohot uhumna, jala ingkon tangihononmu soarana.

¹⁸Jahowa i pe nunga marbagabaga tu ho sadarion, ingkon ho do gabe bangso hapunjunganna, songon naung pinarbagabagana i hian tu ho, jala ingkon radotanmu sude angka tonana.

¹⁹Asa Ibana mambahen ho tumimbul sian saluhut bangso parbegu, angka naung jinadihonna bahen pujipujian dohot marbarita dohot bahen hamuliaon, jala asa ho gabe bangso na badia di Jahowa, Debatam, songon naung nidokna hian.

27¹(I.) Dung i ro ma hata ni si Musa dohot angka sintua ni Israel mandok tu situasi na torop i: Radoti hamu ma sandok tona, angka na hutonahon i tu hamu sadarion.

²Ia dung ditaripari hamu Jordan sahat tu tano silehonon ni Jahowa, Debatam tu ho, ingkon pajongjongonmu ma di ho angka batu na bolon, jala sampangonmu angka i dohot hapur.

³Ingkon uhirhononmu ma tusi sude hata ni patikon, dung taripar ho, asa tung masuk ho tu tano silehonon ni Jahowa, Debatam tu ho, tano habaoran ni susu dohot situak ni loba do i, songon naung pinorbagabaga ni Jahowa, Debata ni angka ompum, hian tu ho.

⁴Ia dung ditaripari hamu Jordan, ingkon pajongjongonmuna ma angka batu on,

songon na hutonahon i di hamu sadarion, di atas dolok Ebal, jala sampangonmu do angka i dohot hapur.

⁵Ingkon pajongjongonmu huhut disi sada langgatan di Jahowa, Debatam, sada langgatan sian batu, ndang jadi mangonai tusi anggo bosi.

⁶Ingkon sian batu angka na so nidakdak pajongjongonmu langgatan ni Jahowa, Debatam, asa mamelehon di atasna angka pelean situtungon di Jahowa, Debatam.

⁷Ingkon pelehononmu huhut angka pelean hamauliateon, laos panganonmu disi, jala marlas ni roha ho di adopan ni Jahowa, Debatam.

⁸Ingkon torang jala paltak situtu uhirhononmu tu angka batu i sude hata ni patikon.

⁹Dung i ro ma hata ni si Musa dohot angka malim ro di halak Lepi mandok tu sandok Israel: Hohom be ma hamu patangitangihon ale Israel! Apala sadarion ma na niain ni Jahowa, Debatam ho bahen bangsona.

¹⁰Dibahen i sai tangihon ma soara ni Jahowa, Debatam jala ulahon angka tonana dohot aturanna, angka na hutonahon i tu ho sadarion.

¹¹(II.) Dung i ro muse hata ni si Musa tu bangso i di na sadari i songon on:

¹²Angka marga on ingkon jongjong di atas dolok Gerizim manjouhon pasupasus tu bangso

i, ia dung ditaripari hamu Jordan: Simeon, Lepi, Juda, Isasar, Josep dohot Benjamin.

¹³Jala angka marga on ingkon jongjong di atas dolok Ebal mangkonahon torutoru: Ruben, Gad, Aser, Zebulon, Dan dohot Naphtali.

¹⁴Dung i pangiaron ni halak Lepi ma soaranasida i mandok tu sandok bangso Israel:

¹⁵Hona toru ma manang ise na mambahen sada ganaganaan, na niuhir manang na tinuang, hagigian ni Jahowa, jadijadian ni tangan ni halak pande, jala dipajongjong do i di inganan na buni! Dung i alusan ni sandok bangso i ma, mandok: Amin!

¹⁶Hona toru ma manang ise na ro lea mida amana manang inana. Dung i dohonon ni sandok bangso i ma: Amin!

¹⁷Hona toru ma manang ise na paorot talutuk tu hauma ni donganna! Dung i dohonon ni sandok bangso i ma: Amin!

¹⁸Hona toru ma manang ise na mangaliluhon halak na mapitung di dalan! Dung i dohonon ni sandok bangso i ma: Amin!

¹⁹Hona toru ma manang ise na papeol uhum tu halak dagang, tu dakdanak na sopot so marama dohot tu parompuan na mabalu! Dung i dohonon ni sandok bangso i ma: Amin!

²⁰Hona toru ma manang ise na pagodangjolma ni amana, ala naung sampur amana tu

nasida! Dung i dohonon ni sandok bangso i ma: Amin!

²¹ Hona toru ma manang ise na sampur tu manang dia pinahan! Dung i dohonon ni sandok bangso i ma: Amin!

²² Hona toru ma manang ise na sampur tu ibotona, tubu ni amana manang tubu ni inana! Dung i dohonon ni sandok bangso i ma: Amin!

²³ Hona toru ma manang ise na sampur tu simatuana boru! Dung i dohonon ni sandok bangso i ma: Amin!

²⁴ Hona toru ma manang ise na manodos donganna marsibuni! Dung i dohonon ni sandok bangso i ma: Amin!

²⁵ Hona toru ma manang ise na manjalo sisip, laho mamutus hosa ni halak mandurushon mudar na so marpipot! Dung i dohonon ni sandok bangso i ma: Amin!

²⁶ Hona toru ma manang ise na so mangkajongjongkon angka hata ni patikon laho mangulahon angka i! Dung i dohonon ni sandok bangso i ma: Amin!

28¹ (I.) Molo tung tinggil situtu roham tumangihon soara ni Jahowa, Debatam, mangaringgas roham mangulahon patikna, angka na hutonahon i tu ho sadarion, jadi pabangkiton ni Jahowa, Debatam ma ho tumimbul sian nasa bangso di tano on.

² Songgop ma huhut tu ho sude angka pasupasuon jala pasahatonna tu ho, molo ditangihon roham soara ni Jahowa, Debatam.

³ Pasupasuonna ma ho di bagasan huta, pasupasuonna ho huhut di ladang.

⁴ Pasupasuonna parbue ni bortianmi dohot parbue ni tanomi, pasupasuonna ma sinur angka dorbiam, lombum dohot birubirum.

⁵ Pasupasuonna ampangmu dohot pangudianmu.

⁶ Pasupasuonna ho laho bongot, jala pasupasuonna ho laho ruar.

⁷ Pasahaton ni Jahowa do angka musum angka na hehe mangalo ho, asa marragean nasida di adopanmi; marhite sian sada dalan nasida borhat mandopang ho, ingkon marhite sian pitu dalan nasida maporus maradophon ho.

⁸ Dokkonon ni Jahowa ma pasupasu mandongani ho di bagasan angka sopom dohot di saluhut na jinama ni tanganmu, jala pasupasuonna do ho di tano na nilehon ni Jahowa, Debatam tu ho.

⁹ Pahoton ni Jahowa ma ho gabe bangsona na badia, songon naung niuarihonna hian tu ho, molo tung diradoti ho angka tona ni Jahowa, Debatam, jala marparange ho di angka dalanna.

¹⁰ Asa tung saluhut bangso di tano on marnida, naung targoar do ho tu Goar ni Jahowa, laos mabiar nasida mida ho.

¹¹ Jala tumpahan ni Jahowa ma ho marlobilobi di na denggan, di parbue ni bortianmu, di sinur ni pinahanmu dohot di parbue ni tanomi di tano naung niuarihon ni Jahowa hian tu angka ompum, lehononna tu ho.

¹² Buhaon ni Jahowa ma di ho parpeopan ni artana na denggan i, i ma langit i, laho mangalehon udan tu tanomi di tingki halehetanna, huhut mamasumasu sandok jadijadian ni tanganmu, gabe ho parsalian ni torop bangso parbegu, alai anggo ho na so tupa marsali.

¹³ Jala pabangkiton ni Jahowa ma ho gabe ulu (ihutan), unang gabe ihur (pangihutihut); ingkon tongtong do ho di ginjang, ndang jadi ho di toru, molo tung ditangihon roham angka patik ni Jahowa, Debatam, angka na hutonahon i tu ho sadarion ringkotanmu jala ulahononmu.

¹⁴ Molo tung so manimbil ho tu siamun manang tu hambirang sian saluhut hata, angka na hutonahon i tu hamu sadarion, unang tung ihuthononmu angka debata sileban laho marsomba tusi.

¹⁵ (II.) Alai tung sura so ditangihon ho soara ni Jahowa, Debatam, asa mangaringkoti mangulahon angka uhumna dohot aturanna, angka na hutonahon i tu ho sadarion, songgop ma tu ho sude angka torutoru on jala mangonai tu ho.

¹⁶Hona toru ho di bagasan huta, jala hona toru ho di ladang.

¹⁷Hona toru ampangmu dohot pangudianmu.

¹⁸Hona toru parbue ni bortianmu dohot parbue ni tanomi, nang anak poso ni lombum dohot birubirum.

¹⁹Hona toru ho laho bongot jala hona toru ho laho ruar!

²⁰Tongoson ni Jahowa ma tu tongatongamu torutoru, hagaoron dohot hinamago di saluhut na jinama ni tanganmu, na niulami, paima sun siap ho jala mago magira, binahen ni hinaroa ni angka pambahenanmu, ala na tinadingkonmi Ahu.

²¹Sai marnehetneheth do di tongatongamu begu antuk bahenon ni Jahowa, paima siaphononna ho sian tano sitopotonmu nuaeng bahen partalianmu.

²²Toruan ni Jahowa ma ho marhite sian sahith tiarap, panepane, rojan, arun dohot marhite sian podang, sirara dohot antingano, sai lotonganna do ho paima mago ho.

²³Langgo langit na di atas ulum gabe tombaga, jala tano na di torum gabe bosi.

²⁴Lehonon ni Jahowa ma horsik dohot orbuk singkat ni udan tu tanomi, madabu do i tu ho sian langit, paima mago ho.

²⁵Pasahaton ni Jahowa ma ho marragean di adopan ni musum; marhite sian sada dalan ho borhat mandopang musum, hape marhite sian pitu dalan ho maporus maradophon

ibana, jala marsipal ho bahenonna di sude harajaon na di tano on.

²⁶Ia bangkem ingkon gabe sipanganon di sandok pidong na di toru ni langit dohot di binatang na di tano on, jala ndang adong nanggo sahalak na olo mangalele.

²⁷Toruan ni Jahowa ma ho marhite sian puru Misir, dohot marhite sian baro, gurap dohot rasa na so hadaonan.

²⁸Toruan ni Jahowa ma ho marhite sian roha na rintik dohot na lalaen, tole marhite sian hapitungon.

²⁹Jadi ingkon dadapdadap ma ho di hos ni ari, songon pandadapi ni halak na mapitung di haholomon, jala ndang mardohar ho di angka dalanmu, ingkon ripe rupaon jala pupusan ho saleleng ho mangolu, jala so adong sipalua di ho nanggo sahalak.

³⁰Olionmu nian sada parompuan bahen jolmam, hape halak na asing marjolmahon; pajongjongonmu do nian sada jabu, alai ndang sanga ingananmu; pungaonmu do nian sada porlak anggur, hape ndang sanga panganonmu parbuena.

³¹Seaton ni halak ma lombum di adopan ni matam, hape ndang panganonmu sian i; laumon ni halak do halodem sian jolom, hape ndang pasuangonna tu ho; ripe tabanon ni angka musim do birubirum, jala so adong sipalua di ho nanggo sahalak.

³²Angka anakmu dohot borum pasahatonna tu bangso na asing, paidaidaon ni matam maradu lotop binahen ni siholmu tu nasida manipat ari, hape ndang marnangon tanganmu martangiang tu Debata.

³³Ia parbue ni tanomi ro di sude na hinangaluthonmi, suda do i panganon ni sada bangso na so tinandam, ingkon ripe rupaon jala pupusan ho saleleng ho mangolu.

³⁴Ingkon mago roham bahenon ni panuluthon ni matam, paidaida saluhutna i.

³⁵Toruan ni Jahowa ma ho marhite sian puru na rahat di ulu ni totmu dohot di haehaem, angka na so hadaonan olat ni palak ni patmu sahat ro di pakpak ulum.

³⁶Pabalion ni Jahowa ma ho rap dohot rajam, na pinabangkitmi gumomgom ho tu sada bangso parbegu, na so tinandam jala na so tinanda ni angka ompum, jadi oloanmu ma disi angka debata sileban sian hau dohot sian batu.

³⁷Jala ingkon gabe hagigian ho, gabe pambuatan umpama dohot alingalingan di tongatonga ni saluhut bangso, habalianmu bahenon ni Jahowa.

³⁸Godang do nian boni boanonmu ruar manaburhon tu ladangmu, hape otik do papunguonmu, ai suda do i gagaton ni sihapor.

³⁹Pungkaonmu do nian angka porlak anggur jala pauliulionmu, hape ndang

sanga inumonmu anggur sian i manang tapuonmu parbuena, ai suda do i panganon ni gulokgulok.

⁴⁰Tubu do nian di ho angka hau Jetun di saluhut tanomi humaliang, alai ndang tagamon miahanmu dagingmu dohot miak, ai marurus boti do angka parbue ni hau Jetunmu.

⁴¹Tubuhononmu do nian angka anak dohot boru, hape ndang adong tinggal anggo di lambungmu, ai ingkon mardalan tu habuangan do nasida.

⁴²Suda do palpalan ni tamponok sude hau sinuanmu dohot parbue ni tano i.

⁴³Ia halak dagang na di tongatongami lam leleng ingkon lam naek manindi ho, alai anggo ho lam leleng ingkon lam surut do.

⁴⁴Balik ibana pasali ho, alai anggo ho ndang tagamon parsalianna; ibana balik gabe ulu, alai anggo ho gabe ihur.

⁴⁵Sai na songgop do tu ho saluhut torutoru on jala lotonganna ho, jala mangonai tu ho, paima siap ho, ala na so tinangihonmu soara ni Jahowa, Debatam, mangaradoti angka patikna dohot aturanna, angka na tinonahonna tu ho.

⁴⁶Ingkon gabe tanda dohot halongangan angka i di ho dohot di pinomparamu ro di salelelelengna.

⁴⁷Luhutna i ala na so nioloanmu Jahowa, Debatam, mardongan las ni roha dohot

sonang ni roham, mida hinagodang ni saluhutna i.

⁴⁸Ingkon marpandapotan nama ho tu musum, angka sisuruon ni Jahowa mangalo ho, pataontaon haraparon, hauason, parsaemaraon dohot hahurangan marragamragam, jala pampeon ni Jahowa do auga bosi tu rungkungmu, paima agoonna ho.

⁴⁹Boanon ni Jahowa ma sada bangso parbegu sian na dao, sian ujung ni tano on mangalo ho, songon parhabang ni pidong raja wali, sada bangso na so niantusanmu pangkulingna.

⁵⁰Sada bangso na murhing marbohi, na so moralangalang mida halak na tuatua, jala na so marasi ni roha mida dolidoli.

⁵¹Suda do panganonna anak ni pinahanmu dohot parbue ni tanomi, paima sun siap ho, ndang tebahononna di ho eme, anggur, miak, angka anak ni lombum dohot birubirum, paima sun siap ho bahenonna.

⁵²Jala tarsosak ho bahenonna di saluhut angka hutam, paima maloha dibahen parikmu angka na timbo jala na togu, pangatauan ni roham nian di sandok tanomi; tongon tahe tarsosak do ho bahenonna di saluhut angka hutam di sandok tanomi, silehonon ni Jahowa, Debatam tu ho.

⁵³Lam panganonmu do parbue ni bortianmu sandiri, sibuk ni angka anakmu dohot borum,

angka naung nilehon ni Jahowa, Debatam tu ho, binahen ni hagogotan dohot pardangolan na sinosakkon ni angka musum tu ho.

⁵⁴Gari baoa na buas hian di tongatongamu jala na margadombus situtu, somor pamerengna mangiburu mida hahaanggina dohot mida jolmana tuan laenna hian dohot mida pasipasi ni anakna angka na tinggal dope mangolu.

⁵⁵Asa unang nian lehononna tu sada sian nasida sian sibuk ni anakna sandiri na pinanganna; ala so adong teba di ibana agia aha di bagasan hagogotan dohot pardangolan, na pinasosaksosak ni musumi ho di bagasan saluhut angka hutam.

⁵⁶Gari parompuan na buas hian di tongatongamu jala na margadombus, pola ndang somal mangojakkon palak ni patna tu tano dibahen pargadombusonna dohot buasna, somor matana mangiburu mida baoa bangunan ni rohana dohot mida anakna dohot mida boruna.

⁵⁷Unang nian lehononna tusi pusok ni posoposo naung ruar sian holangholang ni patna, manang mida posoposo naung tinubuhonna i, ai naeng do i panganonna di sihabunian, ala hurangan ibana di saluhutna, di bagasan hagogotan dohot pardangolan na pinasosaksosak ni musumi ho di bagasan angka hutam.

⁵⁸Molo tung so ringkotanmu mangulahon saluhut hata ni patikon, angka na tarsurat di bagasan buku on, asa marhabiaran ho tu Goar na marmulia on dohot na songkal, i ma Jahowa, Debatam.

⁵⁹Marhasurungan ma torutoru tu ho dohot tu pinomparmu bahenon ni Jahowa, torutoru angka na bolon dohot na tongtong, ro di angka sahiti na rahat jala na leleng honahononna tu ho.

⁶⁰Jala marsibalik mangonai tu ho bahenonna saluhut sahiti na masa di Misir, angka na hinabiaranmu na jolo, i ma angka na mangonai tu ho.

⁶¹Tole muse saluhut sahiti dohot torutoru angka na so tarsurat di bagasan angka buku patikon, pasonggopon ni Jahowa do i tu ho, paima siap ho.

⁶²Jadi otik nama jolma tinggal sian hamu, atik pe tudoshon bintang na lohote di langit hinatoropmu na jolo, ala so ditangihon ho soara ni Jahowa, Debatam.

⁶³Jadi ia songon i las ni roha ni Jahowa mida hamu na jolo, mambahen uhum na denggan tu hamu dohot patorophon hamu, suang songon i marlas ni roha Jahowa mida hamu laho mangago dohot maniaphon hamu, jala butbutanna hamu sian tano simasukanmuna nuaeng bahen partalianmu.

⁶⁴Ai paserahon ni Jahowa ma ho tu tongatonga ni angka bangso, sian ujung ni

tano on na sada tu ujungna na sadanari, jadi oloanmu ma disi debata sileban sian hau dohot sian batu, angka na so tinandam hian manang angka ompumu pe.

⁶⁵ Angkup ni ndang tagamon marhasonangan ho di tongatonga ni angka bangso i, jala ndang adong pangulonon di palak ni patmu, ai lehonon ni Jahowa do tu ho disi roha na tongtong godoron dohot mata na rondaron dohot ateate na marpandelea.

⁶⁶ Jadi gantung nama ngolum di obuk sada di adopanmu, jala marhatahuton ho borngin dohot arian, jala ndang be nalom roham di ngolum.

⁶⁷ Manogotna i dohononmu: Oe aut haru bodari ma nian! Jala bodarina i dohononmu: Aut haru torang ari ma nian! Binahen ni biar ni roham do i, na mambiarbiari ho dohot binahen ni hinamago angka na niida ni matam.

⁶⁸ Dung i mulak ho tu Misir boanon ni Jahowa di bagasan angka parau, sian dalan naung pola hupaboa nian tu ho: Nandang jadi be idaonmu i, jala gadison do hamuna disi tu angka musumuna bahen hatoban baoa dohot parompuan nian, hape ndang adong halak na olo manuhor.

29¹ (28-69) On do hata ni parpadanan na nidokkon ni Jahowa tu si Musa bahenonna tu halak Israel di tano Moab, di

balik ni parpadanan naung binahenna i tu nasida di Horeb.

²(29-1) (I.) Dung i dipaluhut si Musa ma sandok Israel jala didok tu nasida: Nunga diida hamu sude naung binahen ni Jahowa di adopan ni matamuna di tano Misir tu si Firaun dohot tu sude naposona dohot tu sandok tanona:

³(29-2) Angka pangunjunan bolon, angka naung niida ni matamu, angka tanda dohot halongangan na bolon i!

⁴(29-3) Hape laos so dilehon Jahowa dope tu hamu roha na marateatehonsa manang mata na marnidasa, manang pinggol na umbegesa rasirasa sadarion.

⁵(29-4) Jala Ahu mangiringiring hamu opatpulu taon lelengna di halongonan, ndang pola buruk ulosmuna di dagingmuna, sipatum pe ndang buruk di patmu.

⁶(29-5) Nandang mangan sagusagu hamu jala ndang minum anggur hamu, manang siinumon na horas, asa tung diboto hamu, Ahu do Jahowa, Debatamuna i.

⁷(29-6) Jadi dung sahat hamu tu inganan on, ruar ma si Sihon, raja di Hesbon dohot si Og, raja di Basan naeng manjumpangkon hita laho marmusu, hape talu do nasida itabahen.

⁸(29-7) Laos italaum do tanonasida i, jala italehon do i tu halak Ruben, Gad dohot tu na satonga marga Manasse bahen partalianna.

⁹(29-8) (II.) Antong ringkoti hamu ma hata ni parpadanan on, jala ulahon hamu angka i, asa marsihohot rohamuna di sude siulahononmuna.

¹⁰(29-9) Impi do hamu luhutna jongjong sadarion di adopan ni Jahowa, Debatamuna i, angka indukmana, angka margamuna, angka sintuamuna, angka panuturimuna ro di sandok Israel sadasada.

¹¹(29-10) Angka dakdanakmana, angka jolmamuna, ro di halak dagang na di tongatonga ni parsaroanmu, olat ni halak sitaha sobanmu ro di halak sitahu tapianmu.

¹²(29-11) Asa masuk ho tu bagasan parpadanan binahen ni Jahowa, Debatam, dohot tu bagasan parbulanon, na binahen ni Jahowa, Debatam tu ho sadarion.

¹³(29-12) Asa Ibana pahothon ho sadarion gabe bangsona, jala Ibana gabe Debatam, songon naung pinarbagana i hian tu ho, jala songon naung niuarihonna tu angka ompum, si Abraham, si Isak dohot si Jakkob.

¹⁴(29-13) Ai ndada holan tu hamu ahu mambahen parpadanan dohot parbulanon.

¹⁵(29-14) Tung tu sude do tahe angka na dison jongjong rap dohot hami di adopan ni Jahowa. Debatanta, dohot tu sude angka na so dison sadarion rap dohot hita.

¹⁶(29-15) Ai tangkas do diboto hamu na maringan i hita na jolo di tano Misir, jala

na itabolusi tongatonga ni bangso parbegu, angka na binolusmuna i.

¹⁷(29-16) Jadi nunga diida hamu biasbias angka na niulahonnasida i, ro di ajaiajannasida sian hau dohot batu, sian perak dohot sere, angka na pineopnasida i.

¹⁸(29-17) (III.) Dibahen i sai unang ma adong di tongatongamuna, nanggo sahalak baoa, manang parompuan, manang halak na saompu manang na samarga, tung marbalik rohana sadarion sian Jahowa, Debatanta i, asa laho mangoloi angka debata ni angka bangso on, asa unang adong di tongatongamuna urat na martumburhon na paet dohot pogu.

¹⁹(29-18) Tung sura pe binegena hata ni parbulanon on, lam dipasupasu dope dirina di bagasan rohana, ninna do: Ingkon marhasonangan do ahu nang pe ahu mardalan di hatangkangon ni rohangkon, asa rap mago halak na marlobilobi na uasan.

²⁰(29-19) Ndang tagamon olo Jahowa marpangulah i rohana mida ibana, ingkon marpiarpiar situtu ma rimas ni Jahowa dohot pangiburuonna mida baoa sisongon i, jala ingkon manginona tu ibana saluhut torutoru, angka na tarsurat di bagasan buku on, jala siaphonon ni Jahowa goarna sian toru ni langit i.

²¹(29-20) Ingkon papulihon ni Jahowa huhut ibana sian saluhut marga ni Israel mambahen

marhinamago, hombar tu saluhut torutoru ni parpadanan angka na tarsurat di bagasan buku patikon.

²²(29-21) Pola dohonon ni sundut na soluk, anakmuna i tahe, angka na hehe dung salpu hamu, ro di halak sileban angka na ro sian tano na dao, molo diida nasida torutoru dohot parsahiton, angka na hinonahon ni Jahowa tu tano on.

²³(29-22) Naung gabe barerang dohot sira naung matutung sandok tanona, tung na so tarsabur be, jala ndang martumbur disi agia aha, jala ndang tubu disi agia aha ingkau rata, suman tahe tu harorongrong ni Sodom, Gumora, Adma dohot Zeboim, angka naung marongrong dibahen Jahowa di bagasan rimasna dohot di bagasan parpiarpiar ni murukna.

²⁴(29-23) Dung i dohonon ni sude angka bangso parbegu ma: Boasa tung songon i ulaning bahenon ni Jahowa tu tano on? Aha do ulaning parbonsiran ni parpiarpiar ni rimas na bolon on

²⁵(29-24) Jadi dohonon ni halak ma mangalusi: Ala na tinadingkonnasida parpadanan na binahen ni Jahowa, Debata ni ompunasida i, na binahenna tu nasida, uju Ibana manogihon nasida ruar sian tano Misir.

²⁶(29-25) Hape laho do nasida musengani mangoloi angka debata sileban, huhut marsomba tusi; debata angka na so

tinandanasida i, jala na so tinurpukkonna tu nasida.

²⁷ (29-26) Dibahen i marsigorgor ma rimas ni Jahowa mida tano on, gabe manginona tusi saluhut torutoru, angka na tarsurat di bagasan buku on.

²⁸ (29-27) Jadi disiaphon Jahowa ma nasida sian tanonasida i di bagasan murukna dohot di bagasan parpiarpiar ni rimasna na godang i, jala diambolongkon nasida tu tano na asing, songon na andar sadarion.

²⁹ (29-28) Angka hahomion na buni, Jahowa Debatanta do nampunasa, alai anggo pangungkapon angka na pinapatarna i, hita do nampunasa, nang angka anakkonta ro di salelenglelengna, laho mangulahon sude hata ni patikon.

30¹ (I.) Ia dung songgop tu ho sogot saluhut hata on, manang pasupasu manang torutoru, angka naung hupeakhon di adopanmu, hape dipasuang ho muse roham tu bagasan, di tongatonga ni saluhut bangso parbegu, haambolonganmu binahen ni Jahowa, Debatam.

² Jala mulak roham sahat tu Jahowa, Debatam, jala ditangihon ho soarana, hombar tu saluhut na hutonahon i tu ho sadarion, songon i ho nang angka anakmu sian nasa roham dohot sian nasa ateatem.

³ Jadi marpangulahi ma roha ni Jahowa, Debatam mida habuanganmu, jala asi rohana

mida ho, Ibana sandiri tahe papunguhon ho sian saluhut bangso parserahanmu, binahen ni Jahowa, Debatam.

⁴Tung sura pe ambolong ho tu ujung ni langit sahali, ingkon papunguon ni Jahowa, Debatam ho sian i, jala alapanna ho sian i.

⁵Jadi mulak ma ho boanon ni Jahowa, Debatam tu tano naung tinean ni angka ompum nian, asa teanonmu do i muse, bahenonna huhut uhum na denggan tu ho, jala tumpahanna ho tumorop sian angka ompum.

⁶Dung i sunaton ni Jahowa, Debatam ma roham dohot roha ni pinomparmu laho mangkaholongi Jahowa, Debatam sian nasa roham dohot sian nasa ateatem, asa mangolu ho.

⁷Alai honahonon ni Jahowa, Debatam ma saluhut torutoru on tu angka musum dohot tu angka na mangkagigihon ho, angka naung mangalele ho.

⁸Alai mulak ma anggo ho jala tangihononmu soara ni Jahowa jala ulahononmu saluhut tonana, angka na hutonahon i tu ho sadarion.

⁹Jadi marlobilobi ma ho tumpahan ni Jahowa, Debatam di saluhut ulaon ni tanganmu, di parbue ni bortianmu, di sinur ni pinahanmu dohot di parbue ni tanomi, manumpak tu na denggan; ai mangulahi ma Jahowa sumuang marlas ni roha mida ho

manumpak tu na denggan, suang songon las ni rohana na jolo mida angka ompum.

¹⁰Molo tung ditangihon ho soara ni Jahowa, Debatam mangaradoti angka patikna dohot aturanna, angka na tarsurat di bagasan buku patikon, molo tung mulak ho tu Jahowa, Debatam sian nasa roham dohot sian nasa ateatem.

¹¹(II.) Ai patikon, na hutonahon i tu ho sadarion, ndang masongkalhu di ho, manang maholangku.

¹²Ndada di banua ginjang hata i, umbahen pola ingkon dohononmu: Ise ulaning singkatnami manaek tu banua ginjang, asa mangalapsa di hami dohot pabegehonsa tu hami, asa ulahononnami nian?

¹³Jala ndada di bariba ni laut hata i, umbahen pola ingkon dohononmu: Ise ulaning singkatnami taripar laut mangalapsa di hami dohot patubegehonsa, asa ulahononnami nian?

¹⁴Ai mansai donok do hata i di ho, di bagasan pamanganmu tahe dohot di bagasan roham, asa ulahononmu i.

¹⁵(III.) Ida ma, nunga hupapillithon tu ho sadarion hangoluan dohot hatuaon, hamatean dohot hamagoan.

¹⁶Ahu ma tutu mandokkon ho sadarion: Ingkon haholonganmu Jahowa, Debatam, jala marparange di angka dalanna, huhut mangaradoti angka patikna, angka aturanna

dohot uhumna, asa pangoluonna ho jala patoroponna ho, jala pasupasun ni Jahowa, Debatam ho di tano sitopotonmu nuaeng bahen partalianmu.

¹⁷Alai tung sura marbalik roham, ndang olo ho manangihon, lam olo ho elaelaon marsomba tu angka debata sileban dohot mangoloi angka i:

¹⁸Na pabotohon hian ma ahu tu hamu sadarion, ingkon mago situtu hamu, jala ndang tagamon lelung hamu mangolu di tano sitopotonmu, dung taripar Jordan bahen partalianmu.

¹⁹Jouonku ma sadarion langit dohot tano gabe sitindangingku dompak hamu, paboa naung hupapillithon tu hamu hangoluan dohot hamatean, pasupasu dohot torutoru; dibahen i pillit ma hangoluan i, asa mangolu ho dohot pinomparmu sogot.

²⁰Asa haholonganmu Jahowa, Debatam, jala tangihononmu soarana, jala marsilohot roham tu Ibana, ai Ibana hangoluanmu hian dohot na paginjang umurmu, asa tongtong ho maringan, di tano, naung niuarihon ni Jahowa hian tu angka ompum, tu si Abraham, si Isak dohot si Jakkob, naeng lehononna tu nasida.

31 ¹(I.) Dung i didatdati si Musa ma mangkatahon angka hata on tu sandok Israel.

²Ninna ma mandok nasida: Boho saratus duapulu taon ahu marumur sadarion, ndang

tarbahren ahu be laho ruar dohot laho bongot,
ai nunga pola marlumba Jahowa tu ahu:
Ndang tarbahren ho manaripari Jordan on.

³Jahowa, Debatam sandiri taripar
manguluhon ho, Ibana maniaphon angka
bangso on di adopanmu, asa soluhonmu;
ingkon si Josua tahe taripar manguluhon ho,
songon naung nidok ni Jahowa hian.

⁴Jadi bahenon ni Jahowa ma tu nasida,
songon naung binahenna i tu si Sihon dohot
tu si Og, angka raja ni halak Amori dohot tu
tanonasida, naung siniaphonna i.

⁵Ia dung dipasahat Jahowa angka nasida i
di adopanmuna, ingkon bahenonmuna ma
tu nasida hombar tu saluhut uhum, naung
hutonahon i tu hamu.

⁶Pir ma tondimuna jala marsihohot, unang
tahuton hamu jala unang godoron rohamuna
maradophon nasida, ai Jahowa, Debatam
sandiri donganmu mardalan, ndang tagamon
marsombusombu Ibana mida ho manang
tadingkononna ho.

⁷Dung i dijou si Musa ma si Josua, jala
ninna ma tu ibana di adopan ni sandok Israel:
Pir ma tondim jala marsihohot, ai sahat ma
anggo ho rap dohot bangso on masuk tu tano
naung niuarihon ni Jahowa tu ompunasida,
naeng lehononna tu nasida, jala ho do
marsagihonsa tu nasida bahen partalianna.

⁸Ai Jahowa sandiri mardalan di adopanmu,
Ibana mandongani ho; ndang tagamon

marsombusombu Ibana mida ho, manang tadingkononna ho; unang ho tahuton jala unang ho godoron!

⁹(II.) Dung i disurathon si Musa ma patikon, jala dipasahat tu angka malim, pinompar ni Lepi, angka na mangusung poti parpadanan ni Jahowa, dohot tu sude angka sintua ni Israel.

¹⁰Dung i ro ma hata ni si Musa tu nasida mandok: Dung salpu pitupitu taon, tongon di taon haluaon, di ari raya parlapelapean.

¹¹Molo ro sandok Israel tu adopan ni Jahowa, Debatam, di inganan sipillitonna i, ingkon dohononmu jahaon patikon tu adopan ni sandok Israel, begeon ni pinggolnasida.

¹²Paluhut ma disi bangso i, angka baoa dohot inaina, angka dakdanak dohot halak dagang na di bagasan hutam, asa dibege nasida jala dapotan sipodaon, asa marhabiaran nasida tu Jahowa, Debatamuna i, jala diringkoti mangulahon saluhut hata ni patikon.

¹³Asa dohot ianakhonnasida, angka na so umbotosa dope pabegebegehon jala dapotan sipodaon, asa marhabiaran nasida tu Jahowa, Debatamuna i, saleleng hamu mangolu di tano sitopotonmuna, dung taripar Jordan, bahen partalianmu.

¹⁴(III.) Dung i ro ma hata ni Jahowa tu si Musa: Ida ma, nunga jumpang ne ajalmu, na mate ma ho; antong jou ma si Josua, jala

jongjong ma hamu di bagasan undungundung parluhutan i, asa martona Ahu tu ibana. Jadi laho ma si Musa rap dohot si Josua, jala jongjong nasida di bagasan undungundung parluhutan i.

¹⁵Jadi tarida ma Jahowa di bagasan undungundung i, di bagasan ombun na marsijongjong, di atas pintu ni undungundung i do marsijongjong ombun i.

¹⁶Dung i ro ma hata ni Jahowa tu si Musa: Ida ma, na laho modom ma anggo ho, gabe top dohot angka ompum; hehe ma anggo bangso on jala marmainan mangihuthon tu angka debata sileban di tongatonga ni tano sibongotanna i, jala tadingkononnasida do anggo Ahu, jala oseonna do padan naung hubahen i tu nasida.

¹⁷Jadi marsigorgor ma rimashu di ari na sasada i mida nasida, jala tadingkononku ma nasida, jala padaoonku ma Bohingku sian nasida, asa suda nasida marhinamago. Ia dung mangonai tu nasida angka hinamago godang dohot hagogotan marragamragam, dohononna ma di ari na sasada i: Nda manginona do angka hinamago on tu ahu, ala so di tongatonganku Debatanku?

¹⁸Alai anggo Ahu tongtong do padaoonku situtu Bohingku di ari na sasada i, ala saluhut hajahaton na binahenna i, ala naung marbalik nasida tu angka debata sileban.

¹⁹Nuaeng pe surathon hamu ma di hamu ende on, jala ajarhon ma i tu halak Israel jala memehon tu bagasan pamangannasida, asa ende on gabe sitindangi di Ahu dompak halak Israel.

²⁰Ia dung sahat nasida huboan masuk tu tano naung huarohon hian tu ompuna, tano habaoran ni susu dohot situak ni loba, jadi dung mangan nasida jala bosuran maradu mokmok, marbalik ma nasida tu angka debata sileban jala marsomba tusi, alai toisanna ma anggo Ahu jala oseonna padan na hubahen i.

²¹Jadi ia dung manginona tu nasida angka hinamago bolon dohot hagogotan marragamragam, ingkon ende on ma manindangi dompak nasida, ai ndang jadi lupa i sian pamangan ni pinomparna; ai tangkas do hutanda hian tubutubu ni rohana, naung pinajadijadi ni rohana hian sadarion, tagan so sahat dope nasida huboan tu tano naung huarohon i.

²²Jadi disurathon si Musa ma ende on di na sadari i, jala diajarhon do i tu halak Israel.

²³Dung i ro ma hatana tu si Josua, anak ni si Nun mandokkon ingkon pir ma tondim jala marsihohot, ai ingkon ho do saut manogihon halak Israel masuk tu tano naung huarohon i tu nasida, jala Ahu do mandongani ho.

²⁴ (IV.) Jadi dung sun tolhas disurathon si Musa angka hata ni patikon tu bagasan sada buku.

²⁵ Ro ma hata ni si Musa tu halak Lepi, angka na mangusung poti parpadanan ni Jahowa:

²⁶ Buat hamu ma buku patikon jala peakkon hamu ma i tu lambung poti parpadanan ni Jahowa, Debatamuna i, asa gabe sitindangi disi dompak ho.

²⁷ Ai nunga tangkas hutanda panundalion ni roham dohot hatangkangon ni tangkuhukmu! Ida ma, gari uju mangolu dope ahu di tongatongamuna sadarion garina, sai manggunturi do hamu dompak Jahowa na sai laonna i, lam beha ma tagamon ia dung mate ahu?

²⁸ Paluhut hamu ma tu lambungkon saluhut sintuamuna marmargamarga dohot panuturimuna, asa huhatahon, begeon ni pinggolnasida, angka hata on, ianggo ahu jouonku ma langit dohot tano on, gabe sitindangi dompak nasida.

²⁹ Ai nunga tangkas hian huboto, ia dung mate ahu, ingkon marroha mago do hamu, jala manimbil sian dalan naung hutonahon tu hamu; jadi mangonai ma tu hamu hinamago di ujung ni angka ari, ala na niulahonmuna i sogo ni roha ni Jahowa laho pahehe rimasna marhite sian pambahenan ni tanganmuna.

³⁰Jadi dihatahon si Musa ma dibege pinggol ni sandok luhutan Israel angka hata ni ende on sahat ro di ujungna.

32¹(I.) Paeleng ma pinggolmu, hamu ale angka langit! Ai naeng Ahu mandok hata, jala ho ale tano on, sai tangihon ma pangkataion ni pamanganku.

²Ingkon manetehi nian songon udan sipaingothon, ingkon mabaor nian songon nambur pangkataionku, songon pangonai ni udan nene tu duhutduhut, jala songon pangonai ni simbur tu suansuanan.

³Ai baritahononku ma Goar ni Jahowa; lehon hamu ma hatimbulon tu Debatanta i!

⁴Tau partanobatoan do Ibana, na so hasurahan di pambahenanna, ai na tigor do luhut dalanna, sihaposan do Debata, ndang adong hageduhonna, na tigor jala na bonar do Ibana.

⁵Na jahat do pambahenan ni sundut on, na marhajahaton dohot na geduk, ndada angka anakna nasida, gabe marhaurahon nasida.

⁶Songon i do hape pamalosmu tu Jahowa, ho ale bangso na oto jala na so marbisuk? Nda Ibana do amangmu? Nda Ibana do manobus ho? Ibana tahe manjadihon dohot pauliuli ho.

⁷Sai paingotingot ma angka ari na robi, parateatehon ma angka taon nahinan marsundutsundut! Marsungkun ma ho tu amangmu, asa ibana pabotohonsa tu ho,

sungkun huhut angka na tuatua, asa nasida paboahon tu ho.

⁸Uju disagihon Nasuntimbul tu angka bangso parbegu partalianna, uju Ibana mambahen parbolatan ni jolma manisia, disi ma dipaojak parbalohan ni angka bangso, marguru tu bilangan ni halak Israel.

⁹Ai parjambaran ni Jahowa do bangsona, si Jakkob do partalian tineanna i.

¹⁰Jumpangsa do ibana di tano bangkalbangkal, di halongonan paraotaotan, di tano parauangan ni angka binatang, Ibana marsaro humaliang nasida jala dimatamatahon; Ibana mangaramoti nasida, songon anak ni matana.

¹¹Songon pangaramoti ni pidong raja wali di asarna jala mangareapreap di atas angka anakna, suang songon i Ibana paherbang habongna, laos dijalo jala diusung nasida di atas habongna i.

¹²Jahowa sandiri tahe manogihon nasida, jala ndang adong debata sileban donganna nanggo sada.

¹³Ibana do manogihon nasida mardalan sian inganan angka na timbo di tano i, jala dilehon do panganonna gogo ni tano i, dilehon huhut siruponna situak ni loba sian dolok batu, jala miak sian batu na pir.

¹⁴Miak susu sian lembu jala susu sian birubiru, rap dohot tabotabo sian anak ni birubiru dohot sian birubiru tunggal, angka na

tubu di Basan dohot angka hambing tunggal
rap dohot indahan sigambiri na humushus;
jala mudar ni parbue ni anggur mamolin
diinum ho.

¹⁵Alai dung lam mokmok bangso na tigor
manandak ma ibana! Nunga tung mokmok ho
jala bolon jala tambos, jadi ditadingkon ibana
ma Debata na jumadihon ibana, jala ditoisi
dolok batu hatuaonna i.

¹⁶Sai dipinggil nasida Ibana marhite sian
angka debata sileban, jala dipahehe murukna
marhite sian biasbias.

¹⁷Mamele nasida huhut tu angka begu,
ndada tu Debata; tu debata angka na so
tinandana tahe, angka na imbaru pinajadi,
angka na ro sian na jonok, angka na so
hinabiaran ni ompumuna.

¹⁸Ia Dolok batu na jumadihon ho, nunga
ditadingkon ho, jala nunga dihalupahon ho
Debata na mangae laho manubuhon ho.

¹⁹Jadi dung diida Jahowa songon i
diambolongkon ma nasida, ala rimasna
pinahehe ni angka anakna dohot boruna.

²⁰Dung i ninna Ibana ma: Padaoongku ma
Bohingku sian nasida; naeng Ahu marnida
manang dia ujungnasida sogot; ai sundut
na marbalik do nasida, anak angka na so
marroha haporseaon.

²¹Nunga tung dipinggil nasida Ahu
mangiburu mida na so Debata,
dipahehe nasida murukku binahen ni

ganaganaannasida; Ahu pe antong
pinggilonku ma nasida mangiburu mida na so
bangso hian; marhite sian bangso na oto Ahu
pahehehon rimasnasida.

²²Ai marsigorgor ma api di bagasan
murukku, jala suda panganonna sahat ro di
banua toru sahali, suda huhut panganonna
tano i rap dohot gogona jala nahitanna do
ojahan ni angka dolok.

²³Pagukguhonku ma angka hinamago
tu nasida, jala suda angka sumbiangku
siorhononku dompak nasida.

²⁴Ingkon mandate nasida bahenon ni
haraparon, jala merus dagingna bahenon
ni panepane dohot begu antuk na rahat;
Ahu manongoshon sait ni binatang mangalo
nasida rap dohot bisa ni ulok na manginsir di
orbuk.

²⁵Sian balian podang i papunu nasida, jala
di bagasan bilut masa hasonggoton, nang di
dolidoli dohot namarbaju, nang di posoposo
rap dohot halak naung ubanon.

²⁶Naeng dohononku hian nian:
Purpuhononku ma nasida, asa tung
mago nasida sian parningotan nijolma.

²⁷Aut unang rimas ni musu na huhabiari, asa
unang pabalion ni angka musuna tu sileban,
unang dohononnasida: Tangannami na timbul
i do, ndada Jahowa mambahen saluhutna i.

²⁸Ai bangso parroha mago do nasida, jala ndang adong roha panimbangan di bagasan rohanasida.

²⁹Oe aut marbisuk ma nasida nian marateatehon hata i, asa diantusi rohanasida nian na masa tu nasida sogot!

³⁰Tung beha ma pambahenna leleon ni sahalak saribu halak, jala maporus saloksa bahenon ni dua halak, aut unang Dolok batu di nasida naung manggadis nasida, jala Jahowa pasahathon nasida!

³¹Ai ndada songon Dolok batu na di hita anggo dolok batu na di nasida, laos musunta i do marhatopothon uhumi.

³²Ai sian hau anggur Sodom do ianggo hau anggurnasida, jala sian ladang ni Gumora do; ia parbue ni anggurna, parbue sian pogu do, angka parbue na asom do diparbuehon.

³³Bisa ni ulok naga do anggurnasida i dohot bisa ni ulok dari na mangago situtu.

³⁴Nda nunga putus nian sangkap ni rohangku di bagasan, jala tarsahap di bagasan parpeopan ni artangku?

³⁵Ahu do nampuna partubolon dohot pamaloson di tingki uju tarsulandit patnasida i; ai jonok nama ari hamamagonasida i, jala gira do ro parsorion na pinadiri hian di nasida.

³⁶Ai uhumon ni Jahowa do sogot bangsona, alai marpangulahi rohana anggo mida angka naposona; ai tatapon ni rohana ma naung

suda gogo ni tangannasida jala rap mago do na tarhurung dohot na pinalua.

³⁷Dung i dohononna ma: Didia do angka debatanasida, dolok batu, haposan ni rohanasida i?

³⁸Angka na manganhon tabotabo ni peleannasida sipotongon dohot manginum anggur ni peleannasida siinumon. Nasida ma nian hehe jala mangurupi hamu, nasida nian gabe partanobatoan di hamu.

³⁹Nuaeng pe, ida hamu ma, na mamunjung do anggo Ahu, jala ndang adong debata dungkon ni Ahu. Tarbahen Ahu do mambunu dohot pangoluhon muse; tarbahen Ahu do mambugangi dohot pamalumhon muse, jala ndang adong na tuk manang ise paluahon sian tanganku.

⁴⁰Ai Ahu patoltol tanganku dompak langit huhut mandok: Mangolu do Ahu ro di salelenglelengna!

⁴¹Ia dung sapala Ahu patajom podangku na marsinondang jala tanganku mangumpatsa mangalaluhon uhum, ulahanku ma mambahen partubolon tu angka musungku jala Ahu mamaloshon tu halak na mangkagigihon Ahu.

⁴²Mabuk ma bahenonku angka sumbiangku sian mudar, jala podangku ingkon mangan sibuk sian mudar ni halak na mate tartiham dohot angka na dapot tartangkup, sian ulu parjambulan ni musu.

⁴³Marolopolop mā, hamu ale angka bangso parbegu mida bangsona, ai martubol ma bahenonna mudar ni angka naposona jala pasuangonna pamulason tu angka musuna, asa Ibana mambahen pardenggan tu tanona dohot tu bangsona.

⁴⁴(II.) Dung i ro ma si Musa jala dihatahon saluhut hata ni ende on, dipabegebege pinggol ni bangso i, ibana dohot si Josua, anak ni si Nun.

⁴⁵Jadi dung tolhas dihatahon si Musa saluhut hata i tu sandok Israel.

⁴⁶Ro muse hatana tu nasida: Sai parateatehon hamu ma hata i luhutna, angka na huhatindangkon tu hamu sadarion, laos dokkon hamu angka anakmuna, asa diringkoti mangulahon sude hata ni patikon.

⁴⁷Ai ndada hatahata boti angka i tu hamu, ingkon gabe hangoluanmuna angka i nian, jala hata on do paginjang ariarimuna di tano sisoluhonmuna i, dung taripar Jordan.

⁴⁸(III.) Dung i ro ma hata ni Jahowa tu si Musa, laos di ari na sasada i songon on:

⁴⁹Nangkok ma ho tu atas tor Abarim on, tu dolok Nebo tahe, na di tano Moab, tondong ni Jeriko, jala tatap sian i tano Kanaan, silehononku tu halak Israel bahen partalianna.

⁵⁰Laos mate ma ho di atas dolok sipanaehonmu i, asa pinapungu ho tu angka bangsom, suang songon si Aron, hahami,

naung mate di atas dolok Hor, jala pinapungu tu bangsona.

⁵¹Ala naung mardosa hamu dompak Ahu di tongatonga ni halak Israel, di lambung aek Meriba-Kades di halongonan Sin, ala na so pinarbadianmuna Ahu di tongatonga ni halak Israel.

⁵²Ai jadi do nian tataponmu tano i di adopanmu, alai ndang jadi anggo tung masuk ho tu tano na naeng lehononku tu halak Israel.

33¹(I.) Alai on do pasupasu, na pinasupasuhon ni si Musa, halak ni Debata tu halak Israel, jumolo asa mate ibana.

²Ninna ma: Nunga ro Jahowa sian Sinai, jala nunga binsar Ibana di nasida sian Seir; nunga poltak sinondangna sian dolok Elaparan, jala nunga ro Ibana mardongan angka na badia marriburibu, jala sian tanganna siamun ro api patik i tu nasida.

³Tung na holong situtu do rohana mida angka bangso i! Saluhut angka na badiana di bagasan tanganmu do, hundul do nasida di lambung patmu, jala dapotan sipodaon sian angka hatam.

⁴Ibana manonahon tu hita patik na nilehon ni si Musa, bahen teanteanan ni parluhutan ni si Jakkob.

⁵ Jala Ibana do Raja gumomgom bangso na tigor, uju marluhut angka induk ni bangso i rap dohot angka marga ni Israel.

⁶ Sai mangolu ma Ruben jala unang mate jala lam tu otikna bilangan ni jolma di ibana.

⁷ On do pasupasu taringot tu Juda, ninna do: Sai tangihon ma, ale Jahowa, soara ni Juda, jala boan ibana mulak tu bangsona! Sai tumpahi ma tanganna lam margogo, jala Ho ma donganna mangalo angka musuna!

⁸ Jala taringot tu Lepi, ninna do: Tummum dohot Urim (hasintongan dohot hatiuron) angka na sahat tu ho, tongtong ma i di baoa hasudungan ni roham, naung niunjunanmu di Massa jala naung binadaanmu di lambung aek Meriba!

⁹ Ibana do i naung mandok tu amana dohot tu inana: Ndang moralangalang rohangku marnidasa, jala ndang dipatandatanda angka anggina, jala ndang dipabotoboto angka anakna; ai nasida do mangaradoti angka hatam jala diramoti padan binahenmu.

¹⁰ Ingkon nasida mangajarhon angka uhummu tu Jakkob dohot patikmu tu Israel; ingkon nasida manutung daupa paanggoanggoon ni igungmu dohot mangampehon pelean situtungon di atas langgatanmu.

¹¹ Sai pasupasu ma sahalana, ale Jahowa, jala tumpahi manjadi ulaon ni tanganna! Sai ponggolhon ma gonting ni halak na hehe

mangalo ibana, nang halak na mangkagigihon ibana, asa unang be tarbahensa hehe.

¹²Taringot tu Benjamin, ninna do: Ia hasudungan ni Jahowa maringan do di lambungna marsonangsonang; sai ondinganna do ibana manipat ari, jala maringan ibana di holangholang ni abarana!

¹³Jala taringot tu Josep, ninna do: Naung maruli pasupasu tanona sian Jahowa, binahen ni surung ni panumpak sian langit, binahen ni nambur dohot binahen ni holbungholbung na tangkas di aek.

¹⁴Binahen ni surung ni panumpak ni mata ni ari di parbue, gogo ni tano i, dohot binahen ni surung ni panumpak ni bulan pasimbur suansuanan!

¹⁵Tole muse panumpak ni punsu ni angka dolok sian na robi dohot silehonlehon sian dolokdolok salelenglelengna.

¹⁶Tole muse panumpak sian tano i ro di hinagokna: Sai songgop ma asi ni roha ni Na maringan di bagasan ramba i tu ulu ni Josep dohot tu pakpak ulu ni jolma ma martumpal sian hahaanggina.

¹⁷Hamuliaonna i do tudoshon anak buhabaju ni lombuna, jala tandukna songon tanduk ni horbo! Tambingonna ma marhite sian i angka bangso, asa rap marbubur sahat ro di ujung ni tano on. Ingkon songon i halak Epraim marloksaloksa, jala halak Manasse marriburibu.

¹⁸Jala taringot tu Zebulon, ninna do: Marlas ni roha ma ho, ale Zebulon di haboborhatmu, jala ho, ale Isasar di bagasan angka undungundungmu.

¹⁹Betabetaonnasida do angka bangso tu atas dolok i, mamelehon disi angka pelean hatigoran, ai parsaulihononnasida ma angka parsaulian sian laut dohot mutiha, angka na buni di bagasan horsik.

²⁰Jala taringot tu Gad, ninna do: Pinuji ma Jahowa, na palambas inganan ni Gad; maringan do ibana songon singa, jala diparsurage do botohon dohot pakpak ulu.

²¹Ibana manjoloani manodo luat patumonaan di ibana, ai disi do partalian pinatongon ni silehon patik hian; dung i ro ma ibana manguluhon bangso i, asa mangalaluhon uhum hasintongan ni Jahowa dohot angka toruna rap dohot Israel.

²²Jala taringot tu Dan, ninna do: Singa na bajar do Dan, mangambur do ibana sian Basan.

²³Jala taringot tu Naptali, ninna do: Bosuran do Naptali di lomo ni roha, jala gok pasupasu sian Jahowa ibana; tean ma partalianmu tungkan laut dohot tungkan dangsina!

²⁴Jala taringot tu Aser, ninna do: Gumodang do pasupasu tu Aser sian tu angka anak na asing, ingkon halomoan ni angka hahaanggina ibana jala disornophon patna tu bagasan miak!

²⁵Bosi dohot tombaga angka
ransangransangmu, songon ariarim ma
hasonanganmi.

²⁶Ndang adong nanggo sada tudoshon
Debata, ale bangso na tigor! Marsihundul
Ibana di atas langit mambahen haluaon tu
ho, jala di atas ombun parginjang jumujung
habalgaonna.

²⁷Langit i do inganan ni Debata sian
mulamula sahali jala di banua tonga on do
manggongomi tanganna saleleng ni lelengna!
Ibana do antong mangonjar musim sian
adopanmu jala ninna do: Siaphon ma i!

²⁸Jadi marsonangsonang ma Israel
maringan sasadasa; sai manatapnatap do
mata ni Jakkob tu tano hatubuan ni eme
dohot anggur, sian angka langitna pe sai
manetehi do nambur.

²⁹Tuami, ale Israel! Tung ise ma songon ho?
Ho do sada bangso na martua binahen ni
Jahowa, Ibana do lombulombu ni hatuaonmu
dohot podang ni hatimbulonmu. Ingkon
mangunduk tu ho sogot angka musim; alai
anggo ho ingkon ojakkononmu patmu di
inganannasida angka na timbo i.

34¹(I.) Dung i nangkok ma si Musa sian
adaran Moab tu dolok Nebo, i ma
punsu ni Pisga, tondong ni Jeriko. Dung i
dipatuduhon Jahowa ma tu ibana sandok tano
olat ni Gilead sahat ro di Dan.

²Tole muse sandok Naptali, tano Epraim dohot Manasse, nang sandok tano Juda sahat ro di laut tungkan hasundutan.

³Tole muse tano na tungkan dangsina dohot luat di rura Jeriko, huta parhambiran, sahat ro di Zoar.

⁴Dung i ro ma hata ni Jahowa tu ibana: I ma tano naung huuarihon hian tu si Abraham, si Isak dohot si Jakkob, ningku hian do: Tu pinomparmu ma lehononku on. Nunga hupatuduhon tu ho, diida matam, alai ndang jadi ho taripar masuk tusi.

⁵Jadi mate disi ma si Musa, naposo ni Jahowa di tano Moab, ngomngom tu pamangan ni Jahowa.

⁶Laos Jahowa mananom ibana di rura i, di tano Moab, tondong ni Betpeor, jala ndang adong nanggo sahalak na umboto hinamborna rasirasa sadarion.

⁷Marumur saratus duapulu taon si Musa di hamamatenana, ndang pola homur anggo matana jala ndada surut gogona.

⁸Dung i ditatangisi halak Israel ma si Musa di adaran Moab tolupulu ari lelengna; marujung ma dibahen nasida angka ari partatangison dohot pangandungon ala si Musa.

⁹(II.) Dung i gok Tondi hapistaran ma roha ni si Josua, anak ni si Nun, ai nunga diampehon si Musa hian tanganna tu ibana, jala ditangihon halak Israel do ibana, jala

diulahon hombar tu na tinonahon ni Jahowa
hian tu si Musa.

¹⁰Dung i ndang adong be hehe di tongatonga
ni Israel sada panurirang songon si Musa na
mananda Jahowa adop bohi be.

¹¹Taringot tu saluhut tanda dohot
halongangan, na sinuru ni Jahowa ibana,
bahenonna angka i di tano Misir, tu si Firaun,
tu sude naposona dohot tu sandok tanona.

¹²Dohot taringot tu sandok tangan na gogoi
dohot taringot tu sandok hasonggoton bolon
na binahen ni si Musa di adopan ni sandok
Israel.

Yosua

1 ¹ (I.) Jadi dung mate si Musa, naposo ni Jahowa, ninna Jahowa ma tu si Josua, anak ni si Nun, parhalado ni si Musa, songon on:

² Nunga mate ianggo si Musa, naposongki, on pe borhat ma ho, taripari ma Jordan on, ho dohot sandok bangso on laho tu tano silehononku tu nasida, tu halak Israel i.

³ Sude tano, sidalanan ni palak ni patmuna, nunga hulehon tu hamu, songon na hudok tu si Musa hian.

⁴ Olat ni halongonan dohot Libanon sahat ro di batang aek na bolon, i ma batang aek Euprat, sandok tano ni halak Het, jala sahat ro di laut na bolon tungkan hasundutan, i ma parbalohanmuna.

⁵ Ndang adong manang ise na manahan jongjong di jolom saleleng ho mangolu, songon pandonganingku di si Musa, dongananku ho; ndang tagamon pasombuonku manang tadingkononku ho.

⁶ Pir ma tondim jala marsihohot, ai ingkon ho do marbagi tano on bahen partalian ni bangso on, na huuarihon tu ompunasida, lehononku tu nasida.

⁷Asal pir tondim, jala marsihohot situtu mangaradoti dohot patupahon hombar tu sude patik, angka na tinonahon ni si Musa, naposongki tu ho. Unang manimbil ho sian i tu siamun manang tu hambirang, asa marmulia ho manang dompak dia ho mangalangka.

⁸Unang meret buku ni patikon sian pamanganmu, sai pingkirpingkiri ma i arian dohot borngin, asa diradoti ho, jala dipatupa ho, hombar tu sude na tarsurat di bagasan i, asa maruntung ho di angka dalammu, jala marmulia parulaonmu.

⁹Nda nunga hudok tu ho: Pir ma tondim, jala marsihohot? Unang manonditnondit roham, jala unang tahuton, ai Jahowa Debatam do donganmu, manang dompak dia pe ho mangalangka.

¹⁰(II.) Jadi ditonai si Josua ma angka partogi ni bangso i, songon on:

¹¹Bolus hamu ma tongatonga ni parsaroan i, jala dok hamu ma tu bangso i, songon on: Padiiri hamu ma bohalmuna, ai di bagasan tolu ari on dope tariparanmuna ma Jordan on, asa bongot jala teanonmuna tano silehonon ni Jahowa, Debatamuna tu hamu, bahen partalianmuna.

¹²Jala tu halak Ruben, Gad dohot satonga marga Manasse, didok si Josua songon on:

¹³Ingot hamu ma hata na tinonahon ni si Musa, naposo ni Jahowa, tu hamu di na nidokna i: Nunga sonang hamu dibahen

Jahowa Debatamuna, jala dilehon tu hamu tano on.

¹⁴Langgo jolmamuna, anakkonmuna dohot pinahanmuna, itenang tading di tano na nilehon ni si Musa tu hamu, di bariba ni Jordan; alai anggo hamu, ingkon marsinjata be hamu, nasa sialo musu manguluhon donganmuna taripar mangurupi nasida.

¹⁵Paima dipasonang Jahowa donganmuna, suang songon hamu, jala dohot nasida mangingani tano silehonon ni Jahowa Debatamuna, tu nasida. Dung i mulak ma hamu tu tano partalianmuna, asa hamu nampunasa na nilehon ni si Musa, naposo ni Jahowa tu hamu, di bariba ni Jordan tungkan habinsaran.

¹⁶Jadi didok nasida ma mangalusi si Josua: Sude na tinonahonmu tu hami bahenonnami ma, jala manang tudia pe hami disuru ho, toptonnami do.

¹⁷Sandok songon panangihonnami di si Musa, songon i do tangihononnami ho; asal didongani Jahowa Debatam ho, songon na nidongananna si Musa.

¹⁸Manang ise na mangalo parentam, jala ndang ditangihon angka hatam, taringot tu sude na tinonahonmu tu hami, ingkon marutang hosa ibana; asal pir tondim jala marsihohot.

2¹(I.) Dung i disuru si Josua, anak ni si Nun, dua halak pangkahap sian Sitim,

ninna ma: Laho ma hamu, hahapi hamu ma tano i dohot huta Jeriko. Jadi laho ma nasida, dibongoti nasida ma bagas ni boruboru sibabijalang sada, na margoar si Rahab, laos modom ma nasida disi.

²Dung i didok halak ma tu raja ni Jeriko songon on: Ida ma, ro do na borngin tuson angka baoa sian halak Israel mangkahapi tano on.

³Jadi disuru raja ni Jerikoi ma tu si Rahab, didok ma: Togihon tu ruar baoa, angka na ro tu ho, angka na ro tu jabum, ai mangkahapi sandok tano on, hinorhonnasida i.

⁴Alai nunga diboan boruboru i hian baoa sidua halak i jala dibunihon nasida, gabe didok ma: Tongon do, ro do dua halak manopot ahu, alai ndang huboto manang sian dia nasida.

⁵Jadi martahi mangkinsu harbangan i, dung holom, ruar ma angka baoa i, ndang huboto manang dompak dia nasida laho. Haru eahi hamu ma nasida, sai dapot hamu do eahanmuna.

⁶Alai nunga didokkon boruboru i hian nasida manaek tu tarup, jala dibunihon nasida tu toru ni hori, na jinomurna di ginja tarup i.

⁷Jadi dieahi angka jolma i ma nasida di dalam tungkan Jordan, sahat ro di hatariparan, jala dihinsu harbangan i, dung ruar angka pangeahi di nasida.

⁸(II.) Alai tagan so laho modom dope nasida, dipanaek boruboru i ma tarup i manopot nasida.

⁹Jala didok ma mandok angka baoa i: Nunga huboto, naung dilehon Jahowa tano on tu hamu, jala naung madabu hasonggoton tu hami maradophon hamu, jala malala ateate ni sandok isi ni tano on maradophon hamu.

¹⁰Ai nunga hubege hami na niarsik ni Jahowa aek ni laut Arung maradophon hamu, uju na ruar i hamu sian Misir, dohot na binahenmuna tu na dua raja ni halak Amori na di bariba ni Jordan, tu raja Sihon dohot tu raja Og, na nirotongkonmuna nasida.

¹¹Jadi dung hubege hami barita i, malala ma ateatenami, jala ndang be manggulmit roha ni manang ise, dibahen biarna mida hamu, ai Jahowa Debatamuna, Ibana do Debata di banua gintang dohot di banua tonga on.

¹²On pe, ua mangmangkon hamu ma tu Jahowa, paboa na olo dohot hamu mambahen asi ni roha tu isi ni bagas ni damang, ala asi ni roha na hubahen i tu hamu, jala lehon hamu ma di ahu tanda haburjuon.

¹³Paboa pangoluonmuna damang dohot dainang dohot angka ibotongku dohot hahaanggingku, ro di sude na di nasida, jala paluaonmuna hosanami sian hamatean.

¹⁴Jadi didok baoa na dua i ma tu ibana: Hosanami singkatmuna tu hamatean! Molo so dipaboaboa hamu hatantaon, jala ia dilehon

Jahowa tano on tu hami, sai bahenonnami do tu ho asi ni roha dohot haburjuon.

¹⁵Jadi ditantan ma nasida na dua i dohot tali sian pandiloan tu toru, ai hombarhon parik ni huta i do bagasna, jala maringan di atas parik i do ibana.

¹⁶Dung i didok ma tu nasida: Dompak dolok ma hamu laho, asa unang pajumpang hamu dohot pangeahi, jala martabuni ma hamu disi tolu ari lelengna, paima mulak angka pangeahi, dung i tulus hamu ma dalanmuna.

¹⁷Dung i ninna baoa na dua i ma tu ibana: Lias ma hami sian na minangmanganmon, na pinamangmangmu hami.

¹⁸Ida ma molo masuk hami tu tano on, ingkon gantunganmu do tu pandiloan tali na rara i, panantananmu di hami, jala papunguonmu tu lambungmu di jabu on natorasmu dohot angka ibotom dohot sandok pinompar ni amam.

¹⁹Jala manang ise na ruar sian pintu ni jabum tu balian, marsapata tu ibana do mudarna, lias ianggo hami; alai manang ise donganmi di jabu on marsapata tu hami do mudarna, molo tung dihahua tangan ni manang ise ibana.

²⁰Jala molo tung dipaboaboa ho hatantaon, lias ma hami sian na minangmanganmon, na pinamangmangmu hami.

²¹Jadi didok ibana ma: Songon na nidokmuna ma tutu, dung i dipalaho

ma nasida, gabe mardalan nasida. Jadi digantungkon ibana ma tali na rara i tu pandiloan.

²²(III.) Jadi laho ma baoa na dua i, gabe tolhas ma nasida tu dolok, laos disi ma nasida tolu ari lelengna, paima mulak angka pangeahi; ai sai diburu angka pangeahi do nian nasida di saluhut dalan i, hape ndang jumpangsa nasida.

²³Dung i mulak ma baoa sidua halak i, jala tuat sian dolok i, jala taripar, gabe sahat nasida tu si Josua, anak ni si Nun, jala dipajojor tu ibana sude na masa tu nasida.

²⁴Angka didok nasida ma tu si Josua: Nunga sahat tu tanganta dilehon Jahowa sandok tano i, jala nunga malala huhut ateate ni sandok isi ni tano i dibahen biarna mida hita.

3¹(I.) Dung i dipasogot si Josua ma manogotna i hehe, jala borhat nasida sian Sitim sahat ro di Jordan, ibana dohot sude halak Israel, laos disi nasida marborngin, tagan so taripar dope nasida.

²Jadi dung salpu tolu ari, dibolus angka partogi ma tongatonga ni parsaroan i.

³Jala martona nasida tu bangso i, songon on: Molo diida hamu poti parpadanan ni Jahowa, Debatamuna i, angka malim dohot halak Lepi, angka na mangusungsa, borhat ma hamu sian ingananmuna laho mangihuthon tusi.

⁴Alai ingkon adong arga dua ribu elak holangholangmuna sian i. Ndang jadi hamu dumonok tusi, asa diboto hamu dalam sidalananmuna, ai ndang dung dope dibolus hamu dalam i anggo nasailaonna i.

⁵Dung i didok si Josua ma tu bangso i: Manguras ma hamu, ai marsogot ma bahenon ni Jahowa angka halongangan di tongatongamuna.

⁶Dung i didok si Josua ma tu angka malim, songon on: Usung hamu ma poti parpadanan i, jala taripar ma hamu manguluhon bangso i! Jadi diusung nasida ma poti parpadanan i laho manguluhon bangso i.

⁷Dung i didok Jahowa ma tu si Josua: Sadarion ma pungaonku patimbul ho di jolo ni sandok Israel, asa tung diboto nasida, ia songon i pandonganingku di si Musa, laos songon i dongananku ho.

⁸Alai anggo ho martona ma ho tu angka malim, angka na mangusung poti parpadanan i, songon on: Molo sahat hamu ro di pasir ni aek Jordan, togang ma hamu jongjong di pasir ni Jordan i.

⁹Dung i didok si Josua ma tu halak Israel i: Pajonok hamu tuson, jala tangihon hamu angka hata ni Jahowa Debatamuna i!

¹⁰Jadi didok si Josua ma: On ma partinandaanmuna, paboa Debata na mangolu i di tongatongamuna, jala onjaronna situtu maradophon hamu halak Kanaan, halak

Het, halak Hevi, halak Perisi, halak Girgasi, halak Amori dohot halak Jebusi.

¹¹Ida ma, poti parpadanan ni Tuhan, Sigomgom sandok tano on taripar di Jordan manguluhon hamu.

¹²On pe, buat hamu ma di hamu sampulu dua halak sian angka marga ni Israel, sahalak be sian ganup marga.

¹³Molo mangulon palak ni pat ni malim, angka na mangusung poti ni Jahowa, Tuhan Sigomgom sandok tano on di bagasan aek Jordan, tolak ma angka aek Jordan, togang ma angka aek na mabaor sian julu, manjadi hira dorpi.

¹⁴(II.) Jadi di na borhat bangso i sian undungundungnasida laho manaripari Jordan, jala malim angka siusung poti parpadanan i manguluhon bangso i.

¹⁵Jala sahat angka siusung poti i ro di Jordan, jala dais pat ni malim, angka siusung poti i tu aek i (alai binsat do Jordan i di sandok pasirna saleleng masa gotilon).

¹⁶Jadi togang ma aek angka na mabaor sian julu, jongjong songon dorpi, mangalantap situtu sahat ro di huta Adam, na tungan lambung sian Zaretan; alai anggo aek na mabaor tu laut, tu holbung ni laut sira, lam marsik situtu ma. Jadi taripar ma bangso i tondong ni Jeriko.

¹⁷Jadi jongjong marsihohot ma malim, angka na mangusung poti parpadanan ni

Jahowa, di na mahiang, di parsitongaan ni Jordan; jadi sandok Israel taripar di na mahiang, paima timpas ditaripari sandok bangso i Jordan.

4¹ (I.) Alai dung timpas ditaripari sandok bangso i Jordan i, didok Jahowa ma tu si Josua songon on:

²Buat hamu ma di hamu sian bangso i sampulu dua halak, sahalak be sian ganup marga.

³Jala dokkon hamu ma nasida: Hindat hamu ma sian on, sian tongatonga ni Jordan, sian hajongjongan ni pat ni angka malim, sampulu dua batu, jala boan hamu tu bariba i, jala peakkon hamu di parbornginanmuna saborngin on.

⁴Dung i dijou si Josua ma na sampulu dua halak i, angka na pinillitna sian halak Israel, sahalak be sian ganup marga.

⁵Jadi didok si Josua ma tu nasida: Taripar ma hamu manguhuhon poti ni Jahowa Debatamuna tu tongatonga ni Jordan, diporsan be ma di abarana sada batu mangihuthon bilangan ni angka marga ni halak Israel.

⁶Asa manjadi sada parningotan ma i di tongatongamuna. Molo manungkun sogot anakmuna: Aha do lapatan ni angka batu on di hamu?

⁷Jadi dohononmuna ma tu nasida: Na tolak i angka aek ni Jordan maradophon poti

parpadanan ni Jahowa; ai uju na tinariparanna i Jordan i, tolak ma aek ni Jordan, jala angka batu on ma bahen parningotan di halak Israel ro di saleleng ni lelengna.

⁸Jadi dibahen halak Israel ma songon na nidokkon ni si Josua tu nasida, dihindat nasida ma sampulu dua batu sian parsitongaan ni Jordan, songon na nidok ni Jahowa tu si Josua, mangihuthon bilangan ni marga ni halak Israel, jala diboan tu parbornginan, jala dipajongjong disi.

⁹Dipajongjong si Josua huhut sampulu dua batu di parsitongaan ni Jordan, apala di hajongjongan ni pat ni malim, angka na mangusung poti parpadanan i, laos disi dope rasirasa sadarion.

¹⁰(II.) Alai anggo malim, angka na mangusung poti parpadanan i, jongjong do di parsitongaan ni Jordan, paima sun tulus saluhut hata na tinonahon ni Jahowa tu si Josua, sidohononna tu bangso i, hombar tu sude na tinonahon ni si Musa tu si Josua. Jadi humalaput ma bangso i laho taripar.

¹¹Jadi dung impi taripar sandok bangso i, taripar ma dohot poti ni Jahowa, jala angka malim manguluhon bangso i.

¹²Taripar ma dohot halak Ruben, halak Gad dohot satonga marga Manasse, marsinjata be manguluhon halak Israel, songon na nidok ni si Musa hian tu nasida.

¹³Arga opatpulu ribu angka sialo musu nasida taripar di jolo ni Jahowa laho tu tongtangan di adaran Jeriko.

¹⁴Di ari na sasada i timbul ma si Josua, dibahen Jahowa di adopan ni sandok Israel, gabe mabiar nasida mida ibana, songon na hinabiarannasida si Musa saleleng mangolu ibana.

¹⁵Dung i didok Jahowa ma tu si Josua songon on:

¹⁶Dokkon ma malim, angka na mangusung poti panindangion, asa manaek nasida sian Jordan.

¹⁷Jadi didok si Josua ma tu angka malim: Manaek ma hamu sian Jordan!

¹⁸Jadi dung manaek malim, angka na mangusung poti parpadanan ni Jahowa sian parsitongaan ni Jordan, dung diojakkon angka malim palak ni patnasida tu na mahiang, sumuang ma aek ni Jordan tu ingananna hian, jala mabaor songon na somal, binsat di sandok pasirna.

¹⁹Asa manaek ma bangso i sian Jordan di ari sampulu di bulan sipahasada, jala marsaro nasida di Gilgal, di parbalohan tungkan habinsaran ni Jeriko.

²⁰(III.) Jala batu na sampulu dua i, angka na binoannasida sian Jordan i, dipatindang si Josua ma di Gilgal.

²¹Jadi didok ma tu halak Israel songon on: Molo disungkun anakkonmuna sogot

amanasida: Aha do lapatan ni angka batu on ninna?

²²Ingkon pabotohononmuna ma tu anakkonmuna mandok: Mardalan di na mahiang ditaripari Israel Jordan on.

²³Uju na niarsik ni Jahowa, Debatamuna i, aek ni Jordan i maradophon hamu, paima sahat hamu taripar, songon na binahen ni Jahowa Debatamuna, uju di laut Arung, na niarsikna i maradophon hita, paima sahat hita taripar.

²⁴Asa tung saluhut angka bangso ni tano on mananda di tangan ni Jahowa na gogoi! Asa tongtong hamu mabiar mida Jahowa Debatamuna i.

5¹ (I.) Jadi dung dibege sude raja ni halak Amori, angka na di bariba ni Jordan tungkan hasundutan, dohot sude raja ni halak Kanaan i, angka na di topi laut, naung niarsik ni Jahowa aek ni Jordan maradophon halak Israel, paima impi taripar hita, gabe gang ma ateatenasida, jala ndang be di ingananna rohanasida, dibahen biarna maradophon halak Israel.

²Uju i ma didok Jahowa tu si Josua: Bahen ma di ho raut angka sian batu, jala ulahi sunati halak Israel paduahalihon.

³Jadi dibahen si Josua ma di ibana raut angka sian batu, jala disunati halak Israel di atas buntulbuntul Aralot.

⁴Jala on do alana umbahen disunati si Josua nasida: Sandok bangso i na ruar sian Misir, i ma angka baoa, sude angka sialo musu, nunga marragean di halongonan, di dalam, dung ruar nasida sian Misir.

⁵Ai tarsunat do anggo sandok bangso na ruar i, alai sandok bangso, angka na tubu di halongonan, di dalam, dung ruar nasida sian Misir, ndang tarsunat.

⁶Ai opatpulu taon lelengna maotaot halak Israel di halongonan, paima sun siap sandok baoa sialo musu, angka na ruar sian Misir, ala so ditangihon nasida suara ni Jahowa, umbahen pola marmangmang Jahowa tu nasida, na so tupa idaonnasida tano na niuarihon ni Jahowa tu ompunasida lehononna tu hita, tano habaoran ni susu dohot situak ni loba.

⁷Alai anggo anaknasida tahe, dipatindang ibana singkatnasida, nasida ma na sinunat ni si Josua, ai marsibursibur do nasida, ala so tarsunat nasida di tongan dalam.

⁸Jadi dung impi sandok bangso i disunat, tading ma nasida di inganannasida di parsaroan i, paima malum dihilala nasida.

⁹Dung i ninna Jahowa ma tu si Josua: Sadarion Ahu manggulangi haurahon Misir sian hamu, gabe targoar ma inganan i Gilgal rasirasa sadarion.

¹⁰(II.) Jadi di na marsaro i halak Israel di Gilgal, marulaon Paska ma nasida di ari

sampulu opat di bulan i mareak botari di adaran Jeriko.

¹¹ Jadi marsogot ni dung marulaon Paska i, dipangan nasida ma gogo ni tano i, i ma sagusagu angka na so niigaran dohot eme na binoltok di ari na sasada i.

¹² Jadi mansohot ma Manna i, marsogotna i dung dipangan nasida gogo ni tano i, gabe ndang adong be Manna di halak Israel, jadi dipangan nasida ma gogo ni tano Kanaan di na sataon i.

¹³ (III.) Alai mandapothon huta Jeriko si Josua, manaili ma ibana manatap humaliang, gabe diida ma sada halak jongjong di jolona patioptiop podang na niumpat di bagasan tanganna. Jadi didapothon si Josua ma ibana, didok ma tu ibana: Dongan do Ho, manang alo?

¹⁴ Jadi didok Ibana ma: Ndangana, partogi ni parangan ni Jahowa do Ahu, apala ipe Ahu ro. Jadi manungkap ma si Josua tu tano, jala marsomba, jala didok ma tu Ibana: Aha do dohonon ni Tuhanku tu naposona?

¹⁵ Jadi didok partogi ni parangan ni Jahowa ma tu si Josua: Tanggali ma sipatum sian patmu, ai na badia do tano hajongjonganmon. Jadi dibahen si Josua ma songon i.

6¹ (I.) Alai tarhinsu situtu do pargumbangan ni huta Jeriko didapot halak Israel, ndang tarbahen ruar manang bongot manang ise.

²Dung i ninna Jahowa ma tu si Josua: Ida ma, nunga hupasahat tu tanganmu huta Jeriko dohot rajana, ro di sude sialo musu.

³Dibahen i halianganmuna ma huta i, nasa sialo musu mangkaliangi huta i sahali, songon i do bahenonmu onom ari on lelengna.

⁴Jala usungon ni pitu malim ma na pitu sarune ni taon parolopolopon manguluhon poti i; alai papituarihon, ingkon pitu hali halianganmuna huta i, jala paluon ni angka malim i angka sarune i.

⁵Jadi ia lambat mangkuling sarune parolopolopon i, jala dibege hamu suara ni sarune i, marsurak toletole ma sandok bangso i, jadi angka gargar ma parik ni huta i, jala panaehon ni bangso i ma, martahop tu jolona be.

⁶Jadi dijou si Josua, anak ni si Nun, angka malim, jala didok tu nasida: Usung hamu ma poti parpadanan i! Jala pitu malim mangusung na pitu sarune parolopolopon i manguluhon poti ni Jahowa.

⁷Didok ma dohot tu bangso i: Laho ma hamu, jala haliangi hamu huta i, jala saparduan na marsinjata manguluhon poti ni Jahowa.

⁸Jadi dung songon i didok si Josua tu bangso i, mardalan ma na pitu malim, angka na mangusung na pitu sarune parolopolopon i di jolo ni Jahowa, jala dipalu angka sarune i,

jala mangihut tu nasida do poti parpadanan ni Jahowa.

⁹Jadi diuluhon na saparduaan na marsinjata i ma malim angka na umpalu sarunena be, jala mangihut tu poti i do angka situan na torop, mardalan ma nasida huhut umpalu angka sarune.

¹⁰Alai nunga martona hian si Josua tu bangso i, songon on: Unang marsuraksurak hamu, jala unang tarbege suaramuna, jala ndang jadi ruar nanggo sada hata sian pamanganmuna, paima jumpang ari pandohanki tu hamu: Marsuraksurak ma hamu! Disi pe asa marsurak hamu.

¹¹Jadi dihaliangi poti ni Jahowa ma huta i sahali humaliang, gabe sahat ma nasida muse tu parsaroan, laos marborngin di parsaroan i.

¹²Dung i dipasogot si Josua ma hehe manogotna i, jala diusung angka malim poti ni Jahowa.

¹³Jala na pitu malim, angka na mangusung na pitu sarune parolopolopon i, manguluhon poti ni Jahowa, sai mardalani do nasida huhut umpalu sarune, jala na saparduaan na marsinjata i manguluhon nasida, alai mangihut tu poti ni Jahowa ianggo situan na torop; sai mardalani nasida huhut umpalu angka sarune.

¹⁴Paduaarihon pe dihaliangi nasida do huta i sahali, dung i mulak nasida tu parsaroan. Songon i dibahen nasida padohot onom ari.

¹⁵(II.) Alai anggo papituarihon, dipasogot nasida ma hehe, di hananaek ni sibalik hunik, jala dihaliangi nasida huta i, songon na somal pitu hali; holan di ari na sasada i pitu hali dihaliangi nasida huta i.

¹⁶Tole papituhalihon, dung dipalu angka malim sarunena be, didok si Josua ma tu bangso i: Marsurak ma hamu, ai nunga dilehon Jahowa huta i tu hamu.

¹⁷Alai ingkon harom bahenon huta i; ro di sude na di bagasan di Jahowa; holan si Rahab sibabijalang i pangoluon, ibana ro di sude na rap dohot ibana di jabu; ai dibunihon do angka suruan na itasuru.

¹⁸Alai ramoti hamu dirimuna maradophon na hona harom i, asa unang tarharom hamu, molo adong dibuat hamu sian na hona harom i, gabe hona harom maon parsaroan ni Israel bahenonmuna mambahen marhinamago.

¹⁹Alai nasa perak dohot sere, ro di ulaula sian tombaga dohot bosi, parbadiaan ma i di Jahowa, pamasuhon ma i tu bilut parugasanan ni Jahowa.

²⁰Jadi marsuraksurak ma bangso i, jala dipalu angka malim sarunena be. Jadi dung dibege bangso i suara ni sarune, dipangiar be ma suaranya, marsuraksurak, gabe magargar ma parik i, jala dipanaek na torop i ma huta i martahop be tu jolona, gabe ditaban nasida huta i.

²¹ Jadi diharomhon nasida nasa na di huta i, nang baoa ro di inaina, nang dakdanak ro di na ubanon, ro di lombu, birubiru dohot halode ditampuli dohot podang.

²² Alai tu na dua halak, angka na mangkahapi tano i didok si Josua: Bongot i hamu ma bagas ni boruboru sibabijalang i, jala togihon hamu ruar sian i boruboru i, ro di sude na di ibana, songon na niuarihonmuna tu ibana.

²³ Jadi bongot ma dolidoli pangkahap na dua i, jala ditogihon ruar si Rahab dohot amana dohot inana dohot angka ibotona, ro di nasa na di ibana dohot sandok pinompar ni ompuna, jala dipaulon nasida di balian parsaroan ni Israel.

²⁴ Alai anggo huta i disoksohi nasida dohot api ro di nasa na di bagasan; holan perak dohot sere, ro di ulaula sian tombaga dohot bosi tu bilut parugasanan di bagas ni Jahowa dibahen nasida.

²⁵ Alai anggo si Rahab, sibabijalang i dohot pinompar ni amana, ro di nasa na di ibana, dipangolu si Josua do; laos maringan di tongatonga ni Israel do ibana rasirasa sadarion, ala dibunihon ibana angka suruan, na sinuru ni si Josua laho mangkahapi Jeriko.

²⁶ Dung i maruari ma si Josua uju i, didok ma: Ingkon ripur baoa na hehe sogot, pauli huta Jeriko on bahenon ni Jahowa! Anak buhabajuna ma ali ni ojahanna, jala

siampudanna ali ni pargumbangan pinajokna i.

²⁷ Jadi sai didongani Jahowa do si Josua, jala tarbarita ibana di sandok tano i.

7 ¹ (I.) Alai mangalaosi situtu do halak Israel di ugasan na hona harom; ai adong do dibuat si Agan, anak ni si Karmi, tubu ni si Sabdi, anak ni si Jara sian marga Juda, sian ugasan na hona harom. Jadi marpiarpiar ma rimas ni Jahowa tu halak Israel.

² Dung i disuru si Josua ma angka baoa sian Jeriko tu Ai mardonokkon Bet Apen, tungkan habinsaran ni Betel, jala didok ma tu nasida songon on: Nangkok ma hamu, jala hahapi hamu ma tano i. Jadi nangkok ma angka baoa i, jala dihahapi nasida huta Ai.

³ Jadi dung mulak nasida tu si Josua, didok nasida ma tu ibana: Unang pola sandok bangso i nangkok! Arga dua ribu manang tolu ribu halak pe nasida nangkok, jala papatu Ai, unang pola sandok bangso i loja tusi, ai na otik do nasida.

⁴ Jadi arga tolu ribu halak sian bangso i nangkok tusi, hape maporus do nasida maradophon isi ni Ai.

⁵ Jala dibunu isi ni Ai arga tolupulu onom halak sian nasida, jala dilele nasida, olat ni harbangan ni huta i sahat ro di Sebarim, jala dibunui nasida di robean. Jadi malala ma ateate ni bangso i manjadi hira aek.

⁶(II.) Dung i diribahi si Josua ma angka ulosna, jala manungkap ibana tu tano, di jolo ni poti ni Jahowa ro di botari, ibana dohot angka sintua ni Israel, jala dibahen be sirabun tu uluna.

⁷Dung i ninna si Josua ma: Iale Tuhan Jahowa, boasa tung patariparonmu bangso on sian Jordan i laho mangalehon hami tu tangan ni halak Amori, asa mangago hami? Tung so tading hami nian di bariba ni Jordan!

⁸Iale Tuhan, aha nama dohononku, dung mundur halak Israel dibahen angka musuna?

⁹Begeon ni halak Kanaan i dohot sandok isi ni tano on ma barita i, jadi haliangannasida ma hami, jala siaphononna goarnami sian tano on, jadi aha ma bahenonmu humongkop Goarmi na timbul i?

¹⁰Dung i ninna Jahowa ma tu si Josua: Hehe ma ho! Boasa tung sai manungkap ho?

¹¹Nunga mardosa Israel, jala dilaosi nasida huhut padan na hutonahon i tu nasida, dibuat nasida huhut sian ugasan na hona harom i, jala manangko nasida, huhut mamorso, lam dibahen do tu tongatonga ni ulaulanasida.

¹²Dibahen i ndang tarbahen Israel jongjong maradophon musunasida i, sai na maporus nama nasida maradophon musunasida, ai tarharom nasida. Nandang be dongananku hamu, molo so diago hamu na tarharom i sian tongatongamuna.

¹³Hehe ma ho, urasi ma bangso on, jala dok ma: Urasu hamu ma dirimuna tu marsogot! Ai songon on do didok Jahowa, Debata ni Israel: Adong do jolma siharomon di tongatongamu, ale Israel! Ndang tarbahen ho jongjong moradophon musum, paima dipaholang hamu jolma siharomon i sian tongatongamuna.

¹⁴Ro be ma hamu manogot mangihuthon margamuna, jala ia marga na tinudu ni Jahowa ro be marompuompu, jala ompu na tinudu ni Jahowa ro be marsasaama, jala ama na tinudu ni Jahowa ro be marsasahalak baoa.

¹⁵Jala baoa na tinudu i siharomon, soksohan ma ibana di bagasan api, ro di sude na di ibana i, ala na nilaosanna i padan ni Jahowa, jala ala na binahenna haurahon di Israel.

¹⁶(III.) Jadi dipasogot si Josua ma hehe manogotna i, jala didokkon ro be halak Israel marmargamarga, gabe tartudu ma marga Juda.

¹⁷Dung i didokkon ro be angka ompu ni Juda, gabe tartudu ma ompu Jara, dung i didokkon ma ro be pinompar ni ompu Jara marsasaama, gabe tartudu ma si Sabdi.

¹⁸Dung i didokkon ma ro be pinomparna marsasahalak, gabe tartudu ma si Agan, anak ni si Karmi, anak ni si Sabdi, anak ni si Jara sian marga Juda.

¹⁹Dung i didok si Josua ma tu si Agan: Ale anaha, sai pasangap ma Jahowa, Debata ni

Israel, jala lehon ma pujipujian tu Ibana, topoti tu Ibana, jala paboa tu ahu manang aha na binahenmi, unang porso tu ahu.

²⁰Jadi didok si Agan ma mangalusi si Josua: Tongon do tahe, nunga mardosa ahu tu Jahowa, Debata ni Israel, jala songon on do na hubahen i.

²¹Huida di tongatonga ni tabantaban sada baju Babel na uli dohot dua ratus rupia dohot ponding sere sada, limapulu hati dokdokna, gabe impol matangku disi, laos hubuat; jala ida ma, tartanom do i di tombara, di tongatonga ni undungundungku, jala perak i di toruna.

²²Dung i disuru si Josua ma angka suruan, gabe marlojong ma nasida tu undungundung i, jala ida ma, tartanom do i di undungundungna, jala perak i di toruna.

²³Dung i dibuat nasida ma i sian tongatonga ni undungundung i, jala diboan tu si Josua dohot tu sandok halak Israel, jala dipeakkon di jolo ni Jahowa.

²⁴Jadi diboan si Josua ma si Agan, anak ni si Jara dohot perak i dohot baju i dohot ponding sere i, ro di angka anakna dohot boruna, ro di lombu dohot halodena dohot birubiruna, ro di undungundungna dohot nasa na di ibana, jala sandok Israel donganna manogihon nasida nangkok tu rura Akor.

²⁵Dung i didok si Josua ma, ala mago hami dibahen ho, agoon ni Jahowa ma ho

di ari sadarion, jadi sandok halak Israel, mandangguri ibana mate dohot batu, jala disoksohi nasida di bagasan api, jala ditimbuni batu di nasida.

²⁶Jadi dipatindang di atas ibana sada timbunan batu bolon rasirasa sadarion. Jadi marpangulah ma roha ni Jahowa sian parpiarpiar ni rimasna. Ala ni dibahen halak goar ni inganan i rura Akor rasirasa sadarion.

8¹(I.) Dung i didok Jahowa ma tu si Josua: Unang ho mabiar, jala unang tahuton! Arahon ma sandok sialo musu, jala borhat ma ho nangkok dompak Ai. Ida ma, nunga hupasahat tu tanganmu raja ni Ai dohot bangsona, ro di hutana dohot tanona.

²Jala bahenonmu do tu Ai dohot tu rajana, songon na binahenmi tu Jeriko dohot tu rajana; holan tabantabanna dohot pinahanna, jadi do bagionmuna di hamu; alai bahen ma paronggongan sada di pudi ni huta i.

³Jadi borhat ma si Josua dohot sandok sialo musu laho nangkok tu Ai; jala dipillit si Josua ma tolupulu ribu halak, angka na begu marmusu, jala disuru nasida bornginna i.

⁴Jala ditonai ma nasida songon on: Monggop ma hamu tu pudi ni huta i; alai unang maholangku hamu sian huta i, jala managam ma saluhut hamu.

⁵Alai anggo ahu dohot sandok bangso na rap dohot ahu, dapothononnami ma huta i. Jadi molo ruar nasida manjumpangkon

hami, songon na parjolo i, maporus ma hami maradophon nasida.

⁶Jadi ruar ma nasida mangeahi hami, paima husirang hami nasida sian huta i; ai dohonon nasida ma: Maporus do nasida maradophon hita songon parjolo i. Jala di na maporus i hami maradophon nasida.

⁷Hehe ma ianggo hamu sian paronggopan, jala manoluk huta i; ai lehonon ni Jahowa Debatamuna ma huta i tu bagasan tanganmuna.

⁸Jala ia dung ditaban hamu huta i, surbuonmuna ma huta i dohot api; hombar tu hata ni Jahowa ma bahenonmuna. Ida ma, ahu do manonahon i tu hamu.

⁹Jadi disuru si Josua ma nasida, gabe laho nasida tu paronggopan i, jala monggop nasida diholangkolang ni Betel dohot Ai, tungkan hasundutan sian Ai, laos marborngin anggo si Josua di na saborngin i di tongatonga ni bangso i.

¹⁰Dung i manogotna i dipasogot si Josua ma parentahon angka parangan i, jala nangkok ibana dohot angka sintua ni Israel manguuluhon angka parangan i tu Ai.

¹¹Jala sandok sialo musu na rap dohot ibana, nangkok do tolhas ro di tondong ni huta i, jala marsaro nasida tungkan utara sian Ai, holan rura sada holangholangna sian Ai.

¹²Dung i dibuat ibana ma arga lima ribu halak, jala didokkon nasida monggop di

holangholang ni Betel dohot Ai, tungkan hasundutan ni huta i.

¹³Dung i dipaodor nasida ma parangan ni sandok parsaroan i na tungkan utara ni huta i, dohot angka na monggop i tungkan hasundutan ni huta i. Jadi mardalan ma si Josua di na saborngin i tu tongatonga ni rura i.

¹⁴(II.) Jadi dung diida raja ni Ai songon i, humalaput ma nasida, dipasogot angka baoba ni huta i ma ruar manjumpangkon Israel laho martongtang, rajai dohot sandok naposona tu tongtangan na tinititi di jolo ni adaran, ai ndang diboto ibana naung adong monggop musuna di pudi ni huta i.

¹⁵Jadi lumindak ma si Josua dohot sandok Israel maradophon nasida, jala maporus sian dalan tu halongonan.

¹⁶Dung i satingting ma sandok pangisi ni huta i mangeahi, jala dieahi nasida si Josua, gabe sirang nasida sian huta i.

¹⁷Jala ndang adong tading nanggo sahalak di Ai dohot di Betel, na so ruar mangeahi Israel, jala talak huta i ditadingkon nasida laho mangeak Israel.

¹⁸Dung i didok Jahowa ma tu si Josua: Paunjur ma hujur na di tanganmi dompak Ai; ai nunga hupasahat tu tanganmu huta i. Jadi dipaunjur si Josua ma hujurna di bagasan tanganna dompak huta i.

¹⁹Jadi hapogan ma angka na monggop i hehe sian ingananna, jala marlojong nasida, dung dipatoltol ibana tanganna, gabe masuk ma nasida tu huta i, jala ditaban, disiluhon nasida manurbu huta i.

²⁰Dung i humusor ma angka baoa sian Ai dampak pudi, gabe diida nasida ma martimpul timus ni huta i dampak langit, jala ndang adong be gogonasida maporus manang dampak dia; jala bangso na maporus dampak halongonan mulak muse mangalo dampak pangeahi.

²¹Alai dung diida si Josua dohot sandok Israel naung ditaban angka na monggop i huta i, jala naung martimpul timus ni huta i, mulak nasida, jala dibunu nasida sude angka baoa sian Ai.

²²Ruar ma dohot angka nasida sian huta i manjumpangkon nasida, jadi dihapit Israel i ma nasida tuk humaliang, jala dibunui nasida, paima soadong tading sian nasida nanggo sahalak maporus manang malua.

²³Dung i ditangkup nasida ma raja ni Ai songon i mangolu, jala diboan ibana tu si Josua.

²⁴Jadi dung siap dibunu Israel sandok isi ni Ai angka na di adaran na di halongonan, haporusanna nilelenasida i, jala ditampuli nasida saluhutna dohot podang sun siap, gabe mulak ma sandok Israel tu Ai, jala ditampuli pangisina i.

²⁵ Jadi sude angka na rage di na sadari i sian baoa ro di boruboru, sampulu dua ribu ma sude isi ni huta Ai.

²⁶ Alai ndang dipasuang si Josua tanganna, na pinaunjurna i hujur i, paima sun siap sude isi ni Ai.

²⁷ Holan pinahan dohot taban sian huta i dibagi halak Israel di nasida, hombar tu hata ni Jahowa na tinonahonna tu si Josua.

²⁸ Jadi disurbu si Josua ma Ai, jala dibahen parturanggongan tarulang salelenglelengna rasirasa sadarion.

²⁹ Langgo raja ni Ai digantung do tu hau sahat ro di botari. Alai manihir mata ni ari, didokkon si Josua ma paijuron bangkena i sian hau, jala ditimpalhon nasida ma i tu baba pintu ni harbangan ni huta i, jala dipatindang di atasna sada tambak bolon sian batu rasirasa sadarion.

³⁰ (III.) Uju i ma dipauli si Josua sada langgatan di Jahowa, Debata ni Israel di atas dolok Ebal.

³¹ Songon na tinonahon ni si Musa, naposo ni Jahowa tu halak Israel, songon na tarsurat di bagasan buku patik ni si Musa, sada langgatan sian batu angka na sobinarbar, na so hona bosi, gabe dipelehon ma di ginjangna angka pelean situtungon tu Jahowa, jala dipelehon angka pelean hamauliateon.

³²Dung i diuhirhon ibana ma disi tu angka batu i manduai patik ni si Musa, na tarsurat di adopan ni halak Israel.

³³Jadi sandok Israel dohot angka sintuana ro di angka partogi dohot panguhum jongjong angkupangkup di lambung ni poti di adopan ni angka malim dohot halak Lepi, angka na mangusung poti parpadanan ni Jahowa, songon i parripe, songon i raja huta satonga di robean ni dolok Gerizim, na satonganari di robean ni dolok Ebal, songon na tinonahon ni si Musa, naposo ni Jahowa hian laho mamasumasu bangso Israel na jolo.

³⁴Dung songon i, dijaha ibana ma saluhut hata ni patik i, pasupasu i dohot torutoru i, sude songon na tarsurat di bagasan buku patik.

³⁵Ndang adong nanggo sada hata sian saluhut hata ni tinonahon ni si Musa, na so jinaha ni si Josua di adopan ni sandok luhutan Israel, ro di angka inaina dohot dakdanak dohot halak dagang na manompang di tongatonganasida.

9¹(I.) Jadi dung sar barita i dibege sude raja, angka na di bariba ni Jordan, di dolok dohot di pea dohot di sandok pasir ni laut bolon, tondong ni Libanon, i ma halak Het, Amori, Kanaan, Perisi, Hevi dohot Jebusi.

²Jadi marluhut ma nasida, marsatahi laho marmusu dampak si Josua dohot dampak Israel.

³(II.) Alai anggo pangisi ni Gibeon, dung dibege na binahen ni si Josua tu Jeriko dohot tu Ai.

⁴Dohot ma nasida mambahen angka, laho ma nasida masibohal, dibuat nasida ma pardahanonan, angka na buruk, dihuli angka halode nasida dohot isian anggur angka na basebasean, jala na maribak, jala na nirahutan.

⁵Dohot sipatu angka na buruk, jala na nidungkapan di patnasida, jala dialithon angka ulos na buruk tu nasida, jala nasa sagusagu bohalsida i pe, pir do jala lapuhon.

⁶Dung i laho ma nasida mandapothon si Josua tu parsaroan di Gilgal, jala didok ma tu ibana dohot tu halak Israel: Na ro sian tano na dao do hami, on pe bahen hamu ma parjanjian tu hami.

⁷Dung i didok halak Israel ma tu halak Hevi: Atik tung di tongatonganami do ho maringan, beha ma pambahennami umpungka parjanjian tu hamu?

⁸Alai ninna angka nasida ma tu si Josua: Naposom nama hami on! Jadi didok si Josua ma tu nasida: Ise hamu, jala sian dia hamu ro?

⁹Dung i didok nasida ma tu ibana: Na ro sian tano na dao situtu do hami angka naposomon, ala ni barita ni Jahowa Debatamu; ai hubege

hami baritana dohot sude na binahenna di Misir.

¹⁰Ro di sude na binahenna tu na dua raja ni halak Amori, na di bariba ni Jordan, tu Sihon, raja ni Hesbon dohot tu Og, raja di Basan, na maringan di Astarot.

¹¹Jadi didok angka sintuanami dohot sude isi ni tanonami tu hami, songon on: Boan hamu ma bohal di dalan, jala laho ma hamu manjumpangkon nasida, jala dok hamu ma tu nasida: Naposomuna do hami on, on pe sai pungka hamu ma parjanjian tu hami!

¹²Rotinamion, las dope huboan hami sian jabunami bahen bohalnami di ari haboborhatnami laho tu hamu on; alai anggo nuaeng, ida ma, nunga pola pir jala lapuhon.

¹³Jala isian ni anggurnami on, angka na hugoki hami imbaru dope, hape ida ma, nunga pola maribak, jala angka ulosnami on dohot sipatunami on, nunga pola buruk dibahen pardalanan na dao situtu.

¹⁴Jadi dijalo angka baoa i ma sian bohalnasida, alai ndang jolo disungkunhon nasida tu Jahowa.

¹⁵Jadi dibahen si Josua ma pardemahan tu nasida, jala dipungka parjanjian tu nasida, pangoluonna nasida didok, pola diuarihon angka induk ni luhutan i tu nasida.

¹⁶(III.) Alai salpu tolu ari, dung dipungka parjanjian i tu nasida, dibege nasida ma jonok

do hape nasida di lambungna, jala maringan di tongatonganasida.

¹⁷Dung i borhat ma halak Israel, gabe sahat ma nasida tu hutanasida patoluarohon; angka hutanasida ondo: Gibeon, Kepira, Beerot dohot Kiriath Jearim.

¹⁸Jadi ndang dibunu halak Israel nasida, ala naung dimangmangkon angka induk ni luhutan i tu Jahowa, Debata ni Israel di nasida. Jadi marmungutmungut ma sandok luhutan i dompak angka induk i.

¹⁹Jadi didok sude angka induk i tu sandok luhutan i: Nunga pola huuarihon hami di nasida tu Jahowa, Debata ni Israel, dibahen i ndang tarbahen hita mangkahua nasida.

²⁰Alai on ma tabahen tu nasida, tapangolu nasida, asa unang ro rimas manginona tu hita ala ni uawari, na huuarihon hami tu nasida.

²¹Jadi didok angka induk i ma tu nasida: Loas mangolu nasida, asa angka parsoban jala partuaek nasida di sandok luhutan i, songon na nidok ni angka induk i tu nasida.

²²Jadi dijou si Josua ma nasida, jala didok tu nasida songon on: Boasa tung paotootoonmuna hami, mandok: Na holang situtu do hami sian hamu, hape maringan di tongatonganami do hamu?

²³On pe sitoruan ma hamu, ndang be mansohot sian hamu gabe hatoban dohot parsoban dohot partuaek di bagas ni Debata.

²⁴Jadi didok angka nasida ma mangalusi si Josua: Tangkas do tarbortik tu angka naposomon, na tinonahon ni Jahowa Debatam tu si Musa, naposona, lehononna tu hamu sandok tano on, jala siaphononmu sude isi ni tano on maradophon hamu; jadi mabiar situtu hami taringot tu hosanami maradophon hamu, gabe hubahen hami songon i.

²⁵On pe, ida ma, guru dokmu do hami; na denggan jala na tigor di roham bahenonmu tu hami, i ma bahen.

²⁶Jadi dibahen ma songon on tu nasida, dipalua nasida sian tangan ni halak Israel, asa unang nasida dibunu.

²⁷Jadi dibahen si Josua ma nasida di ari na sasada i, gabe parsoban dohot partuaek di luhutan i dohot di langgatan ni Jahowa, rasirasa sadarion tu inganan sipillitonna.

10¹(I.) Alai dung dibege si Adonizedek, raja sian Jerusalem, naung ditaban si Josua huta Ai, jala disiaphon, songon na binahenna i tu Jeriko dohot tu rajana, laos songon i dibahen tu Ai dohot tu rajana, jala naung mardemak i isi ni Gibeon tu Israel, laos maringan di tongatonganasida.

²Jadi mabiar situtu ma nasida, ai huta na bolon do Gibeon i, sobokkon sada sian angka huta hundulan ni harajaon, jala umbalga huta i sian Ai, jala angka na begu sude baoa isi ni huta i.

³Dibahen i marhara ma si Adonizedek, raja sian Jerusalem tu si Hoham, raja sian Hebron dohot tu si Piram, raja sian Jarmut, dohot tu si Japia, raja sian Lakis, dohot si Debir, raja sian Eglon, didok ma:

⁴Nangkok ma hamu mandapothon ahu, jala urupi hamu ma ahu, asa itapapatu Gibeon, ai nunga mardemak nasida tu si Josua dohot tu halak Israel.

⁵Jadi marpungu ma, jala nangkok na lima raja ni halak Amori, i ma raja sian Jerusalem, raja sian Hebron, raja sian Jarmut, raja sian Lakis, raja sian Eglon, nasida rap dohot sude parduan ni parangannasida, gabe marsaro nasida tondong ni Gibeon, laos marmusu dompak huta i.

⁶(II.) Dung i disuru angka baoa sian Gibeon ma suruanna tu si Josua, tu parsaroan ni Gilgal, angka didok nasida ma: Unang tallushon tanganmi sian hami angka naposom, haru tibu ma ho nangkok mandapothon hami, paluahon dohot urupi hami; ai nunga marpungu dompak hami sude raja ni halak Amori, angka na maringan di dolok.

⁷Jadi nangkok ma si Josua sian Gilgal, ibana dohot sandok sialo musu donganna, ro di sude angka na begu marmusu.

⁸Dung i didok Jahowa ma tu si Josua: Unang ho mabiar mida nasida, ai nunga hupasahat

nasida tu tanganmu; ndang adong na pang manang ise sian nasida mandopang ho.

⁹Jadi dirampok si Josua ma nasida; manipat sapornginna i mardalan nasida nangkok sian Gilgal.

¹⁰Jadi disonggoti Jahowa ma nasida maradophon Israel, marragean situtu ma nasida di Gibeon, jala dieak nasida di dalan tungkan robean sian Bethoron, jala dilotong nasida sahat ro di Azeka, sahat ro di Makkedah.

¹¹Jadi di na maporus i nasida maradophon Israel, jala dituatan sian Bethoron nasida, gabe ditinggangkon Jahowa ma tu nasida angka batu bolon sian banua ginjang sahat ro di Azeka, gabe marmatean nasida; tumorop do nasida mate dibahen angka batu ambolas, sian na dibunu halak Israel marhitehite podang.

¹²Uju i ma didok si Josua tu Jahowa, di ari pangalehonan ni Jahowa di halak Amori tu halak Israel, jala didok ma di adopan ni Israel: Sulon ma ho mata ni ari di Gibeon, jala ho bulan di rura Aialon.

¹³Jadi sulon ma mata ni ari i, jala so bulan i, paima martubol bangso i tu musuna. Nda tarsurat do i di bagasan buku ni partigor? Jadi so ma mata ni ari di parsitongaan ni langit, jala ndang humalaput laho sundut, hira manipat sadarina i.

¹⁴Jala ndang adong sobokkon ari na sasada i na sai laon dohot tu pudina on, tung ditangihon Jahowa do suara ni sada halak ai Jahowa do marporang humongkop Israel.

¹⁵Dung i mulak ma si Josua dohot sandok Israel donganna i tu parsaroan di Gilgal.

¹⁶(III.) Alai nunga maporus anggo raja na lima i, jala martabuni nasida tu bagasan liang di Makkedah.

¹⁷Jadi tarbortik ma tu si Josua songon on: Nunga jumpang raja na lima i, angka martabuni do nasida di bagasan liang di Makkedah.

¹⁸Jadi didok si Josua ma: Antong gulang hamu ma angka batu bolon tu baba ni liang i, jala dokkon hamu angka baoa tusi, jumaga nasida.

¹⁹Alai unang togang anggo hamu, lele hamu ma musumuna, jala bunu hamu ma parpudinasida, unang loas hamu nasida bongot tu hutanasida i, ai nunga dipasahat Jahowa Debatamuna nasida tu tanganmuna.

²⁰Jadi dung rendep nasida dibahen si Josua dohot dibahen halak Israel martongtang bolon situtu; alai adong deba malua, angka na maporus i sian nasida, sanga bongot tu angka huta na gonting.

²¹Jadi mulak ma sandok bangso i tu parsaroan, tu si Josua di Makkedah mardamedame, ndang adong na hum

manang ise pahurehure dilana dompak
manang ise sian halak Israel.

²²Dung i didok si Josua ma: Ungkap hamu
ma baba ni liang i, jala togihon hamu ruar
sian liang i raja na lima i mamboan tu ahu.

²³Jadi dibahen nasida ma songon i, ditogihon
ma ruar sian liang i tu ibana na lima rajai:
Raja sian Jerusalem, raja sian Hebron, raja
sian Jarmut, raja sian Lakis dohot raja sian
Eglon.

²⁴Jadi dung ruar ditogihon nasida angka
rajai tu si Josua, dipaluhut si Josua ma sude
baoa ni Israel, jala didok ma tu angka partogi
ni parangan, angka na borhat rap dohot
ibana: Ro ma hamu tuson, bahen hamu ma
patmuna tu tangkuhuk ni angka rajai! Jadi
jumonok ma nasida, jala dibahen be patna tu
tangkuhuknasida i.

²⁵Dung i didok si Josua ma tu nasida: Unang
hamu mabiar, jala unang tahuton hamu; pir
ma tondimuna jala marsihohot; ai songon i
do bahenon ni Jahowa tu saluhut musumuna,
angka siporanganmuna i.

²⁶Dung i dibunu si Josua ma nasida, jala
digantung nasida tu lima hau, laos targantung
ma nasida di angka hau i sahat ro di botari.

²⁷Alai marhira laho mate mata ni ari,
didokkon si Josua ma paijuron nasida sian
angka hau i, jala timpalhononhon nasida tu
bagasan liang, partabunianasida na jolo, jala

dibahennasida angka batu bolon tu baba ni liang i, angka na disi rasirasa sadarion.

²⁸(IV.) Makkedah pe ditaban si Josua do di ari na sasada i, jala ditampuli pangisina i dohot podang, diharomhon dohot rajana ro di sude hosa na di bagasan huta i, ndang adong malua nanggo sada; jala dibahen do tu raja ni Makkedah, songon na binahenna i tu raja ni Jeriko.

²⁹Dung i borhat ma si Josua rap dohot sandok Israel sian Makkedah tu Libna, laho marporang dompak Libna.

³⁰Huta i pe dilehon Jahowa do tu tangan ni Israel, ro di rajana, jala ditampuli saluhut hosa na di bagasan huta i, jala ndang adong na malua nanggo sada, jala dibahen tu rajana, songon na binahenna i tu raja ni Jeriko.

³¹Dung i borhat ma si Josua rap dohot sandok Israel sian Libna tu Lakis, jala ditungkum huta i, jala diporang.

³²Dung i dilehon Jahowa ma nang Lakis tu tangan ni Israel, gabe ditaban huta i paduaarihon, jala ditampuli sude hosa, angka na di bagasan huta i, sandok songon na binahenna i tu Libna.

³³Uju i ma nangkok si Horam, raja sian Gezer laho manogari Lakis; alai dipapatu si Josua do ibana ro di bangsona, paima soadong tading di ibana nanggo sada.

³⁴Dung i borhat ma si Josua rap dohot sandok Israel sian Lakis tu Eglon, jala ditungkum huta i, jala diporang.

³⁵Jadi ditaban nasida ma huta i di ari na sasada i, jala ditampuli sude hosa na di bagasan huta i, diharomhon ma di ari na sasada i, sandok songon na binahenna i tu Lakis.

³⁶Dung i nangkok ma si Josua rap dohot sandok Israel sian Eglon tu Hebron, jala diporang huta i.

³⁷Jadi ditaban nasida huta i, jala ditampuli pangisina ro di rajana dohot nasa hosa angka na di bagasan huta i, ndang adong tading nanggo sada, sandok songon na binahenna i tu Eglon, jala diharomhon huta i ro di sude hosa angka na di bagasan.

³⁸Dung i mulak ma si Josua rap dohot sandok Israel tu Debir, jala diporang huta i.

³⁹Jadi ditaban ma huta i ro di rajana dohot nasa hutana, ditampuli jala diharomhonnasida ma saluhut hosa angka na di bagasan huta i, ndang adong malua nanggo sada, songon na binahenna i tu Hebron, songon i ma dibahen tu Debir dohot tu rajana, jala songon na binahenna i tu Libna dohot tu rajana.

⁴⁰Asa dipapatu si Josua ma sandok tano i: Tor Juda dohot tano tungkan dangsina dohot tano pea i ro di angka tuatan rap dohot rajanasida sudena, ndang adong tading nanggo sada, diharomhon do saluhut na

marhosa, songon na tinonahon ni Jahowa,
Debata ni Israel.

⁴¹ Jadi dipapatu si Josua ma nasida, olat ni
Kades-Barnea sahat ro di Gaza dohot sandok
tano Gosen, jala sahat ro di Gibeon.

⁴² Jala sude angka rajai, ro di tanonasida,
rap sahali ditaban si Josua do; ai Jahowa
Debata ni Israel marporang humongkop
Israel.

⁴³ Dung i mulak ma si Josua rap dohot
sandok Israel tu parsaroan na di Gilgal.

11 ¹ (I.) Alai dung dibege si Jabin, raja
sian Hazor barita i, marhara ma ibana
tu Jobab, raja sian Madon, dohot tu raja sian
Simron, dohot tu raja sian Aksap.

² Dohot tu raja, angka na tungkan utara, di
dolok dohot di tano adaran, tungkan dangsina
sian Kinerot dohot di tano pea dohot di angka
luat Dor martopihon laut.

³ Tu halak Kanaan tungkan habinsaran dohot
tungan hasundutan, tu halak Amori, halak
Het, halak Perisi, halak Jebusi, angka na di
dolok dohot tu halak Hevi, tungkan bona ni
Hermon di luat Mispa.

⁴ Jadi borhat ma nasida rap dohot sude
parangannasida, bangso na bolon situtu,
sobokkon horsik na di pasir ni laut toropna,
tole hoda dohot hureta mansai torop.

⁵ Marluhut ma sude angka raja ondeng, jala
ro rap marsaro mardonokkon tao Merom laho
marmusu dompak Israel.

⁶Jadi didok Jahowa ma tu si Josua: Unang ho mabiar maradophon nasida, ai marsogot songon on pasahatonku ma nasida luhut ragehonon ni halak Israel; tangkaonmu ma ianggo pat ni hodanasida, jala tutungonmu huretanasida dohot api.

⁷Jadi dirampok si Josua rap dohot nasa paranganna nasida so pangkirimanna martopihon tao Merom.

⁸Jadi dilehon Jahowa ma nasida tu tangan ni halak Israel, angka na manaluhon nasida, jala dilele sahat ro di Sidon na bolon, sahat ro di Misrepot-Maim, jala sahat ro di rura Mispa tungkan habinsaran, jala diragehon nasida paima soada tading sian nasida nanggo sahalak.

⁹Jadi dibahen si Josua ma tu nasida songon na nidok ni Jahowa tu ibana, ditangka ma pat ni hodanasida, jala ditutung angka huretanasida dohot api.

¹⁰(II.) Dung i mulak ma si Josua uju i, jala dipapatu Hazor, jala ditampuli rajana dohot podang, ai Hazor do nasailaon huta sabungan ni saluhut angka harajaon i.

¹¹Jala ditampuli sudejolma isi ni huta i, huhut harom dibahen, ndang adong tading nanggo sada na marhosa, jala disurbu Hazor dohot api.

¹²Ro di sude huta ni angka raja ondeng dohot sude rajanasida i ditaban si Josua, jala ditampuli nasida dohot podang, huhut harom

nasida dibahen, songon na tinonahon ni si Musa, naposo ni Jahowa.

¹³Holan sude huta angka na ojak di buntulbuntul, ndang disurbu Israel, dungkon ni Hazor sambing disurbu si Josua.

¹⁴Dung i dibagi halak Israel ma di nasida sandok tabantaban ni angka huta i, ro di pinahan; holanjolma i luhut ditampuli nasida, paima sun siap nasida, ndang adong tading na marhosa nanggo sada.

¹⁵Songon na tinonahon ni Jahowa tu si Musa, naposona i, songon i do ditonahon si Musa tu si Josua, jala songon i do dibahen si Josua, ndang adong tading dibahen sian sude na tinonahon ni Jahowa tu si Musa, nanggo sada hata.

¹⁶Jadi disoluk si Josua ma sandok tano i: Tano dolok dohot sandok tano tungkan dangsina ro di sandok tano Gosen, tano pea dohot adaran, ro di dolok Israel dohot angka rurana.

¹⁷Olat ni tor saesae, na nangkok tungkan Seir sahat ro di Baal-Gad, di rura ni Libanon, marbonahon dolok Hermon, jala sude rajanasida i ditaban, jala dibunu nasida.

¹⁸Alai nania leleng do si Josua marmusu dohot sude angka raja ondeng.

¹⁹Ndang adong nanggo sada huta na mardemak tu halak Israel sian dengganna, dungkon ni halak Hevi, angka na maringan di

Gibeon; saluhut huta i dibuat nasida marhite sian porang.

²⁰Ai sian Jahowa do tangkang ni rohanasida i laho marmusu dompak Israel, asa harom nasida, jala unang nasida jumpangan asi ni roha, asa tung siap nasida, songon na tinonahon ni Jahowa tu si Musa.

²¹(III.) Uju i ma huhut ro si Josua mangaripurhon halak Enak sian tor, sian Hebron, sian Debir, sian Anab, sian sandok tor Juda dohot sian sandok tor Israel, jala harom nasida rap dohot hutanasida i dibahen si Josua.

²²Ndang adong tading halak Enak di tano ni halak Israel, holan di Gaza, di Gad dohot di Asdod adong tading nasida.

²³Jadi dipapatu si Josua ma nasa tano i, sandok hombar tu na nidok ni Jahowa tu si Musa, jala diparlehon si Josua tano i bahen partalian ni Israel, hombar tu sagisagiannasida marmargamarga. Dung i sohot ma hamusuon sian tano i.

12¹(I.) Alai ondo raja ni tano i, angka na tinaluhon ni halak Israel, jala disoluk tanonasida di bariba ni Jordan, tungkan habinsaran, olat ni batang aek Arnon sahat ro di dolok Hermon dohot sandok adaran tungkan habinsaran.

²I ma Sihon, raja ni halak Amori, na maringan di Hesbon, ia ginomgomanna olat ni Aroer na martopihon batang aek Arnon

sahat ro di parsitongaan ni batang aek i, ro di satonga Gilead sahat ro di batang aek Jabok, parbalohan ni tano ni halak Amon.

³ Salpu adaran sahat tu tao Kinnerot tungkan habinsaran, jala sahat ro di laut ni rura i, i ma laut sira tungkan habinsaran, di dalam laho tu Betjesimot, jala di dangsina marbonahon angka tuatan ni Pisga.

⁴ Angkup ni luat ni si Og, raja sian Basan, sian pasipasi ni halak Repaim, angka na maringan di Astarot dohot Edrei.

⁵ Jala digomgomi dolok Hermon dohot Salka, ro di sandok Basan sahat tu parbalohan ni halak Gesur i dohot Maaka i dohot satonga Gilead, parbalohan ni tano ni Sihon, raja sian Hesbon.

⁶ Si Musa dope, naposo ni Jahowa rap dohot halak Israel manaluhon nasida, laos si Musa naposo ni Jahowa mangalehon tano i bahen partalian ni halak Ruben, Gad dohot satonga Manasse.

⁷ (II.) Alai ondo raja di tano i, angka na tinaluhon ni si Josua rap dohot halak Israel di bariba ni Jordan tungkan hasundutan, olat ni Baal-Gad na di rura ni Libanon, sahat ro di tor na saesae, laho nangkok tungkan Seir, jala dilehon si Josua tano i bahen partalian di angka marga ni Israel, mangihuthon sagisagiannasida.

⁸ Tano di dolok, di rura, di adaran, di angka tuatan, di halongonan dohot di tano tungkan

dangsina: Halak Het, Amori, Kanaan, Perisi,
Hevi dohot Jebusi.

⁹Raja sian Jeriko sada, raja sian Ai, na
tungan lambung sian Betel sada.

¹⁰Raja sian Jerusalem sada, raja sian Hebron
sada.

¹¹Raja sian Jarmut sada, raja sian Lakis
sada.

¹²Raja sian Eglon sada, raja sian Gezer
sada.

¹³Raja sian Debir sada, raja sian Geder
sada.

¹⁴Raja sian Horma sada, raja sian Arad
sada.

¹⁵Raja sian Libna sada, raja sian Adullam
sada.

¹⁶Raja sian Makkedah sada, raja sian Betel
sada.

¹⁷Raja sian Tappua sada, raja sian Heper
sada.

¹⁸Raja sian Apek sada, raja sian Lasaron
sada.

¹⁹Raja sian Madon sada, raja sian Hazor
sada.

²⁰Raja sian Simron-Meron sada, raja sian
Aksap sada.

²¹Raja sian Taanak sada, raja sian Megiddo
sada.

²²Raja sian Kedes sada, raja sian Jokneam
sada marbonahon Karmel.

²³Raja sian Dor, na di luat Dor sada, raja ni parbegu angka na di Gilgal sada.

²⁴Raja sian Tirza sada. Saluhut angka rajai tolupulu sada halak toropna.

13¹ (I.) Jadi dung sarimatua si Josua, didok Jahowa ma tu ibana: Nunga sarimatua ho, jala godang situtu dope tano i tading sipapatuon.

²On do tano na tading i dope: Sandok parbalohan ni halak Palistim dohot sandok tano Gesur i.

³Olat ni Sihor na mardalan di Misir sahat ro di parbalohan Ekron tungkan utara, na masuk etongan tu halak Kanaan: Na lima raja ni halak Palistim, raja sian Gaza, Asdod, Askelon, Gad dohot sian Ekron, ro di halak Awi.

⁴Tungkan dangsina sandok tano ni halak Kanaan dohot Meara, na di halak Sidon, sahat ro di Apek, sahat tu parbalohan ni halak Amori.

⁵Angkup ni tano ni halak Gebal i dohot sandok Libanon, tungkan habinsaran, olat ni Baal-Gad na marbonahon dolok Hermon, tolhas ro di Hamat.

⁶Sude pangisi ni tor, olat ni Libanon sahat ro di Misrepot-Maim, sude halak Sidon, Ahu ma mangonjar nasida maradophon halak Israel. Rujirujihon sambing bahen partalian di Israel, songon na hutonahon i tu ho.

⁷ On pe bagihon ma tano on bahen partalian di na sia marga dohot di satonga marga Manasse.

⁸(II.) Marga Manasse na satonganari rap dohot marga Ruben dohot Gad, nunga manjalo partalianna be, na nilehon ni si Musa tu nasida di bariba ni Jordan tungan habinsaran, songon na nilehon ni si Musa, naposo ni Jahowa tu nasida.

⁹ Olat ni Aroer, na martopihon sunge Arnon dohot huta na di tongatonga ni sunge i, ro di sandok adaran Medeba sahat tu Dibon.

¹⁰ Dohot sude huta ni Sihon, raja ni halak Amori, na manggomgomi Hesbon sahat ro di parbalohan ni halak Amon.

¹¹ Angkupni Gilead dohot tano ni halak Gesur i dohot Maaka i dohot sandok dolok Hermon dohot sandok Basan sahat tu Salka.

¹² Sandok gomgoman ni Og di Basan, na manggomgomi Astarot dohot Edrei: Ibana do na tinggal sian pasipasi ni pinompar ni si Repaim, na pinapatu ni si Musa jala dionjar.

¹³ Alai ndang dionjar halak Israel anggo halak Gesur i dohot halak Maaka, maringan di tongatonga ni halak Israel do Gesur dohot Maaka rasirasa sadarion.

¹⁴ Holan tu marga Lepi ndang dilehon ibana partalian, angka pelean situtungon tu Jahowa, Debata ni Israel tahe partalianna, songon na pinarbagana i tu nasida.

¹⁵(III.) Asa nunga dilehon si Musa hian partalian, anggo tu marga Ruben marsuhusuhu.

¹⁶Ia parbalohannasida olat ni Aroer na martopihon sunge Arnon dohot huta na di parsitongaan ni sunge i, ro di sandok tano pea na di lambung ni Medeba.

¹⁷Hesbon ro di sude hutana angka na di pea, Dibon dohot Bamot-Baal dohot Bet-Baal-Meon.

¹⁸Jahaz, Kadermat dohot Mepaat.

¹⁹Kiriataim, Sibma, Zeret Hasahar di atas dolok ni rura i.

²⁰Betpeor, angka tuatan ni Pisga dohot Betjesimot.

²¹Dohot sude huta di tano pea, ro di sandok harajaon ni Sihon, raja ni halak Amori, na manggomgom di Hesbon, na pinapatu ni si Musa, ibana dohot angka induk sian Midian, i ma Evi, Rekem, Sur, Hur dohot Reba, angka raja wakil ni Sihon, angka na maringan di tano i.

²²Dohot Bileam, anak ni si Beor, pangarunding i dibunu halak Israel marhitehite podang, ro di dongannasida angka na tartiham.

²³Jadi parbalohan ni tano ni halak Ruben, batang aek Jordan do ro di tobingna. I ma partalian ni halak Ruben marsuhusuhu, angka huta dohot sosor.

²⁴ (IV.) Nunga dilehon si Musa hian anggo tu marga Gad, tu angka anak ni si Gad marsuhusuhu.

²⁵ Ia parbalohannasida, i ma Jaser dohot sude huta di Gilead, dohot satonga ni tano ni halak Amon sahat ro di Aroer na di jolo ni Rabba.

²⁶ Jala olat ni Hesbon sahat ro di Ramot-Mispa dohot Betonim, jala olat ni Mahanaim sahat ro di parbalohan ni Debir.

²⁷ Dohot di rura Betharam, Betnimra, Sukot dohot Zapon, ebaeba sian harajaon ni Sihon, raja sian Hesbon, Jordan dohot tobingna, sahat ro di ujung ni tao Kinerot di bariba ni Jordan tungkan habinsaran.

²⁸ I ma partalian ni halak Gad marsuhusuhu, angka huta dohot sosor.

²⁹ (V.) Nunga dilehon si Musa hian partalian, nang tu satonga marga Manasse, gabe satonga Manasse nampunasa marsuhusuhu.

³⁰ Jadi parbalohanna olat ni Mahanaim sandok Basan, saluhut harajaon ni si Og, raja sian Basan, dohot sude huta ni si Jair na di Basan, onompulu huta toropna.

³¹ Dohot satonga Gilead, Astarot, Edrei, angka huta ni harajaon ni si Og di Basan, dilehon tu angka anak ni si Mahir, anak ni si Manasse, tu anak ni si Mahir na satonga marsuhusuhu.

³²I ma na binagi ni si Musa di adaran ni Moab, di bariba ni Jordan, tondong ni Jeriko tungkan habinsaran.

³³Alai tu marga Lepi ndang adong partalian dilehon si Musa, Jahowa Debata ni Israel, Ibana do partaliannasida, songon na pinarbagana i tu nasida.

14¹(I.) Alai on do partalian, angka na jinalo ni halak Israel di tano Kanaan, na binagihon ni malim Eleasar dohot Josua, anak ni si Nun dohot angka induk ni halak Israel marmargamarga.

²Marhite sian rujiruji do dibagi partaliannasida, songon na tinonahon ni Jahowa marhitehite si Musa, lehonon tu na sia margai dohot tu satonga Manasse.

³Ai nunga dilehon si Musa partalian ni na dua marga dohot na satonga i di bariba ni Jordan, alai tu halak Lepi, ndang adong dilehon partalian di tongatonganasida.

⁴Ai angka anak ni si Josep manjadi dua marga, i ma Manasse dohot Epraim; dibahen i ndang dilehon nasida partalian anggo tu halak Lepi di tano i, dungkon ni angka huta bahen inganan dohot upa parik bahen panjampalan di pinahannasida dohot sinamotnasida.

⁵Songon na tinonahon ni Jahowa tu Musa hian, songon i dibahen halak Israel, jala dibagi nasida tano i.

⁶(II.) Dung i ro ma halak Juda mandapothon si Josua di Gilgal, gabe didok si Kaleb, anak ni

si Jepune, marga Keni tu ibana: Diboto ho do hata na nidok ni Jahowa tu si Musa, naposo ni Debata, taringot tu ahu dohot taringot tu ho di Kades-Barnea.

⁷Marumur opatpulu taon ma ahu, uju na sinuru ni si Musa, naposo ni Jahowa, ahu sian Kades-Barnea laho mangkahapi tano i, gabe mulak ahu mamboan barita tu ibana marguru tu panimbang ni rohangku.

⁸Alai anggo donganku, angka na nangkok rap dohot ahu, mangganggu roha ni na torop i; alai anggo ahu sun do parsihohot ni rohangku, mangihuthon Jahowa, Debatangku.

⁹Jadi maruari ma si Musa di ari na sasada i, songon on: Tano na nidalaman ni patmu, di ho ma i bahen partalian, ro di angka anakmu salelenglelengna, ala parsihohot ni roham di Jahowa, Debatangku.

¹⁰On pe, ida ma, dipangolu Jahowa do ahu songon na nidokna i, na opatpulu lima taon on, olat ni dung didok Jahowa hata ondeng tu si Musa, saleleng mardalan Israel di halongonan; on pe, ida ma, ualupulu lima taon ahu sadarion.

¹¹Tong dope gogongku sadarion, songon uju di ari parsuru ni si Musa di ahu; songon gogongku uju i, laos songon i dope gogongku nuaeng, nang marporang, nang laho marmeang muli.

¹²On pe sai lehon ma tu ahu tor on, na nidok ni Jahowa di ari na sasada i, ai dibege

ho do uju i, halak Enak disi, jala huta angka na bolon dohot na gonting; anggiat didongani Jahowa ahu, asa huonjar nasida, songon na ni dok ni Jahowa.

¹³Jadi dipasupasu si Josua ma ibana, jala dilehon Hebron tu si Kaleb, anak ni si Jepune bahen partalian.

¹⁴Ala ni do gabe Hebron partalian ni si Kaleb, anak ni si Jepune, marga Keni rasirasa sadarion, ala parsihohot ni rohana di Jahowa, Debata ni Israel.

¹⁵Alai goar ni Hebron di na robi Kiryat-Arba;jolma na bolon do ibana di halak Enak. Jadi sonang ma tano i sian hamusuon.

15¹(I.) Ia partalian ni marga ni angka anak ni si Juda marsuhusuhu tungkan parbalohan ni Edom, halongonan Sin tungkan dangsina, di partalpahan dangsina.

²Jala parbalohannasida tungkan dangsina sian ujung ni laut Sira, sian tanjung na mamedu tungkan dangsina.

³Jala rura tungkan dangsina sahat tu robean Akrabim, jala taripar tu Sin, jala nangkok tungkan dangsina sian Kades-Barnea, taripar muse tu Hezron, jala nangkok tungkan Adar, jala mamedu tungkan Karka.

⁴Jala taripar tu Azmon, jala ruar sahat ro di sunge Misir, gabe partalpahan ni parbalohanna tungkan laut. I ma parbalohanmuna tungkan dangsina.

⁵Ia parbalohanna tungkan habinsaran, laut Sira sahat ro di ujung ni Jordan. Ia parbalohanna di lambung tungkan utara olat ni tanjung ni laut sian ujung ni Jordan.

⁶Jala nangkok parbalohanna tungkan Bethoglah, jala mamolus sian utara tungkan Bet-Araba, jala nangkok parbalohan i tu batu ni si Bohan, anak ni si Ruben.

⁷Jala nangkok parbalohan i tungkan Debir sian rura Akor, jala tungkan utara mamedu tu Gilgal, tondong ni robean Adumim, na tungkan dangsina sian sunge i. Dung i taripar parbalohan i tu aek Ensemes, jala partalpahanna tu mual Enrogel.

⁸Dung i nangkok parbalohan i tu rura ni anak ni si Hinnom, sambola tungkan dangsina ni halak Jebusi, i ma Jerusalem; dung i nangkok parbalohan i tu punsu ni dolok, na di jolo ni rura Hinnom tungkan laut, na di ujung ni rura Repaim tungkan utara.

⁹Dung i gistang parbalohan i sian punsu ni dolok tu mual ni aek Neptoa, jala ruar tu angka huta ni tor Epron, jala gistang parbalohan i tungkan Baalah, i ma Kiriati-Jearim.

¹⁰Dung i mamedu parbalohan i sian Baalah tungkan laut tu tor Seir, jala taripar tu lambung ni tor Jearim sian utara, i ma Kesalon, jala tuat tungkan Betsemes, jala taripar tu Timna.

¹¹ Jala ruar parbalohan i jonok tu Ekron tungkan utara, jala gistang parbalohan i tungkan Sikron, jala taripar tu dolok Baalah, jala ruar tungkan Jabnel, gabe angka partalpahan ni parbalohan i tungkan laut.

¹² Jala parbalohan tungkan laut, i ma laut na bolon ro di pasirna. I ma parbalohan ni angka anak ni si Juda humaliang marsuhusuhu.

¹³ (II.) Alai tu si Kaleb, anak ni si Jepune, dilehon ibana sada bagian di tongatonga ni angka anak ni si Juda, hombar tu tona ni Jahowa tu si Josua, i ma huta ni si Arba, ama ni si Enak, i ma Hebron.

¹⁴ Jadi dionjar si Kaleb ma sian na tolu anak ni si Enak, i ma si Sesai, si Ahima dohot si Talmai, angka tubu ni si Enak.

¹⁵ Dung i nangkok ma ibana sian i tu pangisi ni Debir; ia goar ni Debir di na robu Kiriath Sepher.

¹⁶ Jadi didok si Kaleb ma manang ise na papatu Kiriath Sepher, jala ditaban, lehononku ma tu ibana borongku si Aksa bahen jolmana.

¹⁷ Jadi ditaban si Otniel, anak ni si Kenas, anggi ni si Kaleb huta i, gabe dilehon ma tu ibana si Aksa, boruna i bahen jolmana.

¹⁸ Jadi di na bongot i parompuan i disosoi ma ibana mangido hauma santurpuk sian amana, laos mijur ibana sian halode. Jadi didok si Kaleb ma tu nasida: Aha di ho?

¹⁹ Gabe didok nasida ma: Lehon di ahu pasupasus sada! Ai nunga dilehon ho tano na

hasang tu ahu, ba lehon huhut di ahu angka mual. Jadi dilehon ma tu nasida angka mual di julu dohot di toruan.

²⁰(III.) On ma partalian ni marga ni angka anak ni si Juda marsuhusuhu.

²¹Jala angka huta ni marga Juda sian ujung ni sada sahat ro di parbalohan tungkan Edom, di dangsina on do: Kabseel, Eder, Jagur.

²²Kina, Dimona, Adada.

²³Kedes, Hazor, Jitnan.

²⁴Sip, Telem, Belot.

²⁵Hazor-Hadata, eriot Hesron, Hezron, i ma Hazor.

²⁶Amam, Sema, Molada.

²⁷Hazor-Gadda, Hesmon, Betpelet.

²⁸Hasar-Sual, Berseba, Biziotia.

²⁹Baalalah, Ijim, Esem.

³⁰Eltolat, Hesil, Horma.

³¹Ziklag, Madmana, Sansana.

³²Lebaot, Silhim, Ain dohot Rimmon.
Saluhut huta i duapulu sia do toropna ro di sosorna.

³³Ia di rura: Estaol, Zora, Asna.

³⁴Samoah, En Ganim, Tappua, Enam.

³⁵Jarmut, Adullam, Soko, Azeka.

³⁶Saraim, Aditaim, Gedera, Gederotaim;
sampulu opat huta ma i ro di sosorna.

³⁷Zenan, Hadasa, Migdal-Gad.

³⁸Dilon, Mispa, Joktel.

³⁹Lakis, Boskat, Eglon.

⁴⁰Khabon, Lahmas, Kitlis.

⁴¹ Gederot, Bet-Dagon, Naama, Makkedah;
sampulu onom huta ma i ro di sosorna.

⁴² Libna, Eter, Asan.

⁴³ Ipta, Asna, Nesib.

⁴⁴ Keila, Aksib, Maressa; sia huta ma i di
sosorna.

⁴⁵ Ekron ro di angka boruna (huta) dohot
sosorna.

⁴⁶ Sian Ekron jala tungkan laut, sude na
marbalokkon Asdod, dohot sosorna.

⁴⁷ Asdod ro di boruna dohot sosorna, Gaza
ro di boruna dohot sosorna, sahat ro di sunge
Misir, jala laut na bolon parbalohanna.

⁴⁸ Jala di atas tor: Samir, Jatir, Soko.

⁴⁹ Danna, Kiriath Sanna, i ma Debir.

⁵⁰ Anab, Estemo, Anim.

⁵¹ Gosen, Holon, Gilo; sampulu sada huta
ma i ro di sosorna.

⁵² Arab, Duma, Esan.

⁵³ Janum, Bettapua, Apeka.

⁵⁴ Humta, Kiriath-Arba, i ma Hebron, Zior;
sia huta ma i ro di sosorna.

⁵⁵ Maon, Karmel, Sip, Jutta.

⁵⁶ Jisreel, Jokdeam, Sanoa.

⁵⁷ Kain, Gibeon, Timna; sampulu huta ma i ro
di sosorna.

⁵⁸ Halhul, Betzur, Gedor.

⁵⁹ Maarath, Bet-Anoth, Eltekon; onom huta ma
i ro di sosorna.

⁶⁰ Kiriath-Baal, i ma Kiriath-Jearim dohot
Rabba, dua huta ma i ro di sosorna.

⁶¹ Di halongonan: Bet-Araba, Midin, Sekaka.

⁶² Nibsan-Ir-Hamela dohot Engedi, onom huta ma i ro di sosorna.

⁶³ Alai anggo halak Jebusi, isi ni Jerusalemi hian, ndang taronjar halak Juda, gabe maringan halak. Jebusi rap dohot halak Juda di Jerusalem rasirasa sadarion.

16¹ (I.) Dung i ruar ma rujiruji ni partalian di angka anak ni si Josep olat ni Jordan mardonokkon Jeriko sian aek Jeriko tungkan habinsaran sahat tu halongonan, na nangkok sian Jeriko laho tu tor Betel.

² Dung i ruar sian Betel tu Lus, jala taripar sahat ro di parbalohan ni halak Arki tungkan Atarot.

³ Jala tuat tungkan laut tu parbalohan ni halak Japlet i, sahat ro di parbalohan ni Bethoron parjae dohot tu Gezer, jala angka partalpahanna mardonokkon laut.

⁴ I ma gabe partalian ni anak ni si Josep, i ma Manasse dohot Epraim.

⁵ (II.) Ia parbalohan ni angka anak ni si Epraim marsuhusuhu, parbalohan ni partalian nasida tungkan habinsaran, i ma Atarot-Adar, sahat ro di Bethoron parjulu.

⁶ Jala ruar parbalohan i tungkan laut, sian Mikhmetat tungkan utara, gabe mamedu parbalohan i tungkan habinsaran ni Taanat Silo, jala taripar sian i tungkan habinsaran tu Janoa.

⁷ Jala tuat sian Janoa tu Atarot dohot tu Naara, jala manihir tu Jeriko, jala ruar tu Jordan.

⁸ Sian Tappua laho do parbalohan i tungkan laut tu sunge Kana, jala partalpahanna tu laut. I ma partalian ni marga Epraim marsuhusuhu.

⁹ Angkupni huta angka na pinapulik di halak Epraim, di tongatonga ni partalian ni halak Manasse, sude angka huta ro di sosorna.

¹⁰ Alai ndang dionjar nasida halak Kanaan, angka na maringan di Gezer. Jadi maringan ma halak Kanaan di tongatonga ni Epraim rasirasa sadarion, asal di rodi do nasida.

17 ¹ (I.) Maruli partalian dohot marga Manasse marhite sian rujiruji, ai ibana do buhabaju ni si Josep; di si Mahir buhabaju ni si Manasse, ama ni si Gilead dilehon Gilead dohot Basan ala baoa sialo musu ibana.

² Angka anak ni si Manasse na asing pe maruli do marsuhusuhu, angka anak ni si Abieser, angka anak ni si Helek, angka anak ni si Asriel, angka anak ni si Sekem, angka anak ni si Heper dohot angka anak ni Semida. I ma angka anak ni si Manasse tubu ni si Josep, angka baoa marsuhusuhu.

³ Alai anggo di si Zelapehat anak ni si Heper, anak ni si Gilead, anak ni si Mahir tubu ni si Manasse ndang adong anakna, holan angka boru do; jala on do goar ni angka boruna: Malala, Noah, Hoglah, Milka dohot Tirza.

⁴Dung i laho ma nasida manopot tu jolo ni malim Eleasar, dohot tu jolo ni si Josua, anak ni si Nun, dohot tu jolo ni angka induk, angka ninna ma: Martona do Jahowa tu si Musa, ingkon lehonon tu hami sada partalian di tongatonga ni angka ibotonami. Jadi dilehon ma tu nasida sada partalian di tongatonga ni angka hahaanggi ni amanasida i, hombar tu tona ni Jahowa.

⁵Alai anggo Manasse maruli sampulu partalian di ruar di tano Gilead dohot Basan, angka na di bariba ni Jordan.

⁶Ai maruli partalian angka boru ni Manasse di tongatonga ni angka anakna; ianggo tano Gilead di angka anak ni si Manasse na asing do dilehon.

⁷Ia parbalohan ni Manasse olat ni Aser tungkan Mikhmetat na di jolo ni Sikem, jala laho parbalohanna tungkan siamun sahat ro di pangisi ni Entappua.

⁸Di Manasse do nian tano Tappua; alai anggo tano Tappua marbalokkon Manasse di angka anak ni si Epraim do.

⁹Dung i tuat parbalohanna tu sunge Kana, tungkan dangsina sian sunge i. Di Epraim do angka huta i di tongatonga ni huta ni Manasse. Alai anggo parbalohan ni Manasse tungkan utara sian sunge i, jala partalpahanna tungkan laut.

¹⁰Tano tungkan dangsina di Epraim, jala tano tungkan utara di Manasse, gabe laut

parbalohanna; manihir tu Aser do tungkan utara, jala manihir tu Isasar tungkan habinsaran.

¹¹Jadi tu Manasse ma di Isasar dohot di Aser Betsean ro di sosorna, dohot Ibleam ro di sosorna, dohot angka pangisi ni Dor ro di sosorna, dohot angka pangisi ni Endor ro di sosorna, dohot angka pangisi ni Taanak ro di sosorna, dohot angka pangisi ni Megiddo ro di sosorna, tolu luat do i.

¹²Alai ndang tarsoluk halak Manasse angka huta i, gabe laos dihalomohon halak Kanaan maringan di tano i.

¹³Alai dung lam marhuaso halak Israel, gabe dirodi ma halak Kanaan i, alai ndang anggo tung dionjar nasida.

¹⁴(II.) Dung i ro ma hata ni angka anak ni si Josep tu si Josua, angka ninna ma: Boasa tung holan sada partalian dohot sada bagian lehononmu tu ahu bahen parjambaranku, ai bangso na torop do ahu tahe, dipasupasu Jahowa ahu rasirasa nuaeng.

¹⁵Jadi ninna si Josua ma tu nasida: Molo bangso na torop ho hape antong nangkok ma ho tu tombak, jala rabi di ho disi, di tano ni halak Perisi dohot Repaim, molo tung masompithu di ho di dolok Epraim.

¹⁶Jadi ninna angka anak ni si Josep ma: Nandang tagamon tuk di hami tano dolok i; jala marhureta bosi do sude halak Kanaan, angka na maringan di tano pea angka na di Betsean

ro di sosorna nang angka na maringan di rura Jisreel.

¹⁷Dung i didok si Josua ma tu pinompar ni si Josep, tu Epraim dohot tu Manasse, songon on: Bangso na torop do ho, jala marhuaso bolon do ho, ndang maruli partalian ho.

¹⁸Ingkon dolok i do di ho, ai tombak do i, ingkon rabionmu do i, jala di ho do angka partalpahanna, ai onjaronmu do halak Kanaan i, atik pe marhureta bosi nasida, jala parhuaso.

18¹(I.) Dung i marluhut ma sandok huria ni halak Israel tu Silo, jala dipajongjong nasida disi undungundung luhutan i, jala patu do tano i di jolonasida.

²Alai adong dope pitu marganari tading di halak Israel, angka na so maruli partalian dope.

³Jadi didok si Josua ma tu halak Israel; sadia leleng on marlemba hamu so laho manoluk tano i, na nilehon ni Jahowa Debata ni ompumuna, tu hamu.

⁴Buat hamu ma tolu halak sian ganup marga, asa hupaborhat nasida mangaliati tano i, huhut di surat i mangihuthon partaliannasida be, dung i mulak nasida tu ahu.

⁵Ingkon pitu bagian tano i bagionnasida, hot do ianggo Juda di parbalohanna hian tungkan dangsina, pinompar ni si Josep hot jongjong di parbalohanna tungkan utara.

⁶Alai anggo hamu pitu bagian tano i surat i hamu, dung i boan hamu tu ahu, asa hudabu, rujiruji di hamu dison di jolo ni Jahowa Debatanta i.

⁷Ai ndang marpartalian anggo halak Lepi di tongatongamuna, ai hamalimon ni Jahowa do partaliannasida. I anggo Gad, Ruben dohot satonga marga Manasse, nunga maruli partalian di bariba ni Jordan tungkan habinsaran, na nilehon ni si Musa naposo ni Jahowa tu nasida.

⁸Jadi borhat ma angka baoa i mardalan, gabe ditonahon si Josua ma tu angka na laho i manurati tano i, ninna ma: Laho ma hamu mangaliati tano i, jala surat i hamu, dung i mulak hamu tu ahu, asa dison hudabu rujiruji di hamu, di jolo ni Jahowa, di Silo.

⁹Dung i mardalan ma angka baoa i, jala diliati nasida tano i, jala disurati mangihuthon angka huta, pitu bagian dibahen tu buku, dung i mulak ma nasida tu si Josua, tu parsaroan Silo.

¹⁰Jadi didabu si Josua ma rujiruji di nasida di Silo, di jolo ni Jahowa; asa disi do dibagi si Josua tano i di halak Israel mangihuthon sagisagiannasida.

¹¹(II.) Jadi ruar ma partalian ni marga Benjamin marsuhusuhu; ia parbalohan ni partaliannasida ruar do di holangholang ni angka anak ni si Juda dohot di holangholang ni anak ni si Josep.

¹²Jala parbalohannasida tungkan utara sian Jordan, boti nangkok parbalohan i tu lambung ni Jeriko tungkan utara, nangkok muse tu dolok tungkan laut jala angka partalpahanna tungkan halongonan Bethapen.

¹³Taripar muse sian i parbalohan i tu Lus, tu lambung ni Lus i ma Betel, tungkan dangsina; tuat muse parbalohan i tu Aterot-Adar, tu dolok, na tungkan dangsina sian Bethoron, parjae.

¹⁴Gistang muse parbalohan i jala mamedu dompak laut, tungkan dangsina sian dolok na di jolo ni Bethoron tungkan dangsina, jala angka partalpahanna tu Kiryat-Baal, i ma Kiriath-Jearim, sada huta ni anak ni si Juda; i ma unjurna tungkan hasundutan.

¹⁵Alai bohangna tungkan dangsina sian ujung ni Kiriath-Jearim, ruar muse parbalohan i tungkan laut, ruar muse tu mual ni aek Neptoa.

¹⁶Dung i tuat parbalohan i tu ujung ni dolok, na di jolo ni rura ni anak ni si Hinnom, na di rura ni halak Repaim tungkan utara, tuat muse tu rura Hinnom, tu lambung ni halak Jebusi, tungkan dangsina, tuat muse tu mual Enrogel.

¹⁷Gistang muse tungkan utara jala ruar tu mual Enses, ruar muse tu Gelilot, tondong ni buntulbuntul Adumim, jala tuat tu batu ni si Bohan, anak ni si Ruben.

¹⁸Jala taripar tu tanggurung ni dolok tondong ni adaran tungkan utara, tuat muse tu pea.

¹⁹Dung i taripar parbalohan i tu tanggurung ni dolok sian Bethoglah tungkan utara, jadi sahat partalpahan ni parbalohan i tu dila ni laut Sira tungkan utara, tu ujung ni Jordan tungkan dangsina. I ma parbalohan tungkan dangsina.

²⁰Alai anggo tungkan habinsaran Jordan i do balokna. I ma partalian ni halak Benjamin marsuhusuhu mangihuthon parbalohannasida humaliang.

²¹Alai huta ni marga Benjamin marsuhusuhu angka on do: Jeriko, Bethoglah, Emek-Kesis.

²²Bet-Araba, Semaraim, Betel.

²³Anim, Para, Opra.

²⁴Keperhamonai, Opni dohot Geba. Sampulu dua huta ma i ro di sosorna.

²⁵Gibeon, Rama, Beerot.

²⁶Mispa, Kepira, Mosa.

²⁷Rekem, Irpel, Tarala.

²⁸Sela, Elep dohot Jebusi, i ma Jerusalem, Gibeon dohot Kiriath Jearim. Sampulu opat huta ma i ro di sosorna. I ma partalian ni halak Benjamin marsuhusuhu.

19¹(I.) Dung i ruar ma rujiruji paduahon di si Simeon, di marga ni angka anak ni si Simeon marsuhusuhu, jala di tongatonga ni partalian ni anak ni si Juda do partaliannasida i.

- ²Jadi sahat ma tu nasida bahen partaliannasida: Huta Berseba, Seba, Molada.
- ³Hasar-Sual, Bala, Esem.
- ⁴Eltolat, Betul, Horma.
- ⁵Ziklag, Betmarkbotot, Hasar-Susa.
- ⁶Betlebaot dohot Saruhen. Sampulu tolu huta ma i ro di sosorna.
- ⁷Ain, Rimmon, Eter dohot Asan. Opat huta ma i ro di sosorna.
- ⁸Angkupni sude sosor na humaliang angka huta i sahat ro di Baalat-Beer-Ramat tungkan dangsina I ma partalian ni marga ni angka anak ni si Simeon marsuhusuhu.
- ⁹Sian partalian ni angka anak ni si Juda do partalian ni angka anak ni si Simeon; ai malambashu partalian ni angka anak ni si Juda, jadi maruli partalian angka anak ni si Simeon di tongatonga ni partaliannasida i.
- ¹⁰(II.) Dung i ruar ma rujiruji patoluhon di angka anak ni si Zebulon marsuhusuhu. Jadi sahat tu Sarit parbalohan ni partaliannasida i.
- ¹¹Dung i nangkok parbalohannasida tungkan laut dohot tungkan Mareala, jala mandolos tu Dabaset, mandolos muse tu sunge, na di jolo ni jokneam.
- ¹²Dung i mamedu sian Sarit tungkan habinsaran sahat ro di parbalohan ni Krislot Tabor, jala ruar muse tu Daberat, nangkok muse tu Japia.

¹³Jala sian i taripar tungkan habinsaran tu Gat Heper, boti tu Etkazin, ruar muse tungkan Rimmon, gistang tu Nea.

¹⁴Dung i mamedu parbalohan i tungkan utara tu Hannaton, jala partalpahanna tu rura Jepta-El.

¹⁵Dohot Karta, Nahalal, Simron, Idale, dohot Betlehem. Sampulu dua huta ma i ro di sosorna.

¹⁶I ma partalian ni angka anak ni si Zebulon marsuhusuhu; i ma angka hutanasida ro di sosorna.

¹⁷(III.) Dung i ruar ma rujiruji paopathon di angka anak ni si Isasar marsuhusuhu.

¹⁸Jala parbalohannasida sahat tu Jesreel dohot Hesulot dohot Sunem.

¹⁹Boti tu Hapraim, Sion, Anaharat.

²⁰Boti tu Rabit, Kision, Ebez.

²¹Boti tu Ramat, En-Ganim, En Hada dohot Betpases.

²²Jala tolhas parbalohanna tu Tabor, Sahagim, Betsemes, jala partalpahan ni parbalohanna di Jordan. Sampulu onom huta ma i ro di angka sosorna.

²³I ma partalian ni marga ni angka anak ni Isasar marsuhusuhu, angka huta ro di sosorna.

²⁴(IV.) Dung i ruar ma rujiruji palimahon di marga ni angka anak ni si Aser marsuhusuhu.

²⁵Jala parbalohannasida on do: Helkat, Hali, Beten, Aksap.

²⁶Alamelek, Amad dohot Miseal jala mandolos tu Karmel tungkan laut boti tu Sihor-Libnat.

²⁷Dung i mamedu tungkan habinsaran tu Bet-Dagon, jala mandolos tu Zebulon boti tu rura Jepta-El tungkan utara sian Betemek dohot Nahiel jala ruar tu Kabul tungkan hambirang.

²⁸Boti tu Ebron, Rehob, Hamon, Kana sahat ro di Sidon na bolon i.

²⁹Dung i mamedu muse parbalohan i tungkan Rama sahat ro di huta Tirus na gonting i; mamedu muse parbalohan i tungkan Hosa jala partalpahanna tungkan laut, sahat tu Aksib.

³⁰Boti tu Umma, Apek dohot Rehob; duapulu dua huta ma i ro di angka sosorna.

³¹I ma partalian ni marga ni angka anak ni Aser marsuhusuhu; angka huta ro di sosorna.

³²(V.) Dung i ruar ma rujiruji paonomhon di angka anak ni si Naptali marsuhusuhu.

³³Jala parbalohannasida sian Helep, sian hariara marbalokkon Zaannim di Adami-Nekeb, Jabnel sahat ro di Lakum, jala parbalohanna di Jordan.

³⁴Dung i mamedu parbalohan ni tungkan laut, tungkan Aznat-Tabor jala ruar sian i tungkan Hukok jala mandolos tu Zebulon tungkan dangsina jala tu Aser tungkan laut dohot tu Juda marbalokkon tungkan habinsaran.

³⁵Ia huta angka na gonting i: Zidim, Zer dohot Hamat, Rakat dohot Kineret.

³⁶Adma, Rama, Hazor.

³⁷Kedes, Edrei, En-Hazor.

³⁸Jiron, Migdal-El, Horem, Bet-Anat dohot Betsemes; sampulu sia huta ma i ro di angka sosorna.

³⁹I ma partalian ni marga ni angka anak ni si Naptali marsuhusuhu; angka huta i ro di sosorna.

⁴⁰(VI.) Dung i ruar ma rujiruji papituhon di marga ni angka anak ni si Dan marsuhusuhu.

⁴¹Ia parbalohan ni partaliannasida: Zora, Estaol, Irsemes.

⁴²Salabin, Aialon, Itla.

⁴³Elon, Timna, Ekron.

⁴⁴Elteke, Gibeton, Baalat.

⁴⁵Jehud, Beneborak, Gatrimon.

⁴⁶Meyarkon, Rakon padohot tano tondong ni Joppe.

⁴⁷Ruar muse salpu sian i parbalohan ni angka anak ni si Dan. Ai nangkok do angka anak ni si Dan laho marporang dompak Lesem, jala ditaban nasida huta i, ditampuli dohot podang, laos disoluk nasida huta i jala diingani, jala singkat ni Lesem Dan goar ni huta i dibahen, mangihuthon goar ni si Dan ompunasida i.

⁴⁸I ma partalian ni marga Dan marsuhusuhu, angka hutana ro di sosorna.

⁴⁹ (VII.) Jadi dung sun nasida marbagi tano i mangihuthon parbalohanna be, gabe dilehon halak Israel ma partalian di si Josua, anak ni si Nun di tongatonganasida.

⁵⁰ Hombar tu tona ni Jahowa dilehon nasida tu ibana hata na pinangidona, i ma Timnat-Sera na di dolok Epraim. Jadi dipauli ma huta i jala maringan di bagasan.

⁵¹ Angka on ma partalian, angka na sinagihon ni malim Eleasar dohot si Josua anak ni si Nun ro di angka induk ni marga ni halak Israel marompumpu marhite sian rujiruji di Silo di adopan ni Jahowa mardonokkon pintu undungundung parluhutan i gabe mansohot ma nasida marbagi tano i.

20¹ (I.) Dung i martona ma Jahowa tu si Josua, ninna ma:

² Paboa ma tu halak Israel songon on: Papulik hamu ma di hamu huta haporusan, angka na hutonahon i hian tu si Musa.

³ Asa tusi maporus manang ise sibunujolma so pangkirimanna, so botobotoanna, angka huta i bahen haporusan maradophonjolma parlulu.

⁴ Molo sanga maporusjolma i tu sada sian angka huta i, ingkonjongjong ibana di haroroan tu bahal ni huta i mangalualuhon hatana, tu pinggol ni angka sintua ni huta i, jala ingkonjangkononnasida ibana tu huta i dohot mangalehon ingananna di lambungnasida.

⁵ Molo tung dilotongi parlulu i ibana sian pudi, na so tupa pasahatonnasida jolma pamunui tu bagasan tanganna, ala so botobotoanna umbahen dibunu donganna, jala ndang marsunisunian hian nasailaon tu ibana.

⁶ Ingkon maringan ibana di huta i paima sanga ibana jongjong di jolo ni rapot paruhuman. Ia dung mate sintua ni malim uju i, jadi ma mulak jolma pamunui tu hutana dohot tu bagasna, tu huta tinadingkonna i laho lintun.

⁷ Jadi diuras nasida ma Kedes di Galilea, di dolok Naptali dohot Sikem di dolok Epraim dohot Kiryat-Arba, i ma Hebron di dolok Juda.

⁸ Ia di bariba ni Jordan, tungkan habinsaran sian Jeriko, dipapulik nasida ma Bezer di halongonan, di tano pea ni marga Ruben, dohot Ramot di Gilead sian marga Gad dohot Golan di Basan sian marga Manasse.

⁹ I ma huta angka na pinapulik di sandok halak Israel dohot di halak dagang, angka na maisolat di tongatonganasida, asa maporus tusi ganup sibunu jolma so pangkirimanna, asa unang mate ibana dibunu parlulu, paima sanga ibana jongjong di jolo ni rapot paruhuman.

21 ¹ (I.) Dung i ro ma angka induk ni halak Lepi marompuompu mandapothon malim Eleasar dohot si Josua, anak ni si Nun,

mandapothon dohot angka induk ni halak Israel marmargamarga.

²Angka didok ma tu nasida di Silo di tano Kanaan songon on: Nunga martona hian Jahowa marhite sian si Musa, lehonon tu hami angka huta bahen inganan ro di upa parikna bahen panjampalan di pinahannami.

³Jadi dilehon halak Israel ma tu halak Lepi sian partaliannasida hombar tu tona ni Jahowa, angka huta on ro di upa parikna.

⁴Dung i ruar ma rujiruji di pinompar ni si Kohat, gabe maruli angka anak ni malim Aron sian halak Lepi: Sian marga Juda dohot sian marga Simeon dohot sian marga Benjamin marhite sian rujiruji sampulu tolu huta.

⁵Pinompar ni si Kohat angka na asing i maruli sian pinompar ni marga Epraim dohot sian marga Dan dohot sian satonga marga Manasse marhite sian rujiruji sampulu huta.

⁶Ia pinompar ni si Gerson maruli sian pinompar ni marga Isasar dohot sian marga Aser dohot sian marga Naptali dohot satonga marga Manasse di Basan marhite sian rujiruji sampulu tolu huta.

⁷Ia pinompar ni si Merari marsuhusuhu maruli sian marga Ruben dohot sian marga Gad dohot sian marga Zebulon sampulu dua huta.

⁸Songon i ma pangalehon ni halak Israel tu halak Lepi di angka huta i ro di upa parikna

marhite sian rujiruji, hombar tu na tinonahon ni Jahowa tu si Musa.

⁹(II.) Jadi dilehon nasida ma sian marga Juda dohot sian marga Simeon angka huta on, angka na targoar be.

¹⁰Jadi maruli ma pinompar ni si Aron sian pinompar ni si Kohat marsuhusuhu, sian halak Lepi, ai di nasida di rujiruji parjolo.

¹¹Jadi dilehon ma tu nasida huta Arba, ama ni si Anok, i ma Hebron di dolok Juda ro di upa parikna humaliang.

¹²Alai anggo golat ni huta i ro di sosorna tu si Kaleb, anak ni si Jepune do dilehon bahen partalianna.

¹³Ia tu pinompar ni malim Aron dilehon nasida Hebron, huta haporusan ni sibunujolma ro di upa parikna dohot Libna ro di upa parikna.

¹⁴Nang Jatir ro di upa parikna dohot Estemo ro di upa parikna.

¹⁵Nang Holon ro di upa parikna dohot Debir ro di upa parikna.

¹⁶Nang Ain ro di upa parikna dohot Jutta ro di upa parikna dohot Betsemes ro di upa parikna; sia huta do i sian marga na dua i.

¹⁷Ia sian marga Benjamin: Gibeon ro di upa parikna, Geba ro di upa parikna.

¹⁸Anatot ro di upa parikna dohot Almon ro di upa parikna, opat huta do i.

¹⁹Luhutna huta ni angka malim, pinompar ni si Aron, sampulu tolu huta do ro di upa parikna.

²⁰(III.) Ia pinompar ni si Kohat marsuhusuhu, i ma halak Lepi angka na teba sian pinompar ni si Kohat maruli angka huta rujiruji nasida sian marga Epraim.

²¹Dilehon do tu nasida Sikem, huta haporusan ni sibunujolma ro di upa parikna di dolok Epraim dohot Gezer ro di upa parikna.

²²Nang Kibsaim ro di upa parikna dohot Bethoron ro di upa parikna opat huta do i.

²³Ia sian marga Dan: Elteke ro di upa parikna, Gibeton ro di upa parikna.

²⁴Aialon ro di upa parikna, Gatrimon ro di upa parikna, opat huta do i.

²⁵Ia sian satonga marga Manasse: Taanak ro di upa parikna dohot Gatrimon ro di upa parikna, dua huta do i.

²⁶Luhutna huta i sampulu do ro di upa parikna di pinompar ni si Kohat, angka na teba i marsuhusuhu.

²⁷(IV.) Ia pinompar ni si Gerson sian halak Lepi marsuhusuhu maruli sian satonga marga Manasse huta haporusan ni sibunujolma, i ma Golan di Basan ro di upa parikna, dua huta do i.

²⁸Ia sian marga Isasar: Kision ro di upa parikna, Daberat ro di upa parikna.

²⁹Jarmut ro di upa parikna, En-Ganim ro di upa parikna, opat huta do i.

³⁰Ia sian marga Aser: Miseal ro di upa parikna, Abdon ro di upa parikna.

³¹Helkat ro di upa parikna dohot Rehob ro di upa parikna opat huta do i.

³²Ia sian marga Naptali huta haporusan ni sibunujolma, i ma Kedes di Galilea ro di upa parikna dohot Hamot-Dor ro di upa parikna dohot Kartan ro di upa parikna, tolu huta do i.

³³Luhutna huta i di pinompar ni si Gerson marsuhusuhu sampulu tolu huta do ro di upa parikna.

³⁴(V.) Ia pinompar ni si Merari marsuhusuhu, halak Lepi, angka na teba i maruli sian marga Zebulon: Jokneam ro di upa parikna, Karta ro di upa parikna.

³⁵Dimna ro di upa parikna, Nahalal ro di upa parikna, opat huta do i.

³⁶Ia sian marga Ruben: Bezer ro di upa parikna dohot Jahaz ro di upa parikna.

³⁷Kadermat ro di upa parikna dohot Mepaat ro di upa parikna, opat huta do i.

³⁸Ia sian marga Gad huta haporusan ni sibunujolma: Ramot di Gilead ro di upa parikna dohot Mahanaim ro di upa parikna.

³⁹Hesbon ro di upa parikna, Jaser ro di upa parikna, luhutna huta i opat do.

⁴⁰Luhutna huta i di pinompar ni si Merari marsuhusuhu, angka na teba sian halak

Lepi marsuhusuhu, sampulu dua huta do rujirujinasida.

⁴¹Jadi luhutna huta i di halak Lepi, di tongatonga ni partalian ni halak Israel, opatpulu ualu huta do ro di upa parikna.

⁴²Songon on do parsagi ni angka huta i, gonop huta ro di upa parikna be humaliang, songon i do di angka huta i luhutna.

⁴³(VI.) Jadi dilehon Jahowa tu halak Israel sandok tano i na niuarihonna lehononna tu ompunasida, gabe dipapatu nasida tano i, laos maringan disi.

⁴⁴Dung i dipasonang Jahowa ma nasida humaliang, hombar tu saluhut na niuarihonna tu ompunasida, jala ndang manahan musunasida nanggo sada maradophon nasida, dipasahat Jahowa do luhut musunasida tu tangannasida.

⁴⁵Ndang adong tartading nanggo sada sian saluhut hata na denggan, angka na pinaboa ni Jahowa tu pinompar ni Israel, tung luhutna do ro.

22¹(I.) Uju i ma dipapungu si Josua ma halak Ruben, Gad dohot satonga marga Manasse.

²Didok ma mandok nasida: Nunga diradoti hamu saluhut na tinonahon ni si Musa, naposo ni Jahowa tu hamu, jala nunga ditangihon hamu suarangku taringot tu saluhutna na hutonahon i tu hamu.

³Ndang ditadingtading hamu
hahaanggimuna, nunga pola na sai
laon rasirasa sadarion, jala nunga burju
diradoti hamu tona ni Jahowa, Debatamuna i.

⁴Ia nuaeng nunga marhasonangan
hahaanggimuna i dibahen Jahowa,
Debatamuna i, hombar tu bagabagana i
tu nasida, on pe muli ma hamu nuaeng tu
undungundungmuna, tu tano partalianmuna
i, na nilehon ni si Musa, naposo ni Jahowa, tu
hamu di bariba ni Jordan.

⁵Asa burju situtu hamu mangaringkoti
patupahon hombar tu tona dohot tu patik, na
tinonahon ni si Musa, naposo ni Jahowa, tu
hamu: Mangkaholongi Jahowa, Debatamuna
i, dohot marparange di saluhut angka
dalanna, huhut mangaradoti angka tonana,
jala marsihohot tu Ibana, huhut mangoloi
Ibana sian nasa rohamuna dohot sian nasa
tondimuna.

⁶Dung i dipasupasu si Josua ma nasida,
jala dipamuli asa laho nasida tumopot
undungundungnasida be.

⁷Alai anggo tu na satonga marga Manasse,
nunga dilehon si Musa hian partalian di Basan,
jala tu na satonganari nunga dilehon si Josua
rap dohot angka hahaanggina di hasundutan
ni Jordan, dingkan laut. Jadi dung dipamuli si
Josua nang nasida tu undungundungnasida
be, jala dipasupasu nasida.

⁸Ninna ma tu nasida songon on: Mararta godang do hamu muli tu undungundungmuna dohot marpinahan na deak situtu, marperak, marsere, martombaga, marbosi dohot marulos mansai godang; antong sai bagi hamu ma tabantaban sian musumuna i rap dohot hahaanggimuna.

⁹(II.) Dung i mulak ma pinompar ni si Ruben, si Gad dohot satonga Manasse, tumadingkon halak Israel sian Silo na di tano Kanaan laho tu tano Gilead, tumopot tano partaliannasida, naung sahat tu nasida hian, hombar tu hata ni Jahowa marhite sian si Musa.

¹⁰Jadi dung sahat nasida tu luat ni Jordan, angka na di tano Kanaan, dipauli pinompar ni si Ruben, si Gad dohot satonga marga Manasse disi sada langgatan martopihon Jordan, na bolon idaon.

¹¹Dung i tarbortik ma tu halak Israel, didok halak: Ida ma, nunga pola dipauli pinompar ni si Ruben, si Gad dohot satonga marga Manasse sada langgatan tondong ni tano Kanaan di luat angka mardonokkon Jordan paiparipar dohot halak Israel.

¹²Jadi dung dibege halak Israel barita i, marluhut ma sandok huria ni halak Israel tu Silo martahi nangkok laho mamorang nasida.

¹³(III.) Dung i disuru halak Israel ma manopot pinompar ni si Ruben, si Gad dohot

satonga marga Manasse tu tano Gilead malim Pinehas, anak ni si Eleasar.

¹⁴Angkupni sampulu induk donganna, sada induk sian ganup marga Israel marompuompu, ganup nasida ihutan di nasida na samarga di tongatonga ni halak Israel marriburibu.

¹⁵Jadi dung tolhas nasida tu pinompar ni si Ruben, si Gad dohot satonga marga Manasse tu tano Gilead, gabe marhata dohot nasida songon on:

¹⁶Boti hata ni sandok huria ni Jahowa Pangoseon dia do i, na mangosei hamu dompak Debata ni Israel, umbahen marbalik hamu sadarion sian Jahowa, di na pinaulimuna di hamu sada langgatan laho manggunturi sadarion dompak Jahowa.

¹⁷Maotikku dope huroha di hita hajahaton ni Peor, na so taruras dope hita sian i rasirasa sadarion gabe masa begu di huria ni Jahowa.

¹⁸Marbalik muse hamu sadarion sian Jahowa, hape molo manggunturi hamu sadarion dompak Jahowa marronirimas ma Ibana marsogot tu sandok huria ni Israel.

¹⁹Alai molo tung ramun tano partalianmuna i, ro hamu taripar tu tano partalian ni Jahowa, ojahan ni undungundung ni Jahowa, asa maruli partalian hamu di tongatonganami, alai unang hamu manggunturi dompak Jahowa dohot dompak hami di na pinaulimuna di

hamu sada langgatan, pulik sian langgatan ni Jahowa Debatanta i.

²⁰Nda mangose do si Agan, anak ni si Jara, marhite sian ugasan na hona harom, gabe masa torutoru tu sandok huria Israel? Jala ndada sasada ibana mate ala hajahatonna.

²¹(IV.) Jadi ninna pinompar ni si Ruben, si Gad dohot satonga marga Manasse mangalusi angka induk ni Israel marriburibu.

²²Debata, Debata Jahowa; Debata, Debata Jahowa, Ibana umbotosa, Israel pe ingkon botoonna do: Molo tung manggunturi hami dompak Jahowa, manang naeng marbalik, unang ma Ho manolongi hami sadarion.

²³Molo tung hupauli hami sada langgatan di hami, asa naeng marbalik sian Jahowa, manang molo tung naeng mamelehon pelean situtungon manang sipanganon hami di atasna, manang molo tung naeng mamelehon angka pelean hamauliateon hami di atasna, Jahowa ma marlulu dompak hami!

²⁴Molo so balik sian holso ni rohanami, umbahen hubahen hami songon i mandok: Marsogot haduan dohonon ni pinomparmuna ma tu pinomparnami songon on: Aha do parsoranmuna tu Jahowa, Debata ni Israel!

²⁵Batang aek Jordan on do parbolatan na binahen ni Jahowa parholangannami tu hamu, ale pinompar ni si Ruben dohot si Gad, ndang parjambar anggo hamu di Jahowa! Jadi

taiton ni pinomparmuna maon pinomparnami, unang marhabiaran tu Jahowa.

²⁶Dibahen i hudok hami ma: Itapauli ma di hita sada langgatan, ndada bahen pamelean ni pelean situtungan manang sipotongon.

²⁷Ingkon bahen sitindangi nian langgatanon di hita dohot di pinomparta sogot, paboa na masuk hami marulaon tu Jahowa di jolona marhite sian peleannami situtungan dohot sipotongon dohot hamauliateon, asa unang dohonon ni pinomparmuna sogot tu pinomparnami: Ndang parjambar anggo hamu di Jahowa!

²⁸Jadi hudok hami ma: Molo tung songon i dohononnasida sogot tu hami dohot tu pinomparnami, gabe dohononta ma: Bereng hamu ma sumansuman ni langgatan di Jahowa naung binahen ni ompunami, ndada bahen pamelean ni pelean situtungan manang sipotongon, ingkon bahen sitindangi do i di tongatonganta.

²⁹Dao ma i sian hami, anggo tung manggunturi hami dompak Jahowa, manang marbalik sian Jahowa sadarion, laho paulihon sada langgatan bahen pamelean ni pelean situtungan manang sipanganon manang sipotongon pe, pulik sian langgatan ni Jahowa, Debatanta i, na jongjong di jolo ni undungundungna.

³⁰Jadi dung dibege malim Pinehas dohot angka induk ni huria i dohot induk ni Israel

marriburibu, angka na rap dohot ibana, hata angka na pinaboa ni pinompar ni si Ruben, si Gad dohot si Manasse, gabe denggan rohanasida umbegesa.

³¹ Dung i ninna malim Pinehas, anak ni si Eleasar ma tu pinompar ni si Ruben, si Gad dohot si Manasse: Apala sadarion ma hutanda hami paboa Jahowa di tongatonganta, ala so naeng mangose hamu dompak Jahowa marhite sian pambaenanon. Hamu do tardok paluahon halak Israel sadarion sian tangan ni Jahowa.

³² Dung i ditadingkon malim Pinehas, anak si Eleasar dohot angka induk i ma pinompar ni si Ruben dohot si Gad, mulak sian tano Gilead tu tano Kanaan mandapothon halak Israel, mamboan barita i tu nasida.

³³ Jadi denggan hata i di roha ni halak Israel, laos mamujimuji Debata halak Israel i, jala ndang be disangkap rohanasida naeng nangkok mamorangi nasida, laho mangago tano i, na niinganen ni pinompar ni si Ruben dohot si Gad.

³⁴ Dung i dibahen pinompar ni si Ruben dohot si Gad ma goar ni langgatan i: Sitindangi, ai ninna do: Langgatanon ma sitindangi di holangholangta, paboa Jahowa do Debata.

23¹ (I.) Dung i di laonlaon ni ari dung marhasonangan halak Israel dibahen Jahowa maradophon saluhut musunasida humaliang, jala naung sarimatua ia si Josua.

²Jadi dipaluhut si Josua ma sandok Israel, angka sintuana dohot angka indukna, angka panguhum ro di angka juaratulis, jala ninna ma mandok nasida: Nunga sarimatua anggo ahu.

³Nunga diida hamu huhut sude na binahen ni Jahowa, Debatamuna i tu saluhut bangso on humongkop hamu, ai tung apala Jahowa, Debatamuna sandiri marporang humongkop hamu.

⁴Ida hamu ma, nunga husagihon tu hamu bangso angka na teba i bahen partalian ni Israel marmargamarga, olat ni Jordan ro di saluhut bangso angka na hurendephon sahat ro di laut na bolon tungan hasundutan.

⁵Jahowa, Debatamuna sandiri mangonjar nasida maradophon hamu, jala pabalionna nasida sian jolomuna, asa hamu manean tanonasida, hombar tu bagabaga ni Jahowa, Debatamuna i tu hamu.

⁶Antong marsihohot situtu ma rohamuna, mangaradoti dohot patupahon saluhut na tarsurat di bagasan buku patik ni si Musa, asa unang manimbil hamu sian i tu siamun manang tu hambirang.

⁷Asa unang saor hamu tu bangso angka na teba i di lambungmuna, jala unang be pajoujou hamu goar ni Debatanasida manang marmangmang tusi, jala unang oloi hamu angka i, manang marsomba tusi.

⁸Ingkon tu Jahowa, Debatamuna i tama hamu marsihohot, songon na binahenmuna rasirasa sadarion.

⁹Jadi nunga dipabali Jahowa sian jolomuna bangso angka na bolon, jala na marhuaso, nanggo sahalak pe ndang manahan jongjong maradophon hamu rasirasa sadarion.

¹⁰Sahalak sambing pe sian hamu mangalele saribu halak, ai Jahowa Debatamuna sandiri marporang humongkop hamu, songon naung pinarbagana hian.

¹¹Dibahen i sai ramoti hamu situtu tondimuna i mangkaholongi Jahowa Debatamuna i.

¹²(II.) Ai molo tung marbalik hamu, jala marsilohot rohamuna di pasipasi ni bangso angka na teba i di lambungmuna, jala olo hamuna masiolian jala masibuatan.

¹³Ingkon botoonmuna ma, tung na so datdatan ni Jahowa Debatamuna i be pabalihon angka bangso on maradophon hamu, balik nasida manjadi jorgong dohot jaring dohot gasip di lambungmuna, manjadi duri di bagasan matamuna, paima sun siap hamu bahenonna sian tano na denggan on, naung nilehon ni Jahowa, Debatamuna tu hamu.

¹⁴Jala ida ma, na laho ma anggo ahu tumopot dalan hatopan ni sandok tano on, jala ingkon botoonmuna do sian nasa rohamuna dohot sian nasa ateatemuna, na

so tartading nanggo sada hata sian sude hata angka na denggan i, angka na pinarbaga ni Jahowa, Debatamuna i tu hamu; tung saluhutna do na songgop tu hamu, ndang tartading sian angka i, nanggo sada hata.

¹⁵Alai ia songon i sintongna songgop tu hamu luhut hata na denggan i, na pinarbaga ni Jahowa, Debatamuna i tu hamu; suang songon i, pasonggo pon ni Jahowa tu hamu luhut hata torutoru, paima sun siap hamu bahenonna sian tano na denggan on, naung nilehon ni Jahowa, Debatamuna i tu hamu.

¹⁶Molo tung dilaosi hamu padan binahen ni Jahowa, Debatamuna i naung tinonahon i tu hamu, tung laho hamu mangoloi angka Debata sileban, jala marsomba hamu tusi; jadi marsigorgor ma rimas ni Jahowa tu hamu, gabe tompu hamu agoonna sian tano na denggan i, naung nilehonna i tu hamu.

24¹(I.) Dung i dipaluhut si Josua ma sude marga ni Israel tu Sikem, jala dipio angka sintua ni Israel, angka indukna, angka panguhum dohot angka juaratulis, jala dung dipatindang nasida di jolo ni Debata.

²Ro ma hata ni si Josua tu sandok bangso i: Boti hata ni Jahowa, Debata ni Israel: Di bariba ni batang aek do maringan anggo ompumumuna di na robi, si Tera, ama ni si Abraham dohot ama ni si Nahor, jala mangoloi angka debata sileban do nasida.

³Jadi hubuat ma ompumuna si Abraham sian bariba ni batang aek i, asa mardalani ibana di sandok tano Kanaan, jala hupasopar, pinomparna, jala hulehon tu ibana si Isak.

⁴Jala tu si Isak hulehon do si Jakkob dohot si Esau, jala tu si Esau hulehon dolok Seir, asa ibana nampunasa; alai tuat tu Misir do anggo si Jakkob dohot angka anakna.

⁵Dung i husuru ma si Musa dohot si Aron manorui Misir, songon naung hubahen di tongatongana, dung i huparuar ma anggo hamu.

⁶Jadi dung huparuar ompumuna sian Misir, jala sahat hamu tu laut, gabe dieahi halak Misir ompumuna i, pola mardongan hureta dohot jolma parsihundul sahat tu laut Arung.

⁷Dung i manganguhi ma nasida tu Jahowa, gabe dibahen Ibana haholomon bahen parbolatanmuna tu halak Misir, jala dibalikkon tu atasnasida laut i laos dilungkupi nasida, nunga pola dipanotnoti matamuna na hubahen i tu halak Misir. Dung i nania leleng hamu maringan di halongonan.

⁸Dung i huboan hamu tu tano ni halak Amori, angka na maringan di bariba ni Jordan; jala dung marmusu nasida dompak hamu, Ahu pasahathon nasida tu bagasan tanganmuna, jala disoluk hamu tanonasida, jala Ahu maniaphon nasida maradophon hamu.

⁹Dung i hehe ma si Balas, anak ni Zippor, raja sian Moab, laho marmusu dompak Israel; laos disuru suruanna manjou si Bileam, anak ni si Beor mamulasi hamu nian.

¹⁰Alai ndang olo Ahu patangitangi si Bileam, gabe ingkon hamu dipasupasu, jala Ahu paluahon hamu sian tanganna.

¹¹Jadi dung ditaripari hamu Jordan i, jala tolhas hamu tu Jeriko, gabe marmusu dompak hamu isi ni Jerikoi, halak Amori, Perisi, Kanaan, Het i, Girgasi, Hevi dohot Jebusi, hape Ahu pasahathon nasida tu tanganmuna.

¹²Dung i hutongos ma naning di jolomuna, jala hupabali nasida maradophon hamu: Na dua raja ni halak Amori, ndada marhitehite podang manang sior.

¹³Hulehon huhut tu hamu tano na so hinangaluthonmuna dohot huta, angka na so pinaulimuna, asa hamu maringan disi, jala mangan do hamu sian porlak anggur dohot hau Jetun, angka na so sinuanmuna i.

¹⁴On pe sai habiari hamu ma Jahowa, jala marsihohot rohamuna mangoloi Ibana di bagasan hasintongan, jala paholang hamu debata sileban, angka na nioloan ni ompumuna di bariba ni batang aek i dohot di Misir, jala oloi hamu ma Jahowa!

¹⁵Alai molo tung sogo rohamuna mangoloi Jahowa, pillit hamu ma sadarion manang ise naeng oloanmuna, manang debata sileban

angka na nioloan ni ompumuna di bariba ni batang aek i, manang debata ni halak Amori nampuna tano na niingananmuna i; alai anggo ahu dohot donganku sajabu, ingkon Jahowa do oloannami.

¹⁶(II.) Dung i ninna bangso i ma mangalusi: Dao ma i sian hami, anggo tung manadingkon Jahowa laho mangoloi angka debata sileban.

¹⁷Ai Jahowa, Debatanta, Ibana naung manogihon hita dohot ompunta ruar sian tano Misir, sian bagas parhatobanan, jala Ibana naung mambahen di adopanta tanda angka na bolon i, jala diramoti do hita di sandok dalan na itadalani i, di tongatonga ni saluhut bangso angka na itabolusi.

¹⁸Jahowa huhut mangonjar saluhut bangso ro di halak Amori na maringan di tano i jumolo sian hita; hami pe, Jahowa do naeng oloannami, ai Ibana do Debatanta.

¹⁹Dung i didok si Josua ma tu bangso i: Nandang tarbahen hamu mangoloi Jahowa, ai Debata na badia do Ibana, Debata parrimas do Ibana, ndang tagamon marpamuati rohana mida pangalaosionmuna dohot mida dosamuna i.

²⁰Molo tung ditadingkon hamu Jahowa, jala dioloi hamu angka debata sileban, marbalik ma Ibana manorui hamu, tung siap hamu bahenonna, hombar tu uhumna na denggan i naung binahenna tu hamu.

²¹ Dung i ninna bangso i ma tu si Josua: Sitongka ma anggo i, ingkon Jahowa do naeng oloannami.

²² Jadi didok si Josua ma tu bangso i: Hamu sandiri do sitindangi dompak hamu, paboa naung dipillit hamu Jahowa, naeng oloanmuna Ibana. Jadi ninna nasida ma: Hami ma tutu sitindangi!

²³ On pe paholang hamu ma debata sileban, angka na di tongatongamuna i, jala paunduk hamu rohamuna tu Jahowa, Debata ni Israel.

²⁴ Jadi ninna bangso i ma tu si Josua: Jahowa Debatanta i do naeng oloannami, jala soarana i naeng tangihononnami.

²⁵ Dung i dibahen si Josua ma sadarina i parjanjian tu bangso i, jala dipatindang do i bahen patik dohot uhum di Sikem.

²⁶ Dung i disurathon si Josua ma angka hata i tu bagasan buku patik ni Debata, jala dibuat sada batu na bolon, laos dipatindang disi di toru ni hau Ara na jongjong mardonokkon undungundung ni Jahowa.

²⁷ Dung i ninna si Josua ma tu sandok bangso i: Ida ma, buaton ma gabe sitindangi dompak hita, ai nunga dibege saluhut hata ni Jahowa, angka na pinaboana tu hita, ingkon gabe sitindangi do i dompak hamu, asa unang disoadahon hamu Debatamuna i.

²⁸ Dung i dipamuli si Josua ma bangso i ganup tu partalianna be.

²⁹(III.) Jadi dung salpu angka jamitai, mate ma si Josua, anak ni si Nun, naposo ni Jahowa, marumur saratus sampulu taon.

³⁰Dung i ditanom nasida ibana di parbalohan ni partalianna, di Timnat-Sera, na di dolok Ephraim tungkan utara sian dolok Gaas.

³¹Sai dioloi halak Israel do Jahowa saleleng mangolu si Josua, saleleng mangolu dohot sintua, angka na leleng mangolu dope di pudi ni si Josua, angka na umboto saluhut pambahenan ni Jahowa, angka na binahenna tu Israel.

³²Ia holiholi ni si Josep, angka na binoan ni halak Israel sian Misir, dibandahon ma i di Sikem, di hauma santurpuk na tinuhor ni si Jakkob sian angka anak ni si Hemor, ama ni si Sikem mararga saratus Kesita, laos gabe partalian ni pinompar ni si Josep do i.

³³Si Eleasar, anak ni si Aron pe mate do, gabe ditanom nasida ibana di Gibeon, huta ni si Pinehas, anakna i, na nilehon tu ibana di dolok Ephraim.

Hakim-hakim

1 ¹ (I.) Jadi dung mate si Josua, manungkun ma halak Israel tu Jahowa, angka ninna ma: Ise do sian hami jumolo nangkok marmusu dompak halak Kanaan?

² Jadi ninna Jahowa ma: Ingkon Juda nangkok; ida ma, nunga hupasahat tano i tu tanganna.

³ Dung i ninna Juda ma tu Simeon, hahana i: Nangkok ma ho donganku tu partalianki, asa marmusu hita dompak halak Kanaan; asa hudongani ho huhut laho tu partalianmi; jadi didongani Simeon ma ibana.

⁴ Dung i nangkok ma Juda, jadi dipasahat Jahowa ma halak Kanaan dohot Perisi tu tangannasida, gabe diragehon nasida sampuluribu halak mardonokkon Besek.

⁵ Dung i pajumpang ma nasida dohot si Adonibezek di Besek, jala marmusu dompak ibana, jala ditaluhon halak Kanaan dohot Perisi.

⁶ Alai maporus ma ianggo si Adonibezek, gabe dilele nasida ibana, jala ditangkap, jala digotapi ina ni tanganna dohot totna.

⁷ Jadi ninna si Adonibezek ma: Pitupulu raja, angka na ginotapan ina ni tanganna dohot totna, manjomputi na marpisikpisik di toru ni mejangki; suang le songon na hubahen i

dibaloshon Debata tu ahu! Dung i tarboan ibana tu Jerusalem, laos mate disi.

⁸Alai marmusu ma anggo pinompar ni Juda dompak Jerusalem, laos dipapatu, jala sun ditampuli pangisina dohot podang, jala disurbu ia huta i.

⁹Dung i tuat ma pinompar ni Juda, laho marmusu dompak halak Kanaan, angka na maringan di dolok dohot tungkan dangsina, dohot di angka rura.

¹⁰Dung i borhat ma halak Juda dompak halak Kanaan, angka na maringan di Hebron (ia goar ni Hebron di na robi Kiryat-Arba), gabe ditaluhon nasida ma si Sesai dohot si Ahiman dohot si Talmai.

¹¹Dung i borhat nasida sian i dompak isi ni Debir; ia goar ni Debir di na robi Kiriath Sepher do.

¹²Jadi ninna si Kaleb ma: Manang ise na papatu Kiriath Sepher, jala ditaban, lehononku ma tu ibana si Aksa, borungki, bahen jolmana.

¹³Jadi ditaban si Othniel, anak ni si Kenas, anggi ni si Kaleb huta i, gabe dilehon si Kaleb tu ibana si Aksa, boruna i, bahen jolmana.

¹⁴Dung i di na bongot i nasida, dihata i ma ibana mangido hauma santurpuk sian amana; laos mijur ma ibana sian halode, gabe didok si Kaleb ma tu ibana: Aha di ho?

¹⁵Jadi didok nasida ma tu ibana: Sai lehon ma di ahu pasupasu sada; ai nunga dilehon

ho tu ahu tano na hasang, ba lehon huhut di ahu angka mual. Jadi dilehon si Kaleb ma tu nasida angka mual di julu dohot di toruan.

¹⁶Dung i nangkok ma angka anak ni si Keni, simatua doli ni si Musa, sian huta parharambiran rap dohot pinompar ni Juda tu halongonan Juda, na tungkan dangsina ni Arad, gabe bungkas nasida, laos maringan di tongatonga ni bangso i.

¹⁷Dung i borhat ma Juda rap dohot Simeon, hahana i, gabe dipapatu nasida ma halak Kanaan, angka na maringan di Zepat, laos diharomhon nasida do, jala dibahen goar ni huta i Horma.

¹⁸Ditaban Juda huhut Gaza ro di luatna humaliang, dohot Askelon ro di luatna humaliang, dohot Ekron ro di luatna humaliang.

¹⁹Jala sai didongani Jahowa do Juda, gabe dipapatu isi ni dolok i, ai ndang taronjarsa ianggo isi ni rura i, ala marhureta bosu nasida.

²⁰Dung i dilehon nasida ma Hebron tu si Kaleb, songon na tinonahon ni si Musa hian, gabe dionjar sian i na tolu anak ni si Enak.

²¹Alai anggo halak Jebusi, angka na maringan di Jerusalem, ndang dionjar pinompar ni si Benjamin, laos maringan di Jerusalem do halak Jebusi, tampak dohot pinompar ni si Benjamin rasirasa sadarion.

²²(II.) Nangkok do huhut pinompar ni si Josep tu Betel, jala Jahowa do dongannasida.

²³Dung i didokkon pinompar ni si Josep ma mangkahapi Betel; ia goar ni huta i di na robu Lus do.

²⁴Jadi diida pangkahap i ma sada halak ruar sian huta i, gabe didok nasida tu ibana: Ua patuduhon di hami haroroan tu huta, mardenggan basa basa pe hami tu ho.

²⁵Jadi dipatuduhon ma tu nasida haroroan tu huta, gabe sun ditampuli nasida isi ni huta i dohot podang; alai anggo baoa i ro di donganna saompu sudena dipalua do.

²⁶Jadi bungkas ma baoa i tu tano ni halak Het, jala dipungka sada huta, dibahen ma goarna Lus, laos i do goarna rasirasa sadarion.

²⁷(III.) Ia Manasse ndang dionjar anggo isi ni Betsean ro di huta angka na ginomgomanna, dohot Taanak ro di huta angka na ginomgomanna dohot isi ni Dor ro di huta angka na ginomgomanna dohot isi ni Ibleam ro di huta angka na ginomgomanna, dohot isi ni Megiddo ro di huta angka na ginomgomanna, ai ditenggeng roha ni halak Kanaan maringan di tano i.

²⁸Alai dung lam marhuaso Israel, dipampe ma rodi tu halak Kanaan, ndang anggo dionjar.

²⁹Epraim pe ndang dionjar halak Kanaan, angka na maringan di Gezer, laos maringan di tongatongana di Gezer, halak Kanaan.

³⁰ Zebulon pe ndang dionjar isi ni Kitron ro di isi ni Nahalol, laos maringan di tongatongana halak Kanaan mangoloi rodi.

³¹ Aser pe ndang dionjar isi ni Akko, ro di isi ni Sidon dohot Ahlab, Aksib, Helba, Apek dohot Rehob.

³² Laos maringan halak Aser di tongatonga ni halak Kanaan, isi ni tano i hian, ai ndang dionjar nasida.

³³ Naptali pe ndang dionjar isi ni Betsemes, ro di isi ni Bet-Anat, laos maringan ibana di tongatonga ni halak Kanaan, isi ni tano i hian, alai mangoloi rodinasida do isi ni Betsemes dohot Bet-Anat.

³⁴ Dung i dionjaronjar halak Amori ma pinompar ni si Dan tu dolok, ai ndang diloas nasida tuat tu rura.

³⁵ Dung i digogohon halak Amori ma maringan di dolok Heres, di Aialon dohot di Salabim; alai marmulia anggo tangan ni pinompar ni si Josep, gabe hona rodi nasida dibahen.

³⁶ Alai anggo parbalohan ni halak Amori, olat ni robean Akrabim sian dolok batu, boti tu julu.

2¹ (I.) Dung i nangkok ma suruan ni Jahowa sian Gilgal tu Bokim, jala ninna ma: Nunga hutogihon hamu ruar sian Misir, jala nunga hupatolhas hamu tu tano, na huuarihon tu ompumuna, jala hudok: Tung na

so tupa ubaonku padan na hubahen i dohot hamu ro di salelenglelengna.

²Alai hamu pe antong, ndang jadi mambahen parjanjian tu isi ni tano on, ingkon lohaonmuna do angka langgatannasida; alai ndang ditangihon hamu soarangki. Boasa tung songon i bahenonmuna?

³Jadi ningku ma antong: Nandang onjaronku nasida sian jolomuna, ingkon gabe alomuna situtu nasida, jala debatanasida gabe jorgong di hamu.

⁴Jadi dung tolhas dihatahon suruan ni Jahowa angka hata i tu sandok halak Israel, dipangiar bangso i ma suaranasida be tumatangis.

⁵Dung i dibahen nasida ma goar ni hajongjongan i Bokim, laos disi nasida mamele tu Jahowa.

⁶Jadi dung dipamuli si Josua bangso i, gabe laho ma halak Israel ganup tu partalianna be, laho manean tano i.

⁷Sai dioloi bangso i ma Jahowa saleleng mangolu si Josua, saleleng mangolu dohot sintua angka na di pudi ni si Josua, angka na sanga marnida saluhut halongangan na godang i, angka na binahen ni Jahowa tu halak Israel.

⁸Dung i mate ma si Josua, anak ni si Nun, naposo ni Jahowa, marumur saratus sampulu taon.

⁹Jadi ditanom nasida ibana di parbalohan ni partalianna, di Timnat-Heres, di dolok Epraim, tungkan utara sian dolok Gaas.

¹⁰(II.) Alai dung marpungu sandokjolma na sansundut i tu angka ompuna, hehe ma sundut na asing di pudinasida, angka na so tumanda Jahowa, manang pambahenan, angka na binahenna i tu Israel.

¹¹Dung i dibahen halak Israel ma sogo ni roha ni Jahowa, jala marsomba nasida tu angka Baal i.

¹²Laos ditadingkon nasida Jahowa, Debata ni ompunasida i, na paruar nasida sian tano Misir, gabe diihuthon nasida angka debata sileban, i ma debata ni bangso angka na maringan humaliang nasida, jala marsomba tusi mangalap rimas ni Jahowa.

¹³Ala tinadingkon nasida Jahowa, gabe marsomba tu Baal dohot tu Astarot.

¹⁴Jadi marsigorgor ma rimas ni Jahowa tu Israel, gabe dipasahat ma nasida tu tangan ni angka panamun, asa disamuni nasida, jala digadishon nasida tu tangan ni musunasida humaliang, gabe ndang be manahan nasida jongjong maradophon musunasida i.

¹⁵Manang tudia pe nasida borhat, sai tangan ni Jahowa alonasida tu hamagoan, songon na nilumbahon ni Jahowa hian, jala songon na niuarihon ni Jahowa tu nasida, gabe hagogotan situtu nasida.

¹⁶Dung i dipahehe Jahowa ma panguhum angka na paluahon nasida sian tangan ni angka na manamuni nasida.

¹⁷Alai ndang ditangihon nasida, nang angka panguhumnasida, ai sai dipaganjang nasida rohana mangihuthon angka debata sileban, jala marsomba tusi, jala tibu nasida manimbil sian dalan na nidalanan ni ompunasida laho mangoloi angka tona ni Jahowa, ndang dibahen nasida songon i.

¹⁸Ia dung dipahehe Jahowa di nasida angka panguhum, gabe dongan ni panguhumi Jahowa paluahon nasida sian tangan ni musunasida, saleleng mangolu panguhumi; ai marpangulah muse roha ni Jahowa dibahen angguhangguknasida maradophon angka na mangarupa dohot na manosak nasida.

¹⁹Alai ia dung mate panguhumi, marbalik muse nasida, gabe jumahat sian angka ompunasida i laho mangihuthon tu angka debata sileban mangoloi nasida, jala marsomba tusi; ndang dipasohot nasida pambahenannasida manang harohaonna na tangkangi.

²⁰Jadi marsigorgor ma rimas ni Jahowa dompak Israel pola didok: Ala na nilaosan ni bangso on padanhu, naung hutonahon tu angka ompunasida, jala ndang ditangihon suaranku.

²¹Ahu pe antong ndang be datdatanku mangonjar nanggo sahalak maradophon

nasida sian bangso parbegu, angka na teba binahen ni si Josua di hamamatenana i.

²²Asa mangunjuni Israel Ahu marhitehite nasida, manang na olo nasida manurut dalan ni Jahowa, jala mandalanisa hombar tu pangaradoti ni angka ompunasida, manang ndang.

²³Jadi dipasombu Jahowa ma angka bangso parbegu, ndang tibu nasida dionjar sian partalianna, jala ndang dope dipasahat nasida tu tangan ni si Josua.

3¹(I.) Alai angka on do bangso parbegu, angka na pinasombu ni Jahowa mangunjuni Israel marhitehite nasida, gumodang luhut Israel angka na so parbotoboto hamusuon dompak Kanaan.

²Asa tung mamoto angka marga ni halak Israel, jala marsiajar di ruhut hamusuon, angka na so pinabotobotonasida na jolo.

³Na lima raja ni halak Palistim ro di saluhut halak Kanaan, halak Sidon dohot Hevi, angka na maringan di dolok Libanon, olat ni dolok Baal-Hermon sahat ro di Hamat.

⁴I ma angka nasida bahen pangunjunan tu Israel, asa tung botoon, manang na tangihononnasida patik ni Jahowa, angka na tinonahonna tu ompunasida, marhite sian tangan ni si Musa.

⁵Jadi dung maringan halak Israel di tongatonga ni halak Kanaan, Het i, Amori, Perisi, Hevi dohot Jebusi.

⁶Gabe dibuat ma borunasida bahen
jolmanasida, jala dilehon borunasida
tu anaknasida, jala disomba angka
debatanasida.

⁷Dung i diulahon halak Israel ma sogo ni
roha ni Jahowa, jala dihalupahon Jahowa,
Debatanasida i, jala marsomba nasida tu
angka Baal dohot tu angka sombaon.

⁸Jadi marsigorgor ma rimas ni Jahowa
dompok Israel, gabe digadishon nasida
tu tangan ni Kusan-Risataim, raja sian
Mesopotamia, gabe marpandapotan halak
Israel tu Kusan-Risataim ualu taon lelengna.

⁹(II.) Dung i manganguhi ma halak Israel
tu Jahowa, gabe dipahehe Jahowa ma sada
sipalua di Israel, paluahon nasida, i ma si
Otniel, anak ni si Kenas, anggi ni si Kaleb.

¹⁰Jadi songgop ma tu ibana Tondi ni
Jahowa, gabe panguhum di Israel, jala borhat
ibana marporang; jadi dipasahat Jahowa tu
tanganna Kusan-Risataim, raja ni Ram, gabe
dipapatu tanganna ma Kusan-Risataim.

¹¹Jadi marhasonangan ma tano i opatpulu
taon lelengna, dung i mate ma si Otniel, anak
ni si Kenas.

¹²(III.) Alai diulahi halak Israel muse
mambahen sogo ni roha ni Jahowa, gabe
dipargogoi Jahowa ma si Eglon, raja sian
Moab, mangalo Israel, ala diulahon nasida
sogo ni roha ni Jahowa.

¹³Jadi marhara ibana tu halak Amon dohot tu halak Amalek, dung i borhat ibana, jala dipapatu Israel, jala disoluk nasida huta parharambiran.

¹⁴Jadi marpandapotan halak Israel tu si Eglon, raja sian Moab, sampulu ualu taon lelengna.

¹⁵Jadi mangangguhi ma halak Israel tu Jahowa, gabe dipahehe Jahowa di nasida sada sipalua, i ma si Ehud, anak ni si Gera, marga Benjamin, mate ia tanganna siamun. Dung i disuru halak Israel ma ibana mamboan silua tu si Eglon, raja sian Moab.

¹⁶Dung i dibahen si Ehud di ibana sada podang siduababa, saasta ganjangna, jala dihohoshon tu toru ni abitna di gontingna siamun.

¹⁷Jadi ibana manaruhon silua i tu si Eglon, raja sian Moab; jolma na mokmok situtu do ianggo si Eglon i.

¹⁸Jadi dung tolhas disombahon silua i, dipalaho ma jolma angka na mangusung silua i.

¹⁹Mulak ma anggo ibana sian ganaganaan, angka na mardonokkon Gilgal, jala ninna ma: Adong do hata sibunianku tu ho, ale rajanami; alai ninna rajai do: Sip ma! Dung i ruar ma sude angka na jongjong di lambungna.

²⁰Dung i didapothon si Ehud ma rajai, na hundul di bilut paranginanginan parginjang hapunjunganna i; jadi ninna si Ehud ma:

Adong do di ahu tona ni Debata tu ho. Jadi hehe ma rajai sian karosina.

²¹ Mamintor dipatoltol si Ehud tanganna sihambirang, diumpat ma podangna sian gontingna siamun i, jala ditihamhon tu butuhana.

²² Jadi ihut tu mata ni podang i masuk dohot suhulna, laos dihungkupi tabotabo i do mata ni podang i, ai ndang diumpat sian butuhana, laos ruar do ginagatna.

²³ Dung i ruar ma si Ehud tu bilut haroroan, jala dihinsu angka pintu ni bilut parginjang i, laos disordak do.

²⁴ Jadi dung ruar ibana, ro ma angka naposo ni rajai, hape sordak do angka pintu i didapot nasida, gabe didok ma: Ra tung patna do hinungkupanna di bilut paranginan i.

²⁵ Ia dung leleng nasida paimaimahon, maradu maila, hape ndang adong manang ise na mangungkap hinsuhinsu ni bilut parginjang i, gabe dibuat nasida ma anak hinsu, laos diungkap pintu i, jadi ida ma, tuannasida i nunga bustang di tano i mate.

²⁶ Alai nunga sanga maporus ianggo si Ehud, saleleng paimaimahon nasida, nunga pola dilaosi ibana angka ganaganaan i, jala malua ibana sahat tu Seira.

²⁷ Jadi dung sahat ibana tusi, dipalu ma sarune di dolok Epraim, jadi tuat ma halak Israel rap dohot ibana sian dolok i, ibana manguluhon nasida.

²⁸Dung i didok ma tu nasida: Tole ihuthon hamu ahu, ai nunga dipasahat Jahowa halak Moab, musumuna i tu tanganmuna, jadi tuat ma nasida mangihuthon tu ibana, gabe dapot nasida angka hatariparan ni Jordan, tondong ni Moab, jala ndang diloas taripar nanggo sahalak.

²⁹Jadi dibunu nasida ma uju i halak Moab arga sampuluribu halak, luhutna i halak na tambos jala parmusu na begu, jala ndang malua nanggo sahalak.

³⁰Jadi tunduk ma Moab di ari na sasada i, marpandapotan tu Israel, gabe marhasonangan tano i ualupulu taon lelengna.

³¹Di pudina muse ro si Samgar, anak ni si Anat, na mambunu halak Palistim onom ratus halak marhitehite sada batahi, asa dohot do ibana paluahon Israel.

4¹ (I.) Alai dung mate si Ehud, diulahi halak Israel muse mangulahon sogo ni roha ni Debata.

²Dibahen i digadishon Jahowa ma nasida tu tangan ni si Jabin, raja ni halak Kanaan, na mangarajai di Hazor, jala partogi ni paranganna, i ma si Sisera, na maringan di Haroset ni angka parbegu.

³Dung i manganguhi ma halak Israel tu Jahowa, ai tung siaratus hureta bos di rajai, jala dirupa halak Israel mambahen uhum gogo tu nasida, duapulu taon lelengna.

⁴(II.) Uju i ma si Debora, sada panurirang boruboru, jolma ni si Lappido, panguhum di Israel.

⁵Maringan do ibana di toru ni harambir Debora, di parholangan ni Rama dohot Betel, di dolok Epraim, gabe nangkok ma halak Israel mandapothon ibana laho maruhum.

⁶Dung i disuru si Debora ma suruanna marhara tu si Barak, anak ni si Abinoam sian Kades di Naptali, jala didok tu ibana: Nda nunga martona Jahowa, Debata ni Israel, songon on: Borhat ma ho, laho tu dolok Tabor, jala uluhon ma sampuluribu halak sian pinompar ni Naptali dohot Zebulon.

⁷Jala Ahu manjumpangkon tu ho, tu batang aek Kison, si Sisera partogi ni parangan ni si Jabin, ro di huretana dohot paranganna, jala Ahu pasahathon ibana tu tanganmi.

⁸Dung i ninna si Barak ma tu ibana: Molo didongani ho ahu, ba laho ahu; alai molo so ho mandongani ahu, ndang laho ahu.

⁹Jadi ninna si Debora ma: Hudongani pe ho, alai ndada ho marbarita di dalan sidalananmu, ai tu tangan ni sada parompuan pasahaton ni Jahowa si Sisera. Jadi borhat ma si Debora, jala mardalan rap dohot si Barak tu Kedes.

¹⁰Dung i dipaluhut si Barak ma halak Zebulon dohot Naptali tu Kedes, gabe nangkok ibana mardalan pat udur dohot sampuluribu halak; nangkok dohot si Debora rap dohot ibana.

¹¹ Alai anggo si Heber, marga Keni, nunga mamulik hian sian halak Keni, sian pinompar ni si Hobab, simatua doli ni si Musa, jala nunga dipajongjong undungundungna sahat ro di hau ara di Zaannim marjonokkon Kedes.

¹² Jadi tarbortik ma tu si Sisera, nunga nangkok si Barak, anak ni si Abinoam, tu dolok Tabor.

¹³ Dung i dipaluhut si Sisera ma nasa huretana, siaratus hureta bosu, ro di saluhut paranganna niuluhonna sian Haroset ni angka parbegu tu batang aek Kison.

¹⁴ Alai ninna si Debora ma tu si Barak: Borhat ma ho, ai laos di ari on do pasahatan ni Jahowa si Sisera tu tanganmu, nda Jahowa sandiri do borhat manguluhon ho? Jadi tuat ma si Barak sian dolok Tabor, jala sampuluribu halak mangihuthon tu ibana.

¹⁵ Jadi ditaluhon Jahowa ma si Sisera, ro di saluhut huretana dohot sandok paranganna marhitehite podang ni si Barak, laos mijur si Sisera sian huretana, gabe maporus mardalan pat.

¹⁶ Dung i dieak si Barak ma huretai dohot sandok parangan i sahat ro di Haroset ni angka parbegu, jadi marragean ma sandok parangan ni si Sisera dibahen podang, ndang adong teba nanggo sada halak.

¹⁷ (III.) Alai maporus do ianggo si Sisera mardalan pat tu undungundung ni si Jael, jolma ni si Heber, marga Keni, ai mardemak

do si Jabin, raja sian Hazor tu pinompar ni si Heber, marga Keni.

¹⁸Jadi ruar ma si Jael manomunomu si Sisera, jala didok ma tu ibana: Sai tuli ma ho, ale rajanami sian jabungku, unang ho mabiar, jadi tuli ibana masuk tu undungundunga i, laos dibulusani ibana dohot hain panas.

¹⁹Dung i ninna si Sisera ma tu nasida: Nia inang aek i otik inumonku, ai mauas do ahu. Jadi dibungka nasida ma isian ni susu, jala dilehon ibana minum, laos dibulusani muse.

²⁰Dung i ninna si Sisera tu nasida: Jongjong ma ho tu pintu ni undungundung i, dung i molo tung ro baoa usousu tu ho: Adong dojolma disi? Gabe dohononmu ma: Nandang adong manang ise.

²¹Dung i dibuat si Jael ma, jolma ni si Heber, marga Keni, labang ni undungundung i sada, dibuat dohot nanggar sada di tanganna, jala disisipi ibana, dung i dilabangkon ma labangi tu bagasan parsontinganna, laos pajal tu tano i, laos derem anggo si Sisera dibahen lojana, jadi mate ibana.

²²Alai di na mangeak si Barak di si Sisera i, ruar ma si Jael manjumpangkon ibana, laos ninna tu ibana: Ro ma ho, asa hupatuduhon tu ho baoa na niluluanmi. Jadi dung masuk ibana tu undungundung i, ida ma bustang ia si Sisera mate, jala labangi di bagasan parsontinganna.

²³Asa dipajimput Debata ma si Jabin, raja sian Kanaan di ari na sasada i, diadopan ni halak Israel.

²⁴Dung i lam leleng, lam posi ma uhum ni halak Israel tu si Jabin, raja sian Kanaan, paima rendep si Jabin, raja sian Kanaan dibahen nasida.

5¹(I.) Dung i marende ma si Debora dohot si Barak, anak ni si Abinoam, di ari na sasada i, songon on:

²Pinuji ma Jahowa, ala adong partogi manguluhon Israel, ala girgir roha ni bangso i sumeahon dirina.

³Tangihon ma, hamu angka raja, jala tarehon pinggolmu, hamu angka partogi! Ahu sandiri tahe naeng marende, umpuji Jahowa, ahu naeng mamiltik parhinaloan di Jahowa, Debata ni Israel.

⁴Ale Jahowa, uju na ruar i Ho sian Seir, uju mamolus Ho sian luat Edom, humuntal tano i, manetehi huhut angka langit dohot angka ombun manetekkon aek.

⁵Malala angka dolok moradophon Jahowa, laos songon i dolok Sinai moradophon Jahowa, Debata ni Israel.

⁶Uju di angka ari ni si Samgar, anak ni si Anat, uju di angka ari ni si Jael, tarulang angka dalan na bolon, jalajolma pardalandalan mardalan sian dalan pangalitan.

⁷ Hurangan partogi di Israel, hurangan tongon, paima hehe ahu si Debora, hehe ahu gabe ina ni Israel.

⁸ Umpillit debata angka na imbaru do Israel, jadi masa ma hamusuon di harbangannasida; hape ndang adong jumpang idaon lombulumbu, manang hujur di tongatonga ni opatpulturibu halak Israel!

⁹ Lomo do rohangku mida angka siparenta Israel, dohot mida halak natorop i, angka na girgir sumeahon dirina sian lomona. Puji hamu ma Jahowa!

¹⁰ Hamu angka na mangkunduli halode sihapaspili, hamu angka na mangkunduli palano na uli, jala hamu angka na mardalan pat marende ma hamu!

¹¹ Singkat ni suara ni angka na pagulut di lambung partuaehan, diendehon boruboru nuaeng disi angka denggan basa ni Jahowa, denggan basa ni partogi di Israel, uju na tuat laho muli tu bahalna be bangso ni Jahowa marsonangsonang.

¹² Tole, tole ale Debora! Tole, tole endehon ma sada ende! Hehe ma ho, ale Barak, jala togihon angka na tartaban binahenmi, ale anak ni si Abinoam!

¹³ Jadi martahop ma pungan na metmet dompakjolma angka na marhuaso, bangso ni Jahowa martahop rap dohot ahu dompakjolma angka na begu.

¹⁴Sian Epraim adong angka na marurat di Amalek, mangihut tu ho do Benjamin di tongatonga ni angka bangsomi, sian Mahir tuat angka partogi, jala sian Zebulon angka sitiop tungan ni partogi on.

¹⁵Angka induk di Isasar pe rap dohot si Debora, jala Isasar do songon si Barak: Mardalan pat ibana martahop tu rura; martopihon angka sunge ni Ruben tading angka sideak pingkiran.

¹⁶Boasa tung ngongong boti ho di holangholang ni angka parsoburan, patangitangi parmehetmehet ni parduan birubiru; martopihon sunge ni Ruben tongon tading angka sideak pingkiran.

¹⁷Ngongong boti di bariba ni Jordan ia Gilead, alai anggo Dan, boasa tung tinggal ibana di bagasan angka parauna? Ia Aser maringan do di topi ni laut, jala marsonangsonang di solok pangarantoanna.

¹⁸Alai anggo Zebulon, i ma bangso na olo sumeahon hosana tu hamatean; suang songon i Naptali di angka adaran na timbo.

¹⁹Marrongoman ro angka raja marporang, marporang uju i angka raja sian Kanaan marjonokkon Taanak, martopihon batang aek Megiddo. Hepeng perak ndang adong pardalananna dompak si Sisera.

²⁰Sian langit huhut marporang, marmusu tahe angka bintang sian pardalananna dompak si Sisera.

²¹ Batang aek Kison mangaup nasida, batang aek sian na robi do batang aek Kison i. Padoras langkam, ale tondingku, marhagagoon!

²² Uju marsidomdom tambirik ni hoda dibahen pangenjak ni angka ulubalangna, laho maporus.

²³ Pulasi hamu ma huta Meros, ninna suruan ni Jahowa, tung pulasi hamu pangisina, ala so ro nasida manolongi Jahowa, manolongi Jahowa dompak parangan angka na begu.

²⁴ Sumurung ma pasupasu tu si Jael,jolma ni si Heber, marga Keni, sian na tu sude angka parompuan; sumurung tahe pasupasu tu ibana sian na tu luhut parompuan, angka na maringan di undungundung.

²⁵ Mangido aek si Sisera, gabe susu dilehon nasida, di bagasan saoan na arga i binoanna miak susu.

²⁶ Tanganna sihambirang mambuat labang, jala siamunna maniop nanggar apala na dokdok mampasak si Sisera manombuhi uluna, jala dirosahi, jala ditombuk parsontinganna.

²⁷ Dung i jomjam ma ibana tu holangholang ni patna, margallogallo, jomjam tu holangholang ni patna, laos tinggang, laos mate jomjam boti.

²⁸ Mandulo sian pandiloan ia ina ni si Sisera, jala mangandungi sian jandela: Boasa tung songon i ngolngol huretana so ro? Mahua

ulaning songon i ngernger langkalangka ni hureta hinundulanna i?

²⁹Mangalusi ma jolma ni panuturina, angka na umbisuk, ibana sandiri pe mangalusi do songon on:

³⁰Nda ingkon jumpangan tabantaban nasida sibagionna! Duadua na marbaju di ganup baa! Angka ulos ragidup tabantaban di si Sisera, ulos angka na niangit angkupangkup, alit di rungkung ni boruboru angka na tarboan!

³¹Ingkon songon i ma nian hamamago ni saluhut angka musum, ale Jahowa! Alai anggo jolma, angka na mangkaholongi Ho, ingkon marsinondang do songon habibinsar ni mata ni ari di hagogoanna. Dung i marhasonangan ma tano i opatpulu taon lelengna.

6¹(I.) Dung i diulahon halak Israel muse ma sogo ni roha ni Jahowa, gabe dipasahat Jahowa nasida tu tangan ni Midian, pitu taon lelengna.

²Jadi dung mangarupa tangan ni Midian tu Israel, dipambahen halak Israel ma di nasida jaringjing angka di dolok dohot liang dohot huta na gonting, bahen haporusanna moradophon Midian.

³Ai disi adong disabur halak Israel, mamintor ro halak Midian, Amalek dohot halak habinsaran mangaromrom nasida.

⁴Jala dibahen parsaroanna manosak nasida laho mangago parbue ni tano i, sahat ro di

Gaza, jala ndang adong ditebahon hangoluan di Israel, nang birubiru, nang lombu, nang halode.

⁵Ai nangkok do nasida rap dohot pinahannasida dohot undungundungna, songon haroro ni sihapor dibahen deakna, jala ndang habilangan torop ni jolma dohot untonasida, disola nasida ma tano i laho mamansingkon.

⁶Jadi tarjepol situtu ma Israel maradophon Midian, gabe mangangguhi halak Israel tu Jahowa.

⁷Jadi dung mangangguhi halak Israel tu Jahowa ala Midian.

⁸Jadi disuru Jahowa ma sada halak panurirang manopot halak Israel, jala didok ma tu nasida: Boti hata ni Jahowa, Debata ni Israel: Nunga hupanangkok hamu sian Misir, jala huparuar hamu sian bagas parhatobanon.

⁹Jala hupalua hamu sian tangan ni halak Misir, sian tangan ni saluhut angka na mangarupa hamu, jala hupabali nasida moradophon hamu, jala hubasabasahon tu hamu tanonasida.

¹⁰Jala ningku do mandok hamu: Ahu do Jahowa, Debatamuna, unang habiari hamu debata ni halak Amori, nampuna tano na niinganamuna, hape ndang ditangihon hamu suaranku.

¹¹(II.) Dung i ro ma suruan ni Jahowa, jala marlinggomlinggom di toru ni hariara

na di Opra, si Joas pinompar ni si Abieser nampunasa, mardege eme do anggo si Gidion, anakna i di pardegean, laho mangkaporushon maradophon halak Midian.

¹²Jadi diida ibana ma suruan ni Jahowa na mandok tu ibana: Didongani Jahowa ma ho, ale ulubalang na gogo!

¹³Alai ninna si Gidion ma tu ibana: Santabi ale Tuhan! Aut na Jahowa tutu dongannami, boasa tung masa saluhutna on tu hami? Jala didia do saluhut halongangan, angka na binahenna, angka na binaritahon ni ompunami tu hami, songon on: Nda Jahowa do na panangkok hami sian Misir? Hape anggo nuaeng, nunga ditadingkon Jahowa hami, jala nunga dipasahat hami tu tangan ni halak Midian.

¹⁴Dung i didompakkon Jahowa ma ibana, huhut didok: Laho ma ho di hagogoonmon, ingkon ho paluahon Israel sian tangan ni halak Midian; nda Ahu do na marsuru ho?

¹⁵Alai ninna si Gidion tu Ibana: Santabi ale Tuhan! Tung marhitehite aha ma ahu paluahon Israel? Ida ma, hami na saompu do na ummetmet di marga Manasse, jala ahu do apala siampudan pinompar ni damang.

¹⁶Alai ninna Jahowa ma tu ibana: Ala Ahu mandongani ho, jadi tunduk bahenonmu halak Midian, songonjolma sada.

¹⁷Dung i ninna si Gidion ma tu Ibana: Molo tung maruli asi ni roha ahu di jolomi, sai

bahen ma tu ahu tanda sada, paboa Ho na mangkatai dohot ahu.

¹⁸Santabi, unang ma Ho morot sian on, paima ro ahu mulak tu Ho, asa hualap pelean sipelehononku di jolomu; gabe ninna Ibana ma: Tinggal pe Ahu, paima mulak ho.

¹⁹Dung i masuk ma si Gidion, jala dihobas anak ni hambing sada, dohot sagusagu na so niigaran sian sasolup itak; dibahen do juhut i tu bagasan sada ampang, jala huahuana dibahen tu bagasan mangkuk, jala ditaruhon tu Ibana, tu toru ni hariara i, jala diparade.

²⁰Dung i ninna suruan ni Debata ma tu ibana: Buat ma juhut i dohot sagusagu na so niigaran, jala peakkon tu atas dolok batu on, usehon ma anggo huahuana tusi. Jadi dibahen ibana ma songon i.

²¹Dung i ditullukkon suruan ni Jahowa ma ujung ni tungkot na di tanganna i, asa dais tu juhut dohot tu sagusagu na so niiasoman i, gabe ruar ma api sian dolok batu manganhon juhut i dohot sagusagu i, laos so dapot matana be anggo suruan ni Jahowa.

²²Jadi dung mamoto si Gidion, tung suruan ni Jahowa do Ibana hape, gabe didok ma: Mate ma ahu, ale Tuhan Jahowa! Ala naung huida hape suruan ni Jahowa adop bohi be.

²³Dung i ninna Jahowa ma tu ibana: Dame ma di ho! Unang ho mabiar, ndang mate ho ala ni.

²⁴ Dung i dipauli si Gidion ma disi langgatan sada di Jahowa, jala dibahen goarna: Jahowa haroroan ni hatuaon! Rasirasa sadarion sai disi dope i di Opra, pinompar ni Abieser nampunasa.

²⁵ (III.) Dung i bornginna i ninna Jahowa ma tu ibana: Buat ma sada anak ni lombu sian lombu ni amami dohot lombu paduahon na marumur pitu taon, jala lohain ma langgatan ni Baal ni amami, jala taba sombaon na di atasna.

²⁶ Dung i paulionmu ma sada langgatan di Jahowa, Debatam, di punsu ni dolok batu on, di haroroan, dung i buat ma lombu paduahon i, jala pelehon sada pelean situtungon sian hau ni sombaon naung tinabami.

²⁷ Jadi diarahon si Gidion ma sampulu halak sian angka naposona, jala dibahen ma songon na nidok ni Jahowa tu ibana; alai dibahen biarna mida pinompar ni amana dohot mida halak isi ni huta i mambahensa arian, gabe bornginna i dibahen.

²⁸ Jadi dung dipasogot isi ni huta i hehe manogotna i, ida ma, nunga maloha langgatan ni Baal, jala nunga tartaba sombaon di atasna, jala lombu paduahon i, nunga dipelehon di atas langgatan nambura pinaulina i.

²⁹ Dung i angka ninna be ma tu donganna: Ise ulaning mambahen haurahon on? Jadi dung disulingkit nasida, jala diusousoi nasida,

gabe didok halak ma: Si Gidion, anak ni si Joas do mambahensa.

³⁰Jadi ninna isi ni huta i ma tu si Joas: Boan ma anakmu tu ruar, ingkon mate ibana bunuon, ala na nilohana i langgatan ni Baal, jala ala tinabanna i sombaon di atasna.

³¹Alai ninna si Joas ma tu saluhut angka na jongjong di lambungna: Hamu do huroha naeng marlulu Baal, manang naeng manolongi ibana? Manang ise na naeng marlulu ibana, ingkon marutang hosa ibana; tapaima ma tu marsogot, molo tung na tutu ibana Debata, tutu ma laos ibana marlulu ibana ala maloha langgatanna i.

³²Jadi olat ni ari na sasada i, digoar halak ma ibana Jerubbaal, ai ninna do: Baal sandiri ma marlulu tu ibana, ala na nilohana langgatanna i.

³³(IV.) Dung i marluhut ma sude halak Midian dohot Amalek dohot halak sian habinsaran, taripar ma nasida jala marsaro di rura Jesreel.

³⁴Jadi ro ma Tondi ni Jahowa songgop tu si Gidion, dipalu ma sarune, asa marhara tu pinompar ni si Abieser.

³⁵Dung i disuru ma suruanna tu sandok marga Manasse, laos dihara dohot nasida; disuru huhut suruanna manopot marga Aser, Zebulon dohot Naptali, gabe ro be nasida manjumpangkon ibana.

³⁶Dung i ninna si Gidion ma tu Debata: Molo tung tongon Ho paluahon Israel marhitehite tanganku, songon na nidokmi.

³⁷Ida ma, hupahembang ma bobak ni birubiru na marimbulu on di pardegean, molo tung holan bobak i marnambur, jala mahiang sandok tano i humaliang, jadi tandaonku ma sian i, paboa tutu Ho naeng paluahon halak Israel marhitehite tanganku, songon na nidokmi.

³⁸Dung i jumpang ma songon i; ai dung dipasogot ibana hehe manogotna i, diporo ma bobak i, gabe manetehi nambur sian bobak i gok sada saon aek.

³⁹Dung i ninna si Gidion ma tu Debata: Unang tung marsigorgor rimasmu mida ahu, ala mangkuling ahu sahalinari sambing, ala huunjuni dope sahalinari marhitehite bobak on: Holan di bobak on mahiang, jala nambur di sandok tano i humaliang.

⁴⁰Dung i dibahen Debata ma songon i di na saborngin i, mahiang holan di bobak i, jala nambur di sandok tano i humaliang.

7¹ (I.) Dung i dipasogot si Jerubbaal, i ma si Gidion, hehe rap dohot sandok bangso donganna i, gabe marsaro ma nasida di lambung mual Harod, jadi parangan ni Midian marsaro di jolona, di rura tungkan utara sian robean More.

²Dung i ro ma hata ni Jahowa tu si Gidion: Matorophu halak donganmu, nda tung

tarlehon Ahu halak Midian tu tangannasida, atik beha mamuji dirina halak Israel maon moradophon Ahu mandok: Tanganku sandiri do paluahon ahu.

³On pe tingtingkon ma tu pinggol ni bangso i songon on: Manang ise na mabiar, jala na tahuton, mulak ma ibana sian dolok Gilead! Jadi mulak ma duapulu dua ribu halak, gabe tading nama sampuluribu.

⁴Dung i ninna Jahowa muse tu si Gidion: Matorophu dopejolma i; togihon ma nasida tuat tu batang aek i, asa Ahu manguji nasida di ho disi, jadi manang ise na hudok tu ho, ingkon i ma donganmu laho, jala ganup na hudok tu ho, ndang jadi donganmu ibana laho, i ma na so jadi laho.

⁵Dung i ditogihon ibana ma bangso i tuat tu batang aek i, gabe didok Jahowa tu si Gidion: Manang ise na manirup aek i sian tanganna, songon pandilati ni biang, pulik ibana pajongjong; suang le songon i sude na minum manunggam.

⁶Jadi bilangan ni angka na manirup sian tanganna, tolu ratus halak do, jala sandok bangso na teba i manunggam do laho minum aek.

⁷Dung i ninna Jahowa ma tu si Gidion: Marhitehite na toluratus halak angka naung manirup sian tanganna Ahu paluahon hamu, jala lehononku Midian tu tanganmu; alai

sandok bangso i dungkon i, muli be ma tu ingananna.

⁸Dung i dibuat nasida ma bohal i sian na torop i dohot angka sarunenasida di bagasan tangannasida, dipamuli ma luhut halak Israel na asing ganup tu undungundungna be; alai ditiopi do anggo na tolu ratus halak i ianggo parangan ni halak Midian, marsaro do di jolona, tungkan toruan di rura i.

⁹(II.) Laos bornginna i didok Jahowa tu ibana: Hehe ma ho! Tuat ma ho tu parsaroan ni parangan i, ai nunga hupasahat nasida tu tanganmu.

¹⁰Molo tung mabiar ho laho tuat, ingkon tuat ma ho rap dohot si Pura parhaladom tu parsaroan i.

¹¹Jadi begeonmu ma manang aha na tinaringotannasida, gabe dapotan gogo ma tanganmu mandopang parsaroan i. Jadi tuat ma ibana rap dohot si Pura parhaladona i, tu partalpahan ni angka parhal di parsaroan i.

¹²Ia halak Midian dohot Amalek dohot sude halak habinsaran marpeahan di rura i, songon sihapor dibahen toropna; jala untonasida songon horsik na di pasir ni laut, ndang habilangan dibahen deakna.

¹³Jadi dung ro si Gidion, ida ma, tongon sada baea pajojorhon tu donganna nipina, ninna do: Ida ma, marnipi ahu songon on: Tung magulang do sada roti na tingko tu tongatonga ni parangan ni halak Midian,

tung tolhas do tu angka undungundung i, jala ditondong, gabe marumpak, pola tung balik tu ginjang, gabe marpeahan angka undungundung i.

¹⁴Dung i ninna donganna i ma mangalusi: Nandang manang dia lapatanna, nda podang ni si Gidion, anak ni si Joas, halak Israel, nunga dilehon Debata halak Midian dohot sandok paranganna tu bagasan tanganna.

¹⁵(III.) Jadi dung dibege si Gidion hata ni nipi i dohot lapatanna, laos marsomba ma nasida, jala mulak ibana tu parsaroan ni Israel, ninna ma: Borhat ma hamu, ai nunga dipasahat Jahowa tu tanganmuna parsaroan ni parangan ni Midian.

¹⁶Dung i disagi si Gidion ma na tolu ratus halak i bahen tolu panggungan, jala diganupi nasida sarune sada be dohot hudon na rumar sada be, na marisi sulu damar.

¹⁷Jala didok tu nasida: Maniru sian ahu ma hamu, bahen hamu ma songon na hubahen! Ida ma, molo sahat ahu tu partalpahan ni parsaroan i, songon i hubahen, ingkon songon i do bahenonmuna.

¹⁸Molo hupalu sarune i, ahu ro di sude angka donganku, dohot ma hamu mamalu sarunena be humaliang sandok parsaroan i, jala surakkononmuna ma: Podang ni Jahowa dohot podang ni si Gidion!

¹⁹Jadi dung sahat si Gidion udur dohot na saratus halak, angka donganna i tu

partalpahan ni parsaroan i, mamungka gansi ni parhal tonga borngin, apala ipe dipatutur angka parhali, gabe dipalu nasida ma sarunenasida, jala ditaporhon ma hudon, angka na di tangannasida i.

²⁰Jadi rap mamalu sarunenasida ma na tolu panggungan i, ditaporhon dohot hudonnasida i, jala ditiop di bagasan tangannasida hambirang angka sulu, jala tanganna siamun maniop angka sarune i laho mamalu, huhut marsuraksurakkon: Podang ni Jahowa dohot podang ni si Gidion!

²¹Dung i jongjong ma nasida di hajongjonganna be humaliang parsaroan i; jadi guntur ma sandok parsaroan i, huhut manganguhi jala maporus.

²²Jadi uju mamalu sarunena be na tolu panggungan i, dipatongon Jahowa ma podang ni ganup dampak donganna dohot dampak sandok parsaroan i, gabe maporus sandok parangan i sahat ro di Betsitta boti tu Zaretan, tolhas ro di partalpahan sian Abel Mehola, marjonokkon Tabbat.

²³Jadi marpungu ma halak Israel sian Naptali dohot sian Aser dohot sian sandok Manasse, asa dieak halak Midian sian pudi.

²⁴Dung i disuru si Gidion ma suruanna tu sandok dolok Epraim, ninna ma: Haru tuat ma hamu manjumpangkon halak Midian, jala bajo hamu nasida di hatariparan aek marjonokkon Bet Bara na di Jordan; jadi

marpungu ma sandok halak Epraim marbajo di angka hatariparan aek sahat ro di Bet Bara dohot Jordan.

²⁵ Jadi ditangkup nasida ma dua raja ni Midian, si Oreb dohot si Seb, jala dibunu si Oreb di dolok batu Oreb, jala si Seb di bagasan pangilangan Seb, jala dieak sandok halak Midian; alai anggo ulu ni si Oreb dohot si Seb diboan nasida tu si Gidion, sian bariba ni Jordan.

8¹ (I.) Dung i ninna halak Epraim ma tu ibana: Boasa tung songon i bahenonmu tu hami, na so hinarami hami laho marmusu dompak Midian? Pola balga badanasida tu ibana.

² Alai ninna ibana ma tu nasida: Tung pola aha ma na hubahen i, molo pinatudos tu na binahenmuna? Nda dumenggan do ebaeba na pinutikkon ni Epraim do ebaeba na pinutikkon ni Epraim sian gotilon godang ni Abieser?

³ Tu tanganmuna do dipasahat Debata induk ni Midian, si Oreb dohot si Seb, jala didia ma tung tarbahen ahu patupahon, songon na binahenmuna i? Jadi dung didok songon i, mombun ma rimasnasida mida ibana.

⁴ Jadi dung sahat si Gidion tu Jordan, taripar ma ibana rap dohot na tolu ratus halak donganna i, angka na mandate, alai sai didatdati do mangeak.

⁵ Dung i ninna ibana ma tu halak isi ni huta Sukot: Ua lehon hamu deba sagusagu tu

halak, angka na mangihuthon tu ahu, ai nunga mandate nasida, jala hudatdati hami mangalele si Seba dohot si Salmunna, angka raja ni Midian.

⁶Hape ninna angka induk ni huta Sukot i ma: Nunga sahat tu tanganmu huroha tangan ni si Seba dohot si Salmunna, umbahen lehononnami sagusagu tu paranganmi?

⁷Dung i ninna si Gidion ma: Antong ia dung dilehon Jahowa si Seba dohot si Salmunna tu bagasan tanganku, balbalonku ma dagingmunai dohot duri dohot angka tadatada sian halongonan.

⁸Dung i nangkok ma ibana sian i tu Peniel, suang le ma songon i tu nasida didok, ala laos songon alus ni isi ni Sukot do alus ni isi ni Peniel.

⁹Dung i ninna ibana ma tu isi ni Peniel i, songon on: Molo tung mulak ahu marsonangsonang, lohaonku ma tungkupon.

¹⁰Alai anggo si Seba dohot si Salmunna di Korkor do rap dohot parangannasida, arga sampulu lima ribu halak toropna, i ma luhut angka na teba sian sandok parangan ni halak habinsaran, jala marragean do saratus duapulu ribu halak, angka parpodang sintak.

¹¹Dung i nangkok ma si Gidion sian dalan ni halak siingani undungundung tungkan habinsaran sian Nobah dohot Jogpeha, jala dirampok angka parangan i, so hinirim nasida.

¹²Maporus ma ianggo si Seba dohot si Salmunna, alai dieak ibana do nasida, jala dapotsa do na dua raja ni Midian, si Seba dohot si Salmunna gabe patu ma sude parangan i.

¹³(II.) Jadi dung mulak si Gidion, anak ni si Joas, sian parporangan i, tagan so binsar dope mata ni ari.

¹⁴Ditangkup ma dakdanak sada sian isi ni Sukot, jala diuso i tu ibana, laos disurathon ibana goar ni angka induk ni Sukot, ro di sintuana pitupulu pitu halak toropna.

¹⁵Dung i tolhas ma ibana tu angka isi ni Sukot, jala didok ma: Ida ma, indi on si Seba dohot si Salmunna, ala na niinsahanmuna ahu, pola didok hamu: Nunga tung sahat tu tanganmu tangan ni si Seba dohot Salmunna, umbahen lehononnami sagusagu tu paranganmu, angka na mandate i?

¹⁶Dung i ditangkup ma angka sintua ni huta i, dibuat dohot duri sian halongonan dohot tadatada manjora nasida.

¹⁷Diloha do ianggo tungkup sian Peniel, jala dibunu isi ni huta i.

¹⁸Dung i ninna ma tu si Seba dohot tu si Salmunna: Songon dia rupa ni halak angka na binunumuna di Tabor? Jadi didok nasida ma: Suman tu ho do nasida, ganup songon rupa ni anak ni raja.

¹⁹Dung i ninna si Gidion ma: Angka hahaanggingku, donganku saina nasida;

songon sintongna mangolu Jahowa, aut na dipangolu hamu nasida, ndang bunuonku hamu.

²⁰Jadi didok ma tu si Jeter, anak buhabajuna i: Tole bunu ma nasida, alai ndang disintak dolidoli i podangna, mabiar do ibana, ai bajar dope ibana.

²¹Dung i ninna si Seba dohot Salmunna ma: Ho sandiri ma nian hehe mambunu hami, ai ia songon i baa, songon i do gogona. Jadi hehe ma si Gidion, jala dibunu si Seba dohot si Salmunna, jala dibuat jagarjagar angka na di rungkung ni untonasida i.

²²(III.) Dung i ninna halak Israel ma tu si Gidion: Rajai ma hami, songon i ho, ro di anakmu, nang pahompum, ai ho do paluahon hami sian tangan ni Midian.

²³Jadi ninna si Gidion ma tu nasida: Nandang ahu mangarajai hamu, jala ndang anakku mangarajai hamu, Jahowa do mangarajai hamu.

²⁴Angkup ni ninna si Gidion: Sada sambing do na hupangido sian hamu, ganup hamu nian mangalehon di ahu tintin pinggol sere sian tabanna, ai martintin sere do nasida, ala halak Ismael nasida.

²⁵Dung i ninna nasida ma: Hulehon hami pe. Jadi dipahembang ma sada ulos, jala direongkon be tusi tintin sere sian tabanna.

²⁶Ia borat ni tintin sere, angka na pinangidona i, saribu pitu ratus tail do,

so padohot angka pangkean sere di bohi dohot di pinggol dohot ulos hasumba, angka naung pinangke ni raja ni Midian, so padohot pangkean angka na di rungkung ni untonasida i.

²⁷ Dung i dipauli si Gidion ma sian i bahen baju epod, jala dipatindang do i di hutana di Opra, gabe marlangka pilit sandok Israel tusi; manjadi jorgong ma i di si Gidion dohot di pinomparna i.

²⁸ Alai tarjepol situtu ma anggo Midian maradophon halak Israel, jala ndang tarbahen nasida be padirgak uluna, gabe sonang ma tano i opatpulu taon lelengna di angka ari ni si Gidion.

²⁹ (IV.) Dung i muli ma si Jerubbaal, anak ni si Joas, laos maringan di jabuna.

³⁰ Jala pitupulu do anak ni si Gidion, angka na ruar sian gontingna, ai torop do jolmana.

³¹ Boruboru pinarjolmana di huta Sikem pe tumubuhon anak sada di ibana, jala dibahen goarna si Abimelek.

³² Dung i mate sarimatua ma si Gidion, anak ni si Joas, jala tartanom di parbandaan ni si Joas, amana i, di Opra ni halak Abieser.

³³ Jadi dung mate si Gidion, marbalik ma halak Israel laho marlangka pilit mangihuthon tu Baal, jala Baal-Berit do dibahen debatanasida.

³⁴ Jala ndang be dipaingotingot halak Israel Jahowa, Debatanasida i, na paluahon

nasida sian tangan ni saluhut musunasida humaliang.

³⁵Jala ndang marasi ni roha nasida tu pinompar ni si Jerubbaal, i ma si Gidion, hombar tu saluhut uhum na denggan, na binahenna i tu Israel.

9¹(I.) Alai laho ma ianggo si Abimelek, anak ni si Jerubbaal, tu Sikem, tumopot angka iboto ni inana, jala ninna ma tu nasida dohot tu sandok marga pinompar ni ompu ni inana songon on:

²Ua dok hamu ma suara tu pinggol ni sandok isi ni Sikem: Dia do tagonan di rohamu, pitupulu halak, anak ni si Jerubbaal luhutna i mangarajai hamu, manang holan sahalak mangarajaisa, jala ingot hamu holiholimuna jala sibukmuna do ahu.

³Jadi dihatahon angka iboto ni inana ma sude hata i tu pinggol ni isi ni Sikem taringot tu ibana, gabe melok rohanasida mangihuthon si Abimelek, ai ninna nasida do: Angginta do ibana.

⁴Dung i dilehon nasida ma tu ibana pitupulu ringgit sian joro ni Baal-Berit, asa diupai si Abimelekjolma, angka na neang jala na jungkat marroha mangihuthon tu ibana.

⁵Dung i bongot ma ibana tu bagasan bagas ni amana di Opra, jala dibunu angka hahaanggina, anak ni si Jerubbaal, pitupulu halak toropna di atas ni sada batu, holan si

Jotam, anak siampudan ni si Jerubbaal na teba, ai martabuni do ibana.

⁶Dung i marluhut ma sandok isi ni Sikem dohot sandok pangisi ni Milo, jala laho nasida mamampe si Abimelek bahen raja, marjonokkon hariara parningotan na di Sikem.

⁷(II.) Dung tarbortik barita i tu si Jotam, laho ma ibana jongjong di punsu ni dolok Gerizim, jala dipangiar suarana joujou, ninna ma tu nasida: Tangihon ahu, hamu ale isi ni huta Sikem! Asa ditangihon Debata hamu.

⁸Laho do nasaingan angka hau naeng mamiahi di nasida sada raja, jadi dipangkulingi nasida ma hau Jetun; ho ma rajanami, ninna.

⁹Alai ninna hau jetun i ma mangalusi: Tung tadingkononku ma miak na di ahu, pinapujipuji ni Debata dohot jolma, asa laho ahu parentarenta angka hau?

¹⁰Dung i dipangkulingi angka hau i ma muse hau ara: Ro ma ho gabe rajanami!

¹¹Jadi ninna hau ara i ma tu nasida: Tung tadingkononku ma hamanisonku dohot parbuengku na denggan i, asa laho ahu parentarenta angka hau?

¹²Dung i dipangkulingi angka hau i muse hau anggur: Ro ma ho gabe rajanami!

¹³Jadi ninna hau anggur i ma tu nasida: Tung tadingkononku ma anggurhu, na palas

roha ni Debata dohot jolma, asa laho ahu parentarenta angka hau?

¹⁴Dung i dipangkulingi luhut angka hau i ma hau tadatada: Ro ma ho gabe rajanami.

¹⁵Jadi ninna hau tadatada i ma tu angka hau i: Molo burjumuna i mamiahi ahu, gabe rajamuna, ba ro ma hamu marlinggomlinggom tu ahu; alai molo ndang, ruar ma api sian tadatada manganhon hau Ares di Libanon.

¹⁶On pe, molo mardongan hasintongan dohot hapolinon pambahenmuna i marrajahon si Abimelek, jala molo na denggan pambahenmuna tu si Jerubbaal dohot tu pinomparna i, jala dibahen hamu tu ibana hombar tu pambahenan ni tanganna?

¹⁷Ai marporang do damang humongkop hamu, jala diseahon hosana laho paluahon hamu sian tangan ni halak Midian.

¹⁸Hape hehe do anggo hamu sadarion dompak pinompar ni damang, jala dibunu hamu anakna pitupulu halak di atas ni sada batu, jala dipampe hamu si Abimelek, tubu ni hatoban ni damang mangarajai isi ni Sikem, ala tuturmuna ibana.

¹⁹Molo tung mardongan hasintongan dohot hapolinon pambahenmuna i sadarion tu si Jerubbaal dohot tu pinomparna i, marlas ni roha ma hamu mida si Abimelek, marlas ni roha nang ibana mida hamu.

²⁰Alai molo ndang, ingkon ruar ma api sian si Abimelek laho manganhon angka induk ni Sikem dohot isi ni Milo; ruar huhut api sian angka induk ni Sikem dohot sian pangisi ni Milo laho manganhon si Abimelek.

²¹Dung i maporus ma si Jotam mangaruntus laho tu Beer, laos maringan disi, ala si Abimelek hahana i.

²²(III.) Jadi dung diparenta si Abimelek halak Israel tolu taon lelengna.

²³Ditongos Debata ma tondi parsalisian di tongatonga ni si Abimelek dohot isi ni huta Sikem, gabe marjehejehe ma isi ni Sikem dompak si Abimelek.

²⁴Manginonahon tu si Abimelek pangarupaon binahenna tu na pitupulu anak ni si Jerubbaal, hahaanggina i, dohot sapata ni mudarnasida, na binununa i nasida, manginona dohot tu isi ni Sikem, na margogoihon tanganna laho mambunu angka hahaanggina i.

²⁵Dung i dipaonggophon isi ni Sikem i ma angka parbajo umbajo ibana, di punsu ni angka dolok, jala dipupusi saluhut angka pamolus di dalan sian lambungnasida, jadi dibaritahon halak ma i tu si Abimelek.

²⁶Alai ro ma muse si Gaal, anak ni si Ebed dohot angka hahaanggina i, bongot tu huta Sikem, gabe marhaposan tu ibana do isi ni Sikem i.

²⁷Dung i ruar ma nasida tu ladang, asa diputihi angka parbue ni porlak anggurnasida,

laos dipangilangi jala marhariburon, huhut dibongoti bagas ni debatanasida mangan jala minum do nasida, jala dipulasi ia si Abimelek.

²⁸Jadi didok si Gaal, anak ni si Ebed ma: Ise do si Abimelek, jala ise do Sikem, umbahen oloanta parentana? Nda anak ni si Jerubbaal do ibana jala si Zebul wakilna? Oloi hamu ma tagonan parenta ni halak Hemor, ama ni si Sikem, tung aha ma labanta marraja tu ibana?

²⁹Ise ulaning pasahat bangso on tu tanganku nian, asa hupamisir nian si Abimelek, jala ninna do anggo tu si Abimelek: Patorop ma paranganmu, jala ruar ma ho!

³⁰(IV.) Alai dung dibege si Zebul, induk ni huta i, hatahata ni si Gaal, anak ni si Ebed, marsigorgor ma rimasna.

³¹Jadi disuru ma suruanna marsibuni mandok tu si Abimelek: Ida ma, nunga ro si Gaal, anak ni si Ebed dohot angka anggina tu Sikem, jala digunturi nasida huta i dompak ho.

³²On pe, borhat ma ho bornginna i, ho dohot bangso na niuluhonmu, asa mambahen paronggopan di ladang.

³³Tole manogotna i, di habibinsar ni mata ni ari, pasogot ma mangarampok huta i; jadi ida, ruar ma ibana dohot bangso na niuluhonna i mandapothon ho, antong bahen ma tu ibana guru jumpang ni tanganmu.

³⁴Dung i borhat ma si Abimelek bornginna i rap dohot sandok bangso donganna i, mambahen paronggopan dompak Sikem opat panggungan.

³⁵Dung i ruar ma si Gaal, anak ni si Ebed, jala jongjong di haroroan tu pargumbangan ni huta i, jadi hehe ma si Abimelek dohot bangso donganna i sian paronggopan i.

³⁶Jadi dung diida si Gaal bangso i, gabe ninna ma tu si Zebul: Ida ma, torop ni halak angka na tuat sian punsu ni dolok an. Alai ninna si Zebul ma tu ibana: Halinu ni angka dolok do na niidam, songonjol ma.

³⁷Alai ninna si Gaal ma muse: Ida ma, tuat do huhut sada bangso sian adaran ni tano i, jala panggungan na sada ro sian dalan ni hariara ni angka parsibalik mata.

³⁸Dung i ninna si Zebul ma tu ibana: Didia do nuaeng babamu, na nidokmu: Ise do si Abimelek, umbahen tung oloanta parenta ni? Rupa i do bangso na tinoisanmi, tole ruar ma ho nuaeng laho marmusu dompak ibana!

³⁹Jadi ruar ma si Gaal manguluhon induk ni Sikem laho marmusu dompak si Abimelek.

⁴⁰Alai dieak si Abimelek ma ibana, gabe maporus ibana sianjolona, jadi torop halak marragean sahat ro di pintu harbangan.

⁴¹Dung i tading ma si Abimelek di Aruma; alai anggo si Zebul dionjar do si Gaal dohot angka hahaanggina i sian ingananna di Sikem.

⁴²Alai manogotna i ruar ma angka na torop i tu ladang, laos dibaritahon halak ma i tu si Abimelek.

⁴³Dung i diarahon ma angka naposona, jala disagi nasida bahen tolu panggungan, jala dibahen marparonggopan di ladang; jadi dung diida ruar halak na torop i sian huta, martahop ma ibana dompak nasida, laos dipatunduk nasida.

⁴⁴Ai si Abimelek dohot panggungan na rap dohot ibana mangarampok nasida, laos jongjong di pintu harbangan ni huta i nasida, ianggo na dua panggungan nari martahop do dompak sude angka na di ladang, laos dipatunduk nasida.

⁴⁵Ia si Abimelek marmusu dompak huta i manipat sadarina i, laos ditaban huta i, jala dibunu sude halak isi ni huta i, laos dipanepnep huta i, jala disirsirhon sira tusi.

⁴⁶Jadi dung dibege saluhut halak isi ni tungkup di Sikem barita i, masuk ma nasida tu benteng ni joro ni debata Berit.

⁴⁷Dung tarbortik barita i tu si Abimelek, naung marluhutjolma induk ni tungkup di Sikem.

⁴⁸Nangkok ma si Abimelek tu dolok Salmon, ibana dohot sude halak donganna i, dung i dibuat si Abimelek ma sada tangke di tanganna, asa manallik sada dangka ni hau, laos dihindat jala diampehon tu abarana, jala didok do tu halak donganna i: Manang aha na

niidamuna, na hubahen i, siluhon hamu ma mambahen songon i.

⁴⁹Jadi luhut halak natorop i masitallik sada be dangka i, jala diihuthon si Abimelek, jala dipeakkon angka dangka i tu lambung ni benteng i, jala sun ditutung benteng i dohot api, gabe marmatean saluhut halak isi ni tungkup di Sikem, arga saribu halak, baoa dohot boruboru.

⁵⁰(V.) Dung i laho ma si Abimelek tu Tebes, jala ditungkum huta i laos ditaban.

⁵¹Alai di tongatonga ni huta i adong sada tungkup na gonting; gabe tusi do maporus saluhut baoa dohot boruboru dohot sude isi ni huta i, laos dihinsu do di pudinasida, jala dipanaek nasida tarup ni tungkup i.

⁵²Jadi mangonjar ma si Abimelek sahat tu tungkup i, jala ditahop, laos didapothon sahat tu pintu ni tungkup i laho manutung nian dohot api.

⁵³Alai didekdekkon sada parompuan ma batu pandudaan sada, tongon tu ulu ni si Abimelek, gabe marosak pakpak uluna i.

⁵⁴Dung i pintor dijou si Abimelek ma dolidoli na mamboan sinjatana, jala didok tu ibana: Umpat ma podangmu, jala bunu ahu, asa unang didok halak taringot tu ahu: Tung inaina sada mambunu ibana. Jadi ditiham naposona i ibana, laos mate.

⁵⁵Alai dung diida halak Israel naung mate si Abimelek, muli be ma nasida tu ingananna be.

⁵⁶Jadi songon i pambahen ni Debata mamaloshon hajahaton ni si Abimelek, na binahenna i tu amana laho mambunu pitupulu halak hahaanggina.

⁵⁷Suang le songon i saluhut hajahaton ni halak Sikem, dipasuang Debata tu ulunasida, gabe manginona tu nasida pulas ni si Jotam, anak ni si Jerubbaal i.

10¹(I.) Jadi dung salpu si Abimelek, hehe ma muse si Tola, anak ni si Pua, anak ni si Dodo, sada halak sian marga Isasar paluahon halak Israel, jala maringan ibana di Samir, di dolok Epraim.

²Jala diparenta ibana halak Israel duapulu tolu taon lelengna. Dung i mate ibana, jala tartanom di Samir.

³Dung salpu ibana, hehe ma muse si Jair, halak Gilead, jala diparenta halak Israel duapulu dua taon lelengna.

⁴Jala tolupulu do anakna, angka na marsihundul di tolupulu halode, laos tolupulu hutanasida, angka na targoar huta ni si Jair rasirasa sadarion, angka na di tano Gilead.

⁵Dung i mate ma si Jair, jala tartanom di Kamon.

⁶(II.) Dung i diulahi halak Israel muse mambahen sogo ni roha ni Jahowa, jala marsomba tu angka Baal dohot tu Astarot,

dohot tu angka debata ni Ram, dohot tu angka debata ni Sidon, dohot tu angka debata ni Moab, dohot tu angka debata ni halak Amon, dohot tu angka debata ni halak Palistim, jala ditadingkon nasida Jahowa, jala ndang Ibana dioloi nasida.

⁷Jadi marsigorgor ma rimas ni Jahowa mida Israel, laos digadishon nasida tu tangan ni halak Palistim dohot tu tangan ni halak Moab.

⁸Jadi diparsipal, jala dirupa nasida ma halak Israel, mamungka di na sataon i boho sampulu ualu taon lelengna, luhut halak Israel angka na di bariba ni Jordan, di tano ni halak Amori, na di Gilead.

⁹Angkupni ditaripari halak Amon do Jordan i, laho marmusu tandang huhut dompak Juda dohot dompak Benjamin dohot dompak pinompar ni Epraim, gabe targogot situtu Israel.

¹⁰Jadi manganguhi ma halak Israel tu Jahowa, angka ninna ma: Nunga mardosa hami dompak Ho, ala naung hutadingkon hami Debatanami, jala ala naung marsomba hami tu angka Baal.

¹¹Alai ninna Jahowa ma tu halak Israel: Nda hona pangarupaon hamu na jolo dibahen halak Misir, halak Amori, halak Amon dohot halak Palistim.

¹²Dohot halak Sidon dohot halak Amalek dohot halak Maon? Dung i manganguhi

hamu tu Ahu, jadi Ahu paluahon hamu sian tangannasida.

¹³Alai atik pe songon i, tung ditadingkon hamu Ahu, gabe marsomba hamu tu angka debata sileban; dibahen i ndang olo be Ahu paluahon hamu.

¹⁴Laho ma hamu antong mangangguhi tu debata, angka na pinillitmuna i di hamu, nasida ma nian paluahon hamu di tingki hagogotanmunai.

¹⁵Alai ninna halak Israel ma tu Jahowa: Nunga mardosa hami, Ho ma mambahen tu hami, hombar tu sandok lomo ni roham, asal dipalua Ho hami sadarion.

¹⁶Jadi dipaholang nasida ma angka debata sileban sian tongatonganasida, jala marsomba nasida tu Jahowa, gabe ditostos rohana mida pardangolan ni Israel.

¹⁷(III.) Dung i marpungupungu ma halak Amon, jala marsaro di Gilead, marpungu ma dohot halak Israel, jala marsaro di Mispa.

¹⁸Dung i ninna sandok angka induk di Gilead ma ganup tu donganna: Manang ise na olo manguluhon laho marporang dompak halak Amon, i ma gabe jujungan ni sandok isi ni Gilead.

11¹(I.) Ia si Jepta, halak Gilead, ulubalang na begu nian, alai anak gampang do ibana, anak sinalong ni si Gilead do si Jepta i.

²Alai dung ditubuhon jolma ni si Gilead angka anak di ibana, jala dung magodang angka anak ni tuanlaenna i, dipabali nasida ma si Jepta, angka ninna ma tu ibana: Nandang panean ho di bagas ni amanta, ai anak na pulik ina do ho.

³Jadi maporus ma si Jepta maradophon angka anggina i, laos maringan di tano Tob. Dung i marpungu ma tu si Jepta jolma angka na neang marroha, angka na laho marbajo i udur dohot ibana.

⁴Dung i di laonlaon ni ari marmusu ma halak Amon dohot halak Israel.

⁵Jadi dung marmusu halak Amon dohot Israel, laho ma angka sintua ni Gilead mangalap si Jepta sian tano Tob.

⁶Dung i ninna nasida ma tu si Jepta: Beta hita! Ho ma partoginami, asa marmusu hita dompak halak Amon.

⁷Alai ninna si Jepta ma tu angka sintua sian Gilead: Nda hamu do na somor roha mida ahu, pola dipabali hamu ahu sian bagas ni damang? Boasa ro hamu mandapothon ahu ia nuaeng, dung hagogotan hamu?

⁸Jadi ninna angka sintua sian Gilead i ma tu si Jepta: Apala ala ni do umbahen na ro hami nuaeng manopot ho, asa didongani ho hami marmusu dompak halak Amon, jala ho gabe partogi ni sude hami, isi ni Gilead.

⁹Dung i ninna si Jepta ma mandok angka sintua sian Gilead: Molo mulak ahu dialapi

hamu laho marmusu dompak halak Amon,
jala dipasahat Jahowa nasida tu ahu, olo ma
ahu gabe partogimuna!

¹⁰Jadi ninna angka sintua sian Gilead ma tu
si Jepta: Jahowa ma sibege hatantaon, molo
so guru dokmu oloannami.

¹¹Jadi diihuthon si Jepta ma angka sintua
sian Gilead, gabe dipampe bangso i ma ibana
bahen jujungan dohot partoginasida, jala di
adopan ni Jahowa do dipaboa si Jepta hatana
i luhutna di Mispa.

¹²(II.) Dung i disuru si Jepta ma suruanna
tu raja ni halak Amon, mandok songon on:
Pardulim ahu huroha, umbahen tung ro
ho manopot ahu laho marmusu dompak
tanongku?

¹³Dung i ninna raja ni halak Amon ma
mangalusi suruan ni i si Jepta: Ala na binuat
ni Israel tanongku, uju di hananangkokna
sian Misir, olat ni Arnon sahat ro di Jabok,
sahat ro di Jordan. On pe paulak ma i tu ahu
sian dengganna.

¹⁴Dung i diulahi si Jepta dope pasurusuru
suruanna tu raja ni halak Amon.

¹⁵Angka na mandok tu ibana: Boti hata ni si
Jepta: Ndang adong na binuat ni Israel tano
ni halak Moab, nang tano ni halak Amon.

¹⁶Ai uju di hananangkoknasida sian Misir,
mardalan do Israel di halongonan sahat ro di
laut arung, jala tolhas muse tu Kades.

¹⁷Dung i disuru Israel ma suruanna tu raja ni Edom mandok: Ua loas ma ahu mamolus sian tanom; hape ndang ditangihon raja ni Edom; disuru muse tu raja ni Moab, hape ndang mangaloas ibana, gabe laos tinggal di Kades do Israel.

¹⁸Jala mardalandalan nasida di halongonan, jala mangaliat sian tano ni Edom dohot sian tano ni Moab, boti tu habinsaran ni tano ni Moab, jala marsaro di bariba ni Arnon, jala ndang didege parbalohan ni tano Moab, ai Arnon do parbalohan ni tano Moab.

¹⁹Dung i disuru Israel ma suruanna tu si Sihon, raja ni halak Amori, raja sian Hesbon, jala ninna Israel do tu ibana: Ua loas ma hami mamolus sian luatmu sahat ro di ingananku.

²⁰Alai ndang pos roha ni si Sihon mangaloas Israel mamolus sian parbalohanna, lam dipapungu si Sihon do sandok bangsona, jala marsaro di Jahaz, laos marmusu dohot Israel.

²¹Alai dipasahat Jahowa, Debata ni Israel do si Sihon ro di sandok bangsona tu tangan Israel, laos dipatunduk nasida, gabe disoluk Israel sandok tano ni halak Amori, na maringan di tano i.

²²Dung i disoluk nasida ma sandok parbalohan ni halak Amori, olat ni Arnon sahat ro di Jabok, jala olat ni halongonan sahat ro di Jordan.

²³Antong anggo dung songon i pangonjar ni Jahowa, Debata ni Israel, di halak Amori

moradophon bangsona Israel, hape naeng soluhonmu muse tano i?

²⁴Nda songon on do: Nasa na tinurpukkon ni Kamos, debatamu tu ho, i do soluhonmu. Antong nasa na tinurpukkon ni Jahowa, Debatanami tu hami, i do soluhonnami.

²⁵On pe, tung umburju ma ho di roham sian si Balas, anak ni si Zippor, raja sian Moab? Tung dung ma ibana marbada dohot Israel, manang tung dung marmusu dampak nasida?

²⁶Nunga pola tolu ratus taon lelengna Israel maringan di Hesbon, ro di sosorna humaliang dohot di Aroer ro di sosorna humaliang dohot di sude huta, angka na martopihon Arnon; boasa so dirampas hamu angka i na sai laon?

²⁷Langgo ahu ndang adong dosangku tu ho, hape mambahen na so uhum ianggo ho tu ahu, laho marmusu dampak ahu, Jahowa do panguhum, Ibana ma manguhum halak Israel dohot halak Amon sadarion.

²⁸Alai ndang ditangihon raja ni halak Amon hata na tinonahon ni si Jepta tu ibana.

²⁹(III.) Dung i songgop ma tondi ni Jahowa tu si Jepta, gabe mamolus ibana sian Gilead dohot Manasse, mamolus muse sian Mispa na di Gilead, jala sian Mispa na di Gilead taripar ibana dampak halak Amon.

³⁰Dung i marbagabaga ma si Jepta tu Jahowa, ninna ma: Molo dipasahat Ho halak Amon tu bagasan tanganku:

³¹ Manang aha na ruar parjolo sian pintu ni bagashu manomunomu ahu, di na mulak ahu marsonangsonang sian halak Amon, ingkon Jahowa nampunasa, jala pelehononku do i bahen pelean situtungon.

³² Dung i taripar ma si Jepta dompak halak Amon laho marmusu dompak nasida, gabe dipasahat Jahowa nasida tu tanganna.

³³ Jadi patu nasida dibahen, olat ni Aroer sahat ro di Minit, duapulu huta, jala sahat ro di Abel Keramim marhite sian hataluan na bolon situtu; gabe tarjepol situtu halak Amon moradophon halak Israel.

³⁴ Jadi dung sahat si Jepta tu Mispa, jonok tu jabuna, ida ma ruar ma boruna manomunomu ibana, umpalu arbab huhut manortor haliang; sasada i do boruna, dungkon ni ndang adong anak manang boru di ibana.

³⁵ Asa dung diida ibana boruna i, gabe disansani pangkeanna, jala didok ma: Oe ale boru hasian! Tarjepol situtu ma ahu dibahen ho, mambahen ahu margudompong; ai nunga huungkap pamanganku marbagabaga tu Jahowa, jala ndang tartait ahu be.

³⁶ Alai ninna boruna i ma tu ibana: Ale amang, molo dung diungkap ho pamanganmu marbagabaga tu Jahowa, bahen ma tu ahu marguru tu hata na ruar sian pamanganmu, dung dibahen Jahowa tu ho partubolon moradophon musum, moradophon halak Amon.

³⁷ Angkup ni ninna nasida ma tu amana: Oloi ma hata sisandok on tu ahu, loas ahu arga dua bulan lelengna, asa laho ahu mardalani di atas ni angka dolok, mananangisi disi habajuonku, ahu rap dohot angka alealengku.

³⁸ Jadi ninna ibana ma: Antong laho ma ho! Diloas ma nasida laho dua bulan lelengna, gabe mardalani nasida rap dohot angka alealena tumatangis taringot tu habajuonna di atas ni angka dolok.

³⁹ Jadi dung marujung na dua bulan i, mulak ma nasida tu amana, gabe dibahen ma tu nasida bagabagana, na binagabagahonna i, gabe ndang tumanda baoa nasida; laos i do gabe adat di Israel.

⁴⁰ Laho do ganup taon angka boru ni Israel papujipuji boru ni si Jepta, halak Gilead i opatopat ari lelengna.

12¹ (I.) Dung i marluhut ma halak Epraim, jala ditondong dompak utara, angka didok nasida ma tu si Jepta: Boasa tung borhat ho laho marmusu dompak halak Amon, so marhara ho di hami mandongani ho nian; tutungonnami ma bagasmu di atasmu dohot api.

² Dung i ninna si Jepta ma tu nasida: Sobu situtu do ahu maralo dohot bangsongku dompak halak Amon, jala marhara ahu tu hamu nian, hape ndang olo hamu paluahon ahu sian tangannasida.

³Jadi dung huida ndang ro pangurupi sian hamu, huseahon ma hosangku, jala borhat ahu dompak halak Amon, gabe dipasahat Jahowa nasida tu bagasan tanganku. Boasa ma tung nangkok hamu sadarion laho marmusu dompak ahu?

⁴Dung i dipaluhut si Jepta ma sude baoa sian Gilead, asa marmusu dompak Epraim. Jadi ditaluhon halak Gilead ma halak Epraim, ala na nidoknasida: Angka na nieak ni Epraim do hamu isi ni Gilead, tung patut ma hamu di tongatonga ni Epraim dohot Manasse.

⁵Dung i marbajo ma halak Gilead i di angka hatariparan ni Jordan, maralohon Epraim. Dung i molo didok angka na maporus sian Epraim: Loas ma ahu taripar, gabe didok halak Gilead ma tu ibana: Atehe halak Epraim do ho? Molo didok ibana ndang.

⁶Gabe didok nasida ma tu ibana: Antong dok ma jolo Shibbolet; molo didok ibana Sibbolet, jala ndang tarbahensa mandok songon i, pintor ditangkup nasida ibana, jala dibunu di lambung ni angka hatariparan ni Jordan, gabe marragean uju i sian Epraim opatpulu duaribu halak.

⁷Alai onom taon do lelengna si Jepta parentahon Israel, dung i mate ma si Jepta, halak Gilead i, jala tartanom ibana di bagasan sada huta angka na di Gilead.

⁸(II.) Dung salpu ibana, soluk ma si Ebsan sian Betlehem manguhum Israel.

⁹Tolupulu anakna, jala tolupulu boruna, angka na pinamulina tu halak ruar, jala tolupulu boruboru nialapna sian halak ruar di anakna, jala diparenta ibana halak Israel pitu taon lelengna.

¹⁰Dung i mate ma si Ebsan, jala tartanom di Betlehem.

¹¹Dung salpu ibana, soluk ma si Elon, marga Zebulon manguhum Israel sampulu taon lelengna.

¹²Dung i mate ma si Elon, marga Zebulon i, jala tartanom di Aialon, di tano Zebulon.

¹³Dung salpu ibana, soluk ma si Abdon, anak ni si Hilel, sian Piraton manguhum Israel.

¹⁴Opatpulu do anakna, jala tolupulu pahompuna baoa, angka na mangkunduli pitupulu halode, jala ibana manguhum Israel ualu taon lelengna.

¹⁵Dung i mate ma si Abdon, anak ni si Hilel sian Piraton, jala tartanom ibana di Piraton di tano Epraim, di dolok ni halak Amalek.

13¹(I.) Dung i diulahi halak Israel ma mambahen sogo ni roha ni Jahowa, gabe dipasahat Jahowa nasida tu tangan ni halak Palistim opatpulu taon lelengna.

²Jadi adong ma sada baoa sian Zora, sian marga Dan, na margoar si Manoa, jala hol do ianggojolmana, ndang tubuan anak.

³Dung i diida boruboru i ma suruan ni Jahowa, na mandok tu nasida: Ida ma, na hol

do ho anggo nuaeng, jala ndang tubuan anak;
alai gabegabean ma ho, jala tumubuhon anak
sada.

⁴On pe, ramoti ma dirim, ndang jadi
inumonmu anggur, manang siinumon na
koras, jala ndang jadi panganonmu manang
aha na ramun.

⁵Ai ida ma, gabegabean ma ho, jala
tumubuhon anak sada, jala raut parnabung,
ndang jadi dais tu uluna, ai gabe halak
na pinapulik di Debata do dakdanak i sian
bortian, jala ibana manungka paluahon Israel
sian tangan ni halak Palistim.

⁶Dung i ro ma boruboru i mangalualuhon
hata i tu sinondukna, ninna do: Ro do tu ahu
sada halak ni Debata, jala rupana songon
rupa ni suruan ni Debata, na songkal situtu,
gabe ndang husungkun manang sian dia
ibana, goarna pe. Nandang dipaboa tu ahu.

⁷Alai ninna do mandok ahu: Ida ma,
gabegabean ma ho, jala tumubuhon anak
sada, on pe ndang jadi inumonmu anggur,
manang siinumon na koras, jala ndang jadi
panganonmu manang aha na ramun, ai gabe
halak na pinapulik di Debata do dakdanak i
sian bortian sahat ro di hamamatenana.

⁸(II.) Dung i martangiang ma si Manoa tu
Jahowa, ninna ma: Santabi, ale Tuhanku,
sai ro ma nian sahalinari halak ni Debata,
naung sinurum manopot hami, asa diajarhon

tu hami manang aha sibahenonnami tu dakdanak situbuhononhon i.

⁹Jadi ditangihon Debata ma suara ni si Manoa, gabe ro ma muse suruan ni Debata tu boruboru i, tongon juguk nasida di ladang, alai ndang di lambungna ianggo si Manoa.

¹⁰Jadi manilu ma boruboru i marlojong paboahon tu sinondukna i, didok ma tu ibana: Ida ma, nunga huida muse baoa na ro tu ahu na imbaru on.

¹¹Dung i hehe ma si Manoa, jala diihuthonjolmana, gabe sahat ibana tu baoa i, jala didok tu ibana: Atehe ho do tutu baoa na mangkatai dohot boruboru on? Ahu ma tutu, ninna.

¹²Dung i ninna si Manoa ma: Molo songgop hata na nidokmi, dia do uhum siingoton ni dakdanak i dohot bahenbahenanna?

¹³Jadi ninna suruan ni Jahowa ma tu si Manoa: Luhut naung hupaboa tu parompuan i, ingkon oromonna do.

¹⁴Ndang jadi panganonna sian saluhut na ruar sian hau anggur, anggur dohot siinumon na koras ndang jadi inumonna, jala ndang jadi panganonna manang aha na ramun, luhut naung hutonahon i tahe, ingkon parateatehononna do.

¹⁵Dung i ninna si Manoa ma tu suruan ni Jahowa: Sai olo ma ho tiopannami, asa huhobas hami di jolomi anak ni hambing sada.

¹⁶Jadi ninna suruan ni Jahowa ma tu si Manoa: Nang pe ditiopi ho ahu, ndang tagamon mangan ahu sian rotimu; alai molo naeng bahenonmu pelean situtungon sada, tu Jahowa ma pelehon, ai ndang diboto si Manoa, tung suruan ni Jahowa ibana.

¹⁷Dung i ninna si Manoa ma tu suruan ni Jahowa: Ise do goarmu? Asa hupasangap hami ho, ia dung songgop hatami.

¹⁸Alai ninna suruan ni Jahowa ma tu ibana: Boasa tung sungkunonmu goarhu, halongangan do i.

¹⁹(III.) Dung i dibuat si Manoa ma sada anak ni hambing rap dohot pelean sipanganon, jala dipelehon do i tu Jahowa di atas ni dolok batu, dibahen suruani halongangan sada, dipaidaida si Manoa dohot jolmana.

²⁰Ai di na manaek nala ni api i sian langgatan i tu ginjang: Manaek ma dohot suruan ni Jahowa di bagasan nala ni api i na sian langgatan i, dipaidaida si Manoa dohot jolmana, gabe manungkap nasida na dua tu tano.

²¹Jadi dung so mullop be suruan ni Jahowa dapot idaon ni si Manoa dohot jolmana i, ipe asa mamoto si Manoa, suruan ni Jahowa do Ibana hape.

²²Dung i ninna si Manoa ma tu jolmana: Ingkon mate nama hita, ala naung itaida Debata.

²³Alai ninna jolmana i ma mangalusi ibana:
Aut na lomo roha ni Jahowa mambunu hita,
ndang tagamon jaloonna sian tanganta
pelean situtungon dohot pelean sipanganon,
jala ndang pataridahononna luhutna i tu hita,
jala ndang patubegehononna tu hita songon i
nuaeng.

²⁴Dung i ditubuhon boruboru i ma anak
sada, jala dibahen goarna si Simson.
Dung i lam magodang ma dakdanak i, jala
dipasupasu Jahowa ibana.

²⁵Dung i dipungka Tondi ni Jahowa ma
mangonjaronjar ibana di parsaroan Dan, di
holangholang ni Zora dohot Estaol.

14¹(I.) Dung i tuat ma si Simson tu
Timna, gabe diida sada boruboru di
Timna, sian boru ni halak Palistim.

²Jadi nangkok ibana muse, asa dipaboa tu
amana dohot tu inana, ninna do: Adong do
huida sada boruboru di Timna sian boru ni
halak Palistim; on pe sai buat hamu ma ibana
bahen jolmangku.

³Alai ninna amana dohot inana ma tu ibana:
Nandang adong huroha di tongatonga ni boru ni
hahaanggim manang di tongatonga ni sandok
houmta bahen jolmam, umbahen tung laho
ho mambuat boru sian halak Palistim, angka
na marhulup? Jadi ninna si Simson ma tu
amana: Ingkon ibana buatonmu di ahu, ai
ibana do hasoloan ni rohangku.

⁴Alai ndang diboto anggo natorasna, tung sian Jahowa do i, ai mangalului parbonsiran do ibana dompak halak Palistim, ai tongon gumomgom Israel do halak Palistim uju i.

⁵(II.) Dung i tuat ma si Simson rap dohot natorasna tu Timna. Jadi dung sahat nasida ro di angka porlak anggur ni Timna, ida ma, ro ma anak ni singa sada patungoromon manjumpangkon ibana.

⁶Jadi songgop ma tu si Simson Tondi ni Jahowa, gabe diparsisiga ma singa i, songon anak ni haming, so agia aha di tanganna, jala ndang dipaboa tu natorasna, na binahenna i.

⁷Jadi dung tuat, mangkatai ma ibana dohot parompuan i, jala apala hasoloan ni rohana do ibana.

⁸Jadi dung salpu manang piga ari, mulak muse ibana laho mangalap parompuan i, gabe manimbil ibana, laho maningkir bangke ni singa i, hape ida ma, angka loba sapunguan di bagasan rangrang ni singa i, nunga pola marsituak.

⁹Jadi dibuat sian i tu tanganna, laos dipangan huhut mardalan laho tu natorasna, jala dilehon tu nasida gabe dipangan nasida, alai ndang dipaboa anggo tu nasida, tung sian rangrang ni singa i binuatna situak ni loba i.

¹⁰(III.) Jadi dung tuat amana i manopot parompuan i, jala dibahen si Simson disi

sipanganon hasampuron, ai somal do songon i dibahen angka dolidoli i.

¹¹ Jadi dung diida nasida ibana, dibuat nasida ma tolupulu halak, bahen pandonganina.

¹² Dung i ninna si Simson ma tu nasida: Marhulingkulingan ma ahu tu hamu, molo tarpaboa hamu i di ahu di bagasan na pitu ari hasampuran on, jala dapot hamu lapatanna, lehononku ma tu hamu tolupulu kameja parbagasan dohot tolupulu salin abit.

¹³ Alai molo so tarpaboa hamu lapatanna tu ahu, ingkon hamu mangalehon tu ahu tolupulu kameja parbagasan dohot tolupulu salin abit. Jadi ninna nasida ma tu ibana: Antong paboa ma hulingkulinganmi, asa hubege hami!

¹⁴ Dung i ninna ibana ma tu nasida: Ruar do sipanganon sian sipangan mago, jala ruar do na tonggi sian na gogo. Hape ndang tarpaboa nasida lapatan ni hulingkulingan i di bagasan na tolu ari.

¹⁵ Tole muse papituarihon, ninna nasida ma tu jolma ni si Simson: Hata i ma sinondukmi, asa dipaboa tu hami lapatan ni umpama i, asa unang hututung hami ho, nang bagas ni amam dohot api. Nda tung naeng buatonmu artanami, umbahen dipio hamu hami ulaning?

¹⁶ Jadi sai tumatangis ma jolma ni si Simson di jolona, ninna ma: Rupa magigi do ho mida ahu, ndang dihaholongi roham ahu. Ai marhulingkulingan ho tu donganku sabangso,

hape ndang dipaboa ho anggo tu ahu. Jadi ro ma alusna: Gari tu damang dohot tu dainang, ndang hupaboa, lam tu ho ma paboaonku?

¹⁷Jadi sai tumatangis ibana di jolona di na pitu ari i, saleleng hasampuron rajai; tole papituarihon, dipaboa ma tu ibana, ai sai disulingkit do ibana, gabe dipaboa parompuan i ma lapatan ni umpama i tu donganna sabangso.

¹⁸Dung i papituarihon, tagan so mate dope mata ni ari, ninna angka baoa ni huta i ma tu ibana: Tung aha ma na tumonggi sian situak ni loba, tung aha ma na gumogo sian singa? Alai ninna si Simson ma tu nasida: Aut unang maninggala hamu dohot anak ni lombungku, tung na so tagamon dapot hamu lapatan ni hulingkulinganki.

¹⁹Dung i songgop ma tu ibana Tondi ni Jahowa, gabe tuat ibana tu Askelon, dibunu ma sian nasida tolupulu halak, jala dibuat pangkeannasida, jala dilehon pangkean i tu angka na jumpangan lapatan ni hulingkulinganna i; alai marsigorgor ma anggo rimasna, gabe nangkok ibana tu jabu ni amana.

²⁰Alai anggojolma ni si Simson i tu sada halak pandonganina, na mandongani ibana dilehon.

15¹(I.) Alai di laonlaon ni ari, di hamamasa ni gotilon, ditopot si Simson ma musejolmana, mamboan anak

ni hambing sada, jala didok do: Naeng ahu manopot jolmangku tu bilut, hape ndang diloas ama ni parompuan i ibana bongot.

²Ai ninna amana do: Na hurimpu do naung magigi ho mida ibana, jadi nunga hupamuli ibana tu pedanmu; alai nda ummuli do anggina i sian ibana, ua i ma di ho singkatna.

³Dung i ninna si Simson ma tu nasida: Lidang do ahu anggo sahalion moradophon halak Palistim, molo hubahen hamagoan tu nasida.

⁴Dung i laho ma si Simson manangkup tolu ratus antuasus, jala dibuat angka tulbu, dipadomu ma ihur tu ihur, jala dibahen tulbu sada tu holangholang ni na dua antuasus i.

⁵Dung i dinahiti ma angka tulbu i, jala dipalua angka antuasus i tu eme ni halak Palistim na jongjong, gabe gor angka tibalangan ro di eme na jongjong dohot hau anggur, nang hau Jetun.

⁶Jadi ninna halak Palistim ma: Ise do ulaning mambahensa? Dung i didok halak ma: Si Simson, hela ni halak Timna i do, ala na binuatna jolmana, jala dipalangkuphon tu pedanna. Jadi nangkok ma halak Palistim, laos dimosokkon nasida ma boruboru i rap dohot amana di bagasan api.

⁷Alai ninna si Simson ma tu nasida: Molo dibahen hamu songon i; ndang na pasohotonku, nda jolo hutubolhon tu hamu.

⁸Jadi diompongi ma marpongolan haehae dohot gontingnasida marhite sian hataluan bolon. Jadi tuat ma ibana, laos maringan di liang batu Etham.

⁹(II.) Dung i borhat ma halak Palistim, jala marserak nasida di Juda, jala marseak sahat ro di Lehi.

¹⁰Alai ninna halak Juda ma: Boasa tung nangkok hamu, naeng mamorangi hami? Jadi ninna nasida ma mangalusi: Naeng manali si Simson do hami, umbahen na nangkok hami, mambahen tu ibana songon naung binahenna i tu hami.

¹¹Jadi tuat ma tolu ribu halak sian Juda tu liang batu Etham, angka didok nasida ma tu si Simson: Ndang diboto ho na ginomgoman ni halak Palistim do hita? Boasa tung songon i bahenonmu tu hami? Gabe didok si Simson ma tu nasida: Suang songon na binahennasida tu ahu, hubahen tu nasida.

¹²Dung i ninna nasida ma tu ibana: Naeng manali ho do umbahen na tuat hami, laho pasahathon ho tu tangan ni halak Palistim. Jadi ninna si Simson ma mangalusi nasida: Mangmangkon hamu ma tu ahu, paboa na so tupa todosonmuna ahu.

¹³Dung i ninna nasida ma tu ibana songon on: Ndangana, asal naeng talionnami do ho, jala pasahathon tu tangannasida, ndang anggo bunuonnamami ho. Jadi dibuat nasida ma

dua jorat na imbaru manali ibana, manogihon ibana nangkok sian liang batu i.

¹⁴Sahat ibana ro di Lehi, marsuraksurak ma halak Palistim mandapothon ibana, gabe songgop ma Tondi ni Jahowa tu ibana; ia jorat angka na di pargolanganna i, songon bonang na tinutung di bagasan api, metep boti angka tali i sian tanganna.

¹⁵Dung i jumpang ibana ma sada osangosang ni halode na rata, laos dipatoltol tanganna manjomputsa, jala dipangalotakkon mambunu saribu halak.

¹⁶Dung i ninna si Simson ma: Marhitehite osangosang ni halode dua parduan parangan, marhitehite osangosang ni halode saribu halak hubunu.

¹⁷Jadi dung tolhas didok songon i, direongkon ma osangosang i sian tanganna, jala digoar hajongjonganna i: Ramat-Lehi.

¹⁸Dung i mauas situtu ma ibana, gabe dijou ma Jahowa, ninna ma: Nunga dilehon Ho tua na sai godang marhitehite tangan ni naposomon, tung mate ma ahu nuaeng bahenon ni uas, jala madabu tubagasan tangan ni halak na marhulup.

¹⁹Jadi dibola Debata ma dolok batu na di Lehi, gabe ruar sian i aek, jala dung diinum si Simson sumuang ma tondina i, jala mangolu. Ala ni do didok halak goarna: Pansur ni panjou na di Lehi rasirasa sadarion.

²⁰Dung i diparenta si Simson halak Israel uju di angka ari ni halak Palistim duapulu taon lelengna.

16¹(I.) Dung i laho ma si Simson tu Gaza, gabe diida disi sada boruboru sibabijalang, laos ditopot do.

²Dung tarbortik barita i tu isi ni Gaza naung masuk si Simson tu huta i, gabe dihaliangi jala dionggop nasida ibana di lambung bahal ni huta i manipat sabornginna i; alai sip do nasida manipat sabornginna i, ninna ma: Manogot marhira torang ari ma itabunu ibana.

³Alai modom do anggo si Simson ro di tonga borngin; tole tonga borngin i hehe ma ibana, ditangkup ma na dua pintu pargumbangan ni huta i, ro di tiangna na dua i, laos diumpat do ro di sordakna, jala diampehon tu abarana, jala diusung tu punsu ni dolok na di jolo ni Hebron.

⁴(II.) Dung i di laonlaon ni ari solo ma rohana mida sada boruboru marjonokkon sunge Sorek, si Delila do goarna.

⁵Dung i nangkok ma angka induk ni halak Palistim manopot parompuan i, angka ninna ma tu ibana: Sai hata i ma ibana, jala sulingkit manang dia parhitean ni hagogoonna na godang i, jala marhitehite aha tarpatunduk hita ibana, asa dapot hita ibana talionta laho paporsukporsukkon; ganup pe hami mangalehon tu ho saribusaratus rupia.

⁶Jadi ninna si Delila ma tu si Simson: Ua paboa tu ahu manang dia parhitean ni gogom na godang i, jala manang beha panalina di ho laho paporsukporsukkon ho?

⁷Dung i ninna si Simson ma tu ibana: Tung sura ditali ho ahu dohot pitu jorat angka na imbaru, angka na so pate hiang dope, tunduk ma ahu, gabe songonjolma sileban.

⁸Jadi diboan angka induk ni halak Palistim ma tu ibana pitu jorat angka na imbaru angka na so pate hiang dope, laos ditali parompuan i ibana marhite sian i.

⁹Alai juguk do di lambungna di bagasan bilut i angka pangonggop; dung i didok parompuan i ma tu ibana: Halak Palistim naeng mangarampok ho, ale Simson! Gabe dirapui ibana angka jorat i, songon tali bonang sada na metep binahen ni api; gabe ndang dapot diboto parhitean ni gogona.

¹⁰Dung i ninna si Delila ma tu si Simson: Ida ma, na dipaotooto ho do ahu, jala gabus do na pinaboam tu ahu; on pe sai paboa ma di ahu, manang marhitehite aha ho dapot talion.

¹¹Dung i ninna si Simson ma tu ibana: Tung sura ditali nasida ahu mansai momos dohot jorat na imbaru, angka na so dung dope pinangke tu ulaon, tunduk ma ahu, gabe songonjolma sileban.

¹²Dung i dibuat si Delila ma jorat angka na imbaru, laos ditali ibana marhite sian i, jala didok tu ibana: Halak Palistim

naeng mangarampok ho, ale Simson! Alai juguk di bagasan bilut i hian anggo angka pangonggop; jadi dirapui si Simson angka jorat i sian tanganna, songon tali bonang.

¹³Dung i ninna si Delila ma tu si Simson: Rasirasa nuaeng sai dipaotooto ho do ahu, jala gabus do na pinaboam tu ahu; sai paboa ma tu ahu manang marhitehite aha ho dapot talion. Jadi ninna si Simson ma tu ibana: Tung sura didandani ho na pitu jengjeng buhit ni obuk ni ulungku rap dohot tali papaut.

¹⁴Laos dilabangkon muse dope tu dorpi, dung i ninna ma tu ibana: Halak Palistim naeng mangarampok ho, ale Simson! Jadi tarsunggul ma ibana sian na modom i, gabe dienet ma na pitu jengjeng buhitna nidandanan i rap dohot labang dohot tali papaut.

¹⁵Dung i ninna parompuan i ma tu ibana: Beha ma tardok ho holong rohangku di ho, hape ndang tu ahu rohami? Patoluhali on ma dipaotooto ho ahu, jala ndang dipaboa ho tu ahu manang dia parhitean ni gogom na godang i.

¹⁶Alai dung sai disulingkit parompuan i ibana ariari jala disosaksosak, gabe marpandelea ma rohana mangido mate.

¹⁷Dung i dipaboa ma tu ibana sandok sibunian ni rohana, ninna ma: Nandang dung hona raut parnabung ulungku, ai halak na pinapulik di Debata do ahu sian bortian ni

dainang dope; tung sura tarnabung ulungku, sumurut ma gogongku sian ahu, jala tunduk ahu, gabe songonjolma sileban.

¹⁸Jadi dung diida si Delila, naung sandok sibunian ni rohana pinapatarna tu ibana, gabe disuru ma manjou angka induk ni halak Palistim mandok tu nasida: Sai nangkok dope hamu sahalion, ai nunga tung sandok sibunian ni rohana dipaboa tu ahu. Jadi nangkok ma manguhahi angka induk ni halak Palistim mandapothon parompuan i, laos diboan hepeng i di bagasan tangannasida.

¹⁹Jadi dung nok mata ni si Simson di ampuan ni si Delila, dijou ma sada baoa, asa dinabung na pitu jengjeng buhit ni uluna, dung i dipungka ma patunduk ibana, hape nunga sumurut gogona sian ibana.

²⁰Dung i ninna si Delila ma: Halak Palistim naeng mangarompok ho, ale Simson! Jadi tarsunggul ma ibana na modom i, jala ninna rohana: Ruar ma ahu songon na somal na sai laon, mangarunta ma ahu, hape ndang diboto naung sumurut Jahowa sian ibana.

²¹Dung i ditangkup halak Palistim ma ibana, jala dipulsikkon matana, jala dipatuat ibana tu Gaza, laos dirante ibana dohot dua rante tombaga, jala ingkon manduda ibana di bagasan bagas hurungan i.

²²(III.) Dung i di laonlaon ni ari mamungka martumbur manguhahi obuk ni uluna, suang songon na jolo tagan so tarnabung.

²³Dung i marluhut ma angka induk ni halak Palistim, naeng mamelehon sada pelean na bolon tu Dagon, debatanasida i, jala marhariburon, gabe didok nasida ma: Nunga dipasahat debatanta si Simson musunta i, tu bagasan tanganta.

²⁴Jadi dung diida situasi na torop i ibana, dipapujipuji nasida ma debatanasida i, ai angka ninna do: Nunga dipasahat debatanta tu bagasan tanganta musunta i, ai mangago tanonta i, jala torop hita on binununa.

²⁵Jadi andorang marlas ni roha nasida, angka ninna ma: Itajou ma si Simson, asa riburan hita dibahen; jadi didokkon nasida ma mangalapi si Simson sian bagas hurungan i, gabe manontori ibana di jolonasida, dipajongjong nasida ma ibana di holangholang ni angka tiang partunggul.

²⁶Dung i didok si Simson ma tu dakdanak, na manogunogu tanganna: Loas ahu asa hujama angka tiang partunggul, ojanan ni bagas i, asa mangunsande ahu tusi.

²⁷Alai gok baoa dohot parompuan bagas i, disi do nang sude induk ni halak Palistim, gari di atas emper i adong do arga tolu ribu halak baoa dohot parompuan, angka na manonduri si Simson manontori.

²⁸Dung i joujou ma si Simson tu Jahowa, ninna ma: Ale Tuhan Jahowa! Sai ingot ma ahu, jala pargogo i ahu nanggo sahalion

dope, ale Debata, asa hutubolhon sahalinari matangku na dua i tu halak Palistim.

²⁹Dung i dihaol si Simson ma tiang partunggul na dua i di tongatonga, ojanan ni bagas i, laos diaithon, sada di siamunna, jala sada di sihambirangna.

³⁰Dung i didok si Simson ma: Mate ma hosangku rap dohot halak Palistim! Laos digogo ma mangonjar, gabe runggang ma bagas i, manipa angka induk i ro di luhut halak angka na di bagasan; gabe tumorop angka na mate binununa di hamamatenana i sian angka na binununa tagan di ngoluna.

³¹Dung i tuat ma angka hahaanggina ro di sandok pinompar ni amana, dihindat nasida ma ibana, laos diboan ibana nangkok, asa tanomonna ibana di holangholang ni Zora dohot Estaol, di parbandaan ni si Manoa, amana i. Alai duapulu taon do lelengna ibana manguhum Israel.

17 ¹(I.) Dung i adong ma sada baoa sian dolok Ephraim, na margoar si Mika.

²Ro ma hatana mandok tu inana: Ia na saribusaratus rupia, naung mago sian ho, pola naung mamburai ho dohot tu pinggolhon hata i didok ho, ida ma, di ahu do hepeng i, ai ahu do mambuatsa. Jadi didok inana ma: Sai dipasupasu Jahowa ma ho, ale anaha!

³Dung i dipaulak ma rupia sisaribu saratus i tu inana, alai ninna inana i ma: Nunga husombasombahon hian hepeng i tu Jahowa

marhite sian tanganku di anakku, asa dipauli sian i sada ganaganaan na niuhir dohot na tinuang, on pe mulak ma i tu ho hulehon.

⁴Alai dipaulak ibana muse hepeng i tu inana, gabe dibuat inana i dua ratus rupia, jala dilehon tu panopa, na mambahen sian i sada ganaganaan na niuhir dohot na tinuang; laos di jabu ni si Mika do i musengani.

⁵I ma dalanna umbahen adong sada joro ni debata hapunjungan ni si Mika, dung i dibahen ma sada baju epod dohot terapim, laos diurasi sada sian angka anakna pabangkithon gabe malimna.

⁶Di angka ari uju i ndang adong raja gumomgom Israel, ganup masibahen lomo ni rohana be.

⁷(II.) Alai adong ma sada dolidoli sian Betlehem Juda, na hinomit di marga Juda, jala halak Lepi do ibana, jala manompang ibana disi.

⁸Naung jalang do baoa i sian huta Betlehem Juda, asa manompang manang didia ibana sangkot; jadi dung ro ibana tu dolok Epraim sahat tu bagas ni si Mika, naeng manulus dalanna nian.

⁹Jadi ro ma hata ni si Mika tu ibana: Sian dia ho ro? Gabe didok ibana ma mangalusi: halak Lepi do ahu sian Betlehem Juda, jala na mardalani do ahu naeng manompang manang didia ahu sangkot.

¹⁰Dung i ninna si Mika ma tu ibana: Tading di lambungkun ma ho! Asa gabe ama dohot malim di ahu; lehononku ma tu ho sampulu rupia sataon, jala singkop pangkean dohot bohalmu, gabe dioloi halak Lepi i ma rap dohot ibana.

¹¹Jadi lomo ma roha ni halak Lepi i maringan di lambung ni baqa i, jala doshon sada sian angka anakna sandiri dolidoli i dibahen.

¹²Dung i dipabangkit si Mika ma halak Lepi i, bahen malimna dolidoli i, laos maringan ibana di jabu ni si Mika.

¹³Dung i didok si Mika ma: Nuaeng pe tangkas huboto, sai tumpahan ni Jahowa do ahu, ala naung halak Lepi gabe malim di ahu.

18¹(I.) Di angka ari uju i ndang adong raja di Israel; laos di angka ari uju i mangalului partalian marga Dan bahen ingananna, ai rasirasa sadarina i ndang maruli partalian nasida di tongatonga ni angka marga ni Israel.

²Dung i dipaborhat halak Dan ma lima halak angka na begu marsuhusuhu sian Zora dohot Estaol laho mangkahapi tano i diordioranna, angka ditonahon ma nasida: Laho ma hamu mandiordiori tano i: Jadi tolhas ma nasida tu dolok Epraim, tu bagas ni si Mika, laos marborngin disi.

³Mardonokkon bagas ni si Mika, ditanda nasida ma suara ni halak Lepi na bajar i, laos tuli nasida sian i angka ninna ma mandok

ibana: Ise do na mamboan ho tuson? Aha do na binahenmu dison? Jala marhua ho dison?

⁴Dung i didok ibana ma mangalusi nasida: Songon on songon on do na binahen ni si Mika tu ahu, pola marupa ahu dibahen, asa gabe malim di ibana.

⁵Dung i ninna nasida ma tu ibana: Ua sungkunhon ma tu Debata, asa tung huboto hami manang na manjadi dalannami, na hudalani hami nuaeng?

⁶Jadi didok malim i ma tu nasida: Laho ma hamu mardamedame! Di jolo ni Jahowa do dalan na nidalananmuna i.

⁷Dung i laho ma na lima halak i, gabe tolhas nasida tu Lais, jala diida marsonangsonang situtu do isi ni huta i, mangihuthon uhum ni halak Sidon, hohom jala nalom, jala ndang marjujungan tano i na mangarupa nasida, jala holang do nasida sian halak Sidon i, jala ndang adong parsorannasida tu jolma na asing.

⁸Jadi dung mulak na lima halak i tu hahaangginasida i tu Zora dohot Estaol, ninna angka hahaangginasida i ma tu nasida: Barita dia diboan hamu?

⁹Jadi ninna nasida ma: Borhat ma hita laho mandopang nasida! Ai nunga huida hami tano i, jala ida ma, na uli situtu do i, hape sai hohom do anggo hamu; unang bangkol hamu borhat laho manoluk tano i bahen partalianmu.

¹⁰Molo dung sahat hamu tusi, dapotonmuna ma disi sada bangso na marsonangsonang boti, lambas dohot tano i; ai nunga dipasahat Debata tano i tu tanganmuna; i ma sada inganan na so hurangan di agia aha na masa di tano on.

¹¹(II.) Jadi hehe ma sian i, sian Zora dohot sian Estaol, onom ratus halak marga Dan, angka na marsinjata be laho porang.

¹²Dung i nangkok ma nasida, jala marsaro di Kiriati Jearim di Juda; ala ni do umbahen targoar inganan i parsaroan Dan rasirasa sadarion, i ma tungkan hasundutan sian Kiriati Jearim.

¹³Dung i mardalan nasida sian i sahat tu dolok Epraim, boti tu bagas ni si Mika.

¹⁴Dung i marboaboa ma na lima halak, angka na borhat mangkahapi tano Lais i, ninna nasida ma tu angka hahaangginasida i: Atehe, diboto hamu do adong di angka bagasan sada baju epod dohot terapim dohot sada ganaganaan na niuhir jala na tinuang? On pe timbang hamu ma manang aha sibahenonmuna.

¹⁵Jadi tuli ma nasida tusi, gabe tolhas nasida tu bagas ni halak Lepi na bajar i, tu bagas ni si Mika, jala dipauso manang na sonang ibana.

¹⁶Ia na onom ratus halak sian pinompar ni si Dan, angka na marsinjata be laho marporang, jongjong do di lambung bahal.

¹⁷ Alai anggo na lima halak, angka na borhat mangkahapi tano i, bongot tu bagasan, dipambuat ma ganaganaan na niuhir dohot baju epod dohot terapim dohot ganaganaan na tinuang; jongjong do ianggo malim i di lambung bahal rap dohot na onom ratus halak, angka na marsinjata be laho marporang.

¹⁸ Jadi dung bongot nasida tu jabu ni si Mika, jala dung dipambuat ganaganaan na niuhir, baju epod dohot terapim. Ro di ganaganaan na tinuang, ninna malim i ma tu nasida: Aha do na binahenmuna i?

¹⁹ Jadi ninna nasida ma tu ibana: Sip ho! Bahen tanganmu tu pamanganmu, jala dongani hami mardalan, gabe ama dohot malim ma ho di hami, tung tagonan ma ho malim holan di jabu ni sada halak, manang malim ho di sada marga ni Israel?

²⁰ Jadi las ma roha ni malim i, gabe dibuat ma baju epod dohot terapim dohot ganaganaan na niuhir, laos diboan tu tongatonga ni halak na torop i.

²¹ Dung i mamedu ma nasida laos mardalan; alai tu jolonasida do dibahen angka dakdanak, dohot pinahan ro di artanasida angka na ummarga.

²² Jadi dung holang nasida sian bagas ni si Mika, marluhut ma baoa angka na di jabu hombarhon bagas ni si Mika, laos dieahi halak Dan i.

²³Dung i dijoui nasida ma halak Dan i, laos humusor halak Dan i, angka didok ma tu si Mika: Aha di ho umbahen sai oruk ho?

²⁴Dung i ninna ibana ma: Nunga dibuat hamu debatanku, angka na hupauli i rap dohot malim i, gabe laho hamu; ba aha be di ahu? Lam didok hamu dope tu ahu: Aha di ho?

²⁵Alai ninna halak Dan ma tu ibana: Unang be tarbege suaram di hami, atik beha ditorpai halak parateate na garang hamu maon, gabe putus bahenonna hosam dohot hosa ni isi ni bagasmu.

²⁶Dung i ditulus halak Dan ma dalannasida i. Jadi dung diida si Mika tumang nasida sian ibana, humusor ma ibana, laos mulak tu jabuna.

²⁷(III.) Dung i dibuat nasida ma na pinauli ni si Mika dohot malim na di lambungna i, dirampok nasida ma Lais, sada bangso na hohom, jala na nalom. Laos ditampuli nasida dohot podang, jala disurbu huta i dohot api.

²⁸Ndang adong manang ise na paluahon nasida, ai holang do huta i sian Sidon, jala ndang adong parsaurannasida tu halak na asing, tole di rura do huta i mardonokkon Betrehob. Dung i dipauli nasida muse huta i, laos maringanan disi.

²⁹Jala dibahen goar ni huta i Dan, mangihuthon goar ni si Dan ompunasida i na

tinubuhon ni si Israel; Lais do goar ni huta i ianggo di na robu.

³⁰Dung i dipatindang halak Dan ma ganaganaan na niuhir i di nasida, jala si Jonatan, anak ni si Gerson, tubu ni si Musa, ibana gabe malim di marga Dan ro di pinomporna rasirasa di ari habubuang ni isi ni luat i.

³¹Jadi dipatindang nasida di tongatonganasida ganaganaan na binahen ni si Mika, saleleng undungundung ni Debata di Silo.

19¹(I.) Dung i di angka ari i, uju na so adong raja di Israel, adong ma sada halak Lepi mardagangdagang di bona ni dolok Epraim, gabe dibuat ma sada parompuan sibabijalang sian Betlehem Juda, bahen imbang ni jolmana.

²Dung i marlangka pilit ma parompuan i, laos laho sian lambungna mulak tu jabu ni amana, tu Betlehem Juda, laos disi nasida arga opat bulan lelengna.

³Dung i borhat ma sinondukna i mangihuthon nasida, mangapoi rohana boanonna mulak, holan naposona dohot halode sapasang donganna; dung i ditogihon parompuan i ibana tu bagasan jabu ni amana; jadi dung diida ama ni parompuan i ibana, las ma rohana manjangkon ibana.

⁴Dung i ditiopi simatuana doli, ama ni parompuan naposo i ma ibana, gabe tinggal

ibana di lambungna tolu ari lelengna, rap mangan minum dohot marborngin nasida disi.

⁵Tole paopatarihon, dipasogot nasida ma manogotna i hehe, borhat naeng mardalan nian, gabe didok ama ni parompuan i ma tu helana i: Patogar ma jolo roham dohot roti sanseat, dung ipe asa mardalan hamu.

⁶Dung i hundul ma nasida jala rap mangan minum nasida duansa. Dung i ninna ama ni parompuan i ma tu baoa i, ua oloi ma laos marborngin, jala palas ma roham.

⁷Alai hehe ma baoa i naeng mardalan nian, gabe diapoi simatuana doli ma ibana, jadi mulak ibana laos marborngin muse disi.

⁸Tole muse palimaarihon, dipasogot ma manogotna i naeng mardalan, gabe didok ama ni parompuan i muse: Ua pasonang jolo roham! Gabe togang nasida maradu manihir ari, jala mangan nasida duansa.

⁹Dung i hehe ma baoa i naeng mardalan, ibana dohot jolmana dohot naposona; alai ninna simatuana doli, ama ni parompuan i ma tu ibana: Ida ma, nunga pola manihir ari, na bot ne ma ari, marborngin ma ho dison, jala pasonang roham, pasogot hamu pe manogot hehe manulus dalamuna, asa laho ho tu undungundungmu.

¹⁰Alai ndang olo baoa i marborngin, lam borhat do ibana mardalan, gabe sahat ibana ro di tondong ni Jebus, i ma Jerusalem, udur

ibana dohot halode sapasang, na marpalano, jolmana pe di lambungna do.

¹¹ (II.) Jadi dung mardonokkon Jebus nasida, sundut ne ma mata ni ari, gabe didok naposo i ma tu tuanna: Ua tuli ma hita sian huta ni halak Jebusi on, laos marborngin disi.

¹² Dung i ninna tuanna i ma tu ibana: Ndang ture hita tuli sian huta na pulik, na so halak Israel nampunasa, talaluhon ma tagonan sahat tu Gibeaa.

¹³ Dung i ninna muse tu naposona i: Padoras ma langkam mandapothon sada huta, asa marborngin hita di Gibeaa manang di Rama.

¹⁴ Jadi didatdati nasida ma mardalan, gabe mate mata ni ari marjonokkon Gibeaa, na masuk tu Benjamin.

¹⁵ Dung i mamedu ma nasida laho tusi, naeng marborngin di Gibeaa. Alai dung masuk tu huta i, gabe hundulhundul ibana di alaman ni huta i, ai ndang adong manang ise na olo manjangkon nasida tu jabuna marborngin.

¹⁶ Jadi ida ma, ro sada halak na tuatua sian ulaonna di ladang botarina i, laos sian dolok Epraim do ibana, jala maisolat di Gibeaa; alai halak Benjamin do anggo isi ni huta i.

¹⁷ Dung i manaili ma ibana, gabe diida ma halak pardalan i di alaman ni huta i, laos ninna halak na tuatua i ma: Naeng laho tudia do ho? Jala sian dia do ho ro?

¹⁸ Dung i ninna ma mangalusi ibana: Halak pardalandalan do hami sian Betlehem

Juda, na di bona ni dolok Epraim, bona ni pinasangki; dung i mardalani ahu sahat tu Betlehem Juda, na mardalani di bagas ni Jahowa ahu nian, hape ndang adong manang ise na manjangkon ahu tu jabuna.

¹⁹Adong do nian durame dohot gagaton di halodenami, roti pe dohot anggur di ahu dohot di naposom boruboru dohot di dolidoli dongan ni naposomon, ndang hurangan hami di agia aha tahe.

²⁰Dung i ninna halak na tuatua i ma: Dame ma di ho! Manang aha na hurang di ho, ahu do na sari disi, asal unang di alaman on ho marborngin.

²¹Jadi ditogihon ma ibana tu jabuna, jala dilehon gagaton tu angka halode i, diburi, nasida huhut patnasida i, jala mangan minum do nasida.

²²(III.) Ipe sonang rohanasida, ida ma, ro ma halak isi ni huta i, angka na jahat situtu marroha, mangkaliangi bagas i, dipurpari nasida ma pintu i, angka didok ma tu baoa na tuatua i nampuna bagas i songon on: Togihon ma tu ruar baoa na sorang i tu jabum, asa hutanda hami ibana.

²³Jadi ruar ma mandapothon nasida baoa nampuna bagas i, jala ninna ma mandok nasida: Unang ale angka donganku! Unang bahen hamu na jat, ala dung masuk baoa on tu jabungku, unang bahen hamu haurahon sisongon i.

²⁴Ida ma, borungku na marbaju i dohot jolma ni baoa i, i ma hutogihon ruar, nasida ma gogoi hamu, tu nasida ma bahen hamu guru lomo ni rohamuna; alai anggo tu baoa i, unang bahen hamu haurahon sisongon i.

²⁵Alai ndang olo angka baoa i tumangihon hatana, jadi ditangkup baoa i ma jolmana, jala ditogihon ruar tu balian di nasida, gabe digogoi nasida boruboru i, jala diparmainani manipat sabornginna i, sahat ro di torang ari; dung pe buha siang ari asa dipalua.

²⁶Marhira torang ari pe ro parompuan i, laos tinggang do di lambung pintu ni bagas ni baoa i, sorangan ni harajaanna i, peak disi do paima torang ari.

²⁷Jadi manogotna i dung hehe harajaanna i, diungkap ma pintu ni bagas i, jala ruar naeng manulus dalanna i nian, hape ida ma, peak di lambung pintu ni bagas i do jolmana, jala ampe tanganna duansa di lobulobu.

²⁸Dung i ninna ibana ma tu parompuan i: Hehe ma ho, asa mardalan hita; hape ndang mangalusi be. Jadi diampehon ma nasida tu atas ni halode, gabe borhat ma baoa i, laos mardalan tumopot ingananna.

²⁹Jadi dung sahat ibana tu jabuna, dibuat ma sada raut, ditangkup ma jolmana i, laos disahei holiholina sampulu dua ponggol, jala dipantongoshon do i tu saluhut luat ni Israel.

³⁰Jadi nasa na marnidasa, ninna be do: Na so uhum on, ndang dung masa manang

dumatang songon i, olat ni ari haruruar ni halak Israel sian tano Misir rasirasa sadarion. Antong parateatehon hamu ma pambahenannaon, martutup ma hamu, dung i paboa hamu ma.

20¹ (I.) Dung i santibalatuk ma sandok Israel borhat, jala marluhut huria i hira sada halak olat ni Dan sahat ro di Beerseba dohot tano Gilead tu jolo ni Jahowa di Mispa.

² Jala angka induk ni sandok bangso Israel marmargamarga, tindang di tongatonga ni huria ni bangso ni Debata, opat ratus ribu halak bilanganna, mardalan pat angka sisintak podang.

³ Jadi dung dibege halak Benjamin barita ni hananangkok ni halak Israel tu Mispa, gabe didok halak Israel ma: Paboa hamu ma manang songon dia pangalaho ni jea on!

⁴ Jadi ro ma alus ni halak Lepi, sinonduk ni parompuan na binununa i, ninna ma: Sahat do ahu dohot jolmangki tu Gibeia di Benjamin, naeng marborngin nian disi.

⁵ Dung i hehe ma angka isi ni Gibeia dompak ahu, jala dihaliangi nasida bagas parbornginanki, ditahi rohanasida naeng bunuonna ahu, jala jolmangki parmainannasida nasida do pola mate.

⁶ Jadi hutangkup ma antong jolmangki, jala husahei, jala hupantongoshon tu saluhut luat partalian ni Israel, ai tung na so uhum dohot haotoon do na niulanasida di Israel.

⁷Ida ma, saluhut hamu halak Israel, martahi ma hamu mandok hata dohot tuptupan dison.

⁸Jadi hehe ma sandok bangso i, hira sada halak mandok: Sandok na so jadi laho manang ise tumopot undungundungna, manang muli tu jabuna.

⁹On pe, taringot tu uhum sibahenonta tu Gibeia, marruji ma hita.

¹⁰Itabuat ma sampulu halak sian na saratus sian sandok marga ni Israel, jala saratus sian na saribu, jala saribu sian na saloksa, angka na pasarisari bohal di halak situan na torop i, asa molo sahat nasida tu Gibeia-Benjamin, tubolhononna tusi hombar tu saluhut haotoon na binahenna di Israel.

¹¹Dung i santibalatuk ma sandok baoa ni Israel dompak huta i, marsatahi nasida hira sada halak.

¹²(II.) Dung i disuru angka marga ni Israel ma suruanna tu marga Benjamin marsuhusuhu, mandok songon on: Hajahaton dia do i na masa di tongatongamuna?

¹³Antong lehon hamu ma baoa, angka na jahat situtu marroha di Gibeia, asa hubunu hami nasida, laho umpurpurhon sapata ni jea sisongon i sian Israel. Hape ndang olo halak Benjamin tumangihon suara ni halak Israel hahanasida i.

¹⁴Lam marpungu tahe halak Benjamin sian angka huta i tu Gibeia, laho borhat marmusu dompak halak Israel.

¹⁵ Jadi tarbilang halak Benjamin sadarina i sian angka huta i: Duapulu onom ribu halak baoa, angka sisintak podang, so padohot isi ni Gibeia dibilang pituratus baoa angka na pinillit.

¹⁶ Sian saluhut halak na torop i, adong pitu ratus baoa na pinillit, angka panjaluk, saluhutna i pande mangambalangkon batu, mangkonahon obuk sada, jala ndang pilit.

¹⁷ (III.) Alai angka halak Israel, so padohot Benjamin opat ratus ribu baoa dibilang, angka sisintak podang, halak na somal marmusu do luhutna.

¹⁸ Dung i borhat ma halak Israel nangkok tu Betel, manungkun tu Debata, angka ninna nasida ma: Ise do sian hami manguluhon laho marmusu dompak halak Benjamin? Gabe didok Jahowa ma: Juda do parjolo.

¹⁹ Jadi manogotna i borhat ma halak Israel, jala marsaro tondong ni Gibeia.

²⁰ Rim ma halak Israel ruar laho marmusu dompak Benjamin, jala patutur be halak Israel jongjong marmusu dompak Gibeia.

²¹ Dung i ruar ma halak Benjamin sian Gibeia, gabe marragean sadarina i duapulu dua ribu halak Israel dibunu nasida.

²² Alai manggusar ma muse halak Israel, diulahi nasida patutur marmusu, laos di hajongjongannasida di ari parjolo i.

²³ Dung i nangkok ma halak Israel tumatangis di adopan ni Jahowa sahat ro di

bodari, huhut manungkunhon tu Jahowa, ninna do: Jadi dope ulahannami turtar marmusu dompak halak Benjamin, angginami i? Jadi ninna Jahowa ma: Nangkok ma hamu mandopang nasida!

²⁴Jadi marsogotna i didapothon halak Israel ma halak Benjamin.

²⁵Gabe ruar muse Benjamin sian Gibeal manjumpangkon nasida di ari paduahon i, marragean muse ma halak Israel sampulu ualuribu halak, angka sisintak podang sude dibunu nasida.

²⁶Dung i nangkok ma sude halak Israel ro di sandok bangso i laho tu Betel tumatangis be, laos hundulhundul disi di adopan ni Jahowa, huhut marpuasa sadarina i sahat ro di bot ari, jala mamelehon pelean situtungon dohot pelean hamauliateon di adopan ni Jahowa.

²⁷Dung i manungkun muse halak Israel tu Jahowa, ai disi do poti parpadanan ni Debata uju i.

²⁸Jala si Pinehas, anak ni si Eleasar, tubu ni si Aron jongjong uju i di adopanna, ninna nasida ma: Jadi dope ulahannami borhat marmusu dompak halak Benjamin, angginami i, manang pasohoton na ma? Jadi ninna Jahowa ma: Nangkok ma hamu, ai marsogot pasahatonku ma nasida tu tanganmu.

²⁹(IV.) Dung i dibahen halak Israel ma angka paronggongan humaliang Gibeal.

³⁰Jadi nangkok ma halak Israel patoluarihon dompak halak Benjamin, jala patutur nasida jongjong mandopang Gibeal, suang songon na dua hali i.

³¹Jadi ruar muse halak Benjamin manjumpangkon bangso i, dung sirang nasida sian huta i, dipungka nasida muse mambunu i deba sian halak Israel arga tolupulu halak, suang songon na dua hali i, di dalan sirpang laho nangkok tu Betel na sada, tu ladang ni Gibeal na sadanari.

³²Jadi ninna halak Benjamin ma: Nunga marragean nasida maralohon hita, songon na jolo i. Alai ninna halak Israel ma: Maporus ma hita, asa itasirang nasida sian huta i tu angka dalan na bolon.

³³Dung i hehe ma luhut baoa ni Israel sian hajongjonganna be, jala jongjong patutur di Baal-Tamar; hehe ma dohot halak Israel pangonggopi sian pangonggopanna, sian adaran Gibeal.

³⁴Jadi sahat ma tu Gibeal sampulu ribu halak, angka na pinillit sian sandok Israel, gabe sobu situtu tongtangan i. Alai ndang mamoto halak Benjamin mangonai tu nasida jea i.

³⁵Asa ditaluhon Jahowa ma halak Benjamin maralohon halak Israel, gabe marragean sadarina i, duapulu lima ribu saratus halak Benjamin, angka sisintak podang sude, dibunu halak Israel.

³⁶Ai dirimpu halak Benjamin naung talu halak Israel, ala naung maporus halak Israel moradophon Benjamin, ai marhaposan do nasida tu parbajo, angka na pinaonggophon nasida di lambung ni Gibeal.

³⁷Dung i disiluhon parbajo i mangarampok Gibeal, laos ditaban ma, jala ditampuli sude isi ni huta i dohot podang.

³⁸Jala nunga marpadan hian halak Israel dohot angka parbajo i: Martimpul tu ginjang bahenon nasida timus sian huta i.

³⁹Jadi marbalik ma halak Israel di tongtangan i, nunga nian dipungka halak Benjamin mangonjar dohot mambunu halak Israel, arga tolupulu halak mate, ai ninna rohanasida do: Nunga talu situtu nasida muse moradophon hita, suang songon di tongtangan parjolo i.

⁴⁰Hape dung mamungka martimpul tu ginjang timus sian huta i, manaili tu pudi ma halak Benjamin, gabe ida ma, tung sandok huta i marsigorgor dompak langit.

⁴¹Jadi dung marbalik halak Israel, tarhatotong ma halak Benjamin, ai nunga diida manginona tu nasida jea i.

⁴²Dung i mamedu ma nasida moradophon halak Israel tu dalan tungkan halongonan, alai sai dilotongi parporang i do nasida, tole huhut jolma, angka na ro sian angka huta humaliang mambunu angka na di tongatongana.

⁴³Dung i dihaliangi nasida ma halak

Benjamin, dilotongi nasida, jala mura nasida diluntakluntak, sahat ro di tondong ni Gibeatungan habinsaran.

⁴⁴Jadi marragean ma sian halak Benjamin, sampuluualu ribu halak, angka na begu marmusu luhutna.

⁴⁵Dung i mamedu ma nasida, jala maporus tungan halongonan, sahat ro di dolok batu Rimmon, jala diragehon di dalan i lima ribu halak, jala dieak nasida sahat ro di Gideom, jala dibunu sian nasida duaribu halak.

⁴⁶Asa luhutjolma angka na rage sian Benjamin sadarina i duapulu lima ribu halak do, angka sisintak podang, jala luhutna i halak na begu marmusu.

⁴⁷Ia angka na mamedu, jala maporus tu halongonan, sahat tu dolok batu Rimmon onom ratus halak toropna, laos maringan di dolok batu Rimmon opat bulan lelengna.

⁴⁸Dung i mulak ma halak Israel tu halak Benjamin, jala ditampuli dohot podang saluhutna ro di pinahan, ro di sude na dapot nasida, disurbu huhut sude huta, angka na dapotsa dohot api.

21¹(I.) Alai nunga pola marmangmang hian halak Israel di Mispa songon on: Na so tupa lehonon ni manang ise sian hita on boruna bahenjolma ni halak Benjamin.

²Dung i tolhas ma bangso i tu Betel, laos tading disi sahat ro di bodari di adopan

ni Debata, jala dipangiar be suaranya mangangguk badar.

³Angka ninna nasida ma: Ale Jahowa, Debata ni Israel, boasa tung masa songon i di Israel, pola tung moru sadarion sada marga sian Israel?

⁴Dung i manogotna i dipasogot bangso i ma hehe, jala dipauli disi sada langgatan, jala dipelehon angka pelean situtungon dohot pelean hamauliateon.

⁵Dung i ninna halak Israel ma: Nda tung adong manang ise sian saluhut angka marga ni Israel, na so nangkok ro tu luhutan manopot Jahowa? Ai tung marsumpa bolon do nasida, ganup na so nangkok tumopot Jahowa tu Mispa, ingkon marutang hosa ibana didok.

⁶Dung i tarsolsol bagi ma halak Israel taringot tu Benjamin, angginasida i, angka ninna ma: Tung siap do hape sadarion sada marga sian Israel.

⁷Beha nama itabahren tu nasida angka na teba i, asa marjolma be? Ai nunga pola marmangmang hita tu Jahowa, na so tupa lehononta tu nasida ianggo borunta bahenjolmanasida.

⁸(II.) Ala ni do umbahren didok nasida: Adong do ulaning sada sian angka marga ni Israel na so nangkok tu Mispa tumopot Jahowa? Jadi ida ma, ndang adong agia ise ro

tu parsaroan i sian Jabes di Gilead tumopot luhutan i.

⁹Ai di na binilangna bangso i, ida ma nanggo sada ndang adong disi baoa sian isi ni Jabes di Gilead.

¹⁰Jadi dipaborhat huria i ma tusi sampulu dua ribu halak angka na begu marmusu ditonahon ma tu nasida songon on: Laho ma hamu, jala tampuli hamu isi ni Jabes di Gilead dohot podang, ro di inaina dohot posoposo.

¹¹Songon on do bahenonmuna: Nasa baoa dohot inaina, angka naung niangkupan ni baoa modom, ingkon siaphononhon do.

¹²Jadi jumpang nasida ma sian isi ni Jabes di Gilead opat ratus boruboru na marbaju, angka na so dung niangkupan ni baoa modom, jala diboan nasida tu parsaroan i tu Silo, na di tano Kanaan.

¹³Dung i disuru sandok huria i ma suruanna mandok hata tu halak Benjamin, angka na di dolok batu Rimmon, maningtingkon pardemahan tu nasida.

¹⁴Jadi uju i ma mulak halak Benjamin, gabe tu nasida dilehon boruboru, angka na pinangolu sian angka boruboru isi ni Jabes di Gilead; alai tahe ndang singkop di nasida.

¹⁵Jadi asi ma roha ni bangso i mida Benjamin, ala naung binahen ni Jahowa hataluan di angka marga ni Israel.

¹⁶(III.) Dung i ninna angka sintua ni huria i ma: Beha nama bahenonta, asa marjolma

dohot angka na teba i? Ai nunga tung siap parompuan sian Benjamin.

¹⁷Angkup ni ninna nasida: Angka na malua i ma nampuna partalian ni Benjamin, asa unang laos pidom sada marga sian Israel.

¹⁸Alai anggo hita, ndang tarlehon hita borunta bahenjolmanasida, ai nunga pola marmangmang halak Israel songon on: Hona bura ma manang ise na mangalehon boru tu halak Benjamin.

¹⁹Dung i ninna nasida muse: Ida ma; masa do ganup taon ari raya di Jahowa di Silo, na tungkan utara sian Betel, tungkan habinsaran ni dalan na laho nangkok sian Betel tu Sikem, jala tungkan dangsina sian Lebona.

²⁰Dung i ditonahon nasida ma tu halak Benjamin songon on: Laho ma hamu mangonggop di angka porlak anggur.

²¹Dung i matahon hamu ma, molo ruar angka boruboru sian Silo laho manontor marhoronhoron, jadi ruar ma hamu sian angka porlak anggur i, jala ganup hamu mangaluahon sada be sian angka boru ni Silo bahenjolmana, laos boan hamu tu tano Benjamin.

²²Dung i molo ro amanasida manang ibotonasida manonjol hami, gabe dohononnami ma tu nasida: Basabasahon hamu ma nasida tu hami! Ai ndang hubuat hami di ganupjolmana marhite sian porang; hamu pe ndada hamu mangalehon nasida tu

nasida; dibahen i sandok na so marsala do hamu disi.

²³Jadi dibahen halak Benjamin ma songon i, angka dipambuat be ma boru marguru tu bilangannasida sian panontori, angka na nilaumnasida, laos laho nasida mulak tu partaliannasida, jala dipauli angka hutana, laos maringan disi.

²⁴Halak Israel pe mardalan do uju i sian i mulak be tu margana dohot tu bangsona, jala borhat be nasida sian i mulak tu partalianna be.

²⁵Di angka ari uju i ndang adong raja di Israel, ganup mambahen lomo ni rohana be.

Rut

1 ¹ (I.) Dung i uju manggomgomi angka panguhum, masa ma haleon potir di tano i. Jadi bungkas ma sada halak sian Betlehem Juda rap dohot jolmana dohot anakna dua halak, laho maisolat tu luat Moab.

² Ia goar ni baea i si Elimelek do, ia goar ni jolmana si Naomi, ia goar ni anakna na dua i si Malon dohot si Kilian, halak Eprata i do nasida sian Betlehem Juda. Jadi dung tolhas nasida tu luat Moab, laos maringan nasida disi.

³ Dung i mate si Elimelek, sinonduk ni si Naomi, gabe holan parompuan i nama tinggal rap dohot anakna na dua i.

⁴ Dung i dibuat nasida ma boru Moab bahen jolmanasida, goar ni na sada si Orpa, goar ni na sadanari si Rut. Jadi dung adong arga sampulu taon nasida maringan disi.

⁵ Mate ma dohot nasida duansa, si Malon dohot si Kilian, gabe tarpunjung ma parompuan i di panading ni anakna na dua i dohot sinondukna i.

⁶ (II.) Dung i hehe ma parompuan i rap dohot parumaenna na dua i, asa mulak sian luat Moab, ai tarbortik do tu pinggolna di luat Moab naung marpangulahi roha ni Jahowa

mida bangsona mangalehon sipanganon tu nasida.

⁷Jadi ruar ma nasida sian inganan paisolatanna na sai laon rap dohot parumaenna na dua halak i, asa mardalan sumuang tu tano Juda.

⁸Dung i ninna si Naomi ma tu parumaenna na dua i: Laho ma hamu mulak ganup tu bagus ni inana be. Sai marasi ni roha ma Jahowa mamaloshon tu hamu, hombar tu na binahenmuna tu angka na mate dohot tu ahu!

⁹Sai dibasabasahon Jahowa ma tu hamu, asa jumpangan hasonangan hamu, ganup di jabu ni sinondukna be! Dung i diumma ma nasida, laos dipangiar be suarana tumatangis.

¹⁰Dung i ninna nasida ma tu simatuana i: Ingkon udur hita mulak tu bangsom.

¹¹Alai ninna si Naomi ma: Mulak ma hamu, ale angka dainang! Boasa naeng mardalan hamu rap dohot ahu? So tagamon adong be tubu anakku bahen sinondukmuna dohot.

¹²Mulak ma hamu, ale angka dainang, ai nunga matuahu ahu anggo tung marsinonduk mangan muse. Tung sura pe hudok: Adong dope sihirimon di ahu, jala saborngin on dope ahu marsinonduk mangan, jala tubuan anak ahu.

¹³Tung tarpaima hamu ma nasida paima magodang? Tung tarpunjung ma hamu bahenon ni, gabe sundat marsinonduk mangan? Unang ma songon i ale angka

dainang, ai sumapot dope na huae sian hamu, ai ruar huhut tangan ni Jahowa marbajo i ahu.

¹⁴Jadi dipangiar nasida muse suarana be, manggogo tumatangis, laos diumma si Orpa ma simatuana i, alai marsihohot ma anggo roha ni si Rut tu nasida.

¹⁵(III.) Dung i ninna si Naomi ma: Ida ma, nunga mulak ia haham tu bangsona dohot tu debatana, mulak ma dohot ho mangihuthon hahami.

¹⁶Alai ninna si Rut ma mangalusi: Unang sai sosoi ahu tumadingkon ho, laho sirang sian ho; ia tusi ho laho, ingkon tusi ihuthononku; ia tusi ho maringanan, ingkon tusi ahu maringanan; bangsom nama bangsongku, Debatam nama Debatangku.

¹⁷Ia disi ho mate, ingkon disi ahu mate, disi do ahu huhut naeng tartanom. Sai songon i ma dibahen Jahowa tu ahu, jala songon i ditambahi tu joloan on, holan hamateani nama tarbahen manirang ahu sian ho.

¹⁸Jadi dung diida si Naomi, sai pir hatana naeng mardalan rap dohot ibana, dipasohot ma hatana manosoi nasida.

¹⁹Dung i mardalan ma nasida duansa, paima sahat tu Betlehem. Jadi dung sahat nasida tu Betlehem, riburan ma sude isi ni huta i ala ibana, angka ninna ma: On do hapengani si Naomi?

²⁰Alai ninna ibana ma mandok nasida:
Unang be goar hamu ahu si Naomi, tagonan
goar hamu ahu si Paet ai paet situtu do
pambahenan ni Nasunhinagogo tu ahu.

²¹Mararta godang ahu laho borhat sian
on, alai marsangkot bulung ahu mulak,
dibahen Jahowa. Boasa dope goaronmuna
ahu si Naomi, nunga tung tarjepol ahu
dibahen Jahowa, jala marhinamago dibahen
Nasunhinagogo i.

²²Alai tongon uju mamungka gotilon
patumonaan sahat tu Betlehem si Naomi
dohot si Rut, boru Moab parumaenna i rap
dohot ibana, mulak sian Moab.

2¹(I.) Dung i adong ma di si Naomi sahalak
sihasolhotan ni sinondukna nahinan, na
mora jong do ibana, dongan samarga ni si
Elimelek, goarna si Boas.

²Dung i ninna si Rut, boru Moab i ma
mandok si Naomi: Ua loas ma ahu laho tu
ladang manjomputi biur paihutihut halak na
marasi ni roha mida ahu. Jadi ninna si Naomi
ma tu ibana: Antong laho ma dainang.

³Dung i laho ma ibana, jala sahat tu ladang
manjomputi biur paihutihut angka panggotil.
Jadi tongon nasida tu ladang golat ni si Boas,
dongan samarga ni si Elimelek.

⁴(II.) Jadi ida ma, tongon ro si Boas,
sian Betlehem, didok ma mandok angka
panggotili: Didongani Jahowa ma hamu! Jadi

didok nasida mandok ibana: Sai dipasupasu Jahowa ma ho!

⁵Dung i didok si Boas ma mandok naposona, na manguluhon angka panggotili: Boru ni ise do na marbaju on?

⁶Jadi ro ma alus ni naposo na manguluhon angka panggotili mandok: I ma boru Moab, na mulak rap dohot si Naomi sian luat Moab.

⁷Ro nangkin hatana songon on: Ue loas ma ahu manjomputi di holangholang ni angka tibalán paihutihut angka panggotil! Jadi ro ibana tutu, jala sai dinunuti do sian na sogot rasirasa nuaeng; satongkin sambing dope ibana hundulhundul di bagasan sopesopo on.

⁸Dung i ninna si Boas ma tu si Rut: Tangihon ma hatangkon, ale ito! Unang ho laho manjomputi tu ladang na asing, jala unang ho laho sian on, sai marsilohot dison ma ho rap dohot naposongku boruboru.

⁹Sai matahon ma ladang tinopotnasida laho manggotil, jala paihutihut nasida. Nunga pola martona ahu tu angka naposongku, asa unang dihaori nasida ho; ia mauas ho, laho ma ho tu panguhatan, jala minum sian aek na tinahuan ni angka naposo i.

¹⁰Jadi manungkap ma si Rut, pola dais bohina tu tano marsomba, huhut didok mandok ibana: Dia do dalanna umbahen marasi roha ho mida ahu, pola disarihon roham ahu halak dagang nian.

¹¹ Dung i ninna si Boas ma mangalusi nasida: Nunga sar dibaritahon halak tu ahu sude uhummu na denggan i, na binahenmu tu simatuam boru, dung mate sinondukmu; na tinadingkonmi amanta dohot inanta dohot tano hagodanganmu, jala laho manopot bangso na so tinanda hian.

¹² Sai dibalos Jahowa ma tu ho uhummu na denggan i, jala ingkon marupa na gok ma ho sian Jahowa, Debata ni Israel, na nidapothonmu, laho marondingonding tu toru ni habonghabongna.

¹³ Dung i ninna si Rut ma: Sai dapotan asi ni roha ma ahu di adopanmu, ale tuanku, ai nunga diapuli ho ahu, jala didok ho hata sipir ni tondi ni naposom boruboru, atik pe so songon sada naposom boruboru ahu nian.

¹⁴ Dung i didok si Boas ma tu ibana: Molo jumpang tingki mangan ro ma dohot ho mandapothon, asa mangan sian sagusagu, jala tullukkon sagusagumi tu bagasan ingkau na asom i. Jadi hundul ma si Rut tu lambung ni angka panggotil, dilehon ibana huhut tu nasida biur na binolgang, gabe butong nasida mangan, pola marlobilobi.

¹⁵ Jadi dung hehe nasida muse laho manjomputi, ro ma hata ni si Boas mandok tu angka naposona: Pasombu hamu ibana huhut manjomputi di holangholang ni angka tibalán, jala unang paura hamu nasida.

¹⁶Pampisikpisikkon hamu huhut deba di nasida sian angka tibalán i, jala tadingkon hamu, asa dijomputi, jala unang mangonai hata hamu tu nasida.

¹⁷(III.) Jadi sai didatdati nasida manjomputi di ladang i sahat ro di bot ni ari, laos didege ma na jinamputanna i, gabe adong arga saampang eme godangna.

¹⁸Dung i diporsan nasida ma i laho masuk tu huta i, gabe diida simatuana ma na jinamputanna i; laos dirungkai, jala dilehon tu nasida ebaeba sian sipanganonna i.

¹⁹Dung i ninna simatuana i ma tu nasida: Didia ho manjomputi sadarion, jala sian dia on diomo ho? Pinasupasu ma baoa na marpanatap tu ho! Dung i dipaboa nasida ma tu simatuana i manang di ladang ni ise nasida mulaulaon, ninna ma: Si Boas do goar ni baoa nampuna ladang panjomputanki sadarion.

²⁰Jadi ninna si Naomi ma tu parumaenna i: Pinasupasu ni Jahowa ma ibana, ala so dialang asi ni rohana i tu halak na mangolu dohot naung mate. Angkupni didok si Naomi tu nasida: Baoa i do na sumolhot tu hita, ibana tama sitean hita.

²¹Dung i ninna si Rut, boru Moab i ma: Dohot hata on tahe didok mandok ahu: Ingkon angka naposongku hombarhombaronmu, paima sun digotil nasida sandok haumangku.

²²Dung i didok si Naomi ma tu si Rut parumaenna i: Denggan do i, ale inang, ia

ruar ho rap dohot angka naposona boruboru, asa unang dihaori halak ho di ladang ni halak na asing.

²³Jadi sai marsilohot ma si Rut tu angka naposo boruboru ni si Boas manjomputi, paima sun gotilon patumonaan dohot gotilon godang, dung i tinggal ibana rap dohot simatuana.

3¹(I.) Dung i ninna si Naomi, simatuana i ma tu nasida: Ale inang, tung so luluanku hahotanmu, asa marhasonangan ho?

²On pe nda si Boas i, nampuna naposo boruboru na nidonganamu, na sumolhot tu hita? Ida ma, na mamurpur eme do ibana saborngin on di pardegean.

³Dibahen i maridi ma ho huhut marpangir, jala solukkon ma pangkeanmu, jala tuat ma ho tu pardegean, alai unang pola tartanda ho tu baa i, paima sun ibana mangan dohot minum.

⁴Ia dung laho modom ibana, jala diboto ho podomanna, laho ma ho mandapothon, jala pasisi bulusanna sian patna, laos papeak ho, dung i paboaonna ma tu ho manang aha sibahenonmu.

⁵Dung i ninna si Rut ma tu simatuana i: Saluhut na pinaboami tu ahu, i do bahenonku.

⁶Dung i tuat ma ibana tu pardegean i, jala dibahen ma hombar tu saluhut na tinonahon ni simatuana i tu ibana.

⁷ Jadi dung sun mangan dohot minum si Boas, jala marlas ni roha ibana, laho ma ibana modom tu lambung ni bunbunan ni eme i; jadi ro ma si Rut manisipi, dipasisi ma bulusan sian patna, laos dipapeak ibana.

⁸ Jadi dung tonga borngin tarsonggot ma baoa i, didadapi ma humaliang, hape ida ma, parompuan sada modom di lambung patna.

⁹ Dung i ninna ibana ma: Ise do ho? Jadi ninna nasida ma: Ahu do si Rut naposom boruboru; sai paherbang ma habonghabongmu mangulosi naposomon, ai ho do na sumolhot pareak ahu.

¹⁰ (II.) Dung i ninna si Boas ma: Sai dipasupasu Jahowa ma ho, ale inang! Ai dumenggan dope holong ni roham na parpudi on sian na parjolo i, ala so dipaihutitut ho angka dolidoli, manang halak na pogos manang na mora pe.

¹¹ On pe ale inang, unang ho mabiar! Manang aha pe pinangidom, bahenonku do i tu ho; ai sange isi ni huta on donganku samarga umbotosa, parompuan na punia marpangalaho do ho.

¹² On pe, tongon do, na solhot do ahu nian tu ho, alai adong dope na sumolhot sian ahu.

¹³ Antong dison ma ho saborngin on, anggo manogot, molo tung olo ibana mareakkon ho, denggan do, pareahonna ma ho; alai molo so lomo rohana mareakkon ho, songon sintongna

mangolu Jahowa, ahu ma mareakkon ho!
Modom ma ho sahat ro di andostorang.

¹⁴Jadi modom ma nasida di lambung patna sahat ro di andostorang. Dung i hehe ma nasida, tagan so masitandaan dope jolma sogotna, ai ninna roha ni si Boas do, sai unang ma diboto halak adong parompuan i ro tu pardegean!

¹⁵Angkup ni didok: Buat tuson mandar na nialithonmi, jala tarehon, laos disuhati ma tusi onom jual eme, laos diampehon tu ibana, dung i laho ibana tu huta.

¹⁶Sahat ma dohot si Rut tu simatuana i, na mandok: Beha do parturena, ale inang? Dung i dipajojor ma tu nasida saluhut na binahen ni baoa i tu ibana.

¹⁷Dipaboa huhut: Eme na onom jualon dilehon tu ahu, ai ninna do mandok ahu: Nandang jadi rumar ho mulak tu simatuam.

¹⁸Dung i ninna si Naomi ma: Pasonang ma roham, ale inang, paima diboto ho ujung ni hata i, ai ndang tagamon pasohoton ni baoa i, nda ingkon marujung sadarion hata i.

4¹(I.) Dung i laho ma si Boas manopot partungkoan ni huta i, laos hundul disi; jadi ida ma, mamolus ma panean na nidok ni si Boas i, ninna ma: Aning ale, ro ho jolo hundul tuson. Jadi ro ma ibana laos hundul.

²Dung i dibuat si Boas ma sampulu halak sian angka sintua ni hutai, ninna ma: Hundul hamu tuson, gabe hundul ma nasida.

³Didok muse tu panean i: Ia hauma golat ni donganta si Elimelek nahinan, nunga digadis si Naomi, na mulak i sian luat Moab.

⁴Jadi huambathon ma hatangku mandok: Naeng jolo papataronku hata i tu pinggolmu, on pe tobus ma i di adopan ni halak isi ni huta on dohot di adopan ni sintua ni bangsongku; alai molo so olo ho manobus, paboa di ahu asa huboto, ai ndang adong halak dungkon ni ho manobus, dung ho ahu nama; jadi didok baa i ma: Ahu ma manobus.

⁵Dung i ninna si Boas ma: Sadari ditobus ho hauma i sian tangan ni si Naomi, pagodangonmu ma dohot si Rut, boru Moab i na mangkabaluhon na mate, asa marrindang bahenonmu na mate na mangihutihut pargolatanna.

⁶Jadi ninna panean i ma: Molo songon i ndang tarbahen ahu manobus i, atik tung beha mangago partohapanku sandiri ahu disi. Tobus ma di ho sitobusonku hian, ai ndang tarbahen ianggo ahu manobus.

⁷Alai songon on do hasomalan di Israel sian na robi dope, molo manobus manang palibehonsa halak, asa tung hot hata i: Ditanggali halak na sambariba ma sipatuna mangalehon tu donganna; i ma hasomalan di Israel.

⁸Dung i didok panean i ma tu si Boas: Tobus ma di ho, laos ditanggal sipatuna i.

⁹Dung i ninna si Boas ma tu angka sintua i dohot tu sude halak situan na torop i: Sitindangi ma hamu sadarion, paboa naung hutobus sian tangan ni si Naomi luhut na tinading ni si Elimelek nahinan ro di luhut na di si Malon dohot si Kilian nahinan.

¹⁰Angkupni pagodangonku ma si Rut, boru Moab i, jolma ni si Malon nahinan, asa marrindang na mate na mangihutihut pargolatanna, asa unang siap goar ni na mate sian tongatonga ni angka donganna dohot sian bahal ni hutana i. Hamu do sitindangi ni saluhutna i sadarion.

¹¹Dung i luhut situan na torop angka na di partungkoan i, ro di angka sintua mandok: Hami ma tutu sitindangina! Sai dibahen Jahowa ma parompuan on na masuk tu jabumuna songon si Rahel dohot si Lea, nasida na dua do haroroan ni pinompar ni Israel, sai marhuaso ma ianggo ho di Eprata, jala marbarita goarmu di Betlehem.

¹²Pinomparmu pe, sai songon pinompar ni si Peres ma, na tinubuhon ni si Tamar di si Juda marhite sian pomparan sibasabasahonon ni Jahowa tu ho sian parompuan naposo on.

¹³(II.) Jadi dibuat si Boas ma si Rut bahen jolmana. Jadi dung ditopot si Boas nasida, gabegabean ma nasida ditumpak Jahowa, jala ditubuhon sada anak.

¹⁴Dung i didok angka parompuan i ma mandok si Naomi: Pinuji ma Jahowa, na

patongonhon tu ho sadarion sada panean,
asa marbarita goarna di Israel.

¹⁵Ingkon ibana ma sipasabam roham dohot
pasisari ho di hatutuamon, ai parumaenmi
na holong roha di ho manubuhonsa, na
dumenggan di ho sian anak pitu.

¹⁶Dung i dibuat si Naomi ma posoposo i,
laos diabing mainunduhonsa, jala ibana gabe
parorotna.

¹⁷Dung i ro ma angka parompuan hombar
bagasna mambahen goarna, ninna ma:
Nunga tubu sada anak di si Naomi, gabe
dibahen goarna si Obed, i ma ama ni si Isai,
ama ni si Daud muse.

¹⁸On ma angka sundut ni si Peres: Peres
manubuhon Hezron.

¹⁹Si Hezron manubuhon si Ram, na
manubuhon si Aminadab.

²⁰Si Aminadab manubuhon si Nahason, na
manubuhon si Salmon.

²¹Si Salmon manubuhon si Boas, na
manubuhon si Obed.

²²Si Obed manubuhon si Isai, na manubuhon
si Daud.

1 Samuel

1 ¹ (I.) Dung i adong ma sada baoa sian Ramataim-Sup, sian dolok Epraim, goarna si Elkana, anak ni si Jeroham, tubu ni si Elihu, tubu ni si Tohu, tubu ni si Sup, halak Eprata.

² Dua dojolmana, goar ni na sada si Hanna, jala goar ni na sadanari si Pininna. Marianakkon do ianggo si Pininna, alai ndang adong anggo tubu ni si Hanna.

³ Sai nangkok do baoa i ganup taon sian hutana laho marsomba dohot mamele tu Jahowa Zebaot di Silo; jala disi do anak ni si Eli na dua i, si Hopni dohot si Pinehas, angka malim ni Jahowa.

⁴ Jadi dung jumpang ari ni si Elkana mamele, gabe dilehon ma tu si Pininna, jolmana i dohot tu saluhut anakna dohot boruna angka parjambaran.

⁵ Alai anggo tu si Hanna parjambaran sidua halak dilehon, ai tuanlaenna do si Hanna, alai na hol do bortianna dibahen Jahowa.

⁶ Sai disungguli imbangna huhut hinamagona manggitihi rohana nian, ala na hol bortianna dibahen Jahowa.

⁷ Sai songon i do dibahen ganup taon, manang piga hali nasida nangkok tu bagas ni Jahowa, sai songon i do diarsahi rohana, gabe tumatangis ibana jala ndang olo mangan.

⁸Jadi ninna si Elkana, sinondukna i ma tu ibana: Ale Hanna, boasa tung tumatangis ho? Jala boasa so olo ho mangan? Jala boasa sai gondok roham? Nda tagonan ahu di ho sian anak sampulu?

⁹(II.) Jadi dung mangan jala minum di Silo, hehe ma si Hanna. Alai hundul di hundulanna ianggo malim Eli di lambung tiang ni bagas ni Jahowa.

¹⁰Tung na marsak situtu rohana, gabe martangiang si Hanna tu Jahowa, huhut tumatangis situtu.

¹¹Dung i marbagabaga ma ibana, ninna ma: Ale Jahowa Zebaot! Molo ditatap roham pardangolan ni naposomon, jala diingot Ho ahu, jala ndang halupahononmu naposomon, jala dilehon Ho tu naposomon sada anak, lehononku ma ibana muse tu Jahowa saleleng mangolu ibana, jala ndang jadi hona raut parnabung uluna.

¹²Jadi dung leleng ibana martangiang di jolo ni Jahowa, sai dipamanatmanat si Eli ma pamanganna.

¹³Ai martangiang di bagasan rohana do si Hanna, asal ubitubit bibirna, ndang tarbege ianggo suaranya, gabe dirimpu si Eli na mabuk ibana.

¹⁴Jadi ninna si Eli ma tu ibana: Sadia leleng on ho mabuk? Utahon ma anggur niinummi sian ho?

¹⁵Alai ninna si Hanna ma mangalusi:
Sitongka, ale tuanku! Parompuan na gondok
roha do ahu tahe, ndang dung huinum
anggur, manang siinumon na koras, rohangki
do na huusehon di jolo ni Jahowa.

¹⁶Unang tung bahen naposom hira boru na
jahat, ai sian ponjot dohot arsak ni rohangku
na godang i ahu mangkatai rasirasa nuaeng.

¹⁷Dung i ninna si Eli ma mangalusi: Laho
ma ho muli mardamedame! Sai na lehonon
ni Debata ni Israel tu ho na pinangidom sian
Ibana.

¹⁸Jadi ninna si Hanna ma: Sai dapotan asi
ni roha ma naposomi di jolom! Dung i ditulus
parompuan i ma dalanna, jala mangan,
bohina pe, ndang be surbot idaon.

¹⁹(III.) Tole manogotna i, sogot ma nasida
hehe asa marsomba di jolo ni Jahowa, dung
i mulak ma nasida muli tu jabuna di Rama.
Dung i ditopot si Elkana ma si Hanna jolmana
i, gabe marningot Jahowa di nasida.

²⁰Dung i di laonlaon ni ari gabegabean ma
si Hanna, jala ditubuhon anak sada, jala
dibahen goarna si Samuel, ai sian Jahowa
ibana hupangido, ninna.

²¹Dung i nangkok ma muse si Elkana rap
dohot sude isi ni bagasna laho mamelehon
tu Jahowa pelean siganup taon ro di
bagabagana.

²²Alai anggo si Hanna ndang nangkok,
ai ninna do mandok sinondukna: Dung pe

sirang susu dakdanak i, asa boanonku ibana, paidaidaonna bohi ni Jahowa, laos tinggal disi tongtong.

²³ Dung i ninna si Elkana, sinondukna i ma tu ibana: Bahen ma lomo ni roham! Tinggal ma ho, paima sirang susu ibana dibahen ho; tung dipasaut Jahowa hatana! Jadi tinggal ma parompuan i pasusu anakna, paima sirang susu ibana dibahen.

²⁴ Jadi dung sirang susu ibana, udur ma nasida nangkok huhut mamboan anak ni lembu tolu dohot itak sada Epah dohot anggur sapoting, jala diboan ibana tubagasan bagas ni Jahowa di Silo. Alai bajar situtu dope dakdanak i.

²⁵ Dung i dipotongi nasida ma anak ni lembu i, jala diboan dakdanak i tu si Eli.

²⁶ Dung i ninna si Hanna ma: Santabi ale tuanku, songon sintongna mangolu tondim ale tuan, ahu ma parompuan i na jongjong di lambungmon na jolo, martangiang tu Jahowa.

²⁷ Dakdanak on do na hupangido uju i, gabe dibasabasahon Jahowa tu ahu na pinangido ni rohangku sian Ibana.

²⁸ Dibahen i ahu pe pasahatonku ma ibana tu Jahowa saleleng mangolu ibana; ai na pinangido di Jahowa do ibana. Jadi laos martangiang tu Jahowa nasida disi.

2¹ (I.) Dung i martangiang ma si Hanna, ninna ma: Marolopolop ma rohangku mida Jahowa, timbul do tandukku di bagasan

Jahowa, na hirtap situtu do pamanganku
dompok angka musungku, umbahen na las
rohanku di pangurupionmi.

²Ndang adong na badia, tudoshon Jahowa,
ai ndang adong dungkon ni Ho, jala
ndang adong partanobatoan, dungkon ni
Debatanku.

³Unang sai datdati hamu manenganengahon
haginjangan, unang ruar hata jungkat sian
pamanganmuna, ai Jahowa do, Debata
nampuna angka parbinotoan, jala Ibana
dumasing angka pambahenan.

⁴Marpongolan do sior ni ulubalang,
jala marhohos hatogaron do angka naung
mandate.

⁵Angka na lobian na sai laon laho do
mansari sipanganon, jala angka na rapar hian
marlanggelangge; pola tubuan anak pitu na
hol hian, jala merus boti sitorop anak hian.

⁶Jahowa do na mambunu dohot na
pangoluhon; Ibana patuathon tu banua toru
dohot panangkokkon muse.

⁷Jahowa do na mambahen pogos dohot
mambahen mamora; Ibana do paijurhon, laos
Ibana patimbulhon muse.

⁸Ibana pahehehon sian orbuk halak na
tarjepol hian, jala dipatimbul na pogos i
sian gambo laho pahundulhon tu lambung ni
angka na sangap, jala diturpukkon habangsa
hamuliaon tu nasida, ai Jahowa do nampuna

angka ojanan ni tano on, jala dipaojak di atasna hasiangan on.

⁹Sai na ramotanna do pat ni angka na niasianna, alai sai parendeponna do di bagasan haholomon ianggo angka parjahat i, ai ndada binahen ni hagogoon sandiri marhuaso baoa.

¹⁰Sai na tunduk do bahenon ni Jahowa halak angka na mangalo Ibana; mangkuling ronggurna di banua ginjang di atas nasida; Jahowa manguhum angka ujung ni tano on sogot, jala lehononna hamuliaon tu Rajana, jala patimbulonna sogot tanduk ni Messiasna.

¹¹(II.) Dung i muli ma si Elkana tu jabuna di Rama; alai parhalado ni Jahowa do anggo dakdanak i di jolo ni malim Eli.

¹²Alai anggo angka anak ni si Elijolma na jahat sahali do, ndang ditanda nasida Jahowa.

¹³Ianggo hasomalan ni malim na dua i tu situan na torop i songon on do: Ia adong manang ise na naeng mamelehon pelean, gabe ro naposo ni malim, tagan mangalompa juhut i, mamboan garpu sitolu ngingi di bagasan tanganna.

¹⁴Jala dipantullangkon tubagasan hudon manang seret manang balanga manang kuali, nasa na lohot tu garpu i dibuat malim i di ibana. Sai songon i do dibahen nasida tu sandok Israel, angka na ro tusi, tu Silo.

¹⁵Gari tagan so dinahitidope tabotabo i; nunga ro naposo ni malim i, jala ninna do

tu baoa na mamelei: Sai lehon ma juhut i gorengon di malim i, ai ndang jaloonna sian ho juhut na nilompa, ingkon na tata do.

¹⁶Ia didok baoa i tu ibana: Sai loas jolo dinahiti tabotabo i, songon na siap ari, dung i buat ma di ho guru pinangido ni roham; gabe didok naposo i tu ibana: Ndangana, ingkon nuaeng do lehononmu, molo ndang, antong gogo do bahenonku laho mambuat.

¹⁷Dibahen i balga situtu do dosa ni angka dolidoli i di jolo ni Jahowa; ai lam lea do roha ni angka baoa di pelean sipanganon tu Jahowa.

¹⁸(III.) Alai anggo si Samuel marhalado di jolo ni Jahowa, jala marsampesampe epod sian hori do dakdanak i.

¹⁹Dibahen inana do huhut jobit sada na metmet di ibana, binoanna tu ibana ganup taon, uju nangkok nasida rap dohot sinondukna laho mamelehon pelean siganup taon.

²⁰Laos dipasupasu si Eli do si Elkana dohot jolmana, ninna ma: Sai dilehon Jahowa ma pinompar tu ho sian jolmamon, singkat ni pangidoan na pinangidona sian Jahowa. Dung i muli nasida tu ingananna.

²¹Tongon tahe, diebati Jahowa ma si Hanna muse, jadi gabegabean nasida, laos ditubuhon tolu anak dohot dua boru di laonlaon ni ari; alai magodang di adopan ni Jahowa do ianggo si Samuel.

²²(IV.) Alai nunga matua situtu ianggo si Eli, jala dibege do barita ni saluhut na binahen ni anakna tu sandok Israel, dohot na niangkupannasida angka boruboru modom, angka na marhalado di lambung pintu ni undungundung luhutan i.

²³Jadi ninna ma tu nasida: Boasa tung angka sisongon i bahenonmuna? Ai tarbortik do tu pinggolhu sian sandok situasi na torop i pambahenanmuna, angka na jahat i.

²⁴Sitongka ale anaha, ai ndang denggan barita na hubage i, mardosa do bangso ni Jahowa binahenmu.

²⁵Molo mardosajolma tu dongannajolma, Debata do pangalualuanna; alai molo dompak Jahowajolma i mardosa, tung ise ma pangalualuanna? Alai ndang ditangihon nasida suara ni amanasida i, ai naeng do bunuon ni Jahowa nasida.

²⁶Alai anggo si Samuel na bajar i, lam magodang, lam hasian ni Jahowa dohotjolma.

²⁷(V.) Dung i ro ma sada halak ni Debata manopot si Eli, ninna ma tu ibana: Boti hata ni Jahowa: Atehe, nda hupapatar situtu Ahu tu pinompar ni ompum, uju di Misir dope nasida, di bagasan bagus ni si Firaun?

²⁸Jala hupillit ibana di Ahu sian nasa marga ni Israel bahen malim, asa mamele ibana di atas langgatanku, manutung daupa, mamangke sampesampe epod di jolongku,

jala hulehon do tu pinompar ni ompum saluhut pelean situtungon ni halak Israel.

²⁹Boasa tung lea bahenonmuna pelean ki sipotongon dohot sipanganon, angka na hutonahon pelehononhon di bagasan undungundung i? Jala sumangap angka anakmu sian Ahu dibahen ho, asa pamokmokkon hamu sian patumonaan ni ganup pelean sipanganon, pinelehon ni bangsongku Israel.

³⁰Dibahen i boti hata ni Jahowa, Debata ni Israel: Nunga pola hudok nian: Pinomparmu dohot pinompar ni amam marhalado di jolongku ro di salelenglelengna. Alai anggo nuaeng, ninna Jahowa: Dao ma i sian Ahu; ai angka na pasangap Ahu marsangap bahenonku, alai angka na palea Ahu, marlea do bahenonku.

³¹Ida ma, na ro do angka ari sogot, gotaphononku ma tanganmu dohot tangan ni pinompar ni amam, asa unang be adongjolma sarimatua di bagasan jabum.

³²Jala sanga dope idaonmu hagogotan ni undungundung di hamamasa ni sandok na denggan tu Israel, jala ndang adong na sarimatua di bagasan jabum ro di salelenglelengna.

³³Alai nda tung sun siap baoa di ho sian langgatanku, asa tung lotop matam, jala marsipal tondim bahenon ni; alai godangan

pinomparmu ingkon mate di haroro ni dagingna.

³⁴Jala on do partinandaan di ho, na ro tu anakmu na dua i, si Hopni dohot si Pinehas: Ingkon mate nasida duansa di bagasan sadari.

³⁵Alai patindangonku ma di Ahu sada malim haposan, hombar tu na di bagasan rohangku dohot di bagasan tondingku bahenonna, jala paulionku di ibana sada bagas na hot, asa marhalado di jolo ni Messiashu ibana saleleng mangolu.

³⁶Jala nasa na teba sian pinomparmu, ingkon ro marsomba tu ibana mangido hepeng sambiji dohot roti sanseat, jala dohononna ma: Sai pabangkit ma ahui manganadoti ulaon malim sada, asa adong panganonku roti sanseat.

3¹(I.) Dung i uju si Samuel na bajar i marhalado di Jahowa, di jolo ni si Eli, mahal ma di angka ari i hata ni Jahowa, jala ndang adong sadia pangungkapon.

²Dung i di na sadari modommodom ma si Eli di ingananna, matana pe nunga mamungka rambon, ndang tarbaensa be marnida.

³Ndang dope mintop ianggo palito ni Debata, jala nunga modom ia si Samuel di joro ni Jahowa, hajongjongan ni poti parpadanan ni Debata.

⁴Jadi joujou ma Jahowa di si Samuel, gabe didok ibana ma: Ida ma, dison do ahui!

⁵Dung i marlojong ma ibana tu si Eli, jala ninna ma: Ida ma, dison do ahu, ai dijou ho do ahu. Alai didok si Eli ma: Nandang ahu manjou ho, mulak ma ho mangulahi modom, gabe laho ma ibana jala modom.

⁶Dung i diulahi Jahowa manjou si Samuel paduahalihon, gabe hehe ma si Samuel jala laho mandapothon si Eli, jala didok ma: Ida ma, dison do ahu, ai dijou ho do ahu. Dung i ninna si Eli ma: Nandang ahu manjou ho, ale anaha, mulak ma ho mangulahi modom.

⁷Alai ndang dope ditanda si Samuel Jahowa, jala ndang dope pinapatar tu ibana hata ni Jahowa.

⁸Dung i diulahi Jahowa ma manjou si Samuel patoluhalihon, gabe hehe ibana jala laho mandapothon si Eli, jala ninna ma: Ida ma, dison do ahu, ai dijou ho do ahu. Jadi mamoto ma roha ni si Eli, Jahowa do hape manjou dolidoli i.

⁹Jadi ninna si Eli ma tu si Samuel: Laho ma ho mangulahi modom; molo tung joujou muse di ho, dohononmu ma: Mangkuling ma Ho, ale Jahowa, ai mananginangi do naposomon! Dung i laho ma si Samuel, jala diulahi modom di ingananna.

¹⁰(II.) Dung i ro muse ma Jahowa, tinding disi jala joujou songon na jolo: O Samuel, Samuel! Gabe didok si Samuel ma: Mangkuling ma Ho, ai mananginangi do naposomon.

¹¹ Dung i ninna Jahowa ma tu si Samuel: Ida ma, pamasaonku ma uhum sada di Israel, tung marnginging do pinggol ni ganup na umbegesa duansa.

¹² Di ari na sasada i paroonku ma tu si Eli saluhut na huhatahon taringot tu pinomparna. Ahu mamungka, laos Ahu paujungkon.

¹³ Ai nunga hulumbahon hian tu ibana, paboa Ahu parlulu dompak pinomparna ro di salelenglelengna, ala hajahaton na binotona, ai mangala torutoru tu nasida angka anakna i, hape so mangonai hata ibana tu nasida.

¹⁴ Dibahen i nunga pola maruari Ahu taringot tu pinompar ni si Eli: Tung na so hahuphupan be hajahaton ni pinompar ni si Eli marhitehite pelean sipotongon manang sipanganon ro di salelenglelengna.

¹⁵ Dung i modom ma si Samuel ro di torang ni ari, dung i diungkap ma angka pintu ni joro ni Jahowa. Alai mabiar do anggo si Samuel paboahon pangungkapon i tu si Eli.

¹⁶ Jadi dijou si Eli ma si Samuel, jala ninna ma: Jo Samuel, ale anaha, gabe didok ibana ma: Dison do ahu.

¹⁷ Dung i ninna si Eli ma: Dia do hata na pinaboana tu ho? Unang tung porso maradophon ahu! Suang songon i bahenon ni Debata tu ho, jala patambaonna dope, molo tung diporso ho tu ahu nanggo sada hata sian saluhut hata na pinaboana tu ho.

¹⁸Jadi dipaboa si Samuel ma hata i luhut tu ibana, jala ndang diporso agia aha tu ibana. Dung i ninna si Eli ma: Jahowa do Ibana, na dengen di rohana ma dibahen.

¹⁹Dung i lam magodang ma si Samuel, jala didongani Jahowa ibana, jala ndang madabu boti tu tano nanggo sada sian saluhut hatana i.

²⁰Jadi sandok Israel, olat ni Dan sahat ro di Beerseba marhatopothon si Samuel sintong panurirang ni Jahowa.

²¹Dung i didatdati Jahowa ma pataridahon Ibana di Silo; ai nunga patar Jahowa tu si Samuel di Silo marhitehite hata ni Jahowa.

4¹ (I.) Dung i songgop ma lumbalumba ni si Samuel tu sandok Israel. Alai borhat ma halak Israel manjumpangkon halak Palistim laho marmusu, gabe marsaro nasida mardonokkon Ebeneser; marsaro di Apek do ianggo halak Palistim.

²Dung i pariris ma halak Palistim manjumpangkon halak Israel, gabe ragat martongtang, jadi talu ma halak Israel dibahen halak Palistim, marragean nasida di tongtangan arga opat ribu halak.

³Jadi dung mulak bangso i tu parsaroan, ninna angka sintua ni Israel ma: Boasa ulaning talu hita sadarion dibahen Jahowa maradophon halak Palistim? Beta ma, itaalap ma sian Silo poti parpadanan ni Jahowa, asa

ro Ibana tu tongatonganta, asa dipalua hita sian tangan ni musunta!

⁴Dung i disuru bangso i ma tu Silo mamboan sian i poti parpadanan ni Jahowa Zebaot, na marhabangsahon angka kerubim, disi do huhut na dua anak ni si Eli, si Hopni dohot si Pinehas, mandongani poti parpadanan ni Debata.

⁵Jadi dung sahat poti parpadanan ni Jahowa tu parsaroan i, marsurak godang ma sandok halak Israel mangolophonsa, pola humuntal tano i dibahen.

⁶Jadi dung dibege halak Palistim suara suraksurahi, angka ninna nasida ma: Soara surak godang dia do i di parsaroan ni halak Heber? Jala dung diboto nasida, poti ni Jahowa do hape ro tu parsaroan i.

⁷Mabiar ma halak Palistim, ai ninna nasida ma: Nunga ro Debata tu parsaroan i; angkupni didok nasida; marjea ma hita, ai ndang songon i nantuari manang nantuari sada.

⁸Marjea ma hita! Tung ise ma paluahon hita sian tangan ni Debata, angka na marmulia sisongon i? I ma Debata, angka na mambunu halak Misir marhitehite begu masa marragamragam di halongonan.

⁹Antong pir ma tondimuna, hamu baoa ni halak Palistim, asa unang diparhatoban halak Heber hamu, songon na pinarhatobanmuna

nasida na sai laon. Asa pir ma tondimuna huhut mangalo, hamu ale angka baoa!

¹⁰Jadi turtar ma halak Palistim marmusu, gabe talu ma halak Israel, jala maporus nasida ganup tu undungundungna; asa hataluan na bolon situtu do i, marragean do sian Israel tolupulu ribu parangan angka na mardalan pat.

¹¹Dapot do dohot poti ni Debata, mate dohot na dua anak ni si Eli, si Hopni dohot si Pinehas.

¹²(II.) Dung i marlojong ma sada halak Benjamin sian tongtangan i, jala sahat ibana tu Silo sadarina i, jala marpangkean na sinansanan, jala tano di atas uluna.

¹³Jadi dung sahat ibana, ida ma, hundul di hundulanna si Eli di lambung dalam manatapnatap, ai nunga holsoan hian rohana taringot tu poti ni Debata. Jadi dung sahat baoa i tu huta i paboahon barita i, manganguhi ma sandok isi ni huta i.

¹⁴Jadi dung dibege si Eli suara ni angguhanggukki, ninna ma: Soara hagunturon dia do i? Gabe hapogan ma baoa i ro mamaritahon tu si Eli.

¹⁵Alai marumur siapulu ualu taon ma ia si Eli uju i, jala nunga rambon matana, ndang be marnida.

¹⁶Dung i ninna baoa i ma tu si Eli: Na ro sian tongtangan do ahu jala maporus sian

tongtangan i do ahu sadarion. Jadi ninna si Eli ma: Aha do barita na masa, ale anaha?

¹⁷Jadi ninna sibuan barita i ma mangalusi: Nunga maporus halak Israel maradophon halak Palistim, tung talu situtu do bangso i, mate dohot anakmu na dua i, si Hopni dohot si Pinehas, dibuan dohot poti ni Debata.

¹⁸Jadi dung ditaringoti ibana poti ni Debata, singgalak ma si Eli tu pudi sian hundulanna di lambung ni harbangan i, gabe upok ma rungkungna laos mate; ai nunga jolma matua ibana, jala na mokmok. Alai arga opatpulu taon lelengna ibana manguhum halak Israel.

¹⁹Ia parumaenna, jolma ni si Pinehas, gabegabean do uju i matoras ne emena; dung dibege barita taringot tu poti ni Debata naung dapot i, jala naung mate simatuana doli dohot sinondukna, marsinggang ma ibana laos mangintubu; ai tompu do manombo rianna.

²⁰Marhira laho mate ibana, ro ma hata ni sibaso, angka na jongjong di lambungna: Unang ho mabiar, ai anak do tinubuhonmon! Alai ndang dialusi, jala ndang parduli rohana disi.

²¹Jadi digoar ma dakdanak i si Ikabod, huhut mandok: Nunga pesan hamuliaon sian Israel, ala naung dapot i poti ni Debata, jala ala naung mate simatuana doli dohot sinondukna i.

²²Alani do umbahen didok: Nunga pesan hamuliaon sian Israel, ai nunga tarboan poti ni Debata.

5¹ (I.) Dung i dibuat halak Palistim ma poti ni Debata, jala diboan sian Ebeneser tu Asdod.

²Asa dibuat halak Palistim ma poti ni Debata, jala diboan do i tu bagasan joro ni Dagon, dipahombar do i tu lambung ni Dagon i.

³Alai dung dipasogot halak Asdod hehe manogotna i, ida ma, nunga tungkap tu tano Dagon i di jolo ni poti ni Jahowa didapot; jadi dibuat nasida ma Dagon i, jala dipasuang ibana tu ingananna hian.

⁴Alai dung dipasogot nasida muse hehe manogotna i, ida ma, nunga manungkap muse tu tano Dagon i didapot di jolo ni poti ni Jahowa; alai matipul ulu ni Dagon dohot palak ni tanganna duansa, peak di lobulobu, holan badanna dengke na teba sian ibana.

⁵Dibahen i sitongka do degeon ni angka malim ni Dagon ro di sude angka na masuk tu joro ni Dagon i lobulobu ni joro ni Dagon na di Asdod rasirasa sadarion.

⁶Alai dokdok do tangan ni Jahowa mandondon tu halak Asdod, jala mangago tu nasida, jala dipatubu barobuni di isi ni Asdod ro di na humaliang huta i.

⁷Jadi dung diida halak Asdod songon i do hape pangalahona, angka ninna nasida ma:

Ndang jadi tinggal di lambungnami on poti ni Debata ni halak Israel, ai posi do tanganna mangonai tu hami dohot tu Dagon, debatanta i.

⁸Dung i disuru nasida ma paluhuthon sude raja ni halak Palistim tu nasida, angka ninna nasida ma: Beha do bahenonnami taringot tu poti ni Debata ni halak Israel? Jadi ninna angka rajai ma mangalusi: Tu huta Gat ma pinaunsat poti ni Debata ni halak Israel. Jadi dipaunsat nasida ma poti ni Debata ni halak Israel tusi.

⁹Jadi dung dipaunsat nasida tusi, mangonai ma tangan ni Jahowa tu isi ni huta i, pola guntur situtu, hona toruna ma isi ni huta i, nang na metmet, nang na magodang, tubu do angka barobuni di nasida.

¹⁰(II.) Dung i ditongos nasida ma poti ni Debata tu Ekron. Alai dung tolhas poti ni Debata tu Ekron, manganguhi be ma isi ni Ekron, angka ninna ma: Diboan nasida poti ni Debata ni halak Israel tu hami, asa mambunu hami dohot bangsonami huroha.

¹¹Dung i disuru nasida ma paluhuthon sude raja ni halak Palistim, angka didok nasida ma: Tongos hamu ma poti ni Debata ni Israel mulak tu ingananna hian, asa unang dibunui hami ro di bangsonami; ai masa do gunturguntur hamatean di sandok huta i, tung na dokdok situtu do tangan ni Debata mangonai tusi.

¹²Jala baa angka na so mate, hona barobuni do, pola manaek sahat tu langit angguhangguk ni huta i.

6¹(I.) Asa pola pitu bulan leleng ni poti ni Jahowa di luat ni halak Palistim.

²Dung i dipaluhut halak Palistim ma angka malim dohot pangarunding, angka ninna ma: Aha do sibaenonnami taringot tu poti ni Jahowa? Sai pabotohon hamu ma tu hami manang aha bahenonnami hamulianna tu ingananna hian.

³Jadi didok angka nasida ma: Molo naeng tongoshononmuna poti ni Debata ni Israel, unang rumar boti tongoshon hamu ingkon paihuthononmuna sada pelean parsalaan tusi. Molo tung malum hilalaonmuna, andar ma botoonmuna manang ala ni aha umbahen so manginsurut tanganna sian hamu.

⁴Jadi ninna nasida ma: Aha do pelean parsalaan sipaihuthononnami tusi? Dung i didok nasida ma mangalusi: Lima baro sere dohot lima monsi sere, marguru tu bilangan ni raja ni halak Palistim, ai sada do uhumu na mangonai tu nasida sude dohot tu rajanasida i.

⁵Dibahen i ingkon bahenonmuna do sumansuman ni baromuna dohot sumansuman ni monsimuna, angka na mangago tu tano i, ingkon lehononmuna hamuliaon tu Debata ni Israel; anggiat

dipaganggang tanganna sian hamu dohot
sian debatamuna dohot sian tanomuna.

⁶Jala boasa tung tangkanganmuna
rohamuna, songon na tinangkangan ni
halak Misir dohot Firaun najolo rohanasida
i? Nda songon on do, dung ditorui Jahowa
nasida, balik do nasida mandokkon bangso i
mardalan?

⁷On pe, hobas i hamu ma mambahen padati
na imbaru sada, jala buat hamu dua lembu
panusuan, angka na so dung niaugaan, tu
lembu i ma pampe hamu padati i, alai olat
hamu anakna i sian pudina mulak tu bara.

⁸Dung i handit hamu ma poti ni Jahowa,
jala pajongjong hamu tu padati i; jala
sombasomba sere, angka sipaihuthononmuna
tusi bahen pelean parsalaan, bahen hamu ma
i tu bagasan potipoti di lambungna, jala loas
hamu laho manulus dalanna.

⁹Dung i matahon hamu: Molo dalan
parbalohan ni tanona dinangkohi laho tu
Betsemes, andar ma Ibana do na mambahen
jea godangon tu hita; alai molo ndang,
botoonta ma na so tanganna do na mangonai
tu hita, hamamasana hian do i tu hita.

¹⁰Jadi dibahen angka baea i ma songon i,
dibuat nasida ma dua lembu panusuan, jala
dipampe padati i tusi, alai dihurung do anggo
anakna i di bara.

¹¹Dung i dipajongjong nasida ma poti ni
Jahowa tu padati i ro di potipoti, isian ni

angka monsi sere dohot sumansuman ni baronasida.

¹²Jadi sai ditulus angka lembu i dalam panigoran mangihuthon dalam laho tu Betsemes; sai dalam balobung i ditulus nasida, huhut marumbeumbe, jala ndang manimbil tu siamun manang tu hambirang; sai diiringiring angka raja ni halak Palistim do antong sahat ro di partalpahan ni Betsemes.

¹³(II.) Alai ragat mambuat eme di rura do ianggo isi ni Betsemes, jadi manaili dompak ginjang ma nasida, gabe diida nasida poti i, jala las rohanasida marnidasa.

¹⁴Dung i sahat ma padati i tu hauma ni si Josua, isi ni Betsemesi, laos ngongong disi, jala adong disi sada batu na bolon. Dung i ditahai nasida ma parhau ni padati i, jala lembu i dipelehon bahen pelean situtungan tu Jahowa.

¹⁵Dung i dipaijur halak Lepi ma poti ni Jahowa dohot potipoti di lambungna, isian ni sombasomba sere i, jala dipeakkon tu batu na bolon i; laos mamelehon angka pelean situtungan dohot sipotongon halak Betsemes sadarina i tu Jahowa.

¹⁶Alai dung ditonduri na lima raja ni halak Palistim pangalahona, mulak ma nasida tu Ekron sadarina i.

¹⁷Jala on do baro sere, angka na pinaihut ni halak Palistim bahen pelean parsalaan tu Jahowa: Sian Asdod sada, sian Gaza sada,

sian Askelon sada, sian Gat sada, sian Ekron sada.

¹⁸Angkupni angka monsi sere. Marguru tu bilangan ni saluhut angka huta ni halak Palistim, ginomgom ni raja na lima i, olat ni huta na gonting sahat ro di sosor ni halak parpea; jala batu na bolon i do sitindangi, pangulonon ni poti ni Jahowa rasirasa sadarion, di hauma ni si Josua, isi ni Betsemesi.

¹⁹(III.) Alai hona toru ma halak Betsemes, ala na tiniliknasida i poti ni Jahowa, jala dibunu sian nasida pitupulu halak sian limapulu ribu halak. Jadi margudompong ma bangso i, ala hataluan bolon na binahen ni Jahowa di tongatonganasida.

²⁰Dung i ninna halak Betsemesi ma: Tung ise ma manahan tindang di jolo ni Jahowa, Debata na badia sisongon i? Jala ise do ulaning topotonna, dung laho sian lambungta?

²¹Dung i disuru nasida ma suruanna manopot isi ni Kiriath Jearim, angka ninna ma: Nunga mulak poti ni Jahowa ditaruhon halak Palistim; sai tuat ma hamu mangalap tu hamu.

7¹(I.) Dung i ro ma halak isi ni Kiriath Jearim mamboan poti ni Jahowa nangkok tu jabu ni si Abinadab, na di atas robean, jala si Eleasar, anakna i, diuras nasida mangaramoti poti ni Jahowa.

²Dung i olat ni ari pangulonon ni poti i di Kiriath Jearim, nania laonna, arga duapulu taon lelengna. Sai margudompong sandok Israel mangihuthon Jahowa.

³(II.) Jadi ro ma hata ni si Samuel tu sandok Israel songon on: Molo tung mulak hamu tu Jahowa sian nasa rohamuna, sai paholang hamu ma angka debata sileban sian tongatongamuna, ro di angka sombaon Astarot, jala marsihohot rohamuna tu Jahowa, jala sasada Ibana oloi hamu, asa dipalua hamu sian tangan ni halak Palistim.

⁴Jadi dipaholang halak Israel ma angka Baal dohot Astarot, jala sasada Jahowa dioloi nasida.

⁵Dung i ro muse hata ni si Samuel: Marluhut ma sandok Israel tu Mispa, asa huondihon hamu tu Jahowa.

⁶Jadi marluhut ma nasida tu Mispa, jala ditahui aek, diusehon muse tu jolo ni Jahowa, jala marpuasa nasida sadarina i, angka ninna huhut disi: Nunga mardosa hami dompak Jahowa. Asa si Samuel do manguhum halak Israel di Mispa.

⁷(III.) Alai dung dibege halak Palistim naung marluhut halak Israel di Mispa, nangkok ma angka raja ni halak Palistim dompak Israel. Jadi dung dibege halak Israel barita i, mabiar ma nasida maradophon halak Palistim.

⁸Jadi ninna halak Israel ma tu si Samuel: Unang ma ho mansohot joujou tu Jahowa

Debatanta, mangondihon hami, asa dipalua hami sian tangan ni halak Palistim.

⁹Jadi dibuat si Samuel ma anak ni birubiru sada onsop manusu, jala hibul dipelehon tu Jahowa bahen pelean situtungon, huhut joujou si Samuel tu Jahowa mangondihon Israel, gabe dialusi Jahowa ibana.

¹⁰Dung i uju mamelehon pelean situtungon i si Samuel, marrongoman ma ro halak Palistim laho marmusu dompak Israel; alai mangkuling ma ronggur mansai gogo sadarina i dibahen Jahowa mangalo halak Palistim, gabe guntur nasida, laos talu maradophon Israel.

¹¹Jadi ruar ma angka baoa ni Israel sian Mispa, jala dilele halak Palistim, jala ditaluhon nasida sahat ro di toruan ni Betkar.

¹²Dung i dibuat si Samuel ma sada batu, jala dipatindang di holangkolang ni Mispa dohot Sen jala dibahen goarna: Ebeneser, jala ninna do: Rasirasa nuaeng diurupi Jahowa do hita.

¹³Jadi tarjepol ma halak Palistim, jala ndang be ro nasida tu partalpahan ni Israel, jala sai dialo tangan ni Jahowa do halak Palistim saleleng mangolu si Samuel.

¹⁴Jadi mulak ma tu Israel huta, angka na nilahang ni halak Palistim sian Israel, olat ni Ekron sahat ro di Gat, nang angka luat humaliang i dirampas Israel sian tangan ni halak Palistim, gabe mardemak ma Israel tu halak Amori.

¹⁵ (IV.) Jadi si Samuel manguhum Israel saleleng mangolu ibana.

¹⁶ Jala ganup taon do ibana marliat sahat ro di Betel, boti tu Gilgal, boti tu Mispa, asa diuhumi Israel di angka huta i.

¹⁷ Dung i mulak ibana muse tu Rama; ai disi do jabuna, jala disi do diuhumi Israel, jala dipauli disi sada langgatan di Jahowa.

8¹ (I.) Alai dung sarimatua si Samuel, dipabangkit ma anakna na dua i, bahen panguhum di Israel.

² Ia goar ni anak buhabajuna, i ma si Joel, goar ni na paduahon i i ma si Abia, rap panguhum nasida di Berseba.

³ Alai ndang diihutihut anakna i dalan ni amana, impolan di perak do nasida, jala manjalo sisip nasida papeol uhum.

⁴ (II.) Alani marluhut ma saluhut angka sintua ni Israel manopot si Samuel tu Rama.

⁵ Angka ninna nasida ma tu ibana: Ida ma, nunga sarimatua anggo ho, jala angka anakmu ndang diihutihut nasida angka dalanmu, on pe pampe ma di hami sada raja, asa ibana manguhum hami, suang songon saluhut bangso parbegu.

⁶ Alai sogo ni roha ni si Samuel do hata, na nidoknasida i: Sai lehon di hami raja sada, asa ibana manguhum hami. Jadi martangiang ma si Samuel tu Jahowa.

⁷ Dung i ninna Jahowa ma tu si Samuel: Tangihon ma suara ni bangso i di saluhut na

nidoknasida i tu ho, ai ndada ho, Ahu do na binolonghonnasida disi, asa unang be Ahu rajanasida.

⁸Suman tu saluhut pambahenan, angka na binahennasida olat ni ari uju Ahu manogihon nasida ruar sian Misir rasirasa sadarion, sai ditadingkon nasida Ahu, asa mangoloi angka debata sileban, suang songon i dibahen nasida nang tu ho.

⁹On pe, tangihon ma suaranasida i, asal tangkas dihatindangkon jala dipasingothon ho tu nasida uhum ni raja na gumomgom nasida sogot.

¹⁰(III.) Dung i dipatolhas si Samuel ma sude hata ni Jahowa tu bangso i, angka na mangido raja sian ibana.

¹¹Jala didok ma: On do uhum siingoton tu raja na gumomgom hamu sogot; buatonna do angka anakmuna jala bahenonna mangiringiring huretana dohot hodana, asa marlojong nasida di jolo ni huretana.

¹²Jala bahenonna nasida gabe induk ni marsasaribu, jala induk ni marlimalimapulu; huhut mambahen saro maninggala haumana, jala manggotil sigotilonna, mamandei dohot angka parhohas tu hamusuonna dohot parhohas ni huretana.

¹³Buatonna dohot borumuna bahen pande pangir, jala bahen angka pangalompas dohot pande roti.

¹⁴Buatonna dohot haumamuna dohot porlak anggurmuna dohot hau jetunmuna, angka na dumenggan i, jala lehononna tu angka naposona.

¹⁵Buatonna do saparsampulu sian parbue ni na niulamuna sian hauma dohot sian porlak anggur, jala lehononna tu angka panuturina dohot tu angka naposona.

¹⁶Buatonna huhut angka naposomuna baa dohot parompuan, ro di lembu dohot halodemuna, angka na dumenggan i, asa pangkeonna tu ulaonna.

¹⁷Buatonna saparsampulu nang sian birubirumuna, jala ingkon gabe naposona hamu.

¹⁸Dung i di laonlaon ni ari manganguhi ma hamu ala ni rajamuna, na pinillitmuna i di hamu, alai ndang alusan ni Jahowa hamu di ari na sasada i.

¹⁹Hape manjua do bangso i tumangihon suara ni si Samuel, angka ninna nasida ma: Agia songon i, ingkon adong raja di hami.

²⁰Asa dos hami songon saluhut bangso parbegu, asa rajanta i manguhum hita, jala manguluhon hita laho marmusu.

²¹Jadi dung dibege si Samuel luhut hata ni bangso i, dialualuhon ma i tu pinggol ni Jahowa.

²²Dung i ninna Jahowa ma tu si Samuel: Tangihon ma suaranasida i, jala pabangkit di nasida raja sada. Jadi ninna si Samuel ma tu

angka baa ni Israel: Muli ma hamu ganup tu hutana be.

9¹ (I.) Dung i adong ma sada halak sian marga Benjamin, na margoar si Kis, anak ni si Abiel, anak ni si Zeror, anak ni si Behorat, anak ni si Apia, anak ni sada halak Benjamin, parsinamot na godang.

² Adong di ibana anak sada, na margoar si Saul, dolidoli na uliutus do ibana, ndang adong baa na ummuli sian sandok halak Israel; olat ni abarana tu ginjang hasurunganna sian sandok bangso i.

³ Dung i mago ma halode boruboru ni si Kis, ama ni si Saul. Jadi didok si Kis ma tu si Saul, anakna i: Ua arahon ma sada sian angka naposo bahen donganmu, dung i borhat ma ho laho mangalului angka halode boruboru i.

⁴ Jadi diliati ibana ma tor Epraim, boti luat Salisa, hape ndang jumpangsa; diliati nasida muse luat Saalim, hape ndang disi; dibolus nasida muse luat Benjamin, hape ndang jumpangsa.

⁵ Alai dung sahat nasida tu luat Sup, gabe didok si Saul ma tu naposona, donganna i: Beta hita mulak, atek beha naung malua roha ni damang sian angka halode i, humolsohon hita gumodang.

⁶ Jadi ninna naposona i ma mangalusi ibana; ida ma, adong do halak ni Debata sada di huta on, jala na marmulia do baa i, sai na sintong do songgop manang aha na nidokna; ua

ibana ma antong itatopot, anggiat paboaonna tu hita dalan sidalananta.

⁷Dung i ninna si Saul ma tu naposona i: Ida ma, tung sura laho hita, tung aha ma boanonta tu baoa i? Ai nunga suda ianggo sagusagu sian isianna, jala so adong silua tau boanon tu halak ni Debata; tung aha ma adong di hita?

⁸Dung i ro muse ma alus ni naposo i tu si Saul songon on: Ida ma, jumpang do di bagasan tanganku saparopat Sekel perak, i ma hulehon tu halak ni Debata, asa dipaboa tu hita dalan sidalananta.

⁹(Ianggo di na robi somal do di halak Israel, jumpa laho manang ise manungkun Debata mandok songon on: Beta hita laho tumopot partondung; ai partondung do digoar di na robi panurirang nuaeng.)

¹⁰Dung i ninna si Saul ma tu naposona: Denggan do hatami, beta hita mardalan! Jadi laho ma nasida tu huta, inganan ni halak ni Debata.

¹¹Tole nangkok nasida di nangkohan laho tu huta, jumpang nasida ma boruboru partuaek, angka na ruar manahui aek, gabe didok ma manungkun nasida: Atehe, dison do partondung i?

¹²Jadi ninna nasida ma mangalusi: Dison do, ida ma, indi an di jolomi do ibana; haru siluhon ma, apala sadarion ibana ro tu huta,

ala pasahathon pelean situasi natorop i sadarion di robean.

¹³Ia dung tolhas hamu tu huta i, jumpang hamu ma ibana tagan so dinangkohi dope robean i laho mangan, ai ndang tagamon mangan situasi natorop i, nda jolo ro ibana; ai ibana do mamasumasu pelean i, dung i pe asa mangan angka na pinio i. On pe, nangkok ma hamu, ai apala sadarion jumpang hamu ibana.

¹⁴Jadi dung nangkok nasida sahat tu tongatonga ni huta i, ida ma, ruar ma si Samuel manjumpangkon nasida laho nangkok tu robean i.

¹⁵(II.) Alai nunga dipalumba Jahowa hian tu pinggol ni si Samuel, jumolo sadari sian haroro ni si Saul, didok hian do:

¹⁶Marsogot songon on suruhononku tu ho sada halak sian tano Benjamin, asa miahannu ibana bahen partogi ni bangsongku Israel, asa ibana paluahon bangsongku sian tangan ni halak Palistim, ai nunga ditatap rohanku bangsongki, ala naung sahat tu Ahu angguhanggukna.

¹⁷Jadi dung dibereng si Samuel si Saul i, ro ma hata ni Jahowa tu ibana: Ida ma, i ma baoa i na hupaboa i tu ho, ingkon gomgomanna bangsongki.

¹⁸(III.) Dung i didapothon si Saul ma si Samuel di tongatonga ni harbangan i, ninna

ma: Ua paboa di ahu, manang didia bagas ni partondung i?

¹⁹Jadi ro ma alus ni si Samuel mandok tu si Saul: Ahu do partondung i, pajolo ma nangkok tu robean i, asa hamu donganku mangan sadarion, marsogot pe paborhatonku ho, jala luhut na di bagasan roham, hupaboa pe tu ho.

²⁰Anggo taringot tu halode, angka na mago i nunga pola tolu ari, unang pola holsoan roham taringot tusi, ai nunga jumpang; jala ise do nampuna sandok sipangidoon ni Israel? Nda ho do nampunasa ro di sandok pinompar ni amam?

²¹Dung i ninna si Saul ma mangalusi: Nda pinompar ni si Benjamin do ahu, sian marga na ummetmet di Israel, jala ahu do na ummetmet sian sandok Benjamin marompuompu? Boasa tung songon i dohononmu tu ahu?

²²Dung i diarahon si Samuel ma si Saul i rap dohot naposona manogihon nasida tu bilut panganan, jala nasida dibahen tu juluan sian angka na tarpioi, arga tolupulu halak toropnasida.

²³Dung i ninna si Samuel ma tu pande sipanganon: Nia tuson todoan na hupasahat i tu ho, pola hudok tu ho papulihonmu do i.

²⁴Dung i diboan pande sipanganon i ma hae bona dohot na lohok tusi, jala dipeakkon tu jolo ni si Saul, huhut didok si Samuel: Ida

ma, na pinapulik do i bahen tu jolom, antong pangan ma! Ai nunga sinimpan hian di ho tu ari raja on, laho manggokkon situasi natorop i ahu. Jadi mangan ma si Saul rap dohot si Samuel sadarina i.

²⁵Jadi dung tuat nasida sian robean i laho tu huta, mangkatai ma si Samuel dohot si Saul di atas tarup.

²⁶Dung i dipasogot nasida ma hehe manogotna i; alai dung manaek sibalik hunik, joujou ma si Samuel di si Saul tu atas tarup, ninna ma: Borhat ma ho, asa hupataru ho. Jadi borhat ma si Saul, rap ruar ma nasida duansa tu balian, ibana dohot si Samuel.

²⁷Jadi dung tuat nasida sahat tu ujung ni huta i, ninna si Samuel ma tu si Saul: Dokkon ma naposo i pajolohon, gabe dipajolo ma; alai ngongong ma ianggo ho dison, asa hupatubegehon tu ho hata ni Debata.

10¹(I.) Dung i dibuat si Samuel ma guriguri sada marisi miak, jala diusehon tu ulu ni si Saul, laos diumma ibana huhut didok: Nda naung miniahan ni Jahowa do ho bahen partogi ni bangso naung niainna i?

²Molo dung tundal ho annon sian lambungkon, jumpang ho ma dua baoa mardonokkon tanoman ni si Rahel, marbalokkon tano Benjamin di Selsa, dohononna ma tu ho: Nunga jumpang halode boruboru angka na niluluanmu; jala ida ma,

nunga malua ianggo angka halode i sian roha ni amanta, balik taringot tu hamu holsoan ibana: Aha na ma bahenonku taringot tu anakku, ninna?

³Molo dung mamedu ho sian i manulus dalanmu sahat ro di hariara Tabor, jumpang ho ma disi tolu halak, angka na nangkok manopot Debata tu Betel, na sada mangusung tolu anak ni hambing, na sada mamboan tolu kibung roti, na sada mamboan guriguri marisi anggur.

⁴Jadi usousoannasida ma sonangmu, jala lehononna tu ho dua roti, sijaloonmu ma i sian tangannasida.

⁵Dung i sahat ma ho tu dolok ni Debata, parsaroan ni halak Palistim, jadi ia dung sahat ho tubagasan huta i, pajumpang ma ho dohot sada horon panurirang, angka na tuat sian robean i, di jolonasida do arbab, sarune, tulila dohot hasapi, angka manurirangi be nasida.

⁶Jadi songgopan ni Tondi ni Jahowa ma ho, gabe manurirangi ho rap dohot nasida, jadi muba ma ho gabejolma na asing.

⁷Jadi ia dung masa angka tandai tu ho, bahen ma guru roham na jumpang tanganmu, ai donganan ni Jahowa do ho.

⁸Dung i tuat ma ho tu Gilgal pajolohon, jala ida ma, tuat pe ahu mandapothon ho laho mamelehon angka pelean situtungon dohot angka pelean hamauliateon; ingkon pitu ari

lelengna paimaonmu ahu ro mandapothon ho, asa hupabotohon tu ho sibahenonmu.

⁹(II.) Jadi dung tundal ibana laho sian lambung ni si Samuel, gabe dipauba Debata ma rohana, songgop ma dohot sude angka tandai sadarina i.

¹⁰Ai dung sahat nasida tu dolok Gibeai, ida ma, sahoron panurirang manjumpangkon ibana, gabe songgop ma Tondi ni Debata tu ibana, laos manurirangi ibana di tongatonganasida.

¹¹Alai dung diida saluhut angka na tumanda ibana na sai laon, ibana manurirangi hape rap dohot angka panurirang, gabe ninna be ma tu donganna: Aha do na masa tu anak ni si Kis? Dohot do si Saul hape di tongatonga ni angka panurirang?

¹²Jadi ro ma alus ni na sahalak sian i mandok: Ise do ulaning amanasida? Alani manjadi gabe umpama: Dohot do si Saul hape di tongatonga ni angka panurirang?

¹³Dung mansohot ibana manurirangi tolhas ma ibana tu robean i.

¹⁴Dung i ninna tulang ni si Saul ma tu ibana dohot tu naposona: Tudia hamu laho huroha? Gabe didok ibana ma: Mangalului angka halode boruboru nian; jadi dung huida hami ndang disi, gabe laho hami manopot si Samuel.

¹⁵Dung i ninna tulang ni si Saul ma: Ue paboa di ahu manang aha na nidok ni si Samuel tu hamu.

¹⁶Jadi ninna si Saul ma tu tulangna i: Tangkas do dipaboa tu hami naung jumpang angka halode i. Alai anggo hata harajaon i, na nidok ni si Samuel, ndang dipaboa tu ibana.

¹⁷(III.) Dung i dipaluhut si Samuel bangso i tumopot Jahowa tu Mispa.

¹⁸Jadi ninna ma tu halak Israel: Boti hata ni Jahowa, Debata ni Israel: Ahu do manogihon Israel ruar sian Misir, jala hupalua hamu sian tangan ni halak Misir, sian tangan ni saluhut harajaon angka na mangarupa hamu.

¹⁹Alai nunga ditoishon hamu sadarion Debatamuna, na paluahon hamu sian saluhut jeamuna dohot sian hagogotanmuna, hape didok hamu do tu Ibana: Ingkon pabangkitonmu di hami sada raja. Dibahen i tindang ma hamu di jolo ni Jahowa marmargamarga, jala marsaribusaribu.

²⁰Dung i didokkon si Samuel ma jumonok saluhut marga ni Israel, gabe hona ma marga Benjamin.

²¹Dung i didokkon muse jumonok marga Benjamin marsuhusuhu, gabe hona suhu Matris, hona muse si Saul, anak ni si Kis. Jadi dilului nasida ma ibana, hape ndang jumpangsa.

²²Jadi diulahi nasida ma manungkunhon tu Jahowa: Nandang dope ro baoa i tuson? Jadi

ninna Jahowa ma: Ida ma, na martabuni do ibana tu parugasanan.

²³Jadi marlojong ma nasida mangalap ibana sian i. Jadi dung tindang ibana di tongatonga ni bangso i, gabe gumanjang ibana sian sandok bangso i, olat ni abarana tu ginjang.

²⁴Dung i ninna si Samuel ma tu sandok bangso i: Ida hamu ma na pinillit ni Jahowa, ai tudoshon ibana ndang adong di sandok bangso i. Jadi marsurak ma sandok bangso i, angka ninna nasida ma: Sai mangolu ma rajai!

²⁵Dung i dipaboa si Samuel ma tu bangso i uhum harajaon, laos disurathon tubagasan sada buku, jala dipeakkon tu jolo ni Jahowa. Dung i dipamuli si Samuel ma sandok bangso i, ganup tu jabuna be.

²⁶Laho do dohot si Saul tu jabuna di Gibeon, dipataru parangan angka na sinunggul ni Debata rohanasida.

²⁷Alai adong do huhut angka halak na jahat, angka na mandok: Tung aha ma hangoluan turgas on ni baon on, gabe marhu ni roha nasida mida ibana, laos so diboan silua tu ibana; alai dipaula so dibege si Saul do hata i.

11 ¹(I.) Dung i nangkok ma si Nahas, marga Amon, jala marungkum dompak Jabes di Gilead; jadi ninna sude baon ni Jabes ma tu si Nahas: Bahen ma parjanjian tu hami, asa huoloi hami rodim.

²Jadi ninna si Nahas, marga Amoni ma tu nasida: Olo pe ahu marjanji tu hamu, molo dung hupulsikkon mata siamun ni saluhut hamu dohot mambahen haurahon tu sandok Israel.

³Dung i ninna angka sintua ni Jabes ma tu ibana: Loas ma hami marpingkir pitu borngin on, asa marsuru angka suruan hami tu sandok partalpahan ni Israel; molo tung laos soadong na palua hami, ruar pe hami mandapothon ho.

⁴Dung i sahat ma angka suruani tu Gibeas-Saul, jala dihatahon angka hata i tu pinggol ni situasi natorop i. Jadi dipangiar nasida suaranya be tumatangis.

⁵(II.) Dung i ida ma, ro do tongon si Saul mangadu lombu sian ladang, gabe didok si Saul ma: Aha do huroha na masa di bangso i umbahen tumatangis nasida? Jadi dipajojor nasida ma tu ibana hatahata ni halak Jabes i.

⁶Jadi dung dibege si Saul angka hata i, songgop ma Tondi ni Debata tu ibana, marsigorgor situtu ma rimasna.

⁷Dung i dibuat ma sapasang lombu, laos ditanggoi, jala dipantongoshon tu sandok partalpahan ni Israel, binoan ni angka suruan laho maningtingkon: Manang ise na so borhat mangihuthon si Saul dohot si Samuel, songon i do bahenon tu lombuna. Jadi madabu hatahuton sian Jahowa tu bangso i, borhat be ma nasida, hira sahalak sambing.

⁸Dung i dibilang ma nasida di Besek, jadi tolu ratus ribu ma torop ni halak Israel, jala tolupulu ribu ia halak Juda.

⁹Dung i didok angka nasida ma tu suruan, angka na ro i: Boti ma dohononmuna tu halak Jabes di Gilead: Ingkon marsogot dapotan pangurupion hamu apala di parngiar ni mata ni ari. Jadi dung ro angka suruani, jala dibaritahon barita i tu angka baoa sian Jabes, las ma rohanasida.

¹⁰Dung i ninna angka baoa sian Jabes ma: Marsogot ma hami ruar mandapothon hamu, asa bahenonmuna tu hami sandok guru lomo ni rohamuna.

¹¹(III.) Tole marsogotna i diaturhon si Saul ma bangso i bahen tolu parduaan, gabe disola nasida ma tongatonga ni parsaroan i, tongon uju di gansi marhira torang ari, gabe tunduk ma halak Amon ro di parngiar ni ari; marserak ma ianggo angka na teba i, ndang tading nanggo dua halak sauduran.

¹²Dung i ninna situan natorop i ma tu si Samuel: Ise do angka na mandok: Tung si Saul ma mangarajai hita? Lehon tuson angka baoa i, asa hubunu hami nasida.

¹³Alai ninna si Saul ma: Nandang jadi bunuon manang ise sadarion, ai apala sadarion mambahen pangurupion Jahowa di Israel.

¹⁴Dung i ninna si Samuel ma tu bangso i: Beta hita laho tu Gilgal, asa itaparata disi harajaon i.

¹⁵Jadi laho ma sandok situasi natorop i tu Gilgal pabangkithon si Saul disi gabe raja di jolo ni Jahowa di Gilgal, jala dipelehon disi angka pelean hamauliateon di jolo ni Jahowa. Jadi marlas ni roha situtu ma disi si Saul dohot saluhut baosa ni Israel.

12¹(I.) Dung i ninna si Samuel ma tu sandok Israel: Ida ma, nunga hutangihon soaramuna taringot tu saluhut na pinaboamuna tu ahu, jala nunga hupabangkit sada raja di hamu.

²On pe, ida ma, rajai ma manguluhon hamu; nunga sarimatua ianggo ahu jala ubanon, ia angka anakku, ida ma, di tongatongamuna do nasida, jala ahu manguluhon hamu sian sidakdanakonku rasirasa sadarion.

³Ida ma, dison do ahu, maralus ma hamu dampak ahu di adopan ni Jahowa dohot di adopan ni raja naung miniahanna: Tung dung ma hubuat lembu ni manang ise, manang halodena, tung dung ma hurupa manang ise, manang hubahen gogo tu manang ise, manang manjalo sisip ahu sian tangan ni manang ise, tung hupapitpit matanku mida ibana? Asa hupasuang nuaeng tu hamu.

⁴Dung i ninna nasida ma: Nandang dung mambahen gogo ho tu hami, jala ndang dung dirupa ho hami, jala ndang dung manjalo agia aha ho sian tangan ni manang ise.

⁵Jadi ninna si Samuel ma tu nasida: Ingkon Jahowa ma sitindangi dampak hamu sadarion,

sitindangi dohot raja naung miniahanna,
paboa na soadong jumpang hamu agia aha di
bagasan tanganku! Sitindangi ma tutu, ninna
bangso i.

⁶(II.) Dung i ninna si Samuel ma tu
bangso i: Jahowa tongon naung pabangkit si
Musa dohot si Aron, jala naung manogihon
ompumuna ruar sian tano Misir.

⁷Antong pajonok hamu ma jongjong tuson,
asa hupasingot hamu di jolo di Jahowa
taringot tu saluhut denggan basa ni Jahowa
angka na binahenna tu hamu dohot tu
ompumuna i.

⁸Dung sahat si Jakkob tu Misir, mangangguhi
ma angka ompumuna tu Jahowa, gabe
disuru Jahowa ma si Musa dohot si Aron, asa
ditogihon nasida ompumuna i ruar sian Misir,
jala dipahundul nasida di inganan on.

⁹Alai dung dihalupahon nasida Jahowa,
Debatanasida i, gabe dipasahat Ibana nasida
tu tangan ni si Sisera, partogi ni parangan
di Hazor, dohot tu tangan ni halak Palistim,
dohot tu tangan ni raja sian Moab, angka na
marmusu dompak nasida.

¹⁰Jadi mangangguhi ma nasida tu Jahowa,
angka ninna do: Nunga mardosa hami, tung
hutadingkon hami Jahowa, jala huoloi hami
angka Baal dohot Astarot; on pe sai palua ma
hami sian tangan ni musunami, asa huoloi
hami Ho.

¹¹ Jadi disuru Jahowa ma si Jerubbaal dohot si Bedan dohot si Jepta dohot si Samuel, asa dipalua hamu sian tangan ni musumuna i humaliang, asa sonang hamu maringan.

¹² Alai dung diida hamu si Nahas, raja ni halak Amon ro mangalo hamu, gabe didok hamu tu ahu: Ndada ho, ingkon adong raja sada mangarajai hami, hape Jahowa, Debatamuna do nian Rajamuna i.

¹³ On pe, ida ma, indi raja na pinillitmuna i, na pinangidomuna i, jala ida ma, nunga dilehon Jahowa raja sada tu hamu.

¹⁴ Molo dihabiari hamu Jahowa, jala dioloi hamu Ibana, jala ditangihon hamu soarana, jala ndang dialo hamu hata ni Jahowa, jala rap nang hamu, nang raja na mangarajai hamu mangihuthon tu Jahowa Debatamuna i, jadi dongananna ma hamu.

¹⁵ Alai molo so ditangihon hamu soara ni Jahowa, jala dipaaloalo hamu hata ni Jahowa, jadi tangan ni Jahowa ma mangalo hamu, songon naung nialona angka ompumuna i.

¹⁶ Antong pajonok hamu ma jongjong tuson, jala ida hamu ma hata na balga on, sibahenon ni Jahowa di adopanmuna.

¹⁷ Nda masa do nuaeng gotilon eme? Joujou ma ahu annon tu Jahowa gabe paroonna ma ronggur dohot udan, asa tung ditanda jala diida hamu godang ni hajahatonmuna, naung binahenmuna di adopan ni Jahowa, laho mangido raja sada di hamu.

¹⁸(III.) Jadi joujou ma si Samuel tu Jahowa, gabe diparo Jahowa ma ronggur dohot udan sadarina i. Jadi mabiar situtu ma sandok bangso i mida Jahowa dohot mida si Samuel.

¹⁹Dung i ninna sandok bangso i ma tu si Samuel: Sai tangiangkon ma angka naposomon tu Jahowa Debatam, asa unang mate hami, ai hutambai hami do tu saluhut dosanami na sai laon hajahaton on na mangido di hami sada raja.

²⁰Jadi ninna si Samuel ma tu bangso i: Unang hamu mabiar! Nunga tutu dibahen hamu saluhut hajahaton on, asal unang manimbil hamu sian Jahowa, sai oloi hamu ma Jahowa sian nasa rohamuna.

²¹Jala unang manimbil hamu mangihuthon tu na so marguna, na so tarbahen mangurupi manang paluahon hamu, ai tung na so marguna do angka ajiajian.

²²Ai ndang tagamon tadingkonon ni Jahowa bangsona ala ni Goarna na timbul i, dung sapala dihalomohon Jahowa mambahen hamu gabe bangsona.

²³Ahu pe antong, dao ma i sian ahu, tung mardosa dompak Jahowa, tung mansohot tumangiangkon hamu, sai podahononku do tu hamu dalan na denggan dohot na tigor i.

²⁴Asal dihabiari hamu Jahowa, jala dioloi hamu Ibana di bagasan hasintongan sian nasa rohamuna; ai ida hamu ma godangna i naung binahenna tu hamu.

²⁵Alai molo didatdati hamu mambahen na jat, rendep ma nang hamu, nang rajamuna i bahenonna.

13¹(I.) Dung salpu sataon hinarajahon ni si Saul, tole paduataonhon mangarajai Israel.

²Jadi dipillit si Saul ma di ibana tolu ribu halak sian Israel; dua ribu sian i dongan ni si Saul di Mikhmas dohot di dolok Betel, jala saribu dongan ni si Jonatan di Gibeab-Benjamin, dipamuli do ianggo bangso na lobi i ganup tu undungundunga be.

³Dung i ditaluhon si Jonatan ma parangan ni halak Palistim, angka na marsaro di Geba, tarbortik ma barita i tu halak Palistim. Alai lam didokkon si Saul ma mamalu sarune di sandok tano i maningtinghon: Ingkon begeon ni halak Heber ma i.

⁴Jadi sandok Israel umbege barita i: Nunga ditaluhon si Saul parangan ni halak Palistim, nunga ngorngor huhut roha ni halak Palistim mida Israel. Jadi dipaluhut si Saul ma bangso i tu Gilgal.

⁵Marpungu ma dohot halak Palistim laho marmusu dompak Israel: Tolupulu ribu hureta, jala onom ribu parsihundul, jala situasi natorop i tudoshon horsik na di topi ni laut hinadeakna; nangkok ma nasida jala marsaro di Mikhmas, tondong ni Bethapen.

⁶Jadi dung diida halak Israel naung hagogotan nasida, ai godoron do situasi

natorop i, gabe martabuni ma bangso i di angka liang, dohot di ramba, dohot di dolok batu, dohot di godunggodung dohot di angka bondar.

⁷ Taripar do huhut halak Heber tu bariba ni Jordan, tu luat Gad dohot Gilead; alai tading di Gilgal dope ianggo si Saul, jala sandok situan natorop i godoron be do mangihuthon ibana.

⁸ (II.) Jadi dung pitu borngin lelengna ibana paimaimahon janji na binahen ni si Samuel, hape matua so ro si Samuel tu Gilgal, mampar ma situan natorop i sian lambungna.

⁹ Dung i ninna si Saul ma: Boan tu ahu pelean situtungan dohot angka pelean hamauliateon; gabe dipelehon ibana ma pelean situtungan i.

¹⁰ Jadi dung tolhas dipelehon pelean situtungan i, ida ma, ro ma tongon si Samuel, gabe ruar ma si Saul manjumpangkon ibana, mandok tabena.

¹¹ Dung i ninna si Samuel ma: Aha do na binahenmu? Jadi ninna si Saul ma: Dung huida mampar bangso i sian lambungku, jala ndang ro ho di tingkina i, tole halak Palistim marpungu di Mikhmas.

¹² Jadi ninna rohangku ma: Tuat ma annon halak Palistim mandapothon ahu tu Gilgal, laos so martangiang dope ahu di adopan ni Jahowa, jadi hupahum rohangku, laos hupelehon pelean situtungan i.

¹³Dung i ninna si Samuel ma tu si Saul: Na oto do pambahenmi, ndang diradoti ho tona ni Jahowa Debatam, na tinonahonna tu ho; ai nuaeng nian naeng pahoton ni Jahowa harajaonmi gumomgom Israel ro di salelenglelengna.

¹⁴Alai anggo nuaeng ndang hot harajaonmi; nunga pola dilului Jahowa sada halak bangunan ni rohana, naung tinonahon ni Jahowa bahen partogi ni bangsona, ai ndang diradoti ho, na tinonahon ni Jahowa tu ho.

¹⁵(III.) Dung i hehe ma si Samuel, laos nangkok sian Gilgal tu Gibeab-Benjamin; alai anggo si Saul umbilang situasi natorop i, angka na jumpang di lambungna, arga onom ratus halak toropna.

¹⁶Langgo si Saul dohot si Jonatan, anakna i ro di situasi natorop, angka na di lambungnasida i, maringan do di Gibeab-Benjamin, alai marsaro di Mikhas do anggo halak Palistin.

¹⁷Dung i borhat ma parbajo sian parsaroan ni halak Palistin tolu panggungan; panggungan na sada mamedu dampak dalan laho tu Opra, tu luat Saul;

¹⁸Panggungan na sada mamedu dampak dalan laho tu Bethoron; panggungan na sada muse mamedu dampak dalan partalpahan, tondong ni rura Zeboim, tungkan halongonan.

¹⁹Alai ndang adong jumpang nanggo sada tungkang bosi di sandok tano Israel, ai ninna

roha ni halak Palistim do, sai unang ma sanga halak Heber mambahen podang manang mundimundi.

²⁰Dibahen i ingkon tuat sandok Israel manopot halak Palistim laho patiptiphon gigi ni ninggalana be manang gupakna, manang tangkena, manang sasapna.

²¹Jadi ndang bolut be baba ni gigi ni ninggala, sasap, gupak dohot tangke, nang patigor turatura tu horbo.

²²Ia dung tole ari tongtangan i, ndang adong jumpang podang manang hujur di tangan ni sandok halak situan natorop, dongan ni si Saul dohot si Jonatan; alai anggo di si Saul dohot di si Jonatan, anakna i, adong do jumpang.

²³Dung i borhat ma sada panggungan ni halak Palistim laho tu jaringjing Mikhmas.

14¹(I.) Dung i di na sadari i, ninna si Jonatan, anak ni si Saul, ma tu naposo siusung angka sinjatana: Beta hita taripar tu parsaroan ni halak Palistim na di bariba i; alai ndang dipaboa anggo tu amana.

²Marsaro do ia si Saul i di ujung ni Gibeas, di toru ni hau dalimo na di Migron, jala arga onom ratus halak donganna.

³Ia si Ahia, anak ni si Ahitub, haha ni si Ikabod, anak ni si Pinehas, tubu ni si Eli, malim ni Jahowa di Silo, marpangkean epod; situan natorop i pe ndang parbinoto naung laho si Jonatan.

⁴Alai diholangkolang ni jarungjung, hatariparan ni si Jonatan, naeng laho taripar tu parsaroan ni halak Palistim, adong do disi dua dolok batu paiparipar be, goar ni na sada Bozez, goar ni na sadanari Sene.

⁵Ia dolok batu na sada bahen tiang tungkan utara, tondong ni Mikhmas, jala na sadanari tungkan dangsina, tondong ni Geba.

⁶Jadi ninna si Jonatan ma tu naposo siusung sinjatana: Beta hita taripar tu parsaroan ni halak na marhulup i, anggiat ditolongi Jahowa hita; ai ndang maol anggo di Jahowa manumpak marhite sian na torop, manang sian na otik.

⁷Jadi ninna siusung sinjatana ma tu ibana: Bahen ma guru lomo ni roham! Ida ma, sai donganmu do ahu, manang dompak dia lomo ni roham.

⁸Dung i ninna si Jonatan ma: Ida ma, taripar ma hita tu halahan, paandarhon hita tu nasida.

⁹Molo tung songon on dohononnasida tu hita; paima hamu ma hami disi, jadi ngongong ma hita di hajongjonganta on, jala unang nangkok hita mandapothon nasida.

¹⁰Alai molo tung didok nasida songon on: Sai nangkok ma hamu mandapothon hami, nangkok ma hita tutu, ia nunga sahat nasida tu tanganta dilehon Jahowa, i ma gabe partinandaan di hita.

¹¹ Jadi dung mullop nasida na dua tu parsaroan ni halak Palistim, gabe didok halak Palistim ma: Ida ma, nunga runkar halak Heber sian angka liang partabuniannasida na sai laon.

¹² Dung i joujou ma angka baoa di parsaroan i tu si Jonatan dohot tu siusung sinjatana, angka ninna ma: Nangkok ma hamu mandapothon hami, asa tung hupabotohon hami hata i tu hamu! Jadi ninna si Jonatan ma tu siusung sinjatana: Ihuthon ma ahu nangkok, ai nunga dilehon Jahowa nasida tu tangan ni Israel.

¹³ Jadi diparsinggorikkon si Jonatan ma tanganna dohot patna tu ginjang, jala diihuthon siusung sinjatana ibana; jadi marragean ma musu i di jolo ni si Jonatan, jala siusung sinjatana mambunu i sian pudina.

¹⁴ Jadi di na tongtang parjolo si Jonatan, dohot siusung sinjatana, mate musu i arga duapulu halak, hirahira satonga parmasan boni tano hamateannai.

¹⁵ Jadi masa ma hagodoron di parsaroan, di ladang dohot di sandok situan natorop i, tole isi ni benteng i dohot parbajo rap godoron nasida, angka hitir be do isi ni tano i, laos gabe hagodoron sian Debata do i.

¹⁶ (II.) Dung i manatapnatap ma angka parjaga dongan ni si Saul di Gibeab-Benjamin,

gabe diida ma, pasimpar pasebut do angka na guntur i.

¹⁷Dung i ninna si Saul ma tu situan natorop, angka na rap dohot ibana: Ua bilangi jala patangkas hamu, manang ise hita on na laho; jadi dibilangi nasida, gabe ida ma, ndang disi si Jonatan dohot siusung sinjatana i.

¹⁸Dung i ninna si Saul ma tu si Ahia: Boan tuson poti ni Debata, ai di tongatonga ni halak Israel do uju i poti ni Debata.

¹⁹Jadi uju mangkatai dope si Saul dohot malim i, lam tu gandana ma hagunturon di parsaroan ni halak Palistim. Dung i ninna si Saul ma tu malim i: Patait ma tanganmu!

²⁰Dung i martoletole ma si Saul dohot sandok bangso donganna i, gabe sahat ma nasida tu tongtangan; hape ida ma, masitalik donganna be do nasida disi, tung hagunturon na bolon situtu do.

²¹Halak Heber pe, dongan ni halak Palistim na sai laon, angka na nangkok rap dohot nasida tu parsaroan humaliang, nasida pe gabe dongan ni Israel, angka na rap dohot si Saul dohot si Jonatan hian.

²²Jala sude halak Israel, angka na martabuni di dolok Ephraim, dung dibege barita i naung maporus halak Palistim, dohot ma nasida porang mangeak musu i.

²³Jadi ditumpak Jahowa ma Israel sadarina i, jala taripar ma angka na martongtang i sahat ro di Bethapen.

²⁴ (III.) Dung i mansai maheu ma halak Israel sadarina i. Alai dipatolon si Saul do bangso i, ninna do: Marjea ma manang ise na mangan sagusagu sahat ro di bodari, asa martubol ahu tu musungku! Jadi ndang apus sipanganon tu sandok bangso i.

²⁵ Jadi sahat ma sandok isi ni tano i tu tombak, gabe rarak situak ni loba di sisik ni ladang i.

²⁶ Jadi dung sahat bangso i tu tombak, gabe ida ma, mabaor ma situak ni loba i, alai ndang adong na hum mambahen tanganna tu pamanganna, ai mabiar do bangso i mida uari.

²⁷ Alai anggo si Jonatan, ndang dibege barita na pinatolon ni amana situasi natorop i, gabe ditullukkon ujung ni tungkot na di tanganna i tu bagasan sarang ni loba, laos dibahen tanganna tu pamanganna, gabe sihar ma panailina.

²⁸ Dung i ninna na sahalak sian bangso i ma songon on: Gogo situtu do amanta patolonhon situasi natorop i, pola didok: Marjea ma manang ise na manganhon sagusagu sadarion. Jadi mandate ma bangso i.

²⁹ Dung i ninna si Jonatan ma: Marhinamago do tano i binahen ni damang; ua ida hamu sihar ni panailingku, dung hudai otik situak ni loba on.

³⁰Muba do siharna tagamon, tung sura mangan bangso i sadarion sian tabantaban na dapotsa sian musuna i, muba dohot panimbukbuk ni hamonangon tagamon dompak halak Palistim.

³¹Jadi ditaluhon nasida ma sadarina i halak Palistim olat ni Mikhmas sahat ro di Aiyalon, alai mansai mandate do anggo situasi natorop i.

³²(IV.) Dung i marsiraup ma bangso i tu tabantaban i, jala dibuat nasida birubiru dohot lembu dohot angka anak ni lembu, laos dipotongi manangkas di tano i, jala dipapangani rap dohot mudar.

³³Dung i adong ma na paboahon tu si Saul; ida ma, nunga mardosa bangso i dompak Jahowa, ala dipangan juhut mardongan mudar. Jadi ninna si Saul ma: Na mangalaosi patik do hamu; gulang hamu ma nuaeng sada batu na bolon tu ahu.

³⁴Angkupni didok si Saul: Marserak ma hamu tu tongatonga ni bangso i, jala dok hamu tu nasida: Masiboan lombuna dohot birubiruna ma nasida tu ahu, jala potongni hamu dison, asa mangan hamu, jala unang mardosa hamu dompak Jahowa ala manganhon juhut mardongan mudar. Jadi sandok bangso i masitogu lombuna be bornginna i, jala dipotongi disi.

³⁵ Dung i dipajok si Saul ma langgatan sada di Jahowa, i ma langgatan parjolo pinajokna i di Jahowa.

³⁶ Dung i ninna si Saul ma: Beta hita tuat mangeak halak Palistim bornginna i, jala mamupusi nasida sahat ro di torang ni ari, jala unang tatebahon sian nasida nanggo sahalak. Jadi ninna nasida ma: Bahen ma sandok guru lomo ni roham. Alai ninna malim i ma: Jumonok ma hita dison tu Debata!

³⁷ Jadi disungkunhon si Saul ma tu Debata: Na jadi do ahu tuat mangalele halak Palistim? Pasahatonmu do nasida tu tangan ni Israel? Alai ndang dialusi Debata ibana sadarina i.

³⁸ Dung i ninna si Saul ma: Ro be ma tuson sude induk ni bangso i, asa diboto jala diida hamu, manang binahen ni aha masa dosa i sadarion.

³⁹ Ai songon sintongna mangolu Jahowa, naung mangalehon tua tu Israel, nang pe di si Jonatan anakki jumpang dosa i, ingkon marutang hosa ibana, jadi ndang adong manang ise pe sian sandok bangso i mangalusi ibana.

⁴⁰ Dung i ninna si Saul ma tu sandok Israel: Bahir ma hamu di na sambariba, ianggo ahu dohot si Jonatan, anakki di na sambariba. Jadi ninna bangso i ma tu si Saul: Lomo ni roham ma bahen.

⁴¹ Jadi ninna si Saul ma tu Jahowa, Debata ni Israel: Hajongjonghon ma hasintongan!

Jadi hona ma si Jonatan dohot si Saul, lias ma anggo bangso i.

⁴²Dung i ninna si Saul ma: Dabu hamu muse rujiruji taringot tu ahu dohot taringot tu si Jonatan anakki! Jadi hona ma si Jonatan.

⁴³Dung i ninna si Saul ma tu si Jonatan: Sai paboa ma tu ahu manang aha na binahenmi! Jadi dipaboa si Jonatan ma tu ibana, ninna do: Ala na hudai otik situak ni loba marhitehite ujung ni tungkot na di tanganku; ida ma, tung patut ma ahu mate?

⁴⁴Jadi ninna si Saul ma: Songon i do bahenon ni Debata tu ahu, jala patambaonna dope, ingkon marutang hosa do ho, ale Jonatan!

⁴⁵Alai ninna situan natorop i ma tu si Saul: Tung mate ma si Jonatan, na mambahen hatuaon godang sisongon i di Israel? Dao ma i! Songon sintongna mangolu Jahowa, ndang jadi marurus obuk ni uluna nanggo sada tu tano, ai mardonganhon Debata do ibana mangulahoni sadarion! Jadi bangso i nama paluahon si Jonatan umbahen so mate.

⁴⁶Dung i nangkok ma si Saul sian na mangalele halak Palistim, mulak tu ingananna be nang halak Palistim.

⁴⁷(V.) Jadi olat ni dung pampe harajaon tu si Saul gumomgom Israel, sai marmusu do ibana dompak saluhut musuna humaliang, dompak Moab dohot dompak halak Amon, dompak Edom dohot dompak angka raja sian

Zoba, dohot dompak halak Palistim; manang dompak dia pe ditulus, sai na marantu do ibana.

⁴⁸Muba huhut gomosna papatu halak Amalek, gabe dipalua Israel sian tangan ni halak na mamupusi nasida na sai laon.

⁴⁹Ianggo angka anak ni si Saul, on do: Si Jonatan, si Ispi dohot si Malkisua; ia goar ni boruna na dua i: Goar ni buhabajuna si Merab, jala goar ni siampudan i: Si Mikhal.

⁵⁰Ia goar ni jolma ni si Saul: Si Ahinoam do, boru ni si Ahimas; ia goar ni partogi ni paranganna si Abner, anak ni si Ner, amanguda ni si Saul.

⁵¹Ai si Kis, ama ni si Saul dohot si Ner, ama ni si Abner, rap anak ni si Abiel do.

⁵²Alai sai musu tihus do dompak halak Palistim saleleng mangolu si Saul; dibahen i dipapungupungu si Saul do tu lambungna luhut halak na begu dohot ulubalang, angka na niidana.

15¹(I.) Dung i ninna si Samuel ma tu si Saul: Na sinuru ni Jahowa do ahu na jolo laho mamiahi ho bahen raja gumomgom bangsona Israel; on pe tangihon ma suara ni angka hata ni Jahowa.

²Boti hata ni Jahowa Zebaot: Marlulu ma Ahu taringot tu na binahen ni Amalek tu Israel, na niambatna di dalam uju di hananangkokna ruar sian Misir.

³On pe laho ma ho jala taluhon Amalek, jala haromhon nasida ro di saluhut na di nasida, jala unang olani nasida; ingkon bunuonmu do nang baa ro di parompuan, nang dakdanak ro di posoposo, nang lombu ro di birubiru, nang unto ro di halode.

⁴Dung i ditingtingkon si Saul ma hata i tu bangso i, laos dibilangi nasida di Telem, dua ratus ribu halak parhantarhantar, jala sampulu ribu halak sian Juda.

⁵Dung i sahat ma si Saul tu huta ni Amalek, jala dibahen pangaropan di rura.

⁶Jadi didok si Saul ma tu halak Keni: Laho ma hamu sumurut, tuat ma hamu sian tongatonga ni halak Amalek, asa unang hurendephon hamu rap dohot nasida; ai nunga mardenggan basa anggo hamu tu sandok halak Israel, uju di hananangkoknasida ruar sian Misir. Jadi sumurut ma halak Keni sian tongatonga ni Amalek.

⁷Jadi ditaluhon si Saul ma Amalek i, olat ni Hevila sahat ro di Sur, marbalokkon Misir.

⁸Dung i ditangkap ibana ma anggo si Agag, raja ni Amalek songon i mangolu, dungkon ni luhut situan natorop i direndephon dohot podang.

⁹Alai diolani si Saul dohot bangso i do anggo si Agag ro di birubiru pamuean dohot lombu, ro di pahanpahanan angka na mokmok, angka anak ni birubiru pe, ro di sude na

uli, ndang olo nasida mangarotongkon;
alai anggo ugasan rentuk angka na roa i
dirotongkon nasida do.

¹⁰(II.) Dung i ro ma hata ni Jahowa tu si
Samuel songon on:

¹¹Nunga husolsoli rohangku, apala
tung hupampe ma si Saul bahen raja, ai
nunga ditundali rohana Ahu, jala ndang
dihajongjongkon angka hatangki. Jadi
tarrimas situtu ma si Samuel, jala joujou
ibana tu Jahowa manipat sabornginna i.

¹²Dung i dipasogot si Samuel ma hehe
manogotna i manjumpangkon si Saul. Jadi
tarbortik ma tu si Samuel dipaboa halak:
Nunga sahat si Saul tu Karmel, jala ida
ma, nunga pola dipatindang di ibana tanda
parningotan sada, mamedu ibana muse jala
taripar laho tuat tu Gilgal.

¹³Jadi dung sahat si Samuel tu si Saul,
ninna si Saul ma tu ibana: Na pinasupasu ni
Jahowa ma ho! Nunga huhajongjongkon hata
ni Jahowa.

¹⁴Alai ninna si Samuel ma: Suara ni birubiru
dia do i ulaning di bagasan pinggolhon, dohot
suara ni lembu na hubege?

¹⁵Jadi ninna si Saul ma: Sian halak Amalek
do i diboan nasida, angka na niolanan ni
bangso i sian birubiru pamuean dohot lembu
bahen pelean tu Jahowa Debatam, ianggo na
teba i nunga hurotonghon hami.

¹⁶Dung i ninna si Samuel ma tu si Saul: Sae ma i! Asa hupabotohon tu ho na pinaboa ni Jahowa tu ahu naborngin. Jadi ninna si Saul ma tu ibana: Antong hatahon ma!

¹⁷Dung i ninna si Samuel ma: Nda songon on do, uju metmet ho di panimbangan ni roham, gabe induk ni angka marga ni Israel do ho, jala dimiahi Jahowa ho gabe raja gumomgom Israel?

¹⁸Jala disuru Jahowa ho tu dalan on, huhut didok: Laho ma ho jala rotongkon angka pardosa, halak Amalek i, jala marmusu ma ho dompak nasida, paima sun rendep nasida dibahen ho.

¹⁹Boasa tung so tangihononmu hata ni Jahowa, tung tagonan hape manahopi tabantaban ho dohot mambahen sogo ni roha ni Jahowa?

²⁰Dung i ro ma hata ni si Saul tu si Samuel: Nunga hutangihon antong suara ni Jahowa, nunga pola hudalani dalan na sinuru ni Jahowa ahu, jala nunga huboan tuson si Agag, raja ni Amalek i, jala nunga pola hurotonghon halak Amalek i.

²¹Ia dibuat halak situasi natorop i pe sian tabantaban i angka birubiru dohot lombu, angka na dumenggan sian sirotonghononhon hian, laho mamelehon tu Jahowa Debatam do di Gilgal.

²²Dung i ninna si Samuel ma: Tung tagamon ma lomoan roha ni Jahowa mida pelean

situtungan dohot sipanganon, asa mida panangihon di suara ni Jahowa? Ida ma, dumenggan do roha panangihon sian pelean sipotongon, jala dumenggan do marateatehon hata i, asa tabotabo sian birubiru tunggal.

²³Ai doshon dosa pangarundington do roha hatangkangon, jala hajahaton dohot pardebataon sileban sambing do na tarboan roha. Ala naung binolangkonmi hata ni Jahowa, ala ni nunga dibolongkon Ibana ho, asa unang be ho raja.

²⁴Dung i ninna si Saul ma tu si Samuel: Nunga mardosa ahu, ala naung hulaosi tona ni Jahowa dohot angka hatami; ai mabiar do ahu mida situan natorop i, gabe huoloi soaranasida i.

²⁵On pe, sai marpamuati ma roham mida dosangki, jala rap mulak ma hita, asa marsomba ahu tu Jahowa.

²⁶Alai ninna si Samuel ma tu si Saul: Nandang mulak ahu rap dohot ho, ai nunga dibolongkon roham hata ni Jahowa, jala nunga dibolongkon Jahowa ho, asa unang be ho raja gumomgom Israel.

²⁷Dung i humusor ma si Samuel naeng mardalan, gabe ditiop si Saul ma suhisuhi ni bajuna, pola maribak.

²⁸Jadi ninna si Samuel ma tu ibana: Nunga dirampas Jahowa harajaon Israel sian ho sadarion, jala dilehon do i tu donganmu na dumenggan marroha sian ho.

²⁹Angkupni ndang tagamon margapgap Haposan ni Israel manang tarsolsol bagi, ai ndadajolma Ibana, tung tarsolsol bagi.

³⁰Dung i ninna si Saul ma: Nunga mardosa ahu nuaeng, alai sai pasangap ahu maradophon sintua ni bangsongki dohot maradophon Israel, rap muli ma hita, asa marsomba ahu tu Jahowa Debatam.

³¹(III.) Jadi mulak ma si Samuel mangihuthon si Saul, gabe marsomba ma si Saul tu Jahowa.

³²Dung i ninna si Samuel ma: Boan hamu ma tu ahu si Agag, raja ni Amalek i. Jadi mardalan ma si Agag marhiras ni roha mandapothon ibana, pola didok hatana: Nunga tung mandao hapaeton ni hamatean!

³³Dung i ninna si Samuel ma: Songon binahen ni podangmi papunu angka inaina, suang songon i do punu bahenon inangmu di tongatonga ni angka inaina. Dung i ditanggoi si Samuel ma si Agag di jolo ni Jahowa di Gilgal.

³⁴Dung i laho ma si Samuel tu Rama; alai nangkok do anggo si Saul tu jabuna, tu Gibeasaul.

³⁵Jadi ndang be masipaidan si Samuel dohot si Saul rasirasa ari hamamatena; alai sai diarsakkon roha ni si Samuel do si Saul i, ala naung tarsolsol bagi Jahowa, tung dipampe si Saul gabe raja gumongom Israel.

16

¹(I.) Dung i ninna Jahowa ma tu si Samuel: Sadia leleng on ho marsak taringot tu si Saul, naung pola hubolongkon, asa unang be raja ibana gumomgom Israel? Gohi ma sahanmu dohot miak, jala laho ho, naeng suruhononku ho tumopot si Isai, isi ni Betlehem; ai nunga hupillit di Ahu sada sian angka anakna bahen raja.

²Dung i ninna si Samuel ma: Songon dia ma langkanku tusi? Ai begeon ni si Saul ma barita i, jadi bunuonna ma ahu. Dung i ninna Jahowa ma: Togutogu ma anak ni lembu sada, jala dohononmu ma: Laho mamele tu Jahowa do ahu umbahen na ro.

³Ingkon pionmu huhut si Isai tu pamelean i, dung i Ahu pabotohon tu ho manang aha sibahenonmu, ingkon miahahmu di Ahu manang ise sidohononku tu ho.

⁴Dung i dibahen si Samuel ma na nidok ni Jahowa, jala sahat ibana tu Betlehem. Jadi tarsonggot situtu ma angka sintua ni huta i manjumpangkon ibana, huhut didok: Hata hademakon do na hinarohonmu?

⁵Dung i ninna ibana ma: Hademakon do! Laho mamele tu Jahowa do ahu umbahen na ro. Manguras ma hamu, asa ro hamu donganku tu pamelean i! Dung i diuras ibana ma si Isai dohot angka anakna, laos dipio nasida tu pamelean i.

⁶Jadi dung masuk nasida, dibereng ibana ma si Eliab, gabe ninna rohana ma: On do huroha simiahan di jolo ni Jahowa!

⁷Alai didok Jahowa ma tu si Samuel: Unang ho mamereng tu rupana, manang tu tongam di dagingna, ai nunga hubolongkon anggo ibana, ai ndada marguru tu parnidaan nijolma; ianggo jolma rupa do na niidana, alai anggo Jahowa roha di bagasan do na niidana.

⁸Dung i dijou si Isai ma si Abinadab, jala didokkon ibana mamolus sian jolo ni si Samuel; alai ninna si Samuel ma: Ibana pe ndang na pinillit ni Jahowa.

⁹Dung i didokkon si Isai ma si Samma mamolus, alai ninna si Samuel muse ma: Ibana pe laos na so pinillit ni Jahowa do.

¹⁰Jadi songon i didokkon si Isai pitu angka anakna mamolus sian jolo ni si Samuel; alai ninna si Samuel ma tu si Isai; ndang adong na pinillit ni Jahowa sian nasida i.

¹¹Dung i ro muse hata ni si Samuel tu si Isai: Holan on do angka anakmu? Dung i ninna ibana ma: Tinggal dope ianggo siampudan i, jala ida ma, marmahan birubiru do ibana. Jadi ninna si Samuel ma tu si Isai: Suru ma mangalap ibana; ai ndang tagamon hundul hita laho mangan, nda jolo ro ibana tuson.

¹²Jadi disuru ma na mangalapi ibana. Alai tarrara do dagingna, uli dohot rupana sorur do ro di panailina. Dung i ninna Jahowa ma: Hehe ma ho, miahi ma ibana, ai i ma ibana!

¹³ Jadi dibuat si Samuel ma sahan parmiahan i, jala dimiahi ibana di tongatonga ni angka hahana. Dung i songgop ma Tondi ni Jahowa tu si Daud olat ni na sadari i dohot tu jolo on. Dung i borhat ma si Samuel laho mulak tu Rama.

¹⁴ (II.) Alai sumurut ma Tondi ni Jahowa anggo sian si Saul, gabe guga rohana dibahen sada tondi na jahat sian Jahowa.

¹⁵ Dung i didok angka naposo ni si Saul ma mandok ibana: Ua ida ma, sai guga do roham dibahen sada tondi na jahat sian Debata.

¹⁶ Ua martona ma ho, ale rajanami - guru dokmu do naposom angka na di jolomon - asa hulului hami sada halak na malo marhasapi; asa ia songgop muse tondi na jahat i sian Debata tu ho, gabe mamiltik ibana dohot tanganna, anggiat sonang hilalaonmu.

¹⁷ Jadi didok si Saul ma tu angka naposona: Antong denggan lulu i hamu ma di ahu sada halak, na malo marhasapi, jala boan hamu ma ibana tu ahu.

¹⁸ Jadi didok sahalak sian angka dolidoli ma mangalusi: Ida ma, huida do na jolo sada anak ni si Isai, isi ni Betlehem, na malo marhasapi, jala na begu, tau ulubalang, huhut na pantas marhata, na uli do rupana, jala dihombari Jahowa do ibana.

¹⁹ Jadi disuru si Saul ma angka suruanna mandok tu si Isai: Sai suru ma tu ahu anakmu si Daud, na marmahan birubiru i.

²⁰Dung i dibuat si Isai ma sada halode angkup ni roti dohot sapoting anggur ro di hambing tunggal sada laho manongoshon tu si Saul, boanon ni si Daud anakna i.

²¹Jadi sahat ma si Daud tu si Saul, asa marhalado di jolona; holong situtu ma roha ni rajai mida ibana, laos dipabangkit ibana bahen siusung sinjatana.

²²Dung i disuru si Saul muse suruanna mandok tu si Isai: Ua loas ma tongtong si Daud marhalado di jolongku, ai tung hasudungan ni rohangku do ibana.

²³Jadi ia jumpa soluk tondi na sian Sibolis i tu si Saul, gabe dibuat si Daud ma hasapina, laos dipiltik dohot tanganna, jadi gumanggung ma roha ni si Saul i, laos sonang dihilala, sumurut huhut sian ibana tondi na jahat i.

17 ¹(I.) Dung i santi balatuk ma parangan ni halak Palistim laho marmusu, jala marluhut nasida tu Soko, di Juda, jala marsaro di holangholang ni Soko dohot Azeka, mardonokkon Dammim.

²Santi balatuk ma dohot si Saul ro di angka baoa ni Israel, jala marsaro di rura parhariaraan, jala patutur be jongjong manjumpangkon halak Palistim marmusu.

³Jadi jongjong ma halak Palistim marbonahon dolok di bariba i, jongjong ia halak Israel marbonahon dolok di baribaon, gabe rura holangholangnasida.

⁴Dung i ruar ma sian parsaroan ni halak Palistim sahalak panglima, na margoar si Goliat, sian huta Gat, onom asta santopap ganjangna.

⁵Tahuluk sian tombaga di atas uluna, jala marpangkean baju partahanan bosi na marsisik ibana, ia dokdok ni baju partahanan i lima ribu sekkel tombaga do.

⁶Jala marondingonding tombaga ia patna duansa, jala marmundimundi tombaga di holangholang ni sasapna.

⁷Ia suhul ni podangna na saumban; anggo apala dokdok ni mata ni podangna onom ratus sekkel bosi do, jala siusung lombulombuna mardalan di jolona.

⁸Dung i sai jongjong ibana jala joujou manguai dompak parangan, ni Israel angka na patutur ninna ma mandok nasida: Boasa tung ruar hamu, jongjong patutur be laho marmusu? Nda ahu do halak Palistim, jala hamu angka naposo ni si Saul? Pillit hamu ma di hamu sahalak, asa tuat ibana mandopang ahu!

⁹Molo tung tardopang ibana ahu, jala talu ahu dibahen, jadi hatobanmuna ma hami; alai molo tung ahu patunduk ibana, jala mate ibana hubunu, jadi hamu ma hatobannami, mangoloi patu tu hami.

¹⁰Angkupni ninna halak Palistim i: Nunga tung ahu mangelesi parangan ni Israel

sadarion: Antong suru hamu ma sada halak tu ahu, asa manguji hami padua.

¹¹ Jadi dung dibege si Saul dohot sandok Israel hatahata ni halak Palistim i, gabe godoron nasida jala mabiar situtu.

¹² (II.) Ianggo si Daud, anak ni sahalak Eprata sian Betlehem Juda, na margoar Isai, ualu do anakna, nunga tungjolma sarimatua ibana uju di ngolu ni si Saul.

¹³ Laho do ianggo na tolu anak ni si Isai angka na umbalga i mangihuthon si Saul tu parporangan, ia goar ni anakna na tolu i, angka na borhat tu parporangan i on do: Si Eliab buhabajuna, paidua si Abinadab, paitolu si Samma.

¹⁴ Siampudan do ianggo si Daud. Alai dung borhat na tolu halak sihahaan i mangihuthon si Saul.

¹⁵ Marmeang muli anggo si Daud sian lambung ni si Saul laho marmahan birubiru ni amana di Betlehem.

¹⁶ Alai sai torpatorpa do ia halak Palistim i sogot manogotna i dohot bodarina i jongjong mangasapi opatpulu ari lelengna.

¹⁷ Dung i ro ma hata ni si Isai tu si Daud anakna i: Ua buat ma di angka hahami sian eme na nirondangon saepa dohot roti na sampulu on, jala siluhon mamboan tu parsaroan tu angka hahami.

¹⁸ Boan dohot susu na malhotan na sampulu pohulon tu partogi ni saribu parangan, jala

tingkir angka hahami manang na sonang nasida, jala boan sada tanda sian nasida laho mulak.

¹⁹Alai anggo si Saul, nang nasida ro di sude baoa ni Israel di rura parhariaraan do marporang dompak halak Palistim.

²⁰Jadi dipasogot si Daud ma manogotna i borhat jala dipasahat angka birubiru tu sada parmahan, jala dung dibuat sibonanonna i, laho ma ibana songon na tinonahon ni si Isai tu ibana, gabe sahat ma ibana tu parsaroan i, tongon ruar angka parangan i maraturan huhut marsurak toletole.

²¹Jadi patutur be jongjong halak Israel dohot halak Palistim paadopadop be maraturan.

²²Dung i dipeakkon si Daud ma barang binoanna i, jala dipasahat tu tangan ni halak sijaga barang, marlojong ma anggo ibana tu partontangan i, laos disaor do, huhut usouso di angka hahana mandok tabena.

²³(III.) Dung i uju mangkatai dope ibana dohot nasida, ida ma, nangkok do tongon baoa panglima i, na margoar si Goliat halak Palistim i sian huta Gat, ro sian tongatonga ni parangan ni halak Palistim, jala mangasapi songon hatahatana na sai laon, dibege si Daud antong.

²⁴Alai anggo sude baoa ni Israel, dung diida nasida baoa i, marbubur be ma nasida maporus maradophon ibana, jala mabiar situ.

²⁵Dung i ninna angka baoa ni Israel ma: Atehe, nunga diida hamu baoa na nangkohi? Ai laho mangasapi Israel do ibana umbahen na nangkok. Dibahen i manang ise na mambunu ibana, mamora situtu do bahenon ni rajai, jala lehononna boruna bahen jolmana, jala paluaonna do sian rodi pinompar ni amana di Israel.

²⁶Dung i ninna si Daud ma tu baoa angka na jongjong di lambungna songon on: Aha do bahenon tu baoa na mambunu halak Palistim adui, jala na paholang haurahon sian Israel? Ai tung ise ma pola halak Palistim siparhulup on, tung asapanna angka parangan ni Debata na mangolu i?

²⁷Dung i dipaboa situasi natorop i ma tu ibana hombar tu hata ondeng: Songon i ma tutu bahenon tu baoa na mambunu ibana.

²⁸Jadi dibege si Eliab hahana i pangkataionna tu angka baoa i, gabe marpiarpiar ma rimas ni si Eliab dompak si Daud, laos didok ma: Marhua tung tuat ho tuson, jala tu ise do dipasahat ho birubiru na otik i di halongonan? Tangkas do hutanda panengaon dohot hinajahat ni roham: Ai na naeng marnida na marporang i do ho umbahen na tuat.

²⁹Dung i ninna si Daud ma: Ai apala aha do na hubahen i? Nda hata sangkababa sambing do i?

³⁰Dung i humusor ma ibana manundalhon hahana, mandompakkon halak na asing, laos

songon hatana ondeng do didok, laos songon hata parjolo i do alus ni situan na torop i tu ibana.

³¹ (IV.) Jadi dung dibege nasida hata angka na pinaboa ni si Daud, gabe dipatolhas ma i tu jolo ni si Saul, na mandokkon alapon ibana.

³² Dung i ninna si Daud ma mandok si Saul: Unang pola godoron roha ni manang ise ala bayo an! Laho pe naposomon mandopang halak Palistim on.

³³ Alai ninna si Saul ma mandok si Daud: Ndang tarbahen ho laho mandopang halak Palistim on laho mangalo ibana, ai bajar dope ho, alai anggo ibana baoa na somal marmusu sian sieteketehonna.

³⁴ Dung i ninna si Daud ma mandok si Saul: Marmahan birubiru ni amana do naposomon sahali, gabe ro ma sada singa dohot gompul mangaluahon sada birubiru sian pungan i.

³⁵ Jadi ruar ma ahu mangalele, laos huompongi ma ibana jala hupalua birubiru i sian babana; jadi uju naeng timbungonna ahu, husoro ma misena, laos hupatunduk ma jala hubunu ibana.

³⁶ Nang singa i, nang gompul i dibunu naposomon do; ingkon suman songon na sada sian i bahenon tu halak Palistim siparhulup on, ala naung niasapanna angka parangan ni Debata na mangolu i.

³⁷ Angkupni ninna si Daud: Jahowa na paluahon ahu sian sisilon ni singa dohot sian

sisilon ni gompul, paluaonna do ahu sian tangan ni halak Palistim. Dung i ninna si Saul ma mandok si Daud: Antong laho ma ho, sai didongani Jahowa ma ho!

³⁸Dung i disolukkon si Saul ma pangkeanna sandiri tu si Daud, jala diampehon tahuluk tombaga tu uluna, jala marbaju partahanan ibana dibahen.

³⁹Dung i disolothon si Daud ma podangna tu pangkeanna, jala dipungka mardalandan, ai ndang dung dope diunjuni. Dung i ninna si Daud ma mandok si Saul: Nandang tarbahen ahu mardalan mamangke sisongon i, ai ndang dung dope huunjuni, laos ditanggali si Daud do i muse sian ibana.

⁴⁰Dung i dibuat ma tungkotna tu bagasan tanganna, jala dipillit di ibana lima batu angka na landit sian sunge, jala dibahen ma i tu bagasan hadanghadanganna, dipatioptiop huhut ambalangna laho mandapothon halak Palistim i.

⁴¹Ro ma dohot halak Palistim i mandapothon si Daud, jala baoa siusung lombulombuna di jolona.

⁴²(V.) Dung i manaili ma halak Palistim i, gabe diida ma si Daud, jala lea rohana mida ibana, ai na bajar dope jala tarrara bohina jala uli rupana.

⁴³Dung i ninna halak Palistim i ma mandok si Daud: Hira biang do ahu di roham umbahen na ro ho mamboan tungkot manjumpangkon

ahu? Laos dipambuburahan halak Palistim i ma si Daud tu debatana.

⁴⁴Ia hata ni halak Palistim i tu si Daud: Haru ro ma ho mandapothon ahu, asa hulehon sibukmu tu pidong angka na martongatonga langit dohot tu binatang na di ladang.

⁴⁵Alai ninna si Daud ma mandok halak Palistim i: Ia ho da ro tu ahu mangasahon podang dohot hujur dohot lombulumbu; alai anggo ahu ro tu ho mangasahon goar ni Jahowa Zebaot, Debata ni parangan ni Israel, angka na niasapanmi.

⁴⁶Apala sadarion ma pasahaton ni Jahowa ho tu bagasan tanganku, asa hubunu ho, jala husirang ulum sian ho, jala hulehon bangke ni parangan ni halak Palistim sadarion tu pidong angka na martongatonga langit dohot tu binatang na di ladang, asa tung sandok tano on mananda, adong do Debata di Israel.

⁴⁷Jala sandok loloanon mananda, paboa na so marhite sian podang manang hujur Jahowa manolongi, ai rimpun di Jahowa do parporangan, jala pasahatonna do hamu tu bagasan tangannami.

⁴⁸Jadi dung hehe halak Palistim i, laos mardalan manjumpangkon si Daud i nian, manilu ma si Daud manahopi tongtangan i manjumpangkon halak Palistim i.

⁴⁹Dung i dibahen si Daud ma tanganna tu bagasan hadanghadanganna, dibuat ma sian i batu sada, laos mangambalang

ibana, gabe hona ma pardompahan ni halak Palistim i, laos bongot ma batu i tu bagasan pardompahanna i, jala tungkap ma ibana tu tano.

⁵⁰Asa gumogo ma si Daud sian halak Palistim, ambalang dohot batu sambing binoanna jala dipatunduk halak Palistim i, jala dibunu ibana alai ndang adong anggo podang di bagasan tangan ni si Daud.

⁵¹Dung i marlojong ma si Daud, jala jongjong di atas ni halak Palistim i, jala ditangkap podangna, jala diumpat ma i sian sarungna, jala dibunu ibana, jala dilobong uluna. Jadi dung diida halak Palistim naung mate do pangulimanasidai, maporus be ma nasida.

⁵²(VI.) Dung i hehe ma angka baoa sian Israel dohot sian Juda marsuraksurak huhut mangeak halak Palistim sahat ro di Gat, sahat huhut ro di harbangan ni Ekron; jadi marragean ma halak Palistim di dalan laho tu Saraim sahat ro di Gat dohot Ekron.

⁵³Dung i mulak ma halak Israel sian na mangalotongi halak Palistim, jala ditaban duduk parsaroannasida i.

⁵⁴Dung i dibuat si Daud ma ulu ni halak Palistim i, jala diboan do i tu Jerusalem; alai anggo sinjatana dipeakkon do di bagasan undungundungna.

⁵⁵Alai uju diida si Saul si Daud i ruar manjumpangkon halak Palistim i, ninna ibana

ma tu si Abner, partogi ni angka parangan i: Anak ni ise do dolidoli on, ale Abner? Jadi ninna si Abner ma: Songon sintongna mangolu hosam, ale rajanami, molo tung huboto.

⁵⁶Dung i ninna rajai ma: Antong pamanat ma manang anak ni ise do dolidoli an.

⁵⁷Jadi dung mulak si Daud sian pamunuan di halak Palistim i, diarahon si Abner ma ibana mamboan tu jolo ni si Saul, jala ulu ni halak Palistim i di bagasan tanganna.

⁵⁸Dung i ninna si Saul ma tu ibana: Atehe dolidoli, anak ni ise do ho? Jadi ninna si Daud ma: Anak ni naposom si Isai, isi ni Betlehem i do ahu.

18¹(I.) Jadi dung sidung si Daud mangkatai dohot si Saul, masijaloan ma roha ni si Jonatan dohot roha ni si Daud, jala dihaolongi si Jonatan ibana, songon hosana sandiri.

²Laos dibuat si Saul ibana sadarina i, jala ndang be diloas ibana mulak tu jabu ni amana.

³Dung i umpungka padan ma si Jonatan dohot si Daud, ala hinaholonganna ibana songon hosana sandiri.

⁴Dung i ditanggal si Jonatan ma baju na pinangkena, jala dilehon ma i tu si Daud, ro di pangkeanna angka na asing ro di podangna, siorna dohot hohosna.

⁵Dung i borhat ma si Daud, manang tudia pe disuru si Saul ibana, sai na marantu do ibana; alani dipampe si Saul ma ibana manguluhon angka baoa parporang, gabe hasian ni sandok bangso i ibana nang hasian ni angka naposo ni si Saul.

⁶(II.) Alai dung mulak nasida, mulak dohot si Daud sian pamunuan ni halak Palistim i, ruar ma angka parompuan sian saluhut huta ni Israel marudurudur laho marende manomunomu raja Saul mardonganna arbab, suraksurak dohot parhinaloan.

⁷Dung i marende taripar ma angka parompuan i, mamiltik parhinaloan huhut mandok; marriburibu do naung tinaluhon ni si Saul, alai anggo si Daud marloksaloksa do!

⁸Jadi tarrimas situtu ma si Saul, jala barjing rohana mida hata i, gabe didok ma: Nunga tung marloksaloksa hape tu si Daud dilehon nasida, ia tu ahu holan marriburibu dilehon, holan jujungan harajaon i na ma so sahat tu ibana.

⁹Jadi mangiburu ma roha ni si Saul mida si Daud olat ni ari i tu jolo.

¹⁰Dung i marsogotna i songgop ma muse tondi na jahat i sian Debata tu si Saul, gabe ritoritoo ibana di tongatonga ni jabuna; alai marhasapi ma ianggo si Daud songon na siap ari, jala patioptiop mundimundi ianggo si Saul.

¹¹ Dung i dipantomhon si Saul ma mundimundi i huhut ninna rohana:

Pantikhononku ma si Daud tu dorpi. Alai disalahon si Daud do pola dua hali.

¹² Jadi mabiar ma si Saul maradophon si Daud, ai didongani Jahowa do ibana, nunga munsat Ibana ianggo sian si Saul:

¹³ Dung i dipaholang si Saul ma si Daud i sian lambungna, jala dipampe ibana bahen induk ni saribu parangan, jadi marmeang muli ibana di adopan ni bangso i.

¹⁴ Ia si Daud sai marantu do di saluhut angka dalanna, jala didongani Jahowa ibana.

¹⁵ Jadi dung diida si Saul marantu situtu do ibana, muba ma biarna mida ibana.

¹⁶ Alai holong do roha ni sandok Israel dohot Juda mida si Daud, ai marmeang muli do ibana manguluhonnasida.

¹⁷ (III.) Dung i ninna si Saul ma tu si Daud: Ida ma, lehononku ma borungku sihahaan si Merab, bahen jolmam, asal anak na begu ho di ahu jala manolehon angka hamusuon ni Jahowa! Alai ninna roha ni si Saul do; ndada tanganku sandiri mangonai tu ibana, tagonan tangan ni halak Palistim patunduk ibana.

¹⁸ Alai ninna si Daud ma mandok si Saul: Tung ise ma ahu pola jala aha ngolungku pola nang pinompar ni damang di Israel, umbahen ingkon gabe hela ni rajai ahu?

¹⁹ Alai dung jumpang tingki lehonon nian si Merab boru ni si Saul, tu si Daud, gabe tu

si Adriel, isi ni Mehola nasida dilehon bahen jolmana.

²⁰Alai holong do roha ni si Mikhal, boru ni si Saul, mida si Daud. Jadi adong ma na pabotohon i tu si Saul, gabe tongon do hata i tu rohana.

²¹Jadi ninna roha ni si Saul ma: Lehononku ma i tu ibana, asa gabe jorgong di ibana, asa tangan ni halak Palistim patunduk ibana. Dung i ninna si Saul ma tu si Daud paduahalihon: Ingkon gabe helangku ma ho sadarion.

²²Jadi martona ma si Saul tu angka naposona: Mangkatai ma hamu tu si Daud marsibuni, dohononmuna ma: Ida ma, lomo do roha ni rajai mida ho, jala luhut naposona mangkaholongi ho; on pe oloi ma hela on ni rajai ho.

²³Jadi dihatahon angka naposo ni si Saul ma angka hata i tu pinggol ni si Daud. Alai ninna si Daud ma hata otik do huroha, di rohamuna, gabe hela ni rajai iba? Hape halak na pogos jala na bile do ia ahu.

²⁴Jadi dipaboa angka naposo ni si Saul ma hata i tu ibana: Songon on do angka hata ni si Daud.

²⁵Dung i ninna si Saul ma: Ingkon songon on do dohononmuna tu si Daud: Ndada mangido boli rajai, nda holan saratus sibursibur sian halak Palistim laho martubol tu musu ni rajai;

alai disangkapi roha ni si Saul mambunu si Daud marhitehite tangan ni halak Palistim.

²⁶Jadi dipatolhas angka naposona ma hata i tu si Daud, gabe tongon ma hata i di roha ni si Daud, dioloi ma hela on ni rajai ibana. Alai ndang dope jumpang anggo buhul ni ari.

²⁷Dung i borhat ma si Daud jala mardalan, ibana dohot angka baoa donganna, laos dibunu ma halak Palistim dua ratus halak. Dung i diboan si Daud ma sibursiburnasida, jala gok bilanganna disombahon tu rajai, asa gabe hela ni rajai ibana. Jadi dilehon si Saul ma di ibana boruna si Mikhal bahenjolmana.

²⁸Jadi diida si Saul ma jala mananda rohana na nidongan na ni Jahowa do si Daud; si Mikhal, boru ni si Saul pe mangkaholongi ibana.

²⁹Dibahen i lam tamba dope biar ni si Saul maradophon si Daud, jala musu ni si Saul do si Daud saleleng mangolu ibana.

³⁰Dung i ruar ma angka induk ni halak Palistim, alai manang piga hali pe nasida ruar sai marantuan do si Daud sian saluhut naposo ni si Saul, gabe marmulia situtu ma goarna.

19¹(I.) Dung i ro ma hata ni si Saul tu si Jonatan, anakna i dohot tu sude naposona, naeng mambunu si Daud; alai lomo situtu do ianggo roha ni si Jonatan anak ni si Saul, mida si Daud.

²Jadi dipaoa si Jonatan ma barita i tu si Daud, ninna ma: Sai dilului roha ni damang

si Saul naeng mambunu ho; dibahen i, ua jaga ma dirim ro di manogot huhut marondingonding ho laos martabuni.

³Alai anggo ahu ruar ma ahu, jala jongjong di lambung ni damang di ladang parmiananmi, jala taringotanku ma ho tu damang, jala paboakonku ma tu ho manang aha na huida.

⁴Jadi ditaringoti si Jonatan ma na denggan sian si Daud tu si Saul amana i, ninna ma mandok ibana: Unang tung mardosa rajai tu si Daud, ai ndang adong dosana tu ho, mansai marguna situtu do balik pambahenanna i tu ho.

⁵Ai nunga pola diseahon hosana laho mambunu halak Palistim i, jala tua bolon do binahen ni Jahowa tu sandok Israel; nunga diida ho tahe, jala las roham disi; boasa tung naeng mardosa ho di mudar na so marpipot, naeng mambunu si Daud soada alana.

⁶Jadi ditangihon si Saul ma soara sipaingot ni si Jonatan, pola maruari si Saul: Songon sintongna mangolu Jahowa, molo tung bunuon be ibana.

⁷Jadi joujou ma si Jonatan di si Daud, jala dipajojor tu ibana sude hata ondeng; laos ditogihon si Jonatan ma si Daud tu si Saul, asa di adopanna ibana songon siap ari.

⁸(II.) Alai tubu ma muse hamusuon, jadi borhat ma si Daud asa marporang dompak halak Palistim, gabe talu situtu ma nasida

dibahen, laos maporus nasida maradophon ibana.

⁹Alai ro ma muse tondi na jahat sian Jahowa tu si Saul, tongon hundul ibana di bagasan jabuna, patioptiop mundimundina di bagasan tanganna, marhasapi do anggo si Daud.

¹⁰Jadi diunjuni si Saul ma mamantikkon si Daud tu dorpi marhitehite mundimundina, alai didengkari ma pantom ni si Saul i, gabe pantik ma mundimundi i tu dorpi, laos maporus ma si Daud paluahon dirina bornginna i.

¹¹Alai marsuru suruanna ma si Saul tu jabu ni si Daud, asa dijaga ibana laos dibunu manogotna i. Alai ro ma si Mikhal, jolmana i paboahon barita i tu si Daud, ninna ma: Molo so paluaonmu hosam saborngin on, ingkon bunuonna ho manogot.

¹²Dung i ditantan si Mikhal ma si Daud sian jandela tu toru, gabe laho ma ibana jala maporus palua dirina.

¹³Dung i dibuat si Mikhal ma ganaganaan terapim, jala dipeakkon tu podoman i, jala bobak ni hambing halang uluna dibahen, jala diborhosi dohot hain panas.

¹⁴Dung i marsuru surusuruanna ma si Saul mangalap si Daud nian, gabe ro ma hata ni si Mikhal: Marsahit do ibana ninna.

¹⁵Alai disuru si Saul muse angka suruani maningkir si Daud nian, huhut martona: Sai

boan hamu ibana nangkok tu ahu di bagasan podoman i, asa binunu ibana.

¹⁶Jadi dung ro angka suruani, ida ma, ganaganaan terapim do hape di podoman i, jala bobak ni hambing halang uluna.

¹⁷Jadi ninna si Saul ma tu si Mikhal: Boasa ma tung songon i sipaotootom tu ahu, jala diloas ho laho musungku, asa malua ibana? Jadi ninna si Mikhal ma tu si Saul: Ninna ibana do mandok ahu: Loas ahu laho, boasa ma tagonan bunuonku ho?

¹⁸(III.) Dung i maporus ma si Daud palua dirina, gabe sahat ibana tu si Samuel di Rama, jala dipajojor tu ibana; sude naung binahen ni si Saul tu ibana; laos mardalan ma ibana rap dohot si Samuel, gabe maringan nasida ni Naiot (angka inganan ni panurirang).

¹⁹Dung i dibaritahon halak ma tu si Saul songon on: Ida ma, maringan do si Daud di Naiot mardonokkon Rama.

²⁰Jadi marsuru angka suruan ma si Saul laho mangalap si Daud, gabe diida nasida ma luhutan ni panurirang angka na manurirangi, jala si Samuel jongjong disi induknasida. Jadi songgop ma tondi ni Debata tu angka suruan ni si Saul, gabe manurirangi ma nang nasida.

²¹Dung i dibaritahon halak ma i tu si Saul, gabe marsuru surusuruan angka na asing ma ibana, manurirangi ma nang nasida; dung i diulahi si Saul muse marsuru angka

surusuruan patoluhalihon, alai nasida pe manurirangi do.

²²Dung i ibana sandiri pe laho tu Rama, jadi dung sahat ibana tu sumur bolon na di Seku, usouso ma ibana: Didia do si Samuel dohot si Daud ninna? Gabe didok halak ma: Ida ma, di Naiot mardonokkon Rama do nasida.

²³Dung i laho ma ibana tusi, tu Naiot mardonokkon Rama, gabe songgop ma dohot tu ibana Tondi ni Debata, gabe mardalani ibana huhut manurirangi paima sahat ibana tu Naiot mardonokkon Rama.

²⁴Dung i mananggal pangkeanna ma nang ibana, laos manurirangi ma dohot ibana di adopan ni si Samuel, gabe bustang ibana salangsalang manipat sadari sabornginna i. Alani do umbahen didok halak: Dohot do si Saul hape di tongatonga ni angka panurirang?

20¹(I.) Dung i maporus ma si Daud sian Naiot mardonokkon Rama manopot si Jonatan, ninna ma dung ro di jolona: Aha do na hubahen? Aha do salangku jala aha do dosangku di jolo ni amangmu, umbahen sai lotonganna hosangki?

²Alai ninna si Jonatan ma: Dao ma i! Nandang tagamon mate ho; ida ma, ndang adong dibahen damang, nang hata balga manang hata metmet, nda jolo dipapatar tu pinggolhon. Boasa ma tung tamondingkonon ni damang sian ahu ia hata on? Nandang tagamon songon i.

³Dung i lam maruari ma si Daud, ninna ma: Tangkas do diboto amangmu naung jumpangan asi ni roha ahu maradophon ho, gabe ninna rohana: Ndang jadi botoon ni si Jonatan hata on, asa unang marsak rohana. Alai tongon do, songon sintongna mangolu Jahowa, mangolu dohot hosam: Hira holan salangka sambing holangholangku dohot hamatean.

⁴Dung i ninna si Jonatan ma tu si Daud: Manang aha pe didok roham, sai na bahenonku do i tu ho.

⁵Dung i ninna si Daud ma tu si Jonatan: Ida ma, marsogot ma poltak ni bulan, ingkon hundul ahu nian somalna rap mangan dohot rajai; alai loas ma ahu laho asa martabuni ahu di ladang sahat ro di patolu bodarihon.

⁶Tung sura usousuan ni amangmu ahu, jadi dohononmu ma: Mansai gogo hata ni si Daud mangido tu ahu, asa manilu ibana tu Betlehem hutana i, ai disi do masa pelean siganup taon di sandok margai.

⁷Tung sura dohononna: Denggan do i! Adong ma hasonangan di naposomon; alai molo tung marpiarpiar rimasna, botoonmu ma naung putus rohana mambahen na jahat i.

⁸On pe sai bahen ma asi ni roha tu naposomon, ai nunga pola mambahen parjanjian ho tu naposom di jolo ni Jahowa. Alai molo tung adong salangku, ho ma

tagonan mambunu ahu, boasa ma tung togihononmu ahu pasahathon tu amangmu.

⁹Dung i ro ma hata ni si Jonatan: Dao ma i sian ahu! Molo tung mamoto ahu, naung putus roha ni damang pasonggophon tu ho na jati, tung so pabotohononku ma tu ho?

¹⁰Jadi ninna si Daud ma tu si Jonatan: Antong ise ma pabotohonsa tu ahu? Molo tung manang aha hata na koras alushonon ni amangmu tu ho?

¹¹Dung i ninna si Jonatan ma tu si Daud: Beta hita ruar tu ladang. Jadi ruar ma nasida duansa tu ladang.

¹²(II.) Dung i ninna si Jonatan ma tu si Daud marmangmangkon: Ale Jahowa, Debata ni Israel! Molo dung hurisik roha ni damang marsogot songon on manang haduan, gabe ida ma, denggan rohana taringot tu si Daud, gabe so mamintor husuru tu ho pabotohonsa tu pinggolmu.

¹³Ingkon songon i bahenon ni Jahowa tu si Jonatan, jala patambaonna dope songon i! Alai molo tung tagonan marsangkap hajahaton damang dompak ho, sai na papataronku do tu pinggolmu, asa marsuru ho, gabe laho ho mardamedame, jadi sai donganan ni Jahowa ma ho, songon na nidongananna damang na sai laon.

¹⁴Alai ndada dolan di ngolungku bahenonmu asi ni roha ni Jahowa tu ahu nang dung mate ahu:

¹⁵Unang tung tostosi asi ni roham sian pinomparhu ro di saleleng ni lelengna, nang dung disiaphon Jahowa angka musu ni si Daud, ganup sian sisik ni tano on.

¹⁶Jadi mambahen padan ma si Jonatan tu isi ni bagas ni si Daud, asa marlulu Jahowa dompak angka musu ni si Daud.

¹⁷Pola diulahi si Jonatan patolonhon si Daud dibahen holong ni rohana mida ibana, ai doshon dirina ibana dihaholongi.

¹⁸Dung i ro ma hata ni si Jonatan tu ibana: Marsogot ma poltak bulan, jadi usousuan ni halak ma ho, ai rumar ma hundulanmu hian dapotonna.

¹⁹Alai anggo patoluarohon pasigoponmu ma tuat, jala topotonmu partabunianmu najolo uju di ari pambahenan, jala hundul ma ho di lambung batu Asel.

²⁰Langgo ahu siorhononku ma tolu sumbia tu lambungna, songon na marsalamat ahu paulaonku.

²¹Dung i ida ma, suruhononku ma naposo i: Laho ma ho mangalului angka sumbia i! Molo tung dohononku tu naposo i: Ida ma, tartungkanon sian ho angka sumbia i, jomput ma! Sai ro ma ho, ai dame ma taringot tu ho, jala mora soada songon sintongna mangolu Jahowa!

²²Alai molo tung songon on hatangku tu dolidoli i: Ida ma, tartungkan adui, tungan

jolom angka sumbia i, denggan ma ho laho, ai Jahowa marsuru ho.

²³Alai anggo hata na itapadanhon, ahu dohot ho, ida ma, Jahowa do di tongatonganta ro di saleleng ni lelengna.

²⁴(III.) Dung i laho martabuni ma si Daud di ladang. Jadi dung jumpang poltak ni bulan, hundul ma rajai naeng mangan sagusagu.

²⁵Alai dung hundul rajai tu hundulanna hian, songon na somal na sai laon, tu hundulan mardonokkon dorpi; jadi hehe ma anggo si Jonatan, hundul ma anggo si Abner tu lambung ni si Saul; alai rumar do ianggo inganan ni si Daud.

²⁶Alai ndang mangkuling si Saul anggo sadarina i, ai ninna rohana do: Atik tung adong masa di ibana, ra tung ramun ibana, ramun ma tutu tagamon.

²⁷Alai marsogotna i, paduaarihon dung poltak bulan, laos rumar inganan ni si Daud, gabe ro ma hata ni si Saul tu si Jonatan, anakna i: Boasa so ro anak ni si Isai, nang nantoari, nang sadarion mangan sagusagu?

²⁸Jadi ro ma alus ni si Jonatan tu si Saul: Ringkot situtu si Daud mangido tu ahu naeng laho tu Betlehem.

²⁹Pola didok, ua loas ma ahu laho, ai mamele do hami na saompu di bagasan huta i, jala apala dahahang sandiri martona di ahu; on pe, molo maruli asi ni roha ahu sian ho, ua husiluhon ma, asa huida angka dahahang i;

alani do umbahen so ro ibana mandapothon meja ni rajai.

³⁰Jadi marpiarpiar ma rimas ni si Saul, mida si Jonatan, ninna ma tu ibana: Anak jea na so siat hata do ho! Nda nunga huboto naung dipillit ho anak ni si Isai mambahen haurahonmu dohot haurahon ni inam na tumubuhon ho?

³¹Alai saleleng mangolu anak ni si Isai di tano on, ndang tagamon hot ho, nang harajaonmu. On pe suruhon ma mangalap ibana tu ahu, ai anak sibunuon do ibana!

³²Jadi ro ma alus ni si Jonatan tu si Saul amana i, ninna ma tu ibana: Boasa tung ingkon bunuon ibana? Aha sala binahenna?

³³Jadi dipantomhon si Saul ma mundimundi tu ibana, naeng manullang ibana. Jadi mamoto ma roha ni si Jonatan, naung putus roha ni amana i, naeng mambunu si Daud.

³⁴Dung i hehe ma si Jonatan sian lambung meja i marmurukmuruk situtu, laos so mangan sagusagu ibana paduaarihon dung poltak bulan; ai marsak do rohana taringot tu si Daud, ala na pinamalu ni amana i ibana.

³⁵(IV.) Dung i manogotna i ruar ma si Jonatan tu ladang di tingki naung jinanjina i tu si Daud, sada dakdanak na metmet donganna.

³⁶Dung i ninna ma mandok naposona i: Marlojong ma ho mangalului sumbia, angka na naeng siorhononku. Dung i marlojong ma

naposo i, gabe disiorhon ibana ma sumbia sada salpu sian atas uluna.

³⁷Jadi dung sahat naposo i tu hapatean ni sumbia na siniorhon ni si Jonatan, joujou ma si Jonatan sian pudi ni naposo i, ninna ma: Nda tartungkan adui, tungkan jolom sumbia i?

³⁸Jadi sai joujou si Jonatan sian pudi ni naposo i: Haru silu, hatop ma ho, unang ho mangulon! Jadi dijomput naposo ni si Jonatan ma sumbia i, laos mulak diboan tu tuanna.

³⁹Alai anggo naposo i ndang diboto parbohalon, holan si Jonatan dohot si Daud do masibotoan di hata i.

⁴⁰Dung i dipasahat si Jonatan ma angka parhohasna tu naposo donganna i, jala ninna ma mandok ibana: Laho ma ho mamboan angka i tu huta.

⁴¹Jadi dung laho naposo i, hehe ma si Daud sian sambariba tungkan dangsina jala manungkap tu tano huhut marsomba tolu hali; dung i masiummaan ma nasida huhut tangis be alai gumogo ma ianggo si Daud.

⁴²Dung i ninna si Jonatan ma tu si Daud: Laho ma ho mardamedame! Manang aha naung itabulanhon, hita na dua, marhitehite Goar ni Jahowa, pola tadok: Jahowa do di tongatonganta, dohot di tongatonga ni pinomparhu tu pinomparmu ro di saleleng ni lelengna.

21

¹(I.) Dung i hehe ma si Daud laos mardalan; alai anggo si Jonatan mulak do tu huta.

²Dung i sahat ma si Daud tu Nob, manopot malim Ahimelek, jadi tarsonggot ma si Ahimelek manjumpangkon si Daud, jala ninna ma tu ibana: Boasa tung punjung sasada ho, jala soadong donganmu nanggo sahalak.

³Dung i ninna si Daud ma tu malim Ahimelek: Nunga ditonahon rajai sada hata tu ahu, jala didok do mandok ahu: Nandang jadi botoon ni manang ise agia aha taringot tu hata umbahen na husuru ho, jala na hutonahon tu ho; ianggo angka naposo i nunga hudokkon topotonna inganan adui.

⁴On pe, molo adong manang aha talpe buaton ni tanganmu, manang sagusagu lima, sai lehon ma tu bagasan tanganku, manang aha tahe sipanganon na asing jumpang ho.

⁵Dung i ninna malim i ma mangalusi si Daud: Nandang adong ianggo sagusagu hian talpe buaton ni tanganku, nda holan sagusagu na marhadohoan adong; asal haramotan angka naposo dirina sian parompuan.

⁶Jadi ninna si Daud ma mangalusi malim i: Nunga pola tolu ari lelengna tarolat hami sian parompuan tagan so borhat dope ahu; angka ulaula ni angka naposo pe badia do; tung sura pe ramun lapangna on, ingkon gabe badia do i antong sadarion marhitehite ulaula i.

⁷ Jadi dilehon malim i ma tu ibana sagusagu na marhadohoan i, ala so adong disi sagusagu hian, dungkon ni sagusagu sipaidaidaon, angka na binuat sian adopan ni Jahowa, laho mameakkon sagusagu na las di ari pambuatanna i.

⁸ Alai adong do disi sahalak sian angka naposo ni si Saul na tarhurung di jolo ni Jahowa sadarina i, si Doeg goarna marga Edom, induk ni angka parmahan ni si Saul.

⁹ Dung i ninna si Daud ma tu si Ahimelek: Atehe adong do dison talpe buaton ni tanganmu hujur sada manang podang? Ai ndang sanga buaton ni tanganku nang podangku nang sinjatanku, ai mansai ringkot hata ni rajai.

¹⁰ Dung i ninna malim i ma: Podang ni si Goliat, halak Palistim i naung binunumi di rura parhariaraan, i ma na dison binalutan di bagasan dagangan, di pudi ni baju epod; molo naeng buatonmu i di ho ba buat; ai ndang adong na asing dison dungkonni. Jadi ninna si Daud ma: Nandang adong tudoshon ni dengganna, lehon ma i di ahu.

¹¹ (II.) Dung i borhat ma si Daud, laos maporus sadarina i maradophon si Saul gabe tolhas ma ibana tu si Akis, raja sian Gat.

¹² Alai ninna angka naposo ni si Akis ma tu ibana: Nda on do si Daud raja ni luat i? Nda taringot tu ibana do marende taripar angka parompuan songon on: Si Saul manaluhon

marriburibu halak, alai anggo si Daud marloksaloksa do ditaluhon.

¹³Dung i holsoan ma si Daud di bagasan rohana umbege angka hata i, laos tahuton situtu ibana maradophon si Akis, raja sian Gat.

¹⁴Pola dipaasing ibana pangalahona di jolonasida jala lalaen ibana dipaula mangaruntarunta sian tangannasida jala diransangi angka hinsuhinsu, jala mabaor gubogubona dibahen tu janggutna.

¹⁵Dung i ninna si Akis ma tu angka naposona: Ida ma, nunga diida hamu baoa na lalaen i, boasa tung boanonmuna ibana tu ahu? (21-16) Hurangan angka halak na lalaen do ahu huroha, umbahen boanonmunajolma on, asa patuduhon lalaenna tu ahu? Tung tama majolma sisongon i masuk tu jabungku?

22¹(I.) Dung i laho ma si Daud sian i jala malua tu liang Adullam. Jadi dung dibege angka hahana ro di sandok pinompar ni amana barita i, gabe tuat ma nasida mandapothon ibana tusi.

²Dung i marpungu ma tu ibana sude baoa angka na targogot dohot parutang, ro di sude angka na marsak marroha, jadi ibana ma induknasida, gabe arga opat ratus halak donganna.

³Dung i laho si Daud sian i tu Mispa di Moab, jala ninna ma mandok raja sian Moab; ua loas

ma marmeang muli damang dohot dainang di hamu, paima huboto manang aha sibahenon ni Debata tu ahu!

⁴Jadi ditogihon ma nasida tu jolo ni raja sian Moab, asa tinggal nasida di lambungna saleleng si Daud martanobato di atas dolok.

⁵Dung i ro ma hata ni panurirang si Gad tu si Daud: Unang ho tinggal di robean martanobato laho ma ho manopot tano Juda. Jadi laho ma si Daud, gabe tolhas ma ibana tu tombak Heret.

⁶(II.) Dung i tarbortik ma tu si Saul barita taringot tu si Daud dohot taringot tu baoa angka donganna i; hundul di Gibeia ianggo si Saul di toru ni hariara di atas robean jala hujurna di bagasan tanganna, jala saluhut naposona jongjong di lambungna.

⁷Dung i ro ma hata ni si Saul tu naposona, angka na jongjong di lambungna: Ua tangihon ma, hamu ale halak Benjamin, tung tagamon ma lehonon ni anak ni si Isai tu hamu sudena angka hauma dohot porlak anggur? Tung tagamon ma pampeonna hamu sude bahen induk ni sasaribu manang induk ni sasaratus?

⁸Umbahen tung luhut hamu marbulan mangalo ahu, jala so adong manang ise na papatar tu pinggolhu agia aha, gari anakku sandiri marpadanpadan do tu anak ni si Isai, jala ndang adong nanggo sada sian hamu marsahit ni roha taringot tu ahu manang papatarhonsa tu pinggolhu, naung

pinahehe ni anakku naposongku mangalo ahu mangonggop ahu, songon na andar nuaeng.

⁹Jadi ro ma alus ni si Doeg, marga Edom i, na jongjong di lambung ni angka naposo ni si Saul, ninna ma: Nunga huida anak ni si Isai ro tu Nob manopot si Ahimelek, anak ni si Ahitub.

¹⁰Ibana ma manungkunhon tu Jahowa taringot tu langkana, dilehon huhut bohal tu ibana, dilehon muse dohot podang ni si Goliat, halak Palistim i, tu ibana.

¹¹Jadi disuru rajai ma suruanna manjou malim Ahimelek, anak ni si Ahitub ro di sandok pinompar ni amana, luhut malim angka na di Nob, jadi ro ma nasida sude manopot rajai.

¹²Dung i ninna si Saul ma: Ua tangihon ma ale anak ni si Ahitub! Gabe didok ibana ma: Ida ma, dison do ahu, ale tuanku!

¹³Dung i ninna si Saul ma mandok ibana: Boasa tung marbulan hamu mangalo ahu, ho dohot anak ni si Isai, di na nilehonmu tu ibana roti dohot podang jala naung sinungkunhonmu tu Debata taringot tu langkana, asa hehe ibana mangalo ahu mangarop ahu songon na andar nuaeng?

¹⁴Jadi ro ma alus ni si Ahimelek tu rajai, ninna ma: Tung ise ma sian saluhut angka naposom haposan songon si Daud, jala hela ni rajai jala masuk umbege tahi sihabunianmu jala marsangap di bagasan jabum?

¹⁵Sadarion pe huroha hupungka manungkunhon tu Debata taringot tu langkana? Dao ma i sian ahu! Unang diampehon rajai hata i tu naposona manang tu sandok pinompar ni damang; ai ndang adong diboto naposom taringot tu saluhutna i, nang hata metmet, nang hata balga.

¹⁶Alai ninna rajai ma: Ingkon marutang hosa ho, ale Ahimelek, ho ro di sandok pinompar ni amam.

¹⁷Dung i ninna rajai ma tu hupas kapala, angka na jongjong di lambungna: Humusor ma hamu jala bunu hamu angka malim ni Jahowa, ala dohot do tangannasida manumpak si Daud, jala ala diboto nasida na maporus do ibana, hape ndang dipapatar nasida tu pinggolhu Alai ndang olo angka naposo ni rajai manurdukkon tangannasida laho maniham angka malim ni Jahowa.

¹⁸Jadi ninna rajai ma tu si Doeg: Humusor ma ho jala tiham ma angka malim i. Jadi humusor ma si Doeg marga Edom i, jala ditiham ibana angka malim i, gabe dibunu ma sadarina i ualupulu lima baoa, angka na marpangkean epod sian hori.

¹⁹Dibunu huhut isi ni Nob, huta inganan ni angka malim, marhitehite podang, sian baoa ro di parompuan, sian dakdanak ro di posoposo, nang jonggi ro di halode dohot birubiru dibunu marhitehite baba ni podang.

²⁰(III.) Alai malua do sada anak ni si Ahimelek, anak ni si Ahitub, si Abiatar goarna, jala maporus ibana mangihuthon si Daud.

²¹Jadi dibaritahon si Abiatar ma tu si Daud naung binunu ni si Saul angka malim ni Jahowa.

²²Dung i ninna si Daud ma tu si Abiatar: Nunga huboto hian di ari uju i naung disi si Doeg, marga Edom i sai na paboaonna do tu si Saul. Marbilangbilang tu ahu do saluhut hosa ni pinompar ni amam.

²³Antong tinggal ma ho donganku, unang ho mabiar, ai manang ise na tumahi hosangki, tahionna ma dohot hosam, ai sinok do ho ramotan di lambungki.

23¹(I.) Dung i dibaritahon halak ma tu si Daud songon on: Ida ma, halak Palistim marporang dompak Keila, jala dipupusi nasida angka pardegean.

²Jadi marsungkun ma si Daud tu Jahowa, ninna ma: Na jadi do ahu laho manaluhon halak Palistim i? Dung i ninna Jahowa ma tu si Daud: Laho ma ho, jala taluhon halak Palistim i jala palua Keila.

³Alai ro ma hata ni angka baoa dongan ni si Daud i tu ibana: Ida ma, gari dison di Juda mabiar hita, lam laho muse hita tu Keila mandopang parangan ni halak Palistim?

⁴Jadi diulahi si Daud sahalinari manungkunhon tu Jahowa, gabe dialusi Jahowa ibana, ninna ma: Borhat ma ho

tu Keila, ai Ahu sandiri pasahathon halak Palistim tu bagasan tanganmu.

⁵Jadi laho ma si Daud rap dohot baoa donganna i tu Keila, jala marporang dompak halak Palistim, laos diolat ma pinahannasida i, jala hataluan bolon dibahen tu nasida, gabe dipalua si Daud ma pangisi ni Keila.

⁶(II.) Alai uju maporus si Abiatar anak ni si Ahimelek mandapothon si Daud tu Keila, laos diboan dohot baju epod i di bagasan tanganna.

⁷Dung i tarbortik ma tu si Saul naung ro si Daud tu Keila. Jadi ninna si Saul ma: Nunga dipasahat Debata ibana tu bagasan tanganku; ai nunga tarlolo ibana, dung masuk ibana tu bagasan huta na marharbangan jala marransang.

⁸Dung i martingting ma si Saul paluhuthon sandok bangso i laho marporang, asa tuat tu Keila laho martungkum si Daud dohot angka baoa donganna i.

⁹Jadi dung diboto si Daud naung marsangkap hamagoan si Saul dompak ibana, gabe ninna ma tu malim Abiatar: Boan tuson baju epod i!

¹⁰Dung i ninna si Daud ma: Ale Jahowa, Debata ni Israel, nunga tangkas dibege naposom marsangkap si Saul naeng ro tu Keila laho mangago huta i ala ahu.

¹¹Beha tagamon do pasahaton ni isi ni Keila ahu tu bagasan tanganna? Tagamon do tuat si Saul, songon naung binege ni naposomon?

Ale Jahowa, Debata ni Israel, ua pabotohon ma i tu naposomon! Jadi ninna Jahowa ma: Sai na tuat do ibana.

¹²Dung i ninna si Daud ma muse: Beha tagamon do pasahaton ni isi ni Keila ahu dohot angka baoa donganki tu bagasan tangan ni si Saul? Jadi ninna Jahowa ma: Sai pasahatonnasida do ho.

¹³Dung i borhat ma si Daud dohot angka baoa donganna, arga onom ratus halak toropna, gabe ruar ma nasida sian Keila, jala madoado boti nasida. Jadi dung tarbortik tu si Saul, naung malua si Daud sian Keila, gabe dipasohot ma tuat tusi.

¹⁴Tading di halongonan ma ianggo si Daud, di atas robean na gonting, laos maringan ibana di atas dolok na di halongonan Sip. Sai didatdati si Saul do paburuburu ibana saleleng mangolu; alai ndang dipasahat Debata ibana tu bagasan tanganna.

¹⁵Jadi dung diida si Daud, naung borhat si Saul paburuburu hosana, gabe tading ma si Daud di halongonan Sip di bagasan sada tombak.

¹⁶Jadi borhat ma si Jonatan anak ni si Saul mandapothon si Daud tu bagasan tombak i, jala dipapir tondina di bagasan Debata.

¹⁷Laos ninna ma mandok ibana: Unang ho mabiar ai ndang tagamon dapot tangan ni damang si Saul i ho, ingkon bangkit raja do ho gumomgom Israel, jala ahu gabe

donganna paidua; damang si Saul pe tangkas do i diboto.

¹⁸Jadi marpadan ma nasida na dua di adopan ni Jahowa; laos tinggal di bagasan tombak i ma si Daud; alai anggo si Jonatan mulak do tu jabuna.

¹⁹(III.) Dung i nangkok ma halak Sip, manopot si Saul tu Gibeia, angka ninna ma: Nda martabuni do si Daud di lambungnami di atas ni dolok angka na di bagasan tombak, di atas robean Keila na tungkan dangsina sian halongonan?

²⁰On pe marguru tu sandok lomo ni roham ale rajanami, sai tuat ma ho, asa hupasahat hami ibana tu bagasan tangan ni rajai.

²¹Dung i ninna si Saul ma: Angka na pinasupasu ni Jahowa ma hamu, ala sayang ni rohamuna di ahu.

²²Antong laho ma hamu haru sulingkit hamu dope, asa diboto jala diida hamu tangkas ingananna, pangulonon ni patna, manang ise naung marnida ibana disi; ai tarbortik do tu ahu, tung na angka situtu do ibana.

²³Riori hamu huhut jala sulingkit hamu saluhut jaringjing tau partabunianna, dung i mulak hamu tu ahu ia dung tontu, asa huihuthon hamu; jala molo tung di bagasan luat i ibana, sai na usousoanku do ibana di tongatonga ni sandok Juda angka na marriburibu.

²⁴Dung i borhat ma nasida jala laho tu Sip manjoloani si Saul. Alai anggo si Daud dohot angka baoa donganna i di halongonan Maon do di adaran tungkan dangsina ni halongonan i.

²⁵Jadi dung laho si Saul dohot angka baoa donganna i naeng mangalului, tarbortik ma i tu si Daud, gabe tuat ma ibana sian dolok batu i laos maringanan di halongonan Maon. Dung dibege si Saul barita i, gabe diihuthon ma mangeak si Daud tu halongonan Maon.

²⁶Dung i mardalan ma si Saul di na sambariba ni dolok i jala si Daud dohot angka baoa donganna i di na sambariba nari ni dolok i. Alai manilu ma nian si Daud maporus maradophon si Saul, gabe ro ma si Saul dohot angka baoa donganna i mangalolo si Daud dohot angka baoa donganna i, naeng manangkup nasida.

²⁷Hape ro ma sada suruan mandapothon si Saul, ninna ma: Haru siluhon ma ro, ai nunga disola halak Palistim tano i.

²⁸Jadi mulak ma si Saul sian na mangalele si Daud, jala laho manjumpangkon halak Palistim. Alani do umbahen digoar halak inganan i: Sela-Hammalekot (dolok batu haluaon).

²⁹(24-1) (I.) Dung i nangkok ma si Daud sian i, laos maringan di punsu ni angka dolok sian Engedi.

24¹ (24-2) Jadi dung mulak si Saul sian na mangalele halak Palistim, tarbortik ma tu ibana; ida ma di halongonan Engedi do si Daud.

² (24-3) Dung i diarahon si Saul ma toluribu baoa angka na pinillit sian sandok Israel, jala laho ibana mangalului si Daud dohot angka halak donganna i di atas ni angka dolok batu parbeduan.

³ (24-4) Jadi tolhas ma ibana tu angka parbaraan ni birubiru di lambung dalan, adong disi sada liang, laos bongot si Saul tu bagasan laho manghungkupi patna nian; alai juguk dingkan pamurnangan ni liang i anggo si Daud dohot angka donganna i.

⁴ (24-5) Jadi ro ma hata ni angka dongan ni si Daud mandok tu ibana: Ida ma, nunga jumpang ari na nidok ni Jahowa tu ho: Ida ma, Ahu pasahathon musum tu bagasan tanganmu, asa bahenonmu tu ibana guru lomo ni roham. Dung i hehe ma si Daud laho marsibuni maneat sada suhisuhi sian ulos ni si Saul.

⁵ (24-6) Alai dung salpu mallobuk ma taroktok ni si Daud, ala naung sineatna i suhisuhi sian ulos ni si Saul.

⁶ (24-7) Dung i didok ma tu angka donganna i: Dao ma i sian ahua ala Jahowa, tung bahenonku songon i tu tuanku, naung miniahan ni Jahowa, tung mangonai tanganku

dompok ibana, ai naung miniahan ni Jahowa do ibana.

⁷(24-8) Pola mangonai hata si Daud tu donganna, ndang diloas nasida hehe mangkahua si Saul. Dung i hehe ma si Saul sian liang i, laos manulus dalanna.

⁸(24-9) (II.) Dung i hehe ma dohot si Daud ruar sian liang i, laos joujou sian pudi ni si Saul songon on: Oale rajanami! Jadi mamereng dompok pudi ma si Saul, manungkap tu tano ma ianggo bohi ni si Daud marsomba rajai.

⁹(24-10) Dung i didok si Daud ma tu si Saul: Boasa tung patangitangionmu hata bolabola ni jolma, angka na mandok: Ida ma, mangalului hamagoanmu do anggo si Daud?

¹⁰(24-11) Ida ma, apala sadarion matam sandiri marnida naung pinasahat ni Jahowa ho sadarion tu tanganku di bagasan liang i; nunga pola dipajuju halak ahu mambunu ho nian, hape huolani do ho, ningku do: Ndang jadi mangonai tanganku tu tuanku, ai naung miniahan ni Jahowa do ibana.

¹¹(24-12) On pe, ale amang, ua bereng suhisuhi ni ulosmi di bagasan tanganku, paboa na so olo ahu mambunu ho uju na huseat suhisuhi ni ulosmi. Tanda jala ida ma sian i paboa na so adong hajahaton manang, pangalaosion di bagasan tanganku, jala na so mardosa ahu dompok ho, hape anggo ho sai diburu ho do hosangku naeng mamutus.

¹²(24-13) Ingkon Jahowa do manguhum hita sogot, jala Jahowa mangaluluhon ahu maradophon ho, alai na so tupa anggo tung tanganku mangonai tu ho.

¹³(24-14) Songon na nidok ni umpama ni natuatua di na robi: Sian halak parjahat ro hajahaton; alai anggo tanganku na so tupa mangonai tu ho.

¹⁴(24-15) Tung apala ise ma na nilelean ni raja sian Israel? Tung apala ise ma na pinaburuburum? Tung biang naung mate ulaning, manang tung hutu ni biang sada?

¹⁵(24-16) Alai tahe ingkon Jahowa ma gabe Panguhum, Ibana manguhum hita, Ibana ma manatap manonggor, jala Ibana umbadahon badanku, jala Ibana mamintori ahu paluahon ahu sian tanganmu.

¹⁶(24-17) (III.) Jadi dung tolhas dihatahon si Daud angka hata ondeng tu si Saul, gabe didok si Saul ma: Nda soaramu do i, ale anaha Daud? Laos dipangiar si Saul ma soarana tumatangis.

¹⁷(24-18) Dung i ninna ma tu si Daud: Umpintor do ho sian ahu, ai na denggan do uhummu tu ahu, hape anggo ahu na jat do hubaloshon tu ho.

¹⁸(24-19) Nunga dipaandar ho sadarion denggan ni uhummu binahenmi tu ahu; nunga nian tutu dipasahat Jahowa ahu tu bagasan tanganmu, hape ndang dibunu ho ahu.

¹⁹(24-20) Ai tung sura jumpang halak musuna, tung tagamon ma paluaonna ibana mardalan di dalan hasonangan? Dibahen i sai dibaloshon Jahowa ma tu ho na denggan bahen balos ni na binahenmi tu ahu sadarion.

²⁰(24-21) On pe, ida ma, tangkas huboto, sai gabe raja do ho sogot, jala hot do harajaon Israel di bagasan tanganmi.

²¹(24-22) Dibahen i sai uarihon ma tu Debata marbagahon tu ahu, paboa na so siaphononmu pinomparhu sogot, paboa na so pidothononmu goarhu sian bagas ni damang.

²²(24-23) Jadi diuarihon si Daud ma i tu si Saul. Dung i laho muli ma si Saul tu jabuna; alai anggo si Daud dohot angka donganna i nangkok do tu punsu ni dolok na gonting.

25¹(I.) Dung i mate ma si Samuel, gabe marluhut ma sandok Israel, jala ditatangisi ibana, jala dibandahon ibana di bagasan jabuna di huta Rama. Alai borhat ma anggo si Daud laho tuat tu halongonan Elaparan.

²Dung i adong ma sada halak di Maon, ia parulaonanna di Karmel do; na mora jong do baa i, tolu ribu birubiruna, jala saribu hamingna; dung i tole ma ibana manggustingi imput ni birubiruna di Karmel.

³Ia goar ni baa i, i ma si Nabal, jala goar ni jolmana si Abigail, na torus situtu roha ni parompuan i, jala na uli rupana; alai anggo

baoa i horas rohana, jala jahat marparulan,
pinompar ni si Kaleb do ibana.

⁴Jadi tarbortik ma tu si Daud di halongonan,
manggustingi imput ni birubiruna si Nabal i.

⁵Jadi disuru si Daud ma sampulu dolidoli,
ninna ma mandok dolidoli i: Nangkok ma
hamu tu Karmel manopot si Nabal patolhas
tebengku tu ibana, laos tangkasi hamu ma
sonangna.

⁶Songon on ma dok hamu: Hipas ma ho,
jala sonang, ro di isi ni bagasmu dohot nasa
na di ho!

⁷Nunga hubege, masa panggustingon imput
ni birubiru di ho. On pe sai rap dohot hami
do angka parmahanmi, ndang dung tarurak
nasida hubahen hami, jala ndang adong mago
di nasida agia aha, saleleng nasida di Karmel.

⁸Tung sungkun angka naposom,
paboaonnasida do i tu ho, on pe asi ma
roham mida angka dolidoli on, ai tongon di
ari na denggan do hami ro; ua lehon ma na
jumpang tanganmu tu angka naposomon
dohot tu si Daud, anakmu.

⁹Jadi dung sahat angka naposo ni si Daud,
jala tolhas dihatahon nasida tu si Nabal sude
hata ondeng, angka na tinonahon ni si Daud,
mangulon ma nasida.

¹⁰Alai ro ma alus ni si Nabal tu angka naposo
ni si Daud, ninna ma: Ise do si Daud? Jala
ise do anak ni si Isai? Lan do nuaeng naposo
angka na lintun tumadingkon indukna be.

¹¹ Tung olo ma ahu mambuat sagusagungku dohot aek siinumonku dohot pinahanku sipotongon di halak sigusting imput ni birubirungku laho mangalehon tu halak angka na so hutanda, manang sian dia nasida?

¹² Dung i mulak ma angka naposo ni si Daud tu dalannasida hian, laho muli. Jadi dung sahat nasida, dibaritahon ma tu si Daud sude angka hata ondeng.

¹³ Jadi ninna si Daud ma tu angka naposona: Masisandang podangna be ma hamu. Jadi masihadang podangna be ma nasida, nang si Daud disandang do podangna, jadi nangkok ma nasida mangihuthon si Daud arga opat ratus halak toropna, tinggal ma anggo na dua ratus halak manginganhon angka parhohas.

¹⁴ (II.) Alai ro ma sada halak sian angka dolidoli paboahon barita i tu si Abigail, jolma ni si Nabal ninna ma: Ida ma, nunga disuru si Daud angka suruanna sian halongonan laho mamasumasu tuanta nian, hape mangonai hata ibana tu nasida.

¹⁵ Na denggan situtu do nian uhum ni angka baoa i tu hami, ndang dung tarurak hami dibahen nasida, jala ndang adong agoan hami agia aha, saleleng rap hami dohot nasida marmahan di jampalan.

¹⁶ Tung tudoshon partanobatoan do nasida di hami, nang borngin, nang arian, saleleng rap hami dohot nasida marmahan angka birubiru.

¹⁷On pe boto ma, jala timbang, manang aha sibahenonmu; ai nunga tung putus sangkap hamagoan dompak tuanta dohot dompak sude isi ni bagasna angkup ni parroha na jahat do ibana, na so hapangkulingan manang ise.

¹⁸Jadi hapogan ma si Abigail mambuat dua ratus sagusagu dohot dua panuhuhan bobak marisi anggur dohot lima birubiru naung pinarade dohot lima ampang eme na nirondang dohot saratus lampet marsaor parbue ni anggur dohot dua ratus lampet na ginulean, luhutna i diampehon do tu angka halode.

¹⁹Dung i didok ma tu angka naposona: Pajolo hamu ma, ida ma ro pe ahu sian pudimuna; alai ndang dipaboa langkana i anggo tu si Nabal sinondukna i.

²⁰Jadi di na marsihundul i nasida di halode i, jala tuat nasida di sada jaringjing ni dolok i, ida ma nunga ro tuat si Daud dohot angka paranganna manjumpangkon nasida, laos pajumpang be.

²¹Alai nunga pola didok si Daud hian: Tung na so marguna do hapengani na hura moti luhutna na di bajoi di halongonan, na so agoan ibana agia aha, hape na jat do balos ni na denggan dibahen tu ahu.

²²Sai songon i ma bahenon ni Debata tu angka musu ni si Daud jala lobi sian i dope, molo tung teba loasonku mangolu sian

saluhut na di ibana ro di tiur ni ari, nanggo sada halak baa.

²³(III.) Alai dung diida si Abigail si Daud i, hapogan ma ibana mijur sian halode i manungkap ma ibana tu tano di jolo ni si Daud marsomba ibana.

²⁴Jala marsinggang tu jolo patna, ninna ma: Tu ahu ma jujur hajahaton i, ale rajanami; ua loas ma ahu mandok hatangkon tu pinggolmu, jala tangihon hata ni naposom boruboru.

²⁵Unang pola piripirion roham, ale tuan, mida baa parroha na jahat, mida si Nabal i, ai songon goarna i do ibana: Si Nabal goarna, sai haotoon i do donganna. Alai anggo ahu naposom boruboru, ndang huida dolidoli angka na sinurumi, ale tuan.

²⁶Nuaeng pe ale tuan, songon sintongna mangolu Jahowa, mangolu dohot hosam, Jahowa sandiri mangambat ho asa unang paroonmu sapata ni mudar, laos tanganmu sandiri mangurupi ho. On pe ingkon gabe songon si Nabal angka musum, ro di sude angka na marsangkap mambahen hamagoan tu tuani.

²⁷Antong silehonlehon on, na binoan ni naposom boruboru tu tuani, i ma nian lehonon tu dolidoli angka na sauduran dohot tuani.

²⁸Sai marpamuati ma roham mida sala ni naposom boruboru! Ai sai na pahoton ni Jahowa do harajaon ni pinomparamu, ai

laluhonon ni tuanku do porang ni Jahowa, jala ndang tagamon marhinamago ho saleleng ho mangolu.

²⁹Tung sura adong hehe sadajolma naeng parburuburu ho manang tumahi hosam, ingkon momos binobohan anggo hosa ni tuani di bagasan bobakan ni halak na mangolu di adopan ni Jahowa Debatangku! Alai anggo hosa ni angka musum ingkon ambalangkononna sian tongatonga ni ambalang.

³⁰Ia dung dibahen Jahowa tu tuani, hombar tu sude na denggan naung pinarbagana i tu ho, jala dohononna ho gabe partogi di halak Israel.

³¹Nandang tagamon gabe gasip di ho manang solsolanmu roham ale tuan ala mandurushon mudar ho soada alana, manang ala tuani sandiri mangaluluhon ibana. Alai dung dibahen Jahowa na denggan tu tuani, sai ingotonmu do naposom boruboru.

³²Dung i ninna si Daud ma tu si Abigail: Pinuji ma Jahowa Debata ni Israel ala sinuruna ho sadarion manjumpangkon ahu!

³³Pujion do huhut hapistaranmu, pujion nang ho, ala diambat ho ahu sadarion unang mandurushon mudar, unang laos tanganku sandiri mangaluluhon ahu.

³⁴Ai tongon tahe, songon sintongna mangolu Jahowa, Debata ni Israel, na mangambat ahu unang mambahen na jat tu ho, ai tung sura

unang humalaput ho ro manjumpangkon ahu, ndang tagamon adong teba di si Nabal ro di torang ni ari nanggo sada halak baoa.

³⁵Jadi dijalo si Daud ma sian tangannasida na binoanna i tu ibana, jala didok tu nasida: Nangkok ma ho muli tu jabum mardamedame; ida ma, nunga hutangihon soarami jala marpamuati rohangku mida ho.

³⁶(IV.) Jadi dung sahat si Abigail tu si Nabal, ida ma marpanggalan bolon ibana di jabuna songon panggalan ni raja, jala marlas ni roha si Nabal, jala mabuk situtu ibana. Dibahen i ndang adong dipaboa si Abigail tu ibana nang hata metmet nang hata balga paima torang ari.

³⁷Alai dung torang ari jala malum mabuk ni si Nabal i, dipaboa jolmana i ma tu ibana angka hata ondeng, gabe mate pusupusuna di bagasan andorana, jala tudoshon batu do i.

³⁸Dung i arga sampulu ari nari dipastap Jahowa ma si Nabal, laos mate.

³⁹Jadi dung tarbortik tu si Daud naung mate si Nabal, ninna ma: Pinuji ma Jahowa, na umbadahon bada ni haurahonku marlulu dompak si Nabal, jala diambat naposona mangulahon hajahaton, jala marbalik hajahaton ni si Nabal tu uluna dibahen Jahowa. Dung i disuru si Daud ma suruanna mandok hatana tu si Abigail, naeng mambuat nasida bahen jolmana.

⁴⁰Jadi dung sahat angka naposo ni si Daud tu si Abigail di Karmel, gabe mangkatai ma nasida songon on: Disuru si Daud do hami manopot ho naeng buatonna ho bahenjolmana.

⁴¹Dung i hehe ma si Abigail manungkap tu tano, huhut didok: Ida ma, naposom boruboru do ahu gabe hatoban laho mamburi pat ni angka naposo ni tuani.

⁴²Dung i hapogan ma si Abigail borhat marsihundul di halode, nidonganen ni lima radingna, angka na sauduran dohot ibana, laos diihuthon nasida do angka suruani, gabejolma ni si Daud.

⁴³Dibuat si Daud huhut si Ahinoam sian Jisreel, jadi duansa nasida gabejolmana.

⁴⁴Alai nunga dilehon si Saul anggo si Mikhal, boruboru i,jolma ni si Daud hian, tu si Palti, anak ni si Lais sian Gallim.

26¹(I.) Dung i ro ma isi ni Sip manopot si Saul di Gibe'a, angka ninna ma: Nda martamonding do si Daud di atas robean Hakila tungkan habinsaran ni halongonan?

²Dung i borhat ma si Saul laho tuat tu halongonan Sip udur dohot tolu ribu halak, angka na pinillit sian Israel, laho mangalului si Daud di halongonan Sip.

³Jadi marsaro ma si Saul di atas robean Hakila tungkan habinsaran ni halongonan di lambung dalan; alai anggo si Daud maringan

do di halongonan i; jadi dung diida naung ro si Saul mangihuthon ibana tu halongonan i.

⁴Disuru si Daud ma angka pangkahap asa tung tangkas diboto naung ro si Saul i.

⁵Jala i borhat ma si Daud jala tolhas tu parsaroan ni si Saul dohot si Abner, anak ni si Ner, partogi ni paranganna. Alai modom di lambung ni partanobatoan anggo si Saul jala marsaro humaliang ibana situasi natorop i.

⁶Dung i ro ma hata ni si Daud mandok tu si Ahimelek, marga Het i dohot tu si Abisai anggi ni si Joab, anak ni Nai Seruia: Ise donganku tuat manopot si Saul tu parsaroan? Jadi ninna si Abisai ma: Ahu ma donganmu tuat.

⁷Jadi sahat ma si Daud dohot si Abisai tu situasi natorop i bornginna i, gabe ida ma modom do si Saul di lambung partanobatoan, jala mundimundina pago di tano di lambung halang uluna, modom be si Abner dohot situasi na torop i humaliang ibana.

⁸Dung i ninna si Abisai ma tu si Daud: Nunga dipasahat Debata sadarion musum tu bagasan tanganmu; on pe loas ma ahu manullang ibana dohot mundimundingkon tu tano nanggo sahali, ndang pola paduahalionku tu ibana.

⁹Alai ninna si Daud ma tu si Abisai: Unang bunu ibana! Ai tung ise ma hea mangonai tangan tu na miniahan ni Jahowa, laos lias ibana sian uhum?

¹⁰Angkup ni ninna si Daud: Songon sintongna mangolu Jahowa, anggo so Jahowa mambunu ibana, manang ro ajalna gabe mate, manang borhat ibana tu tongtangan gabe mate disi.

¹¹Dao ma anggo sian ahu, ala ni Jahowa, anggo tung ahu mangonai tangan tu na miniahan ni Jahowa. On pe buat ma mundimundi na di lambung uluna dohot gendi isian aek, asa laho hita.

¹²Dung i dibuat si Daud ma mundimundi dohot gendi isian aek sian lambung halang ulu ni si Saul, laos laho ma nasida; jala ndang adong nanggo sahalak marnida manang umbotosa manang dungo, ai tung saluhut do nasida tarpodom, ai nunga didabu Jahowa hanenepon modom tu nasida.

¹³(II.) Jadi dung sahat si Daud tu bariba i jongjong ma ibana di punsu ni dolok mandaodao, nania do parholangannasida be.

¹⁴Dung i joujou ma si Daud tu situasi na torop i dohot tu si Abner, anak ni si Ner ninna ma: Jo Abner, ndang alusanmu ahu? Jadi ro ma hata ni si Abner mangalusi; ise do ho, sai joujou ho dompak rajai?

¹⁵Dung i ninna si Daud ma mandok si Abner: Nda halak na begu do ho nian, tung ise ma songon ho di Israel? Antong boasa so dungo ho jumaga rajai, tuanmi? Ai ro do sahalak situasi natorop i, naeng mangago rajai, tuanmi.

¹⁶Ndang denggan parenta binahenmi; songon sintongna mangolu Jahowa, patut marutang hosa hamu ala na so niramotanmuna tuanmuna i, naung miniahana ni Jahowa. Antong tingkir hamu ma manang didia mundimundi ni rajai dohot gendi isian aek, na di lambung halanguluna i.

¹⁷Jadi ditanda si Saul ma soara ni si Daud laos ninna ma: Nda soaram do i, ale Daud anaha? Jadi ninna si Daud ma: Soarangku ma tutu, ale rajanami.

¹⁸Angkupni didok ma: Ala ni aha umbahen sai lelean ni tuanku naposona? Ai aha hubahen jala hajahaton dia na niula ni tanganku?

¹⁹On pe, ua ditangihon rajai ma hata ni naposona: Molo tung Jahowa pajujuhon ho mangalo ahu, dianggo nian pelean sipanganon sada; alai molo tungjolma manisias pajujuhon, ingkon hona bura nasida di adopan ni Jahowa, ala dipabali nasida ahu sadarion, asa unang saor ahu tu parjambaran ni Jahowa, pola didok nasida: Laho ma ho marsomba tu angka debata sileban.

²⁰On pe sai unang ma durus mudarhu tu tano dao sian adopan ni Jahowa; tung pola borhat raja sian Israel mangalului hutu ni asu sada, songon halak na paburuburu manuk jalang di atas ni angka dolok.

²¹(III.) Dung i didok si Saul ma: Nunga mardosa ahu, mulak ma ho, ale anaha Daud,

ai ndang be bahenonku na so uhum tu ho, ala diparhamaol ho hosangku sadarion; ida ma hata oto na hubahen i, jala na lilu situtu do ahu.

²²Dung i didok si Daud ma mangalusi: Ida ma, dison do mundimundi ni rajai, disuru ma sada halak sian angka dolidoli mangalapsa.

²³Alai sai baloson ni Jahowa do tu ganup hombar tu hatigoranna dohot habonaronna, nunga nian dipasahat Jahowa ho sadarion tu bagasan tanganku, hape ndang olo ahu mangalaluhon tanganku tu na miniahan ni Jahowa.

²⁴Jala ida ma, suang songon maol ni hosami sadarion di bagasan rohangku, songon i maol hosangku di roha ni Jahowa, sai paluaonna do ahu sian nasa hagogotan.

²⁵Dung i didok si Saul ma tu si Daud: Pinasupasu ma ho, ale anaha Daud! Sai na patulusonmu do na sinangkap ni roham, jala monang ho. Dung i laho ma si Daud manulus dalanna, mulak ma dohot si Saul tu ingananna.

27¹(I.) Dung i marhusari ma roha ni si Daud di bagasan: Sai na dapot tangan ni Saul do ahu agoonna tagamon, manang andigan: Tagonan nama ahu maporus tu tano ni halak Palistim, asa mansadi si Saul, unang sai didatdati be mangalului ahu di sandok parbalohan ni Israel, asa malua ahu sian tanganna.

²Dung i borhat ma si Daud laho tusi, ibana udur dohot onom ratus halak donganna, bali tu si Akis, anak ni si Maok, raja sian Gat.

³Jadi maringan ma si Daud di lambung ni si Akis di huta Gat, ibana rap dohot donganna, ganup dohot isi ni bagasna, nang si Daud rap dohot jolmana na dua i, si Ahinoam, boru Jesreel dohot si Abigailjolma ni si Nabal nahinan, boru Karmel.

⁴Jadi dung tarbortik tu si Saul naung lintun si Daud tu Gat, gabe ndang be didatdati mangalului ibana.

⁵Dung i ninna si Daud ma tu si Akis: Molo sapala asi roham di ahu, ua lehon ma di ahu sada sian angka huta na di luaton bahen inganan hapunjunganku; boasa ma tagonan maringan naposom di huta hundulan ni harajaon rap dohot ho?

⁶Jadi dilehon si Akis ma tu ibana sadarina i huta Ziklag. Dibahen i rasirasa sadarion angka raja sian Juda nampuna huta Ziklag.

⁷Ia leleng ni si Daud maringan di tano ni halak Palistim sataon opat bulan do.

⁸(II.) Dung i nangkok ma si Daud rap dohot paranganna marbajo dompak halak Gesur, Girsi dohot Amalek, ai angka nasida do isi ni luat i hian sian na robi sahat ro di Sur, pola sahat ro di tano Misir.

⁹Jadi patu ma luat i dibahen si Daud, jala ndang dipangolu nang baoa nang parompuan, diboan huhut angka birubiru, lombu, halode,

unto dohot angka pangkean, dung i mulak ma ibana mandapothon si Akis.

¹⁰Alai ia ro hata ni si Akis manungkun: Sian dia hamu marbajo sadarion? Jadi didok si Daud ma mangalusi: Sian dompak partalpahan dangsina ni Juda dohot sian partalpahan dangsina ni halak Jerahmeel i dohot sian partalpahan dangsina ni halak Keni.

¹¹Alai ndang dipasombu si Daud mangolu, nang baoa, nang parompuan boanon tu Gat, ai ninna rohana do: Atik tung beha dialualuhon nasida pambahenannami mandok: Songonsongon on do dibahen si Daud. Sai songon i do somal pambahenanna saleleng maringan ibana di tano ni halak Palistim.

¹²Jadi nalom roha ni si Akis mida si Daud, ninna rohana do: Nunga bau roha ni bangsona halak Israel mida ibana, dibahen i gabe naposongku nama ibana ro di salelenglelengna.

28¹(I.) Dung i masa ma uju i, dipapungu halak Palistim ma parangannasida santibalatuk laho marporang dompak Israel. Jadi ro ma hata ni si Akis tu si Daud: Ra nunga diboto ho, ingkon dohot do ho, borhat donganku tu parporangan rap dohot angka paranganmi.

²Dung i didok si Daud ma tu si Akis: Antong botoonmu ma manang aha sibahenon ni

naposom. Jadi didok si Akis ma tu si Daud:
Antong ho ma pabangkitonku bahen siramoti
ulungku saleleng mangolu ahu.

³Alai nunga mate anggo si Samuel, jala
nunga ditatangisi sandok Israel ibana, jala
nunga dibandahon ibana di Rama, huta
ingananna i. Ia si Saul nunga dipabungkas
najolo angka halak pangarunding dohot
partondung sian gomgomanna.

⁴Jadi dung ro halak Palistim santibalatuk,
jala marsaro di Sunem, dohot ma si Saul
paluhuthon halak Israel, jala marsaro di
Gilboa.

⁵Alai dung diida si Saul parangan ni halak
Palistim, mabiar ma ibana, jala godoron situtu
rohana.

⁶Dung i marsungkun ma si Saul tu Jahowa,
alai ndang dialusi Jahowa ibana, nang
marhitehite nipi, nang marhitehite Urim, nang
marhitehite angka panurirang.

⁷Jadi ninna si Saul ma tu angka naposona:
Lulu i hamu ma di ahu sada sibaso
pangarunding, asa hutopot ibana manungkun
roha tusi. Dung i ninna angka naposona ma
mandok ibana: Ida ma, adong sada sibaso,
partondi pangarundingon di Endor.

⁸Dung i patinda rupa ma si Saul, jala
marpangkean sileban laho tusi rap dohot
dua halak donganna, gabe tolhas ma ibana
tu sibaso bornginna i, laos didok ma:
Ua martondung ma ho taringot tu ahu

marhitehite pangarundigon, jala panangkok ma jolo di ahujolma sipaboakonku tu ho.

⁹Dung i ninna sibaso ma mandok ibana: Ida ma, diboto ho do na binahen ni si Saul, na siniaphonna angka pangarunding dohot partondung sian gomgomanna i; boasa ma tung taononmu sambil di hosangki laho mambunu ahu?

¹⁰Dung i marmangmang ma si Saul tu Jahowa marsumpahon tu sibaso, ninna ma: Songon sintongna mangolu Jahowa na so tupa hona uhum ho ala ni hata on.

¹¹Jadi ninna sibaso ma: Antong ise do panangkohonku di ho? Jadi didok ibana ma: Si Samuel i ma panangkok di ahu.

¹²Jadi dung diida sibaso ro si Samuel, dipangiar ma soarana manganguhi, laos didok sibaso ma mandok si Saul: Boasa tung paotootonmu ahu? Ai si Saul i do ho hapengani!

¹³Dung i ninna rajai ma mandok ibana: Unang ho mabiar! Ai aha do na niidam? Jadi ninna sibaso ma mandok si Saul: Debata huida nangkok sian bagasan tano.

¹⁴Dung i ninna si Saul ma mandok nasida: Beha do rupana? Gabe ninna nasida ma: Nangkok do sada baoa naung matua martujungkon mandar na lungkang ibana. Jadi mamoto ma si Saul! Si Samuel do i hapengani, laos manangkap ma ibana tu tano laho marsomba.

¹⁵(II.) Alai ninna si Samuel ma mandok si Saul: Boasa tung parusakrusahonmu ahu, mandokkon ahu nangkok? Jadi ninna si Saul ma: Targogot situtu do ahu, ai marmusu halak Palistim dompak ahu, jala nunga sumurut Debata sian ahu, ndang be dialusi ahu nang marhitehite panurirang, nang marhitehite nipi, alani umbahen hujou ho, asa dipabotohon ho tu ahu, manang aha sibahenonku.

¹⁶Dung i ninna si Samuel ma: Boasa tung ahu sungkunonmu, nunga pola sumurut Jahowa sian ho, marbalik gabe alom?

¹⁷Nunga pola dipatulus Jahowa sangkapna, songon na nilumbahonna hian marhite sian ahu, nunga pola dirampas Jahowa harajaon i sian tanganmu, jala dibasabasahon tu pedanmu si Daud i.

¹⁸Ala so ditangihon ho soara ni Jahowa, jala ndang dilaluhon ho parpiarpiar ni murukna tu halak Amalek, alani do umbahen songon i pambahen ni Jahowa tu ho sadarion.

¹⁹Angkup ni pasahaton ni Jahowa huhut Israel rap dohot ho tu bagasan tangan ni halak Palistim, marsogot ma dapothononmu ahu rap dohot angka anakmu. Parangan ni Israel pe pasahaton ni Jahowa ma tu bagasan tangan ni halak Palistim.

²⁰Jadi tongkin i tinggang ma si Saul tungkap tu tano, jala mabiar situtu dibahen hata ni si Samuel, huhut ndang be margogo dagingna,

ai ndang mangan sagusagu ibana sadari saborngin.

²¹ Dung i didapothon sibasoi ma si Saul, gabe diida ma tarsonggot situtu ibana, laos didok ma mandok ibana: Ida ma, nunga diturut naposom boruboru soarami, jala nunga pola huseahon hosangku manurut hatam angka na pinaboam tu ahu.

²² On pe, nang ho sai tangihon ma soara ni naposom boruboru, hubahen ma roti sanseat tu adopanmu, asa mangan ho, asa margogo ho di dalam situlusionmu.

²³ Alai manjua anggo, ibana, didok ma: Ndang adong rohangku mangan. Jadi disosoi angka naposona nang sibasoi ibana, gabe dioloi soaranasida i. Dung i hehe ma ibana sian tano i laho juguk tu podoman.

²⁴ Alai adong do di sibasoi sada anak ni lembu na pinamokmok di jabuna, gabe hapogan nasida manambolisa dibuat huhut itak, didogildogil ma i laos dilompa bahen sagusagu na so niasoman.

²⁵ Dung i diparade ma angka i di adopan ni si Saul dohot di adopan ni angka naposona. Jadi dung sun mangan borhat ma nasida mardalan di na saborngin i.

29¹ (I.) Dung i dipaluhut halak Palistim ma sude parangannasida di Apek, alai marsaro di lambung mual mardonokkon Jisreel do anggo halak Israel.

²Dung i lam mangaromrom ma partogi ni halak Palistim manguluhon paranganna marratus ribu, alai dingkan pudi anggo si Daud dohot paranganna rap dohot si Akis.

³Dung i ninna angka partogi ni halak Palistim ma: Aha ma guna ni halak Heber on? Alai ninna si Akis ma mandok partogi ni halak Palistim: Nda on do si Daud, naposo ni si Saul, raja sian Israel, nunga pola lobi sataon ibana di lambungku? Jala ndang adong jumpang ahu salana nanggo sada, olat ni ari dung bali ibana rasirasa sadarion.

⁴Alai gusar situtu ma angka induk ni halak Palistim mida ibana, laos didok nasida ma mandok ibana: Ingkon suru baoa i muli, asa mulak ibana tu ingananna naung pinadirim di ibana, asa unang tuat ibana rap dohot hami tu parporangan i, asa unang gabe alonta ibana laho tole marporang; ai tung marhite sian aha ma tarbuat bayo on lomo ni roha ni tuanna, nda marhite sian ulu ni angka parangan on?

⁵Nda on do si Daud, na niendean ni halak marende taripar songon on: Si Saul manaluhon marriburibu halak, alai anggo si Daud marloksaloksa.

⁶(II.) Dung i dijou si Akis ma si Daud, ninna ma mandok ibana: Songon sintongna mangolu Jahowa, na bonar do ho marroha, denggan nian rohangku marmeang muli ho rap dohot ahu di parsaroan i, ai ndang adong jumpang ahu hajahaton di ho olat ni ari

harorom tu ahu rasirasa sadarion. Alai ndang denggan roha ni angka induk i mida ho.

⁷ Dibahen i muli ma ho mardamedame, asa unang adong bahenonmu na roa di roha ni angka induk ni halak Palistim.

⁸ Alai ninna si Daud ma mandok si Akis: Ai aha ulaning na hubahen i, jala aha sala jumpang ho sian naposom olat ni ari dung ro ahu tu jolom rasirasa sadarion, alana umbahen so dohot ahu laho marmusu dompak musu ni tuanki?

⁹ Dung i ninna si Akis ma mangalusi si Daud: Tangkas do huboto denggan ni rohangku tu ho, hira surusuruan ni Debata, alai tahe nunga pola didok angka induk ni halak Palistim: Nandang jadi borhat ibana tu hamusuon rap dohot hami.

¹⁰ Antong pasogot ma manogot borhat rap dohot naposo ni tuanmu, angka na ro rap dohot ho; ia dung dipasogot hamu manogot, disi torang ari, laho ma hamu.

¹¹ Jadi dipasogot si Daud ma hehe rap dohot angka naposona i, asa sogot nasida laho muli tu tano ni halak Palistim. Alai nangkok tu Jisreel do anggo halak Palistim i.

30¹ (I.) Jadi dung mulak si Daud dohot angka donganna i tu Ziklag patoluarihon, nunga tartaban jala masurbu didapot huta Ziklag, dibahen halak Amalek angka na marbajo tu tano dingkan dangsina.

²Diboan nasida huhut parompuan angka na metmet dohot na magodang angka na di bagasan huta i, alai ndang adong anggo na binununa nanggo sahalak, asal diboa do laos manulus dalannasida i.

³Jadi dung sahat si Daud dohot angka donganna i tu huta i, jala diida naung masurbu huta i jala tarboan jolmanasida dohot anaknasida dohot borunasida.

⁴Dipangiar si Daud dohot halak donganna i ma soaranasida manganguhi, paima so adong be gogonasida tumatangis.

⁵Tarboan dohot na dua jolma ni si Daud, Ahinoam boru Jesreel dohot Abigail, jolma ni si Nabal nahinan sian Karmel.

⁶Jadi hagogotan situtu ma roha ni si Daud, ai ditahi situasi na torop i naeng mandangguri ibana dohot batu ala gusar roha ni sandok natorop i, ganup ala ni angka anakna dohot boruna, alai marsihohot do anggo roha ni si Daud mida Jahowa, Debatana.

⁷(II.) Dung i ninna si Daud ma mandok malim Abiatar, anak ni si Ahimelek: Ua boan tu ahu baju epod. Jadi diboa si Abiatar ma baju epod i tu si Daud.

⁸Dung i marsungkun ma si Daud tu Jahowa, ninna ma: Na jadi do eahanku na sahoron parbajo i? Dapot ahu do nasida tagamon? Dung i ninna Jahowa ma tu ibana: Eahi ma nasida! Ai sai na dapot ho do nasida jala paluaonmu angka na tarboan i.

⁹Jadi borhat ma si Daud, ibana dohot na onom ratus halak donganna i. Jadi dung sahat nasida tu sunge Besor, sulon ma angka na tartading i.

¹⁰Alai mangeahi ma anggo si Daud dohot opat ratus halak, sulon ma anggo na dua ratus halak angka naung malojahu manaripari sunge Besor.

¹¹Dung i dapot nasida ma sada halak Misir di ladang, laos diboan ibana tu si Daud jala dilehon tu ibana sagusagu, asa mangan ibana, huhut dipainumhon aek tu ibana.

¹²Angkup ni dilehon tu ibana sanseat sagusagu na marsoar parbue ni anggur dohot dua lampet naung ginulean. Jadi dung mangan ibana sumuang ma tondina tu ibana; ai ndang mangan sagusagu ibana jala ndang minum aek tolu ari tolu borngin.

¹³Dung i ninna si Daud ma mandok ibana: Ise nampuna ho? Jala sian dia ho? Dung i ninna ibana ma: Halak Misir do ahu, naposo ni sada halak Amalek, jala ditadingkon induk somanku ahu, ala marsahit ahu nunga pola tolu ari.

¹⁴Na marbajo do hami di partalpahan ni halak Heret i dohot tu Juda dohot tu tano dangsina ni si Kaleb, jala nunga husurbu hami huta Ziklag.

¹⁵Dung i ninna si Daud ma tu ibana: Olo do ho manogihon ahu tuat tu na sahoron parbajo i? Jadi ninna ibana ma: Mangmangkon ma tu

Debata marsumpahon tu ahu, paboa na so bunuonmu ahu, jala na so pasahatonmu ahu tu bagasan tangan ni induk somanku, asa hutogihon ho tuat tu na sahoron i.

¹⁶Jadi ditogihon ibana ma nasida tuat, gabe ida ma, marserak nasida marpeahan di tutup sandok tano i, mangan jala minum nasida huhut marhariburon mida sandok tabantaban na godang i, na binoannasida sian tano ni halak Palistim dohot sian tano Juda.

¹⁷Dung i dirampok si Daud ma nasida olat ni buha siang ari sahat ro di bodari marsogotna i, gabe ndang adong malua sian nasida nanggo sahalak, dungkon ni opat ratus halak dolidoli angka na marsihundul di unto, gabe maporus.

¹⁸Jadi dipalua si Daud ma saluhut na binuat ni halak Amalek, dipalua dohot jolmana na dua i.

¹⁹Jadi ndang adong na mago sian nasida, nang ma metmet, nang na magodang, nang anak, nang boru, nang tabantaban ro di sude na binuat ni musu sian nasida; tung saluhut do mulak diboan si Daud.

²⁰Dung i dibuat si Daud ma sude birubiru dohot lembu, diolat nasida pinahan i di jolona huhut didok nasida: I ma tabantaban ni si Daud.

²¹(III.) Jadi dung sahat si Daud tu na dua ratus halak, angka na malojahu umbahen so tarihuthonsa si Daud, gabe tartinggal

nasida dibahen di lambung sunge Besor, ro ma nasida nuaeng manjumpangkon si Daud dohot angka donganna i. Jadi dipajonok si Daud ma tu situasi na torop i huhut usoso di sonang nasida.

²²Dung i ro ma alus ni baoa parroha na so hasea angka na jahat i sian na opat ratus halak angka na mardalan rap dohot si Daud, angka ninna ma: Ala na so mardalan nasida rap dohot hita, ndang jadi lehonon tu nasida sian tabantaban angka na hurampas hami, diboan be ma jolmana dohot anakonna, dung i laho nasida.

²³Alai ninna si Daud ma: Unang bahen hamu songon i ale angka donganku taringot tu naung nilehon ni Jahowa tu hita, ai Ibana mangaramoti hida, jala dipasahat na sahoron parbajo angka na ro mangalo hita tu bagasan tanganta.

²⁴Tung ise ma olo paihuthon hatamuna on? Ai songon bagian ni halak angka na tuat tu parmusuon, ingkon songon i do bagian ni halak angka na tinggal manginganhon parhohas, ingkon rap marbagi nasida.

²⁵Jadi olat ni ari i tu pudion gabe uhum na hot do i jala adat di halak Israel rasirasa sadarion.

²⁶Jadi dung sahat si Daud tu Ziklag, dipantongoshon ma sian tabantaban i tu angka sintua di Juda, angka alealena i, huhut didok: Ida ma, silehonlehon tu hamu ma

i sian tabantaban na dapot sian musu ni Jahowa.

²⁷ Tu sintua angka na di Betel dohot tu angka na di Ramat tungkan dangsina dohot tu angka na di Jatir.

²⁸ Dohot tu angka na di Aroer dohot tu angka na di Sipmot dohot tu angka na di Estemo.

²⁹ Dohot tu angka na di Rakal, dohot tu angka na di angka huta ni halak Jerahmeel i, dohot tu angka na di angka huta ni halak Keni.

³⁰ Dohot tu angka na di Horma dohot tu angka na di Borasan dohot tu angka na di Atak.

³¹ Dohot tu angka na di Hebron dohot tu saluhut inganan, angka na binolus ni si Daud rap dohot angka donganna i.

31 ¹ (I.) Jadi dung tole tongtang halak Palistim dompak halak Israel, gabe maporus ma halak Israel moradophon halak Palistim, jala marragean nasida di atas dolok Gilboa.

² Dung i sai dilotongi halak Palistim ma si Saul dohot angka anakna, dibunu halak Palistim ma si Jonatan, si Aminadab dohot si Malkisua, angka anak ni si Saul.

³ Lam tarsugutsugut ma dohot si Saul, sai ditumpur halak parsior ibana, gabe targisik bugangna dibahen halak parsior i.

⁴ Dung i didok si Saul ma mandok naposo siusung sinjatana: Umpat ma podangmu jala

tihamhon tu ahu, asa unang ro halak parhulup on maniham ahu, huhut mangalesanlesan ahu. Alai ndang olo naposo siusung sinjatana i, ai mabiar situtu do ibana. Dung i dibuat si Saul ma podangna, laos maninggangkon dirina tusi.

⁵Jadi dung diida naposo siusung sinjatana i naung mate si Saul, dohot ma ibana maninggangkon dirina tu podangna, laos mate rap dohot rajai.

⁶Jadi rap mate ma di na sadari i si Saul dohot anakna na tolu i dohot naposo siusung sinjatana ro di sude halak donganna i.

⁷Jadi dung diida halak Israel angka na di baribaon ni rura i dohot angka na di baribaon ni Jordan naung maporus halak Israel, jala naung mate si Saul dohot angka anakna, ditadingkon nasida ma angka huta i, jala maporus. Jadi ro ma halak Palistim maringan disi.

⁸(II.) Dung i marsogotna i ro ma halak Palistim laho mamupusi angka na marragean i, gabe jumpang nasida ma si Saul dohot anakna na tolu i marpeahan di atas dolok Gilboa.

⁹Dung i ditipul nasida ma uluna jala diduduk angka sinjatana, dipaebangkon ma i tu luat ni halak Palistim humaliang laho mamaritahon barita i di bagasan joro ni ajiajiannasida dohot tu situasi na torop i.

¹⁰Dung i dipampeakkon nasida ma sinjatana i tu bagasan joro ni Astarot, ianggo bangkena digantung nasida do tu parik ni huta Betsean.

¹¹Alai dung dibege isi ni Jabes di Gilead barita taringot tu na binahen ni halak Palistim tu si Saul.

¹²Borhat ma nasa baoa sialo musu mardalan manipat borngin i, dibuat nasida ma bangke ni si Saul dohot bangke ni angka anakna i sian parik ni huta Betsean, jala diboan tu huta Jabes jala disirabuni disi.

¹³Dung i dibuat ma angka holiholina, laos dibandahon ma i di toru ni hariara di Jabes, jala marpuasa nasida pitu ari lelengna.

2 Samuel

1 ¹ (I.) Jadi dung mate si Saul, mulak ia si Daud sian tongtangan dompak halak Amalek, sanga dua ari si Daud maringan di Ziklag.

² Tole patoluarihon, ida ma, ro sada halak sian parangan ni si Saul, maribak pangkeanna jala tano di atas uluna. Jadi dung sahat ibana tu si Daud manungkap ma ibana tu tano jala marsomba.

³ Dung i ninna si Daud ma mandok ibana; sian dia ho ro? Jadi ninna ibana ma: Maporus do ahu sian parangan ni Israel, palua diringku.

⁴ Dung i ninna si Daud ma mandok ibana: Aha huroha na masa? Ua baritahon tu ahu! Jadi ninna ibana ma: Nunga maporus angka porangan i sian tongtangan, angkup ni mansai torop marragean jala mate sian bangso i, mate nang si Saul, dohot si Jonatan anakna i.

⁵ Dung i didok si Daud ma tu dolidoli na mamboan barita i tu ibana: Sian dia diboto ho naung mate si Saul dohot si Jonatan anakna i?

⁶ Jadi ninna dolidoli na mamboan barita i ma tu ibana: Tardempar ahu tu atas dolok Gilboa, gabe ida ma si Saul mangunsande tu hujurna, tole hureta dohot angka parsihundul mangaromrom ibana.

⁷ Dung i humusor ibana dompak pudi, gabe diida ahu, laos dijouhon tu ahu, gabe hudok: Dison do ahu.

⁸ Dung i didok ma mandok ahu: Ise do ho? Jadi hudok ma tu ibana: Halak Amalek do ahu.

⁹ Dung i didok ma tu ahu: Ua pajonok tu ahu jala bunu ahu, ai nunga mangampir huhilala, di bagasan ahu dope nian anggo sandok hosanku.

¹⁰ Jadi hupajonok ma tu ibana, laos hubunu ibana, ai tangkas do huboto na so tagamon mangolu be ibana anggo dung sapala runggang. Dung i hubuat ma tumpal na di atas uluna dohot rutas na di botohonna, angka i ma na huboan nuaeng tu tuanki.

¹¹ (II.) Dung i ditiop si Daud ma pangkeanna sandiri, laos disansani ma i, suang songon i dibahen sude baoa angka na rap dohot ibana.

¹² Dung i mangandungi ma nasida mananangisi huhut marpuasa sahat ro di bodari ala ni si Saul dohot si Jonatan anakna i dohot ala ni bangso i ni Jahowa, dohot ala ni pinompar ni Israel angka naung marragean dibahen podang.

¹³ Dung i didok si Daud ma tu dolidoli na mamboan barita i tu ibana: Sian dia do ho? Gabe didok ibana ma: Anak ni sada halak na pulik marga do ahu, halak Amalek tahe.

¹⁴Dung i didok si Daud ma tu ibana: Tung so mabiar do ho, mangalaluhon tanganmu laho mangago na miniahan ni Jahowa?

¹⁵Dung i digora si Daud ma sada halak sian angka dolidoli, ninna ma: Pajonok tu on, jala bunu ibana tusi! Gabe dibunu ma ibana laos mate.

¹⁶Dung i didok si Daud ma mandok ibana: Marsapata tu ho mudarmi! Ai nunga pamanganmi gabe saksi dompak ho, nimmu do: Ahu do mambunu na miniahan ni Jahowa.

¹⁷(III.) Dung i diandungkon si Daud ma ende andung on, mananangisi si Saul dohot si Jonatan anakna i.

¹⁸Laos didokkon ingkon ajarhononhon do i tu halak Juda ende andung taringot tu sior; ida ma, tarsurat do i di bagasan pustaha ni halak na bonar.

¹⁹Oe ale hamuliaon ni Israel! Nunga mate tartullang hamu di atas ni angka robeanmu! Magoponai, tung marragean angka ulubalang!

²⁰Unang nian dipaboa barita i di Gat, unang ma nian dibaritahon di angka alaman ni Askelon, asa unang marlas ni roha angka boru Palistim, unang marolopolop angka boru ni halak parhulup.

²¹Hamu ale dolok Gilboa! Sai unang ma nian adong nambur manetek tu hamu manang udan madabu, manang hauma patumonaan; ai disi do hadekekdekan ni lombulumbu ni angka

ulubalang bolon, lombulombu ni si Saul, hira na so miniahan marhitehite miak.

²²Na so dung mulak nian sior ni si Jonatan so martubol sian mudar ni angka na marragean, sian tabotabo ni angka ulubalang; podang ni si Saul pe ndang dung mulak boti so martubol.

²³Oe ale Saul dohot Jonatan, angka na hinaholongan jala hasudungan ni roha tagan di ngolunasida, jala dihamatean nasida pe ndang sirang nasida; dumoras do nasida sian pidong raja ualu, jala gumogo sian singa.

²⁴Hamu ale boru Israel, tatangisi hamu ma si Saul na maruloshon tu hamu angka ulos surta, na mambahen pangkeanmuna marjagarjagar sian sere.

²⁵Magoponai! Tung marragean angka ulubalang di tongatonga ni tongtangan! Nunga tung mate tartullang si Jonatan di atas robeanmi!

²⁶Iale Jonatan, ale anggia. Mansai marsak rohangku pasarisari panadingmi! Tung hasudungan ni rohangku situtu do ho, lomoan do rohangku mida holong ni roham di ahu, asa mida holong ni roha ni parompuan.

²⁷Magoponai! Tung marragean angka ulubalang jala mago angka parhohas tu hamusuon!

2¹(I.) Jadi dung salpu angka i, marsungkun ma si Daud tu Jahowa, ninna ma: Jadi do ahu nangkok tu sada sian angka huta di Juda?

Dung i ninna Jahowa ma tu ibana: Nangkok ma ho. Dung i ninna si Daud muse: Tu huta dia do ahu nangkok? Dung i ninna Ibana ma: Tu Hebron do.

²Jadi nangkok ma si Daud tusi rap dohot jolmana na dua i, si Ahinoam, boru Jesreel dohot si Abigail, jolma ni si Nabal nahinan sian Karmel.

³Angkup ni diarahon si Daud ma donganna, angka na nangkok rap dohot ibana, ganup dohot isi ni bagasna be, jadi maringan ma nasida di angka huta na humaliang Hebron.

⁴Dung i ro ma halak Juda, mamiahi si Daud disi bahen raja gumomgom pinompar ni Juda. Dung i dibaritahon halak ma tu si Daud: Naung binandahon ni halak Jabes di Gilead si Saul.

⁵Jadi disuru si Daud ma angka suruanna tu halak Jabes di Gilead, mandok tu nasida: Dapotan pasupasu ma hamu sian Jahowa ala na binahenmuna asi ni roha tu tuanmuna, tu si Saul, ala naung dibandahon hamu ibana.

⁶On pe sai dibahen Jahowa ma tu hamu asi ni roha dohot habonaron, ahu pe bahenonku do denggan basa tu hamu ala naung dibahen hamu songon i.

⁷Antong margogo ma tanganmuna gabe parangan na begu; ai nunga mate nian anggo si Saul tuanmuna i, alai nunga dimiahi pinompar ni Juda ahu bahen raja gumomgom nasida.

⁸Alai ro ma si Abner, anak ni si Ner, partogi ni parangan ni si Saul, dibuat ma si Isboset, anak ni si Saul, jala ditogihon ibana taripar tu Mahanaim.

⁹Jala dipabangkit ibana gabe raja gumomgom Gilead dohot halak Aser i dohot Jisreel dohot Ephraim dohot Benjamin ro di sandok Israel.

¹⁰Marumur opatpulu taon si Isboset, anak ni si Saul di hababangkitna gabe raja gumomgom Israel, jala dua taon lelengna ibana mangarajai. Holan pinompar ni Juda do mangihuthon tu si Daud.

¹¹Ia leleng ni si Daud raja di Hebron gumomgom pinompar ni Juda pitu taon onom bulan do.

¹²(II.) Dung i borhat ma si Abner, anak ni si Ner rap dohot angka naposo ni si Isboset, anak ni si Saul, sian Mahanaim tu Gibeon.

¹³Borhat dohot si Joab, anak ni Nai Seruia rap dohot angka naposo ni si Daud; gabe pajumpang ma nasida di lambung ambar Gibeon; jadi marsaro ma nasida di baribaan ni ambar i, jala alona i di baribaon ni ambar i.

¹⁴Dung i ninna si Abner ma mandok si Joab: Ua hehe ma angka dolidoli i, asa masijonapan nasida di adopanta! Antong hehe be ma nasida, ninna si Joab.

¹⁵Jadi borhat be ma nasida mandapothon, sampulu dua bilanganna sian Benjamin, parangan ni si Isboset, anak ni si Saul, jala

sampulu dua halak sian angka naposo ni si Daud.

¹⁶Dung i ganup nasida manoro ulu ni alona, jala ditihamhon podangna tu andora ni alona, gabe rap rage nasida. Alani targoar inganan i: Helkat-Hasurim mardonokkon Gibeon.

¹⁷Laos sobu situtu ma nasida tongtang sadarina i, talu ma si Abner dohot halak Israel maralohon naposo ni si Daud.

¹⁸(III.) Alai adong disi tolu anak ni Nai Seruia, si Joab, si Abisai dohot si Asahel. Mansai gompis mardalan anggo si Asahel songon sada hije na di ladang.

¹⁹Jadi sai dilotongi si Asahel do si Abner, ndang olo manambil tu siamun manang tu hambirang sian pudi ni si Abner.

²⁰Dung i manaili dompak pudi ma si Abner, ninna ma: Atehe si Asahel do ho? Ahu ma tutu, ninna.

²¹Dung i ninna si Abner ma mandok ibana: Pasimbil ho tu siamunmu manang tu hambirangmu, jala tangkup di ho sahalak sian angka dolidoli i, jala buat di ho pangkeanna. Alai ndang olo si Asahel sumurut sian pudina.

²²Dung i diulahi si Abner muse mandok tu si Asahel: Pasurut ho sian pudingku! Boasa tagonan manungkap tu tano ho bunuonku? Jala beha ma pambahenku tung sura mandompakkon bohi ni si Joab, hahami?

²³Alai manjua do ibana sumurut, jadi ditullangkon si Abner ma suhul ni hujur

i tu butuhana, pola puas hujur i sian tanggurungna, gabe tinggang ibana disi, laos mate tongkinnai. Dung i manang ise na sahat tu tano hapeahan ni si Asahel i, sulon do disi.

²⁴ Alai sai didatdati si Joab dohot si Abisai do mangeak si Abner i. Jadi dung mate mata ni ari sahat na nasida tu robean Amma, tondong ni Gia, di dalan laho tu halongonan Gibeon.

²⁵ Dung i marpungu ma halak Benjamin mangihuthon si Abner, gabe sada parduaan, jadi sulon nasida jongjong di punsu ni sada robean.

²⁶ Dung i mangua ma si Abner mandok tu si Joab; tung sai datdatan ni podang i do marraserasehon? Nandang diboto ho, lam gabe musu tihus do i di laonlaon ni ari? Sadia leleng on so dohononmu situasi na torop i mansohot mangalele angka hahaanggina.

²⁷ Dung i ninna si Joab ma: Songon sintongna mangolu Debata, aut unang didok ho hatam pajujuhon, nunga nasogot mansohot na torop i sian na mangalele donganna be.

²⁸ Dung i dipalu si Joab ma sarune gabe sulon sude na torop i, ndang be didatdati mangalele Israel, jala ndang be didatdati tongtang.

²⁹ Alai anggo si Abner dohot angka paranganna i mardalan umbolus adaran i manipat sabornginna i, laos ditaripari nasida ma Jordan i, jala dibolus nasida sandok luat Biteron, gabe sahat nasida tu Mahanaim.

³⁰ Mulak dohot si Joab sian na mangalele si Abner, jala dipapungu sude na torop i. Jadi hurang sian angka naposo ni si Daud i sampulu sia halak angkup ni si Asahel.

³¹ Alai nunga dibunu angka naposo ni si Daud sian Benjamin, sian parangan ni si Abner tolu ratus onompulu halak, angka na mate.

³² Dung i dihindat nasida ma si Asahel, jala dibandahon ibana tu bagasan tanoman ni amana na di Betlehem. Dung i mardalan ma si Joab dohot angka paranganna i manipat sabornginna i mamungka buha siang ari sahat ma nasida tu Hebron.

3¹ (I.) Dung i sai toltol do hamusuon ni pinompar ni si Saul dompak pinompar ni si Daud; alai lam leleng, lam marhuaso ma anggo si Daud, lam tu galena ma ianggo pinompar ni si Saul.

² Dung i tubuan anak ma si Daud di Hebron. Ia buhabajuna si Amnon do, tubu ni si Ahinoam, boru Jisreel.

³ Ia anakna paidua si Kileab do, tubu ni si Abigail, jolma ni si Nabal nahinan, sian Karmel; ia anakna paitolu si Absalom do, tubu ni si Maaka, boru ni si Talmai, raja sian Gesur.

⁴ Ia anakna paiopat si Adonia do, tubu ni Nai Haggit; ia anakna pailima si Sepatia do, tubu ni si Abital.

⁵Ia anakna paionom si Istream do, tubu ni si Eglā, jolma ni si Daud. I ma angka na tinubuhon ni si Daud di Hebron.

⁶(II.) Dung i saleleng masa hamusuon ni pinompar ni si Saul dompak pinompar ni si Daud, lam marhuaso ma si Abner manumpak pinompar ni si Saul.

⁷Alai adong ma di si Saul nahinan sada boruboru pinarjolmana, na margoar si Rispa, boru ni si Aia. Dung i ninna si Isboset ma tu si Abner: Boasa tung topotonmu jolma ni damang nahinan?

⁸Jadi tarrimas situtu ma si Abner umbege hata ni si Isboset i, ninna ma: Tung parulu anjing ahu huroha, na marsatahi dohot Juda? Rasirasa sadarion hubahen do asi ni roha tu pinompar ni si Saul, amami, tu angka hahaanggina dohot tu angka alealena, umbahen so hupasahat pe ho tu bagasan tangan ni si Daud; hape naeng jujuronmu tu ahu sadarion hageduhon ala ni parompuan sada?

⁹Ingkon songon i bahenon ni Debata tu si Abner jala patambaonna dope songon i tu ibana, molo so hubahen songon na niuarihon ni Jahowa tu si Daud, tongon tahe ingkon songon i bahenonku tu ibana!

¹⁰Laho paunsathon harajaon sian pinompar ni si Saul, asa pajongjongkon habangsa ni si Daud gumomgom Israel dohot Juda olat ni Dan ro di Berseba.

¹¹ Jadi ndang tarbahren si Isboset mangulak nanggo sahata tu si Abner, dibahren biarna mida ibana.

¹² Dung i disuru si Abner ma angka suruanna singkatna manopot si Daud patolhas hatana: Ise hian nampuna tano i? Didok muse: Marpadan ma ho dohot ahu, jala ida ma, sai donganan ni tanganku do ho laho manogihon sandok Israel bali tu ho.

¹³ Dung i ninna rajai ma: Denggan do i, olo do ahu marpadan dohot ho; holan hata sada na hupangido sian ho: Na so tupa idaonmu bohingku, nda jolo mulak tu ahu boanonmu si Mikhal, boru ni si Saul, molo ro ho naeng marnida bohingku.

¹⁴ Angkupni disuru si Daud do angka suruanna manopot si Isboset, anak ni si Saul, mandok tu ibana: Lehon ma tu ahu jolmangku, si Mikhal i, naung huoro bahen jolmangku marhite sian saratus sibursibur ni halak Palistim.

¹⁵ Dung i disuru si Isboset ma laho mambuat parompuan i sian baoana, sian si Paltiel, anak ni si Lais.

¹⁶ Laos dipataru baoa ibana, huhut tumatangis sian pudina sahat ro di Bahurim. Dung i didok si Abner ma tu ibana: Laho ma ho mulak, jadi muli ma ibana.

¹⁷ (III.) Dung i marhata ma si Abner dohot angka sintua sian Israel ninna ma: Nunga

leleng, dipangido rohamu si Daud bahen raja gumomgom hamu.

¹⁸Antong patulus hamu ma nuaeng, ai nunga pola didok Jahowa taringot tu si Daud songon on: Marhitehite tangan ni si Daud, naposongku paluaonku bangsongku Israel sian tangan ni halak Palistim dohot sian tangan ni saluhut musunasida.

¹⁹Suang songon i didok si Abner tu pinggol ni halak Benjamin; laho muse si Abner patolhas hata tu pinggol ni si Daud di Hebron nasa tau lomo ni roha ni Israel ro di sandok pinompar ni Benjamin.

²⁰Jadi dung sahat si Abner tu jolo ni si Daud di Hebron udur dohot duapulu halak donganna, dibahen si Daud ma sada panggalangon di si Abner dohot di halak angka na rap dohot ibana.

²¹Dung i ninna si Abner ma tu si Daud: Borhat ma ahu laho papunguhon tu tuanku, rajai, sandok Israel, asa marpadan nasida dohot ho asa bangkit raja ho gumomgom saluhutna hombar tu lomo ni roham. Jadi didokkon si Daud ma laho si Abner, gabe mardalan ibana mardamedame.

²²Dung i ida ma, ro angka naposo ni si Daud dohot si Joab sian parbajoan, jala diboan nasida godang tabantaban. Alai ndang be di lambung ni si Daud di Hebron anggo si Abner i, ai nunga didokkon ibana laho mardamedame.

²³ Jadi dung sahat si Joab rap dohot sandok parangan donganna i, dibaritahon halak ma tu si Joab songon on: Nunga ro si Abner, anak ni si Ner tu adopan ni rajai, jala nunga didokkon ibana muse laho mardamedame.

²⁴ Dung i ditopot si Joab ma rajai, ninna ma: Aha do na binahenmu? Ida ma, nunga ro hape si Abner tu jolom; boasa tung paluaonmu ibana laho manopot lomo ni rohana?

²⁵ Nunga ditanda ho roha ni si Abner, anak ni si Ner, laho manaon sambil di ho do ibana umbahen na ro, naeng botoonna haruruarmu dohot habobongotmu, naeng botoonna saluhut na binahenmi.

²⁶ Dung i ruar ma si Joab sian adopan ni si Daud, jala disuru angka suruanna mangeahi si Abner, gabe mulak ibana diboan nasida sian sumur Sira. Alai ndang parbinoto anggo si Daud.

²⁷ Jadi dung mulak si Abner tu Hebron, ditogihon si Joab ma ibana manirpang tu tongatonga ni harbangan, naeng masihusipan dohot ibana paduadua dipaula, hape ditiham ibana disi, hona butuhana, laos mate, martubolhon mudar ni si Asahel anggina i.

²⁸ Jadi dung tarbortik barita i tu si Daud, ninna ma: Lias do anggo ahu dohot harajaonki, maradophon Jahowa ro di salelenglelengna sian mudar ni si Abner, anak ni si Ner.

²⁹Ingkon manginona tu ulu ni si Joab do i dohot tu sandok pinompar ni amana, unang holang adong nian sian pinompar ni si Joab na rojanon dohot na puruon, na marsingkorsingkor dohot na mate binahen ni podang jala na mate anturaparon.

³⁰Alai songon i pe pamunu ni si Joab dohot si Abisai, anggina i di si Abner, ala na binununa i si Asahel angginasida i di Gibeon uju marmusu.

³¹(IV.) Dung i ninna si Daud ma tu si Joab dohot tu sude halak donganna i: Sansani hamu ma ulosmuna be, jala hohoshon hamu ma abit tangki laho mangandungi, di adopan ni si Abner. Raja Daud sandiri pe mangihuthon sian pudi ni angka na mangkallung.

³²Jadi laho mananom si Abner i nasida di Hebron, dipangiar rajai ma soarana tumatangis di lambung tanoman ni si Abner; tumatangis dohot sude natorop i.

³³Dung i dipungka rajai ma sada ende andung, ninna ma: Tung patut ma songon halak na oto mate si Abner i?

³⁴So dung hona ihot ia tanganmu, so dung hona rante ia patmu. Tinggang do ho hapengani songonjolma na tinodos ni halak parjahat! Jadi lam manggogo ma sude situasi natorop i mananangisi ibana.

³⁵Dung i ro ma sude situasi natorop i manosoi si Daud mangan sagusagu di na tiur dope ari, alai pola disumpahon si Daud:

Sai dibahen Debata ma songon i tu ahu, jala ditambahi dope molo tung daionku roti manang dia na asing, nda jolo mate mata ni ari.

³⁶Jadi sude situasi natorop i mananda disi, jala denggan rohanasida disi; lomo do tahe roha ni sandok natorop i mida sude na binahen ni rajai.

³⁷Jadi mamoto ma sandok natorop i ro di sandok Israel sadarina i, na so botobotoan ni rajai na hona todos si Abner i, anak ni si Ner.

³⁸Dung i didok rajai ma mandok angka naposona: Ndang diboto hamu halak na raja jala na bolon tahe mate sadarion di Israel?

³⁹Alai bajar dope anggo ahu, jala nambura miniahan gabe raja. Alai anggo halak on, angka anak ni Nai Seruia gumogo do sian ahu. Sai baloson ni Jahowa do tu halak sibahen hajahaton, hombar tu hajahatonna i!

4¹ (I.) Jadi dung tarbortik tu anak ni si Saul, naung mate si Abner di Hebron, daukdauk ma tanganna, tarsonggot huhut roha ni sandok Israel.

²Alai adong ma di anak ni si Saul dua halak, partogi ni angka parangan, goar ni na sada si Baana, goar ni na sadanari si Rekab, duansa do anak ni si Rimmon, halak Beerot i sian pinompar ni Benjamin; ai Beerot pe masuk tu Benjamin do etongan.

³Maporus tu Gitaim do najolo ia halak Beerot, laos gabe paisolat nasida disi rasirasa sadarion.

⁴Angkup ni adong do di si Jonatan, anak ni si Saul, sada anak, na pangpang patna duansa. Lima taon umurna uju na ro barita taringot tu si Saul dohot si Jonatan sian Jisreel. Jadi dihindat parorotna ibana laho maporus nian, hape di na hapogan nasida laho maporus, gabe madabu ibana laos pangpang; ia goarna si Mepiboset do.

⁵Dung i laho ma na dua anak ni si Rimmon halak Beerot i, si Rekab dohot si Baana tahe, gabe bongot ma nasida marhira hos ari tu bagasan jabu ni si Isboset, tongon modom ibana didapot.

⁶Jadi dung sahat nasida ro di parsitongaan ni bagas i, paulahon mangalap eme, gabe ditiham nasida butuhana, dung i maporus ma si Rekab dohot si Baana anggina i.

⁷Ai dung masuk nasida tu jabu i, tongon modom ibana di atas podomanna di bagasan bilut podomanna, gabe ditiham nasida ibana, laos mate, jala ditipul uluna i, laos diboan ma uluna i laho mardalan nasida manulus dalan na di adaran i manipat sabornginna i.

⁸Dung i diboan nasida ma ulu ni si Isboset tu si Daud di Hebron, ninna nasida ma mandok rajai: Ida ma, indi do ulu ni si Isboset, anak ni si Saul, musumi, na paburuburu hosam. Jahowa tahe mangalehon tu tuanku rajai

sadarion partubolon maralohon si Saul dohot pinomparna i.

⁹(II.) Alai ninna si Daud ma mangalusi si Rekab dohot si Baana, anggina i, angka anak ni si Rimmon, halak Beerot i. Songon sintongna mangolu Jahowa naung paluahon tondingku sian nasa hagogotan!

¹⁰Husoro do halak na mamboan barita tu ahu mandok songon on: Ida ma, nunga mate si Saul! Disurasura rohana parbarita na uli ibana, gari hubunu ibana di Ziklag, atik pe diarop rohana maruli upa ibana nian sian ahu.

¹¹Lam halak parjahat i, angka na manodos sahalak na bonar di bagasan jabuna di atas podomanna, lam so patut luluhononku mudarna sian tanganmuna dohot pasiaphon hamu sian tano on?

¹²Dung i didokkon si Daud ma angka naposona, asa dibunu nasida, jala digotapi tangannasida dohot patna jala digantung nasida mardonokkon ambar di Hebron. Alai anggo ulu ni si Isboset dibuat nasida do jala ditanom di bagasan tanoman ni si Abner di Hebron.

5¹(I.) Dung i ro be ma sude marga ni Israel manopot si Daud di Hebron, angka ninna ma: Ida ma, sisada holiholi dohot sibuk hian do hami dohot ho.

²Angkup ni nang na sai laon, uju si Saul dope raja gumomgom hami, nunga ho hian manogihon Israel ruar dohot masuk. Jala

nunga didok Jahowa hian mandok ho: Ingkon ho marmahan bangsongku Israel, jala ingkon ho gabe partogi di halak Israel.

³Jadi ro be ma sude sintua ni Israel manopot rajai di Hebron. Dung i marpadan ma raja Daud tu nasida di Hebron di adopan ni Jahowa, jadi dimiahi nasida ma si Daud bahen raja gumomgom Israel.

⁴Marumur tolupulu taon do si Daud di na bangkit raja ibana, jala opatpulu taon lelengna ibana mangarajai.

⁵Di Hebron ibana mangarajai Juda pitu taon onom bulan lelengna, jala di Jerusalem ibana mangarajai sandok Israel dohot Juda tolupulu tolu taon lelengna.

⁶(II.) Dung i borhat ma rajai rap dohot paranganna tu Jerusalem mandopang halak Jebusi, na mangingani tano i. Dung i didok angka nasida ma mandok si Daud: Nandang tagamon masuk ho tuson, ingkon paundaron ni halak na mapitung dohot angka na pangpang do ho, lapatanna: Nandang tagamon masuk si Daud tuson.

⁷Hape dipapatu si Daud do benteng Sion, i ma huta ni si Daud.

⁸Ai nunga didok si Daud hian di na sadari i: Manang ise na manaluhon halak Jebusi, ingkon dabuonna tu sampuran do angka na pangpang dohot na mapitung angka na hinagigihon ni roha ni si Daud. Alani umbahen didok halak: Anggo halak na mapitung dohot

na pangpang, ndang jadi masuk tu bagasan joro.

⁹Jadi maringan ma si Daud di bagasan benteng i, jala digoar do i huta ni si Daud. Dung i dipauli si Daud ma partanobatoan humaliang, olat ni Milo sahat ro di bagasan.

¹⁰Dung i lam leleng, lam naek ma hatimbulon ni si Daud, ai didongani Jahowa, Debata Zebaot do ibana.

¹¹Dung i disuru si Hiram, raja sian Tirus ma angka suruanna manopot si Daud, angka na mamboan hau Ares, tole pande hau dohot tukang mandakdak batu, angka na mamandei bagas ni si Daud.

¹²Jadi mananda ma si Daud naung pinahot ni Jahowa ibana bahen raja di Israel, jala naung pinatimbulna harajaonna ala ni bangsona Israel.

¹³Dung i ditambahi si Daud dope angka parompuan di Jerusalem bahen jolmana, dung ro ibana sian Hebron, jadi tubu dope di si Daud angka anak dohot boru.

¹⁴Jala on do goargoar ni angka tubuna di Jerusalem: Si Samua, si Sobab, si Natan dohot si Salomo.

¹⁵Si Ibar, si Elisua, si Nepeg dohot si Japia.

¹⁶Si Elisama, si Eliada dohot si Elipelet.

¹⁷(III.) Alai dung dibege halak Palistim, naung miniahan si Daud bahen raja gumomgom Israel, nangkok ma sude halak Palistim naeng marburu si Daud. Jadi dung

dibege si Daud barita i, tuat ma ibana tu benteng i.

¹⁸Alai marroan ma halak Palistim, jala marserak nasida di rura Repaim.

¹⁹Dung i marsungkun ma si Daud tu Jahowa ninna ma: Na jadi lo ahu nangkok mangalo halak Palistim, jala pasahatanmu do nasida tu bagasan tanganku? Jadi didok Jahowa ma mandok si Daud: Nangkok ma ho, ai sai na pasahatanku do halak Palistim i tu bagasan tanganmu!

²⁰Dung i sahat ma si Daud tu Baal Perazim, jala ditaluhon si Daud nasida disi, ninna huhut: Nunga dipaserak Jahowa angka musungku di jolongku, songon parserak ni aek magodang; alani umbahen digoar ibana inganan i Baal Perazim (huta parserahan).

²¹Dung i ditinggalhon nasida disi angka ajiajiannasida, gabe dijomput si Daud dohot paranganna angka i.

²²Alai diulahi halak Palistim muse ma nangkok, jala marserak muse di rura Repaim.

²³Dung i marsungkun muse ma si Daud tu Jahowa, na mandok: Ndang jadi ho nangkok, ingkon lompitonmu nasida sian pudinasida, asa pajumpang ho dohot nasida tondong ni angka hau balsam.

²⁴Ia dung dibege ho pardorom ni halak pardalan di punsu ni angka hau balsam, rampok ma nasida disi, ai disi ma ruar Jahowa

mardalan di jolom laho papatuhon parangan ni halak Palistim.

²⁵Jadi dibahen si Daud ma songon i, hombar tu tona ni Jahowa tu ibana, gabe dipapatu ma halak Palistim olat ni Geba sahat ro di Gezer.

6¹(I.) Dung i diulahi si Daud muse papunguhon sude halak angka na pinillit di Israel, tolupulu ribu halak toropna.

²Dung i borhat ma si Daud manguluhon luhut halak donganna sauduran laho tu Baala-Juda, asa diboan nangkok sian i poti parpadanan ni Debata, disi do dijou halak Goar ni Jahowa Zebaot, na marhabangsahon kerubim.

³Dung i dihindat nasida ma poti ni Debata tu sada hureta naimbaru, asa diboan nian sian jabu ni si Abinadab, na di atas robean i. Alai anggo si Usa dohot si Ahio, angka anak ni si Abinadab i manogu hureta naimbaru i.

⁴Jadi uju tinoguna i huretai sian jabu ni si Abinadab na di atas robean i rap dohot poti ni Debata mardalan di jolo ni poti ni Debata ia si Ahio i.

⁵Ianggo si Daud ro di sandok pinompar ni Israel manontori di adopan ni Jahowa, huhut umpalu parhinaloan marragamragam, mardongan sarune dohot arbab, dohot sordam, ogung panggora dohot ogung panonggahi.

⁶Jadi dung sahat nasida tu pardegean Nakon, ditangkup si Usa ma poti ni Debata maniop nian, ai tarsulandit do angka lombu i.

⁷Jadi tarrimas situtu ma Jahowa mida si Usa, laos dibunu Debata ibana disi ala jerjerna, gabe mate ibana disi mardonokkon poti ni Debata.

⁸Jadi marsak ma si Daud ala parsirangan binahen ni Jahowa tu si Usa, gabe digoar ma inganan i Peres-Usa (parsirangan ni si Usa) rasirasa sadarion.

⁹Dung i mabiar ma si Daud mida Jahowa di na sadari i, ninna ma: Beha ma pambahenna sahat poti ni Jahowa tu ahu?

¹⁰Dung i ndang olo si Daud mangaloas boanon poti ni Jahowa tu ibana, tu bagasan huta ni si Daud, didokkon si Daud do pataruon poti i tu bagas ni si Obed-Edom, halak Gat.

¹¹Jadi dung tinggal poti ni Jahowa di jabu ni si Obed-Edom halak Gat, tolu bulan lelengna, gabe dipasupasu Jahowa ma si Obed-Edom ro di isi ni bagasna sudena.

¹²(II.) Dung i dibaritahon halak ma tu raja Daud, naung pinasupasu ni Jahowa bagas ni si Obed-Edom ro di sude na di ibana, ala poti ni Debata. Jadi laho ma si Daud mamboan poti ni Debata nangkok sian bagas ni si Obed-Edom tu huta ni si Daud mardongan las ni roha.

¹³Jadi dung mangalangkajolma angka siusung poti ni Jahowa onom langka daona,

dipelehon ma sada lombu dohot sada birubiru na pinamokmok.

¹⁴Mangasa gogo huhut anggo si Daud marhujingjang di adopan ni Jahowa; jala marpangkean baju epod sian haen na bontar do si Daud.

¹⁵Songon i ma pamboan ni si Daud ro di sandok pinompar ni Israel di poti ni Jahowa mardongan olopolop dohot soara ni sarune.

¹⁶Jadi dung sahat poti ni Jahowa tu bagasan huta ni si Daud, gabe mandulo ma si Mikhal, boru ni si Saul sian pandiloan, jala i diida ma raja Daud marhujingjang dohot manontori di adopan ni Jahowa, gabe hu rohana mida ibana.

¹⁷Alai dung masuk diboan poti ni Jahowa, dipajongjong ma i di ingananna, di tongatonga ni undungundung i naung pinajongjong ni si Daud hian tusi. Dung i dipelehon si Daud ma angka pelean situtungan dohot hamauliateon di adopan ni Jahowa.

¹⁸Jadi dung tolhas dipelehon si Daud angka pelean situtungan dohot hamauliateon, dipasupasu ma situasi natorop i marhitehite Goar ni Jahowa Zebaot.

¹⁹Dung i diganupi ma sandok situasi natorop i dohot sude halak Israel painondur, nang baoa nang parompuan, sagusagu sada be dohot juhut sangkimpal dohot anggur sapeles be. Dung i muli ma sude situasi natorop i ganup tu jabuna be.

²⁰Alai dung muli si Daud naeng
mamasumasu isi ni bagasna nian, ruar ma
si Mikhal, boru ni si Saul manomunomu si
Daud, jala ninna ma manulliti: Tung marmulia
ma sadarion raja ni Israel, na patutoru
dirina sadarion di adopan ni boru ni angka
naposona, songon sada halak na so umboto
haurahon!

²¹Alai ninna si Daud ma mandok si Mikhal: Di
adopan ni Jahowa, naung umpillit ahu bahen
ganti ni amangmu sian sandok pinomparna,
asa mandokkon ahu gabe induk ni bangso
ni Jahowa, gumomgom Israel, di adopan ni
Jahowa do ahu manontori.

²²Angkup ni ganda sian i dope patutoruonku
diringku, jala pasereponku rohangku, asa
marmulia ahu rap dohot boruboru angka na
tinullitanmi.

²³Alai anggo si Mikhal, boru ni si Saul, laos
so tanggal do bajubajuna sahat ro di ari
hamamatenana.

7¹(I.) Dung i uju hundul rajai sahali
di bagasan jabuna, jala naung
marhasonangan rohana dibahen Jahowa
maradophon nasa musuna humaliang.

²Jadi ro ma hata ni rajai mandok panurirang
Natan: Ua ida ma, maringan di bagasan jabu
na sian hau Ares do ia ahu, ia poti ni Debata
maringan do di tongatonga ni rimberimbe.

³Dung i ninna si Natan ma mandok rajai:
Antong laho ma ho! Nasa na sinangkap ni

roham di bagasan, patupa ma i, ai Jahowa do donganmu.

⁴(II.) Alai bornginna i ro ma hata ni Jahowa tu si Natan mandok songon on:

⁵Laho ma ho, hatahon ma tu naposongku si Daud: Songon on do hata ni Jahowa: Tung tarbahen ho ma paulihon di Ahu sada bagas bahen ingananku?

⁶Ai ndang dung maringan Ahu di bagasan jabu, olat ni ari dung huboan halak Israel nangkok sian Misir rasirasa sadarion, tongtong do Ahu mardalandalan, maringan di bagasan undungundung.

⁷Saleleng Ahu mardalandalan rap dohot sude halak Israel, tung dung ma Ahu mandok nanggo sada hata tu sahalak sian angka marga ni Israel, angka na hudokkon nian marmahan bangsongku Israel, songon on: Boasa so dipauli hamu di Ahu sada joro sian hau Ares?

⁸On pe songon on ma dohononmu tu naposongku si Daud: Boti hata ni Jahowa Zebaot: Nunga Ahu mambuat ho sian parmahanan, sian na mangadu angka birubiru, asa bangkit ho gabe induk gumomgom bangsongku Israel.

⁹Sai hudongani ho na sai laon, manang dompak dia ho mangalangka jala nunga husiaphon sude angka musum maradophon ho, jala hubahen goarmu marbarita situtu,

songon goar ni halak na bolon, angka na di tano on.

¹⁰Angkup ni, nunga hubasabasahon sada inganan tu bangsongku Israel, jala nunga hulopokkon ibana, asa maringanan ibana disi, asa unang be tarhutiksa, jala unang be didatdati angka anak ni hageduhon manosaknosak ibana, songon uju di mulana.

¹¹Jala olat ni ari, dung hupabangkit angka panguhum parenta bangsongku Israel, Ahu do mangalehon hasonangan tu ho maradophon sude musim. Angkup ni marbagabaga muse Jahowa tu ho, paboa pahoton ni Jahowa pinomparmu sogot.

¹²Ia dung jumpang tingkim mate, marpungu ho tu angka ompum, patindangonku ma pinomparmu dipudim, na ruar sian butuham, tu Ibana ma pahotonku harajaon.

¹³Ingkon Ibana pauli sada bagas di Goarhu, jala Ahu pahothon habangsa ni harajaonna ro di salelenglelengna.

¹⁴Ahu gabe Amana, jala Ibana gabe Anakku. Molo tung mambahen dosa Ibana, linsinglinsing nijolma pangkeonku mangalinsingi Ibana.

¹⁵Alai ndang unsatonku sian Ibana anggo asi ni rohangku, songon na huunsati sian si Saul, naung hupaijur di jolomi.

¹⁶Alai ingkon hot do anggo pinomparmi dohot harajaonmu ro di salelenglelengna di

jolom, habangsam pe ingkon hot do ro di salelenglelengna.

¹⁷(III.) Hombar tu saluhut angka hata ondeng, jala hombar tu sandok pangungkapon i mangkatai si Natan tu si Daud.

¹⁸Dung i masuk ma raja Daud, laos hundul ma ibana di adopan ni Jahowa, ninna ma: Tung ise ma ahu pola, ale Tuhan Jahowa? Jala tung ise ma pola anggo pinomparhu, umbahen tung diboan Ho ahu sahat ro tuson?

¹⁹Angkup ni maotikku dope i di roham, ale Tuhan Jahowa! Pola huhut marbagabaga Ho taringot tu pinompar ni naposom, taringot tu na masa sogot; uhum nijolma do i, ale Tuhan Jahowa!

²⁰Tung aha dope angkup ni sidohonon ni si Daud tu Ho? Ai ditanda Ho do naposomon, ale Tuhan Jahowa.

²¹Ala ni hatam, jala hombar tu roham dibahen Ho saluhut halongangan na bolon on, laho pabotohon angka i tu naposomon.

²²Ala ni umbahen timbul Ho, ale Jahowa Debata! Ai ndang adong jumpang songon Ho, jala ndang adong Debata dungkon ni Ho, hombar tu saluhut naung binege ni pinggolnami.

²³Jala tung didia ma adong jumpang sada bangso tudoshon bangsomu, songon Israel tahe di atas tano on? Tung Debata sandiri borhat laho manobus asa mangain bahen bangsona sandiri dohot mambahen barita di

dirina, asa mambahen tu hamu halongangan bolon dohot na songkal humongkop tanomi di jolo ni bangsom, na tinobusmu di Ho sian Misir, sian angka parbegu dohot sian debatanasida.

²⁴Jala nunga dipadiri Ho di Ho bangsom Israel, bahen bangsom ro di salelenglelengna, jala Ho ale Jahowa, gabe Debatanasida.

²⁵Antong ale Debata Jahowa! Sai pahot ma hata naung pinarbagabagami taringot tu naposom dohot taringot tu pinomparna sahat ro di salelenglelengna, jala bahen ma hombar tu bagabagami.

²⁶Asa timbul Goarmu ro di salelenglelengna, asa dohonon ni halak songon on: Jahowa Zebaot do Debata ni Israel, jala hot ia pinompar ni naposom si Daud di jolomi.

²⁷Ai Ho, ale Jahowa Zebaot, Debata ni Israel, nunga dipapatar Ho tu pinggol ni naposomon hata on: Ahu pajongjongkon di ho sada bagas. Ala ni umbahen naung marhasonangan roha ni naposomon manangiangkon tu Ho tangiang on.

²⁸On pe, ale Tuhan Jahowa! Ho sandiri do Debata, jala hasintongan do angka hatam, jala nunga diparbagabaga Ho tu naposomon hata na denggan on.

²⁹Antong punga ma nuaeng mamasumasu pinompar ni naposomon, asa hot di adopanmu nasida ro di salelenglelengna; ai Ho sandiri, ale Jahowa marbagabagahon, jala marhite

sian pasupasum dapotan pasupasu pinompar ni naposomon ro di salelenglelengna.

8¹ (I.) Jadi dung salpu angka i ditaluhon si Daud ma halak Palistim, tung tarjepol situtu nasida dibahen; dirampas si Daud huhut huta angka na masuk tu gomgomon ni huta sabungan Gat sian halak Palistim.

²Ditaluhon muse halak Moab, jala disuhati nasida dohot tali, tung didokkon nasida manungkap tu tano, duadua tali disuhathon laho bunuon, jala boho satali laho pangoluon. Jadi mangoloi patu ma halak Moab, gabe naposo ni si Daud, manggarar sohe.

³Ditaluhon si Daud huhut si Hadadeser, anak ni si Rehob, raja sian Zoba, uju na laho ibana pabidang gomgomanna sahat ro di batang aek Euprat.

⁴Dung i dilaum si Daud ma sian ibana saribu pitu ratus halak parsihundul jala duapulu ribu paranganna parhantarhantar, jala ditallik si Daud do doldol ni saluhut hoda sitait hureta, saratus pasang sambing sian i di tinggalhon.

⁵Alai ro ma halak Ram sian Damaskus naing manolongi si Hadadeser, rajai sian Zoba, gabe mate halak Ram i duapulu dua ribu halak, dibunu si Daud.

⁶Dung i dipajongjong si Daud ma angka benteng di Ram humaliang Damaskus. Jadi mangoloi patu ma halak Ram gabe naposo ni si Daud, manggarar sohe; ai sai ditumpak

Jahowa do si Daud monang manang dompak dia ibana mangalangka.

⁷Dung i dibuat si Daud ma lombulumbu sere, angka na pinaboanboan ni naposo ni si Hadadeser, ditaruhon angka i tu Jerusalem.

⁸Dibuat raja Daud huhut sian Beta dohot sian Berotai, angka huta ni si Hadadeser, mansai godang tombaga.

⁹Alai dung dibege si Tou, raja sian Hamat, naung tinaluhon ni si Daud sandok parangan ni si Hadadeser.

¹⁰Disuru si Tou ma anakna si Joram manopot raja Daud manangkasi sonangna dohot mamasumasu ibana, ala naung pinorangan si Hadadeser, jala naung tinaluhonna ibana; ai marmusu tihus hian do si Tou dompak Hadadeser; diboan huhut di bagasan tanganna angka ulaula perak, sere dohot tombaga.

¹¹Angka i pe diparbadiai raja Daud do laho pasahathon tu Jahowa rap dohot perak dohot sere, naung pinarbadiaanna sian saluhut bangso parbegu angka naung pinapatuna i:

¹²Sian Ram dohot sian Moab dohot sian halak Amon, sian halak Palistim dohot sian Amalek dohot sian tabantaban angka na dapot sian Hadadeser, anak ni si Rehob, raja sian Zoba.

¹³Jadi marbarita goarna dibahen si Daud, uju mulak ibana dung pinapatuna halak Ram,

jala binununa halak Edom di rura parsiraan,
saribu ualu ratus halak toropna.

¹⁴Dung i dipambahen ma angka benteng di Edom, tung di sandok Edom angka benteng i dipambahen, gabe mangoloi patu sandok Edom tu si Daud; ai ditumpak Jahowa do si Daud monang manang dompak dia ibana mangalangka.

¹⁵(II.) Jadi bangkit raja ma si Daud gumomgom sandok Israel, sai dihajongjongkon si Daud do uhum dohot hatigoran tu sandok bangsona i.

¹⁶Alai anggo si Joab, anak ni Nai Seruia manguluhon angka parangan, jala si Josapat, anak ni si Ahilud do panuturi.

¹⁷Jala si Sadok, anak ni si Ahitub dohot si Ahimelek, anak ni si Abiatar, i ma angka malim, jala si Seraia do jurutulis.

¹⁸Jala si Benaia, anak ni si Joiada, panahatan ni angka hupas dohot rundo. Alai anggo angka anak ni si Daud angka panuturi do nasida.

9¹(I.) Dung i ninna si Daud ma manangkasi: Adong dope ulaning jolma tadingtadingan ni raja Saul, asa hubahen asi ni roha tu ibana, ala si Jonatan?

²Jadi adong ma sada naposo isi ni bagas ni si Saul nahinan, na margoar si Siba, gabe tarjou ibana tu jolo ni si Daud. Dung i ninna rajai ma mandok ibana: Atehe ho do si Siba? Naposom do ahu, ninna ibana.

³Dung i didok rajai ma: Atehe adong dopejolma tadingtadingan ni si Saul, asa hubahen tu ibana asi ni roha sian Debata? Jadi ninna si Siba ma mandok rajai: Adong dope sada anak ni si Jonatan, pangpang patna duansa.

⁴Dung i ninna rajai ma mandok ibana: Didia ibana? Gabe didok si Siba mandok rajai: Ida ma, di Lodebar do ibana, sorang tu si Mahir, anak ni si Ammiel.

⁵Dung i disuru raja Daud suruanna mangalap ibana sian bagas ni si Mahir, anak ni si Ammiel di Lodebar.

⁶Jadi dung sahat si Mepiboset, anak ni si Jonatan, tubu ni si Saul, tu jolo ni si Daud, manungkap ma ibana tu tano marsomba. Alai ninna si Daud ma: Ale Mepiboset! Gabe didok ibana ma: Dison do ahu naposom.

⁷Dung i didok si Daud muse tu ibana: Unang ho mabiar, ai ingkon bahenonku tu ho asi ni roha, ala ni si Jonatan amangmu, ingkon paulahonku tu ho sude golat ni si Saul, ompumi, jala ingkon tongtong ho sapanganan dohot ahu.

⁸Jadi marsomba ma ibana, huhut didok: Tung ise ma pola ahu naposom, umbahen pola dompakkononmu biang na mate songon ahu on?

⁹Jadi dijou rajai ma si Siba, naposo ni si Saul, jala didok ma mandok ibana: Nasa na di si Saul dohot di sandok pinomparna najolo, nunga hulehon tu anak ni tuanmu.

¹⁰Dibahen i ingkon ulaonmu tano i di ibana, ho dohot angka anakmu ro di angka naposom ingkon papunguonmu do gogona i, asa adong hangoluan ni anak ni tuanmu; alai anggo si Mepiboset, anak ni tuanmu, ingkon tongtong do ibana donganku sapanganan. Ia si Siba, sampulu lima do anakna jala duapulu angka naposona.

¹¹Dung i ninna si Siba ma mandok rajai: Hombar tu sude na nidokkon ni tuanku, rajai tu naposona, ingkon songon i bahenon ni naposom. Alai anggo si Mepiboset ingkon donganku sapanganan do i, songon sada sian angka anak ni rajai.

¹²Dung i adong ma si Mepiboset sada anakna na metmet, na margoar si Mika. Alai luhut isi ni bagas ni si Siba, angka naposo ni si Mepiboset do.

¹³Asa maringan di Jerusalem do si Mepiboset, ai tongtong do ibana sapanganan dohot rajai; alai pangpang do anggo patna duansa.

10¹(I.) Jadi dung salpu angka i, mate ma raja ni halak Amon, jadi si Hanun anakna i bangkit raja singkatna.

²Dung i ninna si Daud ma: Naeng ahu marasi ni roha si Hanun, anak ni si Nahas, songon amana nahinan na marasi ni roha tu ahu; jadi disuru si Daud ma suruanna laho mangapuli ibana marhitehite angka naposona ala panading ni amana i. Hape dung sahat

angka naposo ni si Daud tu luat ni halak Amon.

³Ro ma hata ni angka induk ni halak Amon mandok tu si Hanun, tuannasida i: Tung pasangaphon amangmu ma tagamon si Daud, nang di roham, umbahen disuru tu ho angka pangapul? Nda na laho manangkasi huta on dohot mangkahapisa, asa agoonna umbahen disuru si Daud angka naposona manopot ho?

⁴Dung i ditangkap si Hanun ma angka naposo ni si Daud, jala didokkon nabungon janggutnasida sambariba, jala horoton ulosnasida sahat ro di hundulanna, gabe songon i nasida dipamuli.

⁵Jadi dung tarbortik barita i tu si Daud, disuru ma angka suruanna manjumpangkon nasida, ai tung na tarurak situtu do angka baoa i dibahen. Ia tona ni rajai tu nasida: Tinggal ma hamu jolo di Jeriko, paima martumbur muse janggutmuna i, dung i pe asa mulak hamu.

⁶(II.) Alai dung diida halak Amon naung bau roha ni si Daud mida nasida, gabe disuru halak Amon ma suruanna laho mangupai halak Ram sian Betrehob dohot halak Ram sian Zoba, arga duapulu ribu halak parhantarhantar, jala sian raja Maaka saribu halak, angkup ni sampulu dua ribu halak sian Tob.

⁷ Jadi dung tarbortik barita i tu si Daud, gabe disuru ma si Joab manguluhon sandok paranganna angka na begu i.

⁸ Jadi ruar ma halak Amon, marodor laho tu tongtangan mardonokkon bahal ni huta i. Alai anggo halak Ram sian Zoba, dohot sian Rehob ro di baoa angka sian Tob dohot sian Maaka pulik jongjong di ladang.

⁹ Jadi dung diida si Joab, sai ibana do hape ditumpur angka musu i, sian jolo dohot sian pudi, gabe dipillit ma sian saluhut dolidoli di Israel, jala dipaodor laho mandopang halak Ram.

¹⁰ Alai anggo pasipasi ni parangan i tu tangan ni si Abisai anggina i dipasahat, jala baris dipajongjong laho mandopang halak Amon.

¹¹ Jala didok do: Molo tung talu onjar ahu bahenon ni halak Ram, ingkon ro ho mangurupi ahu; ai molo tung talu onjar ho bahenon ni halak Amon, ro pe ahu mangurupi ho.

¹² Antong pir ma tondim, itaseahon ma dirinta humongkop bangsonta, humongkop dohot angka huta ni Debatanta; alai sai dipasaut Jahowa ma lomo ni rohana.

¹³ Dung i martahop ma si Joab rap dohot angka parangan donganna i laho mandopang halak Ram, gabe maporus nasida maradophon ibana.

¹⁴Jadi dung diida halak Amon, naung maporus hape halak Ram, maporus ma dohot nasida maradophon Abisai, jala masuk tu bagasan huta i. Dung i mulak ma si Joab sian na mandopang halak Amon, jala tolhas ibana tu Jerusalem.

¹⁵Jadi dung diida halak Ram naung talu nasida dibahen halak Israel, santi balatuk ma nasida.

¹⁶Dung i disuru si Hadadeser ma suruanna marhara tu halak Ram angka na di bariba ni batang aek i, gabe sahat nasida tu Helam, jala si Zoba, partogi ni parangan ni si Hadadeser manguluhon nasida.

¹⁷Jadi dung tarbortik barita i tu si Daud, gabe dipaluhut ibana ma sandok Israel, jala ditaripari batang aek Jordan, gabe sahat ibana tu Helam, jadi marodor ma halak Ram laho mandopang si Daud marmusu.

¹⁸Alai maporus ma halak Ram maradophon Israel, jala dibunu si Daud ma sian halak Ram pitu ratus halak parmusu di hureta dohot opatpulu ribu halak parsihundul, dibunu dohot si Zoba partogi ni paranganna i, laos mate disi ibana.

¹⁹Alai dung diida sude raja, angka na marpandapotan tu si Hadadeser, naung talu nasida dibahen halak Israel, gabe mardemak nasida tu Israel, jala mangoloi patu tu nasida. Jadi mabiar ma halak Ram anggo tung haraon ni halak Amon nasida muse.

11 ¹(I.) Jadi dung salpu sataon, jumpang muse tingki haboborhat ni angka raja, gabe disuru si Daud ma si Joab dohot angka naposona bahen donganna ro di sandok Israel, asa disiaphon nasida halak Amon jala di tungkum huta Rabba. Alai tinggal di Jerusalem do anggo si Daud.

²Dung i marhira bodari, hehe ma si Daud sian podomanna jala mardalandalan di atas tarup ni bagas ni rajai, gabe diida ma sian atas tarup i sada parompuan na maridi, uli situtu do rupa ni parompuan i.

³Dung i disuru si Daud ma suruanna asa ditangkasi pangalaho ni parompuan i, gabe didok halak ma: Nda si Batseba do i, boru ni si Eliam,jolma ni si Uria, marga Het i?

⁴Jadi disuru si Daud ma suruanna mangalap nasida; jadi dung sahat nasida tu jolona, laos diangkupi ma nasida modom. Alai dung manguras nasida sian haramunonna, muli ma nasida tu jabuna.

⁵Hape dung gabegabean parompuan i, disuru ma suruanna pabotohonsa tu si Daud, ninna ma: Nunga gabegabean ahu.

⁶(II.) Dung i disuru si Daud ma suruanna manonahon tu si Joab: Suru tu ahu si Uria, marga Het i. Jadi disuru si Joab ma si Uria manopot si Daud.

⁷Jadi dung sahat si Uria tu jolona disungkuni si Daud ma ibana taringot tu sonang ni si Joab

dohot taringot tu sonang ni angka parangan i, dohot taringot tu sonang ni humusuon i?

⁸Dung i didok si Daud ma tu si Uria: Tuat ma ho laho muli tu jabum jala buri patmu. Jadi dung ruar si Uria sian jabu ni rajai, ihut ma sian pudina silehonlehon sian rajai.

⁹Hape modom do si Uria di lambung pintu ni bagas ni rajai rap dohot saluhut naposo ni tuanna, jala ndang tuat ibana muli tu jabuna.

¹⁰Jadi dibaritahon halak ma tu si Daud songon on: Nandang tuat si Uria laho muli tu jabuna. Dung i didok si Daud ma tu si Uria: Nda nambura ho ro sian pardalanan? Boasa so tuat ho laho muli tu jabum?

¹¹Alai ninna si Uria ma mandok si Daud: Gari poti parpadanan i, tole Israel dohot Juda maringan di bagasan angka undungundung, jala tuanku si Joab ro di angka naposo ni tuanku marsaro manangkas di ladang, tung olo ma ahu masuk tu jabungku laho mangan dohot minum jala modom rap dohot jolmangku? Songon sintongna mangolu ho, mangolu dohot tondim, molo tung olo ahu mambahen songon i!

¹²Dung i ninna si Daud ma mandok si Uria: Tinggal dison dope ho nang sadarion, marsogot pe husuru ho mulak. Jadi tinggal ma si Uria di Jerusalem di na sadari i dohot marsogotna i.

¹³Dung i diontang si Daud ma ibana, asa mangan di adopanna jala minum, pola mabuk

ibana dibahen. Alai bodarina i ruar ma ibana laho modom tu podomanna rap dohot angka naposo ni tuanna, jala ndang tuat ibana laho muli tu jabuna.

¹⁴Tole manogotna i muse disurat si Daud ma sada surat tu si Joab, jala si Uria panongosanna dibahen.

¹⁵Ia hata ni suratna i on do: Patongon hamu ma si Uria tungkan na sumobu marporang, jala lumindak hamu sian pudina, asa hona ibana laos mate.

¹⁶Jadi laho martahop si Joab dompak huta i, dipatongon ma si Uria tu hajongjongan naung binotona hian adong disi parangan angka na umbegu.

¹⁷Dung i ruar ma angka baoa ni huta i, asa masijonapan dohot si Joab, gabe tinggang deba sian natorop i, sian angka naposo ni si Daud, mate ma dohot si Uria marga Het i.

¹⁸(III.) Dung i disuru si Joab ma suruanna mamboan barita tu si Daud taringot tu sandok pangalaho ni parporangan i.

¹⁹Ditonahon ma tu suruani mandok songon on: Ia dung tolhas sandok pangalaho ni parporangan i dipaboa ho tu rajai.

²⁰Tung sura hehe rimas ni rajai diida ho, gabe didok mandok ho: Boasa tung manorpanorpa hamu tu huta i laho marporang? Nda diboto hamu hian, ingkon mamodili nasida sian parik?

²¹ Ise do mambunu najolo si Abimelek, anak ni si Jerubbeset? Nda sada parompuan mandekdekkon santopik batu pandudaan sian parik i tu ibana, gabe mate ibana di Tebes? Boasa tung manorpanorpa hamu tu parik i? Jadi dohononmu ma: Nunga mate nang naposom si Uria marga Het i.

²² Jadi mardalan ma suruani jala sahat paboahon tu si Daud saluhut na tinonahon ni si Joab i tu ibana.

²³ Dung i ninna suruani ma mandok si Daud: Ala tumang angka baoa i sian hami, gabe ruar nasida mandapothon hami tu adaran, hape hudopang hami nasida sahat ro di pintu harbangan.

²⁴ Jadi mamodili angka partembahi dompak angka naposom sian parik i, gabe mate deba sian angka naposo ni rajai, mate dohot naposom si Uria, marga Het i.

²⁵ Dung i ninna si Daud ma mandok suruani: Songon on ma dohononmu tu si Joab: Unang pola gondok roham ala hata i, ai bangkona do i tole sadaon tole sadaan dipangan podang. Sai gogo hamu ma pandopangmu dompak huta i, jala lohain hamu. Antong papir ma tondina i!

²⁶ Jadi dung dibege jolma ni si Uria nahinan naung mate sinondukna i, gabe ditatangisi ma harajaanna i.

²⁷ Alai dung pasae tujung ibana disuru si Daud ma suruanna mangalap nasida tu

jabuna, laos gabe jolmana, jala ditubuhon di ibana sada anak. Alai sogo situtu roha ni Jahowa mida pambahenan ni si Daud i.

12¹ (I.) Dung i disuru Jahowa ma si Natan manopot si Daud. Jadi dung sahat ibana tu jolona, ninna ma mandok ibana: Adong ma dua halak di na sahuta, sada na mora, sadanari na pogos.

²Ia di na mora i mansai torop do birubiru dohot lombu.

³Alai anggo di na pogos i ndang adong dungkon ni sada anak ni birubiru, na tinuhorna, jala dipadimundimun, asa balga di lambungna rap dohot anakna i muse; dipahan do i tu pangananna jala dipasobur tu panginumanna, dipapodompodom tu ampuanna, hira doshon boruna dibahen.

⁴Dung i ro ma sahalak pardalandalan tuli sian na mora i, gabe diolani anggo mambuat sian birubiru na, dohot sian lombuna, laho marhobas sipanganon tu halak pardalandalan na ro manopot ibana; tung dibuat do anak ni birubiru ni halak na pogos i jala dihobas di baoa na ro manopot ibana.

⁵Jadi marpiarpiar ma rimas ni si Daud mida baoa i, ninna ma mandok si Natan: Songon sintongna mangolu Jahowa, ingkon marutang hosa baoa na mambahen songon i.

⁶Angkup ni ingkon lompit opat hali gararonna anak ni birubiru i ala binahenna songon i, ala so alang rohana.

⁷Dung i ninna si Natan ma mandok si Daud: Ho do baoa i! Songon on do hata ni Jahowa, Debata ni Israel: Nunga Ahu mamiahi ho bahen raja gumomgom Israel, jala nunga Ahu paluahon ho sian tangan ni si Saul.

⁸Nunga pola hubasabasahon tu ho dohot isi ni bagas ni tuanmu, ro di angka jolma ni tuanmu tu bagasan ampuanmu, jala nunga hulehon tu ho pinompar ni Israel dohot Juda, jala tung sura maotikku dope i tambaanku dope nian tu ho manang sadianari.

⁹Boasa tung parhamudaonmu hata ni Jahowa laho mangulahon sogo ni rohana? Ia si Uria marga Het i, nunga dibunu ho marhitehite podang, jala jolmana i nunga dibuat ho bahen jolmam; alai anggo ibana nunga dibunu ho marhitehite podang ni halak Amon.

¹⁰On pe ndang be sumurut podang i sian jabum ro di salelenglelengna, ala naung ditoisi ho Ahu, jala dibuat ho jolma ni si Uria, marga Het i bahen jolmam.

¹¹Songon on do hata ni Jahowa: Ida ma, Ahu sandiri pahehehon dompak ho jea sian pinomparmu sandiri, jala buatonku angka jolmam sian jolo ni matam, jala lehononku angka i tu pedanmu, asa diangkupi angka jolmam modom di adopan ni mata ni ari on.

¹²Ai na niulahonmi di na holip, papataronku ma i di adopan ni sandok Israel dohot di adopan ni mata ni ari.

¹³Dung i ninna si Daud ma mandok si Natan: Nunga mardosa ahu dompak Jahowa! Jadi ninna si Natan ma mandok si Daud: Antong nunga disesa Jahowa dosami, ndang be mate anggo ho.

¹⁴Alai tahe ala naung manginsahi situtu angka musu i di Jahowa dibahen ho marhite sian hata on, ingkon mate anggo na tubu di ho.

¹⁵(II.) Dung i muli ma anggo si Natan tu jabuna. Alai disahiti Jahowa ma posoposo i, na tinubuhon ni jolma ni si Uria di si Daud, gabe matemate ne.

¹⁶Dung i diparhurajai si Daud ma Debata ala posoposo i, huhut marpuasa si Daud, jala masuk tu bilutna, laos peak di tano manipat sabornginna i.

¹⁷Dung i hehe ma angka sintua ni jabuna manopot ibana, naeng pahehehon ibana nian sian tano i; alai ndang olo ibana, jala ndang olo ibana mangan sipanganon rap dohot nasida.

¹⁸Tole muse papituarohon, mate ma posoposo i. Jadi mabiar ma angka naposo ni si Daud paboahon tu ibana naung mate posoposo i, ai ninna rohanasida do: Ida ma, uju mangolu dope posoposo i hupangkulingi hami ibana, hape ndang ditangihon soaranami; nda lam maningkotningkot ma ibana molo hudok hami tu ibana: Nunga mate posoposo i.

¹⁹Jadi dung diida si Daud masihusipan angka naposona i, mamoto ma ibana naung mate posoposo i, gabe didok si Daud ma mandok angka naposona i: Atehe nunga mate posoposo i? Jadi didok nasida ma: Nunga mate tutu.

²⁰Dung i hehe ma si Daud sian tano i jala marsuap huhut marpangir jala disalin pangkeanna, jala masuk ibana tu bagas ni Jahowa, asa martangiang. Jadi dung mulak ibana tu jabuna, didokkon ma padirihon sipanganon di ibana, laos mangan ibana.

²¹Jadi ninna angka naposona ma mandok ibana: Dia do i na binahenmon? Uju mangolu dope posoposo i, marpuasa do ho jala tumatangis, alai ia dung mate posoposo i, hehe do ho jala mangan sipanganon.

²²Dung i ninna rajai ma: Uju mangolu dope posoposo i, marpuasa do ahu tutu jala tumatangis, ai ninna rohangku do: Ise umbotosa, atik tung marpangulah i roha ni Jahowa mida ahu, anggiat laos mangolu posoposo i.

²³Alai anggo dung mate nuaeng aha gunana marpuasa ahu? Tung tarbahen ahu be mangalap ibana mulak? Ahu nama mandapothon ibana, alai anggo ibana ndang tagamon be mulak tu ahu.

²⁴Jadi dung diapuli si Daud roha ni si Batseba jolmana i, ditopot ma nasida, laos rap modom. Jadi tubuan anak ma nasida

muse, dibahen ma goarna si Salomo. Holong roha ni Jahowa anggo mida ibana.

²⁵ Dung i dipaguruhon ma ibana tu panurirang Natan, na manggoar ibana Jedija, ala hasudungan ni Jahowa ibana.

²⁶ (III.) Sai marmusu anggo si Joab dompak Rabba ni halak Amon, laos tartaban huta hundulan ni harajaon i.

²⁷ Dung i disuru si Joab ma angka suruanna manopot si Daud huhut mandok: Nunga patu hubahen Rabba, nunga hutaban huhut huta di topi ni aek.

²⁸ Antong haru papungu ma pasipasi ni parangan i jala tungkum huta i, laos papatu, asa unang ahu papatu huta i, jala unang apala goarhu tarjou tusi.

²⁹ Jadi dipapungu si Daud ma sude parangan i jala borhat dompak Rabba, asa marporang dompak huta i, laos dipapatu.

³⁰ Dung i dibuat ma tumpal ni rajanasida sian uluna, ia boratna sada talenta sere padohot angka mata intan, jadi dibahen ma i tu ulu ni si Daud, diboan huhut mansai godang tabantaban sian huta i.

³¹ Diparuar huhut situasi natorop, isi ni huta i, jala dipampeakkon nasida tu toru ni gargaji dohot tu toru ni angka hureta bosi pardegean dohot tu toru ni angka tangke bosi jala dimosokkon nasida tu Molok i. Suang songon i dibahen tu saluhut huta ni halak Amon. Dung

i mulak ma si Daud dohot sandok parangan i tu Jerusalem.

13¹ (I.) Jadi dung salpu angka i, adong ma di si Absalom, anak ni si Daud, sada iboto na uli rupa, na margoar si Tamar, gabe solo roha ni si Amnon, anak ni si Daud, mida nasida.

² Jadi hagogotan ma roha ni si Amnon, pola tung dapotan sahitha ala si Tamar, ibotona i; ai namarbaju do nasida, mansai sungka di roha ni si Amnon mambahen agia aha tu nasida.

³ Alai adong ma di si Amnon sada aleale, na margoar si Jonadab, anak ni si Simea, haha ni si Daud; halak na bisuk situtu do si Jonadab i.

⁴ Ro ma hatana tu si Amnon: Mahua ho, umbahen sai lam ganda niangmu, ho ale anak ni raja, sian sadari tu manogotna i! Atehe ndang tarpaboa ho alana tu ahu? Dung i ninna si Amnon ma mandok ibana: Si Tamar, iboto ni si Absalom, anggingki nian dihasolohon rohangku.

⁵ Jadi ninna si Jonadab ma mandok ibana: Modom ma ho tu podomanmu, jala paula ho marsahit. Ia dung ro amangmu maningkir ho, dohononmu ma tu ibana: Ua dokkon nian ro si Tamar, ibotongki mangalehon ahu mangan sagusagu dohot marhobas sipanganon di jolongku, asa hupaidaida, jala mangan ahu sian tanganna.

⁶Dung i laho modom ma si Amnon, dipaula ibana marsahit. Jadi dung ro rajai maningkir ibana, ninna si Amnon ma mandok rajai: Aut ro nian si Tamar, ibotongku, asa dipauli dua sagusagu di jolongku, jala mangan ahu sian tanganna.

⁷Dung i disuru si Daud ma suruanna mangalapi si Tamar tu jabu, ninna ma: Ua laho ho tu jabu ni si Amnon, ibotom, jala hobas di ibana sipanganon.

⁸Dung i laho ma si Tamar tu jabu ni si Amnon, ibotona i. Alai peak di podomanna do ibana didapot. Jadi dibuat ma itak na niudi, jala didogildogil ma i, asa mambahen sagusagu di jolona, laos dilompa ma angka sagusagu i.

⁹Dung i dihindat ma balanga i laos diusehon di jolona; alai manjua do ibana mangan. Dung i ninna si Amnon ma: Dokkon ma ruar sude jolma i sian lambungku, jadi ruar ma sude jolma i sian lambungna.

¹⁰Dung i ninna si Amnon ma mandok si Tamar: Boan ma ale ito, sipanganon i tu bilut, asa mangan ahu sian tanganmu! Jadi dibuat si Tamar ma angka sagusagu na pinaulina i, jala diboan tu si Amnon, ibotona i tu bagasan bilut.

¹¹Jadi dung diboan jonok tu lambungna, asa mangan ibana, disoro ma nasida, jala ninna ma mandok nasida: Ro ma ho ale ito, modom tu lambungkon!

¹²Alai ninna nasida ma mandok ibana:

Unang songon i ale ito! Unang parsoada ahu, ai ndang jadi ulahononhon songon i di Israel. Unang ulahon haurahon sisongon i!

¹³Ia ahu, tung tudia ma boanonku haurahonku? Ia ho gabe tudoshon sahalak sian angka na oto di Israel. Ua pangkulingi tagonan rajai, ai ndang tagamon juaonna mangalehon ahu tu ho.

¹⁴Alai ndang olo ibana manangihon soaranasida, tung digogoi do nasida, jala diparsoada, laos diangkupi nasida modom.

¹⁵Dung i magigi situtu ma si Amnon mida nasida, umbalga gicina mida nasida, sian holongna na jolo; pola didok si Amnon mandok nasida: Hehe ma ho, laho ma ne ho!

¹⁶Alai ninna nasida ma mandok ibana: Sitongka songon i, umbalga do hajahaton on, sian na asing, na binahenmi tu ahu, tung palaholahoonmu ahu. Alai ndang olo ibana tumangihon nasida.

¹⁷Pola dijou naposona, parhaladona, jala ninna ma: Ua pabali parompuan on sian lambungkon tu balian, jala hinsu pintu i sian pudina!

¹⁸Alai salumbung sampuborna na ganjang alit tu nasida, ai songon i do somal angka boru ni raja, angka namarbaju, marpangkean salumbung do. Jadi dung dionjaronjar pahaladona i nasida tu balian, jala dihinsu pintu i sian pudina.

¹⁹Dibahen si Tamar ma sirabun tu uluna, jala disansani salumbung sampuborna i na ganjang i, na alit tu nasida, jala dibahen tanganna tu uluna, laos hatop mardalan huhut manganguhi.

²⁰Dung i ninna si Absalom, ibotona i ma mandok nasida: Atehe ndatung ditopot si Amnon ibotomi ho? Antong, ale ito, sip ma ho, ibotom do ibana; unang pola arsakkon tu roham hata on! Alai mago marsak boti ma si Tamar tading di jabu ni si Absalom, ibotona i.

²¹Jadi dung dibege si Daud angka hata i sudena, tarrimas situtu ma ibana.

²²Alai ndang masipangkulingan si Absalom dohot si Amnon nang taringot tu na jat, manang na denggan; ai dihosom si Absalom do si Amnon, ala ginogoanna si Tamar, ibotona i.

²³(II.) Jadi dung salpu arga dua taon, uju adong di si Absalom angka sigusting imput ni birubiruna di Baal-Hazor, mardonokkon Epraim, dipio si Absalom ma huhut angka anak ni rajai.

²⁴Dung i ditopot si Absalom ma rajai, ninna ma: Ua ida ma, adong angka sigusting imput ni birubiru di naposomon, aut olo nian rajai rap dohot angka naposona mardalan sauduran dohot naposomon.

²⁵Alai ninna rajai ma mandok si Absalom: Ndang pola, ale anaha! Unang pola luhut hami ro, asa unang pola susa ho bahenonnami. Sai

disosoi do nian ibana, alai laos so olo rajai laho, asal dipasupasu ibana.

²⁶Dung i ninna si Absalom ma: Molo so pola dohot rajai, ua loas ma si Amnon dahahang i mardalan rap dohot hami. Alai ninna rajai ma tu ibana: Boasa pola dohot ibana mardalan rap dohot ho?

²⁷Alai sai didatdati si Absalom do manosoi ibana, asa diloas rajai si Amnon laho rap dohot sude anak ni rajai.

²⁸Dung i martona ma si Absalom tu angka naposona songon on: Ua matahon hamu ma, molo mamungka las roha ni si Amnon binahen ni anggur, jala hudok mandok hamu: Bunu hamu ma si Amnon, ingkon bunuonmuna ibana mate! Unang ma mabiar hamu, ai ahu do mandokkon hamu. Antong pir ma tondimuna jala angka na todos di ari!

²⁹Jadi dibahen angka naposo ni si Absalom ma tu si Amnon, songon na tinonahon ni si Absalom i. Jadi hehe ma sude anak ni rajai jala marsihundul ganup di halodena be na marsahe asa maporus.

³⁰Jadi di tongan dalan dope nasida, nunga sahat barita i tu si Daud, didok halak ma: Nunga dibunu si Absalom sude anak ni rajai, ndang adong teba sian nasida nanggo sahalak.

³¹Dung i hehe ma rajai, jala disansani angka pangkeanna, laos manungkap tu tano, jala

saluhut naposona jongjong humaliang ibana marpangkean angka na sinansanan.

³²Dung i ro ma hata ni si Jonadab, anak ni si Simea, haha ni si Daud, ninna ma: Unang ma didok roha ni tuanku: Luhut dolidoli, angka anak ni rajai naung mate, sasada si Amnon do na mate; ai tibu hian do i ditahi roha ni si Absalom, olat ni ari dung ginogoan ni si Amnon tahe si Tamar, ibotona i.

³³On pe unang ma pola diarsakkon rajai hata i tu rohana, pola dirimpu saluhut anak ni rajai naung mate, ai sasada si Amnon i do na mate.

³⁴Alai maporus ma anggo si Absalom. Dung i manatapnatap ma dolidoli parjaga i, gabe diida ma torop halak ro sian dalan dipudi na, mangoriori dolok.

³⁵Dung i ninna si Jonadab ma mandok rajai: Ida ma, nunga ro angka anak ni rajai; songon na nidok ni naposomon, songon i do masa.

³⁶Jadi dung tolhas hatana i didok, ida ma, nunga ro angka anak ni rajai, angka dipangiar be ma soarana tumatangis; rajai pe ro di naposona sudena manggogo be tumatangis.

³⁷Alai anggo si Absalom nunga maporus laho mandapothon si Talmai, anak ni si Amihud, raja sian Gesur. Alai sai gondok do anggo roha ni si Daud paingotingot anakna i saleleng mangolu ibana.

³⁸Asa dung maporus si Absalom laho tu Gesur, gabe tinggal disi ibana tolu taon lelengna.

³⁹Dung i di laonlaon ni ari masihol ma roha ni raja Daud naeng borhat mandapothon si Absalom, ai nunga sabam rohana mida si Amnon naung mate i.

14¹(I.) Jadi dung mamoto si Joab, anak ni Nai Seruia naung masihol roha ni rajai mida si Absalom.

²Jadi disuru si Joab ma suruanna tu Tekoa mangalapi sian i sada parompuan na bisuk, ninna ma mandok nasida: Ua paula ho marsak jala tujungkon ulosmi jala unang marpangir ho, jala paula songon sada parompuan naung leleng marhinamagohonjolma na mate.

³Dung i topot ma rajai jala aluhon tu ibana hombar tu hata on. Dung i diaturhon si Joab ma hata angka sidohononna.

⁴Tole laho mangalualu nian parompuan sian Tekoa tu rajai manungkap ma ibana tu tano jala marsomba, ninna ma: Tolongi ahu, ale rajanami!

⁵Dung i ninna rajai ma mandok nasida: Aha huroha di ho? Jadi ninna nasida ma: Iale rajanami, parompuan na mabalu do ahu, nunga mate sinondukku.

⁶Jala adong di naposom boruboru dua anak, pagulut nasida na dua di ladang jala ndang adong nanggo sahalak manolai nasida, gabe

dibunu na sahalak na sahalaknari laos mate ibana.

⁷Dung i ida ma, nunga hehe sandok margai dompak naposom boruboru, angka ninna ma: Boan tusonjolma sibunu anggina i, asa hubunu hami ibana bahen abul ni anggina i, naung binununa i, asa husiaphon hami nang panean i. Asa naeng intopannasida do anakku na sampisik na tinggal i, asa unang tinggal di sinondukku goar, manang pinompar di atas tano on.

⁸Dung i didok rajai ma mandok parompuan i: Laho ma ho muli tu jabum, hulehon pe parenta taringot tu ho.

⁹Dung i ninna parompuan sian Tekoa i ma mandok rajai, iale rajanami: Manginona tu ahu dohot tu pinompar ni damang hajahaton i; alai lias ma anggo rajai dohot habangsana.

¹⁰Dung i ninna rajai ma: Molo adong manang ise na mandok boha tu ho, boan ma ibana tu jolongku, asa unang be didatdati pasusasusa ho.

¹¹Dung i ninna parompuan i ma: Sai marningot ma rajai di Jahowa Debatam, asa unang dipatamba parlulu i hinamago, jala unang diago nasida anakki! Alai ninna rajai ma: Songon sintongna mangolu Jahowa, na so tupa marurus nanggo sada sian obuk ni anakmu tu tano.

¹²Dung i ninna parompuan i ma: Santabi ale rajanami, sai loas ma naposom boruboru

mandok hata sisandok tu tuanku! Dung i
ninna rajai ma: Antong hatahon ma!

¹³Dung i ninna parompuan i ma: Boasa tung
songon i sangkap ni roham dompak bangso ni
Debata? Olat ni dung didok rajai hata ondeng,
doshon halak parsala ibana, ala so mulak
diloas rajaijolma na pinabalina.

¹⁴Ai ingkon mate do hita, jala songon aek do
hita na niusehon tu tano, na so tarpapungu
be, jala ndang dibuat Debata hosa ni halak,
sai marsangkap do rohana, asa unang laos
dipabali sian ibanajolma naung bali hian.

¹⁵Nuaeng pe, umbahen na ro ahu mandok
hatangkon tu rajai, ala dipambibiari halak
ahu; jadi ninna roha ni naposom boruboru:
Ua mangalualu ahu tu rajai, anggiat tung
diturut rajai hata ni naposona boruboru.

¹⁶Olo tahe, sai tangihonon ni rajai do laho
paluahon naposona boruboru sian tangan
ni baoa na naeng mangago ahu rap dohot
anakki sian partalian ni Debata.

¹⁷Angkup ni ninna roha ni naposom
boruboru do: Anggiat tung hata ni tuanku,
pasonang roha; ai songon sada surusuruan ni
Debata, songon i do tuanku rajai tumangihon
na denggan dohot na jat; sai didongani
Jahowa Debatam ma ho!

¹⁸(II.) Dung i ro ma alus ni rajai mandok tu
parompuan i: Unang tung porso tu ahu hata
na naeng sungkunhononku tu ho. Jadi ninna
parompuan i ma: Didok tuanku ma hatana!

¹⁹Dung i ninna rajai ma: Atehe, nda tangan ni si Joab mandongani ho di saluhutna i? Jadi ninna parompuan i ma mangalusi: Songon sintongna mangolu hosam, ale rajanami molo tung adong na lipe tungkan siamun manang tungkan hambirang, sian saluhut na nidok ni tuanku, ai naposom si Joab, ibana tahe manonai ahu, jala ibana mangaturhon saluhut hata i tu pamangan ni naposom boruboru.

²⁰Mambahen marpangaliatan pe hata i, laos binahen ni naposom si Joab do; alai na pistar do anggo tuanku, songon hapistaran ni sada suruan ni Debata, tung diboto do saluhut na masa di tano on.

²¹Dung i didok rajai ma mandok si Joab: Ida ma, nunga hubahen hombar tu hatamon; antong laho ma ho, boan ma mulak dolidoli si Absalom i.

²²Jadi manungkap ma si Joab tu tano marsomba, jala dipasupasu rajai, ninna ma: Apala sadarion ma mamoto naposom, naung dapotan asi ni roha ahu di adopanmu, ale rajanami, ala dibahen rajai hombar tu hata ni naposona.

²³Jadi borhat ma si Joab laho tu Gesur, jala diboan si Absalom tu Jerusalem.

²⁴Alai ninna rajai ma: Mulak ma ibana jolo tu jabuna, ndang dope idaonna anggo bohingku. Jadi mulak ma si Absalom tu jabuna, alai anggo bohi ni rajai ndang dope diida.

²⁵ Alai ndang adong di sandok Israel nanggo sahalak songon uli ni si Absalom, pola tarbarita situtu. Sian palak ni patna sahat ro di pakpak uluna, ndang adong tihasma.

²⁶ Ia uju digusting obuk ni uluna (disimburi do i somal di ujung ni gonop taon, ai madokdokhu do i di ibana, jadi ingkon manimburi ibana) jadi borat ni obuk ni uluna dua ratus sekkel do nidasing di hatian ni raja.

²⁷ Dung i tubu ma di si Absalom tolu anak jala sada boru, na margoar si Tamar; i ma sada parompuan na uli rupa.

²⁸ (III.) Asa boho dua taon lelengna tinggal si Absalom di Jerusalem, laos so diida do anggo bohi ni rajai.

²⁹ Jadi disuru si Absalom ma suruanna manopot si Joab, naeng suruonna ibana manopot rajai; hape ndang olo ro si Joab. Dung i disuru muse paduahalihon, alai laos so olo ibana ro.

³⁰ Jadi ninna si Absalom ma mandok angka naposona: Ida hamu ma hauma ni si Joab di lambung haumangku, hatubuan ni eme! Laho ma hamu, jala surbu hamu ma i dohot api! Jadi disurbu angka naposo ni si Absalom ma na santurpuk i dohot api.

³¹ Jadi borhat ma si Joab manopot si Absalom tu jabu, ninna ma mandok ibana: Boasa tung disurbu angka naposom haumangku na santurpuk i dohot api?

³²Dung i ninna si Absalom ma mandok si Joab: Ida ma, nunga pola husuru suruanku manopot ho, mandok: Sai ro ma ho tuson, asa husuru ho manopot rajai, mandok tu ibana, boasa ro ahu ulaning sian Gesur? Tagonan di rohangku disi dope ahu. On pe sai naing idaonku bohi ni rajai. Alai molo tung adong dope salangku, dibunu rajai nian ahu!

³³Dung i ditopot si Joab ma rajai, jala dipasahat hata i tu ibana. Dung i didokkon rajai ma si Absalom ro tu jolona, gabe disomba ibana, pola tung manungkap tu tano di adopan ni rajai, jadi diumma rajai ma si Absalom.

15¹(I.) Dung salpu angka i, didokkon si Absalom ma padirion di ibana hureta dohot angka hoda, angkupni limapulu halak, angka na paihutihut ibana.

²Hehe huhut sogot ganup manogot si Absalom laho jongjong tu lambung dalan tungan bahal. Jadi ia adong ro halak na marparkaro laho manopot rajai mangido uhum, gabe dipangkulingi si Absalom, ibana, ninna ma: Sian huta dia do ho? Ia didok ibana: Sian sada huta di angka marga ni Israel do naposomon.

³Jadi didok si Absalom ma tu ibana: Ida ma, tingkos do nian parkarom jala bonar, alai ndang tagamon adong nanggo sahalak na manangihon alualum di jolo ni rajai.

⁴Angkup ni didok si Absalom ma: Iale inang, aut ahu ma nian dipabangkit halak gabe panguhum di tano on, asa ro tu jolongku ganupjolma na marparsalisian manang marparkaro, patingkosonku ma nian uhum tu ibana!

⁵Dung i molo adongjolma jumonok, naeng marsomba tu ibana, pintor disurdukkon tanganna manogu ibana huhut diumma.

⁶Sai songon i pangalahona dibahen si Absalom tu sandok Israel, angka na ro mangido uhum tu rajai; gabe songon i ditangko si Absalom roha ni halak Israel.

⁷(II.) Jadi dung salpu opat taon, ninna si Absalom ma mandok rajai: Ua loas ma ahu laho tu Hebron, asa hugarar bagabaganku, naung hubagabagahon tu Jahowa.

⁸Ai nunga marbagabaga hian naposomon uju maringan dope ahu di Gesur, di luat Ram, ningku do: Molo tung sonang ahu mulak togihonon ni Jahowa tu Jerusalem pasahatonku ma sada pelean tu Jahowa.

⁹Dung i ninna rajai ma mandok ibana: Antong laho ma ho mardamedame! Jadi borhat ma ibana laho tu Hebron.

¹⁰Alai nunga disuru si Absalom hian halak pangkahap tu saluhut marga ni Israel, maningtingkon: Molo dibege hamu soara ni sarune, dok hamu ma: Nunga bangkit raja si Absalom di Hebron!

¹¹ Alai dua ratus halak sian Jerusalem, angka na ginokkon hian sauduran dohot si Absalom sian tobok ni rohanasida, ai ndang dipabotoboto nasida agia aha taringot tu hata i.

¹² Nunga digokkon si Absalom hian nang si Ahitopel, halak Gilo i, panuturi ni si Daud, ro sian huta Gilo laho pasahathon angka pelean i. Jadi lam gomos ma parbulanon i halak situasi natorop pe, lam torop do ro mandapothon si Absalom.

¹³ (III.) Dung i ro ma sahalak siboan barita tu si Daud, ninna ma: Roha ni ganup halak Israel paihuthon tahi ni si Absalom.

¹⁴ Dung i didok si Daud ma mandok naposona sudena, angka na rap dohot ibana di Jerusalem: Beta ma hita maporus, ai ndang tagamon adong haluaon di hita maradophon si Absalom. Hatop ma hita laho, asa unang rampohonna hita dison, jala marhinamago hita bahenonna, tabanonna dohot huta on marhitehite podang.

¹⁵ Dung i ninna angka naposo ni rajai ma mandok ibana: Manang aha na pinangido ni roha ni rajai patupaon ni hami angka naposomon do!

¹⁶ Dung i ruar ma rajai udur dohot sude isi ni bagasna, mardalan pat. Alai ditinggalhon rajai do sampulu parompuan pinarjolmana mangaramoti bagas i.

¹⁷ Jadi dung ruar rajai dohot sude na torop i mardalan pat, sulon ma nasida di lambung bagas haroroan.

¹⁸ Dung i saluhut naposona mamolus sian lambungna, ro di sude angka hupas dohot rundo dohot sude halak Gat, onom ratus halak toropna, angka na ro sian Gat mardalan pat, angka na mamolus sian adopan ni rajai.

¹⁹ Dung i ninna rajai ma mandok si Ittai, halak Gat i: Boasa pola dohot ho mardalan udur dohot hami? Mulak ma anggo ho jala tinggal di lambung ni rajai, ai halak na pulik marga do ho, angkupni nambura bungkas ho sian ingananmu hian.

²⁰ Nantoari dope ho ro, tung patut ma togihononku ho sadarion maotaot rap dohot hami? Alai anggo ahu laho ma ahu manang dompak dia tarbahen ahu mardalan. Mulak ma anggo ho jala togihon mulak angka hahaang gim. Sai didongani asi ni roha dohot habonaron ma ho!

²¹ Alai ninna si Ittai ma mangalusi rajai: Songon sintongna mangolu Jahowa mangolu dohot tuanku: Manang di inganan dia tuanku, nang laho mate, nang laho mangolu, ingkon disi do dohot naposomon.

²² Dung i ninna si Daud ma mandok si Ittai: Antong beta ma mardalan rap dohot ahu! Jadi dohot ma si Ittai halak Gat, mardalan rap dohot sude halakna dohot sude anakonna, angka na rap dohot ibana.

²³Dung i sandok isi ni tano i masipangiar soarana be tumatangis, uju mamolus sude situan na torop i. Dung i ditaripari rajai ma sunge Kidron, taripar ma dohot sude situan na torop i manulus dalan na laho tu halongonan.

²⁴(IV.) Jadi ida ma, dohot do si Sadok ro di sude halak Lepi donganna, angka na mangusung poti parpadanan ni Debata, laos dipajongjong disi. Dung i dipelehon si Abiatar ma angka pelean situtungon, paima timpas sude situan na torop i ruar sian huta i.

²⁵Alai ninna rajai ma mandok si Sadok: Boan ma mulak anggo poti ni Debata tu huta i! Molo tung jumpangan asi ni roha ahu maradophon Jahowa, sai togihononna do ahu mulak, asa pataridahon Ibana dohot inganan parmiananna tu ahu muse.

²⁶Alai molo tung songon on hatana: Nandang lomo rohangku mida ho: Ida ma dison do ahu, sai dibahen ma tu ahu, hombar tu lomo ni rohana!

²⁷Dung i didok rajai ma mandok malim Sadok: Nda paralatan do ho? Antong mulak ma ho tu huta i mardamedame rap dohot si Ahimas, anakmu dohot si Jonatan, anak ni si Abiatar; anakmuna na dua i ma donganmuna.

²⁸Ida hamu ma, maimaima ma anggo ahu di hatariparan angka na laho tu halongonan, paima ro barita sian hamu laho palumba ahu.

²⁹ Jadi diboan si Sadok dohot si Abiatar ma poti ni Debata mulak tu Jerusalem, laos tinggal disi nasida.

³⁰ Dung i nangkok ma anggo si Daud tu dolok Jetun, nangkok huhut tumatangis jala martujung ibana, jala ndang marsarung patna; jala sandok na torop i na rap dohot ibana martujung be do laho nangkok huhut tumatangis.

³¹ Jadi dung tarbortik tu si Daud didok halak: Dohot do si Ahitopel dongan ni halak angka na marbulan rap dohot si Absalom, ninna si Daud ma: Iale Jahowa sai sundati ma tahi ni si Ahitopel.

³² (V.) Jadi dung sahat si Daud ro di punsu ni dolok i, marsomba ibana disi tu Debata, ida ma, ro ma si Husai halak Arki manomunomu ibana, marpangkean na sinansanan jala tano di atas uluna.

³³ Jadi ninna si Daud ma mandok ibana: Molo ho donganku mardalan paganda dokdokna di ahu do ho.

³⁴ Alai molo mulak ho tu huta i, jala dohononmu tu si Absalom: Naposom ma ahu, ale rajanami! Naposo ni amangmu do ahu anggo na sai laon, alai anggo nuaeng gabe naposom ma ahu, jadi tarselak ma bahenonmu tahi ni si Ahitopel dompak ahu.

³⁵ Angkup ni, nda si Sadok dohot si Abiatar, malim na dua i donganmu disi? Asa saluhut

hata na binegem sian bagas ni rajai, ingkon paboanmu tu malim Sadok dohot Abiatar.

³⁶Ida ma, disi do rap dohot nasida anaknasida na dua i, Ahimas anak ni si Sadok dohot si Jonatan, anak ni si Abiatar; marhite sian nasida tarpaboaboa hamu tu ahu luhut hata na binegemuna i.

³⁷Jadi sahat ma si Husai, aleale ni si Daud tu huta i, si Absalom pe ro do tu Jerusalem.

16¹(I.) Jadi dung tuat si Daud saotik sian punsu ni dolok i, ida ma, ro ma si Siba, naposo ni si Mepiboset manomunomu ibana mardongan sapasang halode na marpalano, sorat mamboan duaratus roti dohot saratus sagusagu marsaor parbue ni anggur dohot saratus lampet na ginulean angkup ni anggur gok sada panuhuhan bobak.

²Dung i ninna rajai ma mandok si Siba: Tu aha do angka i bahenonmu? Jadi ninna si Siba ma: Ia angka holodei di isi ni bagas ni rajai do bahen hundulan, ia roti i dohot angka parbue ni anggur bahen panganon ni angka naposo, ia anggur i bahen inumon ni angka na mandate di halongonan.

³Dung i ninna rajai ma: Didia do anak ni tuanmu huroha? Jadi ninna si Siba ma mandok rajai: Ida ma, na tinggal di Jerusalem do ibana, ai ninna do sadarion ma tagamon paulahon ni pinompar ni Israel harajaon ni damang i tu ahu.

⁴Dung i ninna rajai ma mandok si Siba: Ida ma, ho ma nampuna nasa na di si Mepiboset i! Dung i ninna si Siba ma: Manomba ujung manomba huasi ma ahu, molo maruli asi ni roha ahu maradophon ho ale rajanami!

⁵(II.) Alai dung sahat raja Daud tu Bahurim, ida ma, ruar ma sian i sada halak sian marga ni pinompar ni si Saul, na margoar si Simei, anak ni si Gera, mardalandalan ibana huhut mamburai.

⁶Jala didanggurhon batu dompak si Daud dohot dompak sude naposo ni raja Daud, atik pe sude situan na torop i dohot sude angka ulubalang di siamun dohot di hambirang ni rajai.

⁷Alai songon on do hata bura ni si Simei: Bali hian ma ho, alejolma sisopsop mudar dohot baoa parroha na roa situtu.

⁸Nunga manginona tu ho dibahen Jahowa sandok mudar ni pinompar ni si Saul, na sinolukmi bangkit raja, jala nunga dipasahat Jahowa harajaon i tu tangan ni si Absalom, anakmi, jadi ida ma, nunga tung manginsombut tu ho jea binahenmi, ai baoa sisopsop mudar hian do ho!

⁹Dung i ninna si Abisai, anak ni Nai Seruia mandok rajai: Boasa tung buraan ni anjing na mateon tuanku, ua laos ma ahu mandapothon ibana, asa hupisikhon uluna.

¹⁰Alai ninna rajai ma: Aha do parsoranku tu hamu, ale anak ni Nai Seruia? Pasombu

ibana mamburai! Ai Jahowa do mandok tu ibana: Bura i ma si Daud! Tung ise ma hum mandok: Boasa tung bahenonmu songon i?

¹¹ Angkupni didok si Daud ma tu si Abisai dohot tu sude angka naposona: Ida ma, gari anakku, na ruar sian butuhangku sandiri, tumahi hosangku! Lam anak ni marga Benjamin ma nuaeng? Pasombu hamu ibana mamburai, ai Jahowa mandokkon ibana.

¹² Anggiat tung marpamuati roha ni Jahowa mida salangki, jala baloshonon ni Jahowa tu ahu na denggan singkat ni burana i sadarion.

¹³ Jadi ditulus si Daud dohot angka donganna ma dalanna. Alai anggo si Simei, mardalan mangoriori dolok patondong dohot ibana huhut didatdati mamburai dohot mandanggurhon batu dompak ibana dohot manampakhon orbuk.

¹⁴ Dung i bongot huta ma rajai ro di sude na torop i angka na rap dohot ibana, angka na loja be, asa pahosahon disi.

¹⁵ (III.) Alai anggo si Absalom ro di sude na torop i sian halak Israel sahat tu huta Jerusalem, jala si Ahitopel donganna.

¹⁶ Alai dung ro si Husai, halak Arki, aleale ni si Daud, tu jolo ni si Absalom, ninna si Husai ma mandok si Absalom: Sai horas ma rajai! Sai horas ma rajai!

¹⁷ Alai ninna si Absalom ma mangelak si Husai: Tung songon i ma panatapmu tu

alealem? Boasa tung so udur ho dohot alealem.

¹⁸Dung i ninna si Husai ma mandok si Absalom: Ndada manang ise, ai na pinillit ni Jahowa dohot situan na toropon ro di sude halak Israel, ibana nampuna ahu, jala ibana paihutihutonku.

¹⁹Angkup ni, tung tu ise ma ahu tama mangunduk? Nda tu anak ni rajai? Ia songon i pangoloionku di adopan ni amangmu na sai laon, suang songon i nuaeng di adopanmu.

²⁰Dung i ninna si Absalom ma mandok si Ahitopel: Aturhon hamu ma manang aha sibahenonta.

²¹Dung i ninna si Ahitopel ma mandok si Absalom: Topot ma parompuan angka na pinarjolma ni amangmu, angka na tininggalhonna mangaramoti bagas, asa sar dibege sandok Israel naung bau be ho dohot amanta, asa lam marsigomos roha ni sude angka na rap dohot ho.

²²Dung i dipahembang nasida ma sada undungundung di si Absalom di atas tarup. Jadi ditopot si Absalom ma parompuan, angka na pinarjolma ni amana di adopan ni sandok Israel.

²³Ia aturan na niaturhon ni si Ahitopel di angka ari uju i, hira doshon na marsungkun tu hata ni Debata; songon i sude aturan ni si Ahitopel, nang di roha ni si Daud, nang di roha ni si Absalom.

17 ¹(I.) Dung i ro ma hata ni si Ahitopel tu si Absalom: Ua loas ma ahu mamillit sampulu dua ribu halak, asa borhat ahu mangeak si Daud borngin on.

²Asa hurampok ibana binsan loja dope jala daukdauk tanganna, asa godoron ibana hubahen, gabe maporus sandok situan na torop angka na rap dohot ibana, laos bunuonku ma rajai sasadasa.

³Dung i togihononku ma sude na torop i mulak tu ho. Ia dung mulak sude jolma i, jumpang ma songon na pinangido ni roham, mardame ma sandok na torop i.

⁴Jadi lomo ma roha ni si Absalom di hata i, lomo dohot roha ni sude sintua ni Israel.

⁵Alai ninna si Absalom ma: Ua jinou ma dohot si Husai, halak Arki, asa itatangi manang beha dohononna taringot tusi.

⁶Jadi dung ro si Husai tu jolo ni si Absalom, ninna si Absalom ma mandok ibana: Songon on do hata ni si Ahitopel; atehe patulusonta do hatana i, manang ndang? Ia ho beha dohononmu?

⁷Jadi ninna si Husai ma mandok si Absalom: Nandang denggan aturan na niaturhon ni si Ahitopel anggo sahalion.

⁸Angkup ni ninna si Husai: Ditanda ho do roha ni amangmu dohot roha ni halakna, ai angka na begu do nasida jala na todos be di ari, songon gompul di ladang tahe na agoan anak. Angkup ni baoa na somal marmusu

hian amangmu, ndang tagamon marborngin ibana rap dohot na torop i.

⁹Ida ma, ra tung martabuni ibana nuaeng di sada barungbung, manang di sada inganan na asing. Jadi tung sura tinggang deba mate sian nasida di mulana on, gabe dibege na umbegesa, dohononna ma: Nunga talu halak na torop angka na mangihuthon tu si Absalom.

¹⁰Tung sura pe ulubalang manang ise, jala parateate songon singa, godoron situtu do ateatena; ai sandok Israel umbotosa ulubalang do amanta, jala halak na begu do angka donganna i.

¹¹Dibahen i anggo ahu mangaturhon, ingkon jolo papunguonmu tu lambungmu sandok Israel, olat ni Dan sahat ro di Beerseba, songon horsik di topi ni laut toropna, jala ho sandiri manguluhon tu tongtangan.

¹²Dung i sahali ro hita mandopang ibana di sada inganan manang didia jumpang hita ibana, asa itarongom ibana songon hadadabu ni nambur tu tano, jadi ndang tagamon adong teba sian ibana dohot sian sude halak angka na rap dohot ibana, nanggo sahalak.

¹³Alai tung sura manginsurut ibana tu sada huta, ingkon bahenon ni sandok Israel tu huta i angka jorat, laho mangarumpakkon huta i sahat ro di batang aek, paima so adong be jumpang disi nanggo sada batu metmet.

¹⁴Dung i ninna si Absalom dohot sude halak Israel ma: Dumenggan do aturan ni si Husai, halak Arki, sian aturan ni si Ahitopel. Alai tahe marharoroan sian Jahowa do hata i laho manundati tahi ni si Ahitopel na denggan i nian, asa diparo Jahowa hamagoan tu si Absalom.

¹⁵(II.) Dung i ninna si Husai ma tu si Sadok dohot tu si Abiatar, malim na dua i: Songon on songon on diaturhon si Ahitopel tu si Absalom dohot tu angka sintua ni Israel, alai songon on songon on anggo ahu mangaturhon.

¹⁶On pe, hatop ma suru hamu halak mamboan barita i tu si Daud mangalumbahon: Unang ho marborngin di angka hatariparan laho tu halongonan: Hatop ma ho taripar tagonan, asa unang tarbondut rajai ro di sandok situasi natorop angka na rap dohot ibana.

¹⁷Alai anggo si Jonatan dohot si Ahimas jongjong do di lambung sumur Enrogel. Dung i laho ma sada naposo boruboru pasahathon barita i tu nasida, asa laho nasida paboahon barita i tu raja Daud; ai ndang jadi mullop nasida laho masuk tu huta i.

¹⁸Hape diida sada dakdanak nasida, gabe dipaboa tu si Absalom. Alai hatop do nasida na dua mardalan, gabe masuk nasida tu jabu ni sada halak di Bahurim; adong di ibana sada sumur di alamanna, gabe mijur nasida tusi.

¹⁹Dung i dibuat parompuan i ma tutupna i jala di paherbang di atas baba ni sumur i, laos disirsirhon tusi monis, asa unang mamoto halak disi.

²⁰Dung i ro ma angka naposo ni si Absalom mandapothon parompuan i tu jabu, angka ninna ma: Didia do si Ahimas dohot si Jonatan? Alai ninna parompuan i ma mandok nasida: Nunga ditaripari nasida sunge na metmetan! Jadi dung mutu rohanasida mangalului, hape ndang jumpangsa, gabe mulak nasida tu Jerusalem.

²¹Jadi dung laho angka jolma i manaek ma nasida sian sumur i, laos mardalan mamboan barita i tu raja Daud, angka ninna nasida ma mandok si Daud: Hehe borhat ma hamu jala hatop taripari hamu sunge i, ai songon on do diaturhon si Ahitopel mangalo hamu.

²²Jadi borhat ma si Daud ro di sude na torop i angka na rap dohot ibana, jala ditaripari nasida batang aek Jordan; tole torang ari manogotna i, ndang adong be teba nanggo sada, na so manaripari Jordan i.

²³Alai dung diida si Ahitopel na so tulus aturanna i, dipalanoi ma halodena, laos borhat ibana laho muli tu jabuna di hutana i; dung martona ibana tu isi ni bagasna, maningkot ma ibana laos mate, gabe ditanom halak ibana di bagasan tanoman ni amana.

²⁴(III.) Ianggo si Daud sahat ma tu Mahanaim; alai anggo si Absalom ditaripari

ma Jordan, ibana ro di sude halak Israel donganna i.

²⁵Dung i dipabangkit si Absalom ma si Amasa bahen partogi ni parangan, singkat ni si Joab. Alai anggo si Amasa, anak ni sada baoa na margoar si Jeter halak Ismael, na marjolmahon si Abigail, boru ni si Nahas, anggi ni Nai Seruia, ina ni si Joab.

²⁶Dung i marsaro ma Israel dohot si Absalom di tano Gilead.

²⁷Jadi dung sahat si Daud tu Mahanaim, ro ma si Sobi, anak ni si Nahas, sian Rabba ni halak Amon, dohot si Mahir, anak ni si Ammiel sian Lodebar, dohot si Barsilai halak Gilead sian Regolim.

²⁸Angka na mamboan bantal, balanga, mangkuk tano tangko, dahanon sipulut dohot dahanon hian, itak omping, dalidali, hadio dohot dahanon na sinaok.

²⁹Tole muse situak ni loba dohot mantega dohot birubiru dohot susu ni lembu na nialhotan mangalehon tu si Daud dohot tu na torop, angka donganna i panganonnasida; ai ninna rohanasida: Nunga male na torop i, jala galegale jala mauas di halongonan.

18¹(I.) Dung i dipaodor si Daud ma na torop i angka na rap dohot ibana, jala dipabangkit di nasida induk ni sisaribu dohot induk ni sisaratus.

²Dung i dipaborhat si Daud ma situasi na torop i, sapartolu niuluhon ni si Joab,

jala sapartolu niuluhon ni si Abisai, anak ni Nai Seruia, anggi ni si Joab, jala sapartolu niuluhon ni si Ittai, halak Gat. Dung i didok rajai ma mandok na torop i: Ingkon borhat do ahu rap dohot hamu.

³Alai ninna na torop i ma: Ndang jadi ho borhat; ai tung sura pe maporus hami, ndang pola pardulinasida anggo hami, ai sobokkon saloksa do anggo ho. Asa tagonan do ro ho sian huta laho manolongi hami.

⁴Dung i ninna rajai ma mandok nasida: Manang dia lomo ni rohamuna, i do bahenonku! Dung i jongjong ma rajai tu lambung bahal, ruar ma anggo sude na torop i marratusratus dohot marriburibu.

⁵Dung i martona ma rajai tu si Joab dohot tu si Abisai dohot tu si Ittai, songon on: Maol bahen hamu tu dolidoli si Absalom! Pola dohot na torop i umbegesa, uju martona rajai tu sude angka induk taringot tu si Absalom.

⁶(II.) Jadi dung ruar na torop i tu adaran mandapothon Israel, tongtang ma nasida di tombak Epraim.

⁷Jadi talu ma disi halak Israel dibahen angka naposo ni si Daud tung hataluan godang masa disi di na sadari i, pola mate duapulu ribu halak.

⁸Tung na ragat situtu do na martongtang i, disampak do sandok tano i, jala andul toropna parangan i mago dipangan tombak sian na pinangan ni podang sadarina i.

⁹Dung i pajumpang ma si Absalom dohot angka naposo ni si Daud; mangkunduli halode na marsahe do anggo si Absalom. Jadi dung tolhas halode na marsahe i mamolus sian toru ni dangka ni hariara na bolon, alit ma obukna tu hariara i, gabe gaunggaung ibana di holangholang ni langit dohot tano, laos laho do anggo halode na marsahe i sian toruna.

¹⁰Jadi dung diida sahalak ibana, dipaboa ma barita i tu si Joab, ninna ma: Ida ma, nunga huida si Absalom gaunggaung di sada hau hariara.

¹¹Dung i ninna si Joab ma tu baoa na mamboan barita i tu ibana: Ida ma, nunga diida ho ibana, boasa tung so bunuonmu ibana disi marbabap tu tano? Ingkon mangalehon ahu nian tu ho sampulu rupia dohot hohos sada.

¹²Alai ninna baoa i ma mandok si Joab: Nang tung sura didasing ho saribu rupia tu bagasan tanganku, ndang tagamon mangonai tangan ahu tu anak ni rajai, ai apala tu pinggolta martona rajai tu ho dohot tu si Abisai dohot si Ittai, ninna do: Ingkon maol bahen hamu dolidoli si Absalom i!

¹³Tung sura hubahen sipaotooto umbunu hosana i, manang hata dia tahe ndang tarporso maradophon rajai, ho sandiri tagamon hehe gabe alongku.

¹⁴Dung i ninna si Joab ma: Nandang tarbahen ahu songon i leleng maimaima di jolomi!

Jadi dibuat ma tolu mundimundi di bagasan tanganna jala ditullangkon tu bagasan parpusupusuan ni si Absalom, uju mangolu dope ibana di tongatonga ni hariara i.

¹⁵Dung i ro ma sampulu dolidoli, angka siusung sinjata ni si Joab, mangkaliangi ibana, laos dibunu nasida ma si Absalom, asa mate ibana.

¹⁶Dung i didokkon si Joab ma umpalu sarune asa mulak na torop i, unang be didatdati mangalele Israel; ai naeng olanan ni si Joab do na torop i.

¹⁷Dung i dibuat nasida ma bangke ni si Absalom jala dibolongkon ibana di tombak, tu bagasan sada godung na bolon, jala ditimbuni di atasna sada timbunan batu na godang situtu. Alai anggo sandok Israel maporus do ganup tu undungundungna be.

¹⁸Alai anggo si Absalom, nunga dibuat hian sada tiang jala dipatindang di dirina, tagan di ngoluna dope, jongjong do i di rura ni raja; ai ninna do: Ndang adong anakku, na mambahen parningotan di goarhu; dung i dibahen ma goar ni tiang i mangihuthon goarna sandiri, laos targoar do i partinandaan ni si Absalom rasirasa sadarion.

¹⁹(III.) Dung i ro ma hata ni si Ahimas, anak ni si Sadok: Ua marlojong ma ahu mamboan barita i tu rajai, ala naung dipintori Jahowa ibana sian tangan ni musuna.

²⁰Alai ninna si Joab ma mandok ibana:

Ndada baa siboa barita na uli ho sadarion, di ari na asing pe baritahononmu, alai anggo sadarion ndang baritahononmu, ala naung mate anak ni rajai.

²¹Alai didok si Joab ma anggo tu halak Etiopia: Laho ma ho, paboa ma tu rajai naung niidam! Dung i marsomba ma halak Etiopia tu si Joab, laos marlojong.

²²Alai diulahi si Ahimas, anak ni si Sadok muse mandok tu si Joab: Manang beha pe, marlojong ma dohot ahu mangihuthon halak Etiopia. Jadi ninna si Joab ma: Boasa tung marlojong ho, ala anaha? Nandang tagamon maruli upa siboa barita ho!

²³Manang beha pe, sai laho do ahu. Jadi ninna si Joab ma mandok ibana: Antong lojong ma! Jadi marlojong ma si Ahimas manulus dalan sian tobing (ni Jordan), gabe dijoloani ma halak Etiopia.

²⁴Alai hundul di holangholang ni na dua pintu harbangan do anggo si Daud, sai mardalandalan do parjaga i di atas tarup ni harbangan mardonokkon parik manatapnatap humaliang, gabe diida ma sada halak marlojong sasadasa.

²⁵Jadi joujou ma parjaga i paboahon barita i tu rajai. Alai ninna rajai ma: Molo sasadasa, barita na uli ma di bagasan pamanganna. Jadi dung sai didatdati mardalan lam jonok ma ibana.

²⁶Dung i diida parjaga i ma sada halak na asing marlojong gabe joujou parjaga i dompak sijaga bahal, ninna ma: Ida ma, marlojong muse sada halak sasadasa. Jadi ninna rajai ma: Ibana pe sibuan barita na uli do.

²⁷Dung i ninna parjaga i ma: Huida parlojong ni parjolo i, songon parlojong ni si Ahimas, anak ni si Sadok. Jadi ninna rajai ma: Baoa na denggan roha do ibana, jala barita na uli do na binoanna!

²⁸Dung i joujou ma si Ahimas, ninna ma mandok rajai: Nunga demak! Laos marsomba di jolo ni rajai, pola manungkap tu tano jala ninna ma: Pinuji ma Jahowa, Debatam, na patundukkon baoa angka na manggunturi dompak tuanku.

²⁹Alai ninna rajai ma: Beha horas do dolidoli si Absalom i? Dung i ninna si Ahimas ma: Hagunturon bolon do nian na huida, uju na sinuru ni si Joab naposo ni rajai dohot ahu naposomon alai ndang huboto manang aha i.

³⁰Dung i ninna rajai ma: Sumurut ma ho jongjong tusi. Jadi sumurut ma ibana, laos jongjong disi.

³¹Jadi ida ma, nunga ro halak Etiopia, laos didok ma: Barita na uli na hubuan i ale rajanami! Ai nunga dipintori Jahowa ho sadarion sian tangan ni sude halak angka na hehe mangalo dompak ho.

³²Alai ninna rajai ma mandok halak Etiopia:
Beha horas do dolidoli si Absalom i? Jadi
ninna halak Etiopia ma: Ingkon songon tu
dolidoli ma nian songgop tu angka musu ni
tuanku dohot tu sude halak angka na hehe
mangalo dompak ho laho mangago!

³³(19-1) (I.) Jadi margudompong situtu ma
roha ni rajai, jala nangkok tu bilut parginjang
ni harbangan huhut tumatangis; songon
on ma didok huhut mardalandalan ibana:
lale anaha Absalom! Ale anaha! Ale anaha
Absalom! Aut ahu nian mate singkatmi! Ale
Absalom, ale anaha, ale anaha!

19¹(19-2) Dung i dibaritahon halak ma
tu si Joab: Ida ma, sai tumatangis do
rajai jala mangandungi ala si Absalom.

²(19-3) Asa antu hamonangan di na sadari i
manjadi arsak ni roha di sandok bangso i; ai
sar dibege bangso i hata ni halak di na sadari
i: Marsak do roha ni rajai ala anakna.

³(19-4) Jadi marsibuni ma na torop i di na
sadari i laho bongot tu huta, songon parsibuni
ni halak angka na tarurak, ala naung maporus
nasida sian tongtangan.

⁴(19-5) Pola tung dihungkupi rajai bohina,
jala dipangiar soarana mangandungi: lale
anaha Absalom! Absalom, ale anaha, ale
anaha!

⁵(19-6) Dung i ro ma si Joab mandapothon
rajai tu jabu, jala ninna ma: Murak ma
sadarion dibahen ho bohi ni sude naposom,

angka na paluahon hosam sadarion dohot hosa ni angka anakmu dohot borum dohot hosa ni angka jolmam dohot hosa ni parompuan, angka na pinarjolmami.

⁶(19-7) Ala na hinaholonganmu jolma angka na mangkagigihon ho, jala dihagigihon ho jolma angka na mangkaholongi ho; ai diandarhon ho do sadarion, hira na so pola pardulim angka partogi dohot angka naposo; ai tangkas do hutanda sadarion, asal mangolunian si Absalom, nang luhut hami mate sadarion, i ma na tongon di bagasan roham.

⁷(19-8) On pe, hehe ma ho, ruar ma ho, paboa ma hata tau papir tondi ni angka naposom; ai tung husumpahon ma tu Jahowa: Molo so ruar ho annon, ndang tagamon marborngin saborngin on nanggo sahalak donganmu, gabe jea na umbalga do i di ho, sian sandok jea naung mandatang tu ho, olat ni sidakdanakonmu rasirasa nuaeng.

⁸(19-9) Jadi hehe ma rajai laho hundul tu harbangan. Dung i tarbortik ma tu sandok situasi na torop i: Ida ma, hundul do rajai di pintu harbangan! Jadi ro be ma sandok situasi na torop i tu jolo ni rajai, alai anggo halak Israel nunga maporus, ganup tu undungundungna be.

⁹(19-10) (II.) Dung i masisolsolan ma sandok na torop i di saluhut marga ni Israel, angka ninna ma: Nunga dipalua rajai hita sian tangan ni angka musunta, ibana huhut

paluahon hita sian tangan ni halak Palistim;
hape ia nuaeng, ingkon pola maporus ibana
sian tano on maralohon si Absalom.

¹⁰(19-11) Ia si Absalom, naung itamiahi nian
mangarajai hita, nunga mate di tongtangan;
nuaeng pe, boasa sai hohom boti hamu,
mangalapi rajai nian mulak?

¹¹(19-12) Dung i disuru raja Daud ma
suruanna manopot si Sadok dohot si Abiatar,
malim na dua i mandok tu nasida: Pangkulingi
hamu ma angka sintua ni Juda, mandok
tu nasida: Boasa hamu apala parpudi laho
mangalapi rajai mulak tu jabuna? Ai nunga
pola sahat hatahata ni sandok Israel tu rajai
dohot tu jolma isi ni bagasna i.

¹²(19-13) Angka hahaanggingku do hamu,
sisada sibuk dohot mudar hamu dohot ahu.
Antong boasa apala hamu parpudi mangalapi
rajai mulak?

¹³(19-14) Ia tu si Amasa dok hamu ma:
Nda sisada sibuk dohot mudar ho dohot
ahu? Ingkon songon i bahenon ni Debata tu
ahu jala patambaonna dope songon i, molo
so ingkon ho gabe partogi ni parangan di
jolongku saleleng ho mangolu, singkat ni si
Joab.

¹⁴(19-15) Jadi melok ma roha ni saluhut
halak Juda, saroha ma nasida marsuru
manopot rajai, mandok: Sai mulak ma ho ro
di sude angka naposom.

¹⁵(19-16) Dung i mulak ma rajai. Jadi dung sahat ibana tu Jordan, nunga ro hian halak Juda tu Gilgal laho manomunomu rajai, naeng manogihon rajai manaripari Jordan.

¹⁶(19-17) (III.) Jadi hapogan ma si Simeï, anak ni si Gera, halak Benjamin sian Bahurim, asa tuat ibana rap dohot halak Juda manomunomu raja Daud.

¹⁷(19-18) Jala saribu halak donganna sian Benjamin; angkup ni si Siba, naposo ni pinompar ni si Saul, rap dohot anakna sampulu lima halak dohot naposona duapulu halak, gabe ditaripari nasida Jordan i di jolo ni rajai.

¹⁸(19-19) Jadi dung taripar rakit i laho patariparhon isi ni bagas ni rajai, asa mambahen lomo ni rohana, ro ma si Simeï, anak ni si Gera, marsinggang di jolo ni rajai, tongon uju taripar ibana di Jordan.

¹⁹(19-20) Huhut didok mandok rajai: Sai unang dijujur tuanku tu ahu hajahaton i, jala unang dipaingotingot rohana hageduhon na niula ni naposomon, uju di ari haruruar ni tuanku sian Jerusalem, unang pola dipagagathon rajai hata i tu rohana.

²⁰(19-21) Ai nunga tangkas ditanda naposomon, naung mardosa ahu uju i; jala ida ma, anggo sadarion ahu do apala parjolo ro sian sandok pinompar ni si Josep laho tuat manomunomu tuanku.

²¹ (19-22) Dung i ro ma hata ni si Abisai, anak ni Nai Seruia mangalusi: Tung so tama marutang hosa si Simei ala ni on, ai nunga pola diburai ibanajolma na miniahan ni Jahowa!

²² (19-23) Alai ninna si Daud ma: Aha do parsoranku tu hamu, ale angka anak ni Nai Seruia, umbahen naeng gabe Sibolis hamu di ahu sadarion? Tung jadi ma adong mate sadarion baoa di Israel? Ai nda huboto do apala sadarion ahu bangkit raja gumomgom Israel?

²³ (19-24) Dung i ninna rajai ma mandok si Simei: Nandang jadi ho mate! Pola disumpahon rajai tu ibana.

²⁴ (19-25) (IV.) Si Mepiboset pe, anak ni si Saul tuat do manomunomu rajai, ndang dipahe ibana patna manang misena, jala ndang disunci pangkeanna, olat ni ari hapoporus ni rajai, sahat ro di ari hamumulakna mardamedame.

²⁵ (19-26) Jadi dung sahat ibana tu Jerusalem, laho manomunomu rajai, gabe didok rajai ma mandok ibana: Boasa tung so dongananmu ahu na jolo, ale Mepiboset?

²⁶ (19-27) Jadi ninna ibana ma: Iale rajanami, nunga dipaotooto naposongku ahu; ai ninna roha ni naposomon do nian: Palanoanku ma halode sada bahen hundulanku, asa laho ahu manopot rajai, ai na pangpang do naposomon.

²⁷ (19-28) Angkup ni, nunga disuan ibana gasa ni naposomon di adopan ni tuanku. Alai anggo tuanku tudoshon surusuruan ni Debata sada! Antong bahen ma manang aha lomo ni roham.

²⁸ (19-29) Ai tung dia ma nian sandok pinompar ni damang, nda baoa angka na patut nian marutang hosa di jolo ni tuanku; hape lam dipatop ho naposomon hundul tu tongatonga ni halak angka na sapanganan dohot ho. Aha ma gunana tahe pintoranku dope diringku manang mangalu dope tu rajai?

²⁹ (19-30) Dung i ninna rajai ma mandok ibana: Aha labana sai datdatanmu mandok hatam? Nunga putus hatangku: Ingkon ho dohot si Siba marbagi tano i.

³⁰ (19-31) Dung i ninna si Mepiboset ma mandok rajai: Luhut pe dibuat ibana tusi, asal dung mulak tuanku tu jabuna mardamedame!

³¹ (19-32) (V.) Si Barsilai pe, halak Gilead i tuat do sian Regolim, jala ditaripari Jordan rap dohot rajai, pataruhon ibana tu bariba ni Jordan.

³² (19-33) Alai nunga tung matua situtu si Barsilai, ualupulu taon tahe umurna, jala ibana marmudu rajai, uju maringan ibana di Mahanaim, ai baoa ma mora jong do ibana.

³³ (19-34) Jadi didok rajai ma mandok si Barsilai: Ingkon ho donganku taripar, asa huparmudu ho di lambungku di Jerusalem.

³⁴ (19-35) Alai ninna si Barsilai ma mandok rajai: Pola piga ari nari ahu tagamon mangolu, umbahen ingkon nangkok ahu rap dohot rajai tu Jerusalem?

³⁵ (19-36) Boho marumur ualupulu taon ahu sadarion, tung beha ma pambahenku manirang na denggan sian na jat? Tung tarbahen naposomon be mandai manang aha na hupangan manang na huinum? Tung tarpatangitangi ahu be soara ni angka parende baoa dohot parompuan? Angkup ni boasa tung bahenon ni naposomon hasusaan tu tuanku di laonlaon ni ari?

³⁶ (19-37) Asal otik pataruon ni naposomon rajai tu bariba ni Jordan. Alai boasa pola pamaloson sisongon i baloshonon ni rajai tu ahu?

³⁷ (19-38) Ua loas ma naposomon mulak, asa mate ahu di bagasan hutanku, di lambung tanoman ni damang dohot dainang. Alai tahe ida ma, disi do naposom si Kim Kana, ibana ma tagonan taripar rap dohot tuanku, jala bahen ma tu ibana manang aha lomo ni roham!

³⁸ (19-39) Jadi ninna rajai ma: Antong si Kim Kana ma donganku taripar, asa hubahen tu ibana manang aha lomo ni roham; jala nasa na pinangidom sian ahu, bahenonku do tu ho.

³⁹ (19-40) Jadi dung ditaripari sude na torop i batang aek Jordan, taripar dohot rajai,

diumma rajai ma si Barsilai jala dipasupasu ibana, dung i mulak ibana tu ingananna.

⁴⁰(19-41) Dung i ditulus rajai ma dalanna tu Gilgal, jala si Kim Kana donganna. Jadi dung dipataru sandok bangso Juda rajai taripar, ro di satonga ni bangso Israel.

⁴¹(19-42) (VI.) Jadi ida ma, ro be ma sandok baoa ni Israel manopot rajai, angka ninna ma mandok rajai: Boasa tung olo ho tangkoon ni angginami, halak Juda i, jala pataruonnasida rajai dohot isi ni bagasna tu bariba ni Jordan, ro di sude naposo ni si Daud donganna?

⁴²(19-43) Jadi ro ma alus ni sude halak Juda mandok tu halak Israel: Ala sumolhot rajai tu hami. Jala boasa tung mangiburu hamu alani? Hea adong hupangan hami sian rajai, manang adong silehonlehonna tu hami?

⁴³(19-44) Alai ro ma alus ni halak Israel mandok tu halak Juda: Sampulu bagian di hami maradophon rajai; angkup ni tumorop hami dirajai si Daud sian hamu. Boasa tung parhamudaon ni rohamuna hami, so hatanami jumolo paimaonmu mandokkon mangalap mulak rajanta i? Alai tahe kumoras do hata ni halak Juda sian hata ni halak Israel.

20¹(I.) Dung i adong ma disi so pangiriman sada halak parroha na jahat, na margoar si Seba, anak ni si Bikri, halak Benjamin, na umpalu sarune huhut mandok: Ndang parjambar hita hapengani di si Daud, jala ndang parhuaonta ia anak ni si

Isai! Antong ale Israel, mulak be ma hita tu undungundunga be!

²Jadi marbalik ma nasa baoa ni Israel sian si Daud laho mangihuthon tu si Seba, anak ni si Bikri. Alai anggo angka baoa sian Juda marsilohot rohanasida di rajanasida, olat ni Jordan sahat tu Jerusalem.

³Alai dung sahat si Daud tu jabuna di Jerusalem, dibuat rajai ma na sampulu parompuan, angka na tininggalhonna na jolo mangaramoti bagas i, dibahen ma nasida tu bagas parjagaan, jala diparmudu nasida, alai ndang be ditopot nasida; jadi tarhurung ma nasida disi sahat ro di ari hamamatenasida, hira parompuan na mabalu nasida saleleng mangolu.

⁴Dung i didok rajai ma tu si Amasa: Martingting ma ho papungu halak Juda tu lambungku di bagasan tolu ari on, ho pe ingkon mangulahi jongjong dison.

⁵Jadi laho ma si Amasa martingting papungu Juda, hape mangerngerhu ibana, pola salpu tingki na tiniti tu ibana.

⁶Dung i ninna si Daud ma tu si Abisai: Ra tung gumodang jea tu hita bahenon ni si Seba, anak ni si Bikri, sian na binahen ni si Absalom. Antong ho ma mangarahon angka naposo ni tuanmu, jala eahi ibana, asa unang sanga dapotsa huta angka na gonting, gabe tarholip sian matanta.

⁷ Jadi borhat ma angka parangan ni si Joab mangeahi ibana ro di hupas dohot rundo, ro di sude ulubalang; borhat be nasida sian Jerusalem mangeahi si Seba, anak ni si Bikri.

⁸(II.) Alai dung sahat nasida tu batu na bolon mardonokkon Gibeon, ro ma si Amasa manjumpangkon nasida. Ia si Joab marpangkean baju parmusu, alit tusi hohos ni podang na gampit di gontingna di bagasan sarungna, hape peut do i gabe mumpat podang i.

⁹Dung i ninna si Joab ma tu si Amasa: Beha sonang do ho, ale anggia? Laos disoro tangan siamun ni si Joab do janggut ni si Amasa mangondam mangumma ibana.

¹⁰Alai ndang marjaga si Amasa di podang na di tangan hambirang ni si Joab, gabe ditihamhon ma i tu butuhana, pola use raoanna tu tano, ndang pola dipaduahali maniham ai nunga mate ibana. Alai anggo si Joab dohot si Abisai anggina i mangeahi si Seba, anak ni si Bikri.

¹¹Dung i sulon ma sada baoa sian angka naposo ni si Joab jongjong di lambungna, ninna ma: Manang ise na holong roha mida si Joab, jala manang ise na marraja tu si Daud, diihuthon ma tu si Joab.

¹²Alai marguluhon mudarna anggo si Amasa di tongatonga ni dalan na bolon. Jadi dung diida baoa i sulon sude na torop i disi, gabe disarat ma si Amasa sian dalan na bolon tu

ladang, jala di tinggangkon ulos tu ibana ala diida ganup na ro jongjong di lambungna.

¹³(III.) Jadi dung dipaholang ibana sian dalan na bolon, mamolus ma sude baoa mangihuthon si Joab laho mangalele si Seba, anak ni si Bikri.

¹⁴Jadi dibolus ibana ma sude marga ni Israel sahat tu huta Abel dohot Abel Betmaaka ro di sandok Bikri. Jadi lam torop nasida marpungu huhut mangihuthon ibana.

¹⁵Jadi ro ma nasida martungkum ibana di huta Abel dohot Maaka. Dibahen nasida huhut hubu humaliang huta i, dionjar ma i sahat ro di parik. Dung i martahop ma sandok na torop i, angka na niuluhon ni si Joab, naeng manggargari parik i.

¹⁶Jadi joujou ma sada parompuan na bisuk sian huta i: Ua tangihon hamu ma hatangkon jala pasahat hamu tu si Joab: Pajonok ma tuson, adong dohononku tu ho.

¹⁷Jadi dung jumonok ibana tu nasida, didok parompuan i ma: Atehe ho do si Joab? Ahu ma tutu, ninna. Dung i ninna nasida ma tu ibana: Sai tangihon ma pangkataion ni naposom boruboru! Hubege do, ninna ibana.

¹⁸Dung i ninna parompuan i ma muse: Langgo di na robi somal didok halak songon on: Ingkon marpanungkun jolo di Abel, jadi pul ma tahi.

¹⁹Ahu do sada huta parsindak, pamonari di Israel, hape ditahi roham naeng mangago

sada huta sabungan di Israel? Boasa ma tung bondutonmu partohapan ni Jahowa?

²⁰Dung i ninna si Joab ma mangalusi: Dao ma i, dao ma i tahe sian ahu anggo tung ahu mamondut manang mangago!

²¹Ndang songon i pangalahona, adong do tahe sada baoa sian tor Epraim, na margoar si Seba, anak ni si Bikri, manggunturi ibana dompak raja Daud. Lehon hamu ibana sasadasa, asa muli ahu sian huta i. Jadi ninna parompuan i ma mandok si Joab: Ida ma, ingkon reongkononhon do uluna i tu ho tu bariba ni parik.

²²Dung i masuk ma parompuan i tu parluhutan ni sandok situan na torop pajojorhon habisukonna. Jadi dilobong nasida ma ulu ni si Seba, anak ni si Bikri, jala direongkon tu si Joab. Dung i didokkon ma paluon sarune gabe marserak ma nasida sian huta i, ganup mulak tu undungundungna be. Alai anggo si Joab mulak tu Jerusalem manopot rajai.

²³(IV.) Jadi si Joab ma partogi ni sandok parangan ni Israel, jala si Benaia, anak ni si Joiada mandur ni angka hupas dohot rundo.

²⁴Ia si Adoniram mandur ni angka parhuli, jala si Josapat, anak ni si Ahilud do panuturi.

²⁵Ia si Sepa juaratulis, jala si Sadok dohot si Abiatar malim.

²⁶Angkup ni si Ira, halak Jair i, panuturi haposan ni si Daud.

21

¹(I.) Dung i masa ma haleon potir uju hinarajahon ni si Daud tolu taon padodot. Jadi dilului si Daud ma bohi ni Jahowa. Dung i ninna Jahowa ma: Ala ni si Saul do i dohot ala ni sapata ni mudar nidurushon ni pinomparna, ala naung binununa halak Gibeon.

²Jadi didokkon rajai ma jouon halak Gibeon, ninna ma mandok nasida: (Alai anggo halak Gibeon i ndang sian pinompar ni Israel, pasipasi sian halak Amori do nasida, alai nunga marjanji halak Israel tu nasida pola disumpahon, hape ditahi roha ni si Saul naeng maniaphon nasida dibahen pangaluluhonna di halak Israel dohot Juda).

³Jadi ninna si Daud ma tu halak Gibeon: Aha do bahenonku tubolmuna? Jala aha do pardenggan bahenonku, asa pasupasunmuna partohapan ni Jahowa?

⁴Dung i ninna halak Gibeon ma tu ibana: Ndada tarpangido hami perak manang sere sian si Saul dohot sian pinomparna, jala ndada dipangido rohanami naeng bunuon manang ise sian Israel. Antong aha do dohononmuna bahenonku tubolmuna, ninna rajai?

⁵Jadi ninna nasida ma mandok rajai: Ia baoa naung maniaphon hami, jala naung mangaripurhon hami, pola tung naung rendep hami, so adong be teba di sandok parbalohan ni Israel.

⁶Ingkon lehonon nian tu hami pitu halak sian pinomparna, asa hugantung hami nasida di adopan ni Jahowa di Gibeon-Saul, na pinillit ni Jahowa. Jadi ninna rajai ma: Hulehon pe nasida.

⁷Alai diolani rajai do si Mepiboset, anak ni si Jonatan, tubu ni si Saul, ala ni uari tu Jahowa, na niuarihon ni si Daud tu si Jonatan, anak ni si Saul.

⁸Alai dibuat rajai do anggo na dua anak ni si Rispa, boru ni si Aia, na tinubuhonna di si Saul, i ma si Armoni dohot si Mepiboset; angkup ni na lima anak ni si Merab, boru ni si Saul na tinubuhonna di si Adriel, anak ni si Barsilai, halak Mehola i.

⁹Jala dipasahat nasida tu tangan ni halak Gibeon, angka na manggantungkon nasida di atas dolok di adopan ni Jahowa. Jadi sahali mate ma nasida na pitu i, jala tarbunu nasida di tingki ni panggotilan patumonaan, parmulaan ni gotilon eme saba.

¹⁰Dung i dibuat si Rispa boru ni si Aia ma tujung hori, jala dipahembang do i di atas dolok batu sian parmulaan ni gotilon sahat ro di na manetehi aek sian langit tu nasida, jala ndang diloas angka pidong na di toru ni langit songgop tu nasida arian, manang binatang ni harangan bornginna i.

¹¹Jadi tarbortik ma barita i tu si Daud taringot tu na binahen ni si Rispa, boru ni si Aia, parompuan pinarjolma ni si Saul nahinan.

¹²Dung i laho ma si Daud mambuat holiholi ni si Saul dohot holiholi ni si Jonatan anakna i, sian isi ni Jabes di Gilead, angka na tinangkonasida sian partungkoan ni Betsean, ai tusi do i digantungkon halak Palistim, uju di ari na tinaluhon ni halak Palistim si Saul di dolok Gilboa.

¹³Dung i diboan ma sian i holiholi ni si Saul dohot holiholi ni si Jonatan, anakna i, jala dipapungu do i tu holiholi ni angka na targantung.

¹⁴Jadi ditanom nasida ma holiholi ni si Saul dohot si Jonatan, anakna i di Sela di luat Benjamin, di bagasan tanoman ni si Kis amana i, gabe dipatupa nasida ma sude na tinonahon ni rajai. Jadi dung songon i marpangulahi ma roha ni Debata mida tano i.

¹⁵(II.) Alai tubu ma muse hamusuon ni halak Palistim dampak halak Israel. Jadi tuat ma si Daud rap dohot naposona, tole ma nasida marporang dampak halak Palistim, pola tung loja si Daud.

¹⁶Jadi ro ma si Isbibenob, sada sian angka anak ni si Repaim, ia dokdok ni hujurna tolu ratus sekkel tombaga do, jala disandang do podang na imbaru, diondam rohana do naeng mambunu i si Daud.

¹⁷Alai ro ma si Abisai, anak ni Nai Seruia, mangurupi ibana, dibunu ma halak Palistim i mate. Uju i pola disumpahon angka naposo ni si Daud tu ibana, angka ninna ma:

Ndang jadi be ho borhat udur dohot hami tu parporangan, asa unang intopanmu palito ni Israel.

¹⁸Jadi dung salpu i tubu muse hamusuon di Gob dampak halak Palistim. Uju i dibunu si Sebekkai, halak Husa i ma si Sep, laos pinompar ni si Repaim ibana.

¹⁹Dung i tubu muse hamusuon di Gob dampak halak Palistim, gabe dibunu si Elihanan, anak ni Jare Oregim, halak Betlehem i ma si Goliat, halak Gat, ia suhul ni hujurna na saumban do.

²⁰Dung i tubu muse hamusuon di Gat; adong ma disi sada baoa na ganjang, onom be jarijari ni tanganna dohot patna, gabe duapulu opat bilanganna, ibana pe pinompar ni si Repaim do.

²¹Jadi dung niasapanna halak Israel, gabe dibunu si Jonatan, anak ni si Simea, haha ni si Daud ma ibana.

²²Na opat halak i do tubu ni si Repaim di Gat, gabe mate nasida dibunu si Daud dohot angka na posona i.

22¹(I.) Dung i dihatahon si Daud ma tu Jahowa angka hata ni ende on, di ari dung na pinalua ni Jahowa ibana sian tangan ni saluhut musuna dohot sian tangan ni si Saul.

²Ninna ma: Jahowa do dolok batu di ahu dohot haporusanku, jala sipalua ahu.

³Debata do partanobatoanku, marhaposan tu ibana do ahu, lombulombungku dohot tanduk ni partuaonku, parondingondinganku dohot haporusanku, sipartumpak di ahu, Ibana palua ahu sian uhum gogo.

⁴Sai hupajoujou do Jahowa, na tama sipujion i, jadi malua ma ahu sian angka musungku.

⁵Nunga pola dihaliangi angka ombak ni hamatean ahu, angka sunge ni hajahaton manonggoti ahu.

⁶Nunga pola dihaliangi angka rante ni banua toru ahu, dilungkupi angka jorgong ni hamateani ahu.

⁷Jadi di na targogot i ahu, hujou do Jahowa, jala hupangiar anggukku tu Debatanku, jadi ditangihon Ibana soarangki sian jorona, jala tolhas angguk i tu pinggolna.

⁸Jadi humuntalhuntal ma tano on, lalolalo angka ojanan ni langit, jala humuturhutor, ala tarrimas Ibana.

⁹Martimpul do timus sian igungna, jala ruar api na mandilatdilat sian pamanganna, gara ni api angka na marnalanala ruar sian Ibana.

¹⁰Dung i dipajomba Ibana ma angka langit, gabe tuat Ibana, jala holom marimpotimpot di toru ni patna.

¹¹Marsihundul di kerubim ma Ibana huhut habang, jala mangareapreap Ibana di atas habong ni alogo.

¹²Haholomoni do dibahen undungundungna humaliang Ibana, parhobot ni udan dohot ombun do lapelapena.

¹³Sian sondang di adopanna marsijembur angka gara ni api.

¹⁴Mangkuling ronggur sian angka langit dibahen Jahowa, jala dipatubegehon Natumimbul i soarana.

¹⁵Dung i disiorhon Ibana angka sumbiana, jala dipaserak angka musu, sumiksaksiksak hilapna, asa manggaori nasida.

¹⁶Jadi tarida ma angka lubuk ni laut, gabe mullop angka ojanan ni portibi on maradophon pangasupim, ale Jahowa, maradophon pangunsong ni hosa ni igungna.

¹⁷Disurdukkon Ibana tanganna sian ginjang manangkup ahu, mangelnet ahu sian angka aek magodang.

¹⁸Ibana paluahon ahu sian musungku na gogo i, sian angka na mangkosom ahu, ala gumogo nasida sian ahu.

¹⁹Dirampok nasida do ahu di ari hinamagongku, alai Jahowa do pangunsandeanaku.

²⁰Jala Ibana manogihon ahu tu halambason, Ibana paluahon ahu, ai lomo do rohana mida ahu.

²¹Dibaloshon Jahowa tu ahu hombar tu hatigoranku, hombar tu habontoron ni tanganku tahe dipasuang tu ahu.

²²Ai hujujur do angka dalan ni Jahowa, jala ndang manjahati ahu marbalik sian Debatangku.

²³Ai sai tongtong di jolongku sude angka uhumna, jala ndang hupaholang angka patikna i sian ahu.

²⁴Sai sun do lidang ni rohangku maradophon Ibana, jala sai hujaga do diringku maradophon hajahatonku.

²⁵Jadi dibaloshon Jahowa tu ahu hombar tu hatigoranku, hombar tu halidangonku, na niidana i.

²⁶Asi do roham tu na asi roha i, tobok do Ho maradophon halak na tobok i.

²⁷Bontor do ho dompak na bontor roha i, jala pulos do roham tu pargeduk i.

²⁸Ai ditumpahi Ho dojolma na dangol i, alai dialo matam do angka na ginjang roha, jala dipajimput Ho nasida.

²⁹Ai Ho do, ale Jahowa parpalitoanku! Jala dipatiur Jahowa do holom ni parnidaanku.

³⁰Ai mardonganhon Ho tartondong ahu do parduaan ni parangan, jala mangasahon Debatangku tartimbang ahu do parik.

³¹Sun denggan do dalan ni Debata, pita do hata ni Jahowa, Ibana do lombulumbu ni sude halak na marhaposan tu Ibana.

³²Ai tung ise ma Debata, dungkon ni Jahowa, jala tung ise tau partanobatoan, dungkon ni Debatanta.

³³ Debata do haporusanku na gonting, jala dipatiur do dalanku.

³⁴ Ibana mambahen pathu doshon doras ni tini, jala dipajongjong ahu tu angka habuntulonku.

³⁵ Ibana mangajari tanganku mangula hamusuon, asa tarbahen botohonku manintak sior haksa.

³⁶ Jala dilehon Ho tu ahu lombulumbu ni hatuaonmi, jala habasaonmu do patimbul ahu.

³⁷ Dipalumbang Ho do langkanku, jadi ndang tarbaliksu mata ni arini tothu.

³⁸ Sai hulotongi do angka musungku, laos husiaphon nasida, jala ndang mulak ahu, paima sun nasida hurendephon.

³⁹ Huropuhi jala hurendephon nasida, jadi ndang tarbahen nasida be hehe, marragean do nasida tu toru ni tothu.

⁴⁰ Dihohoshon Ho do pargogo tu ahu mangula hamusuon, dipapatu Ho do angka alongku tu ahu.

⁴¹ Jala nunga dipaundar Ho angka musungku, gabe siap hubahen angka na mangkosom ahu.

⁴² Sai manatapnatap nasida humaliang, hape ndang adong sipalua nanggo sahalak, tu Jahowa pe, hape ndang olo Ibana mangalusi nasida.

⁴³ Jadi hulamoti ma nasida songon orbuk na di tano i, hulutluti nasida songon gambo di alaman.

⁴⁴ Angkup ni nunga dipalua Ho ahu sian parbadaan ni bangsongku, nunga dipabangkit Ho ahu gabe ihutan ni angka bangso parbegu, gari bangso na so hutanda mangoloi ahu.

⁴⁵ Gari halak na pulik marga mangalesemlesem ahu, guru dokku do dioloi nasida.

⁴⁶ Merus do angka anak ni na pulik marga, jala angka hitir do nasida ruar sian partanobatoannasida.

⁴⁷ Mangolu do Jahowa, jala tama do papujipujion partanobatoanki, jala timbul do Debata ni hatuaonku.

⁴⁸ Debata do silehon angka partubolon tu ahu dohot papatuhon angka bangso tu ahu.

⁴⁹ Ibana sipalua ahu sian angka musungku, Ho do tongon patimbul ahu maralohon angka alongku, nunga dipalua Ho ahu sianjolma sibahen gogo.

⁵⁰ Dibahen i pujionku ma Ho ale Jahowa, di tongatonga ni angka bangso parbegu, jala endehononku ma Goarmu.

⁵¹ Ibana sipatimbul angka hatuaon ni rajana, jala Ibana mambahen asi ni roha tujolma naung miniahanna i, tu si Daud dohot tu pinomparna i ro di salelenglelengna.

23¹ (I.) On do angka hata parpudi sian si Daud: Panurirangon sian si Daud;

anak ni si Isai, panurirangon sian baoa na timbul situtu, naung miniahana ni Debata ni si Jakkob, jala hasudungan ni Israel marhite sian angka ende Psalmen.

²Tondi ni Jahowa do mangkatai marhite sian ahu, jala hata sinihathonna di atas dilangku.

³Nunga mangkuling Debata ni Israel, nunga marbagabaga tu ahu Partanobatoan ni Israel: Ingkon adong sada halak sigomgom manisias, sada halak na tigor roha, sada halak panggomgomi mangkajongjongkon biar mida Debata.

⁴Ingkon songon hatiuron manogotna i Ibana, molo binsar mata ni ari manogotna i jumpa so adong ombun manorop, sumurung tahe sian sondang, sian udan, na mambahen martumbur duhutduhut i sian tano.

⁵Ai nda songon i do tahe pinomparhu di adopan ni Debata? Ai nunga pola dipahot tu ahu padan salelenglelengna, maraturan dibahen taringot tu saluhutna, jala marsihohot, ai nasa hatuaonku dohot denggan basa tung so martumbur ma bahenonna?

⁶Alai anggo halak parroha na jahat sahali, tudoshon duriduri na pinurpurhon do nasida luhutna, ai ndada targolom tangan ni jolma be.

⁷Alai manang ise na naeng manjama angka i, ingkon marsinjata bosi manang hujur ibana,

jala suda nasida purunanna di ingananna i hian.

⁸(II.) On do goargoar ni angka ulubalang ni si Daud: Si Josep Basebet, halak Hakmon i, induk ni tolupulu parangan, tung dimonsakkon ibana do hujurna dompak ualu ratus halak, angka na mate sahali tinullangna.

⁹Dung ibana si Eleasar ma, anak ni si Dodo, tubu ni si Ahohit, ibana sada sian na tolu ulubalang angka na rap dohot si Daud, uju na niasapannasida halak Palistim, angka na marpungu tusi laho marporang nian, nunga pola nangkok dohot halak Israel.

¹⁰Jadi hehe ma ibana, laos ditampuli halak Palistim i, pola sanga mangampir tanganna, laos mangongkong tu podang i. Jadi hamonangan bolon ma pinatupa ni Jahowa di na sadari i, mulak ma anggo na torop i mangihuthon ibana, ripe mangarintak rintahan.

¹¹Dung ibana si Sama ma, anak ni si Age, halak Harari. Uju marpungu halak Palistim sahali di Lehi, adong ma disi ladang santurpuk, gok hadio, hape maporus do situasi na torop i maradophon halak Palistim.

¹²Gabe ro ibana jongjong di parsitongaan ni ladang na santurpuk i, laos dionjar do, jala talu halak Palistim dibahen, gabe hamonangan bolon dipatupa Jahowa sian na tolupulu induk i.

¹³Angkup ni tuat do tolu halak induk sian na tolupulu induk i manopot si Daud tu liang Adullam, tongon gotilon uju i jala marsaro saparduan halak Palistim di rura Repaim.

¹⁴Alai di partanobatoan anggo si Daud uju i, jala parangan ni halak Palistim uju i di Betlehem.

¹⁵Jadi mangapian ma roha ni si Daud mangido, ninna ma: Ise ulaning olo mangalehon aek inumonku sian sumur na di Betlehem mardonokkon bahal?

¹⁶Jadi dirampok na tolu ulubalang i ma parsaroan ni halak Palistim, jala ditahui aek sian sumur na di Betlehem mardonokkon bahal, jala diboan do i sahat tu si Daud; alai ndang olo ibana manginumsa, laos diusehon do i tahe bahen pelean tu Jahowa.

¹⁷Ninna ma: Dao ma i sian ahu ale Jahowa tung bahenonku songon i! Nda mudar ni angka baoa do i, angka na laho maneahon hosanasida? Nandang olo ahu manginumsa. I ma na binahen ni na tolu ulubalang i.

¹⁸Si Abisai pe, anggi ni si Joab, anak ni Nai Seruia, ibana do induk ni na tolu halak. Ibana pe disarahon do hujurna manullangi tolu ratus halak, gabe umbaritaan do goarna sian nasida na tolu i.

¹⁹Ibana do tongon na marmuliaan sian nasida na tolu, gabe ibana induk nasida; alai ndang taratupsa anggo tung na tolu parjolo i.

²⁰Si Benaia pe, anak ni si Joiada, tubu ni sada baa na marhuaso jala sigodang pambahenan sian Kabseel, tung dibunu ibana do dua singa (ulubalang) sian halak Moab; tuat muse ibana mambunu singa sadanari di bagasan godung uju di partaonan ngali ni ari.

²¹Dibunu ibana muse sada halak Misir na bolon sahali, taon do di tangan ni halak Misir sada hujur, hape tuat ibana mandapothon mantat tungkot, dirampas ma hujur i sian tangan ni halak Misir, laos dibunu ibana dohot hujurna sandiri.

²²I ma na binahen ni si Benaia anak ni si Joiada umbahen tarbaritaan goarna sian na tolu ulubalang i.

²³Umbaritaan ibana tahe sian na tolupulu halak i, alai ndang taratupsa ianggo na tolu parjolo i. Jadi dipabangkit si Daud ma ibana gabe panuturina haposan.

²⁴Masuk tu na tolupulu halak i do si Asahel, anggi ni si Joab; si Elihanan, anak ni si Dodo sian Betlehem.

²⁵Si Sama, halak Harod i; si Elik, halak Harod i.

²⁶Si Heles, halak Palet i; si Ira, anak ni si Ikes, halak Tekoa i.

²⁷Si Abieser, halak Anatot i; si Mebunnai, halak Husa i.

²⁸Si Salmon, halak Ahohi; si Maharai, halak Netopa i.

²⁹Si Heleb, anak ni si Baona, halak Netopa i; si Ittai, anak ni si Ribai sian Gibeai ni halak Benjamin.

³⁰Si Benaia, halak Piraton i; si Hidai, sian angka rura Gaas.

³¹Si Abialbon, halak Arbati; si Asmapet, halak Bahurim.

³²Si Eliaba, halak Salabini Sian angka anak ni si Jasen, si Jonatan.

³³Si Sama, halak Harari; si Ahiam, anak ni si Sarar, halak Harari.

³⁴Si Elipelet, anak ni si Ahasbai, tubu ni si Maaka i; si Eliam anak ni si Ahitopel, halak Gilo i.

³⁵Si Hesrai, halak Karmel i; si Paarai, halak Arbi.

³⁶Si Jigal, anak ni si Natan sian Zoba; si Bani halak Gaddi.

³⁷Si Selek, halak Amoni; si Naharai, halak Beerot i, siusung parhohas ni si Joab, anak ni Nai Seruia.

³⁸Si Ira halak Itri; si Gareb, halak Itri.

³⁹Si Uria, halak Het i; luhut nasida tolupulu pitu halak do.

24¹(I.) Dung i manguahi muse Jahowa tarrimas mida Israel, gabe dipajuju ma si Daud mangalo nasida, ninna ma: Laho ma ho, bilangi ma halak Israel dohot halak Juda!

²Dung i ninna rajai ma mandok si Joab, partogi ni paranganna na di lambungna: Ua liati ma sude marga ni Israel, olat ni Dan

sahat ro di Beerseba, jala bilangi situasi na torop i, asa tung huboto toropna.

³Dung i ninna si Joab ma mangalusi rajai: Sai ambaan ni Jahowa Debatam ma tu bangso nuaeng lompit ratus hali nari, sai sanga ma mata ni tuanku marnidasa! Alai ala ni aha umbahen tung dipangido tuanku hata on?

⁴Alai parhata sada do rajai tu si Joab dohot tu angka partogi ni parangan. Jadi borhat ma si Joab dohot angka partogi ni parangan sian adopan ni rajai laho mamilangi bangso Israel.

⁵Dung i ditaripari nasida ma batang aek Jordan, jala marsaro di Aroer tungkan siamun ni huta i, na di tongatonga ni rura Gad, jala sahat ro di Jaser.

⁶Dung i sahat ma nasida tu Gilead, boti tu tano Hadsai, jala sahat nasida tu Dan, tole muse humaliang Sidon.

⁷Jala sahat nasida tu benteng Tirus dohot tu sude huta ni halak Hevi dohot Kanaan, gabe puas nasida tungkan partalpahan dangsina sian Juda sahat tu Berseba.

⁸Jadi songon i ma diliati nasida sandok tano i, dung salpu sia bulan dohot duapulu ari, sahat nasida muse tu Jerusalem.

⁹Dung i dilehon si Joab ma bilangan ni bangso na binilanganna i tu rajai. Ia toropna di Israel ualu ratus ribu halak do, angka parpodang sintak, jala di Juda lima ratus ribu halak.

¹⁰Alai dung sun dibilang bangso i mallobuk ma taroktok ni si Daud. Jadi didok si Daud ma tu Jahowa: Nunga mardosa situtu ahu, ala hubahen songon i. Alai nuaeng pe ale Jahowa! Sai marpamuati ma roham mida hajahaton ni naposomon, ai hata oto situtu do na hubahen i.

¹¹(II.) Jadi dung hehe si Daud manogotna i, ro ma hata ni Jahowa tu panurirang Gad, panurirang ni si Daud, ninna ma:

¹²Laho ma ho mangkatai dohot si Daud, dok ma, songon on hata ni Jahowa: Tolu ragam uhum sipatuduhononku tu jolom; pillit ma di ho sada sian i sidabuhononku tu ho.

¹³Jadi ro ma si Gad manopot si Daud paboahon hata i tu ibana, ninna ma mandok ibana: Atehe, dipangido roham do ro haleon potir pitu taon lelengna tu tanom? Manang tagonan ingkon maporus ho tolu bulan lelengna maradophon musum, asa dilele nasida ho? Manang tagonan masa begu antuk tolu ari lelengna tu tanom? Antong pingkiri ma jala timbang manang aha alus boanonku mulak tu Jahowa na marsuru ahu.

¹⁴Dung i ninna si Daud ma mandok si Gad: Targogot situtu do nian rohangku. Alai tagonan hita madabu tu bagasan tangan ni Jahowa; ai godang do asi ni rohana! Nandang olo ahu madabu ianggo tu bagasan tangan ni jolma.

¹⁵ Jadi dipamasa Jahowa ma begu antuk di tongatonga ni Israel sian manogotna i sahat ro di tingki naung binuhulna i, gabe marmatean ma sian bangso i, olat ni Dan sahat ro di Berseba, pitupulu ribu halak.

¹⁶ Alai dung dipatoltol surusuruan i tanganna tu atas ni Jerusalem, naeng agoonna, gabe disolsoli Jahowa ma rohana taringot tu hamagoan i, laos didok ma mandok surusuruan na mambahen hamagoan di tongatonga ni bangso i: Nunga sae, patait ma tanganmi! Alai di lambung pardegean ni si Arauna, halak Jebusi do surusuruan ni Jahowa uju i.

¹⁷ (III.) Jadi dung diida si Daud surusuruan na mambunu bangso i, ninna ma mandok Jahowa: Ida ma, ahu do na mardosa, jala ahu do na mambahen hajahaton i; tung aha ma na binahen ni angka birubiru on? Dompak ahu ma nian tanganmu dohot dompak pinompar ni damang!

¹⁸ Dung i ro ma si Gad manopot si Daud di na sadari i, ninna ma mandok ibana: Nangkok ma ho jala pajokkon ma di Jahowa sada langgatan di pardegean ni si Arauna halak Jebusi.

¹⁹ Jadi nangkok ma si Daud menurut hata ni si Gad, songon na tinonahon ni Jahowa.

²⁰ Dung i manatapnatap ma si Arauna, gabe diida ma ro rajai rap dohot angka naposona mandapothon ibana, gabe ruar ma si Arauna

huhut marsomba tu rajai, pola manungkap tu tano.

²¹Dung i ninna si Arauna ma: Ala ni aha umbahen ro tuanku manopot ahu naposona? Jadi didok si Daud ma: Naeng manuhor pardegean i sian ho, laho paulihon sada langgatan di Jahowa, asa muli begu masa i sian bangso i.

²²Alai ninna si Arauna ma mandok si Daud: Dibuat tuanku ma i, jala dipelehon disi manang aha lomo ni rohana. Ida ma, ndion do lembu bahen pelean situtungon, jala ndion do angka hureta pardege dohot parhohas ni lembu bahen soban.

²³Luhutna i, ale rajanami, naeng sombahonon ni si Arauna tu rajai; laos didok si Arauna muse tu rajai: Sai asi ma roha ni Jahowa Debatam di ho!

²⁴Alai ninna rajai ma mandok si Arauna: Ndada songon i, ingkon naeng tuhoronku sian ho nasa argana; ai ndang olo ahu mamelehon tu Jahowa Debatanku pelean situtungon siseasea. Jadi dituhor si Daud ma pardegean i dohot lembu i mararga limapulu sekkel perak.

²⁵Dung i dipauli si Daud ma disi sada langgatan di Jahowa, jala dipelehon di atasna angka pelean situtungon dohot hamauliateon. Jadi marpangulah i ma roha ni Jahowa mida isi ni tano i, jala dipamuli begu masa i sian Israel.

1 Raja-raja

1 ¹ (I.) Jadi dung sarimatua raja Daud, ndang olo las dagingna, atik pe diborhos ibana dohot angka ulos.

² Jadi ro ma hata ni angka naposona mandok tu ibana: Denggan nian niluluan di tuanku sada boruboru namarbaju na tongtong jongjong di adopan ni rajai, marhaladoi, jala modom di abinganmu, asa las tuanku.

³ Jadi dilului nasida ma sada boruboru namarbaju na uli di sandok gonggoman Israel, gabe jumpang nasida ma si Abisag sian Sunem, jala diboan boruboru i tu jolo ni rajai.

⁴ Alai na uli situtu do boruboru namarbaju i, gabe parhalado di rajai jala pauliuli ibana; alai ndatung ditopot rajai nasida.

⁵ (II.) Alai ro ma si Adonia, tubu ni Nai Haggit, patimbotimbo dirina, ninna ma: Ahu do patut gabe raja! Gabe didokkon ma paulihon di ibana hureta dohot angka jolma parsihundul dohot limapulu halak angka na mardalan di jolona.

⁶ Alai ndang dung marsak ibana dibahen amana, saleleng mangolu ibana, tung pola dohononna: Boasa tung songon i bahenonmu? Angkup ni na uli situtu do rupana; jala ditubuhon inana ibana umpudi sian si Absalom.

⁷ Dung i marsatahi ma ibana dohot si Joab, anak ni Nai Seruia, rap dohot malim Abiatar, angka na mangurupi paihuthon tahi ni si Adonia.

⁸ Alai anggo malim Sadok dohot si Benaia, anak ni si Joiada dohot panurirang Natan dohot si Simeï dohot si Rei, ro di angka ulubalang ni si Daud, ndang marsatahi dohot si Adonia.

⁹ Dung i dipelehon si Adonia ma angka birubiru dohot lombu dohot pinahan na pinamokmok di lambung batu Sohelet, mardonokkon sumur Enrogel, jala dipio saluhut anggina, angka anak ni rajai, ro di sude halak Juda, angka naposo ni rajai.

¹⁰ Alai anggo panurirang Natan dohot si Benaia dohot angka ulubalang, dohot si Salomo anggina i, ndang dipio.

¹¹ (III.) Dung i ninna si Natan ma mandok si Batseba, ina ni si Salomo: Atehe, ndang dibege ho naung bangkit raja si Adonia, tubu ni Nai Haggit? Jala tuanta si Daud ndang umbotosa.

¹² On pe ro ma ho, naeng ahu marsipaingot tu ho, asa malua hosam dohot hosa ni anakmu si Salomo.

¹³ Laho ma ho manopot raja Daud, jala dok ma tu ibana: Nda nunga disumpahon ho, ale rajanami tu naposom boruboru, pola nimmu: Ingkon si Salomo, anakmu gabe raja singkathu, jala ingkon ibana hundul di atas

habangsangku? Boasa ia nuaeng si Adonia bangkit raja?

¹⁴Ida ma, tagan mangkatai dope ho disi dohot rajai, ro ma ahu masuk sian pudim paujungkon angka hatam.

¹⁵Jadi masuk ma si Batseba manopot rajai tu bilut. Alai nunga matua situtu anggo rajai, jala si Abisag sian Sunem marhaladoi di adopan rajai.

¹⁶Dung i dipaunduk si Batseba ibana marsomba tu rajai. Alai ninna rajai ma: Aha di ho huroha?

¹⁷Jadi ninna nasida ma mandok ibana: Ale tuanku, nunga pola disumpahon ho tu Jahowa, Debatam, marbagahon tu naposom boruboru: Ingkon si Salomo, anakmi gabe raja singkathu, jala ingkon ibana juguk di atas habangsangku.

¹⁸Hape ia nuaeng, ida ma, nunga ro si Adonia, bangkit raja, ia ho ale rajanami, ndang parbinoto disi!

¹⁹Nunga pola dipelehon ibana angka jonggi dohot pinahan na pinamokmok dohot birubiru mansai deak, jala dipio saluhut anak ni rajai, dohot malim Abiatar dohot si Joab, partogi ni angka parangan; alai anggo si Salomo naposom, ndang dipio.

²⁰Alai sai tu ho do, ale rajanami, nolnol mata ni sandok Israel, asa dipabotohon ho tu nasida manang ise ingkon juguk di atas habangsa ni tuanku, gantina.

²¹ Alai ia dung monding tuanku, gabe top dohot angka ompuna, ingkon ahu dohot anakmu si Salomo gabe pardosa, pola marutang hosa.

²² Alai ida ma, tagan mangkatai dope nasida dohot rajai, ro ma panurirang Natan.

²³ Jadi marboaboa ma halak tu rajai songon on: Ida ma, disi do panurirang Natan. Jadi dung sahat ibana tu jolo ni rajai, manungkap ma ibana tu tano di jolo ni rajai.

²⁴ Dung i ninna si Natan ma: Atehe ale rajanami, nunga didok ho huroha: Ingkon si Adonia gabe raja singkathu, jala ingkon ibana juguk di atas habangsangku?

²⁵ Ai nunga pola tuat ibana sadarion, jala nunga dipelehon angka jonggi dohot birubiru na pinamokmok mansai deak, jala nunga dipio saluhut anak ni rajai, ro di angka partogi ni parangan dohot malim Abiatar; jala ida ma, mangan minum do nasida di jolona, huhut didok nasida: Horas ma raja Adonia!

²⁶ Alai anggo ahu naposomon dohot malim Sadok dohot si Benaia, anak ni si Joiada dohot naposom si Salomo, ndang dipio.

²⁷ Aturan sian ho do i ulaning, ale rajanami, alai tahe so adong dipabotohon ho tu naposomon, manang ise ingkon juguk di atas habangsa ni tuanku, bahen gantina?

²⁸ (IV.) Dung i ninna raja Daud ma mangalusi: Gora hamu si Batseba ro tu ahu.

Jadi ro ma nasida tu jolo ni rajai, laos tindang di adopan ni rajai.

²⁹Dung i marsumpa ma rajai, ninna ma: Songon sintongna mangolu Jahowa, naung palua hosangku sian nasa hagogotan.

³⁰Ingkon hombar tu naung husumpahon tu Jahowa, Debata ni Israel marbagahon tu ho: Ingkon si Salomo, anakmi gabe raja singkathu, jala ingkon ibana juguk di atas habangsangku, gontingku, ingkon songon i bahenonku sadarion.

³¹Jadi marsomba ma si Batseba, pola manungkap tu tano di jolo ni rajai mandok mauiate: Sai horas ma tuanku, raja Daud ro di salelenglelengna!

³²Dung i ninna raja Daud ma: Gora hamu ro tu ahu malim Sadok dohot panurirang Natan dohot si Benaia, anak ni si Joiada. Jadi dung sahat nasida tu jolo ni rajai.

³³Ninna rajai ma mandok nasida: Arahon hamu ma angka naposo ni tuanmuna, jala pahundul hamu ma anakku si Salomo tu halodengku na marsahe, jala togihon hamu ibana tuat tu Gihon.

³⁴Ingkon dimiahi malim Sadok dohot panurirang Natan ibana disi bahen raja gumomgom Israel, jala palu hamu sarune, huhut dohononmu ma mangolophon: Horas ma raja Salomo!

³⁵Dung i nangkok hamu muse mangihuthon ibana, asa ro ibana jala hundul di atas

habangsangku, jala ibana gabe raja singkathu; ai nunga hutodo ibana hian bahen partogi manguluhon anak Israel dohot Juda.

³⁶Dung i ninna si Benaia, anak ni si Joiada ma mangalusi rajai: Amen! Boti ma dohonon ni Jahowa, Debata ni tuanku!

³⁷Songon na nidonganana ni Jahowa tuanku na sai laon, suang songon i ma nian dongananna dohot si Salomo, tumimbul dope tahe dibahen habangsana, sian habangsa ni tuanku raja Daud.

³⁸Jadi tuat ma malim Sadok dohot panurirang Natan dohot si Benaia, anak ni si Joiada dohot angka hupas dohot rundo, jala dipahundul nasida si Salomo tu halode ni raja Daud, asa manogihon ibana tu Gihon.

³⁹Dung i dibuat malim Sadok ma sahan parmiahan sian undungundung i, laos dimiahi ma si Salomo. Dung i dipalu nasida ma sarune, jala sahata sandok na torop i mangolophon: Horas ma raja Salomo!

⁴⁰Dung i nangkok ma sandok na torop i mangihuthon ibana laos umpalui angka parhinaloan jala marlas ni roha godang, pola mardorom tano i dibahen suraknasida.

⁴¹(V.) Jadi dibege si Adonia dohot sude angka na piniona i, angka na rap dohot ibana, jala ipe sun nasida mangan. Alai dung dibege si Joab soara ni sarune, ninna ma: Na marhua do soara hagunturon di huta i?

⁴²Alai mangkatai dope ibana ida ma, nunga ro si Jonatan, anak ni malim Abiatar. Jadi ninna si Adonia ma: Masuk ma ho, ai jolma haposan do ho, jala barita na uli do tagamon na binoanmi.

⁴³Alai ninna si Jonatan ma mangalusi si Adonia: Tongon do nian, alai tahe nunga dipabangkit tuanta raja Daud si Salomo gabe raja!

⁴⁴Jala nunga disuru rajai bahen donganna malim Sadok dohot panurirang Natan dohot si Benaia, anak ni si Joiada ro di angka hupas dohot rundo, angka na pahundul ibana tu halode na marsahe hinundulan ni rajai.

⁴⁵Angkup ni nunga dimiahi malim Sadok dohot panurirang Natan ibana di Gihon bahen raja, jala marlas ni roha nasida nangkok sian i, pola tung guntur huta i. I ma soara surak na binegemuna i.

⁴⁶Angkup ni nunga hundul si Salomo di atas habangsa harajaon.

⁴⁷Nunga masuk huhut angka naposo ni rajai laho mamasumasu tuanta raja Daud, angka didok do: Dumenggan muse dope nian barita ni si Salomo sian baritam, tumpahon ni Debatam, jala tumimbul habangsana sian habangsami! Nunga pola martangiang rajai di atas podomanna.

⁴⁸Angkup ni nunga pola songon on hata ni rajai: Pinuji ma Jahowa, Debata ni Israel, na marbasabasahon sadarion sahalak na

juguk di atas habangsangku, sanga dope matangkon marnidasa.

⁴⁹Jadi godoron jala hehe be sude jolma na pinio, angka na rap dohot si Adonia, laho be nasida masitondong tondongonna.

⁵⁰Alai tahuton ma si Adonia mida si Salomo, dibahen i hehe ma ibana laos laho mangkaol angka tanduk ni langgatan.

⁵¹Dung i tarbortik ma tu si Salomo didok halak: Ida ma, tahuton do si Adonia mida raja Salomo, jala ida ma, dihaol ibana do angka tanduk ni langgatan, ninna do: Aut olo ma nian raja Salomo marsumpahon tu ahu sadarion, paboa na so bunuonna ahu naposona marhitehite podang.

⁵²Dung i ninna si Salomo ma: Molo tung lidang rohana, na so tupa marurus obukna nanggo sada tu tano; alai molo tung jumpang tahi jahat di bagasan ibana, ingkon marutang hosa ibana!

⁵³Dung i disuru raja Salomo ma suruanna mangalapi ibana mijur sian langgatan i. Jadi dung ro marsinggang ma ibana tu jolo ni raja Salomo. Alai ninna si Salomo ma mandok ibana: Laho ma ho muli tu jabum!

2¹ (I.) Jadi dung lam jonok ajal ni si Daud laho mate, martona ma ibana tu anakna si Salomo, ninna ma:

²Na laho ma anggo ahu tumopot dalan ni saluhut manisia isi ni tano on. Antong marsihohot ma roham jala pir tondim.

³Jala radoti pangoloion tu Jahowa Debatam, asa marparange ho di angka dalanna laho mangaradoti angka patikna, angka tonana, angka uhumna dohot angka panindangionna, hombar tu na tarsurat di bagasan patik ni si Musa, asa marbisuk ho di sude sibahenonmu dohot di sude na tinembak ni roham disi.

⁴Asa dipahot Jahowa hatana, na pinarbagabagana tu ahu, uju nidokna: Molo diramoti angka anakmu angka dalannasida, marparange nasida di jolongku di bagasan hasintongan sian nasa rohanasida dohot sian nasa ateatenasida, na so tupa tos sian ho baoa na hundul di habangsa ni Israel, ninna.

⁵Angkup ni tangkas do diboto ho na binahen ni si Joab, anak ni Nai Seruia tu ahu, na binahenna tu na dua partogi ni parangan ni Israel, tu si Abner tahe, anak ni si Ner, dohot tu si Amasa, anak ni si Jeter, na binununa, jala mandurushon mudar parporangan di demak ni tahi, jala marsapu mudar parporangan dibahen hohosna na di gontingna, dohot sipatuna na di patna!

⁶Antong bahen ma hombar tu hapistaranmu, unang loas ubanna marsonangsonang tuat tu parbeguan.

⁷Alai anggo tu angka anak ni si Barsilai, halak Gilead i, ingkon bahenonmu ma asi ni roha, loas ma nasida saor tu angka jolma sisada panganan dohot ho, ai songon i do

panomunomunasida tu ahu, uju na maporus ahu maradophon si Absalom hahami.

⁸Jala ida ma, di lambungmi do si Simei, anak ni si Gera, halak Benjamin, sian Bahurim, ibana mambuburahon tu ahu bura na sogir uju di ari hapoporushu tu Mahanaim. Hape tuat ibana muse manjumpangkon ahu tu topi ni Jordan, pola husumpahon uju i tu Jahowa marbagahon tu ibana: Ndang bunuonku ho marhitehite podang.

⁹Alai anggo nuaeng, unang lias ibana bahen sian uhum, ai baoa na pistar do ho, jala botoonmu do manang aha sibahenonmu tu ibana, ingkon marabul mudar ubanna tuat tu parbeguan bahenonmu.

¹⁰Dung i monding ma si Daud, gabe top dohot angka ompuna, jala tartanom di huta ni si Daud.

¹¹Alai anggo lelengna mangarajai si Daud di Israel, opatpulu taon do. Pitu taon lelengna ibana mangarajai di Hebron, jala tolupulu tolu taon lelengna ibana mangarajai di Jerusalem.

¹²(II.) Jadi si Salomo i saut juguk di atas habangsa ni si Daud, amana i, jala lam hot situtu do harajaonna i.

¹³Dung i ro ma si Adonia, anak ni Nai Haggit, mandapothon si Batseba, ina ni si Salomo. Jadi didok si Batseba ma: Beha dame do na hinarohonmi? Dame ma tutu ninna!

¹⁴Dung i ninna ma: Adong hata sidohononku tu ho. Antong dok ma! ninna nasida.

¹⁵ Jadi didok ibana ma: Diboto ho do patut tu ahu do harajaon i, jala nolnol tu ahu do bohi ni sandok Israel, parajahon ahu nian; hape anggo nuaeng nunga bali harajaon i jala sahat tu anggingki; Jahowa do tutu patongonhon tu ibana.

¹⁶ Nuaeng pe, sada sambing pangidoan na hupangido sian ho, unang tung tarila bohingku bahen. Jadi didok nasida ma mandok ibana: Antong paboa ma!

¹⁷ Dung i ninna ibana ma: Ua pangkulingi jolo raja Salomo i, ai ndang tagamon pailaonna bohim, asa dilehon tu ahu nian si Abisag sian Sunem bahen jolmangku.

¹⁸ Jadi ninna si Batseba ma: Denggan, hupangkulingi pe rajai taringot tu ho.

¹⁹ Dung i ditopot si Batseba ma raja Salomo, naeng mangkatai dohot ibana taringot tu si Adonia. Jadi hehe ma rajai manjumpangkon laos marsomba dompak nasida, laos hundul ibana tu habangsana. Didokkon huhut boanon sada habangsa di ina ni rajai, asa hundul di siamunna.

²⁰ Dung i ninna si Batseba ma: Adong do pangidoan sada na metmet na hupangido tu ho, unang tung paila ahu. Jadi ninna raja ma mandok nasida: Pangido ma, ale inang, ai ndang pailaonku bohim.

²¹ Jadi ninna si Batseba ma: Nilehon nian si Abisag sian Sunem tu hahami si Adonia bahen jolmana.

²²Dung i ninna raja Salomo ma mangalusi inana i: Boasa tung ho mangidohon si Abisagian Sunem di si Adonia? Pangido tagonan huhut harajaon i di ibana, ai dahahang hian do ibana, jala dingkan ibana do malim Abiatar dohot si Joab, anak ni Nai Seruia.

²³Dung i marsumpa ma raja Salomo tu Jahowa, ninna ma: Ingkon songon i bahenon ni Debata tu ahu, jala patambaonna dope songon i! Ingkon marutang hosa si Adonia ala ni hatana on!

²⁴On pe, songon sintongna mangolu Jahowa, na pahot ahu, jala pahundul ahu tu atas habangsa ni damang si Daud, jala na pauli di ahu sada bagas, songon na pinarbagabagana i: Ingkon sadarion dope mate si Adonia!

²⁵Dung i disuru raja Salomo ma si Benaia, anak ni si Joiada na maniham ibana, asa mate.

²⁶Anggo tu malim Abiatar, didok rajai ho: Laho ma ho tu Anatot, topot ma ladangmu, ai baa na marutang hosa do ho nian; alai ndang dope bunuonku ho anggo sadarion, ala naung niusungmu poti ni Tuhan Jahowa di adopan ni damang si Daud, jala ala naung sapardangolan ho dohot damang na jolo.

²⁷Jadi dibuangkon si Salomo ma anggo si Abiatar i, asa unang be malim ni Jahowa ibana, jadi sintong ma hata ni Jahowa, naung nilumbahonna hian taringot tu pinompar ni si Eli di Silo.

²⁸ (III.) Dung i sahat ma barita i tu si Joab (ai nunga marbalik si Joab mangihuthon si Adonia, ndang nian marbalik ibana anggo mangihuthon si Absalom na jolo). Jadi maporus ma si Joab tu undungundung ni Jahowa, jala dihaol angka tanduk ni langgatan.

²⁹ Dung i adong ma na paboahon tu raja Salomo, naung maporus si Joab tu undungundung ni Jahowa, jala ida ma, di lambung ni langgatan i do ibana. Jadi disuru si Salomo ma si Benaia, anak ni si Joiada, ninna ma: Laho ma ho, tiham ibana tusi! ninna.

³⁰ Jadi dung sahat si Benaia tu undungundung ni Jahowa, ninna ma mandok ibana: Songon on do hata ni rajai: Ruar ma ho! Gabe ninna ibana: Ndang, ai tagonan dison ahu mate. Jadi dipaboa si Benaia muse hata i tu rajai: Songon on do hata ni si Joab, jala songon on do alusna tu ahu.

³¹ Dung i didok rajai ma tu ibana: Bahen ma songon na nidokna i, tiham ma ibana jala tanom, asa dipurpurhon ho sian ahu dohot sian pinompar ni damang sapata ni mudar na so marpipot, na nidurushon ni si Joab.

³² Asa manginona tu uluna bahenon ni Jahowa mudarna, ala tinihamna dua halak na ubanon jala na dumenggan marroha sian ibana, laos dibunu nasida marhitehite

podang, so pamotoan ni damang si Daud, i ma si Abner, anak ni si Ner, partogi ni parangan ni Israel dohot si Amasa, anak ni si Jeter, partogi ni parangan ni Juda.

³³Asa marsibalik sapata ni mudarnasida manginona tu ulu ni si Joab dohot tu ulu ni pinomparna ro di salelenglelengna; alai anggo si Daud, dohot pinomparna ro di isi ni bagasna dohot habangsana, ingkon maruli dame sian Jahowa ro di salelenglelengna.

³⁴Jadi nangkok ma si Benaia, anak ni si Joiada, ditiham ma ibana laos mate; gabe tartanom ibana di bagasan jabuna di halongonan.

³⁵Dung i dipabangkit rajai ma si Benaia, anak ni si Joiada bahen singkatna, manguhuhon angka parangan i, huhut dipabangkit rajai malim Sadok, singkat ni si Abiatar.

³⁶(IV.) Dung i disuru rajai ma mangalapi si Simeï, ninna ma mandok ibana: Pauli ma di ho sada bagas di Jerusalem, asa maringan ho disi, jala unang ruar ho sian i laho manang dompak dia.

³⁷Ai sadari ho ruar jala manaripari batang aek Kidron, ingkon boto hian, sai na mate do ho; manginona tu ulum ma sapata ni mudarmu!

³⁸Dung i ninna si Simeï ma mandok rajai: Denggan do hata i, songon na nidok ni tuanku, ingkon songon i bahenon ni

naposomon. Jadi maringan ma si Simeï di Jerusalem, pola na nia lelengna.

³⁹Hape dung salpu tolu taon lintun ma dua naposo ni si Simeï tu si Akis, anak ni si Maaka, raja sian Gat. Jadi adong ma na paboahon tu si Simeï songon on: Ida ma, di Gat do angka naposom.

⁴⁰Jadi laho ma si Simeï, dipalanoi ma halodena, asa laho ibana tu Gat manopot si Akis naeng mangalului naposona. Jadi dung sahat si Simeï, diboan ma angka naposona mulak sian Gat.

⁴¹Dung i adong ma na paboahon tu si Salomo naung laho si Simeï sian Jerusalem tu Gat, jala mulak muse.

⁴²Jadi disuru rajai ma mangalapi si Simeï, ninna ma mandok ibana: Nda nunga pola hupatolon ho tu Jahowa, jala huhatindangkan tu ho songon on: Sadari ruar ho jala laho manang dompak dia, boto hian ma, ingkon mate ho! Pola didok ho uju i tu ahu: Denggan hata i hubege.

⁴³Boasa tung so ingotonmu uari tu Jahowa dohot tona na hutonahon i tu ho?

⁴⁴Angkup ni, ninna rajai mandok si Simeï: Ho pe, diboto ho do sandok hajahaton na niingot ni roham, na binahenmi tu damang si Daud. Ala ni nunga manginona hajahatonmu tu ulum, dibahen Jahowa.

⁴⁵Alai dapotan pasupasu anggo raja Salomo, jala hot do ia habangsa ni si Daud di adopan ni Jahowa ro di saleleng ni lelengna.

⁴⁶Dung i didokkon rajai ma si Benaia, anak ni si Joiada, asa ruar maniham ibana, laos mate. Jadi hot ma harajaon i dipegang tangan ni si Salomo.

3¹(I.) Dung i martondong ma si Salomo tu si Firaun, raja sian Misir, dibuat ma boru ni si Firaun, jala diboan tu huta ni si Daud, paima sun pinaulina jabuna dohot joro ni Jahowa ro di parik ni Jerusalem humaliang.

²Alai mamele dope uju i situan na torop i di atas robean, ai ndang dope dipajongjong joro di Goar ni Jahowa rasirasa sadarina i.

³Alai holong do roha ni si Salomo mida Jahowa, marparange do ibana di angka aturan ni amana si Daud, asal mamele dope ibana di atas ni angka tambak jala manutung daupa disi.

⁴Dung i laho ma rajai tu Gibeon, asa mamele disi, ai tambak bolon do disi; saribu pelean situtungon dipelehon si Salomo di atas langgatan i.

⁵(II.) Apala di Gibeon ma patar Jahowa tu si Salomo di bagasan nipina bornginna i, didok Debata ma: Pangido ma manang aha silehononku tu ho.

⁶Dung i ninna si Salomo ma: Nunga dibahen Ho asi ni roha godang tu naposom, damang si Daud, hombar tu parangena di jolomi

di bagasan hasintongan, hatigoran dohot habonaron ni roha maradophon ho, jala nunga dipahot Ho di ibana asi ni roha na godangon, dilehon Ho di ibana sada anak na juguk di atas habangsana, songon na masa nuaeng.

⁷On pe, ale Jahowa, Debatanku, nunga dipabangkit Ho naposom gabe raja singkat ni damang raja Daud; alai bajar dope ahu, ndang huboto ruhut tu balian manang di bagasan huta.

⁸Ia naposomon di tongatonga ni bangsom do, naung pinillitmi, bangso na bolon, na so tare tong jala na so habilangan dibahen deakna.

⁹Dibahen i, lehon ma tu naposomon roha na pantas laho manguhum bangsomi, asa huboto manirang na denggan sian na roa; ai tung ise ma na tuk manguhum bangsom na marmulia on?

¹⁰Dung i lomo ma roha ni Jahowa, ala songon i pangidoan ni si Salomo.

¹¹Jadi ninna Debata ma tu ibana: Ala na songon i pangidoanmi, jala ndang dipangido ho ginjang ni umur, jala ndang dipangido ho hamoraon, jala ndang dipangido ho hosa ni angka musum, roha tahe pinangidom asa tumimbang uhum.

¹²Ida ma, bahenonku ma hombar tu hatam. Ida ma! Lehononku ma tu ho roha na bisuk jala na pantas, asa unang adong tudoshon

ho sian na robi angka naung salpu i, nang na tubu muse.

¹³Angkup ni na so pinangidom pe, lehononku do tu ho, nang hamoraon, nang hamuliaon, asa unang adong tudoshon ho nanggo sahalak di tongatonga ni angka raja saleleng ho mangolu.

¹⁴Dung i molo sai tong marparange ho di angka dalanku laho mangaradoti angka patikku dohot tonanku, songon parange ni amangmu si Daud, tumpahonku ho huhut sarimatua.

¹⁵Jadi dung ngot si Salomo, ida ma, nipina do hapengani. Jadi dung sahat ibana tu Jerusalem, jongjong ma ibana di jolo ni poti parpadanan ni Jahowa, jala dipelehon angka pelean situtungon, dibahen huhut angka pelean hamauliateon, jala dilehon mangan saluhut naposona.

¹⁶(III.) Uju i ro ma dua parompuan sibabijalang mangalualu tu rajai, laos jongjong di jolona.

¹⁷Ninna parompuan na sada ma: Santabi, ale tuanku, ia ahu dohot parompuan on maringan di sada jabu, jadi mangintubu ahu di lambungna di jabu i.

¹⁸Dung i patoluarihon dung mangintubu ahu, mangintubu huhut parompuan on; jala rap hami na dua, ndang adong halak na asing di jabu i, dungkon ni hami na dua.

¹⁹Dung i mate ma anak ni parompuan on borngin i, ditipa ibana uju modom.

²⁰Jadi hehe ma ibana tonga borngin, dihindat ma anakku sian lambungku, uju modom naposom boruburu, jala dipeakkon ibana tu ampuanna, ia anakna na mate dipeakkon tu ampuanku.

²¹Jadi dung hehe ahu manogotna i laho pasusuhon anakki, gabe ida ma, nunga mate ibana. Alai hupamanatmanat ma ibana manogotna i, gabe ida ma, ndada ibana anakku na hutubuhon i.

²²Alai ninna parompuan na sadanari ma: Ndang songon i, ai anakku do na mangolu i, jala anakmu do na mate. Alai ninna parjolo i ma: Ndada! Ai anakmu do na mate, jala anakku do na mangolu i. Songon i nasida marbada masialusan di jolo ni rajai.

²³Dung i ninna rajai ma: Sadaon mandok: On do anakku na mangolu i, jala anakmu do na mate. Alai sadaan mandok: Ndada, ai anakmu do na mate, jala anakku do na mangolu i.

²⁴Jadi ninna rajai ma: Antong boan hamu ma tu ahu sada podang. Jadi dung sahat podang i tu jolo ni rajai.

²⁵Ninna rajai ma: Ponggol dua hamu ma posoposo na mangolu i, jala lehon hamu samponggol tu sadaon, jala samponggol tu sadaan.

²⁶Jadi ninna parompuan, paranak na mangolu i ma tu rajai (ai tarsunggul do holong ni rohana mida anakna i): Sombangu di ho, ale tuanku, lehon hamu ma tu nasida posoposo na mangolu i, unang tung bunu hamu ibana. Alai ninna parompuan na sadanari ma: Unang di ahu, unang di ho, ponggol hamu ma i!

²⁷Dung i ninna rajai ma mangalusi: Lehon hamu ma posoposo na mangolu i tu parompuan on, unang be bunu hamu, on do inana.

²⁸Dung i sar ma uhum na nidabu ni rajai tu sandok Israel, gabe mabiar ma nasida mida rajai, ai diida nasida do habisuhon sian Debata di bagasan ibana laho madabu uhum.

4¹ (I.) Jadi raja Salomo i ma gabe raja gumomgom sandok Israel.

²Jala on do induk angka na pinabangkitna i: Si Azaria, anak ni malim Sadok.

³Si Elihorep dohot si Ahia, anak ni si Sisa, i ma jurutulis; si Josapat, anak ni si Ahilud do panuturina.

⁴Jala si Benaia, anak ni si Joiada, partogi ni parangan, jala si Sadok dohot si Abiatar malim.

⁵Ia si Azaria, anak ni si Natan, induk ni angka parhalado, jala si Sabud, anak ni si Natan, aleale hasudungan ni rajai.

⁶Jala si Ahisar induk ni angka siramoti bagas, jala si Adoniram, anak ni si Abda, induk ni halak parrodi.

⁷Angkup ni dipabangkit si Salomo sampulu dua halak siparenta sandok Israel, angka na pasingkop sipanganon tu rajai dohot tu isi ni bagasna, sasabulan lelengna di na sataon, gonop nasida pasingkopphon.

⁸On do goargoar nasida: Anak ni si Hur di dolok Epraim.

⁹Anak ni si Bendeker di Makas dohot di Salabim dohot di Betsemes dohot di Elon sahat ro di Betharan.

¹⁰Anak ni si Benhesed di Arubot, masuk tu ibana huhut Soko ro di sandok tano Heper.

¹¹Anak ni si Amminadab di sandok banua Dor; si Tafat, boru ni si Salomo dojolmana.

¹²Si Baana, anak ni si Ahilud di Taanak dohot Megiddo ro di sandok Betsean, marbalokkon Zaretan, tungkan toruan sian Jisreel, olat ni Betsean sahat ro di Abel Mehola, sahat ro di bariba ni Jokmeam.

¹³Anak ni si Geber di Ramot di Gilead, masuk tu ibana do angka huta ni si Jair, anak ni si Manasse, angka na di Gilead, masuk tu ibana muse luat Argob, na di Basan; onompulu huta na bolon marparik jala marransangransang tombaga.

¹⁴Si Ahinadab, anak ni si Ido di Mahanaim.

¹⁵Si Ahimas di Naptali, ibana pe mambuat si Basemat, boru ni si Salomo bahen jolmana.

¹⁶Si Baana, anak ni si Husai, di Aser dohot di Alot;

¹⁷Si Josapat, anak ni si Parua, di Isasar.

¹⁸Si Simeï, anak ni si Ela, di Benjamin.

¹⁹Si Geber, anak ni si Uri, di tano Gilead, di tano ni si Sihon, raja ni halak Amori dohot si Og, raja sian Basan. Sasadasa do siparenta tano i.

²⁰Mansai deak do halak Juda dohot Israel, songon horsik di pasir ni laut hinadeakna, angka na mangan minum jala marlas ni roha nasida.

²¹(5-1) (I.) Asa si Salomo panggomgomi di sandok harajaon, olat ni batang aek sahat ro di tano ni halak Palistim jala sahat ro di parbalohan Misir, angka na mamboan sohe jala mangoloi rodi ni si Salomo, saleleng mangolu ibana.

²²(5-2) Alai ingkon adong bahen bohal ni si Salomo sasadari tolupulu pingkul itak na lamot dohot onompulu pingkul itak hian.

²³(5-3) Sampulu lembu na pinamokmok dohot duapulu lembu sian jampalan dohot saratus birubiru, so padohot angka urisa dohot bedu dohot hije dohot pahanpahanan marragamragam na pinamokmok.

²⁴(5-4) Ai digomgomi ibana do sandok tano di bariba ni batang aek Euprat, olat ni Tirza sahat ro di Gasa, digomgomi saluhut raja na di baribaon ni batang aek i, jala marhademahon ibana sian na humaliang.

²⁵ (5-5) Jadi marhasonangan ma Juda dohot Israel maringan ganup di toru ni hau anggurna be dohot di toru ni hau arana, olat ni Dan sahat ro di Berseba, saleleng mangolu raja Salomo.

²⁶ (5-6) Angkup ni adong di raja Salomo opatpulu ribu hajongjongan ni hoda angka sitait huretana dohot sampulu dua ribu hoda hundulan ni parangan parsihundul.

²⁷ (5-7) Dung i angka siparenta ondeng marbohalhon raja Salomo ro di sude angka na mangan sian meja ni raja Salomo, ganup di bulanna be, ndang adong hurang agia aha.

²⁸ (5-8) Tole eme dohot durame di angka hoda sitait hureta dohot hoda hundulan, diboan nasida do i tu inganan parmianan ni rajai ganup di gansina be.

²⁹ (5-9) (II.) Dung i dibasabasahon Debata ma tu si Salomo habisuhon dohot roha panimbangan mansai godang dohot parbinotoan godang, tudoshon horsik na di topi ni laut godangna.

³⁰ (5-10) Jala gumodang do habisuhon ni si Salomo sian habisuhon ni saluhut anak angka na di habinsaran dohot sian saluhut habisuhon ni halak Misir.

³¹ (5-11) Umbisuk ibana tahe sian sude manisia, umbisuk sian si Etan, halak Esrahi dohot si Heman dohot si Kalkol, dohot si Darda, angka anak ni si Mahol, gabe

sar baritana tu saluhut bangso parbegu humaliang.

³² (5-12) Jala dihatahon ibana tolu ribu umpama, ia torop ni endena saribu lima do.

³³ (5-13) Diboto huhut torsahononna taringot tu angka hau, sian hau Ares na di Libanon ro di Ysop (limutlimut) na tubu di dorpi; ditorsahon huhut taringot tu angka pahanpahanan, taringot tu angka pidong, taringot tu angka gulokgulok dohot taringot tu angka dengke.

³⁴ (5-14) Jadi marroan ma halak sian saluhut bangso naeng umbege habisuhon ni si Salomo, sian saluhut angka raja di tano on, angka na umbege barita ni habisukonna.

5¹ (5-15) (III.) Dung i disuru raja Hiram, sian Tirus ma angka naposona manopot si Salomo, ala naung binegena naung miniahan ibana bahen raja singkat ni amana; ai holong roha ni si Hiram mida si Daud saleleng mangolu ibana.

² (5-16) Jadi ditongoshon si Salomo ma hatana tu si Hiram, ninna ma:

³ (5-17) Diboto ho do, na so tarbahen si Daud damang i pajongjong sada joro di Goar ni Jahowa Debatana, ala ni hamusuon angka na humaliang ibana, paima dipatunduk Jahowa nasida tu toru ni palak ni patna.

⁴ (5-18) Alai anggo nuaeng nunga marhasonangan ahu humaliang dibahen

Jahowa, Debatangku, ndang adong be alo nanggo sahalak, manang masa hinamago.

⁵(5-19) Dibahen i, ninna rohangku, dengan pinajongjong sada joro di Goar ni Jahowa Debatangku songon na pinorbagabaga ni Jahowa tu damang si Daud, uju nidokna: Anakmu, sipahundulonku di atas habangsamu bahen gantim, ingkon ibana pajongjong sada joro di Goarhu.

⁶(5-20) Antong dokkon ma halak angka na manaba di ahu hau Ares sian Libanon, asa tampak angka naposongku dohot angka naposom, ia upa ni angka naposom lehononku do tu ho, guru pandokmu; ai diboto ho do ndang adong anggo di tongatonganami manang ise na umboto manaba hau, songon halak Sidon i.

⁷(5-21) Jadi dung dibege si Hiram angka hata ni si Salomo i, las situtu ma rohana, ninna ma: Pinuji ma Jahowa sadarion, ala naung nilehonna tu si Daud anak sada na bisuk gumomgom bangso na bolon on.

⁸(5-22) Dung i disuru si Hiram ma suruanna manopot si Salomo mandok: Nunga hubege alana umbahen disuru ho manopot ahu; sai bahenonku do sude hombar tu lomo ni roham taringot tu hau Ares dohot taringot tu hau sampinur.

⁹(5-23) Ingkon angka naposongku patuathon hau i sian Libanon tu laut; dung i ahu mambahen angka i marrakitrakit di laut

sahat ro di inganan sitonahononmu tu ahu, asa pinarade disi, jadi ripe mangalap ho. Alai ho pe ingkon bahenonmu huhut pinangido ni rohangku mangalehon bohal tu isi ni bagashu.

¹⁰(5-24) Jadi dilehon si Hiram ma tu si Salomo hau Ares dohot hau sampinur guru lomo ni rohana.

¹¹(5-25) Alai anggo raja Salomo mangalehon tu si Hiram duapulu ribu pingkul dahanon bahen bohal ni isi ni bagasna dohot duapulu pingkul miak dahan. Songon i dilehon raja Salomo ganup taon tu si Hiram.

¹²(5-26) Dung i dibasabasahon Jahowa ma hapistaran tu raja Salomo, songon na pinarbagabagana i hian tu ibana; jadi mardame ma si Hiram dohot raja Salomo, laos umpungka parjanjian nasida na dua.

¹³(5-27) (IV.) Dung i dipillit raja Salomo ma angka parrodi sian sandok Israel, ia torop ni parrodi i tolupulu ribu halak do.

¹⁴(5-28) Jadi disuru rajai ma nasida tu Libanon, sampulu ribu halak sagsansi sasabulan lelengna, gabe sabulan nasida di atas Libanon jala dua bulan di jabuna. Jadi si Adoniram do induk ni angka parrodi i.

¹⁵(5-29) Angkup ni pitupulu ribu halak parhuli di raja Salomo, jala ualupulu ribu halak pandakdak batu di dolok.

¹⁶(5-30) So padohot induk angka na pinabangkit ni raja Salomo angka na parenta

ulaon i, tolu ribu tolu ratus halak, angka na mandasdas situan na torop i mangula ulaon.

¹⁷(5-31) Didokkon rajai huhut nasida mangkali batu angka na bolon dohot batu angka na arga, angka na nidakdak bahen ojahan ni joro i.

¹⁸(5-32) Jadi rap tole ma angka pande ni raja Salomo dohot pande ni raja Hiram ro di halak Gebal i mambarbar hau dohot mandakdak batu laho marhobas bagas joro i.

6¹(I.) Boho opat ratus ualupulu taon, dung ruar halak Israel sian tano Misir, jala paopattaonhon hinarajahon ni raja Salomo gumomgom Israel, di bulan Siw, i ma bulan paidua, dipungka rajai palolo joro ni Jahowa.

²Ia joro na pinalolo ni raja Salomo di Jahowa, onompulu asta unjurna, jala duapulu asta bohangna, jala tolupulu asta timbona.

³Ianggo emper na di adopan ni bagas joro i, duapulu asta do unjurna, mangihuthon bohang ni joro i, sampulu asta ia bohangna di adopan ni joro i.

⁴Dipambahen huhut di joro i pandiloan angka na marhandanghandang na sosot.

⁵Dipauli huhut di lambung dorpi ni joro i sada emper humaliang, i ma humaliang dorpi ni joro i, boti humaliang pamurnanganna dohot pudina, jala dibahen angka bilut humaliang marlampislampis.

⁶Ia emper partoru lima asta bohangna, ai partonga onom asta bohangna, ia paitolu

pitu asta bohanga; ai dipambahen do bagas joro i martagahambing humaliang, asa unang masijaloan angka i tu dorpi ni joro i.

⁷Tole laho palolohon joro i, nunga tipak hian didakdak angka batu i, asa unang tarbege be soara ni nanggar manang tangke manang dia ulaula bosi di bagasan joro i laho palolohon.

⁸Alai anggo pintu laho tu emper partonga dingkan siamun ni joro i do, asa marhite sian tangga na marlegotlegot manaek halak tu emper partonga, jala sian emper partonga tu emper paitolu.

⁹Songon i ma parpaulina di joro i jala dipasidung jala dilangitlangit i joro i margulanggulang jala marpapan sian hau Ares.

¹⁰Dipauli huhut sada emper di sandok haliang bagas i, lima asta timbona, jala hau Ares dipangke padomuhon tu joro i.

¹¹(II.) Dung i ro ma hata ni Jahowa tu si Salomo songon on:

¹²Taringot tu joro on na pinalolomon: Molo marparange ho di bagasan angka patikku, jala dipatupa ho angka uhumhu, jala diradoti ho angka tonangku, jala marparange ho hombar tu angka i, jadi pahotonku ma tu ho bagabagangku, na huparbagabaga tu amangmu si Daud.

¹³Jadi maringan ma Ahu di tongatonga ni halak Israel, jala ndang be tadingkononku bangsongku Israel.

¹⁴ (III.) Songon i ma parpauli ni raja Salomo di joro i, jala dipasidung.

¹⁵ Ia dorpi ni joro i dilampis do sian bagasan dohot papan na sian hau Ares, sian pantar ni joro i sahat ro di gulanggulang ni langitlangit di lampis do dohot hau sian bagasan, ia pantar ni joro i dilampis do dohot hau sampinur.

¹⁶ Ia na duapulu asta na di pudi ni joro i dilampis do dohot papan sian hau Ares, olat ni pantar tolhas ro di gulanggulang, jala dipauli ibana huhut sian bagasan sada bilut bahen partangiangan, i ma na songkal sahali.

¹⁷ Jala opatpulu asta unjur ni joro parbagasan i, i ma adopan ni joro i.

¹⁸ Dung i hau Ares tungkan bagasan ni joro i, maruhiran mutikmutik dohot bungabunga angka na mangerbang, luhutna i sian hau Ares do, ndang adong tarida batu nanggo sada.

¹⁹ Ia bilut partangiangan na di tongatonga ni joro i, dipauli do bahen hajongjongan ni poti parpadanan ni Jahowa.

²⁰ Ia ungkuran ni bilut partangiangan i, duapulu asta unjurna, jala duapulu asta bohangna, jala duapulu asta timbona, jala dilampis do i dohot sere palangki; dibahen huhut sada langgatan sian hau Ares di jolona.

²¹ Dung i dilampis raja Salomo joro parbagasan i dohot sere palangki, jala dipagistang angka ranterante sere di jolo ni

bilut partangiangnan i, na nilampisanna i dohot sere.

²²Jadi sandok joro i dilampis do dohot sere; nang sandok langgatan na di jolo ni bilut partangiangnan i dilampis do dohot sere.

²³Dibahen huhut di bagasan bilut partangiangnan i dua kerubim sian hau jetun, sampulu asta timbona.

²⁴Jala lima asta ganjang ni habong ni kerubim na sada, jala lima asta ganjang ni habong ni kerubim na sadanari, gabe sampulu asta sian ujung ni habongna na sambariba sahat tu ujung ni habongna na sambariba nari.

²⁵Laos sampulu asta do nang kerubim na sadanari, sisada ungkuran dohot sisada rupa tahe kerubim na dua i.

²⁶Asa sampulu asta do timbo ni kerubim i sadasada.

²⁷Dung i dibahen ma angka kerubim i tu tongatonga ni joro parbagasan. Jadi dipaherbang angka kerubim i ma habongna, asa dolos habong ni na sada tu dorpi sambariba, jala habong ni kerubim na sadanari dolos tu dorpi na sambariba nari; alai masidolosan habongnasida anggo di tongatonga ni joro i.

²⁸Dung i dilampis ma angka kerubim i dohot sere.

²⁹Jala tu saluhut dorpi ni joro i humaliang diuhirhon sumansuman ni angka kerubim

dohot harambir dohot bungabunga angka na mangerbang, sian bagasan dohot sian balian.

³⁰Nang pantar ni joro i dilampis do dohot sere songon i bilut parbagasan, songon i bilut parbalian.

³¹Jala pintu haroroan tu bilut partangiangan i dibahen do marhinsuhinsu sian hau Jetun, jala tohang dohot angka tiangna i ma saparlina ni dorpi i.

³²Jadi dipauli ma na dua hinsuhinsu sian hau Jetun, jala diuhirhon do tusi sumansuman ni angka kerubim dohot harambir dohot bungabunga angka na mangerbang, jala dilampis do i dohot sere; dilampis huhut angka kerubim nang harambir i dohot sere.

³³Laos songon i dibahen di haroroan ni joro i tiang sian hau Jetun angka na pinaropat suhi.

³⁴Jala dua hinsuhinsu sian hau sampinur, jadi mordong na dua hinsuhinsu ni pintu na sada, mordong ma dohot na dua hinsuhinsu ni pintu na sadanari.

³⁵Diuhirhon huhut tusi sumansuman ni angka kerubim, harambir dohot bungabunga angka na mangerbang, jala dilampis do i dohot sere, mangihuthon une ni uhirani.

³⁶Dipauli muse alaman parbagasan, tolu rinte batu angka na nidakdak jala sarinte tiang sian hau Ares angka na niotom.

³⁷Paopattaonhon, di bulan Siw dibahen haojahan ni joro ni Jahowa.

³⁸Jala pasampulusadataonhon, di bulan Bul, i ma bulan paiualu sun ma joro i, hombar tu sandok hata ni rajai dohot sandok lomo ni rohana, asa pola pitu taon lelengna dipauli.

7¹ (I.) Alai anggo bagasna sandiri pola sampulu tolu taon lelengna, asa sun dipauli raja Salomo tung sandok bagasna.

²Dipauli huhut bagas tombak Libanon saratus asta unjurna, limapulu asta bohangna, jala tolupulu asta timbona, ojak di atas ni opat rinte tiang sian hau Ares, jala di atas ni angka tiang i peak angka gulanggulang sian hau Ares.

³Jala ditarup dohot hau Ares di ginjang ni bilut, angka na jinujung ni angka tiang, opatpulu lima bilanganna, sasampulu lima sarinte.

⁴Jala tolu rinte angka tiang, jala pajojor angka pandiloan, tolu rinte patondong be.

⁵Saluhut angka pintu dohot tiang pinaropat suhi do nang gulanggulang jala patondong be angka jandela tolutolu rinte.

⁶Dipauli huhut sada emper sian tiang, limapulu asta unjurna, jala tolupulu asta bohangna, maremper muse di jolona, martiang jala marlobulobu di jolona.

⁷Angkup ni dibahen do panisioan ni habangsa paruhuman, i ma parrapotan, pantarna dohot dorpina dilampis do dohot hau Ares.

⁸Bagasna pe na niingananna i, marpulik alaman do tungkan bagasan sian panisioan i, suang songon i do parpaulina. Angkup ni dipauli raja Salomo muse sada bagas di boru ni raja Firaun, na binuatna bahen jolmana, suang songon i parpaulina.

⁹Luhutna i dipauli sian batu angka na arga, angka na nidakdak marungkuran jala ginargajian sian bagasan dohot sian ruar, sian ojahan sahat ro di sumban, jala sian balian sahat ro di alaman godang.

¹⁰Ojahanna pe sian batu angka na arga, jala na bolon, batu sisampulu asta dohot sialu asta unjurna.

¹¹Di atas ni muse batu angka na arga, angka na nidakdak marungkuran, dohot hau Ares.

¹²Alai anggo di alaman godang humaliang tolu rinte batu angka na nidakdak, jala sarinte tiang sian hau Ares; suang songon i alaman parbagasan di adopan ni joro ni Jahowa, dohot emper ni bagas i.

¹³(II.) Dung i disuru raja Salomo ma mangalapi si Hiram sian Tirus.

¹⁴Anak ni parompuan na mabalu do ibana sian marga Naptali, alai anggo amana halak Tirus do,jolma pande tombaga, gok hapistaran, parbinotoan dohot marhapandean, mamandei luhut ulaula sian tombaga; jadi dung ro ibana manopot raja Salomo, tole ma dipauli saluhut ulaulana.

¹⁵Dung i dijadihon ma dua tiang sian tombaga, sampulu ualu elak be timbona, jala sampulu dua elak be ganjang ni tali lilitna i humaliang.

¹⁶Dipauli huhut dua uluna angka na tinuang sian tombaga, jala dibahen tu pasi ni tiang i; lima elak timbo ni ulu ni tiang i sadasada.

¹⁷Dibahen huhut pinartaraoang jala, tole ranterante tu ulu ni tiang na di atas tiang i, pitu tu uluna na sada, laos pitu tu uluna na sadanari.

¹⁸Dibahen huhut angka parbue ni hau dalimo, pola dua rinte humaliang gantung tu taraoangna i bahen pangkuphupi ni uluna i angka na di ginjang ni tiang i, laos songon i do parpaulina dohot di na paduahon i.

¹⁹Ia ulu na di atas ni tiang i tudos do tu bunga pansur na mangerbang, opat asta tumimbo sian emper i.

²⁰Jala uluna angka na di atas ni tiang na dua i di ginjangna dope mardonokkon badanna mardonokkon pinartaraoang, adong huhut dua ratus parbue ni hau dalimo, dua rinte humaliang di ganup uluna.

²¹Dung i dipajongjong ibana ma na dua tiang i, jonok tu adopan ni joro i; jumolo dipajongjong tiang pangiamunan, dibahen ma goarna Jakin, dipajongjong muse tiang pangambirangan, dibahen ma goarna Boas.

²²Ia di atas ni ulu ni tiang i adong hapandean bunga pansur na mangerbang; sun disi ma pinauli ulaon taringot tu angka tiang i.

²³(III.) Dung i dibahen ma sada tobat tuangan, sampulu asta bidangna sian topi na sada tu baribana tuk humaliang, jala lima asta bagasna, jala tolupulu asta lilitna humaliang.

²⁴Jala di toru ni topina adong angka mutik ni bungabunga tuk humaliang sampulu kibung di bagasan saasta humaliang tobat i; dua rinte mutik ni bungabunga tartuang di panuanganna.

²⁵Ojak do i di atas ni sampulu dua lembu, tolu uluna mandompakkon utara, tolu uluna mandompakkon pastima, tolu uluna mandompakkon dangsina, jala tolu uluna mandompakkon habinsaran, jala tobat i di atas nasida; jala ihur ni angka lembu i dompak bagasan do.

²⁶Ia hapalna santopap, jala topina hira songon topi ni panginuman songon bunga pansur na mangerbang siatsiat dua ribu bat.

²⁷Dibahen huhut sampulu tong pamurian sian tombaga, ganup pamurian i opat asta ganjangna, opat asta bidangna jala tolu asta timbona.

²⁸Alai songon on do parpaulina di pamurian i: Marbibir humaliang, jala pantarna di holangholang ni bibirna.

²⁹Ia di pantarna angka na di holangholang ni bibirna adong do sumansuman ni singa dohot lombu dohot kerubim; suang songon i di tiangna parsuhi tungkan ginjang dohot tungkan toru ni angka singa dohot lombu, adong muse hapandean ramerame.

³⁰Jala opat galapang sian tombaga di ganup pamurian, botohonna pe sian tombaga do; jala suhina na opat i marabara do; di toru ni pamurian i do angka ramerame sadasada.

³¹Ia babana tungkan bagasan ni bibirna do saasta do tu ginjang, jala tingko do babana suman tu pat ni tiang tonga dua asta bidangna; adong do huhut di babanai hapandean na niuhir; alai anggo pantarna i pinaropat suhi do, ndada tingko.

³²Anggo na opat galapang i di toru ni pantarna i do jala angka botohon ni galapang i mardomu do tu pamurian i; ganup galapang tonga dua asta timbona.

³³Ia parpaulina di angka galapang i suman do tu galapang ni hureta hian; luhutna i na tinuang do pangordonganna, botohonna, ranganangana dohot anakanakna.

³⁴Opat abara huhut di na opat suhi ni ganup pamurian i, jala sisada tuangan do abara dohot pamurian i:

³⁵Tungkan ulu ni pamurian i tingko do humaliang arga satonga asta timbona, jala di atas ulu ni parburian i angka sitioponna, sisada tuangan dohot pantarna.

³⁶Jala diuhirhon tu papan ni sitiopanna i dohot tu papanna humaliang sumansuman ni angka kerubim, singa dohot harambir marguru tu siatna di ganup papan, jala angka ramerame humaliang.

³⁷Songon i ma parpaulina di na sampulu pamurian i, dos tuanganna, suhatna dohot rupana di na saluhutna.

³⁸Angkup ni dipauli sampulu hudon sian tombaga, siatsiat opatpulu bat di ganup hudon; opat asta do ruak ni ganup hudon i, jala di atas ni ganup pamurian na sampulu i adong hudon sada be.

³⁹Dung i dibahen do lima pamurian i tungkan siamun ni joro i, na lima nari tungkan hambirangna; alai anggo tobat i dibahen do tungkan siamun ni joro i dingkan anggoni na.

⁴⁰(IV.) Songon i ma parpauli ni si Hiram di angka hudon, siuksiuk dohot mangkuk. Jadi sun ma dipauli si Hiram sandok ulaon na pinandeanna di raja Salomo tu joro ni Jahowa.

⁴¹Na dua tiang i ro di pinarninggor ni ulu angka na di atas ni tiang na dua i dohot taraoang na dua i bahen pangkuphupi ni na pinarninggor na dua i na di atas ni ulu ni tiang i.

⁴²Tole muse na opat ratus parbue ni hau dalimo na lohoh tu taraoang i duadua rinte parbue ni hau dalimo i di sada taraoang

bahen pangkuphupi ni na dua pinarninggor ni ulu di atas ni tiang na dua i.

⁴³Tole muse na sampulu pamurian i dohot na sampulu hudon na di atas ni pamurian i.

⁴⁴Tole muse tobat i ro di na sampulu dua lembu na di toru ni tobat i.

⁴⁵Tole angka hudon, siuksiuk dohot mangkuk Saluhut ulaula angka na pinandean ni si Hiram di raja Salomo tu joro ni Jahowa, sian tombaga mamolin do.

⁴⁶Di tano tobing mardonokkon Jordan di holangholang ni Sukot dohot Zaretan; didokkon rajai tuangon luhutna i di bagasan tuangan sian tano liat.

⁴⁷Jala dipasombu raja Salomo saluhut angka ulaula i, ai ndang dapot dasingon borat ni tombaga i dibahen hinagodangna situtu.

⁴⁸Didokkon raja Salomo huhut paulion sude ulaula angka na masuk tu joro ni Jahowa, i ma langgatan sere dohot meja sere hapeahan ni sagusagu na marhadohoan.

⁴⁹Tole angka parpalitoan, lima tungan siamun jala lima tungan hambirang di adopan ni bilut partangiangan, sian sere na pita do luhut na i.

⁵⁰Ro di angka mangkuk dohot raut dohot saoran dohot balanga dohot pardaupaan sian sere na pita do; nang angka pangordongordongan ni pintu ni joro parbagasan, di na songkal sahali dohot

pangordongordongan ni pintu ni joro i sian sere do.

⁵¹ Jadi sun ma sandok hapandean ni raja Salomo tu joro ni Jahowa. Dung i diboan si Salomo ma tu bagasan saluhut arta na niuras ni amana si Daud ro di perak dohot sere dohot ulaula, jala dipeakkon tu bilut parpeopan arta di joro ni Jahowa.

8¹ (I.) Dung i dipaluhut raja Salomo ma angka sintua ni Israel dohot sude induk ni halak Israel marmargamarga dohot marompumpu ro tu jolo ni raja Salomo di Jerusalem, naeng boanonna nangkok poti parpadanan ni Jahowa sian huta ni si Daud i ma Sion.

² Jadi marluhut ma tu jolo ni raja Salomo nasa baea di Israel di ari raya bulan Etanim, i ma bulan sipaha pitu.

³ Jadi dung marluhut sude sintua ni Israel, dihindat angka malim i ma poti i.

⁴ Dung i diboan nasida ma poti ni Jahowa nangkok, angkup ni undungundung parluhutan dohot sude ulaula ni habadiaon, angka na di undungundung i na sai laon, laos diboan angka malim dohot halak Lepi do i nangkok.

⁵ Jadi marudur ma raja Salomo dohot sandok luhutan ni Israel, angka na marluhut di lambungna mardalan rap dohot ibana di adopan ni poti i, huhut mamelehon angka

birubiru dohot lombu, angka na so tarbilang manang tare tong dibahen godangna.

⁶Jadi sahat ma diboan angka malim poti parpadanan ni Jahowa tu hajongjonganna, tu bilut partangianan di joro i, tu bagasan bilut na songkal sahali di toru ni habong ni kerubim na dua i.

⁷Ai dipaherbang kerubim na dua i do habongna na dua i tu atas hajongjongan ni poti i, laos dihungkupi kerubim na dua i do poti i ro di haluhaluna sian ginjang.

⁸Juruk do angka haluhalu i, pola dapot idaon uluna sian bilut na badia i di adopan ni bilut partangianan, alai ndang dapot idaon anggo sian ruar, laos disi do angka i rasirasa sadarion.

⁹Ndang adong agia aha di bagasan poti i, nda holan na dua lei batu, angka naung pineakkon ni si Musa tusi uju di Horeb, uju na binahen ni Jahowa parjanjian tu halak Israel, dung diparuar nasida sian tano Misir.

¹⁰(II.) Jadi dung ruar angka malim sian bilut na badia i, ro sada ombun manggo hi joro ni Jahowa.

¹¹Pola ndang manahan angka malim i jongjong marulaon na badia maradophon ombun i, ai hamuliaon ni Jahowa manggo hi joro ni Jahowa.

¹²Dung i didok raja Salomo ma: Nunga marboaboa hian Jahowa ingkon maringanan ibana di bagasan haholomon.

¹³Antong nunga hupauli sada joro bahen parmiananmu, bahen ojahan ni habangsam ro di saleleng ni lelengna.

¹⁴Dung i dipahusor rajai ma bohina asa pasupasuonna sandok luhutan Israel, jala jongjong be do sandok luhutan Israel i.

¹⁵Dung i ninna rajai ma: Pinuji ma Jahowa, Debata ni Israel, naung marboaboa hian marhite sian pamanganna sandiri tu damang si Daud i, jala nunga dipasintong nuaeng marhite sian tanganna, uju na nidokna:

¹⁶Olat ni ari uju Ahu manogihon bangsongku Israel ruar sian Misir, ndang dung hupillit sada huta sian sandok marga ni Israel, paulionna sada joro bahen inganan ni Goarhu; alai nunga hupillit anggo si Daud, asa ibana manggomgomi bangsongku Israel.

¹⁷Nunga nian disangkap roha ni damang si Daud naeng paulionna sada joro di Goar ni Jahowa, Debata ni Israel.

¹⁸Alai ninna Jahowa ma mandok damang si Daud i: Ala naung ditahi roham naeng pajongjongonmu sada joro di Goarhu, dengen do nian anggo sangkap ni roham.

¹⁹Alai ndada jadi anggo ho pajongjong joro i, ingkon anakmu na ruar sian butuham, ingkon ibana pe pajongjong sada joro di Goarhu.

²⁰Nunga tung dipasintong Jahowa hatana naung pinaboana hian, jala nunga ahu dipahot singkat ni damang si Daud i, jala

nunga hundul ahu di habangsa ni harajaon Israel, songon na pinaboa ni Jahowa hian, jala nunga ahu pajongjong sada joro di Goar ni Jahowa, Debata ni Israel.

²¹ Jala nunga hupadiri disi sada hajongjongan di poti i, parpeopan ni parjanjian ni Jahowa, na binahenna tu angka ompunta, uju tinogihonna nasida ruar sian tano Misir.

²² (III.) Dung i jongjong ma raja Salomo di adopan ni langgatan ni Jahowa mandompakkon sandok luhutan Israel, jala dipaherbang tanganna dompak langit.

²³ Dung i ninna ma: Ale Jahowa, Debata ni Israel! Nandang adong Debata na tudoshon Ho di banua ginjang dohot di banua tonga on; Ho do tutu pahothon parjanjian dohot asi ni roha tu naposom, angka na marparange di jolom sian nasa rohana.

²⁴ Ho do naung pasintongkon tu damang, naposom si Daud i hata na pinorbagabagam tu ibana; pamanganmu tutu marbagabagahon, jala tanganmu pasintongkon apala sadarion.

²⁵ On pe, ale Jahowa, Debata ni Israel! Sai pasintong ma tu naposom si Daud, damang i hata naung pinorbagabagam hian tu ibana, uju na nidokmu: Nandang jadi hurangan di ho sada baoa di jolongku na hundul di atas habangsa ni harajaon Israel, asal diramoti angka anakmu dalanna, marparange nasida di jolongku songon ho naung marparange di jolongku.

²⁶On pe, ale Debata ni Israel, sai pasintong ma hatami naung pinorbagabagam tu naposom si Daud, damang i.

²⁷Alai tahe, tung tarbahen Debata ma tutu maringan di atas tano on? Ida ma, gari langit ni langitan ndang hahaliangansa Ho, baliksa apala joro on na hupauli on?

²⁸Alai sai manatap ma Ho tu tangiang ni naposom dohot tu parhurajaonna i, ale Jahowa Debatangku! Sai tangihon ma joujou dohot tangiang na tinangiangkon ni naposom di adopanmon sadarion.

²⁹Sai tonggor ma matam manatap tu joro on borngin dohot arian, tu inganan naung nidokmu: Ingkon disi do Goarhu! Antong sai tangihon ma tangiang na tinangiangkon ni naposom di inganan on.

³⁰Sai tangihon ma tutu parhurajaon ni naposomon dohot bangsom Israel, na tinangiangkon nasida di inganan on; sai tangihon ma i tutu di inganan parhabangsaanmu di banua ginja; tangihon ma tutu jala marpamuati roham!

³¹Tung sura mardosa sada baoa dompak donganna pola dipatolon halak ibana ala ni, sanga ibana jala saut manolon di adopan ni langgatanmon di bagasan joro on.

³²Sai manangi ma Ho di banua ginja huhut marlulu asa maruli uhum angka naposom, laho manorui anggo halak parjahat, asa manginona pambahenanna tu uluna laho

mamintori anggo halak parpintor mangalehon tu ibana hombar tu hatigoranna i.

³³Tung sura talu bangsom Israel maradophon musuna, ala naung mardosa nasida dompak Ho; alai molo mulak nasida tu Ho jala dihatindangkon Goarmu, jala martangiang nasida huhut marhuraja tu Ho di bagasan joro on.

³⁴Sai manangi ma Ho di banua ginjang jala marpamuati roham mida dosa ni bangsom Israel, jala boan nasida mulak tu tano naung nilehonmu tu ompunasida i.

³⁵Tung sura tarhinsu langit i, gabe ndang ro udan, ala naung mardosa nasida dompak Ho, dung i martangiang nasida di inganan on, jala dihatindangkon nasida Goarmu, jala mulak nasida sian dosanasida i, ala naung tarjepol nasida binahenmu:

³⁶Sai manangi ma Ho di banua ginjang, jala marpamuati roham mida dosa ni angka naposom dohot bangsom Israel, ala naung niajarhonmu tu nasida dalan na denggan i na tama sidalananna, jala lehon udan tu tanom, naung nilehonmu tu bangsom bahen partalianna.

³⁷Tung sura masa haleon di tano i manang begu antuk, manang siraraon hauma manang antinganon manang masa sihapor manang tamponok; molo tung disosak musuna nasida di tano i pola dirongom pargumbanganna,

manang tung masa begu antuk manang sahit na asing.

³⁸Nasa tangiang dohot pangidoan, manang marsasahalak, manang tung sandok bangsom Israel manangiangkonsa, ala naung mananda be di jea ni harohaonna, gabe dipaherbang tanganna dompak joro on.

³⁹Sai manangi ma Ho di banua ginjaang, ojahan ni habangsam, jala marpangulahi roham, huhut marlulu dohot mangalehon tu ganup hombar tu saluhut dalanna marguru tu panandam di harohaonna, ai sasada ho do tumanda roha ni jolma manisia luhutna.

⁴⁰Asa tung dihabiari nasida Ho tongtong, saleleng mangolu nasida di tano naung nilehonmu tu ompunasida i.

⁴¹Nang halak sileban, na so sian bangsom Israel, na ro tahe sian luat na dao ala Goarmu.

⁴²Ai begeonnasida ma barita ni Goarmu na timbul i dohot tanganmu na gogo i, dohot botohonmu na toltoli, molo ro ibana martangiang di bagasan joro on:

⁴³Sai manangi ma Ho di banua ginjaang, ojahan ni habangsam, jala bahen ma hombar tu saluhut na pinangido ni halak dagang i tu Ho, asa tung saluhut bangso di tano on mananda di Goarmu jala marhabiaran tu Ho songon bangsom Israel, asa tung diboto naung sahat jinou Goarmu tu atas joro na hupauli on.

⁴⁴Tung sura ruar bangsom laho marporang
dompok musuna di dalan sinurum nasida,
jala martangiang nasida tu Jahowa dompak
huta on naung pinillitmu dohot dompak joro
on naung hupajongjong di Goarmu.

⁴⁵Sai tangihon ma tangiang dohot
pangidoannasida di banua ginjang, jala
pasintong uhum tu nasida.

⁴⁶Tung sura mardosa nasida dompak Ho
(ai ndang adong jolma nanggo sada na so
mardosa), gabe tarrimas Ho mida nasida,
jala dipasahat Ho nasida tu musuna, asa tung
tarbuang nasida tu tano ni musuna, na dao
manang na jonok.

⁴⁷Dung i dipasuang nasida ma rohanasida
tu bagasan di tano habuangannasida i, laos
dipauba nasida rohanasida i, jala martangiang
tu Ho di tano habuangannasida i songon on:
Nunga mardosa hami, jala nunga huulahon
hami hajahaton jala nunga manggunturi
hami.

⁴⁸Molo mulak nasida tu Ho sian nasa
rohanasida dohot sian nasa ateatenasida
di tano ni musuna angka na mambuankon
nasida, jala martangiang nasida tu Ho
mandompakkon tanonasida naung nilehonmu
tu ompunasida, mandompakkon huta naung
pinillitmu dohot mandompakkon joro na
hupauli on di Goarmu:

⁴⁹Sai manangi ma Ho di banua ginjang, di
ojahan ni habangsam mangalusi tangiang

dohot pangidoannasida, huhut pasintong
uhum tu nasida.

⁵⁰Jala marpamuati roham mida dosa
angka naung niulahon ni bangsom dampak
Ho dohot mida saluhut hajahaton angka
naung binahennasida dampak Ho, jala lehon
tu nasida asa maruli asi ni roha nasida
maradophon halak angka na mambuankon
nasida, jala asianna nasida.

⁵¹Ai bangsom do nasida jala partalianmu,
angka naung tinogihonmu ruar sian Misir, sian
parsitongan ni liang pamurunan bosi.

⁵²Jala patonggor matam manatap
parhurajaon ni naposom, manatap dohot
parhurajaon ni bangsom Israel laho
manangihon nasida taringot tu saluhut na
pinangidonasida sian Ho.

⁵³Ai nunga sapala dipapulik Ho nasida sian
saluhut bangso ni tano on bahen partalianmu
sandiri, hombar tu naung pinorbagabagam
marhite sian si Musa naposom, uju na
tinogihonmu angka ompunami ruar sian Misir,
ale Tuhan Jahowa.

⁵⁴(IV.) Jadi dung sun ditangiangkon raja
Salomo tu Jahowa saluhut tangiang dohot
pangidoan ondeng, hehe ma ibana sian
adopan ni langgatan ni Jahowa dohot sian na
marsinggang i dohot sian na pinaherbangna i
tanganna dampak banua ginjang.

⁵⁵ Laos jongjong ma rajai, huhut
mamasumasu sandok luhutan Israel, pola
dipagogo soarana mandok songon on:

⁵⁶ Pinuji ma Jahowa, naung mangalehon
hasonangan tu bangsona Israel, hombar tu
sandok naung pinarbagana i! Ndang adong
tartinggal nanggo sada hata sian saluhut
hatana na denggan i, naung pinaboana hian
marhite sian si Musa naposona i.

⁵⁷ Sai didongani Jahowa, Debatanta i ma
hita, songon naung nidongananna angka
ompunta na jolo; sai unang ma ditadingkon
Ibana hita manang mambolongkon hita.

⁵⁸ Sai ditaiti ma rohanta tu Ibana, asa
marparange hita di saluhut dalanna huhut
mangaradoti angka tonana dohot patikna
dohot uhumna, angka naung tinonahonna tu
angka ompunta i.

⁵⁹ Jala saluhut hata pangidoan on, angka
naung husombahon di adopan ni Jahowa, sai
ngomngom ma i di jolo ni Jahowa, Debatanta
i borngin dohot arian, asa pasintongonna
uhum tu naposona dohot tu bangsona Israel,
singkop ariari!

⁶⁰ Asa tung saluhut bangso ni tano on
mananda, paboa Jahowa do Debata, jala
dungkon ni Ibana ndang adong.

⁶¹ Jala ingkon sun daulat rohamuna tu
Jahowa, Debatanta i, asa marparange di
bagasan angka patikna jala mangaradoti
angka tonana suman songon sadarion.

⁶²(V.) Dung i dipelehon rajai rap dohot sandok bangso i ma angka pelean di adopan ni Jahowa.

⁶³Pelean hamauliateon angka na pinelehon ni raja Salomo tu Jahowa, i ma duapulu dua ribu lembu dohot saratus duapulu ribu birubiru. Songon i ma parturena dibahen rajai dohot sandok halak Israel pasahathon joro i tu Jahowa.

⁶⁴Laos di ari na sasada i diuras rajai parsitongaan ni alaman na di adopan ni joro ni Jahowa, ai disi do dipelehon ibana pelean situtungon dohot pelean sipanganon dohot tabotabo ni pelean hamauliateon, ai langgatan tombaga na di adopan ni Jahowa, mametmethu do i ndang siat bahen pamelean ni pelean situtungon dohot sipanganon ro di tabotabo ni angka pelean hamauliateon.

⁶⁵Dung i marari raya ma raja Salomo uju i rap dohot sandok Israel, luhutan na bolon, angka na ro sian Hamat sahat ro di sunge Misir marpungu di adopan ni Jahowa, Debatanta i, pitu ari jumolo, pitu ari muse gabe sampulu opat ari luhutna.

⁶⁶Tole paualuarihon dipamuli rajai ma halak situan na torop i laos dipasupasu nasida rajai, gabe laho nasida masitopot undungundungna be marhasonangan, jala marlas ni roha ala saluhut na denggan i, na binahen ni Jahowa tu raja Daud naposona i dohot tu Israel bangsona i.

9¹ (I.) Asa dung sun dipajongjong raja Salomo joro ni Jahowa dohot bagas ni rajai, ro di nasa esehesek ni raja Salomo, na hinalomohon ni rohana naeng paulionna.

²Ro muse Jahowa pataridahon dirina tu raja Salomo paduahalihon, suang songon uju na niidana Ibana di Gibeon.

³Dung i ninna Jahowa ma tu rajai: Nunga hutangihon tangiangmu dohot parhurajaonmu, na sinombahonmi di jolongku; jala nunga huparbadiai joro on, naung pinaulim bahen parmianan ni Goarhu ro di saleleng ni lelengna, jala ingkon disi do tongtong ariari matangku dohot rohangku marpanatap.

⁴Molo tung marparange ho di jolongku, suang songon amam si Daud i marparange marrohahon roha hadaulaton dohot hatigoran laho patupahon sude na hutonahon i tu ho, tole angka patikku dohot uhumhu diradoti ho:

⁵Jadi pahotonku ma habangsa ni harajaonmi gumomgom Israel ro di salelenglelengna, hombar tu naung huparbagabaga hian tu amam si Daud, mandok songon on: Nandang jadi hurang di ho sada baoa hundul di atas habangsa ni harajaon Israel.

⁶Alai molo tung marbalik hamu manang anakmuna sogot sian Ahu, jala ndang diradoti hamu angka tonangku dohot patikku, angka naung hupeakhon di jolomuna, pola laho

hamu mangoloi angka debata sileban dohot marsomba tusi:

⁷Jadi ripashononku ma Israel sian tano naung hulehon i tu nasida, jala joro on naung huparbadaia di Goarhu, padaoongku ma i sian jolo ni bohingku, jala bahenonku halak Israel gabe pambuatan umpama dohot bahen alingalingan di tongatonga ni saluhut bangso.

⁸Ia joro on naung timbul sahali, pola longang roha ni ganup na mamolus sian i, huhut mangarehe mandok songon on: Boasa ulaning bahenon ni Jahowa songon i tu tano on dohot tu joro on?

⁹Dung i dohonon ni halak ma mangalusi: Ala na tinadingkonnasida i Jahowa, Debatanasida i, na manogihon ompunasida ruar sian tano Misir, gabe marparsigantungan nasida tu angka debata sileban, jala marsomba tusi, jala mangoloi disi, ala ni do umbahen diparo Jahowa luhut jea on tu nasida.

¹⁰(II.) Jadi dung salpu na duapulu taon i lelengna raja Salomo i paulihon na dua bagas i, i ma joro ni Jahowa dohot bagas ni rajai.

¹¹Tinumpak ni si Hiram, raja sian Tirus mangalehon tu raja Salomo hau Ares dohot sampinur dohot sere, marguru tu sandok lomo ni rohana, gabe dilehon raja Salomo tu raja Hiram duapulu huta di laut Galilea.

¹²Dung i borhat ma raja Hiram sian Tirus laho maningkir huta i, angka naung nilehon

ni raja Salomo tu ibana, hape ndang tongon angka i tu rohana.

¹³Pola didok: Ba apala dia ma huta on, angka naung nilehonmu tu ahu, ale anggia? Gabe digoar ma angka huta i luat Kabul rasirasa sadarion.

¹⁴Ala na ditongoshon raja Hiram tu raja Salomo saratus duapulu talenta sere.

¹⁵(III.) Jala songon on do parture ni parrodi on, na niampehon ni raja Salomo laho paulihon joro ni Jahowa dohot bagasna sandiri dohot Milo dohot parik ni Jerusalem ro di Hazor, Megiddo dohot Gezer.

¹⁶Ai nangkok do na jolo Firaun, raja sian Misir papatu Gezer, laos disurbu dohot api, jala dibunui halak Kanaan angka na maringan di huta i, jala dilehon huta i panseang tu boruna, jolma ni raja Salomo.

¹⁷Dung i dipauli raja Salomo muse huta Gezer dohot Bethoron parjae.

¹⁸Dohot Baalat dohot Tamar di halongonan na di luat i.

¹⁹Angkup ni saluhut huta parpeopan bohal na di raja Salomo, ro di angka huta parpunguan ni hureta porang dohot jolma parsihundul, tung guru esehesek ni roha ni raja Salomo laho paulihon di Jerusalem dohot di atas Libanon dohot di sandok tano ginomgomanna i.

²⁰Saluhut halak angka na teba sian halak Amori, Het i, Perisi, Hevi dohot Jebusi, angka na so sian halak Israel.

²¹Ro di pinomparnasida, angka na teba i sian nasida di tano i, angka na so dapot halak Israel rendephononna, tu nasida ma diampehon raja Salomo ulaon rodi rasirasa sadarion.

²²Alai anggo tu halak Israel ndang diampehon raja Salomo ulaon rodi, bahenjolma parmusu do nasida, parhaladona, angka induk, angka ulubalangna dohot induk panahatan ni huretana dohotjolma parsihundulna.

²³On ma induk, angka na pinabangkit mamatamatahon ulaon na nidokkon ni raja Salomo, lima ratus limapulu halak toropna, angka na mandasdas halak situasi na torop i mangula ulaonna be.

²⁴(IV.) Jadi dung nangkok boru ni raja Firaun sian huta ni raja Daud, bongot tu jabuna naung pinauli ni rajai di nasida, pintor dipauli rajai ma dohot Milo.

²⁵Dung i tolu hali di bagasan sataon raja Salomo mamelehon angka pelean situtungan dohot hamauliateon di atas langgatan, naung pinaulina di Jahowa, huhut manutung daupa disi di adopan ni Jahowa, asa tung sun tipak joro i.

²⁶Huhut disuru raja Salomo paulihon angka kopal di Esion Geber, mardonokkon Elat, di pasir ni laut arung di tano Edom.

²⁷Dung i disuru raja Hiram ma angka naposona bahen halak parhalado di kopal, angka naomal di laut, rap dohot naposo ni raja Salomo.

²⁸Jadi sahat ma nasida tu Opir, jala diboan sian i sere opat ratus duapulu talenta, na binoanna tu raja Salomo.

10¹(I.) Ia raja boruboru sian Saba, dung dibege barita ni raja Salomo taringot tu Goar ni Jahowa, ro ma nasida naeng masiujian dohot rajai marundangundang.

²Jadi sahat ma nasida tu Jerusalem mardongan parangan mansai torop, tole unto, angka na mangusung na hushus marragamragam dohot sere mansai godang dohot mata intan na arga. Jadi dung ro nasida tu jolo ni raja Salomo dipaboaboa ma tu ibana saluhut na di bagasan rohana i.

³Jadi dipatorang raja Salomo ma tu nasida sude sungkunsungkunna, ndang adong na buni nanggo sada sian roha ni rajai, na so pinatorangna tu nasida.

⁴Jadi dung diida raja boruboru sian Saba luhut hapistaran ni raja Salomo dohot bagas na pinaulina i.

⁵Tole sipanganon di mejana, tole partordingna hundul angka naposona, tole panagam ni angka parhaladona dohot

pangkeannasida, tole angka sitahu anggurna, tole partanggaonna laho nangkok tu joro ni Jahowa, jadi hira na tarmali tondinasida.

⁶Laos didok ma mandok rajai: Sintong do hape barita i na hubege di luathu taringot tu aturan binahenmi dohot taringot tu hapistaranmu.

⁷Ndang nian diparhatongon rohangku jolo barita i paima ro ahu tuson, gabe diida matanku; hape ida ma, nanggo satongana ndang dibaritahon halak tu ahu; dilompoi hapistaranmu dohot artam do tahe barita na hubage i.

⁸Martua ma halak naposom, martua ma halak parhaladomon, angka na tongtong jongjong di adopanmu pabegebege hapistaranmu.

⁹Pinuji ma Jahowa, Debatam, na marlomo ni roha mida ho, na pabangkithon ho tu atas habangsa ni harajaon Israel! Ala ni holong ni roha ni Jahowa mida Israel salelenglelengna, umbahen dipabangkit Ibana ho gabe raja mangulahon uhum dohot hatigoran.

¹⁰Dung i dilehon boruboru i ma tu rajai saratus duapulu talenta sere dohot pamurpuri mansai godang dohot mata intan; ndang dung ro be pamurpuri na sai godang, songon na nilehon ni raja boruboru sian Saba tu raja Salomo.

¹¹Tole kopal ni raja Hiram, angka na mamboan sere sian Opir, diboan huhut sian

Opir hau jati mansai godang dohot mata intan.

¹²Dung i didokkon rajai paulion sian hau jati angka handanghandang di joro ni Jahowa dohot di jabu ni rajai, tole angka hasapi dohot tulila di halak parende; ndang dung ro songon i mansam ni hau jati, diboan halak manang didia pe rasirasa sadarion.

¹³Raja Salomo i pe dilehon do tu raja boruboru sian Saba sandok guru lomo ni rohana dohot pangidoanna, so padohot silehonlehon na sian tangan ni raja Salomo sandiri. Dung i mulak ma nasida tu tanona rap dohot angka naposona.

¹⁴(II.) langgo dokdok ni sere na ro tu raja Salomo di bagasan sataon, arga onom ratus onompulu onom talenta sere do.

¹⁵So padohot sere na dapotsa sian halak pangallung dohot sian partigatiga pansar dohot sian saluhut raja ni Arab dohot sian halak na mora di tano i.

¹⁶Dung i didokkon raja Salomo i ma paulion dua ratus lombulumbu sian sere na pinapita; pola onom ratus sekkel sere dilampishon tu sada lombulumbu.

¹⁷Dipauli huhut tolu ratus lombulumbu parinse sian sere na pinapita, pola tolu hati sere dilampishon tu sada parinse; tu bagasan jabu na di tombak Libanon angka i dipambahen rajai.

¹⁸Dung i didokkon rajai ma paulion sada habangsa na bolon sian gading, jala lampisanna do i dohot sere palangki.

¹⁹Onom do talha ni habangsa i, jala ulu ni pangunsandean di habangsa i tingko do dingkan pudi, adong huhut siradeon ni tangan angkupangkup be humaliang hundulani, jala dua suman ni singa jongjong di lambung siradeon i.

²⁰Jongjong huhut disi sampulu dua suman ni singa di atas ni na onom talha i angkupangkup be. Ndang dung adong dope songon i hapandean ni halak manang di harajaon dia.

²¹Nang saluhut mangkuk panginuman ni raja Salomo sian sere do jala saluhut ulaula ni jabuna di tombak Libanon sian sere na pinapita do, ndang adong anggo sian perak, ai hira na so marguna do anggo perak di roha ni halak uju di tingki ni raja Salomo.

²²Ai adong do huhut kopal sian Tarsis di rajai angka na di laut rap dohot kopal ni raja Hiram; sahali di bagasan tolu taon ro angka kopal Tarsis mamboan sere dohot perak dohot gading dohot bodat dohot angka pidong uo.

²³Dung i tumimbul ma raja Salomo sian saluhut raja ni tano on taringot tu hamoraon dohot hapistaran.

²⁴Nasa isi ni tano on tahe marsangkap naeng idaonna bohi ni raja Salomo huhut

naeng begeonna hapistaranna, naung nilehon ni Debata tu bagasan rohana.

²⁵Jadi angka diboan be siluana ganup taon, i ma angka ulaula perak dohot sere dohot pangkean dohot sinjata marragamragam dohot pamurpuri, tole angka hoda dohot hoda na marsahe.

²⁶Dipapungupungu raja Salomo huhut angka hureta dohotjolma parsihundul, pola saribu opat ratus hureta di ibana, jala sampulu dua ribujolma parsihundul, angka na sinagihonna di bagasan angka huta hajongjongan ni hureta dohot di Jerusalem dilambung ni rajai.

²⁷Dung i dipagodang rajai ma perak i di Jerusalem, hira doshon batu godangna ro di hau Ares hira antajau na tubu di tano pea godangna.

²⁸Langgo haroroan ni hoda angka na tu raja Salomo sian Misir do, marrongkanrongkan angka saudagar ni rajai mangalap hoda i marhabanhaban, pajak hian ia argana.

²⁹Mararga onom ratus sekkel perak sada hureta diboan halak nangkok sian Misir, jala saratus limapulu sekkel arga ni sada hoda; laos songon i diboan nasida tu sude raja ni halak Het dohot halak Ram.

11 ¹(I.) Dung i dihasolohon roha ni raja Salomo torop parompuan sian bangso sileban di balik ni boru ni raja Firaun, angka boru Moab, Amon, Edom, Sidon dohot Het.

²Sian bangso parbegu, pola naung didok Jahowa tu halak Israel taringot tusi: Nandang jadi hamu manopot nasida, nasida pe ndang jadi ro tu tongatongamuna, ai sai na elaon nasida do rohamuna mangihuthon tu debatanasida; hape tu parompuan sisongon i marsilohot roha ni raja Salomo mangkaholongi.

³Dung i adong ma di rajai pitu ratus parompuan tuan laenna angka boru ni na raja dohot tolu ratus radingna, angka na paeleng roha ni rajai.

⁴Jadi dung sarimatua raja Salomo dielaela angka jolmana i ma rohana mangihuthon tu debata sileban, gabe ndang be sun denggan rohana tu Jahowa, Debatana, songon roha ni si Daud amana i.

⁵Dung i diihuthon raja Salomo ma marsomba tu sombaon Astarte, ajiajian ni halak Sidon dohot tu Milkom, ajiajian ni halak Amon.

⁶Jadi diulahon raja Salomo ma sogo ni roha ni Jahowa, jala ndang marsihohot rohana mangihuthon tu Jahowa, songon si Daud amana i.

⁷Dipauli raja Salomo huhut uju i sada tambak di Kamos, ajiajian ni halak Moab, di atas dolok tondong ni Jerusalem dohot di Molok, ajiajian ni halak Amon.

⁸Laos songon i binahenna di saluhut jolmana sian bangso sileban, angka na manutung daupa dohot mamele tu ajiajiannasida be.

⁹(II.) Dung i tarrimas ma Jahowa mida raja Salomo, ala marbalik rohana sian Jahowa, Debata ni Israel, naung niida ni rajai pola dua hali.

¹⁰Nunga pola marlumba Ibana tu rajai taringot tu hata on, na so tupa ihuthononhon angka debata sileban; alai ndang diradoti ibana tona ni Jahowa.

¹¹Dibahen i ninna Jahowa ma tu raja Salomo: Ala na binahenmi songon i, jala ndang diradoti ho padan na hubahen i dohot patikku angka na hutonahon i tu ho, rampasonku ma harajaon i sian ho, jala lehononku do i tu naposom.

¹²Alai tahe saleleng mangolu ho ndang dope bahenonku songon i, ala ni si Daud amangmu; sian tangan ni anakmu pe rampasonku.

¹³Alai ndada sandok harajaon i rampasonku; sada marga lehononku tu anakmu, ala ni si Daud naposongku dohot ala ni Jerusalem na hupilliti.

¹⁴(III.) Dung i dipahehe Jahowa ma sahalak alo ni raja Salomo, i ma si Hadad, halak Edom i, sian pinompar ni raja di Edom do ibana.

¹⁵Ai uju marporang raja Daud di Edom, uju nangkok si Joab, partogi ni angka parangan laho mananom angka na mate tongtang, laos dibunu saluhut baoa di Edom.

¹⁶Ai onom bulan lelengna tinggal disi si Joab rap dohot sandok Israel, paima disiaphon sude baoa di Edom.

¹⁷ Alai maporus ma anggo si Hadad, ibana rap dohot deba baoa halak Edom sian angka naposo ni amana, naeng laho tu Misir; bajar dope si Hadad uju i.

¹⁸ Dung i borhat ma nasida sian Midian, gabe sahat tu Elaparan laos diarahon nasida deba baoa sian Elaparan bahen donganna gabe sahat nasida tu Misir tu Firaun, raja sian Misir, na mangalehon tu ibana sada bagas, jala diparbaga parbohalanna jala dilehon tu ibana tano ulaonna.

¹⁹ Jadi maruli asi ni roha godang si Hadad sian raja Firaun, pola dilehon tu ibana anggi ni jolmana sandiri, i ma anggi ni si Tahpenes bahen jolmana.

²⁰ Dung i ditubuhon anggi ni si Tahpenes ma di ibana sada anak na margoar si Genubat na pinagodanggodang ni si Tahpenes di bagasan jabu ni raja Firaun, gabe di jabu ni raja Firaun si Genubat di tongatonga ni angka anak ni raja Firaun.

²¹ Jadi dung tarbortik tu si Hadad di Misir naung monding si Daud rap dohot angka ompuna naung mate dohot si Joab, partogi ni angka parangan, ninna si Hadad ma tu raja Firaun: Loas ma ahu mulak tu tanongku.

²² Dung i ninna raja Firaun ma tu ibana: Aha na hurang di ho di lambungkon, umbahen disangkap roham naeng mulak tu tanom? Jadi ninna ibana ma: Ndang adong nian, alai sai loas ma ahu laho!

²³ Dung i dipahehe Debata muse sahalak alona, i ma si Reson, anak ni si Eliada, na maporus na jolo tumadingkon tuanna, i ma si Hadadeser, raja sian Seba.

²⁴ Jala dipapungupungu deba halak tu lambungna, asa ibana partogi ni parangan sahoron, uju raja Daud mambunu i isi ni Zoba; dung i laho nasida tu Damaskus, laos maringan disi jala mangarajai di Damaskus.

²⁵ Ibana pe sai alo ni Israel do saleleng mangolu raja Salomo; jala on do jea na binahen ni si Hadad, nunga marbiasbias rohana masuk tu gongoman ni Israel, gabe ibana mangarajai Ram.

²⁶ Tole muse si Jerobeam, anak ni si Nebat, marga Ephraim sian Zaretan, naposo ni raja Salomo (boruboru na mabalu anggo inana na margoar si Seruia), ibana manggunturi do dampak rajai.

²⁷ Jala on do alana umbahen manggunturi ibana dampak rajai: Uju raja Salomo paulihon Milo dohot manggohi lombang ni huta ni si Daud amana i.

²⁸ Jolma na marhuaso situtu si Jerobeam i; jadi dung diida raja Salomo ringgas ni dolidoli i mulaulaon, gabe dipabangkit ma ibana bahen induk ni sude halak pangula sian pinompar ni si Josep.

²⁹ (IV.) Dung i uju ruar sahali si Jerobeam sian Jerusalem, gabe pajumpang ibana di tongan dalan dohot panurirang Ahia sian Silo

na marsampesampe na imbaru, jala holan nasida na dua di ladang i.

³⁰Dung i ditiop si Ahia sampesampena na imbaru i laos diparribakkon sampulu dua ribak.

³¹Dung i didok ma tu si Jerobeam: Buat di ho sampulu ribak! Ai songon on do hata ni Jahowa, Debata ni Israel: Ida ma, rampasonku ma harajaon i sian pinompar ni raja Salomo marbasabasahon tu ho sampulu marga.

³²Holan samarga nama tinggal di ibana, ala naposongku si Daud dohot ala huta Jerusalem na hupilliti sian saluhut marga ni Israel.

³³Ala naung tinadingkonnasida Ahu jala marsomba tu sombaon Astarte, ajiajian ni halak Sidon dohot tu Kamos, ajiajian ni halak Moab dohot tu Milkom, ajiajian ni halak Amon, jala ndang marparange nasida di angka dalanku mangulahon na tigor, idaon ni matanku dohot mangaradoti angka patikku dohot uhumhu, songon si Daud amana i.

³⁴Alai ndang rampasonku sandok harajaon i anggo sian tanganna, raja ibana pasombuonku, saleleng mangolu ibana, ala si Daud naposongki, na hupilliti, na mangaradoti tonanku dohot patikku na sai laon.

³⁵Alai unsatonku do harajaon i anggo sian tangan ni anakna marbasabasahon tu ho sampulu marga.

³⁶Samarga sambing lehononku tu anakna, asa tongtong adong sada palito di si Daud naposongki di adopan ni bohingku di Jerusalem, huta na hupilliti di Ahu bahen hajongjongan ni Goarhu.

³⁷Antong Ahu ma pabangkithon ho, asa mangarajai ho sandok hombar tu pinangido ni roham, jala ho gabe raja gumomgom Israel.

³⁸Molo ditangihon ho sude na hutonahon tu ho, jala marparange ho di angka dalanku huhut mangulahon na tigor, idaon ni matanku laho mangaradoti angka patikku dohot tonanku, songon na binahen ni si Daud naposongku, jadi dongananku ma ho jala paulionku di ho sada bagas na hot tongtong, songon na hubahen i tu si Daud jala pasahatonku tu ho Israel.

³⁹Jala pajepolonku ma ala ni anggo pinompar ni si Daud, alai nda tung salelenglelengna.

⁴⁰Dung i diondam raja Salomo naeng bunuonna si Jerobeam; jadi borhat ma si Jerobeam maporus tu Misir mandapothon raja Sisak sian Misir, laos tinggal di Misir ibana paima mate raja Salomo.

⁴¹(V.) Jamita na tinggal i dope sian raja Salomo ro di sude na binahenna dohot hapistaranna, nda tarsurat do angka i di bagasan buku jamita ni raja Salomo?

⁴²Alai anggo lelengna mangarajai raja Salomo di Jerusalem gumomgom sandok Israel opatpulu taon do.

⁴³Dung i monding ma raja Salomo, gabe top dohot angka ompuna, gabe tartanom ibana di huta ni si Daud amana i, jadi anakna si Rehabeam bangkit raja singkatna.

12¹(I.) Dung i laho ma si Rehabeam tu Sikem; ai nunga marpungu sandok Israel di Sikem naeng parajahon ibana.

²Jadi dung dibege si Jerobeam anak ni si Nebat barita i, uju di Misir dope ibana, ai maporus tusi ibana maradophon raja Salomo, gabe mulak Jerobeam sian Misir.

³Ai nunga disuru nasida hian suruanna manjou ibana. Dung i ro ma si Jerobeam rap dohot sandok luhutan Israel, asa mandok hatana tu si Rehabeam songon on:

⁴Ilanggo amanta nahinan dokdok do auganami dibahen, alai anggo ho sai paneang ma parrodi on na pora binahen ni amanta dohot auga na dokdok na niampehonna tu hami, asa marunduk tu ho hami.

⁵Dung i ninna rajai ma tu nasida: Muli ma hamu jolo, tolu ari nari ulahi hamu ro tu ahu. Jadi muli ma bangso i.

⁶Dung i martuptup ma raja Rehabeam dohot sintua, angka dongan satuptupan ni raja Salomo amana i, andorang di ngoluna, ninna ma: Songon dia panuturimuna patut alusta tu bangso on?

⁷Jadi didok nasida ma tu ibana: Molo olo ho marunduk ni roha sadarion tu bangso on dohot mangoloi nasida dohot mangalusi

nasida mandok hata na lambok tu nasida, jadi marunduk tu ho ma nasida saleleng ho mangolu.

⁸Alai ditadingkon rajai do panuturion tinuturhon ni angka sintua, laho ibana martuptup dohot halak na umposo, angka donganna magodang, angka na jongjong di jolona.

⁹Dung i didok ma tu nasida: Ia hamu, dia do panuturimuna patut alusta tu bangso on angka na mandok tu ahu songon on: Sai paneang auga, na niampehon ni amanta nahinan tu hami?

¹⁰Dung i ninna halak na umposo i, angka donganna magodang ma tu ibana, ingkon songon on dohononmu tu bangso on na mandok tu ho hata on: Langgo amanta nahinan dokdok do auganami dibahen, alai anggo ho sai paneang ma auganami; songon on ma tama dohononmu tu nasida: Umbolon do anak ni tanganku sian haehae ni damang.

¹¹On pe, dokdok pe auga na niampehon ni damang nahinan tu hamu, alai anggo ahu lam dumokdok dope bahenonku augamuna; ia damang linsinglinsing hian do dibahen maminsang hamu, alai anggo ahu hala do bahenonku maminsang hamu.

¹²Tole patoluarohon ro ma si Jerobeam rap dohot sandok bangso i mandapothon si Rehabeam, marningot janji ni rajai: Ulahi hamu patoluarohon ro tu jolongku.

¹³Jadi horas ma alus ni rajai tu bangso i, ai nunga ditadingkon rohana panuturion niaturhon ni angka sintua i tu ibana.

¹⁴Jadi ninna rajai ma tu nasida, hombar tu panuturion ni halak na umposo i, songon on: Dokdok pe auga na niampehon ni damang nahinan tu hamu, alai anggo ahu lam dumokdok dope bahenonku augamuna: Ia damang linsinglinsing hian do dibahen maminsang hamu, alai anggo ahu hala do bahenonku maminsang hamu.

¹⁵Asa ndang dioloi rajai pangidoan ni bangso i, ai marharoroan sian Jahowa do hata i, asa mangkajongjongkon hatana naung nilumbahon ni Jahowa hian marhitehite si Ahia sian Silo tu si Jerobeam, anak ni si Nebat.

¹⁶(II.) Jadi dung diida sandok Israel, na so nioloan ni rajai pangidoannasida i, ro ma alus ni bangso i mandok tu rajai: Aha do parjambaranta dibahen si Daud? Ndang adong partaliana dibahen anak ni si Isai. Beta hita, ale Israel mulak ganup tu undungundungmu be! On pe, paingotingot angka isi ni bagasmu sandiri, ale Daud! Jadi muli ma Israel tu undungundungna be.

¹⁷Alai anggo halak Israel, angka na maringan di angka huta ni Juda, angka nasida ma dirajai si Rehabeam.

¹⁸Dung i disuru raja Rehabeam ma si Adoniram, sintua papungu guguan, hape

sandok halak Israel mandangguri ibana dohot batu, pola mate ibana. Dung i hapogan ma raja Rehabeam manaeak tu huretana laho maporus tu Jerusalem.

¹⁹Jadi bali ma Israel sian pinompar ni si Daud rasirasa sadarion.

²⁰Jadi dung tarbortik tu sandok Israel naung mulak i si Jerobeam, disuru nasida ma suruanna mangalapi ibana tu parluhutan i, jala dipabangkit nasida ibana bahen raja gumomgom sandok Israel; ndang adong nanggo sahalak na mangihuthon tu pinompar ni si Daud, dungkon ni marga Juda sambing.

²¹(III.) Alai dung sahat si Rehabeam tu Jerusalem, dipaluhut ma sandok pinompar ni Juda dohot marga Benjamin, saratus ualupulu ribu halak sialo musu, angka na pinillit, naeng marmusu dompak pinompar ni Israel, asa pasuangkon harajaon i nian tu si Rehabeam, anak ni si Salomo.

²²Alai ro ma hata ni Debata tu si Semaya, halak ni Debata, songon on.

²³Dok ma tu si Rehabeam, anak ni si Salomo, raja sian Juda, dohot tu sandok pinompar ni Juda dohot Benjamin dohot pasipasi ni bangso na teba i songon on:

²⁴Boti hata ni Jahowa: Nandang jadi hamu nangkok, jala ndang jadi hamu marmusu garembong, dompak hahaanggimuna, i ma halak Israel i; mulak ma hamu ganup tu jabuna be, ai marharoroan sian Ahu do

hata on. Jadi ditangihon nasida ma hata ni Jahowa, laho ma nasida muli hombar tu hata ni Jahowa.

²⁵(IV.) Dung i dipauli si Jerobeam ma huta Sikem di dolok Epraim, laos maringan disi; dung i borhat ibana sian i jala dipajongjong huta Peniel.

²⁶Alai ninna si Jerobeam ma di bagasan rohana: Atik tung beha mulak harajaon i maon muse tu pinompar ni si Daud.

²⁷Molo sai nangkok bangso on laho mamelehon angka pelean di bagasan joro ni Jahowa di Jerusalem, sai na mulak do roha ni bangso on tu tuannasida hian, tu si Rehabeam, raja sian Juda, jala todosonnasida ma ahu, asa mulak nasida tu si Rehabeam, raja sian Juda.

²⁸Dung i martuptup ma rajai jala dibahen dua lembu sere, jala didok ma tu situan na torop i: Nunga sae lelengna hamu nangkok tu Jerusalem Ida ma, indi debatamu, ale Israel, na manogihon ho nangkok sian tano Misir!

²⁹Dung i dipajongjong ma na sada di Betel, jala na sadanari ditaruhon tu Dan.

³⁰Hape parbingkasan tu dosa do pambahenanna i, ai mardalan do bangso i di jolo ni ganaganaan na sada sahat ro di Dan.

³¹Dipauli ibana huhut sada joro parsantian, jala dipabangkit angka malim sian sandok bangso i, angka na so sian halak Lepi.

³²Angkup ni dipajadi si Jerobeam sada ari raya di bulan sipaha ualu di ari sampulu lima di bulan i, manuman ari raya di Juda laos mamele ibana di atas langgatan i. Suang songon i dibahen di Betel laho mamele tu lombu angka na binahenna i, jala dipabangkit di Betel angka malim di joro parsantian angka na binahenna i.

³³Dung i mamele ibana di atas langgatan, na binahenna i di Betel, di ari sampulu lima bulan sipaha ualu, tung guru lomo ni rohana sandiri mamillitsa, jala dipajadi sada ari raya di halak Israel, laos ibana mamele di atas langgatan i huhut manutung daupa.

13¹(I.) Dung i ida ma, ro sada halak ni Debata sian Juda tu Betel nidokkon ni Jahowa, tongon jongjong si Jerobeam di lambung langgatan i laho manutung daupa.

²Dung i joujou ma panurirang i dompak langgatan i patolhas hata ni Jahowa, ninna ma: Oale langgatan, langgatan! Songon on do hata ni Jahowa: Ida ma, na tubu do sogot sada anak, pinompar ni si Daud, na margoar si Josia, ibana ma mamelehon di atasmu angka malim ni joro parsantian, angka na manutung daupa di atasmu, jala holiholi nijolma tutungon ni halak sogot di atasmu.

³Dilehon ibana huhut di ari na sasada i sada tanda halongangan, ninna ma: On ma tanda halongangan, paboa nunga Jahowa mandok

hata on: Ida ma, marigat ma langgatanon, pola sabar dohot sirabun na di atasna.

⁴Alai dung dibege rajai hata ni halak ni Debata, na joujou dompak langgatan i di Betel, disurdukkon si Jerobeam ma tanganna sian atas langgatan i huhut didok: Tangkup hamu ibana! Hape malos ma tanganna sinurdukkonna i dompak ibana, jala ndang tarbahensa be palendukkon tu ibana.

⁵Marigat ma ia langgatan i, jala sabar sirabun sian langgatan i, hombar tu tanda halongangan naung nilehon ni halak ni Debata marhite sian hata ni Jahowa.

⁶Dung i ro ma alus ni rajai, jala didok tu halak ni Debata: Ua martangiang ma ho marsomba tu Bohi ni Jahowa, Debatam, mangondihon ahu, asa anggiat sumuang tangankon tu ahu. Jadi mombun ma Bohi ni Jahowa dibahen halak ni Debata, gabe sumuang ma tangan ni rajai tu ibana, suang songon na sai laon.

⁷Dung i didok rajai ma tu halak ni Debata: Beta hita muli tu jabu pahosahon satongkin, asa hulehon huhut silehonlehon tu ho.

⁸Alai ninna halak ni Debata ma mandok rajai: Tung sura pe lehononmu tu ahu sambariba jabum, ndang olo ahu muli rap dohot ho, jala ndang olo ahu mangan sagusagu manang minum aek di huta on.

⁹Ai songon on do hata ni Jahowa manonahon tu ahu: Nandang jadi panganonmu sagusagu

manang inumonmu aek, jala ndang jadi ho mulak sian dalan naung nidalamanmu.

¹⁰Jadi mardalan ma ibana sian dalan na asing, ndang mulak sian dalanna hian laho tu Betel.

¹¹(II.) Alai maringan do di Betel sada panurirang na matua, gabe ro anakna pajojorhon tu ibana sandok pambahenan na binahen ni halak ni Debata sadarina i di Betel, tole hata angka na pinaboana tu rajai, dipajojor nasida tu amanasida i.

¹²Dung i didok amanasida ma tu nasida: Sian dalan dia ibana mardalan? Gabe dipatuduhon angka anakna i tu ibana dalan na binolus ni halak ni Debata, na ro sian Juda.

¹³Dung i didok ibana ma tu angka anakna i: Palanoi hamu halode i di ahu. Jadi dung sun dipalanoi nasida halode i di ibana, marsihundul ma ibana tusi.

¹⁴Dung i diihuthon ibana ma halak ni Debata, jala jumpangsa ibana mangunsande di bona ni hariara, jala didok mandok ibana: Atehe, ho do halak ni Debata, na ro sian Juda? Ahu ma tutu ninna.

¹⁵Dung i ninna ma mandok ibana: Beta hita muli tu jabu, asa mangan sagusagu.

¹⁶Alai ninna ibana ma: Nandang tarbahen ahu muli rap dohot ho manang udur dohot ho, jala ndang tarbahen ahu mangan sagusagu manang minum aek rap dohot ho di huta on.

¹⁷ Ai nunga ro hata ni Jahowa mandok tu ahu: Ndang jadi panganonmu sagusagu disi manang inumonmu aek, ndang jadi ho mulak sian dalanmu hian.

¹⁸ Dung i ninna jolma i tu ibana: Ahu pe panurirang do suang songon ho, jala nunga ro hata ni sada surusuruan tu ahu marhite sian hata ni Jahowa mandok: Togihon ibana mulak tu jabum, asa mangan sagusagu ibana dohot minum aek. Hape gabusna do i.

¹⁹ Jadi saut ma ibana ditogihon muli, asa mangan sagusagu di bagasan jabuna dohot minum aek.

²⁰ (III.) Hape dung hundul nasida di lambung meja, ro ma hata ni Jahowa tu panurirang na manogihon ibana mulak.

²¹ Laos joujou ibana mandok tu halak ni Debata, na ro sian Juda, ninna ma: Songon on do hata ni Jahowa: Ala naung manggunturi ho dompak hata ni Jahowa, jala ndang diradoti ho tona, na tinonahon ni Jahowa Debatam.

²² Nunga pola mulak ho jala mangan sagusagu dohot minum aek di huta na nidokna i nian tu ho: Ndang jadi ho mangan sagusagu manang minum aek disi dibahen i ndang jadi sahat bangkem tu tanoman ni angka ompum.

²³ Jadi dung sun ibana mangan sagusagu dohot minum, dipalanoi ma di ibana halode ni panurirang, na manogihon ibana mulak.

²⁴ Jadi mardalan ma ibana, gabe pajumpang ibana dohot singa di tongan dalan, laos dibunu ibana, ia bangkena ambolong do di dalan, jongjong di lambungna halode i, singa i pe jongjong do di lambung bangke i.

²⁵ Dung i ida ma, ro ma halak pamolus, gabe diida bangke i ambolong di tongan dalan, jala singa i jongjong di lambung bangke i, laos ro nasida paboahon barita i tu huta, na niinganen ni panurirang na matua i.

²⁶ Dung dibege panurirang, na manogihon ibana mulak sian dalan, barita i, ninna ma: Halak ni Debata do ibana, na manggunturi dompak hata ni Jahowa, ala ni umbahen dipasahat Jahowa ibana tu singa na manoro dohot mambunu ibana, hombar tu hata ni Jahowa naung nilumbahonna hian tu ibana.

²⁷ Dung i didok panurirang i ma tu angka anakna: Palanoi hamu di ahu halode i; jadi dung dipalanoi nasida.

²⁸ Mardalan ma ibana, gabe jumpangsa bangkena i ambolong di dalan, jala halode dohot singa i jongjong di lambung bangke i, ndang dipangan singa i bangke i jala ndang disoro ia halode i.

²⁹ Dung i dihindat panurirang i ma bangke ni halak ni Debata jala diampehon tu halode i, jala diboan ibana mulak; jadi dung sahat panurirang na matua i tu huta, diandungi ma ibana laos ditanom.

³⁰Dipeakkon tahe bangkena i tu bagasan tanomanna sandiri, jala diandungi nasida ibana: Oe isuang, ale anggiah!

³¹Jadi dung ditanom nasida ibana, ninna panurirang i ma mandok angka anakna: Ia dung mate ahu, sai tanom hamu ma ahu di bagasan tanoman hapeahan ni halak ni Debata; peakkon hamu holiholingu tu lambung ni holiholina.

³²Ai ingkon saut do hata na jinouhonna i, nidokkon ni Jahowa dompak langgatan na di Betel dohot dompak saluhut joro parsantian, angka na di bagasan angka huta ni Samaria.

³³(IV.) Dung salpu jamita on, laos so mulak si Jerobeam sian dalanna na roa i, lam diulahi tahe pabangkithon jolma sian sandok bangso i bahen angka malim di joro parsantian. Manang ise tahe na lomo roha, i do dipabangkit gabe malim di angka joro parsantian i.

³⁴Jadi pambahenanna i gabe parbingkasan tu dosa di pinompar ni si Jerobeam, asa siap jala ripur sian tano on.

14¹(I.) Laos di tingki uju i, marsahit ma si Abia, anak ni si Jerobeam.

²Dung i didok si Jerobeam ma tu jolmana: Ua borhat ma ho jala patinda rupam, asa unang diboto halak jolma ni si Jerobeam do ho, jala laho ma ho tu Silo; ida ma, disi do panurirang Ahia na marbagahon hian tu ahu gabe raja gumomgom bangso on.

³Laos boan ma di bagasan tanganmu sampulu sugusagu dohot angka gaburgabur dohot sada guriguri marisi situak ni loba laho manopot ibana, asa ibana pabotohon tu ho taringot tu hosa ni dakdanak on.

⁴Jadi dibahenjolma ni si Jerobeam ma songon i, borhat ma nasida mardalan tu Silo, gabe masuk ma nasida tu jabu ni si Ahia. Alai anggo si Ahia i ndang be tangkas marnida, ai nunga rambon matana dibahen hatutuana.

⁵Alai nunga ro hian hata ni Jahowa tu si Ahia: Ida ma, na ro majolma ni si Jerobeam, naeng manungkun hata tu ho taringot tu anakna, ai marsahit do ibana. Songon on songon on ma dohononmu tu nasida; molo masuk ibana pasamahonna ibana tu halak na asing.

⁶Jadi dung dibege si Ahia soara ni patna i, ro masuk tu bagasan pintu, ninna ma: Masuk ma ho, alejolma ni si Jerobeam! Boasa tung paasingonmu rupam? Na sinuru do ahu paboahon tu ho hata na horas.

⁷Laho ma ho, paboa ma tu si Jerobeam: Songon on do hata ni Jahowa, Debata ni Israel: Ala naung hupatimbul ho sian tongatonga ni bangso i, jala hupabangkit ho bahen partogi ni bangsongku Israel.

⁸Pola Ahu mangarampas harajaon i sian pinompar ni si Daud, jala hulehon do i tu ho; hape ndang suman ho marroha songon naposongku si Daud, na mangaradoti angka

patikku, jala na mangihuthon Ahu sian nasa rohana, holan na tigor di bagasan rohangku do na niulana.

⁹Hape mangulahon na roa do anggo ho, lobi sian saluhut raja na jumolo sian ho; laho do ho mambahen di ho angka debata sileban dohot ganaganaan tuangan, asa pahehe murukku, jala dibolongkon ho Ahu tu pudi ni tanggurungmu:

¹⁰Dibahen i, ida ma, paroonku ma jea tu pinompar ni si Jerobeam, jala ripashononku sian si Jerobeam nasa baoa, na bajar dohot na tang di Israel, jalojalo buriapus bahenonku pinompar ni si Jerobeam, songon pangapusi ni halak di na rotak, paima sun siap ibana.

¹¹Manang ise na mate sian si Jerobeam di bagasan huta, ingkon suda panganon ni panangga; jala manang ise na mate di ladang, ingkon suda parguton ni pidong na martongatonga langit; tongon tahe, nunga pola Jahowa mandok songon i!

¹²Antong borhat ma ho laho muli tu jabum; molo masuk patmu tu bagasan huta, mate ma dakdanak i.

¹³Jala sandok Israel mangandungi anggo ibana, dohot mananom ibana; ai sasadasa do sian pinompar ni si Jerobeam tipak tu tanoman, ala adong jumpang di bagasan ibana roha na denggan maradophon Jahowa, Debata ni Israel, di bagasan jabu ni si Jerobeam.

¹⁴Alai patindangon ni Jahowa ma sada raja gumomgom Israel, na mangaripashon pinompar ni si Jerobeam di ari binuhulna i; aha huhut naung masa nuaeng?

¹⁵Jala rosahon ni Jahowa ma Israel, songon arung na meoleol di bagasan aek, jala paunsatonna Israel sian tano na denggan on, naung nilehonna tu angka ompunasida i, jala paserahonna nasida sahat tu bariba ni batang aek, ala sombaon angka na binahennasida i, pahehe rimas ni Jahowa.

¹⁶Jala pasahatonna ma Israel ala ni dosa na niulahon ni si Jerobeam sandiri, huhut ala na nielana i halak Israel mambahen dosa.

¹⁷(II.) Dung i borhat ma jolma ni si Jerobeam mardalan sahat tu Tirza. Jadi dung sahat ibana tu lobulobu ni jabuna, mate ma dakdanak i.

¹⁸Dung i ditanom nasida ma ibana, jala sandok Israel mangandungi ibana, hombar tu hata ni Jahowa, naung pinaboana hian marhite sian panurirang Ahia naposona i.

¹⁹Jamita na tinggal i dope sian si Jerobeam, i ma parture ni parporangonna dohot pangarajaionna, tarsurat do angka i di bagasan buku jamita ni angka raja ni Israel.

²⁰Alai anggo lelengna mangarajai si Jerobeam duapulu dua taon do. Dung i monding ma ibana gabe top dohot angka ompuna, jala si Nadab anakna i bangkit raja singkatna.

²¹ (III.) Alai anggo si Rehabeam, anak ni si Salomo, mangarajai di Juda. Opatpulu sada taon umur ni si Rehabeam di na bangkit raja ibana, jala sampulu pitu taon lelengna ibana mangarajai di Jerusalem, huta na pinillit ni Jahowa sian saluhut marga ni Israel bahen parmianan ni Goarna. Ia goar ni ina ni rajai, i ma si Naema, boru Amon.

²² Dung i diulahon halak Juda ma sogo ni roha ni Jahowa, pahehe iburuna, lobi hehena sian sude na binahen ni ompunasida marhite sian dosa, angka na niulahonnasida i.

²³ Ai dohot do nasida paulihon ni nasida angka joro parsantian dohot ganaganaan dohot angka sombaon di atas ni saluhut dolokdolok na timbo dohot di toru ni saluhut hau na rugun.

²⁴ Adong do huhut baoa angka na marjoldemahon baoa di tano i, angka na maniru mangulahon hajahaton na niula ni bangso parbegu, angka naung pinabali ni Jahowa maradophon halak Israel.

²⁵ Alai tole palimataonhon dung raja si Rehabeam, nangkok ma si Sisak, raja sian Misir mandopang Jerusalem.

²⁶ Dung i ditaban duduk ma angka ugasan sian joro ni Jahowa dohot sian bagas ni rajai, tung saluhut do dibuat; dibuat do huhut saluhut lombulumbu parinse sian sere, angka na pinauli ni si Salomo.

²⁷ Dung i dipauli raja Rehabeam ma angka parinse sian tombaga bahen singkatna, jala dipasahat do i tu tangan ni partogi ni parangan, angka na marhal di lambung pintu ni jabu ni rajai.

²⁸ Manang piga hali pe rajai masuk tu bagasan joro ni Jahowa, sai diusung angka parangan i do angka parinse i, dung i dung salpu i diboan do i mulak tu bilut ni angka parangan i.

²⁹ Jamita na tinggal i dope sian si Rehabeam dohot sude na niulana, nda tarsurat do i di bagasan buku jamita ni angka raja sian Juda?

³⁰ Alai sai tong tangging humusuon i di holangholang ni si Rehabeam dohot si Jerobeam saleleng mangolu be nasida.

³¹ Dung i monding ma si Rehabeam gabe top ibana dohot angka ompuna, laos tartanom di lambung ni angka ompuna di bagasan huta ni si Daud. Ia goar ni inana, i ma si Naema, boru Amon. Jadi si Abia anakna i bangkit raja singkatna.

15¹ (I.) Tole pasampuluualu taonhon dung raja si Jerobeam, anak ni si Nebat, bangkit raja ma si Abia di Juda.

² Dung i tolu taon lelengna ibana mangarajai di Jerusalem; ia goar ni inana, i ma si Maaka, boru ni si Absalom.

³ Dung i marparange ibana di bagasan saluhut dosa ni amana, angka ma binahenna jumolo sian ibana, jala ndang sun daulat

rohana tu Jahowa, Debatana, songon roha ni ompuna si Daud.

⁴Alai ala ni si Daud dilehon Jahowa, Debatana i tu ibana sada palito di Jerusalem laho pabangkithon anakna dung salpu ibana, asa pahothon Jerusalem.

⁵Ala diulahon si Daud na tigor di bagasan roha ni Jahowa, jala ndang dung sumurut ibana sian saluhut na tinonahonna tu ibana saleleng mangolu ibana, dungkon ni hata na tu si Uria, halak Het i.

⁶Alai sai tangging do hamusuon di holangholang ni si Rehabeam dohot si Jerobeam saleleng mangolu be nasida.

⁷Jamita na tinggal i dope sian si Abia dohot sude na binahenna i, nda tarsurat do i di bagasan buku jamita ni angka raja sian Juda? Alai sai tangging do anggo humusuon i di holangholang ni si Abia dohot si Jerobeam.

⁸Dung i monding ma si Abia gabe top dohot angka ompuna, jala tartanom ibana, di bagasan huta ni si Daud. Dung i si Asa anakna i bangkit raja singkatna.

⁹(II.) Paduapulutaonhon dung gabe raja sian Israel si Jerobeam, bangkit raja ma si Asa gumomgom Juda.

¹⁰Jala opatpulu sada taon lelengna ibana mangarajai di Jerusalem. Ia goar ni inana, i ma Maaka, boru ni si Absalom.

¹¹Dung i diulahon si Asa ma na tigor di roha ni Jahowa, suang songon si Daud ompuna i.

¹²Ai dipalaho ibana do baoa angka na marjolmahon baoa sian tano i, jala dipaholang saluhut ganaganaan na ronsam, angka na pinauli ni ompuna.

¹³Dipaijur huhut inana si Maaka sian tohonanna raja, ala pinaulina sada ganaganaan di sombaon Asera. Dung i disiaphon si Asa ma ganaganaanna i jala ditutung do i martopihon sunge Kidron.

¹⁴Alai ndang dipaholang anggo angka joro parsantian. Sai tong do nian marsihohot roha ni si Asa tu Jahowa saleleng mangolu ibana.

¹⁵Diboan do huhut perak dohot sere dohot ulaula, angka na pinarbadian ni amana, pinarbadianna sandiri pe tu bagasan joro ni Jahowa.

¹⁶Sai tangging do anggo hamusuon di holangholang ni si Asa dohot si Baesa, raja sian Israel, saleleng mangolu be nasida.

¹⁷Ai nangkok do si Baesa, raja sian Israel, mandopang Juda, jala dipagonting huta Rama, asa unang tarbahen manang ise marmeang muli tumopot si Asa, raja sian Juda.

¹⁸Dung i dibuat si Asa ma sandok perak dohot sere na tinggal i dope sian arta angka na di joro ni Jahowa, tole arta angka na di jabu ni rajai jala dipasahat do i tu angka naposona; dung i disuru raja Asa ma nasida manopot si Benhadad, anak ni si Tabrimon,

tubu ni si Hesion, raja sian Ram, na maringan di Damaskus, ninna ma:

¹⁹Tibu hian do hita marjanji, sian amanta be dope, dibahen i manongos silua perak dohot sere ma ahu tu ho; antong laho ma ho, tulakkon ma padanmu tu si Baesa, raja sian Israel, asa sumurut ibana sian ahu.

²⁰Dung i ditangihon si Benhadad ma hata ni raja Asa jala disuru angka partogi ni paranganna mandopang angka huta ni Israel, gabe dipapatu ma huta Lyon dohot Dan dohot Abel Betmaaka dohot sandok tano Kinerot ro di sandok tano Naptali.

²¹Dung sahat barita i, dibege si Baesa, mansohot ma ibana pagonting Rama, laos tinggal di Tirza.

²²Dung i santi balatuk ma sandok Juda, didokkon raja Asa, ndang jadi malua nanggo sahalak, asa diusung nasida angka batu dohot hau sian Rama naung pinauli ni si Baesa, naeng pangkeon ni raja Asa do i pauli huta Geba dohot Mispa.

²³Jamita na tinggal i dope sian si Asa ro di sude huasona dohot na binahenna dohot huta angka na pinaulina, nda tarsurat do i di bagasan buku jamita ni angka raja sian Juda? Dung marhira matua ibana sarion ma patna duansa.

²⁴Dung i monding ma si Asa, gabe top dohot angka ompuna, jala tartanom di lambung ni angka ompuna di huta ni si Daud ompuna

i. Dung i si Josapat, anakna i bangkit raja singkatna.

²⁵(III.) Alai si Nadab, anak ni si Jerobeam, bangkit raja di Israel paduataonhon dung raja si Asa di Juda, jala dua taon lelengna ibana mangarajai Israel.

²⁶Jala diulahon do sogo ni roha ni Jahowa, diihutihut tahe dalan ni amana dohot dosana mangela Israel mardosa.

²⁷Dung i marbulan ma si Baesa, anak ni si Ahia sian pinompar ni si Isasar, naeng mangalo ibana, laos dibunu si Baesa ibana di Gibeton na masuk tu halak Palistim, tongon uju si Nadab dohot sandok Israel martungkum huta Gibeton.

²⁸Jadi dibunu si Baesa ibana patolutaonhon dung si Asa raja di Juda, jala si Baesa bangkit raja singkatna.

²⁹Dung bangkit raja ibana, diripurhon ma sandok pinompar ni si Jerobeam, ndang teba nanggo sada na marhosa sian si Jerobeam dipasombu, tung diripurhon do pinomparna, hombar tu hata ni Jahowa naung nilumbahonna hian marhitehite naposona si Ahia sian Silo.

³⁰Ala ni dosa ni si Jerobeam angka na niulana sandiri huhut, ala na nielana i halak Israel mambahen dosa, marhite sian paminggilna pahehe muruk ni Jahowa, Debata ni Israel.

³¹ Jamita na tinggal i dope sian si Nadab dohot sude na binahenna, nda tarsurat do i di buku jamita ni angka raja sian Israel?

³² Sai tangging do anggo humusuon i di holangholang ni si Asa dohot si Baesa, raja sian Israel saleleng mangolu be nasida.

³³ Patolutaonhon dung raja si Asa di Juda, bangkit raja ma si Baesa, anak ni si Ahia gumomgom sandok Israel di Tirza duapulu opat taon lelengna.

³⁴ Jadi diulahon ibana ma sogo ni roha ni Jahowa mangihutihut dalan ni si Jerobeam dohot dosana sandiri huhut mangela Israel mardosa.

16¹ (I.) Alai ro ma hata ni Jahowa tu si Jehu, anak ni si Hanani palumba si Baesa songon on:

² Ala naung hupatimbul ho sian orbuk jala hupabangkit ho gabe partogi ni bangsongku Israel, hape diihutihut ho do dalan ni si Jerobeam dohot mangela bangsongku Israel mardosa, asa pahehe murukku marhite sian dosanasida.

³ Ida ma, ripur ma bahenonku si Baesa dohot pinomparna, bahenonku tahe tu pinomparmu, suang songon tu pinompar ni si Jerobeam, anak ni si Nebat.

⁴ Manang ise na mate sian si Baesa di bagasan huta, ingkon suda panganon ni panangga, jala manang ise na mate di

ladang, ingkon suda parguton ni pidong na martongatonga langit.

⁵Jamita na tinggal i dope sian si Baesa dohot na binahenna ro di huasona, nda tarsurat do i di bagasan buku jamita ni angka raja sian Israel?

⁶Dung i monding ma si Baesa gabe top dohot angka ompuna, jala tartanom di Tirza, jadi si Ela anakna i bangkit raja singkatna.

⁷Alai songgop pe hata ni Jahowa nilumbahon ni panurirang Jehu hian, anak ni si Hanani, tu si Baesa dohot tu pinomparna i, ala saluhut hajahaton na niulana maradophon Jahowa, pahehe murukna marhite sian pambahenan ni tanganna, gabe tudos ibana tu pinompar ni si Jerobeam dohot ala naung binununa ibana.

⁸(II.) Tole paduapuluonomtaonhon dung raja si Asa di Juda, bangkit raja ma si Ela, anak ni si Baesa, gumomgom Israel di Tirza dua taon lelengna.

⁹Dung i marbulan ma naposona si Simri, induk ni satonga huretana mangalo ibana, tongon ibana di Tirza minum anggur, pola mabuk di jabu ni si Arza, siramoti bagas ni rajai di Tirza.

¹⁰Dung i masuk ma si Simri laos dibunu ibana mate paduapulupitutaonhon dung raja si Asa di Juda, jala si Simri bangkit raja singkatna.

¹¹Jadi dung bangkit raja ibana, sanga juguk di atas habangsana, didokkon ma bunuon

sandok pinompar ni si Baesa, ndang teba dibahen nanggo sada baoa, ro di tuturna dohot alealena.

¹²Tung siap do dibahen si Simri sandok pinompar ni si Baesa, hombar tu hata ni Jahowa, na nilumbahonna hian tu si Baesa marhite sian panurirang Jehu.

¹³Ala saluhut dosa ni si Baesa dohot ala dosa ni si Ela, anakna i na niulana sandiri dohot mangela Israel mardosa pahehe muruk ni Jahowa, Debata ni Israel, marhite sian ganaganaannasida.

¹⁴Jamita na tinggal i dope sian si Ela dohot sude na binahenna, nda tarsurat do i di buku jamita ni angka raja sian Israel?

¹⁵(III.) Tole paduapulupitutaonhon dung raja si Asa di Juda bangkit raja ma si Simri pitu ari lelengna di Tirza; alai anggo angka parangan i martungkum huta Gibeton do, na masuk tu halak Palistim.

¹⁶Jadi dung tarbege barita i tu parangan angka na di parsaroan i: Naung mambahen parbulanan si Simri, nunga pola mate rajai dibunu, jadi sandok parangan ni Israel pabangkithon sadarina i si Omri, partogi ni angka parangan bahen raja gumomgom Israel di parsaroan i.

¹⁷Dung i nangkok ma si Omri rap dohot sandok Israel sian Gibeton laho martungkum Tirza.

¹⁸Alai dung diida si Simri naung patu huta i, masuk ma ibana tu parhalan ni bagas ni rajai, laos ibana sandiri mamosokkon bagas ni rajai di atasna, gabe mate.

¹⁹Ala dosana sandiri, na niulahonna i sogo ni roha ni Jahowa laho mangihutihut dalam ni si Jerobeam dohot maniru dosana na niulahonna mangela dohot Israel mardosa.

²⁰Jamita na tinggal i dope sian si Simri dohot parbulanan na binahenna i, nda tarsurat do i di bagasan buku jamita ni angka raja sian Israel?

²¹(IV.) Mardua rongkangan bangso Israel uju i; na satonga bangso i mangihuthon tu si Tibni, anak ni si Ginat parajahon ibana, na satonganari mangihuthon tu si Omri.

²²Alai ditaluhon bangso na mangihuthon tu si Omri do bangso na mangihuthon si Tibni, anak ni si Ginat; mate ma ia si Tibni, jadi si Omri bangkit raja.

²³Patolupulusadataonhon dung raja si Asa di Juda, bangkit raja ma si Omri gumomgom Israel sampulu dua taon lelengna, onom taon lelengna ibana mangarajai anggo di Tirza.

²⁴Dung i dituhor ma dolok Samaria sian si Semer mararga dua talenta perak, jala dipungka sada huta di atas dolok i, dibahen ma goar ni huta na pinungkana i Samaria mangihuthon goar ni si Semer, tuan nampuna dolok i hian.

²⁵ Dung i diulahon si Omri ma sogo ni roha ni Jahowa, jumahat tahe ibana sian saluhutjolma angka na jumolo sian ibana.

²⁶ Diihutihut ibana huhut saluhut dalam ni si Jerobeam, anak ni si Nebat dohot dosana angka na binahenna i mangela Israel mardosa, asa pahehe muruk ni Jahowa, Debata ni Israel marhite sian ganaganaannasida i.

²⁷ Jamita na tinggal i dope sian si Omri, na binahenna dohot habeguon na niulana, nda tarsurat do i di buku jamita ni angka raja sian Israel?

²⁸ Dung i monding ma si Omri gabe top dohot angka ompuna, jala tartanom di Samaria, jadi si Ahab, anakna i, bangkit raja singkatna.

²⁹ (V.) Patolupuluualutaonhon dung raja si Asa di Juda, bangkit raja ma si Ahab, anak ni si Omri, gumomgom Israel di Samaria duapulu dua taon lelengna.

³⁰ Dung i diulahon si Ahab, anak ni si Omri ma sogo ni roha ni Jahowa, gumodang sian saluhutjolma angka na jumolo sian ibana.

³¹ Hira na maotikku dope di rohana na niihutihutna angka dosa ni si Jerobeam, anak ni si Nebat. Lam dibuat dope si Izebel, boru ni si Etbaal, raja ni halak Sidon, bahenjolmana; laho ibana huhut mangoloi Baal dohot marsomba tusi.

³²Dung i dipajongjong ma sada langgatan di Baal, di bagasan joro ni Baal, na pinaulina di Samaria.

³³Dipungka si Ahab huhut sada sombaon Asera, asa gumodang do dibahen si Ahab pahehe muruk ni Jahowa, Debata ni Israel, sian saluhut raja ni Israel angka na jumolo sian ibana.

³⁴Di angka arina ro si Hiel sian Betel mangulahi paulihon huta Jeriko. Mate si Abiram, anak buhabajuna laho mambahen ojahanna; mate si Segub, anakna siampudan laho umpajokkon pargumbanganna, hombar tu hata ni Jahowa, naung nilumbahonna hian marhite sian si Josua, anak ni si Nun.

17¹(I.) Dung i ro ma hata ni si Elia, halak Tisbi, sian halak paisolat di Gilead, mandok tu si Ahab: Songon sintongna mangolu Jahowa, Debata ni Israel, jala ahu marhalado di jolona, ndang jadi ro nambur manang udan, manang piga taon on, molo so jolo ahu mandokkon!

²Dung i ro ma hata ni Jahowa mandok tu ibana:

³Laho ma ho sian on jala tondong ma dompak purba, jala martabuni ma ho di lambung sunge Kerit na di bariba ni Jordan.

⁴Ingkon minum sian sunge i ma ho, jala nunga hudokkon angka pidong sigak, asa nasida marmudu do disi.

⁵Dung i laho ma ibana jala dibahen ma hombar tu hata ni Jahowa, laho ma ibana tutu jala hundul di lambung sunge Kerit na di bariba ni Jordan.

⁶Jadi ro ma angka pidong sigak mamboan tu ibana sagusagu dohot juhut manogotna i dohot bodarina i, jala sian sunge i ibana minum.

⁷(II.) Dung i marhira sataon lelengna, marsik ma sunge i, ala soada ro be udan di tano i.

⁸Dung i ro ma hata ni Jahowa tu ibana songon on:

⁹Borhat ma ho laho tu Sarpat na mardonokkon Sidon, maringan disi ma ho; ida ma, nunga hudokkon sada parompuan na mabalu disi marmudu ho.

¹⁰Dung i borhat ma ibana laho tu Sarpat; jadi dung sahat ibana tu harbangan ni huta i, ida ma, adong ma disi sada parompuan na mabalu na marsobansoban. Dung i joujou ma si Elia mandok tu nasida: Ua alap di ahu aek i otik di bagasan tabutabu on, asa minum ahu.

¹¹Alai dung laho nasida naeng mangalap, joujou muse ibana mandok tu nasida songon on: Ua buat di ahu santopik sagusagu di bagasan tanganmu.

¹²Alai ninna parompuan i ma: Songon sintongna mangolu Jahowa, Debatam, ndang adong sagusagu di ahu nanggo sada, nda holan itak sampohul di bagasan hudon,

angkep ni miak otik di bagasan guriguri, jala ida ma, na marsobansoban do ahu, asa laho ahu paulihon itak i di ahu dohot di anakki, asa mangan hami na dua dung i mate ma.

¹³Alai ninna si Elia ma tu nasida: Unang ho mabiar, laho ma ho, bahen ma songon na nidokmu, alai pauli di ahu jumolo sian i sada sagusagu na metmet, jala boan tu ruar di ahu, dung pe i asa pauli di ho dohot di anakmu.

¹⁴Ai songon on do hata ni Jahowa, Debata ni Israel: Ia itak na di bagasan hudon ndang olo suda, jala miak na di bagasan guriguri ndang jadi marsik, paima jumpang ari haroro ni udan tongoson ni Jahowa tu sisik ni tano on.

¹⁵Dung i laho ma parompuan i, dibahen ma songon na nidok ni si Elia, gabe mangan nasida, nang ibana nang parompuan i ro di isi ni jabuna ariari.

¹⁶Ia itak na di bagasan hudon ndang olo suda, jala miak na di bagasan guriguri ndang olo marsik, hombar tu hata ni Jahowa, naung pinaboana hian marhite sian si Elia.

¹⁷(III.) Jadi dung salpu angka jamita ondeng, marsahit ma anak ni parompuan, soranganna i, pola pasang situtu sahithna laos tos hosana.

¹⁸Dung i ninna parompuan i ma tu si Elia: Aha parsoranku tu ho, ale halak ni Debata? Rupa ro do ho tu ahu laho pasingothon dosangku dohot mambunu anakki?

¹⁹Dung i ninna si Elia ma mandok nasida: Boan tuson anakmi. Dung i dibuat si Elia ma anakna i sian ampuanna, laos diboan ibana tu ginjang, tu bilut na niingananna i, jala diampehon ibana tu podomanna.

²⁰Dung i joujou ma ibana tu Jahowa, ninna ma: Oale Jahowa, Debatangku! Tung dohot ma parompuan na mabalu on, soranganki marhinamago bahenonmu laho mambunu anakna?

²¹Dung i dipabustang ma ibana tolu hali di ginjang ni dakdanak i huhut joujou tu Jahowa, ninna ma: Ale Jahowa, Debatangku, ua paulak ma hosa ni dakdanak on tu bagasan ibana.

²²Jadi ditangihon Jahowa ma soara ni si Elia, gabe mulak hosa ni dakdanak i tu bagasan ibana, laos mangolu ibana.

²³Dung i dibuat si Elia ma dakdanak i jala diboan sian bilut parginjang tu toru, jala dilehon ibana tu inana huhut didok si Elia: Ida ma, na mangolu do anakmon.

²⁴Dung i didok parompuan i ma tu si Elia: Nuaeng pe asa huboto halak ni Debata do ho, jala hasintongan do hata ni Jahowa na ruar sian pamanganmu.

18¹(I.) Dung i di laonlaon ni ari ro muse ma hata ni Jahowa tu si Elia, patolutaonhon tahe, ninna ma: Laho ma ho, pataridahon ma ho tu si Ahab, ai naeng ma tongosonku udan tu tano i.

²Dung i laho ma si Elia pataridahon ibana tu si Ahab. Alai masa do uju i haleon potir di Samaria.

³Dung i dijou si Ahab ma si Obaja, siramoti jabuna. Alai marhabiaran situtu anggo si Obaja mida Jahowa.

⁴Ai uju na niripashon ni si Izebel angka panurirang ni Jahowa, dibuat si Obaja ma saratus halak panurirang jala ditabunihon nasida limalimapulu halak di bagasan sada liang, jala dipasingkop sagusagu dohot aek tu nasida.

⁵Dung i ninna si Ahab ma tu si Obaja: Adangi ma tano on manopot sude mual dohot sunge anggiat tung jumpang hita duhutduhut, asa itapangolu angka hoda dohot angka hoda na marsahe, asa unang rendep angka pinahan i.

⁶Jadi disagi nasida padua ma tano i adangadanganna; sasada si Ahab mardalan di dalan na sada, jala sasada si Obaja mardalan di dalan na sadanari.

⁷Jadi dung di tongan dalan si Obaja ida ma, pajumpang ma ibana dohot si Elia; dung ditanda ibana rupana, manungkap ma ibana huhut didok: Dison do ho hape ale tuanku Elia?

⁸Dung i didok ma: Dison ma tutu, laho ma ho, paboa ma tu tuanmu: Ida ma nunga disi si Elia!

⁹Alai ninna si Obaja ma: Aha ulaning dosangku, umbahen naeng pasahatonmu

naposom tu bagasan tangan ni si Ahab, asa bunuonna ahu?

¹⁰Songon sintongna mangolu Jahowa, Debatam: Nandang adong bangso manang harajaon na so tinopot ni suruan ni tuanku mangalului ho nian; ia didok nasida: Nandang dison ibana, pola dipatolon rajai harajaon dohot bangso i, paboa na tutu ndang jumpang nasida ho.

¹¹Ia nuaeng lam didok ho do: Laho ma ho, paboa ma tu tuanmu: Ida ma, nunga disi si Elia!

¹²Angkup ni, molo laho ahu sian lambungmon, gabe ro Tondi ni Jahowa mangusung ho manang tudia so huboto; hape ro ahu palumbahon nian tu si Ahab, alai ndang jumpangsa ho, gabe bunuonna ma ahu; alai sai marhabiaran do naposomon mida Jahowa olat ni sidakdanahonna.

¹³Ndada tarbortik huroha barita ni na hubahen i tu tuanku, uju na binunu ni si Izebel angka panurirang ni Jahowa, na hutabunihon i angka panurirang ni Jahowa saratus halak, limalimapulu halak di bagasan sada liang, jala hupasingkop tu nasida sagusagu dohot aek?

¹⁴Lam didok ho nuaeng: Laho ma ho, paboa ma tu tuanmu: Ida ma, nunga disi si Elia, asa bunuonna ahu huroha.

¹⁵Dung i didok si Elia ma: Songon sintongna mangolu Jahowa Zebaot, jala ahu

marhalado di jolona, ingkon sadarion dope patuduhononku ahu tu ibana.

¹⁶Dung i laho ma si Obaja manjumpangkon si Ahab, jala dipaboa barita i tu ibana; gabe mardalan ma si Ahab manjumpangkon si Elia.

¹⁷(II.) Jadi dung pajumpang si Ahab dohot si Elia, ninna si Ahab ma tu ibana: Nunga disi hape ho siago Israel?

¹⁸Alai ninna ibana ma: Ndada ahu mangago Israel, ho do dohot pinompar ni amam, binahen ni naung tinadingkonmuna angka patik ni Jahowa, jala mangihuthon tu angka Baal.

¹⁹On pe, suru ma na papunguhon sandok Israel mandapothon ahu tu atas dolok Karmel ro di angka panurirang ni Baal na opat ratus limapulu halak i dohot angka panurirang ni sombaon Asera na opat ratus halak i, angka na mangan sian meja ni si Izebel.

²⁰Dung i disuru si Ahab ma martingting tu sandok halak Israel, dipapungu huhut angka panurirang i tu atas dolok Karmel.

²¹(III.) Dung i didapothon si Elia ma sandok bangso i, ninna ma: Sadia leleng nari naeng mengkatengkat hamu angkup be? Molo Jahowa Debata, Ibana nian ihuthon; alai ia tung Baal, ibana nian ihuthon hamu! Hape nanggo sahata ndang dialushon bangso i tu ibana.

²²Dung i didok si Elia ma tu bangso i: Sasada ahu na ma tinggal panurirang ni

Jahowa, alai anggo panurirang ni Baal opat ratus limapulu halak do toropna.

²³Antong lehon hamu ma tu hami dua jonggi, itenang dipillit nasida sada jonggi di nasida jala ditanggoi laos diampehon tu soban i, alai unang dibahen api tusi; jadi ahu ma marhobas jonggi na sadanari dohot mangampehon tu soban, unang pe hubahen api tusi.

²⁴Dung i pajoujou hamu ma goar ni debatamuna, jala ahu pajoujou Goar ni Jahowa; manang debata dia na mangalusi dohot api, Ibana ma Debata na tutu. Dung i sahata ma sandok bangso i mangalusi: Denggan do hata i!

²⁵Dung i didok si Elia ma tu angka panurirang ni Baal: Pillit hamu ma di hamu sada jonggi jala pauli hamu parjolo, ai torop do anggo hamu, jala pajoujou hamu ma goar ni debatamuna, alai unang ampehon hamu api tusi.

²⁶Dung i dibuat nasida ma jonggi, na nilehonna tu nasida, jala dipauli nasida lombu i, jala dipajoujou nasida goar ni Baal sian manogotna i sahat ro di hos ni ari, sai ninna do: O Baal, alusi hami! Hape ndang adong ro soara manang alus; pola marhajangjang nasida humaliang langgatan na binahennasida i.

²⁷Alai dung hos ari, direhe si Elia ma nasida, ninna ma: Pagogo hamu soaramuna antong

manjoujou, ai Debata do ibana tahe! Atek tung lilian marhusari ibana, manang adong ulaonna na ringkot, manang di pardalanan ibana, manang tung tarlalap modom, asa ngot ibana.

²⁸Dung i dipagogo nasida ma soarana be manjoujou jala dirarihi dagingna marhitehite podang dohot hujur marningot hasomalannasida, pola sap mudar dagingnasida i.

²⁹Alai dung salpu hos ari, sai didatdati nasida do marhatahata sahat ro di tingki pamelehon di pelean sipanganon, alai ndang adong soara manang alus manang panangihon pe.

³⁰Dung i didok si Elia ma tu sandok bangso i: Pajonok hamu ma tu ahu! Jadi sandok bangso i jumonok tu ibana; laos diumban ibana ma langgatan ni Jahowa naung malohai.

³¹Dung i dibuat si Elia ma sampulu dua batu, mangihuthon bilangan ni marga ni anak ni si Jakkob panahatan ni hata ni Jahowa na jolo, uju na nidokna i: Ingkon si Israel goarmu.

³²Dung i sian angka batu i dipauli ibana sada langgatan di Goar ni Jahowa, dihali huhut sada bondar humaliang langgatan i, arga dua solup boni lambasna.

³³Dipatutur huhut soban i, jala ditanggoi dohot jonggi jala diampehon tu atas soban i.

³⁴Dung i ninna ma: Gohi hamu opat gunsi aek, jala usehon hamu tu pelean situtungon i dohot tu soban i. Didok muse: Bahen hamu

songon i paduahalihon! Jadi dipaduahali nasida ma; didok muse: Bahen hamu songon i patoluhalihon! Jadi dipatoluhali nasida.

³⁵ Pola mardalan aek i humaliang langgatan i, bondar i pe gok aek do.

³⁶ Jadi dung jumpang tingki pamelehon di pelean sipanganon, ro ma panurirang Elia jumonok jala didok ma: Ale Jahowa, Debata ni si Abraham, si Isak dohot si Israel, sai pabotohon ma sadarion, paboa Ho do Debata di Israel jala ahu naposom, jala marhite sian hatam saluhutna on hubahen.

³⁷ Sai alusi ma ahu, ale Jahowa, alusi ma ahu tutu! Asa tung diboto bangso on sasada Ho Debata, ale Jahowa asa tung dipauba Ho rohanasida tumadingkon Baal!

³⁸ Dung i madabu ma api sian Jahowa jala suda dipangan pelean situtungon ro di soban dohot batu dohot tano i, pola didilati dohot aek di bagasan bondar.

³⁹ Jadi dung diida sandok bangso i songon i, manungkap be ma nasida, angka didok ma: Jahowa do Debata na tutu! Jahowa do Debata na tutu!

⁴⁰ (IV.) Alai ninna si Elia ma tu nasida: Tangkupi hamu ma angka panurirang ni Baal, unang adong malua sian nasida nanggo sahalak. Jadi ditangkupi ma nasida songon i. Dung i ditogu si Elia ma nasida tuat tu sunge Kison, laos diseseati nasida disi.

⁴¹ Dung i ninna si Elia ma tu si Ahab:

Nangkok ma ho, asa mangan minum, ai marhasak do hubege songon haroro ni udan na por.

⁴² Jadi dung nangkok si Ahab laho mangan minum, nangkok ma si Elia tu punsu ni Karmel laos manungkap tu tano, jala dibahen bohina tu holangholang ni ulu ni totna.

⁴³ Dung i didok ma tu naposona: Ua nangkok ma ho manatapnatap tungkan laut. Dung i nangkok ma ibana manatapnatap huhut didok: Nandang adong disi agia aha. Dung i didok si Elia muse: Ulahi laho, pola pitu hali.

⁴⁴ Tole papituhalihon ninna ma: Ida ma, ombun sada na metmet songon tangan ni baoa sada balgana manaek sian laut. Dung i didok si Elia ma: Nangkok ma ho, dok ma tu si Ahab: Pasang ma huretam jala tuat, asa unang ambaton ni udan i ho.

⁴⁵ Dung i ndang piga dan mangkolom ma langit i dibahen ombun mardongan habahaba, gabe ro ma udan tipotipo. Alai marhureta ma anggo si Ahab laho tu Jisreel.

⁴⁶ Dung i ro ma tangan ni Jahowa manogu si Elia, laos dihososi ma gontingna marlojong manjoloani si Ahab sahat ro di Jisreel.

19¹ (I.) Dung i dipajojor si Ahab ma tu si Izebel sude na binahen ni si Elia dohot pamununa di saluhut angka panurirang marhite sian podang.

²Dung i disuru si Izebel ma suruanna manopot si Elia mandok tu ibana: Ingkon pinsangon ni angka debata ma ahu, molo so bahenonku tu hosam marsogot songon on, suang songon na binahenmi tu hosa ni sada sian angka nasida i.

³Dung sanat hata i diboto si Elia hehe ma ibana mardalan marhamaol hosana, gabe sahat ma ibana tu Berseba na di Juda, jala ditinggalhon naposona disi.

⁴Alai mardalan ma anggo ibana tu halongonan, sadari mardalan daona, dung sahat tusi hundul ma ibana marlinggomlinggom di bona ni sada hau tadatada laos mangidohon mate hosana, ninna ma: Nunga i sae ale Jahowa, buat na ma tagonan hosangki, ai apala dumenggan ahu marroha sian angka daompung.

⁵Dung i dipapeak ma ibana laos modom di linggom ni hau tadatada i. Jadi ida ma, ro sada surusuruan manjama ibana, huhut didok tu ibana: Hehe ma ho mangan!

⁶Dung i humusor ma ibana, gabe diida peak dingkan uluna sada sagusagu na ginoreng dohot sada gunsi marisi aek. Jadi dung mangan dohot minum ibana, diulahi muse ma modom.

⁷Dung i ro surusuruan ni Jahowa paduahalihon manjama ibana huhut didok: Hehe ma ho mangan, ai dalan na dao do sidalananmu.

⁸Dung i hehe ma ibana jala mangan minum, jala mardalan margogohon sipanganon i opatpulu ari opatpulu borngin lelengna, sahat ro di dolok ni Debata, i ma Horeb.

⁹(II.) Masuk ma ibana disi tu bagasan sada liang laos marborngin disi. Dung i ida ma, ro ma hata ni Jahowa, mandok tu ibana: Aha do ni niulam dison, ale Elia?

¹⁰Dung i ninna ibana ma: Marmurukmuruk situtu do ahu nian humongkop ulaon ni Jahowa, Debata Zebaot, ai nunga ditadingkon halak Israel parjanjianmu, nunga maloha angka langgatanmu, jala nunga dibunu angka panurirangmu marhite sian podang, sasada ahu na ma tading, dohot hosangki dope dilului nasida naeng buatonna.

¹¹Dung i ninna Ibana ma: Ruar ma ho jala jongjong tu dolok na di jolo ni Jahowa, ai ida ma, naeng mamolus Jahowa! Tongkinnari ro ma habahaba bolon, na manorbani angka dolok dohot mambolai angka dolok batu mardalan di jolo ni Jahowa; alai ndada Jahowa dope di bagasan habahaba i. Dung salpu habahaba i ro ma lalo; alai ndada Jahowa dope di bagasan lalo i.

¹²Dung salpu lalo i ro ma api; alai ndada Jahowa dope di bagasan api i. Dung salpu api ro ma alogo na tarangonangon.

¹³Jadi dung dibege si Elia soarana i, dihungkupi ma bohina dohot sampesampena; dung i ruar ma ibana laos jongjong di baba ni

liang i. Dung i ida ma, ro sada soara mandok tu ibana: Aha do na niulam dison, ale Elia?

¹⁴Dung i ninna ibana ma: Marmurukmuruk situtu do ahu nian humongkop ulaon ni Jahowa, Debata Zebaot; ai nunga ditadingkon halak Israel parjanjianmu, jala nunga diloha nasida angka langgatanmi, nunga dibunui dohot angka panurirangmu marhite sian podang, jala sasada ahu na ma tading, dohot hosangki dope dilului nasida naeng buatonna.

¹⁵Alai ninna Jahowa ma tu ibana: Mulak ma ho tu dalanmu hian tungkan Damaskus, laho ma ho tusi jala miahi si Hasael bahen raja gumomgom Ram.

¹⁶Miahi dohot si Jehu, anak ni si Nimsi bahen raja gumomgom Israel, miahi dohot si Elisa, anak ni si Sapat sian Abel Mehola bahen panurirang singkatmu.

¹⁷Jadi manang ise na malua sian podang ni si Hasael, ingkon mate bunuon ni si Jehu ma i, jala manang ise na malua sian podang ni Jehu, ingkon mate bunuon ni si Elisa ma i.

¹⁸Angkup ni tinggal dope hubahen di Israel pitu ribu halak, saluhutna i angka na so mangalompit ulu ni totna marsomba tu Baal dohot na so dung mangumma ibana.

¹⁹(III.) Dung i mardalan ma si Elia sian i, gabe jumpangsa si Elisa, anak ni si Sapat, tongon maninggala ibana dohot sampulu dua pasang horbo di jolona, ibana sandiri mangolatolat pasang na pasampuluduahon

i. Dung i didapothon si Elia ma ibana laos dilungkuphon sampesampena tu ibana.

²⁰Dung i ditadingkon si Elisa ma angka horbo i jala marlojong mangihuthon si Elia, didok ma: Ua loas ahu jolo mangumma damang dohot dainang, asa huihuthon ho. Dung i ninna si Elia ma tu ibana: Laho ma ho mulak! Ai aha do na hubahen i tu ho?

²¹Dung i mulak ma ibana sian lambungna, jala dibuat sapaasang horbo laos dipotongi do i, ulaula ni horbo i do dipangke marmasak juhut i jala dilehon panganon ni angka naposona. Dung i borhat ma ibana mangihuthon si Elia gabe parhaladona.

20¹(I.) Dung i dipaluhut si Benhadad raja sian Ram ma sandok paranganna, jala tolupulu dua raja angka na hinarana, tole angka hoda dohot hureta porang, jadi nangkok ma ibana, ditungkum ma Samaria, laos diporang do i.

²Dung i disuru ma angka suruanna manopot si Ahab, raja sian Israel, tu bagasan huta i.

³Asa dohononna tu ibana: Songon on do hata ni si Benhadad: Perakmu dohot serem ahu do nampunasa, angka jolmami dohot anakkonmu angka na ummuli ahu do nampuna nasida.

⁴Dung i ninna raja ni Israel ma mangalusi: Songon na nidokmi do na tutu, ale rajanami, ho do nampuna ahu ro disude na di ahu.

⁵Dung i diulahi angka suruani ro muse, didok nasida ma: Songon on do hata ni si Benhadad: Nunga nian husuru suruanku mandok tu ho: Perakmu dohot serem dohot angka jolmam ro di anakkonmu ingkon tu ahu do i lehononmu.

⁶Antong marsogot songon on suruonku ma angka naposongku manopot ho, asa disungkapi nasida jabum dohot jabu ni angka naposom, jala nasa ugasan homitan ni roham, ingkon boanor nasida ma i di bagasan tanganna.

⁷Dung i dipaluhut raja sian Israel ma sude sintua ni tano i, didok ma: Ua tanda jala ida hamu, haurahonta do hape na niluluan nian, ai nunga disuru ibana suruanna mangido tu ahu angka jolmangku dohot anakkonku ro di perakku dohot serengku, jala ndang hujua mangalehon angka i tu ibana.

⁸Dung i sahata ma sude sintua dohot bangso i mandok tu ibana: Unang patangitangi hatahatana jala unang oloi.

⁹Dung i ninna rajai ma tu angka suruan ni si Benhadad: Dok hamu ma tu tuanku rajai: Saluhut naung nidok ni suruanmi parjolo tu ahu naposom, bahenonku do i, alai anggo hata on ndang haoloan ahu. Dung i laho ma angka suruani patolhas alusi tu tuanna.

¹⁰Dung i diulahi si Benhadad muse marsuru suruanna mandok tu ibana: Ingkon marlulu situtu angka debata tu ahu, molo tung

singkop orbuk ni Samaria manggohi tangan sandok bangso angka na mangihuthon tu ahu.

¹¹Dung i ninna raja ni Israel ma mangalusi, dok hamu ma tu rajai: Ndang jadi nian manenganenga halak na manandang podangna, hira songon halak naung mambahen sinjatana tu rompean.

¹²Jadi dung dibege raja Benhadad hata i, tongon ibana minum anggur rap dohot angka raja hinarana di bagasan undungundungna, didok ma tu angka naposona: Haliangi hamu ma huta i! Jadi dihaliangi nasida ma huta i.

¹³(II.) Dung i ida ma, ro ma sada panurirang mandapothon si Ahab, raja sian Israel, didok ma: Songon on do hata ni Jahowa: Atehe nunga diida ho musum na deakon? Ida ma, pasahatonku ma i sadarion tu bagasan tanganmu, asa tung ditanda ho Ahu do Jahowa.

¹⁴Dung i ninna si Ahab ma: Marhite sian ise do? Dung i ninna panurirang i ma: Songon on do hata ni Jahowa: Marhite sian angka naposo ni angka induk marluatluat. Dung i ninna rajai ma: Ise hami jumolo bingkas? Dung i ninna panurirang i ma: Ho do!

¹⁵Dung i dibilang rajai ma angka naposo ni angka induk i marluatluat, gabe dua ratus tolupulu dua halak toropna, dung salpu nasida, dibilang ma dohot sian sandok bangso i, i ma sude halak Israel, pitu ribu halak.

¹⁶Dung i ruar ma nasida di hos ni ari. Alai anggo si Benhadad lilian minum anggur sanga mabuk di bagasan undungundungna rap dohot na tolupulu dua raja, angka na hinarana i.

¹⁷Dung i ruar ma jumolo angka naposo ni angka induk i marluatluat. Jadi disuru si Benhadad ma suruanna, angka na mangalualuhon tu ibana mandok: Nunga adong ruar angka baoa sian Samaria.

¹⁸Dung i didok rajai ma: Manang na naeng mardemak nasida umbahen ruar, manang laho marporang, sai tangkupi hamu nasida songon i mangolu!

¹⁹Alai dung ruar angka nasida sian huta i, i ma angka naposo ni angka induk i marluatluat dohot angka parangan sian pudinasida.

²⁰Dibunu nasida be ma alona, gabe maporus halak Ram jala dieak halak Israel nasida; maporus dohot si Benhadad, raja sian Ram marsihundul di hoda rap dohot deba jolma parsihundulna.

²¹Jadi ruar ma dohot raja ni Israel, jala dibunu angka jolma parsihundul di hoda dohot hureta porang, gabe torop situtu marragean halak Ram dibahen.

²²Dung i ro ma panurirang i mandapothon raja ni Israel, didok ma tu ibana: Mulak ma ho, patorop ma jolo angka paranganmu, pingkiri ma jala ida manang aha na tama

sibehenonmu; ai dapot taon ulahan ni raja sian Ram ma nangkok mandopang ho.

²³Ai nunga didok angka naposo ni raja sian Ram hian mandok ibana: Debata pandingini di dolok do angka Debatanasida i, ala ni do umbahen talu hita dibahen nasida; alai molo maralo di adaran hita dohot nasida, sai na tunduk do nasida bahenonta.

²⁴Ala ni songon on ma bahen: Palaho ma angka rajai, ganup sian hajongjonganna be, jala bahen ma angka ulubalang singkatnasida.

²⁵Alai anggo papungu ma di ho parangan, suang songon torop ni parangan naung marragean sian ho, tole angka hoda dohot hureta songon toropna na jolo, asa taulahi marmusu dohot nasida di adaran, sai na tunduk do nasida bahenonta. Jadi dioloi rajai ma hatanasida i, jala dibahen songon i.

²⁶Jadi dung salpu na sataon i, dibilang si Benhadad ma halak Ram, jala nangkok ibana tu Apek laho marporang dompak Israel.

²⁷Dung i tarbilang ma dohot halak Israel jala diparbohali, asa mardalan manjumpangkon halak Ram; dung i marsaro ma halak Israel patondong dohot nasida, hira songon dua pungan haming; alai anggo halak Ram tung ditutup do tano i.

²⁸Dung i ro ma sada halak ni Debata mandapothon raja ni Israel, ninna ma mandok ibana: Songon on do hata ni Jahowa: Ala naung didok halak Ram, Debata

pandingini di angka dolok do Jahowa, ndada Debata pandingini di adaran, dibahen i nunga hupasahat tu tanganmu sandok jolma na deak on, asa tung ditanda hamu, Ahu do Jahowa.

²⁹Jadi marsaro ma nasida patondong be pola pitu ari lelengna. Tole papitu arihon turtar be ma nasida tongtang, gabe dibunu halak Israel ma saratus ribu halak Ram, angka na mardalan pat di bagasan sadari.

³⁰Jala angka na teba i maporus do tu bagasan huta Apek, gabe ditinggang parik ni huta i duapulu pitu ribu halak angka na teba i; maporus dohot si Benhadad masuk tu bagasan huta i, laho sian bilut na sada tu bilut na sadanari.

³¹(III.) Dung i ninna angka naposona i ma mandok ibana: Ida ma, nunga hubege hami barita ni angka raja ni halak Israel, raja parasi ni roha do nasida; dibahen i loas ma hami marabithon tangki dohot martalitalihon tangki ruar mandapothon raja ni Israel, anggiat tung pangoluonna hosam.

³²Dung i marabithon tangki ma nasida jala martalitalihon tangki laho mandapothon raja ni Israel, laos didok nasida ma: Hata ni naposom si Benhadad mandok: Ua pangolu ma hosanku! Jadi ninna rajai ma: Mangolu dope ibana hape? Antong anggingku ma ibana.

³³ Pintor disigop angka baoa i ma hatana i mangaithon tu nasida, angka didok ma: Anggim ma tutu si Benhadad! Dung i didok rajai ma: Laho ma hamu mamboan ibana tuson. Jadi ruar ma si Benhadad mandapothon rajai, laos didokkon rajai ibana manaek tu hureta.

³⁴ Dung i didok si Benhadad ma tu rajai: Huta angka na nirampas ni damang na jolo sian amanta, paulahonku ma tu ho, bahen huhut di ho angka jambur di Damaskus, songon na binahen ni damang nahinan di Samaria. Alai anggo ahu (ninna si Ahab), paluaonku ma ho marningot padan on. Jadi marpadan ma nasida na dua, diloas ma ibana laho.

³⁵ Dung i ro ma hata ni sada halak sian angka anak ni panurirang mandok tu donganna marhite sian hata ni Jahowa: Ua lombuti ma ahu! Hape manjua do baoa i mangalombuti ibana.

³⁶ Dung i didok panurirang i ma tu ibana: Ala na so tinangihonmi soara ni Jahowa, ida ma, molo laho ho annon sian lambungkon, soroon ni singa ma ho. Jadi dung laho ibana sian lambungna pajumpang ma ibana dohot singa na manoro ibana.

³⁷ Dung i jumpang panurirang i ma sada halak na asing, ninna ma: Ua lombuti ma ahu! Jadi dilombuti baoa i ma ibana, pola mabugang ibana dibahen.

³⁸Dung i laho ma panurirang i mangambat rajai di tongan dalan, jala dipatinda rupana marhite sian bulangbulang binahenna tu matana.

³⁹Jadi dung mamolus rajai, manganguhangguk ma ibana dompak rajai, ninna ma: Ruar do ahu naposomon sian tongatonga ni parporangan, gabe ida ma, ro sada halak na manimbil sian parporangan mamboan tu ahu sada halak, ninna ma: Ramoti baoa on! Molo tung mangangkat ibana, ingkon hosam singkat ni hosana; manang ingkon gararonmu perak satalenta.

⁴⁰Hape uju ringkot situtu ulaon ni naposomon, gabe ndang disi be ibana hudapot. Dung i ninna raja ni Israel ma tu ibana: Laos i ma uhum madabu tu ho, ho sandiri tahe paputushon.

⁴¹Dung i hapogan ma panurirang i mananggal bulang i sian matana, gabe ditanda raja ni Israel ma ibana, sada sian angka panurirang i do ibana hape.

⁴²Dung i ninna panurirang i ma mandok rajai: Songon on do hata ni Jahowa: Ala na pinaluam i sian tanganmu baoa naung harom hian hubahen, ingkon hosam singkat ni hosana, jala bangsom singkat ni bangsona.

⁴³Dung i laho ma mulak raja ni Israel tu jabuna, pola gusar jala muruk situtu ibana sahat tu Samaria.

21

¹(I.) Jadi dung salpu angka jamita ondeng, adong ma sada halak na margoar si Nabot sian Jisreel, marporlak anggur ibana di Jisreel, mardonokkon jabu ni si Ahab, raja di Samaria.

²Dung i ro ma hata ni si Ahab mandok tu si Nabot: Ua lehon tu ahu porlak anggurmi, asa gabe porlak hatubuan ni ingkau rata i di ahu, ala jonokna tu lambung ni jabungku; hulehon pe tu ho porlak anggur na dumenggan bahen singkatna, manang perak na saarga ni porlakmi, molo i lumehet di bagasan roham.

³Alai ninna si Nabot ma mandok si Ahab: Dao ma i sian ahu bahenon ni Jahowa, anggo tung lehononku tu ho tadingtadingan ni damang.

⁴Jadi mulak ma si Ahab tu bagasan jabuna, pola gusar jala marmurukmuruk ala hata ni si Nabot sian Jisreel tu ibana, songon on: Nandang olo ahu mangalehon tu ho tadingtadingan ni damang. Dung i dipapeak rajai ma ibana tu podomanna, jala dipahusor bohina dompak dorpi pola ndang olo ibana mangan sagusagu.

⁵Dung i ro ma si Izebel, jolmana i, manopot ibana huhut didok tu ibana: Ala ni aha umbahen tung marsakmarsak roham, jala ndang olo ho mangan sagusagu?

⁶Dung i didok ibana ma tu nasida: Nunga nian mangkatai ahu dohot si Nabot sian Jisreel, jala hudok tu ibana: Ua lehon di ahu porlak anggurmi tuhoronku, manang molo

lomoan roham asa hulehon tu ho sada porlak anggur na asing singkatna; alai ninna ibana do: Ndang olo ahu mangalehon tu ho porlak anggurhi.

⁷Dung i didok si Izebel jolmana i ma mandok ibana: Atehe mangkajongjongkon harajaon di Israel do ho nuaeng? Hehe ho, jala pangan sagusaguon, jala pir tondim! Ahu pe mangalehon tu ho porlak anggur ni si Nabot, halak Jisreel.

⁸Dung i dibahen ma angka surat marhitehite goar ni si Ahab jala disahap marhitehite sahapna, jala ditongoshon angka surat i tu angka sintua dohot tu halak na raja di bagasan hutana, angka dongan sahuta ni si Nabot tahe.

⁹Jala songon on do hata ni angka suratna i: Martingting ma hamu mandokkon saluhut halak marpuasa, jala dokkon hamu si Nabot hundul di julu on ni luhutan i!

¹⁰Pahundul hamu huhut dua halak parroha na so hasea, na jahat situtu paadopadop dohot ibana, asa manindingi nasida dompak ibana, dohononna ma: Nunga diinsahi ho Debata dohot raja. Dung i togihon hamu ibana tu ruar, laos dangguri hamu ibana dohot batu asa mate.

¹¹Jadi ro ma halak donganna sahuta, i ma angka sintua dohot halak na raja, angka na maringan di bagasan hutana i, dibahen nasida ma songon na nidokkon ni si Izebel

di bagasan surat angka na tinongosna i tu nasida.

¹²Martingting ma nasida mandokkon halak marpuasa, jala didokkon si Nabot hundul di julu on ni luhutan i.

¹³Dung i ro ma sidua halak parroha na jahat i, jala hundul nasida paadopadop dohot ibana, dung i manindangi ma halak parroha na jahat i dompak si Nabot di adopan ni bangso i, ninna ma: Nunga diinsahi si Nabot on Debata dohot rajai. Dung i ditogihon nasida ma ibana tu balian ni huta i, gabe didangguri ibana dohot batu laos mate.

¹⁴Dung i disuru nasida ma suruanna manopot si Izebel, mandok tu ibana: Nunga mate si Nabot didangguri dohot batu.

¹⁵Jadi dung dibege si Izebel naung mate si Nabot didangguri dohot batu, didok si Izebel ma tu si Ahab: Hehe ma ho, buat ma porlak anggur ni si Nabot, halak Jisreel, na jinouna i mangalehon tu ho tuhoronmu, ai ndang be mangolu si Nabot, nunga mate ibana.

¹⁶Jadi dung dibege si Ahab naung mate si Nabot, hehe ma ibana laho tuat tu porlak anggur ni si Nabot, halak Jisreel, asa soluhonna.

¹⁷(II.) Alai ro ma hata ni Jahowa tu si Elia halak Tisbi, ninna ma:

¹⁸Hehe ma ho jala tuat mandapothon si Ahab, raja ni Israel na marhabangsa di Samaria; ida ma, di bagasan porlak anggur

ni si Nabot do ibana nuaeng, ai nunga tuat ibana tusi asa soluhonna.

¹⁹Jala dohononmu ma tu ibana: Songon on do hata ni Jahowa: Nda nunga mambunujolma ho huhut mangalaum ugasan? Angkup ni dohononmu ma tu ibana: Songon on do hata ni Jahowa: Ia disi didilati angka biang mudar ni si Nabot, ingkon disi dilatan ni angka biang mudarmu!

²⁰Dung i ninna si Ahab ma mandok si Elia: Nunga leak tardapot ahu dibahen ho, ale musungku? Dung i ninna si Elia ma: Nunga dapot ahu ho tutu, ala naung digadishon ho dirim mangulahon sogo ni roha ni Jahowa.

²¹Ida ma, Ahu parohon jea tu ho, jala Ahu mangaripashon pinomparmu, mangaripashon sian Ahab nasa baoa, na bajar dohot na tang di Israel.

²²Jala Ahu mambahen pinomparmu, songon pinompar ni si Jerobeam, anak ni si Nebat dohot songon pinompar ni si Baesa, anak ni si Ahia, ala paminggilna pahehe murukku dohot ala nielana i halak Israel mambahen dosa.

²³Nang taringot tu si Izebel songon on do hata ni Jahowa: Ingkon suda panganon ni biang sogot si Izebel di lambung parik ni Jisreel.

²⁴Manang ise na mate sian si Ahab di bagasan huta, ingkon suda panganon ni biang, jala manang ise na mate di

ladang, ingkon suda parguton ni pidong na martongatonga langit.

²⁵Ndang dung adong antong jolma naung manggadishon dirina mangulahon sogo ni roha ni Jahowa, songon si Ahab, na pinajuju ni si Izebel jolmana i.

²⁶Tung na sogir situtu do parulaonna laho mangihuthon tu angka debata sileban, maniru sude na binahen ni halak Amori na jolo, angka naung pinabali ni Jahowa nian maradophon halak Israel.

²⁷Alai dung dibege si Ahab angka hata ondeng, gabe diribahi ma pangkeanna, jala disolukkon abit tangki tu dagingna huhut marpuasa ibana, jala modom marabit tangki, jala tungki mardalan.

²⁸Dung i ro ma hata ni Jahowa tu si Elia, halak Tisbi songon on:

²⁹Atehe nunga diida ho na pinaunduk ni si Ahab dirinai maradophon Ahu? Ala naung pinaundukna i dirina maradophon Ahu, ndang paroonku jea i saleleng mangolu ibana, di ngolu ni anakna pe paroonku jea tu pinomparna.

22¹(I.) Dung i marsonangsonang ma nasida tolu taon lelengna, demak hamusuon ni Ram tu Israel.

²Alai dapot patolutaonhon tuat ma si Josapat, raja sian Juda mandapothon raja sian Israel.

³Dung i didok raja sian Israel ma tu angka naposona: Atehe diboto hamu do hita nian nampuna Ramot di Gilead? Hape sai so do hita, ndada itarampas huta i sian tangan ni raja sian Ram?

⁴Dung i ninna rajai ma tu si Josapat: Atehe olo do ho haraonku laho marmusu dompak Ramot di Gilead? Dung i ninna si Josapat ma mandok raja sian Israel: Ia songon i ho, songon i do ahu, ia songon i bangsomi, songon i do bangsongki, ia songon i angka hodam, songon i do angka hodangku.

⁵Angkup ni ninna si Josapat tu raja sian Israel: Ua marsungkun ho jolo sadarion tu hata ni Jahowa.

⁶Jadi dipaluhut raja sian Israel ma angka panurirang, hirahira opat ratus halak toropna, jala didok do tu nasida: Atehe jadi do ahu laho tu Ramot di Gilead marporang, manang so jadi? Dung i ninna angka nasida ma: Jadi do ho nangkok, sai na pasahaton ni Tuhan i do nasida tu bagasan tangan ni rajai.

⁷Alai ro ma hata ni si Josapat: Atehe ndang adong be dison nanggo sada panurirang ni Jahowa, asa marsungkun tu ibana hita?

⁸Dung i ninna raja sian Israel ma tu si Josapat: Adong dope nian dison sada halak, tarsungkun hita do nian Jahowa marhite sian ibana, alai sogo do rohangku mida ibana, ai ndang dung adong na denggan nanggo sada disurirangkon ibana tu ahu, sai holan jea do,

i ma si Mika, anak ni si Jimla. Dung i ninna si Josapat ma: Unang nian songon i hata ni rajai!

⁹Dung i dijou raja sian Israel, ma sada halak siramoti bagasna, ninna ma: Hatop boan tuson si Mika, anak ni si Jimla!

¹⁰Alai raja sian Israel dohot si Josapat, raja sian Juda hundul ganup di habangsana be mamangke pangkean harajaon di partungkoan mardonokkon pintu harbangan ni Samaria, jala saluhut angka panurirang i manurirangi di jolonasida.

¹¹Nunga dibahen si Sedekia, anak ni si Kenaana hian di ibana angka tanduk bosi, huhut didok: Songon on do hata ni Jahowa: Ingkon marhite sian angka on tambingonmu halak Ram, paima sun siap nasida bahenonmu.

¹²Sude angka panurirang i laos songon i do disurirangkon, ninna do: Nangkok ma ho laho tu Ramot di Gilead, sai marantu do ho, jala pasahatan ni Jahowa do nasida tu bagasan tangan ni rajai.

¹³Ia suruan naung laho i manjou si Mika, mandok hian tu ibana songon on: Ida ma, sauduran do hatahata ni angka panurirang mandok na denggan tu rajai; dibahen i hatamu pe, sai songon hata ni sahalak sian nasida ma, sai hatahon ma na denggan.

¹⁴Alai ninna si Mika ma: Songon sintongna mangolu Jahowa, manang aha sipaboan ni Jahowa tu ahu, i do hatahononku!

¹⁵(II.) Jadi dung sahat ibana tu jolo ni rajai, ninna rajai ma mandok ibana: Atehe ale Mika, na jadi do hami laho tu Ramot di Gilead marporang, manang na so jadi? Dung i ninna ibana ma tu rajai: Jadi do ho nangkok, jala marantu ho, ai pasahaton ni Jahowa do nasida tu bagasan tangan ni rajai.

¹⁶Dung i diulahi rajai mandok tu ibana: Ingkon intap piga hali ho patolononku, paboan na so hatahononmu tu ahu, nda holan hasintongan marhite sian Goar ni Jahowa?

¹⁷Dung i ninna si Mika ma: Nunga hutatap hian sandok Israel marserak di atas ni angka dolok, songon birubiru na so adong na marmahan. Dung i ninna Jahowa ma: Nandang martuan angka ndian, mulak be ma ganup tu jabuna mardamedame!

¹⁸Dung i ro ma hata ni raja sian Israel tu si Josapat: Nda nunga hudok hian tu ho, ndang tagamon agia aha na denggan surirangkononna tu ahu, nda holan jea ho?

¹⁹Dung i ninna si Mika ma: Dibahen i tangihon ma hata ni Jahowa: Nunga hutatap hian Jahowa hundul di atas habangsana, jala sandok parangan ni banuaginjang tindang di lambungna, tungkan siamunna dohot tungkan hambirangna.

²⁰Dung i ninna Jahowa ma: Ise ulaning olo mangelaela si Ahab, asa nangkok ibana, jala tinggang mardonokkon Ramot di Gilead? Dung i masidok sian ibana be do nasida.

²¹Dung i ruar ma sada tondi panurirangon, laos jongjong tu adopan ni Jahowa, jala ninna ma: Ahu ma mangela ibana. Dung i ninna Jahowa ma tu ibana: Marhite sian aha do?

²²Dung i ninna ibana ma: Ruar ma ahu gabe tondi sipaotooto di bagasan pamangan ni saluhut angka panurirangna. Dung i ninna Jahowa ma: Saut ma ibana elaelaonmu, jala ingkon monang ho; antong ruar ma ho, jala ulahon ma songon i.

²³Nuaeng pe, ida ma, nunga dilehon Jahowa tondi sipaotooto tu bagasan pamangan ni saluhut panurirangmu on, jala nunga dilumbahon Jahowa ro jea tu ho.

²⁴Dung i ro ma jumonok si Sedekia, anak ni si Kenaana, dipastap ma hurum ni si Mika, huhut didok: Beha nimmu, hira naung munsat Tondi ni Jahowa sian ahu, mandok tu na sasada ho huroha?

²⁵Dung i ninna si Mika ma: Ida ma, sanga do i idaonmu di ari hapoporusmu sian bilut na sada tu bilut na sada laho martabuni nian.

²⁶Dung i didok raja sian Israel ma: Tangkup ma si Mika, jala boan ibana mulak tu si Amon, induk ni huta i dohot tu si Joas, anak ni rajai.

²⁷Jala dohononmu ma: Songon on do hata ni rajai: Bahen hamu ma bayo on tu hurungan

jala lehon hamu ibana mangan sagusagu
pardangolan dohot tapian pardangolan,
paima mulak ahu mardamedame.

²⁸Dung i ninna si Mika ma: Molo tung mulak
ho marsonangsonang, ndang tutu naung
marlumba Jahowa marhite sian ahu, pola
ninna muse dope: Tangihon ma hata i, hamu
ale angka bangso luhutna!

²⁹(III.) Dung i nangkok ma raja sian Israel
dohot si Josapat, raja sian Juda, tu Ramot di
Gilead.

³⁰Jadi ninna raja sian Israel ma tu si
Josapat: Patinda rupa ma anggo ahu ro tu
tongtangan, alai anggo ho laos pangke ma
pangkeanmu hian. Jadi patinda rupa ma
anggo raja sian Israel laho tu parporangan.

³¹Alai nunga martona hian raja sian Ram tu
angka induk panahatan ni huretana, tolupulu
dua halak toropna, songon on: Ndang jadi
hamu mardopur dampak halak na metmet
manang na magodang, nda holan dampak
raja sian Israel sasadasa.

³²Jadi dung diida angka induk panahatan ni
angka hureta ni si Josapat, ninna rohanasida
ma: Rupa ibana do raja sian Israel, gabe
ibana ditahopi nasida naeng porangonna, alai
manganguhi ma si Josapat.

³³Jadi dung diida angka induk panahatan
ni hureta, ndada ibana hape raja sian Israel,
sumurut ma nasida sian ibana.

³⁴Alai adong ma sada baoa na manintak siorna, ndang manang ise nian tinujuna, hape hona do raja sian Israel sian pardomuan ni baju partahanan i. Dung i ninna rajai ma tujolma sihosong huretana: Hosingkon ma huretai dohot tanganmu, jala togu ahu haruar sian tongtangan, ai nunga mabugang ahu.

³⁵Hape lam tu ragatna marporang di na sadari i, laos jongjong rajai di bagasan huretana ditungkol paadopadop dohot halak Ram, tole bodarina i mate ma ibana, jala mudar sian bugang ni rajai mabaor do tu pamurnangan ni huretai.

³⁶Dung i marhira mate mata ni ari ro ma soara tingting tu parsaroan i songon on: Mulak be ma ganup tu hutana dohot tu tanona be.

³⁷Jadi mate ma rajai, jala tarboan tu Samaria, jala ditanom halak do rajai di Samaria.

³⁸Hape andorang diburi halak huretai di lambung tobat Samaria ro angka biang mandilati mudarna, ro dohot angka boruboru sibabijalang maridi disi, hombar tu hata ni Jahowa naung nilumbahonna hian.

³⁹Jamita na tinggal i dope sian si Ahab dohot sude na binahenna dohot jabu sian gading pinaulina i, ro di sude huta angka na pinungkana i, nda tarsurat do i di bagasan buku jamita ni angka raja sian Israel?

⁴⁰Dung i monding ma si Ahab gabe top dohot angka ompuna, jala si Ahasia anakna i bangkit raja singkatna.

⁴¹(IV.) Ia si Josapat, anak ni si Asa, bangkit raja di Juda, paopattaonhon dung raja si Ahab di Israel.

⁴²Alai marumur tolupulu lima taon do si Josapat uju bangkit raja ibana, jala duapulu lima taon lelengna ibana mangarajai di Jerusalem. Ia goar ni inana, i ma si Azuba, boru ni si Silhi.

⁴³Dung i marparange ma rajai di sandok dalan ni si Asa, amana i, ndang manimbil ibana sian i, asa mangulahon na tigor di roha ni Jahowa.

⁴⁴Alai tahe ndang diloha anggo angka joro na di angka robean, sai mamele dohot manutungi daupa dope anggo situasi na torop i di atas ni angka tambak.

⁴⁵Dung i sai mardemak ma si Josapat tu raja sian Israel.

⁴⁶Jamita na tinggal i dope sian si Josapat dohot huaso angka na niulana ro di parporangonna, nda tarsurat do i di bagasan buku jamita ni angka raja sian Israel.

⁴⁷Nang pasipasi ni baoa angka na marjolmahon baoa angka na teba i, uju di ngolu ni si Asa amana i, disiaphon do sian tano i.

⁴⁸Ndang adong anggo raja ihutan di Edom uju i, wakil sambing mangarajai disi.

⁴⁹Dung i didokkon si Josapat ma paulihon angka kopal Tarsis, angka na marlayar tu Opir mangalap sere nian, alai ndang saut marlayar, ai marropuhan angka kopal i di Esion Geber.

⁵⁰Uju i ma didok si Ahasia, anak ni si Ahab tu si Josapat: Ua loas ma angka naposongku rap dohot angka naposom marlayar di angka kopal i; alai ndang olo be si Josapat.

⁵¹Dung i monding ma si Josapat, gabe top dohot angka ompuna, jala tartanom di lambung ni ompuna, di huta ni si Daud, ompuna i, gabe si Joram, anakna i bangkit raja singkatna.

⁵²(V.) Anggo si Ahasia, anak ni si Ahab, bangkit raja gumomgom Israel di Samaria, pasampulupitutaonhon dung raja si Josapat di Juda jala dirajai Israel dua taon lelengna.

⁵³Jala diulahon do sogo ni roha ni Jahowa, sai diihutihut do dalan ni amana dohot inana, diihutihut huhut dalan ni si Jerobeam, anak ni si Nebat, na mangela Israel mambahen dosa. (22-54) Dioloi ibana huhut Baal, jala marsomba tusi, asa pahehe muruk ni Jahowa, Debata ni Israel, sandok suang songon na binahen ni amana i.

2 Raja-raja

1 ¹ (I.) Jadi dung mate si Ahab, marbalik ma halak Moab sian Israel.

² Dung i madabu ma si Ahasia sian pandiloan ni bilutna parginjang di Samaria, pola hansit. Dung i disuru ma suruanna, ninna ma tu nasida: Laho ma hamu manungkunhon tu Baal Zebub, ajiajian di Ekron, manang na leak malum hilalaonku sian sahithon.

³ Alai nunga marboaboa hian suruan ni Jahowa tu si Elia, halak Tisbi: Borhat ma ho mangambat angka suruan ni raja sian Samaria, jala dok ma tu nasida: Tung na so adong be huroha Debata di Israel, umbahen laho hamu manungkunhon tu Baal Zebub, debata di Ekron?

⁴ Dibahen i songon on do hata ni Jahowa: Nandang jadi be ho morot sian podoman hapeahanmu nuaeng, ingkon mate na ma ho. Dung i laho ma si Elia.

⁵ Jadi dung mulak angka suruani tu rajai, ninna ibana ma tu nasida: Boasa tung mulak hamu?

⁶ Dung i didok nasida ma tu ibana: Ro do sahalak nangkok mangambat hami, didok ma tu hami: Laho ma hamu mulak tu raja, na marsuru hamu, dok hamu ma tu ibana: Songon on do hata ni Jahowa: Tung na so

adong be huroha Debata di halak Israel umbahen marsuru ho manungkunhon tu Baal Zebub, debata di Ekron? Dibahen i ndang jadi be ho morot sian podomanmon, ingkon mate na ma ho!

⁷ Dung i didok rajai ma tu nasida: Songon dia do rupa ni baoa i na ro nangkok mangambat hamu dohot paboahon angka hata i tu hamu?

⁸ Jadi ninna nasida ma tu rajai: Baoa na marsampesampe na marimbulu do ibana, jala hohos sian hulingkuling di gontingna. Dung i ninna rajai ma: Si Elia, halak Tisbi do i.

⁹ (II.) Dung i disuru rajai ma tu ibana sada partogi ni parangan manguluhon limapulu paranganna. Jadi dung nangkok ibana sahat tu lambungna, ida ma, tongon juguk ibana di punsu ni dolok i, gabe didok ma tu ibana: Ho ale halak ni Debata, didok rajai ingkon tuat ho!

¹⁰ Dung i ro ma alus ni si Elia mandok tu partogi ni parangan silimapulu halak i: Molo tutu halak ni Debata ahu, ingkon madabu ma api sian banua ginjang jala suda panganonna ho dohot paranganmu silimapulu halak i! Jadi madabu ma api sian banua ginjang, jala suda ibana dipangan dohot paranganna silimapulu i.

¹¹ Dung i diulahi rajai marsuru tu ibana sada partogi na asing rap dohot paranganna na limapulu i, didok ma tu ibana: Ho ale halak ni

Debata, songon on do hata ni rajai: Ingkon gira ho tuat!

¹²Dung i ro ma alus ni si Elia mandok tu nasida: Molo halak ni Debata ahu, ingkon madabu ma api sian banua ginjang jala suda panganonna ho dohot paranganmu silimapulu i. Jadi madabu ma api ni Debata sian banua ginjang, jala suda ibana dipangan dohot paranganna na limapulu i.

¹³Dung i diulahi rajai marsuru sada partogi patoluhalihon rap dohot paranganna limapulu halak. Jadi dung sahat tu ginjang partogi patoluhon i, marsinggang ma ibana di jolo ni si Elia huhut marsomba tu ibana, ninna ma mandok ibana: Ale halak ni Debata, sai diparhamaol roham ma hosangkon dohot hosa ni angka naposongkon na limapulu halak i!

¹⁴Ida ma, nunga madabu api sian banua ginjang, jala nunga suda dipangan na dua partogi parjolo i rap dohot paranganna na limapulu halak i, alai sai mararga ma anggo hosangkon di roham.

¹⁵(III.) Dung i ro ma hata ni suruan ni Jahowa tu si Elia: Tuat ma ho rap dohot ibana, unang pola mabiar ho mida ibana. Dung i borhat ma ibana jala tuat rap dohot partogi i mandapothon rajai.

¹⁶Dung i ninna si Elia ma mandok rajai: Songon on do hata ni Jahowa: Ala naung marsuru suruan ho manungkunhon tu Baal

Zebub, debata di Ekron, hira na so adong be huroha Debata di Israel na dapot sungkunon hatana, dibahen i ndang jadi be morot ho sian podomanmon, ingkon mate na ma ho.

¹⁷Jadi mate ma rajai, hombar tu hata ni Jahowa, naung nilumbahon ni si Elia hian; jadi bangkit raja ma anggina si Joram singkatna paduataonhon dung raja di Juda si Joram, anak ni si Josapat, ai ndang adong anakna.

¹⁸Jamita na tinggal i dope sian si Ahasia dohot na binahenna, nda tarsurat do i di bagasan buku jamita ni angka raja sian Israel?

2¹(I.) Dung i uju naeng alapon ni Jahowa si Elia tu banua ginjang marhite sian habahaba, mardalan ma si Elia rap dohot si Elia sian Gilgal.

²Dung i didok si Elia ma mandok si Elisa: Ua tinggal dison ma ho, ai nunga disuru Jahowa ahu laho tu Betel. Alai ninna si Elisa ma: Songon sintongna mangolu Jahowa, mangolu dohot hosam, na so tupa tadingkononku ho! Jadi rap tuat ma nasida tu Betel.

³Dung i ruar ma sisean ni panurirang, angka na di Betel, mandapothon si Elisa, didok nasida ma tu ibana: Atehe diboto ho do na naeng boanon ni Jahowa tuanmu sadarion sian lambungmu? Dung i ninna ibana ma: Ahu pe nunga huboto, sip ma hamu!

⁴Dung i ninna si Elia muse tu ibana: Ua tinggal dison ma ho, ale Elisa, ai nunga disuru

Jahowa ahu tu Jeriko. Alai ninna si Elisa ma: Songon sintongna mangolu Jahowa, mangolu dohot hosam, na so tupa tadingkononku ho! Jadi rap sahat ma nasida tu Jeriko.

⁵Dung i ro ma sisean ni panurirang, angka na di Jeriko mandapothon si Elisa, ninna nasida ma tu ibana: Atehe diboto ho do na naeng boanon ni Jahowa tuanmu sadarion sian lambungmu? Dung i ninna ibana ma: Ahu pe nunga huboto, sip ma hamu!

⁶Dung i ninna si Elia muse tu ibana: Ua tinggal dison ma ho, ai nunga disuru Jahowa ahu tu Jordan. Alai ninna si Elisa ma: Songon sintongna mangolu Jahowa, mangolu dohot hosam, na so tupa tadingkononku ho! Jadi rap mardalan ma nasida na dua.

⁷Alai limapulu halak sian angka sisean ni panurirang mardalani huhut jongjong mandaodao, na dua panurirang i pe jongjong do di topi ni Jordan.

⁸Dung i dibuat si Elia ma sampesampena, disorpi ma i jala dilibashon tu aek, jadi tolak ma i tu jae tu julu, laos ditaripari nasida na dua ma i mardalan di na mahiang.

⁹Jadi dung taripar nasida, ninna si Elia ma tu si Elisa: Haru pangido ma sian ahu manang aha lomo ni roham bahenonku tu ho, tagan so ro dope na mangalap ahu sian lambungmu. Dung i ninna si Elisa ma: Ingkon silompit dua nian sian tondim songgop tu ahu!

¹⁰Dung i ninna si Elia ma: Na dokdok situtu do nian pinangidomi; alai molo diida ho ahu tarboan sian lambungmu, sai na songgop do songon i tu ho; alai molo so idaonmu, ndang songgop.

¹¹Jadi andorang mardalan dope nasida huhut mangkatai, ida ma, ro ma sada hureta api dohot angka hoda api manirang nasida na dua, manaek tu banua ginjang ma ia si Elia marhite sian habahaba.

¹²Alai dung diida si Elisa songon i, joujou ma ibana: O damang, damang! Hureta ni Israel dohot angka jolma parsihundulna do ho! Dung i ndang be diida ibana. Laos dibuat ma ulosna jala diribahi bola dua.

¹³Dung i dijomput ma sampesampe ni si Elia na madekdeki sian ibana, laos mulak ibana, jongjong suang tu topi ni aek Jordan.

¹⁴Dung i dibuat ma sampesampe ni si Elia na madekdehi sian ibana jala dilibashon tu aek, ninna ma: Didia do nuaeng Jahowa, Debata ni si Elia, ibana tahe? Jadi dung dilibas ibana aek i tolak ma i tu jae tu julu, laos taripar ma si Elisa.

¹⁵(II.) Jadi dung diida sisean ni panurirang angka na di Jeriko ibana sian bariba i, ninna nasida ma: Nunga songgop hape tondi ni si Elia tu si Elisa, dung i ro ma nasida manomunomu ibana, laos manungkap tu tano marsomba ibana.

¹⁶Dung i ninna nasida ma tu si Elisa: Ida ma, adong do dongan ni angka naposomon limapulu halak angka na bontis, ua tasuru ma angka nasida laho mangalului tuanmu, atek tung diboan Tondi ni Jahowa ibana, jala didekdekkon ibana muse tu atas sada dolok manang tu sada rura. Alai ninna si Elisa ma: Unang suru hamu nasida.

¹⁷Alai sai disosoi nasida do ibana maradu maila ibana, laos didok ma: Antong suru hamu tusi. Jadi disuru nasida ma limapulu halak angka na mangalului ibana tolu ari lelengna, alai ndang jumpang nasida ibana.

¹⁸Dung i mulak ma nasida tu si Elisa, ai tinggal di Jeriko dope ibana; jadi didok ibana ma tu nasida: Nda nunga hudok hian tu hamu, unang hamu laho?

¹⁹(III.) Dung i ninna angka baoa isi ni huta i ma tu si Elisa: Ida ma, denggan do nian inganan di huta on, songon na niida ni tuanku; alai na paet, asom do anggo tapian, jala mareme na bibi isi ni tano i dibahen.

²⁰Dung i ninna si Elisa ma: Boan hamu tu ahu sada saoan na imbaru, jala bahen hamu sira tusi. Jadi diboan nasida ma saoan i tu ibana.

²¹Dung i ruar ma si Elisa manopot mual i, jala diusehon sira i tusi, huhut didok: Songon on do hata ni Jahowa: Nunga denggan tarinum aek on hubahen, ndang jadi be

horhononna hamatean manang na mareme na bibi!

²²Jadi denggan ma aek i tarinum rasirasa sadarion, hombar tu hata na nidok ni si Elisa.

²³Dung i nangkok ma si Elisa sian i laho tu Betel, jadi di dalam laho nangkok tu huta i ibana, ruar ma sian huta i angka dakdanak mangarehe ibana, angka didok ma: Manaek ma ho, ale palpal ulu! Manaek ma ho, ale palpal ulu!

²⁴Dung i humusor ma si Elisa; jadi dung diida nasida, diburai ma nasida marhite sian Goar ni Jahowa. Dung i ruar ma dua gompul sian harangan, disoroi ma sian nasida opatpulu dua halak dakdanak.

²⁵Dung i laho ma ibana sian i tu dolok Karmel, jala mulak sian i tu Samaria.

3¹ (I.) Ia si Joram, anak ni si Ahab bangkit raja gumomgom Israel di Samaria pasampuluualutaonhon dung raja si Josapat di Juda, jala sampulu dua taon lelengna ibana mangarajai.

²Jala diulahon do sogo ni roha ni Jahowa, alai ndada songon amana dohot inana; ai dipadao do ganaganaan Baal, na pinauli ni amana nahinan.

³Alai atik pe songon i marsilohot do rohana mangihutihut dosa ni si Jerobeam, anak ni si Nebat, na mangela Israel mambahen dosa, ndang sumurut ibana anggo sian i.

⁴Alai anggo si Mesa, raja sian Moab, halak pardorbia godang do ibana, jala digarar sohe tu raja sian Israel, i ma imbulu ni saratus ribu anak ni birubiru dohot imbulu ni saratus ribu birubiru tunggal.

⁵Alai dung mate si Ahab, marbalik ma raja ni halak Moab sian raja ni Israel.

⁶Ala ni ruar ma uju i raja Joram sian Samaria, laho mamilangi sandok halak Israel.

⁷Dung i disuru rajai ma suruanna manopot si Josapat, raja sian Juda, mandok tu ibana: Nunga marbalik raja ni halak Moab sian ahu; atehe olo do ho haraonku laho marmusu dompak Moab? Dung i ninna ibana ma: Ro pe ahu nangkok, ia songon i ho, songon i do ahu, ia songon i bangsomi, songon i do bangsongki, ia songon i angka hodam, songon i do angka hodangku.

⁸Dung i ninna si Joram ma: Sian dalan dia do hita nangkok tusi? Sian dalan na di halongonan Edom do, ninna si Josapat.

⁹Jadi mardalan ma raja sian Israel dohot raja sian Juda dohot raja sian Edom. Jadi dung pitu ari lelengna nasida mangaliat, hurangan aek ma angka parangan i ro di pinahan na mangihut tu nasida.

¹⁰Dung i ninna raja sian Israel ma: Iale suang! Nunga dipapungu Jahowa hape na tolu raja on laho pasahathon nasida tu bagasan tangan ni Moab!

¹¹ Alai ninna si Josapat ma: Atehe, ndang adong dison panurirang ni Jahowa, asa marsungkun tu Jahowa hita marhite sian ibana? Jadi ro ma alus ni sahalak sian angka naposo ni raja di Israel, ninna ma: Dison do si Elisa, anak ni si Sapat, na mangusehon na jolo aek pamuri tu tangan ni si Elia.

¹² Dung i ninna si Josapat ma: Sintong do hata ni Jahowa di ibana. Jadi rap tuat ma manopot ibana raja sian Israel dohot si Josapat dohot raja sian Edom.

¹³ (II.) Alai ninna si Elisa ma tu raja sian Israel: Aha ma parsoranku tu ho? Laho ma ho manopot angka panurirang ni amangmu dohot inangmu! Alai ninna raja sian Israel ma tu ibana: Unang songon i! Ai nunga pola dipapungu Jahowa na tolu raja on laho pasahathon nasida tu bagasan tangan ni Moab.

¹⁴ Dung i ninna si Elisa ma: Songon sintongna mangolu Jahowa Zebaot, jala ahu jongjong marhalado di jolona, aut unang marpanatap ahu mida bohi ni si Josapat, raja sian Juda, ndang tagamon tataponku manang berengonku anggo ho!

¹⁵ On pe, boan hamu ma tu ahu sada jolma na pande mamiltik hasapi! Jadi andorang mamiltik tali ni hasapi jolma pamiltik i, songgop ma tangan ni Jahowa tu atasna!

¹⁶Jadi didok ma: Songon on do hata ni Jahowa: Hali hamu ma di rura on angka bondar marbarisbaris.

¹⁷Ai songon on do hata ni Jahowa: Ndang idaonmuna ro alogo manang udan, hape ingkon gok aek rura on, asa minum hamu ro di pinahanmuna dohot angka hodamuna parhuli.

¹⁸Jala maotikku dope anggo i di roha ni Jahowa, pasahatonna nang halak Moab tu bagasan tanganmuna i.

¹⁹Tunduk do bahenonmuna saluhut huta na gonting dohot saluhut huta angka na pinillit, jala tabaonmuna do saluhut hau angka na marparbue jala polpolonmuna ma saluhut mual jala tarulang ma bahenonmuna sandok hauma angka na dumenggan marhite sian batu.

²⁰Tole manogotna i jumpang tingki pamelehon di pelean sipanganon, ida ma, marroan aek sian dalan laho tu Edom, mangalantap tano i dohot aek.

²¹(III.) Alai dung dibege sandok halak Moab barita i naung nangkok angka rajai laho marporang dompak nasida, santi balatuk ma nasida saluhutna ro di jolma sandangan podang balgana dohot na tumua sian i, jala patutur nasida jongjong di partalpahan.

²²Jadi dung dipasogot nasida manogotna i hehe jala binsar mata ni ari marsinondang tu

aek i, jadi marrara ma aek i songon mudar, diida halak Moab di jolona.

²³Laos didok nasida ma: Mudar do i! Nunga rupa masilengsean angka rajai laos masibunuan sama nasida. On pe, hamu ale halak Moab tahopi hamu ma tabantaban i.

²⁴Hape dung sahat nasida tu parsaroan ni halak Israel, hehe ma halak Israel i jala ditaluhon halak Moab, gabe maporus maradophon nasida; laos disoluk halak Israel ma tanona, jala marragean halak Moab dibahen.

²⁵Dung i dipanepnep nasida ma angka huta i, jala ganup sian nasida mandanggurhon batu sada be tu saluhut hauma tano bosar, gabe gok batu do i, jala dipolpol saluhut mual, jala ditaba saluhut hau angka na marparbue, holan di huta Kir Hareset tinggal angka batu; ro muse angkajolma pangambalang mangkaliangi huta jala dibunui angka pangisina.

²⁶Alai dung diida raja sian Moab, ndang leak manahan ibana di parporangan i, di arahon ma pitu ratus halak angka parpodang sintak bahen donganna naeng martahop dompak raja sian Edom, hape ndang tolapsa.

²⁷Jadi dibuat ma anak buhabajuna na bangkit raja hian singkatna, jala dipelehon ibana bahen pelean situtungon di atas parik. Jadi parohon parpiarpiar ni muruk godang do

i tu Israel, gabe sumurut nasida sian ibana jala mulak be tu tanona.

4¹ (I.) Dung i ro ma sada parompuan sian angka jolma ni angka sisean ni panurirang mangalualu tu si Elisa, ninna ma: Nunga mate anggo naposom sinondukki, jala diboto ho do na marhabiaran do naposom tu Jahowa. Hape ro nuaeng sahalak parutangan naeng mamboan anakku na dua i bahen naposona.

²Dung i ninna si Elisa ma tu nasida: Aha do sibahenonku tu ho? Paboa di ahu manang aha na pineopmu di bagasan jabum? Dung i ninna nasida ma: Sandok na so adong do dipeop naposom boruboru di bagasan jabuna, nda holan sada guriguri marisi miak.

³Dung i ninna si Elisa ma: Laho ma ho tu balian manginjam hudon angka na rumar sian hombar bagasmu, jala unang maotikku.

⁴Dung i masuk ma ho tu jabum rap dohot anakmu jala hinsu i pintu i sian pudimuna jala usehon ma miak i tu bagasan saluhut angka hudon on, ia dung gok sadasada bahen tu lambung.

⁵Dung i laho ma parompuan i sian lambungna, jala dihinsu pintu i sian pudina dohot sian pudi ni anakna na dua i, angka na manarehon hudon i tu ibana sadasada, jadi parompuan i ma mangusehon.

⁶Jadi dung gok angka hudon i, ninna ma mandok anakna: Haru lehon tu ahu hudon i sadanari! Alai ninna anakna i ma mandok

inana: Nandang adong be hudon nanggo sada.

Jadi montok ma miak i.

⁷Dung i laho ma parompuan i paboahon hata i tu halak ni Debata. Jadi didok ibana ma: Laho ma ho, gadisi ma miak i jala garar utangmi; na lobi i ma bahen hangoluanmu dohot hangoluan ni angka anakmu.

⁸(II.) Dung i di na sada ari laho ma si Elisa taripar tu huta Sunem; adong ma disi sada parompuan na mora na mangarahon ibana mangan sagusagu. Manang piga hali dibolus ibana huta i, sai tuli do ibana tu parompuan i laho mangan sagusagu.

⁹Dung i ro ma hata ni parompuan i tu sinondukna: Ida ma, nunga tangkas hutanda halak ni Debata na badia do ibana na tongtong tuli tu hita.

¹⁰Ua itabahren ma di ibana sada bilut na metmet di ginjang mardorpi papan, tapamasuk huhut tusi sada podoman dohot sada hundulan dohot sada palito, asa ia tuli ibana sian hita maringan tusi ibana.

¹¹Dung i di na sadari ro muse ibana tusi, laos maringan tu bilut parginjang i jala modom disi.

¹²Dung i didok ma mandok si Gehasi naposona i: Jou ma ne parompuan sian Sunem i. Jadi dung dijou jongjong ma nasida di adopanna.

¹³Nunga adong hian hata ni si Elisa tu naposona: Ua paboa ma tu nasida, ida ma,

nunga na sai godang denggan ni uhummu pasarisari hami, aha do ulaning tarbahen ahu balos ni tu ho? Adong do hata siondihononhon di ho tu rajai manang tu partogi ni angka parangan? Jadi ninna nasida ma: Maringan di tongatonga ni bangsongku do ahu.

¹⁴Dung i ninna ibana ma: Antong aha do tama bahenon tu nasida? Jadi ninna si Gehasi ma: Ndang adong anakna, jala nunga matua ia sinondukna.

¹⁵Jadi ninna si Elisa ma: Haru jou ma nasida! Jadi dung dijou, ro ma nasida jongjong di pintu i.

¹⁶Dung i didok si Elisa ma: Suang songon on taon i adong ma anakmu sipahedokhedohonmu. Dung i ninna parompuan i ma: Unang, ale tuan halak ni Debata, unang tutu gabusi naposom boruboru.

¹⁷Dung i gabegabean ma parompuan i jala ditubuhon sada anak tongon boho sataon, songon naung nidok ni si Elisa hian tu nasida.

¹⁸(III.) Alai dung magodang dakdanak i, ruar ma ibana di na sadari mandapothon amana tu panggotilan.

¹⁹Dung i didok ma mandok amana i: Ulungku, ulungku hansitnai! Dung i didok amana i ma tu sahalak naposo: Boan ma ibana tu inana.

²⁰Jadi diompa ma ibana mamboan tu inana, jadi hundul ma dakdanak i di ampuanna sahat ro di hos ni ari, laos mate ibana.

²¹Dung i manaek ma parompuan i tu ginjang, diampehon ma anakna i tu podoman ni halak ni Debata, laos dihinsu pintu i sian pudina laho tu ruar.

²²Dung i dijou ma sinondukna, ninna ma: Ua suru tu ahu sahalak sian angka naposo i angkup ni sada halode boruboru naeng hatop ahu laho manopot halak ni Debata, dung i mulak ahu.

²³Dung i ninna sinondukna i ma: Boasa naeng laho ho sadarion manopot ibana, so manang poltak ni bulan manang ari Sabbat sadarion? Alai ninna nasida ma: Pasonang ma roham disi!

²⁴Dung i dipalanoi nasida ma halode boruboru i huhut didok mandok naposona i: Haru hudus ma mardalan, unang sulonsulonon ahu marsihundul, nda ahu mandok tu ho.

²⁵Jadi mardalan ma nasida jala sahat tu halak ni Debata di atas dolok Karmel. Jadi dung ditatap halak ni Debata nasida ro mandapothon ibana, ninna ma tu si Gehasi naposona i: Ida ma ndian, nunga ro parompuan sian Sunem!

²⁶On pe, ua marlojong ma ho manjumpangkon nasida, jala dok ma tu nasida: Atehe sonang do ho? Sonang dohot

sinondukmu? Sonang dohot anakmi? Jadi
ninna nasida ma: Sonang do!

²⁷Alai dung sahat nasida tu halak ni Debata
di atas dolok i, dihaol ma patna; alai ro ma
si Gehasi jumonok naeng onjaronna nasida.
Alai ninna halak ni Debata ma: Pasombu
ma nasida, ai na marsak situtu do rohana
jala diporso Jahowa do i sian ahu, ndang
marboaboa Ibana tu ahu.

²⁸Dung i ninna parompuan i ma: Atehe,
nandigan dung hupangido sada anak sian
tuanku? Nda hudok hian do: Unang ahu
paotooto?

²⁹Dung i ninna si Elisa ma tu si Gehasi:
Hohos i ma gontingmu jala tiop ma tungkothu
di bagasan tanganmu, laho ma ho tusi! Molo
tung pajumpang ho dohot halak unang tabe
ibana, jala molo ditabi halak ho, unang alusi
ibana, jala ampehon ma tungkothu tu atas
bohi ni dakdanak i.

³⁰Alai ninna ina ni dakdanak i ma: Songon
sintongna mangolu Jahowa, mangolu dohot
hosam, ndang tagamon tadingkononku ho
Jadi borhat ma si Elisa mangihuthon nasida.

³¹Alai di joloan i si Gehasi ma nasida na dua
mardalan, jala diampehon tungkot i tu atas
bohi ni dakdanak i; alai ndang adong soara
manang pananginangion. Dung i mulak ma
ibana manjumpangkon si Elisa jala dipaboa tu
ibana, ninna ma: Nandang olo ngot dakdanak i.

³² Jadi dung masuk si Elisa tu jabu i, ida ma, peak do dakdanak i mate di atas podomanna.

³³ Dung i masuk ma ibana jala dihinsu pintu i sian pudi ni nasida na dua, dung i martangiang ma ibana tu Jahowa.

³⁴ Dung i manaek ma si Elisa jala dipabustang ibana tu atas ni dakdanak i, diampehon pamanganna tu atas pamangan ni dakdanak i, matana tu atas matana, jala tanganna tu atas tanganna, jala manungkap songon i tu atasna, asa diangor bangke ni dakdanak i.

³⁵ Dung i hehe ibana muse huhut mardalandalan di jabu i mulakulak, dung i manaek ibana muse jala dipatungkap ibana tu atasna. Jadi barsibarsion ma dakdanak i pola pitu hali, dung i dipabidok ma matana.

³⁶ Dung i dijou si Elisa ma si Gehasi, ninna ma: Haru jou ma ne parompuan sian Sunem i. Jadi dung dijou ro ma nasida manopot ibana, gabe didok si Elisa ma: Na, buat ma anakmon!

³⁷ Jadi ro ma nasida manungkap tu patna marsomba pola dais tu tano; dung i dibuat ma anakna laos ruar.

³⁸ (IV.) Dung i mulak ma si Elisa muse tu Gilgal; alai tongon masa haleon potir di luat i, jala hundulhundul angka sisean ni panurirang di adopanna. Dung i ninna ibana ma tu naposona: Hodohon hudon na bolon i tu api jala lomuk ingkau di angka sisean ni panurirang.

³⁹Dung i ruar ma sahalak tu ladang naeng mansalong ingkau rata, gabe jumpangsa ma andor ni ansimun harangan, jala diputikken sian i angka ansimun harangan gok ulosna; jadi dung mulak ibana diirisi ma i tu bagasan hudon pangalomuhan, ai ndang ditanda nasida na so sipanganon do i.

⁴⁰Dung i disonduhi nasida ma i panganon ni angka baoa i; jadi dung dipangan nasida sian ingkau na nilomuk i, manganguhi ma nasida, ninna ma: Hamatean do hape di bagasan hudon on, ale halak ni Debata! Laos so tarpangan nasida do i.

⁴¹Alai ninna si Elisa ma: Boan tuson itak! Jadi disirsirhon ma i tu bagasan hudon i laos ninna ma: Usehon ma i nuaeng di situan na toropon, asa mangan nasida. Jadi ndang adong be tau parmaraan di bagasan hudon i.

⁴²(V.) Dung i ro ma sada halak sian Baal-Salisa na mamboan di halak ni Debata angka sagusagu patumonaan duapulu sagusagu sian eme siansimun dohot itak sian dahanon na binolgang di bagasan hadanghadanganna. Dung i ninna si Elisa ma: Lehon ma i di situan na torop i asa mangan nasida.

⁴³Dung i ninna naposona i ma: Beha ma pangalehonku mangganupi saratus halak? Alai ninna si Elisa ma: Sai lehon ma i di situan na torop i, asa mangan nasida; ai songon on do hata ni Jahowa: Ingkon mangan angka jolma i jala ingkon adong dope teba.

⁴⁴Dung i diparade ma i di jolonasida, gabe mangan nasida, jala adong dope teba, hombar tu hata ni Jahowa.

5¹(I.) Ia si Naaman, partogi ni parangan ni raja sian Ram, jolma na sangap do ibana di adopan ni tuanna jala marmulia situtu; ai marhite sian ibana ditumpakkon Jahowa hamonangan tu halak Ram, jala ulubalang na tarbarita do ibana, alai puruon.

²Dung i borhat sahali halak Ram marrongkanrongkan marbajoi gabe diboan nasida ma sian tano Israel sada boruboru na metmet, dibahen ma i gabe sisuruon ni jolma ni si Naaman.

³Dung i ro ma hatana tu soranganna: Aut ni di adopan ni panurirang na di Samaria tuanki, sai na paluaonna do ibana sian puruna i.

⁴Dung i ro ma si Naaman pabotohon barita i tu tuanna, ninna ma: Songon on, songon on hata ni boruboru na sian tano Israel i.

⁵Jadi ninna raja sian Ram ma: Antong borhat ma ho, hutongos pe sada surat tu raja sian Israel. Dung i borhat ma ibana diboan huhut sampulu talenta perak dohot onom ribu sekkel sere dohot sampulu salinan pangkean na marhadohoan.

⁶Dung i dipasahat ma surat i tu raja sian Israel, songon on do hatana: Molo sahat suraton tu ho, ida ma, naung husuru do manopot ho naposongku si Naaman, asa paluaonmu ibana sian puruna.

⁷ Jadi dung dijaha raja sian Israel surat i, diribahi ma pangkeanna huhut didok: Tung Debata ma ahu, tarbahen ahu mambunu dohot pangoluhon jolma, umbahen marsuru rajai tu ahu paluahon baoa i sian puruna? Dibahen i ua tanda jala ida hamu ma, na masisindir do ibana tu ahu.

⁸(II.) Alai dung dibege si Elisa, halak ni Debata, naung diribahi raja sian Israel pangkeanna, disuru ma suruanna tu rajai mandok tu ibana: Boasa tung pola ribahanmu pangkeanmu? Ua ro nian ibana tu ahu, asa tung diboto, na adong do sada panurirang di Israel.

⁹ Jadi ro ma si Naaman mardongan hodana dohot huretana, laos mangulon di jolo pintu ni jabu ni si Elisa.

¹⁰ Dung i disuru si Elisa ma suruanna mandok tu ibana: Laho ma ho maridi pitu hali di bagasan Jordan, gabe sumuang ma sibukmu hian tu ho, jala ias.

¹¹ Jadi tarrimas situtu ma si Naaman mangaruntus mardalan huhut didok: Ida ma, na hurimpu do ruar ibana mandapothon ahu jala jongjong huhut manjoujou Goar ni Jahowa, Debatana, huhut jamahononna tanganna tu sahiti laho paluahon ahu sian puru i.

¹² Nda dumenggan do sunge Abana dohot Parpar, angka na di Damaskus sian saluhut aek di Israel? Ndang tarbahen ahu huroha

maridi disi asa malum hilalaonku? Jadi marsiulak ma ibana mangaruntus mardalan piription situtu.

¹³Dung i ro ma jumonok angka naposona, didok ma mandok ibana: Ale amang, tung sura hata na dokdok didokkon panurirang i patupaonmu, nda patupaonmu do i? Lam nuaeng ma dung didok tu ho: Maridi ma ho, asa ias!

¹⁴Jadi tuat ma ibana jala mangungkor di bagasan Jordan pitu hali, hombar tu hata ni halak ni Debata, jadi sumuang ma sibukna, songon sibuk ni sada dakdanak, gabe ias ma.

¹⁵(III.) Dung i mulak ma ibana tu halak ni Debata, ibana rap dohot sandok paranganna, dung sahat, jongjong ma ibana di adopanna, ninna ma: Ida ma, nuaeng pe asa huboto na so adong Debata di sandok tano on, dungkon ni di Israel. On pe, ua jalo ma sada silehonlehon sian naposomon.

¹⁶Alai ninna si Elisa ma: Songon sintongna mangolu Jahowa jala ahu jongjong marhalado di jolona, na so tupa jaloonku anggo i. Dung i sai disosoi nian ibana, asa jaloonna, alai sai manjua do ibana.

¹⁷Dung i ninna si Naaman ma: Molo so jadi hape, ua laos ma lehonon tu naposomon tano sorat dua hoda na marsahe mangusung! Ai ndang olo be naposomon mamelehon pelean situtungon manang sipotongon tu angka debata sileban, nda holan tu Jahowa.

¹⁸Holan taringot tu hata on, sai marpamuati ma roha ni Jahowa mida naposomon: Molo masuk tuanku tu bagasan joro ni Rimmon laho marsomba tusi jala martungkolhon botohonku ibana laos marsinggang dohot ahu di bagasan joro ni Rimmon, sai marpamuati ma roha ni Jahowa mida naposomon taringot tu na marsinggang i ahu.

¹⁹Dung i ninna si Elisa ma tu ibana: Laho ma ho mardamedame. Jadi dung mardalan ibana sian lambungna arga sapaal daona.

²⁰(IV.) Ninna roha ni si Gehasi, naposo ni si Elisa, halak ni Debatai ma: Ida ma, nunga diolani tuanku si Naaman halak Ram i, ndang adong dijalo sian tanganna manang aha naung binoanna i nian; songon sintongna mangolu Jahowa hueaki na ma ibana, asa hujalo sian ibana manang aha.

²¹Jadi dieahi si Gehasi i ma si Naaman; jadi dung diida si Naaman, ibana do hape na nieahanna, manimbung ma ibana sian huretana manjumpangkon ibana huhut didok: Beha sonang do?

²²Jadi ninna ibana ma mangajuk: Sonang do! Na disuru tuanku do ahu mandok tu ho: Ida ma, apala ipe ro mangalualu tu ahu dua dolidoli sian angka sisean ni panurirang, sian dolok Epraim, ua lehon ma tu nasida sapikkul perak dohot dua salin pangkean na marhadohoan.

²³ Dung i ninna si Naaman ma: Molo lomo roham, jalo ma dua talenta; pola disosoi ibana jala ditimpus dua talenta perak di bagasan dua puro dohot dua salin pangkean na marhadohoan, jala dipasahat tu naposona dua halak, asa diusung di jolona.

²⁴ Jadi dung sahat si Gehasi tu robean ni dolok i, dibuat ma barang i sian tangannasida jala dipajop di bagasan sada jabu, dipamuli ma anggo angka baoa i, gabe laho ma nasida.

²⁵ Dung i ro ibana muse laos jongjong di adopan ni tuanna. Jadi ninna si Elisa ma mandok ibana: Sian dia do ho, ale Gehasi? Jadi ninna ibana ma: Ndang manang sian dia naposomon mardalan.

²⁶ Alai ninna si Elisa ma mandok ibana: Nda mardalani rohangku rap dohot ho uju mijur baoa i sian huretana mulak manjumpangkon ho? Tung tingki panjaloan perak do i huroha di roham, manang manjalo pangkean manang hau jetun dohot porlak anggur, manang birubiru dohot lembu, manang naposo baoa dohot boruboru?

²⁷ Dibahen i anggo puru ni si Naaman, ingkon lohok di ho ma ro di pinomparmu salelenglelengna. Dung i ruar ma si Gehasi sian adopanna, pintor mamontar ma puru i songon hapur.

6¹ (I.) Dung i ro ma hata ni angka sisean ni panurirang mandok tu si Elisa: Ua ida ma,

ianggo inganan hundulannami di adopanmi,
nunga masompithu di hami.

²Ua loas ma hami laho tu Jordan manoktok
tiang sada be, asa hupauli hami disi sada
inganen bahen hundulannami di adopanmu.
Dung i ninna ibana ma: Antong laho ma
hamu.

³Dung i ro ma hata ni na sahalak: Ua
dohot ma tuani mardalan rap dohot angka
naposomon. Jadi ninna ibana ma: Dohot pe
ahu.

⁴Jadi mardalan ma ibana rap dohot nasida.
Jadi dung sahat nasida tu Jordan, ditoktok
nasida ma angka hau.

⁵Jadi uju manaba hau na bolon na sahalak
pinsir ma mata ni tangke tu aek, gabe
manganguhi ibana ninna ma: Lale tuan
niinjam do i!

⁶Alai ninna halak ni Debata ma: Tudia
do i madekdek? Jadi dung dipatuduhon
hadekdekanna, dihorot ibana ma sada hau
jala ditimpalhon tusi, gabe mumbang bosi i.

⁷Dung i ninna ma: Jomput ma i di ho! Jadi
disurdukkon ma tanganna laho manjomput.

⁸(II.) Dung i marmusu ma raja sian Ram
dompok Israel, jadi martuptup ma ibana
dohot naposona, ninna ma: Di adui ma bahen
hamu parbonjoran ni paranganku.

⁹Alai disuru halak ni Debata ma suruanna
palumba raja sian Israel, ninna ma: Jaga

dirim, so tung mamolus ho sian inganan adui, ai nunga marsaro halak Ram disi.

¹⁰Dung i disuru raja sian Israel ma suruanna tu inganan na pinaboa ni halak ni Debata tu ibana palumbahonsa, muba do panjagana disi, ndada holan sahali manang dua hali songon i.

¹¹Jadi gunsang ma roha ni raja sian Ram ala ni, dijou ma angka naposona, ninna ma mandok nasida: Ndang rupa olo hamu, pabotohon tu ahu, manang ise sian hita on bali tu raja sian Israel?

¹²Dung i ro ma hata ni sahalak sian angka naposona mandok: Ndang adong na bali ale rajanami, panurirang Elisa tahe na di Israel, i do pabotohon tu raja sian Israel luhut hata angka na pinaboam di bagasan bilut podomanmu.

¹³Dung i ninna rajai ma: Antong laho ma hamu diori hamu ma manang didia ibana, asa husuru halak mangalap ibana. Dung i adong ma halak na pabotohon tu rajai: Ida ma, di Dotan do ibana, ninna.

¹⁴Dung i dipaborhat rajai ma tusi angka hoda dohot hureta dohot torop parangan. Jadi dung sahat nasida bornginna i, dihaliangi nasida ma huta i.

¹⁵Dung i dipasogot parhalado ni halak ni Debata ma hehe manogotna i naeng laho tu balian nian; hape ida ma, torop angka parangan mardongan hoda dohot hureta

humaliang huta i. Jadi ninna naposona i ma tu ibana: Iale tuanku, aha nama sibahenonta?

¹⁶Jadi ninna ibana ma: Unang ho mabiar, ai na tumorop do na mandongani hita sian na mandongani nasida.

¹⁷Dung i martangiang ma si Elisa, ninna ma: Ale Jahowa, sai patonggor ma mata ni naposongkon, asa tangkas marnida! Jadi dipatonggor Jahowa ma mata ni naposo i, gabe marnida; dung i ida ma, dolok i gok angka hoda dohot hureta na songon api humaliang si Elisa.

¹⁸Jadi dung tuat nasida mandapothon ibana, martangiang ma si Elisa tu Jahowa, ninna ma: Ua bahen ma mata ni bangso on pangalelaon! Jadi pangalelaon ma matanasida dibahen Jahowa, hombar tu hata ni si Elisa.

¹⁹Dung i ninna si Elisa ma tu nasida: Ndada on dalan i, jala ndada on huta i, ihuthon hamu ma ahu, asa hutogihon hamu tu baoa na niluluanmuna i. Jadi ditogihon ma nasida tu huta Samaria.

²⁰Jadi dung sahat nasida tu Samaria, ninna si Elisa ma: Ale Jahowa, pasuang ma parnidaan ni halak on, asa marnida nasida. Jadi dipasuang Jahowa ma parnidaannasida i, asa marnida, hape ida ma, di tongatonga ni Samaria do nasida.

²¹Jadi dung diida raja sian Israel nasida, ninna ma tu si Elisa: Beha jadi do bunuonku nasida, ale amang?

²²Alai ninna ibana ma: Ndang jadi bunuonmu nasida; tung tagamon ma bunuonmu dope halak naung dapot tartangkap marhite sian podangmu dohot siormu? Parade tagonan sagusagu dohot aek tu jolonasida, asa mangan nasida jala minum, asa muli nasida mandapothon tuannasida i.

²³Dung i diparade rajai ma di nasida panggalan bolon, gabe mangan nasida jala minum, dung i dipamuli ma nasida, asa mulak tu tuannasida i. Olat ni ndang adong be ro parbajo sian halak Ram manola tano Israel.

²⁴(III.) Dung i di laonlaon ni ari didokkon si Benhadad, raja sian Ram ma santibalatuk sandok paranganna, laos nangkok nasida martungkum Samaria.

²⁵Jadi masa ma haleon potir di Samaria, ai ida ma, sai diendel nasida do huta i, paima mararga sada ulu ni halode ualupulu rupia, jala saparopat solup kacang goreng mararga lima rupia.

²⁶Jadi uju mardalandalan sahali raja sian Israel di atas parik, manganguhi ma sada parompuan mandok tu rajai: Sai tolongi ma ahu, ale rajanami.

²⁷Dung i ninna rajai ma: Molo so Jahowa manolongi ho, sian dia ma tarbahen ahu manolongi ho? Sian pardegean ulaning, manang sian pangilangan anggur?

²⁸Angkup ni didok rajai ma tu nasida: Aha di ho? Jadi ninna nasida ma: Ro do hata ni parompuan on mandok tu ahu: Lehon anakmi asa itapangan ibana sadarion, marsogot pe panganonta anggo anakku.

²⁹Dibahen i nunga hulompa hami anggo anakku, jala suda hupangan hami; dung i ningku ma marsogotna i tu ibana: Antong lehon ma anakmi, asa itapangan ibana; hape nunga ditabunihon ibana ia anakna.

³⁰Jadi dung dibege rajai hata ni parompuan i, disansani ma pangkeanna, tongon ibana mardalandalan di atas parik. Jadi longang ma halak situan na torop i marnida daging ni rajai marpangkean tangki hapengani.

³¹Dung i ninna rajai ma: Ingkon songon i bahenon ni Debata tu ahu, jala patambaonna dope songon i, molo so tarpisik sadarion ulu ni si Elisa, anak ni si Sapat.

³²Alai hundulhundul di bagasan jabuna do anggo si Elisa, jala angka sintua i hundul di lambungna. Dung i disuru rajai ma sada halak patujolona; alai tagan so sahat dope suruani tu si Elisa, nunga didok ibana hian tu angka sintua i: Atehe ndang diida hamu, nunga pola marsuru suruanna anak ni partodoson mandokkon mamisikkon ulungku? Antong ingot hamu ma, molo ro suruanna i, hinsu hamu ma pintu i, laos onjar hamu ibana marhite sian hinsuhinsu i; nda nunga tarbege soara ni pat ni tuanna sian pudina?

³³Uju mangkatai dope ibana dohot nasida, ida ma, nunga ro tuat suruani mandapothon ibana, gabe didok rajai ma; ida ma, marharoroan sian Jahowa do jea on, aha be labana marhaposan tu Jahowa ahu?

7¹ (I.) Dung i ninna si Elisa ma: Tangihon hamu ma hata ni Jahowa! Songon on do hata ni Jahowa: Marsogot songon on mararga sarupia ma sajual dahanon simetmet, mararga sarupia huhut dua jual dahanon siansimun di harbangan ni Samaria.

²Jadi ro ma alus ni sahalak parsihundul, pangarabinan ni tangan ni rajai, mandok tu halak ni Debata: Ida ma, tung sura pe dibahen Jahowa angka pandiloan di langit i, beha ma pambahenna saut na nidokmi? Dung i ninna si Elisa ma: Ida ma, sanga do i nian anggo idaon ni matam, alai ndang dohot ho manganhon sian i.

³(II.) Dung i adong ma opat halak na puruon di lambung bahal ni huta i, masipandohan ma nasida ganup tu donganna: Aha gunana tinggal hita dison paima mate.

⁴Tung sura pe didok rohanta masuk hita tu bagasan huta, haleon potir do di bagasan huta i, mate do hita nang disi; alai tung sura hita tinggal dison, laos mate do hita; dibahen i beta hita bali tu parbonjoran ni halak Ram Molo dipangolu nasida hita, ba mangolu taho; molo dibunu nasida hita, ba mate hita tusi.

⁵Tole dung rambon ari hehe ma nasida laho mandapothon parbonjoran ni halak Ram, jadi dung sahat nasida tu partalpahan ni parbonjoran ni halak Ram, ida ma, ndang adong disi nanggo sahalak!

⁶Ai nunga dipatubegehon Tuhan i tu parbonjoran ni halak Ram pardorom ni torop hureta dohot hoda dohot parangan, gabe masipandohan ma nasida ganup tu donganna: Ida ma, nunga marhara raja sian Israel tu angka raja ni halak Het, dohot tu angka raja ni halak Misir bahen alonta, asa ro nasida mandopang hita.

⁷Dibahen i borhat ma nasida laos maporus di rambon ni ari, ditadingkon nasida ma angka undungundung nasida dohot hodana dohot halodena ro di sandok parbonjoran i, jala maporus be laho paluahon hosanasida sandiri.

⁸Jadi dung sahat halak na puruon i tu partalpahan ni parbonjoran i, dimasuhi nasida ma sada undungundung i, laos mangan minum nasida, jala dibuat sian perak, sere dohot angka pangkean, laos laho nasida manabunihonsa; mulak muse nasida masuk tu bagasan undungundung na sadanari, sian i pe dibuat do angka ugasan i, laho muse nasida manabunihonsa.

⁹Alai masipandohan ma nasida ganup tu donganna: Nandang patut songon i bahenonta, ai ari on do ari barita hatuaon; molo laos sip

hita paimaimahon sahat ro di torang ni ari, sala hita maon tardapot. Dibahen i, beta ma hita mamboan barita i tu bagasan bagas ni rajai.

¹⁰Jadi dung sahat nasida tu huta i, joujou ma nasida tu sijaga bahal ni huta i, dibaritahon ma tu nasida hata i, ninna ma: Nunga sahat hami tu parbonjoran ni halak Ram, hape ida ma, ndang adongjolma disi nanggo sada, soara ni jolma pe ndang tarbege, asal tartambat boti angka hoda dohot halode dapot hami ro di angka undungundung i, songon na somal.

¹¹Jadi joujou ma angka sijaga bahal mandokkon paboaonna barita i tu bagasan jabu ni rajai.

¹²(III.) Jadi hehe ma rajai bornginna i, jala didok ma tu angka naposona: Pabotohononku ma tu hamu pingkiran na naeng pamasaon ni halak Ram tu hita: Diboto nasida do naung haleon on do hita, alani umbahen ruar nasida sian parbonjoranna i, laho martabuni di ladang, ai ninna rohanasida do: Ia dung ruar nasida sian huta i, itatangkup ma nasida songon i mangolu, asa hita masuk tu bagasan huta i.

¹³Jadi ro ma alus ni sahalak sian angka naposona i mandok: Ua binuat ma lima hoda, sian hoda angka na tinggal i dope di bagasan huta; ida ma, ai so manang dumenggan nasida sian sandok halak Israel angka na

tinggal i dope disi manang sian sandok halak Israel angka naung marragean; antong angka i ma itasuru tusi laho maningkir.

¹⁴Jadi dibuat nasida ma dua pasang hoda, laos disuru rajai ma nasida mangeahi parangan ni halak Ram, ninna ma: Laho ma hamu manangkasi!

¹⁵Jadi dung dieahi nasida angka parangan i sahat ro di Jordan, ida ma, sandok dalam i gok pangkean dohot ulaula, angka na binolongkon ni halak Ram di na maporus i nasida. Dung i mulak ma angka suruani paboahon barita i tu rajai.

¹⁶Jadi ruar ma bangso i ditaban duduk ma parbonjoran ni halak Ram; jadi saut ma sajual dahanon simetmet mararga sarupia, songon i dohot dua jual dahanon siansimun, hombar tu hata ni Jahowa.

¹⁷(IV.) Nunga disuru rajai hian na sahalak parsihundul pangarabinan ni tanganna marjaga di bahal i, hape didegedegei halak ibana di bagasan harbangan pola mate ibana, hombar tu hata ni halak ni Debata, na nilumbahonna hian, uju na tuat rajai mandapothon ibana.

¹⁸Jadi masa ma tutu hombar tu hata ni halak ni Debata, na nilumbahonna hian tu rajai: Dua jual dahanon siansimun mararga sarupia, songon i nang sajual dahanon simetmet marsogot songon on di harbangan ni Samaria.

¹⁹Uju na nidok ni halak parsihundul i mangalusi halak ni Debata: Ida ma, tung sura pe dibahen Jahowa angka pandiloan di langit i, beha ma pambahenna saut na nidokmi? Alai ninna si Elisa ma: Ida ma, sanga do i nian ianggo idaon ni matam, alai ndang dohot ho manganhon sian i.

²⁰Jadi masa ma songon i tu ibana, didegedegei halak situasi na torop i ma ibana di bagasan harbangan pola mate ibana.

8¹(I.) Alai nunga mangkatai hian si Elisa tu parompuan, paranak naung pinangoluna i, songon on: Hehe ma ho jala bungkas rap dohot isi ni jabum, jala manginsua ma ho songon halak dagang manang didia, ai nunga didokkon Jahowa ro haleon potir; saut do i ro antong tu tano i, pola pitu taon lelengna.

²Jadi borhat ma parompuan i jala dibahen hombar tu hata ni halak ni Debata, bungkas ma nasida, rap dohot isi ni bagasna, jala maisolat di tano ni halak Palistim pitu taon lelengna.

³Alai dung salpu na pitu taon i, mulak ma parompuan i sian tano ni halak Palistim, laos ruar ma nasida mangalualu tu rajai mangido mulak bagasna dohot haumana.

⁴Alai tongon rajai mangkatai dohot si Gehasi, naposo ni halak ni Debata na jolo, ninna ma: Pajojor ma tu ahu saluhut ulaon habalgaon, angka na binahen ni si Elisa.

⁵Alai andorang pajojorhon ibana tu rajai, na pinangoluna i sada halak naung mate, ro ma tongon parompuan, paranak na pinangoluna i mangalualu tu rajai, mangidohon mulak bagasna dohot haumana. Jadi ninna si Gehasi ma: Ale rajanami, on ma parompuan i, jala on do anakna, na pinangolu ni si Elisa.

⁶Jadi dipamanat rajai ma hata i tu parompuan i, gabe dipajojor nasida ma i tu ibana. Dung i disuru rajai ma sada halak siramoti bagasna dongannasida, ninna ma: Pasuang ma tu nasida saluhut ugasanna hian, angkup ni sandok gogo ni hauma i olat ni ari habubungkasna sian tano on rasirasa nuaeng.

⁷(II.) Dung i sahat ma si Elisa tu Damaskus, tongon marsahit si Benhadad, raja sian Ram didapot, gabe dibaritahon halak tu rajai, songon on: Nunga ro halak ni Debata tu huta on.

⁸Jadi ninna rajai ma tu si Hasael: Boan ma sada silehonlehon di bagasan tanganmu, jala laho ma ho manjumpangkon halak ni Debata, jala marsungkun tu Jahowa ma ho marhite sian ibana, songon on: Beha leak malum dope sahithon hilalaonku?

⁹Jadi laho ma si Hasael manjumpangkon ibana, diboan dohot sada silehonlehon di bagasan tanganna sian saluhut ugasan na arga di Damaskus, pola sorat opatpulu unto; jadi dung sahat ibana tu jolo ni si Elisa, ninna ma: Disuru anakmu si Benhadad, raja sian

Ram ahu mandapothon ho, mandok tu ho:
Beha leak malum dope sahithon hilalaonku?

¹⁰Dung i didok si Elisa ma mandok ibana:
Laho ma ho, paboa ma tu ibana: Malum do
nian hilalaonmu; alai nunga dipapatar Jahowa
tu ahu, ingkon mate do ibana.

¹¹Angkup ni sai dinolnol mata ni si Elisa
ibana, pola maradu maila ibana, huhut sai
tumatangis halak ni Debata.

¹²Jadi ninna si Hasael ma: Boasa tung
tumatangis tuanki? Jadi ninna ibana ma:
Ala naung huboto jea sibahenonmu tu
halak Israel: Ia hutanasida na gonting
i surbuonmu do dohot api, jala dolidoli
sian nasida bunuonmu do marhitehite
podang, jala posoposonasida ropuhanmu
do, jala parompuannasida na marhangoluan
lapaonmu do.

¹³Dung i ninna si Hasael ma: Ise ma pola
ahu naposomon, biang nian dohonon, tung
bahenonna ma hata na balga sisongon i?
Alai ninna si Elisa ma: Nunga dipataridahon
Jahowa tu ahu, ho bangkit raja gumomgom
Ram.

¹⁴Dung i marsantabi ma ibana laho sian
lambung ni si Elisa, jala sahat ibana tu
tuanna, na mandok tu ibana: Dia do hata ni
si Elisa tu ho? Jadi ninna ibana ma: Malum do
nian hilalaonmu, ninna mandok ahu.

¹⁵Alai tole marsogotna i dibuat si Hasael
ma bulusan i, jala disornophon tu bagasan

aek laos dihungkuphon tu bohina gabe mate mogap. Jadi si Hasael ma bangkit raja singkatna.

¹⁶(III.) Palimataonhon dung bangkit raja sian Israel si Joram, anak ni si Ahab (uju si Josapat raja di Juda) bangkit raja di Juda ma si Joram, anak ni si Josapat.

¹⁷Marumur tolupulu dua taon ibana di na bangkit raja, jala ualu taon lelengna ibana mangarajai di Jerusalem.

¹⁸Jala dalan ni angka raja sian Israel diihutihut, suang songon na binahen ni pinompar ni si Ahab, ai boru ni si Ahab gabejolmana, jala diulahon do sogo ni roha ni Jahowa.

¹⁹Alai ndang olo Jahowa anggo mangago Juda ala si Daud naposona i, songon naung pinarbagana hian tu ibana, lehononna tongtong tu ibana sada palito di tongatonga ni angka anakna.

²⁰Uju di angka arina marbalik huhut halak Edom sian gomgoman Juda, laos dipabangkit sada raja gumomgom, nasida.

²¹Jadi taripar ma si Joram tu Sair rap dohot saluhut huretana; dung i hehe ma ibana bornginna i mangarampok halak Edom, angka na humaliang ibana, ro di angka induk panahatan ni hureta porang, gabe maporus situan na torop i tu undungundungna be.

²²Alai atik pe songon i laos bali do halak Edom sian gomgoman Juda rasirasa sadarion. Bali huhut uju i ia Libna.

²³Jamita angka tinggal i dope sian si Joram ro di nasa na niulana, nda tarsurat do i di bagasan buku jamita ni angka raja sian Juda?

²⁴Dung i monding ma si Joram gabe top dohot angka ompuna, jala tartanom di lambung ni angka ompuna di huta ni si Daud; jadi si Ahasia, anakna i bangkit raja singkatna.

²⁵(IV.) Pasampuluduataonhon dung bangkit raja sian Israel si Joram, anak ni si Ahab, bangkit raja sian Juda ma si Ahasia, anak ni si Joram.

²⁶Marumur duapulu dua taon si Ahasia di na bangkit raja ibana, jala sataon lelengna mangarajai di Jerusalem. Ia goar ni inana, i ma si Atalia, boru ni si Omri, raja sian Israel.

²⁷Dung i sai dalan ni pinompar ni si Ahab do diihutihut ibana, jala diulahon sogo ni roha ni Jahowa, suang songon pinompar ni si Ahab, ai martondong do ibana tu pinompar ni si Ahab.

²⁸Dung i borhat ma ibana rap dohot si Joram, anak ni si Ahab, laho marporang dompak si Hasael, raja sian Ram mardonokkon Ramot di Gilead; alai ditaluhon halak Ram do si Joram i.

²⁹Dung i mulak ma raja Joram tu Jisreel, laho padaonhon bugangna, angka na binahen ni halak Ram di Ramot, uju marporang ibana

dompak si Hasael, raja sian Ram. Dung i tuat ma si Ahasia, anak ni si Joram, raja sian Juda, naeng maningkir si Joram, anak ni si Ahab di Jisreel, ai na marsahit do ibana.

9¹ (I.) Alai dijou panurirang Elisa ma sahalak sian sisean ni panurirang, ninna ma mandok ibana: Hohos i ma gontingmu, jala boan guriguri on na marisi miak di bagasan tanganmu, jala laho ma ho tu Ramot di Gilead.

²Ia dung sahat ho tusi diori ma disi si Jehu, anak ni si Josapat, anak ni si Nimsi. Dung i bongot i ma jabu ingananna i jala dokkon ibana hehe sian tongatonga ni angka donganna, jala togihon ibana tu bilut parbagasan i.

³Dung i buat ma guriguri na marisi miak jala usehon tu uluna, huhut dohononmu: Songon on do hata ni Jahowa: Nunga humiahi ho bahen raja gumomgom Israel. Dung i ungkap ma pintu i laos maporus ma ho, na so tupa sulonsulonon.

⁴Dung i mardalan ma dolidoli i, sisean ni panurirang i, sahat tu Ramot di Gilead.

⁵Jadi dung sahat ibana tusi, ida ma hundulhundul disi angka partogi ni parangan didapot, laos ninna ma: Adong do hata sidohononku tu ho, ale partogi! Dung i ninna si Jehu ma: Tu ise sian hami on sudena? Dung i ninna ibana ma: Tu ho, ale partogi!

⁶Jadi hehe ma ibana jala masuk tu bagasan jabu i; dung i diusehon naposo i ma miahi tu uluna, huhut didok mandok ibana: Songon on do hata ni Jahowa, Debata ni Israel: Nunga Ahu pabangkit ho bahen raja gumomgom bangso ni Jahowa, i ma Israel.

⁷Ingkon ripur bahenonmu pinompar ni si Ahab, tuanmu, asa hutubolhon mudar ni angka naposongku, angka panurirang i dohot mudar ni saluhut naposo ni Jahowa tu si Izebel.

⁸Asa tung ripur sandok pinompar ni si Ahab; ripashononku ma sian si Ahab nasa baoa na bajar dohot na tang.

⁹Tung ripur do bahenonku pinompar ni si Ahab, suang songon pinompar ni si Jerobeam, anak ni si Nebat dohot songon pinompar ni si Baesa, anak ni si Ahia.

¹⁰Jala si Izebel ingkon suda panganon ni biang di ladang tu Jisreel, jala ndang jadi tanomon ni manang ise ibana. Dung i diungkap ma pintu i laos maporus ibana.

¹¹(II.) Dung i ruar ma si Jehu mandapothon angka naposo ni tuanna, angka na mandok tu ibana: Beha hasonangan do? Ala ni aha umbahen ro jolma na lalaen on manopot ho? Dung i ninna ibana ma tu nasida: Hamu pe ditanda hamu do baoa i dohot salinna marpangalaho.

¹²Alai ninna nasida ma: Hata sipaotooto do i! Bulus paboa tu hami. Dung i ninna

ibana ma: Songon on songon on do hatana
tu ahu, ninna do: Songon on do hata ni
Jahowa: Nunga Ahu mamiahi ho bahen raja
gumomgom Israel.

¹³Dung i hapogan ma nasida ganup
mambuat pangkeanna be jala dipahembang
tu toruna bahen tutup ni habangsa
pinanaekna i, huhut umpalu sarunena be, jala
ninna do: Nunga bangkit raja si Jehu!

¹⁴(III.) Jadi mambahen parbulanan ma si
Jehu, anak ni si Josapat, anak ni si Nimsi,
mangalo si Joram. Alai anggo si Joram ro di
sandok halak Israel martaon di parik ni huta
Ramot di Gilead maralohon si Hasael, raja
sian Ram.

¹⁵Alai nunga mulak hian anggo raja Joram
tu Jisreel laho padaonhon bugangna, angka
na binahen ni halak Ram uju marmusu ibana
dompok si Hasael, raja sian Ram. Dung i
ninna si Jehu ma: Molo sada pingkiran ni
rohamuna unang italoas ruar malua sian
huta i nanggo sahalak, asa unang laho ibana
mamboan barita i tu Jisreel.

¹⁶Dung i marsihundul ma si Jehu laho tu
Jisreel, ai peak disi do si Joram, si Ahasia raja
sian Juda pe, nunga tuat tusi maningkir si
Joram.

¹⁷Alai anggo parjaga na jongjong di atas
tungkup di Jisreel, dung diida ro parduaan na
niuluhon ni si Jehu, ninna ma: Nunga huida
ro sada parduaan. Dung i ninna si Joram ma:

Buat ma sahalak parsihundul jala suru ibana manjumpangkon nasida manungkun: Atehe dame do?

¹⁸Jadi borhat majolma parsihundul i di hoda i manjumpangkon ibana, jala didok ma: Songon on do hata ni rajai: Atehe dame do? Alai ninna si Jehu ma: Aha pardulim di dame i? Laho ma ho tu pudingku! Dung i dipaboa parjaga i ma barita i, ninna do: Nunga nian sahat suruani tu nasida, hape ndang mulak.

¹⁹Dung i disuru ma sahalak na asing parsihundul di hoda; dung sahat ibana tu nasida, ninna ma: Songon on do hata ni rajai: Atehe dame do? Alai ninna si Jehu ma: Aha pardulim di dame i? Laho ma ho tu pudingku!

²⁰Ro muse parjaga i paboahon barita i, ninna do: Nunga nian sahat suruani tu nasida, hape ndang mulak ibana. Alai anggo pangenjakna songon pangenjak ni si Jehu, anak ni si Nimsi do, ai songon pangenjak ni halak na lalaen do pangenjakna.

²¹Dung i ninna si Joram ma: Pasang ma hoda! Jadi dipasangjolma i ma hoda i tu huretana; jadi borhat ma si Joram, raja sian Israel dohot si Ahasia, raja sian Juda, ganup di huretana be, ruar ma nasida manjumpangkon si Jehu, gabe pajumpang nasida dohot ibana di ladang ni si Nabot, halak Jisreel.

²²(IV.) Jadi dung diida si Joram si Jehu, ninna ma: Atehe dame do, ale Jehu? Alai ninna ibana ma: Pinabotoboto dame i saleleng

didatdati si Izebel inamu mangulahon
parmainanon dohot ujarujaran godang?

²³ Jadi dihosing si Joram ma huretai laho
maporus nian, jala didok do tu si Ahasia:
Jehejehe do i, ale Ahasia!

²⁴ Alai disintak si Jehu ma siorna, gabe disior
ma si Joram gabe hona holangholang ni
sasapna, pola ditorusi sumbia i pusupusuna,
jala gadap ibana di bagasan huretana.

²⁵ Dung i ninna si Jehu ma mandok si Bidkar
naposona i: Hindat ma ibana jala reongkon
tu hauma ni si Nabot, halak Jisreel; sai
ingot ma na marsihundul i hita tampak ahu
dohot ho mangihuthon si Ahab amana i, uju
dilumbahon Jahowa hian toruna on dompak
ibana.

²⁶ Tongon tahe nunga maungaung hubege
nantoari mudar ni si Nabot dohot mudar
ni angka anakna i, ninna Jahowa; ingkon
tubolhononku do i tu ho di haumaon, ninna
Jahowa! On pe hindat ma ibana jala reongkon
tu hauma i, hombar tu hata ni Jahowa.

²⁷ Jadi dung songon i diida si Ahasia, raja
sian Juda, maporus ma ibana sian dalan,
laho tu jabu paranginanginan. Alai sai dieak
si Jehu do ibana, jala ninna ma: Ibana pe
ingkon bunuonmuna do! Jadi dibunu nasida
ma ibana di atas huretana di nangkohan Gur,
na mardonokkon Ibleam; jadi maporus ma
rajai sahat tu Megiddo, mate disi ma ibana.

²⁸Dung i diboan angka naposona ma ibana di bagasan hureta tu Jerusalem, jala dibandahon ibana di parbandaanna i sandiri di lambung ni angka ompuna di huta ni si Daud.

²⁹Pasampulusadataonhon dung gabe raja si Joram, anak ni si Ahab, bangkit raja ma si Ahasia gumomgom Juda.

³⁰Jadi sahat ma si Jehu tu Jisreel. Dung tarbege barita i tu si Izebel, marpangir ma ibana jala mandulo sian pandiloan.

³¹Jadi dung dimasuhi si Jehu harbangan i, ninna si Izebel ma: Atehe dame do, ale Simri, sitodos tuanna?

³²Dung i manaili ma si Jehu dompak pandiloani, ninna ma: Ise do donganku? Ise tutu? Jadi adong ma dua manang tolu halak naposona mamereng dompak ibana.

³³Dung i didok si Jehu ma: Tunggalingkon ma nasida sian i tu toru! Jadi ditunggalingkon nasida ma, pola mamirsak sian mudarna i tu dorpi dohot tu angka hoda i, jala dipasombu degedegean ni hoda.

³⁴Jadi dung masuk ibana tu huta i, jala dung mangan minum, ninna ma: Ua tingkir hamu ma boruboru naung tinoruan ni Debata, jala tanom hamu nasida, ai boru ni raja do ibana nian.

³⁵Alai dung laho nasida naeng mananom nian, hape ndang adong jumpangsa sian bangkena, nda holan tangkurakna dohot bulang ni patna dohot tanganna.

³⁶Jadi mulak ma nasida mamaritahon barita i tu si Jehu. Alai ninna ibana ma: I ma hata ni Jahowa hian, naung nilumbahonna hian marhite sian naposona si Elia, halak Tisbi, uju na nidokna: Ingkon di atas hauma ni Jisreel suda panganon ni biang sibuk ni si Izebel.

³⁷Ia bangke ni si Izebel i, ingkon hira gabe napa di ladang Jisreel, pola ndang tarpaboa halak be: On do si Izebel!

10¹(I.) Alai adong do pitupulu halak angka anak ni si Ahab di Samaria. Dung i disuru si Jehu ma angka surat jala dipantongoshon tu Samaria, tu angka induk sian Jesreel, tu angka sintua dohot tu angka guru panahatan ni angka anak ni si Ahab, songon on:

²Ia dung sahat suraton tu hamu, molo adong di hamu angka anak ni tuanmuna, angka hureta dohot hoda dohot sada huta na gonting, ro di angka sinjata marragamragam.

³Ingkon pillit hamujolma na dumenggan jala na sumintong marroha di tongatonga ni angka anak ni tuanmuna, jala pahundul hamu ibana tu atas habangsa ni amana, laos marporang ma hamu humongkop pinompar ni tuanmuna!

⁴Alai mabiar situtu ma nasida, angka ninna do: Ida ma, gari dua raja ndang manahan jongjong di adopanna lam beha ma ia panahanta?

⁵Dung i marsuru suruanna ma halak induk ni bagas dohot induk ni huta i, ro di angka sintua dohot guru manopot si Jehu, mandok tu ibana: Angka naposom do hami, jala nasa sidohononmu tu hami, ingkon bahenonnami do; ndang olo hami pabangkithon manang ise gabe raja; manang aha na denggan di bagasan roham, i ma bahen.

⁶Dung i disurathon si Jehu ma suratna paduahon tu nasida, songon on: Molo tutu donganku hamu, jala olo hamu tumangihon soarangku, buat hamu ma ulu ni angka baoba i, angka anak ni tuanmuna jala boan hamu tu ahu tu Jisreel marsogot songon on. Alai angka anak ni rajai, pitupulu halak toropna rap dohot halak na sangap di huta i, angka na pagodanggodang nasida.

⁷Jadi dung sahat surat i tu nasida, dibuat nasida ma angka anak ni rajai jala dipotongi, pitupulu halak toropna, jala dipampeakkon ulunasida i tu bagasan angka hirang, jala ditongoshon tu si Jehu tu Jisreel.

⁸Jadi dung ro suruani paboahon barita i tu ibana, ninna do: Nunga diboan nasida angka ulu ni angka anak ni rajai, gabe didok si Jehu ma: Pampeakkon hamu ma angka i bahen dua timbunan di lambung pintu harbangan paima marsogot.

⁹Dung i marsogotna i, ruar ma ibana, laos jongjong mandok tu sandok situan na torop i: Na lidang do anggo hamu! Ida ma, ianggo

ahu nunga hubahen parbulanon mangalo tuanku, jala nunga hubunu ibana; alai ise ulaning mambunu sude angka nasida on?

¹⁰Antong boto hamu ma, na so madabu boti tu tano nanggo sada sian hata ni Jahowa, naung nilumbahon ni Jahowa hian dompak pinompar ni si Ahab; nunga tahe dipasaut Jahowa naung nilumbahonna hian marhite sian si Elia naposona i.

¹¹Jadi dibunu si Jehu ma sude jolma angka na tinggal i dope sian pinompar ni si Ahab di Jisreel, ro di sude jolma angka na pinasangapna dohot angka alealena dohot angka panuturina haposan ni rohana, nanggo sahalak ndang ditebahon di ibana.

¹²Dung i borhat ma si Jehu mardalan sahat tu Samaria. Jadi dung sahat ibana tu sopesopo panisioan ni angka parmahan di tongan dalan.

¹³Pajumpang ma si Jehu dohot angka anggi ni si Ahasia, raja sian Juda, ninna ma: Ise do hamu? Jadi didok nasida ma: Angka anggi ni si Ahasia do hami, jala tuat do hami masipasaoran dame tu angka anak ni rajai dohot tu angka anak ni inana.

¹⁴Alai ninna si Jehu ma: Tangkupi hamu nasida songon i mangolu! Jadi ditangkupi ma nasida songon i mangolu, jala dipotongi nasida mardonokkon sumur di lambung sopesopo panisioan ni angka parmahan,

opatpulu dua halak toropna, jala ndang adong na malu sian nasida nanggo sahalak.

¹⁵(II.) Jadi dung mardalan ibana sian i, pajumpang ma ibana dohot si Jonadab, anak ni si Rekab, na manomunomu dohot mamasumasu ibana, gabe didok si Jehu ma mandok ibana: Atehe bonar do roham tu ahu, suang songon rohangki tu roham? Dung i didok si Jonadab ma: Songon i do! Antong molo songon i, lehon ma tanganmu tu ahu; jadi dilehon ma tanganna tu ibana. Dung i didokkon ma manaek tu huretana, hundul tu lambungna.

¹⁶Dung i didok si Jehu ma: Sai rap ma hita mardalan, asa idaonmu murukku humongkop ulaon ni Jahowa. Jadi tampak ma nasida marsihundul di huretana i.

¹⁷Jadi dung sahat ibana tu Samaria, dibunui ma saluhut halak angka na tinggal dope sian si Ahab di Samaria, paima sun siap dibahen, hombar tu hata ni Jahowa, naung nilumbahonna hian tu si Elia.

¹⁸Dung i dipaluhut si Jehu ma sude situasi na torop i, jala ninna ma tu nasida: Humurang dope anggo pangoloi ni si Ahab di Baal, umburju dope anggo si Jehu mangoloi.

¹⁹Dibahen i martingting ma hamu paluhuthon tu lambungku sude angka panurirang ni Baal, saluhut angka parhaladona ro di sude angka malimna, ndang jadi tinggal nanggo sahalak, ai pelean

na bolon naeng pasahatonku tu Baal; manang ise na so disi, ingkon marutang hosa ibana.

Alai pangela ni si Jehu do i, asa pungu dapotsa bunuonna angka parhalado ni Baal i.

²⁰Dung i didok si Jehu ma: Parbadiai hamu ma di Baal sada hariburon raja! Jadi ditingtingkon nasida ma i.

²¹Pola disuru si Jehu angka suruanna tu sandok Israel, mandokkon ro be sude angka parhalado ni Baal ndang tinggal nanggo sahalak na so ro tusi. Jadi marpungu ma nasida tu joro ni Baal, pola gok joro ni Baal sian jabu bona sahat ro di jolojolo.

²²Dung i didok si Jehu ma tujolma panahatan ni bagas parpeopan ni pangkean: Paruar ma pangkean di sude parhalado ni Baal. Jadi diparuar ma di nasida angka pangkean i.

²³Dung i ro ma si Jehu rap dohot si Jonadab, anak ni si Rekab masuk tu joro ni Baal, laos didok ma tu angka parhalado ni Baal i: Patangkas hamu ma marnida, unang tung adong saor tu hamu sian angka naposo ni Jahowa, ingkon holan angka parhalado ni Baal i saming disi.

²⁴Jadi dung ro angka nasida naeng mamelehon angka pelean sipotongon dohot pelean situtungon, dipadiri si Jehu hian di ibana di balian ualupulu halak, laos ninna ma: Molo tung malua nanggo sahalak sian baoa

angka na hupasahat tu tanganmuna, ingkon hosamu sahalak singkat ni hosana.

²⁵Jadi dung sun dihobas nasida pelean situtungan i, ninna si Jehu ma tu angka parangan dohot tu angka partogina: Masuk ma hamu tu bagasan jala bunu hamu nasida, na so tupa malua nanggo sahalak! Jadi dibunu ma nasida luhut marhite sian podang. Dung i direongkon angka parangan dohot partogina ma nasida tu balian, asa mangonjar nasida sahat tu bagasan joro ni Baal i.

²⁶Diparuar nasida huhut angka ganaganaan sian joro ni Baal, laos dimosokkon do i.

²⁷Diropuhi nasida huhut ganaganaan Baal jala dilohai joro ni Baal i, dibahen do i gabe panduduran ni na rotak rasirasa sadarion.

²⁸Jadi siap ma Baal i sian Israel dibahen si Jehu.

²⁹(III.) Holan angka dosa ni si Jerobeam, anak ni si Nebat, na mangela Israel mambahen dosa, ndang ditundalhon roha ni si Jehu, i ma angka lombu sere na di Betel dohot na di Dan.

³⁰Dung i ninna Jahowa ma tu si Jehu: Ala na denggan pambahenanmu mangulahon lomo ni rohangku mambahen tu pinompar ni si Ahab, hombar tu sandok na sinangkap ni rohangku, ingkon anakmu ro di sundut paopathon hundul di atas habangsa ni Israel.

³¹Alai ndang marsihohot roha ni si Jehu mangaradoti patik ni Jahowa, Debata ni

Israel, sian nasa rohana; ai ndang ditundalhon anggo angka dosa ni si Jerobeam na mangela Israel mambahen dosa.

³²Olat ni angka ari i ma dipungka Jahowa pametmet Israel, ai talu onjar ma nasida dibahen si Hasael di sandok partalpahan ni Israel.

³³Olat ni Jordan sambola tungkan habinsaran, sandok tano Gilead, tano ni halak Gad, Ruben dohot Manasse, olat ni Aroer na martopihon sunge Arnon, ro di Gilead dohot Basan.

³⁴Alai jamita na tinggal i dope sian si Jehu ro di sude na binahenna dohot habeguonna, nda tarsurat do i di bagasan buku jamita ni angka raja sian Israel?

³⁵Dung i monding ma si Jehu gabe top dohot angka ompuna jala tartanom ibana di Samaria, jala si Joahas anakna i bangkit raja singkatna.

³⁶Alai anggo lelengna si Jehu mangarajai gumomgom Israel di Samaria, duapulu ualu taon do.

11¹(I.) Alai anggo si Atalia, ina ni si Ahasia, dung diida naung mate anakna i, hehe ma ibana jala dibunui sandok pinompar ni rajai.

²Alai dibuat si Joseba, boru ni raja Joram, iboto ni si Ahasia ma si Joas, anak ni si Ahasia, jala diluahon ibana sian tongatonga ni angka anak ni rajai, angka sibunuon hian,

jala dibahen ibana tu bilut podoman rap dohot parorotna, manabunihon ibana maradophon si Atalia, asa unang bunuonna.

³Jadi rap martabuni nasida di bagasan joro ni Jahowa, pola onom taon lelengna. Alai si Atalia do mangarajai di tano i.

⁴Tole papitutaonhon disuru si Joiada ma mangalapi angka partogi ni parangan sirajai saratus dohot angka malim mandokkon nasida masuk tu joro ni Jahowa manopot ibana, dung i marpadan ma ibana dohot nasida, pola dipatolon nasida di bagasan joro ni Jahowa, jala dipatuduhon tu nasida anak ni rajai.

⁵Dung i martona ma ibana tu nasida, ninna ma: On do hata sibahenonmuna: Sapartolu sian hamu, angka na masuk gansi di ari Sabbath, ingkon marjaga di bagasan jabu ni rajai.

⁶Jala sapartolu ingkon marjaga di lambung bahal Sur, jala na sapartolu muse, ingkon di lambung bahal na di pudi ni angka parangan; ingkon marjaga hamu di lambung bagas joro manulakkon angka na ro.

⁷Alai anggo dua rongkanaan sian hamu, sudejolma tahe angka na malua di ari Sabbath, ingkon marjaga nasida di bagasan joro ni Jahowa jonok di lambung ni rajai.

⁸Jala ingkon halianganmuna do rajai, ganup marsinjata di bagasan tanganna; jala manangise na manoluk angka odoran i ingkon

marutang hosa; asa ingkon sai dongan ni rajai hamu, molo ruar ibana manang masuk.

⁹Jadi dibahen angka partogi ni parangan sisaratus ma hombar tu sandok na tinonahon ni malim Joiada, diarahon be ma donganna angka na masuk gansi di ari Sabbath rap dohot angka na malua di ari Sabbath, laos ro nasida manopot malim Joiada.

¹⁰Dung i diparlehon malim i ma tu angka partogi ni parangan sisaratus, angka hujur dohot lombulumbu angka na sian raja Daud nahinan, jala na pineop di bagasan joro ni Jahowa.

¹¹Dung i jongjong be ma angka parangan i ganup patioptiop sinjatana di bagasan tanganna dingkan siamun ni joro i sahat ro di hambirang ni joro i, di holangholang ni langgatan dohot joro i, humaliang rajai.

¹²Dung i ditogihon ma anak ni rajai tu ruar jala dibahen tumpal i tu atas uluna jala dilehon buku patik i tu bagasan tanganna jala dipabangkit nasida ibana bahen raja, laos dimiahi ibana, huhut martopaptopap tanganna be mangolophon, ninna do: Horas ma rajai!

¹³(II.) Jadi dung dibege si Atalia soara olopolop ni angka parangan dohot situan na torop i, ro ma ibana manopot situan na torop i tu joro ni Jahowa.

¹⁴Jadi dung dipamanat pangalahona, ida ma, jongjong do rajai mangunsande di

tiang hajongjongan ni raja, songon somalna
hian, jala angka partogi dohot parsarune
di lambung ni rajai, jala marlas ni roha be
sandok situan na torop isi ni luat i, huhut
mamalui sarune. Alai diribahi si Atalia ma
pangkeanna huhut joujou: Masa do jehejehe!

¹⁵Alai didokkon malim Joiada ma angka
partogi ni parangan sisaratus, angka na
manguluhon parangan i, ninna ma mandok
nasida: Togihon hamu nasida ruar sian
holangholang ni angka odoran, jala manang
ise na mangihuthon nasida, ingkon mate
bunuon do ibana marhite sian podang! Ai
nunga pola didok malim i: Ndang jadi mate
nasida di bagasan joro ni Jahowa.

¹⁶Dung i ditangkap nasida ma ibana jala
mardalan nasida sian dalan habongotan ni
angka hoda tu bagas ni rajai, laos disi nasida
dibunu.

¹⁷Dung i dibahen si Joiada ma sada
parjanjian tu Jahowa dohot tu rajai ro di
halak situan na torop i, paboa ingkon bangso
ni Jahowa nasida; dibahen huhut sada
parjanjian di holangholang ni rajai dohot
sitan na torop i.

¹⁸Dung i bongot ma sude situan na torop ni
luat i tu bagasan joro ni Baal jala dilohai do i;
ia angka langgatanna dohot ganaganaanna,
tung diropuhi situtu do angka i, jala si Matan,
malim ni Baal i dibunu nasida do ibana
mate di adopan ni angka langganan. Dung i

dipabangkit malim i ma halak na marjujungan parenta joro ni Jahowa.

¹⁹Dibuat ma angka partogi ni parangan sisaratus dohot angka parjaga di jabu ni rajai ro di parangan dohot sandok isi ni luat i, laos ditogihon nasida rajai tuat sian joro ni Jahowa jala ro nasida sian dalan pamolusan ni angka parangan sahat tu bagas ni rajai, jala hundul ibana tu atas habangsa harajaon.

²⁰Jadi marlas ni roha be ma sandok bangso isi ni luat i jala sonang be isi ni huta i. Alai nunga dibunu nasida anggo si Atalia marhite sian podang di bagasan bagas ni rajai.

²¹(12-1) (l.) Marumur pitu taon do si Joas, uju na bangkit raja ibana.

12¹(12-2) Papitutaonhon dung raja si Jehu, bangkit raja ma si Joas, jala opatpulu taon lelengna ibana mangarajai di Jerusalem; ia goar ni inana i ma si Zibia sian Berseba.

²(12-3) Dung i diulahon si Joas ma lomo ni roha ni Jahowa saleleng mangolu ibana, saleleng diajari malim Joiada ibana.

³(12-4) Holan angka tambak tahe ndang dilohai, sai mamele dope dohot manutung daupa halak situan na torop i di atas angka tambak i.

⁴(12-5) Dung i ninna si Joas ma tu angka malim: Sandok perak naung niuras, na somal binoan ni halak masuk tu joro ni Jahowa, i ma perak na nilehon ni halak bahen tobus

ni hosa, saluhut perak na nilehon ni ganup sian ringgas ni rohana mamboan tu joro ni Jahowa.

⁵(12-6) I ma sibuaton ni angka malim di nasida, ganup sian sihasolhotanna; ingkon pangkeonna do i pauliuli na sega di joro i, manang aha pe tahe na sega jumpangsa disi paulionna do.

⁶(12-7) Alai nunga pola duapulu tolu taon dung raja si Joas, laos so adong dope dipauli angka malim i na sega di joro i.

⁷(12-8) Jadi dijou raja Joas ma malim Joiada rap dohot angka malim na asing, ninna ma mandok nasida: Boasa so dipauli hamu dope na sega di joro i? Nuaeng pe ndang jadi be buatonmuna perak sian sihasolhotanmuna i, ingkon lehononmuna do i laho paulihon na sega di joro i.

⁸(12-9) Jadi dioloi angka malim i ma hata i, ndang be dibuat perak sian halak situan na torop i, jala ndang be nasida paulihon na sega di joro i.

⁹(12-10) Dung i dibuat malim Joiada ma sada poti, jala dituhak ma langkopna i, jala dipeakkon poti i dingkan siamun ni langgatan laho masuk jolma i tu joro ni Jahowa; jadi malim angka na marjaga di lambung lobulobu mandekdekkon sandok perak na binoan ni halak tu joro ni Jahowa.

¹⁰(12-11) Ia dung diida nasida naung godang perak i di bagasan poti i, ro ma

sahalak juaratulis ni rajai rap dohot sintua ni malim i, ditimpus ma perak i tu bagasan puro, dung dibilang na dapotsa di bagasan joro ni Jahowa.

¹¹ (12-12) Jadi dung didasing nasida perak i, dipasahat ma i tu tangan ni halak panahatan ni ulaon, angka na parenta joro ni Debata, asa nasida muse mangalehon upa tu angka tukang hau dohot pande, angka na mangula di joro ni Jahowa.

¹² (12-13) Tole angka tukang dohot halak pandakdak batu, huhut manuhor parhau dohot batu naung nidakdak laho paulihon na sega di joro ni Jahowa, tole sandok harugian laho pauli joro ni Jahowa, nasida paturehon.

¹³ (12-14) Alai tahe ndang dipauli sian i di joro ni Jahowa angka pinggan perak manang raut manang mangkuk parburian manang sarune, manang dia tahe ulaula sere dohot perak anggo sian perak na binoan tu joro ni Jahowa.

¹⁴ (12-15) Ingkon dilehon do i tu halak pangula, asa dipauli nasida marhite sian i na sega di joro ni Jahowa.

¹⁵ (12-16) Jala ndang pola masietongan nasida dohot baoa panahatan ni perak i, asa lehononna tu halak pangula, ai masihaposan do nasida.

¹⁶ (12-17) Alai anggo perak sian pelean hasalaan dohot perak sian pelean pardosaon,

ndang diboan anggo i tu joro ni Jahowa, di angka malim do i.

¹⁷(12-18) (II.) Uju i ma nangkok si Hasael, raja sian Ram laho marporang dompak Gat laos dipapatu do i. Dung i dipatohom si Hasael ma bohina laho nangkok tu Jerusalem.

¹⁸(12-19) Jadi dibuat si Joas raja sian Juda ma nasa ugasan na pinarbadian, na pinarbadia ni angka ompuna si Josapat, si Joram dohot si Ahasia, angka raja sian Juda dohot na pinarbadiana sandiri ro di nasa sere na jumpang di tongatonga ni arta, angka na pineop di joro ni Jahowa dohot di bagas ni rajai, jala ditongoshon do i tu si Hasael, raja sian Ram; gabe mundar ma ibana sian Jerusalem.

¹⁹(12-20) Jamita na tinggal i dope sian si Joas ro di sude na niulana, nda tarsurat do i di bagasan buku jamita ni angka raja sian Juda?

²⁰(12-21) Jadi hehe ma angka naposona mambahen parbulanan mangalo ibana, laos dibunu nasida si Joas i di bagasan jabu Milo, laho tuat tu Sila.

²¹(12-22) Ai ditodos si Jozakar, anak ni si Simeat dohot si Josabad, anak ni si Somor, naposona i ibana gabe mate; jadi tartanom ma ibana di lambung ni angka ompuna di huta ni si Daud, jala si Amasia anakna i bangkit raja singkatna.

13¹(I.) Paduapulutolutaonhon dung gabe raja sian Juda si Joas, anak ni si

Ahasia, bangkit raja ma si Joahas, anak ni si Jehu gumongom Israel di Samaria, sampulu pitu taon lelengna.

²Jala diulahon do sogo ni roha ni Jahowa, ai diihuthon do angka dosa ni si Jerobeam, anak ni si Nebat, na mangela Israel mambahen dosa, jala ndang dipasurut rohana sian i.

³Dibahen i marsigorgor ma rimas ni Jahowa mida Israel, jala dipasahat nasida tu bagasan tangan ni si Hasael, raja sian Ram dohot tu bagasan tangan ni si Benhadad, anak ni si Hasael i saleleng mangolu nasida.

⁴Jadi mangido asi ni roha ma si Joahas sian Jahowa, jala ditangihon Jahowa ibana, ai ditatap rohana do haporsuhon ni Israel, na pinaporsukporsuk ni raja sian Ram i nasida.

⁵Dung i dilehon Jahowa ma tu Israel sada halak sipalua, gabe malua nasida sian tangan ni halak Ram, jala maringan halak Israel di bagasan undungundungnasida be songon na sai laon.

⁶Alai marisuang, ndang sumurut nasida sian angka dosa ni pinompar ni si Jerobeam, na mangela Israel mambahen dosa, laos diihuthon do tusi; nang sombaon Asera tinggal do i jongjong di Samaria.

⁷Ai ndang adong be parangan ni si Joahas ditinggalhon Jahowa, nda holan limapulu halak parsihundul dohot sampulu hureta dohot sampulu ribu halak parhantarhantar; ai nunga rendep nasida dibahen raja sian Ram,

jala nunga diluntakluntak nasida songon orbuk.

⁸Jamita na tinggal i dope sian si Joahas ro di sude na niulana dohot habeguonna, nda tarsurat do i di bagasan buku jamita ni angka raja sian Israel?

⁹Dung i monding ma si Joahas gabe top dohot angka ompuna, jala tartanom ibana di Samaria, jadi si Joas anakna i bangkit raja singkatna.

¹⁰Patolupulupitutaonhon dung gabe raja sian Juda si Joas, bangkit raja ma si Joas, anak ni si Joahas gumomgom Israel di Samaria, sampulu onom taon lelengna.

¹¹Jala diulahon do sogo ni roha ni Jahowa, ndang dipasurut rohana sian saluhut dosa ni si Jerobeam, anak ni si Nebat, na mangela Israel mambahen dosa, laos diihuthon disi.

¹²Jamita na tinggal i dope sian si Joas, ro di sude na niulana dohot habeguonna uju marmusu ibana dompak si Amasia, raja sian Juda, nda tarsurat do i di bagasan buku jamita ni angka raja sian Israel?

¹³Dung i monding ma si Joas gabe top dohot angka ompuna, jala si Jerobeam hundul tu atas habangsana. Jadi tartanom ma si Joas di Samaria di lambung ni angka raja sian Israel.

¹⁴(II.) Dung i tubu ma sahiti ni si Elisa, laos i do mamboan ibana. Jadi tuat ma si Joas raja sian Israel maningkir ibana, laos tangis di jolona, ninna ma: O damang, damang! Hureta

ni Israel dohot angka jolma parsihundulna do ho.

¹⁵Dung i ninna si Elisa ma tu ibana: Buat ma sior dohot angka sumbia i! Jadi dung dibuat sior i tu ibana rap dohot angka sumbia i.

¹⁶Ninna si Elisa muse tu raja sian Israel: Tanganmu sandiri ma manangging sior i! Jadi ditangging ma. Dung i diampehon si Elisa ma tanganna tu atas tangan ni rajai.

¹⁷Laos didok ma: Ungkap ma pandiloan dingkan habinsaran! Jadi diungkap ma i. Dung i ninna si Elisa ma: Siorhon ma! Jadi disiorhon ma. Jadi ninna si Elisa muse ma: I ma sumbia hatuaon sian Jahowa dohot sumbia haluaon sian halak Ram! Ai taluhononmu do halak Ram di Apek, maradu siap nasida bahenonmu.

¹⁸Dung i didok muse ma: Buat ma angka sumbia i! Jadi dung dibuat, ro muse hatana mandok tu raja sian Israel: Lipathon ma angka i tu tano! Jadi dilipathon ma tolu hali, dung i mansohot ma.

¹⁹Dung i tarrimas ma halak ni Debata mida ibana, ninna ma: Aut ni lima manang onom hali nian dilipathon ho, talu ma halak Ram bahenonmu maradu siap; alai anggo nuaeng holan tolu hali taluhononmu halak Ram.

²⁰(III.) Dung i mate ma si Elisa jala ditanom halak ibana. Jadi ro ma parbajo marrongkanrongkan sian halak Moab sumola tano i di bona ni taon.

²¹ Tongon mananom sada halak na mate nasida, jadi dung diida nasida halak parbajo i, gabe hapogan nasida manimpalhon halak na mate tu bagasan tanoman ni si Elisa. Hape dung sahat halak na mate tu bagasan jala dolos tu bangke ni si Elisa, mulak mangolu ma ibana, laos hehe mangojakkon patna.

²² Sai dipasosaksosak si Hasael, raja sian Ram do halak Israel saleleng mangolu si Joahas.

²³ Alai marpangulahi do roha ni Jahowa mida nasida jala diasii, jala marpanatap tu nasida ala ni padan na binahenna i tu si Abraham, si Isak dohot si Jakkob, jala ndang lomo rohana mida hamagoannasida manang mambolongkon nasida sian adopanna rasirasa nuaeng.

²⁴ Dung i mate ma si Hasael, raja sian Ram, gabe si Benhadad anakna i bangkit raja singkatna.

²⁵ Alai dirampas si Joas, anak ni si Joahas ma muse sian gomgoman ni si Benhadad, anak ni si Hasael, huta angka na nilaumna sian gomgoman ni si Joahas amana i di hamusuon; pola tolu hali talu tongtang ibana dibahen si Joas, gabe mulak ma angka huta i tu Israel dibahen.

14¹ (I.) Paduataonhon dung gabe raja sian Israel si Joas, anak ni si Joahas, bangkit raja ma si Amasia, anak ni si Joas, raja di Juda.

²Marumur duapulu lima taon ibana di na bangkit raja, jala duapulu sia taon lelengna ibana mangarajai di Jerusalem; ia goar ni inana i ma Nai Joadan sian Jerusalem.

³Jala diulahon ibana do lomo ni roha ni Jahowa, alai ndada songon si Daud ompuna i; suman tahe pambahenna tu sandok pambahenan ni si Joas amana i.

⁴Holan angka tambak i ndang dilohai, sai tole dope halak situasi na torop i mamele dohot manutung daupa di atas ni angka tambak i.

⁵Jadi dung lam hot harajaon i di bagasan tanganna, dibunu ibana ma naposona, angka na manodos raja nahinan, amana i.

⁶Alai anggo angka anak ni partodos i, ndang dibunu, hombar tu hata ni Jahowa na tarsurat di bagasan buku patik na binahen ni si Musa, songon on: Nandang jadi mate amaama ala angka anakna, jala ndang jadi mate angka anak i ala amana, alai ganup ingkon mate ala ni dosana sandiri.

⁷Ditaluhon ibana huhut halak Edom di bagasan rura parsiraan, saloksa halak toropnasida mate, disoluk huhut huta Sela di hamusuon, jala dibahen do goarna Joktel rasirasa sadarion.

⁸(II.) Uju i ma disuru si Amasia angka suruanna manopot si Joas, anak ni si Joahas, tubu ni si Jehu, raja sian Israel, mandok tu ibana: Tole ma hita masiujian.

⁹Alai disuru si Joas, raja sian Israel ma suruanna manopot si Amasia, raja sian Juda, mandok hata alingalingan: Hau unak na di Libanon marsuru pangaririt manopot hau Ares na di Libanon, mandok songon on: Ua lehon ma borum bahenjolma ni anakku; hape ro ma binatang angka na di atas Libanon ditondong ma hau unak i laos didegedegei.

¹⁰Nunga tutu ditaluhon ho halak Edom, gabe dipaginjang ho roham. Denggan paingotingot baritam jala tinggal ho di bagasan jabum! Boasa tagonan tahopanmu hamagoan, asa marjea ho rap dohot halak Juda.

¹¹Alai ndang ditangihon si Amasia hata umpamana i. Jadi nangkok ma si Joas, raja sian Israel gabe masiujian ma nasida, ibana dohot si Amasia, raja sian Juda di Betsemes na di tano Juda.

¹²Alai talu ma halak Juda maradophon halak Israel, gabe maporus nasida ganup tu undungundungna be.

¹³Dapot tartangkup ma di Betsemes anggo si Amasia, raja sian Juda, anak ni si Joas, tubu ni si Ahasia dibahen si Joas, raja sian Israel, laos diboan ibana tu Jerusalem, jala dilohai parik ni Jerusalem olat ni bahal Epraim sahat tu bahal parsuhisuhi, pola opat ratus asta ganjangna.

¹⁴Dibuat huhut nasa sere dohot perak ro di sude ulaula angka na jumpang di bagasan joro ni Jahowa dohot di bagasan

bilut parpeopan arta na di bagas ni rajai, tole angka jolma tahan joratna, dung i mulak ma ibana tu Samaria.

¹⁵(III.) Jamita na tinggal i dope sian si Joas ro di sude na binahenna i dohot habeguonna uju marmusu ibana dompak si Amasia, raja sian Juda, nda tarsurat do i di bagasan buku jamita ni angka raja sian Israel?

¹⁶Dung i monding ma si Joas gabe top dohot angka ompuna, jala tartanom di Samaria, di lambung ni angka raja sian Israel. Jadi si Jerobeam anakna i bangkit raja singkatna.

¹⁷Alai anggo si Amasia, anak ni si Joas, raja sian Juda, mangolu dope sampulu lima taonnari dung mate si Joas, anak ni si Joahas, raja sian Israel.

¹⁸Jamita na tinggal i dope sian si Amasia, nda tarsurat do i di bagasan buku jamita ni angka raja sian Juda?

¹⁹Dung i dibahen halak ma parbulanon mangalo ibana di Jerusalem; alai maporus do rajai tu Lakis; jadi disuru nasida ma halak mangihuthon ibana tu Lakis, asa bunuonna ibana disi.

²⁰Dung i diboan nasida ma ibana di atas ni angka hoda, gabe tartanom ibana di Jerusalem, di lambung ni angka ompuna di bagasan huta ni si Daud.

²¹Dung i ro ma sandok bangso Juda mambuat si Azaria, na marumur sampulu

onom taon dope, jala dipabangkit ibana gabe raja singkat ni si Amasia, amana i.

²²Ibana do i na patoguhon huta Elat, jala mulak tu Juda dipasuang, dung monding rajai rap dohot angka ompuna.

²³(IV.) Pasampululimataonhon dung bangkit raja sian Juda si Amasia, anak ni si Joas, bangkit raja ma si Jerobeam, anak ni si Joas, gumongom Israel di Samaria, opatpulu sada taon lelengna.

²⁴Alai diulahon ibana do sogo ni roha ni Jahowa, ndang dipasurut rohana sian angka dosa ni si Jerobeam, anak ni si Nebat, na mangela Israel mambahen dosa.

²⁵Ibana tahe pasuangkon muse angka partalpahan ni Israel, olat ni haroroan tu Hamat sahat ro di laut na di adaran, hombar tu hata ni Jahowa, Debata ni Israel, naung pinarbagana hian marhite sian naposona si Jona, anak ni si Amittai, i ma panurirang na sian huta Gat Heper.

²⁶Ai nunga marpanatap roha ni Jahowa mida pardangolan ni Israel na sapot situtu, nunga pola siap baoa na bajar dohot na tang, jala ndang adong tinggal nanggo sahalak tau panolongi di Israel.

²⁷Alai ndang dung marlumba Jahowa hian naeng siaphononna goar ni Israel sian hasiangan on, alani umbahen manolongi Ibana di nasida marhite sian tangan ni si Jerobeam, anak ni si Joas.

²⁸Jamita na tinggal i dope sian si Jerobeam, ro di sude na niulana dohot habeguonna, uju marmusu ibana dohot pasuangkon Damaskus nang Hamat, na masuk tu Juda hian, mulak tu Israel, nda tarsurat do i di bagasan buku jamita ni angka raja sian Israel?

²⁹Dung i monding ma si Jerobeam gabe top dohot angka ompuna, i ma angka raja sian Israel, jadi si Sakaria anakna i bangkit raja singkatna.

15¹(I.) Paduapulupitutaonhon dung gabe raja sian Israel si Jerobeam, bangkit raja sian Juda ma si Azaria, anak ni si Amasia.

²Marumur sampulu onom taon ibana di na bangkit raja, jala limapulu dua taon lelengna ibana mangarajai di Jerusalem; ia goar ni inana, i ma Nai Jekolia sian Jerusalem.

³Dung i diulahon ibana ma lomo ni roha ni Jahowa, sandok songon na binahen ni si Amasia, amana i.

⁴Holan angka tambak i ndang dilohai; sai tole dope halak situasi na torop i mamele dohot manutung daupa di atas angka tambak i.

⁵Jadi ditorui Jahowa ma rajai, gabe puruon ibana sahat ro di ari hamamatena, gabe punjung ibana maringan di bagasan sada jabu. Alai anggo si Jotam, anak ni rajai, mangarajai bagasna i dohot manguhum bangso isi ni luat i.

⁶Jamita na tinggal i dope sian si Azaria ro di sude na niulana, nda tarsurat do i di bagasan buku jamita ni angka raja sian Juda?

⁷Dung i monding ma si Azaria gabe top dohot angka ompuna, jala tartanom ibana di lambung ni angka ompuna di huta ni si Daud, jadi si Jotam anakna i bangkit raja singkatna.

⁸(II.) Patolupuluualutaonhon dung gabe raja sian Juda si Azaria bangkit raja ma si Sakaria, anak ni si Jerobeam gumomgom Israel di Samaria, onom bulan lelengna.

⁹Dung i diulahon ibana ma sogo ni roha ni Jahowa, suang songon na binahen ni angka ompuna. Ndang dipasurut rohana sian angka dosa ni si Jerobeam, anak ni si Nebat, na mangela Israel mambahen dosa.

¹⁰Dung i mambahen parbulanon ma si Sallum, anak ni si Jabes, mangalo ibana, laos dibunu ma rajai di adopan ni situasi na torop i gabe mate, jadi ibana ma bangkit raja singkatna.

¹¹Jamita na tinggal i dope sian si Sakaria, ida ma, tarsurat do i di bagasan buku jamita ni angka raja sian Israel.

¹²Jala on do hata na nilumbahon ni Jahowa hian tu si Jehu, uju na nidokna: Ingkon anakmu ro di sundut paopathon hundul di atas habangsa ni Israel; jadi saut ma songon i.

¹³Patolupulusiataonhon dung gabe raja sian Juda si Usia, bangkit raja ma si Sallum anak

ni si Jabes, jala holan sabulan lelengna ibana mangarajai di Samaria.

¹⁴(III.) Ai nangkok ma si Menahem, anak ni si Gaddi, sian Tirza, jala sahat ibana tu Samaria, jala ditodos ma si Sallum, anak ni si Jabes di Samaria, gabe mate, jadi ibana bangkit raja singkatna.

¹⁵Jamita na tinggal i dope sian si Sallum ro di parbulanon na binahenna i, ida ma tarsurat do i di bagasan buku jamita ni angka raja sian Israel.

¹⁶Uju i ma ditaban si Menahem huta Tirza jala dibunu sude pangisina ro di isi ni partalpahanna olat ni Tirza; ala so olo nasida mangungkap harbangan mangoloi patu umbahen dibunui nasida, jala dilapa sude parompuan na marhangoluan.

¹⁷Patolupulusiataonhon dung gabe raja sian Juda si Azaria, bangkit raja ma si Menahem, anak ni si Gaddi gumomgom Israel di Samaria sampulu taon lelengna.

¹⁸Jala diulahon ibana do sogo ni roha ni Jahowa; ndang dipasurut rohana saleleng mangolu ibana sian angka dosa ni si Jerobeam, anak ni si Nebat, na mangela Israel mambahen dosa.

¹⁹Dung i ro ma si Pul, raja sian Assur manola tano i. Jadi dilehon si Menahem ma tu si Pul saribu talenta perak, asa ditolongi ibana pahothon harajaon i di bagasan tanganna.

²⁰ Ia perak i didokkon si Menahem do guguan ni halak Israel, sude halak paradongan tahe margugu, limapulu sekkel perak sasahalak lehononna tu raja sian Assur, jadi muli ma raja sian Assur, ndang tinggal ibana di bagasan luat i.

²¹ Jamita na tinggal i dope sian si Menahem ro di sude na niulana, nda tarsurat do i di bagasan buku jamita ni angka raja sian Israel?

²² Dung i monding ma si Menahem gabe top dohot angka ompuna, jadi si Pekahia anakna i bangkit raja singkatna.

²³ (IV.) Palimapulutaonhon dung gabe raja sian Juda si Azaria, bangkit raja ma si Pekahia, anak ni si Menahem gumomgom Israel di Samaria, dua taon lelengna.

²⁴ Jala diulahon ibana do sogo ni roha ni Jahowa, ndang dipasurut rohana sian angka dosa ni si Jerobeam, anak ni si Nebat, na mangela Israel mambahen dosa.

²⁵ Dung i marbulan ma si Peka, anak ni si Remalia, ulubalangna i mangalo ibana, laos ditodos ma ibana di Samaria di bagasan jabu ni rajai rap dohot si Argob dohot si Arje angkup ni limapulu halak isi ni Gilead donganna; dung dibunu rajai gabe ibana bangkit raja singkatna.

²⁶ Jamita na tinggal i dope sian si Pekahia ro di sude na niulana, ida ma, tarsurat do i

di bagasan buku jamita ni angka raja sian Israel.

²⁷Palimapuluduataonhon dung gabe raja sian Juda si Azaria, bangkit raja ma si Peka, anak ni si Remalia gumomgom Israel di Samaria, duapulu taon lelengna.

²⁸Jala diulahon ibana do sogo ni roha ni Jahowa; ndang dipasurut rohana sian angka dosa ni si Jerobeam, anak ni si Nebat, na mangela Israel mambahen dosa.

²⁹Uju di tingki ni si Peka, raja sian Israel, ro ma si Tiglat-Pileasar, raja sian Assur, ditaban ma huta Ijon, Abel Betmaaka, Janoa, Kedes, Hazor, Gilead, Galilea ro di sude tano Naptali, jala dibuangkon angka pangisina i tu Assur.

³⁰Dung i marbulan ma si Hosea, anak ni si Ela mangalo si Peka, anak ni si Remalia, jala ditodos ibana gabe mate, jadi ibana bangkit raja singkatna paduapulu taonhon hinarajahon ni si Jotam, anak ni si Usia.

³¹Jamita na tinggal i dope sian si Peka ro di sude na niulana, ida ma tarsurat do i di bagasan buku jamita ni angka raja sian Israel.

³²(V.) Paduataonhon dung gabe raja sian Israel si Peka, anak ni si Remalia, bangkit raja sian Juda ma si Jotam, anak ni si Usia.

³³Marumur duapulu lima taon ibana di na bangkit raja, jala sampulu onom taon lelengna ibana mangarajai di Jerusalem; ia

goar ni inana, i ma Nai Jerusa, boru ni si Sadok.

³⁴Jala diulahon ibana do lomo ni roha ni Jahowa, sandok songon na binahen ni si Usia amana i.

³⁵Holan angka tambak i ndang dilohai, sai tole dope halak situan na torop i mamele dohot manutung daupa di atas angka tambak i. Ibana huhut pauli pintu harbangan parjulu di joro ni Jahowa.

³⁶Jamita na tinggal i dope sian si Jotam ro di sude na niulana, nda tarsurat do i di bagasan buku jamita ni angka raja sian Juda?

³⁷Di tingki uju i ma dipungka Jahowa marsuru si Resin, raja sian Ram dohot si Peka, anak ni si Remalia mangalo Juda.

³⁸Dung i monding ma si Jotam gabe top dohot angka ompuna, jala tartanom di lambung ni angka ompuna di huta ni si Daud ompuna i. Jadi si Ahas, anakna i bangkit raja singkatna.

16¹(I.) Pasampulupitutaonhon dung gabe raja si Peka, anak ni si Remalia, bangkit raja sian Juda ma si Ahas, anak ni si Jotam.

²Marumur duapulu taon si Ahas di na bangkit raja ibana, jala sampulu onom taon lelengna ibana mangarajai di Jerusalem, jala ndang diulahon lomo ni roha ni Jahowa, Debatana, songon ompuna si Daud.

³Ai diihutihut ibana do dalan ni angka raja sian Israel, gari anakna sandiri dipabolushon do sian api mangihuthon biasbias na niulahon ni halak kapid, angka na pinabali ni Jahowa maradophon halak Israel.

⁴Angkup ni mamele do ibana dohot manutung daupa di atas angka tambak dohot di atas ni angka dolokdolok dohot di toru ni saluhut hau na rugun.

⁵(II.) Uju i ma nangkok si Resin, raja sian Ram dohot si Peka, anak ni si Remalia, raja sian Israel, laho marporang dompak Jerusalem, jala ditungkum si Ahas, alai ndang tarpapatu nasida anggo huta i.

⁶Di tingki uju i dilaum si Resin, raja sian Ram ma si Elat pamasukkon tu Ram, jala dipabali halak Juda sian Elat, gabe ro halak Ram tu Elat laos maringan disi rasirasa sadarion.

⁷Alai disuru si Ahas ma angka suruanna manopot Tiglat-Pileasar, raja sian Assur mandok tu ibana: Naposom dohot anakmu do ahu; antong sai nangkok ma ho paluahon ahu sian tangan ni raja sian Ram dohot sian tangan ni raja sian Israel, angka na hehe naeng mangalo ahu.

⁸Dung i dibuat si Ahas ma perak dohot sere, na jumpang di bagasan joro ni Jahowa dohot di bagasan bilut parpeopan arta na di bagas ni rajai, jala ditongoshon do i bahen silua tu raja sian Assur.

⁹Jadi dioloi raja sian Assur ma pangidoanna i, nangkok ma raja sian Assur marporang dompak Damaskus laos patu dibahen, jala pangisina i dibuangkon tu Kir, jala dibunu ia si Resin.

¹⁰(III.) Dung i mardalan ma raja Ahas manjumpangkon Tiglat-Pileasar, raja sian Assur, tu Damaskus. Jadi dung diida sada langgatan di Damaskus, ditongoshon raja Ahas ma sada sumansuman ni langgatan i dohot singana ro di sandok jadijadianna tu malim Uria.

¹¹Jadi dipauli malim Uria ma sada langgatan, sandok suman tu na tinongoshon ni raja Ahas sian Damaskus, songon i do dibahen malim Uria, paima ro raja Ahas sian Damaskus.

¹²Jadi dung ro rajai sian Damaskus jala diida langgatan i, laos dipajonok rajai ma tu langgatan i jala mamele di atasna.

¹³Jala ditutung di atasna peleanna situtungan dohot peleanna sipanganon, jala diusehon peleanna siinumon, jala dipistikkon mudar ni angka peleanna hamauliateon tu langgatan i.

¹⁴Alai anggo langgatan sian tombaga na di adopan ni Jahowa, dipaorot do i sian hajongjonganna di adopan ni joro i, gabe ndang be jongjong di holangholang ni langgatan dohot joro ni Jahowa, dipaunsat do i tu lambung ni langgatan tungkan utara.

¹⁵Dung i didok raja Ahas ma tu malim

Uria: Ingkon di atas langgatan na bolon i do tutungonmu pelean situtungan manogotna i dohot pelean sipanganon bodarina i, ro di angka pelean situtungan ni rajai dohot pelean sipanganon, ro di pelean situtungan ni sandok bangso isi ni tano i dohot pelean sipanganon dohot pelean siinumon di nasida, jala pistikkononmu do tu atasna sandok mudar ni pelean situtungan dohot pelean sipotongan; anggo taringot tu langgatan tombaga i marpingkir dope ahu.

¹⁶Jadi dibahen malim Uria ma sandok hombar tu na nidokkon ni raja Ahas.

¹⁷Diloha raja Ahas huhut angka topi ni hajongjongan ni parburian, jala dipaunsat angka parburian i sian atasna, dipaijur huhut tobat i sian atas ni angka lembu tombaga, angka na di toruna, jala dibahen do pantar batu hajongjonganna.

¹⁸Angkup ni, emper pardalanan di ari Sabbath, na pinauli ni halak di joro i dohot pintu habongotan ni raja sian ruar, dipaunsat do i sian joro ni Jahowa mambuat roha ni raja sian Assur.

¹⁹Jamita na tinggal i dope sian si Ahas ro di na niulana, nda tarsurat do i di bagasan buku jamita ni angka raja sian Juda?

²⁰Dung i monding ma si Ahas gabe top dohot angka ompuna, jala tartanom di lambung

ni angka ompuna di huta ni si Daud, jadi si Hiskia, anakna i, bangkit raja singkatna.

17¹ (I.) Pasampuluduataonhon dung bangkit raja sian Juda si Ahas, bangkit raja ma si Hosea, anak ni si Ela, gumomgom Israel di Samaria, sia taon lelengna.

² Jala diulahon do sogo ni roha ni Jahowa, alai ndada songon raja sian Israel, angka na jumolo sian ibana.

³ Dung i nangkok ma si Salmanaser, raja sian Assur marporang dompak ibana, gabe dioloi si Hosea ma patu tu ibana dohot mangalehon sohe tu ibana.

⁴ Alai dung didapot raja sian Assur si Hosea mambahen parbulanon, nunga pola disuru angka suruanna manopot raja So sian Misir, jala ndang be diboan sohe tu raja sian Assur, songon na somal ganup taon. Jadi dihurungkon raja sian Assur ma ibana, jala dirante ibana di bagasan hurungan.

⁵ Dung i dilaum raja sian Assur ma sandok tano i sahat ibana dohot tu Samaria jala ditungkum do i tolu taon lelengna.

⁶ (II.) Pasiataonhon hinarajahon ni si Hosea, patu ma Samaria dibahen raja sian Assur, jala dibuangkon halak Israel tu Assur, jala didokkon nasida maringan di Hala dohot di Habor martopihon batang aek Gozan dohot tu angka huta ni halak Madai.

⁷ Masa pe songon i, ala naung mardosa halak Israel dompak Jahowa, Debatanasida

i, na manogihon nasida nangkok sian tano Misir, paluahon sian gomgoman ni si Firaun raja sian Misir, huhut ala marsomba nasida tu Debata sileban.

⁸Jala diihuthon nasida hasomalan ni halak parbegu, angka naung nionjar ni Jahowa nian maradophon halak Israel, dohot hasomalan angka na pinungkapungka ni angka raja sian Israel.

⁹Ala marsibuni huhut halak Israel marparangehon parange angka na so tama maradophon Jahowa, Debatanasida i, dipauli tahe di nasida angka tambak di bagasan saluhut hutanasida i, olat ni tungkup parhalan sahat ro di huta na gonting.

¹⁰Dipajongjong huhut di nasida angka tiang panombanombaan dohot sombaon di atas ni saluhut robean na timbo dohot di toru ni saluhut hau na rugun.

¹¹Huhut manutung daupa nasida disi di atas ni saluhut tambak maniru pambahenan ni halak kapi, angka naung pinabali ni Jahowa nian maradophon nasida, jala diulahon nasida angka hajahaton, asa pahehe muruk ni Jahowa dompak nasida.

¹²Huhut ala marsomba nasida tu angka ganaganaan, atik pe naung marlumba Jahowa tu nasida: Ndang jadi ulahononmuna sisongon i.

¹³Pola marpanindangion muse Jahowa di Israel dohot di Juda marhite sian pamangan

ni saluhut angka panurirangna dohot saluhut
jolma parpangungkapon mandok tu nasida:
Pauba hamu ma rohamuna sian dalamuna
angka na roa i, jala radoti hamu angka
tonangku dohot aturanku, hombar tu sandok
patik naung hupatikkon tu angka ompumuna
jala naung hutongoshon tu hamu marhite sian
angka naposongku, i ma angka panurirang i.

¹⁴Hape ndang ditangihon nasida, lam
ditangkangi do tangkuhuknasida, suang
songon tangkuhuk ni ompunasida, angka na
so porsea di Jahowa, Debatanasida i.

¹⁵Jala ditoishon rohanasida do angka
patikna dohot padan na binahenna i tu
ompunasida ro di panindangionna angka na
hinatindangkonna tu nasida, jala diihuthon
nasida ganaganaan angka na so hasea gabe
so hasea dohot nasida, jala marparange
nasida songon bangso parbegu angka
na humaliang nasida, atik pe naung pola
martona Jahowa tu nasida, ndang jadi nasida
marparange songon angka bangso parbegu i.

¹⁶Alai ditadingkon rohanasida do saluhut
tona ni Jahowa, Debatanasida i, jala dibahen
di nasida ganaganaan tuangan, i ma lembu
na dua i, jala dibahen di nasida angka
sombaon, pola marsinggang nasida huhut
marsomba tu saluhut parangan na di langit i,
jala marsomba nasida tu Baal.

¹⁷Huhut dipabolushon nasida angka anakna
dohot boruna sian api, diulahon nasida huhut

pangarundongan dohot partondungan, jala digadishon dirina laho mangulahon sogo ni roha ni Jahowa, asa pahehe murukna.

¹⁸Jadi tarrimas situtu ma Jahowa mida Israel, jala dipaholang nasida sian adopanna, ndang adong na tinggal, nda holan sasada marga Juda.

¹⁹Alai tahe nang halak Juda ndang diradoti angka tona ni Jahowa, Debatanasida i, nasida pe diihuthon do hasomalan angka na binahen ni Israel.

²⁰Ala ni dibolongkon Jahowa ma sandok pinompar ni Israel jala tarjimpot nasida dibahen, jala dipasahat nasida tu bagasan tangan ni halak partaban, paima Ibana mambolongkon nasida situtu sian adopanna.

²¹Ai nunga mamulik Israel sian pinompar ni si Daud, jala diparaja nasida si Jerobeam, anak ni si Nebat, jala diela si Jerobeam Israel marbalik sian Jahowa mangulahon dosa na dokdok situtu.

²²Jadi diihuthon halak Israel ma tu saluhut dosa ni si Jerobeam, angka na binahenna i, jala ndang sumurut nasida sian i.

²³Paima dipaholang Jahowa Israel sian adopanna, songon naung nilumbahonna hian marhite sian saluhut angka naposona, i ma angka panurirang i. Ala ni do umbahen tarbuang Israel sian tanona tu Assur rasirasa sadarion.

²⁴ (III.) Alai ro ma raja sian Assur disolukkon ma halak sian Babel dohot sian Kuta dohot sian Awa dohot sian Hamat dohot sian Separwaim mandokkon nasida maringan di angka huta ni Samaria singkat ni halak Israel; jadi disoluk nasida ma Samaria jala maringan di bagasan angka hutana.

²⁵ Alai anggo di mulana nasida maringan disi ndang marhabiaran nasida tu Jahowa, gabe ditongos Jahowa ma angka singa tu tongatonganasida, angka na mambunu nasida.

²⁶ Dung i ninna nasida ma tu raja sian Assur songon on: Bangso parbegu angka naung sinolukkonmi jala nidokkonmi maringan di bagasan angka huta ni Samaria, ndang diboto nasida sambutonna uhum ni Debata pangingini ni tano i, gabe ditongos Ibana angka singa tu tongatonganasida; jala ida ma, nunga dibunui angka nasida, ala so diboto nasida sambutonna uhum ni Debata pangingini ni tano i.

²⁷ Dung i ro ma hata ni raja sian Assur mandokkon: Togihon hamu ma tusi sahalak sian malim angka naung binuangkonmuna sian i, asa nasida laho maringan tusi, asa diajarhon tu nasida uhum ni Debata pangingini ni tano i.

²⁸ Dung i ro ma sahalak sian malim angka na binuangkon sian Samaria, jala maringan

ibana di Betel, jala diajarhon tu nasida parturena marhabiaran tu Jahowa.

²⁹(IV.) Hape ganup bangso masibahen debatana be jala dipampeakkon tu bagasan joro parsantian, angka na binahen ni halak Samaria, ganup bangso di bagasan huta, angka na niingananna be.

³⁰Ai halak Babel marsomba tu Sukot-Benot, jala halak Kuta marsomba tu Nergal, jala halak Hamat marsomba tu Asima.

³¹Jala halak Awa marsomba tu Nibhas dohot tu Tartak, jala halak Separwaim manutungi angka anakna di bagasan api marsomba tu Adramelek dohot tu Anamelek, i ma angka debata ni halak Separwaim.

³²Adong do huhut sian nasida marsomba tu Jahowa, laos dipabangkit ma sian tongatonganasida halak bahen angka malim di joro parsantian, angka na marhalado di bagasan angka joro parsantian.

³³Marhabiaran do nian nasida tu Jahowa, alai huhut nasida marsomba tu angka debata sileban di nasida be, hombar tu hasomalan ni ganup bangso parbegu, haroroannasida i.

³⁴Rasirasa sadarion sai dijujur nasida do hasomalannasida najolo; ndang marhabiaran nasida tu Jahowa, jala ndang haru dijujur nasida hombar tu ruhut dohot hasomalannasida hian, manang hombar tu patik dohot tona, na tinonahon ni Jahowa tu

pinompar ni si Jakkob, na marimbang goar Israel binahenna i.

³⁵Pola marpadan Jahowa dohot nasida, jala ditonahon tu nasida songon on: Unang marhabiaran hamu tu angka debata sileban, jala unang marsomba hamu tusi, jala unang hamu marpangoloion tusi, jala unang hamu mamele tusi.

³⁶Holan tu Jahowa, na manogihon hamu ruar sian Misir marhite sian hagagoon godang dohot marhite sian tangan na toltol hamu tama marhabiaran, jala marsomba tu Ibana, jala mamele tu Ibana.

³⁷Angka aturanna pe dohot uhum dohot patik dohot tona, angka naung sinurathonna tu hamu, tama ingkon radotanmuna laho mangulahon tongtong, jala unang hamu marhabiaran tu angka debata sileban!

³⁸Padan na hubahen i pe tu hamu, ndang jadi halupahononmuna, asa unang hamu marhabiaran tu debata sileban.

³⁹Ingkon marhabiaran tu Jahowa, Debatamuna i hamu, asa Ibana paluahon hamu sian tangan ni saluhut musumuna.

⁴⁰Alai ndang ditangihon nasida, sai diulahon nasida do hombar tu hasomalannasida na jolo.

⁴¹Asa tole angka bangso on marhabiaran tu Jahowa, tole huhut marsomba tu angka ganaganaannasida nang anaknasida, nang pahompunasida, laos songon i do dibahen,

maniru pambahen ni amanasida rasirasa sadarion.

18¹ (I.) Patolutaonhon dung gabe raja sian Israel si Hosea, anak ni si Ela, bangkit raja sian Juda ma si Hiskia, anak ni si Ahas.

²Marumur duapulu lima taon ibana di na bangkit raja; jala duapulu sia taon lelengna ibana mangarajai di Jerusalem; ia goar ni inana, i ma si Abia, boru ni si Sakaria.

³Jala diulahon ibana do lomo ni roha ni Jahowa, sandok songon na binahen ni si Daud, ompuna i.

⁴Dilohai ibana huhut angka tambak jala dibolai angka ganaganaan, jala dipansingkon angka sombaon Asera, jala dirosahi ulok tombaga na binahen ni si Musa; ai rasirasa tingki uju i, sai manutungi daupa halak Israel tusi, jala digoar do i Nehustan.

⁵Marhaposan tu Jahowa, Debata ni Israel do ibana, jala sian nasa raja di Juda angka na umpudi sian ibana, ndang adong tudoshon ibana marroha, nang sian angka raja na jumolo sian ibana.

⁶Sai marsilohot do rohana tu Jahowa, ndang dipasurut rohana sian Ibana jala diradoti tonana, angka na tinonahon ni Jahowa tu si Musa.

⁷Dibahen i, sai didongani Jahowa do ibana, manang tudia pe ibana mangalangka, sai na

manjadi do i. Laos mamulik ibana huhut sian raja di Assur, ndang be mangunduk tusi.

⁸Dipapatu ibana huhut halak Palistim sahat ro di Gaza dohot partalpahannasida, olat ni tungkup parhalan sahat ro di huta na gonting.

⁹(II.) Paopattaonhon dung gabe raja si Hiskia, i ma taon papituhon dung gabe raja sian Israel si Hosea, anak ni si Ela, nangkok ma si Salmanaser, raja sian Assur marporang dompak Samaria, jala ditungkum do i.

¹⁰Jala ditaban do i dung salpu tolu taon, i ma paonomtaonhon hinarajahon ni si Hiskia jala pasiataonhon hinarajahon ni si Hosea, raja sian Israel, disi ma tartaban Samaria.

¹¹Jala dibuangkon raja sian Assur do halak Israel tu Assur, jala didokkon nasida maringan di Hala dohot di Habor martopihon batang aek Gozan dohot tu angka huta ni halak Madai.

¹²Ala na so tinangihonnasida soara ni Jahowa, Debatanasida i, jala dilaosi nasida padan binahenna i dohot sude na tinonahon ni si Musa, naposo ni Jahowa; ndang ditangihon nasida jala ndang diulahon.

¹³(III.) Alai pasampuluopattaonhon dung gabe raja si Hiskia, nangkok ma si Sanherib, raja sian Assur, marporang dompak sude huta ni Juda angka na gonting i, jala dipapatu do i.

¹⁴Dung i disuru si Hiskia, raja sian Juda ma suruanna tu Lakis manopot raja sian Assur mandok tu ibana: Nunga mardosa ahu; sai sumurut ma ho sian ahu, manang sadia

pe ampehononmu tu ahu jomba bahal, sai gararonku do i. Jadi diampehon raja sian Assur ma tu si Hiskia, raja sian Juda, tolu ratus talenta perak dohot tolupulu talenta sere.

¹⁵Jadi dilehon si Hiskia ma sandok perak na jumpang di bagasan joro ni Jahowa dohot di bagasan bilut parpeopan arta di bagas ni rajai.

¹⁶Di tingki uju i ma dilongkangi si Hiskia, raja sian Juda, nasa sere sian pintu ni joro ni Jahowa dohot sian tiang angka na nilampisanna sandiri, jala dilehon do i tu raja sian Assur.

¹⁷Hape lam disuru raja sian Assur do si Tartan dohot si Rabsaris dohot si Rabsake mardongan parangan mansai torop sian Lakis tu Jerusalem manopot raja Hiskia. Jadi nangkok ma nasida; dung sahat nasida tu Jerusalem, mangulon ma nasida mardonokkon halian aek ni ambar parjulu i, na di lambung dalan na bolon ni ladang panunsian.

¹⁸Dung i joujou ma nasida tu rajai. Jadi ruar ma manopot nasida si Eliakim, anak ni si Hilkia, siramoti bagas i dohot si Sebna, juaratulis i dohot si Joa, anak ni si Asap, panuturi i.

¹⁹Dung i didok si Rabsake ma tu nasida: Ua paboa hamu ma tu si Hiskia: Songon on do

hata ni raja na bolon, raja sian Assur: Tung aha ma pangatauan, na pinangasahonmu?

²⁰Nimmu do: Hatahata ni bibir sambing do i, adong dope tahi dohot hahuasoon tu hamusuon. On pe, tung tu ise ma ho marhaposan, umbahen tung hum roham naeng marbalik sian ahu?

²¹Ida ma, rupa marhaposan do ho tu tolong na marosak on, i ma Misir, manang ise jolma na martungkothon ibana, tombukonna do tanganna. Songon i do si Firaun, raja sian Misir tu sude jolma na marhaposan tu ibana.

²²Alai tung sura naeng dohononmuna tu ahu: Marhaposan tu Jahowa, Debatanami do hami! Nda Ibana do nampuna sombaon dohot langgatan, angka na niloha ni si Hiskia, jala didok do tu Juda dohot tu Jerusalem: Di adopan ni langgatanon do hamu marsomba di Jerusalem.

²³On pe, ua martaru ma ho dohot tuanku, raja sian Assur, asa hulehon tu ho dua ribu hoda, manang tuk ma tarlehon ho jolma na mangkunduli?

²⁴Tung beha ma panahanmu mangalo nanggo bohi ni sahalak partogi sian angka naposo apala na ummetmet ni tuanku? Hape tung marhaposan do ho tu Misir, ala hureta dohot ala angka jolma parsihundul.

²⁵On pe, dirimpu ho na so mangasahon Jahowa ahu laho nangkok tu tano on asa husiaphon? Jahowa do tahe naung mandok tu

ahu: Nangkok ma ho tu tano on jala siaphon ma il!

²⁶(IV.) Dung i ninna si Eliakim, anak ni si Hilkia dohot si Sebna dohot si Joa ma tu si Rabsake: Ua hata Ram ma dok tu hami angka naposomon, ai huantusi hami do i, jala unang dok hata Jahudi tu hami di adopan ni situan na torop, na di atas parik.

²⁷Alai ninna si Rabsake ma tu nasida: Tung tu tuanmu huroha dohot tu ho disuru tuanku ahu mandok angka hata on? Nda huhut do tu baoa angka na hundul di atas parik, angka na manganhon ginagatnasida dohot manginum teposnasida rap dohot hamu?

²⁸Jadi hehe ma si Rabsake dipangiar ma soarana mandok di hata Jahudi: Tangihon hamu ma hata ni raja na bolon, raja sian Assur!

²⁹Songon on do hata ni rajai: Unang olo hamu paotootoon ni si Hiskia, ai ndang tarbahen ibana paluahon hamu sian tanganna.

³⁰Jala unang olo hamu paposon ni si Hiskia mangasahon Jahowa mandok: Sai na paluaon ni Jahowa do hita, ndang tagamon pasahatonna huta on tu bagasan tangan ni raja sian Assur.

³¹Unang tangihon hamu hata ni si Hiskia, ai songon on do hata ni raja sian Assur: Lehon hamu ma jomba bahal tu ahu, jala ruar hamu mandapothon ahu, asa ganup hamu mangan

sian hau anggurna dohot sian hau antajauna, jala minum tapian ganup sian sumurna.

³²Paima ro ahu jala hualap hamu tu tano na songon tanomuna i, tu tano hatubuan ni eme dohot anggur, tu tano na lobian di roti dohot di porlak anggur, tu tano na lobian di hau jetun dohot di situak ni loba, asa laos mangolu hamu jala unang mate. Sai unang tangihon hamu hata ni si Hiskia, ai na paotootohon hamu do ibana molo didok: Sai paluaon ni Jahowa do hita.

³³Atehe, nunga tung dipalua debata ni angka bangso parbegu ganup luatna be, sian tangan ni raja sian Assur?

³⁴Didia do nuaeng angka debata sian Hemat dohot sian Arpad? Didia do angka debata sian Separwaim, Hena dohot Iwa? Tung adong ma na paluahon Samaria sian tanganku?

³⁵Tung ise ma sian sude debata ni angka luat ondeng na tuk paluahon tanonasida sian tanganku, umbahen muba huroha ia Jerusalem paluaon ni Jahowa sian tanganku?

³⁶Jadi sip be ma situasi na torop i, jala ndang adong na mangalusi ibana nanggo sandok, ai songon i do tona ni rajai: Unang alusi hamu ibana!

³⁷Dung i ro ma si Eliakim, anak ni si Hilkia, panahatan ni bagas i dohot si Sebna, juaratulis i dohot si Joa, anak ni si Asap panuturi i manopot si Hiskia, marulos na

maribak, laho paboahon tu ibana angka hata ni si Rabsake.

19¹ (I.) Jadi dung dibege raja Hiskia hata i, diribahi ma pangkeanna jala marulos tangki ibana laho manopot joro ni Jahowa.

²Dung i disuru ma si Eliakim, panahatan ni bagasna i dohot si Sebna, juaratulis i rap dohot malim angka na tumua i, rap marulos tangki be manopot panurirang Jesaya, anak ni si Amos.

³Asa dohononnasida tu ibana: Songon on do hata ni si Hiskia: Ari hagogotan dohot paminsangon dohot haurahon do ari on, ai nunga jumpang nian hasasanga ni posoposo tubu, hape ndang adong gogo laho manubuhon.

⁴Anggiat tung dibege Jahowa, Debatam hata ni si Rabsake, angka na tinonahon ni raja sian Assur tuanna i, laho manginsahi Debata na mangolu i, anggiat ditorui ibana ala ni hata angka naung binege ni Jahowa, Debatam; antong patolhas ma tangiangmi mangondihon pasipasi na jumpang i.

⁵Jadi dung sahat angka naposo ni raja Hiskia tu si Jesaya.

⁶Ro ma hata ni Jesaya tu nasida mandok: Songon on do dohononmuna tu tuanmuna i: Songon on do hata ni Jahowa: Unang ho mabiar maradophon hata angka naung binegem, angka naung niinsakkon ni angka naposo ni raja sian Assur, palea Ahu.

⁷Ida ma, Ahu ma mangalehon tu bagasan rohana sada tondi, asa begeonna barita jala mulak tu tanona, asa Ahu mangaragehon ibana marhitehite podang di bagasan tanona sandiri.

⁸(II.) Dung i mulak ma si Rabsake, gabe marmusu dompak Libna raja ni Assur i didapot; ai nunga tarbortik hian tu pinggolna naung borhat ibana sian Lakis.

⁹Jala dibege barita taringot tu si Tirhaka, raja sian Kus didok halak: Ida ma, nunga borhat ibana laho marmusu dompak ho! Jadi diulahi ma marsuru angka suruanna manopot si Hiskia mandok:

¹⁰Songon on ma dok hamu tu si Hiskia, raja sian Juda: Unang olo ho paotootoon ni Debatam, na pinangasahonmu mandok: Ndang tagamon pasahatonna Jerusalem tu bagasan tangan ni raja sian Assur.

¹¹Ida ma, nunga dibege ho na binahen ni angka raja sian Assur tu sude angka luat laho mangarendephon angka i, ia ho hape, tung tagamon ma ho malua?

¹²Tung adong ma angka debata ni bangso parbegu na tuk paluahon nasida, angka na siniaphon ni angka daompung, i ma Gozan, Haran, Resep dohot angka anak ni Eden, angka na maringan di Telasar?

¹³Didia nuaeng raja sian Hamat dohot raja sian Arpad dohot raja sian huta Separwaim, Hena dohot Iwa?

¹⁴ Jadi dibuat si Hiskia ma surat i sian tangan ni angka suruani, jala dijaha, dung i nangkok ma ibana tu joro ni Jahowa, jala dipaherbang raja Hiskia ma surat i di adopan ni Jahowa.

¹⁵ Dung i martangiang ma si Hiskia tu Jahowa: Ale Jahowa, Debata ni Israel, na marhabangsahon angka kerubim, sasada Ho do Debata ni saluhut harajaon di tano on, Ho do na tumompa langit dohot tano on!

¹⁶ Sai paeleng ma pinggolmu, ale Jahowa, jala tangihon! Sai patonggor ma matam, ale Jahowa, jala ida, jala tangihon sude hata ni si Sanherib, angka na tinonahonna i laho mangarehei Debata na mangolu i.

¹⁷ Tongon tahe, ale Jahowa, nunga nian disiaphon angka raja sian Assur saluhut angka bangso parbegu dohot luatnasida i.

¹⁸ Jala nunga ditimpalhon tu api angka debatanasida i, ai ndang tongon debata angka i, jadijadian ni tangan ni jolma do tahe, hau dohot batu, umbahen disiaphon angka i.

¹⁹ On pe, ale Jahowa, Debatanami, sai palua ma hami sian tanganna, asa tung mananda saluhut harajaon di tano on, paboa sasada Ho do Debata, ale Jahowa!

²⁰ (III.) Dung i marsuru suruanna ma si Jesaya, anak ni si Amos manopot si Hiskia mandok tu ibana: Songon on do hata ni Jahowa, Debata ni Israel: Anggo naung pinangidom sian Ahu taringot tu si Sanherib, raja sian Assur, nunga hutangihon.

²¹ On do hata na tinonahon ni Jahowa dompak ibana: Mamaus jala mangarehe mida ho do namarbaju boru Sion i, mangupir do ia ulu ni boru Jerusalem sian pudim.

²² Ise tahe naung nireheanmu jala nielesanmu? Jala dompak ise dipangiar ho soaram, jala mamaus matam dompak ginjang? Dompok na badia ni Israel do tahe!

²³ Marhite sian pamangan ni angka naposom dielesi ho Tuhan i, jala nimmu do: Binahen ni hinadeak ni angka huretangku, ahu manaek tu ginjang ni angka dolok, tu partalpahan ni Libanon, asa hutaba angka hau Ares na timbo i, dohot angka marantina na dumenggan i, jala tolhas ahu tu punsuna, tu tombak hasoloanna.

²⁴ Nunga huhali jala huinum aek na pulik, jala nunga huarsik marhitehite palak ni pathu sude sunge ni Misir.

²⁵ Ndang dung dibege ho dope naung songon i hubahen sian na robi, di angka ari na galia hujadihon i? Nuaeng pe asa huparo, ingkon siap bahenonmu angka huta na gonting bahen timbunan batu.

²⁶ Jala angka pangisina i partangan na so marnangon i, ingkon tarsonggot do jala tarurak; ingkon manjadi duhutduhut di ladang do nasida dohot ingkau rata, songon ri tu angka tarup, jala antinganon eme tagan so bibi dope.

²⁷ Nunga huboto hian hundulanmu dohot haruruarmu dohot habobongotmu dohot pangogaogaonmu dompak Ahu.

²⁸ Ala na mangoga ho dompak Ahu, jala tolhas tu pinggolhu hajungkatonmu, jadi bahenonku ma harihir tu igungmu dohot kokang tu bibirmu, jala toguonku ma ho mulak sian dalan haroroanmi.

²⁹ Jala on ma partinandaan di ho: Panganonmu ma sataon on eme sagak dohot di taon paduahon, alai anggo patolutaonhon manabur ma hamu jala manggotil jala manuan porlak anggur jala panganonmu parbuena.

³⁰ Jala datdatan ni angka na malua sian pinompar ni Juda, angka pasipasina i ma marurat tu toru jala marparbuehon parbue tu ginjang.

³¹ Ai sian Jerusalem do ruar pasipasi dohot angka na malua sian dolok Sion. Hamuruhon ni Jahowa Zebaot patupahon songon i.

³² Dibahen i, songon on do hata ni Jahowa taringot tu raja sian Assur: Na so tupa ibana bongot tu huta on manang siorhononna tusi nanggo sada sumbia, manang dapothononna marlombulombu, manang bahenonna hubu humaliang huta i.

³³ Ingkon sian dalan haroroanna ibana mulak, alai anggo tu huta on na so tupa ibana bongot, ninna Jahowa.

³⁴ Ai ingkon Ahu mangondingi huta on laho paluahon, ala ni Ahu dohot ala ni naposongku si Daud.

³⁵ (IV.) Dung i laos di borngin na sasada i, ruar ma suruan ni Jahowa, jala dibunu di parsaroan ni Assur saratus ualupulu lima ribu halak. Jadi dung hehe nasida sogot manogotna i, ida ma, saluhut nasida nunga gabe bangke.

³⁶ Jadi borhat ma si Sanherib, raja sian Assur laho mulak, laos maringan ibana di Ninive.

³⁷ Jadi uju na marsomba ibana di bagasan joro ni Nisrok debatana i, roma si Adramelek dohot si Sar-Eser, angka anakna i mambunu ibana marhitehite podang, dung i maporus ma nasida tu tano Ararat. Jadi si Esarhaddon, anakna i, bangkit raja singkatna.

20¹ (I.) Di angka ari uju i marsahit ma si Hiskia, pola matemate ne. Jadi ro ma manopot ibana panurirang Jesaya, anak ni si Amos, jala didok mandok ibana: Songon on do hata ni Jahowa: Pature ma bagasmu, ai na mate ma ho, ndang tagamon mangolu be.

² Dung i dipahusor rajai ma bohina dompak dorpi, jala martangiang tu Jahowa songon on:

³ Oe ale Jahowa, sai marningot ma Ho na marpangalaho i ahu di adopanmu, di bagasan hasintongan dohot punia ni roha, jala na huulahon na denggan di adopan ni bohim, huhut tumatangis situtu si Hiskia.

⁴Alai ndang dope ruar si Jesaya sian tongatonga ni huta i, nunga ro muse hata ni Jahowa tu ibana songon on:

⁵Mulak ma ho, jala dok ma tu si Hiskia, partogi ni bangsongku: Songon on do hata ni Jahowa, Debata ni ompum si Daud: Nunga hutangihon tangiangmi, nunga huida partangisonmi; ida ma, pamalumonku ma ho, di ari patoluhon i tarbahen ho ma nangkok tu joro ni Jahowa!

⁶Jala Ahu manambai tu angka ariarim sampulu lima taon nari, jala Ahu paluahon ho dohot huta on sian tangan ni raja di Assur, jala ondinganku do huta on ala Ahu dohot ala ni si Daud naposongki.

⁷Dung i ninna si Jesaya ma: Boan hamu tuson hare sian antajau. Jadi diboan nasida ma i, jala dilanggumhon tu atas baro ni rajai, gabe malum dihilala.

⁸Dung i ninna si Hiskia ma tu si Jesaya: Dia do partinandaan paboa na tutu pamalumon ni Jahowa ahu, jala tarbahen ahu patoluarohon nangkok tu joro ni Jahowa?

⁹Dung i ninna si Jesaya ma: On ma partinandaan di ho sian Jahowa, paboa pasauton ni Jahowa do hata naung nidokna i: Ingkon dompak dia dohononku mardalan halinu ni angka gurat, na dompak jolo do manang na dompak pudi?

¹⁰Jadi didok si Hiskia ma: Mura do halinu i anggo gistang tu jolo sampulu gurat, ndada

i, ingkon mulak tu pudi do halinu i sampulu gurat.

¹¹ Jadi joujou ma panurirang Jesaya tu Jahowa, gabe dipaulak Jahowa ma halinu ni gurat i angka naung mijur di jom ni si Ahas sampulu gurat tu pudi.

¹² (II.) Di tingki uju i ma disuru Merodak-Baladan, anak ni si Baladan, raja sian Babel suruanna mamboan surat dohot silua tu si Hiskia, ai nunga tarbortik tu pinggolna na marsahit i si Hiskia.

¹³ Jadi las ma roha ni si Hiskia mida angka suruani, jala dipatuduhon tu nasida sandok bagas parpeopan ni artana, ro di perak dohot sere, ro di angka pamurpuri dohot miak na hushus, ro di nasa bagas parpeopan ni sinjata dohot sude na jumpang di angka bagas parpeopan ni artana; tung na so adong do nanggo sada na so pinatuduhon ni si Hiskia tu nasida tole di bagasan bagasna dohot di sandok harajaonna.

¹⁴ Dung i ro ma panurirang Jesaya tumopot raja Hiskia, jala didok ma tu ibana: Aha do didok angka baoa i, jala sian dia do nasida ro manopot ho? Jadi ninna si Hiskia ma: Sian luat na dao do nasida ro, sian Babel tahe.

¹⁵ Dung i ninna si Jesaya ma muse: Aha do na niidanasida di bagasan jabum? Dung i ninna si Hiskia ma: Nasa na di bagasan jabungku nunga diida nasida; nda tung adong nanggo sada di bagasan angka jabu

parpeopan ni artangki, na so hupatuduhon i tu nasida.

¹⁶Dung i ninna si Jesaya ma tu si Hiskia: Tangihon ma hata ni Jahowa!

¹⁷Ida ma, na ro do angka ari sogot, tarboan ma disi nasa na di bagasan jabum dohot na sinamotsamot ni angka ompum rasirasa sadarion tu Babel; ndang adong teba nanggo sada, ninna Jahowa.

¹⁸Jala sian anakmu, angka na marama tu ho, angka situbuhononmu dope, buatonnasida ma, asa gabejolma suruanna di bagasan bagas ni raja sian Babel.

¹⁹Dung i ninna si Hiskia ma tu si Jesaya: Denggan do hata ni Jahowa, na nidokmi. Angkup ni didok muse: Asal sonang jala mardemak saleleng mangolu ahu!

²⁰(III.) Jamita na tinggal i dope sian si Hiskia ro di sandok huasona dohot na binahenna i ambar dohot halian aek, asa manogunogu aek tu bagasan huta, nda tarsurat do i di bagasan buku jamita ni angka raja sian Juda?

²¹Dung i monding ma si Hiskia, gabe top dohot angka ompuna, jala si Manasse, anakna i bangkit raja singkatna.

21¹(I.) Marumur sampulu dua taon dope si Manasse di na bangkit raja ibana, jala limapulu lima taon lelengna ibana mangarajai di Jerusalem; ia goar ni inana i ma Nai Hepsiba.

²Dung i diulahon rajai na sogo ni roha ni Jahowa, hombar tu biasbias angka na niulahon ni bangso parbegu, angka naung pinabali ni Jahowa nian maradophon halak Israel.

³Jala diulahi rajai paulihon joro parsantian, angka naung nilohaian ni si Hiskia, amana i, jala dipajongjong angka langgatan di Baal, jala dibahen sada sombaon Asera, suang songon na binahen ni si Ahab, raja sian Israel, jala marsomba ibana tu sandok parangan di langit, jala marpangoloion tusi.

⁴Jala dipajongjong angka langgatan di bagasan joro ni Jahowa, taringot tusi nunga pola didok Jahowa hian: Di Jerusalem do pahotonku Goarhu.

⁵Angkup ni, dipauli do angka langgatan di sandok parangan di langit di bagasan na dua alaman ni joro ni Jahowa.

⁶Jala dipabolushon anakna sandiri sian bagasan api, diulahon do huhut pangarundingon dohot parsibalikmataon, jala dipabangkit angkajolma bahen hasandaran ni begu dohot partondung, tung na godang situtu do diulahon sogo ni roha ni Jahowa, asa pahehe rimasna.

⁷Dipajongjong huhut ganaganaan Asera naung binahenna i tu bagasan joro, naung pola nian didok Jahowa hian tu si Daud dohot tu si Salomo anakna i songon on: Tu bagasan joro on dohot tu bagasan Jerusalem,

naung hupilliti sian saluhut marga ni Israel,
pahotonku Goarhu ro di salelenglelengna.

⁸Jala ndang be paunsatonku pat ni
Israel sian tano, naung hubasabasahon tu
ompunasida i, asal diringkoti nasida laho
mangulahon hombar tu saluhut naung
hutonahon i tu nasida, jala diihuthon tu
sandok patik naung tinonahon ni naposongku
si Musa tu nasida.

⁹Alai ndang ditangihon nasida hata i,
ai dililuhon si Manasse do nasida laho
mangulahon hajahaton, gumodang sian
bangso parbegu, angka naung nirendephon ni
Jahowa maradophon halak Israel.

¹⁰(II.) Dung i marlumba ma Jahowa marhite
sian pamangan ni angka naposona, i ma
angka panurirang i, ninna ma:

¹¹Ala naung diulahon si Manasse, raja
sian Juda biasbiason, angka na rumoa
sian saluhut na niulahon ni halak Amori,
angka na jumolo sian ibana, tole dohot Juda
diela mangulahon dosa marhite sian angka
ganaganaan binahenna i.

¹²Dibahen i songon on do hata ni Jahowa,
Debata ni Israel: Ida ma, paroonku ma jea tu
Jerusalem dohot tu Juda, ganup na umbegesa
pola tung marnginging pinggolna duansa.

¹³Jala pagistangonku ma tu atas ni
Jerusalem hotang pamalok ni Samaria dohot
tali rambu ni pinompar ni si Ahab, jala
buriapus Jerusalem bahenonku, songon

pangapusi ni halak di pinggan, jala ia dung diapusi dipatungkap do i panepnephon.

¹⁴Jala tadingkononku do pasipasi ni partalianku, jala pasahatonku nasida tu bagasan tangan ni musunasida, asa tabanon ni halak nasida jala ripe pupusan ni saluhut musuna.

¹⁵Ala na niulahon nasida i sogo ni rohangku, jala dipahehe murukku, olat ni ari na hutogihon i ompunasida i ruar sian Misir rasirasa sadarion.

¹⁶Angkup ni mansai godang situtu mudar na so marpipot didurushon si Manasse, pola tung gok Jerusalemi dibahen sian ujung na sada tu ujung na sadanari, di balik ni dosana na asing, na nielana i Juda mambahen dosa, laho mangulahon sogo ni roha ni Jahowa.

¹⁷Jamita na tinggal i dope sian si Manasse ro di sude na niulana dohot dosana na binahenna i, nda tarsurat do i di bagasan buku jamita ni angka raja sian Juda?

¹⁸Dung i monding ma si Manasse gabe top dohot angka ompuna, jala tartanom di bagasan porlak mardonokkon jabuna i, di bagasan porlak ni si Usa tahe, jala si Amon anakna i bangkit raja singkatna.

¹⁹(III.) Marumur duapulu dua taon si Amon di na bangkit raja ibana, jala dua taon lelengna ibana mangarajai di Jerusalem; ia goar ni inana i ma si Mesulemet, boru ni si Harus sian Jotba.

²⁰Jala diulahon ibana do sogo ni roha ni Jahowa, suang songon na binahen ni si Manasse amana i.

²¹Ai diihutihut ibana do sandok dalan na nidalaman ni amana i, jala dioloi do debata sileban, angka na nioloan ni amana i, jala marsomba do ibana tusi.

²²Jala ditadingkon do Jahowa, Debata ni angka ompuna, jala ndang marparange ibana di bagasan dalan ni Jahowa.

²³Dung i marbulan ma angka naposo ni si Amon mangalo ibana, jala dibunu rajai di bagasan jabuna.

²⁴Alai ro ma bangso isi ni luat i mambunu saluhutjolma angka na marbulani mangalo raja Amon. Jadi dipabangkit isi ni tano i ma si Josia anakna i, bahen raja singkatna.

²⁵Jamita na tinggal i dope sian si Amon ro di na niulana, nda tarsurat do i di bagasan buku jamita ni angka raja sian Juda?

²⁶Jadi tartanom ma ibana di bagasan tanomanna, di bagasan porlak ni si Usa tahe; jadi si Josia anakna i bangkit raja singkatna.

22¹(I.) Marumur ualu taon do si Josia di na bangkit raja ibana, jala tolupulu sada taon lelengna ibana mangarajai di Jerusalem; ia goar ni inana, i ma si Jedida, boru ni si Adaya sian Boskat.

²Jala diulahon ibana do lomo ni roha ni Jahowa, jala diihutihut do sandok dalan ni si

Daud ompuna i, jala ndang manambil ibana tu siamun manang tu hambirang.

³Jadi dung marumur sampulu ualu taon raja Josia, disuru rajai ma si Sapan, anak ni si Azalia, tubu ni si Mesulam, juaratulis i, tu joro ni Jahowa mandok:

⁴Nangkok ma ho manopot sintua ni malim Hilkia mandok tu ibana, ingkon etonganna perak na binoan tu joro ni Jahowa, angka na pinapungu ni halak sijaga pintu sian na torop i.

⁵Asa lehononna perak i tu bagasan tangan ni halak panahatan ni ulaon di bagasan joro ni Jahowa, asa nasida muse marsagihon tu halak pangula, angka na di bagasan joro ni Jahowa, asa patipakonna na sega di bagasan joro i.

⁶I ma tu halak tungkang hau dohot tu angka pande maninga dohot tu angka tungkang batu dohot tu halak angka na manuhori parhau dohot batu na nidakdak laho patipak joro i.

⁷Alai ndang pola masietongan nasida dohot baoa panahatan ni perak i, ai ingkon masihaposan do nasida.

⁸(II.) Dung i didok sintua ni malim Hilkia ma tu si Sapan juaratulis i: Nunga jumpang ahu buku patik i di bagasan joro ni Jahowa. Jadi dilehon si Hilkia ma buku i tu si Sapan, asa jahaonna.

⁹Dung i ro ma muse si Sapan juaratulis i tu jolo ni rajai, asa mamboan barita tu rajai, ninna ma: Nunga diusehon angka naposom perak na jumpang i di bagasan joro ni Jahowa, jala dilehon do i tu halak panahatan ni ulaon di bagasan joro ni Jahowa.

¹⁰Angkup ni dibaritahon si Sapan, juaratulis i tu rajai, ninna ma: Nunga dilehon malim Hilkia sada buku tu ahu. Jadi dijaha si Sapan ma buku i di adopan ni rajai.

¹¹Alai dung dibege rajai angka hata ni buku patik i, disansani rajai ma pangkeanna.

¹²Dung i ro ma hata ni rajai mandokkon malim Hilkia dohot si Ahikam, anak ni si Sapan dohot si Akbor, anak ni si Mikha dohot si Sapan, juaratulis i dohot si Asaya, parhalado ni rajai, ninna ma.

¹³Laho ma hamu manungkunhon tu Jahowa taringot tu ahu dohot taringot tu bangso i dohot taringot tu sandok Juda, ala ni hata ni angka buku on na jumpang i, ai tung na balga situtu do rimas ni Jahowa, na marsigorgor mida hita, ala so ditangihon ompunta i angka hata ni buku on mangulahon nian luhut na tarsurat tu hita disi.

¹⁴Dung i laho ma malim Hilkia, si Ahikam, si Akbor, si Sapan dohot si Asaya manopot panurirang Nai Hulda,jolma ni si Sallum, anak ni si Tikwa, anak ni si Harhas, siramoti pangkean Alai maringan do Nai Hulda di

Jerusalem partoruan, gabe mangkatai nasida dohot ibana.

¹⁵(III.) Dung i ninna Nai Hulda ma tu nasida: Songon on do hata ni Jahowa, Debata ni Israel: Paboa hamu ma tu baoa na marsuru hamu manopot ahu.

¹⁶Songon on do hata ni Jahowa: Ida ma, paroonku ma jea tu huta on dohot tu jolma isina i, hombar tu saluhut hata ni buku i, angka naung jinaha ni raja sian Juda.

¹⁷Ala naung tinadingkon nasida i Ahu jala manutung daupa nasida tu angka debata sileban, asa pahehe rimashu marhite sian sude pambahenan ni tanganna, gabe ingkon marsigorgor rimashu mida inganan on, jala ndang be haintopan.

¹⁸Alai anggo tu raja sian Juda, na marsuru hamu laho manungkunhon tu Jahowa, ingkon songon on do dohononmuna tu ibana: Songon on do hata ni Jahowa, Debata ni Israel, anggo taringot tu hata angka naung binegem i:

¹⁹Ala naung mangilala roham, jala dipaunduk ho dirim di adopan ni Jahowa, dung dibege ho hata angka na hulumbahon i dompak huta on, dohot dompak jolma pangisina i, ingkon gabe halongonan do i jala sipulaspulason ni halak; ala naung diribahi ho pangkeanmu huhut tumatangis di adopan ni Bohingku, Ahu pe nunga hutangihon ho, ninna Jahowa.

²⁰Dibahen i, ida ma, Ahu sandiri papunguhon ho tu angka ompum, asa marsonangsonang ho papunguonna tu bagasan tanomanmu, asa unang sanga idaon ni matami saluhut jea na naeng paroونku tu atas ni huta on. Jadi diboan nasida ma hata i tu rajai.

23¹(I.) Dung i disuru rajai ma suruanna asa paluhuthon tu jolona saluhut sintua sian Juda dohot Jerusalem.

²Dung i nangkok ma rajai tu joro ni Jahowa rap dohot sude baa sian Juda dohot sude pangisi ni Jerusalem ro di angka malim dohot panurirang dohot sandok situasi na torop i, tole angka na metmet ro di na magodang, laos didokkon ma manjaha tu pinggolnasida saluhut hata ni buku parjanjian na jumpang i di bagasan joro ni Jahowa.

³Dung i jongjong ma rajai tu lambung tiang i laho mambahen parpadanan di adopan ni Jahowa, ingkon naeng magihuthon tu Jahowa dohot mangaradoti angka tonana dohot panindangionna dohot aturanna sian nasa rohana dohot sian nasa ateatena laho pahothon hata ni padan on, angka na tarsurat di bagasan buku on. Jadi sandok bangso i mangundukkon padani.

⁴(II.) Dung i didokkon rajai ma sintua ni malim Hilikia dohot angka malim paidua dohot angka sijaga pintu, asa paruaronna sian joro ni Jahowa sude ulaula angka na pinauli di Baal dohot di sombaon Asera dohot

di sandok parangan di langit, laos ditutung ibana ma luhutna i di balian ni Jerusalem, di angka ladang martopihon sunge Kidron, jala sirabunna i didokkon do boanon tu Betel.

⁵Dung i dipaijur rajai ma halak malimmalim, angka na pinabangkit ni angka raja sian Juda, asa manutung daupa nasida di atas tambak angka na di bagasan huta ni Juda dohot humaliang Jerusalem; tole huhut angka jolma na manutung daupa di Baal, di mata ni ari, di bulan dohot di sude bintang, i ma sandok parangan di langit.

⁶Didokkon rajai huhut paruaron ganaganaan Asera sian joro ni Jahowa tu balian ni Jerusalem, tu rura ni sunge Kidron, laos ditutung do i di rura ni Kidron, jala digopui gabe sirabun, jala sirabunna i disaburhon do tu tanoman ni halak situan na torop i.

⁷Angkup ni dilohai do angka bagas ni baoa angka na marjolmahon baoa, angka na mardonokkon joro ni Jahowa, inganan ni parompuan angka na martonun abit undungundung di sombaon Asera.

⁸Dung i didokkon ma ro sude malim sian angka huta ni Juda, jala diramuni angka tambak, panutungan ni angka malim di daupa, olat ni Geba sahat ro di Beerseba, jala dilohai do angka tambak di partungkoan, tole tambak di haroroan tu bahal ni si Josua, induk ni huta i, na di hambirang ni ganup jolma na masuk tu bahal ni huta i.

⁹Alai anggo angka malim ni tambak, ndang jadi mamele di atas ni langgatan ni Jahowa na di Jerusalem, asal mangan sagusagu na so niasoman nasida di tongatonga ni angka hahaanggina.

¹⁰Diramuni ibana huhut Topet na di rura ni angka anak ni si Hinnom, asa unang tarbahen manang ise be pabolushon anakna manang boruna sian api laho mamele tu Molok.

¹¹Dipaholang do huhut hoda, angka na niapus ni angka raja sian Juda pasahathon tu mata ni ari sian lambung pintu laho bongot tu joro ni Jahowa tungkan bilut panganan ni Netan-Melek ni halak parhalado na maringan di angka alaman, alai anggo hureta ni mata ni ari ditutung do i di bagasan api.

¹²Dilohai raja huhut langgatan angka na di atas tarup ni bilut parginjang ni si Ahas, angka na pinauli ni angka raja sian Juda; tole langgatan angka na pinauli ni si Manasse di na dua alaman ni joro ni Jahowa, ndang adong tinggal disi nanggo sada, jala sirabunna i disirsirhon do tu sunge Kidron.

¹³Tole tambak angka na di adopan ni Jerusalem, tungkan siamun ni dolok hamagoan, angka na pinauli ni si Salomo raja sian Israel di sombaon Astarot, biasbias ni halak Sidon dohot di Kamos, biasbias ni halak Moab dohot di Milkom, biasbias ni halak Amon, luhutna i diramuni rajai do.

¹⁴Diponggolhon huhut angka tiang panombanombaon jala ditaba angka sombaon Asera, jala digohi hajongjonganna i dohot holiholi ni halak na mate.

¹⁵Tole muse langgatan na di Betel, dohot tambak na pinauli ni si Jerobeam, anak ni si Nebat, na mangela Israel mambahen dosa, langgatan na sasada i dohot tambak i dilohai rajai do jala ditutung do ia tambak i jala disirabuni, disurbu dohot sombaon Asera.

¹⁶(III.) Dung i dibereng si Josia ma humaliang, gabe diida tanoman angka na disi di atas dolok, jala disuru suruanna mangongkal angka holiholi sian angka tanoman i jala ditutung do i di atas langgatan i laho paramunhon, hombar tu hata ni Jahowa, naung jinouhon ni halak ni Debata hian na palumbahon angka hata on.

¹⁷Dung i ninna rajai ma muse: Hinambor ni ise do i na huida on? Jadi ninna angka baoa isi ni huta i ma tu ibana: Hinambor ni halak ni Debata do i, na ro sian Juda jala na manjouhon angka hata i na binahenmi nuaeng tu langgatan na di Betel.

¹⁸Dung i ninna raja ma: Pasombu hamu ma ibana modom, ndang jadi haoran ni manang ise holiholina! Jadi diolani nasida ma holiholina i rap dohot holiholi ni panurirang na ro sian Samaria.

¹⁹Angkup ni, dilohai si Josia huhut saluhut joro parsantian, angka na di bagasan huta ni

Samaria, angka na pinauli ni angka raja sian Israel, pahehe rimas ni Jahowa, jala dibahen tusi sandok songon na binahenna i di Betel.

²⁰Dung i diseati ma saluhut malim ni joro parsantian, angka na disi, di atas ni angka langgatan, jala ditutungi holiholi ni jolma di atasna, dung i mulak ma ibana tu Jerusalem.

²¹Dung i didok rajai ma tu sandok situasi na torop i songon on: Marulaon Paska ma hamu di Jahowa, Debatamuna i, songon na tarsurat di bagasan buku parpadanan on.

²²Ai ndang dung marulaon Paska nasida songon sahalion, olat ni tingki ni panguhum, angka na parenta halak Israel ro di sandok tingki ni angka raja sian Israel dohot sian Juda.

²³Pasampuluualutaonhon hinarajahon ni si Josia marulaon Paska nasida tu Jahowa di Jerusalem.

²⁴(IV.) Dipaholang raja Josia huhut saluhut halak hasandaran ni begu dohot partondung dohot terapim dohot ganaganaan ro di sude biasbias angka na dapot idaon di tano Juda dohot di Jerusalem, asa pahothon hata ni patik i ibana, angka na tarsurat di bagasan buku na jumpang malim Hilkia di bagasan joro ni Jahowa.

²⁵Jala tudoshon ibana ndang adong nanggo sada sian angka raja na jumolo sian ibana, na paubahon rohana tu Jahowa sian nasa rohana dohot sian nasa ateatena dohot sian nasa

gogona, hombar tu sandok patik ni si Musa, jala sian pudina pe ndang adong hehe raja songon ibana marroha.

²⁶Alai atik pe songon i ndang marpangulahi roha ni Jahowa sian parpiarpiar ni rimasna na godang i, sai marsigorgor do rimasna mida Juda ala saluhut pinggilpinggil na binahen ni si Manasse pahehe murukna i.

²⁷Dung i ninna Jahowa ma: Nang Juda paholonganku do sian adopan ni Bohingku, songon naung hupaholangi Israel, jala bolongkononku ma huta on naung hupilliti, i ma Jerusalem, dohot joro naung pola hudok nian: Ingkon disi maringan Goarhu!

²⁸Jamita na tinggal i dope sian si Josia ro di sude na niulana, nda tarsurat do i di bagasan buku jamita ni angka raja sian Juda?

²⁹Uju di tingki ni rajai, nangkok ma Firaun-Neko, raja sian Misir laho marporang dompak raja sian Assur sahat ro di sunge Euprat; gabe ro raja Josia mangambat ibana, hape disi tole martongtang nasida dibunu Firaun do ibana di Megiddo.

³⁰Dung i diboan angka naposona ma bangke ni rajai di atas hureta, sian Megiddo tu Jerusalem, jala ditanom ibana di bagasan tanomanna. Dung i ro ma bangso isi ni tano i dibuat ma si Joahas, anak ni si Josia, jala dimiahi ibana pabangkithon gabe raja singkat ni amana i.

³¹ (V.) Marumur duapulu tolu taon do si Joahas di na bangkit raja ibana jala tolu bulan lelengna ibana mangarajai di Jerusalem; ia goar ni inana, i ma si Humuntal, boru ni si Jeremia, sian Libna.

³² Jala diulahon ibana do sogo ni roha ni Jahowa, sandok songon na binahen ni angka ompuna.

³³ Dung i didokkon Firaun-Neko rante on ibana di Ribla di tano Hamat, asa unang be ibana mangarajai di Jerusalem, jala hona dando isi ni tano i dibahen saratus talenta perak dohot satalenta sere.

³⁴ Dung i dipabangkit Firaun-Neko ma si Eliakim, anak ni si Josia bahen raja singkat ni amana i, jala dipaimbar goarna gabe si Joiakim; alai anggo si Joahas diboan do tu Misir laos mate disi do ibana.

³⁵ Ia perak dohot sere i tu Firaun do dilehon si Joiakim, alai didokkon do isi ni tano i margugu perak silehononna nidokkon ni Firaun, ganup isi ni tano i marguru tu gogona be margugu perak dohot sere i silehonon tu Firaun-Neko.

³⁶ Marumur duapulu lima taon si Joiakim di na bangkit raja, jala sampulu sada taon lelengna ibana mangarajai di Jerusalem; ia goar ni inana i ma si Zebida, boru ni si Pedaya sian Ruma.

³⁷ Jala diulahon ibana do sogo ni roha ni Jahowa, sandok songon na binahen ni angka ompuna.

24¹ (I.) Uju di tingki ni si Joiakim, nangkok ma si Nebukadnesar, raja sian Babel, jadi mangoloi patu si Joiakim tu ibana tolu taon lelengna dung i marbalik ibana muse jala mangalo dompak si Nebukadnesar.

² Dung i disuru Jahowa ma angka parduaan ni parangan sian halak Kasdim, Ram, Moab dohot Amon mangalo ibana, disuru nasida asa solaonna Juda jala agoonna, hombar tu hata ni Jahowa naung nilumbahonna hian marhite sian angka panurirang, naposona i.

³ Masa pe songon i tu halak Juda, hombar tu hata ni Jahowa hian, asa paholangonna nasida sian adopan ni bohina, ala ni angka dosa ni si Manasse, hombar tu sude na niulana i.

⁴ Dohot ala ni mudar na so marpipot na ni durushonna, pola gok mudar na so marpipot Jerusalemi dibahen, dibahen i ndang olo be marpamuati roha ni Jahowa.

⁵ Jamita na tinggal i dope sian si Joiakim ro di sandok na niulana, nda tarsurat do i di bagasan buku jamita ni angka raja sian Juda?

⁶ Dung i monding ma si Joiakim gabe top dohot angka ompuna, jala si Joiakin anakna i bangkit raja singkatna.

⁷ Jadi olat ni ndang be morot raja ni Misir sian tanona, ai nunga dipapatu raja sian

Babel saluhut tano na masuk tu gomgomon ni raja sian Misir na sai laon, olat ni sunge Misir sahat tu sunge Euprat.

⁸Marumur sampulu ualu taon si Joiakin di na bangkit raja, jala tolu bulan lelengna ibana mangarajai di Jerusalem; ia goar ni inana i ma Nehusta, boru ni si Elnatan, sian Jerusalem.

⁹Jala diulahon ibana do sogo ni roha ni Jahowa, sandok songon na binahen ni amana.

¹⁰(II.) Di tingki uju i nangkok ma angka parangan ni si Nebukadnesar raja sian Babel dampak Jerusalem, laos dihubu ma huta i.

¹¹Ro huhut si Nebukadnesar sandiri, raja sian Babel marporang dampak huta i, naung tinungkum ni angka paranganna hian.

¹²Dung i ruar ma si Joiakin, raja sian Juda mandapothon raja sian Babel rap dohot inana dohot angka parhaladona dohot angka partogi ni paranganna dohot angka siramoti bagasna; laos diboan raja sian Babel ma ibana paulu taonhon hinarajaonna i.

¹³Diboan huhut sian i saluhut arta na di joro ni Jahowa dohot arta angka na di bagas ni rajai, jala dilongkangi sere i sian saluhut ulaula angka na pinauli ni si Salomo, raja sian Israel di bagasan joro ni Jahowa, songon naung nilumbahon ni Jahowa hian.

¹⁴Jala diboan tu habuangan sandok isi ni Jerusalem dohot sude angka induk dohot sude halak na marhuaso, sampulu ribu halak

tarbuang, tole sude angka tungkang hau dohot tungkang bosi, ndang adong tinggal nanggo sahalak, nda holan halak na so mardihadiha sian bangso ni luat i.

¹⁵Jadi dibuangkon ma si Joiakin tu Babel rap dohot ina ni rajai dohot angka jolma ni rajai ro di sude siramoti bagasna dohot halak na marhuaso di luat i, tarboan sian Jerusalem tu Babel.

¹⁶Dohot sude halak sialo musu, pitu ribu halak toropna, tole angka tungkang hau dohot tungkang bosi, saribu halak toropna ro di sude angka ulubalang na gogo, saluhutna i diboan raja sian Babel mambuangkon tu Babel.

¹⁷(III.) Dung i dipabangkit raja sian Babel ma si Matania, amangudana i gabe raja singkatna, jala dipauba goarna gabe Sedekia.

¹⁸Marumur duapulu sada taon si Sedekia di na bangkit raja ibana, jala sampulu sada taon lelengna ibana mangarajai di Jerusalem; ia goar ni inana, i ma si Humuntal, boru ni si Jeremia, sian Libna.

¹⁹Jala diulahon ibana do sogo ni roha ni Jahowa, sandok songon na binahen ni si Joiakim.

²⁰Ai ala rimas ni Jahowa umbahen masa songon i di Jerusalem dohot di Juda, paima ambolongkononna nasida sian adopan ni Bohina. Dung i marbalik ma si Sedekia mangalo dompak raja sian Babel.

25¹ (I.) Tole pasiataonhon hinarajaonna i di bulan sipaha sampulu di ari sampulu, ro ma si Nebukadnesar, raja sian Babel manguluhon sandok paranganna laho marporang dompak Jerusalem, marsaro di adopan ni huta i, dibahen huhut angka partanobatoan humaliang.

²Jadi tartungkum ma huta i sahat ro di pasampulusadataonhon hinarajahon ni si Sedekia.

³Alai di ari sia bulan sipaha opat masa ma haleon potir di bagasan huta i, pola ndang adong be sagusagu panganon ni bangso isi ni luat i.

⁴Dung i dirampok ma huta i, jala saluhut baoa sialo musu maporus bornginna i sian dalan tu bahal na di holangholang ni na dua parik mardonokkon porlak ni rajai. Alai nunga ditungkum halak Kasdim huta i tuk humaliang, gabe mardalan rajai sian dalan tu adaran.

⁵Alai dieak parangan ni halak Kasdim do rajai, jala dapot nasida ibana di angka adaran sian Jeriko, gabe marserak sandok paranganna sian lambungna.

⁶Dung i ditangkup nasida ma rajai, jala diboan ibana nangkok tu adopan ni raja sian Babel tu Ribla, asa diputus uhumna tu ibana.

⁷Ilanggo angka anak ni si Sedekia diseati do di adopan ni matana, jala dipitungi do ia mata ni si Sedekia duansa, jala dirante ibana dohot

dua rante tombaga laho mamboan ibana tu Babel.

⁸Tole papituarihon di bulan sipaha lima, i ma pasampulusiataonhon dung Nebukadnesar bangkit raja sian Babel, ro ma Nebusaradan, induk ni angka parangan, parhalado ni raja sian Babel tu Jerusalem.

⁹Dung i disurbu ma joro ni Jahowa dohot bagas ni rajai ro di sude bagas di Jerusalem, sude bagas na bolon tahe disurbu do dohot api.

¹⁰Ia parik humaliang Jerusalem dilohai sandok parangan ni halak Kasdim, angka na rap dohot induk ni parangan i.

¹¹Alai anggo pasipasi ni bangso i, angka na tinggal di bagasan huta, ro di halak angka na bali mandapoti raja sian Babel, ro di pasipasi ni halak situan na torop, luhutna i dibuangkon si Nebusaradan, induk ni angka parangan i do.

¹²Alai anggo sian halak na so mardihadiha di luat i ditinggalhon sintua ni parangan do deba bahen pangula di porlak anggur halak parumauma.

¹³Angkup ni angka tiang tombaga, angka na masuk tu joro ni Jahowa ro di angka ojanan dohot tobat tombaga na di bagasan joro ni Jahowa, dipamponggolhon halak Kasdim do, jala tombaga i diboan do tu Babel.

¹⁴Tole angka hudon, sonduk, raut, mangkuk ro di sude ulaula tombaga, angka na pinangke

marulaon di bagasan joro i, dibuat nasida sude.

¹⁵Dibuat induk ni angka parangan i do huhut angka seret panutungan daupa dohot mangkuk pamispisan, angka na sian sere dohot sian perak.

¹⁶Tole tiang na dua i ro di tobat na sasada i dohot hajongjonganna, angka na pinauli ni si Salomo di joro ni Jahowa; tung na so dapot timbangan do godang ni tombaga sian saluhut angka parhohasi.

¹⁷Sampulu ualu elak do timbo ni tiang na sada, ulu ni tiang di atasna pe tombaga do, jala timbo ni ulu ni tiang i tolu elak do, tole handanghandangna dohot parbue ni dalimo humaliang ulu ni tiang i, tombaga do i sude; laos songon i do di tiang paduahon ro di handanghandangna.

¹⁸Dung i dibuat induk ni angka parangan i ma sintua ni malim Seraia dohot si Sepania, malim paidua dohot na tolu halak sijaga pintu.

¹⁹Dibuat huhut sian bagasan huta i sahalak siramoti bagasna, na pinabangkit parentahon halak sialo musu; tole lima halak sian halak angka na somal marhalado di adopan ni rajai, angka na jumpang di bagasan huta; tole muse juaratulis ni partogi ni parangan, na somal manurati situan na torop i angka na masuk soldadu, tole muse onompulu halak

sian bangso ni luat i, angka na jumpang di bagasan huta.

²⁰I ma angka na binoan ni si Nebusaradan, induk ni angka parangan, jala ditogihon nasida tu adopan ni raja sian Babel tu Ribla.

²¹Dung i didokkon raja sian Babel ma bunuon nasida di Ribla na di tano Hamat. I ma habubuang ni Juda sian tanona.

²²(II.) Alai bangso na tinggal i dope di luat Juda, na tininggalhon ni si Nebukadnesar, raja sian Babel, dipabangkit ma di nasida si Gedalia, anak ni si Ahikam, anak ni si Sapan.

²³Jadi dung dibege sude induk ni angka parduaan ni parangan ro di angka baoa, naung dipabangkit raja sian Babel si Gedalia, ro be ma nasida manopot si Gedalia tu Mispa, i ma si Ismael, anak ni si Netania dohot si Johanan, anak ni si Karea, dohot si Seraia, anak ni si Tanhumet, halak Netopa i, dohot si Jasanya, anak ni halak Maaka i rap dohot angka baoa dongannasidai.

²⁴Dung i marbulan ma si Gedalia tu nasida dohot tu angka baoa dongannasidai, ninna ma mandok nasida: Unang hamu mabiar maradophon angka naposo ni halak Kasdim; tinggal ma hamu di luat i jala oloi hamu rodi ni raja sian Babel, jadi marsonangsonang ma hamu.

²⁵Alai tole papitubulanhon ro ma si Ismael, anak ni si Netania, anak ni si Elisama sian pinompar ni rajai, jala sampulu halak

donganna, gabe ditodos nasida si Gedalia, pola mate rap dohot halak Jahudi dohot halak Kasdim, angka na rap dohot ibana di Mispa.

²⁶Dung i hehe ma sandok bangso i, tole na metmet ro di na magodang rap dohot angka induk ni parangan, maporus ma nasida tu Misir, ai mabiar do nasida maradophon halak Kasdim.

²⁷(III.) Alai tole patolupulupitutaonhon dung tarbuang si Joiakin, raja sian Juda, di ari duapulu pitu bulan hurung dipabangkit Epilmerodak, raja sian Babel, i ma taon parjolo hababangkit ni Epilmerodak gabe raja sian Babel, dipahehe rajai ma ulu ni si Joiakin, raja ni halak Juda sian bagasan hurungan.

²⁸Jala basar pangkulingna tu ibana, jala tumimbo dibahen habangsana sian habangsa ni raja angka na rap dohot ibana di Babel.

²⁹Jala disalin rajai do angka pangkeanna pinangkena di hurungan, jala sapanganan ibana tongtong dohot rajai saleleng mangolu ibana.

³⁰Jala ariari dilehon rajai tongtong bohalna na binuhul saleleng mangolu ibana.

1 Tawarikh

1 ¹ (I.) Si Adam, si Set, si Enos.

² Si Kenan, si Mahalaleel, si Jared.

³ Si Henok, si Metusalah, si Lamek.

⁴ Si Noak, si Sem, si Ham dohot si Japet.

⁵ Angka anak ni si Japet on do: Si Gomer, si Magog, si Madai, si Jawan, si Tubal, si Mesek dohot si Tiras.

⁶ Ia angka anak ni si Gomer on do: Si Askenas, si Ripat dohot si Togarma.

⁷ Ia angka anak ni si Jawan on do: Si Elisa, si Tarsis, si Kitim dohot si Dodanim.

⁸ Ia angka anak ni si Ham on do: Si Kus, si Misraim, si Put dohot si Kanaan.

⁹ Ia angka anak ni si Kus on do: Si Seba, si Hawila, si Sabta, si Raama dohot si Sabteka. Ia angka anak ni si Raama on do: Si Seba dohot si Dedan.

¹⁰ Alai anggo si Kus manubuhon si Nimrod, na mamungka marsiajar ulubalang di tano on.

¹¹ Ia si Misraim manubuhon: Halak Lidia, Anam, Lehabim, Naptuhim.

¹² Halak Patrusim, Kasluhim, haroroan ni halak Palistim dohot Kaptorim.

¹³ Alai anggo si Kanaan manubuhon: Si Sidon, buhabajuna dohot si Het.

¹⁴ Si Jebusi, si Amori, si Girgasi.

¹⁵Si Hevi, si Arki, si Sini.

¹⁶Si Arpaditi, si Semari dohot si Hamati.

¹⁷Ia angka anak ni si Sem on do: Si Elam, si Assur, si Arpaksad, si Lud, si Ram, si Us, si Hul, si Geter dohot si Mesek.

¹⁸Alai anggo si Arpaksad manubuhon: Si Sela, na manubuhon si Heber.

¹⁹Dung i tubu ma dua anak ni si Heber, goar ni na sada: Si Peleg, ala di angka arina sirang tano on, ia goar ni anggina i si Joktan.

²⁰Ia si Joktan manubuhon: Si Almodad, si Salep, si Hasarmawet, si Jera.

²¹Si Hadoram, si Usal, si Dikla.

²²Si Hebal, si Abimael, si Seba.

²³Si Opir, si Hevila dohot si Jobab. I ma sude anak ni si Joktan.

²⁴Si Sem, si Arpaksad, si Sela.

²⁵Si Heber, si Peleg, si Reu.

²⁶Si Serug, si Nahor, si Tera.

²⁷Si Abram, i ma si Abraham.

²⁸(II.) Ia angka anak ni si Abraham on do: Si Isak dohot si Ismael.

²⁹On do pinomparnasida anak buhabaju ni si Ismael, i ma si Nabaiot, dung i si Kedar, si Abdel, si Mibsam.

³⁰Si Misma, si Duma, si Masa, si Hadad, si Tema.

³¹Si Jetur, si Napis dohot si Kademah. I ma angka anak ni si Ismael.

³²Ia angka anak ni si Ketura,jolma ni si Abraham on do: Si Zimran, si Joksan, si

Medan, si Midian, si Isbak dohot si Sua. Ia angka anak ni si Joksan i ma: Si Seba dohot si Dedan.

³³Ia angka anak ni si Midian on do: Si Epah, si Eper, si Hanok, si Abida dohot si Elda. I ma sude angka anak ni si Ketura.

³⁴Ditubuhon si Abraham huhut si Isak. Ia angka anak ni si Isak on do: Si Esau dohot si Israel.

³⁵(III.) Ia angka anak ni si Esau on do: Si Elipas, si Reguel, si Jehus, si Jalam dohot si Kora.

³⁶Ia angka anak ni si Elipas on do: Si Teman, si Omar, si Sepi, si Gatam, si Kenas, si Timna dohot si Amalek.

³⁷Ia angka anak ni si Reguel on do: Si Nahat, si Jara, si Samma dohot si Missa.

³⁸Ia angka anak ni si Seir on do: Si Lotan, si Sobal, si Sibeon, si Ana, si Dison, si Eser dohot si Disan.

³⁹Ia angka anak ni si Lotan on do: Si Hori dohot si Homam; jala iboto ni si Lotan, i ma si Timna.

⁴⁰Ia angka anak ni si Sobal on do: Si Alian, si Manahat, si Ebal, si Sepi dohot si Onam. Ia angka anak ni si Sibeon i ma: Si Aia dohot si Ana.

⁴¹Ia anak ni si Ana i ma: Si Dison. Ia angka anak ni si Dison i ma: Si Hamran, si Esban, si Itran dohot si Heran.

⁴²Ia angka anak ni si Eser on do: Si Bilhan, si Sapan dohot si Jaakan. Ia angka anak ni si Disan i ma: Si Us dohot si Aran.

⁴³(IV.) Jala on do goar ni rajaraja, angka na mangarajai di tano Edom, jumolo sian na adong raja mangarajai halak Israel, i ma: Si Bela, anak ni si Beor, jala goar ni hutana i ma Dinhaba.

⁴⁴Jadi dung mate si Bela, bangkit raja ma singkatna: Si Jobab, anak ni si Jara sian Bosra.

⁴⁵Jadi dung mate si Jobab, bangkit raja ma singkatna si Husam sian tano ni halak Teman i.

⁴⁶Jadi dung mate si Husam, bangkit raja singkatna si Hadad, anak ni si Bedad, na papatu halak Midian di ladang ni Moab, jala goar ni hutana i ma Apit.

⁴⁷Dung mate si Hadad, bangkit raja singkatna si Samla sian Masreka.

⁴⁸Dung mate si Samla, bangkit raja singkatna si Saul sian Rehobot martopihon sunge.

⁴⁹Dung mate si Saul, bangkit raja singkatna si Baal-Hanan, anak ni si Akbor.

⁵⁰Dung mate si Baal-Hanan, bangkit raja singkatna si Hadad; ia goar ni hutana i ma Pahi, jala goar ni jolmana si Mehetabel, boru ni si Materet, boru Mesahab.

⁵¹ Alai dung mate si Hadad, bangkit ma gabe induk di Edom: Induk Timna, induk Alia, induk Jete.

⁵² Induk Aholibama, induk Ela, induk Pinon.

⁵³ Induk Kenas, induk Teman, induk Mibzar.

⁵⁴ Induk Magdiel, induk Iram. I ma angka induk di Edom.

2¹ (I.) On do angka anak ni si Israel: Si Ruben, si Simeon, si Lepi, si Juda, si Isasar, si Zebulon.

² Si Dan, si Josep, si Benjamin, si Naptali, si Gad dohot si Aser.

³ Ia angka anak ni si Juda on do: Si Er, si Onan dohot si Sela; na tolu anak i tubu di ibana sian boru Sua, boru ni halak Kanaan. Alai anggo si Er, buhabaju ni si Juda, na jahat do i di adopan ni Jahowa, ala ni dibunu Jahowa do ibana.

⁴ Alai anggo si Tamar, parumaenna i manubuhon di ibana: Si Peres dohot si Jara; jadi luhut anak ni si Juda lima halak do.

⁵ Ia angka anak ni si Peres i ma: Si Hezron dohot si Hamul.

⁶ Ia angka anak ni si Jara i ma: Si Simri, si Etan, si Heman, si Kalkol dohot si Dara; luhutna i lima halak do.

⁷ Ia anak ni si Karmi i ma: Si Agan, na mangarsahi Israel ala adong binuatna ugasan naung hona harom.

⁸ Ia anak ni si Etan, i ma si Azaria.

⁹Ia anak angka na tinubuhon ni si Hezron i ma: Si Jerahmeel, si Ram dohot si Kaleb.

¹⁰Ia si Ram manubuhon si Abinadab, na manubuhon si Nahason, i ma induk ni halak Juda.

¹¹Si Nahason manubuhon si Salmon, na manubuhon si Boas.

¹²Si Boas manubuhon si Obed, na manubuhon si Isai.

¹³Si Isai manubuhon si Eliab, buhabajuna i dohot si Abinadab, anakna paidua, si Simea anakna paitolu.

¹⁴Si Netaneel anakna paiopat, si Raddai anakna pailima.

¹⁵Si Osem anakna paionom dohot si Daud anakna paipitu.

¹⁶Ia ibotonasida i ma: Nai Seruia dohot si Abigail. Ia angka anak ni Nai Seruia i ma: Si Abisai, si Joab dohot si Asahel, na tolu i do.

¹⁷Anggo si Abigail manubuhon si Amasa; alai anggo ama ni si Amasa, i ma si Jeter, halak Ismael.

¹⁸(II.) Ia si Kaleb, anak ni si Hezron manubuhon anak sian jolmana si Azuba dohot sian si Jeriot, jala on do angka anakna si Ieser, si Sobab dohot si Ardon.

¹⁹Jadi dung mate si Azuba, dibuat si Kaleb ma si Eparat bahen jolmana, na manubuhon si Hur.

²⁰Ia si Hur manubuhon si Uri, na manubuhon si Besalel.

²¹ Dung i ditopot si Hezron ma boru ni si Mahir, ama ni si Gilead, dibuat ma i bahenjolmana, uju marumur onompulu taon ibana, jala parompuan i manubuhon si Segub.

²² Ia si Segub manubuhon si Jair, na manggomgomi duapulu tolu huta di tano Gilead.

²³ Dilaum ibana huhut sian halak Gesur dohot sian halak Ram angka sosor ni si Jair, tole muse Kenat ro di angka sosorna, onompulu huta. Luhut nasida angka anak ni si Mahir, ama ni si Gilead.

²⁴ Dung mate si Hezron di Kaleb-Eprata, ditubuhon si Abia,jolma ni si Hezron ma Ashur, ama ni si Tekoa.

²⁵ Ia angka anak ni si Jerahmeel, buhabaju ni si Hezron, i ma si Ram, buhabajuna i, dung i si Buna, si Oren, si Osem dohot si Ahia.

²⁶ Adong dope sadanari jolma ni si Jerahmeel, i ma na margoar si Atara, i ma ina ni si Onam.

²⁷ Ia angka anak ni si Ram, buhabaju ni si Jerahmeel, i ma: Si Maas, si Jamin dohot si Eker.

²⁸ Ia angka anak ni si Onam i ma: Si Sammai dohot si Jada. Ia angka anak ni si Sammai i ma: Si Nadab dohot si Abisur.

²⁹ Ia goar ni jolma ni si Abisur i ma: Abigail, na manubuhon di ibana: Si Ahban dohot si Molid.

³⁰Ia angka anak ni si Nadab i ma: Si Seled dohot si Apaim; mate punu do ia si Seled.

³¹Ia anak ni si Apaim i ma: Si Ishe; ia anak ni si Ishe i ma: Si Sesan, na manubuhon si Ahloi.

³²Ia angka anak ni si Juda, anggi ni si Sammai i ma: Si Jeter dohot si Jonatan; alai mate punu anggo si Jeter.

³³Ia angka anak ni si Jonatan i ma: Si Pelet dohot si Sasa. I ma pinompar ni si Jerahmeel.

³⁴Alai ndang tubuan anak anggo si Sesan, holan boruboru do. Dung i adong sada halak Misir naposo ni si Sesan na margoar si Jarha.

³⁵Jadi dilehon si Sesan ma boruna tu si Jarha naposona i bahen jolmana, na manubuhon di ibana si Attai.

³⁶Si Attai muse manubuhon si Natan, na manubuhon si Sabad.

³⁷Si Sabad manubuhon si Eplal, na manubuhon si Obed.

³⁸Si Obed manubuhon si Jehu, na manubuhon si Azaria.

³⁹Si Azaria manubuhon si Heles, na manubuhon si Elasa.

⁴⁰Si Elasa manubuhon si Sismai, na manubuhon si Sallum.

⁴¹Si Sallum manubuhon si Jekamia, na manubuhon si Elisama.

⁴²Ia angka anak ni si Kaleb, anggi ni si Jerahmeel i ma: Si Mesa, buhabajuna, i ma

ama ni si sip dohot angka anak ni si Maressa,
ama ni si Hebron.

⁴³Ia angka anak ni si Hebron i ma: Si Kora,
si Tappua, si Rekem dohot si Sema.

⁴⁴Si Sema manubuhon si Raham, ama ni si
Jorkeam; si Rekem manubuhon si Sammai.

⁴⁵Ia anak ni si Sammai i ma si Maon; jala si
Maon do ama ni si Betzur.

⁴⁶Alai anggo si Epah, jolma ni si Kaleb,
manubuhon si Haran, si Mosa dohot si Gazis;
si Haran muse manubuhon si Gazis.

⁴⁷Ia angka anak ni si Jahdai i ma: Si Regem,
si Jotam, si Gesan, si Pelet, si Epah dohot si
Saap.

⁴⁸Alai anggo si Maaka jolma ni si Kaleb
manubuhon si Seber dohot si Tirhana.

⁴⁹Ditubuhon nasida huhut si Saap, ama ni
si Madmanah dohot si Sepa, i ma ama ni si
Makbena, dohot ama ni si Gibeal. Ia boru ni si
Kaleb, i ma si Aksa.

⁵⁰On ma angka pinompar ni si Kaleb: Anak
ni si Hur, buhabaju ni si Eprata, i ma si Sobal,
ama ni si Kiriat Jearim.

⁵¹Si Salmon ama ni si Betlehem; si Harep,
ama ni si Bet-Gedor.

⁵²Ia angka anak ni si Sobal, ama ni si Kiriat
Jearim i ma: Si Haroe, satonga ni halak
Menuhoti.

⁵³Ia pinompar ni si Kiriat Jearim, i ma: Halak
Itri, Puti, Sumati dohot Misrai; sian nasida do
ro halak Zora i dohot Estaol.

⁵⁴Ia pinompar ni si Salmon i ma: Halak Betlehem, Netopa i, Atarot, Betjoab dohot satonga ni halak Manahat dohot Zora i.

⁵⁵Ia pinompar ni halak sibotosurat, angka na maringan di Jabes, i ma halak Tirati, Simeati dohot Sukoti. I ma halak Keni, angka ma marharoroan sian si Hamat, ama ni pinompar ni si Rekab.

3¹ (I.) On ma anak ni si Daud, angka na tinubuhonna di Hebron: Buhabajuna si Amnon sian si Ahinoam, boru Jesreel; paidua si Daniel sian si Abigail, boru Karmel.

²Paitolu si Absalom, tubu ni si Maaka, boru ni si Talmai, raja sian Gesur; paipat si Adonia, tubu ni Nai Haggit.

³Pailima si Sepatia sian si Abital; paionom si Itream, sian Jolmana, si Eglai.

⁴Na onom i ma tinubuhonna di Hebron; ai mangarajai ibana disi pitu taon onom bulan lelengna; alai tolupulu tolu taon lelengna ibana mangarajai anggo di Jerusalem.

⁵Angka on do anakna tinubuhonna di Jerusalem: Si Samua, si Sobab, si Natan dohot si Salomo; na opat i sian si Batseba, boru ni si Ammiel.

⁶Angkup ni si Ibar, si Elisua, si Elipelet.

⁷Si Noga, si Nepeg, si Japia.

⁸Si Elisama, si Eliada, si Elipelet; na sia halak i do.

⁹Ia ma saluhut anak ni si Daud, so padohot angka anak tubu ni radingna; jala si Tamar do ibotonasida.

¹⁰(II.) Ia anak ni si Salomo i ma Rehabeam, anak ni muse si Abia, anak ni muse si Asa, anak ni muse si Josapat.

¹¹Anak ni muse si Joram, anak ni muse si Ahasia, anak ni muse si Joas.

¹²Anak ni muse si Amasia, anak ni muse si Azaria, anak ni muse si Jotam.

¹³Anak ni muse si Ahas, anak ni muse si Hiskia, anak ni muse si Manasse.

¹⁴Anak ni muse ni si Amon, anak ni muse si Josia.

¹⁵Ia angka anak ni si Josia i ma: Buhabajuna si Johanan, paidua si Joiakim, paitolu si Sedekia, paopat si Sallum.

¹⁶Ia angka anak ni si Joiakim i ma: Si Jekonya, anak ni muse si Sedekia.

¹⁷(III.) Ia angka anak ni si Jekonya na tarbuang i i ma: Si Sealtiel anakna i.

¹⁸Si Malkiram, si Pedaya, si Senasar, si Jekamia, si Hosama dohot si Nebaia.

¹⁹Ia angka anak ni si Pedaya, i ma: Si Serubabel dohot si Simei; ia angka anak ni si Serubabel i ma: Si Mesulam, si Hanania dohot si Selomit ibotonasida i.

²⁰Angkup ni si Hasuba, si Ohel, si Berekia, si Hasaja dohot si Jusab-Hesed, na lima i do.

²¹ Ia anak ni si Hanania i ma: Si Pelatia dohot si Jesaya; tole angka anak ni si Repaia si Arnan, si Obaja dohot si Sekania.

²² Ia anak ni si Sekania i ma: Si Semaya. Ia angka anak ni si Semaya i ma: Si Hattus, si Igal, si Baria, si Naearia dohot si Sapat, na onom i do.

²³ Ia angka anak ni si Naearia i ma: Si Eleonai, si Hiskia dohot si Asrikam, na tolu i do.

²⁴ Ia angka anak ni si Eleonai i ma: Si Hodapia, si Eliasib, si Pelaia, si Akkub, si Johanan, si Delaia dohot si Anani, na pitu i do.

4¹ (I.) Angka anak ni si Juda i ma: Si Peres, si Hezron, si Karmi, si Hur dohot si Sobal.

² Alai anggo si Reia, anak ni si Sobal, manubuhon si Jahat, na manubuhon si Ahumai dohot si Lehad; i ma pinompar ni halak Zora i.

³ Jala angka on do marama tu si Etham: Si Jesreel, si Isma, si Idbas, jala goar ni ibotonasida si Hasselponi.

⁴ Jala si Peniel do ama ni si Gedor, jala si Eser ama ni si Husa. I ma angka anak ni si Hur, buhabaju ni si Eprata, ama ni si Betlehem.

⁵ Ia si Ashur, ama ni si Tekoa, dua dojolmana: Si Hela dohot si Naara.

⁶ Jala si Naara manubuhon di ibana: Si Ahusam, si Heper, si Temeni, si Haahasfari; i ma angka anak ni si Naara.

⁷Alai angka anak ni si Hela on do: Si Seret, si Ishar dohot si Etam.

⁸Ia si Kos manubuhon si Anub dohot si Hasobeba dohot pinompar ni si Aharlel, anak ni si Harum.

⁹Alai anggo si Jabes sumangap do i sian angka hahaanggina, jala dibahen inana pe goarna si Jabes, ninna do: Mansai bernit huae laho manubuhon ibana.

¹⁰Dung i martangiang ma si Jabes tu Debata ni halak Israel songon on: Tung sura pasupasunmu ahu tongtong jala mangonjar parbalohanku bahenonmu, jala manumpak tanganmu di ahu, jala padaoonmu hinamago, unang diparsahiti ahu! Jadi diparo Debata ma na pinangidona i.

¹¹Ia si Kaleb, haha ni si Suha, manubuhon si Mehiri, i ma ama ni si Eston.

¹²Ia si Eston manubuhon Betrapa, si Pasea dohot si Tehinna, ama ni si Irnahas; i ma halak sian Reka.

¹³Ia angka anak ni si Kenas i ma: Si Otniel dohot si Seraia; ia anak ni si Otniel i ma si Hatat.

¹⁴Ia si Meonotai manubuhon si Opra; ia si Seraia manubuhon si Joab, ama ni halak angka na maringan di rura ni angka tungkang, ai angka tungkang do nasida.

¹⁵Ia angka anak ni si Kaleb, anak ni si Jepune i ma: Si Iru, si Ela dohot si Naam; ia anak ni si Ela i ma si Kenas.

¹⁶Ia angka anak ni si Jehaleleel: Si Sip, si Sipa, si Tiria dohot si Asarel.

¹⁷Ia angka anak ni si Esra i ma: Si Jeter, si Mered, si Eper dohot si Jalon (ia jolma ni si Mered na sada); manubuhon si Miryam, si Sammai dohot si Isba, ama ni si Estemo.

¹⁸Ia jolmana boru Jahudi manubuhon si Jered, ama ni si Gedor dohot si Heber, ama ni si Soko dohot si Jekutiel, ama ni si Sanoa. Jala on do angka anak ni si Bitia, boru ni si Firaun, na binuat ni si Mered bahen jolmana.

¹⁹Ia angka anak ni jolmana na margoar si Hodia, iboto ni si Naam, ama ni si Keila i ma: Si Garmi, si Estemo halak Maaka i.

²⁰Ia angka anak ni si Simon i ma: Si Amnon, si Rinna, si Benhanan dohot si Tilon. Ia angka anak ni si Ishi: Si Sohet dohot si Ben Sobet.

²¹Ia angka anak ni si Sela, anak ni si Juda i ma: Si Er, ama ni si Leka dohot si Laada, ama ni si Maressa, ro di pinompar ni halak sitonun hori sian pinompar ni si Betasbea.

²²Angkup ni si Jokim dohot sude baoa sian halak Koseba, Joas dohot Sarap, angka na mangarajai di Moab dohot halak Jasubi-Lehem. Alai angka jamita sian na galia na ma i.

²³Nasida do angka sitopa hudon jala maringan di bagasan huta angka na marparik na sinuanan humaliang; alai maringan pe nasida disi di lambung ni rajai mangula ulaonna do.

²⁴ (II.) Ia angka anak ni si Simeon i ma: Si Nemuel, si Jamin, si Jarib, si Jara dohot si Saul.

²⁵ Anak ni si Saul si Sallum, na manubuhon si Mibsam, ama ni si Misma.

²⁶ Ia angka anak ni si Misma i ma: Si Hamul na manubuhon si Sakkur, ama ni si Simei.

²⁷ Ia angka anak ni si Simei sampulu onom halak do jala onom boruna; alai ndang sadia gabe anggo angka anggina; sandok pinomparnasida tahe ndang songon sopar ni pinompar ni si Juda.

²⁸ Alai maringan do nasida di Berseba, Molada, Hasarsual.

²⁹ Bilha, Esem, Tolad.

³⁰ Betul, Horma, Ziklag.

³¹ Betmarkoba, Hasar-Susa, Betbiri dohot di Saarim. I ma angka hutanasida sahat ro di raja Daud.

³² Tole angka sosornasida: Etham, Ain, Rimmon, Tohen dohot Asan, lima do toropna.

³³ Angkup ni saluhut tano humaliang angka huta i sahat ro di Baal. I ma angka huta inganannasida i ro di aturan ni partuturanna.

³⁴ Tole si Mesobab, si Jamle, si Josa, anak ni si Amasia.

³⁵ Si Joel, si Jehu, anak ni si Josibia, na manubuhon si Seraia, ama ni si Asiel.

³⁶ Tole si Eleonai, si Jaakoba, si Jesohaia, si Asaya, si Adiel, si Jesimiel dohot si Benaia.

³⁷ Tole si Sisa, anak ni si Sipi, anak ni si Allon, anak ni si Jedaia, anak ni si Simri, anak ni si Semaya.

³⁸ Sude nasida angka naung ginoari raja do i di tongatonga ni bangsona, jala sopar situtu do pinompar ni ompunasida i.

³⁹ (III.) Jadi marserak ma nasida pola sahat ro di Gedor, sahat muse tu habinsaran ni rura i laho mangalului jampalan di birubirunasida.

⁴⁰ Jadi jumpang nasida ma jampalan na lomak jala na denggan, jala mansai lambas tano i humaliang, tole sonangna dohot mardemak; ai pinompar ni si Ham do maringan disi di na robi.

⁴¹ Ro muse manoluk angka na tarsurat goarnasida uju di tingki ni si Hiskia, raja sian Juda, diparumpak ma undungundung dohot bagas ni halak angka na nidapotna disi, jala disiaphon nasida, laos maringan disi manoluk nasida rasirasa sadarion; ai singkop do disi panjampalan di birubirunasida.

⁴² Bungkas do huhut sian nasida, sian pinompar ni si Simeon i lima ratus halak laho tu dolok Seir, jala si Pelatia, si Naearia, si Repaia dohot si Usiel, angka anak ni si Ishi do partoginasida.

⁴³ Jala dibunu nasida do pasipasi ni halak Amalek na malua i, laos disoluk inganannasida i rasirasa sadarion.

5¹ (I.) Ia angka anak ni si Ruben, buhabaju ni si Israel; ai ibana do tutu buhabajuna,

alai ala na niramunanna i podoman ni amana i, gabe bali sahalana sihahaan tu angka anak ni si Josep, anak ni Israel; alai tahe ndang tarjujur tu ibana sahala sihahaan.

²Ai si Juda nian na sumangap sian angka hahaanggina, gabe sahat tu ibana jujungan partogion, alai anggo sahala sihahaan tu si Josep do.

³Ia angka anak ni si Ruben, buhabaju ni Israel i ma: Si Hanok, si Pallu, si Hesron dohot si Karmi.

⁴Ia angka anak ni si Joel i ma: Si Semaya, na manubuhon si Gog, anak ni muse si Simei.

⁵Anak ni si Simei do si Mika, anak ni muse si Reia, anak ni muse si Baal.

⁶Anak ni muse si Beera, na binoan ni si Tiglat Pelesar, raja sian Assur tu habuangan; ibana do sada induk di halak Ruben.

⁷Alai anggo hahaanggina marompuompu mangihuthon aturan ni sundutsundutnasida marihutan do tu si Jeiel dohot si Sakaria.

⁸Tole muse si Bela, anak ni si Asas, anak ni si Sema, anak ni si Joel, maringan do ibana di Aroer sahat ro di Nebo dohot Baal-Meon.

⁹Dung i maringan ibana tungkan habinsaran, sahat tu partalpahan ni halongonan na mardonokkon Euprat, ai mansai sinur do dorbianaasida di tano Gilead.

¹⁰Jala uju di tingki ni si Saul marporang do nasida dompak halak Hagar i, gabe marragean nasida dibahen, laos disoluk

do undungundungnasida di sandok partalpahanna tungkan habinsaran sian Gilead.

¹¹ (II.) Maringan huhut patondong dohot nasida halak Gad, di tano Basan sahat ro di Salka.

¹² Si Joel do jujunganna parjolo, jala si Sapam paidua tole muse si Janai dohot si Sapat di Basan.

¹³ Jala hahaangginasida mangihuthon pinompar ni ompuna be i ma: Si Mikhael, si Mesulam, si Seba, si Jorai, si Jakan, si Sia dohot si Heber, na pitu i do.

¹⁴ On do angka anak ni si Abihail, anak ni si Huri, anak ni si Jaroa, anak ni si Gilead, anak ni si Mikhael, anak ni si Jesisai, anak ni si Jahdo, anak ni si Bus.

¹⁵ Tole muse si Ahi anak ni si Abdiel, anak ni si Guni, i ma partogi ni pinompar ni ompuna.

¹⁶ Jala maringan nasida di Gilead di Basan dohot di bagasan angka sosorna dohot di saluhut luat humaliang Saron sahat ro di partalpahanna.

¹⁷ Luhutna i tarbilang do uju di tingki ni si Jotam, raja sian Juda dohot uju di tingki ni si Jerobeam, raja sian Israel.

¹⁸ (III.) Ia angka pinompar ni si Ruben, si Gad dohot satonga marga Manasse, nasa baoa sialo musu, angka na manandang hujur dohot podang, jala angka sisintak sior dohot angka na somal marmusu, opatpulu opat ribu

pitu ratus onompulu halak toropna, angka na borhat tu parporangan.

¹⁹Jadi saut ma nasida marporang dompak halak Hagar i, Jetur, Napis dohot Nodab.

²⁰Jadi dapotan pangurupion ma nasida, gabe sahat ma halak Hagar i tu tangannasida ro di saluhut halak na hinaranasida; ai joujou do nasida tu Debata di tongtangan jala dioloi Ibana do pangidoannasida, ala marhaposan tu Ibana do nasida.

²¹Jadi tarboan ma dohot dorbiasida, limapulu ribu unto jala dua ratus limapulu ribu birubiru, jala dua ribu halode angkup ni saratus ribu jolma na mangolu.

²²Ai mansai torop jolma marragean dibunu, ala sian Debata parporangan i; laos disoluk nasida inganannasida i sahat ro di tingki habubuangnasida.

²³(IV.) Ia pinompar ni satonga marga Manasse, maringan do di tano olat ni Basan sahat ro di Baal Hermon dohot Senir ro di dolok Hermon, ai torop do nasida.

²⁴Jala angka on do jujungan ni pinomparna marompuompu: Si Eper, si Isai, si Eliel, si Asriel, si Jeremia, si Hodapia, si Jahdiel, luhut do halak ulubalang angka na tarbarita, jala jujungan di pinompar ni ompunasida i.

²⁵(V.) Alai dung mardosa nasida dompak Debata ni ompunasida i jala marmainan nasida mangihuthon angka debata ni angka

bangso isi ni tano i, angka na niago ni Debata nian maradophon nasida.

²⁶Jadi disunggul Debata ni halak Israel ma tondi ni si Pul, raja sian Assur dohot tondi ni si Tiglat Pelesar, raja sian Assur, asa ibana mambuankon halak Ruben, Gad dohot satonga marga Manasse, jala diboan nasida tu Hala, Habor dohot Hara dohot tu batang aek Gozan tahe rasirasa sadarion.

6¹ (5-27) Ia angka anak ni si Lepi on do: Si Gerson, si Kohat dohot si Merari.

² (5-28) Ia angka anak ni si Kohat: Si Amram, si Ishar, si Hebron dohot si Usiel.

³ (5-29) Ia angka anak ni si Amram: Si Aron, si Musa dohot si Miryam. Ia angka anak ni si Aron: Si Nadab dohot si Abihu, si Eleasar dohot si Itamar.

⁴ (5-30) Si Eleasar manubuhon si Pinehas, na manubuhon si Abisua.

⁵ (5-31) Si Abisua manubuhon si Bukki, na manubuhon si Usi.

⁶ (5-32) Si Usi manubuhon si Seraia, na manubuhon si Merayot.

⁷ (5-33) Si Merayot manubuhon si Amaria, na manubuhon si Ahitub.

⁸ (5-34) Si Ahitub manubuhon si Sadok, na manubuhon si Ahimas.

⁹ (5-35) Si Ahimas manubuhon si Azaria, na manubuhon si Johanan.

¹⁰ (5-36) Si Johanan manubuhon si Azaria, ibana do na mangaradoti hamalimon di

bagasan joro, na pinajongjong ni si Salomo di Jerusalem.

¹¹ (5-37) Si Azaria manubuhon si Amaria, na manubuhon si Ahitub.

¹² (5-38) Si Ahitub manubuhon si Sadok, na manubuhon si Sallum.

¹³ (5-39) Si Sallum manubuhon si Hilkia, na manubuhon si Azaria.

¹⁴ (5-40) Si Azaria manubuhon si Seraia, na manubuhon si Josadak.

¹⁵ (5-41) Alai anggo si Josadak tarboan do tu habuangan uju na binuangkon ni Jahowa halak Juda dohot Jerusalem marhite sian si Nebukadnesar.

¹⁶ (6-1) (I.) Asa angka on do anak ni si Lepi: Si Gerson, si Kohat dohot si Merari.

¹⁷ (6-2) On do goargoar ni angka anak ni si Gerson: Si Libni dohot si Simei.

¹⁸ (6-3) Ia angka anak ni si Kohat on do: Si Amram, si Ishar, si Hebron dohot si Usiel.

¹⁹ (6-4) Ia angka anak ni si Merari: Si Mahli dohot si Musi. I ma angka sundut ni si Lepi marompuompu.

²⁰ (6-5) Anak ni si Gerson i ma si Libni, anak ni muse si Jahat, anak ni muse si Zima.

²¹ (6-6) Anak ni muse si Joa, anak ni muse si Ido, anak ni muse si Jara, anak ni muse si Jerahia.

²² (6-7) Ia anak ni si Kohat: Si Abinadab, anak ni muse si Kora, anak ni muse si Asir.

²³ (6-8) Anak ni muse si Elkana, anak ni muse si Abiasap, anak ni muse si Asir.

²⁴ (6-9) Anak ni muse si Kohat, anak ni muse si Uriel, anak ni muse si Usia, anak ni muse si Saul.

²⁵ (6-10) Ia angka anak ni si Elkana: Si Amasai dohot si Ahimot.

²⁶ (6-11) Anak ni muse si Elkana, anak ni muse si Elkana sian Sup, anak ni muse si Nahat.

²⁷ (6-12) Anak ni muse si Eliab, anak ni muse si Jeroham, anak ni muse si Elkana.

²⁸ (6-13) Ia angka anak ni si Samuel: Si Azaria buhabajuna dohot si Abia.

²⁹ (6-14) Ia anak ni si Merari: Si Mahli, anak ni muse si Libni, anak ni muse si Simeï, anak ni muse, si Usa.

³⁰ (6-15) Anak ni muse, si Simea, anak ni muse si Hagia, anak ni muse si Asaya.

³¹ (6-16) (II.) I ma angka na pinabangkit ni si Daud mangaradoti parendeon di joro ni Jahowa, olat ni dung mangulon poti parpadanan disi.

³² (6-17) Jadi marhalado ma nasida di adopan ni undungundung parluhutan mangaradoti parendeon sahat ro di na pinauli ni si Salomo joro ni Jahowa di Jerusalem, sai marhalado nasida marningot gansi ni tohonanna be.

³³ (6-18) Jala on do angka nasida na marhalado rap dohot anaknasida i: Sian anak

ni si Kohat do si Heman na manguluhon
parende, i ma anak ni si Joel, i ma anak ni si
Samuel.

³⁴ (6-19) I ma anak ni si Elkana, i ma anak
ni Jeroham, i ma anak ni si Eliel, i ma anak ni
si Toah.

³⁵ (6-20) I ma anak ni si Asir, i ma anak ni si
Elkana, i ma anak ni si Mahat, i ma anak ni si
Amasai.

³⁶ (6-21) I ma anak ni si Elkana, i ma anak
ni si Joel, i ma anak ni si Azaria, i ma anak ni
si Sepania.

³⁷ (6-22) I ma anak ni si Kohat, i ma anak ni
si Asir, i ma anak ni si Abiasap, i ma anak ni
si Kora.

³⁸ (6-23) I ma anak ni si Ishar, i ma anak ni
si Kohat, i ma anak ni si Lepi, i ma anak ni si
Israel.

³⁹ (6-24) Ia si Asap anggina i, jongjong di
siamunna. Ia si Asap anak ni si Berekia, i ma
anak ni si Simea.

⁴⁰ (6-25) I ma anak ni si Mikhael, i ma anak
ni si Baeseya, i ma anak ni si Malkia.

⁴¹ (6-26) I ma anak ni si Etni, i ma anak ni si
Jara, i ma anak ni si Adaya.

⁴² (6-27) I ma anak ni si Etan, i ma anak ni
si Zima, i ma anak ni si Simei.

⁴³ (6-28) I ma anak ni si Jahat, i ma anak ni
si Gerson, i ma anak ni si Lepi.

⁴⁴ (6-29) Ia angka anak ni si Merari
angginasida i, na jongjong dingkan

hambirang, i ma: Si Etan, anak ni si Kisi, i ma anak ni si Abdi, i ma anak ni si Malluk.

⁴⁵ (6-30) I ma anak ni si Hasabya, i ma anak ni si Amasia, i ma anak ni si Hilkia.

⁴⁶ (6-31) I ma anak ni si Amzi, i ma anak ni si Bani, i ma anak ni si Semer.

⁴⁷ (6-32) I ma anak ni si Mahli, i ma anak ni si Musi, i ma anak ni si Merari, i ma anak ni si Lepi.

⁴⁸ (6-33) Alai anggo tu angka angginasida, halak Lepi, nunga pinasahat mangaradoti sude ulaon di joro ni Debata.

⁴⁹ (6-34) Alai anggo si Aron dohot angka anakna i manutung daupa di atas langgatan pamelean ni pelean situtungon dohot di atas langgatan panutungan ni daupa, nasida mangaradoti nasa ulaon di bagasan bilut na songkal sahali laho mambahen pardenggan na tu Israel, hombar tu sandok na tinonahon ni si Musa, naposo ni Debata.

⁵⁰ (6-35) Angka on do pinompar ni si Aron. Si Eleasar apala tubuna, anak ni muse si Pinehas, anak ni muse si Abisua.

⁵¹ (6-36) Anak ni muse si Bukki, anak ni muse si Usi, anak ni muse si Seraia.

⁵² (6-37) Anak ni muse si Merayot, anak ni muse si Amaria, anak ni muse si Ahitub.

⁵³ (6-38) Anak ni muse si Sadok, anak ni muse si Ahimas.

⁵⁴ (6-39) (III.) Jala on do inganannasida ro di golatna dohot partalpahanna. Ia tu

pinompar ni si Aron, tubu ni si Kohat (ai di nasida do bagian parjolo).

⁵⁵ (6-40) Dilehon nasida do Hebron di tano Juda ro di golatna humaliang.

⁵⁶ (6-41) Alai anggo ladang ni huta i ro di angka sosorna dilehon nasida do tu si Kaleb, anak ni si Jepune.

⁵⁷ (6-42) Dilehon nasida huhut tu anak ni si Aron angka huta haporusan: Hebron dohot Libna ro di golatna; tole Jatir dohot Estemo ro di golatna.

⁵⁸ (6-43) Tole Holon ro di golatna dohot Debir ro di golatna.

⁵⁹ (6-44) Tole Asan ro di golatna dohot Betsemes ro di golatna.

⁶⁰ (6-45) Alai sian marga Benjamin: Geba ro di golatna dohot Almon ro di golatna dohot Anatot ro di golatna. Jadi saluhut hutanasida sampulu tolu huta do mangihuthon sundutnasida.

⁶¹ (6-46) Alai di anak ni si Kohat, angka na tinggal i sian sundut ni margai dohot sian satonga marga Manasse sampulu huta do dilehon marhite sian rujiruji.

⁶² (6-47) Ia di anak ni si Gerson marsundutsundut maruli bagian sian marga Isasar dohot sian marga Aser dohot sian marga Naptali dohot sian marga Manasse di Basan, sampulu tolu huta do.

⁶³ (6-48) Ia di pinompar ni si Merari marsundutsundut dilehon do marhite sian

rujiruji sian marga Ruben dohot sian marga Gad dohot sian marga Zebulon, sampulu dua huta.

⁶⁴ (6-49) Jadi dilehon halak Israel ma tu halak Lepi angka huta i ro di golatna.

⁶⁵ (6-50) Dilehon nasida huhut marhite sian rujiruji sian marga Juda dohot sian marga Simeon dohot sian marga Benjamin angka huta on, pola dipaboa goargoarna.

⁶⁶ (6-51) Alai anggo pinompar ni si Kohat na asing maruli angka huta bahen bagiannasida sian marga Epraim.

⁶⁷ (6-52) Ai dilehon donganna tu nasida angka huta haporusan: Sikem ro di golatna di dolok Epraim dohot Gezer ro di golatna.

⁶⁸ (6-53) Tole Jokneam ro di golatna dohot Bethoron ro di golatna.

⁶⁹ (6-54) Tole Aialon ro di golatna dohot Gatrimon ro di golatna.

⁷⁰ (6-55) Angkup ni sian satonga marga Manasse: Huta Aner ro di golatna dohot Ibleam ro di golatna. I ma huta angka na nilehonna tu pinompar ni si Kohat, angka na tinggal i.

⁷¹ (6-56) Ia tu pinompar ni si Gerson dilehon do bagian sian pinompar ni satonga marga Manasse: Golan di Basan ro di golatna dohot Astarot ro di golatna.

⁷² (6-57) Ia sian marga Isasar: Kision ro di golatna, Dabarat ro di golatna.

⁷³ (6-58) Ramat ro di golatna dohot Hilon ro di golatna.

⁷⁴ (6-59) Ia sian marga Aser: Miseal ro di golatna, Abdon ro di golatna.

⁷⁵ (6-60) Helkat ro di golatna dohot Rehob ro di golatna.

⁷⁶ (6-61) Ia sian marga Naptali: Kedes di Galilea ro di golatna, Hamon ro di golatna dohot Kiriataim ro di golatna.

⁷⁷ (6-62) Ia tu pinompar ni si Merari, angka na tinggal i, dilehon do bagian sian marga Zebulon: Rimona ro di golatna dohot Tabor ro di golatna.

⁷⁸ (6-63) Jala di bariba ni Jordan tondong ni Jeriko, tungkan habinsaran martopihon Jordan, dilehon sian marga Ruben: Bezer na di halongonan ro di golatna, Jahaz ro di golatna.

⁷⁹ (6-64) Kadermat ro di golatna dohot Mepaat ro di golatna.

⁸⁰ (6-65) Jala sian marga Gad: Ramot di Gilead ro di golatna, Mahanaim ro di golatna.

⁸¹ (6-66) Hesbon ro di golatna dohot Jaser ro di golatna.

7 ¹ (I.) Ia angka anak ni si Isasar on do: Si Tola, si Pua, si Jashub dohot si Simron, na opat i do.

² Ia angka anak ni si Tola on do: Si Usi, si Repaia, si Jeriel, si Jahmai, si Ibsam dohot si Samuel; luhutna i angka partogi do di pinompar ni amanasida, sian si Tola tubu

angka ulubalang manjujur sundutsundutna,
bilangannasida uju di tingki ni si Daud
duapulu dua ribu onom ratus halak toropna.

³Ia angka anak ni si Usi: Si Israhia; ia angka
anak ni si Israhia: Si Mikhael, si Obaja, si Joel
dohot si Ishia; luhut na lima i angka induk do.

⁴Jala dongannasida mangihuthon
partubunasida, di pinompar ni ompuna angka
parduaan ni parangan, tolupulu onom ribu
halak toropna; ia torop dojolmanasida dohot
ianakhonna.

⁵Ia angka dongannasida mangihuthon
sandok pinompar ni si Isasar, angka ulubalang
na marhuaso do, ualupulu pitu ribu halak
molo niransap sudena.

⁶Ia angka anak ni si Benjamin: Si Bela, si
Beker dohot Jediael, na tolu i do.

⁷Ia angka anak ni si Bela: Si Esbon, si Usi,
si Usiel, si Jerimot dohot si Iri; na lima i,
angka induk di pinompar ni amana, angka
ulubalang na marhuaso, jala tare tong sian
nasida duapulu dua ribu tolupulu opat halak.

⁸Ia angka anak ni si Beker: Si Semira, si
Joas, si Elieser, si Eleonai, si Omri, si Jerimot,
si Abia, si Anatot dohot si Alemet, luhutna i
angka anak ni si Beker.

⁹Jala aturannasida mangihuthon partubuna,
angka induk di pinompar ni amana, angka
ulubalang na marhuaso, duapulu ribu dua
ratus halak.

¹⁰Ia anak ni si Jediael: Si Bilhan do; ia angka anak ni si Bilhan: Si Jeus, si Benjamin, si Ehud, si Kenaana, si Setan, si Tarsis dohot si Ahisahar.

¹¹Luhutna i angka anak ni si Jediael, mangihuthon induk pinompar ni amana, angka ulubalang na marhuaso, sampulu pitu ribu dua ratus halak toropna, angka na tarbahen borhat rap dohot parangan tu parporangan.

¹²Alai si Suppim dohot si Hupim, i ma anak ni si Rehobot Ir, jala si Husim anak ni si Aher.

¹³Ia angka anak ni si Naptali: Si Jeser, si Guni, si Ieser dohot si Shillem, i ma anak ni si Bilha.

¹⁴(II.) Ia angka anak ni si Manasse: Si Asriel na tinubuhon ni jolmana boru Ram; ditubuhon muse si Mahir, ama ni si Gilead.

¹⁵Dung i dibuat si Mahir ma iboto ni si Hupim dohot si Suppim bahen jolmana na margoar si Maaka; ia goar ni anakna paidua: Si Jelapehat, holan boruboru do tubuna.

¹⁶Dung i ditubuhon si Maaka, jolma ni si Mahir ma sada anak, dibahen ma goarna si Peres jala goar ni anggina si Seres jala anakna i muse: Si Ulam dohot si Rekem.

¹⁷Ia anak ni si Ulam i ma si Bedan. I ma pinompar ni si Gilead, anak ni si Mahir, anak ni si Manasse.

¹⁸Ia ibotona si Molekhet manubuhon si Isod, si Abieser dohot si Mala.

¹⁹Ia angka anak ni si Semida: Si Ahian, si Sekem, si Liki dohot si Aniam.

²⁰Ia angka anak ni si Epraim: Si Sutela, anak ni muse si Bered, anak ni muse, si Tahan, anak ni muse si Eleada, anak ni muse si Tahan.

²¹Anak ni muse si Sabad, anak ni muse si Sutela, si Eser dohot si Elead. Hape ro halak Gat mambunu i halak na tubu di tano i, ala tuat nasida laho mangalaum pinahannasida i.

²²Dibahen i nania leleng do marsak si Epraim, amanasida i, gabe ro angka hahaanggina mangapuli ibana.

²³Dung i ditopot ma jolmana, gabe marhangoluan nasida, jala manubuhon sada anak, dibahen ma goarna si Beria, ala masa hinamago di bagasan jabuna.

²⁴Alai anggo boruna i ma si Jara, na pauli huta Bethoron jae dohot julu ro di Usen-Jara.

²⁵Si Repaim pe anakna do i angkup ni si Resep, anak ni muse si Tela, anak ni muse si Tahan.

²⁶Anak ni muse si Ladan, anak ni muse si Amihud, anak ni muse si Elisama.

²⁷Anak ni muse si Nun, anak ni muse si Josua.

²⁸Jala partaliannasida dohot inganannasida, i ma Betel ro di angka pagaran na masuk tusi, jala tungkan habinsaran Naaran, jala tungkan hasundutan Gezer ro di angka pagaranna

dohot Sekem ro di angka pagaranna, sahat ro di Gasa dohot pagaranna.

²⁹Jala di lambung ni pinompar ni si Manasse: Betsean ro di angka pagaranna dohot Taanak ro di pagaranna dohot Megiddo ro di pagaranna dohot Dor ro di pagaranna. Maringan do di bagasan angka huta i pinompar ni si Josep, anak ni si Israel.

³⁰(III.) Ia angka anak ni si Aser: Si Innah, si Isha, si Ishi, si Beria dohot si Jara, ibotonasida i.

³¹Ia angka anak ni si Beeria: Si Heber dohot si Malkiel, i ma ama ni si Birsapet.

³²Ia si Heber manubuhon Japlet, Somer, Hotam dohot Sua, ibotonasida i.

³³Ia angka anak ni si Japlet: Si Pasak, si Bimhal dohot si Aspat; i ma angka anak ni si Japlet.

³⁴Ia angka anak ni si Somer: Si Ahi, si Roga, si Jehuba dohot si Ram.

³⁵Ia angka anak ni si Helem, anggina i: Si Sofah, si Innah, si Seles dohot si Amal.

³⁶Ia angka anak ni si Sofah: Si Sua, si Harneper, si Sual, si Beeri, si Imra.

³⁷Si Bezer, si Hot, si Sama, si Silsa, si Itran dohot si Bera.

³⁸Ia angka anak ni si Jeter: Si Jepune, si Pispa dohot si Ara.

³⁹Ia angka anak ni si Ula: Si Ara, si Hammiel dohot si Risia.

⁴⁰Luhutna i do pinompar ni si Aser, angka induk ni pinompar ni ompuna, angka ulubalang na marhuaso jala na pinillit, jala ihutan ni angka induk, jala taretong do sian nasida masuk parangan, duapulu onom ribu halak toropna.

8¹(I.) Ia si Benjamin manubuhon si Bela, buhabajuna i, si Asbel, paidua, si Ara paitolu.

²Si Noha paiopat, dohot si Rapa pailima.

³Ia angka anak ni si Bela: Si Adar, si Gera, si Abihud.

⁴Si Abisua, si Naaman, si Ahoa.

⁵Si Gera, si Sepupan dohot si Huram.

⁶On do angka anak ni si Ehud, angka induk marompuompu, angka isi ni Geba, jala tarbuang nasida tu Manahat.

⁷Naaman, Ahia dohot Gera; ibana ma mambuankon nasida, jala ditubuhon muse: Si Usa dohot si Ahihud.

⁸Si Saarim pe tubuan anak do di ladang ni Moab, dung dipalaho si Husim dohot si Baara angka jolmana i.

⁹Tubuan anak ibana sian si Hodes jolmana i: Si Jobab, si Zibia, si Mesa, si Malkam.

¹⁰Si Jeus, si Saja dohot si Mirma. I ma angka anakna, angka induk marompuompu.

¹¹Tubuan anak ibana dohot sian si Husim: Si Ahitub dohot si Epaal.

¹²Ia angka anak ni si Epaal: Si Heber, si Misham dohot si Semer. Ibana umpungka huta Ono dohot Lod, ro di pagaranna.

¹³Anggo si Beria dohot si Sema, nasida do induk marompuompu, di angka isi ni Aialon nasida huhut pabalihon angka isi ni Gat.

¹⁴Angkup ni: Si Ahio, si Sasak, si Jeremot.

¹⁵Si Sebadia, si Arad, si Eder.

¹⁶Si Mikhael, si Ispa dohot si Joha, i ma angka anak ni si Beria.

¹⁷Tole muse si Sebadia, si Mesulam, si Hiski, si Heber.

¹⁸Si Ismari, si Islia, si Jobab, i ma angka anak ni si Epaal.

¹⁹Tole muse si Jakim, si Sikri, si Sabdi.

²⁰Si Elienai, si Jilletai, si Eliel.

²¹Si Adaya, si Beraia dohot si Simrat, i ma angka anak ni si Simeil.

²²Tole muse si Ispan, si Heber, si Eliel.

²³Si Abdon, si Sikri, si Hanan.

²⁴Si Hanania, si Elam, si Antotia.

²⁵Si Jepdeya dohot si Peniel i ma angka anak ni si Sasak.

²⁶Tole muse si Samserai, si Seharia, si Atalia.

²⁷Si Jaeresia, si Elia dohot si Sikri, i ma angka anak ni si Jeroham.

²⁸I ma angka induk marompuompu mangihuthon partubuna be; induk angka na maringan di Jerusalem.

²⁹Alai maringan di Gibeon do ama ni si Gibeon, jala goar ni jolmana si Maaka.

³⁰Ia anak buhabajuna si Abdon do, dung i si Sur, si Kis, si Baal, si Nadab.

³¹Si Gedor, si Ahio dohot si Seker.

³²Ia si Mikhlot manubuhon si Simea; nasida pe maringan do di Jerusalem rap dohot angka hahanggina patondong be.

³³(II.) Ia si Ner manubuhon si Kis, na manubuhon si Saul; si Saul manubuhon: Si Jonatan, Malkisua, si Abinadab dohot si Esbal.

³⁴Ia anak ni si Jonatan: Si Meribaal; si Meribaal manubuhon si Mika.

³⁵Ia angka anak ni si Mika: Si Piton, si Melek, si Terea dohot si Ahas.

³⁶Ia si Ahas manubuhon si Jehoadab, na manubuhon si Alemet, si Asmapet dohot si Simri; si Simri manubuhon si Mosa.

³⁷Si Mosa manubuhon si Binea, anak ni muse si Rapa, anak ni muse si Eleasa, anak ni muse si Asel.

³⁸Ia di si Asel onom do anakna, angka on do goarnasida: Si Asrikam, si Boheru, si Ismael, si Searia, si Obaja dohot si Hanan; luhutna i angka anak ni si Asel do.

³⁹Ia angka anak ni si Esek, anggina i: Si Ulam, buhabajuna i, si Jeus paidua si Elipelet paitolu.

⁴⁰Ia angka anak ni si Ulam angka ulubalang do, jala pande manior, jala torop anakna dohot pahompuna, saratus limapulu halak

toropna. I ma pinompar ni si Benjamin luhutna.

9¹ (I.) Jadi sandok Israel tarsurat tu bagasan aturan sundutsundut, jala ida ma, nunga tarsurat nasida di bagasan buku ni angka raja sian Israel: Alai anggo halak Juda tarbuang do tu Babel ala pangoseoseonna.

²Ia isi ni tano i parjolo, angka na maringan di partalianna be dohot di bagasan hutana be, i ma halak Israel, angka malim, halak Lepi dohot angka parhalado di joro (Netinim).

³Maringan di Jerusalem do deba sian halak Juda, tole sian halak Benjamin, sian halak Ephraim dohot Manasse.

⁴Si Utai, i ma anak ni si Amihud, i ma anak ni si Omri, i ma anak ni si Imri, i ma anak ni si Bani, sian pinompar ni si Peres anak ni si Juda.

⁵Ia sian halak Siela: Si Asaya, buhabajuna ro di angka anakna.

⁶Ia sian anak ni si Jara: Si Jeuel dohot angka hahaanggina, onom ratus siapulu halak toropna.

⁷Ia sian pinompar ni Benjamin: Si Sallu, anak ni si Mesulam, i ma anak ni si Hodopia, i ma anak ni si Hassenuna.

⁸Tole si Ibnia, anak ni si Jeroham dohot si Ela, anak ni si Usi, i ma anak ni si Mikhri, dohot si Mesulam, anak ni si Sepatia, i ma anak ni si Reguel, i ma anak ni si Ibnia.

⁹Ro di angka hahaanggina marsundutsundut, sia ratus limapulu onom halak toropna.

Luhutna i halak partogi marompuompu, di pinompar ni ompunasida.

¹⁰(II.) Alai anggo sian angka malim: Si Jedaia, si Johaiarib, si Jakin.

¹¹Tole si Azaria, anak ni si Hilkia, i ma anak ni si Mesulam, i ma anak ni si Sadok, i ma anak ni si Merayot, i ma anak ni si Ahitub, sada induk di joro ni Debata.

¹²Tole muse si Adaya, anak ni si Jeroham, i ma anak ni si Pashur, i ma anak ni si Malkia; tole si Maasai, anak ni si Adiel, i ma anak ni si Jahsera, i ma anak ni si Mesulam, i ma anak ni si Mesilemit, i ma anak ni si Immer.

¹³Tole angka hahaanggina, angka partogi di pinompar ni ompuna, saribu pitu ratus onompulu halak toropna, angka halak na pande mangaradoti ulaon di bagasan joro ni Debata.

¹⁴Alai anggo sian halak Lepi, sian pinompar ni si Merari: Si Semaya, anak ni si Hasup, i ma anak ni si Asrikam, i ma anak ni si Hasabya.

¹⁵Tole si Bakbakkar, si Heres, si Galal, si Matania, anak ni si Mika, i ma anak ni si Sikri, i ma anak ni si Asap.

¹⁶Tole muse si Obaja, anak ni si Semaya, i ma anak ni si Galal, i ma anak ni si Jedutun; tole si Berekia, anak ni si Asa, i ma anak ni si Elkana, na maringan di bagasan angka sosor ni halak Netopa i.

¹⁷ (III.) Tole angka sijaga pintu: Si Sallum, si Akkub, si Talmon dohot si Ahiman rap dohot angka hahaanggina; alai si Sallum do anggo partogina.

¹⁸ Jala rasirasa nuaeng sai di lambung bahal ni rajai tungkan habinsaran nasida marjaga parsaroan ni halak Lepi.

¹⁹ Ia si Sallum, anak ni si Kora, i ma anak ni si Eliasap, i ma anak ni si Kora dohot hahaanggina sian pinompar ni ompuna, halak Kora ma nampuna ulaon ni todoan i, asa marjaga nasida di lobulobu laho bongot tu undungundung i, suang songon ompunasida i di parsaroan ni Jahowa, asa dijaga nasida pintu haroroan.

²⁰ Jala si Pinehas, anak ni si Eleasar induk nasida na jolo, ai Jahowa do mandongani ibana.

²¹ Ia si Sakaria, anak ni si Meselemya, sijaga pintu di undungundung parluhutan i.

²² Luhut nasida halak na pinillit do bahen sijaga pintu, dua ratus sampulu dua halak toropna; nunga tarsurat nasida di aturan sundutsundut mangihuthon hutana be; nunga dipabangkit si Daud dohot si Samuel panurirang i nasida hian tu tohonanna, ala burju nasida.

²³ Asa nasida ro di anaknasida i tongtong sijaga pintu di joro ni Jahowa, i ma di lambung bagas undungundung, asa jagaonna.

²⁴Mangihuthon desa na opat i jongjong angka parjaga i, di purba, di pastima, di utara dohot di dangsina.

²⁵Alai anggo hahaangginasida di bagasan angka soso, ingkon ro be ganup papituarihon, asa rap nasida.

²⁶Ai ingkon burju mangaradoti tohonanna na opat halak induk ni angka sijaga pintu, i ma halak Lepi; jala nasida do panahatan ni bilut dohot angka arta di joro ni Debata.

²⁷Marborngin nasida huhut humaliang joro ni Debata, ai nasida do panahatan ni parhalan, jala nasida mangungkap pintu ganup sogot.

²⁸Adong huhut deba sian nasida panahatan ni ulaula ni tohonan i, ai ingkon jolo dibilang mamboan tu bagasan dohot paruarhon muse.

²⁹Adong huhut deba sian nasida panahatan ni sude ulaula angka na pinangke di na songkal sahali, tole paturehon itak, anggur, miak, daupa dohot pamurpuri.

³⁰Adong muse deba sian angka anak ni malim, angka na mamandei miak na hushus pangkeon laho mamiahi.

³¹Jala si Matitia sian halak Lepi, buhabaju ni si Sallum, halak Kora, panahatan ni todoan patureture sigorengon di bagasan balanga.

³²Ia sian pinompar ni si Kohat, angginasida i adong deba panahatan ni roti radean paradeonna ganup ari Sabbath.

³³Adong huhut deba sian nasida angka parende, jujungan ni halak Lepi marompuompu, angka na malua sian ulaon di bagasan bilut, ai borngin dohot arian sai tole nasida mangaradoti ulaonna.

³⁴Ai nasida do jujungan ni halak Lepi marompuompu, mangihuthon sundutnasida i; jala maringan di Jerusalem do angka jujungan i.

³⁵(IV.) Alai maringan di Gibeon do: Si Jeiel, ama ni si Gibeon, ia goar ni jolmana Maaka.

³⁶Ia anak buhabajuna si Abdon, dung i: Si Sur, si Kis, si Baal, si Ner, si Nadab.

³⁷Si Gedor, si Ahio, si Sakaria dohot si Mikhlot.

³⁸Ia si Mikhlot manubuhon si Simea; nasida pe maringan do di Jerusalem rap dohot angka hahaanggina patondong be.

³⁹Ia si Ner manubuhon si Kis, na manubuhon si Saul; ia si Saul manubuhon si Jonatan, si Malkisua, si Abinadab dohot si Esbal.

⁴⁰Ia anak ni si Jonatan i ma si Meribaal, na manubuhon si Mika.

⁴¹Ia angka anak ni si Mika: Si Piton, si Melek dohot si Terea.

⁴²Ia si Ahas manubuhon Jarah, na manubuhon: Alemet, si Asmapet dohot si Simri, na manubuhon Mosa.

⁴³Ia si Mosa manubuhon si Binea na manubuhon si Repaim, anak ni muse si Eleasa, anak ni muse si Asel.

⁴⁴ Onom do ia anak ni si Asel, angka na margoar: Si Asrikam, si Boheru, si Ismael, si Searia, si Obaja, dohot si Hanan; i ma angka anak ni si Asel.

10¹ (I.) Dung i marporang ma halak Palistim dompak halak Israel, gabe maporus ma halak Israel maradophon halak Palistim, jala marragean nasida di dolok Gilboa.

² Dung i sai dilotongi halak Palistim ma si Saul dohot angka anakna, jala dibunu halak Palistim ma si Jonatan, si Abinadab dohot si Malkisua, angka anak ni si Saul.

³ Jadi tarsugutsugut ma si Saul, sai ditumpur angka halak parsior i ibana, gabe targisik bugangna dibahen angka parsior i.

⁴ Dung i didok si Saul ma mandok naposona siusung sinjatana: Umpat ma podangmu jala tihamhon tu ahu, asa unang ro halak parhulup on mangalesanlesan ahu. Alai ndang olo naposo siusung sinjatana i, ai mabiar situtu do ibana. Dung i dibuat si Saul ma podang i, laos ditinggangkon dirina tusi.

⁵ Jadi dung diida naposo siusung sinjatana i, naung mate si Saul, dohot ma ibana maninggangkon dirina tu podangna, laos mate.

⁶ Jadi rap mate ma si Saul dohot anakna na tolu i ro di sandok pinomparna rap mate do.

⁷ Jadi dung diida halak Israel, angka na maringan di rura, naung maporus angka

donganna i, jala naung mate si Saul rap dohot angka anakna, ditadingkon nasida ma hutanasida i jala maporus. Jadi ro ma halak Palistim maringan disi.

⁸(II.) Dung i marsogotna i ro ma halak Palistim laho mamupusi angka na marragean i, gabe jumpang nasida ma si Saul dohot angka anakna i marpeahan di dolok Gilboa.

⁹Jadi dung dipupusi nasida ibana ditipul ma uluna, laos diboan do i rap dohot sinjatana, dipaebangkon ma i tu luat ni halak Palistim humaliang, laho mamaritahon barita i tu bagas ni ajiajiannasida dohot tu situasi na torop i.

¹⁰Dung i dipampeakkon nasida ma angka sinjatana i tu bagasan joro ni debatanasida i, alai anggo tangkurakna i digantungkon do di bagasan joro ni Dagon.

¹¹Jadi dung dibege sandok isi ni Jabes di Gilead barita taringot tu na binahen ni halak Palistim tu si Saul.

¹²Borhat ma nasa baoa sialo musu, dibuat nasida ma bangke ni si Saul dohot bangke ni angka anakna i, jala diboan do i tu Jabes, jala ditanom holiholinasida di toru ni hariara di Jabes, laos marpuasa nasida pitu ari lelengna.

¹³Jadi mate ma si Saul di bagasan dosana, angka na binahenna dompak Jahowa, ala na so niradotanna hata ni Jahowa dohot ala marsungkun ibana tu parompuan pangarunding mangalului pangungkapon.

¹⁴Alai ndang dilului rohana anggo tu Jahowa, gabe dibunu Jahowa ibana, jala dipatongon harajaon i tu si Daud, anak ni si Isai.

11 ¹(I.) Dung i marluhut ma sandok Israel manopot si Daud di Hebron, ninna ma: Ida ma, sisada holiholi dohot sisada sibuk do hami dohot ho.

²Angkup ni, nang na sai laon uju si Saul dope raja, nunga ho hian manogihon Israel ruar dohot masuk; jala nunga didok Jahowa Debatam hian marbagahon tu ho: Ingkon ho marmahan bangsongku Israel, jala ingkon ho gabe partogi di bangsongku Israel.

³Jadi ro be ma sude sintua ni Israel manopot rajai di Hebron. Dung i marpadan ma si Daud tu nasida di Hebron di adopan ni Jahowa; jadi dimiahi nasida ma si Daud bahen raja gumomgom Israel, hombar tu hata ni Jahowa hian marhite sian si Samuel.

⁴Dung i borhat ma raja Daud rap dohot sandok Israel laho tu Jerusalem, i ma Jebus, ai halak Jebusi do isi ni tano i hian.

⁵Dung i didok isi ni Jebusi ma mangasapi si Daud: Nandang tagamon masuk ho tuson! Hape dipapatu si Daud do benteng Sion, i ma huta ni si Daud.

⁶Ai nunga didok si Daud hian: Manang ise parjolo mambunu halak Jebusi, ingkon gabe partogi dohot induk ibana. Jadi si Joab, anak ni Nai Seruia ma parjolo manaek parik i, alani bangkit ma ibana gabe partogi.

⁷Jadi maringan ma si Daud di bagasan huta i, ala ni do umbahen digoar halak benteng i huta ni si Daud.

⁸Dung i dipagonting ibana ma huta i humaliang olat ni Milo tuk humaliang. Alai anggo si Joab paimbaruhon na debanari di bagasan huta i.

⁹Dung i lam leleng lam naek ma hatimbulon ni si Daud, ai didongani Jahowa Zebaot do ibana.

¹⁰(II.) On do angka partogi ni ulubalang ni si Daud, angka na marsihohot be manolongi ibana pahothon harajaonna rap dohot sandok Israel laho pabangkithon ibana gabe raja, hombar tu hata ni Jahowa taringot tu Israel.

¹¹Jala on do bilangan ni angka ulubalang angka na rap dohot si Daud: Jasobeam, anak ni Hakmoni, induk ni tolupulu parangan, tung dimonsakkon ibana do hujurna dompak tolu ratus halak, angka na rap sahali binununa.

¹²Dung i ibana si Eleasar ma, anak ni si Dodo, halak Ahohi; ibana masuk bilangan tu na tolu, ulubalang i.

¹³Ibana do dongan ni si Daud di Dammim, uju na marpungu disi halak Palistim laho marporang. Jadi adong ma disi santurpuk hauma na mareme na masak; hape maporus do situasi na torop i maradophon halak Palistim.

¹⁴Jadi jongjong ma nasida tu tongatonga ni hauma i, gabe dipalua nasida ma i,

laos ditaluhon ma halak Palistim i. Jadi hamonangon bolon ma na tinumpakkon ni Jahowa.

¹⁵Dung i tuat ma tolu halak sian na tolupulu induk i sian dolok batu mandapothon si Daud tu liang Adullam; alai anggo parangan ni halak Palistim marsaro do uju i di rura Repaim.

¹⁶Alai di partanobatoan do anggo si Daud uju i, jala parangan ni halak Palistim uju i di Betlehem.

¹⁷Jadi mangapian ma roha ni si Daud, gabe didok ma: Ise ulaning olo mangalehon aek inumonku sian sumur na di Betlehem mardonokkon bahal?

¹⁸Jadi dirampok na tolu ulubalang i ma parsaroan ni halak Palistim, jala ditahui aek sian sumur na di Betlehem mardonokkon bahal, laos diboan do i sahat tu si Daud; alai ndang olo si Daud manginumsa, laos diusehon do i tahe bahen pelean tu Jahowa.

¹⁹Ninna ma: Dao ma i sian ahu, ale Debatangku, tung bahenonku songon i! Tung olo ma ahu manginum mudar ni angka baa on, pola marmara hosanasida i? Ai pola diseahon nasida hosanasida i mamboan aek i; dibahen i ndang olo ibana manginum sian i. I ma na binahen ni na tolu ulubalang i.

²⁰Si Abisai pe, anggi ni si Joab, ibana do partogi ni tolu halak; ibana pe disarahon do

hujurna manullangi tolu ratus halak, gabe umbaritaan goarna sian nasida na tolu i.

²¹ Sian na tolu halak rongkanaan paduahon i, ibana ma tutu marmuliaan, gabe ibana induknasida; alai ndang taratupsa anggo tung na tolu parjolo i.

²² Si Benaia pe, anak ni si Joiada, tubu ni sada baoa na marhuaso jala sigodang pambahenan sian Kabseel; tung dibunu ibana do dua singa sian Moab; tuat muse ibana mambunu singa sadanari di bagasan godung uju di partaonan ngali ni ari.

²³ Dibunu ibana muse sada halak Misir na bolon situtu, lima asta ganjangna, jala taon do di bagasan tangan ni halak Misir i sada hujur, na saumban do suhulna; hape tuat ibana mandapothon mantat tungkot sambing, jala dirampas hujur i sian tangan ni halak Misir i, laos dibunu ibana dohot hujurna sandiri.

²⁴ I ma na binahen ni si Benaia, anak ni si Joiada, umbahen tarbaritaan goarna sian na tolu ulubalang i.

²⁵ Ida ma, ibana umbaritaan tahe sian na tolupulu halak i; alai ndang taratupsa anggo na tolu parjolo i. Jadi dipabangkit si Daud ma ibana gabe ihutan ni paranganna.

²⁶ Alai goargoar ni saluhut ulubalangna on do: Si Asahel anggi ni si Joab; si Elihanan, anak ni si Dodo sian Betlehem.

²⁷Si Sama, halak Harod i; si Heles halak Peloni.

²⁸Si Ira, anak ni si Ikes, halak Tekoa i; si Abieser, halak Anatot i.

²⁹Si Sebekkai, halak Husa i; si Ilai halak Ahohi.

³⁰Si Maharai, halak Netopa i; si Heled, anak ni si Bahanas, halak Netopa i.

³¹Si Ittai, anak ni si Ribai sian Gibeon ni halak Benjamin; si Benaia, halak Piraton i.

³²Si Hurai, sian angka rura Gaas; si Abiel, halak Arbati.

³³Si Asmapet, halak Bahurim; si Eliaba, halak Salabini.

³⁴Angka anak ni si Hasem, halak Gison i; si Jonatan, anak ni si Sage, halak Harari.

³⁵Si Ahiam, anak ni si Sahar, halak Harari; si Elipal, anak ni si Ur.

³⁶Si Heper, halak Meherati; si Ahia, halak Peloni.

³⁷Si Hesrai, halak Karmel i; si Naharai, anak ni si Esbai.

³⁸Si Jigal, anak ni si Natan; si Mibhar, anak ni si Hagri.

³⁹Si Selek, halak Amoni; si Naharai, halak Beerot i, siusung senjata ni si Joab, anak ni Nai Seruia.

⁴⁰Si Ira, halak Itri; si Gareb, halak Itri.

⁴¹Si Uria, halak Het i; si Sabad, anak ni si Ahloi.

⁴²Si Adina, anak ni si Sisa, halak Ruben, partogi ni halak Ruben jala tolupulu halak donganna.

⁴³Si Hanan, anak ni si Maaka; si Josapat, halak Mitni.

⁴⁴Si Usia, halak Astera; si Sama dohot si Jeiel, rap anak ni si Hotam, halak Aroer i.

⁴⁵Si Jediael, anak ni si Simri dohot si Joha anggina i, halak Tisi.

⁴⁶Si Eliel, halak Mahapa, si Jeribai dohot si Josabia, rap anak ni si Elnaam, si Itma, halak Moab.

⁴⁷Si Eliel, si Obed, si Jasiel sian Mezobaya.

12¹ (I.) On do goargoar ni halak angka na mandapoti si Daud tu Ziklag, uju ingkon martabuni dope ibana maradophon si Saul, anak ni si Kis, laos masuk nasida tu bilangan ni angka ulubalang, angka na gogo manolongi di parporangan.

²Angka na marsinjatahon sior do nasida, angka na pande mangambalang mangiamun dohot manjaluk, huhut maniorhon sumbia marhite sian sior; sian angka hahaanggi ni si Saul do nasida sian Benjamin.

³Partogina i ma si Ahieser dohot si Joas, duansa anak ni si Sema halak Gibeon tole si Jesiel dohot si Pelet, rap anak ni si Asmapet; Beraka dohot si Jehu, halak Anatot i.

⁴Si Ismaia, halak Gibeon, sada ulubalang di tongatonga ni tolupulu halak, laos ibana partogi ni na tolupulu halak i; tole muse si

Jiremia, si Jehasiel, si Johanan, si Josabad, halak Gedera i.

⁵Si Elusai, si Jerimot, si Bealia, si Semaria, si Sepatia, halak Harupi.

⁶Si Elkana, si Jesia, si Asarel, si Joeser, si Jasobeam, halak Kora.

⁷Si Joela dohot si Sebadia, duansa anak ni si Jeroham sian Gedor.

⁸Nang sian halak Gad adong do deba mamulik mandapothon si Daud tu dolok batu di halongonan, angka ulubalang do nasida na somal marmusu, angka na jongjong marrinte patioptiop lombulumbu dohot hujur ia bohinasida songon bohi ni singa idaon, jala dorasna songon hije di atas ni angka dolok.

⁹Si Eser goar ni indukna parjolo si Obaja paidua, si Eliab paitolu.

¹⁰Si Mismana paiopat, si Jeremia pailima.

¹¹Si Attai paionom, si Eliel paipitu.

¹²Si Johanan paiualu, si Elsabad paisia.

¹³Si Jeremia paisampulu, si Makbanai paisampulusada.

¹⁴Luhutna i sian pinompar ni si Gad, angka partogi ni parangan, sada na ummetmet sian nasida parentahon saratus halak, jala na umbalga parentahon saribu halak.

¹⁵Nasida ma i angka na manaripari Jordan di bulan sipaha sada, uju sirnip sandok pasirna, jala dilele nasida do saluhut isi ni angka rura sambola tungkan habinsaran dohot tungkan hasundutan.

¹⁶Ro do huhut deba sian halak Benjamin dohot Juda mandapothon si Daud tu dolok batu.

¹⁷Dung i ruar ma si Daud mandapothon nasida, ninna ma mangalusi joujounasida i: Molo dame binoanmuna ro tu ahu, naeng mangurupi ahu, ingkon marsihohot ma rohangku tu hamu; alai molo tung ro hamu naeng manjehehon ahu tu musungku, atik pe so diulahon tanganku pangarupaon, sai manatap manonggor ma Debata ni angka ompunta, jala Ibana manorui!

¹⁸Jadi songgop ma Tondi ni Debata tu si Amasai, partogi ni tolupulu halak, ninna ma: Angka naposom do hami, ale Daud! Jala sai donganannami do ho, ale anak ni si Isai! Dame, dame ma di ho, dame huhut di angka na manolongi ho! Ai nunga ditolongi Debatam ho. Jadi dijangkon si Daud ma nasida jala dipabangkit nasida bahen partogi ni angka parangan.

¹⁹Sian Manasse pe adong do deba bali tu si Daud, uju na ro ibana rap dohot halak Palistim naeng marporang dompak si Saul, alai tahe ndang saut ibana manolongi nasida, ai dung martuptup angka induk ni halak Palistim, disuru nasida ma ibana muli ninna ma: Marmara ulunta maon tung sura bali ibana tu si Saul tuanna i.

²⁰Jadi di na laho muli ibana tu Ziklag bali ma tu ibana sian Manasse: Si Adna, si Josabad, si

Jediael, si Mikhael, si Josabad, si Elihu dohot si Jilletai, angka partogi ni halak Manasse marsasaribu.

²¹ Nasida huhut manolongi si Daud mangalo parangan ni halak Amalek; ai angka ulubalang nasida luhutna jala bangkit gabe partogi ni angka parangan.

²² Ai uju i ariari do adong ro halak mandapoti si Daud, naeng tolonganna ibana, pola gabe sada parduaan parangan na bolon, songon parduaan parangan ni Debata.

²³ (II.) Jala on do angka bilangan ni angka partogi ni angka parangan angka na gopas be marsinjata, angka na ro mandapothon si Daud tu Hebron, pahothon harajaon ni si Saul tu si Daud, hombar tu hata ni Jahowa.

²⁴ Sian halak Juda, angka na mangusung lombulumbu dohot hujur, onom ribu ualu ratus halak, angka na gopas be marsinjata tu parporangan.

²⁵ Sian halak Simeon ulubalang angka na marhuaso tu parporangan, pitu ribu saratus halak.

²⁶ Sian halak Lepi opat ribu onom ratus halak.

²⁷ Jala si Joiada, partogi ni pinompar ni si Aron, tolu ribu pitu ratus halak donganna sian i.

²⁸ Si Sadok pe, sada halak na bajar dope nian, alai ulubalang na marhuaso jala sian

pinompar ni amana duapulu dua halak do angka partogi.

²⁹Sian halak Benjamin, hahaanggi ni si Saul, tolu ribu halak do; ai rasirasa nuaeng torop dope sian nasida paihuthon pinompar ni si Saul.

³⁰Sian halak Ephraim duapulu ribu ualu ratus halak, angka ulubalang na marhuaso pola sanga tarbarita goarnasida di pinompar ni ompunasida.

³¹Sian satonga marga Manasse sampulu ualu ribu halak, pola tarsurat goarnasida i, asa ro nasida pahothon harajaon di si Daud.

³²Sian pinompar ni Isasar, angka na pande manjujur ari, asa botoon ni Israel manang aha sibahenonna, dua ratus halak do partoginasida, jala saluhut hahaangginasida i, mangoloi guru doknasida.

³³Sian Zebulon, halak angka na borhat tu parporangan, angka na gopas be marsinjata marragamragam tu parporangan, limapulu ribu halak angka na marodor be sian sada ni rohana situtu.

³⁴Sian halak Naphtali saribu halak partogi, jala dongannasida angka na marsinjatahon lombulumbu dohot hujur, tolupulu pitu ribu halak.

³⁵Sian pinompar ni Dan, duapulu ualu ribu onom ratus halak, angka na marodor be tu parporangan.

³⁶Sian halak Aser, opatpulu ribu halak do, angka na tarbahen borhat tu parporangan maraturan.

³⁷Jala sian bariba ni Jordan, i ma sian halak Ruben, Gad dohot satonga Manasse, saratus duapulu ribu halak do mardongan ragamragam ni angka sinjata tu parporangan.

³⁸Luhutna i halak parporang, marodoran be hobas tu parporangan, ro nuaeng sian nasa rohana tu Hebron pabangkithon si Daud gabe raja gumomgom sandok Israel; nang sandok Israel na tinggal i marsaroha do laho pabangkithon si Daud gabe raja.

³⁹Jala disi do nasida rap dohot si Daud tolu ari lelengna mangan minum, ai nunga diparade angka hahaangginasida do i di nasida.

⁴⁰Nang halak angka na jonok tu nasida sahat ro di Isasar, Zebulon dohot Naptali, masiboan sagusaguna be di atas halode, unto, hoda na marsahe dohot jonggi, tole sipanganon sian itak, gaburgabur sian antajau dohot parbue ni anggur, tole muse anggur dohot miak, tole lembu dohot birubiru mansai torop; ai marlas ni roha be do halak Israel.

13¹(I.) Dung i martuptup ma si Daud rap dohot partogi ni paranganna marsasaribu, marsasaratus, rap dohot sude angka induk i tahe.

²Dung i didok si Daud ma tu sandok luhutan Israel: Molo denggan hata on di

rohamu jala marharoroan sian Jahowa, Debatanta i, itatompohon ma marsuru manopot hahaangginta angka na tinggal i di bagasan saluhut luat ni Israel, asa rap nasida muse manopot angka malim dohot halak Lepi di bagasan huta partaliannasida i, asa marpungu nasida di lambungta on.

³Asa mulak itaboan tu tongatonganta poti ni Debatanta; ai ndang lulululu hita disi saleleng mangolu si Saul.

⁴Jadi sahata ma sandok luhutan i manolopi, ingkon bahenon songon i, ai sude situasi na torop i marhatongonhon hata i.

⁵Jadi dipaluhut si Daud ma sandok Israel olat ni sunge Sihor di Misir sahat ro di Hamat, asa mangalap poti ni Debata sian Kiriath Jearim.

⁶Dung i nangkok ma si Daud rap dohot sandok Israel tu Baalah, i ma Kiriath Jearim, na masuk tu Juda, asa diboan nangkok sian i poti ni Debata Jahowa, na marhabangsahon kerubim, disi do somal dijou halak Goarna.

⁷Jadi diboan nasida ma poti ni Debata di atas ni sada hureta na imbaru, sian bagas ni si Abinadab; si Usa dohot si Ahio manogunogu huretai.

⁸Alai anggo si Daud ro di sandok Israel mangasa gogo manortori di adopan ni Debata, huhut marende dohot umpalu parhinaloan marragamragam, mardongan

sarune, arbap, sordam, ogung panggora
dohot ogung panonggahi.

⁹(II.) Jadi dung sahat nasida tu pardegean
Kidon, disurdukkon si Usa ma tanganna
naeng maniopi poti i, ai manimbil do angka
lombu i.

¹⁰Jadi tarrimas situtu ma Jahowa mida si
Usa, laos dibunu ibana, ala na sinurdukkonna
tanganna manjama poti i, gabe mate ibana
disi di adopan ni Debata.

¹¹Jadi marsak situtu ma si Daud, ala
parsirangan na binahen ni Jahowa tu si Usa,
gabe digoar ma inganan i Peres-Usa rasirasa
sadarion.

¹²Dung i mabiar ma si Daud mida Debata di
na sadari i, ninna ma: Beha ma pambahenku
mamboan poti ni Debata sahat tu ahu?

¹³Ala ni ndang diloas si Daud boanon poti
i tu ibana, tu bagasan huta ni si Daud,
didokkon do pataruon poti i tu bagas ni si
Obed-Edom, halak Gat.

¹⁴Jadi tinggal ma poti ni Debata di bagasan
jabu ni si Obed-Edom tolu bulan lelengna.
Dung i dipasupasu Jahowa ma pinompar ni si
Obed-Edom ro di sandok na di ibana.

14¹(I.) Dung i disuru si Hiram, raja sian
Tirus ma angka suruanna manopot si
Daud, angka na mamboan hau Ares dohot
tungkang mandakdak batu dohot angka
pande hau, asa dipauli nasida sada bagas di
rajai.

²Jadi mananda ma si Daud, naung pinahot ni Jahowa ibana bahen raja di Israel, ai lam tu timbulna do harajaonna i ala ni bangsona Israel.

³Dung i ditambahi si Daud dope angka parompuan bahen jolmana di Jerusalem, jala ganda dope angka anak dohot boru ditubuhon si Daud.

⁴On do goargoar ni anak, angka na tinubuhonna di Jerusalem, si Samua, si Sobab, si Natan, si Salomo.

⁵Si Ibar, si Elisua, si Elipelet.

⁶Si Noga, si Nepeg, si Japia.

⁷Si Elisama, si Beliada dohot si Elipelet.

⁸(II.) Alai dung dibege halak Palistim, naung miniahan si Daud bahen raja gumomgom sandok Israel, nangkok ma sude halak Palistim, paburuburu si Daud. Jadi dung dibege si Daud barita i, ruar ma ibana mandapothon nasida.

⁹Jadi marroan ma halak Palistim jala marsaro nasida di rura Repaim.

¹⁰Dung i marsungkun ma si Daud tu Debata, ninna ma: Na jadi do ahu nangkok mandopang halak Palistim, jala pasahatanmu do nasida tu bagasan tanganku? Dung i didok Jahowa ma tu ibana: Nangkok ma ho, ai nunga hupasahat nasida tu bagasan tanganmu.

¹¹Jadi dung sahat nasida tu Baal Perazim, ditaluhon si Daud nasida disi; laos didok si

Daud ma: Nunga mampar angka musungku dibahen Debata marhite sian tanganku songon pangalantap ni aek magodang. Ala ni umbahen digoar inganan i Baal Perazim.

¹²Dung i ditinggalhon nasida disi angka ajiajiannasida, gabe ro hata ni si Daud mandokkon ingkon purunon do angka i di bagasan api.

¹³Alai diulahi halak Palistim muse ro jala marsaro di rura i.

¹⁴Dung i marsungkun muse si Daud tu Debata, gabe ro hata ni Debata mandok tu ibana: Ndang jadi ho nangkok mangeak nasida, ingkon lompitonmu nasida sian pudinasida, asa pajumpang ho dohot nasida tondong ni angka hau balsam.

¹⁵Ia dung dibege ho pardorom ni halak pardalan di punsu ni angka hau balsam, rampok ma nasida disi, ai nunga ruar Debata mardalan di jolom laho papatuhon parangan ni halak Palistim.

¹⁶Jadi dibahen si Daud ma songon i, hombar tu tona ni Debata tu ibana, gabe dipapatu ma halak Palistim, olat ni Gibeon sahat ro di Gezer.

¹⁷Jadi sar ma barita ni si Daud tu saluhut luat. Jadi dilehon Jahowa ma biar mida rajai tu bagasan roha ni saluhut bangso parbegu.

15¹(I.) Dung i didokkon si Daud ma paulion angka bagasna di bagasan huta ni si Daud, diparade do huhut sada

ingan di poti ni Debata, jala dipahembang sada undungundungna.

²Uju i ma didok si Daud: Ndang jadi usungon ni manang ise poti ni Debata, dungkon ni halak Lepi; ai nunga dipillit Jahowa nasida mangusung poti ni Debata dohot marhalado di Ibana ro di saleleng ni lelengna.

³Jadi dipaluhut si Daud ma sandok Israel tu Jerusalem, asa diboan nasida poti ni Jahowa nangkok tu ingananna, na pinadirina hian disi.

⁴Dipaluhut si Daud huhut pinompar ni si Aron dohot halak Lepi.

⁵Sian pinompar ni si Kohat: Si Uriel, indukna i, ro di hahaanggina, saratus duapulu halak toropna.

⁶Sian pinompar ni si Merari: Si Asaya, indukna i, ro di hahaanggina, dua ratus duapulu halak toropna.

⁷Sian pinompar ni si Gerson: Si Joel, indukna i, ro di hahaanggina, saratus tolupulu halak toropna.

⁸Sian pinompar ni si Elsapan: Si Semaya, indukna i ro di hahaanggina, dua ratus halak toropna.

⁹Sian pinompar ni si Hebron: Si Eliel, indukna i ro di hahaanggina, ualupulu halak toropna.

¹⁰Sian pinompar ni si Usiel: Si Abinadab, indukna i ro di hahaanggina, saratus sampulu dua halak toropna.

¹¹ Dung i dijou si Daud ma malim Sadok dohot si Abiatar ro di halak Lepi i ma: Si Uriel, si Asaya, si Joel, si Semaya, si Eliel dohot si Abinadab.

¹² Jala didok rajai tu nasida: Hamu do angka partogi ni halak Lepi marompumpu; dibahen i parbadiai hamu ma dirimuna dohot hahaanggimuna i, asa diboan hamu poti ni Jahowa, Debata ni Israel, nangkok tu inganan naung hupadiri disi.

¹³ Ai na jolo, tagan so disi dope hamu, dibahen Jahowa, Debatanta i do sada parsirangan di tongatonga ni hita on, ala so italului Ibana songon patutna.

¹⁴ Jadi manguras be ma angka malim dohot halak Lepi, asa boanonna nangkok poti ni Jahowa, Debata ni Israel.

¹⁵ Jadi diusung halak Lepi ma poti ni Debata marhaluhalu di abarana, songon naung tinonahon ni si Musa hian, hombar tu hata ni Jahowa.

¹⁶ (II.) Dung i didokkon si Daud ma angka induk ni halak Lepi, asa dipadiri hahaangginasida i, angka parende mardongan parhinaloan marragamragam, angka hasapi, arbap dohot sordam, asa dipalu angka i pariburhon soara, paganda las ni roha.

¹⁷ Jadi dipadiri halak Lepi ma si Heman, anak ni si Joel, jala sian angka hahaanggina si Asap, anak ni si Berekia; jala sian pinompar

ni si Merari, hahaangginasida i, si Etan, anak ni si Kusaria.

¹⁸Jala dongannasida muse angka hahaangginasida rongkanaan paduahon: Si Sakaria, si Ben, si Jasiel, si Semiramot, si Jeiel, si Uni, si Eliab, si Benaia, si Maaseia, si Matitia, si Elipelen, si Mikneya, si Obed-Edom, si Jeiel, angka sijaga pintu.

¹⁹Alai anggo halak parende, i ma si Heman, si Asap dohot si Etan mardongan hesekhesek tombaga paribur soara.

²⁰Alai anggo si Sakaria, si Asiel, si Semiramot, si Jeiel, si Uni, si Eliab, si Maaseia dohot si Benaia mardongan hasapi marsoara boruboru.

²¹Alai anggo si Matitia, si Elipelen, si Mikneya, si Obed-Edom, si Jeiel dohot si Asasia mardongan arbap marsoara na sihil laho marendehon.

²²Alai anggo si Kenania, induk ni halak Lepi manguluhon parendeon dohot mangajarhon parendeon, ai na pande do ibana.

²³Ia si Berekia dohot si Elkana sijaga pintu di lambung poti.

²⁴Alai anggo si Sebania, si Josapat, si Netaneel, si Amasai, si Sakaria, si Benaia dohot si Elieser, angka malim i tahe mamalu sarune di adopan ni poti ni Debata; ianggo si Obed-Edom dohot si Jehia gabe sijaga pintu di lambung poti.

²⁵ (III.) Dung i borhat ma si Daud rap dohot angka sintua ni Israel ro di angka induk ni saribu halak laho mamboan poti parpadanan ni Jahowa nangkok sian jabu ni si Obed-Edom marlas ni roha godang.

²⁶ Jadi dung ditumpak Debata halak Lepi, angka na mangusung poti parpadanan ni Jahowa, dipelehon nasida ma pitu lembu naposo dohot pitu birubiru tunggal.

²⁷ Alai anggo si Daud marpangkean baju juba sian hain na halus, songon i nang sude halak Lepi, angka na mangusung poti i dohot angka parende, nang si Hanania, induk manguluhon angka halak parende; marpangkean baju epod sian hain na bontar do si Daud huhut.

²⁸ Jadi sandok Israel mamboan nangkok poti parpadanan ni Jahowa mardongan olopolop dohot soara ni sarune, sordam dohot arbap dipagogo huhut soara ni hasapi dohot tulila.

²⁹ Jadi dung sahat poti parpadanan ni Jahowa tu bagasan huta ni si Daud, gabe mandulo ma si Mikhal, boru ni si Saul sian pandiloan; jadi dung diida raja Daud i marhajangjang dohot manontori, marhu ni roha ibana mida rajai.

16¹ (I.) Jadi dung masuk diboan nasida poti ni Debata, dipajongjong ma i di parsitongaan ni undungundung i, na pinagohon ni si Daud tusi. Dung i dipelehon nasida ma angka pelean situtungan dohot hamauliateon di adopan ni Jahowa.

²Jadi dung tolhas dipelehon si Daud angka pelean situtungon dohot hamauliateon, dipasupasu rajai ma situasi na torop i marhitehite Goar ni Jahowa.

³Dung i diganupi raja ma sandok halak Israel, nang baoa nang parompuan, sagusagu sada be dohot anggur satabutabu be dohot lampet na tinanggulean sada be.

⁴Dung i dipadiri rajai ma di adopan ni poti ni Jahowa deba halak Lepi bahen parhalado, asa nasida mamujimuji dohot mandok mauliate dohot pasangaphon Jahowa, Debata ni Israel.

⁵Si Asap do ihutan parjolo si Sakaria paidua, dung i si Jeiel, si Semiramot, si Jeiel, si Matitia, si Eliab, si Benaia, si Obed-Edom dohot si Jeiel mardongan parhinaloan dohot hasapi; alai anggo si Asap dipagogo do soara ni hasapi.

⁶Ia malim Benaia dohot si Jehasiel, tongtong do nasida mamalu sarune di adopan ni poti parpadanan ni Debata.

⁷(II.) Di ari na sasada i do apala parjolo didokkon si Daud mamujimuji Jahowa marhite sian si Asap dohot angka hahaanggina i.

⁸Puji hamu ma Jahowa, baritahon hamu ma Goarna i, pabotohon hamu ma di tongatonga ni angka bangso angka pambahenanna i!

⁹Endehon hamu ma Ibana, palu hamu ma parhinaloan umpuji Ibana, marnonangi ma hamu taringot tu halongangan angka na binahenna i sudena!

¹⁰Tanggulhon hamu ma Goarna na badia i, ingkon marlas ni roha ma angka na mangalului Jahowa!

¹¹Sisiri hamu ma Jahowa dohot hagogoonna i, tongtong ma lulu i hamu bohina.

¹²Paingotingot hamu ma halongangan angka naung binahenna i, angka tanda halongangan naung binahenna i dohot uhum angka na ruar sian pamanganna!

¹³Hamu ale pinompar ni Israel, naposona i, hamu ale anak ni si Jakkob, angka na pinillitna i!

¹⁴Ibana, Jahowa do Debatanta i, sar tu liat portibi on do angka uhumna.

¹⁵Sai marningot ma hamu di padan binahenna i ro di saleleng ni lelengna, di hata pinatikna i marriburibu sundut.

¹⁶Padan naung binahenna i tu si Abraham, ro di uarina tu si Isak.

¹⁷Jala dihajongjongkon do i tu si Jakkob bahen patik, tu Israel bahen padan salelenglelengna.

¹⁸Ninna do: Tu ho do lehononku tano Kanaan, partalian ni partohapanmuna.

¹⁹Uju otik dope bilanganmuna, otik tutu, jala jolma paisolat hamu disi.

²⁰Jala sai marbungkasan nasida sian bangso tu bangso, sian sada harajaon tu bangso na asing.

²¹Ndang diloas Ibana halak mangarupa nasida, jala ditorui do angka raja ala nasida.

²²Unang hahua hamu halak angka na humiahi, jala unang sonoi hamu panurirang angka na husuru!

²³Endehon ma Jahowa, ale sandok tano on, baritahon hamu ma hatuaonna ganup ari.

²⁴Pajojor hamu ma di tongatonga ni halak parbegu hamuliaonna i, di tongatonga ni saluhut bangso halongangan angka na binahenna i.

²⁵Ai na timbul do Jahowa, jala tama situtu pujion, na songkal do Ibana mangatasi sude angka debata.

²⁶Ai ajiajian do sude debata ni angka bangso parbegu, alai anggo Jahowa naung manjadihon angka langit.

²⁷Hatongamon dohot hamuliaon di jolona, hagagoon dohot hinauli masa di bagasan habadiaonna i.

²⁸Hamu ale angka marga ni angka bangso, sai lehon hamu ma tu Jahowa, lehon hamu ma tutu tu Jahowa hamuliaon dohot hagagoon.

²⁹Lehon hamu ma di Jahowa hamuliaon ni goarna; boan hamu ma silehonlehon, dung i ro ma hamu tu adopan ni Bohina, marsomba ma hamu tu Jahowa marpangkean na marhadohoan!

³⁰Raion ma maradophon Ibana, ale isi ni sandok tano on, hot ma antong portibi on, ndang tagamon humordit.

³¹Ingkon marlas ni roha ma antong angka langit, jala marolopolop tano on, jala

paboaboa hamu ma di tongatonga ni angka parbegu, Jahowa do Raja!

³²Marhasakhasak ma laut i ro di isina! Marolopolop ma ladang i ro di nasa na disini!

³³Marolopolop ma disi sude angka hau di tombak di adopan ni Jahowa, ai nunga ro Ibana laho manguhum tano on.

³⁴Mandok mauliate ma hamu di Jahowa, ai na basa do ibana, ai ro di saleleng ni lelengna do asi ni rohana i.

³⁵Jala dok hamu ma: Tumpahi ma hami, ale Debata ni hatuaonnami, jala papungu, jala palua hami sian angka bangso parbegu, asa hupuji Goarmu na badia i jala martanggulhon pujipujianmi hami.

³⁶Pinuji ma Jahowa, Debata ni Israel, sian na saingan sahat ro di salelenglelengna, jala rim bangso i mandok: Amen! Jala pujipujian di Jahowa!

³⁷(III.) Dung i ditadingkon rajai disi, di adopan ni poti parpadanan ni Jahowa si Asap dohot angka hahaanggina i, asa tongtong nasida marhalado di adopan ni poti i ariari.

³⁸Laos songon i nang Obed-Edom dohot angka hahaanggina i, onompulu ualu halak toropna; ia si Obed-Edom, anak ni si Jedutun dohot si Hosa rap sijaga pintu do.

³⁹Alai anggo malim Sadok dohot angka hahaanggina i, rap malim tahe marhalado do di jolo ni undungundung ni Jahowa di dolokdolok na di Gibeon.

⁴⁰Asa tongtong nasida mamelehon angka pelean situtungon tu Jahowa di atas langgatan pamelean ni pelean situtungon manogotna i dohot bodarina i, jala diula luhut na tarsurat di bagasan patik ni Jahowa, na tinonahonna tu halak Israel.

⁴¹Dongannasida do huhut si Heman dohot si Jedutun ro di halak na pinillit na asing, nunga pola digoar, asa nasida mamujimuji Jahowa, ai ala ro di salelenglelengna asi ni rohana i.

⁴²Dongan ni si Heman dohot si Jedutun huhut angka na mamalu sarune dohot sordam dohot parhinaloan ni Debata marragamragam pariburhon parendeon; alai sijaga pintu do anggo pinompar ni si Jedutun.

⁴³Dung i muli be ma sandok situan na torop i, ganup tu jabuna be; muli ma dohot si Daud laho mamasumasu isi ni bagasna.

17¹(I.) Dung i uju hundulhundul si Daud sahali di bagasan jabuna, ro ma hatana tu panurirang Natan: Ida ma, ia ahu maringan di bagasan jabu na sian hau Ares, ia poti parpadanan ni Jahowa hape jongjong di tongatonga ni rimberimbe.

²Dung i ninna si Natan ma mandok si Daud: Nasa na sinangkap ni roham di bagasan, i ma patupa, ai Debata do donganmu!

³(II.) Alai bornginna i ro ma hata ni Debata tu si Natan songon on:

⁴Laho ma ho, hatahon ma tu naposongku si Daud: Songon on do hata ni Jahowa: Nandang

jadi anggo ho pajongjong di Ahu sada bagas bahen ingananku.

⁵Ai ndang dung dope Ahu maringanan di bagasan jabu olat ni ari dung huboan halak Israel nangkok rasirasa sadarion, sai tong do Ahu munsatunsat sian undungundung na sada tu undungundung na asing, sian inganan na sada tu na asing.

⁶Manang didia pe Ahu mardalandalan rap dohot sude halak Israel, tung dung ma hudok nanggo sandok tu sahalak sian angka panguhum di Israel, angka na hudokkon nian parmahanonna bangsongku manunungirhon tu ibana: Boasa so dipauli hamu di Ahu sada joro sian hau Ares?

⁷On pe dok ma tu naposongku si Daud: Songon on do hata ni Jahowa Zebaot: Nunga Ahu mambuat ho sian parmahanan, sian na mangolat angka birubiru, asa bangkit ho gabe induk gumomgom bangsongku Israel.

⁸Sai hudongani do ho antong nasailaon manang dompak dia ho laho, jala nunga husiaphon sude angka musum maradophon ho, jala hubahen goarmu marbarita situtu, songon goar ni halak na sangap angka na di tano on.

⁹Angkup ni, nunga hubasabasahon sada inganan tu bangsongku Israel, jala nunga hulopokkon ibana, asa maringanan ibana disi, asa unang be tarhutiksa, jala unang

be didatdati angka anak ni hageduhon manosaknosak ibana, songon uju di mulana.

¹⁰Jala olat ni ari dung adong hupabangkit angka panguhum gumomgom bangsongku Israel, tarjepol do hubahen sude angka musum; marbagabaga muse Ahu tu ho, paboa pahoton ni Jahowa pinomparmu sogot.

¹¹Alai ia dung jumpang buhul ni ariarim laho marpungu ho tu angka ompum, patindangonku ma pinomparmu di pudim, i ma sada halak sian angka anakmu, pahotonku ma harajaonna i.

¹²Ingkon Ibana pe pauli sada bagas di Ahu, jala Ahu pahothon habangsana ro di salelenglelengna.

¹³Ahu gabe Amana, jala Ibana ingkon gabe anakku; jala ndang unsatonku sian Ibana anggo asi ni rohangku, songon na huunsat do i sian ibana na jumolo sian ho.

¹⁴Alai ingkon hot do anggo Ibana bahenonku di bagasan jabungku dohot di bagasan harajaonku ro di salelenglelengna, habangsana pe ingkon hot do ro di salelenglelengna.

¹⁵(III.) Hombar tu saluhut angka hata ondeng, jala hombar tu sandok pangungkapon i mangkatai si Natan tu si Daud.

¹⁶Dung i masuk ma raja Daud tu bagasan undungundung i, laos hundul ma ibana di adopan ni Jahowa, ninna ma: Tung ise ma ahu pola, ale Jahowa Debatangku, jala tung

ise ma pola anggo pinomparhu, umbahen tung diboan Ho ahu sahat ro tuson?

¹⁷Angkup ni maotikku dope i di roham, ale Debata! Pola huhut marbagabaga Ho taringot tu pinompar ni naposom, taringot tu na masa sogot, jala nunga ditatap Ho ahu, songon panatap ni jolma, ale Jahowa, Debata na di ginjang i.

¹⁸Tung aha dope angkupni sidohonon ni si Daud tu Ho? Ala hamuliaon na binasabasahonmu tu naposom? Alai tahe ditanda Ho do naposomon.

¹⁹Ale Jahowa, ala ni ahu naposomon, jala hombar tu lomo ni roham nunga dibahen Ho saluhut halonganganna bolon on laho pabotohon sude angka habalgaon on.

²⁰Ale Jahowa, ndang adong nanggo sada tudoshon Ho, jala ndang adong Debata dungkon ni Ho, hombar tu saluhut naung binege ni pinggolnami.

²¹Jala tung didia ma adong jumpang sada bangso di tano on, songon bangsom Israel, pola tung Debata sandiri borhat laho manobus sada bangso ainonna dohot laho mambahen Goarmu marbarita marhite sian halongangan bolon dohot na songkal, laho pabalihon angka bangso parbegu maradophon bangsom na tinobusmu sian Misir.

²²Jala nunga dipadiri Ho di Ho bangsom Israel bahen bangsom ro di salelenglelengna, jala Ho, ale Jahowa, gabe Debatanasida.

²³Antong ale Jahowa, sai pahot ma hata naung pinarbagabagami tu naposom taringot tu pinomparna sahat ro di salelenglelengna, jala bahen ma hombar tu na pinarbagabagami!

²⁴Olo sai sintong ma i, jala lam tu timbulna Goarmu ro di salelenglelengna asa dohonon ni halak songon on: Jahowa Zebaot do Debata ni Israel, Ibana tongon Debata humongkop Israel, jala hot do ia pinompar ni naposom si Daud di jolomi.

²⁵Ai Ho ale Debatanku, nunga dipapatar Ho tu pinggol ni naposomon, paboa ingkon paulionmu di ibana sada bagas; ala ni do umbahen hum roha ni naposomon martangiang di adopanmon.

²⁶On pe, ale Jahowa, Ho sandiri do Debata, jala nunga diparbagabaga Ho tu naposomon hata na danggan on.

²⁷Antong, nunga sapala lomo roham mamasumasu pinompar ni naposomon, asa hot di adopanmu ro di salelenglelengna; ai manang ise na pinasupasum ale Jahowa, i ma dapotan pasupasu ro di salelenglelengna!

18¹(I.) Jadi dung salpu angka i, ditaluhon si Daud ma halak Palistim, tung tarjepol situtu nasida dibahen, dirampas ibana huhut huta Gat, ro di huta angka na masuk tusi sian tangan ni halak Palistim.

²Ditaluhon muse halak Moab, gabe mangoloi patu nasida tu si Daud jala manggarar sohe.

³Ditaluhon si Daud huhut Hadateser, raja sian Zoba, di Hemat, uju na laho ibana pahothon gomgomanna di pasir ni batang aek Euprat.

⁴Dung i dilaum si Daud ma sian ibana saribu hureta porang dohot pitu ribu halak parsihundul dohot duapulu ribu halak parhantarhantar; jala ditallik si Daud do doldol ni saluhut hoda sitait hureta, saratus pasang sambing sian i ditinggalhon di ibana.

⁵Alai ro ma halak Ram sian Damaskus naeng manolongi si Hadateser, raja sian Zoba; gabe mate halak Ram i duapulu dua ribu halak, dibunu si Daud.

⁶Dung i dipajongjong si Daud ma angka benteng di Ram humaliang Damaskus, jadi mangoloi patu ma halak Ram tu si Daud huhut manggarar sohe; ai sai ditumpak Jahowa do si Daud monang manang dompak dia ibana mangalangka.

⁷Dung i dibuat si Daud ma lombulumbu sere, angka na pinaboanboan ni naposo ni Hadateser, jala ditaruhon angka i tu Jerusalem.

⁸Dibuat si Daud huhut sian Teba dohot sian Kun, angka huta ni si Hadateser mansai godang tombaga; sian i dipauli si Salomo muse tobat tombaga ro di tiang na dua i dohot angka ulaula tombaga.

⁹Jadi dung dibege si Tou, raja di Hemat, naung ditaluhon si Daud sandok parangan ni si Hadateser, raja sian Zoba.

¹⁰Disuru ibana ma anakna Hadoram manopot raja Daud manangkasi sonangna dohot mamasumasu ibana, ala naung pinorangna Hadateser, jala naung tinaluhonna ibana, ai marmusu tihus hian do si Tou dompak si Hadateser; ditongoshon muse ulaula sere, perak dohot tombaga marragamragam.

¹¹Angka i pe diparbadiai raja Daud do laho pasahathon tu Jahowa rap dohot perak dohot sere naung binuatna sian saluhut bangso parbegu, sian halak Edom, Moab, Amon, Palistim dohot Amalek.

¹²Angkup ni ditaluhon si Abisai, anak ni Nai Seruia do halak Edom di rura parsiraan, sampulu ualu ribu halak toropna.

¹³Dung i dipambahen ma angka benteng di Edom, gabe patu saluhut halak Edom dibahen si Daud, ai ditumpak Jahowa do si Daud monang manang dompak dia ibana mangalangka.

¹⁴(II.) Jadi dirajai si Daud ma sandok halak Israel jala dihajongjongkon uhum dohot hatigoran di sandok bangsona i.

¹⁵Alai anggo si Joab, anak ni Nai Seruia manguhuhon angka parangan, jala si Josapat, anak ni si Ahilud do panuturi.

¹⁶Jala si Sadok, anak ni si Ahitub dohot Abimelek, anak ni si Abiatar, i ma angka malim, jala Sausa do juaratulis.

¹⁷Jala si Benaia, anak ni si Joiada, panahatan ni angka hupas dohot rundo. Alai anggo angka anak ni si Daud, i ma angka na sumolhot di lambung ni rajai.

19¹(I.) Jadi dung salpu angka i, mate ma si Nahas, raja ni halak Amon, jadi anakna i bangkit raja singkatna.

²Dung i ninna si Daud ma: Naeng ahu marasi ni roha tu si Hanun, anak ni si Nahas, ai amana nahinan pe marasi ni roha do tu ahu; jadi disuru si Daud ma suruanna laho mangapuli ibana ala panading ni amana i. Jadi dung sahat angka naposo ni si Daud tu luat ni halak Amon, tu jolo ni si Hanun, naeng mangapuli ibana.

³Ro ma hata ni angka induk ni halak Amon mandok tu si Hanun: Tung pasangaphon amangmu ma tagamon si Daud, nang di roham, umbahen disuru tu ho angka pangapul? Nda ala naeng manangkasi dohot mangago dohot mangkahapi tano on, umbahen ro angka naposona i manopot ho?

⁴Dung i ditangkup si Hanun ma angka naposo ni si Daud, jala didokkon nabungan janggutnasida jala horoton ulosnasida sahat ro di hundulanna, gabe songon i nasida dipamuli.

⁵Jadi laho ma nasida, gabe ro ma halak mangalualuhon tu si Daud barita ni angka suruanna i. Jadi disuru rajai ma halak mandapothon nasida, ai tung na tarurak situtu do angka baoa i dibahen. Ia tona ni rajai tu nasida: Tinggal ma hamu jolo di Jeriko, paima martumbur muse janggutmuna i, dung i pe asa mulak hamu.

⁶(II.) Alai dung diida halak Amon, naung bau roha ni si Daud mida nasida, gabe ditongos si Hanun dohot halak Amon ma saribu talenta perak laho mangupai angka hureta porang dohot jolma parsihundul sian Mesopotamia, sian Maaka di Ram dohot sian Zoba.

⁷Jadi diupai nasida ma tolupulu dua ribu hureta porang angkup ni raja sian Maaka rap dohot paranganna; jadi ro ma nasida jala marsaro di adopan ni Medeba. Santibalatuk dohot halak Amon ro sian hutana be laho tu parporangan.

⁸Jadi dung tarbortik barita i tu si Daud, disuru ma si Joab manguluhon sandok paranganna angka na begu i.

⁹Jadi ruar ma halak Amon marodor laho tu tongtangan di partungkoan ni huta i. Alai anggo rajaraja angka na hinara i pulik do jongjong di ladang.

¹⁰Jadi dung diida si Joab, sai ibana do hape ditumpur musu i sian jolo dohot sian pudi, gabe dipillit ma sian saluhut dolidoli di Israel, jala dipaodor laho mandopang halak Ram.

¹¹ Alai anggo pasipasi ni parangan i tu tangan ni si Abisai anggina i dipasahat, jala baris dipajongjong laho mandopang halak Amon.

¹² Jala didok do: Tung sura talu onjar ahu bahenon ni halak Ram, ingkon ro ho manolongi ahu; alai tung sura talu onjar ho bahenon ni halak Amon, ro pe ahu mangurupi ho.

¹³ Antong pir ma tondim, itaseahon ma dirinta humongkop bangsonta, humongkop dohot angka huta ni Debatanta; alai sai dipasaut Jahowa ma lomo ni rohana.

¹⁴ Dung i martahop ma si Joab rap dohot angka parangan donganna i laho mandopang halak Ram, gabe maporus nasida maradophon ibana.

¹⁵ Alai dung diida halak Amon, naung maporus hape halak Ram maporus ma dohot nasida maradophon Abisai, anggi ni si Joab i, jala manginsurut tu bagasan huta; mulak tu Jerusalem ma anggo si Joab.

¹⁶ Jadi dung diida halak Ram, naung talu nasida dibahen halak Israel, disuru nasida ma angka suruanna marhara tu halak Ram angka na di bariba ni sunge i, jala si Zoba partogi ni parangan ni si Hadateser manguhuhon nasida.

¹⁷ Jadi dung tarbortik barita i tu si Daud, gabe dipaluhut ibana ma sandok Israel, jala ditaripari batang aek Jordan i; jadi dung sahat ibana tu nasida, dipaodor ma angka

paranganna i dompak nasida; dung dipaodor si Daud angka paranganna i laho mandopang halak Ram, gabe masijonapan ma nasida.

¹⁸Alai maporus ma halak Ram maradophon halak Israel, jala dibunu si Daud ma sian halak Ram pitu ribu halak parmusu di hureta dohot opatpulu ribu halak parhantarhantar, dibunu dohot si Zoba partogi ni paranganna i.

¹⁹Jadi dung diida angka naposo ni si Hadateser, naung talu nasida dibahen halak Israel, gabe mardemak nasida tu si Daud jala mangoloi patu tu ibana. Dung i ndang olo be halak Ram anggo tung haraon ni halak Amon.

20¹ (I.) Jadi dung salpu sataon, jumpang muse tingki haboborhat ni angka raja, gabe diuluhon si Joab ma sude angka parangan jala disiaphon tano ni halak Amon; sahat ibana huhut tu huta Rabba laos ditungkum; alai tinggal di Jerusalem do anggo si Daud. Jadi dipapatu si Joab ma huta Rabba laos dipanepnep do.

²Dung i dibuat si Daud ma tumpal ni rajanasida i sian atas uluna, ia boratna didasing satalenta sere padohot angka mata intan. Dung i dibahen ma tumpal i tu ulu ni si Daud, diboan huhut mansai godang tabantaban sian huta i.

³Alai anggojolma angka na di bagasan huta i diboan do tu balian jala dilobongi nasida marhite sian gargaji, angka hureta bosi pardegean dohot angka tangke. Suang

songon i dibahen si Daud tu saluhut huta ni halak Amon. Dung i mulak ma si Daud dohot sandok parangan i tu Jerusalem.

⁴(II.) Jadi dung salpu i tubu muse hamusuon di Gezer dampak halak Palistim. Uju i ma dibunu si Sebekkai, halak Husa i ma si Sipar, sada halak sian angka anak ni si Repaim gabe tarjepol nasida.

⁵Dung i tubu muse hamusuon dampak halak Palistim, gabe dibunu si Elhanan, anak ni si Jair ma si Lakmi, anggi ni si Goliat, halak Gat, ia suhul ni hujurna, na saumban do.

⁶Dung i tubu muse hamusuon di Gat; adong ma disi sada baoa na ganjang situtu, onom be jarijari ni tanganna dohot patna, gabe duapulu opat toropna; ibana pe tubu ni si Repaim do.

⁷Jadi dung niinsahanna halak Israel, gabe dibunu si Jonatan, anak ni si Simea, haha ni si Daud ma ibana.

⁸Luhut nasida tubu ni si Repaim do di Gat, gabe rap mate nasida dibunu si Daud dohot angka naposona i.

21 ¹(I.) Dung i hehe ma Sibolis i mangalo Israel, gabe dipajuju ma si Daud mamilangi torop ni halak Israel.

²Jadi ninna si Daud ma tu si Joab dohot tu sude induk ni bangso i: Laho ma hamu mamilangi halak Israel olat ni Berseba sahat ro di Dan, jala boan hamu bilangannasida i tu ahu, asa huboto toropna.

³Dung i ninna si Joab ma: Sai ambaan ni Jahowa dope bangsona nuaeng lompit ratus hali nari! Alai tahe, ale tuan rajanami, nda luhut nasida naposo ni tuanku? Boasa tung dipangido roha ni tuanku songon i? Boasa ma bahenon hasalaan tu halak Israel?

⁴Alai parhata sada do rajai tu si Joab. Jadi borhat ma si Joab, mardalan mangaliati sandok Israel, dung i mulak ibana tu Jerusalem.

⁵Dung i dilehon si Joab ma bilangan ni bangso na binilanganna i tu si Daud. Ia torop ni sandok Israel sajuta saratus ribu halak do angka parpodang sintak; ia torop ni Juda opat ratus pitupulu ribu halak do angka parpodang sintak.

⁶Alai anggo halak Lepi dohot Benjamin ndang dirajumi tusi, ai marbiasbias roha ni si Joab mida hata ni rajai.

⁷Sogo huhut roha ni Debata di hata i, ala ni umbahen ditorui Israel.

⁸Dung i didok si Daud ma tu Debata: Nunga mardosa situtu ahu, ala hubahen songon i; alai sai marpamuati ma roham mida hajahaton ni naposomon, ai hata oto situtu do na hubahen i.

⁹(II.) Dung i ro ma hata ni Jahowa tu si Gad, panurirang ni si Daud, ninna ma:

¹⁰Laho ma ho mangkatai tu si Daud, dok ma: Songon on do hata ni Jahowa: Tolu

ragam uhum sipatuduhononku tu jolom; pillit ma di ho sada sian i sidabuhononku tu tu.

¹¹ Jadi dung sahat si Gad tu jolo ni si Daud, ninna ma: Songon on do hata ni Jahowa: Pillit ma di ho!

¹² Manang haleon potir tolu taon lelengna, manang palamotlamoton ni musum ho marhite sian podang tolu bulan lelengna; manang podang ni Jahowa mangaraserase tolu ari lelengna, masa tahe begu antuk di bagasan tanom, tole suruan ni Jahowa mangagojolma di sandok partalpahan ni Israel? Antong timbang ma manang dia alus boanonku mulak tu Ibana na marsuru ahu.

¹³ Dung i ninna si Daud ma tu si Gad: Targogot situtu do nian rohangku. Alai tagonan ahu madabu tu bagasan tangan ni Jahowa, ai godang situtu do asi ni rohana; ndang olo ahu madabu ianggo tu bagasan tangan ni jolma!

¹⁴ Jadi dipamasa Jahowa ma begu antuk di tongatonga ni Israel, gabe marragean sian Israel pitupulu ribu halak toropna.

¹⁵ (III.) Dung i disuru Debata ma suruanna i naeng tu Jerusalem, agoonna nian. Alai dung diida Jahowa pangagona i, disolsoli ma rohana mida hinamago i, laos didok ma tu surusuruan pangago i: Nunga sae, patait ma tanganmi! Alai jongjong do suruan ni Jahowa di lambung pardegean ni si Ornan, halak Jebusi.

¹⁶Dung i manaili ma si Daud, gabe diida ma suruan ni Jahowa jongjong di tongatonga ni langit dohot tano on patioptiop podang na niumpat di bagasan tanganna na toltol di atas Jerusalem. Jadi manungkap tu tano ma si Daud rap dohot angka sintua i marabit tangki be nasida.

¹⁷Jadi ninna si Daud ma tu Debata: Nda ahu do mandokkon ingkon bilangan bangso i? Ahu do tutu na mardosa, jala ahu do mambahen jea na bolon on! Tung aha ma na binahen ni angka birubiru on? Iale Jahowa, Debatangku! Dompak ahu ma nian tanganmu dohot dampak pinompar ni damang, unang nian dampak bangsom on laho manorui.

¹⁸Dung i ro ma hata ni suruan ni Jahowa tu si Gad patolhasonna tu si Daud, asa nangkok si Daud laho umpajokkon di Jahowa sada langgatan di pardegean ni si Ornan, halak Jebusi.

¹⁹Jadi nangkok ma si Daud hombar tu hata ni si Gad, naung pinaboana marhite sian Goar ni Jahowa.

²⁰Dung i humusor ma si Ornan, gabe diida ma suruani, jadi martabuni ma ibana rap dohot anakna na opat i; ai tongon mardege eme si Ornan.

²¹Jadi dung sahat si Daud tu lambung ni si Ornan, manatapnatap ma si Ornan, gabe diida ma si Daud, laos ruar ma ibana sian

pardegean i jala marsomba tu si Daud, pola manungkap tu tano.

²²Dung i ninna si Daud ma tu si Ornan: Ua lehon ma di ahu pardegeanon, asa hupajokkon disi sada langgatan di Jahowa; manang sadia argana lehononmu tu ahu, asa muli begu masa i sian bangso i.

²³Alai ninna si Ornan ma tu si Daud; buat ma i di ho, jala dibahen tuanku rajai ma guru lomo ni rohana. Ida ma, ahu pe mangalehon lembu bahen pelean situtungon dohot hureta pardege bahen sobanna dohot eme i bahen pelean sipanganon; luhutna i lehononku do.

²⁴Alai ninna raja Daud ma tu si Ornan: Nandang songon i, ingkon naeng tuhoronku sian ho nasa argana, ai ndang olo ahu mambuat na di ho mamelehon tu Jahowa pelean situtungon siseasea.

²⁵Jadi dilehon si Daud ma tu si Ornan tuhor ni pardegean i onom ratus sekel sere.

²⁶Dung i dipajok si Daud ma disi sada langgatan di Jahowa, jala dipelehon angka pelean situtungon dohot hamauliateon, huhut joujou ibana tu Jahowa, jadi dialusi Jahowa ma ibana marhite sian api na ro sian banua ginjang di atas langgatan pamelean ni pelean situtungon i.

²⁷Dung i didok Jahowa ma tu suruani, asa dipasuang podangna tu bagasan sarungna.

²⁸Jadi dung diida si Daud uju i, naung nialusan ni Jahowa ibana di pardegean ni

si Ornan, halak Jebusi, laos tongtong ibana mamele disi.

²⁹Ai anggo undungundung ni Jahowa na binahen ni si Musa na jolo di halongonan dohot langgatan pamelean ni pelean situtungan pajok uju i di atas robean Gibeon.

³⁰Alai ndang tarbahen si Daud laho tusi mangalului Debata ala songgot ni rohana binahen ni podang ni suruan ni Jahowa.

22¹(I.) Dung i didok si Daud ma: Ingkon dison do hajongjongan ni joro ni Debata Jahowa, jala langgatanon bahen pamelean ni pelean situtungan di Israel.

²Dung i didokkon si Daud ma ingkon marpungu sude halak paisolat, angka na di tano Israel, jala dipadiri hian halak pandakdak batu, asa didakdak batu angka na martulis, laho paulihon joro ni Debata.

³Tole bosi mansai godang diparade si Daud hian bahen labang padomuhon papan bahen hinsuhinsu dohot bahen panggomal, tole tombaga mansai godang, pola ndang dapot timbangan boratna.

⁴Tole angka hau Ares ndang habilangan godangna; ai mansai godang hau Ares diboan halak Sidon dohot Tirus tu si Daud.

⁵Ai ninna roha ni si Daud do: Ia si Salomo anakki bajar dope jala sorta; alai anggo joro sipaulion di Jahowa, ingkon balga situtu bahenon, asa timbul Goarna dohot hamuliaonna di sandok tano on; dibahen i

ingkon paradeonku hian tusi. Jadi mansai godang hian diparade si Daud tagan so mate dope ibana.

⁶(II.) Dung i dijou ma si Salomo anakna i, jala didok tu ibana pajongjongonna sada joro di Jahowa, Debata ni Israel.

⁷Jadi didok si Daud ma tu si Salomo: Ale anaha, disangkap rohangku do nian naeng pajongjong sada joro di Goar ni Jahowa, Debatanku.

⁸Hape ro hata ni Jahowa mandok tu ahu: Nunga mansai godang mudar didurushon ho, jala nunga dihasuhuthon ho hamusuon angka na bolon; dibahen i ndang jadi anggo ho pajongjong sada joro di Goarhu, ala godang mudar nidurushonmu tu tano di adopanku.

⁹Ida ma, ingkon tubu di ho sada anak, ibana gabe sada baoa hadameon, ai mardame ibana bahenonku maradophon saluhut musuna humaliang; dibahen i ingkon si Salomo goarna bahenon; ai hadameon dohot hasonangan lehononku tu Israel saleleng mangolu ibana.

¹⁰Ingkon ibana pajongjong sada joro di Goarhu; jala ingkon gabe anakku ibana, jala Ahu gabe amana, jala pahotonku do habangsa ni harajaonna gumomgom Israel ro di saleleng ni lelengna.

¹¹On pe, ale anaha, sai na donganan ni Jahowa do ho, jala tumpahanna ho mardohar, asa paulionmu joro ni Jahowa, Debatam,

songon naung pinarbagabagana hian taringot tu ho.

¹²Sai na lehonon ni Jahowa tu ho hapistaran dohot panimbangan pasauthon parentana tu ho gumomgom Israel, asa radotanmu patik ni Jahowa, Debatam.

¹³Tongon tahe, sai na martua do ho, molo diringkoti roham mangulahon patik dohot uhum, angka na tinonahon ni Jahowa tu si Musa, ingoton ni halak Israel. Antong pir ma tondim jala marsihohot, unang ho mabiar jala unang tahuton roham!

¹⁴Jala ida ma, di bagasan hasusaan pe ahu na sai laon, nunga huparade hian di joro ni Jahowa saratus ribu talenta sere, jala sajuta talenta perak; ianggo tombaga dohot bosi ndang dapot timbangan dibahen hinagodangna; tole angka parhau dohot batu nunga huparade, ingkon tambaonmu dope tusi.

¹⁵Angkup ni mansai torop angka tungkang di ho, angka pandakdak batu, angka tungkang batu dohot tungkang hau dohot torop halak na pande di ulaon marragamragam.

¹⁶Taringot tu sere, perak, tombaga dohot bosi ndang habilangan godangna. Tole, hehe ma ho jala ulahon, sai donganan ni Jahowa do ho!

¹⁷(III.) Dung i didokkon si Daud ma saluhut induk ni Israel, asa ditolongi nasida si Salomo anakna i, ninna ma:

¹⁸Nda Jahowa, Debatamuna mandongani hamu, jala mardame hamu humaliang dibahen? Ai nunga pola dipasahat Ibana angka isi ni tano i tu bagasan tanganku, jala nunga patu tano i di adopan ni Jahowa dohot di adopan ni bangsona.

¹⁹Antong padiri hamu ma rohamuna dohot hosamuna mangalului Jahowa, Debatamuna i! Jala hehe ma hamu laho paulihon inganan na badia di Jahowa, Debatamuna i, asa masuk binoan poti parpadanan ni Jahowa, dohot ulaula ni Debata, angka na badia i tu bagasan joro sipaulion di Goar ni Jahowa.

23¹(I.) Jadi dung matua si Daud jala mahap rohana di hangoluan on, dipabangkit ma anakna si Salomo gumomgom Israel.

²Dung i dipaluhut ibana ma saluhut induk di Israel, ro di angka malim dohot halak Lepi.

³Jadi dibilang ma halak Lepi olat ni na marumur tolupulu taon dohot lobi sian i, gabe tolupulu ualu ribu halak bilangannasida, holan baoa angka na tang.

⁴Duapulu opat ribu halak sian i angka na mangaradoti ulaon di joro ni Jahowa, jala onom ribu halak panuturi dohot panguhum.

⁵Jala opat ribu halak sijaga pintu, jala opat ribu halak muse angka parende mamujimuji Jahowa, huhut umpalu parhinaloan angka na hubahen i mamujimuji, ninna.

⁶Disagi si Daud huhut nasida mambahen margansi mangihuthon angka anak ni si Lepi, i ma si Gerson, si Kohat dohot si Merari.

⁷Angka induk sian si Gerson: Si Ladan, dohot si Simeil.

⁸Angka anak ni si Ladan: Si Jeiel i ma parjolo, dung i si Jetam dohot si Joel, na tolu i do.

⁹Angka anak ni si Simeil: Si Selomit, si Hasiel dohot si Haran, na tolu i do. I ma angka induk sian si Ladan marompuompu.

¹⁰Angka anak ni si Simeil angkup ni dope: Si Jahat, si Sina, si Jeus dohot si Beria; na opat i pe angka anak ni si Simeil do.

¹¹Alai anggo si Jahat i ma parjolo, si Sina paidua. Alai anggo si Jeus dohot si Beria ndang sadia torop pinomparna, dibahen i sisada ompu jala sisada gansi nasida dietong.

¹²Ia angka anak ni si Kohat: Si Amram, si Ishar, si Hebron, dohot si Usiel, na opat i do.

¹³Ia angka anak ni si Amram: Si Aron dohot si Musa. Alai dipapulik hian do anggo si Aron, asa gabe badia ibana marhalado di na badia sahali; ibana dohot angka anakna ro di salelenglelengna, asa manutung daupa di adopan ni Jahowa, marhalado di Jahowa dohot mamasumasu marhite sian Goarna ro di salelenglelengna.

¹⁴Ia si Musa, halak ni Debata, asal tare tong do angka anakna i tu marga Lepi.

¹⁵Ia angka anak ni si Musa: Si Gerson dohot si Elieser.

¹⁶Sian angka anak ni si Gerson: Si Sebul do parjolo.

¹⁷Ia sian angka anak ni si Elieser: Si Rehabia do parjolo; dungkon ni ndang adong anak ni si Elieser; alai anggo anak ni si Rehabia mansai torop do.

¹⁸Sian angka anak ni si Ishar: Si Selomit do parjolo.

¹⁹Ia angka anak ni si Hebron: Si Jeria i ma parjolo si Amaria paidua, si Jehasiel paitolu dohot si Jekameam paiopat.

²⁰Ia angka anak ni si Usiel: Si Mika, i ma parjolo dohot si Ishia paidua.

²¹Ia angka anak ni si Merari: Si Mahli dohot si Musi; ia angka anak ni si Mahli: Si Eleasar dohot si Kis.

²²Alai mate punu do anggo si Eleasar, ai holan boruna adong; jala angka anak ni si Kis, ibotonasida i marjolmahon nasida.

²³Ia angka anak ni si Musi: Si Mahli, si Eder dohot si Jerimot, na tolu i do.

²⁴(II.) I ma pinompar ni si Lepi marompuompu, angka indukna pe marompuompu, mangihuthon bilangan ni goargoar, angka na mangaradoti ulaon todoan di bagasan joro ni Jahowa, olat ni na marumur duapulu taon dohot lobi sian i.

²⁵Ai ninna si Daud do: Nunga dipasonang Jahowa, Debata ni Israel bangsona,

jala maringan Ibana di Jerusalem ro di salelenglelengna.

²⁶Dibahen i nang halak Lepi, ndang be pausungusungonna undungundung i rap dohot sude ulaula, angka na masuk tu ulaonna.

²⁷Ai parenta ni si Daud parpudi do i mandokkon bilangan halak Lepi olat ni na marumur duapulu taon dohot lobi sian i.

²⁸Ai anggo todoannasida nuaeng, ingkon jongjong do nasida di lambung ni pinompar ni si Aron, mangaradoti, ulaon di joro ni Jahowa, taringot tu angka alaman, angka bilut, pangurasion di saluhut ulaula na badia, ro di ulaon tohonan di bagasan joro ni Debata.

²⁹Tole taringot tu roti na marhadohoan dohot itak na lamot bahen pelean sipanganon, bahen sagusagu na so niasoman, bahen sigorengon dohot sisaohon, tole taringot tu sude sidasingon dohot sisuhaton.

³⁰Tole muse taringot tu na tindang i ganup sogot mandok mauliate dohot mamujimuji Jahowa, suang songon i bodarina i.

³¹Tole muse mamelehon saluhut pelean situtungan tu Jahowa di angka ari Sabbath dohot di poltak ni bulan dohot di angka ari raya, naung binuhul toropna mangihuthon hasomalannasida tongtong di adopan ni Jahowa.

³²Ingkon radotannasida do ulaon di undungundung parluhutan dohot ulaon di

inganan na badia dohot ulaon di angka anak ni si Aron, hahanasida i, marhalado di joro ni Jahowa.

24¹ (I.) Alai on do angka gansi ni pinompar ni si Aron. Ia angka anak ni si Aron: Si Nadab dohot si Abihu, si Eleasar dohot si Itamar.

² Alai mate punu do anggo si Nadab dohot si Abihu di adopan ni amanasida; bangkit malim do ianggo si Eleasar dohot si Itamar.

³ Songon on do tahe parsagi ni si Daud di nasida: Si Sadok sian pinompar ni si Eleasar, jala si Ahimelek sian pinompar ni si Itamar, mangihuthon gansina mangaradoti ulaonna.

⁴ Alai andul do tumorop dapot sian pinompar ni si Eleasar bahen induk ni angka baoa parhalado, asa sian pinompar ni si Itamar. Songon on do tahe parsagina: Sian pinompar ni si Eleasar sampulu onom halak bahen induk nasida marompuompu, jala sian pinompar ni si Itamar ualu halak bahen induk nasida marompuompu.

⁵ Alai marhite sian rujiruji do parsagina i, rap hona dibahen, ala saor sian pinompar ni si Eleasar dohot sian pinompar ni si Itamar, adong be induk di inganan na badia dohot induk marhalado di adopan ni Debata.

⁶ Ia si Semaya, juaratulis i, anak ni si Netaneel sian halak Lepi, manurati goarnasida di adopan ni rajai dohot angka induk i, dohot malim Sadok dohot si

Ahimelek, anak ni si Abiatar dohot di adopan ni induk nasida marompuompu di tongatonga ni angka malim dohot halak Lepi; marsorinsorin dibuat sada gansi sian si Eleasar jala sada gansi muse sian si Itamar.

⁷Jadi ruar ma rujiruji parjolo di si Johaiarib, na paduahon i di si Jedaia.

⁸Na patoluhon i di si Harim, na paopathon i di si Seorun.

⁹Na palimahon i di si Malkia, na paonomhon i di si Mijamin.

¹⁰Na papituhon i di si Hakos, na pauluhon i di si Abia.

¹¹Na pasiahon i di si Jesua, na pasampuluhon i di si Sekania.

¹²Na pasampulusadahon i di si Eliasib, na pasampuluduahon i di si Jakim.

¹³Na pasampulutoluhon i di si Hupa, na pasampuluopathon i di si Jesebeab.

¹⁴Na pasampululimahon i di si Bilga, na pasampuluonomhon i di si Immer.

¹⁵Na pasampulupituhon i di si Hesir, na pasampuluualuhon i di si Hapises.

¹⁶Na pasampulusiahon i di si Petahia, na paduapuluhon i di si Jeheskiel.

¹⁷Na paduapululusadahon i di si Jakin, na paduapuluduahon i di si Gamul.

¹⁸Na paduapulutoluhon i di si Delaia, na paduapulupathon i di si Maasia.

¹⁹Angka i ma gansinasida mangaradoti ulaonna be laho masuk tu joro ni Jahowa,

mangihuthon aturan binahen ni si Aron,
amanasida i, songon na tinonahon ni Jahowa,
Debata ni Israel tu ibana.

²⁰(II.) Alai taringot tu halak Lepi angka na
tading i, sian angka anak ni si Amram: Si
Sebuel indukna, sian angka anak ni si Sebuel:
Si Jedeia.

²¹Tole muse si Rehabia, sian angka anak ni
si Rehabia: Si Ishia indukna.

²²Sian angka anak ni si Ishar: Si Selomit do;
sian angka anak ni si Selomit: Si Jahat do.

²³Sian angka anak ni si Hebron: Si Jeria
indukna, si Amaria paidua, si Jehasiel paitolu,
si Jekameam paiopat.

²⁴Sian angka anak ni si Usiel: Si Mika; sian
angka anak ni si Mika: Si Samir.

²⁵Ia anggi ni si Mika, i ma si Ishia, sian
angka anak ni si Ishia: Si Sakaria do indukna.

²⁶Ia angka anak ni si Merari: Si Mahli dohot
si Musi; sian angka anak ni si Jaasia: Si Beno.

²⁷Ia angka anak ni si Merari tubu ni si
Jaasia: Si Beno, si Soham, si Sakur dohot si
Iberi.

²⁸Sian angka anak ni si Mahli: Si Eleasar do
indukna; alai ndang adong anggo anakna.

²⁹Tole muse si Kis, sian angka anak ni si Kis:
Si Jerahmeel.

³⁰Sian angka anak ni si Musi: Si Mahli, si
Eder dohot si Jerimot. I ma pinompar ni halak
Lepi marsasaama jala marompuompu.

³¹ Taringot tu nasida pe didabu do rujiruji suang songon taringot tu hahanasida, pinompar ni si Aron, di adopan ni raja Daud, si Sadok, si Ahimelek dohot di adopan ni angka induk marompuompu di tongatonga ni angka malim dohot halak Lepi; dos do tahe di indukna marompuompu songon di anggina.

25¹ (I.) Dung i dipapulik si Daud ma rap dohot angka partogi ni parangan mangaradoti ulaon sian angka anak ni si Asap: Si Heman dohot si Jedutun, angka na manurirangi huhut umpalu hasapi, arbap dohot sordam, jala on do bilangan ni baoa angka na pande mangaradoti ulaon tohonannasida i.

² Sian angka anak ni si Asap: Si Sakur, si Josep, si Netania, si Asarela, i ma anak ni si Asap, angka na niuluhon ni si Asap, na manurirangi di lambung ni rajai.

³ Sian si Jedutun, angka anak ni si Jedutun, i ma: Si Gedalia, si Seri, si Jesaya, si Hasabya, si Matitia dohot si Simei, na onom i, angka na umpalu parhinaloan niuluhon ni amana si Jedutun, na manurirangi laho mamujimuji dohot mandok mauliate tu Jahowa.

⁴ Sian si Heman, ia angka anak ni si Heman: Si Bukia, si Matania, si Usiel, si Sebuel, si Jerimot, si Hanania, si Hanani, si Eliata, si Gidalti, si Romamti-Eser, si Josbekasa, si Malloti, si Hotir dohot si Mahasiot.

⁵I ma luhut angka anak ni si Heman, panurirang ni rajai, taringot tu angka hata ni Debata, laho patimbulhon tanduk hatuaon, umbahen dilehon Debata tu si Heman sampulu opat anakna dohot tolu boruna.

⁶Luhut nasida angka na niuluhon ni amanasida, si Asap, si Jedutun dohot si Heman, jumpa marende di bagasan joro ni Jahowa huhut umpalu angka parhinaloan mangaradoti ulaon di bagasan joro ni Debata, di lambung ni rajai.

⁷Ia bilangannasida i rap dohot hahana, angka na pande di parendeon tu Jahowa, dua ratus ualupulu ualu angka indukna luhut.

⁸(II.) Alai mandabu rujiruji nasida taringot tu pargansion ni todoanna, dos do di na metmet songon di na balga, di guru songon di parsiajar.

⁹Rujiruji parjolo si Asap hona tu si Josep; na paduahon i hona tu si Gedalia, rap dohot angka anggina dohot anakna, sampulu dua halak toropna.

¹⁰Na patoluhon i tu si Sakur, rap dohot angka anakna dohot anggina, sampulu dua halak.

¹¹Na paopathon i tu si Isri, rap dohot angka anakna dohot anggina, sampulu dua halak.

¹²Na palimahon i tu si Netania rap dohot angka anakna dohot anggina sampulu dua halak.

¹³Na paonomhon i tu si Bukia, rap dohot angka anakna dohot anggina, sampulu dua halak.

¹⁴Na papituhon i tu si Jesarela, rap dohot angka anakna dohot anggina, sampulu dua halak.

¹⁵Na paualuhon i tu si Jersaya, rap dohot angka anakna dohot anggina, sampulu dua halak.

¹⁶Na pasiahon i tu si Matania, rap dohot angka anakna dohot anggina sampulu dua halak.

¹⁷Na pasampuluhon i tu si Simeï, rap dohot angka anakna dohot anggina sampulu dua halak.

¹⁸Na pasampulusadahon i tu si Asarel, rap dohot angka anakna dohot anggina, sampulu dua halak.

¹⁹Na pasampuluduahon i tu si Hasabya, rap dohot angka anakna dohot anggina sampulu dua halak.

²⁰Na pasampulutoluhon i tu si Sebuël, rap dohot angka anakna dohot anggina, sampulu dua halak.

²¹Na pasampuluopathon i tu si Matitia, rap dohot angka anakna dohot anggina, sampulu dua halak.

²²Na pasampululimahon i tu si Jerimot, rap dohot angka anakna dohot anggina, sampulu dua halak.

²³Na pasampuluononhon i tu si Hanania, rap dohot angka anakna dohot anggina, sampulu dua halak.

²⁴Na pasampulupituhon i tu si Josbekasa, rap dohot angka anakna dohot anggina, sampulu dua halak.

²⁵Na pasampuluualuhon i tu si Hanani, rap dohot angka anakna dohot anggina, sampulu dua halak.

²⁶Na pasampulusiahon i tu si Malloti, rap dohot angka anakna dohot anggina sampulu dua halak.

²⁷Na paduapuluhon i tu si Eliata, rap dohot angka anakna dohot anggina, sampulu dua halak.

²⁸Na paduapulusadahon i tu si Hotir, rap dohot angka anakna dohot anggina, sampulu dua halak.

²⁹Na paduapuluduahon i tu si Gidalti, rap dohot angka anakna dohot anggina, sampulu dua halak.

³⁰Na paduapulutoluhon i tu si Mahasiot, rap dohot angka anakna dohot anggina, sampulu dua halak.

³¹Na paduapuluopathon i tu si Romamti-Eser, rap dohot angka anakna dohot anggina, sampulu dua halak.

26¹(I.) Taringot tu pargansion di halak sijaga pintu: Sian pinompar ni si Kora: Si Meselemya, anak ni si Kora, sian pinompar ni si Asap.

²Ia angka anak ni si Meselemya on do: Si Sakaria buhabajuna, si Jediael paidua, si Sebadia paitolu, si Jatniel paiopat.

³Si Elam pailima, si Johanan paionom, si Eleonai paipitu.

⁴Ia angka anak ni si Obed-Edom on do: Si Semaya buhabajuna. Si Josabad paidua, si Joa paitolu, si Sahar paiopat, si Netaneel pailima.

⁵Si Ammiel paionom, si Isasar paipitu, si Peuletai paiualu, ai ditumpak Debata do ibana gabe.

⁶Anakna si Semaya pe tubuan anak do, angka na mangarajai di pinompar ni ompuna, ai angka ulubalang na marhuaso do nasida.

⁷Angka anak ni si Semaya on do: Si Otni, si Repael, si Obed dohot si Eljabat, ro di angka anggina i: Si Elihu dohot si Semaya, angka na marhuaso.

⁸Luhutna i pinompar ni si Obed-Edom do; nasida tahe ro di anaknasida dohot anggina, angkajolma na gogo be mangaradoti tohonanna, onompulu dua halak sian pinompar ni si Obed-Edom.

⁹Ia pinompar ni si Meselemya ro di anggina, angkajolma na marhuaso do, sampulu ualu halak toropna.

¹⁰Ia angka anak ni si Hosa, sian pinompar ni si Merari, on do: Si Simri i ma indukna: Atik pe so ibana nian buhabajuna, dipabangkit amana do ibana gabe induk.

¹¹ Si Hilkia paidua, si Tebalia paitolu, si Sakaria paiopat. Sude angka anak dohot anggi ni si Hosa sampulu tolu halak do.

¹² On ma angka pargansion ni halak sijaga pintu mangihuthon induk ni angka baoa, panahatan ni parhalan, rap dohot angka anggina, marhalado di bagasan joro ni Jahowa.

¹³ Jadi didabu nasida ma rujiruji, dos tahe di na metmet dohot di na balga marompuompu, mangganupi angka pintu i.

¹⁴ Ia rujiruji ni pintu na dingkan habinsaran, hona do tu si Selemia; taringot tu si Sakaria anakna i, panuturi na marroha, didabu rujiruji, gabe hona tu ibana sambola tungkan utara.

¹⁵ Alai anggo di si Obed-Edom hona do tungkan dangsina dohot tu anakna di lambung bagas parugasanan.

¹⁶ Ia di si Suppim dohot di si Hosa tungkan hasundutan, di lambung bahal Salehet, di dalan tungkan julu; patondong be angka parhalan i.

¹⁷ Tungkan habinsaran onom do halak Lepi; tungkan utara opat halak ganup ari; tungkan dangsina pe opat halak ganup ari; alai anggo di lambung bagas parugasanan duadua halak do.

¹⁸ Tole di bahal Parbar tungkan hasundutan, opat halak do tondong ni dalan na bolon jala dua halak di Parbar.

¹⁹I ma angka pargansion di halak sijaga pintu sian pinompar ni si Kora dohot sian pinompar ni si Merari.

²⁰(II.) Ia sian halak Lepi si Ahia do panahatan ni ugasan di joro ni Debata ro di ugasan angka na pinarbadian.

²¹Ia angka anak ni si Ladan, pinompar ni si Gerson: Si Jeiel i do indukna sian si Ladan pinompar ni si Gerson.

²²Ia angka anak ni si Jeiel i i ma: Si Jetam dohot si Joel, anggina i, i ma panahatan ni ugasan di joro ni Jahowa.

²³Ia sian pinompar ni si Amram dohot si Jisehari dohot si Hebron dohot si Usiel:

²⁴Si Sebucl, anak ni si Gerson, tubu ni si Musa, induk ni nasa panahatan ni ugasan.

²⁵Ia angka anggina, i ma pinompar ni si Elieser: Si Rehabia apala anakna, anak ni muse si Jesia, anak ni muse si Joram, anak ni muse si Sikri, anak ni muse si Selomit.

²⁶Ia si Selomit i rap dohot angka anggina panahatan ni nasa ugasan na badia, angka na pinarbadian ni raja Daud dohot angka induk marompuompu ro di angka induk ni sisaribu halak dohot sisaratus halak ro di angka induk ni parangan.

²⁷Ugasan angka na dapot sian hamusuon ro di tabantaban nunga diparbadaiai nasida hian, asa pabalgahon joro ni Jahowa.

²⁸Tole muse saluhut na pinarbadian ni panurirang Samuel dohot si Saul, anak ni si

Kis dohot si Abner, anak ni si Ner dohot si Joab, anak ni Nai Seruia. Luhut tahe ugasan na pinarbadian sahat tu si Selomit do dohot tu angka anggina i.

²⁹(III.) Sian pinompar ni si Jisehari: Si Kenania dohot angka anggina mangaradoti ulaon ruar di halak Israel bahen panuturi dohot panguhum.

³⁰Sian pinompar ni si Hebron: Si Hasabya dohot angka anggina i, jolma angka na marhuaso, saribu pitu ratus halak toropna, angka na parentarenta tohonan di Israel sambola tungkan hasundutan ni Jordan, mangaradoti huhut sandok ulaon tu Jahowa dohot ulaon tu rajai.

³¹Sian pinompar ni si Hebron: Si Jeria indukna marompuompu di pinompar ni si Hebron marsundutsundut. Paopatpulutaonhon dung harajaon ni si Daud tarjou nasida marpungu tu Jaser di Gilead, gabe jumpang di tongatonganasida angka ulubalang na marhuaso.

³²Jala angka anggina i, halak na marhuaso, dua ribu pitu ratus toropna, angka induk marompuompu; nasida ma dipabangkit raja Daud parentarenta halak Ruben, Gad dohot satonga marga Manasse, mangaradoti nasa ulaon tu Debata dohot tu rajai.

27¹(I.) On do bilangan ni sandok halak Israel, angka na niuluhon ni angka induk marompuompu dohot angka induk

sasaribu dohot sisaratus halak, ro di panuturi angka na marhalado di jolo ri rajai, taringot tu sude ulaon ganup mangihuthon gansina be, marlaho ro sasabulan di saluhut bulan ni na sataon; jala ganup gansi duapulu opat ribu halak toropna.

²Ia induk ni gansi parjolo di bulan sipaha sada, i ma Jasobeam, anak ni si Sabdiel, jala duapulu opat ribu halak masuk tu gansina i.

³Sian pinompar ni si Peres do ibana, induk ni saluhut partogi ni parangan di bulan sipaha sada.

⁴Ia induk ni gansi di bulan sipaha dua i ma si Dodo, halak Ahohi, si Mikhlot do donganna induk di gansina i, jala duapulu opat ribu halak masuk tu gansina i.

⁵Ia induk patoluhon manguluhon parangan di bulan sipaha tolu i ma si Benaia, anak ni malim Joiada; jala duapulu opat ribu halak masuk tu gansina i.

⁶I ma si Benaia, ulubalang na umbaritaan sian na tolupulu halak, laos gabe induk ni na tolupulu i, jala anakna si Amisabad donganna induk di gansina i.

⁷Ia na paopathon di bulan sipaha opat i ma si Asahel, anggi ni si Joab, jala si Sebadia anakna i donganna, jala duapulu opat ribu halak masuk tu gansina i.

⁸Ia na palimahon i di bulan sipaha lima i ma induk si Samhud, halak Jisrahi, jala duapulu opat ribu halak masuk tu gansina i.

⁹Ia na paonomhon i di bulan sipaha onom i ma si Ira anak ni si Ikes, halak Tekoa i, jala duapulu opat ribu halak masuk tu gansina i.

¹⁰Ia na papituhon i di bulan sipaha pitu i ma si Heles halak Peloni sian pinompar ni Epraim, jala duapulu opat ribu halak masuk tu gansina i.

¹¹Ia na paualuhon i di bulan sipaha ualu i ma si Sebekkai, halak Husa i sian halak Zerah, jala duapulu opat ribu halak masuk tu gansina i.

¹²Ia na pasiahon i di bulan sipaha sia i ma si Abieser, halak Anatot i sian pinompar ni si Benjamin, jala duapulu opat ribu halak masuk tu gansina i.

¹³Ia na pasampuluhon i di bulan sipaha sampulu i ma si Maharai halak Netopa i sian halak Zerah, jala duapulu opat ribu halak masuk tu gansina i.

¹⁴Ia na pasampulusadahon i di bulan li i ma si Benaia, halak Piraton i sian pinompar ni si Epraim, jala duapulu opat ribu halak masuk tu gansina i.

¹⁵Ia na pasampuluduahon i di bulan hurung i ma si Heled, halak Netopa i sian si Otniel, jala duapulu opat ribu halak masuk tu gansina i.

¹⁶(II.) Ia angka induk ni marga ni Israel sadasada on do: Sian marga Ruben i ma si Elieser, anak ni si Sikri, sian marga Simeon i ma si Sepatia, anak ni si Maaka.

¹⁷Sian marga Lepi i ma si Hasabya, anak ni si Kemuel; sian pinompar ni si Aron i ma si Sadok.

¹⁸Sian marga Juda i ma si Elihu, sada sian hahaanggi ni si Daud; sian marga Isasar i ma si Omri, anak ni si Mikhael.

¹⁹Sian marga Zebulon i ma si Ismaia, anak ni si Obaja; sian marga si Naptali i ma si Jerimot, anak ni si Asriel.

²⁰Sian pinompar ni Epraim i ma si Hosea, anak ni si Asasia; sian satonga marga Manasse i ma si Joel, anak ni si Pedaya.

²¹Sian satonga marga Manasse na di Gilead i ma si Iddo, anak ni si Sakaria; sian marga Benjamin i ma si Jehasiel, anak ni si Abner.

²²Sian marga Dan i ma si Asarel, anak ni si Jeroham. I ma angka induk ni angka marga ni Israel.

²³Alai ndang masuk tu bilangan dibahen si Daudjolma angka na so gok dope marumur duapulu taon, ala naung diparbagabaga Jahowa hian patoroponna halak Israel, songon bintang angka na di langit.

²⁴Nunga nian dipungka si Joab, anak ni Nai Seruia mamilangi, alai ndang marujung dibahen; ai ala ni do masa torutoru tu halak Israel; dibahen i ndang disurathon bilangan i tu bagasan buku jamita ariari ni raja Daud.

²⁵(III.) Ia panahatan ni sude ugasan ni rajai i ma si Asmapet, anak ni si Adiel; ia panahatan ni angka ugasan di ladang, di

angka huta bagasan dohot di angka huta na gonting, i ma si Jonatan, anak ni si Usia.

²⁶Ia panahatan ni halak parumauma, angka na mangula di balian i ma si Esri, anak ni si Kelub.

²⁷Ia panahatan ni angka porlak anggur i ma si Simei, halak Rama i; ia panahatan ni anggur angka na pineop di angka porlak anggur i ma si Sabdi, halak Syifmi.

²⁸Ia panahatan ni porlak hatubuan ni hau Jetun dohot hau ara harangan na di rura, i ma si Baal-Hanan, halak Geder; ia panahatan ni bagas parpeopan miak i ma si Joas.

²⁹Ia panahatan ni lembu angka na manjampal di Saron, i ma si Sirtai, halak Saron i; ia panahatan ni lembu angka na di rura i ma si Sapat, anak ni si Adlai.

³⁰Ia panahatan ni unto, i ma si Obil, halak Ismael i; ia panahatan ni halode boruboru, i ma si Jehdeia, halak Meronot i.

³¹Ia panahatan ni birubiru, i ma si Jasis, halak Hagar i. I ma saluhutjolma panahatan ni ugasan ni raja Daud.

³²Alai anggo si Jonatan, hasudungan ni si Daud, i ma panuturina, bapa na pantas marroha jala na pistar; ia si Jeiel, anak ni Hakmoni, i ma dongandongan ni angka anak ni rajai.

³³Si Ahitopel pe panuturi ni rajai do; jala si Husai halak Arki, i ma aleale ni rajai.

³⁴Jadi dung salpu si Ahitopel soluk ma si Joiada, anak ni si Benaia dohot si Abiatar, alai anggo si Joab partogi ni parangan ni rajai do.

28¹(I.) Dung i dipaluhut si Daud ma saluhut induk ni Israel tu Jerusalem, angka induk ni marga sadasada, angka induk ni pargansion, angka na marhalado di adopan ni rajai, angka induk ni sisaribu halak dohot angka induk ni sisaratus halak dohot angka jolma panahatan ni sandok ugasan dohot dorbia ni rajai, panahatan ni angka anakna pe ro di halak siramoti bilutna, nang angka ulubalang ro di sude halak na marhuaso.

²Dung i hehe ma raja Daud laos jongjong, jala ninna ma: Tangihon hamu ma hatangkon, hamu ale angka hahaanggingku dohot bangsongku! Disangkap rohangku do nian naeng pajongjong sada joro bahen pangulonon ni poti parpadanan ni Jahowa, huhut bahen sidegedegean ni pat ni Debatanta; nunga pola huparade angka ulaulana.

³Alai ro hata ni Debata mandok tu ahu: Nandang jadi anggo ho pajongjong sada joro di Goarhu, ala halak parmusu do ho na sai laon dohot naung mandurushon mudar.

⁴Nunga nian dipillit Jahowa, Debata ni Israel ahu sian sandok pinompar ni damang, asa ahu manjadi raja gumomgom Israel ro di salelenglelengna; ai nunga dipillit hian anggo si Juda bahen jujungan, jala sian pinompar ni

si Juda, pinompar ni damang dipillit, jala sian angka anak ni damang ahu do dihalomohon rohana pabangkithon raja gumomgom sandok Israel.

⁵Jala sian sude angka anakku, ai torop do anak dibasabasahon Jahowa tu ahu, nunga dipillit Ibana si Salomo, anakku, asa hundul ibana di atas habangsa ni harajaon ni Jahowa gumomgom Israel.

⁶Jala nunga pola didok mandok ahu: Ingkon anakmu si Salomo pauli jorongku dohot angka alamanku; ai nunga hupillit ibana, asa ibana gabe anakku, jala Ahu gabe Amana.

⁷Jala Ahu pahothon harajaonna ro di salelenglelengna, molo tung marsihohot rohana mangulahon angka tonangku dohot uhumhu, songon sadarion.

⁸Nuaeng pe, di adopan ni sandok Israel, i ma luhutan ni Jahowa dohot di adopan ni parbinegean ni Debatanta sipaingoton tu hamu: Sai ringkoti hamu ma mangaradoti saluhut tona ni Jahowa, Debatamuna i, asa teanonmuna tano na denggan i bahen partalianmuna dohot partalian ni anakmuna sogot ro di salelenglelengna.

⁹Ia ho, ale anakku Salomo, sai tanda ma Debata ni amangmu jala oloi Ibana sian nasa roham dohot sian nasa ateatem! Ai disulingkit Jahowa do nasa roha di bagasan, jala diantusi do nasa sangkapsangkap ni roha; molo dilului ho Ibana, sai jumpang ho do Ibana; alai molo

tung tadingkononmu Ibana, bolongkononna
ma ho ro di salelenglelengna.

¹⁰Antong parateatehon ma hata i, ai nunga
dipillit Jahowa ho pajongjongonmu sada joro
bahen habadiaon. Sai marsihohot ma roham
laho pasauthon!

¹¹(II.) Dung i dilehon si Daud ma tu anakna
si Salomo sada tiruan ni emper ni joro dohot
angka bagasna i dohot bilut parpeopan ni
ugasan, ro di angka bilut parginjang dohot
bilut parbagasan, ro di bilut hajongjongan ni
langkop pardenggan.

¹²Nang tiruan ni saluhut na sinihathon ni
Tondi tu ibana, taringot tu angka alaman
ni joro ni Jahowa dohot taringot tu saluhut
bilut angka na humaliang bahen parpeopan
ni angka ugasan di bagas ni Debata dohot
ugasan angka na badia.

¹³Nang bahen inganan ni pargansion ni
angka malim dohot halak Lepi dohot bahen
parpeopan ni luhut ulaula laho mangaradoti
ulaon tohonan di joro ni Jahowa.

¹⁴Dilehon huhut tu ibana sere marguru tu
timbangan sere bahen ulaula marragamragam
masuk tu ulaonna be, nang ulaula perak
marragamragam pola martimbangan bahen
ulaula pangkeon tu ulaonna be.

¹⁵Jala dibuhul hian timbangan ni
parpalitoan sere dohot angka palitona sere,
martimbangan be do ganup parpalitoan dohot
palitona; suang songon i nang taringot tu

parpalitoan perak marguru tu timbangan ni ganup parpalitoan dohot palitona hombar tu ulaon ni ganup parpalitoan.

¹⁶Dibuhul huhut timbangan ni sere tu ganup meja ni sagusagu na marhadohoan, suang songon i perak di ganup meja sian perak.

¹⁷Dilehon huhut tiruan ni angka garpu, mangkuk dohot saoran sian sere na pita, ro di guriguri sere, martimbangan be ganup guriguri; suang songon i guriguri perak, martimbangan be ganup guriguri.

¹⁸Tole muse langgatan panutungan daupa sian sere na pita, pola martimbangan; tole muse tiruan ni hureta ni na dua Kerubim sian sere, na paherbang habongna huhut manghungkupi poti parpadanan ni Jahowa.

¹⁹Luhutna i, ninna si Daud, tarsurat tu ahu marhite sian tangan ni Jahowa, asa diajarhon tu ahu saluhut ulaon ni tiruan on.

²⁰Dung i didok si Daud ma tu anakna si Salomo: Pir ma tondim jala marsihohot laho pasauthon! Unang ho mabiar jala unang tahuton! Ai Debata Jahowa, i do Debatangku, sai dongananna do ho, jala ndang tagamon pataitonna tanganna sian ho manang tadingkononna ho, paima marujung bahenonmu sude ulaon tohonan di joro ni Jahowa.

²¹Jala ida ma, disi do angka pargansion ni angka malim dohot halak lepi mangaradoti saluhut tohonan di joro ni Debata: Donganmu

do huhut di saluhut ulaon sude halak angka na ringgas jala na pantas marroha mangaradoti saluhut tohonan, tole dohot angka induk ro di sandok situan na torop i girgir be patupahon hatam.

29¹ (I.) Dung i ninna raja Daud ma tu sandok luhutan i: Ia si Salomo anakki, naung pinillit ni Debata sasadasa, bajar dope jala sorta; alai anggo ulaon i mansai dokdok do, ai ndada bahen jabu ni jolma, ingkon bahen joro ni Debata Jahowa do i.

²Jala nunga nian hubahen nasa gogongku parade ulaula tu joro ni Debatangku, i ma sere tu ulaula sere, perak tu ulaula perak, tombaga tu ulaula tombaga, bosi tu ulaula bosi dohot hau tu ulaula hau, tole angka batu unam dohot simata landus dohot ragamragam mata intan na arga ro di batu na martulis mansai godang.

³Angkup ni, dibahen las ni rohangku mida joro ni Debatangku, ia adong pe sere manang perak na hupeop, lehononku do i bahen guguan tu joro ni Debatangku, di balik ni saluhut naung huparade hian tu bagas habadiaon i.

⁴I ma tolu ribu talenta sere Opir, dohot pitu ribu talenta perak naung pinapita, lampishononhon tu dorpi ni angka bilutna.

⁵Asa gabe ulaula sere na sian sere hian, jala gabe perak na sian perak hian jala gabe ragamragam ni ulaula marhite sian tangan

ni angka pande. On pe ise do nuaeng na las roha manggohi tanganna mangalehon buas tu Jahowa?

⁶Jadi marlas ni roha be angka induk marompuompu dohot angka induk ni angka marga Israel sadasada dohot angka induk ni sisaribu dohot sisaratus halak, ro di angka induk ni ulaon rundo tu rajai.

⁷Margugu be tu ulaon di joro ni Debata: Lima ribu talenta sere, dohot sampulu ribu dirham, jala sampulu ribu talenta perak, jala sampuluualu ribu talenta tombaga, jala saratus ribu talenta bosi.

⁸Jala ia jumpang di manang ise angka mata intan, dilehon do i tu ugasan na pineop di joro ni Jahowa, dipasahat do i tu tangan ni si Jeiel, pinompar ni si Gerson.

⁹Jadi marlas ni roha be situasi na torop i ala ringgas nasida margugu, ai sian nasa rohana mangaringgas be margugu tu Jahowa; nang raja Daud marlas ni roha godang do.

¹⁰(II.) Dibahen i dipuji si Daud ma Jahowa di adopan ni sandok luhutan i, jala ninna si Daud ma: Pinuji ma Ho, ale Jahowa, Debata ni Israel, amanami, sian salelenglelengna ro di salelenglelengna!

¹¹Ai gok di ho do, ale Jahowa hatimbulon dohot hagagoon dohot hamuliaon dohot hatongamon dohot pujipujian; gok di Ho tahe nang saluhut na di banua ginjang dohot na di tano on! Gok di Ho do, ale Jahowa harajaon,

jala dipatimbul Ho dirim di atas ni saluhut na marjujungan.

¹²Marharoroan sian Bohim do hamoraon dohot hamuliaon, jala Ho panggomgomi di saluhutna, jala guru di Ho do hagagoon dohot huaso, guru di Ho huhut patimbulhon dohot margogoihon luhutna i!

¹³On pe, ale Debatanami! Mandok mauiate ma hami tu Ho dohot mamujimuji Goarmu na marmulia i.

¹⁴Ai ise nian ahu pola, jala ise pola ia bangsongki, tung pola tuk gogonami mangaringgas margugu songon on? Ai marharoroan sian Ho do saluhutna i, jala sian tanganmi do i na hulehon hami tu Ho.

¹⁵Ai halak dagang do hami di adopan ni Bohim jala halak panginsua, suang songon saluhut ompunami; tudoshon halinu sambing do ariarinami di atas tano on jala ndang adong sihirimon.

¹⁶Ale Jahowa, Debatanami! Sandok guguan na gukguk on, naung huparade hami laho pajongjong di Ho sada joro di Goarmu na badia i, marharoroan sian tanganmu do i, jala Ho do nampuna sasudena i.

¹⁷Tangkas do huboto, ale Debatanku, Ho do na manguji roha, jala hasintongan do lomo ni roham; dibahen i saluhutna on sian sintong ni rohangku umbahen na mangaringgas ahu margugu, tole dohot bangsomu na

pungu dison, nunga huida marlas ni roha mangaringgas be margugu tu Ho.

¹⁸Ale Jahowa, Debata ni ompunami si Abraham, si Isak dohot si Israel, sai pahot ma ro di salelenglelengna harohaon dohot pingkiran sisongon i di bagasan roha ni bangsom, jala togutogu rohanasida tu Ho!

¹⁹Jala lehon tu anakku si Salomo roha na marsihohot mangaradoti angka tonami, panindangionmi dohot aturanmi, laho mangulahon saluhutna i dohot pajongjong bagas joro on, naung huparade ulaulana!

²⁰(III.) Dung i ro ma hata ni si Daud tu sandok luhutan i: Sai puji hamu ma Jahowa, Debatamuna i! Jadi sandok luhutan i mamujimuji Jahowa, Debata ni ompunasida i, dung i dipaundukunduk be uluna jala marsomba tu Jahowa dohot tu rajai.

²¹Dung i dipelehon nasida ma tu Jahowa angka pelean sipotongon, dipelehon muse manogotna i tu Jahowa angka pelean situtungon: Saribu lembu, saribu birubiru tunggal, saribu anak ni birubiru rap dohot angka pelean siinumon dohot sipotongon mansai torop, mangurasi sandok Israel.

²²Jadi laos di ari na sasada i ma nasida mangan minum di adopan ni Jahowa marlas ni roha godang; jala dipabangkit nasida paduahalihan si Salomo, anak ni si Daud bahen raja, laos dimiahi ibana bahen jujungan di Jahowa, jala si Sadok bahen malim.

²³ Jadi hundul ma si Salomo di atas habangsa ni Jahowa gabe raja, singkat ni si Daud amana i; mardohar do ibana jala sandok Israel mangunduk tu ibana.

²⁴ Sude angka induk pe ro di angka ulubalang dohot sude anak ni raja Daud mangunduk tu raja Salomo.

²⁵ Dung i dipasangap Jahowa ma si Salomo gabe timbul situtu di adopan ni sandok Israel, jala dibasabasahon tu ibana hamuliaon ni harajaon, na so dung jinujung ni manang ise raja na jumolo sian ibana gumomgom Israel.

²⁶ (IV.) Asa nunga salpu anggo si Daud, anak ni si Isai mangarajai sandok Israel.

²⁷ Alai anggo lelengna ibana mangarajai Israel opatpulu taon do; di Hebron ibana mangarajai pitu taon lelengna jala di Jerusalem ibana mangarajai tolupulu tolu taon lelengna.

²⁸ Dung i mate sarimatua ma rajai, sombu rohana di hangoluan on, di hamoraon dohot di hamuliaon; jadi si Salomo anakna i bangkit raja singkatna.

²⁹ Alai anggo angka jamita ni raja Daud, angka parjolo dohot angka parpudi, ida ma tarsurat do i di bagasan buku jamita ni panurirang Samuel dohot di bagasan buku jamita ni panurirang Natan dohot di bagasan buku jamita ni panurirang Gad.

³⁰ Rap dohot sandok harajaonna dohot huasona ro di parsorion angka na masa tu

ibana dohot tu Israel dohot tu sude harajaon
ni angka luat na asing.

2 Tawarikh

1 ¹ (I.) Dung i lam hot ma si Salomo, anak ni si Daud, di bagasan harajaonna i, ai Jahowa Debatana mandongani ibana dohot pasangaphon ibana gabe timbul situtu.

² Dung i ro ma hata ni si Salomo mandok tu sandok Israel, tu angka induk sisaribu halak dohot sisaratus, tu angka panguhum dohot tu partogi ni sandok Israel, angka induk marompuompu.

³ Asa laho nasida, si Salomo ro di sandok luhutan i rap dohot ibana, manopot tambak pamelean na di Gibeon; ai disi do ojak undungundung parluhutan ni Debata, na pinauli ni si Musa, naposo ni Jahowa di halongonan.

⁴ Alai anggo poti ni Debata, nunga diboan si Daud nangkok sian Kiriath Jearim tu inganan na pinadiri ni si Daud tusi; ai nunga dipagohon sada undungundung bahen ingananna di Jerusalem.

⁵ Alai anggo langgatan tombaga na pinauli ni si Bezaleel, anak ni si Uri, tubu ni si Hur, laos disi do di adopan ni undungundung ni Jahowa; jalaomal si Salomo dohot luhutan i mangalului Jahowa disi.

⁶ Jadi mamele ma si Salomo disi di adopan ni Jahowa di atas langgatan tombaga na di jolo

ni undungundung parluhutan i; dipelehon ma di atasna saribu pelean situtungon.

⁷(II.) Laos di borngin na sasada i tarida Debata di si Salomo, jala didok mandok ibana: Pangido ma manang aha silehononku tu ho.

⁸Dung i ninna si Salomo ma tu Debata: Nunga dibahen Ho asi ni roha godang tu damang, si Daud i, jala nunga dipabangkit Ho ahu gabe raja singkatna.

⁹On pe ale Debata Jahowa, sai pasintong ma bagabagami tu damang, si Daud i! Ai nunga sapala dipabangkit Ho ahu gabe raja gumomgom sada bangso, na tudoshon orbuk ni tano i toropna.

¹⁰Dibahen i sai lehon ma tu ahu hapistaran dohot parbinotoan, asa huboto marmeang muli songon na tama di adopan ni bangso on; ai tung ise ma na tuk manguhum bangsom on na sai balga i?

¹¹Dung i ninna Debata ma tu si Salomo: Ala na songon i pangidoan ni roham, jala ndang dipangido ho hamoraon, angka arta, manang hamuliaon, manang hosa ni angka musum, manang ginjang ni umur; hapistaran tahe dohot parbinotoan pinangidom di ho, asa botoonmu manguhum bangsongki, naung hupampe ho gabe rajana.

¹²Dibahen i nunga hubasabasahon tu ho hapistaran dohot parbinotoan. Angkup ni lehononku do tu ho hamoraon dohot arta

dohot hamuliaon na so dung adong tudosanna di manang ise raja angka na jumolo sian ho, manang sian pudim pe ndang adong tudosanna.

¹³(III.) Dung i mulak ma si Salomo sian tambak, sian adopan ni undungundung parluhutan na di Gibeon i tu Jerusalem, jala dirajai halak Israel.

¹⁴Dung i dipapungupungu si Salomo ma angka hureta dohotjolma parsihundul, pola saribu opat ratus hureta di ibana, jala sampulu dua ribujolma parsihundul, angka na sinagihonna di bagasan angka huta hajongjongan ni hureta dohot di Jerusalem di lambung ni rajai.

¹⁵Dung i dipagodang rajai ma perak dohot sere di Jerusalem, hira doshon batu godangna; tole hau ares, hira antajau na tubu di tano pea godangna.

¹⁶Langgo haroroan ni hoda angka na tu si Salomo sian Misir do, marrongkanrongkan angka saudagar ni rajai mangalap hoda i marhabanhaban, pajak hian ia argana.

¹⁷Mararga onom ratus sekkel perak sada hureta, diboan halak nangkok sian Misir, jala saratus limapulu sekkel arga ni sada hoda; laos songon i diboan nasida tu sude raja ni halak Het dohot halak Ram.

2¹(1-18) Dung i disangkap si Salomo ma naeng pajongjong sada joro di Goar

ni Jahowa dohot sada bagas ojahan ni habangsana.

²(2-1) (I.) Dung i dibilang si Salomo ma pitupulu ribu halak parhuli jala ualupulu ribu halak pandakdak batu di atas dolok, jala tolu ribu onom ratus halak sintua pandasdas di nasida.

³(2-2) Dung i disuru si Salomo ma suruanna manopot si Hiram raja sian Tirus, ninna ma: Songon na binahenmi tu damang si Daud i manongosi tu ibana hau ares, asa pajongjongonna di ibana sada bagas bahen ingananna, suang songon i ma bahen tu ahu nuaeng.

⁴(2-3) Ida ma, naeng ahu pajongjong sada joro di Goar ni Jahowa, Debatangku, bahen habadiaonna, bahen panutungan di daupa na hushus di adopanna dohot padiri tongtong sagusagu na marhadohoan dohot angka pelean situtungan manogotna i dohot bodarina i, angka ari Sabbath dohot di poltak ni bulan dohot di angka ari raya ni Jahowa, Debatanami, gabe patik di Israel ro di salelenglelengna.

⁵(2-4) Jala bagas joro na naeng pajongjongonki, ingkon balga do, ai tumongam do Debatanami sian nasa debata sileban.

⁶(2-5) Alai tahe tung ise ma na tuk gogo pajongjong sada joro di Ibana? Ai gari langit ni langitan, ndang tarhangkamsa

anggo Ibana; tung ise ma ahu pola asa pajongjongonku di Ibana sada joro, nda holan laho manutung daupa nian di adopanna?

⁷(2-6) On pe suru ma tu ahu sada halak na pistar marhapandean di sere, perak, tombaga, bosi dohot di panubaron dohot di pansopan dohot na malo manguhir mata intan, rap dohot halak na pistar angka na di lambungku di Juda dohot di Jerusalem, angka na pinadiri ni damang si Daud i.

⁸(2-7) Tongoshon huhut tu ahu angka hau ares, sampinur dohot ingul sian Libanon; ai tangkas do huboto na pande do angka naposom pauli hau di Libanon; jala ida ma, ingkon angka naposongku dongan ni angka naposom.

⁹(2-8) Asa godang situtu parhau diparade di ahu; ai joro na naeng paulionki, ingkon tongam do tau halongangan.

¹⁰(2-9) Jala ida ma, lehononku do tu pande hau, angka na pauli hau i bahen bohal ni angka naposom duapulu ribu pingkul itak na lamot dohot duapulu ribu bat anggur dohot duapulu ribu bat miak.

¹¹(2-10) Dung i ninna si Hiram, raja sian Tirus ma di bagasan surat tinongoshonna tu si Salomo: Ala holong ni roha ni Jahowa mida bangsona, umbahen ho dipabangkit gabe raja gumomgom nasida.

¹²(2-11) Angkup ni didok si Hiram: Pinuji ma Jahowa, Debata ni Israel, na manompa langit

dohot tano, naung mangalehon tu raja Daud sada anak na pistar, na umboto hapantason dohot panimbangan laho pajongjong sada joro di Jahowa dohot sada bagas ojahan ni habangsana!

¹³(2-12) Dibahen i husuru ma sada halak na pistar, na umboto panimbangan, i ma damang si Hiram i.

¹⁴(2-13) Anak ni sada parompuan sian pinompar ni si Dan, alai anggo amana halak Tirus do; na pistar do ibana marhapandean di sere, perak, tombaga, bosu hau, di panubaron dohot di pansopan dohot na malo manguhir mata intan dohot manurgasi saluhut ulaon hapistaran, hapandean angka na pineakkon di jolona rap dohot halak na pistar na di ho hian dohot halak na pande ni tuanku, amangmu si Daud i.

¹⁵(2-14) Antong ditongoshon tuanku ma tu angka naposona itak na lamot dohot itak hian, miak dohot anggur, naung pinarbagabagami.

¹⁶(2-15) Asa hutaba hami angka hau sian Libanon manang sadia, asa singkop di ho; hami pe mamboan hau i tu ho marrakitrakit di laut tu Joppe, jala ho muse mamboan nangkok tu Jerusalem.

¹⁷(2-16) (II.) Dung i dibilang si Salomo ma sude halak dagang di tano Israel mangihuthon bilangan na binahen ni amana si Daud i di nasida, gabe jumpang ma saratus limapulu tolu ribu onom ratus halak toropna.

¹⁸(2-17) Jadi dipapulik sian i pitupulu ribu halak parhuli, jala ualupulu ribu halak pandakdak batu di dolok, jala tolu ribu onom ratus halak sintua mandasdas situasi na torop i tu ulaonna.

3¹(I.) Dung i dipungka si Salomo ma pajongjong joro ni Jahowa di Jerusalem, di atas dolok Moria, naung pinatuduhon hian tu si Daud amana i, di inganan naung pinadiri ni si Daud hian di pardegean ni si Ornan, halak Jebusi i.

²Alai di bulan sipaha dua di suma paopattaonhon hinarajaonna i, dipungka rajai paulihon.

³Jala on do ojahan binahen ni si Salomo laho paulihon joro ni Debata: Unjurna onompulu asta, mangihuthon ungkuran na jolo, jala bohagna duapulu asta.

⁴Alai anggo emper na di adopan i, duapulu asta unjurna mangihuthon bohag ni joro i, ia timbona duapulu asta do; ianggo parbagasanna i dilampis do i dohot sere na pita.

⁵Joro ma balga i pe dilampis do i sian bagasan dohot hau sampinur, jala dilampis muse dohot sere palangki, jala diuhir tusi angka hau harambir dohot gabagaba.

⁶Jala dilohothon tu joro i batu angka na arga situtu bahen sipajagarjagar; alai anggo sere i, sere sian Parwaim do.

⁷ Dilampis muse dohot joro i, angka gulanggulangna, tiangna, lobulobuna, dorpina, angka pintuna dohot sere jala diuhirhon angka rupa ni kerubim di dorpina.

⁸(II.) Dipauli huhut joro i inganan na songkal sahali, unjurna duapulu asta mangihuthon bohang ni joro i, jala bohangna pe duapulu asta do, jala dilampis do i dohot sere na pita, arga onom ratus talenta godangna.

⁹Jala dokdok ni angka labang pola limapulu sekel sere, jala dilampis do angka bilut parginjang dohot sere.

¹⁰Dibahen huhut di bagasan joro, i ma na songkal sahali, dua kerubim, jadijadian ni pandakdak batu, jala dilampis do i dohot sere.

¹¹Ia habong ni angka kerubim duapulu asta unjurna, ia bohang ni na sada lima asta unjurna, pola dais tu dorpi ni joro i, jala habongna na sadanari laos lima asta do, jala dais tu habong ni kerubim na sadanari.

¹²Jala habong ni kerubim na sada laos lima asta do, jala dais tu dorpi ni joro i; jala habongna na sadanari laos lima asta do, jala dais tu habong ni kerubim na asing.

¹³Jadi angka habong ni angka kerubim i mangerbang duapulu asta ganjangna; jala duansa jongjong di atas patna sandiri, jala bohinasida mandompakkon joro i.

¹⁴Dipauli huhut rimberimbe sada sian bonang na sinop dohot na tinubar dohot sian

haen na halus, jala digorga angka rupa ni kerubim tusi.

¹⁵Dibahen huhut di adopan ni bagas i dua tiang, tolupulu lima asta ganjangna, jala uluna di atasna lima asta timbona.

¹⁶Dibahen huhut pinartaraoang songon jala dohot ranterante tu ulu ni tiang na di atasna i, dibahen muse saratus parbue ni hau dalimo, jala digantung tu taraoang i.

¹⁷Dung i dipajongjong ma angka tiang i di adopan ni joro, sada tu siamun, jala sada tu hambirang, jala dibahen do goar ni tiang na di siamun i Jakin, jala goar ni na di hambirang i Boas.

4¹ (I.) Dung i dibahen ma sada langgatan tombaga, duapulu asta unjurna, duapulu asta bohangna, jala sampulu asta timbona.

²Dibahen huhut sada tobat tuangan, sampulu asta sian topina na sada tu topina na sadanari, tingko humaliang, jala lima asta timbona, jala tolupulu asta ganjang ni tali lilitna humaliang.

³Jala di toru ni topina adong angka mutik ni bungabunga tuk humaliang sampulu kibung toropna di bagasan saasta humaliang tobat i; dua rinte mutik ni bungabunga i tartuang di panuanganna.

⁴Ojak do i di atas ni sampulu dua lombu, tolu uluna mandompakkon utara, tolu uluna mandompakkon pastima, tolu uluna dompak dangsina, jala tolu uluna dompak habinsaran,

jala tobat i di atasna, jala ihur ni angka lombu i dompak bagasan do.

⁵Ia hapalna santopap do, jala topina hira topi ni panginuman, songon bunga pansur na mangerbang, siatsiat tolu ribu bat.

⁶Dibahen huhut sampulu tong pamurian, lima dibahen tu siamun jala lima tu hambirang bahen pamurian ni ulaula na pinangke tu pelean situtungon, asa dilusak tu bagasan; alai anggo tobat i bahen parburian ni angka malim do i.

⁷Dibahen huhut sampulu parpalitoan sere suman tu tiruan i, jala dibahen do i tu bagasan joro, lima tungkan siamun jala lima tungkan hambirang.

⁸Dibahen huhut sampulu meja jala dipajongjong tu bagasan joro i, suang songon bongka ondeng; lima tungkan siamun jala lima tungkan hambirang; dibahen huhut mangkuk pangurasan sian sere saratus toropna.

⁹Dibahen huhut alaman di angka malim dohot alaman godang, tole angka pintu laho tu alaman godang, jala dilampis pintu i duansa dohot tombaga.

¹⁰Ia tobat i dibahen do i tungkan siamun, dingkan habinsaran dompak dangsina.

¹¹(II.) Angkup ni dibahen si Hiram do angka hudon, siuksiuk dohot mangkuk pangurasan. Jadi sun ma dibahen si Hiram sandok ulaon na niulana di raja Salomo tu joro ni Debata.

¹²Na dua tiang i ro di pinarninggor ni ulu angka na di atas ni tiang na dua i dohot taraoang na dua i bahen pangkuphupi na pinarninggor na dua i na di atas ni ulu ni tiang i.

¹³Tole muse na opat ratus parbue ni hau dalimo na lohohot di taraoang i, duadua rinte parbue ni hau dalimo di sada taraoang bahen pangkuphupi ni na dua pinarninggor ni ulu di atas ni tiang na dua i.

¹⁴Dibahen muse angka rinti dohot angka hudon di atas ni angka rinti.

¹⁵Tole muse tobat i ro di na sampulu dua lombu na di toruna.

¹⁶Tole muse angka hudon, siuksiuk dohot garpu; saluhut ulaula na masuk tusi tahe dipandei si Hiram amana i di raja Salomo tu joro ni Jahowa sian tombaga mamolin do.

¹⁷Di tano tobing mardonokkon Jordan, didokkon rajai tuangon luhutna i di bagasan tuangan sian tano liat, di holangholang ni Sukot dohot Zaretan.

¹⁸Tung na mansai godang situtu sude ulaula angka na binahen ni si Salomo, pola ndang dapot dasingon borat ni tombaga i.

¹⁹Didokkon si Salomo huhut paulion sude ulaula angka na masuk tu joro ni Debata, tole langgatan sere dohot angka meja hapeahan ni sagusagu na marhadohoan.

²⁰Tole muse angka parpalitoan rap dohot palitona sian sere na pita, asa pagalahonna

di adopan ni partangiangan, songon uhumna hian.

²¹ Tole muse bungabungana, angka palitona dohot gustingna sian sere na pita do i.

²² Ro di angka raut, mangkuk pangurasan dohot saoran pardaupaan sian sere na pita do i; tole pintu ni joro i, angka hinsuhinsuna parbagasan na tungkan inganan na songkal sahali, nang hinsuhinsu ni bilut na badia, sian sere do.

5¹ (I.) Jadi sun ma sandok ulaon na binahen ni si Salomo tu joro ni Jahowa. Dung i diboan si Salomo ma tu bagasan saluhut ugasan na niuras ni amana si Daud ro di perak dohot sere dohot sude ulaula, jala dipeakkon tu bilut parpeopan arta di bagas ni Debata.

² Dung i dipaluhut si Salomo ma angka sintua ni Israel dohot sude induk ni halak Israel marmargamarga, ro di induk marompuompu tu Jerusalem, naeng boanonna nangkok poti parpadanan ni Jahowa sian huta ni si Daud, i ma Sion.

³ Jadi marluhut ma tu jolo ni rajai nasa baoa di Israel di ari raya na di bulan sipaha pitu.

⁴ Jadi dung marluhut sude sintua ni Israel, dihindat halak Lepi ma poti i.

⁵ Dung i diboan nasida ma poti i nangkok, ro di undungundung parluhutan dohot sude ulaula ni habadiaon, angka na di undungundung i na sai laon; laos diboan

angka malim dohot halak Lepi do angka i nangkok.

⁶Alai anggo raja Salomo ro di sandok luhutan ni halak Israel angka na marluhut di lambungna di adopan ni poti i, mamelehon angka birubiru dohot lombu, angka na so tarbilang manang tare tong dibahen godangna.

⁷Jadi sahat ma diboan angka malim poti parpadanan ni Jahowa tu hajongjonganna, tu bilut partangiangan di joro i, tu bagasan bilut na songkal sahali, di toru ni habong ni kerubim na dua i.

⁸Ai dipaherbang kerubim na dua i do habongna na dua i tu atas hajongjongan ni poti i, laos dihungkupi kerubim na dua i do poti i ro di haluhaluna sian ginjang.

⁹Juruk do angka haluhalu i pola dapot idaon uluna sian bilut na badia i di adopan ni bilut partangiangan, alai ndang dapot idaon anggo sian ruar; laos disi do i rasirasa sadarion.

¹⁰Ndang adong agia aha di bagasan poti i, nda holan na dua lei batu, angka naung pineakkon ni si Musa tusi uju di Horeb, uju na binahen ni Jahowa parjanjian tu halak Israel, dung diparuar nasida sian tano Misir.

¹¹(II.) Jadi dung ruar angka malim sian bilut na badia i (ai saluhut malim angka na disi nunga manguras be ndang be dijujur anggo pargansionna.

¹²Tole muse halak Lepi; angka parende i ro di sude angka na niuluhon ni si Asap, si Heman, si Jedutun ro di angka anaknasida dohot habaangginasida marpangkean haen na halus be, huhut mardongan sarune, arbap dohot biola, jongjong tungkan habinsaran ni langgatan, jala di lambungnasida saratus duapulu malim, angka na umpalu sarunena be.)

¹³Jadi hira sisada soara begeon halak na umpalu sarune dohot angka na marende laho mamuji dohot mandok mauiate tu Jahowa. Jadi dung dipangiar soara i binahen ni sarune, arbap dohot parhinaloan, angka na asing dohot binahen ni pamujimujon di Jahowa, ala pardengganbasa Ibana jala ro di salelenglelengna do asi ni rohana i, jadi ro ma ombun i manggohi joro ni Jahowa.

¹⁴Pola ndang manahan angka malim i jongjong marulaon na badia maradophon ombun i, ai hamuliaon ni Jahowa manggohi joro ni Debata.

6¹(I.) Uju i ma didok si Salomo: Nunga marboaboa hian Jahowa ingkon naeng maringanan Ibana di bagasan haholomon.

²Antong nunga hupauli sada joro parmiananmu, bahen ojahan ni habangsam ro di saleleng ni lelengna.

³Dung i dipahusor rajai ma bohina, asa pasupasuwonna sandok luhutan Israel, jala jongjong be do sandok luhutan Israel.

⁴Dung i ninna rajai ma: Pinuji ma Jahowa, Debata ni Israel, naung marbagabaga hian marhite sian pamanganna sandiri tu damang si Daud i, jala nunga dipasintong nuaeng marhite sian tanganna, uju na nidokna i.

⁵Olat ni ari uju Ahu manogihon bangsongku ruar sian tano Misir, ndang dung hupillit sada huta sian sandok marga ni Israel paulionna sada joro bahen inganan di Goarhu, jala ndang dung hupillit nanggo sada halak, asa ibana gabe jujungan gumomgom bangsongku Israel.

⁶Alai nunga hupillit anggo Jerusalem, asa disi Goarhu; jala nunga hupillit anggo si Daud, asa ibana manggomgomi bangsongku Israel.

⁷Nunga nian disangkap roha ni damang si Daud i, naeng paulionna sada joro di Goar ni Jahowa, Debata ni Israel.

⁸Alai ninna Jahowa ma mandok damang si Daud i: Ala naung ditahi roham naeng pajongjongonmu sada joro di Goarhu, denggan do nian anggo sangkap ni roham.

⁹Alai ndada jadi anggo ho pajongjong joro i, ingkon anakmu na ruar sian butuham, ibana pe pajongjong sada joro di Goarhu.

¹⁰Nunga tung dipasintong Jahowa hatana, naung pinaboana hian, jala nunga ahu dipahot singkat ni damang si Daud i, jala nunga hundul ahu di atas habangsa ni harajaon Israel, songon na pinaboana ni Jahowa

hian, jala nunga ahu pajongjong sada joro di Goar ni Jahowa, Debata ni Israel.

¹¹ Jala nunga hubahen tusi poti, parpeopan ni parjanjian ni Jahowa, binahenna tu halak Israel.

¹² (II.) Dung i jongjong ma rajai di adopan ni langgatan ni Jahowa mandompakkon sandok luhutan Israel, jala dipaherbang tanganna.

¹³ Ai nunga dibahen si Salomo hian sada parjamitaan sian tombaga, jala tu tongatonga ni alaman do i dibahen, lima asta unjurna jala lima asta bohangna jala tolu asta timbona. Jadi jongjong ma rajai tu atasna, laos marsinggang di adopan ni sandok luhutan Israel, jala dipaherbang tanganna dompak langit.

¹⁴ Dung i ninna ma: Ale Jahowa, Debata ni Israel! Ndang adong Debata na tudoshon Ho, nang di banua ginjang, nang di tano on; Ho do tutu pahothon parjanjian dohot asi ni roha tu naposom, angka na marparange di adopan ni Bohim sian nasa rohana.

¹⁵ Ho do naung pasintongkon tu damang, naposom si Daud i, hata na pinorbagabagam tu ibana; pamanganmu tutu marbagabagahon, jala tanganmu pasintongkon apala sadarion ma.

¹⁶ On pe, ale Jahowa, Debata ni Israel! Sai pasintong ma tu naposom si Daud, damang i, hata naung pinarbagam hian tu ibana, uju na nidokmu: Nandang jadi hurangan di ho

sada baoa di jolongku, na hundul di atas habangsa ni harajaon Israel, asal diramoti angka anakmu dalanmu, marparange nasida di bagasan patikku, songon ho naung marparange di jolongku.

¹⁷On pe, ale Jahowa, Debata ni Israel! Sai pasintong ma hatami, naung pinarbagam tu naposom si Daud i.

¹⁸Alai tahe, tung tarbahen Debata ma tutu maringan rap dohotjolma i di atas tano on? Ida ma, gari langit ni langitnandang tuk mangkamham Ho, baliksa apala joro na hupauli on.

¹⁹Alai sai manatap ma Ho tu tangiang ni naposom dohot tu parhurajaonna i, ale Jahowa, Debatangku! Sai tangihon ma joujou dohot tangiang, na tinangiangkon ni naposom di adopanmon!

²⁰Sai tonggor ma matam manatap tu joro on borngin dohot arian, tu inganan naung nidokmu: Ingkon disi bahenonmu Goarmu; antong sai tangihon ma tangiang na tinangiangkon ni naposom di inganan on!

²¹Sai tangihon ma tutu parhurajaon ni naposomon dohot bangsom on Israel, na tinangiangkon nasida di inganan on; sai tangihon ma i tutu sian inganan parhabangsaanmu, sian banua ginjaang, tangihon ma tutu, jala marpamuati roham!

²²Tung sura mardosa sada baoa dompak donganna, molo dipatolon halak ibana alani,

sanga ibana ro jala saut manolon di adopan ni langgatanmon di bagasan joro on.

²³Sai manangi ma Ho sian banua ginjang huhut marlulu, asa maruli uhum angka naposom, laho manorui anggo halak parjahat, asa manginona pambahenanna tu uluna sandiri, laho mamintori anggo halak parpintor, mangalehon tu ibana hombar tu hatigoranna i.

²⁴Tung sura talu bangsom Israel maradophon musuna, ala naung mardosa nasida dompak Ho; alai molo mulak nasida tu Ho, jala dihatindangkon Goarmu, jala martangiang nasida huhut marhuraja tu adopan ni bohim di bagasan joro on.

²⁵Sai manangi ma Ho sian banua ginjang, jala marpamuati roham mida dosa ni bangsom Israel, jala boan nasida mulak tu tano naung nilehonmu tu nasida dohot tu ompunasida i.

²⁶Tung sura tarhinsu langit i, gabe ndang ro udan, ala naung mardosa nasida dompak Ho, dung i martangiang nasida di inganan on, jala dihatindangkon nasida Goarmu, jala mulak nasida sian dosanasida i, ala naung tarjepol nasida binahenmu.

²⁷Sai manangi ma Ho di banua ginjang, jala marpamuati roham mida dosa ni angka naposom dohot bangsom Israel, ala naung niajarhonmu tu nasida dalan na denggan i na tama sidalananna, jala lehon udan tu

tanom naung nilehonmu tu bangsom bahen partalianna.

²⁸Tung sura masa haleon di tano i, manang begu antuk, manang siraraon hauma, manang antinganon, manang masa sihapor manang tamponok; molo tung disosak musuna nasida di tano i, pola dirongom pargumbanganna, tung sura masa begu masa manang sahiti na asing.

²⁹Nasa tangiang dohot nasa pangidoan manang marsasahalak, manang tung sandok bangsom Israel manangiangkonsa, ala naung mananda be di jea ni harohaonna dohot parsorionna, gabe dipaherbang tanganna dompak joro on.

³⁰Sai manangi ma Ho sian banua ginjang, ojahan ni habangsam, jala marpangulah roham huhut mangalehon tu ganup hombar tu saluhut dalanna, marguru tu panandam di harohaonna, ai sasada Ho do tumanda roha ni jolma manisial!

³¹Asa tung dihabiari nasida Ho, jala marparange di bagasan angka dalanmu ariari, saleleng mangolu nasida di tano naung nilehonmu tu ompunasida i.

³²Nang halak dagang na so sian bangsom Israel, tung sura ro ibana sian luat na dao ala Goarmu na timbul i dohot ala ni Tanganmu na sun hinagogo i dohot ala ni Botohonmu na toltoli, molo ro ibana tahe martangiang dompak joro on.

³³Sai manangi ma Ho sian banua ginjang, sian ojanan ni habangsam, jala bahen ma saluhut hombar tu na pinangido ni halak dagang i tu Ho, asa tung saluhut bangso di tano on mananda di Goarmu, jala marhabiaran tu Ho, suang songon bangsom Israel, asa tung diboto naung sahat jinou Goarmu tu atas joro on na hupauli i.

³⁴Tung sura borhat bangsom laho marporang dampak musuna, di dalam sinurum nasida, jala martangiang nasida tu Ho mandompakkon huta on, naung pinillitmu dohot mandompakkon joro naung hupajongjong di Goarmu.

³⁵Sai tangihon ma tangiang dohot pangidoannasida di banua ginjang, jala pasintong uhum tu nasida!

³⁶Tung sura mardosa nasida dampak Ho (ai ndang adongjolma nanggo sada na so mardosa), gabe tarrimas Ho mida nasida, jala dipasahat Ho nasida tu musuna, asa tung tarbuang nasida tu tano ni musuna na dao manang na donok.

³⁷Dung i dipasuang nasida ma rohanasida tu bagasan di tano habuangannasida i, laos dipauba nasida rohanasida i, jala martangiang tu Ho di tano habuangannasida i songon on: Nunga mardosa hami, nunga huulahon hami hajahaton, jala nunga manggunturi hami.

³⁸Molo tung mulak nasida tu Ho sian nasa rohanasida dohot sian nasa ateatenasida di

tano habuangannasida i, jala martangiang nasida mandompakkon tanonasida, naung nilehonmu tu ompunasida i dohot mandompakkon huta naung pinillitmu dohot mandompakkon joro naung hupauli on di Goarmu.

³⁹Sai manangihon ma Ho sian banua ginjang, sian ojahan ni habangsam mangalusi tangiang dohot pangidoannasida, huhut pasintong uhum tu nasida, jala sai marpamuati ma roham mida dosa, angka naung niulahon ni bangsom dompak Ho!

⁴⁰On pe, ale Debatangku! Sai tonggor ma matam, jala tinggil pinggolmu mangalusi tangiang di inganan on!

⁴¹On pe ale Debata Jahowa! Sai hehe ma Ho tumopot paradiananmon, Ho dohot poti ni hamuliaonmu, alai sai marpangkean hatuaon ma angka malimmu bahen, ale Debata Jahowa, jala marlas ni roha ma angka na niasianmu mida denggan ni basam!

⁴²Ale Debata Jahowa! Unang tung tulak bohi ni na miniahanmu, sai ingot ma asi ni roha angka na tu si Daud naposom!

7¹ (I.) Jadi dung sun na martangiangi si Salomo, madabu ma api sian banua ginjang mansudahon pelean situtungon dohot angka pelean sipotongon, jala hamuliaon ni Jahowa manggohi joro i.

² Pola ndang manahan angka malim i masuk tu bagasan joro ni Jahowa, ala gok hamuliaon ni Jahowa joro ni Jahowa.

³ Jadi dung diida sude halak Israel madabu api i dohot hamuliaon ni Jahowa songgop tu joro i, manungkap be ma nasida tu tano di pantar, jala martangiang huhut mamujimuji Jahowa, ala pardengganbasa Ibana, jala ro di saleleng ni lelengna asi ni rohana i.

⁴ (II.) Dung i dipelehon rajai rap dohot sandok bangso i angka pelean sipotongan di adopan ni Jahowa.

⁵ Ia pelean sipotongan angka na pinelehon ni raja Salomo i, i ma duapulu dua ribu lembu dohot saratus duapulu ribu birubiru. Songon i ma panahathon ni rajai dohot sandok bangso i di joro ni Debata.

⁶ Jongjong be angka malim i mangaradoti tohonannasida rap dohot halak Lepi umpalu parhinaloan ni Jahowa, naung pinauli ni raja Daud hian laho mamujimuji Jahowa, ala ro di salelenglelengna asi ni rohana i, huhut marendehon ende Psalmen angka na binahen ni si Daud; jala angka malim umpalu angka sarune patondong dohot nasida, jongjong do anggo sandok Israel.

⁷ Dung i diuras si Salomo ma alaman parbagasan i na di adopan ni joro ni Jahowa; ai disi do dipelehon angka pelean situtungan dohot tabotabo ni angka pelean hamauliateon, ai ndang siat anggo tu

langgatan tombaga na binahen ni si Salomo angka pelean situtungon dohot sipanganon ro di tabotabo.

⁸Dung i marari raya ma si Salomo uju i, pola pitu ari lelengna rap dohot sandok Israel, sada luhutan na bolon situtu, olat ni Hamat sahat ro di sunge Misir ro tusi.

⁹Tole paualuarihon disi ma mata ni ari raya i; ai panahathonna di langgatan pitu ari lelengna, ari raya i pe laos pitu ari lelengna.

¹⁰Tole paduapulutoluarihon di bulan sipaha pitu, dipamuli rajai ma bangso i tu undungundungna be, marlas ni roha be jala sonang ala sude na denggan, na binahen ni Jahowa tu si Daud, tu si Salomo pe dohot tu Israel, bangsona i.

¹¹Jadi sun ma dibahen si Salomo joro ni Jahowa dohot bagas ni rajai; jala nasa esehesek na tubu di bagasan roha ni si Salomo laho pajongjong joro ni Jahowa dohot bagasna sandiri pe manjadi do.

¹²(III.) Ro muse Jahowa pataridahon dirina tu si Salomo bornginna i, jala ninna ma mandok ibana; nunga hutangihon tangiangmi, jala nunga hupillit inganan on di Ahu bahen joro pamelean.

¹³Ida ma, tung sura tarhinsu langit i hubahen, gabe ndang ro udan, manang molo hudokkon angka sihapor, asa suda gogo ni tano i panganonna, manang molo hudokkon ro begu antuk di tongatonga ni bangsongku.

¹⁴Ia dung dipaunduk bangsongku, na targoar tu Goarhu rohana, jala martangiang nasida, jala dilului Bohingku, jala mulak nasida sian dalannasida, angka na roa i, Ahu pe tangihononku do sian banua ginjaang, jala marpamuati rohangku di dosanasida i, jala pamalumonku ma isi ni tanona.

¹⁵Antong ingkon tonggor matangku, jala tinggil pinggolhu tumangihon tangiang di inganan on.

¹⁶On pe nunga hupillit jala huparbadiai joro on, asa disi Goarhu ro di salelenglelengna; matangku pe dohot rohangku, ingkon disi do manatap ariari.

¹⁷Alai anggo ho, molo tung marparange ho di jolongku, suang songon amam si Daud i marparange, jala diulahon ho saluhut hombar tu na hutonahon i tu ho, jala diradoti ho aturanku dohot uhumhu.

¹⁸Jadi pahotonku ma habangsa ni harajaonmi, hombar tu naung huparbagabaga tu amam si Daud i, mandok songon on: Ndang jadi hurang di ho sada baoa panggomgomi di Israel.

¹⁹Alai molo tung marbalik hamu dohot manadingkon aturanku dohot tonangku, angka naung hupeakhon di jolomuna, pola hamu laho mangoloi angka debata sileban dohot marsomba tusi.

²⁰Jadi ripashononku ma nasida sian tanongku, naung hulehon i tu nasida, jala joro

on naung huparbadiai di Goarhu, padaoonku ma i sian jolo ni Bohingku, jala bahenonku nasida gabe pambuatan umpama dohot gabe alingalingan di tongatonga ni saluhut bangso.

²¹ Ia joro on naung timbul sahali, pola tung longang roha ni ganup na mamolus sian i, huhut mandok: Boasa ulaning bahenon ni Jahowa songon i tu tano on dohot tu joro on?

²² Dung i dohonon ni halak ma mangalusi: Ala na tinadingkonnasida i Jahowa, Debata ni ompunasida i, naung manogihon nasida ruar sian tano Misir, gabe marsitiopan nasida tu angka debata sileban, huhut marsomba tusi jala dioloi, ala ni do umbahen diparo Ibana luhut jea on tu nasida.

8¹ (I.) Jadi dung salpu na duapulu taon lelengna raja Salomo paulihon joro ni Jahowa dohot bagasna sandiri.

² Dipagonting si Salomo huhut huta angka na pinaulak ni si Hiram tu si Salomo, jala disagihon halak Israel maringan disi.

³ Dung i borhat ma si Salomo tu Hamat-Zoba jala dipapatu do i.

⁴ Dung i dipagonting ibana ma huta Tamar di halongonan, ro di sude huta parpeopan arta, angka na pinagontingna di Hamat.

⁵ Dipagonting muse Bethoron julu dohot Bethoron jae, asa gabe huta na gonting situtu, marparik, marpargumbangan dohot marransangransang.

⁶Tole muse Baalat dohot sude huta parpeopan arta, angka na di si Salomo, ro di sude huta inganan ni hureta porang dohot sude huta inganan ni jolma parsihundul dohot nasa esehesek ni si Salomo, na hinalomohon ni rohana naeng paulionna di Jerusalem, di Libanon dohot di sandok tano ginomgomanna i.

⁷Anggo saluhut halak situan na torop i na tinggal sian halak Het i, Amori, Perisi, Hevi dohot Jebusi, angka na so sian halak Israel.

⁸Pinomparnasida i tahe, angka na tinggal sian pudinasida di tano i, angka na so nirendephon ni halak Israel, angka i ma hona rodi dibahen si Salomo rasirasa sadarion.

⁹Alai anggo sian halak Israel ndang adong nanggo sahalak hona ulaon rodi dibahen si Salomo; ingkon gabe jolma parmusu nasida, gabe induk ni angka ulubalangna dohot induk ni angka huretana porang ro di angka jolma parsihundul.

¹⁰Jala on do induk angka na pinabangkit mamatamatahon ulaon na nidokkon ni raja Salomo, dua ratus limapulu halak toropna.

¹¹Dung i didokkon si Salomo ma boanon nangkok boru ni si Firaun sian huta ni si Daud tu jabu naung pinaulina di nasida, ai ninna do: Ndang jadi maringan jolmangku di bagasan jabu ni si Daud, raja ni Israel, ai badia do angka inganan i, ala naung masuk tusi poti ni Jahowa.

¹²(II.) Olat ni ma si Salomo mamelehon angka pelean situtungon tu Jahowa di atas langgatan ni Jahowa, na pinajongjongna di adopan ni emper i.

¹³Ganup di arina be dipelehon hombar tu tona ni si Musa, di angka ari Sabbath, di poltak ni bulan, di angka ari raya naung binuhul, tolu hali di bagasan sataon, i ma di ari raya sagusagu na so niasoman, tole ari raya sisaminggu dohot di ari raya parlapelapean.

¹⁴Dung i didokkon rajai ma jongjong angka malim marguru tu gansina mangaradoti tohonanna, hombar tu uhum na binahen ni si Daud, amana i, tole halak Lepi mangaradoti tohonanna laho mamujimuji Debata dohot marhalado di adopan ni angka malim i, ganup di arina be; tole angka sijaga bahal marningot gansina be di ganup bahal; ai songon i do parenta ni si Daud, halak ni Debata.

¹⁵Jala ndang adong nanggo sahalak na mangalaosi tona ni rajai taringot tu angka malim dohot halak Lepi dohot taringot tu sude hata dohot arta.

¹⁶Jadi sun ma dipadiri saluhut ulaon ni si Salomo sahat ro di ari haoojak ni joro ni Jahowa, sahat ro di sunna tahe. Jadi sun ma tutu joro ni Jahowa.

¹⁷Uju i ma laho si Salomo tu Esion Geber dohot tu Elat na di topi laut di bagasan tano Edom.

¹⁸Dung i ditongos si Hiram ma tu ibana angka kopal marhite sian naposona dohot naposo angka na somal marlayar di laut. Jadi marlayar ma nasida rap dohot naposo ni si Salomo tu Opir, jala diboan sian i sere opat ratus limapulu talenta godangna jala diboan do i tu raja Salomo.

9¹(I.) Ia raja boruboru sian Saba, dung dibege barita ni si Salomo, ro ma nasida tu Jerusalem naeng masiujian dohot si Salomo marundangundang, mardongan parangan mansai tongam, tole unto, angka na mangusung na hushus marragamragam dohot sere mansai godang dohot mata intan. Jadi dung sahat nasida tu jolo ni si Salomo, dipaboaboa ma tu ibana saluhut na di bagasan rohana i.

²Jadi dipatorang si Salomo tu nasida sude sungkunsungkunna, jala ndang adong na buni nanggo sada sian roha ni si Salomo, na so pinatorangna tu nasida.

³Jadi dung diida raja boruboru sian Saba hapistaran ni si Salomo dohot bagas na pinaulina i.

⁴Tole sipanganon di mejana, tole partordingna hundul angka naposona, tole panagam ni angka parhaladona dohot pangkeannasida, tole angka sitahu anggurna dohot pangkeannasida, tole partanggaonna laho nangkok tu joro ni Jahowa, jadi hira na tarmali tondinasida.

⁵Laos didok ma mandok rajai: Sintong do hape barita i na hubege di luathu, taringot tu aturan binahenmi dohot taringot tu hapistaranmu.

⁶Ndang nian diparhatongon rohangku jolo barita i, paima ro ahu tuson, gabe diida matanku; hape ida ma, nanggo satongana ndang dibaritahon halak tu ahu sian hinagodang ni hapistaranmi; dilompoi hapistaranmi do barita na hubage i.

⁷Martua ma halak parhaladom, martua ma dohot angka naposom, angka na tongtong marhalado di adopanmu pabegebege hapistaranmu!

⁸Pinuji ma Jahowa Debatam, na marlomo ni roha mida ho laho pabangkithon ho tu atas habangsana, bahen raja singkat ni Jahowa Debatam! Ala holong ni roha ni Debatam mida Israel, naeng pahotonna do i ro di salelenglelengna, umbahen dipabangkit Ibana ho gabe raja gumomgom nasida, manguлахon uhum dohot hatigoran.

⁹Dung i dilehon boruboru i ma tu rajai saratus duapulu talenta sere dohot pamurpuri mansai godang dohot mata intan; ndang dung ro be pamurpuri na sai godang, songon na nilehon ni raja boruboru sian Saba tu raja Salomo.

¹⁰Tole muse angka naposo ni si Hiram rap dohot naposo ni si Salomo, angka na

mamboan sere sian Opir, mamboan dohot hau jati dohot mata intan.

¹¹ Dung i didokkon rajai ma paulion sian hau jati angka handanghandang di joro ni Jahowa dohot di jabu ni rajai, tole angka hasapi dohot tulila di halak parende; ndang dung diida songon i mansam ni hau jati di tano Juda anggo nasailaonna i.

¹² Raja Salomo i pe dilehon do tu raja boruboru sian Saba sandok guru lomo ni rohana dohot pangidoanna, so padohot na binoannasida tu rajai. Dung i muli ma nasida tu tanona rap dohot angka naposona.

¹³ (II.) Dokdok ni sere pe na ro tu si Salomo di bagasan sataon arga onom ratus onompulu onom talenta sere do.

¹⁴ So padohot sere na dapotsa sian halak pangallung dohot sian partigatiga pansar dohot sian saluhut raja ni Arab dohot sian halak na mora di tano i angka na mamboan sohe sere dohot perak tu si Salomo.

¹⁵ Dung i didokkon raja Salomo ma paulion dua ratus lombulumbu sian sere na pinapita pola onom ratus sekkel sere di lampishon tu sada lombulumbu.

¹⁶ Dipauli huhut tolu ratus lombulumbu parinse sian sere na pinapita, pola tolu ratus sekkel sere dilampishon tu sada parinse; tu bagasan jabu na di tombak Libanon angka i dipambahen rajai.

¹⁷Dung i didokkon rajai ma paulion sada habangsa na bolon sian gading, jala lampisanna do i dohot sere palangki.

¹⁸Onom do talha ni habangsa i jala sada sidegean ni pat sian sere lohok tu habangsa i, dua siradeon ni tangan angkupangkup be humaliang hundulani, jala dua suman ni singa jongjong di lambung siradeon i.

¹⁹Jongjong huhut disi sampulu dua suman ni singa di atas ni na onom talha i angkupangkup be. Ndang dung songon i dope hapandean ni halak manang di harajaon dia.

²⁰Nang saluhut mangkuk panginuman ni raja Salomo sian sere do, jala saluhut ulaula ni jabuna di tombak Libanon sian sere na pinapita do, ai hira na so marguna do anggo perak di roha ni halak uju di tingki ni si Salomo.

²¹Ai angka kopal ni rajai angka na marlayar tu Tarsis rap dohot angka naposo ni si Hiram; sahali di bagasan tolu taon ro angka kopal Tarsis mamboan sere, perak, gading, bodat dohot angka pidong uo.

²²Dung i tumimbul ma raja Salomo sian saluhut raja ni tano on taringot tu hamoraon dohot hapistaran.

²³Nasa raja ni tano on tahe marsangkap naeng idaonna bohi ni si Salomo, naeng huhut begeonna hapistaranna naung nilehon ni Debata tu bagasan rohana.

²⁴Jadi angka diboan be siluana gonop taon, i ma angka ulaula perak dohot sere dohot angka pangkean dohot senjata marragamragam dohot pamurpuri, tole angka hoda hian dohot hoda na marsahe.

²⁵Pola siat opat ribu hoda dohot hureta jongjong di bara pinauli ni si Salomo, jala sampulu dua ribu jolma parsihundul, angka na sinagihonna di bagasan angka huta hajongjongan ni hureta dohot di Jerusalem di lambung ni rajai.

²⁶Jala marunduk tu rajai do sude angka raja olat ni batang aek Euprat sahat ro di tano ni halak Palistim, jala sahat tu partalpahan ni Misir.

²⁷Dung i dipagodang rajai perak i di Jerusalem, hira doshon batu godangna, tole angka hau ares hira antajau na tubu di tano pea godangna.

²⁸Langgo haroroan ni hoda tu raja Salomo sian Misir do diboan halak dohot sian angka luat humaliang.

²⁹(III.) Ia jamita angka na tinggal i dope sian si Salomo, angka na parjolo dohot parpudi, nda tarsurat do i di bagasan buku ni panurirang Natan dohot di bagasan buku panurirangon ni si Ahia sian Silo dohot di bagasan buku pangungkapon ni si Ido sinurirangkonna taringot tu si Jerobeam, anak ni si Nebat.

³⁰Jadi opatpulu taon lelengna si Salomo mangarajai di Jerusalem gumomgom sandok Israel.

³¹Dung i monding ma si Salomo gabe top dohot angka ompuna, jala tartanom ibana di bagasan huta ni si Daud amana i. Jadi Rehabeam anakna i bangkit raja singkatna.

10¹(I.) Dung i laho ma si Rehabeam tu Sikem, ai nunga marpungu sandok Israel di Sikem naeng parajahon ibana.

²Jadi dung dibege si Jerobeam, anak ni si Nebat barita i uju di Misir dope ibana, ai maporus tusi ibana maradophon raja Salomo, gabe mulak si Jerobeam sian Misir.

³Ai nunga disuru nasida hian suruanna manjou ibana. Dung i ro ma si Jerobeam rap dohot sandok Israel, asa mandok hatana tu si Rehabeam songon on.

⁴Ilanggo amanta nahinan dokdok do auganami dibahen, alai anggo ho sai paneang ma rodi na poran binahen ni amanta i dohot auga na dokdok na niampehonna i tu hami, asa marunduk hami tu ho.

⁵Dung i ninna rajai ma tu nasida: Tolu ari nari ulahi hamu ma ro tu ahu. Jadi muli ma bangso i.

⁶Dung i martuptup ma raja Rehabeam dohot sintua, angka dongan satuptupan ni raja Salomo amana i andorang di ngoluna, ninna ma: Songon dia panuturimuna, patut alusta tu bangso on?

⁷ Jadi didok nasida ma tu ibana: Molo basar ho tu situan na toropon dohot sumambut lomonasida dohot mandok hata na lambok tu nasida, jadi mangunduk tu ho ma nasida saleleng ho mangolu.

⁸ Alai ditadingkon rajai do panuturion tinuturhon ni angka na tuatua laho ibana martuptup dohot halak na umposo, angka donganna magodang, angka na jongjong di adopanna.

⁹ Dung i didok ma tu nasida: Ia hamuna, dia do panuturimuna patut alusta tu bangso on, na mandok tu ahu songon on: Sai paneang ma auga na niampehon ni amanta nahinan tu hami?

¹⁰ Dung i ninna halak na umposo i ma angka donganna magodang tu ibana, ingkon songon on dohononmu tu bangso i, na mandok tu ho hata on: Langgo amanta nahinan dokdok do auganami dibahen, alai anggo ho sai paneang ma auganami; songon on do tama dohononmu tu nasida: Umbolon do anak ni tanganku sian haehae ni damang.

¹¹ On pe, dokdok pe auga na niampehon ni damang nahinan tu hamu, alai anggo ahu lam dumokdok dope bahenonku augamuna; ia damang linsinglinsing hian do dibahen maminsang hamu, alai anggo ahu hala do bahenonku maminsang hamu.

¹² Tole patoluarihon ro ma si Jerobeam rap dohot sandok bangso i mandapothon

si Rehabeam, marningot janji ni rajai na nidokna i: Ulahi hamu patoluarihon ro tu jolongku.

¹³Jadi koras ma alus ni rajai tu nasida, ai nunga ditadingkon raja Rehabeam panuturion ni angka na tuatua i.

¹⁴Jadi ninna rajai ma tu nasida, hombar tu panuturion ni halak na umposo i songon on: Dokdok pe auga na niampehon ni damang nahinan tu hamu, alai anggo ahu lam dumokdok dope ampehononku tu hamu; ia damang linsinglinsing hian do dibahen maminsang hamu, alai anggo ahu hala do bahenonku maminsang hamu.

¹⁵Asa ndang dioloi rajai pangidoan ni bangso i, ai marharoroan sian Debata do hata i, asa naeng mangkajongjongkon hatana do Jahowa naung nilumbahonna hian marhitehite si Ahia sian Silo tu si Jerobeam, anak ni si Nebat.

¹⁶(II.) Jadi dung diida sandok Israel, na so nioloan ni rajai pangidoannasida i, ro ma alus ni bangso i mandok tu rajai: Aha do parjambaranta dibahen si Daud? Nandang adong partaliana dibahen anak ni si Isai. Beta hita, ale Israel, mulak ganup tu undungundungna be! On pe paingotingot angka isi ni bagasmu sandiri, ale Daud! Jadi muli ma sandok Israel tu undungundungna be.

¹⁷Alai anggo halak Israel angka na maringan di angka huta ni Juda, angka nasida ma dirajai si Rehabeam.

¹⁸Dung i disuru raja Rehabeam ma si Adoniram, sintua papungu guguan, hape didangguri halak Israel do ibana dohot batu pola mate. Dung i hapogan ma raja Rehabeam manaek tu huretana laho maporus tu Jerusalem.

¹⁹Jadi bali ma Israel sian pinompar ni si Daud rasirasa sadarion.

11 ¹(I.) Jadi dung sahat si Rehabeam tu Jerusalem, dipaluhut ma sandok pinompar ni si Juda dohot si Benjamin, saratusualupuluribu halak sialo musu angka na pinillit, naeng marmusu dompak Israel, asa pasuangkon nian harajaon i tu si Rehabeam.

²Alai ro ma hata ni Jahowa tu si Semaya, halak ni Debata songon on:

³Dok ma tu si Rehabeam, anak ni si Salomo, raja sian Juda dohot tu sandok Israel di Juda dohot di Benjamin, songon on.

⁴Boti hata ni Jahowa: Ndang jadi hamu nangkok, jala ndang jadi hamu marmusu garembong dompak hahaanggimuna! Mulak ma hamu ganup tu jabuna be, ai marharoroan sian Ahu do hata on. Jadi ditangihon nasida ma hata ni Jahowa, laos mulak nasida sian na borhat i dompak si Jerobeam.

⁵Alai maringan di Jerusalem do anggo si Rehabeam, jala dipagonting angka huta di Juda bahen paraloan.

⁶Dipagonting ma: Betlehem, Etham, Tekoa.

⁷Betzur, Soko, Adullam.

⁸Gat, Maressa, Sip.

⁹Adoraim, Lakis, Azeka.

¹⁰Zora, Aiyalon dohot Hebron, i ma angka huta na gonting di Juda dohot di Benjamin.

¹¹Laos dipatogu ma angka huta paraloan i, jala dibahen tusi angka induk jala dipagodang tusi sipanganon miak dohot anggur.

¹²Diparade muse tu bagasan ganup huta i angka lombulumbu dohot hujur, jala dipagonting situtu angka huta i: Asa mangunduk tu ibana do Juda dohot Benjamin.

¹³(II.) Tole angka malim dohot halak Lepi, angka na di sandok Israel mandapoti ibana sian sandok partalpahannasida i.

¹⁴Ai ditadingkon halak Lepi do huta partaliannasida i dohot ugasanna laho bali tu Juda dohot tu Jerusalem, ala naung dipabali si Jerobeam dohot angka anakna i nasida sian ulaon malim di adopan ni Jahowa.

¹⁵Laos si Jerobeam do pabangkit di ibana angka malim mamele tu angka tambak, tu angka begu dohot tu lembu angka na binahenna i.

¹⁶Mangihut tu halak Lepi do sian sandok marga ni Israel halak angka na mangalehon rohanasida naeng mangalului Jahowa, Debata ni Israel; ro be do nasida tu Jerusalem, asa mamele tu Jahowa, Debata ni ompunasida i.

¹⁷Jadi lam tu toguna do harajaon Juda, patogar roha ni si Rehabeam, anak ni si Salomo, tolu taon lelengna; ai tolu taon

lelengna nasida marparange di dalam ni si Daud dohot si Salomo.

¹⁸(III.) Dung i dibuat si Rehabeam ma si Mahalat, boru ni si Jerimot, anak ni si Daud bahenjolmana, angkup ni si Abihail, boru ni si Eliab, anak ni si Isai.

¹⁹Jadi tubuan anak ma ibana: Si Jeus, si Semaria dohot si Saham.

²⁰Dung i dibuat muse ma si Maaka, boru ni si Absalom, na manubuhon di ibana: Si Abia, si Ahai, si Sisa dohot si Selomit.

²¹Alai humolong do roha ni si Rehabeam mida si Maaka boru ni si Absalom, asa mida sudejolmana dohot radingna. Ai sampulualu parompuan dioli, jala onompulu radingna, jala ditubuhon duapulu ualu anak, dohot onompulu boru.

²²Dung i dipabangkit si Rehabeam ma si Abia, anak ni si Maaka bahen partogi dohot induk di tongatonga ni angka hahaanggina, ai naeng pabangkitonna ibana gabe raja.

²³Jala marbisuk pambahen ni rajai, disagihon do saluhut angka anakna tu sandok luat ni Juda dohot Benjamin, di bagasan huta angka na pinagontingna i, jala marlobilobi di parbohalon nasida dibahen, jala torop parompuan diririt bahenjolmanasida.

12¹(I.) Alai dung lam hot harajaon ni si Rehabeam, jala lam marhuaso ibana, ditadingkon rohana ma patik ni Jahowa, rap dohot sandok Israel.

²Dibahen i palimataonhon dung raja si Rehabeam, nangkok ma raja Sisak sian Misir mandopang Jerusalem, ala naung mardosa nasida dompak Jahowa.

³Manguluhon saribu dua ratus hureta porang dohot onompulu ribu jolma parsihundul, jala ndang habilangan anggo situan na torop angka na ro rap dohot ibana sian halak Misir, halak Libia, Suki dohot Kus.

⁴Dung i dipapatu ma sude huta na gonting, angka na di Juda, pola sahat ibana tu Jerusalem.

⁵(II.) Dung i ro ma panurirang Semaya manopot si Rehabeam dohot angka induk sian Juda, angka na manginsurut tu Jerusalem maradophon Sisak, jala didok mandok nasida: Songon on do hata ni Jahowa: Nunga ditadingkon hamu Ahu, dibahen i Ahu pe nunga hupasahat hamu tu bagasan tangan ni si Sisak.

⁶Jadi dipaunduk angka induk ni halak Israel dohot rajai ma rohanasida angka ninna ma: Bonar do Jahowa!

⁷Alai dung diida Jahowa naung dipaunduk nasida rohanasida i, ro ma hata ni Jahowa tu si Semaya songon on: Nunga dipaunduk nasida rohanasida i, dibahen i ndang be mago nasida bahenonku, magira ma Ahu mangalehon haluaon tu nasida, asa unang apala use parsigorgor ni rimashu tu Jerusalem marhite sian tangan ni si Sisak.

⁸Alai ingkon mangunduk nasida di ibana, asa tung diboto nasida parsirangna mangoloi Ahu sian na mangoloi di angka harajaon ni luat ni halak na asing.

⁹(III.) Jadi nangkok ma raja Sisak sian Misir mandopang Jerusalem, jala dilaum angka arta sian joro ni Jahowa dohot arta sian bagas ni rajai, tung luhut do dilaum ro di lombulumbu parinse sian sere, angka na pinauli ni si Salomo.

¹⁰Dung i didokkon raja Rehabeam ma paulion angka lombulumbu tombaga bahen singkatna, jala dipasahat do i tu tangan ni partogi ni parangan, angka na marhal di lambung pintu ni jabu ni rajai.

¹¹Manang piga hali pe rajai masuk tu bagasan joro ni Jahowa, sai ro do angka parangan i mangusung angka parinse i, dung i dipaulak muse tu bilut ni angka parangan i.

¹²Ala songon i pinaunduk ni rajai rohana sumurut ma rimas ni Jahowa sian ibana, asa unang tung sahali diago luhutna, ai adong dope tinggal ruhut na denggan di halak Juda.

¹³Dung i mangulahe marhuaso ma raja Rehabeam di Jerusalem jala mangarajai, ai marumur opatpulu sada taon si Rehabeam di na bangkit raja, jala sampulu pitu taon lelengna ibana mangarajai di Jerusalem, huta na pinillit ni Jahowa sian nasa marga ni Israel, bahen parmianan ni Goarna. Ia goar ni ina ni rajai Naema, boru Amon do.

¹⁴Dung i diulahon rajai ma hajahaton, ai ndang marsihohot rohana dibahen laho mangalului Jahowa.

¹⁵Alai anggo jamita ni si Rehabeam, angka na parjolo dohot parpudi, nda tarsurat do i di bagasan buku jamita ni panurirang Semaya dohot di bagasan buku sundutsundut, sinurat ni partondung Ido? Alai sai tong tangging humusuon i di holangholang ni si Rehabeam dohot si Jerobeam.

¹⁶Dung i monding ma si Rehabeam gabe top dohot angka ompuna, jala tartanom di bagasan huta ni si Daud, jala si Abia anakna i bangkit raja singkatna.

13¹ (I.) Pasampuluualutaonhon dung raja si Jerobeam, bangkit raja ma si Abia di Juda.

²Tolu taon lelengna ibana mangarajai di Jerusalem; ia goar ni inana si Mikha, boru ni si Uriel sian Gibea. Dung i tubu ma hamusuon di holangholang ni si Abia dohot si Jerobeam.

³Jala si Abia jumolo bingkas mardongan parduaan ni parangan angka na begu opat ratus ribu halak, angka na pinillit; si Jerobeam pe paodor paranganna mangalo ibana, ualu ratus ribu halak na pinillit, jala na begu donganna.

⁴Dung i nangkok ma si Abia tu atas ni dolok Semaraim, na di tor Epraim, jala ninna ma: Tangihon ma hatangkon, ho ale Jerobeam dohot sandok Israel!

⁵Atehe ndang diboto hamu naung nilehon ni Jahowa, Debata ni Israel, harajaon Israel tu si Daud ro di salelenglelengna tu ibana dohot tu pinomparna, pola mardongan sira padanna.

⁶Hape hehe ma si Jerobeam, anak ni si Nebat, naposo ni si Salomo, anak ni si Daud, laos manggunturi dampak tuanna.

⁷Jala marpungu tu lambungna do baoa angka na neang marroha, angka anak na jahat situtu, angka na manggogo be mangalo si Rehabeam, anak ni si Salomo; bajar dope anggo si Rehabeam jala biahat marroha, umbahen so hum ibana mangalo nasida.

⁸Hape ditahi rohamuna nuaeng naeng manggaga mangalo dampak harajaon ni Jahowa, na pinegang ni angka anak ni si Daud; tutu do nian mansai torop hamu, jala donganmuna lombu sere i, angka na binahen ni si Jerobeam, bahen debata sileban di hamu.

⁹Nda nunga dipabali hamu angka malim ni Jahowa, pinompar ni si Aron, dohot halak Lepi, laos hamu pabangkit malim di hamu manuman pambahen ni angka bangso parbegu marluatluat? Ganup na ro mamboan sada lombu naposo dohot pitu birubiru tunggal mangido pabangkiton, i do dipabangkit hamu gabe malim di debata sileban.

¹⁰Alai anggo hami on, Jahowa do Debatanami, jala ndang dung hutadingkon

hami Ibana; angka malim pe, angka na marhalado di Jahowa, angka anak ni si Aron do, jala halak Lepi mangaradoti tohonanna be.

¹¹Sai tole do nasida ganup sogot ganup potang manutung angka pelean situtungan di Jahowa, tole daupa na hushus marragamragam. Huhut diparade roti di atas meja na badia i, tole angka parpalitoan sere dohot palito na pinagalakna ganup bodari; ai anggo hami sai huradoti hami do pangoloion tu Jahowa, Debatanami, alai anggo hamu nunga ditadingkon hamu Ibana.

¹²Dibahen i ida ma, Debata sandiri do manguluhon anggo hami dohot malimna ro di angka sarune panonggahi, asa marsoara toletole mangalo hamu! Hamu ale pinompar ni Israel, unang marporang hamu dompak, Debata ni ompumuna i; ai ndang tagamon marantu hamu!

¹³(II.) Alai didokkon si Jerobeam ma halak bahen paronggopan, asa ro sian pudinasida, asa paranganna di adopan ni Juda, jala halak pangonggopi sian pudinasida.

¹⁴Jadi dung hamusor halak Juda, ida ma turtar do marporang dompak nasida sian jolo dohot sian pudi. Jadi manganguhi ma nasida tu Jahowa, jala umpalu sarunena angka malim i.

¹⁵Dung i manggogo marsurak toletole halak Juda. Jadi dung marsurak toletole halak Juda,

ditaluhon Debata ma si Jerobeam dohot sandok Israel maradophon si Abia dohot Juda.

¹⁶Jadi maporus ma halak Israel maradophon halak Juda, jala dipasahat Debata nasida tu bagasan tanganna.

¹⁷Tung pamunuon na rahat situtu do dipamasa si Abia dohot bangsona di tongatonganasida, marragean do sian Israel lima ratus ribu halak angka na pinillit.

¹⁸Jadi tarjepol situtu ma halak Israel uju i, alai lam margogo ma anggo halak Juda, ai marpangatauan tu Jahowa, Debata ni ompunasida i do nasida.

¹⁹Dung i dieak si Abia ma si Jerobeam, laos dilaum sian ibana angka huta on: Betel ro di pagaran angka na masuk tusi; Jesana ro di pagaran angka na masuk tusi dohot Epron ro di pagaran angka na masuk tusi.

²⁰Laos so maruli gogo be manuhenuhe anggo si Jerobeam saleleng mangolu si Abia. Dung i dipastap Jahowa ma ibana laos mate ibana.

²¹Jadi dung lam mardohar si Abia, dibuat ma sampulu opat parompuan bahenjolmana, jala ditubuhon duapulu dua anak jala sampulu onom boru.

²²Jamita na tinggal i dope sian si Abia, angka dalanna pe dohot pangkataionna tarsurat do i di bagasan buku jamita sian panurirang Ido.

14¹ (13-23) Dung i monding ma si Abia gabe top dohot angka ompuna, jala

tartanom ibana di huta ni si Daud; jadi si Asa, anakna i bangkit raja singkatna. Uju hinarajaonna i mardemak ma tano i sampulu taon lelengna.

²(14-1) (I.) Jala diulahon si Asa do na denggan dohot lomo ni roha ni Jahowa, Debatana i.

³(14-2) Ai dipaholang do angka langgatan pamelean tu debata sileban dohot angka tambak, jala ditapori angka ganaganaan jala ditaba angka sombaon.

⁴(14-3) Dung i martingting ma ibana tu Juda mandokkon mangalului Jahowa, Debata ni ompunasida i dohot mangulahon patikna dohot tonana.

⁵(14-4) Dipaholang huhut sian saluhut huta ni Juda angka tambak dohot tiang parsombaan. Jadi mardemak ma harajaon i di hinarajaonna i.

⁶(14-5) Dipungka huhut angka huta na gonting di Juda, ala mardemak tano i, jala ndang masa hamusuon dompak ibana di angka taon uju i; ai Jahowa do manumpak ibana sonang.

⁷(14-6) Dung i ro ma hata ni rajai tu halak Juda: Tole ma itapauli ma angka huta on jala itapagonting parikna humaliang, tole angka partanobatoan, pargumbangan dohot ransangransang, ai hita dope nampuna tano i, ala italului, Jahowa, Debatanta i, italului Ibana tutu jadi ditumpak hita sonang

humaliang. Jadi tole ma nasida umpungka huta, laos manjadi do antong.

⁸(14-7) Dung i adong ma di si Asa sada parduaan parangan, angka na marlombulombu dohot marhujur, sian Juda tolu ratus ribu jala sian Benjamin angka na marlombulombu parinse dohot do umboto manintak sior dua ratus ualupulu ribu halak; luhutna i angka ulubalang na begu do.

⁹(14-8) Dung i borhat ma mandopang nasida si Jara, halak Etiopia manguluhon paranganna sajuta halak toropna dohot tolu ratus hureta porang, pola sahat ibana tu Maressa.

¹⁰(14-9) (II.) Jadi borhat ma si Asa manjumpangkon ibana, rap dipaodor do paranganna di rura Zera mardonokkon Maressa.

¹¹(14-10) Dung i joujou ma si Asa tu Jahowa, Debatana, ninna ma: Ale Jahowa, ndang adong dia imbarna anggo di Ho, manolongi halak na margogo dohot na so margogo; sai tolongi ma hami, ale Jahowa, Debatanami, ai tu Ho do hami marpangatauan, jala mangasahon Goarmu do hami umbahen na ro mangalo halak na toropon! Ale Jahowa, Ho do Debatanami! Sai unang ma margogo jolma na gale i, anggo so mardonganhon Ho.

¹²(14-11) Dung i ditaluhon Jahowa ma halak Etiopia maradophon si Asa dohot Juda, gabe maporus halak Etiopia.

¹³(14-12) Dung i dieak si Asa rap dohot bangso donganna i ma nasida, sahat ro di Gerar. Jadi marragean ma halak Etiopia, ndang tarbahen nasida be manuhenuhe, ai tung rendep do nasida maradophon Jahowa dohot maradophon paranganna i; jadi maruli tabantaban halak Juda mansai godang.

¹⁴(14-13) Dipapatu nasida huhut sude huta angka na humaliang Gerar, ai nunga madabu hasonggoton sian Jahowa tu nasida, gabe halak Juda martaban duduk sude huta i, ai mansai godang tabantaban di bagasan.

¹⁵(14-14) Tole huhut angka undungundung ni dorbial dapotsa gabe diboan mansai godang birubiru dohot unto, dung i mulak nasida tu Jerusalem.

15¹(I.) Dung i songgop ma Tondi ni Debata tu si Azaria, anak ni si Obet.

²Jadi ruar ma ibana manjumpangkon si Asa jala didok ma tu ibana: Tangihon ma hatangkon, ho ale Asa dohot sandok Juda dohot Benjamin! Nunga didongani Jahowa hamu, ala marsitiopan hamu tu Ibana; molo tung laos dilului rohamuna Ibana, sai jumpang hamu do Ibana; alai molo tung hamu manadingkon Ibana, tadingkononna ma hamu.

³Alai pola nania lelengna sogot halak Israel so mardebata na sintong, jala so marmalim pangajari, jala so marpatik be.

⁴Alai molo nionjar ni haporsuhon niaena i nasida paubahon rohana tu Jahowa, Debata ni Israel, jala luluanna Ibana, sai na jumpang nasida do Ibana.

⁵Alai di angka tingki uju i ndang marhasonangan jolma na marmeang muli, ai haporsuhon angka na balga do masa tu sandok isi ni tano on.

⁶Ai masijonapan ma disi bangso sama bangso, jala huta sama huta; ai Debata do manonggoti nasida marhite sian haporsuhon marragamragam.

⁷Alai anggo hamu, pir ma tondimuna, jala unang daukdauk boti tanganmuna i, ai sai na marupa do sogot ulaonmuna i.

⁸Jadi dung dibege si Asa angka hata ondeng dohot panurirangon ni panurirang Obet, pir ma tutu tondina i, dipadao ma angka ganaganaan na ronsam sian sandok tano Juda dohot Benjamin dohot sian huta angka na pinapatuna sian dolok Epraim, jala dipaimbaru do langgatan ni Jahowa na di adopan ni emper di joro ni Jahowa.

⁹Dung i dipaluhut ma sandok Juda dohot Benjamin rap dohot halak dagang angka sian Epraim, Manasse dohot Simeon, ai mansai torop halak bali tu ibana sian Israel, dung

diida nasida Jahowa Debatana mandongani ibana.

¹⁰Jadi marluhut ma nasida tu Jerusalem di bulan sipaha tolu, pasampululimataonhon harajaon ni si Asa.

¹¹Jadi di na sadari i mamele ma nasida tu Jahowa sian tabantaban, na binoannasida i, pitu ratus lembu jala pitu ribu birubiru.

¹²(II.) Dung i diparata nasida ma padani marbagahon luluanna Jahowa, Debata ni ompunasida i sian nasa rohana dohot sian nasa ateatena.

¹³Jala manang ise na so mangalului Jahowa, Debata ni Israel, ingkon marutang hosa do, nang dakdanak, nang na magodang, nang baoa, nang parompuan.

¹⁴Pola marbulan nasida tu Jahowa marsoara na balga, huhut mardongan olopolop, hasapi dohot sarune.

¹⁵Jadi marlas ni roha sandok Juda mida bulanna i; ai marbulan do nasida sian nasa rohanasida, jala dilului nasida Ibana sian nasa lomonasida, gabe jumpang nasida Ibana tutu, jadi marhasonangan ma nasida humaliang, ditumpak Jahowa.

¹⁶Nang si Maaka, inana i dipaijur raja Asa sian tohonanna raja, ala pinaulina i sada ganaganaan di sombaon Asera. Dung i disiaphon si Asa ma ganaganaan i jala ditutung di bagasan rura ni sunge Kidron.

¹⁷Alai ndang dipaholang anggo angka joro parsantian sian Israel; sai tong do nian marsihohot roha ni si Asa tu Jahowa saleleng mangolu ibana.

¹⁸Diboan huhut tu bagasan joro ni Debata ugasan, angka na pinarbadiaan ni amana, pinarbadiaanna sandiri pe, angka sere, perak dohot ulaula marragamragam.

¹⁹Jala ndang adong masa hamusuon sahat ro di patolupululimataonhon harajaon ni si Asa.

16¹ (I.) Tole patolupuluonomtaonhon harajaon ni si Asa, nangkok ma si Baesa, raja sian Israel mandopang Juda, jala dipagonting huta Rama, asa unang tarbahen manang ise marmeang muli tumopot Asa, raja sian Juda.

²Dung i diparuar si Asa ma sian angka arta na di joro ni Jahowa dohot di bagas ni rajai sere dohot perak, jala ditongoshon do i tu si Benhadad, raja sian Ram, na maringan di Damaskus, ninna ma.

³Tibu hian do hita marjanji, sian amanta be dope; dibahen manongos perak dohot sere ahu tu ho, asa laho ho manulakkon parjanjianmu tu si Baesa, raja sian Israel, asa sumurut ibana sian ahu.

⁴Jadi ditangihon si Benhadad ma hata ni raja Asa, jala disuru angka partogi ni paranganna mandopang angka huta ni Israel, gabe

dipapatu ma huta Ijon, Dan dohot Abel Maim ro di sude huta parpeopan bohal di Naptali.

⁵Dung sahat barita i dibege si Baesa, mansohot ma ibana pagonting Rama, laos dipasadi ma ulaonna i.

⁶Dung i santibalatuk ma sandok Juda, didokkon raja Asa, asa diusung nasida angka batu dohot hau sian Rama, naung pinauli ni si Baesa, laos dipangke rajai do i pauli huta Geba dohot Mispa.

⁷(II.) Uju i ma ro panurirang Hanani manopot si Asa, raja sian Juda, jala ninna ma mandok ibana: Ala naung marpangunsandean ho tu raja sian Ram, jala ndang ho marpangunsandean tu Jahowa, Debatam, ala ni nunga malua parangan ni raja ni Ram sian tanganmu.

⁸Nda torop situtu do parangan ni halak Kus dohot Libia najolo mardongan torop situtu hureta porang dohot jolma parsihundul? Alai ala marpangunsandean ho tu Jahowa, gabe dipasahat Ibana nasida tu bagasan tanganmu.

⁹Ai manatap manonggor do mata ni Jahowa manatap sandok tano on humaliang, laho mangalehon gogo tu halak parroha na marsitiopan tu Ibana. Dibahen i hata oto do i na binahenmon, ai olat ni on masa ma hamusuon di ho.

¹⁰Alai marronirimas ma si Asa tu panurirang i, pola dibeangkon ibana di bagasan bagas

hurungan, ai piripirion ibana mida panurirang ala hatana i; angkup ni dirupa si Asa uju i deba sian halak situasi na torop i.

¹¹ (III.) Dung i ida ma, jamita ni si Asa, angka na parjolo dohot parpudi tarsurat do angka i di bagasan buku rajaraja sian Juda dohot Israel.

¹² Tole patolupulusiataonhon ni harajaonna i sarion ma patna duansa, mansai posi diae sahita i. Alai nang di bagasan sahita i, ndada Jahowa dilului rohana, tagonan do pandaoni.

¹³ Dung i monding ma si Asa gabe top dohot angka ompuna, paopatpulusadataonhon hinarajaonna i ibana mate.

¹⁴ Dung i tartanom ibana di bagasan tanomanna sandiri naung tinuhilna hian di bagasan huta ni si Daud. Dung i dipeakkon nasida ma ibana tu lagna naung sinirsiran dohot sira na hushus marragamragam, pinadiri ni halak na pande mangkapur, ditutung huhut sada pamurunan apala na balga sahali pasangap rajai.

17 ¹ (I.) Dung i si Josapat, anakna i, bangkit raja singkatna, jala dipatomos dirina mangalo Israel.

² Ai disagihon do angka parangan di saluhut huta ni Juda angka na gonting i, dipambahen huhut angka parduaan parangan di tano Juda dohot di huta ni Ephraim, angka na pinapatu ni si Asa amana i.

³Jala didongani Jahowa do si Josapat, ala marparange ibana di bagasan dalan ni si Daud ompuna i, angka na parjolo i, jala ndang marsungkun ibana tu angka Baal.

⁴Sai dilului rohana do tahe Debata ni amana, jala marparange ibana di bagasan angka tonana, ndang songon pambahenan ni halak Israel dibahen.

⁵Jadi dipahot Jahowa ma harajaon i di bagasan tanganna, pola sandok halak Juda mangalehon silua tu si Josapat, gabe marhamoraon jala marhamuliaon situtu ibana.

⁶(II.) Jadi dung lam marsihohot rohana marparange di angka dalan ni Jahowa, lam dipaholang dope angka joro parsantian dohot sombaon Asera sian Juda.

⁷Tole patolutaonhon hinarajaonna i dipaborhat ma angka indukna: Si Benhail, si Obaja, si Sakaria, si Netaneel dohot si Mikha, asa mangajari nasida di angka huta ni Juda.

⁸Dibahen huhut dongannasida halak Lepi: Si Semaya, si Netania, si Sebadia, si Asael, si Semiramot, si Jonatan, si Adonia, si Tobia dohot si Tob-Adonia halak Lepi; dongannasida muse: Malim Elisama dohot si Joram.

⁹Jadi mangajari ma nasida di Juda, dipaboanboan nasida huhut buku patik ni Jahowa, gabe diebati nasida sude huta ni Juda humaliang huhut mangajari halak situan na torop i.

¹⁰(III.) Dung i madabu ma songgotsonggot sian Jahowa songgop tu sude harajaon ni luat angka na humaliang Juda, gabe ndang humarmusu dompak si Josapat.

¹¹Tole deba halak Palistim mamboan silua perak tu si Josapat bahen sohe; nang halak Arab mamboan tu ibana dorbiala, pitu ribu pitu ratus birubiru tunggal jala pitu ribu pitu ratus hambing tunggal.

¹²Jadi lam leleng, lam timbul ma si Josapat, pola marmulia situtu. Jadi dipungka ma di Juda angka huta na gonting dohot huta parpeopan bohal.

¹³Godang situtu bohal dipagukguk di angka huta ni Juda, ia angka baola parmusu dohot ulubalang di Jerusalem do.

¹⁴Jala on do bilangannasida marompuompu. Sian Juda angka induk manguluhon saribu halak: Si Adna induk jala donganna tolu ratus ribu halak ulubalang niuluhonna.

¹⁵Jala donganna induk i ma si Johanan, jala dua ratus ualupulu ribu halak niuluhonna.

¹⁶Donganna induk muse i ma si Amasia, anak ni si Sikri, na pasahathon dirina tu Jahowa sian nasa rohana, jala dua ratus ribu ulubalang niuluhonna.

¹⁷Jala sian Benjamin: Si Eliada sada halak ulubalang jala na niuluhonna dua ratus ribu halak, angka na marsinjatahon sior dohot lombulumbu.

¹⁸Jala donganna induk i ma si Josabad, jala na niuluhonna saratus ualupulu ribu halak, angka na tang be borhat tu parporangan.

¹⁹Angka i ma parhalado ni rajai, so padohot angka na sinagihon ni rajai tu bagasan huta angka na gonting di sandok Juda.

18¹(I.) Jadi marhamoraon godang ma si Josapat jala marhamuliaon situtu, hape martondong ibana tu si Ahab.

²Dung i di laonlaon ni ari tuat ma rajai tu Samaria manopot si Ahab. Dung i didokkon si Ahab ma patongon di rajai, dohot di halak donganna i torop birubiru dohot lombu, dung i dielaela ma rajai nangkok tu Ramot di Gilead.

³Ai didok si Ahab, raja sian Israel ma tu si Josapat, raja sian Juda: Atehe olo do ho haraonku laho marmusu dompak Ramot di Gilead? Dung i didok rajai ma tu ibana: Ia songon i ho, songon i do ahu, ia songon i bangsom, songon i do bangsongku, donganmu pe hami di hamusuonon.

⁴Angkup ni ninna si Josapat tu raja sian Israel: Ua marsungkun ho jolo sadarion tu hata ni Jahowa.

⁵Dung i dipaluhut raja sian Israel ma angka panurirang, opat ratus halak toropna, jala ninna ma mandok nasida: Atehe na jadi do hami laho marporang dompak Ramot di Gilead, manang na so jadi? Dung i ninna angka nasida ma: Jadi do ho nangkok, sai na

pasahaton ni Debata do huta i tu bagasan ni tangan ni rajai.

⁶Alai ninna si Josapat ma: Atehe ndang adong be dison nanggo sada panurirang ni Jahowa, asa marsungkun tu ibana hita?

⁷Dung i ninna raja sian Israel ma tu si Josapat: Adong dope nian dison sada halak, tarsungkun hita do nian Jahowa marhite sian ibana, alai sogo do rohangku mida ibana, ai ndang dung adong na denggan nanggo sada disurirangkon ibana tu ahu, sai holan jea do ariari; i ma si Mika, anak ni si Jimla. Dung i ninna si Josapat ma: Unang nian songon i hata ni rajai!

⁸Dung i dijou raja sian Israel ma sada halak siramoti bagasna, ninna ma: Hatop boan tuson si Mika, anak ni si Jimla.

⁹Alai anggo raja sian Israel dohot si Josapat, raja sian Juda, hundul ganup di habangsana be, jala marpangkean harajaon: Hundul do nasida tahe di partungkoan mardonokkon pintu harbangan ni Samaria, jala saluhut angka panurirang i manurirangi di adopannasida.

¹⁰Ia si Sedekia, anak ni si Kenaana, nunga dibahen hian di ibana angka tanduk bosi, huhut didok: Songon on do hata ni Jahowa: Marhite sian angka on tambingonmu ma halak Ram, paima sun siap nasida bahenonmu.

¹¹Sude angka panurirang i laos songon i do disurirangkon, ninna do: Nangkok ma ho tu

Ramot di Gilead, sai na marantu do ho! Jala pasahatan ni Jahowa do nasida tu bagasan tangan ni rajai.

¹²Ia suruan naung laho i manjou si Mika mandok hian tu ibana songon on: Ida ma, sauduran do hatahata ni angka panurirang i mandok na denggan tu rajai; dibahen i hatamu pe, sai songon hata ni sahalak sian nasida ma, sai hatahon ma na denggan.

¹³Alai ninna si Mika ma: Songon sintongna mangolu Jahowa, manang aha sipaboan ni Debata tu ahu, i do hatahononku!

¹⁴(II.) Jadi dung sahat ibana tu jolo ni raja, ninna rajai ma tu ibana: Atehe ale Mika, na jadi do hami laho marporang tu Ramot di Gilead, manang na so jadi? Dung i ninna ibana ma: Laho ma hamu nangkok, sai na marantu do hamu, jala sai na sahat do nasida tu bagasan tanganmuna.

¹⁵Alai ninna rajai ma tu ibana: Ingkon intap piga hali ho patolononku, paboa na so hatahononmu tu ahu, nda holan hasintongan marhite sian Goar ni Jahowa?

¹⁶Dung i ninna si Mika ma: Nunga hutatap hian sandok Israel marserak di atas ni angka dolok, songon birubiru na so adong na marmahan. Dung i ninna Jahowa ma: Nandang martuan angka ndian; mulak be ma ganup tu jabuna mardamedame!

¹⁷Dung i ro ma hata ni raja sian Israel tu si Josapat: Nda nunga hudok hian tu

ho, ndang tagamon agia aha na dengen surirangkononna tu ahu, nda holan jea do?

¹⁸Dung i didok si Mika ma: Dibahen i tangihon hamu ma hata ni Jahowa: Nunga hutatap hian Jahowa hundul di atas habangsana, jala sandok parangan ni banua ginjang tindang di siamunna dohot di hambirangna.

¹⁹Dung i ninna Jahowa ma: Ise ulaning olo mangelaela si Ahab, asa nangkok ibana jala tinggang mardonokkon Ramot di Gilead? Dung i masidok sian ibana be do nasida.

²⁰Dung i ruar ma sada tondi panurirangon laos jongjong tu adopan ni Jahowa, jala ninna ma: Ahu ma mangela ibana. Dung i ninna Jahowa ma tu ibana: Marhite sian aha do?

²¹Dung i ninna ibana ma: Ruar ma ahu gabe tondi sipaotooto di bagasan pamangan ni saluhut angka panurirangna. Dung i ninna Jahowa ma: Saut ma ibana elaelaonmu, jala ingkon monang ho; antong ruar ma ho jala ulahon ma songon i!

²²Nuaeng pe, ida ma, nunga dilehon Jahowa tondi sipaotooto tu bagasan pamangan ni saluhut panurirangmon, jala nunga dilumbahon Jahowa hian ro jea tu ho.

²³Dung i ro ma jumonok si Sedekia, anak ni si Kenaana, dipastap ma hurum ni si Mika, huhut didok: Beha nimmu, hira naung munsat Tondi ni Jahowa sian ahu, mandok tu na sasada ho huroha?

²⁴Dung i ninna si Mika ma: Ida ma, sanga do i idaonmu di ari hapoporusmu sian bilut na sada tu bilut na sada laho martabuni nian.

²⁵Dung i didok raja sian Israel ma: Tangkup hamu ma si Mika, jala boan ibana mulak tu si Amon, induk ni huta i dohot tu si Joas, anak ni rajai.

²⁶Jala dohononmuna ma: Songon on do hata ni rajai: Bahen hamu ma baoa on tu hurungan, jala lehon hamu ibana mangan sagusagu pardangolan dohot tapian pardangolan, paima mulak ahu mardamedame.

²⁷Dung i ninna si Mika ma: Molo tung mulak ho marsonangsonang, ndang tutu naung marlumba Jahowa marhite sian ahu; pola ninna muse dope: Tangihon ma hata i, hamu ale angka bangso luhutna.

²⁸(III.) Dung i nangkok ma raja sian Israel dohot si Josapat, raja sian Juda, tu Ramot di Gilead.

²⁹Jadi ninna raja sian Israel ma tu si Josapat: Patinda rupa ma anggo ahu ro tu tongtangan, alai anggo ho pangkeanmu hian ma pangke. Jadi patinda rupa ma anggo raja sian Israel laho tu parporangan nasida.

³⁰Alai nunga martona hian raja sian Ram tu angka induk panahatan ni huretana, songon on: Nandang jadi hamu mardopur dompak halak na metmet manang na magodang, nda holan dompak raja sian Israel sasadasa.

³¹ Jadi dung diida angka induk panahatan ni huretai si Josapat, ninna rohanasida ma: Rupa ibana do raja sian Israel, gabe ibana ditahopi nasida naeng paranganna; alai manganguhi ma si Josapat, jala Jahowa mangurupi ibana, jala dipaundar Debata ma nasida sian ibana.

³² Jadi dung diida angka induk panahatan ni huretai, ndada ibana hape raja sian Israel, sumurut ma nasida sian ibana.

³³ Alai adong ma sada baoa na manintak siorna, ndang manang ise nian tinujuna, hape hona do raja sian Israel sian pardomuan ni baju partahanan i. Dung i ninna rajai ma tujolma sihosong huretana: Hosongkon ma huretai dohot tanganmu, jala togu ahu haruar sian tongtangan i, ai nunga mabugang ahu.

³⁴ Hape lam tu ragatna marporang di na sadari i, laos jongjong rajai di bagasan huretana ditungkol paadopadop dohot halak Ram sahat ro di bodari, dung i mate ma rajai di na mate mata ni ari.

19¹ (I.) Alai anggo si Josapat, raja sian Juda, mulak do mardamedame tu jabuna di Jerusalem.

² Dung i ruar ma manjumpangkon ibana panurirang Jehu, anak ni si Hanani, jala ninna ma tu raja Josapat: Tung na jadi ma di roham tolongan halak parjahat manang haholongan halak na hinagigihon ni Jahowa? Marmuruk situtu Jahowa ala ni mida ho.

³Alai adong dope tahe jumpang ruhut na denggan sian ho, ala naung disiaphon ho angka sombaon Asera sian tano i jala nunga dipadiri ho roham, naeng mangalului Debata.

⁴(II.) Dung i maringan di Jerusalem ma si Josapat; alai diulahi muse borhat maningkir bangso i sian Berseba sahat ro di dolok Epraim, jala mulak nasida ditogihon tu Jahowa, Debata ni ompunasida i.

⁵Dung i dipabangkit ma angka panguhum di luat i, di bagasan saluhut huta ni Juda angka na gonting i, tung diganupi do huta i sadasada.

⁶Dung i didok rajai ma tu angka panguhumi: Manat timbangi hamu na binahenmuna! Ai ndada di jolma hamu mandabu uhum, di Jahowa do, di lambungmuna do Ibana uju mandok uhum hamu.

⁷Nuaeng pe sai songgop ma tu hamu biar mida Jahowa, sai ramoti hamu dirimuna, jala torang ulahon hamu! Ai ndang masa anggo di Jahowa Debatanta i uhum hageduhon, manang marmiak ni bohi, manang panjaloan sisip.

⁸Nang di huta Jerusalem dipabangkit si Josapat deba sian halak Lepi dohot angka malim dohot sian angka induk marompuompu di Israel mangaradoti uhum ni Jahowa dohot paputus parbadaan; alai sai mulak nasida tu Jerusalem.

⁹Dung i gogo ma rajai mandok tu nasida: Ingkon songon i bahenonmuna di bagasan biar mida Jahowa, di bagasan hasintongan dohot sian roha sisangunjur.

¹⁰Nasa parbadaan tahe na tarboan tu jolomuna sian hahaanggimuna, angka na maringan di hutanasida be taringot tu mudar na durus, taringot tu partorang ni patik, tona, angka aturan dohot uhum, ingkon ajaranmuna nasida, asa unang marsala nasida tu Jahowa, gabe songgop maon rimasna tu hamu dohot tu hahaanggimuna i. Antong bahen hamu ma songon i, asa unang marsala hamu.

¹¹Jala ida ma, sintua ni malim Amasia do jujunganmuna taringot tu saluhut hata tu Jahowa; jala si Sebadia, anak ni Ismael, jujungan di pinompar ni Juda taringot tu sude hata tu rajai; tole muse halak Lepi bahen panuturi di jolomuna. Antong pir ma tondimuna laho mangulahon songon i! Jala sai donganan ni Jahowa do panguhum na denggan marroha!

20¹(I.) Jadi dung salpu angka i, ro ma halak Moab dohot Amon, jala dongannasida halak Maoni marporang dompak si Josapat.

²Dung i ro ma halak paboahon barita i tu si Josapat songon on: Na ro ma mandopang ho mansai torop parangan sian bariba ni laut,

sian Ram, jala ida ma, nunga sahat nasida tu Haseson-Tamar, i ma Engedi.

³Jadi godoron ma si Josapat, huhut dipatohom bohina mangalului Jahowa, jala didokkon maningtingkon sada parpuasaon tu sandok Juda.

⁴Dung i marluhut ma sandok Juda mangido pangurupion sian Jahowa; ro do huhut halak sian saluhut huta ni Juda mangalului Jahowa.

⁵(II.) Dung i jongjong ma si Josapat di tongatonga ni luhutan Juda dohot Jerusalem, di bagasan joro ni Jahowa, di adopan ni alaman na imbaru i.

⁶Dung i ninna ma: Ale Jahowa, Debata ni ompunami, nda Ho do Debata di banua ginjang, Ho huhut panggomgomi di sude harajaon ni angka bangso parbegu? Tongon tahe di bagasan tanganmu do hagogoon dohot hatogaron, jala ndang adong nanggo sahalak na tarbahren manahan anggo maradophon Ho.

⁷Nda nunga dipabali Ho, ale Debatanami, angka isi ni tano on maradophon bangsom Israel, jala nunga pola dibasabasahon Ho tano i tu pinompar ni si Abraham, hasudungan ni roham ro di salelenglelengna?

⁸Jadi nunga maringan nasida disi jala nunga pola dipajongjong di Ho disi sada bagas habadiaon di Goarmu, nunga pola didok nasida:

⁹Tung sura ro tu hami hinamago manang podang, torutoru, begu antuk manang haleon,

ingkon jongjong hami di adopan ni joro on dohot di adopan ni Bohim; ai maringan di bagasan jabu on do Goarmu! Ingkon joujou hami tu Ho sian haporsuhon na huae hami, gabe tangihononmu jala urupanmu hami!

¹⁰Ia nuaeng, ida ma, ro halak Amon dohot Moab dohot halak sian tor Seir, na so niloasmu halak Israel mamolus sian luatna, uju ro nasida sian tano Misir, lam mamedu nasida pasiding nasida, asa unang ingkon ripashononna nasida.

¹¹Jala ida ma, ro nasida nuaeng tutu naeng mamaloshon tu hami, naeng pabalihon hami sian partaliannami, naung binasabasahonmu teanonnnami.

¹²Asi roham, ale Debatanami! Tung so marlulu Ho dompak nasida? Ai ndang margogo anggo hami maralohon parangan na toropon, na ro mangalo hami; jala ndang huboto hami manang aha sibahenonnami, sai tu Ho do manganaranap matanami.

¹³(III.) Jadi sandok Juda jongjong di adopan ni Jahowa, rap dohot posoposonasida, angkajolmanasida dohot anaknasida.

¹⁴Alai songgop ma Tondi ni Jahowa di tongatonga ni luhutan i tu si Jehasiel, anak ni si Sakaria, i ma anak ni si Benaia, i ma anak ni si Jeiel, anak ni Matania, halak Lepi sian pinompar ni si Asap.

¹⁵Jala ninna ma: Tangihon ma hatangkon, hamu ale sandok Juda dohot isi ni Jerusalem,

dohot ho, ale raja Josapat! Songon on do hata ni Jahowa tu hamu: Unang hamu mabiar, jala unang godoron hamu maradophon parduaan ni parangan na toropon, ai ndada hamu suhut di hamusuonon, Debata do.

¹⁶Ingkon manogot hamu tuat mandapothon nasida! Ida ma, nangkok do nasida sian nangkohan Sis, jala dapot hamu do nasida di ujung ni rura di adopan ni halongonan Jeruel.

¹⁷Sandok ndada hamu marporang sahalion, ingkon hohom be hamu jongjong disi, huhut paidaidahon tua sibahenon ni Jahowa tu hamu, ale halak Juda dohot Jerusalem! Unang hamu mabiar, jala unang godoron hamu! Manogot ma hamu borhat mandapothon nasida, sai na donganan ni Jahowa do hamu!

¹⁸Jadi marsomba ma si Josapat, pola manungkap tu tano bohina, sandok Juda pe dohot isi ni Jerusalem marsinggang be di adopan ni Jahowa, asa martangiang tu Jahowa.

¹⁹Dung i hehe ma halak Lepi sian pinompar ni si Kohat dohot sian pinompar ni si Kora, laos jongjong mamujimuji Jahowa, Debata ni Israel, pola dipagogo situtu soarana be.

²⁰Jadi dipasogot nasida ma manogotna i borhat mardalan tu halongonan Tekoa. Jadi di na borhat i nasida jongjong ma si Josapat huhut didok: Tangihon ma hatangkon, hamu ale halak Juda dohot isi ni Jerusalem: Sai porsea ma hamu di Jahowa, Debatamuna

i, asa marsihohot rohamuna; porsea hamu huhut di angka panurirangna, asa marantu hamu.

²¹ Dung i martuptup ma rajai dohot situasi na torop i, jala dipajongjong angka parende di Jahowa, asa mamujimuji nasida marpangkean habadiaon laho borhat mardalan di adopan ni parangan na tang be marsinjata, jala dohononna: Mandok mauiate ma hamu tu Jahowa, ai ro di saleleng ni lelengna do asi ni rohana i.

²² (IV.) Jadi andorang mamungka nasida marsoara olopolop dohot pujipujian, didokkon Jahowa ma ro halak parbajo sian pangaropan manahopi halak Amon, Moab dohot halak sian tor Seir, angka na ro mamorang Juda nian, gabe tunduk nasida dibahen.

²³ Ai marmusu tihus hian halak Amon dohot Moab dampak isi ni dolok Seir, naeng mangkaromhon dohot maniaphon nasida. Jadi dung sun siap isi ni dolok Seir, masilongsaan ma nasida sama nasida.

²⁴ Jadi dung sahat halak Juda tu robean panatapan tungkan halongonan, humusor ma nasida dampak musu na torop i; hape ida ma, angka bangke marpeahan di tano i, ndang adong na malua nanggo sada.

²⁵ Dung i ro ma si Josapat rap dohot bangsona, naeng marbagi tabantaban, gabe jumpang nasida disi mansai godang ugasan dohot bangke dohot ulaula angka na arga,

laos masilaum di ibana be, pola ndang tarusungsa; tolu ari lelengna nasida marbagi tabantaban, ai tung na godang situtu do.

²⁶Tole paopatarihon marluhut ma nasida di rura pamujimujian, ai disi do dipapujipuji nasida Jahowa. Ala ni umbahen didok halak goar ni inganan i rura pamujimujian rasirasa sadarion.

²⁷Dung i mulak ma sude halak Juda dohot Jerusalem, jala si Josapat manguluhon nasida, asa muli tu Jerusalem marlas ni roha godang, ai nunga las rohanasida mida musunasida i dibahen Jahowa.

²⁸Dung i bongot ma nasida tu Jerusalem umpalu arbab, sordam dohot sarune laho tu joro ni Jahowa.

²⁹Dung i songgop ma hasonggoton sian Debata tu saluhut harajaon ni angka luat i, dung dibege nasida naung marporang Jahowa dompak angka musu ni Israel.

³⁰Jadi marsonangsonang ma harajaon ni si Josapat, ai ditumpakkon Debatana tu rajai hasonangan humaliang.

³¹(V.) Songon i ma pangarajaion ni si Josapat gumomgom Juda. Marumur tolupulu lima taon ibana di na bangkit raja, jala duapulu lima taon lelengna ibana mangarajai di Jerusalem, ia goar ni inana, i ma Azuba, boru ni si Silhi.

³²Dung i marparange ma rajai di dalan ni si Asa amana i, jala ndang manimbil ibana

sian i, laho mangulahon na tigor di roha ni Jahowa.

³³Alai tahe ndang diloha anggo angka joro parsantian, ai ndang dope marsihohot anggo roha ni situan na torop i tu Debata ni ompunasida i.

³⁴Jamita angka na tinggal i dope sian si Josapat, angka na parjolo dohot parpudi, ida ma, tarsurat do i di bagasan buku jamita ni si Jehu, anak ni si Hanani, angka na sinurathonna tu bagasan buku rajaraja ni Israel.

³⁵Dung salpu angka i marsatahi ma si Josapat, raja sian Juda dohot Ahasia, raja sian Israel, na jahat do i marparulan.

³⁶Marsatahi rajai tahe dohot ibana laho paulihon angka kopal, asa marlayar tu Tarsis; di Ezion Geber ditungkangi nasida angka parau i.

³⁷Alai ro ma si Elieser, anak ni si Dodawa sian Maressa, manurirangi dompak si Josapat, ninna ma: Ala marsatahi ho dohot si Ahasia, nunga disegai Jahowa angka ulaonmu. Jadi marropuhan ma angka kopal i, gabe ndang tarbahensa marlayar tu Tarsis.

21 ¹(I.) Dung i monding ma si Josapat, gabe top dohot angka ompuna, jala tartanom di lambung ni ompuna, di huta ni si Daud. Jadi si Joram, anakna i, bangkit raja singkatna.

²Adong huhut angka hahaanggina, angka anak ni si Josapat, i ma: si Azaria, si Jeiel, si Sakaria, si Azariahu, si Mikhael dohot si Sepatia. Luhutna i angka anak ni si Josapat, rajai sian Juda.

³Dung i dilehon amanasida tu nasida godang silehonlehon sian perak, sere dohot arta angka na arga, tole deba huta angka na gonting di Juda. Alai anggo harajaon i tu si Joram do dilehon, ai ibana do buhabajuna.

⁴Alai dung sahat tu si Joram harajaon ni amana i jala lam marhuaso ibana, dibunu ma saluhut anggina marhite sian podang, angkup ni deba sian angka induk ni Israel.

⁵Marumur tolupulu dua taon si Joram di na bangkit raja ibana, jala ualu taon lelengna ibana mangarajai di Jerusalem.

⁶Jala marparange do ibana di dalan ni angka raja sian Israel, suang songon na binahen ni pinompar ni si Ahab; ai nunga boru ni si Ahab gabejolmana; jala diulahon do sogo ni roha ni Jahowa.

⁷Alai ndang olo Jahowa anggo tung mangago tu pinompar ni si Daud, ala padan naung binahenna tu si Daud, jala ala naung pinarbagana lehononna tongtong tu ibana sada palito dohot tu pinomparna ro di salelenglelengna.

⁸(II.) Uju di tingki ni si Joram mamulik halak Edom sian gomgoman Juda, laos dipabangkit nasida sada raja gumomgom nasida.

⁹Jadi taripar ma si Joram rap dohot angka indukna dohot saluhut huretana; dung i hehe ma ibana bornginna i mangarampok halak Edom, angka na humaliang ibana, ro di angka induk panahatan ni hureta porang.

¹⁰Alai atik pe songon i laos mamulik do halak Edom sian gomgoman Juda rasirasa sadarion. Mamulik huhut uju i Libna; ai nunga ditadingkon rajai Jahowa, Debata ni ompunasida i.

¹¹Dibahen ibana huhut angka joro parsantian di atas ni angka dolok Juda, jala dielaela isi ni Jerusalem mangulahon parmmainanon, pola dipaksa dohot Juda.

¹²(III.) Alai sahat ma tu ibana sada surat sian panurirang Elia na mandok: Songon on do hata ni Jahowa, Debata ni ompum si Daud: Ala so marparange ho di angka dalan ni si Josapat, amangmu dohot di angka dalan ni si Asa, raja sian Juda.

¹³Nunga pola diihutihut ho dalan ni angka raja sian Israel, jala diela ho Juda dohot isi ni Jerusalem mangulahon parmmainanon, maniru parmmainanon ni pinompar ni si Ahab, angkup ni nunga dibunu ho angka anggim, pinompar ni amangmu, angka na dumenggan marroha sian ho.

¹⁴Ida ma, Jahowa mangkonahon sada jea na bolon tu bangsom, tu angka anakmu, tu angka jolmam dohot tu sandok ugasonmu.

¹⁵Alai anggo ho aeonmu ma sahiti na pasang, marsahiti rojan ma butuham, pola martaontaon, paima ruar butuham nionjar ni sahiti.

¹⁶Dung i disunggul Jahowa ma tondi ni halak Palistim dohot Arab, angka na maringan di lambung ni halak Kus mangalo si Joram.

¹⁷Dung i nangkok ma nasida dompak Juda, laos disola ma i jala ditaban duduk sandok ugasan na jumpang di jabu ni rajai, tole angka anakna dohot jolmana, gabe ndang tinggal di ibana anak, dungkon ni si Joahas, anakna siampudan i.

¹⁸Dung salpu luhutna i ditorui Jahowa ma ibana marhite sian sahiti di bagasan butuhana na so hadaonan.

¹⁹Pola martaontaon diae; alai dung salpu dua taon, ruar ma butuhana nionjar ni sahiti na i, gabe mate ibana marsingkor situtu. Nandang pola dibahen bangsona tu ibana sada pamurunan pasangaphon rajai, songon pamurunan na tu ompuna i.

²⁰Marumur tolupulu dua taon ibana di na bangkit raja, jala ualu taon lelengna ibana mangarajai di Jerusalem; dung i mate ma ibana, ndang pola marhabot ni roha disi manang ise; tartanom do nian ibana di huta ni si Daud, alai ndang tu parbandaan ni angka raja.

22¹(I.) Dung i dipabangkit isi ni Jerusalem ma si Ahasia, anakna

siampudan i, gabe raja singkatna; ai sude angka hahana nunga dibunu sahoron parbajo, angka na ro dohot halak Arab tu parsaroan i. Jadi bangkit raja ma si Ahasia, anak ni si Joram, raja sian Juda.

²Marumur opatpulu dua taon si Ahasia di na bangkit raja ibana, jala sataon sambing ibana mangarajai di Jerusalem; ia goar ni inana i ma si Atalia, boru ni si Omri.

³Ibana pe marparange do di angka dalan ni pinompar ni si Ahab, ai inana do panuturina, laho mangulahon hajahaton.

⁴Ala ni sai diulahon do sogo ni roha ni Jahowa, suang songon pinompar ni si Ahab, ai nasida do gabe panuturina, dung mate amana i, bahen hamagoanna.

⁵Paihuthon tahinasida ibana huhut umbahen borhat ibana rap dohot si Joram, anak ni si Ahab, raja sian Israel, laho marporang dompak si Hasael, raja sian Ram, tu Ramot di Gilead; alai ditaluhon halak Ram do si Joram.

⁶Dung i mulak ma ibana tu Jesreel laho padaonhon bugangna, angka na binahen ni halak Ram di Rama, uju marporang ibana dompak si Hasael, raja sian Ram. Dung i tuat ma si Ahasia, anak ni si Joram, raja sian Juda, naeng maningkir si Joram, anak ni si Ahab di Jesreel, ai na marsahit do ibana.

⁷Alai marharoroan sian Debata do roha tu si Joram mambahen hamagoan tu si Ahasia; ai dung sahat ibana, borhat ibana muse

rap dohot si Joram dompak si Jehu, anak ni si Nimsi, naung miniahan ni Jahowa, asa siaphononna pinompar ni si Ahab.

⁸Jadi laho mangalaluhon uhum si Jehu tu pinompar ni si Ahab, jumpangsa deba induk sian Juda, angka anggi ni si Ahasia, angka na marhalado di si Ahasia, gabe dibunu nasida.

⁹Dung i dilului ma dohot si Ahasia, gabe ditangkup halak ibana, uju martabuni ibana di Samaria, laos diboan ibana tu si Jehu, jala dibunu ibana jala ditanom, ai ninna nasida do: Anak ni si Josapat na mangalului Jahowa sian nasa rohana do ibana. Dung i ndang adong be nanggo sahalak sian pinompar ni si Ahasia, na tuk gogo jumujung harajaon i.

¹⁰(II.) Alai anggo si Atalia, ina ni si Ahasia, dung diida naung mate anakna i, hehe ma ibana jala dibunui sandok pinompar ni raja sian Juda.

¹¹Alai dibuat si Josabad, boru ni rajai ma si Joas, anak ni si Ahasia, jala diluahon ibana sian tongatonga ni angka anak ni rajai, angka sibunuon hian, jala dibahen ibana rap dohot parorotna tu bilut podoman. Jadi ditabunihon si Josapat, boru ni raja Joram,jolma ni malim Joiada anak i (ai iboto ni si Ahasia do nasida) maradophon si Atalia, asa unang dapotsa bunuonna.

¹²Jadi rap martabuni nasida di bagasan joro ni Debata, pola onom taon lelengna. Alai si Atalia do mangarajai di tano i.

23¹ (I.) Tole papitutaonhon dipatodos si Joiada ma rohana, dialapi ma angka partogi ni parangan, sirajai sisaratus, ima: Si Azaria, anak ni si Jeroham dohot si Ismael, anak ni si Johanan dohot si Azaria, anak ni si Obed dohot si Maseia, anak ni si Adaya dohot si Elisapat, anak ni si sikri bahen donganna saparjanjian.

²Dung i diliati nasida ma Juda jala dipaluhut halak Lepi sian saluhut huta ni Juda, dohot angka partogi marompuompu di Israel, asa ro nasida tu Jerusalem.

³Jadi umpungka parjanjian ma sandok luhutan i di bagasan joro ni Debata rap dohot rajai. Dung i ninna si Joiada ma tu nasida: Ida ma, ingkon anak ni rajai patut bangkit raja, songon naung pinarbaga ni Jahowa taringot tu angka anak ni si Daud.

⁴On do hata i sibahenonmuna: Sapartolu sian hamu, angka na masuk gansi di ari Sabbat sian angka malim dohot halak Lepi, ingkon marjaga di lambung jabu ni rajai.

⁵Jala sapartolu ingkon marjaga di bagasan jabu ni rajai, jala sapartolu muse di lambung bagas parrapotan; alai sandok bangso i, ingkon jongjong do di angka alaman ni joro ni Jahowa.

⁶Jala ndang jadi masuk tu bagasan joro ni Jahowa manang ise, dungkon ni angka malim dohot halak Lepi, angka na marhalado, nasida do na jadi masuk, ai na badia do nasida;

alai anggo sandok situan na torop i, ingkon radotanna pangoloion hian tu Jahowa.

⁷Jala ingkon haliangan ni halak Lepi rajai humaliang, ganup marsinjata di bagasan tanganna; jala manang ise na naeng masuk tu bagasan joro i, ingkon marutang hosa do. Asa ingkon sai dongan ni rajai nasida, molo ruar ibana manang masuk.

⁸Jadi dibahen halak Lepi dohot sandok Juda ma saluhut hombar tu na tinonahon ni malim Joiada; diarahon be ma donganna, angka na masuk gansi di ari Sabbath rap dohot angka na malua di ari Sabbath; ai ndang diloas malim Joiada muli angka pargansion i.

⁹Dung i diparlehon malim Joiada ma tu angka partogi ni parangan sisaratus angka hujur dohot lombulumbu dohot parinse na sian raja Daud nahinan, angka na pineop di bagasan joro ni Debata.

¹⁰Dung i dipajongjong ma sandok bangso i, ganup patioptiop sinjatana di bagasan tanganna dingkan siamun ni joro i sahat ro di hambirang ni joro i, di holangholang ni langgatan dohot joro i, humaliang rajai.

¹¹Dung i ditogihon nasida ma anak ni rajai tu ruar, jala dibahen tumpal i tu atas uluna, jala dilehon buku patik i tu bagasan tanganna, jala dipabangkit nasida ibana bahen raja; laos dimiahi si Joiada dohot angka anakna i ibana, huhut didok mangolophon: Horas ma rajai!

¹²(II.) Jadi dung dibege si Atalia soara olopolop ni situan na torop i, angka na ro manganrongom, huhut papujipuji rajai, ro ma ibana manopot situan na torop i tu joro ni Jahowa.

¹³Jadi dung dipamanat pangalahona, ida ma, jongjong do rajai mangunsande di tiang hajongjonganna hian di pintu haroroan, jala angka induk dohot parsarune di lambung ni rajai, jala marlas ni roha be sandok bangso isi ni luat i, huhut mamalui sarune, marendei huhut umpalu parhinaloan angka parende i manunggulnungguli manggogo mamuji. Dung i disansani si Atalia ma pangkeanna, huhut didok: Masa do jehejehe!

¹⁴Alai didokkon malim Joiada ma angka partogi ni parangan sisaratus, angka na manguluhon parangan i, ninna ma mandok nasida: Togihon hamu ibana ruar sian holangholang ni adaran, jala manang ise na mangihuthon tu ibana, ingkon mate ibana bunuon marhite sian podang! Ai nunga pola didok malim i: Ndang jadi mate bunuon nasida di bagasan joro ni Jahowa.

¹⁵Dung i ditangkup nasida ma ibana; dung sahat nasida tu pintu habongotan ni angka hoda, mardonokkon bagas ni rajai, laos dibunu ma nasida disi.

¹⁶Dung i dibahen si Joiada ma sada padan tu ibana sandiri tu sandok situan na torop

i dohot tu rajai, paboa ingkon bangso ni Jahowa nasida.

¹⁷Dung i bongot ma sandok situan na torop i tu bagasan joro ni Baal, jala dilohai do i, jala diropuhi angka langgatanna dohot ganaganaanna, jala dibunu si Matan, malim ni Baal i, di adopan ni angka langgatan.

¹⁸Dung i diparenta si Joiada ma angka ulaon tohonan di bagasan joro ni Jahowa marhite sian angka malim dohot halak Lepi, naung sinagi ni si Daud hian tu joro ni Jahowa, asa nasida mamelehon angka pelean situtungon tu Jahowa, hombar tu na tarsurat di bagasan patik ni si Musa, mardongan las ni roha dohot parendeon, mangihuthon aturan binahen ni si Daud.

¹⁹Dung i dipajongjong ma angka sijaga pintu tu lambung ni angka pintu di joro ni Jahowa, asa unang masuk tusi manang ise na ramun binahen ni manang aha pe.

²⁰Dung i dibuat ma angka partogi ni parangan sisaratus, angka jolma na marhuaso pe dohot angka panggomgomi di situan na torop i, ro di sandok bangso isi ni luat i, laos ditogihon ibana rajai tuat sian joro ni Jahowa, jala mardalan nasida sian tongatonga ni bahal parjulu sahat tu bagas ni rajai, laos dipahundul nasida rajai tu atas habangsa harajaon i.

²¹Jadi marlas ni roha be ma sandok bangso isi ni luat i, jala sonang be isi ni huta i. Alai

nunga dibunu nasida anggo si Atalia marhite sian podang.

24¹ (I.) Marumur pitu taon si Joas di na bangkit raja ibana, jala opatpulu taon lelengna ibana mangarajai di Jerusalem; ia goar ni inana i ma si Zibia sian Beerseba.

²Dung i diulahon si Joas ma lomo ni roha ni Jahowa, saleleng mangolu malim Joiada.

³Dung i dibuat si Joiada ma dua parompuan bahen jolmana, gabe tubuan anak dohot boru ibana.

⁴Jadi dung salpu angka i tubu ma roha ni si Joas, naeng mangumban joro ni Jahowa.

⁵Dung i dipaluhut rajai ma angka malim dohot halak Lepi, ninna ma mandok nasida: Borhat ma hamu manopot angka huta di Juda, asa papunguhon perak sian sandok Israel laho mangumban joro ni Debatamuna ganup taon; jala ringkot bahen hamu hata i, hape ndang diringkoti halak Lepi.

⁶Dung i dijou rajai ma sintua ni malim Joiada, jala ninna ma mandok ibana: Boasa tung so dasdasonmu halak Lepi, asa diboan sian Juda dohot sian Jerusalem guguan pinatikkon ni si Musa, naposo ni Jahowa siguguan ni sandok luhutan Israel tu undungundung ni panindangion?

⁷Ai nunga maloha joro ni Debata dibahen si Atalia na jahat i dohot angka anakna, jala saluhut ugasan angka na badia i di joro ni Jahowa mamele tu angka Baal do dipangke.

⁸Dung i didokkon rajai ma mambahen sada poti, jala dipeakkon do i tu balian di lambung pintu laho masuk tu joro ni Debata.

⁹Dung i didokkon ma martingting di Juda dohot di Jerusalem: Ingkon diboan be tu Jahowa guguan pinatikkon ni si Musa, naposo ni Debata, tu halak Israel uju di halongonan.

¹⁰Jadi marlas ni roha be ma sude angka induk dohot sandok bangso i, diboan be guguan mandekdekkon tu bagasan poti i, paima gok.

¹¹Ia dung jumpang tingkina boanon ni halak Lepi poti i tingkiron ni rajai; jala ia dung diida nasida naung godang perak di bagasan, ro ma juaratulis ni rajai dohot wakil ni sintua ni malim, asa diparumar poti i, dung i dipasuang muse tu ingananna hian. Sai songon i dibahen nasida marngombasngombas, gabe godang perak dipapungupungu.

¹²Dung i dipasahat rajai dohot si Joiada ma i tujolma panahatan ni ulaon pauli joro ni Jahowa, asa nasida muse mangalehon upa tu angka tungkang pandakdak batu dohot tungkang hau, laho mangumban joro ni Jahowa; nang angka tungkang bosi dohot tombaga laho paulihon joro ni Jahowa.

¹³Jadi tole be ma angka tungkang i mangaringkoti ulaon i, gabe lam tu tipakna ma marhite sian ulaon ni tangannasida, gabe suang ma hot jongjong joro ni Debata di hajongjonganna hian.

¹⁴Jadi dung sun ulaon i, diboan nasida ma perak na lobi i tu jolo ni rajai dohot tu jolo ni si Joiada; sian i ma dipauli angka ulaula tu joro ni Jahowa, angka ulaula laho marhalado dohot mamelehon angka pelean situtungon, tole angka saolan dohot ulaula sian sere dohot perak. Dung i dipelehon nasida ma tongtong angka situtungon di bagasan joro ni Jahowa saleleng mangolu si Joiada.

¹⁵(II.) Dung i sarimatua ma si Joiada jala mahap rohana di hangoluan on laos mate; marumur saratus tolupulu taon ibana di na laho mate ibana.

¹⁶Dung i tartanom ma ibana di huta ni si Daud di lambung ni angka raja, ala na denggan na binahenna i di Israel taringot tu Debata dohot jorona i.

¹⁷Jadi dung mate si Joiada ro be ma angka induk ni Juda marsomba tu rajai: Ditangihon rajai do antong pangidoannasida i marisuang!

¹⁸Dung i ditadingkon nasida ma joro ni Jahowa, Debata ni ompunasida i, tagonan nasida marsomba tu angka sombaon Asera dohot tu angka ajiajian, asa parohon rimas ni Debata tu Juda dohot tu Jerusalem ala ni dosanasida on.

¹⁹Dung i disuru Jahowa ma angka panurirang tu tongatonganasida, asa mulak nasida tu Jahowa togihononna: Gogo do angka i marsipaingot tu nasida, alai ndang diparateatehon nasida.

²⁰Dung i songgop ma Tondi ni Debata tu si Sakaria, anak ni malim Joiada, gabe jongjong ma ibana di adopan ni situasi na torop i jala didok ma tu nasida: Songon on do hata ni Debata: Boasa tung laosanmuna angka tona ni Jahowa? Ala ni ndang tagamon marhasonangan hamu; ai nunga ditadingkon hamu Jahowa, jadi tadingkononna ma hamu.

²¹Hape lam marbulan nasida mangalo ibana, pola didangguri ibana dohot batu, patulus tona ni rajai di alaman ni joro ni Jahowa.

²²Asa ndang be diingot raja Joas uhum na denggan naung binahen ni si Joiada amana i tu ibana, lam dibunu tahe anakna; alai laho mate ibana didok si Sakaria ma: Tatapon ni Jahowa do i jala luluhononna!

²³(III.) Jadi dung salpu sataon, nangkok ma parangan ni halak Ram marporang dompak ibana, pola sahat nasida tu Juda dohot tu Jerusalem, jala disiaphon sude induk ni bangso i, jala nasa tabantaban na dapot nasida ditongoshon do i tu raja sian Damaskus.

²⁴Ai otik do nian parangan ni halak Ram ro; alai Jahowa do pasahathon tu bagasan tangannasida sada parduaan parangan na torop situtu, ala naung ditadingkon nasida Jahowa, Debata ni ompunasida i; asa halak Ram mangalaluhon uhumi tu si Joas.

²⁵Jadi di na laho nasida manadingkon ibana, nunga pasang hian bugangna, lam marbulan

angka naposona mangalo ibana, ala mudar ni anak ni malim Joiada, laos ditodos ibana di atas podomanna pola mate. Dung i ditanom halak ibana di huta ni si Daud; alai ndang tartanom ibana tu parbandaan ni angka raja.

²⁶Alai on do halak angka na marbulan mangalo ibana: Si Sabad, anak ni si Simeat, boru Amon dohot si Josabad, anak ni si Simrit, boru Moab.

²⁷Alai anggo angka anakna dohot godang ni sohe na ampe tu ibana, ro di na pinaulina i joro ni Debata, ida ma, tarsurat do i di bagasan buku jamita ni angka raja. Jadi si Amasia, anakna i, bangkit raja singkatna.

25¹(I.) Marumur duapulu lima taon si Amasia di na bangkit raja ibana, jala duapulu sian taon lelengna mangarajai di Jerusalem; ia goar ni inana, i ma Nai Joadan sian Jerusalem.

²Jala diulahon ibana do lomo ni roha ni Jahowa, alai ndang sian nasa rohana marisuang!

³Jadi dung lam hot harajaon i di ibana, dibunu ma naposona, angka na manodos raja nahinan amana i.

⁴Alai anggo anaknasida i ndang dibunu, hombar tu hata na tarsurat di bagasan buku patik na binahen ni si Musa, tinonahon ni Jahowa tu ibana, songon on: Nandang jadi mate amaama ala angka anakna, jala ndang jadi

mate angka anak i ala amana, alai ganup ingkon mate ala ni dosana sandiri.

⁵Dung i dipaluhut si Amasia ma halak Juda, jala dipaodor nasida marompuompu bahen angka induk ni sisaribu halak dohot sisaratus di sandok Juda dohot Benjamin; dung i dibilangi ma nasida olat ni na marumur duapulu taon dohot lobi sian i, gabe jumpangsa ma tolu ratus ribu halak angka na pinillit, angka na tarbahen borhat tu parporangan patioptiop hujur dohot lombulumbu.

⁶Angkup ni diupai dope sian Israel saratus ribu halak parangan angka ma marhuaso, pola saratus talenta perak dilehon.

⁷Alai ro ma sada halak ni Debata manopot ibana, ninna ma: Ale rajanami, unang loas borhat parangan ni Israel rap dohot ho, ai ndang hadonganan Jahowa anggo halak Israel ro di sude halak Epraim.

⁸Molo sai naeng borhat ho, ulahon ma, pir ma tondim marporang! Atik tung beha tarurak ho maon, bahenon ni Debata maradophon musu; ai saguru di Debata do hagogoon laho manolongi dohot mambahen tarurak.

⁹Dung i ninna si Amasia ma tu halak ni Debata: Alai beha na ma bahenon taringot tu sisaratus talenta, naung hulehon i bahen upa ni parduaan parangan sian Israel? Dung i ninna halak ni Debata ma: Gumodang sian i dope dipeop Jahowa, tarlehonsa tu ho.

¹⁰Dung i dipapulik si Amasia ma parduaan parangan, angka na ro tu ibana sian Epraim, jala didokkon muli tu ingananna hian. Ala ni marsigorgor situtu rimasnasida mida Juda, jadi mulak ma nasida tu ingananna hian marmurukmuruk situtu.

¹¹Dung i pir ma tondi ni si Amasia manogihon paranganna, pola sahat ibana tu rura parsiraan, jala dibunu sian halak Seir saloksa halak.

¹²Dapot tartangkup songon i mangolu dibahen halak Juda saloksa halak, angka na binoanna tu punsu ni dolok batu, laos didabu sian punsu ni dolok batu i, gabe maropuk saluhutna.

¹³Alai anggo parduaan parangan, angka naung pinamuli ni si Amasia, asa unang rap dohot ibana borhat tu parporangan, dirampok nasida ma angka huta ni Juda olat ni Samaria sahat ro di Bethoron, jala dibunu sian nasida tolu ribu halak, jala godang tabantaban dilaum.

¹⁴(II.) Jadi dung mulak si Amasia sian na manuluhon halak Edom, laos diboan ma debata angka na pinasombasomba ni halak Seir, jala dipajongjong do angka i bahen debatana, laos marsomba di adopannasida, huhut manutung daupa tusi.

¹⁵Jadi marsigorgor ma rimas ni Jahowa mida si Amasia, laos disuru ma manopot ibana sada panurirang na mandok tu ibana: Boasa tung

luluanmu debata sileban ni bangso, angka na so tarbahren paluahon bangso nidinginanna sandiri sian tanganmu?

¹⁶Alai andorang mangkatai dope ibana, ro ma hata ni rajai tu ibana: Atehe nunga dipabangkit halak ho bahen panuturi ni rajai? Pasadi hatahatam, boasa tagonan bunuon ni halak ho? Jadi mansadi ma panurirang i, ninna ma: Nunga tangkas hutanda naung putus sangkap ni Debata, naeng mangago ho, ala na binahenmon, jala ndang ditangihon ho panuturionku.

¹⁷Dung i martuptup ma si Amasia, raja sian Juda, laos disuru ma suruanna manopot si Joas, anak ni si Joahas, tubu ni si Jehu, raja sian Israel, mandok tu ibana: Tole ma hita masiujian!

¹⁸Alai disuru si Joas, raja sian Israel ma suruanna manopot si Amasia, raja sian Juda mandok hata alingalingan: Hau anak na di Libanon marsuru pangaririt manopot hau Ares na di Libanon mandok songon on: Ua lehon ma borum bahenjolma ni anakku; hape ro ma binatang angka na di atas Libanon, ditondong ma hau anak i laos didegedegei.

¹⁹Ninna roham huroha: Ida ma, nunga hutaluhon halak Edom, jadi dipaginjang ho roham naeng masipujipujian. On pe tinggal ma ho tagonan di bagasan jabum! Boasa tagonan tahopanmu hamagoan, asa marjea ho rap dohot halak Juda?

²⁰Alai ndang ditangihon si Amasia hata umpamana i, ai marharoroan sian Debata do i, asa lehononna nasida tu bagasan tangan ni musu, ala na niluluannasida debata ni halak Edom.

²¹Jadi nangkok ma si Joas, raja sian Israel, gabe masiujian ma nasida, ibana dohot si Amasia, raja sian Juda di Betsemes na di tano Juda.

²²Alai talu ma halak Juda maradophon halak Israel, gabe maporus nasida ganup tu undungundungna be.

²³Alai dapot tartangkup ma di Betsemes anggo si Amasia, raja sian Juda, anak ni si Joas, dibahen si Joas, tubu ni si Joahas, raja sian Israel, laos diboan ibana tu Jerusalem, jala dilohai parik ni Jerusalem olat ni bahal Epraim sahat tu bahal parsuhisuhi, pola opat ratus asta ganjangna.

²⁴Dibuat huhut nasa sere dohot perak ro di sude ulaula angka na jumpang di bagasan joro ni Debata na niramotan ni si Obed-Edom, tole muse angka arta di jabu ni rajai, tole angka jolma tahan joratna dung i mulak ibana tu Samaria.

²⁵(III.) Alai anggo si Amasia, anak ni si Joas, raja sian Juda mangolu dope sampulu lima taonnari dung mate si Joas, anak ni si Joahas, raja sian Israel.

²⁶Jamita na tinggal i dope sian si Amasia, angka na parjolo dohot parpudi, ida ma, nda

tarsurat do i di bagasan buku jamita ni angka raja sian Juda dohot Israel.

²⁷Jadi olat ni dung sumurut si Amasia sian Jahowa, dibahen halak ma parbulanan mangalo ibana di Jerusalem. Alai maporus do rajai tu Lakis, jadi disuru nasida ma halak mangihuthon ibana tu Lakis, asa bunuonna ibana disi.

²⁸Dung i diboan nasida ma ibana di atas ni angka hoda; laos tartanom ibana di lambung ni angka ompuna di bagasan huta ni si Daud.

26¹(I.) Dung i ro ma sandok bangso Juda, dibuat ma si Usia na marumur sampulu onom taon dope, jala dipabangkit ibana gabe raja, singkat ni si Amasia amana i.

²Ibana do i na patoguhon huta Elat, jala mulak tu Juda dipasuang, dung monding rajai rap dohot angka ompuna.

³Marumur sampulu onom taon si Usia di na bangkit raja ibana, jala limapulu dua taon lelengna ibana mangarajai di Jerusalem; ia goar ni inana, i ma Nai Jekolia sian Jerusalem.

⁴Dung i diulahon ibana ma lomo ni roha ni Jahowa, sandok songon na binahen ni si Amasia amana i.

⁵Sai diringkoti rohana do mangalului Debata saleleng mangolu si Sakaria, na pande patorangkon pangungkapon sian Debata; jala saleleng ibana mangalului Jahowa, manjadi do ulaon ni rajai, ditumpak Debata.

⁶Ai borhat do rajai marporang dompak halak Palistim, jala digargari parik ni huta Gat dohot parik ni huta Jamnia dohot parik ni huta Asdod, jala dipungka angka huta humaliang Asdod dohot di tongatonga ni halak Palistim.

⁷Ai ditumpak Debata do ibana mangalo halak Palistim dohot halak Arab, angka na maringan di Gurbal dohot mangalo halak Maoni.

⁸Dung i ro ma halak Amon manaruhon silehonlehon tu si Usia gabe tarbarita goarna sahat ro di Misir, ai lam timbul situtu do huasona.

⁹Dipauli si Usia huhut angka palaspalas di Jerusalem di atas bahal parsuhisui dohot di atas bahal rura dohot di saluhut suhisui, jala dipatogu angka i.

¹⁰Dipajongjong huhut angka palaspalas di halongonan jala dihali torop angka sumur, ai godang do dorbiana di tano pea dohot di adaran; tole angka halak parumauma dohot tungkang porlak anggur di atas ni angka dolok dohot di Karmel; ai lomo roha ni rajai mangaradoti parumaon.

¹¹Angkup ni godang do parangan ni si Usia, angka na somal marmusu, angka na borhat tu parporangan marhoronhoron mangihuthon torop ni bilangannasida, niuluhon ni si Jeuel, juaratulis i dohot si Maaseia, panuturi angka na marpandapotan tu si Hanania, sada sian angka induk ni rajai.

¹²Sandok bilangan ni angka partogi marompuompu di angka ulubalang dua ribu onom ratus halak do.

¹³Marpandapotan tu nasida do sada parduaan parangan, tolu ratus ribu pitu ribu lima ratus halak angka na marhuaso situtu marmusu manolongi rajai mangalo musu.

¹⁴Dung i didokkon si Usia ma paulion di nasida, di sandok paranganna i tahe angka lombulumbu, hujur, tole tahuluk dohot baju partahanan dohot sior dohot angka batu ambalang.

¹⁵Dipauli huhut di Jerusalem angka parhohas, hapandean ni halak na pande, angka sibahenon tu atas ni angka palaspalas dohot bungkulan laho maniorhon sian i angka sumbia dohot mandanggurhon angka batu bolon. Jadi tarbarita situtu ma goar ni rajai sahat tu na dao, ai marhasurungan situtu pangurupion tu ibana, sanga marhuaso situtu ibana.

¹⁶(II.) Alai dung marhuaso rajai, dipaginjang ma rohana mambahen hamagoanna; ai mardosa ibana dompak Jahowa, Debatana, tung dibongoti do joro ni Jahowa laho manutung daupa di atas langgatan pardaupaan.

¹⁷Ro do nian malim Azaria mangihuthon ibana, pola ualupulu malim ni Jahowa, angka na marhuaso be donganna.

¹⁸Diambat nasida nian raja Usia, angka ninna ma tu ibana: Ale Usia! Ndang patut anggo di ho manutung daupa di Jahowa, holan di angka malim do, angka anak ni si Aron, angka naung niuras patut manutung daupa. Ruar ma ho sian inganan na badia i, ai na mardosa do ho disi, jala ndang tagamon gabe hamuliaonmu bahenon ni Debata Jahowa.

¹⁹Hape lam piription dope si Usia huhut patioptiop saolan pardaupaan di bagasan tanganna, naeng manutung daupa. Alai andorang piription dope ibana dompak angka malim i, tubu ma puru di pardompahanna di adopan ni angka malim di bagasan joro ni Jahowa di lambung langgatan pardaupaan.

²⁰Dung i humusor ma sintua ni malim Azaria, ro di sude angka malim mandompakkon ibana, hape ida ma, nunga puruon ibana di pardompahanna. Jadi hapogan nasida pabali ibana sian i; ibana sandiri pe hapogan do laho tu balian, ala naung ditorui Jahowa ibana.

²¹Jadi laos puruon ma raja Usia sahat ro di ari hamamatenana, gabe punjung ibana maringan di bagasan sada jabu ala puruna i, ai bali ibana huhut sian joro ni Jahowa. Jadi si Jotam, anakna i, panahatan ni bagas ni rajai, manguhum sandok bangso isi ni luat i.

²²Jamita na tinggal i dope sian si Usia, angka na parjolo dohot na parpudi, i ma

naung sinurat ni panurirang Jesaya, anak ni si Amos.

²³Dung i monding ma si Usia gabe top dohot angka ompuna, jala tartanom ibana di lambung ni angka ompuna di ladang parbandaan ni angka raja; ai ninna nasida do: Na puruon do ibana. Jadi si Jotam, anakna i, bangkit raja singkatna.

27¹(I.) Marumur duapulu lima taon si Jotam di na bangkit raja ibana, jala sampulu onom taon lelengna ibana mangarajai di Jerusalem; ia goar ni inana, i ma si Jerusa, boru ni si Sadok.

²Jala diulahon ibana do lomo ni roha ni Jahowa, sandok songon na binahen ni si Usia amana i; dungkon ni na so bongot ibana tu bagasan joro ni Jahowa; alai tong dope marroha mago anggo halak situasi na torop i.

³Dipauli rajai huhut pintu na timbo di joro ni Jahowa; jugul ibana huhut patoguhon parik Opel.

⁴Dipungka ibana huhut angka huta di atas dolok Juda; jala di bagasan angka tombak dipauli do angka partanobatoan dohot batarbatar.

⁵Dung i marmusu ma rajai dompak raja ni halak Amon jala ditaluhon nasida, pola mangalehon sohe halak Amon di na sataon i tu ibana saratus talenta perak saloksa kor dahanon simetmet dohot saloksa kor dahanon siansimun; suang songon i godang dilehon

halak Amon tu rajai nang paduataonhon dohot patolutaonhon.

⁶Jadi lam naek huaso ni si Jotam, ai marsihohot angka dalanna di adopan ni Jahowa, Debatana.

⁷Jamita na tinggal i dope sian si Jotam ro di sude hamusuonna dohot pangalahona, ida ma, tarsurat do i di bagasan buku ni angka raja sian Israel dohot Juda.

⁸Marumur duapulu lima taon ibana di na bangkit raja, jala sampulu onom taon lelengna ibana mangarajai di Jerusalem.

⁹Dung i monding ma si Jotam gabe top dohot angka ompuna, jala tartanom ibana di huta ni si Daud. Jadi si Ahas anakna i bangkit raja singkatna.

28¹(I.) Marumur duapulu taon si Ahas di na bangkit raja ibana, jala sampulu onom taon lelengna ibana mangarajai di Jerusalem, jala ndang diulahon lomo ni roha ni Jahowa, songon si Daud ompuna i.

²Lam marparange ibana di angka dalan ni angka raja sian Israel, angkup ni dipauli huhut angka ganaganaan tuangan di Baal.

³Manutung daupa ibana huhut di rura na di anak ni si Hinnom, jala suda ditutung angka anakna di bagasan api mangihuthon biasbias ni bangso parbegu, angka na pinabali ni Jahowa maradophon halak Israel.

⁴Mamele jala manutung daupa ibana huhut di atas ni angka tambak dohot di atas ni

dolokdolok dohot di toru ni saluhut hau na rugun.

⁵Dibahen i dipasahat Jahowa, Debatana ma ibana tu bagasan tangan ni raja sian Ram, gabe ditaluhon nasida ibana, jala mansai torop sian angka na nirajaanna dibuangkon laho mamboan tu Damaskus. Dipasahat ibana huhut tu bagasan tangan ni raja sian Israel, na manaluhon ibana situtu.

⁶Ai dibunu si Peka, anak ni si Remalia, di Juda di bagasan sadari saratus duapulu ribu halak, luhutna i halak na somal marmusu, ala na tinadingkon nasida Jahowa, Debata ni ompunasida i.

⁷Tole muse si Sikri sahalak ulubalang sian Epraim mambunu si Maaseia, anak ni rajai dohot si Asrikam, siramoti bagasna dohot si Elkana, panuturi ni rajai.

⁸Asa dibuangkon halak Israel sian angginasida i dua ratus ribu parompuan ro di anak dohot boru angkup ni mansai godang tabantaban dilaum sian nasida, laos diboan tabantaban i tu Samaria.

⁹(II.) Dung i adong ma disi sada panurirang ni Jahowa, na margoar si Obed; ruar ma ibana manjumpangkon parangan angka na ro tu Samaria, ninna ma tu nasida: Ida ma, ala marronirimas Jahowa, Debata ni ompumuna i, mida Juda, umbahen dipasahat nasida tu bagasan tanganmuna; hape marmurukmuruk

dohot hamu mambunu i nasida, pola maungaung sahat tu banua ginjang.

¹⁰Nuaeng pe, lam ditahi rohamuna dope naeng patundukkon halak Juda dohot Jerusalem, bahen naposomuna baoa dohot parompuan. Beha ia hamu, nda dokdok do nang angka salamuna maradophon Jahowa, Debatamuna i?

¹¹Dibahen i tangihon hamu ma hatangkon jala paulak hamujolma na tarboan i, angka na binoanmuna sian anggimuna i; ai nunga marpiarpiar muruk ni Jahowa mida hamu.

¹²Jadi hehe ma deba baoa sian angka induk ni halak Ephraim, i ma: si Azaria, anak ni si Johanan dohot si Berekia, anak ni si Mesilemot dohot si Hiskia, anak ni si Sallum dohot si Amasa, anak ni si Hadlai laho mandapothon parangan angka na mulak sian tongtangan.

¹³Ninna ma mandok nasida: Ndang jadi boanonmuna tusonjolma angka na tarboan i, ai parohon torutoru ni Jahowa tu hita hamu disi; rupa disangkap rohamuna do naeng manambai dosa dohot salanta na sai laon; ai nunga godang hian salanta, jala marpiarpiar rimas ni Jahowa mida Israel.

¹⁴Jadi ditadingkon parangan na marsinjata i ma halak na tarboan i ro di tabantaban di adopan ni angka induk dohot sandok luhutan i.

¹⁵Jadi hehe ma baa angka na ginoar ondeng manjangkon halak na tarboan i, jala saluhut sian nasida na marsaemara diparulosi do sian tabantaban i, diparlehon tu nasida angka ulos dohot sipatu ro di sipanganon dohot siinumon, pola dimiahi nasida jala dipahundul tu halode manogihon sude halak angka na mandate, jala diboan nasida, sahat tu Jeriko, huta parharambiran, tu hahaangginasida i; dung i mulak nasida tu Samaria.

¹⁶(III.) Uju i ma disuru raja Ahas angka suruanna manopot angka raja sian Assur, mangido tolongannasida ibana.

¹⁷Ai diulahi halak Edom muse ro mambunu halak Juda, diboan huhut torop halak tu habuangan.

¹⁸Tole dohot halak Palistim mangalaum angka huta di pea dohot di tano dangsina sian Juda, jala dipapatu nasida Betsemes, Aialon, Gederot dohot Soko ro di pagaran na masuk tusi, dohot Timna ro di pagaran na masuk tusi, dohot Gimzo ro di pagaran na masuk tusi, laos maringan nasida disi.

¹⁹Ai Jahowa pajimputhon Juda ala si Ahas, raja sian Juda, ala naung ibana pahijang Juda mardosa godang dompak Jahowa.

²⁰Jadi ro ma mangalo ibana si Tiglat-Pileasar, raja sian Assur, jala disosaksosak ibana, ndada ditogari.

²¹ Ai nunga pola dipupusi si Ahas deba ugasan sian joro ni Jahowa dohot sian bagas ni rajai ro di angka induk, jala dilehon do i tu raja sian Assur, hape laos so ditolongi ibana.

²² (IV.) Alai gari tu tingki hagogotanna, lam digandai raja Ahas dope dosana dompak Jahowa.

²³ Lam mamele ibana tu angka debata pandingini di Damaskus, angka na manaluhon ibana, ninna ma: Ala naung angka debata ni rajaraja sian Ram manolongi nasida, dohot ma ahu mamele tusi, anggiat dohot ahu ditolongi nasida; hape gabe jorgong do angka i di ibana dohot di sandok Israel.

²⁴ Dung i dipapungu si Ahas ma angka ulaula di joro ni Debata jala ditapori angka ulaula di joro ni Debata, laos dihinsu angka pintu ni joro ni Jahowa, jala dipambahen di ibana angka langgatan di ganup suhi di Jerusalem.

²⁵ Dipambahen huhut di ganup huta ni Juda angka tambak laho manutung daupa di angka debata sileban, asa pahehehon rimas ni Jahowa, Debata ni ompuna i.

²⁶ Jamita na tinggal i dope sian ibana ro di sandok dalandalanna, angka na parjolo dohot parpudi, ida ma, tarsurat do i di bagasan buku ni angka raja sian Juda dohot Israel.

²⁷ Dung i monding ma si Ahas gabe top dohot angka ompuna, jala tartanom ibana di huta Jerusalem; ai ndangdiboan nasida ibana

tu parbandaan ni angka raja sian Juda. Jadi si Hiskia anakna i bangkit raja singkatna.

29¹ (I.) Marumur duapulu lima taon si Hiskia di na bangkit raja, jala duapulu sia taon lelengna ibana mangarajai di Jerusalem; ia goar ni inana, i ma si Abia, boru ni si Sakaria.

² Jala diulahon ibana do lomo ni roha ni Jahowa, sandok songon binahen ni si Daud ompuna i.

³ Pintor didokkon ma ungkapon angka pintu ni joro ni Jahowa, jala dipaimbaru di bulan sipaha sada di taon parjolo hinarajaonna i.

⁴ Dung i didokkon ma ro angka malim dohot halak Lepi, jala dipaluhut nasida di alaman tungkan habinsaran.

⁵ Jala didok ma tu nasida: Tangihon ma hatangkon, hamu ale halak Lepi! Manguras ma hamu nuaeng, jala urasi hamu ma joro ni Debata, Debata ni ompumuna i, jala paruar hamu nasa na ramun sian joro na badia i.

⁶ Ai nunga mardosa godang angka ompunta i, jala diulahon nasida sogo ni roha ni Jahowa, Debatanta i, tung ditadingkon nasida Ibana, jala dipadao nasida bohinasida i sian inganan ni Jahowa, tung ditundali nasida do Ibana.

⁷ Angkup ni nunga dihinsui nasida angka pintu ni emper i, jala diintopi angka palito, jala ndang be ditutup nasida daupa, jala ndang be dipelehon pelean situtungan di

bagasan bagas na badia i marsomba tu
Debata ni Israel.

⁸Jadi marronirimas ma Jahowa mida Juda
dohot mida Jerusalem, jala dipasahat nasida
ripe rupaon, ulangon dohot lealeaan, songon
na niida ni matamuna sandiri.

⁹Ai ida ma, nunga pola marriagean angka
ompunta marhite sian podang, anakta pe
dohot borunta ro di jolmanta, nunga pola
tarboan tu habuangan ala ni.

¹⁰Nuaeng pe disangkap rohangku do
naeng mambahen padan tu Jahowa, Debata
ni Israel, asa anggiat sumurut sian hita
parpiarpiar ni rimasna.

¹¹Dibahen i, hamu ale angka anaha, unang
tung marbenda hamu nuaeng, ai hamu do
na pinillit ni Jahowa jongjong di adopanna
marhalado, jala hamu do angka parhaladona
dohot manutung daupa di Ibana.

¹²(II.) Jadi hehe ma halak Lepi: Si Mahat,
anak ni si Amasa i dohot si Joel, anak ni si
Azaria sian pinompar ni si Kohat; jala sian
pinompar ni si Merari: Si Kis, anak ni si Abdi
dohot si Azaria, anak ni si Jehalieel; ia sian
pinompar ni si Gerson: Si Joa, anak ni si Sima
dohot si Eden, anak ni si Joa.

¹³Ia sian pinompar ni si Elisapan: Si Simri
dohot si Jeiel; ia sian pinompar ni si Asap: Si
Sakaria dohot si Matania.

¹⁴Ia sian pinompar ni si Heman: Si Jeiel dohot si Simei; ia sian pinompar ni si Jedutun: Si Semaya dohot si Usiel.

¹⁵Jadi dipaluhut nasida ma angka hahaangginasida i, laos diuras dirinasida, asa bongot nasida hombar tu tona ni rajai, naeng manguras joro ni Jahowa mangihuthon hata ni Jahowa.

¹⁶Alai masuk ma anggo angka malim tu bagasan joro ni Jahowa laho manguras; nasa haramunon angka na jumpang nasida di bagasan joro ni Jahowa, diparuar nasida ma i tu alaman ni joro ni Jahowa; dijalo halak Lepi muse mamboan tu balian mangaup tu sunge Kidron.

¹⁷Alai mamungka do nasida manguras di artia di bulan sipaha sada, tole paualuarihon di bulan i masuk ma nasida tu emper ni Jahowa laho manguras joro ni Jahowa, pola ualu ari lelengna, pasampuluonomarihon pe di bulan sipaha sada sidung nasida.

¹⁸Dung i masuk ma nasida tu bagasan manopot raja Hiskia, ninna nasida ma: Nunga sun huuras hami sandok joro ni Jahowa dohot langgatan pamelean ni pelean situtungan ro di sandok ulaulana; nang meja hapeahan ni roti na marhadohoan ro di sandok ulaulana.

¹⁹Angkup ni nasa ulaula, angka naung binolongkon ni raja Ahas saleleng hinarajaonna i, di na mardosai ibana, nunga hupadiri jala huurasi hami; jala ida ma,

luhutna i di adopan ni langgatan ni Jahowa do.

²⁰(III.) Dung i dipasogot raja Hiskia ma hehe jala dipaluhut angka induk ni huta i, asa nangkok tu joro ni Jahowa.

²¹Dung i diboan halak ma pitu lembu naposo dohot pitu birubiru tunggal dohot pitu anak ni birubiru dohot pitu hambing tunggal bahen pelean pardosaan manguras harajaon dohot joro na badia i dohot halak Juda. Dung i ninna rajai ma tu pinompar ni si Aron, angka malim i, asa mamele nasida di atas langgatan ni Jahowa.

²²Jadi dipotongi nasida ma angka lembu i, jala ditarei angka malim mudar i jala dipistikkon do i tu langgatan; dipotongi muse angka birubiru tunggal jala dipistikkon mudar i tu langgatan i; dipotongi muse angka anak ni birubiru jala dipistikkon mudar i tu langgatan i.

²³Dung i diboan muse angka hambing tunggal bahen pelean pardosaan di adopan ni rajai dohot di adopan ni luhutan i, jala diampehon tangannasida tu atasna.

²⁴Laos dipotongi angka malim ma hambing i, mudarna i na pinistikkon tu langgatan padaohon dosa mambahen pardenggan tu sandok Israel; ai manatap sandok Israel do umbahen didokkon rajai pelehononhon pelean situtungon dohot pelean pardosaan.

²⁵ Dipajongjong rajai huhut halak Lepi di bagasan joro ni Jahowa mardongan arbab; sordam dohot hasapi mangihuthon tona ni si Daud dohot si Gad, partondung ni rajai dohot panurirang Natan; ai tona na ro sian Jahowa do i marhite sian pamangan ni angka panurirangna.

²⁶ Jadi jongjong ma tutu halak Lepi patioptiop parhinaloan sian si Daud, patioptiop sarune anggo angka malim.

²⁷ Dung i didokkon si Hiskia ma pelehononhon pelean situtungan i di atas langgatan. Jadi andorang mamungka mamelehon pelean situtungan i, manungka ma dohot ende pujipujian tu Jahowa rap dohot soara ni sarune dohot parhinaloan sian si Daud, raja sian Israel.

²⁸ Jadi sandok luhutan i martangiang; sai didatdati angka parende do marende jala angka parsarune mamalu sarunena, luhutna i paima marujung pelean situtungan i.

²⁹ Jadi dung tolhas pelean i, marsinggang ma rajai dohot sude halak na jumpang di lambungna, laos martangiang nasida.

³⁰ Dung i didokkon raja Hiskia dohot angka induk i ma halak Lepi mamujimuji Jahowa marendehon hata ende sian si Daud dohot si Asap partondung i. Jadi mamujimuji ma nasida maradu marlas ni roha huhut marsomba dohot martangiang.

³¹ Dung i ro ma hata ni si Hiskia mandok:

Nunga dipasahat hamu muse dirimuna tu Jahowa, antong pajonok hamu ma mamboan angka pelean sipotongon dohot pelean pujipujian tu joro ni Jahowa! Jadi diboan luhutan i ma angka pelean sipotongon dohot pelean pujipujian, jala nasajolma na ringgas roha mamboan angka pelean situtungon.

³² Ia bilangan ni pelean situtungon, angka na binoan ni luhutan i, i ma pitupulu lembu, saratus birubiru tunggal jala dua ratus anak ni birubiru. Luhutna i bahen pelean situtungon tu Jahowa.

³³ Diparbadiai dope angkup ni onom ratus lembu dohot tolu ribu birubiru.

³⁴ Alai maotikku do angka malim, polandang taralo nasida mambobahi sude pelean situtungon i, dibahen i halak Lepi, angginasida i mangurupi nasida, paima sun ulaon i, paima dohot angka malim i taruras; ai umburju roha ni halak Lepi manguras dirina sian angka malim.

³⁵ Angkup ni torop situ do disi pelean situtungon rap dohot tabotabo ni angka pelean hamauliateon dohot angka pelean siinumon bahen dongan ni pelean situtungon. Asa songon i ma pangarataina di ulaon di joro ni Jahowa.

³⁶ Jadi marlas ni roha ma si Hiskia dohot sandok bangso i, taringot tu naung pinadiri ni

Debata di bangso i; ai tung tompu do masa hata i.

30¹ (I.) Dung i disuru si Hiskia suruanna tu sandok Israel dohot Juda, ditongos huhut angka surat tu Epraim dohot Manasse, asa ro be nasida tu joro ni Jahowa di Jerusalem, asa marulaon Paska di Jahowa, Debata ni Israel.

²Ai nunga martuptup hian rajai rap dohot angka indukna dohot sandok luhutan i di Jerusalem, naeng marulaon Paska di bulan sipaha dua.

³Ai ndang tarbahen nasida marulaon di tingkina hian, ala so singkop dope taruras angka malim i jala ndang dope pungu situasi na torop i di Jerusalem.

⁴Jadi lomo ma roha ni rajai di hata i dohot sandok luhutan i.

⁵Jadi mardos ni roha ma nasida, ingkon tingtingkononhon hata i tu sandok Israel, olat ni Berseba sahat ro di Dan, asa ro be tu Jerusalem marulaon Paska di Jahowa, Debata ni Israel, ai nunga tung leleng ndang rim nasida marulaon, hombar tu na tarsurat.

⁶Dung i mardalan ma angka suruani mamboan angka surat sinurat ni tangan ni rajai dohot angka indukna martingting tu sandok Israel dohot Juda, hombar tu tona ni rajai songon on: Hamu ale angka anak Israel! Mulak ma hamu tu Jahowa, Debata ni si Abraham, si Isak dohot si Israel, asa mulak

Ibana tu jolma pasipasi angka na malua di hamu sian tangan ni raja di Assur.

⁷Unang tung hamu songon ompumuna dohot songon hahaanggimuna, angka na mardosa dompak Jahowa, Debata ni ompumuna i, gabe dipasahat Ibana nasida tu hamagoan, songon na niidamuna nuaeng.

⁸On pe, sai unang ma patangkang hamu tangkuhukmuna i, songon na binahen ni ompumuna, pasahat hamu tagonan dirimuna tu Jahowa, jala ro be hamu tu habadiaonna, naung pinarbadiaanna ro di salelenglelengna, jala oloi hamu Jahowa, Debatamuna i, asa mundar sian hamu parpiarpiar ni rimasna.

⁹Ai molo mulak hamu tu Jahowa, jumpangan asi ni roha ma hahaanggimuna dohot anakkonmuna maradophon halak na mambuankon nasida, asa mulak nasida loasonna tu tano on. Ai parasi roha jala pardengganbasa do Jahowa, Debatamuna i, jala ndang tagamon padaonna bohina sian hamu, molo mulak hamu tu Ibana.

¹⁰Jadi mardalan ma angka suruani sian huta na sada tu na asing di tano Ephraim dohot Manasse jala sahat tu Zebulon. Hape diparengkeli halak do nasida jala diinsahi.

¹¹Alai adong deba baoa sian Aser dohot Manasse dohot Zebulon, angka na paunduk rohana jala ro tu Jerusalem.

¹²Angkup ni andar do di Juda tangan ni Debata manumpak, mangalehon tu nasida

sada ni roha laho mangulahon tona ni rajai dohot angka induk i, hombar tu hata ni Jahowa.

¹³Jadi marluhut ma di Jerusalem mansai torop halak, naeng marari raya sagusagu na so niasoman di bulan sipaha dua, tung na balga situtu do luhutan i.

¹⁴(II.) Jadi hehe be ma nasida mangalohai langgatan, angka na di Jerusalem, jala dipadao sude langgatan pamelean daupa, jala direongkon angka i tu bagasan sunge Kidron.

¹⁵Dung i dipotongi nasida ma birubiru Paska di ari sampulu opat bulan sipaha dua. Ai nunga tarurak angka malim dohot halak Lepi gabe diuras dirina, asa masuk boanonna angka pelean situtungon tu bagasan joro ni Jahowa.

¹⁶Jadi marudur nasida jongjong di hajongjonganna be, hombar tu tohonanna hian, na tarsurat di patik ni si Musa, halak ni Debata. Dung i dipistikkon angka malim i ma mudar i sian tangan ni halak Lepi.

¹⁷Ai mansai toropjolma di luhutan i, angka na so manguras dirina dope, dibahen i halak Lepi do umpotongi angka birubiru Paska, manguras sudejolma, angka na so taruras dope, asa gabe badia nasida di Jahowa.

¹⁸Ai mansai torop halak situasi na torop i, angka sian Epraim, Manasse, Isasar dohot Zebulon, angka na so taruras dope, mangan Paska do nian nasida, alai ndang hombar

tu na tarsurat. Jadi martangiang ma si Hiskia mangondihon nasida, ninna ma: Pardengganbasa do Jahowa, sai marpangulah ma rohana.

¹⁹Mida ganupjolma na marsihohot mangalului sian nasa rohana Debata Jahowa, Debata ni ompuna i, atik pe so hombar tu pangurasion na badia i.

²⁰Jadi ditangihon Jahowa ma tangiang ni si Hiskia, jala dipahisar bangso i.

²¹Jadi halak Israel angka na jumpang di Jerusalem marari raya sagusagu na so niasoman pitu ari lelengna marlas ni roha godang. langgo halak Lepi dohot angka malim, sai mamujimuji Jahowa do ariari huhut mardongan parhinaloan papujipuji hagagoon ni Jahowa.

²²Dung i marsipaingot ma si Hiskia tu roha ni ganup halak Lepi, angka na pantas marroha mangaradoti ulaon tu Jahowa. Dung i mangan pelean ari raya nasida pitu ari lelengna, huhut mamelehon angka pelean hamauliateon, huhut papujipuji Jahowa, Debata ni ompunasida i.

²³Dung i mardos ni roha sandok luhutan i, naeng dope marari raya pitu ari nari; saut ma nasida marari raya pitu ari nari huhut marlas ni roha.

²⁴Ai nunga dibasabasahon si Hiskia, raja sian Juda, tu luhutan i saribu lembu dohot pitu ribu birubiru; angka induk i pe marbasabasahon

tu luhutan i saribu lembu dohot saloksa ribu birubiru; angka malim pe nunga mansai torop mangurasi dirina be.

²⁵Jadi marlas ni roha ma sandok luhutan Juda ro di angka malim dohot halak Lepi, rap dohot sandok luhutan angka na ro sian Israel, angkup ni halak dagang, angka na ro sian tano Israel, nang angka na maringan hian di Juda.

²⁶Jadi masa las ni roha godang di Jerusalem; ai olat ni tingki ni si Salomo, anak ni si Daud, raja sian Israel, ndang dung masa songon i di Jerusalem.

²⁷Dung i hehe ma angka malim dohot halak Lepi laho mamasumasu bangso i, jala ditangihon Debata soaranasida i, ai sahat do tangiangnasida i tu ingananna na badia i di banua ginjang.

31¹(I.) Jadi dung marujung saluhutna i, borhat ma sandok Israel, angka na jumpang disi manopot angka huta di Juda, jala dibolai nasida angka ganaganaan na jongjong, jala ditaba angka sombaon Asera, jala dilohai angka tambak dohot langgatan maniaphon sian sandok Juda dohot Benjamin dohot Epraim dohot Manasse, tung sun siap do dibahen. Dung i mulak ma sude halak Israel ganup tu partalianna di bagasan hutanasida.

²Dung i dipaodor si Hiskia muse angka pargansion ni malim dohot halak Lepi,

mangihuthon pargansionna hian, ganup hombar tu tohonanna, nang malim, nang halak Lepi, laho mamelehon pelean situtungan dohot pelean hamauliateon, asa marhalado nasida, mandok mauliate dohot mamujimuji di bagasan pintu ni joro ni Jahowa.

³Nang bagian ni rajai, sian ugasanna sandiri do dilehon bahen pelean situtungan, i ma angka pelean situtungan manogotna i dohot bodarina i, ro di pelean situtungan di ari Sabbath dohot poltak ni bulan dohot di angka ari raya, songon na tarsurat di bagasan buku patik ni Jahowa.

⁴Dung i didok rajai ma tu bangso i, isi ni Jerusalem, ingkon lehononna be guguan na tu malim dohot tu halak Lepi, asa marsihohot rohanasida mangaradoti patik ni Jahowa.

⁵Jadi dung sar hata i dipagodang halak Israel ma angka patumonaan sian eme, anggur, miak, situak ni loba dohot sian sandok gogo ni tano i, ro di parsampuluan sian saluhutna diboan nasida mansai godang.

⁶Tole halak Israel dohot Juda, angka na maringan di bagasan angka huta di Juda, diboan be huhut parsampuluan sian lombu dohot birubiru, nang parsampuluan sian ugasan na badia naung pinarbadian tu Jahowa, Debatanasida i, pola margugungugun dibahen.

⁷ Di bulan sipaha tolu dipungka nasida mambahen margugungugun, jala di bulan sipaha pitu pe asa marujung.

⁸(II.) Jadi dung bongot si Hiskia dohot angka induk i maningkir angka gugungugun i, dipuji nasida ma Jahowa jala dipasupasu bangsona Israel.

⁹Dung i usouso ma si Hiskia tu angka malim dohot halak Lepi taringot tu angka gugungugun i.

¹⁰Dung i ninna sintua ni malim Azaria, sian pinompar ni si Sadok ma tu rajai: Olat ni dung dipungka halak mamboan silehonlehon tu joro ni Jahowa, sai mangan do hami jala bosur jala marlobilobi dope mansai godang; ai nunga dipasupasu Jahowa bangsona, ala ni umbahen lobi angka gugungugunon.

¹¹Dung i didokkon si Hiskia ma, ingkon paulion deba bilut parbohalan di joro ni Jahowa; jadi dipauli nasida ma i.

¹²Dung i dipamasuk nasida ma tusi angka silehonlehon dohot parsampuluan dohot ugasan na pinarbadian marroha hasintongan; jala induk panahatan ni luhutna i, i ma si Hanania, halak Lepi dohot si Simei, anggina i induk paidua.

¹³Tole muse si Jeiel, si Azasiah, si Nahat, si Asahel, si Jerimot, si Josabad, si Eliel, si Ismakia, si Mahat dohot si Benaia angka induk nian, alai marpandapotan tu si Hanania

dohot si Simeia anggina i, pinarenta ni raja Hiskia dohot si Azaria, induk di joro ni Debata.

¹⁴Tole muse si Kora, anak ni si Innah, halak Lepi, sijaga pintu tungkan habinsaran, ibana panahatan ni nasa silehonlehon sian lomo ni roha tu Debata, asa sagihononna silehonlehon tu Jahowa dohot na badia sahali.

¹⁵Jala marpandapotan tu ibana do si Eden, si Minyamin, si Jesua, si Semaya, si Amaria dohot si Sekania di bagasan angka huta ni malim, ingkon marroha hasintongan be nasida marsagihon tu hahaanggina hombar tu parsagionna, nang tu na magodang, nang tu na metmet.

¹⁶So padohot baoa angka na sinuratnasida i, olat ni na marumur tolu taon tu ginjang, taringot tu sude angka na masuk tu bagasan joro ni Jahowa, singkop di ganup di arina be mangaradoti ulaon di tohonanna, mangihuthon pargansionna be.

¹⁷Tole muse malim angka na tarsurat mangihuthon pinomparnasida marsasaama, tole halak Lepi olat ni na marumur duapulu taon tu ginjang mangaradoti tohonanna mangihuthon pargansionna be.

¹⁸Tole muse angka na tarsurat sian saluhut dakdanaknasida, jolmanasida, anaknasida dohot borunasida di sandok luhutan i, ai marroha hasintongan nasida pabadiahon dirina be marsagihon ugasan na badia i.

¹⁹Nang di pinompar ni si Aron, i ma angka malim i, adong do targoar angka baoa di ganup huta ro di tano na masuk tusi marsagihon parjambaran tu ganup baoa sian angka malim dohot tu sude na tarsurat sian halak Lepi.

²⁰Songon i dibahen si Hiskia di sandok Juda, sai diulahon do na danggan, habonaron dohot hasintongan di adopan ni Jahowa, Debatana.

²¹Jala di bagasan saluhut ulaon na pinungkana mangaradoti ulaon di bagas ni Debata, mangaradoti patik dohot tona laho mangalului Debatana, sai sian nasa rohana do diula, gabe manjadi ma.

32¹ (I.) Jadi dung salpu angka jamita ondeng dohot ulaon hasintongan i, ro ma si Sanherib, raja sian Assur, manola Juda jala ditungkum huta angka na gonting, jala ditahi rohana naeng soluhonna.

²Jadi dung diida si Hiskia naung ro si Sanherib, jala dipatohom bohina naeng marporang dompak Jerusalem.

³Martuptup ma rajai rap dohot angka indukna dohot ulubalangna, naeng manongsong angka aek mual, angka na di balian ni huta i, jadi diurupi nasida ibana.

⁴Ai marpungu do mansai torop halak, gabe disongsong nasida nasa mual dohot sunge i tahe, na mardalan sian tongatonga ni tano i, ai ninna do: Molo ro angka raja sian Assur, boasa ingkon godang aek dapotonna?

⁵Dung i dipapir rajai ma tondina jala dipatogu sandok parik, molo adong na maloha, jala dipajongjong angka palaspalas di atasna, dibahen muse sadanari parik balian jala dipagonting Milo di bagasan huta ni si Daud, jala dipambahen sinjata mansai torop dohot angka lombulombu.

⁶Dung i dipabangkit ma angka partogi tu hamusuon manguluhon situasi na torop i jala dipaluhut nasida tu lambungna di alaman mardonokkon bahal ni huta i, jala didok hata sipir ni tondinasida i songon on:

⁷Pir ma tondimuna jala marsihohot! Unang hamu mabiar jala unang godoron rohamuna maradophon raja sian Assur, manang maradophon sandok paranganna na rap dohot ibana, ai tumorop do na mandongani hita asa ibana!

⁸Botohon sibuk tahe donganna, alai anggo donganta Jahowa, Debatanta do laho manolongi dohot manguluhon hita marporang. Jadi nalom ma roha ni situasi na torop i umbege hata ni si Hiskia, raja sian Juda.

⁹(II.) Dung i disuru si Sanherib, raja sian Assur ma angka naposona tu Jerusalem (ai di Lakis do anggo ibana rap dohot sandok paranganna) manopot si Hiskia, raja sian Juda, dohot sandok halak Juda, angka na di Jerusalem mandok tu nasida:

¹⁰Songon on do hata ni si Sanherib, raja sian Assur: Marhaposan tudia do hamu ulaning, umbahen tinggal dope hamu di Jerusalem naung tinungkum humaliang?

¹¹Nda si Hiskia do i na paotootohon hamu, naeng pasahatonna hamu tu hamatean marhite sian haraparon dohot hauason mambahen ende halilian ni pinggol mandok: Jahowa, Debatanta i paluahon hita sian tangan ni raja di Assur?

¹²Nda ibana do si Hiskia, naung mangaloha angka tambakna dohot langgatanna, lam didok muse tu Juda dohot tu Jerusalem: Di adopan ni langgatan na sasada on do hamu marsomba dohot manutung daupa di atasna?

¹³Ndang diboto hamu huroha, manang aha naung hubahen dohot naung binahen ni angka daompung tu saluhut bangso ni angka luat? Tung adong ma angka debata ni bangso parbegu marluatluat na tuk paluahon angka luatnasida sian tanganku?

¹⁴Tung ise ma sian saluhut debata ni angka bangso parbegu on, angka na nirendephon ni daompung, na tarbahen paluahon bangsona sian tanganku, tung muba tagamon. Debatamuna tarpaluasa hamu sian tanganku?

¹⁵Nuaeng pe, unang olo hamu paotootoon ni si Hiskia, jala unang olo hamu ansionna, unang porsea hamu di ibana! Ai ndang adong nanggo sada debata ni sandok bangso parbegu manang harajaon, na tarbahen

paluahon bangsona sian tanganku manang
sian tangan ni angka daompung pe, lam
Debatamuna ma huroha ndang tagamon
tarpaluasa hamu sian tanganku!

¹⁶Lam didatdati angka naposona dope
mandok hatana manginsahi Debata Jahowa
dohot si Hiskia naposona i.

¹⁷Angkup ni disurati huhut deba surat laho
manginsahi Jahowa, Debata ni Israel dohot
mandok hatana dompak Ibana, songon
on: Suang songon debata ni angka bangso
parbegu marluatluat, ndang tarbahensa
paluahon bangsonasida sian tanganku,
suang le songon i Debata ni si Hiskia, ndang
tagamon tarpaluasa bangsona sian tanganku!

¹⁸Dung i joujou ma nasida marsoara na gogo
di hata Jahudi tu bangso isi ni Jerusalem, na
di atas parik, naeng manahuti nasida dohot
mambahen godoron, asa papatuonna huta i.

¹⁹Huhut marhatahata dompak Debata
pandingini di Jerusalem, suang songon
dompak debata sileban ni angka bangso di
atas tano on, jadijadian ni tangan nijolma.

²⁰(III.) Alai martangiang ma anggo raja
Hiskia dohot panurirang Jesaya, anak ni si
Amos, mangalo hatana i, pola manganguhi
nasida dompak banua ginjang.

²¹Dung i disuru Jahowa ma sada suruanna,
na mangarendephon sude ulubalang na
marhuaso dohot partogi dohot induk di
parsaroan ni raja sian Assur, gabe tarurak

situtu ibana laho mulak tu luatna. Jadi dung masuk ibana tu bagasan joro ni Debatana, ro ma tubuna sandiri mambunu ibana disi marhite sian podang.

²²Asa Jahowa do paluahon si Hiskia dohot isi ni Jerusalem sian tangan ni si Sanherib, raja sian Assur dohot sian tangan ni saluhut musuna, jala diparmahan nasida humaliang.

²³Jadi torop halak mamboan silehonlehon di Jahowa tu Jerusalem dohot arta angka na arga tu si Hiskia, raja sian Juda. Jadi dung songon i lam timbul ma rajai maradophon saluhut bangso parbegu.

²⁴(IV.) Di angka ari uju i marsahit ma si Hiskia pola matemate ne, gabe martangiang ibana tu Jahowa; na mangalusi ibana jalojalo huhut mangalehon sada tanda halongangan tu ibana.

²⁵Alai tahe ndang dibaloshon si Hiskia, hombar tu asi ni roha jinalona i, ai dipaginjang do rohana. Ala ni mangonai rimas tu ibana dohot tu Juda dohot tu Jerusalem.

²⁶Alai dung dipaunduk si Hiskia rohana i, ala ni ginjang ni rohana i rap dohot isi ni Jerusalem, gabe ndang saut ro rimas ni Jahowa tu nasida, saleleng mangolu si Hiskia.

²⁷Alai na mora jong do si Hiskia jala marhamuliaon godang situtu, jala dipauli di ibana angka bilut parpeopan arta, perak, sere, mata intan, pamurpuri, angka parinse

dohot angka ulaula hasudungan ni roha marragamragam.

²⁸Dipauli huhut angka bagas parpeopan ni gogo ni tano i, eme, anggur dohot miak; tole muse angka bara ni pinahan marragamragam dohot bara ni birubiru.

²⁹Tole muse dipambahen angka huta, jala mansai godang dorbiana, angka birubiru dohot lombu; ai nunga dilehon Debata sinamot tu ibana mansai godang.

³⁰Laos si Hiskia do manambok haroroan ni aek Gihon sian julu, jala ditogutogu do i sian toru ni tano tungkan hasundutan sian huta ni si Daud. Jadi mardohar si Hiskia di sandok ulaonna.

³¹Alai tahe dung ro suruan ni angka raja sian Babel, angka na sinuru manopot ibana usouso di tanda halongangan naung masa di luat i, ditadingkon Debata ma ibana, pola diunjuni ibana, asa tung tartanda saluhut na di bagasan rohana i.

³²Alai jamita na tinggal i dope sian si Hiskia dohot hadaulaton ni rohana, ida ma, tarsurat do angka i di bagasan buku pangungkapon ni panurirang Jesaya, anak ni si Amos dohot di bagasan buku ni angka raja sian Juda dohot Israel.

³³Dung i monding ma si Hiskia, gabe top dohot angka ompuna, jala tartanom ibana di robean ni parbandaan ni pinompar ni si Daud. Dung i ro be ma sandok halak Juda

dohot isi ni Jerusalem pasangaphon rajai di hamamatena. Jadi si Manasse, anakna i bangkit raja singkatna.

33¹ (I.) Marumur sampulu dua taon si Manasse di na bangkit raja ibana, jala limapulu lima taon lelengna ibana mangarajai di Jerusalem.

²Dung i diulahon rajai ma sogo ni roha ni Jahowa hombar tu biasbias angka na niulahon ni angka bangso parbegu, angka naung pinabali ni Jahowa maradophon halak Israel.

³Jala diulahi rajai paulihon tambak, angka naung nilohaana ni si Hiskia amana i, jala dipajongjong angka langgatan di Baal, jala dibahen angka sombaon Asera, jala marsomba ibana tu sandok parangan di langit, jala marpangoloion tusi.

⁴Jala dipajongjong angka langgatan di bagasan joro ni Jahowa, taringot tusi nunga pola didok Jahowa nian: Di Jerusalem do pahotonku Goarhu ro di salelenglelengna.

⁵Angkup ni dipauli do angka langgatan di sandok parangan di langit, di bagasan na dua alaman ni joro ni Jahowa.

⁶Ibana sandiri tahe pabolushon angka anakna sian bagasan api, di rura na di anak ni si Hinnom, diulahon huhut pangarundigon dohot parsibalikmataon, jala dipabangkit angka jolma bahen hasandaran ni begu, dohot partondung, tung na godang situtu do

diulahon sogo ni roha ni Jahowa, asa pahehe rimasna.

⁷ Dipajongjong huhut sada ganaganaan Asera, naung binahenna i tu bagasan joro ni Debata, naung pola nian didok Debata hian tu si Daud dohot tu Salomo anakna i: Tu bagasan joro on dohot tu bagasan Jerusalem, naung hupilliti sian saluhut marga ni Israel, pahotonku Goarhu ro di salelenglelengna.

⁸ Jala ndang be paunsatonku pat ni Israel sian tano naung huturpukhon tu ompunasida i, asal diringkoti nasida laho mangulahon hombar tu saluhut naung hutonahon i tu nasida, jala diihuthon sandok patik, aturan dohot uhum, angka na nilehon marhite sian si Musa!

⁹ Alai dililuhon si Manasse do halak Juda dohot isi ni Jerusalem laho mangulahon hajahaton, gumodang sian bangso parbegu angka naung niago ni Jahowa maradophon halak Israel.

¹⁰ Dung i ro do nian hata ni Jahowa tu si Manasse dohot tu sandok bangsona, alai ndang diparateatehon nasida.

¹¹ Ala ni diparo Jahowa ma dompak nasida angka induk ni parangan ni raja sian Assur, angka na manangkup si Manasse marhite sian rante, laos songon i tarrante dohot dua rante tombaga diboan nasida ibana tu Babel.

¹² (II.) Jadi dung hagogotan rohana, digogo ma marhuraja di adopan ni Jahowa,

Debatana, jala dipaunduk situtu rohana maradophon Debata ni angka ompuna i.

¹³Jala martangiang tu Ibana. Jadi marpangulah ma roha ni Debata jala ditangihon tangiangna i, jala diboan ibana mulak tu Jerusalem, sumuang tu harajaonna. Jadi mananda ma si Manasse, Jahowa do hape Debata.

¹⁴Dung salpu songon i dipatogu ma parik ruar di huta ni si Daud, tungkan hasundutan sian sunge Gihon laho masuk tu bahal pardengkean, jala dihaliangi do Opel, jala timbo situtu dibahen, jala dipaojak angka induk ni parangan di bagasan saluhut huta angka na gonting di Juda.

¹⁵Dung i dipaholang angka debata sileban dohot ganaganaan sian bagasan joro ni Jahowa, jala saluhut langgatan angka na pinajokna di atas dolok hajongjongan ni joro ni Jahowa dohot di Jerusalem; laos dibolongkon do angka i tu balian ni huta i.

¹⁶Jala dipajongjong muse langgatan ni Jahowa jala pipelehon di atasna angka pelean hamauliateon dohot pujipujian, jala dipatik halak Juda, ingkon oloanna Jahowa, Debata ni Israel.

¹⁷Alai tong dope anggo situasi na torop i mamele di atas ni angka tambak, atik pe holan tu Jahowa, Debatanasida i nian.

¹⁸(III.) Alai jamita na tinggal i dope sian si Manasse ro di tangiangna tu Debatana dohot

angka hata sipaingot sian angka panurirang, angka na marsipaingot tu ibana marhite sian Goar ni Jahowa, Debata ni Israel, ida ma, tarsurat do angka i di bagasan buku jamita ni angka raja sian Israel.

¹⁹Nang tangiangna dohot panangihon ni Debata disi, ro di sude dosana dohot hajahatonna, ro di hajongjongan ni angka tambak pinaulina disi huhut bahen hajongjongan ni angka sombaon Asera dohot ganaganaan angka na niuhir, tagan so dipaunduk dope rohana, ida ma, tarsurat do angka i di bagasan buku ni halak partondung.

²⁰Dung i monding ma si Manasse gabe top dohot angka ompuna, jala tartanom ibana di bagasan jabuna sandiri; jadi si Amon, anakna i, bangkit raja singkatna.

²¹(IV.) Marumur duapulu dua taon si Amon di na bangkit raja ibana, jala dua taon lelengna ibana mangarajai di Jerusalem.

²²Jala diulahon ibana do sogo ni roha ni Jahowa, suang songon na binahen ni si Manasse amana i; huhut mamele do si Amon tu saluhut ganaganaan, angka na niuhir ni si Manasse amana i, jala marsomba do ibana tusi.

²³Alai ndang anggo dipaunduk rohana di adopan ni Jahowa, songon pangundukkon ni si Manasse amana i, lam dipagodang si Amon tahe salana.

²⁴Dung i marbulan ma angka naposona mangalo ibana, laos ditodos ma ibana di bagasan jabuna sandiri.

²⁵Alai ro ma situan na torop isi ni luat i, dibunu ma sude halak na marbulan mangalo raja Amon; laos dipabangkit situan na torop isi ni luat i ma si Josia, anakna i, gabe raja singkatna.

34¹(I.) Marumur ualu taon si Josia di na bangkit raja ibana, jala tolupulu sada taon lelengna ibana mangarajai di Jerusalem.

²Jala diulahon do lomo ni roha ni Jahowa, jala marparange ibana di angka dalan ni si Daud, ompuna i, jala ndang manimbil ibana tu siamun manang tu hambirang.

³Ai paualutaonhon hinarajaonna i, uju bajar dope ibana, nunga dipungka mangalului Debata ni si Daud, ompuna i, jala pasampuluduataonhon, dipungka ma manguras Juda dohot Jerusalem sian angka tambak dohot sombaon Asera dohot ganaganaan angka na niuhir dohot na tinuang.

⁴Dung i di adopan ni raja dilohai halak angka langgatan pamelean tu Baal, jala angka tiang na jongjong di atasna dilobongi, jala ditaba angka sombaon Asera jala dibolahon ganaganaan angka na niuhir dohot na tinuang, laos disirabuni do jala disirsirhon tu atas tanoman ni halak angka na mamele tusi.

⁵ Ditung huhut holiholi ni angka malim di atas langgatannasida, asa manguras Juda dohot Jerusalem.

⁶ Nang di bagasan angka huta ni Manasse, Epraim, Simeon sahat tu Naptali di bagasan angka halongonan humaliang.

⁷ Dilohai rajai huhut angka langgatan dohot sombaon Asera dohot ganaganaan angka na niuhir, laos ditapori jala digopui jala sude angka tiang panombanombaan dilobongi do di sandok tano Israel, dung i mulak ibana tu Jerusalem.

⁸ (II.) Pasampuluualutaonhon hinarajaonna i, dung sun diuras tano i dohot joro i, disuru ma si Sapan, anak ni si Azalia dohot si Maaseia, induk ni huta i dohot si Joa, anak ni si Joahas, juaratulis i, asa umbanonna joro ni Jahowa, Debatana i.

⁹ Jadi ro ma nasida manopot sintua ni malim Hilkia, jala dipasahat tu ibana perak, naung binoan tu joro ni Debata, na pinapungupungu ni halak Lepi, angka sijaga pintu mardonokkon lobulobu, sian tangan ni halak Manasse dohot Epraim dohot sian sandok pasipasi ni Israel dohot sian sandok Juda dohot Benjamin dohot sian angka isi ni Jerusalem.

¹⁰ Dipasahat nasida do i muse tu bagasan tangan ni tungkang, angka panahatan ni ulaon di joro ni Jahowa; jala nasida muse mangalehon perak i tu halak angka na

mangula di joro ni Jahowa, laho mangumban dohot patoguhon joro i.

¹¹ Ai dilehon nasida do i tu angka tungkang hau dohot tungkang batu, asa dituhor nasida angka batu na nidakdak dohot parhau bahen gulanggulang dohot bahen tiang singkop tu bagas angka naung niloha ni angka raja sian Juda.

¹² Marhaburjuon be angka baoa i mangaradoti ulaon i; aijolma panahatannasida i, i ma: Si Jahat, dohot si Obaja halak Lepi sian pinompar ni si Merari; tole muse si Sakaria dohot si Mesulam sian pinompar ni si Kohat, angka na mangaringkoti ulaon i; tole halak Lepi sude do nasida pande umpalu parhinaloan.

¹³ Nasida huhut panahatan ni halak parhuli dohot manguluhon saluhut halak tu ulaon marragamragam; adong huhut sian halak Lepi angka juaratulis dohot panuturi dohot sijaga pintu.

¹⁴ Jadi dung diparuar nasida perak na binoan tu bagasan joro ni Jahowa, jumpang malim Hilkia ma buku patik ni Jahowa, na nilehon marhite sian si Musa.

¹⁵ Dung i ro ma hata ni si Hilkia mandok tu si Sapan, juaratulis i: Nunga jumpang ahu buku patik di bagasan joro ni Jahowa! Laos dilehon si Hilkia ma buku i tu si Sapan.

¹⁶ Alai diboan si Sapan muse buku i tu rajai, laos diboan huhut barita, tu rajai songon on:

Saluhut na pinasahat tu angka naposom,
diula nasida do i.

¹⁷Nunga diusehon nasida perak na jumpang
i di bagasan joro ni Jahowa, jala dilehon do i
tu halak panahatan ulaon dohot tu halak na
mangaradoti ulaon i.

¹⁸Angkup ni dipaboa si Sapan, juaratulis i tu
rajai barita on: Nunga dilehon malim Hilkia
sada buku tu ahu. Jadi dijaha si Sapan ma
buku i di adopan ni rajai.

¹⁹(III.) Jadi dung dibege rajai angka hata ni
buku patik i, disansani ma pangkeanna.

²⁰Dung i ro ma hata ni rajai mandokkon si
Hilkia dohot si Ahikam, anak ni si Sapan dohot
si Akbor, anak ni si Mika dohot si Sapan,
juaratulis i dohot si Asaya, parhalado ni rajai,
ninna ma.

²¹Laho ma hamu manungkunhon tu Jahowa
taringot tu ahu dohot taringot tu jolma
pasipasina di Israel dohot di Juda ala ni angka
hata ni buku na jumpang i; ai tung na balga
situtu do rimas ni Jahowa, na niusehonna tu
hita, ala na so diradoti angka ompunta hata
ni Jahowa, mangulahon nian luhut na tarsurat
di bagasan buku on.

²²Dung i laho ma si Hilkia rap dohot angka
na ginoar ni rajai manopot panurirang
Nai Hulda, jolma ni si Sallum, anak ni si
Tikpa, anak ni si Hasra, siramoti pangkean.
Alai maringan do Nai Hulda di Jerusalem

partoruan, gabe mangkatai nasida patolhas tona i tu ibana.

²³Dung i ninna Nai Hulda ma tu nasida: Songon on do hata ni Jahowa, Debata ni Israel: Paboa hamu ma tu baoa na marsuru hamu manopot ahu:

²⁴Songon on do hata ni Jahowa: Ida ma, paroonku ma jea tu huta on dohot tu jolma isina i, hombar tu saluhut torutoru angka na tarsurat di bagasan buku i, naung jinaha di adopan ni raja sian Juda.

²⁵Ala naung tinadingkonnasida i Ahu, jala manutung daupa nasida tu angka debata sileban, asa pahehe rimashu marhite sian sude pambahenan ni tangannasida; dibahen i ingkon usehononhon rimashu tu inganan on, jala ndang be haintopan.

²⁶Alai anggo tu raja sian Juda, na marsuru hamu laho manungkunhon tu Jahowa, ingkon songon on do dohononmuna: Boti hata ni Jahowa, Debata ni Israel, anggo taringot tu hata angka naung binegem i:

²⁷Ala naung mangilala roham, jala dipaunduk ho dirim di adopan ni Debata, dung dibege ho hata angka na nilumbahonna i dompak huta on dohot dompak jolma pangisina i; ala naung dipaunduk ho tutu dirim di adopan ni Bohingku, nunga pola diribahi ho pangkeanmu huhut tumatangis di adopan ni Bohingku, Ahu pe, nunga hutangihon ho, ninna Jahowa.

²⁸Ida ma, Ahu sandiri papunguhon ho tu angka ompum, asa marsonangsonang ho papunguonna tu bagasan tanomanmu, asa unang sanga idaon ni matami saluhut jea na naeng paroonku tu atas ni huta on dohot tu atas ni jolma pangisina i. Jadi diboan nasida ma hata alusi tu rajai.

²⁹(IV.) Dung i disuru rajai ma suruanna asa paluhuthon saluhut sintua sian Juda dohot Jerusalem.

³⁰Dung i nangkok ma rajai tu joro ni Jahowa, rap dohot sude baosa sian Juda dohot pangisi ni Jerusalem, ro di angka malim dohot halak Lepi dohot sandok situasi na torop i, tole angka na magodang ro di na metmet; laos didokkon ma manjaha tu pinggolnasida saluhut hata ni buku parjanjian, na jumpang i di bagasan joro ni Jahowa.

³¹Dung i jongjong ma rajai tu hajongjonganna hian, asa mambahen parpadanan di adopan ni Jahowa, ingkon mangihuthon tu Jahowa dohot mangaradoti angka tonana dohot panindangionna dohot aturanna sian nasa rohana be dohot sian nasa ateatena laho mangulahon angka hata ni parjanjian, angka na tarsurat di bagasan buku on.

³²Dung i didokkon rajai ma jongjong mangundukkon parjanjian i sude jolma na jumpang di Jerusalem dohot di Benjamin. Jadi dibahen isi ni Jerusalem ma hombar tu

hata ni parjanjian ni Debata, i ma Debata ni ompunasida i.

³³Dung i didokkon si Josia ma paholongan saluhut ganaganaan biasbias sian sandok luat angka na niinganan ni Israel, jala dipatik sandok jolma angka na jumpang di Israel, ingkon mangoloi di Jahowa, Debatanasida i. Jadi saleleng mangolu rajai, ndang sumurut nasida sian Jahowa, Debata ni ompunasida i.

35¹(I.) Dung i marulaon Paska ma si Josia tu Jahowa di Jerusalem, jala diseat nasida birubiru Paska di ari sampulu opat bulan sipaha sada.

²Laos rajai mandokkon angka malim mangaradoti tohonannasida i, jala dipapir tondinasida i mangaradoti ulaon di joro ni Jahowa.

³Ro huhut hatana tu halak Lepi, angka na mangajari sandok halak Israel, jala naung pinarbadian di Jahowa: Bahen hamu ma poti na badia i tu bagasan joro naung pinajongjong ni si Salomo, anak ni si Daud, raja sian Israel; ndang pola be sorat abaramuna mangusung; dibahen i marpangoloion tu Jahowa, Debatamuna i ma hamu rap dohot bangsona Israel.

⁴Antong diri ma hamu marhalado mangihuthon pargansionmuna marsasaama, songon na tarsurat di bagasan buku sinurat ni si Daud, raja sian Israel dohot si Salomo anakna i.

⁵Ingkon jongjong ma hamu di bagasan inganan na badia i, marguru tu parsagi ni pinomparmuna marompuompu di tongatonga ni hahaanggimuna, i ma halak Israel i, huhut marguru tu pinompar ni halak Lepi marompuompu.

⁶Dung i seati hamu ma birubiru Paska i, jala manguras ma hamu jala padiri hamu Paska i di hahaanggimuna i, asa diulahon nasida hombar tu hata ni Jahowa marhite sian si Musa.

⁷Dung i dibasabasahon si Josia ma tu situasi na torop i angka birubiru, angka anak ni birubiru dohot anak ni haming, luhutna i bahen pelean Paska di sude jolma na disi, tolupulu ribu kibung toropna; angkup ni tolu ribu lembu; luhutna i sian ugasan ni rajai do.

⁸Angka indukna pe girgir be do mangalehon tu situasi na torop, tu angka malim dohot tu halak Lepi bahen pelean Paska, si Hilkia, si Sakaria dohot si Jeiel, na tolu induk i di bagasan joro ni Debata mangalehon tu angka malim dua ribu onom ratus birubiru angkup ni tolu ratus lembu bahen pelean Paska.

⁹Ia si Hanania, si Semaya dohot di Netaneel, anggina i dohot si Hasabya, si Jeiel dohot si Josabad, angka induk ni halak Lepi, i ma mangalehon tu halak Lepi lima ribu birubiru dohot lima ratus lembu bahen pelean Paska.

¹⁰Songon i ma pangaturna di ulaon i, jongjong tahe angka malim

dihajongjongannasida, nang halak Lepi marguru tu pargansionnasida, hombar tu tona ni rajai.

¹¹Dung i diseat nasida ma birubiru Paska i, jala angka malim i mamistikkon mudar i sian tangannasida; ianggo halak Lepi dibobahi do angka pelean Paska.

¹²Dung i dipapulik nasida ma angka pelean situtungon, asa lehononna marguru tu rongkanaan ni pinomparnasida marompuompu di tongatonga ni halak Israel, asa pelehononna tu Jahowa, hombar tu na tarsurat di buku ni si Musa; suang songon i dibahen tu angka lembu i.

¹³Dung i dipanggang nasida ma Paska i di atas api, songon na somal hian. Alai anggo naung pinarbadian i, dilompa nasida do i di bagasan hudon dohot seret dohot balanga, hatop do dibagi tu situasi na torop i.

¹⁴Dung i diparade ma dohot di nasida sandiri dohot di angka malim i, ai angka malim, i ma pinompar ni si Aron, pola sanga borngin nasida mamelehon angka pelean situtungon dohot tabotabo. Ala ni do umbahen ingkon halak Lepi marhobas di nasida sandiri dohot di angka malim, pinompar ni si Aron.

¹⁵Tole angka parende, pinompar ni si Asap, jongjong di hajongjonganna be, hombar tu aturan na binahen ni si Daud, si Asap, si Heman dohot si Jedutun, partondung ni rajai; tole angka sijaga pintu jumaga pintuna be;

ndada ingkon pola meret nasida sian ulaonna be, ai hahaangginasida, halak Lepi, marhobas di nasida.

¹⁶Jadi maraturan ma sandok pangoloion tu Jahowa di ari na sasada i, asa tarbahen marulaon Paska dohot mamelehon angka pelean situtungon di atas langgatan ni Jahowa, hombar tu patik ni raja Josia.

¹⁷Jadi marulaon Paska ma halak Israel angka na disi uju i, tole marari raya sagusagu na so niasoman pitu ari lelengna.

¹⁸Ndang dung masa ulaon Paska songon sahalion di Israel, olat ni tingki ni panurirang Samuel; ndang dung marulaon Paska nanggo sada sian angka raja ni Israel, songon na binahen ni si Josia dohot angka malim dohot halak Lepi dohot sandok Juda, nang Israel na disi uju i ro di isi ni Jerusalem.

¹⁹Pasampuluualutaonhon harajaon ni si Josia masa ulaon Paska on.

²⁰(II.) Dung salpu saluhutna i, dung diumban si Josia joro i, nangkok ma si Neko, raja sian Misir naeng marporang dompak Karkemis martopihon sunge Euprat. Jadi borhat ma si Josia manjumpangkon ibana.

²¹Alai disuru ma suruanna mandok tu ibana: Aha parkarongku tu ho, ale raja sian Juda? Ndada mandopang ho ahu ro anggo sadarion, dompak pinompar ni musungku tihus hian do; pola dohot Debata mandok, ingkon hatop langkangku; dibahen i jaga dirim maradophon

Debata na mandongani ahu, asa unang agoonna ho!

²²Alai ndang olo si Josia paundaronna, lam patinda rupa ibana naeng marporang dompak ibana, jala ndang ditangihon hata ni si Neko, angka na sian pamangan ni Debata, lam sahat ibana tu rura Megiddo asa marporang.

²³Hape manior halak parsior i, gabe hona raja Josia. Dung i didok rajai ma tu naposona: Boan hamu ma ahu sian on, ai nunga targisik bugangku.

²⁴Jadi dihindat angka naposona ibana sian hureta porang, jala diampehon ibana tu huretana paidua laho mamboan ibana tu Jerusalem. Dung i mate ma rajai jala tartanom di bagasan parbandaan ni angka ompuna. Jadi sandok isi ni Juda dohot Jerusalem margondok ni roha mida si Josia.

²⁵(III.) Si Jeremia pe dibahen do sada ende andung taringot tu si Josia, jala saluhut parende baa dohot parompuan manaringoti goar ni si Josia di bagasan ende andungnasidai rasirasa sadarion; laos dibahen do angka i gabe hasomalan di Israel; jala ida ma, tarsurat do angka i di bagasan buku ende andung.

²⁶Jamita na tinggal i dope sian si Josia dohot hadaulaton ni rohana, hombar tu na tarsurat di bagasan buku patik ni Jahowa.

²⁷Jamitana pe angka na parjolo i dohot parpudi, ida ma, tarsurat do angka i di

bagasan buku ni angka raja sian Israel dohot Juda.

36¹ (I.) Dung i ro ma bangso isi ni tano i, dibuat ma si Joahas, anak ni si Josia, jala dipabangkit ibana gabe raja di Jerusalem singkat ni amana i.

²Marumur duapulu tolu taon si Joahas di na bangkit raja ibana, jala tolu bulan lelengna ibana mangarajai di Jerusalem.

³Ai dipaijur raja sian Misir ibana di Jerusalem, jala didando isi ni tano i saratus talenta perak dohot satalenta sere.

⁴Dung i dipabangkit raja sian Misir ma si Eliakim, anggina i, bahen raja gumomgom Juda dohot Jerusalem, jala dipaimbar goarna gabe si Joiakim; alai anggo si Joahas hahana i diboan raja Neko, ibana tu Misir.

⁵(II.) Marumur duapulu lima taon si Joiakim di na bangkit raja ibana, jala sampulu sada taon lelengna ibana mangarajai di Jerusalem; jala diulahon do sogo ni roha ni Jahowa, Debatana.

⁶Dung i nangkok ma si Nebukadnesar, raja sian Babel mangalo rajai, laos dirante ma ibana dohot dua rante tombaga laho mamboan ibana tu Babel.

⁷Sian ulaula angka na di bagasan joro ni Jahowa pe, diboan si Nebukadnesar deba tu Babel, jala dibahen do i tu bagasan jorona di Babel.

⁸Jamita na tinggal i dope sian si Joiakim, ro di biasbias angka na niulana ro di hajahaton na asing na jumpang sian ibana, ida ma, tarsurat do i di bagasan buku jamita ni angka raja sian Israel dohot Juda. Jadi si Joiakin anakna i bangkit raja singkatna.

⁹(III.) Marumur sampulu ualu taon si Joiakin di na bangkit raja ibana, jala tolu bulan sampulu ari lelengna mangarajai di Jerusalem, jala diulahon do sogo ni roha ni Jahowa.

¹⁰Alai dung salpu sataon, disuru raja Nebukadnesar ma suruanna mamboan ibana tu Babel rap dohot ulaula angka na arga di joro ni Jahowa, jala dipabangkit si Sedekia amana i gabe raja gumomgom Juda dohot Jerusalem.

¹¹(IV.) Marumur duapulu sada taon si Sedekia di na bangkit raja ibana, jala sampulu sada taon lelengna mangarajai di Jerusalem.

¹²Jala diulahon ibana do sogo ni roha ni Jahowa, Debatana i, jala ndang dipaunduk dirina maradophon panurirang Jeremia, na patolhas hata ni Jahowa tu ibana.

¹³Angkup ni i manggunturi ibana dompak raja Nebukadnesar naung patolon ibana tu Debata, hape dipajogal ibana tangkuhukna jala ditangkangi rohana, asa unang mulak rohana tu Jahowa, Debata ni Israel.

¹⁴Nang sude induk ni angka malim dohot situasi na torop i, godang situtu hajahaton

diula, suman tu sandok biasbias angka na niulahon ni angka bangso parbegu, gari joro ni Jahowa na pinarbadaanna di Jerusalem diramuni nasida do.

¹⁵Angkup ni i tibu hian jala jotjot disuru Jahowa, Debata ni ompunasida i palumba nasida marhite sian angka suruanna, ai dipalambas do rohana mangolani bangsona dohot joro ingananna i.

¹⁶Hape lam dilealeai nasida angka suruan ni Debata jala ditoishon rohana hata sipaingotna i, jala diengkelengkel angka panurirangna, paima marpiarpiar situtu rimas ni Jahowa tu bangsona, maradu so haintopan be.

¹⁷Ai didokkon ibana ma nangkok raja ni halak Kasdim mandopang nasida, gabe dibunu angka dolidolinasida marhite sian podang di bagasan joronasida na badia i, jala ndang maralangalang rohana mida dolidoli manang namarbaju, nang mida halak na matua dohot na ubanon; tung luhutna do i dipasahat tu tanganna.

¹⁸Tole nasa ulaula di joro ni Debata, angka na balga dohot na metmet ro di arta angka na di joro ni Jahowa, nang angka arta ni rajai dohot angka indukna, saluhutna i tarboan do tu Babel.

¹⁹Ia joro ni Debata disurbu nasida do, jala dilohai angka parik ni Jerusalem jala sude bagas bolon na disi suda disurbu nasida dohot

api; jadi mago ma sandok ulaulanasida angka na arga i.

²⁰Jala pasipasina angka na malua sian podang, dibuangkon do tu Babel, gabe naposo ni rajai nasida dohot naposo ni angka anakna, sahat ro di panggomgoman ni harajaon Persia.

²¹Asa tung sintong jumpang hata ni Jahowa marhite sian pamangan ni si Jeremia, paima diparhasiholi tano i angka Sabbatna; ai saleleng hauulangna maradian do tano i, paima boho na pitupulu taon i.

²²(V.) Alai di taon parjolo hinarajahon ni si Sirus, raja sian Persia, asa tung sintong jumpang hata ni Jahowa marhite sian pamangan ni si Jeremia, disunggul Jahowa ma tondi ni si Sirus, raja sian Persia, asa disuru martingting tu sandok gomgomanna, pola mardongan surat mandok.

²³Songon on do hata ni si Sirus, raja sian Persia: Nunga sahat tu ahu saluhut harajaon di tano on, dilehon Jahowa, Debata na di surgo, jala Ibana marsuru ahu pajongjong di Ibana sada joro di Jerusalem, na di tano Juda. Manang ise nuaeng sian hamu, sian bangsona, sai didongani Jahowa, Debatana, ma ibana asa nangkok!

Ezra

1 ¹ (I.) Di taon parjolo hinarajahon ni si Sirus, raja sian Persia, asa pasintongkon hata ni Jahowa marhite sian pamangan ni si Jeremia, disunggul Jahowa ma tondi ni si Sirus, raja sian Persia, asa disuru martingting tu sandok gomgomanna, pola mardongan surat mandok:

² Songon on do hata ni si Sirus, raja sian Persia: Nunga sahat tu ahu saluhut harajaon di tano on, dilehon Jahowa, Debata di surgo, jala Ibana marsuru ahu pajongjong di Ibana sada joro di Jerusalem, na di tano Juda.

³ Manang ise sian hamu, sian sandok bangsona i, sai didongani Debatana ma ibana, asa nangkok tu Jerusalem, na di tano Juda, asa dipajongjong joro ni Jahowa, Debata ni Israel, Ibana do Debata na mian di Jerusalem.

⁴ Jala manang ise na tinggal dope di saluhut inganan paisolatanna i, songon halak dagang, ingkon tolongon ni angka baoa donganna sahuta ibana marhite sian perak, sere, sinamot dohot pinahan, angkup ni silehonlehon sian lomo ni rohana tu joro ni Debata, na di Jerusalem.

⁵ (II.) Jadi hehe ma angka induk sian Juda dohot Benjamin marompuompu, ro di angka malim dohot halak Lepi, sude tahe

angka na sinunggul ni Debata tondina i laho nangkok, asa pajongjong joro ni Jahowa, na di Jerusalem.

⁶Dung i luhut jolma angka na humaliang nasida margogoihon tangannasida marhite sian angka ulaula perak dohot sere, tole sinamot dohot pinahan dohot arta angka na arga, so padohot saluhut silehonlehon tu joro sian lomo ni rohana.

⁷Diparuar raja Sirus huhut ulaula ni joro ni Jahowa, angka naung binoan ni si Nebukadnesar sian Jerusalem, jala naung binahenna tu bagasan joro ni debatana.

⁸Jadi didokkon si Sirus, raja sian Persia, paruaron ni si Mistredat, siramoti arta angka i, jala bilanganna angka i tu si Sesbasar, induk ni halak Juda.

⁹Jala on do bilanganna: Angka saolan sere tolupulu, angka saolan perak saribu, angka raut duapulu sia.

¹⁰Angka panginuman sere tolupulu angka panginuman perak paidua opat ratus sampulu, ulaula angka na asing saribu.

¹¹Luhut angka ulaula sere dohot perak lima ribu opat ratus do. Luhutna i diboan si Sesbasar nangkok manguluhon angka na tarbuang sian Babel tu Jerusalem.

2¹(I.) Jala on do pinompar ni Juda marluatluat, angka na nangkok sian habuangan, angka na binuangkon ni si Nebukadnesar, raja sian Babel tu Babel, jala

angka na mulak tu Jerusalem dohot tu Juda,
ganup tu hutana be.

²Angka na ro rap dohot si Serubabel, si
Josua, si Nehemia, si Seraia, si Reelaia, si
Mordahai, si Bilsan, si Mispar, si Bigpai, si
Rehum dohot si Baana. On do bilangan ni
angka baoa sian bangso Israel.

³Pinompar ni si Paras dua ribu saratus
pitupulu dua.

⁴Pinompar ni si Sepatia tolu ratus pitupulu
dua.

⁵Pinompar ni si Ara pitu ratus pitupulu lima.

⁶Pinompar ni si Pahat-Moab, sian pinompar
ni si Jesua-Joab dua ribu ualu ratus sampulu
dua.

⁷Pinompar ni si Elam saribu dua ratus
limapulu opat.

⁸Pinompar ni si Jattu siaratus opatpulu lima.

⁹Pinompar ni si Sakai pitu ratus onompulu.

¹⁰Pinompar ni si Bani onom ratus opatpulu
dua.

¹¹Pinompar ni si Bebai onom ratus duapulu
tolu.

¹²Pinompar ni si Asgad saribu dua ratus
duapulu dua.

¹³Pinompar ni si Adonikam onom ratus
onompulu onom.

¹⁴Pinompar ni si Bigpai dua ribu limapulu
onom.

¹⁵Pinompar ni si Adin opat ratus limapulu
opat.

¹⁶Pinompar ni si Ater sian si Hiskia siapulu ualu.

¹⁷Pinompar ni si Bisia tolu ratus duapulu tolu.

¹⁸Pinompar ni si Jora saratus sampulu dua.

¹⁹Pinompar ni si Hasum dua ratus duapulu tolu.

²⁰Pinompar ni si Gibar siapulu lima.

²¹Pinompar sian Betlehem saratus duapulu tolu.

²²Angka baoa sian Netopa limapulu onom.

²³Angka baoa sian Anatot saratus duapulu ualu.

²⁴Pinompar sian Asmapet opatpulu dua.

²⁵Pinompar sian Kiriath Jearim, Kepira dohot Beerot pitu ratus opatpulu tolu.

²⁶Pinompar sian Rama dohot Geba onom ratus duapulu sada.

²⁷Angka baoa sian Mikhmas saratus duapulu dua.

²⁸Angka baoa sian Betel dohot Ai dua ratus duapulu tolu.

²⁹Pinompar sian Nebo limapulu dua.

³⁰Pinompar ni si Magbis saratus limapulu onom.

³¹Pinompar ni si Elam na asing saribu dua ratus limapulu opat.

³²Pinompar ni si Harim tolu ratus duapulu.

³³Pinompar ni si Lod, si Hadid dohot si Ono pitu ratus duapulu lima.

³⁴ Pinompar sian Jeriko tolu ratus opatpulu lima.

³⁵ Pinompar sian Sena tolu ribu onom ratus tolupulu.

³⁶ Angka malim: Pinompar ni si Jedaia sian pinompar ni si Jesua sia ratus pitupulu tolu.

³⁷ Pinompar ni si Immer saribu limapulu dua.

³⁸ Pinompar ni si Pashur saribu dua ratus opatpulu pitu.

³⁹ Pinompar ni si Harim saribu sampulu pitu.

⁴⁰ Halak Lepi: Pinompar ni si Jesua dohot si Kadmiel, sian pinompar ni si Hodapia, pitupulu opat.

⁴¹ Angka parende: Pinompar ni si Asap saratus duapulu ualu.

⁴² Pinompar ni angka sijaga pintu: Pinompar ni si Sallum, pinompar ni si Ater, pinompar ni si Talmon, pinompar ni si Akkub, pinompar ni si Hatita, pinompar ni si Sobai, luhutna i saratus tolupulu sia.

⁴³ Angka Netinim: Pinompar ni si Siha, pinompar ni si Hasupa, pinompar ni si Tabaot.

⁴⁴ Pinompar ni si Keros, pinompar ni si Siaha, pinompar ni si Padon.

⁴⁵ Pinompar ni si Lebana, pinompar ni si Hagaba, pinompar ni si Akkub.

⁴⁶ Pinompar ni si Hagab, pinompar ni si Salmai, pinompar ni si Hanan.

⁴⁷ Pinompar ni si Gidel, pinompar ni si Gohar, pinompar ni si Reia.

⁴⁸Pinompar ni si Resin, pinompar ni si Nekoda, pinompar ni si Gasam.

⁴⁹Pinompar ni si Usa, pinompar ni si Pasea, pinompar ni si Bisia.

⁵⁰Pinompar ni si Asna, pinompar ni si Meunim, pinompar ni si Nepusim.

⁵¹Pinompar ni si Bakbuk, pinompar ni si Hakupa, pinompar ni si Harhur.

⁵²Pinompar ni si Baslut, pinompar ni si Mehida, pinompar ni si Harsa.

⁵³Pinompar ni si Barkos, pinompar ni si Sisera, pinompar ni si Tama.

⁵⁴Pinompar ni si Nesia, pinompar ni si Hatipa.

⁵⁵Pinompar ni angka naposo ni si Salomo: Pinompar ni si Sotai, pinompar ni si Soperet, pinompar ni si Perida.

⁵⁶Pinompar ni si Jaala, pinompar ni si Darkon, pinompar ni si Gidel.

⁵⁷Pinompar ni si Sepatia, pinompar ni si Hatil, pinompar ni si Rokeret Hasebaim, pinompar ni si Ami.

⁵⁸Luhut angka Netinim dohot pinompar ni angka naposo ni si Salomo tolu ratus siapulu dua.

⁵⁹Jala on do huhut angka na nangkok sian Tel-Mela, Tel-Harsa, Kerub, Addon dohot Immer; alai ndang tarpajojor nasida pinompar ni amanasida i, manang pinomparna sandiri pe, manang tung sian halak Israel nasida.

⁶⁰Pinompar ni si Delaia, pinompar ni si Tobia, pinompar ni si Nekoda, onom ratus limapulu dua.

⁶¹Jala sian pinompar ni angka malim: Pinompar ni si Habai, pinompar ni si Hakos, pinompar ni si Barsilai na mambuat boru sian si Barsilai, halak Gilead bahenjolmana, laos dibuat goarna i.

⁶²Angka i ma mandiori surat aturan ni partubunasida, alai ndang jumpangsa, jadi ramun nasida dietong, laos dipabali nasida sian hamalimon.

⁶³Dung i ro ma hata ni pangarajai mandok tu nasida: Tung na so jadi do nasida mangan sian na badia sahali, paima adong hehe malim sada mangkajongjongkon Urim dohot Tummum.

⁶⁴Sandok luhutan i hira sahalak do, opatpulu dua ribu tolu ratus onompulu halak toropna.

⁶⁵So padohot angka naposonasida baoa dohot parompuan, pitu ribu tolu ratus tolupulu pitu halak toropna; mangihut tu nasida do halak parende baoa dohot parompuan dua ratus halak toropna.

⁶⁶Ia hodanasida pitu ratus tolupulu onom, ia hodanasida angka na marsahe dua ratus opatpulu lima.

⁶⁷Ia untonasida opat ratus tolupulu lima, ia halodenasida onom ribu pitu ratus duapulu.

⁶⁸(II.) Jadi dung sahat deba induk marompuompu tu joro ni Jahowa na di

Jerusalem, margugu ma nasida sian lomona tu joro ni Debata, asa pajongjongonna di hajongjonganna hian.

⁶⁹Marguru tu gogonasida dilehon nasida pasingkop bohal tu ulaon i onom loksa saribu dirham sere, jala lima ribu hati perak, angkup ni saratus salinan pangkean malim.

⁷⁰Jadi maringan ma angka malim dohot halak Lepi, nang sian situasi na torop i, ro di halak parende dohot sijaga pintu dohot halak Netinim di bagasan hutana be, sandok Israel pe di bagasan hutana be maringan.

3¹ (I.) Jadi dung jumpang bulan sipaha pitu, jala maringan di bagasan hutana be halak Israel, marluhut ma bangso i, hira sahalak do, tu Jerusalem.

²Jadi hehe ma si Josua, anak ni si Josadak, rap dohot hahaanggina, i ma angka malim i dohot si Serubabel, anak ni si Sealtiel, ro di hahaanggina, asa nasida paulihon langgatan pamelean tu Debata ni Israel, mamelehon di atasna angka pelean situtungan, songon na tarsurat di bagasan buku patik ni si Musa, halak ni Debata.

³Jadi dipaojak nasida ma langgatan i di atas hajongjonganna hian (atik pe tahuton nasida maradophon angka bangso marluatluat), tole do nasida mamelehon di atasna angka pelean situtungan tu Jahowa, angka pelean situtungan manogotna i dohot bodarina i.

⁴Marari raya parlapelapean nasida huhut, songon na tarsurat i, mardongan pelean situtungan siganup ari, mangihuthon bilangan hombar tu uhum hian toropna ariari.

⁵Tole songon i muse dipelehon angka pelean situtungan hian ariari dohot di poltak ni bulan dohot di saluhut ari raya tu Jahowa, angka naung pinarbadian hian, ro di sude pelean na pinelehon sian lomo ni roha tu Jahowa.

⁶Olat ni artia bulan sipahapitu dipungka nasida mamelehon angka pelean situtungan tu Jahowa; alai anggo joro ni Jahowa ndang dope dipaojak.

⁷Dung i dilehon nasida hian ma perak tu halak pande batu dohot hau, angkup ni sipanganon, siinumon dohot miak tu halak Sidon dohot Tirus, asa diboan nasida hau Ares sian Libanon mardalan sian laut sahat tu Joppe, hombar tu parenta ni Sirus, raja sian Persia tu nasida.

⁸(II.) Alai paduataonhon dung sahat nasida tu joro ni Debata di Jerusalem, di bulan sipaha dua, dipungka si Serubabel, anak ni si Sealtiel dohot si Josua, anak ni Josadak, ro di pasipasi ni hahaangginasida i, i ma angka malim dohot halak Lepi, ro di sude angka naung mulak sian habuangan ro tu Jerusalem, jala dipabangkit nasida halak Lepi olat ni na marumur duapulu taon tu ginjang, mangaradoti ulaon di joro ni Jahowa.

⁹Jongjong huhut disi si Josua rap dohot anakna dohot hahaanggina, si Kadmiel pe rap dohot angka anakna, ro di halak Juda, hira sahalak do mangaranapi angka jolma na mangaradoti ulaon di joro ni Debata, tole pinompar ni si Henadad ro di anaknasida dohot hahaanggina, i ma halak Lepi.

¹⁰Jadi dung dibahen angka pande ojanan ni joro ni Jahowa, jongjong ma angka malim marpangkean be, patioptiop sarune dohot halak Lepi, pinompar ni si Asap mardongan parhinaloan laho mamujimuji Jahowa, hombar tu aturan na binahen ni si Daud, raja sian Israel.

¹¹Jadi marende taripar nasida mamujimuji dohot mandok mauliate tu Jahowa, ala pardengganbasa Ibana, jala ro di salelenglelengna asi ni rohana i mida Israel. Jadi sandok bangso i pangiar soarana marolopolop mansai gogo laho mamujimuji Jahowa, ala naung dibahen ojanan ni joro ni Jahowa.

¹²Alai torop do sian angka malim dohot halak Lepi ro di angka induk marompuompu, angka na tuatua, angka na sanga marnida joro parjolo i, dung diida nasida ojanan di bagas i tumatangis be do nasida marsoara godang; alai torop halak huhut marolopolop sian las ni rohana, pola dipangiar soarana i.

¹³Jadi ndang tarsirang halak situasi na torop i soara olopolop dibahen las ni roha sian soara

partangison ni bangso i: Ai tung marsoara na gogo situtu bangso i marolopolop pola tarbege soara i tu na dao.

4¹ (I.) Alai dung dibege angka musu ni halak Juda dohot Benjamin, naung tole hape halak na mulak sian habuangan i paulihon sada joro tu Jahowa, Debata ni Israel.

²Ro ma nasida mandapothon si Serubabel dohot angka induk i marompuompu, ninna ma mandok nasida: Donganmuna ma hami paulihon; ai suang songon hamu naeng luluannami Debatamuna i; nunga pola hami mamelehon angka pelean tu Ibana olat ni tingki ni Asarhadon, raja sian Assur, na marsuru hami nangkok tuson.

³Alai ro ma hata ni si Serubabel dohot si Josua dohot pasipasi ni angka induk sian Israel marompuompu mandok tu nasida: Ndang tama rap hamu dohot hami paulihon joro di Debatanami, holan hami sandiri pe paulihon di Jahowa, Debata ni Israel, hombar tu parenta ni raja Sirus, raja sian Persia tu hami.

⁴Jadi daukdauk ma tangan ni halak Juda dibahen halak isi ni luat i, manundatnundati nasida di ulaonna i.

⁵Pola mangalehon sisip nasida manggaji halak panuturi mangalo nasida, mangambatambat sangkapnasida i, saleleng mangolu si Sirus, raja sian Persia

sahat ro di harajaon ni si Darius; raja sian Persia.

⁶(II.) Alai dung bangkit raja Serses, di mula ni harajaonna i dope, manongos surat pangalualuan ma nasida dompak halak isi ni Juda dohot Jerusalem.

⁷Nang uju hinarajaon ni si Artasasta manongos surat ma si Bislam, si Mistredat dohot si Tabel ro di donganna satahi angka na asing tu si Artasasta, rajai sian Persia; tarsurat do surat i marhite sian surat dohot hata Ram.

⁸Si Rehum panuturi dohot si Simsai juaratulis i, manongoshon sada surat taringot tu Jerusalem tu raja Artasasta, songon on:

⁹Ia hami, si Rehum, panuturi dohot si Simsai, juaratulis i, ro di sude donganna satuptupan na asing, angka sian Dina, sian Aparsata, sian Tarpela, sian Aparsata, sian Ara, sian Babel, sian Susan, sian Deha dohot sian Elam.

¹⁰Ro di angka bangso na asing, angka naung nilopokkon ni Assurbanipal naung tarbarita i, jala disuru nasida maringan di angka huta ni Samaria dohot halak na asing tu bariba ni sunge Euprat.

¹¹On do hata ni surat, na tinongoshon nasida tu ibana, tu raja Artasasta, hami baoa angka naposom di bariba ni batang aek i songonsongon on:

¹²Na pabotohon ma hami tu rajai, ia halak Jahudi naung manadingkon ho mandapothon hami nangkok tu Jerusalem, naeng paulihon muse huta panggunturi dohot na jahat i, nunga pola sidung ne parikna jala dibahen ojahanna.

¹³On pe, na pabotohon ma hami tu rajai, tung suru ulahanna paulihon huta i jala sun angka parikna bahenonna, ndang tagamon gararonnasida be sohe, beo dohot gogo ni tano i gabe marhagigian angka rajai.

¹⁴Alai ala sude hami manggugut sira sian bagas ni rajai, jala ndang patut paidaidaonnami marlea rajai, ala ni do umbahen na hutongos hami suraton pabotohonsa tu rajai.

¹⁵Asa dohononmu halak mandiori buku parningotan sian angka ompum, jadi jumpang ho ma di bagasan buku i tarsurat, asa botoonmu huta panggunturi do huta on, pasusasusa angka raja dohot luat, sian na robi dope sai masa do hagunturon di bagasan huta i, umbahen laos diago huta i na jolo.

¹⁶Dibahen i umbahen na hupabotohon hami tu rajai, tung sura loasonmu paulionna muse huta on, jala pasunonna angka parikna, ndang tagamon adong be tinggal di bariba ni batang aek i masuk tu gomgomanmu.

¹⁷(III.) Dung i ditongos rajai ma sada surat tingting balosna i tu si Rehum, panuturi, dohot tu si Simsai, juaratulis i dohot tu

dongannasida satahi, angka na maringan di Samaria dohot tu halak na asing angka na maringan di bariba ni batang aek i: Dame ma di hamu! Songonsongon on:

¹⁸Ia surat naung tinongosmu tu hami, nunga tangkas dijaha di adopanku.

¹⁹Pintor mangalehon parenta ahu mandiori buku parningotan; jadi jumpang nasida ma tutu, olat ni na robi dope sai manggunturi huta i dompak angka raja, sai masa hagunturon dohot musu garembong di bagasan.

²⁰Angkup ni raja angka na marhuaso gumomgom huta i na jolo, pola sandok tano na di bariba ni batang aek i digomgomi nasida, pola manjalo sohe, beo dohot gogo ni tano i nasida ganup taon.

²¹Nuaeng pe, lehon hamu ma parenta mandokkon halak manundati angka baoa i, asa unang dipauli nasida muse huta i, nda jolo ro sian ahu parenta mangaloas.

²²Antong manat ma parateatehon hamu hata i, so tung marlemba hamu disi, asa unang lam ganda jea i, boasa tagonan marharugian angka rajai?

²³Jadi dung dijaha hata ni surat tinongos ni raja Artasasta di adopan ni si Rehum, panuturi dohot si Simsai, juaratulis i dohot dongannasida satahi, hapogan ma nasida laho tu Jerusalem mandapothon halak Juda manundatnundati nasida, pola gogo dibahen.

²⁴ Jadi mansohot ma ulaon di joro ni Debata di Jerusalem, laos mansohot do sahat ro di paduataonhon hinarajahon ni si Darius, raja sian Persia.

5¹ (I.) Alai anggo panurirang Haggai dohot Sakaria, anak ni si Ido rap manurirangi do nasida duansa marhite sian Goar ni Debata ni Israel tu halak Juda na di tano Juda dohot Jerusalem.

² Jadi hehe ma si Serubabel, anak ni si Sealtiel dohot si Josua, anak ni si Josadak, jala dipungka nasida muse pajongjong joro ni Debata na di Jerusalem, jala dongannasida do angka panurirang ni Debata na papir tondinasida i.

³ Laos di tingki uju i ro ma manopot nasida si Tatnai, pangarajai ni luat i sian bariba ni batang aek i dohot si Jetar Bosenai rap dohot donganna satahi, angka ninna ma tu nasida: Ise marsuru hamu pajongjong joro on dohot pasunhon angka parik on?

⁴ Jadi hudok hami ma tu nasida goargoar ni baoa angka na mangkasuhuthon pajongjong joro i.

⁵ Alai marpanatapon do ianggo mata ni Debatanasida tu angka sintua ni halak Juda, asa unang sanga dilohai halak nasida, paima sahat pangaluani tu si Darius, jala sanga ro mulak surat balosna.

⁶ (II.) Alai on do hata ni surat naung tinongos ni si tatnai, pangarajai ni tano di bariba

ni batang aek i dohot si Jetar Bosenai, ro di donganna satahi, i ma halak Aparsata i, angka na di bariba ni batang aek i tu raja Darius.

⁷Ia hata ni surat barita na tinongosnasida tu rajai songon on do: Dame godanggodang di raja Darius!

⁸Na hupabotohon hami tu rajai, nunga sahat hami tu tano Juda, tu joro ni Debata na timbul sahali, sian batu na balga angka na denggan binarbar dipauli nasida joro i, jala dorpina i dilampis dohot hau, mansai gira huhut ulaon i diula, jala manjadi marhite sian tangannasida sandiri.

⁹Nunga pola husungkun hami sintuanasida i, songon on hudok hami tu nasida: Atehe, ise naung marsuru hamu pajongjong joro on dohot pasunhon angka parik on?

¹⁰Nang goarnasida husungkun hami do tu nasida, naeng pabotohononnami nian tu ho, ala ni umbahen husurathon hami goargoar ni baoa angka na manguluhon nasida.

¹¹Alai on do hata alusnasida tu hami: Ia hami, naposo ni Debata sigomgom langit dohot tano on do hami, jala hupajongjong hami joro on, naung pinauli hian di tingki na robi, na pinajongjong ni sada raja ni Israel na timbul jala dipasidung.

¹²Alai dung dipahehe angka ompunami rimas ni Debata sigomgom langit i, gabe dipasahat nasida tu bagasan tangan ni si

Nebukadnesar, raja sian Babel, halak Kasdim i, na mangaloha joro on, jala dibuangkon bangso i tu Babel.

¹³Alai di taon parjolo hinarajahon ni si Sirus, raja sian Babel, dilehon raja Sirus i ma parenta mandokkon pajongjongon joro on di Debata.

¹⁴Nang ulaula sere dohot perak di bagasan joro ni Debata, angka na binuat ni si Nebukadnesar sian joro na di Jerusalem, jala binoanna tu bagasan joro na di Babel, nunga pola diparuar raja Sirus sian joro na di Babel, jala dipalumehon angka i tu sada halak na margoar Sesbasar, naung pinabangkitna gabe pangarajai di luat i.

¹⁵Dung i ninna rajai ma mandok ibana: Buat ma angka ulaula on, boan ma i tu joro na di Jerusalem, jala dokkon ma pajongjongon muse joro ni Debata di hajongjonganna hian.

¹⁶Jadi ro ma tutu Sesbasar i, saut ma tutu dibahen ojanan ni joro ni Debata di Jerusalem, jadi olat ni rasirasa nuaeng sai tole halak paulihon, alai ndang dope sidung.

¹⁷Nuaeng pe, molo denggan di roha ni rajai, didokkon ma manigati di bagasan jabu parpeopan arta ni rajai na di Babel, manang tutu jumpang disi surat parenta sian raja Sirus mandokkon pajongjongon joro ni Debata na di Jerusalem; manang beha pingkiran ni roha nirajai taringot tusi, ditongoshon ma tu hami!

6¹ (I.) Dung i didokkon raja Darius ma, ingkon dioran di bagasan jabu parpeopan ni surat parningotan, di bagasan jabu parpeopan arta ni rajai na di Babel.

²Jadi jumpang ma di Akmeta, di bagasan huta na gonting na di tano Madai, sada pustaha parningotan, songon on do hata na tarsurat disi:

³Di taon parjolo hinarajahon ni raja Sirus dilehon raja Sirus parenta taringot tu joro ni Debata na di Jerusalem: Ingkon pajongjongon muse di ingananna hian joro bahen pamelean, ingkon togu bahenon ojahanna, onompulu asta timbona jala onompulu asta bohangna.

⁴Ingkon tolu rinte batu na nidakdak bahen dorpina jala sarinte hau na imbaru; ia harugian tusi ingkon sian bagas ni rajai lehonon.

⁵Angkup ni ulaula sere dohot perak sian bagas ni Debata hian, angka naung binuat ni si Nebukadnesar sian joro na di Jerusalem, jala diboan tu Babel, ingkon paulahon do, asa dipasuang tu bagasan joro na di Jerusalem, tu ingananna hian, ingkon sahat tu joro ni Debata boanonna.

⁶Dibahen i, ho ale Tatnai, pangarajai di bariba ni batang aek Euprat dohot ho Jetar Bosenai, ro di donganmu satahi sian halak Aparsata i, angka na maringan di bariba ni batang aek i, unang jonoki hamu nasida.

⁷ Pasombu hamu nasida mangulasulas ulaon di joro ni Debata, asa tole pangarajai ni halak Juda dohot sintua ni halak Juda pajongjong joro ni Debata di hajongjonganna hian.

⁸ Angkup ni i nunga pola mangalehon parenta ahu taringot tu sibahenonmuna tu angka sintua ni halak Juda, asa dipajongjong nasida joro ni Debata: ingkon buaton sian arta ni rajai, sian seoa na jinalo sian bariba ni batang aek i jala bulus lehonon tu halak on bahen bohalnasida, asa unang tarsabat nasida.

⁹ Tung sura hurangan nasida di lombu naposo, manang di birubiru tunggal, manang di anak ni birubiru, bahen pelean situtungan tu Debata sigomgom langit i, hurangan huhut di eme, sira, anggur manang miak, ingkon guru dok ni malim, angka na di Jerusalem godangna lehonon tu nasida ariari, na so tupa marbeda.

¹⁰ Asa dipelehon nasida pelean angka na hushus tu Debata sigomgom langit i, huhut mangidohon hahorason di rajai dohot di angka anakna.

¹¹ Angkup ni dope parenta sian ahu, tung sura adong manang ise na manguba parentangkon, ingkon buaton sada tiang ni bagasna sandiri bahen pamajalanna, jabuna pe ingkon gabe partangkalan ala ni.

¹² Alai anggo Debata, naung paian Goarna disi, sai ditunggalingkon ma nasa raja dohot

bangso, angka na hum patoltol tanganna naeng paubahon manang mangaloha joro ni Debata na di Jerusalemi. Ahu, raja Darius i mangalehon parenta i, ingkon sigop do i pasauton!

¹³(II.) Jadi sigop ma dipasaut si Tatnai, pangarajai di bariba ni batang aek i dohot si Jetar Bosenai ro di angka donganna satahi parenta i, hombar tu hata naung tinongoshon ni raja Darius i.

¹⁴Jadi tole ma angka sintua ni halak Juda mangaringkoti ulaon i, jala gira dipasidung, hombar tu hata panurirang Haggai dohot Sakaria, anak ni si Ido; diringkoti nasida ma tutu ulaon i jala dipasidung, hombar tu hata ni Debata ni Israel, hombar huhut tu parenta ni si Sirus dohot si Darius dohot si Artasasta, raja sian Persia.

¹⁵Jadi sidung ma joro i di ari tolu bulan Adar, paonomtaonhon hinarajaon ni raja Darius.

¹⁶Dung i marari raya ma halak Israel, angka malim dohot halak Lepi, ro di halak na asing angka na mulak sian habuangan pasahathon joro i tu Debata marlas ni roha godang.

¹⁷Laho pasahathon joro i nasida tu Debata, dipelehon ma saratus jonggi, dua ratus birubiru tunggal, opat ratus anak ni birubiru, jala sampulu dua hambing tunggal bahen pelean pardosaon manguras sandok Israel, mangihuthon bilangan ni angka marga ni Israel.

¹⁸Jadi dipajongjong nasida ma angka malim mangihuthon pargansionna dohot halak Lepi mangihuthon rongkananna marhalado di Debata na di Jerusalem, hombar tu na tarsurat di bagasan buku ni si Musa.

¹⁹(III.) Dung i marulaon Paska ma halak Juda, angka na mulak sian habuangan di ari sampulu opat bulan sipaha sada.

²⁰Ai nunga diuras angka malim dohot halak Lepi dirina be, hira sahalak do iasnasida sudena; jadi diseat nasida ma birubiru Paska i di sude halak Juda, angka na mulak sian habuangan dohot di hahaangginasida i, i ma angka malim i dohot di nasida sandiri.

²¹Jadi halak Israel angka naung mulak sian habuangan ro di sude halak angka na papulik dirina sian haramunon ni angka bangso parbegu di luat i, gabe dongannasida mangalului Jahowa, Debata ni Israel manganhon Paska i.

²²Jala marari raya sagusagu na so niasoman nasida pitu ari lelengna marlas ni roha; ai nunga dipalas Jahowa rohanasida i, jala disunggul roha ni raja sian Assur manumpak nasida, margogoihon tangannasida mangaradoti ulaon di bagas ni Debata, i ma Debata ni Israel.

7¹(I.) Jadi dung salpu angka jamita ondeng, uju hinarajahon ni si Artasasta, raja sian Persia, ro ma sian Babel si Esra,

anak ni si Seraia, i ma anak ni si Azaria, i ma anak ni si Hilkia.

²I ma anak ni Sallum, i ma anak ni si Sadok, i ma anak ni si Ahitub.

³I ma anak ni si Amaria, i ma anak ni si Azaria, i ma anak ni si Merayot.

⁴I ma anak ni si Seraia, i ma anak ni si Usi, i ma anak ni si Bukki.

⁵I ma anak ni si Abisua, i ma anak ni si Pinehas, i ma anak ni si Eleasar, i ma anak ni si Aron, sintua ni malim i.

⁶I ma si Esra i, na nangkok sian Babel, jala siboto surat do ibana, na pistar di bagasan patik ni si Musa, naung nilehon ni Jahowa, Debata ni Israel. Sandok guru pangidoanna dilehon rajai tu ibana, hombar tu panogunoguon ni Jahowa Debatana di ibana.

⁷Nangkok huhut deba sian halak Israel, sian angka malim dohot halak Lepi, sian angka parende, sijaga pintu dohot halak Netinim tu Jerusalem papitutaonhon hinarajahon ni raja Artasasta.

⁸Dung i sahat ma ibana tu Jerusalem di bulan sipahalima, papitutaonhon hinarajahon ni rajai.

⁹Ai di artia bulan sipahasada ibana mamungka nangkok sian Babel, jala di artia bulan sipahalima sahat ibana tu Jerusalem, hombar tu panogunoguon ni Debata na basa i di ibana.

¹⁰Ai nunga marsihohot hian roha ni si Esra mandiori patik ni Jahowa naeng ulahononna, huhut laho mangajarhon patik ni uhumi tu halak Israel.

¹¹(II.) Jala on do hata ni surat, na pinaihut ni raja Artasasta tu si Esra, malim jala siboto surat i, na pistar pajojor angka hata tona ni Jahowa dohot aturanna tu halak Israel.

¹²Ahu surat tinongos ni si Artasasta, raja ni angka raja, tu malim Esra, siboto surat na sun pistar pajojor patik ni Debata na di surgo, dame ma di hamu.

¹³Nunga hulehon parenta sian ahu: Nasa na lomo roha di harajaonku sian bangso Israel, nang sian angka malim dohot halak Lepi naeng laho tu Jerusalem, jadi do i donganmu laho.

¹⁴Ala naung sinuru ni rajai dohot panuturina sipitu halak i ho, asa parentaonmu Juda dohot Jerusalem, hombar tu patik ni Debatam na di bagasan tanganmu.

¹⁵Boanonmu huhut perak dohot sere, naung nilehon ni rajai dohot angka panuturina sian lomona di Debata ni Israel, na maringanan di Jerusalem.

¹⁶Angkup ni sandok perak dohot sere guguan na dapot ho di sandok tano Babel rap dohot guguan na nilehon ni situan na torop i dohot angka malim sian lomona, tumpakna tu joro ni Debatana na di Jerusalem.

¹⁷Ala ni gira ma tuhorhon hepeng i tu angka jonggi, birubiru tunggal, anak ni birubiru rap dohot angka pelean sipanganon dohot siinumon donganna i, ingkon pelehononmu do i di atas langgatan mardonokkon joro ni Debatamuna na di Jerusalem.

¹⁸Taringot tu perak dohot sere na lobi, jadi do marguru tu panimbang ni rohamuna pangkeonmuna, hombar tu lomo ni roha ni Debatamuna.

¹⁹Tole ulaula angka naung pinalumehon tu ho laho mangaradoti tohonan di joro ni Debatam, pasahatanmu do i tu adopan ni bohi ni Debata di Jerusalem.

²⁰Tung sura adong dope hurang di joro ni Debatamu, na patut lehonon, ninna roham, lehon ma i sian bagas parpeopan arta ni rajai.

²¹Sian ahu sandiri, sian raja Artasasta, ruar parenta i tu saluhut induk siramoti arta, angka na di bariba ni batang aek i, manang sadia pe na pinangido ni malim Esra, na pistar pajojor patik ni Debata na di surgo, ingkon gira lehonon tu ibana.

²²Sahat ro di saratus talenta perak, jala saratus tuhukan eme, jala saratus bat anggur, jala saratus bat miak, ndang pola dibuhul anggo godang ni sira.

²³Tung saluhut do na masuk tu lomo ni roha ni Debata na di surgo, ingkon bahenon do i sian nasa roha manumpak joro ni Debata na

di surgo, asa unang hehe rimasna songgop tu harajaon ni rajai dohot tu angka anakna.

²⁴Angkup ni na pabotohon ma ahu di hamu taringot tu angka malim dohot halak Lepi, angka parende, sijaga pintu dohot halak Netinim, ro di angka parhalado di bagasan joro ni Debata, na so tupa pangidoon sian nasida sohe manang beo manang gogo ni tano i siganup taon.

²⁵Alai anggo ho, ale Esra, hombar tu hapistaran ni Debatamu na sahat tu ho, pabangkit ma angka pangarajai dohot panguhum, angka na manguhumi bangso na di bariba ni batang aek i, i ma sude halak angka naung umboto patik ni Debatam, tung sura adong dope na so umbotosa, ingkon siajaranmuna do i tu ibana.

²⁶Jala manang ise na so gira mangulahon patik ni Debata dohot patik ni rajai, ingkon gira hona uhum ibana bahenon ala ni, manang marutang hosa ibana manang tu habuangan, manang mangalehon dando, manang tarhurung.

²⁷(III.) Pinuji ma Jahowa, Debata ni ompunta i, naung manungguli songon i roha ni rajai, asa tung marmulia dibahen joro ni Jahowa di Jerusalem!

²⁸Nunga dipatongon Ibana tu ahu asi ni roha di adopan ni rajai dohot di adopan ni wakil ni rajai dohot di adopan ni saluhut induk ni rajai, angka na marhuaso. Jadi lam margogo

ma ahu hombar tu panogunoguon ni Jahowa, Debatangku manumpak ahu, jala hupaluhut sian Israel induk angka na nangkok rap dohot ahu.

8¹ (I.) On do goargoar ni angka induknasida marompumpu dohot aturan ni partubunasida, angka na nangkok rap dohot ahu sian Babel, uju hinarajahon ni raja Artasasta.

²Sian pinompar ni si Pinehas: Si Gerson; sian pinompar ni si Itamar: Si Daniel; sian pinompar ni si Daud: Si Hantus.

³Sian pinompar ni si Sekania dohot si Paras: Si Sakaria rap dohot angka baoa donganna saompu, saratus limapulu halak toropna.

⁴Sian pinompar ni si Pahat-Moab: Si Eleonai, anak ni si Seraia rap dohot donganna, dua ratus halak baoa.

⁵Sian pinompar ni si Jattu: Si Sekania anak ni si Jehasiel rap dohot donganna, tolu ratus halak baoa.

⁶Sian pinompar ni si Adin: Si Ebed, anak ni si Jonatan rap dohot donganna, limapulu halak baoa.

⁷Sian pinompar ni si Elam: Si Jesaya, anak ni Atalia rap dohot donganna, pitupulu halak baoa.

⁸Sian pinompar ni si Sepatia: Si Sebadia, anak ni si Mikhael rap dohot donganna, ualupulu halak baoa.

⁹Sian pinompar ni si Joab: Si Obaja, anak ni si Jeiel rap dohot donganna, dua ratus sampulu ualu halak baoa.

¹⁰Sian pinompar ni si Selomit: Anak ni si Josipia rap dohot donganna, saratus onompulu halak baoa.

¹¹Sian pinompar ni si Bebai: Si Sakaria, anak ni si Bebai rap dohot donganna, duapulu ualu halak baoa.

¹²Sian pinompar ni si Asgad: Si Johanan, anak ni si Hakkaban rap dohot donganna, saratus sampulu halak baoa.

¹³Sian pinompar ni si Adonikam, angka na parpudi tubu, jala on do goarnasida: Si Elipelet, si Jeiel dohot si Semaya rap dohot donganna, onompulu halak baoa.

¹⁴Sian pinompar ni si Bigpai: Si Utai dohot si Sabut rap dohot donganna, pitupulu halak baoa.

¹⁵(II.) Dung i hupaluhut ma nasida di topi ni batang aek na mardalan tungkan Ahapa laos mangulon disi hami tolu ari lelengna. Jadi dung hupamanatmanat situasi na torop i dohot angka malim, gabe ndang adong jumpang ahu nanggo sahalak Lepi.

¹⁶Dibahen i husuru ma mangalapi si Elieser, si Ariel, si Semaya, si Elnatan, si Jarib, si Natan, si Sakaria dohot si Mesulam, i ma angka induk, tole muse si Johaiarib dohot si Elnatan, i ma pangajari angka na marroha.

¹⁷ Jadi hupaborhat ma nasida manopot Ido pangarajai di Kaspia pola humemehon tu pamangannasida hata angka sipatolhasonna tu Ido, tu angka hahaanggina dohot tu halak Netinim angka na di huta Kaspia, asa diboan tu hami angka parhalado di joro ni Debatanta.

¹⁸ Jadi diboan nasida ma tu hami, hombar tu panogunoguon ni tangan ni Debatanta di hita, sada baoa na pistar sian pinompar ni si Mahli, halak Lepi, anak ni si Israel, i ma si Serebia ro di angka anakna dohot hahaanggina, sampulu ualu halak toropna.

¹⁹ Tole muse si Hasabya jala donganna si Jesaya sian pinompar ni si Merari, angka hahaanggina dohot anaknasida duapulu halak toropna.

²⁰ Ia sian halak Netinim, angka na nilehon ni si Daud dohot angka induk i bahen parhalado ni halak Lepi, dua ratus duapulu halak Netinim, pola dipaboa goargoar ni saluhutna i.

²¹ Dung i hutingtingkon ma disisi di topi ni batang aek Ahapa sada parpuasaon asa hupaunduk hami rohanami di adopan ni Debatanami, mangidohon sian Ibana dalan na tiur di hami dohot di ianakhonnami ro di sandok ugasannami.

²² Ai maila do ahu anggo mangidohon sian rajai angka parangan dohot jolma parsihundul manolongi hami maralohon musu di tongan dalan; ai nunga pola hudok hami tu rajai

songon on: Panogunogunon ni tangan ni Debatanami manumpak tu na denggan di saluhutjolma angka na mangalului Ibana; alai anggo gogona dohot rimasna manginona tu saluhutjolma angka na manadingkon.

²³Jadi marpuasa ma hami huhut mangidohon pangurupion sian Debatanami, gabe ditangihon Ibana hami.

²⁴(III.) Dung i hupapulik ma sian angka induk ni malim sampulu dua halak, i ma si Serebia dohot si Hasabya, jala hahaangginasida sampulu halak dongannasida.

²⁵Dung i hudasingkon ma tu nasida perak dohot sere dohot ulaula, silehonlehon tu joro ni Debatanta, angka naung binasabasahon ni rajai dohot angka panuturina dohot angka indukna ro di sandok Israel na disini bahen pelean.

²⁶Alai godangna na hudasingkon tu tangannasida onom ratus limapulu talenta perak, ia ulaula perak saratus talenta, laos saratus talenta sere.

²⁷Tole muse duapulu panginuman sere na mararga saribu dirham sere dohot dua mangkuk sian tombaga marsillam songon sere na pita, argana pe doshon sere do.

²⁸Dung i ningku ma tu nasida: Na badia do hamu di Jahowa, angka ulaula i pe na badia do, ro di perak dohot sere silehonlehon sian

lomo ni roha di Jahowa, Debata ni ompumuna i.

²⁹Dibahen i dungo ma hamu mangaramoti na pinalumehon i, paima sanga hamu mandasingkon angka i di jolo ni angka induk ni malim dohot halak Lepi ro di angka induk marompuompu di halak Israel di Jerusalem, di bagasan angka bilut ni joro ni Jahowa.

³⁰Jadi dijalo angka malim dohot halak Lepi ma perak dohot sere dohot ulaula na nidasing i, asa boannonnasida angka i tu Jerusalem, tu joro ni Debatanta.

³¹(IV.) Jadi borhat ma hami sian batang aek Ahapa di ari sampulu dua bulan sipaha sada, mardalan tu Jerusalem; jala tangan ni Debatanta manogunogu hami, jala dipalua hami sian tangan ni musu dohot sian halak parbajo di tongan dalan.

³²Jadi dung sahat hami tu Jerusalem mangulon hami disi tolu ari lelengna.

³³Tole paopatarihon hudasingkon hami ma perak dohot sere dohot angka ulaula di bagasan joro ni Debatanta tu tangan ni malim Meremot, anak ni si Uria, jala donganna do si Eleasar, anak ni si Pinehas, dongannasida muse si Josabad, anak ni si Jesua dohot si Noaja, anak ni si Binnui, halak Lepi duansa.

³⁴Sintong be do bilangan dohot timbangan ni saluhutna, disurathon huhut uju i timbanganna luhutna.

³⁵Ia halak angka na tarbuang na jolo, jala naung mulak sian habuangan mamelehon angka pelean situtungon tu Debata ni Israel, i ma sampulu dua lembu manguras sandok Israel, siapulu onom birubiru tunggal, pitupulu pitu anak ni birubiru dohot sampulu dua hambing tunggal bahen pelean pardosaon; saluhutna i bahen pelean situtungon tu Jahowa.

³⁶Dung i dipasahat nasida ma surat parenta ni rajai tu angka wakil ni rajai dohot tu pangarajai di bariba ni batang aek i, jadi ditumpak nasida ma situasi na torop i paulihon joro ni Debata.

9¹ (I.) Jadi dung marujung saluhutna ondeng, ro ma angka induk manopot ahu, ninna ma: Ndang dipapulik bangso Israel, angka malim dohot halak Lepi dirina sian angka bangso parbegu marluatluat dohot sian biasbias angka na niulahon nasida, niulahon ni halak Kanaan, Het i, Perisi, Jebusi, Amoni, Moab i, Misir dohot Amori.

²Ai nunga dibuat nasida sian borunasida bahen jolmanasida dohot bahen jolma ni anaknasida, nunga marsampur boni na badia i dibahen nasida marhite sian angka bangso parbegu marluatluat; jala tangan ni angka induk dohot partogi manjolahon mangulahon hajahaton on.

³Jadi dung hubege barita i, husansani ma pangkeanhu dohot bajungku, huruntuni dohot

obuk ni ulungku dohot misengku, laos hundul tarhatotong boti ahu.

⁴Jadi marluhut ma tu lambungku saluhut halak na manonditnondit mida hata ni Debata ni Israel, ala pangalaosion ni halak angka na ro sian habuangan; alai laos hundul tarhatotong boti anggo ahu sahat ro di tingki pamelean bodarina i.

⁵Jadi marhira jumpang tingki pameleon bodarina i hehe ma ahu sian hajepolonku laos mamangke pangkean dohot bajungku na sinansanan i, jala marsinggang ahu huhut paherbang tanganku duansa tu Jahowa, Debatangku.

⁶(II.) Dung i ningku ma: Ale Debatangku, maila do ahu nian jala manonditnondit pasindak bohingku manaili dompak Ho, ale Debatangku, ai nunga tung disalpui hajahatonnami ulunami, jala na balga situtu salanami maungaung sahat ro di banua ginjang.

⁷Olat ni tingki ni angka ompunami rasirasa sadarion hami di bagasan sala na godang, jala ala ni hajahatonnami umbahen naung pinasahat nang hami, nang rajanami, nang malimnami tu bagasan tangan ni angka raja marluatluat, na ripe suda bahenon ni podang, habuangan, tabantaban dohot hailaon ni bohi, songon na andar sadarion.

⁸Alai anggo nuaeng hira jumpangan asi ni roha hami satongkin sian Jahowa,

Debatanami ala ditebahon dope di hami jolma angka na malua dohot marbasabasahon tu hami nanggo sada labang hau di inganan na badia i, asa dipatiur Debatanami parnidaannami, jala diapuli hami muse otik di parhatobanannami.

⁹Ai hatoban do hami tutu, alai nang di parhatobanannami ndang ditadingkon Debatanami hami, lam dipamelok tahe roha ni angka raja sian Persia marasi ni roha tu hami mangapuli rohanami otik, mangaloas hami pajongjong joro ni Debatanami dohot pauliulihon angka na maloha disi, huhut mangalehon tu hami sada parik di Juda dohot di Jerusalem.

¹⁰Nuaeng pe, tung aha ma dohononnnami, ale Debatanami, dung salpu angka i? Ai nunga hutadingkon hami angka tonami.

¹¹Angka naung tinonahonmu marhite sian pamangan ni angka naposom, angka panurirang i, nimmu do: Ia tano sisoluhonmuna laho manean, tano na ramun do i marhite sian haramunon ni angka bangso marluatluat, binahen ni hagigion angka na niulanasida i, pola gok tano i sian partalpahan na sada tu partalpahan na sadanari, binahen ni haramunonnasida i.

¹²Dibahen i ndang jadi lehononmuna borumuna di anaknasida, jala ndang jadi buatonmuna borunasida di anakmuna, jala ndang jadi tumpahanmuna nasida

mardame manang marhasonangan ro di salelenglelengna, asa lam margogo anggo hamu, jala manganhon na denggan di tano i, laos teanonmuna, nang anakmuna ro di salelenglelengna.

¹³Manimbang sian saluhut naung songgop tu hami ala ni pambahenannami angka na roa i dohot ala ni salanami na godang i, tardok dope Ho marpanatap tu hami, ale Debatanami gumodang sian na tama, ala ni hajahatonnami, jala nunga dilehon Ho tu hami songon na andar sadarion.

¹⁴Tung patut ma nian ulahannami mangose angka tonami, asa laho martondong tu angka bangso hagigian on? Tung so tagamon marronirimas Ho mida hami, maradu sun siap hami bahenonmu, asa unang tinggal manang malua nanggo sahalak?

¹⁵Ale Jahowa, Debata ni Israel, na bonar do anggo Ho, ai tinggal dope anggo hami pasipasina malua, songon na andar sadarion; ida ma, di adopan ni Bohim do hami di bagasan hasalaannami, ai nanggo sahalak ndang manahan jongjong di adopan ni Bohim ala ni hajahaton on.

10¹(I.) Jadi andorang martangiang dope si Esra, huhut manopoti dosa, sai tumatangis jala marsinggang di adopan ni joro ni Debata, marluhut ma tu lambungna sian halak Israel sada luhutan na balga situtu angka baoa, parompuan dohot dakdanak,

ai tumatangis situtu situasi na torop i, pola sosombopon.

²Dung i ro ma alus ni si Sekania, anak ni si Jeiel, sian pinompar ni si Elam mandok tu si Esra: Nunga tutu mardosa godang hami tu Debatanami, ala olo hami marjolmahon angka parompuan sibabijalang sian bangso isi ni luaton; alai tahe adong dope sihirimon di Israel taringot tu dosa on.

³Tole ma hita mambahen padan tu Debatanta, paboa ingkon palahoonnami nasa parompuan ro di tubunasida, hombar tu lomo ni roha ni Tuhan i dohot halak angka na manonditnondit mida tona ni Debatanta, ingkon hombar tu patik i do bahenon.

⁴Antong hehe ma ho, ingkon sahat tu ho ma hata i, jala ingkon donganannami ho; pir ma tondim jala ulahon hata i!

⁵Dung i hehe ma si Esra, pola dipatolon angka induk ni malim dohot halak Lepi ro di sandok Israel, paboa ingkon ulahononna hombar tu hata i; jadi marsumpa ma nasida.

⁶Dung i hehe ma si Esra sian adopan ni joro ni Debata, jala masuk tu bagasan bilut ni si Johanan, anak ni si Eliasib. Jadi dung sahat ibana tusi, ndang mangan roti ibana manang minum aek, ala arsak ni rohana mida dosa ni halak na mulak sian habuangan.

⁷(II.) Dung i didokkon ma martingting di Juda dohot di Jerusalem tu sude halak

habuangan i, asa marluhut nasida tu Jerusalem.

⁸Jala manang ise na so ro tusi di bagasan tolu ari on mangihuthon panuturion ni angka induk dohot sintua, ingkon haromhononhon nasa ugasanna, jala ingkon pabalion ibana sian huria habuangan i.

⁹Jadi marluhut ma sude baoa sian Juda dohot Benjamin tu Jerusalem di bagasan tolu ari, i ma di ari duapulu bulan sipaha sia, jala hundul do sandok bangso i di alaman ni joro ni Debata, pola angka hitir nasida ala hata i dohot binahen ni udan na por.

¹⁰Dung i hehe ma malim Esra, ninna ma mandok nasida: Nunga mardosa godang hamu, na pinarjolmamuna angka parompuan sibabijalang laho manambai hasalaan ni Israel na sai laon.

¹¹Nuaeng pe topoti hamu ma dosamuna tu Jahowa, Debata ni ompumuna i, jala ulahon hamu ma lomo ni rohana, ingkon sirang ma hamu sian angka bangso ni luaton dohot sian angka parompuan sibabijalang.

¹²Jadi sandok luhutan i mangalusi, pola marsoara na gogo mandok: I ma tutu, ingkon songon hatami tu hami ulahononnami.

¹³Alai tahe mansai torop halak, jala nunga partaonan rondo ni ari, ndang tartahan halak jongjong di balian on, jala ndada ulaon sisadari manang sidua ari, ai nunga tung

godang pangalaosionnami di hata na sasada on.

¹⁴Ua angka induknam i nian tinggal singkat ni sandok luhutan i, manang ise pe jumpang di bagasan angka hutanta naung marjolmahon angka parompuan sibabijalang, ingkon ro di tingki angka na binuhul rap dohot angka sintua dohot panguhum ni huta i, paima sumurut sian hita parpiarpiar ni rimas ni Debatanta, ala ni dosa on.

¹⁵Holan si Jonatan, anak ni si Asahel dohot si Jehseia, anak ni si Tikwa hehe mangalo hata i, jala si Mesulam dohot si Sabetai, halak Lepi manolopi juanasida i.

¹⁶(III.) Jadi dibahen halak habuangan i ma songon i. Dung i dipapulik malim Esra ma deba baa, sian angka induk marompuompu ganup sian pinompar ni ompuna be, pola digoar luhutna i; marluhut ma nasida di artia bulan sipaha sampulu mangarisik hata i.

¹⁷Jadi marujung ma hata i dibahen nasida tu sude baa angka na marjolmahon parompuan sibabijalang, sahat ro di artia bulan sipaha sada.

¹⁸Jadi jumpang ma sian angka anak ni malim, angka naung marjolmahon parompuan sibabijalang, sian pinompar ni si Jesua, anak ni si Josadak dohot hahaanggina i: si Maseia, si Elieser, si Jarib, dohot si Gedalia.

¹⁹Pola martopap tangan nasida, paboa ingkon paulahonna jolmanasida i, jala pelehononna sada birubiru tunggal bahen pelean pardosaan.

²⁰Sian pinompar ni si Immer: Si Hanani dohot si Sebadia.

²¹Sian pinompar ni si Harim: Si Maseia, si Elia, si Semaya, si Jeiel dohot si Usia.

²²Sian pinompar ni si Pashur: Si Eleonai, si Maseia, si Ismael, si Netaneel, si Josabad dohot si Eleasa.

²³Sian pinompar ni si Lepi: Si Josabad, si Simeï, si Kelaia (i ma si Kelita), si Petahia, si Juda dohot si Elieser.

²⁴Sian angka parende: Si Eliasib. Sian angka sijaga pintu: Si Sallum, si Telem dohot si Uri.

²⁵Sian halak Israel sandok, sian pinompar ni si Paras: Si Ramia, si Ishia, si Malkia, si Mijamin, si Eleasar, si Malkia dohot si Benaia.

²⁶Sian pinompar ni si Elam: Si Matania, si Sakaria, si Jeiel, si Abdi, si Jeremot dohot si Elia.

²⁷Sian pinompar ni si Jattu: Si Eleonai, si Eliasib, si Matania, si Jeremot, si Sabad dohot si Asisa.

²⁸Sian pinompar ni si Bebai: Si Johanan, si Hanania, si Sabai, si Atlai.

²⁹Sian pinompar ni si Bani: Si Mesulam, si Malluk dohot si Adaya, si Jashub, si Seal dohot si Jeremot.

³⁰ Sian pinompar ni si Pahat-Moab: Si Adna, si Kelal, si Benaia, si Maseia, si Matania, si Besalel, si Binnui dohot si Manasse.

³¹ Sian pinompar ni si Harim: Si Elieser, si Ishia, si Malkia, si Semaya, si Simeon.

³² Si Benjamin, si Malluk dohot si Semaria.

³³ Sian pinompar ni si Hasum: Si Matenai, si Matatta, si Sabad, si Elipelet, si Jeremai, si Manasse dohot si Simei.

³⁴ Sian pinompar ni si Bani: Si Maadai, si Amram, si Uel.

³⁵ Si Benaia, si Bedaia, si Keluhi.

³⁶ Si Benaia, si Meremot, si Eliasib.

³⁷ Si Matania, si Matenai, si Jasu.

³⁸ Si Bani, si Binnui, si Simei.

³⁹ Si Selemia, si Natan, si Adaya.

⁴⁰ Si Maknadeboi, si Sasai, si Sarai.

⁴¹ Si Asarel, si Selemia, si Semaria.

⁴² Si Sallum, si Amaria, si Josep.

⁴³ Sian pinompar ni si Nebo: Si Jeiel, si Matitia, si Sabad, si Sebina, si Jahdai, si Joel, si Benaia.

⁴⁴ Luhut nasida naung marjolmahon parompuan sibabijalang jala adong do deba sian angka parompuan naung tubuan anak.

Nehemia

1 ¹ (I.) On ma angka jamita sian si Nehemia, anak ni si Hakalia. Masa do di bulan sipahasia paduapulutaonhon, tongon ahu di huta Susan, di bagasan jabu ni rajai.

² Jadi ro ma si Hanani, sada sian hahaaanggingku rap dohot deba baosa sian Juda, gabe hupauso tu nasida pangalaho ni halak Jahudi, angka na malua, angka na teba sian halak na tarbuang dohot pangalaho ni Jerusalem.

³ Dung i ninna nasida ma tu ahu: Pasipasi ni jolma, angka na tinggal sian halak na tarbuang, marpardangolan godang nasida di luat i, jala marhaurahon, ai nunga marbungbungan angka parik ni Jerusalem, jala pintu harbanganna nunga ditutung dohot api.

⁴ (II.) Jadi dung hubege barita i, hundul ma ahu laos tumatangis, margudompong ahu pola nania leleng, jala marpuasa ahu dohot martangiang di adopan ni bohi ni Debata na di surgo.

⁵ Ningku ma: Iale Jahowa, Debata na di surgo, Ho do Debata na timbul jala na songkal, na tongtong marningot padan dohot asi ni roha tu halak na mangkaholongi Ibana, jala na mangaradoti angka tonana!

⁶Sai patinggil ma pinggolmu jala tonggor matam tumangihon tangiang ni naposomon, na hutangiangkon nuaeng di adopanmi borngin dohot arian mangondihon halak Israel, angka naposomi, huhut ahu manopoti angka dosa ni halak Israel, angka na hubahen hami dampak Ho. Nang ahu, nang pinompar ni damang, nunga mardosa hami.

⁷Tung na marroha mago situtu hami marparulaon dampak Ho, ala so huradoti hami tona, aturan dohot uhum angka na tinonahonmu tu si Musa naposom.

⁸Alai sai ingot ma hata na tinonahonmu tu si Musa naposom, uju na nidokmu: Molo dituntun hamu mardosa, paserahonku ma hamu tu tongatonga ni angka bangso.

⁹Alai molo mulak rohamuna tu Ahu, jala diradoti dohot diulahon hamu angka tonangku, nang tung sura naung ambolong hamu sahat ro di ujung ni langit, sai papunguonku do hamu sian i, jala mulak hamu boanonku tu inganan naung hupillit bahen inganan ni Goarhu.

¹⁰Angka naposom do nasida tongon jala bangsom, naung pinaluam i marhitehite hagagoon godang dohot marhitehite tanganmu na gogo sahali.

¹¹Iale Tuhan! Sai patinggil ma pinggolmu tumangihon tangiang ni naposomon dohot tangiang ni naposom, angka na lomo roha marhabiaran tu Goarmu, sai manumpak ma

Ho di langka ni naposomon sadarion, asa jumpangan asi ni roha ahu di adopan ni rajai! Ai sitahu anggur ni rajai do ahu.

2¹ (I.) Alai masa ma di bulan Nisan, paduapulutaonhon hinarajahon ni raja Artasasta, tongon adong anggur di adopanna, gabe hubuat ma anggur i jala hulehon tu rajai; ndang dung surbot panailingku di adopanna anggo na sai laonna i.

² Dung i ninna rajai ma tu ahu: Boasa songon i surbot panailim? Nda tung adong sahizmu? Nandang tahe rupa adong do arsak ni roham! Jadi mabiar situtu ma ahu.

³ Ningku ma mandok rajai: Sai mangolu ma rajai ro di salelenglelengna! Boasa so surbot panailingku? Ia huta bagas parbandaan ni angka daompung, nunga tarulang, jala nunga masurbu pintu harbanganna dohot api.

⁴ Dung i ninna rajai ma tu ahu: Apala nuaeng pinangidom? Jadi martangiang ma rohangku di bagasan tu Debata na di surgo!

⁵ Dung i ningku ma mandok rajai: Molo tung denggan di roha ni rajai jala lomo roham ahu naposomon di adopanmu, sai suruhon ma ahu tu tano Juda, tu huta parbandaan ni angka daompung, asa hupauli.

⁶ Dung i ninna rajai ma tu ahu, nangjolma ni rajai na marhabangsa di lambungna: Sadia laon tagamon pardalanonmu, jala andigan ho mulak? Jadi denggan ma di roha ni rajai marsuru ahu dung hubuhul janjina.

⁷ Alai ningku ma mandok rajai: Molo tung dengen di roha ni rajai, dilehon ma nian tu ahu angka surat boanonku tu pangarajai ni luat di bariba ni batang aek i, asa dipataru nasida ahu, paima sahat tu tano Juda.

⁸ Angkup ni sada surat tu Asap, sijaga porlak ni rajai, asa dilehon tu ahu hau bahen gulanggulang ni pintu harbangan ni huta i mardonokkon joro i dohot bahen parik ni huta i dohot bahen parhau ni bagas siingananku. Dung i dilehon rajai ma surat i tu ahu, hombar tu panogunoguon ni tangan ni Debata na basa i di ahu.

⁹ (II.) Jadi dung sahat ahu tu angka pangarajai ni luat na di bariba ni batang aek i, hupasahat ma tu nasida angka surat tinongos ni rajai. Mardongan partogi ni parangan dohotjolma parsihundul ahu hian dibahen rajai.

¹⁰ Alai dung dibege Sambalat, halak Horon i dohot Tobia naposo i sian halak Amon barita i, sogo situtu ma rohanasida disi, ala adong ro sahalak mangalului hasonangan ni halak Israel.

¹¹ Jadi dung sahat ahu tu Jerusalem, jala dung tinggal ahu disi tolu ari lelengna.

¹² Hehe ma ahu bornginna i rap dohot deba angka baoa; alai ndang hupaboa tu manang isejolma manang aha naung niaturhon ni Debatanku tu bagasan rohangku, na naeng bahenonku di Jerusalem; jala ndang

mardongan hoda parhuli ahu nanggo sada,
dungkon ni na huhunduli.

¹³Dung i ruar ma ahu bornginna i sian bahal rura tole muse sian jolo ni sumur naga, boti tu bahal partangkalan; dung i hutangkasi ma angka parik ni Jerusalem, naung marbungbungan dohot pintu harbanganna naung matutung dibahen api.

¹⁴Dung i taripar ma ahu tu bahal parmualan dohot tu tobat ni rajai, alai tahe sungkot do hoda i mardalan anggo di atasna ahu.

¹⁵Laos bornginna i ahu nangkok sian rura i asa hutangkasi parik i, dung i mulak ahu jala masuk sian bahal rura laho muli.

¹⁶Alai anggo angka induk ni huta i ndang diboto manang dompak dia ahu mardalan, jala manang aha na naeng bahenonku, ai rasirasa nuaeng ndang marboaboa ahu tu halak Jahudi, tu angka malim pe, tu halak na sangap, tu angka induk pe, ro di halak na asing, angka na mangula ulaon i.

¹⁷Dung i ningku ma mandok nasida: Nunga diida hamu hinamago na songgop tu hita, naung tarulang i Jerusalem jala masurbu pintu harbanganna dibahen api; tole ma hita manguahi pajongjong parik ni Jerusalem, asa unang be marhaurahon hita!

¹⁸Dung i hubaritahon ma tu nasida panogunogunon ni tangan ni Debata, na basa i di ahu; angkup ni hata ni rajai angka na pinaboana i tu ahu. Dung i ninna nasida ma:

Hehe ma hita tutu manolehon pajongjongkon muse! Jadi manggogo ma tangannasida mangaringkoti ulaon na denggan i.

¹⁹(III.) Alai dung dibege Sambalat, halak Horon i dohot Tobia naposo i, sian halak Amon dohot Gesem halak Arab, barita i, mangelak ma nasida di hami, jala marro ni lea, angka didok ma hata dia do on na binahenmuna i? Naeng ulahanmuna manggunturi dompak rajai?

²⁰Alai ningku ma mangalusi nasida: Debata na di surgo i, Ibana manumpak ulaonnami saut, ala ni umbahen hehe muse anggo hami naposona i pajongjongkon; alai anggo hamu ndang martohap manang nampuna hatigoran dohot parningotan di Jerusalem.

3¹(I.) Dung i hehe ma sintua ni malim Eliasib rap dohot angka malim hahaanggina i, pajongjongkon bahal birubiru, laos diparbadiai ma i jala dipajongjong angka pintuna, diparbadiai nasida ma i sahat ro di palaspalas Mea, sahat ro di palaspalas Hananel.

²Di lambungnasida muse mangula halak Jeriko, di lambung ni muse mangula si Sakur, anak ni si Imri.

³Alai anggo bahal pardengkean, pinompar ni si Sena pajongjongkon; dibahen nasida ma gulanggulangna, dipajongjong dohot angka pintuna ro di panggomalna dohot ransangransangna dipauli.

⁴Di lambungnasida muse mangumban si Meremot, anak ni si Uria, anak ni si Hakos; di lambungnasida muse mangumban si Mesulam, anak ni si Berekia, anak ni si Mesezabeel: Di lambungnasida muse mangumban si Sadok, anak ni si Baana.

⁵Di lambungnasida muse mangumban halak Tekoa, alai anggo halak na sangap sian nasida ndang ditarehon tangkuhukna mangunduk ulaon ni tuanna i.

⁶Ia harbangan ni huta bagasan diumban si Joiada, anak ni si Pasea dohot si Mesulam, anak ni si Besodeia; digulanggulang nasida do i jala dipajongjong angka pintuna, ro di panggomalna dohot ransangransangna.

⁷Di lambungnasida muse mangumban si Melaja halak Gibeon i dohot si Jalon, halak Meronot i rap dohot angka baoa sian Gibeon dohot Mispa sahat ro di habangsa paruhuman ni pangarajai di bariba ni batang aek i.

⁸Di lambungna muse mangumban si Usiel, anak ni si Harhaia rap dohot halak panopa; di lambungna muse mangumban si Hanania, anak ni sada pande pauli miak na hushus; alai songon i dipasombu nasida Jerusalem sahat ro di parik na lambas.

⁹Di lambungnasida muse mangumban si Repaia, anak ni si Hur, induk ni satonga bagian Jerusalem.

¹⁰Di lambungnasida muse mangumban si Jedaia, anak ni si Harumap, tondong ni

jabuna; di lambungna muse mangumban si Hantus, anak ni si Hasabneya.

¹¹Alai dua talian do anggo diumban si Malkia, anak ni si Harim, dohot si Hasub, anak ni si Pahat-Moab, tole muse palaspalas pamurunan.

¹²Di lambungna muse mangumban si Sallum, anak ni si Hallohes, induk ni satonga bagian Jerusalem, ibana rap dohot angka boruna.

¹³Ia bahal rura diumban si Hanun dohotjolma isi ni Sanoa; dipajongjong nasida do i ro di pintuna, panggomalna dohot ransangransangna, pola saribu asta olat ni parik i sahat ro di bahal partangkalan.

¹⁴Alai anggo bahal partangkalan diumban si Malkia, anak ni si Rekab, induk ni bagian Bethakkerem; ibana pajongjongkon ro di pintuna panggomalna dohot ransangransangna.

¹⁵Ia bahal parmualan diumban si Sallum, anak ni si Kalhose, induk ni bagian Mispa; ibana pajongjongkonsa, manggulanggulangi, mambahen angka pintuna, panggomalna dohot ransangransangna; tole muse parik ni ambar Siloam mardonokkon porlak ni rajai, sahat ro di tagahambing angka na tuat sian huta ni si Daud.

¹⁶Dung ibana mangumban si Nehemia, anak ni si Asbuk, induk ni satonga bagian Betzur, sahat tu tondong ni parbandaan ni si Daud,

sahat muse tu ambar na pinauli, sahat muse tu bagas ni angka ulubalang.

¹⁷Dung ibana mangumban halak Lepi, si Rehum, anak ni si Bani; di lambungna muse mangumban si Hasabya, induk ni satonga bagian Keila, bagianna i.

¹⁸Dung ibana mangumban angka hahaanggina si Baoa i, anak ni si Henadad, induk ni satonga bagian nari sian Keila.

¹⁹Di lambungna muse mangumban si Eser, anak ni si Jesua, induk di Mispa dua talianna patondong be laho nangkok tu bagas parsinjataan tungkan suhisuhi.

²⁰Dung ibana mangumban mansai jugul si Baruk; anak ni si Sabai dua talianna sian suhisuhi sahat ro di pintu bagas ni sintua ni malim Eliasib.

²¹Dung ibana mangumban si Meremot, anak ni si Uria, tubu ni si Hakos dua talianna sian pintu jabu ni si Eliasib sahat ro di ujung ni jabu ni si Eliasib.

²²Dung ibana mangumban malim, angka na maringan di tano adaran.

²³Dung nasida mangumban si Benjamin dohot si Hasub tondong ni bagasna; dung nasida mangumban si Azaria, anak ni si Maaseia, tubu ni si Anania di lambung jabuna sandiri.

²⁴Dung ibana mangumban si Binnui, anak ni si Henadad, dua talianna, olat ni jabu ni si Azaria, sahat ro di ujung ni suhisuhi.

²⁵Ia si Palal, anak ni si Usai mangumban tondong ni suhisuhi dohot palaspalas, na tumimbo sian jabu ni rajai, mardonokkon alaman ni hurungan; dung ibana si Pedaya, anak ni si Paras.

²⁶(Alai anggo halak Netinim maringan do di Opel sahat ro di tondong ni bahal partuaehan tungan hasundutan, sahat ro di palaspalas na timbo.)

²⁷Dung nasida mangumban halak Tekoa, dua talianna, olat ni palaspalas na timbo i sahat ro di parik Opel.

²⁸Olat ni bahal hoda mangumban angka malim, ganup tondong ni jabuna be.

²⁹Dung ibana mangumban si Sadok, anak ni si Immer tondong ni jabuna; dung ibana mangumban si Semaya, anak ni si Sekania, sijaga bahal habinsaran.

³⁰Dung ibana mangumban si Hanania, anak ni si Selemia dohot si Hanun, anak ni si Salap paionom dua talianna. Dung ibana mangumban si Mesulam, anak ni si Berekia, tondong ni bilutna.

³¹Dung ibana mangumban si Malkia, anak ni panopa i sahat ro di jabu ni halak Netinim dohot partigatiga, tondong ni bahal parhalan, sahat tu bilut parginjang di suhisuhi.

³²Anggo di holangholang ni bilut parginjang di suhisuhi dohot bahal birubiru mangumban angka panopa dohot partigatiga.

4¹ (3-33) (II.) Alai dung dibege si Sambalat, tole hita hape pauli parik i, marsigorgor ma rimasna jala gusar situtu jala mangelak ma ibana di halak Jahudi.

² (3-34) Ninna ma di adopan ni hahaanggina dohot angka parangan di Samaria, didok ma: Aha do ulaning na binahen ni halak Jahudi, angka na malasi? Pasombuonta nasida ulaning? Saut do ulaning nasida mamele? Marujung do i ulaning bahenonna manang andigan? Huaranna muse ulaning angka batu sian timbunan, angka naung minosokkon?

³ (3-35) Alai di lambungna do anggo si Tobia, halak Amoni, jala ninna ma: Loas didatdati nasida pauliulihon, sada pe antuasus manimbung parik batu i, pintor magargar do bahenonna.

⁴ (3-36) Iale Debatanami! Sai tangihon ma pangaleaina i di hami, jala baloshon tu ulunasida leanasida i, jala pasahat nasida ripe pupuson di bagasan tano habuangan!

⁵ (3-37) Jala unang ma marpangulahi roham mida hajahatonna nasida i, jala unang nian sesa dosanasida i sian adopanmu! Ai nunga dipahehe nasida rimasmu di adopan ni halak na mangula.

⁶ (3-38) Alai sai hudatdati hami do pajongjongkon parik i, nunga pola mardomu sandok parik i satonga timbona, ai lam dihamurukkon situasi na torop i ulaon i.

⁷(4-1) (I.) Alai dung dibege si Sambalat, si Tobia, halak Arab, halak Amoni dohot halak Asdodi, lam simpan hape angka parik ni Jerusalem, nunga pola mamungka tutup angka bungbungna na sai laon, gabe tarrimas situtu nasida.

⁸(4-2) Rap marbulan ma nasida sude mangondam ro marporang dompak Jerusalem, asa manggaori huta i nian.

⁹(4-3) Alai martangiang do anggo hami tu Debatanami jala hupajongjong hami angka parhal mangalo nasida arian dohot borngin, asa unang dirampok nasida hami.

¹⁰(4-4) Dung i didok halak Juda ma: Nunga surut gogo ni halak parhuli jala godang dope turanggong i, dibahen i ndang tarbahen hita pasunhon parik i.

¹¹(4-5) Alai roha ni angka alonta mandok: Nandang jadi botoonnasida, jala ndang jadi idaonna manang aha, paima sahat hita tu tongatonganasida, asa mangaragehon nasida jala manundati ulaonnasida i.

¹²(4-6) Alai dung ro deba halak Jahudi, angka na maringan di lambungnasida i, palumba hami pola sampulu hali taringot tu saluhut inganan, haroroan ni musu dompak hami.

¹³(4-7) Jadi hupajongjong hami ma halak situan na torop mangihuthon partubuna bahen parjaga di inganan angka na rumodop,

di pudi ni parik i huhut patioptiop podang,
hujur dohot sior.

¹⁴(4-8) Jadi dung hutangkasi, hehe ma ahu,
huhut mandok tu halak na sangap dohot tu
angka induk dohot tu pasipasi ni halak situan
na torop: Unang hamu mabiar mida nasida,
sai paingotingot hamu ma Tuhan i na timbul
jala na songkal sahali, jala marporang ma
hamu humongkop hahaanggimuna, angka
anakmuna dohot borumuna, jolmamuna
dohot bagasmuna.

¹⁵(4-9) Alai dung tarbortik dibege angka
musunami naung huboto hami hape luhutna
i, jala naung disundati Debata tahinasida i,
mulak ma hami sude manahopi parik i, ganup
tu ulaonna be.

¹⁶(4-10) Jadi olat ni ari na sasada i
marsatonga nama angka naposongku
mangula ulaon i, anggo na satonganari
nasida patioptiop hujur, lombulombu, sior,
jala marbaju partahanan; jala angka induk i
jongjong di pudi ni sandok pinompar ni Juda.

¹⁷(4-11) Ia halak angka na pajongjong parik
i dohot halak na mangkuli tano dohot halak
na pausungkon, tanganna na sada dipangke
mulaulaon, jala tanganna na sadanari
patioptiop sinjata.

¹⁸(4-12) Ai sude halak na tole mulaulaon
manandang be podangna, laos songon i
mangula; jala halak na mamalu sangka
jongjong di lambungku.

¹⁹(4-13) Ai ningku ma tu halak na sangap dohot tu angka induk dohot tu pasipasi ni na torop i: Godang do ulaon i jala lambas jala mampar di atas parik i do hita, ganup holang sian donganna.

²⁰(4-14) Manang sian inganan dia dibege hamu soara ni sangka i, ingkon tusi ma hamu marpungu mandapothon hami! Debatanta i do anggo marporang humongkop hita!

²¹(4-15) Antong tole be ma hita mangaringkoti ulaon i. Jadi satonga sian nasida patioptiop hujur sian andos torang sahat ro di na mullop angka bintang.

²²(4-16) Angkup ni hudok uju i tu situasi na torop i: Ingkon ganup hita marborngin di Jerusalem rap dohot naposona be, asa marhal hita ia bornginna i, jala mangaringkoti ulaon ia arian.

²³(4-17) Alai nang ahu, nang angka hahaanggingku, nang angka naposongku, nang angka baoa parhal, angka na mangihuthon tu ahu, ndang dung hutanggali hami ulosnami; ganup patioptiop sinjatana laho haduru.

5¹(I.) Dung i mangangguk badar ma situasi na torop i ro di jolmanasida dompak hahaangginasida, halak Jahudi:

²Ai adong do deba na mandok: Torop do hami, nang anaknami dohot borunami, salionnami ma eme, asa mangan hami jala mangolu.

³Alai anggo na deba mandok: Ingkon lehononnamami na ma haumanami, porlak anggurnami dohot bagasnamami bahen singkoram, asa tarbahen hami manuhor eme managam haleon.

⁴Adong muse deba angka na mandok: Nunga huurang hami hepeng bahen garar ni rundo tu rajai, haumanami dohot porlak anggurnami singkoramna.

⁵Nuaeng pe, ia songon i sibuk ni hahaangginami, songon i do sibuknamami, angka anaknamami pe laos songon anaknasida do; hape ida ma, ingkon lehononnamami nama anaknamami dohot borunamami bahen hatoban, nunga pola mangadop deba sian borunamami, jala marhagogoon Debata tangannami; haumanami pe dohot porlak anggurnami nunga sahat tu halak na asing.

⁶Jadi tarrimas situtu ma ahu, dung hubege angguhangguknasida dohot alualunasida i.

⁷Jadi marpingkir ma rohangku di bagasan, laos mangonai hata ma ahu tu halak na sangap dohot tu angka induk, ningku ma mandok nasida: Nunga manjalo bunga ni hepeng hamu hape ganup sian hahaanggina? Jadi hupaluhut ma sada luhutan na balga mangalo nasida.

⁸Dung i ningku ma mandok nasida: Nunga pola hita manobus hahaangginta, halak Jahudi, angka naung targadis tu halak parbegu, hombar tu gogonta be; dohot hamu

naeng manggadis hahaanggimuna i, laos manggadis tu hita tahe? Jadi sip be ma nasida ndang haalusansa.

⁹Dung i ningku ma: Nandang denggan pambahenanmuna i! Nda ingkon marhabiaran tu Debatanta hita nian tama marparange ala ni panginsahion ni halak parbegu musunta i?

¹⁰Nang ahu, nang hahaanggingku dohot angka naposongku, nunga hupasali hami nasida perak dohot eme; ua itasalesehon ma utangon.

¹¹Ua paulak hamu ma tu nasida sadarion haumanasida, porlak anggurnasida, porlak Jetun nasida dohot bagasnasida, ro di bunga ni hepeng, eme, anggur dohot miak, naung tinunggumuna sian nasida.

¹²Dung i ninna nasida ma: Olo ma hami paulakkon, jala ndang be tungguonnam i sian nasida, bahenonnam i ma songon na nidokmi. Dung i hujou ma angka malim, laos hupatolon ma nasida, asa bahenonna hombar tu hata i.

¹³Angkup ni hupaspas ma parandoraan ni bajungku huhut hudok: Sai songon i ma paspason ni Debata ganupjolma na so mangkajongjongkon hata on, sian jabuna dohot sian artana, ingkon songon i ibana tarpaspas, jala luangan. Dung i sandok luhutan i mandok: Amen! Jala dipuji nasida Jahowa; halak situan na torop i pe diulahon do hombar tu hata i.

¹⁴(II.) Angkup ni olat ni ari na pinabangkit ni rajai ahu gabe pangarajai di tano Juda sian taon duapulu sahat ro di taon tolupulu dua, hinarajahon ni raja Artasasta, pola sampulu dua taon lelengna, ndang dung hupangan upa jambar ni pangarajai hian, angka hahaanggingku pe songon i.

¹⁵Ai pangarajai angka na jumolo sian ahu pasiaksiak situasi na torop i, ai dijalo do sian nasida sipanganon dohot anggur, angkup ni opatpulu sekkel perak; tole angka naposonasida roharohana do mangarupa situasi na torop i; alai anggo ahu ndang songon i hubahen, ala ni biar mida Debata.

¹⁶Lam dohot do ahu manggogo ulaon mangumban parik on, ndang adong hutuhor hami hauma nanggo santurpuk; sude tahe dolidoli angka naposongki marpungu disi mangaringkoti ulaon.

¹⁷Balik ahu marmudumudu halak Jahudi dohot angka induk, pola saratus limapulu halak toropna, ro di baoa angka na ro mandapothon hami sian bangso parbegu, angka na humaliang hami.

¹⁸Suda do dihobas di ahu ganup ari: Sada jonggi, onom birubiru, angka na pinamokmok, tole angka pidong dihobas di ahu, tole ganup sampulu ari anggur marragamragam mansai godang; alai atik pe songon i ndang hupangido upa, jambar ni

pangarajai hian, ai dokdok do ulaon rodi hian di situan na torop i.

¹⁹Sai ingot ma, ale Debatangku, manumpakkon na denggan tu ahu, bahen balos ni sude na hubahen i tu situan na toropon.

6¹(I.) Jadi dung tarbortik tu si Sambalat, si Tobia dohot si Gesem, halak Arab i, tarbortik dohot tu musunami angka na asing, barita ni naung sun hupauli angka parik i, jala ndang adong be bungbungna nanggo sada tinggal disi, alai tutu ndang dope sanga anggo hinsuhinsu ni pintu harbangan pinamasuk.

²Disuru si Sambalat dohot si Gesem ma suruanna mandok tu ahu: Ro ho jolo asa rap martuptup hita di bagasan huta angka na di rura Ono; alai anggo sangkap ni rohanasida naeng mambahen na so uhum tu ahu.

³Alai suruanku ma husuru mandok tu nasida: Mansai rosros ulaon godang na huula on, dibahen i ndang tarbahen ahu tuat; boasa tagonan sulon ulaon on, molo hutadingkon i, jala tuat mandapothon hamu?

⁴Alai pola opat hali padodot songon i disuru nasida suruanna tu ahu, sai songon i do alushu tu nasida.

⁵Dung i disuru si Sambalat ma palimahalihon songon i tu ahu naposona patioptiop di bagasan tanganna sada surat na ungap.

⁶Tarsurat do di bagasani songon on: Mehet do barita di tongatonga ni angka parbegu,

jala si Gesem, paboahon, ho dohot halak Jahudi ninna marsangkap naeng marbalik, ala ni umbahen dipajongjong ho parik i, jala ho bangkit rajanasida, ninna barita i.

⁷Nunga pola dipabangkit ho angka panurirang, asa nasida martingting di Jerusalem taringot tu ho songon on: Ibana ma raja di Juda! Nuaeng pe sai na sahat do barita i tu rajai, dibahen i ro ma ho, asa rap martuptup hita.

⁸Alai husuru muse suruanku mandok tu ibana: Nandang na tutu hatahata ni barita i, na tinuhashonmu, na tubu di bagasan roham saming do hatahata i.

⁹Ai sude nasida naeng mambiarbiari hami, ninna rohanasida: Pasohoton ni tangannasida ma ulaon i gabe unang saut diulahon. Dibahen i, ale Tuhan, sai lam pargogoi ma tanganku!

¹⁰Dung i sahat ma ahu tu bagasan jabu ni si Semaya, anak ni si Delaia, anak ni si Mehetabel, hape tarhurung ibana, ninna ma: Marpungu ma hita tu joro ni Debata, apala tu tongatonga ni joro i, jala hinsuonta ma angka pintu ni joro i, ai na ro ma nasida naeng manodos ho, bornginna i tahe nasida ro naeng manodos ho.

¹¹Alai ningku ma: Tung maporus ma baoa songon ahu on, jala tung ise ma songon ahu on masuk tu bagasan joro, laos mangolu tarbahensa? Nandang olo ahu masuk tusi.

¹²Ai ditanda rohangku do, ndada rupa
Debata marsuru ibana, didok pe hata
panurirangon i palumba ahu, ala naung diupai
si Tobia dohot si Sambalat ibana.

¹³Ala ni do umbahen na niupaan ibana, asa
mabiar ahu di rohana, laos hubahen songon
na nidokna i, asa mardosa ahu, asa pabaubau
goarhu, asa insahanna ahu.

¹⁴Ale Debatangku, sai baloshon ma tu
si Tobia dohot tu si Sambalat, hombar tu
angka pambahenannaon, nang tu boruboru
panurirang Noaja dohot tu panurirang na
asing, angka na naeng mambiarbiari ahu!

¹⁵(II.) Jadi sidung ma parik i di ari duapulu
lima bulan Elul, di bagasan limapulu dua
borngin.

¹⁶Jadi dung dibege saluhut musunami barita
i, jala diida sude bangso parbegu, angka
na humaliang hami, margudompong situtu
ma rohanasida, ai mananda be ma nasida,
Debatanta do hape manumpak saut ulaon on.

¹⁷Manongos surat huhut uju i torop halak
Jahudi, angka na umboto surat angka na
mandapothon si Tobia dohot surat angka na
ro sian si Tobia mandapothon nasida.

¹⁸Ai torop halak Juda saparbulanan dohot
ibana, ala marsimatua ibana tu Sekania, anak
ni si Ara jala si Johanan anakna i mambuat
boru ni si Mesulam, anak ni si Berekia.

¹⁹Angkup ni sai dipapujipuji nasida
pangalaho na denggan sian ibana di jolongku,

jala angka hatangku dipasahat nasida tu ibana; manongos surat huhut si Tobia naeng mambiarbiari ahu.

7¹ (I.) Jadi dung sidung pinauli parik i, hupamasuk ma huhut pintu harbangan, jala pinarose huhut angka sijaga pintu, parende dohot halak Lepi.

²Dung i hupasahat ma tu si Hanani, anggingki dohot tu si Hanania induk ni benteng i, asa parentaonna Jerusalem, ai halak na marroha hasintongan do ibana, jala mabiar mida Debata gumodang sian torop halak.

³Dung i ningku ma mandok nasida: Nandang jadi ungkapon pintu harbangan ni Jerusalem, nda jolo las ari; jala andorang disi dope jongjong angka parhali, ingkon hinsuon angka pintu harbangan i, jala momos sordahon; jala pajongjongon angka parhal sian halak isi ni Jerusalem, ganup jongjong di parhalanna, jala ganup tondong ni jabuna be.

⁴Alai mansai lambas huta i tu lambung be, jala bolon; alai otik do anggojolma pangisina, jala ndang adong dope dipauli angka jabu.

⁵(II.) Dung i dipatubu Debatangku ma tu bagasan rohangku papunguhon halak na sangap dohot angka induk dohot situasi na torop i manurathon nasida mangihuthon partubuna, gabe jumpang ahu ma sada buku aturan ni partubu ni angka na nangkok parjolo, jala jumpang ahu tarsurat disi:

⁶On ma angka jolma marluatluat, angka naung nangkok sian habuangan, angka na binuangkon ni si Nebukadnesar, raja sian Babel, gabe mulak nasida tu Jerusalem dohot tu Juda, ganup tu hutana be.

⁷Angka na ro rap dohot si Serubabel, si Josua, si Nehemia, si Azaria, si Raamyas, si Nahamani, si Mordahai, si Bilsan, si Misperet, si Bigpai, si Nehum dohot si Baana. On do bilangan ni angka baoa sian bangso Israel:

⁸Pinompar ni si Paras dua ribu saratus pitupulu dua halak.

⁹Pinompar ni si Sepatia tolu ratus pitupulu dua halak.

¹⁰Pinompar ni si Ara onom ratus limapulu dua halak.

¹¹Pinompar ni si Pahat-Moab, sian pinompar ni si Jesua dohot si Joab dua ribu ualu ratus sampulu ualu halak.

¹²Pinompar ni si Elam saribu dua ratus limapulu opat halak.

¹³Pinompar ni si Jattu ualu ratus opatpulu lima halak.

¹⁴Pinompar ni si Sakai pitu ratus onompulu halak.

¹⁵Pinompar ni si Binnui onom ratus opatpulu ualu halak.

¹⁶Pinompar ni si Bebai onom ratus duapulu ualu halak.

¹⁷Pinompar ni si Asgad dua ribu tolu ratus duapulu dua halak.

¹⁸Pinompar ni si Adonikam onom ratus onompulu pitu halak.

¹⁹Pinompar ni si Bigpai dua ribu onompulu pitu halak.

²⁰Pinompar ni si Adin onom ratus limapulu lima halak.

²¹Pinompar ni si Ater sian si Hiskia siapulu ualu halak.

²²Pinompar ni si Hasum tolu ratus duapulu ualu halak.

²³Pinompar ni si Bisia tolu ratus duapulu opat halak.

²⁴Pinompar ni si Harip saratus sampulu dua halak.

²⁵Pinompar ni si Gibeon siapulu lima halak.

²⁶Angka baoa sian Betlehem dohot Netopa saratus ualupulu ualu halak.

²⁷Angka baoa sian Anatot saratus duapulu ualu halak.

²⁸Angka baoa sian Bet Asmapet opatpulu dua halak.

²⁹Angka baoa sian Kiriat Jearim, Kepira dohot Beerot, pitu ratus opatpulu tolu halak.

³⁰Angka baoa sian Rama dohot Geba onom ratus duapulu sada halak.

³¹Angka baoa sian Mikhmas saratus duapulu dua halak.

³²Angka baoa sian Betel dohot Ai saratus duapulu halak.

³³Angka baoa sian Nebo paduahon limapulu dua halak.

³⁴ Pinompar ni si Elam paduahon saribu dua ratus limapulu opat halak.

³⁵ Pinompar ni si Harim tolu ratus duapulu halak.

³⁶ Pinompar sian Jeriko tolu ratus opatpulu lima halak.

³⁷ Pinompar sian Lod, Hadid dohot Ono pitu ratus duapulu sada halak.

³⁸ Pinompar sian Sena tolu ribu sia ratus tolupulu halak.

³⁹ Angka malim: Pinompar ni si Jedaia sian pinompar ni si Jesua sia ratus pitupulu tolu halak.

⁴⁰ Pinompar ni si Immer saribu limapulu dua halak.

⁴¹ Pinompar ni si Pashur saribu dua ratus opatpulu pitu halak.

⁴² Pinompar ni si Harim saribu sampulu pitu halak.

⁴³ Halak Lepi: Pinompar ni si Jesua dohot si Kadmiel sian pinompar ni si Hodapia pitupulu opat halak.

⁴⁴ Angka parende: Pinompar ni si Asap saratus opatpulu ualu halak.

⁴⁵ Angka sijaga pintu: Pinompar ni si Sallum, pinompar ni si Ater, pinompar ni si Talmon, pinompar ni si Akkub, pinompar ni si Hatita, pinompar ni si Sobai saratus tolupulu ualu halak.

⁴⁶ Angka Netinim: Pinompar ni si Siha, pinompar ni si Hasupa, pinompar ni si Tabaot.

⁴⁷ Pinompar ni si Keros, pinompar ni si Siaha, pinompar ni si Padon.

⁴⁸ Pinompar ni si Lebana, pinompar ni si Hagaba, pinompar ni si Salmai.

⁴⁹ Pinompar ni si Hanan, pinompar ni si Gidel, pinompar ni si Gohar.

⁵⁰ Pinompar ni si Reia, pinompar ni si Resin, pinompar ni si Nekoda.

⁵¹ Pinompar ni si Gasam, pinompar ni si Usa, pinompar ni si Pasea.

⁵² Pinompar ni si Bisia, pinompar ni si Meunim, pinompar ni si Nepusim.

⁵³ Pinompar ni si Bakbuk, pinompar ni si Hakupa, pinompar ni si Harhur.

⁵⁴ Pinompar ni si Baslut, pinompar ni si Mehida, pinompar ni si Harsa.

⁵⁵ Pinompar ni si Barkos, pinompar ni si Sisera, pinompar ni si Tama.

⁵⁶ Pinompar ni si Nesia, pinompar ni si Hatipa.

⁵⁷ Pinompar ni angka naposo ni si Salomo, pinompar ni si Sotai, pinompar ni si Soperet, pinompar ni si Perida.

⁵⁸ Pinompar ni si Jaala, pinompar ni si Darkon, pinompar ni si Gidel.

⁵⁹ Pinompar ni si Sepatia, pinompar ni si Hatil, pinompar ni si Rokeret Hasebaim, pinompar ni si Amon.

⁶⁰ Luhut halak Netinim dohot pinompar ni angka naposo ni si Salomo tolu ratus siapulu dua halak.

⁶¹ Jala on do halak angka na nangkok sia Tel-Mela, Tel-Harsa, Kerub, Addon dohot Immer, alai ndang tarpajojo nasida pinompar ni ompunasida i, nang pinomparnasida sandiri, manang tutu nasida sian Israel.

⁶² Pinompar ni si Delaia, pinompar ni si Tobia, pinompar ni si Nekoda, onom ratus opatpulu dua halak.

⁶³ Jala sian angka malim: Pinompar ni si Habai, pinompar ni si Hakos, pinompar ni si Barsilai na mambuat sada boru ni si Barsilai, halak Gilead i bahenjolmana, laos dipanggoarhon goarnasida i.

⁶⁴ Angka nasida ma mandiori surat aturan ni partubunasida, alai ndang jumpangsa, jadi ramun nasida dietong, laos dipabali nasida sian hamalimon.

⁶⁵ Dung i ro ma hata ni pangarajai mandok tu nasida: Tung na so jadi do nasida mangan sian na badia sahali, paima adong hehe malim sada mangkajongjongkon Urim dohot Tummum.

⁶⁶ Sandok luhutan i hira sahalak do opatpulu dua ribu tolu ratus onompulu halak toropna.

⁶⁷ So padohot angka naposonasida baoa dohot parompuan pitu ribu tolu ratus tolupulu pitu halak toropna; mangihut tu nasida do halak parende baoa dohot parompuan dua ratus opatpulu lima halak toropna.

⁶⁸Ia hodanasida pitu ratus tolupulu onom, ia hodanasida angka na marsahe dua ratus opatpulu lima.

⁶⁹Ia untonasida opat ratus tolupulu lima, ia halodenasida onom ribu pitu ratus duapulu.

⁷⁰(III.) Deba sian angka induk marompuompu huhut mangalehon tumpakna tu ulaon i: Pangarajai mangalehon tu parartaan i saribu dirham sere, limapulu saoran dohot lima ratus tolupulu pangkean malim.

⁷¹Deba sian angka induk marompuompu mangalehon tu parartaan i manumpak ulaon i duapulu ribu dirham sere dohot dua ribu dua ratus Mina perak.

⁷²Ia pasipasi ni situan na torop i mangalehon duapulu ribu dirham sere dohot dua ribu Mina perak dohot onompulu pitu pangkean malim.

⁷³Dung i maringan di bagasan hutanasida be ma angka malim, halak Lepi, angka sijaga pintu, angka parende, dohot deba sian na torop i, halak Netinim ro di sandok Israel. Jadi dung jumpang bulan sipaha pitu sahat ma halak Israel di bagasan hutanasida be.

8¹(I.) Dung i marluhut ma sandok bangso i hira sahalak do tu alaman na di adopan ni bahal partuaehan, angka didok nasida ma tu si Esra, siboto surat i, asa diboan buku patik ni si Musa, naung tinonahon ni Jahowa tu halak Israel.

²Jadi diboan malim Esra ma patik i tu adopan ni luhutan i, tu adopan ni baoa dohot parompuan, ro di sude halak angka na marroha manimbangi di artia bulan sipaha pitu.

³Jadi manjaha ma ibana sian i di adopan ni alaman mardonokkon bahal partuaehan sian buha siang ari sahat ro di hos ni ari di adopan ni angka baoa dohot parompuan dohot halak angka na marroha, jadi pinggol ni sandok situan na torop i mananginangi tu hata ni buku patik i.

⁴Alai anggo si Esra, siboto surat i, jongjong do di atas parjamitaan sian hau, naung binahenna hian tu ulaon on, jala jongjong di lambungna do Matitia, Sema, Anaya, Uria, Hilkia, dohot Maaseia, di siamunna, jala di hambirangna: Pedaya, Misael, Malkia, Hasum, Hasbadana, Sakaria dohot Mesulam.

⁵Dung i dipaherbang si Esra ma pustaha i di adopan ni mata ni sandok situan na torop i, ai tumimbo do ibana jongjong sian sandok situan na torop i. Jadi di na pinaherbangna i pustaha i, jongjong ma sandok bangso i.

⁶Dung i dipuji si Esra ma Jahowa, Debata na sun timbul i; jadi sandok bangso i mangalusi mandok: Amin, Amin! Toltol ia tangannasida dompak ginjang, laos songon i nasida marsomba, jala martangiang tu Jahowa, pola manungkap bohinasida dais tu tano.

⁷ Nang si Jesua, si Bani, si Serebia, si Jamin, si Akkub, si Sabetai, si Hodia, si Maaseia, si Kelita, si Azaria, si Josabad, si Hanan, si Pelaia dohot halak Lepi mangapoi bangso i mamparateatehon patik i, laos jongjong anggo bangso i di hajongjonganna.

⁸ Nasida pe torang do manjaha di bagasan buku patik ni Debata, jala dipajojor lapatanna, asa dapot nasida antusanna na jinahana i.

⁹ (II.) Dung i ro ma hata ni Nehemia, i ma pangarajai, dohot malim Esra, siboto surat i, dohot halak Lepi, angka na mangapoapoi situasi na torop i, ninna ma tu sandok situasi na torop i: Na badia do ari sadarion di Jahowa, Debatamuna i! Dibahen i unang gondok rohamuna, jala unang tumatangis hamu! Ai tumatangis be sandok bangso i, dung dibege nasida hata ni patik i.

¹⁰ Ala ni huhut umbahen didok tu nasida: Laho ma hamu, pangan hamu ma sipanganon na talmis, jala inum hamu tuak na tonggi i, tongoshon hamu huhut parjambaran tu dongan, angka na so adong hobasonna di ibana; ai na badia do ari sadarion di Tuhanta i; dibahen i unang holsoan hamu, ai las ni roha mida Jahowa, i do haroroan ni gogo tu hamu.

¹¹ Jadi dipasonangsonang halak Lepi ma sandok bangso i, ninna ma: Hohom be ma hamu, ai na badia do ari sadarion, dibahen i unang holsoan hamu!

¹²Dung i laho ma sandok bangso i, asa mangan dohot minum, huhut manongoshon angka parjambaran laho mambahen las ni roha godang; nunga tangkas diantusi nasida hata angka naung pinabotohon tu nasida.

¹³(III.) Tole paduaarihon marluhut ma angka induk marompuompu di sandok bangso i, rap dohot angka malim dohot halak Lepi tu si Esra, siboto surat i, asa tumangkas dope pajojoronna tu nasida angka hata ni patik i.

¹⁴Jadi jumpang nasida ma tarsurat di bagasan patik naung tinonahon ni Jahowa marhite sian si Musa, ingkon maringanan halak Israel di bagasan angka parlapelapean di ari raya di bulan sipaha pitu.

¹⁵Jala ingkon lumbahononna do i, pola tingtingkononna tu sandok hutanasida i dohot tu Jerusalem dohononna tahe: Borhat ma hamu tu tombak mangalap sian i rantingranting ni hau Jetun dohot rantingranting ni hau jarak harangan dohot rantingranting ni hau sampinur dohot maremare ni bagot dohot rantingranting ni hau na rugun, asa mambahen parlapelapean, songon na tarsurat i.

¹⁶Dung i ruar ma bangso i tu balian mamboan rantingranting, jala dipambahan angka parlapelapean di nasida, ganup di atas tarup ni jabuna dohot di angka alamannasida dohot di alaman ni joro ni Debata dohot di

alaman ni bahal partuaehan dohot di alaman
ni bahal Epraim.

¹⁷Jadi sandok luhutan ni halak, angka naung
mulak sian habuangan mambahen angka
parlapelapean, jala maringan di bagasan
angka parlapelapean, ai olat ni tingki ni si
Josua, anak ni si Nun rasirasa sadarion ndang
dung songon i dibahen halak Israel, jadi muba
ma godang ni las ni rohanasida disi.

¹⁸Ariari nasida tole manjaha di bagasan
buku patik ni Debata, sian ari parjolo ro di
ari panimpuli, pola pitu ari padodot nasida
marari raya, tole pauualuarihon mata ni ari
raya i, hombar tu patik i.

9¹(I.) Tole paduapuluopatarihon di bulan i
marluhut ma halak Israel, asa marpuasa
jala maruloshon tangki huhut mambahen
tano tu atas ulunasida.

²Nunga dipapulik hian anggo pinompar
ni Israel sian sandok halak sileban, laos
jongjong nasida huhut manopoti dosanasida
sandiri dohot hajahaton angka na niula ni
ompunasida i.

³Dung i hehe ma nasida jongjong di
hajongjongannasidai, huhut manjaha
nasida di bagasan buku patik ni Jahowa,
Debatanasida i, pola sansuhi ari lelengna
jala sansuhi ari nari sai didatdati nasida
manopoti dosana dohot martangiang tu
Jahowa, Debatanasida i.

⁴(II.) Dung i hehe ma laho jongjong tu hajongjongan ni halak Lepi: Si Jesua, si Bani, si Kadmiel, si Sebania, si Buni, si Serebia, si Bani dohot si Hanani, marsoara na gogo ma nasida manganguhi tu Jahowa, Debatanasida i.

⁵Ro muse hata ni halak Lepi: Si Jesua, si Kadmiel, si Bani, si Hasabneya, si Serebia, si Hodia, si Sebania dohot si Petahia mandok: Hehe ma hamu, puji hamu ma Jahowa, Debatamuna i sian salelenglelengna, ro di salelenglelengna! Ingkon pujion ni halak ma Goar ni hamuliaonmu, na tumimbul tahe sian nasa parendeon dohot pujipujian ni halak.

⁶Sasada Ho do Debata, ale Jahowa! Nunga ditompa Ho langit ni langitan, rap dohot sandok paranganna, nang tano on ro di nasa na di atasna, tole laut ro di nasa isina; laos Ho do panguluhon saluhutna i, jala sandok parangan di langit i marsomba tu Ho.

⁷Ho do Debata, ale Jahowa, naung mamillit si Abraham, jala naung manogihon ibana ruar sian Ur di Kasdim, jala nunga dibahen Ho goarna si Abraham.

⁸Jala nunga jumpang Ho rohana marsihohot di adopanmi jala nunga marpadan Ho dohot ibana, lehononmu tano ni halak Kanaan, Het i, Amori, Perisi, Jebusi, Girgasi marbasabasahon tu pinomparna; jala nunga dipasintong Ho angka bagabagami, ai nabonar do Ho.

⁹Jala nunga marpanatap roham mida pardangolan na niae ni ompunami di Misir, jala nunga ditangihon Ho angguhangguknasida di lambung laut arung.

¹⁰Jala nunga dipatupa Ho angka tanda dohot halongangan mangalo Firaun dohot sude angka naposona ro di sandok bangso isi ni tanona; ai nunga ditanda Ho jungkatna dompak nasida, gabe tarbarita Goarmu dibahen Ho, songon na andar sadarion.

¹¹Nunga dipatolak Ho laut i di adopannasida, asa taripar nasida mardalan di na mahiang di tongatonga ni laut i, alai anggo halak na mangeahi nasida nunga disampathon Ho tu bagasan lung, hira sada batu tu bagasan aek angka na doras.

¹²Jala nunga ditogihon Ho nasida marhite sian ombun na marsijongjong ia arian, jala marhite sian api na marsijongjong ia bornginna i, asa manulu dalam sidalanannasida i.

¹³Nunga turun Ho tu atas dolok Sinai, jala nunga mangkatai Ho dohot nasida sian banua ginjang, jala nunga dilehon Ho tu nasida uhum angka na tigor dohot angka patik hasintongan, aturan dohot tona, angka na denggan i.

¹⁴Jala nunga dipabotohon Ho tu nasida ari Sabbatmu na badia i, jala nunga ditonahon Ho tu nasida angka tona, aturan dohot patik marhite sian pamangan ni si Musa naposom.

¹⁵Jala nunga dilehon Ho tu nasida sagusagu sian banua ginjang, uju anturaparon nasida; jala nunga diparuar Ho aek sian dolok batu pasombu uasnasida i, jala nunga marbagabaga Ho tu nasida, asa bongot nasida manean tano i, nunga pola dipatoltol Ho tanganmu maruari, ingkon lehononmu tano i tu nasida.

¹⁶Alai marisuang marroha hajungkaton do ompunami jala dipajogal tangkuhukna, jala ndang ditangihon nasida angka tonami.

¹⁷Lam dijua nasida do manangihon, jala ndang diingot nasida halongangan angka naung binahenmu tu nasida, dipajogal nasida tangkuhukna, pola dipabangkit sahalak ihutan naeng mulak uju manggunturi nasida tu parhatobanannasida i. Alai anggo Ho, ale Debata, marpamuati do roham, parasi roha jala pardengganbasa do Ho, lambat tarrimas jala parasi roha godang, jala ndang ditadingkon Ho nasida.

¹⁸Atik pe dibahen nasida di nasida sada lombu tuangan, huhut didok: On do Debatam, naung manogihon ho ruar sian Misir, asa mambahen gasip godang.

¹⁹Alai laos so olo anggo Ho manadingkon nasida di halongonan sian asi ni roham angka na godang i; ia ombun na marsijongjong ndang meret sian lambungnasida arian, laho manogihon nasida di tongan dalan; api

na marsijongjong pe songon i bornginna i,
manulu dalan sidalanannasida i.

²⁰Angkup ni nunga dibasabasahon Ho tu nasida Tondim na denggan i, marrohaihon nasida, jala ndang diontok Ho mannamu sian pamangannasida, jala nunga dilehon Ho tu nasida aek pasombu uasnasida i.

²¹Pola opatpulu taon lelengna diparmudumudu Ho nasida di halongonan, asa unang hurangan nasida; ulosnasida pe ndang olo buruk jala patnasida ndang olo marpurapura.

²²Jala nunga dibasabasahon Ho tu nasida angka harajaon dohot bangso, jala nunga disagisagihon Ho tu nasida angka i sahat ro di partalpahan, asa nasida manoluk tano ni si Sihon dohot tano ni raja sian Hesbon dohot tano ni si Og, raja sian Basan.

²³Jala nunga dipatorop Ho anaknasida, songon bintang angka na di langit, jala nunga diboan Ho nasida sahat tu tano naung pinarbagabagami hian tu angka ompunasida, ingkon bongotanna jala teanonna.

²⁴Jadi nunga bongot angka anaknasida i tu tano i, jala nunga ditean nasida; jala nunga dipatunduk Ho maradophon nasida halak isi ni tano i, halak Kanaan i, jala nunga dipasahat Ho nasida tu bagasan tangannasida i, nang rajanasida, nang angka bangso ni tano i, asa bahenonna tu nasida guru lomo ni rohanasida.

²⁵Nunga dipapatu nasida huta angka na gonting i dohot tano bosar, jala disoluk bagas angka na gok arta marragamragam, tole sumur angka na nidakdak, porlak anggur, porlak ni hau jetun dohot hau na marparbue, tau sipanganon mansai godang, gabe mangan nasida maradu bosur jala mokmok, gabe mangolooloi hisapna nasida marhite sian denggan ni basam na godang i.

²⁶Hape lam jungkat nasida jala manggunturi mangalo Ho jala dibolongkon patikmi tu pudi ni tanggurun nasida, lam dibunui muse panurirangmu, angka na manindangi dompak nasida, naeng manogihon nasida mulak nian tu Ho, asa mambahen angka gasip godang.

²⁷Ala ni nunga dipasahat Ho nasida tu bagasan tangan ni musuna, angka na pasipalsipal nasida. Alai ia dung hagogotan nasida manganguhi ma nasida tu Ho, gabe ditangihon Ho nasida sian banua ginjang, jala hombar tu asi ni roham angka na godang i dilehon Ho tu nasida halak silehon tua, angka na paluahon nasida sian tangan ni musuna.

²⁸Alai ia dung marhasonangan nasida, mangualahi muse nasida mangualahon sogo ni roham, gabe dipasombu Ho nasida di bagasan tangan ni musunasida, asa diparhatoban nasida. Dung i mulak muse rohanasida i, ma nasida tu Ho, gabe ditangihon Ho jadi ditangihon Ho nasida sian banua ginjang, jala

dipalua Ho nasida hombar tu asi ni roham angka na godang i mansai jotjot.

²⁹Dung i disuru Ho muse suruanmu mangapoapoi nasida, asa mulak rohanasida tu patikmu. Alai lam jungkat nasida marroha jala ndang ditangihon angka tonami, sai didatdati do mardosa dompak patikmi, angka na tama patupaon nijolma nian, asa mangolu ibana; hape lam dipaholang nasida abaranasida i, jala dipajogal tangkuhukna, jala ndang olo nasida manangihon.

³⁰Hape pola leleng situtu sai dipaanjuanju Ho nasida, jala marsipaingot Ho tu nasida marhitehite Tondim, marhite sian pamangan ni angka panurirangmu; alai ndang diparateatehon nasida. Ala ni do umbahen dipasahat Ho nasida tu bagasan tangan ni angka bangso marluatluat.

³¹Alai binahen ni asi ni roham angka na godang i, ndang laos sun siap nasida dibahen Ho, jala ndang ditadingkon Ho nasida. Ai Debata parasi roha jala pardengganbasa do Ho!

³²(III.) Nuaeng pe, ale Debatanami! Ho do Debata na timbul sahali, na sun hinagogo, jala na songkal, na tongtong marningot parjanjian dohot asi ni roha! Unang lea roham mida sude pardangolan, angka na mangonai tu hami, tu rajanami, tu induknami, tu malimnami, tu panurirangnami, tu ompunami dohot tu

sandok bangsom, olat ni tingki ni angka raja sian Assur rasirasa sadarion.

³³Alai tutu na bonar do anggo Ho, taringot tu sude naung mangonai tu hami, ai na mangulahon hasintongan do anggo Ho, alai na mangulahon hajahaton do anggo hami.

³⁴Angka rajanami pe dohot induknami, malimnami dohot ompunami ndang diulahon angka patikmi, jala ndang diparateatehon nasida angka tonami dohot panindangionmi, angka naung hinatindangkonmu tu nasida.

³⁵Hape anggo nasida ndang marpangoloion tu Ho di bagasan harajaonnasida i dohot di denggan ni basam na godang i, naung nilehonmu tu nasida dohot di bagasan tano na lambas dohot na lunak, naung nilehonmu tu nasida, jala ndang dipauba nasida rohanasida i sian parulaonnasida angka na roa i.

³⁶Ida ma, ala ni hatoban do hami nuaeng di bagasan tano, naung binasabasahonmu tu ompunami, asa panganonna nian parbuena dohot gogona, hape ida ma, hatoban do hami balik disi.

³⁷Jala gogo ni tano i ganda do di raja, angka naung pinabangkitmu gumomgom hami ala ni dosanami, jadi guru lomo ni rohanasida do gumomgom dagingnami dohot dorbiamami, tung na marhagogotan godang do hami.

³⁸(10-1) (I.) Jadi dung salpu saluhutna i marsihohot rohanami paratahon padan

na hot, pola tarsurat jala disahap angka induknam, halak Lepi dohot malimnam.

10¹ (10-2) On do goargoar ni jolma angka na mambahen sahapna: Pangarajai si Nehemia, anak ni si Hakalia dohot si Sedekia.

² (10-3) Si Seraia, si Azaria, si Jeremia.

³ (10-4) Si Pashur, si Amaria, si Malkia.

⁴ (10-5) Si Hantus, si Sebania, si Malluk.

⁵ (10-6) Si Harim, si Meremot, si Obaja.

⁶ (10-7) Si Daniel, si Gineton, si Baruk.

⁷ (10-8) Si Mesulam, si Abia, si Mijamin.

⁸ (10-9) Si Maseia, Bilgai dohot si Semaya; malim do luhutna i.

⁹ (10-10) Alai anggo halak Lepi on do: Si Jesua, anak ni si Azanya, si Binnui sian angka anak ni si Henadad dohot si Kadmiel.

¹⁰ (10-11) Ia hahaangginasida on do: Si Sebania, si Hodia, si Kelita, si Pelaia, si Hanan.

¹¹ (10-12) Si Mika, si Rehob, si Hasabya.

¹² (10-13) Si Sakur, si Serebia, si Sebania.

¹³ (10-14) Si Hodia, si Bani, si Beninu.

¹⁴ (10-15) Angka induk ni bangso i on do: Si Paras, si Pahat-Moab, si Elam, si Jattu, si Bani.

¹⁵ (10-16) Si Buni, si Asgad, si Bebai.

¹⁶ (10-17) Si Adonia, si Bigpai, si Adin.

¹⁷ (10-18) Si Ater, si Hiskia, si Assur.

¹⁸ (10-19) Si Hodia, si Hasum, si Bisia.

¹⁹ (10-20) Si Harip, si Anatot, si Nebai.

²⁰ (10-21) Si Magpias, si Mesulam, si Hesir.

²¹ (10-22) Si Mesezabeel, si Sadok, si Jadua.

²² (10-23) Si Pelatia, si Hanan, si Anaya.

²³ (10-24) Si Hosea, si Hanania, si Hasub.

²⁴ (10-25) Si Halohes, si Pilha, si Sobek.

²⁵ (10-26) Si Rehum, si Hasabna, si Maseia.

²⁶ (10-27) Si Ahia, si Hanan, si Anan.

²⁷ (10-28) Si Malluk, si Harim dohot si

Baana.

²⁸ (10-29) Tole muse pasipasi ni bangso i, angka malim, halak Lepi, angka sijaga pintu, angka parende, angka Netinim, ro di sude halak na pulik dirina sian angka bangso marluatluat, naeng mangihuthon tu patik ni Debata rap dohot jolmanasida, anaknasida dohot borunasida, sude tahe angka na umboto mangantusi patik i.

²⁹ (10-30) (II.) Sude nasida marsahata dohot hahaangginasida i, angka na sangap i, rap ro nasida pola marbulan jala maruari, ingkon marparange nasida di bagasan patik ni Debata, naung nilehonna marhite sian pamangan ni si Musa, naposo ni Debata, jala ingkon radotan jala ulahononnasida sude tona ni Jahowa, Tuhanta i, angka uhumna pe dohot aturanna.

³⁰ (10-31) Jala na so tupa be lehononnam i borunami tu angka bangso ni tano i, manang buaton ni anaknami borunasida i.

³¹ (10-32) Jala tung sura dipamboan angka bangso ni luat i boniagana dohot tuhortuhoran marragamragam di ari Sabbath

naeng gadisonna, na so tupa buatonnamisian nasida anggo di ari Sabbath manang di ari na badia pe; tole papitutaonhon ingkon taon haluaon do i, na so tupa hamu martunggu utang anggo disi.

³²(10-33) Angkup ni laos hami sandiri mambahen angka patik tu hami, ingkon lehononnamis ganup taon sapartolu sekkel manumpak ulaon di joro ni Debatanta.

³³(10-34) Pangkeon do i tu roti na marhadohoan, tu pelean sipanganon ariari dohot tu pelean situtungon ariari, di ari Sabbath, di poltak ni bulan, di angka ari raya dohot tu ulaon na badia angka na asing dohot tu pelean pardosaon bahen pardenggan di Israel, ro di sude ulaon di bagasan joro ni Debatanta i tumpahanna.

³⁴(10-35) Angkup ni mandabu tondung do hami taringot tu soban silehonlehon ni angka malim, halak Lepi dohot situasi na torop i, asa huboan hami do i tu joro ni Debatanta, mangihuthon partubunami marompuompu, di tingki angka na binuhul ganup taon, laho tutungon di atas langgatan ni Jahowa, Debatanta i songon na tarsurat di bagasan buku patik.

³⁵(10-36) Tole muse ingkon boanonnamis ganup taon patumonaan ni haumanami, dohot patumonaan ni nasa parbue ni hau ganup taon, tu joro ni Jahowa.

³⁶(10-37) Tole muse angka anak buhabajunami dohot buhabaju ni pinahannami, songon na tarsurat di bagasan buku patik; tole muse angka buhabaju ni lombunami dohot birubirunami, ingkon boannonami do i tu joro ni Debatanta, tu malim angka na marhalado di bagasan joro ni Debatanta.

³⁷(10-38) Ingkon boannonami huhut patumonaan sian itaknami dohot sian peleannami sitatingan dohot sian sude parbue ni hau, sian anggur dohot sian miak tu angka malim, tu bagasan angka bilut di joro ni Debatanta, tole muse saparsampulu sian gogo ni haumanami tu halak Lepi, alai ingkon halak Lepi sandiri papungupunguhon parsampuluan i di saluhut huta parhaumaannami.

³⁸(10-39) Malim pe, pinompar ni si Aron, ingkon dongan ni halak Lepi, molo laho halak Lepi mangido parsampuluan i, jala ingkon boanon ni halak Lepi muse saparsampulu sian parsampuluan i nangkok tu joro ni Debatanta, tu bagasan angka bilut ni bagas parpeopan arta.

³⁹(10-40) Ai ingkon tu bagasan angka bilut i boanon ni halak Israel dohot halak Lepi angka pelean tatingan sian eme, anggur dohot miak; ai disi do angka ulaula na badia i dohot malim angka na marulaon, tole angka sijaga pintu dohot angka parende; jala na so tupa tadingkononami joro ni Debatanta i.

11¹ (I.) Alai maringan di Jerusalem

do anggo angka induk ni bangso i; mandabu todung ma anggo pasipasi ni bangso i, ingkon boanon saripe sian sampulu, asa maringan di Jerusalem, huta na badia i, jala na sia ripenari di bagasan huta angka na asing.

² Jadi dipasupasu bangso i ma sude baoa, angka na ringgas sian lomona maringan di Jerusalem.

³ On do angka induk ni luat i, angka na maringan di Jerusalem, nang angka na maringan di angka huta ni Juda, ganup di partalianna be, di angka hutanasida i; halak Israel, angka malim dohot halak Lepi, angka Netinim dohot pinompar ni angka naposo ni si Salomo.

⁴ Alai anggo di Jerusalem maringan deba sian pinompar ni si Juda, jala deba sian pinompar ni si Benjamin. Angka sian pinompar ni si Juda, on do: Si Ataya, anak ni si Usia, i ma anak ni si Sakaria, i ma anak ni si Amaria, i ma anak ni si Sepatia, i ma anak ni si Mahalaleel, sian pinompar ni si Peres.

⁵ Tole muse si Maseia, anak ni si Baruk i ma anak ni si Kalhose, i ma anak ni si Hazaia, i ma anak ni si Adaya, i ma anak ni si Johaiarib, i ma anak ni si Sakaria, i ma anak ni si Siela.

⁶ Sandok pinompar ni si Peres, angka na maringan di Jerusalem opat ratus onompulu ualu halak, angka na marhuaso.

⁷ On do pinompar ni si Benjamin: Si Sallu, anak ni si Mesulam, i ma anak ni si Joed, i ma anak ni si Pedaya, i ma anak ni si Kolaia, i ma anak ni si Maseia, i ma anak ni si Itiel, i ma anak ni si Jesaya.

⁸ Jala dung ibana: Si Gabbai, si Sallai, sia ratus duapulu ualu halak.

⁹ Jala si Joel, anak ni si Sikri, induk nasida; jala si Juda, anak ni si Hassenua, induk paidua parenta huta i.

¹⁰ Sian angka malim: Si Jedaia, anak ni si Johaiarib, dohot si Jakin.

¹¹ Si Seraia, anak ni si Hilkia, i ma anak ni si Mesulam, i ma anak ni si Sadok, i ma anak ni si Merayot, i ma anak ni si Ahitub, induk di joro ni Debata.

¹² Tole muse hahaangginasida, angka na mangaradoti ulaon di bagasan joro i, ualu ratus duapulu dua halak do. Tole muse si Adaya, anak ni si Jeroham, i ma anak ni si Pelaia, i ma anak ni si Amzi, i ma anak ni si Sakaria, i ma anak ni si Pashur, i ma anak ni si Malkia.

¹³ Tole muse hahaanggina, angka induk marompuompu dua ratus opatpulu dua halak. Angkup ni si Amasa i, anak ni si Azarel, i ma anak ni si Aksai, i ma anak ni si Mesilemot, i ma anak ni si Immer.

¹⁴ Ro di hahaangginasida, angkajolma na marhuaso saratus duapulu ualu halak, jala induk nasida si Sabdiel, anak ni si Gedolim.

¹⁵Sian halak Lepi: Si Semaya, anak ni si Hasub, i ma anak ni si Asrikam, i ma anak ni si Hasabya, i ma anak ni si Buni.

¹⁶Nang si Sabetai dohot si Josabad sian induk ni halak Lepi, angka na parenta ulaon ruar di joro ni Debata.

¹⁷Tole si Matania, anak ni si Mika, i ma anak ni si Sabdi, i ma anak ni si Asap, ibana induk manguluhon pujipujian laho martangiang; tole muse si Bakbukya, induk paidua sian hahaanggina; tole muse si Abda, anak ni si Samua, i ma anak ni si Galal, i ma anak ni si Jedutun.

¹⁸Saluhut halak Lepi angka na di huta na badia i dua ratus ualupulu opat halak.

¹⁹Angka sijaga pintu: Si Akkub, si Talmon rap dohot hahaangginasida, angka na marjaga angka bahal saratus pitupulu dua halak.

²⁰Alai halak Israel na tinggal i ro di angka malim dohot halak Lepi, maringan di angka huta ni Juda do, ganup di partalianna be.

²¹Ia halak Netinim maringan do di Opel; jala si Siha dohot si Gispa parenta halak Netinim.

²²Alai anggo induk ni halak Lepi di Jerusalem, i ma: Si Usi, anak ni si Bani, i ma anak ni si Hasabya, i ma anak ni si Matania, i ma anak ni si Mika. Sian pinompar ni si Asap do angka parende mangaradoti ulaon di joro ni Debata.

²³ Ai adong do huhut parenta ni rajai taringot tu nasida, umbuhul bohal sijaloon ni angka parende ganup ari.

²⁴ Ia si Petahia, anak ni si Mesezabeel, sian pinompar ni si Jara, anak ni si Juda, wakil ni rajai di saluhut hata tu situasi na torop i.

²⁵ (II.) Angkup ni sian pinompar ni si Juda, adong deba maringan di huta pagaran dohot di ladangnasida mardonokkon Kiryat-Arba ro di pagaran na masuk tusi; di Dibon ro di pagaran na masuk tusi; di Jekabseel ro di pagaran na masuk tusi.

²⁶ Di Jesua, di Molada, di Betpelet.

²⁷ Di Hasar-Sual, di Berseba dohot di pagaran na masuk tusi.

²⁸ Di Ziklag, di Mekona dohot di pagaran na masuk tusi.

²⁹ Di En-Rimmon, di Zora, di Jarmut.

³⁰ Di Sanoa, di Adullam ro di sosorna; di Lakis ro di ladangna; di Azeka ro di pagaranna. Jadi marsaro ma nasida olat ni Berseba sahat ro di rura Hinnom.

³¹ Alai anggo pinompar ni si Benjamin maringan do olat ni Geba di Mikhmas, Haya, Betel ro di angka pagaranna.

³² Di Anatot, Nob, Anania.

³³ Hazor, Rama, Gitaim.

³⁴ Hadid, Zeboim, Naballat.

³⁵ Lod halak Ono ro di rura ni angka tungkang hau.

³⁶Sian halak Lepi pe satonga maringan di Juda, na satonganari di Benjamin.

12¹(I.) On do goargoar ni angka malim dohot halak Lepi, angka naung nangkok rap dohot si Serubabel, anak ni si Sealtiel dohot si Josua, si Seraia, si Jeremia, si Esra.

²Si Amaria, si Malluk, si Hantus.

³Si Sekania, si Rehum, si Meremot.

⁴Si Ido, si Ginnetoi, si Abia.

⁵Si Mijamin, si Maadia, si Bilga.

⁶Si Semaya, si Johaiarib, si Jedaia.

⁷Si Sallu, si Amok, si Hilkia dohot si Jedaia. I ma angka induk ni malim dohot hahaangginasida di tingki ni si Josua.

⁸Alai anggo halak Lepi on do: Si Josua, si Binnui. Si Kadmiel, si Serebia, si Juda dohot si Matania manguluhon pujipujian rap dohot hahaanggina.

⁹Tole si Bakbukya dohot si Uni, hahaangginasida i, patondong dohot nasida marrongkanrongkan.

¹⁰Alai si Josua manubuhon si Joiakim, ma manubuhon si Eliasib, anak ni muse si Joiada.

¹¹Si Joiada manubuhon si Jonatan, si Jonatan manubuhon si Jadua.

¹²Uju di tingki ni si Joiakim angka on do induk ni angka malim marompumpu: Sian gansi si Seraia do si Meraya, sian si Jeremia do si Hanania.

¹³Sian si Esra do si Mesulam, sian si Amaria do si Johanan.

¹⁴Sian si Melihu do si Jonatan, sian si Sebania do si Josep.

¹⁵Sian si Harim do si Adna, sian si Merayot do si Helkai.

¹⁶Sian si Ido do si Sakaria, sian si Gineton do si Mesulam.

¹⁷Sian si Abia do si Sikri, sian si Minyamin dohot si Moaja do si Piltai.

¹⁸Sian si Bilga do si Samua, sian si Semaya do si Jonatan.

¹⁹Sian si Johaiarib do si Matenai, sian si Jedaia do si Usi.

²⁰Sian si Salai do si Kallai, sian si Amok do si Heber.

²¹Sian si Hilkia do si Hasabya sian si Jedaia do si Netaneel.

²²Uju di tingki ni si Eliasib, si Joiada, si Johanan dohot si Jadua tarsurat do angka induk ni halak Lepi dohot malim marompuompu sahat ro di harajaon ni si Darius, raja sian Persia.

²³Angka induk ni halak Lepi marompuompu tarsurat do di bagasan buku jamita sahat ro di tingki ni si Johanan, anak ni si Eliasib.

²⁴Angka induk ni halak Lepi on do: Si Hasabya, si Serebia, dohot si Josua, anak ni si Kadmiel ro di hahaangginasida i, patondong dohot nasida laho mamujimuji dohot mandok

mauliate, hombar tu parenta ni si Daud, halak ni Debata marrongkanrongkan.

²⁵Ianggo si Matania, si Bakkukya, si Obaja, si Mesulam, si Talmon dohot si Akkub, i ma angka sijaga pintu harbangan marhal di lambung ni angka bilut parpeopan arta di lambung bahal.

²⁶I ma angka induk uju di tingki ni si Joiakim, anak ni si Josua, i ma anak ni si Josadak dohot uju di tingki ni si Nehemia, pangarajai ni luat i dohot malim Esra, siboto surat i.

²⁷(II.) Alai laho mangompoi parik ni Jerusalem dilului nasida ma halak Lepi sian sude inganannasida i, asa boanonna nasida tu Jerusalem, asa marari raya haompoan mardongan las ni roha dohot angka ende pujipujian, mardongan arbab, sordam dohot hasapi.

²⁸Jadi marpungu ma pinompar ni halak parende, nang sian tano adaran humaliang Jerusalem, nang sian angka pagaran ni halak Netopa i.

²⁹Nang sian pagaran Gilgal, nang sian ladang Geba dohot Asmapet; ai pauli angka pagaran do halak parende humaliang Jerusalem.

³⁰Dung i manguras dirina be ma angka malim dohot halak Lepi, diuras nasida huhut situasi na torop i, angka pintu harbangan dohot parik.

³¹ Dung i hudokkon ma angka induk ni Juda manaek tu parik, laos hupajongjong ma dua rongkanaan bolon halak na mamujimuji angka na marudurudur di atas parik tungkan siamun dompak bahal partangkalan.

³² Jala ihut tu nasida do: Si Hosaya dohot satonga ni angka induk ni Juda.

³³ Nang si Azaria, si Esra, si Mesulam.

³⁴ Si Juda, si Benjamin, si Semaya dohot si Jeremia.

³⁵ Nang deba sian angka anak ni malim mardongan sarune: Si Sakaria, anak ni si Jonatan, i ma anak ni si Semaya, i ma anak ni si Matania, i ma anak ni si Mikha, i ma anak ni si Sakur, i ma anak ni si Asap.

³⁶ Nang hahaanggina: Si Semaya, si Asarel; si Milalai, si Gilalai, si Mai, si Netaneel, si Juda dohot si Hanani rap dohot parhinaloan ni si Daud, halak ni Debata dohot si Esra, siboto surat i manguluhon nasida.

³⁷ Tole muse dompak bahal partuaehan tondongnasida i manaek nasida muse mangihutihut tangga ni huta ni si Daud tu atas parik na tumimbo, sian bagas ni si Daud sahat ro di bahal partuaehan tungkan habinsaran.

³⁸ Ia rongkanaan paduahon ni halak na mamujimuji mardalan do tungkan hambirang, ihut tu nasida do ahu dohot satonga halak situasi na torop i di atas parik tungkan julu ni

palaspalas pamurunan sahat ro di parik na lambas i.

³⁹Tole muse tungkan julu ni bahal Epraim, boti tu bahal na matua i, boti tu bahal pardengkean, boti tu palaspalas Hananel, boti tu palaspalas Mea sahat ro di bahal birubiru, ngongong nasida muse di bahal hurungan.

⁴⁰Jadi jongjong ma na dua rongkanaan ni halak na mamujimuji di bagasan joro ni Debata, nang ahu dohot satonga ni angka induk donganku.

⁴¹Alai anggo angka malim: Si Eliakim, si Maaseia, si Minyamin, si Mikha, si Eleonai, si Sakaria dohot si Hanania mardongan sarune do.

⁴²Tole muse si Maaseia, si Semaya, si Eleasar, si Usi, si Johanan, si Malkia, si Elam dohot si Eser; ro di angka parende mangasa gogo marende, jala si Israhia indukna manguluhon.

⁴³Jala di ari na sasada i dipelehon nasida angka pelean bolon, jala marlas ni roha nasida; ai nunga dipalas Debata rohanasida i marhite sian las ni roha godang; marlas ni roha nang jolmanasida dohot ianakhonnasida, pola tarbege tu na dao las ni roha ni isi ni Jerusalem.

⁴⁴(III.) Laos di ari na sasada i huhut dipabangkit nasida angka baoa mangaramoti angka bilut parpeopan arta, angka pelean tatingan, angka patumonaan dohot

parsampuluan, asa papunguonna tusi gogo ni tano i humaliang angka huta bahen parjambaran naung binuhul ni patik hian di angka malim dohot di halak Lepi; ai marlas ni roha do halak Juda di ulaon na niradotan ni angka malim dohot halak Lepi.

⁴⁵Jadi diradoti nasida ma ulaon di Debatanasida i dohot ulaon pangurasian; nang angka parende dohot sijaga pintu, hombar tu parenta binahen ni si Daud dohot si Salomo anakna i.

⁴⁶Ai sian na robi dope, olat ni tingki ni si Daud, sai pinompar ni si Asap do angka induk ni parende manguluhon ende pujipujian dohot hamauliateon tu Debata.

⁴⁷Dibahen i uju di tingki ni Serubabel dohot Nehemia, sandok Israel mangalehon parjambaran tu halak parende dohot sijaga pintu bahen bohalna siganup ari, jala diparbadiai nasida do i di halak Lepi, jala halak Lepi muse pabadiahon angka i di pinompar ni si Aron.

13¹(I.) Laos di ari na sasada i dijaha nasida buku patik ni si Musa tu pinggol ni situan na torop i, gabe jumpang nasida tarsurat disi, na so tupa masuk halak Amon dohot Moab tu bagasan luhutan ni Debata ro di salelenglelengna.

²Ala so ditomutomuhon nasida halak Israel mamboan sagusagu dohot aek, lam diupai nasida tahe si Bileam mangalo halak Israel,

asa palasanna nasida, hape dihosong Debata do bura i manjadi pasupasu.

³Jadi dung dibege nasida hata ni patik i, dipapulik nasida ma sandok halak sileban sian Israel.

⁴Alai tahe jumolo sian tingki on sahat tu malim Eliasib sada bilut di joro ni Debatanta, gabe martondong ibana tu si Tobia, jala nunga dibahen di ibana sada bilut na bolon.

⁵Jadi tusi do dipamasuk halak na jolo angka pelean sipanganon, daupa, angka ulaula ro di parsampuluan sian eme, anggur dohot miak, naung pinatik hian tu halak Lepi, angka parende dohot sijaga pintu, angkup ni pelean tatingan tu angka malim.

⁶Alai uju masa saluhutna i ndang ahu di Jerusalem; ai patolupuluduataonhon hinarajahon ni si Artasasta, raja sian Babel, ro ahu mulak tu rajai, jadi dung salpu deba ari mangido muse ahu tu rajai, loasonna ahu laho.

⁷Jadi dung sahat ahu tu Jerusalem, pintor mamoto ahu di jea naung binahen ni si Eliasib manatap si Tobia, naung binahenna i di ibana sada bilut di alaman ni joro ni Debata.

⁸Jadi piripirion situtu ma ahu, pola hureongkon luhut ulaula sian jabu ni si Tobia tu balian sian bilut i.

⁹Dung i hudokkon ma asa urasanna angka bilut i; dung i hupasuang muse tusi angka

ulaula tu joro ni Debata, pelean sipanganon dohot daupa.

¹⁰(II.) Dung i tarbortik huhut tu ahu na so nilehonna angka parjambaran tu halak Lepi; dibahen i nunga pola maporus halak Lepi dohot angka parende, angka na mangaradoti ulaon i nian, ganup tu ladangna be.

¹¹Jadi mangonai hata ma ahu tu angka induk i, ningku ma: Boasa naung tarulang joro ni Debata? Dung i hupaluhut ma nasida, jala hupasuang nasida muse tu tohonanna hian.

¹²Jadi sandok halak Juda muse mamboan parsampuluan sian eme, anggur dohot miak tu bagasan bilut parpeopan arta.

¹³Dung i hupabangkit ma bahen induk siramoti angka arta malim Selemia dohot si Sadok, juaratulis i, jala sian halak Lepi: Si Pedaya, jala marpandapotan tu nasida si Hanan, anak ni si Sakur, i ma anak ni Matania; ai haposan do nasida dirajumi, jala ulaonnasida ingkon sagihononna tu angka hahaanggina.

¹⁴Sai ingot ma i, ale Debatangku, manumpakkon na denggan tu ahu balosna, jala unang sesa uhumhu na denggan i, angka na hubahen tu joro ni Debatangku mangaradoti ulaon na masuk tusi.

¹⁵(III.) Di angka ari uju i, huida huhut deba halak Juda, angka na mardege pangilangan di ari Sabbat dohot mamboan angka tibalán, jala

diampehon tu angka halode, nang anggur, parbue ni anggur dohot parbue ni hau ara dohot ragamragam siboanon, asa boanonna masuk tu Jerusalem di ari Sabbat. Jadi huorai ma nasida gadisonna sipanganon di ari na sasada i.

¹⁶Alai maringan huhut disi halak Tirus, angka na mamboan dengke dohot tuhortuoran marragamragam, asa gadisonna di ari Sabbat tu halak Juda, angka na di Jerusalem.

¹⁷Jadi mangonai hata ma ahu tu halak Juda, angka na sangap, ningku ma mandok nasida: Pambahenan na roa dia do i na binahenmuna on, asa mangaramuni ari Sabbat?

¹⁸Nda laos songon i do binahen ai ompumuna i, gabe diparo Debatanta luhut jea on tu hita dohot tu hutanta on? Hape lam ditambahi hamu muse torutoru tu Israel, ala naung niramunanmuna ari Sabbat i.

¹⁹Jadi disi mamungka rambon ari di jolo ni ari Sabbat, hudokkon ma hinsuon angka pintu harbangan ni Jerusalem, jala hupatikkon ma na so tupa ungkapon ni halak, nda jolo salpu ari Sabbat i; hupajongjong huhut deba sian angka naposongku marjaga di angka harbangan, asa unang adong na mamboan siboanon tu bagasan huta i di ari Sabbat.

²⁰Jadi marmalam di balian ni Jerusalem ma sahali manang dua hali saudagar, angka na manggadis boniaga marragamragam.

²¹ Jadi hupalumba ma nasida, ningku ma mandok nasida: Boasa tung marmalam hamu di balian ni parik? Molo sahalinari dibahen hamu songon i, ingkon tangkupon do hamu! Jadi olat ni ari i ndang dung be ro nasida di ari Sabbat.

²² Dung i ningku ma mandok halak Lepi, ingkon urasanna dirina, asa ro nasida mangaramoti angka pintu harbangan laho pabadiahon ari Sabbat i. Ale Debatanku, ingot ma dohot i manumpakkon na denggan tu ahu balosna, jala olani ahu hombar tu hinagodang ni asi ni roham.

²³ (IV.) Angkup ni huida huhut di angka ari uju i deba halak Jahudi, angka na marjolmahon parompuan sian Asdod, Amon dohot Moab.

²⁴ Dibahen i anakkonasida pe mamangke satonga hata Asdod, ai ndang diboto nasida hata Jahudi, dibuat do tahe pangkuling ni ganup bangso.

²⁵ Jadi mangonai hata ma ahu tu nasida, pola huburai nasida, jala hulombuti deba baoa sian nasida, jala hujanggejangge obuknasida, pola hupatolon nasida tu Debata: Na so tupa lehononmuna borumuna tu anaknasida i, jala na so tupa buatonmuna borunasida bahenjolma ni anakmuna, manang bahenjolmamuna sandiri.

²⁶ Nda nunga mardosa taringot tusi si Salomo, raja ni Israel? Hape nian di

tongatonga ni torop bangso parbegu ndang adong raja nanggo sahalak tudoshon ibana, na hinaholongan ni Debatana nian, pola dipabangkit Debata ibana gabe raja gumomgom sandok Israel; ibana garina mardosa dielaela angka parompuan sileban.

²⁷ Tung lomomuna ma tama paihutonnami, asa mangulahon jea on na sai balga, asa mardosa tu Debatanta, laho marjolmahon parompuan sileban?

²⁸ Jadi sada sian angka anak ni si Joiada, anak ni sintua ni malim Eliasib, marsimatua tu si Sambalat halak Horon i, gabe hulele ibana sian lambungku.

²⁹ Ale Debatanku sai ingot ma tu nasida naung niramunanna hamalimon dohot parjanjian ni angka malim dohot halak Lepi!

³⁰ Dung i huuras ma nasida sian nasa ruhut ni halak sileban, jala hupahot muse pargansion di angka malim dohot halak Lepi, ganup mangaradoti ulaonna be.

³¹ Tole dohot panaruon soban di tingki angka na binuhul, tole huhut angku patumonaan. Ale Debatanku, ingot ma i manumpakkon na denggan tu ahu balosna.

Ester

1 ¹ (I.) Dung i masa ma di angka ari ni si Serses, i ma si Serses, na mangarajai, olat ni India sahat ro di Kus, saratus duapulu pitu luat ginomgomanna.

² Jadi uju marhabangsa raja Serses sahali di atas habangsa harajaonna i di huta Susan.

³ Patolutaonhon hinarajaonna i, dibahen rajai ma sada panggalangon di saluhut indukna dohot angka naposona. Jadi marluhut ma angka partogi ni parangan di Persia dohot Madai ro di angka pangarajai dohot induk marluatluat di adopan ni rajai.

⁴ Asa patotondurhononna hinagodang ni hamoraon dohot hamuliaon ni harajaonna ro di hajagaron ni hatimbulonna i, pola na nia lelengna, sampe saratus ualupulu ari.

⁵ Jadi dung salpu angka ari i, dibahen rajai muse sada panggalangon di sandok situasi na torop, angka na jumpang di huta Susan, nang halak na magodang, nang halak na metmet, pola pitu ari lelengna di alaman ni porlak mardonokkon bagas ni rajai.

⁶ Targantung do disi rimberimbe angka na bontar, sibolang dohot na rata disuruk dohot tali bonang na binalau dohot abit na tinubar, disuruk tu tintin perak, jala dilohothon tu tiang batu na martulis, tole angka bantal sian

sere dohot perak marpeahan di pantar sian batu na martulis dohot simata landus.

⁷Tole angka siinumon ditarehon do di bagasan panginuman sere, jala sai masisoluhan do angka panginuman marragamragam; tole anggur harajaon mansai godang, hombar tu hinagodang ni hamoraon ni rajai.

⁸Parminumna pe tung guru sombuna be do ndang jadi ontohon, ai nunga songon i hian hata ni rajai tu sude induk di bagasan jabuna, ingkon ganup mambahen guru lomo ni rohana.

⁹(II.) Nang si Wasti,jolma ni rajai dibahen do sada panggalangon di angka parompuan di bagasan jabu harajaon, na di raja Serses.

¹⁰Tole papituarihon, uju marlas ni roha rajai binahen ni anggur, didokkon rajai ma si Mehuman, si Bista, si Harbona, si Bigta, si Abagta, si Jetar dohot si Karkas, na pitu halak naposo angka na marhalado di adopan ni raja Serses.

¹¹Asa boanonna si Wasti, jolma ni rajai tu adopan ni rajai mantat tumpal harajaon, naeng patuduhononna hinaulina tu angka bangso dohot induk, ai tung na uli utus do rupana i.

¹²Alai manjua do anggo si Wasti, jolma ni rajai ro nidokkon ni rajai, pinasahat ni angka naposo. Jadi tarrimas situtu ma rajai, pola marpiarpiar murukna di bagasan ibana.

¹³Dung i ro ma hata ni rajai tu halak na pistar, angka na umboto manjujur ari: Ai songon i somal hata ni rajai, ingkon dasingon ni saluhut panuturi dohot siboto patik.

¹⁴Alai angka na sumolhot tu rajai, i ma: Si Karsena, si Jetar, si Admata, si Tarsis, si Meres, si Marsena dohot si Memukan, na pitu induk ni halak Persia dohot Madai, angka na somal marnida bohi ni rajai, angka na hundul di hundulan parjolo di bagasan harajaon i.

¹⁵Manungkun manang aha na patut tu uhum bahenon tu si Wasti,jolma ni rajai, ala na jinouna i hata ni raja Serses, na pinasahat ni angka naposona.

¹⁶Jadi ro ma alus ni si Memukan di adopan ni rajai dohot angka induk i: Ndada holan tu rajai sandiri marsala si Wasti, jolma ni rajai, dohot do tu sude induk dohot tu sude bangso, angka na maringan di saluhut luat ginomgom ni raja Serses.

¹⁷Ai sar ma barita ni pambahenan ni jolma ni rajai tu sude angka parompuan, asa pis matana mida baoana tu joloan on, ai dohonon nasida ma: Nunga pola dilehon raja Serses, parenta mandokkon boanon si Wasti, jolma ni rajai, tu adopan ni rajai, hape ndang ro nasida.

¹⁸Jala olat ni sadarion dohonon ni angka jolma ni induk di Persia dohot Madai ma i, angka na umbege barita ni pambahenan ni jolma ni rajai tu sude angka induk ni

rajai, jadi ndang mansohot haleaon, dohot hamuruhon na mardongan saripe.

¹⁹Asa molo denggan di roha ni rajai, ruar ma sada parenta harajaon sian adopan ni rajai laos tarsurat tu bagasan buku patik ni halak Persia dohot Madai, angka na so jadi laosan: Na so tupa be ro si Wasti tu adopan ni rajai Serses, jala sahala harajaonna i basabasahonon ni rajai ma tu parompuan na asing na dumenggan marparange sian ibana.

²⁰Jala ingkon tingtingkononhon parenta na binahen ni rajai, asa sange umbotosa di sandok harajaonna na bolon i, jadi saluhut parompuan mangalehon hormat tu harajaannasida, nang na magodang nang na metmet.

²¹Jadi denggan ma hata i di roha ni rajai dohot angka induk i, gabe dibahen rajai ma hombar tu hata ni si Memukan.

²²Dung i dipantongoshon ma angka surat tingting tu saluhut luat ginomgom ni rajai, tu ganup luat mangihuthon panurathonna dohot tu ganup bangso mangihuthon pangkulingna mandok: Ingkon ganup baoa mangarajai di bagasan jabuna, jala ingkon marpangkuling hombar tu pangkuling ni bangsona.

2¹(I.) Jadi dung salpu angka jamita ondeng, dung mombun rimas ni raja Serses, diingot rohana ma si Wasti ro di naung binahenna dohot naung tinuptupna taringot tu nasida.

²Dung i ro ma hata ni angka naposo ni rajai, angka pahaladona i mandok: Ingkon ririton nian di rajai boruboru angka namarbaju, angka na uli rupa.

³Ingkon pabangkiton ni rajai nian angka jolma simatamatai di saluhut luat ginomgomanna i, asa dipapungupungu sude boruboru namarbaju, angka na uli rupa tu huta Susan, tu bagasan jabu parpunguan ni boruboru i, na marpandapotan tu si Hegai, naposo ni rajai, siramoti angka parompuan, ingkon lehonon nian huhut miak parpangiron.

⁴Jala boruboru namarbaju, lomo ni roha ni rajai, ingkon i ma nian pabangkiton gabe jolma ni rajai singkat ni si Wasti. Jadi denggan ma hata i di roha ni rajai, jala dibahen songon i.

⁵Alai adong ma uju i di huta Susan sada baoa Jahudi na margoar si Mordahai, anak ni si Jair, i ma anak ni si Simei, i ma anak ni si Kis, halak Benjamin.

⁶Naung tarbuang sian Jerusalem rap dohot halak na tarbuang uju tarboan si Joiakin raja sian Juda, na binuangkon ni si Nebukadnesar, raja sian Babel.

⁷Ibana ma ama pagodanggodang si Hadasa, i ma si Ester boru ni amangtuana, ai ndang adong be amana manang inana; na uli utus do pardagingonna, uli dohot rupana. Jadi dung mate amana dohotinana, ro ma si Mordahai mangain nasida.

⁸Jadi dung sar hata ni rajai dohot patikna, jala nunga nania torop boruboru dipapungupungu tu huta Susan, marpandapotan tu si Hegai, tarboan ma dohot si Ester tu bagasan jabu ni rajai, marpandapotan tu si Hegai, siramoti angka parompuan.

⁹Jadi lomo ma rohana mida boruboru namarbaju i, jala jumpangan asi ni roha di adopanna, hapogan ma ibana mangalehon angka miak parpangiron dohot parjambaran naung binuhul tu nasida dohot na pitu boruboru silehonon sian jabu ni rajai bahen pandonganina. Dung i dipatongon ma tu ibana dohot tu boruboru pandonganina i bilut na dumenggan di jabu parpunguan i.

¹⁰Alai ndang dipaboaboa si Ester bangsona manang hulahulana, ai nunga ditonahon si Mordahai hian tu nasida, na so jadi paboaboonna.

¹¹(II.) Alai ariari si Mordahai mardalandalan di jolo bagas parpunguan ni parompuan i, asa diboto manang na sonang dihilala si Ester, jala manang aha binahenna tu nasida.

¹²Alai molo dung jumpang gansi ni ganup namarbaju, asa bongot ibana tu adopan ni raja Serses, di ujung ni tingki naung binuhul hian tu angka parompuan, pola sampulu dua bulan lelengna; ai songon on do panggohina di angka ari parpangiron: Onom bulan marpangir dohot miak mir, jala onom bulan

muse dohot miak na hushus marragamragam,
pinangke ni parompuan hian.

¹³Ia dung songon i masuk ma namarbaju
i tu adopan ni rajai, tung guru dokna do
mangido manang aha boanonna sian jabu
parpunguan ni boruboru laho masuk tu jabu
ni rajai.

¹⁴Ia bodarina i ibana masuk, manogotna
i muse ibana mulak tu jabu paduahon
parpunguan ni boruboru, marpandapotan tu
si Saasgas, naposo ni rajai, siramoti angka
rading; jala ndang jadi be ro tu jolo ni rajai,
nda ingkon lomo ni rajai di ibana, jala dijou
goarna.

¹⁵Jadi dung jumpang gansi ni si Ester, boru
ni si Abigail, amangtua ni si Mordahai, naung
niainna i bahen boruna, asa masuk tu adopan
ni rajai, ndang adong agia aha dipangido,
dungkon ni na nidokkon ni si Hegai, naposo
ni rajai, siramoti angka parompuan. Jadi
jumpangan asi ni roha ma si Ester sian
saluhut halak na marnida ibana.

¹⁶Jadi tarboan ma si Ester tu adopan ni
raja Serses, tu bagasan jabu ni rajai di
bulan sipaha sampulu, i ma bulan Tebet,
papitutaonhon hinarajaonna i.

¹⁷Jadi humolong ma roha ni rajai mida si
Ester, asa mida sude parompuan na asing,
jumpangan asi dohot talup ni roha ibana
di adopan ni rajai, gumodang sian saluhut
namarbaju i; jadi dibahen rajai ma sada

tumpal harajaon tu uluna, jala dipabangkit gabe raja, singkat ni si Wasti.

¹⁸Dung i dibahen rajai ma sada panggalangon na bolon di saluhut indukna dohot naposona; panggalangon ala si Ester ma i. Dung i marari raya ma saluhut luat didokkon rajai, jala mangalehon asiasi ibana, hombar tu hamoraon ni rajai.

¹⁹Tole laho papunguhon angka namarbaju paduahalihon hundul ma si Mordahai di pintu ni jabu ni rajai.

²⁰Alai ndang dipaboaboa si Ester hulahulana dohot bangsona, songon na tinonahon ni si Mordahai hian tu nasida, ai guru dok ni Mordahai dioloi si Ester, suang songon uju pinagodanggodangna nasida.

²¹(III.) Di angka ari uju hundulhundul si Mordahai di pintu ni jabu ni rajai, tarrimas ma dua naposo ni rajai, goarna si Bigtan dohot si Teres, sian angka sijaga lobulobu, pola mangalului dalan naeng todosonna rajai.

²²Tarbortik ma hata i tu si Mordahai, gabe dipaboa ma i tu si Esterjolma ni rajai, jala si Ester muse paboahon tu rajai marhite sian goar ni si Mordahai.

²³Jadi dung disulingkit hata i, sintong do hape dapotsa; laos targantung nasida duansa tu hau, jala tarsurat hata i di bagasan buku jamita ariari na di adopan ni rajai.

3¹(I.) Dung salpu angka jamita ondeng dipasangap raja Serses ma si Haman,

anak ni si Hamedata, pinompar ni si Agag, jala dipatimbul ibana, jala tumimbo hundulanna dibahen sian hundulan ni saluhut induk donganna i.

²Jala saluhut naposo ni rajai, angka na di pintu ni jabu ni rajai marsomba tu si Haman, pola marsinggang di jolona, ai songon i do tona ni rajai taringot tu ibana; alai anggo si Mordahai ndang olo marsinggang manang marsomba.

³Dung i ninna angka naposo ni rajai ma, angka na di pintu ni jabu ni rajai, tu si Mordahai: Boasa tung laosanmu tona ni rajai?

⁴Jadi dung songon i didok nasida ariari tu ibana, hape ndang ditangihon ibana hatanasida i, dipaboa nasida ma i tu si Haman, naeng idaonna antong manang na tarhajongjongkon si Mordahai angka hatana i, ai adong do na paboahon tu nasida halak Jahudi ibana.

⁵(II.) Jadi dung diida si Haman, na so marsinggang si Mordahai manang marsomba tu ibana, gabe tarrimas situtu ma si Haman.

⁶Alai maleahu di rohana laluhononna tanganna holan tu si Mordahai; ai nunga dipaboa halak tu ibana bangso ni si Mordahai, jadi ditahi roha ni si Haman naeng rendepphononna sude halak Jahudi, angka na di sandok harajaon ni si Serses, ala bangso ni si Mordahai nasida.

⁷ Tole di bulan sipaha sada, i ma bulan Nisan, pasampuluduataonhon hinarajahon ni raja Serses mandabu tondung ma halak, i ma Pur, di adopan ni si Haman manjujur ari na denggan, pola marbulanbulan lelengna sahat ro di bulan hurung, i ma bulan Adar.

⁸ Dung i ninna si Haman ma mandok raja Serses: Adong do sada bangso na marserak, jala mampar tu tongatonga ni angka bangso di saluhut luat ginomgomamu; patiknasidai asing do sian patik ni saluhut bangso, jala ndang diturut nasida patik ni rajai; dibahen i ndang patut pasombusombuon ni rajai nasida songon i.

⁹ Molo denggan di roha ni rajai, dibahen ma nian surat mandokkon bunuon nasida; asa hudasingkon saloksa talenta perak tu bagasan tangan ni halak na pasauthon ulaon i, asa boanonna tu bagasan bilut parartaan ni rajai.

¹⁰ Dung i diumpat rajai ma tintinna sian tanganna, jala dilehon do i tu si Haman, anak ni si Hamedata, pinompar ni si Agag, alo ni halak Jahudi.

¹¹ Dung i ninna rajai ma tu si Haman: Sahat tu ho ma anggo perak i nang bangso i, asa bahenonmu tusi guru lomo ni roham.

¹² Jadi dijou ma angka juaratulis ni rajai, di bulan sipaha sada, ari sampulu tolu di bulan i, gabe disurat ma guru pangaturhon ni si Haman tu angka induk ni rajai dohot

tu angka pangarajai marluatluat dohot tu angka induk marsasabangso marluatluat mangihuthon panurathon dohot pangkuling ni ganup bangso, marhite sian goar ni raja Serses do disurat, dibahen huhut tintin sahap ni rajai tusi.

¹³Jadi dipantongoshon ma angka surat i marhite sian halak parsihundul tu sandok luat ni rajai, mandokkon rotongkononhon, bunuon jala agoon saluhut halak Jahudi, sian na bajar ro di na tuatua, posoposo dohot parompuan di bagasan sadari, i ma di ari sampulu tolu bulan hurung, i ma bulan Adar, huhut do pupusan barangnasida i.

¹⁴I ma hata ni surat i mangalehon parenta tu sude luat pabotohononhon tu sude bangso, asa ingkon managam be di ari naung binuhul i.

¹⁵Dung i borhat ma angka parsihundul i, pola mangesjak didokkon rajai; tarlehon do parenta i di huta Susan; minum anggur do rajai rap dohot si Haman, alai tarhatotong do anggo isi ni huta Susan.

4¹(I.) Alai dung diboto si Mordahai saluhut na masa i, disansani si Mordahai ma angka ulosna, jala marulos tangki dohot sirabun ibana, laos ruar ibana tu tongatonga ni huta i huhut mangangguk badar dohot mangandungi.

²Jadi ro ma ibana sahat tu jolo pintu jabu ni rajai, ai ndang jadi masuk halak tu bagasan pintu jabu ni rajai anggo marulos tangki.

³Nang di saluhut luat hasahatan ni hata dohot parenta ni rajai, masa do angguk badar di halak Jahudi dohot parpuasaan, partangison dohot andung, jala torop halak marpeahan di sirabun marulos tangki.

⁴Dung i ro ma boruboru pandongani ni si Ester rap dohot angka naposona pabotohon barita i tu nasida gabe holsoan situtu ma roha nijolma ni rajai, laos ditongoshon ma pangkean solukkonon ni si Mordahai, jala tanggalanna sian dagingna tangkina, alai ndang dijalo.

⁵Dung i dijou si Ester ma si Hatak, sada sian naposo ni rajai, na nidokkonna marhaladoi di adopannasida, laos disuru ibana manopot si Mordahai, asa diboto manang aha na masa dohot alana.

⁶Jadi ruar ma si Hatak mandapothon si Mordahai tu alaman ni huta na di jolo pintu ni jabu ni rajai.

⁷Dung i dipaboa si Mordahai ma tu ibana saluhut na masa tu ibana dohot godang ni perak, naung pinarbaga ni si Haman dasingkonnonna tu arta ni rajai, molo jadi agoonna halak Jahudi.

⁸Dilehon huhut tu ibana sada surat parenta, naung nilehon di Susan mandokkon agoon nasida, asa patuduhononna tu si Ester

pabotohon barita i, huhut mandokkon nasida masuk tu adopan ni rajai, mangidohon asi ni rohana, mangondihon bangsona i di adopanna.

⁹(II.) Dung i ro ma si Hatak pabotohon tu si Ester angka hata ni si Mordahai.

¹⁰Alai ninna si Ester ma tu si Hatak, laos ditonai ibana pasahathon hata on tu si Mordahai:

¹¹Sude naposo ni rajai dohot sandok bangso di angka luat ni rajai tangkas umbotosa manang ise baosa manang parompuan na masuk tu adopan ni rajai tu alaman parbagasan, na so jinouna, sada do patikna, ingkon marutang hosa do, dungkon ni molo disurdukkon rajai tungkot harajaon sere tu ibana, asa mangolu ibana. Alai anggo ahu ndang tarjou ahu masuk tu adopan ni rajai, nunga pola tolupulu ari.

¹²Jadi dipasahat nasida ma angka hata ni si Ester tu si Mordahai.

¹³Alai ro ma muse alus ni si Mordahai mandok tu si Ester; unang ma ninna roham, ala di bagasan jabu ni rajai ho umbahen malua ho, jumolo sian saluhut halak Jahudi na asing.

¹⁴Ai tung sura mauhom boti ho di tingki on, ro do nian panolongion dohot haluaon di halak Jahudi sian inganan na asing; alai mago ma anggo ho dohot pinompar ni amangmu.

Angkup ni, ise umbotosa, atik ala ni tingki on do umbahen sahat harajaon tu ho?

¹⁵Dung i ditonahon si Ester ma tu si Mordahai:

¹⁶Laho ma ho paluhuthon saluhut halak Jahudi, angka na jumpang di Susan, jala marpuasa ma hamu manangiangkon ahu, unang hamu mangan manang minum tolu ari on, arian dohot borngin; ahu pe rap dohot boruboru pandonganingku marpuasa songon i, dung pe songon i asa masuk ahu tu adopan ni rajai, atik pe pantang bolon nian; molo tung mago ahu, ba mago ahu tusi!

¹⁷Dung i laho ma si Mordahai jala dibahen ma, hombar tu sude naung tinonahon ni si Ester tu ibana.

5¹ (I.) Tole patoluarihon marpangkean harajaon ma si Ester jala jongjong di alaman parbagasan mardonokkon jabu ni rajai, tondong ni jabu ni rajai tahe, alai hundul di habangsa harajaonna i anggo rajai di bagasan jabu ni rajai, tondong ni pintu ni jabu i.

²Jadi dung diida rajai si Ester,jolma ni rajai, jongjong di alaman, lomo ma roha ni rajai marnida si Ester, laos disurdukkon rajai ma tu si Ester tungkot harajaon sere na di bagasan tanganna. Dung i dipajonok si Ester ma, laos dijama ma ujung ni tungkot harajaon i.

³Dung i ninna rajai ma tu nasida: Aha do na hurang di ho, ale Ester, jolma ni raja, jala

aha do na pinangido ni roham? Sahat ro di satonga ni harajaon i ingkon lehonon do i tu ho.

⁴Alai ninna si Ester ma: Molo tung denggan di roha ni rajai, sai ro ma rajai rap dohot si Haman sadarion tu panggalangon na hupauli di ibana.

⁵Dung i ninna rajai ma: Haru silu ma dokkon hamu si Haman pasauthon hata ni si Ester! Jadi dung ro rajai dohot si Haman tu panggalangon, na pinadiri ni si Ester.

⁶Mangkuling ma rajai mandok tu si Ester, dung sombu rohana minum anggur: Aha do na pinangido ni roham, ingkon lehonon do i tu ho, jala aha do sihol ni roham ro di satonga ni harajaon i, ingkon pasauton do.

⁷Jadi ninna si Ester ma mangalusi: Pangidoanku dohot sihol ni rohangku on do:

⁸Molo asi roha ni rajai marnida ahu, jala molo denggan di roha ni rajai mangalehon pangidoanku dohot pasombu sihol ni rohangku, sai ro ma rajai rap dohot si Haman tu panggalangon na hupauli di nasida, jadi marsogot ma bahenonku hombar tu hata ni rajai.

⁹(II.) Dung i ruar ma si Haman di ari na sasada i marlas ni roha jala marhasonangan; alai dung diida si Haman si Mordahai di pintu ni jabu ni rajai, ndang hehe ibana manang humordit mida ibana, gabe tarrimas situtu ma si Haman mida si Mordahai.

¹⁰Alai ditiopi si Haman dirina, laos sahat ma ibana tu jabuna; dung i disuru ma mangalapi angka alealena dohot si Seresjolmana i.

¹¹Dung i dipajojor si Haman ma tu nasida hamuliaon ni hamoraonna dohot hinadeak ni angka anakna, ro di sude pambahen ni rajai pasangap ibana, jala naung pinatimbona ibana gumodang sian angka induk dohot naposo ni rajai.

¹²Angkup ni didok si Haman: Nandang adong nanggo sahalak didokkon si Ester,jolma ni rajai ro tu panggalangon na pinaulina i, dongan ni rajai, dungkon ni ahu; nang marsogot sasada ahu do dijou mangan rap dohot rajai.

¹³Alai saluhutna i ndang tau pasombu rohangku, saleleng huida dope si Mordahai, halak Jahudi i, hundul di pintu ni jabu ni rajai.

¹⁴Dung i ro ma hata ni si Seresjolmana i dohot sude alealena mandok tu ibana: Ua pinajongjong nian sada tiang limapulu asta timbona, jala marsogotna i pinaboa tu rajai, asa targantung si Mordahai tusi, asa marlas ni roha ho ro rap dohot rajai tu panggalangon i. Jadi denggan ma hata i di roha ni si Haman, laos didokkon ma pajongjongon tiang i.

6¹ (I.) Di borngin na sasada i ndang tarnono mata ni rajai, jadi didokkon ma boanon buku parningotan di angka jamita ariari, laos dijaha ma angka i di adopan ni rajai.

²Jadi jumpangsa ma tongon na tarsurat, naung pinalumba ni si Mordahai taringot tu si Bigtan dohot si Teres na dua naposo ni rajai sian halak sijaga lobulobu, angka naung marsangkap naeng laluhononna tanganna tu raja Serses.

³Dung i ninna rajai ma: Aha do upa manang hatimbulon naung itabahren tu si Mordahai balosna? Dung i ninna angka dolidoli, parhalado ni rajai ma: Ndang adong agia aha itabahren tu ibana balosna.

⁴Dung i ninna rajai ma: Ise do di alaman i? Ai nunga ro si Haman tu alaman parbalian ni jabu ni rajai naeng dohononna tu rajai, asa targantung nian si Mordahai tu hau naung pinajongjongna di ibana.

⁵Dung i ninna angka naposo ni rajai ma tu ibana: Ida ma, si Haman do jongjong di alaman i. Dung i didok rajai ma: Denggan ibana masuk.

⁶Jadi dung masuk si Haman, ninna rajai ma mandok ibana: Ingkon songon dia do bahenon tu baoa sigodang ni rohangku pasangaphon ibana? Jadi marhusari ma si Haman di bagasan rohana: Tung ise ma tagamon sigodang ni roha ni rajai, naeng marmulia bahenonna, ia so ahu?

⁷Dibahren i didok si Haman ma tu rajai: Ia baoa sigodang ni roha ni rajai naeng pasangaponna.

⁸Ingkon boanon ni halak nian sada pangkean harajaon, naung somal pinarulos ni rajai dohot hoda naung somal hinundulan ni rajai, jala ingkon bahenon nian sada tumpal harajaon tu uluna.

⁹Ingkon lehonon nian pangkean dohot hoda i tu tangan ni sahalak sian angka induk ni rajai, sian halak angka na sumangap, asa diparuloshon pangkean i tu baoa sigodang ni roha ni rajai, na naeng pasangaponna, jala pahundulonna ibana tu atas hoda i, laos togutoguonna di angka alaman ni huta i, huhut tingtingkononna di jolona: Ingkon songon i do bahenon tu baoa sigodang ni roha ni rajai pinasangapna i.

¹⁰(II.) Dung i didok rajai ma tu si Haman: Haru gira ma buat pangkean i dohot hoda na nidokmi, dung i bahen ma songon i tu si Mordahai halak Jahudi i, na hundulhundul di pintu ni jabu ni rajai, na so tupa hurang nanggo sahata sian naung nidokmi.

¹¹Jadi dibuat si Haman ma pangkean dohot hoda i, jala diparuloshon tu si Mordahai, jala dipahundul ibana tu hoda i, laos ditogutogu di angka alaman ni huta i, jala ditingtingkon di jolona: Ingkon songon i do bahenon tu baoa sigodang ni roha ni rajai laho pasangaphon ibana.

¹²Dung i mulak ma anggo si Mordahai tu pintu ni jabu ni rajai; alai humalaput

ma anggo si Haman mulak tu jabuna
margudompong jala martujung uluna.

¹³Dung i dipajojor si Haman ma tu si Seres
jolmana i dohot tu sude alealena, saluhut
naung masa tu ibana. Dung i ro ma hata
ni alealena, angka na pistar i dohot hata
ni si Seres jolmana i mandok tu ibana:
Molo tung sian pinompar ni halak Jahudi
si Mordahai, parbingkasanmu mamungka
tinggang maralohon ibana, ndang tagamon
manahan ho di adopanna, ingkon tunduk
situtu na ma ho.

¹⁴Andorang mangkatai dope nasida dohot
ibana, nunga sahat angka naposo ni rajai,
jala humalaput naeng mangarahon si Haman
tu panggalanon, naung binahen ni si Ester.

7¹ (I.) Jadi dung ro rajai dohot si Haman,
naeng minum rap dohot si Ester jolma ni
rajai.

²Ro ma hata ni rajai tu si Ester nang
paduaarihon, dung sombu minum anggur:
Aha do na pinangidom, ale Ester, jolma ni
rajai? Ingkon lehonon do i tu ho; jala aha
do sihol ni roham? Sahat ro di satonga ni
harajaon i, ingkon pasahaton do.

³Dung i ninna si Ester, jolma ni rajai ma
mangalusi: Molo naung jumpangan asi ni roha
ahu di adopanmu, ale rajanami, jala molo
tung denggan di roha ni rajai, sai pangolu
ma hosangku ala pangidoanku, pangolu

dohot hosa ni bangsongku, pasombu sihol ni rohangku.

⁴Ai nunga targadis hami, nang ahu nang bangsongku asa siaphononhon, bunuon dohot agoon; ummaha dope tung sura targadis hami, gabe hatoban baoa manang boruboru, jala masip boti ahu; ai ndang tartimbang musu panosahi harugian ni rajai.

⁵Dung i ninna raja Serses ma mandok tu si Ester, jolma ni rajai: Ai ise do ibana? Jala didia do ibana na hum marsangkap di bagasan rohana naeng mambahen songon i?

⁶Dung i ninna si Ester ma: Baoa alo i, jala musu i, i ma si Haman na jahat on! Jadi tarmali tondi ma si Haman dibahen biarna maradophon rajai dohot jolma ni rajai.

⁷(II.) Dung i hehe ma rajai di bagasan rimasna sian na minum anggur, laos laho ibana tu porlak mardonokkon bagasna i; alai laos jongjong tarhatotong anggo si Haman mangido tu si Ester, jolma ni rajai pangoluonna hosana; ai nunga tangkas diida naung putus roha ni rajai pasonggophon hamagoan tu ibana.

⁸Alai dung mulak rajai sian porlak mardonokkon bagasna i tu bagasan bagas parminuman anggur, bustang ma didapot si Haman di atas bantal, hundulan ni si Ester, gabe didok rajai ma: Tung dohot do di lambungku di bagasan jabungku naeng gogoanna jolma ni rajai? Disi ruar hata i sian

pamangan ni rajai, pintor dihungkupi halak ma bohi ni si Haman.

⁹Dung i ro ma hata ni si Harbona, sada sian angka naposo di adopan ni rajai, ninna ma: Ida ma, jongjong huhut sada tiang di lambung jabu ni si Haman, limapulu asta timbona, naung binahen ni si Haman di si Mordahai, naung mandok hata parhorasan tu rajai. Dung i ninna rajai ma: Gantungkon hamu ma ibana tusi!

¹⁰Jadi digantungkon nasida ma si Haman tu tiang, naung pinajongjongna hian di si Mordahai. Dung i mombun ma rimas ni rajai.

8¹(I.) Laos di ari na sasada i dibasabasahon raja Serses tu si Esterjolmana i bagas ni si Haman, musu tihus ni halak Jahudi; si Mordahai pe ro do tu adopan ni rajai, ai nunga dipaboa si Ester tuturna tu si Mordahai.

²Dung i diumpat rajai ma tintinna, naung binuatna i sian si Haman, jala disolukkon tu si Mordahai, laos dipabangkit si Ester do si Mordahai panahatan ni bagas ni si Haman.

³(II.) Dung i diulahi si Ester muse mandok hatana di adopan ni rajai, pola marsinggang tu jolo ni patna, tumatangis huhut marhuraja tu ibana, asa disundati rajai hajahaton ni si Haman, pinompar ni si Agag dohot tahi ni rohana naung sinangkapna dompak halak Jahudi.

⁴Jadi disurdukkon rajai ma tungkot harajaon sian sere tu si Ester, gabe hehe ma si Ester, laos jongjong di adopan ni rajai.

⁵Ninna ma: Molo tung denggan di roha ni rajai, jala molo nunga jumpangan asi ni roha ahu di adopanna, molo bonar dohot hata i di adopan ni rajai, jala lomo roha ni rajai marnida ahu, dibahen ma nian surat manulak hata ni angka surat sangkap ni si Haman, anak ni si Hamedata, pinompar ni si Agag, angka naung sinuratna mandokkon agoon halak Jahudi, angka na marserak di saluhut luat ni rajai.

⁶Ai tung tarpaidaida ahu ma hamagoan na mangonai tu bangsongku, tung sura? Tung tarpaidaida ahu ma hamagoan ni hulahulangu?

⁷Dung i ninna raja Serses ma tu si Ester jolmana i dohot tu si Mordahai halak Jahudi: Ida ma, nunga pola hulehon bagas ni si Haman tu si Ester, jala si Haman i nunga targantung tu hau, ala naung dilaluhon tanganna tu halak Jahudi.

⁸Alai anggo hamu, jadi do tongosanmuna surat tu halak Jahudi, guru lomo ni rohamuna marhite sian goar ni rajai, huhut mansahap surat i marhite sian tintin sahap ni rajai; ai surat naung sinurat marhite sian goar ni rajai, jala tarsahap marhite sian tintin sahap ni rajai, na so tupa tulak.

⁹Jadi tarjou ma angka juaratulis ni rajai di tingki uju i, di bulan sipaha tolu, i ma bulan Sipan, di ari duapulu tolu bulan i. Jadi disurat nasida ma saluhut hombar tu pangaturhon ni si Mordahai tu halak Jahudi dohot tu angka induk, pangarajai dohot partogi marluatluat, olat ni India sahat ro di tano Kus, saratus duapulu pitu luat, tu ganup luat mangihuthon panurathonna dohot tu ganup bangso mangihuthon pangkulingna, nang tu halak Jahudi mangihuthon panurathon dohot pangkulingnasida i.

¹⁰Jadi disurat nasida ma i marhite sian goar ni raja Serses, laos disahap marhite sian tintin sahap ni rajai. Dung i ditongoshon ma angka surat i marhite sian halak parsihundul di hoda, angka na tangkas niajaran ni halak na sangap marenjak.

¹¹Maningtingkon paboa naung niloas ni rajai halak Jahudi, manang di huta dia pe marpungupungu pangoluhon hosanasida i, huhut mangarontongkon, mambunu dohot mangago nasa huaso ni bangso manang isi ni luat, angka na pasosaksosak nasida. Jadi do huhut laumonna angka dakdanak, parompuan dohot ugasannasida i.

¹²Laos di ari na sasada i sude luat ni raja Serses, di ari sampulu tolu bulan hurung, i ma bulan Adar.

¹³Alai anggo hata ni surat i on do: Nunga nilehon parenta di saluhut luat, papataron tu

sandok bangso, palumbahon ingkon hobas halak Jahudi di ari na sasada i marlulu dompak musunasida i.

¹⁴Jadi halak parsihundul di hoda, angka na tangkas niajaran i, halak na sangap marenjak, borhat be ma mamatak hoda i, nidokkon ni rajai; tarlehon huhut parenta i di huta Susan.

¹⁵(III.) Alai ruar ma anggo si Mordahai sian adopan ni rajai marpangkean harajaon, marabit surta na tinubar jala marhaen na halus, jala martumpal sere na bolon, jala marsalendang sian bonang na saksak saor surta na rara, jala sandok isi ni huta Susan marolopolop huhut marlas ni roha.

¹⁶Binsar ma anggo di halak Jahudi hatiuron, las ni roha, hasonangan dohot hamuliaon.

¹⁷Jadi di saluhut luat dohot di saluhut huta hasampean ni hata ni rajai dohot parentana, masa ma las ni roha dohot hariburon di halak Jahudi, panggalangon dohot ari raya. Jadi torop halak sian angka bangso ni luat i masuk Jahudi, ai songgop do marsibalik hasonggoton mida halak Jahudi.

9¹(I.) Tole di bulan hurung, i ma bulan Adar, di ari sampulu tolu bulan i, naung binuhul ni hata ni rajai dohot parentana ulahononhon nian, di ari naung hinirim ni angka musu ni halak Jahudi tunduk nasida bahenonna, hape marsibalik do tahi,

halak Jahudi balik patundukkon halak na mangkagigihon nasida.

²Jadi marpungupungu ma halak Jahudi di bagasan hutanasida dohot di saluhut luat ni raja Serses, asa mangalaluhon tangan tu halak na naeng mangago nasida, jala ndang manahan jongjong nanggo sahalak maradophon nasida, ai biar mida nasida songgop do tu saluhut bangso.

³Tole saluhut induk ni angka luat dohot pangarajai dohot partohonan pinabangkit ni rajai dohot halak angka na mangaradoti ulaon ni rajai, pasangaphon halak Jahudi; ai songgop do tu nasida biar mida si Mordahai.

⁴Ai tung na timbul do si Mordahai di bagasan jabu ni rajai, jala baritana marlupuk tu saluhut angka luat; ai lam leleng, lam timbul do halak si Mordahai.

⁵Jadi dipatunduk halak Jahudi ma saluhut musunasida i marhite sian podang, bunubunu dohot harendepon, tung guru lomo ni rohana do dibahen nasida tu halak na mangkagigihon nasida.

⁶Di huta Susan pe dibunu jala diago halak Jahudi do lima ratus baoa.

⁷Dibunu nasida huhut si Parsandata, si Dalpon, si Aspata.

⁸Si Porata, si Adalia, si Aridata.

⁹Si Parmasta, si Arisai, si Aridai dohot si Waisata.

¹⁰I ma na sampulu anak ni si Haman, anak ni si Hamedata, musu tihus ni halak Jahudi, alai ndang dihahua anggo ugasannasida.

¹¹Laos di ari na sasada i sahat do bilangan nijolma angka na binunu di bagasan huta Susan tu adopan ni rajai.

¹²Dung i ninna rajai ma tu si Esterjolmana i, nunga dibunu halak Jahudi di huta Susan lima ratus baa, direndephephon dohot na sampulu anak ni si Haman; aha ulaning binahennasida di luat ni rajai angka na asing, jala aha dope pangidoanmu? Ingkon lehonon do i tu ho, jala aha dope sihol ni roham? Ingkon pasauton do!

¹³Dung i ninna si Ester ma: Molo tung denggan di roha ni rajai, sai diloas rajai ma nang marsogot halak Jahudi angka na di Susan mangulahon hombar tu parenta sadarion, asa digantung nasida na sampulu anak ni Haman i tu hau.

¹⁴Jadi didokkon rajai ma ingkon songon i bahenon, parenta i pe dilehon do di Susan, jala na sampulu anak ni si Haman digantungkon do i.

¹⁵Nang di ari sampulu opat, bulan Adar marpungupungu do halak Jahudi, angka na di Susan, jala dibunui di Susan tolu ratus halak; alai ndang dais tangannasida anggo tu ugasannasida i.

¹⁶Alai anggo pasipasi ni halak Jahudi, angka na di luat ni rajai marpungupungu

do pangoluhon hosanasida i, gabe marhasonangan maradophon musunasida i, jala dibunui halak na mangkagigihon nasida pitupulu lima ribu halak; alai ndang dais tangannasida anggo tu ugasannasida i.

¹⁷(II.) I ma na masa di ari sampulu tolu, bulan Adar, gabe marhasonangan nasida di ari sampulu opat bulan i, gabe dibahen nasida ma i ari panggalangan dohot las ni roha.

¹⁸Alai anggo halak Jahudi, angka na di Susan marpungu do di ari sampulu tolu dohot sampulu opat, jala marhasonangan di ari sampulu lima bulan i, jala dibahen ma i ari panggalangan dohot las ni roha.

¹⁹Dibahen i anggo halak Jahudi, angka na maringan di angka huta pagaran, ari sampulu opat bulan Adar dibahen nasida, ari las ni roha, panggalangan dohot ari raya, laos masipiringan nasida disi ganup tu alealena.

²⁰Dung i disurathon si Mordahai ma angka jamita on, jala ditongoshon angka surat tu sude halak Jahudi, angka na maringan di saluhut luat ni raja Serses, tu angka na jonok dohot tu angka na holang.

²¹Umpatikkon di nasida, ingkon marari raya nasida di ari sampulu opat dohot sampulu lima bulan Adar ganup taon.

²²Bahen ari parningotan di hasonangan ni halak Jahudi maradophon musunasida i; ai di bulan i do martungkar gondok ni rohanasida gabe las ni rohana, jala arsak ni rohanasida,

gabe ari raya; ingkon bahenonnasida do angka ari i gabe ari panggalangan dohot las ni roha, jala masipiringan ganup dohot alealena, huhut marsilehonlehon tu halak na pogos.

²³Dung i diundukkon halak Jahudi ma, ingkon ulahononna naung pinungkana i dohot naung sinurat ni si Mordahai tu nasida.

²⁴Ai nunga pola disangkap si Haman, anak ni si Hamedata, pinompar ni si Agag, musu tihus ni sude halak Jahudi, naeng agoonna nasida; nunga pola didabu tondung, i ma Pur, naeng maniaphon dohot mangago nasida.

²⁵Alai dung masuk si Ester tu adopan ni rajai, dilehon rajai ma surat parenta, ingkon tulak sangkapna hamagoan, naung sinangkap ni si Haman dompak halak Jahudi, marsibalik songgop tu uluna, gabe targantung ibana dohot angka anakna tu hau.

²⁶Ala ni do umbahen digoar nasida angka ari on Purim, mangihuthon goar Pur; ala ni saluhut hata ni suraton dohot ala ni sude na niidanasida taringot tusi manang naung sahat tarbortik tu nasida.

²⁷Dipatikkon jala diundukkon halak Jahudi ma i, ingkon nasida dohot pinomparnasida ro di sude halak angka na masuk tu nasida, na so tupa laosannasida, ingkon marari raya nasida di ari na dua i ganup taon, hombar tu hata ni surat i dohot tingki naung binuhul hian.

²⁸Jala angka ari on patut, ingkon ingoton jala marulaon disi, ingoton ni saluhut pinompar, luat dohot huta sadasada; jala na so tupa laosan angka ari Purim on di tongatonga ni halak Jahudi, jala na so tupa mansohot parningotanna di pinomparnasida sogot.

²⁹Alai anggo si Ester,jolma ni rajai, boru ni si Abigail dohot si Mordahai halak Jahudi mambahen nasa gogona manurathon surat tingting laho umpatikkon surat Purim na paduahon on.

³⁰Dung i ditongoshon ma angka surat tu sude halak Jahudi, angka na maringan di na saratus duapulu pitu luat gomgoman ni Serses, mardongan hata dame dohot hasintongan.

³¹Asa dipatikkon nasida angka ari Purim on di angka tingki angka naung binuhul, naung pinatik ni si Mordahai, halak Jahudi i, dohot si Ester, jolma ni rajai tu nasida, naung pinatikna di ibana sandiri dohot di pinomparnasida, angka hata parpuasaon dohot andungnasidai.

³²Parenta ni si Ester pahothon angka ari raya taringot tu Purim on, laos tarsurat di bagasan sada buku.

10¹(I.) Dung i diampehon raja Serses sohe gararon ni halak di darat dohot di pulo, angka na di bagasan laut.

²Dung i saluhut ulaon ni hagogoonna dohot hatimbulonna, rodi sandok hatimbulon ni si Mordahai, naung pinatimbul ni rajai ibana, nda tarsurat do angka i di bagasan buku jamita ariari ni angka raja sian Madai dohot Persia?

³Ai si Mordahai, halak Jahudi i, bangkit wakil ni raja Serses, sangap do ibana di tongatonga ni halak Jahudi, jala hasudungan ni torop hahaanggina ibana, ala naung diringkoti rohana hasonangan ni bangsona, sai hata dame dipaboa tu sandok pinomparna.

Ayub

1 ¹ (I.) Adong do na jolo di tano Us, sada baa, na margoar si Job; na daulat jala na burju do roha ni baa i jala mabiar mida Debata, jala dipadao rohana sian hajahaton.

² Ditubuhon ibana do pitu anak dohot tolu boru.

³ Ia torop ni pinahanna pitu ribu birubiruna, jala tolu ribu untona, jala lima ratus pasang horbona, jala lima ratus halodena boruboru, angkup ni mansai torop naposona; sumangap do ibana tahe sian saluhut halak na di habinsaran.

⁴ Alai laholaho do anggo angka anakna mambaheni panggalangon, ganup di bagasan jabuna dohot di ari hatutubuna be; disuru huhut mamio ibotona na tolu i, asa mangan dohot minum rap dohot nasida.

⁵ Ia dung marliat angka ari panggalangan i, disuru si Job ma mangalapi nasida, asa diuras nasida; dipasogot ma hehe manogotna i; jala dipelehon angka pelean situtungon, marguru tu toropnasida sudena. Ai ninna roha ni si Job do: Atik tung naung mardosa angka anakkonku, jala naung ditundali rohana di bagasan maon Debata. Sai songon i dibahen si Job ganup ari.

⁶(II.) Alai jumpang ma di na sadari, ro be ma angka anak ni Debata jongjong di jolo ni Jahowa, tung ro ma dohot sibolis tu tongatonganasida.

⁷Dung i didok Jahowa ma tu sibolis i: Sian dia do ho ro? Jadi ninna sibolis i ma mangalusi Jahowa: Sian paraotaotan do ahu mangkahapi tano on.

⁸Dung i ninna Jahowa ma tu sibolis i: Atehe, nunga tung diiburu roham naposongku si Job? Ai ndang adong baoa tudoshon ibana marroha di tano i, daulatna, tigorna, biarna mida Debata, jala dipadao rohana sian hajahaton.

⁹Dung i ninna sibolis i ma mangalusi Jahowa: Nda na marpambuat do biar ni si Jobi mida Debata?

¹⁰Nda diramoti Ho ibana dohot jabuna humaliang ro di nasa na di ibana? Ulaon ni tanganna pe nunga ditumpak Ho manjadi, jala ditutup pinahanna do tano i.

¹¹Alai tung sura disurdukkon Ho tanganmu mambuat saluhut na di ibana, manang so buraan na ma Ho di hapataron.

¹²Dung i ninna Jahowa ma tu Sibolis i: Ida ma, sahat tu tanganmu ma nasa na di ibana, alai ndang jadi dais tanganmu anggo tu ibana sandiri. Dung i ruar ma Sibolis i sian adopan ni Jahowa.

¹³(III.) Dung i jumpang ma di na sadari, tongon mangan dohot minum anggur angka

anak ni si Job dohot boruna di bagasan jabu ni sihahaannasida.

¹⁴Jadi ro ma sada suruan manopot si Job, ninna ma: Maninggala nangkin angka horbo, jala angka halode boruboru manjampal di lambungna.

¹⁵Dung i ro halak sian Seba mangalaum, ianggo angka naposo i ditampuli do dohot podang, holan sasada ahu na ma malua, mamboan barita tu ho.

¹⁶Andorang mangkatahon dope ibana, ro ma soluk jolma na asing mandok: Madabu api ni Debata sian langit, jadi suda dipangan api i angka birubiru dohot angka naposo i, holan sasada ahu na ma malua mamboan barita i tu ho.

¹⁷Andorang mangkatahon dope ibana, ro ma soluk jolma na asing mandok: Ro do halak Kasdim mambahen tolu panggungan, mangalaum angka unto laos diboan do, ianggo angka naposo i ditampuli do dohot podang, holan sasada ahu na ma malua mamboan barita tu ho.

¹⁸Andorang mangkatahon dope ibana, ro ma soluk jolma na asing mandok: Tongon mangan dohot minum anggur angka anakmu dohot borum di jabu ni sihahaannasida.

¹⁹Jadi ida ma, ro halisungsung na marpiupiu sian halongonan manondong dampak na opat suhi ni bagas i, gabe mate angka anakkonmu

ditipa, holan sasada ahu na ma malua mamboan barita i tu ho.

²⁰Dung i hehe ma si Job disansani ma angka ulosna jala dinabung obuk ni uluna, jala manungkap ibana tu tano huhut martangiang.

²¹Jala didok ma: Na marsaemara do ahu ruar sian butuha ni dainang, jala marsaemara do ahu mulak tusi. Jahowa do na mangalehonsa, Jahowa do muse mambuatsa pinuji ma Goar ni Jahowa!

²²Di bagasan saluhut parsorionna i, ndang mardosa si Job, jala ndang manarita rohana dompak Debata.

2¹(I.) Alai jumpang muse ma di na sadari, ro be angka anak ni Debata laho jongjong di jolo ni Jahowa, tung ro do dohot sibolis i di tongatonganasida jongjong di jolo ni Jahowa.

²Dung i didok Jahowa ma tu sibolis i: Sian dia do ho ro? Jadi ninna sibolis i ma mangalusi Jahowa: Sian paraotaotan do ahu mangaliati tano i.

³Dung i ninna Jahowa ma tu sibolis i: Atehe, nunga tung diiburu roham naposongku si Job? Si ndang adong baoa tudoshon ibana marroha di tano i, daulatna, tigorna, biarna mida Debata, jala dipadao rohana sian hajahaton; sai tong dope marsihohot rohana di hadaulatonna, atik pe dipinggil ho Ahu dompak ibana laho mangago soada alana.

⁴Dung i ninna sibolis i ma mangalusi Jahowa: Hulingkuling singkat ni hulingkuling,

ro di nasa na di ibana dilehonjolma i do i singkat ni hosana.

⁵Alai tung sura disurdukkon Ho tanganmu manjama holiholina dohot sibukna, manang so buraanna ma. Ho di hapataron.

⁶Dung i ninna Jahowa ma tu Sibolis i: Ida ma, sahat tu tanganmu ma ibana, asal diolani ho hosana.

⁷Dung i ruar ma sibolis i sian adopan ni Jahowa, gabe hona puru godang ma si Jobi dibahen sian palak ni patna ro di pakpak uluna.

⁸Dung i dibuat si Job ma santopik ngarngar mangkoisi dagingna, laos hundulhundul di bagasan sirabun.

⁹Dung i didokjolmana ma tu ibana: Sai tong dope marsihohot roham di hadaulatonmu? Bura i na ma Debata asa mate ho!

¹⁰Alai ninna ibana ma tujolmana i: Songon hata ni sada boruboru na riting do pangkulingmi. Nunga itajalo na tonggi sian Debata, nda jaloonta dohot na paet? Di bagasan saluhutna i ndang mardosa si Job marhite sian pangkulingna.

¹¹(II.) Jadi dung sar barita ni sandok hinamago ni si Job tu na tolu halak alealena, ro be ma nasida ganup sian ingananna be, i ma si Elipas sian Teman dohot si Bildad sian Sua, dohot si Sopar sian Naama. Ai mardos ni roha do nasida rap ro maningkir dohot mangapuli ibana.

¹²Jadi dung ditatap nasida ibana sian na dao, ndang be ditanda nasida ibana, gabe dipangiar suarana be tumatangis, jala ganup manansani ulosna jala dipirpirhon orbuk tu atas ulunasida dompak langit.

¹³Dung i rap hundul ma nasida manangkaskas di tano pitu ari pitu borngin lelelengna, agia ise ndang mandok nanggo sada hata tu ibana, ala diida nasida mansai bernit sahita i diae.

3¹(I.) Dung songon i dibungka si Job ma pamanganna jala diburai ari hatutubuna.

²Dipungka si Job ma mandok hatana:

³Ua tung mago ma nian ari hatutubungki dohot borngin na manggora: Nunga dijangkon bortian sada posoposo baa.

⁴Ingkon gabe haholomon nian ari na sasada i, unang nian usouso Debata disi sian ginjang, jala unang nian marsinondang hatiuron disi!

⁵Ingkon mulak nian ari i tungguon ni haholomon dohot linggoman ni hamatean, ingkon ombun mangitom nian songgop tusi, ingkon samon arian nian manonggoti ari i!

⁶Ingkon haholomon marimpotimpot nian tongtong nampuna borngin na sasada i, unang nian marlas ni roha di tongatonga ni angka ari ni na sataon, jala unang nian masuk etongan tu bilangan ni angka bulan.

⁷Ida ma, unang ma nian marhagabeon borngin na sasada i, jala unang adong masa disi olopolop.

⁸Ingkon pulasan ni angka parsibalik mata, angka na malo manungguli naga nian borngin na sasada i.

⁹Ingkon mangkolom ma nian angka bintangna andostorang, sai maimaima di hatiuron, hape matua so ro, unang nian sanga idaonna imbulu ni sibalik hunik.

¹⁰Ala so ditutup pintu ni bortian ni dainang, manabunihon nian hinamago on sian matanku.

¹¹(II.) Boasa tung so mate hian ahu sian bortian, pintor tos nian hosanku dung ruar sian butuha ni dainang.

¹²Boasa tung pintor rade ampuan manjangkon ahu, dohot bagot pangonsopanku?

¹³Aut unang i nian peak do ahu nuaeng jala maradian, jala modom ahu disi marsonangsonang.

¹⁴Rap dohot angka raja dohot panuturi ni luat i, angka na pauli tambak di dirina.

¹⁵Manang rap dohot halak na sangap, angka parsere na godang, angka na manggohi jabunasida dohot perak.

¹⁶Manang songon silumaksa ijur na pinanguspangus ahu nian, gabe soada be, songon posoposo na so sanga mida hasiangan.

¹⁷Mansohot ma disi angka parjahat ogaoga, maradian huhut disi angka na mandate ala hurangan gogo.

¹⁸Rap moradian disi luhut angka na tarrante, ndang be dibege nasida suara ni pandasdas.

¹⁹Marsada do disi pangkilalaan ni na metmet dohot na balga, hatoban pe malua do sian indukna.

²⁰Boasa tung lehononna hatiuron tu halak na marhinamago, dohot hangoluan tu halak na marsak situtu marroha.

²¹Angka na mangkalungunhon hamatean nian, hape matua so ro, pola dipatumorosi rohana gumodang sian arta godang.

²²Angka na marlas ni roha, pola tung marolopolop, mariaia ma tutu tung sura jumpangsa tanoman.

²³Tudia na ma baoa na holom marparnidaan, na nirungga ni Debata dalanna tuk humaliang.

²⁴Ai singkat ni sipanganonku ro do hoihoingku, jala mabaor songon aek do angguhanggukku.

²⁵Ai na hinatondithon ni rohangku, i do na songgop tu ahu, jala na hinolsohon ni rohangku, i do na ro tu ahu.

²⁶Nda marhadoharon hian do ahu? Nda marhasonangan hian do ahu? Nda marnalom ni roha hian ahu? Hape ro do hinamago ia nuaeng.

4¹ (I.) Dung i ro ma hata ni si Elipas sian Teman mangalusi.

²Ra tung sogo roham, molo huunjuni hami mandok hata tu ho, alai tahe ise ma ibana tung taroromsa so dohononna hatana?

³Ida ma, mansai torop halak naung niajaranmu, jala tangan ni angka na so marnangon naung pinargogoanmu.

⁴Halak na tinggang hehe do muse binahen ni hatam, jala pat angka na telluktelluk dipatogar ho.

⁵Hape anggo nuaeng, dung songgop hinamago tu ho, gabe manderse ho, jala dung mangonai tu ho, gabe gamang roham.

⁶Nda biarmu mida Debata haposan ni roham na sai laon? Nda habonaron di dalammu pangkirimon ni roham na sai laon?

⁷Ua marningot ma ho! Andigan dung adong magojolma na lidang marroha? Jala didia dung hea pesanjolma na tigor marroha?

⁸Langgo naung huida, matua halak na maninggalahon hajahaton dohot manaburhon hamagoan, ingkon gotilonna do i.

⁹Matua mago nasida dibahen pangombus ni Debata, jala siap nasida dibahen parngongos ni igungna.

¹⁰Parauangon ni singa dohot suara ni singa panoro dohot sait ni singa naposo dapot do diropangi.

¹¹Singa na matua pe mago do ala hurangan soroanna, jala anak ni singa boruboru dapot diparsisiga.

¹²(II.) Ro do tu ahu marsibuni hata ulpuhan, jala pistik tu pinggolhu lingona.

¹³Jumpa mamingkirmingkiri alatan bornginna i, uju renge modom angkajolma i.

¹⁴ Mangonai tu ahu hasonggoton, pola angka dotdot ahu, jala sude holiholingu angka hitir.

¹⁵ Ai mamolus sada Tondi sian jolongku, gabe manindang imbulu ni dagingku.

¹⁶ Jongjong do ibana di jolongku, alai ndang hutanda anggo rupana, asal rumangna dapot matanku, husiphusip dohot sada suara hubege na mandok.

¹⁷ Tung adong ma jolma na gale tarbahen tigor anggo moradophon Debata? Manang tung adong ma baea tarbahen bontor anggo moradophon Sitompa ibana?

¹⁸ Ida ma, gari mida angka parhaladona ndang pos rohana, jala di angka surusuruanna dapotsa dope tuduonna haliluon.

¹⁹ Lam di nasida ma angka na manginganhon bagas sian tano liat, angka na marojahan di orbuk, angka na pisar dapot dogilon songon ngitngit.

²⁰ Tupa olat ni manogotna i sahat ro di botari nunga marragean nasida i; ndang dope disura roha ni jolma nunga mago nasida saleleng ni lelengna.

²¹ Nda tongon do tahe? Molo tos hosanasida di bagasan, mate ma nasida, so jolo sanga maruli habisuhon.

5¹ (I.) Ua joujou ma ho! Manang tung adong ma na mangalusi ho? Tung tu ise ma sian angka na badia i tarbahen ho mangalualu?

²Lam bunuon ni gusarna do tahe anggo halak na oto, jala piripirina sandiri mambunu halak na bodo.

³Apala ahu sandiri tahe marnida sada halak na oto manjarar uratna, alai tongkinnari huburai ingananna.

⁴Mandaodao do angka anakna sian hatuaon, jala dirupa halak nasida di pintu paruhuman, jala ndang adong na paluahon.

⁵Tung suda do eme na ginotilna dipangan halak na rapar, gari sian tongatonga ni runga diroro do, jala halak panamun mangonsop sinamotna.

⁶Ai ndada na ruar boti hinamago sian orbuk, jala ndada martumbur boti pardangolan sian tano i.

⁷Ai tinubuhon hianjolma i tu hinamago, songon balontung ni api na habang dompak ginjang.

⁸(II.) Alai tung sura ahu ho, tu Debata do ahu mangalualu, tu Debata do pasahatonku tangiangki.

⁹Ibana mambahen habalgaon, angka na so dapot sulingkiton, dohot halongangan angka na so dapot habilangan.

¹⁰Ibana mangalehon udan tu sisik ni tano i, Ibana patongonhon aek tu adaran.

¹¹Ibana patimbulhon halak na tarjepol dohot patimbulhon hatuaon tu halak na marsak marroha.

¹²Ibana papurpurhon angka pingkiran ni halak na bisuk, gabe ndang manjadi na niula ni tangannasida.

¹³Ibana manangkup angka na bisuk di bagasan angka nasida sandiri, jala diagohon pingkiran ni halak na marpangansi.

¹⁴Tingganton ni haholomon nasida arian, jala dadapdadap nasida di hos ni ari suang songon bornginna i.

¹⁵Alai anggo halak na pogos dipalua Ibana do sian podang ni pamangannasida, dohot sian tangan ni pangarupa.

¹⁶Jadi adong ma muse arop ni roha di halak na dangol, tarhuntam do ianggo pamangan ni hajahaton.

¹⁷(III.) Ida ma, martua ma jolma na niajar ni Debata, dibahen i unang ma toishon pinsangpinsang ni Nasunhinagogo i.

¹⁸Ai Ibana mambugangi, laos Ibana mangaliliti, Ibana manggopui laos tanganna pamalumhon muse.

¹⁹Onom hali ho hagogotan, Ibana paluahon ho, tole papituhalihon ndang tagamon loasonna mangonai hinamago tu ho.

²⁰Jumpa haraparon, paluaonna do ho sian hamatean, jumpa di hamusuon sian podang.

²¹Ondinganna do ho anggo maradophon lipatlipat ni dila, jala ndang pola habiaranmu hamagoan tung sura ro.

²²Tarbahen ho do mengkel mida hamagoan dohot haleon, jala ndang pola habiaranmu binatang ni luat i.

²³Ai marjambar do ho dohot batu angka na di ladang, binatang di harangan mardame do tu ho.

²⁴Jadi tandaonmu ma marhasonangan undungundungmu, ia dibilang ho isi ni jabum, gabe ndang adong na malua nanggo sada.

²⁵Tandaonmu huhut lam tu soparna pinomparmu, angka tunasmu songon suansuanan di tano.

²⁶Ingkon jolo sanga sarimatua ho asa suruhonmu tanoman, songon tibalán na binunbunhon di hajujumpang ni tingkina.

²⁷Ida ma, songon i ma pangalahona, nunga tung ditimbang rohanami! Sai tangihon ma i jala parateatehon!

6¹ (I.) Dung i ninna si Job ma mangalusi:
²Aut tangkas ma nian nidasing gusarhu dohot hinamagongku rap dipeakkon nian tu timbangan!

³Ai umborat do angka i nuaeng sian horsik di pasir ni laut; ala ni umbahen hata oto angka pangkataionku.

⁴Ai angka sumbia ni Nasunhinagogo i pantik di bagasan ahu, nunga pola manggagat bisana tu tondingku, jala angka hasonggoton sian Debata marudur mangalo ahu.

⁵Tung tagamon marlingik ma halode harangan, molo singkop duhutduhut

jampalonna? Manang tung marumbe ma lombu, molo singkop gagatonna?

⁶Tung tarpangan jolma ma sipanganon na so mardai, na so siniraan; manang tung mardai ma na bontar ni pira ni manuk?

⁷Ginegine do rohangku nanggo manjama, hape i do gabe sipanganonku songon indahan na baribari.

⁸Ise nian sumubut pangidoanku, aut dilehon Debata nian na hinalungunhon ni rohangku.

⁹Aut lomo nian roha ni Debata manorbuk ahu, aut dipatoltol Debata nian tanganna manostosi hosangku!

¹⁰Sabam ma antong rohangku, jala mirjahirjak dope ahu di bagasan pardangolan na so moralangalang, ala so dung husoadahon hata ni Nabadia.

¹¹Tung aha be gogongku umbahen mangkirim dope ahu? Jala tung aha be ajalhu, umbahen pabengetonku rohangku manaonnaon?

¹²Manang tung songon togu ni angka batu gogongku? Manang tung sian tombaga sibukku?

¹³Tung na so adong be huroha pangurupion di ahu, jala dalan haluaon maporus sian ahu.

¹⁴(II.) Tama nian marpangkaehe alealena mida na marsingkor, nang tung sura naung ditallushon rohana sian biar mida Nasunhinagogo i.

¹⁵Hape gari angka hahaanggingku marpangansi do songon anak ni sunge, songon sunge tutu pola mangalantap tobingna.

¹⁶Litok do angka i dibahen tangkuju, mabaor tusi tahe tangkuju i.

¹⁷Hape marsik do angka i anggo di partaonan logo ni ari, molo mohop ari tung mahiang do ingananna.

¹⁸Marlegotlegot do pardalananna, manaek uapna tu aoangaoang, laos mago boti.

¹⁹Manatapnatap nian angka pangallung sian Tema tusi, jala mangkirim disi angka saudagar sian Seba.

²⁰Hape tarhirim do nasida ala marhaposan tusi, ai dung sahat nasida tusi tarurak ma nasida.

²¹Suang songon i do hamu nuaeng, tung na so marguna di ahu, dung diida hamu hasonggoton, gabe tarhatotong hamu.

²²Hea dung hudok tu hamu lehononmu tu ahu manang aha, manang boanonmuna silua tu ahu sian artamuna.

²³Manang paluahon ahu sian tangan ni pangarupa, manang tumobus ahu sian tangan ni halak sibahen gogo?

²⁴Ajari hamu ahu, asa sip ahu, jala tudu hamu manang taringot tu aha ahu lilu!

²⁵Tung na marsorop situtu do anggo hata hasintongan! Alai aha ma guna ni hata paminsangon anggo sian hamu?

²⁶Rupa marjarum sina hamu naeng manulingkit angka hatangku? Hape gabe alogo do anggo pangkataion ni jolma na marpandelea?

²⁷Rupa olo do hamu marruji laho mangkilang dakdanak na tading di lampin, dohot manggadisjauhon alealemuna.

²⁸On pe, ua bereng hamu bohingkon, tung olo ma ahu manggabusi hamu adop bohi be?

²⁹Ua mulak ma hamu, asa unang mambahen na so uhum hamu! Mulak ma hamu tutu, sai tong dope marsihohot hatigoranku.

³⁰Tung adong ma hageduhon di atas dilangku? Tung na so diboto pamanganku be manirang angka hinamago?

7 ¹(I.) Nda ulaon porang do ulaon ni jolma saleleng di tano on? Jala nda songon ari ni anak gajian do ariarina?

²Songon hatoban tahe na mangido marlinggomlinggom, jala songon anak gajian na paimaimahon gajina:

³Suang songon i diturpukkon tu ahu angka bulan hinamago, jala dipadiri tu ahu angka borngin na marhangaluton.

⁴Molo laho modom ahu, ningku do: Andigan pe tarbahen ahu hehe? Alai borngin pe mansai ngolngol do, jala loja ahu margilinggiling sahat ro di andostorang.

⁵Marsapu gulokgulok dohot orbuk do dagingku; tongkin maripos ngolu hulingkulingku, tongkinnari malala muse.

⁶Tumibu ariaringku laho salpu sian turak,
jala magomago boti soada adong sihirimon.

⁷(II.) Sai ingot ma, alogo sambing do
ngolungku, jala ndang tagamon mulak
matangku marnida hadoharon.

⁸Nang mata ni na maningkir ahu, ndang be
idaonna ahu; molo dilului matam ahu, hape
ndang be disi ahu.

⁹Habang boti do ombun laho salpu, suang
songon i turun manisias tu parbeguan, ndang
tarbahensa be nangkok sian i.

¹⁰Ndang tagamon mulak be ibana tu jabuna
hian, jala ndang be tandaon ni sambulona
ibana.

¹¹Ahu pe antong ndang olo ahu mangontok
pamanganku, alualuhononku ma hagogotan
ni tondingku, jala andungkononku ma
hinaponjot ni rohangku.

¹²Apala laut ahu manang ihan lumbalumba,
umbahen pajongjongonmu parhal jumaga
ahu?

¹³Molo didok rohangku: Paratengku ma
mangapuli ahu, podomanku mamuati
orongorongku.

¹⁴Jadi disonggoti Ho ahu marhitehite nipi,
pola angka hitir ahu dibahen Ho marhitehite
alatan.

¹⁵Jadi patahitahi paningkoton do rohangku
jala holiholungku mangido hamatean.

¹⁶Nunga biasan ahu, ndang ahu naeng mangolu salelenglelengna; palua ma ahu, ai alogo sambing do ariaringku.

¹⁷Tung aha ma nianjolma i umbahen pola patimbulonmu ibana, jala pola tiroan ni roham ibana?

¹⁸Sai diebati Ho ibana ganup sogot, jala ganup tongkin diunjuni Ho ibana?

¹⁹Sadia leleng on so padaoonmu pamerengmu sian ahu? So paluaonmu asa sanga ahu nian mamondut ijurhu?

²⁰Molo naung mardosa ahu, tung aha ma tarbahen ahu dompak Ho, ale Sijaga jolma manisia? Boasa tung ahu bahenonmu panonjolanmu, gabe ahu sandiri padokdok sitaononku?

²¹Boasa so marpamuati roham mida pangalaosingku, jala boasa so dibolus roham hajahatonku? Ai laho modom ma ahu nuaeng tu bagasan orbuk, molo dilului Ho ahu manogot, ndang be disi ahu dapotonmu!

8¹ (I.) Dung i ninna si Bildad sian Sua ma mangalusi:

²Sadia leleng on datdatanmu songon i hatahatam, jala tudoshon habahaba na doras pangkataion ni pamanganmu?

³Tung olo ma Debata papeol uhum? Manang tung olo ma Nasunhinagogo papeol habonaron?

⁴Atik tung naung mardosa angka anakmu
dompok Ibana, jadi Ibana manginonahon tu
nasida hajahatonnasida i.

⁵Molo burju anggo ho mangalului
Debata dohot mangido asi ni roha sian
Nasunhinagogo.

⁶Molo pita jala bonar anggo ho, sai
tarsunggul do Ibana manatap ho, jala
patipakonna muse inganan ni hatigoranmu.

⁷Marmetmet pe parmulaanmu, ganda situtu
do hadoharonmu di ujung.

⁸(II.) Ua marsungkun nian ho tu sundut na
robi, jala parateatehon poda na dapot angka
ompu na jolo.

⁹Ai na tubu nantoari do anggo hita, jala
ndang agia aha na itaboto, ai halinu sambing
do ariarinta di atas tano on.

¹⁰Nda nasida mangajari ho, nasida
paboahon tu ho, jala nasida paruarhon angka
hata poda sian rohanasida?

¹¹Tung tagamon tubu ma ansising, anggo
so di gambo? Tung tagamon ma simbur tubu
arung, anggo so di berneberne?

¹²Molo martumbur dope, ndang dirambas,
hape ingkon malos do i jumolo sian nasa
duhutduhut sileban.

¹³Suang songon i do pangalaho ni sude
jolma na mangkalupahon Debata, ingkon
pesan do pangkirimon ni halak parjahat.

¹⁴Ingkon mago do pangatauan ni rohana, jala tudoshon rambangrambang ni babibabi na hinaposan ni rohana.

¹⁵Mangunsande ibana tu jabuna, hape ndang manahan jongjong marsitiopan ibana tusi, hape ndang hot.

¹⁶Margota do nian ibana nang di las ni ari, jala marjurambak uratna manutup sandok porlakna.

¹⁷Manjirir huhut angka andorna tu timbunan batu, pola dijangkit tu bagasan bagas batu.

¹⁸Alai molo dung niruntun ibana sian ingananna, soadahonon ni do ibana, dohononna do: Nandang dung huida ho.

¹⁹Ida ma, i ma halomoan ni dalanna, gabe martumbur na asing sian orbukna.

²⁰Ida ma, ndang tagamon bolongkonon ni Debatajolma na daulat marroha, jala ndang tagamon tumpahanna tangan ni parjahat.

²¹Alai anggo pamanganmu gok parengkelon sogot bahenonna, jala bibirmu gok parolopolopon.

²²Angka na mangkosom ho, ingkon maruloshon haurahon, jala undungundung ni parjahat ingkon siap do.

9¹ (I.) Dung i ninna si Job ma mangalusi:
²Tangkas do huboto sintong do songon i; tung tarbahen ma tigorjolma na gale anggo moradophon Debata?

³Tung sura olo Ibana manjujur dompak jolma i, ndang haalusansa nanggo sada sian saribu.

⁴Parroha na sun pistar Ibana jala Nasunhinagogo, tung ise ma manangkangi rohana maralohon Ibana laos marsonangsonang?

⁵Ibana paunsathon angka dolok so pangkirimanna, Ibana pabalikkon angka i di bagasan rimasna.

⁶Ibana mangkutol tano on sian ingananna, pola reberebe angka tiang partunggulna.

⁷Ibana mandok tu mata ni ari, gabe ndang olo binsar, jala Ibana mansahapi angka bintang humaliang.

⁸Sasada Ibana paherbang angka langit, jala Ibana mardalan di atas galumbang ni laut.

⁹Ibana manjadihon bintang poriama, bintang sidongdong dohot hala ro di bintang angka na di langit pardangsina.

¹⁰Ibana mambahen habalgaon angka na so dapot sulingkiton, dohot halongangan, angka na so dapot bilangan.

¹¹Ida ma, Ibana mardalan di lambungku, hape ndang huida, Ibana mamolus sian jolongku, hape ndang pamotoanku.

¹²Ida ma, Ibana tarsulandit, tung ise ma na tuk manogang Ibana? Tung ise ma na hum mandok tu Ibana: Aha do na binahenmi?

¹³Ndang olo Debata pasuruthon rimasna; nunga pola tunduk dibahen angka na hinara ni Rahab.

¹⁴Lam ahu ma, tung haalusan ahu ma Ibana, hapillitan ahu ma hata angka na taralushon ahu tu Ibana?

¹⁵Nang tung sura parpintor ahu, ndang haalusan ahu Ibana, ingkon mangido asi ni roha ahu sian Siuhum ahu.

¹⁶Molo joujou ahu, jala Ibana mangalusi ahu, laos so pahatopoton ni rohangku dope, tung Ibana manangihon suarangku.

¹⁷Ibana mangaropuhi ahu marhitehite habahaba, jala dipatorop bugangku, soada alana.

¹⁸Ndang diloas Ibana ahu humosa, lam dipagodang do angka soro ni aringku.

¹⁹Tung sura naeng mangasahon gogo iba, gumogo do Ibana; tung sura mangasahon uhum iba, tung ise ma mangaluhon Ibana?

²⁰Nang tung sura hapintoran ahu diringku, pamanganku sandiri manorui ahu; nang tung sura bontor rohangku, pargeduk do ahu anggo tuduonna.

²¹Bontor do ahu tutu, ndang huholsohon hosangku, nunga biasan rohangku di hangoluan on.

²²Sada do pangarimpunanna, ala ni do umbahen hudok: Rap diago Debata dojolma na daulat dohot na jahat marroha.

²³ Molo tompu Ibana mambunu marhite sian begu antuk, mengkel do Ibana mida pandelean ni jolma na so marpipot.

²⁴ Nunga dipasahat Ibana luat i tu tangan ni halak parjahat, nunga dipapitung Ibana bohi ni panguhum ni luat i; tung ise ma mambahensa, molo so Ibana?

²⁵ (II.) Dumoras do ariaringku laho salpu sian halak na doras marlojong, luhutna i nunga habang so sanga marnida hadoharon.

²⁶ Luhutna i nunga salpu songon solu hotang dorasna, songon lali piuan laho manoro sisoroon.

²⁷ Molo didok rohangku: Naeng ahu mangkalupahon pardangolanku, naeng manadingkon surbot ni bohingku, jala naeng pasiharonku:

²⁸ Jadi bajogiton muse rohangku mida sude pardangolanku, ala huboto hian ndang tagamon lias ahu dohononmu.

²⁹ Antong, ingkon parjahat na ma ahu, aha gunana sai datdatanku marporsukporsuk?

³⁰ Tung sura pe huparidi aek ni ambolas jala hupaias tanganku dohot aek ni sabun.

³¹ Sai na gunomhononmu do ahu tu bagasan lupaklupak, gabe magigi pangkeanhu mida ahu.

³² Ai ndada baoa Ibana songon ahu on, umbahen so haalusan ahu Ibana, tung sura rap tarboan tu paruhuman.

³³Angkup ni ndang adong panolai di tongatonga ni hami na dua, na mambahen tanganna tu hami padua.

³⁴Sai dipaholang ma nian sian ahu batahina, jala unang hinasongkalna manonggoti ahu.

³⁵Asa hudok nian hatangku jala unang mabiar ahu mida Ibana, ai ndang parsala ahu huhilala.

10¹(I.) Nunga biasan rohangku di hangoluan on, antong guru lomo ni rohangku na ma mandatdati andungku, naeng mangandungkon hinaponjot ni rohangku.

²Dohononku ma tu Debata: Unang torui ahu! Sai pabotohon ma tu ahu manang ala ni aha umbahen badaamu ahu!

³Tung tama ma i di roham Ho mangarupa, dohot mambolongkon jadijadian ni tanganmu, hape manumpak marmulia do Ho ianggo di luhutan ni halak parjahat?

⁴Tung marmata sian sibuk ma Ho? Tung songon parnida ni jolma parnidam?

⁵Tung songon ariari ni jolma na gale i ma ariarim? Manang angka taonmu, songon taon ni sada baoa?

⁶Umbahen songon i risihanmu hajahatonku, jala dioranmu dosangku?

⁷Ala naung diboto Ho nian na so parjahat ahu, jala na so adong jolma na tuk paluahon ahu sian tanganmu.

⁸Nunga pola loja tanganmu manjadihon dohot manompa ahu tipak tuk humaliang, hape naeng polgahonmu ahu ia nuaeng?

⁹Sai ingot ma naung ginanami ahu songon tano liat, hape mulak tu orbuk ahu naeng pasuargonmu!

¹⁰Nda nunga diusehon Ho ahu songon susu, jala pola ahu dibahen Ho songon susu na nialhotan?

¹¹Nunga marpahean hulingkuling dohot sibuk ahu dibahen Ho, jala nunga disirat Ho holiholi dohot hurador tu bagasan ahu.

¹²Nunga dibasabasahon Ho tu ahu hangoluan dohot asi ni roha, jala panatapmu mangaramoti hosangku.

¹³Hape naung ditabunihon Ho angka on di bagasan roham; tangkas do huboto tibu hian songon i sangkap ni roham.

¹⁴Molo tung mardosa ahu, nunga dapot Ho ahu tutu, jala ndang tagamon lias ahu paluaonmu sian hajahatonku.

¹⁵Marjea ma ahu tutu molo tung halak parjahat ahu; alai tung sura pe pintor ahu, laos so hum do ahu padirgak ulungku, ahu on naung gok haurahon jala mahap marnida pardangolanku.

¹⁶Tung sura pe hupadirgak, ponsaonmu do ahu songon singa panoro, jala ulahanmu do mambahen gogo tu ahu.

¹⁷Mardapotdapot angka sitindangim dipatindang Ho dompak ahu, jala dipaganda

Ho rimasmu dampak ahu; margantiganti tongon angka parangan haporsuhon manahopi ahu.

¹⁸(II.) Boasa tung paruaronmu ahu sian bortian? Denggan nian pintor tos hosangku, gabe unang sanga nanggo sada mata marnida ahu.

¹⁹Jadi hira na so tubu ahu etongan nuaeng, pintor sian butuha ni dainang ahu boanonna tu tanoman.

²⁰Nda otik do angka ariaringku? Dibahen i dipasohot Ibana nian jala dipasombu ahu, asa hupahosa nian nanggo satongkin.

²¹Tagan so laho dope ahu tu luat na holom marimpotimpot dohot linggoman ni hamatean, na so tarbahen mulak sian i.

²²Tu tano haholomon marimpotimpot, songon haholomon linggoman ni hamatean, na so maraturan, sobokkon haholomon marimpotimpot do hatiuron disi.

11 ¹(I.) Dung i ninna si Sopar halak Naemai ma mangalusi:

²Tung so alusan ma hatahata ni sihapodea, manang tung tagamon pintor halak siduatdait?

³Tung teal ni pangkulingmu ma tama pasiphon halak; sai didatdati ho do mangelak, hape soada adong nanggo sahalak na paura ho.

⁴Sai nimmu do: Pita do podangku, jala lias do ahu nang moradophon matam, ale Debata.

⁵Alai tahe aut ni olo Debata mangkuling, jala dibungka pamanganna dompak ho.

⁶Jala dipabotohon tu ho angka hahomion ni habisukonna, ai tung marlompitlompit do hasintonganna jadi botoonmu ma marpamuati dope roha ni Debata mida ho taringot tu hajahatonmu.

⁷Tung dirimpu roham dapot hadodoan ho parmulaan ni sangkap ni Debata, manang tung jumpang ho ma sun ni hinadenggan ni Pargogo na so hatudosan.

⁸Tumimbo do i sian angka langit, tung aha ma bahenonmu? Umbagas do i sian banua toru, tung aha ma dipabotoboto ho?

⁹Gumanjang do suhatsuhatna sian tano on, jala umbidang sian laut.

¹⁰Tung sura mamolus Ibana dohot mangkurungkon dohot mamboan tu paruhuman, tung ise ma na tuk manogang Ibana?

¹¹Ai Ibana do mananda halak pangansi, jala diida hajahaton, ndang pola loja rohana mangarisik.

¹²Gari baoa na oto sahali marroha dibahen, jala anak ni halode harangan tarbahensa manguahi tubu gabejolma.

¹³(II.) Alai molo marsihohot roham, jala dipaherbang ho tanganmu tu Ibana.

¹⁴Molo tung adong hajahaton di bagasan tanganmu, paholang ma i, asa unang mian hageduhon di bagasan undungundungmu.

¹⁵Disi ma tarbahren ho padirgak bohim,
malua sian haurahon, gabe marsihohot roham
marojahan, ndang be marhabiaran.

¹⁶Ai disi ma halupahononmu parsorionmu,
songon aek naung salpu mabaor, parningotmu
disi.

¹⁷Jadi tumiur ma parnidaanmu tu joloan on
sian tiurna di hos ni ari; soluk pe sipata na
holom i, songon tiurna manogotna i do i.

¹⁸Jadi marnalom ni roha ma ho, ai adong
do sihirimonmu, jala ranapanmu luhutna
humaliang, jala marsonangsonang ho laho
modom.

¹⁹Sonang ho papeahonmu, jala ndang
adong nanggo sahalak na manonggoti ho,
jala torop halak papujipuji ho adop bohi be.

²⁰Alai rondaron do anggo mata ni halak
parjahat i, mago do ia pangatauan ni rohana,
jala marpangkirimon tu hatotos ni hosana na
ma ibana.

12¹(I.) Dung i ninna si Job ma mangalusi:
²Tongon tahe, hambal hamu do
jolma, mate do habisukon i rap dohot hamu!

³Ahu pe marroha do, suang songon hamu,
ndang pola talu ahu martimbangkon hamu,
tung ise ma na so umboto mandok angka
sisongon i?

⁴Ingkon gabe sirehereheon ni alealena
sandiri do anggo ahu on, ahu na joujou
tu Debata, jala na nialusanna antong,

sireherehean do tongon ahu jolma na bonar jala na daulat marroha.

⁵Marro ni lea do tutu halak na dohar mida halak na marhinamago, rade do haleaon di halak naung tarsulandit totna.

⁶Marhasonangan do undungundung ni halak pandobo, jala marpangatauan tu debata na binoanna di bagasan tanganna do halak angka na pauruuru Debata.

⁷Ua marpanungkun ma ho nian tu angka pinahan, asa nasida mangajari ho; tu pidong angka na di toru ni langit, asa nasida pabotohon tu ho.

⁸Pangkulingi nian tano on, asa i ma mangajari ho, dengke angka na di bagasan laut nian pajojorhonsa tu ho.

⁹Tung ise nian na so umbotosa taringot tu saluhutna i, paboa tangan ni Jahowa manjadihon luhutna i.

¹⁰Di bagasan tanganna do hosa ni nasa na mangolu dohot tondi ni nasa daging ni jolma.

¹¹Nda pinggol do tumanda hata, jala pamangan umboto dai ni sipanganon?

¹²Matua di halak na tuatua nian luluan habisuhon, jala halak sigodang umur panungkunan poda.

¹³(II.) Mandapot di Ibana habisuhon dohot hagagoon, di Ibana do panuturion dohot panimbangan.

¹⁴Ida ma, Ibana mangarumpakkon, gabe ndang be dapot paulion, Ibana

mangkurungkon sada baa, gabe ndang adong na tuk paluahon.

¹⁵Ida ma, Ibana maniopi aek gabe marsik luhutna i, Ibana muse palungkashon, gabe marbalik tano on dibahen.

¹⁶Mandapot di Ibana do hagogoon dohot hapantason, guru di Ibana jolma na lilu dohot na mangaliluhon.

¹⁷Ibana manogihon angka panuturi hira tabantaban, jala maoto angka panguhumi dibahen.

¹⁸Ibana mangkarhari uhum roharoha ni angka raja, jala dihooshon rante tu gontingnasida.

¹⁹Ibana manogihon angka malim bahen tabantaban, jala ditinggangkon tu tano halak na marhuaso.

²⁰Ibana mangunsat pamollungon sian halak na pir tahak, jala dibuat panuturion sian halak na tuatua.

²¹Ibana mangusehon haleaon tu angka raja, jala dipahondur hohos ni halak na begu.

²²Ibana papatarhon angka na buni sian haholomon, jala diboan do tu hatiuron linggoman ni hamatean.

²³Ibana patimbulhon angka bangso, jala diago muse; Ibana pararathon angka bangso jala dipaundar muse.

²⁴Ibana mangunsat roha sian angka partogi ni bangso di tano on, jala dililuhon nasida di halongonan soada dalan.

²⁵ Jadi dadapdadap nasida di haholomon so marhatiuron, jala rabatrabat nasida dibahen songon halak na mabuk.

13¹ (I.) Ida ma, luhutna i nunga diida matanku, nunga dibege pinggolhon jala diantusi.

² Suang songon botomuna do botongku huhut, ndang talu ahu martimbangkon hamu.

³ Alai atik pe songon i, naeng ahu mandok suara tu Nasunhinagogo i, jala dipangido rohangku naeng masialusan dohot Debata.

⁴ Ai siulasulas gabus do anggo hamu, jala pandaoni angka na so marguna do hamu sude.

⁵ Tagonan mangiman boti nian hamu, i ma tanda ni habisuhon di hamu dohonon ni halak.

⁶ Antong tangihon hamu ma poralusonku, jala parateatehon hamu panarison ni bibirhon.

⁷ Tung hageduhon naeng hatahononmuna mangampini Debata? Naeng dohononmuna sipaotooto mangamini Ibana?

⁸ Tung hamu naeng mandingkani Ibana? Manang tung hamu gabe pangondian ni Debata?

⁹ Tung tagamon ma sonang hamu, tung sura Ibana manulingkit hamu? Manang tung dirimpu hamu dapot ansionmu Ibana, songonjolma na gale na dapot ansion?

¹⁰Tongon tahe, Ibana sandiri manggogo maminsang hamu, molo marroha di bagasan hamu mangampini Ibana.

¹¹Tung so hamuliaonna manonggoti hamu, jala hatahuton mida Ibana maninggangi hamu?

¹²Angka sipaingotmuna gabe nonang sian sirabun na so marimpola, jala panariasonmuna gabe partanobatoan sian tano liat.

¹³Antong sip ma anggo hamu, jala loas hamu ahu mandok suara, rohana do manang aha pamasaonna tu ahu.

¹⁴(II.) Tung ahai sai usungonku sibukku di holangkolang ni ngingingku, manang tondingku di bagasan tanganku?

¹⁵Ida ma, sai na bunuonna na ma ahu, ndang adong be sihirimonku, alai anggo angka dalanku, sai naeng tariashononku di jolona.

¹⁶Nang on tarbahen do i gabe hatuaonku, na so niloasna masuk tu jolona anggo halak parjahat.

¹⁷Dibahen i, tangkas ma tangihon hamu panopotionku, jala dijangkon pinggolmuna panariasonku.

¹⁸Ida ma, nunga huaturhon pangaluan, jala huboto hian ingkon pintoranna ahu.

¹⁹Tung ise ibana na tuk mangaluhon ahu, asa sip ahu nian nuaeng jala tos hosangku antong.

²⁰Asal unang na dua on dibahen Ho tu ahu, jadi ndang tabunihononku diringku maradophon bohim.

²¹Sai paholang ma sian ahu torutorum, jala unang hinasongkalmu manonggoti ahu.

²²Dung i joujou ma ho, sai na alusanku do, manang ahu tahe jumolo mandok asa balosonmu.

²³Tung sadia godang do huroha hajahatonku dohot dosangku? Sai pabotohon ma tu ahu panundalionku dohot dosangku.

²⁴Ala ni aha umbahen tabunihononmu bohim, jala etongonmu ahu hira musum?

²⁵Tung sada bulung na mapirapir huroha naeng songgotanmu, jala gala ni eme sada naung masak naeng leleanmu?

²⁶Umbahen songon i godang uhum na posi surathononmu tu ahu, jala manginona tu ahu bahenonmu angka hajahaton ni haposoonku.

²⁷Jala bahenonmu pathu tu bagasan beangan jala ranapanmu dalanku sudena, gari bogas ni pathu dihampungi Ho do.

²⁸Atik pe ruhap on iba songon hau na tandetandeon, jala songon ulos na pinangan ni ngitngit.

14¹(I.) Ia jolma na tinubuhon ni parompuan, otik do ariarina, jala mahapan di hangaluton.

²Mangerbang do ibana songon bungabunga dung i malos, jala manilu ibana laho salpu songon halinu na so lelung manahan.

³Hape pola ma tung ranapan ni matam
jolma sisongon i, jala pola boanonmu ahu tu
paruhuman di adopanmu?

⁴Tung ise ma tarbahen mambahen sada
jolma na ias sian na ramun? langgo sada
ndang adong.

⁵Molo naung dibuhul Ho ariari ni manisias,
bilangan ni angka bulanna, naung dibahen Ho
parbalohanna, na so tupa laosanna.

⁶Padao nian pamerengmu sian ibana, asa
sonang ibana satongkin, asa sombu rohana di
ujung ni ariarina, songon anak gajian.

⁷Ai adong dope sihirimon anggo di hau,
nang tung sura ditaba, tarbahensa dope
martumbur, jala ndang mansohot martunas.

⁸Nang tung sura matua uratna di bagasan
tano, jala mate pangkalna di bagasan orbuk.

⁹Asal diangor aek ulahanna do martunas,
jala marranting songon suansuanan nambura
sinuan.

¹⁰Alai anggo baoa ia dung mate, laos
bustang boti, jala ia dung tos hosa ni jolma
tudia be ibana?

¹¹Suda do aek mabaor sian tao, jala olo
marsik ia sunge gabe mahiang.

¹²Alai anggo jolma i dung sapala bustang,
ndang tarbahensa be hehe; saleleng adong
dope langit, ndang hehe nasida, jala ndang
tarsungul sian na modom.

¹³(II.) Aut olo ma Ho nian manabunihon ahu
di bagasan parbeguan; diondingi Ho nian ahu

disi, paima mombun rimasmu, jala dibahen
Ho nian buhulna di ahu, dung i marpangulah
nian roham mida ahu.

¹⁴Ia dung mate baoa i, tung tagamon ma
ulahanna mangolu? Tung di saluhut ariari ni
parporangonku nian ahu mangkirim, paima
ro ari haluaonku.

¹⁵Disi Ho joujou di ahu, pintor alusanku
do Ho, halungunhononmu tahe jadijadian ni
tanganmu.

¹⁶Alai anggo nuaeng dibilangi Ho do
langkalangkanku, jala ndang marpamuati
roham mida dosangku.

¹⁷Nunga tarsahap panundalionku di bagasan
parningotanmu, lam ganda dope hajahatonku
dijujur Ho.

¹⁸Alai gari dolok tupa matompas do laos
magargar, jala dolok batu tupa munsat sian
ingananna.

¹⁹Angka batu peo pe malala do dibahen aek,
jala tangkujuna mamburburhon orbuk ni tano
i; suang songon i diago Ho pangkirimon ni
jolma na gale.

²⁰Dipatunduk Ho do ibana ro di saleleng ni
lelengna, gabe laho salpu ibana; Ho huhut
paubahon bohina, dung i dipalaho Ho ibana.

²¹Marmulia pe angka anakna, ndang
dipabotoboto, marlea pe nasida ndang
pardulina.

²²Alai ripe mangae na bernit na ma dagingna
i, jala ripe marsak ia tondina.

15¹ (I.) Dung i ninna si Elipas sian Teman mangalusi:

²Tung ture ma halak na pistar mangalushon parbinotoan angin? Manang tung paburnangonna rohana dohot alogo sian purba?

³Ndang marguna anggo paminsangon marhite sian hata sambing, jala ndang adong labana hatahata sambing marpoda.

⁴Tongon tahe mansoadahon biar mida Debata do ho, jala diorui ho do tangiang moradophon Debata.

⁵Ai hajahatonmu sandiri tahe mamodahon tu pamanganmu mandok songon i halak na mangkalushon salana pinangasahonmu.

⁶Pamanganmi sandiri tutu manguhumi ho, ndada ahu, jala bibirmu manindangi dompak ho.

⁷Tung ho ma di rohamjolma na parjolo tubu? Manang jumolo ho tarjadi sian angka dolok batu?

⁸Nunga tung dibege ho huroha hahomion ni Debata, jala diduduk roham sandok hapistaran?

⁹Tung aha ma na binotom, so dohot hami umbotosa? Tung aha ma na niantusanmu, so dohot hami mangantusi?

¹⁰Nang di tongatonganami adong do halak na ubanon, naung sarimatua situtu, angka na tumua tahe sian amanta.

¹¹ Tung na so pola do huroha anggo di roham angka pangapulon sian Debata dohot hata na lambok na hudok hami tu ho?

¹² Boasa tung pangaruntuson roham, jala boasa tung songe pamerengmu?

¹³ Tung hum ho marmurukmuruk dompak Debata dohot paruarhon hata teal sian pamanganmu?

¹⁴ (II.) Tung beha ma pambahen ni jolma na gale gabe na ias ibana? Manang jolma tubu ni parompuan gabe bonar ibana?

¹⁵ Ida ma, gari mida angka na badiana ndang pos rohana, gari angka langit i ndang pita anggo moradophon Ibana.

¹⁶ Lam beha ma jolma parroha mago dohot na busuk, jolma na manobur hajahaton songon aek!

¹⁷ Naeng tariashononku tu ho, antong tangihon ma ahu, jala manang aha naung huida naeng pajojoronku tu ho.

¹⁸ Manang aha naung binaritahon ni halak na pistar so marpamorso sian ompunasida.

¹⁹ Tu nasida sandiri tahe tano i dipasahat, jala ndang adong na jumonok tusi anggo halak na buro.

²⁰ (III.) Saleleng mangolu halak parjahat i sai mangae na porsuk do ibana, jala nunga binuhul hian bilangan ni angka taon di halak siulahon gogo.

²¹ Suara hasonggoton marsaringar tongtong di bagasan pinggolna, apala di tingki hadoharonna ro pangago so pangkirimanna.

²² Nandang be dihirim rohana tarbahensa dope malua sian haholomon, ripe panganon ni podang na ma ibana diparbaga rohana.

²³ Sai madoado do ibana mangalului sipanganon, nunga diboto hian naung jonok pinadiri di ibana ari haholomon.

²⁴ Pusok hosana binahen ni hasusaan dohot hagogotan, angka na manahopi ibana, songon raja na hobas manahopi parporangon.

²⁵ Ala pinatoltolna tanganna naeng mangalo Debata, jala ogaoga ibana dompak Nasunhinagogo.

²⁶ Tung dipagakgak do rungkungna marlojong manahopi Ibana, marondingonding tu lombulombuna angka na baris.

²⁷ Ala naung hinungkupan ni mokmokna bohina, pola marhorothorot haehaena dibahen mokmokna.

²⁸ Jadi maringan ibana di bagasan huta, angka naung niulang, di bagasan jabu, angka na so jadi inganan nian, angka naung pinadiri hian bahen timbunan batu.

²⁹ Nandang tagamon mamora ibana, jala ndang tagamon tongtong sinamotna i, jala ndang tagamon tu gandana artana di tano on.

³⁰ Nandang tagamon malua ibana sian haholomon, angka tumburna pe malos do

dibahen jilam ni api, jala purpur do ibana binahen ni parngongos ni hosa ni Debata.

³¹Unang ma marhaposan ibana tu ugasan na laho salpu, na paototohon dirina ibana disi, ai hamagoan do upana di ujung.

³²Ndang dope gok arina, nunga jumpang ajalna, jala ndang be rata marbulung dangkana.

³³Mosu ibana bahenon ni Debata songon parbue ni hau anggur, jala marurus ibana bahenonna songon bunga ni hau jetun.

³⁴Ai ingkon ripur do pinompar ni parjahat, jala ingkon suda panganon ni api angka undungundung ni halak na olo manjalo sisip.

³⁵Marbortianhon hangaluton nasida, gabe ditubuhon pardangolan, jala butuhanasida mangarade sipaotooto.

16¹(I.) Dung i ninna si Job ma mangalusi:
²Nunga godang pangkataion sisongon i hubege, angka pangapul sipaganda hinamago do hamu sude.

³Sadihari pe marujung angka hobar angin? Aha ulaning pasugal roham umbahen sai datdatanmu maralus?

⁴Ahu pe, tarbahen ahu do marhatahata songon hamu, tung sura ditaon hamu songon na hutaon on; sai datdatanku mangalage hatahata mangalo hamu, jala paseolseolonku ulungku mida hamu.

⁵Tongon tahe papironhu ma tondimuna marhitehite hata ni pamanganku, jala apulapul ni bibirhu pasohothon parniahapanmuna.

⁶(II.) Molo marhata i ahu, ndang tagamon mansohot parniahapanku; molo hohom ahu, ndang tagamon tu oruna.

⁷Tutu anggo nuaeng, nunga suda gogongku dibahen Ibana, nunga tung ripur angka isi ni bagashu dibahen Ho.

⁸Nunga tung disoro Ho ahu, gabe sitindangi do i dampak ahu, jala nunga hehe niangku mangalo ahu, jala mangalualuhon ahu adop bohi be.

⁹Rimasna marsurage dohot mangalo ahu, patungoripon Ibana dampak ahu, alongku patajom pamerengna dampak ahu.

¹⁰Dipangangang nasida pamanganna be dampak ahu, dipastapi nasida hurumhu marhite sian hata reherehe, marsitampak nasida mangalo ahu.

¹¹Nunga dipasahat Debata ahu tu halak pargeduk, jala nunga ditinggangkon ahu tu bagasan tangan ni halak parjahat.

¹²Marsonangsonang ahu nian, gabe Ibana manggopui ahu, disoro do tangkuhukku jala digosagosa ahu, jala dipajongjong ahu bahen panonjolanna.

¹³Marngeos angka sumbiana humaliang ahu, dibola Ibana piangku so moralangalang, jala diusehon pogungku tu tano.

¹⁴Mardapotdapot angka bugangku dibahen, didorong do ahu songon pandorong ni ulubalang na begu.

¹⁵Nunga hualithon abit takki tu hulingkuling ni dagingku, jala nunga huguluhon ulungku tu bagasan orbuk.

¹⁶Marbosol do bohingku binahen ni partangison, jala ampe tu langkop ni matangku linggoman ni hamatean.

¹⁷Atik pe so adong lohoh pangarupaon di tanganku, jala tongtong pita tangiangku.

¹⁸(III.) Sai unang ma dionsop tano i mudarhu, jala unang jumpangan pangulonang angguhanggukki.

¹⁹Gari nuaeng, ida ma, di bagasan surgo i do Sitindangingku, jala Pangondianku do di angka banua ginjang.

²⁰Manginsahi pe angka alealengku mida ahu, dumarede do iluilu ni matangku marpangatauan tu Debata.

²¹Asa ditolai mangondihon baoa i moradophon Debata, jala dipintori anak ni jolma maralohon alealena.

²²Ai otik na ma bilangan ni angka taonhu, jonok na ma ajalhu, bolusonku ma dalan na so haulahan do.

17¹(I.) Nunga mandate tondingku, nunga mintop angka ariaringku, nunga rade tanoman i di ahu.

²Hape tong dope angka reherehe humaliang ahu, nang bornginna i ingkon taon on ni matanku angka pamadaionnasida.

³Ua bahen ma parhangkungan, Ho ma tahe mangampu ahu! Tung ise ma dungkon ni Ho na olo martopak tangan dohot ahu.

⁴Ai nunga ditamondingkon Ho panimbangan sian rohanasida, dibahen i ndang tagamon pamonangonmu anggo nasida.

⁵Manang ise na manjehehon angka alealena tabanon ni halak, ingkon rondar mata ni angka anakna.

⁶Nunga dibahen Ibana ahu gabe sirehereheon ni halak situan na torop, pola luhut halak mamursihi bohingku.

⁷Dibahen i pola lotop matanku dibahen hinamago, jala saluhutna ruashu songon halinu sambing.

⁸Pola marseto alani roha ni halak partigor, jala mangiburu halak na so marpipot mida halak parjahat.

⁹Alai tahe tong do marsihohot roha ni partigor i mangihutihut dalanna, lam tamba tahe gogo ni halak na ias tangan.

¹⁰(II.) Alai luhut hamu, datdati hamu ma mulahulak ro tu ahu, ndang tagamon jumpang ahu na marroha di tongatongamuna nanggo sahalak.

¹¹Nunga salpu angka ariaringku, nunga pesan angka sangkaphu, angka pangidoan ni rohangku.

¹²Borngin i gabe arian dibahen nasida, jonok na ma hatiuron i didok, atik pe ngomngom dope haholomon.

¹³Tung sura marpangkirimon disi ahu, tong do parbeguan gabe jabungku, jala hupahembang lagengku di bagasan haholomon.

¹⁴Joujou pe ahu mandok tu tanoman i: Damang do ho! Tu angka gulokgulok: Dainang dohot angka ibotongku do hamu!

¹⁵Didia be adong tagamon sihirimonku, jala ise tagamon pataridahon tu ahu na huhirim i?

¹⁶Turun do i tu pargumbangan ni parbeguan, molo rap moradian di bagasan orbuk.

18¹(I.) Dung i ninna si Bildad sian Sua ma mangalusi:

²Sadia leleng on sai palagelageonmuna hatahata? Sai olo ma hamu parrohaon, dung pe i asa mangkatai hita!

³Boasa tung dietong roham hami songon pinahan? Boasa tung songon na maoto hami di roham?

⁴Tung ho sandiri do tahe marsuragehon roham di bagasan dibahen gusarmu; tung tagamon tarulang ma tano on ala ho, manang tung munsat dolok batu sian ingananna?

⁵(II.) Tongon tahe, ingkon mintop do palito ni halak parjahat, jala unang be marsinondang nalanala ni apina.

⁶Hatiuron i pe, ingkon gabe haholomon di bagasan undungundungna, jala palitona ingkon mintop di atasna.

⁷Ingkon lam targogot langkalangka ni hagogoonna, jala sangkapsangkapna manginona tu ibana sandiri.

⁸Ai patna sandiri padapot ibana di bagasan aring, jala mardalani ibana di bagasan tali na rundut.

⁹Sai na taralit do tambihulna di bagasan jorgong, jala lingkup tu ibana rambang.

¹⁰Marsibuni di bagasan tano aringna ditaon, jala bostangna di dalan na bolon.

¹¹Angka hinamago manonggoti ibana humaliang, jala dihampungi angka bogas ni patna.

¹²Hisapan hinamagona i pasudasuda ibana, jala ngomngom di lambungna hamagoan i.

¹³Nunga suda dipangan uraturat ni dagingna, nunga pola suda tahe angka ruasna dipangan anak buhabaju ni hamatean.

¹⁴Tarsarat do ibana sian undungundungna, haposan ni rohana hian, jala ingkon langkahononna mandapothon raja ni hasonggoton.

¹⁵Halak na pulik marga na ma maringan di bagasan undungundungna, ala so adong tadingtadinganna; tung disirsirhon do barerang tu ingananna i.

¹⁶Malos do angka uratna sian toru, jala ditultuli dangkana sian ginjal.

¹⁷ Pesan do baritana sian tano on, jala ndang be targoar ibana di angka alaman.

¹⁸ Dionjarhon halak do ibana sian hatiuron tu haholomon, pola dipabali ibana sian tano on.

¹⁹ Nandang teba di ibana anak manang pahompu di tongatonga ni bangsona, tung na so adong pasipasina tinggal di ingananna.

²⁰ Tung tarsonggot situtu do halak di pudina mida ari hinamagona, jala panonditnonditon disi halak na robi.

²¹ Sai songon i do parsorion ni isi ni jabu ni halak pargeduk, jala songon i do inganan ni halak angka na so tumanda Debata.

19 ¹ (I.) Dung i ninna si Job ma mangalusi:
² Sadia leleng on sai arsa hanmuna rohangku? Jala pasipalsipalonmuna ahu marhite sian hatahata?

³ Nunga pola sampulu hali hamu manginsahi ahu, ndang maila hamu mangalojai ahu.

⁴ Tung sura pe naung tutu ahu sala, ahu do mandapot salangku.

⁵ Tongon tahe, sai naeng manenganenga hamu dompak ahu, lam mangonai hata muse hamu dompak ahu patamba haurahonku.

⁶ (II.) Antong boto hamu ma, nunga dipajepol Debata ahu, jala nunga lingkup tu ahu rambangna.

⁷ Ida ma, huanggukkon pe pangarupaon! Hape ndang adong na mangalusi; sai marhuraja ahu mangido pangurupion, hape ndang adong na mamintori ahu.

⁸Nunga dirungga Ibana dalanku, gabe ndang tarbolus ahu; jala nunga gabe haholomon angka dalanku dibahen Ibana.

⁹Nunga diosari Ibana hamuliaonku sian ahu, jala nunga dirampas tumpalhu sian ulungku.

¹⁰Nunga tung diparumpak Ibana ahu tuk humaliang asa tung mate ahu; jala nunga diborgati arop ni rohangku songon hau.

¹¹Nunga marsigorgor rimasna dompak ahu, jala hira musuna ahu dietongi.

¹²Nunga isi angka parduan ni paranganna ro mangarampok ahu; nunga dipalendes nasida dalanna laho mangalo ahu, jala ditungkum undungku tuk humaliang.

¹³Nunga dipaholang Ibana angka hahaanggingku sian ahu, jala banding tu ahu angka donganku magodang.

¹⁴Nunga ditadingkon angka tondongku ahu, jala nunga dihalupahon angka alealengku ahu.

¹⁵Halak isi ni bagashu pe ro di angka naposongku mangetongi ahu doshon halak ruar, hira halak na pulik luat do ahu di rohanasida.

¹⁶Ia hujou naposongku, gabe ndang mangalusi ibana, maradu huparrajarajai ibana dohot pamanganku.

¹⁷Nunga biasan jolmangku manganggo hosangku, nang angka pahompungku manganggo mongkushu.

¹⁸Gari angka dakdanak na tuit mangaleai ahu; molo huondam hehe, gabe mambebeati nasida dompak ahu.

¹⁹Marbiasbias do mida ahu saluhut aleale hasudungan ni rohangku na sai laon, jala halak na huhaholongi nunga marbalik mangalo ahu.

²⁰Tandos tu holiholingku na ma hulingkulingku dohot sibukku, holan sisik ni suratanku na ma na so hona.

²¹(III.) Sai asi ma rohamu mida ahu, asi ma tutu rohamu mida ahu, hamu ale angka alealengku, ai nunga mangonai tangan ni Jahowa tu ahu.

²²Boasa tung leleanmuna ahu songon pangalele ni Debata? Ndang dope mahap rohamu pasipalsipal dagingku?

²³Aut ni tarsurat nian angka hatangku, aut taruhir nian di bagasan sada pustaha!

²⁴Aut dilontik nian dohot panurat bosi dohot simbora tu dolok batu, bahen parningotan salelenglelengna.

²⁵Ai tangkas do huboto mangolu do Sipangolu ahu, jala Ibana parpudi jongjong di atas orbuk.

²⁶Jala ia dung malangke hulingkulingkon, jala malua ahu sian sibukkon, idaonku ma Debata.

²⁷Ahu sandiri ma tutu marnida Ibana gabe hatuaonku, apala matangkon marnida Ibana, jala ndada anggo sileban; pola tung

suda piangku dibahen sihol ni rohangku di bagasan.

²⁸Molo tung didok rohamuna dope: Beha bahenonta mangalele ibana? Angkup ni: Parbonsiran ni hata i dapot do di bagasan ahu.

²⁹Sai mabiar ma hamu mida podang partubolon, ai rimas i do podang mangonai tu angka hajahaton, asa tung diboto hamu adong do uhum partubolon sogot.

20¹Dung i ninna si Sopar na sian Naema ma mangalusi:

²Sai masirapusan angka pingkiranku mangalusi hatahatam, pola gunsang rohangku di bagasan ala ni.

³Ingkon pabegebegeonku hape pangajaran bahen haurahonku, alai tondi i manariashon paralusan tu ahu di bagasan rohangku.

⁴Ndang diboto ho hapengani hata on sian na robi sahali dope, olat ni dung adong dipaojakjolma di atas tano on.

⁵Satongkin sambing do suraksurak ni halak parjahat, jala las ni roha ni halak pangarupa sangkidop mata do lelengna.

⁶Nang pe manaek sahat ro di langit hajungkatonna pola mandolos uluna tu ombun di rohana.

⁷Ingkon buriapus ibana songon ginagatna sandiri ro di salelenglelengna, pola dohonon ni halak na marnida ibana na jolo: Didia ibana ulaning?

⁸Songon doras ni nipi ibana habang, ndang be jumpang halak ibana, hiap do ibana songon alatan borngin.

⁹Mata naung marnida ibana, ndang be idaonna ibana, jala ingananna hian pe, ndang umbolanna be.

¹⁰Angka anakna pe ingkon manehenehe tu halak angka naung pinapogosna, jala tanganna sandiri paulakkon arta na nidobona.

¹¹Manggagat tu holiholina do dosa angka na niulana di sibunian, peak di bagasan orbuk do i rap dohot ibana.

¹²Nang pe tonggi hajahaton i didai pamanganna, jala diongom ibana do i di toru ni dilana.

¹³Lomo rohana paianianhon, ndang olo mambolongkon, tung dipaongomongom do i di bagasan pamanganna.

¹⁴Hape muba do roti pinanganna gabe rasundung ro di butuhana, gabe bisa ni ulok dari di bagasan ibana.

¹⁵Sinamot naung binondutannai, ingkon utahononna muse, Debata sandiri tahe paruarhon i sian butuhana.

¹⁶Nunga disopsop ibana bisa ni ulok dari, gabe dila ni ulok dari mambunu ibana.

¹⁷Tung na so jadi be idaonna mabaor angka sunge sian situak ni loba dohot miak susu.

¹⁸Ingkon paulahonna naung nilaumna, ndang jadi parsaulihononna; ndang tagamon las rohana mida hamoraon na nilahanganna i.

¹⁹(II.) Ala naung dirupa ibana halak na pogos, jala dipupusi, jala nunga dilaum bagas, angka na so pinaulina.

²⁰Ai ndang olo sombu hisap ni butuhana, manang aha na pinangido ni hisapna i, ndang tagamon malua.

²¹Nanggo sada ndang malua dibahen papanganna, dibahen i ndang tagamon ganda sinamotna.

²²Atik pe na mora jong hian ibana, gabe marpogospogos do, tung marsitampak do angka jea i mangonai tu ibana.

²³Jadi asa tung gok butuhana, tongoson ni Debata ma parpiarpiar ni rimasna tu ibana, jala diudanhon do i tu ibana bahen sipanganonna.

²⁴Ia sanga pe ibana malua moradophon sinjata bosi, garsang ma ibana bahenon ni sior haksa.

²⁵Ia dienet sumbia i, jadi ruar do nian sian dagingna, songon i nang podang sumillamsillam sian poguna, alai songgop do tu ibana songgotsonggot hamatean.

²⁶Nasa haholomon marsibuni di bagasan sinamotna, suda do i panganon ni api na so niombus nijolma, ia adong pe teba di bagasan undungundungna, ingkon mago marambolongan do i.

²⁷Langit i huhut papatarhon hajahatonna, jala ia tano on hehe mangalo ibana.

²⁸Ingkon tarboan tu habuangan do sinamot na di bagasan jabuna, jala maup di ari pangarimasanna.

²⁹I ma jambar na pinatongon ni Debata tujolma parjahat, jala teanteanan na pinatontu ni Debata tu ibana.

21 ¹(I.) Dung i ninna si Job ma mangalusi:
²Sai tangihon hamu ma panarisonku, i ma nian singkat ni pangapulonmuna i.

³Hasiati hamu ahu, asa hudok hatangkon, ia dung tolhas hudok, tole pe hamu manginsahi.

⁴Tung tu jolma ma ahu marpangalualuan, leak ma marsak tondingku tung sura.

⁵Dompakkon hamu ma ahu, asa tarhalomong hamu, jala mangampehon tangan tu pamangan.

⁶Ai molo sapala marningot ahu disi, angka hitir do ahu jala manindang imbulu ni dagingku.

⁷(II.) Boasa tung laos mangolu halak parjahat i, pola sanga sarimatua, jala lam tamba sinamotna?

⁸Pinomparnasida marsonangsonang do di jolonasida, jala simbur magodang angka pahompuna dipaidaida matana.

⁹Bagasnasida pe marhasonangan do ndang dung marhabiaran, jala ndang dung mangonai batahi ni Debata tu nasida.

¹⁰Marbaringin lombuna jala ndang sala,
rodot do lombuna maranak jala ndang dung
habangan.

¹¹Disuru nasida anakkonna tu balian songon
sada pungan birubiru, jala panihalnihalon
angka anakna.

¹²Marioho suaranasida mardongan gondang
dohot hasapi, jala marlas ni roha nasida
umbege suara ni tulila.

¹³Dipasudasuda nasida ariarina
marhariburon, hape tompu nasida
lonong tu banua toru so pangkirimanna.

¹⁴Lam didok muse dope tu Debata: Paholang
ma sian hami, ai ndang lomo rohanami
umboto angka dalanmu.

¹⁵Pinabotoboto Ibana Nasunhinagogo i,
umbahen tung oloannami Ibana? Jala tung
aha ma gunana hami martangiang tu Ibana?

¹⁶Ida ma, ndada guru di nasida hadoharonna
i. Sai mandao ma sian ahu pingkiran ni halak
parjahat!

¹⁷Anggo piga hali do mintop palito ni halak
parjahat jala songgop hamagoan tu nasida?
Piga hali diturpukkon Ibana hinamago tu
nasida di bagasan rimasna?

¹⁸Jala piga hali nasida tudoshon durame
moradophon alogo, jala tudoshon hurangkam
pinurpurhon ni habahaba?

¹⁹Tu pinomparna disimpan Debata
torutoruna; tu ibana sandiri nian diluluhon
Ibana, asa mananda nian rohana disi!

²⁰Matana sandiri nian sanga marnida hamagoanna; ibana sandiri nian minum sian rimas ni Nasunhinagogo.

²¹Ai ndang disarihon rohana pinomparna, dung mate ibana, anggo dung gok bilangan ni bulan angka naung binuhul hian tu ibana.

²²Tungjolma ma mangajarhon parbinotoan tu Debata, Ibana balik manguhumi angka isi ni banua ginjang.

²³Sadaan mate apala di haroro ni gogona, uju di sun ni hadoharonna jala marhasonangan situtu dope ibana.

²⁴Uju gok horbo siporoan barana, jala gok utohutok dope holiholina.

²⁵Jala sadaan mate margondok ni roha situtu, jala ndang dung didai hasonangan.

²⁶Hape rap nasida modom di bagasan orbuk jala marsapu gulokgulok nasida duansa.

²⁷(III.) Ida hamu ma, tangkas do hutanda pingkiranmuna i dohot getegete ni rohamuna mangarupa ahu.

²⁸Ai didok hamu do: Didia do bagas ni halak sibahen gogo, jala didia do undungundung inganan ni halak parjahat?

²⁹Beha, ndang dung disungkun hamu halak pardalan pansar, jala ndang mananda hamu di partinandaannasida on?

³⁰Ai di ari hamagoan ndang marmara anggo halak parjahat, jala di ari gombunggombang ni tahi diiringiring halak do nasida.

³¹ Tung ise ma na hum patumpolhon tu ibana harohaonna adop bohi be, jala tung ise ma na hum mamaloshon tu ibana hombar tu na binahenna?

³² Lam dipataru halak dope ibana tu tanoman pasangaphonsa, jala marjaga dope di atas hinamborna.

³³ Lambok marpeahan di atasna angka galogat ni rura i, jala luhutjolma naeng maniru pambahenna i, jala ndang habilangan toropna angka na mambahen songon i jumolo sian ibana.

³⁴ Dibahen i boasa sai datdatanmuna mangapuli ahu so marguna; pangarimpunan ni sude alusmuna i, holan dosa do.

22 ¹ (I.) Dung i ninna si Elipas sian Teman ma mangalusi:

² Tung tarbahen baoa ma manumpak Debata? Ndada manumpak tu dirina sambing do halak na marroha i.

³ Tung adong ma tagamon gunana di Debata Nasunhinagogo, molo dipintori ho dirim? Manang tung adong ma untungna sian i molo dipadaulat ho pangalahom?

⁴ Tung tagamon ma pinsangonna ho anggo ala ni hadaulatonmu, laos Ibana mamboan ho tu paruhuman?

⁵ Nda ala ni godang ni hajahatonmu do i dohot ala ni dosam angka na so marpansadian?

⁶Ai nunga dibuat ho singkoram sian donganmu soada alana, jala disoro ho do ulos ni halak na marsangkot bulung hian.

⁷Ndang dilehon ho aek inumon ni halak na mandate, jala dihomolhomol ho indahan paidaida halak na rapar.

⁸Jala halak sigostang botohon nampuna tano i, jala na sangap maringan disi ditumpak ho.

⁹Rumar boti angka na mabalu dipalaho ho, jala botohon ni halak na tading di lampin diropuhi ho do.

¹⁰Alani umbahen ditaon angka jorgong tuk humaliang ho, jala ro songgotsonggot tu ho so pangirimanmu.

¹¹Manang tung so tama hian ma holom parnidaanmu, jala so hungkupan ni aek na sumar i ho?

¹²(II.) Nda maringan do Debata di langit apala parginjang sahali? Jala tailihon ma angka bintang, timbona i tu ginjang!

¹³Hape dohononmu dope: Aha ma dipabotoboto Debata? Tung tagamon ma manguhum Ibana sian pudi ni haholomon?

¹⁴Angka ombun do partabunianna, umbahen so marnida Ibana, jala diliati Ibana do langit ni langitan!

¹⁵Naeng do huroha jujuronmu dalan ni halak sian na robi, dalan na nidalanan ni halak parjahat!

¹⁶Angka na redep so panagaman ni rohana, aek na sumar i mangumbang ojahannasida sandiri.

¹⁷Angka na mandok tu Debata: Paholang ma sian hami! Tung aha ma bahenon ni Nasunhinagogo i tu nasida!

¹⁸Hape nian, nunga Ibana manggohi bagasnasida dohot denggan basa. Sai mandao ma sian ahu pingkiran ni halak parjahat!

¹⁹Idaon ni halak partigor ma i, huhut marlas ni roha, jala halak na so marpipot mangarehe nasida songon on:

²⁰Nunga ripur hapengani angka alonta, jala nunga suda hamuliaonna dipangan api!

²¹(III.) Ua mardenggan ma ho dohot Ibana, asa mardame ho, asa marhite sian i ro hatuaon tu ho.

²²Sai jalo ma pangajaran sian pamanganna, jala parateatehon ma angka hatana!

²³Molo mulak roham tu Ibana Nasunhinagogo i, mangulahi mardohar do ho bahenonna, molo dipaholang ho hageduhon sian undungundungmu.

²⁴Reongkon ma sere i tu orbuk, jala sere sian Opir tu tongatonga ni batu rese di sunge.

²⁵Jadi Ibana Nasunhinagogo i ma gabe seremi, dohot perak margugungugun di ho.

²⁶Jadi disi ma ho marlas ni roha mida Nasunhinagogo i, jala padirgahonmu bohim tu Debata.

²⁷ Martangiang ho tu Ibana, jadi tangihononna ma ho, jala gararonmu angka bagabagam.

²⁸ Molo disangkap roham manang aha, sai na saut do i tumpahanna, jala marhatiuron angka dalanmu sondanganna.

²⁹ Molo dipajepol halak ho, jadi dohononmu ma: Hatimbulon do i! Jala manang ise na serep marpanaili, martua do bahenonna.

³⁰ Paluaonna ma sian salana nang halak na so lias hian, paluaonna ma tutu marhite sian habontoron ni tanganmu.

23 ¹ (I.) Dung i ninna si Job ma mangalusi: ² Nang sadarion sugal dope alualungku; ndang tarantan ahu tanganku dibahen orongku.

³ Aut ni huboto nian manang didia jumpang ahu Ibana, aut tarbahen ahu nian sahat tu habangsana!

⁴ Naeng nian pajojoronku panariasanku tu jolona, jala gok paraluson pamanganku bahenonku.

⁵ Botoonku nian hata sialushononna tu ahu, jala antusanku manang aha sidohononna tu ahu.

⁶ Tung tagamon ma mangasahon hinagodang ni gogona Ibana laho manorui ahu? Nandang tahe, sai na tiroanna do ahu.

⁷ Tanda ma disi antong halak partigor masialusan dohot Ibana, gabe malua ahu sian Siuhum ahu ro di salelenglelengna.

⁸(II.) Alai ida ma, tung sura laho ahu dompak habinsaran, ndang disi Ibana, mulak ahu muse tu hasundutan, ndang dapot ahu Ibana disi.

⁹Molo mangula Ibana tungkan utara, ndang dapot tataponku Ibana, molo martabuni Ibana tungkan dangsina, gabe ndang idaonku.

¹⁰Alai anggo ibana, diboto do dalanku, tung sura diuji Ibana ahu, songon sere na pita ma ahu ruar.

¹¹Sai marsihohot do pathu manjujur bogasna, sai huihut do dalanna, ndang dung manimbil ahu.

¹²Ndang dung hulaosi tona na ruar sian pamanganna, gumodang do huradoti hata angka na ruar sian pamanganna, asa hangoluanku sandiri.

¹³Alai tahe, parhata sada do anggo Ibana, tung ise ma na tuk manogang Ibana? Jala guru lomo ni rohana do dipasaut.

¹⁴Sai na paujungonna do sangkap ni rohana hian taringot tu ahu, jala tung na marragam do angka sisongon i di bagasan rohana.

¹⁵I ma alana umbahen tung tarsonggot ahu moradophon bohina; molo sapala hupinghiri, angka hitir do ahu mida Ibana.

¹⁶Nunga Debata mambiarbiari rohangku, jala Nasunhinagogo i mambukbahi ahu.

¹⁷Ai ndang nian mago rohangku anggo mida holom ni parnidaanku, manang mida ahu

sandiri pe na hinungkupan ni haholomon nuaeng.

24¹ (I.) Boasa ulaning so dibuhul Ibana Nasunhinagogo i angka tingki partubolon, asa diida angka na tumanda Ibana nian angka ari pamalosanna.

²Sai dipaorot halak parjahat parbalohan, jala dilaum angka parduan birubiru, laos diparmahan do.

³Diolat nasida halode ni angka na tading di lampin, dibuat ia lembu ni na mabalu bahen singkoram.

⁴Dionjar ia halak na pogos sian dalan; ingkon mamolngit be isi ni tano angka na dangol i dibahen nasida.

⁵Ida ma, tudoshon halode harangan di halongonan ruar nasida tumopot ulaonna; ingkon sogot nasida hehe magalului sisoroonna; ingkon paraotaotan na ma mangalehon sipanganon tu nasida dohot tu ianakhonna.

⁶Ingkon di ladang nasida mansalong gagatonna, jala ingkon putihanna parbue na tading di bagasan porlak anggur ni parjahat.

⁷Marsaemara nasida modom bornginna i so marulos, jala ndang marbulusan di panangkihik ni ari.

⁸Marudan marari nasida di atas ni angka dolok, ala soada panisioanna gabe dolok batu dihaolhaol.

⁹Tung dirapus parjahat i do posoposo sian bagot ni inana, jala disoro dope na alit di halak na pogos bahen gade.

¹⁰Marsangkot bulung halak na pogos dipalaholaho nasida, so marbaju dibahen, jala halak na manarui tibalanna rapar do dipalaho.

¹¹Ingkon di holangkolang ni parikna nasida mamoro miak, ingkon mauas dipasombu nasida halak na mardege pangilangan anggurna.

¹²Ingkon pola morongorong tarbege sian huta i angka na laho mate, jala maungaung suara ni halak na mabugang, alai ndang ditudu Debata na so uhum binahenna i.

¹³Di tongatonga ni halak angka na mangalo hatiuron do nasida, ndang olo nasida mananda angka dalanna, jala ndang dijujur nasida angka bogasna.

¹⁴Andos torang dope ari nunga hehe sibunujolma laho mambunu halak na dangol dohot na pogos, jala bornginna i madoado ibana songon panangko.

¹⁵Mata ni pangalangkup paimahon rambon ni ari, ai ninna rohana do: Nandang adong na marnida ahu nanggo sahalak, jala patinda rupa ibana.

¹⁶Ia dung holom mangarut nasida tu angka jabu, mangkurung do nasida ia arian, ndang dihalomohon nasida hatiuron.

¹⁷Ai tiur ni ari manogotna i tudoshon linggoman ni hamatean di nasida luhutna,

ai somal do nasida mangae songgotsonggot mida hamatean.

¹⁸(II.) Doras do parjahat i diumbang aek, hona bura partalianna di tano on, ndang be diumboli dalan laho tu angka porlak anggurna.

¹⁹Songon panintak ni logo ni ari marngiarngiar di aek udan, songon i do panompu ni parbeguan di halak na mardosa.

²⁰Gari bortian ni inana mangkalupahon ibana, jala suda ibana dijepjep angka gulok, ndang be diingot halak ibana, jala marobur do halak parjahat i songon hau na tinaba.

²¹Dipupusi halak parjahat do parompuan na hol, na so dung marianakkon, jala ndang maruhum na denggan ibana tu parompuan na mabalu.

²²Alai tahe sai diudut Debata do ngolu ni halak pangarupa marhite sian gogona; hehe do nian ibana muse naung tarsosak rohana di ngoluna.

²³Sanga marhasonangan ibana dibahen Debata, pola dipangatauanhon, alai sai diranapi matana do angka dalannasida i.

²⁴Sanga dope nasida timbul, hape tongkin nari nunga lonong; mate do nasida songon halak na asing, jala digotil do nasida songon eme di hatotorasna.

²⁵Alai tung sura so songon i, tung ise ma na tuk manudu gabushu, jala mansoadahon panarisonku?

25 ¹(I.) Dung i ninna si Bildad na sian
Sua ma mangalusi:

²Saguru di Debata do panggomgomon dohot hasongkalon, Ibana mambahen hadameon di bagasan ingananna angka na timbo i.

³Tung habilangan ma torop ni angka paranganna? Jala tung ise ma na so hona sondangna?

⁴Tung beha ma pambahenna tigor jolma na gale i anggo moradophon Debata? Jala beha ma pambahenna bontor tubu ni parompuan?

⁵Ida ma, gari bulan ndang marhatiuron, angka bintang pe ndang ias anggo moradophon ibana.

⁶Lam jolma na gale, na songon gulok i ma; jala anak ni jolma, na songon gea i!

26 ¹(I.) Dung i ninna si Job ma mangalusi:

²Jagar ma ho manolongi halak na so margogo, jala ditumpak ho botohon na so marnangon!

³Jagar ma ho manuturi halak na so marbisuk, jala nunga tung godang pingkiran dipabotohon ho!

⁴Mangonai tu ise ulaning hatahata angka naung pinaboam, jala tondi ni ise ulaning naung ruar sian ho?

⁵Gari begu ni halak na mate angka hitir do nang halak isi ni lung.

⁶Tedek do parbeguan i di jolona, jala ndang martutup banua toru.

⁷ Ibana pahembang langit parutara i di atas ni lung, Ibana manggantungkan tano on tu atas ni na soada.

⁸ Ibana manimpus aek di bagasan ombunna, jala ndang olo mapuntas angka ombun i dibahen.

⁹ Ibana manghungkupi bohi ni habangsana, jala dipaherbang ombunna bahen rimberimbena.

¹⁰ Ibana umpajok parbalohan ni angka aek humaliang, sahat ro di partomuan ni hatiuron dohot haholomon.

¹¹ Pola tung humuturhutor angka tiang ni langit jala tarsonggot moradophon pangasupina.

¹² Pola gunsang laut i binahen ni hagogoonna, jala marhite sian hapistaranna dipatunduk Ibana Rahab.

¹³ Marhite sian hosana minar angka langit i dibahen, jala tanganna manjadihon ulok na marlegotlegot.

¹⁴ Ida ma, i ma angka ujung ni dalanna dope, asal pistik hata husiphusip na itabege taringot tusi! Tung ise ma na manahan anggo umbege suara ronggur ni hagogoonna?

27 ¹ (I.) Dung i didatdati si Job ma angka panariasonna, ninna ma:

² Songon sintongna mangolu Debata naung padaohon sian ahu hatigoranku, mangolu dohot Nasunhinagogo i naung mambahen margudompong rohangku.

³Ai saleleng simpan dope hosangku di bagasan ahu, jala hosa na sian Debata di bagasan igungku.

⁴Na so tupa bibir ni pamanganku mangkatahon hageduhon manang dilangku paboahon sipaotooto.

⁵Dao ma sian ahu tung tolopanku hatamuna; rasirasa tos hosangku, ndang tagamon sumurut sian ahu habontoronku.

⁶Sai marsitiopan do ahu di hatigoranku, jala ndang paluaonku; ndang pola marlobok taroktokku taringot tu ariaringku nanggo sada.

⁷Ingkon musungku nian balik tartudu songon halak parjahat, jala songon halak pargeduk ia alongku.

⁸(II.) Ai tung aha ma sihirimon ni halak parjahat, nang pe dipagukguk artana, molo ditait Debata hosana?

⁹Tung tagamon tangihonon ni Debata ma angguhanggukna, molo ro hagogotan tu ibana?

¹⁰Tung tarbahensa ma marlas ni roha mida Nasunhinagogo i, manang martangiang tongtong tu Debata?

¹¹Ahu ma nuaeng mangajari hamu taringot tu pambahenan ni Debata, ndang porsoonku tu hamu sangkap ni Nasunhinagogo i.

¹²Hamu sandiri pe, nunga nian diida hamu luhutna i, boasa sai datdatanmuna mamingkiri na so marguna?

¹³I ma jambar na pinatongon ni Debata tu jolma parjahat, jala teanteanan na pinatontu ni Nasunhinagogo i tu halak pangarupa.

¹⁴Molo tamba torop ni angka anakna, sude do i panganon ni podang, jala pahompuna hurangan sipanganon.

¹⁵Ia pasipasina na teba i, i ma bonduton ni begu antuk, jala ndang mananangisi parompuan angka na mangkabaluhon ibana.

¹⁶Nang pe dipagukguk ibana perak songon orbuk godangna, jala diparade pangkeanna songon tano liat godangna.

¹⁷Na ripe paulina do di ibana, alai halak partigor do maruloshon, jala halak na so marpipot marbagi perakna.

¹⁸Dipauli pe bagasna songon ngitngit, jala songon pondokpondok na pinauli ni halak parladang.

¹⁹Mamora ibana laho modom, hape ndang be ulahanna; molo dipabidok matana, hape ndang disi be ibana.

²⁰Songgotsonggot ni hamatean manahopi ibana songon aek magodang, jala luahonon ni habahaba poting haliung ibana bornginna i.

²¹Boanon ni habahaba sian purba ibana, jala purpurhononna ibana dao sian ingananna.

²²Debata manginonahon luhutna i tu ibana, jala ndang moralangalang, ingkon maporus ibana moradophon tanganna.

²³Jadi martilla ni roha ma halak mida ibana, pola martopaktopak tangan jala diasingkon ibana sian ingananna.

28¹ (I.) Adong do panombangan di perak jala pangaragaan anggo di sere.

²Bosi pe sian tano do binuat, jala dilala ia batu gabe tombaga.

³Gari haholomoni marujung do dibahenjolma i, sahat ro di sude tampahanna disulingkit rohana do, nang batu haholomon dohot linggoman ni hamatean.

⁴Marbuhalbuhal disi sada sunge sian tano na so dung niumbolan ni pat nijolma, tartantan nasida tusi, gaunggaung holang sianjolma.

⁵Sada do tano i, sian sisikna do ruar sipanganon, hape anggo partorunai marbalik do dibahen api.

⁶Jumpang do disi batu na marisi mata intan Sapi, huhut marisi sere marhimpalhimpal.

⁷Ndang dipabotoboto pidong panoro dalam laho tusi, jala ndang dapot mata ni lali puiandaonna.

⁸Ndang dung diumboli pat ni binatang ingananna, jala ndang dung dibolus singa.

⁹Mangonai tanganna tu dolok batu, jala marbalik ojanan ni angka dolok dibahen.

¹⁰Tolpus do dituhil angka dolok batu bahen dalam ni aek, luhut arta na arga dapot diidamatana do.

¹¹ Ditambak do angka sunge, asa unang mimir nanggo santetek, jala na buni sahali diparuar tu hatiuron.

¹²(II.) Alai anggo hapistaran i, sian dia ulaning jumpang? Jala didia do ulaning inganan pangalapan parbinotoan?

¹³Ndang dibotojolma na gale i asamna, jala ndang tagamon jumpang di bagasan luat ni halak na mangolu on.

¹⁴Lung i mandok: Ndang di bagasan ahu ibana; jala laut i mandok: Ndang di lambungku ibana.

¹⁵Ndang dapot tuhoron ibana, nang marhite sian sere na pita, jala asam na i ndang dapot timbangon marhite sian perak.

¹⁶Ndang tartimbang ibana dohot sere sian Opir, manang mutiha na arga, manang mata intan pe.

¹⁷Ndang tartimbang ibana dohot sere manang simata landus pe, jala ndang tartungkar nang marhitehite ulaula sian sere.

¹⁸Ndang pola etongon humala dohot mata intan na songkal martimbangkon ibana; molo maruli hapistaran manang ise ummarga do i sian mutiha.

¹⁹Ndang tartimbang tusi nang mata intan Topas sian Kus, jala sere na pita pe ndang tartimbang tusi.

²⁰(III.) Antong marharoroan sian dia ulaning hapistaran i? Jala didia ulaning jumpang inganan ni parbinotoan?

²¹ Ai holip do i sian mata ni saluhut na mangolu, jala buni do i nang moradophon pidong angka na martongatonga langit.

²² Banua toru dohot hamatean mandok: Nunga nian dibege pinggolnami lingona.

²³ Debata sambing tahe mangantusi dalanna, jala Ibana umboto ingananna.

²⁴ Ai Ibana manatap sahat ro di angka ujung ni tano on, Ibana marnida saluhut na di toru ni langit.

²⁵ Uju na binahenna timbangan ni alogo, jala dipaojak parbalohan ni angka aek.

²⁶ Uju na binahenna patik di udan, dohot dalan di porhas.

²⁷ Uju i nunga Ibana martiruan tusi, jala dipapatar, jala dipadiri ojahanna huhut disulingkit.

²⁸ Alai anggo tu jolma i songon on do hatana: Ida ma, biar mida Jahowa, i do hapistaran, jala sumurut sian hajahaton, i do parbinotoan.

29¹ (I.) Dung i didatdati si Job muse mandok hatana songon on:

² Ise ulaning pasuang tu ahu songon di angka bulan na jolo, songon di angka ari, uju Debata mangaramoti ahu!

³ Uju na marsinondang dope palitona di atas ulungku, uju na nidonganana ni hatiuronna ahu manondang haholomon.

⁴ Songon uju di angka ari haposoonku,
uju paralealeon ni Debata dope di
undungundungku.

⁵ Uju didongani Nasunhinagogo i dope ahu,
jala angka anakku humaliang ahu.

⁶ Uju huburi pathu di bagasan miak susu,
jala dolok batu mambaorhon di ahu angka
sunge miak.

⁷ Uju na ruar ahu tu bahal ni huta i, jala
hupajongjong hundulanku tu partungkoan.

⁸ Jadi disi diida angka dolidoli ahu, pintor
martabuni nasida, angka na ubanon pe hehe
do laos jongjong.

⁹ Pola sulon angka raja mandok hatana, jala
diampehon tanganna tu pamanganna.

¹⁰ Pola sundat angka na sangap mandok
suarana, jala dilana lohok di langitlangit ni
pamanganna.

¹¹ Ai pinggol na umbege hatangku
marhatuahon ahu, jala mata na marnida ahu
manolopi hatangku.

¹² (II.) Ai hupalua do halak na dangol na
mangalualu dohot na tading di lampin, nang
halak na so adong pangalualuanna.

¹³ Jadi pasupasu ni halak na siol mago hian
songgop tu ahu, jala roha ni parompuan na
mabalu marolopolop hubahen.

¹⁴ Nunga huparuloshon habonaron, gabe
pangkean ni diringku do i, tudoshon ulos
dohot bulangbulang di ahu uhum na hudabui.

¹⁵Manjadi mata do ahu di halak na mapitung, jala pat di halak na pangpang.

¹⁶Ama do ahu di halak na pogos, jala parkaro ni halak na so hutanda pe husulingkit do.

¹⁷Huropangi do ipon ni halak pangarupa, jala hurampas do sian holangkolang ni iponna ugasan naung nilaumna.

¹⁸(III.) Jadi ninna rohangku ma: Rap dohot asarhu pe ahu mate, jala patoroponku ariaringku songon horsik toropna.

¹⁹Manjarar tu lambung aek do ia urathu, jala nambur i marborngin di atas ni angka rantingku.

²⁰Sai rata do di ahu hamuliaonku jala ganda do gogo ni siorhu di bagasan tanganku.

²¹Sai ditangihon halak do hatangku, jala hohom be do paimaimahon panuturionku.

²²Ia dung hudok hatangku, ndang adong be na hum mangkuling, jala lambok manetehi tu nasida pangkataionku.

²³Sai maimaima nasida di ahu songon di udan, jala dipangangang be pamanganna songon saba langit mangkalungunhon udan.

²⁴Basar ahu tu nasida, jumpa bohaboahaon rohanasida, jala sihar ni panailingku ndang tarpasurbot nasida.

²⁵Lomo do rohangku sauduran dohot nasida, jala hundul di julu on ahu, jala marhabangsa ahu di luhutannasida songon raja, songon halak na mangapuli angka na marsak roha.

30¹ (I.) Hape anggo nuaeng halak na umposo sian ahu marengkelihon ahu, ianggo amanasida nian na jolo maleahu huetong bahen dongan ni biang angka na mangadu birubirungku.

²Aha ma gunana di ahu nang gogo di tangannasida i, ai ndang sanga nasida sarimatua.

³Nasida angka na marniang binahen ni hahurangan dohot haraparon, pola laho manggagat tu tano bangkalbangkal, tu tano halongonan dohot na niulang sian na robi dope.

⁴Nasida angka na mansalong siarum horsik di holangkolang ni ramba, jala mangalului siarumpepe bahen panganonnasida.

⁵Tarliplip do nasida sian tongatonga nijolma, jala disurakkon do nasida songon halak panangko.

⁶Ingkon maringan nasida di bagasan lombang sapsap bire, di bagasan liang ni tano i dohot di bagasan jaringjing ni dolok batu.

⁷Disi do nasida morongorong di holangkolang ni romporompo, jala manggompang nasida di toru ni tadatada.

⁸Angka anak ni halak na oto do nasida, huhut angka anak ni lapaslapas, pola batahi dibahen pabali nasida sian tano i.

⁹Hape anggo nuaeng gabe ende aling ahu di nasida, jala sirehereheonna.

¹⁰Marbiasbias nasida mida ahu, pola dipaholang dirina sian ahu, jala ndang moralangalang nasida mamursihi bohingku.

¹¹Ala naung dipahondur Ibana tali ni siorhu, jala tarjepol ahu dibahen, gabe dibuang nasida kokang na di jolongku.

¹²Di siamunhu hehe do angka halak gambalgambal jala dionjar pathu, jala dibungbungi dalam hamagoan dompak ahu.

¹³Dilohai nasida do dalanku laho pagandahon hamagoanku, ndang pola adong na mangurupi nasida.

¹⁴Hira sian bungbung na ruak nasida ro manahopi ahu, pola mardorop pangarongomna.

¹⁵Angka hinamago manahopi ahu humaliang, nunga dipurpurhon hasonanganku hira marhite sian habahaba, jala nunga salpu mamolus hadoharonku songon ombun.

¹⁶(II.) Ala ni malampot do ateatengku di bagasan huhilala, nunga tung ditangkap angka ari pardangolanku ahu.

¹⁷Bornginna i ditura do holiholingku, hira dihishis sibukku huhilala, jala ndang mansohot panggirikna.

¹⁸Binahen ni panggagat ni sahithu mubauba do parsisikku hira pangkeanhu, jala disongkik ringkorang i ahu songon parrungkungan ni bajubaju.

¹⁹Nunga disampathon Ibana ahu tu bagasan gambo, gabe samak ahu tu orbuk dohot tu sirabun idaon.

²⁰Manganguhi ahu nian tu Ho, hape ndang dialusi Ho ahu, tongtong ahu jongjong di jolomi, jala dipanotnoti Ho ahu.

²¹Nunga tung marbalik Ho gabe musu na songe di ahu, mangasahon gogo ni tanganmu do Ho mangalo ahu.

²²Nunga tung dihindat Ho ahu laho papurpurhon tu alogo, tung didugudugu Ho do hadirionku.

²³Ai nunga huboto hian naeng boanonmu ahu tu hamatean, tu bagas partumpuan ni nasa na mangolu.

²⁴Alai tahe, laho ompasjolma i nda diojakkon dope tanganna, manang ia ro hinamagona nda manganguhi do?

²⁵Nda tangis do ahu mida halak na marhinamagoi? Nda maras do rohangku mida halak na pogos?

²⁶Ai sai maimaima do ahu di na denggan, hape jea do na ro; mangkirim ahu di hatiuron, hape haholomon do na ro.

²⁷Sai hira gara do butuhanku huhilala, ndang olo marpasadian, nunga tung dirampok angka ari hinamago ahu.

²⁸Pola marbirong dagingku ahu mardalani, alai ndada binahen ni parngiar ni mata ni ari; hehe do ahu humasungsang di bagasan luhutan ni halak, huhut manganguhi.

²⁹Nunga tung gabe dongan ni ulok naga ahu, gabe aleale ni pidong unto.

³⁰Marbirong do sisikku pola angka luak, jala mosok holiholingu dibahen mohopna di bagasan.

³¹Ala ni muba suara ni hasapingku gabe andung, jala suara ni tulilangu gabe suara partatangison.

31 ¹(I.) Nunga huhomat matangu, tung na so tupa mamereng tu boruboru na marbaju.

²Jadi ninna rohangku, aha ulaning tohaphu lehonon ni Debata sian ginjang, manang partalianku bahenon ni Nasunhinagogo sian banua ginjang?

³Tung so tama ma mangonai hamagoan tu halak pargeduk, manang hinamago tu halak siula hajahaton?

⁴Tung na so diida Debata ulaning angka dalanku, jala na so dibilangi ulaning sude langkalangkangu?

⁵Tung sura naung marpangansi pangalahongku, jala pathu manilu manahopi, sipaotooto.

⁶Ibana nian mandasing ahu di bagasan timbangan na sintong, asa Debata mananda habontoronku.

⁷Tung sura naung manimbil langkangu sian dalan hasintongan, jala dipaihut rohangku lomolomo ni matangu, jala lohот di tanganku haurahon:

⁸Ahu pe manabur, ingkon halak na asing manganhon, jala suansuananku, ingkon butbutonna do rap dohot uratna.

⁹Tung sura naung tarpaoto rohangku olo ahu elaelaon nijolma ni halak sileban, jala mangonggop ahu di lambung pintu ni alealengku:

¹⁰Jadi ingkon jolmangku manduda di halak na asing, jala halak na asing mangalangkup nasida.

¹¹Binoto ma i haurahon do i antong, jala hajahaton na patut uhumon ni panguhum.

¹²Ai api do i na manggagat sahat ro di banua toru, jala saluhut na huomo mosokkononna tama.

¹³Tung sura naung hupametmet uhum tu naposongku baosa manang boruboru, jumpa marsalisi nasida dohot ahu:

¹⁴Tung aha ma bahenonku tung sura hehe Debata, tung sura marlulu Ibana, aha ma tagamon alushu tu Ibana?

¹⁵Nda laos Sitompa ahu di bagasan butuha ni dainang, manjadihon nang ibana? Nda laos Sasadasa do manjadihon hami duansa di bagasan bortian?

¹⁶Tung sura naung hujua pangidoan ni halak na pogos, jala lotop hubahen mata ni parompuan na mabalu.

¹⁷Jala sasada ahu manganhon rotingku, so dohot dakdanak na tading di lampin manganhon sian i.

¹⁸Ai olat ni haposoonku magodang ibana rap dohot ahu, hira sisada ama, jala sian butuha ni dainang ahu mangiringiring na mabalu i.

¹⁹Tung sura naung huida halak mago marsangkot bulung, manang halak na pogos so marbulusan.

²⁰Tung sura so gontingna mamasumasu ahu ala so pinalas dagingna sian imput ni birubirungku.

²¹Tung sura naung mangonai tanganku tu dakdanak na tading di lampin, ala mangasahon panolongion ahu di partungkoan.

²²Ingkon tanggal abarangku sian sasapna, jala tanganku sirang sian ringringna!

²³Ai matua ahu, sai huhabiari do torutoru ni Debata, jala ndang manahan ahu moradophon hatongamonna.

²⁴(II.) Tung sura sere hubahen haposan ni rohangku, jala hudok tu sere palangki: Ho do arop ni rohangku!

²⁵Tung sura mangapian rohangku naeng marsinamot godang ahu, jala naeng jumpangan pangomoan godang tanganku.

²⁶Tung sura naung dung hutailihon mata ni ari jumpa marsinondang arian, manang bulan jumpa di rondangna situtu mardalan.

²⁷Manang tung dung tarpaoto rohangku di sibunian, tung olo ahu maniop tanganku manombahon tusi:

²⁸Binoto ma i hajahaton na tama uhumon ni Panguhum do nang i, ala mansoadahon Debata na di ginjang i do ahu disi.

²⁹Tung sura naung martilla ahu mida hinamago ni musungku, manang marolopolop ahu molo marjea ibana.

³⁰Alai tahe gari langitlangit ni pamanganku, ndang dung huloas mardosa, mangidohon mate hosana marhite sian bura.

³¹Balik dojolma isi ni undungundungku mandok: Didia do adongjolma na so dung bosur mangan lompan binahenmi!

³²Halak dagang pe, ndang dung hupasombu marmalam di alaman, sai talak do pintu ni jabungku didapot halak pardalandalan.

³³Tung sura naung huhungkupi pangalaosionku, mangihuthon pangalaho nijolma, manang hutabunihon hajahatonku, di bagasan andoranku.

³⁴Ala na mabiar ahu mida situasi na torop i, jala tahuton ahu mida haleaon ni halak marompuompu, umbahen mauhom ahu, jala ndang ruar sian jabungku.

³⁵(III.) Aut adong ma nian sahalak na olo pangalualuanku! Na ida ma, tanda tanganhon; sai na alusan ni Nasunhinagogo i do ahu! Aut di ahu nian surat pangaluan na sinurat ni alongku!

³⁶Tongon tahe pampehononku do i tu abaranku, jala talitalihononku do i songon bulangbulang.

³⁷Papataronku ma tu Ibana bilangan ni langkalangkangku, jala marpangalaho raja ahu mandapothon Ibana.

³⁸Tung sura maungaung tanongku dompak ahu, manang rap tumatangis angka baruranna.

³⁹Tung sura naung hupangan gogo na so magargar, manang naung dung hupangan mudar ni anak gajian.

⁴⁰Denggan ma tubu di ahu sihupi singkat ni eme, jala unak singkat ni jagung! - Marujung ma hata panarison ni si Job.

32¹ (I.) Dung i mansohot ma sitolu halak i masisualan dohot si Job, ala sai dipintori ibana dirina.

²Jadi marpiarpiar ma rimas ni si Elihu, anak ni si Barakel, marga Bus i, marompu tu si Ram; marsigorgor rimasna mida si Job, ala sai dipintori dirina moradophon Debata.

³Marro ni rimas ibana huhut mida alealena sitolu halak i, ala so haalusan nasida si Job, hape ditorui do ibana.

⁴Ai nunga ngolngolan hian si Elihu naeng mandok hatana tu si Job, ala tumua sitolu halak i sian ibana.

⁵Alai dung diida si Elihu, ndang haalusan sitolu halak i si Jobi, tarrimas situtu ma ibana.

⁶Dung i ro ma hata ni si Elihu, anak ni si Barakel, marga Bus i mangalusi: Bajar dope nian anggo ahu, alai nunga pola ubanon ia

hamu; dibahen i alang rohangku jala mabiar ahu papatarhon parbinotoanku tu hamu.

⁷Ai ninna rohangku do: Angka na tuatua ma jumolo mandok hatana, jala halak siginjang umur pabotohon habisuhon.

⁸Alai tongon tahe, Tondi na di bagasanjolma na gale i dohot pangombushon ni Nasunhinagogo i marrohaihonjolma i.

⁹Ndada sai tardok halak siginjang umur pangalapan bisuk, jala ndada sai tardok halak na tuatua umboto manimbang uhum.

¹⁰Ala ni umbahen hudok: Tangihon hamu ma ahu, asa dohot ahu pabotohon parbinotoan ni rohangku.

¹¹(II.) Ida ma nunga sanga ngolngolan ahu paimaima hatamuna, sai hupatangitangi sipaingotmuna paima sun dirisik hamu hata na humona dohononmuna.

¹²Sai ditimbangi rohangku do nian hatamuna, hape ida ma, ndang adong sian hamu nanggo sahalak patundukkon si Job, manang na torang mangalusi hatahatana.

¹³Dibahen i unang ma tung dok hamu: Nunga jumpang hami habisuhon, Debata do na manorui ibana, ndadajolma.

¹⁴Alai tahe, ndada ahu pininggil ni hatahatana, jadi ndada alusanku ibana hombar tu hatamuna i.

¹⁵Nunga tung tarhatotong anggo nasida, ndang be tarbahensa maralus, nunga tung jut nasida mandok hatana.

¹⁶Tung sai ngolngolan ahu, umbahen na so mangkuling nasida, ala sai tarhatotong boti nasida jongjong, jala ndang diboto be maralus?

¹⁷Antong ahu ma huhut mandok alushu, ahu pe naeng papatarhon pingkiran ni rohangku.

¹⁸Ai nunga gok hata ahu huhilala, sai disosak Tondi na di bagasan rohangku do ahu.

¹⁹Ida ma, tudoshon anggur na so binungka do andorangku, tudoshon tuhukan bobak na imbaru do naeng mapuntas.

²⁰Dibahen i naeng mangkuling ahu asa lumbang huhilala, naeng bungkaonku pamanganku, huhut mangalusi.

²¹Dao ma sian ahu anggo tung marnida bohi mandingkani manang ise.

²²Ai ndang huboto marsipalensem, atik tung beha tompu ahu ripurhonon ni Sitompa ahu.

33¹(I.) Santabi ale Job, sai tangihon ma hatangkon, jala pinggol ma sude pangkataionku.

²Ida ma, nunga sapala hubuha pamanganku, nunga mangkuling dilangku di bagasan pamanganku.

³Sian burju ni rohangku hudok angka hatangkon, jala torang paboaon ni bibirhu parbinotoan.

⁴Tondi ni Debata do naung manjadihon ahu, jala pangombus ni Nasunhinagogo pangoluhon ahu.

⁵Molo tung tarbahren ho, denggan alusanmu ahu, marhobas ma ho mangalo ahu adop bohi be.

⁶Ida ma, Debata do nampuna ahu suang songon ho, nang ahu sian sanggumul tano liat dijadihon.

⁷Ida ma, unang pola hinasongkalhu manonggoti ho, jala unang hinatongam ni tanganku maninggang ho.

⁸(II.) Antong nunga dipaboa ho, apala pinggolhon umbegesa, jala nunga hubege suara ni hatam:

⁹Na bontor do ahu nimmu, ndang marpipot, na daulat do ahu, jala ndang marhajahaton.

¹⁰Ida ma, na mangalului sindir do Ibana dompak ahu, dietong rohana ahu hira musuna.

¹¹Dibahren do pathu tu bagasan beangan, dirigopi do nasa dalanku.

¹²Ida ma, apala disi ma ndang haampinan ho, i ma alushu tu ho, ai umbalga situtu do Debata sian jolma na gale i.

¹³Boasa ma tung manarita ho dompak Ibana, ala so nialusanna ho taringot tu pambahenanna sudena?

¹⁴Ai gari Debata sahali, dua hali pe Ibana mangkuling, hape ndang diparateatehon jolma.

¹⁵Marhite sian nipi alatan bornginna i, uju renge modom angka jolma i, uju tarlalap modom di podomanna:

¹⁶Disi do dipatinggil Ibana pinggol ni jolma, jala disahap pinsangpinsangna tu nasida.

¹⁷Naeng pasuruthon jolma i sian pambahenanna na jahat i, dohot manjora baoa unang marhajungkaton.

¹⁸Naeng paluahon tondina sian hamagoan, dohot ngoluna unang tompu disoro hamatean.

¹⁹Huhut ibana ditorui marhite sian parsahiton di atas podomanna, pasang situtu panggagatna nang tu holiholina.

²⁰Pola gialan ngoluna mida sipanganon, ginegine nang rohana mida sipanganon hasudunganna na sai laon.

²¹Sanga merus situtu sibuk ni dagingna, maras roha marnida, pola panggagat holiholina angka na so dapot idaon na sai laon.

²²Nunga jonok hosana tu godung, jala ngoluna tu surusuruan angka na mambunu.

²³(III.) Tung sura adong donganna sada surusuruan, pangondian, sahalak sian tongatonga ni na saribu mangondihon ibana, laho pabotohon tu jolma hatigoran ni Debata.

²⁴Jadi asiasianna ibana, jala dohononna ma: Tobus ma ibana asa unang turun ibana tu godung, ai nunga jumpang Ahu pardenggan.

²⁵Jadi suang hisar dagingna, songon uju di haposonna, jala mulak poso ibana.

²⁶Molo martangiang ibana tu Debata, jadi asiasianna ma ibana, jala pataridahononna

Bohina tu ibana mardongan olopolop, jala pasuangonna tu jolma na gale i hatigoranna.

²⁷Dung i mamujimuji ma ibana di jolo ni jolma manisia, dohononna ma: Nunga mardosa ahu nian, jala nunga hupapeol uhum hatigoran, alai ndang dibaloshon Ibana tu ahu hombar tu pambahenanku.

²⁸Balik Ibana paluahon hosangku, asa unang turun tu bagasan hamagoan, jala marlas ni roha ngolungku marnida hatiuron.

²⁹Ida ma, luhutna i dibahen Debata dua manang tolu hali tu manisia.

³⁰Naeng manogihon tondina mulak sian hamagoan, asa dipatiur rohana marhite sian hatiuron ni hangoluan.

³¹Sai parateatehon ma on ale Job, jala tangihon ahu! Sip ma anggo ho asa hudatdati mandok hatangkon.

³²Alai molo tung adong dope sulam sialushononmu tu ahu, haru hatahon ma i, ai dipangido rohangku naeng mamintori ho.

³³Alai molo so adong be, ho ma antong manangihon ahu, sip ma ho, asa hupodahon tu ho habisuhon.

34¹(I.) Dung i didok si Elihu muse ma mangalusi:

²Tangihon ma hatangkon, hamu ale angka na bisuk, jala tarehon ma pinggolmuna tu ahu, hamu ale angka na marparbinotoan godang!

³Ai pinggol do tumanda hata, jala pamangan umboto dai ni sipanganon.

⁴Uhum hasintongan ma itapillit di hita, rap mananda ma hita di manang aha na denggan.

⁵Ai nunga pola didok si Job: Na pintor do ahu nian, alai Debata do padaohon sian ahu hatigoranku.

⁶Ala marhatigoran ahu hudok, hira na margabus do ahu disi; targisik do bugangku dibahen sumbia na pantik di bagasan ahu, atik pe so mardosa ahu.

⁷Tung ise ma baoa songon si Job, na manobur reherehe songon aek?

⁸Sauduran do ibana dohot halak siula hajahaton, jala rosu ibana tu halak parjahat?

⁹Ai nunga pola didok ibana: Ndang adong labana di baoa, sian parsauranna tu Debata!

¹⁰Dibahen i, hamu ale angka baoa na marroha! Tangihon hamu ma hatangkon: Dao ma sian Debata anggo hajahaton, jala dao sian Nasunhinagogo i uhum hageduhon!

¹¹Ibana tahe balik mamaloshon tu ganupjolma hombar tu pambahenanna, jala ganup mandapot dalanna be.

¹²Tongon tahe, tung na so tupa do Debata mambahen hajahaton, jala ndang olo Nasunhinagogo i papeol uhum hasintongan.

¹³Ise ulaning palumehon tu Ibana tano on? Jala ise paojakkon liat portibi on?

¹⁴Tung sura tubu rohana mangalojolma i, mambuat muse tondina dohot hosana.

¹⁵Tongkinnai rap monding ma nasa sibuk,
jala mulak tu orbuk hianjolma i!

¹⁶(II.) Molo tung marroha ho, sai tangihon
ma on, jala pinggol ma suara ni angka
hatangkon.

¹⁷Tung tarbahen raja na mangkagigihon
uhum ma mangarajai? Tung tarbahen
ho ma manorui Ibana Nasuntigor dohot
Nasunhinagogo?

¹⁸Tung patut ma dohonon tu raja hian: Ho
sisoada! Manang tu halak na sangap: Ho
halak parjahat!

¹⁹Lam tu Ibana ma na so marnida bohi ni
jolma na sangap, jala na so mandingkani
halak na mora moradophon halak na pogos,
ai luhut nasida jadijadian ni tanganna do.

²⁰Tupa mate satongkin nasida tongatonga
borngin, pola tarsonggot angka donganna
sabangso mandok: Tibunai laho salpu ibana!
Tarboan do nang na gogo, hape so binoan ni
tangan.

²¹Ai tongtong do diranapi matana
angka dalan ni ganupjolma, jala nasa
langkalangkana diida Ibana do.

²²Ndang adong haholomon manang
linggoman ni hamatean tau partabunian ni
halak siula hajahaton.

²³Ndang pola leleng risihonna pangalaho ni
jolma, asa tarboan ibana tu paruhuman di
jolo ni Debata.

²⁴Ibana mangaripuhi jolma angka na marhuaso, ndang pola marpangarisihon, jala dipabangkit halak na asing bahen singkatna.

²⁵Ai tangkas hian ditanda Ibana angka pambahenannasida, bornginna i nasida dipabalik jala digopui.

²⁶Diragehon do nasida songon halak parjahat apala di tongatonga ni mangajana.

²⁷Ala naung marbalik nasida sian Ibana, jala ndang diparateatehon sude angka dalanna i.

²⁸Asa manginonahon tu nasida angguhangguk ni halak na pogos, asa ditangihon Ibana angguhangguk ni halak na dangol.

²⁹Molo Ibana pasonangkon, tung ise ma na tuk manorui? Molo Ibana manamondingkon Bohina, tung ise ma na tuk paombun rohana? Nang sasabangso, nang sasahalak, tung rap do.

³⁰Asa unang jolma parjahat i mangarajai, gabe jorgong di bangso i!

³¹Ai tung tardok jolma ma tu Debata songon on: Huae pe songon on, nda tung sian salangku.

³²Ia adong dapot ho na so huida, ho ma manggorahon tu ahu! Molo tung naung huulahon hageduhon, unang be hudatdati.

³³(III.) Ingkon hombar tu hatam huroha Debata mamaloshon tu ho, ala naung manarita ho? Ingkon ho huroha mamillit,

ndada Ahu? Tung aha ma diboto ho? Haru hatahon nian!

³⁴Anggo halak na marroha dohot baa na marbisuk, na umbege hatangku, tolopanna do i mandok:

³⁵Ndang marparbinotoan pangkataion ni si Job, jala ndang marpanimbangaon hatahatana i.

³⁶Denggan nian tongtong tarunjun si Job sahat ro di ujung, ala maralus ibana songon halak parjahat.

³⁷Ala ditambahi dope hajungkaton tu dosana hian, pola mangelak hatana di tongatonganta, jala dipadeak hatahatana dompak Debata.

35¹ (I.) Dung i didok si Elihu muse ma mangalusi:

²Tung hombar tu uhum hasintongan ma di roham na nidokmu: Marhatigoran do ahu anggo moradophon Debata?

³Ai didok ho do: Aha gunana di ahu, molo lias ahu sian dosa? Aha ulingku sian i gumodang sian dosangku?

⁴Antong ahu ma nuaeng mangalushon hata tu ho dohot tu alealem na rap dohot ho.

⁵Manaili ma ho dompak langit i, jala ida ma, jala bereng angka ombun parginjang, andul do i tumimbo sian ho.

⁶Molo mardosa ho, pola aha bahenonmu tu Ibana? Molo dipatorop ho angka pangalaosim, pola hahuaonmu Ibana huroha?

⁷ Molo tung pintor ho, aha ulina sian i lehononmu? Manang tung aha ma jaloonna sian tanganmu?

⁸ Tu jolma songon ho sambing manginona hajahatonmu, jala tu ho anak ni jolma marguna ia hatigoranmu.

⁹ (II.) Manganguhi do nian halak na nirupa ala godang ni pangarupaon, mangandungi do nasida nian ala ni uhum sigostang botohon binahen ni halak na sangap.

¹⁰ Alai ndang adong nanggo sahalak na mandok: Didia do Debata Sitompa ahu, Ibana na mangalehon tu ahu ende Psalmen bornginna i?

¹¹ Ibana na mamodai hita gumodang sian pinahan di ladang, jala na pabisuk hita gumodang sian pidong na martongatonga langit.

¹² Disi do nasida manganguhi ala ni hajungkaton ni halak parjahat, hape ndang mangalusi anggo Ibana.

¹³ Leak ma antong, ai ndang olo Debata manangihon anggo tangiang na so marguna, jala ndang manaili Nasunhinagogo i tusi.

¹⁴ Lam didok ho dope: Nandang dapot ho Ibana idaonmu, nunga sahat tu jolona pangalualuanmu, antong unang ngolngolan ho paimaimahon Ibana.

¹⁵ Alai ala so marlulu dope Debata di bagasan rimasna, tung so tangkas situtu ma tandaonna roha hajungkaton?

¹⁶Alai anggo si Job nunga pola dibungka pamanganna mandok hata na teal so marguna, jala dipadeak hatahatana so marparbinotoan.

36 ¹(I.) Dung i diulahi si Elihu muse hatana mandok:

²Paima ahu satongkinnari, asa huajari ho, ai adong dope hata sido sidohononku mamintori Debata.

³Sian na dao ma alaponku parbinotoanku laho manariashon habonaron ni Sitompa ahu.

⁴Tongon tahe, ndada sipaotooto angka hatangkon, ai halak na sun marparbinotoan donganmu mangkatai.

⁵Ida ma, Nasunhinagogo do nian Debata, alai ndang ditulak Ibana manang ise, na songkal sahali Ibana marhite sian gogo ni hapistaranna.

⁶Ndang leleng pangoluonna anggo halak parjahat i, alai patingkosonna do uhum tu halak na dangol.

⁷Ndang padaonna matana sian halak na bonar, lam dipahundul do nasida tahe tu habangsa rampak dohot angka raja ro di salelenglelengna, asa tung timbul nasida.

⁸Alai tung sura tarihot nasida dohot rante, jala tarhurung di bagasan rante pardangolan.

⁹Jala dipabotohon tu nasida pambahenanna na jahat i dohot angka dosanasida i, ala naung pinatimbotimbona dirina.

¹⁰Asa Ibana patinggilhon pinggolnasida tumangihon pangajaran, mandokkon nasida paubaonna rohana sian hajahaton.

¹¹Molo tung ditangihon nasida pinsangpinsangna, jala dipaunduk rohana, jadi rasirasa matua nasida sai marhasonangan nasida bahenonna, jala marlas ni roha.

¹²Alai molo so ditangihon nasida, mate garsang nasida bahenon ni podang, jala tos hosanasida so sanga dapotan roha.

¹³Alai marrimas anggo halak na marroha pangansion, ndang marhuraja nasida, molo Ibana mangarante nasida.

¹⁴Jadi ingkon tos hosanasida i tagan di haposoonna dope, jala ngolunasida di tongatonga ni halak pangalangkup.

¹⁵Alai dipalua Ibana do anggo halak na dangol sian pardangolanna, jala dipatinggil pinggolnasida marhite sian hagogotan.

¹⁶(II.) Suang songon i paluaonna nang ho sian godung hagogotan, taripar tu halambason na tongtong, jala paradeonna mejam gok dohot sipanganon na tabo.

¹⁷Alai molo tung gok roham panguhumon ni halak parjahat, jadi laos uhum dohot torutoru manginona tu ho.

¹⁸Unang tung taiton ni rimas ma ho tu hajunghaton, jala unang dipaotooto roham ho, tung tarpalua ho dirim marhite sian godang ni partobus.

¹⁹Tung angguhanggukmi ma tagamon paluahon ho sian hagogotan, manang hinajugulmu mangasahon gogom sandiri.

²⁰Dibahen i unang ma halungunhon haroro ni borngin, na papurpurhon angka bangso sian ingananna hian.

²¹Jaga ma dirim, asa unang laho roham tu pingkiran na so marguna; tung tagonan ma mate ho pangidoonmu, sian na pataontaon pardangolan!

²²(III.) Ida ma, timbul do Debata di bagasan hagogoonna! Tung ise ma Pangajari tudoshon Ibana?

²³Tung ise ma mangaturhon tu Ibana dalan sidalananna? Jala tung ise ma na hum mandok tu Ibana: Hageduhon do i na binahenmu?

²⁴Tagonan ingotonmu parturena patimbulhon pambahenanna na pinapujipuji ni halak.

²⁵Luhut jolma manisias marlomo ni roha marnidasas, pola ingkon mandaodao jolma na gale i manatap tusi.

²⁶Ida ma, na timbul sahali do Debata, ndang dapot dongdongan ni rohanta, bilangan ni angka taonna pe, ndang tarsulingkit hita.

²⁷Ai Ibana manait tu ginjang uap ni angka aek, na marpungu muse gabe udan, na manetehi sian ombunna.

²⁸Manetehi tutu sian angka ombun parginjang marsagihon tu torop jolma.

²⁹Lam parsarak ni ombun dohot pardorom ni suara di bagasan undungundungna ma dapotjolma tagamon antusanna?

³⁰Ida ma, hira marrimberimbehon hilap Ibana, jala dihungkupi Ibana dirina marhite sian lung ni laut.

³¹Ai marhite angka i Ibana manguhumi angka bangso, huhut mangalehon sipanganon marlobilobi.

³²Ibana mamegang hilapi marhite sian tanganna, duansa, jala dipaborhat do i manoro angka alona.

³³Suara ni ronggurna palumbahon harorona, gari angka pinahan marboaboa do taringot tu harorona.

37¹(I.) Tongon tahe pola marlobok taroktokku taringot tusi, jala ndang di ingananna rohangki.

²Ndi hamu ale, tangihon hamu ma pardorom ni ronggurna dohot suara na ruar sian pamanganna.

³Tung tu toru ni sandok langit i margilinggiling suarana, jala sillam ni hilapna sahat tu angka ujung ni tano on.

⁴Ihut tu hilapi mardorom ronggur i, mangkuling Ibana marhite sian suara ni hatongamonna, jala laos so mansohot angka hilapna nang pe tarbege suarana.

⁵Mangkuling Debata marhite sian ronggurna na songkal situtu, Ibana patupa habalgaon, angka na so dapot hita antusanta.

⁶Ai Ibana mandok tu ambolas i: Turun ma ho tu tano i! Ibana huhut marsuru udan na por dohot udan tipotipo angka na doras situtu.

⁷Jadi disi ma hona sahap tangan ni saluhutjolma dibahen Ibana, asa tung mananda sudejolma, angka na tinompana i.

⁸Angka binatang pe masuk do tu bagasan pangaropanna be, jala manggompang di bagasan angka liangna.

⁹Sian bilut na buni ro habahaba, jala alogo sian purba mamboan ngali ni ari.

¹⁰Marhite sian pangombus ni Debata ro ambolas, jadi pola tartutup aek na lambas i marhimpalhimpal.

¹¹Ibana huhut pasorat ombun i dohot udan, Ibana muse paserakkon ombun na marisi hilap.

¹²Ibana huhut pahasorhon angka ombun i guru panoguna, manang aha na tinonahonna dipatupa nasida do tu liat portibi on.

¹³Manang bahen linsinglinsing, molo tung i haseana tu tanona, manang bahen tanda ni basana pangonaina i.

¹⁴(II.) Tangihon ma i, ale Job, jongjong ma ho, jala parateatehon halongangan angka na binahen ni Debata.

¹⁵Tung tagamon botoonmu ma parture ni pandokkon ni Debata di nasida! Dohot alana umbahen marsinondang ombunna marhite sian hilap?

¹⁶Tung tagamon ma botoonmu pangantanna di ombun, ro di sude halongangan, angka na binahen ni Parbinotonasun?

¹⁷Manang botoonmu tagamon parturena umbahen gabe mohop angka pangkeanmu, molo Ibana mamohopi tano i hinorhon ni alogo sian dangsina?

¹⁸Tung ho ma donganna pahembang langit parginjang i, asa hira songon sorminan na tinuang idaon?

¹⁹Ho ma huroha mamodahon tu hami manang aha sidohononnam i tu Ibana; ai ndang tarpajojo anggo hami dibahen haholomon ni rohanami!

²⁰Adong do ulaning na palumbahon tu Ibana molo naeng mangkuling ahu? Manang tung adong ma jolma na mangido naeng mago ibana?

²¹Langgo nuaeng tutu, ndang dapot jolma i idaonna sondang ni mata ni ari, atik pe marsinondang di langit i, alai hinungkupan ni ombun do, hape ia ro alogo pasisihon, marsinondang ulahanna.

²²Sian purba do i binsar hira songon sere idaon - humaliang Debata do tongtong hamuliaon na songkal sahali.

²³Langgo Ibana Nasunhinagogo i, ndang tagamon dapot hita, ai na songkal sahali do hagogoonna: Alai anggo uhum dohot hinagodang ni hatigoranna, ndang tagamon rupaonna.

²⁴ Dibahen i tama ingkon dihabuari jolma Ibana, ai ndang marnida bohi ni saluhut jolma angka na bisuk Ibana.

38 ¹ (I.) Dung i ro ma alus ni Jahowa tu si Job marhite sian habahaba, ninna ma.

² Ise do ibana, na naeng paholom tuutupan marhite sian pangkataion na so marpanimbangaon?

³ Ua hohos i ma gontingmu songon baoa! Ai dung do na naeng sungkunhononku tu ho, asa ho nian mangajari Ahu!

⁴ (II.) Didia do ho, uju Ahu paojakkon tano on? Paboa ma i, molo tung singkop panimbangan ni roham!

⁵ Ise ulaning mambahen suhatsuhatna na jolo? Peak botoonmu do i, manang ise ulaning pagistang hotang pamalok di atasna?

⁶ Di atas ni aha ulaning ditanom hajongjongan ni angka tiangna partunggul? Ise ulaning mameakkon batu parsuhina?

⁷ Uju rap mamujimuji Ahu angka bintang sidongdong, jala marolopolop sude anak ni Debata?

⁸ Ise ulaning manutup laut marhite sian angka pintu, uju di gunsangna ruar sian bortian?

⁹ Uju Ahu manjadihon ombun bahen pangkeanna, dohot haholomon bahen lilitna.

¹⁰ Uju Ahu mambuhul parbalohanna di atasna, jala hupahot di ibana ransangransang dohot pintu.

¹¹ Laos hudok ma: Intap ni on do ho jadi ro, jala ndang jadi salpuanmu! Ingkon dison do sulon gunsanggunsang ni angka galumbangmu.

¹² Dung do ho saleleng di ngolum mandokkon binsar ari? Manang pabotohon tu sibalik hunik ingananna?

¹³ Asa disoro angka ujung ni tano on, jala dipabali sian i halak parjahat?

¹⁴ Asa muba rupana, songon damar sahap, jala andar tarida luhutna i songon pangkean.

¹⁵ Jala ditait sian halak parjahat hatiuronnasida, jala diponggolhon botohon naung hitirhitir hian.

¹⁶ Nunga dung turun ho sahat ro di angka pusat ni laut? Nunga dung didalani ho tondolan ni lung i?

¹⁷ Nunga dung dipatalak tu ho angka harbangan ni hamatean? Nunga dung diida ho angka harbangan linggoman ni hamatean?

¹⁸ Nunga dung torang ditatap ho sahat ro di bohong ni tano on? Antong hatahon ma, molo tung diboto ho luhutna i!

¹⁹ (III.) Didia do dalan laho tu inganan ni hatiuron? Jala didia do inganan ni haholomon?

²⁰ Asa tung boanonmu do i tu parbalohanna be, manang tung botoonmu ma angka lapang laho tu jabuna?

²¹ Rupa diboto ho do i, ai uju i ho tubu huroha, jala torop do bilangan ni ariarim!

²²Nunga tung sahat ho huroha ro di parpeopan ni ambolas na lamot? Jala nunga tung diida ho huroha parpeopan ni ambolas hian?

²³Angka na hutipi paimahon tingki hagogotan, dohot ari tongtangan laho mangalo musu.

²⁴Didia do dalan parsirangan ni hatiuron dohot parserahan ni alogo sian habinsaran tu tano on?

²⁵Ise ulaning mambahen patik marsagihon aek udan dohot mambahen dalan di porhas?

²⁶Asa dipaudanudan tano i na so marisijolma, ro di halongonan na so niinganan ni jolma?

²⁷Laho pasombu uas ni tano bangkalbangkal dohot na niulang, dohot mambahen martumbur duhutduhut na rata?

²⁸Beha na marama do ulaning udan i? Jala ise ulaning manubuhon angka tetek ni nambur?

²⁹Sian bortian ni ise ulaning ruar udan ambolas? Jala ise ulaning manubuhon nambur aris?

³⁰Jadi marhimpal angka aek i pir songon batu, jala sisik ni lung i tartutup do.

³¹Tung dapot ho ma pudunonmu angka ihot ni bintang hala, manang tarbahen ho mangkarhari angka ihot ni bintang porinama?

³²Tung dapot ho ma paruaronmu angka binatang na marhillohillo di tingkina be? Jala

dapot ho togutogunmu bintang gompul ro di angka anakna?

³³Tung diboto ho ma patikpatik ni langit, manang tung ho pahothon parentana di atas tano on?

³⁴Tung tarpangiar ho ma suaram sahat ro di ombun, asa parohon udan tipotipo manghungkupi ho?

³⁵Tung tarsuru ho ma angka hilap asa sumiksaksiksak angka i, jala didok mandok ho: Ida ma, guru dokmu do hami!

³⁶Ise ulaning mameakkon hapistaran tu bagasan na holom? Jala ise ulaning mangalehon panimbangan tu bagasan ombun?

³⁷Ise ulaning tarbahen mamilangi angka ombun marhitehite hapistaran? Jala ise ulaning tarbahen mangusehon angka hajo ni langit?

³⁸Asa marhimpalhimpal orbuk i songon na niudi angka na lohote be tu donganna?

³⁹Tung dapot ho ma buruonmu soroan di singa boruboru manang pasombu hisap ni angka anak ni singa?

⁴⁰Molo mangunsimpu nasida di bagasan angka liangna, jala mangonggop di bagasan ramba poso pangaropanna i?

⁴¹Ise ulaning padirihon bangke panganon ni pidong sigak molo sioksiok angka anakna tu Debata jala monsong manerepnerep ala soada panganonna?

39¹ (I.) Tung diboto ho ma tingki ni hije maranak poso? Nunga tung dung dipamanat ho ursa tini laho mangae anakna?

²Nunga tung dietongi ho angka bulan hasasangana maranak poso, jala nunga tung diboto ho tingkina mangintubu?

³Uju marsinggang nasida laho mangintubu, laho mambolongkon pusokna na niaena i.

⁴Dung i lam margogo ma angka anakna jala magodang di ramba, ruar nasida laos so mulak be tu inana.

⁵Ise ulaning pajalang halode jalang i mardalan guru lomo ni rohana? Jala ise ulaning mangkarhari angka tali tambatan ni halode jalang i?

⁶Nunga pola Hulehon halongonan bahen jabuna, jala tano na niulang bahen ingananna.

⁷Pola diparengkeli angka hariburon na masa di bagasan huta, jala ndang dibege suara songgak ni jolma pandasdas.

⁸Sai diaotaoti do angka dolok mangalului gagatonna jala sai diihutihut do sandok tumbur ni duhutduhut.

⁹Tung tagamon olo badak i pajinahonmu mangoloi ho? Tung tagamon olo ma ibana marudam di lambung ni panggagatan binahenmi?

¹⁰Tung tagamon tarpampe ho ma tali tompi tu tangkuhuk ni badak asa ditait ninggala? Manang tung tagamon ma ihuthononna ho manisir di angka rura?

¹¹ Tung tarbahen ho ma marhaposan tusi ala panimbukbuk ni gogona? Manang tung tarpasahat ho ma ulaonmu tusi?

¹² Tung pos ma roham disi boanonna muli gogo ni na niulam, manang papunguonna eme i tu bagasan sopom?

¹³ Denggan do nian mamerper anggo habong ni pidong unto; alai nda tung taratup habongna habong ni sibarung.

¹⁴ Hape dipirahon do pirana i tu tano, laos dipasombu do horsik na mohop i mamorpori.

¹⁵ Laos lupa rohana atik tung mabola bahenon ni pat, jala mapisar degeon ni binatang di ladang.

¹⁶ Sai pangaritingon do ibana dompak angka anakna, hira na so ibana nampunasa, ndang dihaborihon rohana atik tung beha mangago hangalutonna i.

¹⁷ Ala naung diunsati Debata habisuhon sian ibana jala ndang marjambar dibahen di panimbangan.

¹⁸ Alai anggo uju dipaspas habongna laho marlojong, diparengkeli do nang hoda ro dijolma parsihundulna.

¹⁹ Tung ho ma huroha naung mangalehon gogo tu hoda? Tung ho ma mamangke tangkuhukna dohot jumbak na janggejanggeon?

²⁰ Tung tarpaakkathon ho ma i songon siapor? Pola tarsonggot jolma binahen ni parlongos ni pariheiheonna?

²¹ Ia tambirikna sai mangkaishaisi tano i do sian las ni rohana di gogona, tole borhat ditahopi do musu na tang marsinjata.

²² Eles rohana anggo mida habiaran, jala ndang olo humordit, jala ndang olo lumindak bahenon ni podang.

²³ Patuseok pe nangkat di atasna, sumillamsillam ia mundimundi dohot hujur.

²⁴ Pangarimason jala pangaritingon do i mangkaishaisi tano i, jala ndang be hatogangan, molo dibege suara ni sangka.

²⁵ Disi mangkuling sangka i, mariheihe ma i, dition ma langkana, sian na dao dope nunga dianggo uap ni parporangan, ro di suara porioho ni partogi dohot suraksurak ni parangan.

²⁶ Beha do, binahen ni parentam ulaning habang pidong lali tu ginjang, jala meapeap habongna tungan dangsina?

²⁷ Beha do, binahen ni parentam ulaning habang pidong raja ualu dompak ginjang, jala dibahen asarna di inganan na timbo sahali?

²⁸ Dolok batu do diingani, laos meat ibana di punsu ni dolok batu dohot di jaringjingna.

²⁹ Sian i do diranapi sisoroonna, mansai dao ditatap matana.

³⁰ Jala angka anakna mudar sambing do disopsop; jala ia disi adong bangke disi do ibana.

40¹ (I.) Angkup ni didok Jahowa ma tu si Job songon on:

²Antong beha ma pamadai ni jolma na manarita di Ibana Nasunhinagogo i? Jolma na naeng mangajari Debata, i ma nian mangalusi angka sungkunsungkunna i?

³Dung i ninna si Job ma mangalusi Jahowa:

⁴Ida ma, mametmethu do ahu, tung aha ma dohononku balosna tu Ho? Huampehon na ma tagonan tanganku tu pamanganku.

⁵Nunga sahali tarsor hatangku, ndang be ulahanku, manang dua hali pe, na so tupa be datdatanku.

⁶(II.) Dung i ro ma alus ni Jahowa tu si Job marhite sian habahaba ninna ma.

⁷Ua hohos i ma gontingmu songon baoa, adong do naeng sungkunhononku tu ho, asa ho nian mangajari Ahu!

⁸Tung naeng do segaanmu uhumhu? Tung naeng salahononmu Ahu, asa mamintori dirim ho?

⁹Manang tung dos ma gogo ni botohonmu songon botohon ni Debata? Tung tarbahen ho ma marsuara ronggur songon Ibana!

¹⁰Ua pajagar ma dirim marhite sian habalgaon dohot hatimbulon, jala bahen ma hatongamon dohot hamuliaon pangkeanmu!

¹¹Tingting i ma parpiarpiar ni rimasmu, jala ranapi ma saluhut halak na ginjang marroha, angka i ma jolo paserep.

¹²Tailihon ma saluhut halak na jungkat marroha, angka i ma jolo patunduk, jala dugudugu ma halak parjahat i di ingananna.

¹³Rap panguspangus ma nasida tu bagasan orbuk, tambathon ma bohinasida i tu bagasan haholomon.

¹⁴Jadi dohot ma Ahu mamuji ho, ala tanganmu siamun sandiri manolongi ho.

¹⁵(III.) Ua ida ma binatang hoda aek naung hujadihon rap dohot ho, duhutduhut do digagat suang songon lembu.

¹⁶Ua ida ma, di bagasan gontingna do hagogoonna, jala di bagasan angka urat ni butuhana do hapuragaonna.

¹⁷Dipaegolegol do ihurna songon hau Ares, jala masidandanan do angka urat ni haehaena.

¹⁸Holiholina do songon ponot tombaga, ia angka ruasna songon tiang bosi.

¹⁹Ibana do situasi ni jadijadian ni Debata, Sitompasa huhut mangalehon tangkena.

²⁰Angka dolok gabe panjampalanna; laos disi do marmeammeam saluhut binatang di harangan.

²¹Lomo rohana marlinggomlinggom tu toru ni hau ampolu, jala modom tu arung dohot ansising.

²²Di linggom ni hau ampolu i ibana marlinggomlinggom, jala angka bulung ni ansising manghungkupi ibana.

²³Munsat pe batang aek i ndang pola humordit ibana, ndang pola tahuton ibana nang pe nasa balga ni Jordan masuk tu babana.

²⁴ Tung tagamon ma dapot jolma jailonna dohot jorat songon i mangolu manang mangkarihiri igungna?

41 ¹ (40-25) Tung dapot ho ma tagamon toguonmu buea marhite sian hail, manang mangampot dilana dohot tali?

² (40-26) Tung dapot ho ma tagamon harihiranmu igungna dohot hotang manang turaonmu hurumna dohot hail bosi?

³ (40-27) Tung tagamon ma pagodangonna elehelekna tu ho, manang manomba huasi tu ho?

⁴ (40-28) Tung tagamon ma olo ibana marpadanpadan dohot ho, mangido jaloonmu ibana bahen naposom salelenglelengna?

⁵ (40-29) Tung tagamon dapot ho ma ibana parmeammeamonmu songon pidong? Manang tambatonmu bahen meammeam ni angka borum?

⁶ (40-30) Tung tagamon olo ma angka pardengke marboniagahon ibana? Manang olo halak partigatiga marbagi disi?

⁷ (40-31) Tung dapot ho ma tagamon gohanmu sisikna dohot tampuning, manang uluna dohot turatura?

⁸ (40-32) Tole ampehon ma tanganmu tu ibana, ndang tagamon sangkaponmu marporang dohot ibana paduahalihon.

⁹ (41-1) (I.) Ida ma, ingkon tarhirim jolma i di aropna, asal diida rupana, nunga runggang ala tarmali tondi ibana.

¹⁰(41-2) Ndang adong na hum nanggo sahalak manunggul ibana; tung ise ma manahan jongjong di adopan ni Bohingku?

¹¹(41-3) Tung ise ma jumolo mangalehon manang aha tu Ahu, asa balosonku tu ibana? Saluhut na di toru ni langit i, Ahu do nampunasa.

¹²(41-4) Naeng dope Ahu mandok sada hata taringot tu ruasruas ni buea i, taringot tu gogona dohot hinauli ni rupana pe.

¹³(41-5) Tung ise majolma na hum mangosari pangkeanna parduru? Tung ise majolma na hum mangaroro tu bagasan ngingina sidua rinte i?

¹⁴(41-6) Tung ise majolma na hum pabuha osangosangna? Jorbut do ngingina baris humaliang.

¹⁵(41-7) Tongam situtu do parinse angka na togu marbarisan, marrapetrapet songon na nironket.

¹⁶(41-8) Masirainan ma tutu na sada tu donganna, gari alogo ndang tarbahen masuk sian holangkolangna.

¹⁷(41-9) Masirainan ma tutu ganup tu donganna, marsilohot pola ndang tarsirang manang ise.

¹⁸(41-10) Barsibarsina pola marsinondang, jala matana songon imbulu ni sibalik hunik manogotna i.

¹⁹(41-11) Sian babana ruar huathuat, jala marjillamjillam api sian i.

²⁰ (41-12) Sian bungbung ni igungna ruar timus hira sian hudon na gurgur na ginorgoran dohot arsam.

²¹ (41-13) Hosana tarbahen pagalak arang, jala nala ni api ruar sian babana.

²² (41-14) Maringan di bagasan tangkuhukna do hagogoonna, jala di jolona maringkat hatahuton.

²³ (41-15) Marsada do na bulot ni sibukna hira haksa na tinuang do masirainan, tung na so tarhutik do.

²⁴ (41-16) Pir do ateatena songon batu, pir tahe songon batu pandudaan partoru.

²⁵ (41-17) Molo hehe ibana, raion ma halak angka na begu, laos maporus binahen ni songgotna.

²⁶ (41-18) Molo ro halak mandapothon ibana marpodang manang marhujur manang marmundimundi manang marlembing, rap so belut do.

²⁷ (41-19) Hira gala ni eme do anggo bosi dietong rohana, jala hira hau na ondapondapon do anggo tombaga.

²⁸ (41-20) Nandang pola maporus ibana binahen ni anak ni sior, hira gabe durame do anggo batu ni ambalang di ibana.

²⁹ (41-21) Hira gala ni eme anggo antukantuk dietong rohana, jala diengkelengkel do parngingis ni hujur.

³⁰(41-22) Di toruna marpeahan ngarngar angka na tajom, jala hira hureta pardege do pamolusanna di atas gambo.

³¹(41-23) Marbuhalbuhal liang i dibahen ibana hira aek na gurgur di bagasan hudon, jala laut i hira pangalompaan ni halak sipauli daon.

³²(41-24) Marsinondang dalanna sian pudina dibahen, jala doshon uban sisik ni aek i idaon.

³³(41-25) Ndang adong tudosanna anggo di darat, tartompa pe ibana asa unang tahuton.

³⁴(41-26) Hu rohana mida saluhut na timbul, ibana do raja gumomgom saluhut binatang panoro.

42¹(I.) Dung i ninna si Job ma mangalusi Jahowa:

²Nuaeng pe asa huboto, tung guru dokmu do luhutna, jala ndang hasundatan sangkap ni roham nanggo sada.

³Ise do ibana na paholom tuptupan so marpanimbangaon? Tongon tahe, nunga huhatahon tutu na so huantusi; halongangan do angka i, salpu sian rohangku jala na so huboto.

⁴Ua tangihon ma, naeng ahu mangkatai; adong do naeng sungkunonku tu Ho, asa Ho pabotohon tu ahu.

⁵Nunga nian dibege pinggolhon lingona taringot tu Ho, alai anggo nuaeng nunga dohot matangku marnida Ho.

⁶Dibahen i jora ma ahu jala husolsoli dagingku hundul di bagasan orbuk dohot sirabun.

⁷(II.) Jadi dung sun dihatahon Jahowa angka hata ondeng tu si Job, ninna Jahowa ma mandok si Elipas sian Teman: Nunga tung marsigorgor rimashu mida ho dohot mida alealem sidua halak i; ai ndang hata sintong dipaboa hamu taringot tu Ahu, songon na pinaboa ni naposongku si Job i?

⁸Nuaeng pe, buat hamu ma di hamu pitu lembu tombur dohot pitu birubiru tunggal, jala laho ma hamu manopot naposongku si Job, asa dipelehon hamu sada pelean situtungon manguras hamu, jala ditangiangkon naposongku si Jobi hamu. Jadi tataponku ma ibana, gabe ndang bahenonku tu hamu hombar tu haotoon binahenmuna i, ai ndang hata sintong dipaboa hamu taringot tu Ahu, songon na pinaboa ni naposongku si Jobi.

⁹Dung i laho ma si Elipas sian Teman dohot si Bildad sian Sua dohot si Sopar sian Naema, jala dibahen nasida ma hombar tu hata ni Jahowa tu nasida. Jadi marpamuati ma roha ni Jahowa ala si Job.

¹⁰(III.) Dung i humosing ma dibahen Jahowa parsorion ni si Job, uju na martangiang ibana mangondihon alealena, jala nasa arta na di si Job na jolo silompit dua ditambahi Jahowa.

¹¹ Dung i ro be ma sude hahaanggina dohot angka ibotona ro di sude donganna magodang manopot ibana, laos mangan sagusagu rap dohot ibana di bagasan jabuna, jala didok hata sipir ni tondina, huhut diapulapuli ibana taringot tu saluhut hinamago na pinaro ni Jahowa tu ibana, jala dilehon be tu ibana sakesita dohot tintin sere sada be.

¹² Dung i gumodang dipasupasu Jahowa si Job di ujungna sian na di mulana; ai sampulu opat ribu birubiruna, onom ribu untona, saribu pasang horbona, jala saribu halodena boruboru.

¹³ Tubu muse pitu anakna dohot tolu boruna.

¹⁴ Goar ni boruna sihahaan, i ma si Jemima, ia goar ni paidua si Kesia, ia goar ni paitolu si Keren-Hapuk.

¹⁵ Dung i di sandok tano i ndang adong jumpang parompuan songon hinauli ni boru ni si Job i, jala dilehon amanasida tu nasida hauma bangunan di tongatonga ni angka ibotonasida.

¹⁶ Dung i mangolu dope si Job i saratus opatpulu taonnari, gabe sanga dope diida pahompuna dohot ninina pola opat sundut.

¹⁷ Dung i mate sarimatua ma si Job i jala mahap rohana di hangoluan on.

Mazmur

1 ¹ (I.) Martua ma halak, na so olo mangihuthon tahi ni angka parjahat, jala na so olo jongjong tu dalan ni angka pardosa, jala na so olo sahundulan dohot angka pangarehei.

² Sai patik ni Jahowa do lomo ni rohana, jala sai i do dipingkiri rohana arian dohot borngin.

³ Songon hau do ibana, na sinuan di topi ni batang aek, na marparbuehon parbuena di hajujumpang ni tingkina bulungna pe ndang olo malos, jala sude na niulana manjadi do.

⁴ (II.) Alai ndang songon i anggo pangalaho ni angka parjahat, songon orbuk, na hinabangkon ni alogo do nasida.

⁵ Dibahen i ndang manahan angka parjahat i maradophon paruhuman, manang tarbahen angka pardosa jongjong di luhutan ni angka na tigor roha.

⁶ Ai ditanda Jahowa do dalan ni angka na tigor roha i; alai matua laho lonong do anggo dalan ni angka parjahat.

2 ¹ (I.) Boasa sai ogaoga angka parbegu, jala sai na so marniula dipingkiri roha ni angka bangso?

² Hehe martahi do angka raja ni tano on rap dohot angka na begu, mangalo Jahowa dohot Messiasna i.

³"Tarapui ma angka ihotnasida, jala taambolongkon ma angka talina i," ninna.

⁴Alai diengkelengkel Ibana na marhabangsa di banua ginjang i do nasida, jala dielesi Tuhanta i do nasida.

⁵Songgahanna do nasida sogot di rimasna, jadi martimpalan ma nasida mida parpiarpiar ni murukna.

⁶Hape anggo Ahu, hupabangkit do Rajangku di dolok Sion, dolok habadiaonku.

⁷(II.) Jamitahononku ma na gabe patik, didok Jahowa do mandok ahu: Anakku do Ho, sadarion do Ho hutubuhon.

⁸Pangido ma sian Ahu, asa hulehon tu Ho angka parbegu bahen jambarmu, jala gok di Ho angka ujung ni tano on.

⁹Ropuhanmu ma nasida dohot batahi bosi jala songon hudon do nasida taporanmu.

¹⁰(III.) On pe, hamu ale angka raja, sai olo ma hamu parrohaon, jala hamu ale angka panguhum ni tano on, sai olo ma hamu paingoton.

¹¹Oloi hamu ma Jahowa dohot biar ni roha, jala marolopolop ma hamu, huhut angka hitir.

¹²Umma hamu ma Anak i, asa unang ro rimasna, jadi mago hamu maon ditongan dalan, ai tibu do marpiarpiar rimasna, alai martua ma sude angka na marhaposan tu Ibana.

3¹Ende ni raja Daud uju na maporus ibana maradophon anakna si Absalom.

²Iale Jahowa, lan situtu do angka na manosak ahu, angka na hehe tumahi ahu.

³Angka na mandok taringot tu hosanku: "Ndang adong be hangoluan ni i sian Debata." Sela.

⁴Alai Ho do, ale Jahowa, lombulombungku, hasahalonku, dohot na padirgak ulungku.

⁵Joujou do soarangku tu Jahowa, jadi dialusi Ibana ahu jalojalo sian dolok habadiaonna. Sela.

⁶Hupapeak do ahu, jadi laos nok matangku, dundo ahu muse, ai Jahowa do manande ahu.

⁷Ndang huhabiari nang riburibu loksa halak, angka na manungkum ahu humaliang.

⁸Hehe ma Ho, ale Jahowa, palua ahu, ale Debatanku, ai dipastapi Ho do sude angka musungku, ipon ni angka na geduk marroha diropangi Ho do. (3-9) Matua gok di Jahowa do haluaon, di atas ni bangsom do tongtong pasupasum. Sela.

4 ¹Ende sian si Daud.

²(I.) Sai alusi ma ahu, ale Debata ni hatigoranku, ia hujou Ho, jala palumbang ahu jumpa hagogotan, asi ma roham di ahu, jala tangihon ma tangiangki.

³Ia hamu, pinompar nijolma, sadia leleng on do lea rohamu di hasahalaonki, sadia leleng on do haholongan ni rohamuna na so hasea, jala dioronmuna gabus. Sela.

⁴Unang so boto hamu: Marhasurungan do dibahen Jahowa angka hasianna, matua ditangihon Jahowa do, molo hujou Ibana.

⁵Holsohon hamu hian ma, asa unang dapotan dosa, marhusari ma rohamuna, dung ro di podoman hamu, asa sonang hamu. Sela.

⁶Pelehon hamu ma pelean hatigoran, jala marhaposan tu Jahowa ma hamu.

⁷(II.) Lan do angka ma mandok: Tung ise ma manumpakkon na denggan tu hita? Alai ale Jahowa, sai pasondangkon ma tu hami sondang ni bohim!

⁸Gumodang do las ni rohangku dilehon Ho, sian di nasida di hamamasa ni gotilon eme dohot anggur na gabe situtu. (4-9) Sonang do ahu hupapeak huhut mamintor nok; ai sasada Ho do, ale Jahowa, pasonang ahu maringan.

5¹Ende sian si Daud.

²Sai tangihon ma, ale Jahowa, angka hatangki, sai timbang ma ho i ni rohangku.

³Sai patinggil ma pinggolmu ale Rajangku dohot Debatangku, tumangi soara ni anggukkon, ai tu Ho do ahu martangiang.

⁴Sogot ma, ale Jahowa, tangihon soarangku, sogot do ahu marhobas manopot Ho, jala manatapnatap ahu.

⁵Ai ndang lomo roham mida hageduhon, ale Debata, jala ndang tarsorang na geduk marroha i Ho.

⁶Ndang manahan angka na ginjang marroha maradophon pamerengmu, dihosom roham do nasa siulahon na so uhum.

⁷Matua diago Ho do, ale Jahowa, angka sidon gabus, jala dihaigigihon roham do halak angka na tumahi mudar dohot sipaotooto.

⁸Alai ianggo ahu, sian godang ni asi ni roham sai bongotanku do bagasmu, marsomba dampak bagas ni habadiaonmi, mangkabiari Ho.

⁹Ale Jahowa, sai togu ma ahu marhitehite hatigoranmu ala ni angka na mangonggop ahu, sai pahornop ma dalanmu di jolongku.

¹⁰Ai ndang pos roha di hatanasida i, sai hamagoan do tahi ni rohanasida di bagasan, godung na talak do tolonnasida i, dipalanditlandit do ia dilana.

¹¹Torui ma nasida, ale Debata, sai ambalhon ma tahi ni rohanasida i, ambolongkon ma nasida ala hinadeak ni pangalaosionnasida i, ai dampak Ho do nasida manenganenga.

¹²Sai marlas ni roha ma sude angka na marhaposan tu Ho, sai marendei ma nasida ro di salelenglelengna ala ni ondinganmu nasida, sai marolopolop ma mida Ho angka na holong roha di goarmu. (5-13) Ai Ho do, ale Jahowa, mamasumasu na tigor marroha i, songon lombulumbu do dihaliangkon Ho asi ni rohami tu ibana.

6 ¹Ende sian si Daud.

²(I.) Ale Jahowa unang uhumi ahu di bagasan rimasmu, jala unang ajari ahu di bagasan parpiar ni murukmu.

³Asi ma roham di ahu, ale Jahowa, ai mauas do huhilala; pamalum ahu, ale Jahowa, ai angka hitir do sude holiholingu.

⁴Rohanku di bagasan pe mansai mallobuk do, sadia leleng on Ho, ale Jahowa?

⁵Sai marpangulahi ma roham, ale Jahowa! Malua ma hosanku! Urupi ahu ala ni denggan ni basam.

⁶Ai anggo di hamatean ndang adong be parningotan tu Ho; jala tung ise mamuji Ho, dung ro di banua toru?

⁷Maheu do huhilala dibahen ponjot ni rohangku, ganup borngin do huhembangi lagengku, mansai maraek do nang bulusanku dibahen iluilungku.

⁸Pola do lotop matangku sian marsak ni rohangku, pola naung gabe matua, dibahen sude angka na manosak ahu.

⁹(II.) Pasurut ma sian ahu, sude hamu angka na mangulahon na so uhum, ai nunga ditangihon Jahowa soara ni angukkon.

¹⁰Nunga ditangihon Jahowa hoingkon, dijangkon do ia tangiangkon. (6-11) Tarurak jala tarsonggot situtu do sogot sude angka musungku; hapogan do nasida laho sumurut, jala tarurak so pangkiriman.

7 ¹Ende sian si Daud, na niendehonna tu Jahowa, ala ni hatahata ni si Kus, marga Benjamin i.

²(I.) Ale Jahowa, Debatangku, marhaposan tu Ho do ahu, tumpahi ma ahu maradophon sude angka na mangalele ahu, jala palua ahu!

³Asa unang disoro hosangku, songon panoro ni singa, jala diparsurage, soada na paluahon.

⁴Ale Jahowa, Debatangku, molo tung hubahen angka indi on: Molo tung hajahatan diulahon tanganku.

⁵Molo tung hubahen na roa tu angka alealengku jala hupupusi na manosak ahu, soada alana:

⁶Sai dilutlut musu i ma hosangku, jala dapotsa, diluntakluntak ma dohot ngolungku tu tano, jala margulu di orbuk hamuliaonku dibahen. Sela.

⁷Hehe ma Ho, ale Jahowa, di bagasan rimasmu! Borhat ma Ho mangalo roharoha ni angka na manosak ahu, jala duno ma Ho mandapothon ahu, ai Ho do umpatik uhum.

⁸Sai dihaliangi luhutan ni angka bangso ma Ho sogot jala sian atasnasida ma Ho mulak tu ginjang.

⁹Jahowa do manguhum angka bangso; sai luluhon ahu, ale Jahowa, hombar tu hatigoranku dohot halidangon ni rohangku di bagasan.

¹⁰Aut mansohot ma nian hajahatan ni angka parjahat! Sai pargogoi ma na tigor roha i!

Ai Ho do sidodo roha dohot pia, bonar do Debata.

¹¹(II.) Mangasahon Debata do lombulombungku, Ibana do manumpahi angka na tigor roha i.

¹²Panguhum na tigor do Debata, jala mangalumbai do Ibana ganup ari.

¹³Molo so muba rohaniba, garutonna ma podangna, sintahonna ma dohot siorna manuju.

¹⁴Angka pangalo hamatean do ditujuhon dompak iba, mantat api do angka sumbiana i dibahen.

¹⁵Ida ma! Dirianrianhon rohana do hajahaton; gabe dapotan hamagoan ibana, jala ditubuhon sipaotooto.

¹⁶Dihali do sada godung jala bagas dibahen, hape laos ibana sandiri madabu tu godung, na binahenna i.

¹⁷Mulak tu uluna do hamagoanna i, jala songgop tu pakpak ni uluna do hajahatonna i. (7-18) Pujionku do Jahowa hombar tu hatigoranna i, jala endehononku do Jahowa Natumimbul i.

8¹Ende sian si Daud.

²Ale Jahowa, Sigomgom hami. Mansai sangap do goarmu di liat portibi on, dipatimbul Ho do hamuliaonmu ro di atas ni angka langit.

³Gari sian pamangan ni angka dakdanak dohot angka posoposo dijadihon Ho do

paranganmu, ala ni angka na mangalo Ho, asa paonjaphon musu dohot sitahi sudolsudol.

⁴Molo hutailihon langitmi, angka jadijadian ni jarijarim, bulan dohot bintang, angka na pinaulim.

⁵Tung aha ma nianjolma i, umbahen poladitaringoti roham ibana? Jala anak nijolma i, umbahen pola diebati Ho?

⁶Humurang apala otik do ibana sian Debata dibahen Ho, alai ditalitalihon Ho muse hamuliaon dohot hatongamon tu ibana.

⁷Dipabangkit Ho do ibana gumomgom angka jadijadian ni tanganmu, sude do tahe dipatunduk Ho tu ibana:

⁸Angka birubiru dohot lombu sudena ro di binatang angka na di harangan.

⁹Pidong angka na di toru ni langit dohot angka dengke di laut, ro di sude na manginsir di laut. (8-10) Ale Jahowa, Sigomgom hami, mansai sangap do goarmu di liat portibi on.

¹Ende sian si Daud.

9 ²(I.) Pujionku ma Jahowa sian nasa rohangku, pajojoronku ma sude halongangan angka na binahenmu.

³Marlas ni roha jala marolopolop ma ahu mida Ho, endehononku ma goarmu, ale Natumimbul!

⁴Ala naung mundar tu pudi angka masungku; martinggangan do nasida jala marragean maradophon bohim.

⁵Ai dipasintong Ho do uhum dohot parjambaran di ahu, hundul tu habangsa do Ho, ale Panguhum na tigor.

⁶Mangonai hata do Ho tu angka parbegu, diago Ho do parjahat i, siap do goarnasida dibahen Ho ro di salelenglelengna.

⁷Sun do hasisiap ni musu i salelenglelengna, jala tarulang do angka huta dibahen Ho, pesan do nasida rap dohot baritana i.

⁸Alai anggo Jahowa marhabangsa do salelenglelengna, nunga dipajongjong habangsana laho manguhum.

⁹Jala Ibana manguhum sogot portibi on marhitehite hatigoran, pagostangonna ma uhum tu angka bangso.

¹⁰Sai olo ma Ho, ale Jahowa, haporusan di angka tingki hagogotan!

¹¹Asa marhaposan tu Ho angka na tumanda goarmu, ai ndang ditadingkon Ho angka na usousu di Ho, ale Jahowa.

¹²Endehon hamu ma Jahowa, na marhabangsa di Sion, baritahon hamu ma angka pambahenanna tu angka bangso.

¹³Ai parlulu do Ibana di sapata ni mudar, angka dipaingotingot do, ndang dihalupahon angguhangguk ni angka na dangol.

¹⁴(II.) Asi ma roham di ahu, ale Jahowa, tatap ma dangolhon binahen ni angka na mangkosom ahu, Ho do sihindati ahu sian angka harbangan hamatean.

¹⁵Asa hubaritahon sude angka baritam di angka bahal ni boru Sion, asa marolopolop ahu mida hatuaonmi.

¹⁶Nunga lonong angka parbegu tubagasan godung na binahennasida i, taralit do patnasida i tu jorgong, na buni tinaonnasida i.

¹⁷Sar do barita ni Jahowa, paboa sidabu uhum Ibana, laos di pambahenan ni tanganna sandiri do taralit parjahat i. Pingkiri ma i! Sela.

¹⁸Ingkon runsur tu banuatoru ma nian angka parjahat i, sude parbegu, angka na mangkalupahon Debata.

¹⁹Ai ndang tagamon tongtong halupahononna na pogos i, ndang tagamon tongtong mago na hinirimhirim ni angka na dangol.

²⁰Hehe ma Ho, ale Jahowa, asa unang mangasahon gogo jolma i, sai uhum i ma sogot di jolom angka parbegu! (9-21) Sai ampehon ma sipasonggot tu nasida, ale Jahowa, asa ditanda angka parbegu, jolma na gale do nasida hape. Sela.

10¹(I.) Boasa tung sai mandaodao Ho jongjong, ale Jahowa, sai martabuni Ho di angka tingki hagogotan?

²Mosok ma dihilala na dangol dibahen hajungkaton ni parjahat, tardapot do nasida dibahen tahi, angka na sinangkapnasida i.

³ Ai ditengatengahon parjahat i do sangkap ni rohana, jala dipartuanihon pangalansum, dilesanlesan do ia Jahowa.

⁴ Ninna roha ni parjahat i do di bausbaus ni igungna: "Ndang tagamon marlulu Ibana! Nandang adong Debata!" I do pangarimpunan ni angka sangkapna sudena.

⁵ Sai na manjadi do angka langkana tongtong; dao do tu ginjang angka uhummu sian jolona, dikuasi rohana do angka alona i sudena.

⁶ Ninna do di bagasan rohana: "Pantangna do tung sumurut ahu, ndang tagamon adong parmaraanku ro di na hupompar."

⁷ Gok pamulasian dohot sipaotooto dohot hadoboon pamangannai; halojaon dohot hajahaton do ditoru ni dilana.

⁸ Sai marparonggopan do ibana di angka huta, sai dibunui do na so marpipot di sihabunian, sai dimatamatahon do na mandate.

⁹ Sai mangonggop do ibana di pangaropan, songon babiat di ramba; mangonggop do ibana laho manoro na dangol, disoro ma na dangol i, pinadapotna di bagasan jorgongna.

¹⁰ Dipabungkuk do ibana manisipi, jadi dapot sisilonna ma angka na mandate i.

¹¹ Ninna do di bagasan rohana: "Nunga dihalupahon Debata, nunga ditabunihon bohina i, ndang be idaonna salelenglelengna."

¹²(II.) Hehe ma Ho, ale Jahowa! Patoltol ma tanganmu, ale Debata! Sai unang halupahon angka na dangol i!

¹³Boasa ma tung lesanlesanon ni parjahat i Debata, tung dohononna di bagasan rohana: Nandang marlulu Ho!

¹⁴Diida Ho do tahe, ai ditatap Ho do halojaon dohot haporsuhon mambahen tubagasan tanganmu, tu Ho do dipasahat na mandate i, Ho do partumpak tu na sopot so marama.

¹⁵Sai ponggolhon ma botohon ni parjahat i, jala luluhon hajahaton ni parjahat i, asa ndang jumpang be.

¹⁶Jahowa do raja salelenglelengna; siap do angka parbegu sian tanona.

¹⁷Nunga ditangihon Ho, ale Jahowa, pinangido ni angka na dangol i, dipatogu Ho do rohanasida, dipatinggil Ho do pinggolmu;

¹⁸Laho patingkoskon uhum tu nasopot so marama dohot tu na tarsosak, asa unang be didatdatijolma na sian tano i manenganenga.

11 ¹(I.) Ende sian si Daud. Marhaposan tu Jahowa do ahu, boasa ma tung dohononmuna mandok tondingku: "Maporus hian ma tu dolokmuna, ale pidong, na meat di handang."

²Ai ida ma, nunga pola disintak angka parjahat sior i, nunga pola diampehon nasida sumbiana tu ihotihot i, laho maniorhon di na holom tu angka na tigor marroha.

³Ai ia dung sanga marompas angka tiang ojahan, hahuaon ni partigor i be?

⁴(II.) Di bagasan bagasna na badia i pe Jahowa, jala banua ginjang habangsana, sai mangaranapi do matana, sai didodoi imbulu ni matana do jolma manisiasa.

⁵Ditanda Jahowa do na tigor roha i, alai dihosom rohana do parjahat i dohot na mangkaholongi hajahaton.

⁶Udanudanhononna do tu angka parjahat i porhas, api, barerang dohot alogo, na mohop do jambar siinumonnasida.

⁷Ai na tigor do Jahowa, jala dihaolongi do angka hatigoran, idaon ni na tigor roha i ma sogot bohina.

12¹Ende sian si Daud.

²(I.) Sai manumpak ma Ho, ale Jahowa, ai nunga lam moru angka na daulat marroha i, lam otik do manisiasa, angka na burju marroha.

³Na so hasea i do dihata i be dohot donganna, marbibir na landit, jala mardua roha nasida mangkatai.

⁴Sai diginsir Jahowa ma sude bibir angka na landit i, dohot angka dila, na jungkat marpangkuling.

⁵Angka na mandok: Sai monang do hami dibahen dilanami, bibirnam i do mandongani hami, tung ise ma rajanami?

⁶(II.) Mida hamamago ni angka na dangol dohot mida andung ni angka na pogos, hehe

ma Ahu nuaeng, ninna Jahowa, ampehononku
ma tua tu angka na mangkalungunhonsa.

⁷Na sintong do angka hata ni Jahowa,
songon perak naung nilala di bagasan
balanga, pola pitu hali tinapis.

⁸Ho do, ale Jahowa, mangondingi nasida,
paluaonmu do ibana sian halak na sansundut
on, ro di salelenglelengna. (12-9) Nang pe
monsong humaliang angka parjahat i dibahen
panimbuk ni hajungkaton ni jolma manisia.

13¹Ende sian si Daud.

²Sadia leleng on do, ale Jahowa, sai
halupahononmu ahu tongtong? Sadia leleng
on do tabunihononmu bohim sian ahu?

³Sadia leleng on sai mardondami rohangku,
sai humasusa rohangku di bagasan manipat
ari? Sadia leleng on sai angatan ni alongku
ahu?

⁴Tatap tu on, jala alusi ahu, ale Jahowa,
Debatangku; sai patiur ma parnidaanku, asa
unang laos mate modom boti ahu.

⁵Asa unang dohonon ni musungku: Nunga
tung hupatunduk ibana, gabe marsurak
angka alongku maon, molo tung reberebe
ahu.

⁶Alai anggo ahu, marhaposan tu asi ni
roham do ahu, ingkon marolopolop rohangku
mida pangurupim, marende ma ahu tu
Jahowa, ai denggan do uhumna tu ahu.

14¹(I.) Ende sian si Daud. Ninna na
oto i do di bagasan rohana: Nandang

adong Debata; jahat jala sogir do nasida marpangalaho, ndang adong sibahen na denggan.

²Manatapnatap do Jahowa sian banua ginjang, paidaida jolma manisia, marnida manang na adong na marroha, na usousu di Debata.

³Hape tung saluhut do nasida sumurut, tung sange do nasida marroha mago, ndang adong sibahen na denggan, nanggo sahalak.

⁴(II.) Tung na so mananda do ulaning sude angka sibahen hajahaton? Angka na manganhon bangsongku songon na mangan roti, ia Jahowa ndang dijou nasida.

⁵Alai tarsonggot situtu do nasida disi sogot, ai matua didongani Debata do pinompar ni na tigor roha i.

⁶Ditungkol hamu pe tahi ni na dangol, hape sai Jahowa do parsigantunganna.

⁷Ise ma ulaning sian Sion mangalehon haluaon di Israel? Molo disuhe Jahowa habuangan ni bangsona, marolopolop ma ho, ale Jakkob, marlas ni roha ma ia Israel.

15¹Ende sian si Daud. Ale Jahowa, ise do na jadi sorang di bagasan undungundungmu? Ise do na jadi mian di dolok ni habadiaonmi?

²Halak na sun burju marpangalaho dohot siulahon hatigoran, jala sidon na sintong sian bagasan rohana.

³Halak na so olo mangkata tundal, na so olo mambahen hajahaton tu donganna, jala na so olo mambahen haurahon tu sisolhotna.

⁴Halak na mansoadahon na lea, jala dipasangap do angka na mangkabiari Jahowa; halak na so olo manguba naung sinumpahonna, nang tung marharugian ibana.

⁵Halak na so olo paanakkon hepengna, jala na so olo manjalo sisip mangalo na lidang roha i. Halak na mangulahon sisongon i, ndang tagamon humordit salelenglelengna.

16¹Ende sieheteheton sian si Daud. (I.) Sai ramoti ma ahu, ale Debata, ai marhaposan tu Ho do ahu.

²Ningku do mandok Jahowa: Ho do Tuhanku, ndang adong hasonanganku dungkon ni Ho.

³Taringot tu nabadia angka na di tano on: Nasida do angka na sangap jala apala hasudungan ni rohangku situtu.

⁴Godang do sitaonon ni angka na hapogan paimbarhon Debata, ndang olo ahu mangusehon peleannasida sian mudar, jala subang do rohangku mandok angka goarnasida.

⁵Jahowa do partalianku dohot panginumanki, Ho do pasintong jambarhu.

⁶Jadi tano na lunak do partalianku, tongon tahe, na uli situtu do jambarhu.

⁷ Papujipujionku ma Jahowa, na marrohaihon ahu, dohot do puangku palumba ahu bornginna i.

⁸(II.) Tongtong do hubahen Jahowa tu jolongku, ai molo di siamunhu Ibana, ndang tagamon humordit ahu.

⁹Ala ni las ma rohangku jala marolopolop tondingku, dagingku pe sinok do maringanan dibahen.

¹⁰Ai ndang tagamon pasombuonmu tondingku di banua toru, ndang tagamon loasonmu hasianmu marnida habusukon.

¹¹Sai pabotohononmu do tu ahu dalam hangoluan, sun ma las ni roha di adopan ni bohim, angka hasudungan ni roha masa di siamunmu salelenglelengna.

17 ¹Tangiang sian si Daud. Sai tangi ma hasintongan, ale Jahowa, tangihon ma alualungkon! Sai tarehon ma pinggolmu tu tangiangkon sian bibir na so marpangansi!

²Sai dapotan uhum ma ahu sian bohim, sai ditatap matam ma hasintongan.

³Nunga didodo Ho rohangki, ditingkir Ho bornginna i, dilala Ho do ahu, hape ndang adong jumpang Ho, hupompangi do angka pingkiranku, asa unang mangalaosi pamanganku.

⁴Sai marjaga do ahu di langkalangka nijolma sipangarupa, di angka pambahenan nijolma dompak hata ni pamanganmu.

⁵Sai diihutihut langkalangkanku do angka bogasmu, ndang maoraor pangalangkanku.

⁶Sai Ho do hupajoujou, ai dialusi Ho do ahu, ale Debata! Sai tarehon ma pinggolmu tu ahu, tangihon ma hatangkon!

⁷Sai marhasurungan ma bahen angka asi ni roham, Ho ale Sipartumpak, tu angka na marhaporusan tu Ho maradophon angka na mangalo tanganmu siamun i.

⁸Sai ramoti ma ahu, songon anak ni mata, sai ondingi ma ahu di linggoman ni angka habongmi.

⁹Moradophon parjahat, angka na naeng mangago ahu, maradophon musungku, angka na monsong mangarohai ahu.

¹⁰Sai di hunsi nasida do tabotabona, sai hajungkaton do dihatahatahon pamanganna.

¹¹Sai diiraniran nasida do nuaeng langkanami, sai dimatamatahon do mangompashon hami tu tano.

¹²Tudoshon babiat, na naeng manoro do ibana, jala sobokkon anak ni babiat na mangonggop di aropan.

¹³Hehe ma Ho, ale Jahowa, joloani ma, ompashon ibana! Sai palua ma hosangku sian parjahat i hinorhon ni podangmu.

¹⁴Palua ahu, ale Jahowa, marhitehite tanganmu sian angkajolma parroha portibi on, angka na manjalo jambarna di hangoluan on, gok butuhanasida dibahen Ho dohot

artam, gabean do nasida di anak, jala tading di pinomparnasida do lobilobinasida i.

¹⁵Alai anggo ahu sai idaonku do sogot bohim, marhitehite hatigoran, pamahaponku ma rohangku marnida rupam, ia dung tarsunggul ahu muse.

18¹Ende sian si Daud, naposo ni Jahowa, na mandok hata ni ende on tu Jahowa, dung malua ibana dibahen sian tangan ni angka musuna sudena dohot sian tangan ni si Saul, ninna ma:

²Holong situtu do rohangku di Ho, ale Jahowa, Sipargogoi ahu.

³Jahowa do partanobatoanku dohot haporusanku, jala Sipalua ahu, Debatangku. Sitiopanku, marhaposan tu Ibana do ahu, lombulombungku dohot tanduk ni partuaonku, haporusanku.

⁴Sai hupajoujou do Jahowa, Sipujion i, jadi malua ma ahu sian angka musungku.

⁵Nunga nian dihaliangi angka jorat ni hamateani ahu, jala disonggoti angka sunge ni hajahaton ahu.

⁶Nunga nian dihaliangi rante ni banuatorui ahu, dilungkupi angka jorgong ni hamateani ahu.

⁷Jadi di na targogot i ahu, hujou do Jahowa jala hupangiar do anggukku tu Debatangku; jadi dibege ma soarangki sian jorona, jala tolhas do angguk i tu pinggolna.

⁸Jadi humuntalhuntal ma tano on jala lumpat angka ojahan ni dolok jala lalolalo, ai tarrimas do Ibana.

⁹Martimpul do timus sian igungna, jala runkar do api na mandilatdilat sian pamanganna, gara ni api na marnalanala ruar sian Ibana.

¹⁰Dung i dipajomba Ibana ma angka langit, gabe tuat Ibana, holom marimpotimpot di toru ni patna.

¹¹Marsihundul di kerubim ma Ibana huhut habang, jala mangareapreap di atas habong ni alogo.

¹²Haholomon do dibahen pangondinganna humaliang Ibana, parhobot ni udan dohot ombun do lapelapena.

¹³Mamolus do sian angka ombunna i ambolas dohot gara ni api, dibahen sinondang na di jolona i.

¹⁴Mangkuling do ronggur di angka langit dibahen Jahowa, jala dipalu na Tumimbul i do soarana. Ambolas dohot gara ni api do mangihut.

¹⁵Dung i disiorhon ma angka sumbiana, jala dipaserak angka musu, di jotjoti ma maniorhon angka hilap, manggunturi nasida.

¹⁶Jadi tarida ma angka lubuk ni aek, gabe mullop ma dohot angka ojahan ni portibi on maradophon pangasupim, ale Jahowa, maradophon pangunsong ni hosa ni igungmu.

¹⁷ Disurdukkon do tanganna sian ginjang manangkup ahu, manait ahu sian angka aek magodang.

¹⁸ Dipalua do ahu sian musungku na gogo i dohot sian angka na mangkosom ahu, ala gumogo do nasida sian ahu.

¹⁹ Dirampok nasida do ahu di ari hinamagongki, jadi Jahowa ma pangunsandeanku.

²⁰ Jala ditogihon do ahu tu halambason, dipalua do ahu, ai lomo do rohana mida ahu.

²¹ Hombar tu hatigoranku do dibaloshon Jahowa tu ahu; hombar tu habontoron ni tanganku do dipasuang tu ahu.

²² Ai hujujur do angka dalan ni Jahowa, jala ndang manjahati ahu marbalik sian Debatanku.

²³ Ai sai tong di jolongku sude angka uhumna, jala ndang hupaholang angka patikna i sian ahu.

²⁴ Sai sun do lidang ni rohangku mardonganhon Ibana, jala sai hujaga do diringku maradophon hajahatonku.

²⁵ Jadi dibaloshon Jahowa ma tu ahu hombar tu hatigoranku, hombar tu halidangon ni tanganku, na niidana i.

²⁶ Asi do roham tu na asi roha i, tobok do Ho maradophon halak na tobok i.

²⁷ Bontor do Ho dompak na bontor roha i, jala pulos do roham tu pargeduk i.

²⁸Ai ditumpahi Ho do jolma na dangol i, jala dipajimput Ho do jolma parmata na elak.

²⁹Ai marsinondang do parpalitoanku dibahen Ho, dipatiur Jahowa, Debatangku, do holom ni parnidaanku.

³⁰Ai mardonganhon Ho tartondong ahu do parduan ni parangan, jala mangasahon Debatangku tartimbang ahu do parik na timbo.

³¹Sisangunjur do dalan ni Debata, pita do hata ni Jahowa, Ibana do lombulumbu ni sude angka na marhaposan tu Ibana.

³²Ai tung ise ma Debata, dungkon ni Jahowa, jala tung ise tau partanobatoan, dungkon ni Debatanta.

³³Debata do mangkohoshon pargogo tu ahu, jala dipatiur do dalanku.

³⁴Doshon doras ni tini do pathu dibahen, jala dipajongjong do ahu tu angka habuntulonku.

³⁵Ibana mangajari tanganku mangula hamusuan, asa tarbahen botohonku manintak sior haksa.

³⁶Jala dilehon Ho do tu ahu lombulumbu ni hatuaonmi, jala ditungkol siamunmu do ahu, jala habasaonmu do patimbul ahu.

³⁷Dipalumbang Ho do langkangku, jadi ndang tarbaliksu mata ni ari ni tothu.

³⁸Sai hulotongi do angka musungku, gabe dapot ahu do nasida, jala ndang mulak ahu paima siap nasida hubahen.

³⁹Huropuhi do nasida, jadi ndang tarbahen nasida be hehe, marragean do nasida tu toru ni tothu.

⁴⁰Dihohoshon Ho do pargogo tu ahu, mangula hamusuan, dipapatu Ho do angka alongku tu ahu.

⁴¹Dipaunduk Ho do angka musungku, gabe siap hubahen angka na mangkosom ahu.

⁴²Mangangguhi do nasida, hape ndang adong na paluahon, tu Jahowa pe, hape ndang olo Ibana mangalusi nasida.

⁴³Jadi hulamoti ma nasida songon orbuk maradophon alogo, hulutluti ma nasida songon gambo di alaman.

⁴⁴Dipalua Ho do ahu sian angka parbadaan ni bangso, dipabangkit Ho do ahu, gabe pandapotan ni angka parbegu, gari halak na so hutanda mangoloi ahu.

⁴⁵Guru dokku do nasida, halak na pulik marga pe mangalesemlesem ahu.

⁴⁶Merus do anak ni na pulik margai, jala angka hitir do nasida ruar sian partanobatoannasida.

⁴⁷Mangolu do Jahowa, jala pujion ma partanobatoanki, jala timbul do Debata ni hatuaonku.

⁴⁸Debata do Silehon angka partubolon tu ahu dohot papatuhon angka bangso tu ahu.

⁴⁹Ibana sipalua ahu sian angka musungku, Ho do tongon patimbul ahu maralohon

angka alongku, dipalua Ho do ahu sian jolma sibahen gogo.

⁵⁰Dibahen i pujionku ma Ho, ale Jahowa, di tongatonga ni angka parbegu, jala endehononku ma goarmu. (18-51) Ibana Sipatimbul angka hatuaon ni rajana, jala Sibahen asi ni roha tu miniahanna i, tu si Daud dohot tu pinomparna i ro di salelenglelengna.

19¹Ende sian si Daud.

²(I.) Angka langit do mamaritahon hamuliaon ni Debata, jala jadijadian ni tanganna do pinaboa ni na ratarata ni langit.

³Masipaboaan do angka ari, jala masilehonan parbinotoan do angka borngin.

⁴Ndada barita manang hatahata na so binege soarana i di bagasan.

⁵Tolhas tu liat portibi on tali pangungkurna, jala ro di topi ni tano on do baritana. Dibahen do disi sopesopo ni mata ni ari.

⁶Jadi songon bajo pangoli do ibana ruar sian bilutna; las do rohana songon ulubalang na manopot sitopotonna.

⁷Sian topi ni langit do habibinsarna, jala tolhas ro di angka topina muse pangkusorna i, jala ndang adong na buni maradophon mohopna i.

⁸(II.) Sun denggan do patik ni Jahowa, tau sipasabam roha; sintong do panindangion ni Jahowa, dipabisuk do na tobok marroha.

⁹Tigor do patik ni Jahowa, angka sipalas roha; pita do patik ni Jahowa, dipatiur do parnidaan.

¹⁰Pita ni parsombaon tu Jahowa do na hot tongtong, hasintongan do angka uhum ni Jahowa, tigor do sudena.

¹¹Ummarga do angka i sian mas dohot sian sere palangki na godang situtu, tumonggi do angka i sian situak ni loba dohot tanggule.

¹²Naposom pe dapotan sipaingot do hinorhon ni, godang do upa ni na mangaradoti angka i.

¹³(III.) Tung ise ma umboto angka haliluon? Sai sesa ma dohot dosa, angka na so huboto.

¹⁴Palua ma huhut naposom sian angka haginjangan ni roha, asa unang ahu dirajai! Disi pe asa lias jala bontor ahu sian pangalaosion na godang i. (19-15) On pe, sai lomo ma roham di angka hata ni pamanganki dohot di pangkataion ni rohangki tu jolo ni bohim, ale Jahowa, partanobatoanku dohot siluluhon ahu.

20¹Ende sian si Daud.

²Sai dialusi Jahowa ma ho di ari hagogotan, sai dipatimbul goar ni Debata ni si Jakkob ma ho!

³Ditongoshon ma tu ho panumpahion sian bagas habadiaon, jala ditungkol ho sian Sion!

⁴Sai marningot ma Ibana di sude angka peleanmu sipanganon, sai talmis ma di rohana angka peleanmu situtungon! Sela.

⁵Sai dilehon ma tu ho sisubut roham, jala dipasaut nasa sangkapmi.

⁶Asa mariaia hita mida hatuaonmi, jala mamiorhon tonggol, mangasahon goar ni Debatanta i. Sai dipasaut Jahowa ma nasa pangidoanmu.

⁷Nuaeng pe huboto tangkas, na tinumpahan ni Jahowa miniahanna i, sai alusanna do ibana sian angka langit habadiaonna i marhitehite angka pangabahan ni hatuaon ni siamunna.

⁸Mangasahon hureta dohot hoda do ianggo nasida, alai anggo hita goar ni Jahowa, Debatanta i do itaingot.

⁹Martungkapan jala martinggangan ianggo nasida, alai anggo hita tong do marsihohot jongjong. (20-10) Sai tumpahi ma rajai, ale Jahowa, sai alusi ma hami di ari pangalualuannami!

21 ¹Ende sian si Daud.

²(I.) Ale Jahowa, marlas ni roha do rajai mida gogom, jala marolopolop situtu do ibana mida panumpahim.

³Dilehon Ho do tu ibana pinangido ni rohana, jala ndang dijua Ho pinangido ni hatana. Sela.

⁴Ai ditomutomuhon Ho do tu ibana angka pasupasu ni hadoharon, ditalitalihon Ho do tu uluna tumpal sere palangki.

⁵Hangoluan do dipangido sian Ho, dilehon Ho do tu ibana, diudut Ho do ariarina ro di salelenglelengna.

⁶Timbul do hamuliaonna dibahen panumpahim; hatongamon dohot hatimbulon diampehon Ho tu ibana.

⁷Ai parhitean ni angka pasupas do ibana dibahen Ho salelenglelengna, dipasabam Ho do rohana marhitehite las ni roha mida bohim.

⁸Ai marhaposan tu Jahowa do rajai, jala ndang humordit ibana dibahen asi ni roha ni Natumimbul i.

⁹(II.) Sai jumpang tanganmu do sogot sude angka musum, jumpang siamunmu do sogot sude angka na mangkosom Ho.

¹⁰Doshon pamurunan do nasida bahenonmu di tingki pangaluluhonmu, sai polgahan ni Jahowa do nasida di bagasan rimasna, jala api manganhon nasida.

¹¹Siaphononmu do sogot tubunasida sian tano on ro di pinomparnasida sianjolma manis.

¹²Ai tahi mangago do rohanasida dompak ho, sai disangkapi do angkal, hape matua so tuk.

¹³Ai lumindak do nasida bahenonmu, tujuonmu do bohinasida i marhitehite tali ni siormu. (21-14) Hehe ma Ho, ale Jahowa, mangasahon Antumu! Asa hupuji jala huendehon hami hagagoonmi.

22¹Ende sian si Daud.

²(I.) Ale Debatangku, Debatangku! Boasa tung tadingkononmu ahu? Sai

mandaodao do angka hata ni anggukkon sian hatuaonku.

³Ale Debatangku, sai joujou do ahu arian, alai ndang mangalusi Ho, jala borngin pe ndang jumpang ahu hasonangan.

⁴Alai nabadia do anggo Ho, marhabangsahon angka pujipujian ni Israel.

⁵Marhaposan tu Ho do angka ompunami, pos do rohanasida, jadi dipalua Ho do nasida.

⁶Tu Ho do nasida manganguhi, jadi malua ma nasida, marhaposan tu Ho do nasida, jadi ndang tarurak.

⁷Alai gea nama ianggo ahu, ndada jolma, haeleson ni halak jala parbilean ni natorop.

⁸Sude angka na marnida ahu marengkelengkelihon ahu, dipangangang do babana huhut mangupirupir.

⁹"Tu Jahowa ma nian dipasahat, asa dipalua ibana, dipangolu ma nian ibana, ai lomo do rohana mida ibana."

¹⁰Ho do tongon na manait ahu sian ampuan, sipapos rohangku, mangonsop bagot ni dainang.

¹¹Dung tubu ahu, sai Ho do parsigantunganku, sian butuha ni dainang dope sai Ho do Debatangku.

¹²Unang mandaodao Ho sian ahu, ai donok nama parmaraan, ai soadong sipartumpak.

¹³Sai dihaliangi angka horbo panguge do ahu, jala torop do angka jonggi Basan mangalele ahu.

¹⁴Angka dipangangang be do babana
dompok ahu songon babiat panoro, jala na
patungoromon.

¹⁵Durus do ahu songon aek, pasitik be
do sude holiholingu ditangging, songon
pantis na malala do ateatengku di bagasan
dagingku.

¹⁶Merus do gogongku songon ngarngar,
jala lohok do dilangu di langitlangit ni
pamanganku, jala tu orbuk ni hamatean
dipapodom Ho ahu.

¹⁷Ai dihaliangi angka biang do ahu, luhutan
ni angka parjahat do mangonsongi ahu,
diturai do tanganku dohot tothu.

¹⁸Habilangan ahu do sude holiholingu,
martilla be do ianggo nasida mida ahu.

¹⁹Dibagi nasida do angka uloshu, mandabu
tondung do nasida taringot tu bajubajungku.

²⁰Alai sai unang mandaodao ianggo Ho,
ale Jahowa, parsigantunganku, hapogani ma
mangurupi ahu.

²¹Sai palua ma hosangku sian podang, sian
sisilon ni biang hosangku na tarpunjung.

²²Sai palua ma ahu sian baba ni babiat, jala
alusi ahu maradophon tanduk ni angka horbo
jalang.

²³(II.) Sai jamitahononku ma goarmu tu
angka hahanggingku, jala pujionku ma Ho di
tongatonga ni huria, na marluhut i.

²⁴Puji ma Jahowa, hamu ale angka na
mangkabiari Ibana, sude pinompar ni si

Jakkob pasangaphon Ibana, jala sude pinompar ni Israel mangkormat Ibana!

²⁵ Ai ndang lea rohana manang marbiasbias mida pardangolan ni na dangol, jala ndang ditabunihon bohina maradophon ibana, jala ditangihon do anggukna i tu Ibana.

²⁶ Asa Ho do haroroan ni pujipujianku di tongatonga ni huria na ria i, gararonku ma angka bagabagangku di jolo ni angka na mangkabiari Ibana.

²⁷ Sai mangan do sogot angka na dangol i jala butongan, ingkon mamujimuji Jahowa do angka na usousu di Ibana, sai huminsa do rohamuna salelelenglelengna.

²⁸ Ingoton ni isi ni liat portibi on ma i, gabe mulak ma nasida tu Jahowa, jala marsomba tu jolom do sogot sude angka marga ni parbegu.

²⁹ Ai Jahowa do nampuna harajaon, jala panggomgom di angka parbegu.

³⁰ Mangan jala marsomba do sogot sude angka na gok na hum di tano on, marsinggang tu jolona do sogot sude angka na marsingkor ro di na mate gasing.

³¹ Sai adong do pinompar ni manisia, na mangoloi Ibana, angka na manaringoti Tuhan i tu pinompar na sogot. (22-32) Ro do angka nasida sogot, manjamitahon hatigoranna tu halak na tubu muse, paboa Ibana do pasunhon.

23 ¹Ende sian si Daud. Jahowa do
Siparmahan ahu, ndang tagamon
hurangan ahu.

²Dipatongon do ahu tu jampalan angka na
lomak, ditogutogu do ahu di lambung aek
hasonangan.

³Dipasabam do rohangku, ditogu do ahu di
dalam hatigoran, ala ni goarna i.

⁴Ai nang pe mardalan ahu di rura linggoman
ni hamatean, ndang huhabiari parmaraan,
ai Ho do mandongani ahu tungkotmu dohot
batahim mangapuli ahu.

⁵Ho do menutup meja di jolongku
maradophon angka musungku, dimiahi Ho do
ulungku, suksuk do panginumanki.

⁶Tongon tahe denggan basa dohot asi ni
roha mangihutihut ahu saleleng ahu mangolu,
jala dung mulak ahu masuhanku ma bagas ni
Jahowa salelenglelelengna.

24 ¹Ende sian si Daud. (I.) Gok di Jahowa
do tano on ro di isina, portibi on dohot
pangisina.

²Ai Ibana do paojakkonsa di atas ni angka
laut, jala dipahot di atas ni angka batang aek.

³Ise do na jadi nangkok tu dolok ni Jahowa?
Jala ise do na hum jongjong sogot di
hajongjongan ni habadiaonna i?

⁴Halak partangan na lidang dohot na ias
roha, parroha na so paihuthon na so hasea,
jala na so olo margana laho mangansi.

⁵I ma halak na maruli pasupasu sian Jahowa, dohot hatigoran sian Debata ni hatuaonna i.

⁶I ma sundut ni angka na usousu di Ibana, angka na mangalului bohimi, Jakkob. Sela.

⁷(II.) Patuginjang ma tohangmuna, hamu ale angka harbangan, patuginjang ma hamu, ale angka pintu sian na robi, asa bongot Raja ni hamuliaon!

⁸Ise ulaning Raja ni hamuliaon i? I ma Jahowa, na gogo jala Ulubalang, Jahowa Ulubalang di hamusuon.

⁹Patuginjang ma tohangmuna, hamu ale angka harbangan, jala patuginjang ma hamu, ale angka pintu sian na robi, asa bongot Raja ni hamuliaon i!

¹⁰Ise ulaning Ibana, Raja ni hamuliaon i? I ma Jahowa Zebaot, Ibana do Raja ni hamuliaon i. Sela.

25¹Ende sian si Daud. Ho do, ale Jahowa, dihalungunhon rohangku.

²Ale Debatanku, marhaposan tu Ho do ahu, unang tung paila ahu, asa unang marsuraksurak angka musungku mida ahu.

³Ndang tahe tagamon tarurak sude angka na mangkaposi Ho, sai maila do sogot angka pangose soada alana.

⁴Ale Jahowa, sai pabotohon ma tu ahu angka dalanmu, jala ajarhon tu ahu angka bogasmu.

⁵Sai togutogu ma ahu tubagasan hasintonganmu, jala ajari ahu, ai Ho do Debata ni hatuaonku, Ho do na huhaposi ganup ari.

⁶Sai ingot ma, ale Jahowa, angka denggan ni basam dohot asi ni roham, ai sian na robid do angka i.

⁷Sai unang paingotingot angka dosa ni haposoonku dohot pangalaosingku, sai ingot ma ahu, ale Jahowa, hombar tu asi ni roham, ala ni denggan ni basam.

⁸Pardengganbasa jala na bonar do Jahowa, ala ni dipodahon do dalan na tigor i tu angka pardosa.

⁹Diparnonohon do uhum tu angka na dangol jala diajarhon dalanna tu angka na tarjepol.

¹⁰Asi ni roha dohot hasintongan do sude dalan ni Jahowa di angka na mangaradoti padanna dohot angka panindangionna.

¹¹Ala ni goarmu, ale Jahowa, sai marpamuati ma roham di dosangu, ai tung na balga do i.

¹²Ise ulaning baoa na mangkabiari Jahowa? Sai na ajarhononna do tu ibana dalan sipillitonna.

¹³Sorang di hasonangan do tondina i, jala pinomparna i tumean tano on sogot.

¹⁴Hasudungan ni Jahowa do angka na mangkabiari Ibana, jala dipabotohon tu nasida padanna.

¹⁵Sai tong do mangaranap matangku tu Jahowa, ai Ibana do mangelnet tothu sian jorgong.

¹⁶Sai dompakkon ma ahu, jala asi roham di ahu, ai punjung jala na dangol do ahu.

¹⁷Lam ganda do hagogotan ni rohangku, sai palua ma ahu sian angka hasosahanku.

¹⁸Sai tatap ma dangolhon dohot ngaluthon, jala marpamuati ma roham di angka dosangku sudena.

¹⁹Ida ma angka musungku, ai lan do nasida, jala hosomhosom pangarupaon dibahen nasida mangkosom ahu.

²⁰Sai ramoti ma tondingki jala palua ahu, unang tung paura ahu, ai marhaposan tu Ho do ahu.

²¹Halidangon dohot hatigoran ma mangaramoti ahu, ai marhaporusan tu Ho do ahu.

²²Ale Debata, sai palua ma Israel sian angka hagogotanna sudena.

26¹Ende sian si Daud. Luluhon ahu, ale Jahowa, ai marpangalaho di bagasan hadaulatonku do ahu, jala tu Jahowa do ahu marhaposan, ndang meoleol ahu.

²Uji ma ahu, ale Jahowa, jala sulingkit rohangkon, sai lala ma angka piangki dohot rohangki.

³Ai sai solpa do di matangku dengan basam, jala marparange ahu di bagasan hasintonganmi.

⁴ Nandang dung sahundulan ahu dohot halak sineang roha, jala ndang huparangkupi angka parsibuni.

⁵ Huhagigihon do luhutan ni angka panggetegete, jala ndang sahundulan ahu dohot angka parjahat.

⁶ Sai hupaburiburi do tanganku di bagasan halidangon, jala sai naeng halianganku langgatanmi, ale Jahowa!

⁷ Laho patubegehon soara pujipujian dohot pajojorhon sude halongangan, angka na binahenmi.

⁸ Ale Jahowa, huhaholongi do hajongjongan ni bagasmu dohot hasonggopan ni hamuliaonmu.

⁹ Sai unang sarat tondingku rap dohot angka pardosa, manang ngolungku tu angka jolma sisopsop mudar.

¹⁰ Angka na paulaula hajahaton, jala gok sisip siamunnasida i.

¹¹ Alai anggo ahu sai marpangalaho di bagasan halidangonhon, palua ahu jala asi ma roham di ahu!

¹² Jongjong di dalan na tigor do tothu, pujionku ma Jahowa di bagasan angka luhutan.

27 ¹ Ende sian si Daud. (I.) Jahowa do panondangingku dohot hatuaonku, tung ise ma habiaranku? Jahowa do partanobatoan ni ngolungku, tung mida ise ma ahu biahaton?

²Molo tung ro angka parjahat
mangarongrong ahu naeng manganhon
sibukku, angka sisosak ahu dohot angka
musungku, gabe martinggangan do nasida,
jala marragean.

³Nang pe marhoronhoron parangan angka
na manungkum ahu, ndang dihabitari
rohangku, nang pe hehe parmusuon dompak
ahu, sai pos do rohangku disi.

⁴(II.) Sada do naung hupangidohon sian
Jahowa, sai i do hulului! Naeng mian ahu di
bagasan joro ni Jahowa saleleng mangolu
ahu, paidaida hinadenggan ni Jahowa dohot
mamingkiri ganup sogot di bagasan jorona i.

⁵Ai diondingi do ahu di bagasan
undungundungna di ari hinamago,
ditabunihon do ahu di partabunian ni
undungundungna, tu dolok partanobatoan do
ahu dipanangkok.

⁶Asa mandirgak ulungku mida musungku,
angka na humaliang ahu; jadi pelehononku
ma di bagasan undungundungna i angka
pelean pujipujian, marende ma ahu huhut
mamalu parhinaloan mamuji Jahowa.

⁷(III.) Sai tangihon ma soarangku, ale
Jahowa, molo joujou ahu, asi ma roham mida
ahu, jala alusi ahu.

⁸Ninna rohangku do mandok Ho: lulu i hamu
ma bohingku! Antong bohim ma na hulului,
ale Jahowa.

⁹Unang tung tabunihon bohim maradophon ahu, unang tung tulak naposom di bagasan rimasmu, matua Ho do pangurupingku, unang tung ambolongkon ahu, jala unang tadingkon ahu, ale Debata ni hatuaonku!

¹⁰Ai nunga ditadingkon damang dohot dainang ahu, alai dijangkon Jahowa do ahu.

¹¹Sai podahon ma tu ahu dalammu, ale Jahowa, jala togu ahu di dalam hatigoran, ala ni angka alongku.

¹²Unang tung pasahat ahu guru roharoha ni angka musungku, ai hehe do dompak ahu angka sitindangi pargabus, jala dibuashon hajahaton.

¹³Aut unang huhaporseai paidaaidaonku sogot hinadenggan ni Jahowa di tano hangoluan on!

¹⁴Parhanalom ma Jahowa, pagomos jala patogu roham jala parhanalom Jahowa!

28¹Ende sian si Daud. (I.) Tu Ho do ahu joujou, ale Jahowa, partanobatoanku, unang sai sip Ho, manundali ahu, asa unang ahu molo tung laos sip Ho manundali ahu, doshon halak angka na manuruk tanoman.

²Sai tangihon ma soara ni sombasombangku, molo mangangguhi ahu tu Ho, molo hupaherbang tanganku tu bilut ni habadiaonmu.

³Unang tung sarat ahu rap dohot angka parjahat dohot angka siulahon hajahaton,

angka parhata lesem tu donganna, hape hajahaton do di bagasan rohanasida.

⁴Sai baloshon ma tu nasida hombar tu pambahenannasida dohot tu hinajahat ni pangalahonasida; hombar tu parulaon ni tangannasida baloshon tu nasida, tubolhon tu nasida pambahenannasida i.

⁵Ai ndang pardulina mangantusi angka jadijadian ni Jahowa manang parulaon ni tanganna; lohaonna ma nasida sogot jala ndang be paulionna nasida.

⁶(II.) Pinuji ma Jahowa, ai nunga ditangihon soara ni sombasombangki.

⁷Jahowa do pargogongku dohot lombulombungku, marhaposan tu Ibana do rohangku, jadi dapotan pangurupion ahu; asa marolopolop ma rohangku jala pujion ni endengku ma Ibana.

⁸Jahowa do pargogonasida jala partanobatoan ni angka hatuaon ni Messiasna i do Ibana.

⁹Sai tumpahi ma bangsomi jala pasupasu bangso na niainmi, sai parmahan i jala usungi ma nasida ro di salelenglelengna.

29¹Ende sian si Daud. Lehon ma tu Jahowa, hamu ale angka anak ni Debata, lehon ma tu Jahowa hamuliaon dohot hagagoon.

²Lehon ma tu Jahowa hamuliaon ni goarna, marsomba ma hamu tu Jahowa mamangke pangkean parhadohoan.

³ Soara ni Jahowa do di atas ni angka aek, Debata ni hamuliaon parohon ronggur, Jahowa do di atas aek angka na bolon.

⁴ Soara ni Jahowa do mardongan hagogoon, soara ni Jahowa mardongan hatongamon.

⁵ Soara ni Jahowa do umpunokkon angka hau ares jala dipunokkon Jahowa do angka hau ares ni Libanon.

⁶ Huhut panihalnihalon nasida dibahen, songon anak ni lembu, nang Libanon nang Sirion songon anak ni horbo jalang.

⁷ Soara ni Jahowa do manggurasahon jilam ni api.

⁸ Soara ni Jahowa do mambahen humuntal halongonan, dihuntal Jahowa do halongonan Kades.

⁹ Soara ni Jahowa do mambahen marasar angka tini, jala dipalanga do angka tombak, jala sude na di bagasan jorona i mandok: Hamuliaon!

¹⁰ Marhabangsa do Jahowa mangkorhon aek na sumar, jala marhabangsa do Jahowa, paboa raja ro di salelenglelengna.

¹¹ Lehonon ni Jahowa do sogot pargogo tu bangsona i, tumpahan ni Jahowa do sogot bangsona mardamedame.

30¹ Ende sian si Daud laho pasahathon bagas i tu Debata.

² (I.) Patimbulonku ma Ho, ale Jahowa, ai Ho do manganet ahu sian godung, jala ndang

dipalas Ho roha ni angka musungku mida ahu.

³Ale Jahowa, Debatangku, tu Ho do ahu manganguhi, jadi dipamalum Ho ahu.

⁴Ale Jahowa, nunga dipanangkok Ho tondingku sian banua toru, nunga dipangolu Ho ahu sian angka na manuruki hinambor.

⁵Puji ma Jahowa, hamu ale angka na niasianna, jala endehon hamu ma barita ni habadiaonna i!

⁶Ai tongkin do panombo ni rimasna, alai saleleng mangolu do ianggo asi ni rohana; botarina i sorang partangison, hape manogotna i masa parolopolopon.

⁷(II.) Alai anggo ahu ningku do, saleleng sonang ahu: ndang tagamon humordit ahu salelenglelengna.

⁸Ho do, ale Jahowa, pagonting dolokku sian denggan ni basam; ditabunihon Ho do bohim, jadi tarhatotong ahu.

⁹Tu Ho do ahu joujou ale Jahowa, jala tu Jahowa do ahu marhuraja.

¹⁰Tung aha ma labam di mudarhi, di hatutuathu tu godung? Tung tagamon ma pujion ni orbuk Ho, manang manjamitahon hasintonganmi?

¹¹Sai tangihon ma, ale Jahowa, jala asi roham mida ahu! Sai Ho ma Sipartumpak di ahu ale Jahowa!

¹²Nunga dihosing Ho andungku gabe endengku, nunga ditanggal Ho horingku,

dung i dihooshon Ho do tu ahu las ni roha.
(30-13) Asa pujion ni hamuliaon tondingku
Ho, ndang marpansadian. Sai pujionku do Ho,
ale Jahowa, Debatangku salelenglelengna.

31 ¹Ende sian si Daud.

²(I.) Tu Ho do, ale Jahowa,
ahu marhaposan, unang tung paurak
ahu salelenglelengna, sai palua ma ahu
marhitehite hatigoranmu!

³Sai paeleng ma pinggolmu tu ahu, hapogani
paluahon ahu; sai Ho ma gabe dolok batu
partanobatoan di ahu, gabe huta na gonting
laho pangoluhon ahu.

⁴Ai Ho do partanobatoanku hian dohot
pangondianku, jala ala ni goarmu sai
iringiringonmu jala toguonmu ahu.

⁵Sai tanggalanmu do ahu sian jorgong, na
buni tinaonnasida i mambuat ahu, ai Ho do
partanobatoanku.

⁶Tubagasan tanganmu do hupasahat
tondingku, nunga ditobus Ho ahu, ale Jahowa,
Debata ni hasintongan i.

⁷Sai huhagigihon do angka na marsomba
ganaganaan na so marniula, alai anggo ahu,
Jahowa do na huhaposi.

⁸Sai marolopolop jala marlas ni roha ma
ahu bahen mida asi ni roham, na tinatapmu
dangolhon, na marbinoto i Ho di angka
hagogotan ni tondingki.

⁹Jala ndang dipadapot Ho ahu tu tangan ni musu, dipajongjong Ho do pathu di halambason.

¹⁰Asi ma roham di ahu, ale Jahowa, ai hagogotan do ahu, pola do lotop matangku binahen ni haarsahon, maras do rohangku dohot dagingku.

¹¹Ai nunga suda ngolungku dibahen hamarason, suda dohot angka taonhu dibahen angguhangguk, merus do gogongku dibahen dosangki, jala ndang mangalo be holiholungku.

¹²Jadi gabe parbilean do ahu maradophon sude angka alongku dohot hombarhu hundul, jala tarsonggot situtu do angka donganku magodang; marsidingsiding be do angka na marnida ahu di balian.

¹³Nunga tung lupa ahu sian roha, songon halak na mate, sobokkon ngarngar na ambolongan nama ahu.

¹⁴Ai sai hupabegebege do husiphusip ni torop halak, habiaran humaliang; sai marluhut i do nasida martuptup i ahu, mambuat hosangku do dipingkiri nasida.

¹⁵Alai anggo ahu, tu Ho do ahu marhaposan, ale Jahowa, ningku do: Ho do Debatangku.

¹⁶Marguru tu tanganmu do angka parsoriongki, sai palua ma ahu sian tangan ni angka musungku dohot sian angka na mangalotongi ahu.

¹⁷ Sai pasondangkon ma bohim tu naposom, jala tumpahi ahu marhitehite asi ni roham.

¹⁸ Ale Jahowa, sai unang paura ahu, ai Ho do na hujou; sai tarurak ma nian sogot angka parjahat jala hohomhohom di bagasan banua toru.

¹⁹ Ingkon mangungu ma nian angka bibir pargabus, angka na jungkat marpangkuling tu partigor mangasahon hajungkaton dohot haelakon.

²⁰ (II.) Tung na godang situtu do denggan basam, na pineopmu di angka na mangkabiari Ho, na binahenmi tu angka na mangkaposi Ho di adopan ni manisias.

²¹ Diondingi Ho do nasida marhitehite pangondingan ni bohim maradophon pandoboan ni jolma, ditabunihon Ho do nasida di bagasan undungundung maradophon pamodaion ni angka bibir.

²² Pinuji ma Jahowa, ai tung na sumurung do asi ni rohana di ahu di bagasan huta na gonting.

²³ Langgo ahu nunga pola hudok ni hatahutonku: nunga sirang ahu sian adopan ni matam! - Hape ditangihon Ho do soara di angguk i uju manganguhi ahu tu Ho.

²⁴ Sai haholongi ma Jahowa, sude hamu angka na niasian, dijaga Jahowa do angka na porsea, alai mardapotdapot do dibaloshon tu angka sibahen hajungkaton. (31-25) Sai

marsihohot ma rohamuna jala togu, sude hamu angka na mangkalungunhon Jahowa!

32¹Ende sipodaon sian si Daud. (I.)

Martua ma manang ise naung sinesaan pangalaosina, naung hinungkupan dosana.

²Martua ma jolma, ia so dijujur Jahowa tu ibana hajahaton, jala ndang marpangalensem tondina di bagasan.

³Ai saleleng huhasiphon dosangku reung do holiholingu, dibahen anggukku ganup ari.

⁴Ai sai didondoni tanganmu do ahu arian dohot borngin, jadi marsik do mudarhu songon di hamamasa ni logo ni ari. Sela.

⁵Jadi hupabotohon ma tu Ho dosangku jala ndang huhungkupi salangku; ningku do: Topotanku ma angka pangalaosingku tu Jahowa, jadi marpamuati do roham di utang ni dosangki.

⁶Ala ni martangiang ma tu Ho sude na lidang marroha di tingki parsaulian; tongon do, nang pe ro tahop angka aek magodang, ndang tagamon sampe ianggo tu ibana.

⁷Ho do pangondianku, sai jagaonmu do ahu sian parmaraon, sai haliangknonmu do tu ahu olopolop ni haluaon. Sela.

⁸(II.) Huparrohai jala hupodai pe ho taringot tu dalan sidalananmu, huringiring pe ho dohot pamereng ni matangku.

⁹Unang tung songon hoda hamu, manang songon halode na so marroha, ndang olo dumonok tu ho, nda pinatunduk ni kongkang.

¹⁰Tung na lan do parniahapan ni parjahat, alai manang ise na marhaposan tu Jahowa, haliangkononna tusi asi ni roha.

¹¹Marlas ni roha ma hamu mida Jahowa, jala marolopolop ma hamu, ale angka partigor, jala marende ma sude hamu angka parsihohot marroha.

33¹(I.) Marolopolop ma hamu, ale angka partigor, mangasahon Jahowa, talup do marende angka na unjur marroha.

²Puji hamu ma Jahowa mardongan hasapi, marende ma hamu umpuji Ibana, mardongan hasapi na martali sampulu.

³Endehon hamu ma ende na imbaru tu Ibana, padenggan hamu ma soara ni sarune.

⁴Ai na sintong do hata ni Jahowa, jala marhaburjuon do sude pambahenanna.

⁵Ibana mangkaholongi hatigoran dohot uhum, gok asi ni roha ni Jahowa do tano on.

⁶Marhitehite hata ni Jahowa do manjadi angka langit, jala marhitehite hosa ni pamanganna sude angka paranganna.

⁷Ibana papunguhon aek ni laut i, songon timbunan, angka parartaanna do angka lung i dibahen.

⁸Sai marhabiaran maradophon Jahowa ma sude tano on, jala marsomba tu Ibana ma sude pangisi ni portibi on.

⁹Ai mangkuling Ibana, gabe manjadi do, mandokkon do Ibana, jadi jongjong ma.

¹⁰Jahowa do pahusorhon tahi ni angka parbegu, ditulaktulak do pingkiran ni angka bangso.

¹¹Ianggo sangkap ni Jahowa sai na hot do salelenglelengna, pingkiran ni rohana pe marsundutsundut do.

¹²(II.) Martua ma bangso na mardebatahon Jahowa, bangso na pinillitna laho ainonna.

¹³Manatapnatap do Jahowa sian banua ginjang marnidajolma manisiasudena.

¹⁴Manatapnatap do Ibana sian ojahan ni habangsana dompak sude pangisi ni tano on.

¹⁵Ibana do manjadihon rohanasidasudena, diantoi do sude pambahenannasida i.

¹⁶Ndada hinadeak ni parangan pamonangkon raja, ndada hinatimbul ni gogo paluahon na begu.

¹⁷Pangalensem do nang hoda panumpahi, jala ndang hinatimbul ni gogona paluahon ibana.

¹⁸Ida ma, sai nolnol do mata ni Jahowa tu angka na mangkabiari Ibana, angka na mangkalungunhon asi ni rohana.

¹⁹Asa dipalua tondinasida sian hamatean, jala dipangolu nasida di haleon.

²⁰Sai dihalungunhon rohanami do Jahowa, Ibana do panumpahi dohot lombulombunami.

²¹Ai mangasahon Ibana marlas ni roha do hami, marhaposan tu goarna na badia i do hami.

²²Sai pasonggop ma asi ni roham tu hami,
ale Jahowa, hombar tu pangkalungunhonnami
di Ho.

34¹Ende sian si Daud, uju nalalaen ibana
dipaula di jolo ni raja Abimelek, na
palahohon ibana, gabe muli ibana.

²(I.) Pujionku ma Jahowa sipatsipat ni
ari, sai tong ma pujipujianna di bagasan
pamanganku.

³Jahowa do dipartanggulhon rohangku,
begeon ni angka na dangol ma i, jadi las ma
rohanasida.

⁴Dongani hamu ma ahu pasangaphon
Jahowa, rap ma hita patimbulhon goarna i.

⁵Hulului do Jahowa, jadi dialusi ahu, jala
dipalua ahu sian angka hagogotanku sudena.

⁶Sai manatapnatap nasida tu Ibana, jadi
sihar ma panailinasida, jala na so tupa tarila
bohinasida i.

⁷Joujou do na dangol on, gabe ditangihon
Jahowa, jala dipalua do ibana sian
hagogotanna sudena.

⁸Marsaro do suruan ni Jahowa humaliang
angka na mangkabiari Ibana, jala dipalua
nasida.

⁹Dai jala ida hamu denggan basa ni Jahowa,
martua ma baoa na marhaposan tu Ibana.

¹⁰Habiari ma Jahowa, hamu ale angka
na badiana! Ai ndang hurangan angka na
mangkabiari Ibana.

¹¹ Anturaparon jala haleon on do angka anak ni singa, alai ndang hurangan di nasa na denggan angka na mangalului Jahowa.

¹²(II.) Ro ma hamu, ale angka anaha, manangihon hatangkon, asa huajarhon tu hamu parture ni biar mida Jahowa.

¹³Ise do baoa na mangkalomohon hangoluan on, mangkaholongi ariari marnida na denggan.

¹⁴Sai jaga ma dilam maradophon hajahaton, jala bibirmu maradophon pangkuling sipaotooto.

¹⁵Sumurut ma ho sian hajahaton, jala ulahon na denggan, lulu i hasonangan jala pareak ma i.

¹⁶Sai manatap do mata ni Jahowa tu angka partigor, jala pinggolna tu angguknasida.

¹⁷Matua alo ni angka sibahen na jat do bohi ni Jahowa, asa disiaphon sian tano on baritanasida i.

¹⁸Manganguhi do angka partigor, gabe ditangihon Jahowa do, jala dipalua nasida sian hagogotannasida sudena.

¹⁹Donok do Jahowa di angka na bojok marroha, jala ditumpahi do angka na pogos tondi.

²⁰Lan pe parniahapan ni partigor, alai dipalua Jahowa do ibana sian sudena i.

²¹Ibana mangaramoti holiholina sudena, ndang maponggol nanggo sada.

²²Sai hamatehonon ni parjahat do hajahaton, jala sai marutang do sogot angka na mangkosom partigor. (34-23) Ditobus Jahowa do hosa ni angka naposona, jala ndang marutang sogot sude na marhaposan tu Ibana.

35¹Ende sian si Daud. (I.) Badai, ale Jahowa, angka na mambadai ahu, musu i angka na mamusui ahu.

²Sintak ma lombulombu na bidang dohot na metmet, jala hehe ma Ho mangurupi ahu.

³Hitir i ma hujur, jala ambat angka na mangalele ahu, dok ma tu rohangku: Ahu do hatuaonmi.

⁴Ingkon maila jala murak ma nian sogot angka na mangalotongi hosangki, sai sumurut tu pudi jala tarjimpot ma angka na marsangkapi hamagoanku.

⁵Ingkon sobokkon rapanrapan ma nasida maradophon alogo, jala suruan ni Jahowa ma mamonsa nasida.

⁶Sai gabe haholomon dohot hamororon ma dalannasida i, jala suruan ni Jahowa mangalotongi nasida.

⁷Ai buni do ditaon nasida jorgongna dompak ahu soada alana, dihali do sada godung padapot hosangku nian, soada alana.

⁸Sai ro ma tu ibana hadodobur, so pangkirimanna, jala jorgongna, na tinaonna i buni padapot ibana, mardobur ma ibana tubagasan.

⁹Asa marolopolop rohangku mida Jahowa, jala marhinsa mida hatuaon na sian Ibana.

¹⁰Ingkon sude angka holiholingu mandok: Ale Jahowa, ise ma songon Ho, na paluahon na dangol sian na gumogo sian ibana, nang na dangol dohot na pogos sian na mandobo ibana!

¹¹Hehe do angka sitindangi hajahaton, na so hupabotoboto do diusousoi tu ahu.

¹²Najat do dibahen nasida tu ahu balos ni na denggan; tarduru do hosangku dibahen.

¹³Ianggo ahu nian, hori do abithu jumpa marsahit nasida, hupapeak do rohangku marpuasa, jala mulak tu ampuanku do tangiangku.

¹⁴Sobokkon aleale, sobokkon dahahang ibana pangalahongku hubahen, tungki jala donda do pangalangkanku, songon na marhinamagohon ina.

¹⁵Hape marlas ni roha jala marpungupungu do nasida di hadadapothon, marpungupungu pallampusung, angka na so hutanda tumahi ahu, sai marlesanlesan do nasida, ndang marpansohotan.

¹⁶Udur do nasida dohot angka simanggoanggo patungoripon dampak ahu.

¹⁷Ale Tuhan, sadia leleng on do paidaidaonmu? Sai paulak ma hosangku sian hamagoan binahennasida, sian anak ni singa hosangku na tarpunjung.

¹⁸Pujionku ma Ho di luhutan na balga, jala baritahononku ma Ho di hatorapan.

¹⁹Sai unang ma marlas ni roha angka musungku pangansi mida ahu, angka na mangkasomorhon ahu, soada dalanna, angka na masihidopan.

²⁰Ai ndada hadameon dihatahata nasida, sai ditubutubui do hata sipaotooto dompak angka partobok isi ni tano i.

²¹Jala sai dipangangang do babanasida dompak ahu, angka ninna do: E, debai, e, debai! Ndi nunga tung huida hami!

²²Diida Ho do i, ale Jahowa, unang sai sip Ho! Unang mandaodao Ho sian ahu, ale Tuhan!

²³Sai ngot ma Ho jala tarsunggul mangaluluhon uhum di ahu di parbadaankon, ale Debatangku jala Tuhanku.

²⁴Sai uhum ma ahu hombar tu hatigoranmu, ale Jahowa, Debatangku, asa unang marlas ni roha nasida mida ahu.

²⁵Asa unang angka didok di bagasan rohanasida: E, debai, i ma lomo ni rohanami! Unang tardok nasida; nunga hupolgaki hami ibana.

²⁶Ingkon maila ma nian jala murak saluhut angka na mangkalashon hinamagongki, maruloshon hilaon dohot haurahon ma angka na manggakgak dompak ahu.

²⁷Sai marolopolop jala marlas ni roha ma angka na mangkalomohon hatigoranki, angka

na tongtong mandok: Timbul do Jahowa, na lomo roha di hasonangan ni naposona!

²⁸Jala sai paboaboaon ni dilangku do hatigoranmi, sipatsipat ni ari pujionna Ho.

36 ¹Ende sian si Daud, naposo ni Jahowa.

²(I.) Di bagasan rohangku do pangkuling ni pangalaosion tu parjahat i: Ndang marhabiaran tu Debata rohana.

³Laos i do mangela ibana paimpolimpol matana mangulahon hajahatonna, sunisunian i.

⁴Getegete dohot pangansion do hatahata ni pamanganna, nunga mansadi ibana mamingkiri mangulahon na denggan.

⁵Getegete nama dipingkiri di atas podomanna i, dalan na so ture i nama ditopot, ndang be dihabiasion najat i.

⁶(II.) Tolhas ro di langit do angka asi ni roham, ale Jahowa, tolhas ro di angka ombun do hasintonganmu.

⁷Sobokkon angka dolok ni Debata do hatigoranmu, doshon aek na sumar do angka panguhumu, diparmudu Ho dojolma dohot pinahan ale Jahowa.

⁸Tung na arga situtu do asi ni roham, ale Debata! Jadi marhaporusan di parlinggoman ni habongmu do angka anak nijolma.

⁹Dihamahaphon nasida do tabotabo ni bagasmu, jala dipainumhon Ho do tu nasida sian batang aek ni angka hahinsaonmi Edenmi.

¹⁰Ai di lambungmi do mual hangoluan, di bagasan hatiuronmi huida hami hatiuron.

¹¹Sai panene ma asi ni roham tu angka na tumanda Ho jala hatigoranmu tu angka na unjur marroha.

¹²Sai unang ditunjang tot ni haginjangon ahu, jala sai unang dilotongi tangan ni angka parjahat i ahu. (36-13) Marragean ma disi angka siulahon hajahaton, diompashon do nasida, jadi ndang tarbahen nasida be hehe.

37 ¹Ende sian si Daud. Sai unang ma mohop ateatem mida angka parjahat i, jala unang mangiburu Ho mida angka siulahon hajungkingon.

²Ai doras do nasida sabion songon duhutduhut, jala marmalosan nasida songon tumbur ni duhutduhut.

³Sai marhaposan tu Jahowa ma ho jala ulahon na denggan; inganhon ma tano i jala radoti haburjuon.

⁴Jala halomohon Jahowa, jadi lehononna ma tu ho pinangido ni roham.

⁵Pasahat ma dalanmu tu Jahowa jala haposi Ibana, asa Ibana paturehon.

⁶Jadi paulloponna ma hatigoranmu, songon hatiuron dohot hapintoronmi songon tingkos ni ari.

⁷Pasombu ma Jahowa, jala Ibana paimaima; sai unang mohop roham midajolma na mardohar dalanna, mida baoa siulahon getegete.

⁸Otapi rimas jala tadingkon mohopmohop;
unang sai hamohophon tu roham, ai laho tu
najat do i.

⁹Ai sai na siap do sogot angka parjahat i,
alai sai na teanon ni angka na mangkaposi
Jahowa do tano i sogot.

¹⁰Tongkinnari ndang disi be parjahat i, jala
ia ditingkir ho ingananna, ndang be jumpang.

¹¹Alai sai na teanon ni angka parlambohi do
sogot tano i, jala hahilashononna hinadeak ni
hadameon.

¹²Sai ditahii parjahat i do partigor i jala
dipaturonsiti iponna dompak ibana.

¹³Alai diengkelengkel Tuhan i do ibana, ai
diida do haroro ni arina.

¹⁴Diumpat angka parjahat i do podang jala
disintak siornasida i pagadaphon na dangol
dohot na pogos mamotongi angka na burju
marpangalaho.

¹⁵Hape ateatenasida sandiri do ditopot
podangnasida i, jala angka ponggol do
siornasida i.

¹⁶Tagonan do na otik pineop ni partigor sian
hamoraon jong ni torop angka parjahat.

¹⁷Ai angka ripuk do sogot botohon ni angka
parjahat i, alai ditungkol Jahowa do angka
partigor i.

¹⁸Diboto Jahowa do angka ari ni parlidang i,
jala saleleng ni lelengna do teanteanonnasida.

¹⁹Ndang tagamon murak nasida di tingki hagogotan, jala sai butong do nasida di hamamasa ni haleon.

²⁰Ai sai na siap do sogot angka parjahat i, jala sobokkon hajagaron ni ladang do angka musu ni Jahowa, sai na gabe timus do nasida muse.

²¹Marsali do parjahat i, hape ndang digarar; alai marasi roha jala mardenggan basa ianggo partigor i.

²²Ai angka na tinumpakna i do tumean tano i sogot, jala sai na siap do sogot angka na tinoruanna i.

²³Jahowa do pahothon langkalangka ni baoa, jala dihalomohon do dalanna i.

²⁴Tinggang pe ibana, ndada laos sarat, ai ditungkol Jahowa do tanganna.

²⁵Dakdanak ahu jolo, nunga pola matua ahu, ndang dung dope huida tartading partigor manang mangidoido sipanganon pinomparna i.

²⁶Sai mardenggan basa do ibana jala pasalihonsa ganup ari, jadi parhitean ni pasupasu do pinomparna i.

²⁷Sumurut ma ho sian najat i, jala ulahon na denggan, asa maringanan ho salelelenglelengna.

²⁸Ai holong do roha ni Jahowa mida uhum jala ndang tagamon tadingkononna angka na niasianna; sai ramotanna do nasida

salelenglelengna, alai anggo pinompar ni angka parjahat i siap do sogot.

²⁹Teanon ni angka partigor i do sogot tano i, jala tongtong do nasida maringanan disi.

³⁰Mamodahon habisuhon do pamangan ni partigor i, jala mangkatahon uhum do dilanai.

³¹Dipeop rohana do patik ni Debatana, ndang tagamon humordit angka langkana i.

³²Sai mangonggop do parjahat dompak partigor i, naeng bunuonna ibana ditahi rohana.

³³Alai ndang tagamon lehonon ni Jahowa ibana tu tanganna, manang tung toruanna ibana, di na hona uhum ibana.

³⁴Haposi ma Jahowa jala paihutihut dalanna i, jadi patimbulonna ma ho tumeana tano i, idaيداonmu ma hasisiap ni angka parjahat.

³⁵Huida ma sada parjahat na sumalin jala manurumbun ibana songon hau na rugun di hatubuanna.

³⁶Jadi mamolus iba, hape ndang disi be; pola do hulului ibana, hape ndang jumpang.

³⁷Sai matahon na lidang i jala bereng na tigor i, ai sai hadameon do ujung ni halak sisongon i.

³⁸Alai sai siap do sogot angka pangalaosi sudena, pinompar ni angka parjahat pe siap do.

³⁹Sian Jahowa do ianggo hatuaon ni angka partigor, Ibana do partanobatoannasida di tingki hagogotan.

⁴⁰Ditumpak jala dipalua Jahowa do nasida dipalua do nasida sian angka parjahat i, jala ditumpahi nasida, ai marhaposan tu ibana do nasida.

38¹Ende sipaingot sian si Daud.

²Ale Jahowa, unang ahu pinsang di bagasan rimasmu, jala unang ajari ahu di parpiarpiar ni murukmu.

³Ai nunga pantik tu ahu angka sumbiam, jala didondoni tanganmu ahu.

⁴Ndang adong be na hisar di dagingku binahen ni rimasmu, ndang be marhasonangan holiholingu dibahen dosangu.

⁵Ai disalpui angka dosangki do ulungku, madokdokhu do angka huhilala, songon siboanon na dokdok situtu.

⁶Nunga pola bau jala malala angka barongki dibahen otongku.

⁷Puhung jala tungki situtu do ahu, sai martujungtung do ahu mardalan manipat ari.

⁸Ai gok gara do huhilala angka haehaengku, jala ndang adong be na hisar di dagingku.

⁹Jogal jala lampot situtu do dagingku huhilala, sai mangangguk badar do ahu dibahen ponjot ni rohangku.

¹⁰Iale Tuhan, peak di jolom do sude na pinangido ni rohangku, jala ndang buni sian Ho parhoingki.

¹¹ Sai mulbahulbak do pusupusungku, ndang margogo be ahu, jala hatiuron ni matangku pe ndang disi be.

¹² Sai mandaodao do jongjong angka na marhamaolhon ahu, angka donganku pe ro di angka na solhot tu ahu marnida parniahapanku.

¹³ Jala bostang do ditaon angka na tumahi hosanku, jala sai patahitahi parhilangon do angka na mangalului hamagoanku, jala pangansion do dipahatahata ganup ari.

¹⁴ Alai songon halak na nengel do ianggo ahu, ndang hupatangitangi, jala songon halak na ngungu, na so pabuha pamanganna.

¹⁵ Jala songon halak na so marbinege do ahu, jala na so marpaminsang pamanganna.

¹⁶ Ai marhaposan tu Ho do ahu, ale Jahowa, sai Ho ma mangalusi, ale Tuhan Debatanku.

¹⁷ Ai ninna rohangku do: Sai unang ma marlas ni roha nasida mida ahu, nasida angka na mangunteas dampak ahu di na tarsulandit i pathu.

¹⁸ Ai naengnaeng tinggang do ahu, jala sai tong sonson di jolongku parniahapanki.

¹⁹ Ai hutopoti do dosanku, jala holsoan ahu ala ni dosanku.

²⁰ Alai anggo angka musungku haroro ni gogona do, jala torop do nasida angka na mangkosom ahu, soada alana.

²²Sai unang ma tadingkon ahu, ale Jahowa, Debatangku! Sai unang paholang Ho sian ahu! (38-23) Sai hapogani ma mangurupi ahu, ale Tuhan, hatuaonku.

²(I.) Ninna rohangku do: Sai jagaonku do
angka pangalahongku maradophon dosa
marhite sian dilangku, jagaonku do huntam
ni pamanganku, saleleng di jolongku dope
parjahat i.

⁴Sai mohop do ateatengku di bagasan ahu, lam hupingkiri, lam marjimbur do api, gabe mangkuling ma dilangku:

⁶Ida ma, marsasantopap do angka
ariaringku dibahen Ho, jala sobokkon soada
na ma adamhu di jolom, alogo sambing do
sude jolma, nang pe hot jongjong. Sela.

⁷ Halinu sambing do jolma i mardalani, alogo sambing do digulutgulut, sai papunguhon do ibana, hape ndang diboto, manang ise na mangahuti muse.

⁸(II.) On pe ale Tuhan, aha nama
sihaposangku? Marhaposan tu Ho nama ahu.

⁹Sai palua ma ahu sian angka
pangalaosingku sudena, unang ahu
bahen sieleseleson ni na oto.

¹⁰Sai hohom nama ahu, ndang hubungka be
pamanganku, ai Ho do mambahensa.

¹¹Sai paholang ma sian ahu linsinglinsingmi,
nunga pola madamor ahu dibahen pangonai
ni tanganmu.

¹²Molo dilinsingkon Ho angka linsinglinsingi
tujolma, ala ni dosa, gabe mabaor ma
hinaulina songon pinangan ni ngitngit; alogo
saming do jolma i sudena. Sela.

¹³Sai tangihon ma tangiangku, ale Jahowa,
jala pinggol anggukkon! Unang sai sip Ho
mida iluilungku, ai pardagang do ahu di
lambungmi, paisolat songon angka daompung
sudena. (39-14) Sai padao ma pamerengmu
sian ahu, asa hupasihar ahu, tagan so laho
dope ahu gabe pidom.

40¹Ende sian si Daud.

²(I.) Sai tong do huhaposi Jahowa,
jadi dipaeleng Ibana dirina tu ahu, jala
ditangihon alualungku.

³Jala dienet ahu tu ginjang sian godung
halonongan, sian dore na pilhot, jala
dipajongjong tothu tu atas ni dolok batu,
marsihohot langkalangkangku dibahen.

⁴Dung i dilehon muse ende na imbaru
tubagasan pamanganku, pujipujian tu

Debatanta. Lan do na marnidasa, gabe mabiar nasida, jala marhaposan tu Jahowa.

⁵Martua ma baoa na mambahen Jahowa haposanna, jala na so olo marbalik paihuthon siginjang roha i, angka na paulaula gabus.

⁶Torop do angka halongangan dohot sangkapsangkap dibahen Ho humongkop hami, ale Jahowa, Debatanku, ndang tarpajojo tu Ho, nang pe naeng baritahononku jala paboakonku, ndang tarpajojo tahe dibahen toropna.

⁷Ndang lomo roham di pelean sipotongon dohot sipanganon, ditura Ho pinggolhu duansa, ndang dipangido Ho pelean situtungon dohot pardosaon.

⁸Jadi ningku ma: Ida ma, nunga ro ahu mamboan buku, na sinurat taringot tu ahu.

⁹Dipangido rohangku do patupahon lomo ni roham, ale Debatanku, jala di parsitongaan ni rohangku do patikmi.

¹⁰Hubaritahon do hatigoran di luhutan na bolon i; ida ma, ndang hututup bibirhu, diboto Ho do i, ale Jahowa.

¹¹Ndang hutabunihon hatigoranmu di bagasan rohangku; sai hupaboaboa do hasintonganmu dohot hatuaonmi; ndang huporso asi ni roham dohot habonaronmi tu luhutan na bolon.

¹²(II.) Ho, ale Jahowa, sai unang polpol angka asi ni roham sian ahu: Denggan basam

dohot habonaronmi ma mangaramoti ahu tongtong.

¹³Ai tuk do humaliang ahu angka parsorion, maradu so habilangan, disoro angka dosangu do ahu, gabe so malo ahu marnida, tumorop do angka i sian obuk ni ulungku, jala diparsitadingi rohangku do ahu.

¹⁴Sai lomo ma roham, ale Jahowa, paluahon ahu! Hapogani ma, ale Jahowa, mangurupi ahu!

¹⁵Ingkon maila nian jala murak sude angka na paburuburu hosangu laho maniaphon nian. Ingkon sumurut tu pudi jala murak nian angka na mangkalomohon hinamagongki.

¹⁶Ingkon tarhatotong nian nasida ala ni haurahonnasida i, angka na mandok tu ahu: E, debai! E, debai!

¹⁷Ingkon marolopolop nian jala marlas ni roha di bagasan Ho sude angka na mangalului Ho, ingkon tongtong ma dohonon ni angka na mangkaholongi hatuaonmi: Timbul do Jahowa! (40-18) Dangol pe ahu jala pogos, Tuhan i do sumarihon ahu. Ho do pangurupingku dohot sipalua ahu! Ale Debatangku, sai unang pabenda!

41 ¹Ende sian si Daud.

²(I.) Martua ma halak na manatap uhum tu na soro ni ari on, sai paluaon ni Jahowa do ibana di ari hinamago.

³Ramotan jala pangoluon ni Jahowa do ibana, martua do ibana bahenonna di tano

on, jala ndang tagamon lehononmu ibana ripe rupaon ni musuna.

⁴Sandeon ni Jahowa ma ibana di podoman parsahiton, dipahosing Ho do lagna sudena di parsahitonna i.

⁵(II.) Ianggo ahu ningku do: Asi ma roham di ahu, ale Jahowa, sai pamalum rohangki, ai dampak Ho do ahu mardosa.

⁶Roa do ianggo pandok ni angka musungku tu ahu: Sadihari ma ibana mate, asa pesan nian goarna i?

⁷Jala ia ro ibana mandulo, gabus do dipangkatahatahon; papungupungu hajahaton do rohana di ibana, ruar tu balian ibana, dihatahon ma i.

⁸Masihusipan do sude angka na mangkasomorhon ahu laho tumahi ahu, roa do sangkapnasida dampak ahu.

⁹Dituangkon do tu ibana hata na jahat sahali, jala ndang be tagamon hehe na peakon.

¹⁰Gari bajo hasudungan ni rohangki, na huhaposi, na manganhon indahanku manandakkon tambihul dampak ahu.

¹¹(III.) Alai anggo Ho, ale Jahowa, sai asi ma roham di ahu, jala pahehe ahu, asa hubaloshon tu nasida.

¹²Sian i do hutanda lomo ni roham mida ahu: Na so tarbahen i musungku martillahon ahu.

¹³Langgo ahu, Ho do maniop ahu di haburjuonku, jala dipajongjong Ho do ahu tu jolo ni bohim salelenglelengna. (41-14) Pinuji ma Jahowa, Debata ni Israel olat ni narobi ro di saleleng ni lelengna! Amen, Amen!

42¹Ende sipodaon sian angka anak ni si Kora.

²(I.) Songon pangkalungunhon ni ursa di angka guluan, songon i do pangkalungunhon ni tondingku tu Ho, ale Debata.

³Mauas do tondingku di Debata, ni Debata na mangolu i, andigan pe tolhas ahu, asa huida bohi ni Debata?

⁴Sai iluilungku do sipanganonku arian dohot borngin, ai manipat ari do dipandok tu ahu: Didia do Debatam?

⁵Molo sapala marningot ahu disi, jadi use ma huhilala rohangku di bagasan: Na udur i ahu najolo rap dohot angka natorop manopot bagas ni Debata, huhut marsoara olopolop dohot pujipujian rap dohot angka na laho marari raya.

⁶Boasa sai tungki ho, ale tondingku, jala boasa sai rusak ho di bagasan ahu? Haposi ma Debata, ai sai na pujionku dope Ibana, hatuaon ni bohingku jala Debatangku.

⁷(II.) Tungki do rohangku di bagasan, dibahen i marningot do ahu di Ho sian luat martopihon Jordan, dohot sian Hermon, sian dolok Misar.

⁸Sai masiharaan do angka sampuran dibahen soara ni hasakmu, sude angka ombakmu dohot galumbangmu manghungkupi ahu.

⁹Alai diparbagabaga Jahowa do asi ni rohana arian, borngin pe sai mamuji jala martangiang do ahu tu Debata ni hangoluanku.

¹⁰Jadi ningku do mandok Debata, partanobatoanki: Boasa tung dihalupahon ho ahu? Boasa ingkon sai martujungtujung ahu mardalan dibahen pangarsahi ni musu?

¹¹Nunga magopu hian holiholingku, lam diinsahi angka musungku do ahu, ai dipandatdati nasida do ganup ari mandok tu ahu: Didia do Debatam? (42-12) Boasa sai tungki ho, ale tondingku, jala boasa sai rusak ho di bagasan ahu? Haposi ma Debata, ai sai na pujionku dope Ibana, hatuaon ni bohingku jala Debatanku.

43¹(III.) Luluhon ahu, ale Debata, jala badahon badangku dompak bangso na so daulat, sai palua ma ahu sian baoa siulahon sipaotooto dohot hajengkelon.

²Ai Ho do Debata ni hagogoonku, boasa tung ambolongkononmu ahu? Boasa ingkon sai martujungtujung ahu mardalan binahen ni pangarsahi ni musu?

³Tongoshon ma hatoranganmu dohot hatigoranmu, angka na manogu ahu, pataruhon ahu tu dolok ni habadiaonmu dohot tu ingananmu.

⁴Asa tung masuk ahu tu langgatan ni Debata, tu Debata silas ni rohangku, asa hupuji Ho mardongan parhinaloan, ale Debata, Debatangku tongon.

⁵Boasa sai tungki ho, ale tondingku, jala sai rusak di bagasan ahu? Haposi ma Debata, ai sai na pujionku dope Ibana, hatuaon ni bohingku jala Debatangku.

44¹Ende sipaingot sian angka anak ni si Kora.

²(I.) Ale Debata, nunga sar dibege pinggolnami, dipajojor angka ompunami tu hami, pambahenan na binahenmi di ngolunasida, di angka ari na robi.

³Dipabali Ho do marhitehite tanganmu angka parbegu asa mangalopokkon ianggo nasida; disiaphon Ho do angka bangso, alai dipararat Ho do ianggo nasida.

⁴Ai ndada marhitehite podangnasida disoluk nasida tano i, jala ndada botohonnasida mambahen marantu nasida; tangan siamunmi dohot botohonmi dohot hatiuron ni bohim do tahe, ai dihalomohon Ho do nasida.

⁵Apala Ho sandiri do rajangku, ale Debata! Sai paborhat ma angka hatuaon ni si Jakkob.

⁶Mangasahon Ho duguduguhononnami ma angka musunami, mangasahon goarmi luntahonnami ma angka alonami.

⁷Ai ndada siorhu na huhaposi jala ndada podangki pamonang ahu.

⁸Ho do tahe pamonang hami maradophon musunami, Ho do mambahen tarurak angka na mangkasomorhon hami.

⁹Mangasahon Debata hami mamuji manipat ari, jala mandok mauiate hami di goarmi salelenglelengna. Sela!

¹⁰(II.) Hape diambolongkon jala dipaurak Ho do hami nuaeng, jala ndang borhat Ho mandongani parangannami.

¹¹Dipaundarundar Ho do hami maradophon musu, gabe dipupusi angka na mangkasomorhon hami do hami.

¹²Dilehon Ho hami songon birubiru sipanganon, jala dipaserak Ho do hami tu tongatonga ni angka parbegu.

¹³Diseaseahon Ho do bangsom manggadissa, jala ndang dipanaeknaek Ho asamnasida.

¹⁴Dibahen ho do hami sieleseleson ni hombar hundulnami, parbilean dohot marhaurahon di angka na humaliang hami.

¹⁵Dibahen Ho do hami parumpamaan di tongatonga ni angka parbegu, paregolegolan ni ulu di tongatonga ni angka bangso.

¹⁶Sai solpa do di jolongku haurahonku ganup ari, jala hailaon ni bohingku manghungkupi ahu.

¹⁷Maradophon soara ni pangelesi dohot panginsahi, maradophon musu dohot panuboli.

¹⁸(III.) Ro pe sudena i tu hami, laos so huhalupahon hami Ho, jala ndang huose hami padan binahenmu.

¹⁹Ndang sumurut tu pudi rohanami, jala ndang manambil langkanami sian dalanmi.

²⁰Hape diropuhi Ho do hami di parbueaan, jala dilungkuphon Ho do tu hami linggoman hamatean.

²¹Tung sura huhalupahon hami goar ni Debatanami, jala hupaherbang hami tangannami tu Debata sileban:

²²Tung so sisiran ni Debata i? Ai Ibana do tumanda angka sibunian ni roha.

²³Ai humongkop Ho do umbahen dibunui hami ganup ari, doshon birubiru sipotongon do hami di rohanasida.

²⁴Ngot ma Ho! Boasa sai modom Ho, ale Tuhan? Tarsunggul ma Ho, unang ambolongkon hami salelenglelengna.

²⁵Boasa tung tabunihononmu bohim, halupahononmu pardangolan dohot hagogotannami?

²⁶Ai tungki do rohanami ro di sumanggo, lohoh tu tano do butuhanami. (44-27) Sai hehe ma Ho mangurupi hami, jala palua hami, ala asi ni roham!

45¹Ende sipaingot sian angka anak ni si Kora, taringot tu holong ni roha.

²(I.) Gurgur do rohangku dibahen hata na denggan ningku do: Rajai do nampuna angka

pambahenanki angka endengki, panurat ni na pande manurat do dilangku.

³Ummuli do Ho sian angka anak nijolma, janggaleman do use tu bibirmu, ala ni do umbahen dipasupasu Debata ho salelenglelengna.

⁴Hohoshon ma podangmu tu gontingmu, ale ulubalang, ro di hamuliaonmu dohot hatongamonmu.

⁵Sai marantu ma hamuliaonmu, borhat ma Ho marhureta humongkop hasintongan dohot haserepon ni hatigoran, jadi ajaron ni siamunmu ma Ho mambahen angka halongangan.

⁶Tajom do angka sumbiami, marraggean ma angka bangso tu toru ni patmu; ditorusi do angka ateate ni musu ni rajai.

⁷Ia habangsami ale Debata, hot do ro di salelenglelengna, tungkot hatigoran do tungkot ni harajaonmi.

⁸Dihaholongi Ho do hatigoran, jala dihagigihon roham do hajahaton, ala ni do umbahen dimiakkon Debatam miak halalas ni roha tu Ho sumurung sian na tu angka donganmu.

⁹Gota Mir dohot Aloe, Cendana do angka ulosmu sudena las do roham dibahen parhinaloan na piniltihan sian angka bagas gading.

¹⁰ (II.) Angka boru ni raja do di tongatonga ni angka haholonganmu, jongjong di siamunmu do oroan i marpangkean sere sian Opir.

¹¹ Tangihon, ale boru hasian, ida jala paeleng pinggolmu, jala halupahon bangsomu dohot bagas ni amangmu.

¹² Asa dihalomohon rajai hinaulim, ai Ibana do Tuhanmu jala ingkon marsomba tu Ibana ho.

¹³ Dohot do boru Tirus, angka na mora ni bangso i, marhasiholhon bohim mardongan silua.

¹⁴ Marmulia situtu do boru ni rajai di bagasan bilut, na pinunsa dohot sere do pangkeanna.

¹⁵ Marpangkean na niangit do ibana ditogihon tu rajai, angka namarbaju alealena i ihut sian pudina, ditogihon tu Ho.

¹⁶ Marlas ni roha jala marolopolop do nasida ditogihon laho masuk tu bagas ni rajai.

¹⁷ Angka anakmu ma sumingkat amamu, pabangkitonmu ma nasida gabe pangarajai di liat portibi on. (45-18) Sai pujionku do goarmu marsundutsundut, ala ni pujion ni angka bangso ma Ho salelenglelengna.

46 ¹ Ende sian angka anak ni si Kora.

² Debata do haporusanta dohot hagogoanta, pangurupion situtu di hagogotan, angka na mangonai tu hita.

³ Dibahen i ndang mabiar hita, nang pe balik tano on, jala lalolalo angka dolok laho marongrong tu tongatonga ni laut.

⁴Nang pe gasagasaon jala margumogumo angka aekna, pola humuntal angka dolok dibahen pasangnai. Sela!

⁵Sada batang aek, ro di sungena palas roha ni huta ni Debata, inganan na badia ni Natumimbul.

⁶Debata do di tongatongana, ndang tagamon humordit, andostorang dope, nunga diurupi Debata ibana.

⁷Guntur pe angka parbegu, lonong angka harajaon, molo mangkuling Ibana, malala do tano on.

⁸Jahowa Zebaot do donganta, Debata ni si Jakkob do partanobatoanta. Sela!

⁹Sai ro ma hamu marnida halongangan angka na binahen ni Jahowa, Ibana mambahen angka panonggoti di tano on.

¹⁰Ibana do pasohothon hamusuon ro di ujung ni tano on; Ibana do umponggolhon sior jala ditallihi hujur, dipuruni do angka hureta di bagasan api.

¹¹Pasohot hamu ma jala tanda hamu Ahu do Debata, sai timbul do Ahu sogot di tongatonga ni angka bangso, timbul di tano on. (46-12) Jahowa Zebaot do donganta, Debata ni si Jakkob do partanobatoanta. Sela!

47 ¹Ende sian angka anak ni si Kora.

²Martopaptopap tangan ma sude hamu angka bangso! Puji hamu ma Debata mardongan soara olopolop!

³Ai Jahowa do na tumimbul, na songkal,
Raja bolon do Ibana gumomgom liat portibi
on.

⁴Papatuonna do angka bangso tu hita dohot
angka marga tu toru ni patta.

⁵Ibana do mamillit di hita pargolatanta,
hatimbulon ni si Jakkob, na hinaholonganna i.
Sela.

⁶Manaek do Debata mardongan
parolopoloapon, Jahowa mardongan
soara ni sarune.

⁷Sai endehon hamu ma Debata! Sai endehon
hamu ma Rajanta i! Endehon ma tutu!

⁸Ai Debata do Raja ni liat portibi on, endehon
hamu ma ende sipodaon.

⁹Debata do mangarajai angka parbegu,
hundul do Debata di atas habangsa
habadiaonna i. (47-10) Marpungu do angka
na sangap ni angka bangso tu bangso ni
Debata ni si Abraham, ai Debata do nampuna
angka lombulombu raja ni tano on, timbul
situtu Ibana.

48¹Ende sian angka anak ni si Kora.
²(I.) Timbul do Jahowa jala pujion
situtu di bagasan huta ni Debatanta, di atas
dolak habadiaonna i.

³Denggan do martagahambing, silas ni roha
ni liat portibi on do dolok Sion i, suhi na
tungan utara, huta ni Raja na timbul i.

⁴Tau partanobatoan do Debata, tartanda di
angka bagasnasida.

⁵Ai ida ma, marluhut do angka raja mandapothon.

⁶Hape dung diida nasida, pintor tarhatotong do, mabuk be do nasida maporus.

⁷Angka hitir do nasida disi, mangae songon boruboru na laho mangintubu.

⁸Diropuhi Ho do angka parau Tarsis marhitehite alogo sian habinsaran.

⁹Suman do tu barita na hubege hami do huida hami di bagasan huta ni Jahowa Zebaot, di bagasan huta ni Debatanta i, sai pahoton ni Debata do i ro di salelenglelengna. Sela.

¹⁰(II.) Ditimbang rohanami do, ale Debata, asi ni roham di parsitongaan ni joromi.

¹¹Suman tu goarmu do baritam, ale Debata, ro di ujung ni tano on, gok hatigoran do siamunmi.

¹²Marlas ni roha ma dolok Sion, marolopolop ma angka boru Juda ala ni panguhummu.

¹³Haliangi hamu ma Sion i jala liati hamu, bilangi hamu ma angka partanobatoanna i.

¹⁴Tangkasi hamu ma parikna i, sigati hamu ma angka bagasna i, asa tarpajojo hamu tu pinomparmu sogot. (48-15) Paboa Debata on do Debatanta ro di salelenglelengna, Ibana manogu hita ro di hamatean.

49¹Ende sian angka anak ni si Kora.

²Tangihon ma on, sude hamu angka bangso, tarehon ma pinggolmu, sude hamu pangisi ni hasiangan on.

³Nang hamu situasi natorop, nang raja, ro di na mora dohot na pogos!

⁴Hatahonon ni pamanganku ma habisuhon, jala hapistaran do pingkiran ni rohangku.

⁵Paelengonku ma pinggolhu tu umpama, papataronku ma hulingkulinganku mardongan parhinaloan.

⁶Boasa ma tung tahuton ahu di angka ari parhinamagoan, di na hinaliangan ni hajengkelon ni angka na mangarupa ahu?

⁷Angka na marhaposan tu sinamotna, jala dihaginjangkon hinagok ni hamoraonnasida.

⁸So manang tartobus manang ise donganna manang tarlehonsa partobusna tu Debata.

⁹Maargahu do partobus ni tondina i, ingkon pasohotonna do salelenglelengna.

¹⁰Tung mangolu ma ibana ro di salelenglelengna, so idaonna tanoman?

¹¹Ingkon idaonna do marmatean angka na bisuk i, rap mago do na oto dohot na londongan, jadi tading di na asing ma sinamotna.

¹²Ianggo rohanasida nian di bagasan: Salelenglelengna do bagasnasida i, inganannasida pe marsundutsundut, goarnasida do dibahen pambuatan ni goar ni angka golat.

¹³Hape ndang mangulonjolma di hadoharonna i doshon pinahan do nasida diragehon.

¹⁴I ma pangalaho ni angka na mangasahon haotoonna, dohot angka na mangihuthon nasida, angka na mangkalomohon hatanasida i. Sela!

¹⁵Sobokkon birubiru do nasida dipabara tu banuatoru, hamatean do marmahan nasida, jala rajaana ni angka na tigor roha i ma nasida di na sansogot i, turtaran ni banuatoru ma pinangasahon nasida i, gabe ndang adong be inganannasida.

¹⁶Alai anggo tondingki, sai tobuson ni Debata do sian tangan ni banuatorui, ai jangkononna do ahu. Sela!

¹⁷Unang ma ho tahuton, molo lam mamora sahalak, molo ganda hamuliaon ni bagasna i.

¹⁸Ai ndang boanonna sudena i di hamamatenana i, ndang ihuthonon ni hamuliaonna i ibana laho tuat.

¹⁹Ai nang pe diparhatua tondina i di ngoluna jala dipapujipuji halak ho, ala dibahen ho na denggan i tu ho:

²⁰Sai topotonna do sundut ni ompuna, angka na so marnida hatiuron salelenglelengna. (49-21) Sobokkon pinahan do ragejolma di hadoharon, molo so marroha ibana.

50¹Ende sian si Asap. Mangkuling do Debata Jahowa, jala martingting tu tano on sian habinsaran tolhas ro di hasundutan.

²Sian Sion, situana ni hinadenggan marsinondang Debata.

³Sai na ro Debatanta, jala ndang tagamon hohom Ibana, di jolona do api mandilatdilat, jala ronggur na gogo situtu humaliang Ibana.

⁴Dipio do angka langit sian ginjang, ro di tano on, asa diuhum bangsona.

⁵Papungu hamu ma tu Ahu angka na daulat marroha angka na marpadan dohot Ahu marhitehite pelean.

⁶Jadi dibaritahon angka langit ma hatigoranna, ai apala Debata do panguhum. Sela!

⁷Sai tangihon ma, ale bangsongku, asa mangkuling Ahu: Ho ale Israel, asa huhatindangkon tu ho: Ahu Debata do Debatam.

⁸Ndada ala ni peleanmi umbahen hupinsang ho, manang ala ni peleanmi situtungon, angka na tongtong di jolongku.

⁹Ndang nian pola sian jabum Ahu mambuat lombu, manang hambing sian angka baram.

¹⁰Ai guru di Ahu do sude binatang ni harangan, pinahan na marriburibu angka na di dolok pe.

¹¹Hutanda do sude pidong angka na di dolok, ro di angka na manggulmit di ladang guru di Ahu do.

¹²Tung sura male Ahu, ndang pola tu ho Ahu mangalualu, ai guru di Ahu do liat portibi on ro di isina.

¹³Tung panganonku ma juhut horbo tunggal manang inumonku mudar ni angka hambing?

¹⁴ Pelehon ma tu Debata hamauliateon, jala garari ma angka bagabagami tu Natumimbul.

¹⁵ Jala jou ma Ahu jumpa di ari hagogotan, asa hupalua ho, asa dipuji ho Ahu.

¹⁶ Alai anggo tu parjahat i ninna Debata do: Boasa tung hum ho jumamitahon angka patikki, jala leap di bagasan pamanganmu padan na hubahen i?

¹⁷ Hape dihagigihon roham do sipaingot, jala ditundalhon ho do angka hatangki.

¹⁸ Ia adong diida ho panangko, laos lomo do roham mandongani ibana, jala satahi do ho dohot angka pangalangkup.

¹⁹ Dipasombu ho do roharoha ni pamanganmu mandok najat dohot dilam mandandani sipaotooto.

²⁰ Sai hundulhundul do ho pahatahata donganmu, sai disuan ho do gasa tu anak ni inangmu.

²¹ Sai songon i do dibahen ho, jala sai sip do Ahu, jadi ninna roham ma tudoshon ho do Ahu. Sai pinsangonku do ho tahe, jala rujionku do apala di jolo ni matam.

²² Sai timbang ma i hamu, ale angka na mangkalupahon Debata, asa unang sanga husoro hamu, soadadong na paluahon.

²³ Manang ise na mamelehon hamauliateon, i do na pasangap Ahu, jala mambahen lapang, asa hupatuduhon di ibana hatuaon ni Debata.

51¹Ende sian si Daud.²Uju na ro panurirang si Natan manopot ibana, dung diparjolma Nai Batseba.³(I.) Asi ma roham di ahu, ale Debata, hombar tu denggan ni basam, sai sesa ma angka pangalaosingku hombar tu godang ni asi ni roham.⁴Ias situtu ma ahu buri sian hajahatonku, jala paias ma ahu sian dosangku.⁵Ai nunga huboto angka pangalaosingku, jala sai tong do sonson di jolongku dosangku.⁶Dompak Ho sambing do ahu mardosa, jala najat situtu do di matam na huulahon, asa tung bonar Ho di bagasan pandohanmu, pita di bagasan panguhumu.⁷Tongon do di bagasan hajahaton do ahu tubu, jala di bagasan dosa dijangkon dainang ahu.⁸Sintong ni roha di bagasan do tongon lomo ni roham, antong pabotohon ma habisuhon tubagasan rohangku.⁹Sai urasi ma ahu sian dosangku marhitehite sanggul, asa tung ias ahu; sai buri ma ahu, asa sumaksak ahu sian itak.¹⁰Sai patubegehon ma tu ahu hasonangan dohot las ni roha, asa marolopolop holiholi, angka naung ginopuanmu.¹¹Sai hungkupi ma bohim mida angka dosangki, jala sesa ma angka hajahatonku sudena.

¹²(II.) Tompa ma roha na ias di bagasan ahu, ale Debata, jala paimbaru ma tondi na marsihohot di bagasan ahu.

¹³Sai unang pabali ahu sian jolom, jala unang unsati tondim na badia i sian ahu.

¹⁴Sai pasuang ma tu ahu halalas ni hatuaonmu, jala togu ma ahu marhitehite tondi ni haringgason.

¹⁵Asa huajarhon angka dalanmu tu angka parjahat, asa mulak angka pardosa tu Ho.

¹⁶Sai palua ma ahu sian angka parsapataon mudar, ale Debata, Debata ni hatuaonku, asa dipuji dilangku hatigoranmu.

¹⁷Sai pabuha ma bibirhu, ale Tuhan, asa dibaritahon pamanganku pujipujianmu.

¹⁸Ai ndang dihalomohon roham pelean sipanganon, sai na lehononku do nian, jala ndang lomo roham di pelean situtungan.

¹⁹Angka pelean tu Debata: I ma tondi na magopu, tongon do roha na magopu dohot na bojok, ndang ditulakkon roham, ale Debata.

(51-20) Sai bahen ma na denggan tu Sion marningot denggan ni basam, sai pauli ma angka parik ni Jerusalem. (51-21) Dung i disi ma halomohononmu angka pelean hatigoran, pelean situtungan dohot pelean na sun denggan, disi ma pelehononhon angka lombu di atas langgatanmu.

52¹Ende sipodaon sian si Daud.

²Di na ro i si Doeg, halak Edom i, mangalualuhon tu si Saul paboahon tu ibana: Nunga dibongoti si Daud jabu ni si Ahimelek.

³Boasa manenganenga dirim di bagasan hajahaton, ho ale ulubalang? Manipat ari do ianggo asi ni roha ni Debata.

⁴Hamagoan do ditahitahi dilam, ho ale siulahon sipaotooto, sobokkon raut parnabung.

⁵Godangan do dihaholongi roham najat asa na denggan gabus sian na mandok hatigoran. Sela!

⁶Dihaholongi roham nasa hata simangan mangere laho mangago, ale dila pangansi!

⁷Antong, ho pe siaphonon ni Debata do ro di salelenglelengna, tangkuponna ma ho manaratnarat ho sian undungundung, jala uratanna ma ho sian tano hangoluan i. Sela!

⁸Jadi idaon ni angka partigor ma i, gabe mabiar nasida jala engkelengkelonnasida ma ibana:

⁹Ida ma, indi bajoi, na so mambahen Debata partanobatoanna, jala marhaposan tu hinadeak ni hamoraonna, hajengkelonna do dipangasahon. (52-10) Alai anggo ahu, sobokkon hau jetun na rata do di bagasan bagas ni Debata, asi ni roha ni Debata do na huhaposi ro di salelenglelengna. (52-11) Sai pujionku do Ho ro di salelenglelengna, ai Ho do sibahensa, jala sai parhanalomonku do

goarmu, ai haleaon do i maradophon angka na niasianmu.

53

¹Ende sipodaon sian si Daud.

²(I.) Ninna na oto i do di bagasan rohana: Nandang adong Debata; jahat jala sogir do nasida marpangalahohon hajahaton, ndang adong siulahon na denggan.

³Manatap manonggor Debata sian banua ginjang, marnida jolma manisia, manang na adong na marroha, na usousu di Debata.

⁴Alai tung saluhut do nasida sumurut tu pudi, tung sange do nasida marroha mago: Nandang adong siulahon na denggan, nanggo sahalak.

⁵Tung na so mananda do ulaning angka siulahon hajahaton, angka na manganhon bangsongku, songon na mangan roti? Ia Debata ndang dijou nasida.

⁶(II.) Alai tarsonggot situtu do nasida disi sogot, nang so adong habiaran; ai paserahon ni Debata do holiholi ni na tumungkum ho; tarurak do nasida bahenonmu, ai nunga diambolongkon Debata nasida. (53-7) Ise do ulaning sian Sion mangalehon hatuaon di Israel? Molo mulak sogot boanon ni Debata angka na tarbuang sian bangsona, marolopolop ma Jakkob jala marlas ni roha ma Israel.

54¹Ende sipodaon sian si Daud.²Di na ro i pangisi ni Sip, angka na mandok tu si Saul: Nda di lambungnami do martabuni si Daud?³Sai tumpahi ma ahu, ale Debata, marhitehite goarmu, jala pasintong uhum di ahu marhitehite hagagoonmu.⁴Sai tangihon ma tangiangki, ale Debata, paeleng ma pinggolmu, tumangi pangkataion ni pamanganku.⁵Ai halak na pulik marga do hehe mangalo ahu, jala angka sibahen gogo mangiran hosangki, ndang dibahen nasida Debata tu jolonasida i. Sela!⁶Ida ma Debata do situmpak ahu, Tuhan i do di tongatonga ni angka sitiopi hosangki.⁷Pasuangonna do najat i tu angka na manosak ahu, sai siaphon ma nasida marhitehite hasintonganmi. (54-8) Marroha habinsaon ma ahu mamele tu Ho, pujionku ma goarmu, ale Jahowa, ai haleaon do i. (54-9) Ai dipalua do ahu sian nasa hagogotan, jadi sombu ma matangku marnida angka musungku.**55**¹Ende sipodaon sian si Daud.²(I.) Sai tangi ma tangiangku, ale Debata, jala unang martabuni Ho maradophon parhurajaionku.³Tangihon ahu jala alusi ahu, sai monsong do pingkiranku jala marhoi ahu.

⁴Ala ni pangkuling ni musu i, ala ni panosak ni parjahat i; ai sai manggulang hamagoan do nasida tu ahu, jala marmurukmuruk situtu nasida mangkasomorhon ahu.

⁵Mamalingi do rohangku di bagasan ahu, jala hasosonggot ni hamatean maninggang ahu.

⁶Dironron habiaran jala panonditnonditon ahu jala dihungkupi hatahuton do ahu.

⁷Jadi ningku ma: Ise ulaning mangalehon tu ahu habong songon darapati! Asa habang ahu jala mangulon manang didia.

⁸Ida ma, dao ma ahu jaur, marmalamalam di halongonan. Sela!

⁹Halaputanku ma haporusan sada di ahu maradophon alogo maruohok, maradophon habahaba.

¹⁰Siaphon ma nasida ale Tuhan, bolabola ma dilanasida i! Ai uhum gogo dohot parsalisian huida di bagasan huta i.

¹¹Arian dohot borngin diliati nasida pariknasida i, jala hajahaton dohot pardangolan masa di bagasan.

¹²Hajungkaton do di bagasan, jala ndang meret pangarupaon dohot sipaotooto sian onannasida i.

¹³Ai ndada musu na mangesesi ahu, taononku do i nian, ndada parsomor hian di ahu manenganenga dompak ahu, ua martabuni ahu anggo maradophon ibana.

¹⁴Hape jolma doshon ahu do ho, partogingku jala hasudungan ni rohangku.

¹⁵Rosu situtu do itabahren paralealeon, rap mardalan do hita di hatorapan tu bagas ni Debata.

¹⁶Sai ditompuhon hamatean ma nian nasida, mangolu songon i ma nian nasida tuat tu banuatoru, ai hajahaton do masa di bagasan inganannasida, di bagasan rohanasida.

¹⁷(II.) Ianggo ahu; tu Debata do ahu mangalualu, jadi sai tumpahan ni Jahowa ma ahu.

¹⁸Bodarina i dohot manogotna i, nang di hos ni ari, sai mangalualu jala mariale ahu, jadi tangihononna ma soarangki.

¹⁹Mardamedame hosangki ditobus Ibana, asa unang tarhahua nasida ahu, ai torop situtu do nasida mangalo ahu.

²⁰Martinangi do Debata, jala pajepolonna do nasida, jala marhabangsa Ibana sian na robi. Sela! Nasida na so olo muba, jala na so mangkabiari Debata.

²¹Mangonai do tanganna tu angka alealena, diose do padanna i.

²²Landitan do hata ni pamangannai sian miak susu, hape parbadaan do ditahi rohana; lumambok do hatahatana sian miak, hape baba ni podang do angka nasida.

²³Sai tu Jahowa ma pasahat parsorionmi, jadi Ibana ma pangoluhon ho, ndang tagamon loasonna partigor i humasusa ro

di salelenglelengna. (55-24) langgo Ho, ale Debata, pangonjarhononmu do nasida tubagasan godung hamagoan, ndang eahon ni angka jolma sisopsop mudar dohot parjehe ariarinasida satonga tubu; alai anggo ahu, Ho do na huhaposi.

56¹ Ende sieheteheton sian si Daud uju na tinangkup ni halak Palistim ibana di huta Gad.

² Asi ma roham di ahu, ale Debata, ai naeng polgahan ni jolma na gale i do ahu, ganup ari disosak musu i ahu.

³ Ganup ari do naeng polgahan ni angka alongku ahu, ai torop do musu mangalo ahu sian ginjang ni roha.

⁴ Di ari hatahutanku, sai tu Ho do ahu marhaposan.

⁵ Mangasahon Debata, sai pujionku do hatana, Debata do na huhaposi, ndang tahuton ahu, tung hahuaon ni sibuk ma ahu?

⁶ Ganup ari do dipabalikbalik nasida angka hatanku, sai tu najat do pingkirannasida sudena mangalo ahu.

⁷ Sai marpungupungu do nasida mangaropi, dihampungi nasida do angka langkalangkanku, songon angka na marbajo hosangki.

⁸ Tung dapotan haluaon ma nasida tagamon di hajahatonna i? Tinggangkon ma angka bangso di bagasan rimas, ale Debata!

⁹Dibilangi Ho do paraotaotanku, sai bahen ma iluilungku tubagasan tabutabumu! Tung so tarsurat angka i di bagasan bukumu?

¹⁰Ingkon sumurut tu pudi sogot angka musungku, di ari pangalualuanku; tangkas do huboto on: Debata do mandongani ahu.

¹¹Mangasahon Debata, pujionku do hata i, mangasahon Jahowa, pujionku do hata i.

¹²Marhaposan tu Debata do ahu, ndang tahuton ahu, tung hahuaon ni jolma i ahu?

¹³Sai dondon do tu ahu angka bagabaga tu Ho, ale Debata, sai gararonku do tu Ho angka pelean hamauliateon. (56-14) Ai nunga dipalua Ho dosangku sian hamatean, pathu pe sian partuktuhan, asa marpangalaho ahu di jolo ni Debata, di bagasan hatiuron ni hangoluan.

57 ¹Ende sieheteheton sian si Daud, di hapoporosna maradophon si Saul tubagasan liang.

²(I.) Sai asi ma roham di ahu, ale Debata, asi ma roham di ahu, ai marhaporosan tu Ho do rohangku, jala di linggom ni habongmi do ahu marondingonding, paima salpu parmaraan i.

³Sai mangalualu tu Debata na tumimbul i do ahu, tu Debata, siluluhon ahu.

⁴Tongoshononna do sian banua ginjang, asa manumpahi ahu, pauraonna do na naeng mamolgak ahu. Sela! Tongoshonon ni Debata do asi ni rohana dohot hasintonganna.

⁵Di tongatonga ni angka singa do hosangki, marsaro do ahu di tongatonga ni angka na gara marroha, angka jolma manisia, doshon hujur dohot sumbia do iponnasida, jala doshon podang na tajom do dilanasida i.

⁶Sai patimbul ma dirim, ale Debata, tu atas ni langit, hamuliaonmu, tu sandok tano on.

⁷Nunga ditaon nasida jorgong di langkalangkanku, nunga tarjimpot rohangku; nunga dihali nasida di jolongku sada godung, hape nasida sandiri madabu tubagasan. Sela!

⁸(II.) Nalom do rohangku, ale Debata, nalom do rohangku, sai marende ma ahu huhut umpalu parhinaloan.

⁹Ngot ma ho, ale saudarangki tondingki, ngot ma ho ale parhinaloan! Tarsunggul ma ahu buha siang ari.

¹⁰Pujionku ma Ho, di tongatonga ni angka bangso, ale Tuhan, endehononku ma Ho di tongatonga ni angka marga.

¹¹Ai timbul do sahat ro di langit asi ni roham, jala tolhas ro di auangauang do hasintonganmu. (57-12) Sai patimbul ma dirim tu atas ni langit, ale Debata, hamuliaonmu tu sandok tano on.

58¹Ende sieheteheton sian si Daud.

²(I.) Tung na tutu do ulaning mangkajongjongkon hatigoran na pinompoman hamu, mandabu uhum hasintongan hamu, ale anak ni jolma?

³Ndangana, lam hageduhan do dipajadijadi rohamuna di bagasan, uhum gogo na niula ni tanganmuna disagihon hamu di tano on.

⁴Sian bortian dope, sai marbalik do angka parjahat i, olat ni dung tubu, sai lilu do angka sidok gabus.

⁵Tudoshon bisa ni ulok do bisanasida i, songon ulok dari na ngungu, na sumongsong pinggolna.

⁶Asa unang dibege soara ni panubuti, angka na pande martabas i.

⁷(II.) Sai ropangi ma iponnasida di bagasan pamangannasidai, ale Debata, ponggolhon ma ngadol ni angka singa na bajar, ale Jahowa!

⁸Sai mabaor ma nasida, songon aek na laho moru, ditujuhon pe sumbiana i, hape songon angka na tinamtaman do.

⁹Songon ansisibang na pisar nidege do ibana mago, songon silumaksaijur ni boruboru, na so sanga mida mata ni ari.

¹⁰Tagan so dihirimhirim hudonmuna dope sampilpil, nunga dipurpurhon Debata nang na tata nang na masak.

¹¹Marlas ni roha ma partigor i sogot, ia dung diida partubolon i, marsapu mudar ma patna di bagasan mudar ni parjahat i. (58-12)
Jadi dohonon nijolma ma: dapotan laba do hape partigor i, tongon do adong Debata na manguhum portibi on.

59¹ Ende sieheteheton sian si Daud, uju
disuru si Saul marhal bagasna i naeng
mambunu ibana.

²(I.) Sai palua ma ahu sian angka
musungku, ale Debatangku, sai bahen
ma partanobatoanku maradophon angka
alongku.

³Sai palua ma ahu sian angka siulahon
hajahaton, jala tumpahi ahu maradophon
angka halak sisopsop mudar.

⁴Ai ida ma, diarop nasida do hosangku, sai
marpungupungu do angka na begu mangalo
ahu, so manang adong utangku manang
dosangku, ale Jahowa.

⁵Sai marlojongi do nasida jala marhontas,
so manang adong hajahatonku; ngot ma Ho,
manjumpangkon ahu jala tatap!

⁶Ngot ma Ho tutu, ale Jahowa Debata
Zebaot, Debata ni Israel, maminsang sude
angka parbegu i, sai unang ma marpamuati
roham mida angka panggetegete sudena.
Sela!

⁷Sai mulahulak do nasida bodarina i,
mangorongi songon biang mangkaliangi huta
i.

⁸Ida ma margumogumo do
pamangannasida, mantat podang do
bibirnasida i, ai tung ise ma umbegesa?

⁹Alai anggo Ho, ale Jahowa,
marengkelengkelihon nasida, dilesanlesan Ho
do angka parbegu sudena.

¹⁰Ale pargogongku, sai Ho do pangasahononku, ai Debata do partanobatoanku.

¹¹Sai tomutomuon ni Debatanku do asi ni rohana tu ahu, sombu ma matanku mida angka alongku bahenon ni Debata.

¹²(II.) Sai unang tompu bunu nasida, asa unang bangsongku mangkalupahon i, sai paundarundar ma nasida hinorhon ni gogom, dung i ragehon nasida, ale Tuhan, lombulombunami!

¹³Dosa ni pamangannasida do hata ni bibirnasida i, sai tardapot ma nasida di haginjangonnasida i, ala ni pamuraion pe dohot gabus, na hinatahonnasida i.

¹⁴Sai siaphon ma nasida di panombo ni rimasmu, sai siaphon ma, asa pido nasida, asa diboto nasida Debata do hape panggomgom di Jakkob ro di ujung ni tano on. Sela!

¹⁵Sai mulahulak do nasida botarina i, mangorongi songon biang, huhut dihaliangi huta i.

¹⁶Sai maotaot do nasida mangalului sisohalon, molo so mahap nasida, laos marmalam nasida.

¹⁷Alai anggo ahu, sai endehononku do hagagoonmu jala olophononku do manogotna i asi ni roham, ai Ho do partanobatoanku jala haporusanku di ari hagogotanku. (59-18)
Endehononku ma Ho, ale pargogongku, ai

Debata do partanobatoanku, Debata parasi roha di ahu.

60¹Ende siehetehton dohot sipodaon sian si Daud.

²Uju na marmusu ibana dompak Ram di Mesopotamia dohot dompak Ram Zoba, di na mulak i si Joab, dung ditaluhon halak Edom di rura parsiraan, sampulu dua ribu halak toropna.

³Ale Debata, nunga dibolongkon jala dipaserak Ho hami, tarrimas do Ho, sai marpangulah i ma roham tu hami.

⁴Nunga digunsang jala dibola Ho tano on; sai padomu ma bolabolana i, ai nunga lalolalo.

⁵Nunga dipatuduhon Ho na bernit tu bangsom nunga dipainumhon Ho tu hami anggur hagodoron.

⁶Alai dilehon Ho do muse tu angka na mangkabiari Ho sada partonggol, pahinsa nasida ala ni hatigoran. Sela!

⁷Asa malua angka na niasianmi, sai manumpak ma siamunmi jala alusi hami!

⁸Nunga marbagabaga Debata di bagasan habadiaonna i: Ingkon marolopolop ahu, marsagihon Sikem dohot manali rura Sukot.

⁹Ahu do nampuna Gilead jala ahu nampuna Manasse, jala Ephraim do partanobatoan ni ulungku, Juda do tungkot ni harajaonku.

¹⁰Moab do mangkuk parburianku, tu Edom hureongkon sipatungku, olophon ma ahu ale luat Palistim.

¹¹ Ise ulaning manogihon ahu tu huta na gonting i? Ise ulaning pataruhon ahu tolhas ro di Edom?

¹² Nda Ho do, ale Debata, Ho naung mambolongkon hami, jala na so ruar, ale Debata mandongani parangannami? (60-13) Sai patupa ma haluaon di hami sian hagogotan, ai ndang marnosan ianggo pangurupion ni jolma. (60-14) Mangasahon Debata sai hamonangan do ulahononta, jala Ibana sandiri mangalotlot alontai.

61 ¹ Ende sian si Daud.

² Sai tangihon ma, ale Debata, alualungkon, sai parateatehon tangiangkon!

³ Sian ujung ni tano on do ahu joujou tu Ho di hagogondok ni rohangkon; sai togihon ma ahu tu atas dolok batu, na so tardongdong anggo ahu.

⁴ Ai Ho do haporusanku, partanobatoan na gonting maradophon musu.

⁵ Sai loas ma ahu maringan di bagasan undungundungmi salelenglelengna, sai marondingonding tu linggom ni habongmi ma ahu. Sela!

⁶ Ai ianggo Ho, ale Debata, nunga dibege Ho angka bagabaganku, nunga dilehon Ho tu ahu jambar ni angka na mangkabiari goarmu.

⁷ Sai ambai ariari tu ariari ni Rajai, asa marsundutsundut angka taonna i.

⁸ Sai marhabangso ma ibana salelenglelengna di jolo ni Debata, sai

padiri ma asi ni roha dohot hasintongan
mangaramoti ibana. (61-9) Asa huendehon
goarmu salelenglelengna, manggarari angka
bagabaganku ganup ari.

62¹ Ende sian si Daud.

²(I.) Tu Debata sambing do marhuraja
rohangku, sian Ibana ro hatuaonku.

³Holan Ibana do partanobatoanku dohot
hatuaonku, haporusanku ndang pola sadia
humordit ahu.

⁴Sadia leleng on do hamu martahop
dompok sada baa, tung luhut hamu naeng
mangarumpakkon ibana songon dorpi ni
jomba, songon parik na matompas?

⁵Sai martuptup i nasida naeng
mangonjarhon ibana sian hatimbulonna
i, mangapian di gabus, mamasumasu ia
pamanganna, hape mamburai do ianggo
rohanasida di bagasan. Sela!

⁶Holan tu Debata ma ho marhuraja, ale
tondingki, ai sian Ibana ro sihirimonku.

⁷Holan Ibana do partanobatoanku dohot
hatuaonku, haporusanku, ndang tagamon
humordit ahu.

⁸Guru di Debata do hatuaonku dohot
hamuliaonku, partanobatoan ni hagagoonku,
marhaposan tu Debata do ahu.

⁹Sai marhaposan tu Ibana ma tongtong
nang hamu, ale donganjolma! Usehon
hamu ma rohamuna tujolona, Debata do
haposanta. Sela!

¹⁰(II.) Hosa sambing do ianggojolma manisia, gabus do anak ni baa nang nasangap, mungkal tu ginjang di bagasan timbangan, sian hosa do nasida luhutna.

¹¹Unang ma pangasahon hamu pangarupaon, jala unang haginjangkon hamu na nidobo, unang ma mangapian rohamuna di gandaganda ni sinamot.

¹²Sahali do mangkuling Debata, dua hali do i hubege: Saguru di Debata do hagogoon. (62-13) Jala gok di Ho do, ale Tuhan, asi ni roha, ai dibaloshon Ho do tu ganupjolma hombar tu pambahenanna.

63¹Ende sian si Daud, uju di halongonan Juda ibana.

²Ale Debata, Ho do Debatanku, sogot do manogotna i dilului rohangku Ho, mauas do rohangku di Ho, dihalungunhon nang dagingku Ho di tano na dangaron dohot na uasan, soada aek.

³Songon i do panataphu tu Ho di bagasan bagas na badia i, naeng marnida hagogoonmu dohot hamuliaonmu.

⁴Ai denggan do asi ni roham sian hangoluan, sai pujion ni bibirhu ma Ho.

⁵Sai songon i ma pamujingku di Ho saleleng ahu mangolu, mangasahon goarmu paherbangonku ma tanganku tu ginjang.

⁶Mahap ma disi tondingku, songon na mangan tabotabo dohot na talmis, jala las roha ni bibir ni pamanganku mamujimuji.

⁷ Molo sapala diingot rohangku Ho di atas podomanku, laos torus sabornginna i marhusari ahu taringot tu Ho.

⁸ Ai Ho do manjadi pangurupion di ahu, jala tarbahen ahu marolopolop di linggom ni angka habongmu.

⁹ Sai lohot tu Ho do rohangku, sai ditiop tanganmu siamun i do ahu.

¹⁰ Alai anggo nasida, angka na mangalului hamagoan ni hosangku, sai tolhas do nasida sogot tu banuatoru.

¹¹ Sai buaton ni podang do nasida sogot, gabe jambar ni angka gompul do nasida. (63-12) Alai ianggo Rajai sai marlas ni roha do mangasahon Debata, sai marolopolop do sude na marmangmang tu Ibana ai hona huntam do sogot pamangan ni angka sidon gabus.

64 ¹ Ende sian si Daud.

² (I.) Ale Debata, sai tangihon ma soarangku di alualungkon, sai ramoti ma ngolungkon maradophon hasosonge ni musu.

³ Sai ondingi ma ahu maradophon partutupan na buni ni angka parjahat i, maradophon hagunturon ni angka siulahon hajahaton.

⁴ Angka na patajom dilanasida songon podang, angka na manujuhon sumbianasida mandok hata na sogir.

⁵Asa disior na lidang roha i di sibunian, tompu ibana disior, so pangkirimanna, jala ndang maralang rohanasida.

⁶Tung dipirhon nasida do jat ni tahina i, dipatarhon do laho manabunihon jorgong, angka ninna do: Tung ise ma marnida angka i?

⁷Sai angka hajahaton do dipingkiri nasida, marujung do dibahen sangkap piningkiranna i, tung lung na bagas do roha ni baoa i di bagasan.

⁸(II.) Alai sioron ni Debata do nasida, sumbia so pangiriman mambugangi nasida.

⁹Tardapot ma nasida dibahen dilanasida i, mangupir be do sude na marnida nasida.

¹⁰Jadi mabiar ma sude manisia, jala dibaritahon pambahen ni Debata, jala diantusi ulaonna i. (64-11) Marlas ni roha ma ianggo partigor i mangasahon Jahowa, jala marhaposan tu Ibana, jala mamujimuji ma sude na tigor roha i.

65¹Ende sian si Daud.

²(I.) Ingkon nalom ni roha di Ho do pujipujian, ale Debata di Sion, jala gararon do tu Ho bagabaga.

³Ale sitangihon tangiang! Tu Ho do ro nasa sibuk.

⁴Gumogo do angka alualu ni hajahaton asa ahu, sai Ho ma manesa angka pangalaosionnami.

⁵ Martua ma halak na pinillitmi, jala niloasmi dumonok, manginganhon angka alamanmi! Sai pasabam ma rohanami binahen ni hinadenggan ni bagasmu, jorom na badia i.

⁶ Tung na songkal do pangalusim tu hami di bagasan hatigoran, ale Debata ni hatuaonnami, haposan ni saluhut ujung ni tano on dohot laut, angka na dao i.

⁷ Ho do sipaojak angka dolok marhitehite gogom, marhohos hagagoon.

⁸ Ho do sipaso hasak di angka laut, hasak ni angka galumbangna i dohot ogaoga ni angka bangso.

⁹ Jadi mabiar ma angka partopi laut maradophon tanda angka na binahenmi, marolopolop ma dibahen Ho angka parmulaan ni habinsaran dohot hasundutan.

¹⁰ (II.) Ditingkir Ho do tano on, jadi sirnip ma, jala gabe situtu. Gok aek do mual ni Debata, manjadi do emenasida dibahen Ho, ai songon on do parpaulim:

¹¹ Sirnip ma angka baruranna dibahen Ho, jadi buruk ma angka golena; ro muse udan na por, jadi sarge ma, jala dipasupasu Ho do na tubu disi.

¹² Nunga martumpal denggan ni basam partaonan i dibahen Ho, gok miak do angka bogasmi.

¹³ Lomak situtu do panjampalan di halongonan, jala marhohos olopolop do angka robean. (65-14) Hona tutup do angka

panjampalan dibahen birubiru, angka rura pe
dibahen eme; marolopolop huhut marende do
angka nasida.

66 ¹Ende sian si Daud. (I.) Marolopolop
tu Debata ma, ale sandok tano on!

²Endehon hamu ma hamuliaon ni goarna,
marmulia bahen hamu pujipujianna!

³Dok hamu ma mandok Debata: Tung na
songkal do angka pambahenanmu! Binahen
ni hinatimbul ni gogom ingkon marsomba tu
Ho angka musum.

⁴Ingkon liat portibi on tahe marsomba tu Ho
sogot, jala mangendehon Ho, mangendehon
goarmu. Sela!

⁵Ro be ma hamu marnida angka
pambahenan ni Debata, tung na songkal do
pangarajaionna di manisia.

⁶Nunga dipauba Ibana laut i gabe mahiang,
mardalan pat do nasida manaripari batang
aek i, marlas ni roha do hita uju i mida Ibana.

⁷Matua Ibana mangarajai marhitehite
hagogoonna i, sai mangaranapi matana tu
angka bangso, asa unang dipaginjang angka
panggunturi dirina. Sela!

⁸(II.) Puji ma Debatanami, hamu ale angka
bangso, jala patubegehon hamu ma soara
pujipujianna!

⁹Ibana mambahen hosanta mangolu, jala
ndang diloas totta tarsulandit.

¹⁰Ai nunga diunjuni Ho hami, ale Debata, nunga tung dilala Ho hami songon na mangalala perak.

¹¹Nunga ditogu Ho hami tubagasan aring, na dokdok situtu diampehon Ho tu gontingnami.

¹²Nunga diloas Hojolma na gale marhureta sian ulunami, nunga masuk hami tubagasan api dohot aek, alai diparuar Ho do hami, gabe sabam situtu rohanami.

¹³(III.) Dibahen i masuhanku ma jabum, mamboan angka pelean situtungon, manggarar angka bagabaganku tu Ho.

¹⁴Angka naung pinapuas ni bibirhon, jala naung pinarbagabaga ni pamangankon, uju hagogotan ahu:

¹⁵Angka pelean situtungon sian birubiru na tinaruan do pelehononku tu Ho, angkup ni daupa sian hambing ro di lombu dohot birubiru tunggal pelehononku tu Ho. Sela!

¹⁶Ro be ma mananginangi sude hamu angka na mangkabiari Debata, asa hujamitahon naung binahen ni Debata tu tondingku.

¹⁷Tu ibana do joujou pamanganku, jala pujipujian mampe tu dilangku.

¹⁸Tung sura hajahaton ditahi rohangku, ndang tagamon tangihonon ni Tuhan i ahu.

¹⁹Tongon do, nunga ditangihon Debata ahu, nunga diparateatehon soara ni tangiangku.

²⁰Pinuji ma Debata, na so manulakkon tangiangku manang asi ni rohana pe sian ahu.

67 ¹Ende na mardongan parhinaloan sipiltihon.

²Ale Debata, sai asi ma roham di hami, jala pasupasu hami, sai marsinondang ma bohim mandongani hita. Sela!

³Asa lam marbinoto tano on di dalanmu, diboto angka bangso sudena hatuaonmu.

⁴Ingkon pujion ni angka bangso do Ho sogot, ale Debata, sude angka bangso tutu mamuji Ho.

⁵Marlas ni roha jala marolopolop sogot angka bangso, ala tigor panguhumu di angka bangso, jala ditogu Ho angka marga di tano on. Sela!

⁶Ingkon pujion ni angka bangso Ho sogot, ale Debata, sude do angka bangso tutu mamuji Ho.

⁷Tano on mangalehon gogona; sai pasupasuon ni Debata, Debatanta do hita. (67-8) Dipasupasu Debata ma hita jadi habiaran ni sude ujung ni tano on ma Ibana.

68 ¹Ende sian si Daud.

²(I.) Sai hehe ma Debata! Ingkon harhar angka musuna, jala maporus angka na mangkasomorhon Ibana maradophon bohina.

³Songon pangombus di timus do ombushononmu nasida, songon halalala ni pantis maradophon api, ingkon songon i ma marmagoan angka parjahat maradophon Debata.

⁴Alai sai marlas ni roha ma, marolopolop di jolo ni Debata ianggo angka partigor, sai marhasonangan ma nasida di bagasan las ni roha.

⁵Endehon hamu ma Debata, puji hamu ma goarna i, palendes hamu ma dalan di Ibana na marhureta di halongonan, Jahowa do goarna, jala marolopolop ma hamu di jolona.

⁶Ibana do ama ni angka na tading di lampin, jala pangondian ni angka na mabalu, Ibana do Debata di bagasan ingananna na badia i.

⁷Debata do mambahen hot ripe, angka na punjung hian; Ibana paruarhon angka na tarhurung tu hasonangan; alai anggo angka na marbalik maringan di halongonan na tunggil situtu.

⁸(II.) Ale Debata, uju diuluhon Ho bangsom, uju mangalangka Ho, di bagasan halongonan i: - Sela!

⁹Humuntal do tano on, manetehi huhut angka langit maradophon Debata, nang dolok Sinai adui maradophon Debata, Debata ni Israel.

¹⁰Udan lomo ni roha do dipangusehon Ho, ale Debata: Jala dipargogoi Ho do parjambaranmu na heal i.

¹¹Jadi maringan ma disi angka na pinangolum, diparmudu Ho do na dangol i, ale Debata, marhitehite denggan ni basam.

¹²Martingting ma Tuhan i, jadi torop situtu ma angka boruboru siboan barita na uli.

¹³Hapogan ma angka raja ni angka parduaan parangan maporus, jadi boru siingani jabu marbagihon tabantaban.

¹⁴Molo mangulon hamu di holangkolang ni angka parduaan, marsinondang do hamu songon habong ni darapati, na nilampis dohot perak, jala marsere na gorsing do holenasida.

¹⁵Uju dipaserak Pargogo-nasohatudosan angka raja disi, mamontar ma di atas dolok Salmon.

¹⁶Dolok ni Debata do dolok Basan, gok angka punsu do dolok Basan i.

¹⁷Boasa sai mangiburu hamu, ale angka dolok na timbo, dompak dolok Sion, na pinillit ni Debata bahen ingananna? Sai inganan ni Jahowa do i salelenglelengna.

¹⁸Marriburibu do hureta ni Debata, di tongatonganasida do Tuhan i, hira Sinai di bagasan habadiaon.

¹⁹Nunga manaek Ho tu ginjang, ditaban Ho do na hona taban, nunga maruli silehonlehon Ho di tongatonga ni manisia, nang angka na marbalik, asa maringan disi Debata Jahowa.

²⁰Pinuji ma Tuhan i ganup ari! Dokdok pe dipaporsanhon tu hita, Debata do mangurupi hita. Sela!

²¹Debata ni angka hatuaon do Debatanta i, jala guru di Tuhan Jahowa do angka haluaon sian hamatean.

²²Tongon do sai rosahan ni Debata do ulu ni angka musuna, ulu parjambulan ni angka

na mandatdati marpangalaho di bagasan dosana.

²³Nunga didok Tuhan i: Mulak do nasida boanonku sian Basan mulak do nasida sian angka lung ni laut i.

²⁴Asa diburi Ho patmu di bagasan mudar, marjambar do dila ni angka biangmu sian angka musu i.

²⁵(III.) Nunga diida nasida habobongotmu, ale Debata, habobongot ni Debatangku, rajangku tubagasan habadiaonna i.

²⁶Mardalan di jolo angka parende, di pudi ni angka parsarune di tongatonga ni na marbaju, angka na mamalu doal.

²⁷Pinuji ma Debata di bagasan angka luhutan; Tuhan i, hamu ale angka na sian mual ni Israel.

²⁸Disi do si Benjamin siampudan pangarajainasida, angka induk sian Juda pe pasimpar, angka induk sian Zebulon, angka induk sian Naptali.

²⁹Ditonahon Debata do hagogoonmu, sai pargogoi ma, ale Debata, na pinatupam tu hami!

³⁰Ala jorom na di Jerusalem taruhonon ni angka raja do sogot silehonlehon tu Ho.

³¹Sai songgahi ma buea na di tolongi, angka jonggi na marhoronhoron rap dohot angka anak ni lembu ni angka bangso, asa dioloi nasida patu mangalehon jomba

hahal. Ibana paserakkon bangso, angka na mangkalomohon hamusuon.

³²Ro do sogot angka na sumangap sian Misir, Kus pe hapogan do marsomba tu Debata.

³³Hamu ale angka harajaon di tano on, endehon hamu ma Debata, palu hamu ma parhinaloan mamuji Tuhan i! Sela!

³⁴Ibana na marhitehitehon langit ni langit sian narobi, ida ma, pangiaronna ma soarana, soarana na gogo i.

³⁵Sai lehon hamu ma hahormaton tu Debata! Hamuliaonna i do gumomgom Israel, jala di angka banua ginjang sahali do hagogoanna! (68-36) Songkal do Debata, ro sian ingananna angka na badia i! Debata ni Israel do Ibana, silehon hagogoon dohot hamuliaon tu bangso i. Pinuji ma Debata!

69¹Ende sian si Daud.

²(I.) Sai tumpahi ma ahu, ale Debata, ai nunga sipat ro di hosa angka aek i.

³Nunga pola lonong ahu tubagasan gambo lisop, soada hajongjongan, nunga pola tolhas ahu tu lintong laut angka na bagas i, jala dilungkupi galumbang i ahu.

⁴Nunga pola maheu ahu dibahen joujoungki, nunga mahiang aruarungku, nunga pola lotop matanku mangkalungunhon Debatanku.

⁵Tumorop do sian obuk ni ulungku angka na mangkosom ahu, soada paralaan, angka na gogo be mangago ahu, angka musungku pangalajak; abulonku do nang na so hudobo.

⁶Ala Debata, Ho do umboto taringot tu haotoanki, jala ndang tarporso angka dosangki maradophon Ho.

⁷Sai unang ma muruk mida ahu angka na mangkaposi Ho, ale Tuhan Jahowa Zebaot, sai unang ma tarila mida ahu angka na mangalului Ho, ale Debata ni Israel!

⁸Ai humongkop Ho do ahu tumaon insahinsak, dihungkupi hilaon bohingku.

⁹Pola banding angka donganku tu ahu, gabe halak na buro di roha ni donganku saina.

¹⁰Ai hamuruhon humongkop bagasmu do manganhon ahu, jala taha tu ahu do reherehe ni angka na mangarehei Ho.

¹¹Sai tumatangis do ahu jala tumaon parpuasaon do rohangku, hape manjadi reherehe tu ahu do i.

¹²Hori do hubahen abithu, jadi pambuatan umpama do ahu dibahen nasida.

¹³Sai dipahatahata angka na hundul di partungkoan i do ahu jala alingalingan ni angka siparmabuk.

¹⁴(II.) Alai anggo ahu sai tong do tu Ho tangiangki, ale Jahowa, di tingki halehetanna; ale Debata, sai alusi ma ahu hombar tu hasintongan ni hatuaonmi ala ni godang ni asi ni roham.

¹⁵Sai palua ma ahu sian gambo lisop i, asa unang lonong ahu, asa malua ahu sian angka na humosom ahu dohot sian lintong laut angka na bagus i.

¹⁶Sai unang diaupi galumbang ni aek i ahu, jala unang dibondut pusat i ahu, manang dilungkuphon godung i babana di atas ahu.

¹⁷Sai alusi ma ahu, ale Jahowa, ai denggan do asi ni roham; sai dompakkon ma ahu hombar tu godang ni asi ni roham.

¹⁸Sai unang tabunihon bohim maradophon naposomon, ai hagogotan do ahu, hapogani ma mangalusi ahu.

¹⁹Sai padonok ma Ho tu rohangku paluahonsa, sai palua ma ahu ala ni angka musungku.

²⁰Ianggo Ho, ditanda Ho do hailaonku dohot haurahonku dohot halenjengongku, di jolomi do sude angka alongku.

²¹Haurahon do manostosi rohangku, gabe matemate ahu marsahit, jala hupaimaima panangisi, hape so adong; dohot angka pangapuli, hape ndang jumpang ahu.

²²Lam pogu do dilehon nasida panganonku, jala na asom do dipainumhon tu ahu di hauaski.

²³Sai gabe jorgong ma mejanasida di jolo nasida, jala aring di angka na marsonangsonang.

²⁴Sai homur ma matanasida, asa unang marnida jala angka hitir ma tongtong bahen haehaenasidai.

²⁵Pangusehon ma tu nasida rimasmu, jala parpiarpiar ni murukmu manoro nasida.

²⁶Sai tarulang ma bagasnasida i, sai unang ma marpangisi undungundungnasida i.

²⁷Ai dilele nasida do na nilinsingmu, jala dipangkatahatahon nasida do habebernit ni angka na binuganganmu.

²⁸Sai tambai ma hasalaan tu hasalaannasida i, asa unang sahat nasida tu hatigoranmi.

²⁹Sai sosa ma nasida sian pustaha hangoluan, asa unang tarsurat nasida rap dohot angka partigor i.

³⁰Alai na dangol do ianggo ahu, jala marsingkor, sai patimbulon ni hatuaonmi do ahu sogot, ale Debata.

³¹(III.) Pujionku ma goar ni Debata marhitehite ende, jala pasangaponku ma Ibana marhitehite pujipujian.

³²Jadi lomoan ma roha ni Jahowa disi asa mida jonggi manang lembu sitingko tanduk, na martambirik.

³³Diida angka na dangol i ma i, gabe las ma rohanasida; sai hiras ma rohamuna, hamu ale angka na mangalului Debata!

³⁴Ai ditangihon Jahowa do angka na pogos, jala ndang lea rohana mida bangsona na tarbuang i.

³⁵Sai pujion ni langit dohot tano on do Ibana sogot, angka laut pe ro di nasa na manginsir di bagasan angka i.

³⁶Ai sai tumpahan ni Debata do Sion jala paulionna do angka huta ni Juda, asa maringan nasida disi jala nampunasa. (69-37)

Asa pinompar ni angka naposona i tumeansa sogot, jala angka na mangkaholongi goarna maringan disi.

70¹Ende sian si Daud bahen parningotan.
²Ale Debata, sai hapogani ma paluahon ahu, sai hapogani ma, ale Jahowa, mangurupi ahu!

³Ingkon murak ma nian jala maila angka na tumahi hosangki, ingkon sumurut tu pudi jala murak angka na mangkalomohon hinamagongku.

⁴Ingkon mulak nian pandok ni angka na mandok: Boha do! Boha do! Bahen upa ni haurahonnasida i.

⁵Ingkon marolopolop nian jala marlas ni roha di bagasan Ho sude angka na mangalului Ho, jala ingkon tongtong ma dohonon ni angka na mangkaholongi hatuaonmu: Timbul do Debata! (70-6) Alai anggo ahu na dangol jala na pogos do - ale Debata, sai hapogani ma mandapothon ahu! Ho do siurupi dohot sipalua ahu, sai unang pabenda, ale Jahowa!

71¹(I.) Marhaporusan tu Ho do ahu, ale Jahowa, ndang tagamon murak ahu salelenglelengna.

²Sai luahon ma ahu marhitehite hatigoranmu, jala palua ahu, sai paeleng ma pinggolmu tu ahu jala urupi ahu.

³Sai Ho ma gabe partanobatoan di ahu, tau inganan bongotanku tongtong; nunga

pola diparbaga Ho urupanmu ahu, ai Ho do partanobatoanku jala haporusanku.

⁴Ale Debatanku, sai palua ma ahu sian tangan ni parjahat i, sian tangan ni pargeduk dohot sibahen gogo.

⁵Ai Ho do pangkirimonku, ale Tuhan Jahowa, nalom ni rohangku sian sietehetehonku.

⁶Naung mangunsande tu Ho do ahu sian bortian, Ho do siparmudu ahu sian butuha ni dainang, sai Ho do tongtong pujionku.

⁷Jadi sobokkon parhalongangan ni torop halak do ahu, alai Ho do haporusanku na gonting.

⁸Sai gok pujipujianmu ma pamanganku, gok hamuliaonmu manipat ari.

⁹Sai unang bolongkon ahu di tingki haubanonku, molo maol suda gogongku unang tadingkon ahu.

¹⁰Ai dipahatahata angka musungku do ahu, jala rap martuptup i do angka na mangarop hosangki.

¹¹Angka ninna do: Nunga ditadingkon Debata ibana, lotongi jala soro hamu ma ibana, ai ndang adong sipalua.

¹²Ale Debata, sai unang paholang sian ahu, ale Debatanku, hapogani ma mangurupi ahu.

¹³Ingkon murak ma nian jala siap angka sialo hosangki, sai dihungkupi hailaon dohot haurahon ma angka silului hinamagongku.

¹⁴(II.) Alai anggo ahu sai tong do marhaposan, jala manambai pujipujianmu sudena.

¹⁵Sai baritahonon ni pamanganku do hatigoranmu, ganup ari hatuaonmu, ai ndang huboto bilanganna.

¹⁶Sai harohononku do angka pambahenan hagogoan ni Tuhan Jahowa, sai hatigoranmu sandiri do pujionku.

¹⁷Ale Debata, sai Ho do mangajari ahu sian sietehetehonku, jala rasirasa nuaeng sai hupaboaboa do halongangan angka na binahenmi.

¹⁸Nang sahat di hadohungon dohot haubanon, sai unang tadingkon ahu, ale Debata, paima hubaritahon tanganmu tu na pinompar, hagogoonmu tu saluhut angka na ro sogot.

¹⁹Tolhas ro di banua ginjang do hatigoranmi, ale Debata, nunga dijadihon Ho angka halongangan bolon, tung ise ma songon Ho, ale Debata?

²⁰Nunga torop angka hagogotan dohot hinamago dipasonggop Ho tu hami, sai ulahanmu do pangoluhon hami, jala enetonmu do hami muse tu ginjang sian angka lung ni tano on.

²¹Sai ambaanmu do habalgaonki jala ulahanmu do mangapul ahu.

²²Ahu pe antong, pujionku ma Ho mardongan uninguningan, habonaronmu,

ale Debatangku; endehononku ma Ho
mardongan arbap, ale Nabadia ni Israel!

²³Ingkon marolopolop ma bibirhu, ai
endehononku ma Ho, nang tondingku, naung
tinobusmi.

²⁴Dohot do dilangku mangendehon
hatigoranmi manipat ari, asa maila jala murak
angka na mangalului hinamagongku.

72¹Sian si Salomo. (I.) Ale Debata, sai
pasahat ma angka panguhumu tu
rajai, jala hatigoranmu tu anak ni rajai.

²Asa diuhum bangsom marhitehite
hatigoran, jala maruli uhum angka na
dangolmu.

³Asa marparbuehon hadameon angka dolok
di bangso i, jala maruli hatigoran angka
robean.

⁴Sai patingkosonna do uhum tu angka na
dangol ni bangso i, tumpahanna do angka
anak ni na pogos, jala ropuhanna do sibahen
gogo.

⁵Sai Ho ma dihabiari halak saleleng adong
mata ni ari, jala saleleng tarida bulan
marsundutsundut.

⁶Sai tuat ma Ibana songon pangonai ni udan
tu padang na sinabi, songon udan nene na
mamornohi tano.

⁷Martunasi ma di angka arina i partigor i,
jala manimbukbuk hadameon ro di na so
adong be bulan.

⁸Jadi Ibana ma mangarajai sian laut sahat tu laut, jala sian batang aek i sahat ro di angka ujung ni tano on.

⁹Ingkon marsomba di jolona angka pangisi ni halongonan, jala dilatan ni angka musuna orbuk.

¹⁰Boanon ni angka raja sian Tarsis dohot angka pulo ma sombasomba, angka raja sian Seba dohot Etiopia manaruhon silehonlehon.

¹¹Jala sombaon ni sude raja Ibana, luhut do angka parbegu mangoloi Ibana.

¹²Ai paluaonna ma na pogos na joujou dohot na dangol na so marpangalualuan.

¹³Olananna do na metmet dohot na pogos, jala paluaonna do angka tondi ni angka na pogos.

¹⁴Paluaonna do tondinasida sian pangarupaon dohot sian parhilangon, jala na arga situtu do mudarnasida di rohana.

¹⁵(II.) Sai mangolu do ibana jala lehononna tu Ibana sere sian Seba; jala tangiangkononna do Ibana tongtong, pasupasuonna do Ibana ganup ari.

¹⁶Jadi gabe situtu ma eme di tano on ro di punsu ni angka dolok, humaras ma parbuena, songon Libanon, jala martumburi nasidajolma i sian huta, songon duhut ni tano on.

¹⁷Sai hot ma goarna i ro di salelenglelengna, sai muap ma baritana saleleng adong mata ni ari, asa maruli pasupasu nasida di bagasan

Ibana, luhut angka parbegu martuahon

Ibana.

¹⁸Pinuji ma Debata Jahowa, Debata ni Israel, sasadasa do mambahen angka halongangan.

¹⁹Pinuji ma dohot goar ni hamuliaonna i ro di salelenglelengna, jala gok hasangaponna ma liat portibi on! Amen! Amen!

²⁰Marujung ma angka tangiang ni si Daud, anak ni si Isai.

73¹Ende sian si Asap. (I.) Mardenggan basa mamolin do Debata maradophon Israel, angka na ias marroha.

²Alai anggo ahu, tarsulandit ne ma tothu, tinggang ne do ahu.

³Ai mangiburu do rohangku mida angka na jungkat roha, dung huida hasonangan ni angka parjahat.

⁴Ai ndang adong parniahapannasida rasirasa mate nasida, tambos do dagingnasida i.

⁵Ndang marhangaluton nasida songonjolma na asing, jala ndang marsipalsipal nasida songonjolma na asing.

⁶Dibahen i marhorungkorungkon ginjang ni rohanasida, jala maruloshon parhilangan.

⁷Pola songon na bosol matanasida dibahen mokmokna, disalpai nasida do angka pingkiran ni roha.

⁸Sai mangarehei dohot pahatahata pangarupaon do nasida mangasahon hajahaton, sai tumindi do pangkulingnasida i.

⁹Hira ulpuhan sian banua ginjang do pandok ni pamangannasida, jala guru dok ni dilanasida do tano on.

¹⁰Dibahen i dohot do bangsona marbalik tusi, jadi butongan ma nasida manobur aek.

¹¹Angka didok nasida ma: Tung adong ma diboto Debata? Jala ndang adong parbinotoan di Natumimbul i.

¹²Ida ma, i ma angka parjahat sai mardohar salelenglelengna, lam tu suksukna hamoraonnasida.

¹³Tung na so marniula do hape na hupapita i rohangki, jala na huburii tanganku di bagasan hapitaon?

¹⁴Jala na huae i na porsuk ganup ari, jala na hona pinsang ahu ganup manogot?

¹⁵Tung sura hudok: Marpangkuling songon nasida ma ahu, ida ma na manjehehon pinompar ni angka anakmu do ahu disi.

¹⁶(II.) Dung i sai hupingkiri asa dapot rohangku nian, hape mamaolhu do.

¹⁷Paima bongot ahu tu angka inganan ni Debata na badia i, hutangkastangkasi ujungnasida i.

¹⁸Hape landit situtu do hajongjongannasida dibahen Ho, didabuhon Ho do nasida tu hamagoan.

¹⁹Satongkin situtu mago nasida so pangkirimanna, ripur jala lekse do nasida dibahen hinamago na jorbut situtu.

²⁰ Songon pangalaho ni nipi, ia dung ngot, songon i do lea ni roham, ale Tuhan, mida sumansumannasida di huta.

²¹ Saleleng margorokgorok rohangku jala songon na ginirik piangku.

²² Maoto do ahu jala ndang adong huboto; sobokkon pinahan do ahu maradophon Ho.

²³ Alai sai marsihohot ahu tu Ho, ditiop Ho do tanganku siamun.

²⁴ Sai toguonmu do ahu marhitehite sangkap ni roham jala jangkononmu do ahu muse tu hasangapon.

²⁵ Tung ise ma donganku di angka banua ginjang? Jala dungkon ni Ho ndang adong dihalomohon rohangku di tano on.

²⁶ Nang pe merus sibukku dohot rohangku, sai Debata do partanobatoan ni rohangku jala parjambaranku salelenglelengna.

²⁷ Ai ida ma, sai na laho mago do angka na paholang dirina sian Ho; disiaphon Ho do sude angka na mangose padan maradophon Ho.

²⁸ Alai anggo ahu - untungku do hasolhoton tu Debata; haposanku do hubahen Tuhan Jahowa, asa hubaritahon angka pambahenanmu sudena.

74¹ Ende sipodaon sian si Asap. (I.) Ale Debata, boasa tung tongtong hami bolongkononmu, martimburak rimasmu mida birubiru angka na pinarmahanmu?

²Sai ingot ma huriami, na tinobusmu nahinan, na pinaluam gabe marga parjambaranmu, dolok Sion on, na niinganamu.

³Sai pasintak ma angka langkam monopot angka parsiragongan salelenglelengna, tung luhutna do disiaphon musu i di bagasan habadiaon i.

⁴Marsurak do angka alom di bagasan undungundung parluhutanmu, angka dipajongjong do tandanasida bahen partinandaan.

⁵Songon na mangalbangkon tangke di tombak longolongo do pangalahona idaon.

⁶Jala ia nuaeng ditahahon be do tangke dohot baliung tu uhiruhirnai.

⁷Disurbu nasida do bagas habadiaonmu, diramuni do gabe tano inganan ni goarmu.

⁸Angka ninna do di bagasan rohanasida be: Tasiaphon ma nasida sude! Gor ma sude bagas parluhutan ni Debata di luat i dibahen nasida.

⁹Ndang huida hami be angka partinandaanmi, ndang adong be panurirang, jala ndang adong sian hami na umboto manang sadia leleng on.

¹⁰Sadia leleng on, ale Debata, datdatan ni musu i mangelesi? Tung insahan ni musu i nama goarmu salelenglelengna?

¹¹Boasa tung taitonmu tanganmi dohot siamunmi? Enet ma nian sian bagasan ampuanmu laho maniaphon?

¹²(II.) Jala rajangku hian Debata sian narobi, Ibana do patupahon angka pangurupion di parsitongaan ni tano i.

¹³Ho do umbola laut marhitehite gogom, dilobong Ho do ulu ni angka naga di lambung aek.

¹⁴Ho do mangaropuhi angka ulu ni buea, dilehon Ho do ibana panganon ni bangso, pangisi ni halongonan.

¹⁵Ho do manuhak mual dohot bondar, Ho do mangarsik angka batang aek na marlananglanang.

¹⁶Gok di Ho do arian, gok di Ho dohot borngin; Ho do paojakkon hatiuron dohot mata ni ari.

¹⁷Ho do mamagohon sude talutuk ni tano on: Ari logo dohot ari rondo Ho do jumadihonsa.

¹⁸Sai paingotingot: Na niinsahan ni musu i Jahowa, jala na nielesan ni bangso na oto i goarmi.

¹⁹Sai unang lehon hosa ni anduhurmi tu binatang, sai unang tongtong halupahon ngolu ni angka na dangolmi.

²⁰Sai tatap ma parpadanoni, ai gok pandoboan do angka solotsolot ni tano on.

²¹ Sai unang mulak tarurak na ginosagosa i, sai dipuji na dangol jala na pogos i ma goarmu.

²² Hehe ma Ho, ale Debata! Badahon ma parbadaanmi! Sai ingot ma haurahonmi binahen ni na oto sipatsipat ni ari.

²³ Sai unang halupahon parioho ni angka musum, hagunturon ni angka alom na tongtong martimburak.

75¹ Ende sian si Asap marlogu unang siaphon.

² Mauliate ma rohanami tu Ho, ale Debata, mamujimuji ma hami dibahen donok do goarmu, angka dibaritahon halak do halongangan angka na binahenmu.

³ Ai ia dung jumpang tingkingku, tingkos ni uhum ma dabuonku ianggo Ahu.

⁴ Malala pe sogot tano on dohot pangisina sudena, ianggo Ahu pahotonku do angka ojahanna. Sela!

⁵ Ningku do mandok angka panggetegete: Sai unang manggetegete hamu! Dohot mandok angka parjahat i: Sai unang ma paagaaga hamu tandukmuna i.

⁶ Sai unang ma patimbo hamu tandukmuna i, unang ma hatahon hamu hajungkaton mangasahon gakgak ni rungkung.

⁷ Ai ndada sian habinsaran manang sian hasundutan, jala ndada sian halongonan ro hatimbulon.

⁸Ai Debata do panguhum, sadaon dipajimput jala sadaon dipatimbul.

⁹Ai adong do sada panginuman di tangan ni Jahowa, jala gurgur do anggur di bagasan ni, gok raru do jala dipainumhon sian i; ingkon soburon ni angka parjahat ni tano on sude apala partoruna i.

¹⁰Alai anggo ahu baritahononku do salelenglelengna, endehononku do Debata ni si Jakkob. (75-11) Upokkononku do sude tanduk ni angka parjahat i, ingkon patimboon do angka tanduk ni partigor i.

76

¹Ende sian si Asap.

²Tartanda do Debata di Juda, timbul do goarna di Israel.

³Dijadihon do di Salem undungundungna jala di Sion do ingananna.

⁴Disi do diponggolhon angka sumbia api ni sior, ro di lombulombu, podang dohot parhohas tu hamusuon. Sela!

⁵Sumangap jala marmuliaan do Ho sian angka dolok panamunan.

⁶Tarsamun do angka na begu marroha i, tarlalap modom do nasida, jala ndang margogo tangan ni angka parangan i sudena.

⁷Hinorhon ni pangasupim, ale Debata ni Jakkob, tarlalap modom do nang hureta, nang hodanasida.

⁸Na songkal situtu do Ho, tung ise ma manahan jongjong di jolo ni bohim, molo sapala manombo rimasmu?

⁹Sian banua ginjang do dipatubegehon
Ho uhum, dambirbiron ma tano on jala
mamolngit.

¹⁰Di na hehei Debata mandabu uhum laho
paluahon sude angka na dangol ni tano on.
Sela!

¹¹Ai manjadi pujipujianmu do rimas ni angka
jolma, dihohoshon Ho do ebaeba ni angka
rimas i.

¹²Marbagabaga ma hamu, jala garari hamu
tu Jahowa, Debatamuna i! Sude angka na
humaliang Ibana manaruhon silehonlehonna
be tu Sihabiarhononhon i. (76-13) Ibana do
manostosi hosa ni angka raja, songkal Ibana
di roha ni angka raja ni tano on.

77 ¹Ende sian si Asap.

²(I.) Tu Debata do hujoujouhon
soarangkon, jala manganguhi ahu, tu Debata
do tongon soarangkon! Jadi ditangihon do
ahu.

³Hulului do Tuhan i di ari hagogotanki, sai
toltol do tanganku bornginna i, jala ndang
marpansohotan, sai dipajuajua rohangku do
apulon.

⁴Sai hupaingotingot Debata, jala marhoi; sai
hupingkiri, jadi biahaton tondingku. Sela!

⁵Sai ditiopi Ho do langkop ni matanku, sai
diumbani do ahu, jadi ndang tarbahen ahu
mangkuling.

⁶Sai hupingkiri do angka ari na robi, angka
taon naung leleng salpu.

⁷ Sai hupaingotingot do pamiltikku di parhinaloan bornginna i, sai marhusari do rohanku jala sai manangkasi do tondingku.

⁸ Tung saleleng ni lelengna nama ulaning mambolongkon Tuhan i, jala ndang be ulahanna mardenggan basa?

⁹ Tung naung marujung salelenglelengna nama ulaning asi ni rohana, tung pesan nama bagabaga i marsundutsundut?

¹⁰ Tung naung lupa ma ulaning Debata marasi roha? Manang naung ditiopi angka asi ni rohana i dibahen murukna? Sela!

¹¹ (II.) Jadi hudok ma: Hagaleonku do i, angka taon ni siamun ni Natumimbul do i.

¹² Sai pujionku do angka pambahenan ni Jahowa, ai sai ingotonku do halongangan angka na binahenna i sian na robi.

¹³ Jala sai marhusari do ahu taringot tu angka pambahenanmu sudena, jala sai hutangkasi do angka jadijadianmu.

¹⁴ Ale Debata, habadiaon do parhitean ni dalanmu! Dung Debata dia ma marhatimbulon songon Ho, ale Debata!

¹⁵ Ho do Debata sipatupa halongangan, dipabotohon Ho do gogom tu angka bangso.

¹⁶ Nunga dipalua Ho bangsomi marhitehite tanganmu, angka anak ni si Jakkob dohot si Josep. Sela!

¹⁷ Diida angka aek i do Ho, ale Debata! Diida angka aek i do Ho, gabe margilinggiling angka gunsang ma dohot angka lung.

¹⁸Mangusehon aek ma angka ombun,
marsaringar do angka aoangaoang,
sumiksaksiksak ma huhut angka sumbiam.

¹⁹Marsaringar ma ronggurmu di bagasan
halisungsung, disondangi angka hilap ma
portibi on, humuntal jala lalolalo ma tano on.

²⁰Di bagasan laut do dalanmu, jala mardalan
balobung do Ho di angka aek magodang,
jala ndang tanda angka bogasmu. (77-21)
Diadu Ho do bangsom, songon sada pungan
marhitehite tangan ni si Musa dohot si Aron.

78¹Ende sipodaon sian si Asap. Hamu ale
bangsongku, sai tangihon hamu ma
podangkon! Paeleng hamu ma pinggolmuna
tu angka hata ni pamangankon.

²Bungkaonku ma pamanganku mandok
umpama, manurasihon hulingkulingan sian
na robi.

³Angka naung tabege jala na itaboto dohot
na pinajojo ni angka ompunta tu hita.

⁴Ndang porsoonta tu anaknasida, tu sundut
na singkat sogot; baritahononta do angka
pujipujian ni Jahowa ro di hagogoonna dohot
halongangan, angka na binahenna i.

⁵Ai nunga dipatindang Ibana sada
panindangion di Jakkob, jala dibahen do
sada patik di Israel, na tinonahonna tu
angka ompunta, asa dipabotohon nasida tu
anaknasida i.

⁶Asa diboto sundut na singkat sogot,
anak angka situbuhononhon dope; ia dung

magodang nasida, asa dipaboa muse tu anaknasida.

⁷Asa dibahen nasida Debata haposannasida i, jala unang dihalupahon angka pambahenan ni Debata, jala dijujur angka patikna i.

⁸Asa unang nasida doshon ompunasida, sundut na marbalik dohot panggunturi, sundut na so patoguhon rohana, jala ndang marsihohot tondina tu Debata.

⁹Anak ni si Epraim, angka parsinjata sior, angka na mundar di ari hatongtangan i.

¹⁰Ndang diingot nasida padan binahen ni Debata, jala dijua nasida do mangihuthon tu patikna i.

¹¹Jala dihalupahon do angka pambahenanna i dohot halongangan angka na pinataridahonna i tu nasida.

¹²Dibahen Ibana do halongangan di adopan ni ompunasida i, di tano Misir, di adaran Zoan.

¹³Dibola do laut i patariparhon nasida, jala diunsong do aek i doshon timbunan.

¹⁴Jala ditogihon nasida marhitehite ombun ia arian, jala marhitehite sondang ni api manipat borngin.

¹⁵Dibola do angka dolok batu di halongonan jala dipainum nasida doshon aek na marbuhalbuhal godangna.

¹⁶Jadi ruar ma angka sunge sian dolok batu i jala mabaor songon batang aek.

¹⁷ Alai sai didatdati nasida dope mardosa dompak Ibana, mangalo Natumimbul i di tano bangkalbangkal.

¹⁸ Jala sai diunjuni nasida do Debata di bagasan rohanasida laho martungguhon sipanganon guru roharohanasida.

¹⁹ Jala marmungutmungut dompak Debata, angka ninna ma: Tung tagamon tarpatupa Debata ma padirihon sada meja di halongonan on?

²⁰ Ida ma, nunga dilombut Ibana dolok batu i, jadi martihaltihal ma aek, jala gas andalu angka batang aek; tarpatupasa do huhut ulaning mangalehon sagusagu, manang manjadihon juhut di bangsona i?

²¹ Dibahen i dung dibege Jahowa, muruk ma Ibana, gabe marjimburjimbur ma api di Jakkob, marpiarpiar ma huhut rimas dompak Israel.

²² Ai ndang dihaporseai nasida Debata jala ndang diparhanalom hatuaonna i.

²³ Hape lam didokkon Ibana do angka ombun di ginjang, jala diungkap angka pintu ni langit.

²⁴ Jala diudanhon tu nasida Manna bahen sipanganon, jala dahanon sian banua ginjang dilehon tu nasida.

²⁵ Sagusagu ni surusuruan do dipangan nasida be, maradu mahapan di bohal tinongosna i tu nasida.

²⁶Dipahehe do di langit alogo habinsaran, jala ditogutogu do alogo dangsina marhitehite gogona i.

²⁷Dung i diudanhon tu nasida juhut songon orbuk, jala pidong na marhabong songon horsik di laut.

²⁸Jala didekdekkon angka i tu tongatonga ni parsaroanna i, humaliang inganannasida i.

²⁹Jadi mangan ma nasida jala mahapan situtu; jala diparo tu nasida pinangidonasida i.

³⁰Ndang dope muli nasida sian pinangido ni rohanasida, ongom dope sipanganonnasida i di pamangannasida:

³¹Nunga marpiarpiar rimas ni Debata mida nasida, jadi dibunu ma angka na mokmok sian nasida, jala diragehon angka dolidoli ni Israel.

³²Luhutna pe songon i, sai didatdati nasida dope mardosa, jala ndang dihaporseai halongangan angka na binahenna i.

³³Dibahen i dipasalpu ma ariarinasida maralimos jala manungka do taonnasida i.

³⁴Molo Ibana mambunu nasida, jadi usousu ma nasida di Ibana, jala mulak nasida pasogothon mangalului Debata.

³⁵Jala diingot nasida, Debata do hape partanobatoannasida i, jala Debata na tumimbul i sipaluanasida.

³⁶Dilesemlesem ma Ibana marhitehite pamangannasida, jala dilanasida i manggabusi Ibana.

³⁷Alai ndang marsihohot rohanasida tu Ibana, jala ndang dipasintong nasida padanna i.

³⁸Alai anggo Ibana, asi do rohana disesa do dosa, jala ndang disiaphon, jala jotjot do mulak rimasna i dibahen, jala ndang disunggul rimasna apala saluhut.

³⁹Sai diingot rohana do, sibuk do nasida, alogo na laho salpu, jala na so mulak.

⁴⁰Na sai jotjot Ibana dialo nasida di halongonan, jala diarsahi nasida Ibana di tangkaltangkal.

⁴¹Dung i diulahi nasida muse mangunjuni Debata, jala disarita Nabadia ni Israel.

⁴²Nandang diingot nasida tanganna i, nang ari, na pinaluana i nasida sian sipangarupa.

⁴³Uju pinatindangna i angka tandana di Misir, jala halongangan binahenna i di adaran Zoan.

⁴⁴Jala dipauba angka batang aeknasida i gabe mudar, ro di angka sungenasida, gabe ndang tarinum nasida be.

⁴⁵Ditongoshon tu tongatonganasida lanok angka na manganhon nasida, dohot tohuk angka na mangago nasida.

⁴⁶Tu tamponok do dilehon suansuanannasida i, jala na niulanasida i tu sihapor.

⁴⁷ Mate do angka hau anggurnasida dibahen ambolas, ro di angka hau antajau.

⁴⁸ Rage do dorbiasida dibahen ambolas, jala disoro porhas do parduaannasida i.

⁴⁹ Dipalua do dompak nasida parpiarpiar ni rimasna i, piripiri, rimas dohot hagogotan, saparduan surusuruan ni angka parsorion.

⁵⁰ Dipahornop do dalan ni rimasna i, ndang diolani hosanasida sian hamatean, jala dipasahat do ngolunasida i tu begu antuk.

⁵¹ Jala diantuk do sude buhabaju di tano Misir, buhabaju ni haroro ni gogonasida di angka undungundung ni si Ham.

⁵² Dung i dipaborhat ma bangsona songon birubiru, jala diadu nasida songon parduaan di halongonan.

⁵³ Jala tangkas do nasida diiringiring asa unang tarsonggot nasida, alai anggo musunasida i dihungkupi laut do.

⁵⁴ Dung i dipatolhas ma nasida tu parbolatan ni habadiaonna i, tu dolok on, na nionjar ni siamunna i.

⁵⁵ Jala dipabali sian jolonasida angka parbegu i, jala didabu tu partaliannasida, jala angka marga ni Israel mangingani undungundungnasida i.

⁵⁶ Hape diunjuni nasida do muse Debata na tumimbul i, jala dialo, jala ndang diingot nasida angka panindangionna i.

⁵⁷ Jala manginsurut nasida huhut manois i, suang songon ompunasida i, marbalik ma nasida songon sior sipaotooto.

⁵⁸ Jala digitihi Ibana marhitehite tambaknasida i, jala dipinggil Ibana marhitehite ganaganaannasida i.

⁵⁹ Jadi dung dibege Debata, tarrimas ma Ibana, gabe gialan situtu ma rohana mida Israel.

⁶⁰ Dung i diulang ma ingananna di Silo, undungundung na niingananna di tongatonga ni jolma.

⁶¹ Jala dipasahat hagogoonna i tu habuangan, jala hamuliaonna poti parpadanan i tu tangan ni sipangarupa.

⁶² Jala dipasahat bangsona i tu podang, ala tarrimas Ibana mida bangso na niainna i.

⁶³ Dipangan api ma angka dolidolina i, jala ndang tarpuji be angka namarbajuna i.

⁶⁴ Marragean do angka malimna i dibahen podang, jala ndang mananangisi angka na mabaluna i.

⁶⁵ Jadi tarsunggul ma Tuhan i songon halak na modom songon ulubalang na marolopolop dibahen anggur.

⁶⁶ Jala dipaundar angka musuna i, haurahon saleleng ni lelengna do dilehon tu nasida.

⁶⁷ Jala dibolongkon undungundung ni si Josep, jala ndang be dipillit marga Epraim.

⁶⁸ Marga Juda nama dipillit, dolok Sion na hinaholonganna i.

⁶⁹Jala dipabuntul habadiaonna i sobokkon langit, songon tano on na pinaojakna i salelenglelengna.

⁷⁰Jala dipillit si Daud, naposona i, jala dibuat do ibana sian parmahanan birubiru.

⁷¹Sian na mangadu birubiru panusuan ibana dialapi, asa parmahanonna Jakkob, bangsona i dohot Israel bangso na niainna i.

⁷²Jadi diparmahan ma nasida hombar tu habonaron ni rohana i, jala ditogihon nasida marhitehite hapistaron ni angka tanganna.

79¹Ende sian si Asap. (I.) Ale Debata, nunga disola angka parbegu partohapanmu, nunga diramuni nasida jorom na badia i, jala parangusan dibahen Jerusalem.

²Nunga diparlehon nasida bangke ni angka naposom panganon ni pidong na martongatonga langit, tu binatang ni luat i do sibuk ni angka na niasianmi.

³Nunga dipangusehon mudarnasida i, songon aek humaliang Jerusalem, jala ndang adong sitanomsa.

⁴Jadi haurahon ni angka hombar hundul do hami, sielesan jala pangarehean ni angka na humaliang hami.

⁵Sadia leleng on, ale Jahowa, mangarimas Ho tongtong, jala marsijembur songon api hamuruhonmu?

⁶Pangusehon ma parpiar ni rimasmu tu parbegu, angka na so tumanda Ho, dohot tu harajaon, angka na so manjou goarmu.

⁷Ai nunga dipolgak nasida Jakkob, jala diulang ingananna i.

⁸(II.) Sai unang jujur tu hami angka hajahaton ni ompu najolo, hapogani ma manjumpangkon angka asi ni roham tu hami, ai tarjimpit situtu do hami.

⁹Sai urupi ma hami, ale Debata ni hatuaonnami, ala ni hamuliaon ni goarmu, jala palua ma hami jala hungkupi dosanami ala ni goarmu.

¹⁰Boasa ma tung dohonon ni angka parbegu: Didia do nuaeng Debatanasida i? Sai sange ma diboto angka parbegu sogot, idaonnami, partubolon ni mudar ni angka naposom, na durus i.

¹¹Sai tolhas ma tu jolo ni bohim angguhangguk ni angka na tarbuang; sai pateba ma angka anak sibunuon hian hombar tu hatimbulon ni tanganmu.

¹²Sai lompit pituhali ma pasuang tu ampuan ni hombar hundulnami haeleson, na nieleshonna i tu Ho, ale Tuhan!

¹³Ianggo hami, bangsomi jala birubiru na pinarmahanmu, sai Ho do pujionnami salelenglelengna, jala baritahononnami do pujipujianmu marsundutsundut.

80¹Ende sian si Asap.

²Ale Siparmahan Israel, sai manangi ma Ho! Ai Ho do siadu Josep, songon birubiru; sai pataridahon ma Ho, ale na marhabangsahon kerubim.

³Sai sungguli ma hagogoanmu di jolo ni Epraim dohot Benjamin dohot Manasse, jala sai ro ma Ho mangurupi hami.

⁴Ale Debata, sai pasuang ma hami, jala pasihar bohimi, asa malua hami.

⁵Ale Jahowa, Debata Zebaot, sadia leleng on marmusu tihus Ho mida tangiang ni bangsom.

⁶Dipapanganhon Ho do tu nasida roti iluilu, jala dipainumhon Ho do tu nasida iluilu martahutahu.

⁷Dibahen Ho do hami ripe badaani hombar hundulnami, jala sai dielesi angka musunami do hami.

⁸Ale Debata Zebaot, sai pasuang ma hami, jala pasihar ma bohimi asa malua hami.

⁹Dilopokkon Ho do najolo sada hau anggursian Misir, dibutbut Ho do angka parbegu, asa manuanhon ibana.

¹⁰Dipalumbang Ho do tano i di jolona, jadi marurat ma ibana jala digohi tano i.

¹¹Ditutup halinuna do angka dolok, jala doshon hau Ares ni Debata do angka rantingna.

¹²Tolhas ro di laut do manjarar angka dangkana, jala tolhas tu batang aek Euprat angka tumburna i.

¹³Boasa ma tung lohaonmu angka handangna, asa roharoha ni angka pamolus sude mamalpali ibana?

¹⁴Sai diugei baragas sian tombak do ibana, jala dijampal angka binatang ni harangan.

¹⁵Ale Debata Zebaot, sai marpangulah i ma roham, tatap ma sian banua ginja, ida jala tingkir hau anggurmon!

¹⁶Sai ondingi ma na sinuan ni siamunmi dohot anak na niainmu.

¹⁷Nunga pola masurbu ibana jala ditultuli; nunga pola angka mago nasida maradophon pangarupion ni bohim.

¹⁸Sai diondingi tanganmu ma baa ni siamunmu, anak ni jolma i na niainmu.

¹⁹Jadi ndang olo be hami sumurut sian Ho, sai pangolu ma hami, jadi pujionnami ma goarmu. (80-20) Ale Jahowa, Debata Zebaot, sai pasuang ma hami; pasihar ma bohim, asa malua hami.

81 ¹Ende sian si Asap.

²(I.) Olophon hamu ma Debata hagogoontai, suraksurakkon hamu ma Debata ni si Jakkob.

³Pungka hamu ma marende, jala pinalu ma arbab i, tulila na denggan i angkup ni sordam.

⁴Palu hamu sangka di poltak ni bulan, di tula ari parpestaanta i.

⁵Ai i do patik di Israel, uhum tu Debata ni si Jakkob.

⁶Panindangion do i dibahen Ibana di si Josep, di na borhat i ibana dompak tano Misir, pangkuling na so huantusi do hubege disi:

⁷Hubuat do siboanon i sian abarana, malua do tanganna i sian ranjang.

⁸Joujou do ho uju di hagogotan, gabe hupalua ho, hualusi do ho marhitehite ronggur, huunjuni do ho di lambung aek Meriba. Sela!

⁹(II.) Tangi ma, ale bangsongku, asa huhatindangkon tu ho! Aut ni ditangihon ho nian ahu, ale Israel!

¹⁰Ndang jadi adong Debata sileban di tongatongamu, jala unang marsomba ho tu debata ni na pulik.

¹¹Ahu do Jahowa Debatam, na panangkok ho sian tano Misir, pangangang ma pamanganmu, asa hugoki.

¹²Alai ndang ditangihon bangsongku soarangki, jala ndang dioloi Israel Ahu.

¹³Jadi hupasombu ma ibana di tangkang ni rohana i, gabe diihutihut nasida ma lomolomo ni rohanasida.

¹⁴Oe aut ma Ahu ditangihon bangsongku, diihutihut Israel angka dalanku.

¹⁵Mura do pajimputonku angka musunasida i, jala dompak angka na manosak nasida do tanganku.

¹⁶Ingkon sombaon ni angka na mangkosom Jahowa do Ibana, jala salelenglelengna do tingkinasida i. (81-17) Jala mangan

indahan sigambiri do ibana bahenonna, jala pamahaponku do ho dohot situak ni loba sian dolok batu.

82¹Ende sian si Asap. Tindang do Debata di bagasan luhutan ni Debata, mandabu uhum do Ibana di tongatonga ni angka panguhum.

²Sadia leleng on do pageduhonmuna uhum, jala dingkan an muna angka parjahat i? Sela!

³Patingkos hamu ma uhum tu na metmet dohot tu na sopot so marama, ondihon hamu ma na dangol dohot na pogos.

⁴Palua hamu ma na metmet dohot na pogos, sian tangan ni angka parjahat ma palua hamu nasida.

⁵Ndang mananda nasida, jala ndang olo nasida parrohaon, sai mardalani di haholomon do nasida, jadi reberebe ma sude angka ojahan ni tano on.

⁶Ilanggo ahu, nunga pola hudok nian: Angka Debata do hamu, jala anak ni Natumimbul do hamu sudena.

⁷Alai atik pe songon i mate do hamu songonjolma hian, jala tinggang do hamu sogot songon raja na asing sada.

⁸Hehe ma Ho, ale Debata, sai uhum ma tano on, ai guru di Ho hian do angka parbegu sudena!

83¹Ende sian si Asap.

²Ale Debata, sai unang marsonangsonang boti Ho! Unang laos

mauhom Ho, jala unang so roham, ale
Debata!

³Ai ida ma, sai manggunturi do angka
musum, jala dipagakgak angka na
mangkosom Ho do uluna.

⁴Sai marangkal do nasida mambahen tahi
sibunian dompak bangsom, jala martuptup i
nasida mangalo angka na niondinganmu.

⁵Angka ninna do: Beta, itasiaphon ma
nasida sian parbangsoan, asa unang be
taringot goar ni Israel.

⁶Ai saroha do nasida martuptup i,
mambahen parpadanan mangalo Ho:

⁷Tole angka undungundung ni Edom dohot
halak Ismael, Moab dohot halak Hagar i.

⁸Gebal dohot Amon dohot Amalek, Palistim
ro di isi ni Tirus.

⁹Tarihut nang Assur dongannasida,
tumungkol botohon ni pinompar ni si Lot.
Sela!

¹⁰Sai bahen ma tu nasida, songon tu Midian,
songon tu si Sisera, songon tu si Jabin di
lambung batang aek Kison!

¹¹Angka na siap di Endor, gabe napu tu
hauma do nasida.

¹²Bahen ma angka na sangapnasida i
songon si Oreb dohot si Seb, jala sude
rajanasida i songon si Seba dohot Salmunna.

¹³Angka na mandok: Sai italahuti ma di hita
angka inganan ni Debata!

¹⁴Ale Debatangku, sai bahen ma nasida songon halisungsung, songon hurangkam maradophon alogo.

¹⁵Songon api na mamansingkon tombak, jala songon jimburjimbur na mandilathon angka dolok.

¹⁶Suang songon i ma nasida lotongi marhitehite habahabami jala guntur i nasida marhitehite halisungsungmi.

¹⁷Marsapu haurahon ma bohinasida bahen, asa usoso nasida di goarmu, ale Jahowa!

¹⁸Ingkon langan ma nasida jala gaor salelenglelengna, sai murak ma nasida jala siap. (83-19) Asa ditanda nasida sasada Ho do na margoar Jahowa, Natumimbul gumomgom liat portibi on.

84 ¹Ende sian angka anak ni si Kora.
²Dengganna i angka ingananmi, ale Jahowa Zebaot!

³Pola do langan jala maras rohangku dibahen lungunna di angka alaman ni Jahowa; marolopolop do rohangku dohot sibukku tu Debata na mangolu i.

⁴Gari amporik jumpangan jabu, jala leangleang dapotan asarna bahen inganan ni angka anakna, mandok: Angka langgatan pamelean tu Ho, ale Jahowa Zebaot, Rajangku dohot Debatangku.

⁵Martua ma angka na mangingani bagasmu, sai Ho do pujionnasida. Sela!

⁶Martua ma halak ia di bagasan Ho hagogoonna, ia rohanasida di bagasan manuju dalan na tigor.

⁷Angka na umbolus rura partangisan, Ibana do dibahen mualna; gabe maruli pasupasu nasida.

⁸Lam leleng, lam ganda do gogonasida, paima tolhas nasida tujolo ni Debata di Sion.

⁹Ale Jahowa, Debata Zebaot, sai tangihon ma tangiangkon! Sai tangi ma, ale Debata ni si Jakkob! Sela!

¹⁰Lombulombunami do Ho, ale Debata, asi ma roham, tatap ma bohi ni Messiasmi.

¹¹Ai dumenggan do sadari di angka alamanmu sian saribu ari na asing; tagonan do dipangido rohangku sijaga pintu ahu di bagas ni Debatangku, asa maringan di angka undungundung ni parjahat.

¹²Ai Debata Jahowa do mata ni ari dohot lombulumbu, dilehon Jahowa do asi ni roha dohot hamuliaon, ndang diholit na denggan i di angka na burju marpangalaho. (84-13) Ale Jahowa Zebaot, martua ma jolma na marhaposan tu Ho.

85 ¹Ende sian angka anak ni si Kora.
²(I.) Ale Jahowa, asi do najolo roham di tanomon, dipalua Ho do si Jakkob sian habuangan.

³Marpamuati do roham di hajahaton ni bangsom on, dihungkupi Ho do dosanasida sudena. Sela!

⁴Nunga dipaombun Ho sude rimasmi, nunga mansohot roham sian parpiar ni murukmu.

⁵Sai marpangulahi ma roham tu hami, ale Debata ni hatuaonnami, jala pasohot somor ni roham dompak hami!

⁶Tung saleleng ni lelengna ma Ho marrimas dompak hami, ingotonmu tongtong rimasmu marsundutsundut?

⁷Tung so ulahanmu do pangoluhon hami, asa las roha ni bangsom mida Ho?

⁸Sai pataridahon ma tu hami, ale Jahowa, asi ni roham, jala lehon ma tu hami hatuaonmu!

⁹(II.) Sai tangihononku do manang aha na nidok ni Debata Jahowa, ai diparbaga do hasonangan tu bangsona dohot tu angka na niasianna, asa unang mulak nasida tu haotoon.

¹⁰Tongon do, donok do hatuaonna di angka na mangkabiari Ibana, asa mian muse hamuliaon di tanonami on.

¹¹Asa pajumpang sogot asi ni roha dohot hasintongan, jala masiummaan hatigoran dohot hadameon.

¹²Asa martumbur sian tano i hasintongan, jala hatigoran manatap sian banua ginjaang.

¹³Sai lehonon ni Jahowa do huhut na denggan i, jadi lehonon ni tanonami ma parbuena. (85-14) Mardalan ma hatigoran di jolona, jala patongononna ma langkanasida tu dalan.

86

¹Tangiang sian si Daud. (I.) Sai paeleng ma pinggolmu, ale Jahowa, alusi ahu, ai na dangol jala na pogos do ahu.

²Sai ramoti ma rohangku, ai hasian do ahu; sai urupi ma naposom, na marhaposan tu Ho, ale Debatangku.

³Asi ma roham di ahu, ale Tuhan, ai sai tu Ho do ahu joujou manipat ari.

⁴Sai palas ma roha ni naposomon, ai Ho do, ale Tuhan, dihalungunhon rohangku.

⁵Ai anggo Ho, ale Tuhan, pardengganbasa jala marpamuati roham, jala godang situtu do asi ni roham di sude angka na manjou Ho.

⁶Sai tangi ma, ale Jahowa, tangiangkon jala parateatehon soara ni anggukkon.

⁷Di ari hagogotanki Ho do hujou, ai sai alusanmu do ahu.

⁸Ndang adong tudoshon Ho di tongatonga ni angka Debata, ale Tuhan, jala ndang adong tudoshon angka pambahenanmi.

⁹Ro do sogot sude parbegu, angka na tinongosmi marsomba tu jolom, ale Tuhan, jala pasangaphon goarmu.

¹⁰Ai timbul do Ho jala mambahen angka halongangan, sasada Ho do Debata.

¹¹Sai ajarhon ma tu ahu, ale Jahowa, dalanmu, asa marpangalaho ahu di bagasan hasintonganmi; sai pasada ma rohangku mangkabiari goarmu.

¹² (II.) Asa hupuji Ho, ale Tuhan Debatangku, sian nasa rohangku, jala hupasangap goarmu salelenglelengna.

¹³ Ai na godang situtu do asi ni roham di ahu, jala dipalua Ho do tondingku sian banua toru apala partoru.

¹⁴ Ale Debata, hehe do angka na jungkat roha mangalo ahu, jala satuptupan do angka sibahen gogo marburu hosangki, jala ndada Ho tu jolonasida dibahen.

¹⁵ Alai anggo Ho, ale Tuhan, Debata parasi roha jala pardengganbasa do Ho, lambat tarrimas, jala parasi roha dohot parhasintongan godang.

¹⁶ Sai dompakkon ma ahu, jala asi ma roham di ahu, sai tumpakkon ma gogom tu ahu naposomon, jala palua anak ni hatobanmu.

¹⁷ Sai bahen ma tu ahu sada tanda paboa denggan ni roham, asa diida angka na hosom roha di ahu, jala maila nasida, paboa Ho sandiri, ale Jahowa, mangurupi dohot mangapuli ahu.

87 ¹ Ende sian angka anak ni si Kora. Di atas ni angka dolok habadiaon i do ojahanna.

² Holongan do roha ni Jahowa mida angka bahal ni Sion, asa mida sude inganan ni si Jakkob.

³ Na sumurung do barita taringot tu ho, ale huta ni Debata. Sela!

⁴Tariashononku ma Rahab dohot Babel masuk tu bilangan ni angka na tumanda Ahu, ida ma, halak Palistim dohot Tirus ro di Kus angka naung tubu disi.

⁵Jala taringot tu Sion dohonon ni halak do sogot: Sadasada do baoa tubu di bagasan ibana, jala laos Ibana, Natumimbul i pahothon.

⁶Bilangan ni Jahowa do angka bangso laho manurathon: Tubu disi do on sadasada. Sela!

⁷Jadi angka parende ro di panortor mandok: Di bagasan ho do angka mualhu sudena.

88¹Ende sipodaon sian si Heman, anak ni si Esra, taringot tu parsahiton ni angka na dangol.

²Ale Jahowa, Debata ni hatuaonku, sai joujou do ahu arian, sai di jolom do ahu bornginna i.

³Sai tolhas ma tu jolom tangiangki, sai paeleng ma pinggolmu tu angguhanggukki.

⁴Ai nunga mandaon rohangki di angka hinamago, jala nunga pola dolos ngolungku tu banua toru.

⁵Doshon angka na manuruk tanoman nama ahu, songon baoa na so margellok.

⁶Di tongatonga ni angka naung mate do podomanku, songon angka na rage tartullang marmodoman di tanoman, angka na so niingotmu be, jala naung tinostosan nasida sian tanganmu.

⁷ Nunga dipeakkon Ho ahu tubagasan godung apala partoru, tubagasan angka haholomon, tubagasan angka lung.

⁸ Sai didondoni murukmu do ahu, jala sude angka galumbangmu diodothon Ho tu ahu. Sela!

⁹ Nunga dipaholang Ho sian ahu angka alealengku, nunga dibahen Ho ahu hagigiannasida, tarhurung do ahu jala ndang tarbahen ahu haruar.

¹⁰ Pola do lotop matanku binahen ni pardangolan, sai Ho do hupajoujou, ale Jahowa, manipat ari, sai hupaherbang, do tanganku tu Ho.

¹¹ Tung tagamon ma bahenonmu halongangan tu angka naung mate? Manang tagamon ma hehe angka halinu mamuji Ho? Sela!

¹² Tung tagamon ma baritahononhon asi ni roham di bagasan tanoman, manang hasintonganmi di banua toru?

¹³ Tung tagamon ma botoon halongangan binahenmu di bagasan haholomon, manang hatigoranmu di bagasan tano parhalupaan?

¹⁴ Alai anggo ahu, ale Jahowa, sai tu Ho do ahu angguhangguk, gari sogot manogotna i nunga dijumpangkon tangiangki Ho.

¹⁵ Boasa ma tung tulakkononmu tondingki, ale Jahowa, tabunihononmu bohim sian ahu?

¹⁶Na dangol do ahu jala matemate sian sidakdanahon, sai hupataontaon angka parsorion binahenmu, gabe mandeledele ahu.

¹⁷Nunga dibolus angka parpiarpiar ni murukmu ahu, nunga disiaphon angka sipasonggotmu ahu.

¹⁸Sai dihaliangi do ahu songon aek manipat ari, tung luhutna do mangonsongi ahu.

(88-19) Dipaholang Ho do sian ahu aleale dohot dongan magodang, gabe haholomon do angka na hutanda.

89¹Ende sipodaon sian si Etan, anak ni si Esra.

²(I.) Sai endehononku ma angka asi ni roha ni Jahowa salelenglelengna, sai pabotohonon ni pamanganku ma hasintonganmi marsundutsundut.

³Ai ningku do: Sai lam manjadi hot do asi ni roha i salelenglelengna, marojahan di angka banua ginjaang do hasintonganmi.

⁴Nunga hubahen padan tu na pinillit ni rohangku, nunga pola huuarihon tu si Daud, naposongki:

⁵Ro di saleleng ni lelengna do pahotonku pinomparmu, jala paulionku habangsami marsundutsundut. Sela!

⁶Jadi dipuji angka banua ginjaang do halongangan binahenmu, ale Jahowa, nang hasintonganmu di luhutan ni angka na badia.

⁷ Ai tung ise ma di aoangaoang tudoshon Jahowa? Tung ise ma sian angka anak ni Debata doshon Jahowa?

⁸ Debata na songkal situtu diluhutan ni angka na badia, jala tongam maradophon sude angka na humaliang Ibana.

⁹ Ale Jahowa, Debata Zebaot, tung ise ma songon Ho? Pargogo, ale Jahowa jala hasintonganmu humaliang Ho.

¹⁰ Ho do gumomgom hagunsangon ni laut; molo manaek angka galumbangna, Ho do pasohon.

¹¹ Nunga diropuhi Ho Rahab, songon halak na tinampul: Dipaserak Ho do angka musum marhitehite botohon ni hagogoonmu.

¹² Gok di Ho do angka banua ginjang, gok di Ho do dohot tano on, nang portibi on ro di isina i, Ho do paojakkon nasida.

¹³ Utara dohot dangsina. Ho do jumadihonsa, Tabor dohot Hermon marolopolop mida goarmu.

¹⁴ Marbotohon na gogo do Ho, gogo do tanganmu, timbul do siamunmi.

¹⁵ Hatigoran dohot uhum do ojahan ni habangsami, asi ni roha dohot hasintongan patujolo ni bohim.

¹⁶ Martua ma bangso na umboto olopolop! Angka na marpangalaho di bagasan hatiuron ni bohim, ale Jahowa.

¹⁷ Sai marolopolop do nasida manipat ari marhitehite goarmu, jala timbul do nasida hinorhon ni hatigoranmu.

¹⁸ Ai Ho do saudara ni hagogoonnasida, jala hinorhon ni habasaonmi do manuarang tanduknami.

¹⁹ Ai sian Jahowa do lombulombunami, jala sian na badia ni Israel do rajanami.

²⁰ (II.) Uju i mangkatai do Ho di bagasan alatan tu angka na niasianmu, jala nimmu do: Nunga hupasahat pangurupion tu sada ulubalang, nunga hupabangkit sada dolidoli sian bangso i.

²¹ Nunga jumpang Ahu si Daud, naposongku, nunga humiahi ibana, dohot miak habadiaonki.

²² Sai tong do donganan ni tanganku ibana, nang botohonku margogoihon ibana.

²³ Na so tupa onjaron ni musu ibana, manang rupaon ni anak ni hajahaton ibana.

²⁴ Sai ropuhanku do angka alona maradophon ibana, jala ragehononku do angka na mangkosom ibana.

²⁵ Jala hasintonganku dohot asi ni rohangku mandongani ibana, jala manuarang do sogot tandukna marhitehite goarhu.

²⁶ Jala pampeongku tanganna tu laut, jala siamunna tu angka sunge.

²⁷ Langgo ibana jouonna ma Ahu: Damang do Ho, Debatanku dohot partanobatoan ni hatuaonku!

²⁸Ahu pe bahenonku do ibana sihahaan, na tumimbul sian angka raja ni tano on.

²⁹Ro di saleleng ni lelengna paianonku di ibana asi ni rohangku, jala sai hot do padanhu tu ibana.

³⁰Sai pampeongku do pinomparna ro di salelenglelengna, jala habangsana matua langit.

³¹Molo tung ditadingkon angka anakna patikki, jala ndang marpangalaho di bagasan angka uhumhu.

³²Molo tung diramuni nasida angka aturanku, jala ndang diradoti angka tonanku:

³³Jadi luluhononku ma pangalaosinasida marhitehite linsinglinsing, dohot hajahatonnasida marhitehite angka parsorion.

³⁴Alai anggo asi ni rohangku, ndada unsatonku sian ibana, jala ndang oseonku hasintonganki.

³⁵Nandang ramunanku padan na hubahen i, jala ndang ubaonku na ruar sian bibirhu.

³⁶Nunga pola huuarihon sahali tu habadiaonki: Molo tung gabusanku si Daud!

³⁷Ingkon saleleng ni lelengna do pinomparna i, jala habangsana songon mata ni ari di jolongku.

³⁸Hot do ibana salelenglelengna songon bulan, jala sintong do sitindangi di ombun. Sela!

³⁹ (III.) Hape anggo nuaeng, ditulakkon, jala dibolongkon Ho do, tarrimas do Ho dompak na miniahanmu.

⁴⁰ Nunga diupir Ho padan tu naposomon, nunga diramuni Ho tumpalna i tu tano.

⁴¹ Nunga dipuntasi Ho sude angka handangna, nunga magargar angka partanobatoanna i dibahen Ho.

⁴² Sude angka pamolus mamupusi ibana, manjadi sieleseleson ni angka hombarna hundul ibana.

⁴³ Nunga dipatimbul Ho siamun ni angka alona i, jala marlas ni roha sude musuna i dibahen Ho.

⁴⁴ Angkup ni nunga dipabalik Ho baba ni podangna i, jala ndang marnangon ibana di tongtangan dibahen Ho.

⁴⁵ Nunga dipesanhon Ho hadoharonna i, jala ditunggalingkon Ho habangsana tu tano.

⁴⁶ Nunga dipajempek Ho ariari ni haposoonna i, jala ditujungkon Ho tu ibana haurahon.
Sela!

⁴⁷ Sadia leleng on, ale Jahowa, tabunihononmu dirim tongtong? Sai marjimburjimbur murukmu songon api?

⁴⁸ Sai ingot ma, pola sadia ma umurhu, boasa ma tung magopo panompam di manisia sudena?

⁴⁹ Tung ise ma baoa i na mangolu, so idaonna hamatean, tung tarpaluasa tondina i sian tangan ni banua toru? Sela!

⁵⁰Didia do asi ni roham, angka na jolo i, ale Tuhan, angka naung niuarihonmu tu si Daud di bagasan hasintonganmu?

⁵¹Sai ingot ma, ale Tuhan, haurahon ni angka naposomon, pangusungku di sude angka bangso na sai torop di bagasan ampuanku.

⁵²Sai mangelesi do angka musum, ale Jahowa! Sai mangarehei angka bogas ni na miniahanmu do nasida. (89-53) Pinuji ma Jahowa salelenglelengna! Amin! Amin!

90¹Tangiang sian si Musa, naposo ni Debata. (I.) Ale Tuhan, sai Ho do haporusannami marsundutsundut!

²Tagan so tubu dope angka dolok, jala tagan so adong dope ditubuhon tano on dohot portibi on, nunga adong hian Ho, ale Debata, sian salelenglelengna ro di salelenglelengna.

³Sumuang do gabe orbuk jolma i dibahen Ho, dung i didok Ho muse: Mulak ma hamu, ale jolma manisia!

⁴Ai sobokkon sadari nantuari naung salpu do na saribu taon ianggo di jolom, jala songon sada gansi parjaga di borngin.

⁵Diumbang Ho do nasida, jadi mate ma nasida, manogotna i nunga martumbur diulahi songon duhutduhut.

⁶Torang ari marbunga do i, jala martumbur, hape bodarina i disabi do jadi malos.

⁷ Ai siap do hami dibahen rimasmu, jala binahen ni parpiar ni murukmu, umbahen tompu mago hami.

⁸ Nunga dibahen Ho hajahatonnami tu jolom, dosanami angka na buni tu hatiuron ni bohim.

⁹ Ai lam moru do angka ariarinami sudena dibahen rimasmu, ai songon ho i sada do laho suda angka taonnami.

¹⁰ Ariari ni taonnami, intap pitupulu taon do i, jala molo marhagagoon situtu dieak do ualupulu taon, jala hinadenggan nasida do hangaluton dohot halojaon, ai hatop situtu do laho salpu, jala habang do hami.

¹¹ Tung ise ma tumanda gogo ni rimasmu, jala dihabiari Ho hombar tu pangonai ni rimasmu?

¹² Sai parroha i ma hami mamilangi angka ariarinami, asa dapotan roha na bisuk hami.

¹³ (II.) Sai marpangulahi ma roham, ale Jahowa! Tung sadia leleng on ma? Jala asi ma roham mida angka naposom.

¹⁴ Disi torang ari pasabam ma rohanami marhitehite asi ni roham, asa marolopolop jala marlas ni roha hami di saluhut ariarinami.

¹⁵ Sai palas ma rohanami timbang ni angka ari hajimputonnami, timbang ni angka taon hinamago, na huida hami.

¹⁶ Sai pataridahon ma tu angka naposom angka pambahenanmu dohot hamuliaonmu tu angka pinomparnasida.

¹⁷Sai songgop ma tu hita habasaron ni Jahowa Debatanta, sai ditumpak Ibana ma pambahenan ni tanganta, olo tahe, sai ditumpak ma pambahenan ni tanganta i!

91 ¹Manang ise na hundul di pangondingan ni Natumimbul i, marborngin do ibana di linggom ni Pargogo na so hatudosan.

²Ningku do mandok Jahowa: Haporusanku jala partanobatoanku, Debatanku, marhaposan tu Ibana do ahu!

³Ai anggo Ibana, sai paluaonna do ho sian sambil ni parsambil, sian pangago i ni begu antuk.

⁴Sai ulosanna do ho dohot habongna, jala marhaporusan tu toru ni hatirna i do ho, tau lombulumbu dohot pangondingan do hasintonganna i.

⁵Ndang pola mabiar ho maradophon songgotsonggot borngin, maradophon sumbia, na habang arian.

⁶Maradophon begu antuk, na manisipi di na holom marimpotimpot, maradophon begu masa, na mangago di hos ni ari.

⁷Nang pe marribu marragean di lambungmi, jala marloksaloksa di siamunmi, ndang mangonai ianggo tu ho.

⁸Asal ambal matam manaili, idaonmu ma pamaloson tu angka parjahat i.

⁹Ai Ho do, ale Jahowa, haporusanku;
Natumimbul i nunga dibahen ho
partanobatoanmu.

¹⁰Ndang tagamon mangonai tu ho
hinamago, jala ndang tagamon begu masa i
dumonok tu undungundungmu.

¹¹Ai dohononna do angka surusuruanna
taringot tu ho, asa dijaga ho di angka
dalammu sudena.

¹²Sai tangantanganonnasida do ho, asa
unang tartuktuk patmu tu batu.

¹³Bolusonmu do singa dohot hala,
degedegeonmu do singa dohot buea.

¹⁴Ala na holong situtu rohana di Ahu, jadi
paluaonku ma ibana, patimbulonku ibana, ala
tinandana i goarhu.

¹⁵Jouonna ma Ahu, jadi alusanku ma ibana,
sai dongananku do ibana jumpa hagogotan,
paluaonku do ibana, jala marmulia ibana
bahenonku.

¹⁶Sai pamahaponku do ibana sarimatua,
jala pataridahononku tu ibana hatuaonku.

92 ¹Ende di ari Sabbath.

²(I.) Na denggan situtu do na mamuji
Jahowa dohot mangendehon goarmu, ale
Natumimbul!

³Mamaritahon asi ni roham manogotna i
dohot hasintonganmi bornginna i.

⁴Mardongan uninguningan sisampulutali
dohot sisampuluduatali dohot hasapi.

⁵Ai nunga dipalas Ho rohangku, ale Jahowa, marhitehite angka pambahenanmu, marolopolop do ahu mida angka jadijadian ni tanganmu.

⁶Tung na balga do angka jadijadianmu, ale Jahowa, bagus situtu do angka pingkiranmu.

⁷Ianggo baoa na bodo ndang mananda disi, jala na oto ndang marateatehonsa.

⁸Lam martumbur pe angka parjahat songon duhutduhut, jala marbunga pe sude angka siulahon hajahaton, asa siaphononhon do nasida salelenglelengna.

⁹Alai anggo Ho, ale Jahowa, timbul do ro di salelenglelengna!

¹⁰(II.) Ai ida ma, angka musum, ale Jahowa! Ai ida ma, sai na siap do sogot angka musum sai na marserak do sude angka siulahon hajahaton.

¹¹Alai dipatimbo Ho do tandukku songon tanduk ni sada rango, nunga dimiahi ahu dohot miak na lambok.

¹²Jala sombu do roha ni matangku marnida angka na mangonggop ahu, lomo do roha ni pinggolhu mananginangi barita ni angka na jungkat roha mangalo ahu.

¹³Ianggo partigor i, sai na martumbur do songon harambir, songon sada hau Ares di Libanon do ibana martunas.

¹⁴Angka na sinuan di bagasan bagus joro ni Jahowa, marbunga do nasida di bagasan angka alaman ni Debatanta.

¹⁵Sai marpinompari dope nasida, nang dung ubanon, marmiak jala rata do nasida. (92-16) Mamaritahon, paboa na tigor do Jahowa, partanobatoanki, jala ndang adong hageduhon di bagasan Ibana.

93¹Jahowa do raja, nunga marpangkean hamuliaon Ibana, marpangkean tongon Jahowa, nunga dihohoshon hagogoon: Jadi hot ma portibi on, ndang tagamon humuntal.

²Hot do habangsam sian na robi, sian saleleng ni lelengna do Ho.

³Nunga martimpul angka batang aek, ale Jahowa, nunga martimpul hasak ni angka batang aek, nunga diumbakkon angka batang aek panunjanasida.

⁴Gumogo sian angka parhasak ni aek na godang do angka galumbang ni laut, alai tumongam sahali do Jahowa di banua ginjang.

⁵Sintong situtu do angka panindangionmu, habadiaon do na tama di bagasmu, ale Jahowa, ro di salelenglelengna.

94¹(I.) Ale Debata Jahowa, nampuna angka partubolon, ale Debata, nampuna angka partubolon, marsinondang ma Ho!

²Hehe ma Ho, ale Panguhum ni tano on, paro ma partubolon mangalo angka na ginjang roha.

³Sadia leleng on angka parjahat i, ale Jahowa, sadia leleng on marolopolop angka parjahat i?

⁴Sai marbullakbullak do nasida mangkatahon hajungkaton, sai teal do pangkuling ni sude angka siulahon hajahaton.

⁵Sai diparsipal nasida do bangsom, ale Jahowa, jala diruparupa parjambaranmu.

⁶Marragean do na mabalu dohot na buro dibahen nasida, jala dibunui do angka na tading di lampin.

⁷Dung i didok nasida: Ndang diida Jahowa, jala ndang marbinoto Debata ni si Jakkob.

⁸Ua manimbang ma hamu, ale angka na oto ni bangso i, jala hamu, ale angka na bodo, sadihari pe marbisuk hamu?

⁹Tung so marbinege ma Ibana Sisuan pinggol? Tung so marnida ma Sijadihon mata?

¹⁰Ibana, na mangajar angka parbegu, tung so marlulu Ibana, Ibana do na mangajarhon parbinotoan tu manisia?

¹¹Ditanda Jahowa do angka pingkiran ni manisia, ai alogo do angka nasida.

¹²(II.) Martua ma baoa na pininsangmu, ale Jahowa, jala na pinodam marhite sian patikmu.

¹³Asa dipasonang Ho ibana maradophon angka ari hinamago, paima sidung hinali godung tu parjahat i.

¹⁴Ai ndang tagamon bolongkonon ni Jahowa anggo bangsona, manang tadingkononna parjambaranna.

¹⁵Ai sai mulak tu hatigoran do uhum, jadi ihuthonon ni sude angka na tigor roha ma Ibana.

¹⁶Tung ise ma donganku hehe mangalo angka parjahat i? Tung ise ma mangondihon ahu mangalo angka siulahon hajahaton?

¹⁷Aut sura unang Jahowa gabe pangurupion di ahu, na tung naung mangulon tondingku di tano hasonangan.

¹⁸Molo didok rohangku: Tarsulandit ma pathu, jadi disande asi ni roham do ahu, ale Jahowa.

¹⁹Di hinadeak ni holso ni rohangku di bagasan, sai dipasabam angka pangapoim do tondingku.

²⁰Tung tagamon ma satahi Ho dohot habangsa ni hamagoan, na pajadijadi halojaon tada tu patik hian?

²¹Sai marluhut i do nasida tumahi tondi ni partigor, jala mudar na so marpipot ditorui nasida.

²²Alai Jahowa do gabe partanobatoan di ahu, jala Debatangku gabe dolok batu haporusanku.

²³Jala Ibana pasuang tu nasida hajahatonnasida i, jala siaphononna do nasida di bagasan hajahatonnasida i,

siaphonon ni Jahowa Debatanta do nasida sogot.

95¹ (I.) Beta hamu itaendehon ma Jahowa, itaolophon ma partanobatoan ni hatuaonta!

²Itadapothon ma tu jolo ni bohina marhitehite pujipujian, itaolophon ma Ibana marhitehite ende!

³Ai Debata na timbul do Jahowa, jala raja bolon mangatasi sude angka debata.

⁴Di bagasan tanganna do angka ojahan ni tano on, jala guru di Ibana do punsu ni angka dolok.

⁵Guru di Ibana do laut, jala Ibana do tumompasa, jala tanganna do jumadihon tano darat.

⁶Beta hita manungkap dohot marsomba, marsinggang ma hita tu jolo ni Jahowa, Sitompa hita.

⁷Ai Ibana do Debatanta, jala hita bangso pinarmahanna, jala birubiru ni tanganna. Sadarion, aut ditangihon hamu nian soarana!

⁸(II.) Unang ma tangkangi hamu rohamuna songon uju di Meriba, songon ari uju di masa pangunjunan di halongonan.

⁹Uju na niunjunan ni angka ompumuna Ahu, tung diuji Ahu, atik pe naung diida nasida pambahenanku.

¹⁰Tung opatpulu taon bolon lelengna Ahu marbiasbias mida sundut i, jadi ningku ma:

Bangso parroha lilu do nasida, alai ndang ditanda nasida angka dalanku.

¹¹ Jadi pola maruari Ahu di bagasan rimashu: Molo tung masuk nasida tu paradiananku!

96¹ (I.) Endehon hamu ma sada ende na imbaru di Jahowa, endehon ma Jahowa, ale sandok tano on!

² Endehon hamu ma Jahowa, puji hamu ma goarna, baritahon hamu ma hatuaonna ganup ari.

³ Pajojor hamu ma di tongatonga ni angka parbegu hamuliaonna i, di tongatonga ni saluhut bangso halongangan, angka na binahenna i.

⁴ Ai na timbul do Jahowa, jala tama situtu pujion, na songkal do Ibana mangatasi sude angka debata.

⁵ Ai ajiajian do sude debata ni angka bangso, alai anggo Jahowa naung manjadihon angka langit.

⁶ Hatongamon dohot hamuliaon di jolona, hagagoon dohot hinauli masa di bagasan habadiaonna i.

⁷ (II.) Hamu ale angka marga ni angka bangso, sai lehon hamu ma hamuliaon dohot hagagoon tu Jahowa!

⁸ Lehon hamu ma di Jahowa hamuliaon ni goarna; boan hamu ma silehonlehon dung i masuk ma hamu tubagasan angka alamanna.

⁹ Marsomba ma hamu tu Jahowa marpangkean na marhadohoan, angka hitir

ma maradophon Ibana ale isi ni sandok tano on.

¹⁰Paboaboa hamu ma di tongatonga ni angka parbegu: Jahowa do raja! Hot ma antong portibi on, ndang tagamon humordit, uhumonna ma sogot angka bangso di bagasan hatigoran.

¹¹Marlas ni roha ma disi angka langit jala marolopolop tano on, marhasakhasak ma laut ro di isina.

¹²Marolopolop ma angka ladang ro di nasa na disi, marolopolop ma disi sude angka hau di tombak.

¹³Di jolo ni Jahowa, ai nunga ro Ibana, nunga ro Ibana manguhum tano on; uhumonna ma liat portibi on di bagasan hatigoran, nang angka bangso di bagasan hasintonganna.

97 ¹(I.) Jahowa do raja, marolopolop ma tano on, marlas ni roha ma pulopulo angka na lan i!

²Ombun jala haholomon marimpotimpot humaliang Ibana, hatigoran dohot uhum ojahan ni habangsana.

³Api mardalan di jolona manganhon angka alona humaliang.

⁴Disondangi angka hilapna do portibi on, jadi lalolalo tano on marnidasa.

⁵Malala do angka dolok songon pantis maradophon bohi ni Jahowa, maradophon bohi ni Tuhan ni sandok tano on.

⁶Dibaritahon angka langit do hatigoranna, jala sude angka bangso marnida hamuliaonna.

⁷(II.) Ingkon tarurak sogot sude angka sisomba ajiajian, angka na papujipuji dirina mida ganaganaan, ingkon marsomba tu Ibana do sude angka debata sileban!

⁸Dibege Sion do i, jadi marlas ni roha ma, marolopolop ma angka boru ni Juda, ala ni panguhummu, ale Jahowa!

⁹Ai Ho do, ale Jahowa na tumimbul, gumomgom sandok tano on, tumimbul situtu do Ho sian nasa debata sileban.

¹⁰Hamu ale angka na mangkaholongi Jahowa, sai hagigihon hamu ma na jat! Ibana do siramoti tondi ni angka na niasianna, sai paluaonna do nasida sian tangan ni parjahat.

¹¹Sai tarsabur do hatiuron di partigor, jala las ni roha di angka na unjur marroha.

¹²Marlas ni roha ma hamu, ale angka partigor di bagasan Jahowa, jala puji hamu ma goarna na badia il

98¹Endehon hamu ma di Jahowa ende na imbaru sada, ai nunga dipambahen Ibana angka halongangan; nunga ditumpahi siamunna i dohot tanganna na badia i Ibana.

²Nunga dipabotohon Jahowa hatuaonna i, nunga dipapatar Ibana hatigoranna i di adopan ni angka parbegu.

³Nunga diingot Ibana asi ni rohana dohot hasintonganna tu bagas ni Israel, nunga diida luhut ujung ni tano on hatuaon ni Debatanta.

⁴ Marsuraksurak ma ho, ale sandok tano on, mangolophon Jahowa, pangiar ma soaram marolopolop, jala marende ma hamu.

⁵ Puji hamu ma Jahowa, marangkup arbap, mardongan arbap dohot soara ni ende!

⁶ Marolopolop ma hamu di jolo ni Raja Jahowa, mardongan sarune dohot soara ni sangka.

⁷ Mardorom ma laut ro di isina, portibi on ro di pangisina i.

⁸ Martopaptopap ma angka batang aek, rap marolopolop ma angka dolok.

⁹ Dijolo ni Jahowa, ai nunga ro Ibana laho manguhum tano on, uhumonna ma portibi on marhitehite hatigoran dohot angka bangso marhitehite hasintongan.

99 ¹ Jahowa do raja, angka hitir ma angka bangso; marhabangsahon kerubim Ibana, humuntal ma tano on.

² Tongam do Jahowa di Sion, jala timbul do Ibana gumomgom sude angka bangso.

³ Pujionnasida ma sogot goarmu na timbul jala na songkal, na badia do Ibana.

⁴ Dohot hagagoon ni raja na mangkaholongi uhum. Nunga dipahot Ho hasintongan, nunga dipamasa Ho uhum dohot hatigoran di Jakkob.

⁵ Patimbul hamu ma Jahowa Debatanta i, jala marsinggang ma hamu tujolo ni sidegedegean ni patna, na badia do Ibana!

⁶Si Musa dohot si Aron di tongatonga ni angka malimna, jala si Samuel di tongatonga ni angka sijou goarna, manjoujou do nasida tu Jahowa, jadi Ibana mangalusi nasida.

⁷Di bagasan ombun na marsijongjong Ibana mangkatai tu nasida, diradoti nasida do angka panindangionna i dohot patik na nilehonna i tu nasida.

⁸Ale Jahowa, Debatanami, Ho do mangalusi nasida, Debata na marpamuati do Ho di nasida, jala parlulu di pambahenannasida.

⁹Sai patimbul hamu ma Jahowa Debatanta i, jala marsinggang ma hamu di dolokna na badia i, ai na badia do Jahowa Debatanta i.

100¹Ende hamauliateon. Olophon ma Jahowa, ale sandok tano on!

²Oloi hamu ma Jahowa marhitehite las ni roha, ro be ma hamu tu jolona marhitehite olopolop.

³Boto hamu ma on: Jahowa do Debata; ibana jumadihon hita, jala Ibana nampuna hita, bahen bangsona dohot birubiru pinarmahanna.

⁴Bongot i hamu ma angka bahalna marhitehite hamauliateon, angka alamanna marhitehite pujipujian, mauliate ma rohamuna tu Ibana, puji hamu ma goarna.

⁵Ai pardengganbasa do Jahowa, ro di saleleng ni lelengna do asi ni rohana, jala marsundutsundut do hasintonganna.

101

¹Ende sian si Daud. Asi ni roha dohot uhum endehononku, umpalu parhinaloan ma ahu mamuji Ho, ale Jahowa.

²Naeng pantas ahu marpangalahohon dalam haburjuon; sadihari pe ro Ho manopot ahu, naeng ahu marpangalahohon hadaulaton ni rohangku ditonga ni jabungku.

³Ndang olo ahu mambahen pambahenan na jat di jolo ni matangku; dihagigihon rohangku do pambahenan roharoha, tung na so jadi dais do i tu ahu.

⁴Ingkon mandao sian ahu roha pangansi, ndang hutanda hajahaton.

⁵Manang ise na marsibuni mangkata tundal donganna, sai siaphononku do ibana; manang ise parmata baus dohot parroha manggang, ndang tarparrombang ahu.

⁶Sai humatamatahon do angka parburju ni luat i bahen donganku sahundulan; manang ise na mangihutihut dalam hadaulaton, ingkon ibana parhaladongku.

⁷Na so tupa maringan ditonga ni jabungku sibahen sipaotooto; na so tupa mian di adopan ni matangku sihatahon gabus.

⁸Sai siaphononku do ganup sogot sude angka parjahat ni luat i umpidomhon sian huta ni Jahowa sude angka siulahon hajahaton.

102

¹Tangiang sian sada halak na dangol jumpa maras ibana, jala diusehon alualuna tujolo ni Jahowa.

²(I.) Ale Jahowa, sai tangi ma tangiangkon, jala sai tolhas tu Ho ma angukkon!

³Unang tung tabunihon bohim maradophon ahu di ari hagogotanki, sai paeleng ma pinggolmu tu ahu, hapogani ma mangalusi ahu di ari panjouonku.

⁴Ai nunga salpu ariaringku songon timus, jala mohop situtu holiholingku songon dalihan.

⁵Mosok songon duhutduhut jala mahiang ateatengku, gari manganhon sipanganon lupa do rohangku.

⁶Manandos holiholingku di sibukku dibahen soara ni anggukku.

⁷Tudoshon onggang di halongonan do ahu, songon sipauk di turanggong do ahu.

⁸Sai marhal do ahu, jadi songon amporik na meat punjung di tarup do ahu.

⁹Manipat ari sai direhei angka musungku ahu, angka nalalaen do nasida mambahen ahu panolonannasida.

¹⁰Ai sirabun do hupangan i songon roti, jala husaor iluilungku tu siinumonku.

¹¹Maradophon rimasmu dohot parpiripirionmu, ai jolo dijomput Ho ahu, dung i ditimpalhon Ho ahu.

¹²Songon halinu na manihir do angka ariaringku, jala lam malos do ahu songon duhutduhut.

¹³(II.) Alai anggo Ho, ale Jahowa, sai marhabangsa do Ho salelenglelengna, jala marsundutsundut do parningotan di Ho.

¹⁴Sai hehe ma Ho mambahen asi ni roham di Sion, ai nunga jumpang tingki parasi ni roha di ibana, nunga ro tingkina.

¹⁵Ai holong situtu do roha ni angka naposom mida angka batu ni Sion, jala habot do rohanasida mida orbukna.

¹⁶Jadi mabiar sogot angka parbegu mida goar ni Jahowa, ro di sude angka raja ni tano on mida hamuliaonmu.

¹⁷Ala naung dipauli Jahowa Sion i, naung tarida Ibana di hamuliaonna.

¹⁸Naung marpangulah i rohana mida tangiang ni na so mardihadiha, jala ndang lea rohana di tangiangnasida.

¹⁹Surathononhon ma i tu na pinompar sogot, jadi bangso sitompaon dope mamuji Jahowa sogot.

²⁰Ala naung manatapnatap Ibana sian habadiaonna na timbo i, ala naung mandulo Jahowa sian banua ginjang tu tano on.

²¹Laho manangihon hoihoi ni angka na tarbuang, laho paluahon angka anak ni hamatean hian.

²²Asa dibaritahon nasida di Sion goar ni Jahowa dohot baritana di Jerusalem.

²³Molo sange marpungu sogot angka bangso ro di angka harajaon mangoloi Jahowa.

²⁴Nunga suda gogongku di tongandalan dibahen Ibana, nunga dipajempek ariaringku.

²⁵Ningku ma: Ale Debatangku, unang tung alap ahu di parsitongaan ni angka ariaringku, marsundutsundut do ianggo angka taonmi.

²⁶Ho do paojakkon tano on di na robi, jala jadijadian ni tanganmu do angka langit.

²⁷Ianggo nasida laho mago do sogot, alai anggo Ho sai hot do; laho buruk do ianggo nasida sude songon ulos; songon sampesampe paubaonmu nasida sogot, gabe muba ma nasida.

²⁸Alai sai tong do ianggo Ho, jala ndang olo marujung angka taonmi. (102-29) Sai dapotan inganan do angka anak ni naposom, jala sai hot di jolom do pinomparnasida.

103¹Ende sian si Daud. Puji ma Jahowa, ale tondingku, jala nasa rohanku di bagasan mamuji goarna na badia i.

²Puji ma Jahowa, ale tondingku, jala unang tung halupahon denggan ni basana sudena.

³Ibana do manesa dosam sudena, Ibana pamalum angka sahitsu sudena.

⁴Ibana paluahon ngolum sian hamagoan, Ibana martumpalhon tu ho denggan basa dohot asi ni roha.

⁵Ibana pamahap roham marhitehite denggan basa, asa mulak poso ho, songon pidong raja wali.

⁶Jahowa do patupahon angka pambahenan hatigoran, jala dipatingkos uhum tu sude angka na nirupa.

⁷Ibana do pabotohon angka dalanna tu si Musa, tu angka anak ni Israel angka pambahenna i.

⁸Parasi roha jala pardengganbasa do Jahowa, lambat tarrimas jala parasi roha godang.

⁹Ndang tongtong Ibana manorui, jala ndang gotos rohana saleleng ni lelengna.

¹⁰Ndang dibahen tu hita hombar tu angka dosanta, jala ndang dibaloshon tu hita hombar tu angka hajahatonta.

¹¹Ai songon dao ni langit sian tano on do gogo ni asi ni rohana di angka na mangkabiari Ibana.

¹²Songon dao ni habinsaran sian hasundutan dipadao Ibana sian hita angka pangalaosintai.

¹³Songon asi ni amaama tu angka anakna asi ni roha ni Jahowa di angka na mangkabiari Ibana.

¹⁴Ai diboto Ibana do tompanta, diingot do orbuk hita.

¹⁵Songon duhutduhut do ariari nijolma na gale i, marbunga ibana songon bunga di ladang.

¹⁶Ai dibolus alogo ibana, jadi ndang disi be, jala ndang tartanda be ingananna i.

¹⁷Alai anggo asi ni roha ni Jahowa sian salelenglelengna do ro di salelenglelengna di

angka na mangkabiari Ibana, jala hatigoranna marnini marnono.

¹⁸Di angka na mangaradoti padan binahenna i dohot patupahon angka patikna i.

¹⁹Nunga dipaojak Jahowa habangsana di banua ginjang, jala harajaonna sasudena.

²⁰Puji ma Jahowa, hamu ale angka surusuruanna, hamu ale angka ulubalang na gogo, angka na patupahon hatana, di na tinangihonmuna soara ni hatana i!

²¹Puji ma Jahowa, hamu ale angka paranganna i sudena, hamu angka parhaladona, angka sipasaut lomo ni rohana!

²²Puji ma Jahowa, hamu ale angka jadijadianna sudena, di sude inganan ni harajaonna i, puji ma Jahowa, ale tondingku!

104¹ (I.) Puji ma Jahowa, ale tondingku! Na bolon situtu do Ho, ale Jahowa Debatangku, marpangkean hasangapon dohot hamuliaon do Ho.

²Hatiuron dialithon Ibana hira ulos, Ibana pahembangkon angka langit songon rimberimbe.

³Ibana manggulanggulangi di angka aek bilutna parginjang; huretana do dibahen angka ombun i, mardalandalan do Ibana di atas habong ni alogo.

⁴Ibana mambahen angka alogo surusuruanna, api na marjimburjimbur bahen parhaladona.

⁵Nunga dipaojak Ibana tano on tu angka ojahanna i, asa unang lalolalo salelenglelengna.

⁶Lintong majoajo do pangkuphupina dibahen hira ulos, disalpui aek i do angka dolok.

⁷Maporus do angka i dibahen pangasupim, humalaput do nasida maporus maradophon soara ni ronggurmu.

⁸Hinsat ma angka dolok, marongrong ma angka rura tu inganan, na pinaojakmu hian di nasida.

⁹Nunga dibahen Ho hian sada parbolatan, na so tupa salpuanna, ndang jadi ulahanna manghungkupi tano on.

¹⁰Ibana manongos angka mual di angka rura, sian holangkolang ni angka dolok do angka i mabaor.

¹¹Dipasobur nasida saluhut binatang harangan, gabe sombu ma uas ni angka halode harangan.

¹²Marasari di lambungnasida i pidong angka na martongatonga langit, angka na pahar soarana sian holangkolang ni angka dangka.

¹³Ibana pasobur angka dolok sian angka bilutna parginjang i, sian parbue ni angka jadijadianmu do butong tano on.

¹⁴Ibana patubuhon duhutduhut di pinahan dohot ingkau rata bahen parulian ni jolma, laho paruarhon roti sian tano on.

¹⁵Ro di anggur, na palas roha ni jolma na gale i, asa marmiak bohina lobi sian na hona

miak, dohot roti na tumungkol roha ni jolma na gale i.

¹⁶Butongan ma angka hau ni Jahowa, angka hau Ares ni Libanon, angka na sinuanna i.

¹⁷Disi ma marasari angka pidong; siboru tasik i na marjabuhon hau tusam.

¹⁸Angka bedu do nampuna dolok angka na timbo i, haporusan ni angka antuasus do angka dolok batu.

¹⁹Ibana mambahen bulan panjujuran tingki, diboto mata ni ari do hasundutanna.

²⁰Ho do mambahen haholomon, jadi tubu ma borngin, disi ma gumamang saluhut binatang harangan;

²¹Singa na bajar, angka na patungaor mangido sisoroonna jala mangalului sian Debata sipanganon nasida.

²²Binsar mata ni ari, manginsurut ma nasida, laho manggompang tubagasan liangnasida.

²³Ruar ma jolma i tumopot ulaonna, na pinuhutanna rasirasa bot ari.

²⁴(II.) Tung na lan situtu do angka jadijadianmu, ale Jahowa! Saluhutna i dipauli Ho marhitehite hapistaran, tung gok jadijadianmu do tano on.

²⁵Tole laut i na balga jala na lambas, disi do rumamang angka gulokgulok na so habilangan, binatang angka na metmet rap dohot angka na balga.

²⁶Disi do mardalani angka parau, tole buea, na jinadihonmu, asa marmeammearm disi.

²⁷Saluhut nasida mangaranap tu Ho, asa lehononmu sipanganon nasida di tingkina be.

²⁸Molo dilehon Ho di nasida, dijomputi nasida, molo dipatedek Ho tanganmu, butongan nasida di na denggan i.

²⁹Molo ditabunihon Ho bohim, holsoan ma nasida, ditait Ho ma hosanasida, monding ma nasida, jala mulak nasida tu orbuknasida hian.

³⁰Molo ditongos Ho tondim, tartompa ma nasida, jala dipaimbaru Ho do rupa ni tano on.

³¹Sai ro di salelenglelengna ma hamuliaon ni Jahowa marlas ni roha ma Jahowa mida angka jadijadianna i!

³²Molo Ibana mamereng tano on, jadi humuntal ma, dijama angka dolok, jadi martimus ma.

³³Endehononku ma Jahowa saleleng di ngolungku, umpalu parhinaloan ma ahu umpuji Debatangku, saleleng adong dope ahu.

³⁴Sai dihalomohon rohana ma nian pingkiranku, ianggo ahu, sai marlas ni roha do ahu mida Jahowa.

³⁵Sai siap ma nian angka pardosa sian tano on, jala unang adong be angka parjahat! Puji ma Jahowa, ale tondingku! Halleluya!

105

¹ (I.) Puji hamu ma Jahowa,
baritahon hamu ma goarna i,
pabotohon hamu di tongatonga ni angka
bangso angka pambahenanna i!

²Endehon hamu ma Ibana, palu hamu ma
parhinaloan umpuji Ibana, marnonangi ma
hamu taringot tu halongangan angka na
binahenna i sudena.

³Tunggulhon hamu ma goarna na badia
i, marlas ni roha ma angka na mangalului
Jahowa.

⁴Sisiri hamu ma Jahowa dohot hagogoonna
i, tongtong ma lulu i hamu bohina.

⁵Sai ingot hamu ma halongangan angka
naung binahenna i, angka tanda halongangan
naung binahenna i dohot uhum angka na ruar
sian pamanganna.

⁶Hamu ale pinompar ni si Abraham,
naposona i, hamu ale anak ni si Jakkob,
angka na pinillitna i!

⁷Ibana, Jahowa do Debatanta, sar tu liat
portibi on do angka uhumna.

⁸Sai marningot do Ibana di padan binahenna
ro di salelenglelengna, di hata pinatikna i
marriburibu sundut.

⁹Padan naung binahenna i tu si Abraham, ro
di uarina tu si Isak.

¹⁰Jala dihajongjongkon do i tu si Jakkob
bahen patik, tu si Israel bahen padan
salelenglelengna.

¹¹ Ninna do: Tu ho do lehononku tano Kanaan, partalian ni partohapanmuna.

¹² Ujujolma habilangan dope nasida, otik jala paisolat disi.

¹³ Jala sai marbungkasan nasida sian bangso tu bangso, sian sada harajaon tu bangso na asing.

¹⁴ Ndang diloas Ibana halak mangarupa nasida, jala dipinsang do angka raja ala nasida.

¹⁵ Unang hahua hamu angka na humiahi, jala unang sonoi hamu angka panurirangku!

¹⁶ Dung i dipasonggop Ibana haleon tu tano i, diponggolhon ma nasa tungkot parbohalan.

¹⁷ Disuru Ibana sada halak parjolonasida, targadis ma si Josep gabe hatoban.

¹⁸ Disuhulhon halak ma patna i tu beangan, sumuruk bosi do hosana i.

¹⁹ Paima jumpang tingki hasosonggop ni hatana, dung diuji pangkataion ni Jahowa ibana.

²⁰ Jadi disuru rajai ma paluahon ibana, sigomgom angka bangso mandokkon tanggalon ibana.

²¹ Dipabangkit ma ibana bahen induk ni jabuna dohot sigomgom sinamotna sudena.

²² Asa tarihot angka indukna guru lomo ni rohana, jala diparbisuhi angka sintuana.

²³ Dung i tolhas ma Israel tu Misir, gabe paisolat ma si Jakkob di tano ni si Ham.

²⁴Dung i gabe situtu ma bangsona i ditumpak, jala sumangap do i dibahen sian angka alona i.

²⁵Dipahosing ma ianggo rohanasida mangkosom bangsona i, mambahen bisukbisuk tu angka naposona i.

²⁶(II.) Dung i disuru ma si Musa, naposona i, si Aron, na pinillitna i.

²⁷Dipatupa nasida na dua ma di tongatonganasida tanda angka na tinonahonna dohot angka halongangan di tano ni si Ham.

²⁸Ditongos Ibana ma haholomon, asa paholomhon, jadi ndang dijua nasida angka hatana i.

²⁹Dipauba angka batang aeknasida gabe mudar, jadi marragean ma dengkenasida.

³⁰Marrumang ma angka tohuk sian tanonasida masuk tubagasan bilut ni angka rajanasida.

³¹Mangkuling ma Ibana, jadi ro ma angka naning, angka rongit di sandok parbolatannasida.

³²Udannasida gabe ambolas dibahen Ibana, angka jimbunjimbur ni api di tanonasida.

³³Jala i do mamopoi hau anggur dohot antajaunasida, jala ditipulhon angka hau di parbolatannasida.

³⁴Mangkuling Ibana, jadi ro ma angka sihapor dohot tamponok so habilangan.

³⁵Jadi dijampal ma sude ingkau rata di tanonasida, dijampal dohot parbue ni tanonasida.

³⁶Dung i diantuk Ibana ma nasa buhabaju di tanonasida, patumonaan ni gogonasida sudena.

³⁷Dung i diparuar ma nasida mantat perak dohot sere, jala ndang adong na gale di angka marganasida i.

³⁸Marlas ni roha do Misir di na ruar i nasida, ai madabu do tu nasida hatahuton maradophon nasida.

³⁹Dipaherbang Ibana sada ombun bahen parlapelapean, dohot api patiurhon borngin.

⁴⁰Mangido nasida, jadi diparo ma angka lote, jala dipamahap nasida mangan sagusagu sian banua ginjang.

⁴¹Ibana mangarigathon dolok batu, jadi mabaor angka aek, angka na mardalan di tano tangkaltangkal songon sunge.

⁴²Ai diingot Ibana do hatana na badia i tu si Abraham, naposona i.

⁴³Jadi Ibana paruarhon bangsona i marhinsa ni roha, marolopolop do angka na pinillitna i.

⁴⁴Dung i dilehon Ibana tu nasida angka tano ni parbegu, jala nasida do tumeana na niula ni angka bangso.

⁴⁵Asa diradoti nasida angka aturanna jala diparangehon angka patikna i. Halleluya!

106¹ (I.) Halleluya! Mandok mauiate ma hamu di Jahowa, ai na basa

do Ibana, ai ro di salelenglelengna do asi ni rohana i.

²Tung ise ma tuk mangkatahon angka hagagoon ni Jahowa, patubegehon baritana i sudena?

³Martua ma angka na mangaradoti uhum, na tongtong patupahon hatigoran.

⁴Sai ingot ma ahu, ale Jahowa, hombar tu halolomo di bangsom, sai tingkir ma ahu marhitehite hatuaonmi!

⁵Asa hupaidaida hadoharon ni angka na pinillitmu, asa huhalashon halalas ni roha ni bangsomi, mamujimuji rap dohot partohapanmi.

⁶(II.) Nunga mardosa hami rap dohot ompunami, nunga mangulahon hageduhon hami, nunga manjahati hami.

⁷Ndang diparateatehon angka ompunami di Misir halongangan angka na binahenmi, ndang diingot nasida hinagodang ni asi ni roham, jala mangalo do nasida di lambung laut pararungan i.

⁸Hape Ibana paluahon nasida ala ni goarna i, laho pabotohon hagagoonna i.

⁹Jadi mangonai hata do Ibana tu laut pararungan i, gabe marsik ma, dung i Ibana manogihon nasida umbolus angka lung songon adaran.

¹⁰Jadi Ibana paluahon nasida sian tangan ni parsomor, jala ditobus nasida sian tangan ni musu.

¹¹ Dung i dilungkupi aek alonasida i, nanggo sada sian nasida ndang teba.

¹² Jadi dihaporseai nasida ma angka hatana, diendehon ma baritana i.

¹³ (III.) Hape tibu do dihalupahon nasida angka pambahenanna i, ndang dipaima nasida sangkapna i.

¹⁴ Lam mangoloi hisaphisap do nasida di halongonan, jala diunjuni Debata di tano tangkaltangkal.

¹⁵ Jadi dilehon Ibana tu nasida pinangidonasida i, gabe ditongos ma begu tiarap ala ni hisaphisapnasida i.

¹⁶ Dung i mangiburu ma nasida dompak si Musa di parsaroan, dompak si Aron, na badia ni Jahowa.

¹⁷ Dipangangang tano i ma babana asa mamondut si Datan, jala dilungkupi luhutan ni si Abiram.

¹⁸ Jala didilati api luhutannasida i, nala ni api mansudahon angka parjahat i.

¹⁹ Dipauli nasida ma sada lombu di Horeb, jala marsomba nasida tu gambaran na tinuang i.

²⁰ Jadi disambarhon nasida ma hamuliaonnasida tu sumansuman ni lombu, sigagat duhut.

²¹ Nunga dihalupahon nasida Debata, Sipaluanasida i, na patupahon angka pambahenan na balga di Misir.

²²Angka halongangan di tano ni si Ham, angka sipasonggot di lambung laut pararungan.

²³Nunga pola didok Ibana, siaphononna nasida, aut unang si Musa, na pinillitna i jongjong di partostosan di jolona i, paombunhon murukna i, asa unang disiaphon.

²⁴Dung i dihapishon rohanasida tano na hinapianan ni roha, ndang dihaporseai nasida hatana i.

²⁵Marmungutmungut ma nasida di bagasan undungundungnasida i, ndang ditangihon nasida soara ni Jahowa.

²⁶Jadi ditenggalhon Ibana ma tanganna dompak nasida, naeng mangaragehon nasida di halongan.

²⁷Mandanggurhon dohot pinomparnasida tu tongatonga ni angka parbegu, jala paserakkon nasida tu angka luat.

²⁸Dung i diharosuhon nasida ma Baal-Peor huhut manganhon angka pelean ni na mate ajiajiannasida.

²⁹Sai maminggili do nasida di pambahenannasida i, jadi rarat ma begu masa mangaragehon nasida.

³⁰Dung i hehe ma si Pinehas mangaluluhon, gabe motap ma begu masa i.

³¹Jadi dietong ma i tu ibana gabe hatigoran marsundutsundut sahat ro di salelenglelengna.

³²Dung i manggitih muse nasida di lambung aek Meriba parbadaan, gabe tarjea ma si Musa dibahen nasida.

³³Ai ditaji nasida tondina i, gabe tarsor ma bibirna mandok soara.

³⁴(IV.) Nandang disiaphon nasida angka bangso, naung nidokkon ni Jahowa tu nasida.

³⁵Lam disaorsaor nasida do angka parbegu, jala diguruhon angka pambahenannasida.

³⁶Jala dipapelepele angka ajiajiannasidai, jadi jorgong ma i tu nasida.

³⁷Huhut do dipampelehon nasida angka anak dohot borunasida tu begu.

³⁸Jala dipandurushon nasida mudar na so marpipot, mudar ni angka anak dohot borunasida, angka na pinelehonna tu angka ajiajian ni tano Kanaan, gabe ramun ma tano i dibahen sapata ni mudar.

³⁹Jadi ormus ma nasida di pambahenannasida i, jala mangincui nasida di parulaon nasida i.

⁴⁰Jadi marpiarpiar ma muruk ni Jahowa dompak bangso i, jala dihabiasion partohapanna i.

⁴¹Dung i dipasahat ma nasida tubagasan tangan ni angka parbegu, gabe digomgom halak na mangkasomorhon nasida ma nasida.

⁴²Jadi dirupa musunasida i ma nasida, gabe tarsugutsugut nasida tu toru ni tanganna.

⁴³Mansai jotjot do nian Ibana paluahon nasida, hape anggo nasida sai mangalo do

mangihutihut sangkapnasida i, jadi pesan ma nasida binahen ni hajahatonnasida i.

⁴⁴(V.) Alai manatap ma anggo Ibana di hagogotannasida i, uju na tinangihonna i angguhangguknasida.

⁴⁵Jadi diingot Ibana muse padanna i tu nasida, meol ma rohana hombar tu hinagodang ni asi ni rohana.

⁴⁶Jadi dapotan asi ni roha ma nasida dibahen maradophon sude angka na mambuangkan nasida.

⁴⁷Tumpahi ma hami, ale Jahowa, Debatanami, jala papungu hami sian angka parbegu, asa hupuji hami goarmu na badia i jala martanggulhon baritami.

⁴⁸Pinuji ma Jahowa, Debata ni Israel sian na saingan sahat ro di salelenglelengna jala rim bangso i mandok: Amin! Halleluya!

107 ¹(I.) Mandok mauiliate ma hamu di Jahowa, ai pardengganbasa do Ibana, ai salelenglelengna do asi ni rohana i.

²I ma dohonon ni angka na pinalua ni Jahowa, angka na pinaluana sian tangan ni musu.

³Jala angka na pinapunguna i sian angka luat, sian habinsaran dohot sian hasundutan, sian utara dohot sian laut i.

⁴Lilu do angka nasida di halongonan di dalan na lungun, ndang jumpang nasida huta soranganna.

⁵Male huhut mauas nasida, pola tarhatos rohanasida di bagasan.

⁶Jadi joujou ma nasida tu Jahowa di hagogotannasida i, gabe dipalua Ibana nasida sian hagogotannasida i.

⁷Dung i ditogihon ma nasida di dalan na tigor i, asa tolhas nasida tu huta siinganan.

⁸(II.) Ingkon pujionnasida ma Jahowa ala ni asi ni rohana dohot halongangan angka na binahenna i tujolma manisiasia.

⁹Ala naung pinasabamna roha na malungun i, jala dipasuksuk na denggan i tu roha na male i.

¹⁰Angka na hundul di haholomon dohot di linggom ni hamatean, angka na nirante ni pardangolan dohot bosi.

¹¹Ala na nialonasida i angka hata ni Debata, jala dielesi sangkap ni Natumimbul i.

¹²Jadi dipajimput Ibana ma rohanasida marhitehite hangaluton, angka martungkapan ma nasida, jala ndang adong sipangurupi.

¹³Dung i joujou ma nasida tu Jahowa di hagogotannasida, jadi dipalua ma nasida sian hasosahannasida i.

¹⁴Ibana do paruarhon nasida sian haholomon dohot sian linggom ni hamatean, jala dirapui angka rantenasida i.

¹⁵(III.) Ingkon pujionnasida ma Jahowa ala ni rohana dohot halongangan angka na binahenna i tujolma manisiasia.

¹⁶Ala naung binolana i angka pintu haksa, jala dirosahi angka sordaksordak bosi.

¹⁷Marsipal dihilala angka na oto ala ni dalan pangalaosionnasida i dohot dibahen angka hajahatonnasida.

¹⁸Luhut do sipanganon dihaginehon rohanasida, jala nunga pola dolos nasida sahat tu angka harbangan ni hamatean.

¹⁹Dung i joujou ma nasida tu Jahowa di hagogotannasida i, jadi dipalua Ibana nasida sian angka hasosahannasida.

²⁰Ditongos ma hatana i jala dipamalum nasida, jala dipalua nasida sian hamagoannasida i.

²¹(IV.) Ingkon pujionnasida ma Jahowa ala asi ni rohana dohot halongangan angka na binahenna i tu jolma manisias.

²²Jala dipelehon nasida ma angka pelean hamauliateon jala dipajojor angka pambahenanna i mardongan olopolop.

²³Angka na tuat marparau tu laut, angka na marboniaga tu angka laut bolon.

²⁴Diida nasida ma angka jadijadian ni Jahowa dohot halongangan angka na binahenna di bagasan lung.

²⁵Dung i mangkuling ma Ibana, jadi hehe ma habahaba, gabe lam timbo ma angka galumbangna i.

²⁶Tongkin manaek nasida tu langit, tongkin tuat nasida tu angka lung, malala ma rohanasida dibahen hinamago.

²⁷ Moror do angka nasida jala lalolalo songon parmabuk, jala tarbondut do sude habisukonnasida.

²⁸ Dung i joujou ma nasida tu Jahowa di hagogotannasida i, jadi diparuar Ibana nasida sian hasosahannasida i.

²⁹ Dipasohot ma habahaba i gabe mardemak, so ma dohot angka galumbangnasidai.

³⁰ Jadi marlas ni roha ma nasida ala naung so angka i, dung i ditogihon Ibana ma nasida tu muara lomo ni rohanasida.

³¹ (V.) Ingkon pujionnasida ma Jahowa ala asi ni rohana, dohot halongangan angka na binahenna i tujolma manisias.

³² Jala patimbulonnasida Ibana di bagasan luhutan ni bangso i, jala pujionnasida Ibana di luhutan ni angka sintua.

³³ Ibana mangarsik angka batang aek gabe halongonan dohot angka mual gabe tano bangkalbangkal.

³⁴ Tano bosar hian gabe garaga ala hajahaton ni angka pangisina i.

³⁵ Ibana muse mambahen halongonan hian gabe tao jala tano bangkalbangkal hian gabe angka mual.

³⁶ Dung i tusi ma dipaian angka na male, gabe dipaojak nasida ma sada huta inganan.

³⁷ Jadi disaburi nasida ma angka ladang i, jala dipungka angka porlak anggur, jala gabe do na niulanasida i.

³⁸Dung i dipasupasu Ibana ma nasida, gabe sopar situtu nasida, pinahannasida i pe dipasinur do.

³⁹Dung i lam otik ma ianggo nasida, jala tarjimpot dibahen pangarupaon, hinamago dohot pardangolan.

⁴⁰Ibana mangusehon haleaon tu angka induk, jala dililuhon nasida di halongonan soada dalan.

⁴¹Jala Ibana patimbul na pogos sian pardangolan jala dibahen angka marga songon birubiru toropna.

⁴²Diida angka partigor i ma i, jadi marlas ni roha ma nasida gabe manguntam ma pamangan ni nasa hajahaton.

⁴³Manang ise na pantas roha ditimbangi ma angka i, jala diparateatehon nasida ma angka asiasi ni Jahowa.

108 ¹Ende sian si Daud.

²(I.) Nalom do rohangku, ale Debata, marende ma ahu jala umpalu arbap, i ma tutu, ale hamuliaonku.

³Ngot ma ho, ale arbap dohot sordam, asa husunggul buha siang ari.

⁴Pujionku ma Ho di tongatonga ni angka bangso, ale Jahowa, jala endehononku ma Ho di tongatonga ni angka marga.

⁵Ai manalpui angka langit do godang ni asi ni roham, jala tolhas ro di aoangaoang parginjang do hasintonganmu.

⁶Sai patimbul ma dirim tu atas ni angka langit, ale Debata, jala hamuliaonmi tu sandok tano on.

⁷Asa malua angka na niasianmi, sai manumpak ma siamunmi jala alusi ahu!

⁸(II.) Nunga marbagabaga Debata di bagasan habadiaonna i: Ingkon marolopolop ahu marsagihon Sikem dohot manali rura Sukot.

⁹Ahu do nampuna Gilead, jala ahu nampuna Manasse, jala Ephraim do partanobatoan ni ulungku, Juda do tungkot ni harajaonku.

¹⁰Moab do mangkuk parburianku, tu Edom hureongkon sipatungku, marolopolop ma ahu mida Palistim.

¹¹Ise ulaning manogihon ahu tu huta na gonting? Ise ulaning pataruhon ahu tolhas ro di Edom?

¹²Nda Ho do, ale Debata, Ho naung mambolongkon hami, jala na so ruar, ale Debata, mandongani parangannami?

¹³Sai patupa ma haluaon di hami sian hagogotan, ai ndang marnosan ianggo haluaon binahen ni jolma. (108-14)
Mangasahon Debata sai hamonangan do ulahononta, jala Ibana sandiri mangalotlot alontai.

109 ¹Ende sian si Daud. (I.) Sai unang mauhom Ho, ale Debata ni pujipujianku!

²Ai ngangang do pamangan ni parjahat dohot pangalajak mangalo ahu, angka na mangkatai dohot ahu mardila sipaotooto.

³Jala dihaliangi ahu dohot angka hata hasomoran, jala dimusui ahu soada paralaan.

⁴Sai dialo nasida do ahu balos ni holong ni rohangku, alai sai martangiang do anggo ahu.

⁵Jala diampehon do tu ahu hajahaton, balos ni denggan basa, jala hasomoran, balos ni holong ni rohangku.

⁶Pabangkit ma sada parjahat pandapotanna, jala sai jongjong ma di siamunna pangasung i.

⁷Tole diuhumi ibana, ruar ma ibana tandap parjahat, jala gabe dosa ma tangiangna i.

⁸Sai lam tu otikna ma angka ariarina i, ingkon na asing jumalo tohonanna.

⁹Sai tading di lampin ma anakonna i, jala mabalu jolmana i.

¹⁰Sai mompasompas ma anakonna manggoanggo, jala sai mandiori sidabuannasida holong sian parulangulangannasida i.

¹¹Sai dihishis pangurangan ma sude na di ibana i, jala sai dipupusi halak na pulik ma na sinamotsamotna.

¹²Sai unang ma adong na pateltel asi ni roha tu ibana, jala sai unang adong na asi roha tu anakonna angka na tading di lampin.

¹³Sai ripur ma pinomparna i, sai siap ma goarnasida di sundut paduahon.

¹⁴Sai taringot ma hajahaton ni amanasida tu Jahowa, jala sai unang tarsesa dosa ni inana i.

¹⁵Sai tongtong ma angka i di adopan ni Jahowa, jala Ibana maniaphon baritanasida sian tano on.

¹⁶Ala na so diingot mambahen asi ni roha jala dilotongi sada baoa na dangol jala na pogos, jala na jimput hian marroha, naeng bunuonna.

¹⁷Dihaholongi rohana do torutoru, jadi manginona ma tu ibana; jala ndang dihalomohon pasupasu, jadi mandao ma sian ibana.

¹⁸Dialithon do torutoru hira pangkeanna, jadi ditopot ma tubagasan dirina songon aek, jala songon miak tubagasan holiholina.

¹⁹Asa songon ulos na tinapolhon ma i tu ibana, jala gabe hohos na tongtong hinobahon.

²⁰I ma nian upa ni angka na mangalo ahu sian Jahowa dohot angka parpangkuling na jat dompak tondingki.

²¹(II.) Alai anggo Ho, ale Tuhan Jahowa, roham ma di ahu ala ni goarmi; ai na denggan do asi ni roham, sai palua ma ahu!

²²Ai na dangol jala na pogos do ahu, jala mabugang do rohangku di bagasan.

²³Songon halinu na pagistang dirina do ahu laho salpu, dilotongi do ahu songon sihapor.

²⁴Rabatrabat do ulu ni tothu dibahen parpuasaon, jala merus do sibukku, ndang be marmiak.

²⁵Jadi ingkon sieleseleson nasida nama ianggo ahu, angka mangupir be ulunasida i marnida ahu.

²⁶Sai urupi ma ahu, ale Jahowa, Debatangku! Sai tumpahi ma ahu hombar tu asi ni roham.

²⁷Asa tung ditanda nasida tanganmu do i, Ho do, ale Jahowa, mambahensa.

²⁸Mamburai ianggo nasida, alai mamasumasu do ianggo Ho; hehe do angka nasida, hape tarurak do, jadi marlas ni roha ma naposom.

²⁹Sai marpangkean haurahon do sogot angka na mangalo ahu, jala ditapolhon hailaon nasida i songon sampesampe.

³⁰Pujionku situtu ma Jahowa marhitehite pamanganku, jala patimbulonku ma Ibana di tonga ni hatoropan.

³¹Ai jongjong do Ibana di siamun ni na pogos laho paluahon tondina i sian angka na manguhum marutang hosa.

110¹Ende sian si Daud. Nunga didok Jahowa mandok Tuhanku: Hundul ma Ho tu siamunhon, paima hubahen angka musum sidegedegean ni patmu.

²Tongoson ni Jahowa ma sian Sion tungkot harajaon ni huasomi; antong mangarajai ma Ho di tongatonga ni musum!

³Marrongoman bangsom ro sian lomona di ari parporanganmu marpangkean habadiaon, sian ampuan ni andostorang ro do tu Ho nambur ni paranganmu angka na bajar.

⁴Nunga pola maruari Jahowa, jala ndang tagamon solsolanna bagina: Sai Ho do malim ro di salelenglelengna mangihuthon horong ni si Melkisedek.

⁵Tuhan i do di siamunmu, Ibana mangalengsehon angka raja di ari panombo ni rimasna.

⁶Ibana mandabu uhum di tongatonga ni angka parbegu, Ibana mambahen gok angka bangke; Ibana do mangarosak ulu di tano adaran bidang.

⁷Inumonna ma sian sunge di dalan, ala ni patimbulonna ma muse uluna.

111 ¹Halleluya! Pujionku ma Jahowa sian nasa roha di luhutan ni angka partigor dohot di huria i.

²Balga do angka pambahenan ni Jahowa, hinalungunhon ni sude angka na lomo roha disi.

³Hamuliaon dohot hasangapon do parulaonna i, jala hot do jongjong hatigoranna i salelenglelengna.

⁴Nunga dibahen Ibana sada parningotan di halongangan angka na binahenna i, pardengganbasa jala parasi roha do Jahowa.

⁵Nunga diparbohali angka na mangkabiari Ibana, diingot do padan binahenna i ro di salelenglelengna.

⁶Nunga dipabotohon tu bangsona gogo ni pambahenanna i mangalehon tu nasida parjambaran ni angka parbegu.

⁷Hasintongan dohot uhum do angka pambahenan ni tanganna, sintong do sude angka patikna i.

⁸Hot do angka i ro di salelenglelengna, dibahen do angka i di bagasan hasintongan dohot habonaron.

⁹Nunga ditongoshon Ibana haluaon tu bangsona, dipatik do padan binahenna i salelenglelengna, nabadia jala na songkal do goarna i.

¹⁰Biar mida Jahowa do parmulaan ni habisuhon, maruli hapistaran na sumurung do sude angka na mangulahonsa; hot do baritana i ro di salelenglelengna.

112¹Halleluya! Martua ma baoa na mangkabiari Jahowa, na lomo roha situtu di angka patikna!

²Sangap ma pinomparna i sogot di tano on, dapotan pasupasu ma sundut ni angka partigor sogot.

³Hamoraon marlobilobi di bagasan jabuna, jala hot do hatigoranna i ro di salelenglelengna.

⁴Sai binsar do di partigor i hatiuron di haholomon, sian Ibana pardengganbasa, parasi roha jala na bonar.

⁵Mardohar ma baoa na asi roha dohot na pasalihonsa, tarondolhonsa ma angka hatana di paruhuman.

⁶Ndang tagamon humordit ibana salelenglelengna, marbarita salelenglelengna do partigor i.

⁷Ndang tagamon mabiar ibana binahen ni barita hinamago, nalom do rohana marhaposan tu Jahowa.

⁸Marsitiopan do rohana, ndang mabiar ibana, paima idaonna pamalosan tu angka alona i.

⁹Manaburi ibana, mangalehon tu angka na pogos, hot do hatigoranna i ro di salelenglelengna, timbul ma tandukna sogot di bagasan hamuliaon.

¹⁰Idaon ni parjahat i ma i sogot, jala hagitikhononna, patungoripon ma iponna jala malangke ibana, matua lonong do pinangido ni angka parjahat i.

113 ¹Halleluya! Mamuji ma hamu, ale angka naposo ni Jahowa, puji hamu ma goar ni Jahowa!

²Pinuji ma goar ni Jahowa olat ni on ro di salelenglelengna.

³Sian habinsaran ni mata ni ari ro di hasundutanna do sipujion goar ni Jahowa.

⁴Tumimbul do Jahowa sian luhut angka bangso, diginjang ni angka langit do hamuliaonna i.

⁵Tung ise ma songon Jahowa, Debatanta i? Timbo Ibana marhabangsa.

⁶Hape dipaserep dirina manatap na di angka banua ginjang dohot na di tano on.

⁷Ibana pahehehon na metmet sian orbuk, dipatimbul do na pogos i sian gambo.

⁸Laho pahundulhon ibana top dohot angka raja ni bangsona.

⁹Ibana paian parompuan na hol di jabu, gabe ina na las roha mida angka anakna. Halleluya!

114 ¹Uju na ruar i Israel sian Misir, pinompar ni si Jakkob sian bangso parhata bobang:

²Jadi Juda gabe habadiaonna, Israel gomgomanna.

³Diida laut i ma i, gabe tolak, jala sumurut tu pudi ia Jordan.

⁴Marhagingjang ma angka dolok songon birubiru tunggal, angka robean songon anak ni birubiru.

⁵Aha di ho, ale laut, umbahen maporus ho? Ale Jordan umbahen sumurut tu pudi ho?

⁶Hamu ale angka dolok, umbahen marhagingjang hamu songon birubiru tunggal, hamu ale robean, songon anak ni birubiru?

⁷Maradophon bohi ni Tuhan i humuturhatur
ma ho, ale tano on, maradophon Debata ni si
Jakkob.

⁸Na paubahon dolok batu gabe ambar aek,
batu ping gabe mual.

115 ¹(I.) Ndada di hami, ale Jahowa,
ndada di hami, di goarmu ma
tagonan lehon hamuliaon, ala ni asi ni roham,
ala ni hasintonganmu.

²Boasa ma tung dohonon ni angka parbegu:
Didia ulaning Debatanasida i?

³Hape di banua ginjang do Debatanta i,
saguru lomo ni rohana dipatupa.

⁴Alai anggo ajiajiannasidai perak do jala
sere bahenbahenan ni tangan nijolma.

⁵Adong do pamangannasida, hape ndang
mangkuling; adong do matanasida, hape
ndang marnida.

⁶Adong do pinggolnasida, hape ndang
marbinege; adong do igungnasida, hape
ndang marnianggo.

⁷Adong do tangannasida, hape ndang
tarjamahonsa, jala ndang tarlangkahonsa
ia patnasida i; ndang mangkuling ianggo
aruarunasida.

⁸Sobokkon nasida sogot angka na
mambahennasida, sude angka na
marhaposan tusi.

⁹(II.) Ianggo ho, ale Israel, marhaposan tu
Jahowa ma ho! Ibana do pangurupi dohot
lombulombunasida.

¹⁰Ale pinompar ni si Aron, marhaposan tu Jahowa ma hamu! Ibana do pangurupi dohot lombulombunasida.

¹¹Hamu ale angka na mangkabiari Jahowa, marhaposan tu Jahowa ma hamu! Ibana do pangurupi dohot lombulombunasida.

¹²Nunga diingot Jahowa hita: Ibana mamasumasu, Ibana mamasumasu pinompar ni Israel, Ibana mamasumasu pinompar ni si Aron.

¹³Ibana mamasumasu angka na mangkabiari Jahowa, angka na metmet dohot angka na magodang.

¹⁴Sai ambaambaan ni Jahowa do tu hamu, tu hamu dohot tu pinomparmuna.

¹⁵Angka na pinasupasu do hamu sian Jahowa, Sitompa angka langit dohot tano on.

¹⁶Jahowa do nampuna angka langit ni langitan, alai anggo tano on nunga dilehon tu jolma manisia.

¹⁷Ndang tagamon pujion ni angka naung mate Jahowa, nang sude angka naung tuat tu tano hasonangan.

¹⁸Alai anggo hita, sai pujionta do Jahowa olat ni on ro di salelenglelengna. Halleluya!

116 ¹(I.) Holong do rohangku di Jahowa, ala naung ditangihon joujoungki, parhurajaionku.

²Ai nunga dipaeleng pinggolna tu ahu, jadi sai jouonku ma Ibana, saleleng ahu mangolu.

³Nunga pola dihaliangi angka rante ni hamatean ahu, jala nunga pola mangonai tu ahu angka hagogotan ni banua toru, nunga pola mangonai tu ahu hagogotan dohot pardangolan.

⁴Dung i hupajoujou ma goar ni Jahowa: Ale Jahowa, sai palua ma tondingki!

⁵Parasi roha do Jahowa jala na bonar, jala parasi roha do Debatanta i.

⁶Siramoti angka siunjur roha do Jahowa, nunga tung tarjepol ahu, jadi Ibana mangurupi ahu.

⁷Mulak ma ho, ale tondingku, tu paradiananmi, ai denggan do uhum ni Jahowa tu ho.

⁸Tongon do, nunga dipalua Ho tondingku sian hamatean, matangku sian iluilu, pathu sian partuktuhan.

⁹Sai marparange di jolo ni Jahowa ma ahu di angka luat ni halak na mangolu.

¹⁰Porsea do ahu umbahen huhatahon, mansai dangol situtu do ahu huhilala.

¹¹Ianggo ahu, nunga pola hudok di hatahutonku: Sudejolma pargabus.

¹²(II.) Tung beha ma pamaloshu tu Jahowa, ala saluhut denggan ni uhumna i tu ahu!

¹³Jaloonku do panginuman ni angka hatuaon, jala pajoujouonku do goar ni Jahowa.

¹⁴Gararonku ma angka bagabagangku tu Jahowa, apala di adopan ni sandok bangsona.

¹⁵Arga do di roha ni Jahowa hamamate ni angka na niasianna i.

¹⁶Antong, ale Jahowa, nunga tung naposom ahu, naposom do ahu, anak ni hatobanmu, nunga diharhari Ho angka rante sian ahu.

¹⁷Sai pelehononku ma tu Ho pelean hamauliateon, jala sai pajoujouonku ma goar ni Jahowa.

¹⁸Sai gararonku ma angka bagabagangku tu Jahowa, apala di adopan ni sandok bangsona.

¹⁹Di angka alaman ni bagas ni Jahowa, di parsitonganmi, ale Jerusalem! Halleluya!

117 ¹Puji ma Jahowa, hamu ale angka parbegu sudena! Puji ma Ibana hamu ale angka bangso sudena!

²Ai tung na godang do asi ni rohana tu hita jala ro di salelenglelengna do habonaron ni Jahowa. Halleluya!

118 ¹(I.) Mandok mauiliate ma hamu tu Jahowa, ai pardengganbasa do Ibana, ai ro di salelenglelengna do asi ni rohana!

²Dohonon ni Israel ma tongon: Ai ro di salelenglelengna do asi ni rohana!

³Dohonon ni pinompar ni si Aron ma: Ai ro di salelenglelengna do asi ni rohana.

⁴Dohonon ni angka na mangkabiari Jahowa ma: Ai ro di salelenglelengna do asi ni rohana i.

⁵Sian hagogotan do hupajoujou Jahowa, gabe dialusi Jahowa ahu, di na pinalumbangna i ahu.

⁶Jahowa do donganku, ndang mabiar ahu, tung aha ma tagamon bahenon ni jolma tu ahu?

⁷Jahowa do donganku di tongatonga ni angka na mangurupi ahu, jadi sombu ma roha ni matanku marnida angka na mangkosom ahu.

⁸Dengganen marhaporusan tu Jahowa, asa marhaposan tu jolma.

⁹Dengganen marhaporusan tu Jahowa, asa marhaposan tu angka raja.

¹⁰Nunga pola luhut angka parbegu mangkaliangi ahu, mangasahon goar ni Jahowa tung rasiphononku do nasida.

¹¹Nunga pola dihaliangi nasida ahu tuk humaliang, mangasahon goar ni Jahowa tung rasiphononku do nasida.

¹²Nunga pola dihaliangi nasida ahu, songon angka loba, mintop do nasida songon api di buluduri, marhitehite goar ni Jahowa tung rasiphononku do nasida.

¹³Nunga pola digogo ho manulakkon ahu, asa tinggang nian, hape Jahowa mangurupi ahu.

¹⁴(II.) Jahowa do pargogongku dohot endengku, jadi gabe hatuaonku ibana.

¹⁵Soara ni olopolop dohot hatuaon marsaringar di undungundung ni angka

partigor: Siamun ni Jahowa do sibahen hamonangan.

¹⁶Timbul situtu do siamun ni Jahowa, siamun ni Jahowa do sibahen hamonangan.

¹⁷Ndang tagamon mate ahu, sai na mangolu do ahu, asa hupajojor angka pambahen ni Jahowa.

¹⁸Nunga gogo tutu dipinsang Jahowa ahu, alai nda tung tu hamatean ahu dipasahat.

¹⁹Ungkap hamu ma di ahu angka bahal ni hatigoran, asa hubongoti angka i laho mamuji Jahowa.

²⁰On do bahal ni Jahowa, bongotan ni angka partigor do i sogot.

²¹Mandok mauiate ma ahu di Ho, ala naung dialusi Ho ahu, jala manjadi hatuaonku.

²²Batu naung binolongkon ni angka pande bagas, i ma jadi batu parsuhi.

²³Sian Jahowa do i masa, halongangan do i anggo di matanta.

²⁴Ari on do na jinadihon ni Jahowa, marolopolop jala marlas ni roha ma hita disi.

²⁵Iale Jahowa, sai manumpak ma Ho! Iale Jahowa sai Ho ma mambahen manjadi!

²⁶Pinasupasu ma na ro marhitehite goar ni Jahowa, hupasupasu hami ma hamu, angka na sian bagas ni Jahowa.

²⁷Jahowa do Debata, jala Ibana manondangi hita. Tambathon hamu ma angka pelean pesta i sahat ro di angka tanduk ni langgatan.

²⁸Ho do Debatangku, jadi Ho do pujionku;
ale Debatangku, sai Ho do patimbulonku.

²⁹Mandok mauiate ma hamu di Jahowa,
ai pardengganbasa do Ibana, ai ro di
salelenglelengna do asi ni rohana i.

119¹(I.) Martua ma halak angka na
daulat marpangalaho, angka na
marpangalahohon patik ni Jahowa.

²Martua ma halak angka na mangaradoti
angka panindangionna i, angka na mangalului
Ibana sian nasa roha.

³Huhut angka na so mangulahon hageduhon,
angka na mangkampungi angka dalanna i.

⁴Nunga ditonahon Ho angka parentam,
siradotan situtu.

⁵Aut ni sai marsihohot angka dalanku
mangaradoti angka aturanmu!

⁶Dung i ndang tagamon tarurak ahu, molo
sai huparateatehon sude angka tonami.

⁷Sai mandok mauiate ma ahu di Ho sian
hatigoran ni roha, molo huguruhon angka
uhum ni hatigoranmi.

⁸Sai radotanku do angka aturanmi, unang
tung tadingkon ahu situtu.

⁹(II.) Marhitehite aha tarpabontor dolidoli
langkana? Molo dipahombarhombar tu hatam.

¹⁰Sai hulului do Ho sian nasa rohangku
unang tung loas ahu lilu sian angka tonami.

¹¹Nunga hupajop hatami di bagasan
rohangku, asa unang mardosa ahu tu Ho.

¹²Pinuji ma Ho, ale Jahowa, sai podahon ma tu ahu angka aturanmi.

¹³Nunga dipajojor angka bibirhon sude uhum, angka na ruar sian pamanganmi.

¹⁴Hinsaan do rohangku mida dalan ni angka panindangionmu, asa mida nasa hamoraon.

¹⁵Sai papingkirpinkingronku do angka parentam, jala sai berengonku do angka bogasmi.

¹⁶Sai huhahilashon do angka aturanmi, ndang tagamon halupahononku hatami.

¹⁷(III.) Mardenggan basa ma Ho tu naposom, pangolu ma ahu! Asa huradoti hatam.

¹⁸Sai pabuha ma matangku, asa huida halongangan, angka sian patikmi.

¹⁹Paisolat do ahu di tano on, unang tung tabunihon angka tonami sian ahu.

²⁰Malampot do rohangku mangkalungunhon angka uhummu manipat ari.

²¹Mangonai hata do Ho mamulasi angka na jungkat roha, angka na manimbil sian tonami.

²²Gilingi ma sian ahu haurahon dohot haleaon, ai nunga huradoti angka panindangionmi.

²³Hundul pe angka raja manuptupi mangalo ahu, sai angka aturanmi do dipingkirpinkingiri naposom.

²⁴Tongon angka panindangionmi do hasoloan ni rohangku, angka i dojolma panuturingku.

²⁵ (IV.) Lohot di rere do rohangku, sai pangolu ma ahu hombar tu hatam!

²⁶ Hupajojo do angka dalanku, jadi dialusi Ho ahu, sai podahon ma tu ahu angka aturanmi.

²⁷ Sai parroha i ahu mangantusi dalam ni angka parentam, asa hupingkirpingkiri halongangan angka na binahenmi.

²⁸ Malampot do rohangku dibahen holsoholso, sai pahehe ma ahu hombar tu hatam.

²⁹ Sai paholang ma sian ahu dalam ni pangansion, jala asinirohahon tu ahu patikmi.

³⁰ Nunga hupillit dalam hasintongan, angka uhummu nunga hubahen tu jolongku.

³¹ Sai marsihohot do ahu di angka panindangionmu, unang tung paurak ahu, ale Jahowa.

³² Sai dalam ni angka tonami do tulusonku, ai nunga dipalumbang Ho rohangku.

³³ (V.) Sai podahon ma tu ahu, ale Jahowa dalam ni angka aturanmi, asa huradoti ro di ujung.

³⁴ Sai parroha i ahu, asa huradoti patikmi, jalahuhajongjongkon sian nasa roha!

³⁵ Sai panonohon ma tu ahu dalam balobung ni angka tonami, ai lomo do rohangku disi.

³⁶ Sai paeleng ma rohangku tu angka panindangionmu, unang tung tu parhilangon.

³⁷ Sai pasalpu ma angka matanku, unang marnida na so gabeak, sai pangolu ma ahu hinorhon ni angka dalanmi.

³⁸ Hajongjongkon ma tu naposom bagabagam taringot tu biar maradophon Ho.

³⁹ Sai pasalpu ma haurahonku, na huholsohon, ai denggan do angka uhummi.

⁴⁰ Ida ma, sai huhalungunhon do angka parentami sai pangolu ma ahu hinorhon ni hatigoranmi.

⁴¹ (VI.) Sai tolhas ma tu ahu angka asi ni roha, ale Jahowa, hatuaonmi pe hombar tu bagabagam.

⁴² Asa hualushon sada hata tu na mangelesi ahu, ai marhaposan tu hatam do ahu.

⁴³ Jala unang tung paunsat situtu hata hasintongan i sian pamanganku, ni angka uhummi do na huhalungunhon.

⁴⁴ Sai tongtong do radotanku patikmi ro di saleleng ni lelengna.

⁴⁵ Sai mardalani ma ahu di halambason, ai huharingkoti do angka parentam.

⁴⁶ Sai hatahononku do angka panindangionmu di jolo ni angka raja jala ndang hailahononku.

⁴⁷ Sai dihahinsahon rohangku do tonami, angka na huhaholongi.

⁴⁸ Jala sai hupataretare do tanganku tu tonami, angka na huhaholongi, jala sai pingkirpingkiranku do angka aturanmi.

⁴⁹(VII.) Sai ingot ma hata tu naposom, na pinalungunhonmu tu ahu.

⁵⁰Sai on do sabam ni rohangku di pardangolankon, ai bagabagami do pangoluhon ahu.

⁵¹Mansai eles situtu do angka na jungkat roha tu ahu, alai ndang manimbil anggo ahu sian patikmi.

⁵²Sai huingot do angka uhummu sian narobi, ale Jahowa, jadi sabam ma rohangku.

⁵³Marpiarpiar do murukku mida parjahat, angka na tumadingkon patikmi.

⁵⁴Jadi gabe endengku do angka aturanmi, di bagasan bagas paisolatanki.

⁵⁵Sai huingoti do bornginna i goarmi, ale Jahowa, jala huradoti patikmi.

⁵⁶On do na sorang tu ahu: Sai naeng radotanku angka parentam.

⁵⁷(VIII.) Parjambaranku do Ho, ale Jahowa, nunga pola hudok, sai radotanku do angka hatami.

⁵⁸Marhuraja do ahu tu bohimi sian nasa roha, asi ma roham di ahu hombar tu bagabagam.

⁵⁹Nunga tung hutimbangi angka dalanku, jadi sai mulak tu angka panindangionmi do pathu.

⁶⁰Sai humalaput do ahu, jala ndang huhabendahon mangaradoti angka tonami.

⁶¹ Sai dihaliangi angka aring ni angka parjahat i do ahu, ianggo patikmi ndang huhalupahon.

⁶² Hehe do ahu tonga borngin laho mandok mauiate tu Ho ala ni angka uhum ni hatigoranmi.

⁶³ Aleale ni sude angka na mangkabiari Ho do ahu, ro di angka na mangaradoti angka parentam.

⁶⁴ Gok asi ni roham do tano on, ale Jahowa, sai podahon ma tu ahu angka aturanmi.

⁶⁵ (IX.) Nunga denggan uhummi dibahen Ho tu naposom, ale Jahowa, hombar tu hatami.

⁶⁶ Sai podahon ma tu ahu roha hapantason dohot parbinotoan na denggan, ai huhaporseai do angka tonami.

⁶⁷ Tagan so tarjepol ahu, sai lilu do ahu, alai anggo nuaeng sai bagabagami do na huradoti.

⁶⁸ Denggan do Ho marroha jala pardengganbasa, sai ajarhon ma tu ahu angka aturanmi.

⁶⁹ Sai patubutubu gasa do angka na jungkat roha mangalo ahu, ianggo ahu sai radotanku do angka parentam sian nasa roha.

⁷⁰ Nandang mangilala rohanasida songon tabotabo, ianggo ahu patikmi do na huhahilashon.

⁷¹ Untungku do i na tarjepol i ahu, asa huguruhon angka aturanmi.

⁷²Tagonan do di rohangku patik sian pamanganmi asa sere dohot perak marriburibu.

⁷³(X.) Angka tanganmi do tumompa ahu jala pauliuli ahu, sai parroha i ahu, asa huguruhon angka tonami.

⁷⁴Ia diida angka na mangkabiari Ho ahu, sai las ma rohanasida, ala na huhalungunhon hatami.

⁷⁵Nunga huboto, ale Jahowa, hatigoran do tongon angka uhummi, jala mardongan haburjuon do dijepol Ho ahu.

⁷⁶Sai apulapul tu ahu ma nian asi ni rohami hombar tu bagabagam tu naposom.

⁷⁷Sai tolhas ma tu ahu angka asi ni roham, asa mangolu ahu, ai patikmi do na huhahilashon.

⁷⁸Sai tarurak ma angka na jungkat roha i ala dipatungki ahu marhitehite gabus; ianggo ahu, sai angka parentam do hupingkirpingkiri.

⁷⁹Sai mulak tu ahu ma angka na mangkabiari Ho dohot angka na umboto angka panindangionmi.

⁸⁰Sai sisangunjur ma rohangku tu angka aturanmi, asa unang tarurak ahu.

⁸¹(XI.) Pola maheu rohangku dibahen siholna di hatuaonmi, sai hatami do na huhalungunhon.

⁸²Pola do rambon angka matangku mangkalungunhon bagabagami, angka ninna do: Andigan pe ulaning apulonmu ahu?

⁸³ Ai nunga pola doshon hajut bobak sinale ni timus ahu, ianggo angka aturanmi ndang huhalupahon.

⁸⁴ Pola piga ariari ni naposom? Andigan pe dabuonmu uhum tu angka na mangalotongi ahu?

⁸⁵ Nunga pola dihali angka na jungkat roha i angka godung tu ahu, nasida angka na so marparange hombar tu patikmi.

⁸⁶ Hasintongan do sude angka tonami; pangansion dibahen nasida mangalotongi ahu; sai urupi ma ahu!

⁸⁷ Otik nari tung siap ahu bahenon nasida di tano on, alai laos so hutadingkon do angka parentam.

⁸⁸ Sai pangolu ma ahu hombar tu asi ni roham, asa huradoti panindangion sian pamanganmi.

⁸⁹ (XII.) Ro di salelenglelengna do hot hatami di angka banua ginjang, ale Jahowa.

⁹⁰ Marsundutsundut do hasintonganmi, nunga dipaojak Ho tano on, jadi hot ma jongjong.

⁹¹ Rasirasa sadarion sai hot do angka uhummu, ai angka naposom, do nasida saluhutna.

⁹² Aut unang patikmi ma huhahilashon, nunga leleng mago ahu di pardangolankon.

⁹³ Ro di salelenglelengna do ndang tagamon halupahononku angka parentami ai marhitehite angka i do dipangolu Ho ahu.

⁹⁴Gok di Ho do ahu, sai palua ma ahu, ai angka aturanmi do na hulului.

⁹⁵Sai diaropi angka parjahat i do ahu, naeng agoonna ahu, sai angka panindangionmi do huparateatehon.

⁹⁶Sai marujung do huida saluhutna pangabahan, mansai hangkam do ianggo tonami.

⁹⁷(XIII.) Mansai huhaholongi do patikmi, sai i do hupingkirpingkiri manipat ari.

⁹⁸Bisikan do ahu sian angka musungku dibahen angka tonami, ai gok disi do ahu salelenglelengna.

⁹⁹Marrohaan do ahu sian sude angka gurungku, ai sai angka panindangionmi do na huparateatehon.

¹⁰⁰Marrohaan do ahu sian angka natuatua, ai sai huradoti do angka parentam.

¹⁰¹Sai huambatambat do angka pathu sian nasa dalan na roa, asa huradoti hatami.

¹⁰²Ndang dung manimbil ahu sian angka uhummi, ai nunga dipodai Ho ahu.

¹⁰³Tumonggi do bagabagami didai aruarungku sian situak ni loba di pamanganku.

¹⁰⁴Binahen ni angka parentam do ahu marroha, ala ni do umbahen huhagigihon nasa dalan pangansion.

¹⁰⁵(XIV.) Hatami do sulusulu ni pathu jala hatiuron di dalanku.

¹⁰⁶ Nunga pola huuarihon, jadi sai huhajongjongkon do: Mangaradoti angka uhum ni hatigoranmi.

¹⁰⁷ Tarjepol situtu do ahu, sai pangolu ma ahu, ale Jahowa, hombar tu hatam.

¹⁰⁸ Sai halomohon ma, ale Jahowa, angka pelean pujipujian ni pamanganku sian nasa roha, jala ajarhon tu ahu angka uhummu!

¹⁰⁹ Sai tongtong do huhomolhomol tondingki di bagasan tanganku, jala ndang huhalupahon patikmi.

¹¹⁰ Sai ditaoni angka parjahat i do jorgong tu ahu, alai laos so manimbil do ahu sian angka parentam.

¹¹¹ Angka panindangionmi do hubahen parjambaranku salelenglelengna, ai hahilason ni rohangku do angka i.

¹¹² Sai hupaunduk do rohangku, laho mangulahon angka aturanmi salelenglelengna ro di ujung sogot.

¹¹³ (XV.) Sai huhagigihon do angka simeoleol, jala huhaholongi patikmi.

¹¹⁴ Pangondianku jala lombulombungku do Ho, sai hatami do na huhalungunhon.

¹¹⁵ Sumurut ma sian ahu, hamu ale angka parjahat i, sai angka tona ni Debatanku do radotanku.

¹¹⁶ Sai tiopi ahu hombar tu bagabagam, asa mangolu ahu, jala sai unang loas ahu tarurak mida na hinirim ni rohangku.

¹¹⁷ Sai sande ma ahu, asa martua ahu, asa tongtong huhahilashon angka aturanmi.

¹¹⁸ Diparhamuda roham do sude angka na manimbil sian angka aturanmi, ai gabus do sipaotooto binahennasida i.

¹¹⁹ Disiaphon Ho do sude angka parjahat ni tano on, hira gubogubo, dibahen i huhaholongi do angka panindangionmi.

¹²⁰ Manindang do imbulungku panonditnonditon mida Ho, jala huhabiari do angka uhummi.

¹²¹ (XVI.) Sai huulahon do uhum dohot hatigoran, sai unang loas ahu rupaon ni angka siulahon gogo mangalo ahu!

¹²² Sai ondihon ma naposom tu na denggan, asa unang dirupa angka na jungkat roha i ahu.

¹²³ Pola do rambon angka matangku mangkalungunhon hatuaonmi dohot bagabaga ni hatigoranmi.

¹²⁴ Bahen ma tu naposom hombar tu asi ni roham, jala podahon tu ahu angka aturanmi.

¹²⁵ Naposom do ahu, sai parroha i ma ahu, asa huboto angka panindangionmi.

¹²⁶ Nunga jumpang tingki ni Jahowa painonahon uhum, ai nunga ditorbangi halak angka patikmi.

¹²⁷ Ala ni do umbahen na huhaholongi angka tonami lobi sian sere, tongon tahe lobi sian sere palangki.

¹²⁸Ala ni do umbahen huparhatongon salulut angka parentam di saluhutna, sai huhagigihon do nasa lapang pangansion.

¹²⁹(XVII.) Tung na sumurung do angka panindangionmi, ala ni do umbahen diradoti rohangku angka i.

¹³⁰Pangungkapon di angka hatami do patiur parnidaan, marrohaihon angka na oto.

¹³¹Sai hupangangang do pamanganku jala marhoi, ai angka tonami do na huhauashon.

¹³²Sai dompakkon ma ahu, jala asi ma roham di ahu, mangihuthon uhum tu angka na mangkaholongi goarmi.

¹³³Sai pahot ma langkalangkanku marhitehite bagabagam, jala unang loas dirajai manang hajahaton dia ahu!

¹³⁴Sai palua ma ahu sian pangarupaon nijolma, asa huradoti angka parentam!

¹³⁵Sai bahen ma bohim marsinondang tu naposom, jala podahon tu ahu angka aturanmi.

¹³⁶Sai mabakbak do ilu ni matangku hira pansur, ala so diradoti halak angka patikmi.

¹³⁷(XVIII.) Nabonar do Ho, ale Jahowa, jala na tigor do angka uhummu.

¹³⁸Nunga tung ditingtingkon Ho paboa hatigoran do angka panindangionmu jala hasintongan situtu.

¹³⁹Ngaetan do ahu dibahen hajugulonki, ala dihalupahon angka alongku angka hatami.

¹⁴⁰Na pinindan situtu do bagabagami, jadi holong roha ni naposom disi.

¹⁴¹Metmet pe ahu jala lea, ianggo angka parentam ndang dung huhalupahon.

¹⁴²Hatigoran ro di salelenglelengna do hatigoranmu, jala hasintongan do patikmi.

¹⁴³Songgop pe hagogotan dohot hasusaan tu ahu, ianggo angka tonami sai huhahilashon do.

¹⁴⁴Sai hatigoran do angka panindangionmi ro di salelenglelengna, parroha i ahu, asa mangolu ahu.

¹⁴⁵(XIX.) Sai joujou do ahu sian nasa roha, sai alusi ma ahu, ale Jahowa; sai radotanku do angka aturanmi.

¹⁴⁶Sai joujou ahu tu Ho: Tumpahi ma ahu! Asa sai huradoti angka panindangionmi.

¹⁴⁷Hujoloani do buha siang ari asa maungaung, angka hatami do huhalungunhon.

¹⁴⁸Dijoloani angka matanku do angka gansi borngin, naeng mamingkirmingkiri bagabagami.

¹⁴⁹Sai tangihon ma soarangki hombar tu asi ni roham, sai pangolu ma ahu, ale Jahowa, hombar tu angka uhummi.

¹⁵⁰Dumonokdonok do angka sieahi hajahaton, holang do nasida sian patikmi.

¹⁵¹Donok do Ho, ale Jahowa, jala hasintongan do sude angka tonami.

¹⁵²Tibu hian do huboto sian angka panindangionmi, paboa Ho paojakkon angka i ro di salelenglelengna.

¹⁵³(XX.) Sai tatap ma pardangolankon, jala palua ahu, ai ndang huhalupahon patikmi.

¹⁵⁴Badahon ma parbadaanki, jala palua ahu, sai pangolu ma ahu ala ni bagabagami.

¹⁵⁵Mandao do hatuaon sian angka parjahat, ai ndang dilului nasida angka aturanmi.

¹⁵⁶Torop do angka asi ni roham, ale Jahowa, sai pangolu ma ahu hombar tu angka uhummi.

¹⁵⁷Torop do angka silotongi dohot sisosak ahu, laos so manimbil do ahu sian angka panindangionmi.

¹⁵⁸Huida angka parjehe, jadi gine ateatengku, ala so diradoti nasida bagabagami.

¹⁵⁹Sai tatap ma, ai sai huhaholongi do angka parentam, ale Jahowa, sai pangolu ma ahu hombar tu asi ni roham.

¹⁶⁰Hasintongan do pangarimpunan ni hatam, jala ro di salelenglelengna do nasa uhum ni hatigoranmi.

¹⁶¹(XXI.) Dilotongi angka raja do ahu soada alana, alai holan hatami do dihabiari rohangku.

¹⁶²Marhilas ni roha do ahu ala ni bagabagami, songon halak na jumpangan godang taban.

¹⁶³ Huhagigihon jala huhabiashon do sipaotooto, huhaholongi do ianggo patikmi.

¹⁶⁴ Pitu hali di na sadari hupuji Ho, ala ni angka uhum ni hatigoranmi.

¹⁶⁵ Mardame situtu do angka na mangkaholongi patikmi, jala ndang adong partuktuhan di nasida.

¹⁶⁶ Sai huhalungunhon do hatuaonmi, ale Jahowa, jala huulahon angka tonami.

¹⁶⁷ Sai diradoti rohangku do angka panindangionmi, jala huhaholongi situtu angka i.

¹⁶⁸ Sai huradoti do angka parentam dohot panindangionmi, ai di jolom do saluhut angka dalanku.

¹⁶⁹ (XXII.) Sai loas ma alualungku dumonok tu bohim, ale Jahowa, sai parroha i ma ahu hombar tu hatam.

¹⁷⁰ Sai tolhas tujolo ni bohim ma angguhangguk i, sai palua ma ahu hombar tu bagabagam.

¹⁷¹ Sai marbulakkon pujipujian ma angka bibirhu, ala dipodahon Ho angka aturanmi tu ahu.

¹⁷² Sai tariashonon ni dilangku do bagabagami, ai hatigoran do angka tonami saluhutna.

¹⁷³ Sai ditumpahi tanganmi ma ahu, ai nunga hupillit angka parentam.

¹⁷⁴Sai dihalungunhon rohangku do hatuaonmi, ale Jahowa, jala patikmi do hasudungan ni rohangku.

¹⁷⁵Sai mangolu ma tondingku, asa Ho dipuji, jala ditumpahi angka uhummu ma ahu!

¹⁷⁶Nalilu do ahu, songon birubiru na mago, sai lulu i ma naposom, ai ndang huhalupahon angka tonami.

120¹Ende hananangkok. Tu Jahowa do ahu mangalualu di hagogotanki, jadi dialusi Ibana ahu.

²Ale Jahowa, sai palua ma tondingki sian bibir pangansion, sian dila siduatdait!

³Tung aha lehononna tu ho, jala tung aha dope ambaanna tu ho, ale dila siduatdait?

⁴Sumbia angka na tajom ni ulubalang angkup ni arang ni turituri.

⁵Soro ni aringki, tung maisolat ahu di Mesek halak parbada, tung maringan ahu di lambung undungundung ni Kedar! Panggetegete.

⁶Nunga malelengku nian rohangki maringan di lambung ni angka na mangkasomorhon hadameon.

⁷Sai dame do ianggo ahu, alai molo mangkuling ahu, sai mamungka hamusuon do ianggo nasida.

121¹Ende hananangkok. Sai mangananapi do matangku dompak angka dolok: Sian dia do ulaning ro pangurupion tu ahu?

²Sian Jahowa Sitompa langit dohot tano on saming ro pangurupion ianggo tu ahu.

³Ndang tagamon loasonna tarsulandit patmu, ndang tagamon nok mata ni Sijaga ho.

⁴Ida ma, ndang olo nok mata, jala ndang olo modom ianggo Sijaga Israel.

⁵Jahowa do Sijaga ho, Jahowa do parlinggomanmu di lambung ni tanganmu siamun.

⁶Ndang tagamon doiton ni mata ni ari ho arian, manang bulan pe bornginna i.

⁷Sai jagaon ni Jahowa do ho sian nasa parmaraan, sai jagaonna do tondim.

⁸Sai jagaon ni Jahowa do ho laho ruar dohot laho bongot, olat ni on ro di salelenglelengna.

122¹Ende hananangkok sian si Daud.

Las do rohangku di angka na mandok tu ahu: Beta hita manopot bagas ni Jahowa!

²Nunga jongjong patnami di angka bahalmi, ale Jerusalem!

³Ale Jerusalem, naung pinauli songon huta na tipak marrapitrapit gabe sada.

⁴Nangkok do tusi angka marga, angka marga ni Jahowa, bahen panindangion di Israel, laho mamuji goar ni Jahowa.

⁵Ai tusi do dipajongjong angka habangsa paruhuman, angka habangsa di pinompar ni si Daud.

⁶Sai pangido hamu ma hadameon di Jerusalem, sai mardohar ma angka na mangkaholongi ho!

⁷Sai masa ma hadameon di bagasan parikmu, hasonangan ma di bagasan jabum angka na bolon!

⁸Ala ni angka hahaanggingku dohot alealengku sai dohononku do: Hadameon ma di bagasan ho.

⁹Ala ni bagas ni Jahowa, Debatanta i, sai haringkothononku do nadenggan di ho.

123¹Ende hananangkok. Sai manatapnatap do matangku tu Ho, ale na marhabangsa di banua ginjang.

²Ida ma, songon mata ni angka anak somang tu tangan ni induk somangnasida, songon mata ni naposo boruboru tu tangan ni sorangannasida: Songon i do mangaranapi matanta tu Jahowa, Debatanta, paima asi rohana di hita.

³Sai asi ma roham di hami, ale Jahowa, sai asi ma tutu, ai nunga tung mahap situtu hami di pangareheon.

⁴Nunga tung mahap situtu rohanami dihaeleson ni angka na jungkat roha, di pangareheon ni angka na ginjang roha.

124¹Ende hananangkok sian si Daud. Aut unang Jahowa mandongani hita, sai i ma didok Israel.

²Aut unang Jahowa mandongani hita, uju hehejolma mangalo hita:

³Sai ngolungolu hita bondutonna, uju i di panombo ni rimasnasida dompak hita.

⁴Sai na aupon ni angka aek do hita uju i, sai na boluson ni batang aek i do tondinta.

⁵Sai na boluson ni angka aek na marhasahi do tongon tondinta uju i.

⁶Pinuji ma Jahowa, na so mangalehon hita sisoroon ni angka nginginasida i.

⁷Nunga malua tondinta i songon pidong, na malua sian sambil ni parsambil, nunga matos sambil i, jadi malua hita.

⁸Ianggo pangurupion di hita di bagasan goar ni Jahowa, Sitompa langit dohot tano on do.

125¹Ende hananangkok. Angka na marhaposan tu Jahowa, songon dolok Sion do nasida, ndang tagamon humordit, hot do tahe ro di salelenglelengna.

²Angka dolok do ia humaliang Jerusalem, Jahowa do ianggo humaliang bangsona olat ni on ro di salelenglelengna.

³Ai ndang tagamon tong mandondon tungkot harajaon ni hajahaton di atas parjambaran ni angka partigor, asa unang laho tangan ni angka partigor i tu hageduhon.

⁴Sai bahen ma na denggan, ale Jahowa, tu angka na denggan roha i dohot tu angka sisangunjur marroha di bagasan.

⁵Alai anggo angka na manimbil tu dalannasida sandiri, angka na geduk i, sai na togihonon ni Jahowa do nasida rap dohot

angka siula hajahaton. Dame ma songgop ianggo tu Israel!

126 ¹Ende hananangkok. Di na mulak tinogihon ni Jahowa angka na tarbuang sian Sion, doshon halak na marnipi do hita.

²Gok parengkelon ma uju i pamanganta, jala marolopolop dilanta, martaringot ma uju i di tongatonga ni angka parbegu: Godang ma na binahen ni Jahowa tu nasida!

³Godang ma tongon na binahen ni Jahowa tu hita, jadi marhilas ni roha ma hita.

⁴Sai togihon ma mulak, ale Jahowa, angka na tarbuang sian hami, songon angka sunge di tano tungkan dangsina.

⁵Angka na mariluilu laho manabur, marolopolop do sogot laho manggotil.

⁶Mardalandalan pe ibana huhut tangis pausungusung boni sisaburhononhon, ro do ibana sogot marolopolop mangusung angka tibalanna.

127 ¹Ende hananangkok sian si Salomo. Molo so Jahowa paulihon bagas, loja saming do angka na mamandei; molo so Jahowa marhal huta i, ndang marniula hadudungo ni parhal.

²Ndang adong labamuna dipasogot hamu hehe, dipaleleng hamu muse laho hundul manganhon roti hangaluton, songon i modom dilehon Ibana tongon tu hasianna.

³Ida ma, pala ni Jahowa sambing do di anak, silehonlehonna do parbue ni bortian.

⁴Songon angka sumbia di tangan ni ulubalang, songon i do angka anak di haroro ni daging.

⁵Martua ma baoa na manggohi parangkatanna sian nasida: Ndang tagamon tarurak nasida, molo marsiuaan nasida dohot angka musu di parjompahan.

128 ¹Ende hananangkok. Martua ma ganup na mangkabiari Jahowa, na marparange di angka dalanna i.

²Sai panganonmu do na niula ni tanganmu, martua ma ho jala sonang.

³Tudoshon hau anggur na marparbue do ianggo jolmam di bagasan angka bilut ni jabum, tudoshon tunas ni hau jetun do angka anakmu humaliang mejam.

⁴Ida ma, sai songon i do tongon dapotan pasupasu baoa, na mangkabiari Jahowa.

⁵Sai pasupasuon ni Jahowa ma ho sian Sion, asa paidaidaonmu hinadenggan ni Jerusalem ganup ari saleleng ho mangolu.

⁶Jala ingkon idaonmu do angka pahompum tubu ni anakmu. Hasonangan ma songgop tu Israel.

129 ¹Ende hananangkok. Jotjot situtu do disosak halak ahu sian sietehetehonku, i ma dohonon ni Israel nian.

²Jotjot situtu do tongon disosak halak ahu sian sietehetehonku, hape ndang tarhahua nasida ahu.

³Maninggalai pola angka paninggala di atas tanggurunku, ganjang do dibahen angka barurannasida.

⁴Bonar do anggo Jahowa, nunga digotapi tali ni angka parjahat i.

⁵Ingkon tarurak nian jala sumurut tu pudi sude angka na mangkasomorhon Sion.

⁶Ingkon gabe doshon ri na tinaruphon nasida nian, ndang dope binutbut, nunga ape.

⁷Na so pola gohan ni panabi tanganna sian i, manang pola abingon ni panarui.

⁸Jala ndang pola dohonon ni angka pamolus: Pasupasu ni Jahowa ma mandongani hamu! Hupasupasu hami ma hamu marhitehite goar ni Jahowa!

130¹Ende hananangkok. Sian pardangolan angka na bagas i do ahu joujou tu Ho, ale Jahowa!

²Ale Tuhan, sai tangihon ma soarangki, sai patinggil ma pinggolmu tumangi soara ni anggukkon!

³Molo tung manjujur Ho, ale Jahowa, di angka dosa, tung ise ma manahan jongjong, ale Tuhan?

⁴Alai tahe marroha pamuation do Ho, asa dihabiari halak Ho.

⁵Huhalungunhon do Jahowa, malungun do tondingku, jala huparhanalom do hatana.

⁶Gumogo do dihalungunhon rohangku Tuhan i sian angka parhal di torang ni ari, angka parhal di torang ni ari tongon.

⁷Nalom ma roham tu Jahowa, ale Israel, ai parasi roha do Jahowa, jala godang do haluaon di Ibana.

⁸Jala Ibana sandiri paluahon Israel sogot sian dosana sudena.

131 ¹Ende hananangkok sian si Daud. Ale Jahowa, ndang ginjang rohangku, jala ndang buas angka matangku, jala ndang hupangalahohon ruhut hatimbulon angka na so tarjujung ahu.

²Tongon tahe nunga tung hupataem jala hupahohom rohangku songon dakdanak na sirang susu di lambung ni inana, songon dakdanak na sirang susu do rohangku di bagasan.

³Nalom ma roham, ale Israel tu Jahowa olat ni on sahat ro di salelenglelengna!

132 ¹Ende hananangkok. (I.) Sai ingot ma, ale Jahowa, di si Daud sude angka parniahapanna!

²Na marmangmang i ibana tu Jahowa, marbagabagahon tu Sipargogoi Jakkob:

³Molo tung bongotanku undungundung ni bagashu, molo tung panaehonku podoman hapeahanku.

⁴Molo tung loasonku tarnono matangku manang tung podompodom bolak langkop ni matangku.

⁵Paima jumpang ahu sada ojahan di Jahowa, sada inganan di Sipargogoi Jakkob.

⁶Ida ma, nunga itabege barita ni poti parpadanan di Eprata, nunga jumpang hita di ladang ni si Jaar.

⁷Antong itabongoti ma angka ingananna i, marsomba ma hita tu jolo ni sidegedegean ni totna!

⁸Hehe ma Ho, ale Jahowa, mandapothon paradiananmu, Ho dohot poti hamuliaonmu!

⁹Sai marpangkean hatigoran ma angka malimmi jala marolopolop angka na niasianmu.

¹⁰Ala ni si Daud, naposomi, unang tulakkon bohi ni na miniahanmu!

¹¹(II.) Nunga pola diuarihon Jahowa hasintongan tu si Daud, ndang tagamon ubaonna: Sian pinomparmi do pabangkitonku di ho nampuna habangsa i.

¹²Molo tung diradoti angka anakmu padan na hubahen i, dohot panindangionku na huajarhon tu nasida, anaknasida pe sai hundul do di habangsam ro di salelenglelengna.

¹³Ai nunga dipillit Jahowa Sion, dipangido rohana naeng maringanan disi.

¹⁴On do paradiananku ro di salelenglelengna, dison do Ahu naeng maringan, ai hasudungan ni rohangku do i.

¹⁵Sai pasupasuonku do bohalna i, pamahaponku do angka na pogosna i mangan roti.

¹⁶Jala bahenonku do angka malimna i marpangkean hatuaon, jala ingkon mariaia do angka na niasianna i.

¹⁷Patimbulonku ma disi sada tanduk di si Daud, paradehon sada palito di na miniahanku na miniahan.

¹⁸Bahenonku ma ianggo angka musuna marulos haurahon, alai marlinanglinang ma ianggo di uluna tumpalna i.

133¹Ende hananangkok sian si Daud. Ida ma, dengganna i dohot sonangnai, molo tung pungu sahundulan angka na marhahamaranggi!

²Songon miak na hushus di ulu pola mabaor tu mise, tu mise ni si Aron, pola mabaor sahat tu rambu ni angka ulosna.

³Songon nambur ni Hermon, na mabaor tu angka dolok Sion, ai disi do diparbaga Jahowa pasupasu, hangoluan sahat ro di salelenglelengna.

134¹Ende hananangkok. Ida ma, puji ma Jahowa, sude hamu ale naposo ni Jahowa, hamu ale angka na jongjong di bagas ni Jahowa ganup borngin.

²Paherbang hamu ma tanganmuna tu habadiaon, jala puji hamu ma Jahowa!

³Sai dipasupasu Jahowa, Sitompa langit dohot tano on, ma ho sian Sion!

135¹(I.) Halleluya! Puji hamu ma goar ni Jahowa, mamujimuji ma hamu, ale naposo ni Jahowa!

²Hamu angka na jongjong di bagasan joro ni Jahowa, di angka alaman ni bagas ni Debatanta!

³Puji hamu ma Jahowa, ai pardengganbasa do Jahowa, endehon hamu ma goarna, ai hasudungan do Ibana.

⁴Ai nunga pola dipillit Jahowa si Jakkob di Ibana, nang Israel asa Ibana nampunasa.

⁵Ai anggo ahu tangkas do huboto, tung natimbul do Jahowa, jala Tuhanta i mangatasi sude angka Debata sileban.

⁶Nasa lomo ni rohana dipatupa Jahowa do di angka langit dohot di tano on, di bagasan angka laut ro di sude angka lung.

⁷Ibana do panaekkon angka ombun sian ujung ni tano on, gabe udan do angka hilapi dibahen, Ibana do paruarhon alogo sian angka parpeopanna.

⁸Ibana do mambunu angka buhabaju ni Misir, sianjolma ro di pinahan.

⁹Ibana manongos angka tanda dohot halongangan di parsitongaanmi, ale Misir, mangalo Firaun dohot sude angka naposona i.

¹⁰Ibana maniaphon torop angka bangso ni parbegu, jala dibunu raja angka na marhuaso:

¹¹Si Sihon, raja ni halak Amori, dohot si Og, raja ni Basan ro di sude angka harajaon Kanaan.

¹²Dung i dilehon Ibana tanonasida bahen partalian, partalian ni Israel, bangsona i.

¹³Ale Jahowa, ro di salelenglelengna do goarmu, marsundutsundut do parningotanmu, ale Jahowa.

¹⁴Ai luluhonon ni Jahowa do sogot bangsona i, jala marpangulahi do sogot rohana mida angka naposona i.

¹⁵(II.) langgo angka ajiajian ni parbegu perak do jala sere, jadijadian ni tangan nijolma.

¹⁶Marpamangan do nasida hape ndang mangkuling; marmata do nasida, hape ndang marnida.

¹⁷Marpinggol do nasida, hape ndang marbinege, huhut ndang adong hosa di bagasan pamangannasida.

¹⁸Sobokkon angka i do sogot jolma angka na jumadihonsa, sude angka na marhaposan tusi.

¹⁹Hamu ale pinompar ni Israel, puji hamu ma Jahowa; hamu ale pinompar ni si Aron, puji hamu ma Jahowa!

²⁰Hamu ale pinompar ni si Lepi, puji hamu ma Jahowa! Hamu ale angka na mangkabiari Jahowa, puji hamu ma Jahowa!

²¹Pinuji ma Jahowa sian Sion, Ibana na maringanan di Jerusalem. Halleluya!

136¹(I.) Mandok mauiliate ma hamu tu Jahowa, ai pardengganbasa do Ibana, ai ro di salelenglelengna do asi ni rohana.

²Mandok mauliate ma hamu tu Debata, na mangatasi angka Debata sileban, ai ro di salelenglelengna do asi ni rohana.

³Mandok mauliate ma hamu tu Tuhan ni angka tuan, ai ro di salelenglelengna do asi ni rohana.

⁴Ibana sandiri jumadihon halongangan angka na bolon, ai ro di salelenglelengna do asi ni rohana.

⁵Ibana sandiri jumadihon angka langit marhitehite hapistaran, ai ro di salelenglelengna do asi ni rohana.

⁶Ibana sandiri paherbang tano on di atas ni angka aek, ai ro di salelenglelengna do asi ni rohana.

⁷Ibana sandiri jumadihon panondang angka na bolon, ai ro di salelenglelengna do asi ni rohana.

⁸Mata ni ari bahen pangguruan ni arian, ai ro di salelenglelengna do asi ni rohana.

⁹Bulan i dohot angka bintang bahen pangguruan ni borngin, ai ro di salelenglelengna do asi ni rohana.

¹⁰(II.) Ibana sandiri mambunu angka buhabaju ni Misir, ai ro di salelenglelengna do asi ni rohana.

¹¹Jala diparuar Israel sian tongatonganasida, ai ro di salelenglelengna do asi ni rohana.

¹²Marhitehite tangan na gogo jala botohon na toltol, ai ro di salelenglelengna do asi ni rohana.

¹³Ibana naung umponggol laut pararungan i gabe dua bagian, ai ro di salelenglelengna do asi ni rohana.

¹⁴Jala dipataripar Israel sian tongatongana, ai ro di salelenglelengna do asi ni rohana.

¹⁵Jala dipangalonongkon Firaun dohot angka paranganna tubagasan laut pararungan i, ai ro di salelenglelengna do asi ni rohana.

¹⁶Ibana sandiri manogihon bangsona di halongonan, ai ro di salelenglelengna do asi ni roha.

¹⁷Ibana mambunu raja angka na bolon, ai ro di salelenglelengna do asi ni rohana.

¹⁸Jala diragehon raja angka na sangap, ai ro di salelenglelengna do asi ni rohana.

¹⁹Si Sihon i, raja ni halak Amori, ai ro di salelenglelengna do asi ni rohana.

²⁰Dohot si Og, raja ni Basan, ai ro di salelenglelengna do asi ni rohana.

²¹Jala dilehon tanonasida bahen partalian, ai ro di salelenglelengna do asi ni rohana.

²²Partalian ni halak Israel naposona i, ai ro di salelenglelengna do asi ni rohana.

²³Ibana marningot hita di hajimputonta i, ai ro di salelenglelengna do asi ni rohana.

²⁴Jala dirampas do hita sian angka alontai, ai ro di salelenglelengna do asi ni rohana.

²⁵Ibana mangalehon sipanganon tu nasa sibuk, ai ro di salelenglelengna do asi ni rohana.

²⁶Mandok mauiate ma hamu tu Debata ni angka surgo, ai ro di salelenglelengna do asi ni roha.

137 ¹Di topi ni angka batang aek Babel, disi do hami hundul huhut tumatangis, molo huingot hami Sion.

²Tu hau ampolu, angka na di tongatonga nasida, hugantungkon hami angka hasapinami.

³Ai disi do didokkon angka na mambuangkan hami dohononnami angka hata ende, dohot angka na paporsukporsuk hami mandokkon hami marlas ni roha: Endehon hamu ma di hami sada ende sian Sion!

⁴Tung beha ma pangendehonnami di ende ni Jahowa di luat ni halak na pulik marga?

⁵Molo tung huhalupahon ho, ale Jerusalem, ingkon lupa tanganku siamun di ulaonna!

⁶Ingkon lohota ma dilangku di langitlangitna i, molo tung so huingot ho, molo tung so Jerusalem mangatasi saluhut las ni rohangku hubahen.

⁷Sai ingot ma ale Jahowa tu pinompar ni Edom ari hatataban ni Jerusalem, angka didok nasida uju i: Ingkon panepnep hamu ma ro di batu ojahanna i!

⁸Ho ale boru Babel, naung pinapatu, martua ma manang ise na mamaloshon tu ho pambahenmi tu hami!

⁹Martua ma manang ise na manoro
posoposom baoa, jala dipangalotakkon tu
dolok batu!

138¹Ende sian si Daud. Mandok
mauliate ma ahu tu Ho sian nasa
rohangku, di jolo ni angka Debata paluonku
parhinaloan umpuji Ho.

²Marsomba ma ahu mandompakkon jorom
na badia i, jala pujionku ma goarmi ala ni
asi ni roham dohot ala ni hasintonganmi, ai
nunga dipabalga Ho bagabagam, tumindi
nasa goarmu.

³Dialusi Ho do ahu di ari pangalualuanki,
nunga dipapir Ho tondingku, gabe margogo
rohangki.

⁴Sai mandok mauliate tu Ho do, ale
Jahowa, sude angka raja ni tano on sogot
ia dung dibege nasida angka bagabaga ni
pamanganmu.

⁵Jala marende do nasida sogot mida angka
dalan ni Jahowa, ai timbul do hamuliaon ni
Jahowa.

⁶Ai timbul do tongon Jahowa, jala ditatap do
na serep roha i, jala ditanda do sian na dao
na ginjang roha i.

⁷Molo mardalandalan ahu di parsitongaan ni
hagogotan, dipangolu Ho do ahu, diondingkon
Ho do tanganmu dampak muruk ni angka
musungku, jala ditumpahi siamunmi do ahu.

⁸Sai paujungon ni Jahowa do mangondihon
ahu, ale Jahowa ro di salelenglelengna do

asi ni roham, unang tadingkon jadijadian ni tanganmu.

139¹ Ende sian si Daud. (I.) Ale Jahowa, disulingkit jala ditanda Ho do ahu!

² Sai diboto Ho do manang na hundul manang na jongjong ahu, gari sian na dao diantusi Ho do pingkiranku.

³ Manang mardalandalan manang modom ahu, disege Ho do ahu, jala tangkas do diboto Ho angka dalanku sudena.

⁴ Ai ndang adong nanggo sada hata di atas dilangku, tongon do ale Jahowa, diboto Ho do sudena i.

⁵ Tole sian pudi tole sian jolo dihaliangi Ho do ahu, jala dilinggom tanganmu do ahu.

⁶ Tung masurungku do parbinotoan sisongon i di ahu, matimbohu do, ndang hadongdongan ahu.

⁷ Tung tudia ma tarbahren ahu laho maradophon tondim, jala tung tudia ma tarbahren ahu maporus maradophon bohim?

⁸ Tung sura manaek ahu tu banua ginjang, disi do Ho, jala tung sura hubahren banua toru podomanku, ida ma disi do Ho.

⁹ Tung sura manginjam ahu di angka habong ni buha siang ari, laho songgop nian tu bariba ni laut.

¹⁰ Nang disi sai toguon ni tanganmu do ahu, jala tiopon ni siamunmu ahu.

¹¹ Jala tung sura hudok: Haholomon sambing ma manghungkupi ahu, jadi hatiuron do borngin i humaliang ahu.

¹² Haholomoni pe, ndang mangkolom ianggo di jolom, jala marsinondang do borngin songon arian, songon hatiuron i suang songon i haholomon marimpotimpot.

¹³ Ai Ho do na manompa angka piangku, ditonun Ho do ahu di bagasan bortian ni dainang.

¹⁴ Mandok mauiliate ma ahu tu Ho ala ni surung ni pambahenmu di ahu, na sumurung do angka jadijadianmu, jala tangkas situtu do i ditanda rohangku.

¹⁵ Nda tung buni holiholingku di jolom, uju na tarjadi ahu di sihabunian, uju na tarsirat ahu di dalam laut.

¹⁶ Di hurungan manuk ahu, nunga diida angka matam, jala nunga tarsurat tu pustaham sasudena i, nunga binuhul hian angka ariaringku, uju so adong dope nanggo sada.

¹⁷ (II.) Dibahen i mansai arga situtu do angka pingkiranmu di ahu, ale Debata, jala mansai torop do bilanganna.

¹⁸ Tung sura naeng rajumanku, tumorop do nasida sian horsik; molo ngot ahu, tong dope ahu di lambungmi.

¹⁹ Aut dibunu Ho ma nian parjahat i, ale Debata, jala hamu ale angka baoa sisopsop mudar, pasurut hamu ma sian ahu!

²⁰Nasida angka na manaringoti Ho mambahen sireheon, marsineang do angka alom mandok goarmu.

²¹Tung so hagigihononku ma, ale Jahowa, angka na mangkagigihon Ho, tung so marbiasbias ahu mida angka na hehe mangalo Ho?

²²Tung na sun do gigi ni rohangku di nasida, jadi musungku do nasida.

²³Sulingkit ma ahu, ale Debata, jala tanda rohangki, uji ma ahu jala tanda angka pingkiranki.

²⁴Jala ida, manang tung adong lapang haporsuhon di bagasan ahu, jala togu ahu di dalan salelenglelengna.

140¹Ende sian si Daud.

²Sai palua ma ahu, ale Jahowa, sianjolma parjahat i, sai ramoti ahu sian baoa siulahon jorjor!

³Angka na umpingkiri hajahaton di bagasan rohana, angka na patubitubi hamusuon ganup ari.

⁴Sai ditansiri nasida do dilanasida, songon ulok, bisa ni ulok dari do di toru ni bibirnasida. Sela!

⁵Sai ramoti ma ahu, ale Jahowa, maradophon angka tangan ni parjahat i, maradophon baoa siulahon jorjor, angka na mamingkiri mambahen tarsulandit pathu.

⁶Marsibuni do angka na ginjang roha manaon aring dompak ahu dohot angka

jorgong, nunga dipahirtang nasida angka rambang di pinggol ni dalan, nunga pola ditaon nasida angka bostang padapot ahu. Sela!

⁷Jadi ningku ma tu Jahowa: Debatangku do Ho, sai pinggol ma, ale Jahowa, soara ni angguhanggukkon!

⁸Jahowa, Tuhanki do partanobatoan ni hatuaonku, nunga diondingi Ho ulungku di ari hatongtangan.

⁹Sai unang lehon, ale Jahowa, pinangido ni parjahat i, sai unang tulus sangkapna i, lam tu ginjangna roha nasida maon. Sela!

¹⁰Sai pate tu ulu ni angka na mangonsongi ahu ma hajahaton ni bibirnasida i!

¹¹Diambalangkon Ibana ma nian tu nasida angka gara, tubagasan api ma nian nasida didabuhon, tubagasan angka lung, unang tarbahren nasida be hehe.

¹²Sai unang ma hot baoa pardila siduatdait di tano on, sai dilotongi hinamago ma baoa siulahon jorjor patompu mago.

¹³Tangkas do huboto, sai na maruli uhum do na dangol dohot angka na pogos bahenon ni Jahowa. (140-14) Tongon do, sai pujion ni angka partigor i do goarmu sogot, sai mian di jolo ni bohim do angka na unjur roha.

141 ¹Ende sian si Daud. Ale Jahowa, Ho do na hupajoujou, halaputi ma mandapothon ahu, sai tangi ma soarangki, molo joujou ahu tu Ho!

²Sai martimpul ma tangiangku bahen daupa di jolom, panindang ni tanganku bahen pelean sipanganon bodari.

³Sai bahen ma siramoti pamanganku, ale Jahowa, sai jagai ma pintu ni angka bibirhu!

⁴Unang loas rohangku manimbil paihuthon parkaro na jat, laho marpangalahohon angka pambahenan di hajahaton rap dohot baoa angka siulahon hajahaton, jala unang tung mangapian ahu naeng mandai panganon pangomoannasida i.

⁵Denggan tahe dilingsingi partigor i ahu, asi ni roha do i, diajar pe ahu, miak tu ulu do i, sai unang ma diupirhon ulungku antong, ai tong do tangiangki alo ni hajahatonnasida i.

⁶Ditunggalingkon do angka panguhumnasida tu dorpi ni batu hopit, jadi nunga dibege nasida hatangku angka na dampor i.

⁷Songon paninggala na mamunggari tano i, angka maraburan holiholinta ro di baba ni banua toru.

⁸Ai tu Ho do, ale Jahowa, Tuhanku, manaili matangku, marhaposan tu Ho do ahu: Unang tung durushon hosangki!

⁹Sai ramoti ma ahu sian angka mata ni jorgong, na tinaonnasida padapot ahu, dohot sian angka rambang ni angka siulahon hajahaton!

¹⁰Sai madabu ma angka parjahat i tubagasan jorgongna be, malua boti ma ianggo ahu.

142

¹ Tangiang sipodaon sian si Daud,
uju di bagasan liang ibana.

² Mangangguk badar ahu joujou tu Jahowa,
marhuraja do soarangku tu Jahowa.

³ Hupangusehon do alualungku tu jolona,
hupabotohon hagogotanki tu jolona.

⁴ Molo holom parnidaan ni tondingki di
bagasan, sai diboto Ho langkalangkanku;
marsibuni nasida manaon jorgong di dalam
sibolunsonku, padapot ahu nian.

⁵ Tailihon ma dompak siamun jala ida, hape
ndang adong na maralealehon ahu, polpol do
haporusanku, ndang adong na marhamaol
hosangki.

⁶ Manganguhi tu Ho do ahu, ale
Jahowa, ningku do: Ho do haporusanku,
parjambaranku di tano hangoluan on.

⁷ Sai parateatehon ma angguk i, ai maras
situtu do huhilala, sai palua ma ahu sian
angka na mangalotongi ahu, ai gumogo do
nasida sian ahu. (142-8) Sai paruar ma
tondingki sian hurungan, asa hupuji goarmu.
Marrongoman do sogot marpungu tu ahu
angka partigor i, ala binahenmi na denggan i
tu ahu.

143

¹ Ende sian si Daud. Ale Jahowa, sai
tangihon ma tangiangki, patinggil
pinggolmu umbege anggukkon, sai alusi ma
ahu di bagasan habonaronmu, hombar tu
hatigoranmu.

²Jala unang tung boan naposom tu paruhuman, ai ndang adong na tigor roha manang ise, na mangolu maradophon bohim.

³Ai sai diburu musu i do tondingki, tung didegehon do ngolungku tu tano, tung dipahundul do ahu tubagasan haholomon marimpotimpot, songon halak naung laon mate.

⁴Jala naung mandate do tondingku di bagasan ahu, naung malampot do rohangku di bagasan.

⁵Sai hupaingotingot do angka ari na robi, sai mamingkiri do ahu di angka pambahenanmu sudena, sai manimbangi do rohangku di angka jadijadian ni tanganmu.

⁶Sai hupaherbang do tanganku tu Ho, songon tano na so maraek do pangkalungunhon ni tondingku tu Ho. Sela!

⁷Hapogani ma mangalusi ahu, ale Jahowa, naeng mandate tondingku: Unang tung tabunihon bohim maradophon ahu, asa unang tung doshon angka na manuruk tanoman ahu.

⁸Sai patubegehon ma tu ahu manogotna i asi ni roham, ai marhaposan tu Ho do ahu. Sai pabotohon ma tu ahu dalan sidalananku, ai sai tu Ho do tinuju ni rohangku.

⁹Sai palua ma ahu sian angka musungku, ale Jahowa! Tu Ho do ahu martanobato.

¹⁰Sai ajari ma ahu mangulahon lomo ni roham, ai Ho do Debatangku, tondim na

denggan i ma manogihon ahu di tano na
hornop!

¹¹Ala ni goarmu, ale Jahowa, sai pangolu
ma ahu, paruar ma tondingku sian parmaraan
marhitehite hatigoranmu!

¹²Jala dibahen asi ni roham, sai siaphon ma
angka musungku, jala rendephon sude angka
na manosak tondingki, ai naposom do ahu.

144¹Ende sian si Daud. (I.) Pinuji
ma Jahowa, partanobatoanki,
na mangajari tanganku marporang, angka
jarijaringku mangulahon hamusuon.

²Parasiroha di ahu jala partanobatoanku,
haporusanku dohot sipalua ahu,
lombulombungku, jala marhaporusan
tu Ibana do ahu, Ibana patundukkon
bangsongku, asa guru di ahu.

³Ale Jahowa, tung aha ma nian jolma,
umbahen pola ditanda Ho ibana? Anak ni
jolma na gale, umbahen pola diparhamaol Ho
ibana?

⁴Tudos tu hosa sambing do jolma i, songon
halinu na mamolus do angka ariarina i.

⁵Ale Jahowa, sai pajomba ma angka
langitmi, jala tuat ma Ho, sai jama angka
dolak asa martimus nasida!

⁶Sai hilaphon ma hilapi jala paserak nasida,
asi siorhon ma angka sumbiam, asa guntur
nasida!

⁷Sai surdukkon ma tanganmu sian banua
ginjang, sai enet jala palua ma ahu sian

angka aek magodang, sian tangan ni angka anak na pulik marga.

⁸Angka parpamangan na mangkatahon na so marniula, jala siamun pangansion do siamunnasida i.

⁹(II.) Ale Debata, ende na imbaru ma endehononku di Ho, mardongan hasapi sisampulutali mamuji Ho.

¹⁰Ho do na mangalehon tua tu angka raja, paluahon naposom si Daud sian goluk hamagoan.

¹¹Sai rampasi jala, palua ma ahu sian tangan ni angka anak na pulik marga, parpamangan angka na mangkatahon na so gabeak, jala siamun pangansi do siamunnasida i!

¹²Ala simbur magodang angka anaknami di hadanakonna songon suansuanan, ia borunami songon tiang na nirungkungan mangihuthon parruhuton ni bagas bolon.

¹³Angka soponami gok do, ripe alapan sian i bohal ragamragam; ia birubirunami sinur ganda marriburibu jala marloksaloksa di alamannami.

¹⁴Marlambe do angka lombunami, soada na tumbason, jala soada na tarposo, jala ndang adong angguhangguk di alamannami.

¹⁵Martua ma bangso na songon i maruntung, martua ma bangso na mardebatahon Jahowa!

145¹Ende pujipujian sian si Daud.
Patimbulonku ma Ho, ale

Debatangku, Ho ale Raja, jala pujionku ma goarmu ro di salelenglelengna.

²Ganup ari do pujionku Ho, jala pasangaponku goarmu ro di salelenglelengna.

³Timbul do Jahowa, jala sipujion situtu, tung na so hadodoan do hatimbulonna i.

⁴Sai na masitonaan do angka sundut papujipuji angka jadijadianmu jala masipaboaan do nasida di hagogoonmu angka na sumurung i.

⁵Sai papingkirpingkironku do hinauli ni hamuliaonmu na sangap i, dohot angka barita ni halongangan angka na binahenmu.

⁶Jala ingkon paboaboaan do hagogoon ni halongangan angka na binahenmi, jala pajojoronku do angka hatimbulonmu.

⁷Ingkon doras do pararaton parningotan ni denggan ni basam na godang i, jala marolopolop nasida mida hatigoranmi.

⁸Partalup jala parasiroha do Jahowa, lambas do Ibana tarrimas jala pardengganbasa bolon.

⁹Pardengganbasa do Jahowa di saluhutna, jala dilinggom asi ni rohana do jadijadianna sudena.

¹⁰Mandok mauiate ma sude jadijadianmu tu Ho, ale Jahowa, jala dipuji angka na niasianmu do Ho.

¹¹Dibaritahon nasida do hamuliaon ni harajaonmu, jala diparhatopot nasida hagogoonmu na sumurung i.

¹²Laho pabotohon tu jolma manisia angka hagogoonna i, dohot hamuliaon ni harajaonna na sangap i.

¹³Harajaon ro di sude angka saleleng ni lelengna do harajaonmu, jala panggomgomionmu ro di sude angka sundut.

¹⁴Jahowa do situngkol sude angka na naeng tinggang, jala sipahehe sude angka na tungki marroha.

¹⁵Mangaranap tu Ho do angka mata ni sasudena, jadi dilehon Ho tu nasida sipanganon nasida di tingkina be.

¹⁶Dibungka Ho do tanganmu pasombu lomo ni roha ni nasa na mangolu.

¹⁷Nabonar do Jahowa di saluhut angka dalanna jala basa di bagasan saluhut jadijadianna i.

¹⁸Donok do Jahowa di sude angka na manjou Ibana, tongon tahe di sude angka na manjou Ibana di bagasan hasintongan.

¹⁹Ibana mambahen lomo ni roha ni angka na mangkabiari Ibana, jala dibege do angguknasida i, jala dipalua do nasida.

²⁰Jahowa do pangondingan ni sude angka na mangkaholongi Ibana, jala disiaphon do sude angka parjahat.

²¹Ingkon baritahonon ni pamanganku do pujipujian di Jahowa, jala nasa sibuk mamuji goarna na badia i ro di salelenglelengna.

146

¹ Halleluya! Ale tondingku, puji ma Jahowa!

² Pujionku ma Jahowa saleleng ahu mangolu, sai endehononku do Debatangku saleleng adong dope ahu.

³ Unang marhaposan hamu tu angka pangarajai, tu anak nijolma, na so umpeop panumpahion di bagasan ibana.

⁴ Ia ruar sogot tondina i, mulak ma ibana tu tanona, di ari na sasada i pesan ma sude angka sangkapsangkapna i.

⁵ Martua ma manang ise, na mambahen Debata ni si Jakkob pangurupina, marpangkirimon ibana di Jahowa Debatana!

⁶ Sitompa langit dohot tano on dohot laut ro di isina sudena, Siingot hasintongan ro di salelenglelengna.

⁷ Sipatingkos uhum tu angka na nirupa, Silehon sipanganon tu angka na male. Jahowa mangkarhari angka na tarrante.

⁸ Jahowa patonggor mata ni angka na mapitung, Jahowa pahehe angka na tungki, Jahowa mangkaholongi angka partigor.

⁹ Jahowa mangaramoti halak na buro, Ibana margogoihon angka na sopot so marama so marina dohot angka na mabalu, jala dipalipe ianggo dalan ni angka parjahat.

¹⁰ Jahowa do raja ro di salelenglelengna, Debatami, ale Sion, marsundutsundut do Halleluya!

147

¹ (I.) Halleluya! Ai denggan do endehononhon Debatanta, ai

hasudungan do Ibana tama papujipujion.

² Jahowa do na pauli Jerusalem, Ibana na papunguhon halak Israel angka na mampar i.

³ Ibana pasabam angka parroha bojok, jala dililiti angka bugangnasida i.

⁴ Ibana umbilang torop ni angka bintang, dijou do goarnasida sudena.

⁵ Timbul do Tuhanta i jala pargogo situtu, ndang habilangan parbinotoannai.

⁶ Jahowa pahehehon angka na nirupa, dipatungki tu tano ianggo angka parjahat i.

⁷ Marende taripar ma hamu umpuji Jahowa marhitehite hamauliateon, palu hamu ma uninguningan mamuji Debatanta!

⁸ Ibana manghungkupi langit i marhitehite ombun, Ibana paradehon udan tu tano on, Ibana patumbur duhutduhut di angka dolok.

⁹ Ibana mangalehon tu pinahan gagatonnaasida, nang tu angka anak ni pidong sigak, angka na ngoakngoak.

¹⁰ Ndang lomo rohana mida hagogoon ni hoda, ndang lomo rohana mida haehae ni baoa.

¹¹ Dihalomohon roha ni Jahowa do tahe angka na mangkabiari Ibana, angka na mangkalungunhon asi ni rohana i.

¹² (II.) Puji ma Jahowa, ale Jerusalem, puji ma Debata, ale Sion!

¹³Ai Ibana patogu angka ransang ni
pargumbanganmu, Ibana mamasumasu
angka anakmu di parsitonganmi.

¹⁴Ibana mambahen marhademahon
parbalohanmu, dipamahap do ho dohot eme
na marmiak.

¹⁵Ibana manongos bagabagana tu tano on,
mansai doras marlojong hatana i.

¹⁶Ibana na mangalehon ambolas songon
imput ni birubiru, disaburhon do nambur
songon sirabun.

¹⁷Ibana maninggankon ambolasna
martanggotanggo; tung ise ma manahan
jongjong maradophon ngalina?

¹⁸Ibana manongos hatana, gabe malala
angka i, dipaborhat anginna, mabaor ma
angka aek.

¹⁹Ibana mamaritahon hatana tu si Jakkob,
angka patikna dohot uhumna tu Israel.

²⁰Ndang dung dibahen songon i ianggo
tu manang ise bangso parbegu, jala ndang
diboto nasida angka uhumna. Halleluya!

148¹ Halleluya! Puji ma Jahowa, hamu
ale angka sian banua ginjang, puji
hamu Ibana di angka banua ginjang!

²Puji Ibana, sude hamu ale angka
surusuruanna, puji Ibana, sude hamu ale
angka paranganna!

³Puji Ibana, ho ale mata ni ari dohot bulan,
puji Ibana, sude hamu ale bintang angka na
marsinondang i!

⁴Puji Ibana, hamu ale angka langit ni langitan dohot hamu ale aek angka na di atas ni langit!

⁵Ingkon pujionnasida ma goar ni Jahowa, ai mandokkon Ibana, jadi tartompa ma nasida.

⁶Jala Ibana pahot angka nasida ro di salelenglelengna, dibahen do sada aturan jala ndang halaosansa.

⁷Puji ma Jahowa, hamu ale angka sian tano on, angka binatang ni laut ro di sude angka lung!

⁸Ho ale api dohot ambolas ro di timus, habahaba, na pasauthon hatana i.

⁹Hamu ale angka dolok dohot sude angka robean, hamu ale hau angka na marparbue ro di sude hau Ares.

¹⁰Ho ale binatang dohot sude pahanpahanan, angka gulomit ro di angka pidong na marhabong.

¹¹Hamu ale angka raja ni tano on dohot sude angka bangso, hamu ale angka pangarajai ro di sude angka panguhum ni tano on.

¹²Hamu ale angka dolidoli dohot namarbaju pe, hamu ale angka natuatua rap dohot angka na bajar.

¹³Ingkon pujionnasida ma goar ni Jahowa, ai sasada goarna i do na timbul, diatasi hamuliaonna i do tano on dohot angka langit!

¹⁴Jala Ibana patimbul sada tanduk di bangsona i, bahen pujipujian di sude angka

na niasianna, di angka anak ni Israel, bangso
hasolhotonna i. Halleluya!

149¹ Halleluya. Endehon hamu ma
di Jahowa sada ende na imbaru,
pujipujianna di bagasan luhutan ni angka na
niasian!

² Marlas ni roha ma Israel mida Sitompa
ibana, marolopolop ma angka anak ni Sion
mida rajanasida i!

³ Ingkon pujionnasida ma goarna marhaliang
arbap, mardongan sordam dohot sarune
pujionnasida Ibana!

⁴ Ai lomo do roha ni Jahowa mida bangsona,
dipahei do angka na dangol marhitehite
hatuaon.

⁵ Marolopolop ma sogot angka na niasian
di bagasan hamuliaon, mariaia ma nasida di
atas podomannasida i.

⁶ Angka ende hatimbulon ni Debata do di
bagasan aruarunasida, jala podang sidua
baba do di tangannasida.

⁷ Laho patupahon partubolon tu angka
parbegu, angka paminsangon tu angka
bangso.

⁸ Laho tarihot angka rajanasida dohot rante,
jala angka na sangap sian nasida dohot angka
bostang bosi.

⁹ Asa pasonggophon tu nasida uhum na
tarsurat i. Hamuliaon ma i di sude angka na
niasianna. Halleluya!

150

¹ Halleluya! Puji hamu ma Debata di bagasan habadiaonna i, puji hamu

ma ibana di hajanghajang ni hagogoonna i!

² Puji hamu ma Ibana ala hagogoonna, angka na sumurung i, puji hamu ma Ibana, hombar tu hinagodang ni hatimbulonna.

³ Puji hamu ma Ibana mardongan soara ni sarune, puji hamu ma Ibana mardongan arbap dohot sordam.

⁴ Puji hamu ma Ibana mardongan tali sajak dohot panontoron na marliat, puji hamu ma Ibana mardongan hasapi dohot tulila!

⁵ Puji hamu ma Ibana mardongan ogung panggora, puji hamu ma Ibana mardongan ogung panonggahi!

⁶ Sude na marhosa ingkon mamuji Jahowa! Halleluya.

Amsal

1 ¹ (I.) Ondo angka poda sipaingot ni si Salomo, anak ni si Daud, raja sian Israel:

² Asa botoon hapistaran dohot pangajaran, asa dapot antusan undangundang ni hapantason.

³ Asa manjalo pangajaran ni panuturion, roha manimbang hatigoran, uhum dohot hasintongan.

⁴ Laho mangalehon habistohon tu halak na tobok marroha, parbinotoan dohot pingkiran tu halak na bajar.

⁵ Sai dibege na pistar ma i, asa tamba poda di ibana, jala na marroha i dapotan ruhut partogion;

⁶ Asa diantusi umpama dohot undangundang, hatahata ni angka na pistar dohot hulingkulingannasida.

⁷ Biar mida Jahowa do parmulaan ni parbinotoan, alai anggo halak na oto manisai hapistaran dohot pangajaran.

⁸ (II.) Sai tangihon ma, ale anaha, pangajaran ni amangmu, jala unang tulakkon poda ni inangmu.

⁹ Ai bulangbulang hasoloan do i di ulum, jala horunghorong landus di rungkungmu.

¹⁰ Ale anaha, molo dielaela halak pardosai ho, unang ma ho mangoloi.

¹¹ Tung sura didok nasida: Beta hita marbajo laho mandurushon mudar, itagopgop ma halak na so marpipot, soada paralaan.

¹² Itapolgak ma nasida songon i mangolu, songon na binahen ni parbeguan, jala angka na daulat i, songon halak angka na turun tu tanoman.

¹³ Marragam ma arta angka na arga dapot hita, gohanta ma jabunta tabantaban!

¹⁴ Marpintu ma ho di tongatonganami, sisada puro ma hita sudena!

¹⁵ Ale anaha, unang ma olo ho sauduran rap dohot nasida, paholang tagonan patmu sian dalannasida i.

¹⁶ Ai marlojong tu jea do patnasida i, jala hapogan nasida laho mandurushon mudar.

¹⁷ Ai tung na so marguna do taon on rambang di adopan ni nasa na marhabong.

¹⁸ Nasida pe, mudarnasida sandiri do na binajoanna disi, hosanasida sandiri do na ginopgopanna.

¹⁹ Sai songon i do pangalaho ni ganup na hisapan di pangomoan, tung hosa ni indukna do dibuat.

²⁰ (III.) Sai joujou do hapistaran i di balian, dipangiar do suaranya di angka alaman.

²¹ Di partumpuran ni hariburon do nasida joujou, di pintu harbangan ni huta i ditingtingkon hatahatana songon on:

²² Sadia leleng on, hamu ale angka na oto, haholonganmuna haotoon? Jala

halomohononmuna insahinsak; hamu ale angka panginsahi? Jala hagigihononmuna parbinotoan; hamu ale angka na bodo?

²³Ua mulak ma hamu mangoloi pinsangpinsangku! Ida ma, pangusehononku ma tu hamu Tondingku, pabotohononku ma angka hatangku tu hamu!

²⁴Ala joujou Ahu, hape manjua ia hamu; husurdukkon tanganku, hape ndang adong parduli disi nanggo sahalak.

²⁵Lam diambolongkon hamu tahe sandok panuturionku, jala pinsangpinsangku ndang dioloi hamu:

²⁶Ahu pe nda martata ma Ahu di hinamagomuna, mangolesi ma Ahu di haroro ni hagodoron tu hamu.

²⁷Molo ro hagodoron tu hamu songon habahaba, jala jeamuna ro songon halisungsung, molo ro tu hamu hagogotan dohot hasosahan.

²⁸Disi ma jouonnasida Ahu, hape ndang alusanku; pasogotonnasida ma mangalului Ahu, hape ndang jumpang nasida Ahu.

²⁹Ala naung hinagigihonnasida parbinotoan, jala ndang dipillit biar mida Jahowa.

³⁰Jala ndang dioloi panuturionku, jala ndang dipengkon sandok pinsangpinsangku.

³¹Jadi ingkon panganonnasida parbue ni dalannasida, jala habutongkononna sangkapsangkap ni rohana sandiri.

³²Ai panundalion ni halak na oto laos mambunu nasida, jala hapedemon ni halak na bodo laos mangago nasida.

³³Alai manang ise na tumangihon Ahu, marsonangsonang ma ibana maringanan, jala sonang rohana maradophon hagodoron dohot jea.

2¹ (I.) Ale anaha, molo dijangkon roham angka hatangki, jala diparateatehon ho angka tonangki.

²Jala dipatinggil ho pinggolmu tumangihon hapistaran, dipaeleng ho roham tu habisuhon.

³Pola tung joujou ho mangido pangantusion, dipangiar ho suaram mangido habisuhon.

⁴Molo dijalahi ho angka i, songon perak, jala disulingkit ho, songon arta angka na buni:

⁵Jadi antusanmu ma biar mida Jahowa, jala jumpang ho parbinotoan ni Debata.

⁶Ai Jahowa do na marbasabasahon hapistaran, sian pamanganna do ro parbinotoan dohot habisuhon.

⁷Jala Ibana pahot hatuaon di halak partigor, Ibana do lombulumbu di halak na marpangalahohon hadaulaton.

⁸Asa diramoti angka lapang ni uhum, jala dijagai dalam ni angka na niasianna.

⁹Jadi disi ma antusanmu hatigoran dohot uhum, ro di ruhut hasintongan, sandok pangalaho na denggan i tahe.

¹⁰ (II.) Molo masuk hapistaran tu bagasan roham, jala dihalomohon roham parbinotoan.

¹¹ Jadi roha hapantason mangaramoti ho, jala habisuhon marjaga ho.

¹² Asa paluaonna ho sian dalam ni parjahat, sian baoa na mangkatahon getegete.

¹³ Sian halak angka na tumundalhon dalam hasintongan, asa mardalani di angka dalam haholomon;

¹⁴ Halak angka na las roha mangulahon hajahaton, mariaia nasida mida getegete angka na roa;

¹⁵ Halak angka na geduk marpangalaho, jala pasebut angka dalanna;

¹⁶ Asa paluahon dirim sianjolma ni halak sileban, sian sibabijalang na patabotabo hatahatana;

¹⁷ Naung tumadingkon hasoloan ni haposoonna, jala dihalupahon padan tu Debatana.

¹⁸ Ai marongrong tu hamatean do bagasna, jala pate tu banua toru do angka dalanna.

¹⁹ Nasa na manopot nasida, ndang ulahan bulung, jala ndang dapotsa angka lapang tu hangoluan.

²⁰ Dibahen i mardalani ma ho ale anaha, di dalam ni halak angka na denggan roha, jala marsihohot roham mangihutihut angka dalam ni halak partigor;

²¹ Ai halak partigor i mangingani tano on sogot, jala halak na daulat roha tading disi.

²² Alai anggo halak parjahat siap sian tano on, jala halak pangoseose pidom sian i.

3¹ (I.) Ale anaha, sai unang halupahon
poda na sian ahu, sai diradoti roham ma
angka tonangku.

² Ai tambaan ni do di ho ganjang ni ariari
dohot taon ni ngolum dohot dame.

³ Sai unang ma tallushon sian
roham habasaon dohot hasintongan,
horunghorongkon tagonan angka i tu
rungkungmu, jala surathon angka i bahen
parningotan ni roham.

⁴ Jadi dapotan asi ni roha dohot pangantusion
na denggan ho maradophon Debata dohot
jolma.

⁵ Marhaposan tu Jahowa ma ho sian nasa
roham, jala unang marpangunsandean ho tu
pingkiranmu sandiri.

⁶ Sai Ibana ma tanda di nasa dalanmu, asa
Ibana patigor angka dalanmu.

⁷ Unang tung na bisuk ho diparbaga roham,
habiari ma Jahowa, jala paholang dirim sian
hajahatan.

⁸ I ma gabe hahisaron di dagingmu, jala
haneangon di holiholim.

⁹ Pasangap ma Jahowa marhite sian
hamoraonmu dohot marhite sian patumonaan
ni sandok pangomoanmu.

¹⁰ Jadi marsipinjut ma angka sopom, jala
sirnip tuak anggur angka pangilanganmu.

¹¹ Ale anaha, sai unang toishon pangajaran
ni Jahowa, jala unang hagitikhon
pinsangpinsangna.

¹²Ai matua dipinsang Jahowa do na hinaholonganna, songon amaama mida anakna hasudungan ni rohana.

¹³(II.) Martua ma jolma na jumpangan hapistaran dohot jolma pangalapan roha.

¹⁴Ai dumenggan do pangomoanna sian pangomoan di perak, jala dumenggan parbuena sian sere palangki.

¹⁵Ummarga do i sian angka mutiha, jala sandok arta hasoloan ni roham, ndang tarpatudos tusi.

¹⁶Di tanganna siamun do ganjang ni umur, jala di hambirangna do hamoraon dohot hamuliaon.

¹⁷Dalanna do angka dalan hasudungan ni roha, jala sude lapangna hademakon.

¹⁸Hau hangoluan do Ibana di angka na mandahopi, jala manang ise na marsitiopan tusi martua do.

¹⁹Marhitehite hapistaran do dipaojak Jahowa tano on, jala marhitehite hapantason angka langit i dipadiri.

²⁰Marhitehite parbinotoanna mabola angka lung i, jala manetekkong nambur angka ombun parginjang i.

²¹Ale anaha, unang tung loas malua sian matam, sai tiopi ma tagonan roha hahohomon dohot hapantason.

²²Asa gabe hangoluan do i di tondim, jala hajagaron di rungkungmu.

²³ Jadi marsihohot ma roham manulus dalanmu, jala ndang tartuktuk ia patmu.

²⁴ Molo modom ho ndang tagamon tarsonggot, jala ia naung renge ho modom, sonang ma parpodommu.

²⁵ Nandang pola tahuton ho mida hagunturon so pangkiriman, manang mida rampokrampok ni halak parjahat, molo ro.

²⁶ Ai Jahowa do gabe haposanmu, jala Ibana mangaramoti patmu maradophon jorgong.

²⁷ (III.) Unang jua mambahen na denggan tu na hurangan, molo tung tuk gogo ni tanganmu patupahon.

²⁸ Unang dok tu donganmu: Datdati tusi marlaho ro; marsogot pe hulehon, hape naung dipeop ho nian nuaeng.

²⁹ Unang patubutubu gasa dompak donganmu, hape nalom do anggo rohana maringan di lambungmu.

³⁰ Unang pagulut ho dohot manang ise soada paralaan, molo so adong na jat dibahen tu ho.

³¹ Unang mangiburu ho di baoa pangarupa, jala unang paihut dalanna nanggo sada.

³² Ai marbiasbias do Jahowa mida halak na geduk, alai rosu do Ibana tu halak partigor.

³³ Manginona do torutoru ni Jahowa tu jabu ni parjahat, alai dipasupasu do ianggo undungundung ni halak partigor.

³⁴ Ibana marengkelengkelihon halak pangelesi, alai dilehon doasi ni roha anggo tu halak na unduk marroha.

³⁵Hamuliaon do teanon ni halak na bisuk sogot, alai luahonon ni haurahon do halak na oto i.

4¹(I.) Sai tangihon ma, hamu ale angka anaha, pangajaran ni sada ama, jala ringkoti hamu ma gumuruhon pangantusion.

²Ai poda na denggan do na hulehon tu hamu, unang tung tadingkon hamu patikku.

³Ai ahu pe, siminik ni damang do ahu, hasudungan jala anak sasada ni dainang.

⁴Jadi dipodai ibana ahu, jala didok do mandok ahu: Sai parateatehon ma angka hatangki, jala radoti angka tonangku, asa mangolu ho!

⁵Sai eahi hapistaran, eahi ma tutu pangantusion; unang tung halupahon, jala unang tundali angka hata ni pamanganku.

⁶Unang tung tadingkon angka i, asa diramoti ho; sai haholongi ma angka i, asa dijaga nasida ho.

⁷Parmulaan ni hapistaran, on do: Tuhori hapistaran i, jala tuhorhon sandok na niomom tumuhor pangantusion!

⁸Sai parhamaol ma i, asa dipatimbul ho, marmulia do ho bahenonna, molo marparsigantungan tusi ho.

⁹Lehononna do tu ulum bulangbulang hasoloan, tumpal na jagar situtu basabasahononna tu ho.

¹⁰(II.) Sai tangihon, ale anaha, jala jangkon ma angka hatangki, asa tamba di ho angka taon ni ngolum.

¹¹Di bagasan dalan hapistaran ahu mangajari ho, huringiring ho mardalan di angka lapang hatigoran.

¹²Molo mardalan ho disi, ndang tagamon hagogotan langkalangkam, jala molo marlojong ho, ndang tagamon tartuktuk.

¹³Marsitiopan tu pangajaran ma ho, unang parsitading i; sai tiopi ma i, ai i do hangoluanmu.

¹⁴Unang paihut dalan ni angka parjahat, jala unang mardalani ho di dalan ni parjahat.

¹⁵Tung palua dirim sian i, unang bolus sian i, paholang dirim sian i jala pasiding.

¹⁶Ai ndang tarpodom nasida, nda jolo manjahati, ndang tarnono matanasida, nda jolo targasip dibahen manang ise.

¹⁷Ai roti hajahaton do dipangan nasida, jala anggur pangarupaon diinum nasida.

¹⁸Alai anggo lapang ni halak partigor tudos tu buha siang ari, lam tu tiurna do, sahat ro di hos ni ari.

¹⁹Ia dalan ni halak parjahat tudos tu na holom marimpotimpot, ndang diboto nasida partuktuhannasida i.

²⁰(III.) Ale anaha, sai parateatehon ma angka hatangki, tarehon ma pinggolmu tumangihon angka hatangki.

²¹ Unang tung sirpang angka i sian matam, sai momosi ma di tongatonga ni roham.

²² Ai hangoluan do i di angka na jumpangan disi, jala gabe hahisaron di sandok dagingna.

²³ Sian saluhut sijagaon i, gumodang ma jaga roham, ai sian i do ruar angka mual hangoluan.

²⁴ Paholang ma sian ho ansiansi ni pamangan, jala padao sian ho bibir sijubajabi.

²⁵ Sai manulus tu jolo ma matami mamereng, jala langkop ni matam manuju tigor tu jolom.

²⁶ Sai timbangi ma pangalangka ni patmu, asa tung marsihohot saluhut dalanmu.

²⁷ Unang manimbil ho tu siamun manang tu hambirang, sai paholang ma patmu sian hajahaton.

5¹ (I.) Ale anaha, sai parateatehon ma habisuhon na huajarhon i, tarehon ma pinggolmu tumangihon poda na sian ahu.

² Asa diradoti ho angka panuturion, jala dipajop bibirmu parbinotoan.

³ Ai maneteknetekkon situak ni loba do bibir ni sibabijalang, jala lumandit do aruaruna sian miak.

⁴ Alai anggo ujungna paet do songon pogu, tajom songon podang sidua baba.

⁵ Tuat tu hamatean do ianggo patna, na roko do manjail langkalangkana.

⁶ Nandang ditimbang rohana ianggo lapang hangoluan, sai maor do pangalangkana, ndang diboto manang dompak dia.

⁷ Dibahen i ale angka anaha, tangihon hamu ma ahu, jala unang manimbil hamu sian pangkataion ni pamanganku.

⁸ Sai paholang ma dalanmu sian parompuan i, jala unang jumonok ho tu pintu ni jabuna!

⁹ Asa unang dipasayang ho hamuliaonmu tujolma sileban, manang angka taon ni ngolum tu halak na garang.

¹⁰ Asa unang halak na asing marsaulihon gogom, jala na hinangaluthonmi tading di bagasan jabu ni halak sileban.

¹¹ Jala ingkon morongorong ho di haju jumpang ni ajalmu, ia dung sun siap dagingmu dohot sibukmu.

¹² Gabe dohononmu ma: Apala huhagigihon ma pangajaran marisuang, jala ditoishon rohanku pinsangpinsang!

¹³ Tung so hutangihon suara ni angka gurungku, tung so hupaeleng pinggolhu tu angka na mangajari ahu!

¹⁴ Otknari, tung marjea situtu do ahu hape di tongatonga ni luhutan dohot huria!

¹⁵ (II.) Minum aek ma ho sian sumurmu sandiri, jala aek mata na mabaor sian tongatonga ni mualmu.

¹⁶ Tung tama ma binsat angka mualmu tu balian, hira sunge di angka alaman.

¹⁷ Sasada ho ma nampuna nasida, jala unang halak sileban donganmu nampunasa.

¹⁸ Sai pinasupasu ma mualmu, jala dihalashon roham ma jolma ni haposoonmu!

¹⁹I ma ursa tini hasoloan di ho, jala hije hasudungan; sombu ma roham tongtong mida bagotna, mariaia ma ho tongtong binahen ni holong ni rohana.

²⁰Boasa ma tung parhamudaonmu dirim ale anaha, mangihutihut parompuan sileban, jala pajamajamaonmu bagot ni sibabijalang.

²¹Ai patar do di adopan ni Jahowa dalan ni ganupjolma, jala dipahornop Ibana do saluhut dalan ni patna.

²²Hajahatonna sandiri do padapot parjahat i, jala angka jorat ni dosana sandiri marningot ibana.

²³Laos mate ibana ala so ditangihon pangajaran, jala binahen ni hinagodang ni haotoonna lonong ibana.

6¹ (I.) Ale anaha, molo tung mangkangkung ho di donganmu, pola masijamaan tangan ho mangkangkung halak sileban.

²Tung sura naung tarjorgong ho binahen ni hatahata ni pamanganmu, jala naung tardapot ho binahen ni pangkataion ni pamanganmu.

³Songon on ma bahen ale anaha, sai palua ma dirim ale naung tarjobung ho tu bagasan tangan ni donganmu; laho ma ho padoras langkam jala parajarajai donganmi!

⁴Unang loas tarnono matam, manang mondokondok langkop ni matam.

⁵Sai palua ma dirim songon hije sian tangan ni parburu, jala songon pidong sian tangan ni parsambil.

⁶(II.) Laho ma ho, ale sigurbak ulu marsiajar tu porhis, parateatehon ma angka dalanna, asa marbisuk ho!

⁷Nang so adong di ibana induk manang partogi manang pangarajai.

⁸Sai dipadiri do bohalna di partaonan logo ni ari, dipapungupungu do sipanganonna di hamamasa ni gotilon.

⁹Sadia leleng on modommodom ho, ale sigurbak ulu? Sadihari pe ho hehe sian podomanmon?

¹⁰Otiknari modom, otiknari mondokondok, otiknari mangunsimpu tangan, laos peak modom, nimmu.

¹¹Jadi ro ma hapogosonmu songon halak panamun, jala haraparonmu songon halak parlombulumbu.

¹²(III.) Jolma parroha na jat sahali do baoa pangansi, na marpangalahohon ansiansi ni pamangan.

¹³Mangkidophidopi ia matana mangkatai do ibana marhitehite patna, martudutudu marhitehite jarijarina.

¹⁴Getegete do di bagasan rohana, sai tongtong do ibana patahitahi hajahaton, patubitubi parbadaan.

¹⁵ Dibahen i ro hinamago tu ibana so pangkirimanna, tompu do ibana ripur, so hadaonan.

¹⁶ Harohaon na onom on do dihagigihon Jahowa, jala marbiasbias rohana mida na papituhon:

¹⁷ Mata haginjangan; dila pargapgap; tangan angka na mandurushon mudar na so marpipot.

¹⁸ Roha na patubutubu gasa; pat angka na bontis marlojong tu hajahaton.

¹⁹ Sitindangi pangansi na mangaturhon gapgap, jala na pabolabola halak na marhahamaranggi.

²⁰ (IV.) Ale anaha, sai radoti ma tona ni amangmu, jala unang tulakkon poda ni inangmu.

²¹ Duduk ma angka i tongtong tu bagasan roham, jala horunghorongkon tu rungkungmu.

²² Molo mardalani ho, ingkon i ma mangiringiring ho; molo modom ho, ingkon i ma mangaramoti ho; jala ia dungo ho muse, ingkon i ma donganmu mangkatai.

²³ Ai sulusulu do tona i, jala patik i do panondang, jala dalan tu hangoluan do angka pinsangpinsang ni pangajaron.

²⁴ Laho mangaramoti ho maradophon parompuan parjahat dohot maradophon dila elaela ni sibabijalang.

²⁵Unang ma mangapian roham di hinaulina, jala unang tarjorgong ho binahen ni pangkirdop ni salibonna.

²⁶Ai binahen ni parompuan sibabijalang sahat iba tu roti sanseat sambing, jalajolma ni halak sileban mangago tondi na arga i.

²⁷Tung tarpatuba halak ma api di gedekgedekna, so soksohanna angka ulosna?

²⁸Tung tarbahen halak ma mardalan di atas gara ni api, so matutung patna?

²⁹Laos songon i do manang ise na manopotjolma ni donganna: Nandang tarbahen so manginsombut tu ganup na jerjer jamajama.

³⁰Gari halak panangko ingkon hona uhum do, molo manangko ibana pasabam hisapna, ala male ibana.

³¹Tung sura dapot tartangkup ibana, ingkon uhum simamitui gararonna, pola ingkon sandok ugasan ni jabuna lehononna alina.

³²Alai tung na lalaen do manang ise na mangalangkupjolma ni halak, na mangago tondina do halak na mangulahoni.

³³Jea dohot haurahon manginona tu ibana, jala ndang hasalesean haurahonna.

³⁴Ai pangiburuon manunggul rimas ni baoa, jala ndang maralangalang rohana di ari partubolon i.

³⁵Nandang parduli ibana di uhum pardenggan, jala ndang sombu rohana nang dipagodang ho dangdang.

7¹ (I.) Ale anaha, sai radoti ma angka hatangki, jala pajop tu bagasan roham angka tonangki.

² Sai paingotingot angka tonangki, asa mangolu ho, jala ramoti patikki songon anak ni matam.

³ Tung rahuti ma angka i tu jarijarim, jala surathon angka i bahen parningotan ni roham.

⁴ Dok ma tu hapistaran i: Ibotongku do ho! Jala goari habisukon i pedanmu.

⁵ Asa diramoti ho maradophonjolma ni sileban, maradophon sibabijalang, na palanditlandit hatahatana.

⁶ (II.) Ai mandulo ahu sahali sian pandiloan ni jabungku, sian bonggarbonggar:

⁷ Jadi huida ma di tongatonga ni halak na so hona ajar, dapot ahu ma di tongatonga ni angka anak, sada dolidoli na hurang roha.

⁸ Madangadang do ibana di alaman mardonokkon suhisuhi ni bagas ni parompuan i, jala dalan tu jabu ni sibabijalang didalani.

⁹ Di na rambon ari, di na mamungka holom, pola borngin marimpotimpot.

¹⁰ Jadi ida ma, ro sada parompuan manomunomu ibana marpangkean sibabijalang, jala parroha marsibuni.

¹¹ Na tetep do ibana, jala na hijang, ndang hatiopansa patna di bagasan jabuna.

¹² Tongkin di alaman, tongkin di pasar, jala di saluhut sirpang ni dalan nasida mangonggop.

¹³Dung i disoro nasida ma dolidoli i, laos diumma, jala dipapuraga bohina huhut didok mandok ibana.

¹⁴Marutang angka pelean hamauliateon ahu, apala sadarion ma hugarar bagabaganku.

¹⁵Alani umbahen ruar ahu manjumpangkon ho mangalului bohim, gabe jumpang ahu do tongon.

¹⁶Nunga pola hupahembang angka lage di podomanku, martutup hain na halus sian Misir.

¹⁷Nunga pola hupispisi podomanku dohot pamurpuri angka na angur.

¹⁸Beta hita, pasombu rohanta masihaholongan sahat ro di torang ni ari, asa tung sabam rohanta masiummaan!

¹⁹Ai ndang di jabu anggo baoa i, laho do ibana tu dalanan na dao.

²⁰Diboan huhut puro isian ni hepeng di bagasan tanganna, di tula pe ibana mulak.

²¹Jadi meleng ma rohana binahen ni hinagodang ni sipaotootona, binahen ni tabotabo ni hatana ibana diluahon.

²²Hapogan ibana mangihuthon parompuan i, songon jonggi na tartogu tu pamotongan, jala songon ursa na masuk tu bagasan aring ni parburu.

²³Paima dibola sumbia ateatena; songon pidong na manahopi sambil, hape ndang diboto, hosana sandiri dona binununa.

²⁴ (III.) Dibahen i hamu ale angka anaha, tangihon hamu ma ahu, jala parateatehon hamu angka hata ni pamanganku.

²⁵ Unang paeleng roham tu dalan ni parompuan i, unang maupaup ho di angka lapangna.

²⁶ Ai tung torop do baoa marragean angka na binununa, jala deak halak angka na tinodosna.

²⁷ Angka dalan tu na roko do dalan tu jabuna, angka na pate tu angka bilut ni hamatean.

8¹ (I.) Nda joujou do hapistaran i, jala dipangiar habisukon i suarana?

² Di punsu ni angka dolokdolok di lambung dalan, di tongatonga ni angka dalan sirpang na maropat do ibana jongjong.

³ Di lambung ni angka bahal, di partungkoan ni huta i, di haroroan tu angka pintu harbangan Ibana joujou songon on:

⁴ Tu hamu ale angka baoa Ahu joujou, jala tu hamu alejolma manisiahupangiar suarangki.

⁵ Marsiajar habisuhon ma hamu, ale angka na bodo, jala olo ma hamu parrohaon, hamu ale angka na oto.

⁶ Sai tangihon hamu ma, ai na andar do angka na huhatahon, jala buhabuha ni bibir ni pamanganku do hasintongan.

⁷ Ai habonaron do dipaboaboa pamanganku, jala marbiasbias do bibir ni pamanganku mida hajahaton.

⁸Hatigoran do saluhut hata ni pamanganku, ndang adong na geduk di bagasanna, manang getegete nanggo sada.

⁹Luhutna i unur do di halak na marroha, jala sintong di halak naung dapotan parbinotoan.

¹⁰Sai jangkon hamu ma pangajaranku, unang tagonan perak; jangkon hamu parbinotoan lobi sian sere palangki.

¹¹Ai ummarga do hapistaran sian mutiha, jala saluhut mata intan ndang tarpatudos tusi.

¹²(II.) Ahu, Hapistaran i maringan tampak dohot habisuhon, jala jumpang Ahu do parbinotoan ni panuturion.

¹³Biar mida Jahowa do mangkagigihon na jat, roha haginjangon dohot hajungkaton; pangalaho na jahat pe dohot pamangan getegete pe na huhagigihon do.

¹⁴Ahu do nampuna panuturion dohot hatongtongon, Ahu do nampuna pangantusion dohot hagogoon.

¹⁵Marhitehite Ahu mangarajai angka raja, jala mangkajongjongkon hasintongan angka induk.

¹⁶Marhitehite Ahu mangarajai angka induk, nang angka na sangap ro di saluhut panguhum na di tano on tahe.

¹⁷Ahu mangkaholongi angka na mangkaholongi Ahu, jala angka na burju mangalului Ahu sai jumpangsa do Ahu.

¹⁸Guru di Ahu do hamoraon dohot hamuliaon, arta angka na arga dohot hatigoran.

¹⁹Dumenggan do parbuengku sian sere palangki dohot sian sere naung niuji, jala dumenggan do na huomo sian perak na pinillit.

²⁰Ahu mangiringiring halak di dalam hatigoran di tongatonga ni angka lapang habonaron.

²¹Marbasabasahon siteanon tu angka na mangkaholongi Ahu, jala parartaon nasida hugoki do.

²²(III.) Jahowa do nampuna Ahu di mula ni dalanna sahali, jumolo sian jadijadianna di na robi.

²³Sian mulamula sahali Ahu dimiahi, jumolo sian mula ni tano on.

²⁴Uju so adong dope angka laut, nunga ditubuhon hian Ahu, uju so adong dope mual angka na marisi aek.

²⁵Tagan so ojak dope angka dolok, jumolo sian angka dolok batu Ahu ditubuhon.

²⁶Uju so dijadihon dope tano dohot angka adaran ro di sisiasia ni tano on.

²⁷Uju dipadiri Ibana angka langit i, nunga disi hian Ahu, uju pinahembangna hajanghajang i di atas ni lung.

²⁸Uju pinahotna angka ombun di ginjang, uju pinaojakna angka mual ni lung.

²⁹Uju binahenna parbalohan ni laut, asa unang disalpui angka aek bibirna, uju na pinahotna angka ojahan ni tano on.

³⁰Ahu do uju i di lambungna pande, jala marolopolop Ahu ariari marmeami tongtong di jolona.

³¹Jala Ahu marmeami di liat portibi on, jala hasudungan ni rohangku do jolma manisia.

³²(IV.) On pe hamu ale angka anaha, sai tangihon hamu ma Ahu! Martua ma angka na mangaradoti angka dalanku.

³³Sai tangihon hamu ma pangajaran, asa marbisuk hamu, jala unang hamu mangalo.

³⁴Martua ma jolma na tumangihon Ahu, marjaga di lambung ni pintungku ariari mangaramoti angka tiang ni bahalhu.

³⁵Ai manang ise na jumpangan Ahu, jumpangan hangoluan do, jala maruli asi ni roha sian Jahowa.

³⁶Alai manang ise na mardosa dompak Ahu, mangago tondina sandiri do; nasa na mangkagigihon Ahu mangkaholongi hamatean.

9¹(I.) Nunga dipajongjong hapistaran i jabuna, jala nunga, didakdak tiangna batu sipitupitu i.

²Nunga dipotongi pinahanna pamuean jala dipapang anggurna, nunga huhut dipadiri mejana.

³Nunga disuru surusuruanna boruboru, manggokkon jolma di atas buntulbuntul ni huta i:

⁴Manang ise na tobok, ro ma ibana tuson! Tu ganup na hurangan roha hatana songon on:

⁵Ro ma hamu, pangan hamu ma sian rotingku, jala inum hamu sian anggur ma hupapang i.

⁶Tadingkon hamu ma angka na neang roha, asa mangolu hamu, jala ihutihut hamu ma dalan hapantason.

⁷(II.) Manang ise na umpinsang pangarehe, mangalap haurahon tu ibana sandiri do, jala manang ise na mangajar parjahat gabe tihasna do.

⁸Unang pinsang pangarehe, asa unang ho dihagigihon; pinsang tagonan halak na bisuk, jadi haholonganna ma ho.

⁹Lehon sipaingot tu na bisuk, asa ganda dope bisukna; ajari halak partigor, asa tamba parbinotoanna.

¹⁰Biar mida Jahowa do parmulaan ni hapistaran, jala parbinotoan ni angka na badia do hapantason.

¹¹Ai marhitehite Ahu ganda ariarim, jala tamba di ho angka taon ni ngolum.

¹²Molo tung marbisuk ho, bisuk di dirim sandiri do ho, jala molo mangarehe ho, manginona tu ho sandiri do.

¹³ (III.) Parompuan na oto do na hijang marpangalaho, jala na gatal, jala ndang diboto agia aha.

¹⁴ Hundulhundul do ibana di pintu ni jabuna, marhabangsa di atas buntulbuntul ni huta i.

¹⁵ Asa dipail pardalan angka na mamolus sian dalan i, angka na manulus dalanna hian, ninna do:

¹⁶ Manang ise na tobok, tuli ma ibana sian on! Jala tu na hurang marroha i hatana songon on:

¹⁷ Aek na tinangkotangko do na tonggi, jala roti sibunian do na tabo.

¹⁸ Alai ndang mamoto rohana, disi do angka anak hamatean, jala di bagasan angka godung ni na roko do, angka na ginokkonna i.

10¹ (I.) Anak na pistar palas roha ni amana, alai anggo anak na bodo arsak ni roha ni inana.

² Nandang marguna angka arta hajahaton, alai anggo hatigoran paluahon sian hamatean.

³ Nandang tagamon haraparon tondi ni partigor loason ni Jahowa, alai anggo hisap ni angka parjahat, disundati do.

⁴ Marpogospogos ma manang ise na langgus mulaulaon, alai anggo tangan ni angka na padot parohon hamoraon.

⁵ Manang ise na papungupunguhon di partaonan logo ni ari, i ma anak na marroha; alai manang ise na redem di hamamasa ni gotilon, i ma anak jea.

⁶Angka pasupasu do songgop tu ulu ni partigor; alai anggo pamangan ni halak parjahat hungkupan ni haurahon do.

⁷Parningotan ni partigor mangkorhon pasupasu, alai anggo barita ni halak parjahat, sai na busuk do.

⁸Parroha na bisuk manjalo pangajaran, alai anggo pardila na oto sai na pidom do.

⁹Manang ise ma marpangalahohon hadaulaton, sai na marsihohot di dalanna, alai manang ise na pageduk dalanna botoon ni halak do i.

¹⁰Manang ise na mangkidophidopi mambahen hajepolon; jala pardila na oto, sai na pidom do.

¹¹Mual ni hangoluan do ianggo pamangan ni partigor; alai anggo pamangan ni halak parjahat hungkupan ni haurahon do.

¹²Hosom pahehe parbadaan, alai saluhutna hasalaan di hungkupi roha holongi do.

¹³Di bibir ni halak na marroha i jumpang halak habisuhon, alai matua hotang tama tu tanggurung ni na hurang roha.

¹⁴Ia halak na bisuk marhohomhon parbinotoan, alai anggo pamangan ni na oto manahopi hamagoan.

¹⁵Artana i do huta na gonting di roha ni na mora, alai hapipidom ni angka na parir do hapogosonnasida i.

¹⁶Na niula ni partigor gabe hangoluan, alai anggo na niomo ni parjahat gabe dosa do.

¹⁷ Mardalan di lapang tu hangoluan do manang ise na mangaramoti pangajaran, alai manang ise na manjua pinsangpinsang, na mangaliluhon do.

¹⁸ Manang ise na mananom roha hosom, pardila sipaotooto do i; alai manang ise na pararat pangkataon tundal, halak na oto do i.

¹⁹ Di bagasan hinadeak ni hatahata, ndang holang adong sala; alai manang ise na mangkongkangi bibirna, i ma na marroha.

²⁰ Tudoshon perak na pita do dila ni partigor, alai anggo roha ni halak parjahat, ndang hanopan.

²¹ Bibir ni partigor marmahan torop halak, alai anggo halak na oto i haotoon ni rohana do di hamatehon.

²² Pasupasu ni Jahowa do mambahen mamora, jala ndang mardongan hangaluton dibahen.

²³ Hira meammeam do di roha ni na oto mangulahon getegete, suang songon i do halak parhapistaran mangulahon habisuhon.

²⁴ Na hinabiaran ni parjahat, i do songgop tu ibana, alai pinangido ni roha ni partigor dilehon Jahowa do.

²⁵ Songon pamolus ni habahaba, tompuna pesan parjahat i, alai anggo partigor i, hot do ro di salelenglelengna.

²⁶ Songon pangkorhon ni na asom tu ipon, jala songon timus tu mata, songon i do sigurbak ulu tu na marsuru ibana.

²⁷ Biar mida Jahowa mangudut ariari, alai jempek do anggo angka taon ni parjahat.

²⁸ Arop ni roha ni halak partigor manjadi las ni roha, alai tarhirim do ianggo halak parjahat i di na niaropna.

²⁹ Partanobatoan do di halak na daulat roha dalan ni Jahowa, alai hamagoan do ianggo di halak siulahon hajahaton.

³⁰ Nandang tarhutik partigor i ro di saleleng ni lelengna, alai anggo parjahat i, ndang maringan di tano on.

³¹ Pamangan ni partigor martumburhon hapistaran, alai anggo dila ni panggetegete ginsiron do.

³² (II.) Angka bibir ni partigor umboto na patut dohononna, alai anggo pamangan ni halak parjahat getegete sambing do dihatahon.

11 ¹ (I.) Hatian na marpangansi do na hinabiashon ni Jahowa, alai batu an na gok do lomo ni rohana.

² Ia ro hajungkaton, ro ma dohot haurahon: Alai jumpang do hapistaran di halak na serep marroha.

³ Hadaulaton ni halak partigor manogihon nasida, alai ansiansi ni halak pangoseose mangago nasida sandiri.

⁴ Nandang marguna hamoraon uju di ari pangarimasan, alai anggo hatigoran paluahon sian hamatean.

⁵Hatigoran ni na daulat roha patigor dalanna, alai tinggang do anggo parjahat i, binahen ni hajahatonna.

⁶Hatigoran ni angka partigor paluahon nasida, alai tarjorgong do anggo halak pangoseose, binahen ni hisapna sandiri.

⁷Molo matejolma parjahat i, mate do dohot arop ni rohana, jala pangkirimon marhite sian hajahaton mago do.

⁸Malua do halak partigor sian hagogotan, parjahat i do soluk singkatna tusi.

⁹Marhitehite pamangan ni pangansi mago donganna dibahen, alai marhitehite parbinotoan ni halak partigor malua nasida.

¹⁰Marolopolop do isi ni sada huta mida hadoharon ni halak partigor, jala ia mago halak parjahat masa suraksurak.

¹¹Marhitehite pasupasu ni halak partigor, gabe timbul huta, alai marhitehite pamangan ni halak parjahat maloha do huta i.

¹²Manang ise na paro lea di donganna, i ma na so marroha, alai anggo baoa na pantas marroha hohom do.

¹³Manang ise na mangalap manaruhon hata, i ma manjehehon hahomion; alai anggo partondi na marsihohot mangkuphupi hatahata.

¹⁴Molo soada ruhut harentaon, peut ma na sabangso i, alai hatuaon do i, molo torop panuturi.

¹⁵Tung na marjea situtu do manang ise na girgir mangkangkungi halak sileban, alai manang ise na mangkasogohon pangkangkungion, na marsijamaan tangan, i ma na sonang.

¹⁶Inaina na basar marsihohot do maniopi hamuliaon, tudos tu halak siulahon gogo mangahuti hamoraon.

¹⁷Mambahen na denggan tu dirina do baoa na basa, alai pasusa sibukna sandiri do halak na garang roha.

¹⁸Marpangomoan sipaotooto do halak parjahat; alai manang ise na manaburhon hatigoran, maruli upa haburjuon do.

¹⁹Manang ise na marsihohot di hatigoran, sahat do tu hangoluan; alai manang ise na mangeahi hajahaton, patibu hamamatena.

²⁰Marbiasbias do roha ni Jahowa mida halak parroha na geduk, alai lomo ni rohana do halak na daulat marpangalaho.

²¹Sian sundut tu sundut, tung na so tarbahen lias do parjahat i; alai anggo pinompar ni halak partigor malua do.

²²Songon harihir sere di bagasan igung ni babi, suman tusi do parompuan na uli na tumundalhon hatomanon.

²³Pangidoan ni halak partigor denggan sambing do, alai anggo arop ni roha ni halak parjahat, mangalap torutoru situtu do.

²⁴Adong deba halak na buas manaburhon, hape lam ganda do, adong huhut

deba mangkolit hamoraonna, hape lam marpogospogos do.

²⁵ Halak pardenggan basa mokmohan do, jala lam lobian manang ise na mardenggan basa.

²⁶ Manang ise na manongkik arga ni emena, buraan ni halak ma ibana, alai maruli pasupasu do ulu ni panggadis.

²⁷ Manang ise na manjugulhon na denggan, mangalului lomo ni Debata, alai manang ise na manjalahi hajahaton, sai na manginona tu ibana sandiri do.

²⁸ Manang ise na marhaposan tu hamoraonna, sai na tinggang do ibana, alai martumbur do songon bulung anggo halak partigor i.

²⁹ Manang ise na mangarapari isi ni bagasna, teanonna ma alogo, jala gabe naposo ni na pistar roha do halak na oto i.

³⁰ Parbue ni partigor do hau hangoluan, jala manang ise na malo sumambut roha ni halak, na pistar do i.

³¹ Ida ma, gari halak partigor maruli pamaloson di tano on, lam halak parjahat ma dohot pardosa.

12¹ (I.) Manang ise na holong roha di pangajaran, holong ma rohana di parbinotoan; alai anggo halak na mangkagigihon pinsangpinsang, na dodongon do i.

²Halak na denggan roha maruli halomoan sian Jahowa; alai anggo baoa panggetegete ditorui Ibana do.

³Ndang marsihohot roha ni jolma binahen ni hajahaton; alai anggo urat ni halak partigor, ndang tarhutik.

⁴Parompuan na marhuaso do tumpal ni harajaanna, alai songon bisa na manggagat tu holiholina do anggo parompuan sibahen haurahon.

⁵Hasintongan do pingkiran ni halak partigor, alai aturan ni halak parjahat sipaotooto do.

⁶Pangkataion ni halak parjahat mangonggop naeng mandurushon mudar; alai anggo pamangan ni halak partigor paluahon halak.

⁷Humosinghosing do roha ni halak parjahat, gabe pedom nasida; alai hot do ianggo bagas ni halak partigor.

⁸Marguru tu hapantasonna marroha tarpuji baoa, alai anggo halak na sungkalit marroha hagigian do.

⁹Denggan marlea iba, laos iba naposoniba, sian patimbotimbo diriniba, hape hurangan sipanganon do.

¹⁰Diparhamaol halak partigor i do hosa ni pinahanna; alai anggo asiasi ni halak parjahat hagarangan do.

¹¹Manang ise na mangula tanona, bosuran ma di sipanganon; alai anggo halak na mangolooloi marlanggelangge, hurangan roha do.

¹² Marsiilailaan do halak parjahat i manaon jorgong hamagoan, alai hot do ianggo urat ni halak partigor.

¹³ Jorgong na rahat do oseose ni pangkataion, alai malua sian hagogotan do halak partigor i.

¹⁴ Marhite sian parbue ni pamangan butongan baoba i di na denggan, jala sumuang tu ibana do pambahenan ni tanganna sandiri.

¹⁵ Tigor do dalan ni na oto di rohana, alai anggo halak na pistar i, olo do tumangihon sipaingot.

¹⁶ Hamurhingon ni na oto botoon do satongkinnari; alai manang ise na mangkuphupi haurahon, i ma na bisuk.

¹⁷ Manang ise na patajom hasintongan, i ma na papatarhon hatigoran; alai halak sitindangkon gabus papatarhon sipaotooto.

¹⁸ Halak na neang marpangkuling tudoshon horis na maniham do tajomna, alai anggo dila ni halak na pistar hahisaron do.

¹⁹ Hot do pangkataion hasintongan ro di salelenglelengna, alai sangkidop mata sambing do anggo dila sipaotooto.

²⁰ Sipaotooto do di bagasan roha ni halak na patubutubu hajahaton; alai las ni roha do di halak angka na marsangkap hadameon.

²¹ Ndang mangonai hamagoan agia aha tu partigor; alai gok hajahaton do anggo halak parjahat i.

²²Marbiasbias do roha ni Jahowa mida angka bibir sipaotooto; alai lomo ni rohana do anggo halak siulahon hasintongan.

²³Jolma na bisuk mangkahohomhon parbinotoan; alai anggo roha ni halak na oto maningtingkon habodoon.

²⁴Manggomgomi do sogot tangan ni halak na padot; alai anggo halak sigurbak ulu, ingkon marrodi do.

²⁵Holsoholso di bagasan roha ni baoa patungki ibana, alai anggo hata na denggan pahinsahon rohana muse.

²⁶Dipatongon halak na tigor do donganna tu dalan hasintongan; alai anggo dalan ni halak parjahat mangaliluhon nasida sandiri do.

²⁷Ndang dapotan na binuru anggo halak sigurbak ulu, alai dapotan arta apala na arga do anggojolma na padot.

²⁸Di bagasan lapang hatigoran do hangoluan, alai anggo dalan panirpangan pate tu hamatean do.

13¹(I.) Anak na pistar marateatehon pangajaran ni amana, alai anggo pangelesi, ndang ditangihon nang hona hata ibana.

²Marhite sian parbue ni pamanganna, mangan na denggan ganupjolma, alai anggo hisap ni pangoseose pangarupaon do.

³Manang ise na mamompomi pamanganna, i do na mangaramoti hosana, alai manang

ise na pangangang bibirna, hamagoan do ujungna.

⁴Sai dajian mangapian do roha ni sigurbak ulu, hape matua so sombu rohana; alai marmiak do ianggo roha ni halak na padot.

⁵Dihagigihon halak partigor do hata sipaotooto, alai anggo halak parjahat pabusuk dohot paura dirina.

⁶Hatigoran mangaramoti halak na daulat marpangalaho, alai anggo hajungkaton mangonjar tu dosa.

⁷Adong deba halak paulahon mora ibana, hape maliali di handang do; na deba paula pogos ibana, hape na mora jong do.

⁸Partobus ni hosa ni baoa do hamoraonna, alai anggo halak na pogos ndang ditangihon, nang hona hata ibana.

⁹Panondang ni halak partigor marsigorgor do, alai anggo palito ni halak parjahat mintop do.

¹⁰Roha haginjangon mangalap tongkartongkar sambing, alai jumpang do hapistaran anggo di halak na olo parrohaon.

¹¹Hamoraon sian dalan na so turut, lam tu otikna do, alai manang ise na paidukidukkon, lam tu gandana do.

¹²Arop na ngolngol pasusasusa roha, alai hau hangoluan do pangidoan naung ro.

¹³Manang ise na so parduli di hata ni Debata, mangago dirina sambing do, alai

anggo halak na mangkabiari patik, maruli upa do.

¹⁴Poda ni halak na pistar do mual hangoluan, pasidingkon angka jorgong hamatean sian ibana.

¹⁵Roha hapantason na denggan mambahen hasian, alai anggo dalan ni halak pangose mambahen hagigian.

¹⁶Luhut na niula ni halak na bisuk maraturan do, alai anggo na bodo pararat habodoonna do.

¹⁷Suruan na jahat parohon hamagoan, alai anggo suruan haposan mangkorhon hahisaron do.

¹⁸Hapogoson dohot haurahon do tohap ni halak na manulak pangajaran; alai manang ise na marateatehon pinsangpinsang, sai marmulia do.

¹⁹Molo jumpang na pinangido, tonggi do di roha; alai marmalumalu do halak na oto sumurut sian hajahaton.

²⁰Manang ise na mangkombar halak na bisuk, gabe marbisuk do, alai manang ise na sauduran dohot halak na oto, manjadi jahat do.

²¹Hamagoan do paburuburu halak pardosa, alai na denggan do dibasahon Jahowa tu halak partigor.

²²Halak na denggan roha martohap do ro di pinomparna alai bali tu halak partigor do hamoraon ni pardosa.

²³ Godang sipanganon dapot na pogos sian rimbana, alai lan halak ripur do binahen ni hageduhon.

²⁴ Manang ise na alang roha mangonai hotang, i ma na mangkagigihon anakna alai manang ise na holong roha di anakna, patibuonna ma pangajaran.

²⁵ Halak partigor mangan sampe sombusombu ni rohana, alai sai na rapar do anggo butuha ni halak parjahat.

14¹ (I.) Hapistaran ni angka parompuan pajongjong jabuna, alai anggo na oto, laos tanganna sandiri mangalohaisa.

² Manang ise na marpangalahohon hatigoranna mabiar do mida Jahowa, alai anggo halak na pageduk dalanna, palea Ibana do.

³ Di bagasan pamangan ni halak na oto do linsinglinsing ni jungkatna; alai anggo bibir ni halak na pistar mangaramoti nasida.

⁴ Molo so adong horbo paninggala, rumar ma sopo; alai godang parsaulian dapot sian gogo ni horbo.

⁵ Sitindangi haposan, ndang olo margabus, alai mangkusiphon gabus do anggo halak sitindangkong sipaotooto.

⁶ Mangalului hapistaran do halak pangarehe, hape ndang jumpangsa; alai muda do dapot halak na marroha i parbinotoan.

⁷ Paholang ma ho sian baoa na oto, ndang tagamon dapot ho bibir na marparbinotoan di ibana.

⁸ Hapistaran ni na bisuk do i: Ditimbang do dalanna, alai anggo haotoon ni halak na oto panginsu do i.

⁹ Tung na so marguna do pelean parsalaan di halak na oto, alai anggo di tongatonga ni halak partigor do hasortaon.

¹⁰ Roha i do tumanda arsak ni rohana sandiri, las ni rohana pe, ndang dapot hilalaon ni halak sileban.

¹¹ Bagas ni halak parjahat siap do, alai anggo undungundung ni halak partigor martumbur do.

¹² Adong do sada dalan, tigor do i di roha ni jolma, hape anggo ujungna gabe dalan tu hamatean do.

¹³ Nang di bagasan parengkelon, tupa do marsak roha, jala ujung ni las ni roha sisongon i hajepolon do.

¹⁴ Mahap binahen ni dalanna do parroha na marbalik i, alai dihasabamhon baoa na denggan roha i do na di ibana.

¹⁵ Halak na oto marhatutuhon luhut hatahata, alai anggo halak na bisuk i, ditimbang do langkalangkana.

¹⁶ Mabiari do ia jolma na pistar, gabe sumurut ibana sian hajahaton, alai anggo halak na oto patealteal hatahatana huhut pedem.

¹⁷ Halak parpiripiri mangulahon haotoon, jala baa panggetegete dihagigihon halak do.

¹⁸ Halak na oto martohap haotoon, alai martumpalhon parbinotoan do ianggo halak na bisuk.

¹⁹ Marsomba do sogot halak parjahat di jolo ni halak na denggan roha, jala halak na jungkat di lambung pintu ni partigor.

²⁰ Molo dung pogos, peus nang alealena mida ibana, alai torop do aleale ni halak na mora.

²¹ Manang ise na lea roha mida alealena, pardosa do i; alai manang ise na asi roha mida na dangol, martua do.

²² Tung so lilu ma halak angka na marsangkap hajahaton? Tung so dapotan asi ni roha dohot haburjuon ma halak na marsangkap na denggan?

²³ Sai mardongan parsaulian do nasa hangaluton, alai anggo hata teal mambahen hurangan halak.

²⁴ Tumpal ni halak na pistar do hamoraonnasida, alai haotoon do anggo tengatenga ni halak na oto.

²⁵ Siondingi hosa do halak sitindangkon hasintongan, alai anggo halak sitindangkon gabus mangagohon do.

²⁶ Biar mida Jahowa do partanobatoan na togu, laos gabe haporusan di angka anakna do Ibana.

²⁷ Biar mida Jahowa do mual hangoluan, asa mandao angka jorgong ni hamatean.

²⁸ Hinatorop ni na nirajaan do hamuliaon ni raja, alai oruru ni na nirajaan do hapipidom ni pangarajai.

²⁹ Halak na lambat tarrimas do sigodang panimbangan, alai halak parpiripiri pagodang haotoon.

³⁰ Ngolu tu pamatang do roha halambohon, alai manggagat tu holiholi do anggo roha pangiburuon.

³¹ Manang ise na mangarupa halak na parir, mangaleai Sitompa ibana do; alai manang ise na pasangap Ibana, asi do rohana mida na pogos.

³² Binahen ni hajahatonna pupur parjahat i, alai nalom do roha ni partigor nang di hamamatenana.

³³ Di bagasan roha ni halak na pistar do tongon mangulon hapistaran, alai sai tartanda do i di tongatonga ni halak na oto.

³⁴ Habonaron do patimbul sada bangso, alai haurahon ni angka bangso do ianggo dosa i.

³⁵ Lomo do roha ni raja mida naposo na pantas marroha, alai hona rimasna do ianggo sibahen haurahon.

15¹ (I.) Alus na lambok paombun rimas, alai anggo hata na horas mambahen marsijongjong ateate.

²Dila ni halak na pistar paholpu parbinotoan, alai anggo pamangan ni halak na oto marbullakbullakkon haotoon.

³Manatap manonggor do mata ni Jahowa tu liat portibi on, marnida halak na jahat dohot na denggan marroha.

⁴Dila halambohon do sada hau hangoluan, alai anggo ansiansi marhite sian i, hasedaon ni roha di bagasan do i.

⁵Halak na oto mangkasogohon pangajaran ni amana, alaijolma na bisuk do manang ise na marateatehon pinsangpinsang.

⁶Di bagasan jabu ni halak partigor do godang arta, alai parohon hagaoron do anggo parsaulian tu parjahat.

⁷Pamangan ni halak na pistar manaburhon parbinotoan, ndang songon i anggo roha ni halak na oto.

⁸Marbiasbias do roha ni Jahowa mida pelean ni halak parjahat, alai anggo tangiang ni halak partigor lomo ni rohana do i.

⁹Marbiasbias do roha ni Jahowa mida dalan ni parjahat alai dihaholongi rohana do manang ise na mareakkon hatigoran.

¹⁰Pangajaran na posi do mangonai tu manang ise na tumadingkon dalan hatigoran; ingkon mate do halak na mangkagigihon pinsangpinsang.

¹¹Gari parbeguan dohot banua toru sahali patar do di jolo ni Jahowa, lam angka roha nijolma manisiam a.

¹²Ndang lomo roha ni pangarehe hona pinsang ibana, ndang laho ibana tumopot halak na pistar.

¹³Roha na hilas pasihar panaili, alai molo marsak roha margudompong ma tondi.

¹⁴Roha na pantas mangalului parbinotoan, alai anggo bohi ni halak na oto lilian mida haotoon.

¹⁵Luhut ariari ni na parir jahat do di rohana, alai anggo roha na hilas i hira marharoan tongtong.

¹⁶Tagonan na otik mardongan biar mida Jahowa, asa arta godang mardongan hasusaan.

¹⁷Tagonan ingkau rata mardongan holong ni roha, sian lembu na pinamokmok mardongan pangiburuon.

¹⁸Baoa parpiripiri pahehe parbadaan, alai anggo halak na lambat tarrimas mangintopi pargulutan.

¹⁹Tudos do dalan ni sigurbak ulu tu handang sian bulu duri, alai manaletes do anggo lapang ni halak partigor.

²⁰Anak na pistar palas roha ni amana, alaijolma na oto sahali do manang ise na palea inana.

²¹Haotoon do apala las ni roha ni halak na hurang roha, alai anggo halak na pantas marroha pabulus pangalahona.

²²Sai na tarselak do angka sangkap molo soada tuptupan, alai molo torop panuturi, sai tulus ma.

²³Dapotan las ni roha baoa marhite sian paraluson ni pamanganna, jala hata sisandok pe di tingki halehetanna, mansai denggan do.

²⁴Lapang hangoluan manuju dompak ginjang do di halak na pantas marroha, asa dipaholang dirina sian dalan na tuat tu banuatoru.

²⁵Siap do bagas ni halak na jungkat bahenon ni Jahowa, alai hot do ianggo talutuk ni boruboru na mabalu dihajongjongkon.

²⁶Marbiasbias di roha ni Jahowa mida sangkapsangkap angka na roa; alai pita do di jolona angka pangkataion sian holong ni roha.

²⁷Laos manggaori bagasna sandiri do manang ise na mangadangi pangomoan na so turut, alai sai mangolu ma halak na mangkasogohon sisip.

²⁸Marhusari do jolo roha ni halak partigor taringot tu alusna, alai anggo pamangan ni halak parjahat marbullakbullakkon hajahaton.

²⁹Holang do Jahowa sian halak parjahat, alai ditangihon do anggo tangiang ni halak partigor.

³⁰Si har ni panaili palashon roha, barita na denggan mambahen marmiak holiholi.

³¹ Pinggol na tumangihon pinsangpinsang hangoluan, mian do di tongatonga ni halak na pistar.

³² Manang ise na manjua pangajaran, palea rohana sandiri do, alai manang ise na tumangihon pinsangpinsang dapotan roha ma.

³³ Biar mida Jahowa do pangajaran tu hapistaran, jala haserepon do patujolo ni hamuliaon.

16¹ (I.) Lan do sangkap ni roha ni jolma, alai sian Jahowa do anggo paraluson ni pamangan.

² Saluhut dalan ni baoa pita do di rohana, alai Jahowa do mangantan angka tondi.

³ Tu Jahowa ma giling angka pambahenanmu, asa tulus angka sangkap ni roham.

⁴ Luhut do dijadihon Jahowa hombar tu na tinembak ni rohana, nang halak parjahat tu ari hamagoan.

⁵ Marbiasbias do roha ni Jahowa mida sude jolma na ginjang marroha; sian sundut tu sundut: Nandang tagamon lias ibana.

⁶ Marhite sian asi ni roha dohot habonaron salese hajahaton, jala marhite sian biar mida Jahowa mandao iba sian hajahaton.

⁷ Molo lomo roha ni Jahowa mida dalan ni baoa, padameonna tu ibana nang angka musuna.

⁸ Tagonan do na otik marhitehite hatigoran, asa parsaulian godang sian dalan na so turut.

⁹Roha ni jolma marsangkap dalanna, alai Jahowa do patontu langkana.

¹⁰Uluhan sian Debata di bagasan pamangan ni raja, jadi ndang manjahati pamanganna di paruhuman.

¹¹Jahowa do nampuna hatian dohot bulung ni dasing hasintongan, jadijadianna do saluhut batu timbangan di bagasan hadanghadangan.

¹²Marbiasbias do tama roha ni angka raja mangulahon hajahaton, ai marhite sian hatigoran do hot habangsana.

¹³Bibir hatigoran i do lomo ni angka raja, jala dihaholongi rohana do halak sidok hata sintong.

¹⁴Rimas ni raja do hira angka suruan hamatean, alai anggo halak na pistar paombun rohana.

¹⁵Di bagasan sihar ni panaili ni raja do hangoluan, jala tudoshon ombun di partaonan logo ni ari habasaon ni rohana.

¹⁶Andul do dumenggan mangomo hapistaran asa sere, jala tagonan do mangomo roha hapantason asa perak.

¹⁷Dalan ni halak partigor mandao do sian hajahaton, marhamaol hosana sandiri do manang ise na mangaramoti dalanna.

¹⁸Matua ginjang ni roha do patujolo ni hajepolon, jala hatimboon diri patujolo ni hatinggangan.

¹⁹Tagonan do serep martondi rap dohot halak na dangol, asa marbagi tabantaban rap dohot na jungkat.

²⁰Manang ise na marateatehon hata ni Debata, jumpangan na denggan, jala halak na marhaposan tu Jahowa maruli tua.

²¹Halak na pistar marroha targoar na pantas, jala halambohon ni bibir manambai poda.

²²Mual hangoluan do roha hapantason di nampunasa, alai anggo pangajaran ni halak na oto haatoon sambing do.

²³Roha ni na pistar papantas pamanganna, jala ditambahi poda di atas dilana.

²⁴Tudoshon situak ni loba do pangkataion halambohon, tonggi tu roha, jala hahisaron tu holiholi.

²⁵Adong do sada dalan, tigor di roha ni baoa, hape marhapatean tu hamatean do ujungna.

²⁶Roha ni halak na ngalutan manambai hangalutan tu ibana, ai pamanganna patungki ibana.

²⁷Baoa parjahat sahali mambungbungki hajahaton, jala songon api na marsigorgor do di atas ni bibirna.

²⁸Baoa panggetegete patubi parbadaan, jala parhusiphusip pabolabola halak na maraleale.

²⁹Baoa pangarupa mangela alealena, jala ditogihon ibana tu dalan hamagoan.

³⁰Mangkidophidopi ia matana laho umpingkir getegete, dipahuntamhuntam bibirna naeng mangulahon hajahaton.

³¹Tumpal hamuliaon do uban na jumpang marhite sian dalam hatigoran.

³²Tagonan do halak na lambat tarrimas sian ulubalang, jala halak na mangarajai dirina, umbalga do i sian na papatu huta.

³³Tu bagasan ampuan tardanggur rujiruji, alai saguru di Jahowa do haputusanna.

17¹(I.) Tagonan do roti naung pir sanseat mardongan hasonangan, asa gok bagas juhut tibaltibal mardongan bada.

²Sai na rajaon ni anak somang na pantas marroha do sogot anak mata na marroha jea, jala marbagi teanteanan ibana di tongatonga ni angka hahaanggi.

³Balanga pangalalaan manguji perak, jala liang pangalalaan manguji sere, alai Jahowa do na manguji angka roha ni jolma.

⁴Sai lomo do roha ni halak parjahat i patangitangi bibir pangahution, jala halak sibahen sipaotooto manarehon pinggolna patangitangi dila pangansion.

⁵Manang ise na mangelak halak na pogos, i ma na manginsahi Sitompa ibana, manang ise na martillahon jea ni donganna jolma, ndang tagamon lias sian uhum.

⁶Tumpal ni natuatua do angka pahompuna, jala hamuliaon ni angka anak do amanasida.

⁷ Nandang patut di halak na oto bibir hatengaon, lam di halak na raja ma patut bibir sipaotooto.

⁸ Humala hasudungan ni roha do silehonlehon di roha ni sijalosa, manang dompak dia pe ibana humusor, sai na mardohar do.

⁹ Manang ise na manghungkupi hasalaan, i ma na mangalului haholongan; alai manang ise na mangehet hata, pabolabola halak na maraleale do.

¹⁰ Masuhan do hata pinsang sahali tu roha ni halak na pistar, asa lombutlombut saratus hali tu halak na oto.

¹¹ Hagunturon sambing do na niluluan ni halak parjahat, ingkon borhat nian suruan na jorbut mangalo ibana.

¹² Tagonan pajumpang iba dohot gompul inaina na agoan anak, asa dohot halak na bodo di habodoonna.

¹³ Manang ise na mambahen na jat balos ni na denggan, matua ibana ndang meret jea i sian jabuna.

¹⁴ Umpulha aek do manang ise na marmulahon bada, dibahen i tagan so mangalantap dope tagonan otap i badai.

¹⁵ Manang ise na mamintori halak parjahat, jala disalahon halak partigor, duansa nasida hagigian ni Jahowa do.

¹⁶ Tung aha ma gunana sinamot di bagasan tangan ni halak na oto tung tartuhorsa ma hapistaran so manang na marroha ibana!

¹⁷Manang ise na tongtong marholong ni roha, i ma aleale, alai tartulluk di hagogotan pe ianggo dongan situtu.

¹⁸Jolma na hurang roha do manang ise na girgir martopap tangan laho mangkangkung donganna.

¹⁹Mangkaholongi dosa do manang ise na mangkaholongi pargulutan, halak na patimbo pintuna mangalului hamagoan.

²⁰Ndang tagamon dapotan tua manang ise na geduk marroha, jala halak pardila getegete madabu tu bagasan jea.

²¹Manang ise na tumubuhon anak na bodo, mambahen margudompong rohana sandiri, jala ndang tarbahen marlas ni roha ama ni halak na oto.

²²Roha na hilas manumpak hahisaron, alai anggo tondi na gondok pamalas holiholi.

²³Manjalo sisip sian ampuan do halak parjahat, asa umputor angka dalan ni uhum.

²⁴Di adopan ni halak na pantas marroha do hapistaran, alai anggo mata ni halak na oto mangarambang do sahat ro di ujung ni tano on.

²⁵Hajepolon ni amana do anak na oto, jala arsak ni roha ni ina na tumubuhon ibana.

²⁶Gari dandoon halak partigor ndang jadi, lam ompongan ma tama halak na sangap humongkop hatigoran.

²⁷Manang ise na marroha, markokang do hatahatana, jala parroha na hohom, i ma baoa apala na pantas.

²⁸Nang halak na oto, molo hohom, bisuk do ibana dohonon ni halak, jala na pantas marroha do manang ise na humuntam bibirna.

18¹(I.) Mangolooloi pinangido ni rohana sandiri do manang ise na papulik dirina, saluhut roha hapantason do na nialona.

²Ndang lomo roha ni halak na oto mida roha hapantason, sai naeng botoon ni halak sibunian ni rohana.

³Molo ro hajahaton, ro ma dohot haleaon, jala mangihut tu haurahon do elakelak.

⁴Aek angka na bagas do hata sian pamangan ni baoa, jala sunge na doras mardalan do mual ni hapistaran.

⁵Ndang jadi dingkan an halak parjahat i, ala mida sangap, manang pataluhon partigor di paruhuman.

⁶Bibir ni halak na oto girgir maniroi parsalisian, jala pamanganna pajuju marsilombutan.

⁷Pamangan ni halak na oto mambahen hamagoanna sandiri, jala bibirna gabe jorgong tu rohana.

⁸Hatahata ni pangasung i, hira hata pargaiton, hape torus do angka bilut ni pusupusu ditondong.

⁹Nang halak na marlanggelangge di ulaonna, anggi ni pargadombus do ibana.

¹⁰Partanobatoan na togu do Goar ni Jahowa, marhaporusan tusi do partigor i, gabe timbul do.

¹¹Sinamotna do huta na gonting anggo di roha ni na mora, jala tudoshon parik na timbo disura rohana.

¹²Jolo dipaginjangjolma i do rohana, asa ro hamagoan, matua haserepon do anggo patujolo ni hamuliaon.

¹³Manang ise na mangulak hata, so jolo sahat ditangihon, otona do i, jala parohon haurahon.

¹⁴Baoa partondi na pir manaon, i ma paneang parsahitonna, alai anggo partondi na gondok, tung ise ma manganjusa?

¹⁵Roha na pantas mangomo parbinotoan, jala pinggol ni halak na pistar manjalahi parbinotoan.

¹⁶Silehonlehon ni jolma palumbang langkalangkana, jala i do manogihon ibana tu jolo ni halak na balga.

¹⁷Halak parjolo mangaluhon badana parpintor di rohana, hape ro ma muse alona padapot ibana.

¹⁸Rujiruji pasohot angka parsalisian, jala mambahen tolatola tu halak angka na gogo.

¹⁹Haha manang anggi na niosean, ummendel do i sian huta na gonting, jala

tudoshon ransangransang ni bagas na bolon do angka parsalisian.

²⁰Ingkon sian parbue ni pamanganna pabutongon ni baoa butuhana, jala sian pinarbuehon ni bibirna sabam rohana.

²¹Hamatean dohot hangoluan marpandapotan do tu dila, jala manang ise na mangaradotisa panganonna do parbuena.

²²Manang ise naung jumpangan soripada, dapotan tua, jala maruli habasaon sian Jahowa.

²³Marhurajai na pogos i mandok suara, alai kasar do ianggo na mora i maralus.

²⁴Baoa parpedan na torop parohon hasusaan tu ibana sandiri; alai anggo aleale situtu marsilohotan do i sian hahaanggi.

19¹(I.) Tagonan do halak na pogos, na marpangalahohon hadaulatonna sian halak pardila getegete, hape na oto do ibana.

²Nang roha na so marparbinotoan, ndang denggan, jala manang ise na bojok marpangalaho, sai na mardosa do.

³Haotoon nijolma sandiri mangago dalanna, hape dompak Jahowa do marmungutmungut rohana.

⁴Hamoraon do patorop aleale, alai anggo halak na parir, gari alealena tumadingkon ibana.

⁵Ndang tagamon lias sian uhum halak sitindangi pargapgap, jala ndang tagamon malua manang ise na mangkatahon gabus.

⁶Torop halak papujipuji halak na sangap, jala luhut halak maralealehon baoa pardengganbasa.

⁷Luhut hahaanggi ni na pogos mangkagigihon ibana, lam alealena ma tung so mandao sian ibana; manang ise na mangulasulas hata ndang marlaba.

⁸Manang ise na manuhor roha hapantason, mangkaholongi hosana, manang ise na mangaradoti parbinotoan, dapotan tua.

⁹Halak sitindangi pargapgap, ndang tagamon lias sian uhum, jala mago do halak na mangkatahon gapgap.

¹⁰Ndang tama sampe hadoharon tu halak na oto, lam anak somang ma tama gumomgom indukna.

¹¹Roha habibiton ni jolma palambat ibana tarrimas, jala hamuliaonna do i umbolus hasalaan.

¹²Tudoshon pangorong ni babiat do piripiri ni raja, alai songon nambur tu duhutduhut do anggo habasaronna.

¹³Mardapotdapot do jea dibahen anak na oto tu amana, jala songon panirisan ni udan nene do badabada ni ina.

¹⁴Jabu dohot sinamot do teanteanan sian ama, alai sian Jahowa do anggo pardihuta na pantas marroha.

¹⁵Halosohon mambahen tarnenep modom, jala roha na marlanggelangge, ingkon rapar do.

¹⁶Manang ise na marateatehon tona, mangaramoti hosana do, alai sai na mate do manang ise na neang marpangalaho.

¹⁷Na pasali Jahowa do manang ise na mardenggan basa tu na pogos, jala Ibana mamaloshon denggan basana i tu ibana.

¹⁸Sai ajar ma anakmi, ai tarparbaga dope muba rohana; alai unang tubu roham naeng mambunu hosana.

¹⁹Halak parpiripiri bolon mambahen siaeonna; alai molo tung dipalua ho ibana sai lam tu tambana dope pangajaran.

²⁰Sai tangihon ma hata sipaingot jala jangkon pangajaran, asa gabe pistar ho di hasusuda ni bohalmu.

²¹Pasimpar do sangkapsangkap di bagasan roha ni baoa, alai sangkap ni Jahowa do na marsihohot.

²²Pinangido ni roha ni jolma do habasaronna, jala tagonan do halak na pogos sian baoa pargapgap.

²³Biar mida Jahowa parohon hangoluan, jala halak na sabam roha marsonangsonang do, ndang manginona jea tu ibana.

²⁴Dipohul halak sigurbak ulu do nian indahanna, gari mambahen tu pamanganna ro losokna.

²⁵Mangonai tangan ma ho tu halak pangelesi, asa anggiat marbisuk halak na oto, sai ajar ma halak na pantas marroha, asa tamba parbinotoannai.

²⁶Manang ise na mangarupa amana, tung pola dipalaholaho inana, i ma halak sibahen haleaon dohot haurahon.

²⁷Ale anaha, molo dipasadi ho tumangihon pangajaran, jadi lilu ma ho sian angka hata parbinotoan.

²⁸Halak sitindangi parroha na jat palea uhum, jala pamangan ni halak parjahat mamolgak hageduhon.

²⁹Naung pinadiri hian torutoru di halak pangarehe, jala lipatlipat tu tanggurung ni halak na oto.

20¹(I.) Pangapasi do anggur i, jala sibahen hagunturon tuak na pang, nasa na lilu tu bagasan ni, ndang tagamon marbisuk ibana.

²Tudoshon parauangon ni babiat do asupasup ni raja, manang ise na manggitik ibana, mardosa tu hosana sandiri do.

³Hamuliaon ni baoa do i molo mandao ibana sian bada, alai manang ise na girgir manean bada halak na oto do i.

⁴Binahen ni biar mida ngali ni ari ndang maninggala sigurbak ulu, jadi manohunohu ibana di hamamasa ni gotilon, hape ndang adong jumpangsa.

⁵Tudoshon aek angka na bagas do sangkap ni roha ni baoa di bagasan, alai anggo baoa na bistok dapotsa do sulingkitonna.

⁶Lan jolma mangusaphon denggan basana sandiri, alai anggo baoa haposan, tung mahal do jumpang manang ise.

⁷Halak na marpangalahohon hadaulatonna, i ma partigor, martua ma angka anakna dung mate ibana.

⁸Raja na juguk di habangsa paruhuman, mamurpurhon nasa na jat marhitehite matana sandiri.

⁹Tung ise ma na hum mandok: Nunga tung hurasia rohangki, nunga tung ias ahu sian dosangku?

¹⁰Mardua hatian jala mardua solup, rap hagigian ni Jahowa do duansa.

¹¹Nang dakdanak tartanda do marhite sian angka parulaonna, manang na toman, manang na tigor ulaonna.

¹²Pinggol na tinggil marbinege, dohot mata na torang marnida, Jahowa do jumadihon duansa.

¹³Unang halomohon na modommodom, asa unang gabe pogos ho, pabidok matam, asa butongan sipanganon ho.

¹⁴Na roa do, na roa do! Ninna halak panuhor, alai ia dung tundal ibana, dipapujipuji ma dirina.

¹⁵Adong do nian sere dohot torop angka humala: Alai ulaula apala na arga sahali do angka bibir parbinotoan.

¹⁶Buat hian ma ulosna, ai halak sileban do na hinangkunganna, jala pangido ma singkoram sian ibana ala ni halak ruar.

¹⁷Tabo do didai baoa roti sipaotooto, hape gok batu garaga pamanganna ia di ujung.

¹⁸Marsihohot do angka sangkap binahen ni tuptupan, jala mardongan partogion na pantas ulahon hamusuon.

¹⁹Manang ise sialap manaruhon hata, i ma na manjehehon hahomion; jala unang angkupangkupi halak sijubajabi.

²⁰Manang ise na mamburai amana dohot inana, ingkon mintop palitona di na holom marimpotimpot.

²¹Teanteanan na nilahutan di mulana, ndang parsaulihononhon di ujungna.

²²Unang dok: Ingkon marbalos bahenonku na jati! Marhaposan tu Jahowa ma ho tagonan, asa Ibana manumpak ho.

²³Hagigian ni Jahowa do na mardua batu timbangan, jala tung na roa sahali do dasing panginsu.

²⁴Marharoroan sian Jahowa do langkalangka ni baoa, tung ise ma jolma na mangantusi dalanna sandiri?

²⁵Manjadi jorgong do di jolma, molo marneang ni roha ibana mangehet na badia i; jala dung sor angka bagabagana naeng dope diordioronna alus.

²⁶Raja na pantas marroha mangkiaphon halak parjahat, jala dibolushon di atas nasida roda pardegean.

²⁷Palito ni Jahowa do tondi ni jolma, na manulingkit sude bilut ni pusupusu.

²⁸Habasaron dohot habonaron mangaramoti raja, jala hot habangsana marhitehite roha haholongon.

²⁹Tumpal ni angka dolidoli do gogo nasida, jala hamuliaon ni halak na tuatua do uban.

³⁰Pangalilitan ni bugang do manjadi pangurasan sian na jat dohot libaslibas angka na masuk tu bagasan angka bilut ni pusupusu.

21 ¹(I.) Tudoshon aek ni angka sunge do roha ni raja di bagasan tangan ni Jahowa, tung tu sandok lomo ni rohana do ditogutogu.

²Saluhut dalan ni baoa tigor do di rohana sandiri, alai Jahowa do mangantan angka roha.

³Lomoan do roha ni Jahowa mida na mangulahon hatigoran dohot uhum, asa mida pelean.

⁴Mata haginjangon dohot roha hajungkaton dohot tiur ni parnidaan ni halak parjahat, dosa sambing do i.

⁵Sangkapsangkap ni halak na padot manjadihon hadumaon situtu, alai anggo halak na hojok, ingkon haraparon do.

⁶Manang ise na papunguhon arta marhite sian dila sipaotooto, ombun sambing do i di halak na mangalului hamatean.

⁷Pangarupaon ni halak parjahat manggagat tu ibana sandiri, ai manjua do nasida mangulahon uhum hasintongan.

⁸Marlegotlegot do dalan ni baoa parjahat, alai tigor do anggo ulaon ni halak na pita marroha.

⁹Tagonan do maringan di bubung parsuhi ni jabu, asa marsajabu dohot parompuan parbadabada.

¹⁰Roha ni halak parjahat mangapian di hajahaton, ndang tagamon marasi ni roha ibana, nang mida alealena.

¹¹Molo tarjepol pangarehe, dapotan bisuk ma na oto, jala molo niajaran halak na pistar, ganda ma parbinotoanna.

¹²Manatap manonggor do Partigor i dompak bagas ni halak parjahat, laos didabuhon halak parjahat i tu hamagoan.

¹³Manang ise na manongsong pinggolna maradophon angguk ni na parir, joujou nang ibana sogot, hape ndang adong na mangalusi.

¹⁴Silehonlehon di sihabunian paombun rimas, jala silua di ampuan paombun piripiri bolon.

¹⁵Marlas ni roha do halak partigor mangulahon uhum; alai hasonggoton sambing do i, anggo di halak siulahon jea.

¹⁶Jolma na lilu sian dalan hapistaran, ingkon manganguhi ibana di bagasan parbeguan.

¹⁷Ingkon hurangan do baoa na girgir marpanggalan, ndang tagamon mamora manang ise na holong roha di anggur dohot di pangirpangir.

¹⁸Bahen partobus ni partigor do halak parjahat i, jala singkat ni halak parroha sisangunjur do halak pangoseose.

¹⁹Degganan maringan iba di halongonan, asa marsajabu dohot parompuan parbadabada dohot na murhing.

²⁰Arta na arga dohot miak na hushus do di jabu ni halak na pistar, alai anggo jolma na oto mansuasaehonsa do.

²¹Manang ise na mangaradoti hatigoran dohot habasaon, dapotan hangoluan, hatigoran dohot hamuliaon ibana.

²²Dipanaek halak na pistar do huta ni halak na begu, jala diparumpak do tanobato pangatauanna i.

²³Manang ise na mangaramoti pamanganna dohot dilana, i ma na mangaramoti tondina maradophon hagogotan.

²⁴Halak na ginjang marroha manelengneleng, pangalak do goarna; marpangalahohon hajungkatonna na tarlobi do ibana.

²⁵Hisaphisap ni sigurbak ulu mambunu ibana sandiri, ai manjua do tanganna mulaulaon.

²⁶Ariari do adong hinapian ni rohana; alai anggo halak partigor buas do mangalehon, jala ndang mangkoliti.

²⁷Hagigian hian do pelean ni halak parjahat, muba do sogirna molo marsangkap tu hajahaton umbahen dipelehon.

²⁸Sai na mago do sitindangi pargapgap, alai anggo baqa pananginangi masuk do ibana mandok suara ro di salelenglelengna.

²⁹Baqa parjahat papuragahon bohina, alai anggo halak partigor pahothon dalanna.

³⁰Ndada hasea hapistaran, manang roha hapantason manang tuutupan anggo maralohon Jahowa.

³¹Pinadiri pe hoda tu ari tongtangan, alai guru di Jahowa do anggo haantuon.

22¹(I.) Argaan do barita na dengen sian hamoraon godang, andul do dumenggan roha haholongon sian perak dohot sere.

²Sai pajumpang do halak na mora dohot na pogos, Jahowa do manongos nasida sudena.

³Diida halak na bisuk do jea i ro, gabe laho martabuni, alai anggo halak na oto marsalasala pitpit gabe marsingkor.

⁴Upa ni roha haserepon dohot biar mida Jahowa: I do hamoraon, hamuliaon dohot hangoluan.

⁵Basir dohot jorgong do di dalan ni halak pargeduk, manang ise na naeng

marhamaolhon hosana, dipaholang ma dirina sian i.

⁶Tibu hian pasomalsomal dakdanak i marparange hombar tu dalanna; nang dung matua ibana, ndang tagamon morot ibana sian i.

⁷Halak na mora mangarajai halak na pogos, jala ingkon mangadop parutang tu baoa parutangan.

⁸Manang ise na manaburhon hageduhon, gotilonna do sogot hamagoan, jala siap do tungkot ni hajungkatonna i.

⁹Halak na lambok marpanaili, dapotan pasupasu, ai dilehon do sian indahanna tu halak na pogos.

¹⁰Sai pabali ma halak pargeduk, asa mandao parbadaan, jadi mansadi ma parsalisian dohot tongkartongkar.

¹¹Manang ise na mangkaholongi roha hapitaon, basar huhut pangkulingna, alealena marajai.

¹²Mata ni Jahowa mangaramoti parbinotoan, alai anggo hatahata ni pangoseose, dibalikkon Ibana do.

¹³Hata ni sigurbak ulu: Babiati do di balian, atek beha bunuonna ahu maon di dalan na bolon.

¹⁴Godung na bagas do pamangan ni sibabijalang, halak na tinoruan ni Jahowa madabu tu bagasan.

¹⁵Haotoon do lohoh di bagasan roha ni dakdanak, ingkon hotang pangajaran paholangkon sian ibana.

¹⁶Manang ise na mangarupa halak na pogos, paganda na di ibana do, jala manang ise na mardenggan basa tu na mora, mambahen ibana sandiri hurangan.

¹⁷(II.) Paeleng ma pinggolmu jala tangihon ma pangkataion ni halak na pistar, jala parateatehon ma pangajaranku.

¹⁸Ai tung hasonangan situtu do i, molo dipajop ho angka i di bagasan roham; sai rade ma luhutna i di atas bibirmu.

¹⁹Sai marhaposan tu Jahowa ma ho, i ma na hupabotohon tu ho sadarion, tu ho ma tongon!

²⁰Nda nunga husurathon tu ho hata angka na arga sahali mardongan panuturion dohot parbinotoan?

²¹Laho pabotohon tu ho hagostongon ni angka hata hasintongan, asa tung taralushon ho angka hata hasintongan tu halak na marsuru ho.

²²(III.) Unang tung pupusi halak na parir, ala parir ibana, jala unang tung pajepol halak na dangol hian di paruhuman.

²³Ai Jahowa do marluluhon parkaronasida, jala Ibana mamutusi hosa ni angka na mamutusi nasida.

²⁴Unang maraleale ho tu halak parmuruk, jala unang parrosurosu baoa parpiripiri.

²⁵Asa unang diguruhon ho angka pangalahona, jala manaon jorgong di hosam.

²⁶Unang pasaorsaor ho tu halak angka na marjanji, pola masijalangan, angka na manaoni utang ni halak sileban.

²⁷Molo so adong pineopmi bahen garar, boasa tagonan toltolon ni halak lage podomanmi?

²⁸Unang tung paorot talutuk sian na robi, angka na binahen ni ompum dope.

²⁹Molo diida ho baoa na manjugulhon ulaonna, tarbahensa ma tindang marhalado di jolo ni angka raja, ndengkon ibana tindang di jolo ni halak angka na lea.

23¹(I.) Molo hundul ho sapanganan rap dohot sada halak raja, ingkon tangkas timbanganmu manang ise na di jolom.

²Ingkon ampehononmu hian ma mata ni piso tu aruarum, molo tung parhisap ho.

³Unang mangapian roham di sipanganonna angka na tabo i, ai sipanganon sipaotooto do i.

⁴Unang parenge ulaonmu mangido naeng mamora, tung pasadi ma pingkiranmu sisongon i.

⁵Tung patut ma mangaranapi matam tusi, hape so adong be disi? Ai tung bahenonna do angka habongna, songon pidong raja wali na habang dompak aoangaoang.

⁶Unang pangan roti ni halak na murhing marpanaili, jala unang mangapian roham di sipanganonna angka na tabo i!

⁷Ai songon piningkiranna di bagasan rohana, songon i do ibana tongon; mangan minum ma ho, ianggo hatana tu ho, alai dao do ianggo rohana sian ho.

⁸Indahan naung pinanganmi, ingkon utahononmu muse, gabe magopo sambing hatahatam, angka na manis.

⁹Unang ho mandok hata tu pinggol ni na oto, ai sai na reheonna do sipaingot ni hatami.

¹⁰Unang paorot talutuk sian na robi, jala unang soluk bogas ni tangan ni angka na sopot so marama.

¹¹Ai na gogo sahali do Parlulu di nasida, Ibana sandiri mangkasuhuthon parkaronasida dompak ho.

¹²Sai tarehon ma roham tu pangajaran, jala pinggolmu tumangihon angka hata parbinotoan.

¹³Unang ontohi pangajaran sian dakdanak; molo hona hotang ibana dibahen ho, ndang tagamon mate ibana.

¹⁴Hona hotang pe dagingna dibahen ho, alai anggo tondina paluaonmu ma sian parbeguan.

¹⁵Ale anaha, molo marbisuk roham, las ma rohangku, las ma tutu.

¹⁶Marolopolop huhut angka puangku, molo di hatahon bibirmu hasintongan.

¹⁷Unang mangiburu roham mida halak pardosa, mangapian ma tagonan di biar mida Jahowa ariari.

¹⁸Ai ia dung jumpang ari parpudi, ndang tagamon pesan arop ni roham.

¹⁹Mananginangi ma ho ale anaha, asa marbisuk ho, jala patongon roham tu dalan na tigor.

²⁰Unang pasaorsaor ho tu halak sisobur tuak anggur, manang tu halak sisohali lompan.

²¹Ai sai lam tu pogosna do halak sisobur tuak anggur dohot sisohali lompan, jala marulos rumbangrambing do halak parondohondok.

²²Sai tangihon ma hata ni amangmu na tumubuhon ho, jala unang toishon inangmu, ia dung matua ibana.

²³Tuhori ma hasintongan, jala unang gadishon nang hapistaran, pangajaran dohot roha hapantason.

²⁴Mariaia do ama ni halak partigor, manang ise na maranak na pistar marlas ni roha ma mida ibana.

²⁵Sai marlas ni roha ma amangmu dohot inangmu, ingkon marolopolop ma pangintubu di ho.

²⁶Sai lehon ma, ale anaha, rohami tu Ahu, sai dihalomohon matam ma angka dalanku.

²⁷Ai godung na bagas do sibabijalang, jala sumur na pitut do paiturun.

²⁸Tongon do, mangonggop do nasida songon halak panamun, jala dipatorop do halak pangose di tongatonga ni jolma.

²⁹Di ise ulaning hoihoi? Di ise parisuangen? Di ise badabada? Di ise holsoholso? Di ise do angka bugang so marala? Di ise do mata angka na balisaon?

³⁰Di halak angka na laon painuminum tuak anggur, di halak na ro manguji tuak na marraru.

³¹Unang paberengbereng tuak anggur i, ala marrara idaon, ala marlinolino di bagasan panginuman, ala lambok laho mabaor.

³²Hape anggo di ujungna mangkarat do songon ulok, jala dibursikkon bisana songon ulok dari.

³³Ia matamu mamereng dompak parompuan sileban, jala rohami mangkatahon getegete.

³⁴Jadi tudoshon halak na modom di tongatonga ni laut do ho, jala songon halak na modom di ujung ni tiang layar.

³⁵(Lam dohononmu dope): Hona lombut ahu, ndang hansit huhilala; ditunjang ahu ndang huboto; ia dung tarjolma ahu, suang songon i ulahanku dioronku anggur i.

24¹(I.) Unang mangiburu roham mida halak parjahat, jala unang mangapian roham naeng maralealehon nasida.

²Ai hamagoan do dipatahitahi rohanasida, jala jea sambing dihatahon bibirnasida.

³Marhitehite hapistaran pinajongjong sada bagas, jala dipahot do i marhitehite roha hapantason.

⁴Jala marhitehite parbinotoan, gok angka bilutna dohot ugasan marragamragam angka na arga jala na uli.

⁵Holan halak na pistar do ompu ni gogo, jala baoa na marparbinotoan, i ma na so taralo.

⁶Ai ingkon pantas panguluhonmu tu hamusuon, haantuon pe marguru tu hinadeak ni panuturi do.

⁷Mamaolhu do hapistaran di halak na oto, dibahen i ndang hum ibana mangungkap pamanganna di partungkoan.

⁸Halak na marsangkap naeng manjahati, i ma na patut goaron induk ni getegete.

⁹Pingkiran haotoon do ia dosa, jala marbiasbias do jolma mida halak sipangarehe.

¹⁰Molo godoron roham di ari hagogotan, lam moru ma gogom.

¹¹Sai palua ma halak angka na tarboan laho bunuon, ro di angka na tartogu tu pamotongan, molo tung haambatan ho nasida.

¹²Tung sura dohononmu: Ida ma, ndang huboto hami hata i! Tung so mananda disi Tuhan i, Sidodo angka roha? Tung so mamoto disi Ibana na mangaramoti tondimu? Ibana do tahe mamaloshon tu jolma hombar tu pambahenanna be.

¹³Mangan situak ni loba ma ho, ale anaha, ai na denggan do i dohot aek ni sarang ni loba, ai na tonggi do i di tolonanmu.

¹⁴Suang songon i ma dai ni parbinotoan di hapistaran tu tondimu; molo dung dapot ho, jumpang pe ajalmu, ndang pesan ianggo sihirimon ni roham.

¹⁵Unang mangonggop ho ale parjahat di inganan ni halak partigor, unang segai hapeahanna.

¹⁶Ai tung sura pe tinggang halak partigor i pola pitu hali, sai hehe do ibana muse, alai anggo halak parjahat i ompas do binahen ni hinamago.

¹⁷Unang martilla ni roha ho, molo tinggang musim, jala unang marolopolop roham molo ompas ibana.

¹⁸Asa unang tung diida Jahowa, gabe sogo rohana disi, jala marsibalik rimasna maon sian ibana tu ho.

¹⁹Unang pola mohop ateatem mida halak paruhur, unang pola mangiburu ho mida halak parjahat.

²⁰Ai ndang adong sihirimon di halak parjahat i sogot, tung mintop do palito ni halak parjahat.

²¹Ale anaha, sai habiari ma Jahowa, nang raja, unang rosu ho tu halak panggunturi.

²²Ai tompu do hehe hamagoannasida, jala tung ise na umboto tingki partubolon sian nasida na dua i.

²³ (II.) Nang angka poda siingoton sian halak na pistar do i: Nandang denggan marnida bohi di paruhuman.

²⁴ Manang ise na mandok tu halak parjahat i: Parpintor do ho! Pulasan ni halak situan na torop do ibana, jala buraan ni angka bangso.

²⁵ Alai marsonangsonang do angka na umpinsang ibana, jala songgop do tu nasida pasupasu hatuaon.

²⁶ Mangumma bibir do manang ise na maralushon hata angka na sintong.

²⁷ Jolo sarihon ulaonmu di balian, jala pature ladangmu, dung i pe asa pauli bagasmu.

²⁸ Unang olo ho gabe sitindangi dompak donganmu, soada paralaan; tung tama ma ho marjehejehe marhitehite bibirmu.

²⁹ Unang dok: Suang songon na binahenna tu ahu, bahenonku tu ibana; ahu ma mamaloshon tu baoa i, hombar tu pambahenanna.

³⁰ Mamolus do ahu sian lambung ladang ni sigurbak ulu, dohot sian lambung porlak anggur nijolma na hurang roha.

³¹ Jadi ida ma, tubuan siarum horsik do luhutna, jala ditutup sihupi sisikna, jala maloha do parikna batu.

³² Dung huida i laos huparateatehon ma; dung huida i laos hubuat ma sipaingot sian i.

³³ Otiknari modom, otiknari mondokondok, otiknari muse mangunsimpu tangan peak modom nimmu.

³⁴Jadi ro ma hapogosonmu songon halak panamun, jala haraparonmu songon halak na marsinjata.

25¹(I.) Nang angka on poda sipaingot sian si Salomo dope, angka na pinapungu ni angka naposo ni si Hiskia, raja sian Juda.

²Hamuliaon di Debata do i, mangkomihon hata, alai hamuliaon ni angka raja do i, sumulingkit hata.

³Rap so dapot hadodoan do timbo ni langit dohot hapal ni tano on dohot roha ni angka raja.

⁴Ingkon sirangon do angka taktak sian perak, jala ruar ma ulaula na arga bahenon ni panopa.

⁵Ingkon pabalion halak parjahat i sian jolo ni raja, jadi hot ma habangsana marhitehite habonaron.

⁶Unang patongamtongam dirim di jolo ni raja, jala unang jongjong ho tu inganan ni halak na balga.

⁷Ai tagonan do dohonon ni halak tu ho: Tungkan julu on ma ho! Unang tung pajepolon ni halak ho di jolo ni halak raja, angka na niida ni matam.

⁸Unang girgiran ho marbada, ai beha bahenonmu di ujungna, ia dung tarurak ho dibahen donganmu.

⁹Datdati jujur parkarom dampak donganmu, alai na so tupa papataronmu hata sibunian ni halak sileban.

¹⁰Asa unang direhe na umbegesa i ho, gabe ndang be montok baritam na roa i.

¹¹Antajau sere di bagasan pinggan perak do sada hata na nidok di hahonaanna.

¹²Antinganting sere dohot horungkorung sian sere palangki do sipaingot, na tupuk tu pinggol ni halak na olo paingoton.

¹³Songon lambok ni aek mata di hamamasa ni gotilon, songon i do suruan haposan di na marsuru ibana, tung nalom do roha ni tuanna dibahen.

¹⁴Songon ombun dohot alogo na so mardongan udan, songon i do baoa na papujipuji dirina ala silehonlehon sipaotooto.

¹⁵Tupa do melok roha ni panguhum, binahen ni roha na lambat tarrimas, jala dila na lambok umpongolhon holiholi.

¹⁶Ia jumpang ho situak ni loba, pangan ma i sae di ho asa unang magap roham, gabe ingkon utahononmu muse.

¹⁷Patollang patmu sian jabu ni alealem, asa unang marmahapmahap rohana mida ho, gabe hagigihononna ho maon.

¹⁸Songon ompongompong, podang dohot sumbia na niugam do baoa sitindangkon gabus dampak donganna.

¹⁹Tudoshon ipon na tungkolon dohot pat na tarsulandit do nalom ni roha mida halak pangose di ari hagogotan.

²⁰Songon halak na mananggal ulosna di ngali ni ari, jala songon na asom tu sira masiu songon i do halak na mangendehon angka ende tu halak na marsak roha.

²¹Molo male musim, bahen ibana mangan roti, molo mauas ibana, bahen ibana minum aek.

²²Ai molo dibahen ho songon i, na papunguhon angka gara ni api do ho tu atas uluna disi, jala Jahowa mamalosi tu ho.

²³Alogo sian utara mamboan udan, jala dila na mangkata tundal paasomasom bohi.

²⁴Tagonan do maringan di bubung parsuhi ni jabu, asa marsajabu dohot parompuan parbadabada.

²⁵Tudoshon aek mata di halak na mandate do barita na denggan sian luat na dao.

²⁶Tudoshon mual na litok dohot sumur na nirasun do halak partigor na targasip mida halak parjahat.

²⁷Ndang denggan magodangku panganon situak ni loba, suang songon i halak na masihasangapon padokdok sarihononna.

²⁸Tudoshon huta na marparik naung magargar do halak na so mangarajai dirina.

26¹(I.) Songon ambolas di partaonan logo ni ari dohot songon udan di

hamamasa ni gotilon, suang songon i, ndang patut halak na oto i hasahatan ni hamuliaon.

²Songon amporik na ripe lelean, songon parhabang ni leangleang, songon i do bura na so dalan, ndang mangonai.

³Lisiklisik tama bahenon tu hoda, jala kokang tu halode, alai hotang do tama anggo tu tanggurung ni halak na oto.

⁴Unang paalusalusi halak na oto paihuthon haotoonnai, asa unang dohot ho tudoshon ibana.

⁵Alusi tagonan halak na oto i hombar tu haotoonna, asa unang marbisuk ibana disura rohana.

⁶Manggotapi patna duansa sandiri do, jala marsobur jea manang ise na manongos hata marhite sian halak na oto.

⁷Songon pangantan ni halak na pangpang di patna duansa, songon i do hata umpama di bagasan pamangan ni halak na oto.

⁸Songon batu na tinambat di ambalangna do pangalaho ni halak na mangalehon hamuliaon tu halak na oto.

⁹Songon tungkot tadatada na nialbashon ni tangan ni halak na mabuk, songon i do hata umpama di bagasan pamangan ni halak na oto.

¹⁰Parohon hasusaan godang tu ibana sandiri do manang ise na mangupai halak na oto dohot paraotaot.

¹¹ Songon biang na mulak tu utautana, suang songon i do diulahulahi halak na oto haotoonna.

¹² Ia diida ho sada baoa na bisuk di bagasan rohana, gumodang do sihirimon sian halak na oto sogot asa sian ibana.

¹³ Sigurbak ulu mandok: Adong do babiat di tongan dalan, adong singa di pogu ni alaman.

¹⁴ Songon pintu na mordong di pangordongordonganna, suang songon i sigurbak ulu di atas lagna.

¹⁵ Dipohul sigurbak ulu do nian indahanna, hape pola susa rohana pasuangkon tu pamanganna.

¹⁶ Umbisuk do sigurbak ulu di rohana sian pitu halak angka na malo maralus.

¹⁷ Manangkup pinggol ni biang do manang ise pamolus, molo pola piripirion ibana mida bada na so ro di ibana.

¹⁸ Songon halak na lalaen, na mamantomhon tulbu, sumbia dohot hamatean:

¹⁹ Songon i do baoa na mangansi kedanna, gabe didok muse: Nda na margait sambing do ahu!

²⁰ Molo soada soban mintop ma api, jala molo soadong pangasung i mansohot ma parsalisian.

²¹ Songon arang tu gara ni api, jala songon soban tu api, songon i do baoa parbadabada pasobu parsalisian.

²²Hatahata ni pangasung i, hira hata pargaiton do i, hape torus do angka bilut ni pusupusu ditondong.

²³Songon hudon na nilampis dohot taktak ni perak, songon i do bibir angka na marsigorgor mangumma, hape jat do anggo rohana.

²⁴Marhitehite bibirna mangela pangiburu i, hape patahitahi sipaotooto do anggo rohana di bagasan.

²⁵Molo dipabasar ibana pangkulingna, unang ma porsea ho di ibana, ai pitu lampis do biasbias ni rohana di bagasan.

²⁶Dihungkupi pe hosom ni rohana marhite sian ansiansi, hape patar do muse hinajahatna di bagasan luhutan.

²⁷Manang ise na mangkali godung, laos ibana sandiri madabu tu bagasanna, jala marsibalik do batu tu halak na manggulangsa.

²⁸Matua dila sipaotooto mangkosom halak na niropuhanna, jala pamangan na landit mambahen pargasipan.

27 ¹(I.) Unang ma pangasahon sadari marsogot, ai ndang diboto ho manang aha na tubu di na sadari.

²Halak na asing tagonan mamuji ho, unang tung pamanganmu sandiri, halak sileban tagonan, unang bibirmu sandiri.

³Dokdok do batu, jala borat horsik, alai dumokdok sian duansa do anggo hamurhingan ni halak na oto.

⁴Na jorbut do rimas na marpiarpiar, jala lualua ni piripiri tudoshon aek na mangalantap, alai tahe tung ise ma manahan maradophon pangiburuon.

⁵Tagonan do pinsangpinsang na andar sian roha haholongon na marsibuni.

⁶Tanda ni haburjuon do bugang angka na binahen ni aleale, alai marjehejehe do anggo ummaumma ni pangasung i.

⁷Roha na majal mandegedege nang situak ni loba, alai anggo roha na male, gari luhut na paet tonggi do di rohana.

⁸Songon pidong na tumadingkon asarna, songon i do baoa na madoado holang sian ingananna.

⁹Miak na hushus dohot daupa palas roha ni jolma, alai halambohon ni aleale dumenggan dope sian sangkap ni rohaniba sandiri.

¹⁰Unang tadingkon alealem naung aleale ni amangmu hian, jala unang bongot i bagas ni hahaanggim jumpa di ari hinamagom; tagonan do sahalak hombar bagas na jonok sian hahaanggi na holang.

¹¹Marbisuk ma ho ale anaha, jala sai palas ma rohangku, asa huboto mangalusi hata ni halak pangarehe.

¹²Diida halak na bisuk do haroro ni jea, gabe laho ibana martabuni, alai marsalasala pitpit do anggo halak na oto, gabe marsingkor.

¹³Buat hian ma ulosna, ai halak sileban do na hinangkunganna, jala pangido hian ma singkoram sian ibana, ala ni halak ruar.

¹⁴Manang ise na papujipuji alealena, pola dipangiar suarana sogot manogotna i, bura do i balik etongon tu ibana.

¹⁵Tiris nene di haroro ni udan tipotipo, dos do i dohot ina parbadabada.

¹⁶Manang ise na naeng mamolpol nasida, alogo naeng polpolonna disi, manang miak naeng golomon ni tanganna siamun.

¹⁷Bosi manajomi bosi, suang le songon i baoa manajomi bohi ni donganna.

¹⁸Manang ise na pauliuli hau ara, panganonna ma parbuena, jala halak na marhaladoi tuanna dapotan hamuliaon.

¹⁹Songon halinu ni bohi di bagasan aek, songon i do suman roha ni jolma na sada tu jolma na asing.

²⁰Parbeguan dohot banua toru ndang olo mahap, mata ni jolma pe, ndang olo marmahapmahap.

²¹Balanga pangalalaan manguji perak, jala liang pangalalaan manguji sere, alai anggo baoa taruji do hombar tu pangujianna.

²²Tung sura pe diduda ho halak na oto i dohot andalu di bagasan pandudaan rap dohot jagung, laos so sirang do sian ibana habodoonna.

²³Sai tangkas ma tandai rupa ni birubirum, sai diparhamaol roham ma punganmu.

²⁴Ai ndada hot ro di salelengnilelengna anggo hamoraon, gari tumpal jujungan tung marsundutsundut ma i?

²⁵Molo malos duhutduhut i, tarida ma tumburna, gabe dipapungu halak ma pulungpulungan sian angka dolok.

²⁶Angka anak ni birubiru mambahen parulosonmu, jala tuhor ni hauma do angka hambing tunggal.

²⁷Singkop ma susu ni hambing bahen lompanmu, dohot bahen lompan ni isi ni bagasmu, huhut bahen hangoluan ni angka naposom boruboru.

28¹ (I.) Maporus do halak parjahat soada mangalele, alai anggo halak partigor marnalom ni roha do songon singa.

²Molo masa gunturguntur di na saluat, gabe torop ma indukna; alai molo pantas jala bistok marroha angkajolma i, leleng ma induk i mangolu.

³Baoa pangulu na mangarupa angka na parir tudos do tu udan tangkuju mambaorhon hangoluan.

⁴Halak angka na tumadingkon uhum papujipuji halak parjahat; alai anggo halak na mangaradoti uhum mangalo nasida.

⁵Halak parjahat ndang mananda uhum hasintongan alai anggo halak na mangalului Jahowa mangarisik saluhutna i.

⁶Tagonan do halak na pogos na marpangalahohon hadaulatonna, sian halak

na geduk na mardua roha, nang pe mora ibana.

⁷Manang ise na mangaradoti patik ni Debata i ma anak na pantas marroha, alai manang ise na maralealehon halak pargadombus mambahen haurahon ni amana.

⁸Manang ise na paganda sinamotna marhitehite bunga ni hepeng dohot parlabaan na so turut, i ma na papunguhon di halak na marasi ni roha tu na parir.

⁹Manang ise na padao pinggolna unang tangitangionna uhum, tangiangna pe antong gabe biasbias do.

¹⁰Manang ise na mangaliluhon halak na tigor tu dalan hajahaton, madabu tu bagasan godung binahenna sandiri do ibana, alai anggo halak na daulat roha manean hatuaon sogot.

¹¹Bisuk do halak na mora di rohana, alai anggo halak ma pogos na pantas marroha dapot do sulingkitonna rohana.

¹²Molo marolopolop halak partigor, godang ma hamuliaon, alai molo naek sorga halak parjahat monjap ma angka jolma i.

¹³Manang ise na mamorso angka hajahatonna, ndang tagamon mardohar, alai manang ise na manopoti, laos ditadingkon antong, dapotan asi ni roha do.

¹⁴Martua ma jolma na tongtong marhabiaran, alai manang ise na

manangkangi rohana madabu tu bagasan jea do.

¹⁵ Songon singa na marauang, jala songon gompul na maotaot do pangarajai parjahat gumomgom bangso na parir.

¹⁶ Sada raja na hurang pingkiran, i do pagodang pangarupaon; alai anggo halak na mangkagigihon pangomoan na so turut i do na paganjang ariarina.

¹⁷ Jolma panginonaan sapata ni mudar ni jolma, mompasompas do sahat ro di tanoman, unang ma antong niambat ibana.

¹⁸ Manang ise na daulat marpangalaho dapotan tua, alai manang ise na geduk marpangalaho, mardua dalan, sai na tinggang do ibana di na sada.

¹⁹ Manang ise na mangula tanona, bosuran do ibana di sipanganon; alai manang ise na mangolooloi marlanggelange, bosuran do ibana di hapogoson.

²⁰ Baoa haposan do sigodang pasupasu, alai anggo halak na hapogan pamora ibana, ndang tagamon lias sian uhum.

²¹ Nandang denggan ruhut marmiak ni bohi, hape gari ala ni indahan sampohul, olo do baoa manjahati.

²² Monsong do roha ni baoa naeng pamora ibana, marmata pangiburuon, hape ndang diboto songgop hapogoson tu ibana sogot.

²³Manang ise na umpinsang jolma marhasangapon do ibana di ujung, gumodang sian halak na palemeslemes pangkulingna.

²⁴Manang ise na mamupusi amana dohot inana, lam didok muse dope: Ndang pola sala! Dos do ibana dohot halak panamun.

²⁵Halak pangahuti pagalak bada; alai manang ise na marhaposan tu Jahowa marlobilobi do di parbohalon.

²⁶Tung na oto sahali do manang ise na marhaposan tu rohana sandiri, alai manang ise na marpangalahohon hapistaran, malua do ibana sian hamagoan.

²⁷Manang ise na mardenggan basa tu na pogos, ndang tagamon hurangan, alai manang ise na papitpit matana, godang bura manginona tu ibana.

²⁸Molo naek sorga halak parjahat i, monjap ma jolma na metmet, alai molo ripur halak parjahat i lam tamba ma halak partigor.

29¹(I.) Jotjot pe hona pinsang baoa, hape tong do dipatangakang rohana, tompu do ibana ripur so ulahan bulung.

²Molo lam naek sorga halak partigor, marlas ni roha ma halak situasi na torop, alai molo halak parjahat mangarajai, gondok ma roha ni halak.

³Manang ise na holong roha di hapistaran, palas roha ni amana; alai na mansuasaehon sinamotna do manang ise na rosu tu sibabijalang.

⁴Raja pahothon gomgomanna marhite sian uhum hasintongan; alai anggo baoa sijalo sisip mangago tanona.

⁵Halak na palemeslemes pangkulingna tu donganna, manaon rambang di jolo ni patna ibana disi.

⁶Tarjorgong di bagasan hajahatonna sandiri do halak parjahat i, alai anggo halak partigor i marolopolop do jala marlas ni roha.

⁷Halak partigor maniroi parkaro ni halak na parir, alai anggo halak parjahat i ndang parduli di nasida.

⁸Halak pangarehe pagalakgalak bada, pola gor sada huta, alai anggo halak na pistar paombun rimas do.

⁹Molo maruhum halak na pistar dohot halak na oto, ia so manggunjal martata do ibana, hape laos so marhasunan.

¹⁰Halak sisopsop mudar mangkagigihon halak na daulat roha, alai anggo halak partigor, sai naeng nian pangolu hosana.

¹¹Tung nasa piri pirina diparuar halak na oto, alai anggo halak na pistar paombunombun rohana.

¹²Pangarajai na patangitangi hata gapgap: Saluhut parhaladona gabe parjahat sogot.

¹³Sai na pajumpang do halak na pogos dohot halak na paanakkon hepeng; Jahowa do patiur mata nasida be.

¹⁴Raja na mandabu uhum hasintongan tu angka na parir, pahot habangsana ro di salelenglelengna.

¹⁵Hotang dohot pangajaran mangalehon hapistaran, alai anggo dakdanak na pinasombu tarboan rohana, mambahen haurahon ni inana.

¹⁶Molo ganda halak parjahat, ganda dohot dosa; alai sanga do paidaidaon ni halak partigor hariripurnasida.

¹⁷Sai ajar ma anakmu, asa sonang ho bahenonna, jala lehononna angka silas ni roham.

¹⁸Molo soada panurirangon lumlam ma halak situan na torop, alai martua ma manang ise na mangaradoti patik ni Debata.

¹⁹Ndang tarajar hatoban anggo marhitehite hata sambing, ai diantusi do nian, hape ndang diihuthon.

²⁰Molo diida ho sada baoa na girgir mandok hatahatana, gumodang do sihirimon sogot sian halak na oto asa sian ibana.

²¹Manang ise na mambahen naposona marlompan, olat ni sidakdanahonna, lam naeng gabe anak ni tuan ibana di ujungna.

²²Baoa parpiripiri pahehe parsalisian, jala halak parmurukmuruk do sigodang sala.

²³Roha haginjangon nijolma pajimput ibana, alai anggo partondi na serep dapotan hamuliaon.

²⁴Manang ise na marbagi rap dohot panangko mangkagigihon dirina saming, dibege do nian torutoru i, hape ndang dipalumba.

²⁵Biar midajolma mambahen jorgong, alai manang ise na marhaposan tu Jahowa gabe timbul sogot.

²⁶Torop halak mangalului bohi ni pangarajai mambuat rohana, alai Jahowa do haroroan ni uhum na sintong tu ganupjolma.

²⁷Marbiasbias do halak partigor mida halak pargeduk, marbiasbias huhut halak parjahat mida halak na tigor marpangalaho.

30¹(I.) On ma angka poda ni si Agur, anak ni si Jake. Hata sipaingot dohot panurirangon sian baoa Letiel tu si Itiel dohot si Ukal.

²Ahu do tongon baoa apala na ummoto, jala ndang adong panimbangan ni jolma di ahu.

³Angkup ni ndang huguruhon hapistaran, parbinotoan ni Debata na badia pe ndang hutanda.

⁴Tung ise ma dung manaek tu banua ginjang, jala tuat muse sian i? Tung ise ma manggolom alogo di bagasan tanganna? Tung ise ma manimpus aek di bagasan ulos? Tung ise ma pahot luhut parbolatan ni tano on? Ise do Goarna, jala ise do Goar ni Anakna? Hatahon ma i molo tung diboto ho!

⁵Luhut hata ni Debata pita do, tau lombulumbu do Ibana di halak angka na marhaposan mida Ibana.

⁶Unang ambai angka hatana i, asa unang Ibana maminsang ho, gabe pargapgap ho maon didapot.

⁷Dua ragam do na hupangido sian ho, sai unang ma ontohi sian ahu, tagan so mate dope ahu:

⁸Sai padao ma sian ahu neang ni roha dohot hata gabus; hapogoson manang hamoraon unang lehon tu ahu; sai loas ma panganonku bohal tinurpukkonmi tu ahu.

⁹Asa unang tung huporso Ho, dung butong ahu, gabe dohononku maon: Ise do Jahowa? Manang unang tung manangko ahu ala dung pogos, gabe huparoaroa maon Goar ni Debatanku.

¹⁰Unang patubitubi hatoban mangkata tuanna, asa unang ho diburai, gabe ingkon manginona tu ho muse.

¹¹Adong do sada sundut na mamburai amana, jala ndang dipasupasu ia inana.

¹²Adong muse sada sundut na pita di bagasan rohana, hape gari ginagatna ndang diburi.

¹³Adong muse sada sundut mansai dipabolang matana, jala dipatuginjang langkop ni matana.

¹⁴Adong muse sada sundut tudoshon podang do ngingina, jala tudoshon piso ia

ngadolna laho mansudahon halak na dangol
sian tano on dohot halak na pogos sian
tongatonga ni manisia.

¹⁵(II.) Dua do boru ni linta: Nia tuson! Nia
tuson! Tolu do nasida na so habutongan, opat
do tahe na so olo mandok nunga sae!

¹⁶I ma parbeguan dohot bortian na hol; tano
i na so olo mahap di aek dohot api na so olo
mandok: Nunga sae!

¹⁷Mata ni halak na mangelak amana, jala
malluk rohana mangoloi tona ni inana, ingkon
pulsikkonon ni pidong sigak di topi ni sunge
jala parsurageon ni anak ni lali.

¹⁸Na tolu ragam on tung halongangan
bolon di ahu, jala na opat on ndang dapot
rohangku:

¹⁹I ma dalan ni pidong raja Wali di
aoangaoang, dalan ni ulok di atas dolok
batu, dalan ni parau di tongatonga ni laut
dohot dalan ni baoa di bagasan boruboru
namarbaju.

²⁰Suang le songon i dalan ni parompuan
sibabijalang; mangan do nasida, diapusi
muse babana, gabe didok muse: Nandang
huulahon na so uhum.

²¹Binahen ni na tolu ragam guntur tano on,
jala binahen ni na opat on ndang tarbahensa
manahan.

²²Binahen ni anak somang molo tung gabe
pangarajai ibana, dohot halak na oto molo
tung butongan indahan ibana.

²³ Binahen ni parompuan na hinagigihon molo tung marharajaan muse, dohot hatoban boruboru molo tung ditean na morana.

²⁴ Na opat ragam on do apala na metmet di tano on, alai tung na bisuk sahali do i jala angka na bistok.

²⁵ I ma angka porhis, sada bangso na so margogo nian, alai diparade do bohalna di partaonan logo ni ari.

²⁶ Angka ampodi i ma sada bangso na so tambos nian, alai dibahen do asarna di bagasan dolok batu.

²⁷ Nandang marraja nian angka sihapor, alai sahali borhat do luhutna marhoronhoron.

²⁸ Babibabi manangkup dohot patna nian, hape maringan do di bagasan jabu ni raja.

²⁹ Na tolu ragam i patongamtongam langkana, jala na opat on panuitnuiton mardalan.

³⁰ I ma singa, na umpuraga sian saluhut angka binatang, jala ndang mulak maradophon manang aha.

³¹ Hoda pargonting na gompis, manang hambing sada dohot raja na so tardopang.

³² Molo tarpaoto ho di na pinatimbomi dirim manang naung marsangkap na roa ho, ampehon ma tangan tu pamanganmu!

³³ Ai susu na ginunsang manjadi mantega, jala igung na pinisat gabe tarrungar, jala rimas na ginitik patubu bada.

31

¹(I.) On ma angka hata ni raja Lemuel, hata sipaingot na pinodahon ni inana tu ibana.

²Aha do dohononku tu ho ale anakku? Aha tahe ale sinuan tunashu? Aha ale anak bagabaganku?

³Sai unang ma lehon gogom tu angka parompuan manang angka dalanmu bahen hamagoan ni angka raja.

⁴Ndang patut di angka raja, ale Lemuel, ndang patut tutu di angka raja minum anggur, manang di angka induk minum tuak na pang.

⁵Asa unang lilian minum, gabe lupa ibana di uhum hasintongan, gabe dipapeol uhum tu luhut anak pardangolan.

⁶Lehon hamu ma siinumon na horas tu halak na marhinamago, jala anggur tu halak na marsak marroha.

⁷Minum ma ibana asa dihalupahon hapogosonna; jala unang be dipaingotingot pardangolanna i.

⁸Ungkap ma pamanganmu mangondihon halak na ngungu, humongkop uhum di saluhut anak na tading di lampin.

⁹Ungkap ma pamanganmu mandabu uhum hasintongan, jala patingkos uhum tu halak na dangol dohot na pogos.

¹⁰(II.) Soripada na marhuaso, tung ise ma jumpangan i? Hape daul do argana martimbangkon mutiha.

¹¹ Pos do roha ni harajaonna di nasida, di sinamot pe ndang tagamon hurangan nasida.

¹² Denggan do uhum nasida tu ibana, ndang dung anggo na jat saleleng mangolu ibana.

¹³ Ringkot do rohana manjalahi imput ni birubiru dohot hori jala girgir tanganna marhobas.

¹⁴ Tudos do nasida tu hopal ni saudagar, sian na dao do diparo indahanna.

¹⁵ Borngin dope nunga hehe nasida, asa marsagihon sidabuan ni isi ni bagasna dohot tumurpukkon ulaon tu angka naposona boruboru.

¹⁶ Disangkapi rohana hauma santurpuk, laos dapotsa do sian na niomo ni tanganna, dipungka muse porlak anggur sada.

¹⁷ Marhohos hagogoon do gontingna, jala dipabosi botohonna.

¹⁸ Lam idaida ibana di denggan ni pangomoanna; ndang dung mintop palitona manipat borngin.

¹⁹ Malo do tanganna manjama bonang, jala diordong jarijarina do roda ni sorha i.

²⁰ Disurdukkon do tanganna tu halak na dangol, jala dibungka tanganna mardenggan basa tu halak na pogos.

²¹ Nandang pola holsoan ibana taringot tu isi ni bagasna maradophon partaonan ngali ni ari, ai luhut isi ni bagasna marulos dua do.

²² Dibau do angka bulusan di ibana, hain na halus dohot lakan do pangkeanna.

²³ Tarbarita do harajaonna di angka partungkoan, molo hundul ibana rap dohot angka sintua ni luat i.

²⁴ Dipauli do angka kameja na halus, jala digadisi, jala dilehon do hohos tu saudagar.

²⁵ Togu jala tongam parulosonna, jala marlas ni roha nasida di ari na ro sogot.

²⁶ Diungkap do pamanganna umpodahon hapistaran, jala poda halambohon di atas dilana.

²⁷ Dimatamatahon do harentaon ni isi ni jabuna, jala indahan halangguson ndang dipangan.

²⁸ Naek sorga do angka anakna, jala diparhatua nasida, harajaanna huhut mamujimuji nasida.

²⁹ Torop do nian boru ni halak angka na marhuaso, alai ho do tumindi nasida luhutna!

³⁰ Sipautooto do anggo rupa hasoloan ni roha, jala alogo sambing do haulion, soripada na mangkabiari Jahowa i do sipujipujion.

³¹ Lehon hamu ma tu nasida sian parbue ni tanganna sandiri, jala ingkon papujipujion angka ulaonna di angka partungkoan.

Pengkhotbah

1 ¹ (I.) On ma pangkataion ni parjamita, anak ni si Daud, raja di Jerusalem.

² Tung na laho salpu do luhutna, ninna parjamita i, alogo sambing do tutu luhutna i!

³ Tung aha ma na hot tinggal di jolma i sian saluhut hangalutonna, na hinangaluthonna saleleng di hasiangan on?

⁴ (II.) Marlaho ro angka jolma i marsundutsundut, alai hot do anggo tano on ro di salelenglelengna.

⁵ Binsar ia mata ni ari jala sundut muse tumopot ingananna hian, pola marheahea binsar muse di habinsaranna hian.

⁶ Alogo i pe mangombus do dompak dangsina, husor muse dompak utara, sai songon i didatdati munsatunsat, jala mulahulak tu hamunsatanna hian alogo i.

⁷ Luhut angka batang aek marmuara tu laut, hape matua so binsat laut i; ai matua tu parmuaranna hian sai didatdati angka batang aek i mardalan.

⁸ Luhut hatahata marhangaluton do, tung na so tarhatahon jolma do i. Mata i ndang olo marnasombu marnida, jala pinggol i ndang olo marnamahap marbinege.

⁹ Manang aha naung dung masa na jolo, laos i do na masa sogot; jala manang aha

naung pinatupa ni halak na jolo, laos i do patupaonna nang sogot; tung na so adong do surasuraon na so dung hea masa di hasiangan on.

¹⁰Tung adong ma nanggo sada tardok halak: Ida ma, na so dung hea do anggo on masa? Hape tibu hian do i masa di tingki na rob i angka na jumolo sian hita.

¹¹Ndang adong be parningotan di angka naung salpu i, suang le songon i di angka na ro sian pudina, ndang tagamon adong parningotanna di pinompar na ro sogot.

¹²(III.) Ahu parjamita i bangkit raja na jolo gumomgom Israel di Jerusalem.

¹³Jala diringkoti rohangku do nian manulingkiti dohot mangarisik mardongan hapistaran saluhut angka na tarjadi di hasiangan on. Hape ulaon hangaluton do i na tinurpukkon ni Debata tu jolma manisias, asa marhangaluton marhite sian angka i.

¹⁴Nunga huida saluhut jadijadian angka na tarjadi di hasiangan on, gabe ida ma, saluhutna i na laho salpu do, jala pangeahion di alogo sambing do i.

¹⁵Na bengkok hian ndang tarbahen gabe tigor, jala ndang dapot bilangan na so disi.

¹⁶Nunga pola didok rohangku di bagasan songon on: Ida ma, nunga nian hupagodang jala huambai hapistaran di ahu lobi sian di saluhut jolma angka na jumolo sian ahu di

Jerusalem, jala godang situtu hapistaran dohot parbinotoan diida rohangku.

¹⁷Alai dung diringkoti rohangku naeng botoon mangarisik hapistaran dohot parbinotoan, habodoon dohot habobangon, gabe mamoto rohangku, mangeahi alogo sambing do iba hape nang disi.

¹⁸Ai molo ganda hapistaran, ganda ma dohot hajepolon, jala manang ise na patamba parbinotoan, patamba hangaluton ibana disi.

2¹(I.) Dung i ningku ma di bagasan rohangku: Antong unjunanku ma ho marhite sian las ni roha, guru lomo ni roham idaonmu! Hape ida ma, alogo do nang i.

²Ningku ma mandok parengkelon i: Na lalaen do ho! Dohot tu las ni roha i: Aha do na binahenmu?

³Dung i marsangkap rohangku di bagasan: Naeng patogaronku sibukku marhitehite anggur, alai mangaradoti hapistaran do anggo rohangku dohot mangarisik haotoon, paima huida nian manang aha na denggan dijolma manisia sibahenonna di hasiangan on saleleng di ngoluna.

⁴(II.) Dung i hupabalga ma angka hapadeanku, hupauli di ahu angka bagas bolon, jala hupungka di ahu angka porlak anggur.

⁵Hubahen di ahu angka porlak dohot paredangedangan, jala husuan tusi hau angka na marparbue marragamragam.

⁶Hubahen di ahu angka tobat mamornohi hau suanan angka na rugun martumburi.

⁷Hutuhor ma angka hatoban baoa dohot boruboru, adong huhut di ahu naposo angka na tubu di jabungku; tole muse angka pungan lembu dohot birubiru gumodang di ahu sian saluhut jolma angka na jumolo sian ahu di Jerusalem.

⁸Hupagukguk huhut di ahu perak dohot sere dohot arta na arga sian raja angka na pulik luat. Hupillit huhut di ahu angka parende baoa dohot boruboru bahen hariburon di jolma manisia, tole parinaan tuanlaen mansai torop.

⁹Jadi tumimbul jala ummora ahu sian saluhut jolma angka na jumolo sian ahu di Jerusalem; hot do huhut hapistaranku di ahu.

¹⁰Manang sadia pe na pinangido ni matanku ndang huontohi, ndang hutipi rohangku mangolooloi nasa lomona. Ai tung na las situtu rohangku mida saluhut pambahenanku, jala i do antong jambarhu sian saluhut ulaonku.

¹¹Alai dung hubereng saluhut pambahenanku, angka na binahen ni tanganku, ro di hangaluton angka na huta on laho paulihon, ida ma laho salpu do saluhutna jala mangeahi alogo sambing ahu disi, ndang adong hape na hot anggo di hasiangan on.

¹²(III.) Dung i humusor ma ahu naeng manimbang hapistaran, habodoon dohot

habobangon. Ai ninna rohangku do aha ulaning bahenon ni jolma na ro manggonti rajai? Suman tahe tu naung binahen ni halak hian bahenonna.

¹³Jadi huida ma, marhasurungan tahe hapistaran i martimbangkon haotoon, songon surung ni hatiuron tahe martimbangkon haholomon.

¹⁴Marmata hatiuron do anggo ulu ni halak na pistar, alai mardalan di bagasan haholomon do anggo halak na oto. Alai ditanda rohangku huhut sisada parsorion do sogot manisialuhutna.

¹⁵Jadi ninna rohangku di bagasan ma: Anggo sisada parsorion do ahu hape dohot halak na oto, aha ma gunana sai huringkoti hapistaran na sai laon? Jadi ninna rohangku ma alogo sambing do hape nang i.

¹⁶Ai ndang adong parningotan di halak na pistar ro di salelenglelengna, suang songon di halak na oto, alai naung lupa saluhutna i di angka ari na ro sogot; iale isuang tung mate do hape halak na pistar rap dohot halak na bodo!

¹⁷Jadi marbiasbias rohangku mida hangoluan on; ai sogo rohangku mida pambahenan angka na binahen di hasiangan on, ala na laho salpu do luhutna jala pangeahion di alogo sambing do i.

¹⁸Jadi marbiasbias rohangku mida saluhut ulaon angka na huhangaluthon di hasiangan

on ala ingkon tadingkononku do i di jolma na ro sian pudingku.

¹⁹Jala ise pabotoboto manang halak na pistar ibana manang halak na oto? Hape ibana do gabe tuan di saluhut ulaon angka na huhangaluthon mardongan hapistaran di hasiangan on! Laho salpu do hape nang i.

²⁰(IV.) Dung i marbalik ma rohangku naeng marpandelea nian mida saluhut ulaon angka na huhangaluthon di hasiangan on.

²¹Ala huida sada jolma, dibahen do nian nasa hapistaranna, parbinotoanna dohot hamalonna mangaradoti ulaonna, hape ingkon tinggalthononna do i bahen jambar ni jolma na so dung marhangaluton ala ni! Alogo sambing do hape nang i jala hinamago godang.

²²Ai aha na ma parsaulian ni jolma sian sude ulaonna dohot sian domdamdomdam ni rohana taringot tu na hinangaluthonna di hasiangan on?

²³Ai ariari ibana marhangaluton saleleng di ngoluna, jala mardongan hajepolon ulaonna, nang bornginna i ndang marhasonangan rohana. Alogo sambing do nang i.

²⁴Ndang adong hape na denggan di jolma i, dungkon ni na mangan ibana dohot na minum, jala dipasonang rohana mangihutihut ulaonna hian. Alai nang i hape, ingkon pala ni Debata do huida.

²⁵Ai tung ise ma tarbahen mangan manang minum, ia so marharoroan sian Ibana.

²⁶Ai tujolma hasudungan ni rohana i do dibasabasahon Debata hapistaran, parbinotoan dohot las ni roha; alai anggo tu halak pardosa dilehon do hangaluton laho papungupunguhon dohot pagukgukkon, asa lehonon ni Debata muse tujolma hasudungan ni rohana i. Nang i ndang marguna hape, jala pangeahion di alogo saming do i.

3¹(I.) Martingki be do luhutna na tinompa. Martiti be do huhut nasa sangkapsangkap di hasiangan on.

²Martiti be do: Na tubu dohot na mate; na manuan dohot na mangurati na sinuan i;

³Na mambugangi dohot na pamalumhon; na mangalohai dohot na paulihon;

⁴Na tangis dohot na mengkel; na mangandungi dohot na manontor;

⁵Na mambolongkon batu dohot ma papunguhon batu; na masiummaan dohot na mandao sian na masiummaan;

⁶Na mangalului dohot na mangago; na mangaramoti dohot na mambolongkon;

⁷Na mangaribahi dohot na manjarumi; na mauhom boti dohot na marhata i;

⁸Na mangkaholongi dohot na mangkosom; na marmusu dohot na mardemak;

⁹(II.) Tung aha ma parsaulian na hot tinggal di pangula marhite sian ulaonna sandiri?

¹⁰Nunga tung tangkas huida hangaluton na tinurpukkon ni Debata tu jolma manisias, asa marngalutan marhite sian angka i.

¹¹Alai anggo Ibana denggan do saluhutna i dibahen di tingki halehetanna; ditompahon do huhut roha hangoluan salelenglelengna tu bagasan rohanasida, holan na so dapot jolma i sulingkitonna jadijadian na jinadihon ni Debata sian mulamula sahat ro di ujung.

¹²Dibahen i nunga tung hutanda, ndang adong na dumenggan di nasida, nda na marlas ni roha dohot na mambahen na denggan saleleng di ngoluna.

¹³Angkup ni tahe manang ise jolma na mangan dohot na minumi dohot marnida na denggan marhite sian ulaonna, silehonlehon ni Debata do nang i.

¹⁴Nunga tung tangkas huboto, luhut na binahen ni Debata, i do na hot ro di salelenglelengna; ndang tarbahen jolma i manambai tusi, manang mangorui sian i, dibahen Debata pe songon i, asa mabiar jolma i mida Ibana.

¹⁵Manang aha na masa nuaeng, naung dung masa do i, jala manang aha na masa sogot pe, nunga dung masa do i di na robi; ai diulahi Debata do mangalului naung salpu i.

¹⁶(III.) Angkup ni nunga dung huida di hasiangan on: Hajongjongan ni uhum, hape masa disi hajahaton, dohot hajongjongan ni hatigoran, hape masa disi hageduhon.

¹⁷ Jadi ninna rohangku di bagasan ma:
 Rap uhumon ni Debata ma halak partigor
 dohot parjahat, ai mandapot di Ibana do
 sogot saluhut sangkap ni roha ni jolma dohot
 sandok ulaonna.

¹⁸ Angkup ni didok rohangku ma di bagasan:
 Ala ni pangalaho ni jolma manisia umbahen
 songon i masa, naeng unjukan ni Debata
 nasida, papatarhon tu nasida tudoshon
 pinahan sambing nasida marpangalaho,
 anggo sian rohanasida sandiri.

¹⁹ Ai tung sisada parsorion do sogot jolma
 manisia dohot pinahan; mate pinahan, mate
 dohot jolma i, sada do hosai i di saluhutna,
 ndang adong hasurungan ni manisia sian
 pinahan, ai laho salpu do luhutna.

²⁰ Laos sada do hapatean ni luhutna;
 marharoroan sian orbuk do luhutna, laos
 marhapatean tu orbuk muse luhutna.

²¹ Ai tung ise ma umbotosa manang tung
 manaek tu ginjang do ia tondi ni manisia? Ia
 hosa ni pinahan tung turun do tu tano.

²² Dibahen i nunga tung tangkas huida
 ndang adong na dumenggan, nda marlas
 ni roha jolma i di angka ulaonna, ai i do
 jambarna. Ai tung ise ma mamboan jolma i
 tusi, asa idaonna manang aha na masa dung
 salpu ibana?

4¹ (I.) Dung i huulaki ma patangkashon
 saluhut pangarupaon, angka na masa
 di hasiangan on, gabe huida ma iluilu ni

halak angka na hona pangarupaon hape ndang adong na mangapuli nasida; jala uhum gogo dibahen tangan ni angka pangarupa tu nasida, hape ndang adong na mangapuli nasida.

²Jadi huparhatua ma halak angka naung leleng mate, gumodang sian angka na mangolu dope rasirasa nuaeng.

³Alai martuaan dope sian duansa huetong halak na so dung tubu dope, ala so sanga dope diida pambahenan na jahat, angka na masa di hasiangan on.

⁴Dung i huida muse ma saluhut hangaluton dohot hamaloon marhapandean, hape patubu roha na masiiburuan do i. Jea do nang i, jala mangeahi alogo sambing iba disi.

⁵Halak na oto mamuhung tanganna duansa, jala dipangan sibukna sandiri.

⁶Tagonan do sanggim hasonangan sian sangkatubang hangaluton dohot pangeahion di alogo.

⁷(II.) Dung i huida muse ma haotoon na masa di hasiangan on.

⁸Adong do sada halak punjung, ndang mardongan, anakna so adong, marhahamaranggi pe soada, hape ndang marpansadian ia ulaonna, matana pe ndang olo marnasombu mida hamoraon. Dung i ninna rohana ma: Pasarisari ise tahe ahu umbahen hutaonhon marngalutan, pola

raparon tondingku so marnida na denggan?

Jea do hape nang i, jala hinamago godang!

⁹Tagonan tahe mardongan iba sian na punjung, ala muba dengganna molo rap marsaulihon parbue ni na niulana be.

¹⁰Ai molo tinggang na sada, paheheon ni donganna ma ibana; alai tarjepol situtu ma halak na punjung molo tinggang ibana, ala soadadong donganna pahehehon ibana.

¹¹Songon i molo rap modom dua halak, masiangoran ma nasida, alai beha ma lasna anggo di halak na punjung?

¹²Mura talu gogo anggo punjung sahalak, tupa manahan anggo dua halak nasida maradophon alona, jala tali na tinolu maol do tos.

¹³(III.) Tagonan do sada dolidoli na pogos jala na bistok sian sada raja naung matua nian hape na oto, na so olo be paingoton.

¹⁴Ai ruar parjolo i sian bagas hurungan laho bangkit raja, nunga marpogos hian ibana tubu di harajaonna.

¹⁵Dung i huida ma luhut halak angka na mardalani di hasiangan on paihutihut dolidoli na paduahon i, na manoluk na parjolo i hian.

¹⁶Tung na so tos do odoran ni sandok bangso, angka na niuluhonna i, alai ndang marlas ni roha mida ibana anggo halak na ro sian pudina. Ai haotoon do nang i jala mangeahi alogo sambing iba disi.

5¹ (4-17) Ramoti langkalangkam, molo laho masuk ho tu bagas ni Debata! Ai dumenggan do jumonok iba laho tumangihon hata i, sian pelean pinelehon ni halak na oto, ala so diboto rohana na roa do hape na niulana.

² (5-1) (I.) Unang magirgirhu pamanganmu, jala unang hapogan roham mandok hata anggo di adopan ni Debata; ai maringan di surgo do anggo Debata, di tano on do ianggo ho, dibahen i paotik hatahatam.

³ (5-2) Ai marharoroan sian godang ni hinamago do nipi, suang songon i pangkataion gapgap ni halak na oto sian deak ni hatahatana.

⁴ (5-3) Molo marbagabaga ho tu Debata, unang marbenda ho pasahathon, ai ndang lomo rohana mida halak na oto i. Manang aha pe naung binagabagahonmu, ingkon gararonmu do i.

⁵ (5-4) Tagonan tahe unang iba marbagabaga, sian na marbagabaga hape ndang pinatolhas.

⁶ (5-5) Unang loas pamanganmu mangela dagingmu mardosa, jala unang marneang ni roha ho mandok di adopan ni suruan ni Debata: Nunga sala ahu! Boasa tagonan marronirimas Debata mida ho ala ni hatam, gabe mago maon sandok ulaon ni tanganmu.

⁷ (5-6) Ai molo deak nipi, deak huhut haotoon dohot hatahata, alai ianggo ho sai habiari ma Debata.

⁸ (5-7) (II.) Molo diida ho hona pangarupaon halak na pogos i, mago huhut uhum dohot hatigoran di luat i, unang pola longang roham mida pambahenan sisongon i; ai martuan muse do nang tuan na timbul, jala na tumimbul sahali pandapotan ni duansa nasida.

⁹ (5-8) Jala hasurungan ni na sada luat taringot tu saluhutna i: Molo marmulia rajana diida isi ni luat i.

¹⁰ (5-9) Manang ise na holong roha di perak, ndang olo marnamahap di perak, jala manang ise na holong roha di hamoraon ndang tagamon gabe parsaulianna. Nang i hata oto do i.

¹¹ (5-10) Molo ganda sinamot, ganda dohot halak na manganhon; tung aha ma parsaulian ni tuan nampunasa i disi, nda holan asal paidaidaon ni matana?

¹² (5-11) Renge do modom halak na loja mangula, nang otik, nang godang dipangan; hape balisaon do anggo mata ni halak na mora dibahen pargadombusonna.

¹³ (5-12) Adong dope huida sadanari jea bolon di hasiangan on: I ma hamoraon na hinomolhomol ni tuan nampunasa bahen hamagoanna sandiri!

¹⁴(5-13) Ai mago do hamoraon sisongon i binahen ni soro ni ari; tung sura adong sada anak tinubuhonna, ndang adong tinggal nanggo apus di bagasan tanganna.

¹⁵(5-14) Ia marsaemara ibana ruar sian butuha ni inana, laos suang songon harorona i muse ibana mulak, ndang adong boanonna agia aha upa ni hangalutonna, anggo tung pola golomgolomon ni tanganna.

¹⁶(5-15) Jea bolon do nang on: Sandok ia songon i rojolma i, laos songon i ibana laho; tung aha ma parsaulianna sian hasusaanna pagulutgulut alogo?

¹⁷(5-16) Angkup ni luhut ariarina dipasudasuda di bagasan haholomon, godang huhut hasusaanna, sahitsahitna dohot murukmurukna.

¹⁸(5-17) (III.) Ida ma, pangarimpunan ni na denggan naung huida i: Lehet do i mangan minum jolma i jala dipasonang rohana mangihutihut sandok ulaonna hian, na niulana di hasiangan on, saleleng di ngoluna, na nilehon ni Debata tu ibana; ai i do jambarna.

¹⁹(5-18) Angkup ni molo dilehon Debata tu manang ise jolma hamoraon dohot sinamot, diloas huhut ibana mangan dohot mambuat jambarna sian i huhut marlas ni roha di ulaonna, silehonlehon ni Debata do i.

²⁰(5-19) Ai ndang sadia dipaingotingot rohana angka ari ni ngoluna, ala naung

nialusan ni Debata ibana marhite sian las ni rohana i.

6¹ (I.) Adong dope huida sadanari jea bolon di hasiangan on jala dokdok do i dipasarisarijolma i:

²Molo dilehon Debata hamoraon dohot arta dohot hasangapon tu sada baoa, pola ndang hurangan rohana taringot tu saluhut na pinangidona, hape ndang diloas Debata ibana mangan sian i, halak sileban tahe pasudahon: I ma jea dohot hinamago godang.

³Tung sura saratus ianakhon ditubuhon sada baoa, jala leleng ibana mangolu, sanga sarimatua situtu, hape ndang sombu rohana marsaulihon na denggan i, ndang tipak nang tanomanna, dohononku do: Tagonan do silumaksaijur sian baoa sisongon i.

⁴Ai magopo do i ro, jala di bagasan haholomon muse laho, laos haholomoni manghungkupi goarna.

⁵Nang mata ni ari ndang sanga diida manang di tanda. Andul do i sumonang sian baoa ondeng.

⁶Nang tung sura mangolu ibana dua ribu taon lelengna, hape ndang diida anggo na denggan i, nda sada do hapatean ni saluhutna?

⁷Saluhut hangaluton ni jolma sumarihon pamanganna do, hape ndang sombu anggo rohana binahen ni.

⁸Ai aha do hasurungan ni halak na pistar sian halak na oto? Aha gunana di halak na dangol ia diboto mardalan di adopan ni halak na mangolu?

⁹Tagonan do parnidaan ni mata, sian roha na monsong mardondami; hata na oto do nang i jala pangeahion di alogo sambing.

¹⁰Manang beha pe pangalaho ni jolma, nunga tibu hian targoar goarna i, jala binoto jolma hian do ibana, jala ndang tarbahensa mardabudabu dohot Debata, na gumogo situtu sian ibana.

¹¹Ai molo godang hatahata, na paganda jea do i; tung aha ma laba ni jolma sian i?

¹²Tung ise umbotosa manang aha na denggan di jolma i bahen hangoluanna saleleng di ariari ni ngoluna, angka na laho salpu songon halinu? Ise tahe tarbahen pabotohon tu jolma i manang aha na masa di hasiangan on ia dung salpu ibana.

7¹(I.) Tagonan do barita na denggan sian miak na hushus; jala dumenggan do ari hamatean ni jolma sian ari hatutubuna.

²Tagonan do masuk iba tu jabu parandungandungan asa tu jabu parpanggalangan; ai di bagasan parjolo i tarida do ujung ni nasa manisias, tama ingkon diparateatehon jolma na mangolu i do i.

³Tagonan do margondok ni roha sian na martata, ai gondok ni panaili padenggan roha.

⁴Roha ni halak na pistar mian di bagasan jabu parandungandungon, alai anggo roha ni halak na oto mian di bagasan jabu parhorjaan.

⁵Tagonan do pabegebegeon pinsangpinsang ni halak na pistar, sian ende ni baoa na oto patangitangion.

⁶Ai songon parlopuk ni bulu duri di toru ni hudon, songon i do parengkelon ni halak na oto. Tung na so marguna do i.

⁷Tongon tahe pangarupaon pagilo roha ni halak na pistar, jala sisip mangago tu roha.

⁸(II.) Tagonan do hasunan ni hata sian parbingkasanna; tagonan do halak na lambas marroha sian halak na ginjaang marroha.

⁹Unang girgir roham mangoloi piripirion, ai maringan di bagasan roha ni halak na oto do piripiri.

¹⁰Unang dok: Dia do ulaning dalanna umbahen dumenggan angka ari di na robi sian nuaeng? Ai ndada marbisuk sungkunsungkunmi taringot tusi.

¹¹Denggan do hapistaran, dos tahe dohot teanteanan godang, jala hasurungan ni halak angka na marnida mata ni ari do i.

¹²Ai tarbahen do marlinggomlinggom tu hapistaran, nang tu perak, alai hasurungan ni parbinotoan on do: Hapistaran i mangalehon ngolu tu tuan nampunasa.

¹³Patangkastangkas ma jadijadian ni
Debata, ai tung ise ma tarbahensa patigorhon
manang aha, molo Ibana pabengkukkon?

¹⁴Marlas ni roha ma ho jumpa di ari na
denggan, jala pasuang roham tu bagasan uju
di ari hinamago, ai rap ditongos Debata do
duansa, asa unang jumpangjolma i manang
aha na masa dung salpu ibana.

¹⁵(III.) Luhutna i nunga huida uju di angka
ari haliluonku: Adong huida halak partigor
tung mago di bagasan hatigoranna, adong
huhut huida halak parjahat tung sanga do
sarimatua di bagasan hajahatonna.

¹⁶Unang majujurhu ho di pintormu, jala
unang tarlobi bisukmu; boasa tagonan ho
sandiri naeng mangago ho?

¹⁷Unang pagukguk hajahatonmu, jala unang
mulak maoto ho! Boasa tagonan naeng mate
ho so jumpang dope tingkim?

¹⁸Denggan do ia ditangkap roham na
sadaon, unang huhut dipalua tanganmu
na sadaan, ai manang ise na mabiar mida
Debata tongatongana buatonna.

¹⁹Hapistaran i margogoihon halak na pistar,
gumodang tahe sian sampulu halak ulubalang
angka na martaon di bagasan huta.

²⁰Ai ndang adongjolma partigor di tano on
nanggo sada, anggo tung holan na denggan
diulahon, jala ndang dung mardosa.

²¹ Dibahen i unang ma pagagathon tu roham luhut hatahata, angka na hinatahon ni halak, asa unang begeonmu naposom mamulasi ho.

²² Ai nunga piga hali diingot roham naung dohot ho mamburai halak sileban.

²³ (IV.) Luhutna i nunga huunjuni mardongan hapistaran; ninna rohangku nian: Naeng pistar ahu, hape mandao do hapistaran i sian ahu.

²⁴ Dao do anggo apala dirina, jala mansai bagas; tung ise ma jumpangan disi?

²⁵ Dung i humusor ma rohangku naeng mananda dohot manulingkit dohot mangalului hapistaran dohot panimbangan, naeng mananda huhut hajungkaton ni habodoon dohot haotoan ni hajahaton.

²⁶ Dung i jumpang ahu ma saragam na sumapot sian hamatean: I ma parompuan, tung songon jaring dohot jorgong do rohana, jala tanganna tung songon rante do. Malua do sian ibana anggo halak hasudungan ni Debata, alai anggo halak pardosa ingkon jailonna do.

²⁷ Ida ma angka i do jumpang ahu sadasada, ninna parjamita i asa jumpangan panimbangan.

²⁸ Na niluluan ni rohangku angkup ni dope nian hape ndang jumpang ahu: Sada baea na tigor tahe sian saribu jumpang ahu; alai anggo parompuan ndang adong dapot ahu nanggo sada sian na sai torop.

²⁹ Ida ma, on dope na jumpang ahu: Tigor do nianjolma i anggo ditompa Debata, alailan do ujarujaran dilului rohanasida.

8¹ (I.) Ise ma tung songon halak na pistar? Jala ise umboto lapatan ni hatangkon? Hapistaran i do pasihar panaili nijolma, surbot ni pamerengna pe muba do.

² Sipaingothu di ho; sai parateatehon ma hata ni raja, nang ala ni hata haburjuon naung binulanhonmu tu Debata.

³ Unang hapogan ho ruar sian adopan ni bohina, jala unang pirhon parkaro na geduk, ai saguru lomo ni rohana do bahenonna.

⁴ Ai hata ni raja doshon parenta do, jala ise ma na hum mandok tu ibana: Aha do na binahenmu.

⁵ Manang ise na mangaradoti patik, ndang habiaranna hata na roa, diboto roha ni halak na pistar do tingki halehetan dohot uhum.

⁶ Ai martingki jala marbangko be do saluhut na masa, gabe dokdok disarisonjolma i parsorionna.

⁷ Ai ndang dibotojolma i manang aha na masa sogot ai tung ise ma pabotohon tu ibana manang beha parturena sogot.

⁸ Nandang adongjolma nanggo sada, tung mandapot di ibana hosana, tung hatiopansa hosana i; jala ndang adongjolma tung mandapot di ibana ari hamamatena, jala ndang adong haluaon sian parungkilon na

sasada i, jala ndang tarbahen hajahaton paluahon jolma parjahat i.

⁹Luhutna i nunga huida uju diranapi rohangku saluhut pambahenan, angka na masa di hasiangan on, uju sada jolma mangarajai donganna jolma mambahen ibana marhinamago.

¹⁰Angkup ni, nunga huida tipak tartanom halak parjahat; hape anggo halak na mangulahon na denggan, angka na ro sian inganan na badia, dihalupahon donganna sahuta do i. Ipe hata oto do i.

¹¹Ala so tibu manginona pambahenan angka na jahat i, dibahen i gok roha ni jolma manisias di bagasan mangulahon hajahaton.

¹²Alai tung sura pe ratus hali halak pardosa mangulahon hajahaton, pola sanga sarimatua ibana, tangkas do huboto: Martua sogot halak na mangkabiari Debata, angka na marparange di jolona.

¹³Alai ndang tagamon sonang anggo halak parjahat i, jala ndang tagamon paganjangonna ariarina; alai songon halinu do ibana, ala so marhabiaran tu Debata.

¹⁴(II.) Adong dope sadanari halongangan masa di atas tano on: Adong halak partigor, hira pambahenan ni halak parjahat niulana, parsorionna timbangan; jala adong halak parjahat, hira pambahenan ni halak partigor niulana, parsorionna timbangan. Nunga pola hudok halongangan do i.

¹⁵ Dibahen i hupapujipuji las ni roha, ala na so adong na dumenggan di jolma i saleleng di hasiangan on, ia so na mangan minum dohot marlas ni roha; i do na tinggal di ibana sian ulaonna saleleng ariari ni ngoluna, angka na nilehon ni Debata tu ibana di hasiangan on.

¹⁶ Dung i diringkoti rohangku muse naeng mananda hapistaran dohot manangkasi hinamago na masa di atas tano on, pola tung balisaon mata ni jolma borngin dohot arian, ndang tarpodom.

¹⁷ Jadi tangkas ma huida sandok jadijadian ni Debata, na so tardodo jolma i pambahenanna angka na masa di hasiangan on. Nang pe maradu ngalutan roha ni jolma i mandiori, ndang tagamon jumpangsa; tung sura pe ninna roha ni halak na pistar leak botoonna do i, ndang tagamon jumpangsa.

9¹ (I.) Luhutna angka on nunga diparateatehon rohangku, nunga husulingkit sasudena i, nang halak partigor, nang halak na pistar ro di ulaonnasida tahe di bagasan tangan ni Debata do hape; ndang diboto jolma i manang sian holong ni rohana manang sian rimasna, atik pe ngomngom di jolonasida luhutna i.

² Marhatopan do sude jolma taringot tu saluhutna i, sisada parsorion do halak partigor dohot halak parjahat, halak na denggan dohot na pita marroha, songon halak na ramun; halak na pasahathon pelean, songon halak

na so mamele halak na daulat, songon halak pardosa; halak panolonlon songon halak na mabiar manolon.

³I ma jea apala na umbalga sian saluhut na masa di hasiangan on, tung sisada parsorion do luhutna; tung gok hajahaton huhut roha ni jolma manisias, jala haotoon marragamragam di bagasan rohanasida saleleng mangolu nasida, dung i ingkon topotonna ma angka na mate.

⁴Tung ise ma jolma dibelok sian i? Luhut halak na mangolu marpangkirimon do. Ai tagonan do sada panangga na mangolu sian sada singa na mate.

⁵Ai anggo halak na mangolu i diboto do na ingkon mate nasida sogot, alai anggo halak naung mate ndang diboto agia aha, jala ndang adong be di nasida parjambaran, ai nunga lupa parningotan di nasida.

⁶Nang holong ni rohana, nang hosomna dohot iburuna pe nunga mago, jala ndang be marjambar nasida di saluhut angka na masa di hasiangan on.

⁷(II.) Antong laho ma ho, marlas ni roha ma ho manganhon sagusagum, pir ma tondim manginum anggurmu, ai nunga tibu hian marlomo ni roha Debata mida ulaonmu.

⁸Ingkon tongtong ma ho marpangkean na saksak, jala unang hurangan miak ia ulum.

⁹Sai marlas ni roha ma ho saleleng di ngolum rap dohot jolmam, na hinaholonganmu

saleleng ariari ni ngolum na gale i, na nilehon ni Debata tu ho di hasiangan on, luhut ariarim angka na tibu laho salpu; ai i do jambarmu di hangoluan on sian ulaon na hinangaluthonmu di hasiangan on.

¹⁰Manang aha na jumpang tanganmu siulaonmu, ula ma i sian nasa gogom, ai ndang adong be masa ulaon, manang panimbangan, manang parbinotoan, manang hapistaran anggo di bagasan parbeguan sitopotonmu sogot.

¹¹Dung i huulaki ma patangkashon na masa di hasiangan on, ndada di halak na gompis hape sanggul parlojongon, ndada di halak na begu haantuon, ndada di halak na pistar sagusagu, ndada di halak na marroha hamoraon, ndada di halak sigodang parbinotoan asi ni roha; tingki tahe dohot parsorion mangonai tu nasida luhutna.

¹²Ai nangjolma i ndang diboto hian ajalna, songon dengke tahe na dapot di bagasan jala pangago, jala songon pidong na dapot sambil, suang songon i taralitjolma manisiasuju di tingki hinamago na maninggang nasida so pangkirimanna.

¹³(III.) Dohot on tau hapistaran godang masa di hasiangan on diida rohangku:

¹⁴Adong sada huta na metmet, jala otikjolma pangisina, dung i ro ma sada raja na bolon, ditunghum ma huta i, pola partanobatoan, bolon dibahen humaliang.

¹⁵Alai jumpang ma di bagasan huta i sada halak na pogos, alai na pistar do, tarpaluasa nian huta i marhitehite hapistaranna; hape ndang adongjolma nanggo sada na marningot di halak na pogos i.

¹⁶Jadi ningku ma: Tagonan do hape hapistaran sian hagagoon; alai tahe marhu ni roha angkajolma i mida hapistaran ni na pogos, jala ndang ditangihon angka hata sipaingotna.

¹⁷Tagonan do hata ni halak na pistar pabegebegeon marsonangsonang, sian suraksurak ni sada raja di tongatonga ni halak na oto.

¹⁸Tagonan do hapistaran sian parhohas tu parporangan, alai godang do ruhut na denggan diago sada halak pardosa.

10¹(I.) Sada lanok na mate mambahen bau dohot gurgur miak na hushus ni sada pande ubat; suang songon i jotjot ummarga haotoon saotik sian hapistaran dohot hamuliaon.

²Roha ni halak na pistar di tangan siamunna do, alai anggo roha ni halak na oto di hambirangna do.

³Manang di dalan dia pe mardalani halak na oto i sai tarida do rohana na hurangi, hape balik disura rohana luhut halak na oto.

⁴Molo tung marronirimas raja mida ho, unang pola humorditroham, ai roha haholomon manundati godang dosa.

⁵Adong dope jea sadanari huida di hasiangan on, tudos tahe tu haliluon na pinaksa ni pangarajai:

⁶Halak na oto balik panahatan ni pangkat na balga dibahen, ai halak na mora hundul di talaga dibahen.

⁷Huida huhut marsihundul di hoda ia hatoban, hape mardalan pat ia raja hira hatoban.

⁸(II.) Manang ise na mangkali godung, ibana sandiri madabu tu bagasan; jala manang ise na mangaloha parik batu, parguton ni ulok ma ibana.

⁹Manang ise na mangungkit batu, sai na tipaonna do ibana; manang ise na manggalagat hau, sai na marmara ibana disi.

¹⁰Molo dung matultul tangke dibahen manang ise, jala ndang digarut babana, ingkon mangasahon gogo na ma ibana manallikhon; alai na marhaseangkon hapistaran i do na dumenggan.

¹¹Molo mamargut ulok tagan so hona tabas, ndang be marlaba hapandean ni panubuti.

¹²Lomo roha ni pinggol umbege pangkataion ni halak na pistar, alai bibir ni halak na oto mamondut ibana sandiri.

¹³Mula ni pangkataion ni pamanganna haotoon do, jala ujungna hata lalaen saming do.

¹⁴Sai dipadeakdeak halak na oto do hatahatana; ndang dibotojolma i manang

aha na masa sogot, tung ise ma pabotohon
tu ibana manang aha na masa dung salpu
ibana?

¹⁵Hangaluton ni halak na oto mangalojai
ibana sandiri, ala so diboto topotonna dalan
tu huta.

¹⁶(III.) Marjea ma ho, ale luat na marrajahon
dakdanak, jala sai margadombus papangan
ni indukna.

¹⁷Alai martua ma ho, ale luat na marrajahon
halak na marmulia hian, jala di tingkina hian
mangan angka indukna mangalap gogo,
ndada margadombus.

¹⁸Binahen ni gurbak ni ulu jomba angka
parhau ni bagas, jala binahen ni hagaleon ni
tangan, tiris jabu i.

¹⁹Lilian marhariburon nasida mambahen
panggalangon, jala anggur palashon roha ni
jolma na mangolu, jala hepeng patupahon
luhutna i.

²⁰Nang di bagasan pingkiranmu, unang
pulasi rajai, jala unang bura i halak na mora
di bagasan bilut podomanmu, atik tung
beha adong pidong na martongatonga langit
patolhashon suara i jala onggang pabotohon
pangkataionmu maon.

11 ¹(I.) Padalan ma sagusagum tu bariba
ni laut, ai di laonlaon ni ari dapot ho do
i marbunga.

²Bahen marjambar pitu manang ualu halak, ai ndang diboto ho manang jea dia ro tu atas tano on.

³Molo sorat angka ombun i, dipangusehon ma udan tu atas tano on, molo marobo hau dompak dangsina manang dompak utara, ia tusi haroboan ni hau i laos disi do i peak.

⁴Manang ise na pajagajaga alogo, ndang tagamon saut manabur, jala manang ise na patangkastangkas ombun, ndang tagamon saut ibana manggotil.

⁵Nandang diboto ho manang didia pardalanan ni alogo dohot panjadijadi ni holiholi di bagasan bortian ni boruboru na marhangoluan: Suang songon i ndang diboto ho jadijadian ni Debata na manjadihon saluhutna.

⁶Sogot manogotna i saburhon bonim jala unang patait tanganmu nang bodarina i, ai ndang diboto ho manang dia sian na dua i manjadi, manang tung rap duansa manjadi.

⁷(II.) Tonggi do hatiuron i jala lomo roha ni mata marnida mata ni ari.

⁸Tung sura liput di taon jolma i mangolu, denggan do marlas ni roha ibana di saluhutna i, alai marningot ibana huhut di angka ari haholomon, ai tung torop do angka i. Luhut na masa sogot laho salpu do i.

⁹Antong marlas ni roha ma ho, ale dolidoli tagan di haposoonmu, jala guru sombu ni roham bahen di angka ari hadolionmu!

Jala paihutuhut angka dalam lomolomo ni roham, guru sombu ni matam; alai boto huhut togutoguon ni Debata do ho sogot tu paruhuman ala saluhutna i!

¹⁰Paholang ma murukmuruk sian bagasan roham jala padao hajahaton sian sibukmu, ai tingki haposoon dohot buha siang ari laho salpu do i tibu.

12¹(I.) Sai, dipaingotingot roham ma Sitompa ho di angka ari haposoonmu, tagan so ro dope angka ari hinamago, jala ngomngom angka taon pandohonanmu: Ndang lomo rohangku di angka i.

²Tagan so mangkolom dope mata ni ari dohot hatiuron ro di bulan dohot angka bintang, jala mardapotdapot angka ari rondo.

³Di ari uju i angka hitir angka sijaga bagas i jala telluktelluk baoa angka na margogo jala mansohot manduda angka panduda i ala nunga lam marurus, manjadi homur dohot angka na mandulo sian panduloan.

⁴Jala tarhinsu hinsuhinsu haroroan na dua i lam tu ngerngerna suara ni pandudaan i, hira tudos tu suara ni amporik na ma, jala sulon sude boru ni parendeon.

⁵Pola mabiar nasida mida nangkohan, jala lan habiaran di tongandalan disura rohana, jala marurus sian unte albung angka bunga na saksak jala sorat dihilala sihapor, jala mansadi angka hisaphisap, ai laho ma jolma i manopot bagas siingananna salelenglelengna

nunga pola monsong mardalan di alaman angka pangondasi.

⁶Tagan so tos dope tali perak i, manang matapor guriguri sere jala malala timbatimba di lambung pansur, jala malala galapang di lambung ni sumur.

⁷Jala mulak orbuk i tu tano, pambuatanna hian, alai anggo tondi mulak tu Debata, nampunasa hian.

⁸Tung na so marguna do saluhutna i, ninna parjamita i, saluhutna tahe ndang hasea.

⁹(II.) Angkup ni, ala pistar parjamita i, diajarhon huhut parbinotoan tu halak situan na torop i, jala didasing, jala disulingkit, jala maraturan dibahen godang poda sipaingot.

¹⁰Mutu huhut roha ni parjamita i mandiori hata angka na tangkas marhahonaan jala torang disurathon angka hata hasintongan.

¹¹Ai poda sipaingot sian halak na pistar songon hujur palait do, songon labang angka na pate nilabangkon, marhite sian halak na papungupunguhon, jala na nilehon ni Sada Parmahan.

¹²Angkup ni ale anaha, sai olo ma ho paingoton marhite sian angka poda on! Ai ndang marpansadian halak patoroptorop buku, jala tung na loja do daging mandatdati pajahajaha angka i.

¹³Pangarimpunan ni sude poda naung itabege, on do: Habiari Debata, jala radoti

angka tonana, ai i do inana siingoton ni ganup
jolma.

¹⁴Ai nasa parulaon ni jolma boanon ni
Debata sogot tu paruhuman ro di saluhut na
buni, nang na denggan nang na jat.

Kidung Agung

1 ¹ (I.) Ende ni angka ende sian si Salomo.

² Aut ni olo ibana mangumma ahu marhite sian ummaumma ni pamanganna, ai dumenggan do holong ni roham sian anggur.

³ Angur do uap ni angka miakmu, songon miak na hushus na marusean do goarmu, ala ni do umbahen hasoloan ni angka namarbaju i ho.

⁴ Togu ma ahu, asa marlojong be hami mangihuthon ho! Nunga ditogu rajai ahu tu bagasan angka bilutna. Marolopolop ma hami jala marlas ni roha mida ho! Papujipujionnami ma holong ni roham gumodang sian anggur. Luhutjolma angka na daulat roha mangkaholongi ho.

⁵ Marbirong do ahu nian, alai marmulia do, hamu ale angka boru ni Jerusalem! Songon undungundung ni halak Kedar tahe, songon rimberimbe ni podoman ni si Salomo.

⁶ Unang marhu ni roha hamu mamereng ahu, ala marbirong ahu, mata ni ari na mamilngas mambahensa; nunga marronirimas angka anak ni dainang mida ahu, didokkon nasida ahu gabe pamuro di angka porlak anggur; hape ia porlak anggurhu sandiri ndang huburoi.

⁷ (II.) Sai pabotohon ma tu ahu, ho ale hasudungan ni rohangku, manang didia ho marmahan? Manang didia mangulon pungan i dibahen ho di hos ni ari? Boasa tagonan ahu madoado rap dohot pungan ni angka donganmu?

⁸ Tung so diboto roham do i, ho ale na mauliutus di tongatonga ni angka parompuan! Antong ruar ma ho, ihutihut ma bogas ni pungan birubiru i, jala parmahan i angka hambingmu boruboru mardonokkon angka undungundung ni angka parmahan.

⁹ Tu hodangku na manait hureta ni Firaun hupatudos ho, ale hasoloan ni rohangku.

¹⁰ Uli do hurummu duansa binahen ni mata intan, jala rungkungmu binahen ni horunghorong marjojor.

¹¹ Bahenonnami dope tu ho horunghorong sere, mardongan perak marturpukturpuk.

¹² Saleleng hundul rajai di adopan ni mejana, angur ma uap ni miakku.

¹³ Sarahutan mir na marborngin di holangholang ni bagothu do ho di ahu; ale hasudungan ni rohangku.

¹⁴ Saraungan parbue ni anggur di bagasan angka porlak anggur Engedi do ho di ahu, ale hasudungan ni rohangku.

¹⁵ Tung na uliutus do ho, ale hasoloan ni rohangku! Tung na uliutus do ho, jala matam songon mata ni darapati.

¹⁶Tung na uliutus do ho, ale hasudungan ni rohangku, tung na uliutus do ho tongon! Lagenta pe marbungabunga na rata do.

¹⁷Angka tiang ni bagasta sian hau ares do, jala emperna sian hau pinasa.

2¹(I.) langgo ahu nian, bunga ladang sian Saron do ahu, bunga pansur sian angka rura.

²Songon bunga pansur di tongatonga ni angka duriduri, songon i ma tutu ho, ale hasoloan ni rohangku di tongatonga ni angka boruboru namarbaju.

³Songon hau unte manis di tongatonga ni hau tombak, songon i ma tutu ho, ale hasudungan ni rohangku, di tongatonga ni angka dolidoli. Dihalungunhon rohangku do hundulhundul di parlinggomanmu, jala tabo parbuena didai tolonanku.

⁴Nunga ditogu ibana ahu tu bilut parpeopan tuak anggur, jala holongna i gabe partonggol di ahu.

⁵Dipargogoi do ahu marhite sian parbue ni anggur, jala dipatogar rohangku marhite sian unte manis, ai marsahit do ahu, dibahen sihol ni rohangku.

⁶Tanganna hambirang mangkaol ulungku, jala tanganna siamun mangkaol dagingku.

⁷Hupatolon ma hamu, ale boru Jerusalem tu angka hije dohot ursa tini, angka na di ladang, asa unang disunggul, jala unang

dipahehe hamu hasoloan ni rohangku, nda ingkon sombu ni rohana do.

⁸(II.) Ndi, rupa suara ni hasudungan ni rohangku do i! Ida ma, nunga ro ibana maringkat sian angka dolok, marhajangjang di atas ni angka robean.

⁹Tudos do hasudungan ni rohangku tu sada hije, manang tu anak ni urisa. Ida ma, jongjong do ibana di balik ni dorpi, mandulo sian jandela, marlinanglinang ibana mandulo sian tarali.

¹⁰Dung i mangkuling ma hasudungan ni rohangku, didok ma mandok ahu: Hehe ma ho, ale hasoloan ni rohangku, na mauiutus, jala ruar ma ho!

¹¹Ai ida ma, nunga salpu partaonan ngali ni ari, nunga mansohot dohot ari udan.

¹²Nunga pola mullop angka bungabunga di ladang, nunga jumpang tingki parendeon, nunga pola tarbege suara ni anduhur titi di tanonta i.

¹³Parbue ni hau ara pe nunga mamungka matoras, jala marbunga ia hau anggur, jala maruap na angur. Hehe ma ho, ale hasoloan ni rohangku, na mauiutus, jala ruar ma ho!

¹⁴Ho ale darapatingku na maringan di bagasan rigatrigat ni dolok batu angka na timbo, loas ma ahu marnida rupam, loas ma ahu umbege suaram! Ai na lambok do suaram, jala na uli rupam.

¹⁵Tangkup ma di hita angka antuas, angka na metmet i, angka na mangago porlak anggur! Ai nunga marbunga hau anggurta i.

¹⁶Ahu nampuna hasudungan ni rohangku, jala ibana nampuna ahu, marmahan do ibana di tongatonga ni angka bunga pansur.

¹⁷Paima lamo ari, jala mago angka halinu; mulak ma ho, ale hasudungan ni rohangku, na tudos tu hije manang tu anak ni ursa di atas ni dolok batu parsiran.

3¹ (I.) Di atas podomanku bornginna i ahu mangalului hasudungan ni rohangku; hulului nian ibana, hape ndang jumpang ahu ibana.

²Antong hehe na ma ahu mangaliati huta i, ro di angka onan dohot alaman mangalului hasudungan ni rohangku. Hulului do nian ibana, hape ndang jumpang ahu ibana.

³Pajumpang ahu dohot parjaga angka na mangaliati huta i: Atehe ndang diida hamu hasudungan ni rohangku, ningku?

⁴Hape tongkinnari dung sirang ahu siang nasida, jumpang ahu ma hasudungan ni rohangku. Jadi hutangkup ma ibana, jala ndang be hupalua ibana, nda jolo sahat ibana huboan tu bagasan jabu ni dainang, tu bagasan bilut ni na manubuhon ahu.

⁵Hupatolon ma hamu, ale angka boru Jerusalem, tu angka hije dohot tu ursa tini angka na di ladang, asa unang disunggul, jala

unang dipahehe hamu hasoloan ni rohangku,
nda ingkon sombu ni rohana do.

⁶(II.) Ise ulaning ibana na nangkok sian halongonan, songon timus na marsijongjong, songon daupa na humushus sian saluhut ragam ni daupa, angka na hushus?

⁷Ida ma, podoman ni si Salomo sandiri do i, pola onompulu halak ulubalang sian angka ulubalang ni Israel mangkaliangisa.

⁸Saluhut nasida sialo musu, na somal marporang, ganup marpodang gampit di gontingna be ala songgotsonggot bornginna i.

⁹Nunga dibahen raja Salomo hian sada podoman hasampuron di ibana sian hau ares di Libanon.

¹⁰Angka tiangna sian perak dibahen, radeanna sian sere, tutupna sian abit hasumba; na niangit do parbagasanna marhite sian roha haholongon ni angka boru Jerusalem.

¹¹Ruar ma hamu ale boru Sion, ida hamu ma raja Salomo martumpal, na tinumpalhon ni inana tu ibana di ari hasampuranna, di ari halasan ni rohana i.

4¹(I.) Ida ma, tung na uliutus do ho, ale hasoloan ni rohangku, na uliutus do ho tutu! Songon mata ni darapati do matam, tarida sian pudi ni pangkuphupi ni ulum; siporhotmu pe tudoshon sada pungan haming angka na mangulon di bona ni dolok Gilead.

²Angka ngingim hira sada pungan birubiru nambura ginusteringan dope imbuluna, angka na manaek sian pangarembaan, angka na marlinduat be, jala ndang dung tumbasan.

³Songon bonang na tinubar do bibirmu duansa, lambok situtu do pangkuling ni pamanganmu; songon parbue ni dalimo na sineat do hurummu, tarida sian pudi ni pangkuphupi ni ulum.

⁴Songon tungkup pinauli ni si Daud ia rungkungmu, na pinauli bahen sangkotan ni sinjata, pola saribu parinse sangkot tusi, luhutna i sinjata ni angka ulubalang do.

⁵Adopmu na dua i, songon anak ni hije na linduat, angka na manjampal di tongatonga ni bunga pansur.

⁶Paima lamo ari, jala maporus angka halinu, naeng ahu mardalan tu dolok hatubuan ni mir dohot tu robean hatubuan ni haminjon.

⁷Tung na uliutus sahali do ho, ale hasoloan ni rohangku, jala ndang adong lindangmu.

⁸Rap ma hita sian Libanon, ale oroan, rap tuat ma hita tutu sian Libanon; manatapnatap ma ho sian punsu ni dolok Amana, sian punsu ni Senir dohot Hermon, sian pangulonan ni angka singa, sian angka dolok haroroan ni babiat.

⁹Nunga tung tunduk rohangku dibahen ho, ale pariban oroanku! Nunga tung dibuat ho rohangku marhite sian pangkidop ni matam

sahali, marhite sian sanjure horunghorong na di rungkungmi.

¹⁰Tung na arga situtu do angka tanda ni holong ni roham, ho ale pariban oroanki, andul do dumenggan holong ni roham sian anggur, jala dumenggan do uap ni miakmu, sian nasa miak na hushus.

¹¹Situak ni loba manetehi sian pamanganmu, ale oroan, situak ni loba dohot susu tutu di toru ni sialap ingkaum, jala uap ni pangkeanmu, songon uap ni Libanon.

¹²(II.) Songon porlak na tipak marparik humaliang do ho, ale pariban oroanki, songon pansur na nirunggaan, songon sumur na sinahap.

¹³Angka tumburmu do songon porlak Eden na gok hau dalimo, marparbue angka na arga situtu, tole hau hapur na angur situtu.

¹⁴Tole hau tusam dohot hau ingul, tole hau haminjon dohot ulumamis, tole hau mir dohot aloe ro di saluhut hau pamurpuri, angka na denggan situtu.

¹⁵Songon pansur do ho di bagasan porlak, jala songon mual aek hangoluan, songon sunge na mabaor sian Libanon.

¹⁶Hehe ma ho, ale alogo sian utara, jala ro ma ho, ale alogo sian dangsina, mangombus ma ho sian porlakku, asa muap uapna na angur i! Sai ro ma ho ale hasudungan ni rohangku tu bagasan porlakna, jala mangan sian parbuena angka na arga i!

5¹ (I.) Nunga ro ahu tu bagasan porlakku, ho ale pariban, oroanki! Nunga hutapu mirhu ro di sandok miakku na hushus, nunga hupangan sarangan ni lobangku ro di situakna, nunga huinum anggurhu ro di susu. Mangan minum ma, hamu ale angka kedanhu, maradu mabuk, hamu ale angka haholonganku.

²Modom do ahu nian, alai dungo dope anggo rohangku, ndi! Rupa suara ni hasudungan ni rohangku do na manuktuhi pintu i mandok: Ungkap di ahu, ale ito, hasoloan ni rohangku darapatingku, ho ale na sun daulat! Ai gok nambur do ulungku, jala gok udan borngin do timpushu.

³Jadi ninna oroan i ma: Nunga pola huosari salendanku, beha pambahenku manolukkon muse? Nunga pola huburi pathu, tung pahodaronku ma muse?

⁴Hape dung disurdukkon hasudungan ni rohangku tanganna sian panduloan, jadi marsigorgor ma rohangku di bagasan mida ibana.

⁵Jadi hehe ma ahu mangungkap di hasudungan ni rohangku, gabe manetehi mir sian tanganku, jala mabaor mir sian jarijaringku laho mangodothon ungkitungkit ni pintu.

⁶Laos huungkap ma di hasudungan ni rohangku, hape marhalindo ma hasudungan ni rohangku laho. Jadi mago ma rohangku

marningot hatana nangkin: Laos hulului ma ibana, hape ndang jumpang ahu be ibana, sai hupajoujou ibana, hape ndang be dialusi ahu.

⁷ Pajumpang ma ahu dohot parjaga, angka na mangaliati huta i, dipungkul jala dibugangi nasida ahu, tung dohot do pangkuphupi ni bohingku dirampas angka parjaga di atas parik.

⁸ Hupatolon ma hamu, ale boru Jerusalem, molo tung pajumpang hamu dohot hasudungan ni rohangku, aha do dohononmuna tu ibana? Dapotan sahiti ahu dibahen sihol ni rohangku!

⁹ Dia do huroha hasurungan ni hasudungan ni roham, sian hasudungan angka na asing, ho ale na ummuli sian nasa parompuan? Dia do huroha hasurungan ni hasudungan ni roham sian hasudungan angka na asing, umbahen tung pola patolononmu hami songon on?

¹⁰ (II.) Na bontar, jala na rara do hasudungan ni rohangku, sondangna pe mangalompoi halak na marloksaloksa.

¹¹ Uluna hira sere palangki do, obukna songon bulung ni harambir na marngeat, birong songon pidong sigak.

¹² Matana songon darapati di topi ni angka batang aek, hira na maridi di bagasan susu, mansusuari marlobilobi di eme tudukonna.

¹³ Hurumna hira sada baruran hatubuan ni sanggul, hira dolok hatubuan ni hau na

angur, bibirna hira bunga pansur angka na manetekkon mir.

¹⁴Tanganna hira tintin sere idaon na nilampis dohot mataintan; dagingna hira jadijadian sian gading na nilampis dohot humala.

¹⁵Haehaena hira tiang batu na martulis, angka na marojahan pat sere, rupana hira Libanon, na pinillit songon hau ares.

¹⁶Tolonanna manis do, jala sandok pangalahona tau hasoloan. I ma pangalaho ni hasudungan ni rohangku, songon i ma alealengku, hamu ale boru Jerusalem.

6¹ (I.) Tudia ulaning laho hasudungan ni roham, ho ale na ummuli sian sude parompuan? Dompak dia ulaning ditondong hasudungan ni roham, asa dohot hami mangalului ibana rap dohot ho?

²Nunga tuat hasudungan ni rohangku tu porlakna, tu baruran hatubuan ni sanggul, naeng mardalandalan ibana di bagasan angka porlakna, huhut papungupungu angka bunga pansur.

³Ahu nampuna hasudungan ni rohangku, jala ibana nampuna ahu, marmahan do ibana di tongatonga ni angka bunga pansur.

⁴Tung na uliutus do ho, ale hasoloan ni rohangku! Songon Tirza tahe, jagar songon Jerusalem, jala songkal songon parangan na marhoronhoron.

⁵Padao ma matam sian ahu, ai tarsingot do ahu dibahen; siporhotmu pe tudoshon sada

punguan hambing, angka na mangulon di bona ni dolok Gilead.

⁶Angka ngingim hira sada punguan birubiru, nambura ginusteringan dope imbuluna, angka na manaek sian pangarembaan, angka na marlinduat be, jala ndang dung tumbasan.

⁷Hira janggaleman do hurummu, dapot idaon sian pudi ni pangkuphupi ni ulum.

⁸Onompulu do bilangan ni tuanlaenna, jala ualupulu angka radingna, jala ndang habilangan anggo angka namarbaju.

⁹Alai sasada ho do anggo darapatingku, jala na sun daulat, boru sasada ni inana, hasoloan ni roha ni na manubuhon. Diida angka namarbaju i ibana, jala diparhatua, angkajolma ni raja pe dohot radingna papujipuji ibana:

¹⁰Ise do i na marsinondang songon sibalik hunik manogotnogot, uli ibana songon bulan, sondangna songon mata ni ari, songkal songon parangan marhoronhoron?

¹¹Nunga tuat ahu nian tu porlak hatubuan ni buapala, naeng maningkir angka na ratarata di rura, naeng mandulo manang naung martumbur hau anggur, manang naung marbunga hau dalimo.

¹²Ndada panagaman ni rohangku dope, nunga pinaunsat ahu tu hureta ni bangsongku na sangap i.

¹³(7-1) (I.) Mulak ma ho, ale Sulam, mulak ma, mulak ma, mulak ma ho tutu, asa huida

hami ho! Tung aha ma idaonmuna di Sulam.

Tudos do ibana tu parsaroan Mahanaim.

7¹ (7-2) Denggan ni pangealmi
mangalangka di bagasan sipatum,
ho ale boru ni raja na sangap! Pangibul ni
gontingmu, songon simata godang, hira
jadijadian ni tangan ni halak na pande.

² (7-3) Ampuanmu hira panginuman na hibul
do, ndang jadi hurangan di siinumon na pang.
Butuham hira eme di bolagan na hinaliangan
ni bunga pansur.

³ (7-4) Ia adopmu na dua i, hira anak ni urisa
dua, hira anak ni hije na linduat.

⁴ (7-5) Rungkungmu hira tungkup sian
gading; matam hira tobat angka na di
Hesbon, mardonokkon harbangan ni huta na
rame, igungmu hira tungkup panatapan ni
Libanon, manatap dingkan Damaskus.

⁵ (7-6) Ia ulum di atasmu hira Karmel do,
jala obukmu na janggejangge hira paspasan
baliga hodong do, pola tarpulut roha ni rajai
dibahen pandandanan ni obukmu.

⁶ (7-7) Tung na uliutus do ho, jala na lambok
do, ho ale boru hasian binahen ni hinaulim!

⁷ (7-8) Partubum on hira harambir do, jala
adopmu hira saraungan parbue ni anggur.

⁸ (7-9) Jadi ninna rohangku ma:
Hupanaek na ma harambir on, asa huhaol
dangkadangkana; jala adopmu na dua i,
ingkon hira saraungan parbue ni anggur di

ahu, jala parhosa ni igungmu, hira uap ni unte manis.

⁹(7-10) Ia tololanmu hira anggur na denggan, lambok tahe mabaor diinum hasudungan ni rohangku, jala pagirgir mangkatai bibir ni halak na mondokondok.

¹⁰(7-11) Ahu do nampuna hasudungan ni rohangku, jala tu ahu do laho sihol ni rohana.

¹¹(7-12) Antong ho ale hasudungan ni rohangku, beta hita ruar tu ladang, asa marborngin hita di angka sosor.

¹²(7-13) Sogot pe hita hehe manogot laho manogot angka porlak anggur, maningkir manang naung martumbur hau anggur i, jala mangerbang angka bungana, marbunga dohot hau dalimo; disi do patuduhononku tu ho holong ni rohangku!

¹³(7-14) Disi ma maruap angka parbue dudaim, jala di atas pintu ni jabunta parbue marragamragam, angka na arga, angka nambura dope, dohot naung leleng, angka na hupajop di ho, ale hasudungan ni rohangku.

8¹(I.) Aut ni tudoshon hahaanggi ho di ahu, naung manusu tu bagot ni dainang! Tung sura pajumpang hita di balian, ummaonku ho, ndang tagamon reheon ni halak ahu ala ni.

²Tongon tahe, toguonku do ho laho mamboan tu jabu ni dainang, asa diajari ho ahu; lehononku do tu ho tuak anggur na pang. Painumhononku tu ho sian anggur na

marraru dohot sian gota ni parbue ni hau dalimo.

³Tanganna hambirang mangkaol ulungku, jala tanganna siamun mangkaol dagingku.

⁴Hupatolon ma hamu, ale boru Jerusalem, asa unang disunggul, jala unang dipahehe hamu hasoloan ni rohangku, nda ingkon sombu ni rohana do.

⁵Ise do ulaning ibana na manaek sian halongonan, jala marpangunsandean tu hasudungan ni rohana? Di toru ni hau unte manis ahu manungguli holong ni roham; laos disi do diae inanta ho, disi do ho ditubuhon na manubuhon ho.

⁶Bahen ma ahu songon tintin sahap tu bagasan roham, songon tintin sahap tu botohonmu! Ai tung na gogo do roha haholongon i, songon gogo ni hamatean tahe; tung na jorbut do pangiburuonna i, songon jorbut ni banua toru tahe. Nalanalana do songon nala ni api, songon hilap sian Jahowa.

⁷Ro pe angka aek magodang, ndang tarbaorhonsa anggo roha haholongon i, jala ndang taraup angka batang aek. Tung sura pe olo sada baoa mangalehon nasa arta pineopna di jabuna bahen ali ni roha haholongon i nian, ndang parduli ibana disi.

⁸Adong do sada ibotonta na metmet, gari adopna ndang adong dope; aha do bahenonta tu ibotonta, tung sura adong hata ni anak ni halak tu ibana manang andigan.

⁹Molo tung hira parik ibana, pajongjongonta ma di atasna bagas sada sian perak; alai molo tung hira pintu ibana, bahenonta papan sada sian hau ares manutup dalanna.

¹⁰Nunga parik ianggo ahu, jala adophu hira tungkup do. Jadi tau ahu di rohana songon halak naung jumpang dame.

¹¹(II.) Adong do di Salomo sada porlak anggur di Baal-Hamon. Dung i dipasahat ma porlak anggur i tu halak parjaga, asa ganup nasida mamboan saribu ringgit ali ni parbuena.

¹²Sai tong do dipaingotingot rohangku porlak anggurhu; na saribu ringgit i di ho ale Salomo, jala dua ratus ringgit di halak na mangaramoti parbuena.

¹³Ho ale na maringan di bagasan angka porlak i, sai mananginangi tu suaram do angka aleale; ua patubegehon suaram dohot tu ahu!

¹⁴Siluhon langkam, ho ale hasudungan ni rohangku, asa tudos ho tu hije manang tu anak ni ursa di atas dolok hatubuan ni hau, pambuatan miak na hushus.

Yesaya

1 ¹ (I.) On do pangungkapon tu si Jesaya, anak ni si Amos, na niidana taringot tu Juda dohot Jerusalem, uju di ngolu ni si Usia, si Jotam, si Ahas, si Hiskia, angka raja ni Juda.

² Tangihon, hamu ale angka langit, jala pinggol, ale tano on! Ai mangkuling ma Jahowa: Hupagodanggodang do angka anak, jala hupatimbul, hape marbalik do nasida sian ahu.

³ Ditanda jonggi do nampuna ibana, jala diboto halode panggagatan binahen ni tuanna. Alai anggo Israel ndang tumanda ahu, jala ndang marroha bangsongku.

⁴ Marjea ma bangso na mardosai, na sun marhajahaton! Pinompar ni angka parjahat, angka anak jea, angka na tumadingkon Jahowa, angka na mangaleai na badia ni Israel, angka na sumurut tu pudi.

⁵ Tu aha i sai datdatan linsingan hamu? Sai ditambahi hamu do panundalion. Ganup ulu marsahit do, jala ganup roha bebenesan.

⁶ Sian palak ni pat sahat ro di ulu, ndang adong na hisar di ibana, holan bugang do jala pangalilitan, jala marsalaon nambura; ndang manang dipuntari jala ndang dililiti, jala ndang dipalambok marhitehite miak.

⁷Tarulang do ia tanomuna, masoksok ia hutamuna dibahen api dipangan halak sileban do haumamuna di jolomuna, gabe halongonan do i, songon na siniaphon ni halak sileban.

⁸Jala tarpunjung do boru Sion, songon soposopo di porlak anggur, songon undungundung di parjelohan, songon huta na tartungkum.

⁹Tung sura so ditebahon Jahowa Zebaot boni di hita otik, siol doshon Sodom dohot Gumora hita.

¹⁰(II.) Tangihon hata ni Jahowa, hamu ale angka partogi ni Sodom! Pinggol hamu, ale bangso Gumora patik ni Debatanta.

¹¹Tudihangku do hinadeak ni peleanmu? ninna Jahowa. Nunga mahap rohangku di angka pelean situtungon sian birubiru tunggal dohot di tabotabo ni lembu angka na pinamokmok, jala ndang dihalomohon rohangku mudar ni angka lembu dohot birubiru dohot hambing tunggal.

¹²Molo ro hamu manopot tu jolongku, tung ise ma mangido i sian tanganmuna, luntahonmuna alamanku.

¹³Unang be datdati hamu mamboan pelean sipanganon so marniula, daupa hinabiashon ni rohangku. Poltak ni bulan dohot ari Sabbath, tingting palumba ari raya, ndang tudihangku hajahatan dohot luhutan ari raya.

¹⁴ Dihagigihon rohangku do angka poltak ni bulan dohot angka tingki pararirayaonmuna; bebenesan do Ahu dibahen, ndang tartaon rohangku be.

¹⁵ Jala nang dipaherbang hamu tanganmuna, padaoonku do matangku maradophon hamu; jala nang dijojoti hamu martangiang, ndang tagamon tangihononku hamu; ai gok mudar do tanganmuna i.

¹⁶ (III.) Marburi ma hamu, urasi hamu dirimuna, paholang hamu ma hinaroa ni pambahenanmuna sian jolo ni matangku, pasohot hamu ma manjahati.

¹⁷ Guruhon hamu ma mambahen na denggan, lulu i hamu ma uhum, pintori hamu na nirupa, patingkos hamu ma uhum tu nasopot so marama, ondingi hamu angka na mabalu.

¹⁸ Dung i sai ro ma hamu, asa mardabudabu hita, ninna Jahowa. Tung sura rara dosamuna songon abit bunga dapdap, bontar do bahenonku songon itak; nang pe rara songon abit hasumba, gabe songon hapas do muse.

¹⁹ Molo ringgas hamu tumangihon dohot mangihuthon, sai panganonmuna do hinadenggan ni gogo ni tano i.

²⁰ Alai molo manjua hamu jala mangalo, sai na panganon ni podang do hamu sogot, ai pamangan ni Jahowa do palumbahon.

²¹ (IV.) Tung beha pambahenna, huta na burju i gabe sibabijalang, gok uhum na

sintong ia najolo hatigoran mian di bagasan ibana, hape anggo nuaeng gok angka partodos.

²²Perakmi do muba gabe air, pinamindo ni aek do anggurmi.

²³Angka sintuam gabe panggunturi dohot dongan ni angka panangko. Saluhut nasida mangapian di sisip, jala dilului angka silehonlehon; ndang dipatingkos nasida uhum tu na sopot so marama, jala parbadaan ni na mabalu, ndang ro tu jolonasida.

²⁴Dibahen i ninna Jahowa Zebaot na marhuaso di Israel: Oe, sai pasabamonku do rohangku maradophon angka alongku, jala sudolhononku tu angka musungku.

²⁵Jadi ingkon manguahi ma tanganku mangonai tu ho, jala papitaonku airmi, songon na sinabun, jala pasurutonku ma nasa simborami.

²⁶Jala pasuamongku ma angka siuhum ho, songon di na robi dohot angka panuturim songon di mulana. Dung i targoar ma ho huta ni hatigoran, huta na bonar.

²⁷Tartobus do sogot Sion marhitehite habonaron, jala angka na mulak tu ibana marhitehite hatigoran.

²⁸Alai hinamago ni angka pangalaosi dohot pardosa sahali ro do, jala siap do sogot angka na manadingkon Jahowa.

²⁹Ai ingkon tarurak nasida sogot maradophon angka hariara, angka na

hinalomohonmuna na sai laon, jala ingkon maila hamu maradophon porlak, angka na pinillitmuna.

³⁰Ai doshon hariara i na marurus bulungna do hamu sogot, jala songon porlak na so adong aek di bagasan.

³¹Jadi doshon hori na so hasea ma parhuaso hian, jala jadijadianna gabe gurasa, gabe rap gor duansa, jala ndang adong na tuk mangintopi.

2¹(I.) On do hata na niida ni si Jesaya, anak ni si Amos taringot tu Juda dohot Jerusalem.

²Masa do sogot, di ujung ni angka ari: Hot disi dipaojak dolok ni bagas ni Jahowa di punsu ni angka dolok, jala huminsat sian angka robean, jadi marrongoman ma tusi sude angka parbegu.

³Jala torop angka bangso mandapothon tusi angka na mandok: Beta hita tanangkohi ma dolok ni Jahowa, tu bagas ni Debata ni si Jakkob, asa diajarhon tu hita angka dalanna, jala mardalani hita di angka lapangna. Ai marharoroan sian Sion do sogot patik i, jala sian Jerusalem hata ni Jahowa.

⁴Jadi manguhum ma ibana di tongatonga ni angka parbegu, jala toruanna torop angka bangso. Jadi patopahononnasida ma podangnasida bahen gigi, jala hujurnasida bahen angka sasabi; ndang be sintahon ni

bangso dompak bangso podang i jala ndang
be guruhononnasida parmusuon.

⁵Beta hamu, ale pinompar ni si Jakkob!
Mardalani ma hita di hatiuron ni Jahowa.

⁶(II.) Ai nunga diambolongkon ho bangsom,
pinompar ni si Jakkob, ala gok roha utiutian
sian habinsaran do nasida, jala angka
parsibalik mata, songon halak Palistim, jala
marsatahi nasida tu anak ni na pulik marga.

⁷Jala gok perak dohot sere tanonasida i, jala
ndang tarlilit artanasida i; jala gok angka
hoda tanonasida, jala ndang habilangan
angka huretanasida.

⁸Jala gok angka ajiajian tanonasida;
marsomba do nasida tu jadijadian ni
tanganna, tu bahenbahenan ni jarijarina.

⁹Jadi tarjimput ma jolma i, jala tarurak
baoa, jala ndang tagamon marpamuati roham
di nasida.

¹⁰Suruk hamu ma dolok batu, jala martabuni
ma hamu di bagasan orbuk maradophon
panonggoti ni Jahowa, dohot maradophon
hamuliaon ni hasangaponna.

¹¹Angka mata ni haginjangon ni jolma
patutoruonna, jala tarjimput bahenonna
hatimboon ni baoa, jadi sasada Jahowa timbul
di ari na sasada i.

¹²Ai nunga dibuhul Jahowa Zebaot sada
ari dompak nasa na ginjang, jala na
timbo marroha, dohot dompak nasa na
patimbotimbo dirina, asa pajimputonna.

¹³Nang dompak sude hau ares di Libanon, angka na timbo, jala na rimpur dohot dompak sude hariara di Basan.

¹⁴Dohot dompak sude dolok angka na hinsat dohot dompak sude robean na timbo.

¹⁵Dohot dompak sude palaspalas angka na timbo, dohot dompak sude parik na gonting.

¹⁶Dohot dompak sude angka parau Tarsis, dohot dompak sude ajiajian angka na arga.

¹⁷Asa tarjepol haginjangon ni jolma. Jala tarjimpot hatimboon ni baoa, jadi sasada Jahowa timbul di ari na sasada i.

¹⁸Alai siap situtu ma angka ajiajian.

¹⁹Dung i suruhon ni halak ma angka liang dohot ronggang ni tano i maradophon panonggoti ni Jahowa dohot maradophon hamuliaon ni hasangaponna, di na hehe ibana manonggoti sude isi ni tano on.

²⁰Di ari na sasada i ma pandanggurhonon ni jolma ma angka ajiajianna perak dohot sere, angka na pinaulina be bahen sisombasombaonna, tu angka naitoru dohot lompong.

²¹Jadi suruhonnasida ma angka liang dohot ronggang di dolok batu maradophon panonggoti ni Jahowa, maradophon hamuliaon ni hasangaponna, di na hehei ibana manonggoti isi ni tano on.

²²Dibahen i unang hamu marhaposan tu jolma, na marhosa di bagasan igungna, ai tung pola aha ibana rajuman?

3¹ (I.) Ai ida ma, unsaton ni Tuhan Jahowa Zebaot ma sian Jerusalem dohot sian Juda tungkot dohot panungkoli, nasa togong ni roti dohot nasa togong ni aek.

²Jolma na begu dohot baoa parmusu, panguhum dohot panurirang, pangarunding dohot sintua.

³Pangarajai silimapulu dohot na sangap, panuturi dohot parhapandean na pistar, ro di sihapodea.

⁴Jala lehononku dakdanak bahen rajanasida, jala dakdanak parentahonnasida.

⁵Jala targogot do bangso i, masirupaan sama nasida; elesan ni dakdanak do na tuatua, jala halak na lea mangelesi na sangap.

⁶Jadi tangkupon ni baoa ma anggina di jabu ni amana, dohononna ma: Marmandar do ho! Ho ma partoginami, mandapot di ho ma angka pasipasi on.

⁷Dung i pagogoonna ma soarana di na sadari i, mandok: Nandang tarbahen ahu pandaoni, jala ndang adong roti manang parabiton di jabungku; unang pabangkit hamu ahu bahen partogi ni bangso i.

⁸Ai mandate do Jerusalem jala tinggang ia Juda, ala mangalo Jahowa dila dohot pambahenannasida manggitihi mata ni hamuliaonna.

⁹Parrupaon ni bohinasida manindangi dompak nasida, jala nasida sandiri

paboaboahon dosanasida i, songon isi ni Sodom ndang dihailahon. Marjea ma tondinasida i! Ai laos nasida sandiri do manggalas hinamago tu nasida.

¹⁰Paboa hamu ma tu partigor i, sai na sonang do nasida, ai panganonnasida do parbue ni angka na niulana.

¹¹Marjea ma ianggo parjahat i, ai hombar tu na jat na niula ni tanganna do pamaloston tu ibana.

¹²Dakdanak do partogi ni bangsongku, jala boruboru mangarajaisa. Mangaliluhon ho do angka partogim, ale bangsongku, jala diago nasida do dalan sibolusonmu.

¹³Jongjong do Jahowa laho manguhum, jala hehe do ibana mandabu uhum tu angka bangso.

¹⁴Ro do Jahowa mandabu uhum tu angka sintua ni bangsona dohot tu partoginasida: langgo hamu nunga diago hamu porlak anggur i, di bagasan jabumuna do dapot tabantaban sian na dangol.

¹⁵Na mahua do hamu umbahen sai rupaonmuna bangsongku, jala dipastapi hamu bohi ni angka na dangol, ninna Jahowa Zebaot.

¹⁶(II.) Dung i ninna Jahowa ma: Ala marhatuiton angka boru Sion, jala dipagakgak uluna, jala marmata manuruk, jala manetsenetse patnasida mardalan.

¹⁷Ala ni papalpalon ni Tuhan i ma sisigatan ni boru Sion, jala pasalongon ni Jahowa ma na niabitannasida.

¹⁸Di ari na sasada i unsaton ni Tuhan i ma jagarjagar ni angka tapaktapak na arga, ro di angka simata borgok.

¹⁹Angka sibong dohot leang dohot sanggul.

²⁰Angka tumpal, angka leang di pat, angka hohos ro di angka gelas marisi miak arun ro di talitali di tangan.

²¹Angka tintin di tangan dohot di igung.

²²Angka ulos parhadohoan, angka bintang maratur, angka salendang dohot angka hajat.

²³Angka sorminan dohot angka kameja, angka bulangbulang dohot salendang godang.

²⁴Dung i gabe nana ma miak na hushus i, jala rante singkat ni hohos i, jala hapalpalon singkat ni jengjeng buhit i, jala tangki singkat ni salendang i, jala tihas singkat ni hinauli nasailaon.

²⁵Marragean ma baoa pangisim panganon ni podang, jala paranganmi siap dibahen hamusuon.

²⁶Dung i marngeuk jala mangandungi angka harbanganna i, marsangkot bulung nasida jugukjuguk di tano.

4¹(I.) Jadi di ari na sasada i soroon ni pitu boruboru ma sada baoa, huhut mandok: Mangan indahannami pe hami, jala hami pasarisari parulosonnami, asal

marpanggoarhon goarmu hami; sai buati ma haurahonnamil!

²Di ari na sasada i sogot, uli jala marmulia ma tunas ni Jahowa, gabe huhut uli parbue ni tano i di angka ma malua sian Israel.

³Jala targoar na badia sogot angka na teba di Sion dohot di Jerusalem, nasa na tarsurat goarna di Jerusalem dapotan hangoluan.

⁴Ia dung diburi Tuhan i taktak ni angka boru Sion, jala diaup angka utang mudar ni Jerusalem, sian tongatongana marhitehite tondi ni uhum dohot marhitehite tondi ni parsegeon.

⁵Jadi tompaon ni Jahowa ma di atas ni saluhut inganan ni dolok Sion dohot di atas ni parluhutanna sada ombun arian dohot timus ro di sondang ni api na marsigorgor borngin, ai linggomanna ma saluhut hamuliaon.

⁶Jala adong sogot parlapelapean bahen parlinggoman arian maradophon parngiar ni ari, jala haporusan dohot panisioan maradophon ari dohot udan na por.

5¹(I.) Marende ma ahu nuaeng taringot tu hasianku, sada ende ni haholonganku taringot tu porlak anggurna: Marporlak anggur do hasianku di punsu ni sada dolok na napu.

²Jala dipangkuri, jala dijomputi angka batu sian i, jala disuanhon lopok na denggan tusi, jala dipauli sada tungkup di tongatongana, jala dihali sada pangilangan di bagasan,

paimahon parbue na tonggi, hape na asom ditubuhon.

³Antong hamu isi ni Jerusalem, jala hamu baoa sian Juda, ua uhum hamu ahu dohot porlak anggurhu.

⁴Tung aha dope sibahenon nian tu porlak anggurhu, na so hubahen tusi? Boasa sai hupaimaima parbuehononna parbue na tonggi, hape na asom do diparbuehon.

⁵On pe pabotohononku ma tu hamu sibahenonku tu porlak anggurhu: Umpatonku ma handangna, asa suda digagat binatang, lohaonku ma parikna, asa diluntak.

⁶Bahenonku ma ibana gabe halongonan, asa unang dirantingi manang dipangkuri, asa tubuan suga dohot sihupi, jala dohononku angka ombun, asa unang mangalehon udan tu ibana.

⁷Alai porlak anggur ni Jahowa Zebaot, i ma pinompar ni Israel dohot angka baoa sian Juda, suansuanan hasudunganna. Sai dipaimaima uhum, hape ida ma pangarupaon do, hatigoran hape ida ma angguhangguk do.

⁸(II.) Marjea ma jolma angka na parinterinte angka bagas, diparapet hauma tu hauma, paima soada be hasiatan, jala holan hamu sandiri maringan di tongatonga ni tano i.

⁹Nunga dibortikkon Jahowa Zebaot tu pinggolhu: Ingkon tarulang sogot bagas na torop i, angka na bolon dohot nauli, gabe so marisi.

¹⁰Ai sampulu turpuk porlak anggur margogo sada bat, jala sada tuhukan boni margogo sada ampang sambing.

¹¹Marjea ma jolma angka nasogot hehe manogot nai mangeahi siinumon na pang; angka na leleng hundul di na holom, asa diohopi anggur i nasida.

¹²Umpalu parhinaloan nasida huhut ngomngom anggur siinumon di nasida, alai ndang dipardulihon nasida anggo ulaon ni Jahowa, jala ndang ditangkasi jadijadian ni tanganna.

¹³Dibahen i tarbuang ma bangsongki so pamotoanna, jala anturaparon angka na sangap sian nasida, jala matemate hauason angka na torop.

¹⁴Ala ni i dipaganda banuatoru hisaphisapna, jala dipangangang babana so marpansohotan, gabe turun tusi hamuliaonna dohot hatoroponna dohot hariburonna rap dohot jolma angka na marolopolop.

¹⁵Jadi tarjepol ma jolma i, jala tarjimput baoa i, jala tungki panaili ni angka na ginjang marroha.

¹⁶Alai timbul situtu ma anggo Jahowa Zebaot marhite sian uhum, jala pinarbadian ma Debata nabadia i marhitehite hatigoran.

¹⁷Jadi manjampali ma angka anak ni birubiru, guru lomona di jampalannasida, jala halak na buro manganhon pasipasi ni angka na mokmok.

¹⁸Marjea ma jolma angka na mangaithon hajahaton marhitehite tali ni gabus, jala dosa i marhitehite jorat.

¹⁹Angka na somal mandok: Haru hatop ma ibana, haru dihapogani nian jadijadianna, asa itaida, haru jumonok jala ro nian sangkap ni na badia ni Israel, asa itatanda Ibana.

²⁰Marjea ma jolma angka na mandok tu na jat denggan do i, jala tu na denggan na jat do i, angka na mambahen haholomon gabe hatorangan, jala hatorangan gabe haholomon, angka na mambahen na paet gabe tonggi, jala na tonggi gabe paet.

²¹Marjea ma jolma angka na bisuk di bagasan rohana, jala marroha ibana diparbaga rohana.

²²Marjea ma jolma angka na begu manobur anggur, angka baoa parhuaso manaor raru tu siinumon.

²³Angka na patingkos uhum tu parjahat ala sisip, jala dipadao hatigoran ni partigor.

²⁴(III.) Dibahen i songon papangan ni dila ni api di durame, jala maheu rambaramba dibahen jilam ni api, uratnasida pe songon sirabun sogot, jala bunganasida martimpul songon orbuk, ala dihagarishon rohana patik ni Jahowa Zebaot, jala diinsahi hata ni na badia ni Israel.

²⁵Ala ni umbahen marsigorgor rimas ni Jahowa dampak bangsona, jala dipatoltol tanganna dampak nasida, jala dilinsingi

nasida, pola humuntal angka dolok,
jala marpeahan bangkenasida, songon
rapanrapan di tongatonga ni alaman. Songon
i pe luhutna i, laos so sumurut dope rimasna,
sai toltol dope tanganna.

²⁶Jadi patindangonna ma sada partonggol
di angka parbegu sian na dao, asa dielaela
tu Ibana sian ujung ni tano on; jala ida ma
doras haop nasida ro.

²⁷Ndang adong na loja manang tarsulandit
di tongatonganasida, ndang adong na
mondokondok manang na modom, jala ndang
harhar hohos sian gonting nasida, manang
tos tali ni sipatuna.

²⁸Na niugam do angka sumbianasida, jala
tangging saluhut siornasida, doshon batu peo
tambirik ni angka hodana, jala galapang ni
huretana sobokkon habahaba.

²⁹Patungoromon do nasida songon
singa boruboru, songon anak ni singa,
jala patungaor nasida huhut manintahi
tabantaban, na niluahonna, soada na
paluahon.

³⁰Songon pandorung ni laut pandorungna
dompok nasida di ari na sasada i, jadi
tungki ma pamerengna tu tano, gabe ida ma
haholomon ni hagogotan, pola mangkolom
hatiuron marhitehite ombunna.

6¹(I.) Di taon hamamate ni raja Usia,
huida Tuhan i hundul di atas habangsa na

timbo, jala na marmulia, jala angka rambu ni pangkeanna manggohi bagas joro.

²Jongjong di atasna surusuruan Serapim, angka na marhabong onom be, dua manghungkupi bohinasida, dua manghungkupi patnasida, dua mangkabangkon nasida.

³Jala marsijouan ma nasida songon on: Na badia, na badia, na badia do Jahowa Zebaot, gok hamuliaonna liat portibi on.

⁴Jadi humuntal ma angka ojahan ni tiang sian soara ni na manjou, jala gok timus joro i.

⁵Dung i hudok ma: Marjea ma ahu! Nunga mago ahu, aijolma parbibir na ramun do ahu, jala di tongatonga ni bangso parbibir na ramun ahu maringan, ai nunga diida angka matanku Raja Jahowa Zebaot.

⁶Dung i habang ma sada sian angka surusuruan Serapim mandapothon ahu, jala di tanganna sada batu arang na gara, na binuatna sian langgatan dohot gansip.

⁷Jadi dijama ma pamanganku, jala didok: Ida ma, on do na manjama bibir ni pamanganmu, paboa naung niunsat utangmu, jala naung hinungkupan dosam.

⁸(II.) Dung i hubege ma soara ni Tuhan i, na mandok: Ise do suruhononku, jala ise pardalannami? Jadi ningku ma: Dison do ahu, suru ma ahu!

⁹Jadi didok ibana ma: Laho ma ho, jala dok ma tu bangso on: Sai mananginangi ma

hamu, alai unang antusi hamu; sai ida hamu ma, alai unang mananda hamu!

¹⁰Patangkang ma roha ni bangso on, jala mingori pinggolnasida, jala pitungi matanasida, asa unang marnida matanasida, manang marbinege pinggolnasida, manang mangantusi rohanasida, jala unang muba manang malum hilalaonna.

¹¹Jadi ningku ma: Sadia leleng on ale Tuhan? Jadi ninna ma: Paima tarulang angka huta, soada marisi, jala angka bagas so marisijolma, jala tarulang tano i gabe halongonan.

¹²Ai padaon ni Jahowa ma angkajolma i, gabe langa situtu parsitongaan ni tano i.

¹³Alai tading dope di bagasan saparsampulu, nang angka i siaphononna do, songon hau tusam, jala songon hariara na martungko di hatatabana; boni nabadia do tungkona i.

7¹ (I.) Dung i masa ma di angka ari ni si Ahas, anak ni si Jotam, anak ni si Usia, raja ni Juda, nangkok ma si Resin, raja sian Ram dohot si Peka, anak ni si Remalia, raja sian Israel, tu Jerusalem naeng marmusu dompak huta i, alai ndang tarpapatusa.

²Jadi dung tarbortik barita i tu pinompar ni si Daud: Nunga marsaro halak Ram di Epraim! Jadi bukbak ma roha ni rajai dohot roha ni bangsona, songon hau di tombak angka na humutur binahen ni alogo.

³Dung i ninna Jahowa ma tu si Jesaya: Ruar ma ho manjumpangkon si Ahas, ho dohot

si Sear-Jasub anakmu, tu ujung ni pamalian aek ni ambar parjolo, tu dalan ni hauma paninaron.

⁴Jala dok tu ibana: Dungo ho, jala sonang! Unang ho mabiar, jala unang biahaton roham maradophon tampahan ni na dua tulbu na martimus on, i ma parpiar ni muruk ni si Resin dohot halak Ram, nang anak ni si Remalia.

⁵Ala na jat sangkap ni halak Ram, Epraim dohot anak ni si Remalia dompak ho songon on:

⁶Nangkok ma hita dompak Juda, asa itagunturi, jala mangalaum tu hita, jala tapabangkit anak ni si Tabeel bahen raja di tongatonganasida.

⁷Dibahen i songon on do hata ni Tuhan Jahowa: Na so tupa do i tulus manang masa!

⁸Ai sabungan ni Ram do ia Damaskus, jala pandapotan ni Damaskus do si Resin; jala di bagasan onompulu lima taon on dope ingkon siap Epraim, ndang be masuk bangso etongon.

⁹Jala sabungan ni Epraim do Samaria, jala pandapotan ni Samaria do anak ni si Remalia. Molo so porsea hamu, ndang tagamon hot hamu.

¹⁰(II.) Angkup ni didok Jahowa ma mandok si Ahas, songon on:

¹¹Pangido sada tanda di ho sian Jahowa Debatam, pangido sian banua toru, manang sian banua ginjang sahali.

¹²Jadi ninna si Ahas ma: Ndang olo ahu mangido, asa unang huunjuni Jahowa.

¹³Jadi ninna si Jesaya ma: Ua tangihon hamu ma, ale pinompar ni si Daud! Ndang dope sae hamu pauruuruhonjolma, dohot do Debatangku naeng lojaanmuna.

¹⁴Dibahen i apala Tuhan i sandiri ma mangalehon sada tanda di hamu: Ida ma, gabegabean ma sada namarbaju, jala tumubuhon sada anak, jala bahenonna ma goarna: Immanuel.

¹⁵Mantega dohot situak ni loba panganonna, paima diboto mambolongkon na jat, jala mamillit na denggan.

¹⁶Ai tagan so diboto dakdanak i dope mambolongkon na jat, jala mamillit na denggan, tarulang ma tano i na nirajaan ni na dua raja hinabiaranmu i.

¹⁷(III.) Paroon ni Jahowa ma tu ho dohot tu bangsom dohot tu pinompar ni amam angka ari na so dung ro, olat ni ari hababali ni Epraim sian Juda, bahenon ni raja ni Assur.

¹⁸Ai masa ma di ari na sasada i, paheheon ni Jahowa ma lanok angka na di ujung ni angka sunge ni Misir dohot loba angka na di tano Assur.

¹⁹Jadi ro be ma nasida jala songgop saluhutna tu angka sunge dohot tu angka rura dohot tu angka liang ni dolok batu dohot tu sude angka tadatada, ro di sude angka panjampalan.

²⁰Di ari na sasada i gorbangon ni Tuhan i ma marhitehite raut parnabung na sineoana di bariba ni batang aek i ma marhitehite raja ni Assur, obuk ni ulu dohot imbulu ni pat ro di sandok mise.

²¹Di ari na sasada i paodongon ni sada baoa ma sada anak ni lombu dohot dua birubiru.

²²Jadi bahenonna ma sian susu na godang i mantega panganonna: Ai mangan mantega dohot situak ni loba nasa na tading di parsitongaan ni tano i.

²³Ai masa ma di ari na sasada i: Nasa hajongjongan ni saribu kambona hau anggur najolo na mararga saribu rupia, gabe hatubuan ni duriduri dohot sihupi muse.

²⁴Ingkon marsumbia jala marsior iba laho tusi, ai duriduri jala sihupi nama masa di sandok tano i.

²⁵Jala saluhut dolok, angka panguan najolo, ndang be tartopot sian biar mida angka duriduri dohot sihupi, bahen jampalan ni angka lombu nama, jala luntahan ni angka birubiru.

8¹(I.) Dung i ninna Jahowa ma mandok ahu: Buat di ho sada batu na balga sisuraton, jala surathon tusi dohot panurat nijolma: Hatop martaban, tibu mamupusi.

²Jadi hubuat ma di ahu angka sitindangi na sintong: Malim Uria dohot Sakaria, anak ni si Jeberekia.

³Dung i sampur ma ahu tu panurirang boruboru i, jadi gabegabean ma ibana, jala manubuhon sada anak. Dung i ninna Jahowa ma mandok ahu: Bahen ma goarna: Si hotop martaban, tibu mamupusi.

⁴Ai tagan so diboto dakdanak i dope manjou ale amang manang ale inang, tarboan ma hamoraon ni Damaskus dohot tabantaban ni Samaria tu jolo ni raja sian Assur.

⁵Dung i diulahi Jahowa dope mandok tu ahu songon on:

⁶Ala marhu ni roha bangso on di aek Siloam, angka na ngernger mardalan, jala marlas ni roha mida si Resin dohot mida anak ni si Remalia.

⁷Dibahen i, ida ma, sai panangkohon ni Tuhan i dompak nasida batang aek angka na doras, jala na balga: I ma raja sian Assur ro di nasa hamuliaonna. Salpuanna ma sude angka bondarna, jala binsat ma sude pasirna.

⁸Jadi tolhas ma ibana ro di Juda, binsat ma ibana, jala sumar ro di rungkung, jala tutupon ni tampahan ni habongna sandok tanomi, ale Immanuel.

⁹Ogaoga ma hamu, ale angka bangso, huhut angka hitir, jala tangihon ma, sude hamu sian luat na dao! Mangkontas ma hamu, huhut angka hitir, mangkontas ma hamu tutu huhut angka hitir.

¹⁰ Martuptup ma hamu, hape sundat do tuptupanmuna i, marsahata ma hamu, hape ndang tulus, ai Debata do dongannami.

¹¹ (II.) Ai songon on do hata ni Jahowa tu ahu, pola disoro tanganna ahu, palumbahon ahu, asa unang hudalani dalan ni bangso on, ninna do:

¹² Unang paihut hamu mandok jehe, ala jehe diehet bangso on, jala unang hatahuthon hamu hatahutonna i, jala unang tarsonggot hamu!

¹³ Tagonan Jahowa Zebaot parbadiai hamu, jala ibana ma habiaranmuna, ibana ma hatondithon hamu.

¹⁴ Ai ibana manjadi habadiaon dohot batu partuktuhan dohot batu partinggangan tu na dua bagas ni Israel, jala jaring dohot jorgong tu isi ni Jerusalem.

¹⁵ Jadi torop sian nasida tartuktuk, jala tinggang, jala maropuk, jala tarjaring, jala tartangkap.

¹⁶ Rahuti ma panindangion i, sahapi ma patik i di bagasan roha ni angka siseanku!

¹⁷ Alai anggo ahu marpangkirimon tu Jahowa do naung manabunihon bohina maradophon pinompar ni si Jakkob, jala huhalungunhon ibana.

¹⁸ Ida ma, ahu dohot dakdanak, angka na nilehon ni Jahowa tu ahu, bahen angka tanda dohot halongangan di tongatonga ni Israel,

sian Jahowa Zebaot do i na marhabangsa di dolok Sion.

¹⁹Dibahen i molo didok nasida mandok hamu: Sungkunhon hamu tu angka pangarunding dohot tu angka hasandaran, angka na marhata i dohot marhusipi. Tung so tu Debatana sandiri nian bangso i marpanungkunan? Tung tu na mate ma sungkunon parsorion ni na mangolu i?

²⁰Bahen patik dohot panindangion ma i! Molo so hombar tu hata on didok nasida, ndang tagamon idaonna buha siang ari.

²¹Jadi sai maotaot nasida di tano i mardok ni roha, jala haleonon, ia dung haleonon piripirion ma ibana jala diburai rajana dohot Debatana! Jala dibereng dompak ginjang.

²²Jala dibereng dompak tano, jala ida ma hagogotan dohot haholomon, holom parnidaanna, jala borngin marimpotimpot manongtong diida.

9¹ (8-23) Alai ndang sai tongtong holom parnidaan ni tano na targogot i. Songon na pinajimputna i di tingki parjolo tano Zebulon dohot Naptali, suang songon i pasangaponna sogot dalan ni laut di bariba ni Jordan, luat hinaliangan ni angka bangso parbegu.

² (9-1) (I.) Bangso na mardalani di bagasan haholomon marnida sada panondang na bolon. Binsar do sada panondang di angka na mangingani tano linggoman ni hamatean.

³(9-2) Nunga dipatorop ho bangso i. Nunga dipadiri ho di ibana halalas ni roha na bolon: Marlas ni roha nasida di jolo ni bohim, songon las ni roha di gotilon, songon parolopolopon di na marbagi tabantaban.

⁴(9-3) Ai nunga diponggolhon ho auga na ampe tu ibana, dohot batahi ni abarana dohot linsinglinsing ni na mangadu ibana, songon uju di ari Midian.

⁵(9-4) Ai masoksok do sogot nasa sinjata ni parsinjata di hatuturtar ni tongtangan, ro di ulos na marsapu mudar, gabe sipanganon ni api.

⁶(9-5) Ai nunga tubu di hita sada posoposo dilehon tu hita sada Anak, pampe tu abarana do sogot harajaon, jala bahenonna goarna: Sipartahi Halongangan, siulubalang ni Debata, Ama saleleng ni lelengna, Raja ni hadameon.

⁷(9-6) Bahen hagaganda ni harajaon dohot hadameon na so marujung di habangsa ni si Daud dohot di harajaonna i, pahothon dohot patoguhon marhitehite patik dohot hatigoran, olat nion ro di salelenglelengna. Hamuruhon ni Jahowa Zebaot patupahon songon i.

⁸(9-7) Nunga ditongos Tuhan i sada hata tu si Jakkob, jala nunga songgop tu Israel.

⁹(9-8) (II.) Asa tung diboto sandok bangso i, Epraim dohot isi ni Samaria di haginjangon dohot hajungkaton ni rohana, angka na mandok:

¹⁰(9-9) Nunga matompas angka tano takko, jadi angka batu parbue pajongjongonta; nunga tartaba angka hau antajau, jadi angka hau ares solukkononta.

¹¹(9-10) Alai patimbulon ni Jahowa ma angka musu ni si Resin dompak Epraim, jala pajujuonna angka musuna.

¹²(9-11) Ram sian jolo, jala halak Palistim sian pudi, gabe suda Israel disohali. Songon i pe i sudena, laos so sombu dope murukna, jala sai toltol dope tanganna.

¹³(9-12) (III.) Alai laos so mulak roha ni bangso i tu na mangalinsingi ibana, jala ndang dilului nasida Jahowa Zebaot.

¹⁴(9-13) Dibahen i gotapon ni Jahowa ma sian Israel ulu dohot lailai, dangka ni harambir ro di tolong di na sadari.

¹⁵(9-14) Angka sintua dohot na sangap do ulu i, jala panurirang na mangajarhon sipaotooto, i ma lailai i.

¹⁶(9-15) Ai angka partogi ni bangso on mangaliluhon nasida, jala tu hamagoan do angka na tinogihonna i.

¹⁷(9-16) Dibahen i ndang marlas ni roha Tuhan i mida angka dolidolinasida, jala ndang asi rohana di angka na sopot so marama, dohot angka na mabalu di nasida, ai saluhut do nasida na ramun, jala na jahat, jala nasa pamangan mandok hata haotoan. Songon i pe i sudena, laos so sombu dope murukna, jala sai toltol dope tanganna.

¹⁸(9-17) Ai marsigorgor do hajahaton i songon api; panganonna do duriduri dohot sihupi, jala galak angka tombak longolongo, gabe martimpul tu ginjang timusna.

¹⁹(9-18) Marhitehite parpiar ni rimas ni Jahowa Zebaot holom tano i, jala doshon sipanganon ni api bangso i, ndang masiolanan na martinodohon.

²⁰(9-19) Manabi sahalak tu siamun, gabe haleon on ibana; mangan ibana tu hambirang, jadi ndang butong nasida, ganup manganhon sibuk ni botohonna.

²¹(9-20) Manasse manganhon Epraim, jala Epraim Manasse, rap nasida muse dompak Juda. Songon i pe i sudena, laos so sombu dope murukna, jala sai toltol dope tanganna.

10¹(I.) Marjea ma sude jolma sibahen angka patik hageduhon dohot angka juaratulis, na manurathon pangarupaon.

²Asa dipapeol uhum tu angka na pogos, jala agoan uhum angka na dangol di bangsongku, angka na mabalu gabe tabantabannasida, jala dipupusi nasida angka na sopot so marama.

³Aha do sibahenonmuna di ari pamalosen dohot hatataban na ro sian na dao? Tung tu ise hamu marhaporusan mangido panumpahion, jala didia tadingkononmuna hasangaponmuna i?

⁴Molo so dipaunduk ibana rohana di tongatonga ni na tarbuang i, ingkon rage ibana di tongatonga ni na rage; songon i pe

i sudena, laos so sombu dope murukna, jala sai toltol dope tanganna.

⁵(II.) Marjea ma Assur, batahi ni rimashu, jala linsinglinsing ni parpiar ni murukku di tanganna!

⁶Dompak bangso na ramun ibana husuru, jala dompak bangso panginonaan ni rimashu ibana hudokkon, asa ditaban situtu, jala dipupusi, jala diluntak, songon bustak di alaman.

⁷Alai ndang songon i anggo pingkiranna, jala ndang songon i sangkapna, sai roha martaban dohot maniaphon torop angka bangso do rohana i.

⁸Ai ninna do: Nda raja do sude angka wakilhu?

⁹Nda doshon Karkemis do Kalno? Nda doshon Arpad do Hamat? Manang Samaria doshon Damaskus?

¹⁰Songon pangonai ni tanganku tu angka harajaon ni parbegu, atik pe dumenggan ajiajiannasida, sian angka na di Jerusalem dohot di Samaria.

¹¹Tung so bahenonku tu Jerusalem dohot tu angka ajiajiannai, songon na hubahen i tu Samaria dohot tu angka ajiajiannai?

¹²Jadi ia dung dipaujung Tuhan i nasa jadijadianna di dolok Sion dohot di Jerusalem, luluhononku ma parbue ni haginjangon ni roha ni raja sian Assur dohot hinasonge ni matana na momar i.

¹³Ai ninna do: Marhitehite gogo ni tanganku sandiri hubaen i, jala marhitehite habisukonku, ai na pistar do ahu. Jala hupaorot angka parbalohan ni angka bangso, jala hupupusi angka artanasida, jala hupaijur angka na marhabangsa, songon ulubalang.

¹⁴Jala jumpang tanganku do hamoraon ni angka bangso, songon asar ni pidong, jala songon panjomputiniba di pira na tinadingkon, hujomputi sude angka luat, jala ndang adong na hum mangheparhon habong, manang pangangang tuktuk, manang mangkuling.

¹⁵Tung maneleng ma tangke dampakjolma na manallikhon? Manang manenga gargaji dampakjolma na manait? Hira na dilibas batahi dojolma angka na mangalibashon; manang hira na dijomput tungkot dojolma na martungkothon.

¹⁶Dibahen i tongoson ni Tuhan Jahowa Zebaot ma tiarap tu angka na pinamokmokna i, jala songon parsigorgor ni api do parsigorgor ni hasangaponna i.

¹⁷Jala manjadi api do hatiuron ni Israel, jala na badiana gabe jilam ni api, jadi gor ma jala suda panganonna duridurina dohot sihupina di bagasan sadari.

¹⁸Jadi siaphononna ma hatongamon ni tombakna dohot haumana, nang hosana ro di sibukna, jala songon parmerus ni na marsahit parmerusna.

¹⁹Jala angka hau pasipasi ni tombakna, otik nama dapot suraton ni dakdanak do bilanganna.

²⁰(III.) Di ari na sasada i, ndang be marpangunsandean pasipasi ni Israel, dohot angka na malua sian pinompar ni si Jakkob, tu na mangalinsingi nasida, tu Jahowa na badia ni Israel nama nasida marpangunsandean di bagasan hasintongan.

²¹Mulak ma roha ni pasipasina i, pasipasi ni Jakkob, tu Debata na sun hinagogo.

²²Ai tung sura pe doshon horsik di topi laut bangsom, ale Israel, holan pasipasina i do na muba tu Debata. Ai nunga disangkap hasiapon marhitehite habibinsat ni hatigoranna.

²³Ai saut do bahenon ni Tuhan Jahowa Zebaot hasiaponna sinangkapna i di tongatonga ni sandok tano on.

²⁴Dibahen i songon on didok Tuhan Jahowa Zebaot: Unang ho mabiar, ale bangsongku, na maringanan di Sion maradophon Assur, na mangalinsingi ho dohot batahi, jala na mangondamhon tungkotna dompak ho songon uju di Misir.

²⁵Ai otik nari situtu nama, sombu ma rimashu, jala marbalik murukku gabe hasiapannasida.

²⁶Jadi sintahon ni Tuhan Jahowa Zebaot ma sada linsinglinsing dompak ibana, songon na nilinsingna i Midian uju di dolok batu Oreb;

jala songon na pinatoltolna i tungkotna i di atas laut uju di dalan ro sian Misir.

²⁷Di ari na sasada i munsat ma rodina sian abaram, jala augana sian tangkuhukmu, jala maponggol auga i maradophon na miniahan i.

²⁸(IV.) Ro do ibana tungkan Ayat, mamolus sian Migron; di Mikhmas do diparose angka parhohasna.

²⁹Dibolus nasida hatariparani: Geba ma parmalamanta, godor ma Rama, maporus ma Gibeas-Saul.

³⁰Manganguhi ma ho ale boru Gallim, sai manangi ma ho ale Laisia! Ngulutmi ale Anatot.

³¹Maporus ia Madmena, malua do ianggo isi ni Gebim.

³²Ngongong dope ibana sadarina i di Nob. Diondamhon ma muse tanganna dompak dolok ni boru Sion, dompak robean ni Jerusalem.

³³Alai ida ma, mangasahon gogo ma Tuhan Jahowa Zebaot manultuli angka dangka, tallihanna ma angka na manggakgak, jala pajempehonna ma angka na ginjang marroha.

³⁴Jala rabionna ma anggo tombak longolongo marhitehite bosi, jala matompas Libanon marhitehite Nasunhinagogo i.

11 ¹(I.) Dung i ruar ma sada tunas sian tungko ni si Isai, jala marparbue sada tubis na tubu sian uratna.

²Jadi songgop ma tu ibana Tondi ni Jahowa, Tondi ni habisuhon dohot hapistaran, Tondi ni panuturion dohot hagagoon, Tondi ni parbinotoan dohot biar maradophon Jahowa.

³Jala halomohononna do hadaulaton maradophon Debata, jala ndang manguhum ibana marguru tu parnida ni matana, jala ndang manguhum ibana marguru tu na binege ni pinggolna.

⁴Marhitehite hatigoran tahe uhumonna angka na pogos, jala marhitehite hasintongan patingkosonna uhum tu angka na dangol di tano on, jala marhitehite batahi ni pamanganna libasonna tano on, jala marhitehite tondi ni bibirna bunuonna halak parjahat i.

⁵Jala hatigoran do hohos ni gontingna, jala habonaron hohos ni akna.

⁶Disi ma maringan gompul di lambung ni birubiru, jala manggompang babiat di lambung ni haming, jala tampak do anak ni lombu, babiat dohot pinahan na pinamokmok, jala dakdanak na metmet marmahan nasida.

⁷Rap manjampal ma lombu dohot babiat, jala tampak modom angka anakna be, jala panganon ni singa duhutduhut songon dorbial.

⁸Jala posoposo marmeameam di lambung ruang ni ulok dari, jala dakdanak nambura sirang susu mangarorohon tanganna tu ruang ni libe.

⁹Ndang be manjahati manang mangago nasida di sandok dolok habadiaonku, ai gok parbinotoan di Jahowa tano on sogot, songon aek ni laut mangalungkupi tondolanna.

¹⁰Jadi masa ma di na sadari i: Usouso ma angka parbegu di urat ni si Isai, na pinatindang bahen partonggol ni angka bangso, jala pangulonanna do hamuliaon.

¹¹(II.) Dung i di na sadari i: Ulahan ni Tuhan i ma paduahalihon patoltol tanganna tumobus pasipasi ni bangsona, na teba sian Assur dohot sian Misir dohot sian Patros dohot sian Kus dohot sian Elam dohot Sinear dohot sian Hamat dohot sian angka pulo na di laut.

¹²Dung i patindangonna ma sada partonggol di tongatonga ni angka parbegu, jala papunguonna angka na nilele sian Israel dohot angka na mampar sian Juda, papunguonna sian na opat desa ni tano on.

¹³Jadi sohot ma pangiburuon ni Epraim, jala siap angka na manosak Juda. Ndang be iburuon ni Epraim Juda, jala ndang be sosahan ni Juda Epraim.

¹⁴Alai rap habang do nasida tu abara ni halak Palistim tungkan hasundutan, tampak do nasida muse mamupusi angka anak tungkan habinsaran, papatuon ni tanganna Edom dohot Moab, jala pinompar ni Amon marpandapotan tu nasida.

¹⁵Jala hona toru ni Jahowa solok ni laut Misir, jala ondamhononna tanganna dompak

batang aek i marhitehite parpiar ni murukna, jala bagionna gabe pitu sunge, asa dapot hatariparan marhitehite sipatu.

¹⁶Jadi adong ma dalan na bolon sada di pasipasi ni bangsona na teba sian Assur, songon di Israel uju di ari haruruarna sian tano Misir.

12¹ (I.) Jadi dohononmu ma di ari na sasada i: Mauliate ma ahu tu ho, ale Jahowa, ala dirimasi ho ahu, alai nunga marpamuati rimasmu, jala nunga diapuli ho ahu.

²Ida ma, Debata do hatuaonku, Ibana huhaposi, jadi ndang mabiar ahu, ai Tuhan Jahowa do hagogoonku dohot pujipujianku dohot manjadi hatuaon di ahu.

³Jadi marlas ni roha hamu manahui aek sian mual ni hatuaon.

⁴Jadi dohononmuna ma di ari na sasada i: Puji hamu ma Jahowa, jala jou hamu ma goarna, pabotohon hamu angka jadijadianna di tongatonga ni angka bangso, jamitahon hamu goarna na timbul i.

⁵Endehon hamu ende pujipujian tu Jahowa, ai nunga dijadihon halongangan, sibotoon ni liat portibi on sogot.

⁶Marolopolop jala mariaia ma ho, ale isi ni Sion, ai timbul do di parsitonganmi na badia ni Israel.

13¹ On ma pangungkapon taringot tu
uhum madabu tu Babel na niida ni si
Jesaya, anak ni si Amos.

² (I.) Di atas dolok na sae ma patindang
hamu partonggol, pangiar hamu ma soara
mandok tu nasida, hiraphon hamu ma tangan,
asa dibongoti nasida bahal ni raja angka na
marhuaso.

³ Nunga hutonai angka na huparbadiai,
nunga hujou huhut angka ulubalanku,
angka na ro marolopolophon hatimbulonku
pasonggophon rimashu.

⁴ Tarbege do soara ni hariburon di atas ni
angka dolok, songon soara ni bangso na
balga; soara ni hagunturon ni angka harajaon
ni parbegu na marluhut i; Jahowa Zebaot
maningkir parangan tu hamusuon.

⁵ Angka na ro sian luat na dao, sian ujung ni
langit, Jahowa udur dohot angka parhobas ni
murukna laho maniaphon sandok luat i.

⁶ Manganguhi ma hamu, ai nunga jonok ari
ni Jahowa; ro do ibana songon hasiapon sian
pargogo na so hatudosan.

⁷ Dibahen i mandate ma saluhut tangan, jala
malala ateate ni sandok jolma.

⁸ Jadi tarsonggot ma nasida, songgop ma tu
nasida hagogotan dohot pambebeon, angka
hitir do nasida, songon boruboru na tumiop
siraraisan; sai masipanotnotan do nasida,
songon gara do bohinasida i.

⁹(II.) Ida ma, sogir situtu do haroro ni ari ni Jahowa, jala marpiarpiar rimasna mambahen halongonan tano i, jala siaphononna sian i angka pardosa.

¹⁰Ai angka bintang di langit ro di bintang poriamana ndang be marsinondang, holom do mata ni ari di habibinsarna, jala ndang be marsinondang ia bulan.

¹¹Jadi luluhononku ma tu isi ni portibi on hajahatonna dohot tu angka parjahat hageduhonna. Pasohotonku ma haginjangon ni angka na ginjang marroha, jala tarjepol bahenonku hajungkaton ni siulahon gogo.

¹²Ummahal bahenonku sada jolma sian sere palangki, jala ummahal sada jolma sian sere na sian Opir.

¹³Dibahen i hutolonku ma langit i, asa munsat tano i sian ingananna marhitehite parpiar ni muruk ni Jahowa Zebaot dohot marhitehite ari panomboon ni rimasna.

¹⁴Jala songon ursa na binuru nasida, jala songon birubiru na so marparmahan. Ganup nasida mulak tu bangsona be, jala maporus be tu luatna.

¹⁵Nasa na dapotsa tullangonna; jala nasa na dapot tartangkup, tihamonna marhitehite podang.

¹⁶Jala rosahanna posoposonasida di adopannasida, pupusanna angka bagasnasida, jala bahenonna na so uhum tu jolmanasida.

¹⁷Ida ma, paheheonku ma dompak nasida halak Madai, angka na so parduli di perak, jala na so mangapian di sere.

¹⁸Angka siornasida mangaragehon dolidoli, jala ndang maralang rohanasida di inaina na marhangoluan, ndang diolani matanasida angka dakdanak.

¹⁹Jadi doshon paniaphon ni Debata di Sodom dohot Gumora paniaphonna di Babel, bungaran ni angka harajaon, hasangapon dohot hamuliaon ni halak Kasdim.

²⁰Ndang be haingananjolma salelenglelengna, jala ndang be ebatanna marsundutsundut, jala ndang be marundungundung disi halak Arab, manang marsaro disi angka parmahan.

²¹Manggompang ma disi angka binatang sian halongonan, jala gok angka sipauk jabunasida, jala maringan disi angka pidong unto, jala marembas disi angka begu nurnur.

²²Jala marauang angka gompul di bagas simagodangnasida, jala ulok naga di bagasan jabu parsantiannasida. Jala jonok nama tingkinasida, jala ndang be tarpaganjang ariarinasida.

14¹(I.) Ai marpamuati di roha ni Jahowa mida Jakkob, jala ulahanna mamillit Israel, pasonang nasida di tanonasida. Sauduran do halak na buro dohot nasida laho marpungu tu pinompar ni si Jakkob.

²Jala boanonnasida ma angka bangso tu inganannasida, gabe pinompar ni Israel nampuna nasida di tano ni Jahowa, bahen angka naposo baoa dohot boruboru; jadi tioponna di habuangan jolma angka na mambuankon nasida jala rajaanna angka sibahen gogo tu nasida.

³Dung i di ari hasonanganmi binahen ni Jahowa sian hangaluton niaemi dohot sian hasusaanmi dohot sian parhianduan na posi, na pinarhatobanna i ho.

⁴Dohononmu ma umpama on taringot tu raja ni Babel: Muba ma sonang ni sibahen gogo i, sohot ma nuaeng pangarupaon.

⁵Nunga diponggolhon Jahowa tungkot ni angka parjahat, tungkot ni angka raja.

⁶Ibana na marpiarpiar mangalingsingi angka bangso, so marpansohotan; na mangaluntak angka parbegu di bagasan rimas marhitehite pangaleleon na so marpansadian.

⁷Sonang jala mangulon nuaeng isi ni liat portibi on, marolopolop do nasida.

⁸Marlas ni roha huhut mida ho angka hau sampinur dohot ares na di Libanon: Olat ni na tunduk i ho, ndang adong be nangkok sitaba hami, ninna.

⁹Pola guntur banuatoru mida ho manjumpangkon ho di harorom. Disunggul dompak ho angka halinu, nasa hambing tunggal ni tano on dipahehe sian habangsanasida, sude raja ni angka parbegu.

¹⁰Saluhut nasida mangalusi, jala mandok tu ho: Dohot do ho hape margale, songon hami, naung doshon hami do ho hape!

¹¹Tuat tu banuatoru do hape hamuliaonmu, hariburon ni parhinaloanmu; gulokgulok hape marpeahan di lagem, jala gulokgulok bulusanmu.

¹²Beha do hadadabum sian banuagingjang, ho ale bintang sidongdong, ho ale anak ni sibuha siang ari! Nunga tartaba hape ho marobo tu tano, ho ale sipatunduk angka bangso.

¹³langgo hatahata ni roham di bagasan mandok: Nangkok ma ahu tu banuagingjang, patimbulonku ma habangsangku di ginjang ni angka bintang ni Debata, jala hundul ma ahu tu dolok parluhutan tungkan utara sahali.

¹⁴Nangkok ma ahu tu atas ni angka ombun, gabe tudoshon na tumimbul sahali ahu.

¹⁵Hape tuat tu banuatoru do ho, tu godung na marimpotimpot.

¹⁶Longang do angka na marnida ho, notnotanna ma ho huhut mandok: On do hape baoa na manggunturi tano on, na manggoari angka harajaon?

¹⁷Naung mambahen liat portibi on gabe halongonan, jala ditabani angka hutana, jala ndang diloas muli angka na tartaban i.

¹⁸Nasa raja ni angka parbegu marpeahan tutup di hamuliaon di bagasan jabuna be.

¹⁹Alai anggo ho tartimpal do dao sian tanomanmu, songon ranting na marambolongan; songon ulos ni angka na rage, angka na tiniham dohot podang, angka na tuat tu godung batu songon bangke na nilutlut.

²⁰Ndang tagamon saparbandaan ho rap dohot nasida, ai nunga diago ho luatmu, jala dibunu ho bangsom. Ndang taringot be salelenglelengna anggo pinompar ni angka parjahat.

²¹Hobas i hamu ma sada pamotongan di angka anakna ala ni hajahaton ni amanasida; tung na so tupa suheonna manang teanonna tano i, manang patoroponna huta paribur portibi on.

²²Ai hehe ma ahu mandopang nasida, ninna Jahowa Zebaot, jala siaphononku sian Babel barita dohot pasipasi, nini dohot nono, ninna Jahowa.

²³Jala bahenonku huta i gabe abalan ni andurian dohot lintonglintong, jala saraonku marhitehite sarasara hasiapon, ninna Jahowa Zebaot.

²⁴(II.) Nunga pola maruari Jahowa Zebaot, ninna: Sai na pasautonku do, songon na husangkap, jala sai na songgop do bahenonku, songon na hutahi.

²⁵Sai na segaanku do Assur di tanongku, jala luntahanku ibana di atas ni angka

dolokku, asa tanggal augana sian nasida, jala munsat rodina sian abarana.

²⁶I do sangkap naung sinangkapna tu sandok tano i, jala i do tangan na toltol dompak sude angka bangso.

²⁷Ai naung sinangkap ni Jahowa Zebaot, tung ise ma na tuk manundati? Jala tanganna na toltoli, tung ise ma na tuk manulakkon?

²⁸(III.) Di taon hamamate ni raja Ahas ro lumbalumbaon:

²⁹Unang tung marlas ni roha ho, ale sandok isi ni Palistim, ala naung maponggol linsinglinsing na mangalinsingi ho, ai ruar do sada libe sian urat ni ulok, jala parbuena gabe naga na habang.

³⁰Jadi singkop sipanganon jumpang angka buhabaju ni na pogos, jala marsonangsonang angka na so marparbuatan hian. Alai anggo uratmi bunuonku do marhitehite haleon, asa marragean angka pasipasim.

³¹Manganguhi ma ho ale pargumbangan! Pangiar ma soaram ale huta! Malala ma ho sandok Palistim! Ai ro do sian utara timus, jala ndang adong na pinjil sian parduaannasida i.

³²Jala tung aha ma alusna tu angka suruan ni bangso parbegu? Nunga pola dipahot Jahowa Sion, asa marhaporusan tusi do angka na dangol ni bangsona.

15¹(I.) Uhum madabu tu Moab. Tongon do borngin i do ditaban Ar-Moab, tung

siap do. Tongon do borngin i do ditaban Kir-Moab, tung siap do.

²Nangkok ma tutu jolma tu joro dohot tu Dibon, huhut tumatangis tumopot sombaon i; manganguhi do Moab di atas ni Nebo dohot Medeba; saluhut ulunasida targorbang, jala saluhut mise digansipi.

³Marulos tangki nasida mardalan di alamanna, manganguhi be do angka na mijur sian tarup dohot sian bonggarbonggar, huhut tumatangis.

⁴Jala manganguhi Hesbon dohot Eleale, tolhas ro di Jahas tarbege soaranasida. Dibahen i mangandungi angka parangan ni Moab, ai maras do rohana.

⁵Manganguhi do rohangku taringot tu Moab, tolhas ro di Soar, lembu sitolutaon, angka na maporus sian nasida, ai sai tumatangis manangkohi nangkohon Luhit, ai di dalan tu Horonaim tarbortik do angguhangguk ni hasiapon.

⁶Ai nunga marsik angka batang aek sian Nimra, nunga malos duhutduhut, siap suansuanan, ndang adong be ingkau rata.

⁷Dibahen i tagirtagir ni na niomonasida dohot ugasan na pinajopna tu bariba ni batang aek, parbalohan tungan Moab ditaruhon.

⁸Ai humaliang sandok Moab tarbege soara angguk, tolhas ro di Eglaim dohot Beerelim tarbege partangisnasida i.

⁹Ai gok mudar angka aek Dibon, ganda sian i dope uhum bahenonku tu Dimon, angka na malua sian Moab, singa i manganhon, ro di pasipasina isi ni tano i.

16¹(I.) Tongos hamu guguan birubiru di pangarajai ni luat sian Sela, mamolus sian halongonan, sahat tu dolok ni boru Sian.

²Jadi doshon pidong na marheparhepar, doshon asar na sinegaan do angka boru ni Moab sogot di hatariparan Arnon.

³Boan hamu tahi, dabu hamu uhum, bahen parlinggomanmu di hos ni ari, songon bornginna i; tabunihon angka na nilelean, unang jehehon na maporus!

⁴Sai sorang tu ho ma angka na marserak sian ahu; ho ma haporusanna, ale Moab maradophon partaban! Ai nunga siap pangarupa, marujung ia hasiapon, nunga lengse pangaluntak sian tano i.

⁵Jadi hot ma sada habangsa marhitehite asi ni roha, jala marhabangsa di atasna di bagasan hasintongan di undungundung ni si Daud, ibana na mandabu uhum dohot na mangalului uhum dohot na manilu hatigoran.

⁶(II.) Nunga hubege hami haginjangon ni Moab, na torbang situtu haginjangonna, hajengkelonna dohot hajungkatonna, hata tealna pe angka na so marnosan.

⁷Dibahen i laos Moab sama Moab masitangisan, saluhut nasida tumatangis

taringot tu angka turanggong ni huta Kir Hareset, tongon tahe nunga tarjimpot nasida.

⁸Ai nunga tarulang angka ladang di Hesbon, nang hau anggur di Sibma, mabuk do angka raja ni parbegu dibahen parbuena, angka na tolhas ro di Jaser, lilu tu halongonan manginsir do rantingna, pola taripar laut.

⁹Dibahen i tumatangis ahu songon partangison ni Jaser, ala ni hau anggur di Sibma; pabornohonku do ho dohot ilungku, ale Hesbon dohot Eleale, ai toletole ni hamusuon madabu tongon di gotilon parbue ni hau anggur dohot eme.

¹⁰Jadi sohot ma las ni roha dohot olopolop sian hauma sigotilon i, jala ndang marlas ni roha manang marolopolop di angka porlak anggur. Nandang adongjolma pangilang, angka na mangilang anggur di angka pangilangan, nunga hupasohot angka suraksurak.

¹¹Dibahen i sai patugorok do butuhangku taringot tu Moab, songon soara ni hasapi, nang rohangku di bagasan taringot tu Kir Hareset.

¹²Jadi ia dung patar hamamaras ni Moab di angka robean, jala ditopot habadiaonna laho martangiang nian, hape ndang marniula.

¹³On do hata na nilumbahon ni Jahowa tu Moab sian nahinan dope.

¹⁴Alai anggo nuaeng songon on do didok Jahowa: Di bagasan tolu taon on, songon taon ni sipangan gaji, marlea ma hamuliaon ni

Moab ro di hinatoropna situtu, jadi pasipasina na metmet nama na tading i ndang margogo.

17¹ (I.) Uhum madabu tu Damaskus. Ida ma, sai na meser do Damaskus sian tongatonga ni angka huta, gabe timbunan batu.

² Tarulang ma angka huta Aroer, asa angka dorbias nampunasa, angka na marudam disi, so adong na mangalele.

³ Jadi pesan ma benteng sian Epraim dohot harajaon sian Damaskus, jala pasipasi ni Ram doshon hamuliaon ni halak Israel, ninna Jahowa Zebaot.

⁴ (II.) Pesan ma di ari na sasada i hamuliaon ni Jakkob, jala merus hinamokmok ni dagingna.

⁵ Jala songon pangalaho ni halak na papungu eme na jongjong di gotilon, jala tanganna manggotil angka biur, jala songon na manjomputi biur di rura Repaim.

⁶ Jala tading disi angka turiang, songon na mangkukur parbue ni hau jetun, dua tolu saludang apala di punsuna sahali, opat lima di dangka ni hau na marparbue i, ninna Jahowa, Debata ni Israel.

⁷ Di ari na sasada i ma tailihonon ni jolma ma sitompa ibana, jala berengon ni matana ma na badia ni Israel.

⁸ Jala ndang be tailihononna angka langgatan, jadijadian ni tanganna, jala ndang

be berengonna angka sombaon manang ganaganaan na pinauli ni jarijarina.

⁹Di ari na sasada i ma hutanasida angka na gonting i doshon ladang dohot doshon tombak na tinadingkon ni halak maradophon halak Israel manjadi halongonan sambing.

¹⁰Ai nunga dihalupahon ho Debata ni hatuaonmu, jala ndang diingot ho dolok batu haporusanmu na gonting i. Dibahen i nunga disuan ho angka porlak hasoloan, jala dilopokkon ho angka ranting na pulik marga tusi.

¹¹Di ari pangalopokkonmu manjadi do nian dibahen ho, jala manogotna i marmutihi suansuananmu dibahen ho, hape di ari gotilon jea dohot haporsuhon martibalan jambarmu.

¹²(III.) Jea ni hariburon ni torop angka bangso! Songon parhasak ni angka laut pardoromnasida! Jala parhasak ni angka bangso, songon pardorom ni angka batang aek na doras pardoromnasida i.

¹³Tongon do, songon pardorom ni angka aek magodang, pardorom ni angka bangso; alai mangonai hata ibana tusi, jadi dao ibana maporus, jala mapurpur, songon rapanrapan ni angka dolok maradophon alogo, jala songon halisungsung maradophon habahaba siappalautus.

¹⁴Marhira bodari, ida ma, masa hasonggoton, ndang dope torang ari, hape ndang adong be disi, i ma jambar ni

angka na mandobo hita, jala parsorion ni angka na mamupusi hita.

18¹ (I.) Marjea ma ho, ale tano na marlinggoman pahebaheba, na di bariba ni angka batang aek Kus.

²Na paborhat angka suruan tu laut di bagasan solu hotang di atas aek jala mandok: Laho ma ne hamu angka suruan na pantas tu bangso pardaging na ganjang jala na pinupusan, tu bangso na sumogir marbarita tu na dao, i ma bangso sigodang adat, jala guru dokna angka batangaek mangalantap di tanona.

³Sude hamu ale isi ni portibi on dohot isi ni tano on, molo dipatindang tonggol di atas ni angka dolok, sai bereng hamu ma i! Jala molo dipalu sarune, sai tangihon hamu ma i!

⁴Ai songon on hata ni Jahowa tu ahu: Sai hohom Ahu huhut paidaidahon di bagasan ingananku, songon parngiar ni ari uju di logona, songon ombun manorop di hinamohop ni gotilon.

⁵Ai di jolo ni gotilon, molo sun marurus bungana, jala gabe biur maraek susu bunga i, disi ma sabionna angka lailai dohot sasabi, jala tallihanna angka rantingna, laos bolongkononna do.

⁶Rap tartading do i di pidong angka na di dolok dohot di pinahan ni tano on, asa mansusuari disi angka pidong panoro, jala marudam disi nasa dorbiala ni tano on.

⁷Di tingki na sasada i ma tarboan angka silehonlehon tu Jahowa Zebaot, sian bangso pardaging na ganjang jala na pinupusan; sian bangso na sumogir marbarita tu na dao, bangso sigodang adat jala guru dokna, angka batang aek mangalantap di tanona, taruhononna tu inganan ni goar ni Jahowa Zebaot, tu dolok Sion.

19¹(I.) Uhum madabu tu Misir: Ida ma, Jahowa marhureta di atas sada ombun na doras laho manopot Misir, jadi maporus ma angka ajiajian ni Misir maradophon ibana, jala malala roha ni halak Misir di bagasan.

²Jadi patubionku ma Misir dompak Misir, asa laos nasida sama nasida marmusu, na mardongan dohot na maraleale, huta dompak huta, harajaon dompak harajaon.

³Jala rumar bahenonku tondi ni halak Misir di bagasan, jala muntul tahina i bahenonku, jadi usoso ma nasida tu angka ganaganaan, parsibalik mata, hasandaran dohot pangarunding.

⁴Pasahatonku ma huhut halak Misir tu tangan ni tuan na posi maruhum, jala raja na murhing mangarajai nasida, ninna Tuhan Jahowa Zebaot.

⁵Jadi marsik ma angka aek sian laut, marsik dohot batang aek i gabe mahiang.

⁶Jadi angir ma angka sunge, rejet jala mahiang angka batang aek di Misir, malos ma angka arung dohot tolong.

⁷Hasang ma angka jampalan martopihon batang aek, jala nasa panaburan boni di topi ni batang aek i malos do, rahar jala ndang gabeak.

⁸Jadi marhoi ma angka pardengke, jala marsak sude angka na mandanggurhon hailna tu batang aek i, jala halak angka na manampakhon jalana tu laut, maras do.

⁹Tarurak ma jolma angka na martonun hori na sinuri dohot dagangan na bontar.

¹⁰Jadi marpongolan ma angka tiang ojahan di nasida, tarjimput situtu ma roha ni sude jolma sipangan gaji.

¹¹(II.) Tung angka na oto sambing do angka raja di Zoan, angka panuturi na bisuk ni raja Firaun pe, tung na oto do tahina i. Beha ma partorang ni pandokmuna tu raja Firaun: Anak ni halak na bisuk do ahu, anak ni raja sian na robi.

¹²Didia do nuaeng angka na bisukmu, asa dipabotohon nasida nian tu ho manang aha sangkap ni Jahowa Zebaot dompak Misir.

¹³Nunga manjadi na oto angka pangarajai di Zoan, nunga tarpaoto angka pangarajai sian Nob, jala lilu sandok Misir dibahen jujungan ni angka margana.

¹⁴Nunga diusehon Jahowa tu bagasan nasida sada tondi ni hageduhon, asa dililuhon nasida sandok Misir di nasa jadijadianna, songon siparmabuk na manggalumangi utautana.

¹⁵Jadi ndang adong be manjadi ulaon di Misir, na pinauli marulu manang marihur, marranting ni harambir, manang marlili.

¹⁶Di ari na sasada i doshon inaina halak Misir, angka hitir jala tahuton maradophon pangondam ni tangan ni Jahowa Zebaot, na niondamhonna dampak nasida.

¹⁷Jala panonditnonditon Misir mida tano Juda, nasa na marningot disi tarsonggot alani, dibahen sangkap ni Jahowa Zebaot naung sinangkapna dampak nasida.

¹⁸(III.) Di ari na sasada i marpangkuling Kanaan ma lima huta di tano Misir, jala marmangmang tu Jahowa Zebaot; huta nasada targoar Ir Heres.

¹⁹Di ari na sasada i adong sada langgatan di Jahowa di tongatonga ni tano Misir, jala sada tiang parningotan di Jahowa mardonokkon partalpahanna.

²⁰I ma gabe tanda dohot sitindangi di Jahowa Zebaot di tano Misir, ai manganguhi ma nasida tu Jahowa maradophon angka pangarupa, jadi tongosonna ma di nasida sada sipalua dohot partogi, asa dipalua nasida.

²¹Jadi papataron ni Jahowa ma dirina tu halak Misir, jala tandaon ni halak Misir Jahowa di ari na sasada i, jala pelehononnasida angka pelean sipotongon dohot sipanganon, jala marbagabaga nasida tu Jahowa, jala gararonna do.

²²Jadi posi pe paminsang ni Jahowa di halak Misir, alai pamalumonna muse; jadi mulak ma nasida tu Jahowa, gabe marpamuati rohana tu nasida, jala pamalumonna nasida.

²³Adong ma di ari na sasada i sada dalam balobung sian Misir tu Assur, jadi ro ma halak Assur tu Misir, jala halak Misir tu Assur, rap marsomba ma halak Misir dohot halak Assur tu Jahowa.

²⁴Jadi patoluhon ma halak Israel di ari na sasada i rap dohot halak Misir dohot halak Assur gabe pasupasu diparsitongaan ni tano on.

²⁵Ai pasupasuon ni Jahowa Zebaot ma nasida, dohononna ma: Pinasupasu ma hamu ale halak Misir bangsongku, jala jadijadian ni tanganku, hamu ale halak Assur, jala parjambaranku anggo hamu ale halak Israel.

20¹(I.) Di taon haroro ni si Tartan tu Asdod, sinuru ni si Sargon, raja sian Assur, asa dimusui jala dipapatu Asdod.

²Hata ni Jahowa uju i marhitehite Jesaya, anak ni si Amos, songon on: Laho ma ho, jala tanggali ma abit tangki sian gontingmu, jala tanggali ma sipatum sian patmu! Jadi dibahen ma songon i, laos mardalan marsaemara, jala ndang marsipatu.

³Jadi ninna Jahowa ma: Songon pardalan ni naposongku Jesaya marsaemara, jala ndang marsipatu, pola tolu taon lelengna, bahen

tanda dohot halongangan do i taringot tu na masa sogot tu Misir dohot tu Kus.

⁴ Songon i ma onjaronjaron ni raja sian Assur angka na tinangkup sian Misir dohot angka na tarbuang sian Kus, angka dolidoli dohot angka na ubanon marsaemara, jala ndang marsipatu, jala manangkas ombaombana, gabe haurahon ni halak Misir.

⁵ Jadi tarsonggot ma nasida, jala maila maradophon Kus haposannasida dohot maradophon Misir asangasangnasida.

⁶ Jadi dohonon ni isi ni pulopulo ma di ari na sasada i: Ida ma, songon i do hape pangalaho ni jolma haposanta, haporusanta nasailaon, mangido panumpahion nian, asa malua hita maradophon raja ni Assur; jala songon dia ma tarbahen hita malua?

21 ¹ (I.) Uhum madabu tu halongonan martopihon laut. Songon pansedai ni habahaba di dangsina, harorona sian halongonan sian luat na sogir.

² Sada pangungkapon na dokdok dipapatar tu ahu: Mandobo pandobo i, martaban partaban i! Nangkok ma ho, ale Elam! Manosak ma ho, ale Madai! Pasohotonku ma sude hoihoi.

³ Dibahen i gok haberniton do angka gontingku, mangae do ahu, songon pangae ni boruboru na naeng mangintubu; mangirput ahu umbegesa, angka hitir ahu marnidasa.

⁴Bukbak ateatengku, pola angka hitir ahu sian songgotna, borngin hariburunku gabe jeangku dibahen.

⁵Pinadiri ma sada meja, marhal ma parhali, mangan minum ma! Hehe ma hamu angka raja, hapuri hamu ma lombulumbu.

⁶Ai songon on didok Tuhan i mandok ahu: Laho ma ho, dokkon ma parhal, asa dipaboa na niidana.

⁷Jadi diida ma sahoron baoa parsihundul marduadua, sahoron halode, sahoron unto, mansai tangkas situtu ma ibana mananginangi.

⁸Dung i joujou ibana songon singa: Sai jongjong di parhalan do ahu ale Tuhan manipat ari, jala sai tindang di gansingku do ahu manipat borngin.

⁹Jadi ida ma, ro do sahoron baoa, parsihundul marduadua, na mangalusi, mandok: Nunga tartaban, nunga tartaban Babel; jala nunga diparumpak sude angka ajaajian pinardebatanasida i.

¹⁰Oe ho na hudegedege, jala anak ni pardegeanku naung hubege sian Jahowa Zebaot, Debata ni Israel, i do na hubaritahon tu hamu.

¹¹(II.) Uhum madabu tu Duma: Joujou do sian Seir tu Ahu: Ale parjaga, nunga beha borngin i? Ale parjaga, nunga beha borngin i?

¹²Ninna parjaga i ma: Nunga torang ari, huhut dope borngin. Molo sapala manangkasi

hamu, tangkasi hamu ma, dung i mulak ma hamu tuson.

¹³(III.) Uhum madabu tu Arab: Di bagasan tombak ni Arab ma marmalam hamu, ale angka partigatiga pansar sian halak Dedan i.

¹⁴Jumpangkon hamu aek tu na mauas, hamu isi ni luat Tema! Tomutomuhon hamu ma roti tu halak na maporus i.

¹⁵Ai maradophon angka podangnasida maporus, maradophon podang na sinintak, dohot maradophon sior na tinangging, dohot maradophon parmusuon na sobu.

¹⁶Ai songon on didok Tuhan i tu ahu: Di bagasan sataon dope, songon angka taon ni anak gajian, pesan ma sandok hamuliaon ni Kedar.

¹⁷Jala lam tu otikna di bilangan ni pasipasi ni angka pande manior, angka anak na begu sian Kedar, ai Jahowa, Debata ni Israel mandok songon i.

22¹(I.) Uhum madabu tu rura paralatan: Aha di ho umbahen tung manaek sandok ho, tu angka tarup?

²Ho ale huta na gok hariburon, na rame, benteng parolopolop! Ndang manang tinampul ni podang, manang mate tongtang angka na matem.

³Luhut angka partogim rap maporus do, nunga mangoloi rante on nasida so marsior; saluhut angka na dapot sian ho rap tarrante do, dao do nasida maporus.

⁴ Dibahen i hudok: Padao hamu pamerengmu sian ahu, asa tumatangis situtu ahu; unang datdati hamu mangapuli ahu taringot tu hasiasiap ni boru ni bangsongku.

⁵ Ai ari hagunturon, hasiapon dohot hasonggoton do na pinamasa ni Tuhan Jahowa Zebaot di rura paralatan; dilohai parik, gabe marsaringar angguhangguk sian dolok.

⁶ Nunga pola disintak Elam parsumbiaan mardongan hureta dohotjolma parhantarhantar nang angka parsihundul, jala nunga pola mamontar lombulumbu ni Kir.

⁷ Jadi gok hureta ma ruram, angka na dumenggan i, jala dirongom angka parsihundul do bahal i.

⁸ Jadi dipatait halak ma partanobatoan ni Juda gabe mangaranapi ho di ari na sasada i dompak angka sinjata di bagasan bagas parsinjataan na di tombak.

⁹ Jadi diida hamu angka rigat ni huta ni si Daud, ai torop do angka i, gabe dipapungu hamu angka aek ni ambar partoru.

¹⁰ Dung i dibilangi hamu angka bagas di Jerusalem, jala diloha hamu angka bagas i laho pagontingkon parik i.

¹¹ Jadi dibahen hamu sada lintong di holangholang ni parik na dua i bahen parpeopan ni angka aek sian ambar nahinan Alai ndang manaili hamu dompak ibana na

mambahensa, jala ndang dibereng hamu ibana na jumadihon sian narobi.

¹²Jadi joujou ma Tuhan Jahowa Zebaot di ari na sasada i mambahen partangison dohot parangguhon dohot hapalpalon dohot parhohoson tangki.

¹³Hape ida ma, ianggo nuaeng: Holan las ni roha dohot parolopolopon masa mamotongi lombu dohot manamboli birubiru, mangan juhut dohot minum anggur, lam ninna dope: Mangan jala minum ma hita, ai marsogot do hita mate.

¹⁴Alai nunga dibortikkon Tuhan Jahowa Zebaot hian tu pinggolhu: Tung na so tupa sesaon hajahatonmunaon, paima mate hamu, ninna Tuhan Jahowa Zebaot.

¹⁵(II.) Songon on do didok Tuhan Jahowa Zebaot: Laho ma ho mandapothon wakil on, i ma si Sebna pangaramoti ni bagas i dok ma tu ibana.

¹⁶Aha di ho dison, jala ise pinangasahonmu dison umbahen dituhil ho dison tanomanmu? Tung tama ma ho manuhil tanomanmu di ginjang, mangaruangi ingananmu di bagasan dolok batu.

¹⁷Ida ma sampathonon ni Jahowa ma ho, songon panampathon ni halak na gogo jala panguspangusonna ma ho.

¹⁸Lulunonna ma ho tutu, songon rago tongon ragohononna ho tu tano na dao, jala na so marparbalohan, disi ma ho mate, jala

disi ma angka hureta hatongamonmu, ho ale haurahon ni bagas ni tuanmu.

¹⁹Dung i onjarhononku ma ho sian tohonanmu, jala tulingkononna ho sian hajongjonganmu.

²⁰Jadi jouonku ma di ari na sasada i naposongku si Eliakim, anak ni si Hilkia.

²¹Jala alithononku ma tu ibana pangkeanmu, jala hohoshononku tu ibana hohosmi, jala pasahatonku pangarajaionmu tu tanganna, asa ibana gabe ama di isi ni Jerusalem dohot di bagas ni Juda.

²²Jala ampehononku anakkinsu ni bagas ni si Daud tu abarana, asa ibana mangungkap, jala ndang adong na tuk mangkinsu, jala ibana mangkinsu, gabe ndang adong na tuk mangungkap.

²³Jala pantikhononku ibana songon labang di inganan na hot, asa gabe habangsa hamuliaon ibana di bagasan bagas ni amana.

²⁴Asa hot dijujung ibana saluhut hasangapon ni bagas ni amana, angka dangka dohot tunas, saluhut ulaula metmet, sian ulaula panginuman ro di sude ulaula parhinaloan.

²⁵Di ari na sasada i, ninna Tuhan Jahowa Zebaot ingkon buaton ma labang na pantihi di inganan na hot, jala umpaton jala madekdek; jala siap ma angka na mangihut tu ibana, ai Jahowa do mandok.

23

¹(I.) Uhum madabu tu Tirus:

Manganguhi ma hamu, ale angka isi

ni parau Tarsis, ai nunga siap huta i, ndang adong be labuan hamulian! Sian tano ni halak Kitim tarbortik barita i tu nasida.

²Hohom ma hamu ale isi ni pulo! Angka partigatiga sian Sidon na marparau di laut mangisi ho.

³Ai marhitehite laut godang tarboan tu ho boni ni Nil dohot eme na ginotil martopihon sunge, jadi ho hira onan ni angka bangso.

⁴Maila ma ho ale Sidon, ai ninna laut i, huta na gonting di laut i songon on: Ndang mangae posoposo ahu, jala ndang manubuhon ahu, manang pagodanggodang dolidoli manang namarbaju.

⁵Molo tolhas barita i tu Misir, tarsonggot ma nasida umbege barita sian Tirus.

⁶Taripar ma hamu tu Tarsis, manganguhi ma hamu ala isi ni pulo i!

⁷Tung i do hutamuna na marhariburon i, na marmula di angka ari narobi? Boanon ni patnasida sandiri do nasida maisolat tu na dao.

⁸Ise naung sumangkap songon i taringot tu Tirus, sisagi tumpal raja do angka saudagar disi, jala partigatigana angka na sumangkap di tano on.

⁹Jahowa Zebaot tahe sumangkapi songon i, asa mangaramuni nasa hinauli ni haginjangon, laho pajimputhon nasa halak na sangap di tano on.

¹⁰Pabinsat ma tanomi, songon batang aek Nil, ho ale boru Tarsis! Nandang adong be disi hohos.

¹¹Nunga dipatoltol ibana tanganna tu atas laut, mangkutol angka harajaon, nunga martona Jahowa taringot tu Kanaan naeng maniaphon angka bentengna.

¹²Jala ninna do: Nandang be marolopolop ho tu joloan on, ho ale boru Sidon na nirupa! Hehe ma ho laho taripar tu Kitim! Disi pe, ndang tagamon sonang ho.

¹³Ida ma, tano ni halak Kasdim, i ma bangso na so adong hian, na pinaojak ni Assur di angka isi ni halongonan. Pajongjong palaspalas bahen parhalanna nasida, diloha nasida do bagasnasida na bolon i mambahen parturanggongan sian i.

¹⁴Mangangguhi ma hamu ale angka parau Tarsis, ai nunga siap bentengmuna i.

¹⁵(II.) Dung i di ari na sasada i lupa ma Tirus pitupulu taon, songon leleng ni ariari ni sada raja. Alai dung salpu na pitupulu taon i songgop ma tu Tirus hombar tu ende ni sibabijalang.

¹⁶Sintak ma hasapi, liati ma huta i ale sibabijalang naung hinalupahon! Padenggan ma pamiltikmu jala padeak ende, asa diingot halak ho muse.

¹⁷Ai dung marujung sipitupulu taon i, ebatan ni Tuhan Jahowa ma Tirus i, asa mulak tu ibana upa sibabijalang i, gabe maruhum na

jat tu saluhut harajaon ni tano on, angka na di sandok portibi on.

¹⁸Alai badia di Jahowa do parboniagaonna dohot labana sian tigatiga, ndang pagukguhonna manang tabunihononna, angka na maringanan di jolo ni Tuhan Jahowa nampuna labanasida bahen sipanganon maradu mahapan, jala maruli pangkean na jagar.

24¹(I.) Ida ma, palangaon jala pasiapon ni Jahowa ma tano i, jala balikkononna ma sisikna, pasiaphon angka pangisina.

²Jala doshon halak natorop ma malim, doshon naposo tuanna, doshon boruboru sonduhan soranganna, doshon panuhor panggadis, doshon parsambut parsambutan, doshon pangurang pangurangan.

³Langa situtu ma tano i jala pinupusan, ai Jahowa do mandok hata on.

⁴Majal jala tarulang ma tano i, majal jala tarulang liat portibi on; maras ma dohot angka na timbul sian bangso i di tano on.

⁵Jala ramun tano i dibahen pangisina, ai nunga dilaosi nasida angka patik, jala diuba hasomalan, jala diose padan na salelenglelengna.

⁶Dibahen i siap do tano i gagaton ni torutoru jala manginona tu angka pangisina; dibahen i masoksok angka isi ni tano i, jala otik namajolma teba.

⁷ Marsik do tuak anggur, malos ia hau anggur, marhoi be sude angka na las roha na sai laon.

⁸ Mansohot do las ni roha binahen ni arbab! Mansadi hariburon ni angka parolopolop; mansohot las ni roha binahen ni hasapi.

⁹ Ndang be marende nasida uju minum anggur, paet do tuak na pang di roha ni halak na manginumsa.

¹⁰ Nunga maloha huta na langa i, hinsu be sude angka bagas, ndang be habongotan.

¹¹ Masa angguhangguk di angka alaman ala hurangan anggur; nunga pesan nasa las ni roha, nunga mapurpur nasa las ni roha ni tano on.

¹² Turanggong nama teba di huta i, jala tahaonna ma angka pargumbangan i.

¹³ Ai masa ma di parsitongaian ni tano i, di tongatonga ni angka bangso, songon pangkuturon di hau jetun, songon pamutihon, ia dung salpu gotilon.

¹⁴ (II.) langgo nasida, pangiaron nasida ma soaranasida, marolopolop mida hamuliaon ni Jahowa, marolopolop ma angka nasida sian laut.

¹⁵ Dibahen i pasangap ma Jahowa, hamu angka isi ni tano, habinsaran, hamu angka isi ni pulo di laut goar ni Jahowa, Debata ni Israel.

¹⁶ Sian ujung ni tano on hubege hami angka ende pujipujian: Hamuliaon ma di partigor!

Jadi ningku ma: Ngalutna i di ahu, ngalutna i di ahu! Jea tonahon! Manjehehon angka parjehe, tongon manjehehon angka parjehe.

¹⁷Hasogiron dohot godung dohot jorgong songgop tu ho ale isi ni tano i!

¹⁸Ai tung sura maporus manang ise maradophon soara ni hasogiron, madabu do ibana tu godung; jala manang ise na manaek sian godung, dapot do ibana di jorgong. Ai nunga buha angka pandiloan di langit jala humuntal angka ojanan ni tano on.

¹⁹Marsidomdom situtu ma ianggo tano i jala angka rigat situtu, gunsang situtu ma tano i.

²⁰Lalolalo situtu ma tano i, songon halak na mabuk, jala mambalambal songon geanggeang, ai manginona tu ibana pangalaosina, gabe tinggang, jala ndang tarbahensa be hehe.

²¹Jadi di ari na sasada i marlulu ma Jahowa dompak parangan angka na ginjang marroha di haginjangonna dohot dompak angka raja ni tano on di atas tano on.

²²Rap paluhutonna ma nasida tarrante tu bagasan godung, jala hurungkononna nasida tu bagasan hurungan, dung i di laonlaon ni ari marlulu muse ibana dompak nasida.

²³Jadi maila ma bulan, jala tarurak mata ni ari, ai Jahowa Zebaot Raja di dolok Sion dohot di Jerusalem, jala hamuliaon do di adopan ni angka sintuana.

25¹ (I.) Ale Jahowa, ho do Debatangku, sai patimbulonku do ho, pujionku do goarmu, ai nunga mambahen halongangan ho; angka sangkapmu sian narobi pe na bonar jala na sintong do.

² Ai nunga gabe pantil batu huta i dibahen ho, huta na gonting i gabe maloha; bagas bolon ni angka paisolat malua sian huta i, na so sipaulion be salelenglelengna.

³ Dibahen i ingkon pasangapon ni bangso na marhuaso i ho, jala ingkon habiaran ni huta ni angka bangso pandobo ho.

⁴ Ai ho do partanobatoan ni na dangol, partanobatoan ni na pogos di hagogotanna; haporusan maradophon udan tipotipo, parlinggoman maradophon ari na marngiarngiar, ai doshon udan tipotipo tu dorpi parlongos ni muruk ni halak sibahen gogo.

⁵ Songon ari na marngiarngiar di tano bangkalbangkal dipaonjap ho hariburon ni halak na buro; morpo do ari na marngiarngiar marhitehite linggom ni ombun, ingkon songon i pasohotonmu ende olopolop ni angka sigostang botohon.

⁶ (II.) Jadi padirion ni Jahowa Zebaot ma di saluhut bangso sada haroan di dolok on, haroan na talmis, haroan sian tuak anggur naung leleng, sian sipanganon na hojal, sian angka anggur na galia na pita.

⁷ Dung i pasisionna ma di dolok on hirehire na hinungkuphon tu saluhut angka bangso dohot pangkuphupi na hinungkuphon tu saluhut angka parbegu.

⁸ Bondutonna ma hamatean salelenglelengna jala apusan ni Tuhan Jahowa ma iluilu sian nasa bohi, jala padaonna ma haurahon ni bangsona di sandok tano on, ai nunga Jahowa mandok i.

⁹ Jadi dohonon ni halak ma di ari na sasada i: Ida ma on do Debatanta, na itahaposi, na mangurupi hita, dison do Jahowa na itahaposi. Marolopolop ma hita jala marlas ni roha mida hatuaonna i.

¹⁰ Ai maradian di dolok on ma tangan ni Jahowa, alai anggo Moab degedegeonna ma tu toru ni patna, songon durame na niluntak tu partangkalan.

¹¹ Jadi pahembangonna ma tanganna tu tongatonganasida, songon pangerbang ni tangan ni parlange laho marlange. Alai anggo ibana pajimputonna ma haginjangonnasida ro di sipaotooto angka na binahen ni tanganna.

¹² Panepneponna ma partanobatoanmu dohot angka parik na gonting, pajepolonna do nasida mangonjarhon tu tano, pola tung marguluhon orbuk.

26¹ (I.) Di ari na sasada i endehonon ni halak ma ende on di luat Juda: Adong do huta na gonting di hita, hatuaon do dibahen parik dohot partanobatoan.

² Ungkap hamu ma angka harbangan, asa bongot bangso na tigor, na marsihohot maniopi haburjuon.

³ Hombar tu sangkap na ojak do dipaian ho dame, dame ma tutu, ai marnalom ni roha mida ho do ibana.

⁴ Marhaposan tu Jahowa ma hamu tongtong, ai Tuhan Jahowa do dolok batu ro di salelenglelengna.

⁵ Ai ibana pajimput angka isi ni habuntulon, dipajepol do huta na hinsat i, ditimpalhon do i tu tano, direongkon tu orbuk.

⁶ Asa diluntakluntak pat, angka pat ni halak na dangol dohot langka ni halak na pogos.

⁷ Dalan ni halak na tigor do angka hatigoran, sai tigor do dasingonmu dalan ni partigor i.

⁸ Nang di dalan ni angka uhummu, sai marhaposan tu ho do hami, ale Jahowa! Marlas ni roha hami mida goarmi dohot mida pujipujian tu ho.

⁹ Sai dihalungunhon rohangku do ho bornginna i, tondingku di bagasan pe sogot do ho dilului. Ai disi mangonai angka uhummu tu tano i, gumuruhon hatigoran ma isi ni portibi on.

¹⁰ Nang jumpangan asi ni roha parjahat i, ndang gumuruhon hatigoran ibana; sai manjahati ibana di tano habonaron, jala ndang ditailihon hamuliaon ni Jahowa.

¹¹ Ale Jahowa, nunga timbul nian tanganmu, hape ndang diida nasida; idaonnasida do

sogot hamuruhonmu humongkop bangsom
jala tarurak; nang api panganonna do angka
alom.

¹²Alai anggo di hami, ale Jahowa hadameon
do paradeonmu, ai nasa ulaonnami pe, ho do
mangulahon di hami.

¹³(II.) Ale Jahowa Debatanami, atik pe
angka tuan na asing mangarajai hami di
balik ni ho, sai baritahononnami: Do goarmu
marhitehite ho.

¹⁴Ndang mulak mangolu angka na mate,
ndang hehe angka halinu, ala marlulu ho laho
maniaphon nasida, jala dipidomhon ho do
nasa parningotan di nasida.

¹⁵Nunga ditambahi ho bangso i, ale Jahowa,
nunga ditambahi ho bangso i, nunga marmulia
ho, nunga dipalantas ho nasa parbalohan ni
tano i.

¹⁶Ale Jahowa, jumpa hagogotan dilului
nasida ho, ia mangonai pinsangpinsangmu tu
nasida, ubitubit ma nasida martangiang.

¹⁷Songon parompuan na gabegabean, nunga
jonok hasasangana mangae posoposona,
mangangguhi ma ibana di habernitonna i,
laos songon i do hadadaonami sian bohim ale
Jahowa.

¹⁸Gabegabean do nang hami, mangae
posoposo do hami, hape hira alogo do na
hutubuhon hami; ndang tarpatupa hami
hatuaon di tano i, jala dung sahat hutubuhon
hami isi ni portibi on.

¹⁹ Mangolu do ianggo angka na matem, hehe do muse bangkengku. Ngot ma hamu jala marolopolop hamu angka isi ni orbuk? Ai nambur ni angka panondang do namburmu, jala paruaron ni tano i muse angka naung mate.

²⁰ Laho ma ho ale bangsongku, bongot i ma angka bilutmu jala hinsu ma pintumi di pudim. Martamonding ma ho satongkin paima salpu rimas i.

²¹ Ai ida ma, sai na ruar do Jahowa sian ingananna laho mangaluluhon hajahaton tu isi ni portibi on; jala papataron ni tano on do utang mudarna, jala ndang be hungkupanna angka na mate tartodos.

27 ¹ (I.) Di ari na sasada i marlulu ma Jahowa marhitehite podangna na niugam, na balga jala na sinopu dompak Leviatan i ma ulok na mangarpe dohot dompak Leviatan, i ma ulok na marlegotlegot, jala bunuonna ma naga na di laut i.

² Di ari na sasada i adong ma sada porlak anggur hasudungan, marende taripar ma hamu taringot tusi songon on.

³ Ahu Jahowa sandiri mangaramoti ibana, ganup tongkin hubornoki ibana, sai hura moti ibana borngin dohot arian asa unang adong na manegai dompak ibana.

⁴ Rimas na marpiarpiar ndang adong di ahu; tung ise ma mangalehon suga dohot sihipi tu

ahu di hamusuon, sai tahoponku do i, tung rap suda do i surbuonku.

⁵Manang ia tung ditangkup nasida partanobatoanku, mardame ma nasida tu ahu, mardame ma nasida tongon tu ahu.

⁶Sai marurat do Jakkob di angka ari na ro sogot, marbunga jala martumbur ma Israel, jadi gok parbuena ma liat portibi on.

⁷Tung songon pamungkul ni sipungkul ibana ma pamungkulna di nasida? Manang tung songon pamunuon ni sibunu ibana pamununa di nasida?

⁸Marpangantan tahe marhite sian habuangan dipinsang ho nasida; nunga tung dihiaphon ibana nasida marhite sian anginna na pur i ma di ari angin habinsaran.

⁹Dibahen i marhite sian i salesehononna ma dosa ni Jakkob, jala on do nasa parbue ni pamuation di dosana: Molo tung doshon batu hapur na niduda nasa batu langgatan dibahen, asa unang be tinggal angka ganaganaan ni Astarte dohot Baal.

¹⁰Ai tarpunjung do huta na gonting i, inganan na tarulang jala na tinadingkon, songon halongonan; disi do manjampal anak ni lombu jala disi do marmodoman, jala palpalanna do angka dangkana.

¹¹Molo ranggason angka dangkana, marpongolan ma, jala ro do angka boruboru manutungi angka i. Ai bangso na so marparbinotoan do on, dibahen i ndang

marpamuati roha ni sitompa ibana, jala ndang marasi ni roha Sijadi ibana.

¹²(II.) Di ari na sasada i: Degeon ni Jahowa ma nasa biur, olat ni batang aek Euprat sahat ro di sunge Misir. Jadi jomputon ma hamu ale anak ni Israel sadasada.

¹³Di ari na sasada i paluonna ma sangka bolon, jadi ro ma nasida naung mago di luat Assur dohot nasida angka na tardempar di luat Misir, jadi marsomba ma nasida tu Jahowa di atas dolok na badia i di Jerusalem.

28¹(I.) Marjea ma tumpal haginjangon ni halak Epraim angka na mabuk dohot bunga na malos, hajagaron ni hasangaponna, na di ulu ni rura na napu, angka na mandaon sian anggur.

²Ida ma, adong do di Tuhan i sada na gogo jala na todos: Songon habahaba mardongan ambolas, habahaba siappalautus na mangago, songon parnangkat ni aek na doras mardalan ibana manimpalhon nasida tu tano marhitehite tanganna.

³Luntahanna ma marhitehite pat tumpal haginjangon ni halak Epraim angka na mabuk.

⁴Jala bunga na malos, hajagaron ni hasangaponna na di ulu ni rura na napu doshon antajau patumonaan di jolo ni ari logo, na niida ni na marnida, ndang dope tolhas tu tanganna nunga dibondut.

⁵ (II.) Di ari na sasada i Jahowa Zebaot gabe tumpal hasangapon dohot sanggul hamuliaon di pasipasi ni bangsona.

⁶ Huhut gabe tondi ni uhum tu halak na hundul maruhum, jala hagogoon di halak na paundar hamusuon sahat ro di bahal.

⁷ Alai nang nasida lilu do binahen ni anggur, jala moror diida binahen ni siinumon na pang; tole malim tole panurirang rabatrabat mardalan binahen ni siinumon na pang, dibondut anggur i nasida, moror diida sian siinumon na pang, lilu nasida di bagasan pangungkapon, bohabohaon nasida mandabu uhum.

⁸ Ai sude meja gok utauta na barjit, sap do sudena.

⁹ Tung tu ise ma ajarhononna parbinotoan? Tung tu ise ma pabotohononna jamita? Dakdanak angka nambura sirang susu ulaning, angka nambura pinaholang sian bagot ni inaina ulaning?

¹⁰ Ari mardapotdapot angka tona; mardapotdapot angka oraora, dison saotik, disi saotik.

¹¹ Dibahen i marhitehite bibir pangeleson, dohot marhite dila na pulik ibana mangkatai sogot tu bangso on.

¹² Ala naung ibana mandok tu angka nasida: On do hasonangan: Pasonang hamu halak na loja, jala i do dalan tu hasonangan: Hape ndang ditangihon nasida.

¹³Jadi songgop ma tu nasida hata ni Jahowa: Sai mardapotdapot angka tona, sai mardapotdapot angka oraora, dison saotik, disi saotik, asa mardalan nasida jala maninggalak jala marimpong jala tarjail jala tartangkup.

¹⁴(III.) Dibahen i tangihon ma hata ni Tuhan Jahowa, hamu ale jolma pangelesi, hamu ale pangarajai ni bangso on na di Jerusalem.

¹⁵Ai didok hamu do songon on: Nunga marpadan hami dohot hamatean, jala nunga marjanji hami dohot banuatoru, nang ro linsinglinsing hamagoan parsangean, ndang tagamon tolhas ianggo tu hita; ai nunga marhaporusan tu gabus hita, jala sipaotooto mangondingi hita.

¹⁶Dibahen i songon on do hata ni Tuhan Jahowa: Ida ma, ahu paojakkon di Sion sada batu, batu na niuji, sada batu parsuhi na arga bahen ojanan na hot; manang ise na porsea di ibana, ndang tagamon maporus.

¹⁷Jala nunga hubahen uhum gabe tali rambu, jala hatigoran gabe tali pandodo, jala aupon ni ambolas ma haporusan gabusi, jala umbangon ni aek partabunianna i.

¹⁸Asa tos padanmuna dohot hamatean, jala unang hot janjimuna dohot banuatoru. Molo ro linsinglinsing ni hamagoan parsangean, luntahonna ma hamu.

¹⁹Manang piga hali pe ibana ro, sai na luahononna do hamu, ai ganup sogot do ibana

ro, arian dohot borngin tahe, jala hagogotan sambing mambahen antusan hata na binege.

²⁰Ai majempekk do podoman, ndang tarbahen jolma mangihortang disi, jala magogothu bulusan ndang tarborhoshon.

²¹Ai hehe ma Jahowa songon uju di dolok Perosim jala marsigorgor rimasna songon uju di rura Gibeon, asa diula ulaonna, salin do nian ulaonna i, jala diradoti parhaladoonna, asing do nian parhaladoonna i.

²²On pe, unang datdati hamu mangarehe, asa unang lam momos ihotmuna i; ai nunga hubege sian Tuhan Jahowa Zebaot hasiapon dohot torutoru tu sandok tano on.

²³(IV.) Patinggil hamu pinggolmuna jala tangihon hamu soarangki, paeleng hamu pinggolmuna, jala tangihon hamu hatangkon!

²⁴Tung ganup ari ma paninggala maninggalai laho manabur? Tung sai didatdati ma manggole dohot manisir haumana?

²⁵Nda songon on do ia dung digagati sisikna, disaburhon longa manang juragi manang diordangkon manang diemehon manang daua manang singkoru eme marguru tu pamalohina.

²⁶Dung i didege ma i hombar tu uhum na niajarhon ni Debatana tu ibana.

²⁷Ai ndada marhitehite padati pardege didege halak longa, jala ndang digiling galapang ni padati tu juragi, marhitehite

lotaklotak do longa i didege halak, jala patna didegehon tu eme.

²⁸Diduda pe eme i, ndada sai didatdati maradu magopu, ndada sai dibasbas galapang ni padatina dohot hodana, ndang tahe digopui.

²⁹Nang i marharoroan sian Jahowa Zebaot do i: Na sumurung do tahina, jala dipagodang panumpahina.

29¹(I.) Marjea ma ho, ale tataring ni Debata, tataring ni Debata! Huta parhabangsaan ni si Daud! Sai ambai hamu ma sataon tu sataon, jala marliat ma angka pesta.

²Dung i sosakhononku ma tataring ni Debata, gabe masa angguhangguk dohot partangison, jala gabe songon tataring ni Debata, ibana di ahu tongon.

³Ai tungkumonku ma ho tuk humaliang jala sosahonku ho marhitehite hubu, jala paheheonku angka salosap mangalo ho.

⁴Jadi tungki ma ho mandok hatam sian bagasan tano i, jala sian bagasan orbuk inggohononmu hatam, jala songon soara ni parsibalik mata soaram sian bagasan tano i, jala marhusip pangkataionmu sian bagasan orbuk.

⁵Alai doshon orbuk na neang ma disi hinadeak ni musum, jala songon hurangkam na hinabangkon do hinadeak ni angka

pangarupa, jala tompu do i masa so pangiriman.

⁶Ai marlulu ma Jahowa Zebaot marhitehite ronggur dohot lalo dohot porhas manoro, halisungsung dohot habahaba dohot marhitehite jilam ni api na manganhon.

⁷Jadi doshon nipi alatan borngin ma disi hinadeak ni nasa bangso, angka na marporang dompak tataring ni Debata dohot sude na marmusu mangalo ibana dohot partanobatoanna ro di angka namanosak ibana.

⁸Jadi masa ma disi songon halak na male, mangan ibana diipi, hape dung tarsunggul, laos rapar dope butuhana; manang songon halak na mauas, minum ibana diipi, hape ia dung ngot, laos mandate dope ibana jala mauas; suman tusi do hinadeak ni sude bangso, angka na marporang dompak dolok Sion.

⁹(II.) Marseto ma hamu jala longang masiberengan ma hamu huhut longang! Mabuk do nasida, alai ndang binahen ni anggur, rabatrabat do nasida, alai ndang binahen ni siinumon na horas.

¹⁰Ai nunga diusehon Jahowa tu hamu sada tondi na redem, jala marpanutupi matamuna, i ma angka panurirang i dibahen, jala partogimuna i ma angka paralatan i dipitungi.

¹¹Dibahen i nasa pangungkapon di hamu, songon on hata ni buku na tarsahap, na

nilehon tu halak naumboto manjaha surat i, huhut didok: Na jaha ma on! Gabe didok ibana: Ndang tarbahen ahu ai na tarsahap do i.

¹²Manang nilehon buku i tu halak na so umboto manjaha surat, huhut didok: Na jaha ma on! Gabe didok: Ndang huboto manjaha surat.

¹³Jadi didok Tuhan i ma: Ala na jumonok bangso on tu ahu marhitehite pamanganna dohot marhitehite bibirna pasangap ahu, hape anggo rohana holang do sian ahu, jala hadaulatonna sida maradophon ahu patikpatik ni jolma na ginuruhon sambing do i.

¹⁴Dibahen i, ida ma, salin ma pambahenku tu joloan on tu bangso on, salin situtu ma, asa huagohon habisuhon ni angka na bisukna, jala hubolongkon roha ni angka parroha sian nasida.

¹⁵Marjea ma angka na martamondingkon mansai bagas sangkap ni rohanasida maradophon Jahowa, jala diulahon jadijadiannasida di bagasan haholomon, didok muse dope: Tung ise ma marnida hami, jala tung ise ma tumanda hami?

¹⁶Oe sambar ni pangalahomuna i! Tung doshon sitopa hudon ma tano liat tinopana i, manang tung dohonon ni jadijadian ma mandok na jumadihon ibana: Ndang ibana jumadihon ahu, manang tung dohonon ni

ganaganaan ma tu na manggana: Nandang
malo ibana?

¹⁷ (III.) Nda otiknari situtu nama, jadi muba
ma Libanon, gabe hauma na lunak jala hauma
na lunak i gabe tombak dietong.

¹⁸ Dung i di nasadari i begeon ni angka na
nengel ma angka hata ni buku na badia i jala
marnida ma mata ni halak na mapitung sian
haholomon dohot sian hagolapon.

¹⁹ Jadi mardapotdapot ma las ni roha ni halak
na dangol mida Jahowa, jala marolopolop
ma angkajolma na pogos mida ibana na sun
badia ni Israel.

²⁰ Ai pidom ma disi halak pangarupa, jala
siap pangarehe jala pesan sudejolma angka
na marsangkap hajahaton.

²¹ Angka na mambahen mardosajolma i
marhitehite hata dohot manaon jorgong tu
halak na mandok hata sintong di bahal, jala
dipadapot halak na tigor i marhitehite sipaoto.

²² Dibahen i songon on do hata ni Jahowa, na
palua si Abraham, tu pinompar ni si Jakkob:
Jala ndang be jadi tarurak si Jakkob ndang be
langan bohina!

²³ Ai molo diida angka anakna jadijadian
ni tanganku di tongatonganasida,
parbadiaannasida ma goarhu,
parbadiaannasida ma dohot na badia
ni si Jakkob, jala habiarannasida ma Debata
ni Israel.

²⁴Jadi dapotan roha ma jolma partondi na lilu hian, jala gumuruhon poda ma halak parmungutmungut.

30¹(I.) Marjea ma anak angka na marbalik ninna Jahowa, angka na mambahen tahi so marhite sian ahu, jala mambahen janji so marhite sian tondingku, asa pagukguk dosa tu dosa.

²Angka na laho tuat tu Misir, hape ndang jolo marpanungkun tu pamanganku, naeng marhara tu hagogoon ni Firaun, jala marhaporusan tu linggom ni Misir.

³Hape ingkon gabe haurahonmuna do hagogoon ni Firaun jala gabe haelesonmuna do haporusan tu linggom ni Misir.

⁴Ai sahat tu Zoan angka rajanasida, jala tolhas ro di Hanes angka suruannasida.

⁵Saluhut do nasida tarurak ala ni bangso na so marguna di nasida, na so marpanumpahion manang marguna, ai gabe haurahon do i dohot haeleson.

⁶Uhum madabu tu angka pinahan ni tano pardangsina: Di tano hagogotan dohot hasosahan, haroroan ni singa boruboru dohot jantan, haroroan ni libe dohot naga na habang ditaruhon nasida di atas tanggurung ni halode artanasida, jala di atas tanggurung na bungkok ni unto sinamotnasida tu sada bangso na so marguna.

⁷ Ai alogo sambing do panumpahion ni Misir, dibahen i hugoar do i: Rahab, hape sai so do nasida.

⁸ (II.) Antong ro ma ho, uhirhon ma i tu sada batu di jolonasida jala surathon ma i tu bagasan sada buku, asa tongtong dipeop tu ari sogot ro di salelenglelengna.

⁹ Ai bangso na tangkang do nasida, angka anak pargabus, angka anak na so olo manangihon patik ni Jahowa.

¹⁰ Angka na mandok tu halak paralatan: Unang hamu maralatan! Dohot tu angka panurirang: Unang surirangkon hamu tu hami hasintongan! Lomo ni rohanami ma tagonan paboa hamu, jala angka sipaotooto surirangkon hamu.

¹¹ Manginsurut ma hamu sian dalan i, manimbil ma hamu sian dalan na bolon, padao hamu ma sian jolonami ibana na badia ni Israel.

¹² Dibahen i songon on do hata ni na badia ni Israel: Ala dibolongkon hata on, jala marhaposan hamu tu pangarupaon dohot tu panimbilon jala marpangunsandean tusi.

¹³ Dibahen i hajahaton on gabe doshon rigatrigat na gistang di hamu, nunga pola duruk di dorpi na timbo, ganup tongkin do ibana panagamnagamon di hatotompasna.

¹⁴ Jala taporanna nasida, songon hatatapor ni hudon tano, na tinaporan so maralangalang, ndang adong jumpang sian taportaporna i

tau ngarngar pangalapan gara ni api sian tataring, manang manahui aek sian sumur.

¹⁵(III.) Ai songon on do hata ni Tuhan Jahowa, na badia ni Israel! Marhitehite hamulakon dohot hahohomon jumpangan hatuaon hamu; marhitehite hasabamon dohot marhitehite nalom ni roha maruli hagagoon hamu. Alai ndang olo hamu.

¹⁶Lam didok hamu do: Ndangana, tagonan hami mangkunduli hoda laho maporus, dibahen i ingkon maporus hamu tutu; tagonan hami marsihundul tu na doras mardalan, dibahen i lam marenjak ma halak na mangalele hamu.

¹⁷Saribu halak sian hamu maporus maradophon ogaoga ni sada halak, maradophon ogaoga ni na lima halak maporus do hamu sude paima pasipasimuna, songon hau na rimpur di punsu ni dolok, jala songon tonggol di robean.

¹⁸Dibahen i sai maimaima Jahowa, naeng marpangulah i rohana tu hamu; laos alani borhat ibana asa asianna hamu, ai Jahowa do Debata ni uhum. Martua ma sude na mangkaposi ibana.

¹⁹Ho ale bangso na maringan di Sion, di Jerusalem, na so tupa be tama tangis hamu! Asi ma rohana di ho, disi begeonna soara ni angguhanggukmu, alusanna ma ho.

²⁰Jala nang dilehon Tuhan i tu hamu roti hagogotan dohot aek pangarupaon, alai

ndang be martabuni anggo angka gurum,
idaon ni matam ma tongtong angka gurami.

²¹ Jala apala pinggolmu umbege hata ni na
mandok sian pudim: On do dalan i, i ma dalan
i! Unang manimbil hamu tu siamun manang
tu hambirang!

²² Jadi ramunanmuna ma disi ganaganaanmu
angka na nilampis dohot perak, ro di ulos
angka na marhadohoan, gombaranmu na
tinompa sian sere pe, sirsirhononmu ma
angka i songon napu, misir ma ho, i ma
dohononmu tu ibana.

²³ Jadi ibana ma mangalehon udan tu bonim
naung sinaburhonmu tu haumam, dohot roti
gogo ni hauma i, togong ma i huhut marmiak
bahenonna, manjampal ma ia pinahanmu di
ari na sasada i di panjampalan na bidang.

²⁴ Tole angka jonggi dohot halode, angka na
maninggalai tano i, panganonna ma gagaton
na togong saor sira, naung sinege marhitehite
durungdurung dohot anduri.

²⁵ Jadi adong ma di atas ni saluhut dolok
angka na timbo dohot rahisrahis na hinsat,
angka sunge angka halian aek di ari
tongtangan godang, molo marumpak angka
palaspalas.

²⁶ Jadi tiur ni bulan ma disi songon tiur ni
mata ni ari, jala silompit pitu hali ganda
tiur ni mata ni ari i, doshon hatiuron ni pitu
ari tahe, di ari uju liliton ni Jahowa bugang

ni bangsona, jala pamalumonna holiholi na
magas binahen ni paminsangna?

²⁷ (IV.) Ida ma, ro ma goar ni Jahowa sian
na dao, marsigorgor ia rimasna, martimpul
ma timus i, ia bibir ni pamanganna gok rimas
na marpiarpiar, jala dilanai doshon api na
mandilatdilat do.

²⁸ Jala hosana doshon aek magodang tolhas
ro di rungkung, mamiari angka bangso
parbegu marhitehite anduri hasiapon, jala
kokang haliluon ampe tu osangosang ni
angka bangso.

²⁹ Alai anggo di hamu masa ende pujipujian
songon uju di borngin parhontasan tu pesta
dohot halalas ni roha songon halak na
martulila laho manopot dolok ni Jahowa, tu
dolok batu ni Israel.

³⁰ Alai patubegehonon ni Jahowa ma soarana
na marmulia i jala pataridahononna tanganna
na mangondam marhitehite parpiar ni muruk
dohot jilam ni api na maniaphon marhitehite
aek na sumar, udan tipotipo dohot batu
ambolas.

³¹ Ai tarsonggot ma Assur maradophon soara
ni Jahowa, na mangalipat ibana marhitehite
tungkot.

³² Jala nasa pamolusan ni tungkot
paminsangon i sipasonggopon ni Jahowa
tu ibana, masa do i marhitehite pamaluon
hasarhasar dohot hasapi dohot marhitehite
angka hamusuon na sobu aloonna ibana.

³³Ai nunga tibu hian diparade pamurunan i di nasida dohot di rajai dipadiri, bagas jala lambas do i dibahen; godang situtu do api dohot hau di pamurunanna i, na pinagalak ni hosa ni Jahowa, doshon sunge barerang do godangna.

31¹(I.) Marjea ma angka na tuat tu Misir mangido pangurupion jala mangasahon angka hoda, jala marpos ni roha di angka hureta, ala toropna dohot tu angka jolma parsihundul, ala marhuaso situtu nasida; alai ndang manaili nasida anggo tu na badia ni Israel, jala ndang dilului nasida Jahowa.

²Alai ibana pe na pistar do jala diparo hinamago, jala ndang diuba hatana, sai hehe do ibana mangalo pinompar ni halak parjahat dohot mangalo panumpahion ni halak sibahen hajahaton.

³Ai jolma do nang halak Misir ndada Debata, hodanasida i pe sibuk do, ndada tondi; jadi patoltolon ni Jahowa ma tanganna, gabe tarsulandit panolongi jala tinggang na tinolongan, jadi rap siap ma nasida sude.

⁴Ai songon on do hata ni Jahowa tu ahu: Songon sada singa manang anak ni singa na patungoromon mida soroanna nang pe pinaimpi dompak ibana sasude angka parmahan ndang olo tarsonggot maradophon soaranasida i, jala ndang olo tunduk maradophon hagunturonnasida i,

suang songon i do hatutuat ni Jahowa Zebaot laho marmusu humongkop dohot Sion dohot robeanna i.

⁵Songon pidong na mangkurmuk anakna, suang songon i do pangondingi ni Jahowa Zebaot di Jerusalem, ondinganna jala paluaonna, olananna jala pangoluonna.

⁶Mulak ma hamu, ale anak ni Israel, tu ibana na tinundalanmuna situtu na sai laon.

⁷Ai di ari na sasada i ambolongkonon ni ganup jolma ma ajiajianna angka na sian perak dohot sere, angka na binahen ni tanganmuna di hamu mambahen mardosa.

⁸Jadi marragean ma Assur marhitehite podang, ndada podang ni baoa manang podang ni jolma manganhon ibana; gabe maporus ibana maradophon podang jala gabe hatoban angka dolidolina i.

⁹Jadi salpuanna ma partanobatoanna i sian biar ni rohana, jala raion angka ulubalangna so mardongan tonggol, ninna Jahowa nampuna api di Sion jala nampuna pamurunan di Jerusalem.

32¹ (I.) Ida ma, hombar tu hatigoran do Rajai mangarajai sogot, jala hombar tu uhum angka induk manggomgomi.

²Jadi marhaporusan tu ibana ganup jolma maradophon alogo, jala marpanisioan maradophon ari, tudoshon sunge di halongonan, tudoshon parlinggoman ni dolok batu bolon di tano na marsilopak.

³Jala ndang mamereng dompak pudi mata ni jolma na marnida, jala pinggol ni jolma na marbinege manangihon disi.

⁴Jala roha ni jolma na bodo marpanimbangan jala tiar marpangkuling dila ni jolma angka na hapot hian.

⁵Ndang be targoar raja halak na oto i, manang targoar namoranami halak parjahat i.

⁶Ai mangkatahon haotoon do halak na oto i, jala marsangkap hajahaton do rohana laho mangulahon haramunon, jala mandok poda haliluon dompak Jahowa asa mangarapari roha ni jolma na male, jala mangarampas siinumon ni na mauas.

⁷Jala marparulaonna jahat do halak parjahat i sai angka ditahi roha laho mangago halak na tarjepol marhitehite hata gabus, nang pe hata uhum didok na pogos.

⁸Alai anggo halak parlidang i, angka halidangon do ditahi rohana, jala marsihohot ibana mangulahon angka halidangon.

⁹(II.) Hamu inaina angka na marpangatauan, hehe ma hamu tumangihon soarangki! Hamu boruboru angka na nalom roha, tangihon hamu ma hatangkon!

¹⁰Di laonlaon ni ari angka dotdot ma hamu angka na nalom roha i, ai nunga sun pamutihon di parbue ni hau anggur, ndang ro be gotilon ni parbue ni hau.

¹¹ Angka hitir ma hamu inaina angka na marpangatauan, angka dotdot ma hamu angka na nalom roha! Ai nunga tanggal pangkeanmu, marsaemara hamu jala marabit tangki gontingmuna.

¹² Masitompuk andorana be nasida, ala ni hauma hasoloan, ala ni porlak anggur na marparbue.

¹³ Tubu do di hauma ni bangsongku angka sihupi, tongon tahe nang di atas ni sude bagas hariburon ni huta na ribur i.

¹⁴ Ala naung tarulang bagas bolon, jala naung mansohot hariburon ni huta i, batarbatar jala parhalan gabe liang salelenglelengna, lomolomo ni angka binatang, panjampalan ni angka dorbia.

¹⁵ Paima diusehon tu hita Tondi sian ginjang, jala manjadi tano bosar halongonan hian, alai anggo tano bosar hian gabe tombak dirajum.

¹⁶ Jadi disi ma nian uhum di halongonan, jala marhabangsa hatigoran di tano bosar.

¹⁷ Jadi hadameon ma upa ni hatigoran, jala pangkorhon ni hatigoran hademakon dohot hasonangan salelenglelengna.

¹⁸ Jadi mian ma bangsongku di bagasan undungundung hadameon dohot di bagasan angka bagas nalom ni roha dohot di pangulonon hasonangan.

¹⁹ Alai ro ma ambolas di halelengse ni tombak, jala marhajimputan situtu huta i laho pesan.

²⁰ Martua ma anggo hamu angka na manabur di lambung ni saluhut batang aek, angka na patula pat ni jonggi dohot halode.

33 ¹ (I.) Marjea ma ho partaban, ho na so hona taban dope! Ho pangarupa na so dung nirupa! Ia dung sun ho martaban, tabanon ma ho; ia dung sun ho mangarupa, rupaon ma ho.

² Ale Jahowa asi roham di hami! Marhaposan tu ho do hami. Sai ho ma tangan mangurupi nasida ganup sogot! Pangurupinami tongon di tingki hagogotan.

³ Sai maporus ma angka bangso maradophon parngongos ni suara, marserak ma angka parbegu maradophon hatimbulonmu.

⁴ Jadi gomahan ni halak ma tabantabanmuna, songon panggagat ni tamponok, songon panahopi ni sihapor panahopi ni halak di nasida.

⁵ Nunga timbul Jahowa, ai marhabangsa di ginjang do ibana, nunga gok uhum dohot hatigoran Sion i dibahen.

⁶ Jadi masa ma di tingkim haporseaon, hinagok ni angka hatuaon, hapistaran dohot parbinotoan, biar mida Jahowa pangalapan arta di ibana.

⁷ Ida ma joujou do halak na begu sian nasida di balian, sai tumatangis do angka suruan hadameon.

⁸ Nunga tarulang angka dalan balobung, sohot do pardalan; nunga diose padani marhu

ni roha ibana di angka huta, ndang disarihon ia jolma.

⁹Majal jala malos tano i, rae do Libanon gabe tardas, doshon halongonan ia Saron jala doshon Karmel do Basan marulam.

¹⁰On pe hehe ma ahu ninna Jahowa, timbul jala timbo ahu bahenonku nuaeng.

¹¹Marhangoluan panabian hamu, gabe durame tubumuna, habeguonmuna sandiri gabe api na manganhon hamu.

¹²Jadi dusdusonna ma angka bangso songon batu hapur, songon suga naung tinallik surbuonmu nasida marhitehite api.

¹³(II.) Tangihon hamu ale angka na dao naung hubahen i jala tandai hagogoonku, hamu ale angka na jonok.

¹⁴Angka dotdot do Sion halak pardosa, tarsonggot situtu halak na marsipalensem angka na mandok: Tung ise ma hita maisolat di lambung api na manganhon? Tung ise ma sian hita maisolat di lambung pamurunan salelenglengna?

¹⁵Halak na marpangalahohon hatigoran jala dihatahon hasintongan; na mangkabiashon laba sian pangarupaon, na patait tanganna manjalo sisip, na sumongsong pinggolna asa unang dibege durusdurus di mudar, na papitpit matana, asa unang diida hajahaton.

¹⁶I ma na maringan di ginjang, angka partanobatoan di dolok batu gabe

haporusanna, sai na maruli sagusagu ibana dohot aek siinumon angka na tangkas.

¹⁷Idaon ni matam ma rajai di bagasan hinaulina, tatapon nasida ma sada tano na lambas.

¹⁸Marhusari ma roham mida hasonggotan i dohononmu ma: Didia do juaratulis i? Didia do pandasing? Didia do sisurati angka palaspalas?

¹⁹Ndang be idaonmu bangso na jungkat i, bangsona haloat marpangkuling, marbibir na so dapot antusan.

²⁰Sai berengi ma Sion, huta parpestaanta! Idaon ni matam ma Jerusalem, inganan haposan, undungundung na so tupa munsatunsat, na so tupa umpaton tiangna salelenglelengna, jala na so tupa rapu nasa pangarahutina.

²¹Ai marhamuliaon Jahowa disi, rap dohot hita haroroan ni angka batang aek, angka sunge na bidang pahebaheba; tung na so tupa boluson ni solu sidayungon manang kopal na balga.

²²Ai Jahowa do siuhum hita, Jahowa do silehon patik tu hita, Jahowa do Rajanta, ibana silehon tua di hita.

²³Hondur do angka pangarahutim, ndang tagamon rogangonna tiang layarna, manang tarpahiresa mandera. Dung i bagion ma tabantaban mansai godang gari halak na pangpang maruli tabantaban.

²⁴ Jala na so tupa be dohonon ni pangisina:
Na gale do ahu, ai bangso na maringan disi
nunga maruli hasesaan ni dosa.

34¹ (I.) Jumonok ma hamu angka
parbegu mananginangi dohot hamu
angka bangso patinggil hamu pinggolmuna!
Mananginangi ma ho ale tano on ro di isina,
ho ale portibi on ro di nasa na tubu disi.

² Ai marsigorgor do rimas ni Jahowa
mangonai tu sude angka parbegu, jala
marpiarpiar murukna dompak sude
parangannasida. Nunga tung ditorui
ibana nasida, nunga dipasahat nasida tu
pamotongan.

³ Jadi marragean ma angka na mate
tongtang sian nasida jala manongap tu
ginjang bau ni bangkenasida i, pola malala
angka dolok dibahen mudarnasida.

⁴ Malala ma dohot saluhut parangan ni
langit, jala balunonna ma angka langit i
songon pustaha, jala saluhut parangannasida
malos, marurus songon bulung ni hau anggur
jala songon harururus ni parbue ni antajau.

⁵ (II.) Ala naung mabuk podangku di
banuagingjang, ida ma, tuat ma i tu Edom
dohot tu bangso naung hupadiri tu uhum:

⁶ Gok mudar do podang ni Jahowa,
marlinolino sian tabotabo, sian mudar ni
angka anak ni birubiru dohot hambing
tunggal, sian sigumangi piapia ni angka
birubiru tunggal; ai masa do pelean

sipotongon di Jahowa di Bosra, jala
pamotongan godang di tano Edom.

⁷Jadi marunggal ma angka horbo rap dohot
nasida ro di lembu dohot jonggi gabe mabuk
ma luatnasida i sian mudar jala marmiak
orbuknasida i sian tabotabo.

⁸Ai masa ma ari partubolan di Jahowa, taon
pamalosan laho martubolhon Sion.

⁹Jadi muba ma angka sungenasida gabe
puli, jala orbuknasida gabe barerang, gari
tanona i gabe damar na marsigorgor.

¹⁰Borngin dohot arian ndang mintop, ro di
salelenglelengna do martimpul timusna i;
sian sundut tu sundut tarulang, ndang adong
bejolma pamolus disi salelenglelengna.

¹¹Jadi soluhon ni siboru tasik dohot sulandak
ma i, maringan ma disi sipauk dohot sigak
jala sintahan ni Debata ma tusi pamalok
hasiapon dohot batu hatarulangun.

¹²Ndang adong be disi angkajolma na
sangap i, angka na tau mamegang harajaon,
jala saluhut pangarajaina pesan do.

¹³Jadi tubuan tadatada ma angka bagasna
na bolon, latong dohot siarum horsik di
bagasan hutana angka na gonting, gabe
inganen ni angka naga, jala panjampalan ni
angka pidong unto naposo.

¹⁴Jadi pajumpang ma disi angka binatang
adaran dohot biang jalang, jala marsijouan
angka begu nurnur naeng mangulon disi

nang begu borngin, hape ndang jumpangsa pangulonanna.

¹⁵ Marasar do disi ulok dari, jala ia dung marpira diporpori do, jala dipapungu angka anakna tu parlinggomanna, marpungu do huhut disi lali sombop mardapotdapot.

¹⁶ Diori hamu ma buku ni Jahowa jala jaha hamu! Nanggo sada sian angka i ndang tartading, ndang adong hurang sada manang dua. Ai apala pamanganku do mandokkon jala apala Tondina papungupunguhon.

¹⁷ Jala apala ibana sandiri mandabu partalian tu nasida, jala tanganna marbagi di nasida marhitehite hotang pamalok; ro di salelenglelengna nasida tumeansa, sian sundut tu sundut nasida maringan disi.

35¹ (I.) Marlas ni roha ma halongonan dohot tano bangkalbangkal jala marolopolop ma adaran jala marbunga songon bunga pansur.

² Marbunga situtu ma i jala marolopolop, masa ma tutu parolopolopon dohot pariaiaon. Hamuliaon ni Libanon dibasabasahon tusi rap dohot hinauli ni Karmel dohot Saron. Idaonnasida ma hamuliaon ni Jahowa, hatongamon ni Debatanta.

³ Pargogoi hamu ma tangan angka na dauk jala pahot hamu angka pat na telluktelluk.

⁴ Dok hamu ma tu angka parroha na tahuton: Pir ma tondimuna, unang hamu mabiar! Ida ma Debatamuna i ro martubolhon

dohot mamaloshon! Ho do ibana tongon paluahon hamu.

⁵Buhaanna ma disi mata ni halak na mapitung jala marbinege bahenonna pinggol ni angka na nengel.

⁶Marhajingjang ma disi halak na pangpang songon ursa, jala mariaia dila ni halak na ngungu, ai marbuhalbuhal ma angka aek di halongonan jala sunge di adaran.

⁷Jala tano hasang situtu gabe tao, jala tano bangkalbangkal gabe parmualan aek. Di inganan pangulonon ni naga na sai laon tubu arung dohot tolong.

⁸Adong huhut disi dalan balobung dohot dalan na bolon, na targoar: Dalan na badia. Ndang jadi mamolus sian i halak na ramun, jala nasida nampunasa; manang ise na mandalani dalan i, gari angka na oto ndang tagamon lilu.

⁹Ndang adong disi singa jala na so tupa boluson ni binatang panoro, manang jumpang disi;jolma angka na pinalua mardalan disi.

¹⁰Jadi mulak ma sogot halak angka na pinalua ni Jahowa, jala mariaia ro tu Sion; jala halalas ni roha salelenglelengna di atas ulunasida, dapotan hilas dohot las ni roha nasida, alai maporus ma anggo arsak dohot hoihoi.

36¹ (I.) Pasampulu opat taonhon dung raja si Hiskia, nangkok ma si Sanherib

raja sian Assur dompak saluhut huta ni Juda angka na gonting jala dipapatu.

²Jadi disuru raja sian Assur ma si Rabsake sian Lakis tu Jerusalem manopot raja Hiskia mardongan torop parangan. Jadi jongjong ma ibana di pamalian aek ni ambar parjulu, di lambung dalan ni hauma ni panubari.

³Dung i ruar ma manopot ibana si Eliakim, anak ni si Hilkia, panahatan ni bagas i dohot si Sebna juaratulis i dohot si Joa anak ni si Asap, sisurat jamita ni harajaon.

⁴Dung i ninna si Rabsake ma mandok nasida: Ua paboa hamu ma tu si Hiskia: Songon on do hata ni raja na bolon, raja sian Assur: Tung aha ma pangatauanon na pinangasahonmu?

⁵Ianggo di rohangku: Hatahata ni bibir sambing do on: Tahi dohot hahuasoon tu hamusuon. On pe tung ise ma hinaposanmu, umbahen tung hum do naeng mangalo?

⁶Ida ma, dihaposi ho do tolong na marosak on, i ma Misir, manang ise jolma na martungkothon ibana, tombusonna do tanganna. Songon i do Firaun, raja sian Misir tu sude angka na marhaposan tu ibana.

⁷Jala tung sura didok ho tu ahu: Marhaposan tu Jahowa Debatanami do hami, nda ibana do nampuna sombaon dohot langgatan, angka na niloha ni si Hiskia, jala didok tu Juda dohot tu Jerusalem: Di jolo ni langgatanon do hamu marsomba?

⁸On pe, na martaru ma ho dohot tuanku, raja sian Assur, asa hulehon di ho duaribu hoda manang tuk ma lehononmu jolma na manghunduli i.

⁹Tung beha ma panahanmu di bohi ni sada partogi sian angka naposo apala na ummetmet ni tuanku? Hape tung marhaposan do ho tu Misir ala hureta dohot angka parsihundul.

¹⁰On pe dirimpu ho na so mangasahon Jahowa ahu laho nangkok tu tano on asa husiaphon? Jahowa do mandok tu ahu; nangkok ma ho tu tano on jala siaphon!

¹¹(II.) Jadi ninna si Eliakim dohot si Sebna dohot si Joa tu si Rabsake, ua hata Ram ma dok tu hami naposom, ai huantusi hami do, jala unang dok hata Jahudi tu hami di adopan ni situasi natorop, na di atas parik.

¹²Dung i didok si Rabsake ma: Tung tu tuanmu huroha dohot tu ho disuru tuanku ahu mandok angka hata on? Nda tu baoa angka na hundul di atas parik, angka na manganhon ginagatnasida dohot manginum teposnasida rap dohot hamu.

¹³Jadi hehe ma si Rabsake, dipangiar ma soarana mandok di hata Jahudi: Tangihon hamu ma angka hata ni raja bolon, raja sian Assur!

¹⁴Songon on do hata ni rajai: Unang olo hamu paotootoon ni si Hiskia, ai ndang tarpalua ibana hamu.

¹⁵ Jala unang olo hamu paposon ni si Hiskia tu Jahowa mandok: Sai paluaon ni Jahowa do hita, ndang tagamon lehononna huta on tu bagasan tangan ni rajai sian Assur.

¹⁶ Unang tangihon hamu si Hiskia, ai songon on ninna raja sian Assur: Lehon hamu ma jomba bahal tu ahu, jala dapothon hamu ahu, asa mangan be sian hau anggurna dohot sian hau antajauna, jala manginum tapian sian sumurna be.

¹⁷ Paima ro ahu jala hualap hamu tu tano na songon tanomuna, tu tano hatubuan ni eme dohot anggur, tu tano na lobian di roti dohot di porlak anggur.

¹⁸ So tung olo hamu gitihan ni si Hiskia ia didok: Sai paluaon ni Jahowa do hita! Nunga tung dipalua debata ni angka parbegu ma luatnasida be sian tangan ni raja sian Assur huroha?

¹⁹ Didia nuaeng angka debata sian Hemat dohot sian Arpad? Didia angka debata sian Separwaim? Tung adong ma na paluahon Samaria sian tanganku?

²⁰ Tung ise ma sian sude debata ni angka luat ondeng, na tuk paluahon tano nasida sian tanganku umbahen muba Jerusalem paluaon ni Jahowa sian tanganku huroha?

²¹ Jadi sip ma nasida jala ndang adong na mangalusi ibana nanggo sandok, ai songon i do tona ni rajai: Unang alusi hamu ibana.

²²Dung i ro ma si Eliakim anak ni si Hilkia panahatan ni bagas i dohot si Sebna, juaratulis i, dohot si Joa anak ni si Asap, sisurat jamita ni harajaon manopot si Hiskia, marulos na maribak laho pabotohon tu ibana angka hata ni si Rabsake.

37 ¹(I.) Jadi dung dibege raja Hiskia hata i, diribahi ma ulosna jala marulos hori ibana laho manopot bagas ni Jahowa.

²Jadi disuru ma si Eliakim, panahatan ni bagas i dohot si Sebna, juaratulis i rap dohot angka sintua ni malim, rap marulos hori be manopot panurirang Jesaya, anak ni si Amos.

³Asa didok nasida tu ibana: Songon on do hata ni si Hiskia: Ari hagogotan dohot paminsangon dohot haurahon do ari on; ai nunga jumpang nian hasasanga ni posoposo, hape ndang adong gogo manubuhon.

⁴Anggiat tung dibege Jahowa Debatamu hata ni si Rabsake, angka na tinonahon ni raja sian Assur tuanna i, manginsahi Debata na mangolu i, jala ditorui ibana ala ni hata angka naung binege ni Jahowa Debatam; asa patolhas ma tangiang i mangondihon pasipasi na jumpang i.

⁵Dung i ro ma angka naposo ni raja Hiskia manopot si Jesaya.

⁶Jadi didok si Jesaya tu nasida; songon on ma dohononmuna tu tuanmuna: Songon on do hata ni Jahowa: Unang ho mabiar maradophon hata angka naeng binegem,

angka na niinsakkon ni naposo ni raja sian Assur palea ahu.

⁷Ida ma, lehononku ma tu bagasan rohana sada tondi, asa begeonna barita jala mulak tu tanona, asa huragehon ibana marhitehite podang di bagasan tanona.

⁸(II.) Dung i mulak ma si Rabsake, gabe marmusu dampak Libna raja ni Assur i didapot, ai nunga tarbortik tu pinggolna naung borhat ibana sian Lakis.

⁹Jala dibege barita taringot tu si Tirhaka raja sian Kus didok halak: Nunga borhat ibana laho marmusu dampak ho. Jadi dung dibege hata i, disuru ma angka suruanna tu si Hiskia mandok:

¹⁰Songon on ma dok hamu tu si Hiskia, raja sian Juda: Unang olo ho paotootoon ni Debatam, na pinangasahonmu mandok: Nandang tagamon lehononna huta Jerusalem tu tangan ni raja sian Assur.

¹¹Ida ma, nunga dibege ho, na binahen ni angka raja sian Assur tu sude angka luat laho mangarendephon nasida, ia ho hape tung tagamon malua ma?

¹²Tung adong ma angka debata ni bangso parbegu na tuk paluahonnasida, angka na siniaphon ni angka daompung? I ma Gozan dohot Haran dohot Resep dohot angka anak ni Eden, angka na maringan di Telasar.

¹³Didia nuaeng raja sian Hamat dohot raja sian Arpad dohot raja ni huta Separwaim dohot Hena dohot Iwa?

¹⁴Jadi dibuat si Hiskia ma angka surat i sian tangan ni angka suruani jala dijaha, dung i nangkok ma ibana tu bagas ni Jahowa, jala dipahembang surat i di adopan ni Jahowa.

¹⁵Dung i martangiang ma si Hiskia tu Jahowa songon on:

¹⁶Ale Jahowa Zebaot, Debata ni Israel, na marhabangsahon angka kerubim, sasada ho do Debata ni saluhut harajaon di tano on! Ho do tumompang langit dohot tano on!

¹⁷Sai paeleng ma pinggolmu ale Jahowa, jala tangihon, sai patonggor ma matam ale Jahowa jala ida, jala tangihon sude hata ni si Sanherib, angka na tinonahonna mangarehei Debata na mangolu i.

¹⁸Tongon tahe ale Jahowa, nunga disiaphon angka raja sian Assur saluhut angka bangso dohot luatnasida i.

¹⁹Jala nunga ditimpalhon tu api angka debatanasida, ai ndang tongon Debata angka i, jadijadian ni tangan ni jolma do, hau dohot batu, gabe disiaphon angka i.

²⁰Onpe ale Jahowa Debatanami, sai palua ma hami sian tanganna, asa mananda saluhut harajaon di tano on, paboa sasada ho do Debata, ale Jahowa!

²¹(III.) Dung i marsuru ma si Jesaya, anak ni si Amos, tu si Hiskia mandok: Songon on

do hata ni Jahowa, Debata ni Israel: Anggo na pinangidom tu ahu, taringot tu si Sanherib raja sian Assur, nunga hutangihon.

²²On do hata na tinonahon ni Jahowa dompak ibana: Mamaus jala mangarehe mida ho do namarbaju, boru Sion i; mangupir do ulu ni boru Jerusalem sian pudim.

²³Ise tahe naung nireheanmu jala nielesanmu, jala dompak ise dipangiar ho soaram jala mamaus matam dompak ginjang? Dompok na badia ni Israel do tahe!

²⁴Marhite sian tangan ni angka naposom dielesi ho Tuhan i jala nimmu do: Binahen ni hinadeak ni angka huretangku ahu manaeak tu ginjang ni angka dolok, tu partalpahan ni Libanon jala tabaonku ma angka hau aresna na timbo i dohot angka marantina na dumenggan i, jala tolhas ahu tu punsuna tu tombak hasoloanna.

²⁵Nunga huhali jala huinum angka aek i jala huarsik marhitehite palak ni pathu sude angka batang aek Misir.

²⁶Ndang dung dibege ho, naung hubahen songon i sian na robi, di angka ari na galia hujadihon i? Nuaeng pe huparo; ingkon siap bahenonmu angka huta na gonting bahen timbunan batu.

²⁷Jala angka pangisina i partangan na so marnangan tarsonggot do jala tarurak; manjadi duhutduhut di ladang do nasida

dohot ingkau rata, songon ri tu angka tarup
jala antinganon eme tagan so bibi dope.

²⁸Nunga huboto hian hundulanmu,
haruruarmu dohot habobongotmu dohot
pangogaogaonmu dompak ahu.

²⁹Ala na mangoga ho dompak ahu, jala
tolhas tu pinggolhu hajungkatonmu, jala
bahenonku ma harihir tu igungmu dohot
kokang tu bibirmu jala toguonku ma ho mulak
sian dalan haroroanmi.

³⁰Jala on ma partinandaan di ho:
Panganonmu ma sataon on eme sagak,
dohot di taon paduahon, alai anggo patolu
taonhon manabur ma hamu jala manggotil
jala manuan porlak anggur, jala panganonmu
parbuena.

³¹Jala datdatan ni angka na malua sian
pinompar ni Juda, angka pasipasina i marurat
tu toru jala marparbuehon parbue tu ginjang.

³²Ai ruar do sian Jerusalem pasipasi dohot
angka na malua sian dolok Sion. Hamuruhon
ni Jahowa Zebaot patupahon songon i.

³³Dibahen i songon on do hata ni Jahowa
taringot tu raja sian Assur: Na so tupa ibana
bongot tu huta on, manang siorhononna tusi
nanggo sada sumbia manang dapothononna
marlombulombu, manang bahenonna hubu
humaliang huta i.

³⁴Ingkon marhite sian dalan haroroanna
ibana mulak, alai anggo tu huta on na so tupa
ibana bongot, ninna Jahowa.

³⁵ Ai ondinganku do huta on laho paluahon, ala ni ahu dohot ala ni naposongku si Daud.

³⁶ (IV.) Dung i ruar ma suruan ni Jahowa, jala dibunu di parsaroan ni Assur saratus ualupulu lima ribu halak. Jadi dung hehe nasida sogot manogotna i, ida ma, saluhut nasida nunga gabe bangke.

³⁷ Jadi borhat ma si Sanherib, raja sian Assur laho mulak, laos maringan ibana di Ninive.

³⁸ Jadi uju na marsomba ibana di joro ni Nisrok debatana i, ro ma si Adramelek dohot si Sar-Eser, angka anakna i mambunu ibana marhitehite podang, dung i maporus ma nasida tu tano Ararat. Jadi si Esarhaddon anakna i bangkit raja singkatna.

38¹ (I.) Di angka ari uju i marsahit ma si Hiskia matemate ne. Jadi ro ma manopot ibana panurirang Jesaya, anak ni si Amos, jala didok mandok ibana: Songon on do hata ni Jahowa: Pature ma bogasmu, ai na mate ma ho, ndang tagamon mangolu be.

² Dung i dipahusor si Hiskia ma bohina dompak dorpi jala martangiang tu Jahowa.

³ Jala didok ma: O ale Jahowa, sai ingot ma na marpangalaho i ahu di jolom di bagasan hasintongan dohot di punia ni roha, jala hubahen na denggan di adopan ni bohim, huhut tumatangis situtu si Hiskia.

⁴ Jadi ro ma hata ni Jahowa tu si Jesaya songon on:

⁵Laho ma ho jala dok tu si Hiskia, songon on do hata ni Jahowa Debata ni si Daud ompumi: Nunga hutangihon tangiangmi, nunga huida partangisonmi. Ida ma, ambaanku ma tu angka ariarim sampululima taonnari.

⁶Jala paluaonku ma ho dohot huta on sian tangan ni raja ni Assur, jala ondinganku do huta on.

⁷Jala on ma partinandaan di ho sian Jahowa, paboa pasauton ni Jahowa hata naung nidokna i.

⁸Ida ma, paulahonku ma halinu ni angka gurat, naung mijur di jom ni si Ahas, binahen ni mata ni ari tu pudi sampulu gurat. Jadi mulak ma halinu ni mata ni ari sampulu gurat di tudutudu naung mijur i.

⁹(II.) On do surat pujipujian ni si Hiskia, raja sian Juda, dung na marsahit ibana gabe malum muse sian sahita i.

¹⁰Ningku do di parsitongaan ni angka ariaringku: Na laho ma ahu tumopot angka bahal ni banuatoru; nunga diorui pasipasi ni taontaonku.

¹¹Ningku do, ndang be idaonku Jahowa di tano ni halak na mangolu i, ndang be tailihononkujolma rap dohot angka isi ni portibi on.

¹²Nunga maloha ingananku, jala munsat sian ahu songon undungundung ni parmahan; nunga hutostos ngolungku songon halak

partonun, nunga digotap ibana ahu sian tali;
sun ma adamhu dibahen ho sadari saborngin.

¹³Mangkirim ahu sahat ro di manogotna i;
hape songon singa do ibana mamonggolhon
nasa holiholingu; sun do adamhu dibahen
ho sadari saborngin.

¹⁴Songon leangleang ahu
marngingikngingik, marlangak songon
onggang, marturtu songon anduhur, sai
nolnol do matanku dompak ginjang: Ale
Jahowa targogot situtu do ahu sai ondingi
ahu.

¹⁵Aha dope dohononku? Nunga mangalumba
ibana tu ahu, jala nunga dipasaut. Sai
padondaonku do rohangku marpangalaho
saleleng ahu mangolu, ala ni arsak ni
rohangku.

¹⁶Ale Tuhan marojahan disi mangolu iba jala
sandok mandapot disi do ngolu ni tondingku,
jala ho do mangkorasi dohot pangolu ahu.

¹⁷Ida ma, manjadi hasonangan di ahu
sapot ni parniahapanki, jala nunga dihaol ho
tondingku, jala nunga dienet ho sian godung
ni hasiapon, ai nunga ditimpalhon ho nasa
dosanku tu pudi ni tanggurungmu.

¹⁸Ai ndang dipuji banuatoru i ho, manang
dipasangap hamateani ho; jala ndang
marhaposan di hasintonganmi angka na tuat
tu godung.

¹⁹Halak na mangolu i, na mangolu i tongon,
i ma mamuji ho songon na hubahen nuaeng.

Ama i pabotohon hasintonganmi tu angka anakna.

²⁰Sai paluaon ni Jahowa do ahu, ala ni piltihonta ma hasapinta, nasa ariari ni ngolunta di bagasan joro ni Jahowa.

²¹Dung i ninna Jesaya ma: Binahen ma hare sian antajau, jala nilanggumhon tu baro i, asa mangolu ibana.

²²Jadi ninna si Hiskia ma: Dia do tanda paboa na nangkok ahu masuk tu joro ni Jahowa?

39¹(I.) Uju i disuru si Merodak-Baladan, anak ni si Baladan, raja sian Babel suruanna mamboan surat dohot silua tu si Hiskia, ai nunga tarbortik tu pinggolna marsahit rajai gabe hisar muse.

²Jadi las ma roha ni si Hiskia mida nasida, jala dipatuduhon tu nasida bagas parartaanna, perak dohot sere ro di angka pamurpuri dohot miak na hushus ro di nasa bagas parpeopan ni sinjata dohot sude na jumpang di angka parartaanna i. Tung na so adong do nanggo sada na so pinatuduhon ni si Hiskia tu nasida di bagasna dohot di sandok ginomgomanna.

³(II.) Dung i ro ma panurirang Jesaya tumopot raja Hiskia jala didok ma tu ibana: Aha do didok angka baoa i, jala sian dia nasida ro manopot ho? Jadi ninna si Hiskia ma: Sian luat na dao, sian Babel nasida ro manopot ahu.

⁴Alai ninna si Jesaya ma: Aha diida nasida di jabum? Jadi ninna si Hiskia ma: Nasa na di bagashu diida nasida, nda tung adong nanggo sada di angka parartaanki na so hupatuduhon tu nasida.

⁵Dung i ninna si Jesaya ma mandok si Hiskia: Tangihon ma hata ni Jahowa Zebaot!

⁶Ida ma, na ro do angka ari sogot, tarboan ma disi nasa na di jabum dohot na sinamotsamot ni angka ompum rasirasa nuaeng tu Babel, ndang adong teba nanggo sada, ninna Jahowa.

⁷Jala sian angka anakmu, na marama tu ho, angka situbuhononmu buatonnasida ma, asa gabejolma parhalado di bagas ni raja sian Babel.

⁸Dung i ninna si Hiskia ma mandok si Jesaya: Denggan do hata ni Jahowa na nidokmi, huhut didok: Asal sonang jala mardemak di angka ariaringku.

40¹(I.) Apuli, apuli hamu bangsongki, ninna Debatamuna.

²Hata apulapul ma dok hamu tu roha ni isi ni Jerusalem, jala jouhon hamu ma tu nasida: Nunga marujung parungkilonna, ai nunga salese dosana i, ai nunga dijalo sian tangan ni Jahowa silompit dua singkat ni saluhut dosana.

³Soara ni na joujou di halongonan: Pauli hamu dalan di Jahowa; patigor hamu di adaran dalan balobung di Debatanta.

⁴Ingkon gohan do nasa rura, jala parejeton nasa dolok dohot buntulbuntul, jala gabe na hornop do na marnangkok tuat, jala gabe rura tanggurung ni dolok.

⁵Jadi patar ma hamuliaon ni Jahowa, jala sange nasa sibuk marnidasa, ai pamangan ni Jahowa do mandok.

⁶Adong sada soara na mandok: Joujou ma ho! Jadi dohononna ma: Aha do Jouhononku? Duhutduhut do nasa sibuk, jala doshon bunga pansur hinadengganna i sudena.

⁷Nunga malos duhutduhut i, nunga marurus bunga i, ai nunga mangombus Tondi ni Jahowa tusi. Tongon tahe duhutduhut do bangso i.

⁸Nunga malos duhutduhut i, nunga marurus bunga i, alai anggo hata ni Debatanta sai hot do ro di salelenglelengna.

⁹Tu dolok na timbo ma ho nangkok, ale Sion parbarita nauli i! Pangiar ma soaram ale Jerusalem parbarita nauli i, sai pangiar ma, unang ho mabiar! Dok ma tu angka huta ni Juda: Ida ma, disi do Debatamuna i.

¹⁰Ida ma, marhuaso do ro Tuhan Jahowa, jala tanganna gumomgom ibana; ida ma ihut tu ibana upana jala di jolona pamalosonna.

¹¹Parmahanonna ma pungguanna songon parmahan, papunguonna ma angka anak ni birubiru tu tanganna jala usungonna di ampuanna, lambok do pangaduna di angka panusuan.

¹²(II.) Tung ise naung manuhati angka aek manggim, jala dijongkali angka langit, jala dibalei nasa orbuk ni tano on? Jala didasing angka dolok marhitehite timbangan jala angka buntulbuntul marhitehite hatian?

¹³Tung ise ma na tuk mandodo Tondi ni Jahowa, manang panuturi na manurgasi Ibana?

¹⁴Tung tu ise ma ibana mangalap roha, asa diparrohai ibana jala diajarhon tu ibana lapang ni uhum, jala diajarhon tu ibana parbinotoan, jala dipabotohon tu ibana lapang ni hapistaran?

¹⁵Ida ma, doshon santetek aek di panguhatan do angka bangso, jala doshon orbuk na nipis di timbangan do nasida dirajum. Ida ma, doshon orbuk angka pulo i dibonggal.

¹⁶Gari hau di Libanon ndang singkop tutungonna, jala angka binatang ndang singkop bahen pelean situtungan.

¹⁷Doshon na soada sude angka bangso di jolona, moru tahe sian na soada nasida dietong ibana.

¹⁸Tung tu ise ma naeng patudosonmuna Debata? Manang sumansuman dia naeng paradeonmuna di ibana?

¹⁹Tungkang i manompa ganaganaan i, na nililitan ni panopa dohot sere jala marduri perak dibahen.

²⁰Manang ise na hurang parbohalon, dipillit ma sada hau na maol busuk, dilului ma sada tungkang na pistar di ibana laho paulihon sada ganaganaan na so tarhutik.

²¹Tung so mamoto hamu? Tung so dibege hamu ma i? Tung so pinaboaan tu hamu sian mulamula? Tung so ditimbangi hamu ma angka ojahan ni tano on?

²²Marhabangsa ibana di atas ni liat portibi on, jala doshon sihapor angka pangisina i. Ibana pahembang angka langit songon dagangan na halus, dipahire nasida songon abit undungundung bahen inganan.

²³Ibana pasahathon angka panggomgom gabe soada, angka panguhum di tano on gabe marlea dibahen.

²⁴Ipe nasida disuan, ipe nasida disaburhon, ipe marurat pangkalnasida di tano i, asal mangombus ibana dompak nasida, nunga malos, gabe dihabangkon habahaba i nasida songon rapanrapan.

²⁵Tung tu ise ma patudosonmu ahu, paboa suman ahu tusi ninna na badia i.

²⁶Manaili ma matamuna dompak ginjang, jala ida hamu, tung ise ma na manompa angka i? Tung ise ma paruar parangannasida marbilangan? Ibana tahe manjou luhutna i di goarna be, marguru tu hinagodang ni gogona, jala ibana do na sun hinagogo, ndang tagamon lilis nanggo sada.

²⁷ (III.) Boasa ma dohononmu ale Jakkob, jala didok ho ale Israel: Buni do dalanku maradophon Jahowa, jala ndang maruli uhum ahu sian Debatangku.

²⁸ Atehe, ndang diboto ho, manang ndang dung dibege ho? Debata salelenglelengna do Jahowa, sitompa angka ujung ni tano on, ndang olo loja manang mandate ibana, jala ndang hadodoan pingkiranna i.

²⁹ Ibana balik mangalehon gogo tu na loja, jala dipargogoi situtu angka na so margellok.

³⁰ Loja pe angka dolidoli jala mandate, jala tarsulandit angka na mardaging na tambos.

³¹ Alai angka na marhaposan tu Jahowa maruli hagogoon mardapotdapot, gabe marhabong ni lali laho manaek. Marlojongi nasida ndang olo loja, mardalani nasida ndang olo mandate.

41 ¹ (I.) Hohom ma hamu ale angka pulo mandapothon Ahu, jala ingkon maruli gogo mardapotdapot angka bangso! Jumonok ma angka nasida, dung pe i, asa dohononna: Rap ma hita mandapothon paruhuman!

² Ise do sumunggul hatigoran sian habinsaran? Ise manjou ibana asa ihuthononna langkana? Ise pasahathon angka bangso parbegu di jolona, jala marpandapotan tu ibana dibahen angka raja? Doshon orbuk dibahen ia podangna, jala doshon hurangkam na pinurpurhon ia siorna.

³Ibana mangeak nasida, mardamedame ibana umbolus dalan na so dung nidege ni patna.

⁴Tung ise ma patupahon angka i dohot mambahensa? Ibana manjou angka sundut sian mulamula: Ahu Jahowa na parjolo, jala laos ahu dope rap dohot angka parpudi.

⁵Diida angka pulo do i gabe mabiar jala raion angka ujung ni tano on, ro be angka nasida jumonok jala marpungupungu.

⁶Marsiurupan nasida jala didok mandok donganna: Pir ma tondimu ale dongan.

⁷Pandakdak margogoihon panopa, pangananggari margogoihon panopa, didok ma taringot tu pamijoron i: Denggan do i, dung i dipantik ma i dohot angka labang, unang ruhotruhot.

⁸(II.) Alai anggo ho ale Israel, naposongki, ho ale Jakkob naung hupilliti, ale pinompar ni si Abraham hasudunganku!

⁹Naung hualapi sian ujung ni tano on jala naung hujou sian angka partalpahanna, jala hudok mandok ho: Naposongku ma ho, nunga hupillit ho, jala ndang be bolongkononku.

¹⁰Unang ho mabiar, ai ahu do donganmu! Unang biahaton ho, ai ahu do Debatam: Ahu margogoihon ho huhut mangurupi ho, huhut maniopi ho marhitehite siamun ni hatigoranku.

¹¹Ida ma, ingkon maila jala tarurak sude angka na marsomor ni roha mida ho, gabe

doshon na soada nasida, jala siap baoa angka na mambadai ho.

¹²Usouso ho di nasida, hape ndang jumpang be baoa angka na mangalo ho, gabe doshon na soada, jala doshon hasiapon baoa angka na mamusui ho.

¹³Ai ahu do Jahowa Debatam, na maniop tanganmu siamun, jala na mandok tu ho: Unang ho mabiar, ahu do mangurupi ho.

¹⁴Unang ho mabiar, ale gea Jakkob, hamujolma siothotik sian Israel! Ahu do mangurupi ho, ninna Jahowa dohot siluluhon ho, na badia ni Israel.

¹⁵Ida ma, nunga hubahen ho gabe hureta pardege na tajom, naimbaru, sidua baba, asa diluntak ho angka dolok, jala digopui ho, jala doshon rapanrapan angka buntulbuntul bahenonmu.

¹⁶Piaranmu ma nasida gabe luahonon ni alogo jala paserahon ni habahaba nasida, alai marolopolop ma anggo ho mida Jahowa jala mamujimuji di bagasan na badia ni Israel.

¹⁷Jolma angka na dangol dohot na pogos mangalului aek, hape ndang adong, mahiang ia dilanasida dibahen uasna! Ahu Jahowa mangalusi nasida, ahu Debata ni Israel, ndang tadingkononku nasida.

¹⁸Bungkaonku ma angka sunge di atas robean na saesae nang angka mual di parsitongaan ni rura, bahenonku

ma halongonan i gabe tao, jala tano
bangkalbangkal gabe haroroan ni aek.

¹⁹Patubuongku ma di halongonan hau ares,
sampinur tusam dohot hau jarak, suanonku
ma di adaran hariara jabijabi rap dohot
bintatar.

²⁰Asa rap marnida dohot mananda
dohot manimbangi dohot marateatehon,
mangundukkon tangan ni Jahowa na
mambahensa, jala na badia ni Israel
tumompasa.

²¹(III.) Boan hamu tu jolongku
parbadaanmuna, ninna Jahowa, pajojor hamu
ma pollungmuna, ninna raja ni Jakkob.

²²Loas ma jumonok nasida, asa dipaboa tu
hita na masa sogot; paboa hamu ma tu hami
manang aha na masa di mulamulana, asa
diparateatehon rohanami, jala hutanda hami
ujungna, manang patubegehon hamu tu hami
na ro sogot.

²³Paboa hamu ma tu angka na ro muse, asa
tung hutanda hami angka debata hamu tutu.
Tongon tahe bahen hamu ma na denggan
manang na jat, asa huhalongangkon hami
jala rap marnida.

²⁴Ida ma, moru sian na soada do hamu ro
di jadijadianmuna i, sihabiasnononhon do
manang isejolma na mamillit hamu.

²⁵Sunggulonku ma sian utara sada halak,
gabe ro ibana sian habinsaran, pajoujouonna
ma goarhu, jala degedegeonna ma angka

pangarajai songon tano liat, jala luntahonna nasida songon pangaluntak ni sitopa hudon di tano hudon.

²⁶Ise do na paboahonsa sian mulamula, asa tung huboto hami manang disurirangi hian? Asa hudok hami: Tongon do tahe! Alai ndang adong nanggo sahalak na paboahon, manang na patubegehonsa, manang na umbege hatamuna nanggo sada.

²⁷Ahu do parjolo na mandok tu Sion: Ida ma, nunga disi nasida! Jala hulehon tu Jerusalem sada halak parbarita na uli.

²⁸Alai molo huranap humaliang, hape ndang adong manang ise, jala ndang adong sian nasida nanggo sahalak na tau panuturi, husungkun nasida, gabe ndang adong na mangalusi nanggo sandok.

²⁹Ida ma, saluhut do nasida na soada, na soada do nang angka jadijadiannasida i, alogo sambing do tahe jala na so marnosan angka ganaganaannasida i.

42¹(I.) Ida ma naposongki na hutogu; na hupilliti hasudungan ni rohangku! Nunga huampehon Tondingku tu ibana: Tariashononna ma uhum tu angka bangso parbegu.

²Nandang joujou ibana manang pangiaronna soarana, jala ndang patubegehonna soarana di alaman.

³Arung naung marosahi, ndang laos ponggolhononna, jala sumbu na

marnehetnehet i, ndang laos intopanna,
hombar tu hasintongan tariashononna uhum.

⁴Ndang olo loja ibana manang mandate,
paima dipahot uhum di tano on, jala angka
pulopulo mangkalungunhon patikna.

⁵Songon on do hata ni Debata Jahowa,
sitompa langit, dohot na paherbangkonsa, na
pajarak tano on ro di angka suansuananna,
na mangalehon hosa tu bangso na maringan
di atasna dohot tondi tu angka na mardalani
disi.

⁶Ahu, Jahowa na manjou ho marhitehite
hatigoran, jala ahu manogu tanganku; sai
ramotanku do ho jala lehononku do ho bahen
bangso parjanjian, bahen panondang di
angka parbegu.

⁷Mambungka angka mata ni halak na
mapitung, paruarhon sian hurungan halak
na tarhurung, sian bagas hurungan halak na
maringan di haholomon.

⁸Ahu do Jahowa, i ma goarhu! Jala ndang
lehononku hasangaponku tu na asing manang
hamuliaonku tu angka ganaganaan.

⁹Panurirangon angka sian na robi, ida
ma, nunga ro, jala angka nambura ahu do
paboahon; tagan so martumbur dope nunga
hupatubegehon tu hamu.

¹⁰(II.) Endehon hamu ma sada ende na
imbaru di Jahowa, hamuliaonna sian ujung ni
tano on, tole hamu angka na tuat tu laut ro di
isina i, tole hamu angka pulo ro di isina i.

¹¹ Pangiar ma soaram ho ale halongonan ro di angka hutana, nang angka pagaran na niinganen ni Kedar! Marolopolop ma halak isi ni dolok batu, sian punsu ni angka dolok ma nasida mariaia.

¹² Ingkon lehononnasida hamuliaon di Jahowa jala baritahononna hatongamonna di angka pulo.

¹³ Borhat ma Jahowa songon ulubalang, sunggulonna ma hamuruhon songon jolma parmusu; pagogoonna ma soarana huhut marsurak dampak musuna angka na pinatundukna i.

¹⁴ Sai sip do ahu sian na robi, sai hohom ahu manganjuanju; alai anggo nuaeng manganguhi ma ahu, songon parompuan na mangae posoposona jala marngongosngongos hosanku sian murukku dampak saluhutna.

¹⁵ Tarulang bahenonku angka dolok dohot robean, jala pahasangonku ma saluhut duhutduhut disi, jala bahenonku ma angka batang aek gabe pulopulo, jala arsihanku ma angka lintong.

¹⁶ Jala toguonku ma halak na mapitung di dalan na so binotonasida i, padalanonku nasida di angka dalan balobung na so tinandanasida i; bahenonku ma haholomon di jolonasida gabe hatiuron, jala dalan angka na marlegotlegot gabe hahornopon. I ma angka sibahenonku, jala ndang tadingkononku nasida.

¹⁷Ingkon sumurut tu pudi, jala tarurak situtu halak na marpos ni roha di ganaganaan na niuhir halak na mandok tu ganaganaan na tinompa: Hamu do debatanami!

¹⁸(III.) Tangihon ma, hamu ale angka na nengel, jala manaili ma, hamu ale angka na mapitung asa marnida.

¹⁹Tung ise ma na mapitung, molo so naposongku? Manang na nengel songon suruanku na husuru i? Tung ise ma mapitung songon hasahatan ni dame i, jala mapitung songon naposo ni Jahowa?

²⁰Godang do nian diida ho alai ndang diradoti roham; dibungka pe pinggolna duansa, alai ndang ditangihon.

²¹Dihalomohon Jahowa do patimbulon dohot pasangapon patikna ala ni hatigoranna.

²²Alai anggo nuaeng bangso na pinupusan dohot na tinaban do nasida, marhoihoi di angka godung do nasida sude, jala martamonding di angka bagas hurungan; gabe tabantaban do nasida, jala ndang adong nanggo sahalak na paluahon, gabe sintahan tahe jala ndang adong na mandok: Paulak ma i!

²³Ise ma sian hamu na umpinggol hata i, laos diparateatehon jala ditangihon na masa sogot?

²⁴Tung ise ma naung mangalehon Jakkob gabe sintahan dohot Israel tu halak partaban? Nda Jahowa do i ala dompak ibana hita

mardosa? Jala ndang olo nasida mardalan di angka dalanna i manang tumangihon patikna i!

²⁵ Dibahen i diusehon ibana ma tu nasida parpiar ni rimasna dohot hamusuon na sobu situtu, jala disurbu nasida humaliang, hape laos so mananda nasida jala disoksohi, hape laos so diparateatehon nasida!

43 ¹ (I.) Alai anggo nuaeng, songon on do hata ni Jahowa, sitompa ho ale Jakkob, jala Sijadi ho ale Israel: Unang ho mabiar, ai Ahu do siluluhon ho; nunga pola hujou goarmu, ahu nampuna ho.

² Ai molo dibolus ho aek, donganmu do ahu, manang ditaripari ho angka batang aek, ndang umbanganna ho. Tung sura pe mardalan ho di bagasan api, ndang mosokkononna ho, jala ndang gor ho bahenon ni dila ni api.

³ Ai ahu do Jahowa Debatam, na badia ni Israel, sipalua ho. Nunga pola hulehon Misir bahen pardengganamu, Kus dohot Seba singkatmu.

⁴ Dibahen na arga do ho huida, marmulia jala ahu mangkaholongi ho, jadi hulehonjolma singkatmu, jala angka bangso singkat ni tondim.

⁵ Unang ho mabiar ai donganmu do ahu! Paroonku ma pinomparmu sian habinsaran, jala papunguonku ho sian hasundutan.

⁶Dohononku ma tu utara: Paulak! Dohot tu dangsina: Unang tiopi! Togihonma angka anakku sian na dao dohot angka borungku sian ujung ni tano on.

⁷Ganupjolma naung marpanggoarhon goarhu, jala naung hutompa bahen hasangaponku naung hujadihon ro di naung hubahen.

⁸Togihon tu on bangso na mapitung, atik pe marmata, dohot angka na nengel, atik pe marpinggol nasida.

⁹Marluhut ma saluhut angka bangso parbegu jala marpungu angka bangso! Tung ise ma sian nasida mamaritahon sisongon i, jala di patubegehon tu hita angka na masa na jolo? Dipatindang nasida ma angka sitindanginasida i, asa dipintori dirina, jala dibege halak huhut didok: Hasintongan do i!

¹⁰Hamu do angka sitindangingku, ninna Jahowa, dohot do naposongku naung hupilliti, asa ditanda jala dihaporseai hamu ahu, jala mangantusi rohamuna, paboa ahu ibana! Jumolo sian ahu ndang adong tarjadi Debata, dipudingku pe ndang tagamon adong!

¹¹Ahu tutu, ahu do Jahowa, jala ndang adong silehon tua dungkon ni ahu.

¹²Nunga ahu paboahon, jala ahu paluahon, jala ahu patubegehonsa, jala ndang adong debata sileban di tongatongamuna. Alai hamu do angka sitindangingku, ninna Jahowa, jala ahu do Debata.

¹³Nang tu joloan on sai laos ahu do ibana, jala ndang adong sipalua sian tanganku. Ahu do mambahen, tung ise na manundatisa?

¹⁴(II.) Songon on do hata ni Jahowa, sipalua hamu, na badia ni Israel: Ala hamu do marsuru ahu tu Babel, jala hupatuat angka na maporus sudena, dohot halak Kasdim tu angka parau parolopoloponnasida i.

¹⁵Ahu do Jahowa, na badiamuna i, sitompa Israel rajamuna i.

¹⁶Songon on do hata ni Jahowa, naung mangalehon dalan di laut, jala dalan balobung di bagasan angka aek na doras.

¹⁷Naung paruarhon hureta dohot hoda, parangan dohot parhohas: Rap marpeahan nasida, ndang tarbahensa be hehe, pidom do nasida, songon sumbu naung mintop.

¹⁸Unang be paingotingot hamu angka na masa najolo, jala unang be pingkiri hamu angka na robi:

¹⁹Ida ma: Bahenonku ma na imbaru, nunga pola martumbur nuaeng; tung so tandaonmuna ma i? Songon do tahe, bahenonku ma dalan di halongonan, angka batang aek di tano bangkalbangkal.

²⁰Pasangapon ni angka binatang di ladang ma ahu, angka gompul dohot angka pidong unto, ai lehononku ma aek di halongonan, angka batang aek di tano bakkalbakkal, mangalehon minum bangsongku na hupilliti.

²¹ I ma bangso na hujadihon i di ahu, mamaritahon hamuliaonku sogot.

²² (III.) Alai ndang dipajoujou ho ahu, ale Jakkob, ai nunga mahap roham mida ahu, ale Israel!

²³ Nandang diboan ho di ahu birubiru bahen peleanmu situtungan, jala ndang dipasangap ho ahu marhite sian angka peleanmu sipotongon; ndang na huparhatoban ho marhitehite pelean sipanganon, jala ndang hupalojaloja ho marhitehite daupa.

²⁴ Nandang dituhor ho di ahu marhitehite perak tobu na hushus jala ndang dipangusehon ho tu ahu miak ni peleanmi situtungan. Alai anggo ho nunga diparhatoban ho ahu, marhite sian angka dosam, jala nunga dilojai ho ahu marhite sian angka hajahatonmu.

²⁵ Ahu tutu; ahu sandiri manalesei angka pangalaosim, ala ni ahu, jala ndang be hupaingotingot angka dosam.

²⁶ Paingot ahu, asa mardabudabu hita! Ho ma pajojorhon, mamintori dirim.

²⁷ Ia amam parjolo i nunga mardosa, jala angka pangondianmi, nunga manjahati dompak ahu.

²⁸ Dibahen i nunga huparamun angka induk ni habadiaon i, jala hupasahat si Jakkob bahen sipulasan, jala Israel bahen panginsahion.

44¹ (I.) Alai anggo nuaeng, tangihon ma ale Jakkob, naposongki dohot ho ale Israel naung hupilliti?

²Songon on do hata ni Jahowa na tumompa jala na jumadihon ho, na mangurupi ho sian hatutubum: Unang ho mabiar ale Jakkob, naposongki dohot ho ale bangso na tigor naung hupilliti.

³Ai usehononku ma aek tu jolma na mauas dohot angka sunge tu na mahiang. Usehononku ma tutu Tondingku tu pinomparmu nuaeng, jala pasupasungku tu pinomparmu sogot.

⁴Asa martumbur nasida di holangholang ni duhutduhut, songon arung di topi ni angka sunge.

⁵Sadaon mandok: Jahowa nampuna ahu! Jala sadaan marpanggoarhon goar ni si Jakkob, jala na asing muse manurathon dohot tanganna: Jahowa do nampuna ahu, huhut mangasahon goar ni Israel.

⁶(II.) Songon on do hata ni Jahowa, raja ni Israel dohot sipalua ibana, Jahowa Zebaot: Ahu do parjolo jala ahu do parpudi, jala ndang adong Debata dungkon ni ahu.

⁷Jala tung ise ma tudoshon ahu manjou, dipaboa ma i, jala dipajojor di ahu, olat ni na hupatindang bangso salelenglelengnai? Dohot angka na masa sogot dipaboa hian ma.

⁸Unang hamu tahuton, jala unang manonditnondit! Nda nunga sian nahinan ahu patubegehon tu ho jala hupaboa? Alai hamu do angka sitindangingku: Nandang adong

Debata dungkon ni ahu, jala ndang haporusan na asing, ndang adong anggo na huboto.

⁹Angka halak na manggana ajiajian ndang hasea sudena jala ndang marguna angka hapandean hasudungan ni rohanasida i, laos angka i gabe sitindangi dompak nasida, ala so adong diida jala ndang adong diboto, umbahen tarurak nasida.

¹⁰Tung ise ma na tuk jumadihon Debata, manang manumpa ajiajian na so marguna i.

¹¹Ida ma, sude angka donganna tarurak do, ai parhapandean sianjolma hian nasida, marluhut pe nasida sude jongjong be do tarhatotong jala tarurak.

¹²Tungkang bosi mambahen sada tangke, jala dipauli jumpa gara, jala dibahen rupana marhitehite nanggar, jala dipauli marhitehite tanganna na gogo, huhut male maradu so margogo be, ndang minum aek ibana, gabe mandate.

¹³Ia pande hau manintak rambu, jala dibahen tandana marhitehite agong, diuhir jala diampolas gabe songon suman ni baoa, songon hinauli ni jolma laho mangingani bagas i.

¹⁴Ditaba muse di ibana angka hau ares, jala dibuat hau maranti dohot hoting balanga pola marpili di angka hau ni tombak; disuan sada hau ares, gabe udan pabalgahon.

¹⁵Jadi hasea ma i di jolma bahen soban, gabe dibuat ma sian i bahen pansusuduan,

huhut bahen gara laho mangalompota roti,
huhut dibahen sian i sada debata hidup jala
disomba; dibahen do i gabe ganaganaan jala
marsinggang di jolona.

¹⁶Satongana ditutung di bagasan api, di
lambung ni na satonganari mangan juhut
ibana, digoreng na deba sanga bosuran ibana
huhut mansisudu gabe didok: Ha, nunga las
ahu, nunga huhilala api.

¹⁷Alai tebatebana i dibahen gabe debata
hidup pasombasombaanna. Marsinggang
ibana di jolona jala marsomba jala martonggo
tusi ninna ma: Sai palua ma ahu, ai ho do
debatanku.

¹⁸Ndang mananda nasida jala ndang
mamoto, ai hona panutupi matanasida i, asa
unang marnida rohanasida pe, asa unang
mangantusi.

¹⁹Jala ndang adong sian nasida nanggo
sada na pasuang rohana tu bagasan, manang
marparbinotoan manang marhapistaran
mangetongi mandok: Satongana nunga
hututung di bagasan api jala hulompota roti
marhite sian garana, jala hugoreng juhut laos
hupangan; ia tebatebana i tung bahenonku
hape gabe parbiasan, tung marsinggang ma
ahu hape di jolo ni hau sallobong.

²⁰Rohana na tarpaoto pasabam dirina
marhite sian sirabun, huhut pasimbil ibana,
jadi ndang tagamon paluaonna tondina,

manang dohononna: Nda sipaotooto do di tangan siamunhon.

²¹ (III.) Sai parateatehon ma on ale Jakkob dohot ho ale Israel, ai naposongku do ho! Ahu do jumadihon ho, naposongku do ho! Ale Israel ndang tagamon halupahononku ho.

²² Nunga pola hupasisi songon ombun angka pangalaosim, jala songon ombun manorop angka dosam. Sai mulak ma ho tu ahu, ai ahu do sipalua ho.

²³ Marolopolop ma hamu angka langit, ai nunga Jahowa mambahen songon i. Marsurak ma hamu angka pusat ni tano on. Mariaia ma hamu ale angka dolok nang tombak ro di sude hau na di bagasanna, ai nunga dipalua Jahowa Jakkob jala marmulia ibana di Israel.

²⁴ Songon on do hata ni Jahowa sipalua ho jala na jumadihon ho sian bortian dope: Ahu, Jahowa do na mambahen saluhutna, ahu sandiri pahembang angka langit, ahu sandiri paherbang tano on.

²⁵ Ahu manulak angka tanda ni halak pargabus, jala ahu mangalalaeni angka pangarunding; ahu pamonang halak na bisuk jala parbinotoannasida gabe haotoon.

²⁶ Ahu do mangkajongjongkon hata ni naposona dohot pasintong panindangion ni suruanna; na mandok tu Jerusalem: Ingkon inganan do ho ulahan, jala tu angka huta ni Juda: Ingkon paulion do hamu jala patindangonku muse angka batunasida i.

²⁷Ahu do na mandok tu pusat samudora:
Marsik ma ho jala angka sungemi arsihanku
ma.

²⁸Na mandok tu si Sirus ibana parmahanku,
jala ibana pasauthon nasa lomo ni rohangku
jala dohononna ma tu Jerusalem: Ingkon
paulion ma ho! Jala tu bagas joro ingkon ojak
ho bahenon!

45¹(I.) Songon on do hata ni Jahowa tu
na miniahanna tu si Sirus, na hutiop di
tanganna siamun papatuhon angka bangso
parbegu di jolona, jala mangkarhari sinjata
sian gonting ni angka raja, mangungkap di
jolona angka pintu dohot bahal, unang hinsu
di dapot.

²Ahu mardalan di jolom jala pahornophon
angka buntulbuntul; ropuhanku ma angka
pintu tombaga jala segaanku angka sordak
bosi.

³Jala lehononku ma di ho arta angka na
di haholomon dohot homitan angka na
tinabunihon, asa ditanda ho ahu do Jahowa,
Debata ni Israel na manjou goarmu.

⁴Ala ni Jakkob naposongki dohot ala ni Israel
na hupilliti umbahen na hujou ho di goarmu,
pola marsahala goarmu hubahen tagan so
ditanda ho dope ahu.

⁵Ahu do Jahowa, jala ndang adong be
Debata dungkon ni ahu; huhohosi do ho
tagan so ditanda ho dope ahu.

⁶Asa ditanda halak angka na sian habinsaran dohot sian hasundutan na soadong Debata dungkon ni ahu; ahu do Jahowa, jala dungkon ni ahu ndang adong.

⁷Ahu Sijadi hatiuron dohot sitompa haholomon; sibahen hadameon dohot sitompa hamagoan. Ahu do Jahowa, sibahen saluhutna i.

⁸Manetehi ma hamu angka langit sian ginjang, jala diusehon angka ombun ma udan hatigoran! Buha ma tano on jala diparbuehon hatuaon dohot hatigoran, rap martumbur ma i! Ahu Jahowa do sitompasa.

⁹(II.) Marjea ma manang ise na mambadai sitompa ibana, ngarngar nian sian angka ngarngar ni tano on! Tung dohonon ni tano liat ma tu sitopa ibana: Aha do na binahenmu? Manang jadijadianmu mandok: Nandang martangan ibana.

¹⁰Marjea ma manang ise na mandok tu amana: Aha tinubuhonmu? Manang tu inana: Boasa tung manubuhon ho?

¹¹Songon on do hata ni Jahowa, na badia ni Israel jala sitompasa: Taringot tu angka na masa sogot nian sungkun hamu ahu; taringot tu angka anakku dohot taringot tu jadijadian ni tanganku nian tona i hamu ahu!

¹²Ahu do na mambahen tano on jala na tumompajolma di atasna; tanganku sandiri paherbang angka langit jala guru dokku do angka paranganna saluhutna.

¹³Ahu patindang ibana marhite sian hatigoran jala pahornoponku ma saluhut angka dalanna. Ibana ma pauli hutangku jala paluaonna ma bangsongku na tarbuang i, ndada binahen ni upa manang silehonlehon, ninna Jahowa Zebaot.

¹⁴Songon on do hata ni Jahowa: Na niomo ni halak Misir, jala laba ni halak Kus dohot halak Seba jolma pardaging na ganjang i bali tu ho, gabe ho nampunasa; ihuthononnasida do ho, pola marrante nasida mardalan; jala marsomba nasida tu ho, jala marhuraja tu ho: Holan di bagasan ho do tutu Debata jala ndang adong be Debata na asing.

¹⁵Tongon tahe, na simuk do ho marhadirion ale Debata, Debata ni Israel sipangolu i.

¹⁶Maila huhut tarurak nasida sudena; rap mardalan di haurahon angka sipandei ganaganaan.

¹⁷Alai anggo Israel dapotan tua marhite sian Jahowa tung tua salelenglelengna do. Nandang tagamon maila manang tarurak hamu ro di salelenglelengna.

¹⁸(III.) Ai songon on do hata ni Jahowa, sitompa angka langit, ibana do Debata, Sijadi tano on jala pasunhon; ibana do paojakkonsa ndada laos rumar umbahen ditompa, bahen inganan ni jolma i do umbahen dijadihon: Ahu do Jahowa jala dungkon ni ahui ndang adong be.

¹⁹Ndang dung hudok hatangku di sihabunian, manang di inganan na holom di tano i; ndang dung hudok tu pinompar ni si Jakkob: Ndang marguna pangaluluimuna di ahu! Ahu do Jahowa na mandok hatigoran, na mamaritahon hasintongan.

²⁰Marluhut ma hamu jala rap ro ma hamu tu lambungkan, hamu ale angka naung malua sian bangso parbegu! Ndang adong diboto nasida angka na mangusung hau bahen ganaganaannasida, jala angka na marsomba tu Debata, na so tarbahen paluahon.

²¹Marboaboa ma hamu, jala ro jumonok martuptup sama hamu! Tung ise ma naung patubegehon i sian na robi manang mamaritahonsa? Nda ahu do Jahowa jala ndang adong Debata, dungkon ni ahu, Debata na bonar jala silehon tua, ndang adong Debata dungkon ni ahu.

²²Dompakkon hamu ma ahu, asa martua hamu nasa ujung ni tano on! Ai ahu do Debata, jala ndang adong dungkon ni ahu.

²³Nunga pola marmangmang ahu tu diringku, jala ruar sada hata hatigoran sian pamanganku na so tupa mulak: Ingkon lompit sogot nasa ulu ni tot marsomba tu ahu, jala marmangmang tu ahu saluhut dila.

²⁴Mandok: Holan di bagasan Jahowa do angka hatigoranku dohot hagogoonku. Ro be do tu ibana, alai maila sude angka na hehe mangalo ibana.

²⁵Di bagasan Jahowa dapotan hapintoran jala marolopolop sandok pinompar ni Israel.

46¹(I.) Nunga manungki Bel, nunga jomba Nebo; tu binatang dohot tu pinahan dipampe angka ganaganaannasida, pola sorat nasida mangusung maradu magege.

²Rap tinggang jala manungki nasida, ndang tarpaluasa na niusungnasida i, gari nasida sandiri ingkon laho do tu habuangan.

³(II.) Tangihon ma ahu ho ale pinompar ni si Jakkob dohot nasa pasipasi ni pinompar ni si Israel, angka na huompa sian bortian dope, angka na huabing sian hatutubuna.

⁴Sahat ro di hatutuamu sai tongtong do ahu, jala ro di na ubanon sai ahu do mangusung hamu. Ahu do mambahensa na sai laon, ahu do mangompa, ahu do mangabing jala ahu paluahon nuaeng.

⁵Tung tu ise ma pasumanonmu ahu, manang patudosonmu ahu, manang pasobohonmu ahu, paboa suman ahu tusi?

⁶Dirunggirhon nasida do sere sia puntalan jala martimbangan nasida mandasing perak i; diupai nasida sada panopa, asa dibahen sian i sada debata, marsinggang tusi nasida bahen panombaannasida.

⁷Dipampe nasida ibana tu abara, diusung ibana jala dipajongjong tu hajongjonganna, gabe hot jongjong di hajongjonganna, ndang tarbahensa morot; joujou pe manang ise tu

ibana, ndang dialusi, jala ndang tarbahensa paluahon sian hagotanna.

⁸(III.) Sai parateatehon hamu ma i jala pir ma tondimuna! Sai pasuang hamu ma rohamuna tu bagasan, hamu angka pangalaosi!

⁹Sai parateatehon hamu ma angka na masa na jolo sian mulamula, ai ahu do Debata, jala dungkon ni ahu ndang adong be Debata, manang na tudos tu ahu.

¹⁰Ahu palumbahon hian sian mulamula ujungna sogot, ahu marboaboa sian na robi na so masa dope; laos ahu mandok: Sai hot do sangkaphu jala bahenonku ma nasa lomo ni rohangku.

¹¹Nunga hujou sada pidong raja wali sian habinsaran; sian tano na dao sada baoa na pasauthon sangkaphu. Nunga pola hudok, sai na paroonku do; nunga pola hurumang, sai na pasautonku do.

¹²Tangihon ma ahu hamu ale angka na tangkang marroha, hamu angka na holang sian hatigoran.

¹³Nunga pola hupajonok hatigoranku, ndang be mandaodao, jala ndang marbenda hatuaonku, jala lehononku do di Sion hatuaon, jala hamuliaonku di Israel.

47 ¹(I.) Mijur ma, jala hundul tu sirabun ho ale namarbaju, boru Babel! Hundul ma tu tano, unang be marhabangsa ho, ale

boru Kasdim! Ai ndang be goaron ni halak ho:
Parompuan na lambok jala hasoloan.

²Buat ma pandudaan, jala duda itak!
Pasisi ma pangkuphupi ni bohim, sintak
ma arbearbe ni obukmu, marsabuk ma ho,
taripari ma angka batang aek!

³Andar ma hapantanganmu, huhut tarida
haurahonmu; marlulu ma ahu dompak ho,
jala ndang adongjolma olanangku.

⁴Ia goar ni sipalua hita, i ma Jahowa Zebaot
na badia ni Israel.

⁵Hohom ma ho hundul, jala topot ma
haholomon ho ale boru Kasdim, ai ndang be
goaron ni halak ho: Boru jujungan ni angka
harajaon.

⁶(II.) Tarrimas ahu mida bangsongku,
nunga pola huparamun parjambaranku, jala
hupasahat nasida tu tanganmu hape ndang
maralangalang roham mida nasida, lam
dipadokdok ho situtu augam, nang tu halak
na tuatua.

⁷Gabe didok ho: Salelenglelengna do ahu
boru jujungan, laos so diparateatehon ho hata
i; jala ndang disarihon roham pangapudian
sogot.

⁸Dibahen i tangihon ma hatangkon ho ale
boru hasian, na hundul marsonangsonang,
jala na mandok di bagasan rohana: Ahu ma
bongka i, jala ndang adong halak na songon
ahu on; ndang tagamon juguk ahu mabalu,
jala ndang tagamon tandaonku hapunuon.

⁹Alai ro do na dua i tu ho sogot:

Hapunuon dohot habaluon di na sadari so pangirimanmu, sintong situtu do harorona tu ho, atik pe mansai lan utiutianmu, atik pe torop situtu angka tabasmu.

¹⁰Ai marhaposan tu hinajahatmu do ho, nimmu do: Ndang adong manang ise na marnida ahu. Habisukonmu dohot parbinotoanmu, i do mangaliluhon ho, gabe didok ho di bagasan roham: Ahu ma bongka i, jala ndang adong songon ahu on.

¹¹Hape songgop do tu ho hinamago, ndang botoonmu hinasogotna; jala maninggang tu ho jea, ndang tarpatupa ho pardenggananna; jala ro do tahop tu ho hasiapon so hirimhirimmu so pamatoanmu.

¹²(III.) Ua datdati patindang angka utiutianmu dohot hinadeak ni tabasmu, na pinaulasulasmu sian sietehetehonmu; anggiat tung tarpatupa ho pangurupion; anggiat tung jumpangan gogo ho mangalo.

¹³Nunga pola magege ho dibahen hinadeak ni angka sangkapmu. Ua hehe ma nuaeng nasida angka sijujur parhalaan, angka sitilik bintang, angka na martondung sian bulan paluahon ho nian taringot tu na ro sogot tu ho.

¹⁴Ida ma, doshon rapanrapan do nasida, suda do nasida panganon ni api; ndang tarpalua nasida tondinasida i sian tangan ni

jilam ni api, ai ndada gara ni api pamasak rotinasida, manang bahen pansusuduanna.

¹⁵Suman tusi do halak parutiutian angka na palojaloja ho, angka partigatiga na niangkupanmu sian sietehetehonmu; masitondong dalan haliluonna be do, ndang adong na paluahon ho nanggo sada.

48¹(I.) Tangihon ma on, ho ale pinompar ni si Jakkob, angka na marpanggoarhon Israel, jala marharoroan sian mual ni Juda, angka na marmangmang tu goar ni Jahowa, jala angka na papujipuji Debata ni Israel, alai ndang di bagasan hasintongan manang hatigoran.

²Ai marpanggoarhon huta na badia i do nian nasida, jala marpangunsandean nian di Debata ni Israel, Jahowa Zebaot do goarna.

³Angka na masa parjolo i nunga tibu hian hupalumba, jala sian pamanganku do i ruar, jala hupatubegehon tu nasida. Tompu do i hubahen gabe saut ro.

⁴Ala naung huboto hian na jogal do ho marroha jala marurat bosi tangkuhukmu, jala tombaga pardompahanmu.

⁵Dibahen i hupalumba hian tu ho sian na robi: Tagan so ro dope nunga hupatubegehon hian tu ho, asa unang tardok ho; ajiajianku do na mambaheni jala ganaganaan na huuhir dohot na hutempa do na mandokkoni.

⁶Nunga dibege ho hian, parateatehon ma saluhutna i. Beha ia hamu nda

hatindangkononmu sintongna? Nunga hupatubegehon tu ho olat ni on angka na imbaru dohot angka na simuk, na so binotom na sai laon.

⁷Nuaeng pe tartompa nasida, ndada nahinan, jala di jolo ni ari parbinegeanmu, asa unang tardok ho: Ida ma, nunga huboto hian.

⁸Ndang dung dibege manang diboto ho hian, manang tarbortik tu pinggolmu uju i; ai huboto do simeoleol situtu ho, jala pangalaosi do ho targoar sian bortian ni inangmu.

⁹Ala ni goarhu sambing umbahen hupalambat rimashu, jala ala ni hamuliaonku hupaombun ahu mangolani ho umbahen so siap ho hubahen.

¹⁰Ida ma, nunga hupapita ho, alai ndada songon perak; ingkon di bagasan pamurunan ni pardangolan ahu manguji ho.

¹¹Ala ni ahu, ala ni goarhu tutu nunga hubahen songon i, ai tung beha ma pangaramunna disi? Jala ndang lehononku hamuliaonku tu na asing.

¹²(II.) Tangihon ma ahu, ale Jakkob, dohot ho ale Israel naung hujou! Sai tongtong do ahu, ahu do parjolo, ahu do huhut parpudi!

¹³Tanganku do huhut naung paojak tano on, jala siamunhu paherbang angka langit. Joujou do ahu di nasida, mamintor rap jongjong do.

¹⁴Marluhut ma hamu sudena jala tangihon hamu! Tung ise ma sian nasida paboahon

angka sisongon i? Jahowa do mangkaholongi ibana; bahenonna ma lomo ni rohana tu Babel, jala tanganna mangalo halak Kasdim.

¹⁵Ahu, ahu ma tutu naung mandok i; ahu huhut manjou ibana; ahu parohon ibana, jadi ingkon tulus dalanna i.

¹⁶Ro ma hamu jumonok tu ahu, tangihon hamu ma on! Sian mulamula dope ndang dung hudok di sihabunian. Olat ni tingki hajadianna, nunga disi hian ahu; alai anggo nuaeng disuru Tuhan Jahowa dohot Tondina i ahu.

¹⁷Songon on do hata ni Jahowa sipalua ho, na badia ni Israel: Ahu do Jahowa Debatam, na mangajarhon tu ho bahen hatuaonmu, na manogu ho di dalan sidаланanmu.

¹⁸Aut na diradoti roham angka patikki, jala doshon batang aek hasonanganmu, jala hatigoranmu doshon galumbang ni laut.

¹⁹Jala doshon horsik di topi laut pinomparmu toropna, jala angka tubum songon rihit di topi ni batang aek; ndang tagamon ripur manang mago goarna maradophon ahu.

²⁰(III.) Ruar ma hamu sian Babel, maporus ma hamu sian Kasdim! Marsoara olopolop ma hamu paboahon, patubegehon hata i! Pasar hamu ma i ro di ujung ni tano on, dok hamu ma: Nunga dipalua Jahowa naposona si Jakkob.

²¹Jadi ndang mauas nasida di angka halongonan, uju i tinogihonna i nasida;

mabaor do aek sian dolok batu di nasida
dibahen ibana jala dibolahon batu i gabe
mabaor aek sian bagasan.

²²Alai anggo di halak parjahat ndang adong
hasonangan, ninna Jahowa.

49¹(I.) Tangihon ma ahu, hamu ale angka
pulo, jala patinggil ma pinggolmu
hamu ale angka bangso di na dao! Jahowa do
manjou ahu sian bortian dope, sian butuha ni
dainang, nunga ditaringoti goarhu.

²Jala dibahen pamanganku songon podang
na tajom; diondingi do ahu marhite sian
pangalinggom ni tanganna, jala dibahen ahu
gabe sumbia na niugam, ditabunihon do ahu
di bagasan siorna.

³Jala ninna do mandok ahu: Naposongku
do ho, ale Israel marhite sian ho do ahu
marmulia.

⁴Alai anggo ahu, ninna rohangku do: Nandang
marguna na ngalutan i ahu magopo sambing
do gogongku hupasudasuda; hape Jahowa
patingkostingkos uhum tu ahu, jala upangku
di lambung ni Debatangku do.

⁵Ia nuaeng hata ni Jahowa na jumadihon
ahu sian bortian dope bahen naposona,
asa ahu paulakkon Jakkob tu ibana dohot
papunguhon Israel, jadi marmulia ma
ahu diida Jahowa, jala Debatangku gabe
hagagoonku.

⁶Jala ninna do: Hametmeton do i anggo
tung holan naposongku ho patindang angka

marga ni Jakkob dohot manogihon mulak angka pasipasi sian Israel; nunga hulehon ho huhut bahen panondang di angka parbegu, gabe parhitean ni hatuaonku ho ro di ujung ni tano on.

⁷Songon on do hata ni Jahowa, Sipalua Israel na badiana tu ibana na hinabiashon ni roha ni halak, tu bangso hagigian, tu naposo ni angka pangarajai: Ingkon idaon ni angka raja do ho jala hehe, jala marsomba angka pangarajai ala ni Jahowa na bonar, dohot ala ni na badia ni Israel, na mamillit ho.

⁸Songon on do hata ni Jahowa: Di tingki parasian ahu mangalusi ho, jala di ari hatuaon ahu mangurupi ho, jala ahu mangaramoti ho, jala ahu mambahen ho gabe bangso parjanjian, pahehehon tano i martalihan angka partalian na tarulang.

⁹Mandok tu angka na tarrante: Ruar ma hamu! Tu angka na di haholomon: Ro ma hamu tu hatorangan! Marsonangsonang nasida diparmahan di angka dalan, jala jumpang nasida hangoluanna di saluhut angka robean.

¹⁰Ndang male, manang mauas nasida, ndang mangonai na mohop manang las ni ari tu nasida, ai parasi roha do nasida manogihon nasida, jala ditogutogu nasida tu lambung aek mual.

¹¹ Jala bahenonku ma saluhut angka dolokku gabe dalan na hornop, jala patimboonku ma angka dalanku.

¹² Ida ma, na deba ro sian na dao, jala ida ma, na deba ro sian utara dohot sian laut, jala na deba sian tano Sinim.

¹³ (II.) Marolopolop ma hamu ale angka langit, jala mariaia ma ho ale tano on! Pangiar ma soaram marolopolop, hamu ale angka dolok! Ai nunga diapul Jahowa bangsona jala nunga asi rohana di angka na dangolna.

¹⁴ Alai ninna Sion do: Nunga ditadingkon Jahowa ahu jala nunga dihalupahon Tuhan i ahu.

¹⁵ Tung tarhalupahon inaina ma posoposona, so asi rohana mida anak tinubuhonna i? Tung sura pe tarhalupahon nasida, ianggo ahu laos so halupahononku do ho.

¹⁶ Ida ma, nunga pola ahu manguhirhon ho tu bagasan tanganku duansa, tongtong do angka parikmu di jolongku.

¹⁷ Humalaput ma angka anakmu mandapothon ho; alai anggo halak pangaloha i dohot partaban di ho, ingkon ruar sian ho.

¹⁸ Mangaranap ma matam humaliang, jala ida: Saluhut nasida pungu ro mandapothon ho. Songon sintongna mangolu ahu, ninna Jahowa, ingkon alithononmu do nasida sude, hira pangkean oroan jala ingkon pangkeonmu dirim marhite sian nasida songon boru oroan.

¹⁹Ai tanom naung tarulang, tartaban jala siniaphon nuaeng magogothu do anggo sogot bahen inganan, ia dung mandao halak sibondut ho.

²⁰Angkup ni, ho ale na hol na sai laon marhusip dope sogot tu pinggolmu angka anakmu: Magogothu do inganan on di ahu, palambas di ahu, asa hainganan ahu.

²¹Jadi dohononmu ma di bagasan roham: Ise ulaning naung manubuhon angka anakkon di ahu, ahu na hol hian, jala na punjung, na tarbuang jala na pinaulak? Jala ise ulaning naung pagodanggodang angka nasida di ahu? Ida ma, na punjung hian do ahu, didia do angka nasida on uju i?

²²Songon on do hata ni Tuhan Jahowa: Ida ma, patoltolonku ma tanganku tu angka bangso parbegu, jala patindangonku ma tonggolhu tu angka bangso, jadi ingkon boannonnasida ma angka anakmu di bagasan ampuan, jala usungonna angka borum di abarana.

²³Ai ingkon angka raja gabe parorotmu, jalajolma ni angka raja gabe panusuanmu; pola ingkon manungkap tu tano nasida marsomba tu ho, jala orbuk ni patmu dilatonnaasida, jadi botoonmu ma, ahu do Jahowa, ndang tagamon tarurak manang ise na marhaposan tu ahu.

²⁴Tung tarrampas ma tabantaban sian halak na gogo? Manang tung malua ma na tarhurung sian uhum madabu?

²⁵Alai songon on do hata ni Jahowa: langgo nuaeng rampason ma tutu halak na tarbuang sian na gogo, jala malua tabantaban sian halak pangarupa, ai ahu mambadai angka na mambadai ho, jala ahu paluahon angka anakmu.

²⁶Jala halak na mangarupa ho, lehononku manganhon sibukna sandiri, jala inumonna mudarna sandiri maradu mabuk songon sian tuak na pang, jadi botoon ni nasa sibuk ma, ahu do Jahowa, silehon tua, jala sipalua ho, na sun hinagogo manumpak Jakkob.

50¹(I.) Songon on do hata ni Jahowa: Didia do surat parsirangan ni inamuna, paboa naung hupaulak Ibana? Manang tung ise ma parutangkanku, panggadisanku di hamu? Ida ma, ala ni hajahatonmuna do hamu targadis, jala binahen ni pangalaosionmuna pinaulak inamuna i.

²Boasa tung ro ahu, hape ndang adong manang ise hudapot? Joujou ahu, hape ndang adong na mangalusi? Tung na majempekku do huroha tanganku mambahen haluaon? Manang tung na so margogo ahu huroha paluahon? Ida ma, marhitehite pangasupingku huarsik do laut, hubahen do angka batang aek gabe halongonan, gabe

bau do angka dengke di bagasan, sian na soada aek, jala marmatean dibahen uas.

³Marulos haholomon hubahen angka langit, jala hori hubahen bulusanna.

⁴(II.) Nunga dilehon Tuhan Jahowa tu ahu dila sisean, asa huboto pasabam roha ni na loja marhite sian hata i. Sai disungguli do ahu ganup sogot, dipatinggil pinggolhu marbinege, songon sisean.

⁵Nunga dibungka Tuhan Jahowa pinggolhu, jala ndang manjengkeltjengkel ahu, ndang sumurut ahu tu pudi.

⁶Hutarehon do balik tanggurungku tu halak na mangalinsingi ahu dohot hurumhu tu halak na mamastapi, ndang hutabunihon bohingku maradophon haurahon dohot tijur.

⁷Alai Tuhan Jahowa do mangurupi ahu, dibahen i ndang tarurak ahu; ala ni hubahen do bohingku songon batu ping; ai huboto hian na so tagamon tarurak ahu.

⁸Jonok do ibana na mamintori Ahu; ise naeng maruhum dohot ahu? Antong marluhut ma hita, ise suhut alongku maruhum? Dipajonok ma tu ahu.

⁹Ida ma, sai urupan ni Tuhan Jahowa do ahu, tung ise ma na tuk manorui ahu? Ida ma, sude do nasida matua songon ulos, ngitngit manganhon nasida.

¹⁰Ise ma sian hamu na mabiar mida Jahowa, na tumangihon soara ni naposona, na mardalani di angka haholomon, jala ndang

adong hatiuron di ibana? Dihaposi ma goar ni Jahowa jala marparsigantungan ibana tu Debatana.

¹¹ Ida ma, sude hamu angka na pagalak api, angka na marhampilhon sumbia na ginarahon, laho ma hamu tu bagasan apimuna na marjillamjillam i dohot tu angka sumbia na ginarahon, angka na pinagalakmuna. Sian tanganku masa songon i tu hamu; peak di bagasan angka haporsuhon do anggo hamu.

51 ¹ (I.) Tangihon ma ahu hamu angka na mangeahi hatigoran, angka na mangalului Jahowa! Paberengbereng hamu ma dolok batu hapultahanmuna dohot godung parsumuran na hinali, haruaranmuna i.

² Paberengbereng hamu ma si Abraham, ompumuna dohot si Sara na manubuhon hamu; ai punjung sasadasa do uju na hujou, asa hupasupasu ibana jala hupatorop.

³ Ai asi do roha ni Jahowa mida Sion, asi do tutu rohana mida sude ingananna na tarulang, jala doshon Eden dibahen halongonanna jala tanona bakkalbakkal songon porlak ni Jahowa; jumpang ma disi las ni roha dohot hariburon, hamauliateon dohot soara pujipujian.

⁴ Patinggil ma pinggolmu ale bangsongku tumangihon ahu, jala tangihon ahu hamu ale angka naposongku! Ai sian ahu haroroan ni patik, jala patindangonku uhumhu bahen panondang di angka bangso.

⁵Nunga jonok hatigoranku, nunga borhat hatuaonku, ingkon uhumon ni tanganku do angka bangso. Marhaposan tu ahu ma angka pulo jala marhanalomhon tanganku do nasida.

⁶Manaili ma matamuna dompak ginjang, jala mamereng ma hamu dompak tano i; ai laho salpu do angka langit songon ombun, jala laho matua sogot tano on songon ulos, jala pangisina i marmatean songon i; alai anggo hatuaonku ro di salelenglelengna do, jala hatigoranku ndang olo muba.

⁷Tangihon ahu, hamu ale angka sitanda hatigoran, ho ale bangso na umpeop patikku di bagasan rohana! Unang tung habiari hamu pangeleson ni jolma na gale i, jala unang tung tahuton hamu mida panginsahionnasida i.

⁸Ai ingkon suda nasida panganon ni ngitngit, songon ulos jala ingkon panganon ni gulokgulok nasida songon imput ni birubiru; alai anggo hatigoranku hot do ro di salelenglelengna, jala hatuaonku marsundutsundut.

⁹(II.) Ngot ma ho, ngot ma ho! Solukkon ma hagagoon, ho ale tangan ni Jahowa! Ngot ma ho, songon di angka ari na robi, di angka sundut mulamula! Nda ho do i na patunduk Rahab, naung manullang buea?

¹⁰Nda ho do i na mangarsik laut i pasuruthon angka pusat godang? Na mambahen angka

tondolan ni laut gabe dalan, asa taripar sian i angka na pinaluam.

¹¹ Suang songon i ma mulak angka na tinobus ni Jahowa asa sahat tu Sion mardongan olopolop dohot las ni roha salelenglelengna di atas ulunasida. Jumpangan hahinsaon jala hahilason nasida, alai maporus ma anggo arsakarsak dohot hoihoi.

¹² Ahu, ahu sandiri tutu na mangapuli hamu. Tung ise ma ho, pola habiaranmu jolma na olo mate, manang anak ni jolma na tudoshon duhutduhut?

¹³ Gabe dihalupahon ho Jahowa sitompa ho, sipaherbang angka langit jala na paojak tano on, pola manonditnondit ho tongtong manipat ari maradophon hamuruhon ni pangarupa, molo mangkontas ibana laho mangago? Hape didia do nuaeng hamuruhon ni pangarupa?

¹⁴ Hatop do dapotan haluaon jolma na tarjepol i, asa unang mate ibana di godung, jala unang hurangan roti ibana.

¹⁵ Ahu do antong Jahowa, Debatam, na manggunsang laut, gabe marhasak angka galumbangna; Jahowa Zebaot do goarna.

¹⁶ Ampehononku do huhut angka hatangku tu bagasan pamanganmu, jala tabunihononku ho marhite sian pangalinggom ni tanganku, laho manuan angka langit jala paojak tano on, huhut mandok tu Sion: Bangsongku do ho!

¹⁷ (III.) Ngot ma ho, ngot ma ho! Hehe ma ho ale Jerusalem, naung manjalo sian tangan ni Jahowa minum sian panginuman ni hamuruhonna; nunga suda diinum ho panginuman parmabuhon, pola didilati ho.

¹⁸ Ndang adong manang ise sian nasa anak tinubuhonna i na manogihon ibana jala ndang adong manang ise sian nasa anak pinagodanggodangna i manangkup tanganna.

¹⁹ Na dua ragam on songgop tu ho; tung ise ma marhabot ni roha mida ho? Hatataban dohot hauulang, haraparon dohot podang; tung ise ma mangapuli ho?

²⁰ Nunga pola mandate angka anakmu, marpeahan do nasida di suhi ni saluhut angka alaman, songon ursa na dapot aring, angka na mabuk binahen ni hamuruhon ni Jahowa, pangasupion ni Debatam.

²¹ Dibahen i, ua tangihon ma on, ho ale na dangol, jala na mabuk, alai ndada sian anggur.

²² Songon on do hata ni Tuhanmu, Jahowa jala Debatam, na martubolhon bangsona: Ida ma, buatonku ma sian tanganmu panginuman parmabuhon, panginuman ni hamuruhonku, ndang be inumonmu sian i.

²³ Lehononku ma ibana tu bagasan tangan ni halak na pasipal ho, angka na mandok tu tondim: Paunduk ma ho, asa hudegedege hami ho; gabe dipabustang ho

tanggurungmu, songon tano, jala songon alaman di jolma angka na mamolus sian i.

52¹ (I.) Ngot ma ho, ngot ma ho! Solukkon ma hagagoonmu, ale Sion! Solukkon ma angka ulos hamuliaonmu, ale Jerusalem, huta na badia i! Ai ndang be masuk tu ho tu joloan on nanggo sahalak na so marsunat, manang na ramun.

²Paspas ma orbuk sian ho, hehe ma ho, marhabangsa ma ho, ale Jerusalem! Harhari ma angka ihot ni rungkungmu, ho ale boru Sion na tarbuang.

³Ai songon on do hata ni Jahowa: Nunga targadis hamu soada utang, jadi ndang marhitehite perak hamu tobuson.

⁴Ai songon on do hata ni Tuhan Jahowa: Tuat do di na robi bangsongku tu Misir, asa manginsua disi; dung i dirupa Assur nasida, soada alana.

⁵Alai anggo nuaeng, aha patut bahenonku dison! Ninna Jahowa, ai nunga tarboan bangsongku, soada alana. Sai mariaia do angka panggomgomina, ninna Jahowa, jala tongtong manipat ari diinsahi goarhu.

⁶Dibahen i, ingkon tandaon ni bangsongku goarhu, dibahen i tandaonna ma tutu di ari na sasada i, ahu do i na mandok: Ida ma, dison do ahu.

⁷Lehetna i di atas ni angka dolok angka pat ni parbarita na uli, na patubegehon hadameon, na mamaritahon barita na uli, na

patubegehon hatuaon, na mandok tu Sion:
Debatam do bangkit Raja.

⁸Soara ni jolma parhalmu, angka dipangiar
be soarana rap marolopolop, ai adop bohi be
diida nasida, molo mulak Jahowa tu Sion.

⁹Pangiar ma soaramuna rap marolopolop
ma hamu, ale angka pasipasi ni Jerusalem,
ai nunga marpangulah i roha ni Jahowa mida
bangsona, nunga dipalua Jerusalem.

¹⁰Nunga pola dipatoltol Jahowa tanganna na
badia i di adopan ni saluhut bangso parbegu,
jadi saluhut ujung ni tano on marnida hatuaon
ni Debatanta.

¹¹Ruar, ruar, borhat ma hamu sian i, unang
jama hamu na ramun! Ruar ma hamu sian
tongatonganasida! Manguras ma hamu, ale
angka na mangusung ulaula ni Jahowa.

¹²Ai ndang pola humalaput hamu laho ruar,
manang marlojong songon halak na maporus,
ai Jahowa do manguluhon hamu, jala Debata
ni Israel mangiringiring hamu sian pudi.

¹³(II.) Ida ma, pistar do pambahen
ni naposongku; tarhinsat do ibana jala
dipatimbo, gabe timbul situtu sogot.

¹⁴Ia songon i songgot ni roha ni torop
halak mida ibana dibahen hinaroa ni rupana
dibahen tandina sian jolma hian, rupana pe
maradophon jolma.

¹⁵Songon i do urasonna torop angka bangso
parbegu sogot, hohom be do angka raja
maradophon ibana, ai halak na so dung

panahatan ni barita i, nasida do marnida, jala halak na so dung umbegesa, i do mangantusi sogot.

53¹ (I.) Tung ise ma nuaeng porsea di jamitanami? Jala tangan ni Jahowa, tung ise ma naung tumandasa?

² Ai simbur do ibana tubu songon tumbur di adopan ni bohina, jala songon tunas sian tano na mahiang. Nandang adong hinauli ni rupana manang hamuliaonna; ia huida hami ibana, ndang adong rupana umbahen sihalomohononhon ibana.

³ Dileai jala dipasidingjolma do ibana, baoa na somal mangae pardangolan dohot sahiti ibana, pola ditabunihon halak bohina maradophon ibana, dibahen leana, jadi ndang pola hurajumi hami ibana.

⁴ Tongon do angka sahitta diusung ibana, jala angka pardangolanta diporsan; alai anggo rohanta mandok: Debata do maminsang, mamungkul dohot pasipal ibana.

⁵ Hape ala ni pangalaosinta ibana tartullang, binahen ni hajahatonta ibana mabugang. Ampe tu ibana pinsangpinsang parhitean ni hasonanganta, jala binahen ni bugangna malum itahilala.

⁶ Luhut do hita lilu songon birubiru, ganup masitondong dalanna be, alai hajahaton ni hita sudena dihonahon Jahowa tu ibana.

⁷ Dipasipal pe ibana, sai manaonnaon do anggo ibana, ndang manang mangkuling

pamanganna, songon birubiru do ibana na tinogu tu pamotongan, jala songon anak ni birubiru na hohom maradophonjolma sigusting ibana, tung na so dibungka do pamanganna.

⁸(II.) Dung malua ibana sian pardangolan dohot sian uhum, tung ise ma na tuk manjujur sundutna i? Ai sirang pe ibana sian tano ni halak na mangolu, binahen ni pangalaosion ni bangsongku do mangonai pinsangpinsang i tu ibana.

⁹Rap dohot halak parjahat hian tanomanna dilehon, hape rap dohot halak na mora ibana dung mate, ala na so adong na so uhum diula jala ndang adong sipaotooto di bagasan pamanganna.

¹⁰Alai dihalomohon Jahowa do parsipalna mangae sahit! Ia dung dilehon hosana bahen pelean pardenggan, idaonna ma boni jala paganjangonna ariarina, jala manjadi ma lomo ni roha ni Jahowa marhitehite tanganna.

¹¹Dung malua rohana sian halojaon, idaonna ma na pasabam rohana; torop ma halak pintoran ni naposongku na tigor i marhitehite parbinotoanna, jala porsanonna ma hajahatonnasida i.

¹²Dibahen i torop halak lehononku bahen jambarna, jala marbagi tabantaban ibana rap dohot halak na marhuaso, ala naung sineahonna i hosana tu hamatean, jala tarrajum ibana tu halak parjahat; ala naung

ibana mangusung dosa ni torop halak, jala diondihon halak parjahat.

54¹ (I.) Mariaia ma ho, ale na hol na so dung tubuan anak! Pangiar ma soaram marsuraksurak, jala marolopolop ma ho na so dung mangae posoposo! Ai tumorop situtu do anak ni na punjung, sian anak ni na marharajaan, ninna Jahowa.

²Palambas ma hajongjongan ni undungundungmu, jala paherbang ma angka rimberimbe ni ingananmu. Unang orai! Paganjang ma angka talim jala pahot angka tiangmu.

³Ai manerak ma ho tu siamun dohot tu hambirang, jala soluhon ni pinomparmu ma angka bangso parbegu, jala ingananna ma angka huta na tarulang.

⁴Unang ho mabiar, ai ndang tagamon tarurak ho; unang ho maila, ai ndang tagamon mangirput ho. Ai halupahononmu ma hilaon ni parnaposoonmu, jala ndang be paingotingotonmu haurahon ni habaluonmu.

⁵Ai sitompa ho, i do harajaanmi, Jahowa Zebaot do goarna jala na badia ni Israel do sipalua ho, targoar do ibana Debata ni liat portibi on.

⁶Ai nunga diulahi Jahowa manjou ho, songon inaina na tinadingkon, jala na habot roha situtu; jala songon pardihuta na binolongkon tagan poso dope, ninna Debatam.

⁷ Satakkarisap lelengna hutadingkon ho alai papungupunguonku do ho muse marhitehite angka asi ni roha godang!

⁸ Tagan di parpiar ni murukku hutabunihon bohingku satongkin maradophon ho, alai marhitehite denggan basa salelenglelengna asianku ho, ninna Jahowa sipalua ho.

⁹ Ai songon aek na sumar uju di ngolu ni si Noak do on di ahu: Pola maruari ahu, na so tupa be boluson ni aek na sumar songon uju di ngolu ni si Noak tano on, suang songon i ahu nuaeng maruari: Na so tupa be rimasanku ho, manang asupanku ho.

¹⁰ Ai munsat pe angka dolok, jala humuntal angka robean, alai anggo asiasingku na so tupa munsat sian ho, jala padan ni hadameonku na so tupa humordit, ninna Jahowa siasii ho.

¹¹ (II.) Ho ale na parir, na pinaburuburu, na so tarapul, ida ma, peakkononku ma angka batum di bagasan ampang na arga, jala ojakkonongku ma ho marhitehite intan sapir.

¹² Bahenonku ma angka bungkulanmu sian humala rubin, jala angka bahalmu sian mata intan humala, jala sandok parbalohanmu sian angka batu hasudungan ni roha.

¹³ Jala sude anakmu angka na pinodaan ni Jahowa, jala marhasonangan godang angka anakmu.

¹⁴ Ingkon marhite sian hatigoran do ho pahoton sogot; dao ma sian ho pangarupaon,

ai ndang be adong habiaranmu, jala dao sian ho hasonggoton, ai ndang hajonohansa ho.

¹⁵Ida ma, nang pe marluhutluhut nasida, ndada sian ahu; manang ise pe na martahi ho, sai paihutonna do ho muse.

¹⁶Ida ma, ahu do na manompa tukang bosi, na mandusdus arang di bagasan api, jala na paruarhon sada sinjata bahen jadijadianna; ahu huhut manompa sipangago i laho mangago.

¹⁷Nasa sinjata na jinadihon mangalo ho, ndang manjadi; jala nasa dila, na hehe mangalo ho di paruhuman ingkon toruanmu do. I do parjambaran ni angka naposo ni Jahowa, jala hatigorannasida sian ahu, ninna Jahowa.

55¹ (I.) O sude hamu angka na mauas, ro ma hamu tu aek on! Jala hamu angka na so marhepeng, ro ma hamu manuhor, mamonggoli dohot manganhon! Sai ro ma hamu manuhor anggur dohot susu, unang pola marhepeng manang marpanuhor.

²Boasa tung mandasing hepeng hamu tu na so tau hangoluhononhon, jala na ni momuna tuhor ni na so tau pasonang hamu? Sai tangihon hamu ma ahu, asa panganonmuna na tabo i, jala bosuran rohamuna di tabotabo.

³Tarehon hamu ma pinggolmuna, jala ro ma hamu tu ahu! Tangihon hamu ma, asa mangolu tondimuna i! Jadi bahenonku ma tu hamu padan salelenglelengna: I ma padan

parasian na sintong i tu si Daud na so tupa muba.

⁴Ida ma, sitindangi tu angka bangso ibana hulehon, bahen partogi dohot silehon patik tu angka bangso.

⁵Ida ma, bangso na so tinandam hian ingkon jouonmu do, jala bangso na so tumanda ho ro manahopi ho ala ni Jahowa Debatam dohot ala ni na badia ni Israel, ai nunga marmulia ho dibahen.

⁶Sai lulu i hamu ma Jahowa, binsan tarbahen dope jumpang ibana; jou hamu ma ibana, binsan jonok dope ibana.

⁷Sai ditadingkon halak parjahat i ma dalanna, jala jolma pargeduk i, angka sangkapna, sai mulak ma ibana tu Jahowa, asa marpangulah i rohana mida ibana; dohot tu Debatanta, ai buas do rohana manalesei.

⁸(II.) Ai ndada pingkiranku pingkiranmuna i, jala ndada dalamuna angka dalanku, ninna Jahowa.

⁹Ai songon timbo ni angka langit sian tano on, songon i do tumimbo angka dalanku sian dalamuna i, jala angka pingkiranku sian pingkiranmuna i.

¹⁰Ai songon hadadabu ni udan dohot ambolas sian langit, jala ndada mulak boti tusi, nda jolo dibornohi tano i jala dipagabe, asa martumburi, jala dilehon boni tu halak panabur dohot roti tu halak na manganhon.

¹¹ Ingkon songon i do hatangki na ruar sian pamanganku: Ndang mulak boti tu ahu, ingkon bahenonna do lomo ni rohangku, jala manjadi tu na hutongos.

¹² Ai ingkon di bagasan las ni roha hamu borhat, jala di bagasan hadameon hamu pataruon; pangiaron ni angka dolok dohot robean soarana marolopolop di jolomuna, jala nasa hau di ladang martopaptopap tangan.

¹³ Singkat ni tadatada tubu ma sampinur, jala singkat ni latong tubu ma bunga na hushus; i ma bahen barita di goar ni Jahowa, bahen tanda salelenglelengna, na so olo hambar.

56¹ (I.) Songon on do hata ni Jahowa: Radoti hamu ma uhum, jala ulahon hamu hatigoran, ai jonok na ma asa ro hatuaonku, jala papataron hatigoranku.

² Martua ma jolma na mangulahon songon i dohot anak ni jolma na marsihohot mangulahon sisongon i, na ingot di ari Sabbat, asa unang diramuni, jala na mangaramoti tanganna unang diulahon manang aha na jat.

³ Jala ndang jadi dohonon ni halak dagang, na marsilohot tu Jahowa: Nunga tung dipapulik Jahowa ahu sian bangsona, jala ndang jadi dohonon ni halak na pinangkis: Ida ma, hau na masak do anggo ahu.

⁴ Ai songon on do hata ni Jahowa tu halak na pinangkis, angka na manjujur ari Sabbathu,

jala dipillit lomo ni rohangku, jala marsihohot marningot padanhu:

⁵Sai lehononku ma tu nasida di bagasan jorongku dohot di bagasan angka parikku sada parjambaran dohot goar na dumenggan sian goar ni angka anak dohot boru. Goar salelenglelengna lehononku tu nasida, na so tupa mago.

⁶Jala halak dagang, angka na marsilohot tu Jahowa, mangoloi ibana, dohot mangkaholongi goar ni Jahowa, jala mangido gabe naposona; ganup tahe na marningot ari Sabbat, unang diramuni, jala marsihohot marningot padanhu.

⁷Sai na patolhasonku do nasida tu dolok habadiaonku, jala palasonku rohanasida di bagasan joro partangiangen tu Ahu. Halomohononku ma peleannasida situtungon dohot peleannasida sipotongon di atas langgatanku, ai targoar bagas partangiangen do bagashu di saluhut angka bangso.

⁸(II.) On do hata ni Tuhan Jahowa, na papungu angka naung marserak sian Israel: Papunguonku dope tu ibana halak na asing lobi sian angka naung pinapungu tu ibana.

⁹Nasa binatang di ladang, dohot nasa binatang di tombak sai ro be ma hamu mangan!

¹⁰Angka parjaganasida mapitung do sude, ndang marparbinotoan saluhutna; angka biang na mangungu do nasida na so malo

mangorong; angka na mungkor marpeahan,
angka na lomo roha modom.

¹¹Alai biang, angka na gogo mangoloi
hisaphisapna na so habutongan do nasida.
Hape nasida do angka parmahan angka
na so umboto roha, masitondong dalanna
be nasida saluhutna, ganup mangihutihut
pangomoanna na roa i.

¹²Ninna do: Sai ro ma hamu buatonku ma
anggur, asa itasobur, tuak na pang, ia songon
i sadarion, laos songon i sadari marsogot,
gumodang situtu dope tahe.

57 ¹(I.) Mago do ia halak partigor i,
hape ndang adong manang ise na
marateatehon; jala lam marpungu angka
jolma na daulat, hape ndang adong na
dapotan roha binahen ni. Alai unang sanga
diida ro hinamago umbahen tarboan halak
partigor i.

²Bongot tu hasonangan, maradian nasida di
angka podomanna halak na marparangehon
habonaronna.

³Alai anggo hamu, angka anak ni boru
parsibalik mata pajonok hamu tuson! Ho
pinompar ni pangalangkup dohot sibabijalang!

⁴Mida ise hamu naeng mareles ni roha?
Dompak ise ma pangangangonmuna
pamanganmuna jala pahureonmuna
dilamuna? Nda hamu do tubu ni pangalaosion,
pinompar ni sibahen sipaotooto?

⁵Marsigorgor do hisaphisapmuna binahen ni ajiajian angka na di toru ni nasa hau na rata; dipotongi hamu do angka anakmuna di bagasan angka rura, di bagasan jaringjing ni angka dolok batu.

⁶Di lambung ni angka pasir ni sunge na saesae do parjambaranmu; i do tutu partalianmu; nunga pola diusehon ho di ajiajian tuak tangkasan, jala dipelehon ho tusi pelean sipanganon. Tung so marlulu ahu disi?

⁷Dipadiri ho do podomanmu di atas dolok na timbo jala na hinsat; nunga pola manaek ho tusi mamotongi pelean sipotongon.

⁸Jala di pudi ni pintu dohot tiangna dibahen ho parningotanmu, ai tundal sian ahu dipasalang ho dirim tu na asing; nunga pola manaek ho, dipalumbang ho podomanmu jala digoar ho hian gajim sian nasida; dihaholongi ho do podomannasida manatap pangkirapna.

⁹Jala laho do ho manopot rajai mantat miak, jala dipagodang ho do miak na hushus; jala disuru ho do suruanmu tu na dao, pola tuat ho sahat ro di banuatoru.

¹⁰Loja ma ho dibahen hinadeak ni dalanmu, ndang dung didok ho: Ngalutna i di ahu! Ala margogo dope tanganmu di hilala ho, umbahen so dihasahithon roham.

¹¹Alai tahe mida ise do ho biahaton, manang tahuton, sai margabusi do ho jala ndang diingot ho ahu, ndang mangilala roham? Nda

sai hohom do anggo ahu sian narobi dope?

Alai ndang dihabiaru ho ahu.

¹²Ianggo ahu ingkon baritahononku do hatigoranmu dohot parulaonmu alai ndang adong labam sian i.

¹³Molo angguhangguk ho, ajiajian angka na pinapungupungumi ma nian paluahon ho; hape luahonon ni alogo do sasudena, jala ombuson ni hosa do. Alai manang ise na marhaposan tu ahu, teanonna do tano on, jala ibana nampuna dolok habadiaonku.

¹⁴(II.) Jadi dohonon ni halak ma disi: Horsik i, horsik i, pahornop ma dalan i! Padao hamu ma partuktuhan sian dalan ni bangsongku.

¹⁵Ai songon on do hata ni na sun timbul dohot na sun marmulia, na marhabangsa salelenglelengna, jala pargoar na badia: Di banua ginjang dohot di habadiaon do ahu maringan, alai huhut di lambung ni halak na magopu jala na serep martondi, asa pangoluhon tondi ni halak na serep marroha dohot pangoluhon halak parroha na magopu.

¹⁶Ai ndang ro di salelenglelengna ahu mambadai, jala ndang tongtong ahu mangarimasi! Atik tung mandate maon tondina sian jolongku dohot roha angka na hujadihon i.

¹⁷Mida hajahaton ni pangomoanna do ahu marronirimas, jala hulinsingi nasida, martabuni ahu jala marmurukmuruk; alai

atik pe songon i sai didatdati do mangihutihut
dalan lomo ni rohana sandiri.

¹⁸Nunga huida angka dalanna, alai
pamalumonku ma ibana, jala ahu
manogunogu ibana, jala maruli apulapul
ibana bahenonku, ro di angka na
mangkabothon ibana.

¹⁹Ahu do na manompa parbue ni bibir angka
na mamaritahon dame, dame di angka na
dao dohot di angka na jonok, ninna Jahowa!
Jala ahu pamalum nasida.

²⁰Alai anggo halak parjahat i songon laut
na gunsang do, ai ndang tarbahen so; sai na
disampakkon galumbangna do burta dohot
rampokrampok.

²¹Ndang marhasonangan ianggo halak
parjahat i, ninna Debatanku.

58¹(I.) Mangasa gogo ma ho joujou,
unang paontok! Pangiar ma soaram
songon sarune jala pabotohon tu bangsongku
pangalaosionnasida dohot tu pinompar ni si
Jakkob dosanasida i.

²Sai dilului nasida do ahu nian ariari, jala
dihalomohon parbinotoan di angka dalanku,
hira bangso na mangulahon hatigoran, jala
na so dung tumadingkon uhum ni Debatana,
lam dipangido nasida muse sian ahu angka
uhum hatigoran, jala dihalomohon hajojonok
ni Debata.

³Ninna do: Boasa tung marpuasa hami, hape
ndang diida ho? Hupasipal hami dagingnami,

hape ndang dipardulihon roham? Ida ma di ari parpuasaonmuna, apala disi ma disebut hamu rohamu, jala disosaksosak hamu do pangulamuna.

⁴Ida ma, marpuasa pe hamu asa mambahen bada dohot parsalisian huhut mamastapi mangasahon gostong ni botohon. Unang datdati hamu marpuasa songon nuaeng, ai ndang tarbahen sahat soaramuna tu banua ginjang.

⁵Tung parpuasaon na tarhalomohon ahu ma i, sadari dionsitjolma i rohana, dipatungki uluna songon arung, marpeahan di hori dohot di sirabun? Tung parpuasaon ma i goaron, jala ari lomo ni roha ni Jahowa?

⁶(II.) Nda on do parpuasaon na huhalomohon: Harhari angka ihotihot ni hajahaton, palua angka tali ni auga; jala palua halak na nirupa, jala ropuhi nasa auga?

⁷Nda on do, molo diponggoli ho rotim tu halak na male, jala ditogihon ho tu jabum halak na dangol dohot panangkarnangkar? Molo diida ho halak na marsaemara, gabe diabiti ho ibana, jala ndang martabuni ho maradophon sibukmu.

⁸Jadi tompu ma binsar hatiuronmu songon buha siang ari, jala hatop martumbur hahisaronmu, jala mardalan di jolom hatigoranmu, hamuliaon ni Jahowa manimpulisian pudim.

⁹Dung i joujou ma ho, jadi alusan ni Jahowa ma ho; molo angguhangguk ho, gabe dohononna ma: Ida ma, dison do ahu! Molo dipaholang ho sian tongatongam pangarupaon, tudutudu ni jarijari dohot pangkuling hajahaton.

¹⁰Jala dilehon ho asi ni roham tu na male, jala dipasabam ho roha ni na dangol, jadi binsar ma hatiuronmu di bagasan haholomon, jala hagolaponmu tudoshon hos ni ari.

¹¹Jadi sai tongtong ma togutoguon ni Jahowa ho jala pasabamonna roham di angka inganan na rahar, jala papironna holiholim, gabe tudoshon porlak na siniram do ho, jala songon mual, na so dung marsik.

¹²Jadi paulion ni angka anakmu ma angka pasipasi sian narobi, patindangonmu ma angka ojahan marsundutsundut, jala goaron ni halak ma ho: Sipauli angka riga, sitotas angka dalan balobung asa hainganan.

¹³Molo tung ditait ho patmu sian ari Sabbath mangulahon lomo ni roham di ari habadiaonku, jala digoar ho ari Sabbath: Ari hasoloan, marmulia di angkajolma na badia ni Jahowa; jala dipasangap ho ibana, unang diulahon ho angka dalanmu, unang diihutihut ho lomo ni roham manang marhata rari.

¹⁴Jadi marlas ni roha ma ho mida Jahowa, jala ahu manogunogu ho di atas ni angka buntulbuntul ni tano on, jala parmudumuduonku ma ho marhitehite

parjambaran ni Jakkob ompumuna i, ai pamangan ni Jahowa do mandok songon i.

59¹ (I.) Ida ma, ndada na hurang ganjang tangan ni Jahowa laho mangurupi hamu; jala ndada marhapal pinggolna, so marbinege.

²Angka hajahatonmuna tahe sumirang hamu sian Debatamuna, jala angka dosamuna mangondingi bohina maradophon hamu, umbahen so ditangihon ibana hamu.

³Ai marsapu mudar do tanganmuna jala marsapu hajahaton jarijarimuna; bibirmuna; mangkatahon gabus, dilamuna mamingkiri hajungkaton.

⁴Ndang adong nanggo sahalak na joujou di bagasan hatigoran, jala ndang adong na manguhum di bagasan hasintongan; ganup marhaposan tu na soada, jala dihatahon na so hasea; marhangoluan hinamago nasida, gabe ditubuhon jea.

⁵Pira ni ulok dari diporpori nasida, jala diganti rambangrambang ni babibabi: Manang ise na mangan sian piranasida i ingkon mate do, alai ia dipuntari ruar do sada ulok dari.

⁶Ndang hasea gantigantiannasida gabe ulos, jala ndang tarparulos jadijadiannasida i; jadijadian hajahaton do jadijadiannasida i jala uhum sigostang botohon di tangannasida i.

⁷Marlojong patnasida i laho mangulahon hajahaton jala humalaput nasida mandurushon mudar na so marpipot;

sangkap hajahaton do sangkap nasida i, partabanon dohot hamagoan di angka dalannasida i.

⁸Ia dalan hadameon ndang ditanda nasida, jala ndang adong uhum hasintongan di angka dalannasida i; laos nasida palehulehu dalannasida i, manang ise na mardalan disi, ndang tagamon tandaonna hasonangan.

⁹(II.) Dibahen i mandao do uhum sian hita, jala ndang tolhas tu hita hatigoran. Sai maimaima hita di hatiuron, hape ida ma, tong do haholomon; maimaima di hatorangan, hape sai di bagasan hagolapon hita mardalan.

¹⁰Sai dadapdadap hita tu dorpi songon halak na mapitung, jala jamajama hita songon halak na so marmata. Sai martuktuhan hita di hos ni ari, songon di rambon ni ari; di angka jampalan na lomak hita songon halak na mate.

¹¹Patungoromon do hita sude, songon angka gompul, jala sai margogokgogok songon darapati; sai maimaima hita di uhum hasintongan, hape ndang adong; maimaima di hatuaon, hape sai mandao do i sian hita.

¹²Ai godang do pangalaosionnami di jolom, jala dosanami manindangi dompak hami; ai sai ngongom do pangalaosionnami, jala hutanda hami do hajahatonnami.

¹³Marbalik jala mangose do hami dompak Jahowa, jala nunga hutundali hami Debatanami, mangkatahon pangarupaon

dohot panundalion, manubunubui hata gabus sian rohanami.

¹⁴Dibahen i nunga manginsurut tu pudi uhum hasintongan jala jongjong mandaodao ia hatigoran, ai tartuktuk di partungkoan do hasintongan, jala ndang tarbahen ro jumonok habonaron.

¹⁵Jadi lam pesan hasintongan, jala manang ise na manginsurut sian hajahaton hona pupus do. Diida Jahowa ma i, jadi rupi ma panailina, ala soada be uhum hasintongan.

¹⁶(III.) Diida ibana huhut ndang adong nanggo sadajolma, gabe longang rohana ala soada na mangondihon. Jadi tanganna sandiri manumpahi ibana monang, jala hatigoranna manungkol ibana.

¹⁷Jala diparulos hatigoran, songon baju partahanan, jala talitali hatuaon di atas uluna, jala diparulos angka ulos partubolan, jala diparsampesampe hamuruhon songon mandar.

¹⁸Marguru sian angka pambahenan ibana mamaloshon sogot: Harimason tu angka alona pamalosan tu angka musuna, sai gararonna do pamaloson tu angka pulo.

¹⁹Asa dihabiari halak goar ni Jahowa sian hasundutan dohot hamuliaonna sian habinsaran, ai na ro ma musu i songon aek na mangalantap, na siniaphon ni Tondi ni Jahowa.

²⁰Dung i ro ma tu Sion sada sipalua dohot tu halak na mulak sian hajahaton di Jakkob, ninna Jahowa.

²¹Ianggo ahu, on do padanhu tu nasida, ninna Jahowa: Tondingki na songgop tu ho dohot hatangki angka naung hupampe tu bagasan pamanganmu, tung na so tupa do morot sian pamanganmu, manang sian pamangan ni pinomparmu, manang sian pamangan ni pinompar ni pinomparmu, ninna Jahowa, olat ni on ro di salelenglelengna.

60¹(I.) Hehe ma ho! Marsinondang ma ho! Ai na ro ma panondangmu, jala hamuliaon ni Jahowa binsar di atasmu.

²Ai ida ma, haholomon do manghungkupi tano on, jala hagolapon angka bangso; alai na binsar ne ma Jahowa di atasmu, jala marsinondang hamuliaonna di atasmu.

³Jadi dapothonon ni angka bangso parbegu ma panondangmu dohot angka raja mandapothon sinondang naung binsar di ho.

⁴Patonggor matam mamereng humaliang! Luhut ma nasida marrongoman ro mandapothon ho. Angka anakmu ro sian na dao, dohot angka borum abingabingonna.

⁵Ia dung diida ho nasida marroan sihar ma panailim, jala hinsa jala lumbang roham hilalaonmu, ai turun ma tu ho hamoraon ni laut dohot hinagok ni angka parbegu ro tu ho.

⁶Tutupon ni angka parduaan ni unto ma tanom, angka hoda parhuli sian Midian

dohot Epah, saluhut nasida ro sian Seba, mangusung sere dohot daupa, jala angka pujipujian ni Jahowa baritahononnasida.

⁷Saluhut dorbiasian Kedar marpungu tu ho, angka birubiru tunggal sian Nabaiot mangoloi ho; manaek nasida tu langgatanku bahen pelean lomo ni roha, jala marmulia bahenonku joro ni hamuliaonku.

⁸Ise do angka nasida, na ro marhulalan songon ombun, jala songon darapati, angka na manahopi pintu ni asarna.

⁹Ai mangkalungunhon ahu do angka pulo, angka parau Tarsis apala parjolo naeng mamboan angka anakmu sian na dao, rap dohot perak dohot seren nasida di goar ni Jahowa Debatam dohot di na badia ni Israel, ai nunga marmulia ho dibahen.

¹⁰(II.) Jadi ingkon paulion ni halak sileban muse angka parikmu, jala angka rajanasida marhaladoi ho; ai di bagasan rimashu do ho hulingsingi na sai laon, jala di bagasan talup ni rohangku nunga huasi i ho nuaeng.

¹¹Jadi tongtong ma talak angka bahalmu, arian dohot borngin ndang jadi hinsuon, asa tarboan tu ho parangan ni angka bangso parbegu, jala ditogutogu angka rajanasida.

¹²Ai bangso manang harajaon na so mangoloi ho, ingkon mago do, jala angka bangso parbegu ingkon siap situtu do.

¹³Hatongamon ni Libanon pe, pinasa, maranti dohot sampinur rap ro manopot ho

pajagarhon habadiaonku dohot ojahan ni pathu marmulia bahenonku.

¹⁴Ro do huhut tu ho sombasomba angka anak ni halak na pasipal ho na jolo, jala marsomba tu palak ni patmu sude angka na mangelesi ho, jala goaronna ho: Huta ni Jahowa, Sion ni na badia ni Israel.

¹⁵Ali ni na tinadingkon jala na hinosom ho na sai laon, pola dipasiding halak pamolus ho, bahenonku ma ho gabe hamuliaon salelenglelengna, gabe las ni roha marsundutsundut.

¹⁶Onsoponmu ma disi susu ni angka parbegu jalajolma ni angka raja gabe panusuanmu; jadi tandaonmu ma, ahu do Jahowa sipalua dohot siuluhon ho; ulubalang ni Jakkob.

¹⁷(III.) Singkat ni tombaga boanonku ma sere, jala singkat ni bosi boanonku ma perak, jala singkat ni angka hau tombaga, jala singkat ni angka batu bosi, jala bahenonku ma angka partogim gok hadameon jala hatigoran gabe pangondianmu.

¹⁸Ndang be tarbege uhum sigostang botohon di tanom, manang partabanon dohot hamagoan di parbalohanmu, ingkon goaranmu ma angka parikmu: Hatuaon jala angka bahalmu pujipujian.

¹⁹Ndang be adong di ho mata ni ari bahen panondang arian, jala ndang be manondangi di ho rondang ni bulan, Jahowa na ma

gabe panondangmu salelenglelengna, jala
Debatam gabe hamuliaonmu.

²⁰Ndang be sundut mata ni arim,
manang surut ia bulanmu; ai Jahowa gabe
panondangmu salelenglelengna, jala nunga
salpu angka ari parniahapanmu.

²¹Ia bangsom, saluhut do nasida gabe
halak partigor, ro di saleleng ni lelengna do
teanonnasida tano on, nasida do tumbur
ni naung ahu sandiri manuan, jadijadian ni
tanganku bahen pujipujian di ahu.

²²Na ummetmet i gabe saribu, jala na so
piga gabe bangso na bolon. Ahu Jahowa
mambahensa gira di tingkina i.

61 ¹(I.) Songgop do tu ahu tondi ni Tuhan
Jahowa, ala naung miniahan ni Jahowa
ahu mamaritahon barita na uli tu halak na
dangol, marsuru ahu pauliuli halak parroha
na bojok, maningtingkon haluaon tu halak na
tarhurung dohot tu halak na tarrante buha ni
hurungan.

²Maningtingkon taon parasinirohaon sian
Jahowa, dohot ari partubolan ni Debatanta
mangapuli saluhut halak na marsak roha.

³Laho pahinsahon roha ni halak na marsak
di Sion, mangalehon tu nasida tumpal singkat
ni sirabun, miak las ni roha singkat ni arsak ni
roha, ulos na marhadohoan singkat ni tondi
na tahuton, gabe targoar nasida: Hariara
hatigoran, suansuanan bahen pujipujian di
Jahowa.

⁴Jadi nasida ma paulihon angka naung leleleng tarulang, angka naung tartaban di na robi, nasida muse pajongjongkon dohot paimbaruhon huta na tartaban, angka naung tarulang marsundutsundut.

⁵Jadi halak ruar jongjong marmahan dorbiamuna, jala angka anak ni halak sileban pangulamuna dohot tukang porlak anggurmuna.

⁶Alai anggo hamu targoar angka malim ni Jahowa, parhalado ni Debatanta dohononna tu hamu. Sinamot ni angka bangso parbegu panganonmuna, jala hasangaponnasida do soluhonmuna.

⁷Singkat ni haurahonmuna na sai laon, jaloonu silompit, jala ali ni haeleson marolopolop nasida di partaliannasida. Dibahen i silompit do teanonnasida di tanonasida i! Ingkon maruli las ni roha salelelenglelengna di nasida.

⁸Ai ahu do Jahowa, na holong roha di hatigoran, alai na magigi mida tabantaban pangarupaon; sai lehononku do upanasida di bagasan hasintongan, jala pahotonku tu nasida padan salelelenglelengna.

⁹Jala tarbarita di angka bangso parbegu pinomparnasida i, jala anaknasida di tongatonga ni angka bangso. Sude halak na marnida nasida tandaonna ma, nasida do pinompar ni na pinasupasu ni Jahowa.

¹⁰(II.) Marlas ni roha situtu do ahu di bagasan Jahowa, marolopolop do tondingku di bagasan Debatangku; ai nunga disolukkon tu ahu angka ulos hatuaon, baju hatigoran dihohoshon tu ahu, songon pangoli, na marbulangbulang mangaradoti hamalimon jala songon oroan naung hinohosan.

¹¹Ai songon tano na manubuhon suansuanan, jala songon porlak na pasimbur tubu boni na sinaburhon tusi ingkon songon i do patubuoan ni Jahowa hatigoran dohot pujipujian di adopan ni sandok angka parbegu.

62¹(I.) Ala ni Sion ndang tarbahen ahu sip, jala ala ni Jerusalem ndang olo ahu pompoman, paima binsar hatigorranna songon sondang ni mata ni ari, jala hatuaonna songon sulusulu na marsigorgor.

²Jadi idaon ni angka bangso parbegu ma hatigoranmu, jala saluhut angka raja hamuliaonmu, jala ingkon margoarhon goar na imbaru ho, sipaboan ni pamangan ni Jahowa.

³Jadi gabe tumpal hamuliaon ma ho di tangan ni Jahowa, jala tumpal harajaon di tangan ni Debatam.

⁴Ndang be goaron ni halak ho: Na tinadingkon, jala ndang be dohononna tu tanom: Halongonan; ai goaronna ma ho: Hasoloan ni rohangku do ibana, jala tanomi:

Naung marharajaan do ho! Ai lomo do roha ni Jahowa mida do, jala marharajaan tanomi.

⁵Ai songon ringkot ni dolidoli mangaririt namarbaju, songon i do ringkot ni angka anakmu mangalului ho; jala songon las ni roha ni pangoli mida na niolina, songon i do las ni roha ni Debatam mida ho.

⁶Nunga hudokkon tu atas parikmu, ale Jerusalem, angka parjaga manipat ari manipat borngin, tongtong ndang olo sip nasida. Hamu ale angka na pasingothon Sion tu Jahowa, unang tung marpansadian hamu.

⁷Ibana pe, unang tung marpansadian laos hamu, paima dipahot Jerusalem jala dibahen marbarita di tano on.

⁸Nunga pola maruari Jahowa tu siamunna dohot tu tangan ni hagogoonna: Na so tupa be lehononku emem panganon ni angka musum, jala na so tupa be inumon ni halak sileban tuak anggurmu, naung hinangaluthonmu.

⁹Ingkon laos halak na papungupunguhon manganhon eme i, huhut mamuji Jahowa, jala laos halak na manjantarhon manginum tuak anggur i di angka alaman ni habadiaonku.

¹⁰Ruar ma hamu, ruar ma hamu sian angka harbangan! Sai pahornop hamu dalan di bangso i! Palentes, palentes hamu dalan balobung i, paduru hamu angka batu, patindang hamu ma partonggol di tongatonga ni angka bangso.

¹¹ Ida ma, nunga pola martingting Jahowa ro di ujung ni tano on: Paboa hamu ma tu boru Sion: Ida ma, nunga ro hatuaonmi! Ida ma, ihut tu ibana do upana, jala pamaloshonna di jolona.

¹² Jadi goaron ni halak ma nasida: Bangso na badia, angka na pinalua ni Jahowa; jala ho targoar na hinaholongan, huta na so sitadingkononhon be.

63¹ (I.) Ise do ibana na ro sian Edom, na ro marulos na rara sian Bosra? Na marpangkean na marhadohoan, jala na mangalangka di hinagodang ni gogona? Ahu do i sihatahon hatigoran jala na margogo mangalehon tua.

² Boasa tung marrara pangkeanmu, songon abit ni halak na mardege parbue ni anggur di bagasan pangilangan.

³ Sasada ahu do dumege pangilangan i, jala sian angka bangso ndang adong manang ise donganku! Jala nunga huluntak nasida di bagasan rimashu, jala nunga hugopui nasida di parpiar ni murukku, pola marbirsak mudarnasida tu angka uloshu, gabe sap saluhut abithu.

⁴ Ai nunga dipingkir rohangku hian ari partubolan, jala nunga jumpang taon haluaon di angka naung huhophop.

⁵ Jadi sai mangaranapi ahu humaliang, hape ndang adong nanggo sahalak na paluahon; jala tarhalomong ahu, hape ndang adong na

tau donganku. Jadi tanganku sandiri nama patupahon hamonangan di ahu, jala parpiar ni murukku i ma mandongani ahu.

⁶Dibahen i nunga hugopui angka bangso di bagasan rimashu, jala mabuk nasida hubahen di bagasan parpiar ni murukku, jala hudurushon tu tano mudarnasida i.

⁷Sai baritahononku do angka denggan basa ni Jahowa, angka pujipujian ni Jahowa, ai ido na tama marningot sude na binahen ni Jahowa tu hita, dohot ala ni godang ni denggan basana tu pinompar ni Israel, na binahenna tu nasida hombar tu angka asi ni rohana dohot tu godang ni denggan ni basana.

⁸Ai ninna do: Tongon do, bangsongku do nasida, anak angka na so olo paototohon. Jadi dung songon i ibana ma sipalua nasida.

⁹Di nasa hagogotannasida, dohot ibana targogot, jala suruan ni bohina i paluahon nasida; sian holong ni rohana dohot sian pangolanina ibana paluahon nasida, jala dihindat nasida, jala diompa ganup ari, sian na robi dope.

¹⁰Alai manggunturi do anggo nasida, jala diarsahi Tondina na badia i; dibahen i marbalik ibana gabe musunasida, jala ibana sandiri marporang dompak nasida.

¹¹Alai sai tongtong do anggo ibana marningot di bangsona uju di ngolu ni si Musa di angka ari na robi, alai anggo

naung didok nasida: Didia do ibana naung mamboan nasida, nangkok sian laut rap dohot parmahan ni parduaan ni birubiruna? Didia ibana na marsagihon Tondina na badia i tu tongatonganasida?

¹²Ise ibana na manogu si Musa marhite sian tangan hamuliaonna naung patolak aek di jolonasida laho mambahen baritana salelelenglena.

¹³Ibana na manogu nasida mamolus angka pusat, songon hoda di adaran, ndang dung tartuktuk?

¹⁴Songon pinahan na tuat tu rura, ditogihon Tondi ni Jahowa nasida tu hasonangan; songon i pe ditogihon ho bangsom asa mambahen goarmu marmulia.

¹⁵Sai tatap ma sian banuaginjang, jala ida sian ingananmu na badia, jala na marmulia! Didia do nuaeng hamuruhonmu dohot hagogoonmu? Parsigorgor ni holong dohot asi ni roham? Sai mandao sian ahu.

¹⁶Ai sai ho do amanami, ai ndang ditanda ianggo si Abraham hami, jala ndang dipabotoboto si Israel hami. Ho do ale Jahowa amanami; sipalua hami do goarmu sian nahinan.

¹⁷Boasa tung diloas ho hami lilu sian angka dalanmu, ale Jahowa? Boasa tung dipatanggang ho rohanami, unang huhabiari hami ho? Sai marpangulahi ma roham ala ni naposom tu angka marga ni parjambaranmu.

¹⁸Satongkin sambing bangsom na badia i manean habadiaonmi, anggo nuaeng nunga diluntakluntak alonami.

¹⁹Nunga hami songon halak na so dung ginomgomamu sian na robi, na so dung marpanggoarhon goarmu.

64¹(I.) Aut ni haru diribahi ho angka langit i jala tuat ho, asa malala angka dolok maradophon ho!

²(64-1b) Songon pangalammauashon ni api di arsam, jala panggurguri ni api di aek laho pabotohon goarmu tu angka alom, asa angka hitir angka bangso parbegu maradophon ho.

³(64-2) Mida halongangan angka na binahenmi, angka na so hinirimhirim ni rohanami tuat ho gabe malala angka dolok maradophon ho.

⁴(64-3) Na so dung binege ni halak sian na robi, manang tarbortik, manang diida mata adong Debata, dungkon ni ho, na mambahen halongangan tu angka na marhaposan di ibana.

⁵(64-4) Ditomutomu ho do halak na hilas roha mambahen hatigoran, angka na paingotingot ho di angka dalanmu. Ida ma, nunga tutu tarrimas ho ala na mardosa hami, jala mansai leleng hami di bagasan angka dosa i; alai aut ni dipalua hami nian anggo nuaeng!

⁶(64-5) Jala doshon halak na ramun do hami sude, jala songon ulos na marsapu darodaro

sude hatigorannami. Dibahen i malos do hami sude songon bulung, jala diluahon hajahatonnami do hami songon na niluahon ni alogo.

⁷ (64-6) Jala ndang adong nanggo sahalak na pajoujou goarmu, manang hehe marsitiopan tu ho, ala ni nunga ditabunihon ho bohim maradophon hami, jala malampot ateatenami ala ni hajahatonnami.

⁸ (64-7) Alai nuaeng ale Jahowa. Ho do amanami! Tano do ianggo hami, jala ho do sitompa hami, jala jadijadian ni tanganmu do hami sudena.

⁹ (64-8) Sai unang ma marimashu ho, ale Jahowa, jala unang tongtong paingotingot hajahatonnami! Ua ida jala tatap hami, ai bangsom do hami sude!

¹⁰ (64-9) Nunga pola gabe halongonan angka huta ni habadiaonmu, Sion pe, gabe halongonan do jala tarulang ia Jerusalem.

¹¹ (64-10) Joro habadiaonnami dohot hamuliaonnami, inganan pamujimujian ni ompunami di ho, gabe parturanggongan, jala saluhut hasudungan ni rohanami nunga gabe halongonan.

¹² (64-11) Tung hatiopan ho ma ateatem disi ale Jahowa? Tung laos hasiphononmu ma i asa pajimputhon hami situtu?

65¹ (I.) Angka na so usousu di ahu na sai laon i do mangalului ahu nuaeng, jala halak na so mangalului ahu na sai laon nunga

jumpangsa ahu. Ningku do tu bangso, na so pajoujou goarhu na sai laon: Dison do ahu, dison do ahu.

²Sai hupaherbang do tanganku duansa manipat ari tu bangso na jungking, angka na mandalani dalan na so denggan, mangihuthon pingkiran lomo ni rohanasida sandiri.

³Tu bangso na tongtong pahehe rimashu di adopanku, angka na mamele di bagasan angka porlak, jala manutung daupa di atas ni angka batu na minasak.

⁴Angka na hundul di angka parbandaan, jala marmalam di angka liang; angka na manganhon juhut babi, jala marisi huahua habiason angka saoannasida i.

⁵Lam didok nasida dope: Disi ma ho, unang jumonok ho tu ahu, ai na badia do ahu martimbangkon ho. Ingkon gabe timus di bagasan igungku do angka nasida, jala gabe api na marsigorgor manipat ari.

⁶Ida ma, tarsurat do di jolongku: Nandang tagamon sip ahu nda jolo hubaloshon, sai baloshononku do tutu tu ampuannasida.

⁷Hajahatonmuna sandiri rap dohot hajahaton ni angka ompumuna, ninna Jahowa, angka na manutung daupa di punsu ni angka dolok, jala direhei ahu di atas ni angka robean; dibahen i suhathononku ma upa ni pambahenannasida na jolo tu ampuannasida i.

⁸Songon on do hata ni Jahowa: Songon tuak nambura binuat jumpang di taguk na baso, gabe didok: Unang ago, ai adong do pasupasu di bagasanna! Suang songon i bahenonku ala ni angka naposongku, nda tung saluhut nasida agoonku.

⁹Jala ahu parohon sian Jakkob boni, jala sian Juda sahalak sitean angka dolokku, ai ingkonjolma na hupillit i manean tano i jala angka naposongku maringanan disi.

¹⁰Ia Saron ingkon gabe panjampalan ni birubiru, jala rura Akor gabe parudaman ni angka lombu di bangsongku, na mangalului ahu.

¹¹Alai anggo hamu, angka na tumadingkon Jahowa, angka na mangkalupahon dolokku na badia i angka na padiri di sorigabe sada meja, jala diusehon tuak tangkasi tu sorimago.

¹²Ida ma, ahu sandiri pasahathon hamu panganon ni podang, gabe marsinggang ma hamu sude tu pamotongan, ala joujou ahu, hape ndang mangalusi anggo hamu, mangkuling ahu hape ndang ditangihon hamu, jala diulahon hamu do sogo ni rohangku, jala na so huhalomohon dipillit hamu.

¹³Dibahen i songon on do hata ni Tuhan Jahowa: Ida ma, mangan do sogot anggo angka naposongku, alai anggo hamu anturaparon do: Ida ma, minum do sogot anggo angka naposongku, alai anggo hamu

uasan do; ida ma, marlas ni roha do sogot anggo angka naposongku, alai anggo hamu ingkon tarurak do.

¹⁴Ida ma, marolopolop sogot anggo angka naposongku sian sonang ni rohana, alai anggo hamu manganguhi do binahen ni gondok ni roha, jala maroinang hamu sian jepol ni roha.

¹⁵Jala tadingkononmuna goarmuna bahen panolonan sipatondit di halak na hupillit. Alai bunuon ni Tuhan Jahowa ma anggo ho, jala margoar na imbaru bahenonna angka naposona.

¹⁶Asa manang ise na mamasumasu dirina di tano on, pasupasuongna ma dirina marhitehite Debata sihaposan jala manang ise na marmangmang di tano on, marmangmang tu Debata sihaposan ai nunga lupa sian roha angka hagogotan na jolo, jala nunga buni tutu sian matangu.

¹⁷Ai ida ma, ahu ma manompa langit na imbaru dohot tano na imbaru, jala ndang be ingoton angka na parjolo i manang tarsunggul tu roha.

¹⁸Ingkon marlas ni roha ma hamu jala marolopolop ro di salelenglelengna ala ahu manompa angka i! Ai ida ma, ahu manompa Jerusalem bahen parolopolopon, jala bangso isina i bahen las ni roha.

¹⁹Ahu sandiri pe marolopolop do mida Jerusalem, jala marlas ni roha ahu mida

bangsongku, jala ndang be tarbege disi soara partangison manang soara angguhangguk.

²⁰Nandang adong be disi posoposo siotik ari, manang na ubanon na so gok ariarina; ai dolidoli dope na marumur saratus taon laho mate, jala pardosa sisaratus taon hona bura.

²¹Jala paulionnasida ma angka bagas, laos inganannasida, suanonnasida ma hau anggur jala panganonnasida parbuena.

²²Nandang tagamon nasida paulihon bagas, gabe halak na asing mangingani, ndang tagamon nasida manuan, gabe halak na asing manganhon; ai songon ariari ni hau, songon i do ariari ni bangsongku, jala jadijadian ni tangannasida ingkon halak na hupillit marsaulihonsa.

²³Nandang tagamon loja so marniula nasida, manang manubuhon anak, asa tilahahononna tibu, ai pinompar ni na pinasupasu ni Jahowa do nasida ro di tubunasida i.

²⁴Jala masa huhut: Tagan so manjou dope nasida, nunga mangalusi ahu, mangkatai dope nasida, nunga manangihon ahu.

²⁵Gompul dohot anak ni birubiru marsaroha manjampal, jala singa manggagat panabian songon lembu, jala ulok na mangkangoluhon orbuk, ndang be manjahati manang mangago di sandok dolokku na badia i ninna Jahowa.

66¹(I.) Songon on do hata ni Jahowa: Angka langit do habangsongku jala tano on sidegedegean ni pathu. Tung songon

dia ma joro, na naeng paulionmuna di ahu?

Manang inganan bahen pangulonanku?

²Nda jadijadian ni tanganku sandiri do angka on sasudena, uju na hujadihon sasudena i, ninna Jahowa. Alai huhut do ahu marpanatap tu halak na dangol, jala na bojok martondi, jala manonditnondit mida hatanku.

³Manang ise na mamotong sada jonggi, doshon sibunu baoa do ibana disi; manang ise na mamelehon birubiru, doshon halak na mamonggolhon rungkung ni biang ibana disi; manang ise na mamelehon pelean sipanganon, doshon na mamelehon mudar ni babi ibana disi; manang ise na manutung daupa, doshon na mamuji ganaganaan ibana disi. Masitondong dalan lomo ni rohana be do nasida, jala dihalomohon rohanasida do pambahenannasida na sogir i.

⁴Ahu pe antong pillitonku ma hinamagonasida, jala paroونku tu nasida hinabiaran ni rohanasida i, ala joujou ahu, hape ndang adong na mangalusi; mandok soara ahu, hape ndang ditangihon nasida, lam dibahen nasida do na jat di jolongku, jala dipillit nasida do na so lomo ni rohangku.

⁵Tangihon ma hata ni Jahowa, hamu ale angka na manonditnondit mida hatana! Didok angka hahaanggimuna, angka na mangkosom hamu, angka na pabali hamu ala ni goarhu: Marmulia ma nian Jahowa, asa huida hami

las ni rohamuna i! Hape sai tarurak do nasida sogot.

⁶Tarbege do soara hagunturon sian huta, soara toletole sian bagas joro, soara ni Jahowa, na mamaloshon pambahenan tu angka musuna.

⁷Tagan so diae dope posoposo, nunga ditubuhon anak; tagan so ro dope rianna, nunga ditubuhon baoa.

⁸Tung ise ma dung umbege songon i? Tung ise ma dung marnida sisongon i? Tung tarbahen ma marparbue sada luat di bagasan sadari, manang tarbahen tubu sada bangso di na satongkin, ai anggo Sion i, ipe mangae pintor manubuhon angka anakna huhut.

⁹Tung manggabei ma ahu di halak na asing, hape ndang manubuhon anggo ahu sandiri? Ninna Jahowa. Tung patut ma ahu, manumpak halak maranak, hape ia ahu sandiri tinggal punjung? Ninna Debatam.

¹⁰Marlas ni roha ma hamu rap dohot Jerusalem, jala marolopolop mida ibana sude hamu ale angka na holong roha di ibana! Marlas ni roha situtu ma rap dohot ibana sude hamu ale angka na marsak roha mida ibana na sai laon!

¹¹Asa manusu hamu, jala mahapan sian bagot ni angka apulapulna i; asa marsobur hamu, jala marsabam ni roha sian hinagodang ni hamuliaonna i.

¹²Ai songon on do hata ni Jahowa: Ida ma, ahu patongonhon tu ibana hadameon, songon batang aek godangna, jala songon sunge na sirnip hamuliaon ni angka bangso parbegu, asa manusu hamu; ingkon abingabingonna hamu jala didengdidengonna hamu diampuanna.

¹³Songon baoa, na niapul ni inana, songon i do ahu mangapuli hamu, tongon tahe di bagasan Jerusalem do hamu tarapul sogot.

¹⁴Jala ia dung diida hamu songon i gabe las ma rohamuna, jala martumbur holiholimuna songon ingkau rata, gabe patar tartanda tangan ni Jahowa tu angka naposona, jala rimasna tu angka musuna.

¹⁵Ai ida ma, na ro do sogot Jahowa marhite sian api, jala tudoshon habahaba poting baliung angka huretana i, asa marlulu ibana di bagasan parpiar ni rimasna jala pangasupina di bagasan api na marjillamjillam.

¹⁶Ai marhitehite api dohot marhitehite podangna Jahowa manguhum sogot sandok sibuk, jadi torop ma angka na binunu ni Jahowa.

¹⁷I ma halak angka na pabadiahon dohot angka na manguras dirina di bagasan angka porlak sombaon mangihuthon sada malim diparsitongaanna halak angka sipangan juhut babi, hagigion marragamragam dohot monsi, rap siap do nasida, ninna Jahowa.

¹⁸Alai anggo ahu, sai ro do maningkir
jadijadian dohot sangkapnasida i, laho
papunguhon nasa bangso parbegu dohot dila,
gabe ro nasida, jala idaonna hamuliaonku.

¹⁹Jala patindangonku di nasida sada tanda
parasian jala paborhatonku sian nasida angka
naung malua tu angka bangso parbegu: Tu
Tarsis, Pul dohot tu Lud halak sisintak sior,
tu Tubal dohot Javan, tu pulopulo angka na
holang, angka na so dung umbege baritangku,
jala na so dung marnida hamuliaonku, gabe
baritahononnasida ma hamuliaonku di
tongatonga ni angka bangso parbegu.

²⁰Jadi nasida ma manogihon nasa
hahaanggimuna sian saluhut angka bangso
parbegu, gabe pelean tu Jahowa, marsihundul
di angka hoda, hureta, ruarua, halode
dohot unto sahat tu dolok habadiaonku, tu
Jerusalem, ninna Jahowa, suang songon
na binoan ni angka halak Israel pelean
sipanganon di bagasan ulaula na badia, tu
bagasan joro ni Jahowa.

²¹Jadi dohot sian nasida pabangkitonku
deba bahen malim, bahen halak Lepi, ninna
Jahowa.

²²Ai songon angka langit na imbaru dohot
tano na imbaru, sibahenonku, angka na hot
tongtong jongjong di jolongku, ninna Jahowa,
suang songon i jongjong pinomparmuna
dohot goarmuna.

²³Jadi masa ma: Sian poltak ni bulan
tu poltak ni bulan, jala sian ari Sabbath tu
ari Sabbath ro ma tongtong nasa manisia
marsomba tu adopan ni bohingku, ninna
Jahowa.

²⁴Jadi ruar ma nasida, gabe
paidaidaonnasida ma angka bangke ni
halak angka na manjahati dompak ahu; ai
ndang tagamon mate tungkolnasida, jala
ndang tagamon mintop apinasida i, gabe
hagigian nasida di nasa manisia.

Yeremia

1 ¹ (I.) On do angka hata ni si Jeremia, anak ni si Hilkia, sian malim angka na di Anatot di luat Benjamin.

² Di na ro hata ni Jahowa tu ibana uju di angka ari ni si Josia, anak ni si Amon, raja ni Juda, pasampulutolutaonhon hinarajaonna i.

³ Dung i ro muse di angka ari ni si Joiakim, anak ni si Josia, raja sian Juda sahat ro di ujung ni pasampulusada taonhon hinarajahon ni si Sedekia, anak ni si Josia, raja ni Juda, sahat ro di habubuang ni Jerusalem palimabulanhon.

⁴ Jadi na ro ma hata ni Jahowa tu ahu mandok songon on:

⁵ Tagan so hujadihon dope ho di bortian, nunga hutanda hian ho; jala tagan so ruar dope ho sian ampuan ni natorasmu, nunga huparbadiai hian ho: Hupabangkit ho gabe panurirang tu angka bangso.

⁶ Dung i ningku ma: Iale Tuhan Jahowa, ida ma, ndang huboto mangkatai, ai na bajar dope ahu.

⁷ Jadi ninna Jahowa ma mandok ahu: Unang dok: Na bajar dope ahu. Ai manang tudia pe ho husuru, ingkon tusi ho laho, jala manang aha hutonahon tu ho, ingkon i do hatahononmu.

⁸Unang ho mabiar maradophon nasida, ai sai ahu do donganmu, paluahon ho, ninna Jahowa.

⁹Dung i dipatoltol Jahowa ma tanganna, jala dijama pamanganku, jala ninna Jahowa mandok ahu: Ida ma nunga sahat hulehon angka hatangku tu bagasan pamanganmu.

¹⁰Ida ma, hupabangkit do ho sadarion mangaranapi angka bangso dohot angka harajaon, laho mangurati dohot maniaphon, mangago dohot mangaloha, paulihon dohot manuan.

¹¹(II.) Dung i ro muse hata ni Tuhan Jahowa tu ahu mandok songon on: Aha na niidam, ale Jeremia? Jadi ningku ma: Dangka ni hau na rata do huida.

¹²Jadi ninna Jahowa ma mandok ahu: Sintong do parnidam; ai sai dungo ma ahu pamasa hatangku.

¹³Dung i ro ma hata ni Jahowa tu ahu paduahalihan mandok songon on: Aha do na niidam? Jadi ningku ma: Hudon na gurgur do huida, jala sian utara haroroanna.

¹⁴Dung i ninna Jahowa ma mandok ahu: Sian utara do pul jea tu sandok isi ni tano on.

¹⁵Ai ida ma, marhara ma ahu tu sandok angka marga ni harajaon, angka na tungkan utara, ninna Jahowa, asa ro be nasida pajongjong habangsana tu jolo ni angka bahal ni Jerusalem dohot dompak sude angka

parikna humaliang, dohot dompak sude angka huta ni Juda.

¹⁶Jadi dabuonku ma angka uhumhu tu nasida taringot tu sude hajahatonnasida i, ala naung tinadingkonnasida i ahu, jala manutung daupa tu angka debata sileban, jala marsomba nasida tu jadijadian ni tangannasida i.

¹⁷Alai anggo ho, hohos i hian ma gotingmu, jala borhat ma ho, jala hatahon ma tu nasida sude, na hutionahon i tu ho. Unang ma tarsonggot roham, maradophon nasida asa unang tung hubunu ho di jolo nasida.

¹⁸Alai anggo ahu, ida ma, bahenonku ma ho sadarion gabe huta na ganting, dohot gabe tiang bosi, dohot gabe parik haksa dompak sandok tano i, dompak angka raja ni Juda, dompak angka sintuana, dompak angka malimna dohot dompak situasi na torop ni luat i.

¹⁹Jadi musuannasida ma ho, alai nda tung hahuaonna ho, ai ahu do donganmu, ninna Jahowa, paluahon ho.

2¹(I.) Dung i ro muse hata ni Jahowa mandok tu ahu songon on:

²Laho ma ho, jala tingtingkon tu pinggol ni isi ni Jerusalem songon on: Boti hata ni Jahowa: Sai hupaingotingot basar ni sidakdanakonmu, holong ni roham tagan oroan ho, uju diihuthon ho ahu di halongonan, di tano na so sinaburan.

³Habadiaon ni Jahowa do Israel uju i, patumonaan ni na niulana; nasa na manganhon ibana, ingkon marutang do, ro do jea mangonai tu nasida, ninna Jahowa.

⁴(II.) Tangihon ma hata ni Jahowa, hamu ale pinompar ni si Jakkob dohot sude marga ni pinompar ni Israel.

⁵Boti hata ni Jahowa: Tung aha ma na so uhum jumpang angka ompumuna di ahu, umbahen mandaodao nasida sian ahu, jala diihuthon Debata na so hasea, gabe so gabeak ia nasida.

⁶Jala ndang didok nasida: Didia do Jahowa, na manogihon hita ruar sian tano Misir, na manogunogu hita di halongonan, di tano na tungil, jala na marlombang, di tano hasang, jala linggoman ni hamatean, di tano na so binolus ni halak, jala ndang adongjolma maringan disi.

⁷Dung i hupatolhas hamu tu tano na lunak, asa dipangan hamu parbuena dohot gogona, hape ro hamu mangaramuni tanongku, gabe hagigian partalianku dibahen hamu.

⁸Ndang didok angka malim: Didia do Jahowa? Jala ndang ditanda angka na mangaradoti patik i ahu, jala marbalik do angka parmahan sian ahu; jala angka panurirang manurirangi marhitehite Baal, jala diihuthon nasida do angka na so margogo mangurupi.

⁹Dibahen i ndang tarjua ahu be so mambadai hamu, ninna Jahowa, ro di ninimuna sai badaanku do.

¹⁰Ai tung topot hamu ma angka pulo ni halak Kitim, jala tingkir hamu disi; jala suru hamu ma tu Kedar pamanathon situtu, jala ida hamu, manang dung masa sisongon i disi.

¹¹Tung adong ma bangso na pasambarhon Debatana, atik pe so tutu Debata? Alai anggo bangsongku, tung dipasambar do hamuliaonna tu na so margogo mangurupi.

¹²Longang ma hamu angka banuagingjang alani, jala manonditnondit, tarsonggot situtu tahe, ninna Tuhan Jahowa.

¹³Ai dua do jea binahen ni bangsongku: Ahu, mual ni hangoluan ditadingkon nasida, laho mangkali di nasida sumursumur, sumur angka na marruang, na so marisi aek.

¹⁴(III.) Tung hatoban do Israel ulaning, manang tubu ni hatoban? Boasa tung gabe tabantaban ibana?

¹⁵Patungoromon do angka babiat dompak ibana, dipangiar soaranasida, gabe halongonan do tanona dibahen nasida, angka hutana disurbu nasida, gabe so marisi be.

¹⁶Nang angka anak ni Nob dohot Tahpanhes manggatgat pakpak ni ulum.

¹⁷Nda panadingkonmu di Jahowa, Debatamu mambahen songon i tu ho, uju tinogutoguna ho di dalan.

¹⁸On pe, tung aha ma labam di dalam laho tu Misir, naeng minum aek ni Nil? Jala tung aha ma labam di dalam laho tu Assur, naeng minum aek sian batang aek Euprat?

¹⁹Sai hinajahatmu do maminsang ho, jala panundalim manginsombut tu ho, asa tung diboto jala diida ho jahatna dohot paetna panadingkonmu di Jahowa Debatam, ala na so dihatondithon roham ahu, ninna Tuhan Jahowa Zebaot.

²⁰Ai sian na robi dope sai dipansuakkon ho augam dirapui ho angka tompim, jala didok ho: Ndang olo ahu parhatobanon. Ai di atas ni sude robean na timbo, jala ditoru ni nasa hau rata do ho peak masiamangamang.

²¹Alai anggo ahu nunga nian husuan ho gabe hau anggur na denggan, boni hasintongan, hape gabe lambang do ho di porlak anggur ni halak sileban!

²²Ai nang pe dipangke ho sira masiu mamburi ho, jala dipagodang ho sabun di ho, sai tong do tartanda hajahatonmu di jolongku, ninna Tuhan Jahowa.

²³Tung dia ma tardok ho: Ndang ramun ahu; ndang hupaihutihut angka Baal! Ida ma dalammu di rura! Tanda ma na binahenmi, ho ale unto boruboru na hijau, na pasebutsebut dalanna.

²⁴Ho ale halode boruboru, na somal di halongonan, na mangkosahon alogo dibahen hahisapon ni rohana i, tung ise

ma mangambat pangimbungna i? Basa na mangalului ibana, ndang pola loja; sai jumpang nasida do ibana di bulan hasomalanna i.

²⁵Sai otapi ma patmu, unang tung so marsarung dohot tolonanmu, asa unang mauas! Hape nimmu do: Nandang marniula, ndang adong labana! Ai huhaholongi do angka na pulik, sai ihutihutongku do nasida.

²⁶Songon haurahon ni panangko, ia tardapot ibana, songon i do tarurak pinompar ni Israel: Nasida, angka rajanasida, partoginasida, malimnasida dohot panurirangnasida.

²⁷Angka na mandok tu hau: Damang do ho, jala tu batu: Ho do manubuhon ahu! Ai tangkuhukna didompakkon tu ahu, ndada bohina; hape ia di tingki hinamagonasida, angka ninna do: Hehe ma ho ale Tuhan, jala palua hami!

²⁸Alai didia do Debatam, angka na binahenmi di ho? Angka nasida nian hehe! Tung paluaon nasida do ho ulaning di tingki hinamagom? Ai doshon bilangan ni hutam do angka Debatam, ale Juda.

²⁹(IV.) Boasa ma tung ahu badaanmuna? Tung saluhut do hamu marbalik sian ahu, ninna Jahowa.

³⁰Tung na so marnosan do, na hulingsingi angka anakmuna, ndang dijangkon nasida pinsangpinsang. Podangmuna do manganhon panurirangmuna, songon babiat panoro.

³¹ Oe hamu, na sansundut on! Parateatehon hamu ma hata ni Jahowa: Tung halongonan do ahu di Israel, manang tung tano hagolapon? Boasa tung dohonon ni bangsongku: Mompasompas ma hami, ndang olo be hami manopot ho.

³² Tung tarhalupahon namarbaju ma pangkeanna, manang oroan i hohosna? Alai anggo bangsongku nunga dihalupahon ahu, ndang be habilangan lelengna.

³³ Boasa sai dipalemeslemes ho dalammu mangalului bangunan ni roham? Dibahen i huhut umbahen disomali ho angka dalammu di hajahaton.

³⁴ Jumpang do huhut di angka sampesampe mudar ni halak na pogos, angka na so marpipot. Nandang manang disihabunian jumpang ahu, tung di na andar do.

³⁵ Hape nimmu dope: Nandang marpipot ahu. Nunga tahe sumurut rimasna sian ahu. Ida ma, sai dabuonku do uhum tu ho, ala na nidokmu: Nandang mardosa ahu.

³⁶ Sai mulakulak do ho paimbarhon dalammu. Nang binahen ni Misir tarurak do ho, suang songon haurahonmu binahen ni Assur.

³⁷ Sian i pe, ingkon ruar do ho, huhut manjujung tanganmu manimbasmimbasm. Ai nunga dipesanhon Jahowa haposan ni roham, gabe ndang manjadi tahim tu nasida.

3¹ (I.) Dung i ninna do songon on: Tung sura dipaulak baoa jolmana, gabe laho

boruboru i sian ibana marsinonduk mangan tu na asing, tung tagamon mulak ma ibana tu boruboru i? Nda ramun situtu ma luat bongkai? Alai anggo ho, atik pe naung torop mangalangkup ho, sai mulak ma tu ahu, ninna Jahowa.

²Manaili ma ho dompak angka robean, jala ida! Didia na so maruhum na jat ho? Hundul do ho di pinggol ni angka dalan paimaimahon nasida, songon halak Arab di halongonan, gabe diramuni ho tano i marhitehite parsibabijalangonmu dohot hajahatonmu.

³Jadi alani tarambat udan sipaha pitu, jala ndang ro udan sipaha sada. Alai marpardompahan sibabijalang do ho, ndang diboto ho na maila.

⁴Nda joujou do ho olat ni rasirasa nuaeng mandok tu ahu: Ale amang, partogingku do ho olat ni sidakdanakonku!

⁵Tung salelelenglelengna do ulaning ibana manjujur, jala marsunisunian tongtong? Ida ma, songon i do hatam, alai diulahon ho do angka hajahaton, lam ditambahi ho dope.

⁶(II.) Dung i ninna Jahowa ma mandok ahu uju di ngolu ni raja Josia: Diida ho do, na binahen ni Israel na marbalik i? Tung laho do ibana tu nasa dolok na buntul dohot tu toru ni nasa hau na rata, jala maruhum na jat disi.

⁷Jadi ningku ma, nang dung diulahon sude angka i: Sai mulak ma ho tu ahu! Alai ndang

olo ibana mulak. Jadi diida anggina, Juda na marbalik i ma i.

⁸Alai huida, atik pe hupaulak Israel na marbalik i, na maruhum na jati, ala ni saluhutna i, jala hulehon surat patilaho tu ibana, hape ndang mabiar anggo anggina Juda na so maruhum i, lam laho do dohot ibana maruhum na jat.

⁹Jadi sian soara ni parsibabijalangonna tarramun ma tano i, jala maruhum na jat ibana tu batu dohot tu hau.

¹⁰Alai songon i pe angka i sudena, laos so mulak tu ahu anggina, Juda na so maruhum i sian nasa rohana, marpangansi do tahe, ninna Jahowa.

¹¹(III.) Dibahen i umbahen didok Jahowa mandok ahu: Tigoran dope roha ni Israel na marbalik i sian Juda na so maruhum i.

¹²Laho ma ho, jala tingtingkon angka hata on dompak utara, jala dok ma: Sai mulak ma ho, ale Israel na marbalik i, ninna Jahowa; unang pe huparupi bohingku mida hamu, ai pardengganbasa do ahu, ninna Jahowa, ndang manjujur ahu salelenglelengna.

¹³Asal ditanda ho hajahatonmu, na tinundalanmu Jahowa Debatam, jala mulahulak ho tu angka debata sileban di toru ni saluhut hau na rata, jala ndang ditangihon hamu soarangku, ninna Jahowa.

¹⁴Sai mulak ma, hamu ale angka anak na marbalik i, ninna Jahowa, ai ahu do

harajaanmuna hian, jala alaponku do hamu sahalak sian sada huta, jala dua halak sian sada marga, jala togihononku do hamu tu Sion.

¹⁵Jala lehononku tu hamu angka parmahan, hombar tu lomo ni rohangku, jadi marparbinotoan, jala marroha nasida marmahan hamu.

¹⁶Dung i masa ma, ia dung torop jala mabue hamu di tano i di angka ari sogot, ninna Jahowa, ndang be dohonon ni halak: Poti parpadanan ni Jahowa! Ai ndang be tubu di roha ni manang ise, manang paingotingotonna, jala ndang be lulululuanna manang bahenonna na asing.

¹⁷Goaron ni halak ma Jerusalem di tingki na sasada i: Habangsa ni Jahowa, jala marpungu tusi sude angka parbegu, tu goar ni Jahowa na di Jerusalem, jala ndang be paihutonnasida hatangkangon ni rohanasida na jati.

¹⁸Di angka ari i laho ma pinompar ni Juda tu pinompar ni Israel jala rap ro nasida sian tano na di utara tu tano na huturpukhon tu ompumuna mambahen teanteananna.

¹⁹Jala nunga pola hudok: Sai pagabeonku do ho di anak, jala lehononku tu ho tano hasudungan ni roha, partalian hamuliaon di tongatonga ni angka parangan sian angka parbegu! Jala nunga pola hudok: Damang do

ahu goaronmu, jala ndang be tundalanmu ahu.

²⁰Alai tongon tahe, songon panadingkon ni parompuan di puangna, songon i do panadingkonmuna di ahu, ho ale pinompar ni Israel, ninna Jahowa.

²¹Tarbege do suara di angka robean, partatangison ni anak ni Israel, ala diparoa nasida dalannasida, ala dihalupahon nasida Jahowa Debatanasida i.

²²Sai mulak ma, hamu ale angka anak na marbalik i, asa hupamalum panundalionmuna i! Ida ma, na ro ma hami manopot ho, ai ho do Jahowa Debatanami.

²³Tongon tahe, ndang adong hirimon hatuaon sian angka robean, manang sian angka dolokdolok, ai holan sian Jahowa Debatanta ro hatuaon ni Israel.

²⁴Alai haurahon do manganhon na hinangaluthon ni angka ompunta sian sidakdanahonta: Birubirunasida dohot jongginasida, anaknasida dohot boruna.

²⁵Marpangkean do hita di haurahonta, jala dihungkupi haleaonta do hita, ala mardosa hita dompak Jahowa Debatanta, hita tahe dohot ompunta sian sidakdanahonta rasirasa sadarion, jala ndang itatangihon soara ni Jahowa Debatanta.

4¹ (I.) Molo tung mulak ho, ale Israel, ninna Jahowa, tu ahu ma ho mulak; jala molo tung dipadao ho angka hasogiron pineopmu

sian jolongku, ndang tagamon mompasompas ho.

²Marmangmang ma ho tu Jahowa na mangolu i di bagasan hasintongan, di bagasan uhum dohot di bagasan hatigoran jadi pasupasun ni angka parbegu dirina di bagasan ibana jala mamujimuji mida ibana.

³Ai songon on do hata ni Jahowa tu angka baoa sian Juda dohot tu isi ni Jerusalem: Rabi hamu ma tombak an di hamu, jala unang hamu manabur tu tongatonga ni sihupi.

⁴Sunati hamu ma dirimuna di Jahowa, jala padao hamu hulup ni rohamuna, hamu baoa sian Juda dohot hamu isi ni Jerusalem, asa unang manombo rimashu songon api, jala marsigorgor, hape ndang adong na tuk mangintopi, ala ni hinajahat ni angka pambahenanmuna.

⁵(II.) Baritahon hamu ma di Juda, jala patubegehon hamu di Jerusalem, jala dok hamu: Palu hamu ma sarune di luat i; pangiar hamu ma soaramuna maningtingkon: Marpungu ma hamu, asa itatopot angka huta na gonting.

⁶Patindang hamu ma partonggol dingkan Sion, rim ma hamu maporus, unang ngongong, ai paroonku ma jea sian utara dohot hamagoan bolon.

⁷Nunga nangkok singa i sian pangaropanna, jala nunga borhat siago angka parbegu, ruar sian ingananna i mambahen halongonan

tano i, jala tarulang angka hutam, soada be pangisina.

⁸Dibahen i hohoshon hamu ma abit tangki mananangisi jala mangandungi ma hamu, ai ndang tagamon mulak parpiar ni muruk ni Jahowa sian hita.

⁹Jadi masa ma di ari bongkai, ninna Jahowa, tarjepol ma roha ni raja dohot roha ni angka partogi, jala tarhatotong angka malim, jala tarsonggot angka panurirang.

¹⁰Ianggo ahu ningku: Oe, ale Tuhan Jahowa! Songon ma sipaotooto situtu dibahen ho tu bangso on dohot tu isi ni Jerusalem, di na nidokmu: Mardamedame ma hamu! Hape tolpus ro di ateate podang i.

¹¹Di tingki uju i dohonon ma tu bangso on dohot tu isi ni Jerusalem: Ro do alogo na mohop sian angka robean ni halongonan, tumulus dalan dompak boru ni bangsongku ndada laho marsege manang paiashon.

¹²Alogo na gumogo sian nasida ro sian ahu. Dohot ma ahu nuaeng mardabudabu dohot nasida.

¹³Ida ma, manaek do ibana, songon ombun, jala songon halisungsung angka huretana; dumoras do angka hodana sian lali. Marjea ma hita on, ai nunga pesan hita.

¹⁴Buri ma roham sian hajahaton i, ale Jerusalem, asa maruli panumpahion ho. Sadia leleng on marmalam angka sangkap ni jeam di bagasan roham.

¹⁵Ai nunga tarbege barita sian Dan, jala adong na patubegehon jea sian dolok Epraim.

¹⁶Pabotohon hamu ma tu angka parbegu, ida ma, tingtingkon hamu ma tu Jerusalem: Nunga ro angka ari partungkum sian tano na dao, angka na marsurak dompak angka huta ni Juda.

¹⁷Doshon angka pamuro di ladang pangkalianginasida di ho, ala dialo nasida ahu, ninna Jahowa.

¹⁸Dalanmu dohot pambahenanmu mangkorhon angka i di ho, jea ni roham do i, umbahen tolhas ro di pusupusum na paet i.

¹⁹(III.) Inang butuhangkon, butuhangkon! Hansitnai huhilala ateatengku di bagasan, sai mulbahulbak do pusupusungku, ndang tarbahen ahu sip, ala naung hubege soara ni sarune, dohot hariburon ni hamusuon.

²⁰Mardapotdapot angka barita hataluan di tingtingkon; tung sandok tano i tarulang do; sompong do maloha angka sopusopongku, di na satongkin do angka undungundungku.

²¹Sadia leleng on idaonku partonggol i, begeonku soara ni sarune?

²²Ai na oto do bangsongku; ia ahu, ndang ditanda nasida, angka anak na oto do nasida jala ndang marroha; angka na bisuk do nasida mambahen na jat, alai mambahen na denggan ndang diboto nasida.

²³Hutailihon tano i, jala ida ma, halongonan dohot halalanga! Hubereng dompak langit i, hape ndang marhatiuron.

²⁴Hubereng angka dolok, jadi ida ma, humuntal do sudena i jala humutur do sude angka robean.

²⁵Hubereng humaliang, jadi ida ma, ndang adongjolma, jala nunga marpurpur sude pidong angka na martongatonga langit.

²⁶Hubereng hauma bosar, jadi ida ma, nunga gabe halongonan, jala nunga maloha sude angka huta maradophon Jahowa, maradophon parpiar ni rimasna.

²⁷Ai songon on do hata ni Jahowa: Gabe halongonan do sandok tano i, alai nda tung laos siap bahenonku.

²⁸Dibahen i margudompong sandok tano i, jala mangkolom langit i di ginjang ala naung hudok jala husangkapi, jala ndang husolsoli rohangku, jala ndang be mulak rohangku sian i.

²⁹Maradophon soara ni angka parsihundul dohotjolma panior, maporus do sandok isi ni huta i, dibongoti do angka parholipholipan, jala dipanaek do angka sapsap bire; tung langa do sandok huta i, ndang adong bejolma pangisina.

³⁰Ia ho ale na tartaban, aha do bahenonmu? Nang pe disolukkon ho siangmalam, jala marpangkean horunghorong sere, jala marpangiri ho pasihar panailim, laos so

marniula do panjengkarim; sai na marhu ni roha do angka haholonganmu mida ho, angka ditahi nasida do hosam.

³¹ Ai hubege do soara songon soara ni boruboru na mangae posoposo, soara hagogotan songon na tumubuhon buhabaju; soara ni boru Sion, na marhoi pahortanghortangkon tanganna mandok: Soro ni aringkon, ai mandate ma annon tondingku bahenon ni angka pamunu.

5¹ (I.) Liati hamu angka alaman ni Jerusalem, sai ida jala tanda jala diori hamu di angka alamanna i manang tung jumpang hamu sadajolma, manang tung adong ma sada na mangulahon uhum, na usouso di hasintongan, asa marpamuati rohanku di huta i.

² Jala nang pe didok nasida: Songon sintongna mangolu Jahowa, manolon na tutu do nasida disi.

³ Ale Jahowa, nda tu hasintongan do matam laho? Nunga nian dilingsingi Ho nasida, alai ndang mangilala nasida disi; nunga nian disiaphon Ho nasida, tong do nasida manjua manjangkon sipodaon; tung umpir do bohinasida sian dolok batu, manjua do nasida paubahon rohana.

⁴ Ilanggo Ahu, ningku do: Holan angka na pogos do nasida, angka na pinaotooto! Ala ndang ditanda nasida dalan ni Jahowa, uhum ni Debatanasida i.

⁵Dung i laho ma ahu tu angka na sangap, jala mangkatai dohot nasida, ai anggo nasida, diboto nasida do dalan ni Jahowa, uhum ni Debatanasida i. Hape rap do nasida mamonggoli auga, angka dirapui do angka tompina i.

⁶Dibahen i bunuon ni sada singa sian tombak nasida, gompul harangan mangago nasida; martaronggop ma di lambung hutanasida; ganup na laho ruar sian i soroonna do; ai sai lam ganda do pangalaosionnasida, panundalionna pe ndang habilangan.

⁷Tung beha ma pamuati ni rohangku di ho? Ditadingkon angka anakmu do Ahu, jala marmangmang nasida tu na so debata, jala dung butong nasida hubahen, gabe mangalangkup nasida, marrongoman tu bagas parmainanon.

⁸Angka hoda tunggal na mokmok do nasida, angka na mompasompas, mariheihe be do tu jolma ni donganna.

⁹Tung so luluhononku angka sisongon i, ninna Jahowa manang tung so sudolhonon ni rohangku tu bangso sisongon i.

¹⁰(II.) Panaek hamu ma parikna, jala gargari hamu, alai unang tung siap bahen hamu! Tultuli hamu ma angka rantingna, ai ndada Jahowa nampuna nasida.

¹¹Ai marbalik situtu do dompak ahu, pinompar ni Israel dohot pinompar ni Juda, ninna Jahowa.

¹²Nunga disoadahon nasida Jahowa, jala didok: Nandang adong ibana, jala ndang tagamon ro tu hami jea, nang podang manang haleon, ndang tagamon idaonnami.

¹³Jala angka panurirang gabe alogo, jala ndang adong hata ni Jahowa di bagasan nasida; songgop tu nasida sandiri do songon i.

¹⁴Dibahen i songon on do hata ni Jahowa, Debata Zebaot: Ala songon i hatamuna i, ida ma lehononku ma angka hatangku tu bagasan pamanganmu gabe api, jala bangso on gabe hau, asa suda nasida dipangan.

¹⁵Ida ma, paroongku ma dompak hamu sada bangso sian na dao, ho ale pinompar ni Israel, ninna Jahowa; sada bangso na tang do i, bangso sian na robi, bangso na marpangkuling na so binoto, jala ndang antusanmu manang aha nidokna.

¹⁶Tudoshon tanoman na talak do parsumbiaanna, sude do nasida ulubalang.

¹⁷Panganonna do sigotilonmu dohot rotim; panganonnasida do angka anakmu dohot angka borum; sohalanna do angka birubirum dohot angka lombum, sudahononna do parbue ni hau anggurmu dohot antajaum; tabanonna do hutam angka na gonting i, haposan ni roham na sai laon marhitehite podang.

¹⁸Alai nang di angka ari bongkai, ninna Jahowa, ndang laos siap hamu bahenonku.

¹⁹Jala molo didok hamu: Ala ni aha umbahen saluhutna i dibahen Jahowa Debatanami tu hami? Dohononmu ma tu nasida: Songon panadingkonmuna di ahu mangoloi angka debata sileban di tanomuna, laos songon i do parhatobanon ni halak na pulik hamu di tano na so hamu nampunasa.

²⁰(III.) Baritahon hamu ma i tu pinompar ni si Jakkob, jala tingtingkon hamu ma i di Juda, mandok songon on:

²¹Ua tangihon ma on, ho ale bangso na oto, jala na so marroha! Angka na marmata nian, hape ndang marnida, angka na marpinggol nian, hape ndang marbinege.

²²Tung so pola habiaranmuna ahu, ninna Jahowa, manang so pola manonditnondit maradophon ahu? Ahu na mambahen horsik gabe parbalohan ni laut, bahen patik salelenglelengna, na so tupa laosanna; jala nang pe gunsang, ndang hahuaonna, nang pe marhasakhasak angka galumbangna, laos so pulhaonna do.

²³Alai anggo bangso on parroha na marbalik do, jala na manggunturi, marbalik do nasida, laos laho songon i.

²⁴Jala ndang dung didok di bagasan rohana: Ua itahabiari ma Jahowa Debatanta, na mangalehon udan di tingkina, na mangaramoti di hita minggu angka na pinatik tu gotilon.

²⁵ Alai angka hajahatonmuna palipehon
sisongon i, jala angka dosamuna mangambat
na denggan i sian hamu.

²⁶ Ai jumpang do di tongatonga ni
bangsongku angka parjahat, angka na
manisipi, songon angka parsambil, angka na
manaon jorgong padapotjolma.

²⁷ Songon huruhuruan na gok pidong,
songon i do bagasnasida gok sipaotooto.
Dibahen i timbul, jala mamora nasida.

²⁸ Marmiak jala marlinolino nasida, huhut
binsat nasida dibahen angka pambahenan
na jahat, ndang mandabu uhum na sintong
nasida, uhum tu na sopot so marama, hape
sai manjadi do sangkapnasida; jala ndang
dium nasida angka na pogos hombar tu
uhum.

²⁹ Tung so luluhononku angka sisongon i,
ninna Jahowa? Tung so sudolhononku ma tu
bangso na songon on.

³⁰ Masa do di tano i hasogiron na sogir jala
na jorbut.

³¹ Angka panurirang manurirangi ansiansi,
jala angka malim gumomgom tangannasida,
jala bangsongku mangkaholongi sisongon i.
Alai aha ma bahenonmuna apala parpudi?

6¹ (I.) Maporus ma, hamu ale angka
anak ni si Benjamin sian tongatonga ni
Jerusalem, jala palu ma sangka di Tekoa, jala
patindang ma tonggol di atas Bethakkerem;

ai sian utara mangondam ro hamagoan dohot jea bolon.

²Tudoshon porlak na uli, jala na angonangon do ho, ale boru Sion.

³Ro ma tusi angka parmahan rap dohot pinguannasida; pagohononna ma angka undungundungna mangkaliangi Sion, jala jampalonna ma ingananna be.

⁴Parbadiai hamu ma hamusuon dompak nasida! Beta hita nangkok di hos ni ari! Marjea ma hita, ai nunga manihir ari, ai lam ganjang halinu potangna i.

⁵Beta hita nangkok bornginna i, asa itaago angka bagas bolon di nasida.

⁶Ai songon on do hata ni Jahowa Zebaot: Taba ma angka hau, jala bahen hamu hubu manungkum Jerusalem humaliang! I ma huta sitoruan, ai tung pangarupaon situtu masa di tongatongana.

⁷Songon mual na marbullakkon aekna, songon i dibullakkon huta i hajahatonna; pangarupaon dohot gogo tarbege di bagasan, parsahiton dohot pardangolan masa tongtong di jolo ni bohingku.

⁸Sai olo ma ho ajaran, ale Jerusalem, asa unang marsiruntus rohangku sian ho, unang hubahen ho, gabe halongonan, gabe tano na so marpangisi!

⁹(II.) Songon on do hata ni Jahowa Zebaot: Sai jomputon do na teba sian Israel, songon parbue ni hau anggur. Ulahi pabongot

tanganmu, songon halak siseat parbue ni anggur tu bagasan angka tong.

¹⁰Tung tu ise ulaning ahu mandok hata dohot mangkatindangkon, asa dibege nasida? Ida ma tung na tangkang do rohanasida, jala ndang tarbahen nasida mananginangi. Ida ma, hata ni Jahowa gabe sirehereheon di nasida, ndang lomo rohanasida disi.

¹¹Dibahen i gok rimas ni Jahowa do rohangku, ndang hatiopan ahu be ateatengku. Usehon ma rimasmu tu dakdanak angka di alaman dohot tu saluhut dolidoli, angka na marpungu; ai ingkon rap tartangkup do baoa dohot boruboru, na ubanon rap dohot na sarimatua.

¹²Jala saluhut bagasnasida, ingkon sahat tu na asing do ro di haumana dohot jolmana saluhut, ai patoltolonku ma tanganku dompak pangisi ni tano i, ninna Jahowa.

¹³Ai sian na ummetmet sahat ro di na umbalga, luhut nasida sai masilaba do, jala sian panurirang sahat ro di malim, luhut nasida mambahen sipaotooto.

¹⁴Jala leap do pandaoninasida di bugang ni boru ni bangsongku, ninna do: Dame, dame! Hape ndang adong dame.

¹⁵Patut tarurak nasida, ai hasogiron do diula nasida, hape laos so dihailahon nasida dope, jala ndang diboto be na maila. Dibahen i ingkon rage nasida rap dohot angka na rage,

di tingki pangaluluhonku marragean nasida,
ninna Jahowa.

¹⁶Songon on do hata ni Jahowa: Jongjong
ma hamu tu angka dalan, jala tangkasi hamu,
jala usousu hamu di angka dalan na robi,
manang didia dalan na denggan i, i ma dalan
i hamu, asa jumpang hamu hasonangan ni
rohamuna! Hape didok nasida do: Ndang olo
hami mardalan sian i.

¹⁷Jadi hupatindang tu hamu angka parjaga.
Tangihon hamu ma soara ni sarune! Alai ninna
nasida ma: Ndang olo hami manangihon.

¹⁸Dibahen i tangihon ma, hamu ale angka
bangso parbegu, jala boto ma ho ale
parluhutan, na masa di tongatonganasida.

¹⁹Tangihon ma, ho ale tano on! Ida ma,
paroonku ma jea tu bangso on, parbue ni
sangkapnasida. Ai ndang ditangihon nasida
angka hatangku, jala ditoishon nasida do
patikku.

²⁰Tu dihangku ma daupa na ro sian Seba
dohot ulumamis na denggan sian tano na
dao? Ndang huhalomohon peleanmuna
situtungan, jala ndang las rohangku mida
peleanmuna sipotongon.

²¹Dibahen i songon on do hata ni Jahowa:
Ida ma, bahenonku ma bangso on angka
partuktuhan, asa martinggangan disi amaama
rap dohot dakdanakjolma na marsahuta
dohot alealena rap mago do.

²² (III.) Songon on do hata ni Jahowa: Ida ma, ro do sada bangso sian tano na tungkan utara, sada bangso na bolon hehe sian angka ujung ni tano on.

²³ Sior dohot hujur diboan nasida, jorbut do bangso i, jala ndang maralangalang; soara nasida marhasak do songon laut, jala marsihundul be nasida di hoda, marsinjata be, songon halak parmusu mangaromrom ho, ale boru Sion.

²⁴ Nunga hubege hami baritana; nunga pola lenduk tangannami, targogot hami dibahen, rianon songon boruboru na laho mangintubu.

²⁵ Unang laho hamu tu ladang, jala unang mardalani hamu di balian, ai disi do podang ni musu jala habiaran humaliang.

²⁶ Ho ale boru ni bangsongku, hohoshon ma tangki tu gontingmu, jala margulu ho di sirabun, mangandung sidangolon ma ho, songon na na mate anak sasada, ai so pangiriman do ro sipangago tu hita.

²⁷ Nunga hubahen ho gabe siuji bangsongku dohot partanobatoan, asa diboto jala diuji ho dalannasida.

²⁸ Tung saluhut do nasida manggunturi situtu, angka na mangadangadangkan sipaotooto, tung tombaga jala bosi do nasida, saluhut nasida halak pangago.

²⁹ Marbujogo pandusdusan i tung suda do simbora i dibahen api, ndang marniula sai

datdatan lalaan, ai ndang olo mamulik angka parjahat i.

³⁰Perak na ambolong do nasida targoar, ai nunga di ambolongkon Jahowa nasida!

7¹ (I.) On ma hata na ro tu si Jeremia sian Jahowa songon on:

²Laho ma ho jongjong tu pintu ni bagas ni Jahowa, jala tingtingkon disi hata on, jala dok ma: Tangihon ma hata ni Jahowa, ho ale sandok Juda, angka na bongot tu bagasan pintu on laho marsomba tu Jahowa.

³Songon on do hata ni Jahowa Zebaot, Debata ni Israel: Padenggan hamu ma dalamuna dohot pambahenanmuna, asa hupaian hamu di inganan on marsonangsonang.

⁴Unang ma marhaposan hamu di angka hata sipaotooto, angka na mandok: Joro ni Jahowa, joro ni Jahowa, joro ni Jahowa do on!

⁵Alai molo dipadenggan hamu situtu dalamuna dohot pambahenanmuna; molo dibahen hamu uhum hatigoran ganup baoa tu donganna.

⁶Molo so dirupa hamu halak na buro, na tading di lampin, boruboru na mabalu, jala unang usehon hamu mudar na so marpipot di inganan on jala unang ihuthon hamu angka debata sileban, gabe hamagoan di hamu.

⁷Jadi paianonku ma hamu di inganan on, di tano naung hubasabasahon tu ompumuna sian na robi, ro di saleleng ni lelengna.

⁸(II.) Alai tahe ida ma, marhaposan tu angka hata sipaotooto do hamu, angka na so marguna.

⁹Tung beha ma partorangna? Manangko hamu mambunu, mangalangkup, manolon na tutu, manutung daupa tu Baal, jala mangihuthon tu debata sileban angka na so tinandamuna hian.

¹⁰Dung i angka ro hamu tindang di jolongku, di bagasan joro on na targoar tu goarhu, jala didok hamu: Nunga malua hami laho mambahen saluhut angka hasogiron on.

¹¹Tung gabe liang ni angka pandobo do joro on, na targoar tu goarhu di rohamuna? Ahu pe, nunga tangkas huida, ninna Jahowa.

¹²Ua tung laho hamu tu ingananku na jolo, na di Silo, parmianan ni goarhu hubahen di na robi, jala ida hamu na hubahen tusi ala hajahaton ni bangsongku Israel.

¹³Nuaeng pe, ala diulahon hamu saluhut angka pambahenan on, ninna Jahowa, jala hupasogot mangkulingi hamu, hape ndang olo hamu manangihon, jala hujou hamu, hape ndang olo hamu mangalusi.

¹⁴Jadi bahenonku ma tu joro, na targoar tu goarhu, na pinangasahonmuna, jala bahenonku do tu inganan na hubasabasahon tu ompumuna, suang songon na hubahen tu Silo na jolo.

¹⁵Jala bolongkononku ma hamu sian jolongku, songon na hubolongkon saluhut

hahaanggimuna, i ma sandok pinompar ni Epraim.

¹⁶(III.) Ia ho, unang ondihon bangso on, jala unang pangiar angguhangguk dohot tangiangmu mangondihon nasida, jala unang sai datdati mangido tu ahu, ai ndang olo ahu tumangihon ho.

¹⁷Nandang diida ho huroha na binahennasida di angka huta ni Juda dohot di angka alaman ni Jerusalem?

¹⁸Papungupungu soban angka dakdanak i, mangopan api angka amaama, mandogili na niudi angka inaina laho mambahen juada di langit, jala diusehon nasida tuak tangkasan di angka debata sileban laho mangarsahi ahu.

¹⁹Tung ahu ma na niarsahannasida disi? Ninna Jahowa. Nda laos nasida niarsahanna bahen haurahon ni bohinasida i?

²⁰Dibahen i songon on do hata ni Tuhan Jahowa: Ida ma, usehononku ma murukku dohot parpiar ni rimashu tu inganan on, tujolma dohot tu pinahan dohot tu hau di ladang dohot parbue ni tano i, asa marsigorgor, jala ndang adong na mangintopi.

²¹(IV.) Songon on do hata ni Jahowa Zebaot, Debata ni Israel: Tambai hamu angka pelean situtungon dohot sipotongon, jala pangan hamu ma juhut.

²²Ai ndang hudokkon ompumuna, jala ndang hutonahon tu nasida, uju di ari na hutogihon nasida ruar sian tano Misir, taringot

tu pangalaho ni pelean situtungon, manang pelean sipotongon.

²³Alai hata on do na hutonahon tu nasida, songon on: Sai tangihon hamu ma soarangku, asa ahu gabe Debatamuna, jala hamu gabe bangsongku; antong dalan i hamu ma saluhut dalan, angka na hutonahon tu hamu, asa marsonangsonang hamu.

²⁴Alai ndang olo nasida manangihon, jala ndang ditarehon nasida pinggolnasida i, alai sai mardalani nasida di bagasan sangkapsangkap dohot hatangkangon ni rohanasida na jahat i, jala sai ditundali nasida do ahu, ndada didompakkon.

²⁵Olat ni ari haruruar ni ompumuna sian tano Misir, sahat ro di ari on, sai husuru do tu hamu saluhut naposongku, angka panurirang i, ariari sai hudatdati marsuru nasida.

²⁶Alai ndang ditangihon nasida ahu, jala ndang ditarehon pinggolnasida, tung ditangkangi nasida do tangkuhukna, na manjahati tahe nasida sian ompunasida i.

²⁷Dihatahon ho pe tu nasida saluhut hata on, ndang tagamon tangihononnasida ho, dijouhon ho pe tu nasida, ndang tagamon alusanna.

²⁸Dibahen i dohononmu ma tu nasida: On ma sada bangso na so tumangihon soara ni Jahowa Debatana, jala na so olo manjalo pangajaran. Nunga mago hasintongan, jala siap sian pamanganna.

²⁹ (V.) Antong nabungi ma obuk ni ulum, jala reongkon, jala pangiar soaram mangandungi di angka robean, ai nunga diambolongkon Jahowa, jala ditadingkon sundut na ni rimasanna i.

³⁰ Ai diulahon anak ni Juda do na roa di adopanku, ninna Jahowa; dipatindang nasida do hasogironnasida tu bagasan joro na targoar tu goarhu laho paramunhon.

³¹ Jala dipauli nasida pantilpantil di Topet na di rura ni angka anak ni si Hinnom laho mamurun anaknasida dohot borunasida di bagasan api, na so dung hutonahon, manang na so dung tubu di bagasan rohangku.

³² Dibahen i, ida ma, ro do angka ari sogot, ninna Jahowa, ndang be dohonon ni halak Topet, manang rura ni angka anak ni si Hinnom, tung rura pamunuan na ma, laos tartanom halak di Topet, ala soada inganan na asing.

³³ Ia bangke ni bangso on, gabe panganon di pidong angka na martongatonga langit dohot di pinahan ni tano on, jala ndang adong na manggorahon.

³⁴ Jadi mansohot bahenonku sian angka huta ni Juda dohot sian alaman ni Jerusalem soara las ni roha dohot olopolop, soara ni pangoli dohot soara ni oroan, ai ingkon gabe halongonan tano i.

8¹ (I.) Di tingki uju i, ninna Jahowa, huaron ni halak ma holiholi ni angka raja ni

Juda dohot holiholi ni angka indukna, dohot holiholi ni angka malim dohot holiholi ni angka panurirang, dohot holiholi ni pangisi ni Jerusalem sian tanomanna be.

²Jala panserakhononna asa didadang mata ni ari dohot bulan ro di saluhut parangan di langit, angka na hinaholonganna, angka naung nioloanna, jala niihuthonna, angka naung niluluanna, jala marsomba tusi jala ndang papunguon muse manang tanomon, tung gabe napa do i pasombuon di sisik ni tano on.

³Tagonan hamatean asa hangoluan pilliton ni saluhut angka na tading i, sian sundut na jahat on, di saluhut inganan habalian ni angka na tading, ninna Jahowa Zebaot.

⁴(II.) Jala dok ma tu nasida: Songon on do hata ni Jahowa: Tung adong ma halak tinggang, gabe so naeng hehe muse? Tung adong ma na lilu sian dalan, gabe so naeng mulak muse?

⁵Boasa tung muba ia bangso on di Jerusalem tongtong nasida manundali jala marsigantung di sipaotooto, tung dijua nasida do mulak!

⁶Hupaeleng pinggolhu, jala hutangitangi, hape na so hasea dipahatahata nasida; ndang adong manang ise na sumolsoli rohana ala hajahatonna, na mandok nian: Tung aha do na hubahen on? Tung saluhut do nasida marbalik di parlojongonna, songon hoda na manahopi tongtangan.

⁷Gari pidong siboru tasik na martongatonga langit, diboto do tingkina; jala anduhur dohot leangleang dohot situbiak marningot tingki harorona; alai anggo bangsongku, ndang diboto uhum ni Jahowa.

⁸Beha pambahenmu mandok: Angka na pistar do hami, jala di hami do patik ni Jahowa! Tongon do, ida ma, holan sipaotooto do na binahen ni panurat sipaotooto ni angka juaratulis.

⁹Leak ma tarurak angka na pistar, tarsonggot nasida jala tartangkup; ida ma, nunga tung dibolongkon nasida hata ni Jahowa, tung hapistaran dia ma di nasida?

¹⁰Dibahen i lehononku ma jolmanasida tu halak na asing, angka ladangnasida tu halak partaban, ai sian na metmet sahat ro di na magodang, saluhut do nasida masilaba, sian panurirang sahat ro di malim, saluhut do nasida mangulahon sipaotooto.

¹¹Rausraus do pandaonina, ia di bugang ni boru ni bangsongku, ninna do: Dame, dame! Hape ndang adong dame.

¹²Jadi tarurak ma nasida, ai hasogiron do diula nasida; hape ndang diboto nasida be na maila, manang marlangan mida haurahon. Dibahen i marragean ma nasida rap dohot angka na rage; di tingki partubolan tu nasida martinggangan nasida, ninna Jahowa.

¹³Duduhonku ma nasida, ninna Jahowa. Nandang adong be parbue ni hau anggur

di hau anggur, ndang adong be antajau
di hau antajau, malos do nang bulung i,
jala pasahatonku do nasida tu angka na
mangaluntakluntak nasida.

¹⁴(III.) Ala ni aha hita maringanan disi?
Beta hita marpungu, jala laho tu huta angka
na gonting, siap disi ma hita! Ai Jahowa,
Debatanta maniaphon hita, jala dipainum tu
hita aek rasun, ai dompak Jahowa do hita
mardosa.

¹⁵Sai maimaima do hatuaon do hita, hape
ndang adong ro na denggan; di tingki
hamalumon, hape ida ma: Hasonggoton do.

¹⁶Sian Dan tarbege parngongos ni angka
hodana, sian soara pariheiheon ni angka
hodana tunggal humuntal sandok tano on.
Solaon nasida ma tano i, jala lamotanna ro di
isina, huta i ro di pangisina di bagasan.

¹⁷Ai ida ma, suruonku ma tu
tongatongamuna angka ulok dari, hala
angka na so tarpamuli utiutian, angka i ma
mamarguti hamu, ninna Jahowa.

¹⁸(IV.) Aut ni dapot ahu nian apulapul ali ni
pardangolan! Hape mandate do rohangku di
bagasan.

¹⁹Tarbege do soara angguhangguk ni boru
ni bangsongku sian tano na dao: Beha ndang
be Jahowa di Sion, ndang be disi ia rajana?
Boasa tung digitik nasida ahu marhitehite
ganaganaannasida, angka na tinuang,
marhitehite angka debata sileban!

²⁰Nunga pola salpu gotilon, nunga pola salpu partaonan logo ni ari, hape laos so dapotan haluaon hami!

²¹Tung magege do ateatengku binahen ni bugang ni boru ni bangsongku; martujung ahu, tung tarhatos do huhilala.

²²Tung na so adong be ulaning miak di Gilead, manang so adong be pandaoni disi? Boasa tung so naek hahisaron ni boru ni bangsongku?

9¹ (8-23) Aut ni gabe aek nian ulungku, jala matangku gabe mual pariluilian, asa hutatangisi nian arian dohot borngin, angka na rage sian boru ni bangsongku.

² (9-1) (I.) Aut ni adong nian di ahu di halongonan sada bagas parmalaman ni pangallung, asa hutadingkon bangsongku, asa bungkas ahu tumadingkon nasida, ai saluhut nasida angka pangalangkup do, luhutan ni angka pangoseose.

³ (9-2) Tangging do dila nasida songon sior maniorhon sipaotooto, jala ndang dihajongjongkon nasida hasintongan di tano i, ai mardapotdapot hajahaton diula nasida, alai anggo ahu, ndang ditanda nasida, ninna Jahowa.

⁴ (9-3) Sai diramoti be ma dirina maradophon donganna, jala unang marhaposan tu dongan manang ise pe, ganup dongan marbisukbisuk, jala ganup pedan mangkata tundal.

⁵ (9-4) Tung masipaotootoan do na marpedan jala ndang di hatahon hasintongan; nunga dipasomal dila nasida mandok sipaotooto, jala marngalutan dihilala nasida manjahati.

⁶ (9-5) Di tongatonga ni sipaotooto do ingananmu, jala ala ni sipaotooto i manjua do nasida mananda ahu, ninna Jahowa.

⁷ (9-6) (II.) Dibahen i songon on do hata ni Jahowa Zebaot: Ida ma: Lalaonku ma nasida, jala ujionku, ai tung aha dope ulaning bahenonku maradophon boru ni bangsongku?

⁸ (9-7) Sumbia na ginarahon do dilanasida mangkatahon sipaotooto; hata dame dipaboa ianggo dilana tu donganna, hape mangonggop ianggo rohana di bagasan.

⁹ (9-8) Tung so marlulu ahu dompak nasida alani? Ninna Jahowa; tung so marsudolsudol rohangku mida bangso sisongon i?

¹⁰ (9-9) Di atas ni angka dolok ma bahenonku partatangison dohot angguhangguk, jala di angka jampalan di halongonan sada ende andung, ala naung siap, so adong pamolus nanggo sahalak, jala ndang be tarbege soara ni pinahan. Pidong na martongatonga langit pe ro di pinahan, tung purpur do saluhutna.

¹¹ (9-10) Bahenonku do huhut Jerusalem gabe pantilpantil batu, paronggopan ni angka antuasus, jala angka huta ni Juda bahenonku gabe halongonan so adong pangisina.

¹² (9-11) Tung ise ulaning baosa na pistar, jala na mangantusi hata on? Jala ise

ibana na pinangkulingan ni Jahowa, asa baritahononna? Boasa tung siap tano on, doshon halongonan raharna, so adong pamolus.

¹³(9-12) Dung i ninna Jahowa ma: Ala na tinadingkon nasida i patikki, na hulehon tu jolonasida, jala na so tinangihon nasida soarangku, jala ndang marparange hombar tusi.

¹⁴(9-13) Tung tagonan hatangkangon ni rohanasida paihutihutonna mangihuthon tu Baal, angka na niajarhon ni ompunasida i.

¹⁵(9-14) Dibahen i songon on do hata ni Jahowa Zebaot, Debata ni Israel: Ida ma, ahu papanganhon tu bangso i pogu jala ahu painumhon aek rasun tu nasida.

¹⁶(9-15) Jala ahu paserakkon nasida tu tongatonga ni bangso angka na so tinandanasida, manang ompunasida pe, jala ahu manongos podang sian pudinasida, paima sun siap nasida hubahen.

¹⁷(9-16) Songon on do hata ni Jahowa Zebaot: Tangihon jala jou hamu angka sibaso pangandung, asa ro nasida, jala suru hamu mangalapi angka boruboru pangarunding.

¹⁸(9-17) Asa dihalaputi nasida mambahen sada andung di hita, asa mabakbak iluilu sian matanta, jala mabaor aek sian imbulu ni matanta.

¹⁹(9-18) Ai tarbege do soara andung sian Sion: Nunga mago hita, nunga tarurak situtu

hita, ai nunga bungkas hita sian tanonta,
ai nunga di pangarumpakkon nasida angka
bagasta!

²⁰(9-19) Antong hamu inaina, tangihon
hamu ma hata ni Jahowa, jala ditangkap
pinggolmuna ma hata na ruar sian
pamanganna, jala ajarhon hamu ma andung
tu borumuna, jala ganup mangajarhon
andung tu pedanna.

²¹(9-20) Ai nunga manjangkit hamatean
sian pandiloannami, nunga pola dibongoti
angka bagasnami, asa diragehon angka
dakdanak sian alaman, angka dolidoli sian
onan.

²²(9-21) Dok ma, songon on do hata ni
Jahowa: Marragean ma bangke ni jolma,
songon napa di ladang, jala songon tibalán
di pudi ni panabi, jala ndang adong na
papunguhon.

²³(9-22) (III.) Songon on do hata ni
Jahowa: Sai unang ma ditengahon na bisuk
habisukonna, sai unang ma ditengahon na
gogo hagogoonna, sai unang ma ditengahon
na mora hamoraonna.

²⁴(9-23) Manang ise na naeng mamuji
dirina, on ma dipujihon: Na marroha i ibana,
jala na tinandana i ahu, ai ahu do Jahowa,
parasi roha na mangkajongjongkon uhum
dohot hatigoran di tano on, ai angka ido lomo
ni rohangku, ninna Jahowa.

²⁵ (9-24) Ida ma, na ro do angka ari sogot, ninna Jahowa, marlulu ma ahu dampak nasa parsunaton mardongan sibursibur.

²⁶ (9-25) Dampak halak Misir, dampak halak Jahudi, dampak halak Edom, dampak halak Amon, dampak halak Moab dohot dampak saluhut na marulu na ginorbang, angka na maringan di halongonan. Ai saluhut angka parbegu ndang marsunat, alai anggo sandok pinompar ni Israel marroha na so sinunat do.

10¹ (I.) Tangihon ma hata na hinatahon ni Jahowa tu hamu, ale pinompar ni si Israel!

² Songon on do hata ni Jahowa: Unang tung guruhon hamu dalan ni angka parbegu, jala unang hasonggothon hamu angka tanda di langit, ala tarsonggot angka parbegu disi.

³ Ai tung alogo sambing do patikpatik ni angka bangso; ai tung hau tombak hian ditaba marhitehite tangke, sipandean ni tangan ni pande.

⁴ Dipajagarjagar muse marhitehite perak dohot sere, dipalohot muse marhitehite labang dohot nanggar, asa unang tarhutik.

⁵ Songon pohung di parjelohan do nasida, ndang diboto mangkatai; ingkon usungon do nasida, ai ndang diboto mangalangka. Unang mabiar hamu mida nasida, ai ndang diboto mambahen na roa, manang na denggan.

⁶Ndang adong manang ise tudoshon ho ale Jahowa! Na timbul do ho, jala na timbul goarmu marhitehite hagagoon.

⁷Ise ma tung so habiaranna ho, ale raja ni angka bangso, ai i do na tama maradophon ho; ai di tongatonga ni saluhut angka na pistar di angka bangso, jala di saluhut harajaonna, nda tung adong tudoshon ho.

⁸Tung saluhut do nasida angka na bodo dohot na oto: Tung hau sallobong sambing do, gabe poda na so marguna di nasida.

⁹Perak na ninanggaran binoan ni halak sian Tarsis, dohot sere sian Upas, jadijadian ni panopa dohot tangan ni panuang; marpangkean na sinombul jala na tinubaran do i, jadijadian ni pande do saluhutna i.

¹⁰Alai anggo Jahowa, i ma Debata ni hasintongan, ibana Debata na mangolu, jala raja saleleng ni lelengna! Humuntal do tano on maradophon murukna, jala ndang manahan angka bangso maradophon rimasna.

¹¹Songon on ma dohononmuna tu nasida: langgo debata sileban, angka na so tumompas langit dohot tano on, ingkon siap nasida sogot sian tano on dohot sian toru ni langit.

¹²Alai anggo Debatanta ibana manjadihon tano on marhitehite gogona, ibana paojakkon liat portibi on marhitehite habisukonna, jala dipahembang langit i marhitehite hapistaranna.

¹³ Binahen ni soarana marhasak angka aek di toru ni langit, jala manaek angka ombun sian ujung ni tano on; ibana manjadihon angka hilap gabe udan, jala diparuar alogo sian parpeopanna.

¹⁴ Na bodo do saluhut jolma, ndang marparbinotoan; tung tarurak do saluhut situang ganaganaan, ai sipaotooto do tuanganna jala ndang adong hosana di bagasan.

¹⁵ Alogo sambing nasida, jadijadian haliluon; jumpang tingki partubolon, siap ma nasida.

¹⁶ Alai ndang songon angka nasida ianggo ibana partalian ni Jakkob, ai ibana do Sijadi sandok na adong, jala Israel do marga ni partalianna. Jahowa Zebaot do goarna.

¹⁷ (II.) Papungu ma ugasanmu sian tano i, ho ale isi ni huta na gonting.

¹⁸ Ai songon on do hata ni Jahowa: Ida ma, ambolongkon ma angka isi ni tano i sahalion, jala targogot nasida bahenonku, asa didapot nasida rohanasida i.

¹⁹ Soro ni aringkon ala ni bugangkon! Hansitnai bugangkon! Jadi ningku na ma: Ingkon i na ma sahithu, antong huta on na ma.

²⁰ Nunga tarulang ia undungundungku, jala saluhut angka talina nunga matos; nunga ditadingkon angka anakku ahu, jala ndang adong be nasida. Nandang adong be na

pahembang undungundungku, manang na pahire rimberimbengku.

²¹Tung na oto do angka parmahan i, jala ndang dilului nasida ianggo Jahowa. Dibahen i ndang marhapistaran pambahennasida, jala sandok puguannasida marserak do.

²²Tarbege do sada soara barita, ida na ro ma hagunturon bolon sian tano na tungkan utara, laho mambahen angka huta ni Juda gabe halongonan, parmianan ni antuasus.

²³Nunga huboto, ale Jahowa, ndada guru di jolma dalanna, ndada guru di baa pardalandalan, pahothon langkana.

²⁴Pinsang ahu, ale Jahowa, asal marpangondam, unang di bagasan rimasmu, asa unang tung siap ahu!

²⁵Usehon ma murukmu tu bangso parbegu angka na so tumanda ho, dohot tu bangso angka na so manjou goarmu, ai nunga dipangan nasida Jakkob, jala disudahon ibana, jala tarulang ingananna dibahen nasida.

11 ¹(I.) On do hata na ro tu si Jeremia sian Jahowa, songon on:

²Tangihon ma angka hata ni padan on, jala hatahon tu halak Juda dohot tu isi ni Jerusalem.

³Jala dok ma tu nasida: Songon on do hata ni Jahowa, Debata ni Israel: Hona bura ma ganup na so tumangihon angka hata ni padan on.

⁴Na hutonahon i tu ompumuna uju na hutogihon nasida ruar sian tano Misir, sian liang pamurunan bosi, gabe hudok: Tangihon hamu ma soarangki, jala patupa hamu hombar tu sandok na hutonahon i tu hamu asa gabe bangsongku hamu, jala ahu gabe Debatamuna.

⁵Asa hupahot uari na huuarihon tu ompumuna, mangalehon tu nasida sada tano na binsat dibahen susu dohot situak ni loba, songon na masa di ari on. Jadi ningku ma mangalusi: Songon i ma, ale Jahowa!

⁶Dung i ninna Jahowa ma mandok ahu: Tingtingkon ma saluhut hata i di angka huta ni Juda, dohot di angka alaman ni Jerusalem, songon on: Tangihon hamu ma angka hata ni padan on, jala ulahon hamu!

⁷Ai huhatindangkon situtu tu ompumuna olat ni ari uju ahu manogihon nasida ruar sian tano Misir sahat ro di ari on, tibu hian huhatindangkon songon on: Sai tangihon hamu ma soarangku!

⁸Alai ndang ditangihon nasida, jala ndang ditarehon pinggolna, ganup masitondong dalanna be di hatatangkang ni rohana na jahat i; jadi huparo ma tu nasida saluhut hata ni padan on na hutonahon i sibahenon nasida, hape ndang dibahen.

⁹(II.) Dung i ninna Jahowa mandok ahu: Nunga masa parbulanan di angka baoa sian Juda dohot di angka isi ni Jerusalem.

¹⁰Nunga marbalik nasida mulak tu hajahaton ni ompunasida parjolo i, angka na manjua tumangihon angka hatangki, jala diihuthon nasida do debata sileban angka na nioloannasida i. Nunga mangose pinompar ni Israel dohot pinompar ni Juda di padan na hupahot tu ompunasida.

¹¹Dibahen i songon on do hata ni Jahowa: Ida ma, paroongku ma tu nasida hamagoan, na so tarbahen nasida malua sian i; joujou pe nasida tu ahu, ndang tangihononku nasida.

¹²Dung i laho ma disi angka huta ni Juda dohot isi ni Jerusalem, jala joujou tu debata sileban, angka na nidaupaannasida, hape ndang haurupansa nasida di tingki hamagoannasida i.

¹³Ai manjukur bilangan ni angka hutam do torop ni angka debatam ale Juda, jala mangihuthon bilangan ni angka alaman ni Jerusalem do torop ni langgatan, angka na binahenmuna bahen haurahon, angka langgatan pardaupaan tu Baal.

¹⁴Alai anggo ho, unang tangiangkon bangso on, jala unang ulahon hoihoi manang tangiang mangondihon nasida; ai ndang tangihononku, molo joujou nasida tu ahu ala parsorionnasida i.

¹⁵Tung aha do na niula ni hasianku di jorongku! Ai mangulahon hailaon do na torop i; tung juhut na badia i ma tagamon

pasalpuhon sian ho hamagoanmi? Leak ma marolopolo ho!

¹⁶Hau jetun na rata, na uli marparbue, jala marrupa, digoar Jahowa goarmu, alai mardongan soara ni ronggur na mallatas dipagalak api tusi, gabe gas angka dangkana.

¹⁷Ai Jahowa Zebaot na manuan ho, nunga dilumbahon hian hamagoan tu ho ala ni hajahaton ni pinompar ni si Israel dohot pinompar ni si Juda, angka na binahennasida pahehe murukku, laho manutung daupa tu Baal.

¹⁸(III.) Jadi nunga Tuhan Jahowa pabotohon i tu ahu, umbahen huboto; dipataridahon ho do uju i tu ahu pambahenannasida.

¹⁹Alai anggo ahu tudoshon birubiru, na tinogu tu pamotongan, jala ndang mamoto rohangku ahu do hape tinuntunnasida i mandok: Tole itaago ma hau i rap dohot parbuena, jala itasiaphon ibana sian tano ni angka na mangolu, asa unang be ditaringoti halak goarna.

²⁰Alai paruhum na tigor do anggo ho, ale Jahowa Zebaot, ho do siuji piapia dohot roha. Sai na idaonku do partubolanmu tu nasida, ai nunga tu ho hugiling parbadaanku.

²¹Dibahen i songon on do hata ni Jahowa tu baoa angka na sian Anatot, angka na mamburu hosam, angka ninna do: Unang be ho manurirangi marhitehite goar ni Jahowa, asa unang dibunu tangannami ho.

²² Dibahen i songon on do hata ni Jahowa Zebaot: Ida ma, marlulu ma ahu dompak nasida; ingkon mate ma angka dolidoli bunuon ni podang; mate anturaparon huhut anaknasida dohot borunasida.

²³ Jala ndang adong teba di nasida, ai paroonku ma jea tu baoa angka sian Anatot, di taon partubolan dompak nasida.

12¹ (I.) Na tigor do anggo ho, ale Jahowa, tung sura naeng manarita ahu dompak ho; asal angka uhum naeng taringotanku tu ho: Boasa tung mardohar dalan ni angka parjahat? Boasa tung marsonangsonang saluhut angka pangoseose?

² Nunga disuan ho nasida, huhut marurat nasida; lam ganda nasida huhut marparbue. Talpe do ho di pamangannasida, alai holang do anggo sian bagasan rohanasida.

³ Alai di tanda ho do anggo ahu, ale Jahowa; bereng ahu jala uji rohangkon maradophon ho! Sai toltoli ma nasida songon birubiru tu pamotongan, jala parbadiai nasida tu ari pamunuan.

⁴ Sadia leleng on hasang tano i, jala malos suansuanan di sandok ladang? Binahen ni hajahaton ni pangisina, purpur do angka pinahan dohot pidong, ai didok nasida do: Nandang tagamon idaonna pangapudiannami.

⁵ (II.) Molo mardalan ho rap dohot angka na mardalan pat, jala loja ho dibahen nasida, beha ma pambahenmu mangihuthon angka

na marhoda? Marsonangsonang do ho di tano pardemahan, alai beha ma pambahenmu di habibinsat ni Jordan.

⁶Ai dohot do angka hahaanggim ro di pinompar ni amam, nasida pe sai mangoseose dampak ho; nasida pe marsuraksurak do di pudim. Unang porsea roham mida nasida, nang pe na denggan di pandok tu ho.

⁷Nunga hutadingkon jorongku, nunga hutulakkon partalianku; nunga hupasahat hasudungan ni rohangku tu tangan ni angka musuna.

⁸Ia partalianku gabe tudoshon babiat di tombak maradophon ahu; patungoromon dampak ahu, ala ni do huhasomorhon nasida.

⁹Tung gabe pidong siganding partalianku di ahu? Tung angka pidong mangkaliangi ibana? Antong laho ma hamu, papungu hamu ma saluhut binatang di ladang, olat hamu ma laho manohali.

¹⁰Torop do angka parmahan mangago porlak anggurhu, diluntakluntak nasida do partalianku, gabe halongonan do partalian hasudungan ni rohangku dibahen.

¹¹Gabe halongonan tutu dibahen nasida, hasang do songon halongonan maradophon ahu. Tung saluhut tano i tarulang, ai ndang adong manang ise na marateatehonsa.

¹²Tu saluhut dolokdolok, angka na di halongonan nunga sahat angka pangago, ai

podang ni Jahowa manganhon saluhutna sian ujung ni tano i na sada, sahat ro di ujungna na sadanari, ndang jumpangan hasonangan nango sahalak.

¹³Nunga nian disabur nasida eme, hape duri gotilonna; marngalutan nasida, hape ndang marlaba; tung tarurak do hamu marhite sian na niulamuna, binahen ni parpiar ni rimas ni Jahowa.

¹⁴(III.) Songon on ma hata ni Jahowa tu saluhut hombar balok, angka na jahat i, angka na mangago partalian, na huturpukhon tu bangsongku Israel: Ida ma, sintahonku ma nasida sian tanonasida i, jala bagas ni Juda sintahonku sian tongatonganasida i.

¹⁵Jadi ia dung husintak nasida, mulak ma ahu asa marpangulahi rohangku tu nasida, jala togihononku ma nasida mulak ganup tu partalianna jala ganup tu tanona.

¹⁶Jadi ia dung diguruhon nasida angka dalan ni bangsongku, jala marmangmang tu goarhu: Songon tutuna mangolu Jahowa, ia songon i diajari nasida bangsongku marmangmang tu Baal, suang songon i hona pauli nasida di tongatonga ni bangsongku.

¹⁷Alai molo so ditangihon nasida, siaphononku ma bangso sisongon i, jala agoonku, ninna Jahowa.

13¹(I.) Songon on do hata ni Jahowa tu ahu: Laho ma ho, jala tuhor di ho sada

hohos sian hori, jala hohoshon tu gantingmu, alai unang hona aek bahen.

²Dung i hutuhor ma sada hohos, hombar tu hata ni Jahowa, jala hubahen tu gontingku.

³Dung i ro ma hata ni Jahowa tu ahu paduahalihan, songon on:

⁴Buat ma hohos na tinuhormi, na di gantingmi, jala borhat ma ho laho tu batang aek Euprat, jala tabunihon hohos i disi, di bagasan ronggang ni dolok batu.

⁵Dung i laho ma ahu, jala hutabunihon hohos i di topi ni Euprat, hombar tu na nidokkon ni Jahowa tu ahu.

⁶Dung i di laonlaon ni ari, ninna Jahowa ma tu ahu: Borhat ma ho, laho tu Euprat, jala alap sian i hohos i, na hudokkon i tu ho tabunihononmu disi.

⁷Dung i laho ma ahu tu Euprat, gabe huhali, jala hubuat hohos i sian inganan parsitabunianna i disi. Hape ida ma, nunga metep hohos i, ndang be hasea tu manang aha.

⁸Dung i ro muse hata ni Jahowa tu ahu ninna ma:

⁹Songon on do hata ni Jahowa: Laos songon i do agoonku hamuliaon ni Juda dohot hamuliaon ni Jerusalem na balga i.

¹⁰Tung bangso na jahat do i, angka na manjua tumangihon hatangku, tung hatangkangon ni rohanasida sandiri do di paihutihut, jala angka debata sileban

diihuthon nasida, mangoloi jala marsomba
tusi, ingkon tudoshon hohos on na so
marguna i be nasida sogot.

¹¹ Ai songon hohos i na lilit tu ganting
ni baoa, songon i do hulilithon tu ahu
sandok pinompar ni si Israel dohot sandok
pinompar ni si Juda, ninna Jahowa, asa
gabe bangsongku nasida bahen baritangku,
pujipujianku dohot hamuliaonku, hape ndang
ditangihon nasida.

¹² Jadi dohononmu ma tu nasida:
Songon on do hata ni Jahowa, Debata ni
Israel: Nasa guriguri gok anggur sogot. Jadi
dohononnasida ma tu ho: Tung so botoonnami
ma, gok anggur sogot nasa guriguri?

¹³ Jadi dohononmu ma tu nasida: Songon on
do hata ni Jahowa: Ida ma, gok hamabukon
bahenonku saluhut isi ni tano on, ro di raja
angka na marhabangsa di habangsa ni si
Daud, ro di angka malim, angka panurirang
dohot saluhut isi ni Jerusalem.

¹⁴ Jala masitanggoan nasida bahenonku,
angka amaama dohot anakna, ninna Jahowa.
Ndang olanangku, ndang marhabot ni roha
ahu, manang marpangulahi rohangku, ingkon
mago nasida bahenonku.

¹⁵ Tangihon hamu, jala tarehon hamu
pinggolmuna! Unang ginjang rohamu! Ai
Jahowa do mangkuling.

¹⁶ Lehon hamu ma di Jahowa, Debatamuna
i hamuliaon, tagan so dijadihon dope

haholomon, tagan so tartuktuk dope patmuna
tu angka dolok hagolapon, paimaimahon
hatiuron hamu, hape linggoman ni
hamatean dijadihon ibana, dohot hagolapon
marimpotimpot.

¹⁷ Alai molo so ditangihon hamu, tumatangis
ma rohangku di sihabunian ala ni haginjangan
ni rohamu, jala mariluilu matanku, pola
mabakbak iluilu i, ala tarbuang pungan ni
Jahowa.

¹⁸ (II.) Dok ma tu rajai dohot tu rajai
boruboru: Patoruk hamu ma parhundulmu,
ai nunga madabu tumpal ni hamuliaonmuna
sian ulumuna.

¹⁹ Angka huta tungkan dangsina nunga
tarhinsu, jala ndang adong na mangungkap;
nunga tarbuang sandok Juda, tung tarbuang
sitolu do.

²⁰ Manaili ma matamuna, jala ida hamu
angka na ro sian utara! Didia do pungan
birubiru naung pinalumehon tu ho, angka
birubiru hamuliaonmu?

²¹ Tung aha ma dohononmu, molo
dipabangkit ibana gumomgom ho, angka
naung pinarpedanpedanmu hian, bahen
indukmu? Tung so marrian situtu ma ho,
songon boruboru na naeng mangintubu?

²² Jala molo dohononmu di bagasan roham:
Boasa tung dumatang angka sisongon i tu
ahu? Binahen ni hinadeak ni hajahatonmu do

tarsintak rambu ni ulosmu hona pangarupaon tambihulmu.

²³Tung tarpaimbar halak Kus ma sisikna, manang tung tarpauba babiat tulisna? Tung tarbahen hamu ma huhut mambahen na denggan, hamu angka na somal manjahati?

²⁴Dibahen i panserakhononku ma nasida, songon hurangkam na pinurpurhon ni alogo sian halongonan.

²⁵On do partalianmu, bagianmu na husuhathon di ho, ninna Jahowa ala naung di halupahon roham Ahu, jala marhaposan ho tu sipaotooto.

²⁶Ahu pe antong, nunga husintak rambu ni ulosmu sahat tu bohim, asa tarida hailaonmu.

²⁷Angka pangalangkuponmu dohot pariheiheonmu, hajahaton ni haroronganmu di atas ni angka dolokdolok, di ladang pe huida do hasogiron angka na niulam! Jeami, ale Jerusalem, ndang tagamon pita ho huroha? Sadia laon nari dope songon il!

14¹(I.) On do hata ni Jahowa na ro tu si Jeremia taringot tu logo ni ari.

²Marsak do ia Juda, angka harbanganna pe jomba do margudompong tu tano, maungaung tu ginjang do angguhangguk ni Jerusalem.

³Disuru angka na sangap sian nasida angka situan na torop mangalului aek. Tolhas nasida tu angka sumur, ndang adong jumpangsa aek disi, mulak boti nasida, ndang marisi

hudonna, maila nasida jala tarurak, pola dihungkupi ulu nasida.

⁴Ala angka rigat tanona, ai ndang adong ro udan tu tano i, murak do angka parumauma, pola di hungkupi do ulu nasida.

⁵Ai ursa tini pe di ladang, naung maranak poso, gabe ditadingkon do i, ala so adong duhut na martumbur.

⁶Halode harangan pe angka na jongjong di atas ni robean na palpal, marhosahosa songon naga, homur do mata nasida, ala so adong duhut na martumbur.

⁷(II.) Molo hajahatonnami manindangi dompak hami, ale Jahowa bahen ma hombar tu goarmu, ai torop do panundalionnami, dompak ho do hami mardosa.

⁸Ho ale haposan ni Israel sipalua ibana di tingki hagogotan, boasa tung gabe doshon halak na buro ho di tano on, jala songon halak pardalandalan, na mambahen undungundung parmalaman.

⁹Boasa tung ho gabe doshon halak na tarhatotong, songon ulubalang na so margogo mangurupi? Alai di tongatonganami do ho ale Jahowa, jala targoar tu goarmu do hami; dibahen i unang tung tadingkon hami!

¹⁰Songon on do hata ni Jahowa tu bangso on: Madoado boti do di haholongi rohanasida, ndang diontohi ia patnasida i; alai ndang lomo roha ni Jahowa mida nasida ingotonna ma

nuaeng hajahaton nasida, jala luluhononna angka dosanasida i.

¹¹Dung i ninna Jahowa ma tu ahu: Unang be ondihon bangso on tu na denggan!

¹²Molo marpuasa nasida, ndang tangihononku angguhangguknasida, jala nang pe di pelehon nasida pelean situtungon dohot sipanganon, ndang lomo rohangku di nasida; ingkon ripashononku nasida marhitehite podang, haraparon dohot begu antuk.

¹³(III.) Dung i ningku ma mangalusi: Iale Tuhan Jahowa! Ida ma, angka panurirang i mandok tu nasida: Nandang tagamon idaonmuna podang, jala tagamon haraparon hamu, ai hasonangan manongtong lehononku tu hamu di inganan on.

¹⁴Dung i ninna Jahowa ma tu ahu: Sipautooto do di surirangkon angka panurirang i marhitehite goarhu, ndada ahu marsuru nasida, ndada ahu martona tu nasida, ndada ahu mandok tu nasida; alatan sipautooto dohot pangarundigon dohot na so marguna dohot sipautooto di rohanasida sandiri di surirangkon nasida tu hamu.

¹⁵Dibahen i songon on do hata ni Jahowa dompak panurirang, angka na manurirangi marhitehite goarhu, atik pe so ahu marsuru nasida, angka na mandok: Nandang tagamon masa podang manang haraparon di bagasan

luaton! Ingkon marhitehite podang dohot haraparon rendep angka panurirang i.

¹⁶Alai anggo bangso na sinurirangannasida i, ingkon mampar marambolongan do di angka alaman ni Jerusalem, binahen ni haraparon dohot podang, jala ndang adong na mananom nasida, tole nasida, tolejolmanasida, tole anaknasida dohot borunasida; usehononku ma tu nasida hajahatonnasida i.

¹⁷Dibahen i dohononmu ma tu nasida hataon: Ingkon dumarede iluilu ni matangku borngin dohot arian, ndang marpansadian, ai pasang do bugang ni boru ni bangsongku, tung na bernit situtu do bugangna i diae.

¹⁸Molo ruar ahu tu ladang, ida ma, angka na rage binahen ni podang; molo mulak ahu tu huta, ida ma, angka na marranggangan binahen ni haleon; ai tole panurirang, tole malim mardalani tu tano na so tinandana.

¹⁹(IV.) Beha, nunga tung diambolongkon ho situtu Juda? Manang naung gialan roham di Sion? Boasa tung songon i hami pungkulonmu, gabe so adong be di hami hahisaron? Sai maimaima hami di hatuaon, hape ndang adong na denggan, sai maimaima hami di tingki hamalumon, hape ida ma, holan hasonggotan do.

²⁰Nunga hutanda hami, ale Jahowa, hajahatonnami, hasalaan ni ompunami, ai dompak ho do hami mardosa.

²¹ Unang tung ambolongkon hami ala ni goarmu; unang tung paura habangsa ni hamuliaonmu; sai paingotingot, unang tung muba padan na binahenmu tu hami.

²² Tung adong ma di tongatonga ni debata ni parbegu angka na so hasea tarbahren paro udan? Manang tung tarbahren langit i mangalehon udan sian dirina? Nda ho do, ale Jahowa Debatanami dohot haposan ni rohanami, ai ho do jumadihon saluhutna i.

15¹ (I.) Dung i ninna Jahowa ma tu ahu: Tung sura pe jongjong si Musa dohot si Samuel di jolongku, laos so tagamon marpangulah rohanku tu bangso on; usir ma nasida sian jolo ni bohingku, paruar ma nasida!

² Jadi molo didok nasida tu ho: Tung tudia ma hami laho? Dohononmu ma tu nasida: Songon on do hata ni Jahowa: Manang ise na tu hamatean, tu hamatean ma tutu, manang ise na tu podang, tu podang ma tutu, jala manang ise na tu haraparon, tu haraparon ma tutu, jala manang ise na tu habuangan, tu habuangan ma tutu.

³ Ai pasonggoponku ma tu nasida opat mansam torutoru, ninna Jahowa: Podang laho mambunu nasida dohot angka biang laho mangkaharati, dohot angka pidong martongatonga langit dohot angka binatang di tano i, laho manganhon dohot mangago nasida.

⁴Jadi bahenonku ma nasida gabe hasonggoton di saluhut harajaon angka na di tano on, ala ni si Manasse, anak ni si Hiskia, raja di Juda, ala ni naung binahenna di Jerusalem.

⁵Ai tung ise ma marpangulahi rohana mida ho, ale Jerusalem? Jala tung ise ma marasi ni roha mida ho? Jala tung ise ma manirpang mangidohon hadameon di ho?

⁶Nunga ditadingkon ho ahu, ninna Jahowa, nunga manginsurut tu pudi ho. Dibahen i patoltolonku ma tanganku dompak ho laho mangago ho, nunga mandate ahu sumolsoli rohangku.

⁷Jadi piaranku ma nasida di anduri di angka harbangan ni tano i; bahenonku ma punu bangsongku, jala agoonku, ala so mulak nasida sian dalannasida i.

⁸Tung dumeak do angka na mabalu di nasida bahenonku sian horsik ni laut; paroonku ma tu nasida, tu ina ni na pinillit sada pangago di hos ni ari; dabuhononku tu ibana hagogotan dohot hasonggoton so pangkirimanna.

⁹Mandate ma parompuan naung maranak pitu, tos ma hosana; nunga sundut mata ni arina tagan arian dope; nunga tung maila ibana jala tarurak. langgo angka na teba sian nasida pasahatonku ma tu podang di jolo ni musunasida, ninna Jahowa.

¹⁰(II.) Oe ale dainang on! Tung ditubuhon ho ahu, baoa sibadaan dohot baoa sironuan

di sandok tano i; so manang mangurang ahu
manang pauraangkonsa, hape luhut nasida
mamburai ahu.

¹¹Hata ni Jahowa: Tongon do, sai na
paluaonku do ho asa sonang; tongon do,
sai na marhuraja tu ho do musu i di tingki
pardangolan dohot di tingki hagogotan.

¹²Tung adong ma dapot bosi na
mamonggolhon bosi na sian utara, manang
haksa?

¹³Lehononku ma ugasanmu dohot artam
gabe tabantaban, ndang marali, ala ni saluhut
dosam do i di saluhut parbalohanmu.

¹⁴Jala patariparonku ma ho rap dohot
musum tu tano na so tinandam, ai nunga
nahit sada api di bagasan rimashu,
marnalanala do i di atas hamu.

¹⁵Diboto ho do i, ale Jahowa, antong sai
ingot ahu, sai luluhon ma ahu, jala tubolhon
ahu tu angka na mangalele ahu; unang
butbut ahu hombar tu lambas ni roham; sai
parateatehon ma, ala ho do ahu manaon
insahinsak.

¹⁶Dung jumpang ahu hatamu, gabe husohali
do i, jala hatamu do lomo dohot las ni
rohangku ala naung targoar ahu tu goarmu,
ale Jahowa Debata Zebaot!

¹⁷Ndang dung hundulhundul ahu di
parpunguan ni halak pangarehe, asa mariaia
ahu. Punjung do ahu hundul maradophon

tanganmu, ai gok piripiri do rohangku dibahen ho.

¹⁸Boasa tung tongtong parniahapanku, jala tung targisik bugangku, so hataoaran, tung gabe songon sunge sipaotooto ma ho di ahu, songon aek na so sintong?

¹⁹Dibahen i songon on do hata ni Jahowa: Molo mulak ho tu ahu, mulak ma ahu tu ho, jongjong ho muse di jolongku marhalado, jala molo dipapulik ho na arga sian na roa, jadi hira ho pamangan di ahu. Ingkon mulak nasida tu ho, sitongka do ianggo tung ho mulak tu nasida.

²⁰Dung i lehononku ma ho di bangso on gabe parik haksa na togu, nang pe marmusu nasida dompak ho, laos so tartaluhon nasida ho, ai donganmu do ahu laho paluahon ho dohot mangaramoti, ninna Jahowa.

²¹Jala paluaonku do ho sian tangan ni parjahat, jala paluaonku ho sian tangan ni pangarupa.

16¹(I.) Dung i ro ma hata ni Jahowa tu ahu songon on:

²Ndang jadi ho mambuat boru bahen jolmam, jala ndang jadi adong anakmu, manang borum di inganan on.

³Ai songon on do hata ni Jahowa taringot tu angka anak dohot taringot tu boru, angka na tubu di inganan on, nang taringot tu inanasida, angka na tumubuhon nasida dohot

taringot tu amanasida, angka na tumubuhon nasida di tano on.

⁴Ingkon mate marsingkor nasida, ndang jadi andungan manang tanomon nasida, ingkon gabe napa nasida di sisik ni tano i, ingkon marragean nasida marhitehite podang dohot haraparon, jala bangkenasida gabe sipanganon di pidong, angka na martongatonga langit dohot di binatang na di tano i.

⁵Ai songon on do hata ni Jahowa: Nandang jadi bongotanmu bagas parondasan, jala ndang jadi ho laho mananangisi, manang mangkabothon nasida, ai nunga huunsat damengku sian bangso on, ninna Jahowa ro di denggan basa dohot angka asi ni roha.

⁶Ingkon mate nang angka na magodang, nang angka na metmet di tano on, ndang sitanomon nasida, jala ndang siandungan, jala ndang rarihon manang nabungon ni manang ise uluna ala nasida.

⁷Jala ndang ponggolanna sagusagu di nasida mangapuli na matean i nian di habot ni rohana; jala ndang lehononna tu nasida panginuman pangapulon taringot tu amana dohot taringot tu inana.

⁸Jala ndang jadi bongotanmu bagas partamueon hundul rap dohot nasida laho mangan minum.

⁹Ai songon on do hata ni Jahowa Zebaot, Debata ni Israel: Ida ma, pasohotonku ma

sian inganan on di jolo ni matamuna dohot di angka arimuna suara olopolop dohot soara hariburon, soara ni pangoli dohot soara ni oroan.

¹⁰Jadi ia dung dipatolhas ho tu bangso on saluhut angka hata i, dohononnasida ma tu ho: Ala ni aha umbahen dilumbahon Jahowa saluhut jea na godang i tu hami? Aha do salanami, jala aha do dosanami, angka naung hubahen hami dompak Jahowa Debatanami?

¹¹Jadi dohononmu ma tu nasida: Dibahen naung tinadingkon ni ompumuna ahu, ninna Jahowa, jala diihuthon nasida angka debata sileban, angka na nioloannasida, jala marsomba tusi, alai anggo ahu ditadingkon nasida do, jala ndang diradoti patikku.

¹²Gumodang dope tahe na jat dibahen hamu sian ompumuna, ai ganup sian hamu manondong dalanna be, hombar tu tangkang ni rohana na jati, ndang ditangihon anggo ahu.

¹³Dibahen i ambolongkon ma hamu sian tano on tu tano na so tinandamuna, nang hamu, nang ompumuna, jadi disi ma ingkon oloanmuna angka debata sileban arian dohot borngin, ai ndang olo be ahu mangalehon asiasi tu hamu.

¹⁴(II.) Dibahen i ida ma, na ro do angka ari sogot, ninna Jahowa, ndang be dohonon ni halak: Songon tutuna mangolu Jahowa na manogihon halak Israel ruar sian tano Misir!

¹⁵Alai tahe: Songon tutu mangolu Jahowa, na manogihon halak Israel ruar sian tano na tungkan utara dohot sian saluhut tano haambolongannasida i! Ai boanonku do nasida mulak tu tanonasida naung hulehon hian tu ompunasida i.

¹⁶Ida ma, suruonku ma torop angka panjala, ninna Jahowa, angka na manjala nasida. Dung i suruhononku ma torop parburu, angka na mamburu nasida sian saluhut dolok dohot sian saluhut robean dohot sian saluhut barungbung ni angka dolok batu.

¹⁷Ai diranapi matangku do saluhut dalannasida, ndang holip nasida sian jolongku, jala ndang buni hajahatonnasida sian jolo ni matangku.

¹⁸Alai jolo balosonku do silompit dua hajahatonnasida dohot dosanasida, ala na niramunan nasida tanongku marhitehite bangke ni hasogiron nasida, jala digohi partalianku dohot hagatalon ni rohanasida.

¹⁹Ale Jahowa, ho do hagogoonku dohot partanobatoanku dohot haporusanku di ari hagogotan! Ingkon ro tu ho do sogot angka parbegu sian angka ujung ni tano on, jala dohononnasida do: Sipaotooto sambing do hape na hinasomalhon ni angka ompunami, alogo sambing do tahe angka na so margogo mangurupi.

²⁰Tung tarbahren jolma ma mambahen angka debata di ibana? So manang tutu angka debata nasida!

²¹Dibahren i ida ma, pabotohononku ma sahalion tu nasida, pabotohononku ma tu nasida tanganku dohot hagagoonku, asa tung diboto nasida Jahowa do goarhu.

17 ¹(I.) Ia dosa ni Juda nunga tarsurat marpanurat bosu, marujung mata intan taruhir tu batu panuratan ni rohanasida dohot tu saluhut tanduk ni langgatannasida.

²Songon parningot ni angka anaknasida di angka langgatanna dohot di angka sombaonnasida, di toru ni hau na rata, di punsu ni dolok angka na timbo.

³Ia dolokku rap dohot tanona, sinamotmu ro di saluhut artamu lehononku ma i gabe tabantaban, nang angka panggungmu ala ni dosa angka na masa di saluhut parbalohanmu.

⁴Jadi pabalionna ma ho sian partalianmu na hulehon tu ho, bahenonku ma ho gabe hatoban ni musum di tano na so tinandam, ai nunga dipagalak hamu sada api di bagasan murukku, marnalanala ma i ro di saleleng ni lelengna.

⁵(II.) Songon on do hata ni Jahowa: Marjea ma baa na marhaposan tu jolma, manang tu bolon ni botohonna, gabe dipasurut rohana sian Jahowa.

⁶Songon halak parbahudung di tano na mahiang do ibana, ndang tagamon idaonna ro na denggan i, jala maringan ibana di tano bangkalbangkal di halongonan, di tano na ansim na so hinundulan ni halak.

⁷Alai martua ma baoa na marhaposan tu Jahowa, jala Jahowa haporusanna dibahen.

⁸Tudos do ibana tu hau na sinuan di topi ni batang aek, jala manjarar uratna di lambung batang aek, jala ndang mabiar ibana molo ro hamohopon, jala tongtong rata bulungna, jala ndang holsoan ibana di taon haraharon, jala ndang mansohot marparbue.

⁹Tung na angka situtu do roha ni jolma, jala na ganggu, tung ise ma na tuk mandodoisa?

¹⁰Ahu Jahowa do Sidodo roha, siuji piapia jala mangalehon tu ganup jolma hombar tu dalanna, hombar tu parbue ni pambahenanna.

¹¹Songon manuk harangan na mamodomhon pira angka na so pinirahonna, songon i do halak na papunguhon arta sian dalan na so turut. Di parsitongaan ni angka arina, tadingkononna ma i jala di ujungna gabe halak na oto ibana.

¹²(III.) Oe habangsa ni hamuliaon, hatimboon sian mulamula, hajongjongan ni habadiaonnami!

¹³Ale Jahowa, ho do pangkirimon ni Israel! Saluhut angka na tumadingkon ho gabe tarurak; angka na marbalik sian ahu, ingkon

tarsurat goarna tu tano, ala tinadingkonnasida mual ni aek hangoluan, i ma Jahowa.

¹⁴Sai ho ma pamalum ahu, ale Jahowa, asa tung malum huhilala; sai ho ma mangurupi ahu, asa tung dapotan pangurupion ahu, ai ho do pujipujionku.

¹⁵Ida ma, angka nasida mandok tu ahu: Didia do hata ni Jahowa i? Uaro ma nian nuaeng!

¹⁶Alai anggo ahu, ndang husonsonhon gabe parmahan ahu mangihuthon ho, jala ndang huhalomohon ari na marjea i, ho do umbotosa; hata na ruar sian bibirhu pe patar do i di jolo ni bohim.

¹⁷Unang tung gabe hasonggoton ho di ahu, ho do haporusanku di ari hasusaan.

¹⁸Ingon tarurak nian angka na mangalele ahu, alai unang tarurak anggo ahu; ingkon tarsonggot nasida, alai unang tarsonggot anggu ahu, paro ma tu atasnasida ari hinamago, jala silompit dua hapipidomnasida i.

¹⁹(IV.) Songon on do hata ni Jahowa tu ahu: Laho ma ho, tindang ma ho di bagasan bahal ni angka anak ni bangso i, marmeang muli sian i angka raja ni Juda, tongon tahe di bagasan saluhut angka bahal ni Jerusalem.

²⁰Dung i dohononmu ma tu nasida: Tangihon ma hata ni Jahowa, hamu angka raja ni Juda, dohot sandok Juda ro di sude isi ni Jerusalem, angka na masuk sian angka bahal on.

²¹ Songon on do hata ni Jahowa: Sai jamoti hamu ma tondimuna i, unang usung hamu siusungon di ari Sabbath, jala unang boan hamu sian angka bahal ni Jerusalem.

²² Jala unang paruar hamu siusungon sian bagasmuna di ari Sabbath, jala unang bahen nanggo sada ulaon, sai parbadiai hamu ma ari Sabbath i, songon na hutonahon tu ompumuna.

²³ Alai ndang ditangihon nasida jala ndang dipaeleng pinggolna, lam dipajogal tahe tangkuhukna, unang marbinege, jala ndang dijalo pangajaran.

²⁴ Alai molo tung ditangihon hamu ahu, unang mamboan siusungon sian bahal ni huta on di ari Sabbath laho pabadihon ari Sabbath i, unang dibahen hamu disi manang aha ulaon.

²⁵ Jadi bongot ma sian angka bahal ni huta on angka raja dohot angka induk, angka na hundul di habangsa ni si Daud, marsihundul di hureta dohot di hoda do nasida, dohot induk nasida i, angka halak Juda dohot isi ni Jerusalem, jala ingananna huta on ro di saleleng ni lelengna.

²⁶ Ro do huhut sian angka huta ni Juda dohot sian humaliang Jerusalem dohot sian tano Benjamin dohot sian tano adaran dohot sian dolok dohot sian dangsina angka na mamboan pelean situtungan dohot sipotongon dohot sipanganon dohot daupa dohot pujipujian tu bagasan joro ni Jahowa.

²⁷ Alai molo so ditangihon hamu ahu laho pabadihon ari Sabbath i taringot tu na mangusung siusungon dohot masuk sian angka bahal ni Jerusalem di ari Sabbath, pagalahonku ma sada api di bahalmuna gabe suda panganonna angka bagas bolon ni Jerusalem, jala ndang haintopan.

18¹ (I.) On do hata naung ro tu si Jeremia sian Jahowa, songon on:

² Hehe ma ho jala tuat tu bagas ni sitopa hudon, disi ma patubegehononku tu ho.

³ Dung i tuat ma ahu tu bagas ni sitopa hudon i, jadi ida ma, tongon ibana mambahen sada ulaon di atas pamutoran.

⁴ Hape ndang manjadi hudon na pinaulina i, songon sangkimpal tano di bagasan tangan ni sitopa hudon i; gabe mangulahi ibana paulihon sada inganan na asing, guru lomo ni roha ni sitopa hudon i mambahensa.

⁵ Dung i ro ma hata ni Jahowa tu ahu songon on:

⁶ Tung na so tarbahren ahu huroha, songon sitopa hudon on mambahen tu hamu, ale pinompar ni Israel? ninna Jahowa. Ida ma, songon tano hudon di bagasan tangan ni sitopa hudon, songon i do hamu di bagasan tanganku ale pinompar ni Israel.

⁷ Satongkin ahu martahi dompak sada bangso dohot dompak, sada harajaon naeng mangurati dohot naeng mamansingkon dohot naeng mangago.

⁸Alai molo mulak bangso naung hupalumba i sian hajahatonna, gabe marpangulahi rohangku taringot tu hamagoan naung husangkapi naeng bahenonku tu ibana.

⁹Jala satongkinnari ahu martahi taringot tu sada bangso dohot taringot tu sada harajaon naeng paulihon dohot pahothon.

¹⁰Alai molo dibahen na jat di jolo ni matangku, gabe ndang ditangihon soarangku, jadi solsolanku ma rohangku taringot tu na denggan i, naung hubagabagahon naeng bahenonku tu ibana.

¹¹On pe, ua dok ma tu halak Juda dohot tu isi ni Jerusalem: Songon on do hata ni Jahowa: Ida ma, ahu jumadihon hinamago tu hamu jala sumangkap tahi dompak hamu; ua mulak ma hamu ganup sian dalanna na roa i, jala padenggan hamu dalamuna dohot pambahenanmuna.

¹²Alai dohononnasida ma: Pinabotoboto i! Ai mangihuthon sangkap ni rohanami sandiri hami naeng, jala ganup hami naeng mambahen hajungkaton ni rohana be na jahat i.

¹³(II.) Dibahen i songon on do hata ni Jahowa: Ua usouso ma hamu di tongatonga ni angka parbegu, tung ise ma umbege sisongon i? Tung na sogir situtu do na niula ni boru Israel.

¹⁴Tung tagamon ma mansohot ambolas ni Libanon mabaor sian dolok batu tu adaran?

Manang tagamon marsik ma aek angka na bolon, angka na manorus angka na mabaor?

¹⁵Alai tahe anggo bangsongku tung di halupahon do ahu, tung tu ganaganaan nasida manutung daupa, jadi tarsulandit nasida di dalannasida, dalam angka sian na robi, gabe mardalan nasida di angka dalam na so pinauli.

¹⁶Laho mambahen tanonasida gabe halongonan, gabe sireherehean saleleng ni lelengna, tung ganup na mamolus sian i tarhalomong do jala mangupirupir uluna marnidasa.

¹⁷Marhite sian alogo sian purba panserakhononku nasida maradophon musu, tangkuhuk tahe, ndada bohi paidahononku tu nasida di ari hamagoannasida i.

¹⁸(III.) Dung i ninna nasida ma: Beta hita martuptup dompak si Jeremia, ai ndang mago patik i sian malim, manang panuturion sian na bisuk, manang hata sian panurirang. Beta hita tabunu ibana marhitehite dila, asa unang be ingkon patangitangion luhut angka hatana.

¹⁹Ale Jahowa, sai tiroi ahu, jala tangihon soara ni angka na mambadai ahu.

²⁰Tung tama ma na jat bahenon balos ni na denggan umbahen dihali nasida sada godung di tondingku? Sai ingot manang songon dia ahu jongjong di jolomi laho mangkatahon tu nasida na denggan, manampar rimasmu nian sian nasida.

²¹ Dibahen i sai pasahat ma anaknasida tu haraparon jala ragehon nasida marhite sian podang! Sai punu ma jolmanasida jala angka mabalu, jala baa nasida marmatean dibahen begu antuk, ia dolidolinasida marragean dibahen podang di hamusuon.

²² Sai tarbege ma angguhangguk sian bagasnasida, molo diparo ho dompak nasida parangan marhoronhoron so pangkirimanna, ala naung dihali nasida sada godung laho manangkup ahu, jala marsibuni ditaon nasida angka jorgong di pathu.

²³ Alai anggo ho ale Jahowa, diboto ho do saluhut tahinasida naeng mambunu ahu; sai unang ma marpangulahi roham taringot tu hajahatonnasida, sai unang ma sesa dosanasida sian jolo ni bohim, asa tung martimpalan nasida di jolom. Bahen ma songon i tu nasida di tingki hamamasa ni rimasmu.

19¹ (I.) Songon on ma muse hata ni Jahowa: Laho ma ho jala tuhor sada guriguri tano sian sitopa hudon, boan ma i rap dohot angka sintua ni bangso i dohot sintua ni angka malim.

² Dung i ruar ma ho tu rura ni angka anak ni si Hinnom na di lambung ni pintu harbangan ni sitopa hudon, jala tingtingkon ma disi hata angka sipaboaonku tu ho.

³ Jala dohononmu ma: Tangihon ma hata ni Jahowa, hamu ale angka raja ni Juda dohot isi

ni Jerusalem! Songon on do hata ni Jahowa Zebaot, Debata ni Israel: Ida ma ahu parohon sada hamagoan tu inganan on, ganup na umbegesa marnginging pinggolna hilalaonna.

⁴Ala na tinadingkon nasida ahu, jala ditoisi nasida inganan on, jala manutung daupa nasida disi tu angka debata sileban angka na so tinandanasida manang ompunasida manang angka raja ni Juda pe, jala digohi nasida inganan on dohot mudar ni angka na so marpipot.

⁵Jala dipauli nasida angka panggungpanggung ni Baal laho manutung anaknasida di bagasan api bahen pelean situtungan tu Baal, na so hutonahon manang hudokkon, manang dung tubu pe di bagasan rohangku.

⁶Dibahen i, ida ma, na ro do angka ari sogot, ninna Jahowa, ndang be targoar Topet manang rura ni angka anak ni si Hinnom inganan on, ingkon rura pamunumunuan na ma.

⁷Ai sundat bahenonku di inganan on sangkap ni Juda dohot Jerusalem, asa marragean nasida binahen ni podang maradophon musunasida dohot binahen ni tangan ni angka na tumahi hosanasida, jala lehononku ma bangkenasida bahen sipanganon ni pidong angka na di toru ni langit dohot binatang di tano on.

⁸Jala bahenonku do huta on, gabe halongonan dohot sirehereheon; ganup na mamolus sian i muningan do jala mangarehe taringot tu saluhut jea angka na mangonai tusi.

⁹Papanganhononku ma tu nasida sibuk ni anaknasida dohot sibuk ni borunasida, jala ganup nasida manganhon sibuk ni donganna, binahen ni hagogotan, dohot hasosahan, na pinasosaksosak ni musu i nasida i, angka na tumahi hosanasida i.

¹⁰Dung i ingkon bolahononmu ma guriguri i di adopan ni baoa angka na mardalan rap dohot ho.

¹¹Jala dohononmu ma tu nasida: Songon on do hata ni Jahowa Zebaot: Suang le songon i ponggolhononku bangso on dohot huta on, songon na binolahon hudon ni sitopa hudon, na so tarpaulisa be, jala di Topet nasida tartanom, ala soada inganan bahen tanoman.

¹²Laos songon i bahenonku tu inganan on, ninna Jahowa, dohot tu pangisina i, bahenonku do huta on songon Topet.

¹³Ia angka bagas ni Jerusalem dohot angka bagas ni raja ni Juda, ingkon gabe ramun songon inganan ni Topet, saluhut angka bagas panutungan daupa di atas ni tarupna tu saluhut parangan di langit, jala diusehon pelean siinumon tu angka debata sileban.

¹⁴(II.) Dung i mulak ma si Jeremia sian Topet, tinopotna i sinuru ni Jahowa

manurirangi disi, jadi jongjong ma ibana di alaman ni bagas ni Jahowa, jala didok ma tu sandok bangso i.

¹⁵Songon on do hata ni Jahowa Zebaot, Debata ni Israel: Ida ma, ahu parohon tu huta on dohot tu saluhut huta humaliang luhut jea naung hulumbahon tusi; ai dipajogal nasida do tangkuhuknasida, ndang ditangihon anggo angka hatangku.

20¹(I.) Jadi dung dibege malim Pashur, anak ni si Immer, jala sintua ni induk do ibana di bagasan joro ni Jahowa, angka hata panurirangon ni si Jeremia.

²Jadi dipungkul si Pashur ma panurirang Jeremia jala dibahen ibana tu hurungan na di harbangan Benjamin parjulu i, di bagasan bagas ni Jahowa.

³Dung i marsogotna i diparuar si Pashur ma muse si Jeremia sian hurungan i. Jadi didok si Jeremia ma tu ibana: Nandang be si Pashur goarmu digoar Jahowa, ingkon biar humaliang nama.

⁴Ai songon on do hata ni Jahowa: Ida ma, ahu mangalehon ho, gabe biar di ho dohot di sude angka na mangkaholongi ho, gabe marragean nasida binahen ni podang ni musunasida, jala matami marnidasas. Pasahatonku ma huhut sandok Juda tu tangan ni raja ni Babel, asa ibana mambuankon nasida tu Babel, jala mambunu nasida marhitehite podang.

⁵Jala pasahatonku huhut saluhut sinamot ni huta on ro di saluhut na niomoomona dohot barang angka na arga ro di saluhut arta ni angka raja ni Juda, lehononku ma tu tangan ni musunasida, angka na mamupusi nasida, dohot manangkup laho mamboan nasida tu Babel.

⁶Alai anggo ho ale Pashur ro di sude isi ni bagasmu, ingkon tarbuang hamu tu Babel, laos mate disi jala tartanom, ho ro di sude angka na mangkaholongi ho, angka na pinaotootom marhite sian panurirangonmu.

⁷(II.) Dihata i ho ahu ale Jahowa, jala olo ahu hataanmu. Gumogo do ho sian ahu jala monang do ho; hape gabe sirehereon ahu ganup ari; tung saluhut nasida mangarehe ahu.

⁸Ai ganup mangkuling ahu, ingkon anggukkononku do: Pangarupaon dohot hamagoan; ai hata ni Jahowa manjadi di ahu gabe pangareheon dohot insahinsak ganup ari.

⁹Jadi ningku ma: Nandang be taringotanku ibana, jala ndang be ahu marjamita marhitehite goarna, hape gabe songon api na marsigorgor di bagasan rohangku huhilala, tarhurung di bagasan holiholingu, siol mandate ahu mangotapotapi, hape ndang tarbahren.

¹⁰Ai hubege do hatahata ni torop halak: Biar humaliang! Tuduhon ibana! Itatuduhon ma

ibana! Saluhut jolma alealengku mangonggop di lambungku: Anggiat tung tartangkup ibana, asa itapatunduk ibana, jala martubol hita tu ibana.

¹¹ Alai Jahowa do mandongani ahu, songon ulubalang na begu, dibahen i ingkon tarsulandit angka na mangalele ahu, jala ndang tagamon monang; murak situtu do nasida tahe, ai ndang mardohar nasida, haurahon na saleleng ni lelengna, na so tagamon lupa mangonai tu nasida.

¹² Tongon tahe ale Jahowa Zebaot, ho do na manguji halak na tigor, na marnida piapia dohot ateate. Sai idaonku do partubolanmu songgop tu nasida, ai nunga tu ho hugiling parbadaanku.

¹³ Marende ma hamu di Jahowa, puji ma Jahowa, ai nunga dipalua ibana tondi ni halak na pogos sian tangan ni angka parjahat.

¹⁴ (III.) Siburaan ma nian ari hatutubungku! Ari panubuhon ni dainang di ahu, unang nian hona pasupasu.

¹⁵ Siburaan ma nian jolma na mamaritahon tu damang songon on: Nunga tubu di ho sada anak palas situtu rohana nian.

¹⁶ Masa ma tu baoa i, songon tu huta, angka na binungkar ni Jahowa so maralangalang, jala begeonna ma nian angguhangguk manogotna i, jala suraksurak ni hamusuon di hos ni ari.

¹⁷Ala na so binununa i ahu di bortian, asa laos dainang i nian gabe tanomanku, jala gabegabebean nian bortianna saleleng ni lelengna.

¹⁸Boasa tung ruar ahu sian bortian laho marnida hangaluton dohot haarsahon, jala marsalpusalpuan ariaringku di bagasan haurahon.

21 ¹(I.) On ma hata na ro tu si Jeremia sian Jahowa, uju na sinuru ni raja Sedekia tu ibana si Pashur, anak ni si Malkia dohot malim Sepania, anak ni si Maaslia mandok songon on:

²Ua sungkunhon ma tu Jahowa taringot tu hami, ai marmusu do si Nebukadnesar, raja ni Babel dampak hami, anggiat tung olo Jahowa mambahen tu hami hombar tu saluhut halongangan binahenna i na jolo, asa tung muli ibana sian hami.

³Jadi ninna si Jeremia ma tu nasida: Songon on ma dohononmuna tu si Sedekia:

⁴Boti hata ni Jahowa, Debata ni Israel: Ida ma, ahu pabalikkon senjata hamusuon, angka na di tanganmuna, angka na pinangkemuna marmusu dampak raja ni Babel dohot dampak halak Kasdim, angka na manosaknosak hamu sian balian mangonjar tu parik, jala papunguonku ma nasida tu parsitongaan ni huta on.

⁵Asa ahu sandiri marmusu dampak hamu marhitehite tangan na toltol dohot marhitehite

botohon na gogo, marhitehite rimas dohot parpiarpiar ni hamuruhon godang.

⁶Jala bunuonku ma angka isi ni huta on, nang jolma, nang pinahan, gabe marmatean nasida marhitehite begu antuk na rahat.

⁷Dung i muse, songon on pandok ni Jahowa, pasahatonku ma si Sedekia, raja ni Juda dohot angka naposona ro di situan na torop, angka na teba di huta on sian begu antuk, sian podang dohot sian haleon, tu tangan ni si Nebukadnesar, raja ni Babel, dohot tu tangan ni angka musunasida, dohot tu tangan ni angka na tumahi hosanasida; jadi bunuonna ma nasida marhitehite baba ni podang, ndang tagamon olananna nasida, ndang marpangulah i rohana, jala ndang maralangalang.

⁸(II.) Angkup ni dohononmu ma tu bangso on: Boti hata ni Jahowa: Ida ma, ahu mambahen tu jolomuna dalan hangoluan dohot dalan hamatean.

⁹Manang ise na tading di bagasan huta on, ingkon mate ibana marhitehite podang, haraparon, manang begu antuk; alai manang ise na ruar, asa bali tu halak Kasdim, angka na martungkum hamu, mangolu ma ibana, jala tondina i bahen rintahanna.

¹⁰Ai nunga hudompakkon bohingku dompak huta on laho mangago, ndada mambahen na denggan, ninna Jahowa; ingkon tu tangan ni

raja sian Babel ma pasahatonku huta i, asa tung dipurun marhitehite api.

¹¹ Angkup ni dohononmu ma tu pinompar ni raja sian Juda: Tangihon hamu ma hata ni Jahowa!

¹² Ale pinompar ni si Daud! Boti hata ni Jahowa: Dabu hamu ma uhum na sintong manogotna i, jala palua hamu jolma na tarsamun i sian tangan ni halak pangarupa, asa unang ruar rimashu songon api jala marsigorgor, so adong na mangintopi, ala ni hinajahat ni pambahenanmuna.

¹³ Ida ma, dompak ho ma ahu ale isi ni rura i, dolok batu di adaran, ninna Jahowa! Hamu angka na mandok: Tung ise ma tagamon tuat tu hami on? Manang tung ise ma tagamon ro mambongoti inganannami na gantingi?

¹⁴ Alai marlulu ma ahu dompak hamu, hombar tu parbue ni pambahenanmuna, ninna Jahowa, jala ahu manganahiti sada api di bagasan tombakna, asa disudahon saluhut na humaliang.

22 ¹ (I.) Boti hata ni Jahowa: Tuat ma ho tu bagas ni raja sian Juda, jala hatahon ma disi hata on.

² Dohononmu ma: Tangihon ma hata ni Jahowa, ale raja ni Juda, na hundul di atas habangsa ni si Daud, ho dohot angka naposom dohot na nirajaanmu angka na bongot tu angka harbangan on.

³ Boti hata ni Jahowa: Radoti hamu ma uhum dohot hatigoran, jala palua hamu na tarsamun i sian tangan ni halak pangarupa; jala unang mangarupa hamu manang mambahen gogo tu halak dagang, tu na tading di lampin dohot tu na mabalu, jala unang durushon hamu mudar na so marpipot di inganan on.

⁴ Ai molo diradoti hamu hata ondeng, sai adong do masuk tu pintupintu ni bagasan raja angka na marhabangsa di habangsa ni si Daud, angka na marsihundul di hureta dohot di hoda, nang ibana, nang angka naposona dohot na nirajaanna.

⁵ Alai molo so ditangihon hamu angka hata on, nunga pola maruari ahu tu diringku, ninna Jahowa, ingkon gabe halongonan bagas on.

⁶ Ai songon on do hata ni Jahowa taringot tu bagas ni raja sian Juda: Gilead do ho nian di ahu, ale punsu ni Libanon! Ingkon gabe halongonan do ho bahenonku, gabe huta angka na so marpangisi.

⁷ Jala ahu padirihon dampak ho angka jolma pangago mangalo ho, ganup mardongan sinjata, nasida manaba hau ares angka na pinillitmu jala manipalhon tu bagasan api.

⁸ Jala torop bangso mamolus sian lambung ni huta on, jala didok be ganup tu donganna: Boasa tung songon i bahenon ni Jahowa tu huta on na sai bolon?

⁹ Jadi dohononnasida ma: Ala na tinadingkonnasida padan tu Jahowa,

Debatanasida i, jala marsomba tu angka debata sileban huhut mangoloi nasida.

¹⁰(II.) Unang tatangisi hamu na mate, jala unang andungi hamu ibana; tumatangis ma hamu tagonan taringot tu ibana na laho tarbuang, ai ndang tagamon mulak be ibana, jala ndang idaonna be tano hatubuanna.

¹¹Ai boti hata ni Jahowa taringot tu si Sallum, anak ni si Josia, raja sian Juda, na mangarajai singkat ni si Josia amana i, na ruar sian inganan on: Nandang tagamon mulak be ibana tusi.

¹²Ingkon laos di habuanganna i ibana mate, jala ndang be idaonna tano on.

¹³Marjea ma manang ise na pauli bagasna so marhitehite hatigoran dohot bonggarbonggarna so marhitehite uhum, sibolongbolong ulaon ni donganna dibahen, jala ndang dilehon upa ni ulaonna.

¹⁴Lam ninna muse dope: Paulionku ma di ahu sada bagas na bolon, marbonggarbonggar paranginanginan; dibahen huhut angka pandiloan jala dilampis dohot hau ares, jala salenggam sampangna dibahen.

¹⁵Tung tagamon ma ho raja, ala manengahon hau ares ho? Ia amam, ndang mangan manang minum huroha, huhut mangkajongjongkon uhum dohot hatigoran, jadi sonang ma dihilala uju i?

¹⁶Pasintong uhum ibana tu na parir dohot tu na pogos, jadi sonang ibana; ndai do parbue ni parbinotoan di ahu? ninna Jahowa.

¹⁷Alai anggo matam dohot roham, holan laho tu labam do dohot laho mangusehon mudar na so marpipot, huhut mangarupa dohot mambahen uhum gogo.

¹⁸Dibahen i songon on hata ni Jahowa dompak si Joiakim, anak ni si Josia, raja sian Juda, ndang tagamon andungkonon ni halak ibana mandok: Oe hahang, oe ito! Nandang tagamon andungkononna ibana mandok: Oe ale tuan! Manang oe ale rajanami!

¹⁹Ingkon tanomonna ibana songon halode, saratonna jala timpalhonna ibana dao sian angka bahal ni Jerusalem.

²⁰(III.) Nangkok ma ho tu Libanon jala joujou, pangiar ma soaram di Basan jala joujou, ma ho sian Abarim, ai nunga pesan saluhut angka pedanmu.

²¹Nunga hupalumba ho hian uju di hasonanganmu, alai nimmu do: Nandang olo ahu manangihon. I do antong dalammu sian haposoonmu, matua so ditangihon ho soarangku.

²²Saluhut angka siparmahan ho, purpurhonon ni alogo do, jala saluhut pedanmu ingkon tarboan tu habuangan; jadi maila jala tarurak situtu ma ho disi ala ni saluhut hajahatonmu.

²³Ho ale na hundul di atas ni Libanon! Jala na marasar di angka hau ares! Tung songon dia ma orongorongmu, molo ro tu ho rian, songon boruboru na mangae posoposo.

²⁴Songon tutuna ahu mangolu, ninna Jahowa, tung sura pe si Konia, anak ni si Joiakim, raja sian Juda, gabe tintin sahap di tanganku siamun, sai na umpatonku do ho sian i.

²⁵Jala pasahatonku ma ho tu tangan ni angka na paburuburu hosam, dohot tu tangan ni angka na hinabiaranmu na sai laon, dohot tu tangan ni si Nebukadnesar, raja sian Babel, dohot tu tangan ni halak Kasdim.

²⁶Jala ahu mangareongkon ho dohot inangmu, na tumubuhon ho tu tano na asing, na so hatubuanmuna, laos mate disi ma hamu.

²⁷Alai anggo tu tano, na hinalungunhon ni rohanasida naeng mulak tusi, ndang tagamon mulak nasida tusi.

²⁸Tung guriguri na matapor jala na lea do halak si Konia? Manang tung ulaula na so hinalomohon do ibana? Boasa tung direongkon ibana ro di pinomparna, jala ambolong nasida tu tano na so tinandanasida i?

²⁹O tano, tano, tangihon ma hata ni Jahowa!

³⁰Boti hata ni Jahowa: Surathon ma baoa on, so marpinompar; baoa na so mardohar saleleng mangolu; ai ndang tagamon

manjadi sian pinomporna nanggo sahalak marhabangsa di habangsa ni si Daud manang mangarajai di Juda tu joloan on.

23¹ (I.) Marjea ma parmahan, angka na mangago dohot paserakkon birubiru na huparmahani, ninna Jahowa.

²Dibahen i boti hata ni Jahowa, Debata ni Israel dompak parmahan, angka na marmahan bangsongku: Nunga dipaserak hamu penguanku, jala dionjar hamu, jala ndang dimatamatahon hamu nasida. Ida ma, luluhononku ma tu hamu hinajahat ni pambahenmuna, ninna Jahowa.

³Jala papunguonku ma pasipasi ni penguanki sian saluhut luat haambolongannasida i, jala aduonku nasida mulak tu panjampalannasida i, asa matorop mabue nasida.

⁴Jala patindangonku tu nasida parmahan angka na marmahan nasida, asa unang be tahuton nasida manang tarsonggot, jala ndang mago nanggo sada, ninna Jahowa.

⁵Ida ma, na ro do angka ari sogot, ninna Jahowa, patindangonku ma di si Daud sada tumbur na tigor, na bangkit raja jala na pistar, jala hajongjongkononna ma uhum dohot hatigoran di tano i.

⁶Di angka arina dapotan tua ma Juda, jala Israel marsonangsonang di ingananna; jala on do goarna dohonon ni halak: Jahowa parpintoranta.

⁷ Dibahen i ida ma, na ro do angka ari sogot, ninna Jahowa, ndang be dohononnasida: Songon tutuna mangolu Jahowa, naung manogihon pinompar ni Israel ruar sian tano Misir.

⁸ Ingkon: Songon tutuna mangolu Jahowa, naung manogihon jala naung mamboan pinompar ni Israel mulak sian tano na tungkan utara dohot sian saluhut luat haambolongannasida na hubahen i, asa maringan nasida muse di tanon nasida i.

⁹ (II.) Dompak angka panurirang. Tung ditostos do rohangku di bagasan andoranguku, angka hitir do saluhut holiholingu, jala songon halak na mabuk do pangalahongku, jala songon baoa na pinatunduk ni anggur ala Jahowa dohot humongkop angka hata habadiaonna i.

¹⁰ Ai gok angka pangalangku do tano i, gabe hasang tano i binahen ni sapata, marpirang angka panjampalan di halongonan, ala na roa do pangalahon nasida, jala gogon nasida ndang turut.

¹¹ Ai nang panurirang, nang malim rap ramun do; gari di bagasan jorongku dapot ahu do hajahaton nasida, ninna Jahowa.

¹² Dibahen i dalannasida, ingkon gabe sapsap bire na landit di haholomon; ingkon tarsulandit nasida, asa madabu nasida tu bagasan; ai paroону ma tu atasnasida

hamagoan di taon pamaloson tu nasida, ninna Jahowa.

¹³Nang di angka panurirang ni Samaria nunga huida hasogiron: Manurirangi do nasida marhitehite Baal, jala dililuhon nasida bangsongku Israel.

¹⁴Alai anggo di angka panurirang di Jerusalem, nunga huida hasogiron: Pangalangkupon jala marpangalahohon gabus do nasida, jala dipargogoi nasida do tangan ni angka parjahat, asa unang mulak nasida ganup sian hajahatonna. Tung saluhut do nasida di ahu songon Sodom, jala pangisina i songon Gumora.

¹⁵Dibahen i boti hata ni Jahowa Zebaot taringot tu angka panurirang i: Ida ma, ahu papanganhon tu nasida raru, jala painumhon tu nasida aek rasun, ai sian angka panurirang di Jerusalem nunga ruar haramunon tu sandok tano i.

¹⁶(III.) Boti hata ni Jahowa Zebaot: Unang tangihon hamu hatahata ni panurirang, angka na manurirangi tu hamu! Na paotootohon hamu do nasida. Alatan ni rohanasida sandiri do dihatahon, ndada na sian pamangan ni Jahowa.

¹⁷Sai didok nasida do tu angka na mangelesi ahu: Nunga didok Jahowa, sai na sonang do hamu! Jala tu ganup na marpangalahohon hatangkangon ni rohana didok nasida do:

Ndang tagamon ro hamagoan tu hamu nanggo sada.

¹⁸Ai manang ise naung tindang di partuptupan ni Jahowa, i ma na marnida dohot umbege hatana; manang ise naung marateatehon hatana, i ma dibaritahon.

¹⁹Ida ma, ruar do sada habahaba sian Jahowa, parpiarpiar ni murukna, jala sada habahaba poting baliung martahop mangonai tu ulu ni angka parjahat.

²⁰Ndang tagamon sumurut muruk ni Jahowa, paima dipatupa jala di hajongjongkon angka sangkap ni rohana. Di ujung ni angka ari sogot pe antusanmuna situtu hata i.

²¹Ndada ahu marsuru angka panurirang i, hape marlojong do nasida; ndada ahu mangkatahon tu nasida, hape manurirangi do nasida.

²²Alai tung sura naung tindang nasida di partuptupanki patubegehononnasida ma nian angka hatanku tu bangsongku, jala mulak bangsongku bahenonna sian dalannasida, angka na jahat i dohot sian hinaroa ni pambahennasida.

²³Tung holan Debata sian na jonok do ahu, ninna Jahowa, ndada huhut Debata sian na dao?

²⁴Tung tarbahen ma martabuni manang ise di parsitabunian, so dapot idaonku ibana? ninna Jahowa. Nda ahu do na manggohi langit dohot tano on? ninna Jahowa.

²⁵ Nunga tangkas hubege hata na hinatahon ni angka panurirang, angka na manurirangkon sipaotooto marhitehite goarhu, ninna do: Nunga marnipi ahu, nunga marnipi ahu!

²⁶ Sadia leleng nari songon i di bagasan roha ni panurirang, angka na manurirangkon sipaotooto, angka na manurirangkon angka ni rohanasida sandiri?

²⁷ Angka na sumangkapi mambahen lupa bangsongku di goarhu marhitehite nipinasida, angka na hinatahonna ganup tu donganna, songon pangkalupahon ni ompunasida di goarhu binahen ni Baal.

²⁸ Panurirang hasahatan ni nipi, nipi ma dihatahon; alai anggo hasahatan ni hatangki ibana, hatangki ma sintong dihatahon. Tung aha ma pasaoron ni hurangkam tu eme? ninna Jahowa.

²⁹ Nda songon api do hatangki? ninna Jahowa, jala songon nanggar na mangarosahi batu mamak?

³⁰ Dibahen i ida ma, marlulu ma ahu ninna Jahowa dampak angka panurirang, angka na manangkoi hatangki, ganup sian donganna.

³¹ Ida ma, marlulu ma ahu, ninna Jahowa dampak angka panurirang, angka na pasomal dilanasida mandok songon on: Jahowa do na martona.

³² Ida ma, marlulu ma ahu, ninna Jahowa dampak angka na manurirangkon nipi sipaotooto, angka na hinatahonnasida laho

mangaliluhon bangsongku marhitehite sipaotootonasida dohot marhitehite panengaonnasida. Hape ndang dung ahu marsuru nasida, jala ndang dung ahu martona tu nasida, jala ndang marguna nasida di bangso on ninna Jahowa.

³³(IV.) Molo tung manungkun bangso on, manang panurirang manang malim tu ho songon on: Aha do uhum ni Jahowa? Jadi dohononmu ma tu nasida, songon on ma uhum ni Jahowa: Ambolongkon ma hamu, ninna Jahowa.

³⁴Ia adong panurirang manang malim, manang bangso, na mandok songon on: Pinabotoboto uhum ni Jahowa! Marlulu ma ahu tu baoa i dohot tu pinomparna.

³⁵Songon on ma dohononmuna, ganup tu donganna, jala ganup tu hahaanggina: Dia do alus ni Jahowa? Manang: Aha do na nidok ni Jahowa?

³⁶Alai anggo uhum ni Jahowa, ndang jadi be sitaringotanmuna, ai apala hata elesna sandiri, gabe uhum tu ganup, ala naung dipabalik hamu angka hata ni Debata na mangolu i, Jahowa Zebaot Debatanta i.

³⁷Boti dohononmu tu panurirang: Dia do alus ni Jahowa tu ho? Manang: Aha do na nidok ni Jahowa?

³⁸Alai molo sai ehetonmuna uhum ni Jahowa! Ala ni umbahen songon on hata ni Jahowa: Dibahen na sai diehet hamu hata

on: Uhum ni Jahowa, atik pe naung husuru
tu hamu mandok songon on: Ndang jadi
ehetonmuna be uhum ni Jahowa.

³⁹Dibahen i ida ma, tangkuponku ma hamu
laho mangareongkon hamu sian adopan ni
bohingku, nang huta on na hulehon tu hamu
dohot tu ompumuna.

⁴⁰Jala ampehononku ma tu hamu haurahon
saleleng ni lelengna dohot haleaon saleleng
ni lelengna, na so tagamon halupahononhon.

24¹(I.) Dung i dipataridahon Jahowa ma
tu ahu dua hirang na marisi parbue
ni hau ara, peak di jolo ni joro ni Jahowa,
dung tarbuang dibahen si Nebukadnesar raja
sian Babel si Jekonya anak ni si Joiakim, raja
sian Juda, ro di angka induk ni halak Juda
dohot angka pande hau dohot pande bosi,
jala tarboan nasida sian Jerusalem tu Babel.

²Hirang na sada marisi parbue ni hau ara
angka na denggan situtu, songon parbue ni
hau ara patumonaan; alai hirang na sadanari
marisi parbue ni hau ara angka na roa situtu,
angka na so tarpangan dibahen hinaroana.

³Jadi ninna Jahowa ma tu ahu: Aha do na
niidam ale Jeremia? Gabe ningku ma: Angka
parbue ni hau ara; ia parbue ni hau ara angka
na denggan i, tung na denggan situtu do, alai
angka na roa i tung na roa situtu do, angka
na so tarpangan dibahen hinaroanna.

⁴(II.) Dung i ro ma hata ni Jahowa tu ahu
songon on:

⁵ Boti hata ni Jahowa, Debata ni Israel:

Songon parbue ni hau ara angka na denggan i, songon i do angka na tarbuang sian Juda, angka naung hupaunsat sian inganan on tu tano ni halak Kasdim, tataponku ma nasida tu na denggan.

⁶ Tataponku ma nasida tutu tu na denggan, jala mulak nasida boanonku tu tano on, jala paulionku nasida, ndada laos lohaonku, jala lopokhononku nasida, ndada laos butbutonku.

⁷ Jala lehononku tu nasida roha na tumanda ahu, na marhatutuhon ahu Jahowa; ingkon gabe bangsongku nasida, jala ahu gabe Debatanasida, ai mulak do nasida sogot tu ahu sian nasa rohanasida.

⁸ Alai songon parbue ni hau ara angka na roa i, angka na so tarpangan dibahen hinaroana, suang songon i bahenonku, ninna Jahowa, si Sedekia raja ni Juda ro di angka indukna dohot pasipasi ni Jerusalem, angka na tading di tano on, nang angka na maringanan di tano Misir.

⁹ Jala pasahatonku nasida gabe siruparupaon, gabe hamagaon di saluhut harajaon ni tano on, gabe haurahon jala gabe parumpamaan, gabe ende aling, jala gabe bura di saluhut inganan haambolongannasida na hubahen i.

¹⁰ Jala tongosonku tu tongatonganasida podang, haraparon dohot begu sorop, paima

tung sun siap nasida sian tano naung hulehon tu nasida dohot tu angka ompunasida i.

25¹ (I.) On ma hata na ro tu si Jeremia taringot tu sandok bangso Juda, paopattaonhon hinarajahon ni si Joiakim, anak ni si Josia, raja sian Juda, i ma taon parjolo ni si Nebukadnesar raja sian Babel.

²Naung hinatahon ni panurirang Jeremia tu sandok bangso Juda dohot tu saluhut isi ni Jerusalem songon on:

³Olat ni taon pasampulutuluhon hinarajahon ni si Josia, anak ni si Amon, raja sian Juda sahat ro di ari on, na duapulu tolu taon i sai ro hata ni Jahowa tu ahu, jala naung huhatahon tu hamu, pola sogot ahu hehe mangkatahon, alai ndang ditangihon hamu.

⁴Jala nunga disuru Jahowa nian tu hamu saluhut naposona angka panurirang i, tibu hian nasida disuru, alai ndang ditangihon hamu, jala ndang dipaeleng hamu pinggolmunana mananginangi.

⁵Songon on do didok nasida: Ua mulak ma hamu ganup sian dalanna na jahat i dohot sian hinaroa ni pambahenanmuna, asa mian hamu di tano naung nilehon ni Jahowa tu hamu dohot tu angka ompumuna olat ni na robi ro di saleleng ni lelengna.

⁶Jala unang ihuthon hamu angka debata sileban laho mangoloi nasida dohot marsomba tusi; jala unang pahehe hamu murukku

marhitehite pambahenan ni tanganmuna, asa unang huparo hinamago tu hamu.

⁷Alai ndang ditangihon hamu ahu, ninna Jahowa, asa pahehehon murukku marhitehite pambahenan ni tanganmuna, gabe hinamago tu hamu sandiri.

⁸Dibahen i boti hata ni Jahowa Zebaot: Ala na so tinangihonmuna angka hatangu.

⁹Ida ma, ahu marsuru tu si Nebukadnesar, raja sian Babel, naposongki dohot mangalapi saluhut bangso na tungkan utara, ninna Jahowa, jala togihononku nasida tu tano on dohot tu angka pangisina dohot tu saluhut bangso angka na humaliang on, jala pansing nasida bahenonku, asa gabe halongonan, gabe sirehereheon, jala gabe parhorsihan saleleng ni lelengna.

¹⁰Jala padaoonku sian tongatonganasida soara las ni roha dohot soara olopolop, soara ni pangoli dohot soara ni oroan, soara ni pandudaan dohot hatiuron ni palito.

¹¹Jala sandok tano on gabe halongonan, gabe timbunan batu, jala parhatobanon ni raja sian Babel angka bangso on pitupulu taon lelengna.

¹²(II.) Alai ia dung gok na pitupulu taon i marlulu ma ahu dompak raja ni Babel dohot dompak bangsona, ala hajahatonnasida ninna Jahowa, dohot dompak tano ni halak Kasdim, jala bahenonku do i gabe halongonan saleleng ni lelengna.

¹³Jala paroonku ma tu tano i saluhut hata, angka naung hulumbahon tusi, ro di luhut na tarsurat di bagasan buku on, naung sinurirangkon ni si Jeremia taringot tu saluhut angka bangso i.

¹⁴Ai nasida pe parhatobanon ni torop bangso dohot raja angka na bolon, jala sudolhononku tu nasida hombar tu pambahennasida, jala hombar tu jadijadian ni tangannasida.

¹⁵(III.) Ai boti do hata ni Jahowa, Debata ni Israel tu ahu: Buat ma panginuman anggur pangarimasan on sian tanganku, jala painumhon ma sian i tu saluhut bangso angka sitopotonmu suruonku.

¹⁶Asa minum nasida jala rabatrabat, pola gila binahen ni podang sitongosonku tu tongatonganasida.

¹⁷Jadi hubuat ma panginuman sian tangan ni Jahowa, jala hupainumhon tu saluhut bangso anak na hutopot, sinuru ni Jahowa:

¹⁸Tu Jerusalem dohot tu angka huta ni Juda dohot tu rajana ro di indukna angka na mambahen nasida gabe halongonan, gabe timbunan batu, gabe sirehereheon jala gabe bura, songon na masa sadarion.

¹⁹Angkup ni tu Firaun, raja sian Misir ro di naposona, angka indukna dohot sandok bangsona.

²⁰Dohot tu sandok bangso na hinarana ro di sude raja ni tano Us, dohot sude raja ni tano

ni halak Palistim boti tu Askelon, Gasa, Ekron dohot pasipasi ni Asdod.

²¹ Boti tu Edom dohot tu Moab ro di pinompar ni si Amon.

²² Boti tu saluhut raja sian Tirus dohot sude raja sian Sidon dohot angka raja ni pulopulo, angka na di bariba ni laut.

²³ Boti tu Dedan dohot Tema dohot Bus ro di sude parulu na marjambulan.

²⁴ Dohot tu sude raja ni Arab ro di sude raja na hinara, angka na maringan di halongonan.

²⁵ Boti tu saluhut raja ni Simri, dohot tu saluhut raja ni Elam dohot tu saluhut raja ni Madai.

²⁶ Boti tu saluhut raja na tungkan utara, angka na donok dohot angka na holang, ganup rap dohot donganna, ro di saluhut harajaon ni tano on angka na di portibi on; nang raja sian Sesak, ibana minum apala parpudi sian nasida luhut.

²⁷ Jala dohononmu ma tu nasida: Boti hata ni Jahowa Zebaot, Debata ni Israel: Minum ma hamu gabe mabuk maradu muta jala tinggang, jala ndang be hehe maradophon podang sitongosonku tu tongatongamuna.

²⁸ Jala molo tung manjua nasida manjalo panginumani sian tanganmu laho manginum sian i, dohononmu ma tu nasida: Boti hata ni Jahowa Zebaot: Nandang tarjua hamu so inumonmuna.

²⁹Ai ida ma, apala di huta na targoar tu goarhu ahu mamungka manorui, tung tagamon lias ma ia hamu? Nandang tarbahen lias hamu, ai haraonku ma podang i dompak saluhut isi ni tano on, ninna Jahowa Zebaot.

³⁰Alai anggo ho, surirangkononmu ma tu nasida saluhut angka hata on, jala dohononmu tu nasida: Marioho ma Jahowa sian banua ginjang, jala dipatubegehon soarana sian ingananna na badia i; marioho situtu ma ibana mida partalianna; mariaia ma ibana songon halak sidege pangilangan laho maralus ibana dompak saluhut isi ni tano on.

³¹Tarbege di parsidomdomna sahat ro di ujung ni tano on, ai marparbadaan do Jahowa dompak angka bangso; maruhum do ibana tu saluhut sibuk, pasahatonna do angka parjahat i tu podang, ninna Jahowa.

³²(IV.) Boti hata ni Jahowa Zebaot: Ida ma, ruar do hinamago sian bangso tu bangso, jala hehe do sada habahaba bolon sian angka ujung ni tano on.

³³Jala bangke angka naung marragean binunu ni Jahowa, marpeahan ro di ari na sasada i, sian ujung ni tano on sahat ro di ujung ni tano on; ndang tatangisanna nasida jala ndang papunguonna manang tanomonna; gabe napa do nasida di sisik ni tano on.

³⁴Mangangguk badar ma hamu ale angka parmahan, jala mangandungi; jala margulu

sirabun ma hamu ale angka partogi ni pungan i, ai nunga gok ariarimuna laho potongan, jala marserak hamu hubahen, asa tung tinggang hamu, songon guriguri hasudungan ni roha.

³⁵Jala mandao do haporusan sian angka parmahan, nang haluaon sian angka partogi ni pungan i.

³⁶Tarbege do soara angguhangguk sian angka parmahan, jala andung sian angka partogi ni pungan i, ai nunga diulang Jahowa panjampalannasida i.

³⁷Jala nunga tarulang angka jampalan hasonangan maradophon parpiarpiar ni muruk ni Jahowa.

³⁸Nunga ditadingkon ibana parlinggomanna songon anak ni singa; ai nunga gabe halongonan tanonasida i maradophon rimas ni pamunu dohot maradophon parpiarpiar ni rimasna.

26¹(I.) Di mula ni harajaon ni si Joiakim, anak ni si Josia, raja sian Juda, ro ma hata on sian Jahowa, ninna ma:

²Songon on do hata ni Jahowa: Jongjong ma ho tu alaman ni joro ni Jahowa, jala hatahon ma tu saluhut isi ni angka huta ni Juda, angka na ro marsomba di bagasan joro ni Jahowa, saluhut hata angka naung hutonahon tu ho, sihatahononmu tu nasida; ndang jadi huranganmu, nanggo hata sisandok.

³ Anggiat tung ditangihon nasida jala muba rohanasida, ganup sian dalanna na roa i, asa marpangulah i rohangku taringot tu hamagoan naung husangkap hian naeng bahenon tu nasida, ala hinaroa ni pambahenannasida.

⁴ Dibahen i dohononmu ma tu nasida: Songon on do hata ni Jahowa, molo so ditangihon hamu ahu, asa marpangalaho di bagasan patikku, naung hulehon di jolomuna.

⁵ Molo so ditangihon hamu hata ni angka naposongku, i ma panurirang angka na husuru tu hamu tibu hian tongtong, hape ndang olo hamu manangihon.

⁶ Dibahen i bahenonku ma tu joro on songon naung hubahen tu Silo, jala huta on bahenonku gabe bura di saluhut bangso parbegu di atas tano on.

⁷ (II.) Jadi dibege angka malim dohot angka panurirang ro di sandok bangso i si Jeremia mangkatahon angka hata i di joro ni Jahowa.

⁸ Jadi dung tolhas dihatahon si Jeremia saluhut hata na tinonahon ni Jahowa hatahononna tu sandok bangso i, gabe ditangkup angka malim dohot panurirang dohot sandok bangso i ibana, angka ninna ma: Ingkon marutang hosa do ho!

⁹ Boasa tung manurirangi ho marhitehite goar ni Jahowa, nimmu do: Bagas on ingkon gabe songon Silo, jala huta on tarulang sogot so adong pangisina nanggo sahalak? Jadi

dirongom sandok bangso i ma si Jeremia di bagasan joro ni Jahowa.

¹⁰Jadi dung dibege angka induk ni Juda barita i gabe nangkok ma nasida sian bagas ni rajai laho tu joro ni Jahowa jala hundul nasida di pintu na imbaru na di joro ni Jahowa.

¹¹Dung i didok angka malim dohot angka panurirang tu angka induk dohot tu sandok bangso i songon on: Patut marutang hosa baoa on, ai nunga manurirangi ibana dompak huta on, apala pinggolmuna sandiri umbegesa.

¹²(III.) Alai ninna si Jeremia ma tu sude angka induk dohot tu sandok bangso i songon on: Jahowa do marsuru ahu laho manurirangkon dompak joro on dohot dompak huta on sude hata, angka naung binegemuna i.

¹³On pe padenggan hamu ma dalanmuna dohot pambahenanmuna jala tangihon hamu soara ni Jahowa, Debatamuna i, asa marpangulah i roha ni Jahowa taringot tu hamagoan naung nilumbahonna i tu hamu.

¹⁴Alai anggo ahu, ida ma di bagasan tanganmuna do ahu; bahen hamu tu ahu manang dia na denggan dohot na sintong di rohamuna.

¹⁵Alai ingkon botoonmuna do, molo tung saut ahu dibunu hamu, ingkon marsapata tu hamu mudar na so marpipot dohot tu huta on dohot tu jolma pangisina i, ai tongon

do Jahowa marsuru ahu tu hamu laho mangkatahon tu pinggolmuna saluhut angka hata on.

¹⁶Dung i ninna angka induk dohot sandok bangso i tu angka malim dohot tu angka panurirang: Ndang patut marutang hosa halak on, ai marhitehite goar ni Jahowa, Debatanta i ibana mangkatahon tu hita.

¹⁷Angkup ni hehe ma deba baoa sian angka sintua ni luat i angka ninna nasida ma tu sandok luhutan ni bangso i songon on:

¹⁸Si Mika, na sian Maressa manurirangi do di angka ari ni si Hiskia, raja ni Juda, jala ninna do tu sandok bangso Juda: Songon on do hata ni Jahowa Zebaot: Ingkon ninggala on sogot Sion songon hauma, jala Jerusalem gabe timbunan batu, jala dolok ojahan ni joro, gabe tombak na timbo.

¹⁹Beha huroha, nunga tung dibunu si Hiskia raja sian Juda dohot sandok Juda ibana alani? Nda lam mabiar do rajai mida Jahowa jala martangiang di adopan ni Jahowa? Jadi marpangulahi ma roha ni Jahowa taringot tu hamagoan naung nilumbahonna tu nasida; ia hita, tung bahenonta ma hamagoan bolon tu tondinta i?

²⁰Angkup ni adong muse na jolo sahalak, na manurirangi marhitehite goar ni Jahowa, i ma si Uria anak ni si Semanya sian Kiriat Jearim, jala manurirangi ibana dompak huta on dohot

dompok tano on, suang songon saluhut hata ni si Jeremia.

²¹ Jadi dung dibege raja Joiakim dohot saluhut ulubalangna dohot saluhut induk hatana i, ditahi roha ni rajai ma naeng mambunu ibana. Dung dibege si Uria hata i gabe mabiar ibana laos maporus laho tu Misir.

²² Dung i disuru raja Joiakim deba baoa tu Misir, i ma si Elnatan, anak ni si Akbor, dohot deba baoa donganna laho tu Misir.

²³ Angka na manogihon si Uria sian Misir, jala diboan ibana tu jolo ni raja Joiakim, na mambunu ibana marhitehite podang jala direongkon bangkena tu tanoman ni halak situasi na torop.

²⁴ Alai anggo tangan ni si Ahikam, anak ni si Sapan, mandongani si Jeremia umbahen so sahat ibana tu tangan ni situasi na torop i laho bunuonna.

27 ¹ (I.) Di mula ni harajaon ni si Joiakim, anak ni si Josia, raja sian Juda, ro ma hata on tu si Jeremia sian Jahowa:

² Songon on do hata ni Jahowa tu ahu: Bahen ma di ho angka tali dohot auga jala ampehon tu tangkuhukmu.

³ Dung i pantongoshon ma angka i tu raja sian Edom dohot tu raja sian Moab dohot tu raja ni halak Amon dohot tu raja sian Tirus dohot tu raja sian Sidon marhitehite tangan ni surusuruan, angka naung ro tu Jerusalem tumopot si Sedekia, raja sian Juda.

⁴Jala tonahononmu do tu nasida
sidohononna tu tuannasida: Songon on do
hata ni Jahowa Zebaot, Debata ni Israel,
ingkon songon i dohononmuna tu tuanmuna i.

⁵Ahu naung jumadihon tano on,jolma
i dohot pinahan angka na di tano on
marhitehite hagogoonku na godang i dohot
marhitehite tanganku na toltoli jala hulehon
do i tu manang ise lomo ni rohangku.

⁶Nuaeng pe, nunga hupasahat saluhut
angka luaton tu bagasan tangan ni si
Nebukadnesar, raja sian Babel naposongki
ro di binatang angka na di ladang i nunga
hupasahat tu ibana, asa mangoloi patu di
ibana.

⁷Jala ingkon mangoloi patu tu ibana do
saluhut angka bangso i dohot tu anakna
dohot tu pahompuna paima ro nang tingki ni
tanona sandiri, dung i muse torop bangso
dohot raja angka na balga papatu ibana.

⁸Dung i masa ma, ia adong bangso dohot
harajaon na so mangoloi patu tu ibana,
tu si Nebukadnesar raja ni Babel, jala na
so paundukkon tangkuhukna tu auga ni
raja ni Babel marlulu ma ahu tu bangso i
marhitehite podang marhitehite haraparon
dohot marhitehite begu antuk, ninna Jahowa,
paima sun siap nasida hubahen marhitehite
tanganna.

⁹Dibahen i unang patangitangi hamu
angka panurirangangmuna manang angka

pangarunding manang angka siparnipi di hamu manang angka sijujur parhalaan manang angka parsibalik mata, angka na mandok tu hamu songon on: Unang hamu mangoloi patu tu raja ni Babel.

¹⁰Ai sipaotooto do disurirangkon nasida tu hamu, asa mambahen dao hamu sian tanomuna, jala ahu mangonjar hamu, asa laos mago hamu di rohana.

¹¹Alai anggo bangso na paunduk tangkuhukna jumalo auga ni raja ni Babel, jala mangoloi patu tu ibana, pahotonku ma ibana di tanona, ninna Jahowa, asa dipaulaula, jala maringan disi.

¹²(II.) Ia tu si Sedekia, raja sian Juda, huhatahon do hombar tu saluhut angka hata i songon on: Paunduk hamu ma tangkuhukmuna manjalo auga ni raja sian Babel huhut mangoloi patu di ibana dohot di bangsona, asa mangolu hamu.

¹³Boasa tagonan mate hamu, ho dohot bangsom, marhitehite podang marhitehite haraparon dohot marhitehite begu sorop, songon naung nilumbahon ni Jahowa hian tu bangso na so mangoloi patu tu raja sian Babel.

¹⁴Dibahen i unang patangitangi hamu hatahata ni panurirang, angka na mandok tu hamu songon on: Ndang tagamon patu hamu bahenon ni raja sian Babel! Ai sipaotooto do na sinurirangkonnasida tu hamu!

¹⁵Ai ndada ahu marsuru nasida, ninna Jahowa, manurirangi pe nasida marhitehite goarhu laho paotootohon do, asa ahu mangonjar hamu laos mago di rohana, nang hamu, nang panurirang i, angka na manurirangi tu hamu.

¹⁶(III.) Angkup ni ningku do tu angka panurirang dohot tu sandok bangso i: Songon on do hata ni Jahowa: Unang patangitangi hamu hatahata ni panurirangmuna, angka na manurirangkon tu hamu songon on: Ida ma, magira ma mulak boanon angka ulaula ni joro ni Jahowa sian Babel! Ai sipaotooto do na sinurirangkonnasida i tu hamu.

¹⁷Unang patangitangi hamu nasida! Tagonan hamu mangoloi patu tu raja sian Babel, asa mangolu hamu. Boasa tagonan huta on gabe parsiragongan?

¹⁸Alai molo tung panurirang nasida, jala molo adong hata ni Jahowa tu nasida, ua martangiang nian nasida tu Jahowa Zebaot, asa unang be tarboan ulaula angka na teba di bagasan joro ni Jahowa dohot di jabu ni raja sian Juda dohot di Jerusalem tu Babel.

¹⁹Ai songon on do hata ni Jahowa Zebaot taringot tu angka tiang dohot taringot tu tobat i dohot taringot tu angka sidegedegean dohot taringot tu pasipasi ni ulaula angka na teba di huta on.

²⁰Angka na so binoan ni si Nebukadnesar, raja sian Babel, uju na binuangkonna si

Jekonya, anak ni si Joiakim, raja ni Juda sian Jerusalem tu Babel rap dohot saluhut halak na raja sian Juda dohot Jerusalem.

²¹ Ai songon on do hata ni Jahowa Zebaot Debata ni Israel taringot tu ulaula angka na teba dope di joro ni Jahowa dohot di bagas ni raja sian Juda dohot di Jerusalem.

²² Ingkon luhutna i tarboan tu Babel, jala laos disi sahat ro di ari naung hubuhul panopoton di nasida, ninna Jahowa, laos ahu mamboan nasida mulak tu inganan on.

28¹ (I.) Dung i masa ma di taon na sasada i, di mula ni harajaon ni si Sedekia, raja sian Juda, paopattaonhon, di bulan sipaha lima, ro tu ahu hata ni si Hanania, anak ni si Assur, panurirang na sian Gibeon, di bagasan joro ni Jahowa di adopan ni angka malim dohot sandok bangso i, ninna do:

² Songon on do hata ni Jahowa Zebaot, Debata ni Israel; nunga huponggolhon auga pinampe ni raja sian Babel.

³ Di bagasan dua taon on dope ahu mamboan mulak tu inganan on saluhut ulaula ni joro ni Jahowa, angka naung binuat ni si Nebukadnesar raja ni Babel sian inganan on, jala diboan tu Babel.

⁴ Si Jekonya pe, anak ni si Joiakim, raja ni Juda, ro di saluhut na tarbuang sian Juda, angka na tarboan tu Babel, ingkon mulak boanonku tu inganan on ninna Jahowa; ai

ponggolhononku ma auga pinampe ni raja sian Babel.

⁵Dung i ninna panurirang Jeremia ma tu panurirang Hanania di adopan ni angka malim dohot di adopan ni sandok bangso i, angka na jongjong di bagasan joro ni Jahowa.

⁶Dung i ninna panurirang Jeremia ma: Amin! Denggan nian dibahen Jahowa songon i! Sai dipasintong Jahowa ma hatahatam, angka naung sinurirangkonmi taringot tu hamumulak sian Babel tu inganan on, angka ulaula ni joro ni Jahowa ro di saluhut angka naung tarbuang i.

⁷Alai tahe sai tangihon ma hata on, na huhatahon tu pinggolmu dohot tu pinggol ni saluhut bangso i:

⁸Panurirang angka na jumolo sian ahu dohot sian ho, sian na robi sahali, angka naung manurirangi dompak torop luat dohot dompak harajaon angka na balga taringot tu hamusuon, pardangolan dohot begu antuk.

⁹Ia adong panurirang na sumurirangkon pardamean, di hasisintong ni hata panurirangonna i tartanda ma panurirang i, manang na tongon Jahowa marsuru ibana.

¹⁰Dung i dibuat panurirang Hanania ma auga sian tangkuhuk ni panurirang Jeremia, laos diponggolhon ma i.

¹¹Dung i ninna si Hanania ma di adopan ni sandok bangso i: Songon on do hata ni Jahowa: Di bagasan dua taon on dope

ponggolhononku ma songon i auga na pinampe ni si Nebukadnesar, raja di Babel, sian tangkuhuk ni saluhut bangso. Dung i ditulus panurirang Jeremia ma dalanna.

¹²(II.) Jadi dung diponggolhon panurirang Hanania auga i sian tangkuhuk ni panurirang Jeremia, ro ma muse hata ni Jahowa tu si Jeremia songon on:

¹³Laho ma ho jala dok ma tu si Hanania: Songon on do hata ni Jahowa: Nunga diponggolhon ho anggo auga angka na sian hau; alai ingkon paulionmu do auga angka na sian bosi bahen singkatna.

¹⁴Ai songon on do hata ni Jahowa Zebaot, Debata ni Israel: Auga bosi do na huampehon tu tangkuhuk ni saluhut bangso on, asa mangoloi patu tu si Nebukadnesar, raja sian Babel, ingkon oloannasida ibana, nang angka binatang di ladang nunga hupasahat tu ibana.

¹⁵Dung i ninna panurirang Jeremia ma tu panurirang Hanania: Ua tangihon ale Hanania? Ndang Jahowa marsuru ho, hape ho do mangela bangso on marhaposan di sipaotooto.

¹⁶Dibahen i, songon on do hata ni Jahowa: Ida ma, onjarhononku ma ho sian sisik ni tano on ingkon di bagasan taon on dope ho mate, ala di jamitahon ho parbalion sian Jahowa.

¹⁷Jadi mate ma tongon panurirang Hanania di bagasan na sataon i, di bulan sipahapitu.

29¹ (I.) On do hata ni surat na tinongos ni panurirang Jeremia sian Jerusalem tu pasipasi ni sintua angka na tarbuang i dohot tu angka malim dohot tu angka panurirang dohot tu sandok bangso i, angka naung binuangkon ni si Nebukadnesar sian Jerusalem tu Babel.

²Dung tarboan raja Jekonya dohot jolmana ro di angka na pinangkis, angka induk ni Juda dohot Jerusalem dohot angka pande hau dohot pande bosi sian Jerusalem.

³Na tinongosna tu Babel marhite sian si Eleasa, anak ni si Sapan, dohot si Gemaria, anak ni si Hilkia, na sinuru ni si Sedekia, raja sian Juda, tu si Nebukadnesar raja sian Babel, ninna do:

⁴Songon on do hata ni Jahowa Zebaot, Debata ni Israel, tu saluhut naung tarbuang, angka na hubuangkon sian Jerusalem tu Babel:

⁵Pauli hamu angka bagas, laos ingani hamu, jala punga hamu angka porlak, laos pangan hamu parbuena!

⁶Buat hamu ma parompuan bahen jolmamu, asa tumubuhon anak dohot boru hamu; paorohon hamu anakmuna jala boruhon hamu borumuna, asa tumubuhon anak dohot boru nasida, asa sopar hamu disi, jala unang moru bilanganmuna.

⁷Ringkoti hamu huhut hasonangan ni huta habuanganmuna na hubahen i, jala

tangiangkon hamu nasida tu Jahowa, ai molo marhasonangan huta i, marhasonangan ma dohot hamu.

⁸Songon on do hata ni Jahowa Zebaot, Debata ni Israel: Unang olo hamu paotootoon ni panurirangmuna manang pangarunding angka na di tongatongamuna, jala unang patangitangi hamu nipi, angka na niipimuna.

⁹Ai sipaotooto do na sinurirangkonnasida tu hamu marhitehite goarhu; ndang ahu marsuru nasida, ninna Jahowa.

¹⁰(II.) 2. Ai songon on do hata ni Jahowa: Molo dung gok na pitupulu taon i di Babel, ebatanku ma hamu dohot pasintongkon tu hamu bagabagangku na denggan i asa mamboan hamu mulak tu inganan on.

¹¹Ai nunga tangkas huboto sangkap angka na husangkapi taringot tu hamu, ninna Jahowa, sangkap hasonangan do tahe ndada tu hamagoan, asa ahu mangalehon tu hamu ujung na hinalungunhonmuna.

¹²Jadi pajoujouonmuna ma ahu, huhut laho hamu martangiang tu ahu, gabe tangihononku ma hamu.

¹³Jala luluanmuna ma ahu laos jumpang hamu, molo tung dilului hamu ahu sian nasa rohamuna.

¹⁴Jadi jumpang hamu ma ahu, ninna Jahowa, jala mulak bahenonku angka na tarbuang sian hamu, jala papunguonku hamu sian saluhut bangso parbegu dohot sian

saluhut inganan haambolonganmuna na sai laon na hubahen i, ninna Jahowa, jala mulak hamu boanonku tu inganan haborhatanmuna hian laho tarbuang.

¹⁵(III.) Hape didok hamu do: Nunga adong panurirang di hami di Babel, dipahehe Jahowa.

¹⁶Ai songon on do hata ni Jahowa taringot tu raja, na marhabangsa di habangsa ni si Daud dohot taringot tu sandok bangso na maringan di huta on, i ma hahaanggimuna angka na so tarboan rap dohot hamu tu habuangan.

¹⁷Songon on do hata ni Jahowa Zebaot: Ida ma, ahu manongoshon tu tongatonganasida podang, haraparon dohot begu antuk, jala ahu mambahen nasida songon antajau na busuk, angka na so tarpangan dibahen hinabusukna.

¹⁸Jala ahu paburuburu nasida marhitehite podang, haraparon dohot begu antuk, jala bahenonku nasida gabe siruparupaon ni saluhut harajaon, angka na di tano on, gabe bura jala gabe hasonggoton, gabe sirehereheon dohot siinsakinsahan di tongatonga ni saluhut bangso parbegu, haambolongannasida na hubahen i.

¹⁹Ala na so ditangihon nasida angka hatangki, ninna Jahowa, uju na husuru tu nasida angka naposongku, angka panurirang i, tole manogotna i, tole potangna, hape

ndang olo hamu manangihon hatanasida i ninna Jahowa.

²⁰(IV.) Dibahen i tangihon ma hata ni Jahowa, saluhut hamu angka na tarbuang i, angka naung husuru sian Jerusalem tu Babel.

²¹Songon on do hata ni Jahowa Zebaot, Debata ni Israel, taringot tu si Ahab, anak ni si Kolaia dohot taringot tu si Sedekia anak ni si Maaslia, angka na manurirangkon sipaotooto tu hamu marhitehite goarhu: Ida ma, ahu na pasahathon nasida tu bagasan tangan ni si Nebukadnesar raja sian Babel, asa mate dibunu nasida di jolo ni matamuna.

²²Jala ingkon buaton sian nasida sada bura di saluhut angka na tarbuang sian Juda, angka na di Babel, songon on: Sai dibahen Jahowa ma tu ho suang songon na tu si Sedekia dohot songon na tu si Ahab, na tinutung ni raja sian Babel di bagasan api.

²³Ala naung binahennasida haotoon di Israel, jala marmainan nasida dohotjolma ni dongannasida, jala dihatahon hata sipaotooto marhitehite goarhu, na so hutonahon i tu nasida. Alai ahu do sibotosa jala sitindangisa, ninna Jahowa.

²⁴(V.) Jala tu si Semaya isi ni Nehelam i, ingkon dohononmu songon on:

²⁵Boti hata ni Jahowa Zebaot, Debata ni Israel, ala naung tinongosmi angka surat marhitehite goarmu tu saluhut halak angka na di Jerusalem dohot tu malim Sepania,

anak ni si Maaseya dohot tu saluhut angka malim, songon on:

²⁶Nunga dipabangkit Jahowa ho gabe malim singkat ni malim Joiada, asa hamu gabe siramoti joro ni Jahowa mangaranapi ganup baoa na lalaen dohot na manurirangi, asa bahenonmu ibana tu hurungan dohot tu beangan.

²⁷On pe boasa tung so mangonai hata ho tu si Jeremia isi ni Anatot, na manurirangi tu hamu?

²⁸Ala naung tinongosna i tu hami tu Babel mandok: Laon dope hamu disi. Pauli hamu ma angka bagas jala ingani hamu, jala punga hamu angka porlak asa panganonmuna parbuena.

²⁹Jadi dijaha malim Sepania ma surat i tu pinggol ni panurirang Jeremia.

³⁰Dung i ro ma hata ni Jahowa tu si Jeremia songon on:

³¹Suruhon ma suruanmu manopot saluhut angka naung tarbuang paboahon: Songon on do hata ni Jahowa taringot tu si Semaya isi ni Nehelam i: Ala naung manurirangi si Semaya tu hamu, so manang ahu marsuru ibana, jala dipanalom rohamuna marhaposan tu sipaotooto.

³²Dibahen i songon on do hata ni Jahowa: Ida ma, marlulu ma ahu dompak si Semaya isi ni Nehelam i dohot dompak pinomparna. Ndang jadi adong di ibana nanggo sahalak,

na maringan di tongatonga ni bangso on, jala ndang jadi idaonna na denggan sibahenonku tu bangsongkon ninna Jahowa; ala naung hinatahonna parbalion sian Jahowa.

30¹ (I.) On do hata na ro tu si Jeremia sian Jahowa:

²Songon on do hata ni Jahowa, Debata ni Israel: Surathon ma di ho saluhut hata angka naung huhatahon tu ho, tu sada buku.

³Ai ida ma, na ro do angka ari sogot, ninna Jahowa, mulak ma disi togihononku angka na tarbuang sian bangsongku Israel dohot Juda, ninna Jahowa, jala mulak nasida togihononku tu tano naung hulehon i tu ompunasida, asa nasida nampunasa.

⁴On do huhut hata, angka naung hinatahon ni Jahowa taringot tu Israel dohot taringot tu Juda.

⁵Ai songon on do hata ni Jahowa: Hubege hami do soara angguhangguk, hatahutan, jala ndang adong hasonangan.

⁶Ua sungkunsungkun i jala tangkasi humaliang hamu manang dung do baoa mangae posoposo? Boasa tung huida ganup baoa mangampehon tanganna tu gantingna, songon inaina na mangae posoposona, jala muba saluhut bohi marlangan?

⁷Oe jea tonanon! Ai tung na bolon ari na sasada i, na so adong tudosna, jala tingki hagogotan do i di Jakkob; alai atik pe songon i ingkon paluaon ibana sian i.

⁸Dung i di ari na sasada i, ninna Jahowa Zebaot, ponggolhononku ma augana sian tangkuhukmu, jala rapuanku angka tali pangihot na di ho, jala ndang be halak ruar marhatobanhon ibana.

⁹Ingkon Jahowa Debatanasida i oloannasida dohot si Daud rajanasida i, sipatindangonku di nasida.

¹⁰Alai anggo ho, ale Jakkob naposongki, unang ho mabiar, ninna Jahowa, jala unang tarsonggot ho, ale Israel; ai ida ma, ahu paluahon ho sogot sian luat na dao dohot pinomparmu sian tano habuangannasida; jala ingkon mulak Jakkob marnalom ni roha jala marsonangsonang, jala ndang adong nanggo sahalak na manonggoti.

¹¹Ai ahu do donganmu, ninna Jahowa, laho paluahon ho; ai sun siap do bahenonku saluhut bangso parbegu haambolonganmu na hubahen i na sai laon, alai anggo ho ndang siap bahenonku; ingkon pinsangonku do ho nian hombar tu uhum, jala ndang tarbahen so toruanku ho.

¹²(II.) Ai songon on do hata ni Jahowa: Tung na targisik do bugangmu, jala bernit situtu torutoru na niaemi.

¹³Ndang adong nanggo sahalak na mangondihon ho di paruhuman laho pauliulihon bugangmi, jala ndang adong taoar pamalumhon bugangmi.

¹⁴Nunga dihalupahon saluhut angka alealem ho, ndang usouso nasida di ho, ai harageon ni musu hutonahon tu ho, pinsangpinsang ni halak pangarupa, ala ni godang ni hajahatonmu, tung na so habilangan do angka dosami.

¹⁵Boasa tung manganguhi ho ala ni bugangmu, ala na so hadaonan sahitemu? Binahen ni hinadeak ni hajahatonmu, ala na so habilangan angka dosam umbahen na songon i hubahen tu ho.

¹⁶Dibahen i luhut angka na mamondut ho, ingkon bonduton do sogot, jala luhut angka na manesak ho, ingkon rap tarboan nasida sogot tu habuangan, jala halak na mamupusi ho, ingkon pupusan sogot, jala luhut halak na mandobo ho, ingkon pasahatonku doboon ni halak.

¹⁷Ai ahu ma patupahon hahisaron di ho, jala pamalumonku ho sian bugangmu, ninna Jahowa, ala si habuangan goarmu didok halak ale Sion, na so parduli ni halak nanggo sada.

¹⁸(III.) Songon on do hata ni Jahowa: Ida ma, mulak ma togihononku angka na tarbuang sian undungundung ni si Jakkob jala marpangulah i rohangku mida angka ingananna; jala ingkon paulion muse huta i di atas dolokna jala bagas parhabangsaan i inganan songon uhumna hian.

¹⁹Jala ingkon ruar sian i soara pujipujian dohot soara ni halak na marlas ni roha; ai

ahu patorophon sogot nasida, jala ndang
jadi moru nasida, jala marmulia nasida
bahenonku, jala na so tupa marmetmet
nasida.

²⁰Ida anaknasida ingkon songon di na robi
do, jala parluhutanna ingkon hot di jolongku,
jala marlulu do ahu sogot tu saluhut halak na
mangarupa ibana.

²¹Jala jujungan ihutanna, ingkon ro sian
ibana, jala rajana bangkit sian tongatongana
laos ahu pajonokkon ibana, asa jumonok
ibana tu ahu, ai tung ise ma na hum
sumeahon dirina laho jumonok tu ahu, ninna
Jahowa?

²²Jadi ingkon hamu gabe bangsongku, jala
ahu gabe Debatamuna.

²³Ida ma, ruar do sada habahaba sian
Jahowa, dohot parpiarpiar ni rimas, sada
habahaba poting baliung na mamboan
hamagoan, manipa tu ulu ni halak parjahat.

²⁴Ndang tagamon mombun parpiar ni muruk
ni Jahowa, nda jolo sahat dibahen jala di
hajongjongkon sangkapsangkap ni rohana
hian. Di ujung ni angka ari sogot tangkas
antusanmuna i!

31 ¹(I.) Di tingki ujungna i, ninna Jahowa,
ahu gabe Debata ni saluhut marga ni
Israel jala nasida gabe bangsongku.

²Songon on do hata ni Jahowa. Nunga
dapotan asi ni roha di halongonan bangso na

malua sian podang. Laho ma ahu manogihon Israel tu hasonangan ni rohana.

³Nunga tibu hian diida rohangku Jahowa, ninna ibana do: Haholongon salelenglelengna hubahen mangkaholongi ho, dibahen i hutogutogu ho marhitehite asi ni roha.

⁴Paulionku dope ho muse, asa tung tipak ho, ale boru Israel, marjagarjagarhon arbabmu do ho muse jala ruar marhalianghaliang rap dohot halak na marlas ni roha.

⁵Ingkon pungaonmu dope angka porlak anggur di dolok Samaria, laos halak na umpungkasa manganhon parbuena.

⁶Ai ro do ari sogot, joujou ma disi halak parjaga di dolok Epraim: Beta ma hita, asa nangkok hita tu Sion mandapothon Jahowa Debatanta!

⁷Ai songon on do hata ni Jahowa: Marhinsa ni roha ma hamu marsuraksurak mida si Jakkob, jala marolopolop ma hamu mida ihutan ni angka bangso parbegu! Pangiar hamu ma soaramuna mamujimuji jala dok hamu ma: Sai palua ma ale Jahowa bangsom, pasipasi ni Israel!

⁸Ida ma, ingkon ahu manogihon nasida sian tano na tungkan utara jala ahu papunguhon nasida sian angka ujung ni tano on rap dohot angka na mapitung dohot na pangpang, na gabegabea dohot pangintubu di tongatonganasida. Tung luhutan na bolon do nasida angka na mulak i tuson.

⁹Ro do nasida tutu huhut tumatangis dohot marhuraja. Ahu ma manogihon nasida tu angka batang aek di dalan na hornop, ndang tagamon tarsulandit nasida disi; ai ahu do gabe ama di Israel jala Epraim gabe anak buhabajungku.

¹⁰Tangihon ma hata ni Jahowa, hamu ale angka bangso parbegu, jala baritahon hamu ma i di pulopulo angka na dao jala hatahon hamu: Ibana na paserakkon Israel na jolo, laos ibana papunguhon muse jala ramotanna, songon parmahan di pinguanna.

¹¹Ai nunga ditobus Jahowa Jakkob i jala nunga dipalua ibana sian tangan ni na gumogo sian ibana.

¹²Ro do nasida sogot huhut marolopolop di punsu ni Sion jala marrongoman nasida mandapothon denggan basa ni Jahowa: Eme dohot anggur dohot miak dohot anak ni birubiru dohot lombu, jadi tondinasida ingkon songon porlak na tangkas di aek, jala ndang be mandate nasida.

¹³Jadi marlas ni roha ma disi namarbaju marhalianghaliang dohot dolidoli ro di angka na tuatua, jadi muba ma arsak nasida gabe las ni roha bahenonku, jala apulonku nasida huhut palashon dung salpu gondokna na sai laon.

¹⁴Dung i marlobilobi ma tondi ni angka malim di tabotabo jala bosuran bangsongku

marsaulihon dengan basangku, ninna Jahowa.

¹⁵(II.) Songon on do hata ni Jahowa: Tarbege do di Rama soara andungandung dohot partangison: Ditatangisi si Rahel anakkonna, ndang olo ibana apulon taringot tu anakkonna i, ai nunga siap nasida.

¹⁶Songon on do hata ni Jahowa: Paontok soaram sian partatangison dohot matami sian iluilu, ai adong do upa ali ni hangalutonmu, ninna Jahowa; jala ingkon mulak nasida sian tano ni musu.

¹⁷Jala adong do sihirimonmu di ujungna, ninna Jahowa, ingkon mulak angka anakmu tu partaliannasida hian.

¹⁸Nunga tangkas hubege Epraim mangandungi songon on: Nunga dipinsang ho ahu, jala olo do ahu pinsangon songon anak ni horbo na so niajar. Sai ho ma paubahon rohangku, asa tung saut muba; ai ho do Jahowa, Debatangku.

¹⁹Ai dung muba rohangku, husolsoli ma, jala dung hutanda diringku hutompuk ma gontingku. Maila ma ahu huhut marlangan, ala huusung haurahon ni haposoonki.

²⁰Nda anak hasian si Epraim di ahu? Nda anak hasoloan? Ai manang piga hali pe hatangku dompak ibana, sai marningot dope ahu di ibana; ala ni malala do ateatengku taringot tu ibana, ingkon marpangulahi rohangku mida ibana ninna Jahowa.

²¹ (III.) Patindang ma di ho angka tanda, bahen di ho angka tiang parningotan, patongon ma roham tu dalan na bolon, dalan naung nidalananmu! Mulak ma ho, ale boru Israel, mulak ma ho tumopot angka hutam on.

²² Sadia leleng on sai datdatanmu maotaot, ale boru na marbalik? Ai nunga dijadihon Jahowa pangalaho na imbaru di tano on: Parompuan i mangkaol baoa i.

²³ Songon on do hata ni Jahowa Zebaot, Debata ni Israel: Dohonon ni halak dope sogot hata on di tano Juda dohot di angka hutana, ia dung mulak angka na tarbuang sian nasida: Sai dipasupasu Jahowa ma ho, ale inganan ni hatigoran, dolok habadiaon.

²⁴ Jala maringan disi sogot Juda dohot saluhut hutana patampaktampak, nang halak paruma, nang halak na mangihutihut mangadu parduaan.

²⁵ Ai ahu mangalehon minum parroha na mandate pola marlobilobi, jala ahu palashon roha ni halak na tarhatos.

²⁶ Ala ni tarsunggul ahu jala manaili humaliang, jala lambok di ahu parmodomhu.

²⁷ Ida ma, na ro do angka ari sogot, ninna Jahowa, marboni ma bahenonku pinompar ni Israel dohot pinompar ni Juda, boni jolma dohot boni pinahan.

²⁸ Jala masa sogot, ia songon i ahu duno taringot tu nasida laho mambutbut, laho

mangaloha, laho mamansingkon dohot
laho mangago dohot laho mambahen
marhinamago laos songon i ahu dungo sogot
taringot tu nasida laho paulihon dohot laho
manuan, ninna Jahowa.

²⁹Di angka ari i, ndang be dohonon ni
halak: Angka amaama, manganhon parbue
ni anggur na asom, gabe ngiluan ia ngingi ni
anakna.

³⁰Ingkon ganup baoa tahe mate binahen
ni hajahatonna sandiri. Ganupjolma na
manganhon parbue ni anggur na asom,
ingkon ngingina sandiri tahe ngiluan.

³¹(IV.) Ida ma, na ro do angka ari sogot,
ninna Jahowa, pungaonku ma padan na
imbaru tu pinompar ni si Israel dohot tu
pinompar ni si Juda.

³²Ndada songon padan na hubahen i na
jolo tu ompunasida, uju na hutangkup
tangannasida i laho manogihon nasida ruar
sian tano Misir, hape diose nasida do padan
na hubahen i, atik pe ahu harajaannasida
nian, ninna Jahowa.

³³Ai on do padan sibahenonku tu pinompar
ni si Israel, dung salpu angka ari on,
ninna Jahowa: Lehononku ma patikku tu
bagasan ateatenasida jala surathononku
do i tu bagasan rohanasida, asa ahu gabe
Debatanasida, jala nasida gabe bangsongku.

³⁴Jadi ndang pe podaan ni sahalak
donganna, manang dohononna tu

hahaanggina i songon on: Tanda hamu ma Jahowa! Ai tung saluhut nasida tumanda ahu sogot, tole na metmet, tole na magodang sian nasida, ninna Jahowa, ai marpamuati do sogot rohangku mida hajahatonnasida i, jala ndang be ingotonku dosanasida i.

³⁵(V.) Songon on do hata ni Jahowa, na mangalehon mata ni ari gabe panondang arian, aturan ni bulan dohot angka bintang gabe panondang borngin, ibana manggunsang laut, gabe marhasak angka galumbangna; Jahowa Zebaot do goarna.

³⁶Tung sura mansohot angka aturan i maradophon ahu, ninna Jahowa, mansadi ma dohot pinompar ni Israel, unang be targoar bangso di jolongku salelenglelengna.

³⁷Songon on do hata ni Jahowa: Molo tung dapot suhaton angka langit di ginjang, jala dapot dodoon angka ojahan ni tano on di toru, dohot ma ahu mambolongkon sandok pinompar ni si Israel ala ni saluhut na binahennasida, ninna Jahowa.

³⁸Ida ma, na ro do angka ari sogot ninna Jahowa, paulion ma muse disi huta i di Jahowa sian tungkup Hananel sahat ro di harbangan parsuhi.

³⁹Dung i ruar muse tali pangungkur tu jolo sahat ro di robean Gareb, jala mamedu tungkan Goa.

⁴⁰Tole muse sandok rura ni angka bangke dohot sirabun, ro di saluhut tano pea sahat

ro di batang aek Kidron, sahat muse ro di suhi ni harbangan hoda tungkan habinsaran, ingkon badia do i di Jahowa. Na so tupa be lohaon manang segahononhon ro di salelenglelengna.

32¹ (I.) On do hata na ro tu si Jeremia sian Jahowa, pasampulutaonhon hinarajahon ni si Sedekia, raja sian Juda, i ma pasampuluualutaonhon hinarajahon ni si Nebukadnesar.

²Uju na ditungkum parangan ni raja sian Babel Jerusalem, alai tarhurung, do ianggo panurirang Jeremia di bilut hurungan na di bagas ni raja sian Juda.

³Tusi do ibana dihurungkon si Sedekia, raja sian Juda huhut mandok: Boasa tung manurirangi ho songon on: Songon on do hata ni Jahowa: Ida ma, ahu ma pasahathon huta on tu bagasan tangan ni raja sian Babel asa papatuonna.

⁴Si Sedekia pe raja sian Juda, ndang tagamon malua sian tangan ni halak Kasdim, ingkon ahu pasahathon ibana tu tangan ni raja sian Babel, asa masipangkulingan pamangannasida be jala masiberengan matanasida be.

⁵Jala boanonna si Sedekia tu Babel, loas disi ibana paima marlulu ahu tu ibana, ninna Jahowa. Ai marmusu pe hamu dohot halak Kasdim, ndang tagamon marantu hamu.

⁶Dung i ninna si Jeremia ma: Nunga ro hata ni Jahowa tu ahu songon on:

⁷Ida ma, na ro ma si Hamamel, anak ni si Sallum, amangtuam, manopot ho mandok songon on: Tuhor ma di ho haumangku, na di Anatot, ai di ho do uhum partobuson laho manuhor.

⁸Dung i ro ma si Hamamel, anak ni amangtuangku, hombar tu hata ni Jahowa manopot ahu tu bilut hurungan, jala didok tu ahu: Ua tuhor ma haumangku na di Anatot di tano Benjamin, ai di ho do uhum teanteanan jala di ho do partobuson. Sai tuhor ma i di ho, jadi mamoto ma ahu hata ni Jahowa do i hape.

⁹Jadi hutuhor ma hauma i sian si Hamamel, anak ni amangtuangku na di Anatot, jala hudasingkon tu ibana perak sampulu pitu hati.

¹⁰Dung i husurathon ma hata i tu sada surat jala husahap hubahen huhut angka sitindangi jala hudasing perak i di hatian.

¹¹Dung i hubuat ma surat panurhoron i, naung nirongkom hombar tu adat dohot tu uhum rap dohot surat na tarbungka i.

¹²Dung i hulehon ma surat panuhoran i tu si Baruk, anak ni si Neria, tubu ni si Maaseia, di adopan ni si Hamamel, amangtuangki, dohot di adopan ni angka sitindangi angka na mambahen tanda tangan di surat panuhoran i

di adopan ni saluhut halak Jahudi, angka na hundul di bilut hurungan i.

¹³Jala hutonai si Baruk di adopannasida songon on:

¹⁴Songon on do hata ni Jahowa Zebaot, Debata ni Israel: Buat ma angka suraton, surat panuhoran i tahe, nang sinahap i nang surat na tarbungka i, jala bahen tu bagasan abalabal sian tano takko, asa tung laon tarpeop.

¹⁵Ai songon on do hata ni Jahowa Zebaot, Debata ni Israel: Ingkon tuhoron dope sogot angka bagas, angka hauma dohot angka porlak anggur di tano on.

¹⁶(II.) Jadi dung hulehon surat panuhoran i tu si Baruk, anak ni si Neria, martangiang ma ahu tu Jahowa songon on:

¹⁷Iale Tuhan Jahowa, ida ma nunga dijadihon ho angka langit dohot tano on marhitehite hagogoonmu na godang i dohot marhitehite tanganmu na toltoli, ndang adong na so tarpatupa ho nanggo sada.

¹⁸Ho do na mambahen asi ni roha tu halak marriburibu jala ho do mambaloshon hajahaton ni amaama tu ampuan ni anakna angka na di pudinasida. Ho do Debata na sun timbul jala na gogo, Jahowa Zebaot do goarmu.

¹⁹Parsangkap na timbul do ho jala na gogo marpambahenan; manatap manonggor do matami mida saluhut dalan ni manisias

laho mangalehon tu ganup hombar tu angka dalanna dohot hombar tu parbue ni pambahenanna.

²⁰Ho do naung mambahen angka tanda dohot halongangan di tano Misir rasirasa sadarion, nang tu Israel, nang tu jolma na asing, jala marbarita goarmu dibahen ho sadarion.

²¹Jala nunga ditogihon ho bangsom Israel ruar sian tano Misir marhitehite angka tanda dohot halongangan, marhitehite tangan na gogo jala na toltol dohot marhitehite hasonggoton bolon.

²²Jala nunga dilehon ho tu nasida tano on na niuarihonmu tu ompunasida lehononmu tu nasida, sada tano na marlobilobi di susu dohot di situak ni loba.

²³Jadi dung tolhas nasida tusi jala ditean, gabe ndang ditangihon nasida soaram jala patikmi ndang dipangalahohon nasida; saluhut tahe na tinonahonmu tu nasida sibahenonna nian, ndang dibahen nasida; ala ni dihonahon ho tu nasida saluhut hamagoan on.

²⁴Ida ma, angka salosap nunga tolhas tu huta i laho manoluk, huta i pe nunga sahat tu tangan ni halak Kasdim, angka partungkum i, binahen ni podang, haraparon dohot begu antuk; jala naung nilumbahonmu nunga songgop, ho do marnidasa.

²⁵Hape lam didok ho dope tu ahu, ale Tuhan Jahowa: Tuhor ma di ho hauma i nasa argana jala bahen angka sitindangi! Hape nunga sahat tu tangan ni halak Kasdim ia huta i!

²⁶(III.) Dung i ro ma hata ni Jahowa tu si Jeremia songon on:

²⁷Ida ma, ahu do Jahowa, Debata ni nasa manisias. Tung adong ma tagamon na so tarpatupa ahu?

²⁸Dibahen i songon on do hata ni Jahowa: Ida ma, ahu pasahathon huta on tu tangan ni halak Kasdim dohot tu tangan ni si Nebukadnesar, raja sian Babel, asa papatuonna.

²⁹Ai masuhan ni halak Kasdim, angka partungkum i ma huta on, jala nahitanna huta on, jala surbuonna ro di bagas, panutungan daupa di atas tarupna tu Baal jala panguseanna di pelean siinumon tu angka debata sileban, pahehe rimashu.

³⁰Ai anggo halak Israel dohot halak Juda, holan sogo ni rohangku do diulanasida olat ni haposoonna; ai anggo halak Israel sai tong pahehe rimashu, marhitehite pambahenan ni tangannasida, ninna Jahowa.

³¹Tongon tahe sumunggul rimashu dohot murukku do huta on, olat ni ari dung pinajongjong rasirasa sadarion, umbahen ingkon bolongkononku huta i sian jolongku.

³²Ala ni saluhut hajahaton ni halak Israel dohot halak Juda, angka na binahennasida

pahehe rimashu, nang nasida, nang rajanasida, induknasida, angka malim dohot panurirang di nasida ro di halak Juda dohot isi ni Jerusalem.

³³Nunga pola tangkuhukna, ndada bohina di dompakkon tu ahu; jala atik pe hupasogot mangajari nasida tongtong, ndang ditangihon nasida manang olo manjalo pangajaron.

³⁴Lam dipajongjong nasida ganaganaannasida angka na sogir i tu bagasan bagas naung targoar tu goarhu laho paramunhon.

³⁵Jala dipajongjong nasida angka tambak di Baal, angka na di rura ni anak ni si Hinnom, laho pabolushon anaknasida dohot borunasida sian api marsomba tu ajian Molok, na so dung hutonahon tu nasida, manang tubu di bagasan rohangku bahenonna hasogiron sisongon i, asa mangela Juda mardosa.

³⁶(IV.) Ala ni umbahen songon on hata ni Jahowa, Debata ni Israel, taringot tu huta on naung nidokmuna i, nunga sahat tarlehon tu tangan ni raja sian Babel marhitehite podang dohot haraparon dohot begu antuk:

³⁷Ida ma, ahu sandiri papunguhon nasida sian saluhut luat haambolongannasida na sai laon binahen ni rimashu dohot murukku dohot binahen ni piri-piri godang, jala mulak nasida togihononku tu inganan on, asa marsonangsonang nasida maringan disi.

³⁸Jadi nasida gabe bangsongku, jala ahu gabe Debatanasida.

³⁹Jala ahu mangalehon tu nasida sada roha dohot sada dalan asa marhabiaran tu ahu saleleng arinasida bahen hatuaon di nasida dohot di pinomparnasida sogot.

⁴⁰Jala ahu mambahen tu nasida padan salelenglelengna, paboa na so tupa be ahu sumurut sian nasida mambahen na denggan tu nasida, jala lehononku do biar mida ahu tu bagasan rohanasida, asa unang be marbalik nasida sian ahu.

⁴¹Jadi marlas ni roha ma ahu mida nasida mambahen na denggan tu nasida jala ahu mangalopokkon nasida sogot tu tano on marhitehite habonaron sian nasa rohangku dohot sian nasa tondingku.

⁴²Ai songon on do hata ni Jahowa: Songon naung huparo tu bangso on saluhut jea godangon, suang songon i ahu parohon sogot tu nasida saluhut na denggan naung huparbagabaga i tu nasida.

⁴³Jala ingkon tuhoron dope hauma di tano on naung nidokmuna i: Halongonan do on na so marisijolma manang pinahan, naung sahat tu tangan ni halak Kasdim.

⁴⁴Tuhoron dope tongon angka hauma marhitehite hepeng jala bahenonna do surat laos sahaponna dohot mambahen sitindangi di tano Benjamin dohot humaliang Jerusalem dohot di bagasan angka huta ni Juda dohot

di bagasan huta angka na di dolok dohot
di bagasan huta angka na di pea dohot di
bagasan huta angka na tungkan dangsina;
ai mulak do togihononku angka na tarbuang
sian nasida, ninna Jahowa.

33¹ (I.) Dung i ro ma hata ni Jahowa tu si
Jeremia paduahalihon di na tarhurung
dope ibana di bilut hurungan i, ninna do:

²Songon on do hata ni Jahowa na
pasintongkon bagabagana i, Jahowa na
manjadihonsa laho pasunhon, Jahowa do
goarna!

³Joujou ma ho tu ahu, asa hualusi ho, asa
hupabotohon tu ho hata angka na bolon
dohot na songkal, angka na so binotomi.

⁴Songon on do hata ni Jahowa, Debata
ni Israel, taringot tu angka bagas ni huta
an dohot taringot tu angka bagas ni angka
raja sian Juda angka naung niloha on bahen
partanobatoan dampak angka salosap dohot
dampak angka podang.

⁵Adong pe jolma masuk tu bagasan laho
marmusu dampak halak Kasdim, asa gohanna
angka i dohot bangke ni jolma, angka naung
hubunu di bagasan murukku dohot di bagasan
rimashu, ala naung hupadao bohingku sian
huta on binahen ni saluhut hajahatonnasida.

⁶Ida ma, ahu sandiri pahehehon tu
nasida hahisaron dohot hamalumon, jala
pamalumonku nasida, jala ahu papatarhon

tu nasida hadameon dohot habonaron
mardapotdapot.

⁷Jala ahu manogihon mulak angka na tarbuang i sian Juda dohot angka na tarbuang i sian Israel, jala ahu pahothon nasida suang songon di mulana.

⁸Jala ahu mangurasi nasida sian saluhut hajahatonna nasida i, na mardosai nasida dompak ahu, jala marpamuati rohangku di saluhut hajahatonna nasida i, na mardosai nasida dompak ahu, jala na niosenasida i ahu.

⁹Jala ingkon gabe barita silas ni rohangku huta i, bahen pujipujian dohot bahen hamuliaon maradophon saluhut bangso parbegu di tano on, angka na umbege saluhut na denggan na hubahen i tu nasida, jadi tarsonggot jala angka hitir nasida mida saluhut na denggan dohot mida saluhut huta on na hubahen i tu nasida.

¹⁰Songon on do hata ni Jahowa: Tarbege dope sogot di inganan on, naung nidokmuna i: Nunga tarulang, ndang be marisijolma nanggo sahalak manang pinahan, di bagasan angka huta ni Juda dohot di alaman ni Jerusalem, angka naung tarulang i, ndang be marisijolma nanggo sahalak manang pinahan.

¹¹Tarbege dope sogot disi soara olopolop dohot soara las ni roha, soara ni pangoli dohot soara ni oroan, soara ni angka na mandok:

Puji ma Jahowa Zebaot, ai pardengganbasa do Jahowa, ai ro di saleleng ni lelengna do asi ni rohana! Tole muse soara ni halak na mamboan pelean hamauliateon tu joro ni Jahowa; ai ahu ma manogihon mulak sogot halak angka na tarbuang sian tano on, gabe suang songon di mulana, ninna Jahowa.

¹²Songon on do hata ni Jahowa Zebaot: Adong dope sogot di inganan on, na tarulang nuaeng, so marisijolma nanggo sahalak manang pinahan, jala di bagasan saluhut hutana adong muse pondokpondok ni parmahan, angka na paulonbirubiruna disi.

¹³Tole di bagasan huta angka na di dolok, tole di bagasan huta angka na di pea dohot di bagasan huta angka na tungkan dangsina dohot di tano Benjamin dohot humaliang Jerusalem dohot di bagasan angka huta ni Juda, mamolus dope sogot birubiru angka na niadu ni halak na mamilangi, ninna Jahowa.

¹⁴(II.) Ida ma, na ro do angka ari sogot, ninna Jahowa, ahu ma pasintongkon disi hata na denggan i naung huparbagabaga i taringot tu pinompar ni Israel dohot taringot tu pinompar ni Juda.

¹⁵Di angka ari i dohot di tingki i ahu ma patubuhon di si Daud sada tumbur hatigoran, ibana ma mangkajongjongkon uhum dohot hatigoran di tano on.

¹⁶Di angka ari i ma dapotan tua Juda jala marsonangsonang isi ni Jerusalem

maringanan, jala on do goarna dohonon ni halak: Jahowa parpintoranta.

¹⁷Ai songon on do hata ni Jahowa: Na so tupa tos sian si Daud baoa na hundul di habangsa ni pinompar ni si Israel.

¹⁸Angka malim pe dohot halak Lepi na so tupa tos sian adopanku baoa angka na mamelehon pelean situtungon dohot na manutung pelean sipanganon dohot na marhobas pelean sipotongon ariari.

¹⁹(III.) Dung i ro muse ma hata ni Jahowa tu si Jeremia ninna do:

²⁰Songon on do hata ni Jahowa: Tung sura mansohot bahenonmuna aturan na hubahen i taringot tu arian dohot taringot tu borngin, gabe ndang be masa arian dohot borngin di tingkina be.

²¹Mansadi ma dohot padanhu tu si Daud naposongki, ndang adong be di ibana anak na bangkit raja hundul di habangsana, mansohot dohot tu halak Lepi, nang tu angka malim, angka na marhalado di ahu.

²²Songon parangan angka na lohok di langit, angka na so tarbilang dohot horsik ni laut na so hasuhatan, suang songon i do patoroponku pinompar ni si Daud naposongki dohot halak Lepi angka parhalado di ahu.

²³Dung i ro muse hata ni Jahowa tu si Jeremia songon on:

²⁴Atehe ndang diparateatehon ho na nidok ni bangso on: Na dua marga na pinillit ni

Jahowa hian, nunga dibolongkon muse? Jadi marhu ni roha nasida mida bangsongku, hira na so bangso be bilangan di rohanasida.

²⁵ Songon on do hata ni Jahowa: Tung sura sohot padan na hubahen i taringot tu arian dohot borngin, sohot dohot aturan na hubahen i taringot tu patikpatik tu langit dohot tano on.

²⁶ Ambolong ma bahenonku dohot pinompar ni si Jakkob dohot si Daud, naposongki, asa unang be buaton sian pinomparna bahen pangarajai di pinompar ni si Abraham, si Isak dohot si Jakkob. Ai mulak do togihononku angka na tarbuang sian nasida, jala marpangulahi rohangku mida nasida.

34¹ (I.) On do hata na ro tu si Jeremia sian Jahowa, uju si Nebukadnesar, raja sian Babel, ro di sandok paranganna dohot saluhut harajaon ni tano on na masuk tu gomgomanna ro di saluhut bangso, marporang dampak Jerusalem dohot dampak saluhut hutana, ninna do:

² Songon do hata ni Jahowa, Debata ni Israel: Laho ma ho, jala lumbahon tu si Sedekia raja ni Juda, jala dok ma tu ibana: Songon on do hata ni Jahowa: Ida ma, ahu ma pasahathon huta on tu tangan ni raja sian Babel, asa surbuonna dohot api.

³ Ho pe ndang tagamon malua sian tanganna, ingkon tartangkup ho jala sahat tu tanganna, jala adop mata be masiberengan

ho dohot raja sian Babel, jala pamanganna tu pamanganmu mangkatai jala ingkon tarboan ho tu Babel.

⁴Alai tangihon huhut hata ni Jahowa, ale Sedekia, raja ni Juda! Songon on do hata ni Jahowa taringot tu ho: Ndang mate ho ianggo marhitehite podang.

⁵Ingkon marsonangsonang ho mate, jala songon na binahenna tu angka ompumu, angka raja di na robi, angka na jumolo sian ho, suang songon i tutungonna pamurunan pasangap ho, jala andunganna ho: Iale Tuhan! Ai i do hata na hulumbahon hian, ninna Jahowa.

⁶Jadi dipatolhas panurirang Jeremia ma saluhut hata i tu si Sedekia, raja ni Juda di Jerusalem.

⁷Uju parangan ni raja sian Babel marmusu dampak Jerusalem dohot dampak saluhut huta ni Juda angka na teba i, dampak Lakis dohot dampak Azeka ai i do na teba sian huta ni Juda angka na gantingi.

⁸(II.) On do hata na ro tu si Jeremia sian Jahowa, dung dibahen raja Sedekia parjanjian tu sandok bangso i na di Jerusalem maningtingkon tu nasida haluaon.

⁹Ingkon ganup paluahon naposona baoa dohot naposona boruboru, marga Heber, asa unang adong manang ise na marhatobanhon donganna Jahudi.

¹⁰Jadi mangoloi be ma saluhut induk dohot sandok bangso i angka na masuk tu parjanjian i, ganup do paluahon naposona baoa dohot naposona boruboru, asa unang be diparhatoban nasida; mangoloi be ma tutu nasida paluahon.

¹¹Alai hosing muse rohanasida, laos mulak muse diboan angka naposo baoa dohot parompuan, angka naung pinaluana i, jala dipaksa nasida muse gabe naposo baoa dohot parompuan.

¹²Ala ni ro muse ma hata ni Jahowa tu si Jeremia, ninna do:

¹³Songon on do hata ni Jahowa, Debata ni Israel: Nunga ahu mambahen sada parpadanan tu ompumuna, uju ahu manogihon nasida ruar sian tano Misir, sian bagas pangadopan, songon on:

¹⁴Ganup papitutaonhon, ingkon ganup hamu paluahon donganna marga Heber, naung manggadishon dirina tu ho; ingkon onom taon lelengna pangulahononna ho, dung i paluaonmu boti ibana sian lambungmu. Hape ndang ditangihon ompumuna ahu jala ndang ditarehon pinggolna.

¹⁵Alai nunga muba ianggo rohamuna sadarion, jala nunga dibahen hamu na sintong di rohangku, naung ditingtingkon hamu haluaon ganup tu donganna, jala naung dibahen hamu parpadanan di jolongku di bagasan bagas na targoar tu goarhu.

¹⁶Alai nunga hosing muse rohamuna, gabe diramuni hamu goarhu, jala mulak diboan hamu ganup naposona baoa dohot naposona boruboru, angka naung pinaluamuna boti marguru tu rohanasida gabe marhata ingkon hamu tu nasida sumuang gabe naposomuna baoa dohot parompuan muse.

¹⁷Dibahen i songon on do hata ni Jahowa, ndang ditangihon hamu ahu laho maningtingkon haluaon ganup tu donganna dohot tu pedanna. Ida ma ahu ma maningtingkon haluaon tu hamu, ninna Jahowa, mandokkon ro podang, begu antuk dohot haraparon, jala ahu pasahathon hamu gabe siruparupaon ni saluhut harajaon di tano on.

¹⁸Jala ahu pasahathon baoa, angka na mangalaosi padan na hubahen i, angka na so mangkajongjongkon hata ni padani, naung binahennasida i di jolongku, gabe doshon anak ni lembu naung bola dua binahennasida i, jala mamolus nasida sian tongatonga ni ponggolpongolna i:

¹⁹Tole angka induk ni Juda dohot angka induk ni Jerusalem, tole muse angka partohonan di jabu ni rajai dohot angka malim ro di sandok bangso ni tano i, angka na mamolus sian tongatonga ni anak ni lembu i.

²⁰Tongon do, pasahatonku ma nasida tu tangan ni musunasida dohot tu tangan ni halak na tumahi hosanasida, jala

bangkenasida ingkon gabe sipanganon ni pidong angka na martongatonga langit dohot binatang na di harangan.

²¹ Si Sedekia pe raja sian Juda dohot induk angka na pinabangkitna i pasahatonku ma tu tangan ni musunasida dohot tu tangan ni halak na tumahi hosanasida dohot tu tangan ni parangan ni raja sian Babel, angka naung muli nian sian hamu.

²² Ida ma, ahu do martona, ninna Jahowa, jala ahu manogihon nasida mulak mandopang huta on, gabe musuanna jala tabanonna jala surbuonna dohot api; angka huta di Juda pe tarulang do bahenonku, asa unang adong be pangisina.

35¹ (I.) On do hata na ro tu si Jeremia sian Jahowa, uju di angka ari ni si Joiakim; anak ni si Josia, raja sian Juda, songon on:

² Laho ma ho tu bagas ni pinompar ni si Rekab mangkatai dohot nasida, jala togihon nasida tu joro ni Jahowa tu sada sian angka bilut i jala lehon tu nasida tuak anggur inumonna.

³ Jadi huboan ma si Jaasmia, anak ni si Jeremia, tubu ni si Habassinia ro di angka hahaanggina dohot saluhut anakna dohot sandok pinompar ni si Rekab.

⁴ Dung i hutogihon nasida tu bagasan joro ni Jahowa, tu bagasan bilut ni angka anak ni si Hanan, tubu ni si Igdalit halak ni Debata, na

di lambung ni bilut ni angka induk, di ginjal
ni bilut ni si Maaseia, anak ni si Sallum, sijaga
lobulobu.

⁵Dung i hupeakhon ma di jolo ni angka anak
ni pinompar ni si Rekab angka panginum
gok marisi tuak anggur dohot angka supak,
laos hudok ma tu nasida: Minum anggur ma
hamu!

⁶Alai ninna angka nasida ma: Nandang
tagamon minum anggur hami, ai tona ni si
Jonadab, anak ni si Rekab amanami tu hami
songon on: Unang hamu minum anggur, nang
anakmuna ro di salelenglelengna!

⁷Jala unang hamu pauli bagas, manang
manaburhon boni, manang umpungka porlak
anggur pe, manang umpeop angka sisongon
i; ingkon maringan hamu di undungundung
saleleng hamu mangolu, asa lelung hamu
mangolu di tano paisolatanmunai.

⁸Jadi huoloi hami ma soara ni si Jonadab,
anak ni si Rekab, amanami, taringot tu
saluhut na tinonahonna tu hami, ndang dung
minum anggur hami, saleleng mangolu, nang
hami, nang jolmanami nang anaknami, nang
borunami.

⁹Jala ndang hupauli hami angka bagas
bahen inganannami, porlak anggur pe
manang hauma, manang boni ndang adong
di hami.

¹⁰Maringan di undungundung do hami tahe,
huoloi hami jala hubahen hami do hombar tu

saluhut na tinonahon ni si Jonadab, amanami, tu hami.

¹¹ Alai dung nangkok si Nebukadnesar, raja sian Babel manola tano on gabe hudok hami ma: Beta hita laho tu Jerusalem maradophon parangan ni halak Kasdim dohot maradophon parangan ni halak Ram, gabe maringan di Jerusalem hami nuaeng.

¹² (II.) Dung i ro muse ma hata ni Jahowa tu si Jeremia, ninna do:

¹³ Songon on do hata ni Jahowa Zebaot Debata ni Israel: Laho ma ho jala sungkunhon ma tu halak Juda dohot tu isi ni Jerusalem: Atehe ndang olo hamu manjalo pangajaron laho tumangihon angka hatangku? ninna Jahowa.

¹⁴ Gari hata ni si Jonadab, anak ni si Rekab, angka na tinonahonna tu anakna, asa unang nasida minum anggur, dihajongjongkon nasida do; ai rasirasa sadarion ndang dung nasida minum anggur, ai ditangihon nasida do tona ni amanasida i. Alai anggo ahu tibu hian do hudok hatangku tu hamu, alai ndang ditangihon hamu ahu.

¹⁵ Hupansuruhon muse tu hamu saluhut naposongku, angka panurirang i, tibu hian hudatdati marsuru mandok tu hamu: Sai mulak ma hamu ganup sian dalanna na jahat i jala padenggan hamu angka pambahenanmuna i, jala unang hamu mangihuthon angka debata sileban laho

marsomba tusi, asa hot hamu di tano na hubasabasahon tu hamu dohot tu ompumuna. Alai ndang ditarehon hamu pinggolmuna jala ndang ditangihon hamu ahu.

¹⁶Ala na hinajongjongkon ni angka anak ni si Jonadab, anak ni si Rekab tona ni amanasida i, na tinonahonna tu nasida, hape anggo bangso on ndang ditangihon ahu.

¹⁷Dibahen i songon on do hata ni Jahowa, Debata Zebaot, Debata ni Israel: Ida ma, ahu parohon tu Juda dohot tu saluhut isi ni Jerusalem sandok jea naung hulumbahon hian tu nasida, ala na hudok hatangku tu nasida, hape ndang ditangihon nasida, jala hujou do nasida hape ndang olo nasida mangalusi.

¹⁸Alai anggo tu pinompar ni si Rekab didok si Jeremia do: Songon on do hata ni Jahowa Zebaot, Debata ni Israel: Ala na tinangihonmuna tona ni si Jonadab, amamuna i, jala diradoti hamu saluhut tonana, jala dipatupa hamu saluhut hombar tu na tinonahonna tu hamu.

¹⁹Dibahen i, songon on do hata ni Jahowa Zebaot, Debata ni Israel: Na so tupa tos adong baa di si Jonadab, anak ni si Rekab jongjong marhalado tongtong di jolongku.

36¹(I.) Dung i paopattaonhon hinarajaon ni si Joiakim, anak ni si Josia raja sian Juda, ro ma hata on tu si Jeremia sian Jahowa.

²Buat ma di ho sabalunan laklak, jala surathon ma tusi saluhut hata, angka na huhatahon tu ho taringot tu Israel, taringot tu Juda dohot taringot tu saluhut bangso parbegu, olat ni ari dung ahu mangkatahon tu ho, olat ni angka ari ni si Josia rasirasa sadarion.

³Anggiat tung ditangihon pinompar ni si Juda saluhut jea na husangkap bahenonku tu nasida, asa anggiat mulak nasida ganup sian dalanna na jahat i, jala marpamuati rohangku mida hajahatonnasida dohot mida dosanasida i.

⁴Jadi dijou si Jeremia ma si Baruk, anak ni si Neria. Dung i disurathon si Baruk ma, diaturhon si Jeremia saluhut hata ni Jahowa, angka na pinaboana tu ibana, tu sada balunan laklak.

⁵Dung i ditonahon si Jeremia ma tu si Baruk songon on: Tarsabat do anggo ahu, ndang tarbahen ahu bongot tu joro ni Jahowa.

⁶Dibahen i ho ma laho tusi manjaha hata ni pustaha i, na sinurathonmu, angka na huaturhon i, i ma angka hata ni Jahowa tu pinggol ni bangso i di bagasan joro ni Jahowa jumpa ari puasa, nang tu pinggol ni saluhut halak Juda, angka na ro sian hutana be, ingkon jahaonmu do i.

⁷Anggiat tung sahat tangiangnasida tu jolo ni Jahowa, asa mulak nasida ganup sian dalanna na jahat i, ai tung na balga do muruk

dohot rimas, naung nilumbahon ni Jahowa tu bangso on.

⁸Jadi dibahen si Baruk, anak ni si Neria ma, hombar tu saluhut na tinonahon ni panurirang Jeremia tu ibana, dijaha ma sian buku i angka hata ni Jahowa di bagasan joro ni Jahowa.

⁹Dung i palimataonhon hinarajahon ni si Joiakim, anak ni si Josia, raja sian Juda, di bulan sipahasia, ditingtingkon ma sada ari parpuasaon di jolo ni Jahowa tu sandok bangso di Jerusalem dohot tu sude angka na ro sian angka huta ni Juda tu Jerusalem.

¹⁰Jadi dijaha si Baruk ma sian buku i angka hata ni si Jeremia, di bagasan joro ni Jahowa, di bilut ni si Gemaria, anak ni si Sapan, juaratulis i di alaman parjulu, di pintu na imbaru di joro ni Jahowa, asa saluhut situasi na torop i umbegesa.

¹¹(II.) Jadi dung dibege si Mikha, anak ni si Gemaria, tubu ni si Sapan saluhut hata ni Jahowa sian buku i.

¹²Tuat ma ibana tu bagas ni rajai, boti tu bilut ni juaratulis, tongon hundul disi saluhut induk: si Elisama juaratulis i, si Delaia, anak ni si Semaya, si Elnatan anak ni si Akbor, si Gemaria anak ni si Sapan dohot si Sedekia, anak ni si Hanania ro di saluhut angka induk i.

¹³Jadi dibaritahon si Mikha ma tu nasida saluhut hata, angka na binegena uju jinaha ni si Baruk sian buku i tu pinggol ni na torop i.

¹⁴Dung i luhut angka induk i marsuru si Jehudi, anak ni si Netania tubu ni si Selemia, tubu ni si Etiopia manopot si Baruk mandok songon on: Pustaka na jinahami tu pinggol ni situasi na torop i ingkon boanonmu tuson. Jadi diboan si Baruk, anak ni si Neria ma pustaka i di tanganna mandapothon nasida.

¹⁵Dung i didok nasida ma tu ibana: Ua hundul ma ho jala jaha hata i tu pinggol nami. Jadi dijaha si Baruk ma tu pinggol nasida.

¹⁶Jadi dung dibege nasida saluhut hata i, tarsonggot ma nasida huhut masiberengan, angka didok ma tu si Baruk: Ingkon pabotohonon nami saluhut hata i tu rajai.

¹⁷Laos disungkun nasida ma si Baruk i: Sai paboa ma tu hami manang songon dia panurathonmu di saluhut hata i sian pamanganna?

¹⁸Jadi ro ma alus ni si Baruk tu nasida: Pamanganna mangaturhon tu ahu hata i luhut, gabe husurathon tu buku i dohot maksi.

¹⁹Dung i ninna angka induk i ma tu si Baruk: Laho ma ho martabuni rap dohot si Jeremia, asa unang diboto manang ise ingananmuna i.

²⁰Dung i bongot ma nasida tu emper ni bagas ni rajai; alai anggo pustaka i nunga dipajop hian di bilut ni si Elisama, juaratulis i, gabe dipabotohon ma tu rajai hata i luhutna.

²¹(III.) Dung i disuru rajai ma si Jehudi mangalap pustaka i. Saut ma diboan ibana

pustaha i sian bilut ni si Elisama, juaratulis i, laos dijaha si Jehudi do tu pinggol ni rajai dohot tu pinggol ni saluhut induk angka na jongjong di lambung ni rajai.

²²Alai hundul do ianggo rajai di bagasan jabuna tongon partaonan ngali, di bulan sipahasia, jala pansusuduan di jolona marsigorgor.

²³Ia dung tolhas dijaha si Jehudi tolu lompit manang opat, jalo diseati dohot raut pangarit jala direongkon tu api na di pansusuduan i, paima suda sandok pustaha i dipangan api na di pansusuduan i.

²⁴Ndang adong manang ise pola tarsonggot alani, jala ndang disansani pangkeanna, nang rajai, nang saluhut naposona, angka na umbege saluhut hata i.

²⁵Pola diparrajarajai si Elnatan, si Delaia dohot si Gemaria rajai, asa unang dipurun nian pustaha i, alai ndang ditangihon rajai hatanasida i.

²⁶Lam didokkon rajai Jerahmeel, anak ni rajai, dohot si Seraia, anak ni si Asriel, dohot si Selemia, anak ni si Abdiel asa ditangkup si Baruk juaratulis i dohot panurirang Jeremia. Alai nunga ditabunihon Jahowa nasida na dua i.

²⁷(IV.) Dung i ro muse ma hata ni Jahowa tu si Jeremia, dung sun dipurun rajai balunan i ro di hata angka na sinurathon ni si Baruk niaturhon ni si Jeremia, mandok songon on.

²⁸Ulahi ma buat di ho balunan na asing sada jala surathon tusi saluhut angka hata parjolo i, angka na di balunan parjolo i, naung pinurun ni si Joiakim raja sian Juda.

²⁹Jala taringot tu Joiakim raja sian Juda, dohononmu ma: Songon on do hata ni Jahowa: Nunga tung dipurun ho balunan i, nimmu do: Boasa tung surathononmu tusi: Ingkon ro sogot raja sian Babel, jala agoonna tano on, jala pansingkononna sian i jolma ro di pinahan?

³⁰Dibahen i songon on do hata ni Jahowa taringot tu si Joiakim raja sian Juda: Ndang adong pinomparna nanggo sahalak na tau hundul di habangsa ni si Daud; jala ingkon ambolong bangkena, dadangon ni ari arian jala hona ngali ni ari bornginna i.

³¹Jala luluhononku tu ibana dohot tu pinomparna dohot tu angka naposona hajahatonnasida i, jala paroonku tu nasida dohot tu isi ni Jerusalem dohot tu baa angka sian Juda saluhut jea angka naung hulumbahon hian tu nasida, hape ndang ditangihon nasida.

³²Dung i dibuat si Jeremia ma sada balunan na asing jala dilehon tu si Baruk, anak ni si Neria, juaratulis i; disurathon ibana muse tusi niaturhon ni si Jeremia saluhut hata ni pustaha i naung pinurun ni si Joiakim, raja sian Juda di bagasan api, jala ditambahi dope tusi torop hata sisongon i.

37 ¹ (I.) Jadi bangkit raja ma si Sedekia anak ni si Josia bahen ganti ni si Jekonya, anak ni si Joiakim, na pinabangkit ni si Nebukadnesar, raja sian Babel, gabe raja di tano Juda.

² Alai nang ibana, nang angka naposona, nang isi ni luat i, ndang ditangihon nasida hata ni Jahowa, angka naung nilumbahonna marhitehite panurirang Jeremia.

³ Jadi disuru raja Sedekia ma si Jukhal, anak ni si Selemia dohot malim Sepania, anak ni si Maaseia, manopot panurirang Jeremia mandok songon on: Ua tangiangkon ma hami tu Jahowa Debatanta i.

⁴ Alai marneang muli dope si Jeremia uju i di tongatonga ni situan na torop, jala ndang dope ibana dipamasuk tu hurungan.

⁵ Alai nunga borhat parangan ni Firaun sian Misir; jadi dung dibege halak Kasdim angka na martungkum Jerusalem barita i, muli boti ma nasida sian Jerusalem.

⁶ Dung i ro ma hata ni Jahowa tu panurirang Jeremia ninna do:

⁷ Songon on do hata ni Jahowa, Debata ni Israel: Songon on do dohononmuna tu raja ni Juda, na marsuru hamu manungkunhon tu ahu: Ida ma, parangan ni Firaun, naung borhat manumpak hamu nian, mulak do i tu Misir tanona i.

⁸Alai ulahan ni halak Kasdim ma ro marmusu dompak huta on, jala tabanonna laos surbuonna dohot api.

⁹Songon on do hata ni Jahowa: Unang paotooto hamu rohamuna sandiri mandok songon on: Laos muli situtu nama halak Kasdim sian hami; hape ndang tutu nasida muli.

¹⁰Ai tung sura pe naung dibunu hamu sandok parangan ni halak Kasdim angka na marmusu dompak hamu, hape tading sian nasida baoa angka na mabugang, ganup di undungundungna be, sai na hehe do nasida jala surbuonna huta on dohot api.

¹¹(II.) Jadi dung muli parangan ni halak Kasdim sian Jerusalem maradophon parangan ni Firaun.

¹²Jadi ruar ma si Jeremia sian Jerusalem, naeng laho tu tano Benjamin nian, asa disi marpartalian di tongatonga ni situasi na torop.

¹³Jadi dung sahat ibana tu harbangan Benjamin, adong ma disi sada induk ni parhal na margoar si Jeria, anak ni si Selemia, tubu ni si Hanania; i ma manangkup panurirang Jeremia, ninna ma: Naeng bali tu halak Kasdim do ho!

¹⁴Alai ninna si Jeremia ma mangalusi: Gasa do i, ndang naeng bali ahu tu halak Kasdim; alai ndang ditangihon ibana hatana i, lam ditangkup si Jeria do si Jeremia, laos diboan ibana tu jolo ni angka induk.

¹⁵ Jadi tarrimas situtu ma angka induk i mida si Jeremia, pola dilinsingi nasida ibana jala dibahen ibana tu hurungan na di bagas ni si Jonatan, juaratulis i, ai ido bagas hurungan dibahen nasida.

¹⁶ I ma dalanna umbahen, masuk si Jeremia tu hurungan, tu angka bilut partoru, gabe nania leleng Jeremia hundulhundul disi.

¹⁷ (III.) Dung i disuru raja Sedekia ma suruanna mangalap ibana, jala marsibuni rajai manungkun ibana di bagasan jabuna, ninna ma: Atehe, adong do hata sian Jahowa? Jadi ninna si Jeremia ma: Adong do! Laos didok ma: Sai na sahat do ho tu tangan ni raja sian Babel.

¹⁸ Dung i ninna si Jeremia muse ma tu raja Sedekia: Aha do dosangku dompak ho manang dompak angka naposom, manang dompak bangso on, umbahen dipamasuk hamu ahu tu hurungan?

¹⁹ Jala didia do panurirangmuna angka na manurirangkon tu hamu songon on: Tung na so tagamon ro raja sian Babel dompak hamu manang dompak tano on?

²⁰ On pe, ua tangihon ale rajanami! Sai sahat ma pangidoanku tu jolomi, jala unang mulak ahu bahen tu jabu ni si Jonatan juaratulis i, asa unang mate ahu disi.

²¹ Jadi didokkon raja Sedekia ma jagaonnasida si Jeremia di bagasan emper ni parhalan, jala dilehon tu ibana sada roti

ganup ari sian alaman ni tukang roti, paima suda saluhut roti ni huta i. Laos tading anggo si Jeremia di emper ni parhalan i.

38¹ (I.) Alai sanga dibege si Sepatia, anak ni si Matan dohot si Gedalia anak ni si Pashur dohot si Jukhal anak ni si Selemia dohot si Pashur, anak ni si Malkia do saluhut hata, angka na hinatahon ni si Jeremia tu saluhut situasi na torop i, ninna do:

² Songon on do hata ni Jahowa: Manang ise na tading di huta on, ingkon mate ibana marhitehite podang, haraparon manang begu antuk; alai manang ise na ruar mandapothon halak Kasdim, mangolu ma ibana, jala di ibana hosana hira tabantabanna, gabe mangolu.

³ Ai songon on do hata ni Jahowa: Ingkon sahat huta on tu tangan ni parangan ni raja sian Babel, jala papatuonna.

⁴ Jadi ninna angka induk i ma tu rajai: Ua binunu ma baoa on, ai daukdauk do binahenna i tangan ni halak parporang, angka na tading di huta on, ro di tangan ni sandok situasi na torop i, di na hinatahonna tu nasida angka hata sisongon i. Ai ndada hasonangan ni bangso on na niluluan ni baoa i, hamagoanna i do.

⁵ Alai ninna raja Sedekia ma: Ida ma, di bagasan tanganmuna do ibana, ai ndang tarbahen rajai manang aha mangalo hamu.

⁶Dung i dibuat nasida ma si Jeremia; jala didabuhon ibana tu bagasan godung ni si Malkia, anak ni rajai, na di alaman ni parhalan i, jala ditantan nasida si Jeremia dohot tali tu toru. Alai ndang adong aek di bagasan godung i gambo sambing do, gabe lonsot si Jeremia tu bagasan gamboi.

⁷(II.) Jadi dung dibege si Ebedmelek, marga Kus halak naposo di bagasan jabu ni rajai, naung pinaijur nasida si Jeremia tu bagasan godung.

⁸Jadi ruar ma si Ebedmelek sian bagas ni rajai, jala ninna ma tu rajai songon on:

⁹Ale tuan rajanami! Na jahat do pambahen ni angka halak on di saluhut na binahennasida tu panurirang Jeremia na nidabuna i ibana tu bagasan godung; ingkon mate anturaparon ibana disi, ai ndang adong be roti di huta i.

¹⁰Alai didokkon rajai ma si Ebedmelek, marga Etiopia, arahononna tolupulu halak bahen donganna, asa enetonna panurirang Jeremia sian godung i tu ginjang, tagan so mate dope ibana.

¹¹Jadi diarahon si Ebedmelek ma angka baoa i bahen donganna jala bongot ibana tu jabu ni rajai tu toru ni bilut parugasanan jala dibuat sian i angka sigundal dohot ulos na maribak, jala ditantan tu si Jeremia tu bagasan godung i marhite angka tali.

¹²Dung i ninna si Ebedmelek, marga Etiopia ma tu si Jeremia: Ua lapikkon ma angka

sigundal i dohot ulos na maribahi tu toru ni gedekgedekmu, bahen lapik ni angka tali; jadi dibahen si Jeremia ma songon i.

¹³Jadi dienet nasida ma si Jeremia dohot tali sian godung i tu ginja; laos tading do si Jeremia di alaman ni parhalan i.

¹⁴(III.) Dung i disuru raja Sedekia ma suruanna mangalapi panurirang Jeremia tu lambungna, tu pintu haroroan patoluhon na di joro ni Jahowa. Dung i didok rajai ma tu si Jeremia: Adong do hata sada naeng sungkunonku tu ho, unang tung porso tu ahu agia aha.

¹⁵Jadi ninna si Jeremia ma mangalusi si Sedekia: Molo hupaboa tu ho, ndatung bunuonmu ahu? Jala molo marsipaingot tu ho, ndang tagamon tangihononmu ahu.

¹⁶Dung i marmangmang ma raja Sedekia tu si Jeremia di sihabunian, ninna ma: Songon sintongna mangolu Jahowa, na jumadihon tondinta i, na so tupa bunuonku ho, manang pasahatonku ho tu tangan ni halak on, angka na tumahi hosam.

¹⁷Dung i ninna si Jeremia ma tu si Sedekia: Songon on do hata ni Jahowa Zebaot, Debata ni Israel: Tung sura ruar ho mandapothon angka induk pinabangkit ni raja sian Babel, mangolu ma hosam, huta on pe ndang surbuonna dohot api, jala mangolu ma ho dohot isi ni bagasmu.

¹⁸Alai molo so ruar ho mandapothon induk angka na pinabangkit ni raja sian Babel, sai na sahat do huta on tu tangan ni halak Kasdim jala surbuonna dohot api, jala ndang tagamon malua ho sian tangannasida.

¹⁹Dung i ninna raja Sedekia ma tu si Jeremia: Mabiar do ahu mida halak Jahudi angka naung bali tu halak Kasdim, atik tung pasahatonna ahu tu tangannasida, gabe eleselesonnasida ahu maon.

²⁰Jadi ninna si Jeremia ma: Nandang tagamon pasahatonnasida ho. Sai tangihon ma soara ni Jahowa taringot tu naung hudok tu ho, asa marsonangsonang ho jala mangolu hosam.

²¹Alai molo tung manjua ho ruar, hata on do huhut naung pinapatar ni Jahowa tu ahu.

²²Ida ma, saluhut parompuan angka na tinggal dope di bagasan jabu ni raja sian Juda, ingkon togihononhon tu balian mandapothon induk angka na pinabangkit ni raja sian Babel, gabe dohononnasida ma: Nunga dipaotooto jala nunga dipatunduk angka baoa hasudungan ni roham ho; nunga lonsot tu bagasan gambo patmu, gabe manginsurut tu pudina sida.

²³Jala saluhut angka jolmam ro di angka anakmu togihononnasida ruar tu halak Kasdim, ho sandiri pe ndang tagamon malua sian tangannasida, ai pasahatonna do ho tu tangan ni raja sian Babel, huta on pe surbuonna do dohot api.

²⁴Jadi ninna si Sedekia ma tu si Jeremia:
Ndang jadi botoon ni manang ise angka hata
on, asa unang ho mate bunuon.

²⁵Alai molo tarbortik tu angka induk i naung
mangkatai ahu dohot ho, gabe ro nasida
tumopot ho jala didok mandok ho: Ua paboa
tu hami manang aha hinatahonmu tu rajai,
unang porso tu hami, ndang bunuonnami ho,
jala aha do na nidok ni rajai tu ho?

²⁶Ingkon dohononmu ma tu nasida:
Husombahon do pangidoanku tu jolo ni rajai,
asa unang diboan ahu mulak tu jabu ni si
Jonatan, laho mate disi.

²⁷Dung i ro ma saluhut angka induk
mandapothon si Jeremia, laos disungkuni
ibana, gabe dipaboa ibana tu nasida hombar
tu saluhut hata i, angka naung tinonahon ni
rajai tu ibana, jadi sip nasida tumadingkon
ibana, ai ndang dope sar hata i.

²⁸Jadi tading di alaman ni hurungan i
ma si Jeremia sahat ro di ari hatataban ni
Jerusalem.

39¹(I.) Dung i tartaban ma huta
Jerusalem. Pasiataonhon hinarajahon
ni si Sedekia, raja sian Juda, di bulan sipaha
sampulu, ro ma si Nebukadnesar, raja sian
Babel dohot sandok paranganna tu Jerusalem,
jala ditungkum huta i.

²Pasampulu sada taonhon hinarajahon ni
si Sedekia di bulan sipaha opat ari pasiahon
huta i dibongoti.

³Jadi masuk ma saluhut induk pinabangkit ni raja sian Babel laos juguk nasida mardonokkon harbangan partonga: si Nergal-Sareser, si Sumgar Nebo, si Sarsekim, sintua ni angka pangarajai, si Nergal-Sereser, sintua ni angka na pistar ro di saluhut induk na asing pinabangkit ni raja sian Babel.

⁴Jadi dung diida si Sedekia, raja sian Juda dohot sude halak parmusu nasida, gabe maporus ma nasida bornginna i sian huta i sian dalan tu porlak ni rajai boti tu bahal di holangholang ni na dua parik i, jala ruar sian dalan tu adaran.

⁵Alai dieak parangan ni halak Kasdim ma nasida sian pudi, jala dapotsa ditangkap si Sedekia di adaran Jeriko, laos diboan ma ibana tu jolo ni si Nebukadnesar, raja sian Babel tu Ribla, di luat Hamat, jala didabu uhumna tu ibana.

⁶Dung i diseati raja sian Babel ma angka anak ni si Sedekia di Ribla di adopan ni matana, ro di saluhut angka na raja sian Juda diseati raja sian Babel.

⁷Alai dipulsikkon do anggo mata ni si Sedekia jala dirante ibana dohot dua rante tombaga laho mamboan ibana tu Babel.

⁸Alai anggo bagas ni rajai dohot bagas ni situan na torop i disurbu halak Kasdim do dohot api jala angka parik ni Jerusalem dipanepnep do.

⁹Alai anggo pasipasi ni bangso i, angka na teba di huta i dohot angka na bali tu ibana dohot pasipasi ni bangso angka na teba i, diboan si Nebusaradan, sintua ni angka parangan do tarbuang tu Babel.

¹⁰Alai anggo sian situasi na torop, angka na pogos i, angka na so pardiadia, ditadingkon si Nebusaradan, sintua ni angka parangan i di tano Juda, jala dilehon tu nasida angka porlak anggur dohot hauma di na sadari i.

¹¹(II.) Dung i martona ma si Nebukadnesar, raja sian Babel marhitehite si Nebusaradan, sintua ni angka parangan i taringot tu si Jeremia songon on:

¹²Buat ma ibana jala marpanatap roham mida ibana, jala unang bahen tu ibana agia aha na jat, ingkon marguru sian hatana tu ho bahenonmu tu ibana.

¹³Jadi marsuru suruanna ma si Nebusaradan, sintua ni angka parangan dohot si Nebusaradan, sintua ni angka naposo dohot si Nergal-Sareser, sintua ni angka na pistar dohot saluhut sintua ni raja sian Babel.

¹⁴Disuru nasida ma mangalap si Jeremia sian alama ni hurungan i jala dipasahat ibana tu si Gedalia, anak i si Ahikam, tubu ni si Sapan laho manogihon ibana tu jabuna, laos maringan di tongatonga ni situasi na torop i ibana.

¹⁵ (III.) Nunga ro hian hata ni Jahowa tu si Jeremia uju tarhurung ibana di alaman ni hurungan i songon on:

¹⁶ Laho ma ho, paboa ma tu si Ebedmelek marga Etiopia: Songon on hata ni Jahowa Zebaot, Debata ni Israel: Ida ma, ahu pasintongkon angka hata lumbalumbangu tu huta on mambahen hamagoan, ndada mambahen hasonangan, jala apala di adopanmu do i songgop di na sadari i.

¹⁷ Alai paluaonku do anggo ho di ari na sasada i, ninna Jahowa, jala ndang jadi sahat ho tu tangan ni halak angka na hinabiaranmu.

¹⁸ Ai ingkon ahu sandiri paluahon ho, asa unang mate ho bahenon ni podang, jala ingkon malua hosam hira tabanmu, ala naung marhaposan ho tu ahu, ninna Jahowa.

40¹ (I.) On do hata naung ro tu si Jeremia sian Jahowa, dung dipalua si Nebusaradan, sintua ni angka parangan ibana sian Rama, uju na binoanna i ibana, tarihot do nang ibana dohot rante di tongatonga ni saluhut na tartangkup sian Jerusalem dohot Juda, asa tarboan nian tu Babel.

² Jadi dibuat sintua ni angka parangan ma si Jeremia jala ninna ma tu ibana: Nunga dilumbahon Jahowa Debatam hian hamagoan on tu huta on.

³ Nunga diparo jala dibahen Jahowa nuaeng hombar tu naung nilumbahonna i, ai nunga mardosa hamu dompak Jahowa jala ndang

ditangihon hamu soarana, umbahen na songgop sisongon i tu hamu.

⁴On pe, ida ma, nunga hupalua ho sadarion sian rante angka na di tanganmi; molo denggan di roham laho tu Babel rap dohot ahu ba beta, sai marpanatap pe rohangku mida ho; alai molo sogo roham laho tu Babel rap dohot ahu, ba unang. Ida ma, sandok tano i di jolomi, manang tudia denggan jala tongon di roham denggan tusi ho laho.

⁵Alai ndang dope mangalusi ibana nunga didok muse: Mulak ma ho tu si Gedalia, anak ni si Ahikam, tubu ni si Sapan, naung pinabangkit ni raja sian Babel gumomgom angka huta ni Juda jala maringan ma ho di lambungna, di tongatonga ni situasi na torop i, alai tahe manang dompak dia tongon ni roham, tusi ma topot. Dung i dilehon sintua ni parangan i ma tu ibana bohal dohot silua, jala diloas ibana laho.

⁶Jadi sahat ma si Jeremia tu si Gedalia, anak ni si Ahikam, tu Mispa, laos maringan di lambungna, di tongatonga ni situasi na torop i angka na tading di tano i.

⁷(II.) Jadi dung dibege saluhut induk ni parangan i, angka na di ladang ro di angka parangannasida, naung pinabangkit ni raja sian Babel si Gedalia, anak ni si Ahikam, gumomgom tano i jala naung pinasahatna tu ibana angka baa dohot parompuan ro di

dakdanak dohot sian halak angka na lea di tano i, angka na so tarboan tu Babel.

⁸Jadi ro ma nasida mandapothon si Gedalia tu Mispa: si Ismael, anak ni si Netania dohot si Johanan dohot si Jonatan, angka anak ni si Karea dohot si Seraia, anak ni si Tanhumet dohot angka anak ni si Epah, sian huta Netopa i dohot si Jersania, anak ni sada halak Maaka i, nasida dohot angka parangannasidai.

⁹Dung i marmangmang ma si Gedalia anak ni si Ahikam tubu ni si Sapan tu nasida dohot tu angka parangannasidai ninna ma: Unang hamu mabiar mangoloi patu tu halak Kasdim, inganhon hamu ma tano i jala oloi hamu raja sian Babel, asa marsonangsonang hamu.

¹⁰Alai anggo ahu, ida ma, maringan di Mispa do, asa jongjong di jolo ni halak Kasdim angka na ro manopot hita, alai anggo hamu, papungu hamu ma anggur dohot parbue ni hau dohot miak jala bahen hamu ma i tu bagasan inganan pineopna i, jala maringan ma hamu di bagasan hutamuna angka na sinolukmuna i.

¹¹Nang saluhut halak Jahudi, angka na di Moab dohot di tongatonga ni halak Amon dohot di Edom dohot na di saluhut luat angka na asing, dung dibege barita i naung tinadingkon ni raja sian Babel pasipasi di Juda, jala naung pinabangkitna i si Gedalia anak ni si Ahikam tubu ni si Sapan gumomgom nasida.

¹²Jadi mulak ma saluhut Jahudi sian saluhut inganan parserahannasida i, jala ro nasida tu tano Juda mandapothon si Gedalia tu Mispa jala dipapungu nasida anggur dohot parbue ni hau mansai godang.

¹³(III.) Ro ma dohot si Johanan anak ni si Karea dohot saluhut induk ni angka parangan na di balian mandapothon si Gedalia tu Mispa.

¹⁴Angka ninna nasida ma tu ibana: Atehe ndang diboto ho naung disuru si Baalis, raja ni halak Amon, si Ismael, anak ni si Netania laho mambunu ho, alai ndang porsea si Gedalia, anak ni si Ahikam di hatanasida i.

¹⁵Jadi ninna si Johanan, anak ni si Karea tu si Gedalia di sihabunian di Mispa songon on: Ua laos ma ahu laho, asa hubunu si Ismael, anak ni si Netania, so botobotoan ni manang ise; boasa tagonan bunuonna hosam, asa mampar saluhut halak Jahudi, angka naung marpungu tu lambungmi, gabe mago pasipasi ni Juda maon?

¹⁶Alai ninna si Gedalia, anak ni si Ahikam ma tu si Johanan, anak ni si Karea: Sitongka bahenonmu songon i, ai sipaotooto do na pinaboam taringot tu si Ismael.

41 ¹(I.) Jumpang papitubulanhon ro ma si Ismael anak ni si Netania, tubu ni si Elisama sian pinompar ni rajai rap dohot angka induk pinabangkit ni rajai udur, dohot sampulu halak mandapothon si Gedalia, anak

ni si Ahikam, tu Mispa, jala rap mangan sagusagu nasida disi di Mispa.

²Dung i hehe ma si Ismael anak ni si Netania dohot na sampulu halak angka donganna i, gabe dibunu nasida si Gedalia, anak ni si Ahikam, tubu ni si Sapan marhitehite podang, gabe mate ibana naung pinabangkit ni raja sian Babel gumomgom luat i.

³Dibunu si Ismael huhut saluhut halak Jahudi angka dongan ni si Gedalia di Mispa, ro di halak Kasdim angka na jumpangsa disi, angka halak parmusu.

⁴Jadi paduaarihon, dung binununa si Gedalia, laos so botobotoan ni manang ise dope.

⁵Ro ma angka baoa sian Sikem, sian Silo dohot sian Samaria, ualupulu halak toropna, angka na targorbang misena jala na sinansanan pangkeanna jala na nirarik dagingna jala pelean sipanganon dohot daupa di bagasan tangannasida laho mamboan tu joro ni Jahowa nian.

⁶Jadi ruar ma si Ismael, anak ni si Netania, sian Mispa, manjumpangkon nasida, mardalandalan huhut tumatangis. Jadi dung pajumpang nasida, ninna ma mandok nasida: Beta hita manopot si Gedalia anak ni si Ahikam!

⁷Alai dung sahat nasida tu tongatonga ni huta i, diseati si Ismael, anak ni si Netania

ma nasida, laos direongkon tu godung, ibana dohot angka baoa donganna i.

⁸Alai jumpang do sampulu baoa di tongatonganasida angka na mandok tu si Ismael: Sai unang hami bunu, ai adong do di hami arta angka na buni di ladang, angka eme, miak dohot situak ni loba. Jadi melok rohana, ndang dibunu anggo nasida rap dohot hahaangginasida i.

⁹Ia godung panimpalan ni saluhut bangke ni angka baoa, angka na binununa i, di lambung ni si Gedalia, i ma godung na binahen ni raja Asa maradophon si Baesa raja sian Israel; i ma na ginohan ni si Ismael, anak ni si Netania dohot halak angka na mate tartullang.

¹⁰Laos diboan si Ismael do sandok pasipasi ni bangso i na di Mispa: Angka boru ni rajai ro di sandok situan na torop na tinggal di Mispa, na pinasahat ni si Nebusaradan, sintua ni angka parangan i tu si Gedalia, anak ni si Ahikam; saluhut nasida diboan si Ismael, anak ni si Netania, laos laho ibana taripar tu halak Amon.

¹¹(II.) Jadi dung dibege si Johanan, anak ni si Karea ro di sude induk ni parangan donganna i, saluhutna hajahaton, na binahen ni si Ismael, anak ni si Netania.

¹²Diarahon nasida ma saluhut parangan, asa laho marmusu dompak si Ismael, anak ni si Netania, jadi dapot nasida ma ibana mardonokkon aek godang na di Gibeon.

¹³Jadi dung diida sandok bangso dongan ni si Ismael, si Johanan, anak ni si Karea, ro di saluhut induk ni parangan donganna i, las ma rohanasida.

¹⁴Jala sandok bangso na binoan ni si Ismael sian Mispa, marbalik muse laho mulak mandapothon si Johanan, anak ni si Karea.

¹⁵Alai anggo si Ismael, anak ni si Netania, sanga do maporus rap dohot ualu halak maradophon si Johanan, gabe laho ibana mandapothon halak Amon.

¹⁶(III.) Dung i diarahon si Johanan, anak ni si Karea dohot saluhut induk ni parangan donganna i ma sandok pasipasi ni bangso i, na mulak binoanna sian si Ismael, anak ni si Netania, sian Mispa, dung binununa si Gedalia, anak ni si Ahikam: Baoa angka na somal marmusu, angka parompuan dohot dakdanak ro di naposo, angka na mulak binoanna sian Gibeon.

¹⁷Jadi laho ma nasida laos marsaro di ambatan Kim Kana mardonokkon. Betlehem, asa borhat nasida mardalan tu Misir.

¹⁸Maradophon halak Kasdim, ala biarna mida nasida, ala naung binunu ni si Ismael, anak ni si Netania si Gedalia anak ni si Ahikam, naung pinabangkit ni raja sian Babel gumomgom luat i.

42¹(I.) Dung i ro ma jumonok saluhut induk ni parangan i, i ma si Johanan, anak ni si Karea dohot si Jersania, anak ni si

Hosaya ro di sandok situasi na torop i, sian na metmet ro di na magodang.

²Angka didok nasida ma tu panurirang Jeremia: Sai sahat ma pangidoannami tu jolomi, jala tangiangkon hami tu Jahowa debatam tangiangkon dohot sandok angka na teba on, ai otik nama hami teba sian na deak hian, songon na niida ni matam hami on.

³Asa dipaboa Jahowa Debatam di hami dalam sidalanannami dohot hata sibahenonnami.

⁴Jadi ninna panurirang Jeremia ma tu nasida: Nunga hubege hata i! Ida ma, martangiang ma ahu tu Jahowa, Debatamuna, hombar tu hata pangidoanmuna i; jala sandok hata sialushonon ni Jahowa tu hamu, paboaonku do tu hamu, ndang porsoonku nanggo hata sandok maradophon hamu.

⁵Dung i ninna nasida ma tu si Jeremia: Ingkon Jahowa do sitindangi na bonar jala na sintong dompak hami, tung sura so hubahen hami hombar tu saluhut hata na tinongoshon ni Jahowa Debatam tu ho taringot tu hami.

⁶Manang na denggan manang na roa pe, ingkon tangihononnami do soara ni Jahowa Debatanami, umbahen husuru hami ho manopot ibana, asa anggiat marsonangsonang hami ala na hutangihon hami soara ni Jahowa, Debatanami.

⁷(II.) Alai dung salpu sampulu ari ro muse ma hata ni Jahowa tu si Jeremia.

⁸Jadi dijou si Jeremia ma si Johanan, anak ni si Kareia dohot saluhut induk ni parangan donganna i, ro di sandok situasi na torop i, sian na metmet ro di na magodang.

⁹Laos didok ma tu nasida: Songon on do hata ni Jahowa, Debata ni Israel, na hutopot sinurumuna i laho pasahathon tangiangmuna i tu jolona:

¹⁰Molo hot hamu maringan di tano on, sai hot hamu tumpahanku, ndada lohaonku, ingkon suananku ma hamu, ndada butbutonku, ai marpangulahi do rohangku taringot tu hamagoan naung hubahen i tu hamu.

¹¹Unang hamu mabiar maradophon raja sian Babel, na hinabiaranmuna na sai laon. Unang hamu mabiar mida ibana, ninna Jahowa, ai ahu do donganmuna laho mangurupi hamu dohot paluahon hamu sian tanganna.

¹²Jala ahu marbasabasahon tu hamu asi ni roha, asa marasi ni roha ibana mida hamu, jala mulak hamu boanonna tu tanomuna.

¹³Alai tung sura dohononmuna: Nandang olo hami tading di tano on! Nandang olo hamu tumangihon soara ni Jahowa, Debatamuna i.

¹⁴Lam didok hamu do: Ndada ingkon laho do hami tu tano Misir, asa unang huida hami hamusuon, manang begeonnami soara ni sangka, manang raparan hami di roti, ingkon disi tahe hami maringan!

¹⁵Antong, tangihon ma nuaeng hata ni Jahowa, hamu ale pasipasi ni Juda! Songon on do hata ni Jahowa Zebaot, Debata ni Israel: Molo sai ditahi rohamuna naeng laho tu Misir, asa maisolat hamu disi.

¹⁶Ingkon dapot podang, na hinabiaranmuna i do hamu disi, di tano Misir, dapot haraparon hamu na hinabiaranmuna dison, ingkon leleonna hamu tu Misir, ingkon mate hamu disi.

¹⁷Jala saluhut baa, angka na martahi laho tu Misir asa maisolat disi, ingkon mate do marhitehite podang, haraparon dohot begu antuk, nanggo sahalak sian nasida ndang jadi teba manang malua maradophon hamagoan, siparoonku tu hamu.

¹⁸Ai songon on do hata ni Jahowa Zebaot, Debata ni Israel: Suang songon tu pangisi ni Jerusalem, pangusehononku parpiarpiar ni rimashu dohot tu hamu, molo tung laho hamu tu Misir, ingkon gabe bura hamu, gabe hasonggoton sipapulaspulason dohot sirehereheon, jala ndang be idaonmuna inganan on.

¹⁹Nunga pola dipaboa Jahowa tu hamu, hamu ale pasipasi ni Juda: Unang hamu laho tu Misir! Unang so boto hamu, naung hupalumba hamu sadarion.

²⁰Alai laos hamu sandiri paotootohon rohamuna, uju na sinurumuna ahu tu Jahowa, Debatamuna i, mandok songon

on: Sai tangiangkon ma hami tu Jahowa, Debatanami! Jala hombar tu saluhut sidohonon ni Jahowa Debatanami, i ma paboa tu hami, asa hubahen hami.

²¹ Jadi nunga hupabotohon tu hamu sadarion, hape ndang ditangihon hamu soara ni Jahowa Debatamuna i, jala ndang dioloi hamu nanggo sada tinonahonna tu ahu naung hupatolhas tu hamu.

²² On pe unang so diboto hamu, ingkon mate hamu marhitehite podang, haraparon dohot begu antuk di inganan sitopotonmuna nian asa maisolat disi.

43¹ (I.) Jadi dung tolhas dihatahon si Jeremia tu sandok situan na torop i saluhut hata ni Jahowa, Debatanasida i, naung tinonahon ni Jahowa, Debatanasida i, umbahen disuru ibana manopot nasida.

² Jadi ro ma hata ni si Azaria, anak ni si Hosaya, dohot si Johanan, anak ni si Karea rap dohot saluhut baoa angka na jungkat, ninna ma tu si Jeremia: Gabus do na hinatahonmu! Nandang na tutu ho sinuru ni Jahowa, Debatanami, martona songon on: Unang hamu laho tu Misir maisolat disi.

³ Na pinajuju ni si Baruk, anak ni si Neria do ho mangalo hami, asa pasahathon hami tu tangan ni halak Kasdim, asa bunuonna hami manang mamboan hami tarbuang tu Babel.

⁴ Jadi ndang ditangihon si Johanan, anak ni si Karea dohot saluhut induk ni parangan, ro

di sandok situan na torop i soara ni Jahowa,
laos maringan nian di tano Juda.

⁵Dung i diarahon si Johanan, anak ni si
Karea dohot saluhut induk ni parangan ma
sandok pasipasi ni Juda angka na mulak sian
saluhut bangso parbegu parserahannasida na
sai laon, asa maringan nian di tano Juda.

⁶Tole angka baea dohot parompuan
angka dakdanak, angka boru ni raja ro di
saluhut hosa, angka na tading binahen ni si
Nebusaradan, sintua ni parangan i, dongan ni
si Gedalia anak ni si Ahikam tubu ni si Sapan,
angkup ni panurirang Jeremia dohot si Baruk,
anak ni si Neria.

⁷Jadi tolhas ma nasida tu tano Misir, ai
ndang ditangihon nasida soara ni Jahowa,
gabe sahat ma nasida tu Tahpanhes.

⁸(II.) Dung i ro ma hata ni Jahowa tu si
Jeremia di Tahpanhes songon on:

⁹Buat ma di bagasan tanganmu batu
angka na bolon, jala tabunihon di bagasan
tano liat di bagasan liang parmasahan batu
mardonokkon pintu ni jabu ni Firaun di
Tahpanhes, di adopan ni angka baea sian
Juda.

¹⁰Dung i dohononmu ma tu nasida: Songon
on do hata ni Jahowa Zebaot, Debata ni
Israel: Ida ma, ahu marsuru suruanku
mangalapi si Nebukadnesar raja sian Babel,
naposongki, jala ahu patindang habangsana
di atas ni batu on, angka naung hutabunihon,

jala pahembangonna ma rimberimbe ni undungundungna di atasna.

¹¹Ingkon bongotanna ma jala papatuonna tano Misir: Manang ise na tu hamatean, tu hamatean ma tutu, manang ise na tu habuangan, tu habuangan ma tutu, manang ise na tu podang, tu podang ma tutu.

¹²Jala pagalahonku ma sada api di bagasan joro ni angka debata ni Misir, laos soksohanna ma jala buangkononna, jala alithononna ma tano Misir, songon pangalithon ni parmahan ni ulosna, dung i muli ma ibana sian i mardamedame.

¹³Angkup ni ingkon ponggolhononna do angka tiang partunggul sian Betsemes na ti tano Misir, jala surbuonna dohot api angka joro ni angka debata ni Misir.

44¹(I.) On do hata naung ro tu si Jeremia taringot tu saluhut halak Jahudi, angka na maringan di tano Misir, angka na maringan di Migdol, di Tahpanhes, di Nop dohot di tano Patros, ninna do:

²Songon on do hata ni Jahowa Zebaot, Debata ni Israel: Nunga diida hamu saluhut jea, na huparo tu atas ni Jerusalem dohot tu atas ni saluhut huta di Juda, jala ida ma, laos tarulang do i rasirasa sadarion, jala ndang adong be pangisina nanggo sahalak.

³Ala ni hajahaton, angka naung niulanasida i pahehe rimashu, nunga pola laho nasida manutung daupa mangoloi debata sileban,

angka na so tinandanasida i, nang nasida,
nang ompunasida i.

⁴Jadi husuru do nian tu hamu saluhut
naposongku, angka panurirang i, pola sogot
ahu hehe marsuru mandok songon on: Ua
unang bahen hamu hasogiron sisongon i na
huhasomorhon!

⁵Hape ndang ditangihon nasida jala ndang
dipaeleng pinggolnasida, asa muba nian
rohanasida tumadingkon hajahatonnasida i,
unang nian manutung daupa tu angka debata
sileban.

⁶Dibahen i use ma rimashu dohot murukku
jala marsigorgor dampak angka huta ni Juda
dohot dampak angka alaman ni Jerusalem,
laos tarulang gabe halongonan rasirasa
sadarion.

⁷On pe songon on do hata ni Jahowa,
Debata Zebaot, Debata ni Israel: Boasa tung
bahenonmuna jea bolon dampak hosamuna
sandiri, laos hamu mamansingkon baoa
dohot parompuan, dakdanak dohot posoposo
di hamu sian tongatonga ni Juda, ndang
ditebahon hamu nanggo pasipasina di hamu?

⁸Lam dipahehe hamu rimashu marhitehite
jadijadian ni tanganmuna laho manutung
daupa tu angka debata sileban di tano Misir,
hasahatanmuna i asa maisolat disi, asa tung
sun siap hamu jala asa gabe sipulaspulason
dohot sirehereheon hamu di tongatonga ni
saluhut bangso parbegu di tano on.

⁹Nunga tung lupa hamu huroha di hajahaton ni ompumuna dohot di hajahaton ni angka raja sian Juda dohot di hajahaton ni angka jolmanasida dohot di hajahatonmuna sandiri dohot di hajahaton di jolmamuna, naung binahennasida di tano Juda dohot di angka alaman ni Jerusalem?

¹⁰Laos so dipaunduk nasida tahe rohanasida i rasirasa sadarion, jala ndang mabiar nasida, jala ndang diparangehon nasida patikku dohot tonangku, angka na hupasahat tu hamu dohot tu ompumuna.

¹¹Dibahen i songon on do hata ni Jahowa Zebaot, Debata ni Israel: Ida ma, nunga pola didompakkon bohingku hamu mambahen jea dohot mamansingkon sandok Juda.

¹²Jala tangkuponku ma pasipasi ni Juda, angka na martahi laho tu tano Misir, asa maisolat disi, ingkon siap nasida luhut; ingkon marragean nasida di tano Misir; ingkon siap nasida marhitehite podang dohot haraparon; ingkon mate nasida sian na metmet ro di na magodang marhitehite podang dohot haraparon, ingkon gabe bura nasida, gabe hasonggoton, gabe sipulaspulason dohot gabe sirehereheon.

¹³Ai marlulu ma ahu dompak halak angka na maringan di tano Misir, songon pangaluluingu dompak Jerusalem marhitehite podang, haraparon dohot begu antuk.

¹⁴Jala ndang tagamon adong na malua manang teba sian pasipasi ni Juda, angka na sahat tu tano Misir, asa maisolat disi, asa mulak nian muse tu tano Juda di rohana, na hinalungunhon ni rohanasida naeng mulak laos maringan disi, alai holan angka na malua do mulak tusi sogot.

¹⁵(II.) Dung i ro ma alus ni saluhut baoa, angka na umboto naung manutung daupa jolmanasida i tu angka debata sileban, dohot saluhut parompuan angka na jongjong marluhutan godang ro di sandok situan na torop angka na maringan di tano Misir, di Patros, mandok tu si Jeremia songon on.

¹⁶Ia hata naung hinatahonmu tu hami marhitehite goar ni Jahowa, ndang patangitangionnami ho.

¹⁷Ingkon sai bahenonnami do hombar tu sandok hata naung ruar sian pamangannami; ingkon manutung daupa hami tu raja boruboru di langit dohot mangusehon tuak tangkasan tusi, songon na somal hubahen hami, nang angka ompunami, angka rajanami dohot angka induknami di angka huta ni Juda dohot di angka alaman ni Jerusalem, bosuran ma hami uju i mangan roti, jala marsonangsonang hami, jea pe so huida hami.

¹⁸Alai olat ni dung mansadi hami manutung daupa tu raja boruboru di langit dohot mangusehon tuak tangkasan tusi, hurangan

ma hami di na saluhut, jala siap hami marhitehite podang dohot haraparon.

¹⁹Angkup ni ia manutung daupa pe hami tu raja boruboru di langit dohot mangusehon tuak tangkasan tusi, tung so parbinoto huroha baoanami hubahen hami angka juada tusi laho mambahen sumansumanna dohot mangusehon tuak tangkasan tusi?

²⁰(III.) Jadi ninna si Jeremia ma tu sandok situasi na torop i, tu angka baoa dohot tu angka parompuan, tung tu sandok bangso i, angka na maralus tu ibana, songon on:

²¹Nda tongon do nian nunga diingot Jahowa daupa na tinutungmuna i di angka huta ni Juda dohot di angka alaman ni Jerusalem, nang hamu, nang ompumuna, angka rajamuna dohot indukmuna dohot situasi na torop na di tano i, jala nunga tutu diparateatehon?

²²Jadi ndang be hatiopan Jahowa rohana mida hinaroa ni pambahenanmuna, mida hasogiron angka na niulamuna: Laos alani gabe halongonan tanomuna i, gabe tarulang, gabe sipulaspulason, so adong be pangisina nanggo sahalak songon na andar sadarion.

²³Ala na manutung daupa i hamu jala na mardosai hamu dompak Jahowa, jala ndang ditangihon hamu soara ni Jahowa, jala ndang diparangehon hamu patikna dohot angka uhumna dohot panindangionna, ala ni do tutu

umbahen mangonai tu hamu jea on, songon na andar sadarion.

²⁴Dung i ro muse hata ni si Jeremia mandok tu sandok situan na torop i dohot tu saluhut parompuan: Tangihon ma hata ni Jahowa sude hamu ale halak Jahudi, angka na di tano Misir!

²⁵Songon on do hata ni Jahowa Zebaot, Debata ni Israel: Hamu dohot jolmamuna, pamanganmuna sandiri tahe mangkatahon laos tanganmuna mangulahon songon on: Ingkon sai patolhasonnami do bagabaganami, angka naung hubagabagahon hami, ingkon manutung daupa tu raja boruboru di langit i dohot mangusehon tuak tangkasan tusi! - Datdati hamu ma mangkajongjongkon bagabagamuna i dohot patolhashon bagabagamuna!

²⁶Dibahen i tangihon ma hata ni Jahowa, sude hamu ale halak Jahudi, angka na maringan di tano Misir! Ida ma, nunga pola marmangmang ahu tu goarhu na timbul i, ninna Jahowa: Na so tupa be jouon goarhu marhite sian pamangan ni manang ise sian halak Jahudi di sandok tano Misir, manang dohononna: Songon sintongna mangolu Tuhan Jahowa!

²⁷Ida ma, dungo ma ahu taringot tu nasida mambahen hamagoan, ndada mambahen na denggan, ingkon mate saluhut baoa sian Juda, angka na di tano Misir, marhitehite

podang dohot haraparon, paima sun siap nasida.

²⁸Ia adong pe angka na malua sian podang, mulak sian tano Misir tu tano Juda, otik do bilanganna, jadi tandaon ni sandok pasipasi ni Juda ma, angka na sahat tu tano Misir naeng maisolat nian disi, manang hata ni ise na tulus manang hatangku manang hatanasida.

²⁹Jala on do partinandaan di hamu, ninna Jahowa, paboa marlulu ahu dompak hamu di inganan on, asa tung mananda hamu naung sintong songgop hatangki bahen hamagoanmuna.

³⁰Songon on do hata ni Jahowa: Ida ma, ahu sandiri pasahathon Firaun Hopara, raja sian Misir, tu tangan ni angka musuna dohot tu tangan ni angka na tumahi hosana, songon naung hupasahat si Sedekia, raja sian Juda, tu tangan ni si Nebukadnesar, raja sian Babel, musuna i, na tumahi hosana.

45¹(I.) On do hata naung nilumbahon ni panurirang Jeremia tu si Baruk, anak ni si Neria, uju sinuratna hata on, angka na niaturhon ni si Jeremia tu sada buku, paopattaonhon hinarajahon ni si Joiakim, anak ni si Josia, raja sian Juda ninna do:

²Songon on do hata ni Jahowa, Debata ni Israel tu ho, ale Baruk.

³Nimmu do: Soro ni aringki! Tung ditambahi Jahowa dope haarsahon tu parniahapanku

hian! Pola maheu ahu dibahen hoihoingki,
jala hasonangan so dapot ahu.

⁴Songon on do dohononmu tu ibana:
Songon on do hata ni Jahowa: Ida ma, gari
naung hupauli, huloha do muse, jala naung
husuan, hubutbut do muse, pola tung sandok
tano on!

⁵Lam ho ma, tung tama ma angka
hatimbulon luluanmu di ho? Unang lulu i!
Ai ida ma, ahu sandiri parohon jea tu nasa
sibuk, ninna Jahowa, alai lehononku do anggo
tu ho hosam bahen tabantaban di saluhut
inganan sitopotonmi.

46¹ (I.) On do hata ni Jahowa naung ro
tu panurirang Jeremia dompak angka
bangso.

²Dompak Misir, dompak parangan ni Firaun
Neko, raja sian Misir, angka na marsaro
martopihon batang aek Euprat di lambung
Karkemis na tinaluhon ni si Nebukadnesar,
raja sian Babel, paopattaonhon hinarajahon
ni si Joiakim, anak ni si Josia, raja sian Juda.

³Padiri hamu ma lombulombu na balga
dohot na metmet, jala borhat laho tu
tongtangan!

⁴Palanoi hamu angka hoda, jala panaek
hamu, aek halak parsihundul, patutur ma
hamu jongjong martahuluk be! Pungga hamu
angka hujur! Jala solukkon hamu angka
bajubaju partahanan!

⁵Marhua huroha umbahen tarhatotong angka nasida i huida, huhut lumindak tu pudi? Bebenesan ia angka ulubalang nasida, jala humalaput nasida maporus jala ndang mamereng tu pudi? Hagodoron humaliang ninna Jahowa!

⁶Unang loas maporus halak na gompis, jala unang loas malua halak na begu! Dingkan utara, martopihon batang aek Euprat martinggangan jala marragean nasida.

⁷Ise do ibana na binsat songon Nil, songon aek na magodang pola gasagasaon angka galumbangna?

⁸Halak Misir do i na binsat songon Nil, jala songon aek na magodang pola gasagasaon angka galumbangna, jala didok do: Nangkok ma ahu manutup tano i, mangago huta i ro di pangisina.

⁹Panaek hamu ma angka hoda! Jala purpurhon hamu angka hureta! Jala borhat ma angka ulubalang! Tole halak Kus dohot Put, angka na maniop lombulumbu ro di halak Lud angka na maniop dohot manintak sior.

¹⁰Ai ari partubolan di Tuhan Jahowa Zebaot do ari na sasada i, laho martubolhon tu musuna; jala suda nasida panganon ni podang; maradu mahap jala mabuk sian mudarnasida, ai adong do sada pelean sipotongon di Tuhan Jahowa Zebaot di tano tungkan utara martopihon batang aek Euprat.

¹¹ Nangkok ma ho tu Gilead mangalap miak bahen daon, ale boru Misir! Hape ndang marguna pagodangonmu angka ubat, ai ndang be hadaonan ho.

¹² Begeon ni angka bangso parbegu na haurahonmu, jala gok tano on angguhanggukmu, ai masijonapan do angka ulubalang rap martinggangan jala marragean nasida duansa.

¹³ (II.) On do hata na nilumbahon ni Jahowa hian tu panurirang Jeremia taringot tu haroro ni si Nebukadnesar raja sian Babel, laho papatu tano Misir:

¹⁴ Baritahon hamu ma i di Misir jala tingtingkon hamu ma i di Migdol, asa sar barita i di Nop dohot di Tahpanhes, dok hamu ma: Marodorodor ma ho jongjong jala marsihohot mangalo, ai nunga suda dipangan podang angka hombar balokmu.

¹⁵ Boasa naung marragean angka ulubalangmu? Boasa so manahan jongjong ibana? Ai Jahowa do tahe patundukkon nasida.

¹⁶ Ibana mambahen nasida martinggangan mansai torop rap marragean do nasida, gabe didok nasida do: Beta hita mulak tu bangsonta dohot tu tano hatubuantan maradophon podang ni pangago i.

¹⁷ Joujou nasida disi: Ia Firaun, raja sian Misir, nunga pidom; dipasalpu do antong tingki na denggan i.

¹⁸Songon sintongna mangolu ahu, ninna raja Jahowa Zebaot goarna: Songon Tabor di tongatonga ni angka dolok jala songon Karmel martopihon laut, songon i do harorona sogot.

¹⁹Bahen hian ma di ho ulaula ni halak na tarbuang, ho ale isi ni boru Misir! Ai ingkon gabe halongonan do Nob jala pansing, asa unang adong be pangisina.

²⁰Tudos tu anak ni lembu na uli rupa do Misir, alai ro do sada pangago i, sian utara, ro do ibana tongon.

²¹Nang halak na niupaanna, angka na di tongatonganasida i, songon anak ni lembu angka na pinamokmok do, nang angka nasida marbalik do, rap maporus, ndang manahan jongjong, ai nunga ro ari hamagoannasida tu nasida, tingki partubolan tu nasida.

²²Soarana do songon parlisik ni ulok; ai mardongan parangan nasida mardalan, jala mantat tangke nasida ro mandapothon, songon halak sitaba hau.

²³Nunga pola dirotongkon nasida tombakna, ninna Jahowa, atik pe so tartondong nian, ai tumorop do nasida sian sihapor, jala ndang habilangan toropnasida.

²⁴Nunga tung tarurak boru Misir, nunga sahat nasida tu tangan ni sada bangso sian utara.

²⁵Nunga pola didok Jahowa Zebaot, Debata ni Israel: Ida ma, marlulu ma ahu dompak

Amon sian Tebe dohot dampak Firaun dohot dampak Misir dohot dampak angka debatana dohot dampak angka rajana dohot dampak Firaun dohot dampak halak na marhaposan tu ibana.

²⁶Ahu ma tutu pasahathon nasida tu tangan ni halak na tumahi hosanasida dohot tu tangan ni si Nebukadnesar, raja sian Babel dohot tu tangan ni angka naposona; dung salpu songon i ingkon inganan muse, suang songon di angka ari na robi, ninna Jahowa.

²⁷(III.) Alai anggo ho, ale Jakkob, naposongku! Unang ho mabiar, jala unang ho tarsonggot ale Israel! Ai ida, ahu paluahon ho sian luat na dao dohot pinomparmu sian tano habuangannasida, ingkon mulak Jakkob jala marsonangsonang, jala mardohar, jala ndang adong na manonggoti.

²⁸Dibahen i unang mabiar ho, ale naposongku Jakkob, ninna Jahowa, ai ahu do donganmu! Ai tung pansing do bahenonku saluhut bangso haambolonganmu na sai laon na hubahen i, alai anggo ho ndang pansing bahenonku, ingkon pinsangonku do ho nian hombar tu uhum, ndang tarbahen so toruanku ho.

47¹(I.) On do hata ni Jahowa na ro tu panurirang Jeremia dampak halak Palistim, tagan so dipapatu Firaun dope Gasa.

²Songon on do hata ni Jahowa: Ida ma, binsat ma angka aek sian utara manjadi aek

na sumar, lantapanna ma tano i ro di isina,
huta i ro di pangisina; jadi manganguhi ma
angka jolma i jala mangandung saluhut isi ni
tano i!

³Maradophon pardorom ni tambirik ni angka
hodana, maradophon paruoror ni angka
huretana, pallapak ni angka galapangna.
Ndang ditailihon amaama angka anakna
binahen ni daukdauk ni tangannasida.

⁴Binahen ni ari na laho mamansingkon
saluhut halak Palistim, laho maniaphon Tirus
dohot Sidon, ro di saluhut na malua tau
pangurupi nian, ai rendephonon ni Jahowa
ma halak Palistim, pasipasi ni pasir Kaptor.

⁵Nunga ro hapalpalon tu Gasa, nunga
tarhatotong Askelon, ebaeba ni tano na
di rura. Sadia leleng on dope rarihanmu
dagingmu?

⁶Oe ale podang ni Jahowa, sadia leleng
nari so olo ho mansadi? Sai mulak ma ho tu
bagasan sarungmu, maradian ma ho nian jala
mansadi!

⁷Alai tahe beha ma, pambahenmu mansadi?
Ai Jahowa do mandokkonsa! Dompok Askelon
dohot dampak pasir ni laut do i didokkon.

48¹(I.) Dompok Moab. Songon on do
hata ni Jahowa Zebaot, Debata ni
Israel: Marjea ma huta Nebo, ai nunga
pansing! Nunga tarurak Kiriataim jala patu,
nunga tarurak benteng na timbo i jala
maloha!

²Nunga pesan hamuliaon ni Moab di Hesbon; nunga pola disangkapi halak hamagoanna, ninna do: Beta hita, asa itapansingkon ibana unang be masuk tu bilangan ni bangso! Ho pe ale Madmen, ingkon rendep ho; sai paburuburuon ni podang ma ho.

³Tarbege do soara angguhangguk sian Horonaim! Hapapansing dohot hamagoan dohot hataluan bolon!

⁴Nunga tung siap Moab! Angka na metmet mangangguhi.

⁵Ai di nangkohan Luhit mardapotdapot nangkok halak na tumatangis, pola tarbege di tuatan Horonaim angguk badar ni halak na hagogotan.

⁶Maporus ma hamu, palua hamu hosamuna i! Alai gabe songon tadatada di halongonan do hamu.

⁷Ai ala marhaposan ho mida jadijadianmu dohot mida angka artam, ingkon dohot ho patu, ingkon borhat Kamos tu habuangan, angka malimna dohot angka indukna sasudena.

⁸Ai ingkon ro do sipangago i dompak saluhut halak jala ndang malua nanggo sada huta, jala mago rura i jala tarulang tano pea i, ai songon i do hata ni Jahowa.

⁹Lehon hamu ma habong tu Moab ai naeng gira habang ibana tu ruar. Hape ingkon gabe halongonan angka hutana, ndang be marpangisi nanggo sahalak.

¹⁰Marjea ma manang ise na marlemba mangaradoti ulaon ni Jahowa, jala marjea ma manang ise na mangontok podangna mandurushon mudar.

¹¹(II.) Marsonangsonang do nian Moab sian sieteketehonna, jala hohom ibana peak di atas parakna, jala ndang dung ibana dipainding sian guriguri na sada tu na asing, jala ndang dung ibana tarboan tu habuangan. Dibahen i hot do pandaian, jala ndang muba parniangoanna.

¹²Dibahen i, ida ma, na ro do angka ari sogot, ninna Jahowa, ahu ma marsuru tu ibana jolma angka na painding ibana, jala parumaronna angka gurigurina, jala bolahononna angka saoanna.

¹³Ingkon tarurak do Moab binahen ni Kamos, suang songon pinompar ni Israel tarurak binahen ni Betel haposannai.

¹⁴Boasa ma tung dohononmuna: Angka ulubalang do hami, jala halak parmusu angka na begu do hami?

¹⁵Nunga tung siap Moab, jala nunga dipurun angka hutana, jala dolidoli angka na pinillitna i nunga turun tu pamotongan, ninna raja, na margoar Jahowa Zebaot.

¹⁶Nunga jonok hapepesan ni Moab, jala silu situtu ro hamagoanna.

¹⁷Tatangisi ma ibana, sude hamu angka hombar balokna, sude hamu angka na umboto goarna! Dok hamu ma: Nunga

maponggol do hape tungkot hagogooni,
batahi na arga i.

¹⁸Mijur ma ho sian hamuliaon jala hundul
tu tano hasang, ho ale isi ni boru Dibon!
Ai na nangkok ma siago Moab dompak ho,
siaphononna ma hutam angka na gantingi.

¹⁹Jongjong ma ho tu dalan jala
manatapnatap, hamu ale isi ni Aroer!
Sungkunsungkuni ma jolma na maporus
dohot na malua! Dok ma: Aha do na masa?

²⁰Nunga tung tarurak Moab, ai nunga
maloha. Mangandungi ma hamu jala
tumatangis! Baritahon hamu ma i di Arnon
naung siap do hape Moab.

²¹Jala nunga songgop uhumi tu tano pea, tu
Holon dohot tu Jahaz dohot tu Mefaat.

²²Dohot tu Dibon dohot tu Nebo dohot tu
Bet Diblataim.

²³Dohot tu Kiriataim, tu Bet-Gamul dohot tu
Betmeon.

²⁴Dohot tu eriot Hesron, Bezer dohot tu
saluhut huta ni luat Moab, angka na holang
dohot angka na jonok.

²⁵Nunga tung maponggol tanduk ni Moab
jala nunga marosak botohonna, ninna
Jahowa.

²⁶Pamabuk hamu ma ibana, ala dompak
Jahowa do ibana manenganenga! Laos
marguluhon utautana ma Moab, asa gabe
sieleseleson ni halak ibana huhut.

²⁷ Nda dieleselesi ho do Israel molo jumpang nasida di tongatonga ni angka panangko? Ai ganup ditaringoti hatam ibana, mangupir do ho.

²⁸ Tadingkon hamu ma angka huta jala maringan di dolok batu hamu ale isi ni Moab, jala songon anduhur ma hamu angka na marasar di bagasan angka liang.

²⁹ (III.) Nunga hubege hami hajungkaton ni Moab, tung na jungkat situtu ho, tole hatimbulonna dohot hajungkatonna dohot ginjang ni rohana.

³⁰ Ahu pe tangkas do hutanda hajungkatonna ninna Jahowa, tole panengaonna na so marniula i, sipaotooto do dibahen nasida.

³¹ Dibahen i ingkon mangandung i ahu taringot tu Moab jala ingkon manganguhi ahu taringot tu sandok Moab; tama do marhoihoi iba taringot tu angka baoa di Kir-Heres.

³² Ingkon mabakbak iluilungku mida Jaser, ingkon tumatangis ahu mida ho, ale hau anggur sian Sibma. Taripar do rantingrantingmu tu bariba ni laut, pola sahat tu laut Jaser. Nunga ditinggang pangago i parbue ni hau dohot hau anggur angka sigotilonmu hian.

³³ Nunga munsat huhut las ni roha dohot olopolop sian hauma sigotilon dohot sian tano Moab, jala nunga hupasadi anggur i sian angka pangilangan, ndang adong be

luntakluntahonna mardongan suraksurak,
tung na so masa be suraksurak las ni roha.

³⁴Binahen ni angguhangguk sian Hesbon
sahat tu Eleale, sahat tu Jahaz tahe tarbege
soaranasida i; sian Soar sahat tu Horonaim,
lombu sitolu taon i, ai dohot do angka aek
Nimrim marsik do sogot.

³⁵Ahu ma pasohothon Moab, ninna Jahowa,
asa unang be mamele di atas ni angka
tambak, jala unang be manutung daupa tu
angka debatana sileban.

³⁶Dibahen i sai gunsang do rohangku mida
Moab, jala mardorom songon sarune mida
halak isi ni Kir-Heres, ala naung mago do
pasipasi ni na niomona.

³⁷Ai nunga mapalpal saluhut ulu, jala
ginansip saluhut janggut, luhut tangannasida
angka na nirarihan do, jala marulos tangki
gontingnasida i.

³⁸Di atas ni saluhut tarup ni jabu di Moab
dohot di alamannasida holan angguhangguk
do, ai nunga hubolahon Moab songon
mangkuk sadi na so lomo di rohaniba, ninna
Jahowa.

³⁹Oe suang habobolana i! Angguknasida!
Tungki ni ulu ni Moab dohot urakna i!
Songon do, nunga gabe sirehereheon Moab
dohot hasonggoton di saluhut halak hombar
balokna.

⁴⁰Ai songon on do hata ni Jahowa: Ida ma, songon pidong raja wali ibana habang, jala dipaherbang hatirna di atas Moab.

⁴¹Nunga patu angka huta, jala nunga disoluk angka partanobatoan; jala ingkon songon roha ni parompuan na mangae posoposona, roha ni angka ulubalang ni Moab di ari na sasada i.

⁴²Ingkon pansing Moab, asa unang be targoar bangso, ala dompak Jahowa ibana manenganenga.

⁴³Hasogiron dohot godung dohot jorgong songgop tu ho, ale isi ni Moab, ninna Jahowa.

⁴⁴Manang ise na maporus maradophon hasogiron, ingkon madabu do ibana tu godung, jala manang ise na manaek sian godung, ingkon dapot jorgong ibana, ai ahu parohon tu nasida, tu Moab, taon partubolan tu nasida, ninna Jahowa.

⁴⁵Jongjong do di linggoman ni Hesbon marhosahosa angka na maporus ndang margogo, alai ruar ma api sian Hesbon jala nala ni api sian tongatonga ni Sihon, gabe suda dipangan parsantingan ni Moab dohot pakpak ulu ni angka anak hagunturon.

⁴⁶Marjea ma ho ale Moab! Nunga pido bangso ni Kamos, ai nunga tarboan angka anakmu tu habuangan dohot angka borum tu parhatobanan.

⁴⁷Alai anggo di ujung ni angka ari ahu ma manogihon mulak halak na tarbuang sian

Moab ninna Jahowa. Intap ni i ma uhum tu Moab.

49¹ (I.) Dompak halak Amon. Songon on do hata ni Jahowa: Ndang adong huroha anak di Israel, manang sitean ibana? Boasa tung Milkom manean Gad jala bangsona maringan di angka hutana?

² Dibahen i ida ma, na ro do angka ari sogot, ninna Jahowa, ahu ma patubegehon dompak Rabba ni halak Amon suraksurak hamusuon, ingkon gabe timbunan batu huta i, jala masoksok angka hutana pagaran di bagasan api, jala ingkon Israel manean angka naung manean ibana na jolo, ninna Jahowa.

³ Mangandungi ma ho, ale Hesbon, ai nunga pansing Ai! Manganguhi ma, hamu ale angka boru Rabba, alithon ma ulos tangki! Mangandungi ma hamu huhut marlojonglojong di holangholang ni angka parik, ai ingkon mardalan tu habuangan do Milkom, angka malimna rap dohot angka indukna.

⁴ Boasa manenganengahon angka rura i ho? Mangalantap ma ruram dibahen mudar, ho ale boru na marbalik, na marhaposan tu angka artana, nimmu do: Ise ma na hum jumonok tu ahu?

⁵ Ida ma, ahu parohon tu ho hasonggoton, ninna Tuhan i, Jahowa Zebaot, sian saluhut angka hombar balokmu, jala ingkon onjarhononhon hamu ganup tu jolona, jala

ndang adong manang ise na papunguhon na maporus i.

⁶Alai dung salpu songon i, ahu ma manogihon mulak angka na tarbuang sian halak Amon, ninna Jahowa.

⁷(II.) Dompak Edom. Songon on do hata ni Jahowa Zebaot: Nandang adong be huroha hapistaran di Teman? Nunga mago huroha tahi sian halak parroha angka na pistar? Nunga pesan huroha hapistarannasida?

⁸Maporus ma hamu, lumindak tu pudi, monjap ma hamu maringan tu liang, hamu ale isi ni Dedan, ai hapipidom ni si Esau paroonku tu ibana, ai nunga jumpang tingki partubolanku tu ibana.

⁹Molo ro halak siputik parbue ni anggur tu ho, ndang tagamon tebahononnasida angka sijomputon; molo ro angka panangko borngin, agohononnasida ma na singkop di nasida.

¹⁰Ai anggo ahu, nunga hupasalang Esau, nunga hupapatar angka parsitabunianna, ndang be tarbahensa manabunihon dirina. Nunga pidom pinomparna ro di hahaanggina dohot hombar balokna, jala ndang be disi ibana.

¹¹Tadingkon ma anakmu angka na tading di lampin, asa ahu pangoluhon nasida, jala marhaposan tu ahu do parompuan angka na mangkabaluhon ho.

¹²Ai songon on do hata ni Jahowa: Ida ma, halak na so tama hian nian minum sian panginumani, ingkon inumonna sian i, tung tarbahen ma lias ia ho? Ndang tarbahen lias ho, ingkon inumonmu sian i.

¹³Ai nunga pola marmangmang ahu tu diringku, ninna Jahowa, ingkon gabe tarulang, gabe sirehereheon, gabe halongonan, gabe sipapulaspulason do Bosra, jala saluhut hutana, ingkon gabe halongonan salelelenglelengna.

¹⁴Nunga hubege sada barita sian Jahowa, jala nunga disuru suruanna sahalak tu tongatonga ni angka bangso parbegu martingting: Santi balatuk ma hamu martahop dompak nasida, jala borhat ma hamu tu tongtangan!

¹⁵Ai ida ma, marmetmet ma ho bahenonku di tongatonga ni angka bangso parbegu, marlea di tongatonga ni manisial!

¹⁶Hasogiron binahenmi do paotooto ho, jungkat ni roham, ho ale na maringan di liang ni dolok batu, na sangkot di buntulbuntul ni robean! Tung sura pe dipatimbo ho asarmu songon pidong raja wali, ingkon onjarhononku do ho sian i, ninna Jahowa.

¹⁷Ingkon gabe halongonan do Edom, ganup na mamolus sian i ingkon tarsonggot do marnidasa, jala mangarehe ala ni saluhut jeana.

¹⁸Suang songon uju di harorongrong ni Sodom dohot Gumora, nang angka hombar balokna, ninna Jahowa, songon i ndang maringan di Edomjolma nanggo sada, manang marmalam disi manisias.

¹⁹Ida ma, nangkok do ibana songon singasian tobing ni Jordan tu inganan na ganting, ai tompuhononku ma mangalele ibana sian i jala ise ulaning dolidoli na pinillit, sipampeongku mangalo nasida? Ai tung ise ma songon ahu? Jala tung ise ma mangalualuhon ahu? Jala tung ise parmahan i na manahan jongjong di jolongku?

²⁰Dibahen i tangihon hamu ma sangkap ni Jahowa, naung sinangkapna taringot tu Edom, dohot angka pingkiranna, naung piningkiranna taringot tu isi ni Teman: Tongon do, ingkon toltolan ni halak nasida, birubiru angka na gale i, pola tung marseto jampalan mida nasida.

²¹Sian soara ni pardoburnasida pola humuntal tano on; tarbege do soara angguhanggukna tolhas ro di laut arung.

²²Ida ma, manaek do ibana songon pidong raja wali jala habang, jala dipahembang habongna di atas Bosra; jadi songon roha ni parompuan na mangae posoposona roha ni angka ulubalang di Edom sadarina i.

²³(III.) Dompak Damaskus. Tarurak ma Hamat dohot Arpad, ai nunga dibege barita hamagoan; malala ateatenasida, hagodoron

masa martopihon laut, ndang tarbahen be marsonangsonang.

²⁴Nunga mandate Damaskus, nunga pola lumindak laho maporus, angka dotdot nasida, hagogotan dohot parsahiton niaena, songon parompuan na mangae posoposona.

²⁵Beha, nda nunga tinadingkon huta na tarbarita i, huta hasoloan ni rohangku?

²⁶Dibahen i marragean ma angka dolidoli isina i di angka alamanna, jala saluhut baoa sialo musu siap sadarina i, ninna Jahowa Zebaot.

²⁷Ahu tahe pagalakkon sada api di parik ni Damaskus, gabe suda panganonna angka bagas bolon ni si Benhadad.

²⁸(IV.) Dompak Kedar dohot dompak angka harajaon sian Hazor, angka na pinapatu ni si Nebukadnesar, raja sian Babel. Songon on do hata ni Jahowa: Borhat ma hamu nangkok dompak Kedar, jala pansingkon hamu ma angka anak di habinsaran!

²⁹Ingkon rampasonna angka undungundung dohot pinguannasida, angka rimberimbenasida ro di saluhut parhohas dohot untonasida laumonna di nasida; jala surakkononna tu nasida: Hagodoron humaliang!

³⁰Maporus ma hamu, haru hatop ma hamu marlojongi, monjap ma hamu maringan tu angka liang, hamu ale isi ni Hazor, ninna Jahowa; ai nunga padalan tahi si

Nebukadnesar, raja sian Babel, dompak hamu, nunga pola sada tahina dompak hamu.

³¹ Borhat ma hamu nangkok dompak sada bangso na marsonangsonang jala na nalom roha maringan, ninna Jahowa, ndang marharbangan manang marransang, pinjil ingananna.

³² Ingkon gabe tabantaban ia untonasida jala hinadeak ni pungan dorbua di nasida gabe rampason, jala ahu paserakkon nasida tu saluhut desa, nasida angka na marjambulan, jala sian na humaliang ahu parohon hamagoan tu nasida, ninna Jahowa.

³³ Jala Hazor ingkon gabe parasaran ni ulok naga, gabe halongonan ro di salelenglelengna. Ndang be maringan disi jolma nanggo sada, jala ndang be marmalam disi manisiasa.

³⁴ (V.) On do hata ni Jahowa na ro tu panurirang Jeremia taringot tu Elam di mula ni harajaon ni si Sedekia, raja sian Juda, ninna do:

³⁵ Songon on do hata ni Jahowa Zebaot: Ida ma, ahu ma mamonggolhon sior ni Elam, situan ni hagogoonnasida.

³⁶ Jala ahu parohon dompak Elam na opat paranginan sian na opat desa ni langit, jala ahu paserakkon nasida tu na opat paranginan i, jala ndang adong bangso na so hasahatan ni halak angka na maporus sian Elam.

³⁷ Jala ahu manggodori roha ni halak Elam maradophon musunasida dohot maradophon

angka na tumahi hosanasida, jala ahu parohon tu nasida hamagoan, parpiarpiar ni rimashu, ninna Jahowa, jala ahu paborhathon podang sian pudinasida, paima sun siap nasida hubahen.

³⁸Jala ahu patindang habangsangku di Elam, jala ahu pasiaphon sian i raja dohot angka induk, ninna Jahowa.

³⁹Alai anggo di ujung ni angka ari, mulak ma togihononku angka na tarbuang sian Elam ninna Jahowa.

50¹(I.) On do hata naung nilumbahon ni Jahowa hian dompak Babel dohot dompak tano ni halak Kasdim marhitehite panurirang Jeremia.

²Baritahon hamu ma di tongatonga ni angka bangso parbegu jala tingtingkon hamu jala patindang hamu sada partonggol, patubegehon hamu ma i, unang porso hamu! Dok hamu ma: Nunga patu Babel, nunga tarurak Bel, nunga pidom Merodak, nunga tarurak angka ganaganaan panombanombaanna, nunga pesan angka debatana ibana.

³Ai nangkok do dompak ibana sada bangso sian utara, i ma mambahen tanona gabe halongonan, asa ndang be marpangisi; tolejolma ro di pinahan rap maporus do, dipurpurhon be langkana.

⁴Di angka ari dohot di tingki na sasada i, ninna Jahowa, ro be ma halak Israel, rap

dohot halak Juda; mardalandalan nasida
huhut tumatangis mangalului Jahowa,
Debatanasida i.

⁵Usousoannasida ma Sion, jala bohinasida
manuju dalan laho tusi: Beta hita,
marsihohot rohanta tu Jahowa, marpadan
na hot salelenglelengna, na so tupa
halupahononhon.

⁶Birubiru angka na mago do bangsongku na
sai laon, siparmahan nasida do mangaliluhon
nasida di atas ni angka dolok pangaliluan,
mardalani do nasida sian dolok boti tu
robean, lupa do nasida di pangulonon
hasonangannasida i.

⁷Manang ise na jumpangan nasida, suda
nasida dipangan, jala musunasida mandok:
Ndang marsala anggo hami di nasida; ala
naung mardosa nasida dompak Jahowa,
partanobatoan na sintong jala haposan ni
ompunasida do Jahowa.

⁸Maporus ma hamu sian tongatonga ni
Babel jala ruar sian tano ni halak Kasdim, jala
tudoshon birubiru tunggal ma hamu angka na
manguluhon birubiru.

⁹Ai ida ma, ahu pahehehon dohot
panangkokkon dompak Babel luhutan ni
bangso parbegu angka na bolon sian tano
na tungkan utara, angka na mangaromrom
huta i los tabanonna; sumbianasida tudoshon
ulubalang na marantu, na so dung hea mulak
boti.

¹⁰Ingkon gabe tabantaban do luat ni halak Kasdim, butongan ma saluhut na mamupusi nasida, ninna Jahowa.

¹¹Ala naung marlas ni roha hamu, ala naung marolopolop hamu ale angka na mamupusi partalianki, ai pola marhajingjang hamu songon anak ni lembu na mardege, jala mariheihe songon hoda jantan.

¹²Ingkon tarurak situtu inamuna jala maila na tumubuhon hamu. Ida ma, ujung ni angka bangso parbegu halongonan do, tano hasang dohot adaran.

¹³Maradophon parpiar ni muruk ni Jahowa, ndang be inganan huta i jala ingkon gabe halongonan situtu; manang ise na mamolus sian lambung ni Babel tarhatotong do jala mangarehe ala ni saluhut jea ma manginona tu ibana.

¹⁴(II.) Marodor ma hamu jongjong mandopang Babel humaliang, sude hamu ale angka sisintak sior; sior hamu ma dompak huta i, unang ontahi hamu angka sumbia, ai dompak Jahowa do huta i mardosa.

¹⁵Marsuraksurak ma hamu dompak huta i humaliang! Nunga mangoloi patu, nunga marrumpahan angka partanobatoanna, nunga maloha angka parikna! Ai partubolan sian Jahowa do i. Partubolhon hamu ma tu huta i suang songon naung binahenna i bahen hamu tusi.

¹⁶Siaphon hamu ma halak panabur sian Babel dohot halak sitiop sasabi di hamamasa ni gotilon. Maradophon podang ni pangarupa, mulak be ma tumopot bangsona, jala maporus be ma mulak tu tanona.

¹⁷Birubiru na nilotongan do Israel, angka singa do mangalotongi. Jumolo raja sian Assur manganhon ibana; jala parpudi on si Nebukadnesar raja sian Babel mangaropuhi holiholina.

¹⁸Dibahen i, songon on do hata ni Jahowa Zebaot, Debata ni Israel: Ida ma, marlulu ma ahu dampak raja sian Babel dohot dampak tanona, suang songon naung marlulu ahu dampak raja sian Assur.

¹⁹Dung i mulak ma anggo Israel togihononku tu panjampalanna hian asa manjampal muse di Karmel dohot di Basan jala bosuran rohana di dolok Epraim dohot di Gilead.

²⁰Di angka ari i dohot di tingki na sasada i, ninna Jahowa, luluan ni halak ma hajahaton ni Israel, hape ndang adong dapotsa dohot dosa ni Juda, hape ndang adong jumpangsa nanggo sada! Ai marpangulahi do rohangku midajolma na hutebahon i.

²¹Nangkok ma ho dampak luat na marhajungkaton silompit dua dohot dampak halak isi ni luat na tama torutoruan! Pansingkon jala pidothon pinomparnasida, ninna Jahowa, jala patupa ma hombar tu saluhut na hutonahon tu ho!

²² Soara hamusuon masa di tano i dohot hasiasiap godang!

²³ Nunga tung magopu hape jala maponggol nanggar ni sandok tano on! Nunga tung gabe halongonan hape Babel di tongatonga ni angka bangso parbegu.

²⁴ Nunga huta on jorgong dompak ho, ala ni umbahen laos dapot ho, ale Babel, so botobotoanmu. Nunga tardapot ho huhut tartangkap, ala naung marmusu do dompak Jahowa.

²⁵ Nunga pola diungkap Jahowa bagus parpeopan ni sinjatana, jala diparuar angka sinjata ni murukna, ai jadijadian ni Tuhan Jahowa Zebaot do i di tano ni halak Kasdim.

²⁶ Ro be ma sian ujung ni tano on mandopang huta i, ungkap hamu ma angka sopona, pagukguk hamu ma songon busukbusukan jala purun hamu, unang adong pasipasina tading.

²⁷ Tampuli hamu ma saluhut anak ni lombuna, patuat hamu ma i tu pamotongan! Marjea ma nasida, ai nunga ro arina, tingki partubolan tu nasida.

²⁸ Tarbege do soara ni halak na maporus dohot na malua sian tano Babel laho mamaritahon tu Sion partubolan ni Jahowa, Debatanta i, partubolan ni jorona.

²⁹ (III.) Paluhut hamu ma dompak Babel halak partembak, saluhut halak sisintak sior, tungkum hamu ma huta i humaliang, unang

adong haluaon! Partubolhon hamu ma tu huta i hombar tu pambahenanna marguru tu sude na binahenna bahen hamu tusi ai dompak Jahowa do ibana manenganenga, dompak na badia ni Israel.

³⁰Dibahen i ingkon marragean angka dolidoli di nasida di angka alamanna jala saluhut baoa sialo musu ingkon rendep do di na sadari i, ninna Jahowa.

³¹Ida ma, toruanku ma ho ale si hajungkaton, ninna Tuhan i, Jahowa Zebaot; ai nunga ro arim, tingki partubolon tu ho.

³²Jadi tarsulandit ma si hajungkaton i, laos tinggang, jala ndang adong be na pahehe ibana, jala pagalahonku ma sada api di bagasan angka hutana, gabe suda panganonna saluhut na humaliang ibana.

³³Songon on do hata ni Jahowa Zebaot: Angka na nirupaan do halak Israel rap dohot halak Juda, jala saluhut angka na mambuankon nasida laos maniopi nasida, manjua paluahon nasida.

³⁴Alai na gogo do anggo sipalua nasida, Jahowa Zebaot goarna. Sai badahononna do badanasida, asa marhasonangan tano i bahenonna, jala angka hitir anggo halak isi ni Babel.

³⁵Ingkon ro podang dompak halak Kasdim, ninna Jahowa dohot dompak isi ni Babel dohot dompak angka indukna dohot dompak angka pangarundingna.

³⁶Ro ma tutu podang i dampak angka panurirang pargapgap, asa gabe angka na oto nasida; ro huhut podang i dampak angka ulubalangna, asa tarhatotong nasida.

³⁷Ro huhut podang i dampak hodanasida dohot dampak huretana dohot dampak saluhut na hinarana, angka na di tongatonganasida i, asa hira songon parompuan biarna; ro muse podang i dampak angka artana, asa sipupusan ni halak.

³⁸Ingkon ro huhut haarsihan dampak angka batang aek di nasida, asa marsik, ai tano abalan ni angka ganaganaan do i, jala manenganenga nasida mangasahon ganaganaan angka na sogir.

³⁹Dibahen i, ingkon maringan disi angka arimo dohot sarigala jala maringan disi angka pidong onggang; jala ndang be inganan ro di saleleng lelengna manang manompang disi marsundutsundut.

⁴⁰Songon pangarongrong ni Debata di Sodom dohot di Gumora ro di angka hombar balokna, ninna Jahowa, suang songon i ndang maringan disi jolma nanggo sada, manang manompang disi manisiasa.

⁴¹Ida ma, na ro do sogot sada bangso sian utara, sada bangso na bolon jala torop angka raja borhat sian angka ujung ni tano on.

⁴²Mamboan sior dohot hujur do nasida, angka na garang do nasida, jala ndang maralangalang, soaranasida pe songon

parhasak ni aek, jala marsihundul di hoda do nasida, marparhohas songon halak parmusu, ro dampak ho ale boru Babel.

⁴³Dung dibege raja sian Babel baritanasida, malenduk ma tanganna; hagogotan ma ibana, jala angka hitir songon parompuan na mangae posoposona.

⁴⁴Ida ma, nangkok do ibana songon singa sian tobing ni Jordan tu inganan na ganting, ai tompuhononku ma mangalele ibana sian i, jala ise ulaning dolidoli na pinillit sipampeongku mangalo nasida? Ai tung ise ma songon ahu? Jala tung ise ma mangalualuhon ahu? Jala tung ise parmahan i na manahan jongjong di jolongku?

⁴⁵Dibahen i, tangihon hamu ma sangkap ni Jahowa naung sinangkapna taringot tu Babel dohot pingkiran angka naung piningkiranna taringot tu tano ni halak Kasdim: Tongon do ingkon toltolan ni halak nasida, birubiru angka na gale i, pola tung marseto ingananna mida nasida.

⁴⁶Binahen ni soara on: Nunga patu Babel! Pola humuntal tano on, jala tarbege do angguhanggukki di tongatonga ni angka bangso parbegu.

51 ¹(I.) Songon on do hata ni Jahowa: Ida ma, ahu pahehehon dampak Babel dohot dampak halak na maringan di tongatonga ni angka alongku, sada alogo pangago.

²Jala ahu paborhathon tu Babel halak pamurpuri, angka na mamurpuri ibana, dohot mangarumari tanona, ai tungkumonna do humaliang di ari hinamagona i.

³Dompak halak na manintak, sintahan ni panintak ma siorna, jala dompak na mangalithon bajubajuna partahanan; jala unang olani hamu angka dolidoli di nasida, siaphon hamu ma sandok paranganna.

⁴Asa marragean halak na tartullang di tano ni halak Kasdim, jala halak na tartiham di alamannasida.

⁵Ai ndada laos na mabalu Israel manang Juda pasombuon ni Debatana, Jahowa Zebaot, gok sapata ni mudar do tahe tanonasida i maradophon na badia ni Israel.

⁶Maporus ma hamu sian tongatonga ni Babel, jala ganup paluahon hosana be, asa unang siap hamu bahenon ni hajahatonna, ai tingki partubolan do i di Jahowa, pamaloson do binahenna tu nasida.

⁷Panginuman sere hian do nian Babel di tangan ni Jahowa, na pamabuk sandok isi ni tano on. Nunga minum angka bangso parbegu sian anggurna, umbahen laos lalaen angka bangso parbegu i.

⁸Tompuna i marumpak Babel jala matapor! Andungi hamu ma ibana jala buat hamu miak na hushus daon ni bugangna, anggiat tung malum hilalaonna.

⁹Naeng do nian pamalumonnami Babel, hape ndang hadaonan. Antong tadingkon hamu ma i, mardalan ma hita ganup mulak tu tanona be! Ai nunga sahat ro di langit uhum na madabu, jala nunga tolhas ro di angka ombun.

¹⁰Nunga diparuar Jahowa angka hatigorannami. Beta hita asa itabaritahon di Sion jadijadian ni Jahowa, Debatanta il!

¹¹(II.) Tajomi ma angka sumbia, gohi hamu ma parnangkatan! Nunga dipahehe Jahowa tondi ni angka raja sian Madai, ai dompak Babel do tahina laho mangagohonsa, ai partubolan ni Jahowa do i, partubolon ala ni jorona.

¹²Pajongjong ma partonggol dompak angka parik ni Babel, bahen ma parhalan, pajongjong ma angka parhal padiri ma angka pangaropan! Ai laluhonon ni Jahowa ma songon na sinangkapna, naung nilumbahonna hian dompak angka isi ni Babel.

¹³Ho ale na maringan di lambung ni aek godang, pararta godang! Nunga ro ajalmu, belokbelok ni pangomoanmu.

¹⁴Nunga pola marmangmang Jahowa Zebaot tu dirina: Molo dung hugoki ho dohotjolma songon sihapor toropna, ingkon marende aling nasida dompak ho.

¹⁵Ibana na manjadihon tano on marhitehite gogona, ibana paojakkon liat portibi on

marhitehite habisukonna, jala dipahembang langit i marhitehite hapistaranna.

¹⁶Binahen ni soarana marhasak angka aek di toru ni langit, jala manaek angka ombun sian ujung ni tano on; ibana manjadihon angka hilap gabe udan, jala diparuar alogo sian parpeopanna.

¹⁷Na bodo do saluhut jolma, ndang marparbinotoan; tung tarurak do saluhut situang ganaganaan, ai sipaotooto do tuanganna, jala ndang adong hosana di bagasan.

¹⁸Alogo sambing nasida, jadijadian haliluon; jumpang tingki partubolon tu nasida, siap ma nasida.

¹⁹Ndang songon angka nasida anggo ibana partalian ni si Jakkob, ai ibana do sijadi sandok na adong dohot marga ni partalianna, Jahowa Zebaot do goarna.

²⁰Nanggar do ho nian di ahu, sinjata tu hamusuon; marhitehite ho nunga huropuhi angka bangso parbegu jala hupidomhon marhitehite ho angka harajaon.

²¹Marhitehite ho nunga huropuhi hoda dohot jolma parsihundulna; marhitehite ho tutu huropuhi hureta dohot jolma parsihundulna.

²²Marhitehite ho nunga huropuhi baoa dohot parompuan; marhitehite ho nunga huropuhi natuatua dohot na bajar; marhitehite ho nunga huropuhi dolidoli dohot namarbaju.

²³Marhitehite ho huhut nunga huropuhi
parmahan dohot punguanna; marhitehite ho
nunga huropuhi parumauma dohot horbona
paninggala. Marhitehite ho nunga huropohi
angka induk dohot wakilna.

²⁴Alai anggo nuaeng ahu ma mamaloshon tu
Babel dohot tu saluhut isi ni Kasdim sandok
hajahatonnasida, angka na binahennasida tu
Sion di adopanmuna, ninna Jahowa.

²⁵Ida ma, toruanku ma ho ale dolok na
mangago, ninna Jahowa, ho na mangago
sandok tano on; jala patoltolonku ma
tanganku dompak ho, asa hugulang ho sian
angka dolok batu, jala hubahen ho, gabe
dolok api naung mintop.

²⁶Asa unang be adong buaton ni halak sian
ho batu nanggo sada bahen batu parsuhi
manang bahen batu ojahan, ingkon tarulang
do ho ro di salelenglelengna, ninna Jahowa.

²⁷(III.) Patindang hamu ma partonggol di
luat i; palu hamu ma sarune di tongatonga
ni angka bangso parbegu, parbadiai hamu
ma angka bangso parbegu dompak nasida,
marhara ma hamu tu harajaon Ararat, Mini
dohot Askenas mangalo nasida! Pabangkit
hamu ma sada partogi ni parangan mangalo
nasida, boan hamu ma nangkok angka hoda
songon sihapor na marjumbak.

²⁸Parbadiai hamu ma bangso parbegu angka
na mandopang nasida, angka raja sian Madai

ro di angka indukna dohot saluhut wakilna ro
di sandok tano ginomgomanna i.

²⁹Pola humuntal tano on jala raion ala
dihajongjongkon Jahowa angka sangkapna
taringot tu Babel laho mambahen tano Babel
gabe halongonan soada pangisina nanggo
sahalak.

³⁰Nunga mansadi marporang angka
ulubalang sian Babel, juguk do nasida monjap
di bagasan angka partanobatoan, nunga
pesan habeguonnasida na sai laon, nunga
tahuton nasida songon parompuan, nunga
dipagalak halak jabu inganannasida i, nunga
diponggolhon angka ransangna.

³¹Mardapotdapot do suruan marlojongi,
mardapotdapot huhut sibuan barita laho
mamaritahon tu raja sian Babel naung patui
hutana di partalpahan.

³²Naung dapot dohot angka hatariparan jala
naung marsik angka ambar binahen ni api,
jala naung godoron roha ni halak parmusu.

³³Ai songon on do hata ni Jahowa Zebaot,
Debata ni Israel: Tudoshon pardegean do
boru Babel, tingki pangaluntahan ni halak di
ibana nuaeng. Otknari nama jumpang ma
tingki gotilon ibana.

³⁴Nunga suda dipangan, jala diropuhi si
Nebukadnesar, raja sian Babel ahu, nunga
dibahen ibana ahu songon saolan na rumar,
nunga dipolgak ahu songon pamolgak ni ulok

naga, nunga digohi butuhana sian hasoloan ni rohangku, nunga tung diumbang ahu.

³⁵Sai manginona tu Babel ma pangarupaon tu ahu dohot tu sibukku, ninna pangisi ni Sion, mudarhu pe sai manginona ma tu isi ni Kasdim, ninna Jerusalem.

³⁶Dibahen i songon on do hata ni Jahowa: Ida ma, ahu ma mangkasuhuthon badam, jala ahu martubolhon sipartubolhononmu, jala ahu mambahen marsik lautnasida, jala ahu pahiang mualna.

³⁷Ia Babel ingkon gabe timbunan batu, parasaran ni ulok naga, gabe hasonggoton dohot sirehereheon pangisina nanggo sahalak.

³⁸Ingkon rap nasida marauang songon angka singa jala marngungung, songon anak ni singa.

³⁹Ia dung mohop dihilala nasida, ahu ma mambahen sada panggalangon di nasida, jala pamabuhonku nasida, asa marolopolop nasida laos tarpodom ro di salelenglelengna, jala ndang be tarsunggul, ninna Jahowa.

⁴⁰Ahu ma manogihon nasida tuat songon anak ni birubiru tu pamotongan, birubiru tunggal rap dohot hambing tunggal.

⁴¹(IV.) Oe nunga patu hape Sesak, nunga pesan hape hamuliaon ni sandok tano on! Nunga gabe halongonan hape Babel di tongatonga ni angka bangso parbegu.

⁴²Nunga binsat hape laut i mangalantap Babel, nunga hona lingkup hape binahen ni gunsang ni galumbangna.

⁴³Nunga gabe halongonan hape angka hutana, gabe tano hasang adaran, tano na soada be pangisina, na so tarbolusjolma be nanggo sada halak.

⁴⁴Marlulu ma ahu dohot dompak Bel di Babel jala toltolanku ma sian pamanganna naung pinolgakna, jala ndang be marrongoman angka bangso parbegu mandapothon ibana. Nunga marobo huhut parik ni Babel.

⁴⁵Ruar ma hamu sian tongatongana ho ale bangsongki, jala dipalua be ma hosana maradophon parpiarpiar ni rimas ni Jahowa.

⁴⁶Unang pola godoron rohamuna manang mabiar hamu umbege barita na mehet di luat i; ai masisoluhan do barita i sian taon na sada tu taon muse, taringot tu pangarupaon di luat i, pangarajai sama pangarajai maralo.

⁴⁷Dibahen i, ida ma, na ro do angka ari sogot, marlulu ma ahu dompak angka ganaganaan di Babel, gabe tarurak ma sandok tanona i jala saluhut angka na tartullang sian nasida, ingkon marragean di tongatongana.

⁴⁸Alai ingkon marsuraksurak ma mida Babel langit i dohot tano on ro di isina sudena, ai sian utara do ro pangago dompak nasida, ninna Jahowa.

⁴⁹Marragean do najolo halak Israel dibahen Babel suang songon i ingkon marragean halak isi ni sandok luat Babel i.

⁵⁰Hamu ale angka na malua sian podang, laho ma hamu, unang sulon hamu! Paingotingot hamu Jahowa sian na dao jala malungun rohamuna di Jerusalem!

⁵¹Nunga tarurak hami, ai nunga hubege hami insahinsak, tung haurahon do manghungkupi bohinami, ai nunga masuk halak sileban tu bagasan habadiaon ni joro ni Jahowa.

⁵²Dibahen apala i, ida ma, na ro do angka ari sogot, ninna Jahowa, marlulu ma ahu dompak angka ganaganaannasida, jala di sandok tanona marongrong angka halak na tartullang.

⁵³Tung sura pe manaek Babel sahat ro di langit, jala tung sura sapsap bire partanobatoanna, sai ro do sian ahu angka pangago dompak ibana, ninna Jahowa.

⁵⁴Tarbege do soara angguhangguk sian Babel jala hajepolon godang sian tano ni halak Kasdim.

⁵⁵Ai Jahowa sandiri mangago Babel, jala ibana umpesanhon sian i soara hariburon. Jala marhasak do galumbangna, songon angka aek magodang, pola marsaringar tu na dao soara hagunturonna i.

⁵⁶Ai ro do dompak Babel sada pangago, gabe tartangkup ma angka ulubalangna,

diponggolhon angka siorna, ai Debata partubol do Jahowa, sai na baloshononna do.

⁵⁷Ahu ma pamabukkon angka indukna, angka panuturina, angka pangarajai, angka wakilna dohot angka ulubalangna, asa tung tarpodom nasida nasida ro di salelenglelengna, jala ndang be tarsunggul, ninna rajai, Jahowa Zebaot goarna.

⁵⁸Songon on do hata ni Jahowa Zebaot: Parik ni Babel angka na bidang i ingkon magargar do, jala bahalna angka na timbo i, ingkon purunon dohot api; jadi sayang boti ma na hinangaluthon ni angka bangso, jala suda panganon ni api na hinangaluthon ni angka bangso i.

⁵⁹(V.) On do hata na tinonahon ni panurirang Jeremia tu si Seraia, anak ni si Neria, tubu ni si Maaseia uju ibana dongan ni si Sedekia. Raja sian Juda, tu Babel, paopattaonhon hinarajaonna i. Alai induk pature pangulonon do si Seraia i.

⁶⁰Nunga disurathon si Jeremia hian saluhut jea siparoon dope tu Babel tu bagasan sada buku, luhut tahe hata i angka naung sinuratna i dampak Babel.

⁶¹Dung i ninna si Jeremia ma tu si Seraia: Ia dung tolhas ho tu Babel, ingkon tangkas jahaonmu luhut hata i.

⁶²Jala dohononmu ma: Ale Jahowa, nunga pola marlumba ho dampak inganan on, naeng siaphononmu, asa unang adong maringan

disi nang jolma nang pinahan, ingkon gabe halongonan do i ro di salelenglelengna.

⁶³Ia dung tolhas dijaha ho buku on, rahuti ma tusi sada batu jala reongkon tu tongatonga ni Euprat.

⁶⁴Jala dohononmu ma: Ingkon songon i lonong Babel, jala ndang be hehe maradophon hamagoan siparoonku tusi, asa laos pidom. Intap ni ma angka hata panurirangon ni si Jeremia.

52¹(I.) Marumur duapulu sada taon si Sedekia di na bangkit raja ibana, jala sampulu sada taon lelengna ibana mangarajai di Jerusalem jala goar ni inana do Nai Humuntal, boru ni si Jeremia sian Libna.

²Jala diulahon ibana do sogo ni roha ni Jahowa, sandok songon na binahen ni si Joiakim na jolo.

³Ai masa pe i ala ni rimas ni Jahowa do mida Jerusalem dohot mida Juda, pola nasida dipabali sian adopan ni bohina. Jadi manggunturi ma si Sedekia dompak raja sian Babel.

⁴Alai tole pasiataonhon hinarajaonna i, di bulan sipaha sampulu di ari pasampuluhon, ro ma si Nebukadnesar, raja sian Babel, ibana dohot sandok paranganna mandopang Jerusalem, laos ditungkum huta i jala dibahen partanobatoan humaliang.

⁵Jadi lam tarsosak ma huta i sahat ro di pasampulusada taonhon hinarajahon ni raja Sedekia.

⁶Tole muse paopatbulanhon di ari sia marpotirpotir ma haleon di bagasan huta i, jala ndang adong be sipanganon tu situasi na torop isi ni luat i.

⁷Dung i dibongoti ma huta i, jadi maporus ma sude halak sialo musu jala ruar sian huta i bornginna i mangihutihut dalan laho tu bahal di holangholang ni na dua parik hombarhon porlak ni rajai; alai humaliang huta i do anggo halak Kasdim, jadi diihuthon nasida ma dalan laho tu adaran.

⁸Dung i dieak parangan ni halak Kasdim ma rajai sian puji, jala dapot nasida ma si Sedekia di adaran Jeriko ianggo sandok paranganna nunga mampar sian lambungna.

⁹Jadi ditangkap nasida ma rajai jala diboan ibana nangkok tu jolo ni raja sian Babel, tu Ribla di tano Hamat, laos didabu uhumna tu ibana disi.

¹⁰Dung i diseati raja sian Babel ma angka anak ni si Sedekia di adopan ni matana ro di saluhut induk ni Juda diseati di Ribla.

¹¹Dung i dipitungi ma ia mata ni si Sedekia, jala dirante ibana dohot dua rante tombaga; jala didokkon raja sian Babel boanon ibana tu Babel, jala dipasahat ibana tu bagas hurungan sahat ro di ari hamamatenana.

¹²(II.) Tole muse pasampulu arihon di bulan sipaha lima, i ma pasampulu sia taonhon hinarajahon ni raja Nebukadnesar raja sian Babel, ro ma tu Jerusalem si Nebusaradan, induk ni angka parangan, na jongjong di jolo ni raja sian Babel.

¹³Jala disurbu joro ni Jahowa dohot bagas ni rajai ro di luhut bagas di Jerusalem, jala saluhut bagas angka na bolon disurbu dohot api.

¹⁴Saluhut parik humaliang Jerusalem pe dilohai sandok parangan ni halak Kasdim do angka na rap dohot induk ni parangan i.

¹⁵Langgo deba sian halak na pogos di bangso i dohot pasipasi ni bangso i, angka na tading di huta i dohot angka na bali tu raja sian Babel ro di pasipasi ni angka pande, tarbuang do diboan si Nebusaradan, induk ni angka parangan i.

¹⁶Alai anggo deba sian halak na pogos isi ni tano i, tinggal do dibahen si Nebusaradan, induk ni angka parangan i, bahen angka tukang porlak anggur dohot bahen angka parumauma.

¹⁷Alai anggo tiang tombaga, angka na di joro ni Jahowa dohot angka hundulan ro di tobat haksa na di joro ni Jahowa, diponggolhon halak Kasdim do jala diboan saluhut tombaga i tu Babel.

¹⁸Tole angka hudon dohot angka siuksiuk, angka raut dohot saoran, angka balanga dohot

sandok ulaula tombaga, angka na pinangkena marulaon na badia, dibuat nasida do.

¹⁹Diboan induk ni angka parangan i do huhut angka mangkuk dohot angka parapiapian, angka saoran dohot angka hudon, angka parpalitoan dohot angka balanga ro di angka pinggan pasu, angka na sian sere manang sian perak.

²⁰Tole tiang na dua i tobat sisadasada i ro di lombu tombagana sampulu dua i, angka ondolanna di toru, angka na pinauli ni raja Salomo tu joro ni Jahowa, tung na so tardasing do tombaga ni saluhut angka ulaula i dibahen godangna.

²¹Ia angka tiang i sampulu ualu asta timbona sadasada, jala sampulu dua asta lilitna humaliang, jala hapalna opat jari do, ai marruang do.

²²Jala tombaga do uluna di ginjang jala lima asta do timbo ni uluna sadasada, jala marrungkung jala mardalimo uluna humaliang, luhutna i tombaga do. Laos songon i do tiang paduahon i dohot angka dalimona.

²³Alai siapulu onom do torop ni dalimo i tungkan desa na opat i saluhut angka dalimo i saratus do di rungkungna i humaliang.

²⁴(III.) Dung i dibuat induk ni angka parangan i ma sintua ni malim Seraia dohot si Sepania, malim paidua dohot na tolu halak sijaga bahal.

²⁵ Sian huta pe dibuat do sada halak parhalado na parentahon halak sialo musu dohot pitu halak sian angka na marhalado di jolo ni rajai angka na jumpang di bagasan huta i dohot juaratulis i, induk ni angka parangan, na manurati goar ni bangso isi ni tano i bahen parangan, angkup ni onompulu halak sian bangso isi ni tano i, angka na jumpang di tongatonga ni huta i.

²⁶ I ma angka na binuat ni si Nebusaradan, induk ni angka parangan i, manogihon nasida tu Ribla tu jolo ni raja sian Babel.

²⁷ Dung i dibunu raja sian Babel ma nasida, gabe mate nasida di Ribla, di tano Hamat. Jadi tarboan ma halak Juda sian tanona tu habuangan.

²⁸ On ma bilangan ni bangso na binuangkon ni si Nebukadnesar: Paitu taonhon hinarajaonna i tolu ribu duapulu tolu halak Jahudi.

²⁹ Pasampulu ualu taonhon hinarajahon ni si Nebukadnesar sian Jerusalem: Ualu ratus tolupulu dua halak.

³⁰ Paduapulu tolu taonhon hinarajahon ni si Nebukadnesar dibuangkon si Nebusaradan, induk ni angka parangan i: Pitu ratus opatpulu lima halak Jahudi. Opat ribu onom ratus do bilangan ni halak saluhutna.

³¹ (IV.) Tole muse patolupulu pitu taonhon, dung tarbuang si Joiakin, raja sian Juda, paduapulu lima arihon, bulan hurung,

dipabangkit Epilmerodak, raja sian Babel ma, di taon hababangkitna i gabe raja, ulu ni si Joiakin, raja sian Juda, jala diparuar ibana sian bagas hurungan.

³²Jala basar do hata ni rajai tu ibana, jala huminsat habangsana dibahen sian habangsa ni raja angka donganna i di Babel.

³³Disalin huhut pangkeanna hian di hurungan, jala mangan sagusagu di jolo ni rajai ibana tongtong saleleng mangolu.

³⁴Jala balanjona raja sian Babel i do pasingkophon tongtong ariari saleleng mangolu ibana sahat ro di ari hamamatenana.

Ratapan

1 ¹ (I.) Langami marpangisi, ale huta na rame na sai laon! Tung gabe tudoshon na mabalu do na timbul hian di tongatonga ni angka bangso parbegu, tung gabe mangalehon seoa do hape ibana na manggomgomi angka luat na sai laon.

² Tung mandatdati tumatangis do hape ibana manipat borngin, jala sai mabakbak iluiluna sian hurumna; ndang adong nanggo sahalak sian saluhut haholonganna na sai laon na mangapuli ibana. Tung saluhut pedanna marbalik dompak ibana gabe musuna do nasida.

³ Tarbuang do ia Juda binahen ni pangarupaon dohot binahen ni hinaparir ni parhatobanan. Maringan do ibana di tongatonga ni angka bangso parbegu, ndang adong jumpangsa hasonangan. Saluhut halak pangalele di ibana laos manangkup ibana di angka hagogotan.

⁴ Tarulang do angka dalan laho tu Sion ala so adong be na ro marari raya. Saluhut harbanganna maloha do; angka malimna marhosa godang, marsak be do angka namarbaju disi, tung margudompong do anggo ibana sandiri.

⁵Ia alona lam marbungaran do, marantu ia musuna, ai Jahowa do pajimput nasida ala ni hinadeak ni hajahatonna; angka anakkonna mardalan tu habuangan di jolo ni musu.

⁶Nunga pesan sian boru Sion sandok hamuliaonna, ia indukna tudoshon urisa do angka na so jumpangan jampalan; mardalan do nasida maradu mandate nilotongan ni halak pangalele.

⁷Uju di angka ari pardangolanna dohot paraotaotanna, tarsingot ma Jerusalem di saluhut hamuliaonna, olat ni angka ari na robi. Uju marragean bangsona marhitehite tangan ni musu jala ndang adong pangurupi di ibana, diida angka musu ma ibana, laos dieleselesi ala ni hapipidomna.

⁸Mardosa godang do Jerusalem, ala ni do gabe marbiasbias halak mida ibana. Luhut halak na pasangaphon ibana na jolo marro ni lea mida ibana ala naung niidana hailaonna. Alai marhosa godang ma anggo ibana, laos dipadao matana.

⁹Lohot di rambu ni ulosna do tahe haramunonna; ndang disarihon hian pangapudian sogot, gabe tau halongangan do surutna; ndang adong nanggo sahalak na mangapul ibana. Sai tatap ma, ale Jahowa, pardangolanki, ai mangastaasta do musu i.

¹⁰Nunga pola dipahembang musu i tanganna di atas ni saluhut arta hasoloan ni rohana, ai nunga pola diida ibana ro angka parbegu

bongot tu habadiaonna naung tinonahonmi
nian taringot tusi: Na so tupa masuk nasida
saor tu luhutanmi.

¹¹ Sandok bangsona i marhosa godang
mangalului sipanganon; tung dilehon nasida
do arta hasudungan ni rohana tumuhor
sipanganon asa manguhut hosana nian. Ida
ma, ale Jahowa, jala tatap, ai nunga tung
marlea ahu.

¹² (II.) Tung so pardulimuna hape, sude
hamu ale angka na umbolus dalan i! Tatap
jala bereng hamu manang tung adong ma
tudosan ni parniahapan na mangonai tu ahu,
na pinajepol ni Jahowa ahu di ari parpiarpiar
ni rimasna.

¹³ Ibana tahe mandabu api sian banua
ginjang manginona tu holiholingu
patundukkonsa; ibana manaon jorgong di
pathu, ibana paundar ahu tu pudi; ibana
mambahen ahu marhinamago, marsipal
manipat ari.

¹⁴ Tanganna sandiri tahe mangarahuti auga
ni hajahatonku, angka na pasebut pampe tu
tangkuhukku; ibana mangaropuhi gogongku.
Nunga dipasahat Tuhan i ahu tu bagasan
tangan ni angka na so tardopang ahu.

¹⁵ Nunga diluntakluntak Tuhan i luhut halak
angka na marhuaso di tongatonganami;
dipaluhut do sada luhutan dompak ahu laho
mangaropuhi angka dolidolingu. Nunga tutu

diluntak Tuhan i pangilangan di boru Juda namarbaju i.

¹⁶Ala ni luhutna i sai tumatangis ahu, sai mabakbak do aek ni matangku, ai holang do sian ahu sipangapul na pasabam rohangku. Nunga tung pidom angka anakku, ai mambahen gogo do musu i.

¹⁷Pola do nian dipaherbang Sion tanganna, alai ndang adong na mangapul ibana. Nunga pola marhara Jahowa di musu ni Jakkob humaliang ibana, umbahen gabe biasbias Jerusalem di tongatonganasida.

¹⁸Na bonar do tutu Jahowa, ai na manggunjal do ahu dompak hatana. Sai tangihon ma i, sude hamu ale angka bangso, jala bereng hamu parniahapanki! Tarboan tu habuangan do angka namarbaju dohot dolidoli di ahu.

¹⁹Sai hupajoujou do nian angka alealengku, hape diansi nasida do ahu. Monding do angka malim dohot sintua na pature ahu di bagasan huta uju mandiori sipanganon di ibana be do nasida, asa mangudut hosanasida nian.

²⁰(III.) Iale Jahowa, sai tatap ma hagogotanki, pola gunsang butuhangku jala dibaling ateatengku di bagasan ahu. Ala manggunturi situtu ahu gabe punu ahu dibahen podang sian ruar, dibahen hamatean di bagasan jabu.

²¹Dibege nasida do nian ahu morongorong, alai ndang adong na mangapul ahu. Saluhut

musungku nian umbege hinamagongku,
hape ditillahon do. Alai ho do mambahensa;
paroonmu do sogot ari na nilumbahonmi
hian, asa doshon ahu nasida.

²²Sai sahat tu jolom ma saluhut
hajahatonasida i, jala bahen ma tu nasida
songon na binahenmi tu ahu ala ni saluhut
pangalaosingku; ai tung na godang do
hoihoingku, jala mandate do rohangku.

2¹(I.) Holomna i parnidaan ni boru Sion
dibahen Tuhan i di bagasan rimasna,
nunga direongkon ibana sian banua ginjang
hamuliaon ni Israel tu tano, jala ndang
be diingot sidegedegean ni patna di ari
pangarimasanna i.

²Nunga tung dibondut Tuhan i, ndang diolani
saluhut inganan ni Jakkob; nunga tung dilohai
di bagasan rimasna huta angka na gonting ni
boru Juda, tung dipanepnep do tu tano; tung
diloas do ramunan harajaon i ro di indukna.

³Nunga tung diponggolhon di bagasan
rimasna sandok tanduk ni Israel; tung
dipasurut do tanganna siamun maradophon
musu, jala marsigorgor rimasna mida Jakkob,
songon nala ni api na mangan humaliang!

⁴Nunga tung disintak siorna, songon musu,
diondamhon siamunna songon alo, jala
dipusa saluhut hasoloan ni mata; tung
diusehon do rimasna songon api tu bagasan
undungundung ni boru Sion.

⁵Nunga tung gabe tudoshon musu Tuhan i, nunga tung dibondut Israel, dibondut saluhut bagasna angka na bolon; nunga tung disiaphon hutana angka na gonting i, asa pagodang angguhangguk dohot andung di boru Juda.

⁶Nunga tung diulang undungundungna songon porlak, nunga diloha parluhutanna. Nunga tung lupa di Sion ari raya dohot ari Sabbath dibahen Jahowa jala diambolongkon di bagasan parpiarpiar ni rimasna raja dohot malim.

⁷Nunga tung ditulak Tuhan i langgatanna, marbiasbias rohana mida habadiaonna; nunga dipasahat tu tangan ni musu angka dorpi ni bagasna angka na bolon i, pola marsuraksurak nasida di bagasan joro ni Jahowa, songon di ari raya.

⁸Nunga pola disangkap Jahowa naeng lohaonna parik ni boru Sion; nunga pola disintak pangungkur, tung na so pasurutonna be tanganna paima sun dipolgak, jadi gondok be parik dohot dorpi dibahen, rap marumpak do.

⁹Nunga pola marongrong tu tano angka harbanganna, nunga pola diago jala diponggolhon ransangransangna. Rajana ro di angka indukna, nunga di tongatonga ni angka bangso parbegu; so adong be patik, nang angka panurirangna, ndang be maruli pangungkapon sian Jahowa.

¹⁰Hundulhundul di tano do angka sintua ni boru Sion, hohom be nasida umpirpirhon sirabun tu atas ulunasida, marulos tangki di gontingna, manungki be tu tano ulu ni angka namarbaju sian Jerusalem.

¹¹Nunga tung lotop matangu binahen ni iluilu, gunsang do butuhangu, use tu tano i do ia ateatengu binahen ni hapapansing ni boru ni bangsongku, binahen ni hararage ni dakdanak dohot posoposo di angka alaman ni huta i.

¹²Angka na mandok tu inanasida: Didia do adong eme dohot anggur? Uju na marragean nasida, songon halak na tartullang di angka alaman ni huta i; uju na laho tos hosanasida di ampunan ni inanasida i.

¹³Tung aha ma hatindangkononku tu ho, tung tu aha ma patudosonku ho, ale boru Jerusalem? Tung aha ma bahenonku tudosanmi asa mangapul ahu di ho, ale boru Sion namarbaju? Ai tung tudoshon laut do bidang ni bugangmu, tung ise ma pamalum ho?

¹⁴(II.) Angka panurirangmu manurirangkon tu ho sipaotooto dohot lemeslemes, jala ndang dipapatar hajahatonmu, manundati habuanganmu nian, ulpuhan sipaotooto dohot haambolongan tahe disurirangkon nasida tu ho.

¹⁵Martopaptopap tangan tahe taringot tu ho saluhut halak na umbolus dalan i;

marngiul nasida jala mangupir taringot tu boru Jerusalem: On do hape huta i na nidok ni halak: Sun hinaulina, hasoloan ni portibi on ninna?

¹⁶Saluhut musum pangangang babana be mida ho, marngiul do nasida jala patungoripon, angka didok be do: Nunga tung hupolgak hami ibana, on ma tongon ari na huhalungunhon hami. Nunga tung jumpang hami huta i, nunga huida hami.

¹⁷Nunga tahe dipatolhas Jahowa na sinangkap ni rohana hian, nunga dipasintong hatana, na tinonahonna i olat ni angka ari na robi dope; nunga dipansingkon jala ndang maralangalang, jala dipalas roha ni musum mida ho, nunga dipatimbul ianggo tanduk ni alom.

¹⁸(III.) Mangangguhi ma rohanasida tu Tuhan i. Oe ho ale parik ni boru Sion, laos ma mabaor iluulum borngin dohot arian songon sunge! Unang marpansohotan ho, unang mansadi anak ni matam!

¹⁹Hehe ma ho, tumatangis ma ho bornginna i mamungka sian gansi jaga parjolo! Usehon ma roham songon aek di jolo bohi ni Tuhan i! Paherbang ma tanganmu tu ibana taringot tu hosa ni anakkonmu, angka naung mandate binahen ni haraparon di haroroan ni saluhut angka alaman.

²⁰Sai bereng ma, ale Jahowa, jala tatap, manang tu ise dung dibahen ho songon i?

Tung tama ma inaina manganhon pinomparna sandiri, posoposo angka na minemeanna? Tung tama ma bunuon di habadiaon ni Tuhan i malim dohot panurirang?

²¹ Marragean do di tano di angka alaman i nang dakdanak nang na tuatua; marragean do binahen ni podang angka namarbaju di ahu nang dolidoli, angka na binunum di ari pangarimasamu, angka naung pinotongmu so maralangalang.

²² Nunga dipaluhut ho songon di ari raya angka na manonggoti ahu humaliang; jadi ndang adong na malua manang teba di ari pangarimasan ni Jahowa; angka na hupamemememe jala na hupagodanggodang, musungki do maniaphon nasida.

3¹ (I.) Ahu ma apala baoa panginonaan ni pardangolan binahen ni linsinglinsing ni rimasna.

² Nunga ditogu jala diadu ibana ahu tu haholoman, ndada tu hatiuron.

³ Holan ahu do na tinuju ni tanganna gonop ari.

⁴ Nunga merus sibukku dohot sisikku dibahen ibana, jala maropuk angka holiholingku dibahen.

⁵ Nunga dipagukguk humaliang ahu rasun dohot hangaluton.

⁶ Nunga dipahundul ibana ahu tu bagasan haholoman songon halak naung mate di na robi.

⁷ Nunga ditungkum ibana ahu humaliang, gabe ndang tarbahen ahu ruar, dipaborat do rantengku sian tombaga.

⁸ Tung sura manganguhi ahu manang joujou, ndang tagamon tolhas tangiangki.

⁹ Nunga dipolpol ibana angka dalanku marhitehite batu na nidakdak, jala dipalegotlegot angka dalanku.

¹⁰ Nunga gabe gompul na mangarop ibana di ahu, gabe singa tahe di pangaropan.

¹¹ Nunga dipasimbil angka dalanku jala di parsurage ahu jala dibahen do ahu tarpunjung.

¹² Nunga disintak ibana siorna, jala dipatindang ahu hira selamat di sumbia.

¹³ Nunga disiorhon angka anak ni parangkatanna masuk tu bagasan piapiangku.

¹⁴ Nunga tung gabe sieleseleson ahu di sandok bangsongki, ende alingnasida manipat ari.

¹⁵ Nunga dipamahap ibana ahu marhitehite angka na paet, tung dipainumhon tu ahu raru.

¹⁶ Nunga ibana mangaropangi angka iponku marhitehite batu loting, jala dihungkupi ahu dohot sirabun.

¹⁷ Nunga dipaholang ibana rohangku sian hadameon, gabe lupa ahu di na denggan.

¹⁸ Jadi ningku ma: Nunga tung mago nalom dohot arop ni rohangku maradophon Jahowa!

¹⁹(II.) Sai ingot ma dangolhon dohot pangaleleon na tu ahu ro di raru dohot rasun!

²⁰Sai paingotingot ma tutu, asa tung sabam rohangku di bagasan.

²¹I ma antong parateatehononku, ala ni do umbahen marpangkirimon ahu.

²²Asiasi ni Jahowa sambing do umbahen so haru sun siap hami, ai ndang marpansohotan asi ni rohana i.

²³Mulak rata do i tahe ganup sogot, godang ma tutu habonaronmu!

²⁴Jahowa do parjambaranku, ninna tondingku, dibahen i marhaposan tu ibana ma ahu.

²⁵Pardengganbasa do Jahowa mida angka na marhaposan tu ibana, mida tondi ni na mangalului ibana.

²⁶Martua ma manang ise na hohom mangkalungunhon hatuaon ni Jahowa.

²⁷Denggan do di baoa i, molo diusung augana tagan di haposonna.

²⁸Punjung ma ibana hundul, jala hohom, molo dung dipampe Tuhan i tu ibana.

²⁹Denggan nian dibahen pamanganna tu orbuk, anggiat adong sihirimon.

³⁰Denggan nian ditarehon hurumna tu na mamastap, maradu mahap rohana di haurahon.

³¹Ai ndang olo Tuhan i mangambolongkon halak ro di salelenglelengna.

³²Ai ia dung dipajimput manang ise, marpangulah i ma rohana hombar tu godang ni asi ni rohana.

³³Ai ndada sian lomo ni rohana ibana pasipalhon manang mangarsahi jolma manis ia.

³⁴Molo pinajepoljepol luhut angka na tarhurung di tano on.

³⁵Molo pinapeolpeol uhum tu baoa i di adopan ni na tumimbul.

³⁶Molo niruparupaan jolma di parsalisianna, tung so tatapon ni Tuhan i ma i?

³⁷Tung ise ma na guru dokna manjadi, molo so Tuhan i martona?

³⁸Tung so sian pamangan ni na tumimbul ruar hinamago dohot tua?

³⁹Boasa sai marmungutmungut i jolma na mangolu i? Dompok dosana ma nian marmungutmungut be.

⁴⁰(III.) Denggan ma hita mandiordiori angka dalanta jala itasulingkit, jala mulak hita tu Jahowa.

⁴¹Denggan ma itapahehe rohanta rap dohot tanganta tu Debata na di banua ginjang i!

⁴²Nunga marbalik hami jala manggunturi, umbahen so tarbahen marpangulah i roham.

⁴³Nunga dilungkuphon ho rimasmu tu hami, jala nunga dilele ho hami, nunga dibunu ho hami ndang maralangalang.

⁴⁴Nunga martabuni ho di bagasan ombun, ndang tartondong tangiang.

⁴⁵Nunga rapanrapan dohot biasbias hami dibahen ho di tongatonga ni angka bangso.

⁴⁶Luhut angka musunami pangangang babana be dampak hami.

⁴⁷Hasonggoton dohot godung manjadi jambarnami, tole muse hasiapon dohot hapansingon.

⁴⁸Hira batang aek do mabaor sian matangku, ala ni hapansingon ni boru ni bangsongku.

⁴⁹Sai mabakbak do iluilu ni matangku, ndang marpansadian, ndang marhasonangan.

⁵⁰Paima manatap manonggor Jahowa sian banuaginjang.

⁵¹Matangku paholso rohangku taringot tu saluhut boru ni hutangku.

⁵²Sai dipaburuburu musungku do ahu songon pidong, soada paralaan.

⁵³Nunga direndephon nasida ngolungku di bagasan godung, lam ditompashon dope batu tu ahu.

⁵⁴Nunga pola disalpui aek ulungku, pola hudok: Tos ma annon hosangki.

⁵⁵(IV.) Jadi hupajoujou ma goarmu, ale Jahowa, sian godung apala na bagas i.

⁵⁶Ditangihon ho do soarangku, unang tung padao pinggolmu sian hoihoingki dohot sian angguhanggukki.

⁵⁷Jonok do ho di ari uju na joujou ahu tu ho, nimmu do: Unang ho mabiar!

⁵⁸Nunga dihasuhuthon ho, ale Tuhan, bada tu tondingku; nunga dipalua ho ngolungku.

⁵⁹Nunga diida ho ale Jahowa pangarupaon na tu ahu; sai patingkos ma uhum tu ahu.

⁶⁰Nunga diida ho saluhut partubolonnasida, saluhut sangkapnasida dompak ahu.

⁶¹Nunga dibege ho eleselesnasida, ale Jahowa, saluhut tahi ni rohanasida dompak ahu.

⁶²Pangkuling ni bibir ni angka alongku dohot tubutubu ni rohanasida mangalo ahu manipat ari.

⁶³Sai tatap ma parhundul dohot parhehenasida; ahu do gabe ende aling di nasida.

⁶⁴Baloshon ma tu nasida partubolan, ale Jahowa, hombar tu pambahenan ni tangannasida!

⁶⁵Sai lehon ma tu nasida hatangkangon ni roha, jala harom ma jambarnasida!

⁶⁶Lele ma nasida di bagasan rimasmu, jala pansingkong nasida sian toru ni langit ni Jahowa!

4¹ (I.) Tung gabe marbirong hape sere hian, tung mimbar do hape rupa ni sere palangki mamolin tung marambolongan do hape angka batu ni habadiaon di haroroan ni saluhut alaman!

²Anak ni Sion angka na marmulia, angka na sobokkon mas timbanganna, tung gabe sobokkon ulaula angka na sian tano do hape jadijadian ni tangan ni panopa.

³Gari binatang manarehon mundalana laho pasusuhon anakna; muba do hape sogir ni boru ni bangsongku, tudoshon pidong andurian di halongonan.

⁴Pola tung lohot dila ni posoposo tu langitlangit ni pamanganna dibahen uas; mangido indahan ia dakdanak hape ndang adong na marsagihon di nasida.

⁵Jolma angka na somal manganhon na tabo na sai laon, mate anturaparon nuaeng di angka alaman; jolma angka na pinaompaompa di bagasan surta na jolo, margulu tena nuaeng.

⁶Umbalga do antong hajahaton ni boru ni bangsongku sian dosa ni Sodom, i do garina balik di bagasan sangkidop mata, ndang pola lumenduk tanganna dibahen.

⁷Sumillaman do indukna na jolo sian batu holing, sumaksak sian susu; rumara do dagingna sia mata intan, tung sisandok do rupana.

⁸Alai anggo nuaeng umbirong do rupana sian itom, ndang be ditanda halak ibana di angka alaman; hulingkulingna lohot di holiholina, tung masak do songon hau.

⁹Maruntungan do halak angka na mate binahen ni podang, asa halak na mate binahen ni haraparon, angka na mate marsingkor, ala hurangan parbue tano i.

¹⁰Tung tangan ni inaina angka na bonsa roha mangalompa anakonna sandiri, bahen

sipanganon nasida di hapapansing ni boru ni bangsongku.

¹¹Nunga tung sun hinarimas ni Jahowa, nunga diusehon ibana parpiarpiar ni murukna, jala dipagalak sada api di bagasan Sion, na mansudahon angka ojahanna.

¹²(II.) Ndang diparhatongon roha ni angka raja ni tano on, ro di isi ni portibi on sudena tahe, tung bongotan ni alo manang musu hape angka bahal ni Jerusalem.

¹³Ala ni dosa ni angka panurirangna do antong, ala ni hajahaton ni angka malimna, angka naung mandurushon mudar ni halak partigor di tongatongana.

¹⁴Marbadoatan do nasida songon halak na mapitung di angka alaman, marsapu mudar, tung na so tarjama halak do pangkeannasida i.

¹⁵Pasiding hamu ma, ramun do! Angka dijouhon halak tu nasida. Pasiding! Pasiding! Unang jama hamu nasida. Uju na maporus nasida jala madoado, ninna halak ma di tongatonga ni angka parbegu: Ndang be jadi nasida mangulon disi.

¹⁶Nunga dipaserak bohi ni Jahowa nasida, ndang be tataponna nasida. Ndang pardulinasida angka malim, ndang maralangalang nasida mida angka na tuatua.

¹⁷Jongjong dope nian huta i, sai nolnol matanami mangkasiholi pangurupion di hami nian, hape so marniula. Sai manatapnatap do

hami di panatapannami mangkalungunhon sada bangso nian hape so olo manolongi.

¹⁸Sai dihampungi nasida do langkanami, maradu so tarbahen hami mardalan di alamannami. Nunga jonok tahe ajalnami, nunga gok ariarinami, ai nunga ro adammami.

¹⁹Dumoras do halak na paburuburu hami sian lali na martongatonga langit; sai diburu nasida do hami di atas ni angka dolok, sai diarop do hami di halongonan.

²⁰Hosa ni igungnami nian, na miniahan ni Jahowa, gari tardapot di bagasan godung nasida, hudok hami do nian taringot tu ibana: Di linggomanna mangolu ma hita di tongatonga ni angka parbegu.

²¹(III.) Marolopolop ma ho jala marlas ni roha, ale boru Edom, na maringan di tano Us! Taripar do nang tu ho panginumani, ingkon laos mabuk ho jala marsaemara.

²²Nunga salese utangmi, ale boru Sion, ndang be buangkononna ho. Luluhononna ma ianggo hajahatonmu, ale boru Edom, jala papataronna angka dosami.

5¹(I.) Sai ingot ma, ale Jahowa na manginona tu hami! Sai tatap jala bereng haurahonnami.

²Partaliannami nunga bali tu halak sileban, angka bagasnami tu halak na pulik marga.

³Jadi angka na sopot so marama so marina nama hami; inanami hirana mabalu do.

⁴Ingkon martuhor nama aek siinumonnami,
arga situtu ia sobannami hutuhor hami.

⁵Sai dilotongi nasida do tangkuhuknami,
mandate pe hami laos so diloas do hami
mangulon.

⁶Tu Misir husombahon hami tangannami,
boti tu Assur, asa pasingkop sipanganon nian.

⁷Ompunami nian, angka na so disi be
mardosa, hape manginona tu hami do
hajahatonnasida i.

⁸Hatoban do mangarajai hami, ndang adong
na palua hami sian tangannasida i.

⁹Pola sumeahon hosanami hami mangalap
sipanganonnami maradophon podang di
halongonan.

¹⁰Hira purun do sisiknami hinilala binahen ni
parpotirpotir ni haraparon.

¹¹Nunga digogoi nasida angka inaina di
Sion, ro di angka namarbaju di bagasan
angka huta ni Juda.

¹²Nunga targantung angka induk dibahen
tangannasida, bohi ni angka na tuatua pe,
ndang marsangap diida.

¹³Ingkon pausungusung pandudaan angka
dolidoli, jala angka dakdanak martinggangan
mangusung soban.

¹⁴Angka na tuatua mansohot
marpartungkoan, angka dolidoli mansohot
marhasapi.

¹⁵Nunga pesan las ni rohanami,
panontoronnami nunga hosing gabe arsak ni roha.

¹⁶Nunga peut tumpal sian ulunami. Marjea ma hami ala naung mardosa hami!

¹⁷Ala ni do mandate rohanami, ala ni gabe homur matanami.

¹⁸Mida dolok Sion na tarulang i tahe; tung antuasus hape mardalani disi.

¹⁹(II.) Alai anggo ho, ale Jahowa marhabangsa ro di salelenglelengna, habangsami pe hot do marsundutsundut.

²⁰Boasa tung tongtong hami halupahononmu, tung tadingkononmu hami pola na sai leleleng!

²¹Togihon ma hami mulak tu ho, ale Jahowa, asa saut hami mulak! Paimbaru ma arinami, suang songon di narobi.

²²Tung laos ambolong situtu nama hami pasombuonmu ulaning manang tung sungkot hinarimasmu mida hami so marpangulahi roham tagamon?

Yehezkiel

1 ¹ (I.) Dung i masa patolupulutaonhon, di ari lima bulan sipaha opat, uju ahu di tongatonga ni angka na tarbuang martopihon batang aek Hebar, buha ma angka langit, gabe huida angka pangungkapon sian Debata.

² Palimaarihon di bulan i, i ma palimataonhon, dung tarbuang raja Joiakin.

³ Ro ma tongon hata ni Jahowa tu Heseziel, anak ni malim Busi, di tano ni halak Kasdim, martopihon batang aek Hebar, songgop ma tu ibana disi tangan ni Jahowa.

⁴ Jadi maralatan ma ahu, gabe ida ma, ro habahaba sian utara, mardongan ombun na bolon dohot api na marjilam, jala marsinondang humaliang, jala sian tongatonga ni api i, songon pangalaho ni sere na humillohillo idaon.

⁵ (II.) Jala sian tongatongana ruar sumansuman ni opat parngolu, jala songon on do rupanasida: Tudos tu jolma do nasida.

⁶ Jala ganup maropat bohi be dohot marhabong opat be nasida.

⁷ Jala tingkos do ia patnasida, jala palak ni patnasida i, songon tambirik ni anak ni lembu, jala marlinanglinang songon haksa na niugam.

⁸Jala di toru ni habongnasida, di lambungna na opat i, adong angka tangan ni jolma, jala opat be do bohi dohot habongnasida.

⁹Marrapitrapit do habongnasida ganup tu donganna. Molo mardalan nasida, ndang manaili tu pudi, sai masitulus dalanna be do nasida.

¹⁰Jala rupa ni bohinasida songon on: Bohi jolma, jala bohi singa tungkan siamun ni opatsa nasida, jala bohi jonggi dohot bohi pidong raja ualu tungkan hambirang ni opatsa nasida.

¹¹Jala bohinasida dohot habongnasida mamerper do dampak ginjang; masidolosan do habongnasida na dua, manghungkupi dagingnasida ianggo na dua nari.

¹²Jala masitulus dalanna be do nasida, manang dampak dia Tondi i mardalan, ndang dung manaili tu pudi nasida, jumpa mardalan nasida.

¹³Jala rupa dohot rumang ni angka parngolu i songon gara ni api do, angka na marsigorgor, songon rumang ni huat, sai mardalandalan do i di tongatonga ni angka parngolu i, jala marsinondang do api i, jala ruar do sian api i angka hilap.

¹⁴Alai sai sumiksaksiksak do angka parngolu i, songon rupa ni hilap idaon.

¹⁵(III.) Jadi dung huida angka parngolu i, ida ma, di tano i adong sada roda di lambung ni parngolu i mangihuthon bohina na opat i.

¹⁶ Ia rupa ni angka roda i, jala panjadijadina songon sillam ni mata intan tarsis, jala sisada rupa do opatsa, jala rupanasida dohot panjadijadina, songon di tongatonga ni roda na sada do na sadanari idaon.

¹⁷ Molo mardalan nasida, dompak desa na opat i ditulus, ndang manaili tu pudi nasida di pardalanonna.

¹⁸ Jala tanggurungna mansai timbo jala songkal, jala gok mata do angka tanggurungna i opatsa humaliang.

¹⁹ Molo mardalan parngolu na opat i, mardalan ma dohot angka roda di lambungna; alai molo tarhinsat angka parngolu i sian tano on, tarhinsat ma dohot angka roda i.

²⁰ Manang dompak dia tarhinsat Tondi i, laos tusi do mardalan nang nasida, mangihuthon pardalan ni Tondi i, tarhinsat do huhut angka roda di lambungna, ai di bagasan angka roda i do Tondi ni parngolu i.

²¹ Rap mardalan do nasida, jala rap ngongong do nasida, jala molo tarhinsat nasida sian tano i, tarhinsat ma dohot angka roda di lambungnasida, ai di bagasan angka roda i do Tondi ni parngolu i.

²² (IV.) Jala di atas ni angka ulu ni parngolu i adong do tudosan ni langit na rata, songon rupa ni mata intan na songkal, mangerbang do di atas ulunasida sian ginjang.

²³ Jala di toru ni langit na rata i marsijongjong habongnasida masidompahan, ganup dua be habongna manghungkupi dagingnasida.

²⁴ Jala hubege do parngongos ni habongnasida, jumpa mardalan nasida, songon parhasak ni aek magodang, songon soara ni pargogo na so hatudosan, soara hariburon, songon pardorom ni parangan saparsaroan. Alai jumpa ngongong nasida, dipaheput be do habongnasida.

²⁵ Jala tarbege do sada soara sian atas ni langit na rata i, na di atas ni ulunasida i, jumpa ngongong nasida dipaheput do habongnasida i.

²⁶ Jala di atas ni langit na rata i, na di ginjang ni ulunasida i, idaon do songon rupa ni mata intan sapir, sumansuman ni habangsa, jala di atas ni sumansuman ni habangsa i hundul do songon rupa ni jolma idaon sian ginjang.

²⁷ Huida ma huhut, songon sillam ni sere, songon rupa ni api parbagasanna humaliang; sian rupa ni gontingna tu ginjang, jala sian rupa ni gontingna tu toru huida do songon pangalaho ni api, jala marsinondang humaliang.

²⁸ Songon rupa ni halibutongan na tarjadi di ombun jumpa ari haroro ni udan, songon i do rupa ni sondangna humaliang. I ma rupa ni sumansuman ni hamuliaon ni Jahowa. Jadi dung huida songon i, manungkap ma ahu tu tano, gabe hubege ma soara ni na mangkatai.

2¹ (I.) Jadi didok ibana ma tu ahu: Ale anak nijolma, ojakkon ma patmu, asa mangkatai ahu tu ho.

²Dung i uju mangkatai ibana tu ahu, bongot ma Tondi i tu bagasan ahu, laos dipajongjong ahu di pathu, gabe mananginangi ahu tu ibana na mangkatai dohot ahu.

³Dung i didok ibana tu ahu: Ale anak nijolma, ahu ma marsuru ho tu halak Israel, tu bangso angka na manggunturi dompak ahu; nang nasida, nang ompunasida, sai marbalik do sian ahu rasirasa sadarion.

⁴Ahu ma tongon marsuru ho tu anak, angka na pir bohi dohot na tangkang marroha, jala dohononmu ma tu nasida: Boti hata ni Tuhan Jahowa.

⁵Alai anggo nasida, manang tangihononna manang ndang, ai bangso panggunturi do nasida, gabe diboto nasida naung adong panurirang sada di tongatonganasida.

⁶Ia ho ale anak nijolma, unang ho mabiar maradophon nasida, manang umbege hatanasida i pe, unang ho tahuton! Ai atik pe suga jala tadatada donganmi, jala maringan ho di lambung hala, unang tahuton ho umbege hatanasida i, jala unang mabiar ho mida bohinasida, ai bangso panggunturi do nasida.

⁷Ingkon dohononmu angka hatanku tu nasida, manang tangihononna manang ndang, ai panggunturi do nasida.

⁸(II.) Dibahen i, ho ale anak ni jolma, tangihon ma na hudok tu ho, unang dohot ho manggunturi, songon bangso panggunturi i! Pabuha ma pamanganmu, jala pangan silehononku tu ho.

⁹Dung i maralatan ma ahu, gabe ida ma, tangan sada sonson tu jolongku, jala ida ma, di bagasanna do surat laklak sada na binalunan.

¹⁰Jala dipaherbang di jolongku, jala marsurat do i di jolo dohot di pudi, jala tarsurat disi: Angka andung, partatangison dohot parisuangan!

3¹(I.) Dung i ninna ibana muse tu ahu: Ale anak ni jolma, pangan ma na jumpang ho di jolom; pangan ma tahe balunanon, jala laho ma ho, hatahon ma tu pinompar ni Israel.

²Jadi hupangangang ma pamanganku, gabe dilehon ibana ma balunan i panganonku.

³Laos didok ma tu ahu: Ale anak ni jolma, ingkon panganonmu, jala onjathononmu tu butuham balunan na hulehon i tu ho. Jadi hupangan ma, gabe tonggi songon situak ni loba di bagasan pamanganku.

⁴Dung i ninna ibana muse tu ahu: Ale anak ni jolma, laho ma ho mandapothon pinompar ni Israel, jala hatahon ma tu nasida angka hatangki!

⁵Ai ndada tu bangso parhata bobang, manang pardila na hallang ho sinuru, tu pinompar ni Israel do.

⁶Ndada tu torop bangso, angka parhata bobang, manang pardila na hallang, angka na so dapot ho hatanasida antusanmu; atik pe so tu nasida ho husuru, ianggo nasida tangihononna do ho, tung sura.

⁷Alai anggo pinompar ni Israel, ndang olo nasida tumangihon ho, ai ndang olo nasida tumangihon ahu; ai tung sandok pinompar ni Israel, angka sipir pardompahan do, jala angka na tangkang marroha do nasida.

⁸Ida ma, nunga hupapir bohim suman tu bohinasida, jala nunga hupapir pardompahanmu suman tu pardompahannasida i.

⁹Nunga hupapir pardompahanmu, songon mata intan, umpir sian batu hian tahe; unang ho mabiar mida nasida, jala unang tahuton ho maradophon bohinasida, ai pinompar na tangkang do nasida.

¹⁰Angkup ni ninna ibana tu ahu: Ale anak nijolma, luhut hata angka na huhatahon tu ho, ingkon pajoponmu tu bagasan roham, jala pinggolonmu.

¹¹Antong laho ma ho mandapothon angka naung tarbuang, manopot angka anak ni bangsom, pangkulinganmu ma nasida, jala dohononmu tu nasida: Songon on do hata

ni Tuhan Jahowa! Manang tangihononna,
manang ndang.

¹²(II.) Dung i diluahon Tondi i ma ahu, gabe
hubege sian pudingku soara hariburon bolon,
ninna ma: Pinuji ma hamuliaon ni Jahowa
sian hajongjonganna!

¹³Angkup ni hubege soara ni habong ni
angka parngolu i, angka na masidolosan,
dohot soara ni roda, angka na di lambungna,
dohot soara ni hariburon bolon.

¹⁴Jadi dung diluahon Tondi i ahu, laos
diusung ahu, gabe piription ahu mardalan di
mohop ni ateatengku, alai tangan ni Jahowa
do margogoihon ahu.

¹⁵Jadi tolhas ma ahu tu angka na
tarbuang di Tel-Abib, angka na maringan
martopihon batang aek Hebar, laos disi do
ahu hundulhundul rap dohot nasida pitu ari
padodot, hohom boti di tongatonganasida.

¹⁶(III.) Jadi dung salpu na pitu ari i, ro ma
hata ni Jahowa tu ahu songon on:

¹⁷Ia ho anak ni jolma! Nunga hupabangkit ho
bahen siparmahan halak Israel, dibahen i sai
tangihon ma hata na ruar sian pamanganku,
angka sipatolhasonmu palumba nasida sian
ahu.

¹⁸Molo hudok tu parjahat i: Ingkon mate
ho, hape ndang dipalumba ho ibana, jala
ndang diapoi ho ibana tumundalhon dalanna
na jahat i, asa dapotan hangoluan ibana
nian; sai na mate do nian parjahat i di

bagasan hajahatonna, alai sian tanganmi do partungguhononku mudarna.

¹⁹Alai anggo dipalumba ho do parjahat i, hape ndang olo ibana tumadingkon hajahatonna i dohot dalanna na jahat i, mate di bagasan hajahatonna ma ibana, alai malua do anggo tondim.

²⁰Alai molo ditadingkon partigor i hatigoranna na sai laon, jala diulahon hageduhon, bahenonku ma partuktuhan tu jolona, asa mate ibana, ai ndang dipalumba ho ibana; mate di bagasan dosana do nian ibana, jala ndang be ingoton hatigoranna na niulana i, alai anggo mudarna sian tanganmu do pangidoonku.

²¹Alai molo tung dipalumba ho partigor i na sai laon, unang nian mardosa partigor i, gabe laos so mardosa ibana, ingkon mangolu ibana, ala na olo ibana palumbaon, ho pe nunga dipalua ho tondim.

²²(IV.) Dung i ampe ma disi tu ahu tangan ni Jahowa, jala ninna ma tu ahu: Borhat ma ho, ruar ma ho mandapothon rura i, asa disi huangkupi ho mangkatai.

²³Jadi borhat ma ahu, jala ruar manopot rura i, gabe ida ma, jongjong disi hamuliaon ni Jahowa, suang songon hamuliaon, na huida di topi ni batang aek Hebar, gabe manungkap ma ahu tu tano.

²⁴Jadi bongot ma Tondi i tu bagasan ahu, jala dipajongjong ahu di pathu, laos diangkupi

ahu mangkatai, jala ninna mandok ahu: Laho ma ho, hurungkon ma ho di bagasan jabum!

²⁵Ia ho ale anak ni jolma, ida ma, ampehononnasida ma angka tali tu ho, laos ihotanna ho, asa unang ho ruar tu tongatonganasida.

²⁶Angkup ni lohok ma bahenonku dilam tu langitlangit ni pamanganmu, asa mangungu ho, asa unang be ho jolma paminsang di nasida, ai bangso panggunturi do nasida.

²⁷Alai molo huangkupi ho muse mangkatai, bungkaonku ma pamanganmu, gabe dohononmu ma tu nasida: Songon on do hata ni Tuhan Jahowa: Manang ise na umbegesa, dibege ma, manang ise na so olo, ndengkon olo! Ai bangso panggunturi do nasida.

4¹(I.) Ia ho ale anak ni jolma, buat ma di ho tano takko sada, jala peakkon di jolom, jala uhirhon tusi huta Jerusalem.

²Jala bahen hubu dompak huta i, jala pauli angka batarbatar di atasna, jala pajongjong parik sada dompak huta i, jala bahen angka parsaroan martungkum huta i, jala pajongjong angka salosap humaliang.

³Angkup ni buatonmu ma di ho balanga bosi sada, jala pajongjongonmu ma i gabe parik bosi, parholanganmu sian huta i, jala sai dituju bohim ma i, asa hona hubu huta i tungkumonmu. I ma gabe tanda di pinompar ni Israel.

⁴Alai anggo ho podomanmu ma sihambirangmu, jala ampehon ma hajahaton ni pinompar ni Israel tu atasna, marguru sian bilangan ni angka ari parpodommu disi, lelengna usungonmu hajahatonnasida.

⁵Ianggo ahu nunga hubuhul tu ho angka taon ni hajahatonnasida, manjadi torop ni ari tolu ratus siapulu ari lelengna usungonmu hajahaton ni pinompar ni Israel.

⁶Ia dung dipatolhas ho angka ari i, podomanmu ma paduahalihon siamunmi, asa usungonmu hajahaton ni pinompar ni Juda opatpulu ari lelengna, sada taon gabe sadari hubahen anggo tu ho.

⁷Antong dompak parhubuon ni Jerusalem ma tujuan ni bohim dohot tanganmu manangkas, asa manurirangi ho dompak huta i.

⁸Jala ida ma, nunga pola hubahen tu ho angka tali, jala ndang jadi humosing ho sian hambirang tu siamun, paima dipatolhas ho angka ari partungkumonmu.

⁹(II.) Ia ho buatonmu ma di ho eme simetmet dohot siansimun dohot dalidali dohot hadio dohot bajaure dohot daua, jala bahenonmu luhutna i tu bagasan sada tong, jala paulionmu angka i di ho bahen sagusagu, marguru sian bilangan ni angka ari parpodommu manjorbing, singkop tolu ratus siapulu ari lelengna panganonmu.

¹⁰Ia godang ni panganon sipanganonmu ganup ari dasingon do duapulu sekkel sadari, ingkon martingki do panganonmu.

¹¹Ingkon marsuhat do nang aek siinumonmu, saparonom hin, ingkon martingki do inumonmu.

¹²Angkup ni panganonmu do sagusagu sada sian gadongkau, jala masahonmu do i marhitehite ginagat ni jolma di adopannasida.

¹³Dung i ninna Jahowa ma: Ingkon songon i ramun panganon ni halak Israel sogot rotinasida di tongatonga ni angka parbegu, haambolongannasida bahenonku.

¹⁴Jadi ningku ma: Iale Tuhan Jahowa, ida ma, ndang dung tarsamar rohangku, jala ndang dung hupangan na mate garam, manang soroan olat ni sietehetehonku rasirasa nuaeng jala ndang dung bongot tu bagasan pamanganku juhut habiason.

¹⁵Dung i ninna ibana tu ahu: Ida ma, hulehon pe tu ho ginagat ni lombu, singkat ni ginagat ni jolma, di atas ni pe masahonmu sagusagum.

¹⁶Angkup ni ninna ibana tu ahu: Ale anak ni jolma, ida ma, ponggolhononku ma tungkot parbohalon di Jerusalem, asa panganonnasida roti na nidasing, jala mardongan hagogotan, nang aek marsupak do inumonnasida, jala mardongan hapariron.

¹⁷Ala hurangan roti dohot aek nasida, gabe tarhatotong be nasida jala mandate binahen ni hajahatonnasida i.

5¹(I.) Ia ho ale anak ni jolma, buat ma di ho podang sada na tajom, songon raut parnabung! Buat ma i di ho, jala bolushon sian ulum dohot sian janggutmu; dung i buat muse di ho dasing sada laho marbagi angka obuk i.

²Sapartoluna ma purunonmu di bagasan api di tongatonga ni huta i, ia dung gok angka ari partungkumon i; dung i buat ma na sapartolu nari, jala jaljali marhitehite podang humaliang huta i; jala na sapartolu muse purpurhon ma tu alogo, ai sintahonku ma podang i sian pudinasida.

³Angkup ni buatonmu ma sian i otik bilanganna, jala pudunonmu do i di bagasan suhisuhi ni ulosmu.

⁴Dung i buatonmu muse sian i otik, jala reongkononmu do i tu tongatonga ni api, jala purunonmu di bagasan api; ruar ma sian i muse api rarat tu sandok pinompar ni Israel.

⁵(II.) Songon on do hata ni Tuhan Jahowa: Ia huta Jerusalemon, nunga hupahot di tongatonga ni angka parbegu, jala dihaliangi angka luat.

⁶Hape manggunturi nasida dompak angka uhumhu, gabe jumahat nasida sian angka parbegu, jala manggunjal nasida dompak angka patikku, lobi sian luat angka na

humaliang nasida, ai ditoisi nasida do angka uhumhu, jala ndang diparangehon nasida angka patikku.

⁷ Dibahen i songon on do hata ni Tuhan Jahowa: Ala jumahat hamu sian parbegu, angka na humaliang hamu, ndang diparangehon hamu angka patikku, jala ndang diradoti hamu angka uhumhu; uhum ni parbegu pe, angka na humaliang hamu, ndang diihuthon hamu.

⁸ Dibahen i, songon on do hata ni Tuhan Jahowa: Ida ma, dohot ma ahu gabe alom, apala di tongatongami ahu mandabu uhum di adopan ni angka bangso parbegu.

⁹ Jala bahenonku tu ho na so dung hea hubahen, manang ulahanku pe mambahen sogot, ala ni saluhut hasogiron angka na niulam.

¹⁰ Dibahen i masipapanganan ma amaama dohot anakna di tongatongami, jala ahu mandabu angka uhum di tongatongami, jala ahu paserakkon sandok pasipasimi tu ganup desa.

¹¹ Dibahen i, songon sintongna ahu mangolu, ninna Tuhan Jahowa: Ala niramunanmu habadiaonki marhitehite sandok biasbias dohot hasogiron, angka na niulam, gabe dohot ma ahu marnabung, jala ndang marolanolan matanku, jala ndang marpangulahi rohangku.

¹²Sapartolu hamu mate binahen ni begu antuk, jala siap mate anturaparon di tongatongami, jala na sapartolu nari marragean binahen ni podang humaliang ho, jala na sapartolu muse ahu do paserakkon tu ganup desa, jala marpodang sintak sian pudinasida.

¹³Asa tung sun tolhas hinamurukku, jala sombu rimashu di nasida, jala dampor ateatengku, asa tung diboto nasida, ahu Jahowa do naung mangkuling di bagasan piripiringku, molo dung sun tolhas hubahen rimashu tu nasida.

¹⁴Dung i bahenonku ma ho gabe halongonan dohot haurahon di tongatonga ni parbegu, angka na humaliang ho, di adopan ni saluhut pamolus.

¹⁵Asa tung gabe haurahon dohot sieleseleson, panjoraan dohot hatotongon di parbegu angka na humaliang ho, ia dung hudabu tu ho angka uhum di bagasan rimas dohot di bagasan piripiri marhitehite pinsangpinsang ni harimason. Ahu Jahowa do na mandok i.

¹⁶Molo dung husiorhon sumbia ni haraparon, angka na rahat i dompak nasida, angka na laho mangago, angka na husiorhon laho mangago hamu, jala patambaonku dope haraparon tu hamu, jala ponggolhononku do di hamu tungkot parbohalon.

¹⁷Dung i tongoshononku ma tu hamu haraparon dohot binatang angka na rahat, asa tung punu ho bahenonna, masa huhut tu ho begu antuk dohot durusdurus ni mudar, paroonku huhut dampak ho podang. Ahu Jahowa do na mandok i.

6¹ (I.) Dung i ro muse ma hata ni Jahowa tu ahu songon on.

²Ale anak ni jolma, tujuhon ma bohim dampak angka dolok di Israel, jala surirangi dampak nasida.

³Jala dohononmu ma: Hamu ale angka dolok ni Israel, tangihon hamu ma hata ni Tuhan Jahowa! Songon on do hata ni Tuhan Jahowa tu angka dolok dohot tu angka robean, tu angka jaringjing dohot tu angka rura: Ida ma, ahu parohon tu hamu podang, asa huago angka tambaktambakmuna.

⁴Jala ingkon marumpak sogot angka langgatanmuna, jala angka ropuk tiang panombanombaan jala marragean bahenonku jolma angka na tartullang sian hamu di adopan ni angka ganaganaanmuna.

⁵Tongon tahe, reongkononku ma angka bangke ni halak Israel di adopan ni angka ganaganaannasida, jala marambolangan bahenonku holiholimuna humaliang angka langgatanmuna.

⁶Tung di saluhut ingananmuna, ingkon pansingkononhon angka huta, jala tarulang bahenon angka robean, asa

tung pansing jala marumpak angka langgatanmuna, marpongolan jala siap angka ganaganaanmuna, jala maropuk angka tiang panombanombaan, jala sun siap jadijadianmuna.

⁷ Jala marragean jolma di tongatongamuna, asa tung ditanda hamu ahu do Jahowa.

⁸ Alai tebahononku do di hamu angka na malua sian podang di tongatonga ni angka parbegu, ia dung marserak hamu di angka luat ni halak.

⁹ Jadi ingoton ni angka na malua i sian hamu ahu di tongatonga ni angka parbegu, habuangannasida i, ia dung hulala roha parmainanonnasida i, na manimbil sian ahu, ro di mata parmainanonna i mangihuthon ganaganaannasida, gabe laos nasida marbiasbias mida bohinasida i, ala ni hajahaton, angka na niulanasida, marguru tu saluhut hasogironnasida i.

¹⁰ Asa tung ditanda nasida ahu do Jahowa, ndada asal hulumbahon jea i na naeng bahenonku tu nasida.

¹¹ (II.) Songon on do hata ni Tuhan Jahowa: Martopapi ma tanganmu, jala marhajingjang bahen patmu, jala manimbias ma ho taringot tu saluhut hasogiron dohot hajahaton angka na niula ni pinompar ni Israel, angka na marragean sogot bahenon ni podang, haraparon dohot begu antuk.

¹²Manang ise naung holang, ingkon mate binahen ni begu antuk, jala manang ise na jonok, ingkon tinggang binahen ni podang, jala manang ise na teba, manang naung malua, ingkon mate anturaparon, asa tung sun hupatolhas rimashu tu nasida.

¹³Jadi tandaonmuna ma, ahu do Jahowa, ia dung marpeahan angka na binunu sian nasida di tongatonga ni angka ganaganaannasida, humaliang langgatannasida i, di atas ni saluhut buntulbuntul, di punsu ni angka dolok, di toru ni saluhut hau na rugun dohot di toru ni saluhut hariara bolon, di panutungan daupa tu saluhut ganaganaannasida i.

¹⁴Jadi patoltolonku ma tanganku dompak nasida, jala bahenonku tano i tarulang gabe halongonan, lobi sian halongonan Ribla, di saluhut inganannasida i, asa tung diboto nasida ahu do Jahowa.

7¹ (I.) Dung i ro muse ma hata ni Jahowa tu ahu, songon on:

²Ia ho ale anak ni jolma! Songon on do hata ni Tuhan Jahowa taringot tu tano ni Israel: Nunga jumpang ajalna, nunga ro ajal ni na opat suhi ni tano i.

³Apala nuaeng ma ro ajalmu, jala ahu manongoshon rimashu tu bagasan ho dohot manguhum ho, hombar tu angka dalanmu, jala manginona bahenonku tu ho sude hasogiron, angka na niulam.

⁴Jala ndang maralangalang matangku
dompok ho, jala ndang marpangulahi
rohangku, ingkon manginona tu ho
bahenonku, hombar tu dalanmu na sai laon,
jala ingkon di tongatongami hasogiron, angka
na niulam, asa tung ditanda hamu, ahu do
Jahowa.

⁵Songon on do hata ni Tuhan Jahowa:
Ingkon mardapotdapot do jea i ro!

⁶Nunga tung ro ajal i, nunga tung tarsunggul
dompok ho, ida ma, nunga tung ro.

⁷Nunga tung marliat mangonai tu ho, ale
isi ni tano i, nunga ro tingkina, jonok nama
arina, soara hagunturon do, ndada hariburon
di atas ni angka dolok.

⁸On pe magira ma usehononku rimashu
tu ho, jala sun tolhas bahenonku murukku
tu ho, jala uhumonku ho, hombar tu angka
dalanmu, jala bahenonku manginona tu ho
saluhut hasogiron, angka na niulam.

⁹Jala ndang maralangalang matangku, jala
ndang marpangulahi rohangku, hombar tu
angka dalanmu manginona tu ho bahenonku,
jala ingkon di tongatongami do hasogiron,
angka na niulam, asa tung ditanda hamu,
ahu do Jahowa na manginonahonsa.

¹⁰Ida ma ari i, ida ma, nunga tung ro, nunga
tung marliat, nunga tung martumbur batahi,
nunga tung marbunga hajungkaton.

¹¹Nunga tung borhat sipangarupa bahen
linsinglinsing di hajahaton; ndang adong teba

sian nasida, nang sian hinadeaknasida, nang sian hariburonnasida, jala ndang adong na mangandungi nasida.

¹²Nunga tung ro tingkina, nunga jumonok ari i; unang marlas ni roha ia panuhor, jala unang gondok roha ni panggadis; ai na ro ma rimas na marsigorgor dompak sandok hinadeaknasida i.

¹³Ai ndang be mulak tu panggadis ugasan naung ginadisna i, nang tung sura mangolu dope nasida duansa, ai ndang tagamon tulak pangungkapon taringot tu sandok hinadeaknasida i, jala ndang manahan ngolu ni manang ise di bagasan hajahatonna.

¹⁴(II.) Dipapalupalu nasida pe sangka, jala dihontas saluhutna, hape ndang adong na hum, nanggo sahalak borhat tu tongtangan, ai rimashu do alo ni sandok hinatoropnasida i.

¹⁵Podang do marraserasehon di balian, begu antuk dohot haraparon ia di bagasan jabu; manang ise na di ladang, ingkon mate binahen ni podang, jala manang ise na di bagasan huta, ingkon siap bahenon ni haraparon dohot begu antuk.

¹⁶Malua pe angka na malua i, ingkon maotaot nasida di atas ni angka dolok, songon darapati di angka rura, tung saluhut do nasida marturtu, ganup di bagasan hajahatonna.

¹⁷Saluhut tangan mandate, jala saluhut ulu ni tot mabaor do songon aek.

¹⁸Jala maruloshon abit tangki do nasida, jala hasonggoton do bulusanna, bolak be do bohinasida, jala palpal ia ulunasida luhutna.

¹⁹Peraknasida reongkononna do tu alaman, jala serenasida gabe biasbias di nasida. Ndang masuk perak manang serenasida bahen partobus di nasida di ari pangarimasan ni Jahowa, ndang tarpasabam nasida rohanasida disi, jala ndang hagohansa butuhanasida sian i, ai parbingkasan tu hajahatonnasida do i.

²⁰Jala hamuliaon ni hinaulina, gabe hatongamonna hian nian binahenna, hape sumansuman ni hasogiron dohot biasbias dibahen nasida sian i. Dibahen i lehononku do i gabe haramunon di nasida.

²¹Jala pasahatonku do i tu tangan ni halak sileban pupusanna dohot tu angka parjahat di tano on, bahen tabantaban jala ramunanna.

²²Jala padaoonku do bohingku sian nasida, asa ramunannasida ingananku na badia i, jala masuk tu bagasan do angka sipangarupa laho ramunanna.

²³Bahen ma rante, ai gok parsapataan mudar do tano i, jala gok pangarupaon do huta i.

²⁴(III.) Dibahen i paroonku ma angka parbegu, apala parjahat sahali, asa teanonna angka bagasnasida, jala pasadionku ma hajungkaton ni angka na gogo, jala tarramun habadiaonnasida i.

²⁵ Nunga ro hasiapon, mangalului pardemahan nian anggo nasida, hape ndang jumpangsa.

²⁶ Sai mardapotdapot do tahe jea i ro, jala pasimpar barita i, jala usouso do nasida di alatan sian panurirang, hape nunga pesan patik sian malim, jala panuturion sian angka sintua.

²⁷ Gondok do ia roha ni rajai, jala induk i maruloshon hatotongon, jala raion do tangan ni situan na torop, isi ni tano i; hombar tu dalannasida bahenonku tu nasida, jala marguru tu uhumnasida i dabuonku uhum tu nasida, asa tung ditanda nasida, ahu do Jahowa.

8¹ (I.) Dung i paonomtaonhon, di ari lima bulan sipaha onom, hundulhundul ahu di bagasan jabungku, jala angka sintua ni Juda hundul di jolongku, gabe songgop ma tu ahu disi tangan ni Jahowa.

² Jadi maralatan ma ahu, gabe ida ma, sumansuman sada, songon rupa nijolma, sian gontingna tu toru idaon songon api, sian gontingna tu ginjang, songon sondang, songon sillam ni sere tahe.

³ Dung i disurdukkon ma sumansuman ni tangan sada, jala dijambut obuk ni ulungku, jala diluahon Tondi i ahu tu holangholang ni tano dohot langit, di bagasan alatan angka na sian Debata, laos diusung ahu tu Jerusalem, boti tu baba pintu parbagasan na tungkan

utara, disi do hajongjongan ni ganaganaan pangiburuan, na pasunggul iburu.

⁴Jala ida ma, laos disi do hamuliaon ni Debata ni Israel, suman tu rupa na huida na jolo di rura i.

⁵Dung i ninna ibana ma tu ahu: Ale anak ni jolma, ua manaili ma matam tu dalan tungkan utara, jadi manaili ma matanku tu dalan tungkan utara, gabe ida ma, tungkan utara sian pintu ni langgatan, apala di haroroan, jongjong do ganaganaan pangiburuan i.

⁶Dung i ninna ibana ma tu ahu: Atehe ale anak ni jolma, diida ho do na binahennasida? Tung biasbias bolon angka na binahen ni pinompar ni Israel disi, asa holang ahu sian habadiaonku, alai idaonmu muse dope biasbias angka na umbolon.

⁷(II.) Dung i ditogihon ma ahu tu pintu ni alaman i, gabe maralatan ahu, jadi ida ma, sada bungbung di bagasan dorpi.

⁸Dung i ninna ibana ma tu ahu: Ale anak ni jolma, ua paruak ma bungbung na di bagasan dorpi! Jadi dung hutolpushon dorpi i, gabe ida ma, pintu sada disi.

⁹Dung i ninna ibana ma tu ahu: Beta hita, asa diida ho biasbias angka na roa, angka na binahennasida disi.

¹⁰Jadi dung masuk ahu, jala hutilik, gabe ida ma, disi do saluhut sumansuman ni gulokgulok dohot pinahan, biasbias dohot

ragamragam ganaganaan ni pinompar ni Israel, taruhir tu dorpi tuk humaliang.

¹¹ Jala pitupulu baoa, sintua ni pinompar ni Israel, angka na jongjong paadopadop, jala si Jesania, anak ni si Sapan, jongjong di tongatonganasida, jala ganup nasida maniop pardaupaanna be di bagasan tanganna, jala uap ni timus ni daupa i martimpul tu ginjang.

¹² Dung i ninna ibana ma tu ahu: Atehe ale anak ni jolma, diida ho do na binahen ni angka sintua ni pinompar ni Israel di bagasan haholoman, ganup di bagasan bilut panguhiranna be? Ai angka didok nasida do: Ndang tagamon idaon ni Jahowa hami, nunga pola ditadingkon Jahowa tano on!

¹³ Dung i ninna ibana ma tu ahu: Adong muse dope idaonmu biasbias bolon, angka na binahennasida.

¹⁴ Dung i ditogihon ibana ma ahu tu baba pintu ni joro ni Jahowa, na tungkan utara, gabe ida ma, adong disi hundulhundul inaina, angka na mananangisi Tamus.

¹⁵ Dung i ninna ibana ma tu ahu: Atehe ale anak ni jolma, nunga diida ho? Idaonmu muse dope biasbias, angka na umbolon sian i.

¹⁶ Dung i ditogihon ibana ma ahu tu alaman parbagasan ni joro ni Jahowa, gabe ida ma, di lambung pintu ni joro ni Jahowa, di holangholang ni emper dohot langgatan, adong arga duapulu baoa, tanggurun nasida dompak joro ni Jahowa, jala bohinasida

dompok habinsaran, sai marsombasomba nasida dompok habinsaran, dompok mata ni ari.

¹⁷Dung i ninna ibana ma tu ahu: Atehe ale anak nijolma, nunga diida ho? Tung na lobi neang do i di pinompar ni Juda mambahen biasbias, angka na niulanasida dison, ai nunga pola gok pangarupaon tano i dibahen nasida, jala marbalik nasida, asa pahehe rimashu, jala ida ma, lam di pambahen nasida dope rantingranting ni hau anggur tu igungnasida.

¹⁸Ahu pe antong laluhononku ma rimashu, ndang maralangalang matangku, jala ndang marpangulah rohanku, nang pe dipangiar nasida soarana joujou tu bagasan pinggolhu, ndang tagamon tangihononku nasida.

9¹(I.) Dung i dipangiar ibana ma soarana joujou tu bagasan pinggolhu, songon on: Nunga jonok angka partubolon tu huta i, jala ganup marsinjata pangago di bagasan tanganna be.

²Jadi ida ma, onom baoa, angka na ro sian dalan ni bahal parjulu na tungkan utara, jala ganup marantukantuk pangaropuhi di bagasan tanganna be; adong muse sada baoa di tongatonganasida marulos hori, jala parmangsian sada gampit di gontingna; dung i bongot ma nasida, jala jongjong di lambung ni langgatan tombaga.

³Dung i tarhinsat ma hamuliaon ni Debata ni Israel sian ginjang ni kerubim na di atasna

hian, laho tu lobulobu ni joro i; dung i joujou ma ibana di baoa na marulos hori, na marparmangsian gampit di gontingna.

⁴Jadi ninna Jahowa ma tu ibana: Bolus ma tongatonga ni huta i, tongatonga ni Jerusalem tahe, jala gurithon parsilang sada tu pardompahan ni baoa, angka na marisuang, jala na marhoi taringot tu saluhut biasbias, angka na masa di tongatongana.

⁵Alai tu angka na asing i, ninna do, dibege pinggolhon: Bolus hamu ma huta i ihut tu ibana huhut mambunu i; unang maralangalang matamuna, jala unang marpangulahi rohamuna!

⁶Na ubanon, dolidoli, nang namarbaju rodi posoposo dohot inaina, ingkon bunuonmuna do maradu siap sude; alai taringot tu saluhut baoa, angka na marparsilang ndang jadi hahuaonmuna, jala sian habadiaonku do pungaonmuna. Jadi dipungka nasida ma sian sintua angka na di jolo ni joro i.

⁷Dung i ninna ibana ma tu nasida: Ramuni hamu ma joro i, jala gok bangke ma bahen hamu angka alaman; ruar ma hamu! Jadi ruar ma nasida, jala marraserase dibahen nasidajolma angka na di bagasan huta i.

⁸(II.) Jadi dung songon i marraserase angkajolma i dibahen nasida, tading ma ianggo ahu, gabe manungkap ma ahu huhut manganguhi mandok: Iale Tuhan Jahowa, tung siaphononmu ma sandok pasipasi

ni Israel di na niusehonmu rimasmu tu Jerusalem?

⁹Jadi ninna ibana ma mangalusi ahu: Hajahaton ni pinompar ni Israel dohot Juda, tung na godang sahali do i, jala gok parsapataon mudar do tano i, jala gok hageduhon ia huta i, ai angka didok nasida do: Nunga ditadingkon Jahowa tano i antong, jala ndang marnidasa Jahowa.

¹⁰Ahu pe antong, ndang maralangalang matangku, jala ndang marpangulahi rohanku, balbal hona tu ulunasida bahenonku dalannasida i.

¹¹Dung i ida ma, baoa na marulos hori i, jala na marparmangsian gampit di gontingna i mamboan alus, ninna do: Nunga hubahen songon na tinonahonmi tu ahu.

10¹(I.) Dung i maralatan ma ahu, gabe ida ma, di ratarata ni langit, na di atas ulu ni angka kerubim, adong do songon batu intan sapir, songon sumansuman ni habangsa sada idaon di atasnasida.

²Dung i ninna ibana ma tu baoa na marulos hori: Bongot ma ho tu holangholang ni angka roda, tu toru ni kerubim, jala gomaki gara ni api gok tanganmu duansa sian holangholang ni angka kerubim, jala sampakkon tu atas ni huta i. Jadi bongot ma ibana di adopan ni matangku.

³Jongjong do ianggo angka kerubim di sambariba ni joro i tungkan siamun laho

bongot baa i, jala ombun i manggohi alaman parbagasan i.

⁴Dung i tarhinsat ma hamuliaon ni Jahowa sian ginjang ni kerubim di atas ni lobulobu ni joro i, jadi digohi ombun i ma joro i, jala gok sinondang ni hamuliaon ni Jahowa do alaman i.

⁵Dung i tarbege ma soara ni habong ni angka kerubim, sahat ro di alaman parbalian, suman tu soara ni Debata pargogo na so hatudosan, uju mangkatai ibana.

⁶Jadi dung martona ibana tu baa na marulos hori, songon on: Buat ma api sian holangholang ni angka roda, sian holangholang ni angka kerubim gabe bongot ma ibana, jala jongjong tu lambung ni roda i.

⁷Jadi surduk ma tangan ni kerubim na sada sian tongatonga ni angka kerubim i tu api na di holangkolang ni angka kerubim, laos dibuat sian i jala dipagolomhon tu tangan ni na marulos hori, dung di jalo ruar ma ibana.

⁸(II.) Dung i tarida ma di angka kerubim sumansuman ni tangan ni jolma sada di toru ni habongnasida.

⁹Dung i maralatan ma ahu, gabe ida ma, opat roda di lambung ni angka kerubim, sada be do roda i di lambung ni kerubim sadasada, jala rupa ni angka roda tudos do tu batu intan tarsis.

¹⁰Jala sisada rupa do opatsa nasida idaon, songon di tongatonga ni roda na sada do roda na sadanari.

¹¹Molo mardalan nasida, tungkan na opat desanasida do ditulus, ndang manaili tu pudi nasida jumpa mardalan, ai manang dompak dia dituju ulu i, ihut tusi do nasida mardalan, ndang manaili tu pudi nasida jumpa mardalan.

¹²Jala sandok daging ni kerubim i, hau tanggurungnasida, tangannasida dohot habongnasida ro di angka roda i, gok mata do tuk humaliang, opatsa do nasida marroda be.

¹³Taringot tu angka roda i digoar do nasida halisungsung, pola hubege.

¹⁴Alai opat bohi be do angka parngolu i: Bohi ni na sada, bohi kerubim do, jala bohi ni na paduahon i, bohi jolma, jala na patoluhon i bohi singa, jala na paopathon i bohi pidong raja ualu.

¹⁵Dung i tarhinsat ma angka kerubim i, i ma parngolu i na huida na jolo di topi ni batang aek Hebar.

¹⁶Jala molo mardalan angka kerubim i, mardalan ma dohot roda angka na di lambungnasida, molo dipaperper angka kerubim i habongnasida, asa tarhinsat sian tano i, laos so mamedu dohot angka roda i sian lambungnasida.

¹⁷ Molo ngongong nasida rap ngongong do, molo tarhinsat nasida rap tarhinsat do, ai tondi ni parngolu i do di bagasan nasida.

¹⁸ Dung i ruar ma hamuliaon ni Jahowa sian atas ni lobulobu ni joro i, jala marsijongjong di atas ni angka kerubim i.

¹⁹ Dung i dipaperper angka kerubim i ma habongnasida, jala tarhinsat sian tano i di adopan ni matangku di na ruar i nasida, jala angka roda i di lambungnasida, jala ngongong be do di baba pintu ni joro ni Jahowa tungkan habinsaran, jala hamuliaon ni Debata ni Israel mangalinggomi nasida sian ginjang.

²⁰ I ma parngolu i na huida di toru ni Debata ni Israel martopihon batang aek Hebar, gabe hutanda angka kerubim do nasida hape.

²¹ Maropat bohi be do sadasada, jala maropat habong be, jala sumansuman ni tangan nijolma di toru ni habongnasida.

²² Jala rupa ni bohinasida, suman tu bohi angka na huida martopihon batang aek Hebar, rupanasida pe, nang nasida sandiri tahe, ganup masitulus dalanna tujolona be.

11 ¹ (I.) Dung i dihindat Tondi i ma ahu, jala diboan ahu tu pintu ni joro ni Jahowa sambariba tungkan habinsaran, gabe ida ma, di baba pintu i adong duapulu lima baoa, di tongatonganasida huida si Jesania, anak ni si Assur dohot Pelatia, anak si Benaia, angka induk ni bangso i.

²Dung i ninna Ibana ma tu ahu: Ale anak ni jolma, nasida do baoa angka na marsangkap jea, jala mangaturhon tahi na roa di bagasan huta on.

³Angka didok nasida do: Ndang dope jonok! Tole tapauli ma angka bagas! Huta i do hudon, jala hita juhut.

⁴Dibahen i manurirangi ma ho dompak nasida, manurirangi ma ho, ale anak ni jolma.

⁵Jadi songgop ma tu ahu Tondi ni Jahowa, jala ninna tu ahu: Songon on do hata ni Jahowa dohononmu: Hamu ale pinompar ni Israel mandok songon i, apala so huboto tubutubu ni rohamuna i.

⁶Nunga dipatorop hamu jolma angka na tartullang sian hamu di bagasan huta on, jala nunga gok bangke alamanna dibahen hamu.

⁷Dibahen i songon on do hata ni Tuhan Jahowa: Jolma angka naung tartullang i sian hamu, angka na marragean di tongatonga ni huta i, nasida ma juhut i, jala huta i do hudon i; alai anggo hamu haruar do toguonku sian tongatongana.

⁸Podang do na hinabiaranmuna, hape podang i do paroonku dompak hamu, ninna Tuhan Jahowa.

⁹Ahu ma tahe paruar hamu sian tongatongana, jala ahu pasahathon hamu tu bagasan tangan ni halak ruar, jala ahu mangkonahon tu hamu angka torutoru.

¹⁰Ingkon marragean hamu binahen ni podang; di partalpahan ni Israel uhumonku hamu, asa tung diboto hamu ahu do Jahowa.

¹¹Ndada huta i gabe hudon di hamu, manang hamu gabe juhut di tongatongana; di partalpahan ni Israel tahe uhumonku hamu.

¹²Asa tung diboto hamu ahu do Jahowa, na so pinarangehonmuna angka patikku, jala ndang diulahon hamu angka uhumhu; hombar tu uhum ni parbegu, angka na humaliang hamu balik tahe diulahon hamu.

¹³Dung i uju manurirangi ahu, mate satongkin ma si Pelatia, anak ni si Benaia. Jadi manungkap ma ahu tu tano, jala hupangiar soarangku mangangguhi, ningku ma: Iale Tuhan Jahowa! Tung sun siap ma bahenonmu pasipasi ni Israel.

¹⁴(II.) Dung i ro ma hata ni Jahowa tu ahu songon on:

¹⁵Ale anak ni jolma! Hahaanggimu, hahaanggimu tongon, angka baoa hasolhotonmu ro di sandok pinompar ni Israel, tung tu nasida saluhut do na nidok ni isi ni Jerusalem: Paholang hamu ma sian lambung ni Jahowa! Antong nunga tu hita tano i dipasahat bahen partalian.

¹⁶Dibahen i dohononmu ma: Songon on do hata ni Tuhan Jahowa: Ala ahu mambolongkon nasida dao tu tongatonga ni angka parbegu, jala ala ahu paserakkon nasida tu angka luat ni halak, jadi laos ahu

muse gabe habadiaon di nasida sangombas
na metmet di angka luat hasahatannasida i.

¹⁷ Dibahen i dohononmu ma: Songon
on do hata ni Tuhan Jahowa: Laos ahu
papungupungu hamu sogot sian angka
bangso, jala ahu patumpuhon hamu sian
angka luat parserahanmuna i, jala ahu
mangalehon tu hamu tano Israel.

¹⁸ Jadi dung sahat nasida ro disi,
paholangonnasida ma sian i sandok hasogiron
dohot saluhut biasbias.

¹⁹ Jadi lehononku ma tu nasida roha
sisangunjur, jala suanhononku tondi
na imbaru tu bagasan ateatenasida,
jala paholangonku ma roha batu sian
dagingnasida, jala lehononku ma tu nasida
roha sibuk.

²⁰ Asa diihuthon nasida angka patikku, jala
diradoti angka uhumhu, jala diulahon, jadi
gabe bangsongku ma nasida, jala ahu gabe
Debatanasida.

²¹ Alai manang ise marrohahon roha ni
angka hasogiron, dohot biasbiasnasida,
naeng ihuthononna, manginona tu ulunasida
dalannasida i bahenonku, ninna Tuhan
Jahowa.

²² (III.) Dung i dipaperper angka kerubim
ma habongnasida i, jala angka roda di
lambunghnasida, jala hamuliaon ni Debata ni
Israel mangalinggomi nasida sian ginjang.

²³Dung i manaek ma hamuliaon ni Jahowa sian tongatonga ni huta i, jala marsijongjong di atas ni dolok, na tungkan habinsaran ni huta i.

²⁴Dung i dihindat Tondi i ma ahu, jala diboan ahu di bagasan alatan marhitehite Tondi ni Debata tu luat Kasdim, tu angka na tarbuang i; dung i manaek ma sian atashu alatan naung huida i.

²⁵Jadi huhatahon ma tu angka na tarbuang i saluhut hata ni Jahowa, angka na pinapatarna i tu ahu.

12¹(I.) Dung i ro muse hata ni Jahowa tu ahu, songon on:

²Ale anak nijolma, di tongatonga ni bangso na manggunturi do ho maringan, angka parmata na marnida nian, hape ndang marnida, angka parpinggol na marbinege nian, hape ndang dibege, ai bangso panggunturi do nasida.

³Dibahen i ho ale anak nijolma, bahen ma di ho angka parhohas parbungkason, jala bungkas ma ho arian di adopan ni matanasida. Ingkon bungkas ho sian ingananmu tu inganan na asing di adopan ni matanasida, anggiat mamoto rohanasida, ai bangso panggunturi do nasida.

⁴Ingkon paruaronmu angka parhohasmu arian i di adopan ni matanasida, songon angka parhohas parbungkason. Alai ingkon bodari pe ho ruar di adopan ni matanasida,

songon na somal haruruar ni halak na bungkas.

⁵Ingkon di adopan ni matanasida dungkirdungkironmu dorpi, asa sian i ho ruar.

⁶Ingkon di adopan ni matanasida ampehononmu tu abaram, dung pe holom asa ruar usungonmu, ingkon tujunganmu bohimi, jala ndang jadi idaonmu tano i; ai nunga hubahen ho gabe tudosan halongangan di bangso Israel.

⁷Jadi hubahen ma songon na tinonahon i tu ahu: Huparuar arian angka parhohashu, songon angka parhohas parbungkasan, jala hudungkirdungkiri bodarina i dorpi i torus dohot tanganku sandiri; dung pe holom asa ruar huusung, huampehon tu abaranku di adopan ni matanasida.

⁸(II.) Alai manogotna i ro ma hata ni Jahowa tu ahu, songon on:

⁹Atehe ale anak ni jolma, nda tung adong sian bangso Israel, bangso panggunturi i, angka na mandok tu ho: Aha do na binahenmu?

¹⁰Dohononmu ma tu nasida: Songon on do hata ni Tuhan Jahowa: Marhahonaan tu raja di Jerusalem do i dohot tu sandok bangso Israel, angka na di tongatongana.

¹¹Dohononmu ma: Aha do apala tanda halongangan di hamu; suang songon na hubahen i, ingkon bahenon tu nasida,

ingkon mardalan nasida tu parbungkasan, tu habuangan.

¹²Ia raja na di tongatonganasida, pasoratonna ma abarana, dung pe holom asa ruar usungonna, dorpi i do dungkirdungkirannasida laho paruarhon sian i; tujunganna ma bohina i, alai na so jadi idaon ni matana tano i.

¹³Lingkuphononku huhut rambangku tu atasna, asa tartangkup ibana di bagasan jorgongku, jala ahu mamboan ibana tu Babel, tu tano ni halak Kasdim, alai ndang jadi idaonna tano i, laos mate disi ibana.

¹⁴Jala saluhut angka na humaliang ibana, angka na hinarana ro di sandok paranganna, paserahonku do tu saluhut desa, jala podang i do sintahonku sian pudinasida.

¹⁵Asa tung ditanda nasida ahu do Jahowa, ia dung mampar nasida hubahen di tongatonga ni angka parbegu, jala hupaserak nasida tu angka luat ni halak.

¹⁶Alai tebahononku do sian nasida angka baoa, hira pamilangina angka na malua sian podang, sian haraparon dohot sian begu antuk, asa nasida sandiri manjamitahon saluhut biasbias angka na niulanasida di tongatonga ni angka parbegu hasahatannasida i, asa ditanda nasida ahu do Jahowa.

¹⁷(III.) Dung i ro muse ma hata ni Jahowa tu ahu songon on:

¹⁸Ale anak ni jolma, ingkon mardongan raion ho laho manganhon rotim, jala mardongan hatahuton dohot hagogotan inumonmu aek.

¹⁹Jala dohononmu ma tu bangso ni tano i: Songon on do hata ni Tuhan Jahowa taringot tu isi ni Jerusalem, angka na di tano Israel: Ingkon mardongan hagodoron panganonnasida rotinasida i, jala mardongan hapariron inumonnasida aek, ala naung tarulang tanona, bolong ia hinagabena binahen ni pangarupaon ni saluhut angka pangisina.

²⁰Jala tarulang do huta angka na niingan na sai laon, jala tano i gabe halongonan, asa tung ditanda nasida ahu do Jahowa.

²¹(IV.) Dung i ro muse ma hata ni Jahowa tu ahu, songon on:

²²Ale anak ni jolma, umpama dia do i na mehet di hamu di tano Israel songon on: Laon dope angka ari i, jala nunga pesan sandok alatan.

²³Dibahen i dohononmu ma tu nasida: Songon on do hata ni Tuhan Jahowa: Pasadionku ma umpama i, asa unang be parumpamahononnasida di Israel, ingkon dohononmu ma tu nasida: Nunga jonok angka ari i dohot hata ni sandok alatan i.

²⁴Ai ndang tagamon adong be agia aha alatan sipaotooto, manang pangarundigon lesemlesem di tongatonga ni bangso Israel.

²⁵ Ai ahu Jahowa sandiri mangkatai, manang hata dia huhatahon, ingkon pasautonku do i, ndang be togangonku, ai di angka arimuna, ho ale bangso panggunturi hatahononku, sada hata jala pasautonku, ninna Tuhan Jahowa.

²⁶ Dung i ro muse hata ni Jahowa tu ahu songon on:

²⁷ Ale anak ni jolma, ida ma, hata ni bangso Israel songon on: Alatan na niidana i, laon dope ariarina, jala taringot tu tingki angka na dao do ibana manurirangi.

²⁸ Dibahen i dohononmu ma tu nasida: Songon on do hata ni Tuhan Jahowa: N dang be togangonku saluhut angka hatangku; hata naung huhatahon i, ingkon pasautonku do i, ninna Tuhan Jahowa.

13 ¹ (I.) Dung i ro muse hata ni Jahowa tu ahu songon on:

² Ale anak ni jolma, manurirangi ma ho dompak panurirang ni Israel, angka na manurirangi, jala dohononmu ma tu angka na manurirangi sian tubutubu ni rohana sandiri: Tangihon hamu ma hata ni Jahowa!

³ Songon on do hata ni Tuhan Jahowa: Marjea ma panurirang angka na oto, angka na paihuthon tondinasida sandiri, dohot na so pinapatar tu nasida.

⁴ Tudoshon antuasus angka na di halongonan do angka panurirangmu, ale Israel.

⁵ Nandang dipanaek hamu angka bungbung, jala ndang dibahen hamu parik humaliang pinompar ni Israel, asa manahan nian jongjong di hamusuon di ari ni Jahowa.

⁶ Sipaotooto do diida nasida dohot pangarundingon gabus, angka didok nasida do: Songon on do hata ni Jahowa! Hape ndada Jahowa marsuru nasida, gabe tarurak nasida maimaima hasosonggop ni hata i.

⁷ Nda alatan sipaotooto na niidamuna i dohot pangarundingon gapgap na hinatahonmuna i, angka didok hamu do: Pandok ni Jahowa do i, hape so ahu mangkatahon.

⁸ Dibahen i songon on do hata ni Tuhan Jahowa: Ala sipaotooto na hinatahonmuna, jala ala gapgap na niidamuna i; dibahen i ida ma, ahu ma marlulu dompak hamu, ninna Tuhan Jahowa.

⁹ Jala tanganku sandiri mangonai tu panurirang angka na maralatan sipaotooto, dohot angka na mangarundingkon gapgap, ndang jadi masuk nasida tu bagasan luhutan ni bangsongku, jala ndang jadi tarsurat nasida tu surat aturan, ni pinompar ni Israel, jala ndang jadi masuk nasida tu tano ni Israel, asa tung ditanda hamu ahu do Tuhan Jahowa.

¹⁰ Dibahen i tongon do, ala na nililuhon nasida bangsongki, didok do: Dame, hape soadong dame, gabe dipauli bangso i dorpi tano, jala ida ma, nasida mambahen sampangna.

¹¹ Ingkon dohononmu ma tu angka sibahen sampang: Ingkon marumpak do i! Ai masa tahe udan tipotipo, jala hamu ale angka batu ambolas, madabu ma hamu, jala malua ma ho, ale habahaba!

¹² Jadi ida ma, marumpak ma dorpi i; nda dohonon ni halak ma tu hamu: Didia do nuaeng sampang na nileaphonmuna i?

¹³ Dibahen i songon on do hata ni Tuhan Jahowa: Ahu ma paluahon habahaba di bagasan rimashu, jala masa udan tipotipo di bagasan murukku, dohot angka batu ambolas di bagasan parpiarpiar ni rimashu laho maniaphon.

¹⁴ Jala lohaonku ma dorpi naung sinampangmuna i, jala panepneponku dohot tano i, asa tedek ojahanna, jala marumpak huta i, jala siap hamu di tongatongana; asa tung ditanda hamu ahu do Jahowa.

¹⁵ Asa sun tolhas hubahen rimashu dompak dorpi i dohot dompak angka sibahen sampangna, jala dohononku ma tu hamu: Ndang adong be disi dorpi, jala ndang disi be angka sibahen sampangna!

¹⁶ Angka panurirang ni Israel tahe, angka na manurirangi tu Jerusalem, angka na mangulpuk taringot tu huta i ulpuhan pardemahan, hape so adong pardemahan, ninna Tuhan Jahowa.

¹⁷ (II.) Ia ho ale anak ni jolma, tujuhon ma bohim dompak angka boru ni bangsom,

angka na manurirangi sian tubutubu ni rohanasida sandiri, jala manurirangi ma ho dompak nasida!

¹⁸Jala dohononmu ma: Songon on do hata ni Tuhan Jahowa: Marjea ma angka boruboru na manjarumi bantalbantal tu saluhut ruasruas ni tangan, dohot angka na mambahen tujungtujung marragamragam balgana bahenon tu ulu laho mamburu tondi ni halak. Ia tondi ni bangsongku naeng buruonmuna, ia tondimuna sandiri hape tung naeng pangoluonmuna.

¹⁹Jala naeng do leaanmuna ahu maradophon bangsongku, binahen ni eme sanggim, manang binahen ni roti sanseat laho mambunu tondi, angka na so jadi bunuon dohot pangoluhon tondi, angka na so jadi pangoluon, marhitehite gabusmuna tu bangsongki, angka na girgir patangitangi gabus.

²⁰Dibahen i, songon on do hata ni Tuhan Jahowa: Ida ma, ahu ma alo ni bantalbantalmuna, angka na pinangkemuna umburu angka tondi laho mangela tu hamagoan; hape ahu mangarompas nasida sian abinganmuna, jala ahu paluahon tondi angka na binurumuna i, tondi angka na pinaelaelamuna i.

²¹Jala ahu manansani angka tujungmuna, jala ahu paluahon bangsongku sian tanganmu, jala ndang be tagamon dapot

tanganmuna nasida buruonmu, asa tung ditanda hamu ahu do Jahowa.

²²Ala naung marpangansi hamu mangarsahi roha ni partigor i, so manang ahu mangarsahi ibana, jala lam dipargogoi hamu tangan ni parjahat, gabe sundat ibana mulak sian dalanna na roa i, asa mangolu nian ibana.

²³Dibahen i ndang be marulpuhan sipaotooto hamu, jala ndang be hamu mangarundingi, jala ahu paluahon bangsongki sian tanganmuna, asa tung ditanda hamu ahu do Jahowa.

14¹ (I.) Dung i ro ma angka baoa sian angka sintua ni Israel manopot ahu, laos hundul di jolongku.

²Jadi ro ma hata ni Jahowa tu ahu songon on:

³Ale anak nijolma, angka baoa on marparsigantungan tu ganaganaannasida di bagasan rohanasida, jala dibahen do parbonsiran tu hajahatonnasida sonson tu jolonasida, tung olo ma ahu tagamon usousoannasida?

⁴Dibahen i mangkatai ma ho dohot nasida, jala dohononmu ma tu nasida: Songon on do hata ni Tuhan Jahowa: Manang ise sian pinompar ni Israel na marparsigantungan tu ganaganaan na di bagasan rohana, jala dibahen parbonsiran tu hajahatonna sonson tu jolona, ro muse dope ibana manopot panurirang i, ahu, Jahowa sandiri

ma mangalusi ibana, hombar tu hinadeak ni ganaganaanna.

⁵Asa tung mangilala roha ni pinompar ni Israel di bagasan, angka na marbalik tumundalhon ahu, binahen ni ganaganaannasida saluhutna.

⁶Dibahen i dohononmu ma tu pinompar ni Israel: Songon on do hata ni Tuhan Jahowa: Mulak ma hamu, tundalhon hamu ma ganaganaanmuna, jala padao hamu ma bohimuna sian saluhut biasbias, angka na niulahonmuna.

⁷Ai manang ise sian pinompar ni Israel manang sian halak ruar pe, na maisolat di tongatonga ni Israel, molo tung marbalik ibana sian ahu, jala marparsigantungan rohana di bagasan tu ganaganaanna, jala dibahen parbonsiran tu hajahatonna sonson tu jolona, ro muse dope ibana mandapothon panurirang, asa marhitehite ibana usousoanna ahu, apala ahu, Jahowa sandiri ma maralus tu ibana manojom.

⁸Apala bohingku ma bahenonku gabe alo ni baoa i laho mangago ibana, bahen tanda dohot pambuatan hulingkulingan, jala ahu maniaphon ibana sian tongatonga ni bangsongku, asa tung ditanda hamu ahu do Jahowa.

⁹Jala tung sura olo panurirang i paotootoon gabe dihatahon hata sisandok, ahu, Jahowa sandiri ma paoto panurirang sisongon i, jala

patoltolonku ma tanganku dompak ibana,
jala ripurhononku ibana sian tongatonga ni
bangsongku Israel.

¹⁰Ingkon manginona tu nasida be
hajahatonnasida i, dos do hajahaton ni na
usousu, songon hajahaton ni panurirang i.

¹¹Asa unang be lilu pinompar ni Israel
mandao sian ahu, jala unang be diramuni
dirinasida di bagasan saluhut hajahatonnasida
i, asa sumuang nasida gabe bangsongku, jala
ahu gabe Debatanasida, ninna Tuhan Jahowa.

¹²(II.) Dung i ro muse ma hata ni Jahowa tu
ahu songon on:

¹³Ale anak ni jolma, tung sura mardosa
sada luat dompak ahu mangoseosei: Jadi
patoltolonku ma tanganku dompak luat i, jala
ponggolhononku, sian i tungkot parbohalan,
jala tongoshononku tusi haraparon, jala
pansingknononku sian i jolma nang pinahan.

¹⁴Tung sura pe di tongatongana na tolu
halak on: si Noak, si Daniel dohot si Job,
hosanasida sandiri do paluaon nasida, alani
hatigorannasida, ninna Tuhan Jahowa.

¹⁵Manang tung sura ahu pamasa binatang
na rahat di luat i, pola langa pangisina i
dibahen, jala tarulang, gari mamolus sian i
ndang tarbahen maradophon binatang i.

¹⁶Songon sintongna mangolu ahu, ninna
Tuhan Jahowa, di tongatongana pe na tolu
halak i, molo tung adong paluaonnasida

tagamon anak nang boru, so holan nasida sandiri malua, ia luat i gabe halongonan do.

¹⁷Manang tung sura ahu parohon podang tu atas ni luat i, laos ningku do: Rasehon ma tano i, ho ale podang! Gabe ripas hubahen sian i jolma nang pinahan.

¹⁸Songon sintongna mangolu ahu, ninna Tuhan Jahowa, di tongatongana pe na tolu halak i, ndang adong paluaonnasida anak manang boru, tung holan nasida sandiri do malua.

¹⁹Manang tung sura ahu parohon begu masa tu luat i, jala huusehon rimashu tusi marhitehite durusdurus ni mudar laho mangaripashon sian i jolma nang pinahan.

²⁰Songon sintongna mangolu ahu, ninna Tuhan Jahowa, di tongatongana pe si Noak, si Daniel dohot si Job, molo tung adong anak manang boru paluaonnasida, so holan hosanasida paluaonnasida marhitehite hatigorannasida.

²¹Ai songon on do hata ni Tuhan Jahowa: Lam beha ma molo rap hutongoshon tu Jerusalem uhumhu ma opat i angka na rahat i, i ma podang, haraparon, binatang na rahat dohot begu antuk, laho maniaphon sian i jolma nang pinahan.

²²Ai ida ma, sai adong do tading di bagasan pasipasina na malua, angka na ruar tinogihon, anak nang boru angka nasida ma ruar sogot manopot hamu, jadi idaonmuna

ma dalannasida dohot pambahenannasida,
gabe tarapul rohamuna ala ni jea na huparo
dompok Jerusalem, ala ni saluhut tahe na
huparo tusi.

²³Jadi apulonnasida ma hamu, ai idaonmuna
ma dalannasida dohot pambahenannasida,
asa tung ditanda hamu, na marala do saluhut
na hubahen i tu Jerusalem, ninna Tuhan
Jahowa.

15¹(I.) Dung i ro muse ma hata ni
Jahowa tu ahu, songon on:

²Ale anak ni jolma, tung aha ma surung
ni hau anggur martimbangkon saluhut hau
hian? Manang ranting ni hau anggur na di
tongatonga ni hau tombak?

³Tung tarbuat ma sian i bahen parhau
mambahen ulaula sian i, manang tung tarbuat
sian i nanggo labang sada manangkothon tusi
ulaula manang aha?

⁴Ida ma, sinubahon do i tu api, asa
disudahon, nunga pola suda tampahanna
na dua i dipangan api, gabe sipusipu ia
tongatongana, tung tagamon marguna dope i
bahen ulaula?

⁵Ida ma, gari uju simpan dope, gari so
tarpangke bahen ulaula, lam ia dung dipangan
api ma, jala gabe sipusipu, tung tarpangke
dope bahen ulaula?

⁶Dibahen i songon on do hata ni Tuhan
Jahowa: Songon pangalaho ni hau anggur di
tongatonga ni hau tombak, naung hupasahat

tu api sudahononna, suang songon i naung hupasahat isi ni Jerusalem.

⁷Nunga apala bohingku hubahen gabe alonasida; malua pe nasida sian api na sada, ingkon suda nasida panganon ni api sadaan, asa tung ditanda hamu ahu do Jahowa, ia dung hubahen bohingku gabe alonasida.

⁸Jala nunga hubahen tano i gabe halongonan, ala mangoseosei nasida, ninna Tuhan Jahowa.

16¹(I.) Dung i ro muse ma hata ni Jahowa tu ahu, songon on:

²Ale anak ni jolma, pabotohon ma tu Jerusalem biasbias angka na niulana.

³Jala dohononmu ma: Songon on do hata ni Tuhan Jahowa tu Jerusalem: Haroroanmu dohot hatubuanmu sian tano ni halak Kanaan do, marga Amori do amam, jala boru Het do inam.

⁴Pangalaho ni hatutubum songon on do: Nandang diseat pusokmu di ari hatutubum, jala ndang dididi ho dohot aek laho paiashon; jala ndang diososhon sira tu ho, jala ndang diborhosi ho.

⁵Nandang adong na asi roha mida ho nanggo sahalak, mambahen tu ho sada sian angka bongka ondeng, manundunhon ho nian; lam diambolongkon do ho tahe tu ladang, dibahen gigina mida hosam di ari hatutubum.

⁶Jadi mamolus ma ahu sian lambungmu, gabe huida ho marguluguluhon mudarmu,

gabe hudok tu ho: Ingkon mangolu ho di bagasan mudarmu! Songon hudok ma tu ho: Ingkon mangolu ho di bagasan mudarmu!

⁷Marloksaloksa ho muse hubahen, songon tumburtumbur di ladang; gabe torop ho jala magodang, jala sungkot hinaulim, lam tu balgana do bagotmu, jala lam martumbur obukmu, alai salangsalang jala marsaemara do ho.

⁸Dung i mamolus muse ahu sian lambungmu, jala huida ho, gabe ida ma, nunga jumpang tingkim, tingki partandanganmu. Jadi hupaherbang ma habongku mangulosi ho, jala huhungkupi parsaemaraonmu, pola marmangmang ahu tu ho, jala marpadan ahu tu ho, ninna Tuhan Jahowa, gabe ahu nampuna ho.

⁹Dung i ahu mandidi ho dohot aek, jala huusa mudarmu sian ho, jala humiahi ho dohot miak.

¹⁰Jala hubahen ho marpangkean na niangit, dohot martapaktapak sian hulingkuling na arga sahali, jala hubahen ho marulos na halus, jala huhungkupi ulum dohot surta.

¹¹Jala hubahen ho marpangkean na jagar sahali, jala hubahen angka leang tu tanganmu dohot horunghorong tu rungkungmu.

¹²Hubahen igungmu martintin, jala marantinganting ia pinggolmu, jala tumpal sada na arga situtu tu ulum.

¹³Jadi marbujonggit ho sian sere dohot sian perak, jala dagangan na halus do parulosonmu, surta dohot hain na niangit. Sagusagu mardongan situak ni loba dohot miak panganonmu, jadi sungkot ma hinaulim, jala pampe tu ho harajaon.

¹⁴Jadi pansar ma baritam tu tongatonga ni angka parbegu dibahen hinaulim, ai tung na sun denggan do i, dibahen hamuliaonku na hupampe tu ho, ninna Tuhan Jahowa.

¹⁵(II.) Hape marhaposan tu hinaulim do ho, jala marmainan ho mangasahon baritam, jala didaishon ho do parmainanonmu tu ganup na mamolus mangalohoti ibana.

¹⁶Dibuat ho do huhut sian pangkeanmu asa mambahen di ho angka langgatan siganding, marmainan ho di atasna, na so dung dumatangi, jala na so tagamon masa nang sogot.

¹⁷Dibuat ho do huhut ulaula ni hajagaronmu sian serengku dohot sian perakku, na hulehon i tu ho, jala dibahen ho di ho angka sumansuman ni baoa, asa marmainan tusi.

¹⁸Dibuat ho do huhut pangkeanmu na niangit, jala dihungkuphon ho tu nasida, dipatibal ho do huhut miakku dohot daupanku tu jolonasida.

¹⁹Jala rotingku na hubasabasahon i tu ho, i ma sagusagu mardongan miak dohot situak ni loba na hulehon bahen panganonmu nian,

hape dilehon ho do i tu jolonasida bahen uap na hushus, i ma tutu, ninna Tuhan Jahowa.

²⁰Angkup ni dibuat ho do angka anakmu dohot borum, angka na tinubuhonmu di ahunian, gabe dipelehon ho do i tu nasida asa sudahononna; tung numeang ma i sian angka parmainanonmu di roham?

²¹Nunga dipotongi ho huhut angka anakku, jala diseahon ho nasida, asa pabolashon nasida sian api pasahathon tu debata sileban.

²²Jala di bagasan saluhut biasbias angka na niulam dohot parmainanonmu, ndang marningot ho di angka ari haposoonmu, uju salangsalang ho jala marsaemara, tung marguluguluhon mudarmu ho.

²³Dung salpu saluhut hajahatonmu, jea, jea ma di ho, ninna Tuhan Jahowa!

²⁴Tung dipauli ho do di ho bagas na marpangalaho langkitang, jala dibahen ho do di ho tambak di saluhut alaman.

²⁵Di saluhut haroroan ni dalan dipauli ho angka tambakmu, jala dibahen ho do hinaulim gabe biasbias, jala dipahangkang ho do patmu di ganup na mamolus, asa paganda parmainanonmu.

²⁶Jala laho do ho marmainan tu angka anak ni Misir, hombar balokmu, angka sigodang sibuk, jala dipatamba ho do parmainanonmu, asa pahehe rimashu.

²⁷Jadi ida ma, ala ni hupatoitol tanganku tu atasmu, jala huorui partalianmu hian jala

hupasahat ho gabe guru roharoha ni angka na mangkagigihon ho, i ma angka boru Palistim, angka na maila balik mida dalan ni haroronganmu.

²⁸Laho muse ho marmainan tu angka anak ni Assur ala so olo mahap roham, marmainan ho tahe tu nasida, hape laos so olo mahap roham.

²⁹Lam digandai ho do parmainanonmu tu tano Kanaan, boti tu luat Kasdim, laos so olo mahap dope roham disi.

³⁰Marasnai rohami marisuang, ninna Tuhan Jahowa, di na binahenmi saluhutna i, i ma pambahenan ni parompuan sibabijalang na tarboan rohana.

³¹Di na binahenmi joromi di haroroan ni luhut dalan dohot na binahenmi tambakmu di saluhut alaman, jala ndada ho songon sibabijalang hian na mangigil upa.

³²Oe ale boru sibabijalang, na manjangkon halak sileban, singkat ni harajaanna hian!

³³Somalna nian di saluhut sibabijalang manjalo ugasan, alai muba do anggo ho, ho do balik mangalehon ugasanmu tu saluhut puangmu dohot mangalehon silua tu nasida, mangela ro manopot ho sian na humaliang marmainan dohot ho.

³⁴Asa na sumalin do ho diparmainanonmu martimbangkon parompuan angka na asing; ndada ho diihutihut naeng marmainan, ho

do balik mangalehon ugasan, ndada tu ho dilehon ugasan, umbahen gabe sumalin ho.

³⁵(III.) Dibahen i ale sibabijalang, tangihon ma hata ni Jahowa!

³⁶Songon on do hata ni Tuhan Jahowa:
Ala naung pinansuasaehonmi hepengmu, jala dipatedek ho hailaonmu, binahen ni parmainanonmu tu angka puangmu, dohot tu saluhut ganaganaan ni hasogiron angka na niulam, jala hombar tu mudar ni anakmu angka na sinombahonmu tu nasida.

³⁷Dibahen i, ida ma, ahu ma papunguhon saluhut puangmu angka na mangkasolohon ho, dohot saluhut angka na hinaholongan ni roham ro di saluhut angka hasomorani roham, ahu ma papunguhon nasida sian na humaliang dompak ho, asa hupatedek hailaonmu tu nasida, asa tung diida nasida sandok hailaonmu.

³⁸Jala ahu mandabu tu ho uhum na tu angka sibabijalang hian dohot tu parompuan angka na mandurushon mudar, jala ahu pasahathon ho gabe mudar ni harimason dohot pangiburuan.

³⁹Jala ahu pasahathon ho tu bagasan tangannasida, asa lohaonnasida angka joromi, jala panepneponna angka tambakmu, jala tanggalannasida angka pangkeanmu, jala rampasonnasida angka mata intan jagarjagarmu, jala pasombuonna ho salangsalang dohot marsaemara.

⁴⁰Jala nangkok do togihononnasida dompak ho sada luhutan, jala dangguranna ho dohot batu, jala tampulanna ho dohot podangnasida.

⁴¹Jala purunanna angka bagasmu dohot api, jala bahenonna tu ho angka uhumi di adopan ni torop parompuan. Asa ahu pasohothon parmainanonmu, panuang pe ndang be lehononmu.

⁴²Asa tung sombu rimashu mida ho, jala sumurut pangiburuonku sian ho, gabe sonang ahu, jala unang be tarsunggul rimashu.

⁴³Ala na so niingotmu angka ari haposoonmu, jala na ritoon i ho dompak ahu di saluhutna i. Ahu pe antong, ida ma, manginona tu ulum bahenonku dalanmu, ninna Tuhan Jahowa, jala ndang be tambaonmu harorangan dongan ni saluhut biasbias, angka na niulam.

⁴⁴(IV.) Ida ma, saluhut halak na somal marumpama, dohononna ma hata umpama on dompak ho: Suman tu inana do boruna.

⁴⁵Boru ni inam do ho, naung mahilolong di baoa na dohot di anakonna; jala anggi ni haham do ho angka na mahilolong mida baoa nasida dohot mambolongkon anaknasida; boru Het do inamuna, jala marga Amori do amamuna.

⁴⁶Jala hahami do Samaria, ibana dohot angka boruna na maringan tungkan sihambirangmu, jala anggim na maringan

tungkan siamunmu, i ma Sodom dohot angka boruna.

⁴⁷Alai ndang diihuthon ho angka dalannasida, jala ndang diulahon ho hombar tu biasbias angka na niulanasida, hira na maotikku, gabe jumahat ho di sude angka dalanmu, sian nasida.

⁴⁸Songon sintongna mangolu ahu, ninna Tuhan Jahowa, molo tung tudos binahen ni Sodom anggim i, ibana dohot angka boruna, songon na binahenmi dohot angka borum!

⁴⁹Ida ma, on do hajahaton ni Sodom anggim i: Roha haginjangon, pargadombuson dohot hapedemon, i ma di ibana dohot di angka boruna; ianggo tangan ni na dangol dohot na parir, ndang dipargogoi nasida.

⁵⁰Lam jungkat tahe rohanasida jala diulahon do angka biasbias di jolongku, jadi hurendephon nasida, disi huida.

⁵¹Samaria i pe, nanggo satonga ni dosami ndang diulahon, andul do digandai do angka biasbiasmi martimbangkon nasida, tung hira dipintori ho do hahami di saluhut biasbias angka na niulam.

⁵²Ho pe antong, ingkon usungonmu haurahonmu na niuhumhonmu tu hahami; marhitehite dosam angka na sumogir i binahenmu sian nasida, gabe umpintor nasida sian ho. Dibahen i tarurak ma nang ho, jala usungonmu haurahonmu marhitehite pamintorim di hahami.

⁵³ (V.) Dung i mulak ma togihononku angka na tarbuang sian nasida, angka na tarbuang sian Sodom dohot sian angka boruna, angka na tarbuang sian Samaria dohot sian angka boruna, nang angka na tarbuang ni habuanganmu nuaeng di tongatongana.

⁵⁴ Asa usungonmu haurahonmu, gabe maila ho mida saluhut na binahenmi, di na niapulanmu nasida.

⁵⁵ Jadi mulak ma Sodom anggim i, ro di angka boruna tu haroroanna hian; jala Samaria dohot angka boruna mulak tu haroroanna hian; hape dohot angka borum mulak tu haroroanmuna hian.

⁵⁶ Jala Sodom anggim i, ndang be gabe barita saming di bagasan pamanganmu, songon uju di ari haginjangon ni roham.

⁵⁷ Tagan so patar dope hinajahatmu, songon di tingki pangareheon ni angka boru sian Ram dohot saluhut hombarna hundul humaliang ro di boru Palistim, angka na palea ho humaliang.

⁵⁸ Haroronganmu tahe dohot biasbias angka na niulam, angka na manginsombut tu ho, ninna Jahowa.

⁵⁹ Ai songon on do hata ni Tuhan Jahowa: Ahu mambahen tu ho suang songon na binahenmi, na tinoisanmi uari laho mangose padan.

⁶⁰ Alai anggo ahu, sai huingot do padan na hubahen i tu ho, uju di angka ari haposoonmu,

jala huhajongjongkon tu ho padan saleleng ni lelengna.

⁶¹ Jadi ingotonmu ma angka dalanmu, laos hailahononmu do di na jinangkonmi haham dohot anggim, angka silehononku tu ho sogot bahen angka boru, alai ndada sian patik parpadanonmu.

⁶² Jala ahu mangkajongjongkon padanhu tu ho sogot, asa tung diboto ho ahu do Jahowa.

⁶³ Asa tung marningot ho jala maila, pola ndang be hum ho mangungkap pamangan binahen ni ilam, ia dung husalesehon tu ho taringot tu saluhut na binahenna i, ninna Tuhan Jahowa.

17 ¹ (I.) Dung i ro muse ma hata ni Jahowa tu ahu, songon on:

² Ale anak ni jolma, marhulingkulingan, jala marumpama ma ho tu pinompar ni Israel.

³ Jala dohononmu ma: Songon on do hata ni Tuhan Jahowa: Sada pidong raja ualu na bolon, bidang habongna, jala ganjang hatirna, gok imbulu, angka na marrintik songgop tu Libanon, jala dibuat apala pusuk ni hau ares.

⁴ Digotap do ujung ni angka rantingna, laos diboan do i tu tano parboniagaan, jala dibahen do i tu bagasan huta ni angka partigatiga.

⁵ Dibuat do huhut sian boni ni tano i, jala dibahen do i tu bagasan hauma sisaburon, dilopokkon muse tu lambung ni aek godang.

⁶Jadi martumbur ma i gabe hau anggur na manjarar, rodop partubuna, manjomba do ianggo angka rantingna tu ibana, angka uratna pe di toruna do. Jadi gabe hau anggur ibana, pola marranting jala marbulung.

⁷Dung i adong ma sada pidong raja ualu na asing na bolon, bidang habongna, jala semet imputna. Jadi ida ma, hau anggur i parangkithon uratna tusi, jala rantingna manjarar tusi, asa dibornohi ibana sian baruran ni panuananna.

⁸Tu tano bosar, di tobing do ibana tarsuan, asa martumbur ibana, jala marparbue nian, asa gabe hau anggur na marmulia situtu.

⁹Dohononmu ma: Songon on do hata ni Tuhan Jahowa: Tung tagamon manjadi ma i? Nda runtunanna angka uratna jala seatonna parbuena, asa malos? Ingkon saluhut bulung ni tumburna tahe malos; jala ndada pola marhitehite tangan na gogo, manang marhitehite bangso na timbul eneton ibana sian uratna.

¹⁰Tongon tahe, nunga nian tarsuan ibana, tung tagamon manjadi ma? Nda mamintor malos situtu ma tagamon, disi diullus alogo sian purba ibana? Malos ma tutu ibana di atas baruran partumburanna i.

¹¹(II.) Dung i ro muse ma hata ni Jahowa tu ahu, songon on:

¹²Ua paboa ma tu bangso panggunturi i: Ndang mamoto hamu manang dia lapatanna?

Dohononmu ma: Ida ma, nunga ro raja sian Babel tu Jerusalem, gabe ditangkup rajana dohot angka indukna, jala diboan nasida bahen donganna tu Babel.

¹³Dibuat huhut sian pinompar ni raja i, jala dibahen padanna tusi, pola dipatolon ibana, ianggo angka na sangap ni tano i diboan do.

¹⁴Asa tung laos tarjepol harajaon i, unang be manggusar, asa diradoti padanna, laos hot dihajongjongkon nian.

¹⁵Hape manggunturi do i dompak ibana, laos disuru angka suruanna tu Misir, mangido lehononna nian tu ibana angka hoda dohot na nirajaanna torop. Tung adong ma labana sian i? Tung tagamon malua ma halak na mambahen songon i? Tung tagamon malua ma siose padan?

¹⁶Songon sintongna mangolu ahu, ninna Tuhan Jahowa, molo so laos mate ibana di tongatonga ni Babel, di inganan ni raja na pabangkit ibana gabe raja, nampuna uari na tinoisanna, jala nampuna padan na ni oseanna.

¹⁷Jala ndang tagamon donganan ni Firaun ibana marhitehite godang parangan, manang na torop i laho tole porang, laho pajongjong hubu dohot pauli batarbatar, asa mangarendephon torop halak.

¹⁸Tongon tahe, ala naung tinoisanna uari laho mangose padan, jala ida ma, pola

dilehon tanganna, lam dibahen do saluhutna ondeng, ndang tagamon malua ibana.

¹⁹Dibahen i songon on do hata ni Tuhan Jahowa: Songon sintongna mangolu ahu, molo so manginona tu uluna bahenonku uaringku naung tinoisanna i dohot padanhu naung niosena i.

²⁰Lingkuphononku ma rambangku tu atasna, asa tartangkup ibana di bagasan jaring parburuonki, jala ahu mamboan ibana tu Babel, jala disi do uhumonku ibana, ala na mangoseosei ibana dompak ahu.

²¹Jala saluhut angka na maporus sian paranganna marhoronhoron, ingkon marragean nasida bahenon ni podang, ianggo angka pasipasina paserahonku tu ganup desa, asa tung ditanda hamu ahu do Jahowa na mandok i.

²²(III.) Songon on do hata ni Tuhan Jahowa: Apala ahu ma mambuat sada ranting sian pusuk ni hau ares na timbo i, jala lopokhononku; sian punsu ni angka tumburna gotaponku sada lunduna, jala ahu manuanhonsa di atas dolok na timbo, jala na timbul.

²³Di atas dolok ni Israel na timbo i suanhononku ibana, asa laos mardangka jala marparbue, laos gabe hau ares na marmulia, asa marasar di toruna saluhut pidong na marhabong, angka na balga dohot

na metmet marlinggomlinggom nasida di toru ni dangkana.

²⁴Jadi tandaon ni saluhut hau di ladang ma, ahu Jahowa sandiri parodophon hau na timbo i, dohot patimbohon hau na rodop i. Ahu mambahen malos hau na rata, jala ahu mambahen martumbur hau na malos, ahu Jahowa sandiri na mandok i dohot mambahensa.

18¹(I.) Dung i ro muse hata ni Jahowa tu ahu songon on:

²Ala ni aha umbahen sai pangkeonmuna hata umpama on taringot tu tano Israel mandok: Angka amaama manganhon parbue ni hau anggur na asom, gabe ngiluan ia angka ngingi ni anakna!

³Songon sintongna mangolu ahu, ninna Tuhan Jahowa, tung na so jadi be pangkeonmuna hata umpama i di Israel.

⁴Ida ma, ahu do nampuna saluhut tondi nijolma, nang tondi ni amaama, nang tondi ni anakna, ahu do nampunasa. Tondi ni manang ise na mardosa, ingkon i do mate.

⁵Alai molo gabe partigor manang ise, jala diulahon uhum dohot hatigoran.

⁶Ndang mangan tibaltibal ibana di atas ni angka dolok, ndang manaili matana tu angka ganaganaan ni pinompar ni Israel, jala ndang diramuni jolma ni donganna, jala ndang jumonok ibana tu parompuan jumpa diida hasomalanna.

⁷Jala ndang dirupa manang ise; gade jinalona i dipaulak do tu parutang, ndang olo ibana mangarampas ugasan na nirampas, rotina dilehon do tu na male, jala diparulosi do na marsaemara.

⁸Ndang paurangkon hepeng ibana, jala ndang torbang pambuatna di laba, ditait do tanganna mulak sian hageduhon, uhum hasintongan do dibahen manguhum halak na marsalisi.

⁹Diparangehon do angka patikki, jala diradoti angka uhumhu laho mangulahon hasintongan; i ma halak partigor, sai na mangolu do ibana, ninna Tuhan Jahowa.

¹⁰Hape tung sura ditubuhon ibana sada anak siulahon roharoha, na mandurushon mudar, manang diulahon tu donganna nanggo sada sian angka bongka ondeng.

¹¹Jala ndang diulahon ibana agia aha sian angka parjolo i, tung mangan do ibana di atas ni angka dolok, jala diramunijolma ni donganna.

¹²Tung dirupa do na dangol dohot na parir, jala dirampas do ugasan naung nirampas, jala dipatehon gade ni parutang, jala manaili matana tu angka ganaganaan, huhut mangulahon biasbias ibana.

¹³Dipaurangkon hepengna, jala matorbangku pambuatna di laba, tung tagamon mangolu ma ibana? Tung na so jadi mangolu ibana, ala na niulana saluhut

biasbias ondeng, ingkon mate ibana! Ingkon manginona tu ibana sogot mudarna!

¹⁴Jala ida ma, tung sura ditubuhon ibana sada anak, na marnida sandok dosa, angka na niula ni amana, diida pe, hape ndang diulahon sisongon i:

¹⁵Ndang mangan tibaltibal ibana di atas ni angka dolok, jala ndang manaili matana tu angka ganaganaan ni pinompar ni Israel, ndang diramunijolma ni donganna.

¹⁶Ndang dirupa manang ise, jala ndang dipatehon gade jinalona i, jala ndang dirampas ugasan na nirampas, sipanganonna dilehon do tu na male, jala diparulosi do na marsaemara.

¹⁷Dipasurut do tanganna sian na dangol, jala ndang matorbangku pambuatna di anak ni hepeng dohot di laba, diulahon do uhumhu, angka patikku diparangehon do: Ibana ma na so tagamon mate ala ni hajahaton ni amana, ingkon mangolu situtu ibana.

¹⁸Alai anggo amana, ala mangulahon pangarupaon ibana, dirampas do ugasan ni donganna, jala diulahon do na so jadi di tongatonga ni bangsona, ida ma, ingkon mate do ibana di bagasan hajahatonna.

¹⁹Hape anggo hamu mandok: Boasa so manginona tu anakna hajahaton ni amana? Ala na mangulahon uhum dohot hatigoran anak i, saluhut angka patikki diradoti do jala diulahon, tongon tahe ingkon mangolu ibana.

²⁰Tondi ni manang ise na mardosa, ingkon i do mate! Ndang jadi manginona tu anak hajahaton ni amana, tu ama, pe ndang jadi manginona hajahaton ni anakna. Ingkon songgop sogot hatigoran tu partigor, jala hajahaton tu parjahat.

²¹(II.) Alai tung sura ditundalhon roha ni parjahat i saluhut dosana, angka na niulana na sai laon, jala diradoti saluhut angka patikki, jala diulahon uhum dohot hatigoran, tongon do ingkon mangolu ibana, ndang jadi mate.

²²Saluhut hajahaton angkana niulana na sai laon, ndang jadi jujuran tu ibana, hatigoran na niulahonna i do hanguluhononna.

²³Tung tagamon marlomo ni roha ma ahu mida hamatean ni parjahat i, ninna Tuhan Jahowa; nda tagonan nian, molo muba rohana i sian dalanna angka na sai laon, asa mangolu ibana.

²⁴Alai tung sura ditundalhon halak partigor i hatigoranna i, jala diulahon na so uhum paihutihuthon saluhut biasbias, angka na niula ni parjahat hian laos diula, tung patut ma mangolu ibana? Saluhut hatigoranna angka na niulana na sai laon, ndang be ingoton, ingkon di bagasan panundaliaonna na niulana do ibana mate dohot di bagasan dosana angka naung binahenna i.

²⁵Hape anggo hamu mandok: Ndang sintong dalan ni Tuhan i! Ua tangihon hamu ma, ale

pinompar ni Israel! Tung tarbahren ma so sintong dalanku? Dalanmuna do tahe na so sintong.

²⁶Ai molo ditundalhon partigor hatigoranna i, jala diulahon na so uhum, gabe mate ibana alani: Ingkon mate di bagasan hajahaton naung niulana do ibana.

²⁷Alai parjahat i pe, molo tung ditundalhon hajahaton na niulana na sai laon, jala diulahon uhum dohot hatigoran: Pangoluhon tondina ma ibana disi.

²⁸Laos mananda rohana, jala ditundalhon saluhut hajahaton angka na niulana na sai laon, tongon do ingkon mangolu ibana, ndang jadi mate.

²⁹Hape ro ma anggo pinompar ni Israel mandok: Nandang sintong dalan ni Tuhan i! Tung tarbahren ma so sintong angka dalanku ale pinompar ni Israel? Dalanmuna i do tahe na so sintong!

³⁰(III.) Dibahren i ale pinompar ni Israel, uhumonku ma hamu sogot, ganup hombar tu angka dalanna be, ninna Tuhan Jahowa. Sai mulak ma hamu, jala tundalhon hamu ma saluhut hajahatonmuna, asa unang hajahaton i gabe partuktuhan di hamu!

³¹Sai reongkon hamu ma sian hamu saluhut pangalaosionmuna, angka naung binahenmuna i, jala ulahon hamu ma di hamu roha na imbaru dohot tondi na imbaru; boasa

tung tagonan mate hamu, ale pinompar ni Israel?

³²Ai ndang lomo rohangku mida hamatean ni na mate, ninna Tuhan Jahowa. Antong pauba hamu ma rohamuna, asa mangolu hamu!

19¹(I.) Alai anggo ho punga ma sada ende andung taringot tu angka induk ni Israel.

²Jala dohononmu ma: Aha do inangmu? Singa boruboru do ibana, na manggompang di tongatonga ni angka singa, laos di tongatonga ni angka anak ni singa dipagodanggodang anakna.

³Jala dipatogitogi do sada sian angka anakna, asa gabe singa parsiajar, manoro sisoroon, manganhonjolma.

⁴Jadi dung dibege angka bangso parbegu baritana, gabe tartangkup ibana di bagasan godungnasida, jala diharihiri manogu ibana tu tano Misir.

⁵Jadi dung diida inangna i na maimaima na sai laon, naung pesan do hape aroparopna i, gabe dibuat muse sada sian angka anakna mambahen ibana gabe singa parsiajar.

⁶Sai mardalani do ibana di tongatonga ni angka singa, gabe singa parsiajar, asa marsiajar manoro sisoroon, manganhonjolma.

⁷Dung i digogoi ma angka parompuan na mabalu, jala hutanasida diulang do, gabe

tarulang ma tano i, jala godoron pangisina i maradophon soara parauangna i.

⁸Jadi marrongoman ma dompak ibana angka bangso parbegu humaliang sian luatna be, jala ditaon rambangnasida padapot ibana, gabe tartangkup ibana di bagasan godungnasida.

⁹Dung i diharihiri nasida ibana mambahen tu bagasan huruhuruan, laos ditogutogu ibana tu raja sian Babel, diboan ibana muse tu bagasan huta angka na gonting, asa unang be tarbege soarana di atas ni angka dolok Israel.

¹⁰(II.) Tudoshon hau anggur do inangmu, suang songon ho, tarsuan di tobing; marparbue jala mardangkai ibana dibahen godang ni aek.

¹¹Jala adong di ibana ranting angka na marmulia, pola tarpangke bahen tungkot harajaon, jala timbo partubuna pola disalpui angka ombun, gabe tarida ibana binahen ni hinatimbulna dohot hinadeak ni angka rantingna.

¹²Dung i tarbutbut ibana di bagasan harimason, laos tartimpal tu tano, ro muse alogo sian purba mangarahar parbuena, angka suak ma rantingna na marmulia i jala ranggason, api muse manganhon ibana.

¹³Alai anggo nuaeng tarsuan do ibana di halongonan, di tano bakkalbakal jala na so maraek.

¹⁴Jala ruar do api sian ranting ni dangkana na sada na manganhon parbuena, gabe ndang adong be di ibana ranting na marmulia tau bahen tungkot harajaon. Ende andung ma i laos pangkeon bahen ende andung tu joloan on.

20¹(I.) Dung i papitutaonhon, di ari sampulu bulan sipaha lima, ro deba baoa sian angka sintua ni Israel usousu tu Jahowa, jala hundul nasida di jolongku.

²Jadi ro ma hata ni Jahowa tu ahu songon on:

³Ale anak nijolma, mangkatai ma ho dohot angka sintua ni Israel, jala dohononmu ma tu nasida: Songon on do hata ni Tuhan Jahowa: Tung usousu tu ahu ma tagamon hamu angka na ro i? Songon sintongna mangolu ahu, molo tung olo be ahu usousoanmuna, ninna Tuhan Jahowa.

⁴Atehe ale anak nijolma, naeng toruanmu nasida? Naeng toruanmu tutu? Antong pabotohon ma tu nasida biasbias angka na niula ni angka ompunasida!

⁵Jala dohononmu ma tu nasida: Songon on do hata ni Tuhan Jahowa: Di ari uju pamillithu di Israel, pola hupatoltol tanganku tu pinompar ni si Jakkob, jala hupapatar diringku tu nasida di tano Misir, jala hupatoltol tanganku tu nasida, huhut mandok songon on: Ahu do Jahowa, Debatamuna.

⁶Apala di ari na sasada i hupatoitol muse tanganku tu nasida, laho manogihon nasida ruar sian tano Misir tu tano naung hupillit di nasida, tano habaoran ni susu dohot situak ni loba, tano na marmulia on sian saluhut angka luat.

⁷Jala hudok hian tu nasida: Ganup ma hamu mangambolongkon angka hasogiron ni matana, jala unang ramuni hamu dirimuna marhitehite angka ganaganaan ni Misir! Ahu do Jahowa, Debatamuna i!

⁸Alai manggunturi do anggo nasida dompak ahu, jala ndang olo nasida tumangihon ahu, ndang saut ganup nasida mangambolongkon angka hasogiron ni matana be, jala ndang ditadingkon nasida angka ganaganaan ni Misir. Jadi diondam rohangku ma naeng mangusehon rimashu tu nasida, asa tung sun tolhas rimashu tu nasida di tongatonga ni tano Misir.

⁹Alai tahe hombar tu goarhu do hupasaut, asa unang marlea goarhu di adopan ni bangso parbegu, angka na humaliang nasida, nunga pola hupapatar diringku tu nasida, pola dipaidaida matanasida, laho manogihon nasida ruar sian tano Misir.

¹⁰(II.) Jadi dung hutogihon nasida ruar sian tano Misir, jala hutogihon nasida tu halongonan.

¹¹Gabe hulehon tu nasida angka patikku, jala hupabotohon tu nasida angka uhumhu,

parhitean ni jolma tu hangoluan nian molo diulahon.

¹²Hulehon muse tu nasida angka ari Sabbathu bahen tanda paboa di tongatonganasida ahu, asa tung ditanda nasida ahu do Jahowa na pabadiahon nasida.

¹³Alai manggunturi dompak ahu do pinompar ni Israel nang di halongonan, ndang diparangehon nasida angka patikku, jala diambolongkon do angka uhumhu, parhitean ni jolma tu hangoluan nian, molo diulahon, jala diramuni nasida situtu angka ari Sabbathu. Jadi diondam rohangku ma mangusehon rimashu tu nasida di halongonan, maniaphon nasida nian.

¹⁴Alai tahe hombar tu goarhu do hupasaut, asa unang marlea goarhu di adopan ni bangso parbegu, angka na paidaidahon ahu manogihon nasida ruar.

¹⁵Dung i hupatoitol huhut tanganku dompak nasida, uju di halongonan, na so tupa boanonku nasida sahat tu tano naung hubasabasahon nian tu nasida, tano habaoran ni susu dohot situak ni loba, tano na marmuliaan sian saluhut angka luat.

¹⁶Ala naung niambolongkonnasida angka uhumhu, jala na so pinarangehonnasida angka patikku, jala na niramunannasida angka ari Sabbathu, ai angka ganaganaannasida do dipaihutihut rohanasida.

¹⁷Alai marpangulahi do rohangku mida nasida, umbahen so mago nasida, jala ndang sun siap nasida hubahen di halongonan.

¹⁸Dung i ningku ma tu angka anaknasida di halongonan: Unang paihutihut hamu angka patik ni amamuna i, jala unang radoti hamu angka uhumnasida, jala unang ramuni hamu dirimuna marhitehite angka ganaganaannasida.

¹⁹Ai ahu do Jahowa, Debatamuna i, angka patikki ma paihutihut hamu, jala angka uhumhu ma radoti hamu, jala ulahon hamu angka i.

²⁰Jala angka ari Sabbathu parbadiai hamu, bahen tanda paboa ahu di tongatongamuna, asa tung ditanda hamu ahu do Jahowa, Debatamuna i.

²¹Hape manggunturi dompak ahu do nang angka anakna: Angka patikki ndang diparangehon nasida, jala angka uhumhu ndang diradoti nasida laho mangulahon nian, parhitean ni jolma tu hangoluan nian, molo diulahon, angka ari Sabbathu diramuni nasida do. Jadi huondam muse mangusehon rimashu tu nasida, asa sun tolhas rimashu tu nasida di halongonan.

²²Alai tahe hupasurut muse tanganku, jala hubahen hombar tu goarhu, asa unang marlea di adopan ni bangso parbegu, angka na paidaidahon naung hutogihon nasida ruar.

²³Nang di halongonan hupatoltol do tanganku dompak nasida, laho pamamparhon nasida tu tongatonga ni angka bangso parbegu dohot paserakkon nasida tu angka luat ni halak.

²⁴Ala na so niulahon nasida angka uhumhu, jala na niambolongkon nasida angka patikku, jala na niramunannasida angka ari Sabbathu, jala na pinaihutihut ni matanasida angka ganaganaan ni amanasida.

²⁵Ahu pe antong, hulehon ma tu nasida patik, angka na so denggan dohot uhum angka na so tarhangoluhon nasida.

²⁶Jala huramuni nasida marhitehite angka peleannasida, ala dipabolushon nasida sian api, sandok buhabajunasida, asa husiaphon nasida, asa tung ditanda nasida ahu do Jahowa!

²⁷(III.) Dibahen i ale anak ni jolma, hatahon ma tu pinompar ni Israel, jala dohononmu ma tu nasida: Songon on do hata ni Tuhan Jahowa: Lam didatdati ompumuna dope mangaleai ahu di na nioseoseannasida ahu.

²⁸Ai dung tolhas nasida huboan tu tano, naung pola humangmangkon lehononku do i tu nasida; gabe dipelehon nasida peleannasida i tu ganup dolokdolok na timbo dohot tu ganup hau na rugun angka na niidanasida i, jala disi do dibahen nasida pargasipan ni peleannasida, jala dipatindang

disi daupanasida na hushus i, jala diusehon
disi peleannasida siinumon i.

²⁹Jadi hudok ma tu nasida: Tu aha do
tambak na tinopotmuna i? Laos dibahen ma
goarna "tambak" rasirasa sadarion.

³⁰Dibahen i dohononmu ma tu pinompar ni
Israel: Songon on do hata ni Tuhan Jahowa:
Tung so mangaramuni dirimuna do hamu
paihutihut dalan ni ompumuna i, jala tung so
marmainan ma hamu mangihuthon angka
hasogironnasida?

³¹Jala di na sinombahonmuna
silehonlehonmuna i di na pinabolushonmuna
sian api anakmuna i, diramuni hamu do
dirimuna hombar tu saluhut ganaganaanmuna
rasirasa sadarion; ia ahu tung olo ma ahu
usousoanmuna, hamu ale pinompar ni Israel?
Songon sintongna mangolu ahu, ninna Tuhan
Jahowa, ndang olo ahu usousoanmuna.

³²Tubutubu ni rohamuna pe ndang tagamon
saut, na nidokmuna i: Songon angka bangso
parbegu do hita sogot, songon angka bangso
ni angka luat na asing hita marsomba tu hau
dohot tu batu.

³³(IV.) Songon sintongna mangolu ahu,
ninna Tuhan Jahowa: Molo so ahu sandiri
mangarajai hamu sogot marhitehite tangan
na gogo dohot marhitehite botohon na toltol
dohot marhitehite rimas na use.

³⁴Jala ahu manogihon hamu ruar sian
angka bangso parbegu jala ahu papunguhon

hamu sian luat parserahanmuna na sai laon, marhitehite tangan na gogo dohot marhitehite botohon na toltol dohot marhitehite rimas na use.

³⁵Jala ahu manogihon hamu tu halongonan ni angka bangso, asa hutorui hamu disi paadop bohi be.

³⁶Songon panoruingku di ompumuna uju di halongonan ni tano Misir, laon songon i toruanku hamu, ninna Tuhan Jahowa.

³⁷Jala ahu pabolushon hamu sian toru ni tungkot harajaon, jala ahu mamboan hamu tu bagasan ihot ni parpadanan.

³⁸Jala ahu papurpurhon sian hamu angka panggunturi dohot angka na marbalik sian ahu, paruaronku ma nasida sian tano panangkarnangkaran nasida i; alai ndang tolhas nasida tu tano ni Israel, asa tung ditanda hamu ahu do Jahowa.

³⁹Antong hamu, ale pinompar ni Israel, songon on do hata ni Tuhan Jahowa: Laho ma hamu marsomba ganup tu ganaganaanna! Alai dungkon ni, molo so olo hamu tumangihon ahu, ianggo goar ni habadiaonku ndang be ramunanmuna marhitehite peleanmuna manang ganaganaanmuna.

⁴⁰(V.) Ai di atas ni dolok ni habadiaonku, di atas dolok ni Israel na timbo i, ninna Tuhan Jahowa, disi ma sombaon ni sandok pinompar ni Israel ahu sogot, tung saluhut halak na di tano i do; disi ma marlomo ni roha ahu mida

nasida, jala disi ma usousoanku peleanmuna dohot patumonaan ni silehonlehonmuna ro di saluhut habadiaonmuna i.

⁴¹ Mardongan uap na hushus ma ahu mangkalomohon hamu, di na hutogihon hamu ruar sian angka bangso, jala hupapungu hamu sian angka luat parserahanmuna na sai laon, asa tung badia ahu di bagasan hamu di adopan ni angka bangso parbegu.

⁴² Asa tung ditanda hamu ahu do Jahowa, molo dung huboan hamu tu tano Israel, tu tano naung pola huuarihon lehononku do i tu ompumuna i.

⁴³ Jadi disi ma ingotonmuna angka dalanmuna dohot saluhut pambahenanmuna, angka na paramun hamu, gabe laos marbiasbias ma hamu mida dirimuna ala saluhut hajahaton, angka na binahenmu i.

⁴⁴ Asa tung ditanda hamu, ahu do Jahowa, ia dung hubahen tu hamu hombar tu goarhu, ndada hombar tu dalanmuna, angka na jahat i, jala ndada hombar tu pambahenanmuna, angka na busuk i, hamu ale pinompar ni Israel, ninna Tuhan Jahowa.

⁴⁵ (21-1) (I.) Dung i ro muse hata ni Jahowa tu ahu songon on:

⁴⁶ (21-2) Ale anak ni jolma, tujuhon ma bohim tu dalan tungan dangsina, jala mangalumba ma ho dompak dangsina, jala manurirangi ma ho dompak tombak ni ladang tungan dangsina.

⁴⁷ (21-3) Jala dohononmu ma tu tombak tungkan dangsina: Tangihon ma hata ni Jahowa! Songon on do hata ni Tuhan Jahowa: Ida ma, ahu pagalakkon sada api di bagasan ho, gabe suda panganonna di bagasan ho, saluhut hau na rata dohot saluhut hau na masak; tung na so haintopan manang ise jilamna, gabe mosok ma binahen ni saluhut bohi sian dangsina sahat ro di utara.

⁴⁸ (21-4) Jadi idaon ni nasa sibuk ma, ahu Jahowa do pagalakkon, ndang be haintopan.

⁴⁹ (21-5) Jadi ningku ma: Oe ale Tuhan Jahowa! Angka nasida mandok tu ahu: Nda marhulingkulingan do ibana mangkatai?

21 ¹ (21-6) (II.) Dung i ro muse ma hata ni Jahowa tu ahu songon on:

² (21-7) Ale anak ni jolma, tujuhon ma bohim dampak Jerusalem, jala mangalumba ma ho dampak angka inganan na badia i, jala manurirangi ma ho dampak tano Israel!

³ (21-8) Jala dohononmu ma tu tano Israel: Songon on do hata ni Tuhan Jahowa: Ida ma, marlulu ma ahu dampak ho, nunga pola huumpat podangku sian sarungna, asa husiaphon sian ho partigor dohot parjahat.

⁴ (21-9) Ala na naeng ahu maniaphon sian ho partigor dohot parjahat, umbahen na ruar podangku sian sarungna marlulu dampak nasa jolma sian dangsina sahat ro di utara.

⁵ (21-10) Asa tung ditanda nasa jolma ahu do Jahowa, naung mumpat podangku sian sarungna, ndang tagamon mulak boti tusi.

⁶ (21-11) Ia ho ale anak ni jolma, ingkon marhoihoi ma ho maradu marpongolan gontingmu, jala manimbasmimbasm ma ho di adopannasida.

⁷ (21-12) Tung sura dohononnasida mandok ho: Ala ni aha umbahen sai marhoihoi ho? Gabe dohononmu ma: Ala barita naung ro, gabe malala ateate ni luhutna, jala mandate tangan ni sudena, jala godoron roha ni sudena, jala saluhut ulu ni tot telluktelluk songon aek. Ida ma, nunga ro jala nunga masa, ninna Tuhan Jahowa.

⁸ (21-13) (III.) Dung i ro muse ma hata ni Jahowa tu ahu songon on:

⁹ (21-14) Ho ale anak ni jolma, manurirangi ma ho! Jala dohononmu ma, songon on do hata ni Jahowa: Dok ma: Nunga tung ginarutan podang i, nunga niugam podang i huhut.

¹⁰ (21-15) Asa marraserasehon hararage bolon umbahen ginarutan, asa sumiksaksiksak songon hilap umbahen na niugam! Manang tung tarbahen hami ma marlas ni roha? Tungkot harajaon ni anakki do i na mangarasehon saluhut hau.

¹¹ (21-16) Nunga tung dilehon podang i paugamhonsa laho pagolomhon tu bagasan tangan. Nunga tung ginarut podang i, jala na

niugam laho mangalehon tu bagasan tangan ni sipamunu.

¹²(21-17) Manganguhi jala mangandung ma ho, ale anak ni jolma! Ai marlulu dompak bangsongki do podang i; dompak saluhut induk ni Israel do podang i, marragean do nasida rap dohot bangsongki dibahen podang i. Dibahen i tompuhi ma gontingmu!

¹³(21-18) Nunga nian ro pangunjunan, hape ndang adong labana! Tung so marguna ulaning nang tungkot harajaon na marraserase? ninna Tuhan Jahowa.

¹⁴(21-19) Ia ho, ale anak ni jolma, manurirangi ma ho jala topaktopak i tanganmu! Ingkon silompit dua podang i, silompit tolu, podang ni halak angka na mate tartiham do i, podang ni jolma na sangap na tartiham na manolpusi nasida.

¹⁵(21-20) Asa tung malala ateate ni angka jolma i, asa patorophon angka partuktuhan di lambung ni saluhut bahalnasida, umbahen tung hulehon parlisik ni podang i. Oe nunga gabe hilap hape laho mamotongi umbahen na niugam!

¹⁶(21-21) Pasada ma dirim, tondong ma dompak siamun, marsijongjong ma ho dompak hambirang, manang dompak dia pe babami humusor ingkon mangan do.

¹⁷(21-22) Ahu pe antong, ingkon martopaptopap tangan ahu, asa tung sombu rimashu! Ahu Jahowa sandiri na mandok i.

¹⁸ (21-23) (IV.) Dung i ro muse hata ni Jahowa tu ahu songon on:

¹⁹ (21-24) Ia ho, ale anak ni jolma, gambar ma di ho dua dalan haroroan ni podang ni raja sian Babel: Sada do tano haroroan ni dalan i duansa, gambar muse ma sada tangan, di haroroan ni dalan tu sada huta do i jadihononmu.

²⁰ (21-25) Bahenonmu huhut sada dalan haroroan ni podang tu Rabba ni halak Amon dohot tu Juda pola sahat tu bagasan Jerusalem na gonting i.

²¹ (21-26) Ai jongjong do raja sian Babel di sirpang ni dalan, apala di haroroan ni dalan na dua i, asa pahundul pangarunding, maniori angka sumbia, manungkun angka terapim, manilik ateate ni manuk.

²² (21-27) Di tanganna siamun do pangarundingon "dompok Jerusalem" bahenon angka salosap, ungkapon pamangan mandopurdopuri, pangiaron soara marsuraksurak, bahenon angka salosap tu lambung bahal, pungaon hubu, paulion batarbatar.

²³ (21-28) Alai hira tondung sipaotooto do i di rohanasida, ala mardapotdapot angka uari di nasida, hape marningot ma anggo ibana di hajahaton laho patundukkon.

²⁴ (21-29) Dibahen i, songon on do hata ni Tuhan Jahowa: Ala naung dipasingothon hamu hajahatonmuna, di hapapatar ni

pangalaosionmuna laho patandaphon
dosamuna di saluhut pambahenanmuna, ala
naung soro hamu tu parningotan, ingkon
papatuon do hamu.

²⁵ (21-30) Ia ho parjahat na sumalin,
induk ni Israel! Nunga ro ajalmu di tingki
panimpulon ni hajahaton.

²⁶ (21-31) Songon on do hata ni Tuhan
Jahowa: Paholang ma talitali, jala buat ma
tumpal, ai ingkon rap mago do! Sipatimboon
do na rodop, jala siparodopon do na timbo.

²⁷ (21-32) Siap, siap, siap do i bahenonku!
Tongon ndang disi be, paima ro ibana
nampuna uhumi, jala tu ibana do i lehononku.

²⁸ (21-33) (V.) Ia ho ale anak nijolma,
manurirangi ma ho, jala dohononmu
ma, songon on do hata ni Tuhan Jahowa
taringot tu halak Amon dohot taringot tu
panenganengaonnasida, jala dohononmu
ma: Nunga tung diumpat podang i laho
mamotongi, nunga tung niugam laho
maniaphon, asa sumiksaksiksak songon hilap.

²⁹ (21-34) Ala na nialatanna di ho
sipautooto, ala na tinondunganna di ho gabus
laho mameakkon ho tu rungkung ni parjahat
angka naung mate tartullang, naung ro
arinasida di tingki panimpulon ni hajahaton.

³⁰ (21-35) Pasuang ma podang i tu bagasan
sarungna! Apala di inganan panjadianmu, di
tano parmulaanmu ahu manguhum ho.

³¹ (21-36) Jala usehononku ma tu ho rimashu, ombusonku ma api parpiarpiar ni rimashu dampak ho, jala pasahatonku ma ho tu bagasan tangan ni baea angka na garang, angka tungkang hamagoan.

³² (21-37) Ingkon suda ho panganon ni api, ingkon durus di tongatonga ni tano i ia mudarmu, ndang be taringotan ni halak ho; ai ahu Jahowa sandiri na mandok i.

22¹ (I.) Dung i ro muse hata ni Jahowa tu ahu songon on:

² Ia ho ale anak ni jolma, nda naeng toruanmu? Nda naeng toruanmu huta parsapataan mudar? Pabotohon ma tusi saluhut hasogiron angka na niulana.

³ Jala dohononmu ma: Songon on do hata ni Tuhan Jahowa: Ho ale huta na mandurushon mudar di tongatongana, asa parohon ajalmu, jala mambahen angka ganaganaan mangalo dirina, asa paramunhon!

⁴ Marhitehite mudar naung niusehonmu ho marutang, jala marhitehite ganaganaan angka naung binahenmi ramun ho, laos ho pajonokkon ariarim dohot parohon taonmu. Ala ni do hupasahat ho gabe haurahon di tongatonga ni angka bangso parbegu, jala sieleseleson di saluhut luat.

⁵ Tole halak angka na jonok dohot na dao mangelesi be mida ho ale parbarita na ramun, parhagunturon godang.

⁶Ida ma, angka induk ni Israel mangasahon gostong ni botohonna be di bagasan ho, asa mandurushon mudar.

⁷Ama dohot ina ditoisi nasida do di bagasan ho, mangulahon pangarupaon tu halak dagang do nasida di tongatongami, na tading di lampin pe dohot na mabalu dirupa nasida do di bagasan ho.

⁸Nunga marlea dibahen ho angka habadiaonku, jala nunga diramuni ho angka ari Sabbathu.

⁹Adong do di bagasan ho angka baoa parjehejehe, asa mandurushon mudar, jala di atas ni angka dolok do nasida mangan di bagasan ho, harorongan di diulahon nasida di tongatongami.

¹⁰Nunga dipatedek nasida hailaan ni ama di bagasan ho, parompuan na ramun binahen ni hasomalanna pe nunga digogoi nasida di bagasan ho.

¹¹Jala ganup mambahen hasogiron tujolma ni donganna, jala ganup mangaramuni parumaenna marhitehite harorongan, jala ganup manggogoi di bagasan ho ibotona sandiri, na sama dohot ibana.

¹²Manjaloi sisip do nasida di bagasan ho, asa mandurushon mudar, jala dibuat ho do anak ni hepeng na matorbangku, jala diangati ho do donganmu marhitehite pangarupaon, jala dihalupahon ho do anggo ahu, ninna Tuhan Jahowa.

¹³ Jadi ida ma, nunga pola hupiupiu tanganku taringot tu parpihiton naung niulahonmi dohot taringot tu parsapataan mudar, angka na masa di tongatongami.

¹⁴ Tung tagamon manahan ma rohami? Manang tung margogo ma tanganmu di ari angka sibahenonku dompak ho? Ahu Jahowa sandiri do mandok hata i dohot na mambahensa.

¹⁵ Jala ahu paserakkon ho sogot tu tongatonga ni angka bangso parbegu dohot pamamparhon ho tu angka luat, asa tung husiaphon haramunonmu sian ho.

¹⁶ Asa manginona tu ho haramunonmu di adopan ni angka bangso parbegu, asa tung ditanda ho ahu do Jahowa.

¹⁷ (II.) Dung i ro muse hata ni Jahowa tu ahu songon on:

¹⁸ Ale anak ni jolma, nunga tung gabe tasik ianggo pinompar ni Israel di ahu! Tung saluhut nasida gabe haksa, tombaga, bosi dohot simbora di tongatonga ni liang pamurunan, gabe te ni perak do nasida.

¹⁹ Dibahen i, songon on do hata ni Tuhan Jahowa: Ala naung saluhut hamu gabe tasik, dibahen i, ida ma, ahu mangalaum hamu tu tongatonga ni Jerusalem.

²⁰ Songon pangalaum ni halak di perak, haksa, bosi, simbora dohot tombaga tu tongatonga ni liang pamurunan, asa mangombus api di toruna laho mangalala;

suang songon i laumonku hamu di bagasan rimashu dohot di bagasan parpiarpiar ni murukku, asa hutubahon jala hulala hamu.

²¹ Tongon tahe ahu mangalaum hamu dohot mangombushon dompak hamu api parpiarpiar ni rimashu, asa malala hamu di tongatongana.

²² Songon pangalalaon di perak di tongatonga ni liang pamurunan, ingkon songon i lalaon hamu di tongatongana, asa tung ditanda hamu ahu Jahowa sandiri naung mangusehon rimashu dompak hamu.

²³ (III.) Dung i ro muse hata ni Jahowa tu ahu songon on:

²⁴ Ale anak ni jolma, dok ma tu ibana: Ho do sada tano na so pinaias, na so tininggang ni udan di ari pangarimasan.

²⁵ Marbulan do angka panurirangna di tongatongana; songon singa na marauang mandiori sisoroon do nasida mamolgak tondi ni halak, dilahangi nasida do ugasan angka na arga dohot patorophon angka na mabalu di tongatongana.

²⁶ Angka malimnasida pe manjahati dompak patikku, jala diramuni nasida angka inganan habadiaonku; ndang dibelok nasida na badia martimbangkon na ramun, jala ndang dipabotohon nasida belok ni na ramun martimbangkon na ganjing, jala dipapitpit do matanasida manoisi angka ari Sabbathu gabe marlea ahu dibahen di tongatonganasida.

²⁷ Angka induk na di tongatongana, hira sarigala do angka na manoro sisoroonna laho mandurushon mudar, laho mangago angka tondi ni jolma, asa mandiori pangomoan.

²⁸ Angka panurirangnasida pe mangaleaphon sampang tu nasida, maralatan sipaotooto dohot mangarundingkon gabus tu nasida, angka ninna do: Songon on do hata ni Tuhan Jahowa, hape so tutu Jahowa mandok.

²⁹ Ia situan na torop isi ni tano i mangulahon pangarupaon, jala mamupusi, dirupa nasida huhut na dangol dohot na parir, jala mambahen gogo nasida tu halak dagang mangulahon na so uhum.

³⁰ Jadi hulului nian sian nasida sahalak na mambahen talak batu, jala na jongjong di haluapan manuhenuhe maradophon ahu humongkop tano i, asa unang huago nian, hape ndang adong jumpang ahu nanggo sahalak.

³¹ Dibahen i huusehon ma rimashu tu nasida, di bagasan parsigorgor ni murukku husiaphon nasida, manginona tu ulunasida hubahen dalannasida i, ninna Tuhan Jahowa.

23¹ (I.) Dung i ro muse hata ni Jahowa tu ahu songon on:

² Ale anak ni jolma, adong do na jolo dua parompuan, sisada ina do nasida.

³ Dung i marmainan nasida di Misir, tagan di haposoonna tahe marmainan nasida;

disi do dipajamajama bagotna, jala disi do diparmeameam ulu ni susuna.

⁴Ia goar ni parompuan na umbalga i: Si Ohola; jala anggina i si Oholiba; jadi ahu ma nampuna nasida duansa, gabe tubuan anak dohot boru; jala lapatan goarnasida: Samaria i ma si Ohola jala Jerusalem i ma si Oholiba.

⁵(II.) Alai marmainan ma anggo si Ohola uju ahu mangangkupi ibana, sai mangkidophidopi ibana dompak puangna, tu Assur, angka na jonoki.

⁶Angka na marpangkean surta, angka raja dohot partogi ni parangan, angka dolidoli hasoloan do nasida luhutna, angka parsihundul di hoda.

⁷Sai dipuluti do marhite sian parmainanonna saluhut anak ni Assur angka na pinillit; jadi marhitehite saluhut halak angka na hinidophidopanna, marhitehite saluhut ganaganaannasida diramuni do dirina.

⁸Parmainanonna tu halak Misir pe ndang dipasohot, ala naung niangkupanna modom tagan di haposoonna, jala nasida marmeameamhon ulu ni susuna uju namarbaju dope, jala naung niusehonna i harorangonna tu nasida.

⁹Dibahen i, laos ahu pasahathon nasida tu bagasan tangan ni angka puangna, tu bagasan tangan ni halak Assur, angka na hinidophidopanna i.

¹⁰Angka nasida ma patedekkon hailaanna, laos dipambuat nasida angka anakna dohot boruna, anggo inana i dibunu do marhitehite podang, gabe marbarita na roa tu angka parompuan, angka na mangalaluhon uhum tu nasida.

¹¹(III.) Jadi dung songon i diida si Oholiba, anggina i, gabe jumahat muse ibana mambolongkon dirina, jala ganda parmainanonna sian angka parmainanon ni hahana.

¹²Mangkidophidopi do ibana tu halak Assur, angka raja dohot partogi ni parangan angka na jonoki, angka parpahean na sun denggan, angka parsihundul di hoda, angka dolidoli hasoloan do nasida luhutna.

¹³Jadi huida ma naung niramunanna i dirina, sisada dalan do nasida duansa.

¹⁴Digandai nasida dope tahe angka parmainanonna i; molo diida baoa angka na niuhir tu dorpi, sumansuman ni halak Kasdim, angka na ginorga dohot salenggam.

¹⁵Angka na marhohos di gontingna, angka na marjabajaba di uluna, saluhut nasida rupa panglima di hureta porang, sumansuman ni halak Babel, Kasdim do tano hatubuannasida.

¹⁶Sai mangkidophidopi ibana dompak nasida disi pajumpang matanasida, pola disuru angka suruanna manopot nasida tu luat Kasdim.

¹⁷ Jadi ditopot halak Babel ma nasida, asa mangangkupi modom, gabe diramuni ma nasida marhitehite parmainanonna; jadi dung ramun nasida dibahen, gabe magigi ma rohana mida nasida.

¹⁸ Jadi dipapatar ma parmainanonna, jala dipatedek hailaonna, jadi magigi ma rohanku mida nasida, suang songon gigi ni rohanku mida hahana i.

¹⁹ Hape lam digandai dope parmainanonna i, diingot muse angka ari haposoonna, uju na marmainan ibana di tano Misir.

²⁰ Jala mangkidophidopi ibana dompak puangna, angka na marsibuk songon halode, jala subur ni boninasida, subur ni boni ni hoda.

²¹ Diparhagiot roham muse dope hagatalon ni haposoonmu, uju na pinarmeammear ni halak Misir ulu ni susum, ala ni bagot ni haposoonmu.

²² (IV.) Dibahen i, ale Oholiba, songon on do hata ni Tuhan Jahowa: Ida ma, ahu pahehehon angka puangmu dompak ho, angka naung hinagigihon ni roham nian, jala ahu parohon nasida dompak ho sian na humaliang:

²³ Tole halak Babel dohot saluhut halak Kasdim, halak Pekod dohot Soa dohot Koa, rap dohot saluhut halak Assur, angka dolidoli hasoloan, angka raja dohot partogi ni parangan do nasida saluhut, angka

panglima di hureta porang dohot angka na hinara, angka parsihundul di hoda do nasida saluhutna.

²⁴Angka nasida i ro dompak ho, marparhohas hureta porang dohot galapang jala mardongan luhutan ni torop bangso, angka na marlombulombu na bolon dohot na metmet dohot martahuluk, nasida martungkum ho humaliang, jala ahu pasahathon uhumu tu nasida, asa nasida manguhum ho hombar tu uhumnasida i.

²⁵Jala ahu painonahon pangiburuonku tu ho, asa garang pambahennasida tu ho; igungmu dohot pinggolmu sapsapannasida, jala pasipasim marragean do bahenon ni podang; rampasonnasida ma angka anakmu dohot borum, jala pasipasim suda do panganon ni api.

²⁶Angkup ni tanggalannasida do angka pangkeanmi, jala rampasonna ulaulam angka na arga i.

²⁷Asa ahu pasadihon haroronganmu dohot parmainanonmu olat ni tano Misir, asa unang be manaili matam tu nasida, jala ndang be paingotingotonmu Misir.

²⁸Ai songon on do hata ni Tuhan Jahowa: Ida ma, ahu pasahathon ho tu bagasan tangan ni halak naung hinabiashonmu, tu bagasan tangan ni halak naung hinagigihon ni roham.

²⁹Jadi mardongan hasomorana ma pambahennasida tu ho, jala rampasonnasida

sandok na hinangaluthonmu, jala tadingkononna ho salangsalang dohot marsaemara, asa tung patar hailaan ni parmainanonmu dohot haroranganmu dohot hagatalonmu.

³⁰Bahenonna do luhutna i tu ho ala ni parmainanonmu mangihuthon tu angka bangso parbegu, ala na niramunonmu dirim marhitehite angka ganaganaannasida.

³¹Ala dalan ni hahami na niihuthonmi, laos lehononku ma panginumanna tu bagasan tanganmu.

³²Songon on do hata ni Tuhan Jahowa: Ingkon inumonmu do isi ni panginuman ni hahami, na hobuk dohot na ruak, pola dielak jala dieleselesi halak do dibahen godang ni isina.

³³Jadi ingkon gok parmabuhon dohot hangaluton ma ho, panginuman hasiapon dohot harendepon do panginuman ni Samaria hahami.

³⁴Ingkon inumonmu do i, pola siruponmu, maradu dilatanmu angka ngarngarna, jala garianganmu angka bagotmu; ai ahu do na mandok i, ninna Tuhan Jahowa.

³⁵Dibahen i, songon on do hata ni Tuhan Jahowa; ala naung hinalupahon ni roham ahu, jala dibolongkon ho ahu tu pudim, ho pe ingkon taononmu haroranganmu dohot angka parmainanonmu!

³⁶(V.) Dung i ninna Jahowa muse tu ahu:

Atehe ale anak ni jolma, naeng do toruanmu si Ohola dohot si Oholiba? Antong patuduhon ma tu nasida biasbias angka na niulanasida i!

³⁷Ala naung marmainan i nasida, jala marsapu mudar tangannasida, jala na marmainan i nasida tu ganaganaannasida i, pola dohot anaknasida, angka na tinubuhonna di ahu nian, dipabolushon nasida do sian api papanganhonsa marsomba tu ganaganaannasida i.

³⁸On dope angkupni dibahen nasida tu ahu: Laos di ari na sasada i diramuni nasida habadiaonku, jala marlea angka ari Sabbathu dibahen nasida.

³⁹Jala dung diseati nasida anaknasida i bahen somba di angka ganaganaannasida i, ro muse nasida tumopot habadiaonku sadarina i, laho paramunhon, jala ida ma, tung songon i do dibahen nasida di tongatonga ni jorongku.

⁴⁰Lam disuru nasida muse dope suruanna mangalapi baoa angka sian na dao; jala ida ma, dung ro nasida, maridi ma ho jala marpangir huhut mambahen sipajagarjagar pasangap nasida.

⁴¹Laos juguk ma ho tu atas podoman apala na jagar, jala rade sada meja di adopanmu, jala diampehon ho tu atasna daupa dohot miak na hushus tu ahu.

⁴²Jadi tarbege ma di tongatongana soara hagunturon bolon, jala dongan ni angka

baoa situasi na torop i, tarboan dope halak Saba angka na sian halongonan, angka na mambahen leang tu tangannasida, jala tumpal hamuliaon tu atas ulunasida.

⁴³Jadi ninna rohangku ma taringot tu sibabijalang naung matua i: Tung datdatanna dope ulaning parmainanonna tusi?

⁴⁴Dung i ditopot halak ma nasida, songon na somal tinopot ni halak boruboru sibabijalang; suang songon i ditopot nasida si Ohola dohot si Oholiba, parompuan na gatal i.

⁴⁵Dibahen i ingkon baoa angka na bonar manguhum nasida, hombar tu uhum sidabuon tu sibabijalang hian, hombar tu uhum sidabuon tu parompuan na mandurushon mudar, ai sibabijalang do nasida jala marsapu mudar do tangannasida.

⁴⁶Ai songon on do hata ni Tuhan Jahowa: Ahu ma manogihon nangkak marlulu dompak nasida sada luhutan bangso jala ahu pasahathon nasida pasipalsipalon dohot pupusan.

⁴⁷Jala dangguran ni luhutan bangso i nasida dohot batu, jala tampulanna nasida dohot podangnasida i; angka anaknasida dohot borunasida i bunuonna do, jala bagasnasida surbuonna do dohot api.

⁴⁸Asa ahu pasadihon harorongan sian tano i, anggiat tung jora saluhut parompuan, jala unang diulahon harorongan sisongon i.

⁴⁹Asa manginona tu hamu bahenonnasida haroronganmunai, jala manginsombut tu hamu dosa ni ganaganaanmunai, asa tung ditanda hamu, ahu do Tuhan Jahowa.

24¹ (I.) Pasiataonhon di ari sampulu bulan sipaha sampulu, ro muse hata ni Jahowa tu ahu songon on:

²Ale anak ni jolma surathon ma di ho goar ni ari on, apala sadarion; ai apala sadarion do ro raja sian Babel mandopang Jerusalem.

³Jala bahen ma umpana sada dompak pinompar ni panggunturi i, jala dohononmu ma tu nasida: Songon on do hata ni Tuhan Jahowa: Hodohon ma sada hudon, hodohon ma tutu, jala tahui huhut aek tu bagasanna.

⁴Papungu ma tusi angka tanggotanggona, saluhut tanggotanggo angka na denggan, hae bona dohot hae tangan, holiholi angka na pinillit bahen panggohina.

⁵Buat muse ma birubiru pamuean, jala haliangkon soban sian holiholi tu toruna, pagurgurhon situtu, asa tung masak dohot holiholi na di tongatongana.

⁶Dibahen i, songon on do hata ni Tuhan Jahowa: Marjea ma huta parsapataan mudar, i ma hudon na martasik di bagasan, jala na so halongkangan tasikna! Paruar ma sian i tanggotanggona sadasada, unang pola dabu rujiruji taringot tusi.

⁷Ai di tongatongana do mudarna, tung di atas dolok batu manangkas do

diusehon, ndada tu tano i didurushon, asa panguspanguson tu orbuk nian.

⁸Laho pahehehon rimas, mandokkon martubolhon partubolan, umbahen hudurushon mudarna tu atas dolok batu manangkas, asa unang hapanguspangusan.

⁹Dibahen i, songon on do hata ni Tuhan Jahowa: Marjea ma huta parsapataan mudar! Ahu pe pabalgaonku ma pamurunan i.

¹⁰Patamba ma soban i, opan ma api, asa disudahon juhut i, jala marsik huana, jala mosok ia holiholi.

¹¹Bahen muse hudon na rumar i tu atas garana, asa ginarahon, pola marrara tombagana, jala malala tasikna di tongatongana, jala disudahon nian.

¹²Hape ngalutan boti do ahu, ai ndang olo lokkang tasikna na godang i, manahan do tahe tasikna i nang di bagasan api.

¹³Apala di bagasan haramunonmu do harorongan; ala naeng ahu mangurasi ho, hape ndang olo ho paiason, ndang be tagamon paiason ho sian haramunonmu, paima sombu rimashu mida ho.

¹⁴Ahu Jahowa sandiri do na mandok i, sai na ro do ahu pasauthon, ndang tagamon pasurutonku, manang olanangku, manang tarsolsol bagi ahu; hombar tu angka dalanmu tahe, jala hombar tuambahenanmu uhumonnasida ho, ninna Tuhan Jahowa.

¹⁵(II.) Dung i ro muse hata ni Jahowa tu ahu songon on:

¹⁶Ale anak ni jolma, ida ma, ahu mambuat sian ho hasoloan ni matam marhitehite begu masa; alai ndang jadi andunganmu manang tatangisanmu, manang mabakbak iluilum.

¹⁷Hohom boti ho marhoihoi, ianggo pangondason ndang jadi ulahononmu, alithon ma talitalim, jala bahen tapaktapakmu tu patmu, jala ndang jadi martujung janggutmu, jala ndang jadi panganonmu sagusagu ni halak sileban.

¹⁸Jadi dung mangkatai ahu manogotna i tu situasi na torop i, gabe mate ma jolmangku bodarina i, gabe hubahen ma manogotna i, songon naung tinonahon hian tu ahu.

¹⁹Jadi ninna situasi na torop i ma tu ahu: Atehe, ndang paboaonmu tu hami manang aha lapatan ni na binahenmu?

²⁰Jadi ningku ma tu nasida: Hata ni Jahowa do i tu ahu songon on:

²¹Dok ma tu pinompar ni Israel: Songon on do hata ni Tuhan Jahowa: Ida ma, ahu paramunhon habadiaonku, i ma hatimbulon ni gogomuna, hasudungan ni matamuna dohot hasoloan ni rohamuna, jala anakmuna dohot borumuna, angka na tinadingkonmuna i, ingkon marragean do bahenon ni podang.

²²Jadi ingkon bahenonmuna ma songon na hubahen i, ndang jadi martujung

janggutmuna, jala ndang jadi panganonmuna
sagusagu ni halak sileban.

²³Ingkon talitalimuna di atas ulumuna,
jala tapaktapakmuna di patmuna,
ndang jadi hamu mangandungi manang
mananangisi, asa mandate hamu di bagasan
hajahatonmuna, jala marhoi be hamu ganup
tu donganna.

²⁴Asa tung gabe tanda halongangan si
Hesekiel i di hamu; hombar tu saluhut naung
binahenna, bahenonmuna di masana, asa
tung ditanda hamu ahu do Tuhan Jahowa.

²⁵Langgo ho, ale anak nijolma, nda
tongon do di ari pambuathu sian nasida
partanobatoannasida i, halasan ni
hamuliaonnasida, hasudungan ni matanasida
dohot na hinalungunhon ni rohanasida ro di
anaknasida dohot borunasida.

²⁶Nda ro ma di ari na sasada i sahalak
naung malua manopot ho pabotohon barita i
tu pinggolmu?

²⁷Di ari na sasada i mungkap ma muse
pamanganmu rap dohot halak na malua i,
asa mangkatai ho, jala ndang be mangungu
boti, asa tung gabe tanda halongangan ho di
nasida, jala ditanda nasida ahu do Jahowa.

25¹ (I.) Dung i ro muse hata ni Jahowa tu
ahu songon on:

²Ale anak nijolma, tujuhon ma bohim
dompok halak Amon, jala manurirangi ma ho
taringot tu nasida.

³Jala dohononmu ma tu halak Amon:
Tangihon hamu ma hata ni Tuhan Jahowa!
Songon on do hata ni Tuhan Jahowa: Ala
naung nidokmu: Ha, ha, martillahon bagas
habadiaonku, ala naung tarramun dohot
tano ni Israel, ala naung tarulang dohot
pinompar ni Juda, ala naung tarboan nasida
tu habuangan!

⁴Dibahen i, ida ma, ahu pasahathon
ho tu angka anak sian habinsaran
bahen teanteanan, asa dipajok nasida
undungundungnasida di bagasan ho, jala
dipajongjong inganannasida di bagasan ho,
nasida manganhon parbue ni tanom, jala
nasida manginum susu ni pinahanmu.

⁵Jala ahu mambahen, Rabba gabe
parudaman ni angka unto, jala angka anak ni
Amon gabe pangulonon ni birubiru, asa tung
ditanda hamu ahu do Jahowa.

⁶Ai songon on do hata ni Tuhan Jahowa:
Ala naung martopaptopap tangan ho jala
marhajingjang jala martilla roham di saluhut
panengaon ni roham taringot tu tano Israel:

⁷Dibahen i, ida ma, ahu patoltolhon
tanganku dompak ho jala ahu pasahathon
ho pupusan ni angka bangso parbegu, jala
ahu maniaphon ho sian tongatonga ni angka
bangso, jala ahu mangarendephon ho sian
angka luat, asa tung hupansingkon ho, asa
ditanda ho ahu do Jahowa.

⁸(II.) Songon on do hata ni Tuhan Jahowa: Ala na nidok ni Moab dohot Seir: Ida ma, songon saluhut bangso parbegu do hape pinompar ni Juda!

⁹Dibahen i, ida ma, ahu patalak dalam tu Moab sumola angka huta, angka hutana tutu sahat ro di partalpahanna tano bosar i, sahat ro di Betjesimot, Baal-Meon dohot Kiriataim.

¹⁰Tu angka anak sian habinsaran do i lehononku rap dohot angka anak ni Amon bahen teanteanan, asa unang be taringotan halak Amon di tongatonga ni angka bangso parbegu.

¹¹Tu Moab pe dabuonku do angka uhum, asa tung ditanda nasida ahu do Jahowa.

¹²(III.) Songon on do hata ni Tuhan Jahowa: Ala mangulahon partubolon Edom tu pinompar ni Juda, gabe marsala godang nasida, ala marsunisunian nasida tu Juda.

¹³Dibahen i, songon on do hata ni Tuhan Jahowa: Ahu patoltolhon tanganku marlulu dompak Edom, asa mangaripashon sian ijolma nang pinahan, jala tarulang do i bahenonku sian Teman sahat ro di Dedan ingkon marragean nasida bahenon ni podang.

¹⁴Jadi ahu mambahen partubolan tu Edom marhitehite tangan ni bangsongku Israel, asa dibahen nasida tu Edom hombar tu rimashu dohot hombar tu murukku, asa tung ditanda nasida pangaluluhonku, ninna Tuhan Jahowa.

¹⁵ (IV.) Songon on do hata ni Tuhan Jahowa:

Ala marsunisunian pambahen ni halak Palistim, jala martilla rohanasida mangulahon partubolon, laho mangago, ala musu tihus sian na robi dope.

¹⁶ Dibahen i, songon on do hata ni Tuhan Jahowa: Ida ma, ahu patoltolhon tanganku marlulu dampak halak Palistim, asa husiaphon halak Heret i, jala huago pasipasi ni halak partopi laut.

¹⁷ Jala hubahen tu nasida angka partubolan godang, asa tung ditanda nasida ahu do Jahowa, molo dung hulaluhon partubolan ni rimashu tu nasida.

26 ¹ (I.) Pasampulu sada taonhon, di ari sada bulan sipaha sada, ro muse hata ni Jahowa tu ahu songon on:

² Ale anak ni jolma, ala na nidok ni Tirus martillahonsa taringot tu Jerusalem: Ha, ha! Nunga tung maloha pintu haroroan ni angka bangso, mangarongom ro tu ahu ma nuaeng; gok ma ia ahu, tarulang ma ianggo ibana!

³ Dibahen i songon on do hata ni Tuhan Jahowa: Ida ma, marlulu dampak ho ma ahu, ale Tirus, jala ahu manogihon nangkok dampak ho torop angka bangso parbegu songon habibinsat ni laut binahen ni galumbangna.

⁴ Lohaonnasida ma angka parik ni Tirus jala marumpak bahenonna angka palaspalna,

jala sapuonku ma sian i orbukna, asa hubahen nasida gabe dolok batu manangkas.

⁵Asa gabe paninaran ni angka jala do i di tongatonga laut; ai ahu do na mandok songon i, ninna Tuhan Jahowa; gabe sipupusan ni angka bangso parbegu huhut.

⁶Jala pagaranna angka na di tano na bidang, ingkon marragean do bahenon ni podang, asa tung ditanda nasida ahu do Jahowa.

⁷(II.) Ai songon on do hata ni Tuhan Jahowa: Ida ma, ahu parohon dampak Tirus si Nebukadnesar, raja sian Babel, sian utara raja ni angka raja, mardongan hoda dohot hureta porang dohot angkajolma parsihundul dohot parangan mansai deak.

⁸Bunuonna do marhitehite podang angka pagaranmu di tano na bidang, alai bahenonna ma batarbatar anggo dampak ho, jala pungaonna ma parik dampak ho, jala paheheonna dampak ho lombulumbu.

⁹Jala pasolhotonna ma salosap pangaloha tu angka parikmi, jala angka palaspalasmirobohononna ma i marhitehite parhohasna porang.

¹⁰Binahen ni hinadeak ni angka hodana hungkupan ni orbuk ma ho, humuntal ma angka parikmu bahenon ni pardorom ni jolma parsihundul, galapang dohot hureta porang molo bongot ibana tu bagasan angka bahalmu, songon parbongotna tu huta naung matompas parikna.

¹¹ Marhitehite tambirik ni angka hodana luntahanna saluhut alamanmu, bunuonna ma ia bangsom marhitehite podang jala angka tiang ni hagogoonmu ingkon tinggangkononna do tu tano.

¹² Jadi pupusannasida ma sinamotmu, jala laumonna boniagam, jala lohaonnasida ma angka parikmu, jala angka bagas hasoloan ni roham rumpakkononna, ianggo angka batu parhaumi dohot turanggong reongkononna do tu tonga laut.

¹³ Jadi pasohotonku ma hariburon ni angka endemi, jala soara ni parhinaloanmi ndang be tarbege.

¹⁴ Jala ahu manjadihon ho gabe dolok batu manangkas, gabe paninaran ni angka jala do ho, ndang be jadi ho paulion, ai ahu Jahowa do na mandok i, ninna Tuhan Jahowa.

¹⁵ (III.) Songon on do hata ni Tuhan Jahowa taringot tu Tirus: Tung so godoron situtu ma angka pulo umbege parlopuk ni hapapatum, di na morongorong angka na tartullang, di na manganguhi angka na marragean di tongatongami?

¹⁶ Jadi mijur be ma sian habangsanasida sude angka induk partopi laut, jala diambolongkon be sampesampenasida, jala ditanggali be pangkeannasida angka na ni angit, gabe marulos hatotongon nasida, hundul be nasida di tanomanangkas, jala

tarsonggot ganup tongkin, jala tarhalomong nasida mida ho.

¹⁷Jadi pungaonnasida ma sada andung mida ho, jala dohononnasida ma tu ho: Inange, laho mago ho ale na rame binahen ni angka laut, ho huta na tarbarita na gogo di laut, huta i tahe ro di isina angka na mambahen tahuton saluhut pangisina i.

¹⁸Ianggo nuaeng godoron ma angka pulo di ari hapapatum, tarhatotong ma tutu pulo angka na di bagasan laut mida ajalmu.

¹⁹Ai songon on do hata ni Tuhan Jahowa: Molo hubahen ho gabe huta na tarulang, songon huta angka na so niinganen, molo hutogihon nangkok marlulu dompak ho pasang naek, gabe angka aek magodang manghungkupi ho.

²⁰Jala hureongkon do rap dohot angka na turun tu godung, tu bangso na robi, jala hupaian ho tu bagasan tano ni angka lung, tu halongonan sian mulamula sahali rap dohot angka na turun tu godung, asa unang be hainganen ho: Jadi bahenonku ma hamuliaon di bagasan tano ni halak na mangolu.

²¹Alai gabe hasonggoton ma ianggo ho bahenonku, asa tung pido ho; luluan ni halak do ho nian, hape ndang be jumpangsa ho salelenglelengna, ninna Tuhan Jahowa!

27 ¹(I.) Dung i ro muse hata ni Jahowa tu ahu songon on:

²Ia ho ale anak ni jolma, pungka ma sada ende andung taringot tu Tirus!

³Jala dohononmu ma tu Tirus na maringanan mardonokkon angka labuan ni laut, parboniagaan ni angka bangso tu torop angka pulo: Songon on do hata ni Tuhan Jahowa: Ale Tirus, songon on do hatam: Na sun denggan do hinaulingku!

⁴Di tongatonga ni angka laut do parbalohanmu, angka pandem mambahen sun denggan hinaulim.

⁵Hau jior sian Senir do dipangke nasida pauli di ho sandok na lolo sadari, hau ares sian Libanon dibuat nasida laho mambahen tiang layar.

⁶Hau jati sian Basan angka dayungmu dibahen nasida, papan juguhanmu gading do dibahen na nilampis dohot hau ares sian angka pulo Kitim.

⁷Hain lamot na ni angit sian Misir do manderam, asa bahen partonggol di ho, surta na rata dohot na rara sian angka pulo Elisa do abit ni undungundungmu.

⁸Halak isi ni Sidon dohot Arpad do angka jolma pandayung di ho; angka pandem, ale Tirus, angka na di bagasan ho, gabe angka partogim di laut.

⁹Angka sintua sian Gibel dohot pandena di bagasan ho, angka i do padimpos rihariham. Saluhut angka kopal di laut ro di halak

parkopal tahe jumpang do di bagasan ho, asa marboniaga tu ho.

¹⁰Halak Persia, halak Lud dohot Pud masuk paranganmu, gabe ulubalangmu, lombulumbu dohot tahuluk disangkothon nasida di bagasan ho, nasida tahe mambahen ho marmulia.

¹¹Angka anak ni Arpad rap dohot paranganmu do marhaliang di atas parikmu, jala halak na begu di bagasan angka palaspalasmu; lombulombunasida digantungkon nasida di atas ni angka parikmu humaliang, nasida do apala padengganhon sun hamuliaonmu.

¹²(II.) Tarsis do partigatigam dibahen hinagodang ni boniaga na marragam; perak, bosi, tombaga dohot simbora dilehon nasida ali ni boniagam.

¹³Halak Jawan, Tubal dohot Mesek do angka partigatigam, angka hosa ni jolma dohot ulaula haksa dilehon nasida ali ni boniagam.

¹⁴Halak Togarma mangalehon hoda parhuli dohot hoda hundulan dohot hoda na marsahe ali ni boniagam.

¹⁵Halak Dedan do partigatigam; torop angka pulo dapotan boniaga sian ho, gading dohot hau jior ditungkarhon nasida tu boniagam.

¹⁶Halak Ram do parboniagam dibahen hinagodang ni pandeanmu; mata intan zamrud, surta na rara, hain na ni angit, hain

lamot dohot simata borgok dilehon nasida ali ni boniagam.

¹⁷Halak Juda dohot Israel pe partigatigam do nasida, eme sian Minit, juada, situak ni loba, miak dohot parmasak dilehon nasida ali ni boniagam.

¹⁸Halak Damaskus do parboniagam dibahen hinagodang ni pandeanmu dohot boniaga na marragam ali ni anggur sian Helbon dohot imput ni birubiru na saksak.

¹⁹Halak Wedan dohot Jawan pe sian Usal mangalehon bosi naung tinopa, tanggule dohot ulumanis singkat ni boniagam.

²⁰Halak Dedan partigatigam di angka pangkean tu hoda dohot tu hureta.

²¹Halak Arab dohot saluhut induk ni Kedar partigatiga ni tanganmu do nasida, angka birubiru boruboru dohot tunggal dohot hambing tunggal tigatiganasida tu ho.

²²Angka saudagar sian Saba dohot Raama pe angka parboniagam, situan ni saluhut parmasak na hushus dohot batu intan na arga marragamragam dohot sere dilehon nasida ali ni boniagam.

²³Tole halak Haran, Kanne dohot Eden, angka partigatiga sian Saba, Assur, Hilmad ro tu pasarmu.

²⁴Nasida martigatigahon tu ho angka pangkean na sun denggan, angka mandar bugis, hain na ni angit markodikodi dohot

pangkean na arga sahali marpotipoti sian hau ares, jala simpan martali.

²⁵Marhoronhoron do angka kopal Tarsis siusung boniagam, jadi gok boniaga ho jala marmulia situtu di tongatonga ni angka laut.

²⁶(III.) Tu angka aek godang diboan angka pandayungmu ho, ro alogo sian purba mangkaromhon ho apala di tongatonga ni laut.

²⁷Jadi sinamotmu dohot boniagam, partigatigaonmu, angka pandayungmu dohot angka partogim di laut, angka na padimpos rihariham dohot angka partigatigam dohot saluhut ulubalangmu angka na di bagasan ho, ro di saluhut angka na marluhut di tongatongami, ingkon harom di tongatonga ni angka laut apala di ari hapapatum.

²⁸Umbege soara angguhangguk ni angka partogim, humuntal ma angka pagaran di tano bidang.

²⁹Jadi mijur ma sian angka kopalnasida saluhut halak sitiop dayung, angka halak parkopal saluhut partogi di laut, asa tardarat.

³⁰Jala pangiaronnasida ma soaranasida mida ho, jala marangguk badar, jala pirpirhononna orbuk tu atas ulunasida, huhut marguluguluhon sirabun.

³¹Jala palpalannasida ma ulunasida ala ho, huhut marhohoshon ulos tangki, jala tatangisanna ho, dibahen ponjot ni rohana.

³²Pungkaonnasida ma huhut sada andung mida ho di pardangolannasida i, andungkononna ma: Tung ise ma songon Tirus marisuang? Songon siapna di tongatonga ni laut?

³³Uju na ro angka boniagam sian angka laut, butong ma torop bangso dibahen ho; binahen ni hinagodang ni sinamotmu dohot angka boniagam mamora do angka raja ni tano on dibahen ho.

³⁴Nunga jumpang tingki haharomanmu sian angka laut tu bagasan angka lung ni laut, gabe peut ambolong parboniagaonmu dohot sandok na marluhut di tongatongami.

³⁵Sude halak isi ni angka pulo tarhatotong be mida ho, jala manindang imbulu ni rajanasida, bolak be bohinasida.

³⁶Marngiuli be do angka partigatiga di tongatonga ni angka bangso mida ho, gabe hatotongan bolon do ho, jala ndang adong be ho ro di salelenglelengna.

28¹ (I.) Dung i ro muse hata ni Jahowa tu ahu songon on:

²Ale anak ni jolma, dok ma tu induk sian Tirus: Songon on do hata ni Tuhan Jahowa: Ala dipaginjang ho roham tung didok ho do: Ahu do Debata, habangsa ni Debata do na huhunduli di tongatonga ni angka laut! Hape jolma sambing do ho, ndada Debata, alai tudoshon bisuk ni Debata do bisukmu disura roham.

³Ida ma, umbisuk do ho sian si Daniel ninna roham, saluhut hahomion ndang buni sian ho.

⁴Marhitehite habisukonmu dohot hapistaranmu dipatupa ho do hamoraonmu, ninna roham jala papungupungu sere dohot perak di bagasan jabu parpeopan ni artam.

⁵Binahen ni hinagodang ni bisukmu dohot partigatigaonmu dipagodang ho sinamotmu, gabe di haginjangkon roham do sinamotmi.

⁶Dibahen i, songon on do hata ni Tuhan Jahowa: Ala tudoshon bisuk ni Debata bisukmu dibahen ho.

⁷Dibahen i, ida ma, ahu parohon halak sileban marlulu dampak ho, bangso parbegu angka na garang sahali, umpatonnaasida ma angka podangnasida mangago hinauli ni habisukonmu dohot mangaramuni sondangmi.

⁸Tung tu godung do onjarhononnaasida ho, asa tung mate ho di tongatonga ni laut, songon hamamate ni halak na tartiham.

⁹Tung tagamon dohononmu dope disi: Ahu do Debata, di adopan ni na mambunu ho? Hapejolma do ho, ndada Debata, di bagasan tangan ni halak na maniham ho.

¹⁰Ingkon mate do ho songon hamamate ni halak na marhulup di bagasan tangan ni halak sileban, ai ahu do na mandok i, ninna Tuhan Jahowa.

¹¹(II.) Dung i ro muse hata ni Jahowa tu ahu songon on:

¹²Ale anak ni jolma, punga ma sada ende andung taringot tu raja sian Tirus, jala dohononmu ma tu ibana: Songon on do hata ni Tuhan Jahowa: Ho do nian na jolo tumiti parsuhatan, gok habisuhon, jala sun denggan hinaulim.

¹³Maringan di Eden, porlak ni Debata do ho na jolo; saluhut mata intan angka na arga manghungkupi ho, mata intan sardis, topas, diaman, tarsis, onik, dohot jaspis, sapir, rubin, zamrud dohot sere; jadijadian ni arbabmu dohot sarunem di lambungmi; di ari hababangkitmu hian do i dipadiri di ho.

¹⁴Ho do nian sada kerubim na paherbang habongna manghungkupi, jala nunga hupaojak ho di atas dolok habadiaon ni Debata, di tongatonga ni angka batu na marsinondang do ho mardalandalan.

¹⁵Tung sun denggan do ho di bagasan angka dalanmu, olat ni ari hababangkitmu sahat ro di hamamasa ni hajungkaton di bagasan ho.

¹⁶Binahen ni hinagodang ni partigatigaonmu gok pangarupaon tongatongami, gabe mardosa ho; dibahen i hutimpalhon ho ala ni haramunonmu paholangkon sian dolok ni Debata, asa huripashon ho ale kerubim na manghungkupi sian tongatonga ni batu angka na marsinondang.

¹⁷Dipaginjang ho do roham binahen ni hinaulim, diago ho do habisukonmu ala ni hamuliaonmu: Dibahen i tu tano

reongkononku ho, jala bahenonku do ho tu jolo ni angka raja bahen sitotonduron.

¹⁸Binahen ni hinagodang ni hajahatonmu di bagasan hageduhon ni partigatigaonmu diramuni ho do angka habadiaonmu; dibahen i ahu paruarhon api sian tongatongami na pasudahon ho, jala ahu mambahen ho gabe sirabun di sisik ni tano on di adopan ni saluhut halak na manondurhon ho.

¹⁹Saluhut halak na tumanda ho na jolo di tongatonga ni angka bangso, tarhatotong be mida ho, gabe hasonggoton bolon do ho, jala ndang adong be ho ro di saleleng ni lelengna.

²⁰(III.) Dung i ro muse hata ni Jahowa tu ahu songon on:

²¹Ale anak nijolma, tujuhon ma bohim dompak Sidon, jala manurirangi ma ho taringot tusi!

²²Jala dohononmu ma: Songon on do hata ni Tuhan Jahowa: Ida ma, ahu ro marlulu dompak ho ale Sidon, jala marmulia ahu bahenonku di tongatongami, asa tung diboto nasida ahu do Jahowa, molo huputushon angka uhum di bagasanna, jala badia ahu hubahen di tongatongana.

²³Ai tongoshononku ma tu bagasan huta i begu masa dohot durusdurus di mudar di angka alamanna, ingkon marragean jolma na mate tartiham di tongatongana marhitehite podang sian na humaliang, asa tung ditanda nasida ahu do Jahowa.

²⁴Jala ndang adong be sogot di pinompar ni Israel tau suga na manura manang basir na mambugangi sian saluhut halak angka na humaliang nasida, angka na marhu ni roha mida nasida: Asa tung diboto nasida ahu do Tuhan Jahowa.

²⁵(IV.) Songon on do hata ni Tuhan Jahowa: Molo ahu papungupunguhon sogot pinompar ni Israel sian angka bangso parserahannasida na sai laon, jadi badia ma ahu marhite sian nasida di adopan ni bangso parbegu, jadi maringan ma nasida di tanonasida i naung hubasabasahon hian tu si Jakkob naposongki.

²⁶Asa marsonangsonang nasida maringan disi huhut pauli angka bagas dohot manuan angka porlak anggur, asa tung marsonangsonang nasida maringan, molo huputushon angka uhum tu saluhut angka na marhu ni roha mida nasida sian angka na humaliang nasida; asa tung ditanda nasida ahu do Jahowa, Debatanasida i.

29¹(I.) Pasampulutaonhon, di ari sampulu dua bulan sipahasampulu ro muse hata ni Jahowa tu ahu songon on:

²Ale anak ni jolma, tujuhon ma bohim dompak Firaun, raja sian Misir, jala manurirangi ma ho taringot tu ibana dohot taringot tu sandok Misir!

³Jala dohononmu ma: Songon on do hata ni Tuhan Jahowa: Ida ma, na ro ma ahu marlulu dompak ho ale Firaun, raja sian Misir, naga na

bolon i, na manggompang di tongatonga ni angka sungena, na mandok: Ahu do nampuna sungengku jala ahu jumadihon ahu.

⁴Dibahen i, ahu ma mambahen angka haithait tu bagasan osangosangmu, jala lohothononku ma angka dengke ni sungemi tu sisiksisikmu, jala enetonku ho tu ginjang sian tongatonga ni angka sungemi, jala saluhut dengke ni angka sungemi lohohot do di sisiksisikmu.

⁵Jala reongkononku ho tu halongonan, ro di saluhut dengke ni angka sungemi, gabe tinggang ho tu sisik ni ladang, ndang tagamon adong na manjomput manang papunguhon ho; tu binatang di tano i dohot tu pidong na martongatonga langit lehononku ho panganonna!

⁶Asa tung ditanda saluhut isi ni Misir, ahu do Jahowa ala na gabe tungkot tolong nasida di pinompar ni Israel.

⁷Molo dung ditangkup nasida ho di tanganna gabe maponggol ho, laos dibolahon ho do sandok abaranasida, jala molo dipartungkot nasida ho, gabe maponggol ho, laos ditura ho sandok gontingnasida.

⁸Dibahen i songon on do hata ni Tuhan Jahowa: Ida ma, ahu parohon dompak ho podang, asa husiaphon sian ho jolma nang pinahan.

⁹Jadi ingkon gabe halongonan tano Misir jala tarulang, asa tung ditanda nasida, ahu

do Jahowa! Ala naung nidokna i: Ahu do nampuna sunge i, jala ahu do manjadihonsa.

¹⁰Dibahen i, ida ma, na ro ma ahu marlulu dampak ho dohot dampak angka sungemu jala ahu mambahen tano Misir gabe halongonan situtu jala tarulang, olat ni Migdol sahat ro di Siene jala sahat ro di partalpahan tungkan Kus.

¹¹Ndang jadi mamolus sian i pat ni jolma nanggo sada manang pat ni pinahan, jala ndang jadi inganan opatpulu taon on.

¹²Jala ahu mambahen tano Misir gabe halongonan di tongatonga ni luat angka na tarulang, jala angka hutana ingkon tarulang di tongatonga ni huta angka na tarulang opatpulu taon on lelengna! Jala ahu pamamparhon halak Misir tu tongatonga ni angka bangso parbegu dohot paserakkonnasida tu angka luat.

¹³(II.) Ai songon on do hata ni Tuhan Jahowa: Molo dung marujung siopatpulu taon i papunguonku ma halak Misir sian angka bangso parserahannasida na sai laon!

¹⁴Jala ahu manogihon mulak angka na tarbuang sian Misir, asa huboan nasida mulak tu tano Patros, tu tano haroroannasida i, asa gabe sada harajaon na metmet nasida disi.

¹⁵Ingkon ummetmet tahe sian harajaon angka na asing, jala ndang be patimboonna dirina di atas ni angka bangso parbegu; ai

ahu paotikkon nasida asa unang be dirajai angka bangso parbegu na asing.

¹⁶Jala ndang be gabe pangunsandean haposan di pinompar ni Israel, sipasingothon hajahaton, di na nidompahanna mangihuthon tu nasida, asa tung ditanda nasida, ahu do Tuhan Jahowa.

¹⁷(III.) Dung i paduapulu pitutaonhon di ari sada bulan sipaha sada, ro muse hata ni Jahowa tu ahu, songon on:

¹⁸Ale anak nijolma, poran situtu ulaon, maradu magege paranganna dibahen si Nebukadnesar, raja sian Babel martungkum Tirus, pola mapalpal saluhut ulu, jala malaslas saluhut abara, hape ndang dapotan upa nang rajai, nang paranganna sian Tirus, ali ni ulaonna dompak huta i.

¹⁹Dibahen i, songon on do hata ni Tuhan Jahowa: Ida ma, ahu pasahathon tano Misir tu si Nebukadnesar, raja sian Babel, asa rampasonna hinagodang ni sinamotna, jala maruli tabantaban dohot sintahan, asa dapotan upa paranganna i.

²⁰Hira upa ni ulaonna dompak Tirus, lehononku ma tu ibana tano Misir, jala hasea di ahu do na binahennasida i, ninna Tuhan Jahowa.

²¹Di ari na sasada i martumbur ma bahenonku sada tanduk di pinompar ni Israel, tu ho pe lehononku ma buhabuha ni

pamangan di tongatonganasida, asa tung
ditanda nasida, ahu do Jahowa.

30¹ (I.) Dung i ro muse hata ni Jahowa tu
ahu songon on:

²Ale anak ni jolma, manurirangi ma ho,
jala dohononmu ma: Songon on do hata ni
Tuhan Jahowa: Andungkon hamu ma, oe ari i
marisuang!

³Ai nunga jonok ari i, nunga jonok tongon
ari ni Jahowa, ari na hobot, tingki partubolan
tu angka bangso parbegu ma i.

⁴Ingkon masuk ma podang i tu Misir gabe
masa parsipalon di Kus di hararage ni halak
na mate tartiham di Misir; jala buatonnasida
hinagodang ni sinamotna, jala lohaonna
angka ojahanna.

⁵Tole halak Kus dohot Pud dohot Lud ro di
sandok na hinarana dohot Kub ro di angka
anak ni tano parjanjian, rap marragean do
nasida marhitehite podang.

⁶Songon on do hata ni Tuhan Jahowa:
Ingkon marragean do halak situngkol Misir,
jala ingkon mijur hinatimbul ni gogona; olat
ni Migdol sahat tu Siene marragean nasida
di bagasan ibana marhitehite podang, ninna
Tuhan Jahowa.

⁷Jala ingkon tarulang nasida di tongatonga
ni luat angka na tarulang, jala angka hutana
ingkon di tongatonga ni huta angka na
tarulang do.

⁸Asa tung ditanda nasida, ahu do Jahowa, molo ahu pagalakkon api di Misir, jala tarjepol saluhut halak angka na hinarana.

⁹Di ari na sasada i, ruar ma angka suruan sian jolongku di bagasan angka kopal, asa manonggoti Kus na tarlalap i, jala masa parsipalon di nasida, suang songon di ari ni Misir, ai ida ma, nunga tung ro!

¹⁰(II.) Songon on do hata ni Tuhan Jahowa: Ahu huhut pasadihon hariburon ni Misir marhitehite tangan ni si Nebukadnesar, raja sian Babel.

¹¹Ibana udur dohot bangsona rap dohot bangso parbegu angka na gumarang, ro be laho umpansingkon tano i, jala umpatonnasida do podangnasida dompak Misir, jala gokjolma na mate tartiham tano i bahenonnasida.

¹²Jala ahu mambahen marsik angka batang aek i, gadisonku do tano i tu tangan ni halak parjahat, jala tarulang bahenonku tano i ro di isina marhitehite tangan ni halak ruar; ahu Jahowa sandiri do na mandok i.

¹³Songon on do hata ni Tuhan Jahowa: Pesan do huhut bahenonku angka ganaganaan, jala pasohotonku angka debata sileban sian Nop, jala ndang adong be induk sian tano Misir, jala lehononku do roha hatahuton di tano Misir.

¹⁴Tarulang huhut bahenonku Patros, jala pagalahonku api sada di Zoan, jala dabuonku angka uhum di No.

¹⁵ Jala usehononku do rimashu tu Sin, huta na gonting di Misir, jala pindomhononku do hariburon di No.

¹⁶ Jala pagalahonku do sada api ni Misir, tarjimpot situtu ma hilalaon ni Sin, jala tartaban ia No, jala hagogotan situtu ia Nop ariari.

¹⁷ Ianggo angka dolidoli sian On dohot sian Babustis, ingkon marragean do marhitehite podang jala tarboan tu habuangan isi ni huta i.

¹⁸ Di Tahpanhes pe mangkolom ari, molo huponggolhon disi angka auga ni Misir, jala pesan disi hinatimbul ni gogona; ombun do manghungkupisa, jala tarboan tu habuangan do angka boruna.

¹⁹ Jadi putus hubahen angka uhum di Misir, asa tung ditanda nasida, ahu do Jahowa.

²⁰ (III.) Pasampulu sada taonhon, di ari pitu bulan sipaha sada, ro muse hata ni Jahowa tu ahu songon on:

²¹ Ale anak ni jolma, nunga huponggolhon botohon ni Firaun, raja sian Misir jala ida ma, ndang jadi hona pauli ibana manang taoaran manang hona lilit pe, asa margogo nian muse laho maniop podang.

²² Dibahen i songon on do hata ni Tuhan Jahowa: Ida ma, ahu ro marlulu dompak Firaun, raja sian Misir, jala ahu umponggolhon botohonna duansa, nang na gogo dope, nang

naung maponggol hian, jala peuthononku ma podang i sian tanganna.

²³Jala ahu pamamparhon halak Misir tu tongatonga ni angka bangso parbegu, jala paserahonku nasida tu angka luat ni halak.

²⁴Pargogoanku ma anggo angka botohon ni raja sian Babel, jala lehononku podangku tu bagasan tanganna; alai ponggolhononku ma anggo angka botohon ni Firaun, asa manganguhi ibana songon halak na targisik bugangna, jomjam tu jolona.

²⁵Pargogoanku ma tutu angka botohon ni raja sian Babel, daoldaol ma anggo botohon ni Firaun, asa tung ditanda nasida, ahu do Jahowa, molo hulehon podangku tu bagasan tangan ni raja sian Babel, asa ditampulhon marlulu dompak tano Misir.

²⁶Asa ahu pamamparhon halak Misir tu tongatonga ni angka bangso parbegu dohot paserakkon nasida tu angka luat, asa tung ditanda nasida ahu do Jahowa.

31 ¹(I.) Dung i pasampulu sada taonhon, di ari parjolo bulan sipaha tolu, ro muse hata ni Jahowa tu ahu songon on:

²Ale anak ni jolma, dok ma tu Firaun raja sian Misir dohot tu na nirajaanna na deaki: Tung tu ise ma ninna roham patudosonmu dirim di habalgaonmu?

³Ida ma, songon hau ares di Libanon do Assur na jolo, uli dangkadangkana, rugun bulungna tau parlinggoman, jala timbo

badanna, pola disalpui pusukna angka ombun.

⁴Aek do pagodang ibana, jala aek mual patimbo ibana, angka aek halian mardalan humaliang panuananna, jala dangkadangkana manjarar tu saluhut hau di ladang.

⁵Ala ni tumimbo do badanna sian saluhut hau di ladang, jala lam tamba ma dangkadangkana, jala lam ganjang rantingrantingna dibahen godang ni aek di panjangkonna i.

⁶Ro muse saluhut pidong na martongatonga langit marasar di dangkadangkana, jala di toru ni rantingrantingna tubuan anak saluhut binatang di ladang, jala di linggomanna maringan saluhutna bangso parbegu angka na balga.

⁷Dung i lam uli ibana binahen ni habalgaonna, binahen ni ganjang ni rantingrantingna, ai martopihon aek godang do uratna.

⁸Gari angka hau ares di porlak ni Debata, ndang tarlinggom ibana dibahen, gari angka hariara ndang tarpatudos tu dangkadangkana, gari angka hau harangan ndang songon rantingrantingna; saluhut hau di porlak ni Debata tahe, ndang tarpatudos tu ibana di hinaulina.

⁹Nunga tung uli ibana hujadihon binahen ni hinatorop ni dangkana, pola mangiburu

tu ibana saluhut hau di Eden, angka na di bagasan porlak ni Debata.

¹⁰(II.) Dibahen i, songon on do hata ni Tuhan Jahowa: Ala songon i timbo ibana marbadan, pola sahat tu holangholang ni angka ombun pusukna, gabe dipaginjang rohana binahen ni hinatimbona.

¹¹Jadi hupasahat ma ibana tu bagasan tangan ni bangso parbegu na gogo mambahen roharohana tu ibana; binahen ni hajahatonna tahe hupabali ibana.

¹²Jadi ro halak ruar, bangso parbegu angka na garang martaba ibana, laos peak songon i di atas ni angka dolok ibana dipasombu, jala madabu tu bagasan saluhut rura dangkadangkana, jala marpongolan rantingrantingna di saluhut jarungjung ni tano i, jadi mapurpur sian linggomna saluhut bangso ni tano on laos dipasombu ibana.

¹³Songgop ma tu badanna na marobo i saluhut pidong na martongatonga langit, jala modom tu dangkadangkana saluhut binatang di ladang.

¹⁴Asa unang be dihaginjangkon nasa hau martopihon aek hinatimbona, jala unang be pusuknasida manalpui angka ombun, jala unang be mangasahon dirinasida nasa hau sionsop aek dibahen habalgaonna; ai saluhut nasida nunga pinasahat tu hamatean, tu tano apala partoru, tu tongatonga ni manisias angka na tuat tu godung.

¹⁵ Songon on do hata ni Tuhan Jahowa:

Apala di ari hatutuatna tu parbeguan,
ahu mambahen andung pabonsa roha,
hulingkuphon lung i di atasna, jala hutambok
angka sungena gabe monsong angka aek
magodang, jala martujung Libanon mida
ibana, jala mangkolom saluhut hau di ladang
ala ibana.

¹⁶ Binahen ni pardobur ni harorobona raion
hubahen angka bangso parbegu, uju na tuat
ibana huonjarhon tu parbeguan rap dohot
angka na tuat tu godung. Jadi tarapul ma di
banua toru martilla ni roha saluhut hau di
Eden, na pinillit dohot na denggan di Libanon,
saluhut hau angka sionsop aek.

¹⁷ Nang nasida ingkon tuat do rap dohot
ibana tu parbeguan, mandapothonjolma
angka na mate tiniham ni podang ro di
paranganna angka na marlinggom tu ibana di
tongatonga ni angka bangso parbegu.

¹⁸ Tung tudos tu ise ma ho, disura roham,
marhamuliaon dohot marhabalgaon di
tongatonga ni angka hau di Eden? Hape
onjarhononhon do ho tuat rap dohot angka
hau di Eden tu banua toru, ingkon peak ho di
tongatonga ni halak na marhulup rap dohot
jolma angka na mate tiniham ni podang.
I ma pangalaho ni Firaun dohot sandok na
nirajaanna, ninna Tuhan Jahowa.

32¹ (I.) Dung i pasampulu dua taonhon,
di ari sada bulan hurung ro muse ma
hata ni Jahowa tu ahu songon on:

²Ale anak ni jolma, punga ma sada ende
andung taringot tu Firaun, raja sian Misir, jala
dohononmu ma tu ibana: Tudoshon singa na
bajar do ho di tongatonga ni angka bangso
parbegu, jala tudoshon naga do ho di angka
laut, jala mamuntas do ho di bagasan angka
sungem jala dilitohi ho do aek marhitehite
patmu, jala diluntak ho do angka sungena.

³Songon on do hata ni Tuhan Jahowa: Ahu
ma mangalungkuphon rambangku tu ho di
luhutan ni torop bangso, jadi toltolonnasida
ma ho tu ginjang di bagasan rambangku.

⁴Jala saratonku ma ho tu darat, jala
reongkononku ho tu ladang manangkas,
asa hupaeat tu atasmu saluhut pidong na
martongatonga langit, jala butong hubahen
sian ho binatang ni sandok tano on.

⁵Jala marambolongan hubahen sibukmu di
atas ni angka dolok, jala gok bangkem na
margugungugun hubahen angka rura.

⁶Jala butong bahenonku tano habinsatanmu
marhite sian mudarmu sahat ro di angka
dolok, asa gok angka rura bahenonmu.

⁷Apala di hapipidommi hobot bahenonku
angka langit, jala mangkolom angka
bintangna, ia mata ni ari hungkupan ni
ombun do, jala ndang be marsinondang
ianggo bulan.

⁸Saluhut panondang angka na lohut di langit mangkolom do bahenonku di atasmu, jala paroonku do haholomon tu tanom ninna Tuhan Jahowa.

⁹Godoron do huhut bahenonku roha ni torop bangso, molo hupatolhas barita ni hapipidommi tu tongatonga ni angka bangso parbegu, tu luat angka na so tinandam.

¹⁰Jadi tarhatotong bahenonku mida ho torop bangso, jala manindang imbulu ni angka rajanasida mida ho, molo marlisik hubahen podangku di adopannasida, gabe raion nasida gonop tongkin humolsohon hosana be di ari harorobom.

¹¹Ai songon on do hata ni Tuhan Jahowa: Ingkon ro podang ni raja sian Babel marlulu dompak ho.

¹²Marhitehite podang ni angka ulubalang ragehononku angka paranganmu; bangso parbegu angka na garang do nasida luhutna, jala siaphononnasida do hatimbulon ni Misir, jala laumonna sandok hamoraonna.

¹³Jala rendepohononku do saluhut pinahanna sian tano martopihon aek godang, gabe ndang be litohan ni pat ni jolma manang tambirik ni pinahan angka aek i.

¹⁴Dung i patioonku ma muse angka batang aek nasida, jala sungenasida mardalan songon miak bahenonku, ninna Tuhan Jahowa.

¹⁵Ia dung gabe halongonan tano Misir hubahen, jala pesan hinagabe ni tano i, jala huragehon sandok pangisina i, gabe tandaonnasida ma, ahu do Jahowa.

¹⁶I ma ende andungi, laos andungknon ni halak, tole angka boru ni angka bangso parbegu mangandungkonsa taringot tu Misir dohot taringot tu sandok paranganna andungknonna do i, ninna Tuhan Jahowa.

¹⁷(II.) Dung i pasampulu dua taonhon, di ari sampulu lima bulan hurung, ro muse hata ni Jahowa tu ahu songon on:

¹⁸Ale anak ni jolma mangandung ma ho taringot tu hinadeak ni Misir, jala onjarhon ma i rap dohot boru ni bangso parbegu angka na marmulia tuat tu banua toru, mandapothon angka naung tuat tu godung!

¹⁹Tung ise ma na tinindim di haulion? Tuat ma ho asa peak ho di tongatonga ni halak na marhulup!

²⁰Ingkon marragean nasida di tongatonga ni halak na mate tiniham ni podang, nunga pola pinasahat podang i, laos dilaum nasida Misir ro di saluhut ginomgomanna!

²¹Jadi dohonon ni angka na umbegu sian angka ulubalang ma tu ibana sian tongatonga ni parbeguan ro di angka na hinarana: Nunga tuat nasida, nunga marpeahan hape halak na marhulup i, angka na mate tiniham ni podang!

²²Disi do hape Assur ro di sandok na nirajaanna, humaliang ibana angka hinamborna, saluhut do nasida angka na mate tartiham, angka na marragean binahen ni podang.

²³Apala di parsitongaan ni godung i do hinamborna dibahen jala luhutan ni na nirajaanna humaliang hinamborna i, saluhut nasida angka na mate tartiham, angka na marragean binahen ni podang, nasida angka na mambahen hasonggoton na jolo uju di tano hangoluan on.

²⁴Disi do hape nang Elam ro di sandok na nirajaanna humaliang hinamborna, saluhut nasida angka na mate tartiham, marragean binahen ni podang, angka na tuat tu banua toru, songon halak na marhulup nasida angka na mambahen hasonggoton na jolo uju di tano hangoluan on, gabe ingkon usungonna haurahonna nuaeng rap dohot angka na tuat tu godung.

²⁵Di tongatonga ni halak angka na mate tartiham podomanna dibahen ro di saluhut na nirajaanna, humaliang ibana do hinambornasida, saluhut do nasida angka halak na marhulup, angka na mate tiniham ni podang, ala na binahenna hasonggoton uju di tano hangoluan on, gabe usungonnasida nuaeng haurahonnasida rap dohot angka na tuat tu godung, tung di tongatonga ni angka na mate tartiham do ibana dipeakkon.

²⁶Disi do hape nang Mesek, Tubal ro di sandok na nirajaanna, humaliang ibana do hinambornasida, tung luhut do nasida halak na marhulup, angka na mate tiniham ni podang, ala na binahen nasida hasonggoton mida nasida uju di tano hangoluan on.

²⁷Tung so marpeahan nasida rap dohot halak na begu, angka na marragean songon halak na marhulup, angka na tuat tu parbeguan mardongan parhohas nasida tu hamusuon, pola halangulunasida podangnasida i dibahen halak, gabe laos hajahatonnasida manginona tu holiholinasida, ala hasonggoton ni angka ulubalangnasida uju di tano hangoluan on.

²⁸Ho pe ingkon bolahononna do ho di tongatonga ni halak na marhulup, ingkon peak ho rap dohot angka na mate tiniham ni podang.

²⁹Disi do hape nang Edom, angka rajana ro di sude indukna, angka na pinasahat uju di habeguonnasida i bahen dongan ni angka na mata tiniham ni podang. Marpeahan do nasida nuaeng rap dohot halak parhulup, rap dohot halak naung tuat tu godung.

³⁰Disi do hape nang induk angka na sian utara, luhut nasida ro di halak Sidon, angka na tuat rap dohot angka na mate tartiham, gabe tarurak nasida di bagasan hasonggoton mida nasida binahen ni habeguonnasida na jolo, jala marpeahan nasida halak parhulup i rap dohot halak na mate tiniham ni podang,

jala ingkon usungonnasida haurahonnasida
rap dohot halak na tuat tu godung.

³¹ Angka nasida ma idaon ni Firaun, gabe
tarapul ma rohana taringot tu sandok na
nirajaanna i; angka na mate tiniham ni
podang do Firaun ro di sandok paranganna i,
ninna Tuhan Jahowa.

³² Ai ahu do mambahen hasonggoton mida
ibana uju di tano hangoluan on, hape anggo
nuaeng marbustangan do Firaun ro di sandok
na nirajaanna i, di tongatonga ni halak
parhulup rap dohot angka na mate tiniham ni
podang, ninna Tuhan Jahowa.

33¹ (I.) Dung i ro muse hata ni Jahowa tu
ahu songon on:

² Ale anak ni jolma, pangkulingi ma angka
anak ni bangsom, jala dohononmu ma tu
nasida: Tung sura ahu parohon podang
marlulu dampak sada luat, jadi buaton
ni bangso isi ni luat i ma sahalak sian
tongatonganasida jala pabangkitonna ibana
bahen parjaga di nasida.

³ Ia dung diida ibana podang i ro marlulu
dampak luat i, ingkon paluonna sangka asa
palumba bangso i.

⁴ Jadi dibege na umbegesa soara ni sangka
i, hape ndang olo ibana palumbaon, gabe
ro ma tutu podang i, laos dirasiphon ibana,
marbilangbilang tu ibana sandiri do mudarna.

⁵ Ai dibege do nian soara ni sangka i, hape
ndang olo ibana palumbaon, marsapata tu

ibana ma mudarna; alai tung sura olo ibana palumbaon, paluaonna ma hosana.

⁶Alai tung sura naung diida parjaga i podang i ro, hape ndang dipalu sangka, ndang dipalumba nang bangso i, gabe ro podang i jala diago nanggo sahalak sian nasida, pidom di bagasan hajahatonna do nian ibana, alai anggo mudarna sian tangan ni parjaga i do tungguonku.

⁷Ia ho ale anak ni jolma, nunga hupabangkit ho bahen parjaga di pinompar ni Israel, ia adong hata nanggo sada dibege ho sian pamanganku, ingkon sipasingothononmu do i tu nasida sian ahu.

⁸Molo ahu mandok tu halak parjahat: Ingkon mate do ho ale parjahat, hape ndang marboaboa ho palumba halak parjahat i tumundalhon dalanna i nian, mate do nian parjahat i di bagasan hajahatonna, alai anggo mudarna sian tanganmu do tungguonku.

⁹Alai anggo dipalumba ho do halak parjahat i tumundalhon dalanna i nian, asa mulak sian i nian, hape ndang olo ibana mulak tumadingkon dalanna i, mate di bagasan hajahatonna ma ibana, alai anggo ho malua do hosam dibahen ho.

¹⁰(II.) Dibahen i, ho ale anak ni jolma, dok ma tu pinompar ni Israel: Ia hatahatamuna songon on do: Molo naung manginona pangalaosionnami dohot dosanami tu hami,

pola tung mandate hami binahen ni, beha ma pambahenna mangolu dope hami?

¹¹Dok ma tu nasida: Songon sintongna mangolu ahu, ninna Tuhan Jahowa, tung na so lomo do rohangku mida hamatean ni halak parjahat i, so ingkon mida hamumulak ni parjahat i tumadingkon dalanna i nian, asa mangolu ibana. Antong sai mulak ma hamu tumadingkon dalamuna angka na jahat i! Boasa tung tagonan mate hamu, ala pinompar ni Israel?

¹²Ia ho ale anak ni jolma, paboa ma tu angka anak ni bangsom: Tung na so tarpalua hatigoran ni halak partigor ibana di ari pangalaosionnai; hajahaton ni halak parjahat pe ndang tagamon manginsombut tu ibana di ari hamumulakna tumadingkon hajahatonna i; jala ndang tarpangolu hatigoran ni halak partigor ibana di ari pardosaonna i.

¹³Tung sura ahu marboaboa tu halak partigor i: Ingkon mangolu ibana! Gabe marhaposan tu hatigorranna ibana huhut mangulahon na so uhum, saluhut angka hatigorranna i ndang be ingoton, jala ingkon mate ibana di bagasan hajahaton ni binahenna i.

¹⁴Tung sura ahu marlumba tu halak parjahat i: Ingkon mate do ho! Hape mulak rohana tumadingkon dosana, jala diulahon uhum dohot hatigoran.

¹⁵Tung dipaulak halak parjahat i singkoram jinalona i, tung disingkat do na nirampasna,

tung diparangehon do angka patik ni hangoluan, unang mambahen hageduhon, ingkon mangolu ibana, ndang jadi mate.

¹⁶Saluhut dosa angka naung binahenna i, ndang be ingoton tu ibana, ala uhum dohot hatigoran na niulana i, ingkon mangolu ibana!

¹⁷Hape lam ro do hata ni angka anak ni bangsom mandok: Nandang tingkos dalam ni Tuhan i, hape dalannasida sandiri tahe ndang tingkos!

¹⁸Tung sura marbalik halak partigor i tumadingkon hatigoranna hian, jala mangulahon hageduhon, ingkon mate ibana binahen ni.

¹⁹Jala tung sura mulak roha ni halak parjahat i tumadingkon hajahatonna i, jala diulahon uhum dohot hatigoran, ingkon mangolu ibana alani.

²⁰Hape anggo hamu mandok: Nandang tingkos dalam ni Tuhan i. Antong ganup hombar tu angka dalanna uhumonku hamu, ale pinompar ni Israel.

²¹(III.) Dung i pasampulu dua taonhon, di ari lima bulan sipaha sampulu, dung tarbuang hami, ro sada halak na malua sian Jerusalem manopot ahu, mandok songon on: Nunga patu huta i!

²²Alai nunga songgop hian tangan ni Jahowa tu ahu di bodari jumolo asa ro halak na malua i, jala dibungka pamanganku, paima ro ibana manopot ahu manogotna i, gabe

buha pamanganku didapot, jadi ndang be mangungu ahu.

²³Dung i ro muse ma hata ni Jahowa tu ahu songon on:

²⁴Ale anak ni jolma, hatahata ni isi ni huta angka na tartaban i di tano Israel, songon on do: Sada sambing do anggo si Abraham gabe ditean tano i, torop do anggo hita, nunga dibasabasahon tahe tano i tu hita bahen partalian.

²⁵Dibahen i, dohononmu ma tu nasida: Songon on do hata ni Tuhan Jahowa: Dipangan hamu do na binontaran, jala matamuna manaili tu angka ganaganaanmuna, jala mandurushon mudar do hamu, hape naeng dope teanonmuna tano i!

²⁶Mangasahon podangmuna do hamu, diulahon hamu do hasogiron, jala ganup hamu mangaramuni jolma ni donganna, hape anggo tano i naeng do teanonmuna!

²⁷Dibahen i dohononmu ma tu nasida: Songon on do hata ni Tuhan Jahowa: Songon sintongna mangolu ahu, ingkon marragean bahenon ni podang jolma angka na maringan di huta naung tartaban i; jala manang ise na di ladang, lehononku do ibana panganon ni binatang; jala manang ise di bagasan huta angka na gonting, dohot di bagasan liang, ingkon mate nasida begu antukon!

²⁸Ai ahu mambahen tano i gabe halongonan jala tarulang, jala mansadi hamuliaon ni

gogona, jala tarulang do angka dolok ni Israel, asa unang be mamolus sian i nanggo sahalak.

²⁹Asa tung ditanda nasida, ahu do Jahowa, ia dung gabe halongonan tano i hubahen, jala tarulang ala ni saluhut hasogiron angka na niulanasida i.

³⁰(IV.) Ia ho ale anak ni jolma, angka anak ni bangsom pahatahata ho mardonokkon angka dorpi dohot di bagasan pintu ni angka jabu, jala masipandohan nasida ganup tu donganna songon on: Beta hita asa itabege manang hata dia na ruar sian Jahowa!

³¹Jadi ro be ma nasida manopot ho marhoronhoron, laos hundul di jolomi bangsongki, asa mananginangi tu angka hatami, alai ndang anggo ulahononna, ai marsipalensem do ia pamangannasida, alai mangihutihut pangomoanna be do ianggo rohanasida.

³²Jala ida ma, hira ende arur do ho di nasida, tiar marsuara jala na malo mamiltik parhinaloan, gabe ditangitangi nasida do nian angka hatam, hape nanggo sahalak ndang anggo mangulahon.

³³Alai anggo di haroro ni hata i, ida ma, sai na ro do, jadi botoonnasida ma naung adong panurirang di tongatonganasida.

34¹(I.) Dung i ro muse hata ni Jahowa tu ahu songon on:

²Ale anak ni jolma, ingkon manurirangi ma ho taringot tu halak siparmahan Israel! Jala dohononmu ma tu nasida, tu angka parmahan i: Songon on do hata ni Tuhan Jahowa: Marjea ma halak siparmahan Israel, angka na marmahan dirina sambing! Nda ingkon angka birubiru nian parmahanon ni angka parmahan.

³Nunga bosur hamu manganhon tabotabo i, jala imbuluna dibahen hamu pangkeanmuna, pamueanna nunga dipotongi hamu, alai anggo pungan birubiru i, ndang diparmahani hamu!

⁴Angka na gale i ndang dipargogoi hamu, jala na marsahit i ndang didaoni hamu, jala na mabugang i ndang dililiti hamu, jala na tardempar i ndang mulak diboan hamu, jala na mago i ndang dilului hamu, horas do tahe jala posi pangarajaimu di nasida.

⁵Jadi mampar ma nasida ala soada siparmahan gabe sipanganon ni saluhut binatang ni ladang i nasida, jala marserak.

⁶Jadi lilu ma pungan birubirungku di atas ni saluhut dolok dohot di atas ni sandok robean na timbo, jala marserak pungan birubirungku di atas sandok sisik ni tano on, hape ndang adong nanggo sahalak na usousa manang na mangalului punguanki.

⁷Dibahen i, hamu ale angka parmahan, tangihon hamu ma hata ni Jahowa.

⁸Songon sintongna mangolu ahu, ninna Tuhan Jahowa, ala na gabe ripe pupusan pungan birubirungku, jala ripe panganon ni saluhut binatang di ladang pungan birubirungku ala soada siparmahan, jala ndang usousu angka parmahanku di pungan birubirungku, laos dirinasida sambing tahe diparmahani angka parmahan i, ianggo pungan birubirungku ndang diparmahan nasida.

⁹Dibahen i, hamu ale angka parmahan, tangihon hamu ma hata ni Jahowa!

¹⁰Songon on do hata ni Tuhan Jahowa: Ida ma, ahu ma marlulu dampak angka parmahan i, jala ahu martunggu birubirungku sian tangannasida, jala ahu pasadihon nasida sian ulaon parmahanon birubiru, jala ndang be parmahanon ni angka parmahan i dirinasida sambing, jala ahu paluahon birubirungku sian pamangannasida, asa unang be ripe sipanganon di nasida.

¹¹(II.) Ai songon on do hata ni Tuhan Jahowa: Ida ma, ahu, apala ahu sandiri usousu sogot di birubirungku, jala luluanku nasida.

¹²Songon pangalului ni parmahan di puguanna di ari uju di tongatonga ni birubirunna angka na mampar i ibana, suang songon i ahu mangalului birubirungku sogot, jala paluaonku nasida sian saluhut inganan

parserahannasida i, uju di ari ombun dohot haholomon marimpotimpot.

¹³Jala ahu manogihon nasida ruar sian angka bangso dohot papunguhon nasida sian angka luat, asa huboan nasida mulak tu tanonasida i, laos ahu marmahan nasida di atas ni angka dolok Israel, di bagasan angka rura dohot di bagasan saluhut parmianan di tano on.

¹⁴Di jampalan apala na lomak ahu marmahan nasida, jala di atas dolok angka na timbo di Israel parudamannasida, disi ma mangulon nasida di parudaman na denggan, jala jampalan apala na lomak jampalanna di atas ni angka dolok ni Israel.

¹⁵Ahu sandiri ma marmahan birubirungku, jala ahu paulon nasida, ninna Tuhan Jahowa.

¹⁶Luluanku ma na mago i, jala mulak boanonku na tardempar i, jala lilitanku do na mabugang i, jala pargogoanku do na marsahit i; alai anggo na mokmok i dohot na gogo i siaphononku do, ahu sandiri tahe marmahansa marhitehite uhum.

¹⁷Alai anggo tu hamu ale birubirungku songon on do hata ni Tuhan Jahowa: Ida ma, ahu ma manguhum di holangholang ni birubiru martimbangkon birubiru, tole birubiru tunggal martimbangkon hambing tunggal.

¹⁸Maotikku dope huroha di rohamu naung jinampalmuna i jampalan na lomak i, dohot

do ebaeba ni jampalanmuna i, ingkon popoanmuna marhitehite patmuna, jala aek na tio diinum hamu, alai anggo ebaebana i dilitohi hamu do marhitehite patmuna.

¹⁹Tung patut ma birubirungku manjampal na pinopoan ni patmuna i, jala inumonna na nilitohan ni patmuna i?

²⁰(III.) Dibahen i, songon on do hata ni Tuhan Jahowa tu nasida: Ida ma, ahu sandiri mamutus uhum di holangkolang ni birubiru angka na mokmok martimbangkon birubiru na marniang:

²¹Ala didorongi hamu marhitehite lambung dohot abara, jala ditambingi hamu marhitehite tandukmuna saluhut birubiru angka na gale i, paima pola marserak nasida tu balian dibahen hamu.

²²Dibahen i ahu ma manolongi birubirungku, asa unang be ripe pupusan, jala ahu mamutus uhum di holangholang ni birubiru martimbangkon birubiru.

²³Jala ahu patindang di nasida sada parmahan, asa ibana marmahan nasida, i ma naposongku si Daud. Ibana ma marmahan nasida, jala ibana gabe parmahan di nasida.

²⁴(IV.) Jala ahu Jahowa sandiri tahe gabe Debatanasida, jala naposongku si Daud pangarajai di tongatonganasida. Ahu Jahowa do na mandok i.

²⁵Dung i bahenonku ma tu nasida padan pardamean, jala pasadionku binatang na

rahat sian tano i, asa halongonan, jala modom di angka tombak longolongo.

²⁶Dung i bahenonku ma nasida dohot angka na humaliang dolokdolokku gabe pasupasu, jala ahu parohon udan di tingki halehetanna, gabe angka udan parpasupasuan do i.

²⁷Jala lehonon ni hau di ladang do parbuena, jala lehonon ni tano i do gogona, jala marsonangsonang nasida di tanonasida i, asa tung ditanda nasida ahu do Jahowa, ia dung huponggolhon angka hau ni auganasida i, jala hupalua nasida sian tangan ni halak angka na marhatobanhon nasida.

²⁸Jadi ndang be ripe pupusan ni angka bangso parbegu nasida, jala ndang be ripe panganon ni binatang di tano i nasida, asa marsonangsonang nasida maringan, jala ndang adong be panonggoti nanggo sahalak.

²⁹Jala patindangonku di nasida panuanan sada bahen barita, jala ndang be adong nasida angka na mate anturaparon di tano i, jala ndang be usungonnasida haurahon ni angka bangso parbegu.

³⁰Asa tung ditanda nasida ahu do Jahowa, Debatanasida i, dongannasida, jala nasida pinompar ni Israel bangsongku, ninna Tuhan Jahowa.

³¹Jala hamu do punguanku, birubiru angka na huparmahan, jolma do hamu; ahu ho Debatamuna i, ninna Tuhan Jahowa.

35¹ (I.) Dung i ro muse hata ni Jahowa tu ahu songon on:

²Ale anak ni jolma, tujuhon ma bohim dampak dolok Seir, jala manurirangi ma ho taringot tusi!

³Jala dohononmu ma tu ibana: Songon on do hata ni Tuhan Jahowa: Ida ma, ahu ro marlulu dampak ho, ale dolok Seir, jala patoltolonku tanganku dampak ho, jala bahenonku ho gabe halongonan jala tarulang.

⁴Angka hutam pe tarulang do bahenonku, asa gabe halongonan ho, asa tung ditanda ho, ahu do Jahowa!

⁵Ala na marmusu tihus ho sian na robi dope, jala dipasahat ho halak Israel tu baba ni podang, uju di tingki parsipalonnasida, uju di tingki panimpulan ni hajahaton.

⁶Dibahen i, songon sintongna mangolu ahu, ninna Tuhan Jahowa, ingkon gabe mudar ho bahenonku, jala parsapataan mudar paburuburu ho, ala so dihagigihon roham mudar, ingkon parsapataan mudar mangalotongi ho.

⁷Jala bahenonku do dolok Seir gabe halongonan, jala tarulang, jala siaphononku do sian i halak na marmeang muli.

⁸Jala gok bahenonku angka dolokna halak na mate tartiham sian ibana; marpeahan do huhut di dolokdolokmu, di angka ruram, dohot di saluhut angka sungemi, jolma angka na mate tiniham ni podang.

⁹Ingkon gabe halongonan ho ro di salelenglelengna bahenonku, angka hutam pe ndang be inganan, asa tung ditanda hamu, ahu do Jahowa.

¹⁰Ala naung nidokmi: Na dua bangso i dohot na dua luat i sai na sahat tu ahu do i, jala teanonnam i do i, ndang disi Jahowa maringan.

¹¹Dibahen i, songon sintongna mangolu ahu, ninna Tuhan Jahowa, ingkon bahenonku hombar tu rimasmu dohot hombar tu pangiburuonmu, na binahenmi sian gigim mida nasida, asa tung hupatandahon ahu di tongatonganasida, ia dung hulaluhon uhum tu ho.

¹²Asa tung ditanda ho, ahu do Jahowa, naung umbege saluhut elakelakmu, angka naung nidokmu taringot tu angka dolok Israel songon on: Nunga tung tarulang! Sahat tu hita ma sahalanta.

¹³Gari dompak ahu nunga manenganenga pamanganmuna, jala dipadeakdeak hamu hatahatamuna mangalo ahu, pola ahu umbegea.

¹⁴Songon on do hata ni Tuhan Jahowa: Molo marlas ni roha be sogot sandok tano on, halongonan ma ianggo ho bahenonku.

¹⁵Hombar tu las ni roham mida partalian ni pinompar ni Israel ala naung tarulang, suang songon i bahenonku tu ho: Ingkon gabe halongonan ho, ale dolok Seir, tung ro di

sandok Edom, asa tung ditanda nasida, ahu do Jahowa!

36¹ (I.) Ia ho, ale anak ni jolma, manurirangi ma ho taringot tu angka dolok Israel, jala dohononmu ma: Ale angka dolok Israel, tangihon hamu ma hata ni Jahowa!

² Songon on do hata ni Tuhan Jahowa: Ala naung nidok ni musu i taringot tu hamu: Ha, ha! Jala angka buntulbuntul salelenglelengna, nunga tung gabe partalianta!

³ Dibahen i manurirangi ma ho, jala dohononmu ma: Songon on do hata ni Tuhan Jahowa; ala naung tarulang, jala naung binondutan hamu sian na humaliang, pola gabe partalian ni pasipasi ni angka bangso parbegu hamu, jala dipampe hamu tu atas dilana bahen ende aling ni situasi na torop.

⁴ Dibahen i, ale angka dolok Israel, tangihon hamu ma hata ni Tuhan Jahowa! Songon on do hata ni Tuhan Jahowa tu angka dolok dohot tu angka buntulbuntul, tu angka sunge dohot tu angka rura, tu angka turanggong na marambolongan dohot tu huta angka na tinadingkon, angka na gabe tabantaban dohot gabe ende aling di pasipasi ni bangso parbegu, angka na sian humaliang.

⁵ Dibahen i, songon on do hata ni Tuhan Jahowa: Molo so naung mangkatai ahu di bagasan api ni pangiburuonku taringot tu angka pasipasi ni angka bangso parbegu

dohot taringot tu sandok Edom, angka na mangalehon tanongku tu dirinasida bahen partalian marhitehite sandok las ni rohana, marhitehite eleseles ni ateate, ala naung gabe tabantaban jampalanna i.

⁶Dibahen i, manurirangi ma ho taringot tu tano Israel, jala dohononmu ma tu angka dolok dohot tu angka buntulbuntul, tu angka sunge dohot tu angka rura: Songon on do hata ni Tuhan Jahowa: Ida ma, nunga pola marboaboa ahu di bagasan pangiburuonku dohot di bagasan rimashu, ala naung niusungmuna haurahon binahen ni angka bangso parbegu.

⁷Dibahen i, songon on do hata ni Tuhan Jahowa: Nunga pola hupatoltol tanganku marmangmangkon: Molo so ingkon usungon ni bangso parbegu angka na humaliang hamu haurahonnasida sandiri.

⁸Alai anggo hamu, ale angka dolok Israel, ingkon mangulahi martumbur hamu, jala marparbue hamu di bangsongku Israel, ai nunga pola jumonok nasida ro.

⁹Ai ida ma, marpangulahi rohangku manatap hamu, asa paulion hamu muse jala saburon.

¹⁰Jala patambaonku tu hamujolma, saluhut nasida pinompar ni Israel; jala inganan muse angka huta, jala paulion muse angka turanggong.

¹¹Jala patambaonku tu hamujolma nang pinahan, asa matorop mabue nasida, jala

marisi hamu bahenonku, suang songon di parmulaanmuna, jala bahenonku na denggan, ganda sian di tingkimuna angka na robi, asa tung ditanda hamu, ahu do Jahowa!

¹²Jala bahenonku mardalani di atasmuna angka jolma, i ma bangsongku Israel, jala nasida manean ho, jala ho gabe partaliannasida, jala ndang be punu nasida bahenonmu.

¹³Angkup ni songon on do hata ni Tuhan Jahowa: Ala dipandok halak tu hamu: Sipangan jolma do ho, jala sipapunu bangsom do ho.

¹⁴Dibahen i, ndang be panganonmu jolma, jala ndang be papunuonmu bangsom, ninna Tuhan Jahowa.

¹⁵Jala ndang be ahu patubegehon tu ho haurahon ni angka bangso parbegu, jala ndang be taononmu elakelak ni angka bangso, jala ndang be papunuonmu bangsom, ninna Tuhan Jahowa.

¹⁶(II.) Dung i ro muse hata ni Jahowa tu ahu songon on:

¹⁷Ale anak ni jolma, maringan do pinompar ni Israel na jolo di tanonasida i, hape diramuni nasida do i marhitehite dalannasida dohot pambahenannasida; songon hararamun ni parompuan di hasomalanna tahe dalannasida i maradophon ahu.

¹⁸Jadi huusehon ma rimashu tu nasida, ala mudar na nidurushon nasida tu tano i, jala diramuni do i marhitehite ganaganaannasida.

¹⁹Pola ahu paserakkon nasida tu tongatonga ni angka bangso parbegu, gabe mampar nasida tu angka luat; hombar tu dalannasida jala hombar tu pambahenannasida tahe ahu manguhum nasida.

²⁰Jadi dung sahat nasida tu tongatonga ni bangso parbegu, angka na tinopotnasida i, laos diramuni nasida disi goarhu na badia i, pola didok halak taringot tu nasida: Angka nasida do hape bangso ni Jahowa, jala na bungkas sian tanona i!

²¹Alai marpangulah i do rohangku ala goarhu na badia i, na niramunan ni pinompar ni Israel di tongatonga ni bangso parbegu, angka hasahatannasida i.

²²Dibahen i dohononmu ma tu pinompar ni Israel: Songon on do hata ni Tuhan Jahowa: Ndada ala hamu ahu mambahen songon i, ale pinompar ni Israel, ala ni goarhu na badia i do, na niramunanmuna di tongatonga ni bangso parbegu, angka hasahatanmuna i.

²³Jala ahu ma pabadiahon goarhu na timbul i, naung niramunan di tongatonga ni angka bangso parbegu, na niramunanmuna tahe di tongatonganasida, asa tung ditanda angka bangso parbegu, ahu do Jahowa, ninna Tuhan Jahowa, ia dung huparbadiai diringku di bagasan hamu di adopanmuna.

²⁴Jala ahu mambuat hamu sian angka bangso parbegu, jala paluhutonku do hamu sian saluhut angka luat, jala boanonku do hamu mulak tu tanomuna i.

²⁵(III.) Dung i urashononku ma tu hamu aek angka na tio, asa tung ias hamu; urasonku do hamu tahe sian saluhut haramunonmuna i dohot sian saluhut ganaganaanmunai.

²⁶Jala lehononku tu hamu roha na imbaru dohot tondi na imbaru tu bagasan ateatemuna; jala unsatonku do roha batu sian dagingmuna, jala lehononku tu hamu roha sibuk.

²⁷Jala lehononku ma tondingku tu bagasan ateatemuna, jala ahu mambahensa, asa marparange hamu di bagasan angka patikku, angka uhumhu pe radotan jala patupaonmuna do.

²⁸Asa maringan hamu muse di tano, naung hubasabasahon tu ompumuna, jala sumuang hamu gabe bangsongku, jala ahu gabe Debatamuna.

²⁹Jala ahu paluahon hamu sian saluhut haramunonmuna i, jala ahu martingting tu eme huhut pagodangkon, jala ndang be lehononku tu hamu haraparon.

³⁰Jala ahu pagodangkon parbue ni hau dohot gogo ni tano i, asa unang be taononmuna elakelak ni haraparon di tongatonga ni angka bangso parbegu.

³¹ Jadi ingotonmuna ma dalanmuna angka na roa i dohot pambahenanmuna angka na so turut i, balik marbiasbias hamu mida bohimuna, ala ni hajahatonmuna dohot ala ni hasogiron angka na niulamuna i.

³² Ndada ala hamu ahu mambahen songon i, ninna Tuhan Jahowa, boto hamu ma i! Maila ma hamu jala marlangan mida dalanmuna i, hamu ale pinompar ni Israel.

³³ Songon on do hata ni Tuhan Jahowa: Di ari pangurasanku sogot di hamu sian saluhut hajahatonmuna i, marisi muse bahenonku angka huta, jala pajongjongon muse angka turanggong.

³⁴ Ulaon muse huhut tano na tarulang i na sai laon, na niida ni saluhut halak pamolus.

³⁵ Jadi dohonon ni halak ma: Tano na tarulang i na jolo, gabe hira porlak Eden nuaeng, jala huta angka na tartaban jala tarulang jala maloha na jolo, gabe gonting jala ribur nuaeng.

³⁶ Jadi tandaon ni bangso parbegu angka na teba i humaliang hamu, ahu do Jahowa, paulihon muse angka huta naung maloha, manuani muse naung tarulang i: Ahu Jahowa do na mandok i, huhut mambahensa.

³⁷ Songon on do hata ni Tuhan Jahowa: Taringot tusi olo do ahu usousuan ni pinompar ni Israel laho mambahensa tu nasida: Patoroponku do nasida, asa songon pungan birubiru angka jolma i.

³⁸ Songon punguan ni angka na badia tahe, songon luhutan di Jerusalem uju marari raya, suang songon i huta angka na tarulang i gok punguan jolma sogot, asa tung ditanda nasida ahu do Jahowa!

37 ¹ (I.) Dung i songgop ma tu ahu tangan ni Jahowa, jala ditogihon ahu haruar marhitehite Tondi ni Jahowa, jala dipaulon ahu di tongatonga ni rura, na gok holiholi ni jolma na mate.

² Dung i ditogihon ibana ahu mamolus sian lambungnasida tuk humaliang, gabe ida ma, godang situtu marrarahan di atas sisik ni rura i, jala ida ma, masak situtu do luhutna i.

³ Jadi ninna ibana ma tu ahu: Ale anak ni jolma! Atehe tagamon tarpangolu dope angka holiholion? Gabe ningku ma: Ale Tuhan Jahowa, ho do umbotosa!

⁴ Jadi ninna ibana ma tu ahu: Manurirangi ma ho taringot tu angka holiholion, jala dohononmu ma tu nasida: Ale holiholi angka na masak i, tangihon hamu ma hata ni Jahowa!

⁵ Songon on do hata ni Tuhan Jahowa tu angka holiholion: Ida ma, ahu mangalehon tondi tu bagasan hamu, asa mangolu hamu.

⁶ Jala ahu mangalehon tu atas hamu angka uraturat dohot patubuhon sibuk di atas hamu, jala ahu mambahen hamu marhulingkuling huhut mangalehon tondi tu bagasan hamu,

asa mangolu hamu, asa tung ditanda hamu,
ahu do Jahowa!

⁷Jadi manurirangi ma ahu songon naung
tinonahon i tu ahu, jadi di na manurirangi
i ahu ro ma sada soara, jala ida ma, masa
soara na marngongos, gabe masitopotan
angka holiholi ganup tu donganna.

⁸Dung i hubereng ma, gabe ida ma, nunga
maruraturat nasida, jala tubu sibuk, jala leap
hulingkuling di atasnasida, alai ndang adong
dope anggo tondi di bagasan nasida.

⁹Dung i ninna ibana ma tu ahu: Manurirangi
ma ho tu tondi i, manurirangi ma ho tutu
ale anak ni jolma, jala dohononmu ma tu
tondi i; songon on do hata ni Tuhan Jahowa:
Ro ma ho ale tondi sian desa na opat i jala
mangullus ma ho tu bagasan halak na binunu
on, asa mangolu nasida!

¹⁰Jadi manurirangi ma ahu, songon na
tinonahonna i ahu, gabe ro ma tondi i tu
bagasan nasida, jala mangolu nasida, laos
diojakkon patnasida i, parduaan parangan
apala na bolon sahali do i.

¹¹Dung i ninna ibana muse tu ahu: Ale anak
ni jolma, angka holiholion sandok pinompar
ni Israel do i; ida ma, angka nasida mandok:
Nunga tung masak holiholinami, jala pesan
aroparop ni rohanami, naung pedom do hami.

¹²Dibahen i, manurirangi ma ho, jala
dok ma tu nasida: Songon on do hata ni
Tuhan Jahowa: Ida ma, ahu mangungkap

tanomanmuna, jala ahu mamboan hamu nangkok sian tanomanmuna, hamu ale bangsongki jala ahu manogihon hamu mulak tu tano Israel!

¹³Jadi tandaonmuna ma, ahu do Jahowa, ia dung huungkap tanomanmuna, jala huboan hamu nangkok ale bangsongki sian tanomanmuna.

¹⁴Ahu huhut mangalehon Tondingku tu bagasan hamu, asa mangolu hamu, jala ahu mambahen hamu marhasonangan di tanomuna, asa tung ditanda hamu, ahu do Jahowa na mandok i, huhut mambahensa, ninna Tuhan Jahowa!

¹⁵(II.) Dung i ro muse hata ni Jahowa tu ahu songon on:

¹⁶Ia ho, ale anak ni jolma, buat ma di ho sada hau, jala surathon tusi: Di Juda dohot di angka anak ni Israel, angka donganna i! Dung i buat muse sada hau na asing, jala surathon tusi: Di si Josep, hau ni Epraim ro di sandok pinompar ni Israel, angka donganna i!

¹⁷Jala pajonok be nasida, na sada tu donganna, bahen sada hau di ho, asa tung gabe sada nasida di bagasan tanganmu.

¹⁸Dung i molo didok angka anak ni bangsom tu ho songon on: Atehe, ndang olo ho paboahon tu hami manang dia lapatan ni angka na tinonahonmu?

¹⁹Jadi dohononmu ma tu nasida: Songon on do hata ni Tuhan Jahowa: Ida ma, ahu

mambuat hau ni si Josep, na di bagasan tangan ni si Epraim dohot angka marga ni Israel, angka donganna i, jala ahu padomuhon nasida tu ibana, i ma hau ni Juda, jala ahu mambahen nasida gabe sada hau, asa tung sada nasida di bagasan tanganku.

²⁰Asa hau angka naung sinuratanmu, ingkon tioponmu do i di bagasan tanganmu di adopannasida.

²¹Jala dohononmu ma tu nasida: Songon on do hata ni Tuhan Jahowa: Ida ma, ahu mambuat angka anak ni Israel sian tongatonga ni bangso parbegu, angka naung tinopotnasida i, jala ahu papunguhon nasida sian na humaliang, jala ahu mamboan nasida mulak tu tanonasida.

²²Jala bahenonku nasida gabe sisada bangso di tano i, di atas ni angka dolok Israel, jala sada sambing raja di nasida luhut, jala ndang be sidua bangso nasida, jala ndang be sidua harajaon nasida dibagi.

²³Jala ndang be ramunannasida dirinasida marhitehite ganaganaannasida, manang marhitehite hasogiron, angka na niulanasida i, manang marhitehite saluhut pangalaosionnasida i. Jala ahu paluahon nasida sian saluhut inganan angka pardosaannasida na sai loan, asa huurasi nasida, gabe bangsongku nasida, jala ahu Debatanasida.

²⁴Jala naposongku si Daud gabe raja gumomgom nasida, gabe sasadasa siparmahan di nasida luhut, jadi marparange ma nasida di bagasan angka uhumhu, jala radotannasida ma angka patikku huhut ulahononna.

²⁵Jadi maringan nasida muse di tano, naung hubasabasahon tu naposongku si Jakkob, tano naung niinganen ni angka ompumuna, asa maringan nasida disi, nang angka anaknasida, nang angka pahompunasida ro di salelenglelengna, jala si Daud naposongki induknasida ro di salelenglelengna.

²⁶Bahenonku do huhut tu nasida sada padan pardamean, padan salelenglelengna ma i tu nasida, jala ahu mardenggan basa tu nasida huhut patamba nasida, jala paojahonku do habadiaonki di tongatonganasida ro di salelenglelengna.

²⁷Jala ingananku sandiri di atas nasida, jala ahu gabe Debatanasida; jala nasida gabe bangsongku.

²⁸Asa tung ditanda angka bangso parbegu, ahu do Jahowa, na pabadiahon Israel, ia dung di tongatonganasida habadiaonku ro di salelenglelengna.

38¹(I.) Dung i ro muse hata ni Jahowa tu ahu songon on:

²Ale anak ni jolma, tujuhon ma bohim dompak Gog di tano Magog, induk sian Ros,

Mesek dohot Tubal, jala manurirangi ma ho dompak ibana;

³Jala dohononmu ma: Songon on do hata ni Tuhan Jahowa: Ida ma, magira ma ahu ro marlulu dompak ho ale Gog, induk sian Ros, Mesek dohot Tubal!

⁴Jala paundaronku ma ho, jala bahenonku do angka haithait tu bagasan osangosangmu, jala togihononku ho borhat rap dohot sandok paranganmu, angka hoda dohotjolma parsihundul, angka na simpan be marparhohas luhutna, sada luhutan apala na bolon, angka sitiop lombulumbu na balga dohot na metmet, jala marpodang nasida luhut.

⁵Halak Persia, Kus dohot Pud dongannasida, luhut nasida marlombulumbu be jala martahuluk.

⁶Tole Gomer dohot sandok parduaan ni paranganna, tole pinompar ni Togarma angka na sian ujung ni utara sahali ro di sandok parduaan, ni paranganna, torop angka bangso donganmu!

⁷Marhobas ma ho, jala padiri hian ho ro di sandok luhutanmu, angka na marluhut tu ho, jala ho ma gabe partoginasida.

⁸Di laonlaon ni ari muse ingkon masa partubolan tu ho, di ujung ni angka taon sogot tahe sahat ho tu sada luat na malua sian podang pangisina i, angka na pinapungu sian torop angka bangso tu atas ni angka

dolok Israel, angka naung leleng tarulang, gabe pinaruar do nasida sian angka bangso, laos marsonangsonang maringan nasida luhut.

⁹Jala nangkok do ho, songon haroro ni ari, songon ombun do ho ro manghungkupi tano i, ho dohot sude parduaan ni paranganmu, jala torop bangso hinaram.

¹⁰Songon on do hata ni Tuhan Jahowa: Di ari na sasada i padeakdeahonmu do tubutubu ni roham, jala na roa do sangkap ni roham.

¹¹Jala dohononmu ma: Borhat ma ahu nangkok sumola sada luat na manaletes mangarampok halak angka na nalom, jala na marsonangsonang maringan, saluhut nasida maringan di adaran, so marparik manang marransangransang, pintu harbangan pe ndang adong di nasida.

¹²Laho martabuni dohot mamupusi, laho mambahen tanganmu tu turanggong angka naung niingan muse dohot tu sada bangso naung pinapungu muse sian angka bangso parbegu, naung umpungka pinahan jala marpangomoan, angka na maringan di pogu ni tano.

¹³Ro muse hata ni Saba dohot Dedan dohot angka parboniaga sian Tarsis rap dohot sude singana na bajar mandok tu ho: Atehe na ro martaban do ho? Naeng mamupusi do ho, umbahen dipaluhut ho luhutanmi? Naeng mangalaum perak dohot sere? Naeng

mambuat pinahan dohot pangomoan laho martaban godang barangbarang?

¹⁴Dibahen i, manurirangi ma ho, ale anak ni jolma, jala dohononmu ma tu Gog: Songon on do hata ni Tuhan Jahowa: Nda apala di ari na sasada i ma botoonmu na marsonangsonang i bangsongku Israel maringan?

¹⁵Hape ro dope ho sian ingananmu, sian ujung ni utara sahali, ho jala torop bangso hinaram, angka na marsihundul di hoda nasida luhut, sada luhutan apala na bolon, parangan apala na torop sahali.

¹⁶Jala nangkok do ho dompak bangsongku Israel, songon ombun laho manutup tano i; apala di ujung ni angka ari ma i masa, jala ahu parohon ho dompak tanongku, asa tung ditanda angka bangso parbegu i ahu, molo huparbadiai diringku marhite sian ho, ale Gog di adopan ni matanasida.

¹⁷(II.) Songon on do hata ni Tuhan Jahowa: Ho do i naung hulumbahon hian di angka ari na robi marhitehite angka naposongku, angka panurirang ni Israel, angka na manurirangi di angka ari uju i pola martaontaon, paboa ahu naeng parohon ho marlulu dompak nasida.

¹⁸Di ari na sasada i, di ari haroro ni Gog tahe sumola tano Israel, ninna Tuhan Jahowa, martimpul ma rimashu di bagasan igungku.

¹⁹Jala di bagasan piripiringku, di bagasan api ni rimashu, ahu mandok hian: Ingkon

di ari na sasada i masa lalo godang di tano Israel.

²⁰Jadi raion be maradophon ahu angka dengke di bagasan laut dohot pidong na martongatonga langit dohot binatang di harangan, ro di sandok na manggulmit di atas tano i, nang saluhut jolma angka na di sisik ni tano on, jala maloha angka dolok jala marumpahan angka buntulbuntul batu, jala angka tompas tu tano saluhut parik.

²¹Huhut ahu umpanggil podang marlulu dampak ibana sian saluhut angka dolokku, ninna Tuhan Jahowa, asa masirasipan nasida sama nasida dohot podang.

²²Jala uhumonku ibana marhitehite begu antuk dohot durusdurus di mudar, tole udan tipotipo na mangalantap dohot angka batu ambolas, dabuonku ma tahe udan api dohot barerang tu ibana dohot tu angka parduaan ni paranganna dohot tu torop bangso, angka na hinarana i.

²³Asa hupatimbul jala huparbadiai diringku, jala hupabotohon ahu di adopan ni torop bangso parbegu, asa tung ditanda nasida, ahu do Jahowa.

39¹(I.) Ia ho ale anak ni jolma, manurirangi ma ho dampak Gog jala dohononmu ma: Songon on do hata ni Tuhan Jahowa: Ida ma, na ro ma ahu marlulu dampak ho ale Gog, induk sian Ros, Mesek dohot Tubal!

²Jala ahu paundarhon ho jala ahu mangela ho dohot panangkokkon ho sian ujung ni utara sahali, huhut parohon ho tu atas ni angka dolok Israel.

³Jala ahu mameuthon siormu sian tanganmu hambirang ahu huhut mameuthon angka sumbiami sian tanganmu siamun.

⁴Ingkon di atas ni angka dolok Israel ho marragean rap dohot sude parduaan ni paranganmu, ro di bangso angka na hinaram; tu angka pidong panoro, parhabong na marragamragam dohot tu binatang di harangan lehononku ho sohalanna.

⁵Ingkon di atas sisik ni ladang i ho marragean, ai ahu mangalumbahon songon i hian, ninna Tuhan Jahowa.

⁶Jala ahu manongoshon sada api tu bagasan Magog dohot tu tongatonga ni halak na maringan marsonangsonang di angka pulo, asa tung ditanda nasida, ahu do Jahowa.

⁷Jala ahu pabotohon goarhu na badia i di tongatonga ni bangsongku Israel, jala ndang be marlea bahenonku goarhu na badia i, asa tung ditanda angka bangso parbegu, ahu do Jahowa, na badia di tongatonga ni Israel!

⁸Ida ma, nunga ro, jala nunga masa, ninna Tuhan Jahowa! I ma ari naung hulumbahon hian.

⁹Dung i ruar ma halak isi ni angka huta di Israel, jala tutungonna jala purunanna angka parhohas, tole lombulumbu na metmet

dohot na balga, tole sior dohot angka sumbia, tole ompongompong dohot hujur, jala suda purunanna dohot api pola pitu taon lelengna.

¹⁰Asa ndang pola be alaponnasida soban sian harangan, jala ndang be tabaonnasida hau sian tombak, ai purunannasida do angka parhohas dohot api, jala tabanonnasida do halak na martaban nasida, jala pupusanna halak na mamupusi nasida na jolo, ninna Tuhan Jahowa.

¹¹Dung i di ari na sasada i, lehononku ma tu Gog sada inganan bahen parbandaanna di Israel, i ma rura ni halak pamolus tungkan habinsaran ni laut, jala pola polpolonna halak pamolus, jala tanomonnasida disi Gog ro di sandok paranganna, goaronnasida do i: "Rura hariburan ni Gog".

¹²Dung i tanomon ni pinompar ni Israel ma nasida, asa mangurasi tano i, pola pitu bulan lelengna.

¹³Tung sandok bangso ni tano i mananom nasida, pola dapotan barita nasida disi, di ari uju marmulia hubahen diringku, ninna Tuhan Jahowa.

¹⁴Pola papulihonnasida baoa angka na mangaliati tano i, angka na mananom rap dohot halak pamolus i jolma angka na teba di sisik ni tano i, asa mangurasi tano i; dung salpu na pitu bulan i mandiori ma nasida.

¹⁵Jadi mangaliati tano i ma halak pamolus i, gabe diida ma holiholi ni jolma, laos

dipatindang di lambungna sada partinandaan, paima ditanom halak pananom i ibana tu rura hariburan ni Gog.

¹⁶Nang goar ni sada huta laos Hariburan do, asa tung diurasi nasida tano i.

¹⁷(II.) Ia ho ale anak ni jolma, songon on do hata ni Tuhan Jahowa: Dok ma tu angka pidong parhabong marragamragam, dohot tu sandok binatang di harangan: Marluhut ma hamu jala ro! Tung marpungu ma hamu sian na humaliang mangarongom pelean ki sipotongon, na hupotongi di hamu, pelean sipotongon na balga sahali do i di atas ni angka dolok Israel, jala sohali hamu sibukna, jala sopsop hamu mudarna.

¹⁸Ingkon suda sibuk ni angka ulubalang panganonmuna, jala mudar ni angka induk ni tano on sopsoponmuna, angka birubiru tunggal, angka anak ni birubiru, angka hambing tunggal dohot lombu, pinahan pamuean sian Basan do nasida luhut!

¹⁹Ingkon panganonmuna tabotabo maradu bosur, jala inumonmuna mudar maradu mabuk sian pelean ku sipotongon, naung hupotongi di hamu.

²⁰Jadi bosur ma hamu mangan sian mejangku hoda dohot hureta, ulubalang dohot halak parmusu marragamragam, ninna Tuhan Jahowa.

²¹Jadi marbarita ma hamuliaonku bahenonku di tongatonga ni angka bangso

parbegu, asa luhut angka bangso parbegu marnida uhumhu na hubahen i dohot tanganku, na huampehon tu nasida.

²²Asa tung ditanda pinompar ni Israel, ahu do Jahowa, Debatanasida i, olat ni sadarina i dohot tu jolo.

²³Tandaon ni angka bangso parbegu luhut binahen ni hajahatonnasida do hape umbahen na tarbuang pinompar ni Israel, ala mangose nasida maradophon ahu, gabe hutabunihon bohingku maradophon nasida, jala hupasahat nasida tu bagasan tangan ni angka musunasida, jala marragean nasida luhut marhitehite podang.

²⁴Hombar tu haramunonnasida dohot tu pangalaosionnasida tahe hubahen tu nasida, jala hutabunihon bohingku maradophon nasida.

²⁵(III.) Dibahen i, songon on do hata ni Tuhan Jahowa: langgo nuaeng mulak ma togihononku angka na tarbuang sian Jakkob, jala marpangulahi rohangku di sandok pinompar ni Israel, jala piripirion ahu humongkop goarhu na badia i.

²⁶Ia dung diusung nasida haurahonnasida i dohot sandok pangoseoseonnasida, na mangosei nasida dompak ahu, dung marsonangsonang nasida maringan di tanonasida i, jala ndang adong panonggoti nanggo sahalak.

²⁷ Ia dung mulak nasida huboan sian angka bangso, jala hupapungu nasida sian angka luat ni musunasida i, jala ahu pabadiahon diringku marhite sian nasida di adopan ni torop bangso parbegu.

²⁸ Jadi tandaon nasida ma, ahu do Jahowa, Debatanasida i, nang uju na hubuangkon nasida tu angka bangso parbegu, jala hupapungu nasida muse mulak tu tanonasida i, nanggo sahalak sian nasida tahe ndang tading disi hubahen.

²⁹ Jadi ndang be tabunihononku bohingku maradophon nasida, ia dung huusehon tondingku tu pinompar ni Israel, ninna Tuhan Jahowa!

40¹ (I.) Paduapululimataonhon dung tarbuang hami, di mula ni taon i, di ari sampulu ni bulan i, i ma pasampuluopattaonhon dung na tartaban huta i, apala di ari na sasada i songgop ma tu ahu tangan ni Jahowa, laos diboan ahu tusi.

² Di bagasan angka pangungkapon ni Debata tahe diboan ibana ahu tu tano Israel, jala dipaulon ahu tu atas ni sada dolok na timbo situtu, jala di atasna tarhinsat do songon sada huta na pinauli sambola tungkan dangsina.

³ Tusi ma ahu diboan ibana, gabe ida ma, adong disi sada baoa, rupana songon rupa ni tombaga, jala tali hori sada di bagasan tanganna dohot tolong pangungkur,

jala jongjong do ibana di bagasan pintu harbangan.

⁴Dung i ro ma hata ni baoa i tu ahu: Ale anak ni jolma, ida ma marhitehite matam, jala tangihon ma marhitehite pinggolmu, jala parateatehon ma saluhut na naeng pataridahononku tu ho, ai ala naeng pataridahononhon tu ho umbahen tarboan ho tuson; baritahon ma saluhut na niidam tu pinompar ni Israel.

⁵(II.) Jadi ida ma, adong sada parik sian ruar ni joro i tuk humaliang, jala di bagasan tangan ni baoa i do tolong pangungkur i, onom asta ganjangna, ganup saasta santopap, gabe disuhati ibana ma bohang ni parik ni joro i sada tolong pangungkur, timbona pe laos sada ungkuran do.

⁶Dung i ditopot ibana ma pintu harbangan i na tungkan habinsaran, jala dipanaek angka tanggana, jala diungkur lobulobu ni pintu harbangan i satolong pangungkur bidangna be, di ginjang dohot di toru.

⁷Jala ganup bilut parjagaan satolong pangungkur be unjurna dohot bohangna, jala holangholang ni angka bilut parjagaan i lima asta do, jala lobulobu ni pintu harbangan di lambung panisioan ni harbangan i niudut ro sian joro i satolong pangungkur do.

⁸Dung i disuhati ma panisioan ni harbangan i niudut ro sian joro i satolong pangungkur do.

⁹Disuhati muse dohot panisioan ni harbangan i ualu asta jala partungkoanna dua asta be, jala panisioan ni harbangan i niudut ro sian joro i.

¹⁰Jala tolu do angka bilut parjagaan ni panisioan i tungkan habinsaran angkup be, sisada ungkur do tolunsa; sisada ungkur huhut angka partungkoan i angkup be.

¹¹Dung i disuhati ma ruak ni pintu harbangan i sampulu asta, jala timbo ni harbangan i sampulu tolu asta.

¹²Jala dalan di jolo ni angka bilut saasta do angkupangkup be, jala angka bilut parjagaan i onom asta do angkupangkup be.

¹³Disuhati muse harbangan i sian tarup ni bilut parjagaan na sada sahat tu tarup ni bilut na asing, duapulu lima asta ruakna, patondong be angka pintu i.

¹⁴Dibahen do huhut angka partungkoan onompulu asta ganjangna, jala hombarhon partungkoan i do alaman ni harbangan i tuk humaliang.

¹⁵Jala di jolo ni harbangan haroroan sahat rodi jolo ni panisioan ni harbangan parbagasan limapulu asta do.

¹⁶Jala marpandiloan na sompit do angka bilut parjagaan i, lohот di tiangna tungkan bagasan hombarhon harbangan i tuk humaliang, suang songon i di angka dorpi parholangan adong huhut angka pandiloan

tuk humaliang tungkan bagasan, na niuhir do huhut tu tiang i gorgagorga ni hau harambir.

¹⁷Dung i diboan ibana ma ahu tu alaman apala parduru, gabe ida ma, adong disi angka bilut dohot pantar batu, na binahen di alaman i tuk humaliang, tolupulu angka bilut i di atas ni pantar batu manangkas.

¹⁸Jala pantar batu i di lambung ni angka harbangan mangihuthon unjur ni angka harbangan i, i ma pantar batu apala partoru.

¹⁹Dung i disuhati muse ruakna sian jolo harbangan partoru i sahat ro di alaman parbagasan i, sian ruar saratus asta tungkan habinsaran dohot tungkan utara.

²⁰Alai anggo pintu harbangan na tungkan utara hombarhon alaman parduru i, unjurna dohot bohangna disuhati.

²¹Tole bilutna parjagaan na tolu i angkupangkup be dohot partungkoanna ro di panisioanna, suang songon pangungkuron di harbangan parjolo i, limapulu asta unjurna jala duapulu lima asta bohangna.

²²Angka pandiloanna pe dohot panisioanna, partungkoanna ro di gorgagorgana harambir, suang songon pangungkuron di harbangan na tungkan habinsaran, jala pitu do anak ni tanggana laho tu ginjang, jala panisioanna di jolona.

²³Jala pintu harbangan ni alaman parbagasan tondong ni pintu harbangan tungkan utara dohot tungkan habinsaran,

gabe manuhati ibana sian harbangan na sada sahat tu harbangan na sadanari saratus asta do.

²⁴Dung i ditogihon ibana ma ahu tu dalam tungkan dangsina, gabe ida ma, adong dope pintu harbangan sada tungkan dangsina, laos disuhati ibana ma angka tiangna dohot partungkoanna mangihuthon pangungkuron parjolo i.

²⁵Marpandiloan do nang i jala marpanisioan tuk humaliang mangihuthon angka pandiloan parjolo i, limapulu asta unjurna, jala duapulu lima asta bohangna.

²⁶Jala pitu anak ni tanggana laho tu ginjang, jala angka panisioanna di jolona, jala margorga harambir sada be sambariba di angka partungkoanna.

²⁷(III.) Adong do huhut pintu harbangan sada laho tu alaman parbagasan i tungkan dangsina, laos manuhati ibana sian harbangan na sada sahat tu harbangan na sadanari tungkan dangsina saratus asta.

²⁸Dung i ditogihon ibana muse ahu tu alaman parbagasan i mardalan sian harbangan pardangsina, jala disuhati harbangan pardangsina i mangihuthon ungkuran parjolo i.

²⁹Tole angka bilutna parjagaan, tole angka tiangna dohot angka partungkoanna mangihuthon ungkuran parjolo i. Adong do huhut disi angka pandiloan di panisioanna

tuk humaliang, limapulu asta unjurna jala duapulu lima asta bohangna.

³⁰Jala angka panisioan tuk humaliang duapulu lima asta unjurna, jala lima asta bohangna.

³¹Jala angka panisioanna hombarhon alaman parduru i, jala margorga harambir do angka tiangna, jala ualu anak ni tanggana laho tu ginjang.

³²Dung i ditogihon ibana muse ahu tu alaman parbagasan i tungkan habinsaran jala disuhati pintu harbangan i mangihuthon ungkuran parjolo i.

³³Tole angka bilutna parjagaan dohot angka tiangna dohot angka panisioanna mangihuthon ungkuran parjolo i. Marpandiloan huhut angka panisioanna tuk humaliang, limapulu asta unjurna jala duapulu lima asta bohangna.

³⁴Jala panisioanna hombarhon alaman parduru i, jala margorga harambir di angka partungkoanna angkupangkup be, jala ualu anak ni tanggana laho tu ginjang.

³⁵Dung i diboan ibana ahu tu pintu harbangan tungkan utara, laos disuhati mangihuthon ungkuran parjolo i.

³⁶Tole angka bilutna parjagaan ro di tiangna dohot angka panisioanna, jala marpandiloan do i tuk humaliang, limapulu asta unjurna jala duapulu lima asta bohangna.

³⁷ Jala angka tiangna hombarhon alaman parduru i huhut margorga harambir di angka partungkoanna angkupangkup be, jala ualu anak ni tanggana laho tu ginjang.

³⁸ (IV.) Jala adong sada bilut ro di pintuna hombarhon angka tiang ni angka pintu harbangan i, disi do burionna sogot pelean situtungan.

³⁹ Jala di panisioan ni pintu harbangan i adong dua meja angkupangkup be, disi do seaton sogot angka pelean situtungan dohot pardosaon dohot pelean parsalaan.

⁴⁰ Dung i di na sambariba tungkan ruar laho nangkok tu pintu harbangan tungkan utara adong dua meja, jala di na sambariba nari hombarhon panisioan ni harbangan i adong muse dua meja.

⁴¹ Asa opat meja be di na sambariba hombarhon harbangan i, gabe ualu meja bahen paneatan ni pelean sogot.

⁴² Tole muse na opat meja di pelean situtungan sian batu na nidakdak do, tonga dua asta be unjurna dohot bidangna jala saasta timbona, tusi do peakkononhon sogot ulaula angka sipangkeon laho maneat pelean situtungan dohot pelean sipotongan.

⁴³ Jala dua pasi, santopap be bidangna lohok di parik ni joro i tuk humaliang, jala di atas ni angka meja i do juhut pelean i.

⁴⁴ Jala sian ruar hombarhon harbangan parbagasan i do angka bilut ni parende di

alaman parbagasan i, sarinte hombarhon
harbangan sambariba tungkan utara, adop
dangsina do nasida, rinte na sadanari
hombarhon harbangan sambariba tungkan
habinsaran adop utara do nasida.

⁴⁵Dung i ro ma hatana tu ahu: Bilut on,
na tungkan dangsina do di malim angka na
mangaradoti ulaon di bagasan joro.

⁴⁶Langgo bilut na tungkan utara di malim
angka na mangaradoti ulaon di langgatan; i
ma angka anak ni si Sadok angka na jumonok,
sian halak Lepi, tu Jahowa, marhalado di
ibana.

⁴⁷Dung i disuhati ibana ma alaman i:
Saratus asta be unjurna dohot bohanga
maropat suhi, jala langgatan i sonson di jolo
ni joro i.

⁴⁸Dung i diboan ibana ahu tu bagasan
emper ni joro i, jala disuhati tiang ni emper
i lima asta be angkupangkup, jala bohanga ni
harbangan i tolu asta be angkupangkup.

⁴⁹Langgo unjur ni emper i duapulu asta
do, jala bohanga sampulu sada asta, jala
martangga do laho tu ginjang, jala dua tiang
na bolon hombarhon angka tiang na asing,
sada be di na sambariba.

41¹(I.) Dung i diboan ibana ma ahu tu
joro i, laos disuhati ma angka tiang,
onom asta be bidangna di na sambariba,
mangihuthon bohanga ni undungundung i.

²Ia bohang ni pintu i sampulu asta do, jala lima asta be sambola di na sambariba, disuhati muse dohot unjur ni joro i opatpulu asta jala bohangna duapulu asta.

³Dung i bongot ma ibana tu bagasan, laos disuhati ma tiang ni pintu i dua asta, ia pintu i onom asta jala bohang ni pintu i pitu asta do.

⁴Dung i disuhati ibana ma unjurna duapulu asta, bohangna pe duapulu asta mangihuthon jolo ni joro i, jala didok ma tu ahu: On ma bilut na songkal sahali.

⁵Dung i disuhati ibana ma dorpi ni bagas i onom asta timbona jala bohang ni angka emper opat asta humaliang bagas i.

⁶Ia angka bilut emper sai masijaloan do tolu lampis tolupulu hali be, jala sahat do angka tu dorpi ni joro i hombarhon angka bilut emper tuk humaliang, asa masirogangan, alai ndada hot anggo di bagasan dorpi ni joro i.

⁷Jala lam tu ginjang lam tu lambasna do angka bilut emper humaliang, ai tarbahen do mardalan humaliang, joro i tu ginjang tung tuk humaliang joro i tu ginjang, dibahen i lumambas do joro i di ginjang gabe tarbahen manaek sian bilut partoru, boti tu partonga sahat tu parginjang.

⁸Huida huhut di joro i na jukjuk tu ginjang tuk humaliang. Angka ojanan ni angka bilut emper gok do sada ungkuran, i ma onom asta sahat ro di sumban.

⁹Ia bidang ni dorpi ni bilut emper tungkan ruar lima asta do jala na rumar pinasomba holangholang ni angka bilut emper na di joro i.

¹⁰Tole bohang holangholang ni angka bilut i duapulu asta do tuk humaliang joro i.

¹¹Jala pintu ni bilut emper i tondong ni na rumar pinasombu, sada pintu tungkan utara, jala sada pintu tungkan dangsina, jala bohang ni inganan na rumar pinasombu lima asta do tuk humaliang.

¹²Ia bagas na tungkan inganan na pinapulik i di na sambariba tungkan laut, pitupulu asta do bohangna, jala parik ni bagas i lima asta bohangna tuk humaliang, jala unjurna siapulu asta do.

¹³Disuhati ibana huhut joro i saratus asta unjurna ro di inganan na pinapulik i dohot bagas i dohot angka dorpina saratus asta do unjurna.

¹⁴Jala bohang di jolo ni joro i ro di inganan na pinapulik i tungkan habinsaran saratus asta do.

¹⁵Dung i disuhati ma unjur ni bagas i tungkan inganan na pinapulik i na di pudina ro di angka emper na angkupangkup be, saratus asta do ro di joro parbagasan i dohot angka panisioan ni alaman i.

¹⁶Angka lobulobu dohot pandiloan angka na sompit i ro di angka emper humaliang di na tolu suhi tondong ni lobulobu i na nilampis

dohot hau do i tuk humaliang, sian tano sahat ro di angka pandiloan, angka pandiloan pe tahe pola tarlampis do.

¹⁷Tungkan ginjang ni pintu i jala sahat tu bagas parbagasan i boti tu ruar, boti mangoriori sandok dorpi tuk humaliang di bagasan dohot di ruar marungkur be do.

¹⁸(II.) Jala nunga dijadihon hian angka kerubim dohot gorga harambir, sai sada harambir di holangholang ni dua kerubim, jala mardua bohi do kerubim i.

¹⁹Bohijolma tahe maradophon harambir sambariba on, jala bohi singa maradophon harambir sambariba i; tarjadi do songon i di sandok joro i tuk humaliang.

²⁰Olat ni tano sahat ro di atas ni pintu i do tarjadi angka kerubim dohot harambir, laos songon i di dorpi ni joro i.

²¹Maropat suhi do angka tiang ni joro i jala adopan ni habadiaon i, sisada rupa do idaon.

²²Ia langgatan hau tolu asta timbona, jala unjurna dua asta jala marsuhisuhi do ibana, jala unjurna dohot dorpina sian hau do; dung i ro ma hatana tu ahu: On ma meja na di adopan ni Jahowa.

²³Jala dua hinsuhinsu be di joro dohot di habadiaon i.

²⁴Jala dua hinsuhinsu di ganup pintu, dua hinsuhinsu na mordong humaliang, dua do di pintu na sada, laos dua hinsuhinsu di na sadanari.

²⁵Tarjadi do huhut di nasida, lohot di hinsuhinsu ni joro i angka kerubim dohot harambir, suang songon na tarjadi di angka dorpi, jala adong sada lobulobu hau tungkan emper i sian ruar.

²⁶Adong huhut pandiloan angka na sompit dohot harambir angkupangkup hombarhon lambung ni emper i dohot angka bilut emper ni bagas i ro di angka sumban.

42¹(I.) Dung i ditogihon ibana ahu tu alaman parduru i, dalan tungkan utara, jala diboan ahu tu bagasan angka bilut tondong ni inganan na pinapulik i, jala tondong ni bagas i tungkan utara.

²Mangihuthon unjurna di jolo saratus asta sahat ro di pintu tungkan utara, jala bohangna limapulu asta.

³Tondong ni na duapulu asta angka na masuk tu alaman parbagasan i, jala tondong ni pantar batu na masuk tu alaman parduru i, adop be do emper tu emper tolu lampis.

⁴Jala di jolo ni angka bilut adong sada dalan sampulu asta bidangna laho tu alaman parbagasan i, sisaasta be do dalan laho tu angka bilut, jala angka pintuna tungkan utara do.

⁵Asa gumogot do angka bilut parginjang i, ai juruk do pangalaho ni angka emper mamuati sian angka bilut partoru dohot partonga di bagas i.

⁶Ai tolu lampis do angka bilut i, jala ndang dos tiangna songon tiang ni angka alaman i, ala na binuatan do sian partoru dohot sian partonga mamungka sian patna.

⁷Jala parik parholangan na tungkan ruar hombarhon angka bilut i, tondong ni alaman parduru i, gistang do di jolo ni angka bilut, limapulu asta unjurna.

⁸Ai unjur ni angka bilut hombarhon alaman parduru i limapulu asta do; alai ida ma, anggo di jolo ni joro i saratus asta do.

⁹Jala sian toru ni angka bilut i adong sada haroroan sian habinsaran, molo bongot iba tusi sian alaman parduru i.

¹⁰Mangihuthon bohangan ni parik parholangan ni alaman i tungkan habinsaran, di jolo ni inganan na pinapulik i, jala di jolo ni bagas i adong huhut angka bilut.

¹¹Di jolo ni angka i adong huhut sada dalan suman tu dalan ni bilut angka na tungkan utara, dos unjurna dohot bohagna, ro di sude dalan na laho ruar, mangihuthon rumangna dohot pintuna.

¹²Suang songon i dohot hinsuhinsu ni angka bilut i, angka na tungkan dangsina, adong sada pintu di bona ni dalan, tondong ni parik na tigor i tungkan habinsaran laho bongot iba.

¹³Dung i ninna ibana ma tu ahu: Angka bilut tungkan utara, angka bilut tungkan dangsina pe angka na di jolo ni inganan na pinapulik

i, i ma angka bilut na badia, ingkon disi do panganon ni malim, angka na jumonok tu Jahowa, pelean angka na badia sahali, disi huhut peakkononnasida pelean angka na badia sahali, angka pelean sipanganon, pelean pardosaon dohot pelean parsalaan, ai na badia do inganan i.

¹⁴Ia dung masuk angka malim i, ndang jadi ruar nasida sian inganan na badia i laho tu alaman parduru i, ingkon jolo tanggalanna disi pangkeanna, angka na pinangkena marhalado, ai angka na badia do i, jala ulos angka na asing solukkononna, molo laho nasida mandapothon situasi na torop i.

¹⁵(II.) Jadi dung tolhas angka ungkuran ni joro i di bagasan, gabe ditogihon ibana ah ruar mardalan sian harbangan na tungkan habinsaran, laos disuhati do i tuk humaliang.

¹⁶Disuhati ma sambariba tungkan habinsaran marhitehite tolong ungkuran i, limaratus ungkuran i tuk humaliang.

¹⁷Disuhati muse sambariba tungkan utara, suang limaratus ungkuran i tuk humaliang.

¹⁸Disuhati muse sambariba tungkan dangsina, suang limaratus ungkuran i.

¹⁹Marliat muse tu sambariba tungkan hasundutan disuhati suang muse limaratus ungkuran i.

²⁰Asa mangihuthon desa na opat i do joro i disuhati ibana; marparik do i tuk humaliang, unjurna limaratus ungkuran i, bohangna

pe limaratus ungkuran laho mambahen
parsirangan ni na badia sian na ramun.

43¹ (I.) Dung i ditogihon ibana ahu
tu harbangan i, i ma harbangan na
tungan habinsaran.

²Jadi ida ma, ro do hamuliaon ni Debata
ni Israel sian habinsaran, jala soarana
songon parhasak ni aek magodang,
jala marsinondang tano on binahen ni
hamuliaonna.

³Jala pangungkapon i suang songon
pangungkapon na huida na jolo, songon
pangungkapon na huida uju na ro ahu laho
mangago huta i, jala songon pangungkapon
na huida uju di topi ni batang aek Hebar, gabe
manungkap ahu tu tano.

⁴Dung i masuk ma hamuliaon ni Jahowa tu
bagasan joro i, mardalan sian harbangan na
tungan habinsaran.

⁵Dung i dihindat Tondi i ma ahu, laos diboan
ahu tu alaman parbagasan i, gabe ida ma,
gok hamuliaon ni Jahowa do joro i.

⁶Dung i hubege ro hata ni na sahalak tu
ahu sian joro i, jala jongjong sada baoa di
lambungku.

⁷Jadi ninna ibana ma tu ahu: Ale anak ni
jolma, on do hajongjongan ni habangsangku,
jala sidegedegean ni palak ni pathu, disi do
ahu maringan di tongatonga ni halak Israel ro
di salelenglelengna! Jala ndang be ramunan
ni pinompar ni Israel goarhu na badia i,

nang nasida, nang rajanasida marhitehite
parmainanonnasida dohot marhitehite bangke
ni angka rajanasida di hamamatenasida i.

⁸Uju na binahennasida lobulobunasida
hombarihon lobulobungku, jala tiang nasida
di lambung ni tiangku, gabe dorpi saming
parholanganku sian nasida; asa diramuni
nasida goarhu na badia i marhitehite
hasogiron angka na niulahonnasida i, gabe
suda nasida dipangan rimashu.

⁹Ianggo nuaeng paholangonnasida ma
parmainanonnasida i sian ahu ro di bangke
ni angka rajanasida, asa maringan ahu di
tongatonganasida ro di salelenglelengna.

¹⁰On pe, ho ale anak ni jolma, patuduhon
ma tu pinompar ni Israel joro on, asa tung
maila nasida ala ni hajahatonnasida i, ingkon
suhatannasida ungkuran tiruan i.

¹¹Ia dung maila nasida ala saluhut na
binahennasida i, pabotohononmu ma tu
nasida rumang ni joro i dohot parpaulina
angka dalanna laho ruar dohot laho masuk
ro di sandok rumangna dohot angka patikna,
angka panjadianna dohot angka patik ni
uhumna, jala surathon di adopannasida, asa
diramoti nasida sandok panjadianna dohot
angka patikna laos diulahon nasida antong.

¹²Jala on do aturan ni joro i: Di atas
punsu ni dolok i do sandok parbolatanna tuk
humaliang, i ma na songkal sahali. Ida ma, i
ma aturan ni joro i.

¹³(II.) Jala ondo angka ungkuran ni langgatan marasta, sasaasta dohot santopap ganjangna. Ia patna saasta timbona jala saasta bohanga, jala bibirna di topina sanjongkal humaliang, i ma pat ni langgatan i.

¹⁴Sian patna di tano i sahat ro di tanggana partoru dua asta do, jala bohanga saasta; jala sian tanggana na metmet i sahat ro di tanggana na balga, opat asta do, laos saasta do anggo bohanga.

¹⁵Jala "dolok ni Debata" opat asta do; jala sian "tataring ni Debata" tu ginjang adong opat tanduk.

¹⁶Ia "tataring ni Debata" sampulu dua asta be do unjurna dohot bohanga, maropat suhi mangihuthon lambunga na opat i.

¹⁷Ia partanggana sampulu opat asta be do unjurna dohot bohanga, mangihuthon lambunga na opat i, jala bibirna humaliang ibana satonga asta timbona, jala patna saasta humaliang, jala tanggana tungkan habinsaran do.

¹⁸Dung i ninna ibana muse tu ahu: Ale anak ni jolma, songon on do hata ni Tuhan Jahowa: On ma angka aturan taringot tu langgatan di ari panjadionna i sogot, ingkon pelehononhon di atasna angka pelean situtungon, jala pistikkononhon mudar i tusi.

¹⁹Tu angka malim, halak Lepi, angka na sian pinompar ni si Sadok, angka na jumonok

tu ahu mangaradoti ulaonku, ninna Tuhan Jahowa, ingkon lehononmu do anak ni lembu sada bahen pelean pardosaon.

²⁰Jala ingkon buatonmu do sian mudarna, jala pistikkononmu do tu tandukna na opat i dohot tu na opat suhi ni partanggaon i dohot tu bibirna humaliang asa urasonmu do i jala mambahen pardenggananna.

²¹Ingkon buatonmu huhut anak ni lembu pelean pardosaon i, asa tutungon ni halak di inganan ni joro naung pinatik hian, di balian ni inganan na badia i.

²²Tole paduaarihon ingkon pelehononmu ma hambing tunggal sada na so martihas bahen pelean pardosaon, asa diurasi nasida langgatan i, songon naung niurasanna i marhitehite anak ni lembu.

²³Ia dung tolhas pangurasionmi, pelehononmu ma anak ni lembu sada na so martihas dohot birubiru tunggal sada sian pungan i, na so martihas.

²⁴Jala ingkon pelehononmu duansa di adopan ni Jahowa jala pirpirhonon ni angka malim sira tu atasna, asa pelehononna do i bahen pelean situtungon di Jahowa.

²⁵Ingkon pitu ari padodot hobasonmu hambing tunggal sada bahen pelean pardosaon gonop ari, angkup ni anak ni lembu sada dohot birubiru tunggal sada sian pungan i, angka na so martihas hobasonnasida.

²⁶Ingkon pitu ari padodot bahenonnasida pardenggan ni langgatan i jala urasanna, jala gohanna tangan ni malim i.

²⁷Ia dung ditolhasi nasida angka ari i, tole paualuarihon dohot di pudi ni, ingkon hobason ni angka malim ma di atas ni langgatan i angka peleanmuna situtungon dohot angka peleanmuna hamauliateon, asa huhalomohon hamu, ninna Tuhan Jahowa.

44¹(I.) Dung i ditogihon ibana ahu mulak sian dalan laho tu pintu ruar ni inganan na badia i na tungkan habinsaran, hape hinsu do i nidapot.

²Dung i ninna Jahowa ma tu ahu: Ingkon laos hinsu do anggo pintu on, ndang jadi ungkapon, sahalak pe ndang jadi masuk sian i ala Jahowa, Debata ni Israel, naung masuk sian i; umbahen ingkon laos tarhinsu.

³Taringot tu induk i, induk do ibana tongon, umbahen ingkon hundul ibana di bagasanna laho manganhon roti di adopan ni Jahowa; ingkon mardalan sian panisioan ni harbangan i ibana laho bongot, laos sian dalan i muse ibana ruar.

⁴Dung i diboan ibana ahu sian dalan tu harbangan na tungkan utara tu jolo ni joro i, gabe ida ma, gok hamuliaon ni Jahowa do joro ni Jahowa huida, jadi manungkap ma ahu tu tano.

⁵Dung i ninna Jahowa ma tu ahu: Ale anak ni jolma, parateatehon ma on jala ida

marhitehite matam jala tangihon marhitehite
pinggolmu saluhut sipaboakonku tu ho,
taringot tu saluhut aturan ni joro ni Jahowa
dohot taringot tu sandok patik ni uhumna,
jala ingkon pampeonmu tu roham dalan laho
bongot tu joro i ro di sude dalan laho ruar
sian inganan na badia i!

⁶Jala dohononmu ma tu pinompar ni Israel
na tangkangi: Songon on do hata ni Tuhan
Jahowa: Tung na torbang do hamu, ale
pinompar ni Israel mangulahon luhut angka
hasogiron marragamragam.

⁷Tung ditogihon hamu do angka halak ruar,
angka na so tarsunat rohana dohot dagingna,
asa masuk tu ingananku na badia i laho
paramunhon jorongki, di na pinelehonmuna
rotingku, i ma tabotabo dohot mudar, tung
diose nasida do padan na hubahen i marhite
sian saluhut hasogiron angka na niulamuna i.

⁸Jala ndang diradoti hamu ulaon ni
habadiaonku, tung roharoha do dibahen
hamu pabangkithon halak bahen siradoti
ulaonku gantimuna di ingananku na badia i.

⁹(II.) Songon on do hata ni Tuhan Jahowa:
Sandok halak ruar angka na so tarsunat
rohana dohot dagingna, ndang jadi masuk tu
ingananku na badia i, sandok halak ruar tahe,
angka na maisolat di tongatonga ni halak
Israel.

¹⁰Gari halak Lepi, angka na paholang
dirina sian ahu, uju na lilu Israel, angka

na lilu tumundalhon ahu mangihuthon tu angka ganaganaannasida, ingkon usungonna hajahatonnasida i:

¹¹Ingkon gabe parhalado nama nasida di ingananku badia i, gabe angka parjaga di lambung ni angka pintu ni joro i, gabe angka parhalado di bagasan joro i: Angka nasida do maneati sogot pelean situtungon dohot pelean sipotongon di situan na torop i, ingkon tindang nasida di adopannasida marhalado di nasida.

¹²Ala na marhalado nasida na jolo di nasida di adopan ni angka ganaganaannasida, asa mambahen parbonsiran tu hajahaton di pinompar ni Israel, ala ni do hupatoltol tanganku dompak nasida, ninna Tuhan Jahowa, ingkon manginona tu nasida hajahatonnasida i:

¹³Ndang jadi be nasida jumonok tu ahu mangaradoti tohonan malim di ahu, manang jumonok pe tu sandok habadiaonku, manang tu na songkal sahali, ingkon usungonnasida haurahonnasida i dohot hasogiron, angka na niulanasida i.

¹⁴Jadi hubahen nasida angka siradoti parjagaon di joro i mangaradoti sandok ulaonna ro di sude sibahenon disi.

¹⁵(III.) Alai anggo angka malim, halak Lepi, angka anak ni si Sadok, angka na tongtong mangaradoti ulaon ni habadiaonku, uju na lilu halak Israel sian ahu, ianggo nasida ingkon

jumonok tu ahu marhalado di ahu, ingkon tindang nasida di jolongku laho umpelehon tu ahu tabotabo dohot mudar, ninna Tuhan Jahowa!

¹⁶Ingkon nasida bongot tu habadiaonku, jala nasida jumonok tu mejangku marhalado di jolongku, jala mangaradoti ulaonku.

¹⁷Molo naeng bongotannasida angka pintu ni alaman parbagasan i, ingkon solukkononnasida pangkean hori, ndang jadi alit tu nasida pangkean sian imput ni birubiru saleleng marhalado nasida di bagasan angka pintu ni alaman parbagasan i manang di bagasan joro i.

¹⁸Ingkon martalitali hori nang ulunasida, jala saraoal hori di gontingnasida, ndang jadi marhohosnasida, pola hodokan dibahen.

¹⁹Ia laho ruar nasida tu alaman parduru, tu alaman parduru sahali mandapothon halak situan na torop tahe, ingkon tanggalannasida pangkeannasida, angka na pinangkena marhalado, jala pajoponna do i di bagasan angka bilut ni habadiaon i, jala solukkononna muse angka ulos hian, asa unang diparbadiai nasida situan na torop i marhitehite pangkeannasida i.

²⁰Ulunasida pe ndang jadi nabunganna manang pasombuonna obukna ganjang, asal simburanna do obuk ni ulunasida i.

²¹Nasa malim, ndang jadi minum anggur laho bongot nasida tu alaman parbagasan i.

²²Ndang jadi buatonna parompuan na mabalu manang na binolongkon bahenjolmanasida, ingkon namarbaju do sian pinompar ni bangso Israel, manang parompuan naung mangkabaluhon malim buatonna.

²³Ingkon podaannasida huhut bangsongku, asa diboto nasida parsirang ni na badia martimbangkon na ursam dohot parsirang ni na ramun martimbangkon na pansing.

²⁴Molo tubu parsalisian, ingkon tindang nasida laho manguhum, hombar tu angka uhumhu uhumonna; jala patik ni uhumhu dohot patikpatikku, ingkon radotannasida do di saluhut ari rayangku, jala angka ari Sabbathu parbadiaannasida.

²⁵Bangke nijolma na mate pe ndang jadi tingkironnasida paramunhon dirina, dungkon ni ama manang ina, manang anak, manang boru, manang hahaanggi, manang iboto na so dung marharajaan, itenang diramuni nasida disi.

²⁶Ia dung muse diuras dirina ingkon jujuron dope pitu ari tu ibana.

²⁷Dung i di ari habobongotna muse tu habadiaon i, tu alaman parbagasan i, laho marhalado di bagasan habadiaon i, ingkon pelehonna pelean pardosaonna i, ninna Tuhan Jahowa!

²⁸Ingkon adong huhut partalian di nasida, ahu do tahe partaliannasida, asa ndang

jadi lehononmuna partohapan tu nasida di tongatonga ni Israel, ahu do tahe partohapannasida i.

²⁹Alai anggo pelean sipanganon dohot pelean pardosaon dohot pelean parsalaan, ingkon nasida do manganhon i, jala sandok na niontongkon di tongatonga ni Israel, nasida do nampunasa.

³⁰Angkup ni patumonaan ni sandok parjolo tubu, ro di sude pelean tatingan sian saluhut peleanmuna i, ingkon angka malim nampunasa, nang patumonaan ni na niudimuna, ingkon lehononmuna do tu malim, asa mian pasupasu di atas ni bagasmu.

³¹Alai nasa bangke manang juhut soroan binahen ni pidong manang binatang ndang jadi panganon ni angka malim.

45¹(I.) Dung i molo disagi hamu tano i marpartalian, ingkon papulihonmuna do pelean tatingan sada di Jahowa, sapartalian tano na badia, unjurna duapulu lima ribu asta, jala bohangna sampulu ribu asta, habadiaon do i di sandok parbolatanna humaliang.

²Ingkon masuk sian i tu inganan na badia i limaratus asta be unjurna dohot bolangna maropatsuhi tuk humaliang; angkup ni ingkon limapulu asta alamanna di ruar tuk humaliang.

³Jala mangihuthon ungkuran i suhatanmu muse duapulu lima ribu asta jala bohangna

sampulu ribu asta, ingkon di parsitongaanna do inganan na badia i, i ma inganan na songkal sahali.

⁴I ma apala habadiaon di tano i, ingkon i ma partalian ni angka malim, angka na marhalado di bagasan inganan na badia i, angka na jumonok marhalado di Jahowa, i ma bahen hajongjongan ni angka bagas di nasida; jala tano na badia do humaliang inganan na badia i.

⁵Jala duapulu lima ribu asta unjur jala sampulu ribu asta bohang, ingkon lehonon tu halak Lepi angka parhalado di bagasan joro i bahen partalian di nasida, duapulu bilut.

⁶Jala partalian ni huta ingkon lehononmuna do lima ribu asta bohangna jala duapulu lima ribu asta unjurna patampaktampak dohot pelean tatingan na badia i: I ma di sandok pinompar ni Israel.

⁷Ilanggo tu induk i: Sian baribaon dohot sian bariba i ni pelean tatingan na badia i dohot sian partalian ni huta i di jolo ni pelean tatingan na badia i dohot di jolo ni partalian ni huta i tungkan hasundutan dohot tungkan habinsaran, jala unjurna patampaktampak sada sian angka partalian sian partalpahanna hasundutan sahat ro di partalpahan habinsaran.

⁸Ingkon gabe tanona sandiri do i bahen partalian di tongatonga ni Israel, asa unang be rupaon ni angka indukhu bangsongki,

ingkon lehononnasida do tano i tu pinompar ni Israel mangihuthon margana be.

⁹(II.) Songon on do hata ni Tuhan Jahowa: Tung na torbang do hamu, ale angka induk ni Israel! Paholang hamu ma pangarupaon dohot hamagoan, jala ulahon hamu ma uhum dohot hatigoran! Pasohot hamu ma panosakmuna mangonjaronjar bangsongku sian partalianna, ninna Tuhan Jahowa!

¹⁰Ingkon masa di hamu timbangan na sintong dohot ampang na sintong dohot poting na sintong.

¹¹Ingkon ampang dohot poting, ingkon dos tu tulukna, asa saparsampulu ni sada tuhukan do sada poting, jala saparsampulu tuhukan do sada ampang ingkon tuhukan do panuluhanna.

¹²Alai anggo sada mas, ingkon duapulu ringgit do. Duapulu mas dohot duapulu lima mas dohot sampulu lima mas ingkon sada tail di hamu.

¹³On do pelean tatingan siguguanmuna i: Saparonom ni sada ampang sian sada tuhukan dahanon, jala saparonom ni sada ampang sian sada tuhukan eme.

¹⁴Ia aturan ni miak, ingkon marpoting do boanonna, sada poting, pasampuluhon sian sada pingkul, asa sampulu poting gabe sada tuhukan, ai sampulu poting do tongon sada tuhukan.

¹⁵Jala sada anak ni birubiru sian duaratus birubiru sian tano ni Israel na tangkas di aek bahen pelean sipanganon, pelean situtungon dohot pelean hamauliateon, bahen pardenggan di nasida, ninna Tuhan Jahowa.

¹⁶Ingkon sandok bangso ni tano i margugu tu pelean tatingan i di induk ni Israel.

¹⁷Ingkon radotan ni induk i do antong angka pelean situtungon, pelean sipanganon dohot pelean siinumon di angka ari raya, di angka poltak ni bulan, di angka ari Sabbath pe ro di sandok ari raya bolon di pinompar ni Israel; ingkon ibana patupahon pelean pardosaon, pelean sipanganon, pelean situtungon dohot angka pelean hamauliateon bahen pardenggan di pinompar ni Israel.

¹⁸(III.) Songon on do hata ni Tuhan Jahowa: Di artia di bulan sipaha sada ingkon buatonmu ma anak ni lembu sada na sa martihas, asa urasonmu inganan na badia i.

¹⁹Jala ingkon buaton ni malim do deba sian mudar ni pelean pardosaon i, jala pistikkononna tu angka tiang ni joro i dohot tu na opat suhi ni langgatan na martagahambing dohot tu tiang ni pintu ni alaman parbagasan i.

²⁰Suang songon i ingkon bahenonmu papituarhon di bulan i manguras baoa na lilu manang na tarpaoto mambahen pardenggan di joro i.

²¹ Pasampuluopatarihon di bulan sipaha sada, ingkon masa di hamu Paska, ari raya sipitu ari padodot, ingkon sagusagu na so niasoman panganon disi.

²² Ingkon patupaon ni induk i di ari na sasada i anak ni lembu sada bahen pelean pardosaon humongkop ibana sandiri dohot humongkop bangso ni tano i.

²³ Di na pitu ari raya i pe ingkon patupaonna ganup ari bahen pelean situtungan di Jahowa pitu anak ni lembu dohot pitu birubiru tunggal, angka na so martihas, huhut sada hambing tunggal bahen pelean pardosaon ganup ari.

²⁴ Ingkon patupaonna huhut bahen pelean sipanganon, sada ampang dongan ni anak ni lembu sada, jala sada ampang dongan ni birubiru tunggal sada, jala miak sada bale dongan ni ampang sada.

²⁵ Pasampululimaarihon di bulan sipaha pitu ingkon patupaonna suang songon i di ari raya pitu ari padodot, songon i pelean pardosaon, tole pelean situtungan, tole muse pelean sipanganon, songon i nang miahi.

46¹ (I.) Songon on do hata ni Tuhan Jahowa: Pintu ni alaman parbagasan i na tungkan habinsaran, ingkon hinsuon do na onom ari siulahononhon, alai anggo di ari Sabbath dohot di ari poltak ni bulan, ingkon ungkapon do.

²Dung i ingkon bongot induk i mardalan sian panisioan ni pintu ruar, jala tindang ibana di lambung tiang ni pintu i; dung i hobason ni angka malim ma peleanna situtungan dohot peleanna hamauliateon, marsinggang ma ianggo induk i di atas lobulobu ni pintu i, dung i ruar ibana muse alai ndang jadi hinsuon ianggo pintu i sahat ro di bodari.

³Ingkon marsinggang ma nang bangso ni tano i di baba pintu i di angka ari Sabbath dohot di poltak ni bulan di adopan ni Jahowa.

⁴Alai anggo pelean situtungan sipelehonon ni induk i tu Jahowa di ari Sabbath, onom do anak ni birubiru angka na so martihas dohot sada birubiru tunggal do so martihas.

⁵Ia pelean sipanganon suda do sada ampang dongan ni sada birubiru tunggal, jala dongan ni angka anak ni birubiru bahen pelean sipanganon marguru tu pangalehon ni tanganna do, jala miak sada bale dongan ni sada ampang.

⁶Jala di ari poltak ni bulan ingkon pelehononna: Anak ni lembu sada na so martihas dohot onom anak ni birubiru dohot sada birubiru tunggal, angka na so martihas.

⁷Jala sada ampang dongan ni anak ni lembu, jala sada ampang dongan ni birubiru tunggal patupaonna bahen pelean sipanganon, jala dongan ni angka anak ni birubiru marguru tu na dapot tanganna, jala miak sada bale dongan ni sada ampang.

⁸Dung i molo bongot induk i, ingkon ro ibana sian dalan ni panisioan ni pintu i, laos sian dalanna i muse ruar.

⁹Alai molo ro bangso isi ni tano i tu jolo ni Jahowa di angka ari raya bolon, ia bongot ibana sian dalan ni pintu tungkan utara laho marsomba, ingkon ruar ibana sian dalan ni pintu tungkan dangsina; ia bongot ibana sian dalan ni pintu tungkan dangsina, ingkon ruar ibana sian dalan ni pintu tungkan utara; ndang jadi mulak ibana sian dalan ni pintu habongotanna i, ingkon tu jolona tulusonna laho ruar.

¹⁰Nang induk i di tongatonganasida, ingkon rap bongot jala rap ruar nasida.

¹¹Jala di angka ari raya hian dohot di angka ari raya bolon, ingkon on do pelean sipanganon: Sada ampang dongan ni anak ni lembu sada, jala sada ampang dongan ni birubiru tunggal sada; alai anggo dongan ni angka anak ni birubiru, guru pangalehon ni tanganna do, jala miak sada bale dongan ni sada ampang.

¹²Alai molo naeng patupaon ni induk i pelean situtungan sian lomona, manang angka pelean hamauliateon tu Jahowa sian lomona, ingkon ungkapon di ibana pintu na tungkan habinsaran, asa dipatupa peleanna situtungan dohot angka peleanna hamauliateon, suang songon na binahenna di ari Sabbath; ia laho

ruar ibana muse, ingkon hinsuon ni halak do pintu i dung ruar ibana.

¹³Jala ingkon patupaonmu anak ni birubiru sada sisataon, na so martihas bahen pelean situtungon ariari tu Jahowa; ganup sogot do i patupaonmu.

¹⁴Ingkon patupaonmu huhut pelean sipanganon donganna ganup sogot saparonom ampang dohot miak sapartolu bale laho pabornok itak bahen pelean sipanganon tu Jahowa. I ma angka aturan na hot ro di salelenglelengna.

¹⁵Ingkon songon i patupaonnasida anak ni birubiru dohot pelean sipanganon i dohot miahi ganup sogot ro di salelenglelengna.

¹⁶(II.) Songon on do hata ni Tuhan Jahowa: Molo naeng mardenggan basa induk i tu sada sian angka anakna, tung pargolatanna hian do, ingkon saut di angka anakna, laos partohapannasida ma i bahen pargolatan.

¹⁷Alai molo naeng mardenggan basa ibana sian pargolatanna tu naposona sada halak, jadi saut ma di ibana sahat ro di taon haluaon, dung i mulak tu induk i, holan di angka anakna do tama pargolatanna.

¹⁸Jala ndang jadi buaton ni induk i sian pargolatan ni bangso i pahabangkon nasida sian partohapannasida; ingkon sian partohapanna sandiri lehononna bahen pargolatan ni angka anakna, asa unang

purpur sian partohapanna manang ise sian bangsongku.

¹⁹(III.) Dung i diboan ibana ahu tu dalan haroroan na di lambung pintu laho tu bilut angka na badia, angka siadop utara, tu angka malim, gabe ida ma, adong disi sada inganan di na dua suhi sambariba tungkan hasundutan.

²⁰Dung i ninna ibana ma tu ahu: On ma inganan ni angka malim mangalompas di pelean parsalaan, pelean pardosaon, laos di masahannasida pelean sipanganon, asa unang ruar boanonna tu alaman parduru i pabadiahon situasi na torop i.

²¹Dung i diboan ibana ahu ruar tu alaman parduru i, jala dipabolushon ahu sian na opat suhi ni alaman i, gabe ida ma, adong di ganup suhi ni alaman i sada alaman na metmet;

²²Di na opat suhi ni alaman i adong angka alaman na metmet mardongan partimusan, opatpulu asta unjurna, jala tolupulu asta bohagna, sisada ungkuran do na opat suhi ni alaman i.

²³Jala parik na metmet tuk humaliang, humaliang na opat suhi i jala pinauli angka tataring di toru ni angka parik na metmet i humaliang.

²⁴Dung i ninna ibana ma tu ahu: On ma bagas ni angka pande sipanganon, asa di dilompas angka parhalado ni joro i pelean sipotongon ni bangso i.

47 ¹ (I.) Dung i ditogihon ibana ahu mulak tu pintu ni joro i, gabe ida ma, ruar angka aek sian toru ni lobulobu ni joro i tungkan purba, ai siadop habinsaran do joro i; mabaor huhut angka aek i sian toru ni sambariba ni joro i tungkan siamun, tungkan dangsina ni langgatan i.

² Dung i ditogihon ibana ahu ruar tu dalan ni pintu tungkan utara, jala diiringiring ahu di dalan ruar sahat tu pintu ruar na tungkan habinsaran, gabe ida ma, marbullakbullak angka aek i sian sambariba tungkan siamun.

³ Di na ruar baoa i tungkan habinsaran, jala tali ungkuran sada di bagasan tanganna, gabe disuhati ma saribu asta, jala ditogihon ahu taripar aek i, gabe sahat aek i ro di mata ni ari ni tot.

⁴ Dung i disuhati ibana muse saribu asta, jala ditogihon ahu taripar aek i, gabe sahat aek i ro di ulu ni tot; manuhati muse ibana saribu asta, jala ditogihon ahu taripar, gabe sahat aek i ro di gonting.

⁵ Manuhati muse ibana saribu asta, gabe batang aek sada na so hatariparan ahu ala bagas ni angka aek i, ingkon langedan nama aek i, batang aek na so hatariparan do i.

⁶ Dung i ninna ibana ma tu ahu: Nunga tung diida ho ale anak nijolma? Dung i ditogihon ibana ahu mulak tu topi ni batang aek i.

⁷ Jadi dung mulak ahu, gabe ida ma, tungkan pasir ni batang aek i adong hau mansai godang angkupangkup be.

⁸ Dung i ninna ibana ma tu ahu: Angka aek on ruar do tu parbolatan tungkan habinsaran, jala mabaor tu adaran jala tolhas tu laut, dung tolhas tu laut aek angka na ruar i, gabe angka aek mata do.

⁹ Gari saluhut hosa na mangolu, na manggulmit, sai mangolu do manang tudia pe hasahatan ni batang aek na dua i, mansai deak huhut dengke disi, ala tusi angka aek i, jala hisar huhut mangolu saluhut hasahatan ni batang aek i.

¹⁰ Dung i jongjong angka pardengke di lambungna, olat ni En-Gedi sahat ro di En Eglaim bahen paninaran ni angka jala do i; marragam disi angka dengkena, songon dengke ni laut godang, mansai deak.

¹¹ Alai anggo ombikna dohot ambarna, ndang tarinum, tong do ansim.

¹² Jala di topi ni batang aek i tubu do angkupangkup be ragamragam ni hau sipanganon, ndang olo malos bulungna, jala ndang montok parbuena, manjujur bulanna marpatumonaan, ai ruar sian inganan na badia i do angka aekna; jala parbuena tau sipanganon, jala bulungna tau ubat.

¹³ (II.) Songon on do hata ni Tuhan Jahowa: On do parbolatan ni tano sibagionmuna bahen

partalian di na sampulu dua marga ni Israel:
Di Josep dua bagian.

¹⁴Ingkon hamu do manean tano i, dos
pe partalianmuna, nunga pola hupatoitol
tanganku maruari, ingkon lehononku do i tu
ompumuna, ingkon gabe pargolatanmuna do
tano i.

¹⁵Jala on do parbolatan ni tano i, di na
sambariba tungkan utara sian laut godang
mardalan sian Hetlon sahat tu Jedad:

¹⁶Hamat, Berota, Sibraim, na di
holangholang ni parbolatan sian Damaskus tu
parbolatan sian Hamat, Hasor partonga na
marbalokkon Hauran.

¹⁷Ia parbolatan olat ni laut sahat ro di
Hasor-Enon, parbolatan ni Damaskus, jala
tungkan utara Hamat do parbolatan; i ma
sambariba tungkan utara.

¹⁸Ia sambariba tungkan purba, sian
holangholang ni Hauran, boti tu Damaskus,
boti tu Gilead, boti tu tano Israel sahat ro di
Jordan. Ingkon sian parbolatan i sahat ro di
laut tungkan habinsaran suhatanmuna; i ma
sambariba tungkan purba.

¹⁹Ia sambariba tungkan dangsina, olat ni
Tamar sahat ro di aek Meriba-Kades partalian
i, sahat ro di laut godang; i ma sambariba
tungkan dangsina.

²⁰Ia sambariba tungkan pastima laut na
godang i do, olat ni parbolatan sahat ro di

tondong ni Hamat; i ma sambariba tungkan pastima.

²¹Ingkon bagionmu do tano on di hamu mangihuthon angka marga ni Israel.

²²Ingkon marpintu hamu laho martali tano i di hamu dohot di halak paisolat, angka na maisolat di tongatongamuna, angka naung tubuan anak di tongatongamuna; ingkon songon raja huta nasida di tongatonga ni halak Israel, ingkon marpintu nasida rap dohot hamu maruli partalian di tongatonga ni angka marga ni Israel.

²³Ia di tongatonga ni marga dia maisolat paisolat i, laos disi do lehononmuna partalianna, ninna Tuhan Jahowa!

48¹(I.) Jala on do goargoar ni angka marga: Sian partalpahan utara mardonokkon dalan sian Hetlon sahat ro di Hamat, Hasor-Enon parbolatan ni Damaskus tungkan utara mardonokkon Hamat, sambariba tungkan purba sahat ro di laut, sapartalian di si Dan.

²Jala marbalokkon Dan sian sambariba purba sahat ro di pastima sapartalian di Aser.

³Jala marbalokkon Aser sian sambariba purba ro di pastima sapartalian di Naptali.

⁴Jala marbalokkon Naptali sian sambariba purba sahat ro di pastima sapartalian di Manasse.

⁵Jala marbalokkon di Manasse sian sambariba purba sahat ro di pastima sapartalian di Epraim.

⁶Jala marbalokkon Epraim sian sambariba purba sahat ro di pastima sapartalian di Ruben.

⁷Jala marbalokkon Ruben sian sambariba purba sahat ro di pastima sapartalian di Juda.

⁸(II.) Jala marbalokkon Juda sian sambariba purba sahat ro di pastima ingkon gabe pelean tatingan sipapulihonmuna, duapulu lima ribu asta bohangna dohot unjurna suang songon sada partalian hian sian sambariba purba sahat ro di pastima, asa inganan na badia i di parsitongaanna.

⁹Ia pelean tatingan sipapulihonmuna di Jahowa, ingkon duapulu lima ribu asta unjurna jala sampulu ribu asta bohangna.

¹⁰Ingkon disi do pelean tatingan na badia i jambar ni angka malim: Tungkan utara duapulu lima ribu asta, jala tungkan pastima sampulu ribu asta bohangna, jala tungkan purba sampulu ribu asta bohangna, jala tungkan dangsina duapulu lima ribu asta unjurna; asa inganan na badia ni Jahowa di parsitongaanna.

¹¹I ma jambar ni malim angka na pinarbadiaan sian anak ni si Sadok, angka na mangaradoti ulaonku, angka na so lilu, uju na lilu halak Israel, songon lilu ni halak Lepi na asing.

¹²Jadi ingkon di nasida ma pelean tatingan i na pinapulik sian tano na badia sahali marbalokkon halak Lepi.

¹³Halak Lepi pe ingkon maruli mardonokkon parbolatan ni angka malim duapulu lima ribu asta unjurna jala sampulu ribu asta bohangna; sandok unjurna ingkon duapulu lima ribu asta jala bohangna sampulu ribu.

¹⁴Jala ndang jadi gadisonnasida sian i nanggo sada manang tungkaranna, manang pabalionna patumonaan ni tano i tu halak na leban, ai habadiaon ni Jahowa do i.

¹⁵Ia na lima ribu asta bohang na lobi i hombarhon na duapulu lima ribu asta i riperipe ni huta do i bahenon inganan dohot partungkoan, asa huta i di parsitongaanna.

¹⁶Jala angka on do ungkuranna: Sambariba utara opat ribu lima ratus, jala sambariba dangsina opat ribu lima ratus, jala sian sambariba purba opat ribu lima ratus, jala sambariba pastima opat ribu lima ratus.

¹⁷Ingkon marpartungkoan huta i tungkan utara dua ratus lima pulu asta, jala tungkan dangsina dua ratus lima pulu, jala tungkan purba dua ratus lima pulu, jala tungkan pastima dua ratus lima pulu.

¹⁸Jala lobilobi ni unjur hombarhon pelean tatingan na badia i, sampulu ribu tungkan purba jala sampulu ribu tungkan pastima, jala ingkon hombarhon pelean tatingan na

badia i, jala parbuena bahen hangoluan ni angka pangula di huta i.

¹⁹Jala taringot tu pangula di huta i, ingkon sian sandok marga ni Israel buaton mangula tano ni huta i.

²⁰Asa sandok pelean tatingan i ingkon duapulu lima ribu asta be unjurna dohot bohangna maropat suhi papulikonmuna pelean tatingan na badia i bahen partalian ni huta i.

²¹Jala lobilobina ingkon di induk i angkupangkup be sian pelean tatingan na badia i dohot sian partalian ni huta i hombarhon na duapulu lima ribu asta ni pelean tatingan i sahat ro di parbolatan tungkan purba dohot pastima, hombarhon na duapulu lima ribu asta tungkan parbolatan pastima, tondong ni angka partalian marmargamarga di induk i ma i, jala pelean tatingan na badia i dohot habadiaon ni joro i ingkon di parsitongaanna.

²²Sian partalian ni halak Lepi pe dohot sian partalian ni huta i, di tongatonga ni partalian na di induk i, di holangkolang ni parbolatan Juda dohot Benjamin, ingkon di induk i ma i.

²³(III.) Dung i taringot tu angka marga na asing sian sambariba purba sahat ro di pastima sapartalian di Benjamin.

²⁴Jala marbalokkon Benjamin sian sambariba purba sahat ro di pastima sapartalian di Simeon.

²⁵ Jala marbalokkon Simeon sian sambariba purba sahat ro di pastima sapartalian di Isasar.

²⁶ Jala marbalokkon Isasar sian sambariba purba sahat ro di pastima sapartalian di Zebulon.

²⁷ Jala marbalokkon Zebulon sian sambariba purba sahat ro di pastima sapartalian di Gad.

²⁸ Jala marbalokkon Gad tungkan sambariba dangsina sahali ingkon disi parbolatan i: Olat ni Tamar sahat ro di aek Meriba Kades, mangihuthon batang aek i sahat ro di laut godang.

²⁹ I ma tano i sibagionmuna marpintu bahen pargolatan di angka marga ni Israel, jala on do angka partaliannasida, ninna Tuhan Jahowa!

³⁰ (IV.) Jala on do angka haruaran ni huta i: Sian sambariba utara opat ribu limaratus asta.

³¹ Jala angka bahal ni huta i ingkon mangihuthon goargoar ni angka marga ni Israel; tolu bahal tungkan utara, bahal Ruben sada, bahal Juda sada, bahal Lepi sada.

³² Jala tungkan sambariba purba opat ribu limaratus asta, jala tolu bahalna: Bahal Josep sada, bahal Benjamin sada, bahal Dan sada.

³³ Jala sambariba tungkan dangsina opat ribu limaratus asta, jala tolu bahalna, bahal Simeon sada, bahal Isasar sada, bahal Zebulon sada.

³⁴Ia sambariba pastima opatribu limaratus asta do, tolu bahalna: Bahal Gad sada, bahal Aser sada, bahal Naptali sada.

³⁵Asa tung humaliang sampulu ualu ribu asta do, jala goar ni huta i olat ni sadarina i: Jahowa disi!

Daniel

1 ¹ (I.) Patolutaonhon hinarajahon ni si Joiakim raja sian Juda, ro ma si Nebukadnesar, raja sian Babel tu Jerusalem, laos di tungkum huta i.

² Jadi dipasahat Tuhan i ma tu bagasan tanganna si Joiakim, raja sian Juda dohot deba angka ulaula sian joro ni Debata, jala diboan do i tu tano Sinear, tu bagas ni angka debatana, jala dipamasuk angka ulaula i tu bagas parartaan ni angka debatana i.

³ Dung i martona ma rajai tu si Aspenas, sintua ni angka naposona di jabuna boanonna deba sian halak Israel, angka pinompar ni raja dohot sian halak na sangap.

⁴ Dolidoli angka na so adong tihasna, angka na uli rupa, angka na pantas di sandok hapistaran, angka parhapistaran godang, angka na marroha, jala angka na tau marhalado di bagasan jabu ni rajai, asa ajarhononna tu nasida surat dohot hata ni halak Kasdim.

⁵ Dung i diboho rajai ma tu nasida bohal siganup ari sian sipanganon ni rajai, sian anggur siinumonna sandiri, jala ajaran nasida tolu taon lelengna, asa dung salpu i, ingkon marhalado nasida di jolo ni rajai.

⁶Jala di tongatonganasida ma adong sian pinompar ni si Juda: Si Daniel, si Hanania, si Misael dohot si Azaria.

⁷Alai marimbang goar ma nasida dibahen sintua ni angka naposo i dibahen ma goar ni si Daniel: Si Beltsasar, jala si Hanania: Si Sadrak, jala si Misael: Si Mesak, jala si Azaria: Si Abednego.

⁸(II.) Alai anggo si Daniel nunga marsangkap hian di bagasan rohana, asa unang ramunanna dirina, marhite sian sipanganon ni rajai dohot marhite sian anggur siinumonna; jadi dipangido ma sian sintua ni angka naposo i, asa unang ingkon ramunanna dirina.

⁹Jadi dilehon Debata ma tu si Daniel dapotan habasaon dohot asi ni roha ibana maradophon induk ni angka naposo i.

¹⁰Jadi ninna sintua ni angka naposo i ma tu si Daniel: Mabiar do ahu mida tuanku, rajai, naung tumiti sipanganonmuna dohot siinumonmuna; boasa tung idaonna bohimuna humurang sian bohi ni angka dolidoli donganmuna magodang, gabe marutang hosa ahu maon bahenon ni rajai humongkop hamu?

¹¹Alai ninna si Daniel ma tu na pande sipanganon, naung pinabangkit ni induk ni angka naposo i marhaladoi si Daniel, si Hanania, si Misael dohot si Azaria:

¹²Ua unjuni ma angka naposom sampulu ari on, asa lehon tu hami sian angka ingkau rata panganonnami, jala aek do inumonnami.

¹³Dung i tingkiron ma nian di jolomi rupanami, dohot rupa ni dolidoli angka na manganhon sian sipanganon ni rajai, jadi hombar tu parnidam bahen tu angka naposom.

¹⁴Jadi dioloi, ibana ma hatanasida i, jala diunjuni nasida sampulu ari lelengna.

¹⁵Jadi dung marujung na sampulu ari i, jadi dumenggan ma rupanasida idaon, jala ummokmok nasida sian saluhut dolidoli, angka na manganhon sian sipanganon ni rajai.

¹⁶Jadi ditait pande sipanganon i ma sipanganonnasida dohot anggur siinumonnasida na sai laon, jala dilehon ma tu nasida angka ingkau rata.

¹⁷Jadi dibasabasahon Debata ma tu na opat dolidoli i parbinotoan dohot hapantason di saluhut surat dohot hapistaran. Ia si Daniel marbinoto do huhut di saluhut alatan dohot angka nipi.

¹⁸(III.) Jadi dung marujung ariari angka na tiniti ni rajai boanon nasida, gabe diboan sintua ni angka naposo i ma nasida di jolo ni si Nebukadnesar.

¹⁹Dung i diuji rajai ma nasida, gabe ndang adong jumpang sian nasida sude tudoshon si Daniel, si Hanania, si Misael, dohot si Azaria

marroha, jadi marhalado ma nasida di jolo ni rajai.

²⁰Jadi taringot tu saluhut hata dohot hapistaran ni hapantason na niusoan ni rajai tu nasida, lompit sampulu hali umpistar nasida didapot sian saluhut angka partondung dohot sijujur parhalaan di sandok gomgomanna.

²¹Dung i mian disi ma si Daniel sahat ro di taon parjolo ni raja Sirus.

2¹(I.) Dung i paduataonhon hinarajahon ni si Nebukadnesar, marnipi ma si Nebukadnesar, gabe tarsonggot situtu tondina, jala ndang be tarnono matana.

²Jadi didokkon rajai ma jouon halak partondung sijujur parhalaan, parsibalik mata dohot halak Kasdim, asa dipabotohon tu rajai angka nipina i. Jadi ro ma nasida, jala jongjong di jolo ni rajai.

³Dung i ninna rajai ma tu nasida: Nunga huipi sada nipi, gabe tarsonggot situtu rohangku, naeng nian botoon nipi i.

⁴Jadi ninna halak Kasdim ma tu rajai, marhata Ram: Sai mangolu ma ho; ale rajanami ro di salelenglelengna! Sai pajojor ma nipi i tu angka naposom, asa hujujur hami lapatanna.

⁵Jadi ninna rajai ma mangalusi halak Kasdim: Nunga pola ruar parentangku! Molo so dipabotohon hamu tu ahu nipi i,

dohot jujurna, ingkon tanggoan hamu, jala bagasmuna i gabe partangkalan bahenon.

⁶Alai molo dipabotohon hamu nipi i ro di jujurna i, ingkon jaloornuna sian ahu angka silehonlehon dohot denggan basa dohot arta angka na mauiutus. Dibahen i paboa hamu ma tu ahu nipi i ro di jujurna!

⁷Dung i ninna nasida ma mangalusi paduahalihon: Sai dipaboa rajai ma nipi i tu angka naposomon, asa hujujur hami.

⁸Jadi ro ma alus ni rajai, ninna ma: Tangkas do nuaeng huboto mangkatihati tingki do hamu naeng, ala naung diida hamu nunga pola lalu hatanku.

⁹Alai molo tung so dipabotohon hamu nipi i tu ahu, uhum naung binuhul hian madabu tu hamu sude, ala naung disangkap rohamuna mangkatahon hata gabus dohot sipaotooto di jolongku, paima muba tingki di rohamu! Dibahen i sai paboa hamu nipi i tu ahu, asa tung hutanda, tarbahen hamu pajojorhon dohot lapatanna.

¹⁰Jadi ninna halak Kasdim ma maralus di jolo ni rajai: Nda tung adong dapotjolma nanggo sada di liat portibi on, na tarbahen pajojorhon hata ni rajai, ala na so dung antong, manang ise raja na timbul, jala marhuaso mangido hata sisongon i sian manang ise partondung, parsibalik mata, manang halak Kasdim.

¹¹Ai hata na pinangido ni rajai na mamaolhu do i, ndang adong dapot nanggo sahalak

na tarbahren pajojorhonsa di jolo ni rajai; dungkon ni debata, angka na so maringan di tongatonga nijolma.

¹²Ala ni tarrimas jala muruk situtu rajai, jala didokkon bunuon saluhut halak na pistar, angka na di Babel.

¹³Jadi ruar ma parenta i, ingkon bunuon halak na pistar i; jadi dilului nasida ma dohot si Daniel ro di angka alealena i naeng bunuonna nasida.

¹⁴(II.) Jadi ro ma alus ni si Daniel sian parsihohot dohot sian pantas ni rohana mandok tu si Ariok, sintua ni angka parangan ni rajai, naung borhat nian laho mambunu halak angka na pistar di Babel.

¹⁵Dung i maralus ma ibana tu si Ariok, panglima ni rajai, ninna ma: Boasa tung ruar patik na sai horas sian rajai? Jadi dipabotohon si Ariok i ma pangalahona tu si Daniel.

¹⁶Dung i bongot ma si Daniel mangido tu rajai palelengonna janjina tu ibana, asa pabotohononna jujur ni nipi i tu rajai.

¹⁷Dung i mulak ma si Daniel tu jabuna, jala dipabotohon ma barita i tu si Hanania, si Misael do si Azaria angka alealena i.

¹⁸Asa mangido asi ni roha sian Debata, na di surgo i, taringot tu hahomion on, asa unang tarbunu si Daniel dohot angka alealena i rap dohot halak na pistar, angka na asing di Babel.

¹⁹ Jadi pinapatar ma hahomion i tu si Daniel marhitehite alatan bornginna i. Dung i dipuji si Daniel ma Debata na di surgo i.

²⁰ Dung i ro ma alus ni si Daniel, ninna ma: Pinuji ma Goar ni Debata sian salelengna sahat ro di salelenglelengna, ai ibana do nampunasa hapistaran dohot hagogoon.

²¹ Ibana do paimbarhon angka taon dohot jom, ibana paijurhon angka raja dohot pabangkithon, ibana marbasabasahon hapistaran tu halak na pistar dohot roha hapantason tu halak parroha.

²² Ibana do papatarhon na bagas dohot na simuk, ibana do umboto manang aha na masa di bagasan haholomon, jala mian di lambungna do hatiuron i.

²³ Mauliate ma ahu tu ho ale Debata ni angka daompung, jala hupuji ma ho, ala naung nilehonmu tu ahu hapistaran dohot hagogoon. Jala dipapatar ho nuaeng muse tu ahu na hupangido hami sian ho; ai nunga dipabotohon ho tu hami hata ni rajai.

²⁴ (III.) Dibahen i laho ma si Daniel mandapothon si Ariok, naung nidokkon ni rajai, bunuonna halak angka na pistar di Babel. Dung sahat ibana songon on ma hatana tu ibana: Unang ma bunu halak angka na pistar di Babel! Boan ma ahu tahe tu jolo ni rajai, asa hupajojor jujur ni nipina i tu rajai.

²⁵ Jadi hatop ma si Ariok mamboan si Daniel tu jolo ni rajai, jadi ninna ma tu ibana: Nunga

jumpang ahu sada halak Jahudi sian halak na tarbuang, ibana ma pabotohon jujur ni nipi i tu rajai.

²⁶Dung i ro ma alus ni rajai, ninna ma tu si Daniel, na marimbang goar si Beltsasar: Atehe, tarbahen ho do pabotohon tu ahu nipi alatan naung huida i ro di jujurna?

²⁷Dung i ro ma alus ni si Daniel di jolo ni rajai, ninna ma: Ia hahomion i na niusoan ni rajai, ndang tarpapatar manang ise tu rajai, nang halak na pistar, nang parsibalik mata, nang partondung manang sijujur parhalaan pe.

²⁸Alai tahe adong do Debata di surgo, sipapatar hahomion; ibana do pabotohon tu raja Nebukadnesar, manang aha na masa sogotsogot ni ari. Nipimi dohot alatan na niidam di atas podomanmu on do:

²⁹Dipingkirpinkingiri roham do, ale rajanami, di atas podomanmu taringot tu na masa sogot; jadi ro ma ibana na papatar angka hahomion pabotohon tu ho, manang aha na masa sogot.

³⁰Jadi tu ahu ma dipabotohon hahomion i, ndada ala hapistaran na di bagasan ahu sandiri, gumodang sian tu angka na mangolu na asing, ala na naeng pabotohononhon panjujuron tu rajai, jala asa diboto ho angka pingkiran ni roham.

³¹Maralatan do ho, ale rajanami, gabe ida ma, adong gambaran sada apala na bolon

tung na timbo sahali do gambaran i, jala sillamna tung na mauiutus do, jongjong di adopanmi, jala rupana mansai songkal.

³²Ia ulu ni gambaran i sian sere palangki, andorana dohot botohonna sian perak, butuhana dohot haehaena sian tombaga.

³³Bitisna sian bosi, patna deba sian bosi, deba sian tano liat.

³⁴I do na niidam maralatan, paima mungkit sada batu sian ginjang, alai ndada niungkit ni tangan, laos ditipa ma gambaran i di patna na sian bosi marsaor tano liat, laos maropuk dibahen.

³⁵Jadi rap maropuk ma bosi, tano liat, tombaga, perak dohot sere, jala gabe tudoshon hurangkam, na hinabangkon ni alogo sian pardegean, sandok tung na so jumpang be ingananna. Ia batu na manipa gambaran i manjadi dolok batu na bolon, jala digohi liat portibi on.

³⁶(IV.) I ma nipi i, jujurna pe paboaonnami ma nuaeng di jolo ni rajai.

³⁷Ia ho ale rajanami! Raja ni angka raja do ho nunga dilehon Debata na di surgo i tu ho harajaon, hagogoon, huaso dohot hamuliaon.

³⁸Manang didia pe maringanjolma manisiaro di binatang di ladang dohot pidong na martongatonga langit, nunga dipasahat ibana tu bagasan tanganmu, jala dipabangkit ho bahen panggomgomi di nasida luhutna: Ho do tahe ulu sere i!

³⁹Alai dung salpu ho, soluk ma harajaon na asing sada, na moru sian ho; soluk muse harajaon na asing, i ma patoluhon i, na sian tombaga, gomgomanna ma sandok tano on.

⁴⁰Ia harajaon paopathon i, togu do songon bosi; ai suang songon bosi mangaropuhi dohot mangarosahi luhutna, ingkon songon i ropuhanna, jala rosahanna luhutna i.

⁴¹Alai na niidam angka pat dohot jarijari ni pat, deba sian tano liat, jala deba sian bosi, boaboa ni harajaon na binagi do i; alai tading do di bagasanna hatoguon ni bosi, sandok songon na niidam bosi marsaor tano liat.

⁴²Ia jarijari ni pat i deba sian bosi, jala deba sian tano liat; marboaboa togap ni na sabagian harajaon i, getes na sabagiannari.

⁴³Alai songon na niidam bosi marsaor tano liat, boaboa ni na masialian angka jolma pangisina i, alai ndang olo sada situtu, songon bosi na so tarpasada tu tano liat.

⁴⁴Alai di tingki hinarajahon ni angka rajai, padirion ni Debata, na di surgo i, sada harajaon na so tarpapatu ro di salelenglelengna, gomgomanna pe ndang pasahatonna tu bangso na asing; ropuhanna do tahe sogot saluhut angka harajaon i, jala pansingkonna, alai hot do anggo na sasada i ro di saleleng ni lelengna.

⁴⁵Sandok songon na niidam niungkit sada batu sian dolok i, so niungkit ni tangan ni jolma, jala diropuhi bosi, tombaga, tano liat,

perak dohot sere. Debata na mamunjung do pabotohon tu rajai manang aha pamasaonna sogotsogot ni ari; i do sintong nipi i, sintong dohot jujurna.

⁴⁶(V.) Dung i manungkap ma raja Nebukadnesar marsomba tu si Daniel, jala didokkon boanon pelean sipanganon dohot angka na hushus bahen sombasomba tu ibana.

⁴⁷Dung i ninna raja ma mangalusi si Daniel: Tongon do tahe, Debatamuna do Debata ni angka Debata, jala Tuhan ni angka raja, jala sipapatar angka hahomion ala dapot ho papataronmu hahomion on.

⁴⁸Dung i dipatimbul rajai ma si Daniel, jala dilehon tu ibana torop silehonlehon angka na balga, jala dipabangkit ibana gabe pangarajai di sandok luat Babel, jala sintua ni saluhut halak na pistar angka na di Babel i.

⁴⁹Dung i dipangidohon si Daniel ma sian rajai, pabangkitonna si Sadrak, si Mesak dohot si Abednego bahen wakilna, parenta luat Babel; tongtong do anggo si Daniel di bagasan jabu ni raja.

3¹(I.) Dung i dipatungkangkon raja Nebukadnesar ma sada ganaganaan sian sere, timbona onompulu elak, bidangna onom elak; didokkon ma i pajongjongon di rura Dura, di luat Babel.

²Dung i disuru raja Nebukadnesar ma suruanna papunguhon angka pangarajai,

partogi dohot induk ro di angka panglima, angka siramoti arta, angka siboto patik, angka siboto uhum ro di sude halak sitiop parenta, di angka luat humaliang, asa ro be nasida mangontongkon ganaganaan i, naung pinajongjong ni raja Nebukadnesar.

³Jadi marpungu ma angka pangarajai dohot angka partogi, angka induk ro di angka panglima, angka siramoti arta, angka siboto patik, angka siboto uhum ro di sude angka sitiop parenta di angka luat humaliang, laho mangontongkon ganaganaan i, naung pinajongjong ni raja Nebukadnesar. Jadi dung jongjong nasida di jolo ni ganaganaan i naung pinajongjong ni si Nebukadnesar.

⁴Jala dipangiar partingting ma suarana martingting: O hamu angka bangso, angka houw dohot parpangkuling marragamragam, tangihon hamu ma tingtingkon:

⁵Molo dibege hamu suara ni sarune, tulila, hasapi, arbab, sordam, gondang ro di saluhut ragamragam ni parhinaloan: Ingkon marsinggang ma hamu marsomba tu ganaganaan sere i, naung pinajongjong ni raja Nebukadnesar.

⁶Dung i manang ise na so marsinggang jala marsomba, ingkon timpalhohononhon ibana di na satongkin i tu liang pamurunan, na marnalanala.

⁷Dibahen i dung dibege saluhut angka bangso uju i suara ni sarune, tulila, hasapi,

arbab, sordam ro di sandok ragamragam ni parhinaloan: Marsinggang be ma saluhut angka bangso, angka houw dohot parpangkuling marragamragam marsomba tu ganaganaan sere i, naung pinajongjong ni raja Nebukadnesar.

⁸(II.) Dung i ro ma uju i jumonok deba baoa halak Kasdim, angka na mangasungi halak Jahudi.

⁹Angka ninna nasida ma mangalualu tu raja Nebukadnesar: Ale rajanami, sai mangolu ma ho ro di saleleng ni lelengna!

¹⁰Nunga dibahen ho patik, ale rajanami, ganupjolma na umbege suara ni sarune, tulila, hasapi, arbab, sordam, gondang ro di sandok ragamragam ni parhinaloan, ingkon marsinggang ibana, jala marsomba tu ganaganaan sere i.

¹¹Jala manang ise na so marsinggang, jala marsomba, ingkon timpalhohonhon ibana tu bagasan liang pamurunan na marnalanala.

¹²Adong do nuaeng deba halak Jahudi, angka naung pinabangkitmi bahen sitiop parenta di luat Babel, i ma si Sadrak, si Mesak dohot si Abednego; angka baoa ondeng, ndang parduli di patikmi, ale rajanami; tu angka debatami ndang mamele nasida, jala tu ganaganaan sere naung pinajongjongmi ndang marsomba nasida!

¹³Dung i piripirion jala muruk situtu ma si Nebukadnesar mandokkon ingkon boanon si

Sadrak, si Mesak dohot si Abednego tu jolona. Jadi tarboan ma na tolu halak i tu jolo ni rajai.

¹⁴Dung i ninna si Nebukadnesar ma mandok nasida: Atehe, tongon do, ale Sadrak, Mesak dohot Abednego, ndang olo hamu mamele tu debatanku, jala ndang olo hamu marsomba tu ganaganaan sere naung hupajongjong i?

¹⁵On pe molo olo hamu nuaeng, disi dibege hamu suara ni sarune, tulila, hasapi, arbab, sordam, gondang dohot sandok ragamragam ni parhinaloan, marsinggang jala marsomba tu ganaganaan naung hupauli i? Alai molo so olo hamu marsomba, ingkon tongkinnai hamu timpalhohonhon tu liang pamurunan na marnalanala! Dung i idaon ma manang Debata dia na tuk paluahon hamu sian tanganku!

¹⁶Jadi ro ma alus ni si Sadrak, si Mesak dohot si Abednego mandok tu rajai: Ale Nebukadnesar, ndang pola alusannami ho, anggo taringot tu na nidokmi.

¹⁷Molo lomo roha ni Debatanami, na huoloi hami, sai paluaonna do hami sian liang pamurunan na marnalanala i dohot sian tanganmu, ale rajanami.

¹⁸Alai nang so lomo rohana, ingkon botoonmu do, ale rajanami, na so olo hami mamele tu angka debatamu manang marsomba tu ganaganaan sere, naung pinajongjongmi.

¹⁹Jadi piripirion situtu ma si Nebukadnesar, pola rupi bohina dompak si Sadrak, si Mesak dohot si Abednego; jala didokkon ingkon lompit pitu hali ummohop liang pamurunan i bahenon sian na somal.

²⁰Didokkon ma huhut deba paranganna, angka na gumogo manali si Sadrak, si Mesak dohot si Abednego, asa tinimpalhon nasida tu bagasan liang pamurunan na marnalanala i.

²¹Dung i di tali ma na tolu halak i songon i marmandar, marsaraoal, martalitali ro di sandok pangkeanna, laos ditimpalhon tu bagasan liang pamurunan na marnalanala i.

²²Jadi ala horas ni patik ni rajai, jala ala naung mohop sahali liang pamurunan i, gabe dibunu nala ni pamurunan i ma baoa angka na mangampehon si Sadrak, si Mesak dohot si Abednego tu atasna.

²³Alai anggo na tolu halak i si Sadrak, si Mesak dohot si Abednego madabu do songon i tinali tu bagasan liang pamurunan na marnalanala i.

²⁴(III.) Jadi marseto ma roha ni raja Nebukadnesar, jala tompu ibana hehe, huhut didok tu angka panuturina: Atehe, nda tolu baoa na itatali laho manimpalhon tu bagasan api i? Jadi ninna nasida ma mangalusi rajai: I ma tutu, ale rajanami!

²⁵Dung i ninna ibana ma mangalusi: Ida ma, opat halak huida harhar talina mardalandalan di bagasan api, ndang manang mahua nasida,

jala rupa ni na paopathon i, tudos do tu anak ni angka debata.

²⁶Dung i didapothon si Nebukadnesar ma pintu ni liang pamurunan na marnalanala i, huhut ma didok: Hamu ale Sadrak, Mesak dohot Abednego, angka naposo ni Debata na mamunjung, ruar ma hamu jala ro tuson! Jadi ruar ma si Sadrak, si Mesak dohot si Abednego sian api i.

²⁷Dung i marpungu ma angka pangarajai, partogi, induk dohot angka panuturi ni rajai, naeng marnida angka baoa i, angka na so tarhahua api dagingnasida i, gari obuk ni ulunasida ndang muap api, jala pangkeannasida ndang muba, nanggo uap ni api, ndang dais tu nasida.

²⁸Jadi ro ma hata ni si Nebukadnesar: Pinuji ma Debata ni si Sadrak, si Mesak dohot si Abednego, naung marsuru suruanna, asa paluahon naposona, angka na marhaposan tu ibana, gabe ndang dioloi patik ni harajaon, tung diseahon do dagingnasida, asal unang mangoloi manang marsomba tu debata sileban, dungkon ni tu Debatana.

²⁹Dibahen i mambahen patik ma ahu nuaeng: Manang ise sian angka bangso, houw dohot parpangkuling marragamragam mandok hata insahinsak dompak Debata ni si Sadrak, si Mesak dohot si Abednego: Ingkon tanggoan ibana, jala bagasna gabe partangkalan bahenon, ai ndang adong

debata na asing na tuk paluahon, songon ibana.

³⁰Jadi naek ma dibahen rajai tohonan ni si Sadrak, si Mesak dohot si Abednego di luat Babel.

4¹(3-31) Ahu surat tinongos ni raja Nebukadnesar tu sandok bangso, houw dohot parpangkuling angka na maringan di liat portibi on: Tua ma di hamu godanggodang!

²(3-32) Tanda dohot halongangan, angka na binahen ni Debata na mamunjungi tu ahu; dipangido rohangku naeng pabotohononku tu hamu.

³(3-33) Ai tung na balga sahali do angka tanda binahenna i, jala tung na songkal do halongangan angka na pinamasana i. Ia harajaonna harajaon saleleng ni lelengna do, jala gomgomanna marsundutsundut.

⁴(4-1) (I.) Ia ahu Nebukadnesar, marsonangsonang do di bagasan jabungku, jala mardohar di bagashu na bolon i.

⁵(4-2) Dung i adong ma nipingku na manonggoti ahu, tole angka pingkiranku di atas podomanku, tole angka alatan ni ulungku manggunsang rohangku.

⁶(4-3) Dung i mambahen patik ma ahu, ingkon boanon tu jolongku saluhut halak na pistar, angka na di Babel, asa dipabotohon nasida tu ahu jujur ni nipi i.

⁷(4-4) Jadi ro be ma mandapothon ahu angka siboto surat, angka partondung, halak

Kasdim dohot angka sijujur parhalaan, gabe hupajojor nippingku tu pinggolnasida; alai ndang dipabotohon nasida tu ahu jujurna.

⁸(4-5) Paima ro muse tu jolongku si Daniel, na marimbang goar si Beltsasar, mangihuthon goar ni debatanku, jala di bagasan ibana do Tondi ni Debata angka na badia i, gabe hupajojor nipi i tu pinggolna.

⁹(4-6) (II.) Ho ale Beltsasar, sintua ni angka siboto surat, nunga tangkas huboto maringan di bagasan roham do Tondi ni Debata angka na badia i, jala ndang diboto ho jut ni roha taringot tu sandok hahomion: Sai paboa ma tu ahu lapatan ni alatan ni nippingku, angka na huida i.

¹⁰(4-7) On do nian angka alatan ni ulungku di atas podomanku: Maralatan ahu gabe huida jongjong sada hau di parsitongaon ni tano on, tung na timbo sahali do.

¹¹(4-8) Dung i lam tu balgana dohot tu bolonna hau i, jala timbona sahat ro di langit, jala tarida do sahat ro di ujung ni liat portibi on.

¹²(4-9) Uli ia dangkana, jala ramos parbuena, jala singkop di ibana sipanganon marmudu saluhutna; marlinggomlinggom tu ibana do sandok binatang di harangan, jala marasar di dangkadangkana do angka pidong na martongatonga langit, jala mangolu sian ibana do nasa sibuk.

¹³(4-10) Dung i maralatan muse ahu di bagasan alatan ni ulungku di atas podomanku, gabe ida ma: Tuat sian banua ginjang sada halak parjaga, jala na badia.

¹⁴(4-11) Na pangiar suarana joujou songon on: Taba ma hau on jala ranting i, horus ma huhut bulungna, jala panserakkon angka parbuena! Ingkon maporus ma angka binatang sian toruna, jala marhabangan angka pidong sian dangkadangkana.

¹⁵(4-12) Alai anggo pangkalna na marurati pasombu ma di bagasan tano i, alai ingkon tarrante sian bosi dohot tombaga ibana, peakpeak di tongatonga ni jampalan marudan marari, jala mangan duhutduhut di tano i rap dohot angka pinahan.

¹⁶(4-13) Ingkon buaton huhut sian ibana roha jolma, jala lehonon tu ibana roha pinahan, paima salpu pitu taon on.

¹⁷(4-14) Marharoroan sian parluhutan ni angka parjaga do tuutupan on, jala binahen ni pangkataion ni angka na badia sahat pangidoani tu jolo ni Debata, asa tung ditanda nasa na mangolu, saguru di Debata do harajaon ni jolma manisias, jala dibasabasahon tu manang ise lomo ni rohana, jala tarbahensa do gabe jujungan jolma apala na lumea sahali.

¹⁸(4-15) I ma nipi i, na huida maralatan, ninna raja Nebukadnesar. Alai anggo ho, ale Beltsasar, ingkon paboanmu jujurna! Ai

saluhut na pistar angka na di harajaonku, ndang tarpajojorsa jujurna tu ahu; alai anggo ho tarbahen ho do, ai Tondi ni Debata angka na badia i do na maringanan di bagasan ho.

¹⁹(4-16) (III.) Jadi tarhalomong ma si Daniel na marimbang goar si Beltsasar, arga sajom lelengna; jala pingkiranna mambahen mallobuk taroktokna. Dung i ro ma alus ni rajai songon on: Ale Beltsasar, unang pola mallobuk roham bahenon ni nipi i dohot jujurna! Jadi ninna si Daniel ma mangalusi: lale tuanku, aut ni tu angka musum songgop nipi i, jala jujurna tu angka alom nian.

²⁰(4-17) la hau, na niidami, lam tu balgana dohot bolonna, ianggo pala timbona sahat ro di langit, jala tarida do i di liat portibi on;

²¹(4-18) Jala uli dangkadangkana, jala ramos parbuena, singkop panganon marmudu saluhutna, jala marlinggomlinggom angka binatang na di harangan di toruna, jala marasari angka pidong na martongatonga langit di dangkadangkana:

²²(4-19) Ho do i, ale rajanami, naung manjadi balga ho jala margogo, jala naung timbul hatongamonmu, pola tung sahat ro di langit, jala gomgomanmu sahat ro di ujung ni tano on.

²³(4-20) Alai na niida ni rajai sada parjaga dohot na badia tuat sian banua ginjang, jala na nidokna i: Taba ma hau i, jala ago ibana, alai anggo pangkalna ingkon pasombu di

bagasan tano i, jala marrante bosi dohot tombaga ibana bustang di duhutduhut ni ladang i, jala marudan marari ibana, jala sabagian ibana dohot angka binatang di harangan, paima salpu pitu taon di atasna:

²⁴ (4-21) On do lapatanna, ale rajanami, jala on do sinangkap ni na tumimbul, na pinasonggopna tu ho, ale tuanku, rajanami:

²⁵ (4-22) Pabalion ni halak ma ho sian tongatonga ni jolma, gabe sisada inganan ho dohot binatang di harangan, jala lehononna ho mangan duhutduhut songon lembu, jala pasombuonna ho marudan marari, pola pitu taon lelengna, songon i masa tu ho, paima diparhatopot roham saguru di Debata na tumimbul do angka harajaon ni jolma, jala dibasabasahon tu manang ise lomo ni rohana.

²⁶ (4-23) Jala na nidokna i, ingkon tadingkononhon pangkal ni hau i ro di uratna, lapatanna: Ingkon hot muse harajaonmi di ho, dung diparhatopot roham saguru di Debata na di surgo i do luhutna i.

²⁷ (4-24) Dibahen i, ale rajanami, sai halomohon ma sipaingothu tu ho, jala tostosi ma dirim sian angka dosam marhite sian hatigoran, jala palua dirim sian hajahatonmu marhitehite denggan basa tu angka na pogos, ia naeng lumeleng hadoharonmu dipangido roham.

²⁸ (4-25) (IV.) Luhutna i songgop do tahe tu raja Nebukadnesar.

²⁹(4-26) Dung salpu sampulu dua bulan mardalandalan ma rajai di atas tarup ni bagasna di huta Babel.

³⁰(4-27) Jadi ro ma hata ni rajai songon on: Nda on do Babel na bolon i, naung hupauli bahen hundulan ni harajaon marhitehite gogo ni hasangaponku, bahen hamuliaon ni hatongamonku?

³¹(4-28) Laos di bagasan pamangan ni rajai dope hata i, ro ma sada suara sian banua ginjang: Boaboa tu ho, ale raja Nebukadnesar, ia harajaonmi nunga munsat sian ho.

³²(4-29) Ingkon pabalion ni halak ma ho sian tongatonga nijolma, jala sisada inganan do ho dohot binatang di harangan; jala lehononna ho mangan duhutduhut songon lembu, pola pitu taon lelengna masa tu ho, paima dung diparhatopot roham saguru di Debata na tumimbul i do harajaon ni manisias, jala dibasabasahon tu manang ise lomo ni rohana;

³³(4-30) Laos di na sangombas i sintong ma hata i songgop tu si Nebukadnesar, ai dipabali halak ma ibana, jala manjampal duhutduhut ibana songon lembu, jala marudan marari dagingna, pola tung tubu obukna songon imput ni pidong raja ualu ganjangna, jala sisilonna nasa ganjang ni sisilon ni pidong.

³⁴(4-31) (V.) Alai di ujung ni angka ari i manaili ma ahu, Nebukadnesar i dompak banua ginjang, gabe mulak marroha ma ahu

muse, jala hupuji Debata na tumimbul i,
 hupasangap huhut jala marmulia hubahen
 Debata na mangolu ro di saleleng ni lelengna,
 gomgomanna pe ro di saleleng ni lelengna
 do, jala harajaonna marsundutsundut.

³⁵ (4-32) Saluhut isi ni tano on pe hira na
 soada do bilangan martimbangkon ibana; jala
 guru lomo ni rohana do dibahen tu parangan
 angka na lohok di langit dohot tu isi ni tano
 on; jala ndang adong nanggo sada halak na
 tuk manampar tanganna manang mandok tu
 ibana: Aha do na binahenmi?

³⁶ (4-33) Dung i uju i mulak marroha ma ahu,
 mulak muse dohot hamuliaon ni jujunganku,
 habalgaonku dohot hatongamonku, ro muse
 angka panuturingku hian dohot jolma angka
 na sangap mangalului ahu, dipajujungkon
 muse tu ahu harajaonku, jala tamba dope
 hamuliaonku.

³⁷ (4-34) Dibahen i ahu, Nebukadnesar,
 mamujimuji, patimbulhon dohot mangalehon
 hamuliaon tu raja na di surgo i; ai saluhut
 pambahenanna hasintongan do, jala angka
 lapangna hatigoran, jala tarbahensa do
 pajepolhon manang ise na marpangalahohon
 hajungkaton.

5¹ (I.) Dung i dipungka raja Beltsasar
 ma panggalan bolon, sada di angka
 panuturina na saribu halak i, laos minum
 anggur do ibana di jolo ni na saribu halak i.

²Jadi dung didai si Beltsasar anggur i, didokkon ma boanon angka ulaula sere dohot perak, angka na binoan ni amana si Nebukadnesar sian joro na di huta Jerusalem, asa minum sian i rajai dohot angka panuturina ro di angka jolmana dohot imbangna.

³Jadi diboan halak ma ulaula sere, angka na binuat sian bagas joro ni Debata na di Jerusalem, gabe minum ma sian i rajai dohot angka panuturina, ro di jolmana dohot imbangna.

⁴Minum anggur ma nasida huhut dipapujipuji angka debata sileban sian sere, perak, tombaga, bos, hau dohot batu.

⁵Laos di na sangombas i mullop angka jarijari ni tangan ni jolma sada, jala manurati tongon tondong ni parpalitoan i tu dorpi na hinapur ni bagas ni rajai, laos diida rajai do ujung ni tangan na manurati.

⁶Jadi marlangan ma bohi ni rajai, jala mallobuk taroktokna, jala harhar ihotihot ni haehaena, gabe masiantuhan ulu ni totna.

⁷Dung i dipangiar rajai ma suaranya mandokkon boanon angka parsibalik mata, halak Kasdim dohot angka partondung. Dung i ro ma hata ni rajai mandok tu halak na bisuk, angka na di Babel i: Manang ise jolma na umboto manjaha suraton dohot paboahon tu ahu lapatanna, ingkon marbaju dapdap ibana bahenon, jala horunghorong sere tu

rungkungna, jala ingkon gabe raja paitolu ibana di harajaonku.

⁸Jadi ro be ma luhut halak na bisuk ni rajai; alai ndang diboto nasida manjaha surat i; manang pabotohon lapatanna tu rajai.

⁹Jadi muba ma parlobuk ni roha ni rajai, jala marlangan situtu bohina, tarsonggot situtu angka ulubalangna.

¹⁰(II.) Jadi nangkok ma ina ni rajai tu bagasan bilut panggalangan i, ala ni pangkataion ni rajai dohot angka ulubalangna. Dung i ro ma hata ni ina ni rajai mandok songon on: Sai mangolu ma ho, ale rajanami ro di saleleng lelengna! Unang pola tarsonggot ho bahenon ni pingkiranmu, jala unang pola marlangan bohim.

¹¹Adong do sada halak di bagasan harajaonmu, partondi sian Debata angka na badia i; jala di angka ari ni amam jumpang do sian ibana hatorangon, habisuhon dohot hapistaran, songon hapistaran ni angka Debata, gabe ro ma raja Nebukadnesar amami, pabangkithon ibana bahen sintua ni angka siboto surat, parsibalik mata, halak Kasdim dohot angka partondung, i ma tutu dibahen rajai, amami.

¹²Ala na dapot di bagasan ibana tondi na sumurung dohot roha hapantason dohot hapistaran manjujur nipi, pajojo hulingkulingan dohot mangkarhari na pasebut, i ma si Daniel, na marimbang goar

Beltsasar binahen ni rajai. Antong si Daniel i ma jinou, asa dipabotohon lapatanna.

¹³Jadi tarboan ma si Daniel tu jolo ni rajai. Dung i ro ma hata ni rajai mandok tu si Daniel: Atehe, ho do si Daniel, sada sian halak Jahudi, angka na tarbuang i, angka na binoan ni damang, rajai, sian Juda tuson?

¹⁴Nunga pola hubege baritam, maringan do di bagasan roham tondi ni angka debata, jala jumpang do di ho hatorangan, roha hapantason dohot hapistaran na sumurung.

¹⁵Dung i tarboan tu jolongku halak, angka na pistar, angka parsibalik mata, asa dijaha nasida suraton, jala dipabotohon tu ahu lapatanna nian; hape ndang tarpabotohon nasida lapatan ni hata i.

¹⁶Alai hubege do baritam, tarbahen ho do manjujur lapatan dohot mangkarhari na pudun. On pe molo tarjaha ho surat i, jala tarpajojo ho lapatanna tu ahu, ingkon marbaju dapdap ho bahenon, jala horunghorong sere tu rungkungmu, jala ingkon raja paitolu ho di harajaonki!

¹⁷Dung i ro ma alus ni si Daniel mandok tu rajai: langgo angka silehonlehonmi tinggal di ho ma i, jala angka siluami tu halak na asing ma basabasahon! Alai anggo surat i sai jahaonku do di rajai, jala pajojoronku tu ibana lapatanna.

¹⁸Ia ho, ale rajanami! Nunga nian dibasabasahon Debata na mamunjung

harajaon dohot huaso dohot hahormaton
dohot hamuliaon tu si Nebukadnesar,
amangmi.

¹⁹Jala maradophon huaso na
binasabasahonna tu ibana angka hitir
do saluhut angka bangso dohot houw dohot
halak parpangkuling marragamragam, jala
tahuton nasida maradophon ibana. Ai guru
lomo ni rohana do mambunu manang ise; jala
guru lomo ni rohana do pangoluhon manang
ise, jala guru lomo ni rohana do patimbulhon
manang ise, jala guru lomo ni rohana do
pajepolhon manang ise.

²⁰Alai dung dipatimbo ibana dirina, jala
dipajogal rohana, maradu gabe jungkat:
Taronjar ma ibana mijur sian habangsa
ni harajaonna, jala pesan sian ibana
hamuliaonna i;

²¹Jala dipabali do ibana sian tongatonga
ni jolma manisia, jala marroha pinahan
do ibana, jala saingan do ibana dohot
angka halode harangan; dilehon do tu ibana
duhutduhut panganonna songon lombu,
jala marudan marari pamatangna, paima
diparhatopot rohana saguru di Debata na
tumimbul i do angka harajaon ni manisia, jala
guru lomo ni rohana pabangkithon manang
ise manggomgomisa.

²²Ia ho, ale Beltsasar, anak ni rajai, laos
so dipaserep ho roham, atik pe diboto ho
saluhutna i;

²³Lam dipatimbul ho dirim mangalo Tuhan sigomgom langit, jala didokkon ho boanon angka ulaula sian jorona tu jolomi, tole muse minum anggur ho sian i ro di angka ulubalangmu, angka jolmam dohot imbangna, jala dipapujipuji ho debata sileban, angka na sian perak, sere, tombaga, bosi, hau dohot batu, angka na so marnida, manang marbinege, manang umboto manang aha; alai anggo Debata, pandapotan ni hosami dohot saluhut angka dalanmu, ndang dipasangap ho.

²⁴Dibahen i sian ibana do tartongos ujung ni tanganen, jala tarsurat angka suraton.

²⁵Ia hata ni surat na tarsurat disi on do: Mene Mene, Tekel, Uparsin!

²⁶Jala lapatan ni hata i on do Mene: Nunga dibilang Debata harajaonmi, jala dipesanhon.

²⁷Tekel: Nunga nidasing ho di bagasan timbangan, hape maneangku do ho didapot.

²⁸Peres: Nunga dibagi harajaonmi, jala dipasahat tu halak Madai dohot Persia.

²⁹(III.) Dung i ro ma hata ni si Beltsasar mandokkon manolukkon baju dapdap tu si Daniel, jala horunghorong sere tu rungkungna, jala tingtingkonon ni halak taringot tu ibana paboa ibana raja paitolu di bagasan harajaon i.

³⁰Laos di na saborngin i do mate si Beltsasar, raja ni halak Kasdim, dibunu halak.

³¹ (6-1) (I.) Dung i sahat ma harajaon i tu si Darius, halak Madai, uju marumur ibana onompulu dua taon.

6¹ (6-2) Dung i dihalomohon roha ni si Darius ma pabangkithon saratus duapulu induk parentahon harajaon i, angka na sinagihonna di sandok harajaon i.

² (6-3) Dipabangkit huhut tolu halak sintuanasida, si Daniel ma sada; asa mardabudabu angka induk i tu nasida, asa unang rajai marharugian.

³ (6-4) Alai ditindi si Daniel ma angka sintua dohot angka induk i marroha, ai tondi na sumurung do di bagasan ibana. Jadi disangkap roha ni rajai ma pabangkithon ibana bahen palumean ni sandok harajaonna i.

⁴ (6-5) Jadi mangalului sindir ma angka sintua dohot angka induk i dompak si Daniel taringot tu panggomgomina; alai ndang adong sindir jumpang nasida manang hajahaton nanggo sada, ai haposan do ibana, ndang adong jumpang sala manang hajahaton nanggo sada di ibana.

⁵ (6-6) Dung i ninna angka baoa i ma: Nandang tagamon adong dapot hita sindir nanggo sada dompak si Daniel on, molo so jumpang hita marhite sian patik ni Debatana padapot ibana.

⁶ (6-7) Dung i dirongom angka induk rap dohot angka sintua i ma rajai, angka didok

nasida ma tu ibana songon on: Sai mangolu ma ho, ale raja Darius ro di salelenglelengna!

⁷ (6-8) Nunga martuptup saluhut angka induk ni harajaon i, angka pangarajai dohot sintua, angka panuturi dohot partogi, asa dibahen rajai sada patik, jala ditingtingkon oraora, paboa na so jadi manang ise di bagasan tolupulu ari on mangido manang aha, nang tu debata dia nang tu jolma, nda holan tu ho, ale rajanami, ingkon timpalhononhon ibana tu godung parbabiatan.

⁸ (6-9) Dibahen i ale rajanami, ingkon pahotonmu oraora i jala bahenonmu sada surat, na so tarpauba, hombar tu uhum ni halak Madai dohot Persia, na so jadi ubaon.

⁹ (6-10) (II.) Dung i didokkon raja Darius ma sahap on surat patik dohot oraora i.

¹⁰ (6-11) Ia si Daniel, dung dibege, naung tarsurat surat sisongon i, nangkok ma ibana tu bagasan jabuna, alai adong do jandela angka na talak tungkan Jerusalem di bagasan bilutna parginjang; jadi tolu hali di na sadari ibana mangalompit ulu ni totna, laho martangiang dohot mandok mauliate tu Debatana, sandok songon na somal binahenna na sai laon.

¹¹ (6-12) Jadi dirongom angka baoa i ma bagas i, tongon didapot nasida si Daniel martangiang dohot marsomba di jolo ni Debatana.

¹²(6-13) Dung i ro ma nasida jumonok, jala mangkatai di jolo ni rajai taringot tu surat oraora i, angka ninna ma: Ale rajanami, nda nunga pola tarsurat sada surat oraora dibahen ho, paboa manang ise na martangiang di bagasan na tolupulu ari on tu manang ise debata manangjolma, dungkon ni tu ho, ale rajanami, ingkon dabuhononhon ibana tu godung parbabiatan? Jadi ninna rajai ma mangalusi: Hot do hata i, hombar tu uhum ni halak Madai dohot Persia, na so jadi ubaon.

¹³(6-14) Dung i ninna nasida ma mangalusi rajai: Ia si Daniel, sahalak sian halak Jahudi angka na tarbuang i, ndang parduli ibana nang mida ho, ale rajanami, nang mida surat oraora na tiningtingkonmi; sai tong tolutolu hali di na sadari ibana martangiang.

¹⁴(6-15) Jadi dung dibege rajai hata i, marsak situtu ma rohana, mutu ma rohana mamingkiri taringot tu si Daniel naeng paluaonna ibana, pola ro di hasusundut ni mata ni ari ibana mamingkiri angka, naeng paluahon ibana nian.

¹⁵(6-16) Dung i dirongom angka baoa i ma rajai, angka ninna ma mandok rajai: Ingkon boto ale rajanami, ia uhum ni halak Madai dohot Persia, molo adong surat oraora manang patik naung pinahot ni rajai, na so tupa be ubaon.

¹⁶(6-17) Dung i didokkon rajai ma boanon si Daniel, jala timpalhononhon tu bagasan

godung parbabiatan. Alai ninna rajai huhut mandok si Daniel: Sai dipalua Debatam na tongtong nioloanmi ma ho!

¹⁷(6-18) Angkupni diboan halak ma sada batu, jala dipeakkon tu baba ni godung i, laos disahap rajai dohot tintinna, ro di tintin ni angka ulubalangna, asa unang adong na muba manang aha bahenon ni manang ise taringot tu si Daniel.

¹⁸(6-19) (III.) Dung i mulak ma rajai laho masuk tu bagasna, laos so mangan savornginna i, jala ndang diloas piltihon parhinaloan, laos so tarnono do matana.

¹⁹(6-20) Dung i buha siang ari manogotna i, hehe ma rajai, jala hapogan laho mandapothon godung parbabiatan i.

²⁰(6-21) Jadi dung jonok ibana tu godung i, lungun ma suarana manjou si Daniel; didok rajai ma mandok si Daniel: O Daniel, naposo ni Debata na mangolu i! Beha tarpalua Debata na tongtong nioloanmi do ho sian angka singa i?

²¹(6-22) Dung i ninna si Daniel ma mangalusi rajai: Sai mangolu ma ho, ale rajanami ro di salelenglelengna!

²²(6-23) Disuru Debatanku do surusuruanna na mangkuntam baba ni singa i, asa unang ahu dihahua, ala na lidang ahu jumpang di adopanna; di jolomi pe, ale rajanami, ndang huulahon hajahaton nanggo sada.

²³ (6-24) Jadi las situtu ma roha ni rajai alani, didokkon ma taiton si Daniel tu ginjang sian bagasan godung i. Jadi ditait halak ma si Daniel tu ginjang sian bagasan godung i gabe ndang adong mahua agia aha jumpang di ibana, ala marhaposan ibana tu Debatana.

²⁴ (6-25) (IV.) Dung i didokkon rajai ma, ingkon boanon baoa angka na mangasungkon si Daniel; jadi ditimpalhon ma nasida tu bagasan godung parbabiatan i, ro di anaknasida dohot Jolmanasida.ndang dope tolhas nasida tu pantar ni godung i, nunga ditimbung singa nasida, jala diropuhi saluhut holiholinasida.

²⁵ (6-26) Dung i manongos surat ma raja Darius tu saluhut angka bangso, houw dohot halak parpangkuling marragamragam, angka na maringan di sandok tano on, songon on do hatana: Sai martamba ma di hamu tua!

²⁶ (6-27) Ia tonangku di hamu on do: Ingkon saluhut halak na masuk tu gomgomon ni harajaonku mabiar jala manonditnondit maradophon Debata ni si Daniel, ai ibana do Debata na mangolu i jala na tongtong ro di salelenglelengna, harajaonna pe ndang tagamon pesan, jala pamarentana hot do ro di salelenglelengna!

²⁷ (6-28) Ibana do sipalua dohot sipangurupi, jala ibana mambahen tanda dohot halongangan di banua ginjang dohot

di atas tano on. Ibana do paluahon si Daniel sian huaso ni singa i.

²⁸(6-29) Jadi lam marmulia ma si Daniel di bagasan harajaon ni si Darius dohot di bagasan harajaon ni si Sirus, halak Persia.

7¹(I.) Dung i di taon parjolo hinarajahon ni si Beltsasar, raja sian Babel, diida si Daniel ma nipi sada, mardongan angka pangungkapon ni uluna di atas podomanna; laos disurathon si Daniel nipi i, dipaboa huhut pangarimpunan ni hatana.

²Dung i ro ma hata ni si Daniel, ninna ma: Tongon ahu marnida bornginna i di bagasan angka pangungkapon, gabe ida ma, borhat masitahaan ma na opat angin ni langit i di atas ni laut godang.

³Jadi naek ma sian bagasan laut i opat binatang apala na bolon, angka na tandi be marpangalaho.

⁴Na parjolo i tudos tu singa, jala marhabong songon pidong raja ualu; sai hupanotnoti do i paima hona butbut angka hatir ni habongna, jala tarhinsat sian tano on, jala diojakkon patna songon jolma, jala dilehon tu ibana roha jolma.

⁵Dung i ida ma, binatang na asing, na paduahon i, tudos do tu sada gompul, jala jongjong di na sambariba, jala tolu rusuk di bagasan babana di holangholang ni ngingina. Dung i ro ma hata ni halak mandok tu ibana

songon on: Borhat ma ho, sohali ma juhut i godang!

⁶Dung i huida muse, gabe ida ma, sada binatang na asing tudos tu babiat rupana, maropat habong ni pidong di atas tanggurungna, jala maropat ulu do binatang i, jala sahat do tu ibana parenta dilehon.

⁷Dung i huida ma di bagasan angka pangungkapon bornginna i, gabe ida ma, binatang na paopathon i, mansai jorbut, jala na songkal, jala na gogo sahali, marngingi bosi apala na bolon manohali dohot mangaropropi, jala na teba i diluntakluntak dohot patna. Asing do i huhut sian saluhut binatang angka na di jolona i, jala sampulu tandukna.

⁸Dung i uju hupanotnoti angka tanduki, gabe ida ma, tubu ma sada tanduk na metmet di holangholangna, gabe mumpat ma binahenna tolu sian angka tanduk parjolo i; jala ida ma, marmata do tanduki songon mata nijolma, jala marpamangan, na mangkatahon angka hata jungkat.

⁹(II.) Sai hupanotnoti do i paima dipajongjong angka habangsa, jala hundul tusi ibana na so suda arina. Ia pangkeanna saksak do songon itak, jala obuk ni uluna, songon hapas na binusur, ia habangsana songon jillamjillam ni api, jala angka rodana songon api na marnalanala.

¹⁰Ruar do sada sunge api, jala mabaor sian adopanna marriburibu angka na marsomba tu ibana, jala marloksaloksa tindang di jolona marhaladoi. Dung i tarpansang ma loloan jala tarbungka angka buku.

¹¹Jadi sai hupanotnoti ma gumodang alani soara ni angka hata na jungkat, angka na hinatahon ni tanduki; sai hubereng i paima tarbunu binatang i, jala pido pimatangna, jala dipasahat asa purunon tu api.

¹²Jala tarrampas huhut parenta sian binatang angka na tinggal i, ai nunga dibuhul tingki dohot jom ni ajalnasida.

¹³Dung i huida muse di bagasan angka pangungkapon borngin, gabe ida ma, ro sahalak marhitehite ombun di langit i, songon anak ni jolma, jala sahat ibana tu ibana na so suda arina, jala tarboan ibana tu jolona.

¹⁴Jala dibasabasahon ma tu ibana pamarentaon dohot hamuliaon dohot harajaon, jala saluhut bangso, houw dohot halak parpangkuling marragamragam marsomba tu ibana. Ro di salelenglelengna do pamarentaonna, na so tupa munsat sian ibana, harajaonna pe na so tupa pesan do.

¹⁵(III.) Ia ahu, si Daniel marsak situtu rohangku di bagasan, jala disonggoti angka pangungkapon ni ulungku do ahu.

¹⁶Dung i jumonok ma ahu tu sahalak sian angka na tindang disi, laos hupangido paboaonna tu ahu sintong hahonaan ni

saluhutna i. Jadi ninna ibana ma tu ahu, laho pabotohon tu ahu lapatan ni angka hata i:

¹⁷Ia binatang na opat i angka na bolon situtu: Opat raja do i, angka na hehe sian tano on sogot.

¹⁸Alai anggo harajaon i angka na badia ni na tumimbul do panahatanna muse, jala hot do di nasida harajaon i ro di salelenglelengna, tongon do ro di salelenglelengna.

¹⁹Dung i mangido ma ahu naeng botoongku sintong hahonaan ni binatang na paopathon i, na tandi martimbangkon donganna sudena, jala na songkal sahali, parngingi bosi, jala parsisilon tombaga, na mamolgahi dohot mangaropuhi, jala pasipasina i diluntakluntak dohot patna.

²⁰Nang taringot tu tanduk na sampulu, angka na di atas uluna, dohot tanduk na sada, na tubu, gabe mumpat tolu tanduk dibahen; dohot taringot tu tanduk na marmata, jala na marpamangan na mangkatahon hata hajungkaton, jala andul do balga ni rupana sian angka donganna i.

²¹Dung i huida ma tanduk na sadai mamungka marmusu dompak angka na badia i, jala tunduk nasida dibahen.

²²Paima ro ibana na so suda arina, gabe sahat ma panguhumon tu angka nabadia ni na tumimbul, ro dohot tingki paneanan ni angka na badia i di harajaon.

²³Dung i ro ma hatana muse mandok songon on: Ia binatang na paopathon i, i ma harajaon paopathon di atas tano on sogot, na tandi marpangalaho martimbangkon saluhut angka harajaon i, jala bondutonna do sandok tano i jala luntakluntahanna, jala pangaropukhononna.

²⁴Ia lapatan ni tanduk na sampulu i: Hehe do sian harajaon na sasada i sogot sampulu raja; jala di pudi nasida hehe muse sada na asing, na tandi marpangalaho sian angka parjolo i, jala tarjepol do bahenonna tolu raja.

²⁵Jala bursikkononna hatahatana dompak na tumimbul i, jala rupaanna do angka na badia ni na tumimbul i, jala sangkap on ni rohana paubahon angka tingki dohot uhum; jala sahat tu tanganna nasida, paima salpu sada tingki dohot dua tingki dohot satonga tingki.

²⁶Dung i tarpansang ma luhutan paruhuman, gabe tarrampas ma huasona, laho mamesanhon dohot mangarotongkon sahat ro di ujung.

²⁷Alai anggo harajaon i dohot parenta on dohot hatimbulon ni harajaon angka na di toru ni sandok langit i, sahat do sogot tu bangso ni angka na badia ni na tumimbul i; harajaon salelenglelengna do harajaonna i, jala saluhut gomgoman, ingkon marsomba dohot mangihuthon tu ibana.

²⁸Sahat ro disi do ujung ni pangkataionna. Ia ahu Daniel, tung na susa situtu huhilala dibahen angka pingkiranku, jala muba situtu rupa ni bohingku, jala hupajop pangkataion i di bagasan rohangku.

8¹ (I.) Patolutaonhon hinarajahon ni raja Beltsasar, dipapatar muse tu ahu, si Daniel, sada pangungkapon, dung salpu pangungkapon na huida parjolo i.

²Jadi huida ma di bagasan pangungkapon i, uju na tarhinsat tondingku, di huta Susan, na di luat Elam. Dung i huida muse di bagasan pangungkapon i, ahu di topi ni sunge i Ulai.

³Dung i manaili ma matangku, gabe huida ma adong sada birubiru tunggal jongjong di lambung ni sunge i, jala dua do tandukna, jala timbo do angka tanduki, alai tumimbo do na sada sian donganna, jala na tumimbo i tubu parpudi.

⁴Dung i huida ma birubiru tunggal i manambingi dampak hasundutan, dampak utara dohot dampak dangsina, jala ndang tardopang binatang nanggo sada ibana, manangjolma pe ndang tarpaluasa dirina sian tanganna, jala guru lomo ni rohana do dibahen, gabe dipatimbul dirina.

⁵Dung i uju ahu mamingkiri pangalahona i, gabe ida ma, ro sada hambing tunggal sian hasundutan manggohi sandok tano on, ndang pola dais anggo patna tu tano; jala

martanduk na tongam do hambing tunggal i di holangholang ni matana.

⁶Dung i sahat ma ibana mandapothon birubiru tunggal i na mardua tanduki, na huida na jolo jongjong di lambung ni sunge i, laos di dorong ma ibana mangasahon parpiarpiar ni hagogoonna i.

⁷Dung i huida ma ibana sahat tu lambung ni birubiru tunggal i, jala sobu situtu ibana maralo tusi, laos ditambingi birubiru tunggal i, jala diupokkon tandukna duansa; jala ndang be margogo birubiru tunggal i mandopang ibana, laos ditimpalhon ibana tu tano, jala diluntakluntak, jala ndang adong nanggo sahalak na tarbahen paluahon birubiru tunggal i sian tanganna.

⁸Dung i timbul sahali ma hambing tunggal i. Jadi dung sungkot hatimbulonna i, upok ma tanduk na balga i, gabe tubu ma muse apala di haupohanna opat tanduk angka na tongam, tungkan na opat desa ni langit i.

⁹Jala sian sada angka tanduki, ruar sada tanduk na metmet, na manjadi balga, tungkan dangsina dohot tungkan habinsaran dohot tungkan tano na badia i.

¹⁰Jadi lam timbul do i sahat ro di parangan angka na di langit, jala direongkon tu tano deba sian parangan i dohot sian angka bintang, laos diluntakluntak do i.

¹¹Pola tung sahat ro di induk ni parangan i dirinai dipatimbo, jala dirampas sian ibana

pelean ariari, jala inganan ni habadiaonna diparobo do.

¹²Pola sahat tu tanganna parangan i mangalo pelean ariari marhitehite pambahenan na sogir, jala ditimpalhon hasintongan i tu tano, dibahen pe songon i laos marantu do ibana.

¹³Dung i hubege ma mangkuling sahalak na badia, jala didok sahalak na badia na asing tu ibana na mangkulingi: Sahat ro di sadia leleng do pangungkapon i taringot tu pelean ariari dohot taringot tu pambahenan na sogir na mangago, tung pola dipasahat inganan na badia i dohot parangan i, asa diluntakluntak halak?

¹⁴Jadi ninna ibana ma tu ahu: Pola do gok dua ribu tolu ratus ari, dung salpu i urason ma muse inganan na badia i.

¹⁵(II.) Jadi uju ahu, Daniel, marnida pangungkapon i dohot mangalului lapatanna, gabe ida ma, jongjong di jolongku sada songon rupa ni baoa idaon.

¹⁶Dung i hubege ma suara ni jolma sian bariba ni sunge Ulai na joujou mandok: Ale Gabariel! Pajojor ma lapatan ni pangungkapon i tu halak on!

¹⁷Dung i ro ma ibana jongjong tu lambungku, jadi di na ro ibana tarsonggot ma ahu laos manangkap tu tano Dung i ninna ibana ma tu ahu: Tangkas ma parateatehon, ho ale anak ni jolma i, ai marhahonaan tu tingki di ujung do pangungkapon i.

¹⁸Dung i uju mangkatai ibana dohot ahu gonggong ma ahu manungkap tu tano. Jadi dijama ibana ma ahu, laos dipajongjong ahu muse di hajongjonganki hian.

¹⁹Dung i ninna ibana ma: Ida ma, ahu naeng pabotohon tu ho, manang aha na masa sogot, di ujung ni parpiarpiar ni rimas i, ai marhahonaan tu tingki di ujung do pangungkapon i.

²⁰Ia birubiru tunggal na niidam, partanduk siduadua i, i ma angka raja ni Madai dohot Persia.

²¹Ia hambing tunggal na marimbulu i, i ma raja sian tano Junani; jala tanduk na bolon na di holangholang ni matana na dua i, i ma raja parjolo.

²²Alai na upok i tanduki, jala jongjong muse opat singkatna, i ma opat harajaon na tubu sian bangso i, alai ndang songon gogo ni parjolo i.

²³(III.) Jala di ujung ni harajaon nasida i, molo sun lamun halak parjahat, hehe ma sada raja parbohi na horas, jala na pantas marhulingkulingan.

²⁴Tung na timbul do gogona, alai ndada marhitehite gogona sandiri; tung na sumalin do pangagona, jala marantu ibana di na binahenna i; jala agoonna do jolma angka na marhuaso dohot bangso ni angka na badia.

²⁵Jala marhitehite angka na manjadi do sipaotooto binahen ni tanganna i; jala

patimbotimboonna dirina di bagasan rohana,
jala torop halak agoonna so pangkirimanna.
Hehe ibana huhut mangalo raja ni angka
raja; hape pedom do ibana muse, ndang
marhitehite tangan.

²⁶Ia pangungkapon taringot tu bodari
manogot naung taringoti, hasintongan do
i; ia ho sahapi ma pangungkapon i, ai
marhahonaan tu sogotsogot ni ari do i.

²⁷Ia ahu Daniel mandate jala marsahit pola
nania leleng. Dung i hehe ma ahu muse, jala
huula ulaon ni rajai, alai tarhalomong do ahu
taringot tu pangungkapon i, jala ndang adong
manang ise na pajojorhon.

9¹ (I.) Di taon parjolo hinarajahon ni si
Darius, anak ni si Serses, sian pinompar
ni halak Madai, na bangkit raja gumomgom
harajaon ni halak Kasdim.

²Di taon parjolo hinarajaonna i dapot ahu,
Daniel, ma di bagasan angka surat bilangan
ni taon, angka na nilumbahon ni Jahowa tu
panurirang Jeremia: Ingkon boho pitupulu
taon lelengna Jerusalem tarulang.

³Dung i manaili ma ahu tu Tuhan Debata laho
marsombahon tangiang dohot parhurajaion,
mardongan parpuasaon marpangkean tangki
dohot sirabun.

⁴Dung i martangiang ma ahu tu Jahowa
Debatanku, ningku ma manopoti dosa: Iale
Tuhan, ho do Debata na tumimbul, jala na
songkal na mangkajongjongkon parjanjian

dohot asi ni roha tu angka na holong roha mida ho dohot tu angka na mangaradoti angka uhummu.

⁵Nunga mardosa hami, jala nunga marsala hami, nunga manjahati hami huhut manggunturi, nunga manimbil hami sian angka patikmu dohot sian angka uhummu.

⁶Jala ndang hutangihon hami naposom, angka panurirang i, angka na marsipaingot marhitehite goarmu tu angka rajanami, angka induknami, angka ompunami dohot tu sandok bangso ni luaton.

⁷Ho do, ale Tuhan, nampuna hatigoran, alai anggo di hami hailaon ni bohi do rasirasa sadarion, di angka baoa sian Juda dohot di pangisi ni Jerusalem dohot di sandok Israel, angka na jonok dohot angka na holang, di saluhut luat haambolongannasida binahenmi, ala ni hajahatonnaasida, na manjahati i nasida dompak ho.

⁸Iale Tuhan! Na tama do hami marhaurahon, angka rajanami pe, angka induknami dohot ompunami, ala naung mardosa hami dompak ho.

⁹Alai anggo ho Tuhan Debatanami, ho do nampuna asi ni roha dohot angka pamuation, ai nunga manggunturi hami dompak ho.

¹⁰Jala ndang hutangihon hami suara ni Jahowa Debatanami, asa marparange nian di bagasan patikna, angka na pinatolhasna

tu hami marhitehite pamangan ni angka panurirang, naposona i.

¹¹Tongon tahe, tung sandok Israel nunga mangalaosi patikmu jala marbalik, ndang ditangihon suarami, jadi manginona ma tu hami torutoru dohot uari na tarsurat di bagasan patik ni si Musa, naposo ni Debata, ala naung mardosa hami dompak ibana.

¹²Dung i dihajongjongkon ibana ma hatana angka na nilumbahonna tu hami dohot tu panguhum, angka na manguhum hami, parohon tu hami jea bolon na so dung dumatang di toru ni sandok langit, songon na masa nuaeng tu Jerusalem.

¹³Hombar tu na tarsurat di bagasan patik ni si Musa, songgop saluhut jea i tu hami. Hape laos so martangiang hami mamuati muruk ni bohi ni Jahowa Debatanami, laho paubahon rohanami sian hajahatonna nian, dohot marateatehon hasintonganmi.

¹⁴Dibahen i dungo do Jahowa taringot tu jea i, jala dipasonggop tu hami, ai na tigor do Jahowa Debatanami, taringot tu saluhut pambahenanna, angka na binahenna, hape laos so hutangihon hami suarana.

¹⁵Ia nuaeng, ale Tuhan Debatanami, ho do naung manogihon ruar bangsom na jolo sian tano Misir marhitehite tangan na gogo, dohot mambahen barita di goarmu rasirasa sadarion, mardosa do anggo hami, jala manjahati.

¹⁶ Iale Tuhan, ala ni saluhut hatigoranmu, sai pasurut ma rimasmu dohot parpiarpiar ni murukmu sian Jerusalem hutam i, dolok habadiaonmu, ai binahen ni dosanami dohot binahen ni hajahaton ni angka ompunami, umbahen manjadi haurahon Jerusalem dohot bangsomi di saluhut halak na humaliang hami.

¹⁷ On pe ale Debatanami! Sai tangihon ma tangiang ni naposom dohot hoihoina i, jala bahen ma marsinondang bohimi di atas ni inganan habadiaonmu naung tarulang i, ala ni Tuhan i.

¹⁸ Sai paeleng ma pinggolmu, ale Debatanku, jala tangihon, sai tonggor ma matam jala ida ma hamamagonami dohot huta i naung targoar tu goarmu! Ai ndada mangasahon hatigorannami hami, marsombahon hoihoinami tu jolo ni bohimi, mangasahon asi ni roham angka na godang i do.

¹⁹ Ale Tuhan, sai tangihon ma! Ale Tuhan, sai marpamuati ma roham! Ale Tuhan, sai parateatehon ma i, jala patupa, unang pangernger ala ni dirim, ale Debatanku, ale naung targoar goarmu di atas ni hutam dohot bangsom.

²⁰ (II.) Jadi uju mangkatai dope ahu dohot martangiang dohot manopoti dosanku, nang dosa ni bangsongku Israel, jala marsombahon sombasombangu tu jolo ni

Jahowa Debatangku mangondihon dolok habadiaon ni Debatangku.

²¹Tongon uju mangkatai dope ahu di bagasan tangiang, ro baoa na huida na jolo di bagasan pangungkapon i, i ma Gabariel, habang mansai doras mandapothon ahu marhira tingki pelean bodari.

²²Dung i mangkuling ma ibana mangajari ahu, ninna ma: Ale si Daniel, apala ipe ahu borhat pabotohon tu ho pangantusion!

²³Di mula ni partangiangonmi ruar hata pangungkapon i, pola ro ahu pabotohonsa tu ho, alajolma hasudungan ni roha ho. Antong timbangi ma hata i, jala parateatehon pangungkapon i.

²⁴Nunga pola binuhul pitupulu taon minggu taringot tu bangsom, dohot taringot tu hutam na badia i, laho pasunhon hajahaton dohot manggohi angka dosa, asa mambahen pardenggan taringot tu hajahaton, jala parohon hatigoran salelenglelengna, jala tarsahap pangungkapon dohot panurirangon, jala na miniahan na badia i sahali.

²⁵Antong boto ma i, jala parateatehon: Olat ni na ruar i hata i, ingkon ulahan paulion Jerusalem, sahat ro di na miniahan, pangarajai i, pitu minggu dohot onompulu dua minggu lelengna; suang ma ulahan paulion huta i maralaman jala marlombang humaliang, atik pe angka tingki hagogotan situtu.

²⁶Jadi dung salpu na onompulu dua minggu i, marutang hosa ma na miniahan, alai ndada ala dirina. Dung i ro ma bangso ni sada raja mangago huta i dohot inganan na badia i, gabe ujungna di bagasan pasang naek; jala sahat ro di ujungna sai masa do parporangan, jala digondit hian angka hatarulangun i.

²⁷Dung i patoguonna ma parjanjian tu torop halak leleng ni na saminggu; jala satonga minggu i pasohotonna ma pelean sipotongon dohot pelean sipanganon, jala masa hinasingkop ni na so uhum di inganan na badia i, dipamasa angka sipangago, paima taruse hasiapon dohot hamagoan tu sipangago i.

10¹(I.) Patolutaonhon hinarajahon ni si Sirus, raja sian Persia, ro sada hata pangungkapon tu si Daniel na marimbang goar si Beltsasar, jala hasintongan do hata pangungkapon i, jala boaboa ni parporangan bolon do i. Jadi diparateatehon ibana ma hata i, jala dapot rohana lapatan ni pangungkapon i.

²Di angka ari uju i, sai marhohondo si Daniel, pola tolu minggu lelengna.

³Ndang hupangan sagusagu hasudungan, lompan pe dohot anggur, ndang apus tu pamanganku, ndang dung humiahi ahu, paima gok ari ni na tolu minggu i.

⁴Tole muse paduapuluopatarihon di bulan sipaha sada, uju ahu di topi ni aek godang, i ma batang aek Hidekel.

⁵Jadi manaili ma matanku, gabe huida ma sada baoa na marpangkean hori, jala marhohos sere sian Upas di gontingna.

⁶Ia dagingna songon mata intan tarsis, jala bohina songon rupa ni hilap, jala matana songon api na marnalanala, jala botohonna dohot patna songon sillam ni tombaga na ginarahon, jala suara ni hatana songon pardorom ni ronggur.

⁷Alai sasada ahu, si Daniel, marnida pangungkapon i; ianggo baoa angka na di lambungku, ndang diida nasida pangungkapon i, panonggoti bolon do madabu tu atasnasida, gabe maporus nasida laos martabuni.

⁸Alai tading do anggo sasada ahu, huhut paberengbereng pangungkapon godang i, pola ndang adong be tading gogo di bagasan ahu huhilala, jala mimbar do saudaranku, gabe marlangan, jala ndang be margogo ahu.

⁹Dung i hubege ma suara ni hatana, jadi dung hubege suara ni hatana i, gabe gonggong ahu laos manungkap tu tano.

¹⁰Jadi ida ma, adong sada tangan manjama ahu, jala dihutoli ahu pahehe ahu mangondolhon ulu ni tothu dohot palak ni tanganku duansa.

¹¹ (II.) Dung i ro ma hatana tu ahu: Ale Daniel, baoa hasudungan ni roha! Sai parateatehon ma hata angka sipaboaonku tu ho, jala jongjong ma ho di hajongjonganmi! Ai apala ipe ahu disuru manopot ho. Jadi uju dihatahon hata i tu ahu, angka dotdot do ahu jongjong.

¹² Dung i ro muse ma hatana tu ahu: Unang ho mabiar, ale Daniel! Ai olat ni ari parjolo uju marsangkap roham naeng antusanmu, jala dipaunduk ho roham di adopan ni Debatam, nunga ditangihon angka hatami, jala ala ni angka hatami do umbahen na ro ahu.

¹³ Hape ro ma induk ni harajaon Persia mandopang ahu, pola duapulu sada ari lelengna. Jadi ida ma, ro ma Mikhael, sada sian angka induk parjolo manolongi ahu; jadi monang ma ahu maradophon angka raja ni Persia.

¹⁴ Ro pe ahu nuaeng, naeng mangajari ho do taringot tu na masa sogot, di ujung ni angka ari tu bangsom; ai marhapatean tu angka ari sogot do pangungkapon i.

¹⁵ Jadi uju dihatahon ibana angka hata i tu ahu, manungki ma bohingku tu tano huhut hohom ahu.

¹⁶ Dung i ida ma, sada halak tudos tu rupa ni jolma manjama bibirhu, laos hubuha ma pamanganku, jala hudok tu halak na jongjong di jolongku: Ale tuan, binahen ni

pangungkapon i gabe tubu sahithu, jala ndang be margogo ahu.

¹⁷Jadi tung beha ma pambahen ni naposo ni tuangku mangkatai dohot tuangku! Ia ahu tung na so adong be gogongku olat nion, jala ndang adong be hosa tading di bagasan ahu.

¹⁸Dung i diulahi ibana, na tudos tu rupa nijolma idaon manjama ahu, jala dipargogoi ahu.

¹⁹Ro huhut hatana mandok: Unang ho mabiar, ale baoa hasudungan! Dame ma di ho! Pos ma roham, pir ma tondim! Jadi uju mangkatai ibana tu ahu, dapotan gogo ma ahu, laos hudok ma: Antong didok tuangku ma hatana, ai nunga dipargogoi ho ahu.

²⁰Dung i ninna ibana ma: Atehe, diboto ho do manang aha na huharohon nuaeng manopot ho? On pe mulak ma ahu laho marporang tu induk sian Persia; ia dung borhat ahu, ida ma, ro ma soluk induk sian halak Junani.

²¹Alai tahe pabotohononku ma tu ho angka na tarsurat di bagasan buku hasintongan. Hape ndang adong nanggo sahalak donganku mangalo dompak angka nasida i, nda holan Mikhael, indukmana i.

11¹(I.) Di taon parjolo hinarajahon ni si Darius sian Madai pe, laos ahu do donganna laho margogoihon dohot mambahen marsihohot rohana.

²Nuaeng pe, hata hasintongan ma paboakonku tu ho: Ida ma, hehe dope tolunari raja di Persia, jala na paopathon i maruli hamoraon godang situtu tumindi saluhutna. Alai ia dung marhuaso ibana binahen ni hamoraonna i, patubionna ma saluhutna mandopang harajaon ni halak Junani.

³Dung i hehe ma sada raja na begu, jala na gomos situtu marpangarajaion, jala guru lomo ni rohana di bahenonna.

⁴Alai ia dung manimbukbuk sangapna mabola ma harajaonna i bagi opat, mangihuthon na opat desa ni langit i; alai ndada tu pinomparna, jala ndada tudos tu harajaonna manang panggomgomina, tung butbutanna do harajaonna i, jala sahat tu halak na asing, papulik nasida.

⁵(II.) Dung i lam naek sorga ma raja di dangsina; alai gumogo muse sahalak sian angka wakilna, asa laos ibana soluk mangarajai, tung harajaon bolon do gomgomanna i.

⁶Alai di laonlaon ni ari martondong ma nasida, ai ro ma boru ni raja sian dangsina manopot raja di utara, asa mambahen hasunan nian. Alai ndang tartogarsa gogo ni botohon, jala ndang manahan jongjong nang amana dohot huasona i; tung ibana sandiri do sahat tu hamatean ro di angka na pataru nasida, ro di ama pangintubu di nasida dohot ibana na pasangaphon nasida na sai laon.

⁷ Dung i hehe ma sada halak sian tumbur ni uratna manoluk ingananna; jadi ro ma ibana mardongan parangan, pola soluhonna huta na gonting ni raja sian utara, jala dopangonna nasida, laos papatuaonna.

⁸ Nang angka ajiajiannasida, rap dohot ganaganaannasida angka na tinompa ro di angka ulaula, hasudungan ni rohanasida, sian perak dohot sian sere, tarboan do tu Misir; dung i nania leleng ibana manahan jongjong mandopang raja sian utara.

⁹ Ia dung disola ibana harajaon ni raja sian dangsina, ingkon mulak boti ibana tu tanona.

¹⁰ Alai anggo angka anakna mangkontas tu hamusuon dohot papunguhon torop angka parangan marhoronhoron. Dung i ro ma sahalak sian nasida mangalantap songon aek magodang dohot mandorongi; mulak muse ibana, laos marporang nasida sahat ro di hutana na gonting i.

¹¹ Dung i manggusar ma raja sian dangsina, laos borhat jala tole marmusu dompak ibana, dompak raja sian utara; paheheonna ma deak parangan marhoronhoron, gabe sahat tu tanganna do angka parangan ondeng.

¹² Ia dung borhat angka parangan i, ganda ma habeguonna, gabe marloksaloksa halak marragean dibahen, alai ndang tamba ni antuna.

¹³ Ai ulahan ni raja sian utara ma pahehe sada parduaan parangan, tumorop sian

parjolo i; dung i marhira dapot ujung ni angka tingki, ulahanna ro ganup taon, mardongan parduaan parangan bolon dohot parhohas godang tu hamusuon.

¹⁴Alai di angka tingki uju i, hehe ma torop halak dompak raja sian dangsina, anak ni bangsom pe, angka na jungkat marroha, manggunturi do naeng pasintong alatan, hape tardapot do nasida.

¹⁵Dung i ro ma raja sian utara, jala bahenonna hubu martungkum dohot papatu huta sada na gonting. Botohon ni raja sian dangsina pe, ndang manahan, ro di bangso angka na pinillitna, tung na so margogo do mangalo.

¹⁶Jadi bahenon ni na ro dompak ibana ma guru lomolomo ni rohana, jala ndang adong nanggo sahalak manahan maradophon ibana. Solaonna ma dohot tano bagabaga i, jala sun siap do i bahenon ni tanganna.

¹⁷Dung i diondam rohana ma naeng ro manguluhon huaso ni sandok harajaonna, jala dipaula naeng mambahen parjanjian tu ibana dohot mangalehon boruna bahen jolmana laho mangago nian; alai ndang tulus manang manjadi tahina i.

¹⁸Dung i tujuon ni bohina ma dompak angka pulo, jala torop papatuonna disi, alai pasohoton ni sada ulubalang ma insahinsakna, tung marsibalik tu ibana do insahinsaknai bahenonna.

¹⁹Dung i tujuon ni bohina muse dompak huta angka na gonting i di tanona sandiri, tarsulandit ma ibana disi laos tinggang, gabe ndang be jumpang ibana.

²⁰Dung i hehe ma sada halak singkatna, na paborhat sada halak sipapungu guguan mangasahon hamuliaon ni harajaonna i, alai ndang piga dan suda ajalna i; ndada binahen hamuruhon manang hamusuon.

²¹(III.) Dung i bangkit ma sada halak gambalgambal singkatna, ndang nian pinampe tu ibana jujungan harajaon i, gabe ro ibana so pangiriman mangalaum harajaon i marhitehite elaela.

²²Jadi mabaor ma maradophon ibana parangan angka na mangalantapi, laos dipidomhon do, nang sahalak induk ni parjanjian i.

²³Dung i olat ni parjanjian i tu ibana bahenonna ma sipaotooto; laos nangkok do ibana, jala monang marhitehite otikjolma.

²⁴Tung na so pangiriman do dirampok bagian ni tano apala na lunak i, jala bahenonna na so dung binahen ni amana, manang ompuna, reongkononna do tabantaban dohot sintahan dohot sinamot tu tongatonganasida, jala dompak angka huta na gonting do sangkapsangkap ni rohana, sahat ro di tingki naung binuhul hian.

²⁵Dung i paheheonna ma paranganna dohot rohana marporang dompak raja sian

dangsina mardongan parduaan ni parangan mansai godang. Raja sian dangsina pe antong manggusar do tu hamusuon mardongan parangan mansai torop, jala na begu situtu. Alai ndang tagamon manahan ibana, ai sangkap jehejehe disangkapi nasida dompak ibana.

²⁶Gari halak na manganhon indahanna padapot ibana, gabe lumindak paranganna, jala marragean mansai torop.

²⁷Jala roha ni raja na dua i, rap marsatahi mambahen hajahaton, jala rap di lambung ni sada meja nasida mangkatahon gabus; alai ndang tagamon manjadi, ai anggo hasunan i tu tingki na asing dope binuhul.

²⁸Dung i mulak ma ibana tu tanona mamboan arta mansai godang, jala rohana mangalo dompak parjanjian na badia i; dung saut dipatulus, mulak ma ibana tu tanona.

²⁹Jumpang muse tingki na binuhul i, mangulahi ibana muse borhat dompak dangsina, alai ndang songon antuna di na borhat parjolo borhatna parpudi i.

³⁰Ai ro do angka hopal sian Kitim mangalo ibana, gabe godoron ibana laos mulak; jadi dipapuas ma murukna dompak parjanjian na badia i, jala dilaluhon; dung i muli ma ibana, jala marsatahi dohot halak angka na manadingkon parjanjian na badia i.

³¹Dung i hehe ma sian paranganna, angka na paramun inganan na badia i dohot huta

na gonting i, laos pasohotonna ma dohot pelean ariari, jala patindangonna hasogiron ni sipangago i.

³²Jala halak na manjahati dompak parjanjian i, apoanna do marbalik marhite sian hata elaela; alai anggo bangso angka na tumanda Debatana, patodosonna ma rohana laos marsihohot.

³³Jala halak angka na pantas marroha sian bangso i, marrohaihon torop halak; alai marragean do nasida binahen podang dohot jilam ni api, binahen ni hurungan dohot pamupusion manang piga ari lelengna.

³⁴Jala di hararagenasida maruli panolongion siotihotik nasida; alai torop halak marpangansi paihuthon nasida.

³⁵Nang sian halak angka na pantas marroha, marragean do deba, manguji rohanasida, papitahon dohot paiashon sahat ro di tingki panimpuli. Ai ingkon masa dope songon i ro di tingki naung binuhul hian.

³⁶(IV.) Jala guru lomo ni rohana bahenon ni rajai, jala patimbotimboonna dirina, mangastaasta dompak luhut angka debata. Gari dompak Debata ni angka debata, dohononna do hata jungkat mangasapasapi, jala marantu do ibana paima sun tolhas rimas i; ai manang aha naung binuhul hian, ingkon saut do.

³⁷Ndang pardulina nang debata ni angka ompuna; hinauli ni angka parompuan pe,

manang debata dia pe ndang pardulina tung saluhutna do diastaasta rohana.

³⁸Alai anggo debata pandingini di huta, angka na gonting pasangaponna do di hajongjonganna, jala debata na so tinanda ni ompuna pasangaponna do marhitehite sere, perak, batu intan dohot angka arta hasudungan ni roha marragamragam.

³⁹Jala bahenonna do tu huta angka na gonting i, suang songon na binahenna tu debata sileban i: Manang ise na mangolophon ibana pagandaonna ma hamuliaon tusi, jala pabangkitonna nasida mangarajai torop halak, jala bagihononna tano i bahen upanasida.

⁴⁰Alai anggo di tingki marhira jumpang ujungna, masijonapan ma ibana dohot raja sian dangsina. Jadi dorongan ni raja sian utara ma ibana marhitehite hureta, angkajolma parsihundul dohot torop angka hopal, laos solaonna ma angka luat i, jala lantapanna laos binsat.

⁴¹Tolhas muse ibana tu tano bagabaga na marmulia i, jala marloksaloksa halak marragean bahenonna; alai malua do sian tanganna ianggo angka on: Edom dohot Moab dohot angka parjolo ni halak Amon.

⁴²Dung i surdukkononna ma tanganna tu angka luat, tano Misir pe ndang tagamon malua.

⁴³Jala guru dok na do angka arta sian sere dohot sian perak, ro di saluhut arta hasudungan ni Misir; halak Kub pe dohot Kus mangihuthon angka bogasna.

⁴⁴Alai tarsonggot do ibana bahenon ni barita angin, angka sian habinsaran dohot sian utara; jadi borhat ma ibana marmurukmuruk situtu naeng mangago dohot mangarendephon torop halak.

⁴⁵Dung i pagohononna ma angka undungundung ni harajaonna di holangkolang ni dua laut, mardonokkon dolok inganan ni habadiaon na marmulia i; hape jumpang ma ajalna, jala ndang adong nanggo sahalak mangurupi ibana.

12¹(I.) Dung i di tingki uju i, hehe ma Mikhael, induk na balga i, na hehe humongkop angka anak ni bangsom. Jadi masa ma tingki hagogotan na so dung dumatangi, olat ni dung adong bangso sahat ro di tingki panimpuli; alai apala di tingki na sasada i ma malua bangsom, luhut angka na jumpang tarsurat di bagasan pustaha hangoluan.

²Jala torop sian halak na modom di bagasan orbuk ni tano i, tarsunggul sogot: Na deba tu hangoluan salelenglelengna, na deba tu haurahon marragamragam, gabe biasbias salelenglelengna.

³Jala halak angka na pantas marroha, marsinondang sogot songon sondang ni

langit, jala nasida angka na manogunogu torop halak tu hatigoran, marsinondang sogot songon bintang ro di salelenglelengna.

⁴Ia ho, ale Daniel! Tabunihon ma angka hata i, jala sahapi pustaha i, paima jumpang tingki panimpuli; jadi torop halak manulingkit hata i, gabe tamba situtu parbinotoanna.

⁵(II.) Dung i marnida ma ahu, Daniel, gabe ida ma, jongjong disi dua halak na asing, na sada di baribaon ni batang aek i, na sadanari di baribana i.

⁶Dung i ro ma hata ni na sada mandok tu baoa na marpangkean hori, na jongjong di atas aek ni batang aek i; sadia leleng on asa jumpang ujung ni angka halongangan on?

⁷Dung i hubege ma suara ni baoa na marpangkean hori, na jongjong di atas aek ni batang aek i, laos dipatoltol ma tanganna siamun dohot hambirang dompak banua ginjang, asa marmangmang ibana tu ibana na mangolu salelenglelengna: Ingkon jolo salpu sada tingki, dua tingki dohot satonga tingki naung binuhul hian, jala dung pe sohot parserahan ni pasipasi sian bangso na badia i, ipe asa marujung saluhutna i.

⁸Jadi hubege do nian hata i, alai ndang dapot rohangku, gabe ningku ma: Ale tuangku, aha do apala ujung ni saluhutna i?

⁹Alai ninna ibana ma: Laho ma ho, ale Daniel! Ai ingkon buni jala tarsahap angka hata i sahat ro di tingki panimpuli.

¹⁰Ingkon torop halak taruras sogot, jala na pinapita jala angka na niuji. Tongtong do manjahati anggo halak parjahat hian, jala ndang dapotan roha luhut halak parjahat i; alai anggo halak na marroha i antusanna ma i.

¹¹Jala olat ni tingki pansadian ni pelean ariari sahat ro di tingki pajongjongonna hasogiron ni sipangago i saribu duaratus siapulu ari do.

¹²Martua ma manang ise na manaonnaon, jala sanga dieak salpu ni saribu toluratus tolupulu lima ari.

¹³Alai anggo ho, ale Daniel! Laho ma ho, marroha pangkirimon di ujung, jala maradian ma ho, asa hehe ho muse manjalo partohapanmu di ujung ni angka ari!

Hosea

1 ¹ (I.) On ma hata ni Jahowa na ro tu si Hosea, anak ni si Beerli di angka ari ni si Usia, si Jotam, si Ahas dohot si Hiskia, angka raja di Juda; dohot di angka ari ni si Jerobeam, anak ni si Joas, raja di Israel.

² Mula ni hata ni Jahowa marhitehite si Hosea: ninna Jahowa ma tu si Hosea: Laho ma ho, buat ma sada boruboru sibabijalang dohot angka tubu ni sibabijalang! Ai sai didatdati isi ni tano i do marmainan, marbalik sian Jahowa.

³ Jadi laho ma ibana, jala dibuat ma si Gomer, boru ni si Diblaim, gabegabean ma nasida jala ditubuhon di ibana sada anak.

⁴ Dung i didok Jahowa ma tu ibana: Jou ma goarna si Jesreel; ai otik nari marlulu ma ahu di angka utang mudar ni si Jesreel tu pinompar ni si Jehu, jala ahu pasiaphon harajaon ni pinompar ni Israel.

⁵ Jadi di ari na sasada i ponggolhononku ma sior ni Israel di rura Jesreel.

⁶ Dung i gabegabean muse ma boruboru i, jala ditubuhon sada boru. Dung i didok Jahowa ma tu ibana: Jou ma goarna Nai Sohinasian; ai ndang be marpangulahi rohangku tu pinompar ni Israel, manang marpamuati rohangku tu nasida.

⁷ Alai marpangulahi ma rohangku anggo tu pinompar ni Juda jala paluaonku nasida marhitehite Jahowa, Debatanasida i; alai ndang paluaonku marhitehite sior manang podang manang hamusuon, manang hoda manangjolma parsihundul pe.

⁸ Jadi dung sirang susu Nai Sohinasian, gabegabean muse ma boruboru i, jala ditubuhon sada anak.

⁹ Jadi ninna Jahowa ma: Jou ma goarna Lo Ami, ai ndang bangsongku hamu, jala ndang hamu nampuna ahu.

¹⁰ (2-1) (I.) Alai anggo bilangan ni halak Israel sogot sobokkon horsik ni laut do godangna na so hasahatan jala na so habilangan, jala di hajongjongan pandohonan tu nasida: Nandang bangsongku hamu, dohonon ma sogot tu nasida: Angka anak ni Debata na mangolu i do hamu.

¹¹ (2-2) Dung i marpungu ma sogot halak Juda rap dohot halak Israel, jala pabangkiton nasida ma sahalak bahen ihutannasida, jala borhat nasida sian tano i; ai timbul do ari ni si Jesreel sogot.

2¹ (2-3) (II.) Paboa hamu ma tu hahaanggimuna: Bangsongku! Dohot tu ibotomuna: Hinasianan.

² (2-4) Sai badai hamu ma inamuna! Ai ndang ibana jolmangku, ahu pe ndang harajaanna, asa diuras bohina, paholang

parmainanonna dohot pangalangkuponna
sian holangkolang ni bagotna.

³(2-5) Asa unang hupasalang ibana, gabe
marsaemara jala hupatindang ibana, songon
di ari hatutubuna, jala hubahen ibana
sobokkon halongonan jala hubahen ibana
songon tano hasang jala hubunu ibana sogot
binahen ni uas.

⁴(2-6) Jala ndang asianku angka anakna i,
ala anak ni sibabijalang nasida.

⁵(2-7) Ai boruboru sibabijalang do inanasida
i, jala mambahen haurahon do na tumubuhon
nasida, ai tung didok do: Laho ma ahu
mangihuthon puangku, angka na mangalehon
tu ahu roti dohot aek dohot hapas dohot hori
dohot miak dohot tuak na tonggi siinumonku.

⁶(2-8) Dibahen i ida ma rungganaku ma
dalanmu dohot suga, jala bahenonku sada
parik, asa unang be jumpangsa angka
dalanna i.

⁷(2-9) Eahanna pe angka puangna, hape
ndang dapotsa nasida, jala luluanna nasida
hape ndang jumpangsa. Jadi dohononna
ma: Antong mulak nama ahu tu sinondukku
parjolo i, ai sumonang do ahu uju i sian
nuaeng.

⁸(2-10) Alai ndang ditanda rohana, ahu
hian do nasailaon mangalehon tu ibana eme
dohot tuak dohot miak; jala ahu do pagodang
di ibana perak dohot sere, pinaulinasida
jumadihon Baal.

⁹(2-11) Dibahen i ulahanku ma mambuut emengku di tingkina dohot tuakku di tingkina jala rampasonku ma hapashu dohot horingku bahen pangkuphupi ni parsamaraonna hian nian.

¹⁰(2-12) On pe, pasalongonku ma hailaanna di adopan ni angka puangna, jala ndang adong manang ise baoa na tuk palua ibana sian tanganku.

¹¹(2-13) Dung i pasadionku ma sandok las ni rohana, ari rayana, poltak ni bulanna ro di ari Sabbat dohot saluhut arina marulaon godang.

¹²(2-14) Jala tarulang bahenonku hau anggurna dohot antajauna, ala na nidokna i taringot tusi: I do upangku, na nilehon ni angka puangku tu ahu; jala bahenonku do i gabe tombak, jadi suda ma angka i gagaton ni binatang di ladang.

¹³(2-15) Jala luluhononku ma tu nasida ariari ni Baal, uju manutung daupa nasida tusi, jala dipajagar angka tintinna dohot horungkorungna laho mangihuthon tu angka puangna, alai lupa do nasida anggo di ahu, ninna Jahowa.

¹⁴(2-16) (III.) Dibahen i, ida ma, elaonku ma nasida jala togihononku tu halongonan, jala dohononku ma hata apulapul tu rohana.

¹⁵(2-17) Lehononku ma olat ni tu ibana porlak anggurna dohot rura Akor bahen bohal ni pangkirimon; jadi marende taripar

ma nasida disi, songon uju di angka ari ni haposoonna, songon uju di ari haruruarna sian tano Misir.

¹⁶(2-18) Di ari na sasada i, ninna Jahowa; goaronmu ma ahu: Tuanlaengku! Jala ndang be goaronmu ahu: Baal-hu!

¹⁷(2-19) Ai paholonganku ma goargoar ni angka Baal i sian pamanganna, jala ndang be taringotan ni halak angka goarnasida.

¹⁸(2-20) Jala bahenonku ma di ari na sasada i padan pardenggan di nasida tu binatang di ladang dohot tu pidong angka na martongatonga langit dohot tu gulokgulok di tano on; ponggolhononku ma sior dohot podang ro di hamusuon sian tano on, asa marsonangsonang nasida maringanan hubahen.

¹⁹(2-21) Jadi oliongku ma ho bahen jolmangku salelenglelengna; oliongku ma ho marhitehite hatigoran dohot uhum dohot asi ni roha dohot angka habasaon ni roha.

²⁰(2-22) Jala oliongku ma ho di ahu marhitehite haporseaon, gabe tandaonmu ma Jahowa.

²¹(2-23) Di ari na sasada i maralus ma ahu, ninna Jahowa alusanku ma langit, jala alusan ni langit i tano on.

²²(2-24) Jala alusan ni tano i ma eme dohot tuak dohot miak jala alusannasida ma si Jesreel.

²³ (2-25) Dung i saburhononku ma nasida di ahu di tano i jala asianku ma Nai Sohinasian, jala dohononku ma tu Lo Ami: Bangsongku do ho! Jala dohononna ma: Ale Debatangku!

3¹ (I.) Dung i ninna Jahowa ma tu ahu; ulahi ma laho, haholongi ma sada parompuan na hinaholongan ni puangna nian, hape marmainan do; songon pangkaholongi ni Jahowa di halak Israel, hape marbalik do nasida tu angka debata sileban, jala mangapian di gaburgabur angka na tinanggulean.

² Jadi hutobus parompuan i di ahu arga sampululima rupia dohot tonga dua tuhukan eme.

³ Dung i ningku ma tu ibana: Tung nania leleng do ho di ahu; unang ho marmainan jala unang ho masiamangamang, ahu pe songon i tu ho.

⁴ Ai tung na leleng do halak Israel hundulhundul sogot ndang marraja, jala ndang marinduk, jala ndang marpelean, jala ndang marlanggatan jala ndang marsampesampe epod manang marganaganaan terapim.

⁵ Dung i di laonlaon ni ari mulak ma halak Israel, jala luluannasida ma Jahowa, Debatanasida i dohot si Daud, rajanasida i jala angka hitir nasida mandapothon Jahowa dohot hatuaonna di ujung ni angka ari.

4¹ (I.) Tangihon ma hata ni Jahowa, hamu ale pinompar ni Israel! Ai adong do parbadaan ni Jahowa dompak pangisi ni tano i ala soada hasintongan jala soada haholongon, jala soada parbinotoan di Debata di tano i.

²Holan tolontolon do dohot gabus dohot bunubunu dohot tangkotangko dohot langkuplangkup; mangarut do nasida jala mardapotdapot do angka utang mudar.

³Dibahen i marsak do tano i jala mandate sude isina di bagasan ro di binatang di ladang dohot pidong angka na martongatonga langit, marragean dohot angka dengke di laut.

⁴Hape na so tupa adong manang ise na mambadai, jala na so tupa adong manang ise na maminsang! Jala sobokkon halak na mambadai malim do bangsomi.

⁵Dibahen i ompas ma ho arianna i, ompas dohot panurirang rap dohot ho bornginna i, jala ripur bahenonku inam.

⁶Ripur ma sogot bangsongki ala so marparbinotoan nasida, ala naung ditoishon ho parbinotoan, bolongkononku ma ho unang be ho mangaradoti ulaon hamalimon di ahu, ala naung dihalupahon ho patik ni Debatam, halupahononku ma huhut angka anakmi.

⁷Lam sopar nasida lam dituntun nasida mardosa dompak ahu; hamuliaonnasida gabe haurahon pasuharonku.

⁸Dosa ni bangsongki do dihangoluhon nasida, jala mangapian rohanasida, be di hajahaton nasida.

⁹Jadi dos be uhum i tu halak situanna torop dohot tu malim, marlulu ma ahu tu nasida be hombar tu dalannasida i, jala pasudolonku tu nasida hombar tu pambahenanna be.

¹⁰Mangan pe nasida alai ndang butong, marmainan pe nasida alai ndang sopar nasida, ala dipasohot nasida marulaon tu Jahowa.

¹¹Parmainanon dohot anggur dohot tuak na pang, i ma na mangago roha.

¹²Hape anggo bangsongku marpanungkunan tu hauna do i, jala tungkotna marboaboa tu ibana; ai nunga dililuhon tondi parmainanon nasida, gabe marmainan nasida marbalik sian Debatanasida.

¹³Mamele do nasida di atas punsu ni angka dolok, jala manutung daupa di atas ni angka buntulbuntul, ditoru ni hau hariara, jabijabi dohot baringin ala denggan parlinggomanna. Dibahen i laho marmainan do borumuna, jala tardege pinggol ni dalam angka parumaenmuna.

¹⁴Alai ndang marlulu ahu dompak borumuna ala marmainannasida, manang dompak parumaenmuna ala tardege pinggol ni dalam. Ai gari hamu sandiri mangalambung do rap dohot angka parompuan parmainan mamele rap dohot angka parompuan sibabijalang,

hape lam tu hamagoan do bangso na so marroha i.

¹⁵(II.) Molo naeng marmainan ho, ale Israel, unang nian dohot Juda marsala! Unang nian laho hamu tu Gilgal, jala unang nian nangkok tu Bethapen! Jala unang nian marmangmang hamu songon on: Songon sintongna mangolu Jahowa.

¹⁶Ai tung na riar do Israel, songon lombu jalang, aduon ni Jahowa ma nasida nuaeng, songon anak ni birubiru di adaran na lambas.

¹⁷Nunga tung tarrante Epraim tu angka ganaganaan; pasombu ibana tusi antong!

¹⁸Torbang do tahe pargadombusonnasida, sai didatdati nasida do marmainan, sai mangapian di haurahon do angka partoginasida i.

¹⁹Dilualua alogo do nasida marhitehite habongna, gabe tarurak nasida binahen ni peleannasida i.

5¹(I.) Tangihon ma hata on, hamu ale angka malim, jala parateatehon ma i, hamu ale pinompar ni Israel, jala tarehon pinggolmu ho ale pinompar ni raja! Ai dompak hamu do uhum i, ala gabe jorgong hamu di Mispa, huhut gabe aring na tinaon di atas ni Tabor.

²Sai diulasulas angka panimbil do pamotongon pelean, alai gabe paminsang do anggo ahu tu nasida saluhut.

³Tangkas do hutanda Epraim jala ndang buni ia Israel maradophon ahu, ai apala ipe marmainan Epraim, ramun ia Israel.

⁴Ndang diloas angka pambahenannasida mulak tu Debatanasida, ai tondi parmainanon di bagasan rohanasida, jala ndang ditanda nasida Jahowa.

⁵Alai hajungkaton ni Israel manindangi sogot dompak bohina, jala ompas be do Israel dohot Epraim binahen ni hajahatonna; ompas nang Juda rap dohot nasida.

⁶Ro do nasida marhitehite birubirunasida dohot lombunasida naeng mangalului Jahowa nian, alai ndang tagamon jumpangnasida ibana, ai nunga manginsurut ibana sian nasida.

⁷Nunga mahilolong nasida mida Jahowa ai angka anak sileban ditubuhon nasida; dibahen i suda ma nasida panganon ni poltak ni bulan ro di partaliannasida i.

⁸(II.) Palu hamu ma sarune di Gibeah dohot sangka di Rama! Marsurak hamusuon ma hamu di Bethapen: Di pudim do ale Benjamin!

⁹Epraim gabe holongonan di ari paminsangon; jala hasintongan do hupabotohon tu angka marga ni Israel.

¹⁰Angka induk ni Juda nunga gabe tudoshon halak na paorot parbalohan, ala ni usehononku ma tu nasida rimashu, songon aek.

¹¹ Nunga hona pangarupaon Epraim,
tarjepol do i hona uhum; ai girgir do ibana
mangihuthon patik binahen ni jolma.

¹² Dibahen i tudoshon ngitngit do ianggo ahu
di Epraim, jala tudoshon burbur na mangago
di pinompar ni Juda.

¹³ Jadi dung diida Epraim sahithna jala Juda
bugangna, gabe laho ma Epraim tu Assur,
jala disuru suruanna tu raja Jarib; alai ndang
tarbahen anggo ibana pamalumhon hamu,
jala ndang hataoaran ibana bugangmu.

¹⁴ Ai sobokkon babiat do ahu di Epraim,
jala sobokkon anak ni babiat di pinompar ni
Juda. Ianggo ahu, dung huparsisiga laho ma
ahu, huboan nasida, jala ndang adong na tuk
paluahon.

¹⁵ Laho ma ahu mulak tu ingananku, paima
diundukhonnasida dosanasida i, jala dilului
nasida bohingku; di bagasan hagogotannasida
i pasogotonna ma mangalului ahu sian nasa
rohana.

6¹ (I.) Beta hita, asa mulak hita tu Jahowa!
Ai nunga ibana mangaribahi, laos ibana
pamalum hita! Nunga ibana mambugangi,
laos ibana manaoari hita!

² Sai pangolonna do hita dung salpu dua
ari, tole patoluarihon paheheonna hita, asa
mangolu hita maradophon ibana.

³ Sai mananda ma hita, sai ringgas ma hita
mangeahi parbinotoan di Jahowa, tudoshon
buhasiang ari do sintong ni habibinsarna,

jala sai na ro do ibana songon udan tu hita
songon udan nene na mamornohi tano i.

⁴(II.) Tung aha ma bahenonku tu ho, ale
Epraim? Tung aha ma bahenonku tu ho,
ale Juda? Ai tudoshon ombun manogot do
hadaulatonmuna, jala tudoshon nambur
manogot, na tibu manaek.

⁵Dibahen i hubarbar nasida marhitehite
angka panurirang, hubunu nasida marhitehite
hata angka na sian pamanganku, gabe binsar
angka uhumhu, songon panondang.

⁶Ai lomoan do rohangku mida asi ni
roha, asa mida pelean; jala lomoan mida
parbinotoan di Debata, asa mida pelean
situtungan.

⁷Alai anggo nasida dilaosi nasida do padan
na hubahen, songon si Adam nunga marbalik
nasida sian ahu disi.

⁸Huta ni angka siulahon hajahaton do
Gilead, gok bogas sian mudar.

⁹Jala songonjolma panamun do
marmonggopan luhutan ni angka malim;
di dalam laho tu Sikem manodosi nasida, ai
harorongan diula nasida.

¹⁰Angka hasogiron do huida di bagasan
bagas ni Israel; disi do masa parmainanon ni
Epraim, ramun ia Israel.

¹¹Nang di ho, ale Juda, nunga dipatindang
sada gotilon, molo dung mulak sogot huboan
bangsongku sian habuangan.

7¹ (I.) Laho pamalum Israel nian ahu, patar ma dohot hajahaton ni Epraim dohot angka hasalaan ni Samaria. Ai mangulahon sipaotooto do nasida, jala mangarut panangko i, jala mangemur halak pangemur di alaman.

²Jala ndang didok nasida di bagasan rohanasida ahu marningot saluhut hajahatonnasida. Dibahen i dihaliangi angka pambahenannasida ma nasida anggo nuaeng, angka na di jolongku do i.

³Marhitehite hajahatonnasida marlas ni roha rajai dibahennasida, jala marhitehite gabusnasida angka induk.

⁴Tung saluhut do nasida angka pangalangkup, doshon sada pamurunan nasida, na pinatuba ni tukang roti, na mansadi patubatubahon olat ni dung diluntak na niudi paima torus igarigarna.

⁵Tole ari raya ni rajanta i, marsahit be ma induk dibahen raru ni anggur; satahi ibana dohot angka pangarehei.

⁶Ai lam masipasolhotan nasida, songon pamurunan do rohanasida masionggopan: Manipat sabornginna i modom rimasnasida, manogotna i marsigorgor ibana muse, songon jilam ni api.

⁷Saluhut do nasida marsigorgor be songon pamurunan jala suda panguhumnasida dipangan; saluhut rajanasida marragean, ndang adong manang ise sian nasida na joujou tu ahu.

⁸(II.) Saor tu angka bangso parbegu do Epraim, songon sagusagu na so hinosing do Epraim.

⁹Halak ruar umpangan gogona, hape ndang mamoto anggo ibana; nunga pola pistik uban ibana, laos so mamoto do.

¹⁰Alai hajungkaton ni Israel maralus dompak bohina, hape laos so mulak nasida tu Jahowa, Debatanasida i, laos so di lulu i nasida ibana di saluhutna i.

¹¹Jadi tudoshon darapati na oto nama Epraim, ndang marroha: Tongkin tu Misir nasida joujou, tongkin tu Assur nasida laho.

¹²Alai disi laho nasida lingkuphononku ma rambangku tu nasida, jala taitonku nasida tu toru songon pidong na martongatonga langit; pinsangonku ma nasida hombar tu barita di luhutannasida i.

¹³Marjea ma nasida, ala maporus nasida maradophon ahu! Marhinamago ma nasida, ala marbalik nasida sian ahu! Langgo ahu nian naeng paluaonku nasida, hape anggo nasida hata gabus do didok nasida tu ahu.

¹⁴Ndang dung nasida mangangguhi tu ahu di bagasan rohanasida, tagonan nasida mangandungi di atas podomannasida i; ala eme dohot anggur nasida marpungupungu, marbalik sian ahu.

¹⁵Langgo ahu hupodai do nian, hupargogoi tangannasida i; hape anggo nasida na jat do dipingkiri rohanasida dompak ahu.

¹⁶Mulak pe nasida, alai ndang dompak ginjang, gabe tudoshon sior sipaotooto; marragean ma angka induk nasida marhitehite podang, ala ni panengaon ni dilanasida: I ma gabe haurahon nasida di tano Misir.

8¹(I.) Bahen tu pamanganmu sarune i: Songon panoro ni lali songgop musu tu bagas ni Jahowa; ala dilaosi nasida padan na hubahen i, jala manjahati nasida dompak patikki.

²Manganguhi do nian Israel tu ahu: Ale Debatanku, hutanda hami do ho.

³Alai nunga ditulakkon Israel na denggan i: Leleon ni musu ma ibana nuaeng.

⁴Nunga dipampe nasida raja, alai ndang marhite sian ahu; nunga dipabangkit nasida angka induk, hape ndang hutanda nasida. Perakna dohot serena dipauli nasida bahen ganaganaan di dirina ala ni siaphononhon do nasida.

⁵Nunga dibolongkon ibana lombumu, ale Samaria! Nunga marsigorgor rimashu dompak nasida. Sadia leleng on tagamon so tarbahen nasida pita.

⁶Ai sian Israel do haroroan ni, panompa i do mambahensa, jala ndada i Debata, ai gabe tanggotanggo do sogot lembu ni Samaria.

⁷Ai nunga disaburhon nasida alogo, jadi habahaba gotilonna sogot, ndang marbiur emena i, ndang maritak biurna i; tung sura

pe adong diparbuehon, halak sileban do umpolgaksa sogot.

⁸Nunga tarbondut Israel tahe! Gari nuaeng nunga nasida di tongatonga ni angka parbegu, songon ulaula na so tarhalomohon roha ni jolma.

⁹Ala na nangkok i nasida tu Assur, songon halode harangan na riar, na so tarpajinak; mangalehon upa parmainanon do anggo Epraim.

¹⁰Alai atik pe mangalehon upa nasida tu angka bangso parbegu, magira ma papunguonku nasida, asa mamungka otik nasida binahen ni rodi ni raja ni angka pangarajai.

¹¹(II.) Ala naung ditambahi Epraim angka langgatan laho mardosa, mangala dosa ma angka langgatan i tu ibana.

¹²Marloksaloksa pe patikku husurathon tu ibana, hira hata sileban do i dietongi rohanasida.

¹³Dipotongi nasida angka pelean situtungon tu ahu, hira jagal hian, laos nasida manganhon, alai ndang dihalomohon Jahowa nasida. Ingottona ma nuaeng hajahatonnasida, jala luluhononna dosanasida: Mulak tu Misir ma nasida.

¹⁴Ai nunga dihalupahon Israel sitompa ibana, jala dipauli angka joro tu begu, jala nunga dipatamba Juda huta angka na gonting. Jadi tongosonku ma api tu bagasan

angka hutana, laos suda panganonna bagasna angka na bolon i.

9¹ (I.) Unang marlas ni roha ho ale Israel pola marolopolop songon angka parbegu, ai nunga marmainan ho marbalik sian Debatam, nunga mangapian ho di upa parmainanon di atas ni saluhut angka pardegean eme.

² Dibahen i ndang be parmuduon ni pardegean dohot pangilangan anggur nasida jala ansion ni anggur na imbaru do nasida.

³ Nandang be maringan nasida di tano ni Jahowa, ingkon mulak tu Misir do Epraim, jala panganonnasida do na ramun di Assur.

⁴ Nandang tagamon usehononnasida anggur di Jahowa, jala ndang tagamon lomo rohana di angka peleannasida i, tudoshon sagusagu hinamago do i di nasida ramun do sude na manganhon. Ai marmudu hosanasida sandiri do sagusagunasida i, ndang tarbahen masuk tu joro ni Jahowa.

⁵ Tung aha ma bahenonmuna di ari luhutan dohot di ari raya ni Jahowa?

⁶ Ai ida ma, nunga laho nasida dibahen hasisiap; papungupunguon ni Misir do nasida, Mempis mananom nasida. Homitannasida sian perak teanon ni latong do, duriduri tubu di bagasan undungundungnasida.

⁷ Nunga ro angka ari partubolan! Nunga ro angka ari pamalosan! Botoon ni Israel ma disi: Na bodo do panurirang, lalaen do baoa

partondion dibahen hinadeak ni hajahatonmu
dohot dibahen hinagodang ni pangiburuon.

⁸Epraim mangonggop umbajo bangso
ni Debatangku; panurirang i do rambang
ni halak sitaoni pidong di saluhut angka
dalanna; masa do pangiburuon di bagasan
bagas ni Debatana.

⁹Tung na bagas do halonongannasida,
songon uju di Gibeaa; ingotonna ma
hajahatonnasida, luluhononna ma
dosanasida.

¹⁰(II.) Songon parbue ni anggur di
halongonan Israel jumpang ahu, songon
patumonaan ni antajau huida ompumuna di
mulana; hape laho do nasida tu Baal-Peor
pasahathon dirinasida tu haurahon, gabe
biasbias nasida suang songon puangnasida.

¹¹Dibahen i habang do songon pidong
hamuliaon ni Epraim, ndang be mangintubu,
ndang be marhangoluan jolma, manang olo
gabegabean.

¹²Ai nang pe dipagodanggodang nasida
angka anaknasida, punu do nasida
bahenonku, langa soada jolma. Tongon do,
marjea ma nasida molo manginsurut ahu sian
nasida.

¹³Tudoshon Tirus jolo huida Epraim,
sinuan di jampalan na lomak; alai ingkon
togihonon ni Epraim sogot angka anakna laho
pabunuhonsa.

¹⁴Lehon ma tu nasida, ale Jahowa! Aha tahe patut lehononmu? Lehon ma tu nasida bortian na hol dohot bagot na marsik.

¹⁵Nasa hajahatonna nasida di Gilgal do, ai disi do hupungka mangkagigihon nasida. Ala ni roa ni pambahenannasida, onjarhononku ma nasida sian bagashu, ndang be datdatanku mangkaholongi nasida; panggunturi do saluhut induknasida.

¹⁶Nunga talu Ephraim; nunga malos uratna, ndang be marparbue nasida; tung sura pe mangintubu nasida, bunuonku do angka na pinarsinta ni butuhanasida.

¹⁷Bolongkonon ni Debatanku do nasida, ai ndang ditangihon nasida ibana, jadi maotaot ma nasida di tongatonga ni halak parbegu.

10¹(I.) Hau anggur na rugun do Israel marparbue na tudos tu ibana; lam ganda parbuena, lam dipatorop angka langgatan; hombar tu denggan ni tanona, dipadenggan nasida angka ganaganaan.

²Landit do rohanasida, nuaeng ma manginona tu nasida. Ibana ma mangaloha langgatannasida, manegai angka ganaganaannasida.

³Ai dohononnasida ma disi: Nandang marraja hita ala so itahabiari Jahowa; ia rajai, tung aha ma bahenonna tu hita?

⁴Angka hata na so gabeak dihata i nasida, parbulanon na marpangansi dipangke

mambahen parjanjian, jala martumbur uhumu, songon latong di atas gole ni hauma.

⁵Angka hitir do isi ni Samaria humolsohon angka lombu sian Bethapen, ai margudompong do bangsona alani, raion angka malimna, ala na tarboan sian nasida hamuliaonna.

⁶Lombu i pe tarboan do tu Assur bahen somba tu raja Jarib Tarurak ma ia Epraim, maila anggo Israel dibahen sangkapna.

⁷Nunga mago Samaria; rajana pe tudoshon pangotoman di ginjang aek.

⁸Siap ma dohot angka tambak ni Apen, pardosaan ni Israel. Suga dohot duriduri tubu sogot di ginjang langgatannasida. Jadi dohononnasida ma tu angka dolok: Hungkupi hami! Dohot tu angka dolokdolok: Tinggang i hami!

⁹(II.) Olat ni angka ari di Gibeal, sai mardosa do ho, ale Israel! Disi do tinggal nasida, asa unang sahat tu nasida di Gibeal hamusuon i ala ni angka anak hajungkaton.

¹⁰Guru lomongku nama paminsangku tu nasida. Mangaromrom ma angka bangso dompak nasida laho manali nasida ala dosanasida silompit dua.

¹¹Lombu na niajar do anggo Epraim, lomo rohana mardege alai anggo ahu bolusonku ma hinauli ni rungkungna; pampeongku ma auga tu Epraim, ingkon maninggala ma anggo Juda, manisir ia Jakkob di ibana.

¹²Sabur hamu ma di hamu bahen hatigoran
asa manggotil hamu hombar tu asi ni
roha! Totas hamu ma di hamu sada
ladang naimbaru, ai nunga jumpang tingki
mangalului Jahowa, paima ro ibana jala
dipaudanhon tu hamu hatigoran.

¹³Hape hageduhon dininggalai hamu na sai
laon, hajahaton digotil hamu, parbue gapgap
dipangan hamu.

¹⁴Ala marhaposan ho tu dalanmu tu
hinadeak ni ulubalangmu, jadi masa ma musu
garembong di tongatonga ni angka bangsom,
jala saluhut hutam angka na gonting i
tarulang songon pangulang ni si Salmon di
Bet-Arbel; di ari parporangan, uju marosak
angka inaina humongkop angka anakna.

¹⁵Laos songon i do bahenon ni Betel tu
hamu ala ni hinaroa ni hajahatonmuna. Sogot
manogotna i siap situtu raja ni Israel.

11 ¹(I.) Uju bajar dope Israel, holong
rohangku mida ibana, jala sian Misir
do hujou anakki.

²Lam tarjou nasida lam mandaodao nasida
sian bohi ni panurirang; tu angka Baal nasida
balik mamele, tu angka ganaganaan nasida
manutung daupa.

³Ianggo ahu nian, huringiring do Epraim,
hutangkup nasida di tanganna; alai ndang
ditanda nasida, ahu do nian pamalum nasida.

⁴Marhitehite ihot ni jolma ahu manogu
nasida dohot marhitehite tali haholongon;

jala ahu do hira sipaganggang auga
di osangosangnasida jala husulangkon
sipanganon tu ibana.

⁵Ndang tagamon mulak ibana tu tano Misir,
Assur nama gabe rajana, ala manjua nasida
paubahon rohana.

⁶Jadi patuseok ma tongtong podang di
bagasan hutanasida, jala siaphononna
angka ransangna, laos sudahononna ala ni
sangkapnasida.

⁷Hape anggo bangsongki sai mandatdati
marbalik sian ahu, tarjou do nian nasida tu
ginjang, hape ndang olo nasida hehe nanggo
sahalak.

⁸(II.) Beha lehononku ma ho ulaning ale
Epraim? Pasahatonku ma ho ale Israel? Beha
lehononku ma ho ulaning songon Adma?
Bahenonku ma ho songon Zeboim? Humusor
do tahe rohangku dompak ho, marsigorgor
do angka asi ni rohangku.

⁹Ndang tarlaluhon ahu parpiar ni rimashu,
ndang be ulahononku maniaphon Epraim. Ai
Debata do ahu, ndadajolma, di tongatongamu
do na badia, jala ndang ro ahu di bagasan
rimas.

¹⁰Mangihuthon tu Jahowa do nasida sogot,
songon babiat ibana patungoromon, ai
patungoromon ibana, jadi angka hitir ro
mangarongom angka anak sian laut.

¹¹Angka hitir do nasida tongon marlojongi
songon pidong sian Misir, jala songon darapati

sian tano Assur; dung i paianonku na ida di jabunasida marsonangsonang, ninna Jahowa.

¹²(12-1) (I.) Dihaliangi halak Epraim do ahu marhitehite gabus, jala halak Israel marhitehite sipaotooto; ianggo Juda marsihohot dope nian tu Debata dohot tu na badia i.

12¹(12-2) Epraim mangkalomohon alogo jala dieahi habahaba sian purba, ganup ari dipatamba gabus dohot pangarupaon dohot mambahen padan tu Assur, jala diboan miak tu Misir.

²(12-3) Alai adong do huhut parbadaan ni Jahowa tu Juda, jala marlulu ibana dompak Jakkob hombar tu angka dalanna, hombar tu angka pambahenanna tutu baloshononna tu ibana.

³(12-4) (II.) Di bortian dope ibana nunga ditiop hian tambihul ni hahana, jala di haroro ni gogona marsiranggut ibana dohot Debata.

⁴(12-5) Marsiranggut ibana dohot suruani jala monang ibana, tumatangis ibana huhut diparajarajai suruani. Jumpangsa ibana muse di Betel, jala disi do mangkatai ibana tu hita.

⁵(12-6) Alai Jahowa do i, Debata ni angka parangan, Jahowa do goarna.

⁶(12-7) Dibahen i ho ale, sai pauba ma roham tu Debatam; radoti ma haholongon dohot uhum, jala marhaposan tu Debatam ho manongtong!

⁷ (12-8) Halak Kanaan ibana patioptiop hatian sipaotooto, somal ibana mangarohai rasirasa nuaeng.

⁸ (12-9) Lam didok Epraim dope songon on: Asal dung mamora ahu, jumpang ahu sinamot, ndang tagamon jumpangan jea ahu, tau dosangku sian saluhut na huhangaluthon.

⁹ (12-10) Hape ahu do nian Jahowa Debatam olat ni tano Misir; jala ahu mambahen ho maringan dope di undungundung songon uju di angka ari raya.

¹⁰ (12-11) Jala marboaboa ahu tu angka panurirang, jala ahu patorophon pangungkapon, jala marumpama ahu marhitehite angka panurirang.

¹¹ (12-12) Molo masa pameleon tu begu di Gilead, sai na buriapus do nasida; di Gilgal dipelehon nasida angka jonggi. Langgatannasida pe doshon tambaktambak sogot di atas gole ni hauma.

¹² (12-13) Maporus tu Padang-Aram ia si Jakkob, jala sinonduk ia si Israel mambuat boru, marmahanmahan ibana mambuat boru.

¹³ (12-14) Jala marhitehite panurirang sada ditogihon Jahowa Israel ruar sian Misir, jala marhitehite sada panurirang nasida diparmahan.

¹⁴ (12-15) Alai piription situtu ibana dibahen Epraim jadi parsapatahononna ma utangna mudar tu ibana, jala baloshonon ni Tuhanna ma haurahonna tu ibana.

13¹ (I.) Molo mangkuling Epraim, mabiar be do, timbul do ibana di Israel; alai dapotan dosa ibana dibahen Baal, jadi mate ibana.

²Nuaeng pe, sai didatdati nasida do manambai dosa; dipauli nasida do di nasida ganaganaan na tinuang sian peraknasida, angka ganaganaan tubutubu ni rohanasida, jadijadian ni angka pande saluhutna i. Tusi do nasida martonggo umpelehonjolma, angka anak ni lombu diumma nasida.

³Dibahen i sobokkon ombun manogot nama nasida, jala sobokkon nambur, na tibu laho, jala sobokkon hurangkam, na hinabangkon ni habahaba sian pardegean, jala sobokkon timus sian pandiloan.

⁴Hape ahu do nian Jahowa Debatam olat ni tano Misir, jala Debata dungkon ni ahu, ndang adong tinandam, jala ndang adong sipangolu dungkon ni ahu.

⁵Ahu hian marhamaol ho di halongonan di tano na mohop situtu.

⁶Alai dung jumpangan panjampalan nasida hubahen, bosur ma nasida, dung bosur nasida, ginjang ma rohanasida, alani dihalupahon nasida ahu.

⁷Dibahen i hira gabe singa ma ahu tu nasida, hira babiat ahu mangarop di dalan.

⁸Manoro ma ahu di nasida, songon ina ni gompul na agoan anak, jala parsurageonku andoranasida jala polgahongku nasida disi,

songon singa boruboru, angka binatang di ladang tahe manansani nasida.

⁹Lonong pe ho, ala dialo ho do ahu silehon tua hian tu ho.

¹⁰Didia nuaeng rajam? Ibana nian mangurupi ho di saluhut angka hutam! Jala didia do panguhum, angka na pinandohanmu na sai laon mandok: Lehon di ahu sada raja dohot angka induk!

¹¹Hulehon do tu ho sada raja di bagasan rimashu, jala buatonku ibana muse sian murukku.

¹²(II.) Nunga pola binobok hajahaton ni Epraim, nunga pinasinok dosana.

¹³Pambebeon ni parompuan na mangae posoposona ro tu ibana, hape anak na so marbisuk anggo ibana, ala so ditopot dalan na bolon di tingkina i.

¹⁴Sian tangan ni parbeguan paluaonku nasida, sian hamatean tobusonku nasida! Didia angka begu antukmu, ale hamatean? Didia hamagoanmu, ale banuatoru, tung na so hutanda do ruhut ni solsol ni roha.

¹⁵Ai ibana do nian sumopar sian angka hahaanggina; ro ma sogot alogo sian purba, alogo sian Jahowa manaek sian halongonan, jadi marsik ma mualna dohot sumurna bahenonna; ibana ma mamupusi parpeopan ni saluhut ulaula hasoloan ni roha.

¹⁶(14-1) (I.) Ingkon tarjepol Samaria sogot, ala manggunturi dampak Debatana.

Marragean ma nasida bahenon ni podang,
rosahanna do posoposonasida, jala lapaanna
do angka boruboru na marhangoluan.

14¹ (14-2) Sai mulak ma ho, ale Israel,
tu Jahowa, Debatam! Ala naung
tarrobung ho di bagasan hajahatonmu.

² (14-3) Angka hata i ma parateatehon
hamu, laho mulak tu Jahowa, dok hamu
ma tu ibana: Sai marpamuati ma roham
mida hajahatonnami sudena! Sai jalo ma
na denggan on asa hugararhon hami angka
jonggi ni bibir nami bahen pelean tu ho.

³ (14-4) Nandang be anggo Assur manolongi
hami, ndang be marsihundul di hoda hami!
Nandang be dohonon nami tu jadijadian ni
tangannami: Ale debatanami! Marhitehite ho
nama jumpangan asi ni roha anak na sopot
so marama.

⁴ (14-5) (II.) Pamalumonku ma
panundalion nasida, girgir ma ahu
mangkaholongi nasida, ai nunga mombun
rimashu maradophon nasida.

⁵ (14-6) Sobokkon nambur ma ahu di Israel,
marbunga ma nasida songon bunga pansur,
jala manjarar angka uratna, songon Libanon.

⁶ (14-7) Marjurampak ma angka tumburna,
jala songon hau jetun hamuliaonna, jala
uapna songon Libanon!

⁷ (14-8) Ulahon ni halak angka na maringan
di parlinggomanna ma pangoluhon eme, jala

marbunga nasida songon hau anggur baritana
pe songon anggur ni Libanon.

⁸(14-9) Ale Epraim, tung tudihangku dope
angka ganaganaan? Ahu do mangalusi dohot
manatap ho; ahu do songon hariara na rugun,
ahu do haroroan ni parbuem.

⁹(14-10) Ise do na pistar asa diparateatehon
saluhutna i? Ise do na marroha, asa
tandaonna i? Ai tigor do angka dalan ni
Jahowa, jala halak partigor mardalani disi;
alai anggo halak parjahat tarsulandit do disi.

Yoel

1 ¹ (I.) On ma hata ni Jahowa tu si Joel, anak ni si Petuel.

²Tangihon ma hata on hamu ale angka sintua, jala patinggil pinggolmuna, sude hamu isi ni tano on! Tung dung ma masa songon i di angka arimuna, manang di angka ari ni ompumuna i?

³Torsahon hamu ma tu angka anakmuna taringot tusi, jala anakmuna tu anaknasida, jala anaknasida muse tu sundut di pudina.

⁴Na tinebahon ni antatadu digagat sihapor, jala na tinebahon ni sihapor digagat tamponok, jala na tinebahon ni tamponok digagat gulomit.

⁵Ngot ma hamu, angka na mabuk, jala tumatangis ma hamu! Jala mangandung ma saluhut hamu angka sisobur anggur, ala ni anggur na pang, ala naung suda dibuat sian pamanganmuna.

⁶Ai nangkok do tu tanongku sada bangso na tang jala na so habilangan; iponna tudoshon ipon ni singa, jala saitna tudoshon sait ni singa boruboru.

⁷Nunga ranggason hau anggurhu dibahen, jala nunga matultul ia hau antajaungku, tung dilangkati situtu do jala diparumpak, pola mamontar angka rantingna.

⁸Mangandung ma ho, songon boru muli, na martujung hori ala ni bangunan ni haposoonna.

⁹Nunga siap pelean sipanganon dohot siinuman sian joro ni Jahowa, margudompong angka malim, angka parhalado ni Jahowa.

¹⁰Nunga tarulang ladang, duhuton ia hauma, ala lusam eme, jala marsik aek ni anggur, malos ia hau jetun.

¹¹Marlangan ma, hamu angka paruma, mangandung ma hamu parporlak anggur, ala ni eme saba dohot eme tur, ai nunga mago partaonan.

¹²Nunga pola apean hau anggur, jala nunga ranggason hau antajau; nang hau dalimo dohot harambir dohot hau unte ro di saluhut hau na di ladang nunga malos, ai nunga mandao las ni roha sian anak ni jolma.

¹³(II.) Marhohos ma, hamu ale angka malim, jala mangandungi! Manganguhi ma, hamu ale angka parhalado di langgatan! Masuk ma hamu, laos marbulusan abit hori bornginna i, hamu ale angka parhalado ni Debatangku, ala naung munsat sian joro ni Debatamuna pelean sipanganon dohot siinumon.

¹⁴Parbadiai hamu ma sada ari parpuasaon, tingtingkon hamu sada ari raya, paluhut hamu angka sintua ro di sude isi ni luaton tu joro ni Jahowa Debatamuna, jala manganguhi ma hamu tu Jahowa.

¹⁵Oe ari na marjea on! Ai jonok nama ari ni Jahowa, jala songon hasisiap sian na sun hinagogo harorona.

¹⁶Nda nunga sun siap sipanganon di adopan ni matanta? Sian joro ni Debatanta las ni roha dohot olopolop?

¹⁷Nunga busuk angka boni di toru ni bungkina, nunga tarulang angka bagas parugasanan, nunga maloha angka sopo, ai nunga rahar eme i.

¹⁸Maheu ia pinahan marisuang! Bodiaron do angka parduan ni lombu, ala soada jampalan di nasida; gari angka parduaan ni birubiru rapar do.

¹⁹Tu ho do, ale Jahowa, ahu joujou! Ai nunga suda dipangan api angka jampalan di halongonan, jala mosok do sude hau di ladang dibahen api rarat.

²⁰Gari pinahan di balian marhoi tu ho do, ai nunga marsik angka sunge, jala nunga suda dipangan api angka jampalan di halongonan.

2¹(I.) Palu hamu ma sarune di Sion, jala marsurak ma hamu di atas dolok habadiaonki! Angka hitir ma sude isi ni tano on, ai na ro ne ma ari ni Jahowa, tung jonok na ma.

²Ari haholomon do i jala hagolapon, ari ombun na marhobot dohot ombun manorop; songon sibalik hunik manogotna i mangerbang songgop tu angka dolok, songon i ma ro sada bangso na timbul jala na tang,

ndang dung adong sisongon i sian na robi,
tu joloan on pe ndang adong be jumpang
songon i pola marsundutsundut.

³Api na manganhon di jolona, jala di pudina
marjillamjillam; songon porlak Eden tano on
di jolona alai anggo di pudina halongonan
na hasang do, jala ndang adong na malua
nanggo sada sian ibana.

⁴Songon rumang ni angka hoda rumangna,
jala songon halak parsihundul parinjakna.

⁵Songon pardorom ni angka hureta di punsu
ni angka dolok paringkatnasida, songon
soara ni jilam ni api na manganhon durame,
songon bangso na tang na gopas marsinjata
tu hamusuon.

⁶Marsahit rian angka bangso maradophon
ibana, marlangan be sude bohi nijolma.

⁷Martahop nasida songon ulubalang na
begu, songon halak parmusu dijangkiti nasida
parik, jala masitondong dalanna be nasida,
jala ndang mamedu nasida sian dalannasida
i.

⁸Jala ndang masisosahan nasida,
masitondong dalanna be nasida, marragean
do nasida marhitehite hujur palait, laos so
mansohot do marporang.

⁹Di bagasan huta nasida marmeang muli,
marinjak di atas parik, angka bagas do
dipanaek, bongot sian pandiloan songon
panangko.

¹⁰Angka hitir do tano on maradophon nasida, humuntal angka langit, mangkolom do mata ni ari dohot bulan, pola dohot angka bintang maniopi sondangna.

¹¹Jala dipangiar Jahowa do suarana manguluhon paranganna, ai tung na torop situtu do paranganna; tung na gogo do ibana pasaut hatana i; tung na bolon do ari ni Jahowa, jala na songkal sahali, tung ise ma manahan disi?

¹²(II.) Alai nuaeng pe, ninna Jahowa: Sai mulak ma hamu tu ahu sian nasa rohamuna mardongan parpuasaon, partangison dohot angguhangguk.

¹³Jala rohamuna ma ribahi hamu, unang asal ulosmuna, sai mulak ma hamu tu Jahowa, Debatamuna i! Ai pardengganbasa jala parasi roha do ibana, lambas do ibana tarrimas jala parasi roha godang, jala tibuh marpangulahi rohana mida hamagoan i.

¹⁴Ise umbotosa, anggiat tung mulak ibana jala marpangulahi rohana, jala ditadingkon pasupasusada sian pudina bahen pelean sipanganon dohot siinumon di Jahowa, Debatamuna i.

¹⁵Palu hamu ma sarune di Sion! Parbadiai hamu ma sada parpuasaon, tingtingkon hamu ma ari raya sada!

¹⁶Paluhut hamu ma bangso i, parbadiai hamu ma luhutan i! Paluhut hamu ma angka sintua, papungu hamu ma angka dakdanak

ro di angka posoposo na onsop manusu! Ruar ma pangoli sian bilutna dohot oroan i sian bilutna.

¹⁷Ingkon tumatangis ma di holangkolang ni emper dohot langgatan malim, angka parhalado ni Jahowa, dohononnasida ma: Sai marpangulah i ma roham, ale Jahowa, mida bangsom, jala unang pasahat bangso na niainmu gabe sialingon, gabe pambuatan hulingkulingan ni angka parbegu! Boasa ma tung mehet di tongatonga ni angka bangso; didia do nuaeng Debatanasida i?

¹⁸(III.) Jadi mangiburu ma Jahowa humongkop tanona, jala marpangulah i rohana mida bangsona.

¹⁹Dung i ninna Jahowa ma mangalusi bangsona: Ida ma, tongosonku ma tu hamu eme dohot anggur dohot miak, asa butong hamu sian i; jala ndang be bahenonku hamu marhaurahon di tongatonga ni angka bangso.

²⁰Jala paholonganku do sian hamu sipangago i, jala onjaronku ibana tu tano na hasang dohot na tarulang; angka parjolona tu laut na tungkan habinsaran, jala angka na parpudi tu laut na tungkan hasundutan. Jadi manaek ma angirna, manaek dohot busukna, ala tenga pambahenna.

²¹Unang ma mabiar ho, ale tano, marolopolop ma ho jala marlas ni roha, ai timbul do pambahen ni Jahowa!

²²Unang mabiar hamu, ale pinahan di ladang, ai martumbur muse angka jampalan di halongonan, jala marparbue angka hau i, lehonon ni hau antajau dohot anggur muse gogonasida.

²³Antong marolopolop jala marlas ni roha ma hamu, ale angka anak ni Sion mida Jahowa, Debatamuna i! Ai ibana mangalehon tu hamu udan panaburon bahen pamintorion, jala dipatuat tu hamu udan tipotipo, udan panaburon dohot udan gotilon patumonaan.

²⁴Jadi tambun ma eme di angka pardegean, jala binsat angka pangilangan sian anggur dohot miak.

²⁵Jadi marsingkat ma tu hamu bahenonku angka taon panggagatan ni antatadu, sihapor, tamponok dohot gulomit, paranganku na godang, angka na hupaborhat i dompak hamu.

²⁶Dung i datdatanmuna ma mangan jala butong, jala pujionmuna ma goar ni Jahowa, Debatamuna i, na mambahen hamu marhasurungan, jala ndang be tarurak bangsongku salelenglelengna.

²⁷Tandaonmuna ma disi, paboa ahu di tongatonga ni Israel, jala ahu Jahowa, Debatamuna i, jala ndang adong dungkon ni ahu; jala ndang be tarurak bangsongku ro di salelenglelengna.

²⁸(3-1) (I.) Jadi dung songon i:
Pangusehonongku ma Tondingku tu

nasa sibuk, gabe manurirangi ma angka anakmuna dohot borumuna, marnipi ma angka sintuamuna, jala maralatan angka dolidolimuna.

²⁹(3-2) Dohot do tu angka naposomuna baa dohot boruboru pangusehononku di angka ari i Tondingku.

³⁰(3-3) Jala pamasaonku do angka partinandaon di langit dohot di tano on: Mudar dohot api dohot timus na marsijongjong.

³¹(3-4) Muba do mata ni ari gabe haholomon, jala bulan gabe mudar, patujolo ni ari haroro ni Jahowa na bolon jala na songkal i.

³²(3-5) Alai nasa na manjou goar ni Jahowa, malua do, ai di atas ni dolok Sion dohot di Jerusalem masa haluaon, songon na pinarbaga ni Jahowa hian, jala di tongatonga ni halak na malua i do angka na jinou ni Jahowa.

3¹(4-1) (I.) Ai ida ma, di angka ari dohot tingki sogot, molo mulak hutogihon angka na tarbuang sian Juda dohot Jerusalem.

²(4-2) Jadi papunguonku ma saluhut angka bangso parbegu jala patuatongku nasida tu rura Josapat, asa maruhum ahu disi dohot nasida taringot tu bangsongku dohot taringot tu Israel partaliangku, na marserak binahennasida tu tongatonga ni angka bangso parbegu, jala dibagi nasida tanongki.

³(4-3) Jala marruji nasida taringot tu bangsongki; dilehon nasida do sada dakdanak baoa ali ni sada boruboru sibabi jalang, jala digadishon nasida do sada boruboru ali ni anggur, gabe disobur nasida.

⁴(4-4) Jala hamu pe, ale Tirus dohot Sidon ro di sude partalpahan ni Palistim, tung aha ma saritamuna di ahu? Naeng pasudolonmuna tu ahu pambahenan, manang naeng pasuangonmuna manang aha tu ahu? Tibu magira ma pasuangongku pambahenanmuna tu ulumuna.

⁵(4-5) Angka dipambuat hamu do perakku dohot serengku, jala diboan hamu do angka arta hasudungan ni rohangku tu bagasan joromuna.

⁶(4-6) Jala digadishon hamu do angka anak ni Juda dohot Jerusalem tu halak Junani asa paholangkon nasida sian partalpahannasida.

⁷(4-7) Ida ma, padaratonku ma nasida sian tano panggadisannasidai, jala pasuangongku pambahenanmuna tu ulumuna.

⁸(4-8) Gadisongku ma anakmuna dohot borumuna tu tangan ni halak Juda, jala nasida muse manggadis tu halak Saba, tu bangso na holang, ai Jahowa do mandok.

⁹(4-9) Tingtingkon hamu ma i di tongatonga ni angka bangso parbegu parbadiai hamu ma hamusuon! Pahehe hamu ma angka ulubalang! Ro be ma nangkok nasa baoa sialo musu.

¹⁰(4-10) Patopahon hamu ma panggumuna gabe podang, jala sasabimuna gabe hujur! Dohonon ni na galei ma: Ulubalang do ahu!

¹¹(4-11) Hapogan ma sude hamu angka bangso parbegu humaliang ro marpungu! Tusi ma patuat angka ulubalangmu, ale Jahowa.

¹²(4-12) Borhat ma jala nangkok angka bangso parbegu tu rura Josapat! Ai disi do ahu marhabangsa laho manguhum nasa bangso parbegui humaliang.

¹³(4-13) Tole sabihon ma sasabi i, ai nunga matoras sigotiloni! Ro ma hamu mangaluntak! Ai nunga gok pangilangan, nunga pola binsat angka tong, dibahen godang ni hajahatonnasida.

¹⁴(4-14) Marhoronhoron nasida di rura panimpulan ni ulum, ai jonok na ma ari ni Jahowa di rura panimpulan.

¹⁵(4-15) Mangkolom do mata ni ari dohot bulan, jala ditiop angka bintang sinondangna.

¹⁶(4-16) (II.) Dung i patungoromon ma Jahowa sian Sion, jala pangiaronna soarana sian Jerusalem, pola humuntal langit dohot tanoon. Alai Jahowa do haporusan ni bangsona jala partanobatoan di halak Israel.

¹⁷(4-17) Asa tung ditanda hamu, ahu do Jahowa, Debatamunai na maringan di Sion, di dolok habadiaonki; jadi gabe habadiaon ma Jerusalem, jala ndang be mamolus sian i halak sileban.

¹⁸(4-18) Ai di ari na sasadai manetehi ma aek ni anggur sian angka dolok, jala mabaor susu sian dolokdolok, jala saluhut sunge ni Juda marisi aek, jala ruar sada mual sian bagas ni Jahowa, asa dipabornok rura Sittim.

¹⁹(4-19) Alai anggo Misir gabe tano bangkalbangkal jala Edom gabe halongonan na hasang ala ni hajungkatonna tu anak ni Juda, na nidurushonnasida mudar na so marpipot di tanonasida.

²⁰(4-20) Alai anggo Juda siinganon do ro di salelenglelengna, jala hot Jerusalem marsundutsundut.

²¹(4-21) Jala marhasunan bahenonku mudarnasida, na so marhasunan na sai laon, jadi Jahowa ma maringan di Sion.

Amos

1 ¹ (I.) On ma angka hata ni si Amos sada halak sian angka parmahan sian Tekoa, angka na niidana taringot tu Israel di angka ari ni si Usia, raja sian Juda, dohot di angka ari ni si Jerobeam anak ni si Joas, raja sian Israel, dua taon jumolo sian lalo.

² Jadi didok ma: Patungoromon do Jahowa sian Sion, jala dipangiar soarana sian Jerusalem. Jadi malos ma angka jampalan ni angka parmahan, jala hasang punsu ni Karmel.

³ (II.) Songon on do hata ni Jahowa: Ala ni tolu pangalaosion ni Damaskus, jala ala ni opat ndang pasurutonku, ala naung diluntak nasida Gilead marhitehite salosap bosi.

⁴ Alani tongosonku ma api tu bagasan bagas ni si Hasael, gabe suda panganonna angka bagas bolon ni si Benhadad.

⁵ Ponggolhononku dohot ransangransang ni pargumbangan ni Damaskus, jala siaphononkujolma pangisi ni rura ajiajian ro di sitiop tungkot harajaon sian huta Harorangan gabe tarbuang bangso Ram tu Kir, ninna Jahowa.

⁶ (III.) Songon on do hata ni Jahowa: Ala ni tolu pangalaosion ni Gasa, jala ala ni opat ndang pasurutonku, ala dibuangkon

nasida hinagok ni angka na tarbuang laho pasahathon tu Edom.

⁷ Dibahen i tongosonku ma api tu bagasan angka parik ni Gasa, gabe suda panganonna angka bagas na bolon.

⁸ Jala siaphononku jolma pangisi ni Asdod, ro di sitiop tungkot harajaon sian Askelon; jala patoltolonku ma tanganku dompak Ekron, gabe mago ma pasipasi ni halak Palistim, ninna Tuhan Jahowa.

⁹ (IV.) Songon on do hata ni Jahowa: Ala ni tolu pangalaosion ni Tirus, jala ala ni opat ndang pasurutonku, ala dipasahat nasida hinagok ni angka na tarbuang tu Edom, jala ndang diingot nasida padan pardongansabutuhaon.

¹⁰ Dibahen i tongosonku ma api tu bagasan angka parik ni Tirus gabe suda panganonna angka bagas na bolon.

¹¹ (V.) Songon on do hata ni Jahowa: Ala ni tolu pangalaosion ni Edom, jala ala ni opat ndang pasurutonku, ala na nilelena anggina patioptiop podang, jala diojoti angka asina jala tongtong manansani rimasna, jala martaronggop murukna salelenglelengna.

¹² Dibahen i tongosonku ma api tu bagasan Teman, gabe suda panganonna angka bagas bolon di Bosra.

¹³ (VI.) Songon on do hata ni Jahowa: Ala ni tolu pangalaosion ni halak Amon, jala ala ni opat ndang pasurutonku, ala dilapa nasida

angka na gabegabebean di Gilead asa pabidang parbalohannasida.

¹⁴ Dibahen i pagalahonku ma api di bagasan angka parik ni Rabba, gabe suda panganonna angka bagas na bolon, mardongan suraksurak di ari tongtangan, mardongan habahaba di ari hamamasa ni halisungsung.

¹⁵ Tarboan dohot rajanasida tu habuangan, ibana rap dohot induk pinabangkitna i, ninna Jahowa.

2¹ (I.) Songon on do hata ni Jahowa: Ala ni tolu pangalaosion ni Moab, jala ala ni opat ndang pasurutonku, ala tinutunganna i angka holiholi ni raja ni Edom bahen hapur.

² Dibahen i tongosonku ma api tu bagasan Moab, gabe suda panganonna angka bagas bolon di Keriot, gabe mate Moab di hagunturon, marsoara toletole, marsoara sarune.

³ Jala siaphononku ma panguhum sian tongatongana, jala bunuonku sude indukna rap dohot ibana, ninna Jahowa.

⁴ (II.) Songon on do hata ni Jahowa: Ala ni tolu pangalaosion ni Juda, jala ala ni opat ndang pasurutonku ala ditoishon nasida patik ni Jahowa, jala ndang diradoti angka tonana, gabe gabusnasida, angka na niihuthon ni angka ompunasida dope paotootohon nasida.

⁵ Dibahen i tongosonku ma api tu bagasan Juda, gabe suda panganonna angka bagas bolon di Jerusalem.

⁶(III.) Songon on do hata ni Jahowa: Ala ni tolu pangalaosion ni Israel, jala ala ni opat ndang pasurutonku, ala digadishon nasida partigor i tu perak dohot na pogos i ali ni sipatu sapasang.

⁷Nasida angka na mangkauashon orbuk ni tano i ampe tu ulu ni halak na pogos, jala dipailingiling dalan ni halak na dangol; udur anak dohot amana laho tumopot sada parompuan, asa diramuni goarhu na badia.

⁸Marbustangan nasida di angka ulos gade di lambung ni saluhut langgatan, jala anggur ni angka na hona dando disobur nasida di bagas ni angka debatanasida.

⁹Hape ahu nian mamansingkon halak Amori maradophon nasida, atik pe nasa timbo ni hau ares timbona, jala songon hau hariara bolonna; ahu mamansingkon parbuena sian ginjang, jala uratna sian toru.

¹⁰Jala ahu nian manogihon hamu ruar sian tano Misir, jala huringiring hamu, di halongonan opatpulu taon lelengna laho manean tano ni halak Amori.

¹¹Jala ahu pabangkithon sian angka anakmuna bahen panurirang, jala sian dolidolimuna bahen halak na pinapulik. Atehe, nda tongon do, hamu ale angka anak ni Israel! ninna Jahowa.

¹²Hape dipainumhon hamu do anggur tu halak na pinapulik, jala ditonahon hamu

tu angka panurirang: Ndang jadi hamu manurirangi!

¹³Ida ma ahu ma manipa hamu, songon panipa ni hureta, na gok tibalán.

¹⁴Jadi ndang marguna hapoporus ni halak na bontis, jala ndang targogohon halak na gogo gogona i, jala ndang tarpalua ulubalang hosana.

¹⁵Halak sisintak sior pe, ndang manahan jongjong, jala halak na bontis mardalan ndang malua, halak parsihundul di hoda pe, ndang tarpaluasa hosana.

¹⁶Jala halak na todos roha sian angka ulubalang, marsaemara ibana maporus di ari na sasada i, ninna Jahowa.

3¹ (I.) Tangihon hamu ma hata on, na nidok ni Jahowa taringot tu hamu halak Israel, taringot tu sandok bangso, na hutogihon ruar sian tano Misir, songon on do:

²Holan hamu do nian na hutanda sian nasa bangso di tano on; dibahen i luluhononku ma tu hamu saluhut hajahatonmuna i.

³Tung udur ma tagamon mardalan dua halak, nda jolo sian dos ni rohanasida?

⁴Tung tagamon ma patungoromon babiat di tombak nda adong soroonna? Tung tagamon pangiaron ni anak ni babiat ma soarana sian liangna, nda adong na jumpangsa?

⁵Tung tagamon ma tarjail pidong tu jorgong di tano, molo so jolo ditaon sambil? Tung

tagamon ma bingkas jorgong i sian tano, nda adong dapotsa?

⁶Tung tagamon ma mangkuling sarune di bagasan huta, so biahaton situasi na torop? Tung adong ma tagamon masa parmaraan di bagasan huta, so binahen ni Jahowa?

⁷Ai ndang adong dibahen Tuhan Jahowa nanggo sada, nda jolo dipapatar sibunianna tu panurirang, angka naposona i.

⁸Patungoromon babiat, tung ise ma na so mabiar? Mangkuling Tuhan Jahowa, tung ise ma na so manurirang?

⁹(II.) Patubegehon hamu ma i tu angka bagas bolon di Asdod dohot tu angka bagas bolon di tano Misir, jala dok hamu ma: Marluhut ma hamu tu ginjang ni angka dolok Samaria, asa tung diida hamu angka halumlamon godang di tongatongana dohot angka pangarupaon di bagasan.

¹⁰Ndang diboto nasida be mambahen uhum na tingkos, ninna Jahowa; nasida angka na pagukguk hajahaton dohot hadoboan di bagasnasida angka na bolon i.

¹¹Dibahen i songon on do didok Tuhan Jahowa: Musu humaliang tano on; jala paijuronna sian ho hagagoonmi jala pupusonna bagasmu angka na bolon i.

¹²Songon on do hata ni Jahowa: Suang songon pangarampas ni parmahan sian baba ni babiat dua haehae, manang parsibongan ni pinggol sada, laos songon i do halulua

ni halak Israel sogot, angka na hundul di Samaria, di suhi ni lage dohot di surta tutup ni podoman.

¹³Tangihon jala hatindangkon hamu ma i di bagasan jabu ni si Jakkob, ninna Tuhan Jahowa Debata Zebaot.

¹⁴Di ari uju marlulu ahu dompak angka pangalaosion ni Israel, marlulu ma ahu dohot dompak angka langgatan ni Betel, jadi maponggol ma angka tanduk ni langgatan i, jala angka dabu tu tano.

¹⁵Rap lohaonku ma bagas undungundung dohot bagas di huta; mago ma dohot angka bagas gading, jala siap torop angka bagas, ninna Jahowa.

4¹ (I.) Tangihon ma hata on, hamu ale lombu sian Basan, angka na di dolok ni Samaria, angka na mangarupa halak na pogos, jala dipapisatpisat halak na metmet, angka na mandok tu tuannasida: Boan hamu tuson, asa husobur hami.

²Nunga pola marmangmang Tuhan Jahowa tu habadiaonna, ida ma, ro do angka ari sogot tu hamu, saraton ni halak ma hamu marhitehite haithait, jala pinomparmuna marhitehite hail ni pardengke.

³Jadi ruar ma hamu sian bungbung ni parik, masitondong dalanna di jolona be do, jala timpalhononmuna ma ajiajiani, ninna Jahowa.

⁴ (II.) Ro ma hamu tu Betel asa manjahati! Tu Gilgal, patamba pangalaosion! Jala boan

hamu manogotna i peleanmuna dohot saparsampulumuna ganup patoluarohon.

⁵Jala tutung hamu pelean hamauliateon sian na niigaran, jala tingtingkon hamu pelean bagabaga, baritahon hamu! Ai i do lomo ni rohamuna, hamu ale anak ni Israel, ninna Tuhan Jahowa.

⁶Ahu pe antong, hulehon do tu hamu haiason ni ipon di saluhut hutamuna, jala hararapar di sagusagu di saluhut ingananmuna, alai laos so mulak hamu tu ahu, ninna Jahowa.

⁷Ahu pe antong, huontok do sian hamu udan, arga tolu bulan nari dope asa gotilon. Dung i huta nasada hupaudan, huta na sadanari ndang hupaudan; hauma santurpuk dapotan udan, na santurpuk nari, na so tininggang ni udan, marsik do.

⁸Jadi madoado dua manang tolu huta tu huta na sada naeng minum aek nian, hape ndang sombu. Alai laos so mulak hamu tu ahu, ninna Jahowa.

⁹Nunga nian huhonahon tu hamu antingano dohot sirara, jala godangan porlakmuna nunga suda digagat sihapor ro di porlak anggurmuna, hau antajau dohot hau jetunmuna. Alai laos so mulak hamu tu ahu ninna Jahowa.

¹⁰Nunga nian hutongos tu tongatongamuna begu siherut marpangalaho songon uju di Misir, huragehon angka dolidolimuna marhitehite podang, huhut tarboan

hodamuna, jala nunga hupaanggohon angir
ni parsaroanmuna tu bagasan igungmuna,
laos so mulak hamu tu ahu, ninna Jahowa.

¹¹Nunga tung hupabalik hamu, songon
hababalik ni Sodom dohot Gumora, binahen
ni Debata, jadi doshon sipusipu na tinait sian
api do hamu, hape laos so mulak hamu tu
ahu, ninna Jahowa.

¹²(III.) Dibahen i, songon i do bahenonku
tu ho ale Israel! Antong ala huondam
bahenonku songon i tu ho, marhobas ma ho
manjumpangkon Debatam, ale Israel!

¹³Ai ida ma, ibana do Sijadi angka dolok
jala sitompa alogo, jala dipabotohon tu jolma
manang aha sangkapna; ibana mambahen
sibalik hunik gabe haholomon, jala didalani
angka buntulbuntul ni tano on: Jahowa,
Debata Zebaot goarna.

5¹(I.) Tangihon hamu ma hata on, asa
hubahen sada andung taringot tu hamu,
ale pinompar ni israel!

²Nunga tinggang boru Israel, ndang
tarbahensa be hehe nunga bustang tu
tanona, ndang adong nanggo sahalak na
pahehe ibana.

³Ai songon on do hata ni Tuhan Jahowa:
Huta na paborhathon saribu, tading na ma
sian i saratus; jala na paborhat saratus,
tading nama sian i sampulu sogot di pinompar
ni Israel.

⁴(II.) Ai songon on do hata ni Jahowa tu pinompar ni Israel: Lulu i hamu ma ahu, asa mangolu hamu!

⁵Unang tagonan lulu i hamu Betel, jala unang laho hamu tu Gilgal, jala unang taripar hamu tu Berseba! Ai tarboan tu habuangan sogot ia Gilgal, jala ia Betel gabe sisoada.

⁶Lulu i hamu ma Jahowa, asa mangolu hamu! Asa unang dirampok bagas ni si Josep, songon api, jala suda dipangan, hape ndang adong pangintopi di Betel nanggo sahalak.

⁷Hamu angka na pahosing uhum gabe pogu, jala diluntak hatigoran tu tano!

⁸Jahowa do sijadi bintang Poriama dohot bintang Sidongdong jala ibana pahosing linggoman ni hamatean gabe torang ni ari, jala dipaholom ari gabe borngin; ibana do sijou angka aek ni laut, jala diusehon muse tu sisik ni tano on: Jahowa do Goarna!

⁹Ibana do parohon hasiapon tu halak na gogo, gabe ro hasiapon tu huta na gonting.

¹⁰(III.) Dihasomorhon nasida do jolma pamodai di partungkoan, jala marbiasbias nasida mida halak sidok na sintong.

¹¹Dibahen i, ala diluntak hamu halak na pogos, jala dijalo hamu eme silehonlehon manuruk sian ibana, gabe ndang ingananmuna bagas, angka na pinaulimuna sian batu na nidakdak; disuani hamu pe angka porlak anggur hasoloan, hape ndang inumonmuna anggurna.

¹²Ai huboto do torop ni pangalaosionmuna dohot hinadeak ni dosamuna, hamu angka na manosak halak partigor, angka na manjalo hasunan manuruk, jala dipatungki halak na pogos di partungkoan.

¹³Dibahen i laos hohom do halak na marroha, ai tingki na jahat do on.

¹⁴(IV.) Lulu i hamu ma na denggan, unang tagonan na jat i, asa mangolu hamu! Asa tongon Jahowa, Debata Zebaot donganmuna, songon na nidokmuna i.

¹⁵Hagigihon hamu ma na jat i, jala haholongi hamu na denggan, jala hajongjongkon hamu uhum di partungkoan! Anggiat tung marpangulahi roha ni Jahowa Debata Zebaot mida pasipasi ni Josep.

¹⁶(V.) Dibahen i, songon on do hata ni Jahowa, Debata Zebaot, Tuhan i: Di saluhut angka alaman masa andung, jala di saluhut dalan dohononnasida sogot: Oe, oe! Tole parumauma jouonnasida mandokkon tumatangis, tole angka siboto andung dohononna mangandungi.

¹⁷Jala masa do andung di saluhut porlak anggur, molo mamolus ahu sian tongatongamu, ninna Jahowa.

¹⁸Marjea ma nasida angka na mangapian di ari ni Jahowa! Tung aha labamuna sian i? Haholomon do ari ni Jahowa, ndada hatiuron.

¹⁹Hira songon halak na maporus maradophon singa, gabe dijumpangkon

babiat ibana; jala dung ro di jabu ibana, gabe mangunsande tanganna tu dorpi hape dipargut ulok ibana.

²⁰Nda haholomon tongon ari ni Jahowa, jala ndada hatiuron hagolapon do, ndang marsinondang?

²¹Huhagigihon, biasan ahu mida angka ari rayamuna, jala ndang dihalomohon rohangku angka luhutanmuna.

²²Ai nang pe dipelehon hamu tu ahu angka pelean situtungan dohot pelean sipanganon, ndang lomo rohangku disi, pelean hamauliateon sian pinahanmuna pamuean pe, ndang parduli ahu disi.

²³Paholang ma sian ahu hagunturon ni angka endemu, jala ndang lomo roha ni pinggolhu umbege soara ni sordammu.

²⁴Jadi margilinggiling ma songon aek uhumi, jala hatigoran songon sunge na so olo marsik.

²⁵Tung adong ma angka pelean sipotongan dohot sipanganon dipasahat hamu tu ahu di halongonan saleleng siopatpulu taon, hamu ale pinompar ni Israel?

²⁶Antong usungonmuna ma undungundung ni rajamuna ro di ojahan ni ganaganaanmuna, tole bintang ni debatamuna, angka na binahenmuna di hamu.

²⁷Jadi toguonku ma hamu tarbuang dao salpu sian Damaskus, ninna Jahowa, Debata Zebaot goarna.

6¹ (I.) Marjea ma jolma angka na pedem marroha di bagasan Sion dohot jolma angka na marpangatauan tu dolok Samaria, angka ihutan parjolo ni angka bangso, jala tu nasida do ro angka pinompar ni Israel.

²Taripar ma hamu maningkir tu Kalne; dung i laho ma hamu sian i tu Hamat, huta na bolon i; dung i laho tuat ma hamu tu Gat huta ni halak Palistim; tung dumenggan ma nasida sian angka harajaon on, manang tung lumambas parbalohannasida sian parbalohanmuna?

³Hamu ale angka na marsurasurahon holang dope ari hamagoan i, hape hamu do pajonokkon hundulan ni hadoboan.

⁴Hamu angka na marpeahan di atas podoman angka na sian gading, jala marbustangan di atas lagenasida, jala na manganhon angka anak ni birubiru pamuean dohot anak ni lombu na pinamokmok sian tongatonga ni bara.

⁵Hamu angka na umpiltik hasapi jala na patomutomu ende, songon si Daud mardongan parhinaloan.

⁶Hamu angka na marsobur anggur sian panginuman, jala na marpangirhon miak angka na humushus, alai ndang dihabothon anggo habobola ni si Josep.

⁷Dibahen i ingkon nasida ma nuaeng manguluhon angka na tarbuang tu

habuangan: Jadi sohot ma ende ni angka pargadombus.

⁸(II.) Nunga pola marmangmang Tuhan Jahowa tu dirina, ninna Jahowa Debata Zebaot: Marbiasbias do ahu mida hajungkaton ni Jakkob, jala huhagigihon bagasna angka na bolon, jadi pasahatonku ma huta i ro di pangisina.

⁹Tung sura pe tading dope sampulu halak di bagasan sada jabu, marmatean do nasida.

¹⁰Jadi ia adong tondongna na mangusung dohot na manambun nasida, laho paruarhon angka holiholi sian jabu, jala didok ma tu nasa halak na di jambur ni bagas i: Atehe, adong dope donganmu dison? Jadi dohononna ma: Nunga buriapus! Jadi dohononna ma: Sip ma ho, ai ndang be jadi pajoujouon goar ni Jahowa.

¹¹Ai ida ma, Jahowa do na mandokkon jala diropuhi bagas na bolon i, ia bagas na metmet i ditahai do.

¹²Tung marinjak ma tagamon hoda di atas dolok batu manang tung maninggala disi angka lombu? Ai nunga dipauba hamu uhum gabe rasun, jala parbue ni hatigoran gabe pogu.

¹³Hamu angka na mangkalashon na so adong, angka na mandok: Nda nunga maruli angka tanduk hita marhitehite gogonta?

¹⁴Ai ida ma ahu pahehehon dompak hamu, ale pinompar ni Israel, ninna Jahowa, Debata

Zebaot, sada bangso laumonna ma hamu, olat ni Hamat sahat ro di sunge ni adaran.

7¹ (I.) Songon on do dipataridahon Tuhan Jahowa tu ahu, ida ma jumadihon sihapor ibana, di mulana martumbur duhutduhut ni panabian; jala ida ma sagak do i, dung ma nabi rajai.

²Jadi dung sun siap digagat suansuanan ni tano i, ningku ma: Ale Tuhan Jahowa, sai marpamuati ma roham! Tung beha ma panahan ni Jakkob jongjong ai na metmet do ibana?

³Jadi marpangulahi ma roha ni Jahowa taringot tusi; ndang jadi saut! ninna Jahowa.

⁴Songon on do dipataridahon Tuhan Jahowa tu ahu, ida ma: Dipio Tuhan Jahowa ma api laho manorui, nunga pola disudahon lung bolon i, disudahon dohot partalian i.

⁵Jadi ningku ma: Ale Tuhan Jahowa, ua pasadi ma! Tung beha

⁶Jadi marpangulahi ma roha ni Jahowa taringot tusi; dohot i pe ndang jadi saut! ninna Tuhan Jahowa.

⁷Songon on muse dipataridahon tu ahu, ida ma: Jongjong do Tuhan i di atas ni sada parik na rahis situtu sinasap, patioptiop tali rambu na marpungga di bagasan tanganna.

⁸Dung i ninna Jahowa ma tu ahu: Aha do na niidam, ale Amos? Jadi ningku ma: Tali rambu na marpungga do! Jadi ninna Tuhan i ma: Ida ma pagistangonku ma sada tali rambu di

tongatonga ni bangsongku Israel, ndang be marsombusombu ahu mida ibana.

⁹Ingkon saesae ma angka buntulbuntul ni Isak, jala tarulang angka bagas na badia ni Israel, jala hehe ma ahu dompak bagas ni si Jerobeam patioptiop podang.

¹⁰(II.) Jadi disuru si Amasia, malim sian Betel, suruonna tu si Jerobeam, raja sian Israel, ninna ma: Marjehejehe do si Amos dompak ho di tongatonga ni pinompar ni Israel; ndang tartaon tano i hatahatana sudena.

¹¹Ai songon on do didok si Amos: Ingkon mate si Jerobeam marhitehite podang, jala ingkon tarboan tu habuangan ianggo Israel sian tanona.

¹²Dung i didok si Amasia ma tu si Amos: Laho ma ho ale paralatan! Maporus ma ho tu tano Juda, jala disi ma ho mangan sagusagu, jala disi ma ho manurirangi!

¹³Alai anggo di Betel unang be datdati manurirangi! Ai huta habadiaon ni rajai do i, jala hundulan ni harajaon do i.

¹⁴(III.) Jadi ninna si Amos ma mangalusi si Amasia: Nandang nian panurirang ahu, jala ndang anak ni panurirang ahu, halak parmahan do ahu, jala na papungupungu parbue ni hau antajau.

¹⁵Dung i dibuat Jahowa ma ahu sian na mangadu birubiru, jala didok Jahowa tu ahu:

Laho ma ho manurirangi dompak bangsongku Israel!

¹⁶On pe tangihon ma hata ni Jahowa! Nimmu do: Nandang jadi ho manurirangi dompak Israel, jala ndang jadi pistikkononmu hatam dompak pinompar ni si Isak!

¹⁷Dibahen i songon on do hata ni Jahowa: Marmainan do jolmam di bagasan huta, jala marragean angka anakmu dohot borum marhitehite podang, jala bagion do tano on marhitehite rujiruji, jala mate di atas tano na ramun do ianggo ho jala tarboan tu habuangan ia Israel sian tanona.

8¹(I.) Songon on do dipataridahon Tuhan Jahowa tu ahu, ida ma, sada hirang na marisi parbue naung malamun.

²Jadi ninna ibana ma: Aha do na niidam, ale Amos? Jadi ningku ma: Sada hirang marisi parbue naung malamun dung i ninna Jahowa ma tu ahu: Nunga jumpang hasisimpul ni bangsongku Israel, ndang be marsombusombu ahu mida ibana.

³Jadi di ari na sasada i andungkononnasida ma angka ende di joro i, ninna Tuhan Jahowa dibahen hinadeak ni bangke, sip songon i ditimpalhon margugungugun.

⁴Tangihon ma hata on, hamu ale angka na mangarohai halak na pogos, jala disiaphon halak na dangol di tano on.

⁵Angka na mandok: Andigan pe ulaning salpu poltak ni bulan asa manggadis eme

hita? Andigan salpu dohot ari Sabbat, asa tarungkap sopo paremean? Laho pametmethon solup, jala pabalgahon arga dohot mangansi marhite sian hatian si paotooto.

⁶Laho manuhor halak na parir ali ni perak dohot halak na pogos ali ni sipatu sapasang, asa tagadis lapung singkat ni eme.

⁷(II.) Nunga pola marmangmang Jahowa tu hamuliaon ni si Jakkob: Molo tung halupahononku be salelenglelengna angka pambahenannasida sudena.

⁸Tung so humuntal ma tano on taringot tusi, manang so margudompong nasa pangisina? Gabe binsat songon batang aek Nil sandok tano i, jala margalumbang jala moru, songon Nil ni Misir.

⁹Di ari na sasada i, ninna Tuhan Jahowa, sundut ma mata ni ari di hos ni ari, jala paholomonku tano on arian.

¹⁰Paubaonku ma ari rayamuna gabe pangandungan, jala saluhut endemuna gabe andung; jala alithononku tu saluhut gontingmuna ulos hori, jala hapalpalon tu atas saluhut ulu; jala bahenonku do songon hangaluton marhinamagohon anak sasada, jala ujungna songon ari hinamago.

¹¹Ida ma, ro do angka ari sogot, ninna Tuhan Jahowa, tongosonku ma haraparon tu tano on, ndada haraparon di sagusagu

manang hauason di aek ingkon di angka hata ni Jahowa do, naeng begeonna nian.

¹²Jadi madoado ma nasida sian laut na sada tu laut nasada nari, jala sian utara tu habinsaran diliati nasida mangalului hata ni Jahowa nian, hape laos so jumpang nasida do.

¹³Di ari na sasada i mandate ma boruboru namarbaju, angka na uli rupa ro di angka dolidoli dibahen uas.

¹⁴Nasida angka na marmangmang tu hadosaon ni Samaria, angka na mandok; songon sintongna mangolu Debatam, ale Dan! Songon ngolu ni dalan tu Berseba! Ingkon marragean nasida sogot, jala ndang be hehe.

9¹(I.) Huida do Tuhan i jongjong di atas ni langgatan, jala ninna do: Lotak ma pasina, asa humuntal angka balok, jala ropuhi nasida di atas ni ulu ni saluhut nasida! Jala pinomparnasida bunuonku do marhitehite podang; ndang adong na malua sian nasida angka na maporus i, ndang adong na malua tutu nanggo sada.

²Tung sura pe ditondong nasida sahat tu bagasan parbeguan, alapon ni tanganku do nasida sian i; jala tung sura pe manaek nasida tu banua ginjang, paijuronku do nasida sian i.

³Tung sura pe martabuni nasida di punsu ni Karmel hampunganku do nasida, huhut mamboan nasida sian i; tung sura pe

martabuni nasida maradophon matangu di bagasan lung ni laut, dohononku do sian i naga i, asa dipargut nasida.

⁴Tung sura pe laho nasida tu habuangan di jolo ni angka musu nasida, dohononku do sian i podang i, asa dibunu nasida. Sai nolnol do matangu mangalo nasida mambahen marhinamago, ndang anggo na danggan.

⁵Molo Tuhan Jahowa Zebaot manjama tano on gabe malala ma jala margudompong sude pangisina i, gabe binsat songon batang aek Nil sandok tano i jala moru muse songon Nil ni Misir.

⁶Ibana do paulihon angka bilutna parginjang di banua ginjang, jala pungguanna diojakkon di atas tano on. Ibana do na manjou angka aek ni laut, jala diusehon muse tu sisik ni tano on, Jahowa do goarna!

⁷(II.) Nda songon angka anak ni halak Kus, hamu ale halak Israel di ahu? ninna Jahowa. Nda ahu do na manogihon halak Israel ruar sian tano Misir, jala halak Palistim sian Kaptor, jala halak Ram sian Kir?

⁸Ida ma, sai nolnol do mata ni Tuhan Jahowa mangalo harajaon pardosaon i, sai siaphononku do i sian sisik ni tano on, alai tahe ndatung sun siap bahenonku pinompar ni si Jakkob, ninna Jahowa.

⁹Ai ida ma, ahu martona jala marsege sogot pinompar ni Israel di tongatonga ni saluhut bangso parbegu, songon na marsege di

anduri, jala ndang mapisik tu tano na porngis, nanggo sangkamata.

¹⁰Binahen ni podang marmatean sogot nasa pardosa ni bangsongki, angka na mandok: Ndang tagamon sahat manang mangonai tu hita hinamago i.

¹¹Di ari na sasada i pajongjongonku ma muse undungundung ni si Daud na malohai, jala paulionku parik angka na bungbung i, jala pajongjongonku muse angka na malohai, jala paulionku do i, suang songon di angka ari mulamula.

¹²Asa nasida manean pasipasi ni Edom dohot saluhut bangso parbegu angka na targoar tu goarhu, ninna Jahowa, na pasauthon songon i.

¹³Ida ma, na ro do sogot angka ari, ninna Jahowa: Masijaloan ma paninggala dohot panggotil, pardege dohot panabur; jadi manetekkon anggur angka dolok, jala binsat angka dolokdolok sudena.

¹⁴Dung i togihononku ma mulak angka na tarbuang sian bangso Israel; jala paulionnasida muse huta angka na tarulang, laos inganannasida ma, jala pungaonnasida ma angka porlak anggur, laos inumonna ma anggurna, jala pangkeonnasida ma angka porlak, laos panganonna dohot parbuena.

¹⁵Jala lopokhononku ma nasida tu tanonasida, jala ndang be pabalionku nasida

sian tanonasida, na hulehon i tu nasida, ninna
Jahowa Debatam.

Obaja

1 ¹ (I.) Pangungkapon ni si Obaja, songon on do hata ni Tuhan Jahowa taringot tu Edom: Nunga hubege hami sada barita sian Jahowa, jala nunga disuru sada pangulu tumopot angka bangso parbegu: Tole antong, borhat ma hita marmusu dompak nasida.

² Ida ma, metmet do ho bahenonku di tongatonga ni angka bangso parbegu, asa lea situtu ho.

³ Panengaon ni roham do paotootohon ho, ala maringan ho di bagasan angka liang ni dolok batu, buntul ingananna, gabe didok di bagasan rohana: Tung ise ma na tuk mangonjar ahu tu tano?

⁴ Nang pe timbo ho songon lali na mangareapreap, tung sura pe diholangkolang ni angka bintang dibahen ho asarmu, sai na onjaronku do ho sian i, ninna Jahowa.

⁵ Tung sura ro halak panangko tumopot ho, manang pangarut borngin, tung songon dia ma hasisiapmu bahenonna! Tung so tangkoonnasida, sae di nasida? Tung sura ro halak sitapu anggur tumopot ho, nda holan angka pisikpisik tadingkononnasida.

⁶ Alai beha do pandiori ni halak di si Esau, disungkapi angka parbonangan sitabunianna!

⁷ Sahat ro di partalpahan pataruon ni sude angka baoa parjanjianmu ho; na dipaotooto jala dipatunduk angka baoa donganmu sapartahian do ho; sagusagum do bahenonnasida gabe jorgong di torum, so botobotoanmu.

⁸ Nda songon on do masa di ari na sasada i, ninna Jahowa, siaphononku ma halak na bisuk sian Edom, jala parbinotoan sian dolok ni si Esau?

⁹ Jadi tarhatotong ma angka ulubalangmu, ale Teman, asa tung sun siap nasa baoa sian dolok ni si Esau dibahen todostodos.

¹⁰ Ala ni hajungkaton tu anggim si Jakkob, ingkon hungkupan ni haurahon ma ho, jala ingkon siaphononhon ho ro di salelenglelengna.

¹¹ Uju di ari pandopangmu dompak ibana, uju di ari pamuangkon ni halak sileban paranganna, jala dibongoti halak sileban bahalna, jala marruji nasida taringot tu Jerusalem, dohot do ho uju i songon sada sian nasida.

¹² Hape nian, ndang jadi martilla pamerengmu di ari ni anggim, di ari hinamagona, jala ndang jadi marlas ni roha ho mida angka anak ni Juda di ari hasisiapnasida i, jala ndang jadi teal pangkulingmu di ari hagogotanna.

¹³ Nandang jadi bongotanmu bahal ni bangsongku di ari hasisiapnasida, ndang

jadi martilla dohot pamerengmu mida hinamagona, di ari hasisiapna i, jala ndang jadi paganjangonmu jarijarim mambuat ugasanna di ari hinamagona.

¹⁴Jala ndang jadi nian jongjong ho di dalam panirpangan laho mangaragehon angka na maporus sian ibana; jala ndang jadi nian jehehononmu angka na malua sian ibana di ari hagogotan.

¹⁵Ai jonok nama ari ni Jahowa tu atas ni saluhut bangso parbegu: Suang songon na binahenmi bahenonna sogot tu ho; pambahenanmi pasuangonna tu ulum.

¹⁶Ai songon parsoburmuna di atas ni dolok habadiaonki, marsobur sogot tongtong sude bangso parbegu; marsobur ma tongon nasida, jala siruponna, jadi disi pe nasida, hira na so dung disi.

¹⁷(II.) Alai anggo di atas dolok Sion adong do haluaon sogot, jala manjadi habadiaon, jala teanon ni pinompar ni si Jakkob do angka inganannasida.

¹⁸Dung i gabe api ma pinompar ni si Jakkob, jala jilam ni api ia pinompar ni si Josep, alai gabe durame ianggo pinompar ni si Esau: Jadi nahitanna ma nasida, laos suda nasida tutungonna, jadi ndang adong na malua nanggo sada sian pinompar ni si Esau, ai nunga Jahowa mandok i.

¹⁹Dung i teanon ni isi ni dangsina ma dolok ni si Esau dohot tano pea ni halak Palistim;

teanonnasida dohot ladang ni Epraim dohot ladang ni Samaria; alai anggo Gilead di Benjamin do i.

²⁰Jala angka na tarbuang sian parangan ni halak Israel manean sogot tano na di halak Kanaan hian sahat ro di Sarpat; jala halak na tarbuang sian Jerusalem, angka na di Sarpat manean sogot angka huta tungkan dangsina.

²¹Jala nangkok sogot angka silehon tua tu dolok Sion laho manguhum dolok ni si Esau. Jadi di Jahowa ma harajaon i.

Yunus

1 ¹ (I.) Dung i ro ma hata ni Jahowa tu si Jona, anak ni si Amittai, songon on:

² Borhat ma ho laho tu Ninive, huta na bolon i jala martingting dompak huta i, ai nunga pola maungaung hajahatonnasida sahat tu jolongku.

³ Jadi borhat ma si Jona laho maporus tu Tarsis maradophon Jahowa, gabe tuat ma ibana tu Joppe, jumpangsa ma disi sada parau na laho tu Tarsis; jadi dilehon ma seoana, gabe masuk ma ibana tu bagasan parau i laho marlayar rap dohot nasida tu Tarsis maporus maradophon Jahowa.

⁴ (II.) Alai ditompuhon Jahowa ma habahaba siappalautus tu laut i, gabe masa ma hagunturon bolon di bagasan laut i, gabe disurasura nasida angka ripuk parau i.

⁵ Jadi mabiar ma halak parparau i, manganguhi ma nasida ganup tu debatana be, jala direongkon ulaula angka na di bagasan ni parau i tu laut, paneangkon sian nasida. Alai mijur tu pamurnangan ni parau i ianggo si Jona, peak disi laos diparedem modom.

⁶ Jadi ro ma induk ni halak paaparau i mandapothon ibana, jala ninna ma tu ibana: Aha di ho parpodom na redem? Hehe ma ho

manjou ma ho tu Debatam, anggiat tung marpangulahi roha ni Debata tu hita, asa unang harom hita.

⁷Dung i mangkuling ma nasida ganup tu donganna: Tole, marhopok ma hita, asa itaboto manang ala ni ise umbahen na ro parmaraan on tu hita. Jadi marhopok ma nasida, gabe hona si Jona.

⁸Dung i ninna nasida ma tu ibana: Ua paboa di hami ala ni aha umbahen na ro parmaraan on tu hita? Aha do bahenbahenanmu? Jala sian dia ho ro? Dia do tanom, jala sian bangso dia do ho?

⁹Jadi ninna ibana ma tu nasida: Halak Heber do ahu, jala Jahowa, Debata sitompa langit do na huhabiari, ibana do sitompa laut dohot darat.

¹⁰Jadi mabiar situtu ma angkajolma i, angka didok nasida ma tu ibana: Boasa tung songon i bahenonmu? Ai diboto angkajolma i do, na maporus do ibana maradophon Jahowa, ai nunga dipaboa hian tu nasida.

¹¹Dung i didok nasida ma tu ibana: Aha nama bahenonnami tu ho, asa tung mansadi laut i sian hami? Ai lam tu gunturna do laut i.

¹²Jadi ninna ibana ma tu nasida: Hindat hamu ma ahu, jala reongkon hamu ahu tu laut, jadi mansadi ma laut i sian hamu, ai huboto do, ala ni ahu do ro hagunturon bolon on tu hamu.

¹³ (III.) Jadi digogo angka jolma i ma marluga laho mulak tu pasir nian, alai ndang tartondongnasida, ai lam guntur do laut i dompak nasida.

¹⁴ Jadi manjou ma nasida tu Jahowa, angka didok nasida ma: Iale Jahowa, sai unang loas hami mago ala ni hosa ni baoa on, jala unang jujur tu hami mudar na so marpipot, ai nunga dibahen ho hombar tu lomo ni roham, ale Jahowa.

¹⁵ Dung i dihindat nasida ma si Jona jala direongkon ibana tu laut. Jadi so ma laut i sian gunsangna.

¹⁶ Jadi mabiar situtu ma angka jolma i mida Jahowa laos dipelehon pelean tu Jahowa, jala marbagabaga nasida tu ibana.

¹⁷ (2-1) (I.) I. Dung i diparo Jahowa ma sada ihan raja, asa di bondut si Jona. Jadi di bagasan butuha ni ihan i ma si Jona tolu ari tolu borngin.

2¹ (2-2) Dung i martangiang ma si Jona tu Jahowa Debatana, sian butuha ni ihan i.

² (2-3) Jala didok ma: Joujou do ahu sian hagogotanki tu Jahowa gabe dialusi ibana ahu. Sian butuha ni parbeguan ahu manganguhi: Ditangihon ho do soarangki!

³ (2-4) Nunga direongkon ho ahu tu bagasan lung tu bagasan pusupusu ni laut, gabe pusat mangkaliangi ahu, sude angka ombakmi dohot galumbangmi mangalungkupi.

⁴(2-5) Langgo ahu, nunga hudok: Nunga bali ahu sian jolo ni matam; alai tahe ulahanku dope mamereng dompak joro habadiaonmi.

⁵(2-6) Nunga nian dihaliangi angka aek i ahu, pola tos hosangku, lung i pasampaksampak ahu sirambon do alit tu ulungku.

⁶(2-7) Nunga mangungkor ahu sahat tu bona ni angka dolok, ransangransang ni tano on pe nunga tarsordak humaliang ahu ro di salelenglelengna. Alai dipanangkok ho ngolungku sian godung ale Jahowa Debatangku.

⁷(2-8) Uju mandate hosangku di bagasan, Jahowa ma huingot, jadi sahat ma tangiangku tu ho, tu joro ni habadiaonmi.

⁸(2-9) Alai halak na marsomba tu ganaganaan sipaotooto, i ma na manadingkon hasonangannasida i.

⁹(2-10) Alai anggo ahu mardongan soara pujipujian ahu mamele tu ho, gararonku do na huparbagabaga, Jahowa do nampuna hatuaon.

¹⁰(2-11) Dung i didok Jahowa ma tu ihan i, gabe diutahon ma si Jona tu pasir.

3¹(I.) I. Dung i ro ma muse hata ni Jahowa tu si Jona paduahalihon, songon on:

²Borhat ma ho laho tu Ninive huta na bolon i, jala tingtingkon tusi tingting sipaboaonku tu ho.

³Jadi borhat ma si Jona laho tu Ninive hombar tu hata ni Jahowa. Alai huta na bolon do ianggo Ninive di jolo ni Debata, partoluarian mardalan lambasna.

⁴Dung i dipungka si Jona ma mardalan di bagasan huta i parsadarian, jala martingting ma ibana mandok: Opatpulu ari nari na ma, jadi marongrong ma Ninive!

⁵(II.) Jadi porsea ma angkajolma i isi ni Ninive i di Debata, jala ditingtingkon mandokkon marpuasa sadari, jala marulos hori nasida sian halak na magodang ro di na metmet.

⁶Dung i sahat ma hata i tu raja ni Ninive. Jadi hehe ma ibana sian habangsana, jala diosari pangkeanna hian sian dagingna, jala martujungkon hori ibana, jala hundul tu sirabun.

⁷Dung i disuru rajai ma martingting paboahon tu bagasan Ninive, songon on do tingting ni rajai dohot donganna angka na sangap: Nangjolma dohot pinahan, tole lembu dohot birubiru, ndang jadi mandai agia aha, ndang jadi manggagat, aek pe ndang jadi inumonna.

⁸Ingkon marulos horijolma, nang pinahan, jala gogoonna be joujou tu Debata; jala ganupjolma ingkon mulak sian dalanna na roa i, dohot sian hatodoson na niula ni tangannasida.

⁹Ise umbotosa, anggiat tung marpangulahi jala solsolan ni Debata rohana, jala mulak ibana sian parpiar ni rimasna, asa unang mago hita.

¹⁰Jadi dung diida Debata pambahenannasida, na mulak i nasida sian dalannasida angka na roa i, gabe disolsol Debata ma rohana taringot tu hamagoan na nilumbahonna bahenonna hian tu nasida, gabe ndang saut dibahen.

4¹ (I.) Alai sogo situtu do roha ni si Jona disi, jala piripirion ibana.

²Jadi martangiang ma ibana tu Jahowa jala didok ma: Oe, ale Jahowa, nda i do hatangku hian, uju di tanongku dope ahu? Umbahen hujoloani nian maporus tu Tarsis, ai huboto hian do, Debata parasi roha jala pardengganbasa do ho lambat tarrimas, jala parasi roha godang, jala na olo sumolsol rohana taringot tu hamagoan.

³On pe ale Jahowa, ua buat ma tagonan hosangku sian ahu, ai dengganah ahu mate sian na mangolu.

⁴(II.) Dung i ninna Jahowa ma: Tung turut ma ho marronirimas?

⁵Dung i ruar ma si Jona sian huta i, jala hundul tungkan habinsaran ni huta i, jala dibahen disi sopesopona, jala hundul tusi marlinggomlinggom, paima diida manang aha masa tu huta i.

⁶Jadi dipadiri Debata Jahowa ma hau dulang sada, na simbur magodang di atas ni si Jona bahen parlinggoman di atas uluna, paluahon ibana sian hinamagona, jadi las situtu ma roha ni si Jona ala ni hau dulang i.

⁷Dung i dipadiri Debata ma sada gulokgulok di hananaek ni sibalik hunik manogotna i, gabe diruangi ma hau dulang i, laos malos.

⁸Jadi dung binsar mata ni ari dipadiri Debata ma alogo na mohop sian purba. Jadi didoit mata ni ari ma ulu ni si Jona, pola mandate ibana, jadi dipangido ma mate hosana, jala didok do: Dengganan ahu mate sian na mangolu!

⁹Dung i didok Debata ma tu si Jona: Tung turut ma ho marronirimas ala ni hau dulang i? Gabe didok ibana ma: Turut do ahu marronirimas sahat ro di hamatean.

¹⁰Jadi didok Jahowa ma: Gari ho marsak do roham ala ni hau dulang na so hinangaluthonmi manang pinagodanggodangmi, na tubu saborngin, jala mago saborngin.

¹¹Baliksa pala ahu, tung so marasi ni roha ahu mida Ninive, huta na bolon i, na marisi lobi saratus duapulu ribu jolma, angka na so umboto parsirangan ni siamunna dohot sihambirangna, tole pinahan na sai deak?

Mikha

1 ¹ (I.) On ma hata ni Jahowa na ro tu si Mika sian Maressa, uju di angka ari ni si Jotam, Ahas dohot Hiskia, angka raja sian Juda; hata angka na niidana taringot tu Samaria dohot Jerusalem.

² Tangihon ma, hamu ale angka bangso saluhutna! Patinggil ma pinggolmu, ale tano on ro di pangisina i! Asa gabe sitindangi Tuhan Jahowa dompak hamu, Tuhan i sian joro habadiaonna.

³ Ai ida ma, ruar do Jahowa sian ingananna, jala tuat ibana, jala mardalan di atas buntulbuntul ni tano on.

⁴ Jadi malala ma angka dolok di toruna, jala mabola angka rura, songon pantis maradophon api, songon aek tangkuju na mabaor sian robean.

⁵ Ala ni pangalaosion ni si Jakkob do saluhutna i, jala ala dosa ni pinompar ni Israel. Ise do parbonsiran ni pangalaosion ni si Jakkob? Nda Samaria do i? Jala ise do mula ni angka buntulbuntul ni Juda? Nda Jerusalem do i?

⁶ Jadi bahenonku ma Samaria gabe tambak batu di ladang, gabe porlak panuanan anggur; jala baorhononku tu rura angka batuna, jala patedehonku angka ojahanna.

⁷Jala saluhut ganaganaannasida
ropukkononhon sogot, jala nasa upa
parmainanna mosokkononhon do tu api, jala
nasa ganaganaannasida agohononhon do;
ai sian upa parmainan dipapungupungu jadi
ingkon mulak do i muse gabe upa parmainan.

⁸(II.) Ala ni do ahu mangandung i jala
tumatangis, mardalan ahu so marsipatu, jala
marsaemara; marauang ahu songon antuasus,
jala margudompong songon pidong unto.

⁹Ai targisik do bugangna, pola sahat ibana
tu Juda, dolos ibana sahat tu bahal ni
bangsongku, sahat tu Jerusalem.

¹⁰Unang baritahon hamu barita i di Gat,
unang tangis hamu di Akko. Margulu sirabun
ahu di Bet Leapara.

¹¹Borhat ma ho, ale isi ni Sapir marsaemara
mardongan haurahon. Ndang ruar anggo isi
ni Zenan, tarbege do andung sian Bethejel, ai
buatonna do sian hamu hajongjonganna.

¹²Ai margondok ni roha do isi ni Marot ala
mago na denggan i; ai nunga tuat sian Jahowa
hamagoan sahat tu bahal ni Jerusalem.

¹³Pasang ma hoda tu hureta, ho ale isi ni
Lakis; parbonsiran ni dosa do huta i tu boru
Sion, ai di bagasan ho do jumpang angka
pangalaosion ni Israel.

¹⁴Dibahen i tongosonmu ma surat
partulahan taringot tu Maressa Gat, angka
bagas sian Aksib, gabe gabus di angka raja ni
Israel.

¹⁵Paroonku dope angkupni sada sipanean di ho, ale isi ni Maressa; sahat ro di Adullam hamuliaon ni Israel.

¹⁶Marnabung ma ho, asa palpal ho ala ni angka anak hasudunganmu; pabidang ma palpalmu, songon lali: Ai nunga tarboan nasida sian ho.

2¹(I.) Marjea ma halak situptup hageduhon dohot angka sibahen hajahaton di atas lagenasida, disi torang ari diulahon ma i, ai nasa gogo ni tanganna dibahen.

²Ia impol rohanasida di angka hauma, laos dirampas do i, manang di angka bagas, laos dibuat nasida do. Sai dirupa nasida indukna ro di jabuna, baoa i pe ro di partalianna.

³Dibahen i songon on do hata ni Jahowa: Ida ma marsangkap hamagoan ma ahu dompak bangso on, ndang tagamon malua rungkungmuna sian i, jala ndang be mandirgak hamu mardalan, ai tingki hamagoan do i.

⁴Di ari na sasada i bahenon ni halak do sada ende aling taringot tu hamu, jala andungkononna sada andung: Nunga songgop, dohononna, nunga pesan situtu hita; partalian ni bangsongku nunga dipaimbar ibana; songon dia do pangarampasna di ahu! Tu pangose dibagihon haumanta.

⁵Dibahen i ndang adong nanggo sada dingkan ho sisintak hotang pamalok laho martali diluhutan ni Jahowa.

⁶Ndang jadi manurirangi hamu!

Handiannasida i. Tung so manurirangi ma iba taringot tusi? Ndang tagamon mansohot angka haurahon.

⁷Oe tung na jadi ma songon on pangkataion ni pinompar ni si Jakkob: Tung naung piripirion do Tondi ni Jahowa huroha? Tung songon i ma pangalaho ni angka jadijadianna? Tung so denggan huroha angka hatangku tu ganup halak na tigor marpangalaho?

⁸Alai nunga tibu hian hehe bangsongku gabe musu: Dipupusi nasida ulos sampesampe dohot bajubaju sian halak pamolus na marsonangsonang, angka parsindak.

⁹Angka inaina ni bangsongku dionjar hamu do sian bagas hasoloannasida; sian posoposonasida dibuat hamu do hamuliaonki salelelenglelengna.

¹⁰Borhat ma hamu jala laho, ai ndada on tano hasonangan ala haramunon na mangkorhon hamagoan na sogir situtu.

¹¹Tung sura adong sahalak na mangihutihut alogo dohot sipaotooto jala mandok hata gabus songon on: Manurirangi ma ahu di ho taringot tu anggur dohot tu tuak na pang! I ma nian panurirang ni bangso on.

¹²(II.) Sai na papunguonku do sandok ho, ale Jakkob! Sai na paluhutonku do pasipasi ni Israel, pasadaonku ma nasida, songon birubiru di bagasan bara, songon sada

punguan di tongatonga ni adaran, riburan nasida dibahen torop ni jolma.

¹³Dung i manaek sada sipalua manguluhon nasida; tulusonnasida ma sahat ro di bahal, pola salpuanna tahe, jala rajanasida di jolonasida, jala Jahowa manguluhon nasida.

3¹(I.) Dung i hudok ma: Ua tangihon hamu ma ale angka induk ni Jakkob dohot hamu ale angka panguhum ni pinompar ni Israel! Nda tama ma ingkon botoonmuna uhum?

²Hamu angka na mangkagigihon na denggan, jala mangapian di na roa, angka na mambobahi hulingkulingnasida sian dagingna dohot na mambilbil sibuk sian holiholinasida.

³Hamu angka na manohali sibuk ni bangsongku, jala dibobahi hulingkulingnasida sian nasida, jala diponggolhon holiholinasida, jala dijajali songon di bagasan hudon, songon sibuk di tongatonga ni balanga.

⁴Disi ma nasida joujou tu Jahowa, alai ndang alusanna nasida, jala hungkupanna bohina maradophon nasida di tingki uju i, hombar tu pambahenannasida angka na jahat i.

⁵(II.) Songon on do hata ni Jahowa dompak panurirang, angka na mangaliluhon bangsongki, angka na maningtingkon dame molo adong sihilhilon ni iponnasida, alai manang ise na so margugu panganonnasida, marmusumusu nasida dompak ibana.

⁶Dibahen i lia sian pangungkapon do borngin di hamu, jala lia sian pangarundigon

hagolapon di hamu; gari mata ni ari sundut do di atas ni angka panurirang, jala holom marimpotimpot ia arian di nasida.

⁷Jadi murak ma angka pangarunding, jala maila angka partondung, saluhut nasida mangkuphupi misena, ai ndang adong ro paraluson sian Debata.

⁸Alai anggo ahu gok gogo do, gok Tondi ni Jahowa dohot uhum dohot hatogaon paboahon tu Jakkob pangalaosionna, dohot tu Israel dosana.

⁹(III.) Antong tangihon ma on hamu ale angka induk ni pinompar ni si Jakkob dohot hamu angka panguhum ni pinompar ni si Israel, angka na marbiasbias di uhum, jala dipapeol nasa hatigoran.

¹⁰Angka na pauli Sion marhitehite mudar dohot Jerusalem marhitehite hageduhon.

¹¹Manjalo sisip angka induk nasida mandabu uhum, jala manjalo upa mangajari malim nasida, jala manjalo perak panurirang nasida mangarundingi, laos mangasahon Jahowa dope nasida, ninna do: Nda Jahowa do di tongatonganta? Nandang tagamon ro hamagoan tu hita!

¹²Dibahen i ala hamu ninggala on do Sion sogot songon hauma tur, jala Jerusalem gabe timbunan batu, jala dolok ojahan ni joro i gabe tombak.

4¹(I.) Jadi masa ma sogot di ujung ni angka ari: Ojak ma dolok ni joro ni Jahowa

di punsu ni angka dolok, jala huminsat sian angka robean, jadi marrongoman ma tu ibana angka bangso.

²Jadi mardalan ma torop bangso parbegu, angka dohononnasida ma: Beta hita nangkok tu dolok ni Jahowa, dohot tu joro ni Debata ni si Jakkob, asa diajarhon tu hita angka dalanna, jala mardalan hita di angka lapangna. Ai marharoroan sian Sion do patik i, jala hata ni Jahowa sian Jerusalem.

³Jadi manguhum ma ibana di tongatonga ni torop angka bangso jala toruanna angka bangso bolon sahat ro di na dao; jadi patopahononnasida ma podangnasida bahen gigi, jala hujurnasida bahen sasabi. Nandang be sintahon ni bangso dompak bangso podang, jala ndang be guruhononnasida ruhut ni hamusuon.

⁴Hundul be ma nasida di toru ni hau anggurna dohot di toru ni hau arana, jala ndang adong panonggoti, ai pamangan ni Jahowa Zebaot do na mandok i.

⁵Ai saluhut angka bangso mardalani marhitehite goar ni debatana be, alai anggo hita mardalan marhitehite goar ni Jahowa Debatanta ro di saleleng ni lelengna.

⁶Di ari na sasada i, ninna Jahowa, papungupunguonku ma jolma na mengkat, jala jolma na binolongkon paluhutonku muse ro di jolma na hupasipal na jolo.

⁷Jala patindangonku jolma na mengkat i bahen pasipasi, jala jolma na dao binolongkon bahen bangso na gogo, jala Jahowa rajanasida di dolok Sion olat ni nuaeng ro di salelenglelengna.

⁸I anggo ho ale Migdal Eder, robean ni boru hian, ro do hamuliaonmu sogot tu ho; ro do huhut tu ho panggomgomion parjolo harajaon ni boru Jerusalem.

⁹(II.) Ia nuaeng, boasa tung manganguhi ho? Tung na so adong be raja di tongatongamu? Manang tung naung mago do panuturim, umbahen marsahit rian ho, songon boruboru na maniop siraraisan.

¹⁰Paodon ma, jala lujukkon ale boru Sion, songon boruboru na naing mangintubu! Ai ingkon ruar ho anggo nuaeng sian huta i jala maringan di ladang, jala ingkon sahat ho tu Babel; disi ma ho paluaonna, disi ma tobuson ni Jahowa ho sian tangan ni musum.

¹¹Alai anggo nuaeng marpungu torop angka bangso parbegu dompak ho, angka na mandok: Niramunan ma! Asa tung sombu roha ni matanta mida Sion!

¹²Alai ndang ditanda nasida anggo angka sangkap ni Jahowa, jala ndang diantusi nasida tuptupna: Na pinapunguna i nasida, songon tibalana tu pardegean.

¹³Hehe ma ho jala mardege, ale boru Sion! Ai tandukmi gabe bosi bahenonku, jala sisilonmi gabe tombaga bahenonku, jadi

ropuhanmu ma torop angka bangso jala tu Jahowa ontongkononku arta na niomonasida, jala ugasannasida tu Tuhan sigomgom liat portibi on.

5¹ (4-14) On pe marhoronhoron ma hamu, ale boru ni parduan ni parangan! Ai hona tungkum do hita humaliang; tungkot do dilibashon tu hurum ni siuhum Israel.

² (5-1) (I.) Alai anggo ho, ale Betlehem Eprata, mametmethu do ho nian anggo tung pola jujuron tu angka huta marriburibu di Juda; hape sian ho do haroroan ni na gabe panggomgomi di Israel, jala angka haroroanna sian na nahinan, sian angka ari na robi salelenglelengna.

³ (5-2) Dibahen i pasahatonna ma nasida sahat ro di tingki pangintubuan ni na manubuhon, jala mulak pasipasi ni angka hahaanggina tu angka anak ni Israel.

⁴ (5-3) Alai jongjong anggo ibana, jala marmahan mangasahon gogo ni Jahowa, marhitehite hamuliaon ni goar ni Jahowa Debatana; jadi maringan ma nasida, ai timbul ma ibana disi ro di angka ujung ni tano on.

⁵ (5-4) Jala ibana gabe hadameon; molo naeng ro Assur tu tanonta, molo naeng luntahonna bagasta angka na bolon i, jadi patindangonta ma mangalo ibana pitu parmahan dohot ualu induk ni jolma.

⁶ (5-5) Jadi suda gagatonnasida tano Assur marhitehite podang dohot tano ni

si Nimrod di bagasan harbanganna. Jadi ibana ma paluahon hita sian Assur molo ro naeng sumola tanonta, jala naeng degeonna partalpahanta.

⁷ (5-6) Jadi sobokkon nambur sian Jahowa ma pasipasi ni Jakkob di tongatonga ni torop angka bangso, jala songon udan na manetehi tu duhutduhut, na so maimaima di jolma, manang di angka anak ni jolma.

⁸ (5-7) Alai huhut muse pasipasi ni Jakkob di tongatonga ni angka bangso parbegu, di tongatonga ni torop angka bangso, songon singa di tongatonga ni binatang angka na di tombak, songon singa panoro di tongatonga ni angka pungan ni birubiru, molo dibolus, gabe dilotongi jala disoro, ndang adong na paluahon.

⁹ (5-8) Jadi timbul ma tanganmu di atas ni angka na manosak ho, jala siap nasa musim.

¹⁰ (5-9) Di ari na sasada i, ninna Jahowa, siaphononku ma angka hodam sian tongatongami, jala agoonku angka huretam.

¹¹ (5-10) (II.) Siaphononku ma dohot angka huta bolon ni tanom, jala gargaronku nasa hutam angka na gonting i.

¹² (5-11) Jala pansingknonku angka utiutian sian tanganmu, jala ndang adong be di ho pangarunding.

¹³ (5-12) Jala siaphononku ma ganaganaan ni angka na niuhirmi dohot ganaganaan angka na tinuangmi sian tongatongami, jadi

ndang be ho marsomba tu jadijadian ni tanganmu.

¹⁴(5-13) Jala uratanku ma angka sombaonmi sian tongatongam, jala siaphononku angka hutam.

¹⁵(5-14) Jala bahenonku ma partubolan di bagasan parpiar ni rimashu tu angka bangso parbegu, angka na so tumangihon ahu.

6¹(I.) Ua tangihon hamu ma na nidok ni Jahowa: Borhat ma ho marbada dompak angka dolok, asa dibege angka dolokdolok soaram.

²Tangihon ma, hamu ale angka dolok, parbadaan ni Jahowa, hamu pe ojahan ni tano on, angka na hoti, ai marparbadaan do Jahowa dohot bangsona, jala naeng masitarians ibana dohot Israel.

³Aha do uhumhu na sega tu ho, ale bangsongku? Marhitehite aha tahe ho hulojai? Alusi ma ahu!

⁴Ala na hutogihon i ho ulaning ruar sian tano Misir, jala hupalua ho sian bagas parhatobanan i? Husuru si Musa, si Aron dohot si Miriam manguluhon ho?

⁵Sai ingot ale bangsongki, na tinahi ni si Balas, raja sian Moab dohot alus ni si Bileam, anak ni si Beor, tu ibana; angka na masa olat ni Sitim pe sahat ro di Gilgal, asa tung ditanda ho angka habonaron ni Jahowa.

⁶(II.) Marhitehite aha tarbahen ahu mandapothon Jahowa, marsomba ahu

tu Debata na di ginjang? Marhitehite angka pelean situtungan ulaning ahu manjumpangkon ibana marhitehite anak ni lombu, angka na marumur sataon ulaning?

⁷Lomo do ulaning roha ni Jahowa mida hambing tunggal marriburibu? Manang mida angka sunge miak marloksaloksa? Lehononku do ulaning anak buhabajungku abul ni pangalaosingki? Parbue ni butuhangu ulaning abul ni dosa ni rohangku?

⁸Nunga dipabotohon ibana tu ho, alejolma manang aha na denggan, jala manang aha na niluluan ni Jahowa sian ho, nda holan na mangulahon uhum dohot holong ni roha di habasaon, jala marpangalaho haserepon maradophon Debatam.

⁹(III.) Joujou do suara ni Jahowa tu huta i, jala hatuaon do na tinembak ni goarmu. Tangihon hamu ma linsinglinsing dohot ibana na mangalumbahonsa.

¹⁰Nda tong dope adong di jabu ni halak parjahat angka arta hajahaton, dohot ampang na mametmethu, naung pinulasan hian?

¹¹Tung tarbahren ahu ma marsombusombu mida hatian hajahaton dohot mida batu timbangan ni pangansion di bagasan puro?

¹²Ala gok hadoboan halak na mora di bagasan huta i, jala pangisina i mangkatahon gabus, jala sipaotooto do dilanasida di bagasan pamangannasida.

¹³Ahu pe antong matemate ne ho bunuonku, jala tarulang ho bahenonku ala ni dosam.

¹⁴Mangan pe ho, hape ndang butong jala haraparonmu maringan di bagasan butuham, jala na niluahonmu, laos so malua, jala na pinaluam pasahatonku do tu podang.

¹⁵Manabur pe ho hape ndang adong gotilonmu; mardege parbue ni jetun pe ho, hape ndang jadi miahahanmu ho dohot miak nang mangilang parbue ni anggur ho, ndang jadi inumonmu anggur i.

¹⁶Ai diradoti hamu angka patik ni si Omri ro di nasa jadijadian ni pinompar ni si Ahab, jala mardalan hamu mangihuthon angka sangkapnasida, ala ni pasahatonku ma ho gabe tarulang jala pangisina i gabe sirehereheon, ia haurahon ni bangsongku: Ingkon hamu do mangusungsa.

7¹ (I.) Ngalutnai di ahu, ai nunga tung tudos ahu tu halak na papunguhon parbue, songon halak na manjomputi na marpisikpisik dung gotilon anggur! Nandang adong be parbue ni anggur allangon, sai mangapian do rohangku di patumonaanna.

²Nunga tung siapjolma na daulat sian tano on, jala ndang adong halak na tigor nanggo sada di tongatonga nijolma. Tung saluhut nasida mangarop di mudar, sai masitaonan sambil do nasida be tu donganna.

³Girgir do tangannasida mangulahon na roa: Tole pangarajai mangigil silehonlehon,

jala panguhum manjalo sisip, jala halak na bolon guru roharohana do mangkuling, gabe marpiupiu hajahatan dibahen nasida.

⁴Na dumenggan sian nasida tung sobokkon suga do, jala na tumobok tumajom sian tadatada; nunga ro ari na nilumbahon ni pangarundingmi, ari partubolan tu ho tarhatotong ma ho nuaeng bahenonnasida.

⁵Unang ma porsea manang ise di donganna! Unang ma marhaposan tu aleale hasudungan ni roha, gari maradophon parompuan na modom di ampuanmi ingkon jamotanna do angka bibir ni pamanganmu.

⁶Ai anak i paotootohon amana, boru i hehe dompak inana, parumaen dompak simatuana boru, musu ni baoa i i ma angka halak donganna sajabu.

⁷(II.) Alai anggo ahu manatap tu Jahowa do, jala dihalungunhon rohangku do Debata ni hatuaonku, sai tangihonon ni Debatangku do ahu.

⁸Unang ho marlas ni roha, ale musungku, mida ahu! Ai tinggang pe ahu sai hehe do ahu muse; ai hundul pe ahu nuaeng di bagasan haholomon, Jahowa do panondang di ahu.

⁹Usungonku do rimas ni Jahowa, ai dompak ibana do ahu mardosa, paima dibadahon ibana badangku, jala maruli uhum ahu dibahen. Sai toguonna do ahu sogot tu hatiuron, idaonku do hatigoranna.

¹⁰Alai idaon ni musungku ma i sogot, jadi hungkupan ni haurahon bohina, ibana naung mandok tu ahu: Didia do Jahowa Debatam? Marsombusombu ma matangku marnida nasida, dung hona luntak songon gambo di alaman.

¹¹(III.) Nunga ro ari parpaulion di parikmu, ari parholangan ni patik do i.

¹²Ari haroroan ni halak do i tumopot ho sian Assur, dohot sian angka huta ni Misir; jala sian Misir sahat ro di batang aek jala sian laut tu laut jala sian tor tu tor.

¹³Alai gabe halongonan ma tano i ala ni pangisina, binahen ni parbue ni pambahenannasida.

¹⁴Sai parmahan i ma bangsom marhitehite batahim, pungan ni partalianmi, ho ale na punjung maringan di tombak, di tongatonga ni Karmel! Loas ma nasida manjampal di Basan dohot di Gilead songon uju di ari angka na galia.

¹⁵Suang songon di angka ari haruruarmu sian tano Misir, ahu pataridahon tu nasida angka halongangan.

¹⁶Idaon ni angka bangso parbegu ma i, gabe murak nasida ala ni saluhut hagogoonnasida i, ampehononna ma tangan tu pamanganna gabe nengel pinggolnasida.

¹⁷Ingkon dilatonna nasida ma orbuk songon ulok na manginsiri di tano; angka hitir nasida ro sian partabuniannasida i mandapothon

Jahowa Debatanta i, angka dotdot nasida jala mabiar maradophon ho.

¹⁸Tung ise ma Debata songon ho, na marpamuati di dosa jala na umbolus pangalaosion ni partalianna na teba i! Ndang tongtong ibana marsigomos marronirimas, ai mangkalomohon asi ni roha do ibana.

¹⁹Sai marpangulah i do rohana, jala popoanna do angka hajahatonta; jala reongkononna do sude dosanasida i tu laut apala na umbagas.

²⁰Sai lehononmu do hasintongan tu si Jakkob, asi ni roha tu si Abraham, naung niuarihonmu tu ompunami sian angka ari na robi dope.

Nahum

1 ¹ On ma lumbalumba tu Ninive. Buku pangungkapon ni si Nahum, halak Elkos.

² (I.) Debata parrimas jala parlulu do Jahowa, parlulu do tongon Jahowa, jala parrimas situtu, parlulu do Jahowa dompak angka alona, jala parsunisunian ibana dompak angka musuna.

³ Lambat do Jahowa tarrimas alai na gogo situtu, sai na luluhononna do: Jahowa mardongan habahaba dohot halisungsung parhiteanna, jala ombun do orbuk ni patna.

⁴ Mangonai hata ibana tu laut gabe marsik, sude angka batang aek pe marsik dibahen; malos ia Basan dohot Karmel, malos dohot bunga ni Libanon.

⁵ Angka dolok humutur maradophon ibana, jala angka dolokdolok malala, jala tano i humuntal maradophon bohina ro di portibi on dohot pangisina sudena.

⁶ Tung ise ma manahan jongjong maradophon piri pirina? Tung ise ma tarbahen tindang mida parpiar ni rimasna? Marjimburjimbur do songon api murukna, jadi angka torban ma dolok batu maradophon ibana.

⁷Pardenggan basa do Jahowa, tau partanobatoan di ari hagogotan, jala ditanda do angka na marhaposan tu ibana.

⁸Alai marhitehite aek na sumar sun siap inganannasida dibahen ibana, jala haholomon mangalotongi angka musuna.

⁹Tung aha ma ditahi rohamuna mangalo Jahowa? Sun siap nasida dibahen ibana. Ndang pola dua hali hehe hagogotan.

¹⁰Ai hira angka na nirait ni suga, jala hira angka na mabuk di parmabuhannasida sudahononna nasida, songon durame tahe na pate hiang.

¹¹Sian ho do ruar jolma na martahi hajahaton mangalo Jahowa, jolma partahi na jat situtu.

¹²(II.) Songon on do hata ni Jahowa: Nang pe rimpas nasida, jala songon i torop, laos songon i do siap nasida sabion jala laho salpu boti. Ia dung hupajimput ho, ndang be ulahanku pajepol ho.

¹³On pe ponggolhononku ma nuaeng augana sian ho, jala rapuanku angka rantem.

¹⁴Alai nunga martona Jahowa taringot tu ho: Nandang be tarbarita goarmu; siaphononku do sian bagas ni debatam ganaganaan na niuhir dohot na tinuang; ahu do mambahen tanomanmu, ai maneanku do ho jumpang.

¹⁵(2-1) (I.) Ida ma, di atas angka dolok pat ni siboan barita na uli, na maningtingkon: Hademakan! Pestahon angka pestami, ale

Juda, garari ma angka bagabagam! Ai ndang be solaon ni na so marniula ho, nunga tung sun siap ibana.

2¹ (2-2) Nunga nangkok ibana na paserak ho. Jamoti ma partanobatoan i! Taropangi ma dalan! Hohos i ma gontingmu! Pangke ma nasa gogom.

² (2-3) Ai pasuargon ni Jahowa ma hatimbulon ni Jakkob, songon hatimbulon ni Israel, ai nunga dipupusi angka pamupusi nasida, jala disegai angka ranting ni hau anggurnasida.

³ (2-4) Nunga marrara lombulombu ni angka ulubalangna, marpangkean na tinubar angka baqa sialo musu, marsillam songon api do angka sasabi ni huretana porang di ari parhontasanna, jala angka hujur disamarahon.

⁴ (2-5) Dienjak do angka huretai di alaman, mardorom di angka onan, rupana songon huathuat, songon hilap parsiksaknasida.

⁵ (2-6) Diingot roha ni rajai angka ulubalangna, hape martinggangan nasida di angka lapangnasida; humalaput nasida manahopi parikna, hape nunga sonson salosap.

⁶ (2-7) Dipatalak nasida nian angka bahal ni angka batang aek, jadi malala ma bagas bolon ni rajai.

⁷ (2-8) Alai nunga putus uhumi ingkon pasalargon ibana laho tu habuangan, jadi

songon parturtu ni anduhur pangandung ni borunasida, angka ditompuhi be do andorana.

⁸(2-9) Alai anggo Ninive, songon ambar pardengkean sian na robi do i, hape maporus do nasida: So hamu, so hamu! Alai ndang adong na olo humusor nanggo sahalak.

⁹(2-10) Gomaki hamu ma perak, gomaki hamu ma sere! Ai ndang marlilit angka arta na arga situtu dohot sude angka ulaula hasudungan ni roha.

¹⁰(2-11) Siap situtu jala pansing dipupusi luhutna pola malala ateate ni jolma, jala angka hitir ulu ni tot jala dibobok gonting ni saluhut isina jala marlangan bohinasida saluhutna.

¹¹(2-12) (II.) Didia do nuaeng liang ni angka singa, jala didia panjampalan ni angka singa panoro? Parmeammeaman ni singa tunggal dohot boruboru ro di anak ni singa, jala ndang adong na hum manonggoti.

¹²(2-13) Singa na manoro sisoroon singkop di angka anakna, jala na manansani di singa boruboru angkupna, jala digohi liangna dohot soroan, jala ingananna dohot na ginotilna.

¹³(2-14) Ida ma, ro ma ahu marlulu dompak ho, ninna Jahowa Zebaot, martimpul ma timus ni angka huretam tutungonku, jala suda panganon ni podang angka singami, jala siaphononku soroanmi sian tano on, asa unang be tarbege soara ni angka suruanmi.

3¹ (I.) Marjea ma huta sisopsop mudar,
tung gok gabus do i dohot pandoboan,
ndang mansadi adong nilaumna.

² Nunga pola tarbege parlisik ni batahi dohot
parlopuk ni galapang dohot hoda na marinjak,
dohot hureta na maringkatingkat.

³ Tolejolma parsihundul marrongoman ro
dohot podang na marjillamjillam dohot hujur
na marsillam, dohot torop halak angka na
mabugang dohot bangke margugungugun,
tung na so habilangan do bangke angka
na marragean, pola martinggangan nasida
dibahen angka na matena sian nasida.

⁴ Binahen ni hinadeak ni angka parmainanon
ni parompuan sibabijalang na geduk,
parutiutan na pande, naung manggadis torop
angka bangso marhite sian parmainanonna
dohot angka marga binahen ni ujarujaranna.

⁵ Ida ma, marlulu ma ahu dompak ho,
ninna Jahowa Zebaot, lingkuphononku ma
sarungmi tu bohim, jala paidahononku ma
parsaemaraonmu tu angka bangso dohot
hailaonmu tu angka harajaon.

⁶ Jala reongkononku ma tu ho biasbias, palea
ho, jala bahenonku ho sitotonduron.

⁷ Asa ganup na marnida ho maporus sian ho,
jala dohononna do: Nunga tung siap Ninive,
tung ise be mangandungi ibana? Sian dia na
ma luluanku angka na mangapul ho?

⁸ (II.) Tung dumenggan ma ho huroha sian
No-Ammon, na maringanan martopihon

batang aek Nil, aek humaliang ibana, na martanobato laut, laut i tahe parikna?

⁹Tole Kus na gonting dohot Misir, na so habilangan, Put dohot Kub, angka na hinaram manolongi ho.

¹⁰Nasida pe nunga tarboan tu habuangan, posoposona pe dirosahi do di suhisuhi ni nasa alaman, jala marruji do nasida taringot tu angka na marmulia, jala sude angka na raja ditali do dohot rante.

¹¹Ho pe, ingkon mabuk sogot gabe monjap, ho pe luluanmu do partanobatoan maradophon musu.

¹²Saluhut angka partanobatoanmu tudoshon hau antajau do marparbue na gulokon, molo hinutur, gabe madekdek do angka i tu pamangan ni halak na manganhon.

¹³Ida ma, boruboru do bangsom di tongatongami; ingkon talak do angka harbangan ni tanom dapoton ni musum, api manganhon ransangransangmi.

¹⁴Datdati ma tahui aek di ho tumagam tungkumtungkum, patang partanobatoanmu, luntahi ma gambo, jala dogili tano liat, patogu ma liang panutungan.

¹⁵Sai na suda do ho panganon ni api disi, siaphonon ni podang ho, gagatonna ho, songon panggagat ni sihapor. Padeak ma ho songon tamponok, padeak ma ho songon sihapor.

¹⁶(III.) Tumorop hian angka partigatigam dibahen ho sian bintang, angka na di langit, marrongoman angka sihapor, laos habang muse.

¹⁷Songon sihapor do angka jujunganmi, jala songon gulomitgulomit angka indukmi, angka na marasar di dorpi uju di ari ngali: Binsar mata ni ari muse, gabe di purpurhon nasida, jala ndang tanda be ingananna manang didia.

¹⁸Nunga mondokondok angka parmahanmi, ale raja sian Assur; nunga modom be angka partogim. Nunga marserak bangsom di atas ni angka dolok, jala ndang adong na papunguhon.

¹⁹Ndang hadaonan hamamagom, nunga targisik bugangmi. Nasa na umbege baritam martopap be do martillahon ho, ai ise na so dibolus hajahatonmu tongtong?

Habakuk

1 ¹ (I.) On ma pangungkapon na pinapatar tu panurirang Habakuk.

² Sadia leleng on, ale Jahowa, joujou ahu, matua so ditangihon ho? Sai hualualuhon tu ho hadoboan, matua so manumpak ho?

³ Boasa tung pataridahononmu tu ahu hageduhon, jala marsombusombu ho paidaida hangaluton? Pangarupaon dohot hadoboan di jolongku; masa parsalisian, jala tubu parbadaan.

⁴ Ala ni lumlam do patik jala ndang dung ruar uhum na sintong; ai dirohai halak parjahat i do halak partigor, dibahen i peol do uhum ruar.

⁵ (II.) Bereng hamu humaliang di tongatonga ni angka bangso parbegu, jala pamanat hamu asa marseto situtu rohamuna! Ai patulutonku do sada ulaon di angka arimuna, ndang parhatopotonmuna, tung sura adong halak na pajojorhon i tu hamu.

⁶ Ai ida ma, paheheonku ma halak Kasdim, sada bangso na garang jala na hijang, na maotaot dompak desa na opat i di tano on laho manoluk inganan angka na so ibana hian nampunasa.

⁷Jorbut, jala na songkal do bangso i; marharoroan sian ibana do uhumna dohot hatimbulonna.

⁸Jala umbontis angka hodana sian babiat, jala rumahat mangkarat sian gompul bodarina i; jala marinjak angka jolma parsihundulna, ro do tahe jolma parsihundulna sian na dao, habang do nasida songon lali, na manilu sisoroonna.

⁹Ro be do nasida sude mangulahon hadoboan, hisaphisap ni bohinasida i manuju dompak habinsaran, jala dipapungu halak na tarbuang, songon horsik toropna.

¹⁰Pola ibana mangelesi angka raja, jala siparengkelon dibahen angka partogi, mengkel do ibana mida nasa huta na gonting jala di pagukguk do orbuk asa martaban huta i.

¹¹Dung i humosing ma alogo, gabe purpur ibana; alai sai na tarjimput do manang ise na mambahen gogona gabe debatana.

¹²(III.) Nda ho do ale Jahowa Debatanku sian na robi dope na sun badia di ahu? Nandang tagamon mate hami loasonmu. Ale Jahowa bahen uhum do ibana, umbahen dipatindang ho jala bahen panjoraan do ibana, umbahen ojak ibana dibahen ho, ale dolok batu.

¹³Pita situtu do matam umbahen so tarpaidaida ho na roa, jala ndang tarbahen ho marsombusombu mida pangarupaon; boasa ma tung paidaonmu pamupusi? Tung siap ho,

molo dibondut halak parjahat na tumigor sian ibana.

¹⁴Jala tudoshon angka dengke lautjolma i dibahen ho, tudoshon gulokgulok tahe na so marraja.

¹⁵Tung saluhut do disintak nasida tu ginjang marhitehite hail, jala dipapungu di bagasan jalana, jala dionjat tu bagasan hadangkadanganna. Alani marlas ni roha ibana, jala marolopolop.

¹⁶Dibahen i umbahen mamele ibana tu jalana, jala manutung daupa tu hadangkadanganna, ai binahen ni do napu partalianna, jala talmis sipanganonna.

¹⁷Alai dung songon i, tung parumaronna ma jalana, jala datdatanna mambunu i angka bangso parbegu, so marpansadian?

2¹(I.) Di atas panatapanku do ahu jongjong, jala tindang ahu tu partanobatoan, jala manatapnatap ahu marnida manang aha sidohononna tu ahu, jala manang aha alusna taringot tu alualungku.

²Jadi ninna Jahowa mangalusi ahu: Surathon ma pangungkapon i, jala uhirhon tu angka batu panuratan, asa tangkas tarjaha nang pamolus.

³Ai taringot tu tingki sogot dope pangungkapon i, jala hapogan mareahi ujung, jala ndang margabus. Tung sura pe lumemba,

sai paimaima ma i, ai sai na ro do sogot ndang tagamon tartading.

⁴Ida ma na teal do ibana, ndang tigor rohana di bagasan; alai anggo halak partigor i mangolu do binahen ni parsihohotna marhaporseaon.

⁵(II.) Tongon tahe, pangoseose do ianggo anggur, jungkat do baoa i, dibahen ndang marparadianan; diparuak do butuhana songon parbeguan, jala songon hamatean do ibana, na so olo mahap, dipapungupungu tu ibana saluhut angka bangso, jala dipaluhut tu ibana sude angka marga.

⁶Nda saluhut nasida an marumpama taringot tu ibana, marende aling jala marhulingkulingan taringot tu ibana? Dohononna do: Marjea ma manang ise na pagukguk manang aha, so ibana nampunasa; sadia leleng on tagamon? Tung na padokdok utang tu ibana do ibana disi.

⁷Nda sompong ma hehe tagamon angka na pasipalsipal ho, jala tarsunggul halak angka na mangarupa ho? Gabe tabannasida ma ho.

⁸Ala nunga ditaban ho torop angka bangso parbegu: Jadi tabanon ni nasa pasipasi ni angka bangso i ma ho, ala ni sapata ni mudar ni jolma na durus dohot ala hadoboan di tano i, dohot di huta ro di pangisina i sudena.

⁹Marjea ma manang ise na marpangomoan hajahaton tu jabuna, naeng mambahen

asarna di ginjang, laho maporus maradophon tangan ni halak parjahat.

¹⁰Nunga ditahi ho haurahon tu jabum, maniaphon torop angka bangso, hape nunga dapotan dosa anggo tondim.

¹¹Ai joujou do nang batu sian dorpi, jala urur sian tarup ni jabum mangalusi ibana.

¹²Marjea ma manang ise na pauli huta marhitehite mudar, jala diojakkon huta i marhitehite hageduhon.

¹³Ida ma, nda sian Jahowa Zebaot haroroanna, marngalutan pe angka marga, laho papanganhon tu api do, mandate pe angka bangso, humongkop na soada do?

¹⁴Ai gok parbinotoan di hamuliaon ni Jahowa do sogot tano on, songon pangkuphupi ni aek di tondolan ni laut.

¹⁵Marjea ma manang ise na painum donganna, mangusehon parpiar ni rimasmu, huhut pamabukkon ibana naeng marnida parsaeмараonna.

¹⁶Ho pe ingkon hamahaphononmu ma haurahon gumodang sian hasangapon. Minum ma dohot ho, jala pasalang ma ho, tu ho ma sumuang marliat panginuman sian tangan siamun ni Jahowa jala utauta haleaon ali ni hasangaponmu.

¹⁷Ai hadoboan binahenmu tu Libanon lingkup tu ho dohot hasisiap binahen ni binatang na nilelena, ala sapata ni mudar tu

jolma dohot hadoboon tu tano i dohot tu huta ro di pangisina i sudena.

¹⁸Tung aha ma guna ni ganaganaan na niuhir ni pandena? Ganaganaan na tinuang pe ro di guru pargapgap, umbahen tung marhaposan pande i tu jadijadianna sandiri, laho mambahen ganaganaan angka na mangungu.

¹⁹Marjea ma manang ise na mandok tu hau: Ngot ma ho! Hehe ma ho, ale batu na mangungu! Tung tarbahen ibana ma mangajari? Ida ma, na nilampis do ibana dohot sere dohot perak, apus pe hosa, so adong di bagasan ibana.

²⁰Alai di bagasan joro habadiaonna do anggo Jahowa: Ingkon hohom ma maradophon ibana sandok tano on.

3¹(I.) On ma tangiang ni panurirang Habakuk, marlogu andung.

²Ale Jahowa, nunga hubege baritam, gabe mabiar ahu. Ale Jahowa, sai ulahi ma pangolu ulaonmu di parsitongaan ni angka taon, di parsitongaan ni angka taon ma i tutu pabotohon! Sai marningot ma ho di asi ni roha, nang di bagasan rimas.

³Na ro sian Teman do Debata, jala na sun badia i sian dolok Elaparan Sela. Hamuliaonna mangkuphupi angka langit, jala gok pujipujianna do tano on.

⁴Ia sondangna songon tiur ni mata ni ari do, pansar sian tanganna do angka sondangna, parhitean ni hagogoonna.

⁵Di jolona mardalan begu siherut, jala mangihut tu ibana do begu na rahat.

⁶Jongjong do ibana manatap manonggor tu tano on gabe marserak angka bangso parbegu, gabe marigat angka dolok sian na robi, jala marongrong angka dolokdolok sian mulana sahali. Angka lapang sian na galia ibana nampunasa.

⁷Tinipa ni hinamago huida angka undungundung sian Kusan, angka hitir do hirehire ni undungundung ni luat Midian.

⁸Tung tarrimas mida angka batang aek ma tagamon Jahowa? Tung tu angka batang aek ma rimasmu, manang tung tu laut murukmu? Umbahen marsihundul ho di atas ni angka hodam, di atas ni angka hureta hamonanganmu?

⁹Tarsunggul ma Sior naung sinintakmi, linsinglinsing angka naung minangmangkon ni hata, Sela; angka batang aek mambola tano on dibahen ho.

¹⁰Diida angka dolok i ma ho, gabe raion mangalantap ma aek na sumar, dipangiar lung suaranya, dompak ginjang dipaherbang tanganna.

¹¹Mata ni ari dohot bulan togang di hajongjonganna dibahen sondang ni

sumbiam, angka na pasebut, dibahen parsiksak ni angka hujurmu.

¹²Dilangkai ho do tano i di bagasan rimasmu, di bagasan parpiar ni murukmu diluntak ho angka bangso parbegu.

¹³(II.) Nunga borhat ho mambahen hatuaon ni bangsom, mambahen hatuaon ni na miniahanmi. Dirosahi ho do ulu sian jabu ni parjahat, dipatedek ho do ojahan sahat ro di rungkung. Sela.

¹⁴Ditullang ho do marhitehite guringanna sandiri ulu ni partogina, angka na dorongdorong, songon habahaba, paserak ahu; angka na marolopolop, songon na laho manganhon halak na dangol disihabunian.

¹⁵Dibolus ho do laut i marhite sian angka hodam, ditondong ho do galumbang ni torop angka aek magodang na gunsang.

¹⁶Nunga hubege baritana, jadi dibaling do butuhangku, angka hitir bibirhu dibahen suara i; ro do tahe habusukon tu bagasan holiholingku, jala mardugu ulu ni tothu; asa hupahohom ahu di ari hagogotan, molo martahop dompak bangso i na mangarupa nasida.

¹⁷Ai ndang martumbur disi hau antajau, jala ndang marparbue angka hau anggur, lambang do bunga ni hau jetun, jala ndang dapot sipanganon sian angka hauma; rasip do angka birubiru sian balian, jala ndang adong be jonggi di bagasan bara.

¹⁸Alai anggo ahu, marolopolop ma ahu
di bagasan Jahowa, jala mariaia ahu mida
Debata ni hatuaonku.

¹⁹Jahowa, Tuhan i do hagogoonku, jala
dibahen ibana do pathu tudoshon ursa
tini, jala toguonna do ahu dumege angka
dolakdolokku. I ma di pande ende mardongan
parhinaloan.

Zefanya

1 ¹ On ma hata ni Jahowa, na ro tu si Sepania, anak ni si Kusi, i ma anak ni si Gedalia, i ma anak ni si Amaria, i ma anak ni si Hiskia; uju di angka ari ni si Josia, anak ni si Amon, raja sian Juda.

² (I.) Rasiphononku ma saluhut sian sisik ni tano on, ninna Jahowa.

³ Rasiphononku ma jolma dohot pinahan; rasiphononku ma pidong angka na martongatonga langit dohot dengke angka na di bagasan laut, angka jolma parjahat rap dohot sibahen gasip; ahu ma tongon maniaphon angka jolma i sian sisik ni tano on, ninna Jahowa.

⁴ Patoltolonku ma tanganku tu atas ni Juda dohot tu atas ni saluhut pangisi ni Jerusalem, jala siaphononku sian inganan on pasipasi ni Baal, goar ni angka pangarunding rap dohot angka malim.

⁵ Ro di halak angka na marsomba tu parangan di langit di atas ni angka tarup angka na marsinggang, huhut marmangmang tu Jahowa huhut marmangmang tu Malkom.

⁶ Dohot angka na marbalik sian Jahowa, angka na so mangalului Jahowa, jala ndang marpanungkunan tu ibana.

⁷ (II.) Hohom ma hamu maradophon Tuhan Jahowa! Ai jonok na ma ari ni Jahowa! Ai nunga dipadiri Jahowa sada pelean sipotongon, nunga diparbadiai halak na piniona i.

⁸ Jadi di ari pamelehon ni pelean sipotongon tiniti ni Jahowa, marlulu ma ahu dompak angka induk dohot dompak angka anak ni raja dohot dompak sude halak angka na marpangkean na pulik luat.

⁹ Marlulu ma ahu huhut di ari na sasada i dompak saluhut na manjingkal lobulobu, angka na manggohi bagas ni tuannasida marhite sian hadoboan dohot sipaotooto.

¹⁰ Di ari na sasada i, ninna Jahowa, masa ma suara angguhangguk sian bahal pardengkean, dohot andungandung sian parsitongaan ni huta i dohot hadodobur bolon sian angka buntulbuntul.

¹¹ Manganguhi ma hamu ale angka pangisi ni pandudaan! Ai nunga mago saluhut halak partigatiga; tung siap do sude halak na sorat mangusung perak.

¹² Di tingki uju i, ahu sandiri ma mandiori Jerusalem patioptiop sulu, jala marlulu ahu tu baoa, angka na nalom roha di tuaknasida, angka na mandok di bagasan rohanasida: Ndang adong na denggan, manang na jat bahenon ni Jahowa.

¹³ Dibahen i tabanon ni halak ma angka sinamotnasida, jala tarulang angka

bagasnasida, jala ndang inganannasida
 bagas angka na pinaulinasida i, jala ndang
 inumonnasida anggur sian porlak anggur,
 angka na pinungkanasidai.

¹⁴(III.) Jonok na ma ari ni Jahowa na
 bolon i; jonok na ma i, jala silu situtu do i
 ro. Tarbege do sidomdom ni ari ni Jahowa,
 mangangguk badar ma disi ulubalang.

¹⁵Ari pangarimasan ari na sasada i, ari
 hagogotan dohot pardangolan, ari partabanon
 dohot hamagoan, ari haholomon dohot
 hagolapon marimpotimpot, ari na marombun
 dohot na marhobot.

¹⁶Ari parsaruneon dohot suraksurak
 manahopi huta angka na gonting dohot
 tungkup angka na timbo.

¹⁷Hagogotan ma bahenonku jolma,
 dadapdadap nasida songon halak na
 mapitung, ala dompak Jahowa nasida
 mardosa, jadi durus ma mudarnasida songon
 orbuk, jala butuhanasida songon gambo.

¹⁸Ndang tarbahen perak nasida manang
 serenasida paluahon dirinasida di ari
 pangarimasan ni Jahowa, jala marhite sian
 api ni parpirionna i sudahononna sandok tano
 on, ai tung hasisiap, hamagoan na songgot
 bahenonna tu sude halak isi ni tano on.

2¹(I.) Tungki ma hamu jala
 mardangoldangol; ho ale bangso
 na so umboto na maila!

²Tagan so songgop dope uhumi, songon hurangkam do laho salpu ari, tagan so songgop dope tu hamu parpiar ni rimas ni Jahowa, tagan so songgop dope tu hamu ari pangarimasan ni Jahowa.

³Lulu i ma Jahowa, sude hamu, ale angka na unduk roha di tano on, hamu angka na mangaradoti uhumna; lulu i hamu ma hatigoran, lulu i haserepon, anggiat tung diondingi hamu di ari pangarimasan ni Jahowa.

⁴(II.) Ai ingkon tarulang do Gasa sogot, jala Askelon gabe halongonan; ingkon tarlele di hos ni ari ianggo Asdod, jala ingkon pabalihonna ia Ekron.

⁵Marjea ma hamu angka isi ni luat martopihon laut, bangso ni halak Heret i! Manginona ma hata ni Jahowa tu ho, ale Kanaan, tano ni halak Palistim, jala agoonku ma ho, asa unang be marpangisi nanggo sada.

⁶Jala gabe jampalan do luat martopihon laut, jala panjampalan ni angka birubiru.

⁷Jadi pasipasi ni bangso Juda nampuna luat i, nasida marmahan disi, di bagasan angka jabu sian Askelon nasida mangulon bodarina i; ai marpangulah i roha ni Jahowa, Debatanasida mida nasida, jala mulak boanonna sogot angka na tarbuang sian nasida.

⁸Nunga hubege panginsahion ni Moab dohot reherehe ni halak Amon, angka na mangarehei bangsongki, jala manenganenga nasida taringot tu parbalohannasida i.

⁹Dibahen i songon sintongna mangolu ahu, ninna Jahowa Zebaot, Debata ni Israel: Ingkon tudoshon Sodom do Moab sogot, jala tudoshon Gumora angka anak ni Amon, hatubuan ni latong, jala panombangan sira, jala halongonan ro di salelenglelengna. Ingkon pasipasi ni bangsongki martaban nasida sogot, jala ebaeba ni bangsongki tumean nasida.

¹⁰I ma songgop tu nasida, balos ni hajungkatonnasida, ala mangarehei nasida, jala manenganenga dampak bangso ni Jahowa Zebaot.

¹¹Songkal ma Jahowa idaon nasida, ai rasiponna ma nasa debata sileban di tano on, gabe marsomba tu ibana ganup sian ingananna, sude angka pulo ni bangso parbegu.

¹²(III.) Nang hamu ale halak Kus, ingkon bunuon ni podangku do hamu.

¹³Dipatoltol ibana huhut tanganna dampak utara, jala agoonna ma Assur, jala bahenonna Ninive gabe halongonan, hasang songon parhorsihan.

¹⁴Jadi mangulon ma di tongatongana, angka parduan, sude angka binatang harangan, nang sipauk, nang tanggiling marborngini

di angka galapangnasida. Tarbege do suara parendeon di bagasan pandiloan, pangulangan di lobulobu; ai nunga diloha ibana parhau ares.

¹⁵I ma huta na riburan, na nalom maringanan, na mandok di bagasan rohana: Ahu do bongkai dungkon ni ahu ndang adong! Songon dia do pangulangna disi, gabe pangulonan ni angka binatang panoro! Ganup na mamolus sian i bursikanna do, topaponna tanganna.

3¹(I.) Marjea ma huta na jungking dohot na ramun, dohot siulahon gogo!

²Nandang ditangihon be anggo suara sipaingot, ndang dijangkon pangajaran; ndang marhaposan tu Jahowa, jala ndang jumonok tu Debatana.

³Angka indukna di tongatongana hira babiat do angka na marauang; angka panguhum di nasida hira gompul do bodarina i, angka na so mangkirahon tu marsogot.

⁴Angka panurirangnasida do halak sijubajabi, angka baoa pangoseose; ia malimnasida mangaramuni inganan na badia i, guru roharohanasida do patik i dibahen.

⁵Alai na tigor do anggo Jahowa di tongatonganasida, ndang adong diulahon ibana hageduhon, ganup sogot dipapatar uhumna bahen hatiuron, ndang adong na hurang agia aha; alai anggo halak parjahat i, ndang diboto na maila.

⁶Nunga pola husiaphon angka bangso parbegu, tarulang hubahen hutanasida angka na gonting i, manalisik hubahen ia alamannasida, ndang adong be pamolus sian i nanggo sahalak; nunga tarrompak hutanasida, ndang adong be jolma pangisina.

⁷Ningku do; aut ni ahu dihabuari ho, sai jaloonu do pangajaran; jadi ndang tagamon siaphononhon inganannasida, manang sadia pe naung hulumbahon tu nasida. Hape lam dipasogot nasida do paroaroa nasa pambahenannasida.

⁸Dibahen i tagam hamu ma ahu, ninna Jahowa ro di ari haboborhathu laho martaban, ai nunga madabu uhumhu papunguhon angka bangso parbegu, paluhuthon angka harajaon mangusehon tu nasida rimashu, saluhut parpiar ni murukku; ai api ni parpirionki mansudahon sandok tano on sogot.

⁹(II.) Ai disi do patongononku tu angka bangso dila na pita, asa saluhut nasida manjou goar ni Jahowa, asa dioloi nasida ibana marroha sisangunjur.

¹⁰Sian bariba ni angka batang aek Kus, togihonon ni halak na marsomba ahu, huriangku angka na marserahi bahen pelean sipanganon tu ahu.

¹¹Di ari na sasada i ndang be tarurak ho ala ni sude pambahenanmu, angka na binahenmi mangalo ahu; ai unsatonku do disi sian tongatongami angka na teal mangasahon

haginjanonmu, gabe ndang be datdatanmu patimbotimbo dirim di dolok habadiaonku.

¹²Jala tebahononku do di tongatongami sada bangso na dangol jala na parir, angka na marhaposan tu goar ni Jahowa.

¹³Ia ebaeba ni Israel, ndang be ulahononna hageduhon, jala ndang be hatahononna gabus; jala ndang be jumpang di bagasan pamangannasida dila sipaotooto, ai torang do nasida marpamahan jala marpangulonon, jala ndang adong na manonggoti.

¹⁴Mariaia ma ho, ale boru Sion! Marolopolop ma ho ale Israel! Marlas ni roha ma ho jala marolopolop sian nasa roham, ale boru Jerusalem!

¹⁵Nunga diunsat Jahowa uhumna tu ho, nunga disiaphon musum: Ai Jahowa raja ni Israel do di tongatongami, ndang be idaonmu hinamago.

¹⁶Di ari na sasada i, dohonon ni halak ma tu Jerusalem: Unang ho mabiar, ale Sion! Unang palenduk tanganmu.

¹⁷Ai Jahowa Debatam do di tongatongami, ulubalang silehon tua do ibana. Marlas ni roha situtu ibana mida ho, hohom ibana di bagasan haholongon ni rohana; marolopolop ibana mardongan pujipujian mida ho.

¹⁸Halak na gondok roha, angka na holang sian luhutan i, papunguonku do; marharoroan sian ho do nasida, angka na nidondonan ni haurahon nasailaon.

¹⁹Ida ma marlulu ma ahu di tingki na sasada i, dompak sude angka na mangarupa ho; pamalumonku ma halak na mengkat, jala papunguonku halak na pinabali, jala bahenonku nasida gabe pujipujian, jala marbarita di saluhut tano haurahon nasida nasailaon.

²⁰Di tingki na sasada i togihononku ma hamu mulak tu tanomu laos papunguonku ma hamu disi. Ai bahenonku ma hamu marbarita jala gabe hamuliaon di tongatonga ni saluhut angka bangso ni tano on, ia dung hupaulak angka na tarbuang sian hamu tu jolo ni adopanmuna ninna Jahowa.

Hagai

1 ¹ (I.) Paduataonhon dung bangkit raja si Darius, di artia di bulan sipahaonom ro ma hata ni Jahowa marhite sian pamangan ni panurirang Haggai tu si Serubabel, anak ni si Sealtiel pangarajai di Juda, dohot tu sintua ni malim, Josua anak ni si Josadak, songon on:

² Boti do hata ni Jahowa Zebaot: Bangso on mandok: Ndang dope ro tingkina, asa paulion joro ni Jahowa.

³ Dung i ro ma hata ni Jahowa marhite sian pamangan ni panurirang Haggai songon on:

⁴ Alai nunga jumpang huroha anggo tingkimuna mangingani bagasmuna, angka na ginorga, hape anggo joro on tarulang do dipasombu hamu?

⁵ On pe songon on do hata ni Jahowa Zebaot: Parateatehon hamu ma dalanmuna nasailaon.

⁶ Godang do disabur hamu, alai otik do parbuena; mangan do nian hamu, alai ndang bosur; minum do nian hamu, alai ndang sombu uasmu, marulos do nian hamu, alai ndang las dagingmu; mangomo pe manang ise, mangomo tu puro na matombuk do.

⁷ Dibahen i songon on do hata ni Jahowa Zebaot: Parateatehon hamu ma dalanmuna nasailaon i.

⁸Nangkohi hamu ma dolok jala manaru hau ma hamu, jala pauli hamu joro i, asa marlomo ni roha ahu disi, jala marsangap ahu, ninna Jahowa.

⁹Godang do dirambang rohamuna, hape ida ma, gabe i do paotikkon, diboan hamu do i nian masuk tu jabu, hape hupurpurhon do i. Ala ni aha umbahen songon i ninna Jahowa Zebaot: Ala ni jorongku na tarulang do i, hape ganup hamu mansiluhon bagasna be.

¹⁰Ala ni umbahen ditiopi langit i nambur di atas hamu, jala tano i maniopi gogona.

¹¹Jadi nunga hudokkon logo ni ari sinanggarnanggar ro tu tano on dohot tu angka dolok dohot tu eme dohot tu tuak dohot tu miak dohot tu nasa na tinubuhon ni tano i, dohot tujolma dohot tu pinahan dohot tu nasa na niungkit ni tangan.

¹²(II.) Jadi ditangihon si Serubabel, anak ni si Sealtiel dohot sintua ni malim Josua, anak ni si Josadak dohot sandok pasipasi ni bangso i soara ni Jahowa Debatanasida i, ditangihon dohot hata ni panurirang Haggai, hombar tu parsuru ni Jahowa Debatanasida i di ibana, jadi mabiar ma bangso i maradophon Jahowa.

¹³Dung i didok si Haggai, suruan ni Jahowa patolhashon tona ni Jahowa tu bangso i, songon on: Ahu do donganmuna, ninna Jahowa.

¹⁴Jadi disunggul Jahowa ma tondi ni si Serubabel anak ni si Sealtiel, pangarajai

sian Juda dohot tondi ni sintua ni malim Josua, anak ni si Josadak, dohot tondi ni sandok pasipasi ni bangso i, gabe ro be nasida mangaradoti ulaon di bagas ni Jahowa Zebaot, Debatanasida i.

¹⁵Di anggara ni mate di bulan paionom, paduataonhon dung bangkit raja si Darius.

2¹(I.) Paduapulu sada arihon di bulan sipaha pitu, ro ma hata ni Jahowa marhite sian panurirang si Haggai, songon on:

²Ua dok ma tu si Serubabel, anak ni si Sealtiel, pangarajai sian Juda dohot tu sintua ni malim Josua, anak ni si Josadak, dohot tu pasipasi ni bangso i, songon on:

³Ise dope sian hamu na mangolu, angka na sanga marnida joro on di hamuliaonna parjolo i? Hape aha diida hamu disi anggo nuaeng? Nda hira na soada do dietong rohamuna martimbangkon parjolo i.

⁴On pe, ale Serubabel, pir ma tondim ninna Jahowa; pir ma dohot tondim ale sintua ni malim Josua, anak ni si Josadak; pir ma dohot tondim sandok bangso ni tano i, ninna Jahowa, jala datdati hamu mangula, ai ahu do donganmuna, ninna Jahowa Zebaot.

⁵I ma hata na hupadanhon i tu hamu di haruruarmuna sian Misir, nang: Tondingku marsihohot do jongjong di tongatongamuna; unang hamu mabiar!

⁶Ai songon on do hata ni Jahowa Zebaot: Saotiknari nama ulahanku ma mangkuturi langit dohot tano dohot laut ro di darat.

⁷Huturonku ma dohot saluhut angka bangso parbegu, jadi ro ma hasudungan ni roha ni saluhut angka bangso parbegu, jala gohanku ma joro on hamuliaon, ninna Jahowa Zebaot.

⁸Ahu do nampuna perak, jala ahu nampuna sere, ninna Jahowa Zebaot.

⁹Jadi gumodang ma hamuliaon ni joro parpudi on sian parjolo i, ninna Jahowa Zebaot, jala di hajongjongan on lehononku do hadameon, ninna Jahowa Zebaot.

¹⁰(II.) Paduapulu opat arihon, dibulan sipaha sia paduataonhon hinarajahon ni si Darius, ro ma hata ni Jahowa marhite sian panurirang Haggai, songon on:

¹¹Boti hata ni Jahowa Zebaot: Ua usoi ma angka malim taringot tu patik i, songon on:

¹²Ida ma, tung sura diboan manang ise juhut na badia di bagasan suhi ni ulosna, dung i dolos suhi ni ulosna tu sagusagu manang tu lompan, manang tu anggur, manang tu miak, manang tu sipanganon dia pe, tung badia ma i binahen ni? Jadi didok angka malim i ma mangalusi: Ndangana.

¹³Dung i ninna si Haggai ma: Tung sura dijama manang ise na ramun binahen ni bangke saluhutna ondeng, tung ramun ma angka i? Jadi didok angka malim i ma mangalusi: Ramun ma i tutu.

¹⁴Dung i ninna si Haggai ma mangalusi:
Laos songon i do bangso na sansundut on
maradophon ahu, ninna Jahowa, laos songon
i do saluhut jadijadian ni tangannasida ro di
na pinelehonnasida disi: Sai na ramun do i.

¹⁵On pe, ua parateatehon hamu ma i, olat
ni ari on tu ginjang, tagan so ditindihon dope
batu di joro ni Jahowa.

¹⁶Tagan so dibahen nasida songon i ro iba
tu bunbunan siduapulu tuhukan hian, hape
holan sampulu disi; ro iba tu pangilangan
anggur naeng manahui limapulu hudon nian
hape holan duapulu disi.

¹⁷Nunga hupasonggop tu hamu antingano
dohot sirara dohot ambolas, mangago
saluhut jadijadian ni tanganmuna, laos so
didompakkon hamu ahu, ninna Jahowa.

¹⁸Ua manimbang ma rohamuna, olat ni
ari on tu ginjang, olat ni ari duapulu opat,
dibulan sipaha sia, olat ni ari haoojak ni joro
ni Jahowa; sai parateatehon hamu ma i.

¹⁹Tung adong dope jumpang boni di bagasan
sopo? Hau anggur pe dohot antajau dohot
hau dalimo ro di hau jetun, ndang dope
marparbue sahat ro di nuaeng. Anggo olat ni
ari on mamasumasu ma ahu.

²⁰(III.) Dung i ro ma hata ni Jahowa
paduahalihon tu si Haggai di ari duapulu opat
laos di na sabulan i, songon on:

²¹ Dok ma tu si Serubabel, pangarajai sian Juda songon on: Ahu do mangkutur langit dohot tano on sogot.

²² Jala ahu mangonggalhon sogot habangsa ni angka harajaon, jala siaphononku hagogoan ni angka harajaon ni angka bangso parbegu, onggalhononku ma angka hureta ro di jolma ma mangkunduli gabe pesan angka hoda ro di jolma na mangkunduli, ganup binahen ni podang ni donganna.

²³ Di ari na sasada i ninna Jahowa Zebaot, buatonku ma ho, ale Serubabel, anak ni si Sealtiel, naposongki, ninna Jahowa, jala bahenonku ho gabe tintin rongkom. Ai nunga ahu mamillit, ninna Jahowa Zebaot.

Zakaria

1 ¹ (I.) Dibulan sipaha ualu, paduataonhon hinarajahon ni si Darius ro ma hata ni Jahowa tu panurirang Sakaria, anak ni si Berekia, tubu ni si Ido, songon on:

² Marronirimas situtu do Jahowa mida ompumuna.

³ Alai dok ma tu nasida: Songon on do hata ni Jahowa Zebaot sai mulak ma hamu tu ahu, ninna Jahowa Zebaot, asa mulak ahu tu hamu, ninna Jahowa Zebaot.

⁴ Unang hamu songon ompumuna angka naung jinou ni angka panurirang parjolo i, ninna do: Songon on do hata ni Jahowa Zebaot: Ua mulak ma hamu sian dalanmuna, angka na jahat dohot sian pambahenanmuna angka na roa i. Alai ndang ditangihon, jala ndang dipardulihon nasida ahu, ninna Jahowa.

⁵ Ia ompumuna, didia nasida nuaeng? Jala angka panurirang i, tung ro di salelenglelengna ma nasida mangolu?

⁶ Antong angka hatangki dohot patikki, angka na hutonahon tu na naposongku, angka panurirang i, nda nunga mangonai tu angka ompumuna? Gabe mulak nasida jala angka didok do: Songon na sinangkap ni Jahowa Zebaot naeng bahenonna tu hita, hombar tu

angka dalanta dohot pambahenanta songon i do tongon dibahen tu hita.

⁷(II.) Di ari duapulu opat di bulan Li, i ma bulan Sebat, paduataonhon hinarajahon ni si Darius, ro ma hata ni Jahowa tu panurirang Sakaria, anak ni si Berekia, tubu ni si Ido, songon on:

⁸Maralatan ahu bornginna i, gabe ida ma sada halak marsihundul di atas sada hoda na rara, jala sulon ibana di holangholang ni dulang, angka na di rura, jala di pudina hoda angka na rara, sihuning dohot siapaspili.

⁹Jadi ningku ma: Dia do lapatan ni angka on, ale tuanku? Jadi didok suruan donganku mangkatai ma tu ahu: Hupabotohon pe tu ho lapatan ni angka nasida i.

¹⁰Dung i ninna baoa na sulon di holangholang ni angka dulang i mangalusi: I ma angka na sinuru ni Jahowa laho mangaliati tano on.

¹¹Dung i didok angka nasida ma mangalusi suruan ni Jahowa na sulon di holangholang ni angka dulang i: Nunga huliati hami tano on, jadi ida ma, sandok tano on mardemak jala sonang.

¹²Jadi didok suruan ni Jahowa ma mangalusi: Ale Jahowa Zebaot, sadia leleng on so marpangulah i roham mida Jerusalem dohot mida angka huta ni Juda, angka na nirimasammu na pitupulu taon on.

¹³ Jadi dialusi Jahowa ma suruan, donganku mangkatai, angka hata na denggan dohot hata apulapul didok.

¹⁴ Dung i didok suruan donganku mangkatai ma tu ahu: Martingting ma ho songon on: Boti hata ni Jahowa Zebaot: Nunga marronirimas situtu ahu humongkop Jerusalem dohot Sion.

¹⁵ Alai tarrimas situtu ma ahu mida parbegu, angka na jungkat, ala tarrimas ahu otik, gabe manolongi tu hamagoan ianggo nasida.

¹⁶ Dibahen i songon on do hata ni Jahowa: Nunga marpangulahi rohangku tu Jerusalem; ingkon paulion muse bagashu di bagasan huta i ninna Jahowa Zebaot, jala sintahan ma hotang panuhati humaliang Jerusalem.

¹⁷ Ulahi muse martingting mandok: Songon on do hata ni Jahowa Zebaot: Marrarahan dope angka hutangku bahenonku jala lobian dipasupasu, jala ulahan ni Jahowa mangapuli Sion ulahanna huhut mamillit Jerusalem.

¹⁸ (2-1) (I.) Dung i manaili ma ahu dompak ginjang, gabe huida ma opat tanduk.

¹⁹ (2-2) Dung i ningku ma tu suruan angkuphu mangkatai: Dia do lapatan ni angka on? Jadi didok ma tu ahu: I ma tanduk, angka naung paserak Juda, Israel dohot Jerusalem.

²⁰ (2-3) Dung i dipaidahon Jahowa ma tu ahu opat halak panopa.

²¹ (2-4) Jadi ningku ma: Aha do huroha sibahenonnasida on umbahen na ro? Jadi didok ibana ma songon on: I ma tanduk,

angka naung paserak Juda, pola ndang tarbahren manang ise padirgak uluna. Alai ro soluk angka nasida on laho manonggoti nasida, laho mangupokkon angka tanduk ni angka bangso parbegu, angka na paginjang tandukna dompak tano Juda laho paserakkonsa.

2¹ (2-5) (II.) Dung i manaili ahu muse dompak ginjang, asa huida, jadi ida ma, sada halak na patioptiop sada hotang pamalok di bagasan tanganna.

² (2-6) Jadi ningku ma: Naeng tudia ho laho? Dung i ninna ibana ma tu ahu: Naeng manuhati Jerusalem, naeng marnida manang sadia bohangna, jala sadia unjurna.

³ (2-7) Jadi ida ma, ruar ma suruan, angkuphu mangkatai hian; ruar muse sada suruan na asing manjumpangkon ibana.

⁴ (2-8) Jala didok tu ibana: Marlojong ma ho dok ma tu dolidoli on songon on: Gabe adaran manardas ma Jerusalem dibahren hinadeak nijolma dohot pinahan di tongatongana.

⁵ (2-9) Ai ahu do, ninna Jahowa, gabe parik api humaliang huta i, jala ahu gabe hamuliaon di tongatongana.

⁶ (2-10) (III.) Beta hamu antong! Lintun ma hamu sian tano tungkan utara, ninna Jahowa, ai nunga hupaserak hamu tu desa na opat ni langit i, ninna Jahowa.

⁷ (2-11) Beta antong, ale Sion, palua dirim, ho ale na maisolat di tano Babel.

⁸(2-12) Ai songon on do hata ni Jahowa Zebaot: Naeng marmulia ibana umbahen disuru ahu tumopot bangso parbegu, angka na martaban hamu na jolo. Ai manang ise na manjama hamu, anak ni matana jinamana disi.

⁹(2-13) Ai ida ma, laluhononku ma tanganku tu nasida, asa gabe tabantaban nasida di halak na pinarhatobannasida nasailaon, asa tung ditanda hamu Jahowa Zebaot naung marsuru ahu.

¹⁰(2-14) Marolopolop ma ho, jala marlas ni roha, ale boru Sion, ai ida ma, na ro ma ahu maringan di tongatongami, ninna Jahowa.

¹¹(2-15) Jadi torop angka bangso parbegu marsilohot tu Jahowa di ari na sasada i, gabe bangsongku nasida, alai maringan do ahu anggo di tongatongami, asa tung diboto ho Jahowa Zebaot naung marsuru ahu manopot ho.

¹²(2-16) Jadi ainon ni Jahowa muse Juda bahen partalianna di tano na badia i, jala ulahanna mamillit Jerusalem.

¹³(2-17) Hohom ma nasa sibuk maradophon Jahowa, ai nunga tarsungul ibana sian inganan ni habadiaonna.

3¹(I.) Dung i dipataridahon ma tu ahu si Josua, sintua ni malim i, tindang di jolo ni suruan ni Jahowa, jala pangasung i tindang di lambung ni siamunna, mangasungi ibana.

²Jadi ninna Jahowa ma tu pangasung i:
Toruan ni Jahowa ma ho, ale pangasung!
Hona hata ma ho tutu bahenon ni Jahowa,
na mamillit Jerusalem! Nda sipusipu do ibana
on, na tinait sian api?

³Alai marulos angka na ramun do ianggo
si Josua, songon i ibana tindang di jolo ni
suruani.

⁴Jadi didok ibana ma manonai angka na
jongjong di jolona songon on: Tanggali
hamu ma ulos angka na ramuni sian ibana!
Alai anggo tu ibana didok do: Ida ma
nunga hubuat sian ho hageduhonmu, jala
solukknonku ma tu ho, angka ulos na
marhadohoan.

⁵Jadi ningku ma: Sapala dibahen nasida
ma dohot talitali na ias tu atas uluna. Jadi
dibahen nasida ma talitali na ias tu atas
uluna, jala disolukkon angka ulosi tu ibana,
laos tindang anggo suruan ni Jahowa.

⁶Dung i dihatindangkon suruan ni Jahowa
ma tu si Josua songon on:

⁷Boti hata ni Jahowa Zebaot: Molo mardalan
ho di angka dalanku, jala diradoti ho
na hupasahat i tu ho, ingkon dohot ho
manguhum jorongki ramotanmu dohot angka
alamanku, lehononku ma tu ho angka partogi
sian nasida, angka na tindang dison.

⁸(II.) Ua tangihon ma, ale Josua, sintua ni
malim, ho dohot alealem angka na hundul di

jolomi, ai angka baoa tudosan do nasida, ai ida ma, paroonku ma naposongku si Tumbur.

⁹Ai ida ma, batu naung hupeakhon i di jolo ni si Josua, pitu mata di atas ni batu na sasada i; ida ma, laos ahu sandiri mangungkap ruangna, ninna Jahowa Zebaot, jala ahu mangunsat hajahaton ni tano on di ari na sasada i.

¹⁰Laos di na sadari i, ninna Jahowa Zebaot, pionmuna, ma ganup alealemuna be marlinggom tu toru ni hau anggurna dohot tu toru ni hau antajauna.

4¹ (I.) Dung i mulak ma suruan, angkuphu mangkatai, jala disunggul ahu, songon baoa na sinunggul sian na modom.

²Dung i didok ma tu ahu: Aha do na niidam? Jadi ningku ma: Nunga maralatan ahu, jadi huida ma sada parpalitoan sere mamolin, jala parmiahan na di atas uluna jala pitu palitona di atasna, pitu be dangka pangindingan tu palito, angka na di atas uluna.

³Jala dua hau jetun di ginjangna, sada tungkan siamun ni parmiahan, jala sada tungkan hambirangna.

⁴Dung i ningku ma usousu tu suruan, angkuphu mangkatai: Aha do lapatan ni angka on, ale tuangku?

⁵Dung i ninna suruan, angkuphu mangkatai, mangalusi ahu: Ndang diboto ho lapatan ni angka on? Alai ningku ma: Ndang, ale tuangku.

⁶Dung i ninna ibana ma mangalusi ahu; on ma hata ni Jahowa tu si Serubabel, ndada marhitehite parangan jala ndada marhitehite gogo sian diri, ingkon marhite sian Tondingku do saut ninna Jahowa Zebaot.

⁷Tung ise do ho, ale dolok na bolon? Ingkon gabe adaran ho, ianggo maradophon si Serubabel. Paruaronna ma batu parsuhi mardongan suraksurak: Hinaulina i, hinaulina i!

⁸(II.) Dung i ro muse ma hata ni Jahowa tu ahu songon on:

⁹Tangan ni si Serubabel mambahen ojahan ni joro on, ingkon laos tanganna pasunhon muse; asa tung tandaonmu Jahowa Zebaot do marsuru ahu tu hamu.

¹⁰Ai tung ise ma na lea roha di angka ari hametmeton on? Hape naung marlas ni roha marnida batu dodododo di bagasan tangan ni si Serubabel sipitupitui, i ma angka mata ni Jahowa, angka na mangaliati sandok tano on.

¹¹Dung i ningku ma mangalusi ibana: Dia do lapatan ni na dua hau jetun on tungkan siamun ni parpalitoan dohot tungkan sihambirangna.

¹²Dung i ningku ma mangalusi ibana paduahalihan: Dia do lapatan ni na dua ranting ni hau jetun i, angka na masijaloan dohot na dua dangka sere, angka na mangusehon sian nasida miak sere i?

¹³Dung i ninna ma mandok ahu: Tung na so diboto ho do lapatan ni angka on? Jadi ningku ma: Ndang ale tuanku!

¹⁴Dung i ninna ibana ma: I ma na dua anak ni miak angka na tindang di adopan ni Tuhan sigomgom sandok tano on.

5¹(I.) Dung i humusor ma ahu jala manaili dompak ginjang, asa maralatan, jadi huida ma habang pustaha sada na binalun.

²Dung i ninna ibana ma tu ahu: Aha do na niidam? Jadi ningku ma: Huida habang sada pustaha na binalun, unjurna duapulu elak, jala bohangna sampulu elak.

³Dung i ninna ibana ma tu ahu: I ma torutoru na ruar tumopot sandok atas ni tano on. Ai nasa panangko, hombar tusi siaphononhon ibana sian on; jala nasa sitolon na tutu, hombar tusi siaphononhon ibana sian on.

⁴Nunga sapala huparuar torutoru i, ninna Jahowa Zebaot, ingkon bongotanna do bagas ni halak panangko dohot bagas ni halak na manolon na tutu tu goarhu, laos marborngin do di tongatonga ni jabuna, jala siaphononna parhauna ro di batuna.

⁵(II.) Dung i ruar ma suruan, angkuphu mangkatai, jala didok mandok ahu: Ua manaili ma ho dompak ginjang, jala ida manang aha do i na ruar i nuaeng.

⁶Jadi ningku ma: Aha do i antong? Dung i ninna ibana ma: Ampang do i, na ruar i.

Dung i ninna ibana muse: I do tudosan ni hajahatonnasida di tano on.

⁷Dung i ida ma, hinsat do sada pingkul simbora, huhut adong disi sada parompuan, hundul di parsitongaan ni ampangi.

⁸Dung i ninna ibana ma: I ma hajahaton i. Jadi direongkon ibana ma nasida tu tongatonga ni ampangi, jala ditipahon simbora na sangkimpal i tu babana.

⁹Dung i manaili ma ahu dompak ginjang, asa maralatan, jadi huida ma ruar dua parompuan jala alogo di bagasan habongnasida, jala habongnasida, songon angka habong ni siboru tasik, jala diluahon ampangi tu holangkolang ni tano on dohot langit.

¹⁰Dung i ningku ma tu suruan angkuphu mangkatai: Tudia boanonnasida ampangi.

¹¹Dung i ninna ibana ma tu ahu: Laho paulihon di ibana sada jabu di tano Sinear: Jala ia dung dipadiri, patindangonna ma disi di atas hajongjonganna.

6¹(I.) Dung i humusor muse ahu manaili dompak ginjang, asa maralatan, jadi huida ma opat hureta, angka na ruar sian holangkolang ni na dua dolok i, jala sian tombaga do dolok i.

²Di hureta parjolo hoda angka na rara, jala di hureta paduahon, hoda angka na birong.

³Jala di hureta patoluhon, hoda angka na bontar, jala di hureta paopathon, hoda angka siganding.

⁴Dung i ningku ma mandok suruan, angkuphu mangkatai: Dia do lapatan ni angka i, ale tuanku?

⁵Jadi ninna suruani ma mangalusi ahu; i ma na opat tondi sian langit, angka na ruar olat ni dung tindang nasida di lambung ni Tuhan sigomgom liat portibi on.

⁶Hureta na tinait ni hoda, angka na birong; i ma na borhat dompak tano tungkan utara; jala hoda angka na bontar borhat do ihut tu nasida; angka siganding pe borhat do tu tano tungkan dangsina.

⁷Borhat muse dohot angka na rara i, jala dilului rohanasida do mangaliati tano on. Dung i ninna ibana ma: Laho ma hamu mangaliati tano on. Jadi diliati nasida ma tano on.

⁸Dung i joujou ma ibana tu ahu, jala didok ma tu ahu, songon on: Ida ma angka naung borhat tu tano na tungkan utara, i ma na paulon tondingku di tano tungkan utara.

⁹(II.) Dung i ro ma hata ni Jahowa tu ahu, songon on:

¹⁰Buat deba halak sian angka naung mulak sian habuangan, sian si Helda i, sian si Tobia dohot sian si Jedaia; laos di ari na sasada i ma ho ro tumopot bagas ni si Josia, anak ni si Sepania, tusi ro nasida sian Babel.

¹¹Buatonmu ma huhut perak dohot sere, jala bahenonmu sada tumpal, sibahenonmu

tu ulu ni sintua ni malim Josua, anak ni si Josadak.

¹²Jala dohononmu tu ibana: Songon on do: Hata ni Jahowa Zebaot: Ida ma, baoa sada, si Tumbur goarna, jala sian hametmetonna ibana martumbur, jala paulionna sogot joro ni Jahowa.

¹³Paulionna ma tongon joro ni Jahowa, laos ibana jumujung hamuliaon, jala hundul, jala mangarajai ibana di atas ni habangsana, gabe malim ibana di atas habangsana, jala sangkap hadameon di holangkolang ni na dua i sogot.

¹⁴Ia tumpal i baen parningotan di si Helda i, di si Tobia dohot di si Jedaia ro di hasortaon ni anak ni si Sepania di joro ni Jahowa.

¹⁵Ro do huhut halak sian tano na dao naeng parsidohot pauli bagas joro ni Jahowa sogot, asa tung diboto hamu Jahowa Zebaot marsuru ahu tu hamu. I ma na masa sogot, molo tung tangkas ditangihon hamu suara ni Jahowa, Debatamuna i.

7¹(I.) Dung i paopattaonhon hinarajahon ni raja Darius, ro ma hata ni Jahowa tu si Sakaria, di ari opat bulan sipahasia, i ma bulan Kislew.

²Uju disuru isi ni huta Betel si Sareser dohot si Regem Melek, rap dohot angka donganna marsomba tu adopan ni Jahowa.

³Huhut usousu tu malim, angka na di joro ni Jahowa Zebaot dohot tu angka panurirang

songon on: Atehe ingkon sai datdatanku
dope tumatangis di bulan sipahalima, jala
marpuasa songon na hubahen nasailaon
nunga pola martaontaon?

⁴(II.) Jadi ro ma hata ni Jahowa Zebaot tu
ahu songon on:

⁵Dok ma tu sandok bangso ni tano on dohot
tu angka malim: Marpuasa pe hamu, jala
mangandungi di bulan sipaha lima dohot di
bulan sipahapitu nunga pola pitupulu taon
lelengna, tung pasangap ahu ma hamu
marhite sian parpuasaonmuna i?

⁶Alai molo mangan jala minum hamu, nda
di hamu sandiri do hamu na mangan dohot
na minumi?

⁷Nda i hian do hata, angka na tiningtingkon
ni Jahowa marhite sian pamangan ni angka
panurirang na jolo, uju na niingan dope
Jerusalem jala sonang ro di angka hutana
humaliang, jala marpangisi dope tano
dangsina dohot tano pea?

⁸Dung i ro ma hata ni Jahowa tu si Sakaria
songon on:

⁹Boti hata ni Jahowa Zebaot: Uhum
hasintongan ma paruhumhon hamu, jala
denggan basa dohot asi ni roha ulahon hamu
ganup tu donganna.

¹⁰Jala unang rupa hamu halak na mabalu
dohot na sopot so marama so marina, nang
halak na buro dohot na parir! Jala unang

manang ise mamingkiri na roa dompak donganna di bagasan rohana.

¹¹ Alai manjua do anggo nasida manangihon, jala dipabiding dagingna patangkang rohana, jala dipahapal pinggolna unang marbinege.

¹² Jala dipapir rohana, songon batu intan, asa unang dibege patik i dohot hata angka na tinongos ni Jahowa Zebaot marhite sian tondina, dohot marhite sian panurirang angka na jolo i. Dibahen i marpiarpiar ma rimas ni Jahowa Zebaot.

¹³ Jadi hira marsisolisoli: Ibana manjou nasida nasailaon, hape ndang ditangihon nasida, suang songon i nasida joujou, ahu pe ndang tangihononku, ninna Jahowa Zebaot.

¹⁴ Dibahen i nunga hupurpurhon nasida tu saluhut bangso ni parbegu, angka na so tinandanasida hian, jala tano tinadingkonna i gabe halongonan di pudinasida, ndang tarbahen manang ise marmeang muli, jala tano hasoloani gabe halongonan dibahen nasida.

8¹ (I.) Dung i ro ma hata ni Jahowa Zebaot, ninna ma:

² Songon on do hata ni Jahowa Zebaot: Mangiburu situtu do ahu humongkop Sion jala marpiarpiar situtu rimashu humongkop nasida.

³ Songon on do hata ni Jahowa: Marpangulah ma rohangku mida Sion, jala maringan ahu di parsitongaian ni Jerusalem, jadi targoar ma

Jerusalem huta hasintongan, jala dolok ni Jahowa Zebaot, dolok habadiaon.

⁴Songon on do hata ni Jahowa Zebaot: Ingkon hundul dope sogot baoa angka na ubanon dohot boruboru di angka alaman ni Jerusalem, angka na patioptiop tungkotna be di bagasan tanganna dibahen tuana.

⁵Jala angka alaman ni huta i gok dolidoli dohot na marbaju, angka na marmeammeam di angka alamanna.

⁶Songon on do hata ni Jahowa Zebaot: Ala longang roha ni pasipasi ni bangso on disi di angka ari nasida, tung dohot ma ahu huroha longang disi, ninna Jahowa Zebaot.

⁷Songon on do hata ni Jahowa Zebaot: Ida ma, ahu ma paluahon bangsongku sian tano tungkan habinsaran dohot sian tano tungkan hasundutan ni mata ni ari.

⁸Jala ahu mamboan nasida mulak, asa maringanan nasida di parsitongaan ni Jerusalem, jadi bangsongku ma nasida, jala ahu Debatanasida di bagasan hasintongan dohot hatigoran.

⁹(II.) Songon on do hata ni Jahowa Zebaot: Pagomos hamu ma tanganmuna, hamu angka na umbege hata on na sian pamangan ni panurirang, angka na nidokna di ari haoojak ni bagas ni Jahowa Zebaot laho paulihon joro i.

¹⁰Ai di jolo ni angka ari on, ndang taruli halak di gogona, hangoluan di pinahan pe soada,

ndang marhasonangan sian na manosak na marmeang muli, jadi masisosahan nasida sama nasida hubahen.

¹¹Alai anggo nuaeng ndang be ahu songon di angka ari na jolo tu pasipasi ni bangso on, ninna Jahowa Zebaot.

¹²Ingkon adong do boni hadameon. Lehonon ni hau anggur do parbuena jala tano on mangalehon gogona, jala langit i mangalehon namburna, asa ditean pasipasi ni bangso on saluhutna i hubahen.

¹³Jadi masa ma sogot songon i hamu pinompar ni Juda dohot Israel gabe sipaburaburaan di tongatonga ni angka parbegu nasailaon, suang songon i ma ahu manumpak di hamu, asa manjadi pasupasu hamu sogot; unang hamu mabiar, pagomos hamu ma tanganmuna.

¹⁴Ai songon on do hata ni Jahowa Zebaot, songon sangkap ni rohangku na jolo naeng manorui hamu, uju marronirimas ahu mida ompumuna ninna Jahowa Zebaot, jala ndang marpangulah i rohangku.

¹⁵Suang songon i sangkaphu di angka ari on naeng marpangulah i rohangku mambahen na denggan tu Jerusalem dohot tu pinompar ni Juda. Dibahen i unang hamu mabiar.

¹⁶Alai on ma hata angka sibahenonmuna. Ganup ma mandok hata hasintongan tu donganna, hasintongan dohot uhum!

Hadameon ma panguhumonmuna di partungkoanmuna.

¹⁷Jala unang dipingkiri roha ni manang ise bahen hamagoan ni donganna, jala unang mangapian hamu di tolontolon sipaotooto, ai luhut angka sisongon i huhagigihon do, ninna Jahowa.

¹⁸(III.) Dung i ro ma muse hata ni Jahowa Zebaot tu ahu:

¹⁹Songon on do hata ni Jahowa Zebaot: Parpuasaon di bulan sipaha opat dohot parpuasaon di bulan sipahalima dohot parpuasaon di bulan sipaha pitu dohot parpuasaon di bulan sipaha sampulu ingkon manjadi las ni roha do i dohot hasonangan tu pinompar ni si Juda, dohot manjadi angka pararirayaon bolon; asal dihaolongi hamu hasintongan dohot hadameon.

²⁰Songon on do hata ni Jahowa Zebaot: Ro dope anggo sogot angka bangso dohot pangisi ni angka huta bolon.

²¹Jala laho do sogot angka pangisi ni huta na sada tu na sada nari mandok: Beta hita rap marsomba tu bohi ni Jahowa, jala mangalului Jahowa Zebaot! Ahu pe naeng dohot do laho tusi!

²²Tongon tahe ro do sogot angka bangso bolon dohot parbegu angka na marhuaso mangalului Jahowa Zebaot di Jerusalem jala marsomba tu bohi ni Jahowa.

²³ Songon on do hata ni Jahowa Zebaot:

I ma angka ari parsigaungan ni sampulu halak sian saluhut dila ni bangso parbegu, asa marsigantung nasida tu suhisuhi ni ulos ni sada halak Jahudi mandok: Rap hita sauduran, ai nunga hubege hami: Debata do donganmuna.

9¹ (I.) On ma hata uhum ni Jahowa dompak tano Hadrak, jala Damaskus do pansohotanna. Ai manatap do mata ni Jahowa tu sudejolma, alai gumodang tu sandok angka marga ni Israel.

² Tole muse tu Hamat balokna i, Tirus dohot Sidon, ala sigodang habisuhon di rohana.

³ Jala dipauli Tirus do sada partanobatoanna, jala dipagukguk perak sobokkon orbuk, jala sere sobokkon gambo di alaman.

⁴ Ida ma, soluhon ni Tuhan i ma huta i, jala haromhononna ugasanna tu bagasan laut, ianggo huta i suda do panganon ni api.

⁵ Idaon ni Askelon ma i, gabe manonditnondit, jala Gasa gabe raion situtu, nang Ekron ala naung murak hinaposanna i nasailaon, jala nunga mago raja sian Gasa, jala ndang be marpangisi ia Askelon.

⁶ Jadi anak gampangna ma maringan di Asdod jala siaphononku ma hajungkaton ni halak Palistim.

⁷ Jala paholonganonku ma mudarna sian pamanganna, jala biasbias na niulana sian

holangkolang ni iponna. Jadi marpasipasi dohot nasida di Debatanta i, jala sobokkon induk nasida sogot di Juda, jala halak Ekron sobokkon halak Jebusi.

⁸Laos ahu sandiri marsaro humongkop jorongku maralohon parangan angka na marmeang muli, jala ndang be boluson ni halak pangarupa nasida, ai nunga marpangulah rohangu mida hamu anggo nuaeng.

⁹(II.) Mariaia situtu ma ho, ale boru Sion, marolopolop ma ho ale boru Jerusalem! Ida ma, na ro ma rajam tumopot ho, partigor ibana jala siparmonang; na serep do rohana jala marsihundul di halode dohot di anak ni halode inaina.

¹⁰Jala ahu maniaphon angka hureta sian Epraim dohot angka hoda sian Jerusalem, siap dohot sior tu hamusuon. Dung i baritahononna ma hadameon tu angka bangso parbegu, jala masuk tu gomgomanna sian laut tu laut, jala sian batang aek Euprat sahat ro di angka ujung ni tano on.

¹¹Ho pe marhitehite mudar ni parpadanonmu paluaonku angka na tarbuang sian ho, sian godung na so marisi aek.

¹²Mulak ma hamu tu huta na gonting, hamu ale angka na tarrante na marpangkirimon dope! Gari sadarion ahu mamaritahon hian: Silompit dua do pasuamongku tu ho.

¹³Ai hira sior husintak Juda di ahu,
 jala huparade ia Epraim tu parporangan,
 jala husunggul angka anakmi, ale Sion,
 dompak angka anakmu, ale tano Junani jala
 bahenonku ma ho hira podang ni ulubalang.

¹⁴Jadi tarida ma Jahowa di atas nasida,
 jala ruar sumbiana, songon hilap, jala
 paluon ni Tuhan Jahowa ma sarune, jala
 marhitehon angka habahaba sian dangsina
 ibana mardalan.

¹⁵Jahowa Zebaot mangondingi nasida, gabe
 suda panganonnasida jala luntakhononku
 angka batu ni ambalang; jala minum nasida
 jala marhariburon hira sian anggur, gabe gok
 nasida songon saoran pangurasan, songon
 angka suhi ni langgatan.

¹⁶Jadi di ari na sasada i lehonon ni Jahowa,
 Debatanasida ma tua tu nasida, songon
 tu parduan birubiru ni bangsona, ai angka
 batu ni tumpal do nasida, angka na gabe
 partonggol di atas ni tanona.

¹⁷Ai aha hinadengganna, jala aha hinaulina?
 Dahanon pasimbur magodang angka dolidoli,
 jala anggur angka na marbaju.

10¹(I.) Pangido hamu ma tu Jahowa
 udan di tingki ni ombahon! Jahowa do
 na mambahen porhas manoro, lehononna tu
 nasida dohot udan tu nasa suansuanan di
 ladang.

²Ai angka ganaganaan mangkatahon
 gapgap, jala angka pangarunding

manondungi sipaotooto, jala nipi angka na so gabeak, dihatahon nasida, alogo sambing do apulapul sian nasida. Dibahen i lilu do nasida, songon parduan birubiru, tarjepol nasida, ala so adong siparmahan.

³Marsigorgor do rimashu dompak angka parmahan, jala dompak angka hambing tunggal ahu marlulu; ai tingkiron ni Jahowa Zebaot ma pinguanna, i ma pinompar ni Juda, jala bahenonna nasida songon hoda na pinajagarna tu tongtangan.

⁴Sian ibana do batu parsuhi, sian ibana huhut pasi, sian ibana do sior tu hamusuon; sian ibana ruar nasajolma ihutan.

⁵Jadi doshon ulubalang nasida, angka na mangaluntak musuna di alaman uju di hamusuon; laos marporang nasida, ai Jahowa do dongannasida, gabe tarurak angkajolma parsihundul di hoda.

⁶Jala margogo bahenonku pinompar ni Juda, jala pamonangonku ia pinompar ni si Josep, jala pasuangonku nasida tu ingananna hian, ai marpangulahi do rohangku tu nasida, jala songon na so dung nasida hubolongkon pangalahonasida sogot. Ai ahu Jahowa Debatanasida, jala alusanku do tangiangnasida.

⁷Jadi doshon ulubalang Epraim, jala las rohanasida songon binahen ni anggur; idaon ni anaknasida ma i, gabe marlas ni roha. Marolopolop ma rohanasida mida Jahowa.

⁸(II.) Elaongku ma nasida jala papunguonku nasida, ai nunga hutobus nasida, jala patoroponku nasida, songon toropnasida na jolo.

⁹Jala saburhononku nasida tu tongatonga ni angka bangso, ingotonna nasida ma ahu dohot di tano na holang, jadi mangolu nasida rap dohot anaknasida, jala mulak sogot.

¹⁰Jala mulak nasida boanonku sian tano Misir, jala papunguonku nasida sian Assur, jala tu tano Gilead dohot tu Libanon togihononku nasida, gabe ndang hasiatan nasida disi.

¹¹Jala tariparanna do laut hagogotan, jala lipatanna angka galumbang ni laut i jadi marsik ma nasa lung ni Nil, jala direongkon ma haginjangon ni Assur tu toru, jala munsat tungkot harajaon ni Misir.

¹²Jadi ahu mangalehon gogo tu nasida marhite sian Jahowa, gabe marparange nasida di bagasan goarna, ninna Jahowa.

11 ¹(I.) Ungkap ma bahalmu ale Libanon, asa suda dipangan api angka hau ares na di atasmu.

²Manganguhi ma ho ale hariara, ai nunga marobo hau ares, nunga tartaba nasida angka na tongam. Manganguhi ma hamu angka hariara di Basan, ai nunga marobo tombak longolongo.

³Tarbege do suara angguhangguk ni angka parmahan, ai nunga marobo hamuliaonna nasida; tarbege do suara na

marauang ni angka babiat na bajar, ai nunga mago hajagaron ni Jordan.

⁴ Songon on do hata ni Jahowa Debatangku: Parmahan i ma birubiru sipotongon hian!

⁵ Ai angka na manuhor nasida mamotongi nasida jala ndang pola sala di rohanasida jala angka na manggadis nasida muse mandok: Pinuji ma Jahowa, ai nunga mamora ahu. Sipormahan nasida pe ndang mangolani tu nasida.

⁶ Dibahen i ahu pe ndang be olanangku angka isi ni tano on, ninna Jahowa! Ida ma, ahu sandiri pasahathonjolma i sadasada tu bagasan tangan ni donganna dohot tu tangan ni rajana, asa dipansingkon nasida tano on, jala ndang ahu paluahon sian tangannasida.

⁷ (II.) Jadi ahu ma marmahan birubiru sipotongon hian, ala ni birubiru angka na dangol i. Dung i hubuat ma di ahu dua batahi; na sada hugoar haholongan, na sada nari hugoar harosuon. Jadi laos ahu ma marmahan angka birubiru i.

⁸ Jadi husiaphon ma parmahan sitolutolu i di bagasan sabulan, ai biasan rohangku mida nasida, rohanasida pe antong biasan do mida ahu.

⁹ Jadi ningku ma: Nandang olo be ahu marmahan hamu: Mate tusi na mate! Siap tusi na siap i! Jala na teba i dipangan be tusi sibuk ni donganna.

¹⁰(III.) Dung i hubuat ma batahingku haholongan, jala huponggolhon laho manait padanhu, na hubahen i tu saluhut angka bangso.

¹¹Jadi mose ma padani di na sadari i. Dung i mamoto ma birubiru angka na dangol i, angka na mangaranap tu ahu, hata ni Jahowa do i hape.

¹²Jadi ningku ma tu nasida: Molo denggan di rohamuna, lehon tu ahu upangku, alai molo ndang, ba jua hamu tusi. Jadi didasing nasida ma upangki tolupulu rupia.

¹³Dung i didok Jahowa ma tu ahu: Reongkon ma i tu sitopa hudon, jagar ma asami, na niasamnasida ahu. Jadi hubuat ma na tolupulu rupia i, jala hutimpalhon ma i tu bagasan joro ni Jahowa lehonon tu sitopa hudon i.

¹⁴Dung i huponggolhon ma batahingku na paduahon i ma harosuan i, laho manirang pardongan saripeon sabutuhaon ni Juda tu Israel.

¹⁵Dung i ninna Jahowa ma tu ahu: Buat sahalinari di ho ulaula ni sada parmahan na oto.

¹⁶Ai ida ma, ahu ma patindang sogot sada parmahan di tano on, ndang tingkironna angka na mago, jala ndang luluanna na lilu, jala ndang daonanna na ginosagosa, jala ndang parmuduonna na hot jongjong; alai

anggo sibuk ni na mokmok suda panganonna,
jala hiskisonna ia sisilonnasida.

¹⁷Marjea ma parmahan na so marguna,
na olo manadingkon birubiru i! Manginona
ma podang tu botohonna dohot tu matana
siamun i! Malos situtu ma botohonna, jala
lotop matana siamun i.

12¹(I.) Songon on ma hata ni Jahowa,
na paherbang langit jala na paojak
tano on, jala na jumadihon tondi nijolma di
bagasan dirina.

²Ida ma ahu sandiri mambahen Jerusalem
gabe panginuman hamabuhon di saluhut
angka bangso humaliang, sahat ibana huhut
tu Juda di hatutungkum ni Jerusalem.

³Dung i masa ma di ari na sasada i, ahu
sandiri mambahen Jerusalem gabe batu
pangujian gogo di saluhut angka bangso;
nasa na naeng mangkindat maraprap
bahenonna, jala marpungupungu naeng
mangalo huta i nasa bangso parbegu di tano
on.

⁴Di ari na sasada i, ninna Jahowa:
Jimbolangon ma bahenonku nasa hoda,
jala jolma na mangkunduli lalaen ma. Alai
anggo mida pinompar ni Juda mangaranap
ma matanku; ianggo hoda ni angka bangso
papitungonku ma sudena.

⁵Dung i dohonon ni angka induk ni Juda ma
di bagasan rohanasida: Bahen hagagoon di

ahu do angka isi ni Jerusalem marhitehite Jahowa Zebaot Debatanasida i.

⁶Di ari na sasada i ahu sandiri mambahen angka induk ni Juda, songon hudon parapiapian di holangkolang ni soban, jala songon tulbu di holangkolang ni tibalan, asa suda dipangan nasida saluhut angka bangso humaliang tungkan siamun dohot tungkan hambirang. Alai anggo Jerusalem hot do tongtong di ojahanna hian di Jerusalem.

⁷Jadi jumolo lehonon ni Jahowa tua tu angka undungundung ni Juda, asa unang manenganenga hamuliaon ni bagas ni si Daud dohot hamuliaon ni isi ni Jerusalem mangasta Juda.

⁸Di ari na sasada i Jahowa ma gabe partanobatoan humaliang isi ni Jerusalem, asa manang ise sian nasida na tarsulandit di ari na sasada i, sobokkon si Daud jala pinompar ni si Daud tudoshon Debata, songon suruan ni Jahowa di adopannasida.

⁹Marlulu ma ahu di ari na sasada i mamansingkon saluhut bangso parbegu, angka na ro mamorang Jerusalem.

¹⁰(II.) Jadi usehononku ma tu pinompar ni si Daud dohot tu isi ni Jerusalem tondi parasian dohot partangiangon, gabe paberengberengon nasida ma ahu, naung tinullang nasida; jala andungannasida ibana, songon pangandungion di anak sasada, jala

habot situtu rohanasida taringot tu ibana songon habot ni roha mida anak buhabaju.

¹¹ Di ari na sasada i masa ma pangandungion bolon di Jerusalem, songon pangandungion uju di Hadadrimmon di rura Megiddo.

¹² Mangandungi ma isi ni tano on:

Marompuompu pulik be pinompar ni ompu ni si Daud pulik, jolma nasida pe pulik; pinompar ni ompu ni si Natan pulik, jolmanasida pe pulik.

¹³ Pinompar ni ompu ni si Lepi pulik, jolmanasida pe pulik; pinompar ni ompu ni si Simeï pulik, jolmanasida pe pulik.

¹⁴ Suang songon i sude pinompar ni ompu na asing, ganup ompu pulik be, jala jolmanasida pulik.

13 ¹ (I.) Di ari na sasada i sogot adong ma sada mual na talak di pinompar ni si Daud dohot di angka isi ni Jerusalem mamburi sude dosa dohot haramunon.

² Jala di ari na sasada i, masa ma, ninna Jahowa Zebaot: Ahu mamansingkon nasa goargoar ni angka ganaganaan sian tano on, asa unang be dipaingotingot rohana; angka pangarunding pe dohot tondi haramunon pabalionku ma sian tano i.

³ Jadi tung sura mangarundingi dope manang ise, dohonon ni amana dohot inana na manubuhon ibana ma tu ibana: Ndang jadi be ho mangolu, ai nunga dihatahon ho gapgap marhitehite goar ni Jahowa! Pola tullangon ni

amana dohot inana na mangintubui ibana di pangarundingonna i.

⁴Ai masa ma di ari na sasada i: Tarurak be ma angka panurirang marhite sian alatanna, dohot pangarundingonna i, gabe ndang be paruloshononna ulos parhadohoan sian imput ni birubiru laho paotootohon.

⁵Lam dohononna be ma: Nandang panurirang ahu, jolma siula tano do ahu, ai nunga adong jolma na tumuhor ahu sian sietehetehonku dope.

⁶Tung sura adong na mandok tu ibana: Bugang dia do i na di tanganmu? Gabe dohonon ma: Na dibugangi isi ni bagas haholonganku do ahu.

⁷(II.) Ngot ma ho, ale podang dompak parmahanku dohot dompak baea sihasolhotangku ninna Jahowa Zebaot; lombuti ma parmahan i, asa marserak angka birubiru, dung i patoltolonku ma tanganku manogu angka na metmet.

⁸Dung i masa ma di sandok tano on, ninna Jahowa ripashononhon do dua partolu isina, tung tos do hosana, alai tading do anggo na sapartolu isina i.

⁹Na sapartolu i pe togihononku do tu bagasan api, jala papitaonku nasida, songon pamita ni halak di perak, jala ujionku nasida, songon panguji ni halak di sere. I ma na pajoujou goarhu sogot, jala alusanku ibana;

dohononku ma: Bangsongku do i, ibana pe
dohononna ma: Jahowa Debatangku.

14¹(I.) Ida ma, ro do ari ni Jahowa
sogot, parbagian ni tabantabanmu di
parsitongaanmu.

²Ai papunguonku ma saluhut angka
bangso parbegu dampak Jerusalem laho
martongtang, gabe tartaban ma huta i, jala
pupusanna angka jabu, jala ramunanna
angka inaina, jala satonga huta i tarboan tu
habuangan, alai anggo pasipasi ni bangso i,
ndang siaphononna sian huta i.

³Dung i borhat ma Jahowa, asa marmusu
dampak angka bangso parbegu i, songon na
somal ibana marporang, di ari tongtangan i.

⁴Jadi ojakkononna ma patna di ari na
sasada i di atas ni dolok Jetun, tondong ni
Jerusalem tungkan habinsaran. Dung i bola
dua ma dolok Jetuni sian habinsaran tungkan
hasundutan, gabe tubu rura na lambas situtu,
gabe morot na satonga ni dolok i tungkan
utara, na satonganari tungkan dangsina.

⁵Jadi maporus ma anggo hamu tu rura ni
angka dolokku, ai sahat do rura ni angka
dolok i ro di Asel. Maporus ma tutu hamu,
songon hapoporismuna maradophon lalo uju
di angka ari ni si Usia, raja sian Juda. Dung i
ro ma Jahowa Debatangku, udur dohot ibana
saluhut angka na badia.

⁶Jala di ari na sasada i, ndang adong hatiuron, mangkolom ma angka panondang di langit.

⁷Jala sada sambing do ari i, sasada Jahowa umbotosa, so haru arian, so hara borngin. Alai marhira bodari tiur ma muse.

⁸(II.) Di ari na sasada i sogot, ruar ma angka aek hangoluan sian Jerusalem, satongana dompak laut tungkan habinsaran, jala na satonganari dompak laut tungkan hasundutan; manipat partaonan logo ni ari dohot rondo ni ari masa songon i.

⁹Jadi Jahowa gabe raja gumomgom liat portibi on; di ari na sasada i sada situtu Jahowa, goarna pe sada do.

¹⁰Muba ma sandok tano i, songon adaran sian Geba tu Rimmon tungkan dangsina ni Jerusalem. Alai tarhinsat ma ianggo huta i, jala na niinganana di ingananna hian, olat ni harbangan Benjamin sahat ro di hajongjongan ni harbangan parjolo, pola sahat di harbangan parsuhi, jala sian tungkup Hananel sahat ro di pangilangan ni rajai.

¹¹Jadi maringanan ma halak disi jala ndang adong be masa hamagoan, gabe marsonangsonang halak mangingani Jerusalem.

¹²(III.) Alai on do torutoru sipasonggopon ni Jahowa tu saluhut bangso, angka na marporang dompak Jerusalem: Merus bahenonna sibukna, andorang diojakkon

dope patna, matana pe malala do di bagasan liangna, busuk dohot dilana di bagasan pamangannasida.

¹³Dung i pamasaon ni Jahowa ma di ari na sasada i hagunturon bolon di nasida, ganup nasida manoro tangan ni donganna, jala diondamhon tanganna dompak tangan ni donganna.

¹⁴Dohot do halak Juda marmusu di bagasan Jerusalem; jadi diboan halak ma tu bagasan huta i arta ni saluhut bangso parbegu humaliang, sere, perak dohot angka ulos mansai godang.

¹⁵Laos songon i do pangonai ni torutoru i tu hoda, hoda na marsahe, halode, unto, lombu ro di nasa dorbial angka na di parsaroannasida, suman tu torutoru ondeng.

¹⁶(IV.) Dung i nasa na teba sian saluhut bangso parbegu angka na ro mangalo dompak Jerusalem, nangkok ma nasida ganup taon laho marsomba tu raja Jahowa Zebaot, jala marari raya parlapelapean.

¹⁷Alai manang ise sian angka bangso ni tano on na so nangkok tu Jerusalem laho marsomba tu raja Jahowa Zebaot, ndang madabu udan tu nasida.

¹⁸Tung sura bangso Misir na so nangkok, manang ro, tung so dohot ma tu nasida mangonai torutoru i, na hinonahon ni Jahowa tu bangso parbegu na asing, angka na so nangkok marari raya parlapelapean?

¹⁹I ma torutoru ala ni dosa ni Misir dohot torutoru ala ni dosa ni saluhut bangso parbegu, angka na so nangkok marari raya parlapelapean.

²⁰Di ari na sasada i tarsurat do di angka giringgiring ni hoda: Na badia di Jahowa! Jala angka saolan di joro ni Jahowa sobokkon angka saolan pangurusan di adopan ni langgatan.

²¹Tongon, badia di Jahowa Zebaot do nasa saolan di Jerusalem dohot di Juda, jala ro be sude halak angka na mamelehon pelean, jala dipambuat sian i, jala dipangalompai, alai ndang adong be di ari na sasada i halak Kanaan di bagasan joro ni Jahowa Zebaot.

Maleakhi

1 ¹ (I.) On ma hata lumbalumba ni Jahowa tu Israel marhite sian pamangan ni si Maleaki.

² Nunga huhaholongi hamu, ninna Jahowa. Alai didok hamu do: Marhitehite aha hami dihaholongi ho? Nda si Esau do nian haha ni si Jakkob? Ninna Jahowa, hape si Jakkob do hubahen hasudungan ni rohangku.

³ Alai anggo si Esau nunga huhagigihon, jala hubahen angka dolokna gabe halongonan, jala partalianna nunga hupasahat tu antuasus angka na di parhorsihan.

⁴ Tung sura dohonon ni Edom: Nunga nian tartaban hami, alai marhobas ma hami manguahi paulihon angka turanggong! Songon on do hata ni Jahowa Zebaot: Nasida paulihon, ahu muse mangaloha; gabe goaran ni halak nasida luat ni hajahaton, jala bangso panginonaan ni rimas ni Jahowa salelenglelengna.

⁵ Ingkon sanga idaon ni matamuna ma i, gabe dohononmuna ma: Timbul do Jahowa sogot salpu sian parbalohan ni Israel.

⁶ (II.) Ingkon pasangapon ni anak amana, jala anak somang tuanna. Molo ama ahu didia do hasangaponku? Molo tuan ahu, didia do biar mida ahu? Songon on do hata ni

Jahowa Zebaot tu hamu malim angka na palea goarhu; hape lam didok hamu do: Marhitehite aha hupalea hami goarmi?

⁷Diboan hamu do tu atas ni langgatanku sagusagu na ramun; hape lam didok hamu do: Marhitehite aha marlea ho hubahen hami? Ala na nidokmuna i: Meja ni Jahowa, nunga tung lea ibana!

⁸Molo diboaan hamu na mapitung bahen pelean, ndang pola na roa i nimmu! Manang ia diboaan hamu na pangpang dohot na marsahit, ndang pola na roa i! Ua tung boan hamu ma i tu jolo ni indukmu, tung tagamon ma halomohononna ho, manang tung tagamon sorta ma pamerengna mida ho? Ninna Jahowa Zebaot.

⁹Nuaeng pe, ua marsomba ma hamu tu bohi ni Debata, asa asi rohana di hita! I ma na masa sian tanganmuna; tung tarbahen ma lomo rohana marnida hamu? Ninna Jahowa Zebaot.

¹⁰Tung ise ma sian hamu tagamon, na hum mangkinsu angka pintu ni joro i? Asa unang magopo nian panutungna di pelean di atas langgatanki. Nandang lomo rohangku mida hamu, ninna Jahowa Zebaot, jala ndang huhalomohon pelean sipanganon sian tanganmuna.

¹¹Ai sian habinsaran sahat ro di hasundutan timbul do goarhu di tongatonga ni angka bangso parbegu, jala di saluhut inganan,

ingkon boanon daupa di goarhu dohot pelean sipanganon na pita. Ai timbul do goarhu di tongatonga ni angka bangso parbegu, ninna Jahowa Zebaot.

¹²Alai anggo hamu nunga marlea goarhu dibahen hamu, ala na nidokmuna i: Meja ni Jahowa, nunga tung marlea ibana ro di pelean di atasna nang panganonna.

¹³Angkupni didok hamu do: Ida ma, dangolnai jala diombus hamu do i, ninna Jahowa Zebaot jala dipelehon hamu do na nidobo dohot na pangpang dohot na marsahit, jala diboan hamu do bahen pelean sipanganon: Tung tarhalomohon ahu ma i manjalo sian tanganmuna? ninna Jahowa.

¹⁴Marjea ma halak pangansi, adong do nian tunggal di pinguanna, bahen pelean, gabe marbagabaga ibana, hape na martihas do dipelehon tu Tuhan i. Ai raja na bolon do ahu, ninna Jahowa Zebaot, goarhu pe na songkal do di tongatonga ni angka bangso parbegu.

2¹(I.) Nuaeng pe hamu ale angka malim, tu hamu do tona on!

²Molo so ditangihon hamu, jala molo so olo hamu marateatehon hata i mangalehon hamuliaon di goarhu, ninna Jahowa Zebaot, tongosonku ma bura tu tongatongamuna, jala toruanku ma pasupasus na tu hamu, nunga tahe hutorui, ala soadong sian hamu na olo marateatehon hata i.

³Ida ma, ala hamu ahu mangago na sinaburhonmuna, jala ahu manirihon napa tu bohimuna, napa ni ari rayamuna, laos tarboan dohot hamu tu atasna.

⁴Jadi botoonmuna ma, ahu do tongon manongos tona on tu hamu bahen padan naung hubahen tu halak Lepi, ninna Jahowa Zebaot.

⁵Padan na hubahen i tu ibana, padan hangoluan dohot hasonangan do nian. Hulehon pe angka i tu ibana bahen biar nian, asa dihabiari ahu jala manonditnondit ibana maradophon goarhu.

⁶Patik hasintongan do nian di bagasan pamanganna, jala hageduhon, ndang adong jumpang di bibirna; di bagasan hadameon dohot hapitaon ibana marpangalaho rap dohot ahu, jala torop halak mulak sian hajahaton dibahen ibana.

⁷Ai anggo angka bibir ni malim, ingkon ramotanna parbinotoan, jala sian pamanganna usousuan patik, ai suruan ni Jahowa Zebaot do ibana.

⁸Alai anggo hamu nunga manimbil sian dalan i, gabe lan halak targasip dibahen hamu mangalaosi patik; nunga diose hamu padan tu halak Lepi, ninna Jahowa Zebaot.

⁹Ahu pe antong, bahenonku do hamu marlea jala tarjepol maradophon sandok bangso i, hombar tu naung binahenmuna,

na so niradotanmuna angka dalanku, gabe marnida bohi hamu mangaradoti patik i.

¹⁰(II.) Nda sada do ama ni hita on luhut? Nda sada do Debata na tumompa hita? Boasa ma tung masiosean hita ganup tu donganna laho paleahon padan na tu ompunta i?

¹¹Halak Juda nunga mangose, jala nunga diulahon halak Israel biasbias nang di Jerusalem; ai nunga diramuni halak Juda bagas habadiaon na hinaholongan ni Jahowa, jala nunga martuan laen nasida tu boru ni halak pardebata sileban.

¹²Ingkon siap sogot bahenon ni Jahowa bao na mangulahon sisongon i, sian undungundung ni Jakkob, nang pangaririt nang pangolopi ro di na mamboan pelean sipanganon tu Jahowa Zebaot.

¹³Pambahenanmuna angkupni on do: Dihungkupi hamu do langgatan ni Jahowa dohot iluilu, partangison dohot hoihoi, alani ndang adong be rohana manailihon pelean sipanganon, manang marlomo ni roha manjangkon manang aha sian tanganmuna.

¹⁴Lam didok hamu dope: Ala ni aha do? Ala Jahowa do sitindangi di holangkolangmi dohot jolmam di haposoonmu, naung tinoisanmi, atik pe nasida tuan laenmu jala jolma ni parjanjianmu.

¹⁵Jala ndang anggo ibana na sasada i mambahen songon i, laos tading dope di ibana pasipasi ni tondi. Alai aha do diulahon

na sasada i? Na mangalului pinompar sian Debata do ibana. Dibahen i jaga hamu ma tondimuna, unang tung ditoisi manang isejolma ni haposoonna.

¹⁶Ai huhagigihon do parsirangan, ninna Jahowa Debata ni Israel, nang halak na manghungkupi pangarupaon marhite sian ulosna, ninna Jahowa Zebaot. Dibahen i jaga hamu ma tondimuna, unang datdati hamu mangose!

¹⁷Tung na loja do Jahowa dibahen hamu marhitehite pangkataionmuna! Hape lam didok hamu dope: Marhitehite aha hulojai hami ibana? Marhitehite na nidokmuna i: Nasa siulahon hajahaton, denggan do roha ni Jahowa marnidasa, jala marlomo ni roha ibana mida nasida. Manang tung didia ma Debata na mandabu uhum?

3¹(I.) Ida ma, suruanku ma suruanku, asa dipadiri dalan di jolongku. Dung i tompu ma ro tumopot jorona Tuhan, na niluluanmuna dohot suruan ni parpadanan na hinalungunhonmuna. Ida ma, na ro ma ibana, ninna Jahowa Zebaot.

²Alai tung ise ma manahan di ari harorona i? Jala tung ise ma manahan jongjong, molo dipataridahon ibana dirina? Ai songon api na panopa do ibana, jala songon sabun ni panunsi.

³Jadi hundul ma ibana hira sipangalala dohot sipapita perak, asa papitaonna halak

Lepi, jala lalaonna nasida laho papitahon songon sere dohot songon perak, asa gabe siboan pelean sipanganon nasida tu Jahowa di bagasan hatigoran.

⁴Jadi tarbahen Jahowa ma mangkalomohon pelean sipanganon binahen ni Juda dohot Jerusalem, songon uju di angka taon mulamula.

⁵(II.) Jadi jumonok ma ahu tu hamu laho manguhum, gabe sitindangi na doras dampak halak parsibalik mata dohot dampak halak pangalangkup dohot dampak halak sitolon na tutu dohot dampak halak pangarupa umpogo upa ni halak sipangan gaji dohot dampak halak na paeleng uhum tu na mabalu dohot na tading di lampin ro di halak na buro, ia ahu ndang dihabiari, ninna Jahowa Zebaot.

⁶Ai ndang mubauba anggo ahu Jahowa, hamu pe ale angka anak ni si Jakkob, ndang tagamon sun siap hamu.

⁷Olat ni ariari ni ompumuna, sai manimbil do hamu sian angka patikku, jala ndang diradoti hamu; mulak ma hamu tu ahu, asa mulak ahu tu hamu, ninna Jahowa Zebaot. Hape didok hamu do: Taringot tu aha hami mulak?

⁸Tung tarpaotootojolma ma Debata, umbahen naeng paotootoonmuna ahu? Hape didok hamu dope taringot tu aha hupaotooto hami ho? Taringot tu pangalehon di saparsampulu dohot dipelean santisanti.

⁹Tung di bagasan panginonaan ni bura do hamu ala dipaotooto hamu ahu, tung sandok bangso i do.

¹⁰Taruhon hamu ma sintong parsampuluan i tu bagas parpeopan, asa adong bohal di bagasan jabungku, jala unjuni hamu ahu taringot tusi, ninna Jahowa Zebaot, manang so ungkaponku di hamu angka pandiloan ni langit, jala mangusehon tu hamu gabe maradu marlobilobi.

¹¹Jadi manorui ma ahu tu sihapor panggagat manatap hamu, asa unang be diago parbue ni tano i di hamu, jala unang mago partaonan ni hau anggur di ladang manatap hamu ninna Jahowa Zebaot.

¹²Jadi parhatuaon ni saluhut bangso parbegu ma hamu, ai gabe tano hasudungan do hamu, ninna Jahowa Zebaot.

¹³(III.) Dipabalga hamu do hatahatamuna dompak ahu ninna Jahowa. Hape lam didok hamu dope: Tung aha ma hatahatanami dompak ho?

¹⁴Didok hamu do: Ndang adong labana oloan Debata, tung aha ma parlabaannami ala huradoti hami tonana, jala martujung hami di adopan ni Jahowa Zebaot?

¹⁵Nuaeng pe ianggo hami angka halak na jungkat do huparhatua hami; tongon tahe, lam mardohar do angka siulahon hajahaton; gari Debata di unjuni nasida do, hape malua do nasida sian jea.

¹⁶Alai tahe masipaingotan ma angka sihabiari Jahowa sama nasida; gabe ditatap Jahowa nasida jala ditangihon, jala tarsurat di adopanna sada buku parningotan di halak angka sihabiari Jahowa dohot angka na pasangar goarna.

¹⁷Jadi ahu ma nampuna nasida, ninna Jahowa Zebaot, di ari sijadionku, jala marpangkehe ahu tu nasida, songon pangkaehe ni amaama tu anakna na mangoloi ibana.

¹⁸Dung i mulak ma rohamuna, jadi idaonmuna ma hasurungan ni halak partigor martimbangkon halak parjahat, hasurungan ni halak sioloi Debata, martimbangkon halak na so mangoloi ibana.

4¹ (3-19) (IV.) Ai ida ma, na ro ma ari na marsigorgor, songon pamurunan, jadi doshon durame sude halak na jungkat dohot halak siulahon hajahaton, gabe marsijembur ma nasida bahenon ni ari na ro sogot, ninna Jahowa Zebaot, ndang adong tadingkononna di nasida nang urat, nang ranting.

² (3-20) Alai binsar ma anggo di hamu, angka na mangkabiari goarhu mata ni ari ni hatigoran mardongan hahisaron di linggom ni habongna, gabe ruar ma hamu jala panihalnihalon songon anak ni lembu, angka na ruar sian bara.

³ (3-21) Jadi degedegeonmuna ma halak parjahat, ai doshon sirabun nasida sogot

ditoru ni palak ni patmuna, di ari sibahenonku, ninna Jahowa Zebaot.

⁴(3-22) Sai paingotingot hamu ma patik ni si Musa, naposongki, na hupatolhas tu ibana uju di Horeb tu sandok Israel, angka patik dohot uhum.

⁵(3-23) (V.) Ida ma, suruanku ma tu hamu panurirang Elia, patujolo ni haroro ni ari ni Jahowa na bolon, jala na songkal i.

⁶(3-24) Asa ibana paulakkon roha ni amaama tu angka anakna, jala roha ni angka dakdanak tu amanasida, asa unang ro ahu mangkonahon uhum hamagoan tu tano on.

Matius

1 ¹ (I.) On ma surat partuturan ni Jesus Kristus, anak ni si Daud, anak ni si Abraham.

² Anak ni si Abraham si Isak; anak ni si Isak si Jakkob; anak ni si Jakkob si Juda dohot angka hahaanggina.

³ Anak ni si Juda si Peres dohot si Jara, sian si Tamar; anak ni si Peres si Hesron; anak ni si Hesron si Ram.

⁴ Anak ni si Ram si Aminadab; anak ni si Aminadab si Nahason; anak ni si Nahason si Salmon.

⁵ Anak ni si Salmon si Boas sian si Rahab; anak ni si Boas si Obed sian si Rut; anak ni si Obed si Isai.

⁶ Anak ni si Isai raja Daud; anak ni si Daud si Salomo, sian jolma ni si Uria.

⁷ Anak ni si Salomo si Rehabeam; anak ni si Rehabeam si Abia; anak ni si Abia si Asa.

⁸ Anak ni si Asa si Josapat; anak ni si Josapat si Joram; anak ni si Joram si Usia.

⁹ Anak ni si Usia si Jotam; anak ni si Jotam si Ahas; anak ni si Ahas si Hiskia.

¹⁰ Anak ni si Hiskia si Manasse; anak ni si Manasse si Amon; anak ni si Amon si Josia.

¹¹ Anak ni si Josia si Jekonya dohot angka hahanggina; i ma di tingki habubuangnasida na tu huta Babel.

¹² Jadi dung tarbuang nasida, tubu ma si Sealtiel, anak ni si Jekonya, dung i si Serubabel, anak ni si Sealtiel.

¹³ Anak ni si Serubabel si Abihud; anak ni si Abihud si Eliakim; anak ni si Eliakim si Asor.

¹⁴ Anak ni si Asor si Sadok; anak ni si Sadok si Akim; anak ni si Akim si Eliud.

¹⁵ Anak ni si Eliud si Eleasar; anak ni si Eleasar si Mattan; anak ni si Mattan si Jakkob.

¹⁶ Anak ni si Jakkob si Josep, dongan saripe ni si Maria, na tumubuhon Jesus, na margoar Kristus.

¹⁷ Sampulu opat do torop ni sundut ni si Abraham ro di si Daud; laos sampulu opat sundut do olat ni si Daud ro di habubuangnasida tu huta Babel, jala sampulu opat sundut do muse olat ni habubuangnasida sahat ro di Kristus i.

¹⁸ (II.) Ilanggo hatutubu ni Jesus Kristus songon on do: Uju oroan ni si Josep i dope inana, si Maria i, gabegabebean do ibana sian Tondi Parbadia, andorang so masipadonohan dope nasida.

¹⁹ Ala parroha na bonar si Josep, na mangoro si Maria, ndang adong rohana paurakkon nasida, gabe ditahi rohana nama, naeng sirangkononna songon i.

²⁰Alai di na songon i dope tahi ni rohana, diida ma di nipina surusuruan ni Tuhan i, na mandok tu ibana: O Josep, anak ni si Daud, unang alang roham mangalap si Maria, gabe donganmu saripe muse, ai na sian Tondi Parbadia do na naeng tubu di ibana.

²¹Tumubuhon Anak ma ibana; Jesus do Goarna, bahenonmu, ai paluaonna do bangsona sian angka dosanasida be.

²²Masa pe sudena i, asa jumpang na hinatahon ni Tuhan i marhite sian panurirangna na mandok:

²³"Ida hamu ma, gabegabean do na marbaju i, tubuan Anak ma ibana; jala bahenon do Goarna Immanuel, lapatanna: Donganta ma Debata!"

²⁴Jadi dung tarsunggul si Josep, dioloi ma hata ni surusuruan ni Tuhan i: Saut ma dialap na niolina i.

²⁵Alai laos so ditanda, paima tubu buhabajuna i; jadi digoar ma Ibana Jesus.

2¹(I.) Asa dung tubu Jesus di huta Betlehem, di luat Judea, uju hinarajahon ni si Herodes, ro ma angka parhapistaran sian purba tu huta Jerusalem,

²angka ninna ma: Didia do Raja na imbaru tubu i? Naung huida hami do bintangna di tano habinsaran; ala ni i ro do hami sumomba Ibana!

³Alai disi dibege raja Herodes hata i, tarsonggot ma ibana ro di sude pangisi ni huta Jerusalem.

⁴Jadi dipapungu ma angka sintua ni malim ro di sibotosurat ni bangso i, dipamanat ma tu nasida huta hatubuan ni Kristus i.

⁵Jadi didok nasida ma tu ibana: Huta Betlehem na di luat Judea do, ai songon on do pandok ni panurirang i:

⁶"Ia ho, huta Betlehem, apala tung na ummetmet ho di tongatonga ni angka huta na di luat Judea, ai ho do huta haroroan ni Raja i, na marmahan Israel, bangsongki!"

⁷Dung i marhusip ma si Herodes manjou angka parhapistaran i tu jolona disihirsihiri ma tu nasida lelengna, dung tarida bintang i.

⁸Dung i disuru ma nasida tu huta Betlehem, ninna ma: Laho ma hamu, tangkas ma diori hamu Dakdanak i! Ia dung jumpang, paboa hamu ma tu ahu, asa dohot ahu ro marsomba tu Ibana.

⁹Asa dung dibege nasida hata ni raja i, laho ma nasida. Anggo bintang i, naung niidanasida hian di tano habinsaran i, sai di ginjangnasida do muse, rasirasa sahat tingkos di ginjang ni inganan ni Dakdanak i.

¹⁰Marnida bintang i, mansai las situtu ma rohanasida.

¹¹Laos dibongoti ma bagas i, gabe diida ma Dakdanak i dohot si Maria, inana i. Dung i manungkap ma nasida marsomba

tu Dakdanak i, dirungkari ma artanasida:
Sere, haminjon dohot angka na angur,
parsombanasida tu Ibana.

¹²Dung i ro ma tona ni Debata marhite sian
nipinasida, unang pola mulak be tumopot
si Herodes; jadi sian dalan na asing nama
nasida mulak tu luatnasida.

¹³(II.) Asa dung laho nasida, ro ma
surusuruan ni Tuhan i, diida si Josep di nipina,
na mandok tu ibana: Hehe ma ho, boan ma
Dakdanak i rap dohot inana i, maporus ma
hamu tu tano Misir; disi ma hamu jolo, paima
ro muse hatangku, ai na naeng luluan ni si
Herodes do Dakdanak i, asa bunuonna.

¹⁴Jadi hehe ma ibana, diboan ma Dakdanak
i rap dohot inana borngin i, maporus tu tano
Misir.

¹⁵Laos disi ma nasida, paima mate si
Herodes, asa jumpang na nidok ni Tuhan i
marhite sian panurirangna na mandok: "Sian
Misir do hujou Anakki!"

¹⁶Asa dung mamoto si Herodes, naung
dipaotooto angka parhapistaran i ibana,
tarrimas situtu ma ibana, disuru ma tu
Betlehem dohot tu sandok luat na humaliang
i angka na mamunui nasa dakdanak baoa, na
marumur dua taon, ro di angka na ummetmet
sian i, hombar tu tingki naung nirisihanna
sian angka parhapistaran i.

¹⁷Disi ma jumpang hata ni panurirang
Jeremia na mandok:

¹⁸"Tarbege do di huta Rama soara partangison dohot angguk badar: Diangguhi si Rahel do ianakhonna i: Ndang olo be apulon, ai nunga sun siap nasida."

¹⁹(III.) Alai dung mate si Herodes, diida si Josep ma di nipina surusuruan ni Tuhan i di tano Misir, na mandok tu ibana:

²⁰Hehe ma ho, boan ma Dakdanak i rap dohot inana mulak tu tano Israel, ai nunga mate angka na sumangkapi hosa ni dakdanak i.

²¹Jadi hehe ma ibana, diboan ma Dakdanak i rap dohot inana mulak tu tano Israel.

²²Alai dung dibege ibana, si Arkilaus do hape raja di luat Judea manggonti amana si Herodes, biar do rohana, anggo tung laho tusi. Jala dung ro poda sian Debata tu ibana di nipina, gabe dompak luat Galilea nama ditondong.

²³Jadi ojak ma ibana maringanan di sada huta na margoar Nasaret, gabe jumpang ma hata ni panurirang na mandok: Goaron do Ibana si Nasarani!

3¹(I.) Dung i di laonlaon ni ari hehe ma si Johannes pandidi marjamita di halongonan Judea,

²ninna ma: Pauba hamu ma rohamuna, ai nunga songgop harajaon banua ginjang i!

³Ibana do na pinaboa ni panurirang Jesaya, uju na nidokna: "Soara ni na manjoujou di

halongonan: Pature hamu ma dalan di Tuhan i; pahornop hamu ma sidalananna i!"

⁴Imbulu ni unto do ulos ni si Johannes, hulingkuling do hohosna: Angka sihapor dohot situak ni loba do sipanganonna.

⁵Dung i laho ma pangisi ni Jerusalem manopot ibana, songon i dohot sude halak Judea ro di saluhut angka na maringanan di lambung ni Jordan i.

⁶Jadi dipandidihon si Johannes ma nasida di aek Jordan i, dung ditopoti be dosanasida.

⁷Alai di na niidana torop Parise dohot Saduse manopot pandidionna i, ninna ma mandok nasida: Hamu anak ni ulok! Ise do na mangajari hamu, pasidingkon rimas na ro sogot?

⁸Parbuehon hamu ma na tama, paboa naung muba rohamuna!

⁹Jala so tung didok hamu di bagasan rohamuna: Si Abraham do amanami! Ai hudok ma tu hamu: Tarjadihon Debata do anak di si Abraham sian angka batu on!

¹⁰Ai nunga pola ampe tangke tu daling ni angka hau! Onpe, sitabaon ma nasa hau na so marparbuehon na denggan jala sidabuhononhon tu api!

¹¹Ia ahu, aek do hudidihon tu hamu mandokkon paubahon roha; alai andul gumogo do na ro sian pudingku, gari mamboan sipatuna hurang tama dope ahu.

Didihonon ni I do tu hamu Tondi Parbadia dohot api!

¹²Di tanganna do purpuran; paiasonna ma pardegeanna; papunguonna do emena tu sopona; alai tutungonna do anggo hurangkam i tu api na so ra mintop.

¹³(II.) Uju i ma ro Jesus sian Galilea tu batang aek Jordan, laho padidihon Ibana tu si Johannes.

¹⁴Alai manjua do si Johannes, didok ma: Ahu do nian patut didionmu, hape Ho ro mandapothon ahu!

¹⁵Alai didok Jesus ma mandok ibana: Songon i ma jolo! Ai tama do tapajongjong nasa hatigoran! Dung i dioloi ma Ibana.

¹⁶Asa dung tardidi Jesus, pintor hehe ma Ibana sian aek i, jala mungkap ma langit, jadi tarida ma mijur Tondi ni Debata songon darapati sumonggopi Ibana.

¹⁷Laos mangkuling ma soara sian ginjang, didok ma: On do Anakku, Haholongan i; halomoan ni rohangku do Ibana!

4¹(I.) Dung i ditogihon Tondi i ma Jesus tu halongonan, asa diunjuni sibolis i Ibana.

²Jadi dung opatpulu ari, opatpulu borngin lelengna so mangan Ibana, male ma dihilala.

³Dung i didapothon sipangunjuni i ma Ibana, ninna ma: Molo na tutu Ho Anak ni Debata, dokkon ma batu on gabe sipanganon!

⁴Alai ninna ma mangalusi: Na didok Surat i do: "Apala holan sipanganon hangoluan ni

jolma; tung nasa hata ni Debata do, na ro sian Ibana!"

⁵Dung i ditogihon sibolis i ma Ibana tu huta na badia i, dipajongjong ma Ibana tu atas bagas joro i, dung i ninna ma mandok Ibana:

⁶Molo Anak ni Debata Ho, timbungkon ma Dirim tu toru, ai didok Surat i do: "Dohononna do angka surusuruanna manangannangan Ho, asa unang tartuktuk patmu tu batu!"

⁷Dung i ninna Jesus ma mandok ibana: Dohot do on didok Surat i: "Ndang jadi unjunanmu Tuhan Debatam!"

⁸Dung i diulahi sibolis i ma manogihon Ibana tu punsu ni dolok na timbo situtu, dipatuduhon ma tu Ibana nasa harajaon na di portibi on ro di hasangaponna, dung i ninna ma mandok Ibana:

⁹Saluhutna i lehononku do tu Ho, molo olo Ho marsomba tu ahu.

¹⁰Dung i didok Jesus ma mandok ibana: Laho ma ne ho, bolis; ai didok Surat i do: "Tuhan Debatam do sisombaonmu, Sasadasa do sioloanmu!"

¹¹Dung i ditadingkon sibolis i ma Ibana; jadi ro ma angka pardisurgo marhobasi di Ibana.

¹²(II.) Dung dibege Jesus, naung tarhurung si Johannes, laho ma Ibana tu Galilea.

¹³Laos ditadingkon ma huta Nasaret, laho maringanan tu huta Kapernaum na di topi ni tao i, di luat Zebulon dohot Naptali.

¹⁴Asa jumpang na nidok ni panurirang
Jesaya na mandok:

¹⁵"Luat Zebulon dohot Naptali na di topi
ni tao i, di ipar ni aek Jordan, luat Galilea,
inganan ni angka sipelebegu:

¹⁶Jolma angka na maringanan di na holom
marnida Panondang na bolon; nunga binsar
Panondang i di angka na manginganhon tano
na nilinggoman ni hamatean".

¹⁷Jadi olat ni i mamungka ma Jesus
marjamita; ia jamitana on do: Pauba hamu
ma rohamuna, ai nunga songgop harajaon
banua ginjang i!

¹⁸Dung i di na mardalani Jesus di topi
ni tao Galilea, diida ma disi dua halak na
saama na sumampakkon jalanasida tu tao i,
ai pardengke do nasida; i ma si Simon na
margoar si Petrus dohot donganna saama si
Andreas.

¹⁹Dung i ninna ma mandok nasida: Ihuthon
hamu ma Ahu; bahenonku do hamu gabe
sijalajolma!

²⁰Dung i pintor ditadingkon nasida ma
jalanasida i, laho mangihuthon Ibana.

²¹Dung laho Ibana sian i, diida ma muse
dua halak na asing na saama, i ma si
Jakobus dohot anggina, si Johannes, anak
ni si Sebedeus, angka na pauliuli jalanasida
hundul di bagasan paraunasida rap dohot si
Sebedeus, amanasida i. Jadi dijou ma nang
nasida.

²² Dung i pintor ditadingkon nasida ma parau i dohot amanasida, laho mangihuthon Ibana.

²³ (III.) Dung i didalani Ibana ma sandok luat Galilea laho mangajari di angka parguruan, mamaritahon Harajaon i huhut pamalum nasa sahith dohot na niae ni halak na disini.

²⁴ Jadi tarbarita ma Ibana ro di liat tano Siria, pola dipamboan halak tu Jolona nasa na hansitan, angka parsahit na ragam dohot angka hasonggopan ni angka sibolis dohot angka na solpot bulan on ro di angka na sarion, gabe dipamalum ma nasida saluhutna.

²⁵ Jadi mansai torop ma halak mangihuthon Ibana, angka na sian luat Galilea, sian Dekapolis (Sampulu huta), sian Jerusalem, sian Judea dohot sian luat na di bariba ni aek Jordan.

5¹ (I.) Asa dung diida Jesus halak na sai torop i, nangkok ma Ibana tu sada tor jadi hundul ma disi; dung i didapothon angka siseanna ma Ibana.

² Dung i marsoara ma Ibana mangajari nasida, ninna ma:

³ Martua ma na pogos tondi, ai di nasida do harajaon banua ginjang il!

⁴ Martua ma na marsak roha, ai siapulon do nasida!

⁵ Martua ma na lambok roha, ai teanonnasida do tano on!

⁶ Martua ma na mauas male mida hatigoran, ai sipabosuron do nasida!

⁷ Martua ma na asi roha, ai siasian do nasida!

⁸ Martua ma parroha na ias, ai idaonasida do Debata!

⁹ Martua ma sibahen dame, ai goaron do nasida anak ni Debata!

¹⁰ Martua ma na pinaburuburu ni halak ala ni hatigoran, ai di nasida do harajaon banua ginjang i!

¹¹ Martua ma hamu, molo diinsahi halak hamu manang dipaburuburu manang dipatubutubu ragam ni hata na roa, na so tutu, dompak hamu ala ni Ahu!

¹² Las ma rohamuna jala marolopolop, ai godang do umpamuna di banua ginjang i, ai songon i do dipaburuburu angka panurirang na jumolo sian hamu.

¹³ (II.) Hamu do sira ni tano on! Alai molo tung gabe hambar sira i, aha ma bahenon paansimhon? Nda tung na hasea be i; sibolongkononhon nama tu balian, asa didegei halak.

¹⁴ Hamu do panondang ni portibi on! Nandang tarbahen so sai patar huta na di atas dolok.

¹⁵ Nandang dihungkuphon halak ampang tu palito na ginalahanna; tu ginjang ni parpalitoan do dibahen, asa disondangi saluhut na di jabu i.

¹⁶ Naeng songon i ma marsinondang palitomuna di jolo ni halak, asa diida angka pambahenanmuna na denggan i, asa dipuji nasida Amamuna na di banua ginjang i.

¹⁷Unang ma dirimpu rohamuna: Ahu ro mangarumpakkon patik i, manang hata ni angka panurirang i pe. Nandang ro Ahu mangarumpakkon; na pajongjongkon do Ahu!

¹⁸Ai hata na sintong do na hudok on tu hamu: Rasirasa sega langit dohot tano on, na so tupa sega sian patik i nanggo sada sisiasia manang sanggurit pe, paima saut saluhutna i.

¹⁹Asa manang ise na mangarumpakkon sada sian angka patik na ummetmet i jala dipodahon i tu jolma, i ma goaron na ummetmet di harajaon banua ginsang i; alai na mangulahon jala mangajarhonsa, i do goaron na balga di harajaon banua ginsang i.

²⁰Ai hudok ma tu hamu: Molo so andul dumenggan hatigoranmuna sian hatigoran ni angka sibotosurat dohot Parise, ndang habongotan hamu harajaon banua ginsang i.

²¹Dibege hamu do hata na tu angka ompu na robi: "Unang ho mambunu!" Ia pamunu siuhumon do.

²²Alai Ahu do mandok tu hamu: Tu jolo ni paruhuman ma ganup na tarrimas tu donganna; jala tama hona uhum ni rapot godang do ganup na mandok tu donganna: Hurang ajar! Alai na pola mandok tu donganna: Pe ho sisoada!, tama dapot api na roko do i.

²³Asa molo diboan ho sipelehononmu tu langgatan, dung i tarsingot roham disi di sogo ni roha ni donganmu dompak ho,

²⁴tadingkon ma sipelehononmi di jolo ni langgatan i; laho ma ho jolo mardenggan dohot donganmi; dung pe i, asa ro ho pasahathon sipelehononmi!

²⁵Tung denggan ma roham maradophon alomi; alai tibu, binsan rap dope hamu di tongandalan! So tung sanga dipasahat alomi ho tu panguhum, gabe dipasahat panguhum i ho tu opasna, gabe dihurungkon ho maon.

²⁶Situtu do na hudok on tu ho: Na so tupa ho ruar sian i, anggo so sahat gararmi sude ro di na saduit!

²⁷Dibege hamu do hata na tu angka ompu na robi: "Unang ho mangalangkup!"

²⁸Alai Ahu mandok tu hamu: Manang ise na mamereng boruboru huhut marsangkap na roa, nunga saut dilangkup i di bagasan rohana.

²⁹Molo digasipi mata siamunmi ho, pulsikkon ma i jala bolongkon! Ai denggan do mago dagingmu deba nuaeng, unang bolong dagingmi hibul sogot tu api na roko!

³⁰Jala molo digasipi tangan siamunmi ho, gotap ma i jala bolongkon! Ai denggan do mago ruas ni dagingmu sada nuaeng, unang bolong dagingmu hibul sogot tu api na roko!

³¹Angkup ni i didok do: "Manang ise na palahohonjolmana, ingkon dilehon do surat sirang tu ibana."

³²Alai Ahu mandok tu hamu: Ganup na palahohon na niolina, ia so ala ni

na marmainan, na palangkuphonsa do!
Pangalangkup do nang na mambuat na sirang
i!

³³Angkup ni i, dibege hamu do hata na tu
angka ompu na robi: "Ndang jadi tolononmu
na tutu! Naung saut diuarihon ho tu Debata,
ingkon gararonmu do!"

³⁴Alai Ahu mandok tu hamu: Sandok na
so tupa hamu manolon nang maruari pe:
Manang tu langit i, ai habangsa ni Debata do
i;

³⁵manang tu tano on, ai sidegean ni patna
do i; manang tu huta Jerusalem pe, ai huta ni
Raja na bolon i do i.

³⁶Angkup ni i, ndang jadi ho manolon tu
ulum; ai ndang marhuaso ho mambahen
bontar manang birong obukmu nanggo sada.

³⁷Songon on ma hatamuna: Olo, anggo olo;
ndang, ia ndang! Nasa na ganda sian i, sian
na jahat do i!

³⁸Dibege hamu do hata na mandok: "Mata
do abul ni mata; ipon do abul ni ipon!"

³⁹Alai Ahu mandok tu hamu: Unang alo
hamu na jahat! Molo adong na mamastap
hurum siamunmi, tarehon ma nang hurummu
sihambirang!

⁴⁰Molo adong na naeng mambahen sindir tu
ho, laho mambuat ulosmu, atena ma dohot
bajubajum di ibana!

⁴¹Molo adong manang ise na manggogoi ho
mandongani ibana sapaal, oloi ma ibana dua!

⁴²Lehon na mangido tu ho! Unang tundali na naeng marsali tu ho!

⁴³Dibege hamu do hata na mandok: "Holong ma roham di donganmi; hosom ma ia di musum!"

⁴⁴Alai Ahu do mandok tu hamu: Holong ma rohamu di musumuna; tangiangkon hamu ma angka na paburuburu hamu.

⁴⁵Asa tung gabe anak ni Amamuna na di banua ginjang i hamu: Ai dipabinsar do mata ni arina tu angka parroha na jahat nang tu na bonar, diparo do udan tu parroha na tigor nang tu na geduk.

⁴⁶Ai molo holong rohamuna holan di angka na mangkaholongi hamu, dia ma upamuna? Gari angka sijalobeo, nda songon i do dibahen?

⁴⁷Dia do hasurunganmuna, molo denggan hatamuna holan tu angka donganmuna? Gari angka sipelebegu, nda songon i do dibahen?

⁴⁸Ipe, ingkon sun denggan do rohamuna songon Amamuna di banua ginjang na sun denggan roha i!

6¹(I.) Jaga ma hamu, asa unang diulahon hamu hatigoranmuna di jolo ni halak, sitotondurannasida! Ai molo songon i, ndang marupa be hamu sian Amamuna na di banua ginjang i.

²Antong, molo diulahon ho parasinirohaon, unang ma dokkon paluon tingting songon binahen ni halak pangansi di angka parguruan

dohot alaman, asa dipuji halak nasida. Na tutu do na hudok on tu hamu: Nunga sahat dijalo nasida upanasida.

³Asa jumpa dilehon ho asiasi, unang ma pola diboto tanganmu sihambirang na nilehon ni tanganmu siamun,

⁴asa buni angka asi ni roham; jadi baloson ni Amangmu, na marnida di na buni, ma i tu ho!

⁵(II.) Dung i, jumpa martangiang hamu, unang songon halak pangansi hamu, angka na mangkalomohon jongjong martangiang di angka parguruan dohot di dalam balobung, asa diidajolma i nasida. Na tutu do na hudok on tu hamuna: Nunga sahat dijalo nasida upanasida!

⁶Alai ia martangiang ho, tu bilut ma ho laho; sordak ma pintu i! Dung i martangiang ma ho tu Amangmu na di na buni, gabe baloson ni Amangmu, na marnida di na buni, ma i tu ho!

⁷Asa uju martangiang hamu, unang marnoninoni bahen hamu songon binahen ni sipelebegu; i dirimpu, tangihonon ni Debata nasida ala ni deak ni hatahatanasida.

⁸Ipe, unang ma doshon nasida hamu! Ai diboto Amamuna do na ringkot di hamuna, andorang so mangido dope hamu.

⁹Songon on ma tangiangmuna: Ale Amanami na di banua ginjang! Sai pinarbadia ma Goarmu!

¹⁰Sai ro ma harajaonmu! Sai saut ma lomo ni roham di banua tonga on songon na di banua ginjang!

¹¹Lehon ma di hami sadari on hangoluan siap ari!

¹²Sesa ma dosanami songon panesanami di dosa ni angka na mardosa tu hami!

¹³Unang hami togihon tu pangunjunan! Palua ma hami sian na jahat! Ai Ho do nampuna harajaon dohot hagogoon dohot hasangapon ro di saleleng ni lelengna. Amen!

¹⁴Ai ia disesa hamu sala ni halak na dompak hamu, sesaon ni Amamuna na di banua ginjang i do dohot dosamuna.

¹⁵Alai anggo so disesa hamu sala ni halak na dompak hamu, ndang tagamon sesaon ni Amamuna nang dosamuna.

¹⁶(III.) Uju marpuasa hamu, unang ma pola surbot panailimuna idaon songon di halak pangansi, ai dipasingki do bohinasida, asa haru tanda parpuasaonnasida diida halak Na tutu do na hudok on tu hamu: Nunga sahat dijalo nasida upanasida!

¹⁷Alai jumpa marpuasa ho, pangir ma ulum, suapi bohim,

¹⁸asa unang tanda parpuasaonmi di jolo ni halak, alai tanda di jolo ni Amangmu na di na buni, gabe baloson ni Amangmu, na marnida di na buni, ma i tu ho!

¹⁹(IV.) Unang papungupungu hamu arta di hamu di tano on, di na targagat tasik dohot

ngitngit, di na tarhali jala tartangko panangko i!

²⁰Alai papungupungu hamu ma arta di hamu di banua ginjang, di na so targagat tasik manang ngitngit; di na so tarhali jala so tartangko panangko i!

²¹Ai ia disi artam, disi do roham!

²²Palito ni daging do mata. Molo hisar matami, tiur ma sude dagingmu!

²³Alai molo roa matami, holom ma sude dagingmu. Holomna i antong, anggo mangkolom panondang na di bagasan ho!

²⁴Ndang haoloan sada halak dua induk! Sai hosomanna do na sada, haholonganna do na sada nari; hombaranna do na sada, toisanna do na sada nari. Ndang haoloan hamu Debata rap dohot Mammon!

²⁵Ala ni i do umbahen na hudok tu hamuna: Unang holsohon hamu hosamuna sumarihon sipanganon, manang dagingmuna pasarisari parabiton! Nda ummarga hosa sian sipanganon? Nda ummangat daging sian parabiton?

²⁶Bereng hamu ma pidong angka na martongatonga langit, angka na so manabur, na so manggotil, na so papunguhon tu sopo; tong do diparmudumudu Amamuna na di banua ginjang i nasida! Nda godang dope hasurunganmuna sian i!

²⁷ Ise hamu marhuaso pagandahon ariarina nanggo saasta ganjangna, anggo tung sian pangkolsohon ni rohana?

²⁸ Boasa antong holsohononmuna parabiton! Patangkas hamu ma partubu ni bungabunga na di ladang i, angka na so mangula jala na so mangganti!

²⁹ Ahu mandok tu hamuna: Gari si Salomo, uju di bungaran ni hasangaponna i ibana, gari so mamangke songon bungabunga sada.

³⁰ Asa molo songon i diparulosi Debata duhutduhut na di ladang i, na jongjong songon sadari on, na tupa dipuruni marsogotna i, lam hamu ma, lam so parulosanna! Oe hamu siotik haporseaon!

³¹ Antong unang ma holsoan rohamuna, mandok: Aha ma panganonnami? Aha ma inumonnamami? Aha ma parabitonnamami?

³² Angka sipelebegu do mangkaringkothon saluhutna sisongon i. Diboto Amamuna na di banua ginjang i do, naung ringkot angka i di hamu.

³³ Sai jumolo ma lului hamu harajaon ni Debata dohot hatigoranna, dung i tambahononna do sude angka ondeng tu hamuna!

³⁴ Antong, unang ma holsohon hamu ari marsogot, ai sarihonon ni ari marsogot do na ringkot disi. Sae do, molo masiporsan hasusaanna be angka ari.

7 ¹ (I.) Unang hamu manguhumuhumi, asa
unang hona uhum hamu,
² ai panguhumonmuna i do siuhumhononhon
tu hamu, parsuhatonmuna i do
sisuathononhon tu hamu.

³ Aha ma pola paberengberengonmu
silbaksilbak na di mata ni donganmu; ia na
satiang na di matami ndang diantoi ho!

⁴ Tung patut ma dohononmu tu donganmi:
Ua, huumpat ma jolo silbaksilbak i sian
matami! Hape na satiang do di matami!

⁵ E ho pangansi, jumolo ma umpat tiang i
sian matami; dung pe i, asa pingkiranmu,
manang beha pangumpatmu di silbaksilbak
na di mata ni donganmi.

⁶ Unang lehon hamu arta na badia i tu
angka jurangga, jala unang ma danggurhon
hamu mutihamuna tu jolo ni angka babi, so
tung dilotloti i dohot patna, laos humusor
manaroso hamu!

⁷ (II.) Pangido hamu ma, sai na lehononna do
tu hamu; lului hamu ma, sai na jumpangan do
hamu; tuktuhi hamu ma, sai na ungkaponna
do di hamu!

⁸ Ai sai na manjalo do nasa na mangido,
sai na jumpangan do na mangalului; sai na
ungkapon do di na manuktuhi!

⁹ Ai ise sian hamujolma, na mangalehon
batu tu anakna, molo indahan dipangido?

¹⁰ Manang na olo mangalehon ulok, molo
dengke dipangido?

¹¹ Gari hamu angka parjahat umboto mangalehon basabasa na denggan tu anakkonmuna, lam Amamuna na di banua ginjang i ma so lehononna arta na denggan di na mangido tu Ibana?

¹² Saluhut na pinangido ni rohamu, sibahenon ni halak tu hamu, i ma bahen hamu tu nasida, ai i do pamusatan ni patik ro di hata ni angka panurirang.

¹³ (III.) Bongoti hamu ma harbangan na gogot i; ai ruak do harbangan jala lambas do dalan na tu hamagoan, jala torop do angka na bongot sian i.

¹⁴ Alai na hopit do ia harbangan jala gogot do dohot dalan na tu hangoluan, jala otik do halak na jumpangan i.

¹⁵ Jaga hamu ma angka panurirang pargapgap, ai na ro do nasida mandapothon hamu marrupahon birubiru, alai anggo rohana di bagasan, tung babiat panoro do!

¹⁶ Sian parbuena do tandaonmuna nasida. Tung dapot ma putikkononhon parbue ni hau anggur sian bulu duri, manang antajau sian rimbang?

¹⁷ Ai marparbuehon na denggan do nasa hau na denggan; alai matua roa do parbue ni hau na so hasea.

¹⁸ Ai anggo hau na denggan ndang tarparbuehonsa na roa, jala hau na roa ndada tarparbuehonsa na denggan.

¹⁹Nasa hau na so marparbuehon na denggan, sitabaon do, gabe bolong nama tu api.

²⁰Asa sian angka parbuena do tandaonmuna nasida!

²¹(IV.) Ndada saluhut halak, na mandok Ahu Tuhanna, bongot sogot tu harajaon banua ginjang i, holan angka na mangulahon lomo ni roha ni Damang na di banua ginjang i do!

²²Ai torop do sogot di ari parpudi na mandok tu Ahu: Ale Tuhan! Ale Tuhan! Nda manurirangi hami nahinan mangasahon Goarmu? Nda hupabali hami najolo angka sibolis mangasahon Goarmu? Nda lan angka ulaon na balga huula hami mangasahon Goarmu?

²³Dung i dohononku ma tu nasida: Nandang dung hutanda hamu; laho ma hamu sian lambungkon, hamu angka na mambahen na so jadi!

²⁴Asa na umbege hatangki jala diulahon, sipatudoson ma i tu halak na marroha, na paulihon bagasna diatas batu mamak.

²⁵Ia ro pe udan potir, mangalantap pe tangkuju jala pur pe habahaba manondong bagas i, ndang na marumpak, ai batu mamak do haojahanna.

²⁶Alai na umbege hatangki, hape ndang diulahon, i ma sipatudoson tu halak na oto, na paulihon bagasna di atas rihit.

²⁷ Dung i ro ma udan potir, mangalantap ma tangkuju, pur ma dohot habahaba manondong bagas i, gabe marumpak ma, pola tung marongso.

²⁸ Jadi dung sidung dihatahon Jesus angka hata ondeng, tarhatotong ma natorop i umbege podana i.

²⁹ Ai na marsahala do pangajarionna di nasida, ndada songon pamodaion ni angka sibotosurat.

8¹ (I.) Jadi mijur ma Jesus sian dolok i, dung i mansai torop ma halak mangihuthon Ibana.

² Dung i ro ma sada halak na huliton sumomba Ibana, huhut ma didok: Ale Tuhan, molo na olo Ho, tarpaia Ho do ahu!

³ Jadi disurdukkon Jesus ma tanganna, laos dijama ma, huhut ma didok: Na olo do Ahu; ias ma ho! Jadi pintor malum ma hulitna i.

⁴ Dung i didok Jesus ma mandok ibana: Manat ma ho; unang paboaboa manang tu ise; alai laho ma ho, patuduhon ma dirim tu malim; dung i pelehon ma na nidokkon ni si Musa sipelehononmu, gabe panindangion tu nasida.

⁵ (II.) Dung i bongot ma Jesus tu huta Kapernaum, jadi ro ma tu jolona sada induk ni soldadu mangelehelek Ibana, ninna ma:

⁶ Ale Tuhan, sai peak do naposongku di jabungku; na sarion do ibana, mansai bernit diahap.

⁷Dung i ninna Jesus ma mandok ibana: Ro pe Ahu pamalum sahithna.

⁸Dung i didok induk ni soldadu i ma mangalusi: Ale Tuhan, na hurang tama do ahu, tung degeonmu jabungku; dok ma hata sisandok, asa hipas naposongki!

⁹Ai gari ahu, jolma na nirajaan, na mangarajai soldadu; molo hudok tu na sada: Tu sadu i ma ho!, laho do ibana; ia tu na sada: Tu on ma ho!, ba, ro do ibana; jala ia hudok tu naposongku: On ma bahen!, jadi i do dibahen.

¹⁰Jadi longang ma roha ni Jesus umbegesa, gabe didok ma mandok angka na mangihuthon Ibana: Na tutu do na hudok on tu hamu: Gari di halak Israel, ndang jumpang Ahu haporseaon na songon i!

¹¹Alai hudok ma tu hamu: Torop do na ro sogot sian purba dohot sian pastima, gabe dongan sapanganan ni si Abraham dohot si Isak dohot si Jakkob di harajaon banua ginjang i.

¹²Alai anggo angka anak ni Harajaon i hian, sipabalion do i sogot tu na holom marimpotimpot; disi ma masa angguhangguk dohot na patungoripon.

¹³Laos didok Jesus ma mandok induk ni soldadu i: Laho ma ho, jumpang ho ma hombar tu haporseaonmi! Jadi hipas ma naposona i di na sangombas i.

¹⁴ (III.) Dung i ro ma Jesus tu bagas ni si Petrus, jadi peak ma diida simatua boru ni si Petrus i panepaneon.

¹⁵ Jadi dijama ma tanganna, dung i ditadingkon panepane i ma ibana; laos hehe do marhobasi di Ibana.

¹⁶ Alai dung bot arina i, dipamboan halak ma tu lambungna torop na sinonggopan ni angka sibolis. Hatana do dibahen pabalihon sibolis i jala dipamalum do saluhutna angka na marniae,

¹⁷ asa jumpang na nidok ni panurirang Jesaya: "Ibana do mangusung pardangolanta jala angka sahitta diporsan."

¹⁸ Asa dung diida Jesus torop ni halak na mangkaliangi Ibana, didokkon ma taripar tu bariba an.

¹⁹ (IV.) Jadi ro ma sada sibotosurat mandok tu Ibana: Ale Guru, sai naeng ihuthononku do Ho, manang tudia pe Ho laho!

²⁰ Dung i didok Jesus ma mandok ibana: Na marliang do angka antuasus, na marasar do pidong angka na martongatonga langit; alai anggo di Anak ni jolma i ndang adong hapeahan ni uluna!

²¹ Jadi adong ma sahalak sian angka siseanna na mandok tu Ibana: Ale Tuhan; ua, loas ahu jolo mananom damang!

²² Alai ninna Jesus ma mandok Ibana: Ahu ma ihuthon! Angka na mate i ma pasombu mananom na matena!

²³Dung i bongot ma Ibana tu parau, jadi diihuthon angka siseanna ma Ibana.

²⁴Dung i ro ma habahaba siampalautus di tao i, pola dilungkupi angka galumbang i parau i; alai na tarpodom do anggo Ibana.

²⁵Jadi didapothon angka sisean i ma Ibana, disungguli ma, didok ma: Ale Tuhan, urupi ma; na mago ma hami!

²⁶Dung i ninna ma mandok nasida: Na mabiar do hamu hape, hamu parhaporseaon na metmet? Laos hehe ma Ibana, hona hata ma alogo dohot tao i dibahen, gabe menak situtu ma.

²⁷Alai tarhalomong ma roha ni jolma i, angka ninna ma: Halak dia do On? Guru dokna do hape alogo nang tao i!

²⁸(V.) Asa dung sahat Ibana ro di bariba i, tu luat ni halak Gadara, ro ma sian parbandaan dua halak na sinonggopan ni sibolis manjumpangkon Ibana. Mansai jorbut do nasida, pola so tarbolus manang ise dalan i.

²⁹Dung i joujou ma nasida, ninna ma: Oe, marhua Ho tu hami; Ho, Anak ni Debata! Na ro do Ho hape mangarsahi hami, di na so tingkina dope?

³⁰Alai tongon ma manjampali babi sapunguan bolon, ndang pola dao sian nasida.

³¹Dung i dipangido angka sibolis i ma tu Ibana, ninna ma: Molo ingkon pabalionmu

hami, suru ma hami mambongoti babi na sapunguan an!

³²Dung i didok ma mandok nasida: Antong, laho ma ne hamu! Dung i haruar ma nasida, laho songgop tu angka babi i. Dung i marbubur ma babi na sapunguan i sian tolping i tu tao, laos mate mogap di aek i.

³³Dung i maporus ma angka parmahan i, laho tu huta i, dipaboa ma saluhutna, nang taringot tu jolma na sinonggopan ni sibolis i hian.

³⁴Dung i ruar ma saluhut pangisi ni huta i mandapothon Jesus; jadi dung diida, dipangido ma tu Ibana, anggiat ditadingkon luatnasida.

9¹ (I.) Dung i bongot ma Ibana tu parau, ditaripari ma tao i, jadi sahat ma Ibana tu hutana.

²Dung i diboan na mamboan ma tu jolona sada halak na sarion, na peak di podomanna. Jadi disi diida Jesus haporseaonnasida, ninna ma mandok na sarion i: Pos ma roham, ale anaha; nunga sesa dosam!

³Alai didok deba sian angka sibotosurat ma di bagasan rohanasida: Na mangaleai Debata do Halak on!

⁴Diboto Jesus ma pingkiran ni rohanasida, jadi didok ma mandok nasida: Boasa tung dipingkiri hamu na jahat di bagasan rohamuna?

⁵ Dia do ummomo? Dohonon: Nunga sesa dosam, manang dohonon: Hehe ma ho mardalani?

⁶ Alai asa diboto hamu, marhuaso do Anak nijolma i di tano on manesa dosa didompakkon ma na sarion i mandok: Hehe ma ho, boan ma podomanmi, laho ma muli!

⁷ Jadi hehe ma ibana tutu laho muli.

⁸ Marnida i natorop i, mabiar ma nasida jala dipuji ma Debata, na olo mangalehon huaso sisongon i tu angka jolma.

⁹ (II.) Dung i laho ma Jesus sian i, jadi diida ma sada halak na margoar si Mateus, hundul di parbeoan, gabe didok ma mandok ibana: Ihuthon ma Ahu! Jadi hehe do ibana mangihuthon Jesus.

¹⁰ Dung i uju hundul Ibana mangan di bagasna i, ro ma torop sijalobeo dohot pardosa mangangkupi Jesus dohot angka siseanna.

¹¹ Marnida i angka Parise, ninna nasida ma mandok angka siseanna: Boasa tung mangan gurumuna rap dohot angka sijalobeo dohot pardosa?

¹² Alai dibege Jesus do i, jadi ninna ma: Apala ringkot di angka na hisar pandaoni, di angka na marsahit do!

¹³ Alai laho ma hamu mangguruhon na nidok ni hata on: "Asi ni roha do huhalomohon, ndada pelean!" Ai ndada ro Ahu laho manjou

angka partigor, asa dipauba rohana, angka pardosa do!

¹⁴Dung salpu i, didapothon angka sisean ni si Johannes ma Ibana, didok nasida do: Boasa marpuasai hami dohot angka Parise; ia angka siseanmi ndang marpuasa?

¹⁵Jadi didok Jesus ma mandok nasida: Tung tarbahen ma marsak roha ni pandongani ni pangoli, saleleng rap dope dohot nasida pangoli i? Alai na ro ma arina, buatonna ma disi Pangoli i sian lambungnasida; disi ma nasida marpuasa.

¹⁶Angkup ni i: Nandang adong na mandungkaphon abit na imbaru tu abit naung mumut, ai ribakkonon ni na nidungkaphon i do dirina sian pandungkapanna i, jadi lam tu ruakna ma na maribak i.

¹⁷Nandang dipaindingjolma tuak anggur siraruan tu poting naung buruk, aik mapultak poting i gabe bolong tuak i, laos sega dohot ingananna; tu poting na imbaru do bahenon tuak siraruan i, jadi simpan be ma!

¹⁸(III.) Uju dihatahon dope hata ondeng tu nasida, nunga ro sada halak na sangap marsomba tu Ibana, huhut ma didok: Ipe mate borungku; alai ro ma Ho mangampehon tanganmu tu ibana, asa sumuang mangolu!

¹⁹Jadi hehe ma Jesus rap dohot siseanna, laho mangihuthon ibana.

²⁰Dung i tongon ma adong sada boruboru na tamaningon bulan on, leleng ni sampuludua

taon, na ro sian pudina manjama rambu ni ulosna;

²¹ ai ninna rohana di bagasan: Nanggo pala ulosna hujama, mangolu ma ahu!

²² Dung i humusor ma Jesus, dibereng ma ibana, laos ninna ma: Pos ma roham, ale inang, haporseaonmi do na panguluhon ho! Dung i hipas ma boruboru i olat ni na sangombas i.

²³ Asa dung sahat Jesus ro di bagas ni na sangap i, diida ma angka pangondasi dohot natorop oruk.

²⁴ Jadi didok ma: Laho ma hamu, ai ndada na mate si betet on; na modom do! Jadi diparengkeli nasida do Ibana.

²⁵ Asa dung dipalaho natorop i, bongot ma Ibana, ditangkap ma tanganna, jadi mulak mangolu ma dakdanak i.

²⁶ Dung i sar ma barita i tu na saluat i.

²⁷ (IV.) Dung i laho ma Jesus sian i, jadi adong ma dua halak na mapitung mangihutihut Ibana, huhut gogo manjoujou: Ale Anak ni si Daud! Asi ma roham di hami!

²⁸ Jadi laho bongot tu jabu i Jesus, didapothon angka na mapitung ondeng ma Ibana, gabe didok ma mandok nasida: Ai dihaporseai hamu do Ahu margogo patupahon i? Jadi didok nasida ma mandok Ibana: I do, Tuhan!

²⁹Gabe dijama ma matanasida huhut ma didok: Marguru tu haporseaonmuna ma jumpang hamu!

³⁰Jadi saut ma buha matanasida. Dung i gogo ma dipopai Jesus nasida, didok ma: Jaga ma hamu! So tung adong manang ise na umbotosa!

³¹Alai laho do nasida, dipanghatahatahon ma Ibana tu sude nasida na saluat i.

³²Laho tu balian dope nasida ondeng, nunga adong na mamboan tu jolona sada halak na ngungu, hasiaran ni sibolis.

³³Jadi dung bali sibolis i, mangkatai ma na ngungu i. Longang ma antong natorop i, angka ninna ma: Nandang dung tarida dope sisongon i di bangso Israel on!

³⁴Alai didok angka Parise ma: Dipabali Halak on do angka sibolis mangasahon sintua ni sibolis i!

³⁵(V.) Jadi sai mardalani do Jesus mangaliati angka huta ro di angka sosor, mangajari di angka parguruannasida, manurasihon barita na uli taringot tu Harajaon i; dipamalum do nasa sahit dohot tihasnasida.

³⁶Jadi mamereng natorop i, asi ma rohana, ai maheu jala marhinamago do nasida diida songon birubiru na so marparmahan.

³⁷Laos ninna ma mandok siseanna: Bidang do nian sisabion, alai otik do anggo angka pangula.

³⁸Onpe, elehelek hamu ma Nampuna sisabion i, anggiat dipaborhat angka pangula tu sisabionna i!

10¹ (I.) Jadi dijou Jesus ma siseanna na sampuludua i tu jolona, dilehon ma tu nasida sahala mangalo dompak angka tondi na hodar, laho pabalihonsa jala laho pamalum nasa sahiti dohot tihasi.

²Langgo goar ni apostel na sampuludua i, angka on do: Na parjolo si Simon, na ginoar huhut si Petrus, dohot donganna saama si Andreas; dung i si Jakobus dohot donganna saama si Johannes, i ma angka anak ni si Sebedeus;

³dung i si Pilippus dohot si Bartolomeus; si Tomas dohot si Mateus, sijalobeo i; dung i si Jakobus, anak ni si Alpeus, dohot si Tadeus;

⁴dung i si Simon, halak Kana, dohot si Judas Iskariot, parjehe i.

⁵Na sampuludua ondeng ma disuru Jesus, dipatihi ma nasida, ninna ma: Unang tondong hamu dalan na tu halak sipelebegu, jala unang topot hamu tu huta ni halak Samaria!

⁶Tu angka birubiru na mago na sian pinompar ni halak Israel sambing ma hamu laho!

⁷Alai borhat ma hamu mamaritahon hata on: Nunga songgop harajaon banua ginjang i!

⁸Pamalum hamu ma sahiti ni na marsahiti, pangolu hamu ma angkana mate, ias ma bahen hamu angka na huliton, pabali hamu

ma angka sibolis! Sibasabasa do i tu hamu;
antong, basabasahon hamu ma i!

⁹Unang ma sarihon hamu hian sere, manang perak, manang hepeng tu hohosmuna,

¹⁰manang singkop siboanon tu pardalanan,
manang ulos dua, songon i nang sipatu
manang tungkot pe; ai tama do dapotan
bohalna pangula.

¹¹Alai laho mambongoti huta manang
sosor pe, diori hamu ma disi halak na
tama soranganmuna, jadi disi ma hamu
manongtong, paima borhat muse.

¹²Jala laho mambongoti jabu i, tabii hamu
ma nasida!

¹³Laos songgop ma damemuna tu isi ni jabu
i, anggo na tama nasida manjalosa; alai molo
so i, mulak ma tu hamuna damemuna i.

¹⁴Jadi anggo so dijangkon nasida hamu
manang so olo tumangihon hatamuna,
tadingkon hamu ma bagas dohot hutanasida,
laos pirpirhon hamu ma dompak nasida nang
orbuk na lohok di patmuna!

¹⁵Situtu do na hudok on tu hamu: Numeang
do sitaonon ni luat Sodom dohot Gumora di
ari uhum sogot, unang huta ondeng.

¹⁶Husuru do hamu songon birubiru tu
tongatonga ni angka babiat; dibahen i pantas
ma hamu marroha songon ulok, huhut lidang
ma rohamuna songon darapati!

¹⁷Jaga ma hamu di angka jolma, ai
pasahatonna do hamu tu angka paruhuman,

jala linsinganna do hamu di angka parguruannasida.

¹⁸Toguonnasida do hamu tu jolo ni angka panggomgomi dohot tu jolo ni angka raja ala ni Ahu, bahen panindangion tu nasida dohot tu angka sipelebegu.

¹⁹Alai jumpa dipajongjong nasida hamu, unang ma holsoan rohamu di sidohononmuna i, ai di na sangombas i do lehononna tu hamu hata sidohononmuna i.

²⁰Ai apala hamu na mandok hata disi; Tondi ni Amamuna do marturasi di bagasan hamu.

²¹Pasahaton ni hahana do anggina tu hamatean, jala pasahaton ni amaama do anakna; jala na hehe do angka anakkon dompak natorasna, laho pabunuhonsa.

²²Hosoman ni saluhutjolma do hamu ala ni Goarhu; alai nasa na manahan ro di ujungna, i do paluaonna!

²³Ia dilele nasida hamu sian huta na sada, maporus ma hamu tu huta na asing, ai na tutu do na hudok on tu hamu: Ndang sanga toptonmuna sude huta na di tano Israel, nunga ro Anak ni jolma i.

²⁴Apala sumurung anak sisean sian guruna, manang naposo sian indukna.

²⁵Nunga antong jadi di anak sisean i, molo songon na di guruna di ibana; nang di naposo, molo songon na di indukna di ibana. Molo digoar halak nampuna bagas si Belsebul, lam

tu donganna sajabu ma, lam so dohononna
sisongon i!

²⁶Unang ma habiari hamu nasida, ai ndang
adong na holip, na so sipapataron sogot; jala
ndang adong na buni, na so dapot botoon
sogot.

²⁷Na hupaboa tu hamu di na holom, hatahon
hamu ma i di na tiur; na huhusiphon tu
pinggolmuna, baritahon hamu ma i di angka
partungkoan!

²⁸Unang pola mabiar hamu mida angka na
mambunu daging, angka na so tuk mambunu
tondi; alai na marhuaso mangagohon daging
dohot tondi tu na roko, i do sihabiaranmuna.

²⁹Nda digadis halak dua amporik arga
sauang? Alai ndang madabu nanggo sada
sisongon i tu tano, anggo so binoto ni
Amamuna.

³⁰Ianggo di hamu, gari obuk saluhutna na di
ulumuna i nunga dibilang.

³¹Dibahen i unang ma hamu mabiar, ai
ummangat dope hamu sian torop amporik!

³²Ai ganup na mangkatindangkon Ahu di
jolo ni jolma, i do hatindangkononku di jolo ni
Damang na di banua ginjang i;

³³alai ganup na mansoadahon Ahu di jolo
ni jolma, laos soadahononku do i di jolo ni
Damang na di banua ginjang i!

³⁴Unang ma dirimpu rohamuna, na
mamboan dame Ahu, umbahen na ro tu tano

on; ndada na ro Ahu mamboan dame, tung podang do!

³⁵Ai na ro do Ahu pabadahon anak tu amana, boru tu inana, parumaen tu simatuana boru;

³⁶Jala tung donganna sajabu gabe musu ni jolma i.

³⁷Na humolong roha di amana manang di inana asa di Ahu, ndang tama i siseanku; jala na humolong roha di anakna dohot di boruna asa di Ahu, ndang tama i siseanku.

³⁸Jala na so mamorsan silang na tu ibana i, laho mangihuthon Ahu, ndang na tama i siseanku.

³⁹Ai na marhamaolhon ngoluna, ngolu ni i do na mago sogot; alai na sumeahon ngoluna ala ni Ahu, i do jumpangan ngolu sogot.

⁴⁰Na manjangkon hamu, Ahu do jinangkonna: Jala na manjangkon Ahu, Na marsuru Ahu do jinangkonna disi.

⁴¹Na manjangkon panurirang, ala targoar panurirang, dapotan upa ni panurirang; na manjangkon partigor, ala targoar partigor, dapotan upa ni partigor.

⁴²Na painumhon aek tabar santahu tu sahalak sian angka na metmet on, ala targoar siseanku ibana: Na tutu situtu do na hudok on tu hamu, ndang na mago upana!

11 ¹(I.) Jadi dung sun dipatihi Jesus siseanna na sampuludua i, hehe ma Ibana sian i, laho mangajari dohot marjamita di angka hutanasida.

²Alai dibege si Johannes na tarhurung i do barita ni angka na binahen ni Kristus i, jadi disuru ma siseanna manungkun Ibana:

³Ho do na naeng ro i, manang na asing dope sipaimaonnami?

⁴Dung i didok Jesus ma mangalusi nasida: Mulak ma hamu, baritahon hamu ma tu si Johannes i angka na binege dohot na niidamuna on:

⁵Na gabe marnida do angka na mapitung, na mardalani do angka na lumpuon, na gabe ias do angka na huliton, na marbinege do angka na nengel na mulak mangolu do angka na mate; tu angka na pogos do binoan barita na uli.

⁶Jala martua do na so targasip di Ahu!

⁷Jadi dung laho nasida, ditaringoti Jesus ma si Johannes tu natorop i: Aha do na naeng idaonmuna, umbahen na laho hamu tu halongonan? Arung na meoleol na niullus ni alogo do?

⁸Manang na naeng idaonmuna do sahalak parabit na lamot? Di jabu ni angka na raja do anggo parabit na lamot.

⁹Manang na naeng idaonmuna do tahe panurirang? Olo, hudok ma tu hamu: Sumurung do ibana sian panurirang.

¹⁰Ibana do na nidok ni hata on: "Ahu ma marsuru suruanki patujolom, sipature dalammu di jolomi."

¹¹ Na tutu do na hudok on tu hamu: Ndang adong na hehe sian jolma, na tinubuhon ni parompuan, na umbalga sian si Johannes pandidi; alai halak na ummetmet pe, naung di bagasan harajaon banua ginjang i, umbalga do i sian ibana.

¹² Alai olat ni angka ari ni si Johannes pandidi tu jolo on sigogoan do harajaon banua ginjang i, jala angka sibahen gogo do mangaithonsa.

¹³ Ai intap si Johannes nama panurirangon ni sude angka panurirang dohot patik i.

¹⁴ Jadi molo tartangkup rohamuna i: Ibana do si Elia, na naeng ro i!

¹⁵ Hamu angka na marpinggol, pinggol hamu ma i!

¹⁶ Alai tu ise ma tahe patudosonku bangso on? Tudos ma nasida tu dakdanak na hundul di paronanan, angka na manjoujou di angka donganna dakdanak, mandok:

¹⁷ Hupalui hami suling di jolomu, so haru manortor hamu; andung hupatubegehon hami tu hamu, so saut hamu tangis!

¹⁸ Ai na ro do si Johannes, ndang parpapangan, ndang parminum, gabe dipandok: Sibolis do di ibana.

¹⁹ Ia ro Anak ni jolma i, na olo mangan jala minum, gabe didok: Ndi, Halak on, sipapangan mago jala sisobur tuak anggur, aleale ni sijalobeo dohot, pardosa! Gabe

pintor do Hapistaran i dipintori angka pambahenanna i.

²⁰(II.) Dung i ditorui Jesus ma huta, angka naung gumodang marnida hagogoonna i, ala so muba rohanasida, ninna do:

²¹Marjea ma ho, Korasin! Marjea ma ho, Betsaida! Ai aut di huta Tirus dohot Sidon dipamasa hagogoona angka na masa di hamu, ndang tarbahen so paubaonna rohana uju i, marabithon goni, hundul di orbuk!

²²Angkup ni i, hudok ma di hamu: Neang do sitaonon ni pangisi ni huta Tirus dohot Sidon di ari uhum i, martimbangkon sitaononmuna.

²³Ia ho Kapernaum! Nda na pinatimbo ho ro di langit an? Sidabuhononhon do ho sahat tu api na roko! Ai aut di huta Sodom dipamasa hagogoona angka na masa di bagasan ho, ndang tarbahen so hot dope huta i rasirasa sadari on!

²⁴Angkup ni i, hudok ma di hamu: Neang do sitaonon ni pangisi ni huta Sodom di ari uhum i, martimbangkon sitaononmuna!

²⁵(III.) Uju i ma didok Jesus hatana songon on: Hupuji Ho, Amang, Tuhan na manggomgomi banua ginjang dohot tano on, ala ditamondingkon Ho hata i sian jolo ni angka na pistar dohot na marroha, gabe dipapatar Ho i tu angka siondihononhon.

²⁶Olo, Amang, ai i do dihalomohon roham hian.

²⁷ Saluhutna i, nunga dipasahat Damang tu Ahu; asa ndang adong na tumanda Anak i dungkon ni Ama i; Ama i pe, ndang adong na tumanda i, ia so holan Anak i, angkup ni na pinodaan ni Anak i, mangihuthon lomo ni rohana.

²⁸ Ro ma hamu tu Ahu, hamu angka na loja jala na sorat, asa hupasonang hamu!

²⁹ Jangkon hamu ma augangku, marguru ma hamu tu Ahu, ai na lambok do Ahu jala na serep marroha, asa dapotan hasonangan tondimuna.

³⁰ Ai lambok do augangku jala neang do dohot na hupaporsanhon.

12¹ (I.) Dung i mamolus ma Jesus sian tonga ni hauma, tongon di ari Sabbat i, jala digotili angka siseanna ma eme i, ala naung male dihilala, laos digugut.

² Marnida i angka Parise, ninna nasida ma mandok Ibana: Bereng! Indi, siseanmi! Diulahon nasida do na so jadi di ari Sabbat!

³ Dung i ninna ma mandok nasida: Nandang dung dijaha hamu huroha na binahen ni si Daud, uju male ibana rap dohot angka donganna sauduran?

⁴ Ai dibongoti do joro ni Debata, gabe dipangan nasida do roti na marhadohoan, na so jadi panganonna manang panganon ni angka donganna pe, nda holan angka malim i do nian.

⁵Manang na so dung ulaning dijaha hamu di buku patik i, na so sala hape angka malim jumpa ari Sabbath di bagasan joro i, nang pe dilaosi patik ari Sabbath i?

⁶Alai hudok ma tu hamu: Na sumurung sian bagas joro i do On!

⁷Alai ndang tagamon uhumonmuna nasida na so marsala i, aut na diboto hamu na nidok ni hata on: "Asi ni roha do huhalomohon, ndada anggo pelean."

⁸Ai guru di Anak ni jolma i do nang ari Sabbath i!

⁹(II.) Jadi hehe ma Ibana sian i, dibongoti ma parguruannasida.

¹⁰Jala adong ma disi sada halak naung mate tanganna sambariba, jala disungkun nasida ma Ibana: Ai na jadi do pamalumon sahiti di ari Sabbath? Alai na naeng aluhononnasida do Ibana nian.

¹¹Alai ninna ma mandok nasida: Ise sian hamu na marbirubiru sada, na so laho manahopi i jala manaiti tu ginjang, ia tung targodung i di ari Sabbath?

¹²Nda andul sumurung ma antong jolma sian birubiru! Asa na jadi do mambahen na denggan di ari Sabbath.

¹³Dung i ninna ma mandok jolma i: Patoltol ma tanganmi! Jadi dipatoltol ma, gabe sumuang ma hisar songon tanganna na sada nari.

¹⁴ Jadi ruar ma angka Parise i martuptup i, manang beha bahenonnasida mambunu Ibana.

¹⁵ Dung diboto Jesus tahinasida, sumurut ma Ibana sian i. Anggo natorop i, diihuthon do Ibana, jadi dipamalum ma sahithnasida saluhutna.

¹⁶ Jala gomos ma nasida dipopai, asa unang dipaboaboa nasida Ibana.

¹⁷ Asa jumpang na nidok ni panurirang Jesaya:

¹⁸ "Ida ma naposongku na hupillit i, haholonganku jala hasoloan ni rohangku do Ibana; ampehononku do Tondingku tu Ibana, jala lumbahononna ma uhum tu angka bangso.

¹⁹ Nandang olo Ibana mangkuling tomputompu, jala ndang dipagogo soarana; ndang tarbege Ibana di adaran na bidang.

²⁰ Nandang ponggolhononna arung naung marosak, jala ndang na intopanna sumbu na marnehetnehet; ingkon sahat do pamonangonna uhum i.

²¹ Gabe tu Goarna ma marhaposan angka bangso!"

²² (III.) Dung i tarboan ma tu jolona sada halak partondi na hodar, na mapitung jala na ngungu; jadi malum do ibana dibahen, gabe mangkatai ma ibana huhut marnida.

²³ Jadi tarhalomong ma halak natorop i saluhutna, didok nasida ma: Nda tung On Anak ni si Daud ulaning?

²⁴ Umbege i angka Parise, ninna nasida ma: Si Beelsebul, induk ni angka sibolis, do dipangasahon Ibana, laho pabalihon angka tondi na hodar.

²⁵ Alai diboto Jesus do pingkiran ni rohanasida, jadi ninna ma mandok nasida: Pesan do ganup harajaon na marsalisi sama dirina, jala ndang na hot be manang huta manang bagas na marsalisi dohot dirina.

²⁶ Asa molo dipabali sibolis i donganna sibolis, marsalisi nasida sama nasida.

²⁷ Jala molo tung Ahu pabalihon angka sibolis mangasahon si Beelsebul, na mangasahon ise do huroha angka anakmuna laho pabalihonsa? Onpe, nasida do manguhumi hamu disi.

²⁸ Alai anggo Ahu pabalihon angka sibolis i mangasahon Tondi ni Debata, naung songgop ma tahe harajaon ni Debata tu hamu!

²⁹ Tung habongotan halak ma jabu ni ulubalang jala mangarampas ugasanna, anggo so jumolo diihoti ulubalang i? Nda dung pe i, asa tarbuatsa ugasanna?

³⁰ Na so mandongani Ahu, alongku do i; jala na so donganku papunguhon, na paserakkon do i.

³¹ Dibahen i hudok ma tu hamu: Tarsesa do sogot nasa dosa ni halak ro di panginsahion,

alai ndang sesaon anggo panginsahion
dompok Tondi i.

³²Asa molo adong na mandok hatana
mangalo Anak ni jolma i, hasesaan do i; alai
molo adong na mandok hatana mangalo Tondi
Parbadia i, ndang na sesa anggo i, manang di
hasiangan on, nang di na ro sogot.

³³Molo hau na denggan sinuan, na denggan
ma antong parbuena; molo hau na roa
sinuan, gabe roa do parbuena, ai matua sian
parbuena do tandaon hau.

³⁴E hamu anak ni ulok, tung tarbahen hamu
angka na jahat i ma mangkatahon hata na
denggan? Ai ia i na manggohi roha, matua i
do hatahonon ni pamangan.

³⁵Dirungkari halak na denggan roha do
angka hadengganon sian arta na denggan na
pineopna i; jala anggo halak na jahat roha,
angka hajahaton do rungkaranna sian na jat
na pineopna hian.

³⁶Alai hudok ma tu hamuna: Ingkon maralus
do jolma sogot di ari uhum i taringot tu nasa
hata na so gabeak na hinatahonna i.

³⁷Ai marguru tu angka hatami do ho
pintoranna manang uhumonna sogot.

³⁸Dung i ninna na deba sian angka
Parise dohot sibotosurat ma mangalusi:
Ale Guru, naeng idaonnami do sada tanda
sipatupaonmu!

³⁹Alai ninna ma mangalusi nasida: Na
mangido tanda do bangso na jahat jala na

mangalangkup on; alai ndang lehonon tanda tu nasida, ia so holan tanda na masa tu panurirang si Jonas:

⁴⁰Ai songon si Jonas i tolu ari tolu borngin di bagasan butuha ni dengke na bolon, songon i ma muse Anak ni jolma i di bagasan tano, tolu ari tolu borngin lelengna.

⁴¹Na hehe do sogot halak Ninive di paruhuman i dompak bangso na sansundut on, mangkonahon uhum tusi, ai dipauba do rohanasida, umbege jamita ni si Jonas. Jala ida ma, On do na sumurung sian si Jonas i!

⁴²Na hehe do sogot di paruhuman i raja boruboru na sian dangsina i dompak halak na sansundut on, mangkonahon uhum tusi, ai na ro do nasida sian luat na sai dao mananginangi hamaloon ni si Salamo. Ida ma, On do na sumurung sian si Salomo!

⁴³Alai dung bali tondi na hodar sian jolma, didalani ma angka inganan na hasang, mangalului paradianan, jala ndang jumpangsa.

⁴⁴Gabe didok ma: Mulak nama ahu tu ingananku na hutadingkon i! Jadi di na ro ibana, rumar ma i didapot, nunga disapu jala dipalehet.

⁴⁵Dung i borhat ma ibana mangarahon pitutondi na asing, angka na jumahat sian ibana, laos dibongoti ma laho maringanan tusi; jadi jumahat ma pangalaho ni jolma i

di ujungna sian di mulana i. Songon i nama songgop tu bangso na jahat on!

⁴⁶(IV.) Jadi di na mangkatai dope Ibana dohot natorop i, nunga jongjong di duru inana rap dohot angka anggina, naeng mangkatai dohot Ibana.

⁴⁷Dung i adong ma na paboahon: Di balian an do inangmu dohot angka anggim, naeng mangkatai dohot Ho!

⁴⁸Alai ninna ma mangalusi na paboahon i: Ise do goaron dainang, jala ise do dohonon anggingku?

⁴⁹Jadi dipaherbang ma tanganna tu ginjang ni angka siseanna, huhut ma didok: Angka on do dainang dohot anggingku!

⁵⁰Ai na mangulahon lomo ni roha ni Damang na di banua ginjang, i do anggingku, i do ibotongku, i do dainang!

13¹(I.) Di na sadari ruar ma Jesus sian bagas i, laho hundul tu pasir ni tao.

²Jadi marpungu ma torop halak tu jolona, gabe dipanaek Ibana ma sada parau laho hundul tusi, jala sude natorop i jongjong do di pasir i.

³Dung i godang ma dihatahon tu nasida, huhut pangke umpama, ninna ma: Na laho tu balian do sahalak panabur laho manabur.

⁴Jadi di na manabur i ibana, adong ma boni i deba na mamiltik tu dalan, dung i ro ma angka pidong mamarguti.

⁵Alai anggo na deba, tu tano na batu on do madabu, di na so sadia hapal tano, jadi tibu ma tubu, dibahen na so bagas tano disi.

⁶Alai di na lam timbo mata ni ari, rahar ma; gabe mate, ala so marurat.

⁷Anggo na deba, tu parsihupian do madabu, laos tubu do angka sihupi i, gabe dipisati ma eme i.

⁸Alai na deba nari, tu tano na denggan i do madabu, gabe saut ma marparbue, saratus lompit do na deba, onompulu lompit do na deba, jala tolupulu lompit do na deba.

⁹Hamu angka na marpinggol, pinggol hamu ma i!

¹⁰Dung i didapothon angka siseanna ma Ibana mandok: Boasa marumpama Ho marjamita tu nasida?

¹¹Alai ninna ma mangalusi nasida. Ala ni on do: Sibasabasa do i tu hamu, umbahen na ditanda hamu angka hasimoon ni harajaon banua ginjang i; alai ndang dibasabasahon i anggo tu nasida.

¹²Ai tu ganup paradongan lehonon do jala pasuksuhon. Alai buaton ma sian na so paradongan na adong di ibana hian.

¹³I do alana, umbahen na marumpama Ahu manjamitai nasida, ai marnida nasida, so haru diida, jala marbinege nasida, so haru dibege, jala ndang diantusi.

¹⁴Asa naung jumpang ma di nasida na sinurirangkon ni si Jesaya na mandok:

"Begeon ni sipareonmuna do i nian, matua so antusanmuna; simalolongmuna do marnidasa nian, matua so tandaonmuna.

¹⁵Naung tangkang do roha ni bangso on jala maingol do pinggolna, dipapitpit do matana, asa unang marnida simalolongna, unang marbinege sipareonna, jala unang mangantusi rohana, asa unang mulak jala unang malum nasida bahenonku."

¹⁶Alai martua do simalolongmuna ala marnida, dohot sipareonmuna ala marbinege!

¹⁷Ai na tutu do na hudok on tu hamu: Torop do angka panurirang dohot angka partigor, angka na masihol naeng idaonna nian naung niidamuna, hape ndang diida, jala naeng begeonna nian naung binegemuna, hape ndang dibege.

¹⁸Onpe, tangihon hamu ma umpama taringot tu panabur i!

¹⁹Tu ganup na umbege hata Harajaon i, anggo so diantusi, ro do parjahat i, mangarampasi na sinaburhon tu rohana i. I ma na sinaburhon tu dalan i.

²⁰Alai na sinaburhon tu na batu on, i ma na umbege hata i, gabe manigor las ma rohana manjangkon.

²¹Alai ndang marurat di bagasan rohana; parsatongkinan do ibana, ai pintor targasip do rohana, di na songgop haporsuhon manang pangaleleon siala Hata i.

²²Alai anggo na sinaburhon tu parsihupian i, i ma na umbege hata i, gabe pangkolsohonna di angka na di hasiangan on dohot hamoraon sipangansi i do mamisati hata i, jadi ndang saut marparbue.

²³Alai anggo na sinaburhon tu tano na denggan, i do na umbege hata i jala diantusi, laos i do na saut marparbue. Ia parbuena: Saratus lompit do na deba, onompulu lompit do na deba, tolupulu lompit anggo na deba.

²⁴Dung i umpama na asing ma dipatubegehon tu nasida, ninna ma: Tudos do harajaon banua ginjaang i tu sada halak na manaburhon boni na denggan tu haumana.

²⁵Alai di na modom halak, ro ma musuna, manaburhon simaremeeme, tu holangholang ni eme i, laos laho sian i.

²⁶Alai dung marbuhu tano jala martahi boltokon eme i, tanda ma dohot simaremeeme i.

²⁷Jala ditopot angka naposo ma parhauma i, ninna ma: Rajanami, nda boni na denggan do na disaburhon ho tu haumami? Sian dia do simaremeeme i?

²⁸Alai didok ma tu nasida: Musu i do mambahen i. Dung i didok angka naposo i ma tu ibana: Denggan do di roham, hami laho palunggukkon?

²⁹Dung i ninna ma: Ndangana, so tung dohot eme i dibutbuti hamu, laho palunggukkon simaremeeme i.

³⁰Pasombu hamu ma i rap magodang paima gotilon; dung i dohononku ma di masa ni gotilon i tu angka panabi: Jumolo ma palunggukkon hamu simaremeeme i, dung i rahuti hamu ma sasambobok asa tinutung; alai anggo eme i, papungu hamu ma tu spongku!

³¹Dung i didok ma umpama na asing tu nasida: Tudos do harajaon banua ginjang i tu batu ni siarum, na binuat ni sada halak laho manaburhon tu porlakna.

³²I do sada na ummetmet sian nasa ragam ni boni; alai dung tubu, gabe umbalga do i sian nasa ingkau rata, pola hira hau do, jala ro do angka pidong na martongatonga langit marasar tu rantingna.

³³Dung i umpama na asing muse dihatahon tu natorop: Tudos do harajaon banua ginjang i tu itak naung niasoman, na binuat ni sahalak inaina, laho pasaorhon tu itak tolu ampang, paima asom saluhutna.

³⁴Saluhutna i dihatahon Jesus marhite sian umpama tu natorop; ndang na mangkatai Ibana tu nasida, anggo so marhite sian umpama,

³⁵asa jumpang hinatahon ni panurirang i na mandok: "Huungkap pe pamanganku

mangkatahon umpama, hurungkari pe na buni sian mula ni portibi on."

³⁶Dung i dipamuli ma natorop i. Jala dung sahat Ibana tu jabu, didapothon angka siseanna ma Ibana mandok: Patorang ma tu hami umpama taringot tu simaremeeme na di hauma i!

³⁷Dung i ninna ma mangalusi nasida: Anak ni jolma i do manaburhon boni na denggan i.

³⁸Portibi on do ia panaburan i; ianggo boni na denggan, i do angka anak harajaon i; alai anggo simaremeeme, angka anak ni parjahat do i.

³⁹Sibolis i do musu i na manaburhonsa. Ajal ni hasiangan on do ia ari gotilon; angka surusuruan ni Debata do panggotil i.

⁴⁰Asa songon na pinalunggukna i simaremeeme i jala ditutung tu api, songon i do masa sogot di ajal ni hasiangan on:

⁴¹Ai suruon ni Anak ni jolma i do angka surusuruanna papungupunguhon saluhut sipanggasipi dohot siulahon na so uhum sian harajaonna i.

⁴²Dung i dabuon nasida ma angka i tu liang pamurunan i; disi ma masa angguhangguk dohot na patungoripon.

⁴³Di ari i ma marsinondang angka partigor songon mata ni ari di harajaon ni Amanasida. Hamu angka na marpinggol, pinggol hamu ma i!

⁴⁴Tudos do harajaon banua ginjang i tu arta na buni di sada ladang, gabe adong ma sahalak na jumpangan i jala dibunihon ma. Dung i laho ma ibana di las ni rohana i manggadisi nasa na di ibana, laos dituhor ma ladang i.

⁴⁵Tudos do muse harajaon banua ginjang i tu sahalak partigatiga, na mangalului mutiha na arga.

⁴⁶Jadi dung jumpangsa sada mutiha na arga situtu, laho ma ibana manggadisi nasa na di ibana, laos dituhor ma i.

⁴⁷Tudos do muse harajaon banua ginjang i tu jala na sinampakkon tu laut, gabe marragamragam dapotsa.

⁴⁸Jadi dung gok, ditait ma tu darat, dung i hundul ma nasida mamilliti na denggan, mandabuhonsa tu ingananna; alai dipambolongkon do anggo na so hasea.

⁴⁹Songon i do masa sogot di ajal ni hasiangan on: Borhat do angka surusuruan i manirangkon angka parjahat sian tongatonga ni angka partigor.

⁵⁰Dung i dabuonna ma nasida tu liang pamurunan i; disi ma masa angguhangguk dohot na patungoripon.

⁵¹Nunga diantusi hamu saluhutna i? Jadi didok nasida ma tu Ibana: Nunga.

⁵²Gabe didok ma tu nasida: Onpe, ganup sibotosurat, naung mangguruhon ruhut ni harajaon banua ginjang i, tudos ma i tu sada

na mora, na mangarungkari arta na imbaru dohot naung leleng sian na pineopna i.

⁵³(II.) Jadi dung dipaujung Jesus angka umpama ondeng, laho ma Ibana sian i.

⁵⁴Jadi sahat ma Ibana tu huta hagodanganna, jala diajari ma nasida di parguruannasida, pola tarhalomong nasida, angka ninna ma: Sian dia ma dapot Halak on hapistaran dohot ulaon hagogoon sisongon i?

⁵⁵Nda Ibana anak ni tukang i? Nda si Maria do goar ni inana i, jala angka anggina do si Jakobus, Josep, Simon dohot Judas?

⁵⁶Nda di hita on sude angka ibotona i? Sian dia do dapot Ibana sudena i?

⁵⁷Jadi targasip ma nasida mida Ibana. Alai ninna Jesus ma mandok nasida: Tung na so adong do hasangapon ni panurirang anggo di huta hagodanganna dohot di jabuna.

⁵⁸Gabe ndang haru piga ulaon hagogoon diula disi, ala na so porsea i nasida.

14¹(I.) Sar ma uju i dibege si Herodes, raja na opat i, barita ni Jesus.

²Gabe didok ma tu angka naposona: Ibana do si Johannes pandidi; naung hehe do i sian angka na mate, umbahen na tarpatupasa angka ulaon hagogoon.

³Ai naung ditangkup si Herodes do si Johannes, diihoti jala dihurungkon siala si Herodias, dongan saripe ni anggina si Pilippus.

⁴Ai didok si Johannes do tu ibana: Ndang tama di ho nasida!

⁵Na naeng bunuonna do ibana nian, alai dihabiari do natorop, ai panurirang do ibana dirajumi rohanasida.

⁶Alai di ari hatutubu ni si Herodes manortor ma boru ni si Herodias i di jolonasida, jadi solo ma roha ni si Herodes marnida,

⁷pola maruari ibana, marbagabagahon mangalehon manang dia pe sipangidoonna.

⁸Jadi ninna anak boru naung niajaraan ni inana i ma: Lehon tu ahu dison di atas pinggan ulu ni si Johannes pandidi!

⁹Gondok do nian roha ni raja i; alai ala ni uarina i dohot ala ni angka tamuena i, gabe didokkon ma na mangalehonsa.

¹⁰Asa disuru nama na mamisikkon ulu ni si Johannes di hurungan i.

¹¹Saut ma diboan uluna di atas pinggan, dilehon ma tu anak boru i, gabe diboan tu inana i.

¹²Dung i ro ma angka siseanna i, dialap ma bangkena, laos ditanom, dung i didapothon ma Jesus, laho paboahonsa.

¹³(II.) Alai umbege i, borhat ma Jesus sian i marparau tu luat na lungun, punjung sasadasa. Jadi umbege i natorop, mardalan tur ma nasida sian angka huta i mandapothon Ibana.

¹⁴Dung ro Jesus sian i, diida ma halak mansai torop, jadi asi ma rohana mida

nasida, dipamalum ma angka na marsahit na di nasida.

¹⁵Alai mareak bot ari didapothon siseanna ma Ibana, angka ninna ma: Halongonan do dison jala na bot ne ma ari; pamuli ma natorop i, asa laho nasida tu angka huta manuhor sipanganon!

¹⁶Alai didok Jesus ma tu nasida: Ndang pola laho nasida, lehon hamu ma nasida mangan!

¹⁷Dung i ro ma hatanasida: Holan lima roti dohot dua dengke sambing do hupeop hami dison.

¹⁸Alai ninna ma: Boan hamu ma i tu Ahu!

¹⁹Dung i didokkon ma natorop i hundul di duhutduhut, ditiop ma roti na lima dohot dengke na dua i, manaili ma Ibana tu ginjang laho mamasumasu, dibagi ma roti i, diparlehon ma tu angka siseanna, asa nasida mangalehon tu natorop i.

²⁰Jadi mangan ma saluhutna jadi bosur be ma; dung i dipapungu ma angka ebaeba na lobi i, gok sampuludua ampang.

²¹Alai anggo torop ni baoa na mangan i arga limaribu do, so padohot angka parompuan dohot dakdanak.

²²(III.) Dung i didasdas Jesus ma angka siseanna marparau pajolohon tu bariba an, asa dipamuli jolo natorop i.

²³Jadi dung saut dipamuli, nangkok ma sasadasa tu dolok martangiang. Asa dung bot ari, holan sahalakna ma disi.

²⁴ Alai anggo parau i nunga tarholang sian pasir, jala disosak galumbang i do nasida, ai alo do alogo i tu nasida.

²⁵ Jadi martahi tahuak manuk, ro ma Jesus mandapothon nasida di sisik ni tao.

²⁶ Jadi dung diida sisean i Ibana mardalan di sisik ni tao i, marlangan ma nasida, dirimpu tondi; pola manganguhi be nasida sian biar ni rohanasida.

²⁷ Alai pintor dipanghulingi Jesus ma nasida, ninna ma: Pos ma rohamuna, Ahu do! Unang hamu mabiar!

²⁸ Dung i ninna si Petrus ma mangalusi Ibana: Ale Tuhan, anggo Ho do hape, dokkon ahu ro mandapothon Ho, mardalan sian aek i!

²⁹ Gabe didok ma: Ro ma antong! Jadi mijur ma si Petrus sian parau i, mardalan sian aek i mandapothon Jesus.

³⁰ Alai mamereng alogo na gogo i, mabiar ma ibana, jadi naeng lonong ma, gabe dijouhon: Tuhan, palua ahu!

³¹ Jadi pintor disurdukkon Jesus ma tanganna manangkup ibana, jala didok ma tu ibana: E ho, siotik haporseaon; aha ma pola ganggu roham?

³² Laos bongot ma nasida tu parau i, jadi so ma alogo i.

³³ Jadi disomba halak na di parau i ma Ibana, angka ninna ma: Tutu do Ho Anak ni Debata!

³⁴ (IV.) Dung i laos marparau ma nasida sahat tu luat Genesaret.

³⁵Jadi dung ditanda halak isi ni luat i Ibana, disuru nasida ma paboahon tu sandok luat na humaliang i, dung i dipamboan ma tu Ibana nasa na hansitan.

³⁶Jadi dielehelek nasida ma Ibana, asa diloas jamaonnasida nanggo rambu ni ulosna; jadi malum do saluhut na manjamasa.

15¹(I.) Dung i ro ma angka sibotosurat dohot angka Parise sian huta Jerusalem mandapothon Jesus, ninna ma:

²Boasa dilaosi angka siseanmi adat na sian angka natuatua? Ai ndang marburi nasida laho mangan.

³Alai ninna ma mangalusi nasida: Ia hamu, boasa laosanmuna patik ni Debata, paingotingot adاتمuna i?

⁴Ai Debata do mamatikkon: "Pasangap ma amangmu dohot inangmu! Ia na mamburai amana dohot inana, sipusaon do!"

⁵Alai hamu mamodahon: Ia adong na mandok tu amana tu inana: Pinelehon ma tagonan na patut hian pangurupingku di ho, ndang pola be halak i pasangaphon amana manang inana disi!

⁶Gabe disegai hamu do patik ni Debata dibahen adاتمuna i.

⁷E hamu pangansi! Na sintong do dapot di hamu hata na sinurirangkon ni si Jesaya, di na nidokna i:

⁸"Dipasangap pamangan ni bangso on do Ahu; alai anggo rohanasida dao do sian Ahu.

⁹Jala magopo do pambahennasida pasangaphon Ahu, ai poda ni jolma do dipodahon nasida."

¹⁰Laos dijou ma natorop i tu jolona, didok ma tu nasida: Tangi jala parateatehon hamu ma!

¹¹Nda tung gabe ramun jolma hinorhon ni na bongot sian pamanganna; na ruar sian pamanganna, i do mangaramuni jolma.

¹²Dung i didapothon angka siseanna ma Ibana, ninna ma: Diboto Ho do tahe, naung targasip angka Parise umbege hata ondeng?

¹³Alai ninna ma mangalusi: Sibutbuton do nasa suansuanan na so sinuan ni Damang na di banua ginjang i.

¹⁴Pasombu hamu ma nasida! Angka partogi na mapitung do nasida manogu na mapitung; alai molo na lonap manogu na mapitung, targodung do nasida duansa.

¹⁵Dung i ninna si Petrus ma mandok Ibana: Patorang ma tu hami umpama ondeng!

¹⁶Jadi didok Jesus ma: Tong dope so marroha nang hamu?

¹⁷Ndang diantusi hamu: Na laho tu butuha do na bongot sian pamangan, dung i bolong tu hundulan na soding?

¹⁸Alai angka na ruar sian pamangan, sian roha do i hehe, laos i do mangaramuni jolma i.

¹⁹Ai sian roha do hehe angka pingkiran na jahat, pamunuon, pangalangkipun,

harorongan, panangkoon, hata gapgap dohot panginsahion.

²⁰Angka i do na mangaramuni jolma; alai ndada ramun jolma, anggo mangan so marburi.

²¹(II.) Dung i sumurut ma Jesus sian i tu luat Tirus dohot Sidon.

²²Jadi ro ma sada boru Kanaan sian luat i manjoujou: Asi ma roham mida ahu, Tuhan, Anak ni si Daud! Posi do diae borungku dipaporsukporsuk sibolis!

²³Alai ndang dialusi Jesus nasida. Jadi ro ma angka siseanna manglehelek Ibana, ninna ma: Pamuli ma nasida, ai sai diihuthon do hita manjoujou.

²⁴Alai ninna Jesus ma mangalusi: Holan tu angka birubiru na mago na sian pinompar ni halak Israel do Ahu disuru.

²⁵Alai ro ma boruboru i, disomba ma Ibana huhut ma didok: Tuhan, tolong ahu!

²⁶Alai ninna ma mangalusi: Nandang tama buaton sipanganon ni angka dakdanak laho mandabuhon tu angka biang.

²⁷Alai didok boruboru i ma: I do nian, Tuhan; alai diallang biang i do angka na pisik na mardekdehan sian panganan ni ompuna.

²⁸Dung i ninna Jesus ma mangalusi nasida: Balga do haporseaonmi, inang! Saut ma na pinangidomi! Jadi hisar ma boruna i olat ni na sangombas i.

²⁹ (III.) Dung i borhat ma Jesus sian i, jadi sahat ma tu tao Galilea. Jala nangkok ma lbana tu dolok, laos hundul disi.

³⁰ Dung i ro ma mansai torop halak, dipamboan do angka na sarion, na mapitung, na ngungu, na gurdung dohot lan dope na asing; dipampeakkon do angka i tu jolona, gabe saut ma nasida dipamalum.

³¹ Pola longang do natorop i, ala diida mangkuling na ngungu, malum na gurdung, mardalan na sarion jala marnida na mapitung; laos dipuji nasida ma Debata ni halak Israel.

³² (IV.) Alai dijou Jesus ma angka siseanna tu jolona, didok ma: Malengleng ateatengku mida natorop on, ai nunga pola tolu ari diingani Ahu jala ndang adong balanjonasida. Nandang hum rohangku pamulihon nasida, so jolo nilehon mangan, so tung handoruan nasida maon di dalan i.

³³ Dung i ninna angka siseanna i ma mandok lbana: Sian dia ma dapot hita di halongonan roti na tuk pabosur halak na sai torop on?

³⁴ Dung i didok Jesus ma tu nasida: Piga do roti dipeop hamu? Jadi didok nasida ma: Pitu do, angkup ni dengke otik.

³⁵ Dung i didokkon ma natorop i hundul di tano i.

³⁶ Jadi ditiop ma roti na pitu i nang angka dengke i, didok ma mauliate, diponggoli ma, diparlehon ma tu angka siseanna, jala siseanna ma mangalehon tu natorop.

³⁷ Dung i mangan ma nasida saluhutna, pola bosur be; laos dipapungu nasida ma angka ponggolponggol na lobi i, gok pitu singkop.

³⁸ Anggo torop ni na mangan i, opatribu baoa do, so padohot angka parompuan nang dakdanak.

³⁹ Jadi dipamuli Jesus ma natorop i, dung i marparau ma Ibana sahat tu luat Magadan.

16¹ (I.) Dung i ro ma angka Parise dohot Saduse mangunjuni Ibana, mangido tanda sian banua ginjang sipatuduhononna tu nasida.

² Alai ninna ma mangalusi nasida: Jumpa botari somal didok hamu: Logo ma ari, ai manariur do langit.

³ Ia manogotnogot: Na ro ma ari sadari on, ai habut do langit jala halindo. Malo do hamu nian manjujur rupa ni langit; ia manjujur na tinudu ni na masa nuaeng, ndang diboto hamu?

⁴ Bangso parjahat jala pangalangkup mangido tanda; alai holan tanda ni si Jonas do sipamasaon tu nasida. Dung i laho ma Ibana, ditadingkon ma nasida.

⁵ Jadi dung sahat siseanna tu bariba, lupa do nasida hape mamboan roti.

⁶ Gabe didok Jesus ma tu nasida: Manat jala jaga ma hamu pasiding na niasoman na di angka Parise dohot Saduse!

⁷ Dung i masipandohan ma nasida: Dibahen na so mamboan roti do hita hape!

⁸Jadi dung diboto Jesus i, didok ma: Boasa dipanghatahatahon hamu, na so mamboan roti hamu? Oe parhaporsean na otik!

⁹Ndang dope mangantusi rohamuna? Ndang diingot hamu na lima roti i, uju di na limaribu i, dohot godang ni ebaeba pinapungumuna i?

¹⁰Manang na pitu roti i di na opatribu i ro di ebaeba pinapungumuna disi?

¹¹Beha, ndang diantusi hamu, na so taringot tu roti hatangki: Jaga ma hamu pasiding na niasoman na di angka Parise dohot Saduse?

¹²Disi pe asa dapot rohanasida: Ndada na niudi na niasoman ni halak Parise dohot Saduse hape na nidokna i sijagaon, tung podanasida do.

¹³(II.) Jadi sahat ma Jesus tu luat Kaesarea Pilippi, gabe disungkun ma angka siseanna: Ise do Anak ni jolma i, didok halak?

¹⁴Jadi didok nasida ma: Na deba mandok: Si Johannes pandidi, anggo na deba: Si Elia, na asing muse: Si Jeremia manang sahalak sian angka panurirang i.

¹⁵Dung i didok ma tu nasida: Ia hamu, ise do Ahu, didok hamu?

¹⁶Jadi ninna si Simon Petrus ma: Kristus (Messias), Raja na pinarbagabaga i do Ho, Anak ni Debata na mangolu!

¹⁷Dung i ninna Jesus ma mangalusi ibana: Martua do ho, Simon, anak ni si Jona, ai ndada daging dohot mudar papatarhon i tu ho, Damang na di banua ginjang i do.

¹⁸Ahu pe, hudok ma tu ho: Si Petrus (Batu mamak) do ho, jala di atas batu mamak ondeng do paojahonku huriangku, jala na so tupa talu i bahenon ni angka harbangan ni banua toru.

¹⁹Hulehon pe tu ho anak hinsu ni harajaon banua ginjang i: Nasa na niihotanmi di tano on, na tarihot ma i nang di banua ginjang; jala nasa na pinaluam i di tano on, malua ma i nang di banua ginjang.

²⁰Dung i diorai ma angka siseanna, unang dipaboa nasida tu halak, Ibana do Kristus i.

²¹(III.) Olat ni i ma dipatorang Jesus tu angka siseanna, na ingkon laho do Ibana tu Jerusalem manaon na porsuk sian angka sintua ni natorop, sian sintua ni malim nang sian sibotosurat pe, pola ingkon mate Ibana bunuon, jala pangoluon di ari patoluhon.

²²Dung i diarahon si Petrus ma Ibana, disaritai ma, ninna do: Asi ma roha ni Debata di Ho, Tuhan! Unang ma songgop i tu Ho!

²³Alai humusor ma anggo Ibana mandok tu si Petrus: Laho ma ne ho, bolis! Gasip do ho di Ahu, ai ndang diparrohahon ho angka na di Debata, angka na dijolma do.

²⁴(IV.) Dung i didok Jesus ma tu angka siseanna: Nasa na giot mangihuthon Ahu, disoadahon ma dirina, diporsan ma silang na tu ibana; diihuthon ma Ahu!

²⁵Ai na naeng paluahon hosana, mangagohonsa do; alai na agoan hosa ala ni Ahu, i do na jumpangan.

²⁶Ai aha ma antong gunana di jolma, nang liat portibi on diomo, anggo mago do tondina? Aha ma tarlehon jolma bahen tobus ni tondina?

²⁷Ai na ro ma sogot Anak ni jolma i di bagasan hasangapon ni Amana rap dohot angka surusuruanna; dung i balosonna ma tu ganup, hombar tu na niulana.

²⁸Na tutu do na hudok on tu hamu: Nandang na mangae hamatean anggo deba sian angka na jongjong dison, so jolo diida ro Anak ni jolma i di bagasan harajaonna.

17 ¹(I.) Dung i salpu onom ari, diarahon Jesus ma si Petrus, si Jakobus dohot anggina si Johannes, ditogihon ma nasida tu sada dolok na timbo, tu na suhi.

²Dung i muba ma rupana diida nasida, gabe marsinondang ma bohina songon mata ni ari i, mamontar ma ulosna songon na tiur.

³Jadi tarida ma di nasida si Musa dohot si Elia, na mangkatai dohot Ibana.

⁴Jadi dipanghulingi si Petrus ma Jesus: Tuhan, sonangna i dison! Molo na une di roham, hupauli ma dison tolu inganan, sada di Ho, sada di si Musa, sada di si Elia.

⁵Mandok i dope ibana, ro ma sada ombun na tiur mangalinggomi nasida jadi mangkuling ma soara sian bagasan ombun i: On do

Anak haholonganku, lomo do rohangku mida Ibana; tangihon hamu ma Ibana!

⁶Umbege i angka sisean i, manungkap ma nasida jala mabiar situtu.

⁷Gabe didapothon Jesus ma nasida laos dijamai, huhut ma didok: Hehe ma hamu; unang ma mabiar!

⁸Alai laho manaili tu ginjang, sasada Jesus nama dapot matanasida disi.

⁹Jadi laho tuat sian dolok i, dipatihi Jesus ma nasida, na so jadi paboan tu manang ise pe na niidasida, saleleng so hehe dope Anak ni jolma i sian na mate.

¹⁰Dung i disungkun angka siseanna ma Ibana: Beha do pandok ni angka sibotosurat: Ingkon jumolo ro si Elia?

¹¹Gabe dialusi Jesus ma nasida: Ro ma tutu si Elia pajongjongkon saluhutna.

¹²Alai hudok ma tu hamu: Nunga sahat ro si Elia, alai ndang ditanda nasida ibana; roharohanasida do dibahen tu ibana. Laos songon i ma mangae Anak ni jolma i bahenonnasida.

¹³Dung pe i asa diboto siseanna i, si Johannes pandidi na nidokna i disi.

¹⁴(II.) Dung sahat nasida tu natorop i, ro ma sada halak sumomba Ibana huhut mandok:

¹⁵Tuhan, sai asi ma roham di anakki; na solpoton do ibana, mansai bernit diae; jotjot ibana somsam tu api, jotjot tu aek.

¹⁶Huboan do ibana nian tu angka siseanmi alai ndang tarpamalum nasida ibana.

¹⁷Dung i ninna Jesus ma mangalusi: E bangso na so porsea jala na sumalin on! Sadia leleng on angkupanku hamu? Sadia leleng nari anjuonku hamu? Boan hamu ma ibana tuson!

¹⁸Dung i disonggahi Jesus ma ibana, gabe ruar ma sibolis i sian ibana, jadi hisar ma dakdanak i olat ni na sangombas i.

¹⁹Dung i pulik ma ditopot angka sisean i Jesus mandok: Boasa so tarpabali hami ibana?

²⁰Jadi didok Jesus ma tu nasida: Ala ni otik ni haporseaonmuna do! Ai situtu do na hudok on tu hamu: Nanggo na sabatu ni sabi haporseaonmuna, dohononmuna ma tu dolok on: Munsat ma ho sian on tusan!, saut do i munsat; gabe ndang adong na so tarpatupa hamu.

²¹Alai anggo na samansam on, ndang olo bali, ia so marhite sian tangiang dohot parpuasaon.

²²(III.) Alai di na pungu i nasida di Galilea, didok Jesus ma tu nasida: Sipasahaton ma Anak ni jolma i tu tangan ni halak.

²³Pola do mate Ibana bunuonna, dung i pangoluon do Ibana di ari patoluhon. Jadi bobonosan situtu ma rohanasida.

²⁴(IV.) Jadi dung sahat nasida tu huta Kapernaum, ro ma angka sijalo guguan

tu si Petrus mandok: Beha, ndang digarar Gurumuna guguan i?

²⁵ Digarar do, ninna. Jadi laho bongot tu jabu, manjoloani ma Jesus mandok: Beha di roham, Simon, sian ise do dijalo angka raja di tano on guguan manang beo? Sian anakna manang sian na leban?

²⁶ Jadi didok si Petrus ma tu Ibana: Sian na leban i do! Gabe ninna Jesus ma: Antong, lias do ia angka anak!

²⁷ Alai asa unang targasip nasida tabahen, laho ma ho tu tao, dabu ma hail i, dung i sintak ma dengke na parjolo manoro, bungka holaholana, jadi jumpang ho ma disi sada rupia; i ma buat, lehon ma i tu nasida bahen guguan ta i.

18¹ (I.) Uju i didapothon angka sisean i ma Jesus mandok: Ise ulaning na umbalga di harajaon banua ginjang?

² Jadi dijou Jesus ma sada dakdanak, dipajongjong ma i tu tongatonganasida, dung i ninna ma:

³ Situtu do na hudok on tu hamu: Molo so mulak rohamu, gabe songon dakdanak, tung na so bongot hamu tu harajaon banua ginjang i.

⁴ Asa na paoru dirina songon dakdanak on, i do na umbalga di harajaon banua ginjang i.

⁵ Jala na manjangkon dakdanak na songon on marhitehite Goarhu, Ahu do na jinangkonna disi.

⁶Alai na manggasipi sada sian na metmet on, angka na porsea di Ahu, denggan ma ginantungkon losung batu tu runkungna, laho mangalonongkon ibana tu laut na umbagas i.

⁷Oe, jea ni portibi on, nialap ni gasip! Nandang tarbahen so ro nian gasip; alai marjea ma jolma na parohonsa!

⁸Alai molo tung digasipi tanganmu manang patmu ho, gotap jala bolongkon, ai dumenggan mate bariba manang lumpuon ho bongot tu hangoluan, sian na mardua tangan dohot mardua pat, bolong tu api sisalelenglengna.

⁹Molo tung digasipi matami ho, pulsikkon jala bolongkon, ai dumenggan marmata sada ho, bongot tu hangoluan, sian na marmata dua, bolong tu api na roko.

¹⁰Jaga ma hamu, so tung marhu ni roha hamu mida sada sian na metmet on, ai hudok ma tu hamu: Diida angka surusuruannasida na di banua ginjang i do tongtong bohi ni Damang na di banua ginjang i.

¹¹(Ai naung ro do Anak ni jolma i, paluahon na mago.)

¹²Beha do rohamuna: Adong ma di sahalak saratus birubiru, gabe mago sada sian i; nda tadingkononna ma na siapulu sia i di tor, laho mangalului na mago i?

¹³Na sintong ma na hudok tu hamu: Anggo dung jumpangsa, lasan ma rohana mida i, asa mida na siapulu sia na so mago i.

¹⁴Suang songon i do roha ni Amamuna na di banua ginjang i, ai dipangido do, naeng unang mago agia sada sian na metmet on.

¹⁵(II.) Alai molo mardosa donganmi, topot jala ajari ibana, holan hamu padua. Molo ditangihon ho, dapot ho do ibana gabe donganmu muse.

¹⁶Alai anggo so ditangihon ho, arahon ma donganmu sada manang dua, asa hinatindangkan ni dua manang tolu halak nasa hata.

¹⁷Alai molo so ditangihon nang nasida, paboa ma tu na sahuria i. Molo so ditangihon nang huria i, etong ma ibana songon parbegu jala sijalobeo.

¹⁸Situtu do na hudok on tu hamu: Nasa na niihotanmuna di tano on, hot ma i tarihot nang di banua ginjang, jala nasa na pinaluanmuna di tano on, saut ma i malua nang di banua ginjang.

¹⁹Angkup ni i hudok ma di hamu: Molo mardos ni roha manang dua sian hamu di tano on tumangiangkon manang hata dia pe, jaloonmuna do i sian Damang na di banua ginjang i.

²⁰Ai anggo pungu dua manang tolu pe marhitehite Goarhu, sai dongananku do nasida.

²¹ (III.) Dung i didok si Petrus ma mandok Ibana: Tuhan, sintap piga hali do sesaonku sala ni donganku na dompak ahu? Pola do pitu hali?

²² Gabe didok Jesus ma tu ibana: Ndada pitu hali dohononku tu ho, tung sintap pitupulu hali pitu do!

²³ Onpe, tudos ma harajaon banua ginjang i tu sada raja, na laho mardabudabu dohot angka naposona.

²⁴ Jadi di na manungka mangetong ibana, tarboan ma tu jolona sada halak, na marutang tu ibana saloksa talenta.

²⁵ Jadi dibahen na so adong gararna, didokkon raja i ma gadison ibana dohot jolmana ro di anakonna ro di saluhut na di ibana, asa adong gararna.

²⁶ Jadi marsomba ujung ma naposo i tu adopanna, ninna ma: Palambas ma roham, hugarar pe tu ho saluhutna i!

²⁷ Jadi asi do roha ni raja i di naposona, dipalua ma ibana, ba disesa ma utangna i.

²⁸ Alai laho tu balian naposo ondeng, tongon ma dapotsa donganna naposo sahalak, na marutang tu ibana saratus hupang, gabe ditangkup ma i jala dipongkihi, ninna ma: Garar ma utangmi!

²⁹ Dung i marsomba ujung ma i, sumomba donganna naposo mandok: Palambas ma roham mida ahu, hugarar pe tu ho saluhutna i!

³⁰Alai ndang olo, laho do ibana mangkurungkon donganna, paima digarar utangna i.

³¹Jadi dung diida angka donganna naposo na masa i, marsak situtu ma rohanasida, jadi laho ma nasida tu raja i paboahon sude na masa i.

³²Gabe dijou raja i ma ibana, didok ma: Ho naposo na jahat, sude utangmi husalesehon, ala dielehelek ho ahu.

³³Nda ingkon songon i ma ho nian marasi ni roha di donganmu naposo, songon ahu na marasi ni roha di ho!

³⁴Jadi tarrimas ma raja i, dipasahat ma ibana tu pamongkihi, paima digarar sude utangna i.

³⁵Songon i do bahenon ni Damang na di banua ginjang i tu hamu, anggo so disesa hamu be sian rohamuna sala ni donganmuna!

19¹(I.) Asa dung dipaujung Jesus pamodaionna ondeng, borhat ma Ibana sian Galilea, gabe sahat ma tu luat Judea na di ipar ni aek Jordan.

²Jadi mansai torop halak mangihuthon Ibana, laos dipamalum ma nasida disi.

³Dung i ro ma angka Parise mangunjuni Ibana, ninna do: Beha, na jadi do sirangkonon ni baoba jolmana, asal adong alana?

⁴Alai ninna ma mangalusi nasida: Nandang dung dijaha hamu huroha: Sian mulana i

do ditompa Panompa i nasida baoa dohot boruboru?

⁵Ai didok do: "Dibahen i tadingkonon ni baoa do amana dohot inana, laho patophon dirina tu dongan saripena, gabe sada daging do nasida na dua i."

⁶Asa ndada dua be nasida, tung sada daging do. Onpe, naung pinadomu ni Debata, ndang jadi sirangon ni jolma.

⁷Dung i didok nasida ma tu Ibana: Molo boti, boasa patikkonon ni si Musa, lehonon surat sirang laho paulakkon?

⁸Gabe didok ma tu nasida: Ala ni tangkang ni rohamuna do, umbahen na diloas si Musa hamu paulakkon jolmamuna; alai nda tung i songon i sian mulana.

⁹Alai hudok ma tu hamu: Pangalangkup do nasa na paulakkon jolmana, dung i dioli na asing, anggo so ala hata parmainanon.

¹⁰Dung i ninna angka sisean i ma mandok Ibana: Molo songon i do hape ruhut pardongansaripeon, tagonan unang marnioli.

¹¹Alai didok ma tu nasida: Nda tung saluhut halak tarbahen manjalo hata on, holan angka hasahatanna hian do!

¹²Ai adong do jolma na ias: Na deba na songon i hian sian hatutubuna; na deba nari na pinaias ni jolma; jala na deba muse na paias dirina ala ni harajaon banua ginjang i. Manang ise na tarbahen manjalo hata i, dijalo ma!

¹³(II.) Dung i diboan na mamboan ma angka dakdanak tu Ibana, asa diampehon tanganna tu nasida laho tumangiangkonsa. Alai dirimasi angka sisean i ma nasida.

¹⁴Alai ninna Jesus ma: Loas hamu ma ro angka dakdanak i, unang ambat hamu nasida ro tu Ahu; ai di angka sisongon i do harajaon banua ginjang i!

¹⁵Jadi diampehon ma tanganna tu nasida, laos laho ma sian i.

¹⁶(III.) Dung i didapothon sada halak ma ibana, didok ma: Gurunami, na denggan dia do patupaonku, asa dapot ahu hangoluan saleleng ni lelengna?

¹⁷Alai didok ma tu ibana: Boasa Ahu sungkunonmu taringot tu na denggan? Holan Sada do parroha na denggan! Alai molo naeng ho bongot tu hangoluan, angka patik i ma radoti!

¹⁸Jadi didok ma: Angka dia? Gabe didok Jesus ma: On do: "Unang ho mambunu! Unang ho mangalangkup! Unang ho manangko! Unang ho mangkatindangkon gapgap!"

¹⁹"Pasangap amangmu dohot inangmu! Jala: Haholongi ma donganmu songon dirim!"

²⁰Dung i ninna dolidoli i ma mandok Ibana: Nunga huradoti sasudena i sian sietehetehonki. Aha dope hahuranganku?

²¹Jadi ninna Jesus ma mandok ibana: Molo naeng sun denggan ho, laho ma ho

manggadis artami, parlehon tu angka na pogos, asa mararta ho di banua ginjang; dung i ro ma ho mangihuthon Ahu!

²²Umbege i, mulak ma dolidoli i saor habot ni rohana, ai paradongan situtu do ibana.

²³Alai didok Jesus ma tu angka siseanna: Situtu do na hudok on tu hamu: Tung maol do habongotan halak na mora harajaon banua ginjang i.

²⁴Lam dohononku do tu hamuna: Gumabur do bongotan ni gaja pinggol ni jarum, unang halak na mora masuk tu harajaon banua ginjang i.

²⁵Umbege i angka sisean i, tarsonggot situtu ma nasida, angka ninna ma: Ise nama malua, molo boti?

²⁶Alai diberengi Jesus ma nasida, huhut ma didok: Sandok ndang tarpatupa jolma i, alai anggo Debata, saluhut do tarpatupasa.

²⁷(IV.) Dung i ninna si Petrus ma mangalusi Ibana: Ia hami, saluhut do hutadingkon hami mangihuthon Ho. Aha ma balos ni i tu hami?

²⁸Jadi didok Jesus ma tu nasida: Na tutu do na hudok on tu hamuna: Di ari sogot, di haimbaruon i, di na hundul Anak ni jolma i di habangsa hasangaponna i, dohot ma hamu juguk disi di sampuludua habangsa, manguhumi halak Israel na sampuludua marga i.

²⁹Jala ganup na manadingkon hahaanggina, ibotona, amana, inana, anakonna, haumana

manang jabuna pe ala ni Goarhu, manjalo ma i marlompitlompit, angkup ni i teanonna hangoluan na saleleng ni lelengna i.

³⁰Alai lan do angka naung parjolo hian gabe parpudi, jala parpudi hian gabe parjolo.

20¹(I.) Ai tudos do harajaon banua ginjang i tu sada na mora, na laho sogot di torang ni ari mangarahon pangula tu porlak anggurna.

²Jadi dung mardos ni roha ibana dohot angka pangulana taringot tu upanasida, i ma sahupang sadari, disuru ma nasida tu porlakna.

³Dung i, laho tu balian di pungkul sia, diida ma halak na asing na ngongong di onan i.

⁴Gabe didok ma tu nasida: Ua, dohot ma hamu tu porlakki! Hulehon pe tu hamu na tama. Jadi laho ma nasida.

⁵Dung i laho muse ma ibana di pungkul sampuludua dohot di pungkul tolu, laos songon i do dibahen.

⁶Dung i laho muse ma ibana di pungkul lima, jadi jumpangsa ma halak na asing jongjong boti disi, jadi didok ma tu nasida: Boasa ngongong sambing hamu manipat sadari on?

⁷Jadi didok nasida ma tu ibana: Nandang adong na mangarahon hami. Dung i didok ma tu nasida: Dohot ma hamu laho tu porlakki!

⁸Asa dung bot ari, didok parporlak anggur i ma mandok juaratulisna: Jou ma angka

pangula i, parlehon ma upanasida, jozor sian na parpudi sahat ro di na parjolo i!

⁹Jadi ro ma angka na masuk di pungkul lima, dijalo be ma sahpang.

¹⁰Alai di na ro angka na parjolo i, hirim ma rohanasida, gumodang jaloonna; hape nang nasida, sahpang be do dijalo.

¹¹Alai manjalo i, marmungutmungut ma nasida dompak na mora i,

¹²ninna ma: Ia halak an na parpudi masuk, holan sajom do i mulaulaon, gabe dos do dibahen ho nasida tu hami, angka na tumaon rengen ni ulaon ro di mohop ni ari!

¹³Dung i ninna ma mangalusi sada sian nasida: Ndang adong hubahen tu ho na so tigor, amang! Nda mardos ni roha hita di na sahpang i?

¹⁴Jalo ma na tu ho i; dung i laho ma! Alai naeng do ahu mangalehon tu na parpudi on songon na tu ho.

¹⁵Ai nda tama guru di ahu ugasanki? Somor do matam, ala basa ahu?

¹⁶Songon i ma gabe parjolo angka na parpudi hian, jala angka na parjolo hian gabe parpudi. (Ai lan do na jinou; alai otik do na tarpillit.)

¹⁷(II.) Dung i laho nangkok tu huta Jerusalem, pulik ma diarahon Jesus na sampuludua i, dipanghulingi ma nasida di tongandalan i:

¹⁸Na nangkok ma hita tu Jerusalem, pasahatonna ma disi Anak ni jolma i tu angka sintua ni malim dohot tu sibotosurat, gabe uhumonnasida ma Ibana, ingkon marutang hosa.

¹⁹Dung i pasahatonnasida ma Ibana tu parbegu, asa diinsahi, dilingsingi jala diparsilangkon. Dung i mulak mangolu ma Ibana di ari patoluhon.

²⁰(III.) Dung i didapothon ina ni anak ni si Sebedeus rap dohot angka anakna i ma Ibana, disomba ma, laho pasahathon pangidoanna.

²¹Jadi ninna Jesus ma mandok ibana: Aha dipangido rohamu? Dung i didok ma tu Ibana: Loas ma hundul sogot anakku na dua on, na sada di siamunmu, na sada nari di hambirangmu, di harajaonmi!

²²Alai ninna Jesus ma mangalusi: Nandang diboto hamu na pinangidomuna. Tung tarinum hamu ma siinumon na naeng inumonku (jala tarparidi hamu ma paridion siparidionku)? Jadi didok nasida ma: Tarbahen hami do!

²³Dung i didok ma tu nasida: Tutu nian, inumonmuna do siinumonki; jala paridihononmuna do pandidion siparidihononki; alai ndang guru di Ahu na mambahen hundul di siamunhu dohot di hambirangku. Damang i do padirihon i tu angka panahatanna i.

²⁴Umbege i na sampulu i, sogo ma rohanasida mida donganna na dua i.

²⁵Alai dipapungu Jesus ma nasida, ninna ma: Dirajai angka sigomgomi bangso do anak buana, jala dipatunduk angka na sangapna do nasida; diboto hamu do i.

²⁶Unang ma songon i anggo di hamu! Manang ise hamu na naeng sangap, i ma gabe pangoloi di donganna.

²⁷Jadi manang ise hamu, na naeng parjolo, i ma gabe naposo ni donganna.

²⁸Songon Anak nijolma i pe, ndada asa dioloi halak Ibana, umbahen na ro; Ibana balik pangoloi jala mangalehon hosana bahen tobus ni torop jolma.

²⁹(IV.) Jadi laho ruar sian Jeriko, torop ma halak mangihuthon Ibana.

³⁰Jala hundulhundul ma dua halak na mapitung di pinggol ni dalan i; jadi dung dibege mamolus Jesus, joujou ma nasida, ninna ma: Asi ma roham di hami, Anak ni si Daud!

³¹Alai dipinsang angka natorop i ma nasida, asa sip nian: Alai lam gogo ma nasida manjoujou: Asi ma roham di hami, Tuhan, Anak ni si Daud!

³²Jadi mangulon ma Jesus, dipanghulingi ma nasida: Aha dipangido rohamuna sibahenonku tu hamu?

³³Dung i didok nasida ma: Naeng ma mungkap matanami, Tuhan!

³⁴Gabe asi ma roha ni Jesus, dijama ma matanasida jadi pintor marnida ma. Jadi diihuthon nasida ma Ibana.

21 ¹(I.) Dung i laho mandapothon huta Jerusalem, sahat ma nasida tu sosor Betpage, mardonokkon dolok Jetun. Sian i ma disuru Jesus siseanna dua halak.

²Ninna ma: Laho ma hamu tu sosor na di jolomuna an, mamintor jumpang hamu ma disi tambat halode sada rap dohot anakna; harhari jala togu hamu ma i tu Ahu!

³Jadi molo tung adong na mandok hatana tu hamu, alusi hamu ma: Na ringkot do i di Tuhan i! Dung i pintor loasonna ma.

⁴Alai masa pe sisongon i, asa jumpang na hinatahon ni panurirang i:

⁵"Paboa hamu ma tu boru Sion: Ida ma, na ro ma Rajami manopot ho, na lambok do rohana; halode do hundulanna dohot anak ni halode boban."

⁶Dung i laho ma angka sisean i patupahon na nidokkon ni Jesus tu nasida.

⁷Diboan nasida ma halode i dohot anakna, diampehon ma ulosnasida tu ginjangna, laos dipahundul ma Jesus tu atasna i.

⁸Deba sian natorop i pahembangkon ulosnasida tu dalan i, na deba nari manalliki angka ranting ni hau jadi dipanserakkon tusi.

⁹Alai sude natorop i, angka na di jolona nang na mangihut sian pudi pe, mangolopolophon: Hosianna di Anak ni raja Daud! Pinasupasu

ma na ro marhitehite Goar ni Tuhan i!
Hosianna ma di ginjang!

¹⁰Jadi di na bongot i Ibana tu huta
Jerusalem, gaor ma na sahuta i, angka ninna
ma: Ise do halak i?

¹¹Jadi dipandok natorop i ma: Jesus,
Panurirang i do i, na sian huta Nasaret, na di
luat Galilea!

¹²(II.) Dung i dibongoti Jesus ma bagas
joro ni Debata, dipabali ma sian i saluhut
angka na manggadisi dohot na manuhori
disi, ditunggalingkon do meja ni angka
situngkari hepeng ro di bangku ni angka
sigadis darapati.

¹³Laos didok ma tu nasida: "Bagas
partangiangan do goar ni bagashu" ninna
Surat i; alai gabe liang ni pandobo do i
dibahen hamu!

¹⁴Dung i didapothon angka na mapitung
dohot na lumpuon ma Ibana tu bagas joro i,
jadi dipamalum ma nasida.

¹⁵Alai sogo situtu ma angka sintua ni malim
dohot sibotosurat marnida halongangan na
pinambahenna i, nang umbege dakdanak
angka na manjoujou di bagas joro: Hosianna
di Anak ni raja Daud!

¹⁶Laos didok ma tu Ibana: Dibege Ho do
hatanasida on? Jadi didok Jesus ma tu nasida:
Hubege do! Ndang dung dijaha hamu huroha:
"Soara ni angka dakdanak dohot posoposo
dipature Ho gabe pujipujian"?

¹⁷ Dung i ditadingkon ma nasida, ruar ma Ibana sian huta i dompak Betania, laos disi ma marborngin.

¹⁸ (III.) Alai torang ni arina i, laho mulak tu huta i, male ma dihilala.

¹⁹ Dung i diida ma di dalan i hau ara sangkambona jadi didapothon ma, hape holan bulung sambing do jumpangsa disi, gabe didok ma tu hau i: Na so jadi be ho marparbue olat ni on! Jadi pintor rahar ma hau ara i.

²⁰ Marnida i angka sisean i, tarhalomong ma rohanasida, angka ninna ma: Ndi, tompuna i rahar hau ara i!

²¹ Jadi dialusi Jesus ma nasida: Na tutu do na hudok on tu hamu: Aut na porsea hamu, so ganggu rohamu, ndada holan songon na tu hau ara ondeng patupaonmuna. Sandok gari tu dolok an dohononmuna: Munsat ma ho jala madabu tu laut, gari saut do!

²² Ai jaloanmuna do saluhut nasa na pinangidomuna di tangiangmuna, anggo na porsea hamu!

²³ (IV.) Jadi dung bongot Ibana tu bagas joro i, laho mangajari disi, didapothon angka sintua ni malim dohot sintua ni bangso i ma Ibana, angka ninna ma: Huaso dia dipangasahon Ho?

²⁴ Dung i ninna Jesus ma mangalusi nasida: Ahu ma jolo manungkun hamu; dung pe dialusi hamu Ahu, asa paboaonku tu

hamu, manang huaso dia hupangasahon di pambahenanki:

²⁵Ia pandidion ni si Johannes, sian dia do i? Sian banua ginjang do manang sian jolma manisia? Dung i marpingkir ma nasida sama nasida, songon on:

²⁶Ia ninta: Sian banua ginjang, dohononna ma: Boasa so dihaporseai hamu ibana? Anggo tadok annon: Sian jolma, sihabiaranta ma natorop i, ai panurirang do si Johannes di roha ni jolma saluhutna.

²⁷Gabe ninna nasida ma mangalusi Jesus: Ndang huboto hami i. Laos ro ma hatana tu nasida: Antong, Ahu pe, ndang paboakonku tu hamu, manang huaso dia hupangasahon patupahon ulaonki.

²⁸Alai beha do di rohamuna? Adong ma dua anak di na sahalak; jadi ditopot ma sihaahan, didok ma tu ibana: Laho ma ho, anaha, sadari on mangula tu porlakta!

²⁹Alai ro ma alusna: Ndang olo ahu! Hape disolsoli do rohana muse, gabe saut ma ibana laho.

³⁰Ia amaama i ditopot ma sianggian i, laos songon i do hatana, gabe didok i ma mangalusi: Olo, tuan! Hape, ndang saut laho.

³¹Ise sian nasida na dua i mangulahon pinangido ni amanasida? Jadi didok nasida ma tu Ibana: Sihahaan i do! Dung i didok Jesus ma tu nasida: Situtu do na hudok on tu hamu: Tagonan do halak sijalobeo dohot boru

na jahat bongot tu harajaon ni Debata, unang hamu!

³²Ai na ro do si Johannes tu hamu di dalam hatigoran, ndang dihaporseai hamu ibana; alai anggo angka sijalobeo dohot angka boru na jahat porsea do. Diida hamu do i nian; laos tong so disolsoli hamu rohamuna, laho mangkaporseai ibana.

³³Bege hamu ma sada umpana na asing: Adong ma sahalak na mora, na mamungka porlak anggurna, dihandangi, dihali ma pangilangan di bagasan, dipauli ma gudangna, dipasahat ma tu angka pangula, dung i marhutasada ma ibana.

³⁴Dung jumpang tingkina mambuat parbuena, disuru ma angka naposona manopot pangula i manjalo parbuena.

³⁵Jadi ditangkap angka pangula i ma naposona, na sada dilombuti, na sada dibunu, na sada didangguri dohot batu.

³⁶Dung i diulahi na mora i ma marsuru naposona angka na asing, tumorop sian na parjolo i; laos songon i do dipambahen pangula i tu nasida.

³⁷Parpudi ma disuru tu nasida anakna, ai ninna rohana: Ra biar ma rohanasida mida anakki!

³⁸Alai marnida anak i, didok angka pangula i ma sama nasida: On do sitean porlak i! Beta ma, tapusa ibana, asa di hita siteanonna i!

³⁹ Jadi ditangkup nasida ma ibana, dionjar ma sian porlak i, laos dipusa.

⁴⁰ Molo ro sogot parporlak i, aha ma bahenonna tu angka pangula i?

⁴¹ Gabe ninna nasida ma mandok Ibana: Tung jorbut do pamununa di angka parjahat i, jadi pasahatonna ma porlak anggurna tu pangula na asing, angka na mangalehon parbuena di tingkina i.

⁴² Dung i didok Jesus ma tu nasida: Beha, ndang dung dijaha hamu di Surat i: "Ia batu na binolongkon ni angka pande bagas i, apala i do gabe batu parsuhisui (partunggul). Pinamasa ni Tuhan do i, jala halongangan do i diida matanta"?

⁴³ Dibahen i ma umbahen na hudok tu hamu: Buaton do harajaon ni Debata sian hamu jala lehonon ma tu bangso na olo mamboan parbuena.

⁴⁴ Marosak ma ganup na tinggang tu batu on, jala magopu ma ganup na tiningganganna.

⁴⁵ Jadi dung dibege angka sintua ni malim dohot Parise umpamana i, dianto ma, nasida do hinatahonna disi.

⁴⁶ Jadi dilului nasida ma dalan manangkup Ibana; alai mabiar do nasida mida natorop i, ai panurirang do Ibana di rohanasida.

22¹ (I.) Dung i diulahi Jesus ma marumpama tu nasida songon on:

²Tarpatudos do harajaon banua ginjang i tu sada raja na mamestahon anakna na mangoli.

³Jadi disuru ma angka naposona, manjou angka na ginokkonna hian tu pestana i, hape ndang olo nasida ro.

⁴Dung i diulahi ma, disuru ma naposo na asing, ninna ma: Paboa hamu ma tu angka naung ginokkon: Nunga huparade panganon pesta i, nunga hupotong angka horbo dohot lombu; nunga rade saluhutna. Ipe, ro ma hamu tu pesta i!

⁵Alai na laho be do nasida di tois ni rohanasida: Na sada tu haumana, na sada tu partigatigaonna.

⁶Alai ditangkap na deba angka naposona, dipasipalsipal jala dipusa.

⁷Jadi tarrimas ma raja i, disuru ma soldaduna mangalengsehon angka pamunu i jala manurbu hutanasida.

⁸Dung i ninna ma mandok angka naposona: Nunga rade nian na hasea tu pesta i, alai ndang tau angka na pinio i.

⁹Onpe, laho ma hamu tu angka dalan balobung, arahon hamu ma tu haroan on nasa na dapot hamu!

¹⁰Jadi saut ma laho angka naposo i tu angka dalan, ditogihon ma saluhut na jumpang nasida, angka na jahat dohot na denggan, gabe gok tamue ma parpestaan i.

¹¹ Alai laho bongot raja i mamereng angka tamuena, dapot matana ma disi sada halak na so marpangkean pesta.

¹² Jadi didok ma tu ibana: Na beha do parmasukmu tuson, amang, ai ndang marpangkean pesta ho? Gabe mangkohom ma ibana.

¹³ Dung i didok raja i ma tu angka naposona: Tali hamu ma patna dohot tanganna, laos pabali hamu ma ibana tu na holom marimpotimpot; disi ma masa angguhangguk dohot na patungoripon.

¹⁴ Ai lan do na jinou; alai otik do na tarpillit.

¹⁵ (II.) Dung i laho ma angka Parise martuptup sama nasida, manang na beha bahenonnasida padapothon Ibana di hatana.

¹⁶ Jadi disuru nasida ma angka siseannasida rap dohot angka naposo ni si Herodes tu Ibana, angka ninna ma: Gurunami, huboto hami, na tigor Ho; ai sintongsintong dipodahon Ho dalan ni Debata jala ndang dihabiari Ho manang ise, ai so siida bohi ni jolma Ho!

¹⁷ Ipe, paboa ma tu hami: Beha didok roham: Na jadi do lehonon guguan (belasting) tu Kesar i, manang na so jadi tahe?

¹⁸ Alai diboto Jesus do jahat ni rohanasida, jadi didok ma: E hamu pangansi! Boasa unjunanmuna Ahu?

¹⁹Patuduhon hamu ma hepeng guguan i tu Ahu! Gabe diboan nasida ma sada hupang tu Ibana.

²⁰Dung i didok Jesus ma tu nasida: Gombaran dohot surat ni ise do dison?

²¹Jadi dialusi nasida ma: Gombaran ni Kesar i do. Jadi didok ma tu nasida: Antong, lehon hamu tu Kesar, na sian Kesar i; jala lehon hamu ma tu Debata, na sian Debata!

²²Gabe longang ma rohanasida umbegesa; laos laho ma nasida, ditadingkon ma Ibana.

²³(III.) Di na sadari i ro ma angka Saduse, na so marhatutuhon adong haheheon sian na mate, jadi disungkun nasida ma Ibana:

²⁴Gurunami, didok si Musa: Molo adong na mate, so martinading, pareahon ni anggina ma jolmana i, pajongjongkon pomparan di hahana.

²⁵Jadi adong ma di hami pitu halak na marhahamaranggi; mangoli ma sihahaan, dung i mate ma ibana so martinading, ditinggalhon ma jolmana i di tinodohonna.

²⁶Songon i do paidua dohot paitolu ro di paipitu.

²⁷Umpudi sian nasida sasudena i mate dohot boruboru i.

²⁸Antong di ari haheheon i, ise do sian nasida na pitu i nampuna parompuan i, ai sude do nasida marniolihonsa?

²⁹Alai ninna Jesus ma mangalusi nasida:
Nalilu do hamu, siala ndang diboto hamu
Surat i nang hagagoon ni Debata!

³⁰Ai anggo ruhut ni angka naung mulak
mangolu: Nandang mangoli, ndang muli;
songon surusuruan ni Debata do nasida di
banua ginjang i.

³¹Alai anggo taringot tu haheheon ni angka
naung mate, ndang dung dijaha hamu ulaning
na nidok ni Debata tu hamu di hatana on:

³²"Ahu do Debata ni si Abraham, Debata
ni si Isak jala Debata ni si Jakkob!" Apala
Debata ni angka na mate Ibana, Debata ni
angka na mangolu do!

³³Jadi tarhalomong ma halak natorop i
umbege pamodaionna i.

³⁴(IV.) Alai marpungu ma angka Parise i,
dung dibege, naung dipajut Jesus angka
Saduse i.

³⁵Dung i diunjuni sahalak sibotopatik sian
nasida ma Ibana, disungkun ma:

³⁶Gurunami, dia do patik raja sian angka
patik i?

³⁷Jadi didok Jesus ma: Sihaholonganmu do
Tuhan Debatam sian nasa ateatem, sian nasa
hosam dohot sian nasa roham!

³⁸I do patik raja jala parjolo.

³⁹Alai dos do arga ni na paduahon on:
Sihaholonganmu do donganmi doshon dirim!

⁴⁰Patik na dua on do mangkangkam nasa
patik dohot hata ni panurirang.

⁴¹ (V.) Alai di na pungu i angka Parise, disungkun Jesus ma nasida, ninna ma:

⁴² Na beha do rohamu taringot tu Kristus i? Anak ni ise do Ibana? Jadi dialusi nasida ma Ibana: Anak ni si Daud do!

⁴³ Alai didok ma tu nasida: Alai digoar si Daud do Ibana "Tuhan", diajari Tondi i, ai didok do:

⁴⁴ "Ninna Tuhan i do mandok Tuhanku: Hundul ma Ho tu Siamunhon, paima hupeakhon angka musum bahen sidegedegean ni patmu!"

⁴⁵ Antong, anggo digoar si Daud do Ibana "Tuhan", beha ma Ibana Anakna?

⁴⁶ Jadi ndang adong manang ise na tarbahen mangalusi Ibana; jala olat ni na sadari i ndang adong na hum roha manungkun Ibana.

23 ¹ (I.) Dung i dipanghulingi Jesus ma halak natorop dohot angka siseanna,

² ninna ma: Dihunduli angka sibotosurat dohot angka Parise do habangsa ni si Musa.

³ Onpe, ula jala radoti hamu ma sasude na pinodahon nasida tu hamu; alai unang ma tiru hamu ia pambahenannasida! Ai na ripe mamodai do nasida, so adong diulahon.

⁴ Boban angka na dokdok do dirahuti nasida jala diampehon tu abara nijolma i, alai ndang olo nasida manjamasa, nanggo dohot sada jarijarina.

⁵ Nasa pambahenannasida, asa dipaberengbereng halak, umbahen na diula,

ai dipabidang do tali partangiangannasida,
laos dipaganjang do rambuna.

⁶Sai hundulan na sumangap do ditodo, uju
di parpestaan, songon i bangku jolojolo di
angka parguruan.

⁷Dipangido, naeng tabion nasida di onan
jala naeng goaron ni jolma i nasida guru.

⁸Alai anggo hamu, unang ma margoar
guru, ai Sada do Gurumuna; saluhutna hamu
marhahamaranggi.

⁹Ndang jadi goaronmuna manang ise
sian hamu "Ama" di tano on, ai Sada do
Amamuna, i ma na di banua ginjang i!

¹⁰Jala ndang jadi goaron hamu Partogi, ai
Sada do Partogimuna, i ma Kristus i!

¹¹Alai na sumangap sian hamu, i ma gabe
songon naposomuna!

¹²Ai sipaoruon do ganup na patimbo dirina;
alai sipatimboon do na paoru dirina.

¹³Marjea ma hamu sibotosurat dohot
Parise, hamu pangansi! Ai disordak hamu do
harajaon banua ginjang i di jolo ni jolma i.
Ndang masuk hamu; angka na giot bongot
pe, ndang diloas hamu masuk.

¹⁴Marjea ma hamu sibotosurat dohot Parise,
hamu pangansi! Ai dipolgak hamu do jabu ni
boruboru na mabalu jala tangiang na ganjang
dibahen hamu mangkuphupisa. Uhum na lobi
dokdok do jaloonmuna ala ni i.

¹⁵Marjea ma hamu sibotosurat dohot Parise,
hamu pangansi! Ai diliati hamu do laut dohot

tano manaiti tu agamamuna nanggo sada halak. Jadi dung saut ibana masuk, gabe anak ni roko ibana dibahen hamu, silompit sian hamu!

¹⁶Marjea ma hamu partogi na mapitung, angka na mandok: Na manolon tu bagas joro, ndang marguna; alai na manolon tu sere na di bagas joro, i do na marguna.

¹⁷E hamu na oto jala na mapitung! Ai dia do na ummangat, sere i manang bagas joro i, na pabadiahon sere i?

¹⁸Angkup ni i didok hamu: Na manolon tu langgatan, ndang marguna; alai na manolon tu pelean na di atas langgatan i, i do na marguna.

¹⁹E hamu na mapitung! Ai dia do na ummangat, pelean i manang langgatan i, na pabadiahon pelean i?

²⁰Nda songon on: Na manolon tu langgatan i, manolon tusi do, padohot tu saluhut na diatasna.

²¹Jala na manolon tu bagas joro, manolon tusi do, nang tu Ibana na manginganhonsa.

²²Na manolon tu banua ginjang, manolon tu habangsa ni Debata do, nang tu Ibana na mangkundulisa.

²³Marjea ma hamu sibotosurat dohot Parise, hamu pangansi! Ai diparsampulu hamu do angka suansuanan na metmet, alai tading do angka patik na ummaol dibahen hamu, songon hatigoran, parasinirohaon dohot

haburjuon. Siulaon do na sada on, alai unang ma tading na sada an!

²⁴Hamu partogi na mapitung! Dipasisi hamu do rongit; alai ia gaja dibondut hamu do!

²⁵Marjea ma hamu sibotosurat dohot Parise, hamu pangansi! Ai dipaias hamu do panginuman dohot mangkuk sian duru, hape marisi pandoboan do dohot pargadombuson.

²⁶E ho, Parise na mapitung! Parbagasan ni panginuman i ma jolo paias, asa gabe ias nang duruna!

²⁷Marjea ma hamu sibotosurat dohot Parise, hamu pangansi! Ai suman do hamu tu tanoman na hinapur, angka na denggan berengon sian duru, hape marisi holiholi ni na mate do dohot nasa na rotak!

²⁸Tongon songon i hamu: Tigor hamu nian idaon ni halak sian duru, alai anggo di bagasan, gok pangansion do hamu dohot na so uhum.

²⁹Marjea ma hamu sibotosurat dohot Parise, hamu pangansi! Ai dipauli hamu do tanoman ni angka panurirang, jala dipalehet hamu tambak ni angka partigor.

³⁰Pola didok hamu: Aut hami uju di ngolu ni angka ompu, ndang tagamon dohot hami parsala di mudar ni angka panurirang i!

³¹Asa dihatindangkon hamu do hape, anak ni sibunu panurirang i do hamu!

³²Onpe, haru gohi hamu ma suhatsuhat ni ompumuna!

³³Hamu angka ulok jala anak ni ulok dari, tung beha ma bahenonmuna maporus pasidingkon uhuman na roko?

³⁴Dibahen i, ida ma, Ahu marsuru tu hamu angka panurirang dohot parroha dohot sibotosurat: Bunuonmuna jala parsilangknonmuna ma deba sian nasida, na deba linsinganmuna do di parguruanmuna jala leleanmuna sian huta tu huta.

³⁵Asa mandatang tu hamu mudar ni saluhut angka partigor na so marpipot, na use di tano on olat ni mudar ni si Abel na tigor i ro di mudar ni si Sakarias, anak ni si Berekia, na pinusamuna di holangholang ni bagas joro dohot langgatan i.

³⁶Situtu do na hudok on tu hamu: Sasudena i mandatang sogot tu bangso on!

³⁷(II.) Jerusalem! Jerusalem! Dibunu ho do angka panurirang jala didangguri ho do angka na sinuru manopot ho. Nunga piga hali naeng papunguonku do nian angka anakmi, sobokkon pidong na papunguhon anakna tu toru ni habonghabongna; alai ndang dung olo hamu!

³⁸Ida ma, ingkon tarulang do sogot bagasmuna!

³⁹Ai hudok ma tu hamu: Na so idaonmuna be Ahu olat ni on, paima dohononmuna: Pinasupasu ma na ro marhitehite Goar ni Tuhan i!

24¹ (I.) Dung i borhat ma Jesus, laho ruar sian bagas joro i. Jadi didapothon angka siseanna i ma Ibana, dipatuduhon ma tu Ibana angka bagas ni joro i.

²Alai didok Jesus ma tu nasida: Diida hamu sasudena i? Situtu do na hudok on tu hamu: Ndang pasombuonna sogot disi dua batu martinditindi na so gargaronna.

³Dung i uju hundul Ibana di dolok Jetun i, pulik ma didapothon angka siseanna Ibana, mandok: Paboa ma tu hami: Andigan masa i, jala dia ma tanda ni harorom dohot ajal ni hasiangan on?

⁴Gabe dialusi Jesus ma nasida: Jaga ma hamu, so tung dililuhon halak hamu!

⁵Ai lan do na ro sogot manoluk Goarhu, angka na mandok: Ahu do Kristus i, gabe torop ma lilu bahenonnasida.

⁶Alai begeonmuna ma barita ni angka hamusuon dohot soara ni na marmusu. Manat ma hamu, unang hamu tarsonggot; ndang tarbahen so masa angka i, alai ndang i dope ujungna.

⁷Ai na hehe do sogot bangso maralohon bangso, harajaon maralohon harajaon; masa ma nang haleon dohot lalo marluatluat.

⁸Sasudena i, parmulaan ni pambebeonna i dope.

⁹Dung i pasahatonna ma hamu tu haporsuhon, pola pusaonna do hamu, gabe

hosoman ni bangso saluhutna hamu ala Goarhu.

¹⁰Jadi torop ma targasip di tingki i, gabe masijehean jala masihosoman ma!

¹¹Dung i hehe ma lan panurirang pargapgap, mangaliluhon toropjolma.

¹²Jadi ala na lam rarat na so uhum, lam tu ngalina ma haholongon ni roha di jolma godangan.

¹³Alai na manahan ro di ujung, i do paluaonna.

¹⁴Laos baritahononhon do barita na uli on na taringot tu Harajaon i di liat portibi on, laho mangkatindangkonsa tu saluhutna bangso; dung pe i, asa ro ujungna.

¹⁵Antong, molo diida hamu di inganan na badia i hagagaor na so uhum i, na nilumbahon ni panurirang Daniel (diparateatehon na manjaha on ma i!):

¹⁶Disi ma maporus hamu na di Judea tu dolok!

¹⁷Na di bilut parginjang ni jabuna, unang ma dialap angka ugasan na di jabu i, di na mijur.

¹⁸Na di ladang, unang ma pola humusor mambuat ulosna!

¹⁹Alai marjea ma angka na gabegabean dohot angka panarusan di angka ari i!

²⁰Alai martangiang ma hamu, asa unang pola maporus hamu di partaonan ngali manang jumpa ari Sabbath.

²¹ Ai mansai balga do haporsuhon i; sian mula ni hasiangan on rasirasa nuaeng ndang adong dope masa na songon i, tu jolo on pe ndang masa be.

²² Jala aut unang diorui angka ari i, ndang tagamon malua agia sadajolma; alai ala ni angka na pinillit i do umbahen na diorui.

²³ Molo dipandok disi tu hamu: Ida ma, disi, disan do kristus i, unang porsea hamu!

²⁴ Ai na hehe do sogot angka Kristus pargapgap dohot angka panurirang pargapgap, patupahon tanda na balga dohot halongangan, laho mangaliluhon nang angka na pinillit, ia na tarbahen.

²⁵ Jaga ma hamu! Nunga hupalumba hamu hian.

²⁶ Antong, anggo didok nasida tu hamu: Di halongonan an do Ibana, unang hamu laho tusi; ia didok: Di bilut do Ibana, unang haporseai!

²⁷ Ai songon hilap na mullop di habinsaran marnalanala ro di hasundutan, songon i do sogot haroro ni Anak ni jolma i.

²⁸ Ai ia disi bangke, tusi do marumbal angka lali.

²⁹ Alai dung salpu haporsuhon ondeng, pintor mangkolom ma mata ni ari i, ndang marsinondang be bulan i, mardabuan ma angka bintang sian langit, jadi humuntal ma angka hagagoon ni parlangitan.

³⁰Di tingki i ma binsar di langit i tanda ni Anak ni jolma i, gabe mangangguhi ma sude bangso na di tano on, ai idaonnasida ma Anak ni jolma i ro di atas ombun ni langit, mantat hagagoon dohot hasangapon godang.

³¹Jadi suruonna ma angka surusuruan na marsarune mansai gogo, jadi sian desa na ualu i ma papunguonnasida angka na pinillitna, sian suhi ni langit na sada ro di na sada nari i.

³²Alai sian hau ara i ma guruhon hamu tudosanna: Molo martunasi punsuna jala runkar angka bulungna, botoonmuna ma, naung jonok partaonan las.

³³Suang le songon i, jumpa diida hamu masa angka ondeng, botoonmuna ma, naung jonok hasosonggopna.

³⁴Situtu do na hudok on tu hamu: Na so tupa salpu bangso on, so jolo songgop sasudena i.

³⁵Ai laho salpu pe sogot langit dohot tano on, anggo angka hatangki ndang na olo salpu!

³⁶(II.) Alai anggo arina dohot sadiharina, ndang adong na umbotosa, nang surusuruan na di banua ginjaang, nang Anak i; nda holan Ama i!

³⁷Alai songon uju di ngolu ni si Noak i, songon i do sogot haroro ni Anak ni jolma i!

³⁸Ai tagan so ro aek na sumar i, marmangani nasida jala minumminum, mangoli dohot

pabolihonsa, paima dapot ari habobongot ni si Noak tubagasan parau i.

³⁹Laos so mamoto nasida, paima ro aek na sumar i mangaupi nasida saluhutna. Suman tusi do sogot haroro ni Anak ni jolma i!

⁴⁰Rap ma disi dua halak di ladang; na sada do dijangkon, na sada dibolongkon.

⁴¹Rap ma disi dua panduda; na sada do dijangkon, na sada dibolongkon.

⁴²Onpe, dungo ma hamu; ai ndang diboto hamu ari haroro ni Tuhanmuna!

⁴³Alai ingot hamu ma on: Aut na diboto na mora i tingki haroro ni panangko, ndang tagamon so dungo ibana, asa unang disursari ugasanna na di bagasna i.

⁴⁴Dibahen i sai tagam ma hamu, ai na ro ma Anak ni jolma i di na so pangkirimon ni rohamu!

⁴⁵Asa didia do naposo haposan jala na marroha, na pinabangkit ni indukna mangalehon angka naposona mangan di tingkina?

⁴⁶Martua do naposo i, na mangualahon songon i didapot indukna di harorona i!

⁴⁷Situtu do na hudok on tu hamu: Pabangkitonna do ibana mangaramoti saluhutna na di ibana.

⁴⁸Alai ia na jahat naposo i, dohononna ma di bagasan rohana: Leleng dope asa ro indukhi!

⁴⁹Gabe tole ma ibana mangalingsingi angka donganna naposo; mangan minum do anggo ibana, mangangkupi angka siparmabuk.

⁵⁰Dung i ro ma induk ni naposo ondeng di ari na so panagamanna jala di sadihari na so pamotoanna.

⁵¹Jadi agoonna ma ibana, laos lehononna ma tu ibana tohap ni angka pangansi. Disi ma masa angguhangguk dohot na patungoripon!

25¹(I.) Disi ma tarpatudos harajaon banua ginjang i tu sampulu anak boru, angka na borhat manomunomu pangoli i, masiboan parpalitoanna be.

²Alai na oto do na lima sian nasida, na pantas marroha do na lima.

³Ianggo angka na oto i, diboan do nian parpalitoanna, alai ndang mantat miak nasida.

⁴Alai anggo na pantas marroha i, diboan do miak di ingananna i rap dohot parpalitoannasida.

⁵Alai di na leleng so ro pangoli i, mondokondok ma nasida sasude, laos tarpodom ma.

⁶Alai tonga borngin i, adong ma na joujou: Na ro ma pangoli i; hehe ma hamu manomunomu!

⁷Jadi hehe ma angka anak boru i saluhutna, dipature be ma parpalitoanna.

⁸Dung i didok angka na oto i ma tu angka na pantas marroha: Lehon hamu ma tu

hami deba sian miakmuna, ai na mintop ma palitonami.

⁹Alai dialusi angka na pantas marroha i ma: Ndang sae maon di hami dohot di hamu; tu angka panggadis ma hamu laho tagonan, manuhor di hamu!

¹⁰Alai di tongandalan i dope nasida laho manuhor, nunga ro pangoli i; jadi bongot ma angka naung hobas hian rap dohot ibana tu hasampuran rea i, dung i tarsordak ma pintu i.

¹¹Alai ro ma sian pudi anak boru na lima nari, angka ninna ma: Tuannami, ungkap ma di hami!

¹²Alai ninna ma mangalusi: Situtu do na hudok on tu hamu: Ndang na hutanda hamu!

¹³Antong, jaga ma hamu, ai ndang diboto hamu arina manang sadiharina!

¹⁴(II.) Umpamana: Adong ma sada halak na naeng marhutasada, jadi dijou ma angka naposona, laho palumehon artana tu nasida.

¹⁵Jadi dilehon ma tu na sada lima bagian, tu na asing dua, tu na asing muse sada dilehon, ganup marguru tu gogona; dung i borhat ma ibana.

¹⁶Mamintor ma laho na manjalo na lima bagian i, ditigatigahon ma i, jadi diomo ma lima bagian nari.

¹⁷Na manjalo na dua bagian i pe, tong songon i do; dohot do ibana mangomo dua nari.

¹⁸Alai anggo na manjalo na sada i, dihali ma tano mambunihon hepeng ni indukna i tusi.

¹⁹Alai dung leleng, mulak ma induk ni angka naposo ondeng, jadi mardabudabu ma ibana dohot nasida.

²⁰Jadi ro ma na manjalo na lima bagian i, diboan ma na lima bagian nari, ninna ma: Tuannami, lima bagian pinasahatmi tu ahu; ida ndi on, lima bagian nari huomo.

²¹Dung i didok indukna i ma tu ibana: Taho ma i, ale naposo na denggan roha jala haposan! Haposan do ho di na otik, pasahatonku ma tu ho godang. Bongot ma ho tu halasan ni roha ni tuanmu!

²²Dung i ro ma na manjalo na dua bagian i, didok ma: Tuannami, dua bagian pinasahatmi tu ahu; ida ndi on, dua bagian nari huomo.

²³Dung i didok indukna i ma tu ibana: Taho ma i, ale naposo na denggan roha jala haposan; haposan do ho di na otik, pasahatonku ma tu ho godang. Bongot ma ho tu halasan ni roha ni tuanmu!

²⁴Jadi ro ma nang na manjalo na sada bagian i, ninna ma: Tuannami, nunga huboto hian, ho parroha na pir, na manggotil di na so panuananmu, jala na papunguhon di na so panaburanmu.

²⁵Jadi ala na mabiar ahu, laho do ahu mambunihon bagianki tubagasan tano; na, ndi on, ugasanmon!

²⁶Alai ninna indukna i ma mangalusi ibana:
Oe, ho naposo na jahat roha jala na losok!
Diboto ho do hape, ahu manggotil di na
so panuananku jala papunguhon di na so
panaburanku!

²⁷Antong, nda tama ma nian boanonmu
hepengki tu sianahi hepeng, gabe jaloonku
ma di ahu rap dohot bungana di harorongkon?

²⁸Onpe, buat hamu ma bagianna i; lehon
hamu ma i tu na mameop na sampulu bagian
i!

²⁹Ai di ganup paradongan lehonon do, asa
marlobilobi ibana. Alai sibuaton do sian na so
paradongan nang na di ibana hian.

³⁰Laos pabali hamu ma naposo na so hasea
i tu na holom marimpotimpot! Disi ma masa
angguhangguk dohot na patungoripon.

³¹(III.) Alai dung ro sogot Anak ni
jolma i marhasangapon rap dohot saluhut
surusuruanna, hundulanna ma disi habangsa
hasangaponna i.

³²Dung i marluhut ma tu jolona nasa
bangso, jadi sirangonna ma nasida songon
binahen ni parmahan na manirang birubiru
boruboru sian birubiru tunggal.

³³Jadi pajongjongonna ma boruboru
i tu siamunna, alai anggo tunggal i tu
hambirangna.

³⁴Dung i dohonon ni Raja i ma tu angka
na di siamunna i: Ro ma hamu, angka na
pinasupasu ni Damang, tean hamu ma

harajaon i, na pinature di hamu sian haoojak ni tano on!

³⁵Ai na male do Ahu, dilehon hamu do Ahu mangan; na mauas do Ahu, dilehon hamu do Ahu minum; na buro do Ahu, gabe dijangkon hamu do Ahu.

³⁶Na marsangkotbulung do Ahu, jadi diparulosi hamu do ahu; na hansitan do Ahu, jala ditingkir hamu do Ahu; na tarhurung do Ahu jadi ro hamu mandulo Ahu.

³⁷Dung i dohonon ni angka partigor i ma mangalusi: Tuhan, nandigan huida hami Ho male, gabe hulehon hami Ho mangan; manang mauas, gabe hulehon hami Ho minum?

³⁸Nandigan huida hami Ho na buro, gabe hujangkon hami Ho; manang marsangkotbulung, gabe huparulosi hami Ho?

³⁹Nandigan huida hami Ho marsahit manang tarhurung, gabe hudulo hami Ho?

⁴⁰Dung i alusan ni Raja i ma nasida: Situtu do na hudok on tu hamu; Nasa na binahenmuna tu sada sian anggingku angka na metmet on, na tu Ahu do i dibahen hamu!

⁴¹Dung i dohononna ma tu angka na di hambirangna: Laho ma hamu sian jolongkon, hamu angka na binuraan tu api sisalelenglelelengna, na pinature di sibolis i dohot di angka surusuruanna!

⁴²Ai na male do Ahu, ndang dilehon hamu Ahu mangan; na mauas do Ahu, ndang dilehon hamu Ahu minum.

⁴³Na buro do Ahu, ndang dijangkon hamu Ahu; na marsangkotbulung do Ahu, ndang diparulosi hamu Ahu; na marsahit do Ahu, na tarhurung do Ahu, ndang didulo hamu Ahu.

⁴⁴Dung i dohononnasida ma mangalusi Ibana: Tuhan, nandigan huida hami Ho male, manang mauas, manang na buro, manang marsangkotbulung, manang marsahit, manang tarhurung, so hupatureture hami Ho?

⁴⁵Dung i dohononna ma mangalusi nasida: Situtu do na hudok on tu hamu: Di na so niantoanmuna sahalak sian angka na metmet on, sandok Ahu do na so niantoanmuna disi.

⁴⁶Dung i laho ma nasida tu na bernit salelenglelengna; alai anggo partigor i tu hangoluan sisalelenglelengna do.

26¹(I.) Asa dung sahat dihatahon Jesus sude angka jamita ondeng, ninna ma mandok angka siseanna:

²Diboto hamu do, haduan ma dapot pesta Paska; disi ma pasahatonna Anak ni jolma i, asa diparsilangkon.

³Marpungu ma uju i angka sintua ni malim dohot angka sintua ni bangso i tu godung ni sintua ni malim na margoar si Kayapas,

⁴Iaho martuptup, manang bisuk dia bahenonna manangkup Jesus dohot mamusa Ibana.

⁵Alai didok nasida ma: Unang ma di pesta i, so tung guntur natorop i.

⁶(II.) Alai uju di Betania Jesus di bagas ni si Simon na huliton i,

⁷didapothon sada parompuan ma Ibana, mantat guriguri na marisi miak na arga situtu, i ma diusehon tu Uluna, tagan mangan nasida.

⁸Marnida i angka siseanna, sogo ma rohanasida, angka ninna ma: Magoponai, antong!

⁹Aut ginadis i nian arga jala nilehon tu na pogos!

¹⁰Umboto i Jesus, ninna ma mandok nasida: Boasa arsaanmuna parompuan i? Ai na uli do na binahenna i tu Ahu.

¹¹Ai tongtong do adong na pogos di tongatongamuna, alai anggo Ahu ndang manongtong di hamuna.

¹²Ai diusehon pe miak i tu Dagingki, hira na mambahen adat pananomom do nasida disi tu Ahu.

¹³Situtu do na hudok on tu hamu: Manang didia di liat portibi on dijamitahon sogot barita na uli on, hatahononna do nang na binahenna ondeng gabe baritana.

¹⁴Dung i laho ma sada sian na sampuludua i, na margoar Judas Iskariot, manopot angka sintua ni malim,

¹⁵mandok: Sadia ma lehononmuna tu ahu, asa hupasahat Ibana tu hamu? Gabe tolupulu rupia ma dibilang nasida tu jolona.

¹⁶Olat ni i ma dilului rohana tingki halehetanna laho pasahathon.

¹⁷(III.) Alai di ari parhobasan parjolo ni pesta Paska i didapothon siseanna ma Jesus, angka ninna ma: Tudia ma patureonnami di Ho panganon Paska i, dipangido roham?

¹⁸Gabe didok ma: Laho ma hamu tu huta i, manopot si anu, dok hamu ma tu ibana: Tona ni Guru i: Na dapot ne ma tingkingku, di ho ma Ahu sorang, laho mangan Paska i rap dohot siseanku.

¹⁹Dung i dibahen angka sisean i ma songon na nidokkon ni Jesus tu nasida, jadi dihobasi ma panganon Paska i.

²⁰Adong dung bot ari, mangan ma Ibana rap dohot siseanna na sampuludua i.

²¹Jadi di na mangan i nasida, ninna ma: Situtu do na hudok on di hamu: Sada sian hamu naeng pasahathon Ahu!

²²Dung i marsak situtu ma rohanasida, gabe dipandok be ma tu Ibana: Nda tung ahu i, Tuhan?

²³Alai ninna ma mangalusi: Ia i na rap dohot Ahu manurdukkon tanganna tu paringkauan, i do na pasahathon Ahu!

²⁴Tong do nian ujung ni Anak nijolma i, songon na tarsurat hian; alai marjea do halak

na pasahathon Anak ni jolma i? Tagonan unang ma sanga tubu ibana tu hasiangan on!

²⁵Dung i ro ma si Judas, parjehe i, didok ma: Nda tung ahu i, Guru? Jadi didok Jesus ma tu ibana: Ho do tutu!

²⁶Jadi di na mangan i nasida, dihindat Jesus ma roti, dipasupasu ma, diponggoli jala diparlehon ma tu angka siseanna, huhut ma didok: Jalo hamu ma, pangan hamu; Dagingku do on!

²⁷Dung i dihindat ma panginuman, didok ma mauiate, dilehon ma tu nasida, huhut ma didok: Sude ma hamu manginum sian i!

²⁸Ai Mudarhu do on, mudar parpadanan i, na niusehon humongkop torop, bahen hasesaan ni dosa.

²⁹Alai hudok ma tu hamu: Na so tupa be inumonku olat ni on sian parbue ni hau anggur i sahat ro di ari sogot; disi ma inumonku na imbaru rap dohot hamu di harajaon ni Damang.

³⁰Jadi dung diendehon nasida ende pujipujian i, ruar ma nasida laho tu dolok Jetun.

³¹Disi ma didok Jesus tu nasida: Saluhut do hamu naeng targasip mida Ahu di na saborngin on, ai na tarsurat do: "Lombutanku ma parmahan i, gabe marserak ma birubiru na sapunguan i."

³²Alai dung hehe Ahu sian na mate, joloananku ma hamu tu Galilea.

³³Alai ninna si Petrus ma mangalusi Ibana:
Agia sude nasida targasip mida Ho, anggo
ahu, na so tupa targasip.

³⁴Dung i didok Jesus ma mandok ibana:
Situtu do na hudok on tu ho: Tolu hali do
soadahononmu Ahu di na saborngin on, tagan
so martahuak dope manuk.

³⁵Dung i didok si Petrus ma tu Ibana:
Nang mate pe ahu rap dohot Ho, ndang
soadahononku Ho. Laos songon i do hata ni
saluhut sisean i.

³⁶(IV.) Dung i sahat ma Jesus rap dohot
nasida tu porlak sada na margoar Getsemane.
Jadi didok ma tu angka sisean i: Hundul
ma hamu jolo dison, saleleng disan Ahu
martangiang.

³⁷Dung i ditogihon ma si Petrus dohot anak
ni si Sebedeus na dua i, dung i gabe marsak
situtu ma Ibana jala bobonosan.

³⁸Jala didok ma tu nasida: Mansai marsak
situtu do rohangku, hira na mate do. Dison
ma hamu, dungo rap dohot Ahu!

³⁹Dung i laho ma Ibana saotik tujolo,
dipatungkap ma bohina tu tano martangiang,
ninna ma: Ale Amang, namun na tarbahen,
salpuhon ma siinumon on sian Ahu! Alai tahe,
unang marguru tu rohangku; roham do!

⁴⁰Dung i mulak ma Ibana tu angka siseanna,
jala tarpodom do nasida didapot, jadi didok
ma tu si Petrus: Ndang margogo hamu hape
dungo rap dohot Ahu nanggo sangombas?

⁴¹ Dungo ma hamu jala martangiang, asa unang hamu bongot tu pangunjungan, ai na girgir do nian tondi i, alai gale do ia daging!

⁴² Dung i laho ma Ibana paduahalihon martangiang, ninna ma: Ale Amang, molo so tarbahen salpu on, nda ingkon huinum, sai saut ma lomo ni Roham!

⁴³ Dung i di na ro i Ibana, tarpodom muse ma nasida didapot, ai mansai dokdok do salibonnasida.

⁴⁴ Jadi ditadingkon ma nasida, diulakkon ma laho martangiang patoluhalihon, mandok hata ondeng.

⁴⁵ Dung i didapothon ma muse angka siseanna jadi didok ma tu nasida: Datdatanmuna dope modom dohot maradian? Nunga dapot tingkina nuaeng, sahat ma Anak ni jolma i tu tangan ni pardosa.

⁴⁶ Hehe ma hamu, laho ma hita! Ndi, nunga, ro na pasahathon Ahu!

⁴⁷ (V.) Mangkatahon i dope Ibana, nunga ro si Judas, sada sian na sampuludua i, rap dohot torop halak, angka na marpodang jala marlombutlombut, sinuru ni angka sintua ni malim dohot sintua ni bangso i.

⁴⁸ Alai nunga dipabotohon parjehe i hian partinandaan tu nasida, ai didok do: Ia i na huumma, Ibana ma i; i ma tangkup hamu!

⁴⁹ Asa pintor didapothon ma Jesus, didok ma: Tabi di Ho, Guru! Laos diumma.

⁵⁰ Alai ninna Jesus ma mandok ibana: Marhua ho tuson, anggia? Dung i ro ma nasida, dilaluhon ma tangannasida tu Jesus manangkup Ibana.

⁵¹ Dung i adong ma sada sian angka dongan ni Jesus mangalaluhon tanganna, disintak ma podangna, ditampulhon ma tu naposo ni sintua ni malim sahalak, dipisikkon ma pinggolna.

⁵² Jadi didok Jesus ma tu ibana: Pasarung podangmi, ai na manintak podang, mago ma bahenon ni podang!

⁵³ Ai na so tarbahen Ahu do di roham mangido sian Damang, asa dipadiri di Ahu saonari lobi sian sampuludua loksa surusuruan?

⁵⁴ Alai songon dia ma disi saut hata ni Surat i na mandok: Ingkon masa do na songon i?

⁵⁵ Uju i ma didok Jesus tu angka natorop i: Hira na dompak panamun do hamu hehe, marpodang jala marlombutlombut manangkup Ahu. Ariari do Ahu nian hundul mangajari di bagas joro, so adong ditangkup hamu Ahu.

⁵⁶ Alai na masa do sudena on, asa jumpang hata ni angka panurirang i. Dung i ditadingkon saluhut sisean i ma Ibana laho maporus.

⁵⁷ (VI.) Asa dung ditangkup nasida Jesus, ditogihon ma Ibana tujolo ni sintua ni malim si Kayapas, ai nunga pungu disi angka sibotosurat ro di pangituai.

⁵⁸ Alai sai mangihut do si Petrus mandaodao sahat ro di alaman ni sintua ni malim i. Laos bongot ma ibana tubagasan, laho hundul tusi rap dohot angka naposo marnida ujungna.

⁵⁹ Alai anggo angka sintua ni malim ro di sandok rapot godang mangalului panindangion gapgap dompak Jesus, na tuk mambahen Ibana marutang hosa.

⁶⁰ Alai nang pe hehe torop sitindangi gapgap, ndang adong jumpangsa.

⁶¹ Alai parpudi ro ma dua halak, ninna ma: Didok Halak on: Tarbahen Ahu do mangalohai joro ni Debata jala pajongjong i sumuang di bagasan tolu ari.

⁶² Dung i hehe ma sintua ni malim i, mandok tu Ibana: Nandang alusanmu na hinatindangkonnasida dompak Ho?

⁶³ Alai sai hohom do anggo Jesus. Dung i dipanghulingi sintua ni malim i ma Ibana: Hupatolon ma Ho tu Debata Siparngolu i, asa dipaboa Ho tu hami, manang na tutu Ho Kristus, Anak ni Debata!

⁶⁴ Dung i didok Jesus ma tu ibana: Songon na nidokmi ma tutu! Alai hudok ma tu hamu: Olat ni on ma idaonmuna Anak ni jolma i, hundul di siamun ni Hagogoon jala ro di atas ombun ni langit.

⁶⁵ Gabe diribakkon sintua ni malim ma pangkeanna mandok: Na mangaleai Debata do Ibana! Pola luluan dope sitindangi? Nunga dibege hamu pangaleaina i!

⁶⁶Beha do di rohamu? Dung i ninna nasida ma mangalusi: Marutang hosa ma Ibana!

⁶⁷Jadi ditijuri nasida ma bohina, na deba manompuk, na deba mangalinsingi,

⁶⁸huhut mandok: Surirangi hami, Kristus, ise do na mambunu Ho?

⁶⁹(VII.) Alai na hundul do anggo si Petrus di alaman i, jadi didapothon sada parompuan ma ibana mandok: Dohot do ho dongan ni Jesus, na sian Galilea i!

⁷⁰Jadi disoadahon ma di jolonasida saluhutna, ninna ma: Nandang huboto na nidokmi!

⁷¹Dung i di na naeng haruar ibana, diida parompuan na asing ma ibana, didok ma tu angka na disini: On do sada dongan ni Jesus na sian Nasaret!

⁷²Jadi diulahi ma mansoadahon, pola manolon: Tung na so hutanda do Halak i!

⁷³Alai dung satongkin nari, didapothon angka na jongjong disi ma si Petrus mandok: Sintong tahe, dohot do ho sada sian nasida, ai pangkulingmi do patandahon ho!

⁷⁴Dung i dipambuburahon ma dirina huhut manolonnolon: Tung na so hutanda do Halak i, ninna. Jadi pintor martahuak ma manuk.

⁷⁵Jadi diingot si Petrus ma na hinatahon ni Jesus tu ibana: Tolu hali soadahononmu Ahu, tagan so martahuak dope manuk. Dung i laho ma si Petrus tu balian tumatangis situtu.

27 ¹(I.) Torang ni arina i martuptup ma sude angka sintua ni malim dohot sintua ni bangso i dompak Jesus, laho mamusa Ibana.

²Ditali jala ditogu nasida ma Ibana laho pasahathon tu panguhum si Latus.

³(II.) Jadi dung diida si Judas, parjehe i, na naeng hona uhum nama Ibana, disolsoli ma rohana, dipaulak ma na tolupulu rupia i tu angka sintua ni malim dohot tu sintua ni bangso i;

⁴ninna ma: Sala do ahu! Hujehohon do hape na so marpipot! Alai didok nasida ma: Ndang ro di hami i! Ho do na sari disi!

⁵Jadi ditimpalhon ma perak i tu bagasan joro i, laos sumurut sian i laho maningkot.

⁶Alai dibuat angka sintua ni malim ma hepeng i, ninna ma: Ndang jadi padomuon i tu arta ni joro, ai tuhor ni mudar do i!

⁷Jala mardos ni roha nasida manuhorhonsa tu ladang ni pande hudon, bahen parbandaan ni halak dagang.

⁸Ala ni i do umbahen na margoar i ladang mudar ro di sadari on.

⁹Disi ma jumpang hata ni panurirang Jeremia na mandok: "Dibuat nasida do na tolupulu rupia i, asam ni na niasam, diasam deba anak Israel.

¹⁰Dung i dilehon ma i manuhor ladang ni pande hudon, songon na nidokkon ni Tuhan i tu ahu."

¹¹ (III.) Asa dipajongjong do Jesus tujolo ni panguhum i. Jadi disungkun panguhum i ma Ibana, ninna ma: Atehe, Ho do raja ni halak Jahudi? Alus ni Jesus: Songon na nidokmi ma tutu!

¹² Dung i dialuhon angka sintua ni malim dohot sintua ni bangso i ma Ibana; alai ndang dialusi manang aha.

¹³ Jadi didok si Latus ma tu Ibana: Nandang dibege Ho godang ni na hinatindakonnasida dompak Ho?

¹⁴ Alai ndang dialusi Ibana nanggo sada hata, pola longang situtu roha ni panguhum i.

¹⁵ Alai peam do dipalua panguhum i di pesta i sada halak na tarhurung, marguru tu na tinodo ni natorop.

¹⁶ Alai adong ma tarhurung uju i sada parjahat na sumalin, na margoar si Barabas.

¹⁷ Jadi di na pingu i nasida, didok si Latus ma tu nasida: Ise do dipangido hamu paluaonku, si Barabas manang Jesus na targoar Kristus?

¹⁸ Ai diboto do, late ni rohanasida do umbahen na dipasahat nasida Ibana.

¹⁹ Alai di na hundul i ibana di habangsa paruhuman i, ditonahon jolmana ma tu ibana: So tung dihahua ho halak na tigor i, ai susa situtu do ahu naborngin di nippingku ala Ibana.

²⁰ Alai sai disosoi angka sintua ni malim rap dohot sintua ni bangso i natorop, asa

dipangido nasida, malua si Barabas, alai pusaon do anggo Jesus.

²¹ Dung i ninna panguhum i ma mandok nasida: Ise sian na dua i dipangido hamu paluaonku? Jadi didok nasida ma: Si Barabas!

²² Dung i didok si Latus ma tu nasida: Antong, aha ma bahenonku tu Jesus, na targoar Kristus? Gabe saluhut nasida, mandok: Parsilangkon ma!

²³ Alai ninna panguhum i ma: Ai aha na jahat dibahen? Jadi lam gogo ma dipanjoujouhon: Parsilangkon ma!

²⁴ Asa dung diida si Latus, na so marguna hatana, lam ganda tabe gaorna, dibuat ma aek mamburi tanganna di jolo ni natorop i, huhut mandok: Lias do ahu sian mudar ni On! Hamu do na sari disi!

²⁵ Dung i ninna sude natorop i ma: Marsapata tu hami dohot tu ianakhonnami ma mudarna i!

²⁶ Dung i saut ma dipalua si Barabas; alai anggo Jesus dilinsingi, dung i dipasahat ma, asa diparsilangkon.

²⁷ (IV.) Jadi diboan angka soldadu ni panguhum i ma Jesus tu bagas paruhuman, diarahon ma sude dongannasida manahopi Ibana.

²⁸ Ditanggal ma abitna, disolukkon ma tu Ibana baju dapdap.

²⁹ Didandani nasida ma sungsang duri bahen tumpalna, diampehon ma i tu uluna;

dilehon ma tolong tu tanganna siamun, dung i marsomba ma nasida tu jolona mangaleai Ibana, angka ninna ma: Tabi ma di Ho, ale Raja ni Jahudi!

³⁰Huhut ditijuri nasida Ibana, dibuat ma tolong i sian tanganna, dilotakkon tu uluna.

³¹Jadi dung sun dileai nasida Ibana, ditanggal ma sian Ibana baju dapdap i, disolukkon ma muse tu dagingna abitna hian, dung i ditogihon ma Ibana, asa diparsilangkon.

³²Alai laho tu balian jumpang nasida ma sahalak Kirene na margoar si Simon; i nama digogoi nasida mamorsan hau na pinarsilang i.

³³Jadi sahat ma nasida tu inganan na margoar Golgata (lapatanna: Partangkurahan).

³⁴Disi ma dipainum nasida tu Ibana tuak anggur na marsaor pogu; jadi dung didai, ndang olo Ibana manginum.

³⁵Alai dung diparsilangkon nasida Ibana, martondung ma nasida taringot tu angka abitna.

³⁶Jadi hundul ma nasida disi jumaga Ibana.

³⁷Jadi dilohothon nasida ma tu ginjang ni uluna surat paboa salana, hatana: Jesus do On, Raja ni Jahudi!

³⁸Rap dohot Ibana diparsilangkon nasida dua halak panamun; sada di siamunna, sada di hambirangna.

³⁹Alai dilealeai angka na mamolus i Ibana, angka dipaelengeleng uluna mandok:

⁴⁰E Ho, na mangalohai joro i jala na pajongjongkonsa di bagasan tolu ari! Palua dirim, molo na tutu Ho Anak ni Debata; mijur ma Ho sian hau pinarsilang i!

⁴¹Suman tusi do pangaleai ni angka sintua ni malim sibotosurat dohot sintua ni bangso i, ai didok be:

⁴²Ia na asing dipalua, dirina so tarpaluasa. Raja ni Israel do Ibana! Antong, mijur ma Ibana sian hau pinarsilang i, asa porsea hami di Ibana!

⁴³Naung dihaposi Debata; antong, I ma paluahon Ibana nuaeng, molo na lomo rohana, ai ninna do: Anak ni Debata do Ahu!

⁴⁴Laos songon i do pangaleai ni panamun i, na rap diparsilangkon dohot Ibana.

⁴⁵Alai olat ni hos ni ari ro di pungkul tolu holom ma sandok tano i.

⁴⁶Alai tar di pungkul tolu dipangiar Jesus ma soarana, dianggukhon ma: Ale Debatangku, Debatangku, boasa tung tadingkononmu Ahu (Eli, Eli, lama sabachtani)?

⁴⁷Alai umbege i, ninna na deba sian angka na jongjong disi: Na manjou si Elia do I.

⁴⁸Dung i pintor marlojong ma sada sian nasida mangalap limut, dibutongi ma i tu na asom, dipalohot ma tu tolong painumhon Ibana.

⁴⁹Alai na deba nari mandok: Pasombu jolo: Taida ma, manang na olo ro si Elia paluahon Ibana!

⁵⁰(V.) Alai diulahi Jesus ma marsoara na gogo; dung i tos ma hosana.

⁵¹Laos di na satongkin i maribak ma hirehire na di bagasjoro sian ginjang ro di toru. Dung i humuntal ma tano i, marigat ma dohot angka batu mamak.

⁵²Mungkap ma angka tanoman, dung i hehe ma daging ni torop na badia angka na modom disi,

⁵³gabe ruar ma nasida sian angka tanoman i; jadi dung hehe Jesus, ro do nasida tu huta na badia i, pataridahon nasida tu torop halak.

⁵⁴Alai dung diida induk ni soldadu i rap dohot angka donganna, na jumaga Jesus, lalo i ro di angka na masa i, mabiar situtu ma nasida, ninna ma: Tutu do On Anak ni Debata!

⁵⁵Alai adong ma disi torop boruboru, na manatapnatap mandaodao, i ma angka naung mangihuthon Jesus sian Galilea, patureturehon Ibana.

⁵⁶Si Maria Magdalena ma sada sian nasida dohot si Maria, ina ni Jakobus dohot Josep, dohot ina ni angka anak ni si Sebedeus.

⁵⁷(VI.) Alai dung bot ari, ro ma sada halak na mora, na margoar si Josep, na sian huta Arimatea, naung gabe sisean ni Jesus.

⁵⁸Ibana ma laho tu si Latus mangido bangke ni Jesus. Jadi didokkon si Latus ma na pasahathonsa tu ibana.

⁵⁹Dung i dijalo si Josep ma bangke i, dibaluti ma tu dagangan na ias.

⁶⁰Dung i dipeakkon ma tu bagasan tanomanna na imbaru dope, na tinuhil tu bagasan batu, digulang ma batu na bolon tu baba ni tanoman i; dung i laho ma ibana.

⁶¹Alai hundulhundul do disi tondongkon tanoman i si Maria Magdalena dohot si Maria na sada.

⁶²Alai torang ni arina i, na mangihut tu ari parhobasan i, marluhut ma angka sintua ni malim ro di Parise.

⁶³Huingot hami, Tuannami, naung didok Pangansi i, di na mangolu dope Ibana: "Na hehe ma Ahu di ari patoluhon!"

⁶⁴Antong, dokkon ma na manjaga tanoman i sahat ro di ari patoluhon, asa unang ro angka siseanna manangko Ibana, jadi dohononnasida ma tu natorop: Naung hehe Ibana sian na mate; gabe rumoa maon sipaotooto parpudi sian na parjolo i.

⁶⁵Jadi didok si Latus ma tu nasida: Togihon hamu ma parjaga i! Laho ma hamu mangaramotisa sian nasa rohamuna!

⁶⁶Dung i laho ma nasida mangaramoti tanoman i, dipajagahon, huhut ma disahapi batu i.

28¹ (I.) Alai di buhabuha ijuk, di ari parjolo dung salpu Sabbat i, ro ma si Maria Magdalena dohot si Maria na sada maningkir tanoman i.

² Alai nunga masa lalo na gogo. Ai tuat do surusuruan ni Tuhan sian banua ginjang; jala dung sahat, digulang ma batu i, laos hundul diatasna.

³ Alai songon hilap do rupana idaon, saksak do ulosna songon hapur.

⁴ Jadi angka dotdot ma parjaga i dibahen biar ni rohanasida, hira na mate do.

⁵ Alai ninna surusuruan i ma mandok parompuan i: Unang hamu mabiar, ai huboto, dilului hamu do Jesus, naung diparsilangkon.

⁶ Ndang dison Ibana. Ai nunga hehe Ibana, songon na nidokna hian. Pajonok hamu ma; ida hamu ma inganan hapeahanna i!

⁷ Hatop ma hamu laho tu angka siseanna i paboahon, naung hehe Ibana sian na mate, jadi joloananna do hamu tu Galilea, disi ma idaonmuna Ibana; nunga hupaboa i tu hamu.

⁸ Dung i hatop ma nasida laho sian tanoman i, mabiar huhut las situtu rohanasida; marlojong do nasida laho mamaritahonsa tu angka siseanna.

⁹ Disi ma ro Jesus mandapothon nasida, ninna ma: Dame ma di hamu! Dung i dipajonok nasida ma, dihaol ma patna, huhut manungkap tu jolona.

¹⁰Jadi didok Jesus ma tu nasida: Unang hamu mabiar, laho ma hamu mandokkon angka anggingku tu Galilea, disi ma idaonnaasida Ahu!

¹¹(II.) Alai di na laho i nasida, nunga sahat deba sian angka parjaga i tu huta, dibaritahon ma saluhut na masa i tu angka sintua ni malim.

¹²Jadi marluhut ma nasida rap dohot angka sintua ni bangso i martahi, dilehon ma hepeng na nia tu soldadu i;

¹³laos ninna ma: Dok hamu ma: Tagan tarpodom hami, ro do angka siseanna bornginna i, manangko Ibana.

¹⁴Jadi molo tung tarbege i tu panguhum, hami pe mandamedamei ibana huhut sumarihon, unang susa hamu.

¹⁵Dung i dijalo nasida ma hepeng i, dibahen ma songon na pinodahonna tu nasida, gabe mehet ma hata ondeng di halak Jahudi ro di sadari on.

¹⁶(III.) Alai na laho do anggo siseanna na sampulusada i tu sada dolok na di luat Galilea, songon naung tinonahon ni Jesus tu nasida.

¹⁷Jadi dung diida nasida Ibana, disomba ma Ibana; alai na ganggu do roha ni na deba.

¹⁸Dung i didapothon Jesus ma nasida, didok ma: Nunga sahat tu Ahu nasa huaso na di banua gijnang dohot na di tano on.

¹⁹Laho ma hamu, podai hamu ma saluhut bangso, didi hamu ma nasida tubagasan Goar ni Ama. Anak dohot Tondi Parbadia!

²⁰Laos ajari hamu ma nasida mangaradoti nasa hata naung hupatikkon tu hamu. Ai ida ma, sai na dongananku do hamu ganup ari, rasirasa ro ajal ni hasiangan on!

Markus

1 ¹ (I.) On ma mula ni barita na uli ni Jesus Kristus.

² Hombar tu na tarsurat di panurirang Jesaya: "Husuru ma suruanki, patujolo ni bohimi, sipature sidalananmi!"

³ "Soara ni na manjoujou di halongonan: Pature hamu ma dalan di Tuhan i; pahornop hamu ma sidalananna i!"

⁴ Di halongonan do si Johannes mandidihon jala manjamitahon pandidion hamubaon ni roha, laho paselahon dosa.

⁵ Jadi ruar ma sude pangisi ni tano Judea ro di sude halak Jerusalem manopot ibana jala dipandidihon do nasida di batang aek Jordan, dung ditopoti be dosana.

⁶ Langgo si Johannes i, imbulu ni unto do ulosna jala hulingkuling do hohosna, angka sihapor dohot situak ni loba do sipanganonna.

⁷ On do jamitana; Na ro ma sian pudingku na gumogo sian ahu; na hurang tama do ahu paunduk ahu mangkarhari tali ni sipatuna.

⁸ Aek do hudidihon tu hamu; alai Tondi Parbadia do didihononna tu hamu.

⁹ (II.) Uju i ma ro Jesus sian Nasaret, na di luat Galilea, jadi tardidi ma Ibana di aek Jordan, dididi si Johannes.

¹⁰Di na hehe Ibana sian aek i, pintor diida si Johannes ma mungkap langit, jadi songgop ma Tondi i songon darapati tu Ibana.

¹¹Jala masa ma soara sian ginjang i, na mandok: Ho do Anak haholongan ni rohangku; lomo do rohangku di Ho!

¹²(III.) Dung i mamintor ditogihon Tondi i ma Ibana tu halongonan.

¹³Asa di halongonan ma Ibana leleng ni opatpulu ari diunjuni sibolis i; rap dohot angka binatang do Ibana disi, dung i ro ma angka surusuruan marhobasi di Ibana.

¹⁴Alai dung dihurungkon si Johannes, ro ma Jesus tu luat Galilea manjamitahon barita na uli ni Debata.

¹⁵Ninna do: Nunga dapot tingkina; nunga songgop harajaon ni Debata. Pauba hamu ma rohamuna, jala haporseai hamu ma barita na uli i!

¹⁶(IV.) Dung i di na mardalani Ibana di topi ni tao Galilea, diida ma si Simon dohot si Andreas, dongan saama ni si Simon, na sumampakkon jalana tu tao i, ai panjala do nasida.

¹⁷Jadi didok Jesus ma tu nasida: Ihuthon hamu Ahu; bahenonku do hamu sijala jolma!

¹⁸Pintor ditadingkon nasida ma jala i, laos mangihuthon Ibana.

¹⁹Jadi dung dumao otik didalani sian i, diida ma si Jakobus, anak ni si Sebedeus, dohot si Johannes, donganna saama i, di

bagasan parau do nang nasida patureturehon jalanasida.

²⁰Dung i manigor dijou ma nasida, gabe ditadingkon nasida ma amanasida, si Sebedeus na di parau i rap dohot angka anak gajiana, laos ro do nasida mangihuthon Ibana.

²¹(V.) Dung i dibongoti nasida ma huta Kapernaum, jadi manigor tu parguruan ma Ibana di ari Sabbat, laho mangajari.

²²Gabe longang do rohanasida umbege podana, ai na marsahala do pangajarionna di nasida, ndada songon angka sibotosurat.

²³Jala tongon ma adong di parguruannasida sada halak partondi na hodar na manganguhi.

²⁴Ninna do: O Jesus, na sian Nasaret; marhua Ho tu hami! Na ro do Ho hape mangago hami! Hutanda do Ho; na badia ni Debata do Ho!

²⁵Alai disonggahi Jesus do ibana, didok ma: Sip ho! Ruar ma ho sian ibana!

²⁶Gabe disarat tondi na hodar i ma ibana, pola gogo soarana manjoujou, laho ruar sian ibana.

²⁷Jadi longang ma rohanasida saluhutna, pola masisungkunan nasida, angka didok ma: Na beha do on? Poda na imbaru do on! Ai gari angka tondi na hodar dipaksa mardongan sahala, gabe dioloi do Ibana.

²⁸Dung i pintor sar ma baritana tu sandok luat Galilea i.

²⁹Dung ruar sian parguruan i, manigor dibongoti nasida ma jabu ni si Simon dohot si Andreas raphon si Jakobus dohot si Johannes.

³⁰Alai na peak do simatua boru ni si Simon i panepaneon, jadi manigor ditaringothon ma i tu Ibana.

³¹Jadi didapothon ma ibana, dijama ma tanganna pahehehon; dung i ditadingkon panepane i ma ibana, jadi dihobasi ma di nasida.

³²Alai dung bot, dung sundut mata ni ari, masiboan na marsahitna be ma halak tu jolona, ro di na sinonggopan ni angka sibolis.

³³Gabe sude nasida na sahuta i marpungu di jolo ruma i.

³⁴Jadi torop do angka na hansitan na marragamragam sahita dipamalum jala torop sibolis dipabali; alai ndang diloas angka sibolis i paboahon, naung ditanda nasida Ibana.

³⁵Dung i manogotna i, borngin situtu dope, hehe ma Ibana tu balian, laho martangiang tu na lungun.

³⁶Jadi diihuthon si Simon dohot angka donganna ma Ibana tusi.

³⁷Jadi dung jumpangsa, didok nasida ma mandok Ibana: Sude halak mangalului Ho!

³⁸Alai didok Ibana ma tu nasida: Beta ma hita tu na asing, tu angka lumban na

humaliang an, asa dohot disi Ahu marjamita.

Ai ala ni i do umbahen na ro ahu!

³⁹Laos laho ma Ibana marjamita tu parguruannasida na di liat Galilea jala dipabali angka sibolis.

⁴⁰Jadi ro ma sada halak na huliton tu jolona, dielehelek jala disomba ma Ibana huhut mandok: Molo na olo Ho, tarpamalum Ho do ahu!

⁴¹Jadi asi ma rohana, disurdukkon ma tanganna, dijama ma ibana, laos didok ma: Na olo do Ahu; ias ma ho!

⁴²Jadi pintor longkang ma hulit i sian ibana, gabe ias ma dagingna.

⁴³Dung i gogo ma ibana dipopai jala manigor dipalaho ma.

⁴⁴Ninna ma mandok ibana: Jaga ho; so tung dipaboa ho i tu manang ise! Alai laho ma ho, patuduhon ma dirim tu malim, dung i pelehon ma na pinatikkon ni si Musa, ala naung malum ho, bahen panindangion tu nasida!

⁴⁵Alai dung laho ibana, dipungka ma pararathonsa, dipasar ma hata i, pola so tarbahen Ibana be bongot tu huta i di na patar; jadi di ruar, di inganan na sumoding nama Ibana. Laos ro do halak sian desa na ualu i manopot Ibana.

2¹(I.) Asa dung na nia lelengna, diulakkon Jesus ma laho tu huta Kapernaum, jala tarbege ma, naung di jabu Ibana.

²Jadi torop ma marpungu tusi, pola so hasiatan be ro di alamanna, gabe dipaboa ma tu nasida hata i.

³Dung i ro ma na mamboan sada halak na sarion tu Ibana; opat do na mangusungsa.

⁴Alai ndang hajonohan nasida Ibana, ala ni natorop i, gabe diloha nama tarup ni ingananna i; jala dung diungkap i, ditantan ma sian i podoman hapeahan ni na sarion i.

⁵Marnida haporseaonnasida i Jesus, ninna ma mandok na sarion i: O anaha, nunga sesa angka dosami!

⁶Alai adong do hundul disi deba sibotosurat, angka na mandok di bagasan rohanasida:

⁷Na boha do hata ni On! Na mangaleai Debata do Ibana. Sasada Debata do na tuk manesa dosa!

⁸Alai manigor diboto Jesus ma di bagasan rohana parhusarion ni rohanasida, jadi didok ma tu nasida: Boasa songon i pingkiran ni rohamuna?

⁹Dia do ummomo? Dohonon tu na sarion i: Nunga sesa angka dosami! Manang dohonon: Hehe ma ho, boan ma podomanmi; mardalan ma ho?

¹⁰Alai asa diboto hamu, marhuaso do Anak ni jolma i di tano on manesa angka dosa (didok ma tu na sarion i:)

¹¹Ahu mandok tu ho: Hehe ma ho, boan ma podomanmi; laho ma muli!

¹²Jadi hehe do ibana, pintor dibuat ma podomanna i laho tu balian, dipanotnoti nasida sude; pola tarhalomong rohanasida saluhutna, gabe dipuji ma Debata, angka ninna ma: Ndang dung dope huida hami na songon i!

¹³(II.) Dung i diulakkon ma laho tu tao i, jadi didapothon saluhut natorop i ma Ibana, gabe diajari ma nasida.

¹⁴Dung i di na mamolus Ibana, diida ma si Lepi, anak ni si Alpeus, hundul di parbeoan, jadi didok ma tu ibana: Ihuthon Ahu! Jadi hehe do i tutu mangihuthon Ibana.

¹⁵Dung i mangan ma Ibana di bagasna i, jadi torop sijalobeo dohot pardosa mangangkupi Jesus dohot angka siseanna mangan; tung torop do angka na mangihuthon Ibana.

¹⁶Alai diida angka sibotosurat na sian Parise i do Ibana mangan raphon angka pardosa dohot sijalobeo, gabe didok nasida ma tu angka sisean i: Mangan minum do Ibana hape raphon angka sijalobeo dohot pardosa!

¹⁷Alai umbege i Jesus, ninna ma mandok nasida: Apala na ringkot di angka na hisar pandaoni i, di angka na hansitan do! Ndang na ro Ahu manjou angka partigor, angka pardosa do!

¹⁸(III.) Alai somal do angka sisean ni si Johannes marpuasa, songon i angka Parise; jadi ro ma nasida mandok tu Ibana: Boasa marpuasai angka sisean ni si Johannes nang

sisean ni angka Parise; ia angka siseanmi, ndang marpuasa?

¹⁹Gabe didok Jesus ma tu nasida: Tung tarbahren ma pandongani ni pangoli i marpuasa, saleleng rap dope dohot nasida pangoli i? Sapanjang di lambungnasida dope pangoli i, ndang tarbahren nasida marpuasa.

²⁰Alai na ro ma arina, alaponna ma disi Pangoli i sian tongatonganasida i; disi ma nasida marpuasa.

²¹Ndang adong na mandungkaphon abit na imbaru tu abit naung mumut; ai ribak do muse sian i na nidungkaphon na songon i, na imbaru sian na buruk i, jadi lam ganda ma na maribak i.

²²Jala ndang dipaindingjolma tuak anggur siraruan tu inganan naung buruk, ai puntason ni tuak anggur i do ingananna i, gabe mago ma tuak anggur i nang ingananna i.

²³Dung i mamolus ma Ibana sian tonga ni hauma, tongon di ari Sabbath, jadi dipungka angka siseanna ma manggotili angka biur, di na mardalan i.

²⁴Dung i didok angka Parise ma tu Ibana: Bereng ma na binahennasida, na so jadi di ari Sabbath!

²⁵Gabe ninna ma mandok nasida: Ndang dung dope dijaha hamu huroha na binahen ni si Daud, uju tarsosak ibana, di na male ibana dohot angka donganna sauduran?

²⁶Ai dibongoti do joro ni Debata, uju si Abiatar sintua ni malim, jala dipangan do roti na marhadohoan, na so jadi panganon ni manang ise nian, ia so holan angka malim i, laos diparlehon do sian i tu angka donganna.

²⁷Dung i didok ma tu nasida: Ala nijolma i do, umbahen na diaturhon ari Sabbat; ndang ala ni ari Sabbat, umbahen na ditompa jolma i.

²⁸Asa guru di Anak ni jolma i do nang ari Sabbat!

3¹(I.) Dung i dibongoti muse ma parguruan i. Jadi adong ma disi sada halak naung mate tanganna sambariba.

²Jadi mangonggop ma rohanasida di Ibana, manang na olo Ibana pamalumhonsa di ari Sabbat, asa anggiat taraluhon nasida Ibana.

³Alai didok ma mandok halak partangan na mate i: Hehe ma ho tu tongatonga on!

⁴Laos didok ma tu nasida: Dia do na patut ulaon di ari Sabbat, mambahen na denggan manang mambahen na jahat, pangoluhon hosa manang mambunusa? Alai mangkohom do anggo nasida.

⁵Jadi rimas ma rohana manganolnol nasida huhut marsak ala ni tangkang ni rohanasida. Jala didok ma tu jolma i: Patoltol ma tanganmi! Jadi dipatoltol ma tutu, gabe sumuang hisar ma tanganna i.

⁶Alai laho tu balian angka Parise i, pintor martuptup ma nasida rap dohot angka na

mangihuthon si Herodes dompak Ibana,
manang beha bahenonnasida mamusa Ibana.

⁷Dung i sumurut ma Jesus rap dohot angka siseanna tungkan tao i, jadi mansai torop halak sian luat Galilea dohot Judea mangihuthon Ibana.

⁸Songon i sian Jerusalem, nang sian luat Idumea dohot sian ipar ni Jordan ro di angka na humaliang Tirus dohot Sidon; mansai torop angka naung umbege godang ni na binahenna i, ro mandapothon Ibana.

⁹Jadi didokkon ma angka siseanna, asa diparade parau sada di Ibana ala ni natorop i, asa unang disosak nasida Ibana.

¹⁰Ai mansai torop do nasida dipamalum, gabe ro sude na porsuk parniahapanna tahop manjama Ibana.

¹¹Jadi marsomba be do tu Ibana angka tondi na hodar, disi diida nasida Ibana, huhut manjoujou: Anak ni Debata do Ho!

¹²Alai gogo do nasida dipopai, asa unang dipapatar Ibana.

¹³(II.) Dung i nangkok ma Ibana tu sada dolok, jadi dijou ma tu jolona angka silomo ni rohana, gabe ro be ma nasida.

¹⁴Jadi dipillit ma nasida sampuludua, na naeng gabe donganna, jala na naeng suruonna marjamita,

¹⁵huhut marhuaso pabalihon angka sibolis.

¹⁶Asa dipilliti ma na sampuludua i: Ia si Simon digoari do huhut si Petrus.

¹⁷Dungkon ni i si Jakobus, anak ni si Sebedeus i, dohot si Johannes, dongan saama ni si Jakobus i; laos digoar do nasida Boanerges, na mandok: Anak ni ronggur.

¹⁸Tole muse si Andreas, Pilippus, Bartolomeus, Mateus, Tomas, Jakobus, anak ni si Alpeus, si Tadeus, si Simon, na sian huta Kana,

¹⁹dohot si Judas Iskariot, parjehe i.

²⁰Dung i muli ma Ibana, gabe rongom muse ro natorop i, pola sundat nasida mangan.

²¹Jadi umbege i angka sisolhotna, ro ma nasida mangalap Ibana, ai ninna nasida do: Na rintik do Ibana.

²²(III.) Ia angka sibotosurat, naung tuat sian huta Jerusalem, didok do: Na sibolison do Ibana, jala induk ni angka sibolis i do dipangasahon, laho pabalihon angka sibolis.

²³Jadi dijou ma nasida tu jolona, marumpama ma Ibana mandok tu nasida: Tagamon ma pabalion ni sibolis i donganna sibolis?

²⁴Ai molo marsalisi sada harajaon sama dirina, ndang na hot harajaon i.

²⁵Jala molo marsalisi dongan sabagas sama nasida, ndang na hot na sabagas i.

²⁶Asa molo hehe sibolis i mangalo dirina jala marsalisi sama ibana, ndang tarbahen hot be ibana, na laho suda nama.

²⁷Ndang habongotan halak jabu ni ulubalang, laho mangarampas ugasanna,

anggo so jumolo diihoti ulubalang i; dung pe i, asa tarbuatsa ugasanna.

²⁸Situtu do hatangkon: Tarsesa pe nasa dosa ni angkajolma ro di nasa ragam ni panginsahionnasida na dompak Debata;

²⁹anggo na mangaleai Tondi Parbadia i, ndang dapotsa hasesaan ni i nang di tingki sogot; parutang dosa sisalelenglelengna nama ibana.

³⁰Ala didok nasida: Partondi na hodar do Ibana.

³¹(IV.) Dung i ro ma inana dohot angka anggina, jadi di ruar nama nasida jongjong, gabe disuru ma na manjou Ibana.

³²Na hundul do natorop i humaliang Ibana, gabe didok ma: Di alaman an do inangmu dohot angka anggim ro di angka ibotom; diusoi do Ho!

³³Alai ninna ma mangalusi nasida: Ise do goaron dainang, jala ise do dohonon angka anggingku?

³⁴Jala dibereng ma angka na hundul humaliang Ibana, ninna ma: Angka on do dainang dohot angka anggingku!

³⁵Ai na mangulahon lomo ni roha ni Debata, i do anggingku, i do ibotongku, i do dainang!

4¹(I.) Jadi diulahi ma mangajari di topitao i, gabe marpungu ma mansai torop halak tu jolona, pola dibongoti parau sada na di tao i bahen juguhanna; di topi tao i do anggo natorop i sudena.

²Jala godang ma dipodahon tu nasida marhite sian umpama, didok ma di pamodaionna i:

³Tangihon hamu ma! Na laho ma sahalak panabur manaburhon bonina.

⁴Jadi di na manabur i ibana, adong ma deba na mamiltik tu dalan, gabe ro ma angka pidong mamargutisa.

⁵Anggo na deba tu tano na batu on do madabu, di na so sadia hapal tano, jadi pintor tubu ma, dibahen na so bagas tano disi.

⁶Alai di na lam timbo mata ni ari, rahar ma, gabe mate, ala so marurat.

⁷Anggo na deba tu parsihupian do madabu, laos tubu do angka sihupi i jala dipisat do eme i, gabe ndang marparbue.

⁸Alai na deba nari tu tano na denggan i do madabu, gabe saut ma diparbuehon parbue na mangolu jala na olo ganda, ro di tolupulu lompit, onompulu lompit dohot saratus lompit.

⁹Laos didok ma: Hamu angka parpinggol na marbinege, pinggol hamu ma i!

¹⁰Dung i dung laho natorop i, disungkun angka donganna rap dohot na sampuludua i ma Ibana siala angka umpama i.

¹¹Gabe didok ma tu nasida: Bulus do dilehon anggo tu hamu hahomion ni harajaon ni Debata; alai marhite sian umpama do sahat ni i sude tu angka na di balian,

¹²Asa unang saut diida nasida, nang pe tangkas dibereng; asa unang diantusi, nang pe torang dibege; asa unang mulak rohanasida, unang sesa dosanasida.

¹³Laos didok ma tu nasida: Nandang diantusi hamu hape umpama ondeng! Beha ma antusanmuna umpama i sudena?

¹⁴Hata i do disaburhon panabur i.

¹⁵Jala angka on do na sinaburhon tu dalan i: Ia disi disaburhon hata i, dung dibege nasida, pintor ro ma sibolis i, dirampas do hata na sinaburhon tu rohanasida.

¹⁶Suang songon i, angka on ma na sinaburhon tu tano na batu on: Ia disi dibege hata i, manigor las ma rohana manjalosa;

¹⁷alai ndang marurat di bagasan rohanasida, parsatongkinan do nasida, jadi molo masa haporsuhon manang pangaleleon siala hata i, pintor targasip do rohanasida.

¹⁸Asing muse angka na sinaburhon tu parsihupian, i ma angka naung umbege hata i.

¹⁹Alai masuk huhut tu rohanasida pangkolsohon di angka na di hasiangan on dohot hamoraon sipangansi i ro di hisaphisap na asing i, jala angka i do mamisati hata i, laos so marparbue.

²⁰Dung i angka on do na sinaburhon tu tano na denggan: Angka na umbege jala na manjangkon hata i, gabe marparbue, tolupulu

lompit na deba, onompulu lompit na deba
saratus lompit na deba.

²¹ Dung i didok ma tu nasida: Ai dipasang do
ulaning palito laho pajongjongkonsa tu toru
ni ampang manang tu toru ni parate; nda
bahenonna i nian tu atas parpalitoan?

²² Ai ndang adong na holip na so sipapataron
sogot; jala ndang adong na masa di
sihabunian, na so ro tu hatorangon muse.

²³ Hamu angka parpinggol na marbinege,
pinggol hamu ma i!

²⁴ Laos didok ma tu nasida: Manat ma hamu
di na binegemuna; ai parsuhatonmuna do
sisuhathononhon tu hamu, tambaonna dope
tahe tu hamu!

²⁵ Ai tu ganup paradongan lehonon do. Alai
sibuaton do sian na so paradongan nang na
di ibana hian.

²⁶ Dung i didok ma: On ma pangalaho ni
harajaon ni Debata: Songon pambahen ni
halak na manaburhon boni tu haumana.

²⁷ Na modom do ibana bornginna jala dungo
ia arianna; na martumbur do anggo boni i
laos marbuhutano, so pamotoan ni parhauma
i.

²⁸ Ai sian gogona sandiri dipatubu tano i
jumolo hauna, dung i biurna, dung i eme na
porngis i di bagasan biurna i.

²⁹ Alai disi dilehon parbuena, mamintor
disuru ma panabi, ai nunga ro gotilon.

³⁰Dung i didok ma: Tu aha ma pasumanonta harajaon ni Debata; tu dia ma umpamahononta?

³¹Suman tu batu ni siarum ma! Ai bonina na sinaburhon tu tano, i do na ummetmet sian nasa batu ni suansuanan.

³²Alai dung sinaburhon, simbur ma i tubu, gabe tumimbo sian nasa ingkau rata jala balga ma dangkana, pola tarbahen do pidong na martongatonga langit marasar di linggomna i.

³³Jadi marhitehite lan umpama sisongon on dihatahon nasida hata i, marguru tu na tarjangkon nasida.

³⁴Alai ndang adong dihatahon tu nasida so marhitehite umpama; alai pulik do dipatorang saluhutna tu siseanna.

³⁵(II.) Jadi laos di na sadari i, dung bot ari, didok ma tu nasida: Beta marparau ma hita tu bariba an!

³⁶Jadi dipalaho nasida ma natorop i, dijangkon ma Ibana songon i tu bagasan parau i; jala adong dope angka parau na asing udur dohot nasida.

³⁷Dung i masa ma habahaba na gogo situtu, jadi disampakkon ma angka galumbang i tu bagasan parau i, maradu digohi parau i.

³⁸Na modom do anggo Ibana di atas halangulu sada, tartungkan pudipudi ni parau i; gabe disungguli nasida nama Ibana, didok

ma tu Ibana: Ale Guru! Ndang disarihon roham hita mago?

³⁹Jadi hehe ma Ibana, hona hata ma alogo i dibahen, didok ma tu tao i: Sip ma! So! Jadi so ma alogo i jala menak situtu ma.

⁴⁰Laos didok ma tu nasida: Boasa songon i biar rohamuna? Dia do umbahen soada haporsean di hamu?

⁴¹Jadi hatahutan situtu ma nasida jala masipandohan ma: Halak dia do On? Guru dokna do hape alogo ro di tao i!

5¹ (I.) Dung i sahat ma nasida tu bariba ni tao i, tu luat ni halak Gadara.

²Jadi di na ruar Ibana sian parau i, pintor ro ma mandapothon Ibana sahalak na ro sian parbandaan, na manjujung tondi na hodar.

³Di parbandaan do ibana maringanan, jala ndang adong na tuk tumali ibana, nang pe dirantei.

⁴Ai nunga jotjot dirantei tanganna dohot patna, alai ditostosi do angka rante na di tanganna dohot na di patna i; ndang tarpatunduk jolma ibana.

⁵Jala manongtong arian dohot borngin di parbandaan nama ibana manang di angka dolokdolok manganguhanguk huhut mambalbalhon batu tu dagingna.

⁶Di na tinatapna i Jesus sian na dao, ro ma ibana marlojong jala marsinggang tu jolona.

⁷Laos marsoara na gogo ma ibana manjoujou, ninna ma: Marhua Ho tu

ahu, Jesus, Anak ni Debata na tumimbul!
Huelehelek Ho marhitehite Debata: Unang
ahu arsahi!

⁸Ai nunga didok tu ibana: Ruar ma ho, tondi
na hodar, sian halak on!

⁹Dung i disungkun ma ibana: Ai ise goarmu?
Gabe didok ma mangalusi: Loksa do goarhu,
ai torop do hami.

¹⁰Jala mansai dielehelek ma Ibana, anggiat
unang nasida dipabali sian na saluat i.

¹¹Alai adong ma disi, di robean i babi
sapunguan na balga, na manjampali.

¹²Jadi dielehelek nasida ma Ibana, ninna
ma: Suru ma hami tu bagasan babi an, asa i
hubongoti hami!

¹³Dioloi ma nasida, gabe ruar ma angka
tondi na hodar i, dibongoti ma angka babi i,
jadi mardobur ma na sapunguan i sian tolping
i tu tao i; hirahira duaribu do toropna, gabe
mate mogap ma di tao i.

¹⁴Alai na maporus do angka parmahan i,
dibaritahon ma i tu angka na di huta dohot
na di angka ladang. Jadi ro ma angka i
manangkasi na masa i.

¹⁵Jala ro ma nasida tu Jesus, jadi mabiar
ma nasida marnida na sinonggopan ni sibolis
nasailaonna i, hasandaran ni na saloksa i, ai
nunga hundul ibana marulos jala marroha.

¹⁶Jala dipajojor angka na marnidas ma tu
na ro i, naung masa tu hasonggopan ni sibolis
i dohot na taringot tu babi i,

¹⁷ gabe pintor dielehelek ma Ibana, asa sumurut sian luatnasida.

¹⁸ Jadi laho mambongoti parau i Jesus, diparhurajai hasandaran ni angka sibolis i ma Ibana, asa dongananna Ibana nian.

¹⁹ Alai ndang diloas, didok ma tu ibana: Muli ma ho tu angka sisolhotmu, pajojor ma tu nasida godang ni na binahen ni Tuhan i tu ho dohot pangasina di ho!

²⁰ Dung i laho ma ibana dipaboaboa ma di Sisampuluhuta i godang ni sude na binahen ni Jesus tu ibana, gabe longang ma saluhutna.

²¹ (II.) Jadi dung marparau Jesus muse tu bariba i, dirongomi natorop i Ibana na di topi tao i dope.

²² Jala ro ma sintua ni parguruan i sahalak, na margoar si Jairus; jadi disi diida Jesus, marsinggang ma ibana tu lambung patna.

²³ Diparhurajai ma Ibana, ninna huhut: Na matemate ne do nuaeng borungku; sai ro ma Ho jolo mangampehon tanganmu tu ibana, asa malua jala mangolu!

²⁴ Jadi hehe ma Ibana, didongani ma, jala torop ma halak mangihuthon, pola disosak nasida Ibana.

²⁵ Dung i adong ma disi parompuan sada na marsahithon bulan, leleng ni sampuludua taon.

²⁶ Nunga tung godang ditaon binahen ni torop pandaoni jala sude artana dipasuda

tusi; laos so marniula, lam tu pasangna tahe sahitna i.

²⁷Jadi dung dibege barita ni Jesus, ro ma ibana rap dohot natorop i sian pudi, dijama ma ulosna.

²⁸Ai ninna rohana do: Asal hujama nanggo ulosna i, malum do hilalaonku.

²⁹Jadi pintor montok ma mudar i; laos dihilala do di dagingna, naung malua ibana sian na niaena i.

³⁰Ia Jesus mamintor diboto do, naung adong hagagoon ruar sian Ibana, jadi dipahusor ma dirina di tongatonga ni natorop i, ninna ma: Ise i na manjama uloshi?

³¹Gabe didok angka siseanna ma mandok Ibana: Diida Ho do panosak ni natorop on di Ho, gabe didok Ho dope: Ise manjama Ahu?

³²Alai dibereng ma humaliang mananda na mambahensa.

³³Gabe ro ma parompuan i, angka dotdot ma ibana dibahen biar ni rohana, marningot naung masa tu ibana i; laos marsinggang ma ibana tu jolona, sintong ma dipaboa saluhutna i.

³⁴Alai didok ma tu ibana: Dipalua haporseaonmi do ho, inang! Mardame ma ho laho! Sai malua ma ho sian parniaeanmi!

³⁵Mangkatahon i dope Ibana, nunga ro angka na sian bagas ni sintua i mandok: Nunga mate borumi; aha be lojaanmu Guru i!

³⁶Alai diparhamuda Jesus do hata ni na ro i, didok ma tu sintua i: Unang ho mabiar, asal ma porsea!

³⁷Jadi ndang diloas manang ise mangihuthon Ibana, dungkon ni si Petrus, Jakobus dohot Johannes, dongan saama ni si Jakobus i.

³⁸Sahat ma nasida tu bagas ni sintua i, jala diberengi Ibana ma na gaor i, i ma angka na tumatangis jala gogo mangandungi.

³⁹Dibongoti ma, didok ma tu nasida: Boasa songon i gaor hamu jala tumatangis? Nandang na mate si betet i: na tarpodom do i!

⁴⁰Jadi diparengkeli nasida ma Ibana. Alai diparuar ma nasida saluhutna, diarahon ma ama dohot ina ni dakdanak i dohot donganna hian, dibongoti ma bilut hapeahan ni dakdanak i.

⁴¹Dung i ditangkup ma tangan ni dakdanak i, didok ma tu ibana: Talita kumi! Astuanna: O Butet! Ahu mandokkon ho hehe!

⁴²Dung i mamintor hehe ma boruboru i laos mardalandalan. Marumur sampuludua taon do ibana, gabe tarhalomong situtu ma nasida.

⁴³Alai gomos ma nasida dipopai, unang diboto manang ise i; laos didokkon ma lehononna mangan.

6¹ (I.) Jadi hehe ma Ibana sian i, laho tu huta hagodanganna jala diihuthon angka siseanna ma Ibana.

²Jadi jumpa ari Sabbat dipungka ma mangajari di parguruan, jadi longang ma roha

ni natorop na umbegesa, angka ninna ma:
Sian dia do i tu Ibana? Jala hapistaran dia do
i na nilehon tu Ibana? Ai ulaon hagogoon do
hope pinatupa ni tanganna!

³Nda Ibana tukang i, tubu ni si Maria i, haha
ni si Jakobus, Josep, Judas dohot Simon? Nda
di lambungta angka ibotona? Jadi targasip
ma nasida mida Ibana.

⁴Alai ninna Jesus ma mandok nasida: Tung
na so marsangap do panurirang ianggo di luat
hagodanganna, di angka donganna sabutuha
dohot di bagasna.

⁵Jadi ndang tarpatupasa disi ulaon
hagogoon, dungkon ni na niampehonna
tanganna tu otik halak na hansitan, laho
pamalum nasida.

⁶Gabe longang ma rohana, ala so porsea
nasida. Laos diliati ma angka huta di na saluat
i mangajari.

⁷(II.) Dung i dijou ma na sampuludua
i jumonok, dipungka ma marsuru nasida
marduadua, dilehon ma tu nasida huaso
mamaksa angka tondi na hodar.

⁸Jala diorai ma boannonnasida manang aha
tu tongandalan, manang roti manang hajut,
manang hepeng di hohos pe, nda holan
tungkot.

⁹Alai denggan do marsipatu hamu jala
ndang jadi pangkeonmuna bajubaju dua,
ninna.

¹⁰Laos didok do tu nasida: Ia dung dibongoti hamu jabu, disi ma hamu mian, paima borhat muse.

¹¹Molo adong isi ni huta na so olo manjangkon hamu jala ndang ditangihon hatamu, tadingkon hamu ma i, laos pirpirhon hamu ma nang orbuk na lohoh di totmuna, bahen panindangion tu nasida!

¹²Jadi borhat ma nasida marjamita mandokkon paubahon roha.

¹³Jala torop do sibolis dipabali nasida; lan na hansitan dimiahi gabe malum dibahen.

¹⁴(III.) Jadi tarbege ma i tu raja Herodes, ai nunga tarbarita goar ni Jesus, pola didok: Nunga hehe si Johannes pandidi sian angka na mate; i do alana, umbahen parhagagoon sisongon i Ibana.

¹⁵Adong ma na mandok si Elia do Ibana! Na asing muse mandok: Panurirang do Ibana suman tu angka panurirang najolo.

¹⁶Alai anggo si Herodes, dung dibege i, sai ninna do: Si Johannes, naung hugotap i uluna, i do dipahehe.

¹⁷Ai disuru si Herodes i do najolo na manangkup si Johannes dohot mangkurungkon siala si Herodias, pardihuta ni anggina si Pilippus, naung nilangkupna.

¹⁸Ai didok si Johannes do tu si Herodes: Ndang jadi di ho anggi borumi!

¹⁹Jala hosom ma roha ni si Herodias i di ibana; sai naeng bunuonna do ibana, alai ndang tarpatupasa.

²⁰Ai na mabiar do si Herodes mida si Johannes, ala na ditanda do ibana halak na tigor roha jala na bontor, jadi diondingi do ibana, jala bohabohton do rohana umbege jamitana, huhut dihalomohon hatana.

²¹Dung i jumpang ma ari na une, i ma ari hatutubu ni si Herodes, di na mambahen panganon ujuan ibana di angka na sangap dohot di angka induk ni soldadu ro di angka na raja sian halak Galilea.

²²Jadi bongot ma boru ni si Herodias tu bagasan manortor; jadi solo ma mata ni si Herodes dohot angka donganna disi, gabe didok raja i ma tu boru i: Pangido sian ahu manang dia lomo ni roham; lehononku do i tu ho!

²³Laos diuarihon do tu boruboru i: Manang dia pe sipangidoonmi, ro di na satonga ni harajaonki, sai na lehononku do!

²⁴Jadi ruar ma boruboru i mandok tu inangna: Aha ma pangidoonku? Jadi didok ibana ma: Ulu ni si Johannes pandidi ma!

²⁵Jadi humalaput ma ibana bongot tu adopan ni raja i, dipangido ma: Saonari ma lehon tu ahu di atas pinggan ulu ni si Johannes pandidi!

²⁶Marsak situtu ma roha ni raja i, alai ala ni angka uarina dohot ala ni angka na

ginokkonna i, ndang olo ibana paujathon boruboru i.

²⁷ Jala mamintor disuru raja i ma hupasna sada, didokkon ma ibana mangalap ulu ni si Johannes i. Gabe laho ma hupas i manggotap uluna di bagasan hurungan i.

²⁸ Jala diboan ma uluna i di atas pinggan, dipasahat ma tu anak boru i, jala boruboru i ma mangalehonsa tu inangna.

²⁹ Asa dung dibege angka sisean ni si Johannes na masa i, ro ma nasida, dibuat ma bangkena jala ditanom.

³⁰ Dung i marpungu ma angka apostel i tu jolo ni Jesus, dipaboa ma tu Ibana sasude na niula jala na niajarhonnasida.

³¹ Gabe didok Ibana ma tu nasida: Sumurut ma hamu, tungkan na suhi an, pahosahon saotik! Ai torop do halak marlaho ro tu nasida; gari mangan, gari so sadihari.

³² (IV.) Dung i borhat ma nasida marparau sumurut tu inganan na suhi.

³³ Jadi torop do marnida jala mananda nasida na borhat i, gabe sian darat ma marlojong nasida sian saluhut angka huta i pajolohon tusi.

³⁴ Asa di na tardarat Jesus, diida ma pungan na bolon i, gabe asi ma rohana mida nasida, ai songon birubiru nasida na so marparmahan, gabe godang ma dipodahon tu nasida.

³⁵ Jadi di na mareak bot ari, didapothon angka siseanna ma Ibana mandok: Na lungun do inganan on jala guling bot do nuaeng.

³⁶ Pamuli ma nasida, asa sanga nasida tu angka lumban humaliang dohot tu angka huta manuhori sipanganonnasida.

³⁷ Gabe didok Ibana ma mangalusi nasida: Lehon hamu ma nasida mangan! Jadi ro ma nasida: Asa hami nama laho manuhori roti arga duaratus uang silehononnamipanganonnasida?

³⁸ Alai didok ma tu nasida: Piga do roti na di hamu? Laho ma hamu manangkasi! Jadi dung diboto, didok ma: Lima do, angkup ni dua dengke!

³⁹ Dung i didokkon ma nasida sudena hundul di duhutduhut na rata i, marsasapanganan.

⁴⁰ Jadi marpanggungpanggun ma nasida hundul marsasaratus dohot marlimalimapulu.

⁴¹ Jala ditiop Ibana ma roti na lima i dohot dengke na dua i, ditailihon ma tu ginjang laho mamasumasu, dung i dibagi ma angka roti i, diparlehon ma tu angka siseanna, asa disagihon tu angka nasida; nang dengke na dua i pe dibagi do di nasida saluhutna.

⁴² Gabe mangan be ma sasudena i, jala bosur be do.

⁴³ Jadi dipapungu nasida ma angka ebaeba, gok sampuludua ampang; songon i do taringot tu dengke i.

⁴⁴Ia torop ni na manganhon roti i, limaribu baoa do.

⁴⁵(V.) Dung i tagan paulakkon natorop i dope Ibana, mamintor didasdas ma angka siseanna mambongoti parauna, pajolohon tu bariba, tu Betsaida.

⁴⁶Jadi dung dipamuli nasida, laho ma Ibana tu dolok martangiang.

⁴⁷Jadi dung bot ari, di tonga tao do parau i; sasada Ibana nama di darat.

⁴⁸Jala diida ma tarsosak nasida na marluga i dibahen alogo na alo tu nasida, jadi didapothon ma nasida, di na martahuak manuk parjolo sahali; mardalan di sisik ni tao do Ibana, jala songon na naeng salpuanna nasida.

⁴⁹Alai marnida Ibana na mardalan di sisik ni tao i, dirimpu nasida tondi, pola manganguhi.

⁵⁰Ai sude do nasida marnida Ibana jadi hatahutan be ma. Alai pintor dipanghulingi Ibana ma nasida, didok ma: Pos ma rohamuna! Ahu do on; unang ma hamu mabiar!

⁵¹Laos manaek ma Ibana tu nasida tu bagasan parau i, dung i menak ma alogo i; gabe mansai tarhalomong situtu ma nasida.

⁵²Ai ndang mangarti dope nasida marningot roti i; pir do rohanasida.

⁵³Jadi taripar ma nasida tondongkon ni luat Genesaret jala dipadarat ma.

⁵⁴ Jala dung ruar nasida sian paraunasida, manigor ditanda halak do Ibana.

⁵⁵ Gabe humalaput ma nasida sian sandok luat na humaliang i, diusung ma angka na hansitan di podomanna be tu manang dia Ibana dibege nasida.

⁵⁶ Asa laho mambongoti lumban manang huta manang sosor Ibana, disi ma dipeakkon di alamanna angka na hansitan i, jadi dielehelek do Ibana, asa diloas jamaonnasida nanggo rambu ni ulosna, jadi sude na manjamasa dipamalum.

7¹ (I.) Dung i rap marpungu ma tu jolona angka Parise dohot deba sian angka sibotosurat, naung ro sian huta Jerusalem.

² Jadi diida nasida ma deba sian angka siseanna, na jorjor mangan roti, so jolo marburi.

³ Ai anggo halak Parise nang nasa Jahudi, ndang olo mangan, ia so jumolo tangkas diusa tanganna mangihuthon adat ni angka situatua.

⁴ Na sian onan pe, ndang dipangan, so jolo diuras, jala godang dope na asing ditiop siradotan, songon pamurion di angka panginuman, gendi dohot hudon.

⁵ Jadi disungkun angka Parise dohot angka sibotosurat ma Ibana: Boasa so diihuthon angka siseanmi adat ni angka situatua, ai ramun do tanganna mangan roti?

⁶Alai ninna Ibana ma mandok nasida: Sintong do dapot di hamu pangansi na sinurirangkon ni si Jesaya, songon na tarsurat i: "Dipapujipuji pamangan ni bangso on do Ahu; alai ia rohanasida dao do sian Ahu!"

⁷"Jala magopo do pambahennasida pasangaphon Ahu, ai patikpatik ni jolma do dipodahon nasida."

⁸Ai tading do patik ni Debata dibahen hamu, laho mangaradoti adat na sian jolma.

⁹Laos didok ma tu nasida: Leak ma antong ditompas hamu patik ni Debata, laho mangaradoti adاتمuna.

¹⁰Ai didok si Musa do nian: "Pasangap ma amangmu dohot inangmu!" Angkup ni i: "Ia na mamburai amana manang inana, sipusaon do!"

¹¹Alai hamu mamodahon: Dohonon ni halak ma tu amana manang tu inana: Korban! Lapatanna: Pinelehon ma tagonan na patut hian pangurupingku di ho.

¹²Asa ndang diloas hamu be ibana paturehon agia aha di amana manang di inana pe;

¹³gabe disegai hamu do hata ni Debata dibahen adat na pinadalanmuna. Jala godang na suman tusi diula hamu.

¹⁴Jala dijou muse ma natorop i, ninna ma mandok nasida: Tangihon hamu saluhut ma Ahu, jala parateatehon hamu ma:

¹⁵Nda tung gabe ramunjolma binahen ni na ro sian ruar tu bagasan ibana; alai na ruar sianjolma i, i do mangaramuni ibana.

¹⁶Hamu, angka parpinggol na marbinege, pinggol hamu ma i!

¹⁷Jadi dung muli Ibana jala holang sian natorop i, disungkun angka siseanna ma Ibana siala umpama ondeng.

¹⁸Gabe didok ma tu nasida: Asa dohot do hamu hape so mangarti! Ndang dapot rohamu, na so tarbahen ramunjolma bahenon ni nasa na ro sian ruar tubagasan ibana.

¹⁹Ai so manang bongot i tu bagasan rohana; tu butuha do i laho, dung i bolong do i muse di inganan na soding, asa gabe ias do saluhutna sipanganon i.

²⁰Alai on do: Na ruar sianjolma i, i do mangaramuni ibana.

²¹Ai sian bagasan, sian roha nijolma i do ro pingkiran na jahat, parmainanon, panangkoon, pamunuon,

²²pangalangkupon, pangahution, hajahaton, pangansion, pargadombuson, panorgangan, panginsahion, ginjang dohot neang ni roha.

²³Na ro sian bagasan do saluhut angka hajahaton ondeng, jala angka i do na mangaramunijolma.

²⁴(II.) Dung i borhat ma Ibana sian i laho tu luat Tirus, jadi dibongoti ma sada jabu;

naeng ma unang tarboto i di rohana, alai ndang tarbahensa buni.

²⁵Ai ndang piga dan dibege sada inaina baritana; partondi na hodar do boruna, gabe ro ma ibana marsinggang tu jolona.

²⁶Parbegu do ina i, sian bangso Siroponisia, jadi dipangido ma tu Ibana, asa dipabali sibolis i sian boruna.

²⁷Alai ninna do mangalusi: Loas jolo bosur angka dakdanak; ai ndang tama buaton sipanganon ni angka dakdanak, laho mandabuhonsa tu jolo ni angka biang!

²⁸Alai ninna inaina i do mangalusi: I do nian, Tuhan; alai dohot do angka biang, na di toru ni meja i, mangallang na pinarpisikpisikkon ni angka dakdanak!

²⁹Gabe didok ma tu ina i: Ala ni hatami, laho ma ho; nunga ruar sibolis i sian borumi!

³⁰Laho ma tutu nasida muli, gabe jumpangsa ma boruna i modom di podomanna: Nunga ruar sibolis i.

³¹(III.) Dung i borhat ma Jesus muse sian luat Tirus, laho sian Sidon sahat tu tao Galilea, mamolus sian tongatonga ni luat Sisampuluhuta.

³²Jala diboan ma tu jolona sahalak na nengel huhut mangungu; dielehelek ma Ibana, asa diampehon tanganna tusi.

³³Jala diboan ma ibana tu na suhi, holang sian natorop i, dijullukhon ma jarijarina tu

pinggol ni halak i, dung i marsitijur ma Ibana laho manjama dilana.

³⁴ Laos manaili ma Ibana dompak ginjang, marhosa godang ma, dung i didok ma tu ibana: Hepata! Na mandok: Mungkap ma!

³⁵ Jadi mungkap ma tutu parbinegeanna, harhar ma nang ihot ni dilana, gabe tingkos ma pangkulingna.

³⁶ Jala dipopai ma nasida, unang dipaboaboa tu halak; alai lam diorai, lam gogo ma nasida mamaritahonsa.

³⁷ Jadi longang situtu ma nasida, ninna ma: Nunga denggan saluhutna dibahen Ibana, gabe marbinege do angka na nengel, jala na mangungu gabe mangkatai dibahen.

8¹ (I.) Marpungu ma uju i muse torop halak jala ndang adong panganonnasida gabe dijou Jesus ma angka siseanna, didok ma tu nasida:

² Maras do rohangku mida na torop on, ai nunga tolu ari diingani nasida Ahu, jala ndang adong balanjonasida.

³ Anggo hupamuli nasida, so jolo mangan, handoruan nasida maon di tongandalan i; ai parhuta na dao do nasida deba!

⁴ Jadi dialusi angka siseanna ma Ibana: Sian dia ma tarpatupa di halongonan on roti, sae pabosur nasida?

⁵ Gabe disungkun ma nasida: Piga do roti di hamu? Jadi didok nasida ma: Pitu do!

⁶Dung i didokkon ma natorop i hundul tu tano. Ditiop Ibana ma roti na pitu i, didok ma mauiliate, diponggoli ma, laos dipasahat ma tu angka siseanna, gabe diparlehon nasida ma tu natorop i.

⁷Laos adong do di nasida dengke otik, dipasupasu ma nang i, disuru ma nasida manaruhonsa.

⁸Gabe mangan ma nasida jadi bosur be do, laos dipapungu ma angka ponggolponggol ebaebanasida: Gok pitu ampang.

⁹Arga opat ribu do nasida; dung i dipamuli ma.

¹⁰Jadi manigor masuk tu parau ma Ibana raphon angka siseanna jala sahat ma Ibana tu luat Dalmanuta.

¹¹(II.) Jadi ro ma angka Parise, dipungka ma marsual dohot ibana; tanda sian ginjang do dipangido nasida, laho mangunjuni Ibana.

¹²Alai marhoi ma Ibana di bagasan tondina mandok: Boasa ma tanda pangidoon ni bangso on. Situtu do hatangkon tu hamu: Na so tupa lehonon tanda tu bangso on!

¹³Laos ditadingkon ma nasida, manguahi ma Ibana bongot tu parau, laho taripar.

¹⁴Naung lupa do nasida mamboan balanjo; sada sambing nama roti di nasida na di parau i.

¹⁵Jala dipalumba ma nasida, ninna ma: Manat ma hamu jala jaga, pasiding na

niasoman ni angka Parise, nang na di si Herodes pe.

¹⁶Gabe masipandohan ma nasida: Dibahen na so adong roti di hita hape!

¹⁷Jadi dung diboto Ibana i, ninna ma mandok nasida: Boasa dipanghatahatahon hamu, na soada roti di hamu? Laos so marbinoto dope hamu; laos so mangantusi hamu; laos pir do rohamu?

¹⁸Marmata do hamu so marnida; marpinggol do hamu, so marbinege, jala ndang marningot hamu?

¹⁹Di na husagihon na lima roti i tu na lima ribu i, gok piga ampang ebaeba dibuat hamu disi? Gabe didok nasida ma tu Ibana: Sampuludua!

²⁰Beha, uju na pitu i tu na opat ribu i, piga ampang ebaeba dibuat hamu ia disi? Jadi ninna nasida ma: Pitu!

²¹Jala didok ma tu nasida: Laos so mangarti dope hamu?

²²(III.) Dung i ro ma nasida tu Betsaida. Jadi diboan na mamboan ma sada halak na mapitung tu Ibana, dielehelek ma Ibana, asa dijama.

²³Gabe ditiop ma tangan ni na mapitung i, ditogihon ma tu balian ni huta i, ditijuri ma matana, diampehon ma tanganna tu ibana, disungkun ma: Nunga adong diida ho?

²⁴ Jadi mamereng ma ibana, didok ma: Tarsongon bona ni hau do huida jolma na mardalan i.

²⁵ Dung i diulakkon ma mangampehon tanganna tu matana jala tiur ma pamerengna, gabe malum ma: Torang do saluhutna diida.

²⁶ Laos disuru ma ibana muli tu jabuna, didok ma: Unang bongoti huta i!

²⁷ (IV.) Dung i borhat ma Jesus rap dohot siseanna i tu angka huta mardonokkon Kaesarea Pilippi; jala di tongandalan i disungkun ma angka siseanna i, ninna ma: Ise do Ahu, didok halak?

²⁸ Jadi dialusi nasida ma Ibana: Si Johannes pandidi do didok halak; na deba mandok: Si Elia; na asing muse: Sahalak sian angka panurirang i do!

²⁹ Dung i disungkun Ibana ma nasida: Ia hamu, ise ma Ahu didok hamu? Jadi dialusi si Petrus ma Ibana: Kristus i do Ho!

³⁰ Gabe dipopai ma nasida, unang dipaboaboa Ibana tu halak.

³¹ (V.) Jadi dipungka ma mangajari nasida: Ia anak ni jolma i ingkon godang do sitaononna, ingkon bolongkonon ni angka sintua dohot malim dohot sibotosurat do ibana, laos pusaonna do; dung i mulak mangolu do di ari patoluhon.

³² Patar do dipaboa hata i. Alai diarahon si Petrus ma Ibana, disolsoli ma Ibana.

³³ Alai humusor ma anggo Ibana, dipanotnoti ma angka siseanna i, dipinsang ma si Petrus, ninna ma: Laho ma ne ho, bolis, sian lambungkon; ai ndang na diparrohahon ho na di Debata, angka na di jolma do.

³⁴ Laos dijou ma natorop i rap dohot siseanna, didok ma tu nasida: Nasa na giot mangihuthon Ahu, disoadahon ma dirina, dituhuk ma silang na tu ibana i, diihuthon ma Ahu.

³⁵ Ai na naeng paluahon hosana, mangagohonsa do; alai na agoan hosa ala ni Ahu dohot ala ni barita na uli i, i do paluahonsa.

³⁶ Ai aha ma antong gunana di jolma, nang liat portibi on diomo, anggo mago do hosana?

³⁷ Ai aha do na tarlehon jolma bahen tobus ni hosana?

³⁸ Asa molo adong na maila ala ni Ahu manang ala ni hatangki pe maradophon bangso pangalangkup jala pardosa on, laos maila do Anak ni jolma i sogot mangkatindangkon i, di na ro Ibana di bagasan hasangapon ni Amana rap dohot surusuruan angka na badia i.

9¹ Laos didok ma tu nasida: Na tutu do hatangkon tu hamu: Adong do deba sian angka na jongjong dison, na so tupa mangae hamatean, so jolo diida ro harajaon ni Debata marhagagoon!

²(I.) Dung i salpu onom ari diarahon Jesus ma si Petrus, Jakobus dohot Johannes, ditogihon ma nasida nangkok tu sada dolok na timbo, tu na suhi, holan nasida; gabe muba ma rupana diida nasida.

³Gabe marsillam ma angka ulosna, bontar sahali; na so dapot botoon ni panunsi di tano on mambahen bontar songon i.

⁴Dung i diida nasida ma si Elia rap dohot si Musa; na mangkatai do nasida dohot Jesus.

⁵Jadi didok si Petrus na mangkuling i Jesus: Guru, dengganna i dison! Hupauli hami ma dison sopesopo tolu: Sada di Ho, sada di si Musa, sada di si Elia!

⁶Ai ndang diboto na nidokna i, ai tung hatahutan situtu do nasida.

⁷Jala ro ma ombun sada mangalinggomi nasida, laos mangkuling ma soara sian bagasan ombun i, didok ma: On do Anak haholonganku, tangihon hamu ma Ibana!

⁸Alai di na manaili nasida, ndang agia ise be diida; sasada Jesus do angkupnasida.

⁹Jadi laho tuat sian dolok i, dipopai ma nasida, unang dipajojor na niidan nasida i tu halak, ia so jolo hehe Anak ni jolma i sian na mate.

¹⁰Digolom nasida do hata i, gabe masisungkunan ma nasida: Na mandok beha do on: Hehe sian na mate?

¹¹ Jadi disungkun nasida ma Ibana: Didok angka sibotosurat do, ingkon jumolo ro si Elia?

¹² Gabe didok ma tu nasida: Ro do tutu si Elia jumolo pajongjongkon saluhutna; alai beha do na tarsurat taringot tu Anak ni jolma i, paboa ingkon lan do sitaononna jala doshon na soada rajuman Ibana?

¹³ Alai hudok ma tu hamu: Naung ro do si Elia, jadi roharohanasida do dibahen tu ibana, songon naung tarsurat hian taringot tu ibana.

¹⁴ (II.) Laho mandapothon angka sisean i, diida nasida ma torop halak humaliang nasida dohot angka sibotosurat na masisungkunan dohot nasida.

¹⁵ Jadi pintor longang situtu ma sude natorop i marnida Ibana, marlojong be do nasida mandapothon Ibana laho mangkormat.

¹⁶ Dung i disungkun ma nasida: Aha do sinungkunhonmuna tu nasida on?

¹⁷ Gabe ro ma sahalak sian natorop i mangalusi: O Guru, tu Ho hian do huboan anakkon; partondi na ngungu do ibana.

¹⁸ Jadi disi ditangkap ibana, dipasaratsarat do, gabe margumogumo jala patungoripon, laos gonggong. Nunga hudokkon angka siseanmi pabalihon ibana; alai ndang margomo nasida.

¹⁹ Alai ninna ma mangalusi nasida: E hamu, bangso na so porsea! Sadia leleng nari Ahu rap dohot hamu? Sadia leleng nari

paanjuanjuonku hamu? Tu Ahu ma boan hamu ibana!

²⁰Jadi diboan nasida ma ibana. Disi diida tondi i Jesus, mamintor dipapuhung ma anak i, laos tinggang, margallogallo jala margumogumo.

²¹Disungkun Jesus ma amana i: Nunga sadia leleng songgop on tu ibana? Jadi didok ma: Sian sietehetehonna dope!

²²Jala jotjot do ibana ditinggangkon tu api dohot tu aek, mamusa ibana nian. Alai ia adong gogom, urupi hami; asi ma roham di hami!

²³Jadi dialusi Jesus ma ibana: Ia taringot tu gogo: Na marhagogoon do na porsea i patupahon saluhutna!

²⁴Dung i pintor dipagogo ama ni anak i ma soarana, dijouhon ma: Na porsea do ahu! Urupi ahu na hurang porsea on!

²⁵Alai naung lam rongom natorop i diida Jesus, disonggahi ma tondi na hodar i, didok ma tu ibana: Ho, tondi na ngungu jala na pojam! Ahu mandokkon ho ruar sianjolma on, jala ndang jadi bongotanmu be ibana!

²⁶Gabe manganguhi ma i, huhut gogo ma ibana disaratsarat, laos ruar ma, jala songon na mate do anak i, pola lan do mandok: Nunga tos hosana.

²⁷Alai ditangkup Jesus ma tanganna, laho pahehehonsa, gabe jongjong ma.

²⁸Jadi dung muli Jesus, disungkun angka siseanna ma Ibana pulik: Boasa so tarpabali hami ibana?

²⁹Jadi didok ma tu nasida: Holan marhite sian tangiang dohot parpuasaon do tarpabali tondi na saragam on!

³⁰(III.) Dung i borhat ma nasida sian i, didalani nasida ma tano Galilea; alai ndang jadi botoon ni halak Ibana di rohana.

³¹Ai dipodai do angka siseanna, didok ma tu nasida: Sipasahaton ma Anak ni jolma i tu tangan ni halak, jala pusaonna ma Ibana; alai dung dipamate, hehe do Ibana di ari patoluhon!

³²Alai ndang na diantusi nasida hata i jala tanggak do rohanasida manungkun Ibana.

³³(IV.) Dung i sahat ma nasida tu huta Kapernaum; jadi dung ro di tongajabu Ibana, disungkun ma nasida: Aha do na hinataanmuna di tongandalan i?

³⁴Alai mangkohom do nasida; ai dihatai do di dalam i, manang ise nasida na sumurung.

³⁵Laos hundul ma Ibana, dijou ma na sampuludua i, didok ma tu nasida: Ia i na naeng gabe parjolo di rohana, dibahen ma ibana parpudi jala naposo ni saluhut donganna.

³⁶Dung i dibuat ma dakdanak sada, dipajongjong ma tu tongatonganasida, dihaol ma jala didok ma tu nasida:

³⁷ Na manjangkon dakdanak sada sisongon on marhitehite Goarhu, Ahu do na jinangkonna disi! Jala na manjangkon Ahu, ndada Ahu na jinangkonna i, na marsuru Ahu do.

³⁸ Jadi dipanghulingi si Johannes ma Ibana: Guru, huida hami do sahalak na pabalihon angka sibolis marhitehite Goarmu; ndang olo ibana mangihuthon hita jadi hurarang hami do ibana, ala so hita diihuthon.

³⁹ Alai didok Jesus ma: Ndang oraanmuna Ibana nian! Ai ndang tagamon insahan ni halak Ahu, dung jolo diulahon hagagoon marhitehite Goarhu.

⁴⁰ Ai pandongani do di hita, na so mangalo hita.

⁴¹ Ai na sintong do hatangkon tu hamu: Na painumhon aek santahu tu hamu di bagasan Goarhu, ala Kristus nampuna hamu; ndang na mago upa ni i!

⁴² Alai na manggasipi sada sian na metmet on, angka na porsea di Ahu, dengganana ma ginantungkon losung batu tu rungkungna, laho mangalonongkon ibana tu laut.

⁴³ Jala molo digasipi tanganmi ho, gotap! Ai dengganana, telpang ho bongot tu hangoluan, unang mardua tangan ho marobur tu na roko, tu api na so ra mintop,

⁴⁴ di na so ra mate gulokna, di na so mintop apina.

⁴⁵Asa molo digasipi patmi ho, gotap! Ai denggan, telpang ho bongot tu hangoluan, unang mardua pat ho didanggurhon tu na roko,

⁴⁶di na so ra mate gulokna, di na so mintop apina.

⁴⁷Jala molo digasipi matami ho, pulsikkon! Ai denggan, marmata sambariba ho bongot tu harajaon ni Debata, unang mardua mata ho dibolongkon tu na roko,

⁴⁸di na so ra mate gulokna, di na so mintop apina.

⁴⁹Ai ingkon siraan do ganup di bagasan api.

⁵⁰Na marguna do sira i. Alai molo tung hambar sira i, aha ma bahenon paansimhonsa? Sai marsira ma hamu huhut mardame sama hamu!

10¹(I.) Dung i borhat ma Jesus sian i jala sahat ma tu luat Judea na di ipar ni batang aek Jordan. Jadi dirongomi natorop i muse Ibana, gabe diulahi ma mangajari nasida songon naomal.

²Laos ro ma angka Parise mangunjuni Ibana; on do sungkunsungkunnasida: Beha, na jadi do sirangkonon ni baoa dongan saripena?

³Alai dialusi Ibana ma nasida: Ai aha dipatikkon si Musa tu hamu?

⁴Gabe didok nasida ma: Dioloi si Musa do mambahen surat sirang laho paulakkon.

⁵Alai dialusi Jesus ma nasida: Ala ni tangkang ni rohamuna do, umbahen na disurathon tu hamu aturan na songon i.

⁶Alai sian mulana i dope, di hatotompana i, baoa dohot boruboru nasida dibahen.

⁷Ala ni i tadingkonon ni baoa do amana dohot inana, patophon dirina tu niolina.

⁸Na gabe sada daging do nasida na dua i; asa ndada dua be nasida, tung sada daging do.

⁹Onpe, naung pinadomu ni Debata, ndang jadi sirangon ni jolma!

¹⁰Asa dung muli nasida, diulahi siseanna ma manungkun Ibana taringot tusi.

¹¹Gabe ninna ma mandok nasida: Na paulakkon dongan saripena, dung i dioli na asing, pangalangkup do ibana disi.

¹²Boruboru i pe, molo disirang dirina sian sinondukna jala dibuat na asing, pangalangkup do.

¹³(II.) Dung i adong ma na mamboan angka anakkonna tu Ibana, asa dijama; alai dipinsang angka siseanna do nasida.

¹⁴Marnida i Jesus, sogo ma rohana, didok ma tu nasida: Loas hamu ma ro angka dakdanak i sahat tu Ahu; unang orai hamu nasida, ai di angka sisongon i do harajaon ni Debata!

¹⁵Situtu do hatangkon tu hamu: Na so manjalo harajaon ni Debata songon dakdanak, ndang saut bongot tusi.

¹⁶Dung i dihaol ma nasida, diampohon ma tanganna tu nasida laho mamasumasu.

¹⁷(III.) Dung i, laho ruar Ibana tu dalam i, ro ma sahalak marlojong, laos marsinggang ma manungkun Ibana: O Guru, na denggan roha! Dia do sipatupaonku, asa hutean hangoluan na salelenglelengna?

¹⁸Alai didok Jesus ma tu ibana: Boasa didok ho Ahu na denggan roha? Ndang adong na denggan roha, dungkon ni sasada Debata!

¹⁹Diboto ho do angka patik i: "Unang ho mangalangkup! Unang ho mambunu! Unang ho manangko! Unang ho olo mangkatindangkon na so tutu! Unang ho mandaho! Ingkon pasangaponmu amangmu dohot inangmu!"

²⁰Alai ninna ma mandok Ibana: O Guru! Sasudena i huradoti do, sian sieteketehonku dope!

²¹Jadi mamereng ibana, holong ma roha ni Jesus di ibana, huhut ma didok: Sada do na hurang di ho: Laho ma ho jolo manggadis nasa na di ho, parlehon ma tu angka na pogos, asa mararta ho di banua ginjang. Dung i ro ma ho, (porsan silang i), ihuthon Ahu!

²²Alai habot do roha ni i umbege hata ondeng; marsak ma rohana sumurut, ai parsinamot godang do ibana.

²³Dung i dibereng Jesus ma angka siseanna na humaliang, didok ma tu nasida: Maolna

i bongot angka paradongan tu bagasan harajaon ni Debata!

²⁴Ia angka sisean i, tarsonggot do di na nidokna i. Alai ninna Jesus ma muse mangalusi nasida: O angka anaha! Maolna i (angka na pos roha di panamotan) bongot tu harajaon ni Debata!

²⁵Gumabur do boluson ni gaja pinggol ni jarum, unang halak na mora bongot tu bagasan harajaon ni Debata!

²⁶Jadi lam tarhalomong ma nasida, gabe masipandohan ma: Molo boti, ise ma tarbahen malua?

²⁷Dibereng Jesus ma nasida huhut ma didok: Anggo dijolma ndang tarbahen; alai ndang songon i di Debata! Ai saluhutna do tarbahen anggo di Debata!

²⁸Dung i dipanghulingi si Petrus ma Ibana: Ia hami, saluhutna do hutadingkon hami mangihuthon Ho!

²⁹Gabe didok Jesus ma: Na tutu do hatangkon na tu hamu: Nasa na tumadingkon jabuna, manang hahaanggina, manang ibotona, manang inana, manang amana, manang ianakhonna, manang haumana pe, ala ni Ahu dohot ala ni barita na uli,

³⁰ingkon silompit saratus jaloonna nuaeng di hasiangan on angka bagas, angka hahaanggi, iboto, ina, ianakhon ro di angka hauma mardongan buruburu, angkup

ni i: Di hasiangan sogot hangoluan na salelenglelengna.

³¹ Alai lan do angka naung parjolo hian gabe parpudi, jala parpudi hian gabe parjolo.

³² (IV.) Alai di tongandalan laho nangkok tu huta Jerusalem, di jolonasida do Jesus, gabe tarsonggot do nasida, laos mabiar do nasida mangihuthon. Jadi diarahon muse ma na sampuludua i, dipungka ma muse paboahon tu nasida na naeng masa tu Ibana:

³³ Na nangkok do hita tu huta Jerusalem, jadi pasahatonna ma Anak ni jolma i tu angka sintua ni malim dohot tu angka sibotosurat, jadi marutang hosa ma ibana uhumonna, jala pasahatonna ma Ibana tu angka parbegu;

³⁴ insahanna, tijuranna jala linsinganna ma Ibana, laos pusaonna do; alai mulak mangolu do ibana di ari patoluhon.

³⁵ (V.) Dung i ro ma mandapothon Ibana si Jakobus dohot si Johannes, angka anak ni si Sebedeus; ai hatanasida: Gurunami, adong do pinangido ni rohanami, silehononmu tu hami nian.

³⁶ Gabe ninna ma mandok nasida: Ai aha do pinangido ni rohamu sibahenonku tu hamu?

³⁷ Dung i didok nasida ma tu Ibana: Naeng bahenonmu hami hundul di hasangaponmi, na sada tu siamunmu, na sada nari tu hambirangmu.

³⁸ Alai ninna Jesus ma mandok nasida: Ndang diboto hamu na pinangidomuna i. Tung

tarinum hamu ma siinumonki? Tung tarparidi hamu ma paridion siparidionki?

³⁹Gabe didok nasida ma tu Ibana: Tarbahen hami do! Dung i ninna Jesus ma mandok nasida: Tutu do nian, inumonmuna do siinumonki, jala paridionmuna do paridion siparidionki.

⁴⁰Alai na mambahen hundul tu siamunhu dohot tu hambirangku, ndang guru di Ahu i; di angka naung dirade hian do i.

⁴¹Alai dung tarbege i tu na sampulu i, gabe sogo ma rohanasida di si Jakobus dohot Johannes.

⁴²Jadi dipapungu Jesus ma nasida, ninna ma mandok nasida: Diboto hamu do, dirajai angka sigomgomi bangso do parripenasida jala dipaksa angka na sangapna do nasida.

⁴³Alai unang ma songon i, anggo di hamu! Manang ise hamu na giot sangap, i ma gabe pangoloi di donganna!

⁴⁴Jala manang ise hamu, na naeng parjolo, i ma gabe naposo ni donganna saluhutna.

⁴⁵Ai nang Anak ni jolma i pe, ndada asa dioloi halak Ibana, umbahen na ro; Ibana do balik pangoloi jala mangalehon hosana bahen tobus ni torop jolma.

⁴⁶(VI.) Dung i dibongoti nasida ma huta Jeriko. Jadi di na ruar Ibana sian Jeriko raphon siseanna dohot halak natorop, adong ma hundul disi di pinggol ni dalan i sahalak

sipanehenehe na mapitung, si Bartimeus, anak ni si Timeus.

⁴⁷Jadi dung dibege ibana, Jesus na sian Nasaret do i hape, dipungka ma manjouhoun: O Jesus, Anak ni si Daud, asi ma roham mida ahu!

⁴⁸Lan do maminsang ibana, asa sip nian; alai lam digogo do manjouhoun: Ale Anak ni si Daud, asi ma roham di ahu!

⁴⁹Jadi sulon ma Jesus, didok ma: Jou hamu ma ibana! Gabe dijou ma na mapitung i, didok ma mandok ibana: Pos ma roham! Hehe ma ho! Dijou do ho!

⁵⁰Jadi hatop ma ibana hehe, laho mandapothon Jesus; laos tading do anggo ulosna.

⁵¹Dipanghulingi Jesus ma ibana: Aha dipangido roham sibahenonku tu ho? Jala didok na mapitung i ma tu ibana: Gurunami, naeng marnida ma nian matangku!

⁵²Dung i didok Jesus ma tu ibana: Laho ma ho! Dipangolu haporseaonmi do ho. Jala mamintor marnida ma matana, laos diihuthon ma Jesus di sidalananna i.

11 ¹(I.) Dung i di na lam jonok nasida tu huta Jerusalem, tu Betpage dohot Betania, na di lambung ni dolok Jetun, disuru Jesus ma siseanna dua halak.

²Didok ma tu nasida: Laho ma hamu tu sosor na di jolomuna an; jadi disi bongot hamu tusi, dapot hamu ma tambat disi sada

anak ni halode, na so dung dope hinundulan;
harhari jala togu hamu ma i tuson!

³Jadi molo tung adong na mandok tu
hamu: Na marhua do hamu?, dok hamu
ma: Na ringkot do i di Tuhan i; jala tibu do
pasuangonna i tuson.

⁴Borhat do nasida jala dapotsa do anak
ni halode i, tambat dingkan harbangan di
alaman i, jadi ditanggali nasida ma.

⁵Dung i adong ma halak na jongjong disi na
mandok tu nasida: Na marhua do hamu na
mananggali anak ni halode i?

⁶Jadi didok ma songon na tinonahon ni
Jesus tu nasida, gabe dipasombu ma.

⁷Ditogu nasida ma anak ni halode i tu Jesus,
diampehon ma ulosnasida tu atasna jadi
marsihundul ma Jesus disi.

⁸Jala torop do halak angka na
pahembangkon ulosnasida tu dalan i;
na deba manalliki angka bulung rata sian
ladang i, laho mangamparhon tu dalan i.

⁹Ia angka na di jolo nang angka na mangihut
sian pudi, sai manjoujouhon do: Hosianna!
Pinuji ma na ro marhitehite Goar ni Tuhan i!

¹⁰Pinuji ma harajaon ni amanta Daud
na naeng ro! Hosianna ma di ginjang ni
ginjangan!

¹¹(II.) Jadi bongot ma Jesus tu huta
Jerusalem sahat tu bagas joro i. Jala dung
tangkas dibereng sude, ruar ma Ibana muse,

laho tu huta Betania rap dohot na sampuludua i, ala naung bot ari situtu.

¹²Dung i torang ni arina i, dung hehe nasida sian Betania, male ma dihilala.

¹³Jadi ditatap ma hau ara sada naung marbulung jadi didapothon ma, atik beha dapotan Ibana disi. Hape dung sahat, holan bulung sambing do jumpangsa; ai ndang dope tingkina marparbue.

¹⁴Jadi dipanghulingi ma hau i: Matua tano on, ndang jadi be agia ise manganhon parbue sian ho! Dibege angka siseanna do nidokna i.

¹⁵(III.) Dung i sahat ma nasida tu huta Jerusalem. Jadi dibongoti ma bagas joro i, manigor dipabali ma angka na manggadisi dohot na manuhori di joro i, ditunggalingkon ma meja ni angka panungkari ro di bangku ni angka sigadis darapati.

¹⁶Ndang diloas boluson ni na marsiboanon bagas joro i.

¹⁷Laos ninna do mangajari nasida: Nda tarsurat: "Bagas partangiangnan ni saluhut bangso do goaron bagashu?" Hape gabe liang ni pandobo do i dibahen hamu.

¹⁸Jadi dibege angka sintua ni malim dohot angka sibotosurat ma i, gabe dilului ma dalan mamusa Ibana; ai nunga biar rohanasida mida Ibana, ala tarhalomong sude natorop i umbege podana i.

¹⁹Alai ganup bot ari, sai ruar do nasida tumadingkon huta i.

²⁰Di na mamolus nasida manogotna i, diida ma naung rahar hau ara i ro di uratna.

²¹Marningot hata i si Petrus, didok ma tu Ibana: Guru, bereng ma! Nunga rahar hau ara na binuraanmi!

²²Gabe didok Jesus ma mangalusi nasida: Porsea ma hamu di Debata!

²³Na tutu do hatangkon tu hamu: Molo adong na mandok tu dolok on: Hindat dirim, dabuhon ho tu laut!, sai na saut do i idaonna, anggo so ganggu ibana di bagasan rohana jala porsea, ingkon tulus na nidokna i.

²⁴Dibahen i hudok ma tu hamu: Saluhutna, manang dia pe dipangido hamu di tangiangmuna, sai na sahat do i tu hamu, asal porsea hamu, ingkon jaloonmuna.

²⁵Alai molo jongjong hamu martangiang, sai sesa hamu ma, molo adong pangkurangi ni rohamu di halak, anggiat disesa nang Amamuna na di banua gintang i salamuna.

²⁶Alai anggo so disesa hamu, ndang sesaon ni Amamuna na di banua gintang i salamuna.

²⁷(IV.) Jala dibongoti muse ma huta Jerusalem. Jadi mardalandalan ma Ibana di joro i, gabe ro ma mandapothon Ibana angka sintua ni malim, angka sibotosurat ro di angka panunggane.

²⁸Didok nasida ma tu Ibana: Huaso dia dipangasahon Ho mambahen sisongon i? Ise do na mangalehon huaso i tu Ho, laho patupahon angka i?

²⁹Gabe didok Jesus ma tu nasida: Adong na husungkun tu hamu, alusi hamu ma Ahu, asa hupaboa tu hamu, manang huaso dia hupangasahon di pambahenanki:

³⁰Ia pandidion ni si Johannes, sian ginjang do i, manang sian jolma? Alusi hamu ma Ahu!

³¹Gabe marhusari ma nasida songon on: Ia ninta: Sian ginjang!, ndang tagamon so dohononna: Antong, boasa so dihaporseai hamu ibana?

³²Alai beha, ia tadok: Sian jolma? Ai dihabiari do natorop, ala panurirang do si Johannes di roha ni jolma saluhutna.

³³Gabe ninna nasida ma mangalusi Jesus: Nandang huboto hami i! Jala ro ma hata ni Jesus tu nasida: Ahu pe, ndang paboaonku tu hamu, manang huaso dia hupangasahon patupahon ulaonki.

12¹(I.) Dung i dijamitai Jesus ma nasida marhite sian umpama, ninna ma: Adong ma sada halak na pauli porlak anggurna, dihandangi ma humaliang, dihali ma pangilangan, dipauli ma gudangna, dipasahat ma tu angka pangula, dung i marhutasada ma ibana.

²Jadi di tingkina i disuru ma naposona manopot angka pangula i, asa dijalo sian nasida parbuena i deba.

³Hape ditangkup nasida do ibana, dipukpuhi, laos muli boti do ibana dipaulak.

⁴Dung i diulakkon ma marsuru naposona na asing tu nasida, alai dilombut do nang i jala dileai.

⁵Jadi disuru muse sahalak na asing, alai dipusa do anggo i; dung i lan dope angka na asing disuru, na deba dilasahi, na deba dipusa nasida.

⁶Adong dope anakna sada, hinaholongan ni rohana, i ma disuru parpudi tu nasida, ai ninna rohana do: Ra biar ma rohanasida mida anakki!

⁷Alai masipandohan do angka pangula i: On do panean! Beta ma, tapusa ma ibana, asa di hita siteanonna i!

⁸Gabe ditangkap nasida ma ibana, dipusa ma, jala tu balian ni porlak anggur i nama didanggurhon.

⁹Dia ma tagamon bahenon ni tuan parporlak anggur i? Ro ma ibana mangalengsehon angka pangula i, dung i pasahatonna ma porlak i tu halak na asing.

¹⁰Ndang dung dope dijaha hamu hata ni surat on: "Ia batu na binolongkon ni angka pande bagas i, nunga i gabe batu parsuhisui.

¹¹Pinamasa ni Tuhan do i; halongangan do i diida matanta"?

¹²Gabe dilului nasida ma dalan manangkap Ibana; alai mabiar do nasida mida natorop i. Ai diboto, nasida do tinuju ni umpama ondeng, laos laho do nasida manadingkon Ibana.

¹³ (II.) Jadi dipaborhat nasida ma deba sian angka Parise dohot sian angka naposo ni si Herodes, asa dipadapot nasida Ibana di hatana.

¹⁴ Jadi ro ma nasida mandok tu Ibana: Gurunami, huboto hami na tigor Ho jala ndang dihabiar i Ho agia ise, ai so siida bohi ni jolma Ho; sintongsintong dipodahon Ho dalan ni Debata. Na jadi do lehonon guguan tu Kesar i, manang na so jadi? Lehononta do, manang ndang?

¹⁵ Alai diboto Jesus do, ansiansinasida i, jadi didok ma tu nasida: Boasa unjunanmuna Ahu? Boan hamu ma tu Ahu rupia sada asa huida!

¹⁶ Jadi diboan nasida ma i. Dung i didok Ibana ma tu nasida: Gombaran dohot surat ni ise do dison? Jadi didok nasida ma tu Ibana: Gombaran ni Kesar i do!

¹⁷ Laos didok Jesus ma tu nasida: Lehon hamu ma tu Kesar na sian Kesar i, jala tu Debata na sian Debata! Jadi longang ma rohanasida mida Ibana.

¹⁸ (III.) Dung i ro ma tu jolona angka Saduse, na so marhatutuhon, adong haheheon sian na mate, jadi disungkun nasida ma Ibana:

¹⁹ Gurunami, disurathon si Musa do tu hita: Molo mate halak, ditinggalhon pardihutana, so marianakkon, ingkon dihabia anggina do boruboru i, pajongjongkon pomparan di hahana i.

²⁰Asa adong ma pitu halak na marhahamaranggi; mambuat boru ma sihahaan i, jadi mate ma ibana, so martinading.

²¹Dung i dibuat paidua i ma boruboru i, laos mate do ibana, so martinading; paitolu i pe songon i do.

²²Songon i sude nasida na pitu i so martinading. Umpudi sian nasida sasudena i mate ma nang parompuan i.

²³Ise do sian nasida nampuna parompuan i, ia di haheheon i? Ai nasida na pitu di do marniolihonsa.

²⁴Alai ninna Jesus ma tu nasida: Nda i ma haliluonmuna, na so binotomuna Surat i nang hagagoon ni Debata?

²⁵Ai di na hehe nasida sian na mate, ndang mangoli, ndang marhamulian; songon angka surusuruan na di banua ginjaang i do nasida!

²⁶Alai anggo taringot tu haheheon ni angka na mate, ndang dung dijaha hamu ulaning di surat ni si Musa (binduna: Ramba na sampulguk) na nidok ni Debata tu ibana: "Ahu do Debata ni si Abraham, Debata ni si Isak jala Debata ni si Jakkob"?

²⁷Apala Debata ni angka na mate Ibana; Debata ni angka na mangolu do! Tung na lilu situtu do hamu!

²⁸(IV.) Na dibege sibotosurat sahalak do nasida na masialusan i, gabe ro ma ibana jumonok; dung ditanda denggan ni alus ni

Jesus, disungkun ma Ibana: Dia do patik na ummangat sian patik i sudena?

²⁹Dialusi Jesus ma ibana, didok ma: On do patik na ummangat: "Tangihon ma, ale Israel, Tuhan sasadasa do Tuhan Debatanta i.

³⁰Jala haholonganmu do Tuhan Debatam sian nasa ateatem, sian nasa hosam, sian nasa roham dohot sian nasa gogom!"

³¹Ia patik paiduana, on do: Haholonganmu do donganmi songon dirim! Patik na ummangat sian na dua i ndang adong.

³²Jadi didok sibotosurat i ma tu Ibana: Tingkos didok ho, Guru, hombar tu hasintongan: Sada do Debata jala ndang adong na asing dungkon ni Ibana.

³³Jala mangkaholongi Ibana sian nasa ateate, sian nasa roha dohot sian nasa gogo huhut mangkaholongi dongan songon diriniba, ummangat do i sian saluhut angka pelean situtungon nang pelean na asing pe.

³⁴Dung dibege Jesus pantasna maralus, ninna ma mandok ibana: Nandang sadia dao ho sian harajaon ni Debata! Olat ni i ndang adong be na hum roha pasungkunsungkun Ibana.

³⁵(V.) Uju mangajari Jesus di bagasan joro i, ninna ma mandok nasida: Marhua didok angka sibotosurat Kristus i Anak ni si Daud?

³⁶Ai si Daud sandiri do mandok marhitehite Tondi Parbadia i: "Ninna Tuhan i do mandok Tuhanku: Hundul ma Ho tu Siamunhon, paima

hupeakhon angka musum, bahen sidegean ni patmu!"

³⁷Apala si Daud do manggoar Ibana Tuhan, beha ma Ibana Anakna? Lomo do roha ni natorop i tumangihon hatana.

³⁸Laos didok Jesus ma di sipodaonna i: Jaga ma hamu mida angka sibotosurat, angka na lomo roha madangadang marbaju na ganjang, asa ditabi halak nasida di angka onan.

³⁹Na ringkot do rohanasida di bangku jolojolo di angka parguruan ro di hundulan na sumangap di parpestaan.

⁴⁰Dipolgak nasida do bagas ni na mabalu, gabe tangiang na ganjang do dibahen nasida mangkuphupisa. Uhum na dumokdok do jaloonnasida.

⁴¹(VI.) Na hundul do Ibana tondongkon poti parasian, gabe dibereng ma pambahen ni halak mandabuhon hepengna tu poti i. Jadi torop do na mora na mandabuhon na godang.

⁴²Laos ro ma boruboru na mabalu sada, na pogos; didabuhon ma tusi dua rimis, i ma sasen.

⁴³Gabe dijou Jesus ma siseanna i, ninna ma mandok nasida: Situtu do hatangkon tu hamu: Gumodang do na nidabuhon ni na mabalu, na pogos an tubagasan poti parasian i, asa saluhut angka na mandabuhon i.

⁴⁴Ai sian lobilobi nasida do didabuhon be; alai ia parompuan an, sian pogosna do

didabuhon saluhutna na di ibana, tung sandok hangoluanna i.

13¹ (I.) Laho tumadingkon bagas joro i, ninna sahalak siseanna ma mandok Ibana: Bereng ma, Gurunami, uli ni angka batu on dohot tongam ni angka jabu on!

²Alai ninna Jesus ma mandok Ibana: Diida ho do jabu angka na bolon on? Nandang pasumbuon nanggo dua batu martinditindi na so gargaronna.

³Dung i uju hundul Ibana di dolok Jetun, tondongkon joro i, pulik ma disungkun si Petrus, Jakobus, Johannes dohot Andreas Ibana:

⁴Paboa ma tu hami, andigan masa i; jala dia ma tandana, paboa na songgop ma saluhutna i?

⁵Jala dihatahon Jesus ma tu nasida songon on: Jaga ma hamu, so tung dililuhon halak hamu!

⁶Ai lan do na ro sogot manoluk Goarhu, angka na mandok: Ahu do i!, gabe torop ma lilu bahenonnasida.

⁷Asa molo dibege hamu barita ni angka hamusuon ro di gaor ni na marmusu, unang hamu tarsonggot! Nandang tarbahen so masa angka i, alai ndang i dope ujungna.

⁸Ai na hehe do sogot bangso maralohon bangso, harajaon maralohon harajaon; masa ma nang laho marluatluat, masa ma nang haleon. Parmulaan ni pambebeonna do i.

⁹Alai jaga hamu ma dirimuna, ai pasahatonna do hamu tu angka lolooan na godang dohot tu jolo ni rapot huria, linsinganna ma hamu jala pajongjongonna ma hamu tu jolo ni angka panguhum dohot angka raja ala ni Ahu, bahen panindangion tu nasida.

¹⁰Alai ingkon jumolo do baritahononhon barita na uli i tu ganup bangso.

¹¹Asa jumpa ditogu nasida hamu laho pasahathon, unang holsoan rohamuna di sidohononmuna i! Sandok ia i dilehon tu hamu, di na sangombas i, i ma hatahon hamu; ai apala hamu i na mandok hata disi, Tondi Parbadia i do.

¹²Alai pasahaton ni sihahaan do anggina, asa tu hamatean, songon i amaama di anakonna, jala na hehe do angka ianakhon dompak natorasna laho pabunuhonsa.

¹³Hosoman ni halak saluhutna do hamu ala ni Goarhu. Alai na manahan ro di ujungna, i do paluaonna.

¹⁴Alai molo idaonmuna hagagaor ni na so uhum jongjong di na so jadi (diparateatehon na manjaha on ma i), disi ma maporus angka na di luat Judea i tu dolok!

¹⁵Na di bilut parginjang ni jabuna, unang ma dialap angka ugasan na di jabu i, di na mijur i ibana!

¹⁶Na di hauma, unang ma pola humusor mambuat ulosna!

¹⁷Alai marjea ma angka na gabegabebean dohot angka panarusan di angka ari i!

¹⁸Alai martangiang ma hamu, asa unang songgop i di partaonan ngali!

¹⁹Ai masa do di angka ari i haporsuhon, na so dung adong dope olat ni panompaon ni Debata di na tinompana i rasirasa nuaeng, tu jolo on pe ndang masa be.

²⁰Jadi aut unang diorui Tuhan i angka ari i, ndang tagamon malua nanggo sada jolma; alai ala ni angka na pinillitna i do umbahen na diorui.

²¹Molo dipandok disi tu hamu: Ida: Disi, disan do Kristus i, unang porsea hamu!

²²Ai na hehe ma angka Kristus pargapgap nang angka panurirang pargapgap, patupahon tanda dohot halongangan, laho mangaliluhon nang angka na tarpillit, aut tarbahensa.

²³Jaga ma hamu! Naung hulumbahon do sudena i tu hamu!

²⁴Alai di angka ari i, dung salpu haporsuhon ondeng, mangkolom ma mata ni ari jala ndang marsinondang be bulan i.

²⁵Mardabuan ma angka bintang sian langit i jala humuntal ma angka hagagoon ni parlangitan.

²⁶Jadi idaonnasida ma Anak ni jolma i ro marhitehon ombun, mantat hagagoon dohot hasangapon godang.

²⁷Laos disi ma suruonna angka pardisurgo papunguhon angka na pinillitna i sian desa

na ualu i, sian suhi ni tano sahat ro di suhi ni langit.

²⁸Alai sian hau ara i ma guruhan hamu tudosanna. Ia dung martunasi punsuna jala runkar bulungna, botoonmuna ma, naung jonok partaonan las.

²⁹Suang le songon i, jumpa diida hamu masa angka ondeng, botoonmuna ma, naung jonok hasosonggopna.

³⁰Situtu do hatangkon tu hamu: Na so tupa salpu bangso on, so jolo songgop sasudena i.

³¹Salpu pe sogot langit dohot tano on; anggo angka hatangki, ndang na olo salpu!

³²Alai anggo arina dohot sadiharina, ndang adong na umbotosa, nang surusuruan na di banua ginjang, nang Anak i pe; nda holan Ama i!

³³Tagam ma hamu; dungo ma hamu, ai ndang diboto hamu, manang sadihari tingkina i!

³⁴Umpamana: Songon halak na marhutasada na manadingkon jabuna, disagihon do huaso tu angka naposona, tu ganup siulaonna be, jala sijaga pintu i didokkon marjaga.

³⁵Antong, dungo ma hamu, ai ndang diboto hamu, manang sadihari ro tuan nampuna bagas i, manang di bot ni ari, manang di na tonga borngin, manang di na martahuak manuk, manang di torang ni ari i.

³⁶So tung jumpangsa hamu modom, di na ro Ibana tompu!

³⁷Ai tu saluhutna hamu do hatangkon:
Dungo ma hamu!

14¹(I.) Alai dua ari nari nama uju i, asa dapot Pesta Paska, hamamasa ni roti na so pinolongan. Jadi dilului angka sintua ni malim dohot angka sibotosurat angka manangkup jala mamusa Jesus.

²Alai didok nasida ma: Unang ma di pesta i, so tung guntur natorop i!

³(II.) Jadi uju di Betania Ibana, di bagas ni si Simon na huliton najolo, di na hundul Ibana laho mangan, ro ma sada parompuan mamboan galas na marisi miak arum na arga, na so marsampur, dibolai ma galas i jala diusehon ma miak i tu ulu ni Jesus.

⁴Alai adong ma na marmungutmungut sama nasida: Magoponai miak i dibahen!

⁵Aut ginadis nian miak i lobi tolu ratus rupia mangasii na pogos! Jadi dimuruhi ma ibana.

⁶Alai ninna Jesus do: Pasombu hamu ma ibana! Boasa arsa hamu ibana? Na uli do na binahenna i tu Ahu!

⁷Ai tongtong do adong na pogos di tongatongamuna; jala asal ma olo hamu, tarpatongon hamu do na denggan tu nasida; alai anggo Ahu ndang manongtong di hamuna.

⁸Intap na tarbahensa do na niulana i; na manjoloani do ibana mamiahi pamatangku songon di na mananom.

⁹Situtu do hatangkon tu hamu: Manang didia di liat portibi on dijamitahon muse barita na uli on, hatahononna do nang binahenna i gabe baritana.

¹⁰(III.) Dung i laho ma sada sian na sampuludua i, si Judas Iskariot, manopot angka sintua ni malim, asa dijehehon Ibana tu nasida.

¹¹Umbege i, tarhilas ma rohanasida, jadi diparbagabaga ma lehononnasida hepeng tu ibana. Gabe dilului rohana ma tingki halehetanna; laho pasahathon Ibana.

¹²(IV.) Jadi di ari parjolo ni pesta Paska, di na somal dipotong birubiru Paska i, ro ma hata ni angka sisean i tu Ibana: Tudia ma hami laho paturehon panganon Paska i, dipangido roham?

¹³Jadi disuru Ibana ma siseanna dua halak, didok ma tu nasida: Laho ma hamu tu huta i, pajumpang ma hamu disi dohot sada halak na mangusung aek sahudon; ibana ma ihuthon hamu!

¹⁴Jadi dok hamu ma tu nampuna jabu na binongotanna i: Tona ni Guru i tu ho: Didia do bilut inganan, asa disi hupangan hami Paska i rap dohot siseanki?

¹⁵ Jadi patuduhononna ma tu hamu bilut parginjang sada, na lambas, na tipak hinembangan, disi ma pature hamu di hita!

¹⁶ Borhat ma siseanna i, dibongoti ma huta i, jadi jumpang nasida ma tutu songon na nidokna i, gabe dipature ma Paska i.

¹⁷ Asa dung bot ari, ro ma Ibana rap dohot na sampuludua i.

¹⁸ Dung i hundul ma nasida mangan, gabe didok Jesus ma: Na tutu do hatangkon tu hamu: Sada sian hamu on, na rap mangan dohot Ahu, pasahathon Ahu!

¹⁹ Gabe marsak ma rohanasida jala sadasada ma nasida mandok tu Ibana: Nda tung ahu i?

²⁰ Alai ninna Ibana do mangalusi nasida: Sada sian hamu na sampuludua on, na rap dohot Ahu manornophon tu bagasan paringkauan!

²¹ Tong do nian ujung ni Anak ni jolma i, songon na tarsurat hian; alai marjea do halak na gabe parhitean pasahathon Anak ni jolma i! Tagonan unang tubu Ibana!

²² Jadi di na mangan i nasida, dihindat Jesus ma roti, dipasupasu ma, diponggoli jala diparlehon ma tu nasida, huhut ma didok: Jalo hamu ma; Dagingku do on!

²³ Dung i dihandit ma panginuman, didok ma mauiate, dilehon ma tu nasida, gabe saluhut do nasida manginum sian i.

²⁴ Laos didok ma tu nasida: Mudarhu do on, mudar parpadanan i, na niusehon humongkop torop halak.

²⁵ Na tutu do hatangkon tu hamu: Na so tupa be inumonku olat ni on sian parbue ni hau anggur i sahat ro di ari sogot: Disi ma inumonku na imbaru di harajaon ni Debata.

²⁶ (V.) Jadi dung diendehon nasida ende pujipujian i, borhat ma nasida tu dolok Jetun.

²⁷ Jadi didok Jesus ma tu nasida: Na targasip ma hamu saluhutna, ai na tarsurat do: "Lombutanku ma parmahan i, gabe marserak ma angka birubiru i!"

²⁸ Alai dung hehe Ahu sian na mate, joloananku ma hamu tu Galilea.

²⁹ Gabe didok si Petrus ma tu Ibana: Agia sude nasida targasip, ndang anggo ahu!

³⁰ Jadi didok Jesus ma tu ibana: Situtu do hatangkon tu ho: Apala saborngin on ma soadahononmu Ahu tolu hali, tagan so martahuak dope manuk paduahalihon!

³¹ Alai lam digogohon ma hatana, didok ma: Nang pe ingkon mate ahu rap dohot Ho, ndang tagamon soadahononku Ho! Laos songon i do hatanasida sudena.

³² Dung i sahat ma nasida tu sada ladang na margoar Getsemane, jadi didok ma tu angka siseanna: Hundul ma hamu dison, tagan martangiang Ahu.

³³ Jala ditogihon ma si Petrus, Jakobus dohot Johannes. Dung i biahaton ma Ibana jala bobonosan.

³⁴ Jadi didok ma tu nasida: Mansai marsak do rohangku, hira na mate do. Dison ma hamu mian jala dungo!

³⁵ Dung i laho ma Ibana tu jolo saotik, dipatungkap ma dirina tu tano martangiang, anggiat disalpuhon tingki i sian Ibana, anggo na tarbahren.

³⁶ On do hatana: Ale Amang, saluhutna do tarpatupa Ho! Salpuhon ma siinumon on sian Ahu! Alai ndada guru lomo ni rohangku, roham do!

³⁷ Dung i ro ma Ibana, jadi modom do nasida didapot, gabe didok ma tu si Petrus: O Simon, na modom do ho hape! Ndang margogo ho dungo, nanggo sangombas!

³⁸ Dungo ma hamu jala martangiang, asa unang bongot hamu tu bagasan pangunjunan; ai na girgir do nian tondi i, alai gale do ia daging.

³⁹ Dung i diulakkon ma martangiang; laos hata ondeng do didok.

⁴⁰ Dung i di na ro Ibana muse, tong do modom nasida didapot, ai na dokdok do salibon ni matanasida, jala ndang diboto mangalusi Ibana.

⁴¹ Jadi di na ro Ibana patoluhalihon, didok ma tu nasida: Datdatanmuna dope modom dohot maradian! Sae ma i! Nunga dapot

tingkina! Ida hamu, pasahatonna ma Anak ni
jolma i tu tangan ni angka pardosa!

⁴²Hehe ma hamu; laho ma hita! Ndi, nunga
ro na pasahathon Ahu!

⁴³(VI.) Mangkatahon i dope Ibana, mamintor
disi ma si Judas, sahalak sian na sampuludua
i, jala rap dohot ibana torop halak na
marpodang jala marlombutlombut, sinuru
ni angka sintua ni malim, angka sibotosurat
dohot angka panunggane.

⁴⁴Alai dipabotohon parjehe i hian
partinandaan tu nasida, ai ninna do: Ia i na
huumma, Ibana ma i, tangkup hamu ma i jala
jamot ma boan hamu Ibana!

⁴⁵Mamintor didapothon ma Jesus, mandok:
Guru! Laos diumma ma Ibana.

⁴⁶Gabe dilaluhon nasida ma tangannasida tu
Ibana laho manangkup.

⁴⁷Alai adong ma sahalak sian angka na
jongjong disi, disintak ma podangna, ditampul
ma naposo ni sintua ni malim, dipisikkon ma
pinggolna.

⁴⁸Jadi didok Jesus ma mandok nasida:
Hira na dompak panamun do hamu
hehe, marpodang jala marlombutlombut
manangkup Ahu.

⁴⁹Ariari do Ahu nian rap dohot hamu di
bagas joro mangajari, so adong ditangkup
hamu Ahu! Alai naeng ma jumpang na nidok
ni Surat i!

⁵⁰Dung i ditadingkon nasida sude ma Ibana laho maporus.

⁵¹Adong ma disi dolidoli sahalak na mangihutihut Ibana, holan dagangan do dialithon tu dagingna, gabe ditangkup nasida ma ibana.

⁵²Alai ditinggalhon do dagangan i, marsaemara do ibana maporus.

⁵³Ditogihon nasida ma Jesus tu jolo ni sintua ni malim, jala marluhut ma disi sude angka sintua ni malim, angka sintua ro di angka sibotosurat.

⁵⁴Mandaodao do anggo si Petrus mangihut sian pudi ro di alaman parbagasan ni jabu ni sintua ni malim i, jadi disi ma ibana juguk rap dohot angka naposo mansusudu.

⁵⁵(VII.) Alai anggo sintua ni malim i ro di sandok rapot godang mangalului panindangion dampak Jesus mambahen marutang hosa Ibana; alai ndang adong jumpangsa.

⁵⁶Ai lan do nian na mangkatindangkon gapgap dampak Ibana: Alai ndang mardomu na hinatindangkonnasida i.

⁵⁷Laos hehe ma deba sitindangi gapgap dampak Ibana, angka ninna do:

⁵⁸Hubege hami do Ibana mandok: Lohaanku ma joro on na pinauli ni tangan, jala di bagasan tolu ari pajongjongonku na asing, na so pinauli ni tangan.

⁵⁹ Alai nang pe songon i, ndang mardomu na hinatindangkonnasida i.

⁶⁰ Dung i hehe ma sintua ni malim i tu tongatonga, disungkun ma Jesus, ninna ma: Tung so alusanmu do na hinatindangkonnasida dompak Ho?

⁶¹ Alai mauhom do anggo Jesus, ndang agia aha dialusi. Gabe disungkun sintua ni malim i Ibana muse, didok ma: Beha, Kristus do Ho, Anak ni Sipujion i?

⁶² Jadi didok Jesus ma: Ahu do i! Jala idaonmuna do Anak ni jolma i hundul di siamun ni Hagogoon, jala ro marhitehitehon ombun na di langit.

⁶³ Gabe diribakkon sintua ni malim i ma pangkeanna, huhut ma didok: Pola luluan dope sitindangi?

⁶⁴ Nunga dibege hamu pangaleaina i di Debata! Beha do di rohamu? Gabe sude ma nasida manguhum Ibana marutang hosa.

⁶⁵ Dung i dipungka na deba sian nasida manijuri Ibana, dibulang ma matana, dipastapi ma bohina huhut mandok tu Ibana: Manurirangi ma Ho! Nang angka naposo manahopi Ibana, laho mangalombuti.

⁶⁶ (VIII.) Di toru do anggo si Petrus, di alaman parbagasan, jadi ro ma naposo boruboru ni sintua ni malim i sahalak.

⁶⁷ Diida ma si Petrus na mansusudu i, gabe dibereng ma ibana, laos didok ma: Dohot do ho da, dongan ni Jesus na sian Nasaret!

⁶⁸Alai diporso si Petrus do, didok ma:

Ndang adong huboto, jala ndang huantusi na nidokmi! Laos ruar ma ibana tu alaman jolojolo, jala martahuak ma manuk.

⁶⁹Alai marnida ibana, diulahi naposo boruboru i ma mandok tu angka na jongjong disi: On do sada sian nasida!

⁷⁰Alai mamorso muse anggo ibana. Jadi dung satongkin nari, didok angka na jongjong disi ma muse mandok si Petrus: A, tongon do; dongannasida do ho, ai halak Galilea do ho!

⁷¹Gabe dipungka si Petrus ma mambuburahon dirina huhut manolonnon: Ndang hutandajolma na nidokmuna i!

⁷²Dung i mamintor martahuak ma manuk i paduahalihon. Jadi diingot si Petrus ma na nidok ni Jesus tu ibana: Tolu hali do soadahononmu Ahu, andorang so martahuak manuk paduahalihon. Jala marningot i, tumatangis ma ibana.

15¹(I.) Manigor dung torang ari, martuptup ma angka sintua ni malim raphon angka panunggane, angka sibotosurat dohot sandok raport godang i, jadi ditali nasida ma Jesus, mamboan jala pasahathon Ibana tu si Latus.

²Disungkun si Latus ma Ibana: Atehe, raja ni halak Jahudi do Ho? Jala ninna Jesus ma mangalusi ibana: Songon nidokmi do tutu!

³Alai godang do dipartuhashon angka sintua ni malim dampak Ibana.

⁴Jadi diulahi si Latus ma manungkun Ibana: Nandang alusanmu i? Godangna i dituhashon nasida dampak Ho!

⁵Alai ndang dialusi Jesus agia aha, pola longang roha ni si Latus.

⁶Alai jumpa ari pesta, somal dipalua tu nasida sada halak na tarhurung, hombar tu na pinangido ni rohanasida.

⁷Jadi adong ma sada halak na margoar si Barabas, rap tarhurung dohot angka panggunturi, naung mambunujolma di na guntur i.

⁸Jala nangkok ma na torop i laho mangido, asa dibahen tu nasida songon na somal.

⁹Gabe ro ma si Latus mangalusi nasida: Atehe, denggan do rohamuna hupalua tu hamu raja ni halak Jahudi i?

¹⁰Ai diboto, na sian late ni roha do dipasahat angka sintua ni malim Ibana.

¹¹Alai digintali angka sintua ni malim do natorop i, asa tagonan si Barabas dipalua tu nasida.

¹²Jala ninna si Latus ma muse mangalusi nasida: Antong, dia do dipangido rohamu bahenonku tu na ginoarmuna: Raja ni Jahudi?

¹³Alai dijouhon nasida ma: Parsilangkon Ibana!

¹⁴Gabe didok si Latus ma mandok nasida:
Ai aha do na jat dibahen? Alai lam digogo ma
manjouhon: Parsilangkon ma Ibana!

¹⁵Alai naeng mambuat roha ni natorop
i do si Latus, jadi dipalua ma si Barabas;
alai dipasahat ma anggo Jesus, asa
diparsilangkon, dung jolo dilasahi.

¹⁶Dung i ditogihon angka soldadu i ma Ibana
tu emper paruhuman i (i ma Pretorion), jadi
tusi ma dijou sude na sahorong i.

¹⁷Baju dapdap ma disolukkon nasida tu
dagingna, didandani ma sungsang duri bahen
tumpalna.

¹⁸Dung i tole ma nasida mangkormat Ibana,
dipandok ma: Tabi ma di Ho, raja ni Jahudi!

¹⁹Laos dipasakkon nasida tolong tu uluna,
ditijuri do Ibana jala dilompit ma totnasida,
laho sumomba Ibana.

²⁰(II.) Asa dung dileai nasida Ibana,
ditanggal ma muse baju dapdap i sian
dagingna, disolukkon ma tu Ibana angka
abitna hian. Dung i ditogu ma Ibana tu balian,
laho mamajalhon.

²¹Mamolus do sian i sahalak na ro sian
ladangna, si Simon na sian luat Kirene, ama
ni si Aleksander dohot si Rupus; i ma digogoi
nasida, asa diporsan hau na pinarsilang
siporsanon ni Jesus hian.

²²Jadi diboan nasida ma Ibana tu Golgata
(Iapatanna: Partangkurahan).

²³ Dilehon nasida ma tu Ibana anggur na marsaor mir, alai ndang dijalo.

²⁴ Diparsilangkon nasida do Ibana, jadi dibagi ma angka abitna; tondung do dibahen laho pasagihonsa.

²⁵ Di pungkul sia do diparsilangkon nasida Ibana.

²⁶ Jala disurathon nasida do tu ginjangna surat parsalaanna: Raja ni Jahudi!

²⁷ Rap dohot Ibana diparsilangkon nasida dua panamun, sada di siamunna, sada di hambirangna.

²⁸ Gabe jumpang ma na nidok ni Surat i: "Tarrajum do Ibana tu halak parjahat."

²⁹ Jadi diinsahi angka pamolus i ma Ibana, diupirhon be ma ulunasida huhut dipandok: Pe Ho, na mangalohai bagas joro i jala na pajongjongkonsa di bagasan tolu ari!

³⁰ Palua dirim jala mijur ma Ho sian hau na pinarsilang i!

³¹ Suman tusi do panginsahion ni angka sintua ni malim rap dohot angka sibotosurat, angka na masipandohan: Na leban dipalua, ia dirina so tarpaluasa.

³² Ho, Kristus, raja ni Israel! Mijur ma Ho antong sian hau na pinarsilang i, asa huida hami i jala porsea! Manginsahi do nang donganna tarsilang.

³³ Alai di hos ni ari songgop ma na holom tu liat tano i, sahat ro di pungkul tolu.

³⁴Jadi di pungkul tolu i, marsoara na balga ma Jesus manjouhon: Ale Debatangku, Debatangku, boasa tadingkononmu Ahu (Eloi Eloi, lama sabakhtani)!

³⁵Jadi adong ma deba na jongjong disi na umbegesa, gabe didok ma: Si Elia do jinouna i!

³⁶Alai marlojong ma sahalak manornophon limut tu asom, dilohothon ma i tu tolong laho painum Ibana, huhut ma didok: Antong, taida ma, manang na ro si Elia paijurhon Ibana!

³⁷Dung i marsoara na gogo ma Jesus, laos tos ma hosana.

³⁸Jadi maribak bola dua ma hirehire na di bagas joro i, sian ginjang tu toru.

³⁹Dung diida letnan na mangadopi Ibana, songon i hape parmatena, gabe didok ma: Na tutu do Anak ni Debata Halak on!

⁴⁰Manatapnatap do sian na dao deba inaina, songon si Maria Magdalena, si Maria ni si Jakobus na umposo, angkup ni i ina ni si Josep dohot si Salome.

⁴¹Diihuthon nasida do Ibana laho mangkobasi, uju di Galilea dope Ibana; dungkon ni i lan dope angka na asing, na rap nangkok dohot Ibana tu Jerusalem.

⁴²(III.) Jadi dung bot ari, di ari parhobasan i, i ma patujolo ni ari Sabbath,

⁴³ro ma si Josep sian Arimatea, na masuk rapot godang, halak na sangap na maimaima di harajaon ni Debata; dipatomos ma rohana

laho bongot tu jolo ni si Latus, mangido bangke ni Jesus.

⁴⁴Jadi longang ma roha ni si Latus, ala naung mate; gabe dijou ma letnan i, disungkun ma ibana, manang naung leleng mate.

⁴⁵Asa dung ditangkasi i sian letnan i, dipasahat ma bangke i tu si Josep.

⁴⁶Dituhor si Josep ma dagangan, dipaijur ma Ibana, dibaluti ma tu dagangan i, dipeakkon ma bangke i tu tanoman sada na niliang tu bagasan batu; dung i digulang ma sada batu tu baba pintu ni tanoman i.

⁴⁷Dipanothnoti si Maria Magdalena dohot si Maria ni si Josep ma, manang na tu dia Ibana dipeakkon.

16¹(I.) Asa dung salpu ari Sabbat i, dituhor si Maria Magdalena dohot si Maria ni si Jakobus rap dohot si Salome ma ragamragam ni na hushus, laho mamiahi bangkena.

²Jadi mansai sogot di ari parjolo dung Sabbat i, laho ma nasida tu tanoman i, di na binsar mata ni ari.

³Masipandohan do nasida: Ise ma manggulang batu i di hita sian baba pintu ni tanoman i?

⁴Mamereng dompak i nasida, diida ma naung digulang batu i, ai na balga situtu do i.

⁵Dibongoti nasida ma tanoman i, gabe diida ma dolidoli sahalak, parulos na

marlinanglinang, hundul tungkan siamun,
jadi mabiar situtu ma nasida.

⁶Alai ninna do mandok nasida: Unang ma hamu mabiar! Dilului hamu do Jesus na sian Nasaret, naung diparsilangkon. Nunga hehe Ibana; ndang dison Ibana! Ida hamu ma inganan hapeahanna on!

⁷Laho ma hamuna, paboa hamu ma tu angka siseanna dohot tu si Petrus: Joloananna do hamu tu Galilea, disi ma idaonmuna Ibana, songon naung didok hian tu hamu!

⁸Dung i ruar ma nasida maporus sian tanoman i, laos angka dotdot do nasida jala tarmali. Jadi ndang adong dipaboaboa nasida agia tu ise, ai na tahuton do rohanasida.

⁹(II.) Alai anggo Jesus, naung mulak mangolu, sogot di ari parjolo dung ari Sabbath i, dipataridahon do dirina jumolo tu si Maria Magdalena (sian i do dipabali najolo pitu sibolis).

¹⁰Jadi laho ma i paboahonsa tu angka na mandongani Ibana najolo, angka na marsak jala tumatangis.

¹¹Alai ndang porsea nasida, naung mangolu jala naung diida si Maria Ibana.

¹²Dung i dipataridahon Ibana muse dirina tu dua halak sian nasida, marrupahon rupa na asing, di na laho marhutasada nasida.

¹³Jadi dohot ma nasida ro mamaritahonsa tu angka donganna i; alai nang nasida, ndang dihaporseai.

¹⁴Dung i muse uju hundul nasida mangan, dipataridahon ma dirina tu na sampulusada i, dipinsang ma ganggu dohot jogal ni rohanasida, ala so porsea nasida di angka naung marnida Ibana, naung hehe sian na mate.

¹⁵Jadi ninna ma mandok nasida: Laho ma hamu tu liat portibi on; jamitahon hamu ma barita na uli i tu nasa na tinompa.

¹⁶Na porsea jala tardidi, dapotan haluaon; alai na so porsea i, hona uhum do!

¹⁷Jala on ma tanda angka na mangihut tu na porsea: Pabalionnasida do angka sibolis marhitehite Goarhu dohot mangkatahon hata na imbaru.

¹⁸Jomputonnasida do angka, ulok, jala nang diinum rasun hamatean, ndang pola mahua nasida; ampehononnasida ma tanganna tu angka na marsahit, gabe malum ma hilalaonna.

¹⁹(III.) Asa anggo Tuhan i, dung mangkatai Ibana dohot nasida, tarhinsat ma tu banua ginjang, laho hundul tu siamun ni Debata.

²⁰Alai laho do anggo nasida manjamitahon barita na uli tu ganup luat; jala diurupi Tuhan i ma nasida, dipahot ma jamitanasida marhitehite tanda angka na mangihut i.

Lukas

1 ¹ (I.) Nunga na nia nian manguji manurathon jojoor barita ni naung tangkas masa di tongatonganami,

² mangihuthon pamaritahon ni angka sitindangi sian mulana i tu hami, i ma angka naung gabe parhalado di hata i.

³ Jadi dohot ma ahu pasadahon rohangku manurathonsa jojoorjojoor di ho, ale Teopilus na pinarsangapan, dung jolo hupamanat sude sian mulana i,

⁴ asa ditanda ho hasintongan ni hata, naung dipodahon tu ho.

⁵ (II.) Uju Herodes raja di tano Judea, adong ma sada malim na margoar Sakarias na sian horong ni si Abia; boru Aron do dongan saripena, si Elisabet do goarna.

⁶ Bonar do nasida duansa maradophon Debata, diparangehon do nasa patik dohot aturan ni Tuhan i, so hasurahan.

⁷ Ndang adong anakkonnasida, ai na hol do si Elisabet; jala nunga ganjang umurnasida be.

⁸ Jala jumpang ma di anggap ni horongna i mangulahon hamalimon ibana di adopan ni Debata.

⁹ Mangihuthon na hinasomalhon ni malim marsijomput na sinurat nasida, gabe ibana

ma mambongoti joro ni Tuhan i manutung daupa.

¹⁰Di ruar do anggo halak natorop sudena martangiang di tingki manutung daupa i.

¹¹Gabe diida ibana ma surusuruan ni Tuhan i, jongjong di siamun ni langgatan pardaupaan i.

¹²Taronggot ma si Sakarias marnidasa jala laos hatahutan ma.

¹³Didok surusuruan i ma tu ibana: Unang ho mabiar, Sakarias; ai nunga ditangihon pangidoanmi: Tubuhonon di donganmu saripe ma anak di ho; si Johannes ma bahenonmu goarna.

¹⁴Marlas ni roha jala mariaia ma ho, jala torop do mangkalashon hatotopakna i.

¹⁵Ai balga ma ibana di adopan ni Tuhan i; na so tupa inumonna tuak anggur ro di nasa siinumon na pang, jala gok Tondi Parbadia ma ibana sian bortian dope.

¹⁶Torop ma anak Israel pasuangonna tu Tuhan Debatanasida.

¹⁷Patujolona ma ibana di bagasan tondi dohot hagagoon ni si Elia, pasuangonna ma roha ni angka ama tu anakonna jala angka na tois marroha gabe parroha na bonar, laho padirihon di Tuhan i bangso naung ture.

¹⁸Gabe didok si Sakarias ma tu surusuruan i: Sian dia ma tandaonku i? Ai ahu nunga matua, dongan saripengku pe nunga ganjang umurna.

¹⁹Dialusi surusuruan i ma ibana: Gabariel do ahu, na jongjong di jolo ni Debata; disuru do ahu mangkatai dohot ho, mamboan barita las ni roha on tu ho.

²⁰Alai gabe ngungu ma ho, ndang botoonmu mangkuling sahat ro di ari hamamasana, ala so dihaporseai ho hatangki, na naeng tulus di tingkina i.

²¹Ia natorop i, sai maimaima do di si Sakarias; longang do rohanasida, ala songon i gele ibana di joro i.

²²Jadi laho ruar, ndang diboto mamangkulingi nasida, gabe manganto ma nasida, naung adong niidana di joro i. Mangkilapi nama ibana tu nasida, laos tong ngungu.

²³Asa dung sae tingkina marhalado, mulak ma ibana tu jabuna.

²⁴Ndang piga ari nari gabegabea ma si Elisabet, dongan saripena i, jadi martabunitabuni ma ibana lima bulan lelengna.

²⁵Ninna ma: Pambahen ni Tuhan i do i di ahu di tingki on, ai lomo do rohana mambuat haurahonki di jolo ni halak.

²⁶(III.) Salpu onom bulan disuru Debata ma pardisurgo Gabariel tu Nasaret, i ma sada huta di luat Galilea,

²⁷manopot sada anak boru, oroan ni sada baoa na margoar Josep, na sian pomparan ni si Daud; si Maria do goarna.

²⁸Laho mamasuhi jabuna i, ninna ma: Tabi di ho, na niasian! Didongani Tuhan i ma ho!

²⁹Alai tarsongot do nasida umbege hata i, ninna rohana do, parsantabian dia do i ulaning?

³⁰Jala didok surusuruan i ma tu nasida: Unang ho mabiar, ale Maria; ai dapotan asi ni roha do ho di Debata!

³¹Gabegabea ma ho, tubuan anak ma ho; Jesus ma bahenonmu Goarna!

³²Balga ma Ibana muse, goaron do Ibana Anak ni Natumimbul i; lehonon ni Tuhan Debata do tu Ibana habangsa ni si Daud, amana i.

³³Rajaanna do pomparan ni si Jakkob salelenglelengna, jala ndang marhaujungan harajaonna i.

³⁴Didok si Maria ma mandok surusuruan i: Songon dia ma pangalaho ni i, ai so adong hutanda baoa.

³⁵Jadi dialusi surusuruan i ma nasida: Songgopan ni Tondi Parbadia ma ho jala linggoman ni hagagoon ni Natumimbul i do ho; ala ni i na badia do dohonon na tubu i, Anak ni Debata.

³⁶Ia si Elisabet, sisolhotmi na sai tua i, naung digoar na hol, marhangoluan anak do; paonombulanhon ma nuaeng.

³⁷Ai ndang adong na so tarpatupa Debata.

³⁸Gabe didok si Maria ma: Naposo ni Tuhan i do ahu. Sai saut ma tu ahu songon na

nidokmi! Dung i ditadingkon surusuruan i ma nasida.

³⁹(IV.) Di tingki i ma borhat si Maria dipahatop ma laho tu dolok, tu huta Juda.

⁴⁰Bagas ni si Sakarias do dibongoti, ditabi ma si Elisabet.

⁴¹Umbege tabi ni si Maria i si Elisabet manggunjal ma posoposo di bagasan bortianna, jadi gok Tondi Parbadia ma si Elisabet.

⁴²Laos marsoara na gogo ma ibana, dijouhon ma: Dapotan pasupasu do ho di tongatonga ni angka ina; dapotan pasupasu do na pinarorotmi!

⁴³Marhua ma pola ro ina ni Tuhanki manopot ahu on!

⁴⁴Ai disi dapot pinggolhu soara ni tabimi, manggunjal do posoposo i di siubeonku, sian las ni rohana.

⁴⁵Martua ma ho, ala dihaporseai ho, ingkon tulus na tinonahon ni Tuhan i tu ho!

⁴⁶Gabe didok si Maria ma: Dipatimbul rohangku do Tuhan i.

⁴⁷Mariaia do tondingku mida Debata, Sipalua ahu.

⁴⁸Ai ditatap do haetehon ni naposona on. Parhatuaon ma ahu olat ni on marsundutsundut.

⁴⁹Ai habalgaon do dibahen Pargogo i tu ahu. Na badia do Goarna i.

⁵⁰ Ai marsundutsundut do asi ni rohana mida angka na mangkabiari Ibana.

⁵¹ Hagogoon do diula tanganna i, dipanserakkon do angka na ginjang marroha.

⁵² Angka na gogo i dipaijur do sian habangsanasida, dipabangkit do angka na metmet.

⁵³ Na denggan dipasuksuk Ibana tu angka na male, jala angka na lobian hian rumar do dipalaho.

⁵⁴ Dipainuinu do Israel naposona i, marningot asi ni rohana i,

⁵⁵ mangihuthon bagabagana na tu angka ompunta, tu si Abraham dohot tu pomparanna salelenglelengna.

⁵⁶ Laos mian ma si Maria i disi arga tolu bulan jala mulak muse tu jabuna i.

⁵⁷ (V.) Jadi gok ma tingki ni hangoluan ni si Elisabet; anak ma ditubuhon.

⁵⁸ Marlas ni roha ma rap dohot ibana angka hombar bagasna dohot sisolhotna, umbege naung marasi ni roha godang Tuhan i di ibana.

⁵⁹ Di ari pauluhon i ro ma nasida, laho manunat posoposo i; jala dibahen ma goarna Sakarias, mangihuthon goar ni amana.

⁶⁰ Alai mangkuling ma inana i, didok ma: Nda tung; si Johannes do goarna bahenon!

⁶¹ Gabe didok nasida ma mangalusi ibana: So adong agia ise di angka sisolhotmi na margoar songon i!

⁶²Dihilapi nasida ma amana, manang ise goarna bahenon dipangido rohana.

⁶³Gabe dipangido ibana ma panuratan, disurathon ma: Si Johannes do goarna! Jadi tarhalomong ma nasida sude.

⁶⁴Alai di na satongkin i mungkap ma pamanganna, sumuang ma pangkataionna, marsoara ma ibana mamudii Debata.

⁶⁵Gabe hatahutan ma sude hombar hundulnasida, jala di sandok dolok Judea dipanghatahatahon do sasude na masa i.

⁶⁶Jala saluhut na umbegesa, diparateatehon be do barita i, ninna ma: Na gabe aha ma ulaning dakdanak on? Ai tung didongani tangan ni Tuhan i do ibana.

⁶⁷(VI.) Gok Tondi Parbadia ma si Sakarias, amana i, gabe manurirangi ma:

⁶⁸Pinuji ma Tuhan i, Debata ni Israel, ala ditopot bangsona jala dipatupa haluaonna.

⁶⁹Dipatindang do di hita tanduk haluaon, di bagas ni si Daud naposona i,

⁷⁰hombar tu na hinatahonna marhite sian soara ni angka panurirangna na badia i sian na robi:

⁷¹Haluaon sian angka musunta dohot sian tangan ni angka na mangkosomi hita,

⁷²laho mangasii angka amanta marningot padanna na badia i,

⁷³i ma uarina na niuarihonna di si Abraham amanta i,

⁷⁴paboa lehononna tu hita, asa hita marhalado di adopanna i, so pola marhabiaran be, dung malua hita sian tangan ni angka musu,

⁷⁵marhabadiaon jala marhatigoran di adopanna i, saleleng hita mangolu.

⁷⁶Ia ho, anaha, targoar ma panurirang ni Natumimbul, ai patujolo ni Bohi ni Tuhan i do ho, paturehon angka dalanna,

⁷⁷Iaho patandahon tu bangsona haluaon marhite sian hasesaan ni dosanasida,

⁷⁸hinorhon ni pangasii ni Debatanta; ai binahen ni i do ro na binsar sian ginjaung i manopot hita,

⁷⁹Iaho sumondangi angka na hundul di bagasan haholomon, angka na nilinggoman ni hamatean, patongonhon langkanta tu dalan hadameon.

⁸⁰Langgo dakdanak i, lam magodang do, lam togu marroha jala di halongonan do mian, paima papataronna dirina tu bangso Israel.

2¹ (I.) Dung i ro ma uju i parenta sian Kesar Augustus, ingkon suratan nasa jolma di gomgomanna.

²Pamilangon parjolo ma i, uju digomgomi si Kirenius tano Siria.

³Jadi borhat ma sasude, asa disurati, ganup tu bona ni pinasana.

⁴Borhat ma nang si Josep, na sian Galilea, sian Nasaret, nangkok tu luat Judea, tu huta

ni si Daud, na margoar Betlehem, ala sian pomparan jala marga ni si Daud ibana,

⁵pasurathon dirina rap dohot si Maria, oroanna i, naung gabegabean.

⁶Jadi di na disini nasida, gok ma ari ni hangoluanna.

⁷Ditubuhon ma anak buhabajuna, diborhos ma, dipeakkon ma tu bagasan panggagatan, ala so adong inganan na asing di parmianannasida.

⁸Jadi adong ma marborngin di ladang na disini angka parmahan, mangingani pinahannasida.

⁹Jadi didapothon sada surusuruan ma nasida, jala marsinondang ma sangap ni Tuhan i humaliang nasida, gabe mabiar situtu ma.

¹⁰Alai didok surusuruan i ma tu nasida: Unang mabiar hamu; ai barita halalas ni roha godang do huboan tu hamuna, parsaulian ni sandok bangso i.

¹¹Ai naung tubu do di hamu saborngin on, di huta ni si Daud, Sipalua i, i ma Kristus, Tuhan i!

¹²On ma partinandaan di hamu: Posoposo do dapotonmuna, na binorhos peak di panggagatan.

¹³Jala tompu ma adong dongan ni surusuruan i torop angka parangan parbanua ginjang, dipuji nasida do Debata, mandok:

¹⁴Hasangapon ma di Debata di ginjang, dame ma di tano on, di angka jolma halomoan i.

¹⁵Jala di na laho i angka surusuruan i sian nasida dompak ginjang, masipandohan ma angka parmahan i: Beta ma hita tu Betlehem, taida ma na masa on, na pinabotohon ni Tuhan i tu hita!

¹⁶Jadi hatop ma nasida laho tusi, gabe jumpangsa si Maria dohot si Josep dohot Posoposo i, na peak di panggagatan i.

¹⁷Asa dung diida, dibaritahon nasida ma boaboa, naung dihatahon tu nasida taringot tu Dakdanak i.

¹⁸Jadi sude na umbegesa, longang be do siala na hinatahon ni angka parmahan i tu nasida.

¹⁹Ia si Maria, dipeop do hata i sudena jala dipahusorhusor di bagasan rohana.

²⁰Mulak do angka parmahan i, dipasangap jala dipapujipuji do Debata ala ni sasude na binege jala na niidanasida, songon naung dihatahon i tu nasida.

²¹Jadi dung dapot ari pauluhon i, asa tarsunat Ibana, gabe dibahen ma Goarna Jesus, naung digoar pardisurgo i hian, andorang so di bortian dope.

²²(II.) Asa dung gok angka ari pangiasannasida mangihuthon patik ni si Musa, diboan nasida ma Ibana tu huta Jerusalem, pasahathon Ibana tu Tuhan i,

²³ songon na tarsurat di bagasan patik ni Tuhan i: "Nasa baoa, buhabaju ni inana, hadohoan ni Tuhan i do goaron!"

²⁴ Huhut mamelehon pelean, songon na niaturhon di bagasan patik ni Tuhan i: Dua anduhur tabu manang dua anak ni darapati.

²⁵ Jala adong ma sada halak di Jerusalem, na margoar si Simeon, halak na bonar jala daulat, na maimaima di pangapul na tu Israel; na niinganen ni Tondi Parbadia do ibana.

²⁶ Jala nunga dipabotohon Tondi Parbadia i tu ibana, na so idaonna hamatean, ia so jolo diida Kristus ni Tuhan i.

²⁷ Gabe ro ibana tu joro i didasdas Tondi i; tongon ma diboan natorasna Jesus, Posoposo i, tu bagasan, laho mambahen tu Ibana mangihuthon adat na niaturhon ni patik i.

²⁸ Jadi diabing si Simeon ma Posoposo i, dipuji ma Debata, ninna ma:

²⁹ Paluaonmu ma nuaeng, ale Raja, naposomon di bagasan dame, songon na nidokmi;

³⁰ ai nunga diida matangku haluaon na sian Ho i,

³¹ na pinaradem di jolo ni bangso sudena,

³² bahen panondang sumondangi angka parbegu, bahen hasangapon ni Israel, bangsomi!

³³ Jadi longang ma roha ni amana dohot inana umbege hatana i, na taringot tu Posoposo i.

³⁴ Jala dipasupasu si Simeon ma nasida, laos ninna ma mandok si Maria, inana i: Na pinajongjong do on, bahen partinggangan dohot parhehean di torop sian Israel jala bahen tanda na hona gaga,

³⁵ (ho pe, podang do manorushon roham muse), asa gabe patar pingkiran ni roha ni torop halak.

³⁶ Jala adong do boruboru panurirang sada na margoar si Hanna, boru ni si Panuel, sian marga Aser. Nunga na tuatua nasida, na marsinonduk mangan najolo pitu taon lelengna, dung marhamulian.

³⁷ Na mabalu do nasida, marumur ualupulu opat taon. Ndang meret nasida sian joro i, sai marpuasa jala martangiang mangoloi Debata, arian dohot borngin.

³⁸ Dohot do nasida ro di na sangombas i mamuji Debata jala dibaritahon do Ibana tu saluhut na mangkasiholi haluaon ni Jerusalem.

³⁹ Asa, dung dipasidung nasida saluhutna i hombar tu na pinatikkon ni Tuhan i, mulak ma nasida tu Galilea, tu Nasaret, hutanasida i.

⁴⁰ Ia Dakdanak i, lam magodang do, lam margogo huhut marroha situtu, laos didongani asi ni roha ni Debata Ibana.

⁴¹ (III.) Jala ganup taon laho do natorasna tu Jerusalem marariraya Paska.

⁴²Jadi dung marumur Ibana sampuludua taon, rap nangkok do nasida, songon na somal di pesta i.

⁴³Asa dung diradoti nasida angka ari raya i, di na laho mulak i nasida, tinggal ma Jesus, Dakdanak i, di Jerusalem, so pamotoan ni natorasna.

⁴⁴Dirimpu nasida, naung rap dohot dongan sauduran Ibana, jadi didalani nasida ma parsadarian mangalului Ibana di tongatonga ni angka tondong dohot dongan.

⁴⁵Dung so jumpang nasida Ibana, mulak ma nasida tu Jerusalem, laho mangalului Ibana.

⁴⁶Salpu tolu ari, dapot nasida ma Ibana di joro i hundulhundul di tongatonga ni angka guru tumangihon hatanasida huhut manungkunnungkun.

⁴⁷Tarhalomong be do nasida umbege hatana, dibahen torus ni rohana dohot angka alusna.

⁴⁸Marnida Ibana, songgot do rohanasida jala dipanghulingi inana i ma Ibana: Boasa dibahen Ho songon i tu hami, anaha? Bernit do huahap hami dohot amangmu mangalului Ho.

⁴⁹Gabe didok ma tu nasida: Boasa pola luluanmuna Ahu? Nandang diboto hamu, na patut Ahu di bagasan bagas ni Damang?

⁵⁰Alai ndang diantusi nasida hata na nidokna i tu nasida.

⁵¹ Laos tuat do Ibana rap dohot nasida sahat tu Nasaret, jala pangoloi do Ibana di nasida. Alai dipeop inana i do sude na masa i di bagasan rohana.

⁵² Jadi lam ganda ma torus ni roha ni Jesus nang dagingna, lam dihalomohon Debata nangjolma Ibana.

3¹ (I.) Pasampululimataonhon hinarajahon ni Kesar Tiberius, uju Pontius Latus manggomgomi luat Judea, di tingki ni angka raja na opat on: Si Herodes di luat Galilea, si Pilippus, donganna saama, di luat Iturea dohot Trakonitis, si Lisantias di luat Abilene,

² uju si Hannas dohot Kayapas sintua ni malim, ro ma hata ni Debata tu si Johannes, anak ni si Sakarias, di halongonan.

³ Gabe ditopot ibana ma sandok luat humaliang batang aek Jordan, dijamitahon ma pandidion hamubaon ni roha, laho pasesahon dosa.

⁴ Hombar tu na tarsurat di buku parjamitaon ni panurirang Jesaya: "Soara ni na manjoujou di halongonan! Pature hamu ma dalan di Tuhan i, pahornop hamu ma sidalananna!"

⁵ "Ingkon gohan do nasa rura jala siparejeton do nasa dolok dohot buntulbuntul, sipatigoron do na bengkuk jala sipadosdoson na marbungkibungki."

⁶ "Jala idaon ni nasa daging do haluaon na sian Debata!"

⁷Asa didok ma tu natorop na ro padidihon dirina tu ibana: Hamu, anak ni ulok! Ise do na mangajari hamu pasidingkon rimas na ro sogot?

⁸Parbuehon hamu ma na tama, paboa naung muba rohamuna! Jala so tung didok hamu di bagasan rohamuna: Si Abraham do amanami! Ai hudok ma tu hamu: Tarjadihon Debata do anak di si Abraham sian angka batu on.

⁹Ai nunga pola ampe tangke tu daling ni angka hau. Onpe, sitabaon do nasa hau na so marparbuehon na denggan jala sidabuhononhon do tu api!

¹⁰Gabe disungkun natorop i ma ibana: Dia nama bahenonnami?

¹¹Jadi dialusi ma nasida: Na marduabaju dilehon ma tu na so adong bajuna, jala na umpeop sipanganon, songon i ma dibahen!

¹²Ro do nang angka sijalo beo padidihon dirina, angka didok ma: Guru, dia sibahenonnami?

¹³Gabe didok ma tu nasida: Unang ma buat hamu lobi sian na niaturhon tu hamu!

¹⁴Dohot ma angka soldadu manungkun ibana: Ia hami, dia ma sibahenonnami? Jadi dialusi ma: Unang ma susai, unang ma dobo hamu halak! Hasabamhon hamu ma gajimuna!

¹⁵Managamnagam do bangso i, dirimpu be di bagasan rohana taringot tu si Johannes, atik beha Kristus i ibana.

¹⁶Gabe dialusi si Johannes ma nasida saluhutna: Ahu do tutu mandidihon hamu dohot aek; alai na ro ma na gumogo sian ahu; na hurang tama do ahu mangkarhari tali ni sipatuna. Didihonon ni I do tu hamu Tondi Parbadia dohot api.

¹⁷Di tanganna do purpuran, paiaonna ma pardegeanna: Papunguonna do emena tu sopona, alai tutungonna do hurangkam i tu api na so ra mintop.

¹⁸Lan dope na asing dipasingothon tu bangso i, laho mamaritahon barita na uli tu nasida.

¹⁹Alai hona hata do si Herodes, raja na opat i, dibahen si Johannes, siala si Herodias, pardihuta ni anggina, dohot siala sude ulaon na jahat ni si Herodes i.

²⁰Alai tamba ni sasudena i: Didabu ma si Johannes tu hurungan.

²¹Alai uju tardidi natorop i saluhutna, gabe dohot ma Jesus tardidi; jala di na martangiang Ibana, mungkap ma langit.

²²Jala mijur ma Tondi Parbadia tu atasna marrupa songon darapati, jala masa ma soara sian ginjang, songon on: Ho do Anakku, haholongan i; lomo do rohangku di Ho!

²³(II.) Anggo Jesus hirahira tolupulu taon do umurna di parhehena i; jala di roha ni halak, Ibana anak ni si Josep, i ma anak ni si Eli;

²⁴i ma anak ni si Mattat, anak ni si Lepi,
anak ni si Malki, anak ni si Jannai anak ni si
Josep;

²⁵anak ni si Mattatis, anak ni si Amos, anak
ni si Nahum, anak ni si Esli, anak ni si Naggai;

²⁶anak ni si Maat, anak ni si Mattatis, anak
ni si Semein, anak ni si Josek, anak ni si Joda;

²⁷anak ni si Joanan, anak ni si Resa, anak ni
si Serubabel, anak ni si Sealtiel, anak ni si
Neri;

²⁸anak ni si Malki, anak ni si Addi, anak ni si
Kosam, anak ni si Elmadam, anak ni si Er;

²⁹anak ni si Josua, anak ni si Elieser, anak ni
si Jorim, anak ni si Mattat, anak ni si Lepi;

³⁰anak ni si Simeon, anak ni si Juda, anak ni
si Josep, anak ni si Jonam, anak ni si Eliakim;

³¹anak ni si Melea, anak ni si Mina, anak ni
si Mattata, anak ni si Natan, anak ni si Daud;

³²anak ni si Isai, anak ni si Obed, anak ni si
Boas, anak ni si Salmon, anak ni si Nahason;

³³anak ni si Amminadab, anak ni si Admin,
anak ni si Arni, anak ni si Hesron, anak ni si
Peres, anak ni si Juda;

³⁴anak ni si Jakkob, anak ni si Isak, anak ni
si Abraham, anak ni si Tera, anak ni si Nahor;

³⁵anak ni si Serug, anak ni si Reu, anak ni si
Peleg, anak ni si Heber, anak ni si Sela;

³⁶anak ni si Kenan, anak ni si Arpaksad,
anak ni si Sem, anak ni si Noak, anak ni si
Lamek;

³⁷ anak ni si Metusalah, anak ni si Henok, anak ni si Jared, anak ni si Mahalaleel, anak ni si Kenan;

³⁸ anak ni si Enos, anak ni si Set, anak ni si Adam; na sian Debata do anggo i.

4¹ (I.) Gok Tondi Parbadia ma Jesus mulak sian aek Jordan, gabe diliathon Tondi i Ibana di halongonan.

²Opatpulu ari lelengna diunjuni sibolis i Ibana. Sandok ndang mangan Ibana manipat angka ari i; jadi dung marujung i, male ma dihilala.

³Gabe didok sibolis i ma tu Ibana: Anggo na tutu Ho Anak ni Debata, dokkon ma batu on gabe roti.

⁴Dialusi Jesus ma ibana: Tarsurat do: "Apala holan sipanganon hangoluan ni jolma; nasa hata ni Debata do."

⁵Dung i ditogihon ma Ibana tu na huminsat, dipatuduhon ma tu Ibana sude harajaon na di tano on di bagasan sanghidop mata.

⁶Laos didok sibolis ma tu Ibana: Tu Ho ma lehononku sasudena on gomgomanmu ro di hasangaponna i, ai tu ahu dipasahat i, jala hulehon i tu silomo ni rohangku.

⁷Di Ho ma i saluhut, anggo olo Ho marsomba tu ahu.

⁸Jadi dialusi Jesus ma ibana: Tarsurat do: "Tuhan Debatam do sombaonmu, sasada Ibana do sioloanmu!"

⁹Gabe ditogihon do Ibana tu Jerusalem, dipajongjong ma Ibana tu palaspalas ni bagas joro, laos didok ma tu Ibana: Anggo Anak ni Debata Ho, dabuhon ma dirim sian on tu toru.

¹⁰Ai na tarsurat do: "Dohononna do angka surusuruanna taringot tu ho, asa diramoti ho,"

¹¹"jadi tangantanganonnasida do ho, asa unang tartuktuk patmu tu batu."

¹²Alai dialusi Jesus ibana muse: Didok do: "Ndang jadi unjunanmu Tuhan Debatam!"

¹³Jadi dung dipaujung sibolis i sude pangunjunan i, ditadingkon ma Ibana, paima ro tingkina muse.

¹⁴Margogohon Tondi i ro Jesus muse tu Galilea, jadi sar ma baritana tu sude luat humaliang i.

¹⁵Mangajari do Ibana di angka parguruannasida, jala saluhut do mamuji Ibana.

¹⁶(II.) Jadi ro ma Ibana tu Nasaret, tu huta hagodanganna. Mangihuthon hasomalanna laho do Ibana tu parguruan i jumpa ari Sabbath; jadi jongjong ma Ibana, naeng manjaha.

¹⁷Gabe dilehon ma tu Ibana pustaha ni panurirang si Jesaya, diungkap ma i jadi dapot matana ma na tarsurat songon on:

¹⁸"Songgop do tu ahu Tondi ni Tuhan i, ai dimiahi do ahu, mamboan barita na uli tu angka na pogos.

¹⁹Disuru do ahu, mamaritahon tu angka na tarhurung asa malua, tu angka na mapitung asa marnida, paluahon angka na ginosagosa, mamaritahon taon parasinirohaon ni Tuhan i."

²⁰Ditutup ma pustaha i, dipaulak ma tu parhobas; laos hundul ma, gabe nolnol ma dompak Ibana mata ni sude na di parguruan i.

²¹Jala dihatahon ma tu nasida: Sadari on do jumpang na tarsurat ondeng, di na binegemuna i.

²²Sasude do manohoi Ibana jala longang be do, umbege hata na tabo na hinatahonna, gabe ninna ma: Nda anak ni si Josep Ibana?

²³Jala didok Ibana ma tu nasida: Dohononmuna do nian tu Ahu hata ni umpama on: Pamalum ma dirim, ale datu! Angka na hubege hami na binahenmi di Kapernaum, laos bahen ma i dison, di huta hagodanganmon!

²⁴Jadi didok ma: Situtu do hatangkon tu hamu: Tung na so marsangap do panurirang anggo di luat hagodanganna.

²⁵Sintong do na hudok on tu hamu: Lan do nian boruboru na mabalu di bangso Israel di tingki ni si Elia di na manintak langit tolu taon onom bulan lelengna, uju masa haleon potir di sandok tano on.

²⁶Alai ndang tu manang ise nasida disuru si Elia, tung tu Sarpas do, na di luat Sidon, tu sada boruboru na mabalu.

²⁷ Lan do nian na huliton di bangso Israel, di tingki ni panurirang si Elisa; alai ndang adong agia ise nasida dipamalum, holan si Naaman halak Siria i do.

²⁸ Jadi gok rimas ma nasida sude na di parguruan i umbegesa.

²⁹ Hehe do nasida, dipabali Ibana sian huta i, ditogu ma Ibana tu tolping ni dolok, ojahan ni hutanasida i, laho manggulangkon Ibana sian i.

³⁰ Alai mamolus do Ibana sian tongatonganasida, laos laho sian i.

³¹ (III.) Jadi tuat ma Ibana tu huta Kapernaum, na di Galilea; diajari ma nasida jumpa ari Sabbat.

³² Gabe longang do rohanasida umbege podana, ai marsahala do jamitana i.

³³ Jala adong ma di parguruan i sada halak partondi na hodar; marsoara na gogo ma dianggukhon:

³⁴ Oe Jesus na sian Nasaret, marhua Ho tu hami! Na ro do Ho hape mangago hami! Hutanda do Ho; na badia ni Debata do Ho!

³⁵ Alai disonggahi Jesus do ibana, didok ma: Sip ho! Ruar ma ho sian ibana! Jala tu tongatonga i ma disampathon tondi na hodar i ibana, laho ruar; ndang mahua ibana dibahen.

³⁶ Jadi longang ma rohanasida saluhutna, gabe masipandohan ma nasida: Na boha do

on? Mardongan huaso dohot gogo dipaksa angka tondi na hodar, gabe ruar do.

³⁷Jala sar ma baritana tu nasa inganan humaliang.

³⁸Borhat ma Ibana sian parguruan i, gabe masuk ma tu jabu ni si Simon. Ia simatua boru ni si Simon, posa do panepanena, jala ditingothon ma nasida tu Ibana.

³⁹Jadi dijonohi ma nasida, disonggahi ma panepane i, gabe laho ma i. Jala manigor hehe ma inaina i marhobasi di nasida.

⁴⁰Dung sundut mata ni ari, dipamboan be ma tu Ibana na marsahitna, na marragamragam niaena. Jala tu nasida sadasada diampehon Ibana tanganna, laho pamalum nasida!

⁴¹Sian torop nasida marruaran angka sibolis na manampiar, mandok: Anak ni Debata do Ho; gabe disonggahi do nasida, ndang diloas nasida paboahon, naung diboto, Kristus i Ibana.

⁴²Alai di torang ni arina i borhat Ibana laho tu halongonan. Ia natorop i dilului jala didapothon ma Ibana, laho mangambat Ibana nian, unang laho sian nasida.

⁴³Alai didok ma tu nasida: Ingkon dohot do tu angka huta na asing hubaritahon harajaon ni Debata, ai ala ni i do Ahu disuru.

⁴⁴Jala marjamitai do Ibana di angka parguruan na di luat Galilea.

5¹ (I.) Jongjong di topi tao Genesaret do Ibana sahali, di na nirongoman ni natorop Ibana, laho umbege hata ni Debata.

²Jadi tongon ma diida dua parau di topi pasir; ia pardengke i nunga ruar mamburi jalanasida.

³Gabe dibongoti Ibana ma parau na sada na di si Simon i, jala dipangido tu ibana, asa dipaholang parau i saotik sian pasir i. Hundul do anggo Ibana mamodai natorop i sian parau i.

⁴Asa dung mansohot Ibana marjamita, ninna ma mandok si Simon: Lugai ma tu na umbagas jala sampakkon hamu ma jalamuna, asa dapotan.

⁵Gabe ninna si Simon ma mangalusi: Guru! Manipat saborngin on do huhalojahon hami, so adong dapot; alai mangasahon hatami olo do ahu sumampakkon.

⁶Dipasaut nasida ma i, gabe dapot nasida ma dengke mansai godang, pola maribak jala i.

⁷Jala dihilap nasida ma dongannasida na di parau na sada, asa ro mandongani nasida mambuatsa. Ro do nasida, gabe digohi ma parau i duansa maradu lonong.

⁸Marnida i si Simon Petrus, marsomba ma ibana tu jolo ni Jesus, huhut ma didok: Laho ma Ho sian ahu, Tuhan, ai halak pardosa do ahu!

⁹Ai tarhalomong do ibana ro di sude donganna siala dengke na binuatnasida i.

¹⁰Songon i do nang angka dongan ni si Simon i, si Jakobus dohot si Johannes, angka anak ni si Sebedeus. Jala ninna Jesus ma mandok si Simon: Unang ho mabiar: Olat ni on ma ho gabe sijala jolma!

¹¹Dipadarat nasida ma angka parau i, ditadingkon ma saluhutna i mangihuthon Ibana.

¹²(II.) Jala tagan di sada huta Ibana, adong ma sada halak na huliton. Marnida Jesus i, manungkap ma ibana mandok: O Tuhan, molo na olo Ho, tarpaia Ho do ahu!

¹³Jadi disurdukkon Jesus ma tanganna, laos dijama ma ibana, huhut ma didok: Na olo do Ahu, ias ma ho! Jadi pintor longkang ma kulit i sian ibana.

¹⁴Jala diorai Ibana ma, asa unang dipaboa i tu halak; alai laho ma ho, ninna, patuduhon ma dirim tu malim; dung i pelehon ma na pinatikkon ni si Musa, ala naung ias ho, bahen panindangion tu nasida.

¹⁵Alai lam sar do baritana jadi torop halak marpungu, laho tumangihon hatana jala pamalumhon sahithnasida.

¹⁶Alai manginsurut tu halongonan do anggo Ibana, laho martangiang.

¹⁷(III.) Dung i di na sadari mangajari Ibana, jadi hundul ma disi angka Parise ro di guru, angka na ro sian nasa huta na di Galilea dohot

Judea, nang sian Jerusalem. Mangimpas do gogo ni Tuhan i di Ibana, pamalum angka sahit.

¹⁸Jala diboan na mamboan ma sada halak na sarion, na peak di podomanna, dilului do dalan pabongothon ibana, laho mameakkonsa tujolo ni Jesus.

¹⁹Alai ndang tarpabongot nasida ibana dibahen ponjotna i, gabe dipanaek nasida ma tarup i; diungkapi ma butar i, ditantan ma ibana di atas podomanna tongon tu jolo ni Jesus.

²⁰Marnida haporseaonna nasida i Jesus, ninna ma: Nunga sesa angka dosami, anaha!

²¹Gabe marhusari ma angka sibotosurat ro di Parise i; Ise do On, na mangaleai Debata? Holan sasada Debata do na tuk manesa dosa!

²²Alai ditanda Jesus do parhusarion ni rohanasida, jadi dialusi ma nasida: Aha dipingkiri hamu di bagasan rohamuna?

²³Dia do ummomo? Dohonon; nunga sesa angka dosami! Manang dohonon: Hehe ma ho mardalani?

²⁴Alai asa diboto hamu, marhuaso do Anak ni jolma i di tano on manesa angka dosa (didok ma tu na sarion i), Ahu mandok tu ho: Hehe ma ho, boan ma podomanmi; laho ma ho muli!

²⁵Manigor hehe ma ibana dipanotnoti nasida, dihindat ma podoman hapeahanna i laho muli, huhut dipuji Debata.

²⁶Tarhalomong nasida sude, dipuji ma Debata, laos gok biar nasida mandok: Na so dung masa do huida hami sadari on!

²⁷(IV.) Dung salpu i, mardalani ma Ibana, gabe diida ma sada halak sijalo beo, na margoar si Lepi, hundul di parbeoan, jadi didok ma tu ibana: Ihuthon Ahu!

²⁸Jadi hehe ma i, ditadingkon saluhutna mangihuthon Ibana.

²⁹Dihobasi si Lepi ma di Ibana sipanganon ujuan di jabuna i. Jala torop angka sijalo beo dohot jolma na asing rap hundul marsipanganon.

³⁰Marmungutmungut ma angka Parise dohot sibotosuratnasida dompak angka siseanna i, mandok: Boasa mangan minum hamu rap dohot angka sijalo beo dohot sipardosa?

³¹Gabe dialusi Jesus ma nasida: Apala ringkot pandaoni di angka na hisar, di angka na marsahit do!

³²Ndang na ro Ahu manjou angka partigor, asa dipauba rohana, angka pardosa, i do!

³³(V.) Alai didok nasida ma tu Ibana: Marpuasai jala martangiangi do angka sisean ni si Johannes, songon i angka sisean ni Parise i; alai mangan minum do anggo siseanmi.

³⁴Gabe ninna Jesus ma mandok nasida: Ai tarsuru hamu do pandongani ni pangoli marpuasa, saleleng rap dohot nasida pangoli i?

³⁵Alai na ro ma arina, buatonna ma disi Pangoli i sian nasida; disi ma nasida marpuasa.

³⁶Dihatahon ma huhut umpama on tu nasida: Nandang adong na olo mangaribahi abit na imbaru laho mandungkaphonsa tu abit naung buruk; ai molo boti, sega ma abit na imbaru i, laos so tangkup pandungkap na imbaru tu na buruk i.

³⁷Nandang dipaindingjolma tuak anggur siraruan tu inganan na basebasean; ai molo boti, puntason ni tuak anggur siraruan i do ingananna i, gabe ambolong tuak anggur i, ingananna pe sega do.

³⁸Tu poting na imbaru do paindingon tuak anggur siraruan i!

³⁹Jala naung somal manginum tuak anggur naung leleng, ndang dipangido na imbaru, ai ninna do: Lambok do naung leleng i.

6¹ (I.) Jadi jumpa ari Sabbath mamolus ma Ibana sian tonga ni hauma jala digotili siseanna i ma angka biur, laos diguguti, dung dirurusi dohot tangannasida.

²Gabe ninna deba sian angka Parise ma: Boasa ulaonmuna na so jadi jumpa ari Sabbath?

³Jadi dialusi Jesus ma nasida: Asa ndang dijaha hamu huroha pambahenan ni si Daud, uju na male ibana rap dohot donganna sauduran?

⁴ Ai dibongoti do bagas ni Debata jala dibuat roti na marhadohoan, gabe dipangan ma sian i, dilehon deba tu donganna; na so jadi panganon ni manang ise i nian, dungkon ni angka malim.

⁵ Laos didok ma tu nasida: Guru di Anak ni jolma i do nang ari Sabbath!

⁶ (II.) Jumpa ari Sabbath na asing dibongoti Ibana ma parguruan i laho mangajari, jadi adong ma disi sahalak naung mate tanganna siamun.

⁷ Mangonggop do angka sibotosurat ro di angka Parise, manang na olo Ibana pamalum sahiti di ari Sabbath, asa taraluhon nasida Ibana.

⁸ Alai diboto Ibana do pingkirannasida, jadi ninna ma mandok partangan na mate i: Hehe ma ho tu tongatonga on! Jala hehe ma i jongjong tusi.

⁹ Dung i ninna Jesus ma mandok nasida: Husungkun ma hamu: Dia do na patut ulaon di ari Sabbath: Mambahen na denggan manang na jahat, pangoluhon hosa manang mangagohonsa?

¹⁰ Jala dibereng ma nasida tuk humaliang, laos ninna ma tu halak i: Patoltol tanganmi! Diula ma i, gabe malum tanganna i.

¹¹ Songon na ritoritoo do anggo nasida, laos martuptup ma di sibahenonnasida tu Jesus.

¹² (III.) Di angka ari i ma nangkok Ibana tu dolok martangiang, jala manipat na saborngin i ma didatdati martangiang tu Debata.

¹³ Jadi dung torang ari, dijou ma tu jolona angka siseanna, sampuludua do dipillit sian nasida; digoar do nasida apostel.

¹⁴ Si Simon, na ginoaranna Petrus, dohot si Andreas, donganna saama; si Jakobus dohot Johannes; si Pilippus dohot Bartolomeus;

¹⁵ si Mateus dohot si Tomas; si Jakobus ni si Alpeus dohot si Simon, na margoar si Silotes;

¹⁶ si Judas ni si Jakobus dohot si Judas Iskariot, na gabe siparjehe muse.

¹⁷ (IV.) Tuat ma Ibana rap dohot nasida tu sada inganan na hornop; adong ma disi torop angka siseanna dohot mansai godang halak natorop sian sandok Judea dohot Jerusalem, nang sian topi laut ni Tirus dohot Sidon. Na ro do nasida, umbege hatana huhut pamalumhon sahithnasida tu Ibana.

¹⁸ Nang angka na sinahitan ni tondi na hodar gabe malum.

¹⁹ Jadi sude natorop i mangiraira manjama Ibana, ai ruar do gogo sian Ibana, dipalum do saluhutna.

²⁰ Dung i dibereng ma angka siseanna, huhut ma didok: Martua ma hamu angka na pogos, ai di hamu do harajaon ni Debata!

²¹ Martua ma hamu angka na male nuaeng, ai sipabosuron do hamu! Martua ma hamu

angka na tangis nuaeng, ai mengkel ma hamu muse.

²² Martua ma hamu, anggo dihosomi jala dipilpilhon halak hamu, anggo diinsahi jala dibolongkon goarmuna songon parjahat ala ni Anak ni jolma i.

²³ Las ma rohamuna jala mariaia di hamamasana i, ai balga do upamuna di banua ginjaang i, ai songon i do dibahen angka amanasida tu angka panurirang i.

²⁴ Alai marjea ma hamu na mora, ai nunga sahat dijalo hamu apulapul na tu hamu.

²⁵ Marjea ma hamu na bosuran nuaeng, ai rapar hamu muse! Marjea ma hamu, na mengkel nuaeng, ai na mangandung jala tumatangis hamu muse!

²⁶ Marjea ma hamu, anggo saluhut jolma mamujimuji hamu; ai songon i do dibahen amanasida tu angka panurirang pargapgap i.

²⁷ Alai hudok ma tu hamuna na manangi: Haholongi hamu ma musumuna; na denggan ma bahen hamu tu na mangkosomi hamu.

²⁸ Pasupasu hamu ma angka na mamburai hamu, tangiangkon hamu ma angka na mangasupi hamu.

²⁹ Anggo dipastap hurummi, tarehon nang na sambariba i; jala anggo dibuat ulosmu, unang jua nang bajubajum.

³⁰ Nasa na mangido tu ho, lehon; jala unang tunggu halak, naung mambuat ugasanmi.

³¹ Ia i na pinangidomuna, naeng bahenon ni halak tu hamu, i ma bahen hamu tu nasida!

³² Ai molo dihaholongi hamu na marholong ni roha di hamu, parulian dia ma i di hamu? Ai nang angka parjahat dihaholongi do na marholong ni roha di nasida.

³³ Jala anggo dibahen hamu na denggan tu angka sibahen na denggan tu hamu, parulian dia ma i di hamu? Nang angka parjahat i, songon i do pambahenna.

³⁴ Jala molo mangkirim hamu mambuatsa muse, laho pasali dongan, parulian dia ma i di hamu? Ai dipasali parjahat do donganna parjahat, asa dijalo muse hepengna.

³⁵ On ma tahe: Haholongi hamu ma musumuna bahen hamu ma na denggan jala pasali hamu ma, di na so hirim rohamuna di balosna; balga ma upamuna, gabe angka anak ni Natumimbul i ma hamu, ai basa do lbana di na tois marroha jala di na jahat.

³⁶ Gabe parasiroha ma hamu, songon Amamuna, Parasiroha i!

³⁷ Unang ma hamu manguhumuhumi, gabe ndang uhumanna hamu! Unang hamu manorui, gabe ndang toruanna hamu! Palua hamu, gabe paluaonna hamu!

³⁸ Lehon hamu ma, gabe lehononna ma di hamu! Parsuhatan na denggan, na nionjat, na hinuturhutor jala na pinasuksuk lehononna tu ampuanmuna, ai parsuhatan na sinuhathonmuna do suhathononna tu hamu.

³⁹Jala dihatahon do nang umpama on tu nasida: Tung tartogu na mapitung ma donganna na mapitung di dalan? Nda rap targodung ma nasida duansa?

⁴⁰Ndada sumurung sisean sian guruna. Naung sun denggan do ganup, molo doshon guruna.

⁴¹Aha ma pola paberengberengonmu silbaksilbak na di mata ni donganmu; ia na satiang na di matami ndang diantoi ho!

⁴²Tung dohononmu ma tu donganmi: Ua, huumpat ma jolo silbaksilbak na di matami, anggia; hape na satiang na di matami ndang diida ho! E ho pangansi, jumolo ma umpat tiang i sian matami: Dung pe i, asa pingkironmu, manang beha pangumpatmu di silbaksilbak na di mata ni donganmu.

⁴³Ai ndang adong hau na denggan, na marparbuehon na roa, manang hau na roa na marparbuehon na denggan.

⁴⁴Ai sian parbuena i do tartanda nasa hau. Ai ndang tarputikkon antajau sian tadatada, jala ndang tarbuat parbue ni hau anggur sian rimbang.

⁴⁵Angka hadengganon do dirungkari halak na denggan roha sian pangkal na denggan na di bagasan rohana, jala na jahat do dirungkari halak na jahat roha sian na jat na pineopna hian. Ai ia i na manggohi roha, matua i do dihatahon pamangan.

⁴⁶Boasa antong goaronmuna Ahu: Tuhan, Tuhan!, hape ndang diula hamu na hudok.

⁴⁷Nasa na ro tu Ahu, anggo dibege angka hatangku jala diulahon, tudos ma i tu na hupatuduhon on:

⁴⁸Songon halak na pajongjong jabu, na mangkali bagas laho paojakkonsa tu batu mamak. Asa di na magodang aek, ditondong batang aek ma bagas i; alai ndang na tarhutiksa, ala togap dipauli.

⁴⁹Anggo na umbegesa, alai ndang diulahon, tudos ma i tu halak sipajongjong jabu di tano, so marhaojahan tu batu; ditondong batang aek ma i, jadi manigor marumpak ma, pola tung marongso.

7¹ (I.) Asa dung sun dihatahon Ibana sasude hatana ondeng tu pinggol ni natorop, dibongoti ma huta Kapernaum.

²Jadi hansitan ma naposo ni sada letnan, na pinarhamaol ni tuanna, pola matemate ne.

³Dung dibege ibana barita ni Jesus, disuru ma angka sintua ni halak Jahudi manopot Ibana manglehelek, asa ro pamalum naposona i.

⁴Sahat ma nasida tu Jesus jala gomos ma Ibana diapoi, ninna ma: Patut do oloanmu ibana.

⁵Ai holong do rohana di bangsonta; tung ibana do pajongjong parguruanta.

⁶Jadi rap laho ma Jesus dohot nasida. Alai ndang apala dao be Ibana sian jabu i, nunga

disuru letnan i angka donganna mandok tu Ibana: Tuhan, unang loja Ho! Ai na hurang tama do ahu, tung bongotanmu jabungku.

⁷Laos ala ni i do ndang tau huetong diringku manopot Ho. Alai dok ma hata sisandok, asa malum naposongki.

⁸Ai halak, na ginomgoman ni na marhuaso do ahu, na mangarajai soldadu; molo hudok tu na sada: Tusadui ma ho?, laho do ibana; ia tu na sada: Tu on ma ho! - Ro do ibana; jala ia tu naposongku: On ma bahen!, jadi i do dibahen.

⁹Umbege i, longang ma Jesus, laos humusor ma Ibana mandok tu natorop na mangihuthon Ibana: Hudok ma tu hamu: Gari di halak Israel, gari ndang jumpang Ahu haporseaon na songon i!

¹⁰Jadi muli ma angka na sinuru i tu jabu, laos malum do didapot nasida anak somang i.

¹¹(II.) Marsogotna i laho ma Ibana tu sada huta na margoar Nain; siseanna i do donganna sauduran, songon i do natorop godang.

¹²Mandapothon bahal ni huta i nasida, tongon ma diusung tu balian sahalak naung mate, anak sasada ni inana naung mabalu; jala torop do pangisi ni huta i mangundurhon.

¹³Marnida na mabalu i Tuhan i, maras do rohana, jadi didok ma tu ibana: Unang ho tangis!

¹⁴Laos didapothon ma batang i, dijama ma, jadi sulon ma na mangusungsa, gabe didok ma: O dolidoli, hudok ma tu ho: Hehe ma ho!

¹⁵Jadi hundul ma halak naung mate i, dipungka ma mangkatai jala dilehon ma ibana tu inana i.

¹⁶Hatahutan do nasida sasude jala dipuji ma Debata, didok ma: Panurirang bolon do dipahehe di tongatonganta jala ditatap Debata do bangsona.

¹⁷Sar ma baritana i tu sandok luat Judea ro di sude luat na humaliang i.

¹⁸(III.) Jadi dibaritahon angka sisean ni si Johannes ma sasudena i tu ibana, gabe dijou ma dua siseanna tu jolona.

¹⁹Disuru ma nasida manopot Tuhan i mandok: Ai Ho do na naeng ro i, manang na asing dope paimaonnami?

²⁰Asa dung sahat halak i tu jolona, didok nasida ma: Disuru si Johannes pandidi i do hami manopot Ho, mandok: Ai Ho do na naeng ro i, manang na asing dope sipaimaonnami?

²¹Tongon uju i torop ma halak dipalua Ibana sian sahit dohot haporsuhon nang sian angka tondi na jahat, jala torop na mapitung marnida dibahen.

²²Laos dialusi ma nasida songon on: Laho ma hamu mamaritahon tu si Johannes na niida jala na binegemuna on: Na gabe marnida do angka na mapitung, na mardalani

do angka na pangpang, na gabe ias do angka na huliton, na marbinege angka na nengel, na mulak mangolu do angka na mate; tu angka na pogos do binoan barita na uli;

²³Jala martua do na so targasip di Ahu!

²⁴Alai dung laho angka suruan ni si Johannes, ditaringoti ma si Johannes tu natorop i: Aha do na naeng idaonmuna, umbahen na laho hamu ruar tu halongonan? Arung na meoleol na niullus ni alogo do?

²⁵Na marnida aha do umbahen na borhat hamu? Halak parabit na lamot do? Di jabu ni na raja do angka na marabit na sangap jala angka na gaduk.

²⁶Na marnida aha do tahe, umbahen na borhat hamu? Panurirang do? I do tutu! Hudok ma di hamu: Sumurung do ibana sian panurirang!

²⁷Ibana do na nidok ni Surat i: "Suruonku ma suruanki, patujolom, sipature dalanmu di jolomi!"

²⁸Hudok ma tu hamu: Ndang adong na tubu sian parompuan na umbalga asa si Johannes; alai halak na ummetmet, naung di bagasan harajaon ni Debata, umbalga ma i sian ibana.

²⁹Ai natorop i saluhutna na umbege hatana ro di angka sijalo beo, dipintori do Debata, ai dijalo do pandidion i sian si Johannes.

³⁰Alai anggo halak Parise dohot sipeop patik i, disundati do tahi ni Debata na taringot tu nasida, ai ndang dipadidihon dirina tu ibana.

³¹Asa tu ise ma patudosonku halak na sansundut on; tudos tu ise nasida tahe?

³²Tudos ma nasida tu angka dakdanak na hundul di onan, na masijouan mandok: Hupalui hami suling di jolomu, so haru manortor hamu; andung hupatubegehon hami, so saut hamu tangis.

³³Ai na ro do si Johannes pandidi i, ndang mangan roti, ndang minum anggur ibana, gabe didok hamu: Na sibolison do ibana!

³⁴Ro Anak nijolma i, mangan minum do anggo Ibana, gabe didok hamu; Ndi Halak on! Sipapangan mago, sisobur tuak, aleale ni sijalo beo dohot sipardosa!

³⁵Gabe pintor Hapistaran i dipintori angka anakna saluhutna.

³⁶(IV.) Dung i diarahon sahalak sian angka Parise ma Ibana mangan; jadi dibongoti ma jabu ni Parise i, laos hundul disi:

³⁷Dung i ro ma boruboru pardosa sahalak, isi ni huta i, ala diboto, naung hundul Ibana di bagas ni Parise i; diboan ma sada galas alabaster, isian ni miak na hushus.

³⁸Mariluilu do ibana laho mandapothon tu pat ni Jesus; iluiluna do manonui patna i, obukna do dibahen mangapusi, diumma ma patna i jala dimiahi dohot miak na hushus i.

³⁹Marnida i halak Parise na mangarahon Ibana, marhusari ma ibana songon on: Aut na panurirang halak on, tandaonna do boruboru

on na manjama Ibana jala botoonna do pangalahona, ai sipardosa do i.

⁴⁰Gabe dialusi Jesus ma ibana: Simon, adong na hudok tu ho! Ia hata ni i: Hatahon ma, Guru! ninna.

⁴¹Dua do parsingiran ni sada halak sipaanakkon hepeng. Utang ni na sada limaratus rupia, limapulu do di na sada nari.

⁴²Ala soada gararnasida, dibasabasahon ma i tu nasida duansa. Asa ise nasida tagamon na humolong roha di ibana?

⁴³Dialusi si Simon ma: Parsibasabasaan na gumodang i do, anggo di rohangku. Jadi dialusi ma ibana: Tingkos do panimbangmi!

⁴⁴Dung i didompakkon ma parompuan i, laos ninna ma mandok si Simon: Atehe diida ho do parompuan on? Ro do Ahu tu jabum on, ndang dilehon ho aek pamuri ni pathu; alai anggo ibana, iluilu ni matana do dibahen manonui pathu jala diapusi dohot obukna.

⁴⁵Ndang diumma ho Ahu; alai anggo ibana, olat ni dung bongot tuson, ndang dipasohot mangumma pathu.

⁴⁶Ndang dimiahi ho ulungku; alai anggo ibana, dimiahi do pathu dohot miak na hushus.

⁴⁷Dibahen i hudok ma tu ho: Nunga sesa dosana na godang i, umbahen godang holong ni rohana. Alai anggo otik do disesa, otik ma holong ni rohana.

⁴⁸Laos didok ma tu parompuan i: Nunga sesa angka dosami!

⁴⁹Gabe didok angka donganna sapanganan ma sama nasida: Ise do On? Ai dohot do angka dosa disesa?

⁵⁰Laos didok muse tu parompuan i: Haporseaonmi do paluahon ho. Mardame ma ho muli!

8¹(I.) Salpu i dibolus Ibana ma angka huta dohot lumban marjamita, laho mamaritahon harajaon ni Debata; na sampuludua i do donganna,

²nang deba parompuan naung pinamalumna sian angka tondi na jahat dohot sian parsahiton, i ma si Maria, na margoar Magdalena, na tinadingkon ni pitu tondi na hodar,

³dohot si Johanna, dongan saripe ni si Kusa, juara bagas ni si Herodes, dohot si Susana, ro di torop na asing, na manatap Ibana sian sinadongannasida.

⁴(II.) Asa dung pungu torop jolma jala marroan tu jolona sian angka huta i sude, marumpama ma Ibana:

⁵Na laho ma sahalak panabur manaburhon boni. Jadi di na manabur i ibana, adong ma deba na mamiltik tu dalan, gabe tardege ma i jala diparguti pidong na martongatonga langit.

⁶Na deba madabu tu batu; jala dung tubu, rahar ma, ala so maraek.

⁷Na deba madabu tu tongatonga ni parsihupian, jala rap tubu ma sihupi i, dipisat ma i.

⁸Ia na asing i madabu tu tano na denggan i; jala dung tubu, diparbuehon ma saratus lompit. Dung didok songon i, dijouhon ma: Hamu, angka parpinggol na marbinege, pinggol umpama i.

⁹Disungkun angka siseanna ma Ibana taringot tu umpama i.

¹⁰Gabe didok ma: Dilehon do tu hamu pamotoan di hahomion ni harajaon ni Debata; alai marhitehite umpama do tu angka na asing, asa unang diida, nang pe dibereng, jala unang diantusi, nang pe dibege.

¹¹Alai on ma umpama i: Ia boni i, hata ni Debata do.

¹²Anggo na di dalan i, i ma angka na umbegesa, dung i ro ma sibolis i, dibuat ma hata i sian rohanasida, asa unang porsea nasida, unang dapotan haluaon.

¹³Anggo na di batu i, i ma angka na las roha manjangkon hata i, dung dibege; alai ndang marurat nasida, sangombas do nasida porsea, jala di masa ni pangunjunan marbalik nasida.

¹⁴Anggo na madabu tu parsihupian i, i ma angka na umbegesa, gabe laho ma nasida, hapusohan binahen ni pangkolsohon, hamoraon dohot hahisapon ni ngolu on, jala ndang matoras parbuena.

¹⁵Alai anggo na tu tano na denggan, i ma angka na mameop hata binegena i di bagasan roha na bonar jala na denggan, gabe saut marparbue di bagasan habengeton.

¹⁶Alai ndang adong na pagalakkon palito, gabe dihungkuphon ampang tusi, manang dibahen tu toru ni parate; tu parpalitoan do dibahen, asa diida angka na ro i palito i.

¹⁷Ai ndang adong na buni, na so patar muse; jala ndang adong na simo, na so tangkas tandaon muse jala mullop.

¹⁸Dibahen i pamanat hamu ma, manang songon dia parbinegemuna; ai tu paradongan lehonon do, alai buaton ma sian na so paradongan na adong di ibana di rohana.

¹⁹(III.) Dung i ro ma inana dohot angka anggina manopot Ibana, gabe ndang tarbahensa tolhas tu jolona, dibahen torop ni halak.

²⁰Jala adong ma na paboahon tu Ibana: Inangmu dohot anggimu jongjong dibalian; naeng idaonnasida do Ho!

²¹Alai ninna Jesus ma mandok nasida: Angka on na umbege jala mamarangehon hata ni Debata, i do dainang, i do angka anggingku!

²²(IV.) Jala di na sadari bongot ma Ibana tu parau rap dohot angka siseanna, laos didok ma tu nasida: Tataripari ma tao i; dung i borhat ma nasida.

²³Di na marparau i nasida, nok ma matana. Jadi turun ma habahaba siappalautus tu tao i, gabe disangkopi galumbang i ma nasida, pola tarmara.

²⁴Jadi didapothon nasida ma Ibana, disungguli ma: Ia hatanasida: Guru! Guru! Na mago ma hami! Dung i hehe ma Ibana; hona hata ma alogo i dohot galumbang ni aek i dibahen, gabe so ma jala menak.

²⁵Alai ninna ma mandok nasida: Didia do haporseaonmuna? Alai mabiar do nasida huhut longang, jala masipandohan: Halak dia ma On ulaning? Gari angka alogo i dohot aek i dipaksa, jala dioloi do Ibana.

²⁶(V.) Marlayar nasida tu luat Gadara, tondongkon ni luat Galilea.

²⁷Asa dung tardarat Ibana, dapotsa ma sada halak, isi ni huta i, partondi na hodar; nunga na nia lelengna ndang olo be marabit jala ndang olo mian di jabu, di angka parbandaan do ibana.

²⁸Alai disi diida Jesus, mangangguhi ibana manungkap di jolona, jala gogo ma soarana mandok: Marhua Ho tu ahu, Jesus, Anak ni Debata Na tumimbul? Huelehelek Ho, unang ahu arsahi!

²⁹Ai didokkon Jesus do tondi na hodar i ruar sianjolma i. Nunga jotjot disoroi ibana, gabe dirantei jala dibeangkon halak ibana laho mangaramoti; alai dirapui tondi i do angka ihot i jala dihidahida ibana tu halongonan.

³⁰Disungkun Jesus ma ibana: Ai ise goarmu? Gabe didok ma: Loksa do goarhu. Ai torop do tondi na jahat sorang tu ibana.

³¹Laos dielehelek nasida Ibana, unang dipaksa nasida turun tu banua toru.

³²Alai adong ma disi, di robean i, babi sapunguan na balga na manjampali, gabe dipangido, asa diloas nasida mambongoti angka i; jadi dioloi ma.

³³Gabe ruar ma tondi na jahat i sianjolma i, dibongoti ma angka babi i, jadi marbubur ma na sapunguan babi i sian rura tu tao, laos mate mogap.

³⁴Alai dung diida angka parmahan i na masa i, maporus ma nasida, dibaritahon ma i di huta dohot di angka ladang.

³⁵Gabe ruar ma nasida marnida naung masa i; didapothon ma Jesus, jadi jumpang nasida ma halak, na jahat i, marabit jala marroha, hundul di lambung pat ni Jesus, jadi hatahutan ma nasida.

³⁶Alai angka na marnidasa, i do paboahon tu nasida pangalaho ni hamamalum ni na sinorangan ni angka tondi na hodar i.

³⁷Jadi dielehelek saluhut pangisi ni luat humaliang Gadara ma Ibana, asa sumurut sian nasida, ai biahaton situtu do nasida. Laos bongot tu parau ma Ibana laho mulak.

³⁸Dielehelek halak na tinadingkon ni tondi na jahat i do Ibana naeng dongananna Ibana nian; alai dipalaho do ibana, ninna ma:

³⁹Muli ma ho tu jabum, pajojor ma saluhut na binahen ni Debata tu ho! Jadi laho do ibana, dibaritahon ma di sandok huta i nasa na binahen ni Jesus tu ibana.

⁴⁰(VI.) Asa dung mulak Jesus, dijangkon natorop i do Ibana, ai nunga dipaimaima hian Ibana.

⁴¹Jadi ro ma sahalak, na margoar si Jairus, sintua ni parguruan i do ibana; dipatungkap ma dirina tu jolo ni Jesus manglehelek Ibana, asa ro tu jabuna.

⁴²Ai matemate ne do boruna sisadasada, na marumur sampuludua taon. Jadi laho mandapothon tusi, hona sosak ma Ibana dibahen natorop i.

⁴³Dung i adong ma parompuan sahalak, naung sampuludua taon lelengna marsahithon bulan; nunga dipasuda sude artana tu angka pandaoni, so tarpamalumsa.

⁴⁴I do na ro mandapothon Jesus, sian pudi ma dijama rambu ni ulosna, jadi manigor montok ma mudar i.

⁴⁵Gabe didok Jesus ma: Ise do i na manjama Ahu? Dung sude mansoadahon, ninna si Petrus rap dohot angka donganna ma: Guru, natorop i do manosak jala mamonjoti Ho!

⁴⁶Alai ninna Jesus do: Adong do na manjama Ahu! Ai huhilala, ruar do gogo sian Ahu.

⁴⁷Diantusi parompuan i ma, na so buni hape pambahenna i, jadi angka hitir ma ro, disomba ma Ibana, dipajojor ma di jolo ni

saluhut natorop i alana, umbahen na dijama,
ro di hamamalumna di na santongkin i.

⁴⁸Gabe ninna ma mandok ibana:

Haporseaonmi do na paluahon ho, inang;
mardame ma ho muli!

⁴⁹Mangkatahon i dope Ibana, adong ma na
ro sian jabu ni sintua ni parguruan i mandok:
Nunga mate borumi; unang be lojai Guru i!

⁵⁰Umbege i Jesus, dialusi ma ibana: Unang
ho mabiar, asal porsea ho; sai mangolu do
ibana!

⁵¹Dung sahat tu jabu, ndang diloas bongot
halak, dungkon ni si Petrus, si Johannes
dohot si Jakobus, angkup ni ama dohot ina ni
dakdanak i.

⁵²Tangis do sasude mangandungi na mate i.
Alai ninna ma: Unang hamu tangis! Ai ndang
na mate ibana, na modom do!

⁵³Gabe diparengkeli nasida Ibana, ala diboto
naung mate.

⁵⁴Alai ditangkap Ibana ma tanganna,
dijouhon ma: Hehe ma ho, butet!

⁵⁵Gabe mulak ma hosana, jadi manigor hehe
ma; didokkon Jesus ma lehonon dakdanak i
mangan.

⁵⁶Tarmali ma natorasna i; alai dipopai ma
nasida, unang dihatahon na masa i.

9¹ (I.) Dung i dipapungu ma na sampuludua
i; dilehon ma tu nasida gogo dohot huaso,
mangalo nasa tondi na hodar nang pamalum
angka sahit.

²Disuru ma nasida mamaritahon harajaon ni Debata jala pahisarhon halak.

³Jala ninna ma mandok nasida: Unang boan hamu agia aha tu tongandalan, manang tungkot, manang singkop, manang roti, manang hepeng, manang dua baju pe.

⁴Jadi molo dung dibongoti hamu jabu, disi ma hamu mian; laos sian i ma hamu borhat muse.

⁵Anggo so dijangkon hamu, ruar ma hamu sian huta sisongon i; pirpirhon hamu ma orbuk i sian totmuna, bahen panindangion tu nasida.

⁶Jadi borhat ma nasida; diliati ma angka huta marbarita na uli huhut pamalum sahiti di sasude.

⁷Dibege si Herodes, raja na opat i, ma sude na masa i, gabe bohabohaon ma ibana, ala adong na mandok: Nunga dipahehe si Johannes sian na mate.

⁸Na deba mandok: Nunga ro si Elia; na asing muse: Nunga mulak mangolu sahalak sian angka panurirang na robi.

⁹Alai didok si Herodes ma: Langgo si Johannes, nunga hugotap uluna; alai ise ma On, naung songon i hubege baritana? Jala dipangido rohana, naeng idaonna Ibana.

¹⁰(II.) Asa dung mulak angka apostel i, dipajojo nasida ma tu Ibana nasa na niulanasida, gabe ditogihon ma nasida

manginsurut tu sada huta na margoar Betsaida.

¹¹ Umboto i natorop i, diihuthon ma Ibana, jadi dijangkon Jesus ma nasida, dibaritahon ma tu nasida harajaon ni Debata jala dipamalum angka na hurang hipas i.

¹² Alai di na mareak guling bot, ro ma na sampuludua i mandok tu Ibana: Pamuli ma natorop i, asa laho nasida sorang tu angka huta dohot tu angka parladang humaliang, anggiat dapotsa sipanganon, ai halongonan do ingananta on.

¹³ Alai ninna ma mandok nasida: Lehon hamu ma nasida mangan! Gabe ninna nasida ma: Holan lima roti dohot dua dengke do di hita, anggo so hami laho manuhori sipanganon di natorop on saluhutna.

¹⁴ Ai arga limaribu halak do toropnasida. Laos ninna ma mandok siseanna: Dokkon hamu ma nasida juguk marsasapunguan, marlimalimapulu.

¹⁵ Dipatupa nasida ma i, dipahundul ma nasida saluhutna.

¹⁶ Dibuat Ibana ma na lima roti dohot na dua dengke i, ditailihon ma tu ginjang, laho mamasumasu; diponggoli ma, dilehon ma tu siseanna, asa nasida sumagihonsa tu natorop i.

¹⁷ Mangan ma nasida saluhutna jala bosur be do; laos dibuat do angka ponggolponggol ebaebanasida, gok sampuludua ampang.

¹⁸(III.) Jadi uju martangiang Ibana sasadasa, didapothon angka sisean i ma Ibana, gabe disungkun ma nasida: Ise do Ahu didok natorop?

¹⁹Didok nasida ma mangalusi: Si Johannes pandidi do; na deba: Si Elia; na deba: Sahalak sian angka panurirang na robi, naung mulak mangolu.

²⁰Gabe didok Ibana ma tu nasida: Anggo hamu, ise do Ahu didok hamu? Jadi ninna si Petrus ma mangalusi: Kristus ni Debata do Ho!

²¹Alai gogo ma nasida diorai, unang dipaboaboa i tu halak.

²²Laos didok ma: Ia Anak ni jolma i, ingkon godang do taononna, bolongkonon ni angka panunggane, sintua ni malim dohot sibotosurat do Ibana, dung i pusaon do, jala mulak mangolu do di ari patoluhon.

²³Tu saluhutna ma didok: Ia adong na naeng mangihuthon Ahu, disoadahon ma dirina, dituhuk ma ariari hau pinarsilang na tu ibana, laho mangihuthon Ahu.

²⁴Ai agoan hosa ma na naeng paluahon hosana; alai na agoan hosa ala ni Ahu, i do na pangoluhonsa.

²⁵Ai aha ma gunana di jolma, nang nasa portibi on diomo, anggo diago dirina, laos mago disi.

²⁶Asa na olo maila ala ni Ahu dohot ala ni angka hatangki, pailaon ni Anak ni jolma i do

ibana, di na ro Ibana di bagasan hasangapon na di Ibana dohot na di Ama i raphon angka surusuruan na badia i.

²⁷ Alai tutu do hatangkon tu hamu: Adong do deba na jongjong dison, na so tupa mangae hamatean, so jolo diida ro harajaon ni Debata.

²⁸ (IV.) Arga ualu ari dung salpu hata ondeng, ditogihon ma si Petrus, si Johannes dohot si Jakobus nangkok tu dolok martangiang.

²⁹ Jadi uju na martangiang Ibana, mimbar ma rupa ni bohina, jala marlinanglinang ma parabitonna.

³⁰ Mangkatai ma dua halak dohot Ibana; i ma si Musa dohot si Elia.

³¹ Marhasangapon do nasida idaon, angka na humatahon ujung ni langkana, sipasidungonna di Jerusalem.

³² Tarpodom do anggo si Petrus dohot angka donganna. Alai dung dungo nasida, gabe diida ma hasangaponna i, nang halak na dua i jongjong di lambungna.

³³ Jala martahi sirang nasida sian Ibana, ninna si Petrus ma mandok Jesus: O Guru, dengganna i dison! Hupauli hami ma sotosopo tolu: Sada di Ho, sada di si Musa, sada di si Elia; so adong diboto na nidokna i.

³⁴ Mandok songon i dope ibana, ro ma ombun sada mangalinggomi nasida, gabe hatahutan ma nasida, laho bongot tubagasan ombun i.

³⁵ Jadi mangkuling ma sada soara sian ombun i mandok: On do Anakku na tarpili i; tangihon hamu ma Ibana!

³⁶ Jadi dung mangkuling soara i, sasada Jesus nama dapot nasida disi. Laos mauhom do nasida; ndang dipabotohon na niidanasida i tu agia ise anggo di angka ari i.

³⁷ (V.) Torang ni arina i tuat ma nasida sian dolok i, jala ro ma torop halak manjumpangkon Ibana.

³⁸ Jadi adong ma di tongatonga ni natorop i sahalak na manjouhon: Guru, sombangu di Ho, tatap ma anakki; sasada i do tubungku.

³⁹ Disi disoro tondi i ibana, manigor mangguhangguk ma, dipapuhung do ibana, pola margumogumo pamanganna; maol sumurut sian ibana, sai digosagosa do.

⁴⁰ Nunga huelehelek angka siseanmi, asa dipabali nian; alai ndang tarpatupasa i!

⁴¹ Gabe dialusi Jesus ma mandok: E bangso na so porsea jala na sumalin on! Sadia leleng on angkupanku jala paanjuanjuonku hamu? Boan anakmi tuson!

⁴² Mandapothon Jesus i dope nasida, nunga disoro tondi na jahat i ibana jala dipapuhung. Alai disonggahi Jesus ma tondi na hodar i jala dipamalum ma dakdanak i; dipasahat ma ibana tu amana.

⁴³ Tarhalomong do nasida saluhutna dibahen hasahalaon ni Debata. Jadi di na longang

nasida mida sude pambahenanna i, ninna Ibana ma mandok siseanna:

⁴⁴Tangihon hamu ma hatangkon: Magira ma pasahaton Anak ni jolma i tu tangan ni halak!

⁴⁵Alai ndang diantusi nasida pandokna i; buni do i sian rohanasida, so diarti, jala tanggak do rohanasida, manungkun Ibana siala hata i.

⁴⁶(VI.) Alai tubu ma pingkirannasida sama nasida: Manang ise nasida masuk na sumurung.

⁴⁷Alai diboto Jesus do pingkiran ni rohanasida, gabe dialap ma sada dakdanak, dipajongjong ma tu lambungna.

⁴⁸Laos didok ma tu nasida: Na olo manjangkon dakdanak on ala Goarhu, Ahu do na jinangkonna disi; jala na manjangkon Ahu, manjangkon na marsuru Ahu do. Ai na ummetmet sian hamu sude, i do na balga dohonon.

⁴⁹Jadi mangkuling ma si Johannes, ninna ma: Guru, huida hami do sada halak, sipabali angka tondi na jahat mangasahon Goarmu; jala nioraan ibana, ala so didongani hami mangihuthon Ho.

⁵⁰Didok Jesus ma tu ibana: Unang orai hamu ibana! Ai na so mangalo hamu, donganmuna do i.

⁵¹Alai di na lam donok ari hababangkitna, dipatohom ma bohina mardalan tu huta Jerusalem.

⁵²Laos disuru ma angka suruanna patujolona. Jadi laho ma nasida, dibongoti ma sada huta ni halak Samaria, paturehon parbornginanna.

⁵³Gabe ndang dijangkon nasida Ibana, ala dipatohom bohina laho tu Jerusalem.

⁵⁴Marnida i siseanna si Jakobus dohot si Johannes, didok ma: Tuhan, anggo olo Ho, hudokkon hami ma turun api sian ginja mangalengsehon nasida, (songon binahen ni si Elia).

⁵⁵Alai humusor ma Ibana, hona hata ma nasida dibahen, (ninna ma: Nandang diboto hamu hape, manang Tondi dia di hamu?

⁵⁶Ai laho paluahon, ndada mangagohon tondi ni jolma Anak ni jolma i, umbahen na ro). Jala tu huta na asing nama ditopot nasida.

⁵⁷(VII.) Uju di tongandalan nasida, ninna sahalak ma mandok Ibana: Sai ihuthononku do Ho, manang tudia pe Ho laho.

⁵⁸Didok Jesus ma tu ibana: Na marliang do angka antuasus, na marasar do pidong na martongatonga langit; alai anggo di Anak ni jolma i ndang adong hapeahan ni uluna.

⁵⁹Ia tu sahalak na asing didok: Ihuthon Ahu! Alai didok i ma: Loas ahu jolo laho mananom damang!

⁶⁰Alai ninna ma mandok ibana: Pasombu ma angka na mate mananom na matena; alai

anggo ho, borhat ma mamaritahon harajaon ni Debata!

⁶¹ Sahalak na asing muse mandok:
Huihuthon pe Ho, Tuhan; alai loas ahu
jolo martinading hata tu angka donganku
sabagas!

⁶² Alai ninna Jesus ma mandok ibana: Na
manjama ninggala, huhut mamereng tu pudi,
tung na so tau ma i tu harajaon ni Debata.

10¹ (I.) Dung i dipillit Jesus dope pitupulu
halak nari, jala duadua do nasida
disuru patujolona tu sude huta dohot inganan,
sitopotonna i muse.

² Ninna ma mandok nasida: Bidang do
nian sisabion, alai otik do anggo pangula.
Onpe, elehelek hamu ma Nampuna sisabion
i, anggiat dipaborhat angka pangula tu
sisabionna i.

³ Laho ma hamu! Hira birubiru do hamu
husuru tu tongatonga ni angka babiat.

⁴ Unang boan hamu handehande manang
hajut, manang sipatu pe; unang tabi hamu
halak di tongandalan!

⁵ Laho mambongoti jabu, jumolo ma dok
hamu: Dame ma di hamu na sabagas on!

⁶ Jala molo adong disi anak hadameon,
songgop ma damemuna tu ibana; alai molo
soada, mulak ma i tu hamu.

⁷ Di jabu i ma hamu mian; mangan jala inum
hamu ma sian na adong di nasida, ai tama do

marupa pangula; unang laholaho hamu sian jabu na sada tu na sada.

⁸Anggo dibongoti hamu huta jala dijangkon do hamu, pangan hamu ma na nilehonnasida tu hamu.

⁹Pamalum hamu ma angka na hansitan na disini; dok hamu ma tu nasida: Nunga sahat harajaon ni Debata tu hamu!

¹⁰Alai anggo dibongoti hamu huta, gabe ndang dijangkon nasida hamu, ruar ma hamu tu partungkoan; dok hamu ma tu nasida:

¹¹Nang orbuk sian hutamuna on, na lohote di totnami, huapusi hami mulak tu hamu; asal diboto hamu, naung ro harajaon ni Debata.

¹²Hudok ma di hamu: Neang do sitaonon ni pangisi ni huta Sodom di ari sogot, martimbangkon sitaonon ni huta sisongon i.

¹³Marjea ma ho, Korasin! Marjea ma ho, Betsaida! Ai aut di huta Tirus dohot di Sidon dipamasa hagagoon angka naung masa di hamu, tibu ma paubaonnasida rohanasida, marabithon goni, hundul di orbuk.

¹⁴Asa neang do sitaonon ni pangisi ni huta Tirus dohot Sidon di ari uhum i, martimbangkon sitaononmuna.

¹⁵Jala ho Kapernaum, nda na pinatimbo ho ro di langit an? Sidabuhononhon do ho sahat tu banua toru!

¹⁶Na tumangihon hamu, Ahu do tinangihonna, jala na manulak hamu, Ahu do

tinulakna; alai na manulak Ahu, na marsuru Ahu do tinulakna disi.

¹⁷(II.) Mardongan las ni roha do mulak na pitupulu i mandok: Tuhan, guru doknami do nang tondi na jahat i, marhitehite Goarmu!

¹⁸Alai ninna ma mandok nasida: Huida do sibolis i madabu sian ginjang songon porhas.

¹⁹Nunga hupasahat tu hamu huaso mandegei angka ulok dohot hala dohot mangalo nasa hagogoon ni musu i; na so tupa hahuaonna hamu.

²⁰Alai ndang pola las rohamuna, ala naung guru dokmu angka tondi i. On ma tahe halashon hamu: Naung tarsurat goarmuna di banua ginjang i!

²¹Laos di tingki i ma marolopolop Ibana di bagasan Tondi Parbadia, mandok: Hupuji Ho, Amang, Tuhan Sigomgom banua ginjang dohot tano on, ala ditamondingkon Ho i sian jolo ni angka na pistar dohot na marroha, gabe dipapatar Ho i tu angka siondihononhon. Olo, Amang, i do dihalomohon roham hian!

²²Saluhutna i, nunga dipasahat Damang tu Ahu; jala ndang adong na tumanda Anak i, dungkon ni Ama i; Ama i pe, ndang adong na tumanda i, ia so holan Anak i, angkup ni na pinodaan ni Anak i mangihuthon lomo ni rohana.

²³Dung i didompakkon ma pulik angka siseanna, mandok: Martua ma angka mata na marnida na niidamuna;

²⁴ Ai hudok ma di hamu: Torop do angka panurirang dohot raja masihol: Naeng idaonna nian naung niidamuna, hape ndang diida; jala naeng begeonna, naung binegemuna, hape ndang dibege.

²⁵ (III.) Dung i hehe ma sada sibotopatik mangunjuni Ibana, ninna ma: Guru, dia do sibahenonku, asa hutean muse hangoluan na salelenglelengna?

²⁶ Gabe ninna Jesus ma mandok ibana: Aha do tarsurat di patik i? Beha do dijaha ho?

²⁷ Jadi dialusi ma songon on: Ingkon dihaholongi ho do Tuhan Debatami sian nasa ateatem, sian nasa tondim, sian nasa gogom dohot sian nasa roham, jala donganmi songon dirim!

²⁸ Dung i ninna ma mandok ibana: Tingkos do alusmi; ulahon ma i, gabe mangolu ma ho!

²⁹ Alai naeng ma pintoranna dirina gabe ninna ma mandok Jesus: Ai ise do donganku goaron?

³⁰ Jadi mangalusi ma Jesus, ninna ma: Adong ma sada halak, na tuat sian huta Jerusalem laho tu huta Jeriko, gabe disamun panamun; dipupusi ibana, dipukpuhi, dung i laho; matemate ne do ibana ditadingkon.

³¹ Tongon ma mamolus malim sada sian dalan i; diida do ibana, alai dilaosi.

³² Songon i do sahat sahalak Lepi tu inganan i; diida do ibana, alai dlaosi.

³³ Alai mamolus ma sian i sahalak Samaria; jala asi do rohana marnidasa.

³⁴ Didapothon ma, dipauli ma bugangna, didaishon ma miak dohot anggur tusi; dipahundul ma ibana tu hodana, diboan ma ibana tu parbornginan, laos dipasarisari ma ibana.

³⁵ Torang ni arina i dirungkari ma rupia dua, dilehon ma i tu nampuna bagas i, ninna ma: Pauliuli ma ibana; jala molo tung lobi harugianmu, husingkat pe, laho mulak sian on.

³⁶ Ise sian na tolu i di roham, gabe dongan ni na tardobo i?

³⁷ Jadi didok ma: Na marasi ni roha di ibana. Gabe ninna Jesus ma mandok ibana: Laho ma ho, bahen ma songon i!

³⁸ (IV.) Jala di na mardalani nasida, dibongoti ma sada huta. Adong ma disi parompuan sahalak, na margoar si Marta, na manjangkon Ibana tu jabuna.

³⁹ Ianggo anggina na margoar si Maria, hundulhundul do di jolo ni Tuhan i tumangihon hatana.

⁴⁰ Diharonsothon si Marta do ragam ni parhobason. Laos dipajonok ma mandok: Tuhan, ndang diantoi roham, na pinasombu ni anggingki ahu marhobasi sahalakku? Dokkon ibana antong mandongani ahu!

⁴¹ Gabe ninna Tuhan i mangalusi ibana:
O Marta, Marta! Lan do disarihon jala
dihاسوبahon ho!

⁴² Sada do na ringkot! Dipillit si Maria do
tohap na uli i; ndang sibuaton i sian ibana.

11 ¹ (I.) Uju martangiang Ibana di sada
inganan, jala dung mansohot, ninna
sahalak siseanna ma mandok Ibana: Tuhan,
ajari hami martangiang, songon na binahen
ni si Johannes tu angka siseanna.

² Gabe didok ma tu nasida: Songon on ma
dok hamu laho martangiang: Ale Amanami,
sai pinarbada ma Goarmu! Sai ro ma
harajaonmu! Sai saut ma lomo ni roham di
banua tonga on, songon na di banua ginjang!

³ Lehon ma tu hami sadari on hangoluan siap
ari!

⁴ Sesa ma dosanami, songon panesanami di
dosa ni nasa na mardosa tu hami; jala unang
hami togihon tu pangunjunan! Palua ma hami
sian pangago!

⁵ Laos ninna ma mandok nasida: Ise hamu
na maraleale, gabe ditopot ma i mareak
tongaborngin, mandok tu ibana: Ua, pasali
ahu tolu roti!

⁶ Ai ro do alealengku sian pardalananna, jala
ndang adong sipanganon lehononku tu ibana.

⁷ Gabe dialusi halak i ma sian bagasan,
mandok: Unang ahu susai! Nunga sordak
pintu, jala nunga modom angka anakkonku

rap dohot ahu; ndang tarbahen ahu hehe mangalehon di ho.

⁸Hudok ma di hamu: Nang so hehe halak i mangalehon, ala naung maraleale nasida, ndang tarbahensa so hehe mangalehon nasa na ringkot di ibana ala ni jugulna i mangido.

⁹Ahu pe, hudok ma tu hamu: Pangido hamu ma, sai na lehonon do tu hamu; lului hamu ma, sai na jumpangan do hamu; tuktuhi hamu ma, sai na ungkapon do di hamu!

¹⁰Ai sai na manjalo do nasa na mangido; sai na jumpangan do na mangalului jala sai na ungkapon do di na manuktuhi.

¹¹Ise sian hamu angka amaama, anggo dipangido anakna roti tu ibana, gabe dilehon batu tusi, manang dengke dipangido, gabe ulok dilehon?

¹²Manang dipangido tinaru ni manuk, gabe dilehon hala tusi?

¹³Gari hamu, angka na jahat i, umboto mangalehon na denggan tu angka anakkonmuna, lam so lehonon ni Ama i sian banua ginjang Tondi Parbadia tu angka na mangido I sian Ibana?

¹⁴(II.) Dung i dipabali ma sada tondi na mambahen ngungu; alai dung bali tondi i, mangkuling ma na ngungu i, gabe longang ma natorop i.

¹⁵Alai deba sian nasida mandok: Marhitehite Beelsebul, induk ni angka tondi i, dipabali Ibana angka tondi na jahat i.

¹⁶Alai anggo na asing mangunjuni Ibana, mangido tanda sian ginjang.

¹⁷Alai ala ditanda Ibana angka pingkirannasida, gabe didok ma tu nasida: Pesan do nasa harajaon na marsalisi sama dirina jala masittinggangan ma angka jabuna.

¹⁸Jala molo marsalisi sibolis i sama dirina, tung tarbahren ma hot harajaonna i? Ala didok hamu, na hupabali angka tondi i marhitehite Beelsebul.

¹⁹Alai molo tung Ahu pabalihon angka sibolis mangasahon Beelsebul, ise ma dipangasahon angka anakmuna, laho pabalihonsa? Onpe, nasida do manguhumi hamu disi!

²⁰Alai molo hupabali angka tondi na hodar marhitehite tangan ni Debata, naung songgop ma harajaon ni Debata tu hamu.

²¹Anggo dijagai ulubalang na gopas marsinjata jabuna, sinok ma ugasanna.

²²Alai molo ditahopi na gumogo i ibana jala ditaluhon, buaton ni i ma sandok sinjatana na pinangasahonna i, jala sagihononna ma tabantabanna i.

²³Na so mandongani Ahu, alongku ma i; na so donganku papunguhon, na paserakkon do i!

²⁴Ia dung ruar tondi na hodar i sian jolma, didalani ma angka inganan na hasang, mangalului paradiaan; jala anggo so

jumpangsa i, ninna ma: Mulak nama ahu tu ingananku naung hutadingkon i!

²⁵Jadi di na ro ibana, naung sinapu jala pinalehet didapot.

²⁶Jadi laho ma ibana, ditogihon ma pitu tondi angka na jumahat sian ibana, dibongoti ma laho maringan tu si, gabe jumahat ma pangalaho ni jolma i di ujungna sian na di mulana i.

²⁷Di na mangkatahon hata i Ibana, dipagogo sada parompuan sian tongatonga ni natorop i ma soarana, ninna ma mandok Ibana: Martua ma na tumubuhon jala na pabagot Ho!

²⁸Alai ninna Ibana ma: Martua ma angka na umbege hata ni Debata jala na umpeopsa!

²⁹(III.) Jadi lam marpungu ma angka natorop i, gabe marjamita ma Ibana: Na jahat do na sansundut on; tanda do dipangido, jala ndang lehonon tanda tu nasida, dungkon ni tanda ni si Jonas.

³⁰Ai songon si Jonas gabe tanda di pangisi ni huta Ninive, songon i ma Anak ni jolma i di na sansundut on.

³¹Na hehe ma sogot di paruhuman i raja boruboru na sian dangsina i dompak halak na sansundut on, mangkonahon uhum tu si; ai sian suhi ni tano ibana ro, umbege habisuhon ni si Salomo. Ida ma, On do na sumurung sian si Salomo!

³²Na hehe ma sogot di paruhuman i halak Ninive dompak na sansundut on,

mangkonahon uhum tusi, ai dipauba nasida
do rohanasida umbege jamita ni si Jonas i.
Ida ma, On do na sumurung sian si Jonas!

³³Ndang adong na mambahen palito na
pinasangna i tu inganan, na buni, manang tu
toru ni ampang; tu parpalitoan i do dibahen,
asa diida na ro i sondangna i.

³⁴Palito ni daging do mata i. Molo hisar
matam, tiur ma sandok dagingmu; alai molo
roa, mangkolom ma nang dagingmi.

³⁵Ipe, jaga ma ho, so tung mangkolom
sondang na di bagasan ho!

³⁶Asa molo tiur sandok dagingmi, soada na
holom disi, tiur ma sasude, songon naung
pinatiur sondang ni sillam ma ho!

³⁷Andorang dihatahon dope i, diarahon sada
halak Parise ma Ibana mangan; jala bongot
ma Ibana, laos hundul ma.

³⁸Alai longang ma Parise i, ala diida, na so
jolo marburi Ibana laho marsipanganon.

³⁹Jadi didok Tuhan i ma tu ibana:
Anggo hamu Parise, duru ni panginuman
dohot mangkuk dipaias hamu; alai ia
parbagasanmuna gok pandoboan dohot
hajahaton do.

⁴⁰E hamu na hurang roha! Sitompa duruna,
nda laos i do na manompa bagasanna?

⁴¹Asal ma dibasabasahon hamu na di
bagasanna bahen asiasi, sandok ias ma na di
hamu!

⁴²Marjea ma hamu Parise, ai diparsampulu hamu do angka suansuanan na ummetmet, ro di ragamragaman ni simarata; alai dilaosi hamu do uhum dohot holong ni roha ni Debata. Siulaon do na sada on; alai unang ma tading na sada an!

⁴³Marjea ma hamu Parise, ai ringkot do rohamuna mangkunduli bangku jolojolo di angka parguruan, jala asa ditabijolma i hamu di tonga onan.

⁴⁴Marjea ma hamu, ai suman do hamu tu tanoman na so tanda, gabe didege halak tusi, so sian pamotoanna.

⁴⁵Jadi ro ma alus ni sahalak sibotopatik, didok ma tu Ibana: Dohot do hami direhei Ho di hatam ondeng.

⁴⁶Gabe didok Ibana ma: Marjea nang hamu sibotopatik, ai diampehon hamu do tu angkajolma i boban na so tarboan; alai ndang olo anggo hamu manjama porsanon i, nanggo dohot sada jarijarimuna!

⁴⁷Marjea ma hamu, ai dipauli hamu do tanoman ni angka panurirang, hape amamuna do, pamatehon nasida.

⁴⁸Asa sitindangi jala panolopi do hamu di pambahenan ni amamuna, ai nasida do mambunusa, gabe hamu do paulihon.

⁴⁹Ala ni i didok Hapistaran ni Debata: Suruonku ma tu nasida angka panurirang dohot apostel; bunuon jala leleannasida do deba sian i.

⁵⁰Asa luluhononhon ma tu na sansundut on mudar ni sude panurirang, naung durus i olat ni parmulaan ni tano on,

⁵¹mamungka sian mudar ni si Abel ro di mudar ni si Sakarias, na tarbunu di holangholang ni langgatan dohot joro i. Olo tutu, hudok ma tu hamu, luluhononhon ma i tu na sansundut on!

⁵²Marjea ma hamu sibotopatik, ai dirampas hamu do anak hinsu parbinotoan; hamu sandiri ndang bongot, jala angka na naeng bongot, diambati hamu.

⁵³Asa di na ruar Ibana sian i, dionggopi angka sibotosurat dohot Parise ma Ibana, jala ragam do disungkunhon tu Ibana.

⁵⁴Dihaliangi nasida Ibana, anggiat tardapot Ibana binahen ni sada hatana.

12¹(I.) Marrongoman ma ro natorop i marriburibu, pola masidegean nasida, gabe didok Ibana ma parjolo, tu siseanna: Jaga ma hamu pasiding na niasoman na di angka Parise, i ma pangansion i.

²Ndang adong na hungkup, na so ungkap muse, manang na buni, na so dapot botoon muse.

³Dibahen i nasa na hinatahonmuna di na holom, begeon do i muse di na tiur; na hinusiphonmuna tu pinggol di bilut, baritahononhon do muse di angka partungkoan.

⁴Alai hudok ma tu hamu angka alealengku: Unang ma habiari hamu angka na mambunu daging jala dungkon ni i so adong be sihahuaonna.

⁵Alai hupatuduhon ma tu hamu na patut habiaranmuna: Habiari hamu ma ibana, na marhuaso mambunu huhut mandabuhon tu api na roko. Olo, hudok ma tu hamu: Ibana ma habiari hamu!

⁶Nda digadis lima amprik arga dua benggol; agia sada sisongon i, ndang na lupa sian adopan ni Debata.

⁷Gari obuk na di ulumuna, sude do dibilangi. Unang hamu tahutan! Ummangat do hamu sian amprik torop.

⁸Hudok ma di hamu: Ganup na mangkatindangkon Ahu di jolo ni jolma, hatindangkonon ni Anak ni jolma i do sogot di adopan ni angka surusuruan ni Debata.

⁹Alai na mansoadahon Ahu di jolo ni jolma, soadahononhon do sogot di adopan ni angka surusuruan ni Debata.

¹⁰Jala ganup na mandok hatana mangalo Anak ni jolma i, tarsesa do i; alai na mangaleai Tondi Parbadia, ndang dapotan hasesaan.

¹¹Alai molo togihononnasida hamu tu angka parguruan, tu jolo ni angka induk dohot panggongomi, unang ma holsoan hamu, manang beha pangalusionmuna ro di sidohononmuna.

¹²Ai ajarhonon ni Tondi Parbadia i do tu hamu di na sangombas i na patut dohononmuna.

¹³Jadi adong ma sahalak sian natorop i na mandok tu Ibana: Guru, dokkon ma amparangku marbagi teanteannami rap dohot ahu!

¹⁴Alai didok ma tu ibana: Baoa! Ise do pabangkit Ahu gabe panguhum manang sibagi teanteanan di hamu?

¹⁵Laos didok ma tu nasida: Jaga ma hamu, pasiding hamu ma nasa haholiton! Ai nang pe marlobilobi halak, ndada sian artana i ngoluna.

¹⁶Gabe dihatahon ma sada umpama tu nasida, ninna ma: Suha do gogo ni hauma ni sada halak na mora.

¹⁷Jadi marhusari ma ibana di bagasan rohana songon on: Aha nama bahenonku? Ai ndang adong hasiatan ni gogo ni tanongki.

¹⁸Gabe ninna ma: On ma bahenonku: Hulohai nama angka spongki, hupauli ma angka na umbalga, asa tusi papunguonku sude na tubu i ro di artangku.

¹⁹Jala dohononku ma tu tondingku: Ale tondingku, nunga rade godang artam, sae manang piga taon on. Ipe, marhasonangan ma ho, mangan minum ma ho, las ma roham!

²⁰Alai ninna Debata ma mandok ibana: E ho na loahon! Saborngin on ma tungguon hosam sian ho. Ia na pinaradem, tu ise ma i?

²¹ Songon i ma masa di halak an, na papunguhon arta di dirina, anggo so mamora ibana di Debata.

²² (II.) Jadi ninna ma mandok siseanna: Ala ni i hudok ma tu hamu: Unang holsohon hamu hosamuna pasarisari sipanganon, manang dagingmuna sumarihon parabiton.

²³ Ai ummangat do hosa sian sipanganon jala sumurung do daging sian parabiton.

²⁴ Bereng hamu ma pidong sigak, angka na so manabur manang manggotil, na so margudang manang marsopo. Tong do Debata marmudumuduhon angka i. Godang ni hasuranganmuna antong sian angka pidong!

²⁵ Ise hamu na tarpaganda ariarina, nanggo saasta ganjangna, marhite sian pangkolsohon ni rohana?

²⁶ Asa molo so tarpatupa hamu na ummotik i, boasa pola holsohononmuna na di atas ni i?

²⁷ Patangkas hamu ma partubu ni bungabunga na di ladang i, angka na so mangganti manang martonun pe! Alai hudok ma tu hamu: Gari si Salomo uju di bungaran ni hasangaponna i, gari so mamangke songon bungabunga sada.

²⁸ Asa molo songon i diparulosi Debata duhutduhut na di ladang i na jongjong songon sadari on, na tupa dipuruni marsogotna i, lam hamu ma, lam so parulosanna? E hamu siotik haporseaon!

²⁹Asa unang ma lulululu rohamuna di sipanganon manang di siinumonmuna; unang bohobohaon rohamuna disi!

³⁰Angka sipelebegu na di portibi on do mangalului angka sisongon i; alai diboto Amamuna do, na hasea angka i di hamu.

³¹Asal ma dilului hamu harajaonna i; dung i tambahononna do angka i tu hamu.

³²Unang ho mabiar, ale pungan na metmet! Ai naung dihalomohon Amamuna do, mangalehon harajaonna i tu hamu.

³³Gadis hamu ma na pineopmuna, jala lehon hamu ma asiasi. Pauli hamu ma di hamu angka puro na so ra buruk; masiarta parbanua ginjang na so ra suda ma hamu, na so hadonohan panangko jala na so targagat ngitngit.

³⁴Ai ia disi artamuna, disi do nang rohamuna.

³⁵(III.) Sai hohos ma gontingmuna, jala galak ma palitomuna!

³⁶Jala suman ma hamu tu jolma na paipaimahon indukna, di na ro muli ibana sian parunjuhan, asa mamintor diungkap di ibana, di harorona manuktuhi.

³⁷Martua ma angka anak somang i, na dungo dapoton ni indukna di harorona i! Na sintong do hatangkon tu hamu: Hohoshononna ma ulosna, pajuguhonna ma nasida; ibana ma jongjong marhobasi di nasida.

³⁸ Martua ma nasida, anggo songon i nasida didapot, manang na ro ibana di paduanghaebornginhon manang di patolunghaebornginhon.

³⁹ Alai tanda hamu ma on: Aut diboto nampuna jabu, manang di pungkul piga tagamon ro panangko, dungo ma ibana, ndang loasonna ibana manursari ugasanna.

⁴⁰ Hamu pe, gabe hobas ma, ai na ro do Anak ni jolma i di tingki na so panagamanmuna!

⁴¹ Jadi didok si Petrus ma: Tuhan, tu hami do didok Ho umpama ondeng, manang dohot do tu saluhutna?

⁴² Gabe didok Tuhan i ma: Ise ma antong juara bagus na tau haposan, na marroha, sipabangkiton ni indukna manggomgom angka naposona, laho mangalehon bohalnasida di tingkina?

⁴³ Martua ma anak somang i, na mangulahon songon i dapoton ni indukna di harorona i!

⁴⁴ Sintong do na hudok on tu hamu: Pabangkitonna do ibana mangaramoti nasa ugasanna.

⁴⁵ Alai molo didok anak somang i di bagasan rohana: Laon dope, asa ro indukhu, jadi dipungkuli ma angka naposo baoa dohot boruboru, mangan minum ibana maradu mabuk,

⁴⁶ gabe ro ma induk ni naposo i di ari na so panagamanna jala di ngombas na so pamotoanna, jala parduaonna ma ibana,

laho mangalehon tohapna rap dohot na so haposan.

⁴⁷Ia anak somang, na umboto na hinalomohon ni indukna, gabe so marhobas ibana jala ndang diulahon lomo ni rohana, godang ma linsinglinsing taononna.

⁴⁸Alai na so umbotosa, gabe diulahon na tama pinsangon, otik ma taononna. Ai godang ma siluluan tu pangalehongan na godang, jala godang ma tungguon tu panahatan ni na godang.

⁴⁹Na ro do Ahu mandanggurhon api tu tano on. Dihasiholi nasa rohangku do, anggiat haru galak nian!

⁵⁰Alai didihononhon do tu Ahu paridion; jala mansai bobos do rohangku, saleleng so tulus dope i.

⁵¹Na dirimpu rohamuna do, na laho mangalehon dame Ahu tu atas tano on, umbahen na ro? Nda tung, hudok ma di hamu: Panirangon do tahe.

⁵²Ai olat ni on ma maralo lima halak na di sada jabu: Na tolu maralohon na dua, jala na dua maralohon na tolu.

⁵³Maralo ma ama tu anakna, anak i tu amana; ina tu boruna, boru i tu inana; simatua boru tu parumaenna, parumaen i tu namboruna.

⁵⁴Dung i ninna ma mandok natorop i: Jumpa diida hamu nangkok ombun sian hasundutan,

pintor didok hamu do: Na ro ma udan; jadi saut do songon i.

⁵⁵Jala jumpa mangullus alogo sian dangsina, didok hamu: Na logo ma ari: Jadi jumpang do songon i.

⁵⁶E hamu pangansi, malo do hamu hape manimbangi rupa ni tano on dohot langit i; so malo ma hamu manjuri tingki on?

⁵⁷Boasa so sian rohamuna hamu manimbangi na patut?

⁵⁸Binsan raphon alom dope ho manopot panguhum, haringkothon ma di tongandalan i, asa malua ho sian ibana; so tung disarat ibana ho tu jolo ni panguhum, gabe panguhum pasahathon ho tu upasna jala hurungkonon ni upas i ho maon.

⁵⁹Hudok ma tu ho: Na so tupa ho haruar sian i, paima digarar ho sude ro di na saduit!

13¹(I.) Adong ma na ro uju i paboahon tu Ibana taringot tu angka halak Galilea, na didurushon si Latus do mudarnasida, gabe saor tu na pinelehonnasida.

²Jadi ninna Jesus ma mangalusi nasida: Na diagam rohamuna do pardosaan halak Galilea i martimbangkon saluhut halak Galilea, ala songon i diahap nasida?

³Hudok ma di hamu: Ndang; anggo so muba rohamuna, laos songon i do hamu mago muse!

⁴Manang na dirimpu hamu, anggo na sampuluualu halak, na mate ditinggang

palaspalas na di Siloam, parsalaan sian sude pangisi ni huta Jerusalem?

⁵Hudok ma di hamu: Nda tung; anggo so muba rohamuna, laos songon i do hamu mago muse!

⁶Dung i dihatahon ma umpama on: Adong ma di sada halak hau ara na sinuanna tu porlak anggurna; jadi ro ma ibana mangalului parbuena, hape ndang adong jumpangsa.

⁷Gabe ninna ma mandok siula porlak anggurna: Nunga pola patolutaonhon ahu ro mangalului parbue di hau ara on, laos so jumpang. Taba ma i; aha pola magopo tano i bahenonna!

⁸Alai didok i ma mangalusi: Tuannami, loas ma i disi sataon on, asa sanga hupangkur humaliang bonana, mambahen napa tusi,

⁹anggiat olo marparbue tu jolo on; alai anggo soada, tabaon ma!

¹⁰(II.) Dung i mangajari ma Ibana di sada parguruan jumpa ari Sabbath.

¹¹Jadi adong ma disi sada parompuan, naung martondi sibahen marsahit leleng ni sampulu ualu taon; suhung do dagingna jala ndang tarbahensa dirgak.

¹²Dijou Jesus ma ibana jumonok, dung diida; jala ninna ma mandok ibana: Malua ma ho, inang, sian parsahitonmi!

¹³Laos diampehon ma tanganna tu ibana, jadi pintor dipadirgak parompuan i ma dirina jala dipuji ma Debata.

¹⁴Alai ia sintua ni parguruan i, sogo ma rohana, ala na pamalum sahiti Jesus jumpa ari Sabbat, jala ro ma hatana tu natorop i: Onom do ari di na patut mulaulaon hita; disi ma hamu ro, asa dipamalum sahitmuna, unang ma di ari Sabbat!

¹⁵Alai ninna Tuhan i ma mangalusi ibana: E ho pangansi! Nda ganup hamu mangkarhari horbona manang halodena sian panggagatan di ari Sabbat manogihonsa marsobur?

¹⁶Ia on, sada boru ni si Abraham, naung nirahatan ni sibolis sampulu ualu taon lelengna, ndang patut harharan ihotihotna di ari Sabbat?

¹⁷Dung didok Ibana i, muruk ma sude alona i. Jala marlas ni roha ma sude natorop i siala saluhut pambahenna na marmulia i.

¹⁸(III.) Alai didok ma: Tudos tu aha ma harajaon ni Debata, tu aha ma pasumanonku?

¹⁹Tudos ma i tu batu ni siarum, na jinomput ni sada halak, laho manaburhonsa tu porlakna; jadi tubu ma gabe hau, jala ro do angka pidong na martongatonga langit marasar tu rantingna.

²⁰Diulahi mandok: Tu aha ma patudosonku harajaon ni Debata?

²¹Tudos ma i tu itak naung niasoman, na binuat ni sada parompuan pasaorhonsa tu itak tolu ampang, paima asom saluhutna.

²²Jadi dibolus Ibana ma angka huta dohot sosor laho mangajari, uju di pardalanan mandapothon huta Jerusalem.

²³Jala adong ma na mandok tu Ibana: Tuhan, otik do ulaning na saut malua?

²⁴Alai ninna Ibana ma mandok nasida: Marungkil ma hamu, asa masuk sian pintu na gogot i; ai hudok ma tu hamu: Torop do na marsangkap naeng masuk nian, alai ndang tarbahensa.

²⁵Alai dung hehe nampuna jabu i jala disordak pintu i, disi ma jongjong hamu di balian manuktuhi pintu i, mandok: Tuhan, ungkap di hami! Jala dohononna ma: Ndang huboto hamu, manang sian dia!

²⁶Dohononmuna ma disi: Na rap mangan jala minum do hami dohot Ho, jala diajari Ho do hami di angka alamannami.

²⁷Dung i dohononna ma: Hudok ma di hamu: Ndang huboto hamu, manang sian dia. Sumurut ma hamu sian Ahu, hamu sudena, siula hageduhon!

²⁸Disi ma masa angguhangguk dohot na patungoripon, di na idaonmuna di bagasan harajaon ni Debata si Abraham, si Isak dohot si Jakkob ro di panurirang saluhutna; alai pinabali tu balian do anggo hamu!

²⁹Disi ma ro angka na sian purba dohot sian pastima, sian utara dohot sian dangsina, gabe hundul ma marsipanganon di harajaon ni Debata.

³⁰Angka naung parpudi hian tupa gabe parjolo; jala angka naung parjolo hian, tupa gabe parpudi.

³¹(IV.) Uju i didapothon deba Parise ma Ibana mandok: Hehe ma ho, borhat ma sian on, ai na naeng bunuon ni si Herodes do Ho!

³²Gabe ninna ma mandok nasida: Laho ma hamu, dok hamu ma tu antuasus i: Hupabali angka tondi na hodar jala hupamalum angka sahiti sadari on dohot marsogot, jala marujung ma langkangku patoluna.

³³Alai ingkon mardalan Ahu sadari on, nang marsogot ro di ari na mangihut tusi; ai na so bolas mate panurirang, anggo di balian ni huta Jerusalem.

³⁴Jerusalem, Jerusalem! Dibunu ho do angka panurirang i jala didangguri ho do angka na sinuru manopot ho! Jotjotna i naeng papunguonku do nian ianakhonmu, sobokkon pidong na papunguhon anakna tu toru ni habonghabongna; alai ndang dung olo hamu!

³⁵Tarulang ma sogot bagasmuna. Alai hudok ma tu hamu: Na so tupa idaonmuna be Ahu, paima dohononmuna: Pinasupasu ma na ro marhitehite Goar ni Tuhan!

14¹(I.) Jadi jumpa dibongoti Ibana jabu ni sada sintua ni halak Parise di sada ari Sabbath laho marsipanganon, nunga disi nasida mangonggopi Ibana.

²Jadi adong ma disi di jolona sada halak na sigurbahon.

³Jadi ninna Jesus ma mandok angka sibotopatik dohot Parise i: Ai na jadi do pamalumon sahiti di ari Sabbath, manang na so jadi? Alai hohom do anggo nasida.

⁴Gabe dijama Ibana ma halak i; dipamalum ma, laos dipamuli.

⁵Jadi didok ma tu nasida: Anggo na targodung horbo manang halode ni manang ise hamu, nda manigor ditait tu ginjang, nang di ari Sabbath?

⁶Gabe ndang haalusan nasida hatana i.

⁷(II.) Alai diida ma, angka hundulan na sumangap dipilliti angka na pinio i, gabe marumpama ma Ibana, ninna ma mandok nasida:

⁸Anggo tarpio ho tu parunjuhan, unang ho juguk tu hundulan na ummangat, atik beha adong piniona sahalak na sumangap sian ho;

⁹gabe ro suhut i, na rap mamio hamu, mandok tu ho: Di ibana ma juguhanmi! Jadi ila ma roham juguk tu hundulan partoru.

¹⁰Alai anggo dipio na mamio ho, laho ma ho juguk tu hundulan pudipudi; asa anggo dung ro na mamio ho, dohononna ma tu ho: Tungkan julu on ma ho juguk, ale! Jadi sangap ma ho idaon ni sude donganmu na tarpio i.

¹¹Ai nasa na patimbohon dirina, sipaoruon do; jala na paoru dirina, i do sipatimboon!

¹²Didok ma huhut tu na mamio Ibana: Jumpa dibahen ho pesta manang haroan,

unang ma pio tusi angka alealem, manang hahanggim, manang hulahulam, manang hombar bagasmu pe, angka na gabe, asa unang nasida muse mamio ho, gabe dibalos i tu ho.

¹³Alai jumpa mambuat sipanganon ho, pio ma angka na pogos, angka na martihas, na pangpang dohot na mapitung.

¹⁴Jadi martua ma ho disi, ai ndang tarbalos nasida i tu ho; alai marbalos do i tu ho sogot di haheheon ni angka partigor.

¹⁵(III.) Umbege i sahalak donganna marsipanganon i, ninna ma mandok Ibana: Martua ma na mangan di harajaon ni Debata!

¹⁶Gabe ninna Jesus ma mangalusi: Adong ma sahalak na marulaon godang: Torop do halak gokkon tusi.

¹⁷Jadi di mata ni pesta i disuru ma anak somangna mandok tu angka naung ginokkonna i: Ro ma hamu, ai nunga rade saluhutna!

¹⁸Hape rap do nasida sude marsidalian. Didok na parjolo i ma tu ibana: Hutuhor do hauma, ndang tarbahen so laho ahu maningkir. Raja ho, ondihon ahu!

¹⁹Ia na asing mandok: Naung hutuhor do horbo lima auga; na laho ma ahu manangkasi. Raja ho, ondihon ahu!

²⁰Na asing muse mandok: Nambura mambuat boru ahu; ala ni i ndang tarbahen ahu ro.

²¹ Muli ma anak somang i, dibaritahon ma i tu indukna. Jadi tarrimas ma suhut i, didok ma tu anak somangna: Silu, laho ma ne tu angka alaman dohot jambur ni huta i, togihon ma angka na pogos, angka na martihas, na mapitung dohot na pangpang!

²² Jadi ro ma hata ni anak somang i: Nunga saut na nidokkonmi, tuan; alai lumbang dope!

²³ Gabe didok induk i ma tu naposona: Laho ma tu balian, tu angka dalan na metmet, tu angka lapelape; sosoi ma nasida bongot, asa haru gok jabungku!

²⁴ Ai hudok ma di hamu: Na so tupa daion ni nanggo sada sian angka na ginokkon hian sipanganon na hupauli i.

²⁵ (IV.) Alai torop do halak na mandongani Ibana. Jadi humusor ma Ibana, ninna ma mandok nasida:

²⁶ Ganup halak na ro tu Ahu, ndang tarbahen gabe siseanku, ia so dihasogohon ibana amana, inana, na niolina, anakonna, hahaanggina dohot angka ibotona, ro di hosana sandiri.

²⁷ Ndang tarbahen gabe siseanku halak, na so manuhuk silang na tu ibana, laho mangihuthon Ahu!

²⁸ Ai ise hamu na giot pajongjong palaspalas, na so jumolo hundul mangetongi sipalahoonna tusi, manang na tuk laho patulushon?

²⁹Unang dipauli jolo ojahanna, hape ndang tuk gogona pasahathonsa, gabe surahan ni sude halak na marnidasa ibana.

³⁰Dohononnasida ma: Dipungka halak on do pajongjongkon, hape ndang adong bahenonna pasunhon.

³¹Ise raja na borhat marmusu mangalo donganna raja, na so jumolo hundul mamingkiri, manang na tardompakkonsa mardongan saloksa soldadu alona i, na ro manahopi ibana mardongan dua loksa.

³²Alai anggo so tarbahen i, suruonna ma pangulu, binsan holang dope musu i, mangido pardamean.

³³Hamu pe, ndang tarbahen agia ise hamu gabe siseanku, anggo so tartadingkonsa nasa na di ibana.

³⁴Hasea do sira i; alai anggo gabe hambar sira i, aha ma paansimhon i?

³⁵So manang marguna i tu hauma, manang tu tangkal pe; bolongkononhon nama i! Hamu parpinggol na marbinege, pinggol hamu ma i!

15¹(I.) Dung i dipasolhot torop angka sijalo beo dohot sipardosa dirina tu Ibana, laho tumangihon hatana.

²Jadi marmungutmungut ma angka Parise dohot sibotosurat; ia hatanasida: Dijangkon On do angka pardosa, pola sapanganan Ibana dohot nasida.

³Gabe dihatahon Ibana ma umpama on tu nasida:

⁴Ise hamu sahalak parbirubiru saratus, anggo tardempar sada sian i, na so tuminggalhon na siapulu sia i di ladang, laho mangalului na so tarida i, paima jumpangsa?

⁵Ia dung dapotsa, diampehon ma tu abarana sian las ni rohana.

⁶Jadi dung sahat ibana tu jabuna, dipapungu ma alealena dohot hombar hundulna, didok ma tu nasida: Marlas ni roha ma hamu rap dohot ahu, ala jumpang ahu birubirungku naung mago i!

⁷Hudok ma tu hamu: Suman tusi do gumodang las ni roha di banua ginjang mida sipardosa sahalak, na olo paubahon rohana, asa mida siapulu sia partigor, na so pola paubahon rohanasida.

⁸(II.) Adong ma ulaning parompuan na marhepeng sampulu hupang; anggo mago sada sian i, na so pagalakkon palito jala manapui bagasna, mangalului tangkas hupang na mago i, paima jumpangsa?

⁹Ia dung jumpangsa, dipapungu ma angka alealena dohot hombar hundulna mandok: Marlas ni roha ma hamu rap dohot ahu, ala naung jumpang ahu hupangku na mago i.

¹⁰Hudok ma tu hamu: Suman tusi do masa las ni roha di jolo ni angka surusuruan ni Debata mida sahalak sipardosa na paubahon rohana.

¹¹Jala ninna ma muse: Adong ma dua anak ni na sahalak.

¹²Gabe didok sianggian i ma mandok amana: Amang, lehon tu ahu sinamot, manang sadia tohaphi! Jala disagihon ma tu nasida panamotan i.

¹³Ndang pola piga dan nari, dipapungu sianggian i ma saluhutna, dung i laho ma tu luat na dao; disi ma dipansuasaehon sinamotna paolooloi hisapna.

¹⁴Dung dipasuda saluhutna i, masa ma haleon potir di na saluat i, jadi dohot ma ibana mamungka rapar.

¹⁵Jadi laho ma ibana mahiandu tu sada halak pangisi ni luat i, gabe disuru ma ibana tu ladangna, marmahan angka babina.

¹⁶Disangkapi rohana do manggohi butuhana langkat i, indahan ni babi i; alai ndang adong na mangalehonsa tu ibana.

¹⁷Dung i dipasuang ma rohana tu bagasan, ninna ma: Torop ni halak digaji damang, angka na lobian di indahan; anggo ahu mate ma anturaparon dison!

¹⁸Hehe nama ahu laho mandapothon damang; dohononku ma tu ibana: Ale amang, na mardosa do ahu tu banua ginjang nang dompak ho!

¹⁹Ndang tama be ahu goaron anakmu; bahen ma ahu songon anak gajianmu sada!

²⁰Jadi hehe ma ibana manopot amana. Alai dao dope ibana, nunga ditatap amana ibana; jadi asi ma roha ni i marnida ibana, hatop ma ditomu, dihaol jala diumma.

²¹ Gabe ninna anak i ma mandok ibana:
Amang, na mardosa do ahu tu banua ginjang
nang dompak ho; ndang tama be ahu goaron
anakmu!

²² Alai ninna ama i ma mandok naposona:
Haru, boan hamu ma ulos na dumenggan,
salini hamu ma ibana; tintin ma lehon hamu
tu tanganna dohot sipatu tu patna!

²³ Jala boan hamu ma anak ni lombu na
pinamokmok i; potong hamu ma i, naeng
mangan hita marlas ni roha.

²⁴ Ai naung mate do anakkon gabe mangolu;
naung mago ibana, gabe jumpang muse. Jadi
mamungka marlas ni roha ma nasida.

²⁵ Alai di ladang do anggo anakna sihahaan
i. Jadi di na ro ibana dumonok tu bagas i,
dibege ma endeende dohot parhinaloan.

²⁶ Gabe dijou ma sahalak naposo, dipamanat
ma, manang dia na masa i.

²⁷ Jala ninna i ma mandok ibana: Nunga ro
anggim; jadi dipotong amangmu do anak
ni lombu na pinamokmok i, ala hipas ibana
mulak.

²⁸ Alai pangarimason ma ibana, ndang
olo bongot tu jabu; gabe ruar ma amana,
mangapoi ibana.

²⁹ Alai ninna ma mangalusi amana i: Na sai
leleng hupaolooloi ho, ndang dung hulaosi
patikmu. Nandang hea dilehon ho hambing sada
tu ahu, asa marlas ni roha ahu dohot angka
donganki.

³⁰Hape disi ro anakmi, na mamondut sinamotmi rap dohot boruboru na jahat, gabe diseat ho do di ibana anak ni lombu na pinamokmok i!

³¹Alai didok ma tu ibana: Anaha, tongtong do ho rap dohot ahu jala di ho do sasude na di ahu i.

³²Alai patut do pamasaon las ni roha dohot pariaiaon! Ai naung mate do anggimon, gabe mangolu; jala naung mago do ibana, gabe jumpang!

16¹(I.) Laos didok Ibana ma tu siseanna i: Adong ma sada halak na mora na marjuara bagas. Jadi tarbortik ma tu ibana, dipansuasaehon juara bagas i artana.

²Gabe dijou ma ibana, ninna ma mandok ibana: Dia do i na hubege taringot tu ho? Patuduhon ma paretongan ni hajuaraonmi; ai ndang tarbahen ho be leat ni juara bagas!

³Jadi marhusari ma juara bagas i: Dia nama bahenonku, ai buaton ni tuanki nama sian ahu hajuaraonki. Mamangkur, ndang adong gogongku; manehenehe, maila ahu.

⁴On ma tahe sibahenonku di rohangku, asa dijangkon nasida ahu tu jabunasida, ia dung dipaijur ahu sian hajuaraonki:

⁵Jadi sadasada ma dijou nasa parsingiran ni indukna i tu jolona, didok ma tu na parjolo ro i: Sadia sigararonmi tu tuanta?

⁶Alusna: Saratus gunsi miak. Gabe ninna ma mandok ibana: Alap ma suratmi, dung i hundul ma ho manurathon hatop limapulu!

⁷Tu na asing muse didok: Ia ho, sadia do sigararonmi? Saratus tuhukan eme! Gabe didok tu ibana: Alap ma suratmi, dung i surathon ma: Ualupulu!

⁸Jadi dipuji na mora i ma juara bagas na geduk i, ala bisuk pambahenna i. Ai umbisuk do anak portibi on asa anak hatiuron i mangangkupi donganna saroha.

⁹Ahu pe, hudok ma di hamu: Lului hamu ma di hamu aleale marhitehite Mammon na geduk i; asa ia dung suda i, gabe dijangkon ma hamu tu bagasan angka parmianan sogot.

¹⁰Ia haposan halak di na ummotik, haposan ma ibana nang di na godang: Langgo geduk ibana di na ummotik, geduk ma nang di na godang.

¹¹Asa molo so haposan hamu mangaradoti Mammon na geduk i, ise ma antong pasahathon tu hamu arta na tutu i?

¹²Jala molo so haposan taringot tu ugasan ni na leban, ise ma olo mangalehon tu hamu na tu hamu hian!

¹³Ndang haoloan sada anak somang dua induk: Sai hosomanna do na sada, haholonganna do na sada nari; hombaranna do na sada, toisanna do na sada nari. Ndang haoloan hamu Debata rap dohot Mammon i!

¹⁴Alai sude hata ondeng dibege halak Parise, angka na impolan di perak; jala manungarnungar ma nasida dompak Ibana.

¹⁵Gabe ninna Ibana ma mandok nasida: langgo hamu tutu, dipintori hamu do dirimuna di jolo ni halak; alai ditanda Debata do rohamuna. Ai na timbul di roha ni jolma, i do dihagigihon Debata.

¹⁶Intap si Johannes do patik i dohot angka panurirang i. Olat ni i ma dibaritahon harajaon ni Debata, jala saluhutna do mambahen gogo tusi.

¹⁷Alai ummomo do salpu langit dohot tano, sian na gabe bolong sada gurit ni patik i.

¹⁸Pangalangkup do ganup na paluahon niolina, gabe dioli na asing; pangalangkup do nang na mambuat na pinalua ni baoana i.

¹⁹(II.) Asa adong ma sada halak na mora, na marabithon surta na rara dohot haen bontar na lamot; ariari do ibana marlas ni roha godang.

²⁰Alai adong ma sahalak na pogos, na margoar si Lasarus, peakpeak di jolo pintu ni na mora i; gok baro do dagingna.

²¹Dipangido rohana do manganhon ebaeba na sian panganan ni na mora i; alai ro ma biang mandilati barona i.

²²Dung i mate ma na pogos i, gabe diboan angka surusuruan ma ibana tu ampuan ni si Abraham. Laos mate do nang na mora i, dung i ditanom.

²³Jadi sian banua toru i ma ibana manaili tu ginjang, uju di na bernit i ibana, jala ditatap ma si Abraham sian na dao jala si Lasarus di ampuanna i.

²⁴Dung i joujou ma ibana, ninna ma: Ompung Abraham! Asi roham mida ahu: Suru ma si Lasarus manornophon ujung ni jarijarina tu aek, palamohon dilangku, ai bernit do huahap di api on.

²⁵Alus ni si Abraham: Ingot, anaha, naung dijalo ho na denggan, uju di ngolum; ia si Lasarus na porsuk do. Anggo nuaeng, apulon do ibana dison; alai mangae na porsuk nama ia ho.

²⁶Jala angkup ni i muse, dijadihon do lung na bagas holangholangta; asa ndang bolas taripar angka na giot manorusi sian on tu hamu, jala ndang tarbahen na disini manopot hami tuson.

²⁷Ro muse hatana: Molo boti, mangido ma ahu tu ho, ompung, suruonmu ibana tu bagas ni damang.

²⁸Ai lima nari do hahaanggingku; naeng dihatindangkan tu nasida, unang gabe dohot nasida ro tu parhansitan on.

²⁹Alai ninna si Abraham ma: Adong do di nasida surat ni si Musa dohot angka panurirang; angka i ma ditangihon!

³⁰Gabe ninna ma: Ndang i, ompung Abraham; alai aut ni adong sahalak sian

angka naung mate ro mandapothon nasida,
paubaonnasida ma rohanasida.

³¹ Alai dialusi ma: Anggo so ditangihon
nasida si Musa dohot angka panurirang,
ndang tagamon mangoloi nasida, nang adong
na hehe sian angka na mate.

17 ¹ (I.) Alai didok Ibana ma tu siseanna
i: Nandang tarbahen so ro angka gasip;
alai marjea ma na parohonsa!

² Dengganan do di ibana ginantungkon
losung batu tu rungkungna jala nilonongkon
ibana tu laut, unang digasipi sahalak sian
angka na metmet on!

³ Jamoti hamu ma dirimuna! Anggo dung
mardosa donganmu, podai ibana; jadi molo
dipauba rohana, sesa ma dosana i!

⁴ Jala molo tung pitu hali di na sada ari
mardosa ibana dompak ho, jala pitu hali
ibana mulahulak tu jolom mandok: Jora ma
ahu, sesaonmu do!

⁵ Dung i ninna angka apostel i ma mandok
Tuhan i: Tambai ma haporseaonnami!

⁶ Alai ninna Tuhan i ma: Molo adong di hamu
haporseaon na sabatu ni siarum, tardok
hamu do tu hau galagala an: Maborgat ma
ho suanhon ma ho tu laut!, gabe oloanna do
hamu!

⁷ Alai ise sian hamu paranak somang na
maninggala manang marmahan, tagamon
ma dohononmuna tu ibana, jumpa muli sian
hauma: Haru tu on ma ho hundul mangan?

⁸Nda dohononmuna ma mandok ibana: Pature ma sipanganonki, marhohop ma ho, mangkobasi di ahu, asa mangan minum ahu; dung pe i, asa mangan dohot minum ho!

⁹Tung dohononmu ma mauiate tu anak somangmu, ala dipasaut na niaturhonmu?

¹⁰Songon i do nang hamu; molo dung diula hamu saluhut na nidokkonna i tu hamu, dok hamu ma: Naposo na so hasea do hami; intap ulaon na patut do huula hami.

¹¹(II.) Uju mardalan Ibana dompak Jerusalem, dibolus ma sian tongatonga ni luat Samaria dohot Galilea.

¹²Laho bongot tu sada huta, pajumpang ma Ibana dohot sampulu halak na huliton, na jongjong mandaodao.

¹³Dipagogo nasida ma soaranasida, angka ninna ma: Jesus, Guru! Asi ma roham di hami.

¹⁴Jadi ninna Ibana ma marnidasas: Laho ma hamu patuduhon dirimuna tu angka malim! Jala di na laho i nasida, gabe ias ma nasida.

¹⁵Alai mulak do sahalak sian nasida, dung diida, naung gabe malum ibana; dipagogo ma soarana mamuji Debata.

¹⁶Dipatungkap do dirina tu jolo ni Jesus mandok mauiate. Jala halak Samaria do i.

¹⁷Alai ninna Jesus ma mangalusi: Nda sampulu nasida naung gabe ias? Didia do na sia nari?

¹⁸Ndang adong jumpang hape, na olo mulak pasangaphon Debata, dungkon ni halak dagang on?

¹⁹Laos ninna ma mandok ibana: Hehe ma ho, laho ma! Haporseaonmi do paluahon ho!

²⁰(III.) Alai disungkun angka Parise do Ibana: Andigan ma songgop harajaon ni Debata? Gabe dialusi ma nasida, ninna ma: Apala gumortap idaon harajaon ni Debata di harorona i.

²¹Jala ndang tardok: Ndi on do! Manang: Ndi an! Ai tung di tongatongamuna do harajaon ni Debata.

²²Dung i ninna ma mandok siseanna: Na ro ma angka ari, malungun ma rohamuna disi, naeng idaonmuna sada ari ni Anak ni jolma i; alai ndang idaonmuna i.

²³Jala dohononna ma tu hamu: Dison! Disan do i! Unang topot hamu tusi, unang ihuthon hamu!

²⁴Ai songon hilap na sumiksak, laho manorangi sian desa na sada ro di tondongkonna i, suman tusi do pangalho ni Anak ni jolma i di arina i.

²⁵Alai ingkon jumolo lan taononna; bolongkonon ni na sansundut on do Ibana.

²⁶Songon na masa uju di tingki ni si Noak i, suman tusi do sogot di angka ari ni Anak ni jolma i:

²⁷Na mangan minum do nasida, mangoli jala pabolihonsa sahat ro di ari habobongot ni

si Noak i tubagasan parau i; jadi ro ma aek na sumar i mangagohon nasida saluhutna.

²⁸Songon na masa di angka ari ni si Lot: Mangan minum nasida, manuhor manggadis, manuan jala pauli bagas.

²⁹Alai di ari halalaho ni si Lot sian huta Sodom turun ma udan api dohot barerang sian ginjang, mangagohon nasida saluhutna.

³⁰Songon i ma masa di na sadari i, di na gabe patar Anak ni jolma i.

³¹Ia halak na di bilut parginjang ni jabuna di na sadari i, jala di jabu i ugasanna, unang ma dialap i, di na mijur ibana; jala halak na di ladang, laos songon i: Unang pola muli ibana!

³²Ingot hamu ma nioli ni si Lot i!

³³Agoan hosa ma na naeng paluahon hosana; alai na agoan hosa, i do na pangoluhonsa.

³⁴Hudok ma di hamu: Di na saborngin i dua halak ma sapodoman; na sada do jangkononna, na sada nari tulahonna.

³⁵Rap manduda ma dua parompuan; na sada do jangkononna, na sada nari tulahonna.

³⁶Rap mangula hauma ma dua halak; na sada do jangkononna, na sada nari tulahonna.

³⁷Jadi ninna nasida ma mangalusi Ibana: Didia ma i, Tuhan? Gabe didok ma tu nasida: Ia disi bangke, laos tusi do marumbal angka lali!

18¹ (I.) Dung i dihatahon ma tu nasida umpama sada, paboa ingkon tongtong nasida martangiang, na so tupa lemba.

² On do hatana: Adong ma di na sahuta panguhum sada; ndang dihabuari Debata jala ndang dipardulihonjolma.

³ Alai adong ma di huta i parompuan na mabalu, na ro manopot ibana mandok: Pintori ahu maralohon alongki!

⁴ Jadi leleng ndang ringkot rohana. Alai ninna ma muse di bagasan rohana: Tutu do, ndang huhabuari Debata jala ndang parduli ahu dijolma.

⁵ Alai hupintori nama na mabalu on, ala dinengnengi ahu, atik beha ro ibana maon muse manggariangi ahu.

⁶ Dung i didok Tuhan i ma: Tangihon hamu ma pandok ni panguhum na geduk i!

⁷ Ia Debata, tung so pintoranna ma angka na pinillitna, angka na manjou Ibana arian dohot borngin? Tung pangerngeronna ma di nasida?

⁸ Hudok ma di hamu: Magira ma pintoranna nasida! Alai tagamon jumpang Anak nijolma i ma haporseaon di tano on di harorona i?

⁹ (II.) Alai dihatahon ma umpama sada taringot tu halak na mangkaposi dirina, mandok na tigor nasida, angka na marhu, ni roha di dongan, ninna ma:

¹⁰ Adong ma dua halak na nangkok tu joro i martangiang; halak Parise do na sada, sijalo beo na sada nari.

¹¹ Jadi dirgak ma Parise i jongjong; songon on ma tangiangna di bagasan rohana: Mauliate ma ahu tu Ho, ale Debata, ala so dos ahu dohot halak na leban, angka panamun, pargeduk, pangalangkup manang songon sijalo beo an.

¹² Dua hali saminggu ahu marpuasa jala huparsampulu do saluhutna na huomo.

¹³ Langgo halak sijalo beo i, mandaodao do ibana jongjong; gari manaili dompak ginjang, ndang barani. Alai ditompuk ma andorana huhut mandok: Asi roham, ale Debata, di ahu pardosa on!

¹⁴ Hudok ma tu hamu: Umpintor do on laho muli asa na sada an: Ai sipaoruon do ganup na patimbo dirina; alai na paoru dirina, i do sipatimboon!

¹⁵ (III.) Jadi dohot do dakdanak diboan tu jolona, asa jamaonna nasida; alai marnida i angka sisean i, dipinsang ma nasida.

¹⁶ Alai dijou Jesus ma nasida, laos ninna ma: Loas hamu ma ro angka dakdanak i sahat tu Ahu; unang orai hamu nasida, ai di angka sisongon i do harajaon ni Debata!

¹⁷ Situtu do hatangkon tu hamu: Na so manjalo harajaon ni Debata songon dakdanak, ndang saut bongot tusi.

¹⁸ (IV.) Dung i disungkun sahalak sintua ma Ibana, ninna ma: O Guru, na denggan roha! Dia do sipatupaonku, asa hutean hangoluan na salelenglelengna?

¹⁹Gabe ninna Jesus ma mandok ibana:
Boasa digoar ho Ahu na denggan roha? Ndang
adong na denggan roha, dungkon ni sasada
Debata!

²⁰Angka patik i diboto ho do: "Unang
ho mangalangkup! Unang ho mambunu!
Unang ho manangko! Unang ho olo
mangkatindangkon na so tutu! Ingkon
pasangaponmu amangmu dohot inangmu!"

²¹Alai ninna halak i ma: Sasudena i huradoti
do sian sietehetehonku dope.

²²Umbege i Jesus, ninna ma mandok ibana:
Sada nama na hurang di ho: Gadis ma nasa
na di ho, parlehon ma i tu angka na pogos,
gabe mararta ma ho di banua ginjaang. Dung i
ro ma ho mangihuthon Ahu!

²³Alai habot do rohana umbegesa ai na
mora jong do ibana.

²⁴Alai dibereng Jesus ma ibana, laos didok:
Maolna i bongot angka na mora tu bagasan
harajaon ni Debata!

²⁵Gumabur do boluson ni gaja pinggol
ni jarum, unang halak na mora bongot tu
bagasan harajaon ni Debata!

²⁶Gabe didok angka na umbegesa: Molo
boti, ise ma tarbahen malua?

²⁷Alai ninna Ibana ma: Na so tarpatupa
jolma, tarpatupa Debata do!

²⁸Dung i ninna si Petrus ma: Hutinggalhon
hami do na di hami, mangihuthon Ho.

²⁹Gabe didok Ibana ma tu nasida: Na tutu do hatangkon na tu hamu: Nasa na tumadingkon jabuna, manang na niolina, manang hahaanggina, manang natorasna, manang anakonna pe ala ni harajaon ni Debata,

³⁰ingkon silompit do jaloonna i di hasiangan on, angkup ni i hangoluan salelenglelengna di hasiangan sogot.

³¹(V.) Alai diarahon ma na sampuludua i, ninna ma mandok nasida: Na nangkok ma hita tu Jerusalem jala tulus ma tu Anak ni jolma i sasudena, na tarsurat di angka panurirang i.

³²Ai pasahaton ma Ibana tu angka parbegu, gabe insahanna, leaanna jala tijuranna ma Ibana.

³³Linsinganna jala pusaonna do Ibana; dung i mulak mangolu ma Ibana di ari patoluhon.

³⁴Ndang diantusi nasida agia otik sian i; na buni do hata i sian rohanasida, ndang diboto nasida na hinatahonna i.

³⁵(VI.) Dung i mandapothon huta Jeriko, adong ma sada halak na mapitung na hundulhundul di dalan i mangidoido.

³⁶Umbege natorop na mamolus i, dipatangkas halak i ma, manang dia na masa i.

³⁷Gabe dibaritahon halak ma tu ibana, Jesus sian Nasaret i mamolus.

³⁸Jadi joujou ma ibana mandok: O Jesus, Anak ni si Daud, asi roham di ahu!

³⁹Hona hata ma ibana dibahen angka na parjolo i, asa sip ibana nian. Alai lam digogo ma manjoujouhon: O Anak ni si Daud, asi roham di ahu!

⁴⁰Dung i sulon ma Jesus, didokkon ma togihononhon ibana tu jolona. Jadi dung donok, disungkun ma ibana:

⁴¹Aha dipangido roham, bahenonku tu ho? Jadi didok ma: Marnida ma nian matangku, ale Tuhan!

⁴²Gabe didok Jesus ma tu ibana: Marnida ma ho! Haporseaonmi do pamalum ho!

⁴³Jadi pintor marnida ma matana, laos diihuthon Jesus, huhut mamujimuji Debata. Jala sude natorop na marnidasas mamuji Debata.

19¹(I.) Dung i dibongoti, laos dibolus Ibana ma huta Jeriko.

²Jadi adong ma disi sahalak, induk ni angka sijalo beo, na margoar Sakeus; na mora do ibana.

³Dipangido rohana, naeng idaonna rupa ni Jesus; alai ndang tarbahensa siala natorop i, ai pardaging na metmet ibana.

⁴Gabe marlojong ibana tu jolo, dipanaek ma hau galagala sada, anggiat diida Ibana, ai i do dalan sibolusonna.

⁵Dung sahat tusi, mamereng ma Jesus tu ginjang, laos ninna ma mandok ibana: O

Sakeus, hatop ma ho mijur, ai ingkon sorang
Ahu tu jabumi sadari on!

⁶Jadi hatop ma ibana mijur; las rohana
manjangkon Jesus.

⁷Marnida i marungutungut ma nasida sude,
mandok: Na sorang do Ibana hape tu halak
sipardosa!

⁸Gabe ro ma si Sakeus, didok ma tu Tuhan
i: Olo, Tuhan, satonga ni angka artangki ma
hulehon tu angka na pogos; jala ia adong na
huangati, siopat lompit ma hupaulak.

⁹Jadi didok Jesus ma tu ibana: Dapotan tua
do pangisi ni jabu on sadari on, ai pinompar
ni si Abraham do nang ibana.

¹⁰Ai na ro do Anak nijolma i mangalului jala
paluahon na mago.

¹¹(II.) Jadi dibege nasida ma i, gabe
didatdati Ibana marumpama, ala naung
donok tu huta Jerusalem; jala dirimpu nasida,
manigor sipapataron ma harajaon ni Debata.

¹²Asa didok ma: Naeng borhat ma sahalak
na raja tu luat na dao, manjalo harajaon;
dung pe i, asa mulak muse.

¹³Jadi dijou ma naposona sampulu halak,
dilehon ma tu nasida sampulu bagian, laos
ninna ma mandok nasida: Tigatigahon hamu
ma i, paima ro ahu muse!

¹⁴Alai hosom do roha ni angka na nirajaanna
mida ibana, disuru nasida ma suruannasida
sian pudina, paboahon: Ndang olo hami
rajaan ni i!

¹⁵Asa dung dijalo harajaon i, ro ma ibana mulak, jala disuru ma na manjou angka naposona, naung manjalo hepeng i, asa diboto na niomohonna be.

¹⁶Jadi ro ma na parjolo i, ninna ma: Tuan, sampulu bagian do diomo bagian na sian ho i.

¹⁷Gabe ninna ma mandok ibana: Taho ma i, ale naposo na denggan roha! Ala haposan ho di na otik situtu sampulu huta ma gomgomanmu!

¹⁸Dung i ro ma na paduahon i, ninna ma: Ia bagian na sian ho, tuan, lima bagian do diomo.

¹⁹Jala ninna ma nang tu ibana: Ia ho, lima huta ma gomgomanmu!

²⁰Jala ro ma na asing mandok: Na, bagianmon, tuan; hutungkus do i di saputanganku.

²¹Ai biar do rohangku mida Ho, ala na horas ho; dibuat ho do na so pineakkonmu, jala digotil ho do na so sinuanmu.

²²Gabe didok ma tu ibana: Mangihuthon pandokmi do uhumonku ho, naposo na jahat roha! Diboto ho do hape, ahu halak na horas, sibuat na so hupeakhon, sigotil na so husuan!

²³Boasa so dilehon ho antong hepengki tu sianahi hepeng, asa hutunggu rap dohot bungana di harorongkon?

²⁴Laos didok ma tu angka donganna: Buat hamu ma sian ibana bagianna i; lehon hamu ma i tu parbagian na sampulu i!

²⁵ Jadi ninna nasida ma mandok ibana: Alai nunga sampulu bagian di ibana, tuan!

²⁶ Hudok ma di hamu: Di ganup paradongan lehonon do; alai sibuaton do sian na so paradongan na di ibana hian.

²⁷ Alai ia musungki, na so olo rajaanku, boan hamu ma tuson; seseati hamu ma nasida di jolongkon!

²⁸ Jadi dung didok songon i, hehe ma Ibana laho nangkok tu Jerusalem.

²⁹ (III.) Dung i mandapothon huta Betpage dohot Betania, mardonokkon dolok i, na margoar dolok Jetun, disuruma siseanna dua halak.

³⁰ Ninna ma: Laho ma hamu tu huta na di jolomuna an; dung bongot hamu, jumpang hamu ma tambat disi anak ni halode, na so dung dihunduli halak; harhari jala boan hamu ma i tuson!

³¹ Jala molo adong na manungkun hamu: Boasa harharanmuna i?, dok hamu ma songon on: Ringkot do i di Tuhan i!

³² Dung i laho ma angka na sinuru i, jala jumpang nasida do songon na nidokna i tu nasida.

³³ Alai laho mangkarhari anak ni halode i nasida, didok angka nampunasa ma tu nasida: Boasa harharanmuna anak ni halode i?

³⁴ Jadi didok nasida ma: Na ringkot do i di Tuhan i!

³⁵Gabe diboan nasida ma i tu Jesus;
dipeakkon ma ulosnasida tu anak ni halode i
jadi dipahundul ma Jesus tu ginjangna.

³⁶Jala di na borhat i Ibana, dipahembang
nasida ma ulosnasida tu dalan i.

³⁷Alai mandapothon tuatan na di dolok
Jetun i, hinsa ma roha ni sandok pungan ni
sisean i, mamuji Debata, marsoara na gogo,
siala sude hagogoon naung niidanasida i.

³⁸Ia endenasida: Pinasupasu ma Raja i, na
ro marhitehite Goar ni Tuhan! Dame do di
surgo; hasangapon di ginjang!

³⁹Jala halak Parise i deba, na sian natorop
i, mandok tu ibana: Orai ma antong angka
siseanmi, Guru!

⁴⁰Jala ninna ma mangalusi: Hudok ma di
hamu: Aut mauhom nasida, joujou ma angka
batu!

⁴¹(IV.) Jala laho mandapothon huta i, tangis
ma Ibana marnidasas.

⁴²Ninna ma: Aut di arim on ma nian ditanda
ho na tau padamehon ho! Alai naung gabe
buni do i nuaeng sian matami.

⁴³Ai na ro ma muse angka ari manahopi ho;
hubu on ni musum ma ho disi, halianganna
jala sosahonna ma ho humaliang.

⁴⁴Jala panepneponna ma ho rap dohot
anakkonmu di tongatongami, jala ndang
pasombuonna nanggo dua batu martinditindi,
ala na so ditanda ho tingki panopoton na tu
ho.

⁴⁵ (V.) Dung i dibongoti Jesus ma joro i, dipabali ma sian i angka sipanggadis.

⁴⁶ Ninna ma mandok nasida: Na tarsurat do, bagas partangiangon do bagashu; hape gabe liang pandoboan do i dibahen hamu.

⁴⁷ Jala ariari do Ibana mangajari di joro i. Alai anggo angka sintua ni malim i dohot sibotosurat ro di angka panunggane i ni bangso i mangalului dalan mamusa Ibana.

⁴⁸ Alai ndang jumpang nasida dalan patupahonsa; ai sai marsilohot do roha ni natorop i saluhutna tu Ibana, tumangihon hatana.

20¹ (I.) Jala di na sadari uju i mangajari natorop i Ibana di joro i, mamaritahon barita na uli, gabe ro ma mandapothon Ibana angka malim dohot sibotosurat rap dohot angka panunggane i.

² Ninna nasida ma mandok Ibana: Paboa ma tu hami: Huaso dia do dipangasahon Ho mangula Ulaonmi? Ise do na mangalehon huaso i tu Ho?

³ Gabo dialusi ma nasida, ninna ma: Ahu pe, adong do na husungkun tu hamu; paboa hamu ma tu Ahu:

⁴ Ia pandidion ni si Johannes, sian ginjang do i manang sianjolma?

⁵ Alai marhusari ma nasida sama nasida, songon on: Ia ninta annon: Sian ginjang, dohononna ma; boasa so dihaporseai hamu ibana?

⁶Alai ia ninta: Sian jolma, dangguran ni sandok natorop i hita, ai gomos dihaporseai, panurirang do si Johannes i.

⁷Jadi dialusi nasida ma: Nandang huboto hami, manang sian dia i.

⁸Gabe didok Jesus tu nasida: Ahu pe, ndang paboaonku tu hamu, manang huaso dia hupangasahon di ulaonki.

⁹(II.) Jala dihatahon ma umpama on tu natorop i: Adong ma sada halak na pauli porlak anggurna, jadi dipasahat ma i tu angka pangula; dung i laho ma ibana marhutasada lelengleleng.

¹⁰Di tingkina i disuru ma naposona tu angka siula porlak anggur i, asa dilehon tu ibana gogo ni porlak anggur i deba. Alai dilombuti angka pangula i ibana, laos muli boti do ibana dipaulak.

¹¹Jadi disuru muse naposona na asing; alai nang i dilasahi jala dileai nasida do, laos songon i ibana disuru muli.

¹²Disuru muse dope na patoluhon; alai nang i dibugangi do jala dipabali.

¹³Dung i ninna nampuna porlak anggur i ma: Aha nama bahenonku? Anakku haholongan i ma suruonku; ra biar ma rohanasida mida ibana.

¹⁴Alai marnida ibana angka pangula i, masipandohan ma nasida, ninna ma: On do panean i! Tapusa ma ibana, asa di hita siteanonna i!

¹⁵ Jala dipabali nasida ma ibana tu balian ni porlak anggur i, laos dipusa ma. Aha nama bahenon ni nampuna porlak anggur i tu nasida?

¹⁶ Na ro ma ibana mambunu angka siula porlak anggur i, dung i pasahatonna ma porlak anggur i tu halak na asing. Alai umbege i, ninna nasida ma: Palias ma i!

¹⁷ Alai dinolnol Ibana ma nasida, huhut ma didok: Ai dia do lapatan ni na tarsurat songon on: "Ia batu na binolongkon ni angka pande bagas i, apala i do gabe batu parsuhisuhi?"

¹⁸ Marosak ma ganup na tinggang tu batu on, jala magopu ma ganup na tiningganganna.

¹⁹ Di na sangombas i dilului angka sibotosurat ro di sintua ni malim dalan manangkup Ibana; alai mabiar do nasida mida natorop i, ai diantusi be do, tu nasida do tinuju ni umpama ondeng.

²⁰ (III.) Jala dionggopi nasida do Ibana, disuru ma angka pangkahap, sipaulaula songon parroha na tigor, anggiat tarpadapot nasida Ibana di hatana, asa tarpasahatsa Ibana tu panggomgomi, tu huaso ni panguhum i.

²¹ Jadi disungkun nasida ma Ibana, ninna ma: O Guru, huboto hami, na tigor do pangkataionmu nang pamodaionmu, jala na so siida bohi Ho; sintong do tahe dipodahon Ho dalan ni Debata.

²²Na jadi do lehononta guguan tu Kesar i, manang na so jadi?

²³Alai torang diboto Ibana ansiansinasida i, gabe ninna ma mandok nasida:

²⁴Patuduhon hamu ma tu Ahu rupia sada! Gombaran dohot surat ni ise do ndi on? Didok nasida ma: Gombaran ni Kesar i do.

²⁵Jadi ninna ma mandok nasida: Molo boti, lehon hamu ma tu Kesar na sian Kesar i, jala tu Debata na sian Debata!

²⁶Asa ndang tuk nasida padapot Ibana di hatana i di jolo ni natorop i, jala longang do rohanasida dibahen alusna; laos hohom nama nasida.

²⁷(IV.) Gabe ro ma deba sian Saduse na so marhatutuhon, adong haheheon ni na mate, manungkun Ibana.

²⁸Ninna nasida ma: Gurunami, disurathon si Musa di hita: Molo mate sihahaan, tuminggalhon parompuan so martinading, ingkon dihabia anggina do dongan saripe ni hahana i, pajongjongkon pomparan di ibana.

²⁹Asa adong ma pitu halak na marhahamaranggi. Mangoli ma sihahaan, dung i mate ma ibana so martinading.

³⁰Dihabia paidua ma boruboru i.

³¹Dung i paitolu i muse; gabe songon i do torus na pitu i, ndang martinading di hamamatenasida be.

³²Umpudi sian nasida mate nang parompuan i.

³³ Onpe, di haheheon i, ise sian nasida nampuna nioli disi? Ai nasida na pitu i do marniolihonsa.

³⁴ Gabe didok Jesus ma tu nasida: Anak ni hasiangan on do mangoli jala pabolihonsa.

³⁵ Alai angka naung gabe tau tu hasiangan sogot dohot tu haheheon na sian angka na mate, ndang mangoli manang pabolihonsa pe.

³⁶ Ai ndang tarbahensa be mate, ai suman tu surusuruan i jala anak ni Debata do nasida, ia dung gabe partohap di haheheon i.

³⁷ Alai paboa, sipaheheon sogot angka naung mate, nang si Musa ditaringoti do i, uju di ramba na sampulguk i, ai digoar do disi Tuhan i "Debata ni si Abraham, Debata ni si Isak jala Debata ni si Jakkob."

³⁸ Nda tung Debata ni angka na mate Ibana, Debata ni angka na mangolu do; ai saluhut do nasida mangolu di Ibana.

³⁹ Dung i ninna deba sian angka sibotosurat ma mangalusi: Denggan do na nidokmi, Guru!

⁴⁰ Ai ndang barani be nasida manungkun manang dia pe tu Ibana.

⁴¹ (V.) Gabe ninna Jesus ma mandok nasida: Marhua ma didok, Anak ni si Daud do Kristus i?

⁴² Ai didok si Daud sandiri di buku Psalmen: "Ninna Tuhan i do mandok Tuhanku: Hundul ma Ho tu Siamunhon,

⁴³paima hupeakhon angka musum bahen sidegedegean ni patmu!"

⁴⁴Asa digoar si Daud do Ibana Tuhan, beha ma Ibana Anakna?

⁴⁵Alai uju na manangi natorop i saluhutna, ninna Ibana ma mandok siseanna:

⁴⁶Jaga ma hamu mida angka sibotosurat, ai las do rohanasida madangadang, marbaju na ganjang, asa ditabi halak nasida di angka onan; jala ringkot do rohanasida juguk tu bangku jolojolo di angka parguruan dohot tu hundulan na sumangap di parpestaan.

⁴⁷Dipolgak nasida do bagas ni na mabalu; mangansi do nasida martangiang lelengleleng. Uhum na dumokdok do jaloonnasida muse.

21 ¹(I.) Dung i mamereng ma Ibana, gabe diida ma angka na mora na mandabuhon silehonlehonna tu bagasan poti parasian.

²Alai diida ma boruboru na mabalu sada, na pogos, na mandabuhon dua rimis.

³Gabe didok Ibana ma: Situtu do hatangkon tu hamu: Gumodang do na nidabuhon ni na mabalu na pogos an sian saluhutna i.

⁴Ai sasude nasida sian lobilobinasida be do didabuhon; alai ia parompuan an, sian pogosna i do didabuhon sasude na pineopna i.

⁵(II.) Dung i ditaringoti na deba ma joro i, naung dipajagar dohot batu angka na uli dohot silua ni halak, jala ninna Ibana ma:

⁶Diida hamu pe i sude, na ro ma angka arina, ndang tinggal disi dua batu martinditindi na so gargaronna.

⁷Jadi disungkun nasida ma Ibana, ninna ma: Andigan ma masa i, Guru; jala dia ma tandana, paboa laho songgop ma i?

⁸Alai ninna Ibana ma: Jaga ma hamu, so tung lilu hamu! Ai lan do na ro sogot manoluk Goarhu, angka na mandok: Ahu do! Nunga dapot tingkina i! Unang ma ihuthon hamu nasida!

⁹Alai molo dibege hamu barita ni angka hamusuon dohot hagunturon, unang ma hamu tarsonggot; ai ndang tarbahen so songgop i jumolo. Alai ndang dope manigor dapot ajalna i.

¹⁰Laos didok ma tu nasida: Na hehe do sogot bangso maralohon bangso, harajaon maralohon harajaon.

¹¹Masa ma lalo angka na bolon, angka sahiti bala marluatluat nang haleon, tarida ma angka panonggoti ro di tanda na balga sian langit.

¹²Alai tagan so masa dope angka i, tangkupon jala leleannasida do hamu; pasahatonna do hamu tu angka parguruan dohot hurungan, gabe togihononna hamu tu jolo ni raja dohot panguhum humongkop Goarhu.

¹³Laos i ma gabe dalamuna, mangkatindangkon Ahu.

¹⁴On ma parateatehon hamu: Na so pola sarihononmuna hian sitariashononmuna disi.

¹⁵Ai Ahu mangalehon tu hamu soara dohot habisuhon, na so bolas aloon nang alusan ni angka musumuna.

¹⁶Alai nang natorasmuna, hahaanggi, sisolhot ro di alealemuna do pasahathon hamu; jala pamateonna deba sian hamu.

¹⁷Hosoman ni saluhut jolma do hamu ala Goarhu.

¹⁸Jala na so tupa mago sada obuk sian ulumuna.

¹⁹Marhitehite benget ni roha do malua hosamuna.

²⁰Alai molo diida hamu huta Jerusalem i hinaliangan ni angka parangan, boto hamu ma, naung donok nama hasesegana.

²¹Maporus tu dolok i ma di tingki i angka na di Judea i; angka na di bagasan huta i haruar ma sian i, jala angka na di ladang i, unang ma bongot tu huta i.

²²Ai angka ari pamaloson ma i, asa songgop sasude na tarsurat i.

²³Marjea ma angka na gabegabean dohot angka panarusan di angka ari i; ai songgop ma hagogotan bolon tu tano on jala harimason tu bangso on.

²⁴Rage ma nasida bahenon ni mata ni podang jala diihoti ma nasida mamboan tu saluhut angka bangso, gabe lotlotan ni halak

parbegu ma huta Jerusalem, paima gok angka tingki ni parbegu.

²⁵Dung i masa ma angka tanda di mata ni ari, di bulan dohot di angka bintang pe; jala hapusohan ma angka bangso di tano on jala bobonosan, bahenon ni gasak ni laut i dohot galumbangna.

²⁶Tarhatos ma jolma i dibahen hatahutonna dohot panagamon ni rohana di na naeng masa tu liat portibi on; ai humuntal ma angka hagagoon ni parlangitan.

²⁷Dung i idaonnasida ma Anak ni jolma i ro marhitehon ombun mantat huaso dohot hasangapon godang.

²⁸Alai molo mamungka masa angka i, dirgak ma hamu; pasindak hamu ma ulumuna, ai nunga jonok haluaonmuna.

²⁹Jala dihatahon ma tu nasida umpama sada: Bereng hamu ma hau ara i dohot angka hau na asing!

³⁰Ia dung martunasi diida hamu, tandaonmuna do sian i, naung jonok partaonan las.

³¹Suang songon i, ia dung masa angka i diida hamu, boto hamu ma, naung donok harajaon ni Debata.

³²Situtu do hatangkon tu hamu: Na so tupa salpu na sabangso on, so jolo songgop saluhutna i!

³³Salpu pe sogot langit dohot tano on, anggo hatangki na so tupa salpu!

³⁴Alai jaga hamu ma dirimuna, unang sorat rohamuna binahen ni parminumon dohot parmabuhon dohot panarihon di hangoluan on, gabe tompu ditahopi ari i hamu songon tali rambang.

³⁵Ai hatop ma i songgop tu atas ni sude na maringan di atas tano on.

³⁶Alai dungo ma hamu tongtong mardongan tangiang, asa margogo hamu, pasiding saluhut na naeng masa i, laho jongjong di jolo ni Anak ni jolma i.

³⁷Di joro i do Ibana mangajari arianna i; alai bodarina i ruar Ibana, laho marborngin di dolok na margoar Jetun.

³⁸Jala sogot ma didapothon saluhut natorop i Ibana, tumangihon hatana di joro i.

22¹ (I.) Alai na jonok nama ari raya mangan roti na so niasoman, na margoar Paska.

²Jala sai dipingkiri angka sintua ni malim dohot angka sibotosurat dalan mamusa Ibana, ai dihabiari nasida do natorop i.

³Alai dibongoti sibolis i do si Judas na margoar Iskariot, sahalak sian na sampuludua i.

⁴Gabe laho ibana martuptup dohot angka sintua ni malim raphon angka panunggane, manang dia dalanna pasahathon Ibana tu nasida.

⁵Jadi sian las ni rohanasida marpadan ma nasida, mangalehon hepeng tu ibana.

⁶Dioloi si Judas ma i, jadi dilului ma tingki na une pasahathon Ibana, so sian pamotoan ni natorop i.

⁷(II.) Dung i jumpang ma arina mangan roti na so niasoman, laos disi do somal dipotong birubiru Paska.

⁸Jadi disuru Jesus ma si Petrus dohot si Johannes, ninna ma: Laho ma hamu paturehon birubiru Paska sipanganonta i.

⁹Gabe ninna nasida ma mandok Ibana: Tu dia ma dohononmu hami paturehonsa?

¹⁰Dung i ninna Ibana ma mandok nasida: Disi bongot hamu tu huta i, pajumpang ma hamu dohot sada halak sibohan partuaehan; ihuthon hamu ma ibana tu bagasan jabu na binongotanna.

¹¹Dok hamu ma tu nampuna bagas i: Tona ni Guru i tu ho: Didia do inganannami, asa mangan Paska i Ahu rap dohot angka siseanku?

¹²Dung i patuduhononna ma tu hamu bilut parginjang sada na lumbang, naung hinembangan; disi ma pature hamu!

¹³Jadi laho ma nasida; jumpang nasida ma songon na pinaboana i tu nasida, jala dipature ma Paska i.

¹⁴Asa dung dapot tingkina, hundul ma Ibana rap dohot angka apostel.

¹⁵Dung i ninna ma mandok nasida: Mansai masihol rohangku, naeng mangan birubiru

Paska on Ahu rap dohot hamu, tagan so songgop dope sitaononki.

¹⁶Ai hudok ma di hamu: Na so tupa panganonku be i, ia so dapot hagogokna i di harajaon ni Debata!

¹⁷Jala dibuat Ibana ma panginuman, dipasupasu ma, laos ninna ma: Buat hamu ma on, sagihon hamu ma i sama hamu!

¹⁸Ai hudok ma di hamu: Na so tupa be inumonku parbue ni hau anggur, paima songgop harajaon ni Debata!

¹⁹Jala dihindat ma roti, dipasupasu ma, diponggoli jala diparlehon ma tu nasida, huhut ma didok: Dagingku do on, na nilehon humongkop hamu; ula hamu ma i, bahen parningotan di Ahu!

²⁰Songon i do dihindat nang panginuman, dung sun nasida na mangan i, didok ma: Ia panginuman on, padan na imbaru do i, marhitehite mudarhu, na durus humongkop hamu!

²¹Tangan ni na manjehehon Ahu do hape rap dohot Ahu di atas meja on!

²²Tong do nian langka ni Anak ni jolma i, songon naung diaturhon tu Ibana; alai marjea do halak na manjehehon Ibana!

²³Gabe dipungka nasida ma masitangkasan, manang ise nasida ulaning na olo mangualahon i.

²⁴(III.) Jala tubu ma parbadaon di nasida, manang ise nasida rajumon na sumangap.

²⁵Gabe ninna Jesus ma mandok nasida:
Angka raja ni angka sipelebegu do
manggomgom, jala na ulibasa do digoar
angka na sangapnasida.

²⁶Alai unang ma songon i anggo di hamu! Na
sumangap na di hamu, gabe songon naposo,
jala na manguluhon suman ma tu pangoloi!

²⁷Ai ise do na sumangap, na hundul
marsipanganon manang na marhobas i? Nda
na hundul i? Alai di tongatongamuna do
anggo Ahu songon parhobas.

²⁸Alai hamu do na manahan di lambungku,
di na tarunjun i Ahu.

²⁹Anggo Ahu, huturpukhon pe tu hamu
Harajaon i, songon naung diturpukkon
Damang i tu Ahu.

³⁰Asa mangan jala minum hamu di mejangki
di harajaonki, mangkunduli habangsa laho
manguhumi halak Israel na sampuludua
marga i.

³¹O Simon, Simon nunga dipangido sibolis i,
naeng segeonna hamu songon dahanon.

³²Alai Ahu do manangiangkon ho, unang
mintop haporsaonmi. Jala dung mulak
sogot roham, pargogoi ma roha ni angka
hahaanggim!

³³Alai ninna si Petrus ma mandok Ibana:
Tuhan, na hobas do ahu mandongani Ho tu
hurungan, nang tu hamatean pe!

³⁴Alai ninna Ibana ma: Hudok ma tu ho,
Petrus: Ndang martatahuak manuk saborngin

on, so jolo tolu hali soadahononmu, na so tinandam Ahu.

³⁵Laos ninna ma mandok nasida: Uju husuru hamu, so marhajut, so marhandehande, so marsipatu pe, dung do hamu hurangan? Jadi didok nasida ma: Nandang dung!

³⁶Gabe ninna ma mandok nasida: Alai anggo nuaeng, na marhajut, diboan ma i, songon i nang handehande. Jala na so umpeop i, digadis ma mandarna, manuhor podang!

³⁷Ai hudok ma di hamu: Ingkon saut na tarsurat taringot tu Ahu na mandok: "Tarrajum do Ibana tu angka parjahat!" Ai nasa na taringot tu Ahu, jumpang ma nuaeng.

³⁸Gabe didok nasida ma: Tuhan, adong do dua podang dison. Jadi didok ma tu nasida: Sae ma i!

³⁹(IV.) Dung i laho ma Ibana tu balian, tu dolok Jetun, songon na somal; jala diihuthon angka siseanna Ibana.

⁴⁰Asa dung sahat Ibana tusi, ninna ma mandok nasida: Martangiang ma hamu, asa unang bongot hamu tu bagasan pangunjunan!

⁴¹Anggo Ibana dipapulik ma dirina sian nasida, arga tuk dangguron batu, marsinggang ma Ibana martangiang songon on:

⁴²Amang, aut olo ma Ho nian pasalpuhon siinumon on sian Ahu! Alai unang ma rohangku saut, roham ma!

⁴³Alai diida Ibana ma surusuruan sian banua ginjang i, na margogoihon Ibana.

⁴⁴Jala di parungkilonna i, lam digogo ma martangiang; jadi songon mudar na himpal do madekdek hodokna i tu tano.

⁴⁵Jala hehe ma Ibana sian na martangiang i, mandapothon siseanna; jadi tarpodom ma nasida didapot, dibahen arsak ni rohanasida.

⁴⁶Gabe ninna ma mandok nasida: Boasa ma tung modom hamu? Hehe ma hamu martangiang, asa unang hamu bongot tu pangunjunan!

⁴⁷Mandok i dope Ibana, nunga ro torop halak, niuluhon ni sada sian na sampuludua i, ia goarna si Judas, na manjonohi Jesus mangumma Ibana.

⁴⁸Alai ninna Jesus ma mandok ibana: O Judas, pangummaon do hape dibahen ho, pasahathon Anak ni jolma i?

⁴⁹Alai diida angka dongan ni Jesus ma na naeng masa i, gabe didok ma: Tuhan, tampulhononnami ma podang i?

⁵⁰Jala sahalak sian nasida manampul naposo ni sintua ni malim, gabe digotap pinggolna siamun.

⁵¹Alai ro ma alus ni Jesus: Sae ma i! Dijama ma pinggol i, dipamalum ma halak i.

⁵²Gabe ninna Jesus ma mandok angka sintua ni malim, angka sigomgom joro i dohot angka panungganei, naung manahopi

Ibana: Hira dompak halak panamun hamu ro, mantat podang dohot lombutlombut.

⁵³Ariari do Ahu rap dohot hamu di joro i; ndang dung dilaluhon hamu tanganmuna dompak Ahu. Alai on do tingkimuna dohot huaso ni haholomon i.

⁵⁴(V.) Dung ditangkup, diboan nasida ma Ibana manogihon tu bagasan jabu ni sintua ni malim i. Alai mandaodao ma si Petrus mangihuthon.

⁵⁵Dipagalak nasida ma api di pogu ni alaman i jala rap hundul ma disi, gabe ro ma si Petrus juguk tu tongatonganasida.

⁵⁶Dung i diida naposo boruboru sahalak ma ibana juguk mardonokkon api i, dinolnol ma ibana, ninna ma: Dongan ni Halak an do on, tahe!

⁵⁷Alai disoadahon do Jesus, didok ma: Nandang hutanda Ibana, inang!

⁵⁸Dung i satongkin nari, diida sahalak na asing ma ibana jala ninna ma: Sada sian nasida i do ho! Alai didok si Petrus ma: Nandang na tutu i, amang!

⁵⁹Dung salpu hirahira sajom, diondolhon sahalak na asing muse, mandok: Tongon do, dohot do halak on donganna najolo, jala halak Galilea do i.

⁶⁰Alai didok si Petrus ma: Nandang huboto na nidokmi, amang! Mandok i dope ibana, mamintor martatahuak ma manuk.

⁶¹ Jadi humusor ma Tuhan i, dibereng ma si Petrus, gabe diingot si Petrus ma hata ni Tuhan i, i ma na nidokna i tu ibana: Andorang so martatahuak manuk i annon, nunga tolu hali Ahu soadahononmu!

⁶² Jala ruar ma ibana, tumatangis gogogogo.

⁶³ Alai anggo angka baoa na maniop Jesus, dipauruuru jala dilasahi do Ibana.

⁶⁴ Dibulang nasida do Ibana gabe disungkun: Manurirangi ma Ho: Ise i na mamastap Ho?

⁶⁵ Jala lan dope na asing dihatahon nasida tu Ibana laho mangaleai.

⁶⁶ Jadi disi torang ari, marpungu ma raport ni sintua ni bangso i, i ma angka sintua ni malim rap dohot sibotosurat; ditogu nasida ma Ibana tu harungguannasida. Ninna nasida ma: Anggo Kristus i do Ho, paboa ma i di hami!

⁶⁷ Gabe ninna Ibana ma mandok nasida: Nang hupaboa i tu hamu, tong do so porsea hamu!

⁶⁸ Alai molo manungkun Ahu, ndang tagamon alusanmuna Ahu.

⁶⁹ Alai olat ni on ma hundul Anak ni jolma i tu siamun ni Hagagoon ni Debata.

⁷⁰ Gabe saluhut nasida mandok: Asa Anak ni Debata do Ho? Jadi didok Ibana ma tu nasida: Songon na nidokmuna: Ahu ma i tutu!

⁷¹ Dung i ninna nasida ma: Pola luluanta dope sitindangi? Ai nunga apala hita umbegesa dihatahon Ibana.

23¹ (I.) Dung i hehe ma saluhut nasida na pungu i, mamboan Ibana tu jolo ni si Latus.

²Dialuhon nasida ma Ibana, ninna ma: Na dapot hami do on pabalikbalikkon bangsonami jala mangorai mangalehon guguan tu Kesar i; dipandok, Raja Kristus do Ibana.

³Gabe disungkun si Latus ma Ibana: Ho do Raja ni Jahudi i? Jadi dialusi ma ibana, ninna ma: Songon na nidokmi ma tutu!

⁴Dung i ninna si Latus ma mandok angka sintua ni malim dohot natorop i: Ndang adong dapot ahu sala ni Halak on!

⁵Alai lam digogohon nasida do mandok: Digunturi Ibana do bangso i, ai sai mangajari Ibana di sandok tano Judea, mamungka sian Galilea sahat ro tuson.

⁶Alai umbege i si Latus, manungkun ma ibana, manang halak Galilea Ibana?

⁷Jala dung diboto, na sian gongoman ni si Herodes Ibana, disuru ma Ibana tujolo ni si Herodes, ai tongon do ibana di huta Jerusalem uju i.

⁸Marnida Jesus si Herodes i, las situtu ma rohana; ai nunga na nia lelengna, sai naeng idaonna Ibana, ala naung dibege baritana, jala diarop rohana, idaonna tanda sada sipatupaonna.

⁹Jadi godanggodang ma disungkunhon tu Ibana; alai ndang adong dialusi Jesus ibana.

¹⁰Disi do angka sintua ni malim ro di sibotosurat, jala gogogogo do Ibana dialuhon.

¹¹Ia si Herodes rap dohot angka donganna, direhei jala dilealeai do Ibana, disolukkon ma pangkean na arga tu Ibana, laos songon i ma disuru Ibana mulak tu si Latus.

¹²Jadi di na sadari i ma maraleale si Herodes dohot si Latus, ai na masihosoman do nasida anggo nasailaon.

¹³(II.) Alai didokkon si Latus ma angka sintua ni malim, angka panunggane i ro di natorop i marpungu, ninna ma mandok nasida:

¹⁴Diboan hamu do Halak on tu jolongku, sipabalik bangso didok hamu; jala di jolomuna hutangkasi i, gabe ndang adong jumpang ahu di Halak on sala, angka na tinuhashonmuna tu Ibana.

¹⁵Si Herodes pe songon i do, disuru do Ibana mulak tu jolonami; asa ndang adong parulaonna, na tama mambahen Ibana marutang hosa.

¹⁶Dibahen i lasahanku ma Ibana, asa pinalua.

¹⁷Naung i aturan, paluaonna sahalak tu nasida di pesta i.

¹⁸Alai sude nasida sasoara manjoujouhon: Pusa ma on! Si Barabas ma palua di hami!

¹⁹Alai ala ni guntur naung tubu di huta i jala ala ni partodosonna, umbahen na tarhurung ibana.

²⁰Gabe diulahi dipanghulingi si Latus ma nasida, ai naeng paluaonna Jesus.

²¹Alai dipanjoujouhon nasida: Parsilangkon, parsilangkon Ibana!

²²Jala patoluhalihon ma didok tu nasida: Ai aha do na jat dibahen Halak on? Nandang jumpang ahu agia aha di Ibana na tau gabe marutang hosa. Dibahen i lasahanku, dung i paluaonku ma Ibana.

²³Alai dipangiar be do soarana manosahi ibana, mangido parsilanghononhon Ibana; jala siat ma joujounasida.

²⁴Jadi dipaputus si Latus ma, pasauton nama pinangido ni rohanasida i.

²⁵Dipalua ma halak na pinangidonasida i, na tarhurung ala ni na guntur dohot ala ni todostodos; ia Jesus dipasahat ma guru roharohanasida.

²⁶(III.) Laho manogihon Ibana, disoro nasida ma sahalak, si Simon sian Kinene do goarna, na ro sian ladangna; tu ibana ma dipaporsanhon hau pinarsilang i, paihutihut Jesus.

²⁷Mangihuthon Ibana torop halak nang angka boruboru na mananangisi jala mangandungi Ibana.

²⁸Jadi didompakkon Jesus ma nasida, ninna ma: Hamu, angka boru Jerusalem, unang ma Ahu tatangisi hamu, dirimuna dohot anakkonmuna ma!

²⁹Ai na ro ma angka ari sogot, dohononna ma disi: Martua ma angka na hol, angka ina na so dung tubuan jala na so dung panarusan!

³⁰Disi ma pungaon ni halak mandok tu angka dolok: Tinggang i ma hami! Dohot tu angka tor: Hungkupi hami!

³¹Ai molo songon on pambahennasida tu hau na rata, aha ma tagamon masa tu hau naung masak?

³²Alai ditogihon dope dua halak nari, parjahat, sipamateon rap dohot Ibana.

³³(IV.) Asa dung sahat nasida tu dolokdolok na margoar partangkurahan, diparsilangkon ma Ibana disi rap dohot angka parjahat i, na sada tu siamunna, na sada nari tu sihambirangna.

³⁴Jadi didok Jesus ma: Ale Amang! Marpamuati ma roham mida nasida, ai ndang diboto nasida na binahennasida i. Laho marbagi ulosna, manjomput na sinurat ma nasida.

³⁵Jongjong ma disi natorop i mainondur. Alai dohot do angka panunggane manginsahi Ibana, angka ninna ma: Ia na leban dipalua; ua, dirina ma dipalua, anggo na tutu Kristus ni Debata, na pinili i Ibana!

³⁶Alai dohot do angka soldadu i pauruuru Ibana. Dipajonok mamboan na asom tu Ibana.

³⁷Laos didok ma: Anggo raja ni Jahudi do Ho, palua dirim antong!

³⁸Alai adong ma tarsurat di atasna: Raja ni Jahudi do On!

³⁹Alai na sada sian angka parjahat, na targantung i, mangaleai Ibana: Ai ndada Kristus i Ho? Palua ma dirim, nang hami antong!

⁴⁰Alai dialusi donganna ibana, dipinsang ma, ninna ma: Ndang dihabiri ho hape Debata, atik pe rap hona uhum hita?

⁴¹Uhum na tigor do na tu hita, ai tajalo do upa niambahenanta; alai anggo Ibana, ndang adong diula na so ture.

⁴²Laos ninna ma: O Jesus, ingot ahu, ia dung sahat Ho tu harajaonmi!

⁴³Gabe ninna Jesus ma mandok ibana: Situtu do hatangkon tu ho: Sadari on do ho rap dohot Ahu di Paradeiso!

⁴⁴(V.) Jala mareak pungkul sampuludua, songgop ma na holom tu sandok tano i sahat ro di pungkul tolu.

⁴⁵Ai mangkolom ma mata ni ari i. Jadi maribak ma hirehire na di bagas joro i, bola dua.

⁴⁶Dung i marsoara na gogo ma Jesus, ninna ma: Amang! Tu bagasan tanganmu ma hupasahat tondingku! Jadi dung didok i, tos ma hosana.

⁴⁷Marnida na masa i letnan i, dipuji ma Debata, ninna ma: Tutu do, halak na tigor roha do On!

⁴⁸Jadi sude natorop i, na marluhut mainondur, masitompuk andorana, marnida na masa i, laos mulak ma.

⁴⁹Alai mandaodao do jongjong saluhut angka na tumanda Ibana marnidasas, songon i angka parompuan na mangihuthon Ibana sian tano Galilea.

⁵⁰(VI.) Jadi adong ma sada halak, na margoar Josep, masuk rapot godang, parroha na burju jala na tigor.

⁵¹Ndang panolopi ibana di tahi dohot pambahenannasida; pangisi ni huta Arimatea na di Judea do, jala dohot do ibana maimaima di harajaon ni Debata.

⁵²Didapothon ibana do si Latus mangido bangke ni Jesus.

⁵³Dipaijur ma bangke i, dibaluti ma tu dagangan na halus, dipeakkon ma tu bagasan tanoman na niliang tu batu; na so dung adong dope peak manang ise disi.

⁵⁴Ari parhobasan do uju i jala jonok ma Sabbat i.

⁵⁵Alai mangihut do angka parompuan, naung mandongani Ibana ro sian luat Galilea; dibereng nasida do tanoman i ro di parpeak ni bangke i.

⁵⁶Dung i muli ma nasida paturehon angka na hushus ro di miak mir. Jala manipat ari Sabbat i, so nasida mangihuthon patik i.

24¹ (I.) Alai di ari parjolo dung ari Sabbat, ro ma nasida mansai sogot tu tanoman i, mantat na hushus na pinaturenasida.

²Alai nunga digulang batu i sian tanoman i didapot nasida.

³Jala dung bongot, ndang jumpang nasida bangke ni Tuhan Jesus.

⁴Jadi di na jut rohanasida marnidasa, gabe jongjong ma di lambunghasida dua halak parabit na marlinanglinang.

⁵Alai mabiar ma rohanasida jala unduk nasida manaili, gabe ninna halak ondeng ma tu nasida: Boasa luluhanmuna na mangolu di inganan ni angka na mate?

⁶Ndang dison Ibana: Nunga dipahehe Ibana. Ingot hamu ma na hinatahonna i tu hamu, uju di Galilea i dope Ibana!

⁷Ai didok do, ingkon pasahaton Anak ni jolma i tu tangan ni halak pardosa jadi parsilangknonhon, jala mulak mangolu ma Ibana di ari patoluhon.

⁸Jala diingot nasida ma hatana i.

⁹Gabe mulak ma nasida sian tanoman i, dibaritahon ma sasudena i tu na sampulusada i dohot tu donganna saluhutna.

¹⁰Si Maria Magdalena ma i, dungkon ni i si Johannes dohot si Maria ni si Jakobus. Nang angka na asing na mandongani nasida paboahonsa tu angka apostel.

¹¹Hira turiturian do angka hata i di rohanasida jala ndang dihaporseai.

¹²Alai hehe ma si Petrus marlojong tu tanoman i. Dipaunduk ma dirina, pulik ma diida peak angka saputsaputna i. Dung i muli ma ibana, huhut longang do rohana marningot na masa disi.

¹³(II.) Dung i adong ma dua halak sian nasida mardalani di na sadari i tu sada huta na margoar Emmaus, arga ualu paal daona sian Jerusalem.

¹⁴Jala mangkatai ma nasida taringot tu saluhut naung masa i.

¹⁵Jadi di na mangkatai nasida songon i jala masipapuasan, ro ma Jesus sandiri mandapothon jala mardalan rap dohot nasida.

¹⁶Alai pangalelaon do matanasida, unang ditanda nasida Ibana.

¹⁷Jadi ninna ma mandok nasida: Hata dia do na hinatahonmuna sama hamu di tongandalan on? Gabe sulon ma nasida huhut tungki.

¹⁸Dung i mangalusi ma na sahalak na margoar Kleopas, ninna ma mandok Ibana: Sasada Ho do huroha na mian di Jerusalem, na so umboto na masa disi di angka ari on?

¹⁹Jadi ninna ma mandok nasida: Ai aha do? Gabe ninna nasida ma mandok Ibana: Angka na taringot tu Jesus, halak Nasaret i, panurirang na gogo di ulaon nang di hata, di jolo ni Debata dohot sandok bangso i.

²⁰I do dipasahat angka sintua ni malim rap dohot sintuanta, asa marutang hosa jala diparsilangkon.

²¹Alai anggo hami sai mangkirim do, naeng Ibana paluahon Israel! Jala nunga pola patoluarihon sadari on, dung masa angka i.

²²Tarsonggot muse rohanami dibahen angka parompuan deba na sian hami; sogot do nasida nasogotan sian tanoman i.

²³Ndang jumpang nasida bangkena, gabe ro do nasida mandok, naung diida nasida surusuruan angka na paboahon, na mangolu do Ibana.

²⁴Jala adong ma sian hami na laho tu tanoman i, jumpang nasida do tutu songon na hinatahon ni angka parompuan i; alai anggo Ibana ndang adong diida.

²⁵Jadi ninna Ibana ma mandok nasida: Oe hamu, na hurang roha jala na losok mangkaporseai saluhut na hinatahon ni angka panurirang i!

²⁶Nda ingkon songon i marsitaonon Kristus i, laho masuk tu hasangaponna i?

²⁷Jadi joor ma sian si Musa dohot sian saluhut panurirang i dipatorang tu nasida nasa na tarsurat taringot tu Ibana.

²⁸Dung i jonok ma nasida tu huta sitopotonnasida i; anggo Ibana dibahen ma songon na naeng datdatanna dope sidalananna i.

²⁹Gabe disosoi nasida ma Ibana, ninna ma: Ua, mian ma Ho di hami, ai na bot ne ma jala manihir ari! Jadi bongot ma Ibana mandongani nasida.

³⁰Jala di na hundul Ibana rap dohot nasida mandok mangan, dihindat Ibana ma roti i, dipasupasu ma, dung i diponggoli mangalehonsa tu nasida.

³¹Disi ma buha matanasida gabe ditanda ma Ibana. Dung i marhalindo ma Ibana di jolonasida.

³²Gabe masipandohan ma nasida: Nda gara rohanta di bagasan, uju dipanghulingi hita di tongandalan i, laho patorangkon tu hita na tarsurat i?

³³Jadi borhat ma nasida di na sangombas i, laho mulak tu Jerusalem, gabe pungu ma didapot na sampulusada i rap dohot angka dongannasida.

³⁴Angka ninna nasida do mandok: Naung tutu do dipahehe Tuhan i, jala diida si Simon do Ibana!

³⁵Jadi dibaritahon nasida na ro i ma na masa di tongandalan i ro di panandanasida di Ibana, di na mamonggoli roti i Ibana.

³⁶(III.) Mangkatahon i dope nasida, jongjong ma Jesus di tongatonganasida mandok: Dame ma di hamu!

³⁷Gabe tarhalomong jala hatahutan ma nasida, ai dirimpu, tondi do na niidanasida.

³⁸Jadi ninna Ibana ma mandok nasida:
Boasa tarhalomong rohamu jala boasa
songon na ganggu rohamuna?

³⁹Bereng hamu ma tanganku dohot pathu,
paboa Ahu sandiri do! Jama hamu ma Ahu
jala tilik hamu ma; ai anggo tondi ndang
marsibuk manang marholiholi, songon na
niidamuna di Ahu.

⁴⁰Uju mandok songon i, dipatuduhon ma
tanganna dohot patna tu nasida.

⁴¹Alai laos so porsea dope nasida siala las
dohot longang ni rohanasida, gabe didok na
tu nasida: Adong dipeop hamu dison manang
dia sipanganon?

⁴²Jala dilehon nasida ma tu Ibana dengke
na pinanggung sampongol.

⁴³I ma dijalo Ibana, laos dipangan ma i
dipanotnoti nasida.

⁴⁴Jadi ninna Ibana ma mandok nasida:
On ma angka hatanku na huhatahon tu
hamu, uju rap dope Ahu dohot hamu: Ingkon
jumpang do saluhutna na tarsurat taringot tu
Ahu di patik ni si Musa, di angka panurirang i
nang di buku Psalmen.

⁴⁵Jadi dibungkai ma rohanasida, asa diantusi
na tarsurat i.

⁴⁶Dung i ninna ma mandok nasida: Songon
i do tarsurat hian, manaon na porsuk Kristus i
jala hehe sian na mate di ari patoluhon.

⁴⁷Jala baritahononhon ma marhitehite
Goarna hamubaon ni roha mangalap

hasesaan ni dosa, tu sude angka bangso,
mamungka sian huta Jerusalem.

⁴⁸Hamu do mangkatindangkonsa.

⁴⁹Jala suruonku ma songgop tu hamu na
pinarbagabaga ni Damang. Alai mian ma
hamu di huta on, paima disolukkon hamu
hagagoon na sian ginjang!

⁵⁰(IV.) Jadi ditogihon Ibana ma nasida ruar
tungan Betania, dung i dipaherbang ma
tanganna mamasumasu nasida.

⁵¹Jadi di na mamasumasu nasida Ibana,
sirang ma Ibana sian nasida jala tarhindat tu
ginjang.

⁵²Dung i disomba nasida ma Ibana jala
mulak tu huta Jerusalem, marlas ni roha
sitolu.

⁵³Jadi tongtong ma nasida di joro i
mamujimuji Debata.

Yohanes

1 ¹ (I.) Di mulana i nunga adong Hata i, jala saor tu Debata do Hata i, jala Debata do Hata i.

² I ma na saor tu Debata di mulana i.

³ Saluhutna i marhite sian Hata i do, umbahen na manjadi; jala ndang adong nanggo sada sian naung jadi i, na so marhite sian I.

⁴ Di bagasan Hata i do hangoluan; laos hangoluan i do Panondang ni hajolmaon.

⁵ Na marsinondang do Panondang i di bagasan na holom, alai ndang dijangkon na holom i.

⁶ Hehe do sada halak sinuru ni Debata, si Johannes do goarna.

⁷ Sitindangi do ibana, umbahen na ro, asa dihatindangkan Panondang i, anggiat gabe porsea saluhutna marhite sian Ibana.

⁸ Nandang apala ibana Panondang i; na mangkatindangkan Panondang i do tahe.

⁹ Alai nunga mandok ro uju i tu portibi on Panondang na sintong i, na manondangi nasa jolma.

¹⁰ Di portibi on hian do Ibana, jala marhite sian Ibana do manjadi portibi on; hape ndang ditanda portibi on Ibana.

¹¹ Na ro do Ibana manopot na di Ibana hian, gabe ndang dijangkon angka na di ibana i Ibana.

¹² Alai manang piga na manjangkon Ibana, tusi do dilehon huaso, asa gabe anak ni Debata nasida, angka na porsea di Goarna.

¹³ I ma angka na so tubu sian mudar, manang sian sangkap ni daging, manang sian sangkap ni baoa, tung sian Debata do.

¹⁴ Gabe daging ma Hata i jala maringan di tongatonga ni hita on, jadi huida hami ma hasangaponna, i ma hasangapon ni Anak sasada na sian Ama i, gok asi ni roha dohot hasintongan.

¹⁵ Dihatindangkon si Johannes do Ibana, ai ninna ma: On do Ibana na hudok i, na ro sian pudingku; jumolo do Ibana adong asa ahu, ai parjolo hian do Ibana.

¹⁶ Ai sian hamoraonna do saluhut hita manjalo, i ma asi ni roha na so marnamontok.

¹⁷ Ai marhite sian si Musa do dilehon anggo patik i; alai hinorhon ni Jesus Kristus do manjadi asi ni roha dohot hasintongan.

¹⁸ Nandang dung adong na marnida Debata; Anak na sasada i, na di ampunan ni Ama i, Ibana do mamaritahonsa.

¹⁹ (II.) Disuru angka Jahudi sian huta Jerusalem ma angka malim dohot halak Lepi manungkun si Johannes: Ai ise do ho?, gabe on ma dihatindangkon:

²⁰ Ai diparhatopot do, ndang diporso, didok do: Ndang ahu Kristus i.

²¹ Gabe disungkun nasida ma ibana: Antong ise do ho? Si Elia do ulaning? Jadi didok ma: Ndang i ahu! Panurirang i do ho? Dung i dialusi ma: Ndang!

²² Dung i ninna nasida ma mandok ibana: Antong, ise do ho?, asa haalusan hami angka na marsuru hami. Aha do dohononmu taringot tu ho?

²³ Dung i ninna ma: Soara ni na manjoujou di halongonan do ahu: Patigor hamu ma dalam ni Tuhan! songon naung nidok ni panurirang Jesaya.

²⁴ Sian Parise do angka na sinuru i.

²⁵ Jadi didok nasida ma manungkun ibana: Boasa mandidihon ho, so manang Kristus ho, manang si Elia, manang panurirang i?

²⁶ Gabe didok si Johannes ma mangalusi nasida: Ia ahu aek do hudidihon; alai nunga jongjong di tongatongamuna Ibana, na so tinandamuna i.

²⁷ Ibana do i na ro sian pudingku; na hurang tama do ahu mangkarhari tali ni sipatuna.

²⁸ Di Betania do i masa, di ipar ni aek Jordan, ai disi do mandidihon si Johannes.

²⁹ Torang ni arina i diida si Johannes ma Jesus ro tusi, jadi didok ma: On do Birubiru ni Debata, na mamorsan dosa ni portibi on!

³⁰Ibana do na hudok i: Sian pudingku ro sada halak, naung jumolo adong asa ahu; ai parjolo hian do Ibana.

³¹Ahu pe, ndang hutanda Ibana; alai asa tandap Ibana di halak Israel, umbahen na ro ahu mandidihon aek.

³²Dung i dihatindangkon si Johannes ma, ninna ma: Huida do Tondi i tuat songon darapati sian banua ginjang i jala mian di Ibana!

³³Ahu pe, ndang hutanda Ibana jolo. Alai Ibana na marsuru ahu mandidihon aek, I do mandok tu ahu: Ia tusi diida ho tuat Tondi i jala mian di Ibana, Ibana do sididihon Tondi Parbadia.

³⁴Asa nunga huida jala huhajongjongkon: Ibana do Anak ni Debata.

³⁵(III.) Marsogotna i jongjong muse si Johannes disi dohot siseanna dua halak.

³⁶Jadi di na niidana i Jesus mamolus, ninna ma: On do Birubiru ni Debata!

³⁷Jadi dibege siseanna na dua i ma hatana, gabe diihuthon ma Jesus.

³⁸Dung i humusor ma Jesus, diida ma nasida na mangihuthon Ibana, jadi ninna ma mandok nasida: Aha do na niluluanmuna? Jadi didok nasida ma mandok Ibana: Rabbi (na mandok: Guru) didia do Ho sorang?

³⁹Jadi didok ma mandok nasida: Ro ma hamu, asa diida hamu! Dung i ro ma nasida, diida ma parmiananna; laos rap ma nasida

dohot Ibana sadarina i. Tar di pungkul opat ma i.

⁴⁰Si Andreas, dongan saama ni si Simon Petrus, do na sada sian na dua i, na umbege hata ni si Johannes dohot mangihuthon Ibana.

⁴¹Dung i pajumpang ma ibana jumolo dohot si Simon, donganna saama, jadi didok ma mandok ibana: Nunga jumpang hami Messias i (astuanna: Kristus)!

⁴²Laos ditogihon ma ibana tu Jesus. Alai dibereng Jesus ma ibana huhut ma didok: Si Simon, anak ni si Jonas do ho; si Kepas ma ho goaron (astuanna: Batu mamak, Petrus)!

⁴³Torang ni arina i, di na naeng laho Ibana tu Galilea, jumpangsa ma si Pilippus, dung i didok Jesus ma mandok ibana: Ihuthon ma Ahu!

⁴⁴Alai sian Betsaida do si Pilippus, i ma huta ni si Andreas dohot si Petrus.

⁴⁵Dapot si Pilippus ma si Natanael, jadi didok ma mandok ibana: Nunga jumpang hami Ibana, na nidok ni si Musa di surat patik i jala na pinaboa ni angka panurirang; i ma Jesus, anak ni si Josep, na sian huta Nasaret.

⁴⁶Dung i didok si Natanael ma mandok ibana: Tung tarbahen ma ro na denggan sian huta Nasaret? Jadi didok si Pilippus ma: Ro ma ho marnida!

⁴⁷Diida Jesus ma si Natanael ro manopot Ibana, jadi didok ma taringot tu ibana: On ma

sada halak Israel na tutu, na so marpangansi di bagasan!

⁴⁸Ninna si Natanael ma mandok Ibana: Sian dia ditanda Ho ahu? Dung i dialusi Jesus ma ibana: Huida do ho, uju ditoru ni hau ara i ho, andorang so dijou si Pilippus i dope ho.

⁴⁹Dung i ninna si Natanael ma mangalusi Ibana: Gurunami, Ho do Anak ni Debata! Ho do raja ni halak Israel!

⁵⁰Dung i ninna Jesus ma mangalusi ibana: Ala hudok tu ho: Huida ho di toru ni hau ara i, umbahen na porsea ho? Idaonmu dope na sumurung sian i!

⁵¹Laos ninna ma: Na tutu situtu do na hudok on tu hamu: Idaonmuna do mungkap banua ginjang jala manaek mijur angka surusuruan ni Debata tumopot Anak ni jolma i.

2¹(I.) Dung i patoluarohon adong ma na marbagas di huta Kana na di luat Galilea, jala disi ma ina ni Jesus.

²Alai dohot ma Jesus raphon angka siseanna dipio tu pesta i.

³Jadi dung hurangan anggur nasida, ninna ina ni Jesus ma mandok Ibana: Nandang adong anggur di nasida!

⁴Alai ninna Jesus ma mandok ibana: Marhua ho tu Ahu, inang? Nandang dope ro tingkingku.

⁵Dung i ninna inana i ma mandok angka parhobas: Manang dia dohononna tu hamu, bahen hamu ma!

⁶Alai mangihuthon adat parburion ni halak Jahudi, adong ma diri disi onom gunsi (hudon batu), siatsiat dua ro di tolu poting.

⁷Dung i ninna Jesus ma mandok nasida: Gohi hamu ma angka gunsi on aek! Jadi gok situtu ma dibahen.

⁸Laos didok muse tu nasida: Tahui hamu ma sian i, dung i boan hamu ma tu indukmuna! Jadi diboan nasida ma.

⁹Alai didai induk ni angka parhobas i ma aek i naung gabe anggur, jala ndang diboto haroroanna, ai holan angka parhobas na manahui aek i do umbotosa, gabe dijou ma pangoli i.

¹⁰Jadi ninna ma mandok ibana: Saluhutjolma mangalehon parjolo anggur na dumenggan; dung pe butong halak, asa dilehon na humurang. Ia ho, dipeop ho do anggur na dumenggan ro di nuaeng!

¹¹Asa i ma tanda na parjolo, na binahen ni Jesus di huta Kana na di Galilea, papatarhon hasangaponna i, gabe porsea ma angka siseanna di Ibana.

¹²Dung salpu i, tuat ma Ibana tu Kapernaum rap dohot inana, angka anggina dohot siseanna, laos mian manang piga ari disi.

¹³(II.) Jadi jonok ma Paska ni Jahudi, gabe nangkok ma Jesus tu huta Jerusalem.

¹⁴Dung i hundul ma di joro i didapot angka partigatiga lombu, birubiru dohot darapati ro di angka panungkari.

¹⁵ Jadi dipauli Jesus ma tali bahen linsinglinsing, dipabali ma nasida saluhutna sian joro i, rap dohot angka birubiru dohot lombu, disarahon ma hepeng ni panungkari i, diunggilhon ma mejana.

¹⁶ Dung i ninna ma mandok angka partigatiga darapati: Boan hamu ma i sian on! Unang bahen hamu bagas ni Damang gabe partigatigaan!

¹⁷ Jadi diingot angka siseanna i ma hata na tarsurat i: "Hamuruhon humongkop bagasmi do mangallang ahu!"

¹⁸ Dung i ninna angka halak Jahudi ma mangalusi Ibana: Aha ma tanda patuduhononmu tu hami, umbahen songon i dibahen Ho?

¹⁹ Gabe ninna Jesus ma mangalusi nasida: Lohai hamu ma joro on; dung i pajongjongonku ma i di bagasan tolu ari!

²⁰ Jadi didok angka Jahudi i ma: Opatpulu onom taon do lelengna dipauli bagas joro on; ia Ho, pajongjongonmu ma i di bagasan tolu ari?

²¹ Alai dagingna i do joro na nidokna disi.

²² Asa dung hehe Ibana sian na mate, diingot angka siseanna ma hata ondeng, gabe porsea ma nasida di hata ni surat i nang di hata na nidok ni Jesus.

²³ Alai uju di huta Jerusalem Ibana, di pesta Paska i, lan ma porsea di Goarna, dung diida nasida tanda angka na binahenna i.

²⁴Alai ndang dihaporseai Jesus i nasida, ala saluhut nasida ditanda.

²⁵Ai ndang pola manjalo panindangion Ibana taringot tu jolma i, ai diboto Ibana hian do na di bagasan roha ni halak.

3¹(I.) Asa adong ma sahalak sian angka Parise, sintua ni Jahudi na margoar Nikodemus.

²Na ro bornginborngin manopot Ibana, jadi didok ma mandok Ibana: Gurunami, huboto hami do Ho guru na ro sian Debata, ai ndang tarpatupa agia ise tanda songon na binahenmi, ia so Debata donganna.

³Dung i ninna Jesus ma mangalusi ibana: Na tutu situtu do na hudok on tu ho: Ia so tubu jolma sian ginjang, ndang tarbahensa marnida harajaon ni Debata!

⁴Dung i ninna si Nikodemus ma mandok Ibana: Songon dia ma tarbahen tubu muse halak, ia naung matua? Tung haulahansa ma mamasuhi siubeon ni inana, asa tubu?

⁵Jadi dialusi Jesus ma: Na tutu situtu do na hudok on di ho: Anggo so tubu jolma sian aek dohot sian Tondi, ndang habongotansa harajaon ni Debata!

⁶Daging do na tubu sian daging, tondi do na tubu sian Tondi.

⁷Unang ma longang roham, ala hudok tu ho: Ingkon tubu hamu sian ginjang!

⁸Na mangullus do alogo dompak lomo ni rohana; dibege ho do parngongosna, alai

ndang diboto ho haborhatanna manang hasahatanna. Laos songon i do ganup naung tubu sian Tondi.

⁹Dung i ninna si Nikodemus ma mangalusi Ibana: Songon dia ma tarpajadi i?

¹⁰Jadi ninna Jesus ma mangalusi ibana: Ho, guru ni bangso Israel, ndang diboto ho i?

¹¹Na tutu situtu do na hudok on di ho: Huhatahon hami do na huboto hami jala huhatindangkon hami do naung huida hami, gabe ndang dijangkon hamu na huhatindangkon hami.

¹²Gari angka na di tano on huhatahon tu hamu, ndang porsea hamu; tung porsea ma hamu, molo huhatahon tu hamu angka na di banua ginjang i?

¹³Ndang adong na manaek tu banua ginjang, ia so naung tuat i sian banua ginjang; i ma Anak ni jolma i, na di banua ginjang i hian.

¹⁴Jadi songon naung pinatimbo ni si Musa ulok i di halongonan, songon i naeng patimboon Anak ni jolma i,

¹⁵asa dapotan hangoluan na salelenglelengna ganup na porsea di Ibana.

¹⁶Ai songon on do holong ni roha ni Debata di portibi on, pola do Anakna na sasada i dilehon, asa unang mago ganup na porsea di Ibana, asa hangoluan na salelenglelengna di ibana.

¹⁷ Ai ndang na disuru Debata Anakna i tu portibi on, asa uhumanna; naeng paluaonna portibi on tahe, umbahen na disuru.

¹⁸ Nandang siuhuman na porsea di Ibana; alai anggo na so porsea i, nunga hona uhum, ala so porsea ibana di Goar ni Anak sasada ni Debata.

¹⁹ Alai on ma uhum i: Nunga ro na tiur i tu portibi on, jadi holongan do roha ni angkajolma di na holom i asa di na tiur i, ai na jahat do parulaonnasida.

²⁰ Ai ganup na mangulahon na roa, hosom do rohana di na tiur i, jala ndang didapothon na tiur i, asa unang gabe patar angka ulaonna i.

²¹ Alai na mangula hasintongan i, didapothon do na tiur i, asa patar parulaonna i; ai di bagasan Debata do diula.

²² (II.) Dung i ro ma Jesus dohot angka siseanna i tu luat Judea, jadi mian disi ma jolo Ibana rap dohot nasida jala mandidihon.

²³ Alai dohot do si Johannes mandidihon di Enon, mardonokkon huta Salem, ai na nia aek disi. Jadi tusi ma ro halak gabe tardidi.

²⁴ Ai ndang dope dihurungkon si Johannes uju i.

²⁵ Marsual ma disi angka sisean ni si Johannes dohot sahalak Jahudi siala parburion i.

²⁶ Jadi didapothon nasida ma si Johannes, didok ma tu ibana: Gurunami, Halak i

na ro tu jolom, di ipar ni aek Jordan, na hinatindangkonmi, I do mandidihon nuaeng, gabe saluhut halak ro mandapothon Ibana.

²⁷ Dung i ninna si Johannes ma mangalusi: Ndang tarbuatjolma manang aha, anggo so dilehon tu ibana sian banua ginjang.

²⁸ Hamu sandiri do sitindangingku di na hudok: Ndada ahu Kristus i; na sinuru do ahu patujolona.

²⁹ Nampuna oroan, i do pangoli i. Alai na jongjong do aleale ni pangoli i patangitangi ibana; jadi marlas ni roha situtu dibahen soara ni pangoli i. Asa halahas ni roha sisongon i ma jumpang di ahu.

³⁰ Ilanggo Ibana, patut lam ganda; lam moru ma anggo ahu!

³¹ Na ro sian ginjang, I do mangatasi saluhutna. Na ro sian tano on, i ma sian tano on, jala angka na sian tano on do dihatahon.

³² Dihatindangkon na ro sian banua ginjang i do na niidana dohot na binegena, gabe ndang adong na manjangkon na hinatindangkonna i.

³³ Halak na manjangkon na hinatindangkonna i, i do sumahaphon, paboa parsintong Debata.

³⁴ Ai na sinuru ni Debata. I do mangkatahon angka hata ni Debata; ai ndang marpanuhatan Ibana mangalehon Tondi i.

³⁵ Na holong do roha ni Ama i di Anak i; naung dilehon do saluhutna tu tanganna.

³⁶Naung dapotan hangoluan na salelenglelengna do na mangkaporseai Anak i; alai na so mangoloi Anak i, ndang idaon ni i hangoluan; sai na mian do tahe rimas ni Debata di ibana.

4¹ (I.) Dung i diboto Tuhan i ma, naung dibege angka Parise, tumorop do dibahen Jesus siseanna dohot mandidihon sian si Johannes;

²atik pe so Jesus sandiri mandidihon, angka siseanna do.

³Jadi ditadingkon ma luat Judea laho mangulahi tu luat Galilea.

⁴Alai ingkon bolusonna do luat Samaria.

⁵Gabe ro ma ibana tu sada huta na di Samaria, na margoar Sikar, mardonokkon ladang na nilehon ni si Jakkob tu si Josep, anakna i.

⁶Alai adong ma disi sumur ni si Jakkob; jadi dibahen naung loja Jesus sian pardalanan, hundul ma Ibana di lambung ni sumur i; tar di hos ni ari ma i.

⁷Dung i ro ma sada boru Samaria, manahui aek. Jadi didok Jesus ma mandok ibana: Lehon Ahu minum!

⁸Ai nunga laho angka siseanna i tu huta, manuhor bohal.

⁹Jadi didok boru Samaria i ma mandok Ibana. Boasa mangido tapian Ho halak Jahudi, sian ahu boru Samaria? Ai ndang

marparsaoran halak Jahudi dohot halak Samaria.

¹⁰Dung i ninna Jesus ma mangalusi ibana: Aut diboto ho basabasa ni Debata, jala aut ditanda ho na mangido aek inumon sian ho, ra olo ho mangido tu Ibana; dung i lehononna ma tu ho aek na mangolu.

¹¹Jadi didok boruboru i ma tu Ibana: Tuan, tahutahu gari soada di Ho, tole bagas do sumur on; tung sian dia ma tu Ho aek na mangolu?

¹²Tung umbalga ma Ho asa ompunta si Jakkob, na mangalehon sumur on di hami? Ibana do manginum sian i dohot ianakhonna ro di pinahanna!

¹³Dung i ninna Jesus ma mangalusi ibana: Sai mangulahi mauas do nasa na minum sian aek on.

¹⁴Alai na manginum aek silehononki, na so tupa mauas be i ro di salelenglelengna. Ai anggo aek silehononki, gabe mual do i di bagasan ibana, na mabaor sahat ro di hangoluan sisalelenglelengna.

¹⁵Dung i ninna boruboru i ma mandok Ibana: Tapien sisongon i ma lehon di ahu, Tuan, asa unang be mauas ahu jala unang be sai ro tuson manahui.

¹⁶Dung i, ninna Jesus ma mandok ibana: Laho ma ho jolo, jou ma dongan saripem, dung i mulak tuson!

¹⁷Gabe ninna boruboru i ma mangalusi; Ndang mardongan saripe ahu! Dung i ninna Jesus ma tu ibana: Toho do pandokmi, na so adong sinondukmu.

¹⁸Ai nunga lima hali ho mardongan saripe; ia baa na di ho i nuaeng, ndang donganmu saripe i dohonon; asa na tutu do na nidokmi!

¹⁹Dung i ninna boruboru i ma mandok Ibana: Ale tuan, panurirang do Ho huida!

²⁰Di dolok an do martangiang ia ompunami, gabe didok hamu, ingkon Jerusalem do partangiang.

²¹Dung i ninna Jesus ma mandok ibana: Porsea ma ho di Ahu, inang! Na ro ma tingkina, gabe ndang pola be dolok an manang Jerusalem partangiang tu Ama i.

²²Disomba hamu do na so binotomuna; huboto hami do na husomba hami, ai bangso Jahudi do haroroan ni haluaon.

²³Alai na ro ma tingkina jala nunga ro i nuaeng, gabe di bagasan Tondi dohot hasintongan martangiang angka partangiang na tutu tu Ama i; ai angka partangiang na songon i dipangido Ama i.

²⁴Tondi do anggo Debata; asa angka na martangiang tu Ibana, patut martangiang di bagasan Tondi dohot hasintongan.

²⁵Dung i didok boruboru i ma mandok Ibana: Huboto do, na naeng ro Messias na margoar Kristus; ia dung ro Ibana, baritahononna do saluhutna i tu hami.

²⁶Dung i ninna Jesus ma mandok ibana: Ahu do i, na mangkatai dohot ho!

²⁷Dung songon i, ro ma angka siseanna jala longang ma rohanasida, ala mangkatai Ibana dohot boruboru i; alai ndang adong na olo mandok: Aha dipausoi Ho? manang: Aha hinatam dohot ibana?

²⁸Asa ditadingkon boruboru i ma panguhatanna, laho tu huta, gabe didok ma tu angka jolma i:

²⁹Beta hamu! Ida hamu ma sada halak na paboahon tu ahu sude parulaonki! Atik tung Kristus i Ibana?

³⁰Gabe ruar ma nasida sian huta i, laho manopot Ibana.

³¹Andorang i, disosoi angka siseanna ma Ibana, ninna ma: Mangan ma Guru i!

³²Alai ninna ma mandok angka siseanna: Adong do di Ahu sipanganon na so binotomuna.

³³Gabe ninna siseanna ma sama nasida: Ai adong do ulaning na mamboan sipanganon tu Ibana?

³⁴Dung i ninna Jesus ma mandok nasida: Sipanganon do i di Ahu, na mangulahon lomo ni roha ni na marsuru Ahu dohot paujungkon ulaonna.

³⁵Nda didok hamu: Opat bulan nari, ro ma gotilon? Alai hudok ma di hamu: Pabidok hamu ma matamuna, bereng hamu ma

hauma i; ai nunga marlangat, na tau gotilon ma!

³⁶Nunga manjalo upa panggotil i, papunguhon parbue tu hangoluan na salelenglelengna, asa rap marlas ni roha panabur dohot panggotil.

³⁷Ai dison ma tutu hata na mandok: Na sada on manabur; na sada an manggotil.

³⁸Ahu do marsuru hamu manggotil na so hinalojahonmuna; angka na asing do mangkalojahonsa, gabe disoluk hamu na niulanasida.

³⁹Jadi torop do halak Samaria sian na sahuta i gabe porsea di Ibana, ala dihatindangkon boruboru i: Tung saluhut parulaonki dipaboa Ibana do tu ahu!

⁴⁰Asa dung sahat angka halak Samaria ro tu Jesus, dielehelek ma Ibana, asa mian di nasida; jadi laos disi ma Ibana dua ari.

⁴¹Dung i toropan do nasida na gabe porsea ala ni hata ni Jesus.

⁴²Gabe didok nasida ma tu boruboru i: Ndang be ala ni pandokmi, umbahen na porsea hami; ai nunga hubege jala hutanda hami sandiri, Ibana do tutu Sipalua portibi on.

⁴³(II.) Jadi dung salpu na dua ari i, borhat ma Ibana sian i laho tu Galilea.

⁴⁴Ai Jesus sandiri do mangkatindangkon, na so marsangap panurirang di tano hagodanganna.

⁴⁵Jadi di na ro Ibana tu Galilea, gabe dijangkon halak Galilea ma Ibana, dibahen naung diida nasida saluhutna na binahenna i di Jerusalem, di ari raya i; ai dohot do nasida marariraya disi.

⁴⁶Asa ro muse ma Jesus tu huta Kana na di luat Galilea, pambahenanna aek gabe angguru i. Alai adong ma parpangkat sahalak di huta Kapernaum, hansitan di anakna.

⁴⁷Jadi dung dibege i, naung ro Jesus sian luat Judea tu luat Galilea, didapothon ma Ibana; dielehelek ma, asa tuat Ibana pamalum anakna i, ai matemate ne do ibana.

⁴⁸Jadi didok Jesus ma tu ibana: Molo so diida hamu tanda dohot halongangan, ndang na porsea hamu.

⁴⁹Dung i didok parpangkat i ma: Sai tuat ma Ho jolo, Tuhan, andorang so mate dope anakki!

⁵⁰Jadi didok Jesus ma tu ibana: Laho ma ho; na mangolu do anakmi! Gabe dihaporseai halak i ma hata na nidok ni Jesus tu ibana, laos laho ma.

⁵¹Alai laho tuat dope, nunga ditomutomu angka naposona ibana paboahon, na mangolu anakna i.

⁵²Dung i dipamanat ma tu nasida tingkina, manang na sadihari lumambok dihilala; jadi didok nasida ma: Nantoari, tar di pungkul sada do sumurut panepane i sian ibana.

⁵³ Jadi diboto amana i ma: Apala i ma tingkina, uju didok Jesus: Na mangolu do anakmi! gabe porsea ma ibana dohot sude pangisi ni bagasna.

⁵⁴ Asa i ma tanda paduahon, na pinatupa ni Jesus muse, di na ro Ibana sian luat Judea laho tu luat Galilea

5¹ (I.) Salpu ni i adong ma pesta ni halak Jahudi, jadi nangkok ma Jesus tu Jerusalem.

² Jadi adong ma di Jerusalem di lambung ni harbangan birubiru paridian sada na margoar Betesda anggo di hata Heber; lima do sopesopo disi.

³ Marpeahan do disi torop halak na hansitan, na mapitung, na sarion, na tiarapon, angka na paimaimahon hagugunsang ni aek i.

⁴ Ai surusuruan ni Debata do tuat marombasombas tubagasan paridian i manggunsang aek i. Asa na parjolo bongot di hagugunsang ni aek i, gabe malum do, manang dia pe sahiti na lohoni tu ibana.

⁵ Alai adong ma disi sahalak naung tolupulu ualu taon lelengna marsahiti.

⁶ Diida Jesus ibana peak disi, jala diboto ma, naung pola leleng ibana disi, gabe ninna ma mandok ibana: Naeng malum ho?

⁷ Jadi didok na marsahiti i ma mangalusi Ibana: Iale tuan! Ndang adong parhuaonku, na manogu ahu tu paridian i di hagugunsang

ni aek i; ai mandok ro dope ahu, nunga dijoloani na asing ahu mijur.

⁸Dung i ninna Jesus ma mandok ibana: Hehe ma ho; hindat ma lagem, mardalan ma ho!

⁹Jadi pintor hisar ma jolma i, dihindat ma lagna, laos mardalan ma. Alai ari Sabbat do toho na sadari i.

¹⁰Dung i ninna angka Jahudi i ma mandok na pinamalum i: Ari Sabbat do nuaeng; ndang jadi boanonmu lagem!

¹¹Jadi didok ma mangalusi nasida: Halak i na pamalum ahu, i do mandok tu ahu; Hindat ma lagem, mardalan ma ho!

¹²Dung i disungkun nasida ma ibana: Ai ise na mandokkon ho mangkindatsa jala mardalan?

¹³Alai ndang ditanda na hansitan i Ibana; ai nunga sumurut Jesus, ala torop halak disi.

¹⁴Ndang piga dan jumpang Jesus ma ibana di bagas joro, jadi didok ma tu ibana: Atehe, nunga hisar be ho? Unang datdati mangula dosa, asa unang songgop tu ho na umposi!

¹⁵Gabe laho ma halak ondeng paboahon tu angka Jahudi, Jesus do na pahisar ibana.

¹⁶Jadi diburui angka Jahudi ma Jesus, ala dibahen songon i di ari Sabbat.

¹⁷(II.) Alai dialusi Jesus ma nasida, ninna ma: Na mangula do Damang rasirasa nuaeng; Ahu pe mangula do.

¹⁸Ala ni i lam disangkapi angka Jahudi mamusa Ibana, ai disegai do ari Sabbat i, tole digoar do Debata Amana jala dipasobok do dirina dohot Debata.

¹⁹Gabe dialusi Jesus ma nasida, didok ma: Na tutu situtu do na hudok on tu hamu: Ndang tarpatupa Anak i manang aha sian roharohana, anggo so diida Ibana Ama i mangulahonsa; ai ia i dibahen Ama i, laos i do diula Anak i.

²⁰Ai holong do roha ni Ama i di Anak i, dipatuduhon do tu Ibana nasa ulaon ni Ama i; laos patuduhononna ma tu Ibana ulaon na umbalga sian on, asa longang rohamu.

²¹Ai songon panungguli ni Ama i di angka na mate, laho panguluhon nasida, songon i do Anak i: dipangolu do angka na naeng pangoluonna.

²²Ai ndang adong diuhumi Ama i manang ise; nunga dipasahat sandok paruhumon i tu Anak i,

²³asa diparsangapi saluhut halak Anak i, songon parsangapinasida di Ama i. Ia i na so pasangaphon Anak i, i ma na so pasangaphon Ama i, na marsuru Ibana.

²⁴Na tutu situtu do na hudok on tu hamu: Manang ise na tumangihon hatangki jala porsea di na marsuru Ahu, nunga sahat tu ibana hangoluan na salelenglelengna; ndang pola be ibana tu paruhuman, nunga taripar ibana sian hamatean tu hangoluan.

²⁵Na tutu situtu do na hudok on tu hamu:
Na ro ma tingkina jala nunga masa nuaeng,
begeon ni angka na mate i ma disi soara ni
Anak ni Debata; gabe mangolu ma angka na
umbegesa.

²⁶Ai songon Ama i Parngolu hian di bagasan
dirina, laos songon i do dilehon tu Anak i, asa
Parngolu Ibana di bagasan dirina.

²⁷Jala dilehon do tu Ibana huaso
manguhumi, ala Anak ni jolma i Ibana.

²⁸Unang longang rohamu ala ni i, ai di na ro
tingkina, begeon ni saluhut halak na di angka
tanoman i ma soarana.

²⁹Dung i ruar be ma: Angka sibahen na
denggan hehe tu hangoluan; alai angka siula
na jahat hehe tu uhum.

³⁰Ndang tarula Ahu agia aha, anggo tung
sian diringku; hombar tu na hubege do
panguhumhu, jadi tigor do uhumhi, ala
so hulului na pinangido ni rohangku, na
pinangido ni roha ni na marsuru Ahu, i do.

³¹Anggo Ahu mangkatindangkon diringku,
ndang na sintong panindangionki.

³²Adong do na asing na mangkatindangkon
Ahu jala huboto, na sintong do
panindangionna na taringot tu Ahu.

³³Naung disuru hamu do na manopot si
Johannes, gabe na sintong i dihatindangkon
ibana.

³⁴ Alai anggo Ahu, ndang hujalo panindangion sian jolma; ia hutaringoti pe i, ala ni hamu do, anggiat malua hamu.

³⁵ Palito na galak jala na marsinondang do ibana; alai na naeng marlas ni roha do hamu sangombas di bagasan sondangna i.

³⁶ Alai na sumurung do panindangion na di Ahu asa na sian si Johannes; ai angka ulaon na nilehon ni Ama i tu Ahu, sipaujungonku, i ma angka ulaon na huula, i do mangkatindangkon Ahu, paboa na disuru Ama i Ahu.

³⁷ Nang Ama i na marsuru Ahu, dihatindangkon do Ahu. Nandang dung dibege hamu soarana, rupana pe ndang dung diida hamu.

³⁸ Hatana pe ndang ditiop hamu mian di bagasan rohamuna, ai ndang porsea hamu di na sinuruna.

³⁹ Didiori hamu do angka surat i, ai diparbaga rohamu, dapot hamu do disi hangoluan na salelenglelengna; jala Surat i do tutu mangkatindangkon Ahu.

⁴⁰ Alai ndang olo hamu ro manopot Ahu, asa dapotan hangoluan hamu nian.

⁴¹ Nandang adong hujalo hasangapon sian jolma.

⁴² Alai nunga hutanda hamu, na so ditiop hamu di bagasan hamu holong ni roha ni Debata.

⁴³Ro do Ahu marhitehite Goar ni Damang, gabe ndang dijangkon hamu Ahu. Alai molo ro na asing marhitehite goarna sandiri, jangknonmuna do anggo i.

⁴⁴Songon dia ma antong tarbahen hamu gabe porsea, ai na masijaloan sangap do hamu sama hamu; alai anggo sangap na sian Debata na sasada i, ndang dilului hamu.

⁴⁵Unang dirimpu rohamuna, Ahu mangaluhon hamu tu Ama i. Adong do na mangaluhon hamu; i ma si Musa, haposan ni rohamuna i.

⁴⁶Ai aut na porsea hamu di si Musa, porsea ma hamu nang di Ahu; ai taringot tu Ahu do disurathon.

⁴⁷Alai molo so porsea hamu di suratna i, tung porsea ma hamu di hatangki?

6¹ (I.) Asa dung salpu i, ditaripari Jesus ma tao Galilea, Tiberias.

²Alai torop ma halak mangihuthon Ibana, ala diida nasida tanda angka na binahenna tu na hansitan.

³Dung i nangkok ma Jesus tu dolok, laho hundul tusi rap dohot angka siseanna.

⁴Alai jonok nama Paska, ari raya ni Jahudi.

⁵Dung i manatap ma Jesus, diida ma torop halak ro mandapothon Ibana, jadi didok ma mandok si Pilippus: Sian dia ma tuhoronta roti, asa mangan angka on?

⁶Alai didok pe songon i, na laho mangunjuni ibana do; ai diboto hian do sibahenonna.

⁷ Jadi dialusi si Pilippus ma Ibana: Ndang sae roti arga duaratus hupang, asa dijalo ganup nasida sasaotik.

⁸ Dung i didok sahalak sian angka siseanna, i ma si Andreas, anggi ni si Simon Petrus, ma mandok Ibana:

⁹ Adong do dison sada dakdanak na umpeop lima roti dohot dua dengke; alai sadia ma i tu na sai torop?

¹⁰ Alai didok Jesus ma: Dokkon hamu ma hundul angka jolma i; alai bidang do jampalan disi. Dung i hundul ma disi torop ni baoa, arga limaribu.

¹¹ Asa dibuat Jesus ma angka roti i, didok ma mauiate, diparlehon ma i tu angka na hundul i; sian dengke i pe songon i, saguru lomo ni rohanasida.

¹² Alai dung bosur nasida, ninna ma mandok angka siseanna: Papungu hamu ma angka ebaeba i, asa unang magopo!

¹³ Gabe dipapungu nasida, jadi gok ma sampuludua ampang ebaeba sian na lima roti i, na so suda angka na mangan i.

¹⁴ Asa dung diida halak i tanda naung binahen ni Jesus i, ninna nasida ma: On ma tutu panurirang i, na naeng ro tu portibi on.

¹⁵ Mamoto ma Jesus, naeng ro nasida manoro Ibana, laho pabangkithon gabe raja, jadi maporus ma Sasadasa tu dolok.

¹⁶ (II.) Alai dung bot ari, tuat ma angka siseanna i tu topitao.

¹⁷ Dibongoti nasida ma parau i, ditaripari ma tao i dompak Kapernaum. Nunga pola mangkolom; laos so ro dope Jesus mandapothon nasida.

¹⁸ Alai gaor do tao i dibahen pangullus ni habahaba na gogo.

¹⁹ Asa dung marluga nasida arga dua manang tolu paal daona, diida nasida ma Jesus na mardalan diatas tao i manjonohi parau i, gabe mabiar ma nasida.

²⁰ Alai didok ma mandok nasida: Ahu do on; unang hamu mabiar!

²¹ Jadi naeng ma pabongotonnasida Ibana tubagasan parau i; dung i pintor sahat ma parau i tu luat sitondongonnasida.

²² (III.) Torang ni arina i, diboto natorop na tinggal di ipar ni tao i, na so adong disi parauna asing dungkon ni na sasada i, jala na so dohot Jesus bongot tu parau i, holan angka siseanna do na borhat.

²³ Alai na ro do angka parau sian Tiberias jonok tu inganan parmanganan roti na tinangiangkon ni Tuhan i.

²⁴ Asa dung diida natorop i, na so disi Jesus, nang angka siseanna pe, dibongoti ma muse angka parau jadi ro tu huta Kapernaum mangalului Jesus.

²⁵ Jadi dung jumpang nasida Ibana di bariba ni tao i, ninna nasida ma mandok Ibana: Guru, sadihari do ho ro tuson?

²⁶Dung i ninna Jesus ma mangalusi nasida: Na tutu situtu do na hudok on tu hamu: Dilului hamu pe Ahu, ndada ala naung dapot rohamuna tanda i, tung ala ni na bosur i do hamu, na mangan roti i.

²⁷Unang ma sipanganon na olo salpu ula hamu; alai sipanganon na mian ro di hangoluan na salelenglelengna, na naeng lehonon ni Anak ni jolma i tu hamu. Ai Ibana do dihatindangkon Ama i, Debata.

²⁸Dung i ninna nasida ma mandok Ibana: Dia ma bahenonnami, asa huula hami angka ulaon lomo ni roha ni Debata?

²⁹Dung i ninna Jesus ama mangalusi nasida: Haporseai hamu ma Nasinuru ni Debata; i ma ulaon lomo ni rohana.

³⁰Dung i ninna nasida ma: Asa dia ma tanda bahenonmu siidaonnami, asa tung porsea hami di Ho? Aha diula Ho?

³¹Ia ompunami, mangan Manna do di parhorsihan, songon na tarsurat: "Dilehon do roti sian banua ginjang panganonnasida."

³²Dung i ninna Jesus ma mandok nasida: Na tutu do hatangkon tu hamu: Apala si Musa mangalehon tu hamu roti na sian banua ginjang; Damang i do mangalehon di hamu roti na tutu, na sian banua ginjang.

³³Ai na tuat sian banua ginjang do silehon hangoluan tu portibi on; i do roti na sian Debata.

³⁴Gabe didok nasida ma: Sai tong ma lehon tu hami, ale Tuhan, roti sisongon i!

³⁵Dung i ninna Jesus ma mandok nasida: Ahu do roti hangoluan i: sandok na so male be manang ise, naung ro tu Ahu; jala na so tupa be mauas manang ise, na porsea di Ahu.

³⁶Alai nunga hupaboa tu hamu: Diida matamuna do Ahu nian; alai ndang porsea hamu.

³⁷Saluhutna na nilehon ni Ama i tu Ahu, i do na ro tu Ahu; jala na so tupa pabalionku na ro tu Ahu.

³⁸Ai ndada tuat Ahu sian banua ginjang mambahen roharohanku; na pinangido ni roha ni na marsuru Ahu, i do.

³⁹Alai on do dipangido roha ni na marsuru Ahu: Unang ma mago hubahen agia sada sian saluhutna na nilehonna tu Ahu, asa hupangolu i tahe di ari parpudi.

⁴⁰Ai on do dipangido roha ni Damang: Naeng ma dapotan hangoluan salelenglelengna ganup na marnida Anak i jala porsea di Ibana; jala paheheonku do ibana di ari parpudi.

⁴¹Gabe marmungutmungut ma angka Jahudi dompak Ibana siala pandokna i: "Ahu do roti na tuat sian banua ginjang."

⁴²Jadi didok nasida ma: Nda Ibana do Jesus, anak ni si Josep i; nda tatanda amana dohot inana? Beha ma dohononna antong: Na tuat sian banua ginjang do ahu?

⁴³ Jadi dialusi Jesus ma nasida: Unang hamu marmungutmungut!

⁴⁴ Ndang adong na tarbahen ro tu Ahu, ia so na tinogu ni Ama i na marsuru Ahu; jala Ahu pahehehon ibana di ari parpudi.

⁴⁵ Na tarsurat do di angka panurirang: "Na pinodaan ni Debata ma nasida saluhutna." Ganup na manangihon Ama i jala na marguru tu Ibana, i do na ro tu Ahu.

⁴⁶ Ndang dung adong nian na marnida Ama i; holan Ibana na ro sian Debata, I do na marnida Ama i.

⁴⁷ Na tutu situtu do na hudok on tu hamu: Na porsea, i do naung gabe nampuna hangoluan na salelenglelengna.

⁴⁸ Ahu do roti hangoluan i!

⁴⁹ Na mangan Manna i do angka ompumuna di parhorsihan, jadi mate do!

⁵⁰ On do roti na tuat sian banua ginjang, asa unang mate na manganhonsa.

⁵¹ Ahu do roti na mangolu, na tuat sian banua ginjang i. Manang ise na manganhon roti on, i do mangolu salelenglelengna. Ia roti silehononki, bahen hangoluan ni portibi on, i ma dagingku.

⁵² Dung i marsual ma angka Jahudi sama nasida, ninna ma: Beha ma bahenon ni Halak on mangalehon dagingna i panganonta?

⁵³ Jadi didok Jesus ma tu nasida: Na tutu situtu do hatangkon na tu hamu: Tung na so dapot hamu hangoluan i, molo so dipangan

hamu daging ni Anak ni jolma i, jala so diinum hamu mudarna!

⁵⁴ Dapotan hangoluan salelenglelengna do ganup na manganhon dagingku jala manginum mudarhu; jala paheheonku do ibana di ari parpudi.

⁵⁵ Ai sipanganon na tutu do dagingku, jala siinumon na tutu do mudarhu.

⁵⁶ Manang ise na manganhon dagingku jala manginum mudarhu, i do na mian di bagasan Ahu jala Ahu di bagasan ibana.

⁵⁷ Songon parsuru ni Ama Siparngolu i di Ahu, gabe mangolu Ahu marhitehite Ama i, songon i ma mangolu marhitehite Ahu na manganhon Ahu.

⁵⁸ On do roti na tuat sian banua ginja; alai nda tung songon na di angka ompu i, ai mangan do nasida, tong do mate. Mangolu salelenglelengna do na manganhon roti on.

⁵⁹ I ma hata ni Jesus, laho mangajari di bagasan parguruan na di huta Kapernaum.

⁶⁰ (IV.) Asa torop ma sian angka siseanna na umbegesa mandok: Hata na kasar do i; ise pabegebege i?

⁶¹ Alai diboto Jesus ma di bagasan rohana, naung marmungutmungut angka siseanna siala hata i, jadi didok ma tu nasida: Tung ala ni i do hamu targasip?

⁶² Beha nama, anggo idaonmuna Anak ni jolma i manaek tu ingananna hian?

⁶³Tondi i do na pangoluhon; ndang marguna anggo daging i. Angka hata naung huhatahon tu hamu, Tondi do i dohot hangoluan.

⁶⁴Alai adong do deba sian hamuna na so porsea; ai diboto Jesus do sian mulana nasida na so olo porsea, ro di na naeng manjehehon Ibana.

⁶⁵Jadi ninna ma: Dibahen i ma umbahen na hudok tu hamu, na so tarbahen manang ise manopot Ahu, ia so Damang i mangalehonsa tu ibana.

⁶⁶Lan ma angka siseanna i manundalhon Ibana olat ni i; ndang be didongani nasida Ibana.

⁶⁷Dung i didok Jesus ma mandok na sampuludua i: Nda tung dohot hamu naeng laho?

⁶⁸Gabe dialusi si Simon Petrus ma Ibana: Tung tu ise ma hami laho, ale Tuhan? Di Ho do hata hangoluan sisalelenglelengna!

⁶⁹Jala nunga huhaporseai jala hutanda hami: Ho do na badia ni Debata!

⁷⁰Dung i dialusi Jesus ma nasida, ninna ma: Nda sampuludua do hamu naung hupillit i? Hape sada sian hamu gabe sibolis!

⁷¹Si Judas, anak ni si Simon, halak Iskariot i, do na nidokna disi, ai i do na manjehehon Ibana muse; sada sian na sampuludua i do ibana.

7¹(I.) Dung salpu i, diadangi Jesus ma luat Galilea, ai ndang olo Ibana mardalani

di Judea, ala naeng bunuon ni halak Jahudi Ibana.

²Alai jonok do pesta parlapelapean ni Jahudi.

³Jadi didok angka anggina i ma mandok Ibana: Borhat ma Ho sian on laho tu Judea, asa dohot siseanmi marnida angka ulaon na pinatupami!

⁴Ai ndada di na holip diula halak sibahenonna, anggo naeng tu hapataran ibana. Anggo sapala diula Ho angka na songon i, papatar antong dirim tu portibi on!

⁵Ai nang angka anggina, ndang porsea di Ibana.

⁶Dung i ninna Jesus ma mandok nasida: Ianggo tingkingki ndang dope jumpang; alai anggo tingkimuna tongtong do dapot anggo i.

⁷Didia ma hosoman ni portibi on hamu; anggo Ahu dihosomi do, ala Ahu mangkatindangkon, paboa na jahat angka pambahenanna.

⁸Hamu ma nangkok marpesta; ianggo Ahu, ndang nangkok tu pesta on, ai ndang dope jumpang tingkingki.

⁹Dung songon i hatana, tading ma Ibana di Galilea.

¹⁰Alai dung nangkok angka anggina i marpesta, nangkok muse ma nang Ibana; ndang apala patar, tar songon na buni do.

¹¹Asa dilului angka Jahudi ma Ibana di pesta i, angka ninna do: Ai didia do Ibana?

¹²Jadi sai dihatahatai natorop ma Ibana; adong do na mandok: Parroha na denggan do Ibana; alai na asing muse mandok: Nda tung, na mangaliluhon natorop do Ibana.

¹³Alai ndang adong na hum papatarhon hatana taringot tu Ibana, dibahen biarnasida mida Jahudi i.

¹⁴(II.) Nunga pola salpu satonga ni angka ari ni pesta i, asa laho Jesus tu bagas joro mangajari.

¹⁵Gabe longang ma angka Jahudi, didok ma: Sian dia ma diboto On hata ni Debata, so manang diguruhon?

¹⁶Jadi didok Jesus ma tu nasida: Anggo podangku, ndada sian Ahu sandiri, sian na marsuru Ahu do.

¹⁷Ganup na olo mangulahon pinangido ni roha ni I, botoonna ma, manang na sian Debata podangki, manang na huhatahon i sian diringku sambing.

¹⁸Ganup na mangkatahon sian dirina, sangapna do niluluanna; alai na mangalului sangap ni na marsuru ibana, i do parsintong, ndang adong na geduk di bagasan ibana.

¹⁹Nda dilehon si Musa patik i tu hamu? Hape ndang adong nanggo sada sian hamu na mangaradoti patik i. Boasa ditahi rohamuna mamusa Ahu?

²⁰Dung i ninna natorop i ma: Na sibolison do Ho! Tung ise ma tumahi mamusa Ho?

²¹ Dung i ninna Jesus ma mangalusi nasida:
Hupatupa sada ulaon, gabe longang hamu
saluhutna.

²² Onpe, dilehon si Musa tu hamu ruhut
parsunaton (ndang nian sian si Musa
parmulaanna, na sian angka ompu i do),
gabe, disunat hamu halak nang di ari Sabbat.

²³ Asa tarsunat do hapejolma jumpa ari
Sabbat, unang dilaosi patik ni si Musa; tung
Ahu ma muruhanmuna, ala hibuljolma i
hupamalum jumpa ari Sabbat?

²⁴ Unang ma marguru tu na niida sambing
uhummuna, tigor ma panguhummuna!

²⁵ Dung i ninna deba sian isi ni Jerusalem
ma: Nda Ibana i, na naeng bunuonnasida?

²⁶ Ndi, tullom ni hatana i! So manang aha
didok nasida tu Ibana. Atik naung torang
ulaning diboto angka sintuanta, Ibana tutu
Kristus?

²⁷ Alai tahe, taboto do haroroan ni Halak on.
Alai molo ro Kristus i, ndang dapot botoon,
manang sian dia haroroanna.

²⁸ Dung i dipagogo Jesus ma soarana
mangajari di bagas joro i, ninna ma: Olo tutu,
ditanda hamu do Ahu jala diboto hamu do
haroroanki. Nandang na ro Ahu sian diringku,
alai adong do Parsintong i, na marsuru Ahu,
na so tinandamuna.

²⁹ Alai anggo Ahu hutanda do Ibana, ai sian
Ibana do Ahu; Ibana do marsuru Ahu.

³⁰Dung i dilului nasida ma dalan manangkup Ibana; alai ndang adong na mangalaluhon tanganna tu Ibana, ai ndang dope jumpang tingkina.

³¹Alai lan do sian natorop gabe porsea di Ibana, angka ninna do: Molo ro Kristus, tagamon gumodang tanda patupaonna sian na binahen ni On?

³²Dibege Parise i ma angka hata ni natorop i na taringot tu Ibana, jadi disuru angka sintua ni malim dohot Parise i ma angka opas manangkup Ibana.

³³Jadi ninna Jesus ma: Sangombasnari nama Ahu rap dohot hamu; dung i laho ma Ahu manopot na marsuru Ahu.

³⁴Luluanmuna ma Ahu; alai ndang dapot, ai ndang tarbahen hamu ro tu sitopotonki.

³⁵Jadi ninna angka Jahudi ma sama nasida: Tudia ma naeng laho Ibana, umbahen so jumpang hita Ibana? Naeng laho Ibana ulaning tu dongan na mangaranto di Junani dohot mangajari halak Junani i?

³⁶Hata dia do i na nidokna: Luluanmuna ma Ahu, alai ndang dapot; jadi: ndang tartopot hamu tu sitopotonki?

³⁷Dung i di ari pesta na parpudi na sumangap i, jongjong ma Jesus disi, dipagogo ma soarana mandok: Molo adong na mauas, tu Ahu ma ibana ro minum!

³⁸ Songon na nidok ni Surat i: Angka batang aek na mangolu do mabaor sian na porsea di Ahu.

³⁹ Alai taringot tu Tondi i do didok hata ondeng, i ma sijaloon ni angka na gabe porsea di Ibana; ai ndang dope ro Tondi Parbadia, ala so dipasangap dope Jesus.

⁴⁰ Jadi deba sian natorop na umbege hata i mandok: On do tutu Panurirang i!

⁴¹ Deba nari mandok: Kristus do Ibana! Alai adong na asing na mandok: Tung luat Galilea ma haroroan ni Kristus?

⁴² Nda didok Surat i: Sian pomparan ni si Daud, jala sian huta Betlehem, na niinganan ni si Daud nahinan, ro Kristus i?

⁴³ Jadi marsalisi ma natorop ala Ibana.

⁴⁴ (III.) Deba sian nasida naeng manangkup Ibana; alai ndang adong na mangalaluhon tangan tu Ibana.

⁴⁵ Dung i mulak ma angka opas tu angka sintua dohot tu Parise i, gabe didok nasida ma: Boasa so diboan hamu Ibana?

⁴⁶ Jadi mangalusi ma angka opas i: Nandang dung dope adong halak na marjamita songon Ibana.

⁴⁷ Dung i dialusi angka Parise i ma nasida: Tung dohot ma hamu dipaotooto?

⁴⁸ Ai adong do porsea di Ibana sada sian angka sintua manang Parise?

⁴⁹ Holan natorop do, na so umboto patik i; naung hona toru do nasida.

⁵⁰Dung i ninna si Nikodemus, dongannasida sahalak, i do na ro uju i manopot Jesus, didok ma tu nasida:

⁵¹Ai diuhumi patikta i do halak, ia so jolo tinangihon hatana, gabe binoto na niulana?

⁵²Dung i ninna nasida ma mangalusi ibana: Naung dohot do ho huroha halak Galilea? Pamanat ma antong jala ida, na so adong hehe panurirang sian luat Galilea!

⁵³Laos masitopot jabuna be ma nasida.

8¹ (I.) Dung i laho ma Jesus tu balian, tu dolok Jetun.

²Alai torang ni arina i, diulahi laho tu bagas joro i, jadi ro ma nasa natorop i manopot Ibana; laos hundul Ibana mangajari nasida.

³Dung i ditogihon angka sibotosurat dohot Parise ma sada boruboru na targombang tu jolona, dipajongjong ma ibana tusi.

⁴Dung i ninna nasida ma mandok Ibana: Guru, na marlangka pilit do boruboru on, gabe tardapot.

⁵Didok patik ni si Musa, pantinggangkononhon batu tu angka sisongon i. Ia Ho, dia ma pandokmu?

⁶Alai didok nasida pe songon i, na laho mangunjuni Ibana do, asa adong dalan mangaluhon Ibana. Alai dipaunduk Jesus ma Ibana manurati dohot jarijarina tu tano i.

⁷Alai dung sai didatdati nasida manungkun, dipadiringak ma Ibana huhut ma didok tu

nasida: Manang ise sian hamu na so mardosa, i ma jumolo maninggankon batu tu ibana.

⁸Dung i dipaunduk muse ma Ibana manurati tu tano i.

⁹Alai umbege i, laho be ma nasida sadasada, pininsang ni panggora ni rohana be, jumolo ma angka sintua i, gabe tinggal ma holan Jesus angkup ni boruboru i, na jongjong disi.

¹⁰Dipadiringak Jesus ma dirina, jadi ninna ma mandok ibana: Didia do nasida, inang? Nandang adong na mandok uhumna tu ho?

¹¹Jadi ninna ma: Nandang adong, Tuhan! Dung i didok Jesus ma tu ibana: Ahu pe, ndang uhumonku ho. Laho ma ho; unang be ho mardosa tu joloan on!

¹²(II.) Dung i diulahi Jesus muse manjamitai nasida, ninna ma: Ahu do Panondang ni portibi on. Na so tupa mardalan di na holom na mangihuthon Ahu; di ibana do tahe Panondang hangoluan.

¹³Dung i didok angka Parise ma tu Ibana: Dirim do dihatindangkon Ho; ndang na sintong panindangionmi!

¹⁴Dung i ninna Jesus ma mangalusi nasida: Sintong do panindangionku, nang diringku pe huhatindangkon; ai huboto do haroroanku dohot sitopotonku. Nandang diboto hamu haroroanku manang sitopotonku pe.

¹⁵Mangihuthon pardagingon do panguhummuna; anggo Ahu, ndang huuhumi agia ise.

¹⁶Jala ia manguhum pe Ahu, sintong do uhumhu. Ai ndada na mamunjung Ahu; na marsuru Ahu, i do donganku disi.

¹⁷Nang di patik ni uhummana tarsurat do: Na sintong do na hinatindangkon ni dua halak.

¹⁸Ahu do manindangi taringot tu diringku; angkup ni i, Ama i na marsuru Ahu, I do mangkatindangkon Ahu.

¹⁹Dung i didok nasida ma tu Ibana: Didia do Amangmu? Jadi dialusi Jesus, ninna ma: Ndang ditanda hamu manang Ahu, manang Damang pe. Aut na ditanda hamu Ahu, tandaonmuna do nang Damang i.

²⁰I ma dihatahon di bilut inganan ni arta, uju mangajari Ibana di bagas joro i. Ndang adong na manangkup Ibana, ai ndang dapot dope tingkina.

²¹(III.) Dung i didok Jesus ma muse tu nasida: Na laho ma Ahu, gabe jalahanmuna ma Ahu; alai mate ma hamu di bagasan dosamuna. Ndang tardapothon hamu sitopotonki.

²²Dung i ninna angka Jahudi i ma: Na naeng maningkot Ibana ulaning, umbahen na didok: Ndang tardapothon hamu sitopotonki?

²³Dung i didok Jesus ma tu nasida: Anggo hamu, sian toru on do hamuna, na sian ginjang do anggo Ahu; na sian portibi on do hamuna, ndang sian portibi on anggo Ahu.

²⁴Nunga hudok antong tu hamu: Na mate ma hamu di bagasan dosamuna. Ai molo so porsea hamu, Ahu do Ibana, mate nama hamu di bagasan dosamuna.

²⁵Dung i ninna nasida ma mandok Ibana: Ai ise do Ho? Jadi didok Jesus ma tu nasida: Sandok, naung huhatahon tu hamu, i do Ahu!

²⁶Godang do sihataonku dohot sipinsangonku taringot tu hamu. Alai Parsintong i do marsuru Ahu; jala angka na hubege sian Ibana, i do huhatahon tu portibi on.

²⁷Ndang mananda nasida, Ama i do na nidokna disi.

²⁸Dung i didok Jesus ma tu nasida: Dung pe dipatimbo hamu Anak ni jolma i, asa botoonmuna, Ahu do i, jala na so mambahen agia aha Ahu anggo sian roharohangku sandiri; alai songon pinodahon ni Damang tu Ahu, songon i do huhatahon.

²⁹Jala na marsuru Ahu, i do mandongani Ahu. Ndang dung ditadingkon Ibana sasada Ahu, ai tongtong do hubahen lomo ni rohana.

³⁰Asa di na mangkatahon i Ibana, torop ma gabe porsea di Ibana.

³¹Dung i didok Jesus ma tu angka Jahudi, naung gabe porsea di Ibana: Molo mian hamu di bagasan hatangku, sintong ma hamu siseanku.

³²Dung i tandaonmuna ma na sintong i, jala paluaon ni na sintong i ma hamu.

³³ Jadi dialusi nasida ma Ibana, ninna ma: Pinompar ni si Abraham do hami; ndang dung hami mangadop di halak. Boasa dohononmu: Paluaon ma hamu?

³⁴ Dung i didok Jesus ma mangalusi: Na tutu situtu do na hudok on tu hamu: Hatoban ni dosa do ganup na mangula dosa.

³⁵ Ndada tongtong hot di bagas anggo hatoban, Anak i do disi tongtong.

³⁶ Molo dipalua Anak i hamu, na malua situtu ma hamu.

³⁷ Huboto do hamu pinompar ni si Abraham; alai dilului hamu do dalan mambunu Ahu, ai ndang siat hatangku tu hamu.

³⁸ Na huida di Damang, i do huhatahon; hamu pe antong, na binegemuna di amamuna, i do diula hamu.

³⁹ Dung i ninna nasida ma mangalusi: Si Abraham do amanami! Dung i didok Jesus ma: Anggo angka anak ni si Abraham do hamu, ulaonmuna ma angka pambahenan ni si Abraham.

⁴⁰ Alai dilului hamu do dalan mambunu Ahu on, na paboahon tu hamu hasintongan na hubege sian Debata. Nandang songon i pambahen ni si Abraham.

⁴¹ Diula hamu do angka na niula ni amamuna. Dung i didok nasida ma tu Ibana: Apala na tubu sinalong hami: Sada do amanami, i ma Debata.

⁴²Dung i didok Jesus ma tu nasida: Aut ni Debata amamuna, holong ma rohamuna di Ahu. Ai sian Debata do Ahu borhat ro tu on; ai ndang ro Ahu sian roharohangku, Ibana do marsuru Ahu.

⁴³Boasa so diantusi hamu pangkataionku? Ala so tartangihon hamu hatangku.

⁴⁴Na marama tu sibolis do hamu, jala sinangkap ni roha ni amamuna do naeng patupaonmuna. Sibunujolma do ibana sian mulana i, ndang tindang ibana di hasintongan, ai ndang adong hasintongan di bagasan rohana. Jumpa dihatahon gabus, na di dirina hian ma dihatahon disi, ai pargapgap do ibana jala ama ni gapgap.

⁴⁵Alai molo Ahu mangkatahon hasintongan, gabe ndang porsea hamu di Ahu.

⁴⁶Ise sian hamu na padapot Ahu di dosangku? Alai anggo huhatahon na tutu, boasa so porsea hamu di Ahu?

⁴⁷Ganup na sian Debata, tangihonon ni i do hata ni Debata. Ala so sian Debata hamu, umbahen na so ditangihon hamu Ahu.

⁴⁸(IV.) Dung i didok angka Jahudi ma mangalusi Ibana: Nda tigor na hudok hami: Halak Samaria do Ho; na sibolison do Ho?

⁴⁹Jadi dialusi Jesus ma: Nandang na sibolison Ahu; alai hupasangap do Damang, jadi hamu do mangaleai Ahu.

⁵⁰Ianggo Ahu ndang hulului sangaphu; adong do na mangaluluisa jala na manguhumi.

⁵¹ Na tutu situtu do na hudok on tu hamu: Molo adong na mangaradoti hatangki, ndang idaon ni i hamatean salelenglelengna.

⁵² Gabe didok angka Jahudi ma tu Ibana: Apala nuaeng ma huboto hami, naung sibolison Ho; na mate do si Abraham ro di angka panurirang i, gabe didok Ho: Molo adong na mangaradoti hatangku, na so tupa aeon ni i hamatean salelenglelengna, nimmu.

⁵³ Ai umbalga do Ho sian si Abraham, amanami, na mate i? Angka panurirang pe mate do. Ai ise do Ho di roham?

⁵⁴ Dung i dialusi Jesus ma: Molo Ahu pasangap diringku, na soada ma sangaphu. Damang i, na nidokmuna Debatamuna, i do na pasangap Ahu.

⁵⁵ Nandang ditanda hamu Ibana; alai anggo Ahu hutanda do Ibana. Aut hudok: Nandang hutanda Ibana, pargapgap ma Ahu doshon hamu; alai hutanda do Ibana jala huradoti do hatana.

⁵⁶ Marolopolop do si Abraham, amamuna i, ala naeng idaonna aringki; jadi saut ma diida, gabe las ma rohana.

⁵⁷ Dung i didok angka Jahudi i ma mandok Ibana: Nandang tuk dope Ho limapulu taon; tung diida Ho ma si Abraham?

⁵⁸ Dung i ninna Jesus ma mandok nasida: Na tutu situtu do na hudok on tu hamu: Jumolo hian do Ahu asa tubu si Abraham.

⁵⁹Dung i dihindat nasida ma batu laho maninggangkon tu Ibana, alai buni ma Jesus laho sian bagas joro i.

9¹ (I.) Dung i di na mamolus i Ibana, diida ma sada halak na mapitung tubu.

²Gabe ninna angka siseanna ma manungkun Ibana: Ale Guru, ise do na mardosa, halak on do manang natorasna, umbahen na mapitung ibana tubu?

³Jadi dialusi Jesus ma: Ndada ala ni dosana manang ala ni dosa ni natorasna; alai naeng gabe patar angka ulaon ni Debata di ibana.

⁴Ingkon ulaonku do ulaon ni na marsuru Ahu, saleleng arian; ai dung ro borngin, ndang tarbahen mangula disi manang ise.

⁵Panondang ni portibi on do Ahu, tagan di portibi on Ahu.

⁶Jadi dung didok songon i, ditijuri ma tano i mambahen gambo marhite sian ijurna i, didalohon ma gambo i tu matana.

⁷Dung i didok ma tu ibana: Laho ma ho marsuap tu dano Siloam (na mandok: Na sinuru)! Jadi laho ma ibana marsuap, gabe marnida ma ibana mulak.

⁸Dung i didok hombar bagasna ma ro di angka na marnida ibana najolo mangidoido: Nda on do na somal hundul mangidoido?

⁹Jadi adong ma deba na mandok: Ibana do i! Alai na deba mandok: Ndangana, suman do ibana tusi. Didok ibana do: Ahu do i!

¹⁰Dung i ninna nasida ma: Beha do hamumungkap ni matami?

¹¹Jadi didok ma mangalusi: Halak i na margoar Jesus, i do pauli gambo, didalohon ma i tu matangku, jadi disuru ahu marsuap tu dano Siloam; dung i laho ahu tusi marsuap, jadi marnida ma.

¹²Dung i ninna nasida ma tu ibana: Didia do Ibana? Jadi didok ma: Nandang huboto!

¹³Gabe ditogihon nasida ma halak na mapitung hian tu angka Parise.

¹⁴(II.) Alai ari Sabbat do tongon, uju dipauli Jesus gambo i dohot mangungkap matana i.

¹⁵Laos disungkun angka Parise i ma tu ibana pangalahona, umbahen marnida ibana. Jadi didok ma tu nasida: Gambo do didalohon tu matangki, dung i marsuap ahu jadi marnida ma!

¹⁶Dung i didok na deba sian angka Parise i ma: Nandang na sian Debata Halak i, ai ndang dijujur Ibana ari Sabbat i. Angka na asing mandok: Tung tarpatupa halak sipardosa ma tanda sisongon i? Jadi marsalisi ma nasida sama nasida.

¹⁷Dung i didok nasida ma muse tu na mapitung hian: Ia ho, dia ma pandokmu taringot tu Ibana, ala diungkap matami? Jadi didok ma: Panurirang do Ibana!

¹⁸Jadi ndang diparhatutu angka Jahudi i, ibana do na mapitung i najolo, gabe marnida

muse, pola do dijou nasida natoras ni naung marnida i.

¹⁹Jadi disungkun ma nasida: Anakmuna do on tahe, na nidokmuna na mapitung tubu i? Na boha do gabe marnida ibana nuaeng?

²⁰Dung i ninna natorasna i ma mangalusi nasida: Na huboto hami do on anaknami jala na mapitung do ibana tubu.

²¹Alai ndang huboto hami, manang beha pangalahona gabe marnida; ba, ndang hutanda hami na mangungkap matana. Ibana ma sungkun hamu; nunga tang dagingna, botoonna do mandok sidohononna.

²²Ai mabiar mida Jahudi i do natorasna, umbahen na didok songon i. Ai nunga mardos ni roha angka Jahudi, ingkon sipabalion do sian huria ganup na marhatopothon, Kristus Ibana.

²³Dibahen i do umbahen na didok natorasna i: Nunga tang dagingna; ibana ma sungkun hamu!

²⁴Dung i dijou nasida ma paduahalihon halak na mapitung hian, didok ma tu ibana: Pasangap ma Debata! Huboto hami do, pardosa Halak i.

²⁵Dung i ninna ibana ma mangalusi: Manang na pardosa Ibana, ndang huboto. Holan on do na huboto: Na mapitung do ahu najolo, alai na marnida do anggo nuaeng.

²⁶Gabe ninna nasida ma mandok ibana: Ai aha do dibahen tu ho; beha do dibahen mangungkap matami?

²⁷Jadi dialusi ma nasida: Nunga hupaboa i tu hamu; na so dibege hamu do i? Naeng begeonmuna i muse? Naeng gabe siseanna nang hamu?

²⁸Dung i disurahi nasida ma ibana, ninna ma: Ho do siseanna; anggo hami sisean ni si Musa do.

²⁹Huboto hami do, si Musa diangkupi Debata mangkatai; alai anggo Halak on, ndang binoto, manang sian dia Ibana.

³⁰Gabe dialusi ibana ma nasida: Longang do rohangku disi, na so binotomuna, manang na sian dia Ibana, hape diungkap do matangku!

³¹Taboto do, na so ditangihon Debata angka pardosa, alai halak na mangkabiari Debata jala mangulahon pinangido ni rohana, i do ditangihon.

³²Sian mula ni tano on ndang dung binege, adong na mangungkap mata ni halak na mapitung tubu.

³³Aut so sian Debata Ibana, ndang tarpatupasa agia aha.

³⁴Dung i ninna nasida ma mangalusi ibana: Hibul do ho tubu di bagasan dosa, hape naeng ajaranmu hami! Jadi dipabali nasida ma ibana.

³⁵(III.) Dibege Jesus ma, naung dipabali nasida ibana, jadi ninna ma mandok ibana,

dung jumpangsa: Na porsea do ho di Anak ni
jolma i?

³⁶Dung i ninna halak i ma mangalusi: Ai ise
do i, Tuhan, asa huhaporseai Ibana?

³⁷Jadi didok Jesus ma tu ibana: Na niidam,
na mangkatai dohot ho, I ma Ibana.

³⁸Gabe didok ma: Na porsea do ahu, ale
Tuhan! Laos disomba ma Ibana.

³⁹Dung i didok Jesus ma: Mamboan uhum
do, umbahen na ro Ahu tu portibi on, asa
marnida angka na so marnida hian, jala asa
gabe mapitung angka na marnida.

⁴⁰Jadi dibege na deba sian angka Parise na
rap dohot Ibana ma i, jadi didok ma tu Ibana:
Nda tung dohot hami mapitung?

⁴¹Jadi didok Jesus ma tu nasida: Aut na
mapitung hamu, gabe so mardosa hamu. Alai
didok hamu do: Na marnida do hami, gabe
hot ma dosamuna.

10¹(I.) Na tutu situtu do na hudok on tu
hamu: Manang ise na so bongot sian
pintu, laho tu bara ni birubiru, na manjangkit
sian dalan na asing laho bongot, panangko do
i jala pamangus.

²Alai na bongot sian pintu i, i do siparmahan
birubiru i.

³Ungkapon ni sijaga pintu i ma di ibana
jala dibege angka birubiru i do soarana; jala
dijou do angka birubiruna di goarna be, laho
manogihonsa tu balian.

⁴Ia dung diparuar sude na di ibana, sai di jolonasida ma ibana mardalan, gabe diihuthon angka birubiru ma ibana, ai ditanda do soarana.

⁵Alai ndang olo nasida mangihuthon tu na asing; na maporus do nasida mida i, ai ndang ditanda nasida soara ni na asing i.

⁶Asa dihatahon Jesus pe hata umpama ondeng tu nasida, ndang diboto nasida lapatan ni na nidokna i tu nasida.

⁷Dung i didok Jesus ma muse tu nasida: Na tutu situtu na hudok on tu hamuna: Ahu do pintu na tu birubiru i.

⁸Saluhut angka naung manjoloani Ahu, panangko do i jala pamangus; alai ndang ditangihon angka birubiru i nasida.

⁹Ahu do pintu i. Paluaon do ganup na bongot sian Ahu; na laho bongot jala laho ruar ma ibana, dapotan jampalan.

¹⁰Anggo panangko, holan manangkoi, maneati jala mangago do, umbahen na ro Alai anggo Ahu, asa adong hangoluan di nasida, pola marlobilobi di nasida, umbahen na ro.

¹¹Parmahan na denggan do anggo Ahu. Diseahon parmahan na denggan i do hosana humongkop angka birubiruna.

¹²Alai anggo na niupaan, na so parmahan situtu, na so nampuna birubiru i; diida pe ro babiat, ditadingkon do birubiru i laho maporus, gabe disoro babiat i ma birubiru i jala dipanserakkon.

¹³ Ai sipangan gaji do ibana, na so sumarihon angka birubiru i.

¹⁴ Ahu do Parmahan na denggan. Hutanda do angka na di Ahu, jala ditanda nasida do Ahu.

¹⁵ Songon Ama i na tumanda Ahu jala Ahu tumanda Ama i, jala huseahon do hosangku humongkop birubiru i.

¹⁶ Adong dope angka birubirungku na asing, na so sian bara on. Ingkon dohot do angka i togihononku; tangihononnasida do soarangku, dung i gabe sada pungan ma i jala sada ma parmahan.

¹⁷ Ala ni on do umbahen dihaolongi Ama i Ahu, ala hulehon hosangku, asa jaloonku i muse.

¹⁸ Ndang adong na mambuat i sian Ahu, sian lomongku do i hulehon. Na marhuaso do Ahu mangalehon, na marhuaso do Ahu manjalo muse. I ma patik na hujalo sian Damang.

¹⁹ (II.) Dung i marsalisi muse ma angka Jahudi i ala ni angka hata ondeng.

²⁰ Torop do sian nasida mandok: Na sibolison jala na rintik do Ibana; aha patangitangionmuna I?

²¹ Angka na asing mandok: Nda tung hata ni na sibolison i; tung tarungkap sibolis i; tung tarungkap sibolis ma mata ni na mapitung?

²² Dung i jumpang ma ari parningotan di haompoan ni bagas joro i di Jerusalem; partaonan ngali do uju i.

²³ Jadi mardalandalan ma Jesus di emper ni si Salomo na di bagas joro i.

²⁴ Gabe dihaliangi angka Jahudi ma Ibana, didok ma tu Ibana: Sadia leleng on ma bohabohaon rohanami bahenonmu? Molo na tutu Ho Kristus, tullom ma paboa tu hami!

²⁵ Dung i ninna Jesus ma mangalusi: Nunga hupaboa tu hamu; hape ndang porsea hamu. Angka ulaon na huula marhitehite Goar ni Damang, angka i do mangkatindangkon Ahu.

²⁶ Alai ndang porsea hamu, ai ndang masuk birubirungku hamu.

²⁷ Ditangihon angka birubirungku do soarangku jala hutanda do nasida, diihuthon nasida do Ahu.

²⁸ Gabe hulehon tu nasida hangoluan salelenglelengna; ndang be mago nasida salelenglelengna jala ndang tarrampas manang ise nasida sian tanganku.

²⁹ Umbalga sian saluhutna do Damang na mangalehon nasida tu Ahu, umbahen na so tarrampas manang ise nasida sian tangan ni Damang.

³⁰ Sada do Ahu dohot Ama i.

³¹ Dung i dialap angka Jahudi ma muse batu, laho maninggangkonsa tu Ibana.

³² Dung i didok Jesus ma: Lan do ulaonku na denggan sian Damang, angka na hupatuduhon tu hamu; ala ni ulaon dia do naeng dangguranmuna Ahu?

³³Dung i ninna angka Jahudi ma mangalusi Ibana: Apala ala ni ulaon na denggan, umbahen na naeng danggurannami Ho; ala ni pangaleaimi di Debata do: Dipasobok Ho do dirim tu Debata, atik pe donganjolma Ho.

³⁴Dung i dialusi Jesus ma nasida: Ai nda tarsurat di patikmuna: "Nunga hudok: Angka debata do hamuna"?

³⁵Gari nasida na gabe hasahatan ni hata ni Debata, digoar do "debata", jala ndang tarsensang Surat i.

³⁶Tung dohononmuna ma tu na pinarbadian ni Ama i, naung sinuruna tu portibi on: Sileai Debata do Ho, ala hudok: Anak ni Debata do Ahu?

³⁷Molo so huula angka ulaon ni Damang, unang porsea hamu di Ahu.

³⁸Alai ia huula angka i, porsea ma hamu di angka ulaon i, anggo so Ahu dihaporseai hamu, asa diboto jala ditanda hamu, di bagasan Ahu do Ama i, jala Ahu di bagasan Ama i.

³⁹Dung i naeng ma tangkuponnasida Ibana; alai laho do Ibana sian tongatonganasida.

⁴⁰Dung i laho ma Ibana muse tu ipar ni aek Jordan, tu pandidian ni si Johannes najolo, laos mian disi.

⁴¹Dung i torop ma halak ro manopot Ibana, angka ninna ma: Ndang dipatupa si Johannes nian tanda, alai nasa na nidok ni si Johannes taringot tu Halak on, sintong do i.

⁴²Jadi torop do halak disi gabe porsea di Ibana.

11 ¹(I.) Marsahit ma halak si Lasarus na sian Betania, i ma huta na niingan ni si Maria dohot si Marta, hahana i.

²I ma si Maria na mamiahi Tuhan i jala mangapusi patna dohot obuknasida; iboto ni i do si Lasarus na marsahit i.

³Jadi disuru angka ibotona i ma na mandok tu Ibana: O Tuhan, na marsahit do hinaholongan ni roham!

⁴Umbege i Jesus, ninna ma: Nda tung hamatean ujung ni sahiti, alai bahen hasangapon ni Debata do i, asa marsangap Anak ni Debata marhite sian i.

⁵Alai holong do roha ni Jesus di si Marta dohot di anggina i, nang di si Lasarus i.

⁶Asa dung dibege naung marsahit ibana, mangulon dope Ibana dua ari nari di ingananna i.

⁷Dung salpu i, ninna ma mandok angka siseanna: Beta ma hita mulak tu Judea!

⁸Dung i ninna angka siseanna ma mandok Ibana: Gurunami, apala nambura dope ditahi angka Jahudi mandangguri Ho, ulahanmu muse tusi?

⁹Jadi dialusi Jesus ma: Nda sampuludua jom na sadari? Nandang na olo tartuktuk na mardalan arian, ai diida do panondang ni portibi on.

¹⁰Alai na mardalan borngin i, tartuktuk ma anggo i, ai ndang di bagasan ibana panondang i.

¹¹I ma didok. Dung i ninna ma tu nasida: Nunga modom si Lasarus, alealenta i; alai na laho ma Ahu tusi manungguli ibana.

¹²Dung i didok angka siseanna ma tu Ibana: Ale Tuhan, molo na modom ibana, na laho mangolu ma.

¹³Hamamatena do nian na nidok ni Jesus disi; alai dirimpu nasida, parmodomon hian do na nidokna i.

¹⁴Disi pe asa tullom didok tu nasida: Nunga mate si Lasarus!

¹⁵Ala ni hamu do umbahen na las rohangku, so disi Ahu, asa porsea hamu; alai borhat ma hita manopot ibana!

¹⁶Dung i didok si Tomas, na margoar si Linduat, ma mandok angka donganna sisean: Antong, borhat ma hita, asa rap mate hita dohot Ibana!

¹⁷Jadi dung sahat Jesus ro disi nunga pola opat ari di bagasan tanoman ibana didapot.

¹⁸Alai anggo huta Betania, na jonok do i tu Jerusalem, tar dua batu daona.

¹⁹Torop do Jahudi naung ro manopot si Marta dohot si Maria, mangapul nasida siala ibotonasida i.

²⁰Jadi dung dibege si Marta, naung ro Jesus, laho ma ibana manomunomu; na tinggal di bagas do anggo si Maria.

²¹ Dung i ninna si Marta ma mandok Jesus: Aut na dison Ho, ale Tuhan, ndang tagamon mate ibotongki!

²² Alai nuaeng pe, tong do huboto, lehonon ni Debata do tu Ho nasa sipangidoonmu tu Ibana.

²³ Gabe didok Jesus ma tu ibana: Na hehe ma ibotom!

²⁴ Jadi didok si Marta ma tu Jesus: Olo, huboto do, na hehe do ibana di haheheon i, na di ari parpudi.

²⁵ Dung i ninna Jesus ma mandok ibana: Ahu do haheheon dohot hangoluan; na mangolu do na porsea di Ahu, nang pe mate ibana!

²⁶ Jala ganup na mangolu jala na porsea di Ahu, na so tupa mate ibana salelenglelengna! Porsea do ho disi?

²⁷ Dung i didok ma tu Ibana: Olo, Tuhan, na porsea do ahu: Ho do Kristus, Anak ni Debata, na naeng ro tu portibi on.

²⁸ Jadi dung didok songon i, laho ma ibana manjou si Maria anggina i, dihusiphon ma, mandok: Nunga ro Guru i, dijou do ho!

²⁹ Umbege i si Maria, hapogan ma ibana hehe mandapothon Ibana.

³⁰ Ai ndang dope sahat ro di huta i Jesus, mangulon di inganan hajumpanganna dohot si Marta i dope Ibana.

³¹ Ia angka Jahudi i, donganna di jabu i, angka naung ro mangapul nasida, dung diida hapogan si Maria hehe laho tu balian,

dihuthon ma ibana; ai dirimpu, laho tu tanoman do ibana tumatangis.

³²Asa sahat ma si Maria tu pangulonan ni Jesus; jala disi diida Ibana, dipatungkap ma ibana tu jolona, huhut mandok: Aut na dison Ho, ale Tuhan, ndang tagamon mate ibotongki!

³³Jadi dung diida Jesus tumatangis si Maria ro di Jahudi na ro i, angka na tumatangis i, tarrimas ma rohana huhut bonsa.

³⁴Dung i ninna ma: Tudia do dipeakkon hamu ibana? Jadi didok nasida ma: Ro ma Ho marnida, Tuhan!

³⁵Dung i tariluilu ma mata ni Jesus.

³⁶Dung didok angka Jahudi i ma: Ndi! Holong ni rohana i di ibana!

³⁷Alai deba sian nasida mandok: Mata ni na mapitung diungkap Ibana do; ndang hasundatan Ibana huroha halak on, unang mate?

³⁸Gabe tarrimas muse ma roha ni Jesus, di na sahat Ibana tu tanoman i. Liang batu do i, laos batu do langkopna.

³⁹Dung i ninna Jesus ma: Hindati hamu ma batu i! Gabe ninna si Marta, iboto ni naung monding i, ma: Nunga sanga bau, Tuhan, ai nunga pola opat ari.

⁴⁰Dung i ninna Jesus ma mandok ibana: Nda hudok tu ho: Idaonmu do hasangapon ni Debata, molo na porsea ho?

⁴¹ Jadi dihindat nasida ma batu i; dung i manaili ma Jesus dompak ginjang, didok ma: Ale Amang, mauliate ma hudok tu Ho, ala ditangihon Ho Ahu.

⁴² Huboto do nian, na tongtong do ditangihon Ho Ahu; alai ala ni natorop on, na jongjong humaliang, umbahen hudok songon i, asa porsea nasida, naung sinurumi do Ahu.

⁴³ Jadi dung didok songon i, dipagogo ma soarana manjouhon: O Lasarus, ruar ma ho!

⁴⁴ Dung i ruar ma tutu na mate i; lilit dope saput i tu patna dohot tu tanganna, jala alit sekka i tu bohina. Jadi didok Jesus ma: Harhari hamu i, asa mardalan ibana.

⁴⁵ Jadi torop ma sian angka Jahudi, naung ro tu si Maria, gabe porsea di Ibana, dung diida nasida na pinatupana i.

⁴⁶ (II.) Alai deba sian nasida laho manopot angka Parise, mamaritahon na binahen ni Jesus.

⁴⁷ Dung i dipansang angka sintua ni malim i dohot angka Parise ma rapot godang, didok nasida ma: Aha ma bahenonta? Ai lan do tanda dibahen Halak i!

⁴⁸ Molo itapasombu Ibana, porsea ma halak saluhutna di Ibana, gabe ro ma halak Rom maon mangarampas tanonta dohot bangsonta.

⁴⁹ Alai hehe ma sada sian nasida, i ma si Kayapas, sintua ni malim di na sataon i, didok ma tu nasida: Na hurang roha do hamu!

⁵⁰Ndang dipingkiri rohamuna, denggan do mate sada halak humongkop natorop i, unang laho mago sandok bangso i.

⁵¹Alai ndang sian rohana sandiri dihatahon i; ala sintua ni malim ibana di na sataon i, umbahen na disurirangkon, na naeng mate ma Jesus humongkop bangso i.

⁵²Alai tahe, ndada holan laho mangkongkop bangso i; alai naeng papunguonna angka anak ni Debata, angka na marserak dope, laho pasadahonsa.

⁵³Asa olat ni na sadari i martuptup i ma nasida laho mamusa Ibana.

⁵⁴Jadi ndang be mardalani Jesus di na patar di tongatonga ni halak Jahudi; na sumurut do Ibana sian i tu sada luat mardonokkon halongonan, tu huta na margoar Epraim. Jadi disi ma Ibana mian rap dohot angka siseanna.

⁵⁵Alai jonok nama Paska ni Jahudi, jadi torop ma halak laho sian luat i nangkok tu Jerusalem, manguras dirina, patujolo ni Paska i.

⁵⁶Jadi dilului nasida ma Jesus, angka jongjong ma nasida di bagas joro i masipandohan: Beha di rohamuna, na so ro do Ibana ulaning tu pesta i?

⁵⁷Alai nunga dipatikkon angka sintua ni malim dohot angka Parise: Manang ise na umboto inganan ni Jesus, ingkon dipabotohon, asa dapot tangkuponnasida Ibana.

12¹ (I.) Dung i onom ari nari asa dapot pesta Paska i, sahat ma Jesus tu huta Betania, na niinganan ni si Lasarus, na sinunggul ni Jesus sian na mate.

² Jadi dipauli nasida ma disi panganon ujuan di Ibana; si Marta do marhobasi, si Lasarus ma sada donganna mangan disi.

³ Gabe dibuat si Maria ma sahat i miak Nardus na arga na so marsaor, dimiahi ma pat ni Jesus, obukna ma dibahen mangalapu. Jadi digohi uap ni miak i ma bagas i.

⁴ Jadi sada sian angka siseanna, si Judas Iskariot na naeng manjehehon Ibana, mandok:

⁵ Boasa so ginadis miak i arga tolu ratus hupang, bahen silehonlehon nian di angka na pogos?

⁶ Alai ndada na pogos sinarihonna, umbahen na didok songon i; panangko do ibana tahe, diusung do asiasi ni halak, ai tu ibana dipasahat puro i.

⁷ Dung i ninna Jesus ma: Pasombu ma ibana, ai diparade do i hira tu ari hatatanomhi.

⁸ Ai tongtong do adong na pogos di tongatongamuna, alai anggo Ahu ndang tongtong di lambungmuna.

⁹ Dung i diboto torop sian halak Jahudi ma, naung disi Ibana, jadi ro ma tusi, ndada ala ni Jesus sambing; naeng idaonnasida do huhut si Lasarus, naung pinahehena i sian na mate.

¹⁰Alai nunga ditahi angka sintua ni malim i, naeng bunuonnasida nang si Lasarus.

¹¹Ai ala ibana do umbahen torop Jahudi laho tusi jala porsea di Jesus.

¹²(II.) Dung i torang ni arina i dibege halak natorop na ro tu pesta i, na naeng ro ma Jesus tu Jerusalem.

¹³Jadi dibuat nasida ma angka maremare, laho manomunomu Ibana huhut dijoujouhon: Hosianna! Pinanasupasu ma na ro marhite Goar ni Tuhan i, Raja ni Israel!

¹⁴Dung i dapot Jesus ma halode sada, i ma dihunduli, hombar tu na tarsurat:

¹⁵"Unang ho mabiar, boru Sion; ida ma, Rajam do na ro, marsihundul di anak ni halode!"

¹⁶Alai ndang diantusi angka siseanna i hian; dung pe marsangap Jesus, asa diingot nasida, naung marhahonaan tu Ibana do hape na tarsurat i ro di pambahenannasida tu Ibana.

¹⁷Laos dihatindangkon natorop, angka na mandongani Ibana do, paboa naung jinouna i si Lasarus sian tanoman, laho manungguli ibana sian na mate.

¹⁸Jadi ala naung dibege natorop i barita ni tanda na binahenna i, umbahen na ditomu nasida Ibana.

¹⁹Jadi didok angka Parise ma sama nasida: Diida hamu do, na so marniula na binahenmu, ai liat portibi on do paihutihut Ibana.

²⁰(III.) Alai adong ma deba halak Junani, dongan ni angka na nangkok i, laho martangiang di ari raya i.

²¹Jadi didapothon nasida ma si Pilippus na sian Betsaida na di Galilea, manglehelek ibana, ninna ma: Tuannami, naeng do idaonnami Jesus!

²²Dung i ro ma si Pilippus, dipaboa ma i tu si Andreas; dung i ro ma si Andreas rap dohot si Pilippus paboahonsa tu Jesus.

²³Gabe didok Jesus ma mangalusi nasida: Naung dapot ma tingkina, asa marsangap Anak ni jolma i!

²⁴Na tutu situtu do na hudok on tu hamu: Nandang na ganda eme i, molo so madabu tu tano jala mate; dung pe mate, asa godang parbuena.

²⁵Agoan hosa ma na marhamaolhon hosana; alai na mangkasogohon hosana di portibi on, i do na mangaramotisa sahat tu hangoluan salelenglelengna.

²⁶Ahu ma diihuthon ganup na olo mangoloi Ahu; jala ia disi Ahu, disi ma dohot anak somangku. Pasangapon ni Ama i do ganup na mangoloi Ahu.

²⁷Na bonsa do rohangku nuaeng; aha ma dohononku? Palua ma Ahu, Amang, sian tingki on? Alai tahe, ala ni i do umbahen na sahat tingki on tu Ahu.

²⁸Pasangap ma Goarmi, Amang! Dung i ro ma soara sian banua ginjang, mandok: Nunga hupasangap, laos pasangaponku do muse!

²⁹Jadi dung dibege, natorop i na jongjong disi, ninna nasida ma: Ronggur do i. Angka na asing mandok: Adong do surusuruan ni Debata na mangkatai dohot Ibana.

³⁰Dung i ninna Jesus ma mangalusi nasida: Ndada ala ni Ahu, umbahen na ro soara ondeng; ala ni hamu do!

³¹Nuaeng ma jumpang tingkina, asa diuhum portibi on; sipabalion ma nuaeng raja ni portibi on.

³²Anggo Ahu, dung dipatimbo Ahu sian tano on, taitonku do saluhut nasida tu Ahu!

³³Pangalaho ni parmatena do dipatuduhon marhitehite hatana ondeng.

³⁴Asa dialusi natorop i ma Ibana: Hubege hami di surat ni patik i, na mian do Kristus i ro di salelenglelengna; boasa dohononmu: Ingkon sipatimboon do Anak ni jolma i? Ise do Anak ni jolma i, na nidokmi?

³⁵Dung i didok Jesus ma tu nasida: Satongkin nari nama Panondang i di hamu. Mardalan ma hamu, binsan di hamu dope Panondang i, asa unang ditahopi na holom i hamu. langgo na mardalan di na holom, ndang diboto i, manang dompak dia ibana laho.

³⁶Binsan di hamu dope Panondang i, porsea ma hamu disi, asa gabe anak ni Panondang

i hamu! I ma dihatahon Jesus; dung i ditadingkon ma nasida laho martabuni.

³⁷ (IV.) Alai atik pe dipatupa Ibana angka tanda na sai godang i di jolonasida, ndang porsea nasida di Ibana.

³⁸ Asa sintong jumpang hata ni panurirang Jesaya na nidokna i: "Iale Tuhan, tung ise ma na porsea di jamitanami; jala tangan ni Tuhan i, di ise ma i torang tarida?"

³⁹ Dibahen i ndang tarbahen nasida porsea; ai on do didok Jesaya muse:

⁴⁰ "Nunga dipapitung Ibana matanasida, jala nunga dipatangakang rohanasida, asa unang marnida simalolongnasida jala unang mangantusi rohanasida, unang mulak nasida, unang malum nasida hubahen!"

⁴¹ Songon i ma didok Jesaya, ala diida hasangaponna i jala dihatahon taringot tu Ibana.

⁴² Nang sian angka partogi pe, adong do nian na nia na gabe porsea di Ibana; alai ndang diparhatopot nasida i ala ni angka Parise, asa unang bali nasida sian huria.

⁴³ Ai holongan do rohanasida di hasangapon ni jolma, asa di hasangapon ni Debata.

⁴⁴ Dung i joujou ma Jesus, ninna ma: Na porsea di Ahu, ndada Ahu na hinaporseaanna; na marsuru Ahu do dihaporseai disi.

⁴⁵ Na marnida Ahu, marnida na marsuru Ahu do.

⁴⁶Ahu do Panondang na ro tu portibi on, asa unang mian di na holom nasa na porsea di Ahu.

⁴⁷Asa molo adong na umbege hatangku, gabe ndang diradoti, ndada Ahu manguhum ibana; ai ndada laho manguhum portibi on, na laho paluahon portibi on do, umbahen na ro Ahu.

⁴⁸Na mambolongkon Ahu jala na so manjalo hatangku, nunga adong na manguhum i; hata na huhatahon, i do manguhum ibana di ari parpudi.

⁴⁹Ai ndang sian roharohangku Ahu marjamita; diaturhon Ama i na marsuru Ahu do sidohononku dohot sihatahononku.

⁵⁰Jala huboto, hangoluan na salelenglelengna do podana i. Asa di sude hatangki, ia i pandok ni Ama i tu Ahu, i do huhatahon.

13¹(I.) Mandapothon pesta Paska i, nunga diboto Jesus, naung ro tingkina manadingkon portibi on, laho mandapothon Ama i; gabe songon pangkaholongina di angka na di Ibana na di portibi on, laos songon i do dihaholongi nasida ro di ujungna.

²Di na mangan i nasida, nunga disuanhon sibolis i parjeheon tubagasan roha ni si Judas Iskariot, anak ni si Simon.

³Jala diboto Jesus do, naung dipasahat Ama i saluhutna tu tanganna jala Ibana na ro sian Debata laho mulak ma tu Debata.

⁴Gabe hehe ma Ibana sian na mangan i, ditanggal ma ulosna, dibuat ma basahan, ditapolhon tu Ibana.

⁵Diusehon ma aek tu sambong, dung i diburi ma pat ni angka siseanna, diapusi ma dohot basahan na tinapolhonna i.

⁶Dung i sahat ma Ibana tu si Simon Petrus, jadi didok i ma mandok Ibana: Tung Ho ma, ale Tuhan, mamburi pathu?

⁷Dung i ninna Jesus ma mangalusi ibana: Ndang diantusi ho pambahenankon na tu ho anggo nuaeng; muse pe botoonmu i.

⁸Dung i didok si Petrus ma tu Ibana: Matua tano on ndang burionmu pathu! Dung i ninna Jesus ma mangalusi ibana: Molo so burionku ho, ndang partohap ho di Ahu!

⁹Dung i ninna si Simon Petrus ma: Ale Tuhan, unang ma holan pathu, dohot ma tangan dohot ulungku!

¹⁰Gabe didok Jesus ma tu ibana: Halak naung maridi i, ndengkon be burion, ai nunga sude ibana ias. Naung ias do anggo hamu, alai ndang luhut hamu.

¹¹Ai ditanda do sipasahat Ibana, umbahen na didok: Ndang saluhut hamu ias!

¹²Asa dung diburi Jesus patnasida dipangke ma muse ulosna, hundul ma Ibana, didok ma tu nasida: Ai diantusi hamu do pambahenanki tu hamu?

¹³Digoar hamu do Ahu Guru jala Tuhan, jadi ture do pandokmuna disi; ai i do Ahu tutu.

¹⁴Asa molo Ahu, Tuhan jala Gurumuna, mamburi patmuna, tama ma nang hamu masiburian pat!

¹⁵Ai sitiruon do hulehon tu hamu, asa dibahen hamu songon naung hubahen i tu hamu!

¹⁶Na tutu situtu do na hudok on tu hamu: Ndang umbalga anak somang sian indukna, ndang sumurung suruan sian na marsuru ibana.

¹⁷Molo diboto hamu i, martua ma hamu mangulahonsa!

¹⁸Ndada tu saluhut hamu hatangki; na hutanda do angka na hutodo i. Alai naeng ma jumpang na nidok ni Surat i: "Donganku sapanganan, i do manjungkangkon patna dompak Ahu!"

¹⁹Hupaboa i hian tu hamu, andorang so songgop dope; asa ia dung saut, gabe porsea hamu: Ahu do na nidok ni hata i.

²⁰Na tutu situtu do na hudok on tu hamu: Na manjangkon na husuru, Ahu do jinangkonna disi; alai nasa na manjangkon Ahu, manjangkon na marsuru Ahu do!

²¹(II.) Asa dung didok Jesus hata ondeng, bonsa ma rohana, dung i dihatindangkon ma, ninna ma: Na tutu situtu do na hudok on tu hamu: Sahalak sian hamu na pasahathon Ahu!

²²Dung i masiberengan ma angka sisean i, jut ma rohanasida, manang ise na nidokna disi.

²³Alai adong ma sada sian angka siseanna i, na hundul jumonok tu Ibana, haholongan ni Jesus i.

²⁴I ma dihilap si Petrus jadi ninna ma mandok ibana: Sungkun ma, ise i na nidokna i!

²⁵Jadi dipadonok ma tu lambung ni Jesus mandok tu Ibana: Tuhan, ise i?

²⁶Gabe dialusi Jesus ma: Ia tusi hulehon na santapik na husornophon on, i ma ibana! Jadi disornophon ma santapik, dilehon ma tu si Judas Iskariot anak ni si Simon.

²⁷Jadi dung dibondut i, dibongoti sibolis i ma ibana. Dung i didok Jesus ma tu ibana: Humatop ma ula siulaonmi!

²⁸Alai ndang adong manang ise sian nasida na mangan i, na umboto astuan ni na nidokna i.

²⁹Ai ala di ibana puro i, gabe dirimpu na deba, didokkon Jesus ibana manuhor na hasea tu pesta i, manang marsilua tu na pogos.

³⁰Asa dung dijalo si Judas na santapik i, pintor laho do ibana tu balian; alai borngin ma uju i!

³¹(III.) Jadi dung laho ruar ibana, didok Jesus ma: Na marsangap ma nuaeng Anak ni

jolma i, jala marsangap Debata di bagasan Ibana.

³² Molo marsangap Debata di bagasan Ibana, pasangapon ni Debata ma Ibana di bagasan dirina, jala tibu ma pasangaponna Ibana.

³³ Hamu angka anaha, sangombas nari nama Ahu rap dohot hamu; luluanmuna ma Ahu; alai songon naung hudok tu angka Jahudi: Ndang tarbahen hamu ro tu sitopotonki, laos i do hudok nuaeng tu hamu.

³⁴ Patik na imbaru ma hulehon tu hamu: Naeng ma masihaholongan hamu; songon holong ni rohangku di hamu, naeng ma songon i dohot hamu masihaholongan.

³⁵ Apala sian on ma tandaon ni halak saluhutna, hamu siseanku: Molo masihaholongan hamu.

³⁶ (IV.) Dung i ninna si Simon Petrus ma mandok Ibana: Tuhan, tudia ma Ho laho? Jadi ninna Jesus ma mangalusi: Ndang tarihuthon ho dope Ahu tu sitopotonki, anggo nuaeng; muse pe asa ihuthononmu Ahu!

³⁷ Gabe ninna si Petrus ma mandok Ibana: Tuhan, boasa so tarihuthon ahu Ho nuaeng? Hosangku do lehononku humongkop Ho!

³⁸ Dung i ninna Jesus ma mangalusi ibana: Hosam lehononmu humongkop Ahu? Na tutu situtu do na hudok on tu ho: Ndang dope martahuak manuk, nunga sanga tolu hali disoadahon ho Ahu!

14¹ (I.) Unang ma bonsa rohamuna!
Porsea ma hamu di Debata, jala porsea
ma hamu di Ahu!

²Torop do inganan di bagas ni Damang. Aut
so i, dohononku ma tu hamu: Na laho do Ahu
mangarade inganan di hamu?

³Jala laho pe Ahu mangarade inganan di
hamu, sai mulak do Ahu mangalap hamu, asa
rap hamu dohot Ahu!

⁴Jala diboto hamu do dalan tu inganan
sitopotonki.

⁵Dung i ninna si Tomas ma mandok Ibana:
Ndang huboto hami, manang tudia Ho laho,
Tuhan: Jala sian dia ma botoonnami dalan i?

⁶Gabe didok Jesus ma tu ibana: Ahu do
dalan i dohot hasintongan dohot hangoluan.
Ndang adong na sahat tu Ama i, ia so marhite
sian Ahu.

⁷Anggo ditanda hamu Ahu, tandaonmuna do
nang Damang i. Olat ni on ma ditanda hamu
Ibana jala diida hamu Ibana.

⁸Gabe didok si Pilippus ma tu Ibana:
Patuduhon tu hami Ama i, ale Tuhan, asa
sombu rohanami!

⁹Jadi didok Jesus ma: Nunga pola na sai
leleng Ahu rap dohot hamu, laos so ditanda
ho dope Ahu, ale Pilippus. Na marnida Ahu,
marnida Ama i do; boasa ma dohononmu:
Patuduhon tu hami Ama i?

¹⁰Ndang porsea ho, Ahu di bagasan Ama
i jala Ama i di bagasan Ahu? Apala sian

roharohangku huhatahon hata angka na hudok tu hamu. Ama i na maringanan di bagasan Ahu, i do patulus angka ulaonna i.

¹¹Porsea ma hamu di Ahu: Di bagasan Ama i do Ahu jala di bagasan Ahu do Ama i; molo so i, ala ni angka ulaon i ma hamu porsea!

¹²Na tutu situtu do na hudok on tu hamu; Patupaon ni na porsea di Ahu do songon angka ulaon na huula i; na sumurung sian i dope patupaonna tahe, ai na laho ma Ahu tu Damang.

¹³Asa manang aha pangidoanmuna marhitehite Goarhu, patupaonku do, asa marsangap Ama i di bagasan Anak i!

¹⁴Molo dipangido hamu manang aha sian Ahu marhitehite Goarhu, patupaonku ma i!

¹⁵Molo na holong rohamuna di Ahu, radotanmuna do angka patikku.

¹⁶(II.) Jala pangidoonku ma tu Ama i, asa dilehon tu hamu sada Pangondian na asing, asa I mandongani hamu salelengna i.

¹⁷I ma Tondi hasintongan i, na so tarjalo portibi on, ai ndang diida jala ndang ditanda; alai ditanda hamu do Ibana, ai na rap ma Ibana dohot hamu jala di bagasan hamu ma Ibana.

¹⁸Ndang tadingkononku hamu so marama; na ro ma Ahu mandapothon hamu.

¹⁹Saotik nari nama, jadi ndang be idaon ni portibi on Ahu, alai idaonmuna do Ahu; ai na mangolu do Ahu, hamu pe mangolu do!

²⁰Di na sadari i ma botoonmuna, Ahu di bagasan Damang jala hamu di bagasan Ahu jala Ahu di bagasan hamu.

²¹Manang ise na maniop angka patikki jala diradoti, i do na holong roha di Ahu. Alai dihaholongi Damang i do na holong roha di Ahu; Ahu pe, holong do rohangku di ibana jala papataronku ma Ahu tu ibana.

²²Jadi didok si Judas ma (ndada si Iskariot i): Dia do alana, Tuhan, umbahen na holan tu hami papataronmu dirim, ndada tu portibi on?

²³Dung i ninna Jesus ma mangalusi ibana: Ganup na holong roha di Ahu, radotan ni i do hatangki, jala haholongan ni Damang ma ibana, gabe ro ma Hami manopot ibana, maringanan tubagasan ibana.

²⁴Na so holong roha di Ahu, ndang radotan ni i hatangku. Nandang Ahu nampuna hata na binegemuna i, Ama i na marsuru Ahu do!

²⁵(III.) I ma huhatahon tu hamu, tagan rap dope Ahu dohot hamu.

²⁶Alai anggo Pangondian i, i ma Tondi Parbadia, sisuruon ni Ama i marhitehite Goarhu, ajarhonon jala paingothonon ni I do tu hamu nasa na huhatahon i tu hamu!

²⁷Dame do hutinggalhon di hamu; dame na di Ahu, i do hulehon di hamu. Nandang songon pangalehon ni portibi on pangalehonku. Unang ma bonsa jala unang ma mabiar rohamuna!

²⁸Nunga dibege hamu hatangku: Na laho ma Ahu, jala na ro do Ahu muse manopot hamu. Aut na holong rohamuna mida Ahu, las ma rohamuna, ala laho Ahu manopot Ama i; ai umbalga do Damang asa Ahu.

²⁹Asa nunga hupaboa i hian tu hamu, andorang so jumpang dope, asa porsea hamu, dung songgop.

³⁰Ndang haru godang be hatahononku tu hamu, ai na ro ma raja ni portibi on; ndang adong dihana i nian di Ahu.

³¹Alai naeng ma botoon ni portibi on, na holong do rohangku di Ama i jala sipasaut pandok ni Ama i do Ahu. Onpe, hehe ma hamu, laho ma hita sian on!

15¹(I.) Ahu do hau anggur na tutu; Damang do tukang porlak i.

²Digotap do nasa rantingku na so marparbue, jala dipaias do nasa na marparbue, asa ganda parbuena i.

³Nunga ias hamu binahen ni hata i na huhatahon tu hamu.

⁴Sai mian di bagasan Ahu ma hamu, songon Ahu di bagasan hamu! Songon ranting i, na so tarbahen marparbue anggo sian dirina, anggo so mian di hau anggur i; laos songon i hamu, anggo so mian di bagasan Ahu hamu.

⁵Ahu do hau anggur i, hamu do ranting i. Na mian di bagasan Ahu jala Ahu di bagasan ibana, i ma na marparbuehon godang; ai

ndang tarula hamu agia aha, anggo so mardongan Ahu.

⁶Nasa na so mian di bagasan Ahu, dibolongkon do i songon ranting, na gabe masak; dung i dipalungguk, didanggurhon ma i tu api, jadi gor ma.

⁷Molo mian hamu di bagasan Ahu, jala molo mian hatangki di bagasan hamu, jumpang hamu do manang dia pe dipangido rohamuna.

⁸Marsangap ma Damang, molo marparbuehon na godang hamu jala gabe angka siseanku hamu.

⁹Songon holong ni roha ni Damang di Ahu, songon i do holong ni rohangku di hamu. Mian ma hamu di bagasan holong ni rohangki!

¹⁰(II.) Radoti hamu ma angka patikku; i ma dalanna, asa mian hamu di bagasan holong ni rohangku: Songon Ahu pe na mangaradoti angka patik ni Damang, gabe mian di bagasan holong ni rohana.

¹¹Umbahen na huhatahon i tu hamu, asa di bagasan hamu halalas ni rohangki, jala asa gok halalas ni rohamuna.

¹²On ma patikku: Naeng ma masihaholongan hamu, songon Ahu na mangkaholongi hamu.

¹³Na sumeahon hosana humongkop angka alealena, i do parholong ni roha na so halompoan.

¹⁴Alealengku ma hamuna, molo diula hamu na hupatikkon i tu hamu.

¹⁵Nandang hugoar be hamu anak somang, ai ndang diboto anak somang na niula ni indukna; aleale do hamu hudok, ai nunga hupabotohon tu hamu saluhutna na hubege sian Damang.

¹⁶Ndada hamu mamillit Ahu; Ahu do mamillit hamu jala hupadiri hamu, asa laho hamu marparbue, jala asa mian parbuemuna i; asa dilehon tu hamu nasa sipangidoonmuna sian Ama i marhitehite Goarhu.

¹⁷On ma hupatikkon tu hamu. Masihaholongan ma hamu!

¹⁸(III.) Molo dihosomi portibi on on hamu, boto hamu ma, naung jumolo Ahu dihosomi.

¹⁹Aut na sian portibi on hamu, haholongan ni portibi on do donganna. Alai ndang sian portibi on hamu. Ahu do tahe mamillit hamu sian portibi on; ala ni i do, umbahen na dihosomi portibi on hamu.

²⁰Ingot hamu ma hata naung hudok tu hamu: Nandang na umbalga anak somang sian indukna. Molo diburui nasida Ahu, buruanna do nang hamu; molo diradoti nasida hatangku, radotanna ma nang hatamu.

²¹Alai songon i bahenonnasida tu hamu, ala ni Goarhu; ai ndang ditanda nasida na marsuru Ahu.

²²Aut so ro Ahu paboahonsa tu nasida, ndang mardosa nasida disi; alai nuaeng ndang adong be sidohononnasida mangkungkupi dosanasida.

²³Ganup na hosom roha di Ahu, hosom do roha ni i nang di Damang.

²⁴Aut unang huula angka ulaon di tongatonganasida, na so dung niula ni jolma, ndang mardosa nasida disi; alai nunga diida nasida i, gabe dihosomi nasida nang Ahu, nang Damang.

²⁵Alai naeng ma jumpang hata na tarsurat di patik ni uhumnasida: "Dihosomi nasida do Ahu, so adong alana!"

²⁶Asa ro ma Pangondian i sisuruonku sian Ama i tu hamu, i ma Tondi hasintongan i, na borhat sian Damang; I do na mangkatindangkon taringot tu Ahu.

²⁷Alai dohot ma hamu mangkatindangkon, ai donganku do hamu sian mulana i.

16¹(I.) Asa unang targasip hamu, umbahen na huhatahon angka hata ondeng tu hamu.

²Pabalionnasida do hamu sian huria. Na ro ma tingkina, gabe songon na mamele Debata do na mamusa hamu, anggo di rohana.

³Songon i do bahenonnasida, ala so ditanda nasida nang Ama i, nang Ahu.

⁴Alai hupaboa i hian tu hamu, asa diingot hamu di hasosonggopna i, naung huhatahon i tu hamu. Ai ndada sian mulana hupaboa i tu hamu, ala na rap dope hita.

⁵Alai na laho ma Ahu nuaeng manopot na marsuru Ahu, jala ndang adong manang ise hamu manungkun Ahu: Na laho tudia do Ho?

⁶Lam dokdok tahe rohamuna, ala hudok songon i tu hamu.

⁷Alai na mandok na tutu do Ahu tu hamu: Ulimuna do i, ia laho Ahu. Ai aut so laho Ahu, ndang na ro Pangondian i manopot hamu. Alai anggo laho Ahu, suruonku do Ibana tu hamu.

⁸(II.) Anggo dung ro Ibana, ajaranna do portibi on taringot tu dosa dohot taringot tu hapintoron dohot taringot tu uhum.

⁹Anggo taringot tu dosa, i ma na so porsea nasida di Ahu.

¹⁰Anggo taringot tu hapintoron, i ma na laho Ahu manopot Damang, jadi ndang be idaonmuna Ahu.

¹¹Anggo taringot tu uhum, i ma naung hona uhum induk ni portibi on.

¹²Godang dope nian sidohononku tu hamu; alai ndang tarboan hamu dope i nuaeng.

¹³Alai dung ro Tondi hasintongan na nidok ondeng, togihonon ni I do hamu tubagasan nasa hasintongan: Ai ndang adong sihatahononna sian sandirianna; na binegena, i do hatahononna baritahononna do tu hamu, na naeng masa dope.

¹⁴Pasangaponna do Ahu, ai jaloonna do na di Ahu, laho mamaritahonsa tu hamu.

¹⁵Saluhut na di Ama i, di Ahu do i, umbahen na hudok: Jaloonna do na di Ahu, laho mamaritahonsa tu hamu.

¹⁶(III.) Satongkin nari nama, ndang idaonmuna be Ahu, dung i satongkin nari muse, idaonmuna ma Ahu.

¹⁷Gabe masipandohan ma angka siseanna i: Dia do astuan ni na nidokna i tu hita satongkin nari nama, ndang idaonmuna be Ahu; dung i: Satongkin nari muse idaonmuna ma Ahu?

¹⁸Jadi didok nasida ma: Dia do astuan ni hata: "Satongkin nari"? Nandang taboto lapatanna.

¹⁹Mamoto ma Jesus, na naeng ro nasida manungkun Ibana, gabe didok ma tu nasida: Na masisungkunan do hamu taringot tu na hudok: Satongkin nari nama, ndang idaonmu be Ahu, dung i: Satongkin nari muse, idaonmuna ma Ahu?

²⁰Na tutu situtu do na hudok on tu hamu: Na tumatangis ma hamu jala mangandungi, alai las ma roha ni portibi on; marsak do anggo rohamuna, alai muba ma arsak ni rohamuna gabe las ni roha.

²¹Dokdok do roha ni boruboru laho manubuhon posoposona, ai naung songgop hasasangana. Alai dung tubu posoposo i, ndang be diingot na porsuk i, dibahen halalas ni rohana, ala naung tubu jolma i tu hasiangan on.

²²Di hamu pe nuaeng dok ni roha; alai idaonku do hamu muse, gabe las ma rohamuna disi, jala ndang buaton sian hamu halalas ni rohamuna i.

²³Ndang sungkunonmuna be Ahu di na sadari i. Na tutu situtu do na hudok on tu hamu: Nasa sipangidoonmuna tu Ama i, sai na lehononna do marhitehite Goarhu.

²⁴Rasirasa nuaeng ndang dope mangido hamu marhitehite Goarhu. Pangido hamu ma, asa manjalo hamu, asa gok halalas ni rohamuna!

²⁵Na marumpama do Ahu nasailaon mangkatai dohot hamu; alai ndang marumpama be Ahu di tingki na ro i, ai disi ma patar baritahononku tu hamu taringot tu Ama i.

²⁶Di na sadari i ma hamu mangido marhitehite Goarhu, jala ndang pola Ahu mangondihon hamu tu Ama i.

²⁷Ai Ama i sandiri mangkaholongi hamu, ala naung holong rohamuna di Ahu, jala ala naung porsea hamu, Ahu borhat sian Debata.

²⁸Na borhat sian Ama i do Ahu ro tu portibi on; na manadingkon nama Ahu muse di portibi on, laho manopot Ama i.

²⁹Gabe didok angka siseanna i ma: Nuaeng pe, asa patar hatam; ndang songon umpama be na nidokmi.

³⁰Huboto hami do nuaeng, saluhutna do diboto Ho, ndengkon adong na manungkun Ho. Dibahen i ma umbahen na porsea hami, naung borhat sian Debata do Ho.

³¹Jala dialusi Jesus ma nasida: Porsea ma hamu nuaeng?

³²Na ro ma tingkina, jala nunga ro i nuaeng, jadi marserak ma hamu, ganup masitondong dalanna, tadingkononmuna ma Ahu punjung; alai ndang punjung Ahu tahe, ai Ama i do donganku.

³³Asa mardame hamu di bagasan Ahu, umbahen na huhatahon angka i tu hamu. Haporsuhon do jambarmuna di portibi on; alai pos ma rohamuna: Nunga talu hubahen portibi on.

17¹(I.) I ma didok Jesus; dung i manaili ma Ibana dompak ginjang mandok: Ale Amang, nunga dapot tingkina: Parsangapi ma Anakmu, asa dipasangap Anakmi Ho!

²Songon naung nilehonmi tu Ibana huaso mangarajai nasa daging, asa dilehon hangoluan na salelenglelengna tu saluhutjolma na nilehonmi tu Ibana.

³Alai na mananda Ho, Debata na sasada i, na sintong i, dohot Jesus Kristus na sinurum, i do hangoluan na salelenglelengna.

⁴Nunga hupasangap Ho di tano on, ai nunga hupasidung ulaon na nilehonmi siulaonku.

⁵Nuaeng pe, parsangapi ma Ahu tu lambungmi, Amang, songon sangaphu tagan di lambungmi Ahu, andorang so adong dope hasiangan on.

⁶(II.) Nunga hupapatar Goarmi tu jolma angka na nilehonmi tu Ahu sian portibi on. Ho hian do nampuna nasida, jala dilehon Ho do nasida tu Ahu; diradoti nasida do hatami.

⁷ Nunga diboto nasida, na sian Ho do saluhutna na nilehonmi tu Ahu.

⁸ Ai nunga hupasahat tu nasida angka hata na nilehonmi tu Ahu jadi dijangkon nasida do, gabe diboto nasida situtu, Ahu borhat sian Ho, jala nunga porsea nasida, Ho do marsuru Ahu.

⁹ Nandang apala portibi on hutangiangkon, nasida on do, angka na nilehonmi tu Ahu, ai Ho do nampuna nasida.

¹⁰ Jala nasa na di Ahu, na di Ho do i; jala na di Ho, na di Ahu do i, jala nunga marsangap Ahu di bagasan nasida.

¹¹ Nandang di portibi on be Ahu tu joloan on, di portibi on do anggo nasida; na ro do Ahu manopot Ho. Ale Amang na badia, ramoti ma nasida di bagasan Goarmu, angka na nilehonmi tu Ahu, asa sada nasida songon Hita!

¹² Saleleng rap Ahu dohot nasida, Ahu do mangaramoti nasida di bagasan Goarmu na nilehonmi tu Ahu jala hujagai; gabe ndang adong na mago sian nasida, ia so holan anak jea i, asa jumpang hata ni Surat i.

¹³ Alai na ro ma Ahu nuaeng manopot Ho; di portibi on dope Ahu, di na hudok songon i, asa di bagasan nasida rimpas halalas ni roha na di Ahu i.

¹⁴ Nunga hulehon hatami tu nasida; dihosomi portibi on do nasida, ai ndang sian portibi on nasida, songon Ahu na so sian portibi on.

¹⁵Ndang apala hupangido, taitonmu nasida sian portibi on; alai naeng ma ramotanmu nasida maralohon na jahat i.

¹⁶Ndang na sian portibi on nasida, songon Ahu na so sian portibi on.

¹⁷Parbadiai ma nasida di bagasan hasintongan; hatami do hasintongan i.

¹⁸Songon parsurum di Ahu tu portibi on, songon i do husuru nasida tu portibi on.

¹⁹Huparbadiai do diringku humongkop nasida, asa gabe badia nang nasida binahen ni hasintongan i.

²⁰(III.) Alai ndang holan nasida hutangiangkon, dohot do angka na naeng porsea dope di Ahu, tinogu ni hatanasida:

²¹Asa sada nasida saluhutna; songon Ho, ale Amang, di bagasan Ahu jala Ahu di bagasan Ho, songon i ma nang nasida di bagasan Hita, asa porsea portibi on, Ho marsuru Ahu.

²²Nunga hulehon tu nasida hasangapon na nilehonmi tu Ahu, asa sada nasida songon Hita na sada roha i.

²³Ahu ma di bagasan nasida jala Ho di bagasan Ahu, asa sun denggan hasadaonnasida, gabe diboto portibi on, Ho marsuru Ahu jala holong roham di nasida songon holong ni roham di Ahu.

²⁴Ale Amang, naeng ma di rohangku, ia disi Ahu, disi ma dohot angka na nilehonmi tu Ahu, asa diida nasida hasangapon na di Ahu,

na nilehonmi tu Ahu; ai holong do roham di Ahu, jumolo asa ojak portibi on.

²⁵Ale Amang na bonar: So ditanda portibi on pe Ho, anggo Ahu, hutanda do Ho, jala diboto angka on, Ho do marsuru Ahu.

²⁶Nunga hupabotohon tu nasida Goarmi, jala pabotohononku dope, asa di bagasan nasida holong ni rohami na di Ahu, jala asa Ahu di bagasan nasida.

18¹(I.) Jadi dung didok Jesus songon i, ruar ma Ibana rap dohot angka siseanna tu ipar ni aek Kidron. Adong ma disi sada porlak, tusi ma laho Ibana dohot angka siseanna i.

²Alai diboto si Judas siparjehe i do inganan i, ai jotjot do marpungu tusi Jesus dohot angka siseanna.

³Ia si Judas i, diarahon ma angka soldadu dohot angka naposo ni sintua ni malim, didapothon ma tusi, mantat sulusulu, palito dohot sinjata.

⁴Diboto Jesus do saluhut na naeng songgop tu Ibana, jadi ruar ma Ibana, didok ma tu nasida: Ise do na jinalahanmuna i?

⁵Gabe ninna nasida ma mangalusi Ibana: Jesus, halak Nasaret i do! Dung i ninna Jesus ma mandok nasida: Ahu do i! Alai dohot do si Judas siparjehe i jongjong di lambungnasida.

⁶Asa dung didok tu nasida: Ahu do i, sumurut ma nasida, angka martinggangan ma tu tano.

⁷ Dung i diulahi ma manungkun nasida: Ise do na niluluanmuna? Jadi didok nasida ma: Jesus, halak Nasaret i do.

⁸ Dung i ninna Jesus ma mangalusi: Nunga hupaboa tu hamu: Ahu do i. Asa molo Ahu dilului hamu, loas hamu ma laho angka on!

⁹ Ai naeng do jumpang hata na nidokna i: Nandang adong na mago hubahen agia sada sian angka na nilehonmi tu Ahu.

¹⁰ Ia si Simon Petrus marpodang do, i ma disintak jadi ditampulhon ma tu naposo ni sintua ni malim i, jadi dipisikkon ma pinggolna siamun; si Malkus do goar ni naposo i.

¹¹ Dung i ninna Jesus ma mandok si Petrus: Pasarung podangmi! Nda inumonku siinumon na nilehon ni Ama i tu Ahu?

¹² Dung i ditangkup angka soldadu dohot induk nasida ro di angka naposo ni Jahudi ma Jesus, jala diihoti.

¹³ Jadi ditogihon ma Ibana jumolo tu si Hannas, i ma simatua ni si Kayapas, sintua ni malim di na sataon i.

¹⁴ I ma si Kayapas, naung mandok tu angka Jahudi: Dengganen do mate sada halak humongkop, bangso i.

¹⁵ (II.) Alai diihuthon si Simon Petrus dohot sisean na sada nari ma Jesus. Na masitandaan sisean na sada i dohot sintua ni malim i, jadi bongot ma ibana rap dohot Jesus tu alaman ni malim i.

¹⁶Alai jongjong do si Petrus tartungkan balian di lambung pintu i. Jadi ruar ma sisean na sada i, na masitandaan dohot sintua ni malim i, mangkatai dohot boruboru sijaga pintu, gabe ditogihon ma si Petrus tubagasan.

¹⁷Dung i ninna boruboru sijaga pintu i ma mandok si Petrus: Nda ho sada sian angka sisean ni Halak an? Jadi didok ma: Ndang i ahu!

¹⁸Alai na jongjong do disi angka naposo dohot angka opas mansusudu di pansusuduan na niopannasida dibahen ngalina i. Jadi rap dohot nasida ma jongjong si Petrus disi mansusudu.

¹⁹Alai disungkun sintua ni malim i ma Jesus taringot tu angka siseanna dohot taringot tu podana i.

²⁰Jadi dialusi Jesus ma ibana, ninna ma: Patar do hatangki di hatoropan. Na tongtong do Ahu mangajari nasailaon di bagasan parguruan nang di bagas joro pe, parpunguan ni saluhut Jahudi; ndang adong manang aha huhatahon marsibuni.

²¹Boasa Ahu disungkun ho? Nasida naung umbege hatangki, i ma sungkun! Ai diboto nasida do na huhatahon i.

²²Dung didok Jesus songon i, dipastap sada opas na jongjong disi ma Ibana, huhut ma didok: Songon i do pangalusim di sintua ni malim i?

²³Dung i ninna Jesus ma mangalusi ibana: Ia na hurang na hudok, hajongjongkon hurangna; alai anggo na hona do, boasa pastaponmu Ahu?

²⁴Asa disuru si Hannas ma Ibana naung tinali i tu sintua ni malim si Kayapas.

²⁵Laos na jongjong dope disi si Simon Petrus mansusudu, gabe didok nasida ma mandok ibana: Nda dohot do ho sada sian siseanna? Jadi mamorso ma ibana, ninna ma: Nda tung i ahu!

²⁶Dung i didok sahalak naposo ni malim, sisolhot ni nampuna pinggol na pinisikkon ni si Petrus i ma: Nda huida ho rap dohot Ibana di porlak i?

²⁷Jadi diporso si Petrus ma muse, dung i pintor martahuak ma manuk.

²⁸(III.) Asa ditogihon nasida ma Jesus sian jolo ni si Kayapas tu kantor. Alai sogot ma i manogot i. Nandang na bongot anggo nasida tu kantor, asa unang tarsubang nasida laho manganhon Paska i.

²⁹Gabe ruar ma si Latus mandapothon nasida, didok ma: Pangaluan dia do diboan hamu dompak Halak an?

³⁰Dung i ninna nasida ma mangalusi: Aut unang sibahen na jahat Halak on, ndang tagamon pasahatonnami Ibana tu ho.

³¹Gabe ninna si Latus ma mandok nasida: Boan hamu ma Ibana, uhumi hamu ma Ibana marguru tu adatmuna. Alai ninna

angka Jahudi ma mandok ibana: Ndang jadi pusaonnami manang ise.

³²Jumpang ma disi na nidok ni Jesus, uju pinaboana i hian pangalaho ni parmatena.

³³Jadi dibongoti si Latus muse kantorna, dijou ma Jesus, didok ma tu Ibana: Atehe, Ho do raja ni Jahudi?

³⁴Ro ma alus ni Jesus: Na sian roham do na nidokmi, manang na nidok ni halak do i tu ho taringot tu Ahu?

³⁵Gabe dialusi si Latus ma: Ai halak Jahudi do ahu? Bangsomi dohot angka sintua ni malim i do pasahathon Ho tu ahu. Aha do na binahenmu?

³⁶Jadi dialusi Jesus ma: Ndang sian portibi on harajaonku. Aut sian portibi on harajaonku, ndang tarbahen so mangalo angka naposongki, asa unang sahat Ahu tu angka Jahudi, alai ndang sisongon i harajaonki.

³⁷Dung i ninna si Latus ma mandok Ibana: Asa raja do Ho? Jadi ninna Jesus ma mangalusi: Songon na nidokmi ma tutu. Raja do Ahu! Umbahen na tubu Ahu jala umbahen na ro Ahu tu portibi on, asa huhatindangkon hasintongan i. Ganup na sian hasintongan i tangihonon ni i do soarangku.

³⁸Jadi ninna si Latus ma mandok Ibana: Aha ma i, hasintongan i? Jadi dung didok sisongon i, ruar ma ibana muse manopot angka Jahudi

mandok tu nasida: Ndang jumpang ahu manang dia salana.

³⁹Alai tahe, somal hupalua sada halak tu hamu jumpa Paska i. Anggo na lehet di rohamu, hupalua ma raja ni Jahudi i tu hamu?

⁴⁰Gabe dijouhon nasida ma muse: Unang Ibana; si Barabas ma! Alai partodos do anggo si Barabas.

19¹(I.) Dung i ditogu si Latus ma Jesus, didokkon ma linsingan.

²Jadi didandani angka soldadu ma sungsang duri bahen tumpal, diampehon ma i tu uluna; baju dapdap ma dialithon tu dagingna.

³Dung i ro ma nasida tu jolona mandok: Tabi di Ho, ale raja ni Jahudi! Laos dipastapi ma Ibana.

⁴Dung i ruar ma muse si Latus, didok ma tu angka Jahudi: Ida hamu ma, hutogihon do Ibana tu jolomuna, asa diboto hamu, na so adong jumpang ahu salana.

⁵Laos ruar ma Jesus manjujung sungsang duri jala marbaju dapdap. Jadi didok si Latus ma tu nasida: Ida hamu ma Jolma i!

⁶Asa dung diida angka sintua ni malim dohot angka naposo Ibana, dijouhon nasida ma: Parsilangkon, parsilangkon ma Ibana! Dung i didok si Latus ma tu nasida: Boan hamu ma Ibana, parsilangkon hamu ma; ai ndang jumpang ahu salana.

⁷Gabe dialusi angka Jahudi ma Ibana, ninna ma: Marguru tu patiknami ingkon marutang

hosa Ibana, ai dibahen do dirina Anak ni Debata.

⁸Umbege i si Latus lam ganda ma biarna.

⁹Dung i diulahi muse tu kantorna, didok ma tu Jesus: Sian dia do Ho? Alai ndang dialusi Jesus ibana.

¹⁰Dung i didok si Latus ma tu Ibana: Nandang angkupanmu ahu mangkatai? Nandang diboto Ho, marhuaso ahu paluahon Ho, jala marhuaso pasilangkon Ho?

¹¹Jadi dialusi Jesus ma: Nandang adong huasom mangago Ahu, aut unang nilehon i tu ho sian ginjang. Dibahen i gumodang do dosa ni na pasahathon Ahu tu ho.

¹²Jadi olat ni i ma dilului si Latus dalam paluahon Ibana. Alai manjoujou ma angka Jahudi, ninna do: Molo dipalua ho On, ndang aleale ni Kesar ho! Ai na mangalo Kesar i do ganup na mambahen dirina raja.

¹³Asa dung dibege si Latus hata i, ditogihon ma Jesus haruar, laos hundul ma ibana di habangsa paruhuman na di inganan na margoar: Pantar batu, alai anggo di hata Heber: Gabbata.

¹⁴I ma na masa di ari parhobasan Paska, mareak hos ni ari. Dung i didok ma tu angka Jahudi: Ida hamu ma rajamuna!

¹⁵Alai digogo nasida ma manjouhon: Padao, padao ma I: Parsilangkon ma Ibana! Dung i didok si Latus ma tu nasida: Parsilangkononku ma rajamuna? Jadi dialusi angka sintua ni

malim ma: Ndang adong rajanami dungkon ni Kesar i!

¹⁶(II.) Dung i dipasahat ma Ibana tu nasida, asa di parsilangkon; jadi dijalo nasida ma Jesus.

¹⁷Laos Ibana do mamorsan hau pinarsilang i, laho tu inganan na margoar partangkurahan; Golgata do goarna anggo di hata Heber.

¹⁸Disi ma diparsilangkon nasida Ibana rap dohot dua halak na asing di lambungna, angkup be; di tongatonga ma ia Jesus.

¹⁹Alai disurat si Latus ma sada boaboa, dipalohot ma i tu hau i. On do hatana: Jesus, halak Nasaret, raja ni Jahudi!

²⁰Jadi torop ma Jahudi na manjaha boaboa i, ai jonok tu huta i do hapajalan ni Jesus, jala tarsurat do i di hata Heber, di hata Rom dohot di hata Junani.

²¹Dung i didok sintua ni angka Jahudi ma tu si Latus: Unang surat i: Raja ni Jahudi; alai na nidokna i ma nian: Ahu do raja ni Jahudi!

²²Dung i dialusi si Latus ma: Na husurat i, naung sinurat do i!

²³Asa dung diparsilangkon angka soldadu i Ibana, dibuat nasida ma angka abitna, diparopat ma i, di ganup soldadu sabagian be, dungkon ni sampesampena. Anggo sampesampe i ndang marpanjaruman, na ditonun sambing do i.

²⁴Gabe masipandohan ma nasida: Unang ma taribahi on, martondung ma hita taringot tusi,

manang di ise i. Jadi jumpang ma Surat i, na mandok: "Dibagi nasida do abithu; tondung do didabu taringot tu sampesampengku." Asa songon i do pambahen ni angka soldadu.

²⁵ (III.) Dung i jongjong ma di lambung ni Jesus na di hau pinarsilang i inana dohot paribanna dohot si Maria ni si Kleopas dohot si Maria Magdalena.

²⁶ Anggo Jesus, dung diida, disi inana i dohot sisean haholongan ni rohana di lambungna, didok ma tu inana i: Ndi ma, inang, anakmi!

²⁷ Dung i didok ma tu sisean i: Ndi ma, inangmi! Jadi olat ni i ma dijangkon sisean i ibana tu jabuna.

²⁸ Jadi dung diboto Jesus, naung marujung saluhutna, asa jumpang na tarsurat i, ninna ma: Mauas Ahu!

²⁹ Jadi adong ma disi isian ni tuak na asom, jadi dibutongi nasida ma limut tubagasan tuak na asom i, dipalohot ma i tu sada tolong, laho manurdukkon tu pamanganna.

³⁰ Jadi dung dijalo Jesus na asom i, ninna ma: Nunga marujung! Dung i dipaunduk ma uluna, pasahathon tondina.

³¹ Ala tongon ari parhobasan ni pesta na balga, naeng ma unang di hau pinarsilang angka bangke di ari Sabbat i; ala ni i dipangido angka Jahudi ma tu si Latus, asa disuru na mangarosak haehaenasida jala dipaijur.

³²Gabe ro ma angka soldadu i, dirosak ma haehae ni na parjolo i, songon i do donganna na rap tarsilang dohot Jesus.

³³Alai dung sahat nasida tu Jesus, diida ma naung sanga mate Ibana, gabe ndang dirosak be haehaena.

³⁴Alai ditullangkon sada sian angka soldadu i ma mundimundina tu andora ni Jesus; jadi manigor puas ma sian i mudar mardongan aek.

³⁵Na marnidasa i do na mangkatindangkon i, jala sintong do na hinatindangkonna i. Ibana do umboto sintong ni na nidokna i, asa anggiat dohot hamu porsea.

³⁶Ai na masa do i, asa jumpang na tarsurat i, na mandok: "Ndang jadi ponggolon holiholina!"

³⁷Jala surat na asing muse mandok: "Berengonnasida do na tinullangnasida i!"

³⁸(IV.) Dung salpu i dipangido si Josep na sian Arimatea ma tu si Latus, paijuronna bangke ni Jesus. Sisean ni Jesus do ibana, alai marsibuni do ala ni biarna mida angka Jahudi. Jadi dioloi si Latus ma i. Dung i ro ma ibana, dipaijur ma bangkena.

³⁹Alai ro ma nang si Nikodemus, i ma naung ro manopot Jesus bornginborngin najolo, diboan ma mir na marsaor aloe arga saratus hati.

⁴⁰Dung i dibuat nasida ma bangke ni Jesus, dibaluti ma tu dagangan rap dohot na hushus i mangihuthon adat pananomom ni Jahudi.

⁴¹Alai adong ma mardonokkon hapajalanna i sada porlak, jala di bagasan porlak i adong sada tanoman na imbaru, na so dung hapeahan ni manang ise dope.

⁴²Asa tusi nama dipeakkon nasida Jesus, siala ari parhobasan ni Jahudi; ai jonok do tanoman i.

20¹(I.) Dung i di ari parjolo dung salpu ari Sabbath, laho ma si Maria Magdalena sogot di na holom i dope tu tanoman i, jadi diida ma, naung dihindat batu i sian tanoman i.

²Gabe marlojong ma ibana manopot si Simon Petrus dohot sisean na sada nari, haholongan ni roha ni Jesus, paboahon tu nasida: Nunga dibuat na mambuat Tuhan i sian tanomanna; ndang binoto, manang tudia ditaruhon.

³Jadi borhat ma si Petrus dohot sisean na sada nari, jadi sahat ma nasida tu tanoman i.

⁴Na rap marlojong do na dua i, gabe marhajoloan do sisean na sada, na humatop sian si Petrus, gabe parjolo ma ibana sahat tu tanoman i.

⁵Jadi dipaunduk ma dirina, diida ma peak angka pangalilit; alai ndang bongot ibana.

⁶Ro ma nang si Petrus sian pudina; dibongoti ma tanoman i jadi diida ma peak angka pangalilit i.

⁷Anggo sekka panaputi ni uluna ndang rap dohot angka pangalilit i, pulik do dibalun tu ingananna.

⁸Disi pe asa bongot nang sisean na sada, naung parjolo sahat tu tanoman i; dipanotnoti, gabe porsea ma ibana.

⁹Ai ndang dope diantusi nasida hata ni Surat i na mandok: Ingkon hehe Ibana sian na mate.

¹⁰Asa muli ma sisean na dua i.

¹¹(II.) Laos jongjong do si Maria dibalian ni tanoman i tumatangis, jadi di partangisna i dipaunduk ma ibana dompak tanoman i.

¹²Gabe diida ma hundul disi surusuruan dua, parabit na marlinanglinang; na sada tartungkan julu on, na sada nari tartungkan inganan ni pat ni hapeahan ni bangke ni Jesus.

¹³Didok nasida ma tu ibana: Boasa tangis ho, inang? Jadi dialusi ma nasida: Dibuat na mambuat do Tuhanki; ndang huboto, manang na tudia ditaruhon.

¹⁴Mandok songon i, humusor ma ibana dompak pudi, gabe diida ma Jesus jongjong disi; alai ndang ditanda.

¹⁵Dung i didok Jesus ma tu ibana: Boasa tangis ho, inang? Ise dilului ho? Jadi dirimpu rohana ma, tukang porlak i Ibana, gabe didok

ma tu Ibana: Anggo hamu do mambuat Ibana, paboa hamu ma tu ahu, manang na tudia ditaruhon hamu asa hualap Ibana!

¹⁶Dung i didok Jesus ma tu ibana: Maria! Jadi didompakkon si Maria ma Ibana huhut mandok: Ale Guru! (Rabbuni, anggo di hata Heber).

¹⁷Jala didok Jesus ma tu ibana: Unang Ahu jama; ai ndang dope nangkok Ahu tu Ama i. Alai laho ma ho tu angka anggingki, dok ma tu nasida: Na laho nangkok ma Ahu tu Damang jala Amamuna, tu Debatangku jala Debatamuna.

¹⁸Dung i laho ma si Maria Magdalena, dibaritahon ma tu angka sisean i: Nunga huida Tuhan i, jala angka on do hatana tu ahu.

¹⁹(III.) Jadi dung bot ari, di ari parjolo dung salpu ari Sabbath, di naung sordak angka pintu ni inganan ni angka sisean i, ala ni biar ni rohanasida mida angka Jahudi, ro ma Jesus jongjong tu tongatonganasida, jadi didok ma tu nasida: Dame ma di hamu!

²⁰Jadi dung didok songon i, dipatuduhon ma tanganna dohot andorana tu nasida, gabe las ma roha ni angka sisean i, ala naung diida nasida Tuhan i.

²¹Dung i diulahi Jesus ma mandok tu nasida: Dame ma di hamu! Songon sinuru ni Ama i Ahu, suruonku hamu.

²²Jadi dung didok songon i, mangombus ma Ibana dompak nasida, huhut ma didok: Jalo hamu ma Tondi Parbadia!

²³Molo disesa hamu dosa ni manang ise, naung sesa ma i; molo dipahot hamu dosa ni manang ise, hot do i.

²⁴(IV.) Alai anggo si Tomas, sada sian na sampuludua i, na margoar Linduat, ndang rap dohot nasida, di na ro i Jesus.

²⁵Gabe didok angka donganna sisean ma tu ibana: Nunga huida hami Tuhan i! Alai dialusi ma nasida: Na so tupa porsea ahu, molo so huida di tanganna i bogas ni labang i, laos dijama jarijaringku bogas ni labang i, jala ia so dijama tanganku andorana i.

²⁶Dung salpu ualu borngin, pungu ma muse angka sisean i di bagasan, rap dohot si Tomas. Dung i ro ma Jesus, di na sordak i angka pintu, jongjong tu tongatonganasida, didok ma: Dame ma di hamu!

²⁷Dung i didok ma tu si Tomas: Boan tu on jarijarimi jala ida ma tanganku! Surdukkon ma tanganmi manjama andorangku! Unang ganggu roham; sai porsea ma ho!

²⁸Gabe ninna si Tomas ma mangalusi Ibana: Tuhanku jala Debatanku!

²⁹Jadi didok Jesus ma tu ibana: Ala diida ho Ahu, umbahen na gabe porsea ho. Martua ma angka na porsea, atik pe so diida!

³⁰Godang dope tanda angka na asing na pinatupa ni Jesus di jolo ni angka siseanna, angka na so sinurat di buku on.

³¹Alai umbahen na sinurat angka on, asa porsea hamu, Jesus do Kristus, Anak ni Debata; jala asa hamu angka na porsea i dapotan hangoluan marhitehite Goarna.

21 ¹(I.) Dung i dipatuduhon Jesus ma Ibana muse tu angka siseanna di topitao Tiberias. Jala songon on do pangalahona:

²Pungu ma si Simon Petrus dohot si Tomas na margoar Linduat, angkup ni i si Natanael sian Kana na di Galilea dohot angka anak ni si Sebedeus, rap dohot dua nari sian angka siseanna i.

³Gabe ro ma hata ni si Simon Petrus tu nasida: Laho ma ahu mardengke. Jadi didok nasida ma tu ibana: Dohot ma hami! Laos borhat ma nasida, bongot ma tu parau; alai ndang dapot nasida agia aha di na saborngin i.

⁴Alai di na torang ari, jongjong ma Jesus di pasir; alai ndang ditanda angka sisean i Ibana.

⁵Jadi didok Jesus ma tu nasida: Nandang adong dengkemuna, ale angka anaha, nanggo saotik? Jadi ro ma alusnasida: Nandang adong!

⁶Dung i didok ma tu nasida: Sampakkon hamu ma jalamuna tu siamun ni parau i, asa dapotan hamu! Jala disampakkon nasida ma,

gabe ndang tartait nasida be jala i dibahen godang ni dengke i.

⁷Dung i didok sisean haholongan ni roha ni Jesus i ma tu si Petrus: Tuhan i do i! Jadi dung dibege si Simon Petrus, Tuhan i do i hape, dialithon ma abitna, ai ndang marabit hian ibana; dung i ditimbung ma tu tao i.

⁸Alai marparau do angka donganna sisean i sahat, huhut sumarat jala na marisi dengke i; ai ndang sadia dao nasida sian darat i, arga duaratus elak nama.

⁹Jadi dung sahat nasida ro di darat, diida ma gara disi dohot dengke peak di ginjangna, angkup ni roti.

¹⁰Dung i didok Jesus ma tu nasida: Boan hamu ma tu on deba dengke sian angka na dapot hamu nangkin!

¹¹Gabe manaek ma si Petrus tu parau, disarat ma jala i tu darat, gok dengke na balga, saratus limapulu tolu toropna; atik pe na sa i toropna, ndang na maribak jala i.

¹²Jadi didok Jesus ma tu nasida: Ro ma hamu mangan! Alai ndang adong manang ise sian angka sisean i, na hum roha manise Ibana: Ise do Ho? Ai diboto be, Tuhan i do Ibana.

¹³Asa ro ma Jesus, dibuat ma roti i, diparlehon ma tu nasida, angka dengke i pe songon i do.

¹⁴I ma patoluhalihon dipatuduhon Jesus Ibana tu angka siseanna, dung hehe Ibana sian angka na mate.

¹⁵(II.) Asa dung mangan nasida, didok Jesus ma tu si Simon Petrus: Ale Simon, anak ni si Jonas, humolong do roham di Ahu sian angka on? Jadi didok ma tu Ibana: Olo, Tuhan; diboto Ho do holong ni rohangku di Ho! Jadi didok Jesus ma tu ibana: Parmahan i ma anak ni birubirungku!

¹⁶Dung i ninna muse ma paduahalihon: Simon, anak ni si Jonas, holong do roham di Ahu? Jadi didok ma tu Ibana: Olo, Tuhan; diboto Ho do holong ni rohangku di Ho! Dung i didok ma tu ibana: Parmahan i ma angka birubirungku!

¹⁷Dung i didok ma patoluhalihon tu ibana: Simon, anak ni si Jonas, holong do roham di Ahu? Jadi marsak ma roha ni si Petrus, ala patoluhalihon didok tu ibana: Holong do roham di Ahu? Jadi didok ma tu Ibana: Saluhutna, ale Tuhan, diboto Ho; Ditanda Ho do holong ni rohangku di Ho! Dung i didok Jesus ma tu ibana: Parmahan i ma angka birubirungku!

¹⁸Na tutu situtu do na hudok on tu ho: Andorang umposo dope ho, ho do mangkohosi dirim, laho manopot lomo ni roham; alai dung matua ho, surdukkononmu ma tanganmu, jadi hohosan ni na leban ma ho jala

togihononna ma ho tu na so hinalomohon ni roham.

¹⁹Alai marhite sian hatana ondeng dipalumba do ibana, manang songon dia parmatena laho pasangaphon Debata. Jadi dung didok songon i, ninna ma mandok ibana: Ihuthon ma Ahu!

²⁰Dung i humusor ma si Petrus jadi diida ma mangihut sisean haholongan ni roha ni Jesus, i ma na hundul jumonok tu Jesus di na marsipanganon i; laos ibana do na manungkun uju i: Ise do i, Tuhan, na manjehehon Ho?

²¹Asa dung diida si Petrus ibana, ninna ma mandok Jesus: Beha ma halak on, Tuhan?

²²Gabe didok Jesus ma tu ibana: Molo na lomo rohangku, naeng mian ibana, paima ro Ahu, ndang na ro di ho i; asal diihuthon ho Ahu!

²³Asa sar ma tu angka dongan hata on: Nandang mate sisean on! Alai ndang didok Jesus: Nandang mate ibana. On do tahe didok: Molo na lomo rohangku, naeng mian ibana, paima ro Ahu, ndang na ro di ho i!

²⁴I ma sisean i na mangkatindangkon angka on jala manurathon, jadi huboto hami, na tutu do na hinatindangkonna i.

²⁵Alai lan dope na asing na binahen ni Jesus; aut sinurathon i sadasada, ra ndang siat di portibi on di rohangku angka buku na sinuratan i.

Kisah Para Rasul

1 ¹ (I.) Nunga sidung nian hubahen, ale Teopilus, barita na parjolo i, taringot tu saluhut ulaon dohot poda na pinungka ni Jesus,

² sahat ro di ari hahihinsatna, dung jolo dipatihi Ibana marhitehite Tondi Parbadia angka apostel na pinillitna i.

³ Dung salpu haporsuhon na tinaonna i, dipatandaphon do dirina mangolu tu nasida marhitehite lan tanda, i ma na pinataridahonna dirina tu nasida leleng ni opatpulu ari, dohot mangkatahon taringot tu harajaon ni Debata.

⁴ Jadi di na domu Ibana dohot nasida, dipatihi ma, na so jadi meret nasida sian Jerusalem, so jolo dipaima bagabaga ni Ama i, na binegemuna i sian Ahu, ninna.

⁵ Ai aek do dididihon si Johannes i; alai Tondi Parbadia do didihononhon tu hamu, ndang pola piga ari nari!

⁶ Laos disungkun angka na pungu i ma Ibana, angka ninna ma: Pajongjongonmu ma saonari, ale Tuhan, Harajaon i di Israel?

⁷ Alai ninna ma mandok nasida: Nandang ro di hamu i, umboto taonna manang ombasna; na binuhul ni Ama i guru di huasona sambing.

⁸Alai jaloornmuna do hagagoon ni Tondi Parbadia na songgop tu hamu, gabe sitindinginku ma hamu di Jerusalem dohot di sandok Judea dohot di Samaria, sahat ro di ujung ni tano on.

⁹Jadi dung didok songon i, tarhinsat ma Ibana dipanotnoti nasida: Dung i diholipi ombun i ma Ibana sian jolo ni matanasida.

¹⁰Di na tinuluthon nasida dope Ibana na laho i tu ginjang, nunga jongjong di lambungnasida dua halak parulos na marlinanglinang.

¹¹Angka na mandok: O hamu halak Galilea, aha ma sai jongjong hamu mamerengi dampak ginjang? Anggo Jesus i, na tarhinsat sian lambungmuna tu banua ginjang i, na ro do Ibana sogot, songon na niidamuna Ibana laho dampak banua ginjang i.

¹²Dung i mulak ma nasida tu huta Jerusalem sian dolok na margoar dolok Jetun, na jonok tu Jerusalem; na hadalanan di ari Sabbath do daona.

¹³Jadi dung sahat, nangkok ma nasida tu bilut parginjang, parmianannasida, i ma si Petrus, si Johannes, si Jakobus dohot si Andreas, si Pilippus dohot si Tomas, si Bartolomeus dohot si Mateus, si Jakobus, anak ni si Alpeus, dohot si Simon Silotes, dohot si Judas, anak ni si Jakobus.

¹⁴Angka i do saluhutna mandatdati martangiang sian sada ni rohanasida, rap

dohot angka parompuan dohot si Maria, ina ni Jesus, ro di angka anggina i.

¹⁵(II.) Uju i hehe ma si Petrus di tongatonga ni angka donganna (ia torop ni nasida na pungu i, arga saratus duapulu halak do), ninna ma:

¹⁶Hamu angka dongan hahaanggi, ingkon saut do na nidok ni surat na nilumbahon ni Tondi Parbadia marhitehite soara ni si Daud taringot tu si Judas, naung gabe partogi ni angka na manangkup Jesus.

¹⁷Ai tarrajum do nian ibana tu hami, jala parjambar do ibana di tohonan i.

¹⁸Onpe, ladang do dituhor sian upa ni hageduhon i; jadi di na tungkap ibana madabu, mapultak ma dagingna, gabe sabar ma nasa raoanna.

¹⁹Saluhut pangisi ni huta Jerusalem do umbotosa, umbahen na digoari ladang i di hatanasida Akeldamak, astuanna: Tano mudar.

²⁰Ai tarsurat do di buku ni angka Psalmen: "Sai tarulang ma parmiananna i, unang ma adong na manginganisa!" angkup ni i: "Jaloon ni na asing ma tohonanna!"

²¹Antong, ingkon gabe dongannami sihatindangkon haheheon ni Tuhan Jesus ma sada sian angka na mandongani hami, saleleng Ibana marmeangmuli di hita on.

²²Olat ni pandidion ni si Johannes ro di ari hahihinsatna i sian hita.

²³Dung i dipajongjong nasida dua halak, si Josep na margoar si Barsabas, na marimbang goar Titius Justus, dohot si Matias.

²⁴Jadi martangiang ma nasida: Ale Tuhan, sidodo roha ni saluhutna, patandahon ma, manang ise sian na dua on dipillit Ho,

²⁵gabe sijalo tohap di ulaon on dohot tohonan apostel, na tinadingkon ni si Judas, naung laho manopot sitopotonna i!

²⁶Laos marsijomput na sinurat ma nasida, jadi dapot ma si Matias, gabe tarrajum ma ibana dongan ni apostel na sampulusada i.

2¹ (I.) Jadi dung jumpang ari palimapuluhon i (Pentakoste), pungu ma nasida saluhutna di sada inganan.

²Jadi masa ma tompu soara sian ginjang songon parngongos ni alogo na gogo mamolus, gabe digohi ma sandok bagas hundulannasida i.

³Jadi tarida ma di nasida suman tu dila ni api na marjillamjillam, disonggopi ma ganup nasida.

⁴Gabe gok Tondi Parbadia ma nasida saluhutna, jadi mamungka marpangkuling na asing ma nasida, marguru tu pangalehon ni Tondi i tu nasida mangkatahonsa.

⁵Alai adong ma angka Jahudi na maringan di Jerusalem, halak na daulat sian saluhutna bangso na ditoru ni langit.

⁶Alai di na masa soara i, marpungu ma natorop i; jadi tarhalomong ma nasida,

ai ganup umbege nasida mangkatahon di hatana be.

⁷Jadi tarmali ma nasida saluhutna jala longang, angka ninna ma: Nda halak Galilea saluhut nasida na mangkatai i?

⁸Boasa ganup hita umbege di hata hasomalanta be?

⁹Halak Partia dohot Media dohot Elamit dohot angka na maringan di Mesopotamia, di Judea dohot di Kappadosia, di Pontus dohot di Asia.

¹⁰Di Prigia dohot di Pampilia, di tano Misir dohot di angka luat Libia na tungkan Kirene dohot halak Rom na maringan dison, angka halak Jahudi ro di angka parguru,

¹¹angka halak Kreta dohot halak Arab; di hatanta be do itabege dihatahon nasida angka ulaon habalgaon ni Debata!

¹²Jadi tarhalomong ma nasida saluhutna, jut be ma rohana, angka ninna ma sama nasida: Na marhua do i ulaning?

¹³Alai manginsahi do na deba, angka ninna ma: Gok anggur na tonggi do nasida.

¹⁴(II.) Jadi hehe ma si Petrus rap dohot na sampulusada i, dipagogo ma soarana, dipanghulingi ma nasida: Hamu halak Jahudi jala sude hamu na maringan di Jerusalem, boto hamu ma on, jala pasiat hamu ma hatangkon tu pinggolmun!

¹⁵Ai apala na mabuk hami on, songon na tinuhashonmun, ai pungkul sia dope nuaeng.

¹⁶Na hinatahon ni panurirang Joel do tahe na masa on; ai ninna do:

¹⁷"Di angka ari parpudi, ninna Debata, usehononku ma sian Tondingku, tu nasa na mardaging, gabe manurirangi ma angka anak dohot borumuna, maralatan ma angka dolidolimuna, jala marnipi ma angka natuatuamuna."

¹⁸"Tu angka naposongku baoa dohot boruboru pe usehononku ma sian Tondingku di angka ari i, asa manurirangi nasida."

¹⁹"Dung i patupaonku ma angka halongangan di ginjang di langit, angka tanda di toru, di tano i, i ma mudar dohot api dohot timus na marhalimontang."

²⁰"Muba ma mata ni ari gabe mangkolom, dohot bulan i gabe songon mudar, patujolo ni haroro ni ari ni Tuhan i, na balga i."

²¹"Jadi disi ma malua ganup na manjou Goar ni Tuhan i."

²²Hamu angka halak Israel, tangihon hamu ma hata on: Dipatandaphon Debata do tu hamu Jesus na sian Nasaret i, hinorhon ni hagogoon, halongangan dohot tanda, angka na pinatupa ni Debata di tongatongamuna, songon naung binotomuna i.

²³Marhite sian tangan ni na so marpatik i digantungkan jala dipusa hamu Ibana, dung dipasahat Debata sian tahina na hot i dohot sian pamotoanna hian.

²⁴ Ibana do dipahehe Debata, dung diharhari bernit ni hamatean, ai ndada na hatiopan hamatean i Ibana.

²⁵ Ai marhahonaan tu Ibana do pandok ni si Daud: "Tongtong do huida Tuhanki di jolongku, ai di siamunhu do Ibana, asa unang humordit ahu."

²⁶ "Ala ni i las do rohangku jala marolopolop soarangku; dagingku pe maradian do huhut mangkirim."

²⁷ "Ai ndang pasombuonmu diringku di banua toru jala ndang loasonmu na badiami marnida habusukon."

²⁸ "Nunga dipabotohon Ho tu ahu angka dalan hangoluan, gohanmu do ahu halalas ni roha di adopanmi!"

²⁹ Hamu angka dongan, na jadi ma ahu marhiras ni roha mandok tu hamu: Ia ompunta si Daud, na mate do ibana jala tartanom; di hita on do tanomanna rasirasa sadari on.

³⁰ Antong, panurirang do ibana jala diboto do, naung diuarihon Debata tu ibana, pabangkitonna do pomparanna tu atas habangsana i.

³¹ Asa sian pamotoanna hian dilumbahon ibana disi haheheon ni Kristus i, paboa na so pasombuon Ibana di banua toru jala na so idaon ni dagingna i habusukon.

³² I ma Jesus, naung pinahehe ni Debata; saluhut do hami mangkatindangkonsa.

³³Asa dung dipatimbul Debata Ibana tu siamunna, dijalo ma sian Ama i Tondi Parbadia na pinarbagabaga i, gabe diusehon ma i, songon naung niida jala binegemuna i.

³⁴Ai ndada si Daud i nangkok tu banua ginjang, alai didok ibana: "Ninna Tuhan i do mandok Tuhanku: Hundul ma Ho tu siamunhon,"

³⁵"paima hupatunduk angka musum, bahen sidegedegean ni patmu!"

³⁶Antong, tangkas situtu ma diboto sandok bangso Israel: Jesus na pinarsilangkonmuna, i ma bangkit Tuhan jala Kristus dibahen Debata!

³⁷(III.) Jadi umbege i, ditorushon ma rohanasida, dung i didok nasida ma tu si Petrus dohot tu angka donganna apostel: Aha nama sibahenonnami, ale angka dongan?

³⁸Alai didok si Petrus ma tu nasida: Pauba hamu ma rohamuna, dung i padidihon hamu ma ganup hamu tubagasan Goar ni Jesus Kristus, bahen hasesaan ni dosamuna, asa dijalo hamu silehonlehon i, i ma Tondi Parbadia i.

³⁹Ai di hamu do bagabaga i dohot di angka anakkonmuna ro di saluhut angka na dao, manang piga na naeng jouon ni Tuhan Debatanta dope.

⁴⁰Lan dope hata na asing dihatindangkon ibana, laho mangapoi nasida, ninna do: Sai olo ma hamu malua sian bangso na geduk on!

⁴¹ Asa tardidi ma angka na manjangkon hatana i, gabe arga toluribu ma torop ni halak na manamba di na sadari i.

⁴² Alai marsihohot do nasida di poda ni angka apostel marparsaoran, marulaon na badia jala martangiang.

⁴³ Alai songgop ma biar tu roha ni saluhutna; masa ma lan halongangan dohot tanda di Jerusalem, dipatupa angka apostel i.

⁴⁴ Alai sai domu do saluhut angka na porsea i, jala songon hatopan dirajumi nasida saluhut artanasida.

⁴⁵ Tupa digadisi nasida arta dohot ugasannasida, disagihon ma tu saluhutna marguru tu haseana di ganup.

⁴⁶ Ganup ari do nasida tongtong saroha di bagas joro i, jala jojo jabu do nasida marulaon na badia, marlas jala marbulus ni roha nasida marsipanganon.

⁴⁷ Huhut mamuji Debata jala lomo do roha ni nasa natorop mida nasida. Alai ganup ari do ditambahi Debata tu na sahuria i angka na dapotan haluaon.

3¹ (I.) Dung i rap nangkok ma si Petrus dohot si Johannes tu bagas joro, di pungkul tolu di tingki partangiang.

² Jadi diusung na mangusung ma sahalak na pangpang sian hatutubuna; ganup ari do ditaruhon nasida ibana tu lambung pintu ni bagas joro na margoar na uli, asa dipangido asiasi sian angka na bongot tu bagas joro i.

³Jadi di na niidana si Petrus dohot si Johannes, naeng bongot tu bagas joro i, dipangido ma asiassi.

⁴Alai dipanotnoti si Petrus dohot si Johannes ma ibana, ninna ma: Bereng dompak hami!

⁵Dung i dibereng ma nasida, dihirim rohana jaloonna manang aha sian nasida.

⁶Alai ninna si Petrus ma: Anggo perak dohot sere ndang adong di ahu; alai na adong di ahu, hulehon ma tu ho: Marhitehite Goar ni Jesus Kristus na sian Nasaret i, mardalani ma ho!

⁷Laos ditangkap ma tanganna siamun pahehe ibana, jadi pintor hot ma haehaena dohot totna.

⁸Dung i manigor hehe ma ibana, jongjong ma huhut mardalan, dung i bongot ma ibana rap dohot nasida tu bagas joro i mardalan jala mirjahirjak huhut mamuji Debata.

⁹Jadi diida natorop saluhutna do ibana mardalani dohot mamuji Debata.

¹⁰Alai diboto nasida, ibana do i, na hundul nasailaon mangidoido di lambung pintu na uli na di bagas joro i; jadi mansai longang ma rohanasida jala tarhalomong mida na masa tu ibana i.

¹¹(II.) Alai dung sai udur ibana dohot si Petrus dohot si Johannes, marrongoman ma saluhut halak tu nasida, tu inganan na margoar emper ni si Salomo, dibahen songgot ni rohanasida.

¹²Alai marnida i si Petrus, ninna ma mandok natorop i: Hamu, halak Israel, boasa longang rohamu mida on, boasa hami diberengi hamu, songon na hira gogonami sandiri manang hadaulatonnami mambahen mardalan halak on?

¹³Na dipasangap Debata ni si Abraham, si Isak dohot si Jakkob, Debata ni angka amanta i do Jesus naposona i, na pinasahat jala na sinoadahonmuna di jolo ni si Latus na mandok uhumna, paluaon Ibana nian.

¹⁴Alai disoadahon hamu do na badia jala partigor i; dipangido hamu do, lehonon tu hamu pamunu i.

¹⁵Alai dipusa hamu do partogi tu hangoluan. I ma dipahehe Debata sian na mate; hami do angka sitindangi ni i!

¹⁶Asa ala ni haporseaon di Goarna do dipargogoi Goarna halak on na niida jala na tinandamuna, gabe dilehon haporseaon na sian Tuhan i do hahisaron tu ibana di jolomuna saluhutna.

¹⁷Onpe, hamu ale angka dongan, huhilala, na hurang boto do hamu, umbahen na diulahon hamu i, songon i do nang angka sintuamuna.

¹⁸Alai dipasaut Debata do disi na pinaboana hian marhitehite hata ni saluhutna panurirang, mandok: Sitaon na bernit do anggo Kristusna.

¹⁹Antong, pauba jala paulak hamu ma rohamuna, asa tarsesa dosamuna,

²⁰asa anggiat ro angka ari hahilasan sian adopan ni Tuhan i jala asa disuru tu hamu Jesus Kristus, songon naung tinahina i hian.

²¹Dijangkon banua ginjang do Ibana jolo, paima ro tingki hasosonggop ni nasa na hinatahon ni Debata di na robi marhite sian hata ni angka panurirangna na badia i.

²²Ai didok si Musa do: "Paheheon ni Tuhan Debatanta do panurirang sada sian angka hahaanggimuna i songon ahu on; Ibana do sitangihononmuna di saluhut sidohononna tu hamu.

²³Alai sirotongkononhon ma disi sian bangso i nasa na so tumangihon panurirang i!"

²⁴Alai nasa panurirang angka na manurirangi, mamungka sian si Samuel ro di angka na sian pudina i, angka ari on do dibaritahon nasida.

²⁵Hamu do anak ni angka panurirang i jala partohap di padan na binahen ni Debata tu angka amanta i, uju na nidokna i tu si Abraham: "Dapotan pasupasu ma saluhut bangso ni tano on marhite sian Pomparanmi!"

²⁶Jumolo do di hamu dipahehe Debata Naposona i, disuru do Ibana mamasumasu hamu, angka na mulak sian hajahatonmuna be.

4¹ (I.) Alai di na manjamitai natorop i nasida, ditahopi angka malim i dohot sintua ni bagas joro i rap dohot angka Saduse ma nasida.

²Muruk ma i, ala diajari nasida natorop i jala dibaritahon haheheon sian na mate marhite sian Jesus.

³Jadi ditangkup ma nasida, didabu ma nasida saborngin i tu hurungan, ai nunga bot ari.

⁴Alai gabe porsea do torop sian angka naung umbege jamita i, pola gok limaribu torop ni angka baa.

⁵(II.) Alai di torang ni arina i marpungu ma di Jerusalem angka pangituai nang angka sintua ro di angka sibotosurat,

⁶rap dohot si Hannas, sintua ni malim i, dohot si Kayapas, si Johannes dohot si Aleksander ro di sude sisolhot ni sintua ni malim i.

⁷Jadi dipajongjong ma nasida tu tongatonga, dipamanat ma: Gogo ni ise manang goar ni ise dipangasahon hamu patupahon i?

⁸Dung i gok Tondi Parbadia ma si Petrus, didok ma tu nasida: Hamu angka na sangap ni bangso on jala pangituai!

⁹Molo pola tangkasan hami sadari on ala ni denggan basa i na tu sada halak na hansitan, manang marhite sian ise ibana malum,

¹⁰boto hamu ma saluhutna ro di sude bangso Israel: Jongjong pe halak on hisar di jolomuna, sandok marhitehite Goar ni Jesus Kristus na sian Nasaret i do, na pinarsilangkonmuna, na pinangolu ni Debata sian na mate!

¹¹ Ibana do "batu na binolongkon ni hamu angka pande bagas i, naung gabe batu parsuhisui."

¹² Asa ndang adong haluaon di bagasan manang ise na asing; ai ndang adong goar na asing ditoru ni langit dilehon tu jolma, parhiteanta tu haluaon.

¹³ Ia nasida, longang do marnida hiras ni roha ni si Petrus dohot si Johannes i, ai torang do diboto, na so sijama surat jala na so marsiajar nasida; ditanda do, nasida dongan ni Jesus najolo.

¹⁴ Alai diida do jongjong disi rap dohot nasida halak naung malum i, jadi ndang dapotsa be manang aha sidohononna.

¹⁵ Gabe disuru nama nasida tu balian ni parrapotan i, dung i masitungkaran pingkiran ma nasida, angka ninna ma:

¹⁶ Dia ma bahenonta tu angka halak on? Ai tandap do tanda na pinamasanasida on; saluhut pangisi ni huta Jerusalem do umbotosa jala ndang tarsoadahon hita.

¹⁷ Alai asa unang lam rarat tu natorop i, gogo ma nasida taasupi, asa sandok unang be marjamita nasida tu halak mangasahon Goar i.

¹⁸ Dung i dijou ma nasida, dirarang ma, sandok na so tupa be nasida marjamita manang mangajari mangasahon Goar ni Jesus.

¹⁹Alai ninna si Petrus dohot si Johannes ma mangalusi: Hamu ma manimbang, manang na tigor i di roha ni Debata, molo tangian hami di hamu asa di Debata.

²⁰Ai ndang tarbahen hami so mangkatahon naung huida jala hubege hami.

²¹Alai lam diasupi ma nasida, dung i dipalua ma, ala so jumpang nasida dalan manguhumi nasida dibahen natorop i, ai saluhut do mamuji Debata marningot na masa i.

²²Ai lobi opatpulu taon do umur ni jolma na pinamalum i.

²³(III.) Alai dung malua nasida, didapothon ma angka dongannasida, jadi dibaritahon ma sude na nidok ni angka sintua ni malim dohot angka pangituai tu nasida.

²⁴Jadi dung dibege nasida i, sasoara ma nasida mandok tu Debata: O ale Tuhan, Ho do manjadihon langit dohot tano dohot laut ro di nasa isina i!

²⁵Hinorhon ni Tondi Parbadia dihatahon Ho do marhite sian soara ni amanami, si Daud naposomu, songon on: "Boasa ogaoga halak parbegu jala na so marniula dipingkiri angka bangso?"

²⁶"Na hehe do angka raja ni tano on jala marpungu do angka panggongomi laho mangalo Tuhan Kristusna i."

²⁷Ai tutu ma naung marpungu di huta on si Herodes dohot Pontius Latus rap dohot

halak parbegu dohot bangso Israel maralohon Jesus, naposom na badia i, na miniahanmi,

²⁸laho pasauthon hasosonggop ni na tiningki ni tanganmu dohot roham hian.

²⁹Onpe, ale Tuhan, bereng ma asupasupnasida, jala lehon tu angka naposomon hiras ni roha situtu, laho mangkatahon hatam!

³⁰Huhut surdukkon ma tanganmu, laho patupahon hahisaron ro di angka tanda dohot halongangan marhitehite Goar ni Jesus, naposom na badia i!

³¹Jadi dung martangiang nasida, humuntal ma inganan parpunguannasida jala gok Tondi Parbadia ma nasida saluhutna, gabe marhiras ni roha ma nasida mangkatahon hata ni Debata.

³²(IV.) Alai saroha saoloan do angka na porsea na sapunguan i; jala ndang adong nanggo sada sian angka paradongan na mandok: Hapunjunganna artana i, hatopan do i saluhutna dietong.

³³Jadi marhagagoon situtu ma angka apostel i, mangkatindangkon haheheon ni Tuhan Jesus i, jala tung lomo situtu do roha ni halak mida sude nasida.

³⁴Ai ndang adong manang ise nasida hurangan; ai ia adong pe sian nasida parhauma manang parjabu, digadisi do i, dung i diboan ma tuhor ni na ginadisna i.

³⁵ Dipeakkon ma i tujolo ni angka apostel, dung i disagihon nasida ma i tu angka na hurangan.

³⁶ Jadi adong ma sahalak Lepi sian pulo Siprus, i ma si Josep, na ginoar ni angka apostel si Barnabas (mandok: Anak ni pangapulon).

³⁷ Digadis ma hauma golatna, diboan ma hepeng i, laos dipeakkon ma tujolo ni angka apostel i.

5¹ (I.) Adong ma uju i sahalak na margoar si Ananias rap dohot dongan saripena si Sapiro, na manggadis tanona.

² Mardos ni roha ibana dohot dongan saripena, manamondingkon tuhorna i deba; diboan ma na deba nari, dipeakkon ma tujolo ni angka apostel.

³ Alai ninna si Petrus ma: Oe Ananias, naung digohi sibolis i do hape roham, laho manggabusi Tondi Parbadia i dohot mamorso deba tuhor ni tano i.

⁴ Ia ditiop ho i, nda gong di ho; digadis ho pe i, nda laos tong guru di ho? Dia do umbahen na tubu roham, mambahen songon i! Ndadajolma na ginabusanmi disi, Debata do!

⁵ Alai disi dibege si Ananias hata ondeng, runggang ma ibana, laos tos hosana. Jadi biahaton situtu ma sude na umbegesa.

⁶ Jadi hehe ma angka na umposo, disaputi ma bangkena, diusung ma tu balian laho mananom.

⁷Alai salpu arga tolu jom ro ma dongan saripena i, ndang dope diboto na masa i.

⁸Jala dipanghulingi si Petrus ma ibana: Paboa ma tu ahu: Na sa on do digadis hamu tano i? Olo, na sa i do, ninna.

⁹Alai ninna si Petrus ma mandok ibana: Boasa tung saroha hamu mangunjuni Tondi ni Tuhan i? Tagam ma, na mandok masuk ma angka naung mananom dongan saripem; usungonnasida ma nang ho tu balian!

¹⁰Dung i pintor runggang ma ibana tu jolona, laos tos hosana. Jadi di na bongot i angka na umposo i, nunga mate ibana didapot jala diusung ma bangkena tu balian, ditanom ma tulambung ni dongan saripena i.

¹¹Jadi hatahutan situtu ma sude na sahuria i ro di nasa na umbegesa.

¹²(II.) Alai masa do godang angka tanda dohot halongangan marhite sian tangan ni angka apostel i tu natorop; saroha do nasida saluhutna, marpungu do nasida tu emper ni si Salomo.

¹³Alai sian na leban i ndang adong na hum rohana pasaorhon dirina tu nasida; diparsangapi natorop i do nasida tahe.

¹⁴Alai lam tamba ma angka na porsea di Tuhan i, torop baoa nang boruboru.

¹⁵Pola dipamboan halak do angka na hansitan tu alaman, dipeakkon ma tu podoman dohot tu amak, asa anggiat hona

halinu ni si Petrus i deba sian nasida, jumpa ro ibana.

¹⁶Alai dohot do torop halak sian angka huta humaliang ro tu Jerusalem, mamboan angka na marsahit dohot angka na niarsahan ni tondi na hodar, gabe malum ma nasida saluhutna.

¹⁷(III.) Alai hehe ma sintua ni malim i dohot saluhut angka donganna, i ma horong ni halak Saduse, gok rimas rohanasida.

¹⁸Jadi dilaluhon ma tangannasida tu angka apostel i, didabu ma nasida tu hurungan hatopan.

¹⁹Alai bornginna i diungkap surusuruan ni Tuhan i ma angka pintu ni hurungan i, ditogihon ma nasida tu balian, didok ma:

²⁰Laho ma hamu; di bagas joro ma hamu jongjong, mangkatahon tu natorop i saluhut hata hangoluan i!

²¹Jadi dung dibege nasida i, sogot ma nasida laho tu bagas joro laho mangajari. Alai ro ma sintua ni malim i dohot angka donganna, dipapungu ma rapot godang dohot saluhut sintua ni angka anak Israel; dung i disuru ma tu hurungan mangalap nasida.

²²Alai dung sahat ro disi angka naposo i, ndang jumpangsa nasida di hurungan i, jadi mulak ma nasida paboahonsa, ninna ma:

²³Momos do nian hurungan i hudapot hami, angka parjaga pe jongjong di jolo ni angka

pintu i; alai dung huungkap hami, ndang jumpang hami manang ise di bagasan.

²⁴Asa dung dibege sintua ni bagas joro i dohot angka sintua ni malim boaboa i, jut ma rohanasida mamingkiri, manang dia astuan ni i.

²⁵Alai ro ma na mamaritahon tu nasida: Dibagas joro do hape jongjong nasida na hinurungkonmuna i, mamodai natorop i.

²⁶Dung i laho ma sintua i rap dohot angka naposo mangalap nasida; alai ndada gogo dibahen, ai mabiar do nasida mida natorop, aik boha didangguri nasida maon.

²⁷Asa dung diboan, dipajongjong ma nasida tujolo ni rapot godang, dung i dipamanat sintua ni malim i ma nasida, ninna ma:

²⁸Gomos situtu do nian hatanami mangorai hamu, na so jadi be hamu mangajari mangasahon Goar i, hape lam digohi hamu do huta Jerusalem podamuna i; na naeng parsapatahononmuna mudar ni Halak i tu hami?

²⁹Dung i ninna si Petrus dohot angka apostel i ma mangalusi: Ingkon oloan do iba di Debata asa di jolma!

³⁰Dipahehe Debata ni angka amanta do Jesus, na pinusamuna, uju digantung hamu Ibana tu hau.

³¹Tu siamunna do dipabangkit Debata Ibana gabe Partogi jala Sipalua, laho mangalehon

tu halak Israel hamubaon ni roha dohot hasesaan ni dosa.

³²Hami do panindangi di hata on dohot Tondi Parbadia, na nilehon ni Debata tu angka na mangoloi Ibana.

³³Alai umbege i nasida, digotapi ma rohanasida jadi diputushon ma, sipusaon do nasida.

³⁴(IV.) Alai hehe ma di rapot i sahalak Parise, na margoar Gamaliel, sibotopatik, na sangap do ibana di roha ni natorop i, didokkon ma paruaron nasida satongkin.

³⁵Dung i didok ma tu nasida: Hamu halak Israel, manat ma hamu di sibahenonmuna tu angka jolma on!

³⁶Hehe do najolo si Teudas, dipabalga dirina, pola arga opatratus halak mangihuthon ibana, gabe tarbunu do ibana, marserak do saluhutna na mangihuthon ibana, gabe soada be.

³⁷Di pudina hehe muse si Judas, halak Galilea i, di na tarsurat i saluhut halak, jadi torop do dibolabola ditogihon; alai dohot do ibana lengse, gabe marserak sudena na mangihuthon ibana.

³⁸Asa on ma hatangku: Unang hahua hamu be angka halak i, pasombu hamu ma nasida; ai molo sian jolma tahi dohot ulaon on, na laho sega ma i.

³⁹Alai molo sian Debata, ndang taragohon hamu nasida; so tung gabe tardapot hamu maon angka sialo Debata!

⁴⁰Dioloi nasida ma ibana, dijou ma angka apostel i, dilinsingi ma nasida jadi diorai ma mangkatahon mangasahon Goar ni Jesus, dung i dipalua ma.

⁴¹Alai las do rohanasida, laho ruar sian jolo ni rapot i, ala tau nasida dirajumi Debata manaon lealea humongkop Goar i.

⁴²Jadi ndang mansohot nasida ariari di bagas joro nang jojo jabu pe, mangajarhon dohot mamaritahon Kristus Jesus i.

6¹ (I.) Alai di angka ari i lam manamba ma torop ni sisean i, jadi marmungutmungut ma halak Junani dompak halak Heber, ala tartading angka parompuan na mabalu sian nasida di pangurupion ariari.

²Jadi diparia na sampuludua i ma sandok huria i, didok ma: Nandang denggan hupapudi hami hata ni Debata, laho paturehon angka asiasi.

³Onpe, ale angka dongan, diori hamu ma sian tongatongamuna pitu halak na denggan baritana, angka na gok Tondi jala na pantas marroha, sipabangkitonta tu ulaon i.

⁴Alai anggo hami, tangiang dohot ulaon jamita i ma tong huhapadothon hami.

⁵Jadi lomo ma roha ni na sahuria i di hata i; dipillit ma si Stepanus, sada halak na gok haporseaon dohot Tondi Parbadia, dung i si

Pilippus, si Prokorus, si Nikanor, si Timon dohot si Parmenas, angkup ni i si Nikolaus, sada parguru sian Antiokia.

⁶Angka i ma dipajongjong tujolo ni angka apostel i, jala martangiang ma huhut mangampehon tangan tu nasida.

⁷Jadi lam rarat ma hata ni Debata, ganda situtu ma torop ni angka sisean di Jerusalem; angka malim pe, torop do mangoloi porsea.

⁸(II.) Alai na gok asi ni roha dohot hagogoon si Stepanus, dipatupa do halongangan dohot tanda angka na balga di adopan ni natorop i.

⁹Gabe hehe ma deba angka na sian parguruan na margoar Libertini dohot sian Kirene dohot sian Aleksanderia dohot angka na sian Kilikia dohot sian Asia marsual dohot si Stepanus.

¹⁰Alai ndang taralo nasida hapistaranna dohot Tondi i na mangajari ibana.

¹¹Gabe dipajuju nasida ma deba halak na mandok: Hubege hami do ibana mandok hata barangsi mangapasi si Musa dohot Debata.

¹²Jadi digintali nasida ma natorop i ro di angka sintua dohot angka sibotosurat, laos hehe ma nasida, ditangkup ma ibana, diboan ma tujolo ni rapot godang.

¹³Dung i dipajongjong nasida ma angka sitindangi gapgap na mandok: Nandang na mansadi halak on mangkata inganan na badia i nang patik i.

¹⁴Ai hubege hami do ibana mandok: Lohaani Jesus sian Nasaret i ma joro i, paubaonna ma adat na tajalo sian si Musa.

¹⁵Jadi dipanotnoti saluhut parrapot i ma ibana, jala songon bohi ni surusuruan ni Debata do bohina diida nasida.

7¹(I.) Dung i didok sintua ni malim i ma: Atehe, na tutu do i?

²Jadi dialusi ma: Hamu angka hahaanggi dohot angka damang, tangihon hamu jolo! Dipataridahon Debata na marsangap i do Ibana tu amanta si Abraham, uju di Mesopotamia ibana, andorang so maringan di huta Haran dope.

³Ninna ma mandok ibana: Bungkas ma ho sian tanomi dohot sian donganmu sabutuha; topot ma tano sipatuduhononku tu ho!

⁴Jadi laho ma ibana sian tano Kasdim maringan tu huta Haran; dung i sian i muse, dung mate amana i, dipaunsat do ibana tu tano niinganamuna on nuaeng.

⁵Ndang dope dilehon anggo golat tu ibana disi, nanggo na santopap, jadi diparbagabaga do, lehononna tu ibana tano i, asa ibana nampunasa ro di pomparanna, andorang so adong dope anakna.

⁶Alai songon on do didok Debata: "Gabe na hinomit ma pomparanmu di tano na leban; parhatobanon jala paporsukporsukkon ni halak do nasida leleng ni opatratus taon".

⁷"Dung i uhumonku ma bangso na nioloannasida i, ninna Debata; i pe asa bungkas nasida sian i, dung i sombaonnasida ma Ahu di inganan on."

⁸Laos dilehon ma tu ibana padan parsunaton. Dung songon i, ditubuhon ma si Isak, disunat ma ibana di ari paualuhon; jadi disunat si Isak ma muse si Jakkob; laos songon i dibahen si Jakkob tu ompunta na sampuludua i.

⁹Dung i dilatei angka ompunta i ma si Josep, digadis ma ibana tu tano Misir; alai didongani Debata do ibana.

¹⁰Jala dipalua do ibana sian saluhutna haporsuhonna, gabe dilehon tu ibana asi ni roha dohot hapistaran di jolo ni Firaun, raja ni Misir i, na mamampe ibana gabe pangarajai di tano Misir ro di saluhut na di bagasna i.

¹¹Dung i songgop ma haleon tu liat tano Misir dohot tu tano Kanaan, gabe porsuk ma diae, jadi ndang jumpangan sipanganon be angka amanta i.

¹²Alai dibege si Jakkob ma, adong sipanganon di tano Misir, jadi dipaborhat ma angka amanta i tusi parjolo sahali.

¹³Dung i di na paduahalihon i dipatandahon si Josep ma ibana tu hahaanggina, laos torang ma di raja Firaun i partubu ni si Josep.

¹⁴Alai disuru si Josep ma na manjou amana i, si Jakkob, rap dohot saluhutna donganna sabutuha; pitupulu lima do toropnasida.

¹⁵Asa tuat ma si Jakkob tu tano Misir, dung i mate ma ibana nang angka amanta i.

¹⁶Dung i ditaruhon ma nasida tu Sikem, dipeakkon ma tu tanoman, na tinuhor ni si Abraham sian angka anak ni si Hemor disi.

¹⁷Alai dung lam jonok tingki na pinarbagabaga ni Debata, na niuarihonna tu si Abraham i, lam sopar ma bangso i jadi matorop mabue ma nasida di tano Misir i.

¹⁸Paima pampe raja na asing, na so umboto si Josep i.

¹⁹Jadi bisuk ma dibahen mangago bangsonta, dijahati do angka amanta, gabe dibolongkon posoposonasida, asa unang mangolu.

²⁰Jadi di tingki i ma tubu si Musa, jala lomo do roha ni Debata mida ibana. Leleng ni tolu bulan do ibana diparmudumudu di bagas ni amana i.

²¹Dung i ditaruhon nama tu balian, alai dijangkon boru ni raja Firaun ma ibana, dipagodanggodang ma jala diain.

²²Dipodahon ma tu ibana nasa hapistaran ni halak Misir, gabe malo ma ibana di hata nang di ulaon pe.

²³Alai dung dapot umurna opatpulu taon, tubu ma rohana mandulo angka donganna sabutuha, i ma halak Israel i.

²⁴Jala marnida sahalak na nirupa, mangalo ma ibana; diluluhon ma na nirupa i, dipusa ma halak Misir i.

²⁵Na dihirim rohana do, antoan ni angka donganna ma, na naeng patupaon ni Debata haluaon di nasida marhite sian tanganna; hape ndang dianto nasida.

²⁶Dung i marsogotna i ro muse ma ibana, tongon di na marbadai nasida, gabe disosoi ma nasida mardame, ninna ma: Na marhahamaranggi do hamu, ale angka amang; boasa masialoan hamu?

²⁷Alai ditulak parsala i ma ibana, didok ma: Ai ise mamampe ho gabe pangarajai dohot panguhum di hami?

²⁸Nda tung naeng pusaonmu ahu songon naung pinusam nantoari halak Misir i?

²⁹Dung i maporus ma si Musa, umbege hata i; laos mahiandu ma ibana di tano Midian, ditubuhon ma disi dua anak.

³⁰Jadi dung gok opatpulu taon, diida ibana ma surusuruan ni Debata di halongonan, di dolok Sinai, di bagasan api na marsigorgor di ramba sampulguk.

³¹Longang ma roha ni si Musa, dung diida na niidana i, jadi didapothon ma manangkasi; alai tarbege ma soara ni Tuhan:

³²"Ahu do Debata ni angka amangmu, Debata ni si Abraham, si Isak dohot si Jakkob." Jadi angka dotdot ma si Musa, ndang hum be rohana manangkasi.

³³Alai ninna Tuhan i ma mandok ibana: "Tanggali sipatu sian patmu, ai tano na badia do inganan hajongjonganmi!

³⁴Nunga tangkas huida haporsuhon tinaon ni bangsongki di tano Misir, jala nunga hubege hoihoinasida, asa nunga tuat Ahu paluahon nasida; onpe, ro ma ho, asa husuru ho tu tano Misir!"

³⁵I ma si Musa i na jinuanasida, pola didok nasida: Ise na mamampe ho gabe pangarajai dohot panguhum? Apala ibana ma disuru Debata gabe pangarajai dohot sipalua marhite sian tangan ni surusuruan na niidana di ramba na sampulgu k i.

³⁶Ibana do manogihon nasida bungkas, dipatupa do angka halongangan dohot tanda di tano Misir i, di laut rara dohot di parhorsihan, leleng ni opatpulu taon.

³⁷I ma si Musa, na mandok tu angka halak Israel: "Paheheon ni Debata do panurirang sada di hamu sian angka hahaanggimuna songon ahu on!"

³⁸Ibana ma i na di huria na di halongonan i rap dohot surusuruan, na mangkatai di dolok Sinai dohot ibana dohot angka amanta i; dijalo do hata na mangolu, silehononna tu hita.

³⁹Na so tinangihon ni angka amanta i, ai ditulak nasida do ibana, jadi mulak ma rohanasida marningot tano Misir.

⁴⁰Ai didok nasida tu si Aron: Pauli di hita angka debata, na mardalan di jolonta; ai ndang taboto, manang aha masa di si Musa, naung manogihon hita ruar sian tano Misir.

⁴¹ Jadi digana nasida ma lombu uju i, laos dipele ma ganaganaan i, gabe dihalashon nasida hapandean ni tangannasida.

⁴² Alai ditundali Debata ma nasida, dipasahat ma mangoloi angka na pinardebatanasida na di langit i, songon na tarsurat di pustaha ni angka panurirang i: "Ai adong disombahon hamu, bangso Israel, tu Ahu angka pelean dohot silehonlehon, uju na di halongonan i hamu leleng ni opatpulu taon?"

⁴³ Dihunti hamu do balebale ni Molok dohot bintang ni debata Repan ro di angka gambaran na pinaulimuna bahen sisombaonmuna. Tu balik ni Babel dope buangkononku hamu!"

⁴⁴ Di angka amanta di halongonan i do undungundung panindangion i, na suman tu na niaturhon ni Debata na mangkatai dohot si Musa i, asa bahenonna tudos tu tiruan na niidana i.

⁴⁵ I ma dijalo angka amanta i, laos diboan rap dohot si Josua, laho mamuhar angka bangso na pinabali ni Debata sian jolo ni angka amanta i ro di angka ari ni si Daud.

⁴⁶ Ibana ma na niasian ni Debata, gabe dipangido ma, naeng adong inganan ni Debata ni si Jakkob.

⁴⁷ Alai si Salomo ma paulihon inganan di Ibana.

⁴⁸Alai ndang mian Natumimbul i di bagasan inganan na pinandean ni tangan, songon na nidok ni panurirang i:

⁴⁹"Langit i do habangsangku, jala ondolan ni pathu do tano i; bagas dia ma i na naeng paulionmuna di Ahu, ninna Tuhan i; tung dia ma inganan pangulonanki?

⁵⁰Nda tanganku do paulihon saluhutna i?"

⁵¹O hamu na jogal rungkung, angka na so tarsunat rohamu nang pinggolmu, tongtong do dialo hamu Tondi Parbadia i; songon angka amamuna, suang songon i do nang hamu!

⁵²Ise ma sian angka panurirang i, na so pinaburuburu ni angka amamuna? Pola dipusa nasida do angka na sumurirangkon haroro ni Partigor i; Ibana pe dipasahat jala dipusa hamu do!

⁵³Dijalo hamu do patik i, na pinatolhas ni angka surusuruan i; hape ndang diradoti hamu i.

⁵⁴(II.) Umbege i, digotap ma rohanasida jala patungosngoson ma iponnasida dompak ibana.

⁵⁵Alai gok Tondi Parbadia ma si Stepanus mamereng tu ginjang, jadi diida ma hasangapon ni Debata dohot Jesus jongjong di siamunna.

⁵⁶Jadi didok ma: Ida ma, mungkap do langit i huida, jala Anak ni jolma i jongjong tungkan siamun ni Debata!

⁵⁷ Alai marsoara na gogo ma nasida marsurahi huhut disongsongi pinggolnasida be, jadi rap ma nasida manahopi ibana.

⁵⁸ Disarat nasida ma ibana tu balian ni huta i, dung i dipantinggangkon ma batu tu ibana. Ia angka sitindangi i, dipampeakkon do ulosnasida tujolo ni dolidoli na margoar Saulus.

⁵⁹ Asa dipantinggangkon nasida ma batu tu si Stepanus; gabe manjoujou do ibana mandok: Ale Tuhan Jesus, jalo ma tondingku!

⁶⁰ Alai na marsinggang ma ibana, huhut dipagogo ma soarana mandok: Ale Tuhan, unang jujur dosanasida i! Jadi dung didok songon i, monding ma ibana.

8¹ (I.) Alai dihalomohon si Saulus do pamununasida di si Stepanus. Jala masa ma olat ni na sadari i pangaleleon bolon dampak huria na di huta Jerusalem, gabe marserak ma nasida saluhutna, so padohot angka apostel, tu luat Judea dohot Samaria.

² Alai ditanom angka halak na daulat roha ma si Stepanus, jala na nia lelengna ditatangisi nasida ibana.

³ Alai dipaporsukporsuk si Saulus do nasida na sahuria i: Dibongoti angka jabu, disarat sian i baoa nang boruboru, laho pasahathon tu hurungan.

⁴ (II.) Madangadang do angka na marserak i huhut mamaritahon hata i.

⁵Laos tuat ma anggo si Pilippus tu huta Samaria, dijamitahon ma tu nasida Kristus i.

⁶Jadi dung dibege natorop i jamita ni si Pilippus jala diida angka tanda na pinatupana, saro ha ma nasida marateatehonsa.

⁷Ai ruar do angka tondi na hodar, marsoara na balga sian torop halak na sinonggopanna i; godang do nang na sarion dohot na lumpuon dipamalum.

⁸Jadi mansai las ma roha ni nasida na sahuta i.

⁹(III.) Alai adong do di huta i hian sada halak na margoar si Simon, parsibalik mata na mangaliluhon roha ni halak Samaria i, ai na sumurung do ibana didok.

¹⁰Jadi saluhut halak, angka na metmet dohot na magodang, mangihuthon ibana, angka didok ma: On ma hagogoon ni Debata apala na balga!

¹¹Alai umbahen na dipaihutihut nasida ibana na sai leleng, ala lilu nasida dibahen hapandeanna i.

¹²Alai gabe tardidi ma angka baoa nang boruboru, dung porsea nasida di na binaritahon ni si Pilippus na taringot tu harajaon ni Debata dohot Goar ni Jesus Kristus.

¹³Dung i gabe porsea ma nang si Simon ondeng jala tardidi ma, laos dipaihutihut ma si Pilippus; jadi mansai longang ma rohana

marnida tanda dohot hagagoon na balga, angka na masa i.

¹⁴Alai dung dibege angka apostel na di Jerusalem, naung dijalo halak Samaria i hata ni Debata, disuru nasida ma si Petrus dohot si Johannes manopot nasida.

¹⁵Tuat ma nasida, ditangiangkon ma angka dongan i, asa dijalo Tondi Parbadia.

¹⁶Ai ndang dope songgop Tondi i manang tu ise nasida, asal tardidi do nasida tubagasan Goar ni Tuhan Jesus.

¹⁷Jadi mangampehon tangan ma apostel i tu nasida, gabe dijalo ma Tondi Parbadia.

¹⁸Alai dung diida si Simon angka apostel i mangalehon Tondi Parbadia marhite sian na mangampehon tangan, ro ma ibana mamboan hepeng tu nasida.

¹⁹Didok ma: Lehon hamu ma huaso sisongon i nang tu ahu, asa manjalo Tondi Parbadia halak, ia huampehon tanganku tu ibana.

²⁰Alai didok si Petrus ma mandok ibana: Mago ma ho rap dohot perakmi; ai dirimpu ho, tartuhor silehonlehon ni Debata marhitehite hepeng!

²¹Ndang parjambar manang partohap ho di hata on, ai ndang na bonar roham maradophon Debata.

²²Ipe pauba ma roham sian hajahatonmi; dung i pangido ma tu Tuhan i, anggiat tarsesa tahitahi ni roham!

²³ Ai huida do roham di bagasan pogu na paet, niihotan ni hageduhon.

²⁴ Alai ninna si Simon i ma mangalusi: Tangiangkon hamu ma ahu tu Tuhan i, asa unang songgop tu ahu na nidokmuna i.

²⁵ Asa dung dihatindangkon jala dihatahon hata ni Tuhan i, mulak ma anggo nasida tu Jerusalem; laos dibaritahon dope barita na uli i di torop huta na di luat Samaria.

²⁶ (IV.) Alai dipanghulingi surusuruan ni Tuhan i ma si Pilippus: Hehe ma ho, laho ma dompak dangsina tu dalan na langlang i, na tuat sian Jerusalem tu huta Gasa!

²⁷ Jadi hehe ma ibana laho tusi. Jala adong ma disi sada halak Etiopia, parpangkat na balga, siramoti saluhutna arta ni si Kandake, raja ni halak Etiopia; i ma naung ro sian Jerusalem, dung martangiang disi.

²⁸ Jadi hundul ma ibana di huretana laho mulak, huhut manjahai surat ni panurirang Jesaya.

²⁹ Alai ninna Tondi i ma mandok si Pilippus: Laho ma ho tusi, hombari ma hureta i!

³⁰ Jadi marlojong ma si Pilippus tusi, gabe dibege ma ibana manjaha surat ni panurirang Jesaya; dung i ninna ma: Atehe, diantusi ho do na jinahami?

³¹ Alai ninna ma: Songon dia ma haantusan ahu i, anggo so adong na mamodai ahu? Laos disosoi ma si Pilippus manaek, asa hundul tu lambungna.

³²Alai anggo hata ni surat na jinahana i on do: "Ditogu do Ibana songon birubiru tu pamotongan jala songon birubiru na hohom di jolo ni panggustingi; songon i do nang Ibana, ndang tarbege soarana."

³³"Di hametmetonna i marujung uhum na tu Ibana. Ise ma manjujur sundutna i, ai tarhinsat do hosana sian tano on?"

³⁴Dung i ninna parpangkat i ma mangkuling i si Pilippus: Raja ho, ise do na nidok ni panurirang disi? Ibana sandiri do manang halak na leban?

³⁵Dung i mangkuling ma si Pilippus, dibaritahon ma Jesus tu Ibana, marbingkas sian hata ni surat ondeng.

³⁶Alai laho manulus dalan i, jumpang nasida ma aek, jadi ro ma parpangkat i: Ndi on ma aek! Adong dope ambatna, unang ahu tardidi?

³⁷Dung i didok si Pilippus ma: Anggo na porsea ho dohot nasa roham, jadi do i! Gabe ninna ma mangalusi: Ahu porsea. Anak ni Debata do Jesus Kristus!

³⁸Laos didokkon ma maradian hureta i; dung i mijur ma nasida, si Pilippus dohot parpangkat i tu aek i, dipandidihon ma ibana.

³⁹Alai di na nangkok i nasida sian aek i, diluahon Tondi ni Tuhan i ma si Pilippus, jadi ndang be diida parpangkat i ibana; marlas ni roha ma didatdati sidalananna i.

⁴⁰Alai anggo si Pilippus, di Asdod do ibana jumpang; dibolus ma angka huta i sude sahat ro di Kaesarea, huhut mamaritahon barita na uli i.

9¹ (I.) Alai sai tong dope diondamhon si Saulus asupasup dohot pamunuon dompak sisean ni Tuhan i.

²Ditopot ma sintua ni malim i mangido surat mandapothon angka parguruan na di huta Damaskus, asa ihotanna jala boanonna tu Jerusalem baoa nang boruboru pe, nasa na jumpangsa angka na mangihuthon agama i.

³Alai uju di tongandalan ibana, mardonokkon huta Damaskus, tompu ma sumillam sondang sian ginjang humaliang ibana.

⁴Jadi tinggang ma ibana tu tano, dung i dibege ma soara na mandok tu ibana: Saulus, Saulus! Boasa leleanmu Ahu?

⁵Alai didok ma: Ise do Ho, Tuhan? Jadi didok Ibana: Jesus do Ahu, na nileleanmi! (Susa ma ho manandahi turatura!)

⁶Angka hitir jala tarhalomong ibana mandok: Dia ma bahenonku, Tuhan, dipangido roham? Hata ni Tuhan i tu ibana: Hehe ma ho, bongoti ma huta i; disi ma paboan tu ho sibahenonmu.

⁷Alai tarhatotong do anggo angka donganna sauduran i, ai dibege nasida do soara i, alai ndang diida manang ise.

⁸Jadi hehe ma si Saulus sian tano i; alai dung diungkap matana, sandok ndang marnida be;

laos ditiop nasida nama tanganna, manogu ibana tu huta Damaskus.

⁹Asa tolu ari lelengna ndang marnida matana jala ndang mangan manang minum ibana.

¹⁰Jadi adong ma di huta Damaskus i sada sisean na margoar Ananias; dipataridahon Tuhan i ma dirina tu ibana, didok ma: Ale Ananias! Dung i dialusi ma: Dison do ahu, Tuhan!

¹¹Jadi didok Tuhan i ma mandok ibana: Hehe ma ho, laho ma tu alaman na margoar sitigor; tu bagus ni si Juda i ma pausoi halak Tarsus na margoar Saulus, ai na martangiang do ibana.

¹²Gabe diida ibana, bongot sada halak na margoar Ananias mangampehon tangan tu ibana, asa sumuang marnida.

¹³Alai ninna si Ananias ma mangalusi: Ale Tuhan, nunga sian lan halak hubege taringot tu godang ni na jahat na binahen ni halak i di huta Jerusalem tu angka na badiami.

¹⁴Dison pe marhuaso do ibana sian angka sintua ni malim i, mangihoti saluhutna na manjou Goarmu.

¹⁵Alai didok Tuhan i ma tu ibana: Laho ma ho, ai hupillit do ibana ulaulangku, asa diboan Goarhu tujolo ni angka bangso, nang tujolo ni angka raja dohot tujolo ni angka anak Israel.

¹⁶Ai patuduhononku pe tu ibana godang ni sitaonna ala ni Goarhu.

¹⁷ Jadi hehe ma si Ananias, dibongoti ma bagas i, diampehon ma tanganna tu ibana, huhut didok: O Saulus, anggia, disuru Tuhan i do ahu, i ma Jesus na niidami di pardalananmu ro tuson, asa sumuang marnida huhut gok Tondi Parbadia ho.

¹⁸ Dung i pintor peut ma hapitungon i sian matana gabe sumuang marnida: Dung i hehe ma ibana gabe tardidi.

¹⁹ Laos di jolo ma sipanganon jadi suang ma gogona. Dung i na nia do lelengna diangkupi ibana angka sisean na di huta Damaskus i.

²⁰ Manigor marjamita ma ibana di bagasan angka parguruan i, dihatindangkon ma Jesus, paboa Anak ni Debata Ibana.

²¹ Gabe muningan ma roha ni saluhutna na umbegesa, angka ninna ma: Nda ibana i, na mangalele di Jerusalem saluhutna angka na manjou Goar i; nang langkana tuson, nda laho mangihoti jala manogu nasida nian tujolo ni angka sintua ni malim?

²² Alai lam marsigomos ma si Saulus, pola jut do roha ni angka Jahudi na maringanan di huta Damaskus i dibahen, ai dipatorang do, Jesus i do Kristus.

²³ Asa dung na nia lelengna, martahi ma angka Jahudi mamusa ibana.

²⁴ Alai tarbortik ma tuptupnasida tu pinggol ni si Saulus. Pola do angka harbangan diingani nasida arian nang borngin, asa dapot ibana bunuonnasida.

²⁵ Alai diboan angka sisean i ma ibana borngin i; sian parik ma ditantan nasida ibana di bagasan hirang.

²⁶ Asa dung sahat ibana tu Jerusalem, naeng ma pasaoronna dirina tu angka sisean i; alai saluhut nasida mabiar mida ibana, ai ndang porsea nasida, naung gabe sisean ibana.

²⁷ Si Barnabas do manjangkon ibana, ditogihon ma tu angka apostel i, laos dipajojor ma tu nasida, naung diida si Saulus Tuhan i di pardalananna dohot pangkataionnasida ro di pangkatindangkonna di Goar ni Jesus, uju na di huta Damaskus.

²⁸ Dung i sai rap ma ibana dohot nasida mardalani di Jerusalem; marhiras ni roha do ibana mangkatahon Goar ni Tuhan i.

²⁹ Pola dipanghulingi jala disuali angka Hellenist; alai dipatahitahi nasida do mambunu ibana.

³⁰ Alai diboto angka dongan ma i, dipataru ma ibana tuat tu Kaesarea, laos disuru ma ibana tu huta Tarsus.

³¹ Asa mardamedame ma huria i di liat luat Judea dohot Galilea ro di Samaria, jala lam tu toguna ma huhut mamarangehon hatahuton mida Tuhan i, jala lam tu toropna nasida hinorhon ni pangapoion ni Tondi Parbadia.

³² (II.) Alai diebati si Petrus ma nasida saluhutna, jala tuat ma ibana manopot angka na badia na maringanan di Lidda.

³³ Jadi jumpangsa ma disi sada halak na margoar Eneas, na sarion, naung peak di podomanna, leleng ni ualu taon.

³⁴ Jadi didok si Petrus ma mandok ibana: Eneas, dipamalum Jesus Kristus do ho; hehe ma ho, duduk ma podomanmi! Jadi manigor hehe ma ibana.

³⁵ Jadi diida sude pangisi ni huta Lidda dohot Saron ibana, gabe didompakkon ma Tuhan i.

³⁶ (III.) Dung i adong ma di Joppe parompuan sada na porsea, na margoar Tabita, astuanna hije (Dorkas), na sumurung mangulahon na denggan dohot mambahen asi ni roha.

³⁷ Tongon ma di angka ari i marsahit ibana laos mate, jadi diburi ma ibana, dipeakkon ma tu bilut parginjang.

³⁸ Alai jonok do huta Lidda tu huta Joppe; jadi tarbege ma tu angka dongan, si Petrus disi, gabe disuru ma dua halak manopot ibana mangapoi, asa humatop ibana ro tumopot nasida.

³⁹ Jadi hehe ma si Petrus mandongani nasida. Asa dung sahat, ditogihon ma ibana tu bilut parginjang; jadi ro ma mandapothon ibana saluhut boruboru na mabalu angka na tumatangis, dipatuduhon tu ibana ulos dohot abit angka na pinauli ni si Tabita, andorang rap dope dohot nasida.

⁴⁰ Alai dipalaho si Petrus ma nasida saluhutna, dung i marsinggang ma ibana

martangiang, didompakkon ma bangke i, didok ma: O Tabita, hehe ma ho! Jadi dipabidok ma matana; dung i di na niidana si Petrus i, hundul ma ibana.

⁴¹ Jadi disurdukkon ma tanganna, pahehehon ibana; dung i dijou ma angka na badia i ro di angka boruboru na mabalu, dipajongjong ma ibana mangolu di jolonasida.

⁴² Dung i sar ma i diboto saluhut pangisi ni huta Joppe, jadi torop do gabe porsea di Tuhan i.

⁴³ Alai na nia do lelengna ibana mian di huta Joppe, sorang di sada halak na margoar Simon, sipauli hulingkuling.

10¹ (I.) Alai adong ma di Kaesarea sada halak na margoar Kornelius, letnan do ibana, masuk horong Italia.

² Na daulat do ibana jala mangkabiari Debata rap dohot sandok isi ni bagasna; godang do asiasina diparlehon tu bangso i jala ondop do ibana martangiang tu Debata.

³ Jadi torang ma diida di bagasan tondina tar di pungkul tolu arian i, ro surusuruan ni Debata manopot ibana, didok ma tu ibana: O Kornelius!

⁴ Alai marnida i ibana, biar ma rohana, huhut ma didok: Ai aha, Tuhan? Gabe ninna ma: Nunga sahat tu parningotan di jolo ni Debata angka tangiangmi ro di angka asiasimi.

⁵ Onpe, suru ma halak tu Joppe, mangalap si Simon na margoar Petrus.

⁶Na sorang di si Simon sipauli hulingkuling, parjabu di topilaut.

⁷Asa disi laho surusuruan na mangkatai dohot ibana, dijou ma naposona dua halak dohot soldadu sada na daulat roha sian angka na di lambungna.

⁸Dipajojor ma saluhutna i tu nasida, laos disuru ma nasida tu Joppe.

⁹(II.) Alai marsogotna i, uju di tongandalan dope nasida ondeng laho mandapothon huta i, manaek ma si Petrus tu bilut parginjang martangiang di hos ni ari.

¹⁰Gabe male ma ibana, naeng ma mangan. Jadi tagan marhobasi nasida di ibana, adong ma niidana di bagasan tondina:

¹¹Diida ma mungkap langit, dung i mijur ma sian i sada inganan na songon dagangan na bidang, na martali di suhisuhina na opat i, ditantan tu toru.

¹²Di bagasan ni i adong ma ragam ni siopatpat dohot angka na manjirir di tano ro di angka pidong na martongatonga langit.

¹³Dung i tarbege ma soara, na mandok tu ibana: Hehe ma ho, Petrus; seseati ma, pangan ma!

¹⁴Alai ninna si Petrus ma: Tongka, Tuhan! Ai ndang dung hupangan na ramun manang na so ias.

¹⁵Dung i ro muse ma soara paduahalihon mandok tu ibana: Unang ramun dok naung niiasan ni Debata!

¹⁶Tolu hali ma masa songon i, dung i mamintor ma tarhindat dagangan i tu ginjang.

¹⁷Bohabohaon dope roha ni si Petrus, manang dia lapatan ni na niidana i, nunga jongjong di jolo pintu i na sinuru ni si Kornelius i, dung dipausoi nasida bagas ni si Simon i.

¹⁸Jadi joujou ma nasida manungkun, manang na sorang disi si Simon na margoar Petrus.

¹⁹Alai di na marhusari dope roha ni si Petrus taringot tu na niidana i, ninna Tondi i ma mandok ibana: Adong do na mangalului ho!

²⁰Hehe ma ho, mijur ma, dongani nasida; unang ganggu roham, ai Ahu do marsuru nasida!

²¹(III.) Jadi mijur ma si Petrus mandapothon halak i, ninna ma: Ahu do na niluluanmuna! Dia do alana, umbahen na ro hamu?

²²Dung i didok nasida ma: Ia si Kornelius, i ma sada letnan, halak na tigor roha na mangkabiari Debata, na uli baritana di saluhut halak Jahudi; dapot parenta do sian surusuruan na badia; suruonna, ninna, mangalap ho tu jabuna, tumangihon hata sian ho.

²³Jadi diarahon ma nasida tu bagas, ditamuei ma. Manogotna i borhat ma ibana rap dohot nasida; dohot ma deba sian angka dongan na sian Joppe mandongani ibana.

²⁴ Marsogotna i muse sahat ma nasida tu Kaesarea. Alai nunga maimaima hian si Kornelius, jala nunga dipapungu angka donganna samarga dohot angka alealena na sumolhot.

²⁵ Asa di na bongot i si Petrus, ditomu si Kornelius ma ibana, marsinggang ma huhut sumomba ibana.

²⁶ Alai dipahehe si Petrus do ibana, ninna ma: Hehe ma ho; jolma do nang ahu!

²⁷ Dung i mangkatai ma nasida laho bongot, jadi torop ma pungu disi didapot.

²⁸ Dung i didok ma tu nasida: Diboto hamu do, subang bolon do i di halak Jahudi mandongani manang manopot halak na sian bangso na asing. Alai diajari Debata do ahu, na so jadi goaron jolma dia pe ramun manang so ias.

²⁹ Ala ni i umbahen na so manjua ahu ro, di na taralap i ahu. Antong, na manungkun ma ahu nuaeng: Ala ni hata dia do umbahen na dialap hamu ahu?

³⁰ Jadi didok si Kornelius ma: Opat ari ma nuaeng, boho songon on ari, di pungkul tolu, martangiang ahu di bagashon, jadi jongjong ma di jolongku sahalak parulos na marlinanglinang.

³¹ Na mandok: Ale Kornelius, ditangihon Debata do tangiangmi, laos diingot do angka asiasimi.

³²Antong, suru ma tu huta Joppe na manjou si Simon na margoar Petrus, na sorang di jabu ni si Simon, sipauli hulingkuling na di topilaut, ninna.

³³Jadi mamintor ma ahu marsuru mangalap ho; denggan do antong dibahen ho, ala ro ho. Nuaeng pe, nunga pungu hami saluhutna dison di jolo ni Debata, tumangihon saluhutna na nidokkon ni Tuhan i tu ho.

³⁴Dung i mangkuling ma si Petrus, ninna ma: Nunga tangkas dapot rohangku, na so siida bohi Debata!

³⁵Sian ganup bangso do tahe jangkononna angka na mangkabiari Ibana jala mangulahon hatigoran.

³⁶Ditongos Ibana do hatana tu angka anak Israel, laho mamaritahon dame marhite sian Jesus Kristus; Ibana do Tuhan ni saluhutna.

³⁷Diboto hamu do hata na masa di liat tano Judea na mamungka sian luat Galilea, dung salpu pandidion na binaritahon ni si Johannes i.

³⁸I ma taringot tu Jesus na sian Nasaret, na miniahan ni Debata marhitehite Tondi Parbadia dohot hagagoon; na mardalani do Ibana mambahen na denggan jala pahisarhon sude angka na pinatunduk ni sibolis, ai didongani Debata do Ibana.

³⁹Hami do mangkatindangkon saluhut pambahenanna i di tano Jahudi dohot

di Jerusalem; dipusa nasida Ibana,
digantungkon do tu hau.

⁴⁰Dipahehe Debata do Ibana di ari
patoluhon, dilehon do Ibana tu hapataron,

⁴¹ndang apala tu saluhut halak, tu angka
sitindangi do na pinillit ni Debata sian
nahinan; i ma hami, angka na mangan jala
minum rap dohot Ibana, dung hehe Ibana
sian na mate.

⁴²Jala didokkon do hami manjamitahon
dohot mangkatindangkon tu natorop, paboa
Ibana do i, na tinodo ni Debata hian gabe
panguhum di angka na mangolu ro di angka
na mate.

⁴³Saluhut panurirang i mangkatindangkon
taringot tu Ibana: Jaloan ni ganup na porsea
di Ibana hasesaan ni dosa marhite sian
Goarna.

⁴⁴Jadi andorang dihatahon si Petrus hata
ondeng, songgop ma Tondi Parbadia tu
saluhut nasida na umbege hata i.

⁴⁵Jadi longang ma roha ni angka na porsea,
halak Jahudi hian, dongan ni si Petrus i, ala
diusehon silehonlehon ni Debata, i ma Tondi
Parbadia i, nang tu halak sipelebegu.

⁴⁶Ai dibege do nasida mangkatahon di hata
na asing dohot mamuji Debata.

⁴⁷Jadi didok si Petrus ma: Hum ma roha
mangorai didion nasida on, angka naung
manjalo Tondi Parbadia i songon hami?

⁴⁸Gabe didokkon ma didion nasida marhitehite Goar ni Tuhan Jesus Kristus. Dung i dielehelek ma ibana, asa olo ibana jolo mian di nasida.

11 ¹(I.) Alai dibege angka apostel dohot angka dongan na di Judea i ma, naung dohot do hape halak sipelebegu manjangkon hata ni Debata.

²Gabe dibadai angka na porsea sian Jahudi i ma si Petrus, dung nangkok ibana tu Jerusalem, angka ninna ma:

³Bongot do ho hape tu angka halak na so tarsunat, jala rap mangan do ho dohot nasida!

⁴Alai jozor sian mulana ma dipatorang si Petrus na masa i, ninna ma:

⁵Uju na martangiang ahu di huta Joppe, huida ma di bagasan tondingku, mijur sada inganan na bidang na maropatsuhi, tartantan sian ginjang ro di jolongku.

⁶Dung i di na hupanotnoti i, huida ma disi angka siopatpat na di tano, angka binatang dohot angka na manjirir ro di angka pidong na martongatonga langit.

⁷Jadi hubege ma soara na mandok tu ahu: Hehe ma ho, Petrus; seseati ma, pangan ma!

⁸Alai ningku ma: Tongka, Tuhan! Ai ndang dung hudai na ramun manang na so ias.

⁹Alai mangalusi ma soara i paduahalihon sian ginjang: Unang ramun dok naung niisan ni Debata!

¹⁰Ro di tolu hali do masa songon i dung i ditait ma saluhutna i muse tu ginjang.

¹¹Dung i tongon di na satongkin i jongjong ma tolu halak di jolo ni jabu inganannami, angka na disuru sian Kaesarea mandapothon ahu.

¹²Alai didok Tondi i ma tu ahu, na so jadi ganggu rohangku mandongani nasida. Alai angkuphu do dongan na onom on, jadi hubongoti hami ma jabu ni halak i.

¹³Dibaritahon ma tu hami, naung niidana surusuruan i jongjong di bagasan jabuna, na mandok tu ibana: Suru ma tu huta Joppe, manjou si Simon na margoar Petrus!

¹⁴Hatahonon ni i do tu ho hata na tau paluahon ho ro di sandok isi ni jabum!

¹⁵Alai mamungka dope ahu marjamita disi, gabe songgop ma Tondi Parbadia tu nasida, songon na tu hita di mulana i.

¹⁶Disi ma huingot hata ni Tuhan i na nidokna i: "Aek do dididihon si Johannes, alai Tondi Parbadia do didihononhon tu hamu!"

¹⁷Antong, tung margogo ma ahu mangambat Debata, anggo dos do hape silua na binasabasahon ni Debata tu nasida, songon na tu hita, angka naung gabe porsea di Tuhan Jesus Kristus?

¹⁸Dung dibege nasida hata i, hohom be ma, gabe dipuji ma Debata, angka ninna ma: Asa dohot do hape tu halak sipelebegu dilehon Debata hamubaon ni roha asa mangolu!

¹⁹(II.) Alai anggo angka na marserak i hinorhon ni pangaleleon siala si Stepanus, torus ma didalani luat Penisia sahat ro di pulo Siprus dohot Antiokia; alai holan tu Jahudi sambing dope dibaritahon nasida hata i.

²⁰Alai adong do tahe deba sian nasida, halak Siprus dohot Kirene, na sahat ro tu Antiokia, gabe dibaritahon Tuhan Jesus disi nang tu halak Junani.

²¹Jadi didongani tangan ni Tuhan i nasida: Jala na nia toropnasida gabe porsea, angka na mandompakkon Tuhan i.

²²Pola tarbege baritanasida tu huria na di Jerusalem i, gabe disuru nasida ma si Barnabas tu Antiokia.

²³Tolhas ma ibana tusi, jadi diida ma asi ni roha ni Debata, gabe las ma rohana; laos diapoi ma sasude, asa marsihohot rohanasida mian di Tuhan i.

²⁴Ai tung halak na denggan roha do ibana, gok Tondi Parbadia dohot haporseaon, gabe ganda ma torop halak tartogu tu Tuhan i.

²⁵Dung i borhat ma ibana laho tu huta Tarsus mangalului si Saulus; jadi dung jumpangsa, ditogihon ma tu Antiokia.

²⁶Gabe rap ma nasida mian di huria i sataon lelengna, torop ma halak diajari disi; laos di Antiokia parjolo targoar angka sisean i halak Kristen.

²⁷(III.) Alai tuat ma ujui angka panurirang sian Jerusalem tu huta Antiokia.

²⁸Jadi hehe ma sada sian nasida na margoar Agabus, disurirangkon ma marhitehite Tondi i masa ni haleon potir tu liat portibi on; i ma na songgop uju hinarajahon ni si Klaudius.

²⁹Dung i dituptup angka sisean i ma manongos tumpak, marguru tu na tarpatupasa be, tu angka dongan na maringanan di Judea.

³⁰Saut ma i dibahen, ditongos ma i tu angka sintua i marhitehite tangan ni si Barnabas dohot si Saulus.

12¹(I.) Tar di tingki i ma dilaluhon raja Herodes tanganna tu deba na sahuria i paporsukporsukkon nasida.

²Podang do dibahen mambunu si Jakobus, dongan saama ni si Johannes i.

³Jadi dung diida, lomo roha ni Jahudi disi, didatdati ma, ditangkup ma dohot si Petrus, tongon di angka ari ni pesta Paska i.

⁴Jadi dung ditangkup, didabu ma ibana tu hurungan, dipasahat ma ibana tu opat hali opat soldadu panjaga; ditahi rohana, naeng togihononna ibana tujolo ni natorop, dung salpu pesta Paska i.

⁵Asa dijaga nasida do si Petrus di hurungan i; alai sai didatdati huria i do tumangiangkon ibana tu Debata.

⁶(II.) Dung i di na naeng togihonon ni Herodes si Petrus, modom do ibana borngin i di holangholang ni dua soldadu, tarihot dohot

rante dua; di jolo pintu ni hurungan i pe adong do na manjaga.

⁷Dung i tompu ma ro surusuruan ni Tuhan i jadi marsinondang ma sada panondang di bilut i, dituktuk ma lambung ni si Petrus manungguli ibana, huhut didok: Hatop ma ho hehe! Jadi marpeutan ma angka rante i sian tanganna.

⁸Dung i didok surusuruan i ma tu ibana: Hohosi ma dagingmi, pasang ma sipatumi! Jadi dibahen ma songon i. Dung i didok ma tu ibana: Uloshon ulosmi; ihuthon ma ahu!

⁹Dung i diihuthon ma ibana laho tu balian, jadi ndang diboto, manang na tutu do songon i masa tu ibana marhite sian surusuruan i; dirimpu do, di bagasan tondina diida i.

¹⁰Alai dung dibolus nasida panjaga na parjolo dohot na paduahon i, sahat ma nasida tu harbangan bosi, dalan tu huta. Jadi mungkap boti ma i di jolonasida, gabe ruar ma nasida tu dalan di huta i, dung i pintor sirang ma surusuruan i sian ibana.

¹¹Jadi dung tarjolma si Petrus, ninna ma: I pe asa huboto situtu, naung disuru Tuhan i do surusuruanna mangaroro ahu sian tangan ni si Herodes dohot sian nasa na niarop ni bangso Jahudi.

¹²Jadi dung tangkas i di ibana, laho ma ibana tu bagas ni si Maria, ina ni si Johannes na margoar huhut Markus; torop do disi marpungu martangiang.

¹³Alai dung dituktuhi ibana pintu parduru, ro ma naposo boruboru na margoar Rode mananginangi.

¹⁴Ditanda ma soara ni si Petrus alai ndang manigor diungkap pintu i dibahen las ni rohana; tu bagasan do ibana marlojong paboahon, naung jongjong do hape si Petrus di jolo pintu i.

¹⁵Gabe didok nasida ma tu ibana: Na rintik do ho; alai sai diondolhon do hatana i, jadi didok nasida nama: Surusuruanna do i.

¹⁶Alai sai didatdati si Petrus do manuktuhi; jala di na mangungkap i nasida, diida ma ibana, gabe tarhalomong ma rohanasida.

¹⁷Alai dihiraphon ma tanganna tu nasida, asa sip; dung i dipajojor ma tu nasida pambahen ni Tuhan i, manogihon ibana ruar sian hurungan i, laos didok ma: Baritahon hamu ma i tu si Jakobus dohot tu angka dongan. Dung i laho ma ibana tumopot inganan na asing.

¹⁸Alai dung torang ari, gaor situtu ma roha ni angka soldadu i taringot tu na masa di si Petrus i.

¹⁹Alai dung so jumpang si Herodes ibana, atik pe dilului, diuhumi ma angka panjaga i, didokkon ma togihononhon nasida tu hamatean; laos bungkas ma anggo ibana sian Judea tu Kaesarea, jadi disi nama ibana na maringan.

²⁰Dung i marmusumusu ma ibana dompak isi ni Tirus dohot Sidon; alai saroha ma nasida manopot ibana, diellemellem ma si Blastus, naposo haposan ni raja i. Mangido mardame nasida, ala sian tano ni raja i bohal ni luatnasida.

²¹(III.) Dung i di ari na tiniti dipangke Herodes ma ulos harajaonna jadi hundul ma di habangsana manariashon hatana tu nasida.

²²Gabe dijouhon natorop i ma: Soara ni Debata do i, ndada soara ni jolma!

²³Alai pintor dipastap surusuruan ni Debata ma ibana, ala so dilehon hasangapon tu Debata; jadi dipangan gulok ma ibana, laos mate.

²⁴Alai lam rarat ma anggo hata ni Debata.

²⁵Jadi mulak ma si Barnabas dohot si Saulus sian Jerusalem i, dung dipasahat, nasida asiasi i! Diboan ma si Johannes na margoar si Markus.

13¹(I.) Alai adong ma di huria Antiokia i angka panurirang dohot angka guru, i ma si Barnabas dohot si Simeon na margoar Niger dohot si Lucius na sian Kirene dohot si Menahem, na rap magodang dohot raja Herodes, dohot si Saulus.

²Jadi di na marulaon nasida tu Tuhan i huhut marpuasa, ninna Tondi Parbadia ma: Papulik hamu ma di Ahu si Barnabas dohot si Saulus tu ulaon, na hupatongon tu nasida.

³ Jadi marpuasa ma huria i jala martangiang, diampehon ma tanganna tu nasida, laho paborhathon.

⁴ Tuat ma nasida na sinuru ni Tondi Parbadia i tu huta Seloikia; sian i ma marparau nasida tu pulo Siprus.

⁵ Jadi dung sahat nasida tu huta Salamis, dibaritahon ma hata ni Debata di angka parguruan ni Jahudi; alai si Johannes do suruannasida.

⁶ (II.) Ditorusi nasida ma liat pulo i sahat ro di huta Papos, jadi jumpang nasida ma sada halak Jahudi, parsibalik mata jala panurirang pargapgap, na margoar Bar Jesus.

⁷ Na mian do ibana di panggonggomi Sergius Paulus halak na pantas marroha: I do manjou si Barnabas dohot si Saulus, naeng begeonna hata ni Debata.

⁸ Alai dialo parsibalik mata i, si Elimas, do nasida (ai i do astuan ni goarna i), naeng ambatonna panggonggomi i, unang porsea.

⁹ Alai anggo si Saulus, na margoar huhut Paulus, na gok Tondi Parbadia, dijonggor ma ibana.

¹⁰ Mandok: E ho, na gok saluhut ansiansi dohot ragam ni hajahaton, anak ni sibolis, alo ni nasa hatigoran, ndang pasohotonmu papeolhon dalan ni Tuhan angka na tigor i?

¹¹ Tongkin on ma ho hona tangan ni Tuhan; mapitung ma ho, ndang idaonmu jolo mata ni ari i! Jadi pintor rambon, dung i holom ma

diida; dadapdadap nama ibana mangalului partogina.

¹²Jadi porsea ma panggomgomi i, marnida na masa i, jala longang rohana di poda ni Tuhan i.

¹³(III.) Dung i marparau ma anggo si Paulus rap dohot angka donganna sian huta Papos i, gabe sahat ma nasida tu huta Perge na di Pampilia; alai ditadingkon si Johannes do nasida, mulak tu Jerusalem.

¹⁴Alai didatdati nasida do mardalan sian Perge ro di huta Antiokia na di Pisidia, jadi jumpa ari Sabbath i laho ma nasida hundul tubagasan parguruan.

¹⁵Alai dung sidung dijaha disi patik i ro di surat ni angka panurirang i, disuru angka sintua ni parguruan i ma na mandok tu nasida: Ale angka dongan, molo adong di hamu hata sipaingot tu natorop on, dok hamu ma!

¹⁶Dung i hehe ma si Paulus, dihiraphon ma tanganna, ninna ma: Hamu, angka halak Israel, dohot hamu angka na mangkabiari Debata, tangihon hamu ma!

¹⁷Dipillit Debata ni hita bangso Israel do angka ompunta i, dipatimbul do bangso i, uju panginsua nasida di tano Misir, jala dipatoltol do tanganna manogihon nasida ruar sian i.

¹⁸Leleng ni opatpulu taon dipaanjuanju do nasida, uju di parhorsihan.

¹⁹Pitu bangso diparendep di tano Kanaan; tanona i dilehon teanonnasida.

²⁰Tar opatratus limapulu taon ma leleng ni i. Dung i dilehon ma tu nasida angka panguhum ro di panurirang Samuel.

²¹Dung i dipangido nasida ma raja, jadi dilehon Debata ma tu nasida si Saulus, anak ni si Kis, marga Benjamin, leleng ni opatpulu taon.

²²Jadi dung dipaijur i, dipabangkit ma di nasida si Daud bahen rajanasida, na hinatindangkonna i di na nidokna: "Nunga jumpang Ahu si Daud, anak ni si Isai, halomoanki, sipasaut nasa na pinangido ni rohangku!"

²³Sian pinompar ni i ma diparo Debata di halak Israel Jesus, i ma Sipalua na pinarbagabagana i.

²⁴Patujolo ni harorona dibaritahon si Johannes tu sandok bangso Israel pandidion mandokkon paubahon roha.

²⁵Mareak ujung ni langkana didok si Johannes i: Ndada ahu na niarop ni rohamuna; di pudingku do Ibana ro. Na hurang tama do ahu mananggali sipatuna.

²⁶Hamu ale angka dongan, na sian pomparan ni si Abraham, dohot hamu na mangkabiari Debata! Tu hita do ditongos hata haluaon on.

²⁷Ai ndang na ditanda angka pangisi ni Jerusalem dohot angka sintuanasida Ibana;

alai diuhumi nasida do Ibana, pasauthon pandok ni angka panurirang i, na jinaha ganup ari Sabbath.

²⁸Dipangido nasida do tu si Latus, bunuon Ibana, atik pe so adong jumpang nasida alana mambahen marutang hosa.

²⁹Asa dung dipatulus nasida saluhut na tarsurat hian taringot tu Ibana, dipaijur ma Ibana sian hau i, dipeakkon ma tu tanoman.

³⁰Alai disungguli Debata do Ibana sian na mate.

³¹Na nia do lelengna dipataridahon dirina tu angka na rap nangkok dohot Ibana sian Galilea tu Jerusalem; angka i do nuaeng sitindangi on tu bangso i.

³²Jadi barita las ni roha on huboan hami tu jolomuna: Bagabaga na tu angka ompunta i, nunga dipasaut Debata i tu angka anakta, di na pinahehena i Jesus.

³³Songon na tarsurat huhut di ende Psalmen dua: "Anakku do Ho; sadari on do Ho hutubuhon!"

³⁴Dilumbahon hian, paheheonna Ibana sian na mate, jala na so tupa be Ibana mandapothon habusukon, ai didok do: "Lehononku ma tu hamu angka asiasi na sintong na di si Daud!"

³⁵Laos didok do di ende na asing: "Ndang na loasonmu idaon ni na badiami habusukon!"

³⁶Ai anggo si Daud, dung dipatulus lomo ni Debata saleleng di ngoluna, monding do, laos

tartanom tu lambung ni angka amana, gabe diida do habusukon.

³⁷Alai anggo na pinangolu ni Debata, ndang adong diida l habusukon.

³⁸Asa boto hamu ma, ale angka dongan: Binaritahon do tu hamu hasesaan ni dosa marhitehite Ibana.

³⁹Pintoranna do ganup na porsea, dung so tarbahen pintor hamu sian saluhut dosa i, pintoran ni patik ni si Musa.

⁴⁰Antong, jaga ma hamu, unang manginona tu hamu na hinatahon ni angka panurirang i:

⁴¹"Pamanat hamu ma, hamu angka parhu ni roha; marseto ma rohamuna, laos marjea, ai Ahu patupahon sada ulaon di arimuna. Nandang tagamon parhatutuonmuna i, nang adong na pajojorhon i tu hamu!"

⁴²Asa di na laho ruar i nasida, dipangido ma, naeng ma hatahononhon tu nasida angka hata i basa Sabbath i.

⁴³Alai dung muli sian parguruan i, torop ma sian angka Jahudi dohot sian angka parguru na daulat roha mangihuthon si Paulus dohot si Barnabas, gabe dijamitai jala diapoi ma nasida, asa mian di bagasan asi ni roha ni Debata.

⁴⁴Alai di ari Sabbath na ro i sude ne pangisi ni huta i marpungu, naeng begeonna hata ni Tuhan i.

⁴⁵Alai dung diida angka Jahudi torop ni jolma i, gok pangiburuon ma rohanasida,

Kisah Para Rasul 13.46–14.1 59
gabe dialo jala diinsahi ma jamita ni si Paulus
i.

⁴⁶Dung i marhiras ni roha ma si Paulus dohot
si Barnabas mandok: Tama nian tu hamu
parjolo jamitahononhon hata ni Debata; alai
ditulakkon hamu do i, jala ndang tau hamu
parjambar di hangoluan sisalelenglelengna
ditimbang hamu: Antong, sipelebegu i ma
hudompakkon hami.

⁴⁷Ai songon on do ditonahon Tuhan i tu
hami: "Na hupadiri do ho bahen panondang di
angka sipelebegu, bahen haluaon ro di ujung
ni tano on!"

⁴⁸Umbege i angka sipelebegu i, las ma
rohanasida, dipuji ma hata ni Tuhan i, jadi
gabe porsea ma nasa naung pinarade tu
hangoluan sisalelenglelengna.

⁴⁹Jadi dipararat ma hata ni Tuhan i tu
sandok luat i.

⁵⁰Alai digintali angka Jahudi ma angka
parompuan na sangap, na daulat roha dohot
angka pangituai ni huta i, jadi dipatubu
ma pangaleleon dampak si Paulus dohot si
Barnabas, laos dipabali ma nasida sian luat i.

⁵¹Alai dipaspas apostel i do orbuk na lohot
di patna dampak nasida, dung i ro ma nasida
tu Ikonium.

⁵²Alai gok halalas ni roha dohot Tondi
Parbadia ma roha ni angka sisean i.

14¹(I.) Ia di Ikonium suang ditopot
nasida parguruan ni Jahudi, jadi

hinorhon ni jamitanasida gabe porsea ma mansai torop Jahudi dohot halak Junani.

²Alai dijujui jala dipamohop angka Jahudi na so porsea i ma roha ni angka sipelebegu dompak angka sisean.

³Alai na nia do laonna nasida mian disi; hiras do rohanasida marjamita huhut mangasahon Tuhan i. Angka tanda dohot halongangan dilehon Tuhan i patupaonnasida, laho mangondolhon hata asi ni rohana i.

⁴Alai mardua ma roha ni pangisi ni huta i: Na deba mandongani halak Jahudi, na deba mandongani angka apostel.

⁵Alai naeng hehe ma halak sipelebegu dohot Jahudi rap dohot angka induknasida manggosa dohot mandangguri nasida.

⁶Dung tarbortik i, maporus ma nasida tu angka huta na di luat Likaonia, i ma huta Listra dohot Derbe ro di huta angka na humaliang i.

⁷Jadi dibaritahon nasida ma barita na uli disi.

⁸(II.) Jadi adong ma di huta Listra sada halak na hundulhundul, ndang margogo patna, na pangpang sian hatutubuna; ndang dung mardalan.

⁹Gabe dibege ibana ma si Paulus marjamita. Jadi dibereng si Paulus ma ibana jala diida ma, na porsea do ibana, tarbahen malum sahita.

¹⁰Jadi dipagogo ma soarana mandok:
Tingkos ma ojakkon patmi! Manigor hehe ma
ibana huhut mardalani.

¹¹Alai dung diida natorop i na binahen
ni si Paulus i, marsuraksurak ma nasida,
angka ninna ma di hata Likaonia: Nunga
marrupahon rupa nijolma do angka debata,
gabe tuat tu hita on!

¹²Jadi digoar ma si Barnabas: Zeus, si
Paulus: Hermes, ala ibana pangkatai.

¹³Laos diboan malim ni debata Zeus, na
dibalian ni huta i, ma angka horbo tunggal
dohot ramerame tu bahal i, naeng mamele
rap dohot natorop i.

¹⁴Umbege i angka apostel, si Barnabas
dohot si Paulus, diribakkon ma ulosnasida,
laos maringkat ma mandapothon natorop i.

¹⁵Joujou ma nasida mandok: O hamu, ale
angka dongan, aha do na binahenmu? Jolma
do nang hami na marparniahapan songon
hamu; barita na uli do huboan hami tu hamu,
asa mulak hamu sian angka debatamuna na
soada i tu Debata na mangolu, ai Ibana do
manompa langit dohot tano dohot laut ro di
nasa isina.

¹⁶Na dipasombu do di angka sundut na
salpu i saluhut bangso tumopot dalanna be.

¹⁷Alai songon i pe i, ndatung na so
dihatindangkon dirina marhitehite ulaon
dengganbasa, ai dilehon do tu hamu udan sian
ginjang dohot partaonan hadumaon; angkup

ni i dipasabam do rohamuna marhitehite sipanganon dohot las ni roha.

¹⁸Nang songon i hatana, tung na maol do diambat nasida natorop i, unang saut nasida dipele.

¹⁹Alai ro ma angka Jahudi sian Antiokia dohot na sian Ikonium tusi, dihatai ma natorop i, gabe didangguri ma si Paulus, disarat ma ibana tu balian ni huta i, pola dirimpu naung mate ibana.

²⁰Alai dung dihaliangi angka sisean i ibana, hehe ma ibana mulak tu huta i. Dung i torang ni arina i borhat ma ibana rap dohot si Barnabas tu huta Derbe.

²¹Dibaritahon nasida ma barita na uli i di huta i jala na nia diajari nasida gabe sisean. Jadi mulak ma nasida sian Listra ondeng dohot Ikonium tu Antiokia.

²²Dipatogu nasida ma roha ni angka sisean i, diapoi ma nasida, asa marsihohot marhaporseaon, ninna ma: Ingkon bolusonta do lan haporsuhon, laho bongot tu harajaon ni Debata.

²³Alai dipillit ma angka sintua di nasida di ganup huria; mardongan tangiang dohot na marpuasa dipasahat ma nasida tu Tuhan naung hinaporseaannasida.

²⁴(III.) Dung i dibolus nasida ma luat Pisidia, gabe sahat ma tu luat Pampilia.

²⁵Dihatahon ma hata i di huta Perge, dung i tuat ma nasida tu huta Atalia.

²⁶Sian i ma marparau nasida tu Antiokia, ai disi do dipasahat nasida najolo tu asi ni roha ni Debata, laho mangula ulaon naung pinasidungnasida i.

²⁷Jadi dung sahat nasida, dipapungu ma huria i, dibaritahon ma nasa na pinatupa ni Debata marhitehite nasida, pola diungkap pintu ni haporseaon i nang di halak sipelebegu.

²⁸Dung i na nia do lelengna nasida disi mandongani angka sisean i.

15¹(I.) Jadi adong ma na tuat sian luat Judea; songon on do dipodahon tu angka dongan i: Molo so tarsunat hamu mangihuthon agama ni si Musa, ndang tarbahren hamu gabe malua.

²Jadi guntur ma huria i, pola gogo do nasida dialo si Paulus dohot si Barnabas. Dung i disuru ma si Paulus dohot si Barnabas rap dohot dongan deba nari sian nasida nangkok tu Jerusalem manopot angka apostel dohot angka pangituai, patorangkon salisi i.

³Dibolus nasida na pinaborhat ni huria i ma tano Penisia dohot Samaria, dipajojo ma disi hamumuba ni roha ni angka sipelebegu, gabe las situtu ma roha ni sude angka dongan i dibahren.

⁴Jadi dung sahat nasida tu Jerusalem, dijangkon na sahuria i dohot angka apostel ro di angka pangituai ma nasida, jadi dibaritahon

nasida na ro i ma godang ni na niula ni
Debata marhite sian nasida.

⁵Dung i hehe ma na deba sian rongkanaan
ni halak Parise, angka naung gabe porsea,
mandok: Ingkon sunaton do nasida jala
apoaan, mangaradoti patik ni si Musa.

⁶Dung i marpungu ma angka apostel i ro di
angka pangituai, sumulu hata i.

⁷Alai dung leleng marsual, hehe ma si
Petrus, ninna ma mandok nasida: Hamu
angka hahaanggi! Diboto hamu do, naung
tibu dipillit Debata ahu di tongatongamuna,
laho patubegehon tu halak sipelebegu barita
na uli i, asa porsea nasida.

⁸Debata sitanda roha i sandiri do sitindangi
di nasida, marhite sian na nilehonna i Tondi
Parbadia i tu nasida songon na tu hita.

⁹Ndang dia imbarna hita dohot nasida
dibahen Debata, dung dipaias rohanasida
hinorhon ni haporseaon i.

¹⁰Antong, boasa ma unjunanmuna Debata
nuaeng, laho mangampehon auga tu
rungkung ni angka sisean, na so tarusung
angka amanta i nang hita pe.

¹¹Marhite sian asi ni roha ni Tuhan Jesus
do tahe, umbahen na malua hita dihaporseai
rohanta; nasida pe songon i do.

¹²Dung i hohom ma sude natorop i
tumangihon hata ni si Barnabas dohot si
Paulus, na pajojorhon godang ni tanda dohot
halongangan angka na niula ni Debata di

tongatonga ni angka sipelebegu marhite sian nasida.

¹³Asa dung marujung hatanasida, mangalusi ma si Jakobus, ninna ma: Hamu angka hahaanggi, tangihon hamu ma hatangkon!

¹⁴Nunga dipajojor si Simon taringot tu panatap ni Debata apala parjolo sahali, manjangkon tu Goarna bangsona sian angka sipelebegu.

¹⁵Jala mardomu do i tu hata ni angka panurirang i, songon na tarsurat:

¹⁶"Dung salpu i, mulak ma Ahu, laho paulihon muse undungundung ni si Daud naung marumpak i; ulahanku ma paulihon naung maloha i, laho pajongjongkon.

¹⁷Asa dilului angka halak na tading i ma Tuhan i, ro di saluhut sipelebegu, angka na manjujung Goarhu,"

¹⁸ninna Tuhan i, na pabotohon angka i hian sian na robi.

¹⁹Dibahen i hutimbang, ndang sisusaan be nasida, angka na ro sian sipelebegu mandompakkon Debata.

²⁰Alai nirodi ma nasida, sumubangkon pardebataon na leban, parmainanon, na mate so sineat ro di mudar i, angka na mangaramuni.

²¹Ai sian na robi adong do di ganup huta angka na manjamitahon si Musa; ai dijaha do suratna ganup ari Sabbat di angka parguruan.

²² (II.) Denggan ma didok roha ni angka apostel dohot angka pangituai ro di sandok huria i: Pinillit ma sian nasida dongan sisuruon tu Antiokia mandongani si Paulus dohot si Barnabas, i ma si Judas na margoar si Barnabas dohot si Silas, angka sintua di tongatonga ni donganna.

²³ Ia surat siboanonnasida on do: Hami angka donganmuna, angka apostel dohot angka sintua, manongos tabi di angka dongan na sian sipelebegu na di huta Antiokia, di luat Siria dohot Kilikia.

²⁴ Hubege hami, naung ro deba sian hami an, na manggaori hamu marhitehite hatanasida mangaliluhon rohamuna; tung na so hudokkon hami do nasida.

²⁵ Sada do rohanami, mamillit sisuruon on tu hamuna rap dohot si Barnabas dohot si Paulus, angka haholongan ni rohanami.

²⁶ Naung diseahon nasida do hosanasida ala ni Goar ni Tuhanta Jesus Kristus.

²⁷ Asa husuru hami do si Judas dohot si Silas, asa dohot nasida paboahon hata i tu hamu.

²⁸ Ai denggan do di roha ni Tondi Parbadia nang di rohanami: Unang be niampehon tu hamu na dokdok, dungkon ni na ringkot on:

²⁹ Parsubangkon hamu ma pelean na tu begu dohot mudar dohot na mate so sineat, angkup ni i parmainanon i; denggan ma dipasiding hamu angka i. Hipas ma hamu!

³⁰Jadi dung dipaborhat, tuat ma nasida tu Antiokia; jadi dipapungu ma natorop i, laho pasahathon surat i.

³¹Alai dung dijaha nasida surat i, las ma rohanasida jala tarapul.

³²Alai si Judas dohot si Silas, panurirang do nasida huhut, jala godang do jamitanasida mangapoi angka dongan i dohot patoguhon rohanasida.

³³Alai dung na nia lelengna nasida disi, dipaborhat angka dongan i ma nasida di bagasan dame, mulak tu na marsuru nasida.

³⁴Anggo si Silas, lomo do rohana tading disi.

³⁵Alai mian di Antiokia jolo si Paulus dohot si Barnabas dohot torop angka na asing, mangajarhon dohot mamaritahon hata ni Tuhan i.

³⁶(III.) Alai di laonlaon ni ari ninna si Paulus ma mandok si Barnabas: Beta ma hita manguahi marnida angka donganta i tu ganup huta, naung tajamitai najolo, manang beha pangalahonasida!

³⁷Alai ditahi roha ni si Barnabas do, naeng ma togihononhon dohot si Johannes na margoar si Markus.

³⁸Alai anggo di roha ni si Paulus, ndang tama togihononhon ibana, ala naung ditadingkon nasida di Pampilia jala ndang didongani nasida tu ulaon i.

³⁹Jadi marbada ma nasida, pola sirang; gabe ditogihon si Barnabas ma si Markus marparau tu pulo Siprus.

⁴⁰Alai dipillit si Paulus ma si Silas bahen donganna; jadi borhat ma ibana, dung dipasahat angka dongan i ibana tu asi ni roha ni Tuhan i.

⁴¹Jadi diliati ma tano Siria dohot Kilikia, patoguhon angka huria i.

16¹(I.) Tolhas ma ibana sahat ro di huta Derbe dohot Listra; jadi adong ma disi sada sisean na margoar si Timoteus, anak ni boru Jahudi na porsea, alai halak Junani do anggo amana.

²Denggan do baritana, dihatindangkon angka dongan na di Listra dohot Ikonium.

³Jadi dipangido roha ni si Paulus ma ibana donganna borhat, jala ditogihon ma; disunat ma ibana ala ni halak Jahudi na di luat i, ai diboto be, halak Junani do amana.

⁴Alai di na mangaliati angka huta i nasida, dipasahat ma patik na pinaputus ni angka apostel dohot sintua na di Jerusalem, siradotannasida.

⁵Gabe lam togu ma haporseaon ni angka huria i, jala lam ganda toropnasida ganup ari.

⁶(II.) Alai dibolus nasida do luat Prigia dohot Galatia, ala diambat Tondi Parbadia nasida mangkatahon hata i di Asia.

⁷ Jadi sahat ma nasida tungkan luat Misia, dung i diuji nasida ma mardalan tu Bitinia; alai ndang diloas Tondi ni Jesus nasida.

⁸ Asa diarbis nasida ma luat Misia i, jadi tuat ma tu huta Troas.

⁹ (III.) Dung i diida si Paulus ma borngin i di bagasan tondina: Jongjong sada halak Makedonia manglehelek ibana, ia hatana: Taripar ma ho tu Makedonia, mangurupi hami!

¹⁰ Alai dung diida na niidana i, pintor disangkap rohanami ma borhat tu luat Makedonia; ai ditimbang rohanami do, naung didokkon Debata hami tusi, mamaritahon barita na uli tu nasida.

¹¹ Dung i marparau ma hami sian Troas, mamintor tu Samotrake, dung i sadarina i tu Neapolis.

¹² Sian i tu Pilippi, i ma huta sabungan ni Makedonia jala ojahan ni panggonggomi Rom. Disi ma hami manang piga ari.

¹³ (IV.) Jadi di ari Sabbat ruar ma hami tu balian ni huta i, tu topi ni batang aek, tu partangiangan na niarop ni rohanami; disi ma hami hundulhundul mangkatai dohot angka parompuan naung punggu disi.

¹⁴ Jadi adong ma sada parompuan na mananginangi, na margoar si Lidia, sian huta Tiatira, partigatiga abit hasumba, na daulat roha tu Debata; jadi dibungka i Tuhan i ma

rohana, gabe diparateatehon ma angka na hinatahon ni si Paulus i.

¹⁵Asa dung tardidi ibana dohot donganna sajabu, diapoi ma hami, ninna ma: Molo na tutu ahu porsea di Tuhan i di rohamuna, sorang ma hamu tu jabungku; pola disosoi hami.

¹⁶(V.) Jadi laho tu partangiangnan i, pajumpang ma hami dohot sada naposo boruboru pangarunding; godang do laba ni induk somangna sian pangarundingonna i.

¹⁷Dipaihutihut ibana ma si Paulus dohot hami, huhut manjoujou: Angka naposo ni Debata na tumimbul i do halak on, na paboahon dalan tu haluaon di hamuna!

¹⁸Jadi songon i ma dibahen ibana ariari. Alai sogo do roha ni si Paulus disi, jadi humusor ma ibana, mandok tu tondi i: Marhitehite Goar ni Jesus Kristus do hudokkon ho ruar sian ibana. Jadi ruar ma ibana di na satongkin i.

¹⁹Alai dung diida induk somangna i, na so adong be pangomoan sihirimon sian parompuan i, ditangkup nasida ma si Paulus dohot si Silas, disarat ma tu onan, tujolo ni angka pangarajai.

²⁰Jadi ditogihon ma nasida tujolo ni angka panguhum i, ninna ma: Na manggunturi hutanta on do angka halak on; Jahudi do nasida!

²¹ Dibaritahon do adat na so jadi jaloan manang ihuthononnam, ai halak Rom do hami.

²² Jadi hehe ma natorop i dompak nasida, dung i didokkon angka panguhum i ma sintahon ulosnasida, asa dilinsingi.

²³ Jadi dung leleng dilinsingi, didabu ma nasida tu hurungan, didokkon ma sijaga hurungan i mangaramoti nasida situtu.

²⁴ Mangihuthon parenta na jinalona i, didabu ma nasida tu hurungan parbagasan, momos ma patnasida dibeangkon.

²⁵ Alai mareak tonga borngin i martangiang ma si Paulus dohot si Silas mamuji Debata, dipatangitangi angka na tarhurung i.

²⁶ Alai tompu ma masa lalo bolon, pola lalolalo ojanan ni hurungan i; pintor mungkap do saluhut pintu, tanggal ma nang rantenasida saluhutna.

²⁷ Gabe tarsunggul ma sijaga hurungan i; jala dung diida, talak do hape angka pintu ni hurungan i, disintak ma podangna, naeng maningkot; ai dirimpu, naung maporus angka na tarhurung i.

²⁸ Alai dipagogo Paulus ma soarana, ninna ma: Unang bahen jea tu ho, ai dison do hami saluhutna!

²⁹ Jadi dipangido ma palito, dung i marlojong ma ibana tubagasan, manungkap tujolo ni si Paulus dohot si Silas, huhut angka dotdot.

³⁰ Ditogihon ma nasida haruar, ninna ma: Hamu angka tuan, aha ma bahenonku, asa malua ahu?

³¹ Jadi didok nasida ma: Haporseai ma Tuhan Jesus, asa malua ho dohot isi ni bagasmi!

³² Laos dipaboa nasida ma hata ni Tuhan i tu ibana dohot tu saluhut donganna sabagas.

³³ Jadi manigor dialap ma nasida borngin i, diburii ma bogas ni linsinglinsing i, dung i pintor tardidi ma ibana ro di sude nasida na saripe.

³⁴ Ditogihon ma nasida tu bagasna, dihobas ma sipanganon; dung i las ma rohana dohot sude isi ni bagasna, ala naung porsea ibana di Debata.

³⁵ Jadi dung torang ari, disuru angka panguhum i ma angka opas mandokkon: Palua ma angka halak i!

³⁶ Jadi dibaritahon sijaga hurungan i ma hata i tu si Paulus: Nunga disuru angka panguhum i, asa malua hamu. Antong, ruar ma hamu; mardame ma hamu laho!

³⁷ Alai didok si Paulus ma tu nasida: Halak Rom do hami, gabe di hapataran do dilinsingi nasida hami, so jolo dipamanat; didabu do hami tu hurungan. Tung marsibuni ma nasida nuaeng paluahon hami? Ndang songon i; ingkon nasida do ro manogihon hami ruar sian on!

³⁸Dung i dipaboa angka opas i ma hata i tu angka panguhum; jadi mabiar ma nasida, dung dibege, halak Rom do hape nasida.

³⁹Jadi ro ma nasida, diapoapoi ma apostel i; jadi dung ditogihon tu balian, dielehelek ma, asa ditadingkon huta i.

⁴⁰Alai dung ruar nasida sian hurungan i, laho ma nasida manopot si Lidia. Jadi dung diida angka dongan i, jala dung diapuli, borhat ma nasida.

17¹(I.) Alai dung dibolus nasida huta Ampipolis dohot Apolonia, sahat ma nasida tu huta Tessalonik, jala adong ma disi sada parguruan ni Jahudi.

²Mangihuthon somalna ditopot si Paulus ma nasida tusi; tolu ari Sabbat padodot ma dipajojor tu nasida hata ni Surat i.

³Dibuhai ma i laho patorangkon, ingkon marsitaonon Kristus i jala hehe muse sian na mate; jala Jesus i naung hubaritahon tu hamu, i do Kristus i, ninna.

⁴Deba sian nasida mangoloi, gabe domu tu si Paulus dohot si Silas, songon i torop situtu halak Junani angka na daulat tu Debata, nang parompuan na sangap pe na nia do.

⁵Alai mangiburui ma angka Jahudi, diarahon ma deba na jahat roha sian halak gambalgambal, digintali jala digunturi ma na sahuta i, jadi ditahopi ma bagas ni si Jason, dipangido ma, naeng boanon nasida tujolo ni natorop.

⁶Alai dung so jumpangsa nasida, disarat ma si Jason dohot angka dongan i deba tujolo ni na manggomgom huta i, huhut manjoujou: Nunga ro nang tu hita on angka sigunturi liat portibi on!

⁷Si Jason do manjangkon nasida. Sude nasida mangalo patik ni Kesar i; ai didok do, adong raja na asing, i ma Jesus i.

⁸Gabe digaori nasida ma roha ni natorop i dohot roha ni na manggomgom huta i, angka na umbegesa.

⁹Dung pe dijalo nasida tahan sian si Jason dohot angka dongan i, asa dipalua.

¹⁰Alai mamintor dipaborhat angka dongan i ma si Paulus dohot si Silas borngin i tu Berea: Jadi dung sahat ro disi, laho ma nasida tu parguruan ni Jahudi.

¹¹Umburju hian do nasida asa pangisi ni huta Tessalonik, ai girgir situtu do rohanasida manjangkon hata i, jala ganup ari ditangkasi Surat i, manang na domu tusi.

¹²Asa tung torop sian nasida gabe porsea, na nia do nang halak Junani, angka parompuan na sangap nang baoa pe.

¹³Alai dung diboto angka Jahudi na di Tessalonik i, naung dibaritahon si Paulus hata ni Debata di Berea, ro ma nasida tusi, manggintali dohot manggunturi natorop i.

¹⁴Alai pintor dipaborhat angka dongan i ma si Paulus laho dompak laut: Tading ma anggo si Silas dohot si Timoteus disi.

¹⁵ Alai dipataru nasida ma si Paulus sahat ro di huta Aten, jadi mulak ma nasida, dung dijalo tonana tu si Silas dohot si Timoteus, mandokkon nasida humatop ro tusi.

¹⁶ (II.) Andorang dipaimaima si Paulus nasida di huta Aten, targitik do rohana di bagasan marnida godang ni ganaganaan na di huta i.

¹⁷ Jadi sai dipanghulingi ma di parguruan angka Jahudi ro di angka na mangkabiari Debata, songon i di onan ariari angka na ro tusi.

¹⁸ Alai marsual ma deba sian parpoda Epikurus nang Stoa dohot ibana, jadi adong ma na mandok: Aha ma naeng dohonon ni sijubajabi on? Alai na deba mandok: Rupa dihatahon do angka debata na leban; ai dibaritahon do Jesus dohot haheheon sian na mate.

¹⁹ Jadi dialap nasida ma ibana, ditogihon ma tu Areopagus, angka ninna ma: Ai jadi do botoonnami, manang poda na imbaru dia do na hinatahonmi?

²⁰ Ai songon na muba do hata na binoanmi tu hami, gabe naeng ma botoonnami pangalaho ni i.

²¹ Alai saluhut pangisi ni huta Aten ro di angka na leban pe, na mebat tusi, giot mangkatahon dohot mamaritahon barita na imbaru, apala i do na rumingkot di rohanasida.

²²Asa jongjong ma si Paulus di parsitongaan ni Areopagus i, ninna ma: Hamu angka halak Aten, sandok huida, mabiar situtu hamu mida angka na pinardebatamuna i.

²³Ai di na mardalani ahu, mamerengi angka sisombaonmuna, gabe jumpang ahu ma langgatan sada na sinuratan: Tu Debata na so tinanda! Antong, na sinombamuna na so tinandamuna, i do na hubaritahon tu hamu.

²⁴Ia Debata na tumompa hasiangan on ro di saluhut isina, i ma Tuhan ni langit dohot tano, ndang maringanan Ibana di angka joro na pinauli ni tangan.

²⁵Ndang hurangan Ibana, umbahen pola sihobasan ni tangan ni jolma di Ibana, ai tung Ibana do mangalehon di sudena hangoluan dohot hosa ro di saluhutna i.

²⁶Sian sada jolma do dipatupa Ibana saluhut bangso ni manisia, asa diingani liat sisik ni tano on, dibuhul hian do tingki ni angka bangso i ro di parbalohan ni siinganannasida,

²⁷asa luluannasida Debata, anggiat tung hadadapan nasida Ibana jala jumpang, ai ndang na dao Ibana sian ganup hita on.

²⁸Ai di bagasan Ibana do hita mangolu, manggulmit jala humosa, songon na nidok ni deba parendemuna: "Sabangso do hita dohot Ibana!"

²⁹Antong, anggo sabangso hita dohot Debata, unang ma dirimpu rohanta, suman tu sere Debata, manang tu perak, manang tu

batu na pinandean jala piningkiran ni roha ni jolma.

³⁰Naung dibolushon pamereng ni Debata do angka taon haotoon; alai anggo nuaeng dibaritahon do tu hajolmaon: Ingkon sandok sude paubahon rohana.

³¹Ai nunga di tingki Ibana sada ari paruhuman tu portibi on di bagasan hatigoran, marhite sian sada halak na pinillitna i; ai diungkap do dalan tu haporseaon di saluhut jolma, dung dipahehe Ibana sian na mate.

³²Alai umbege hatana na taringot tu haheheon sian na mate, manurahi ma na deba; alai na deba mandok: Naeng begeonnami dope hatam sahali nari taringot tusi.

³³Dung songon i, laho ma si Paulus sian tongatonganasida.

³⁴Alai adong do deba na mangihuthon ibana, gabe porsea, songon si Dionisius na sian Areopagus i, nang parompuan sada na margoar Damaris dohot deba nari donganna.

18¹(I.) Dung i borhat ma si Paulus sian huta Aten, laho tu huta Korint.

²Jadi jumpangsa ma disi sada halak Jahudi na margoar Akuila, na tubu di luat Pontus, dohot donganna saripe si Priskilla, angka nambura ro sian Italia, ala diparentahon raja Klaudius, ingkon saluhut halak Jahudi di bungkas sian huta Rom.

³Nasida ma ditopot, laos mian disi jala rap mulaulaon do, ala sahapandean nasida, i ma partonunon.

⁴Alai marjamita do ibana ganup ari Sabbath di parguruan; ditupuk do roha ni halak Jahudi nang Junani.

⁵Asa dung ro si Silas dohot si Timoteus sian Makedonia, digogo si Paulus do marjamita, laho mangkatindangkon tu angka Jahudi, Jesus i do Kristus.

⁶Alai dibahen na mangalo nasida jala manginsahi, dipaspas si Paulus ma ulosna, didok ma tu nasida: Marsapata tu hamu ma mudarmuna, lias do anggo ahu; olat ni on ma ahu laho tu halak sipelebegu!

⁷Laos meret ibana sian i tu bagas ni sada halak na margoar Titius Justus na mangkabiari Debata; hombarhon bagas parguruan i do jabuna.

⁸Alai na gabe porsea di Tuhan i do si Krispus, sintua ni parguruan i, ro di saluhutna isi ni jabuna; jala torop sian halak Korint, dung dibege i, gabe porsea jala tardidi.

⁹Alai borngin i diida si Paulus di bagasan tondina ma Tuhan i na mandok tu Ibana: Unang ma ho mabiar; hatahon ma, unang ma ho mauhom!

¹⁰Ai hudongani pe ho, ndang tarhahua manang ise ho, laho mangago; ai torop do halak di Ahu di huta on!

¹¹Asa mian ma ibana disi sataon onom bulan lelengna, mangajarhon hata ni Debata tu nasida.

¹²Alai uju si Gallio panggomgomi di Akaya rap hehe ma halak Jahudi dompak si Paulus, ditogihon ma ibana tu paruhuman.

¹³Angka ninna ma: Dihatahatai on do angkajolma i mangoloi Debata maralohon patik i.

¹⁴Jadi di na naeng mangkuling si Paulus, ninna si Gallio ma mandok angka Jahudi: O hamu halak Jahudi! Aut ala ni pambahenan hageduhon manang hajahaton, patut antong antoanku hamu.

¹⁵Alai anggo parsalisian siala podapoda dohot goargoar dohot patikmuna, rohamuna ma disi; ai ndang olo ahu manguhumi sisongon i.

¹⁶Jadi dipalaho ma nasida sian paruhuman i.

¹⁷Gabe ditangkup nasida saluhutna ma si Sostenes, sintua ni parguruan, dibalbali ma ibana di jolo ni paruhuman i; ndang diantoi si Gallio.

¹⁸Jadi na nia dope lelengna si Paulus disi, asa martinading hata tu angka dongan i. Dung i marparau ma ibana tu Siria rap dohot si Priskilla dohot si Akuila. Di huta Kenkrea digusting obukna, ai adong do bagabagana.

¹⁹(II.) Dung i rap sahat ma tu huta Epeus jadi ditadingkon ma nasida disi; laho do anggo ibana tu parguruan mangkatai dohot halak Jahudi.

²⁰Alai ndang dioloi pangidoannasida, naeng mian ibana lumeleng disi.

²¹Martinading hata nama ibana, ninna ma: Huulaki pe manopot hamu, molo diloas Debata. Dung i marparau ma ibana, borhat sian Epesus.

²²Sahat ma ibana tu huta Kaesarea, dung i nangkok ma, ditabi huria i. Dung i tuat ma ibana tu huta Antiokia.

²³Asa dung na nia lelengna ibana disi, borhat ma ibana; jojur ma dibolus luat Galatia dohot Prigia, patoguhon roha ni saluhut sisean i.

²⁴(III.) Alai ro ma tu huta Epesus sada halak Jahudi na margoar Apollos, na tubu di Aleksanderia; halak na pistar do ibana, na torang umboto Surat i.

²⁵Nunga diajarhon tu ibana dalan ni Tuhan i jala na hiras do rohana, mangkatahon, torang do pamodaionna taringot tu Jesus; alai holan pandidion ni si Johannes do diboto.

²⁶Dipungka ibana ma marjamita di parguruan i sian roha na hiras; dibege si Akuila dohot si Priskilla jamitana, gabe ditogihon ma, dipajojur ma dalan ni Debata tumangkas tu ibana.

²⁷Alai di na naeng laho ibana tu Akaya, manolopi do angka dongan i, disurathon ma tu angka sisean i, asa dijangkon ibana. Jadi dung sahat ibana ro disi, godang ma panumpakna di angka na porsea i, dibahen asi ni roha ni Debata.

²⁸Ai mansai torang do jamitana; ditaluhon do angka Jahudi di na patar, ai dipatorang sian angka surat i, Jesus i do Kristus.

19¹(I.) Alai uju di huta Korint si Apollos, didalani si Paulus ma angka luat na tungkan dolok sahat ro di huta Epesus, jadi jumpangsa ma disi deba sisean.

²Dung i ninna ma mandok nasida: Naung dijalo hamu do Tondi Parbadia, di na gabe porsea hamu? Alai ninna nasida ma mandok ibana: So hea hubege hami, adong Tondi Parbadia!

³Dung i ninna ma: Ai pandidion dia do dijalo hamu? Jadi didok nasida ma: Pandidion ni si Johannes do.

⁴Dung i didok si Paulus ma: Ia pandidion ni si Johannes, na mandokkon paubahon roha do; ai diapoi do natorop i mangkaporseai na naeng ro sian pudina, i ma Jesus.

⁵Umbege i nasida, dipadidihon be ma dirina tubagasan Goar ni Tuhan Jesus.

⁶Jadi di na mangampehon tanganna si Paulus tu nasida, songgop ma Tondi Parbadia tu nasida, jadi mangkatahon di hata na asing ma nasida dohot manurirangi.

⁷Alai intap sampuludua halak do nasida pungu.

⁸Dung i laho ma ibana tubagasan parguruan, hiras ma rohana marjamita disi leleng ni tolu bulan; dipatorang jala dipasingothon pangalaho ni harajaon ni Debata.

⁹Alai dipajogal na deba do rohana jala ndang mangoloi huhut dope manginsahi agama i di jolo ni natorop i, jala ditadingkon ibana ma nasida; dipapulik ma angka sisean i, jadi di sikola ni si Tiranus ma ibana marjamita ganup ari.

¹⁰Leleng ni dua taon ma sai songon i gabe sange ma dibege saluhut pangisi ni luat Asia hata ni Tuhan i, nang Jahudi nang Junani pe.

¹¹Jala angka hagogoon na sumurung do diula Debata marhite sian tangan ni si Paulus.

¹²Pola do dipamboan halak angka sekka dohot sampesampe na sian dagingna tu angka na hansitan i, gabe munsat do angka sahit sian nasida, ruar do nang angka tondi na hodar.

¹³Jadi adong ma deba Jahudi na maotaot, angka sipabali begu, na manguji mangkatahon Goar ni Tuhan Jesus tu angka partondi na hodar i, angka ninna ma: Mangasahon Jesus, na binaritahon ni si Paulus i, hupabali ma hamu!

¹⁴Angka anak ni si Sikewa, sada malim ni Jahudi, pitu halak do na mambahensa.

¹⁵Alai ninna tondi na hodar i ma mangalusi nasida: Na hutanda do anggo Jesus i, si Paulus pe huboto do; alai anggo hamu, ise do hamu?

¹⁶Laos ditahopijolma partondi na hodar i ma nasida, dipatunduk ma nasida duansa,

digosagosa, pola marsaemara jala mabugang nasida maporus sian jabu i.

¹⁷Jadi diboto saluhut halak Jahudi ma i ro di halak Junani na maringanan di huta Epesus, gabe songgop ma biar tu rohanasida saluhut, jadi tongam ma Goar ni Tuhan Jesus.

¹⁸Jadi torop sian angka naung gabe porsea ro manopoti jala paboahon bahenbahenannasida.

¹⁹Jala lan do sian angka mangulahon hadatuon najolo palunggukkon angka pustaha i, disoksohi ma i di jolo ni saluhutna; dung i diasam ma argana, jadi dapot ma limapulu ribu rupia.

²⁰Songon i ma lam rarat jala lam hot hata i hombar tu hagogoon ni Tuhan i.

²¹Salpu i, ditahi roha ni si Paulus ma, naeng mardalan tu huta Jerusalem, mamolus sian luat Makedonia dohot Akaya; ai ninna ma: la dung sian i ahu, ingkon dohot ma huta Rom idaonku.

²²Jadi disuru ma dua halak parhobasna, i ma si Timoteus dohot si Erastus, tu luat Makedonia; alai anggo ibana mangulon dope jolo di Asia.

²³(II.) Alai tubu ma uju i guntur bolon siala agama i.

²⁴Ai adong ma sahalak tungkang perak na margoar Demetrius, sipauli angka bagas joro perak ni debata Artemis; na nia do pangomoan dipatongon tu angka pande i.

²⁵ Dipapungu ibana ma angka pande i ro di angka pangulanasida, didok ma: Diboto hamu do, ale, sian ulaon on do sinadonganta.

²⁶ Diida jala dibege hamu do, ndada holan di Epesus on, tung hira di sandok luat Asia dihatahatai jala dipabalik si Paulus on do torop halak, didok do: Ndang na tutu Debata, ia angka na pinauli ni tangan.

²⁷ Jala ndada holan pandaramanta on tarmara laho mago; dohot do tahe debata Artemis na balga i, na sinomba ni liat Asia i dohot isi ni portibi on, gabe lea jorona jala ambolong hamuliaonna.

²⁸ Alai umbege hata i, gok rimas ma rohanasida, jala gogo ma dijoujouhon: Na balga do Artemis ni halak Epesus!

²⁹ Jadi guntur situtu ma nasida na sahuta i: Ria ma nasida manahopi bagas painonduran, laos disarat ma tusi si Gayus dohot si Aristarkus, halak Makedonia, dongan ni si Paulus i.

³⁰ Jadi naeng ma laho si Paulus tu tongatonga ni halak i; alai ndang diloas angka sisean i.

³¹ Pola dohot do deba sian angka pangituai sian luat Asia, alealena i, marsuru manglehelek ibana, unang laho tu painonduran i.

³² Alai asingasing be do dipanjoujouhon nasida; ai tung na gaor do na pungu i, jala godangan do na so umboto, manang ala ni aha umbahen na marpungu.

³³Alai sian tongatonga ni natorop i dipajolo angka Jahudi ma si Aleksander, dung jolo diajari. Jadi dihiraphon ma tanganna, laho manariashon hatana tu natorop i.

³⁴Alai dung diboto nasida, halak Jahudi ibana, sada nama soara ni saluhutna, hira dua jom do lelengna dipanjoujouhon: Balga do Artemis ni halak Epesus!

³⁵Alai dipasonang juaratulis i ma natorop i, ninna ma: Hamu halak Epesus! Halak dia ma na so umboto, huta Epesus do parhalado di Artemis na balga i, nang di gombaranna na madabu sian ginjang!

³⁶Ndang na targaga i antong; dibahen i tama sonang hamu, unang pola tarsomong mambahen manang aha.

³⁷Ditogihon hamu do angka halak on tuson, so manang sisoro ugasan ni bagas joro manang panginsahi di debatanta i nasida.

³⁸Alai molo tung adong alualu ni si Demetrius dohot angka donganna pande dompak manang ise, adong do angka panguhuman dohot angka panggomgomi; disi ma nasida masialusan.

³⁹Alai molo na asing dilului hamu, di parluhutan i ma pinaputus i!

⁴⁰Atik beha dialuhon hita maon, ala ni guntur sisadari on; so haru adong paralaan na mambahen lias hita taringot tu na guntur on.

⁴¹ Songon i ma hatana, pamulihon na pungu i.

20¹ (I.) Asa dung montok na gaor i, dijou si Paulus ma angka sisean i tu jolona, laho martinading hata tu nasida, dung i borhat ma ibana tu Makedonia.

² Didalani ma angka luat i, buas jamitana mangapoi nasida; laos tolhas ma tu tano Junani.

³ Tolu bulan lelengna mangulon ibana disi, jala laho marparau hian tu tano Siria, gabe dionggopi angka Jahudi ma ibana; jadi dipaputus ma rohana, mulak sian Makedonia.

⁴ Alai donganna do si Sopater, anak ni si Pirus na sian Berea, si Aristarkus dohot si Sekundus, halak Tessalonik, si Gayus sian huta Derbe dohot si Timoteus, si Tikikus, dohot si Tropimus na sian Asia.

⁵ Jumolo do anggo nasida, gabe dipaima do hami di Troas.

⁶ Salpu pesta Paska i marparau ma hami borhat sian Pilippi, jadi palimaarhon pajumpang ma hami dohot nasida di Troas; disi ma hami mangulon pitu ari lelengna.

⁷ (II.) Alai marsogot ni ari Sabbat i, uju marpungu hami laho marulaon na badia, marjamita ma si Paulus tu nasida jala dipaganjang ma jamitana pola ro di tonga borngin, ala na naeng borhat ibana manogotna i.

⁸Alai torop do palito di bilut parginjang, di parpunguannami i.

⁹Jadi adong ma dolidoli sahalak, na margoar Eutikus, na hundulhundul di jandela; tarlalap ma ibana di na mandatdati si Paulus mangkatai; jadi nok ma matana, gabe madabu ma ibana sian tindi patoluhon tu toru, jadi nunga mate dihindat.

¹⁰Gabe mijur ma si Paulus, ditahopi ma ibana jala dihaol, ninna ma: Unang hamu gaor, di bagasan ibana do tondina!

¹¹Dung i mulak ma ibana tu ginjang, diponggoli ma roti i, laos mangan ma; dung i na nia dope dihatahon sahat ro di na mareak torang ari, jadi songon i ma ibana borhat.

¹²Alai mangolu do dolidoli i ditogihon nasida; jadi tarapul situtu ma rohanasida.

¹³Dung i jumolo ma hami bongot tu parau i marlayar tu Asos, asa disi jaloonnami si Paulus hombar tu na niaturhonna, ai na naeng mandarat do ibana.

¹⁴Jumpangsa ma hami di Asos jala jinangkon ma ibana, dung i sahat ma hami tu Metilene.

¹⁵Jadi dung marlayar hami sian i, sahat ma hami torang ni arina i tungkan tondong ni Kios jala marsogotna i mandapothon pulo Samos ma hami, dung i marsogotna i muse sahat ma hami tu Miletus.

¹⁶Ai naeng laosan do huta Epesus di roha ni si Paulus, asa unang ginetean tingkina mangulon di Asia; ai mangkudus do ibana,

anggiat sanga marari Pentakoste tu huta Jerusalem.

¹⁷ (III.) Alai disuru do sian Miletus tu Epesus manjou angka sintua ni huria i.

¹⁸ Jadi di na ro i nasida mandapothon ibana, ninna ma mandok nasida: Diboto hamu do pangalahongku, saleleng ahu rap dohot hamu olat ni ari parjolo, dung hudege Asia.

¹⁹ Ai huoloi do Tuhan i sian nasa serep ni roha huhut mariluilu manaon pangunjunan, angka na tahop tu ahu dibahen tahi ni halak Jahudi.

²⁰ Nandang na hutabunihon manang aha na marguna, na so haru jinamitahon manang pinodahon tu hamu di hatoropan, nang marsasajabu pe.

²¹ Tongtong do huhatindangkon tu halak Jahudi nang tu halak Junani hamumuba ni roha tu Debata dohot haporseaon di Tuhanta Jesus Kristus.

²² Anggo saonari, songon na diihoti Tondi i do ahu, laho tu Jerusalem; so adong huboto, manang dia na naeng masa tu ahu disi.

²³ Holan on: Hira di ganup huta dilumbahon Tondi Parbadia, tali dohot na porsuk do sitagamonku disi.

²⁴ Alai ndang pola arga hurajumi hosangku, asal ma hupaujung langkangki dohot ulaon naung hujalo sian Tuhan Jesus, i ma na mangkatindangkon barita na uli taringot tu asi ni roha ni Debata.

²⁵Nuaeng pe, huboto do, ndang be idaonmuna bohingku, saluhut hamu na hutopot i paboahon Harajaon i.

²⁶Dibahen i huhatindangkon tu hamu sadari on: Naung lias do ahu sian sapata ni mudar ni saluhut hamu.

²⁷Ai ndang adong hubuati agia aha; tung sahat do hupabotohon tu hamu nasa tahi ni Debata.

²⁸Antong, ramoti hamu ma dirimu ro di sandok panggungan i, ai dipatindang Tondi Parbadia i do hamu gabe simatamatai, asa diparmahani hamu huria ni Tuhan i, na tinobusna marhite sian mudarna sandiri.

²⁹Ai huboto do: Ia dung laho ahu, bongot ma tu hamu, babiat panoro, angka na so mangolani na pinarmahan i.

³⁰Gari sian tongatongamuna sandiri hehe ma halak angka na mamodahon na lipe, mangelaela angka sisean i mangihuthon nasida.

³¹Dibahen i, dundo ma hamu; ingot hamu ma, na so marpansadian ahu arian dohot borngin tolu taon lelengna paingothon ganup hamu mardongan iluilu.

³²Onpe, hupasahat ma hamu nuaeng tu Debata dohot tu hata asi ni rohana. Ibana do na margogo patoguhon roha jala mangalehon siteanon i tu saluhut na badia i.

³³Ndang dung ditodo rohangku sian manang ise perak, manang sere, manang ulos.

³⁴ Diboto hamu do, tangankon do pangalugai di na hasea di ahu nang di angka na mandongani ahu.

³⁵ Sandok hupatuduhon tu hamu, ingkon songon i do iba mulaulaon laho mangurupi angka na so margellok, marningot hata ni Tuhan Jesus, ai Ibana do mandok: "Martuaan do na mangalehon sian na manjalo!"

³⁶ Jadi dung didok songon i, marsinggang ma ibana jala rap martangiang nasida saluhutna.

³⁷ Alai tangis situtu ma nasida saluhutna jala dihaol nasida si Paulus huhut diumma.

³⁸ Apala hatana ondeng ma gumodang diarsakkon nasida, na so idaonnasida be bohina. Laos dipataru nasida ma ibana tu parau i.

21 ¹ (I.) Asa dung sirang hami sian nasida, marlayar ma hami manumpol tu pulo Kos, jala torang ni arina i tu Rodos, sian i tu Patara.

² Jadi jumpang hami ma sada parau, naeng taripar tu Penisia, i ma hubongoti hami laos marlayar.

³ Dung hutatap hami pulo Siprus, hulaosi hami ma i tungan sihambirang laho manuju dompak Siria, jadi tardarat ma hami di Tirus, ai tusi do hasahatan ni muatan ni parau i.

⁴ Hutopot hami ma angka sisean i jala mangulon disi pitu ari lelengna. Hinorhon ni Tondi i dipalumba nasida do si Paulus, unang nangkok tu Jerusalem.

⁵Alai dung salpu ariarinami disi, hehe ma hami laho borhat muse, jadi dipataru nasida saluhutna padohot angka ina ro di angka dakdanak ma hami tu balian ni huta i, jadi marsinggang ma hami martangiang di topilaut.

⁶Dung masijalangan bongot ma hami tu parau; mulak do anggo nasida tu ingananna be.

⁷Marujung ma parparauonnami, ai sian Tirus sahat ma hami tu Ptolemais; jadi hujalang hami ma angka dongan, laos mangulon do di nasida sadari.

⁸Alai marsogotna i borhat ma hami, gabe sahat ma tu Kaesarea, jadi laho ma hami tu bagas ni si Pilippus parjamita i, sada sian na pitu i, jadi sorang di ibana ma hami.

⁹Alai adong ma opat boruna na marbaju, angka na manurirangi.

¹⁰(II.) Jadi andorang lumeleng mangulon hami disi, tuat ma sian Judea sada panurirang na margoar Agabus.

¹¹Didapothon ma hami, dibuat ma hohos ni si Paulus, dirahuthon ma tu tanganna dohot tu patna, huhut ma didok: On do hata ni Tondi Parbadia: Songon on ma ihoton ni angka Jahudi di Jerusalem nampuna hohos on, pasahatonnasida do ibana tu tangan ni sipelebegu.

¹²Umbege hata i, huelehelek hami rap dohot ma maringan an disi ma ibana, unang nangkok tu Jerusalem.

¹³Alai ninna si Paulus ma mangalusi: Dia do na binahenmuna, na tumatangis i dohot na mangalalai rohangku? Hobas do ahu, ihoton nang bunuon pe di Jerusalem ala ni Goar ni Tuhan Jesus!

¹⁴Dung so olo ibana apoan, hohom sambing hami, gabe hudok hami ma: Sai saut ma lomo ni roha ni Tuhan i!

¹⁵(III.) Asa dung salpu angka ari i, marhobas ma hami, laho nangkok tu Jerusalem.

¹⁶Alai dohot sisean deba na sian Kaesarea mandongani hami, ditogihon ma hami sorang tu si Manason sian Siprus, naung leleng sisean.

¹⁷Di na sahat hami tu Jerusalem, las do roha ni angka dongan i manjangkon hami.

¹⁸Jala torang ni arina i laho ma si Paulus rap dohot hami manopot si Jakobus, gabe ro ma tusi angka sintua saluhutna.

¹⁹Jadi dung dijalang ibana nasida, jojor ma dihatahon tu nasida na binahen ni Debata tu halak sipelebegu marhitehite ulaonna i.

²⁰Umbege hatana i, dipuji nasida ma Debata; dung i didok nasida ma tu ibana: Diida ho do, anggia, marriburibu do halak Jahudi angka naung gabe porsea, jala saluhut do nasida mangkapadothon patik i.

²¹ Dibege nasida, dipodai ho do halak Jahudi saluhutna, na di tongatonga ni halak sipelebegu, asa sirang sian si Musa, jala didok ho do, na so jadi sunatonna angka anakonna, jala ndang pola radotannasida adat i, ninna.

²² Antong, beha nama? Ai begeonna nasida do, naung ro ho.

²³ Onpe, bahen ma na hudok hami on di ho! Adong do di hami opat halak, na marutang bagabaga.

²⁴ Togihon ma nasida, urasi ma dirim rap dohot nasida, harugihon ma tu nasida, asa dipagustingkon obukna, gabe botoon ni saluhutna, na so tutu do hape barita i, na taringot tu ho, naung dohot do ho tahe pangaradoti di patik.

²⁵ Alai taringot tu angka sipelebegu, naung gabe porsea, nunga pinatikkon hian tu nasida, ingkon dijaga dirina be maralohon pelean na tu begu, dohot mudar, songon i na mate so sineat, ro di parmainanon.

²⁶ Jadi marsogotna i diarahon si Paulus ma angka baoa i, diurasi ma dirina rap dohot nasida, laho tu bagas joro, paboahon na naeng gohanna angka ari pangurasan i, paima sahat pelean sian ganup nasida.

²⁷ (IV.) Alai di na mandok marujung na pitu ari i, diida angka Jahudi na sian Asia ma ibana di bagas joro, gabe digunturi ma saluhut natorop i, ditangkap ma ibana.

²⁸Huhut ma dijouhon: O hamu halak Israel, urupi hami! On dojolma i, na sai mangajari saluhut halak maralohon bangsonta dohot patik i ro di inganan on. Dohot do halak Junani hape ditogihon tu bagas joro on; diramuni do inganan na badia on!

²⁹Ai naung diida nasida do si Tropimus na sian huta Epesus rap dohot ibana di huta i, gabe dirimpu, naung ditogihon si Paulus ibana tu bagas joro i.

³⁰Jadi guntur ma sandok huta i, marpungu ma sude natorop, disoro ma si Paulus, disarat ma tu balian ni joro i; dung i pintor ditutup ma angka pintu.

³¹Alai di na naeng pusaon nasida ibana, sahat ma tu kapiten barita i, naung guntur do sandok Jerusalem.

³²Jadi pintor ditogihon ibana ma angka soldadu ro di angka letnan manahopi nasida; asa disi diida nasida kapiten i dohot angka soldaduna, dipasohot ma na mambal bali si Paulus.

³³Gabe ro ma kapiten i, ditangkup ma si Paulus, didokkon ma ihoton ibana dohot dua rante, dung i dipatangkas ma, manang halak dia ibana ro di na binahenna.

³⁴Alai sai masipansorohon hatana do natorop i; asa dung so jumpangsa hata na sintong dibahen na guntur i, didokkon ma togihononhon ibana tu tangsi.

³⁵Alai di na sahat i ibana tu tangga, diusung angka soldadu nama ibana dibahen panahopi ni natorop i.

³⁶Ai na mangihut do natorop i huhut manjoujou: Pinusa ma ibana!

³⁷Jadi di na naeng togihononnasida si Paulus tubagasan tangsi i, didok ma tu kapiten i: Jadi do dohononku hata tu ho? Gabe didok ma: Diboto ho do hape hata Junani?

³⁸Asa ndada ho halak Misir i, na manggunturi naengan on dohot manogihon na opatribu panamun tu parhorsihan?

³⁹Dung i didok si Paulus ma: Jahudi do ahu, raja huta do ahu di Tarsus, huta na tarbarita di luat Kilikia. Raja ho, loas ahu jolo mangkatai tu natorop i!

⁴⁰Jadi dung diloas, jongjong ma si Paulus di tangga i, dihiraphon ma tanganna tu natorop i. Jadi dung hohom be, marhata Heber ma ibana, ninna ma:

22¹(I.) Hamu angka hahaanggi dohot ama, tangihon hamu ma pangalusionkon na tu hamu!

²Asa dung dibege nasida, marhata Heber ibana tu nasida, lam hohom be ma, gabe ninna ma:

³Halak Jahudi do ahu, na tubu di Tarsus na di luat Kilikia, alai magodang do di huta on; di parsikolaan ni si Gamaliel do ahu diajari mangihuthon patik ni angka amanta i timpas,

gabe hupapusuhoon mangoloi Debata, songon sude hamu sadari on.

⁴Hupaburuburu do parugama on maradu mate nasida, ai huihoti do angka baa dohot boruboru laho pasahathon tu hurungan.

⁵Sintua ni malim i ro di angka sintua do panindangi di ahu, ai sian nasida do hujalo surat tu angka dongan i, di na laho i ahu tu huta Damaskus, manogihon dohot tarihot nang angka na disini tu Jerusalem, asa hona uhum nasida.

⁶Alai masa ma, di na di tongandalan i ahu mardonokkon huta Damaskus, tar di hos ni ari, tompu ma sumillam sian ginjang humaliang ahu sondang na tiur situtu.

⁷Pola tinggang do ahu tu tano, dung i hubege ma sada soara na mandok tu ahu: Saulus!, Saulus! Boasa leleanmu Ahu?

⁸Jadi ningku ma mangalusi: Ise do Ho, Tuhan? Jadi ninna ma mandok ahu: Jesus do Ahu, na sian Nasaret, na nileleanmi!

⁹Diida angka donganku do nian sondang i, alai ndang dibege nasida soara ni na mangkatai dohot ahu.

¹⁰Gabe ningku ma: Dia ma sibahenonku, Tuhan? Jadi didok Tuhan i ma tu ahu: Hehe ma ho, laho ma tu Damaskus: Disi do paboaon tu ho saluhut na patut ulaonmu.

¹¹Alai ndang marnida be ahu dibahen sillam ni sondang i, gabe ditogu angka donganki nama tanganku sahat tu Damaskus.

¹²Dung i adong ma disi sahalak na margoar Ananias, halak na daulat roha marningot patik i; na denggan do baritana di saluhut Jahudi na maringan disi.

¹³I do na ro manopot ahu, ninna ma: Ale Saulus, anggia; marnida ma ho! Jadi manigor saut ma huida ibana.

¹⁴Dung i ninna ma: Nunga dipillit Debata ni angka amanta hian do ho, asa tandaonmu lomo ni rohana, jala idaonmu Partigor i jala begeonmu soarana sandiri,

¹⁵asa gabe sitindangina ho tu sudejolma taringot tu na niida dohot na binegem i.

¹⁶Onpe, boasa sulonsulonon roham? Hehe ma ho, padidihon ma ho jala paburihon ma dosam, dung dijou ho Goarna i!

¹⁷Alai jumpang ma di ahu, dung mulak ahu tu Jerusalem, marhatiuron ma tondingku, di na martangiang i ahu di bagas joro.

¹⁸Ai huida do Ibana; didok do tu ahu: Humatop ma ho laho sian Jerusalem on, ai ndang jaloonnasida pangkatindangkonmi na taringot tu Ahu.

¹⁹Dung i ningku ma: Diboto nasida do, ale Tuhan, ahu do na mangkurungkon dohot mangalinsingi di angka parguruan angka na porsea di Ho.

²⁰Jala di na durus mudar ni si Stepanus sitindangimi, disi do ahu jala hinalomohon do i, jala ahu do mangaramoti ulos ni angka na mamusa ibana.

²¹ Jadi didok ma mandok ahu: Laho ma ne ho; ai tu halak sipelebegu, tu na dao naeng suruonku ho!

²² Jadi sintap ni hata ondeng nama dipatangitangi nasida ibana, gabe dipangiar be ma soarana, mandok: Pado ma halak on sian tano on, ai ndang tama mangolu ibana!

²³ Alai sai tole do nasida manjoujou, ditimpalhon do ulosnasida, jala disangkophon orbuk i dompak ginjang.

²⁴ Jadi didokkon kapiten i ma togihononhon ibana tubagasan tangsi; disuru ma na mangalinsingi ibana laho manangkasi, asa binoto alana, umbahen na songon i panjouonnasida dompak ibana.

²⁵ Alai di na naeng tambatonnasida ibana dohot tali pasa, ninna si Paulus ma mandok letnan na jongjong disi: Na jadi do linsinganmuna halak Rom, nang so jolo niuhuman?

²⁶ Umbege hata ondeng letnan i, ditopot ma kapiten paboahonsa, ninna ma: Aha naeng bahenonmu? Halak Rom do halak i!

²⁷ Jadi ditopot kapiten ma ibana, ninna ma: Paboa tu ahu, halak Rom do ho? Jadi didok ma: I do!

²⁸ Dung i mangalusi ma kapiten i: Ia ahu, godang do hugarugihon manuhor uhum Rom. Jadi didok si Paulus ma: Alai anggo ahu, na sian partubungku do songon i.

²⁹Jadi pintor sumurut ma angka na naeng manangkasi ibana; ai mabiar do kapiten i, dung diboto halak Rom do hape si Paulus, naung didokkon talion.

³⁰Torang ni arina i naeng ma tangkas botoonna alana, umbahen na dialuhon angka Jahudi i ibana, jala dipalua ma ibana, didokkon ma marpungu angka sintua ni malim dohot rapot godang i, ditogu ma si Paulus tu tongatonganasida.

23¹(I.) Alai dibereng si Paulus ma rapot i, ninna ma: Hamu, angka hahaanggi, na marparange do ahu sian nasa burju ni rohangku mangoloi Debata ro di sadari on.

²Alai didokkon sintua ni malim Ananias ma angka na jongjong disi mamastap ibana.

³Dung i didok si Paulus ma mandok ibana: Pastapon ni Debata ma ho, dorpi na hinapur! Na hundul do ho manguhumi ahu marguru tu patik, hape didokkon ho pastapon ahu maralohon patik i!

⁴Dung i didok na jongjong disi: Ai insahanmu sintua ni malim ni Debata?

⁵Gabe didok si Paulus ma: Ndang na huboto, ale dongan, ibana sintua ni malim i; ai tarsurat do: "Nandang jadi insahanmu sintua ni bangsom!"

⁶Alai diboto si Paulus ma, deba sian nasida Saduse, na deba halak Parise, gabe dijouhon ma di rapot i: Hamu angka hahaanggi! Halak Parise do ahu jala anak ni Parise. Ala ni

pangkirimon ni roha dohot ala ni haheheon sian na mate, umbahen na tu paruhuman on ahu.

⁷Alai dung didok songon i, marsalisi ma angka Parise dohot Saduse, gabe mardua roha ma na pungu i.

⁸Ai disoadahon angka Saduse do haheheon nang surusuruan nang tondi; alai anggo Parise, diparhatutu do duansa.

⁹Jala mansai guntur ma; alai hehe ma deba sibotosurat sian horong ni angka Parise mangalo, ninna ma: Ndang adong na jahat jumpang hami di halak on. Atik naung tutu dipanghulingi Tondi manang surusuruan ni Debata ibana.

¹⁰Alai lam balga ma bada i, jala mabiar ma kapiten i, aik boha diparsisiga nasida si Paulus, gabe didokkon ma tuat soldadu i mangaroro ibana sian tongatonganasida, manogihon tu tangsi.

¹¹Alai bornginna i jongjong ma Tuhan i di lambungna, didok ma: Pos ma roham! Songon naung hinatindangkonmi Ahu di Jerusalem on, ingkon songon i do ho mangkatindangkon nang di huta Rom!

¹²(II.) Alai dung torang ari, marbulan ma deba sian angka Jahudi, dipambuburahon ma dirina, mandok na so tupa mangan manang minum nasida, saleleng so dipusa si Paulus.

¹³Lobi opatpulu do torop ni na marbulan songon i.

¹⁴Jadi ro ma nasida, manopot angka sintua ni malim ro di angka pangituai, didok ma: Nunga hupambuburahon hami dirinami, na so jadi daionnami agia aha, saleleng so hupusa hami si Paulus.

¹⁵Antong, rap ma hamu dohot rapot i mangidohon tu kapiten i, asa ditogihon ibana tu jolomuna, songon na laho patangkashon tumorang hata i; alai hobas do hami mamusa ibana, tagan di tongandalan dope.

¹⁶Alai tarbege do tahi i tu ibebere ni si Paulus, jadi laho ma ibana tu tangsi i paboahonsa tu si Paulus.

¹⁷Jadi dijou si Paulus ma sada letnan tu lambungna, didok ma: Togihon dolidoli on tu kapiten i, ai adong do sipaboaonna tu ibana.

¹⁸Jadi diarahon ma ibana, ditogihon ma tu kapiten, ninna ma: Na dijou si Paulus na tarhurung i do ahu; dipangido tu ahu, togihononhon dolidoli on tu jolom, ala adong sidohononna tu ho.

¹⁹Ditiop kapiten ma tanganna manogihon ibana tu na soding, disise ma: Ai aha do sipaboaonmu tu ahu?

²⁰Jadi didok ma: Na martuptup do angka Jahudi mangidohon sian ho, naeng togihononmu marsogot si Paulus tujolo ni rapot, songon na naeng dope patangkasonnasida hata i.

²¹Onpe, unang oloi nasida, ai lobi opatpulu halak sian nasida mangonggopi ibana, angka

naung mambuburahan dirina, na so tupa mangan manang minum, saleleng so dipusa ibana; nunga hobas nasida nuaeng, holan hata sian ho nama dipaima.

²²(III.) Dung i dipamuli kapiten ma dolidoli i, dipopai ma, na so jadi paboaonna naung pinatolhasna i tu ibana.

²³Gabe dijou ma dua letnan tu jolona, didok ma: Padiri hamu ma duaratus soldadu laho tu Kaesarea, rap dohot pitupulu halak parsihundul, angkup ni i dua ratus pandongani, pungkul sia borngin.

²⁴Pinadiri huhut hoda hundulan ni si Paulus, mangaluahon ibana tu panggomgomi Feliks.

²⁵Laos dibahen ma surat songon on:

²⁶Na manongos tabi do si Klaudius Lisias tu na pinarsangapan Panggomgomi Feliks.

²⁷Na ditangkap angka Jahudi do halak on; jadi di na naeng pusaonnasida ibana, ro do ahu dohot angka soldadu mangarampas ibana, dung huboto, halak Rom do ibana.

²⁸Alai di na naeng botoonku alana, umbahen na disalahon nasida ibana, hutogihon ma ibana tujolo ni rapotnasida.

²⁹Gabe dapot ahu ma: Siala parsalisian taringot tu patiknasida do dialuhon nasida ibana; ndang adong hata dompak ibana, umbahen na patut marutang hosa manang tu hurungan ibana.

³⁰Alai adong ma na paboahon tu ahu tahinasida dompak halak on, jadi manigor

ma husuru ibana tu ho, jadi hudok tu angka pangalu, asa tu ho diandehon sidohononna i.

³¹Asa diboan angka soldadu i ma si Paulus mangihuthon parenta i, ditogihon ma di na saborngin i tu Antipatris.

³²Alai marsogotna i disuru nasida ma angka parsihundul i mamboan ibana; na mulak tu tangsi i do anggo nasida.

³³Jadi tolhas ma nasida tu Kaesarea, dipasahat ma surat i tu panggomgomi, ditogihon ma si Paulus tu jolona.

³⁴Jadi dung dijaha surat i, disungkun ma, manang sian luat dia ibana. Jadi dung diboto, na sian Kilikia ibana, ninna ma:

³⁵Hutangkasi pe hatami, dung ro angka na mangaluhon ho. Dung i didokkon ma na mangkurungkon ibana tu bagas paruhuman na di raja Herodes.

24¹(I.) Asa dung salpu lima ari, tuat ma si Ananias, sintua ni malim i, rap dohot deba sintua dohot sada halak parhata, si Tertullus, mangadap tujolo ni panggomgomi, mangaluhon si Paulus.

²Alai dung taralap ibana, dibungka si Tertullus ma pangaluanna i, ninna ma:

³Na taruli dame godang do hami binahenmi, jala marhite sian panarohon ni roham ganda do pangabahan ni bangso on; sandok mardongan hamauliateon ni roha godang huhalashon hami saluhutna i, ale Feliks na pinarsangapan!

⁴Alai asa unang malelengku hutogang ho, hupangido ma tu ho: Tangihon hami jolo satongkin hombar tu basam!

⁵Dapot hami do halak on pangago jala panggunturi di saluhut halak Jahudi di liat portibi on, partogi ni halak Nasarani.

⁶Diuji do pasamakkon bagas joro i, gabe hutangkup hami ma ibana.

⁷Saluhutna i, umbahen na hualuhon hami ibana, dapot botoonmu sian ibana, molo ditangkasi ho.

⁸Jadi dohot ma angka Jahudi manolopi, mandok: Tutu do songon i!

⁹Alai dihilap panggomgomi i ma si Paulus mandokkon mangkuling, jadi ninna ma mangalusi:

¹⁰Dibahen na huboto, naung leleng ho panguhum di bangso on, hiras do rohangku manariashon hatangkon.

¹¹Ai hatangkasan ho do: Sampuludua ari dope salpu, dung nangkok ahu tu Jerusalem martangiang.

¹²Ndang jumpang nasida ahu mangkatai di bagasan joro i dohot halak, manang mambahen guntur natorop, nang di parguruan manang di huta pe.

¹³Jala ndang na tarhajongjongkon nasida nanggo sada na pinartuhashon nasida nuaeng dompak ahu.

¹⁴Na mangoloi Debata ni angka daompung do ahu, mangihuthon agama na songon

haliluon di rohanasida, laho mangkaporseai saluhut na tarsurat di buku patik dohot di angka panurirang; i do sitopotanku tu ho!

¹⁵Na mangkirim do rohangku tu Debata, mulak mangolu sogot angka na tigor dohot angka na geduk, songon na hinirim ni rohanasida pe.

¹⁶Ala ni i do umbahen na huhaburjuhon, asa marroha na ias ahu tongtong maradophon Debata nang maradophonjolma.

¹⁷Alai dung salpu manang piga taon, ro ma ahu mamboan asiasi tu bangsongku dohot pelean.

¹⁸Disi jumpang nasida ahu mangurasi diringku di bagas joro, alai ndada mardongan natorop manang di bagasan na guntur.

¹⁹Alai naeng ma dison nian di jolomon, Jahudi deba na sian Asia mangalualu, molo tung adong diboto manang dia hasalaanku.

²⁰Nang nasida on pe dihatahon ma, manang dia gedukku dapot nasida, di na jongjong i ahu di adopan ni rapot i.

²¹Holan hata on na hujouhon i huhut jongjong di tongatonganasida: Ala ni haheheon ni angka na mate on, umbahen na diuhumi hamu ahu sadari on!

²²Alai dipalalaplalap si Feliks ma nasida, ala mansai tangkas diboto agama i, ninna ma: Dung pe tuat kapiten Lisias, patangkasonku ma angka hata na sian hamu i.

²³ Didokkon ma letnan i mangaramoti si Paulus, alai lumumbang; na so jadi ambaton manang ise donganna, na giot marhobasi di ibana.

²⁴ Alai dung salpu deba ari, ro ma si Feliks dohot dongan saripena, si Drusila, boru Jahudi, disuru ma na mangalap si Paulus, naeng begeonna hatana taringot tu haporseaon di Kristus Jesus.

²⁵ Alai di na hinatahonna taringot tu hatigoran dohot hatomanon dohot uhum sogot tarsonggot ma si Feliks, ninna ma mangalusi: Antong, songon i ma jolo! Molo sadihari ahu suruonku do na manjou ho.

²⁶ Alai huhut do dihirim rohana, lehonon ni si Paulus hepeng tu ibana; dibahen i jotjot do disurui mangalap si Paulus, mangkatahatai dohot ibana.

²⁷ Alai dung gok dua taon, ro ma si Perkius Festus mangganti si Feliks; jadi naeng do si Feliks pajongjongkon basana tu halak Jahudi, ditadingkon ma si Paulus tarhurung.

25¹ (I.) Asa dung tolu ari dijujung si Festus tohonanna i, nangkok ma ibana sian huta Kaesarea tu Jerusalem.

² Gabe ro ma tu jolona angka sintua ni malim dohot angka panunggane i ni Jahudi mangaluhon si Paulus, diparhurajai ma ibana:

³ Mangido asi ni roha, asa disuru si Paulus tu Jerusalem, asa bahenon nasida pangonggo pon mamusa ibana di tongandalan.

⁴Alai ninna si Festus ma mangalusi: Naung niramotan do si Paulus di Kaesarea; alai anggo ahu tibu nama mulak tusi, ninna.

⁵Antong, rap tuat ma angka na sangapmuna jala dialuhon ma baoa i, anggo adong diula na jahat.

⁶Asa dung mian di nasida ualu ro di sampulu borngin, tuat ma ibana tu Kaesarea; dung i marsogotna i dihunduli ma habangsa paruhuman i, didokkon ma togihononhon si Paulus tu jolona.

⁷Asa dung ro, dihaliangi angka Jahudi naung tuat sian Jerusalem ma ibana, dipanghatahatahon ma godang pangaluan angka na dokdok, na so tarhajongjongkon nasida.

⁸Ai ditariashon si Paulus ma: Nandang na mardosa ahu manang dompak patik ni Jahudi, nang dompak bagas joro i, nang dompak raja Kesar pe.

⁹Alai laho mambuat roha ni angka Jahudi i, ninna si Festus ma mangalusi si Paulus: Na olo do ho nangkok tu Jerusalem, asa huuhumi ho disi taringot tu angka ondeng?

¹⁰Jadi didok si Paulus ma: Na jongjong do ahu di jolo ni paruhuman ni raja Kesar; disi do ahu patut uhumon. Nandang adong hajahaton huula dompak Jahudi; tangkas situtu do diboto ho i.

¹¹Nuaeng pe, ia adong huulahon na jahat, na tama mambahen ahu marutang hosa,

ndang manjua ahu mate; alai anggo so tutu na tinuhashonnasida tu ahu, ndang tarpasahat manang ise ahu tu nasida. Raja Kesar i do pangondianku!

¹²Jala martuptup ma si Festus dohot angka donganna paruhum, gabe ninna ma mangalusi: Raja Kesar do digoar ho pangondianmu; tu raja Kesar ma ho borhat!

¹³(II.) Alai dung salpu deba ari, ro ma raja Agrippa dohot Bernike tu Kaesarea mangkormat si Festus.

¹⁴Jala di na mangulon nasida disi deba ari, dipajojor si Festus ma tu raja i angka na taringot tu si Paulus, ninna ma: Adong do dison sada halak tarhurung, ditinggalhon si Feliks.

¹⁵Uju di Jerusalem ahu, mangadap do angka sintua ni malim ro di sintua ni halak Jahudi tu jolongku, mangido naeng hona uhum ibana.

¹⁶Jadi ningku ma mangalusi nasida: Nandang adat i di halak Rom, pasahaton sada halak, ia so jolo pinatumpol na tartuhas dohot angka pangalu, asa haalusansa pangaluan i.

¹⁷Jadi dung pungu nasida dison, ndang hupalalaplalap be; marsogotna i ma huhunduli paruhuman i, hudokkon ma togihononhon baoa i.

¹⁸Hehe pe angka na mangaluhon i, ndang adong nanggo sada salana tarhajongjongkon nasida, songon na niagam ni rohangku.

¹⁹Alai adong do angka parsalisiannasida taringot tu pardebataon na di nasida dohot taringot tu sada halak Jesus, naung mate gabe mangolu, ninna si Paulus.

²⁰Alai di na tarsosak i ahu siala parhataan i, husungkun ma ibana, manang na olo laho tu Jerusalem, asa disi ibana diuhumi taringot tusi.

²¹Alai dipangido si Paulus do, naeng ramotan ibana, asa tu paruhuman ni na marmulia i; jadi hudokkon ma ramotan ibana, paima husuru tu raja Kesar.

²²Alai ninna si Agrippa ma mandok si Festus: Naeng ma di rohangku begeonku pandok ni baoa i. Jadi didok ma: Antong, marsogot ma begeonmu!

²³Dung i marsogotna i ro ma Agrippa dohot Bernike marhasangapon godang, jadi bongot ma tubagasan bilut paruhuman rap dohot angka kapiten ro di angka na mora ni huta i; dung i didokkon si Festus ma togihononhon si Paulus.

²⁴Gabe didok si Festus ma: Ale raja Agrippa, dohot hamu saluhut dongan na ro rap dohot hami! Ida hamu ma halak on! Ala ni ibana do dipatopotopot saluhut halak Jahudi ahu tu Jerusalem nang dison, dipanjoujouhon, na so patut be mangolu ibana.

²⁵Alai tangkas do huboto, na so adong diula na tama mambahen ibana marutang hosa; alai ala digoar ibana na marmulia i

Kisah Para Rasul 25.26–26.5 110
pangondianna, huuhumi nama, suruon ibana
tusi.

²⁶Ndang adong manang aha na tangkas
surathononku tu tuan i taringot tu ibana;
ala ni i do umbahen na hutogihon ibana tu
jolomuna, alai jumolo do tahe tu ho, raja
Agrippa, asa adong sisurathononku, dung
tinangkalan.

²⁷Ai haduk do di rohangku, suruon halak na
tarhurung, so pinaboa hasalaanna.

26¹(I.) Dung i didok si Agrippa ma tu
si Paulus: Na jadi ma tariashononmu
hatam! Gabe dihatahon si Paulus ma, huhut
mangkiraphon tanganna:

²Na martua do ahu, dirajumi rohangku, raja
Agrippa, ala na jadi alusanku ho sadari on
taringot tu saluhut na tinuhashon ni angka
Jahudi tu ahu.

³Ala sumurung panandaonmu di sude adat
ro di parsalisian ni halak Jahudi, umbahen
na mangido ahu tu ho: Pabenget ma roham
tumangihon hatangkon!

⁴Diboto saluhut halak Jahudi do
parangengku na sian sietehetehonku, sian
mulana di tongatonga ni bangsongki di
Jerusalem.

⁵Ai ditanda do ahu sian najolo, namun
olo nasida mangkatindangkon, paboa na
huihuthon rongkanaan Parise i ma na rumisik
di agamanta i.

⁶Na jongjong do ahu nuaeng di paruhuman siala pangkirimon ni roha di angka bagabaga na nilehon ni Debata tu angka amanta i.

⁷Naeng sahat tusi do dihirim roha ni na sampuludua marganta, umbahen na dioloi nasida Debata borngin dohot arian sian nasa gogonasida. Ala ni pangkirimon ni roha i do, rajanami, umbahen na dialuhon halak Jahudi ahu.

⁸Atehe, tung so tarparhatutu rohamuna do, Debata pangoluhon angka na mate?

⁹Alai nang ahu pe antong, hurimpu do jolo, ingkon godang do patupaonku mangalo Goar ni Jesus na sian Nasaret.

¹⁰Tulus ma antong hubahen songon i di Jerusalem: Torop sian angka na badia i hupasahat tu hurungan, dung hujalo huaso sian angka sintua ni malim i, jadi martolop do ahu, di na tarbunu i nasida.

¹¹Jala jotjot do hupaporsukporsuk nasida di saluhut parguruan manosoi nasida manginsahi; tung na tarlobi do lalaen ni rohangku, mangalele nasida sahat ro di angka huta na dumao.

¹²Laos songon i do tu Damaskus ahu borhat marhuaso, pinaborhat ni angka sintua ni malim.

¹³Jala di tongandalan i, rajanami, di hos ni ari huida ma sondang na tumiur sian mata ni ari ro sian ginjang, sumondangi ahu ro di angka donganku sauduran.

¹⁴Gabe martinggangan hami saluhutna tu tano jala hubege ma sada soara na mandok tu ahu di hata Heber: Saulus, Saulus! Boasa leleanmu Ahu? Susa ma ho manandahi turatura!

¹⁵Alai ningku ma: Ai ise do Ho, Tuhan? Jadi didok Tuhan i ma: Jesus do Ahu na nileleanmi!

¹⁶Alai hehe ma ho, jongjong ma! Ai hupataridahon pe Ahu tu ho, na laho mamillit ho, gabe suruan dohot sitindangi ni na niidam dohot di na naeng pataridahononku dope tu ho.

¹⁷Hupapulik ma ho sian bangso i dohot sian halak sipelebegu, ai tusi do naeng suruonku ho,

¹⁸laho mamuhai matanasida, asa mulak nasida sian na holom i tu na tiur, sian gomgoman ni sibolis i tu Debata, asa dijalo nasida hasesaan ni dosa dohot tohapna rap dohot angka naung gabe badia hinorhon ni haporseaon di Ahu.

¹⁹Dibahen i, ale raja Agrippa, mangoloi do ahu di na huida sian banua ginsang i.

²⁰Ai hujamitai do jumolo angka na di Damaskus, dung i angka na di Jerusalem, songon i saluhut na di luat Judea ro di halak sipelebegu, asa dipauba rohanasida jala mulak tu Debata mamarangehon na tama di roha naung muba.

²¹Ala ni i do ditangkup angka Jahudi ahu di bagas joro, naeng pusaonna ahu.

²²Alai diurupi Debata do ahu ro di sadari on, umbahen na jongjong dope ahu manjamitai angka na metmet dohot na magodang, jala ndang adong huhatahon na so domu tu na sinurirangkon ni angka panurirang i dohot si Musa.

²³Na mandok, sitaon na bernit do Kristus, jala Ibana do parjolo hehe sian angka na mate, mamaritahon hatiuron tu bangso i nang tu halak sipelebegu.

²⁴Alai dung songon i panariashonna i, dipagogo si Festus ma soarana, didok ma: Na lalaen do ho, Paulus! Parbinotoanmu na godang i do mambahen ho lalaen!

²⁵Alai ro ma si Paulus: Nandang na lalaen ahu, ale Festus na pinarsangapan; hata na tutu jala na torang hutariashon!

²⁶Na marbinoto do raja i disi, umbahen na hiras rohangku mangkuling i ibana; ai didok rohangku, ndang adong agia sada sian angka i na holip sian jolona, ai ndada na masa i di na suhi.

²⁷Porsea do ho, raja Agrippa, di angka panurirang? Huboto, na porsea do ho!

²⁸Alai ninna Agrippa ma mandok si Paulus: Otik nari nama so dihatai ho ahu, asa gabe Kristen ahu!

²⁹Jadi ninna si Paulus ma: Dipangido rohangku tu Debata, manang na hurang otik nari manang godang naeng ma nang ho, nang

saluhut nasida na umbege ahu sadari on,
gabe doshon ahu on, so padohot rante on.

³⁰Jadi hehe ma raja i dohot panggomgomi i
dohot Bernike ro di angka donganna.

³¹Dipaholang dirina otik jala masipandohan
ma songon on: Ndang diula halak on na tau
mambahen ibana marutang hosa manang tu
hurungan pe.

³²Laos ninna Agrippa ma mandok si Festus:
Na tarpalua do nian halak i, aut unang Kesar i
digoar pangondianna.

27¹(I.) Alai dung diuhum, ingkon
marparau nama hami tu Italia,
dipasahat ma si Paulus rap dohot deba
donganna na tarhurung tu sada letnan na
margoar Julius, na sian parangan ni Kesar
Augustus.

²Hubongoti hami sada parau Adramitium,
na marlayar tu angka luat na di Asia;
dung i borhat ma hami si Aristarkus, halak
Makedonia sian Tessalonik, do dongannami.

³Marsogotna i tardarat ma hami di Sidon; na
basar do pangalaho ni si Julius maradophon si
Paulus, diloas do ibana laho manopot angka
dongan, asa ditamuei nasida ibana.

⁴Sian i ma marlayar hami manopinopi pulo
Siprus, ala mangalo alogo i.

⁵Jadi dung binolus laut na di lambung Kilikia
dohot Pampilia, sahat ma hami tu Mirra na di
Likia.

⁶Disi ma jumpang letnan i sada parau Aleksanderia, na naeng marlayar tu Italia; jadi dipabongot ma hami tusi.

⁷Na nia lelengna ngernger do parparauonnam i jala maol nama hami sahat tu Knidus; alai ndang diloas alogo i hami manulus jadi manopinopi pulo Kreta nama hami marlayar manondong Salmone.

⁸Jadi loja do hami manalpui i, gabe sahat ma hami tu sada inganan, na margoar Muara na uli, mardonokkon huta Lasea.

⁹Nunga na nia salpu tingkina gabe mamungka marmara ma parparauon, ai nunga salpu tingki puasa; ala ni i dipaingot si Paulus ma nasida, ninna ma:

¹⁰Hamu angka dongan, ia parparauonta on mantat hasusaan dohot harugian godang huida, ndada holan tu muatan ro di parau i, dohot do hosanta tarmara.

¹¹Alai porseaan do letnan i di juaramudi dohot di induk ni parau i, asa di hata ni si Paulus.

¹²Alai dibahen na hurang denggan muara i pasalpuhon taon ngali disi, naeng ma marlayar sian i di roha ni na tumorop, anggiat tarbahen sahat tu Penike martaon ngali, i ma sada muara na di Kreta, na tartungkan nariti dohot manabia.

¹³Jadi ala ngernger alogo i sian dangsina, dirimpu nasida ma, tarpasautsa tinahi ni

rohana, jadi ditait ma sao i mangkorisi pulo Kreta.

¹⁴Alai ndang pola sadia leleng ro ma sian pulo i habahaba siappalautus, na margoar habahaba siirisanna.

¹⁵Diluahon ma parau i, ndang tardompakkonsa alogo i; jadi hupasombu hami nama, diboan ma hami maupaup.

¹⁶Jadi di na maupaup hami sian topi ni sada pulo na margoar Klauda, maol nama hupegang hami parau na metmet i.

¹⁷I ma dihindat, dipangke nasida ma nasa na tau pangurupi mangaliliti parau i; alai dibahen na mabiar nasida taronjar tu Sirtis, dipaijur ma layar i, jadi maupaup nama hami songon i.

¹⁸Alai di na tarsosak situtu hami dibahen ari i, dibolongkon nasida ma marsogotna i muatan ni parau i.

¹⁹Dung i di ari patoluhon dibolongkon tangannami ma nang parhohas ni parau i.

²⁰Alai dibahen nunga na nia lelengna so tarida manang mata ni ari manang bintang pe, jala gogo do panosak ni ari i di hami, gabe saep ma hirim ni rohanami di hosanami.

²¹Jadi dung leleng so mangan nasida, hehe ma si Paulus di tongatonganasida, ninna ma: Ale angka dongan, aut ditangihon hamu nian iba, unang munsat sian Kreta, pasiding hasusaan dohot harugian on!

²²Ipe, huapoi ma hamu marhiras ni roha, ai ndang adong na agoan hosa sian hamu; holan parau i do na laho mago!

²³Ai na jongjong do di lambungku na borngin surusuruan ni Debatangku na huoloi,

²⁴ninna ma: Unang ho mabiar, ale Paulus; ingkon tujolo ni raja Kesar ho jongjong, jala nunga dibasabasahon Debata tu ho saluhut donganmu na saparau.

²⁵Dibahen i, hiras ma rohamuna, ale angka dongan; ai na porsea do ahu di Debata, ingkon jumpang do songon na nidokna i tu ahu.

²⁶Alai ingkon tarsanggal do hita tu sada pulo.

²⁷(II.) Pasampuluopatbornginhon hami na maupaup di laut Adria, di na tonga borngin i, dianto roha ni angka parparau i, na jonok nama darat.

²⁸Gabe didabu ma tali donda, jadi dapot nasida ma duapulu dopa; jala saotik nari dumao sian i diulakkon didodo, jadi dapot ma sampululima dopa.

²⁹Biar ma rohanasida, atik beha tombom hami tu batu; jadi opat sao ma didabu sian pudi ni parau i, paimahon torang ni ari.

³⁰Dung i naeng lintun ma sian parau angka anak parau i; ditantan ma solu i tu laut, diparsidalianhon naeng dabuon nasida tali sao sian ulu ni parau i.

³¹ Jadi didok si Paulus ma tu letnan i dohot tu angka soldadu: Molo so tinggal nasida di parau on, ndang tarbahen hamu malua.

³² Dung i digotap angka soldadu i ma angka tali ni solu i, dipasombu ma madabu.

³³ Alai paima mamungka torang ari, disosoi si Paulus ma nasida saluhutna marsipanganon, ninna ma: Pasampuluopatarihon ma sadari on hamu na bebenesan, laos so mangan; ndang agia aha dipangan hamu.

³⁴ Dibahen i huapoi ma hamu mambuat sipanganon, tau panumpak do i, asa malua hamu; ai na so tupa marurus nanggo obuk sada sian ulumuna.

³⁵ Jadi dung didok songon i, dibuat ma roti i, didok ma mauliate tu Debata di jolonasida saluhutna, diponggoli ma, dipungka ma manganhon.

³⁶ Jadi hiras ma rohanasida saluhutna, laos dibuat ma sipanganon i.

³⁷ Alai toropnami na di parau i: Duaratus pitupulu onom halak do.

³⁸ Dung bosur nasida, didabu ma bohal i tu laut, laho paneangkon parau i.

³⁹ Dung torang ari, ndang ditanda nasida darat i; alai ditatap nasida ma sada solok na marpasir, naeng tusi ma patongononnasida parau i, namun tarbahen.

⁴⁰ Jadi digotap nasida ma angka tali sao i, pasombuhonsa di laut, huhut diharhari ma

angka ihot ni amudi i dipatongon ma layar i tu alogo mareakkon pasir i.

⁴¹ Alai ambal ma nasida tu sada tuktuk, jadi diloas ma parau i tombom tusi, gabe tarsanggal ma ulu ni parau i, laos hot ma disi: Alai maloha ma pudipudi ni parau i dibahen gogo ni umbak.

⁴² Dung i ditahi angka soldadu ma mambunu angka sitarapan i, asa unang marlange nasida laho malua.

⁴³ Alai naeng do pangoluon ni letnan i si Paulus jadi disundati ma tahi ni rohanasida, didokkon ma angka na malo marlange jumolo manimbung laho tu darat i.

⁴⁴ Na deba marlampuhon papan-papan, na deba marlampuhon angka ponggolponggol ni parau i, gabe songon i ma saluhut nasida malua tu darat.

28¹ (I.) Dung tardarat hami, binege ma goar ni pulo i Malta.

² Alai na basar situtu do pangisi ni pulo i maradophon hami, dipagalak do api, ditogihon ma hami saluhutna tusi, ala ni por ni udan dohot ngali ni ari.

³ Jadi di na pagugunhon rambaramba si Paulus, laho mambahen tu api, ruar ma sian i ulok dari dibahen mohopna, dipargut ma tanganna.

⁴ Jadi dung diidajolma i ulok i gaunggaung di tanganna, masipandohan ma nasida: Sandok

pamunu do halak on; ndang diloas uhum i ibana mangolu, atik pe malua sian laut.

⁵Alai dipirpirhon ma ulok i tubagasan api, ndang pola mahua ibana.

⁶Alai ditagam nasida, naeng magurbak ma, manang runggang mate satongkin ibana; alai dung lelung dipaimaima nasida, so manang mahua ibana diida, martungkar ma rohanasida; didok ma, debata ibana.

⁷Alai adong ma mardonokkon tusi ladang ni sada halak na sumangap di pulo i, na margoar Publius; dijangkon do hami, denggan do hami ditamuei tolu ari lelungna.

⁸Alai peak ma uju i ama ni si Publius i panepaneon huhut barobunion, gabe masuk ma si Paulus manopot ibana; jadi dung martangiang, diampehon ma tanganna tu ibana, gabe malum ma.

⁹Dung songon i, ro ma angka na asing na marsahit di pulo i, jadi malum be ma.

¹⁰Gabe sangap situtu do hami dibahen nasida; jala di na borhat i hami marlayar, dipadiri nasida do na hasea di hami.

¹¹(II.) Alai dung salpu tolu bulan, borhat ma hami marlayar di sada parau Aleksanderia, na marpartanda linduat, naung pasalpuhon taon ngali di pulo i.

¹²Jadi dung tardarat hami di Sirakus, mangulon ma hami disi tolu ari.

¹³Sian i ma hami mangaliat, jala sahat ma hami tu Regium; jadi marsogotna i ro ma

alogo sian dangsina, jadi sahat ma hami tu Potioli di ari paduahon i.

¹⁴Disi pajumpang hami dohot angka dongan na mangapoi hami, mangulon di nasida pitu ari, dung i borhat ma hami tu huta Rom.

¹⁵Sian i ma ro angka dongan, dung dibege baritanami, ditomutomu ma hami sahat ro di Appiporum dohot Tres Taberne. Marnida nasida, mandok mauiate ma si Paulus tu Debata; lam pos ma antong rohana.

¹⁶Alai dung tolhas hami tu huta Rom, diloas do anggo si Paulus maringan di lomo ni rohana rap dohot soldadu sada na manjagai ibana.

¹⁷(III.) Jadi dung salpu tolu ari, dijou si Paulus ma angka panunggane ni halak Jahudi. Dung pungu nasida, ninna ma mandok nasida: Hamu angka dongan! Ia ahu, ndang adong hubahen manang aha dompak bangsonta manang dompak adat na sian angka ompu, gabe diihoti ahu di Jerusalem jala dipasahat ahu tu tangan ni halak Rom.

¹⁸Jadi naeng paluaonna do ahu, dung ditangkasi ahu, ala so dapot salangku na tama mambahen ahu marutang hosa.

¹⁹Alai dibahen sai mangalo angka Jahudi i, ndang tarjua ahu so hugoar raja Kesar pangondianku; ndang adong sialuhononku sala ni bangsongku.

²⁰I do antong alana, umbahen na hujou hamu, asa huida jala hupangkulingi hamu, ai

ala ni pangkirimon ni halak Israel do umbahen na dirantei ahu.

²¹ Dung i ninna nasida ma mandok ibana: Ndang adong hujalo hami surat sian Judea taringot tu ho, jala ndang adong manang ise sian angka dongan i, naung ro tuson paboahon barita na jahat taringot tu ho.

²² Alai tama do di rohanami begeon sian ho parrohaonmi; ai taringot tu agama on huboto hami do, na nialo ni halak do i di liat portibi on.

²³ Asa dung digondit nasida ari di ibana, ro ma nasida torop manopot ibana tu parmiananna, jadi marjamita ma ibana mangkatindangkon harajaon ni Debata: Dipajojor ma tu nasida barita ni Jesus sian patik ni si Musa dohot sian angka panurirang i, olat ni manogotna ro di bot ni ari.

²⁴ Jadi deba ma marhatutuhon na hinatahonna i; alai deba ndang porsea.

²⁵ Gabe marsalisi ma nasida sama nasida jadi laho be ma, dung jolo didok si Paulus hata on tu nasida: Sintong ma na nidok ni Tondi Parbadia marhitehite panurirang Jesaya tu angka amamuna najolo.

²⁶ Ai ninna do: "Laho ma ho paboahon tu bangso on: Marhite sian parbinegeanmuna do begeonmuna i, gabe ndang dapot rohamuna; jala di na marnida i hamu, idaonmuna i, gabe ndang mananda.

²⁷ Ai nunga pir roha ni bangso on, nunga maol marbinege pinggolnasida; nunga ditutup matanasida, asa unang marnida matanasida, unang marbinege pinggolnasida, unang marbinoto rohanasida, unang muba rohanasida, unang tarpamalum Ahu nasida!"

²⁸ Antong, boto hamu ma, nunga ditongos Debata haluaon on tu halak sipelebegu; tangihononnasida do i.

²⁹ Asa dung dihatahon ibana i, laho ma angka Jahudi sian i; godang do parsualonnasida sama nasida.

³⁰ Alai dua taon ma si Paulus maringan di bagas na sineoana i; dijangkon do nasa na ro manopot ibana.

³¹ Marhiras ni roha situtu do ibana mamaritahon harajaon ni Debata jala mangajarhon barita ni Tuhan Yesus; ndang adong na mangambat.

Roma

1 ¹ (I.) Ahu surat tinongos ni si Paulus, naposo ni Jesus Kristus, na tarjou gabe apostel jala pinapulik tu ulaon mamaritahon barita na uli na sian Debata.

² I ma diparbagabaga hian di angka surat na badia marhitehite angka panurirangna.

³ Taringot tu Anakna Jesus Kristus, Tuhanta i, na tubu sian pomparan ni si Daud, ia dagingna.

⁴ Naung gabe tandap Anak ni Debata na marhagagoon mangkihuthon Tondi na badia, dung hehe Ibana sian hamatean.

⁵ Sian Ibana hujalo hami asi ni roha dohot tohonan apostel mangalopokkon pangoloion di haporseaon tu roha ni saluhut bangso, ala ni Goarna i.

⁶ Sian nasida do nang hamu na jinou ni Jesus Kristus.

⁷ Mandapothon angka na hinaholongan ni Debata jala angka na badia, na jinouna i, na di huta Rom: Asi ni roha ma di hamu dohot dame sian Debata Amanta nang sian Tuhan Jesus Kristus!

⁸ (II.) Mandok mauliate ahu jumolo tu Debatangku marhitehite Jesus Kristus siala sude hamu, ala tu liat portibi on do tarbarita haporseaonmuna.

⁹Ndang mansadi ahu marningot hamu. Ia sitindangingku Debata do, na huoloi di bagasan tondingku, di na hubaritahon Anakna i.

¹⁰Tongtong do hupangido di angka tangiangku, anggiat tung manang andigan pe lomo ni roha ni Debata patiurhon dalanku manopot hamu.

¹¹Ai masihol do ahu marnida hamu, anggiat tung tarlehon ahu tu hamu deba silehonlehon partondion, patoguhon rohamuna.

¹²On do tahe: Naeng dapotan hiras ni roha nang ahu sian hamu hinorhon ni haporseaonta be.

¹³Alai naeng ma botoonmuna, angka dongan, naung jotjot ditahi rohangku manopot hamu, asa marparbue ahu nang di hamu songon na di angka bangso na leban i; alai tarsabat do ahu rasirasa nuaeng.

¹⁴Na marutang do ahu di halak Junani nang di bangso na leban, di angka parhapistaran nang di angka na hurang roha.

¹⁵Dibahen i husangkap sian nasa rohangku manjamitahon barita na uli i nang di hamu di huta Rom.

¹⁶(III.) Ai ndang na huhailahon barita na uli i, ai hagogoon ni Debata do i paluahon nasa na porsea, halak Jahudi jumolo, dung i dohot do halak Junani.

¹⁷Ai dipapatar do disi hatigoran ni Debata, na sian haporseaon tu haporseaon, hombar

tu na tarsurat hian: "Na mangolu do partigor i hinorhon ni haporseaonna!"

¹⁸(IV.) Ai dipapatar do sian ginjang rimas ni Debata dompak nasa jolma, na so daulat jala na geduk roha, na mangambat hasintongan i marhitehite hageduhon.

¹⁹Tandap do nian di nasida pamotoan taringot tu Debata dipatandap Debata.

²⁰Ai dapot tarida do pangalaho ni Debata na buni hian, timbangan ni roha, sian angka pambahenan ni Debata di na tinompana i hasiangan on, i ma hagogoonna dohot hadebataonna na manongtong i, asa unang adong sidaliannasida.

²¹Ai atik pe diboto nasida Debata, ndang dipasangap Ibana songon na tama di Debata, jala ndang dipuji, gabe dipaotooto angka pingkiranna do nasida, jala mangkolom ma rohanasida na so mangarti i.

²²Dirimpu, na bisuk nasida, hape na loahon do!

²³Dipasambar do hasangapon ni Debata na manongtong i tu gambaran na suman tu jolma na mangilas i, songon i tu pidong dohot tu binatang ro di na manjirir i.

²⁴Dibahen i dipasahat Debata do nasida di bagasan hisaphisap ni rohanasida tu hahodaron i, pola diparonsam nasida dagingna sama nasida.

²⁵Ai dipasambar do hasintongan ni Debata gabe gabus, jadi disomba jala dioloi na

tinompa singkat ni Panompa i, na tarpuji ro di salelenglelengna. Amen.

²⁶Ala ni i dipasahat Debata nasida tu hahisapon hailaon, ai dipaimbar angka boruborunasida do bangko hian tu na so bangko.

²⁷Suang songon i nang angka baoa, ditinggalhon do ruhut hian, siingoton maradophon boruboru, gabe garang ma nasida di bagasan hahisapon, pola baoa sama baoa mangulahon hailaon jadi patut do dijalo di dirina be upa ni haliluonnasida.

²⁸Ala so diparhamaol nasida na mananda Debata, gabe dipasahat Debata nasida tu parrohaon na so gabeak, asa diulahon na so uhum.

²⁹Tung gok do nasida nasa hageduhon hajahaton, haroaon, pangahution, latelate, bunubunu, badabada, ansiansi dohot angka bisuk.

³⁰Angka parmihimihim, parhata tundal, sihosomi Debata, angka na jungkat, siginjang roha, sideak hata, parpingkiran na roa, na manoisi natorasna;

³¹na so marroha, siose padan, na so umboto holong dohot asi ni roha.

³²Diboto nasida do nian uhum na pinatikkon ni Debata, mandok na tama marutang hosa angka na mangulahon sisongon i, hape tong do diula; lumobi tahe, lomo do rohanasida mida angka na mangulahonsa.

2¹ (I.) Dibahen i ndang dapot ondingan ho, ale jolma, sidabu uhum. Ai dirim do diuhumi ho, di na niuhumanmu donganmi. Ai suman tu na binahenna i do pambahenmi, ho na manguhumi i!

²Ai taboto do: Hombar tu hasintongan do uhum ni Debata mangonai tu angka na mangulahon sisongon i.

³Ai dirimpu ho, ale, tarpasiding ho uhum ni Debata, anggo diuhumuhumi ho na mangula sisongon i, hape dohot do ho mambahensa?

⁴Tung na hu do roham di denggan ni basana na godang i, di panganjuonna nang di lambas ni rohana? Nandang diboto ho, habasaon ni Debata naeng manogihon ho tu hamubaon ni roha?

⁵Alai dibahen jokal ni roham na so olo muba i, dipagukguk ho do tu dirim rimas di ari hasosonggop ni rimas i, di na gabe patar uhum na tigor i dibahen Debata.

⁶Ai baloshononna do tu ganup marguru tu na niulana be!

⁷Hangoluan na salelenglelengna do di angka na marbenget ni roha mangula na denggan, laho mangalului hasangapon, hamuliaon dohot hatongtongan.

⁸Alai rimas dohot muruk ma di angka na tongkar, ala pangoloi nasida di hageduhon, ndada di hasintongan.

⁹Na bernit dohot hatahuton ma tu roha ni nasa jolma na mangulahon hajahaton, tu

halak Jahudi jumolo, dung i dohot do tu halak Junani.

¹⁰Alai hasangapon, hamuliaon dohot dame tu ganup na mangulahon na denggan, tu halak Jahudi jumolo, dung i dohot do tu halak Junani.

¹¹Ai ndang siida rupa anggo Debata!

¹²(II.) Ai angka na mardosa, so marpatik, mago do, nang so marpatik; jala angka na mardosa, ginomgoman ni patik, uhuman ni patik i do.

¹³Ai ndada na umbege patik i, pintor di roha ni Debata; angka na mangulahon patik i, i do pintoranna.

¹⁴Ai diulahon angka sipelebegu sian dirina do na pinangido ni patik i, atik pe so adong patik di nasida, asa gabe nasida sandiri ma songon patik di nasida, angka na so marpatik hian.

¹⁵Sian i ma tarida, paboa naung tarsurat ulaon patik i di bagasan rohanasida, laos mangkatindangkon do panggora ni rohanasida, angkup ni pingkiran ni rohanasida, angka na masisolsolan nang masiondian pe.

¹⁶I ma di ari sogot, di na ro Debata manguhumi nasa na buni na di jolma marhite Kristus Jesus, hombar tu na hubaritahon i.

¹⁷(III.) Na margoar Jahudi do anggo ho, patik i dipartanggulhon do jala Debata ditengahon ho.

¹⁸Diboto ho do pinangidona i, jala tartimbang ho do na jadi dohot na so jadi, ala naung dipodai patik i ho.

¹⁹Tau do ho, didok roham, gabe partogi di na mapitung, panondang di angka na di bagasan na holom;

²⁰sipodai angka na hurang roha, pangajari di angka na metmet, ai di ho do rumang ni parbinotoan dohot hasintongan di bagasan patik i.

²¹Antong, ia na asing dipodai ho do, alai dirim ndang dipodai ho. Ditingtingkon ho do, na so jadi manangko, hape manangko do anggo ho!

²²Didok ho do: Unang mangalangkup; hape pangalangkup do ho! Na magigi do ho mida angka ajiajian, hape pandobo do ho di bagas joro!

²³Dipangasahon ho do patik i, tong do dipalealea ho Debata marhite sian pangalaosim di patik i.

²⁴Songon naung tarsurat i: "Ala ni hamu do umbahen na marlea Goar ni Debata diida angka sipelebegu".

²⁵Hasea do nang parsunaton i, anggo diparangehon ho patik i; alai molo pangalaosi ho di patik i, gabe songon na so parsunaton ma i di ho.

²⁶Asa molo diradoti na so tarsunat i pangidoan ni patik i, nda rajumon ma

dagingna na so tarsunat i doshon naung disunat?

²⁷ Jadi ho naung nampuna hata i dohot parsunaton i, anggo dilaosi ho patik i, uhumon ni na so tarsurat ma ho, anggo diradoti patik i.

²⁸ Ai ndada i tutu Jahudi na marrupahon hajahudion, jala ndada i tutu parsunaton na di daging.

²⁹ Alai naeng ma Jahudi ibana di bagasan rohana; parsunaton i pe, naeng ma di bagasan roha hinorhon ni Tondi, unang hata ni patik; angka sisongon i ma dapotan pujipujian sian Debata, nda tung sianjolma.

3¹ (I.) Asa dia nama hasurungan ni Jahudi? Tu aha ma hasea parsunaton i?

² Sandok godang do i. Parjolo: Hasahatan ni angka pandok ni Debata do nasida.

³ Ai beha nama, ia so porsea na deba? Tung tarbahen nasida na so porsea i ma manegai haburjuon ni Debata Sihaposan i?

⁴ Dao ma i! On do tahe: Parsintong do ia Debata, alai pargabus do nasajolma, songon na tarsurat i: "Asa pintor ho di angka pandohanmu jala monang di panguhumonmi!"

⁵ Alai beha ma dohononta? Ia dipajongjong hageduhonta hatigoran ni Debata, nda na geduk ma Debata, molo dipalalu rimasna? Santabi di Debata!

⁶Dao ma i! Ai aut i, songon dia ma taruhum Debata portibi on?

⁷Alai molo lam timbul hasintongan ni Debata binahen ni gabushu paganda hasangaponna boasa uhumon dope ahu songon pardosa?

⁸Nda tagonan ma taula na roa, asa ro na denggan, songon pandok ni na deba magarehei hita; songon i do hatanta, ninna. Patut ma antong hona uhum angka sisongon i!

⁹Asa boha ma? Marhasurungan do hami? Ndangana, ai nunga hupatorang: Rap ginomgoman ni dosa do saluhutna, halak Jahudi nang halak Junani.

¹⁰Hombar tu na tarsurat i: "Ndang adong na tigor nanggo sada!"

¹¹"Ndang adong na marroha, na usousu di Debata."

¹²"Saluhut nasida nunga manimbil, tung sange do nasida marroha mago; ndang adong sibahen na denggan nanggo sada."

¹³"Tanoman na ngangang do aruarunasida, na paototohon do dilanasida; bisa ni ulok dari do ditoru ni bibirnasida."

¹⁴"Gok burabura dohot hata podu pamangannasida."

¹⁵"Hirtap do patnasida mandurushon mudar."

¹⁶"Hamagoan dohot haporsuhon do di dalannasida."

¹⁷"Ia dalan hadameon i ndang diboto."

¹⁸"Ndang marhabiaran di Debata rohanasida."

¹⁹Alai taboto do: Tu na ginomgoman ni patik i do nasa hata ni patik i, asa mangkohom nasa jolma jala marutang tu Debata sandok manisias.

²⁰Ai ndang dapotan hatigoran jolma nanggo sada di adopan ni Debata, anggo sian na mangulahon patik i. Ai dihorhon patik i do panandaon di dosa.

²¹(II.) Alai nunga gabe patar nuaeng hatigoran ni Debata, so sian patik i, songon naung dihatindangkon patik i nang angka panurirang pe.

²²I ma hatigoran ni Debata na marhitehite haporseaon di Jesus Kristus sahat tu saluhut angka na porsea.

²³Ai ndang adong imbar ni i: Tung saluhut do nasida mardosa jala ndang dapot pujion ni Debata nasida.

²⁴Gabe dipintori do nasida dalan basabasa binahen ni asi ni rohana hinorhon ni panobusion na di bagasan Kristus Jesus.

²⁵Ibana do dipadiri Debata bahen habangsa parasian marhite sian haporseaon di mudarna i, asa dipapatar Debata disi hatigoranna, ala naung dibolus matana angka dosa najolo marhite lambas ni rohana.

²⁶Ai naeng papataron ni Debata hatigoranna apala nuaeng, asa pintor Ibana jala dipintori na marhaporseaon di Jesus.

²⁷Asa adong dope sipangasahononhon?

Nunga gotap anggo i! Binahen ni patik dia do? Binahen ni angka parulaon i do? Nda tung, binahen ni patik haporseaon i do.

²⁸Asa on do dijujur rohanta: Haporseaon i do mamintori jolma, ndada na mangulahon patik.

²⁹Ai holan Jahudi do nampuna Debata? Nda dohot sipelebegu i? I do antong; dohot do sipelebegu i!

³⁰Ai sada do Debata na mamintori na tarsunat sian haporseaonnasida, songon i nang na so tarsunat i, ala ni haporseaonnasida.

³¹Asa na mangarumpakkon patik do hita binahen ni haporseaon i? Dao ma i! Na pajongjongkon patik i do hita.

4¹ (I.) Beha ma di rohanta? Aha ma jumpang si Abraham, amanta i, taringot tu daging.

²Ai ia pintor si Abraham sian na niulana, adong ma sipangasahononna; alai nda tung maradophon Debata.

³Ai nda on do didok Surat i: "Na porsea do si Abraham di Debata, gabe i ma dirajumi bahen hatigoranna!"

⁴Utang na so tarjua do upa sijaloon ni na mulaulaon, nda tung asi ni roha.

⁵Alai haporseaon do rajumon gabe hatigoran anggo di jolma na so mangaradoti ulaon, asal porsea ibana di Sipintori na jahat.

⁶Songon pandok ni si Daud, ai diparhatua do halak na gabe pintor dirajumi Debata, so sian parulaonna:

⁷"Martua ma jolma, naung sinesaan pangalaosionna, naung hinungkupan dosana!

⁸Martua ma halak, anggo so dijujur Tuhan i dosana tu ibana!"

⁹Ise antong diparhatua disi? Angka na marsunat do, manang dohot do angka na so marsunat? Ai nunga tadok: "Dietong do haporseaon ni si Abraham gabe hatigoranna!"

¹⁰Ai beha do antong dirajumi? Dung marsunat ibana, manang andorang so marsunat i? Andorang so marsunat dope!

¹¹Anggo parsunaton i, partinandaan do i, sumahaphon tu ibana hatigoranna ala ni haporseaonna andorang so marsunat dope, asa gabe ama ibana di saluhut angka na porsea na so marsunat i, asa nang tu nasida dirajumi hatigoran.

¹²Huhut do ibana ama ni angka na marsunat; alai ndada asal tarsunat nasida, naeng ma ditiru haporseaon ni si Abraham, amanta i, andorang so marsunat dope.

¹³Ai ndada marhite sian patik i ro bagabaga tu si Abraham nang tu pomparanna, na mandok: Ibana tumeana portibi on; marhite sian hatigoran na sian haporseaon i do.

¹⁴Ai aut angka siradoti patik i gabe panean, ndang marguna haporseaon i, jadi pesan ma bagabaga i.

¹⁵ Ai dihorhon patik i do rimas; alai anggo soada patik, laos so adong do pangalaosion.

¹⁶ Dibahen i sian haporseaon i do bagabaga i, asa sian asi ni roha do, ai naeng hot bagabaga i di sandok pomparanna i; ndada holan di dongan sapatik ni si Abraham, dohot do di donganna sahaporseaon, ai ama ni hita saluhutna do ibana.

¹⁷ Hombar tu na tarsurat i: "Hupabangkit do ho gabe ama ni torop bangso!" Di adopan ni Debata ma i, na hinaporseaanna Sipangolu angka na mate jala Sijou na so adong hian gabe adong.

¹⁸ Maralohon nasa pangkirimon do haporseaonna na mangkirim i, asa gabe ama ni torop bangso ibana, hombar tu hata i: "Songon i ma sogot pomparanmu!"

¹⁹ Ndang na olo gale haporseaonna i paidaida pamatangna na hira so marngolu be, ai nunga saratus taon ne umurna, nang paidaida si Sara, naung saep ladang i.

²⁰ Ndang olo ganggu rohana tumadingkon haporseaon di bagabaga ni Debata; na lam tu toguna do tahe haporseaonna jala diparsangapi do Debata.

²¹ Ai pos situtu do rohana: Tuk do gogo ni Debata patupahon na pinarbagabagana i.

²² Ala ni i do umbahen na dirajumi i gabe hatigoranna.

²³ Ndada ala ni ibana sambing, umbahen na tarsurat, naung dirajumi tu ibana.

²⁴Hita pe, ditatap do disi, ai sirajumon do nang tu hita haporseaon di Ibana, na pahehehon Jesus Tuhanta i sian na mate.

²⁵Ai dipasahat do Ibana ala ni pangalaosionta i, jala dipangolu siala hatigoranta.

5¹ (I.) Asa dung dipintori hita dalam haporseaon, mardame ma hita dohot Debata marhitehite Tuhanta Jesus Kristus.

²Laos marhitehite Ibana do saut masuk hita tu asi ni roha, hajongjonganta nuaeng dalam haporseaon, jala taparhatua do dirinta marningot hasangapon ni Debata na itahirim i i.

³Alai lumobi sian i dope, ai itahalashon do nang angka haporsuhon, ala taboto, dihorhon haporsuhon i do habengeton ni roha.

⁴Jala dihorhon habengeton ni roha i do hatauon, jala hatauon i do mangkorhon pangkirimon.

⁵Alai ndang na murak hita bahenon ni pangkirimon i, ala nunga diusehon tubagasan rohanta holong ni roha ni Debata marhitehite Tondi Parbadia, naung nilehonna i tu hita.

⁶Ai uju na parir dope hita, disi ma tongon mate Kristus humongkop angka parjahat.

⁷Ai maol mate halak humongkop partigor; adong do deba na barani mate humongkop na ulibasa.

⁸Alai ia Debata, dipapatar do holong ni rohana i di hita, uju pardosa dope hita, ai disi do mate Kristus humongkop hita.

⁹Asa lam malua ma hita sian rimas i nuaeng marhite sian Ibana, dung jolo dipintori hita di bagasan mudarna i.

¹⁰Ai molo dipadenggan Ibana hita tu Debata hinorhon ni parmata ni Anakna i, uju musuna dope hita, nda lam paluaonna ma hita, angka naung pinadengganna i, dung mangolu Ibana?

¹¹Lumobi dope, tung itahalashon do Debata mangasahon Tuhanta Jesus Kristus, ai di bagasan Ibana do tajalo pardenggan i.

¹²(II.) Dibahen i, songon na bongot dosa i tu portibi on marhite sian sada halak jala marhitehite dosa i ro hamatean, songon i sahat hamatean i tu saluhut jolma, ala sude nasida mardosa.

¹³Ai nunga di portibi on hian do dosa, nang andorang so ro dope patik i; alai ndang dijujur dosa, ia so adong patik.

¹⁴Alai nunga manggomgomi hamatean i olat ni si Adam sahat ro di si Musa, nang so dos pardosaonnasida tu pangalaosion ni si Adam, sumansuman ni na naeng ro i.

¹⁵Alai ndada sapangalaho pangalaosion i dohot basabasa i. Ai binahen ni pangalaosion ni na sada, marmatean na torop i; alai andul sumurung tu na torop i ma asi ni roha ni Debata dohot basabasa, na hinorhon ni parasirohaon ni na sada jolma Jesus Kristus.

¹⁶Ia silehonlehon i asing do sian na binahen ni na sahalak na mardosa i, ai dihorhon uhum

na sian na sahalak i do uhum hamagoan;
alai hinorhon ni basabasa i do dipintori torop
pangalaosi.

¹⁷Ai molo hamatean manggomgomi,
binahen ni na sada ala ni pangalaosionna
i, nda lam manggomgomi huhut mangolu
marhitehite Jesus Kristus na sada i ma antong
nasida, angka naung manjalo asi ni roha na
tarlobi angkup ni basabasa, i ma hatigoran i?

¹⁸Asa songon marhite sian pangalaosion ni
na sahalak lalu uhum hamagoan tu saluhut
jolma, songon i do marhite sian na Sada
na mamintori sahat hatigoran hangoluan tu
saluhut jolma.

¹⁹Ai songon marhite sian hatoison ni sada
jolma gabe torop tardapot mardosa, songon i
ma marhite sian pangoloion ni na Sada i gabe
torop dipintori.

²⁰Alai soluk ma bongot patik i pagandahon
pangalaosion. Alai ganda pe dosa i, lam
sumurung ma asi ni roha i.

²¹Asa songon na manggomgomi jolo dosa i
mantat hamatean, songon i do nang asi ni
roha i manggomgomi marhitehite hatigoran
mangkorhon hangoluan na salelenglelengna
marhite sian Jesus Kristus Tuhanta i.

6¹(I.) Antong, dia ma dohononta?
Datdatanta ma mardosa, asa tung timbul
asi ni roha?

²Dao ma i! Hita angka naung mate di dosa i, tung tarbahren hita dope mangolu di bagasan i?

³Na so diboto hamu do on: Sude hita, nasa naung tardidi tubagasan Kristus Jesus, tubagasan hamateanna do hita tardidi?

⁴Antong, naung tartanom do hita rap dohot Ibana marhitehite pandidion i tubagasan hamatean, asa marparange hita di bagasan ngolu na imbaru, songon Kristus naung hehe sian angka naung mate hinorhon ni hasangapon ni Amana.

⁵Ai anggo nunga sanghambona hita dohot Ibana, di na rap mate hita dohot Ibana i, suang songon i ma hita nang taringot tu haheheon.

⁶Ai taboto do: Nunga tarsilang hadirionta na buruk raphon Ibana, asa pinasohot daging pardosaon, asa unang be hita mangadop di dosa.

⁷Ai dung matejolma, lias do ibana sian dosa.

⁸Alai molo naung mate hita rap dohot Kristus, dihaporseai rohanta, rap mangolu ma hita dohot Ibana.

⁹Ai taboto do, na so mate be Kristus, dung mulak mangolu sian na mate; ndang dirajai hamatean i be Ibana.

¹⁰Ai mate pe Ibana, sahali do i, ala ni dosa; ia mangolu nuaeng, di Debata do i.

¹¹ Suman tusi ma rajumi hamu dirimuna songon naung mate di dosa i, alai mangolu di Debata di bagasan Kristus Jesus.

¹² Antong, unang ma dosa i mangarajai di bagasan dagingmuna na olo mate i, mangoloi hisapna!

¹³ Jala unang ma pasahat hamu angka ruasmuna tu dosa i, bahen sinjata ni hajahaton; tu Debata ma tahe pasahat hamu dirimuna songon angka naung pinangolu sian na mate; songon i nang ruasmuna, tu Debata ma i, bahen sinjata ni hatigoran!

¹⁴ Ai ndang rajaana ni dosa i be hamu, ai ndang digomgomi patik i hamu, tung asi ni roha i do.

¹⁵ Antong, beha nama? Mardosa ma hita, ala ginomgoman ni asi ni roha i, ndada ginomgoman ni patik i hita? Dao ma anggo il!

¹⁶ Nandang diboto hamu on: Ia tusi dipasahat hamu dirimu gabe hatoban pangoloi, hatoban ni i do hamu angka na mangoloi: Manang hatoban ni dosa tu hamatean, manang pangoloi tu hatigoran.

¹⁷ Alai mauiate ma di Debata, ala salpu tingki pangadopanmuna di dosa i; gabe pangoloi hamu nuaeng sian nasa rohamuna di ruhut ni poda, naung sahat tu hamu.

¹⁸ Ai dung malua hamu sian dosa i, gabe tunduk do hamu mangoloi hatigoran i.

¹⁹ Ruhut ni jolma ma huumpamahon ala ni hagaleon ni dagingmuna: Ai songon

naung pinasahatmuna angka ruasmuna gabe pangoloi di hahodaron dohot di na so uhum, mangulahon na so uhum i; songon i ma pasahat hamu nuaeng angka ruasmuna tu hatigoran, laho pabadiahonsa.

²⁰Tutu nian, uju hatoban ni dosa hamu, malua do hamu sian hatigoran.

²¹Antong, dia do parbuemuna disi? Angka na hinailahonmuna anggo nuaeng, ai hamatean do hapateanna.

²²Alai nuaeng, dung malua hamu sian dosa i, dung gabe pangoloi di Debata hamu, adong do parbuemuna tu habadiaon; jala hangoluan na salelenglelengna do hapateanna.

²³Ai upa tinuhor ni dosa do hamatean; alai basabasa ni Debata do hangoluan salelenglelengna marhitehite Kristus Jesus Tuhanta i.

7¹ (I.) Digomgomi patik i do jolma, saleleng ibana mangolu; diboto hamu do i, ale angka dongan, ai tu angka na umboto patik i do hatangkon.

²Ai hira naung niihot ni patik i do boruboru tu harajaanna, saleleng mangolu baoa i; alai anggo dung mate baoa i, malua ma boruboru i sian patik pardongansaripeon.

³Asa pangalangkup do ibana goaron, ia tu baoa na asing ibana, tagan mangolu dope hamulianna. Alai anggo dung mate baoa i, malua do pardihutana sian patik i; ndang

pangalangkup be ibana goaron, molo muli tu baoa na asing.

⁴Songon i ma antong hamu, ale angka dongan: Nunga mate hamu di patik i marhitehite daging ni Kristus; asa na asing manggomgomi hamu, i ma Ibana naung hehe sian na mate, asa di Debata hita marparbue.

⁵Ai andorang di bagasan daging i hita, margogo do angka hisap hadosaon i di bagasan angka ruasta dihorhon patik i, asa itaparbuehon hamatean.

⁶Alai nunga disirang hita sian patik i, jala naung mate do hita di na maniop hita nasailaon, asa pangoloi hita marpangalaho na imbaru di bagasan Tondi, unang be marpangalaho na buruk di bagasan hata ni patik i.

⁷Antong, beha ma dohononta? Dosa do patik i? Dao ma i! Alai ndang na hutanda dosa i, anggo so marhite sian patik i, ai ndang na botoonku hahisapon i, aut unang didok patik i: "Unang ho marhahisapon!"

⁸Marbingkas sian patik i disungguli dosa i di bagasan ahu ragam ni hahisapon; ai songon na mate dope dosa, anggo so adong patik.

⁹Mangolu do anggo ahu najolo so marpatik dope. Alai ro ma patik i, gabe mangolu ma dosa i.

¹⁰Alai anggo ahu mate do, jadi gabe hamatean do hape di ahu patik i, sihorhon hangoluan nian.

¹¹ Ai marbingkas sian i, dipaotooto jala dipamate dosa i do ahu marhitehite patik i.

¹² Asa na badia do patik i, badia do na tinonahon ni Debata, tigor jala denggan.

¹³ Na beha do? Manjadi hamateanku do na denggan i? Dao ma i! Dosa i do tahe mangkorhon hamatean di ahu marhitehite na denggan, asa tandap dosa i jala patar jahatna na tarlobi i, marhite sian patik i.

¹⁴ (II.) Ai taboto do, partondion do patik i; alai pardaging do anggo ahu jala targadis tu gomgoman ni dosa.

¹⁵ Ai ndang hutolopi na hubahen i; ai na huhagigihon, i do huula, ndada na huhalomohon i.

¹⁶ Alai ia huula na so hinalomohon ni rohangku, na manolopi ma ahu di hinadenggan ni patik i.

¹⁷ Asa ndada ahu na mangulahonsa, tung dosa i do na mangingani ahu.

¹⁸ Ai huboto do, ndang adong na denggan maringanan di bagasan ahu, mandok di bagasan dagingku. Ia hagioton dapot do nian di ahu; alai ndang dapot anggo na patupahon na denggan.

¹⁹ Ai ndada huula na denggan, na pinarhagiot ni rohangku; na roa i, na so huhalomohon, i do huula.

²⁰ Alai molo huula na so hinalomohon ni rohangku, ndang apala ahu mangulasa dosa i do tahe, na maringanan di bagasan ahu.

²¹ Asa jumpang ahu songon aturan: Na roa do dapot di ahu, nang pe dipangido rohangku mangulahon na denggan.

²² Ai dihalashonjolma parbagasan na di ahu do nian patik ni Debata.

²³ Alai huida do patik na asing di bagasan angka ruas ni dagingku, na marmusu dompak patik na di bagasan rohangku; gabe dipatunduk do ahu tu gomgoman ni patik ni dosa, na di bagasan ruas ni dagingku.

²⁴ Oe, ahujolma na dangol on! Ise ma paluahon ahu sian pamatang hamatean on?

²⁵ Mauliate ma hudok tu Debata marhitehite Jesus Kristus Tuhanta i. Dibahen i, ahu sandiri mangoloi patik ni Debata di bagasan rohangku; alai mangihuthon daging i, patik ni dosa i do huoloi.

8¹ (I.) Onpe, ndang na mangonai be uhum tu angka na di bagasan Kristus Jesus, angka na so marpangalaho marguru tu daging, na marguru tu tondi do.

² Ai nunga dipalua patik ni tondi hangoluan na di bagasan Kristus Jesus do ahu sian patik ni dosa dohot hamatean.

³ Ai dung so margogo patik i, na pinagale ni daging i, disuru Debata do Anakna sandiri ala dosa i, marrupahon daging pardosaon i; gabe songon i ma dihonahon uhum tu dosa i, di bagasan daging i.

⁴Asa jumpang ma hatigoran na pinangido ni patik di hita, angka na mangihuthon Tondi i, ndang be anggo daging.

⁵Ai pardagingon do diparrohahon angka na mangihuthon daging i; alai Tondi do diparrohahon angka na mangihuthon Tondi i.

⁶Ai hamatean do harohaon ni daging, alai hangoluan jala hadameon do anggo harohaon ni Tondi.

⁷Hamusuon dompak Debata do harohaon ni daging; ndang olo unduk i di patik ni Debata, ai ndang tarbahensa.

⁸Alai ndang tarhalomohon Debata angka parroha daging.

⁹Alai anggo hamu, ndang be di bagasan daging i, di bagasan Tondi do, molo tung tutu Tondi ni Debata maringanan di bagasan hamu. Alai molo so Tondi ni Kristus di jolma, ndang Kristus nampuna ibana.

¹⁰Alai molo Kristus di bagasan hamu, mangolu do tondi ala ni hatigoran, nang pe mate pamatang ala ni dosa i.

¹¹Alai molo maringanan di bagasan hamu Tondi ni na manungguli Jesus sian na mate, sandok pangoluon ni Ibana, naung manungguli Kristus Jesus i, ma nang pamatangmuna na mate i, hinorhon ni Tondina na mangingani hamu.

¹²Onpe, ale angka dongan, unang be hita mangadop di daging, marparange marguru tu daging!

¹³Ai molo marguru tu daging hamu marparange, mate ma hamu; alai molo dipamate hamu parulaon ni pamatang marhitehite Tondi i, mangolu ma hamu.

¹⁴Ai nasa na tinogihon ni Tondi ni Debata, angka i do anak ni Debata.

¹⁵Ai ndang na dijalo hamu tondi hatoban, asa mangulahi mabiar, Tondi haanakon do dijalo hamu; mangasahon I do panjouonta: Abba, mandok: Ale Amang!

¹⁶Laos Tondi i do mangkatindangkon di tondinta, paboa na tutu hita anak ni Debata.

¹⁷Alai molo anak hita, dohot ma panean; panean di Debata, dongan panean ni Kristus; molo tung donganna hita di sitaonon, gabe donganna hita sogot nang di hasangapon.

¹⁸Ai hurajumi angka sitaonon di hasiangan on, hira na so adong do martimbangkon hasangapon sipapataron tu hita sogot.

¹⁹Ai malungun do nasa na tinompa i paimaimahon tingkina, asa dipapatar angka anak ni Debata.

²⁰Ai tu habusukon do dipatunduk na tinompa i; ndada sian lomona, tung binahen ni na patundukkonsa do.

²¹Huhut mangkirim: Paluaonna ma nang na tinompa i sian pangadopan hamagoan, sahat tu haluaon hasangapon na di angka anak ni Debata.

²²Ai taboto do, sai tong dope rap marhoi jala mambebe nasa na tinompa i.

²³Angkup ni i, nang hita angka naung manjalo patumonaan ni Tondi i, marhoihoi di bagasan rohanta, paimaimahon haanakon, asa disi marhaluaon pamatangta.

²⁴Ai tong dope mangkirim hita, angka naung malua. Alai molo niida na hinirim i, ndang pangkirimon be i dohonon; ai marhua hirimon, anggo dung diida mata!

²⁵Alai molo mangkirim hita di na so taida dope, marbenget ni roha ma hita paipaimahonsa.

²⁶Alai nang Tondi i, diurupi do hita di hagaleonta i; ai ndang taboto, manang aha na tama sipangidoonta, gabe diondihon Tondi i do hita marhitehite hata na hinoihon na so tangkas hinatahon.

²⁷Alai diboto Sitanda roha i do na pinarrohahon ni Tondi i, ai marguru tu lomo ni roha ni Debata do pangondihonna di angka na badia i.

²⁸Alai taboto do, saluhutna do manumpak tu na denggan di angka na marholong ni roha di Debata, angka na jinouna sian tahina hian.

²⁹Ai angka na tinandana hian, i do ditodo, asa gabe tudos nasida tu pangalaho ni Anakna i, asa Ibana na parjolo tubu sian torop anggina.

³⁰Jala angka naung tinodona, i do dijou; jala na jinouna, i do dipintori; jala angka naung pinintoranna, i do dipasangap.

³¹ Onpe, aha ma dohononta disi? Molo Debata donganta, ise ma alonta?

³² Ndang diolani Ibana Anakna sandiri, tung dipasahat do humongkop hita saluhutna tagamon ma so basabasahononna raphon Ibana saluhutna i tu hita?

³³ Ise mangaluhon angka na pinillit ni Debata? Ai Debata do na mamintori.

³⁴ Ise do na mandabu uhum hamagoan? Nunga mate Kristus Jesus i, lobi tahe, naung mulak mangolu do; di siamun ni Debata do Ibana mangondihon hita.

³⁵ Dia manirang hita sian holong ni roha ni Kristus i? Haporsuhon do manang hagogotan, manang pangaleleon manang haraparon, manang parsaemaraon, manang mora, manang podang pe?

³⁶ Hombar tu na tarsurat i: "Humongkop Ho do dibunui hami manipat ari; songon birubiru sipotongon do hami dirajumi."

³⁷ Alai andul do hamonanganta di saluhutna i, hinorhon ni na mangkaholongi hita.

³⁸ Ai gomos do ditiop rohangku: Ndang tarbahren sirang hita sian holong ni roha ni Debata, na di bagasan Kristus Jesus Tuhanta i: Manang bahenon ni hamatean manang hangoluan, nang bahenon ni angka surusuruan nang angka harajaon, nang na masa nuaeng, nang na masa sogot, nang angka hagagoon pe,

³⁹manang bahenon ni na di ginjang nang na di toru, ro di nasa na tinompa pe.

9¹ (I.) Na sintong do hatangkon marhitehite Kristus, ndada gabus i, dihatindangkon rohangku huhut marhitehite Tondi Parbadia:

²Marsak situtu do rohangku jala tongtong do margudompong.

³Ai dipangido rohangku, naeng bali ahu sian adopan ni Kristus humongkop hahaanggingki, donganku sabangso mangihuthon partubu ni daging.

⁴Bangso Israel do nasida. Di nasida do ruhut paramaon dohot hasangapon, nang parpadanan dohot parpatihon, nang pargamaon ro di angka bagabaga.

⁵Di nasida do angka ompu i, sian nasida do haroroan ni Kristus mangihuthon pardagingonna; Ibana ma di ginjang ni saluhutna, Debata, na pinarsangapan salelenglelengna. Amen.

⁶Alai ndatung pesan hata ni Debata; ai ndada saluhut, na tubu sian Israel, goaron Israel.

⁷Jala ndada saluhut nasida anak dohonon, ala pomparan ni si Abraham. On do tahe: "Sian si Isak do goaron pomparanmu!"

⁸Lapatanna: Ndada anak ni daging dohonon anak ni Debata; angka anak na pinarbagabaga, i do dirajumi.

⁹Ai bagabaga do hata on: "Suang songon on tingkina Ahu ro muse, jadi adong ma disi sada anak di si Sara!"

¹⁰Angkup ni i, si Rebekka pe, di na gabegabean ibana sian halak si Isak, ompunta i:

¹¹Ai andorang so tubu dope nasida, so diulahon dope na denggan manang na roa, naeng ma hot na tinahi ni Debata sian pamillitna sambing,

¹²ndada mangihuthon parulaon nasida; sian panjouonna sambing ma. Ai didok tu ibana: "Sioloan ni na umbalga i do na ummetmet i!"

¹³Hombar tu na tarsurat: "Huhaholongi do si Jakkob, alai huhasogohon do si Esau!"

¹⁴Onpe, dia ma dohononta? Nda songon na geduk ma Debata? Dao ma i.

¹⁵Ai didok do tu si Musa: "Martalup ni roha do Ahu di sitalupan ni rohangku, jala asi do rohangku di siasianku."

¹⁶Asa guru di pangasii ni Debata do, ndada guru di na manuntun manang mamuspus.

¹⁷Ai songon on do didok surat i tu si Firaun: "Apala tusi do ho husungguli, asa hupataridahon gogongku marhitehite ho, asa tarbarita Goarhu tu liat tano on."

¹⁸Asa diasii Ibana do na naeng asianna, jala dipajogal do roha ni na, naeng pajogalonna.

¹⁹Ra ro ma alusmu: Boasa manorui dope Ibana! Ai ise mangalo tahina?

²⁰Iale, jolma manisia; tung ise ma ho, na naeng manggaga Debata? Tung dohonon ni na ginana i ma mandok na manggana: Boasa songon i ahu bahenonmu?

²¹Ai nda marhuaso sitopahudon laho patupahon sian na samansam tano liat deba ulaula tu na tama, na deba tu na lea?

²²Ai di na naeng pabotohonon ni Debata rimasna huhut patuduhon gogona, gabe marlambas ni roha godang Ibana manganju angka ulaula sirimasan i, angka naung pinadiri tu hamagoan.

²³Songon i do dipapatar surung ni hasangaponna i maradophon angka ulaula siasian, angka na pinaturena i hian tu hasangapon.

²⁴Ai dijou do hita, nang sian bangso Jahudi, nang sian angka sipelebegu.

²⁵Songon na nidokna i di surat ni si Hosea: "Bangsongku ma goaronku na so bangsongku hian, jala haholonganku do na so hinaholongan hian!"

²⁶"Jala dung nidok jolo tu nasida: Ndada hamu bangsongku, apala disi ma nasida goaron angka anak ni Debata Parngolu!"

²⁷Ai dijouhon si Jesaya do taringot tu bangso Israel: "Nang pe na sarihit na di topilaut torop ni anak Israel, holan pasipasina i do malua.

²⁸Ai dipatulus jala dipaputus Tuhan i do hatana di tano on."

²⁹Songon naung sinurirangkon ni si Jesaya:
"Aut unang ditinggalhon Tuhan Sebaot boni
di hita, suman tu Sodom dohot Gumora do
hita!"

³⁰Asa dia ma dohononta? On do: Angka
parbegu na so mangeahi hatigoran, dapotsa
do, i ma hatigoran na sian haporseaon.

³¹Alai anggo Israel na mangeahi patik
hatigoran i, ndang sahat tusi.

³²Ala ni aha? Ala sian na mangualahon
do (dilului), ndada sian haporseaon, gabe
tartuktuk ma nasida di batu partuktuhan i,

³³hombar tu na tarsurat i: "Hupeakhon do di
Sion batu partuktuhan jala batu pargasipan;
jala ndang sipailaon na porsea di Ibana."

10¹(I.) Ale angka dongan, dipangido
rohangku, huhut hutangiangkon
nasida tu Debata, anggiat malua.

²Ai huhatindangkon do nasida, paboa na
diharingkothon pargamaonna; alai ndang
marroha.

³Ai disoadahon nasida do hatigoran
ni Debata, dilului tahe pajongjongkon
hatigorannasida sandiri, jala ndang
diundukkon hatigoran ni Debata.

⁴Ai Kristus do ujung ni patik i, laho
mamintori nasa na porsea.

⁵Ai disurathon si Musa do nian: "Jolma na
mangualahon hatigoran na marhite sian patik,
i do na mangolu disi."

⁶Alai ia hatigoran na sian haporseaon i mandok songon on: "Unang tung dok di bagasan roham: Ise ma manaek tu banua ginjang?" (Astuanna: Mangalap Kristus sian i.)

⁷Manang: "Ise tuat tu banua toru?" (Astuanna: Manogihon Kristus sian angka na mate.)

⁸On do tahe didok: "Talpe do di ho hata i, di bagasan pamanganmu dohot di bagasan roham do!" I do hata haporseaon i na hubaritahon hami.

⁹Ai malua ma ho, molo diparhatopot pamanganmi Tuhan Jesus i, huhut dihaporseai roham, naung dipahehe Debata Ibana sian angka na mate.

¹⁰Ai roha i do porsea, asa tu hatigoran; pamangan i do mangkatindangkon, asa tu haluaon.

¹¹Ai didok surat i do: "Ndang sipailaon nasa na porsea di Ibana!"

¹²Ai ndang adong imbar ni Jahudi manang Junani; ai Sada do Tuhan ni saluhutna, naung marbasabasahon sian hamoraonna tu saluhut angka na manjou Ibana.

¹³Ai "malua do ganup na manjou Goar ni Tuhan i!"

¹⁴Antong, beha ma jouonnasida Ibana na so hinaporseaannasida? Beha ma porsea nasida, ia so jolo dibege baritana. Alai beha ma begeonnasida, ia so adong parjamita?

¹⁵Alai beha ma marjamita nasida, ia so adong na marsuru, songon na tarsurat i: "Lehetna i langka ni angka sibaritahon na denggan!"

¹⁶Alai ndang sude mangoloi barita na uli i, ai ninna si Jesaya do: "Ale Tuhan, tung ise ma mangkaporseai jamitanami?"

¹⁷Asa sian na tumangihon do ro haporseaon; ia panangihon i, sian hata ni Kristus do.

¹⁸Alai on ma dohononku: Nandang dibege i huroha? Nunga nian! "Naung tolhas do soarana tu liat portibi on, jala ro di suhi ni tano on do baritana."

¹⁹Alai hudok muse: Nandang manganto Israel disi? Parjolo si Musa mandok: "Pinggilonku ma hamu mangiburu mida na so bangso hian, paheheonku rimasmuna mida bangso na oto."

²⁰Hum do si Jesaya mandok: "Angka na so mangalului Ahu, i do na dapotan; naung gabe patar do Ahu di angka na so mangusoi Ahu."

²¹Alai tu bangso Israel do didok: "Manipat ari hupaherbang tanganku tu bangso na so mangoloi jala na manggaga."

11 ¹(I.) Asa hudok ma: Tung dibolongkon Debata do bangsona? Dao ma i! Ai halak Israel do nang ahu, pinompar ni si Abraham, marga Benjamin.

²Nda tung dibolongkon Debata bangsona, naung tinandana hian. Na so diboto hamu do na nidokna di surat na taringot tu si Elia, uju dialuhon ibana Israel tu Debata, ai ninna ma:

³"Ale Tuhan, dipusa nasida angka panurirangmi, dilohai do angka langgatanmi; sasada ahu nama na tading, jala dohot do hosangku disangkapi nasida."

⁴Dia ma didok soara na ro tu ibana? "Huhirahon do di Ahu pituribu halak, angka na so sumomba debata Baal i!"

⁵Nuaeng pe, adong do pasipasi, mangihuthon pamilliton ni asi ni roha i.

⁶Alai molo binahen ni asi ni roha, ndang be sian parulaon; aut unang i, ndang be goaran i asi ni roha!

⁷Asa dia nama? Nandang jumpang bangso Israel na niluluan ni rohana, holan angka na pinillit do na dapotan; dipajogal do roha ni na asing.

⁸Hombar tu na tarsurat i: "Ro di sadari on do dilehon Debata tu nasida tondi na derem dohot mata na so jadi marnida ro di pinggol na so jadi marbinege."

⁹Jala didok si Daud do: "Sai gabe jorgong jala jaring ma mejanasida bahen pargasipan jala bahen pamaloson di nasida!"

¹⁰"Dipaholom ma matanasida, asa unang marnida, jala dipabungkuk ma tanggurun nasida tongtong!"

¹¹On do hudok: Na naeng tinggang do nasida, umbahen na tartuktuk? Dao ma i! Pangalaosionnasida do gabe haluaan di halak parbegu, anggiat tung mangiburu nasida disi.

¹²Alai molo pangalaosionnasida manjadihon parsaulian ni portibi on, jala hahurangannasida manjadihon hamoraon ni parbegu, lam beha ma habobongot ni nasida sudena!

¹³Tu hamu angka sipelebegu do hatangkon: Ala apostel tu sipelebegu ahu, sangap do huetong tohonanki.

¹⁴Anggiat tung mangiburu hubahen donganku sasibuk, laho paluahon nanggo deba sian nasida.

¹⁵Ai molo saut pardengganen ni portibi on, di na bolong i nasida, nda gabe songon hangoluan sian na mate ma i, ia dung saut nasida dijangkon.

¹⁶Alai molo badia patumonaan i, badia ma nang na niudi; jala molo badia uratna, badia ma nang angka dangkana.

¹⁷Tutu, deba rantingna dirampingkon, asa ho tarsumbat tusi; atik pe hau jarak harangan hian ho, gabe partohap do ho di urat dohot di miak ni hau jarak huta i.

¹⁸Unang ma antong ginjang roham maradophon angka ranting i; alai ia ginjang roham, ingot ma: Ndada ho mangusung urat i, niusung ni i do ho!

¹⁹Dohononmu ma: Dirampingkon do ranting i, asa ahu disumbathon tusi!

²⁰Tutu do i! Ala so porsea nasida, umbahen na dirampingkon; alai sian haporseaon i do,

umbahen na jongjong ho. Unang ma ginjang roham, mabiar ma tahe!

²¹ Ai molo so diolani Debata angka ranting hian, ndang olananna nang ho.

²² Onpe, bereng ma basa ni Debata dohot horasna: Horas do Ibana maralohon angka naung tinggang i; basa do maradophon ho, anggo mian ho di bagasan habasaonna; ia so i, tabaonna do nang ho!

²³ Nasida pe, molo masuk porsea, sumbathononna do; margogo do Debata manumbathon nasida muse.

²⁴ Ai sian hau jarak harangan hian ho dirampingkon, gabe disumbathon ho maralohon bangkona tu hau jarak huta; nda lam tarsumbathonsa ma nasida, laho pasuangkon tu hau jarak hian.

²⁵ Asa unang hapistaranmuna pangasahononmuna, ale angka dongan; naeng ma di rohangku botoonmuna hasimoon on: Naung songgop do jolo hatangkangon tu bangso Israel, paima tumpu masuk halak sipelebegu i.

²⁶ Jala i do gabe dalan, asa malua sandok bangso Israel, hombar tu na tarsurat: "Na ro ma sian Sion Sipalua; tamparonna ma hajahaton sian Jakkob!"

²⁷ "Jala on ma padanhu dohot nasida, molo dung hubuat angka dosanasida."

²⁸ Asa marningot barita na uli i, musu do nasida ala hamu; alai mangihuthon pamilliton

i, angka haholongan do nasida ala angka ompu i.

²⁹Ai ndang dipatait Debata angka silehonlehonna nang panjouonna i.

³⁰Ai najolo ndang sioloi Debata hamu (sipelebegu), gabe dapotan asi ni roha hamu anggo nuaeng, hinorhon ni na so mangoloi i nasida (Israel).

³¹Songon i ma nasida: Nandang pangoloi nasida saonari; anggiat siasian nang nasida musengani, hinorhon ni asi ni roha na tu hamu i.

³²Ai naung dipasahat Debata do saluhutna tu roha na so mangoloi, asa asianna muse saluhutna.

³³(II.) Bagasna i, antong, hamoraon, hapistaran dohot parbinotoan ni Debata! Na so hasigatan do angka uhumna jala na so habogasan do angka dalanna!

³⁴Ai ise dung umboto roha ni Tuhan i? Ise manuturi Ibana?

³⁵Ise mangalehon parjolo tu Ibana, asa dibalos tusi?

³⁶Ai sian Ibana do saluhutna ro, marhitehite Ibana jala marhapatean tu Ibana do sasudena i! Di Ibana ma hasangapon salelenglelengna! Amen.

12¹(I.) Na huapoi ma hamu, ale angka dongan, marhitehite asi ni roha ni Debata: Pasahat hamu ma dagingmuna bahen pelean na mangolu, na badia, na

hinalomohon ni Debata; i ma hadaulaton ni na marroha.

²Jala unang gabe sarombang hamu dohot portibi on; alai gabe imbaru ma hamu, dung muba pingkiranmuna, asa tau hamu manimbangi lomo ni roha ni Debata, i ma na uli, na hinalashonna dohot na sun denggan.

³Ai marhite sian asi ni roha na nilehonna tu ahu, hupaingot ma ganup hamu: Unang ma torbang rajumi hamu dirimu, lobi sian na patut; alai intap ni na tama ma parrohaonmuna: Ganup marguru tu godang ni haporseaon na tinurpukkon ni Debata tu ibana.

⁴Umpamana: Torop do ruas di dagingta, alai ndada saulaon ruas i sude:

⁵Songon i do hita: Torop sadaging di bagasan Kristus, alai ruas be do hita sama hita.

⁶Ganup manjalo silehonlehon marguru tu ragam ni asi ni roha na tinurpukkonna tu hita: Ia panurirangon, naeng ma mardomu tu haporseaon.

⁷Ia ulaon marhobas, ba ulaon marhobas ma; ia haguruon, i ma!

⁸Ia pangapoion, i ma; ia na mangasii, sian bulus ni roha ma; ia na manguluhon, marringgas ni roha ma; ia na marbasabasa, sian las ni rohana ma!

⁹Unang ma marpangansi holong ni roha i!
Hagigihon hamu ma na jat; pareak hamu ma
na denggan!

¹⁰Ingot hamu ma holong ni roha sama
dongan Kristen! Masijolojoloanan ma hamu
masipasangapan!

¹¹Unang sumurut ringgas ni rohamuna!
Partondi na girgir ma hamu! Oloi hamu ma
Tuhan i!

¹²Marlas ni roha ma hamu mangkirim!
Marbenget ni roha ma di haporsuhon!
Jugulhon hamu ma tangiang!

¹³Antoi hamu ma na hasea di angka na
badia! Haringkothon hamu ma partamueon!

¹⁴Pasupasu hamu ma angka na paburuburu
hamu; pasupasu ma antong, unang bura i!

¹⁵Marlas ni roha ma hamu rap dohot angka
na marlas ni roha, jala tangis ma hamu rap
dohot angka na tangis!

¹⁶Sada ma rohamu sama hamu: Unang
hatimboon pingkiri hamu, alai patutoru hamu
ma rohamu tu haserepon; unang parbisuk
hamu di rohamu!

¹⁷Unang baloshon hamu na jat alo ni na jat;
ringkoti hamu ma na denggan di jolo ni halak
saluhutna!

¹⁸Molo tarbahen, intap na tarpatupa hamu,
tiop hamu ma dame maradophon halak
saluhutna!

¹⁹Hamu, angka na hinaholongan, unang
hamu marlulu; pasahat hamu ma rimas

i (tu Debata), ai tarsurat do: "Di Ahu do pamaloston, Ahu pe mamaloshon, ninna Tuhan i."

²⁰Onpe, jumpa male musum, lehon ibana mangan; jumpa mauas ibana, painum! Ai songon na pagukgukkon gara do ho tu atas uluna, anggo dibahen ho songon i.

²¹Unang ma talu ho dibahen hajahaton; alai taluhon ma hajahaton i marhitehite na denggan!

13¹(I.) Unduk ma ganup di panggongomi na marsahala; ai ndang adong sahalana, ia so sian Debata, Debata do mangaturhon nasida.

²Asa na mangalo aturan ni Debata do na mangalo panggongomi i. Alai na mangaithon uhum tu dirina do na mangalo i.

³Ai angka siula hajahaton do patut mangkabiari panggongomi, ndada angka siulahon na denggan. Na denggan ma ulahon, asa unang pola habiaranmu panggongomi i, asa dapot pujipujian ho tahe sian nasida.

⁴Suruan ni Debata do nasida, laho manumpak ho. Alai molo diula ho na jat, patut ho tahutan, ai ndada gaitgait podang na niusungna i. Suruan ni Debata do nasida, mangkonahon uhum tu siulahon hajahaton.

⁵Dibahen i patut marunduk ni roha hita; ndada nionjar ni biar mida rimasna, tung sinuru ni roha i do.

⁶Ala ni i garar hamu ma nang beo i, ai parhobas ni Debata do nasida; tusi do nasida disuru.

⁷Tu ganup ma lehon hamu na tama tungguonna: Beo tu na patut manjalosa, sohe tu na ture hasahatanna, biar tu na tama habiaran, hormat tu na talup hormatan.

⁸(II.) Unang marutang hamu manang tu ise, dungkon ni ruhut masihaholongan; ai na mangkaholongi dongan, i do manggohi patik i.

⁹Ai na nidok ni patik i: "Unang ho mangalangkup! Unang ho mambunu! Unang ho mananko! Unang marpangkaliangi roham!" Ro di nasa patik na asing, on do pamusatanna: "Haholongi donganmi songon dirim!"

¹⁰Ia parholong ni roha, ndang diulahon na jahat tu angka dongan; asa haholongon ni roha i do tutu hagogok ni patik i.

¹¹(III.) I ma ringkoti hamu, ala diboto hamu tingkina: Ai naung dapot do ombasna, laho hehe sian na modom; ai nunga jumonok haluaonta nuaeng, sian uju gabe porsea hita.

¹²Na salpu ne ma borngin, na jonok nama arian. Antong, tatanggali ma angka ulaon haholomon; tasolukkon ma angka sinjata hatiuron!

¹³Badia ma hita marpangalaho songon na patut arian, unang masalpuhu parmanganon dohot parminumon, unang marharorangan

dohot margadombus, unang marbada dohot mangiburu!

¹⁴Alai solukkon hamu ma Tuhan Jesus Kristus; jala unang ma sarihon hamu dagingmuna laho manungguli hisaphisapna.

14¹(I.) Anju hamu ma na gale marhaporseaon, unang uhumuhumi hamu pingkirannasida!

²Pos do roha ni na sada on, laho manganhon nasa ragam ni sipanganon; ai na gumale i, ingkau rata sambing do dipangan.

³Unang ma hu roha ni na manganhonsa mida na so manganhonsa; jala na mangorom, unang ma dihumuhumi donganna na manganhonsa, ai naung dijangkon Debata do ibana.

⁴Ai ise do ho, umbahen na dihumuhumi ho anak somang ni na leban? Mandapot di tuanna do ibana, manang na hot, manang na tinggang. Alai hot do ibana, ai tarpahot Tuhan i do ibana.

⁵Ia di roha ni na deba, marhasurungan do ari on sian ari an; ia di roha ni na asing, dos be do angka ari i. Asal ma gomos pingkiranna be!

⁶Na pabadiahon ari i, di Tuhan i ma diparbadiai; na manganhon i, Tuhan i ma diingot disi, ai dipuji disi Debata; songon i do na mangorom, Tuhan i do diingot disi, laos dipuji do Debata.

⁷ Ai ganup hita ndang mangolu di dirinta, jala laos ganup hita ndang mate di dirinta.

⁸ Ai ia mangolu pe hita, mangolu di Tuhan i do; jala mate hita, mate di Tuhan i do! Asa mangolu manang mate pe hita, tong do di Tuhan i hita.

⁹ Ai i do umbahen na mate Kristus jala mulak mangolu, asa Ibana Tuhan ni angka na mate, nang angka na mangolu.

¹⁰ Ia ho, boasa uhumuhumanmu donganmu; boasa hu roham mida donganmu? Ai hita sasude pajongjongonna sogot tu adopan ni habangsa ni Debata.

¹¹ Ai na tarsurat do: "Na mangolu do Ahu, ninna Tuhan i. Marsinggang tu jolongku sogot nasa na mangolu, jala nasa parsoara marhatopothon Debata!"

¹² Asa ganup hita on, alusanta do Debata taringot tu dirinta be.

¹³ (II.) Onpe, unang be hita masiuhumuhuman! On ma tahe timbangi hamu: Unang ma binahen partuktuhan manang pargasipan tu dongan!

¹⁴ Tangkas situtu do huboto marhitehite Tuhan Jesus: Na so adong na ramun hian; alai na gabe ramun do i di na manjursu ramun.

¹⁵ Ai molo diarsahi ho donganmi ala sipanganon, ndang diparangehon ho be holong ni roha i. Unang ma mago donganmu binahen ni sipanganonmu, ai naung mate do Kristus humongkop ibana.

¹⁶Onpe, unang ma hona insak artamuna!

¹⁷Ai ndada sipanganon manang siinumon harajaon ni Debata; hatigoran do dohot hadameon dohot las ni roha di bagasan Tondi Parbadia.

¹⁸Ai molo dioloi ho Kristus disi, dihalomohon Debata do ho jala arga ho di jolma.

¹⁹Dibahen i taeahi ma na tau padamehon jala pauliulihon hita sama hita!

²⁰Unang segai na niula ni Debata, binahen ni sipanganon. Saluhutna i ias do nian, alai gabe dae do i di halak, molo targasip ibana laho manganhonsa.

²¹Tagonan, unang mangan juhut, unang minum anggur hita, unang ma taula manang dia pe, ia targasip donganmu disi.

²²Ia adong pe haporseaonmu, di ho ma i di jolo ni Debata. Martua do na so ganggu be di na tinolopan ni rohana!

²³Alai molo ganggu roha ni halak laho manganhon, hona uhum do, ala so sian haporseaon. Ai nasa na so tubu sian haporseaon, i do dosa.

15¹(I.) Alai patut do hita na margogo i manganju hagaleon ni angka na hurang gogo, jala unang ma tahasiani dirinta.

²Ganup ma hita mambahen halomoan ni roha ni dongan, laho padengganhon jala pauliulihon.

³Ai nang Kristus pe, ndang dihasiani dirina; songon na nidok ni Surat i tahe: "Toho do tu ahu reherehe ni angka na mangarehei Ho!"

⁴Ai nasa na tarsurat hian, bahen poda di hita do, umbahen na tarsurat; asa marpangkirimon hita binahen ni habengeton dohot pangapulon na di bagasan Surat i.

⁵Alai dilehon Debata, nampuna habengeton dohot pangapulon i, ma tu hamu hasadaon ni roha sama hamu mangihuthon Kristus Jesus,

⁶asa sahata sasoara hamu mamuji Debata jala Ama ni Tuhanta Jesus Kristus!

⁷Dibahen i masijangkonan ma hamu, songon panjangkon ni Kristus di hita, bahen hasangapon ni Debata.

⁸Ai on do hudok: Naung gabe pangoloi di angka na tarsunat do Kristus ala ni hasintongan ni Debata, laho pahothon bagabaga na tu angka ompu najolo.

⁹Alai dipasangap angka sipelebegu i do Debata ala ni asi ni rohana, songon naung tarsurat: "Ala ni i do pujionku Ho di tongatonga ni angka sipelebegu jala endehononku ma Goarmu!"

¹⁰Jala didok di na asing muse: "Marolopolop ma hamu angka sipelebegu rap dohot bangsona!"

¹¹Jala di na asing muse: "Puji hamu ma Tuhan i, sude hamu angka sipelebegu, jala pujion ni saluhut angka bangso ma Ibana!"

¹²Jala didok si Jesaya do muse: "Adong ma sogot urat ni si Isai, jala hehe ma na manggomgomi angka parbegu; tu Ibana ma mangkirim angka bangso!"

¹³Alai gok ma dibasabasahon Debata, nampuna pangkirimon i, tu hamu ragam ni halalas ni roha dohot dame di bagasan haporseaon, asa lam sumurung hamu marpangkirimon, pinargogoan ni Tondi Parbadia!

¹⁴(II.) Ahu pe tangkas do huboto, naung gok habasaron jala saluhut hapistaran hamu, angka dongan; na tarbahen hamu do masipasingotan.

¹⁵Alai barani do ahu mambahen saotik surat tu hamu, songon na pasingothon hamu ala ni asi ni roha na binasabasahon ni Debata tu ahu.

¹⁶Ai naung gabe parhalado ni Kristus Jesus do ahu tu halak sipelebegu, asa huulahon barita na uli ni Debata, anggiat angka sipelebegu i gabe pelean na tau jaloan, na pinarbadian di bagasan Tondi Parbadia.

¹⁷Asa na tarpuji ahu do diringku di bagasan Kristus Jesus, marningot ulaon na hujalo sian Debata.

¹⁸Ai ndang hum rohangku mangkatahon na so dihorhon Kristus di bagasan ahu, manogunogu angka sipelebegu tu pangoloion, di hata dohot di ulaon,

¹⁹ mardongan hagogoon ni tanda dohot halongongan, di bagasan hagogoon ni Tondi Parbadia. Songon i do sahat hupatubegehon barita na uli na sian Kristus, mamungka sian Jerusalem dohot luat na humaliang sahat ro di Ilirikum.

²⁰ Alai hasurunganku do huetong: Mamaritahon barita na uli i sandok di na so tarbarita dope Goar ni Kristus, asa unang ahu songon na pauli jabu diatas ojahan ni na leban.

²¹ Alai mangihuthon hata ni Surat i: "Marnida ma angka na so dapotan barita i, jala mangantusi ma angka na so dung umbegesa."

²² (III.) Laos i do mangambat ahu gumodang, umbahen na so ro ahu, manopot hamu.

²³ Alai anggo nuaeng: Nandang adong be siulaonku di angka luat i; jala nunga manang piga taon hian dihasiholi rohangku manopot hamu, laho borhat tu Hispania.

²⁴ Ai hirim do rohangku, idaonku hamu di na mamolus ahu, jala pataruonmuna ahu tusi, dung jolo sombu rohangku otik marnida hamu.

²⁵ Alai tu Jerusalem dope langkanku anggo saonari, sumarihon angka na badia i.

²⁶ Ai dipaputus huria Makedonia dohot Akaya do, mambahen pangurupion tu angka dongan na hurangan di Jerusalem.

²⁷I ma tahinasida; ai tutu utangnasida do i:
Ai molo angka sipelebegu gabe partohap di
arta partondion na di nasida, tama do antong
ditolongi angka sipelebegu nasida taringot tu
angka na ringkot di daging.

²⁸Ia dung hupaujung i jala tangkas
hupatolhas parsaulian on, borhat ma ahu sian
hamu tu Hispania.

²⁹Alai huboto do, molo ro ahu tu hamu,
mantat hagogok ni pasupasu ni Kristus do
ahu ro.

³⁰Alai huapoi ma hamu ale angka dongan,
marhitehite Tuhanta Jesus Kristus dohot
marhitehite holong ni roha ni Tondi i: Dongani
hamu ma ahu marungkil marhite sian na
tumangiangkon ahu tu Debata,

³¹anggiat dipalua ahu sian angka na tois na
di Judea jala anggiat dihalomohon angka na
badia i ulaonki na tu Jerusalem,

³²anggiat marlas ni roha ahu sahat tu hamu
hombar tu roha ni Debata, gabe rap tarapul
rohanta.

³³Didongani Debata Pardame i ma hamu
saluhutna! Amen.

16¹ (I.) Hupasahat ma tu hamu ibotonta
si Poibe, pangurupi di huria Kenkrea.

²Jangkon hamu ma nasida marhitehite
Tuhan i, songon na tama di angka na
badia, jala urupi hamu ma nasida di nasa
ulaon, jumpa ringkot urupan. Ai naung gabe

pangurupi nasida di torop halak, nang di ahu pe.

³Tabingku di si Priska dohot Akuila, angka donganku pangula di bagasan Kristus Jesus.

⁴Diseahon nasida do hosanasida humongkop ahu; gabe ndada holan ahu mandok mauiate tu nasida, tung saluhut huria na sian sipelebegu do.

⁵Tabingku nang di pungan na di bagasnasida, Tabingku di si Epenetus, haholonganki, patumonaan ni huria ni Kristus di Asia.

⁶Tabingku di si Maria na mangkalojahon hamu.

⁷Tabingku di si Andronikus dohot di si Junias, angka donganku samarga, donganku tarhurung; denggan do baritanasida di angka apostel jala na jumolo nasida di Kristus asa ahu.

⁸Tabingku di si Ampliatus, na huhaholongi di bagasan Tuhan i.

⁹Tabingku di si Urbanus, donganta di bagasan Kristus, songon i di si Stakis, haholonganki.

¹⁰Tabingku di si Apelles, naung tau nidapot di Kristus. Tabingku ma di angka dongan sabagas ni si Aristobulus.

¹¹Tabingku di si Herodion, donganku samarga, Tabingku di dongan sajabu ni si Narkissus, angka na di bagasan Tuhan i.

¹²Tabingku di si Tripena dohot Triposa, angka na olo loja humongkop Tuhan i. Tabingku di si Persis, haholongan i, naung olo loja situtu humongkop Tuhan i.

¹³Tabingku di si Rupus, na pinillit ni Tuhan i, songon i di inangna, na songon ina di ahu.

¹⁴Tabingku di si Asinkritus, Plegon, Hermes, Patrobas, Hermes, nang di angka dongan na rap dohot nasida.

¹⁵Tabingku di si Polologus, si Julia, Neriurus di ibotona i, di si Olimpasi dohot di sude dongannasida na badia i.

¹⁶Masitabian ma hamu huhut masiummaan di bagasan habadiaon! Sahat ma tabi ni sude angka huria ni Kristus tu hamuna!

¹⁷(II.) Huapoi ma hamu angka dongan: Jagahon hamu ma angka na mamingkasi parsalisian dohot pargasipan mangalo poda naung ginuruhonmuna, jala pasiding hamu ma nasida.

¹⁸Ai ndada Tuhanta Kristus dioloi nasida, butuhanasida do; jala dipaotooto nasida do angka na so umboto hajahaton, marhitehite hatanasida na uli jala na tabo di pinggol.

¹⁹Ai nunga tarbarita pangoloionmuna tu saluhutna, i do halalas ni rohangku di hamuna; alai naeng ma di rohangku marbisuk tu na denggan hamu, polin pasidingkon na roa.

²⁰ Alai tibu ma rosahan ni Debata Pardame i sibolis i tutoru ni patmuna. Didongani asi ni roha ni Tuhanta Jesus ma hamuna!

²¹ Manongos tabi tu hamu si Timoteus, donganku pangula, songon i si Lucius, Jason, Sosipater, angka donganku samarga.

²² Mandok tabi di hamu di bagasan Tuhan i, ahu si Tertius na manurathon surat on.

²³ Mandok tabi di hamu si Gayus na manamuei ahu ro di sandok huria i, songon i si Erastus hasahatan ni hepeng ni huta i, dohot si Kuartus dongan i.

²⁴ (Didongani asi ni roha ni Tuhanta Jesus Kristus ma hamu sudena! Amen.)

²⁵ Alai hasangapon ma di Debata na tuk margogoihon hamu, hombar tu barita na uli na hubaritahon dohot jamita ni Jesus Kristus. I ma hasimoon naung dipaullop, dung jolo ditabunihon sian na robi.

²⁶ I ma dipapatar nuaeng marhite sian surat ni angka panurirang mangihuthon tona ni Debata na manongtong i, jala dipabotohon tu saluhut bangso, asa dioloi be porsea.

²⁷ Di Ibana, Parbisuk mamunjung i, ma hasangapon marhitehite Kristus ro di salelenglelengna! Amen.

1 Korintus

1 ¹ (I.) Ahu surat sian si Paulus, naung tarjou gabe apostel ni Jesus Kristus, mangihuthon lomo ni roha ni Debata, rap dohot si Sostenes dongan i,

² mandapothon huria ni Debata na di Korint, angka naung gabe badia di bagasan Kristus Jesus, angka na badia, naung tarjou rap dohot saluhut na manjou Goar ni Tuhanta Jesus kristus di ganup inganan, di nasida nang di hami:

³ Asi ni roha ma di hamu dohot dame sian Debata Amanta dohot sian Tuhan Jesus Kristus i!

⁴ Mandok mauiate do ahu tongtong di Debatangku siala hamu, marningot asi ni roha ni Debata, naung nilehonna tu hamu di bagasan Kristus Jesus.

⁵ Ai naung gabe mamora do hamu di bagasan Ibana di saluhutna i, di sandok hata i, nang di sude pangantusion.

⁶ Ai naung dipahot do di hamu panindangion na taringot tu Kristus i.

⁷ Asa ndada na hurangan hamu di nasa ragam ni basabasa ni Debata; na maimaima nama hamu di hapapatar ni Tuhanta Jesus Kristus.

⁸Pahoton ni I do hamu ro di ujung, gabe so hasurahan di ari ni Tuhanta Jesus Kristus i.

⁹Haposan do Debata, naung manjou hamu tu parsaoan dohot Anakna Jesus Kristus, Tuhanta i.

¹⁰(II.) Alai huapoi ma hamu, ale angka dongan, mangasahon Goar ni Tuhanta Jesus Kristus, asa sahata hamu saluhutna, unang ma adong parbolatan di hamu; hot ma hamu binahen ni sada ni roha dohot sada ni pingkiran!

¹¹Ai tarbortik do tu ahu marhite sian pangisi ni bagas ni si Kloe taringot tu hamu angka dongan, paboa na masa di hamu parsalisian.

¹²Alai on do hudok: Adong do di hamu na mandok: Sisean ni si Paulus do ahu; na deba: Sisean ni si Apollos do ahu; na deba: Sisean ni si Kepas do ahu; na deba: Sisean ni Kristus do anggo ahu.

¹³Na binagi do Kristus i? Naung tarsilang do si Paulus ulaning humongkop hamu? Naung tubagasan goar ni si Paulus do hamu tardidi?

¹⁴Mauliate hudok, ala so adong hupandidihon di hamu, dungkon ni si Krispus dohot si Gayus.

¹⁵Unang adong na mandok, tubagasan goarhu sandiri hamu tardidi!

¹⁶Alai dohot do tahe pangisi ni bagas ni si Stepanus hupandidihon; dungkon ni i, ndang adong hupandidihon, intap ni na huboto.

¹⁷ Ai ndang disuru Kristus i ahu mandidihon, mamaritahon barita na uli do; jala i pe, ndada marhata habisuhon, unang diorui silang ni Kristus i.

¹⁸ (III.) Ai haotoon do hata na taringot tu silang i di roha ni angka na laho mago; alai hagagoon ni Debata do i di hita na dapotan haluaon.

¹⁹ Ai na tarsurat do: "Huagohon habisuhon ni na bisuk jala hubolongkon roha ni parroha."

²⁰ Didia ma na bisuk? Didia ma sibotosurat? Didia ma parsinabul di tano on? Nda gabe haotoon habisuhon ni portibi on dibahen Debata?

²¹ Ai mangihuthon habisuhon ni Debata, ndang ditanda portibi on Debata marhite dalan habisuhon; gabe dihalomohon Debata ma paluahon angka na porsea i marhitehite jamita haotoon.

²² Ai na mangido tanda do anggo halak Jahudi, jala mangalului habisuhon do ia halak Junani.

²³ Alai Kristus na tarsilang i do hujamitahon hami; pargasipan do i di halak Jahudi, haotoon di sipelebegu.

²⁴ Alai di angka na tarjou i, nang Jahudi, nang Junani, gabe hagagoon ni Debata dohot habisuhon ni Debata do Kristus i.

²⁵ Ai umbisuk do haotoon ni Debata asa angkajolma i, jala gumogo do hagaleon ni Debata asa angkajolma i.

²⁶Bereng hamu ma, angka dongan, panjouonna di hamu: Nandang pigu hamu na bisuk mangihuthon sibuk, ndang pigu na gogo, ndang pigu na sangap hian.

²⁷Alai na oto di roha ni portibi on dipillit Debata, laho pailahon angka na bisuk; jala na gale di portibi on dipillit Debata, laho pailahon na gogo.

²⁸Angka na teuk di portibi on jala na marlea dipillit Debata: Tung sisoada i do, asa soadahononna naung jongjong hian,

²⁹asa unang manenganenga agia ise jolma maradophon Debata.

³⁰Alai sian Ibana do umbahen na di bagasan Kristus Jesus hamu, ai Ibana do gabe habisuhon di hita sian Debata dohot hatigoran dohot habadiaon dohot haluaon.

³¹Asa saut na tarsurat i: "Na naeng mamuji dirina, mangasahon Tuhan i ma ibana mamuji!"

2¹(I.) Ahu pe, di na ro i ahu tu hamu angka dongan, ndada marhata hamaloon manang marhabisuhon ahu ro mamaritahon tu hamu panindangion taringot tu Debata.

²Ai hupasada do rohangku, na so tupa botoonku di tongatongamuna agia aha, dungkon ni Jesus Kristus, mandok: Barita ni silangna.

³Marhagaleon jala marhatahuton do ahu di tongatongamuna jala bobonosan situtu.

⁴ Hatangku nang parjamitaonku pe, ndada marhata habisuhon na malo mangaithon; tondi dohot hagagoon di dipapatar disi,

⁵ asa marojahan haporseaonmuna di hagagoon ni Debata, unang di habisuhon ni Jolma.

⁶ (II.) Alai habisuhon do huhatahon hami di angka naung rimpas; alai nda tung habisuhon na di portibi on, manang habisuhon ni partogi ni portibi on, angka na laho salpu.

⁷ Habisuhon ni Debata do tahe na simo jala na buni, naung dipaojak Debata hian sian mula ni mulana bahen hasangaponta.

⁸ I ma na so ditanda agia ise sian angka partogi ni portibi on; ai aut ditanda, ndang tagamon parsilangkononna Tuhan na marsangap i.

⁹ Saut do na tarsurat i: "Na so dung niida ni mata, na so dung binege ni pinggol, na so dung hehe di bagasan roha ni jolma, i do diparade Debata di angka na mangkaholongi Ibana."

¹⁰ Alai dipapatar Debata do i tu hami marhite sian Tondi i. Ai sude do didodo Tondi i, ro di angka hasimoon ni Debata.

¹¹ Ai ise jolma umboto na di jolma i, ia so tondi ni jolma na di bagasan ibana? Suang songon i: Nandang adong na tumanda na di Debata, ia so Tondi ni Debata.

¹² Alai ndang hujalo hami tondi portibi on; Tondi na sian Debata do, asa dapot

botoonnami na binasabasahon ni Debata tu hami.

¹³Jala i do huhatahon hami, ndada di bagasan hata habisuhon ni jolma na targuruhon, tung na pinodahon ni Tondi do, laho manimbangi angka partondion mangihuthon ruhut ni tondi.

¹⁴Ndang tarjalo jolma hian na sian Tondi ni Debata, ai haotoon do i di rohana; ndang tartandasa i, ai partondion do mandodo i.

¹⁵Alai saluhutna i didodo partondi; alai ndang tardodo manang ise anggo ibana.

¹⁶Ai ise ma naung tumanda roha ni Debata, asa ajaranna Ibana? Alai roha ni Kristus i do anggo di hami.

3¹(I.) Ahu pe, ale angka dongan, ndang tarbahen ahu mangkatai tu hamu uju i songon na tu angka partondi, sandok songon na tu angka pardaging do jala posoposo di bagasan Kristus.

²Susu do hupainumhon tu hamu, ndada sipanganon hian, ai ndang tarjalo hamu i uju i; gari nuaeng, gari so tarjalo hamu dope!

³Ai tong dope hamu pardaging. Ai anggo masa di hamu pangiburuon dohot parsalisian, nda pardaging hamu jala mamarangehon ruhut hajolmaon?

⁴Ai nda parroha hajolmaon hamu, molo adong na mandok: Sisean ni Paulus do ahu, jala na sada an: Sisean ni Apollos do anggo ahu?

⁵Ai ise Apollos; ise Paulus? Parhalado do nasida, parhiteanmuna gabe porsea, jala ganup hombar tu pangalehon ni Tuhan i di ibana.

⁶Ahu do manuan, Apollos do pabornokkon; alai Debata do patubuhon.

⁷Asa ndada rajuman na manuan manang na pabornokkon; Debata na patubuhon, i do!

⁸Dos do na manuan dohot na pabornokkonsa; alai ganup do manjalo upana, hombar tu pangulaonna be.

⁹Ai dongan pangula ni Debata do hami; hauma ni Debata, bagas ni Debata do anggo hamu.

¹⁰(II.) Hombar tu asi ni roha ni Debata na nilehonna i tu ahu, hupauli ojahan i, songon binahen ni pande bagas na bisuk; na asing do muse pajongjong bagas i. Alai ganup ma mamatahon, manang beha pangulaonna disi.

¹¹Ai ndang tarpauli ojahan na asing, dungkon ni naung ojak i, i ma Jesus Kristus i.

¹²Asa molo dipauli diatas ojahan i manang sere, perak, batu na arga, hau, lamlam manang durame:

¹³Gabe patar do na niula ni ganup. Ari sogot i do paullophonsa, ai papataron ni api ma i; asa api i do mangunjuni, manang beha ulaon ni ganup.

¹⁴Molo hot ulaon na pinaulina i, jaloonna do upa.

¹⁵ Molo soksohanna niulana i, luangan ma ibana; malua do nian anggo ibana, alai songon na nienet sian api nama.

¹⁶ (III.) Nandang diboto hamu: Joro ni Debata hamu, jala Tondi ni Debata maringanan di bagasan hamu?

¹⁷ Agohonon ni Debata do na mangagohon joro ni Debata, ai na badia do joro ni Debata; i ma hamu.

¹⁸ Unang adong na paotootohon dirina. Molo adong dietong na bisuk di tongatongamuna di portibi on, gabe na oto ma ibana jolo, anggiat gabe na bisuk muse.

¹⁹ Ai anggo di jolo ni Debata haotoon do habisuhon ni portibi on, ai tarsurat do: "Ditangkup do angka na bisuk di bagasan angkalnasida."

²⁰ Jala muse: "Diboto Tuhan i do, na so marniula pingkiran ni angka na bisuk!"

²¹ Asa unang ma adong na manenganengahonjolma, ai sasudena i di hamu do.

²² Manang Paulus, Apollos, Kepas, hasiangan on, hangoluan, hamatean, na masa nuaeng dohot na songgop sogot pe, saluhutna do di hamu.

²³ Alai di Kristus do hamu, jala di Debata do anggo Kristus.

4¹ (I.) Dirajumijolma i ma hami: Parhalado ni Kristus jala juarabagas ni angka hahomion ni Debata.

²Jumolo dipangido di angka juarabagas; naeng haposan nasida jumpang.

³Otik do i huetong, anggo hamu manang rapot paruhuman ni jolma manguhumi ahu; ahu pe, ndang huuhumi diringku.

⁴Ai ndang adong salangku, anggo na huboto; alai ndada gabe pintor ahu hinorhon ni i. Tuhan i do manguhumi ahu.

⁵Dibahen i, unang hamu manguhumi di na so tingkina tagan so ro Tuhan i; patiuronna do na buni di na holom, jala papataronna do tahitahi ni roha. Disi ma dapotan pujipujian ganup sian Debata.

⁶(II.) Alai tu ahu dohot tu si Apollos huaithon hata ondeng, ala ni hamu angka dongan, asa marhite sian hami guruhononmuna: Unang nilobian na tarsurat i; unang dipaburnang na deba dirina mandongani na sada, maralohon na sadanari.

⁷Ai ise mangaliga ho; jala aha do adong di ho na so jinalom? Alai molo na ripe manjalo ho, aha ma manenganenga ho, songon na so manjalo!

⁸Nunga mahap hamu, nunga mamora. Nunga raja hamu, so pola marhitehite hami. Aut ma nian gabe raja hamu, asa dohot hami raja raphon hamu!

⁹Ai didok rohangku do, dipatindang Debata hami apostel gabe parpudi, songon naung pinasahat tu hamatean, pola gabe

sitotonduran do hami di portibi on dohot di angka pardisurgo, nang di jolma pe.

¹⁰Na oto do hami ala ni Kristus; anggo hamu, angka na marroha do di bagasan Kristus. Angka na gale hami; hamu angka na gogo. Angka na pinarsangapan hamu; hami angka na lea.

¹¹Ro di na sangombas on, rapar hami jala mauas, marsaemara jala digosagosa do hami, so maringan na hot.

¹²Huhalojohon hami mangulahon tangannami sandiri. Diinsahi hami, mamasumasu hami; dilelei hami, manaonnaon do hami;

¹³diparoaroa hami, manglehelek do hami. Hira gabe rapanrapan ni portibi on do hami, apusapus ni saluhutna do ro di nuaeng.

¹⁴(III.) Ndada laho pailahon hamu, umbahen na husurathon angka ondeng, na laho paingot hamu do, songon anakkonku na hinaholongan.

¹⁵Ai nang pe adong saloksa pangajari di hamu marhitehite Kristus, ndang haru piga ama; ai ahu do manubuhon hamu di bagasan Kristus Jesus, marhite sian barita na uli.

¹⁶Dibahen i huapoi hamu: Gabe sitiru ahu ma hamu!

¹⁷Ala ni i do husuru tu hamu Timoteus, anakkonku, haholongan jala haposan ni rohangku marhitehite Tuhan i, asa ibana paingot hamu di angka dalanku na

marhitehite Kristus Jesus, hombar tu na huajarhon di nasa huria.

¹⁸Alai dipaburnang deba do dirina, songon na so saut be ahu ro mandapothon hamu.

¹⁹Alai gira do ahu ro tahe manopot hamu, anggo lomo roha ni Tuhan i; jala tandaonku ma disi gogo ni angka na paburnang dirina, ndada hatanasida.

²⁰Ai ndada di bagasan hata harajaon ni Debata, di bagasan hagogoon do!

²¹Dia do dipangido rohamuna: Marlinsinglinsing ahu ro manopot hamu manang marholong ni roha jala martondi na lambok?

5¹ (I.) Tarbege do, masa parmainanon di hamu; jala gari di sipelebegu, gari so masa sisongon i, pola diparjolma nioli ni amana.

²Tong dipatimbo hamu do dirimu; nda balik marsak ma nian hamu, asa pinabali sian tongatongamuna na mangulahon na songon i!

³Ai anggo ahu, nang holang pamatangku, di tongatongamuna do ahu mangihuthon partondion: Nunga songon na di tongatongamuna ahu, manguhum na mangulahon sisongon i:

⁴Marhitehite Goar ni Tuhan Jesus, di na pungu hamu dohot tondingku, mardongan hagogoon ni Tuhanta Jesus.

⁵Pasahaton ibana tu sibolis, laho mangago dagingna, anggiat malua tondina di ari ni Tuhan Jesus.

⁶(II.) Nandang denggan baritamuna. Nandang diboto hamu: Otik pe na asom i, diasomi do sude na niudi i?

⁷Ias ma pabali hamu asom naung leleng i, asa na niudi na imbaru hamu, ai ndang na niasoman hamu. Ai nunga pola dibunu Birubiru paska humongkop hita, i ma Kristus.

⁸Onpe, marpesta ma hita di bagasan hapolinon dohot hasintongan, unang ma marhitehite pangasomi hajahaton jala haroaon naung bari.

⁹Nunga husurathon tu hamu: Na so jadi saor hamu dohot angka parmainan.

¹⁰Nandang hudok sude parmainan na di portibi on ro di angka parangat dohot pandobo dohot sioloi ajiajian; aut i, ingkon ruar nama hamu sian portibi on.

¹¹On do tahe hudok di surat i: Na so jadi saor hamu dohot halak na targoar dongan, hape parmainan do ibana, manang parangat, manang sioloi ajiajian, manang panginsahi, manang siparmabuk, manang pandobo pe; gari mangan rap dohot sisongon i, gari so jadi.

¹²Ai marhua ma ahu manguhum angka na di ruar (ni huria; nda angka na di bagasan siuhumonmuna!)

¹³Uhumon ni Debata do angka na di ruar. Pabali hamu ma siparjahat i sian tongatongamuna!

6¹(I.) Adong do hape di tongatongamuna na marparkaro dompak donganna, gabe hum ibana maruhum tu angka sipargeduk, ndada tu angka na badia!

²Ndang diboto hamu: Uhumon ni angka na badia do sogot portibi on? Jala molo uhumonmuna portibi on, ndang tuk hamu manguhum siotihotik i?

³Ndang diboto hamu: Hita manguhum sogot angka surusuruan; lam hata ugasan tano on ma!

⁴Hape jumpa adong di hamu parkaro taringot tu ugasan tano on, dipauhumhon hamu i tu angka na marlea di huria!

⁵Na pailahon hamu do hatangkon: Na so adong huroha di hamu na marroha, nanggo sahalak, na tarbahen manguhum dongan sama dongan?

⁶Na marparkaro do hape dongan sama dongan, jala di jolo ni angka na so porsea i!

⁷Sandok hataluanmuna hian do i, anggo marparkaro hamu sama hamu. Boasa so tagonan ditaon hamu na so uhum? Boasa so tagonan dioloi hamu angatan?

⁸Hape hamu sandiri do mangarupa jala mangangati, pola tu angka dongan!

⁹Na so diboto hamu do: Ndang sitean harajaon ni Debata anggo angka sipargeduk?

Unang hamu lilu: Ndang sitean harajaon ni Debata angka parmainan, angka sioloi ajiajian, angka pangalangkup, angka pangalukluhi, nang angka na marjolmahon baoa.

¹⁰Songon i nang angka panangko, angka parangat, angka siparmabuk, angka panginsahi, nang angka pandobo.

¹¹Jala angka sisongon i do hamu deba najolo; alai nunga hamu diburi, nunga hamu diparbadiai jala dipintori marhitehite Goar ni Tuhan Jesus Kristus dohot marhitehite Tondi ni Debatanta.

¹²Saluhutna do jadi di ahu, alai ndang saluhut marguna; saluhutna do jadi di ahu, alai ndang jadi patunduhon ni manang aha ahu.

¹³Tu butuha i do angka sipanganon, jala butuha i do tu angka sipanganon; alai rap pasohoton ni Debata do angka i. Alai anggo daging i, unang ma tu parmainanon; tu Tuhan i ma, jala tu daging i do Tuhan i!

¹⁴Alai dipahehe Debata do Tuhan i, laos paheheonna ma nang hita di hagogoonna i.

¹⁵Ndang diboto hamu, ruas ni Kristus do pamatangmuna? Tung pangkeonku ma angka ruas ni Kristus i bahen ruas ni siula parmainanon? Dao ma i!

¹⁶Ndang diboto hamu, naung gabe sada daging dohot boruboru na jahat, anggo

sampur tusi; ai ninna do: "Na gabe sada daging do nasida na dua i."

¹⁷Alai na padomu dirina dohot Tuhan i, gabe sada tondi do i dohot Ibana.

¹⁸Maporus ma hamu pasiding parmainanon i! Nasa dosa na niula ni jolma, dibalian ni dagingna do; alai na marmainan, mardosa di dagingna sandiri do.

¹⁹Ndang diboto hamu: Dagingmuna do joro ni Tondi Parbadia, na di bagasan hamu, naung jinalomuna sian Debata; ndada hamu nampuna dirimuna.

²⁰Ai arga do hamu ditobus: Dibahen i pasangap hamu ma Debata marhitehite dagingmuna dohot marhitehite tondimuna; ai Debata do nampuna i.

7¹ (I.) Alai taringot tu na sinurathonmuna, on ma alushu: Denggan do di baoa, unang manjama boruboru.

²Alai laho pasidingkon parmainanon i, denggan ma ganup baoa mardongan saripe jala ganup boruboru marhamulian.

³Diulahon baoa i ma na tama tu pardihutana, laos songon i parompuan i tu hamulianna.

⁴Ndang guru di parompuan i pamatangna, guru di baoa i do; suang le: Ndang guru di baoa i dagingna, guru di na niolina do.

⁵Holan sian dos ni rohamuna be jala martingki hamu masipadaoan, asa sadihari hamu martangiang; dung i masitopotan ma

muse, asa unang diunjuni sibolis i hamu, binahen ni ramun ni rohamuna.

⁶Alai hudok pe songon i, na mangkaehe do ahu, ndada na mandokkon.

⁷Alai naeng ma nian, anggo di rohangku, saluhut halak songon ahu on; alai tahe, ganup ma hombar tu na niasinirohahon ni Debata tu ibana: On tu na sada, an tu na sada.

⁸Alai on ma hatangku tu angka na so marnioli dohot tu angka boruboru naung mabalu: Denggan do nasida manongtong songon ahu on.

⁹Alai molo so harajaan nasida dirina, mardongan saripe ma; ai dengganan do mardongan saripe sian na garang.

¹⁰Alai anggo naung hot ripe, Tuhan i do mamaksa, ndada holan ahu: Na so tupa sirang boruboru i sian hamulianna.

¹¹Alai molo tung sirang, unang marhamulian be, tagonan ma domu muse dohot hamulianna hian; songon i baoa i, unang ma dipaulak dongan saripena.

¹²Ahu, ndang apala Tuhan i, mandok tu angka na asing i: Molo so porsea (so Kristen) pardihuta ni sada dongan, unang ma dipaulak, anggo na lomo roha ni parompuan manginganhon ibana.

¹³Jala molo so porsea (so Kristen) hamulian ni sada boruboru, unang ma ditadingkon, anggo na lomo roha ni baoa i manginganhon ibana.

¹⁴Ai na gabe badia do baoa na so porsea i marhitehite pardihutana, jala gabe badia do boruboru na so porsea i marhitehite dongan i. Aut unang i, ramun ma anakkonmuna; alai badia do nasida.

¹⁵Alai molo disirang na so porsea i dirina, sirang ma ibana tusi. Ndang apala marnihot baoa manang boruboru naung Kristen tu sisongon i; alai di bagasan dame dijou Debata hamu.

¹⁶Ai aha ma diboto ho hian, ale inang, manang na tarpangolu ho baoa i; ho pe, amang aha ma diboto ho, manang na tarpangolu ho boruboru i?

¹⁷Antong, ganup ma marpangalaho songon na sinagihon ni Tuhan i tu ibana, songon uju na dijou Debata ibana. Laos i do huaturhon di saluhut huria i.

¹⁸Anggo naung tarsunat, di na tarjou ibana, unang ma dipauba; na so tarsunat di na tarjou i ibana, unang ma dipasunathon.

¹⁹Ndang arga parsunaton, nang bangko hian; na mangaradoti patik ni Debata, i do!

²⁰Ia songon i ganup, di na tarjou i ibana, laos songon i ma ibana tongtong.

²¹Anggo hatoban ho, di na tarjou i ho, unang holsohon i; tagonan ho mian disi, nang pe tarbahen ho malua.

²²Ai hatoban na tarjou marhitehite Tuhan i, anakmata di Tuhan i do i; songon i anakmata na tarjou i, hatoban ni Kristus do i.

²³Arga do hamu ditobus; unang ma olo hamu parhatobanon ni jolma!

²⁴Ia i ganup, di na tarjou i ibana, ale angka dongan, laos i ma ibana tongtong maradophon Debata.

²⁵Alai anggo taringot tu angka na marbaju, ndang adong nian hujalo patik ni Tuhan i; alai pingkiranku ma hulehon, songon halak na tau haposan, ala na niasian ni Tuhan i ahu.

²⁶On do pingkiranku: Ala tingki hasusaan nuaeng, denggan ma songon i halak.

²⁷Anggo naung tarihot ho tu boruboru, unang lului haluaon; anggo malua ho sian parjolmaon, unang lului boruboru.

²⁸Alai laho mangoli ho, ndang mardosa ho disi; jala molo marhamulian na marbaju i, ndang mardosa ibana disi; alai marniae di daging do nasida. Alai naeng huolani do hamu nian.

²⁹Alai on ma hudok, ale angka dongan: Gogot nama tingkina. Songon on ma tu joloan on: Songon na so marjolma ma angka naung marjolma i.

³⁰Jala songon na so tangis ma angka na tumatangis i. Jala songon na so marlas ni roha ma angka na marlas ni roha i: Jala angka na manuhor, songon na so umpeopsa.

³¹Jala angka na marhaseangkon portibi on, songon na so marhaseangkonsa situtu, ai na mamolus do rumang ni portibi on.

³²Alai naeng ma di rohangku, unang marholso ni roha hamu. Disarihon na so marripe i do na ringkot di Tuhan i, asa dihalomohon Tuhan i ibana.

³³Na marripe i sumarihon angka na di tano on, naeng halomoan ni boruboru i, jala mardua roha do ibana.

³⁴Nang boruboru na so marhamulian, nang na marbaju, na ringkot di Tuhan i do disarihon, asa badia dagingna nang tondina; alai naung marbagas i sumarihon angka na di tano on, naeng halomoan ni hamulianna.

³⁵Alai hudok pe songon i, laho mambahen na hasea di hamu do, ndada manjailhon tali rambang tu hamu; alai asa marruhut na ture hamu jala manongtong di Tuhan i, so hariboriboan.

³⁶Alai molo na hurang tama di rohana, pasombuonna songon i boruna na marbaju, anggo naung tangastangasan, ingkon tulus nama marhamulian, dipasaut ma lomo ni rohana, ndang mardosa ibana disi: Marbagas ma nasida.

³⁷Alai anggo naung gomos rohana jala ndang tarsosak, jadi guru dokna rohana, gabe dipaputus di bagasan rohana, mandok ramotanna nama boruna na marbaju i; denggan do na binahenna i.

³⁸Asa denggan do pambahen ni na pamuli boruna na marbaju; alai denggan do pambahen ni na so pamulihonsa.

³⁹Na tarihot do boruboru na marripe, saleleng mangolu hamulianna; alai ia dung monding baoa i, marhaluaon ma nasida muli tu halomoan ni rohana; asal ma marhitehite Tuhan i!

⁴⁰Alai sonangan do nasida, anggo di rohangku, molo songon i nama nasida; jala didok rohangku, adong do nang di ahu Tondi ni Debata.

8¹(I.) Alai anggo taringot tu juhut naung pinelehon taboto be; naung adong do parbinotoan di hita saluhutna. Na paburnangkon do parbinotoan; alai na pauliulihon do ia holong ni roha.

²Na mangarimpu, naung adong binotona, ndang diboto dope pangalaho ni parbinotoan na tama.

³Alai anggo adong na mangkaholongi Debata, i do na tinanda ni Debata.

⁴Onpe, taringot tu na manganhon juhut naung pinelehon taboto do: Nandang tutu adong begu di portibi on, jala ndang adong Debata dungkon ni Nasasada i.

⁵Ai adong do tutu digoar debata di ginjang nang di tano on pe, ai lan do dipardebata jala lan do dipartuhan.

⁶Alai anggo di hita holan sada do Debata, Ama i, parmulaan ni saluhut, jala hita do tu Ibana; jala sada do Tuhan, i ma Jesus Kristus, parhitean ni saluhutna, jala hita marhitehite Ibana.

⁷Alai ndang apala saluhutna nampuna parbinotoan i. Adong dope na manganhonsa songon pelean situtu, ala somal diparhatutu begu, gabe ramun rohanasida, na hurang togu i.

⁸Alai ndang dipajonok sipanganon hita tu Debata: Nandang na surut hita, anggo so tapangan, jala ndang ummangat hita, nang tapangan.

⁹Alai jaga ma hamu, so tung gabe partuktuhan di angka na gale i huasomuna.

¹⁰Ai adong ma na marnida ho, nampuna parbinotoan ondeng, hundul marsipanganon di parsombaonan ni begu: Nda niapoan ma disi rohana na hurang togu i, manganhon juhut na pinelehon?

¹¹Gabe mago maon binahen ni parbinotoanmi dongan, na gale i dope na hinophop ni hamamate ni Kristus!

¹²Alai molo songon i hamu mardosa dompak angka dongan jala digugai hamu rohanasida na hurang togu i, na dompak Kristus do hamu mardosa disi.

¹³Dibahen i, antong, anggo targasip donganki siala sipanganon, na so tupa be panganonku juhut salelengna i, asa unang targasip donganki hubahen.

9¹(I.) Nda anak mata do ahu? Nda apostel ahu? Nda nunga huida Jesus, Tuhanta i? Nda hamu ulaonku di bagasan Tuhan i?

²Molo so apostel ahu di na leban, sandok apostel do ahu anggo di hamu; ai hamu do sahap ni haapostelonki di bagasan Tuhan i!

³On do paralusonku tu angka na ro manangkasi ahu:

⁴Na so marhuaso do hami mangan dohot minum?

⁵Nda marhuaso hami mardongan saripe jala mamboan nasida, songon binahen ni angka apostel na asing dohot angka anggi ni Tuhan i, nang si Kepas pe?

⁶Ai holan ahu dohot si Barnabas do, na so jadi malua sian na mulaulaon i?

⁷Tung ise ma dung disuru soldadu, so margaji? Tung ise ma pauli porlak anggur, so dipangan sian parbuena? Ise ma marmahan dorbiala, so manganhon susu ni pinarmahanna?

⁸Ai hasomalan ni jolma do na hutaringoti disi; nda laos i didok patik i?

⁹Ai na tarsurat do di patik ni si Musa: "Ndang patut huntamonmu baba ni horbo, uju mardege!" Horbo do pinasarisari ni Debata?

¹⁰Nda sandok tu hita hatana? Ai sumarihon hita do tarsurat: Patut mangkirim paninggala di na maninggala i, jala mangkirim pardege di jambarna.

¹¹Molo husuan hami tu hamu angka partondion, tung godang ma i goaron, molo hugotil hami sian hamu na hasea tu daging?

¹²Gari na leban, gari martohap di gogomuna, nda lam hami ma nian! Alai ndang

na hupangasahon hami huaso i, sandok hupatalu hami do rohanami, asa tung unang huambat hami barita na uli na sian Kristus.

¹³Nda diboto hamu, angka na mangula di bagas joro mangan sian joro i, jala angka na marhalado di langgatan i, marsaulihon sian i?

¹⁴Laos songon i do diaturhon Tuhan i tu angka parbarita na uli: Naeng sian barita i hangoluannasida.

¹⁵Alai ndang dung hupangke sada sian angka i; jala ndada husurathon on, asa masa songon i tu ahu, ai tagonan do ahu mate, asal unang disegai hasurunganki.

¹⁶Ai molo huhatahon barita na uli i, ndang hasurunganku i; utangku hian do i. Marjea do ahu, aut so hubaritahon i!

¹⁷Ai molo huula i sian lomo ni rohangku, marupa ma ahu; alai nang sian na so tarjua, tong do diampehon tu ahu tohonan i.

¹⁸Asa aha do upangku? On do: Di na mamaritahon barita na uli i ahu, so hurugii hamu, asa unang hupangasahon huasongku di barita na uli i.

¹⁹Ai atik pe malua ahu sian saluhutna i, hupatutoru do diringku tutoru ni saluhutna, asa tumorop nasida hutogihon.

²⁰Na gabe songon Jahudi do ahu di angka Jahudi, anggiat hutogihon angka Jahudi. Di angka na ginomgoman ni patik i gabe songon na ginomgoman ni patik i ahu: Nang so tutu

ginomgoman ni patik i ahu, anggiat hutogihon angka na ginomgoman ni patik i.

²¹Asa hutogihon angka na so marpatik, gabe songon na so marpatik ahu di angka na so marpatik i; alai ndada so marpatik ahu di jolo ni Debata, tung ginomgoman ni patik ni Kristus i do ahu.

²²Di angka na gale gabe songon na gale do ahu, asa hutogihon angka na gale i. Hupahombar do diringku tu sasude, anggiat hupalua nango deba.

²³Alai saluhutna i huula ala barita na uli, anggiat dohot ahu partohap disi.

²⁴Nda diboto hamu: la angka na maradu, saluhutna i do nian marlojong; alai sada do manjalo uli. Burju ma hamu marlojong, asa dapotan hamu!

²⁵Alai nasa na maradu, diorom do saluhutna i; angka ondeng tutu, asa dijalo tumpal na laho salpu, alai di hita na so olo salpu.

²⁶Ia ahu, antong, ndada songon na so martujuan parlojongonku, nda tung songon na manampul alogo paraloonku.

²⁷Hupukpuhi do dagingku jala hupatunduk, asa unang angka na asing hujamitai, hape ahu gabe bolong.

10¹(I.) Ai naeng ma tangkas botoonmuna di rohangku, ale angka dongan: la angka amanta najolo, saluhut do nian nilinggoman ni ombun i, jala saluhut do nasida mamostang laut i.

²Jadi saluhut do nasida tardidi tubagasan si Musa, di bagasan ombun i dohot di laut i.

³Jala sada do sipanganon partondion dipangan nasida saluhutna.

⁴Laos sada do siinumon partondion diinum nasida saluhutna, ai diinum nasida do sian dolok batu partondion na mangihut i (Kristus do dolok batu i).

⁵Alai toropan do nasida ndang dihalomohon Debata: Ai rage do nasida di halongonan i.

⁶Alai gabe tudosan panjoraan ma i tu hita, asa unang tahahisaphon na roa, songon nasida na marhisap i.

⁷Jala unang ma sioloi debata na leban hamu, songon na deba sian nasida, suman tu na tarsurat i: "Hundul do bangso i mangan dohot minum, dung i hehe ma nasida manortor."

⁸Unang ma hita marmainan, songon na deba sian nasida na marmainan i, gabe mate satongkin duapulutolu ribu di na sadari i.

⁹Unang taunjuni Tuhan i, songon deba sian nasida na mangunjuni i, gabe angka ulok i mangagohon nasida.

¹⁰Unang ma hamu marungutungut, songon deba nasida na marungutungut i, gabe diago pangago i nasida.

¹¹Tudutudu do i na mangonai tu nasida; lumbalumba tu hita do i, umbahen na tarsurat, ai tu hita do jumonok ajal ni angka ari.

¹²Onpe, ganup na jongjong di rohana, dimatahon ma, unang tinggang!

¹³Holan pangunjunan na patut dijolma do naung mangonai tu hamu. Haposan do Debata, ndang loasonna hamu unjunan lobi sian gogomuna; Ibana na parohon pangunjunan i, laos Ibana do mambahen hapateanna, asa tartaon hamu.

¹⁴(II.) Dibahen i, ale angka haholongan, maporus ma hamu pasiding parsombaon tu angka begu!

¹⁵Tu angka parroha do hatangku. Hamu ma manimbangi na hudok.

¹⁶Siinumon pasupasu i, na tahamauliatehon, nda pars Moran ni mudar ni Kristus do i? Roti na taponggoli i, nda pars Moran ni daging ni Kristus do i?

¹⁷Ala sada do roti i, gabe sadaging do hita torop, ai saluhut do hita partohap di roti na sasada i.

¹⁸Bereng hamu ma Israel hian: Nda partohap di langgatan i do angka na manganhon pelean i?

¹⁹Naung arga do juhut na pinelehon manang margogo do begu; i do na hudok disi?

²⁰Nda on do tahe: Na pinelehonnasida, ndada tu Debata dipelehon, tu begu i do. Alai ndang lomo rohangku, hamu saor tu angka begu!

²¹Ndang tarinum hamu sian panginuman ni Tuhan i huhut sian panginuman ni angka

begu! Ndang tarbahen hamu partohap di langgatan ni Tuhan i huhut di langgatan ni angka begu!

²²Toisanta ma Tuhan i? Tung gumogo ma hita sian Ibana?

²³(III.) Saluhutna jadi do, alai ndang saluhut marguna; saluhutna jadi do, alai ndang saluhut patoguhon.

²⁴Unang ma masiringkoti na di ibana, na di dongan i ma!

²⁵Pangan hamu ma sian saluhut na ginadis di parjagalan i, unang nirisihan, ala ni panggora ni roha i!

²⁶Ai: "Gok di Tuhan i do tano on ro di isina!"

²⁷Anggo dipio na so porsea (na so Kristen) hamu jala dioloi hamu laho, pangan hamu ma sian saluhut na pinatedekna tu jolomuna; unang nirisihan, ala ni panggora ni roha i!

²⁸Alai molo tung adong na mandok tu hamu: Juhut na pinelehon do on; unang pangan hamu sian i, ala ni halak i na paboahonsa dohot ala ni panggora ni roha i!

²⁹Alai ndada panggora ni roha na di ho na hudok disi, na di dongan i do; ai tung hahuaon ni panggora ni roha ni halak ma ahu, naung marhaluaon i!

³⁰Ai molo mauliate rohangku manjangkonsa, aha ma pola insahan ahu, ala ni naung huhamauliatehon i!

³¹ Onpe, na mangan manang na minum hamu, manang dia pe diula hamu: Bahen hamu ma saluhutna i, pasangaphon Debata!

³² Unang bahen hamu partuktuhan di Jahudi, manang di halak Junani, manang di huria ni Debata pe!

³³ Songon ahu on: Hubuat do roha ni saluhut di na sasude, ai ndang hulului na marguna di ahu, na marguna di na torop i do, anggiat malua nasida.

11 ¹ (I.) Tiru hamu ma ahu, songon ahu na maniru Kristus!

² Alai hupuji do hamu, ala sandok diingot hamu ahu jala hot ditiop hamu aturan, songon na hupasahat i tu hamu.

³ Alai naeng ma botoonmuna di rohangku: Kristus i do ulu ni ganup baoa, baoa i do ulu ni boruboru; alai Debata do ulu ni Kristus i.

⁴ Nasa baoa, na martahuluk laho martangiang manang manurirangi, mangaleai uluna.

⁵ Alai ganup boruboru, na martangiang manang manurirangi, so dihungkupi uluna, dileai do uluna, ai tudoshon na jinambak do nasida.

⁶ Ai molo so dihungkupi boruboru i uluna, atena ma digustingi! Alai molo na hansas di boruboru ginustingan manang jinambak, dihungkupi ma antong!

⁷ Anggo baoa, ndang pola dihungkupi uluna, ai sumansuman dohot hasangapon ni Debata

do ibana. Alai boruboru i, hasangapon ni baoana do.

⁸Ndada sian boruboru baoa i; sian baoa do boruboru i.

⁹Jala ndada ala boruboru i tartompa baoa i, boruboru i do ala ni baoa.

¹⁰Ala ni i, patut marsahala do boruboru i diatas uluna, ala ni angka surusuruan i.

¹¹Asal ma di bagasan Tuhan i nasida, ndada boruboru i sopadohot baoa i, songon i nang baoa i sopadohot boruboru i.

¹²Ai marharoroan boruboru i sian baoa, laos songon i do baoa sian boruboru i; alai sian Debata do saluhutna i.

¹³Timbang hamu ma di hamu, manang na tama boruboru martangiang tu Debata, so dihungkupi uluna.

¹⁴Nda nang bangko hian mamodahon tu hamu, hurang tama di baoa marobuk ganjang?

¹⁵Nda hasangapon i di boruboru, marobuk na ganjang; ai obuk na ganjang i do dilehon tu nasida bahen pangkuphupi.

¹⁶Alai molo adong na giot marbada di rohana, ndang i adat di hami, nang di angka huria ni Debata pe.

¹⁷(II.) Alai laho mangudut na mangatur, adong do na so huhalashon: Nandang mangkorhon tu na denggan parpunguanmuna; tu na roa do!

¹⁸Parjolo hubege, jala huparhatutu i deba:
Marbolatbolat hamu jumpa marpungu.

¹⁹Ndang tarbahren so adong di
tongatongamuna parbolatan, asa tandap
parroha na tau na di hamu.

²⁰Jala molo marpungu hamu, ndada na tutu
songon na manganhon parpadanan ni Tuhan i
hamu.

²¹Ai di na mangan hamu, marsisoro
sipanganonna be, gabe male na sada,
mabuhan na sada.

²²Na so adong do jabumuna, asa disi hamu
mangan jala minum? Na hu do rohamuna
di huria ni Debata, jadi dipaila hamu angka
parhahurangan? Aha ma dohononku?
Pujionku do hamu? Ndang hupuji hamu disi.

²³Ai sian Tuhan i do hujalo jala hupasahat
tu hamu: Ia Tuhan Jesus i, di borngin i, uju
tarjehe Ibana, dibuat do roti.

²⁴Didok ma mauliate, diponggoli ma, laos
didok ma: Dagingku do on, na humongkop
hamu. Ula hamu ma i, bahen parningotan di
Ahu!

²⁵Laos songon i ma nang panginuman i,
dung salpu na mangan i; ia hatana: Padan
na imbaru i ma on di bagasan mudarhu. Ula
hamu ma songon i, bahen parningotan di
Ahu, ganup diinum hamu i!

²⁶Ai ganup dipangan hamu roti na songon
on jala diinum hamu sian panginuman on,

hamamate ni Tuhan i do binaritahonmuna
disi, rasirasa ro Ibana.

²⁷Asa molo adong na manganhon roti i jala
minum sian panginuman ni Tuhan i sian na so
tau, parsala do i di daging dohot di mudar ni
Tuhan i.

²⁸Alai ditangkasijolma i ma dirina; dung pe
i, asa dipangan sian roti i jala diinum sian
panginuman i.

²⁹Ai molo so dipandang daging i, tong do
dipangan jala diinum, i do mangalap uhum
tu dirina marhite sian na mangan dohot na
minum i.

³⁰Ala ni i do umbahen torop na gale jala na
marsahit di hamu, jala na nia naung modom.

³¹Alai molo tauhumi dirinta, ndang siuhumon
hita.

³²Alai hona ajar do hita angka na niuhuman
ni Tuhan i, asa unang hona uhum hamagoan
hita rap dohot portibi on.

³³Dibahen i, ale angka donganku:
Masipaimaan ma hamu, anggo marpungu
hamu, laho mangan!

³⁴Molo adong na male, di jabuna
ma ibana mangan, unang gabe uhum
parpunguanmuna. Dung pe ro ahu, asa
huatur angka na asing i.

12¹(I.) Alai dipangido rohangku, ale
angka dongan, naeng ma torang
botoonmuna taringot tu angka partondion.

²Ai diboto hamu do, naung hira ditogu jala disarat do hamu tu angka ganaganaan na mangungu, uju sipelebegu hamu.

³Dibahen i hupabotohon ma tu hamu: Ndang tarbahen halak, na mangkatai marhitehite Tondi ni Debata, mamburai Jesus; jala holan marhitehite Tondi Parbadia do targoar Jesus, Tuhan.

⁴Ragam do parasirohaon i; alai sada do Tondi.

⁵Ragam do ulaon (di huria); alai sada do Tuhan.

⁶Ragam do hagagoon; alai sada do Debata na mangkorhonsa di bagasan sasudena i.

⁷Alai laho manumpak do dibasabasahon jala dipataridahon Tondi i tu ganup.

⁸Ai tu na sada on dilehon do marhitehite Tondi i hata habisuhon; alai tu na sada an hata parbinotoan marhitehite Tondi na sasada i.

⁹Tu na asing muse haporseaon di bagasan Tondi na sasada i, tu na asing huaso pamalumhon di bagasan Tondi na sasada i.

¹⁰Tu na asing gogo patupahon halongangan, tu na asing panurirangon, tu na asing na mananda ragam ni tondi, tu na asing muse mangkatahon di hata na leban, tu na asing pajojorhon parhataan i.

¹¹Alai saluhutna i dipatupa Tondi na sasada i, ai asingasing be disagihon i tu ganup, guru lomo ni rohana.

¹²(II.) Umpamana: Hibul do daging i, alai torop do anggo ruasna, jala ruas na torop i manjadihon daging na sasada i; songon i do Kristus.

¹³Ai Tondi na sasada i do dipandidihon tu hita saluhutna, gabe sada daging, nang Jahudi, nang Junani, nang hatoban, nang anak mata; jala tu saluhut hita dipainumhon Tondi na sasada i.

¹⁴Ai daging i pe, ndang na sada ruasna, tung torop do.

¹⁵Tung sura ninna pat: Dibahen na so tangan ahu, ndang masuk daging ahu; tung na so masuk daging ma i ala ni i!

¹⁶Jala aut sura ninna pinggol i: Ala so mata ahu, ndang masuk daging ahu; tung na so masuk daging ma i ala ni i!

¹⁷Aut mata sandok daging i, didia ma parbinegean? Aut pinggol sandok daging i, didia ma parniangoan?

¹⁸Alai diaturhon Debata do inganan ni ganup ruas di daging i, marguru tu lomo ni rohana.

¹⁹Alai aut sura saruas i sude, beha ma daging i?

²⁰Alai nang pe torop angka ruas i, sada do daging i.

²¹Alai ndang tardok mata tu tangan: Nandang tu dihangku ho! Nang ulu mandok pat: Nandang tu dihangku hamu!

²²Muba do tahe ringkot ni ruas ni daging i, angka na songon na humurang idaon.

²³Jala balik sumangap tabahen ruas ni dagingta, angka na lumea di rohanta, jala tumangkas tasarihon angka na haduk hian.

²⁴Ndang pola ringkot i tu angka ruas na sangap hian. Alai dipatomu Debata do pamatang i, jala sumangap, dibahen ruas na lea hian,

²⁵asa unang marsalisi daging i, sama dirina, asa dengan masipasarisarian ruas sama ruas.

²⁶Ia mangae sada ruas, rap mangae ma saluhut ruas i; jala ia sangap dibahen sada ruas, rap marlas ni roha ma saluhut ruas i.

²⁷Alai daging ni Kristus do hamu, jala ruas hamu sama hamu.

²⁸Jala dipabangkit Debata di bagasan, huria i parjolo angka apostel, paduahon angka panurirang, patoluhon angka pangajari, dung i dibasabasahon angka hagogoon, angka silehonlehon pamalumhon, ro di pangurupion, panggomgomion dohot parhataan na leban.

²⁹Tung apostel ma nasida saluhutna, manang panurirang nasida saluhutna, manang pangajari saluhutna? Tung saluhut ma nasida parhagogoon?

³⁰Tung saluhut ma nasida margogo pamalumhon? Tung saluhut ma nasida mangkatahon di hata na asing? Tung saluhut ma nasida malo pajojorhon?

³¹ Lului hamu ma angka silehonlehon na ummangat! Jala dungkon ni i, patuduhononku dope tu hamu dalan na sumurung situtu.

13¹ (I.) Tung sura huhatahon angka parhataan ni jolma nang surusuruan pe, anggo so parholong ni roha ahu, naung songon hangsa do ahu na mangkulingkuling jala songon ogung na maruolol.

² Jala tung sura panurirangon di ahu, gabe huboto hasimoon sasudena ro di sandok parbinotoan, jala tung sura parhaporseaon situtu ahu, pola tarpaunsat ahu dolok, doshon na soada ma ahu, anggo so parholong ni roha ahu.

³ Jala tung sura hubasabasahon saluhut artangku jala hupasahat dagingku, asa ditutung, tung na so marguna i di ahu, anggo so parholong ni roha ahu.

⁴ Na lambas do haholongon i jala na sorta, ndang na mangiburu haholongon i, ndang tenga jala ndang dipaburnangburnang dirina.

⁵ Maradat situtu do haholongon i, ndang na ahut, ndang olo pangarimason, ndang dipajujurjujur na jahat.

⁶ Nandang las rohana mida hageduhon; alai tongtong do dihalashon hasintongan i.

⁷ Saluhut do ditanom rohana, saluhut do dihaporseai, dihirimi jala ditaon.

⁸ Nandang na olo salpu haholongon i. Ia panurirangon pasohotonna do, mansadi

do nang angka parhataan, parbinotoan pe mansohot do.

⁹Mardebadeba do parbinotoanta, jala mardebadeba do panurirangonta.

¹⁰Dung pe ro na sun denggan i, asa pasohotonna na mardebadeba i.

¹¹Saleleng dakdanak ahu, danak pangkataionku, danak parrohaonku danak pingkiranku; alai disi tang ahu, hubolongkon pangalaho na danak.

¹²Anggo nuaeng, semo do parnidaanta songon sian sorminan; alai sogot adop bohi be ma. Mardebadeba do parbinotoanku anggo nuaeng dope; alai anggo disi, torus ma panandaonku, songon naung tinandana ahu.

¹³Asa tolu do na hot: I ma haporseaon, pangkirimon dohot haholongon; alai haholongon do na umbalga i.

14¹(I.) Eahi hamu ma haholongon i! Ringkoti hamu ma angka partondion; alai na rumingkot, i ma na manurirangi!

²Ai na marhata na leban ndada donganjolma dipanghulingi, Debata do; ai ndang dapot antusan i, hahomion do dihatahon di bagasan tondina i.

³Alai na manurirangi i,jolma do dipanghulingi, laho pauliulihon, mangapoi jala mangapuli.

⁴Na pauliulihon dirina do na marhata na leban, alai huria i do dipauliuli na manurirangi.

⁵Las do rohangku nian, anggo saluhut hamu marhata na leban; alai ummarga, do na manurirangi, ai sumurung do na manurirangi asa na marhata na leban, anggo so laos dipajojor, laho pauliulihon huria i.

⁶Asa, ale angka dongan, molo tung ro ahu manopot hamu jala holan marhata na leban ahu, aha ma guna ni i di hamu, anggo so huhut huhatahon tu hamu pangungkapon manang parbinotoan manang panurirangon dohot poda.

⁷Umpamana: Uninguningan, angka na marsoara, nang so mangolu, songon tulila manang hasapi; anggo samak soarana, songon dia ma dapot botoon, na tinulilahon manang na hinasapihon?

⁸Songon sarune rupani; anggo so tangkas soarana, tung adong ma na marhobas tu tongtangan?

⁹Songon i ma hamu di parhataan i: Anggo so tangkas parhataanmuna, songon dia ma dapot antusan na hinatahon? Nda songon alogo mamolus nama i!

¹⁰Torop do antong ragam ni parhataan di portibi on, angka na masiboan laguna be.

¹¹Anggo so huboto astuan ni hata i, hira so donganjolma ma ahu di roha ni na mangkatai i; ibana pe, songon na so donganjolma ma di rohangku.

¹²Songon i ma di hamu: Sapala diringkoti hamu partondion, lului hamu

ma na tau pauliulihon huria i, asa adong hasurunganmuna.

¹³Dibahen i, martangiang ma parhata na leban i, anggiat tarpajojorsa.

¹⁴Ai jumpa martangiang ahu di hata na leban, tondingku do tutu martangiang; alai so do anggo rohangku.

¹⁵Beha nama? Martangiang ma ahu di bagasan tondingku; alai naeng martangiang do ahu huhut di bagasan rohangku. Marende ma ahu di bagasan tondingku; alai naeng marende do ahu huhut di bagasan rohangku.

¹⁶Ai molo dipuji ho Debata di bagasan tondim, tung tarbahen ma dongan, na hundul di inganan ni natorop i, mandok "amen" di hata hamauliateonmi, anggo so diantusi na hinatahonmu!

¹⁷Ture do nian hamauliateonmi; alai ndang na pauliulihon i di angka dongan.

¹⁸Mauliate do rohangku tu Debata, ala na ummalo ahu marhata na leban sian hamu sudena.

¹⁹Alai anggo di huria i ahu, lasan do rohangku mangkatahon lima hata na marastuan, unang saloksa hata na leban, asa hupodai nang angka na asing.

²⁰Unang ma dakdanak hamu, ale angka dongan, anggo di parrohaon; dakdanak ma hamu taringot tu na roa, alai matoras ma hamu marparrohaon!

²¹ Tarsurat do di patik i: "Mangkatai ma ahu tu bangso on marhitehite parhata na leban jala marhite sian parsoara na asing; jala songon i pe i, tong so tangihononnasida Ahu, ninna Tuhan i!"

²² Asa tanda do angka parhataan na leban: Ndada di angka na porsea, di angka na so porsea i do; alai anggo panurirangon i, ndada di angka na so porsea, di angka naung porsea i do.

²³ Asa molo pungu sandok huria i jala sude marhata na leban, gabe bongot ma angka na so mangantusisa manang na so porsea, nda dohononnasida ma: Angka na ngongar hamu?

²⁴ Alai tung sura sude manurirangi, gabe ro na so porsea manang na so mangarti, nda dapotan poda ma ibana sian sasude, nda ajaran ni saluhutna i ma ibana?

²⁵ Gabe patar ma sihabunian ni rohana, jadi manungkap ma ibana marsomba tu Debata, jala marhatutuhon, naung tutu do Debata di tongatongamuna.

²⁶ (II.) Asa beha do, ale angka dongan? Jumpa marpungu hamu, adong do di na sada endeende, di na sada poda, di na sada pangungkapon, di na sada parhataan na leban, di na sada hatoranganna; sasudena i, laho pauliulihon huria i ma nian!

²⁷ Laho mangkatahon di hata na leban, sae ma dua manang intap tolu, jala sadasada ma; jadi sahalak ma pajojorhonsa!

²⁸Alai molo so adong na pajojorhon, mangkohom ma ibana anggo di jolo ni huria i; tu dirina dohot tu Debata ma i dihatahon!

²⁹Anggo panurirang, lehet ma dua manang tolu marsoara, angka dongan i ma manimbangi.

³⁰Alai molo dapotan pangungkapon sahalak na hundul disi, so ma anggo na parjolo i!

³¹Ai na jadi do hamu saluhutna manurirangi sadasada, asa saluhut dapotan poda dohot sipaingot.

³²Ai pangoloi do angka tondi ni panurirang di angka panurirang i.

³³Ai ndang dihalomohon Debata na gaor, dame i do! Songon na di saluhut huria ni angka na badia i,

³⁴hohom ma angka parompuan di parpunguanmuna, ai ndang patut mandok hata nasida; pangoloi ma antong, songon nidok ni patik i!

³⁵Alai molo adong sitangkasannasida, sinondukna be ma disungkun di jabu; ai subang do di boruboru, anggo tung mandok hata di jolo ni huria i.

³⁶Ai mamungka sian hamu do rarat hata ni Debata, manang holan tu hamu do i sahat?

³⁷Ganup na mandok, panurirang manang partondi ibana, diboto ma antong: Tona ni Tuhan i do naung husurathon on.

³⁸Alai molo so mananda ibana, rohana ma disi!

³⁹Onpe, ale angka donganku, ringkoti hamu ma na manurirangi, jala unang orai hamu na mangkatahon di hata na leban!

⁴⁰Asal sasudena i marruhut na denggan jala maratur!

15¹(I.) Alai naeng ma pabotohononku tu hamu, angka dongan, barita na uli, na hubaritahon tu hamu, na jinalomuna naung gabe hajongjongan muna.

²Laos i do parhiteanmuna gabe malua, namun ditiop hamu hata na binaritahon tu hamu; ia na so sandok magopo hamu porsea.

³Ai sian mulana hupasahat tu hamu na hujalo; on do: Naung mate do Kristus ala ni dosanta, hombar tu na tarsurat i.

⁴Naung tartanom do Ibana, gabe dipahehe di ari patoluhon, hombar tu na tarsurat i.

⁵Jadi dipataridahon do dirina tu si Kepas, dung i tu na sampuludua i.

⁶Dung i dipataridahon dirina sahali tu lobi lima ratus dongan; na tumorop sian angka i mangolu dope, deba do naung monding.

⁷Dung i dipataridahon dirina tu si Jakobus, dung i tu angka apostel i sudena.

⁸Alai dipudi ni saluhutna i, dipataridahon do Ibana nang tu ahu, na tardok tubu di na so tingkina.

⁹Ai ahu do na ummetmet sian angka apostel; na so tama do ahu nian goaron apostel, ala naung hulele huria ni Debata.

¹⁰Alai na di ahu nuaeng, sian asi ni roha ni Debata do, umbahen na dapot; jala ndang na magopo asi ni rohana na tu ahu i, ai gumodang do na huulahon sian nasida saluhutna; alai ndada ahu tahe, asi ni roha ni Debata na tu ahu, i do!

¹¹Antong, manang ahu pe manang nasida, songon i do parjamitaonnami, jala songon i do gabe porsea hamu.

¹²Marhua ma dohonon ni na deba sian tongatongamuna, na so adong haheheon ni angka naung mate, dung sanga binaritahon taringot tu Kristus, paboa naung dipahehe lbana sian na mate!

¹³Alai anggo so adong haheheon ni angka na mate, ndang na hehe nang Kristus.

¹⁴Ai anggo so hehe Kristus sian angka na mate, rumar ma jamitanami, laos rumar ma nang haporseaonmuna.

¹⁵Tardapot ma nang hami ala pargapgap di Debata, ala maralohon Debata huhatindangkon hami, naung dipahehe Kristus i, hape ndang dipahehe, anggo sandok so mulak mangolu angka na mate.

¹⁶Ai anggo so dipahehe angka na mate, ndang tutu hehe nang Kristus i.

¹⁷Alai anggo so dipahehe Kristus i, magopo ma haporseaonmuna, jala tong dope hamu di bagasan dosamuna,

¹⁸gabe mago ma nang angka naung monding marhitehite Kristus.

¹⁹Anggo holan di tano on hita mangkirim di Kristus i, jolma na dumangol do hita sian saluhutna.

²⁰Alai nunga hehe Kristus i sian na mate, Ibana do parjolo ni angka na monding i.

²¹Ai songon marhite sian sada jolma songgop hamatean, songon i do marhite sian sada Jolma haheheon ni angka naung mate.

²²Ai songon na di bagasan Adam saluhut mate, songon i di bagasan Kristus sude dipangolu.

²³Alai ganup ma mangihuthon parjojorna: Parjolo i Kristus, dung i angka na di Kristus i, di harorona i.

²⁴Dung i ujunnga; disi ma pasahatonna harajaon i tu Debata Ama, dung jolo dipasohot nasa panggomgomion, hahuasoon dohot hagogoon.

²⁵Ai ingkon mangarajai Ibana, rasirasa dipatunduk saluhut musu i tutoru ni patna.

²⁶Hamatean i do musu na parpudi sipasohotonna i.

²⁷Ai saluhutna do dipatunduk tutoru ni patna. Alai molo saluhut dipatunduk didok, tandap ma disi, na so dohot na patundukkon saluhutna tu Ibana.

²⁸Alai dung tunduk saluhutna i tu Ibana, disi ma dohot Anak i sandiri unduk tu na patundukkon saluhut tu Ibana, asa Debata gabe saluhut di bagasan saluhut.

²⁹Angkup ni i: Aha do na niula ni angka na padidihon dirina humongkop angka na mate? Ai molo sandok so hehe angka na mate, aha padidihononna dirina humongkop angka i!

³⁰Hami pe, aha pola taononnami mora ganup tongkin?

³¹Songon na mate do ahu ganup ari, songon sintongna hamu, angka dongan, gabe barita sipujion di ahu di bagasan Kristus Jesus, Tuhanta i.

³²Ai anggo holan ala ni jolma hurangguthon di huta Epesus angka binatang, aha ma guna ni i di ahu? Anggo so hehe angka na mate: Ba mangan minum ma hita, ai mate do hita marsogot.

³³Unang hamu lilu! Mago do adat na danggan anggo hinombar na roa!

³⁴Patut ma hamu tarjolma unang mardosa; ai adong do deba, na so tumanda Debata. Laho pailahon hamu do hudok i.

³⁵Alai dohonon ni na deba ma: Songon dia ma hehe angka naung mate i? Dia ma daging ni nasida na ro i?

³⁶E, ho na loahon! Apala na olo mangolu na sinaburhonmi, anggo so na mate!

³⁷Jala jumpa manabur ho, ndada badan ni na naeng ro i disaburhon ho; batuna sambing do, manang na asing pe.

³⁸Alai Debata do mangalehon badan, guru lomo ni rohana; jala asing be do badan tu ganup boni.

³⁹Ndada sarupa nasa ragam ni sibuk i; ai asing do na di jolma, asing sibuk ni pinahan, asing sibuk ni pidong, asing na di dengke.

⁴⁰Adong do badan parbanua ginjang, jala adong do badan parbanua tonga on; alai asing do sangap ni na di ginjang, asing do na sian tano on.

⁴¹Asing do sondang ni mata ni ari, jala asing do sondang ni bulan i; asing muse sondang ni angka bintang, ai marsisurungi do angka bintang marsinondang.

⁴²Songon i do nang di haheheon ni angka naung mate: Tarsabur do di habusukon; alai dipahehe do di hatongtongon.

⁴³Tarsabur do di haleaon; alai dipahehe do di hasangapon. Tarsabur do di hagaleon; alai dipahehe do di hagagoon.

⁴⁴Na tarsabur do badan parhosa; alai dipahehe do badan partondi. Anggo adong do badan parhosa, adong ma nang badan partondi.

⁴⁵Hombar tu na tarsurat i: "Gabe hosa na mangolu do jolma na parjolo, si Adam i"; alai Tondi na pangoluhon do anggo Adam na parpudi i!

⁴⁶Alai ndada badan partondi i na parjolo, parhosa i do; dung i pe, asa partondi i!

⁴⁷Na sian tano do jolma na parjolo i jala marpangalaho tano on; sian banua ginjang do Jolma na paduahon i.

⁴⁸Mangihuthon pangalaho ni na sian tano on do angka na di tano on; jala mangihuthon pangalaho ni na sian ginjang i do angka na di ginjang i.

⁴⁹Jala songon naung tauloshon rumang ni na sian tano on, songon i do uloshononta sogot rumang ni na sian ginjang i.

⁵⁰On do na hudok disi, ale angka dongan: Ndang tarbahen sibuk dohot mudar manean harajaon ni Debata, jala ndang tartean na olo busuk i hatongtongan i.

⁵¹Hahomion do na hudok on tu hamu: Ndang na saluhut hita monding; alai saluhut do hita paubaonna.

⁵²Tompu, di bagasan sanghidopmata, di pangkuling ni sarune na parpudi i; ai mangkuling ma sarune, gabe hehe ma angka naung mate i tu hatongtongan, laos paubaonna ma anggo hita.

⁵³Ai ingkon hatongtongan do manoluk na olo busuk on, jala hangongolu na manongtong do manoluk na olo mate on.

⁵⁴Alai dung disoluk hatongtongan i na olo busuk on, jala disoluk hangongolu na manongtong i na olo mate on, disi ma jumpang hata na tarsurat i: "Nunga tarbondut hamatean; nunga soluk hamonangan!"

⁵⁵"Jo hamatean, didia hamonanganmi? Jo hamatean, didia soropmi?"

⁵⁶Alai dosa do sorop ni hamatean, jala patik i do gogo ni dosa i.

⁵⁷ Alai mauiate ma di Debata, na pamonang hita marhitehite Tuhanta Jesus Kristus!

⁵⁸ Onpe, hamu angka donganku na hinaholongan, marsihohot jala so mubauba ma hamu, jala lam sumurung ma tongtong di bagasan ulaon ni Tuhan i, ai diboto hamu do: Nandang magopo halojaonmuna di bagasan Tuhan i.

16¹ (I.) Alai taringot tu guguan na tu angka na badia i, ulahon hamu ma, songon naung huaturhon tu angka huria na di Galatia.

² Ganup ari Minggu ma dipapungu ganup, marguru tu na tarbahensa; unang pola pamasaon guguan, di na ro i ahu.

³ Alai disi sahat ahu tu hamu, suruonku ma dongan na leak tau di rohamuna mardongan surat, mamboan asiasimuna i tu Jerusalem.

⁴ Alai molo tung umpola, gabe dohot ahu borhat, denggan ma rap hami laho.

⁵ Alai ro do ahu manopot hamu, dung huebati luat Makedonia. Ai mamolus do ahu di luat Makedonia.

⁶ Alai ra mian do ahu di hamu, jala pasalpuonku partaonan ngali, asa pataruonmuna ahu, manang tudia pe ahu borhat.

⁷ Ai ndang naeng bolus hamu idaonku sahali on; arop do tahe rohangku mian di hamu lumeleng, molo diloas Tuhan i.

⁸Alai di Epesus do ahu mian, sahat tu pesta Pentakoste.

⁹Ai mungkap do di ahu pintu na balga, na marpangkorhon godang; jala torop do na mangalo.

¹⁰(II.) Alai molo tung ro si Timoteus, sarihon hamu ma, unang mabiar ibana di tongatongamuna; ai ulaon ni Tuhan i do diula songon ahu on.

¹¹Unang ma adong na marhu ni roha mida ibana! Alai pataru hamu ma ibana di bagasan dame, asa ro ibana mandapothon ahu, ai hupaimaima do ibana raphon angka dongan i.

¹²Alai anggo donganta, si Apollos i, nunga gogo nian huapoi, asa ditopot hamu rap dohot angka dongan on; alai sandok na so ra ibana ro anggo nuaeng, alai ro do ibana muse di tangkas ni langkana.

¹³Dungo ma hamu, marsihohot marhaporseaon, tang ma hamu jala margogo!

¹⁴Di bagasan haholongon ma tulus sasudena di hamu!

¹⁵Diboto hamu do, angka dongan, pangisi ni bagas ni si Stepanus do patumonaan ni luat Akaya, jala dipasahat nasida do dirina gabe parhobas di angka na badia; dibahen i huapoi ma hamu:

¹⁶Dohot ma hamu marunduk ni roha maradophon dongan angka sisongon i, nang

maradophon ganup donganta pangula na mangkalojahon!

¹⁷Alai las do rohangku, ala na ro do si Stepanus dohot si Portunatus dohot si Akaikus; ai nasida do manggohi na so tarpatupa hamu.

¹⁸Ai dipahosa nasida do tondingku nang tondimuna. Onpe, parhamaol hamu ma angka dongan sisongon i!

¹⁹Manongos tabi tu hamu angka huria na di Asia. Manongos tabi godang situtu tu hamu marhitehite Tuhan i: Si Akuila dohot si Priska rap dohot na marpungu di jabunasida.

²⁰Sahat ma tabi ni saluhut angka dongan i tu hamu. Masitabian ma hamu mardongan pangummaon na badia.

²¹On ma tabingku sian ahu, Paulus, sinurat ni tanganku.

²²Hona bura ma na so mangkaholongi Tuhan i! Maranata (Na ro ma Tuhanta)!

²³Didongani asi ni roha ni Tuhan Jesus i ma hamu!

²⁴Didongani holong ni rohangku ma hamu saluhutna di bagasan Kristus Jesus i!

2 Korintus

1 ¹ (I.) Ahu surat sian si Paulus, apostel ni Kristus Jesus, sian lomo ni roha ni Debata, rap dohot dongan si Timoteus, mandapothon huria ni Debata, na di huta Korint, nang saluhut angka na badia, na di sandok Akaya:

² Asi ni roha ma di hamu dohot dame sian Debata Amanta i dohot sian Tuhan Jesus Kristus!

³ (II.) Pinuji ma Debata, Ama ni Tuhanta Jesus Kristus, Ama Parasiroha situtu jala Debata, Sipangapul na sumurung!

⁴ Ai diapul do hami di bagasan saluhut haporsuhonnami, asa tarapul hami angka dongan na di bagasan ragam ni haporsuhon, hinorhon ni apulapul na binasabasahon ni Debata tu hami.

⁵ Ai muba do godang ni haporsuhon ala ni Kristus songgop tu hami; laos hombar tusi do sumurung pangapulon tu hami hinorhon ni Kristus.

⁶ Alai porsuk pe huahap hami, bahen pangapulon dohot haluaon di hamu do; ba tarapul hami, bahen pangapulon di hamu do, ai dibahen do hamu marhabengeton di sitaonon, angka na sapangalaho dohot na huta on hami.

⁷ Jala hot do pangkirimon nami taringot tu hamu, ai on do huboto hami: Songon naung gabe partohap hamu di angka sitaonon, laos songon i do nang di apulapul.

⁸ Ai naeng do tangkas botoonmuna, ale angka dongan, haporsuhon na mangonai tu hami di luat Asia: Tung na sorat situtu do hami, lobi sian na tartaon, pola saep do rohanami di ngolunami.

⁹ Nunga putus hosanami, ditimbang rohanami; asa unang dirinami huhaposi hami, tung Debata do, na manungguli angka naung mate.

¹⁰ Saut do hami dipalua, laos paluaonna do sian hamatean na sai jorbut i. Tu Ibana do mangkirim rohanami, paluaonna do nang tu joloan on.

¹¹ Dohot ma hamu mangurupi tumangiangkon hami, anggiat torop dongan mangkamauliatehon asiasi na tu hami, ala torop naung mangkongkop hami.

¹² On do pujipujian na di hami: Dihatindangkon panggora ni rohanami do, naung huparangehon hami, di adopan ni portibi on, lumobi situtu ma di adopanmuna, habadiaon dohot hapolinon na sian Debata ndada habisuhon hian, tung asi ni roha ni Debata do.

¹³ Ai ndang asing lapatan ni na husurat hami tu hamu sian na jinaha jala niantusanmuna;

jala hirim do rohangku, laos torus antusanmuna,

¹⁴songon naung mamungka diantusi hamu hatanami, paboa hami gabe pujipujian di hamu, jala laos songon i hamu di hami di ari ni Tuhanta Jesus.

¹⁵(III.) Mangasahon i, tibu hian do hutahi ro manopot hamu, asa dua hali hamu marlas ni roha.

¹⁶Naeng mamolus do ahu sian hamu laho tu Makedonia; jala dung sian Makedonia, mulak tu hamu, asa hamu pataruhon ahu tu Judea.

¹⁷Marneang ni roha do ahu tumahi i? Manang marguru tu sibuk do tahingki, gabe rap dapot di ahu hata olo dohot hata ndang?

¹⁸Alai haposan do Debata, ai ndang jumpang di hami hata olo huhut hata ndang.

¹⁹Ai Jesus Kristus, Anak ni Debata, na hubaritahon hami tu hamu, rap dohot si Silwanus dohot si Timoteus, ndada gabe olo Ibana dohot ndang, tung hot do hata olo marhitehite Ibana.

²⁰Ai manang piga bagabaga ni Debata, gabe olo do di bagasan Ibana jala marhitehite Ibana do amen, bahen hasangapon ni Debata marhitehite hami.

²¹Alai Debata do pahothon hami rap dohot hamu tubagasan Kristus i, jala dimiahi hami.

²²Laos Ibana do sumahap hami, jala dilehon do tubagasan rohanami patujolo i, i ma Tondi i.

²³Alai Debata do hujou saksi ni tondingku, paboa hamu do huolani, umbahen so ro dope ahu tu Korint.

²⁴Ai ndada naeng mangarajai haporseaonmuna hami; angka pangurupi muna do hami di halalas ni rohamuna, ai naung ojak do hamu di bagasan haporseaon.

2¹(I.) Hupaputus do di bagasan rohangku, na so ulahanku be ro manopot hamu di bagasan arsak ni roha.

²Ai molo huarsahi hamu, ise ma palas rohangku muse? Nda ibana na huarsahi i?

³Jala ala ni i do, umbahen manurat ahu tu hamu, asa unang arsak ni roha tu ahu di harorongku, sian angka na patut palas rohangku; ai pos do rohangku di hamu sudena, naung halalas ni rohamuna saluhutna do halalas ni rohangki.

⁴Sian haporsuhon godang dohot sian ponjot ni roha do ahu manurat tu hamu mardongan iluilu godang, ndada asa marsak hamu, sandok asa ditanda hamu holong ni rohangku na sumurung mida hamu.

⁵Alai na mangarsahi i, ndada ahu niarsahanna, hamu saluhutna do, manang deba tahe, unang masalpuhu hatangku.

⁶Sae do tu na songon i pinsangpinsang sian na torop.

⁷Onpe, balik ma tagonan hamu manesa dosana jala mangapul ibana, unang dibondut arsak ni roha na torbang i ibana.

⁸Dibahen i huapoi hamu, patuduhon holong ni roha tu ibana.

⁹Laos i do tinembak ni surathu tu hamu, naeng tandaonku, manang na tau hamu, manang pangoloi hamu di na saluhutna.

¹⁰Alai molo disesa hamu dosana, dohot ma ahu. Ai manang dia na husesa, ala ni hamu do husesa i, di adopan ni Kristus.

¹¹Unang diangati sibolis i hita, ai ndada na so taboto tinahina i.

¹²(II.) Alai di na sahat ahu tu huta Troas, manjamitahon barita na uli na taringot tu Kristus, mungkap do nian pintu di ahu di bagasan Tuhan i.

¹³Alai ndang marhasonangan tondingku, ala so dapot ahu donganku, si Titus i, jala martinading hata nama ahu tu nasida, laho borhat tu Makedonia.

¹⁴Alai mauiate ma di Debata, na tongtong pamonang hami di bagasan Kristus, jala dipapatar do, di saluhut inganan marhite sian hami, parbinotoan taringot tu Ibana, na songon uap na hushus.

¹⁵Ai uap na hushus sian Kristus i do hami di adopan ni Debata, di angka na malua, nang di angka na laho mago.

¹⁶Uap hamatean tu hamatean di na deba; uap hangoluan tu hangoluan di na deba. Jala ise do na tau tusi?

¹⁷Ai ndada suman hami tu na deak i, na mangalansumhon hata ni Debata; alai sian

lidang ni rohanami, sinuru ni Debata do hulahaton hami i di adopan ni Debata, di bagasan Kristus.

3¹ (I.) Na mangulahi do hami mamujimuji dirinami? Manang na ringkot marsurat panindangion hami mandapothon hamu manang manjalo sian hamu, songon binahen ni na deba?

²Hamu do suratnami, naung sinurathon tubagasan rohanami, na tinanda jala jinaha ni saluhut jolma.

³Ai tanda do hamu surat ni Kristus na hupature hami, sinurat so dohot tinta, marhite sian Tondi ni Debata na mangolu, i do; ndada tu panuratan batu, alai di panuratan daging, i ma ateate.

⁴Pos do rohanami taringot tusi tu Debata, marhitehite Kristus.

⁵Ndada tau hami sian dirinami, anggo tung mamingkiri agia aha sian dirinami; sandok sian Debata do hatauonnami.

⁶Ibana do patauhon hami, gabe parhalado di padan na imbaru, na marhite sian Tondi i; ndada marhite sian surat, ai na mambunu do surat, Tondi i do pangoluhon.

⁷(II.) Alai gari parhaladoon hamatean, na marsurat, na niuhir tubagasan batu, gari marhasangapon do, pola so tarbahen anak Israel mamereng bohi ni si Musa, dibahen sangap na olo salpu i, na di bohina i:

⁸Lam beha ma sangap ni parhaladoon ni Tondi i!

⁹Ai marhasangapon do parhaladoon na tu uhun; nda lam sumurung ma hasangapon ni parhaladoon na tu hatigoran!

¹⁰Ai hira so marhasangapon be dohonon na marsangap disi, dibahen hasusurung ni hasangapon on.

¹¹Ai molo sangap na olo salpu i, nda dao lumobi hasangapon ni na manongtong on!

¹²Marhiras ni roha situtu do hami, antong, mangasahon pangkirimon na sai balga.

¹³Ndang hutiru hami be si Musa, na mangkungkupi bohina, asa unang dibereng halak Israel ujung ni na olo salpu i.

¹⁴Alai gabe tangkang do rohanasida, ai ro di sadari on tong do tartutup parjanjian lama, jumpa dijaha i; laos so diungkap dope, ala holan di bagasan Kristus dipasohot i.

¹⁵Olo tahe, ro di sadari on peak do pangkuphupi i diatas rohanasida, uju dijaha surat ni si Musa.

¹⁶Alai disi mulak rohanasida mandapothon Tuhan i, buatonna ma pangkuphupi i.

¹⁷Tuhan i do Tondi i; jala ia disi Tondi ni Tuhan i, disi do haluaon.

¹⁸Alai anggo hita saluhutna, angka na sinondangan ni hasangapon ni Tuhan i, so hungkup bohinta, paubaonna ma hita, gabe tudos tu rupana, mandapothon ragam ni hasangapon, marguru tu Tuhan ni Tondi i.

4¹ (I.) Onpe, ala naung hujalo hami tohonan on, sian pangasina di hami, ndang marnaloja hami.

² Sandok hutulakkon hami do angka na buni, angka sihailahononhon; ai ndang marangkal hami, jala ndang marlaok hubahen hami hata ni Debata; hasintongan i do hupapatar hami, gabe jongjong hami, tandaon ni roha ni saluhutna jolma di adopan ni Debata.

³ Jala molo tung tartutup barita na uli, na hujamitahon hami, di angka na laho mago do i tartutup.

⁴ Ai dipapitung debata ni portibi on do pingkiran ni angka na so porsea, asa unang nasida dipatiur sondang ni barita na uli, na taringot tu hasangapon ni Kristus, na tardok suman ni Debata.

⁵ Ai ndada dirinami hujamitahon hami, Kristus Jesus i do, paboa Ibana Tuhan; alai naposomuna do hami ala ni Jesus.

⁶ Ai Debata, na mandokkon marsinondang hatiuron i sian haholomon i, Ibana do patiurhon rohanami, pabinsar parbinotoan di sangap ni Debata, na di bagasan bohi ni Kristus i.

⁷ (II.) Alai di bagasan inganan na mura matapor do artanami on, asa Debata nampuna hagogoon na sumurung i, unang hami.

⁸Di na saluhut do hami marhaporsuhon, alai ndang hapusohan; tarsosak, alai ndada tarhapit.

⁹Na tarlele do hami, alai nda tung pinasombu; pinantinggangkon, alai nda tung anggo bolong.

¹⁰Tongtong do hupausungusung hami di dagingnami hamamate ni Jesus, asa patar di dagingnami nang hangongolu ni Jesus.

¹¹Ai tongtong do hami, angka na mangolu dope, dipasahat tu hamatean, ala ni Jesus i, asa gabe patar nang hangongolu ni Jesus di dagingnami na olo mate i.

¹²Asa na mangkorhon do hamatean di bagasan hami, alai hangoluan do anggo di bagasan hamu.

¹³Alai tong do Tondi haporseaon i di bagasan hami, hombar tu na tarsurat i: "Na porsea do ahu, umbahen na huhatahon"; hami pe, na porsea do, umbahen na dohot hami mangkatahon,

¹⁴ala huboto hami: Naung pahehehon Tuhan Jesus i, pahehehon ni I do nang hami raphon Jesus i, jala pajongjongonna do hami raphon hamu.

¹⁵Alai saluhutna i, ala ni hamu do, asa asi ni roha i, na lam tu gandana, dibahen na torop, mangkorhon hamauliateon na sumurung, bahen hasangapon ni Debata.

¹⁶Dibahen i, ndang marnaloja hami; ai lam tu burukna pe hajolmaonnami parduru i, anggo parbagasan i, ariari do dipaimbaru.

¹⁷Ai haporsuhonnami na martingki jala na neang porsanon, i do patupahon di hami hasangapon na sumurung, na lumobi hamuliaonna na salelenglelengna,

¹⁸ala hutailihon hami na so tarida i, nda tung na tarida i; ai parsatongkinan do na tarida i, alai manongtong do ro di salelenglelengna na so tarida i.

5¹(I.) Ai on do huboto hami: Di na tanggal bagas parlapelapeannami na sian tano on, adong ma di hami inganan na sian Debata, bagas na so pinauli ni tangan, na mian salelenglelengna di banua ginjang i.

²Ai saleleng dison, marhoi do hami huhut masihol, naeng haru solukkononhon inganannami na sian banua ginjang i.

³Ai nda tung songon na marsaemara hami tardapot disi, tung marabit do.

⁴Ai tagan di parlapelapean on hami, marhoi do hami jala sorat, ala dipangido rohanami: Naeng unang ma ditanggali sian hami, dilampishon ma nian, asa dibondut hangoluan i hamatean.

⁵Alai na patauhon hami tusi, Debata do i, dung jolo dilehon tu hami Tondi i, patujolona i.

⁶Asa na pos do rohanami tongtong, atik pe huboto hami, dao hami sian Tuhan i, saleleng maringanan di bagasan daging on hami.

⁷Ai di bagasan haporseaon do hami, ndada dope di bagasan na marnida,

⁸Alai lam pos do rohanami, jala lasan do bungkas sian daging on, laho maringanan di Tuhan i.

⁹Ala ni i huhut huringkoti hami, naeng halomoan ni rohana hami, manang naung sahat tu sambulo, manang di pardalanan dope.

¹⁰Ai ingkon gabe patar be do hita saluhutna sogot di jolo ni habangsa paruhuman ni Kristus, asa dijalo be hombar tu na niulana, tagan di pardagingon, manang na denggan, manang na roa.

¹¹(II.) Onpe, ala na binoto, habiaran do Tuhan i, huapoi hami do angkajolma i; alai patar do hami di Debata, jala hirim rohanami, patar do hami nang di bagasan rohamuna.

¹²Ndada mangulahi hami mamujimuji dirinami di jolomuna, alai mangalehon dalam tu hamu, asa adong pamujionmuna di hami maralohon dongan, angka na mangasahon rupa, alai ndada roha.

¹³Alai molo tung songon na so marroha hami, di Debata ma i; jala molo tung marroha hami, tu hamu do.

¹⁴Ai ditiop holong ni roha ni Kristus do hami.

¹⁵Jala songon on do hujujur hami: Anggo naung mate Nasada i humongkop sude, naung mate do nasida saluhutna. Jala humongkop saluhut do Ibana mate, asa unang be mangolu di dirina angka na mangolu i, asa mangolu nasida di Ibana, naung mate jala mulak mangolu humongkop nasida.

¹⁶Ala ni i, ndang hutanda hami be manang ise mangihuthon pardagingon; jala nang pe hutanda hami najolo Kristus mangihuthon pardagingonna, ndang be hutanda hami anggo nuaeng.

¹⁷Asa molo di bagasan Kristus halak, na tinompa na imbaru ma i. Nunga salpu pangalaho na robi, gabe na imbaru.

¹⁸Sudena i sian Debata do; ai Ibana do padengganhon hita tu dirina marhite Kristus, jala dilehon do tu hami tohonan pardengganan i.

¹⁹Ai di bagasan Kristus do Debata, gabe dipadenggan do portibi on tu dirina, ai ndang dijujur tu nasida dosanasida, jala dipajongjong do di tongatonganami hata pardengganan i.

²⁰Onpe, partonaan ni Kristus do hami, ai na mangapoi do Debata marhite sian hami. Singkat ni Kristus do hami manglehelek: Sai olo ma hamu padengganon tu Debata!

²¹Ai on do dipatupa Debata: Humongkop hita gabe dosa Ibana, na so tumanda dosa,

asa gabe hatigoran ni Debata hita di bagasan Ibana.

6¹ (I.) Na mangapoi do hami, angka dongan pangula, asa unang magopo panjaloonmuna di asi ni roha ni Debata.

²Ai didok do: "Di tingki parasian do ho hutangihon, jala di ari haluaon do ho huurupi. Nuaeng ma tongon tingki parasian; nuaeng ma ari haluaon i!"

³Ndang mangalehon partuktuhan hami di agia aha pe, asa unang hasurahan tohonannami.

⁴Di na saluhut hupatuduhon hami dirinami songon angka naposo ni Debata: Di bagasan habengeton godang, di bagasan angka haporsuhon, hasusaan dohot hagogotan;

⁵di na hona punkul, di na tarhurung, di bagasan hagunturon, di halojaon, di mangkar ni mata, di parpuasaan;

⁶di bagasan hatomanon, di bagasan parbinotoan, lambas ni roha dohot habasaron, di bagasan Tondi Parbadia, di bagasan holong ni roha na so marpangansi;

⁷di bagasan hata hasintongan, di bagasan hagagoon ni Debata, marhitehite sinjata hatigoran di siamun dohot hambirang;

⁸mamolus sian hasangapon dohot haleaon, sian barita na roa dohot barita na denggan; songon angka na mangaliluhon, hape parsintong do;

⁹songon angka na so tinanda, hape na tinanda do; songon na naeng mate, hape na mangolu; songon angka na binunu, alai ndada na mate;

¹⁰songon angka na marsak, alai tongtong do parroha na las; songon angka na pogos, alai torop do dipamora; songon na so paradongan, hape saluhut do digomgom.

¹¹(II.) Buas do pandoknami tu hamu, halak Korint; ungkap do rohanami.

¹²Ndang mangingking rohanami maradophon hamu; rohamuna do na mangingking i.

¹³Songon na tu anakkonku ma hatangkon: Palambas hamu ma nang rohamuna, balos ni i!

¹⁴Unang saauga hamu dohot angka na so porsea! Ai aha ma pardomuan ni hatigoran dohot na so uhum; jala aha do hasaoran ni hatiuron dohot haholomon?

¹⁵Beha ma domu Kristus dohot Belial; aha ma hatopan ni na porsea dohot na so porsea?

¹⁶Tung olo ma mardomu joro ni Debata dohot angka ajiajian? Ai joro ni Debata na mangolu i do hita, songon na nidok ni Debata: "Naeng di tongatonganasida do Ahu maringanan jala mardalani, gabe Debatanasida do Ahu, jala nasida gabe bangsongku."

¹⁷"Dibahen i, ruar ma hamu sian tongatonganasida jala paholang hamu ma

dirimuna, ninna Tuhan i; unang ma jama hamu na ramun, asa hujangkon hamu!"

¹⁸"Jala gabe Ama ma Ahu di hamu, jala hamu gabe anak dohot boru di Ahu, ninna Tuhan, Sigomgom parluhutan."

7¹ (I.) Onpe, hamu angka haholongan, ala naung tu hita angka bagabaga ondeng, tapaias ma dirinta sian nasa na tau pahodarhon daging dohot tondi, laho patulushon habadiaon mardongan biar mida Debata!

²Jangkon hamu ma hami; ndang adong hujahati hami agia ise sian hamu, manang niago, manang niangatan pe.

³Ndang hudok i, laho mandabu uhum tu hamu; ai nunga hudok nangkin, naung di bagasan rohanami hamu, asa rap mate jala rap mangolu.

⁴Godang do hiras ni rohangku mida hamu, godang do nang pamujingku di hamu; naung tarapul situtu do rohangku, marlas ni roha na sumurung do ahu di bagasan saluhut haporsuhonnami.

⁵Ai nang di haroronami tu Makedonia, ndang marhasonangan dagingnami, sandok porsuk do huhilala hami: Paraloon sian duru, hatahuton sian bagasan.

⁶Alai Debata, na mangapul na toruk marroha. I ma mangapul nang hami, dibahen haroro ni si Titus.

⁷ Ndada holan marhitehite harorona, dohot do marhitehite pangapulon, naung jinalona sian hamu, ai dibaritahon do tu hami sihol ni rohamuna, partangismuna dohot ringgasmuna humongkop ahu, gabe lam las do rohangku.

⁸ (II.) Ai nang pe marsak hamu hubahen marhitehite surat i, ndang husolsoli rohangku disi. Tutu, husolsoli do najolo nian, ai huida marsak rohamuna satongkin, dibahen surat i.

⁹ Anggo nuaeng, las do rohangku: Ndada ala naung marsak i rohamuna, ala ni hamubaon ni roha, na hinorhon ni arsak ni rohamuna, i do; ai sian Debata do arsak ni rohamuna, asa sandok unang luangan hamu hubahen hami.

¹⁰ Ai dihorhon arsak ni roha na sian Debata do hamubaon ni roha tu haluaon, na so sisolsolan; alai dihorhon arsak ni roha ni portibi on do hamatean.

¹¹ Tanda hamu ma arsak ni roha on, na sian Debata; ai dihorhon do di hamu ringgas ni roha na sai godang i, tole paraluson, sogo ni roha, hatahuton, sihol ni roha, pangkamuruhon, paminsangon pe. Di saluhutna i dipatuduhon hamu, paboa na lias hamu, di hata i.

¹² Asa hutongos pe surat i tu hamu, ndada ala ni parjahat i, manang ala ni na jinahatanna; ala ni on do tahe: Asa patar sama hamu, di adopan ni Debata ringgas ni rohamuna na humongkop hami.

¹³Ala ni i gabe tarapul hami. Alai dung tarapul hami, lam sumurung muse huhalashon hami las ni roha ni si Titus, ala dipahosa hamu saluhutna tondina i.

¹⁴Ai ndang tarila ahu, di na hupuji hamu maradophon ibana; sandok songon naung huhatahon hami saluhutna i tu hamu, mangihuthon hasintongan i, songon i do gabe marhasintongan pamujinami maradophon si Titus.

¹⁵Jala lam tu balgana do holong ni rohana di hamu, paingotingot pangoloionmuna saluhutna, ai dijangkon hamu do ibana mardongan biar dohot lomos ni roha.

¹⁶Na las do rohangku, ala haposan hamu hudapot di na saluhutna.

8¹(I.) Alai hupabotohon hami ma tu hamu, angka dongan, asi ni roha ni Debata, na nilehonna i tu angka huria na di Makedonia:

²Ai atik pe di bagasan pangunjunan dohot haporsuhon godang nasida, dihorhon halalas ni rohanasida na sumurung angkup ni sungkot ni hinapogosnasida do habasaon na lumobi.

³Huhatindangkon do, naung dilehon nasida nasa na tarpatupasa, lobi tahe sian gogona; jala sian lomona do!

⁴Gogo do diapo i nasida hami jala dipangido asi ni roha, i ma na naeng gabe parsidohot mangurupi angka na badia i.

⁵Jala gumodang sian na huhirim hami: Tung dirina do dilehon nasida parjolo tu Tuhan i,

dung i tu hami, mangihuthon lomo ni roha ni Debata.

⁶Gabe huapoi hami si Titus, asa laos dipaujung di tongatongamuna ulaon asi ni roha on, songon naung pinungkana i.

⁷Alai songon hasurunganmuna di na saluhut, di haporseaon, di hata, di parbinotoan, di nasa haringgason, di pangkaholongimuna di hami, naeng songon i ma hasurunganmuna nang di ulaon asi ni roha on.

⁸Ndada songon paksa hatangki; naeng ujonku do tahe sintong ni holong ni rohamuna, tumimbangkon pangkaburjuhon ni angka dongan.

⁹Ai diboto hamu do asi ni roha ni Tuhanta Jesus Kristus, na mamora hian, gabe pogos ala ni hamu, asa gabe mamora hamu hinorhon ni pogosna i.

¹⁰On do turgas sian ahu: Na patut do i di hamu; ai hamu jumolo hian sian na taon i umpungka nang na patupahon, nang na tumahi.

¹¹Asa patulus hamu ma nuaeng nang na patupahon, asa songon ringkot ni roha laho tumahi, songon i ma na patupahon, hombar tu na dapot.

¹²Ai molo adong ringkot ni roha, halashononhon do na dapot, nda tung salpu sian na dapot.

¹³Ai ndada naeng haporsuhon di hamu, hasonangan ia di dongan; naeng masipadosan ma nian.

¹⁴Anggo saonari ditomutomu na lobi na di hamu ma na hurang di nasida, asa ditomutomu nang na lobi na di nasida na hurang di hamu, asa gabe dos!

¹⁵Hombar tu na tarsurat: "Sipeop na godang, ndang marlobilobi; jala sipeop na otik, ndang hurangan."

¹⁶Alai mauliate ma di Debata, na mangalehon ringgas ni roha na songon i humongkop hamu tubagasan roha ni si Titus.

¹⁷Na olo do ibana apoan; lam ringgas rohana, borhat mandapothon hamu, sian lomona sandiri.

¹⁸Alai rap dohot ibana husuru hami do dongan i, na tarpuji di saluhut huria i, siala barita na uli i.

¹⁹Angkup ni i, disuru angka huria do ibana, mandongani hami di ulaon asi ni roha on, na huhobashon hami, bahen hasangapon di Tuhan, huhut pahinsa rohanami.

²⁰Unang ditihai hami di tumpak na balga, na huhapadothon hami; i do na hutamparhon hami.

²¹Ai hupingkiri hami na patut ingoton di jolo ni Tuhan i, nang di jolo nijolma.

²²Jala rap dohot nasida husuru hami dongannami, dung ragam jala jotjot huuji hami ringgas ni rohana i; alai lam ganda do

ringgas ni rohana nuaeng, dibahen godang ni pos ni rohana di hamu.

²³Asa anggo si Titus, donganku do ibana jala angkuphu mangkongkop hamu; ia angka dongannami, sinuru ni angka huria do jala sipasangap Kristus.

²⁴Onpe, tu nasida ma pataridahon hamu sintong ni holong ni rohamuna, nang sintong ni pamujinami di hamu, di adopan ni angka huria i!

9¹(I.) Anggo taringot tu pangurupion na tu angka na badia, ndang pola be surathononku tu hamu.

²Ai huboto do ringgas ni rohamuna, naung pola hupuji di jolo ni halak Makedonia, mandok: Naung marhobas Akaya sian na taon i dope, jala ringgas ni rohamuna do pajujuhon dongan torop.

³Alai husuru do angka dongan i, asa unang so marimpola pamujingku di hamu taringot tusi, asa tutu hobas hamu, songon naung hudok hian;

⁴asa unang rap ro hami dohot dongan sian Makedonia, gabe ndang hobas hamu hudapot hami, jala murak hami, hamu do tahe, di nalom ni rohanami i.

⁵Dibahen i huringkoti hami mangapoi angka dongan, asa dipajolo nasida mandapothon hamu, laho paradehon pasupasu naung pinarbagabagamuna, asarade i, songon na hinabuashon, unang hinolithon.

⁶Ingot ma: Na manaburhon otik, otik do gotilonna; jala na manaburhon managam pasupasu, mangalap pasupasu di na manggotil.

⁷Ganup ma nionjar ni rohana, unang ma sian muruk manang sian na so tarjua; ai dihaolongi Debata do na las roha mangalehon!

⁸Alai marhuaso do Debata, mangusehon saluhut asiasi tu hamu, asa sandok tuk situtu di hamu jala marlobilobi hamu, laho patupahon saluhut ulaon na denggan;

⁹hombar tu na tarsurat: "Na manaburi ibana, mangalehon tu angka na pogos; hot do hatigoranna i ro di salelenglelengna."

¹⁰Alai na padirihon boni tu panabur dohot indahan tu na manganhon, padirion jala pagandaon ni I do di hamu sisaburhononhon, jala patubonna parbue ni hatigoranmuna,

¹¹asa di na saluhut hamu mamora tu nasa habasaon, na mangkorhon hamauliateon tu Debata, marhite sian hami.

¹²Ai ndada, asal dipatuk ulaon guguan on hahurangan ni angka na badia i; na sumurung do i huhut, ala ni hamauliateon ni na torop tu Debata.

¹³Gabe dipasangap hamu Debata, ia dung tau hamu jumpang di ulaon parhobason on, ala ni pangoloion ni rohamuna, laho mangkatindangkon barita na uli na sian

Kristus, dohot ala na buas pangantoionmuna di nasida dohot di dongan saluhutna.

¹⁴Nasida pe, ditangiangkon do hamu, jala masihol do nasida di hamu, marningot asi ni roha na sumurung na sian Debata tu hamu.

¹⁵Alai mauiate ma tu Debata ala ni silehonlehonna, na so tarhatahon i!

10¹(I.) Alai ia ahu, si Paulus, huapoi ma hamu marhitehite lambok ni roha dohot habasaron ni Kristus. Na toruk roha do ahu maradophon hamu, anggo adop bohi be; alai na barani maralohon hamu, jumpa holang.

²Alai dipangido rohangku do: Naeng unang ma nian pola barani ahu, jumpa dompak, sian pos ni rohangku sipangasahononku di rohangku maradophon na deba, na mangarajumi hami songon parroha daging.

³Tutu do, di bagasan daging dope hami; alai ndada marguru tu daging parungkilonnami.

⁴Ai ndada mangihuthon daging sinjatanami marungkil, tung margogo do di Debata, laho mangarumpakkon angka tano bato.

⁵Ai hurumpakkon hami do angka pingkiran habisuhon ro di nasa roha na timbo, na hehe mangalo parbinotoan na sian Debata, jala huihoti hami do nasa roha, asa gabe pangoloi di Kristus i.

⁶Jala hobas do hami, maminsang nasa na so mangoloi, ia dung timpas pangoloionmuna.

⁷ Bereng hamu ma na tandap di jolomuna: Molo adong na pos roha, mandok, Kristus nampuna ibana, diingot ma: Songon Kristus nampuna ibana, laos songon i do Kristus nampuna hami.

⁸ Ai ndang tagamon tarila ahu, nang pe tamba dope pamujingku di huaso na nilehon ni Tuhan i di hami, laho pauliulihon hamu, ndada manegai.

⁹ Unang ma songon na hupambibiari hamu marhite sian angka surat i.

¹⁰ Ai angka surat i tutu, ninna, dokdok jala gogo; alai gale do, jumpa roibana, jala lea do hatana.

¹¹ On ma dipingkiri halak i: Ia songon i hatanami na marhite sian surat, jumpa dao, songon i do ulaonnami, di na dompak hami.

¹² Tutu, ndang barani hami, pasaorhon manang patudoshon dirinami tu angka na manjuljulhon dirina. Angka parroha mago do nasida, ai na manuhati jala pasumansumanhon do nasida sama dirina.

¹³ Alai ndang olo hami mamujimuji dirinami, ro di na so tingkina; sandok intap aturan, na pinatikkon ni Debata tu hami. Laos i do, umbahen na sahat hami ro di hamu.

¹⁴ Ai ndada na pabalgabalgahon diri hami, so pola jolo ro hami mandapothon hamu; ai hami sahat, antong, nang tu hamu, mamaritahon barita na uli ni Kristus.

¹⁵Ndada lombo sian uhum pamujinami di hami, anggo di bagasan ulaon ni na leban; alai lam ganda situtu ma ulaonnami, dihirim rohanami, molo dung ganda haporseaonmuna sama hamu, marguru tu parturena,

¹⁶laho manjamitahon barita na uli, sahat ro di angka na di balik ni parbalohanmuna, unang pola huhasangaphon hami ulaon, naung tinurpukkon tu na asing siradotanna.

¹⁷Alai na mamuji dirina, marhitehite Tuhan i ma ibana mamuji!

¹⁸Ai ndada na tau na pajolohon dirina; na niuji ni Tuhan i, i do!

11 ¹(I.) Aut ma nian dipataontaon hamu bodokku saotik! Olo tahe, pataontaon hamu ma ahu!

²Muruk ni Debata do na di ahu humongkop hamu; ai nunga hupaorohon hamu tu sada Baoa, padirihon tu Kristus, songon na marbaju na bontor.

³Alai biar do rohangku, so tung diago maon pingkiranmuna, manadingkon bulus ni roha maradophon Kristus, suman tu na pinaotooto ni ulok i si Haoa marhitehite angkalna i.

⁴Ra tung denggan do rohamuna manaon, molo ro deba mamaritahon Jesus na mimbar sian na hubaritahon hami, manang molo dijalo tondi na leban, na so jinalomuna hian, manang barita na uli na asing, na so jinangkonmuna hian.

⁵Alai anggo di rohangku, ndang na humurang ahu sian angka apostel na bolonan i.

⁶Alai nang pe hurang malo ahu di hata, nda tung anggo di parbinotoan; tongtong tahe hupatandahon hami i tu hamu sasudena.

⁷Na mardosa do ahu, di na hupatutoru diringku, laho patimbo hamu, ala songon silehonlehon huboan barita na uli ni Debata, na hubaritahon tu hamu?

⁸Na mangarampas do ahu sian huria na asing bahen balanjongku, laho marulaon di hamu.

⁹Jala ia hurangan pe ahu di tongatongamuna, ndang hususai agia ise, ai angka dongan, na ro sian Makedonia, i do patukkon na hurang di ahu. Tongtong hupatihi diringku, unang hususai hamu, jala laos i do bahenonku tu joloan on.

¹⁰Namun hasintongan ni Kristus di bagasan ahu, ndang jadi montok pujipujian on di ahu di angka luat Akaya.

¹¹Ala ni aha? Ala na so holong do rohangku di hamu? Debata do umbotosa!

¹²Alai huula pe i nuaeng nang tu joloan on, ala ni angka na mangalului parbonsiran do, laho manggotaphon i, asa anggiat dos hami dohot nasida di pamujion i.

¹³Ai anggo nasida, angka apostel pargapgap do, angka pangula pangansi, disumansuman do angka apostel ni Kristus.

¹⁴Ndang pola longang roha disi, ai nang sibolis i, dipasumansuman do ibana songon suruan hatiuron.

¹⁵Lam beha naposona manumannuman rupa ni naposo ni hatigoran! Hombar tu angka parulaonna do ujungna be!

¹⁶Huulaki ma mandok: Unang ma dirimpu na deba, na loahon ahu. Alai molo tung i, jangkon hamu ma ahu hira na loahon, asa tarpapujipuji ahu diringku saotik.

¹⁷Ndada marguru tu Tuhan i hatangki; hira di bagasan na loahon ahu, mangihuthon pambahen ni na mamujimuji diri.

¹⁸Anggo torop mamujimuji diri mangasahon pardagingon, dohot ma ahu mamuji diringku.

¹⁹Lomo do hamu na bisuk mangkaehe na loahon.

²⁰Na mangkaehe do hamu, molo diparhatoban deba hamu, molo pinapangani hamu, molo ditangkup hamu, molo adong na patimbo dirina, molo dipastap hamu.

²¹Hailaon do na hudok, ra na gale do hami disi. Alai na pinangasahon nasida, dohot ma ahu mangasahonsa (haotoon do hatangki, santabi).

²²Halak Heber do nasida? Dohot do ahu! Halak Israel do nasida? Dohot do ahu! Pinompar ni Abraham do nasida? Dohot do ahu!

²³Parhalado ni Kristus do nasida? Haotoon do hatangkon: Lumobi do anggo ahu!

Sumurung manaon renge ni ulaon, nang hurungan; lumobi tu ahu linsinglinsing; jotjot do di bagasan parmaraan hamatean.

²⁴Lima hali ma ahu dilinsingi halak Jahudi, opatopatpulu hurang sada.

²⁵Tolu hali do ahu dilasahi, sahali ahu didangguri dohot batu, tolu hali harom, saborngin sadari ahu mumbangumbang di laut ni lautan.

²⁶Jotjot do ahu di pardalanan, marmara di batang aek, marmara dibahen panamun, marmara sian angka dongan sabutuha, marmara sian angka parbegu, marmara di huta, marmara di halongonan, marmara di laut, marmara di tongatonga ni dongan na so haru dongan.

²⁷Di bagasan ulaon dohot hasusaan, jotjot do mangkar matangku, jotjot do mauasmale dohot marpuasa, di ngali ni ari dohot di na hurungan ulos.

²⁸Dungkon ni i angka na tahop tu ahu ariari, laho mangkolsohon saluhut huria i.

²⁹Ise na gale, so dohot ahu gale? Ise do na targasip, so dohot mohop ateatengku?

³⁰Molo ingkon mamujimuji ahu, angka hagaleonki ma hupapujipuji.

³¹Ia Debata, Ama ni Tuhan Jesus, na tarpuji ro di salelenglelengna, diboto do, na so margabus ahu:

³²Di Damaskus i dijagai komandan ni raja Aretas do huta ni halak Damaskus, naeng manangkup ahu.

³³Jadi di bagasan haranjang ma ahu ditantan sian jandela tu balian ni parik, gabe malua sian tanganna.

12¹(I.) Ingkon mamujimuji diri, nang so marguna; asa taringotanku ma na huida, ro di angka pangungkapon na sian Tuhan i.

²Di bagasan Kristus hutanda sada jolma: Nunga sampuluopat taon salpuna, tarhinsat halak i ro di lampis patoluhon ni banua ginjang i. Manang na di bagasan dagingna ibana uju i, manang dibalian ni dagingna, ndang huboto; Debata do umbotosa.

³Asa na hutanda do jolma i. Alai manang na di bagasan dagingna ibana uju i, manang sirang sian dagingna, ndang huboto; Debata do umbotosa.

⁴Na tarhinsat do ibana ro di Paradeiso, jala dibege do hata na so tarhatahon, na so jadi dohonon ni jolma manisia.

⁵I ma papujipujionku; alai anggo taringot tu diringku, holan ala ni hagaleonku papujipujionku ahu.

⁶Jala nang pe hupapujipuji diringku, ndang na so marroha ahu disi, ai sintong do hatangki. Alai huorom nama i, unang sumurung ahu di rajumi halak sian na niidana dohot binegena di ahu.

⁷ (II.) Jala asa unang huhaginjangkon angka pangungkapon na sumurung na tu ahu: Hona basirbasir do ahu di sibukku, i ma suruan ni sibolis na mamukpuhi ahu, asa unang hupatimbo diringku.

⁸ Tolu hali do hupangido sian Tuhan i, asa sumurut i sian ahu.

⁹ Gabe didok Ibana tu ahu: Tuk ma asi ni rohangku di ho; ai di hagaleon do sun timbul hagagoon. Asa tagonan ma hupapuji di diringku di bagasan angka hagaleonku, asa songgop tu ahu hagagoon ni Kristus.

¹⁰ Dibahen i, sonang do huhilala di bagasan angka hagaleon, pangaleaion, hasosahan, pangaleleon dohot hagogotan ala ni Kristus; ai jumpa gale ahu, disi do ahu margogo.

¹¹ (III.) Naung gabe maoto do ahu hape; hamu do manosaknosak ahu. Hamu do nian tama pajolohon ahu; ai na so adong hahuranganku sian angka apostel na bolonan i, nang pe sisoada ahu.

¹² Pinamasa do nian angka tanda ni apostel di tongatongamuna marhitehite nasa habengeton, angkup ni angka tanda halongangan dohot ulaon hagagoon.

¹³ Ai dia ma hataluanmuna martimbangkon huria angka na asing i? Na so hususai hamu; holan i do. Sesa hamu ma gedukki!

¹⁴ Nunga pola patoluhalihon hobas ahu manopot hamu, jala ndada susaanku hamu, ai ndada artamuna hulului, hamu

sandiri do; ai ndang tama angka ianakhon papungupunguhon arta di natuatuana, angka natuatu i di angka anakonna, i do.

¹⁵Alai las do rohangku mangururi, laos seahononku do diringku humongkop tondimuna. Di na songon i tarlobi pangkaholongingku di hamu, tung ummotik ma ahu haholongan!

¹⁶Songon i pe i, ndang hususai hamu; alai ala parangkal ahu, gabe marbisuk ahu mambuat rohamuna.

¹⁷Naung huangati hamu manang marhitehite sada halak, na husuru manopot hamu?

¹⁸Huapoi do tutu si Titus, jala husuru dongan i rap dohot ibana. Adong do diangati si Titus hamu? Nda sisada tondi hami di parangenami, nda sisada bogas?

¹⁹Nunga hian huroha dirimpu hamu, mamintori diri hami tu hamu? Di adopan ni Debata, di bagasan Kristus do hatanami: Sasudena i, laho pauliulihon hamu, angka haholongan!

²⁰Ai biar do rohangku, atik so dapot ahu hamu di harorongku, hombar tu na pinangido ni rohangku, jala ahu pe asing sian na pinangido ni rohamuna dapotonmuna. Atik beha jumpang parbadabadaon, pangiburuon, rimasrimas, gulutgulut, parhataan tundal, bitibiti, roha na burnang dohot hagaoron.

²¹So tung dipatutoru Debatangku ahu di tongatongamuna di harorongki, pola

tatangisanku torop angka naung mardosa hian, na so manolsoli rohana siala hahodaron, parmmainanon dohot pargadombuson na niula nasida i.

13¹ (I.) Patoluhalihon ma ahu ro nuaeng manopot hamu. Sipaputusan do nasa hata, mangasahon dua manang tolu sitindangi.

²Di harorongku paduahalihon uju i, songon i nang nuaeng, di na dao i dope ahu, nunga hudok hian jala dohononku tu angka naung mardosa, nang tu dongan sasudena: Nandang maralangalang ahu di harorongkon.

³Ai dipangido hamu do partinandaan, paboa na tutu Kristus mangkatai marhite sian ahu; ndang gale Ibana maradophon hamu, marhagagoon do tahe di tongatongamuna.

⁴Ai tarsilang pe Ibana di bagasan hagaleon, na mangolu do Ibana sian hagagoon ni Debata. Nang hami gale di bagasan Ibana, alai na mangolu do hami rap dohot Ibana sian hagagoon ni Debata di bagasan hamu.

⁵Unjuni hamu ma dirimuna, manang na di bagasan haporseaon hamu; sulingkit hamu ma dirimuna! Na so ditanda hamu do dirimuna, paboa naung Jesus Kristus di bagasan hamu? Ai ia so i, sandok na so tau do hamu!

⁶Alai dihirim rohangku, tandaonmuna do, ndang na so tau hami.

⁷ Alai martangiang do hami tu Debata, asa unang diula hamu agia aha na roa; ndada asa hami idaon na tau, naeng hamu mangulahon na denggan, dipangido rohanami, nang pe songon na so tau hami idaon.

⁸ Ai ndang adong gogonami mangalo hasintongan i, sandok mangkongkop hasintongan, i do.

⁹ Ai las do rohanami, hamu margogo, nang pe gale hami. Laos on do tangiangnami: Naeng gabe togu rohamuna!

¹⁰ Dibahen i husurat songon i, di na holang dope ahu, asa unang posi pambahenku, dung ro ahu, marguru tu huaso, na nilehon ni Tuhan i tu ahu, laho pauliulihon, ndada manegai.

¹¹ (II.) Onpe, ale angka dongan, sai las ma rohamuna, sai olo ma hamu patoguon jala apoan, sada ma pingkiranmuna; radoti hamu ma dame i, asa didongani Debata, Parholongroha jala Pardame i, hamu!

¹² Masitabian ma hamu marhitehite umma na badia.

¹³ (13-12b) Na manongos tabi tu hamu saluhut angka na badia i.

¹⁴ (13-13) Sai didongani asi ni roha ni Tuhan Jesus Kristus dohot holong ni roha ni Debata dohot parsaoan ni Tondi Parbadia ma hamu saluhutna!

Galatia

1 ¹ (I.) Ahu surat ni si Paulus, apostel, ndada sian jolma, ndada marhite sian sada jolma, alai marhite sian Jesus Kristus jala marhite sian Debata Ama, naung pahehehon Ibana sian na mate;

² raphon dongan saluhut na mandongani ahu, mandapothon angka huria na di luat Galatia:

³ Asi ni roha ma di hamu dohot dame sian Debata Ama dohot sian Tuhanta Jesus Kristus,

⁴ naung mangalehon dirina ala ni dosanta, asa diroro hita sian hasiangan na jahat on, mangihuthon roha ni Debata Amanta.

⁵ Di Ibana ma hasangapon ro di salelenglelengna i! Amen.

⁶ (II.) Longang do rohangku, ala songon i tibu hamu marbalik sian Ibana, naung manjou hamu marhitehite asi ni roha ni Kristus, mangoloi barita na uli na asing.

⁷ So manang adong na asing. On do tahe: Adong do halak na manggaori rohamuna, jala na pasambarhon barita na uli ni Kristus i.

⁸ Alai aut sura hami, nang surusuruan sian banua gintang pe, mamaritahon barita na uli, asing sian naung binaritahon tu hamu, hona toru ma ibana!

⁹Songon hatangku tu hamu najolo, tong songon i do nang nuaeng: Molo tung dibaritahon halak barita na uli tu hamu, asing sian naung jinalomuna i, hona toru ma ibana!

¹⁰Lomolomo ni jolma do hulului disi, manang lomo ni roha ni Debata? Na tabo di pinggol ni jolma do hulului? Aut i, ndang sintong ahu anak somang ni Kristus.

¹¹(III.) Alai hupabotohon ma tu hamu, angka dongan: Ndada mangihuthon hajolmaon barita na uli i na hubaritahon i.

¹²Ai ndada hujalo manang huguruhon i sian jolma, tung marhite sian pangungkapon ni Jesus Kristus, i do.

¹³Ai nunga dibege hamu pangalahongku, uju di bagasan hajahudion dope ahu: I ma na gasagasaon i ahu, mangalelei jala manganarotongkon huria ni Debata.

¹⁴Sumurung do ahu sian torop dongan torbangku di bangsongku mangulahon hajahudion, ai na tarlobi do pangkamuruhonku, manganaradoti tona na sian angka ompunami.

¹⁵Alai dipapulik Debata do ahu, andorang so topak dope ahu, jala dijou do ahu sian asi ni rohana.

¹⁶Gabe lomo rohana papatarhon Anakna i tu ahu, laho mamaritahon Ibana tu angka sipelebegu; ndang jolo huparguru disi sibuk dohot mudar.

¹⁷ Jala ndada nangkok ahu tu Jerusalem, manopot angka apostel, naung jumolo sian ahu; alai tu tano Arab do ahu laho. Dung sian i, mulak ahu muse tu Damaskus.

¹⁸ Jadi dung salpu tolu taon, nangkok ma ahu tu Jerusalem, laho mananda si Kepas, jala sampululima borngin ma ahu sorang di ibana.

¹⁹ Alai ndang adong huida apostel na asing, dungkon ni si Jakobus, anggi ni Tuhan i.

²⁰ Alai anggo taringot tu na husurat on tu hamu, tung di jolo ni Debata do i: Nandang margabus ahu!

²¹ Dung i laho do ahu tu angka luat na di Siria dohot Kilikia.

²² Alai ndang ditanda huria ni Kristus, angka na di luat Judea i, anggo bohingku.

²³ Holan na tarbege do tu nasida; na mangalele nasida najolo, i do mamaritahon nuaeng haporseaon, na nirotongkonna i najolo.

²⁴ Jala dipuji nasida ma Debata ala ni ahu.

2¹ (I.) Dung pe salpu sampuluopat taon, mangulahi ma ahu nangkok tu Jerusalem, rap dohot si Barnabas; huboan ma nang si Titus.

² Alai mangihuthon pangungkapon do ahu nangkok, jala pamaritahonku di barita na uli tu angka sipelebegu hupatedek tu jolonasida, gumodang tu na marsangap i, atik beha

magopo parlojongonku tu pudi on, nang sian nasailaonna i.

³Gari si Titus, donganki, halak Junani i, ndang apala disosak, asa tarsunat.

⁴Alai adong do deba dongan na so haru dongan, na pasamaksamakkon dirina tu hami, angka na ro manisipi mangonggopi hami, angka naung pinalua ni Kristus Jesus, laho patundukkon hami nian.

⁵Ndang mangunduk hami mangoloi nasida nanggo satongkin, asa hot hasintongan ni barita na uli di hamu.

⁶Alai ndang adong ditambahi angka na marsangap i agia aha tu na di ahu hian; manang ise nasida najolo, ndang mahua i di ahu, ndada siida bohi ni jolma anggo Debata.

⁷Diida nasida do tahe, naung dipasahat do tu ahu barita na uli na tu angka parbegu, songon na tu si Petrus tu angka Jahudi.

⁸Ai na mangulahon di si Petrus haapostelon tu angka Jahudi, laos Ibana do mangulahonsa di bagasan ahu tu angka parbegu.

⁹Ditanda nasida ma asi ni roha i, naung dilehon tu ahu, i ma si Jakobus, Kepas dohot Johannes, angka na songon tiang partunggul dirajumi dongan, gabe dijalang nasida ma ahu dohot si Barnabas, tanda ni parsaoan, paboa hami tu angka parbegu, nasida tu angka Jahudi.

¹⁰Asal huingot hami angka na pogos; jala saut do huringkoti patupahon i.

¹¹ (II.) Alai jumpa ro si Kepas tu Antiokia, tullom do hualo, ala sihataon ibana.

¹² Ai saleleng so ro dope angka na sinuru ni si Jakobus, rap mangan do ibana dohot angka parbegu; alai dung ro nasida, dipasurut do dirina jala dipaholang, sian biarna mida angka dongan na sian Jahudi.

¹³ Marmismisi do angka Jahudi na asing raphon ibana, pola do tartogu nang si Barnabas binahen ni parmismisonnasida i.

¹⁴ Alai dung huida, na so tigor langkanasida marguru tu hasintongan ni barita na uli i, ningku ma mandok si Kepas di jolo ni nasida saluhutna: Halak Jahudi hian do ho, alai diihuthon ho do adat ni parbegu, ndada adat Jahudi; marhua ma sosakhononmu halak parbegu maradat Jahudi!

¹⁵ Halak Jahudi hian do hami, ndada pardosa sian angka parbegu.

¹⁶ Alai on do huboto hami: Sian haporseaon di Jesus Kristus sambing do dapotan hapintoronjolma, ndada sian ulaon patik. Dibahen i, nang hami gabe porsea di Kristus Jesus i, asa dipintori hami, sian haporseaon di Kristus i, ndada sian ulaon patik: Ai ndang dapotan hapintoron nasa na mardaging, anggo sian ulaon patik.

¹⁷ Alai molo pardosa tardapot nang hami, na naeng pintor marhitehite Kristus, nda gabe sitambai dosa do Kristus disi? Dao ma anggo i!

¹⁸Ai hupajongjong do diringku pangalaosi, molo hupauli muse naung hulohai:

¹⁹Ai nunga mate ahu di patik i hinorhon ni patik i, asa mangolu ahu di Debata. Raphon Kristus i do ahu tarsilang.

²⁰Ndada ahu be na mangolu i nuaeng; Kristus do mangolu di bagasan ahu. Ia mangolu pe ahu nuaeng di bagasan daging, mangolu marhitehite, haporseaon di Anak ni Debata, na mangkaholongi ahu jala na mangalehon dirina humongkop ahu.

²¹Ndang hubolongkon asi ni roha ni Debata; ai aut adong hatigoran marhite sian patik i, magopo ma hamamate ni Kristus i.

3¹ (I.) Oe hamu, halak Galatia, na so marroha i! Ise do mandormai hamu? Ai nunga pola songon na ginombar diida matamuna Jesus Kristus na tarsilang i.

²Sasada on ma naeng botoonku sian hamu: Sian ulaon patik do dijalo hamu Tondi i, manang sian jamita haporseaon i?

³Songon i hape hami maoto! Di bagasan Tondi do pamungkaanna, gabe di bagasan daging ma pangujungina?

⁴Tung magopo ma panaononmuna na sai godang i (molo tung magopo)!

⁵Onpe, na patongon Tondi i tu hamu jala mangulahon angka hagagoon di bagasan hamu, na sian ulaon patik do diula i, manang sian jamita haporseaon i?

⁶(II.) Songon di si Abraham: "Dihaporseai do Debata, jadi i do dijujur tu ibana gabe hatigoranna!"

⁷Asa boto hamu ma: Angka na sian haporseaon, i do anak ni si Abraham.

⁸Alai diboto Surat i hian, na sian haporseaon i do pintoran ni Debata angka sipelebegu, gabe dibaritahon tu si Abraham: "Marhite sian ho pasupasun saluhut bangso!"

⁹Onpe, angka na sian haporseaon i do dipasupasu rap dohot si Abraham na porsea i.

¹⁰Ai hona toru do saluhut na naeng marulaon patik, ai na tarsurat do: "Hona bura do ganup, na so mian di bagasan sasude na tarsurat di buku patik i, asa diulahon!"

¹¹Alai tandap do, na so adong dapotan hatigoran di jolo ni Debata, bahenon ni patik i; ai "na mangolu ma partigor i sian haporseaon!"

¹²Alai ndang sian haporseaon i anggo patik i; ai na mangulahonsa, i do na mangolu bahenon ni i!

¹³Ditobus Kristus i do hita sian bura ni patik i, di na hona bura Ibana humongkop hita, ai na tarsurat do: "Hona bura do ganup na targantung di hau!"

¹⁴Ai di bagasan Kristus Jesus naeng songgop tu halak sipelebegu pasupasu na tu si Abraham, asa marhitehite haporseaon tajalo Tondi na pinarbagabaga i.

¹⁵Ale angka dongan, adat ni hita jolma ma ginisanna: Padan testament ni jolma, dung gabe hot, ndang diose, ndang ditambahi.

¹⁶Anggo angka bagabaga i dihatahon do tu si Abraham dohot tu pinomparna; ndada didok: Dohot tu angka pinomparna, songon tu na deak; tung tu na sada do: "Dohot tu pinomparmi", ninna, i do Kristus.

¹⁷Lapatanna: Ia padan testament, naung pinahot ni Debata, ndang tarpasohot patik i, laho manundati bagabaga i; ai opat ratus tolupulu taon do i umpudi ro.

¹⁸Ai molo sian patik i uhum paneanon, ndang be sian bagabaga. Alai dibasabasahon Debata do i tu si Abraham dalan bagabaga.

¹⁹(III.) Tudia ma antong patik i? Ditambahon do i ala ni angka pangalaosion, paima ro Pomparan, Nampuna bagabaga i, jala marhitehite angka surusuruan i dipatongon tu tangan ni Pangulu.

²⁰Alai ndada na patureturehon sambariba ia pangulu; alai sada do anggo Debata.

²¹Asa mangalo angka bagabaga ni Debata do patik i? Dao ma anggo i! Ai aut dilehon patik na tuk panguluhon, sian patik i ma tongon hatigoran i.

²²Alai dihinsu Surat i do saluhutna tubagasan dosa, asa dilehon bagabaga, na marhitehite haporseaon di Jesus Kristus, tu angka na porsea i.

²³Alai tagan so ro haporseaon, tarhurung do hita di bagasan patik jala dihinsu, managam haporseaon, na naeng patandahonon dope.

²⁴Asa gabe songon siparorot do patik i, mamboan hita tu Kristus, asa sian haporseaon hita dipintori.

²⁵Alai dung ro haporseaon i, ndang be ginomgoman ni siparorot i hita.

²⁶Ai saluhut do hamu anak ni Debata marhitehite haporseaon di Kristus Jesus.

²⁷Ai Kristus i do diparuloshon hamu, sude hamu, naung tardidi tubagasan Kristus.

²⁸Ndang mardiaimbar disi Jahudi manang Junani, hatoban manang anak mata, baoa manang parompuan, ai sada do hamu saluhutna di bagasan Kristus Jesus.

²⁹Alai anggo Kristus nampuna hamu, pinompar ni Abraham do hamu, antong, jala panean mangihuthon bagabaga i.

4¹ (I.) Alai on do hudok: Saleleng dakdanak dope panean i, ndang dia imbarna dohot anak somang, atik pe ibana nampuna sasudena i.

²Di gomgoman ni angka pangaramoti dohot juara bagas do ibana, ro di tingki naung hian binuhul ni amana i.

³Songon i nang di hita: Di hadakdanakonna i diparhatoban sisiasia ni hasiangan on do hita.

⁴Alai dung dapot gok ni tingkina, disuru Debata ma Anakna, tubu sian boruboru, ginomgoman ni patik i;

⁵asa ditobus angka na ginomgoman ni patik i, asa tajalo ruhut paramaon.

⁶Alai ala anak hamu, disuru Debata do tubagasan rohanta Tondi ni Anakna i, na manjoujou: Abba (ale Amang)!

⁷Dibahen i, ndang be hatoban ho; tung anak do! Alai molo anak, laos panean do ho marhite sian Debata!

⁸Alai di na so tinandamuna Debata, dipaolooloi hamu do angka na so Debata hian.

⁹Alai anggo nuaeng, ditanda hamu do Debata; nunga ditanda Debata hamu tahe. Marhua ma hamu marbalik muse, mulak tu sisiasia angka na so margellok jala na lea, asa oloanmuna angka i muse?

¹⁰Gabe siradoti ari, bulan, tingki dohot taon do hamuna.

¹¹Huholsohon do hamu, atik na so marniula halojaonki mangkongkop hamuna.

¹²(II.) Songon ahu ma hamu; ai ahu pe, songon hamu do, angka dongan! Elehelekh di hamu; ndang adong dihahua hamu ahu.

¹³Alai diboto hamu do, di bagasan hagaleon ni daging huboan barita na uli tu hamu di mulana.

¹⁴Jala di na tarunjun i hamu dibahen pardagingonku, ndang na lea manang hu rohamuna disi; tung songon surusuruan ni Debata do dijangkon hamu ahu, songon Kristus Jesus, i do.

¹⁵Onpe, dia ma nuaeng na pinarhatuahonmuna i? Ai huhatindangkon do tu hamu, horukonmuna do uju i matamuna, mangalahonsa tu ahu, aut na tarbahen.

¹⁶Asa na gabe musumuna do ahu, ala huhatahon tu hamu hasintongan i?

¹⁷Ndada na polin ringgasnasida mangkongkop hamu. Alai naeng paduruonnasida hamu, anggiat ringgas rohamuna mangkongkop nasida.

¹⁸Denggan do sandok ringgas ni roha na polin, jala unang ma holan, jumpa di tongatongamuna ahu.

¹⁹Hamu angka anakkonku, angka na huae musengani, paima manjadi rupa ni Kristus di bagasan hamu:

²⁰Dipangido rohangku do, aut ma nian di tongatongamuna ahu tongon, jala tarpauneune ahu soarangki, ai na jut do rohangku pasarisari hamu.

²¹Hamu na giot gomgoman ni patik i, paboa hamu ma tu ahu: Ndang dibege hamu patik i?

²²Tarsurat do disi: Dua do anak ni si Abraham, na sada sian hatobanna, na sada nari sian boru mata i.

²³Alai mangihuthon sibuk do partubu ni na sian boru hatoban i, alai sian bagabaga i do na sian boru mata i.

²⁴Na marastuan do i: Ai padan na dua i do nasida: Na sada na sian dolok Sinai, na manjadihon parhatobanon, i ma si Hagar.

²⁵ Ai di luat Arab do dolok Sinai, jala suman ma i tu Jerusalem nuaeng, ai na mangadop do i rap dohot anakonna.

²⁶ Alai Jerusalem na di ginjang i: I do boru mata i, jala i do ina di hita saluhutna!

²⁷ Ai tarsurat do: "Marlas ni roha ma ho na hol, na so mangintubu, mariaia ma ho, marsoara na gogo, na so mangae anak; ai torop do anakkon ni na punjung i, tumorop asa na di na marhamulian."

²⁸ Alai anak bagabaga do anggo hamu, angka dongan, mangihuthon si Isak.

²⁹ Alai tong do nuaeng songon na hian: Dilele na tubu marguru tu daging do na tubu marguru tu Tondi i.

³⁰ Alai aha do didok Surat i? "Pabali ma boru hatoban i rap dohot anakna, ai na so tupa manean anak ni boru hatoban i rap dohot anak ni boru mata i!"

³¹ Onpe, ale angka dongan, ndada anak ni boru hatoban hita, angka anak ni boru mata, i do!

5¹ (I.) Asa saut malua hita, umbahen na dipalua Kristus i hita. Hot ma hamu jongjong, antong, jala unang be olo hamu patunduhon ni auga parhatobanon i!

² Sandok ahu, Paulus, mandok tu hamu: Molo pasunathonsa hamu, ndang marguna be Kristus di hamu!

³Huulaki ma mangkatindangkon tu ganup
jolma: Na pasunathon, ingkon diulahon
sandok patik i!

⁴Naung sirang do hamu sian Kristus, anggo
naeng pintor hamu, bahenon ni ulaon patik;
naung peut do hamu sian parasirohaon!

⁵Ai marhitehite haporseaon di bagasan tondi
hita managam hatigoran sihirimon i.

⁶Ai ndada margogo di Kristus Jesus i, nang
hajahudion, nang na so hajahudion; sandok
haporseaon siula haholongon i do!

⁷Na denggan do parlojongmuna najolo; ise
mangambat hamu, so mangoloi hasintongan i
be?

⁸Ndada sian na manjou hamu ro
pangelaelaon sisongon i.

⁹Diasomi saotik na asom i do sandok itak na
niudi.

¹⁰Pos do rohangku di hamu marhitehite
Tuhan: Ndada na mimbar rohamuna. Alai
manang ise pe na manggaori hamu, porsanon
ni i do uhuman na tu ibana!

¹¹Alai aut hujamitahon hajahudion, ale
angka dongan, marhua ma ahu lelean? Ai
naung mansohot ma antong gasip ni silang i.

¹²Aut gotap ma nian angka na manggunturi
hamu!

¹³(II.) Tu haluaon i hamu dijou, angka
dongan; asal unang haluaon i gabe
parbonsiran di sibuk; sandok marhitehite
haholongon i ma hamu masioloan!

¹⁴Ai hagogok ni saluhut patik do hata na sandok on: Haholongi donganmi songon dirim!

¹⁵Alai molo masiharatan jala masiallangan hamu, jaga ma hamu, so tung suda hamu na masilengsean!

¹⁶Alai on do hudok: Marguru tu Tondi i ma hamu marparange; unang pasaut hamu hisaphisap ni daging!

¹⁷Ai na maralohon tondi do sangkapsangkap ni daging, jala maralohon daging i do sinangkap ni tondi: Na masialoan do i, asa unang dipasaut hamu pinangido ni rohamuna.

¹⁸Alai molo ditogihon Tondi i hamu, ndang ginomgoman ni patik hamu.

¹⁹Alai tandap do parulaon ni daging, i ma parmainanon, hahodaron, pargadombuson,

²⁰hasipelebeguon, hadatuon, parmuseumuon, parbadabadaon, pangiburuon, rimasrimas, pargutugutuon, parsalisian, partahitahion,

²¹bunubunu, parmabuhon, haormuson jala angka na suman tusi. Naung hupaboa najolo tu hamu, songon i do nang nuaeng: Nandang teanon ni angka na mangulahon sisongon i harajaon ni Debata.

²²Alai angka on do parbue ni Tondi: Holong dohot las ni roha, dame dohot lambas ni roha, habasaron, habasaon, haporseaon, halambohon dohot hatomanon.

²³Ndang maralo patik dompak angka sisongon i.

²⁴Alai angka na ginomngoman ni Kristus Jesus, diparsilangkon do dagingna rap dohot angka hisaphisap dohot sangkapsangkap.

²⁵Ia dung dipangolu Tondi i hita, taparangehon ma Tondi i!

²⁶Unang ma taeahi hasangapon na rumar; unang masiasapan manang masilatean!

6¹(I.) Ale angka dongan, molo tung tarsomongjolma mardosa, hamu angka naung taruli di Tondi ma patureturehon ibana marhitehite tondi na lambok; alai matahon dirim, so tung dohot ho tarunjun!

²Masiurupan ma hamu mamorsan angka na dokdok i; i ma dalan mangaradoti patik ni Kristus.

³Ai molo dipaburnang halak dirina, hape so adong di ibana, sipaotooto diri do i.

⁴Alai ganup ma manangkasi ulaonna be; dung i tu ibana sandiri ma pujipujian, ndada maradophon na asing.

⁵Alai adong di ganup siporsanonna be!

⁶(II.) Alai na mamodahon hata ni Debata, tama do taruli di nasa parsaulian ni na pinodaanna i.

⁷Unang hamu lilu; ndang olo Debata leaan! Ai ia i disabur halak, i do gotilonna!

⁸Ai na manabur tu dagingna, manggotil do sian dagingna hamagoan; alai na manabur

tu tondi, manggotil do sian tondi i hangoluan salelenglelengna!

⁹Alai unang marnaloja hita mambahen na denggan, ai na manggotil do hita muse di tingkina i, anggo so pargale hita nuaeng.

¹⁰Antong, binsan sadihari dope, taulahon ma na denggan di saluhut halak, alai gumodang ma tu donganta sahaporseaon!

¹¹(III.) Tanda hamu ma balga ni surat ni tanganku!

¹²Sude na ringkot roha di hasangapon ni pardagingon, manosaknosak hamu pasunathon; asal unang taononna pangaleleon siala silang ni Kristus.

¹³Ai gari nasida, Jahudi hian, ndang diradoti patik i; alai naeng do hamu tarsunat di rohanasida, asa di puji nasida dirina marhite sian dagingmuna.

¹⁴Alai dao ma sian ahu na mamuji diri, anggo so siala silang ni Tuhanta Jesus Kristus! Marhitehite Ibana do tarsilang portibi on di ahu, jala ahu pe, tarsilang do maradophon portibi on.

¹⁵Ai manang sian hajahudion dongan manang sian hasipelebeguon, ndang mahua i; ingkon na tinompa na imbaru do!

¹⁶Jala dame ma dohot asi ni roha tu saluhut na mamarangehon ruhut sisongon i, nang tu Israel ni Debata!

¹⁷ Dungkon ni i, unang ma pola disusai agia ise ahu, ai hupaboanboan do angka tanda ni bugang ni Jesus di dagingku.

¹⁸ Didongani asi ni roha ni Tuhanta Jesus Kristus ma tondimuna, ale angka dongan! Amen.

Efesus

1 ¹ (I.) Ahu surat tinongos ni Paulus, apostel ni Kristus Jesus, sian lomo ni roha ni Debata, mandapothon angka na badia na di Epesus, angka na porsea di Kristus Jesus:

² Asi ni roha ma di hamu dohot dame sian Debata Amanta, nang sian Tuhan Jesus Kristus i!

³ (II.) Pinuji ma Debata, Ama ni Tuhanta Jesus Kristus, naung umpasupasuhon tu hita ragam ni pasupasu partondion sian banua ginjang, di bagasan Kristus.

⁴ Ai dipillit do hita di bagasan Ibana, andorang so ojak dope tano on, asa badia hita jala so hasurahan di adopanna i, di bagasan holong ni roha.

⁵ Ditodo hian do hita bahen anakna, marhitehite Jesus Kristus, asa tu Ibana, mangihuthon halomoan ni rohana,

⁶ asa tarpuji asi ni rohana na marmulia i, na niasihonna tu hita di bagasan na Hinaholonganna i.

⁷ Di bagasan Ibana dapot hita haluaon i, binahen ni mudarna i, i ma hasesaan ni angka pangalaosion, mangihuthon asi ni rohana na tarlobi i,

⁸ naung buas niusehonna i tu hita mardongan hapistaran dohot habisuhon godang.

⁹Ai dipabotohon Ibana do tu hita tahi ni rohana, na buni hian mangihuthon halolomona, naung pinahotna i di bagasan dirina,

¹⁰Iaho pasauthonsa di hagogok ni tingkina, mandok: Pasadahon di bagasan Kristus i sasudena, na di banua ginjang dohot na diatas tano on.

¹¹Ai di bagasan Ibana do dapotan partalian hita, angka naung tinodona hian, marguru tu tahi ni na patulushon sasude, mangihuthon pandok ni rohana,

¹²asa tarpuji hasangaponna marhitehite hita, angka naung mangkirim hian di Kristus i.

¹³Di bagasan Ibana dohot hamu umbege hata hasintongan i, i ma barita na uli na taringot tu haluaonmuna, jala di bagasan Ibana gabe porsea hamu, laos disahaphon do tu hamu Tondi Parbadia na pinarbagabaga i.

¹⁴Ibana do patujolo ni arta siteanonta, bahen haluaon ni na hinophopna i, asa tarpuji hasangaponna i.

¹⁵(III.) Asa ahu pe, dung hubege, naung porsea hamu di Tuhan Jesus jala holong rohamuna di saluhut angka na badia,

¹⁶ndang mansadi ahu mandok mauliate siala hamu, marningot hamu, di na martangiang ahu:

¹⁷Anggiat dilehon Debata ni Tuhanta Jesus Kristus, Ama ni hasangapon i, tu hamu Tondi

hapistaran dohot pangungkapon mananda Ibana.

¹⁸Dipatiur ma mata ni rohamuna, asa diboto hamu rumang ni arta sihirimon sian panjouonna i ro di surung ni hasangapon, siteanon ni angka na badia i.

¹⁹Asa ditanda hamu nang hagogok ni gogona na sumurung i na tu hita, angka na porsea sian pangkorhon ni hagogoonna na marmulia i.

²⁰Ai di Kristus do i diulahon Debata, di na pinahehena i Ibana sian na mate jala pinahundulna i tu siamunna di bagasan banua ginjang i,

²¹tu ginjang ni nasa harajaon dohot huaso, nang hagogoon dohot hamuliaon, nang tu ginjang ni nasa goar na tarhatahon, ndada holan di hasiangan on, dohot do di na ro sogot.

²²Saluhutna do dipatunduk tutoru ni patna, jala dipabangkit do Ibana, na mangatasi sasude, gabe ulu ni huria i.

²³I do pamatangna na manggohi Ibana, asa gohanna sasude di bagasan saluhutna.

2¹(I.) Hamu pe, nunga mate hamu najolo hinorhon ni angka pangalaosion dohot dosamuna,

²angka na niulahonmuna marguru tu tingki ni hasiangan on, mangihuthon lomolomo ni na marhuaso di aoangaoang, i ma tondi na

mangula nuaeng di bagasan angka anak na so siat hata.

³Raphon nasida do nang hita sasudena najolo mangulahon angka hisaphisap ni dagingta, di na taturut lomolomo ni daging i ro di sangkapsangkapna, jadi anak sirimasan do hita sian bangko hian, doshon angka na asing.

⁴Alai anggo Debata parasiroha bolon do jala parholongroha na balga maradophon hita.

⁵Jala raphon Kristus do dipangolu Ibana hita, angka naung mate di bagasan angka pangalaosion; na sian asi ni roha do, umbahen na malua hamu!

⁶Gabe rap dipangolu jala rap dipabangkit hita tu gomgoman banua ginjaang, di bagasan Kristus Jesus.

⁷Laos patuduhononna do di angka tingki na naeng ro dope surung ni hamoraon ni asi ni rohana, di habasaonna i maradophon hita, di bagasan Kristus Jesus.

⁸Ai sian asi ni roha do, umbahen na malua hamu, dalan haporseaon; jala ndada binahenmuna, silehonlehon ni Debata do.

⁹Nda tung sian parulaon i, asa unang adong na mamuji diri.

¹⁰Ai jadijadianna do hita, angka na tinompa di bagasan Kristus Jesus, asa marulaon na denggan hita; ai angka i do dipature Debata hian, asa taparangehon i.

¹¹ (II.) Dibahen i, hamu sipelebegu hian, na targoar na so parsunaton, digoar angka na somal didok parsunaton na pinatupa ni tangan di sibuk i; ingot hamu ma;

¹² Ndang parjambar di Kristus hamu uju i; dibalian ni harajaon Israel do hamu, jala ndang taruli di angka parpadanan bagabaga; soada sihirimon jala soada Debata di hamu di tano on.

¹³ Alai anggo nuaeng, di bagasan Kristus Jesus do hamu; jala dao pe hamu najolo, gabe dipajonok mudar ni Kristus i do hamu nuaeng.

¹⁴ Ai Ibana do pardameanta, dung dipasada na dua i jala ditangtangi dorpi parholangan i, i ma hamusuon i.

¹⁵ Ai di bagasan dagingna do diloha Ibana patik i, i ma angka tona dohot aturan, asa ditompa di bagasan dirina na dua i, gabe sadajolma na imbaru, pajongjong dame.

¹⁶ Jala dipadenggan do na dua i di bagasan daging na sasada i tu Debata, binahen ni silang i; ai disi do dipusa Ibana hamusuon i.

¹⁷ Dung i ro ma Ibana, mamaritahon dame di hamu angka na dao, dame nang di angka na donok.

¹⁸ Ai marhite Ibana adong do dalan manopot Ama i di hita na dua ragam i, di bagasan sada Tondi.

¹⁹ Asa ndada be angka paisolat manang panginsua hamu; angka dongan saharajaon

raphon angka na badia do, jala dongan sabagas ni Debata.

²⁰Ai dipauliuli do hamu diatas ojahan ni angka apostel dohot panurirang; Kristus Jesus sandiri do batu parsuhisuih di.

²¹Di bagasan Ibana do martomu sandok bagas i jala lam ganda, gabe joro na badia di bagasan Tuhan i.

²²Di bagasan Ibana do nang hamu rap dipauliuli, gabe parmianan ni Debata di bagasan Tondi i.

3¹(I.) Ala ni i do ahu, Paulus, niihot ni Kristus, ala hamu angka sipelebegu.

²Molo tung dibege hamu tohonan mangaradoti asi ni roha ni Debata, na pinasahatna i tu ahu, patureturehon hamu.

³Ai sian pangungkapon do dipabotohon tu ahu hahomion, na hutaringoti nangkinian.

⁴Laho manjaha i, dapot timbanganmuna pangantusingku di hahomion ni Kristus i.

⁵Ndang dipabotohon dope i tu angka anak ni jolma di angka sundut najolo, alai nunga dipapatar i nuaeng tu angka apostelna na badia i dohot tu angka panurirangna, di bagasan Tondi i:

⁶Paboa, dohot do halak parbegu gabe dongan panean jala dongan sadaging dohot dongan satohap di bagabaga, na di bagasan Kristus Jesus, marhite sian barita na uli i.

⁷Naung gabe parhalado ni i do ahu, sian pangalehon ni Debata di asi ni rohana, na tu ahu sian pangkorhon ni hagogoonna i.

⁸Tu ahu, na ummetmet sian saluhut angka na badia i, dilehon asi ni roha on: Mamaritahon tu angka sipelebegu hamoraon ni Kristus na so hadodoan i;

⁹jala patorangkon pangalaho ni tohonan di hahomion i, na buni sian mula ni mulana di bagasan Debata, Sitompa saluhut.

¹⁰Naeng ma marhite sian huria i dipatandahon godang ni ragam ni hapistaran ni Debata tu angka na marmulia jala marhuaso di banua ginjang i.

¹¹I do ditahi sian mula ni mulana, gabe dipasaut di bagasan Kristus Jesus, Tuhanta i.

¹²Marhitehite Ibana dapot hita hiras ni roha dohot dalan masuk, di bagasan roha na pos, na mangkaporseai Ibana.

¹³Dibahen i mangido ahu, asa unang mandele hamu mida haporsuhonku, angka na humongkop hamu, ai hasangaponmuna do i.

¹⁴(II.) Ala ni i, hulompit do tothu maradophon Ama i.

¹⁵Ibana do haroroan ni nasa bangso, na targoar di banua ginjang nang di tano on.

¹⁶Anggiat, hombar tu godang ni hasangaponna i, dilehon tu hamu jolma parbagasan, sipargogoan jala sipatoguon marhitehite Tondina,

¹⁷Asa maringanan Kristus i marhitehite haporseaon di bagasan rohamuna, gabe hot hamu marurat jala marojahan di bagasan roha na holong.

¹⁸Naeng ma malo hamu mangantusi, rap dohot saluhut angka na badia i, ganjangna dohot bidangna, bagasna dohot timbona,

¹⁹Iaho tumanda holong ni roha ni Kristus, na mangatasi nasa pangantusion, asa sahat tu hamu sandok hagogok ni Debata!

²⁰Alai tarpatupa Ibana do andul lumobi sian na tapangido manang tapingkiri, hombar tu hagogoon na mangkorhon di bagasan hita.

²¹Di Ibana ma hasangapon di tongatonga ni huria i jala di bagasan Kristus Jesus ro di saluhut sundut salelenglelengna! Amen.

4¹ (I.) Asa ahu na tarihot di bagasan Tuhan i, huapoi ma hamu: Parangehon hamu ma na tama, hombar tu panjouon naung songgop tu hamu!

²Martoruk ni roha situtu, marlambok jala marlambas ni roha, masihaehean di bagasan roha na holong!

³Haringgashon hamu ma mangaradoti hasadaon ni Tondi, pinadomu ni dame!

⁴Ai sada do daging i, jala sada do Tondi; ai songon i do hamu tarjou di bagasan sada pangkirimon di panjouon i.

⁵Sada do Tuhan, sada do haporseaon, sada do nang pandidion.

⁶Sada do Debata, Ama ni sasude, sigomgomi saluhut, sitorusi saluhut jala siingani saluhut.

⁷Alai tu ganup hita be do dibasabasahon asiasi i, marguru tu panagihon ni pangalehon ni Kristus.

⁸Dibahen i ninna do: "Nunga manaek Ibana tu ginjang, ditaban do na tarhurung; dilehon do silehonlehon tu angka jolma!"

⁹Alai nangkok pe Ibana, naung tuat do Ibana jumolo tu inganan na ditoru ni tano.

¹⁰Ibana, naung tuat i, laos I do na manaek tu ginjang ni saluhut banua ginjang, asa digohi sasude.

¹¹Laos Ibana do mangalehon deba gabe apostel, deba panurirang, deba evangelist, deba muse parmahan jala pangajari,

¹²patureturehon angka na badia i, laho mangulahon tohonan i, pauliulihon daging ni Kristus:

¹³Paima sahat hita saluhut tu hasadaon ni haporseaon nang parbinotoan di Anak ni Debata, gabe jolma na tang jala matoras situtu, mangihuthon hagogok ni rimpas ni Kristus.

¹⁴Asa unang be hita dakdanak, angka na pinalindaklindak jala na pinamboanboan ni pangombus ni ragam ni poda, binahen ni pangaliluhon ni jolma dohot angka na paotootohon.

¹⁵Gabe parhasintongan hita tahe di bagasan haholongon i, jala lam magodang ma hita

di na saluhut, mangeahi Ibana, Ulu i, i ma Kristus.

¹⁶Sian Ibana do sandok daging i dipadomu jala martomu, tiniop ni sude uraturat pangurupi, gabe lam magodang daging i mangihuthon pangulaon ni ganup ruas di bagianna be, pinauliuli di bagasan haholongon i.

¹⁷(II.) Asa on do na hudok jala huhatindangkon marhitehite Tuhan: Na so tupa be hamu marpangalaho songon halak sipelebegu, na marrohahon na so marguna.

¹⁸Angka parroha haholomon do nasida, angka na holang sian ngolu ni Debata, binahen ni haotoon ni rohanasida, ala naung gabe pir rohanasida.

¹⁹Ndang marnangon nasida, gabe dipasahat dirina tu pargadombuson, jala diulahon nasa harorongan mardongan pangahution.

²⁰Alai anggo hamu, ndang songon i diguruhon hamu Kristus i,

²¹namun dibege hamu baritana jala dapotan poda sian Ibana, i ma hasintongan di bagasan Jesus:

²²Tanggali hamu ma jolma na buruk i, isara di pangalaho najolo, ai laho mago do i hinorhon ni angka hisaphisap sipaotooto.

²³Alai paimbaru hamu ma dirimuna di bagasan tondi ni rohamuna!

²⁴Jala solukkon hamu ma jolma na imbaru, na tinompa suman tu Debata,

di bagasan hatigoran dohot hapolinon na marhasintongan!

²⁵ Dibahen i, bolongkon hamu gabus i; hatahon hamu ma na sintong, ganup tu donganna, ai ruas do hita sama hita.

²⁶ Ia tarrimas hamu, unang ma mardosa! Unang ma sanga mate mata ni ari, so mintop rimasmuna.

²⁷ Unang pasiat hamu sibolis i!

²⁸ Naung manangko i, unang be manangko; mulaulaon ma ibana, tanganna i ma sumarihon ngoluna, asa adong lehononna tu na hurangan.

²⁹ Unang ma ruar hata na busuk sian pamanganmuna; naeng ma na denggan na tau padengganhon na humurang, asa dapotan uli na umbegesa.

³⁰ Jala unang ma arsahi hamu Tondi Parbadia ni Debata, naung disahaphon tu hamu tu ari haluaon i.

³¹ Dao ma sian hamu nasa riting ni roha dohot muruk dohot rimas, nang hata songgaksonggak dohot insahinsak, songon i nasa hajahaton!

³² Alai gabe na basar ma hamu sama hamu, angka parasiroha; masisesaan dosa ma hamu, songon panesa ni Debata di dosamuna di bagasan Kristus.

5¹ (I.) Onpe, sitiru Debata ma hamu, songon angka anak na hinaholongan!

²Jala parangehon hamu ma haholongon i songon Kristus i, na mangkaholongi hamu jala dilehon do dirina humongkop hita, gabe silua jala pelean bahen uap na hushus tu Debata.

³Alai parmainanon dohot ragam ni harorongan ro di pangahution, unang ma targoar di hamu; ai songon i do tama di angka na badia.

⁴Songon i nasa sihailahononhon, hata barangsi dohot pargaitgaiton na so patut; alai mauliate ma nian dohonon.

⁵Ai boto jala ingot hamu ma: Anggo di harajaon ni Kristus dohot Debata, ndang adong siteanon ni parmainan manang parhodar, manang parroha na ahut; ai sioloi na so Debata do i.

⁶Unang olo hamu paotootoon ni hatahata na rumar; ai ala ni angka i do mangonai rimas ni Debata tu angka anak na so mangoloi.

⁷Dibahen i, unang ma hamu gabe dongan satohapnasida!

⁸Ai na holom do hamu najolo; alai tiur do anggo nuaeng di bagasan Tuhan i: Marparange ma hamu, songon angka anak hatiuron!

⁹Ai nasa habasaon dohot hatigoran dohot hasintongan, i do parbue ni na tiur i.

¹⁰Tangkasi hamu ma, manang dia lomo ni roha ni Tuhan i!

¹¹ Unang ma saor hamu tu angka ulaon haholomon na soada parbuena; pinsangi hamu angka i tagonan!

¹² Ai gari manaringoti na niulanasida di na buni, gari hailaon do.

¹³ Alai gabe patar do i saluhutna, tinoruan ni na tiur i; ai nasa naung dipapatar, tiur ma i!

¹⁴ Dibahen i, ninna do: "Tarsunggul ma ho na tarpodom, jala hehe ma sian angka na mate; gabe sondangan ni Kristus ma ho!"

¹⁵ Antong, manat ma hamu mamereng manangkasi parulaonmuna; songon angka na marroha, unang ma songon angka na hurang roha!

¹⁶ Parhaseang hamu ma tingki, ai ari hasusaan do nuaeng.

¹⁷ Dibahen i, unang ma gabe maoto hamu; alai antusi hamu ma, manang dia lomo ni roha ni Tuhan i.

¹⁸ Unang ma mabuk hamu bahenon ni anggur, ai hamagoan do di bagasan i; alai gok Tondi ma hamu!

¹⁹ Hatahon hamu ma sama hamu angka ende psalmen, angka ende pujipujian dohot ende partondion; endehon jala puji hamu ma Tuhan i di bagasan rohamuna!

²⁰ Manongtong ma hamu mandok mauliate siala saluhutna tu Debata Ama, di bagasan Goar ni Tuhanta Jesus Kristus!

²¹ (II.) Masioloan ma hamu sian biar ni rohamuna mida Kristus!

²²Dioloi angka parompuan ma baoana be, songon pangoloi di Tuhan!

²³Ai baoa i do ulu ni pardihutana, songon Kristus ulu ni huria i; laos Sipangolu daging i do Ibana.

²⁴Alai songon pangoloion ni huria di Kristus i, songon i ma angka parompuan maradophon baoana be di na saluhutna.

²⁵Hamu angka baoa, haholongi hamu ma pardihutamuna be songon Kristus, na mangkaholongi huria i jala dilehon do dirina humongkopsa;

²⁶asa diparbadiai, dung diasi marhitehite na mandidihon aek di bagasan Hata i.

²⁷Jala sangap do dipadiri di Ibana huria i, so marlindang, so marhalingking, manang marhahurangan dia pe, asa badia tahe jala so hasurahan.

²⁸Songon i do patut haholongan ni angka baoa pardihutana be, songon dagingna sandiri. Na mangkaholongi pardihutana, dirina do hinaholonganna disi.

²⁹Ndang dung dihosomijolma dagingna, diparmudumudu do jala dipainuinu, songon pambahen ni Kristus tu huria i.

³⁰Ai ruas ni dagingna do hita.

³¹"Ala ni i, tadingkonon ni halak do amana dohot inana, mangangkupi dongan saripena; jala gabe sada daging do nasida na dua i!"

³²Tung na balga do hahomion on; alai tu Kristus dohot tu huria i huhonahon.

³³Alai sandok ganup hamu, masihaholongi pardihutana be songon dirina; alai dihabiari parompuan i ma baoana!

6¹ (I.) Hamu angka anak, oloi hamu ma angka natuatuamuna di bagasan Tuhan i; ai i do na tigor.

²"Parsangapi amangmu dohot inangmu!" I do patik na parjolo mardongan bagabaga:

³"Asa martua ho jala leleng mangolu di tano on!"

⁴Hamu angka ama, unang gintali hamu angka anakkonmuna; pagodanggodang hamu ma nasida di bagasan ajar dohot poda ni Tuhan i!

⁵Hamu angka anak somang, oloi hamu ma angka indukmuna di hasiangan on mardongan biar dohot lomos ni roha; marroha na bulus songon na maradophon Kristus!

⁶Unang hamu pangoloi di mata, songon na mambuat roha nijolma; songon naposo ni Kristus ma ulahon hamu roha ni Debata, sian nasa rohamuna.

⁷Sian burjumuna ma hamu mangoloi: Songon di Tuhan i, unang dijolma i!

⁸Ai diboto hamu do: Sumuang jaloan ni ganup sian Tuhan i na denggan na niulana, manang hatoban ibana manang anak mata.

⁹Hamu angka induk pe, laos songon i ma bahen hamu tu nasida; antahi hamu ma na mangasupi i, ai diboto hamu do, di banua

ginjang do nang Tuhanmuna, jala ndada siida bohi Ibana.

¹⁰(II.) Dungkon ni i, gabe togu ma rohamuna di bagasan Tuhan i dohot di bagasan hagogoonna na togu i!

¹¹Solukkun hamu ma pangkean sinjata na sian Debata, asa taralo hamu utiutian ni sibolis i.

¹²Ai ndada marungkil hita mangalo mudar dohot sibuk, angka harajaon do, angka parhuaso, angka sigomgomi hasiangan haholomon on, angka tondi hajahaton na di ginjang i.

¹³Dibahen i, jalo hamu ma pangkean sinjata na sian Debata, asa tarbahen hamu mangalo di ari na jahat i, jala hot jongjong, dung dipatunduk hamu sasude.

¹⁴Antong, jongjong ma hamu, marhohoshon hasintongan di gontingmuna, angka naung manolukkon bajubaju partahanan, i ma hatigoran i.

¹⁵Marsipatu ma patmuna, laho mangkaringgashon barita na uli, pardamean i.

¹⁶Angkup ni sudena i, jalo hamu ma lombulumbu haporseaon i; haintopan hamu do marhite sian i sude sumbia api ni parjahat i.

¹⁷Jangkon hamu ma nang tahuluk haluaon dohot podang ni tondi, i ma hata ni Debata.

¹⁸Martangiang ma hamu, mardongan sandok pangidoan dohot elehelek di bagasan Tondi, manang sadihari pe, huhut dungo jala jugul tongtong, tumangiangkon saluhut angka na badia,

¹⁹nang ahu pe, asa dibungka pamanganku, mandok sidohononku, laho pabotohon hahomion ni barita na uli, mardongan hiras ni roha.

²⁰Ai tusi do disuru ahu na tarrante on, asa marhiras ni roha ahu disi, mangkatahonsa songon na tama.

²¹(III.) Alai paboan ni si Tikikus do tu hamu saluhutna i, asa diboto hamu na masa di ahu, ro di ulaonku; ai ibana do dongan na hinaholongan jala parhobas haposan di bagasan Tuhan i.

²²Ala ni i do husuru ibana mandapothon hamu, asa dapot botoonmuna na masa di hami, jala asa diapuli rohamuna.

²³Dame ma di angka dongan, dohot holong ni roha raphon haporseaon sian Debata Ama i, nang sian Tuhan Jesus Kristus i!

²⁴Asi ni roha i ma mandongani saluhut, angka na marsihohot mangkaholongi Tuhanta Jesus Kristus!

Filipi

1 ¹ (I.) Ahu surat, tinongos ni si Paulus dohot si Timoteus, angka naposo ni Kristus Jesus, mandapothon saluhut angka na badia di bagasan Kristus Jesus, angka na di Pilippi, raphon angka sintua dohot pangurupi:

² Asi ni roha ma di hamu dohot dame sian Debata Amanta dohot sian Tuhan Jesus Kristus!

³ Mauliate hudok tu Debatangku, ganup huingot hamu.

⁴ Tongtong manang sadihari pe hutangiangkon hamu sudena; sian las ni rohangku do huula tangiangki.

⁵ Ai huingot saormuna tu barita na uli sian mulana i sahat ro di nuaeng.

⁶ Apala on ma pos ni rohangku: Naung umpungka ulaon na denggan di bagasan hamu, patuluson ni I do i, sahat ro di ari ni Kristus Jesus.

⁷ Tama do songon i rohangku mida hamuna sude, ala na di bagasan rohangku hamuna. Ai rap partohap di asi ni roha na tu ahu i do hamu saluhutna, di na tarhurung i ahu, nang di na hutariashon jala huondolhon barita na uli i.

⁸Ai Debata do saksingku di balga ni siholhu mida hamu sude, mangihuthon pangasii ni Kristus Jesus.

⁹Jala on do hupangido, naeng ma lam sumurung holong ni rohamuna, marurat di parbinotoan dohot di nasa panimbangan partondion,

¹⁰Iaho manangkasi na rumingkot i, asa polin hamu, so partuktuhan, sahat ro di ari ni Kristus,

¹¹asa ramos hamu marparbue hatigoran marhitehite Jesus Kristus, bahen hasangapon jala pujipujian di Debata.

¹²(II.) Alai dipangido rohangku, ale angka dongan, naeng ma botoonmuna: Lam manumpak tu barita na uli do na masa di ahu:

¹³Pola naung gabe barita ni Kristus do angka rantengku tu sandok pangisi ni tangsi i, nang humaliang.

¹⁴Gabe dapotan pos ni roha do tumorop dongan na di bagasan Tuhan i binahen ni rantengki, gabe lam barani ma mangkatahon hata ni Debata, so pola mabiar.

¹⁵Deba tutu mangkatindangkon Kristus marroha latelate dohot badabada, alai deba sian denggan ni roha.

¹⁶Nionjar ni holong ni roha ma angka i, ala diboto, manariashon barita na uli do, umbahen na tarhurung i ahu.

¹⁷Alai na asing i manjamitahon Kristus sian roha na marbada, ndada mamolin; dihirim, tambaannasida do haporsuhon tu ahu na tarrante.

¹⁸Asa beha do? Asal ma dijamitahon Kristus, manang beha pe pangalahona; manang marroha di bagasan, manang marroha na sintong. Las do rohangku disi, nang nuaeng, nang tu jolo on.

¹⁹Ai huboto, manumpak do i tu ahu gabe hatuaonku, horhonon ni tangiangmuna dohot pangurupion ni Tondi ni Jesus Kristus.

²⁰Ai i do na huhalungunhon jala huhirim, sandok na so tarila ahu: Tung mardongan nasa hiras ni roha, songon nasailaon, songon i nang nuaeng, marsangap Kristus marhite sian dagingku, mangolu manang mate pe ahu.

²¹Ai Kristus do hangoluan di ahu, jala laba nang hamatean.

²²Alai anggo marparbue ulaonki hinorhon ni ngolu ni daging on, gabe ndang huboto, manang dia pillitonku.

²³Duansa do manosak ahu: Malungun do ahu borhat, asa rap dohot Kristus; ai dumenggan situtu do i.

²⁴Alai rumingkot do mian di bagasan daging ala ni hamu!

²⁵Jala mangkaposi i, huboto ma: Mian do ahu jala tinggal rap dohot hamu sude, laho patimbul jala pahinsa haporseaonmuna,

²⁶Asa lam sumurung pamujimuna di Kristus Jesus marhite sian ahu, di na ro ahu muse tu hamu.

²⁷(III.) Asal tu barita na uli ni Kristus ma pahombar hamu parsaoanmuna, asa huida di hamu, di na ro i ahu, manang hubege taringot tu hamu, tagan padaodao dope, paboa na hot hamu jongjong di bagasan hasadaon ni tondi jala rap marungkil, marsada ni roha mangkaporseai barita na uli.

²⁸Tung unang ma olo hamu pambibiaran ni angka alo di agia aha pe; tanda ni hamagoanna ma i di nasida, alai di hamu tanda ni haluaon do, jala sian Debata do i.

²⁹Ai pola diasinirohahon tu hamu, marsitaonon humongkop Kristus, ndada holan na mangkaporseai Ibana.

³⁰Jala di hamu do nuaeng parungkilon, naung niidamuna di ahu najolo, jala na binegemuna nuaeng taringot tu ahu.

2¹(I.) Molo tung adong apoapo marhitehite Kristus, dohot sosososo holong ni roha dohot parsaoan ni tondi, nang talup dohot asi ni roha,

²gohi hamu ma halalas ni rohangkon: Sada ma parrohahon hamu; sada ma haholonganmuna; saroha, sapingkiran ma hamu!

³Unang ma mardingkandingkan manang marhasangapon na rumar; alai sian toruk ni

rohamuna be ma rajumi hamu donganmuna
sumurung sian dirimuna!

⁴Unang ma na ringkot di hamu be matahon
hamu, dohot ma na di dongan!

⁵Songon parrohaon ni Kristus Jesus ma
parrohaonmuna!

⁶Atik pe rupa ni Debata di Ibana, ndada
songon na nidobo dirajumi rohana tudosna i
tu Debata.

⁷Dirumari do dirina jala disolukkon rupa ni
hatoban, gabe suman tu jolma do Ibana jala
rumang jolma dapot di Ibana.

⁸Dipatutoru do dirina; na gabe pangoloi do
Ibana paima mate, pola tung mate tarsilang!

⁹Ala ni i do dipatimbo Debata Ibana jala
dibasabasahon tu Ibana Goar na sumurung
asa nasa goar,

¹⁰asa somba tu Goar ni Jesus nasa ulu ni
tot, na di banua ginjang i dohot na di tano,
nang na ditoru ni tano,

¹¹jala asa nasa na marsoara marhatopothon:
Jesus Kristus do Tuhan, bahen hasangapon ni
Debata Ama!

¹²(II.) Onpe, hamu, na hinaholongan,
songon tongtong ni pangoloionmuna
nasailaon, unang holan jumpa di hamuna
ahu, lam songon i ma, di na padaodao ahu:
Mardongan biar dohot lomos ni roha ulahon
hamu ma haluaonmuna!

¹³Ai diula Debata do di bagasan hamu giot ni roha nang ulaon saut, mangihuthon lomo ni rohana.

¹⁴Di nasa pambahenanmuna: Unang ma hamu marungutungut, unang ma marroha ganggu!

¹⁵Naeng ma so hasurahan jala so marlaok hamu, angka anak ni Debata, angka na so marlindang di tongatonga ni sundut na geduk jala na marbalik; disi ma hamu marsinondang songon sisondangi portibi on!

¹⁶Marsitiopan ma hamu tu hata hangoluan i, bahen pujipujian di ahu di ari ni Kristus, paboa na so magopo parlojongonku, jala ndada na so marguna halojaonku.

¹⁷Ai nang pe didurushon mudarhu songon pelean mangkongkop haporseaonmuna, marlas ni roha do ahu rap dohot hamu saluhutna.

¹⁸Laos i ma halashon hamu, jala marlas ni roha ma hamu rap dohot ahu!

¹⁹(III.) Alai hirim do rohangku marhitehite Tuhan Jesus, tibu ma suruonku si Timoteus manopot hamu, anggiat marhiras ni roha nang ahu, anggo dung huboto na masa di hamu.

²⁰Ai ndang adong be donganku sisaroha, na olo sumarihon hamu sian roha na burju.

²¹Ai na ringkot tu dirina be do dijalahi ndada na tu Kristus Jesus i.

²²Alai diboto hamu do hatauonna i, ai songon anak tu amana pangkobasionna di ahu, humongkop barita na uli i.

²³Hirim do rohangku, tarsuru ahu do ibana, disi huboto, manang beha langkangu.

²⁴Alai pos do rohangku di bagasan Tuhan i, tibu ma nang ahu ro.

²⁵Alai ninna rohangku do, patut suruonku manopot hamu dongan i, si Epaproditus, donganku mangula jala marungkil, na sinurumuna mamboan na ringkot di ahu.

²⁶Ai masihol do ibana mida hamu saluhutna, jala humasusa rohana, ala tarbortik tu hamu sahutna i.

²⁷Jala tutu do ibana marsahit, pola mate ne: Alai asi do roha ni Debata mida ibana, ndada holan di ibana tahe, tung na dohot do di ahu, unang mardapotdapot arsak ni rohangku.

²⁸Muba ma antong ringkot ni rohangku marsuru ibana, asa marlas ni roha hamu marnida ibana, palumbang nang rohangku huhut.

²⁹Onpe, marlas ni roha situtu ma jangkon hamu ibana di bagasan Tuhan i, jala parhamaol hamu ma angka na songon i!

³⁰Ai humongkop ulaon ni Kristus i sor mate ibana, jala diseahon do hosana, laho manggohi na hurang dope sian hamu, mangkobasi di ahu.

3¹(I.) Angkup ni i, ale angka donganku, las ma rohamuna di bagasan Tuhan i! Ndang

dokdok rohangku, manurathon jumotjot i tu hamu; jala patoguhon rohamuna do i.

²Bereng hamu angka biang; bereng hamu angka pangula na jahat; bereng hamu parsunaton na torbang!

³Ai hita do targoar parsunaton, angka parsomba di bagasan Tondi ni Debata, angka siasahon Kristus Jesus, angka na so marpos ni roha di daging i.

⁴Adong do nian nang di ahu sipangasahononhon di daging. Ai molo dirimpu deba, adong sipangasahononna di pardagingon, nda lam ahu ma nian!

⁵Tarsunat di ari pauluhon do ahu, na sian bangso Israel marga Benjamin, halak Heber, tubu ni halak Heber, halak Parise mangihuthon patik i.

⁶Garang do rohangku mangalele huria i, so hasurahan di hatigoran na sian patik.

⁷Alai naung paruntungan hian di ahu, harugian do i hujujur ala ni Kristus i.

⁸Saluhutna do tahe huetong harugian tumimbangkon hamuliaon ni panandaon di Kristus Jesus, Tuhanki. Ala Ibana huseangkon saluhutna i, jala orbuhorbuk do i huetong, asa huomo Kristus,

⁹asa di bagasan Ibana ahu didapot, unang ma marhatigoran sian patik, tung sian haporseaon di Kristus do, i ma hatigoran na sian Debata, na marojahan di haporseaon,

¹⁰asa hutanda Ibana dohot hagagoon
ni haheheonna i, ro di hasasaor tu angka
haporsuhonna, di na gabe sapangalaho ahu
dohot Ibana di hamamatena i;

¹¹anggiat sahat ahu tu haheheon na sian
angka na mate!

¹²Apala naung sanga hutangkup i manang
naung gabe sun denggan; alai sai hueaki
do, anggiat tartangkup ahu i, songon naung
tinangkup ni Kristus Jesus i ahu.

¹³Ale angka dongan, ndang hurajumi
diringku, naung sun hutangkup i.

¹⁴On do tahe: Huhalupahon na di pudingku,
hueaki angka na di jolo. Dompok pandang
i do hupuspus, dompak upa hamonangan
na sian panjouon ni Debata sian ginjang, di
bagasan Kristus Jesus i.

¹⁵Manang piga hita naung rimpas, i ma
taparrohahon! Jala molo asing pingkiranmuna
taringot tu manang aha, nang i pe, papataron
ni Debata do tu hamu.

¹⁶Asal ma tatiop, intap naung sahat tu hita!

¹⁷(II.) Rap sitiru ahu ma hamu, ale angka
dongan; jala pamanat hamu ma angka na
marparange songon hami, sitiruonmuna!

¹⁸Ai songon naung jotjot hudok tu hamu,
jala anggo nuaeng mardongan ilu do hudok:
Torop do marpangalaho, gabe musu ni silang
ni Kristus.

¹⁹Hamagoan do ujungnasida, butuhanasida
do dipardebata, sihailahononna

dihasangaphon, angka na di tano on diparrohahon.

²⁰Ai di banua ginjang do sambulonta; sian i do tapaimaima Sipangolu hita, Tuhan Jesus Kristus i.

²¹Paubaonna do dagingta na lea on, gabe doshon dagingna na sangap i, hombar tu hagogoonna i, ai tarpatunduksa do saluhutna tu Ibana.

4¹(I.) Onpe, hamu angka donganku na hinaholongan jala na hinasiholan, halasan ni rohangku jala tumpalhu; songon i ma marsihohot hamu di bagasan Tuhan i; hamu angka haholongan!

²Hamu, Euodia dohot Sintike, huapoi ma hamu, asa marsada ni roha di bagasan Tuhan i.

³Huelehelek ma dohot ho, ale Sunsugos na bontor, urupi ma nasida, angka naung mandongani ahu marungkil humongkop barita na uli, raphon si Klemen dohot donganki saulaon na deba nari; di buku hangoluan i do goarnasida.

⁴Marlas ni roha ma hamu tongtong di bagasan Tuhan i! Huulaki ma mandok: Marlas ni roha ma hamu!

⁵Pabotohon hamu ma habasaronmuna tu saluhut halak! Donok do Tuhan i!

⁶Unang holsohon hamu agia aha; alai sandok pabotohon hamu ma tu Debata

pangidoanmuna marhitehite tangiang dohot elehelek mardongan mauiate!

⁷Jala dame ni Debata na sumurung sian saluhut roha, i ma mangaramoti angka ateate dohot pingkiranmuna di bagasan Kristus Jesus!

⁸Angkup ni i, ale angka dongan, pingkiri hamu ma nasa parange na sintong, na daulat, na tigor, na bontor, na uli, na denggan begeon ro di sude na targoar haburjuon, na tau pujipujian!

⁹Ulahon hamu ma na ginuruhonmuna, na jinalo, na binege jala na niidamuna di ahu; dung i donganan ni Debata Sipardame i ma hamuna.

¹⁰(II.) Alai tarhilas situtu do rohangku di bagasan Tuhan i, ala mangulah i tarida rohamuna sumarihon na ringkot di ahu. Tongtong do i nian rohamuna, alai holan tingkina do na so une.

¹¹Ndada ala na hurangan ahu, umbahen na hudok i; ai nunga huguruhon, mangkasonangkon na adong.

¹²Huboto do marpangontik, huboto do marlobilobian; tongtong do somal ahu di saluhutna, nang bosur, nang rapar, nang marlobilobi, nang marnahurang.

¹³Saluhutna do tarpatupa ahu marhitehite Ibana, na margogoihon ahu!

¹⁴Alai tahe, denggan do pambahenmuna i; ai ditiroi hamu do haporsuhonku.

¹⁵Alai diboto hamu halak Pilippi do, na so adong, dungkon ni hamu, huria na hubahen donganku mangetong hepeng na ro dohot na laho, olat ni mula ni pamaritahonki, di na borhat i ahu sian Makedonia.

¹⁶Ai di Tessalonik dope ahu, nunga ditongos hamu na ringkot di ahu, sahali ro di dua hali.

¹⁷Ndada silehonlehon i hulului parbue i do na hujalahi; na gabe singirmuna do i.

¹⁸Alai sandok tuk do di ahu, marlobilobi gari adong; suksuk do di ahu, dung hujalo na tinongosmuna marhite sian si Epaproditus: Uap na hushus ma i, pelean halaeen, halomoan ni roha ni Debata.

¹⁹Alai gohan ni Debatangku do nasa na ringkot di hamu, hombar tu hamoraonna i di hasangapon i, di bagasan Kristus Jesus!

²⁰Alai hasangapon ma di Debata, Amanta i, ro di salelenglelengna! Amen.

²¹(III.) Pasahat hamu ma tabingku tu nasa na badia di bagasan Kristus Jesus! Na manongos tabi do angka dongan na rap dohot ahu.

²²Saluhut na badia manongos tabi di hamu, alai gumodang ma angka na sian bagas ni Kesar i!

²³Didongani asi ni roha ni Tuhan Jesus Kristus ma tondimuna!

Kolose

1 ¹ (I.) Ahu surat ni si Paulus, apostel ni Kristus Jesus, sian lomo ni roha ni Debata, dohot Timoteus, dongan i,

² mandapothon angka na badia na di Kolosse, angka dongan na porsea, na di bagasan Kristus: Asi ni roha ma di hamu dohot dame sian Debata, Amanta i!

³ (II.) Mandok mauiate do hami, laho tumangiangkon hamu tongtong tu Debata, Ama ni Tuhanta Jesus Kristus.

⁴ Ai hubege hami do barita ni haporseaonmuna di Kristus Jesus, nang holong ni rohamuna mida saluhut na badia,

⁵ ala ni sihirimon i, naung diparade di hamu di banua ginjang i; nunga dibege hamu hian i marhitehite hata hasintongan i, i ma barita na uli i.

⁶ I ma naung sahat, nang tu hamu, nang tu liat portibi on; na marparbue do i jala lam ganda, suang songon na di hamu, olat ni dung dibege jala ditanda hamu asi ni roha ni Debata di bagasan hasintongan.

⁷ Songon i do diguruhon hamu sian si Epapras, dongan saulaon i, na hinaholongan; ai parhalado ni Kristus na haposan do ibana humongkop hamu.

⁸Laos ibana do pajojorhon tu hami holong ni rohamuna di bagasan tondi.

⁹Dibahen i, dung hubege hami i, ndang mansohot nang hami tumangiangkon hamu, jala mangido, asa digohi di hamu pantas ni roha, mananda lomo ni rohana, marhitehite nasa hapistaran dohot habisuhon partondion,

¹⁰asa marparange na tama di Tuhan i hamu, gabe halomoan situtu jala marparbuehon nasa ulaon na denggan;

¹¹laos ganda di hamu panandaon di Debata, gabe margogo situtu hamu hombar tu gogo ni hasangaponna i, mangkorhon nasa habengeton dohot lambas ni roha, mardongan las ni roha.

¹²Mandok mauiate ma hamu di Ama i, naung patauhon hamu, manjalo tohap na di bagasan hatiuron i, siteanon ni angka na badia i!

¹³Ai nunga diroro hita sian gomgoman haholomon i, jala dipaunsat hita tubagasan harajaon ni Anak, haholongan ni rohana.

¹⁴Di bagasan Ibana do adong di hita haluaon i, i ma hasesaan ni angka dosa.

¹⁵(III.) Ibana do suman ni Debata na so tarida i; na parjolo tubu sian nasa na tinompa.

¹⁶Ai marhite sian Ibana do ditompa saluhutna, na di banua ginjang dohot na di tano on, na tarida dohot na so tarida i, angka habangsa, angka harajaon, angka gomgoman, angka parhuasoon; saluhutna

i do ditompa marhitehite Ibana, jala marhapatean tu Ibana.

¹⁷Jala di jolo ni saluhutna do Ibana, jala saluhutna i do hot di bagasan Ibana.

¹⁸Ibana do ulu ni daging i, i ma huria i. Ibana do parmulaan, naung parjolo tubu sian angka na mate, asa Ibana parjolo di na saluhutna.

¹⁹Ai ditontuhon Debata do, naeng ma maringan di bagasan Ibana sandok hagogokna i!

²⁰Laos marhite sian Ibana do padengganonna tu dirina saluhutna i, nang angka na di tano, nang angka na di banua ginjaang, dung dipatupa dame marhitehite mudar na sian silangna i, marhitehite Ibana.

²¹Dohot do hamu, angka na holang najolo jala parroha musu marhitehite angka ulaon hajahatan,

²²dipadenggan Ibana nuaeng marhitehite daging hajolmaonna i, di na mate i Ibana, laho pajongjongkon hamu badia jala so hasurahan jala so sipinsangon, maradophon Ibana.

²³Asal ma mian hamu ojak jala hot di bagasan haporseaon, jala so olo meret sian pangkirimon, na binegemuna di barita na uli, na binaritahon tu saluhut na tinompa, na ditoru ni langit Ahu, Paulus, gabe parhalado ni i.

²⁴Las do rohangku nuaeng di angka haporsuhonku na humongkop hamu, jala marhite sian dagingku hugoki na hurang dope di angka na tinaon ni Kristus, humongkop dagingna, i ma huria i.

²⁵Naung gabe parhalado ni i do ahu, hombar tu pangaradotion ni Debata, na pinasahatna tu ahu, i ma na manggohi hata ni Debata nang di hamu.

²⁶I ma hahomion, na buni najolo sian mula ni mulana, marsundutsundut; alai nuaeng dipapatar do tu angka na badiana.

²⁷Ai tu nasida do naeng pabotohonon ni Debata surung ni hamuliaon ni hahomion on, di tongatonga ni angka parbegu; i ma: Kristus di bagasan hamu, sihorhon pangkirimon di hasangapon.

²⁸Ibana do hubaritahon hami; hupaingot jala huajari hami nasa jolma di nasa habisuhon, laho pajongjong ganup jolma rimpas di bagasan Kristus.

²⁹I do huhalojahon mardongan parungkilon, marguru tu hagogoonna, na gogo situtu mangkorhon di bagasan ahu.

2¹(I.) Alai dipangido rohangku, naeng ma botoonmuna balga ni parungkilonku humongkop hamu, nang humongkop dongan na di Laodikea, ro di sasude, na so sanga marnida bohingku sandiri.

²Ai naeng ma tarapul rohanasida, pinadomu ni holong ni roha, asa sandok mamora nasida

di pangantusion na gomos, gabe ditanda hahomion ni Debata, i ma Kristus i.

³Di bagasan Ibana do buni saluhut habisuhon dohot parbinotoan na arta.

⁴Umbahen hudok songon i, asa unang dihatahatai deba hamu marhitehite malomalo ni pangkuling.

⁵Ai padaodao pe isara di pardagingon, naung rap dohot hamu do ahu di partondion, marlas ni roha mamereng turena na di hamu, ro di hot ni haporseaonmuna di Kristus.

⁶Onpe, songon panjangkonmuna di Kristus Jesus, Tuhan i, songon i ma hamu marparange di bagasan Ibana!

⁷Gabe marurat jala pinauliuli ma hamu di bagasan Ibana, togu marhaporseaon, hombar tu na niajarhon tu hamuna; lumobi ma hamu marroha mauliate!

⁸Jaga ma hamu, so tung diago deba hamu marhitehite hata bisukbisuk dohot hata lensem na so marimpola, hombar tu tonatona ni jolma, mangihuthon sisiasia ni hasiangan on, ndada mangihuthon Kristus.

⁹Ai di bagasan Ibana do maringanan sandok gok ni hadebataon marrupahon daging.

¹⁰Di bagasan Ibana sahat nang tu hamu hagogokna i; Ibana do ulu ni nasa hamuliaon dohot panggomgomion.

¹¹Laos di bagasan Ibana do hamu tarsunat, ndada binahen ni tangan, laho mananggal

pamatang na mardaging on, binahen ni parsunaton na sian Kristus, i do.

¹²Ai rap tartanom do hamu dohot Ibana, di na tardidi i hamu; laos di bagasan Ibana do rap hamu dipahehe, di na gabe porsea hamu di hagagoon ni Debata, na pahehehon Ibana sian angka na mate.

¹³Asa hamu, naung mate di bagasan angka pangalaosion dohot di bagasan sibuk na so tarsunat i, raphon Ibana do hamu dipahehe, di na sinesana i nasa pangalaosionta.

¹⁴Disesa do surat tangan i na dompak hita, i ma angka patik na maralohon hita; dipadao do i, dilohothon tu silang i.

¹⁵Dipupusi do angka hamuliaon dohot panggomgomion, patar do dipatotondurhon nasida, dipaebangkon do nasida na talu i.

¹⁶(II.) Onpe, unang ma diuhumi halak hamu siala sipanganon manang siinumon, manang siala pesta, manang poltak ni bulan, manang ala ni ari Sabbat pe.

¹⁷Halinu ni angka na naeng ro do i; alai Kristus i do nampuna badan.

¹⁸Tung unang ma hamu dilesanlesani halak, na giot paulaula na serep jala sumomba angka surusuruan, ditengatengahon do na niidana di bagasan tondina, pinaburnang ni roharoha ni dagingna.

¹⁹Alai ndang diparsigantungi Ulu i, ai sian I lam magodang, marguru tu Debata, sandok

pamatang i, na niurupan jala pinadomudomu ni angka urat dohot ihotihot.

²⁰Anggo naung rap dohot Kristus i hamu mate taringot tu sisiasia ni hasiangan on; boasa ma olo hamu paksaon songon halak na mangolu di hasiangan on:

²¹Unang jama on! Unang pangan on! Unang tiop on!

²²Sipangkeon jala sipasudaon do i sasudena. Angka patik dohot podapoda ni jolma sambing do angka i.

²³Na songon habistohon do i idaon, na paburjuburjuhon jala na paserepserephon diri, na mangaluntei daging; alai ndang marguna mangalo roha na pasombuhon sibuk.

3¹(I.) Asa molo naung rap hamu dipahehe dohot Kristus, jalahi hamu ma angka na di ginjang; ai disi do Kristus, hundul di siamun ni Debata.

²Angka na di ginjang i ma parrohahon hamu, unang ma angka na di tano on!

³Ai nunga mate hamu, jala buni do ngolumuna raphon Kristus di bagasan Debata.

⁴Alai ia dung gabe patar sogot Kristus, hangoluantu i, disi ma gabe patar nang hamu raphon Ibana di bagasan hasangapon.

⁵Antong, bunu hamu ma ruasmuna, angka na di tano on: parmainanon, hahodaron,

riting ni roha, hisaphisap na roa, ro di pangahution, i ma pardebataon na leban.

⁶Ala ni angka i do lalu rimas ni Debata.

⁷Diulahon hamu do angka i najolo, tagan di bagasan i ngolumuna.

⁸Alai anggo nuaeng, bolongkon hamu ma saluhutna i: Rimas, muruk, hajahaton, panginsahion hata barangsi sian pamanganmuna!

⁹Unang ma masigabusan hamu, ai nunga ditanggal hamujolma na buruk i rap dohot angka parulaonna,

¹⁰Jala nunga disolukkon hamu na imbaru i, na pinaimbaru, asa tandaonna rupa ni na tumompa ibana.

¹¹Ndang mardiaimbar disi Junani manang Jahudi, na marsunat manang na so marsunat, bangso na leban manang bangso na so maju dope, hatoban manang anak mata; Kristus i do tahe saluhutna jala di bagasan saluhutna.

¹²(II.) Onpe, hamu angka naung pinillit ni Debata, angka na badia jala hinaholongan, solukkon hamu ma parasirohaon situtu, habasaron, haserepon, lambok dohot lambas ni roha!

¹³Masipauneunean jala masisesaan dosa ma hamu, jumpa marpangkurangi na sada dompak donganna; songon panesa ni Kristus di hamu, songon i ma nang hamu!

¹⁴Alai diginjang ni saluhutna i: I ma haholongon ni roha i; ai i do rahutrahut ni nasa harimpason.

¹⁵Jala dame ni Kristus i ma mangarajai di bagasan rohamuna, ai tusi do hamu dijou di bagasan sada daging. Gabe parroha mauliate ma hamu!

¹⁶Gugun ma hata ni Kristus maringanan di tongatongamuna; mardongan sandok hapistaran ma hamu masiajaran jala masipaingotan marhitehite angka ende psalmen, endeende pujipujian dohot ende partondion; endehon hamu ma Debata di bagasan rohamuna marroha hamauliateon!

¹⁷Jala na siulaon, manang di hata, manang di pambahenan, saluhutna i ma marhitehite Goar ni Tuhan Jesus, huhut mandok mauliate tu Debata Ama marhitehite Ibana.

¹⁸(III.) Hamu angka parompuan, oloi hamu ma hata ni hamulianmuna be, songon na tama di roha ni Tuhan i.

¹⁹Hamu angka baoa, haholongi hamu ma pardihutamuna be, jala unang ma jungking hamu maradophon nasida!

²⁰Hamu angka dakdanak, sandok pangoloi ma hamu di natorasmuna, ai i do dihalomohon Tuhan i!

²¹Hamu angka amaama, unang gintali hamu angka anakkonmuna, asa unang mandele!

²²Hamu angka anak somang, oloi hamu ma angka indukmuna na di tano on di na

saluhutna; unang ma pangoloi di mata hamu, songon na mambuat roha ni jolma, marbulus ni roha ma, sian biar ni roha mida Tuhan i!

²³Sian rohamuna ma ula hamu nasa sibahenonmuna; songon na tu Tuhan i, ndada tu jolma!

²⁴Ingot hamu ma: Sian Tuhan i do jaloonmuna siteanon i, balos ni i Tuhan Kristus i ma oloi hamu!

²⁵Ai na mangulahon hageduhon, porsanonna do na niulana i, so adong masa parnidanidaon di bohi.

4¹ (I.) Hamu angka induk, lehon hamu ma na tigor jala na tama tu angka anak somang; ingot hamu: Adong do Tuhan nang di hamu di banua ginjang i!

²Manongtong ma hamu martangiang; dungo ma hamu disi, huhut mandok mauliate!

³Tangiangkon hamu nang hami, asa dilehon Debata di hami pintu na ungap di hata i, mangkatahon hahomion ni Kristus; ala ni i do, umbahen na tarihot ahu,

⁴asa hupapatar i songon na tama pangkatahonku.

⁵Marpantas ni roha ma hamu marparange maradophon angka na di balian; parhaseang hamu ma tingki!

⁶Sai tong ma lambok hatamuna, songon na siniraan, asa botoonmuna alus na patut tu ganup jolma.

⁷ (II.) Pabotohonon ni Tikikus do tu hamu nasa na masa di ahu; ibana do dongan na hinaholongan jala parhalado haposan jala dongan pangula di bagasan Tuhan i.

⁸ Alas ni on do, umbahen na husuru ibana tu hamu, asa diboto hamu na masa di hami, jala asa diapul rohamuna,

⁹ rap dohot si Onesimus, dongan haposan, haholongan i, na sian hamu on; pabotohonon nasida do tu hamu nasa na masa di hami.

¹⁰ Manongos tabi tu hamu: Aristarkus donganku tarhurung, dohot Markus, ibebere ni Barnabas; nunga dijalo hamu hata taringot tu ibana; anggo ro ibana tu hamu on, jangkon hamu on, jangkon hamu ma ibana!

¹¹ Songon i Jesus, na margoar Titius Justus; holan nasida do Jahudi hian, donganku pangula di harajaon ni Debata, angka na gabe apulapul di ahu.

¹² Manongos tabi tu hamu Epapras na sian hamu on, naposo ni Kristus Jesus; na tongtong do ibana marungkil tumangiangkon hamu, asa jongjong hamu rimpas jala margomos ni roha situtu di nasa na hinalomohon ni Debata.

¹³ Ahu do saksina di godang ni na hinalojahonna i humongkop hamu dohot humongkop angka dongan na di Laodikea, nang na di Hierapolis.

¹⁴Manongos tabi tu hamu pandaoni Lukas, haholongan i, dohot si Demas.

¹⁵Dok hamu ma tabi tu angka dongan na di Laodikea, songon i tu Nimpa, ro di huria na marpungu di jabuna.

¹⁶Jala ia dung dijaha surat on di hamu, sarihon hamu ma, asa dijaha i nang di huria Laodikea; jala naeng ma jahaonmuna nang surat na tu Laodikea i!

¹⁷Dok ma tu si Arhippus: Jaga ho di tohonan, na jinalom di bagasan Tuhan i, laho mangaradotisa!

¹⁸On ma tabingku sian ahu, Paulus, na sinurat ni tanganku. Ingot hamu ahu na tarrante i! Didongani asi ni roha i ma hamu!

1 Tesalonika

1 ¹ (I.) Ahu surat tinongos ni si Paulus, si Silwanus dohot Timoteus mandapothon huria Tessalonik na di bagasan Debata Ama dohot Tuhan Jesus Kristus: Asi ni roha ma di hamu dohot dame!

² Na mandok mauiate do hami tongtong tu Debata siala hamu saluhutna; ai hutaringoti hami do hamu di tangiangnami.

³ Ai ndang mansadi hami marningot ulaonmuna na sian haporseaon dohot halojaonmuna na sian holong ni roha i ro di habengetonmuna na sian roha na mangkirim di Tuhanta Jesus kristus, i ma maradophon Debata Amanta.

⁴ Ai huboto hami do, ale angka dongan na hinaholongan ni Debata: Angka naung tarpillit do hamu.

⁵ Ai ndada marhitehite hata sambing ro barita na uli, na hupaboa hami tu hamu, tung mardongan hagagoon do dohot Tondi Parbadia, angkup ni hiras ni roha godang; ai diboto hamu do antong pangalaho ni hami na ro i tu hamu humongkop hamu.

⁶ Jadi nunga gabe paniru hamu di hami dohot di Tuhan i, ai marlas ni roha na sian Tondi Parbadia do hamu manjalo hata i di bagasan haporsuhon godang.

⁷ Pola gabe sitiruon hamu di saluhut dongan na porsea, angka na di luat Makedonia dohot Akaya.

⁸ Ai sian hamu do marlupuk hata ni Tuhan i, ndada holan tu luat Makedonia dohot Akaya; tung tu saluhut luat do tarbarita haporseaonmuna di Debata, asa ndang pola be taringotannami anggo i.

⁹ Ai dibaritahon nasida do nang dalannami masuk tu hamu, nang dalam muna mulak tu Debata, tumadingkon angka ajiajian laho mangoloi Debata na mangolu jala na sintong i.

¹⁰ Na maimaima nama hamu di haroro ni Anakna sian banua ginjang i, dung dipahehe sian angka na mate, i ma Jesus, na paluahon hita sian rimas na naeng ro i.

2¹ (I.) Ai nang hamu, ale angka dongan, marbinoto do: Ndada na magopo haroronami tu hamu.

² Ai dung jolo huta on hami na marporsuk dohot na marsipal di huta Pilippi (songon na binotomuna), dapotan hiras ni roha do hami mangasahon Debatanami laho mangkatahon tu hamu barita na uli na sian Debata, nang pe godang paraloon.

³ Ai ndada na lilu manang mangansi manang marangkal hami laho mamodai hamu.

⁴ Alai songon halak angka naung tau di roha ni Debata do hami, gabe hasahatan ni barita na uli i, songon i do huhatahon hami; ndada

songon angka na mambuat roha ni jolma, naeng hami tahe halomoan ni roha ni Debata na manigati rohanami.

⁵Ai diboto hamu do: Nandang dung hami marhata lemeslemes, ndang dung hami marbisukbisuk mambuat arta; Debata do sitindangi disi.

⁶Nandang manjalahi sangap hami sian jolma, manang sian hamu, manang sian angka na asing pe, atik pe tarbahen hami do nian marhatongamon, ala apostel ni Kristus hami.

⁷Alai basar do hami di tongatongamuna songon inaina na pauliuli gellengna.

⁸Songon i do sian sihol ni rohanami di hamu huhalashon hami do mangalehon tu hamu barita na uli na sian Debata; lobi tahe, dohot ma antong dirinami, ala naung huhaholongi hami hamu.

⁹Ai diingot hamu do, ale angka dongan, halojaon dohot hasusaannami, ai arian dohot borngin hami mulaulaon, unang marhaboratan hamu; songon i do hubaritahon hami tu hamu barita na uli na sian Debata.

¹⁰Hamu do sitindangi angkup ni Debata, paboa na daulat, na tigor jala na so hasurahan hami maradophon hamu angka na porsea.

¹¹Suang songon i diboto hamu: Huapoi hami do hamu sadasada, songon pangapoi ni amaama di anakonna, jala huapuli hami;

¹²jala hubulani hami do hamu, asa marparange hamu songon na tama

maradophon Debata, na manjou hamu tu harajaonna dohot tu hasangaponna i.

¹³Dibahen i tongtong do hami mandok mauliate tu Debata, ai dijangkon hamu do hata ni Debata na binegemuna sian hami; ndada songon hata ni jolma dijangkon, hamu i, tung songon hata ni Debata do, ai i do i tutu, gabe marpangkorhon ma hata i di bagasan hamu, angka na porsea.

¹⁴Ai nunga gabe paniru hamu, ale angka dongan, di angka huria ni Debata na di luat Judea, angka na di bagasan Kristus Jesus; ai ditaon hamu do na bernit dibahen angka donganmuna sabangso, songon nasida na pinaporsukporsuk ni halak Jahudi.

¹⁵Ai dibunu nasida do Tuhan Jesus ro di angka panurirang i, nang hamu dilelei do; angka na hinasogohon ni Debata do nasida jala alo ni saluhut jolma.

¹⁶Diorai do hami manjamitai halak parbegu laho paluahon nasida; asa tongtong do nasida pagukgukkon pardosaonnasida, lalu ma antong tu nasida sungkot ni haririmas i.

¹⁷Alai anggo hami, ale angka dongan, hira na tilahaon do hami mandaodao sian hamu sangombas, mandok bohinami do na dao i, ndada anggo rohanami; alai lam huharingkothon hami do marnida bohimuna mardongan sihol ni roha godang.

¹⁸Dibahen i naeng ro do hami tu hamu, ahu si Paulus, sahali, dua hali tahe; alai diambat sibolis i do langkanami.

¹⁹Ai ise do targoar pangkirimon ni rohanami dohot halalas ni rohanami jala tumpal pamujion di hami, ia so hamu di adopan ni Tuhanta Jesus Kristus, jumpa di harorona i?

²⁰Olo, hamu do hasangapon di hami dohot halalas ni roha.

3¹ (I.) Ala na so tartaon hami be siholnami, denggan do di rohanami, holan hami ma jolo tading di huta Aten.

²Gabe husuru hami ma si Timoteus, angginami jala naposo ni Debata, mangkobasihon barita na uli na sian Kristus, asa dipatogu rohamuna jala dipodai hamu marhaporseaon;

³asa unang diunggilhon angka haporsuhon i na deba sian hamu; ai diboto hamu do, tusi do hita dipadiri.

⁴Ai di tongatongamuna dope hami, nunga hulumbahon hami hian tu hamu, na naeng masa angka haporsuhon tu hita, songon naung masa tutu patar di jolomuna.

⁵Dibahen i ndang tartaon ahu be, gabe husuru na manangkasi haporseaonmuna, atik beha naung diunjuni sipangunjuni i hamu, gabe magopo maon na huhalojohon hami.

⁶Alai dung mulak si Timoteus tu hami sian hamu, denggan do dibaritahon tu hami haporseaonmuna dohot holong ni rohamuna

angakup ni i dibaritahon do burjumuna marningot hami dohot sihol ni rohamuna, naeng idaonmuna hami, songon hami na masihol di hamu.

⁷Disi ma tarapul hami marningot hamu, ale angka dongan, dibahen haporseaonmuna, nang pe didondoni ragam ni hagogotan dohot haporsuhon hami.

⁸Ai na mangolu ma hami nuaeng, anggo hot hamu jongjong marojahan di Tuhan i.

⁹Ai hamauliateon dia ma tarlehon hami tu Debata, balos ni saluhut halalas ni roha na huhilala hami di jolo ni Debatanami marningot hamu?

¹⁰Borngin dohot arian lobi sumurung do tangiangnami, asa anggiat idaonnami bohimuna laos patingkosonnami, ia adong dope hahurangan ni haporseaonmuna.

¹¹Alai Debata Amanta sandiri dohot Tuhanta Jesus ma pabulushon langkanami tu hamu!

¹²Alai digohi jala lam ditambahi Tuhan i ma haholongon ni rohamuna sama hamu, nang tu saluhut, songon holong ni rohanami di hamu!

¹³Laho patoguhon rohamuna, gabe so hasurahan marhabadiaon di jolo ni Debata Amanta, di na ro i Tuhanta Jesus rap dohot saluhut angka na badiana.

4¹(I.) Angkup ni i, ale angka dongan, huelehelek jala huapoi hami ma hamu marhitehite Tuhan Jesus: Lam tang ma hamu

marguru tu poda na jinalomuna sian hami taringot tu parange na tama, laho pasauthon lomo ni roha ni Debata, songon naung binahenmuna.

²Ai diboto hamu do patik angka na hulehon hami tu hamu marhitehite Tuhan Jesus.

³On do pinangido ni roha ni Debata: Naeng badia hamu; harorongan i naeng pasidingonmuna.

⁴Naeng ma ganup hamu umboto mardongan saripe di bagasan habadiaon na tama.

⁵Unang ma mangihuthon hisaphisap na garang i, songon halak sipelebegu na so tumanda Debata.

⁶Ndang jadi jahatan manang angatan dongan di pandaraman; ai parlulu do Tuhan i di sasudena i, songon naung hulumbahon jala huhatindangkan hami tu hamu.

⁷Ai tu habadiaon do dijou Debata hita, ndada tu hahodaron.

⁸Dibahen i, molo hu roha ni halak disi, ndadajolma nileaanna, sandok Debata do, naung mangalehon Tondina na badia i tubagasan hamu.

⁹Alai anggo haholongon ni roha di dongan, ndang haru ringkot pasingothononku tu hamu, ai nunga diajari Debata hamu masihaholongan.

¹⁰Laos songon i do diula hamu tu saluhut dongan na di liat Makedonia. Alai huapoi hami

do hamu, ale angka dongan, naeng ma lam sumurung hamu!

¹¹Jala haringkothon hamu ma, asa parhohom hamu masiradoti tohapna, angkup ni i marulaon ma dohot tanganmuna, songon naung hurodihon hami.

¹²Anggiat maradat hamu idaon ni angka na di balian, unang pola marbagahon sian halak.

¹³Alai naeng ma tangkas botoonmuna, ale angka dongan, taringot tu angka naung monding i, asa unang marsak hamu, songon angka na leban, na so marpangkirimon.

¹⁴Ai molo porsea hita, naung mate Jesus dohot hehe, sandok togihonon ni Debata do rap dohot Jesus nang angka naung monding marhitehite Ibana.

¹⁵Ai hata ni Tuhan i do na hupasahat hami nuaeng tu hamu: Ia mangolu pe hita, angka na mian ro di haroro ni Tuhan i, nda tung sumurung hita sian nasida naung monding i.

¹⁶Ai na tuat ma Tuhan i sian banua ginjang mardongan suraksurak, marsoara ma raja ni surusuruan, tarbege ma sarune ni Debata. Dung i hehe ma jumolo angka na mate di bagasan Kristus.

¹⁷Dung songon i, hita na mangolu dope, angka na mian i, taitonna ma hita raphon nasida di bagasan angka ombun, laho manomunomu Tuhan i tu langit an; jadi olat ni i sai tongtong ma hita rap dohot Tuhan i.

¹⁸Antong, masiapulan ma hamu marhitehite angka hata i!

5¹(I.) Alai ndang pola suraton tu hamu, ale angka dongan, taringot tu tingkina dohot sadiharina.

²Ai diboto hamu do tangkas, na songon panangko borngin do haroro ni ari ni Tuhan i.

³Ai molo didok halak, dame do jala mora so adong, disi ma tompu tahop tu nasida hamagoan i, songon pambebeon tu na gabegabeon, jala ndang adong haporusannasida.

⁴Alai hamu, ale angka dongan, ndang di bagasan na holom hamu: So tung hatiuran ari hamu songon panangko!

⁵Ai saluhutna do hamu anak hatiuron jala anak arian; ndang sian borngin hita manang sian haholomon.

⁶Antong, sai unang ma tarpodom hita, songon angka na leban; sai duno ma hita jala marroha na torang!

⁷Ai borngin i do tarpodom angka na modom i, jala borngin i do mabuk angka na mabuk i.

⁸Alai anggo hita na sian arian, marroha na torang ma hita, tasolukkon ma haporseaon dohot haholongon songon baju partahanan jala tajujung ma pangkirimon ni roha di haluaon!

⁹Ai ndang dipadiri Debata hita bahen sirimasan; alai naeng ma dapotan haluahon hita marhite sian Tuhanta Jesus Kristus,

¹⁰Naung mate humongkop hita, asa sandok mangolu hita rap dohot Ibana, manang na dungo (mangolu) dope hita, manang naung modom pe.

¹¹Dibahen i, sai masipaingotan ma hamu jala masipauliulian, songon naung binahenmuna.

¹²Huelehelek hami ma hamu, ale angka dongan, tanda hamu ma angka na mangkalojohon hamu, angka na manguluhon hamu marhitehite Tuhan i, ro di angka na paingothon hamu!

¹³Sangap situtu ma rajumi hamu nasida mardongan holong ni roha ala ni ulaonnasida! Sai mardame ma hamu sama hamu!

¹⁴Alai huapoi hami ma hamu, ale angka dongan, sai paingot hamu ma angka na so maradat, apuli hamu ma angka siotik roha, anju hamu ma angka na gale, lambas ma rohamuna dompak saluhutna!

¹⁵Matamatahon hamu ma, asa unang dibaloshon manang ise na roa balos ni na roa; na denggan ma pareahi hamu tongtong, nang sama hamu, nang tu saluhut halak.

¹⁶Tongtong ma hamu marlas ni roha!

¹⁷Unang mansadi hamu martangiang!

¹⁸Mandok mauliate ma hamu siala saluhutna! Ai i do dipangido Debata sian hamu marhitehite Kristus Jesus.

¹⁹Unang intopi hamu tondi i!

²⁰Unang lea rohamuna di panurirangon!

²¹ Tangkasi hamu ma saluhutna; na denggan i ma tiop hamu!

²² Pasiding hamu ma nasa rumang ni na roa!

²³ Diparbadiai Debata pardame i ma hamu gabe sun denggan, jala diramoti ma tondimuna, nang roha, nang daging, asa ias, so hasurahan di haroro ni Tuhanta Jesus Kristus!

²⁴ Haposan do Ibana na manjou hamu; sai pasautonna do i.

²⁵ Ale angka dongan, tangiangkon hamu ma hami!

²⁶ Mandok tabi ma hamu tu saluhut dongan mardongan umma na badia i!

²⁷ Huelehelek ma hamu di jolo ni Tuhan i, asa dipajahahon hamu surat on tu saluhut dongan.

²⁸ Didongani asi ni roha ni Tuhanta Jesus Kristus ma hamuna!

2 Tesalonika

1 ¹ (I.) Ahu surat tinongos ni si Paulus, si Silwanus dohot Timoteus mandapothon huria Tessalonik, na di bagasan Debata Amanta Dohot Tuhan Jesus Kristus.

² Asi ni roha dohot dame ma di hamu sian Debata Amanta dohot Tuhan Jesus Kristus!

³ Tama situtu do hami mandok mauliate tongtong tu Debata siala hamu ale angka dongan, songon na patut, ai na ganda situtu do haporseaonmuna, laos tamba holong ni roha ni ganup hamu sama hamu.

⁴ Pola hubaritahon hami hamu di angka huria ni Debata, mamuji habengeton dohot haporseaonmuna, di na masa tu hamu ragam ni pangaleleon dohot haporsuhon, angka na pinataontaonmuna.

⁵ I ma tandana, paboa na ro ma paruhumon ni Debata na tigor i; asa disi ma patar hatauonmuna tu harajaon ni Debata, dung jolo manaon na porsuk i hamu humongkopsa.

⁶ Molo tung i tingkos di roha ni Debata, mamaloshon haporsuhon tu angka na paporsukporsukkon hamu;

⁷ alai hasonangan tu hamu, angka na pinaporsukporsuk i rap dohot hami, di na tarida Tuhan Jesus tuat sian banua ginjang rap dohot angka surusuruan ni hagogoonna.

⁸Di bagasan api na marnalanala ro ma Ibana mandabu uhum tu angka na so mananda Debata dohot tu angka na so mangoloi barita na uli ni Tuhanta Jesus.

⁹Jaloonnasida ma uhum, i ma hamagoan sisalelenglelengna sian adopan ni Tuhan i dohot sian hagogoonna na tongam i.

¹⁰Ai di na ro Ibana, marsangap ma Ibana dibahen angka na badiana, jala tarpuji ma Ibana dibahen saluhut naung mangkaporseai Ibana di ari i, ai saut do gabe porsea hamu di na huhatindangkon hami tu hamu.

¹¹Apala i ma tangiangnami tongtong, anggiat tung dipatau Debatanta hamu hombar tu panjouonna i, jala asa ditambahi di hamu las ni roha di na denggan dohot ulaon haporseaon marhitehite hagogoon.

¹²Asa marsangap Goar ni Tuhanta Jesus di bagasan hamu; hamu pe naeng marsangap di bagasan Ibana, marguru tu asi ni roha ni Debatanta dohot Tuhan Jesus Kristus.

2¹(I.) Alai anggo taringot tu haroro ni Tuhanta Jesus Kristus dohot hasasahatta tu Ibana, mangido ma hami tu hamu, ale angka dongan:

²Unang jalojalo mimbar hamu gabe so marroha, jala unang lilu hamu bahenon ni tondi ni partondi, manang hata ni parhata, manang bahenon ni surat pe, songon na sian hami didok, angka na paboahon: Nunga dapot ari ni Tuhan i!

³Sandok unang dipaotooto manang ise hamu! Ai ingkon jumolo marbalik torop, laos tarida ma jolma sipardosa na sumalin, i ma anak parhamagoan i.

⁴I ma sipangalo na pabangkithon dirina tu atas ni saluhut na targoar Debata dohot na patut sombaon, pola do dipahundul dirina, tubagasan joro ni Debata; paboa ibana sandiri Debata.

⁵Ndang diingot hamu, naung hupaboa hian i tu hamu, andorang di tongatongamuna dope ahu?

⁶Angkup ni i, diboto hamu do: Adong dope na mangambat ibana nuaeng, paima ro tingkina pataridahon dirina.

⁷Ai nunga marpangkorhon nuaeng hajahaton i, dalan hahomion, patagamtagam tingkina, asa dipadao na mangambat i dope saonari.

⁸Dung i pe asa sipapataron siparjahat i; alai ripashonon ni Tuhan Jesus ma ibana bahenon ni hosa ni pamanganna; siaphononna ma ibana di hapapatar ni harorona i.

⁹Na sian huaso ni sibolis i do haroro ni siparjahat i, mantat ragam ni hagagoon dohot tanda dohot halongangan gapgap,

¹⁰angakup ni i hajahaton sipaotooto di angka na laho mago i, ala na so olo nasida mangkaholongi hasintongan i, asa malua nian.

¹¹Ala ni i do suruon ni Debata tu nasida sipaotooto na margogo, asa porsea nasida di gapgap,

¹²asa hona uhum saluhut na so olo porsea di hasintongan i, angka na mangkalomohon hageduhon.

¹³Alai na tama do hami tongtong mandok mauiate tu Debata marningot hamu, ale angka dongan, na hinaholongan ni Tuhan i, ala dipillit Debata hamu sian mulana, asa saut hamu malua, i ma marhite sian Tondi na pabadiahon dohot haporseaon di hasintongan.

¹⁴Ai tusi do hamu dijou marhitehite barita na uli, na hubaritahon hami, asa partohap hamu di hasangapon ni Tuhanta Jesus Kristus.

¹⁵Antong, ale angka dongan, hot ma hamu jongjong jala marsitiopan ma hamu tu angka poda na huajarhon hami tu hamu marhite sian hata nang surat pe.

¹⁶Apala Tuhanta Jesus Kristus dohot Debata Amanta, na mangkaholongi hita jala mangalehon apulapul, na mian tongtong, dohot pangkirimon na denggan sian asi ni roha i:

¹⁷Ibana ma mangapuli jala pahothon rohamuna di bagasan nasa ulaon nang hata na denggan!

3¹(I.) Angkup ni i, tangiangkon hamu ma hami, ale angka dongan, asa marlojong

hata ni Tuhan i jala marsangap songon na di hamu,

²anggiat malua hami sian halak na jengkel jala na jahat i; ai ndang saluhutna olo porsea.

³Alai haposan do Tuhan i: Patoguonna do rohamu jala ramotanna do hamu maralohon na jahat i.

⁴Na pos do rohanami mida hamu di bagasan Tuhan i, sai patupaonmuna do na hupodahon hami tu hamu, nang nuaeng, nang tu joloan on.

⁵Sai ditogutogu Tuhan i ma rohamuna tu holong ni roha ni Debata dohot tu habengeton ni kristus i!

⁶Alai mangasahon Goar ni Tuhanta Jesus kristus: Hupaingot hami ma hamu, ale angka dongan: Sumurut ma hamu sian ganup dongan, na so maradat di parange, na so mangihuthon poda na jinalona sian hami!

⁷Ai diboto hamu do, manang songon dia patut tiruonmuna hami, ai ndada songon na so maradat hami di tongatongamuna;

⁸ai ndada songon tamue sorang hami di manang ise hamu; loja do hami tahe jala ngalutan mulaulaon borngin dohot arian, unang sorat hamu hubahen.

⁹Ndada na so marsahala hami nian, alai naeng pajongjongonnami dirinami tiruan di hamu, asa diihuthon hamu hami.

¹⁰Ai nang andorang di tongatongamuna hami, nunga hurodihon hami tu hamu: Na so ra mangula, unang ma ibana mangan!

¹¹Ai tarbege do tu hami, adong do deba sian hamuna na so maradat parangena, angka na so mulaulaon, na so siulaon do tahe dijama.

¹²Tu angka sisongon i hupatikkon jala hurodihon hami mangasahon Tuhan Jesus Kristus: Bulus ma nasida mulaulaon, asa na niomona be dihangoluhon.

¹³Alai anggo hamu, ale angka dongan, unang ma marnaloja hamu mambahen na denggan!

¹⁴Alai ia so olo deba tumangihon hatanami na tarsurat on, patanda hamu ma i; unang ma marparsaoran hamu dohot ibana, asa tarila ibana.

¹⁵Jala unang ma nian rajumi hamu ibana songon musu, pasingot hamu ma ibana tahe songon dongan!

¹⁶Alai manongtong jala mangimpas ma damena dilehon Tuhan Sipardame i tu hamuna! Didongani Tuhan i ma hamu sudena!

¹⁷On ma tabingku sian ahu, si Paulus, na sinurat ni tanganku. Songon i do somal tandatanganku di nasa surathu.

¹⁸Didongani asi ni roha ni Tuhanta Jesus Kristus ma hamu sudena!

1 Timotius

1 ¹ (I.) Ahu surat tinongos ni Paulus, apostel ni Kristus Jesus sian pandokkon ni Debata, Sipalua hita, dohot sian Kristus Jesus, pangkirimonta i,

² mandapothon si Timoteus, anakkonku na tutu di bagasan haporseaon: Asi ni roha, talup ni roha dohot dame sian Debata Ama dohot sian Kristus Jesus, Tuhanta i!

³ (II.) Huapoi do ho, tinggal di Epesus, uju borhat ahu tu Makedonia, asa dirodihon ho tu na deba, unang dipodahon na lipe.

⁴ Unang dijujur turiturian ro di surat sundutsundut na so marujung, angka na mantat parsalisian, gumodang asa parsombaon tu Debata marhitehite haporseaon.

⁵ Alai na tinembak ni patik i do haholongon sian roha na ias, sian panolopi ni panggora ni roha, nang sian haporseaon na so marlaok.

⁶ I do ditadingkon na deba, gabe marbalik tu hatahata na so gabeak.

⁷ Naeng sipodahon patik i nasida: So adong diboto na hinatahon dohot na hinajongjongkonnasida.

⁸ Alai taboto do, na denggan do patik i, molo hombar tusi pamangkena,

⁹Ala diboto, na so dipajongjong patik di parroha na tigor, tung di angka na so maruhum do, di na so tumangihon hata, di na so mangkabiari Debata, di angka pardosa, i ma angka na ramun na so marpaho, angka sibalbal ama dohot ina, angka sipusa jolma,

¹⁰angka parmainan, sibahen rongkos tu na poso, angka pamangus, angka pargapgap, angka siallang gana dohot nasa na alo dompak poda na tiar i,

¹¹hombar tu barita na uli, naung dipasahat tu ahu, na taringot tu hasangapon ni na Martua Debata.

¹²(III.) Mauliate hudok di na margogoihon ahu, i ma Kristus Jesus, Tuhanta i; ai dietong do ahu haposan, umbahen na dipabangkit ahu gabe parhalado.

¹³Panginsahi do ahu najolo jala pangalele jala siulahon gogo; alai dapotan asi ni roha do ahu, ai ndang huboto na huula i, tagan so porsea i dope ahu.

¹⁴Alai gabe lam sumurung do asi ni roha ni Tuhanta i, mantat haporseaon dohot holong ni roha, di bagasan Kristus Jesus.

¹⁵Haposan jala sandok tau jaloan do hata on: Nunga ro Kristus Jesus tu portibi on, paluahon angka pardosa; sian angka i do ahu na parjolo.

¹⁶Alai ala ni on do, umbahen na diasii ahu: Naeng jumolo marhite sian ahu patuduhonon ni Kristus Jesus sandok lambas ni rohana i,

bahen tiruan di angka na naeng porsea di Imana tu hangoluan salelenglelengna.

¹⁷Alai hamuliaon dohot hasangapon sisalelenglelengna ma di Raja na so marmula i; i ma Debata na manongtong, na so dapot idaon, na mamunjung i! Amen.

¹⁸(IV.) I ma podahon, songon na huampehon tu ho, anakkonku, Timoteus, hombar tu hata panurirangon najolo, angka na taringot tu ho, asa marhitehite i ho manahan di paraloan na denggan i.

¹⁹Tiop ma haporseaon i, marroha na ias, na binolongkon ni na deba, gabe tarharom taringot tu haporseaon.

²⁰Songon Himeneus dohot Aleksander, naung hupasahat tu sibolis i, asa taruli ajar nasida, unang be manginsahi.

2¹(I.) Onpe, on do sipaingothu, naeng ma ulahononhon parjolo situtu pangidoan, partangiangan, parpangondianon dohot hamauliateon humongkop saluhut halak,

²humongkop angka raja dohot saluhut parhuaso, asa marsonangsonang jala so hariboriboan hita marpangalaho, di bagasan sandok hadaulaton dohot hahormaton.

³Na denggan do i, jala halomoan ni roha ni Debata, Sipalua hita.

⁴Ai dipangido rohana do, naeng saluhutjolma malua jala sahat mananda hasintongan i.

⁵Ai sada do Debata, jala sada do nang Pangulu ni Debata dohot jolma, i ma jolma Kristus Jesus i.

⁶Dilehon do dirina, bahen tobus humongkop saluhut, i ma sihatindangkononhon di tingki hadenggananna.

⁷Tusi do ahu dipabangkit, gabe parjamita jala apostel, gabe pangajari di halak sipelebegu, di bagasan haporseaon dohot hasintongan; tutu do hatangki, ndang margabus ahu.

⁸(II.) Asa dipangido rohangku: Naeng ma martangiang angka baoa di nasa inganan, sumombahon tangan na bontor, so marrimas, so marroha ganggu.

⁹Angka parompuan pe, songon i do: Pantun marabit, marpangkean hahormaton dohot toruk ni roha; unang ma marhitehite obuk na mardandan dohot sanggul mas dohot mutiha manang abit na arga.

¹⁰Alai naeng ma songon na tama di parompuan, angka na marhatopothon hadaulaton marhitehite angka ulaon na denggan.

¹¹Hohom ma parompuan marguru, marunduk ni roha situtu.

¹²Alai ndada huloas parompuan mangajari manang mangarajai hamulianna; mauhom ma nasida!

¹³Ai jumolo do si Adam ditompa; dung i pe, asa si Haoa.

¹⁴Jala ndada si Adam dipaotooto;
parompuan i do dipaotooto, gabe pangalaosi.

¹⁵Alai dapotan haluaon do ibana marhitehite
na mangintubu, molo mian nasida di bagasan
haporseaon dohot haholongon ni roha, nang
habadiaon mardongan hatomanon.

3¹(I.) Hata haposan do on: Ulaon na
denggan do pinangido ni na mangalului
hasintuaon.

²Dibahen i, unang ma adong dapot
sisurahan di sintua: Harajaan ni sada
boruboru ma ibana, marpangontik, marroha,
marhapantunon, na las roha martamue, na
malo mangajari.

³Unang ma sisobur tuak, unang
pangalinsingi; alai na lambok, pardame jala
si impolan di perak.

⁴Na malo mangarajai donganna sabagas,
paranakon sioloi ajar mardongan sandok
hahormaton.

⁵Ai molo so diboto mangarajai isi ni bagasna,
tung songon dia ma paturetureonna huria ni
Debata?

⁶Unang ma halak na imbaru masuk, unang
gabe ginjang rohana; jala madabu maon
tubagasan uhum ni sibolis i.

⁷Ingkon denggan do baritana di halak na di
balian, asa unang ibana madabu tubagasan
panginsahion dohot sambil ni sibolis i.

⁸Songon i do nang angka parhobas: Ingkon
na toman do, unang mardua hata, unang

sisobur tuak, unang parpangomo sian dalan na so tama;

⁹angka na umpeop hahomion ni haporseaon i di bagasan roha na ias.

¹⁰Alai siunjunan jumolo nang nasida; dung pe i, asa jaloonnasida ulaon i, anggo so hasurahan.

¹¹Songon i ma angka parompuan: Toman, unang sihatahatai donganna; parpangontik, haposan di saluhut.

¹²Ia parhobas i, ingkon harajaan ni sada boruboru, angka na umboto manguluhon anakonna dohot bagasna be.

¹³Ai ia dung ture parhobasonnasida, naek situtu ma nasida, jala marhiras ni roha godang marhaporseaon di Kristus Jesus.

¹⁴(II.) Husurathon angka i tu ho, huhut mangkirim, tibu ahu ro manopot ho.

¹⁵Alai molo tung gumele ahu, naeng botoonmu, na patut parangehononmu di bagas ni Debata, i ma huria ni Debata na mangolu i!

¹⁶Tiang jala tungkol ni hasintongan i jala tandap balga ni hahomion ni hadaulaton i: Nunga gabe patar Ibana mardaging, dipintori di bagasan Tondi, tarida di angka surusuruan, binaritahon tu angka parbegu, hinaporseaan di portibi on jala tarhinsat di bagasan hasangapon!

4¹(I.) Alai tangkas do didok Tondi i: Adong ma di angka ari sogot deba na marbalik

sian haporseaon i; oloan ni i ma angka tondi sipaotooto dohot podapoda ni angka sibolis,

²bahenon ni ansiansi ni angka sihatahon gabus, angka na tinoruan ni panggora ni rohanasida.

³Diorai nasida do mardongan saripe; dipatik do jolma mangorom sipanganon, na jinadihon ni Debata, asa mardongan mauiate i dijalo angka na porsea, angka naung tumanda hasintongan i.

⁴Ai na denggan do nasa na tinompa ni Debata jala ndang sisubanghononhon nasa na jinalo mardongan roha mauiate.

⁵Ai na gabe badia do i, binahen ni hata ni Debata dohot tangiang.

⁶Anggo i diapohon ho tu angka dongan, gabe tutu ma ho parhalado ni Kristus Jesus, mangkangoluhon hata haporseaon i dohot poda na uli na niihuthonmi.

⁷(II.) Pasiding ma angka turiturian na so gabeak, na so marnosan i. Pasomalsomal ma dirim mangulahon hadaulaton!

⁸Ai otik do guna ni na pabosihon daging; alai tu saluhutna do hasea hadaulaton i, ai hangoluan nuaeng nang sogot dibagabagahon.

⁹Haposan do hata i jala tau situtu jaloan.

¹⁰Ai ala ni i do, umbahen loja hita jala marungkil: Ala mangkirim hita di Debata na mangolu, Sipalua halak saluhutna, alai sumurung angka na porsea.

¹¹ I ma patikkon jala podahon!

¹² Unang ma hu roha ni halak mida ho siala haposoonmi; alai gabe tiruan ni angka na porsea ma ho di pangkataion, di parange, di holong ni roha, di haporseaon, nang di hatomanon.

¹³ Sai datdati ma na manjahai, na mangapoi, nang na mangajari, paima ro ahu!

¹⁴ Unang neang roham di silehonlehon na di ho i, na pinasahat tu ho marhitehite panurirangon dohot pangampehon tangan sian angka sintua.

¹⁵ I ma pasarisari, i ma parangehon, asa patar diida sude hanaehanmi!

¹⁶ Matahon dirim, ro di pamodaion i; mian ma ho disi! Ai molo i diula ho, paluaonmu ma dirim ro di angka na tumangihon ho.

5¹ (I.) Unang songgahi na tuatua; alai apoi ma ibana songon ama, angka na poso i songon anggi;

² angka parompuan na tuatua songon ina, angka na umposo songon iboto; alai marhatomanon situtu.

³ Parompuan na mabalu parsangapi, anggo na mabalu na tutu.

⁴ Alai anggo maranakkon manang marpahompu ina na mabalu i, nasida ma jumolo sumarihon donganna sabagas i di bagasan hadaulaton, mambahen pamaloson tu natuatuana, ai i do dihalomohon Debata.

⁵Alai anggo na mabalu na tutu, na so mardihadiha, mangkirim ma tu Debata, jala manongtong mangido dohot martangiang arian dohot borngin.

⁶Alai anggo diulahon hisaphisap, naung mate do i, nang mangolu dope.

⁷I ma patikkon, asa so hasurahan nasida.

⁸Alai na so sumarihon donganna, haputusan donganna sabagas, naung mansoadahon haporseaon do i; jumahat do i sian halak na so porsea.

⁹Ndang sipilliton ina na mabalu, ia so gok onompulu taon umurna, naung sahali marhamulian.

¹⁰Ingkon denggan do ulaonna dihatindangkon halak: Anggo dipagodanggodang anakonna, las rohana martamue, diburi pat ni angka na badia, diurupi angka na di bagasan haporsuhon, dieahi nasa ulaon na denggan.

¹¹Alai pasiding ma angka boruboru na mabalu na poso; ai ia dung garang rohanasida maralohon Kristus, naeng ma marhamulian nasida.

¹²Sisaritaon do nasida, ala nunga ditadingkon haburjuonnasida di mulana.

¹³Angkup ni i, marlanggelangge do nasida; diringkoti na merbaserbas tu bagas ni halak; alai tamba ni parlanggelanggeon i: Na gabe sihapodea do nasida, angka na juit, sihatahon na so marguna.

¹⁴Onpe, dipangido rohangku: Marhamulian ma angka na sopot mabalu, asa tubutubuan, patureturehon bagasna, unang dilehon tu alo i parbonsiran, laho manginsahi.

¹⁵Ai nunga sanga marbalik deba mangihuthon sibolis i.

¹⁶Alai molo adong na mabalu, na marsolhothon na porsea, i ma patureturehon nasida, asa tarpatureture huria i na mabalu na tutu.

¹⁷(II.) Silompit do jujuron hasangapon ni sintua, na burju mangula hasintuaon, gumodang ma tu angka na mangulahon hata dohot poda.

¹⁸Ai didok Surat i: "Ndang jadi huntamonmu baba ni horbo na mardege!" dohot: "Na tama do di pangula upana!"

¹⁹Unang jalo pangaluan dompak sintua, ia so di jolo ni dua manang tolu sitindangi.

²⁰Angka na mardosa i pinsang di jolo ni saluhutna, asa mabiar nang angka dongan.

²¹Humangmangi ho di jolo ni Debata dohot Kristus Jesus, nang di jolo ni surusuruan ni Debata, angka na tarpillit: Unang maralangalang roham mangaradoti angka ondeng, unang ma mardingkandingkan!

²²Unang hapogani mangampehon tanganmu tu halak; unang saor ho tu dosa ni na leban. Ramoti dirim, asa ias ho!

²³Unang sai minum aek ho; pangke ma anggur sasaotik, daon ni butuha, ai jotjot do ho gale.

²⁴Di na deba halak patar hian do dosana, tagan so songgop dope uhum; ia di na deba mangihut sian pudi nama.

²⁵Suang songon i: Patar do angka ulaon na denggan; jala nang pe asing, tong ndang tarbahensa buni!

6¹(I.) Nasa anak somang, ditoru ni auga, dirajumi ma indukna tama pasangapon di na saluhutna, asa unang hona insak Goar ni Debata, nang agama i.

²Alai molo porsea angka induk, unang ma moru parsangapina di nasida, ala dongan nasida; lam dioloi ma, ala porsea nasida jala na hinaholongan, angka naung taruli di basabasa i. I ma ajarhon jala paingothon!

³Na mangajarhon asing, na so marsitiopan tu hata na tingkos, na sian Tuhanta Jesus Kristus, dohot tu poda na mangihuthon hadaulaton i,

⁴i do na burnang, ndang diboto agia aha, parsualon dohot parpollungon dihasahithon, i ma haroroan ni latelate, badabada, panginsahion dohot panihanihaion na roa,

⁵parsalisian na manongtong dijolma naung sega rohana, naung agoan hasintongan i, ai dirimpu, pangomoan do hadaulaton i.

⁶(II.) Pangomoan godang do tutu hadaulaton, anggo mardongan sabam ni roha.

⁷Ai ndang adong taboan tu hasiangan on, jala ndang tarboan hita agia aha laho ruar.

⁸Alai molo adong di hita sipanganon dohot parabiton, tahasabamhon ma i!

⁹Ia angka na naeng gabe mamora, madabu do tubagasan pangunjunan dohot sambil dohot tu lan hahisapon haotoon, angka na mangago, na mangalonongkon jolma i tubagasan jea dohot hamagoan.

¹⁰Ai urat ni nasa hajahaton do roha na holongan di hepeng; i do disangkapi na deba, umbahen na lilu sian haporseaon i, gabe diaithon do godang na bernit tu dirina.

¹¹(III.) Alai anggo ho halak ni Debata, maporus ma sian i; pareahi ma hatigoran, hadaulaton, haporseaon, holong ni roha, habengeton dohot lambok ni roha!

¹²Haburjuhon ma paraloan haporseaon na denggan i; tangkup ma hangoluan salelenglelengna, ai tusi do ho dijou, jala diparhatopot ho do panindangion na denggan di jolo ni torop sitindangi.

¹³Hupatik ma ho di jolo ni Debata, na pangoluhon saluhut, dohot di jolo ni Kristus Jesus, na mangkatindangkon na denggan di jolo ni Pontius Latus:

¹⁴Radoti ma patik i, so marlindang, so hasurahan, paima tarida Tuhanta Jesus Kristus i.

¹⁵Ai di hajujumpang ni tingkina patar ma Ibana, bahenon ni na Martua i, Pargogo sasadasa, Raja ni angka raja, Tuhan ni angka tuan.

¹⁶Sasadasa do na so olo mate, Siingani hatiuron na so tartopot, na so dung diidajolma Ibana, jala ndang tarbereng Hasangapon dohot hagogoon ma di Ibana ro di salelenglelengna! Amen.

¹⁷Rodihon ma angka na mora di hasiangan on, unang ginjang rohanasida, unang dihaposi hamoraon na so mian i; alai dihaposi ma Debata, na buas mangalehon tu hita saluhut sihalashononta.

¹⁸Naeng ma mangulahon na denggan nasida, mamora di angka ulaon na denggan, marroha na buas, na girgir marsibasabasa,

¹⁹papunguhon di nasida pangkal na denggan tu tingki sogot, asa ditangkup nasida ngolu na tutu.

²⁰Ale Timoteus, ramoti naung jinalomi, pasiding ma pangkataion na so marimpola, na so gabeak i, dohot sualsual na pilit targoar parbinotoan!

²¹I do dibaritahon deba, gabe manimbil sian haporseaon. Didongani asi ni roha i ma hamu!

2 Timotius

1 ¹ (I.) Ahu surat tinongos ni si Paulus, apostel ni Kristus Jesus, marhite sian tahi ni Debata, marguru tu bagabaga hangoluan, na di bagasan Kristus Jesus,

² mandapothon si Timoteus, anakkonku na hinaholongan: Asi ni roha, talup ni roha, dame sian Debata Ama dohot sian Kristus Jesus, Tuhanta i!

³ (II.) Mauliate rohangku di Debata, na huoloi di bagasan roha na ias, sian angka daompung dope; ai so marpansohotan hupaingotingot ho di angka tangiangku, borngin nang arian.

⁴ Ai masihol do ahu marnida ho, marningot iluilumi, anggiat gok halalas ni rohangku.

⁵ Ai huingot do haporseaonmu na so marlaok i, na maringanan hian di bagasan ompungmu boru, si Lois, nang di bagasan inangmu, si Eunike; alai dohot do di bagasan ho, dihaporseai rohangku.

⁶ (III.) Ala ni i hupaingot ho, asa diparatarata ho silehonlehon ni Debata, na tu ho i, di na huampehon tanganki tu ho.

⁷ Ai dilehon Debata do tu hita tondi hagagoon, tondi haholongon, tondi pangarajaion diri, ndada tondi hatahuton.

⁸ Onpe, unang ho maila, mangkatindangkon Tuhanta i, jala unang hailahon ahu, na

tarhurung humongkop Ibana; dohot ma ho tahe mangkongkop barita na uli, sian hagagoon ni Debata!

⁹Ai dipalua jala dijou do hita marhitehite panjouon na badia; ndada marguru tu ulaonta, tung sian tahina dohot sian asi ni roha, na binasabasahon tu hita di bagasan Kristus Jesus, na sian mula ni mulana.

¹⁰Alai nuaeng dipapatar do, di na tarida Sipalua hita, Kristus Jesus i. Ibana do pasohothon hamatean, di paullop hangoluan dohot hatongtongon marhitehite barita na uli i.

¹¹Tusi do ahu dipabangkit, gabe parjamita dohot apostel dohot pangajari.

¹²Ala ni i do, umbahen na marsitaonon ahu, alai ndang maila ahu disi; ai hutanda do Ibana na huhaporseai, jala pos do rohangku, margogo Ibana mangaramoti na pinalumehonna i tu ahu, ro di ari sogot i.

¹³Ihuthon ma angka poda na tingkos i tiruanmu, songon naung binegem sian ahu, di bagasan haporseaon dohot holong ni roha na di Kristus Jesus i.

¹⁴Na pinalumehon na denggan i ma ramoti marhitehite Tondi Parbadia, na maringanan di bagasan hita.

¹⁵(IV.) Diboto ho do, naung ditundali saluhut na di Asia i ahu, songon Pigelus dohot Hermogenes.

¹⁶Sai dilehon Tuhan i ma asi ni roha tu bagas ni si Onesiporus; ai jotjot do sonang pangkilalaanku dibahen, jala ndang dihailahon ibana rantengki.

¹⁷Ai disi ro ibana tu huta Rom, dihaburjuhon do mangalului ahu, paima jumpangsa.

¹⁸Sai dilehon Tuhan i ma, asa jumpangan asi ni roha ibana sian Tuhan i di ari sogot i! Torang do diboto ho nasa panolongina di ahu di huta Epesus.

2¹(I.) Onpe, ale anaha, margogo ma ho marhitehite asi ni roha ni Kristus Jesus!

²Jadi ma binegem sian ahu di adopan ni torop sitindangi, i ma pasahat tu halak haposan, angka na tau mangajari na asing.

³Gabe dongan manaon haporsuhon ma ho, songon parangan na denggan di Kristus Jesus!

⁴Nandang olo alit parporang tu angka ulaon pandaraman, asa halomoan ibana di na marsuru ibana.

⁵Nang na marsiadu pe, ndang dipartumpali, ia so tigor paraloonna i.

⁶Ingkon siula hauma i jumolo taruli di parbuena!

⁷Antusi na hudok i; ai lehonon ni Tuhan i do tu ho roha mangarti saluhutna i.

⁸Paingotingot ma Jesus Kristus, naung dipangolu sian angka na mate, na sian pinompar ni si Daud, hombar tu na hubaritahon i.

⁹Ala ni i do ahu manaon na porsuk, pola tarrante songon siula hajahaton; alai ndang tarrante anggo hata ni Debata

¹⁰Dibahen i, benget do rohangku, manaon saluhutna i, ala ni angka na tarpillit, asa dohot nasida taruli di haluaon, na di bagasan Kristus Jesus, dohot di hasangapon salelenglelengna i.

¹¹Haposan do hata on: Anggo donganna do hita tu hamatean, donganna ma nang tu hangoluan.

¹²Anggo benget hita manaon, rap mangarajai ma hita sogot. Molo mansoadahon hita, dohot ma Ibana mansoadahon hita.

¹³So haposan pe hita, tong do haposan anggo Ibana; ai ndang tarsoadahonsa dirina.

¹⁴(II.) I ma pasingothon jala hatindangkon di jolo ni Debata; unang ma nasida masisualan, ai tung na so hasea do i, na mangago do i di angka na umbegesa.

¹⁵Haringgashon patuduhon haburjuonmi di Debata, songon pangula na so tarila, na padalanhon hata hasintongan i tigortigor.

¹⁶Alai pasiding ma pangkataion na so marimpola, na so gabeak i, ai lam tu gandana do hajahatonnasida hinorhon ni i.

¹⁷Songon baro sirarat lam ragat hatanasida; songon na di si Himeneus dohot Piletus.

¹⁸Na lilu do nasida sian hasintongan i, ai didok: Nunga sanga masa haheheon i, gabe marbalik deba sian haporseaon i.

¹⁹Alai na hot do haojahan na sian Debata. Hata on ma sahapna: "Ditanda Tuhan i do angka na di Ibana!" Dohot: "Sirang ma sian hageduhon nasa na mandok Goar ni Tuhan i!"

²⁰Ala ndada holan ulaula sere dohot perak dapot di bagasan bagas na bolon, dohot ma ulaula hau dohot tano; na deba tu ulaon hasangapon, na deba tu haleaon.

²¹Asa halak na paia dirina sian angka ondeng, i ma gabe ulaula na badia, na tu ulaon hasangapon, na hasea di nampuna bagas i, rade tu nasa ulaon na denggan.

²²Maporus ma ho pasiding sangkapsangkap haposoon; alai pareak ma hatigoran, haporseaon, holong ni roha dohot dame, rap dohot angka na manjou Tuhan i sian roha na ias.

²³Alai pasiding ma angka sungkunsungkun haotoon na ngongar, ai diboto ho, na mangkorhon parbadaan do i.

²⁴Na so patut parbadabada anggo naposo ni Tuhan i, alai tama basar maradophon saluhut, malo mangajari, benget manaon na jat;

²⁵marlambok ni roha ma maminsang angka na mangalo, anggiat dilehon Debata tu nasida hamubaon ni roha, laho mananda hasintongan,

²⁶asa tarjolma nasida, dung malua sian jorgong ni sibolis i, na nialithonna tu nasida, pasauthon roharohana.

3¹ (I.) Alai patut ma botoonmu on: Na ro ma angka ari hasusaan, di angka tingki parpudi.

²Ai mangkaholongi dirina ma jolma disi, impolan di perak, parhata manggang, parroha haginjangon, angka panginsahi, na so mangoloi natorasna, na so marningot lagu, angka na tois;

³angka na so marroha holong, pangoseose, panihasnihasi, na so umboto mangorom, parmurukmuruk, na so marholong ni roha di na denggan;

⁴angka parjehe, parroha na neang, sipaburnang diri, holongan di hisap ni daging asa di Debata.

⁵Parrumang hadaulaton do nasida; alai hagogoonna i ndang dapot di nasida. Pasiding ma angka sisongon i!

⁶Angka sisongon i do na olo manisipi tu jabu ni halak, mandormai roha ni angka boruboru, naung sorat binahen ni dosa, angka na nielaela ni ragam ni hahisapon,

⁷angka na tongtong marguru, alai matua so sahat nasida mananda hasintongan i:

⁸Tudoshon si Jannes dohot si Jambres, angka na mangalo si Musa, laho mangalo hasintongan. Nasida do jolma naung sega rohana; ndang manahan haporseaonnasida.

⁹Alai ndang tagamon patulusonnasida i, ai patar do diida sude haotoonnasida, suang songon di na dua ondeng.

¹⁰(II.) Alai diihuthon ho do ahu di poda, di parange, di tahi, di haporseaon, di lambas, holong dohot benget ni roha,

¹¹di bagasan angka pangaleleon, haporsuhon, angka na masa tu ahu di Antiokia, di Ikonium, di Listra: Pangaleleon na sai godang do huta on, jala dipalua Tuhan i do ahu sian saluhutna i.

¹²Alai ndang tarbahen so hona lele nasa, na naeng marparange na daulat marhitehite Kristus Jesus.

¹³Alai na mangkapogani hamagoanna do angka parjahat dohot siulas utiutian; na paotootohon do nasida huhut dipaotooto.

¹⁴Alai anggo ho, sai mian ma di bagasan angka na ginuruhon jala naung hinaporseaanmi, ai diboto ho do na mangajarhonsa tu ho.

¹⁵Huhut ala diboto ho, sian sietehetehonmi dope, surat na badia i, na margogo pabisukkon ho, asa taruli di haluaon marhitehite haporseaon di Kristus Jesus.

¹⁶Ai nasa Surat i, sinihathon ni Debata do; jala hasea mamodai, maminsang, pauliulihon, manogunogu di bagasan hatigoran,

¹⁷asa rimpas halak ni Debata, hobas tu nasa ulaon na denggan.

4¹(I.) Di jolo ni Debata dohot Kristus Jesus, na ro manguhumi angka na mangolu dohot na mate, huhatindangkon nang hapataronna, nang harajaonna.

²Jamitahon hata i, hajongjongkon di tingki na une nang so une; pinsang, paingot, apoi marhitehite nasa lambas ni roha dohot pamodaion.

³Ai na ro ma tingkina, ndang tartahan halak disi poda na tingkos i; alai mangihuthon hisaphisap sandiri ma alaponnasida pangajari na pageokgeokkon pinggolnasida.

⁴Taitonnasida ma pinggolnasida sian hasintongan i, laho paelengkonsa tu angka turiturian.

⁵Alai anggo ho, sandok unang ma mabuk roham, taon ma na jat i; radoti na tama ulaon ni parbarita na uli; sahat ula tohonanmi!

⁶(II.) Ai pasahaton nama anggo ahu songon pelean; na dapot ne ma tingki haluluangki!

⁷Nunga hupasidung paraloan na denggan i, nunga hupaujung parlojongonki; ramot hubahen haporseaon i.

⁸Diri nama di jolongku tumpal hatigoran, silehonon ni Tuhan, Paruhum na tigor i, di ari sogot i tu ahu; alai ndada holan tu ahu, tu saluhutna do tahe, angka na mangkaholongi hapataronna i.

⁹Pahatop manopot ahu tibu!

¹⁰Ai ditadingkon si Demas i do ahu, ala naung holong rohana di portibi on, laos laho tu Tessalonik; songon i si Kreskes tu Galatia si Titus tu Dalmatia.

¹¹ Sasada si Lukas i nama donganku. Arahon si Markus i, jala boan ibana donganmu, ai hasea situtu do ibana tu parhobason.

¹² Ia si Tikikus i, nunga husuru tu Epesus.

¹³ Molo ro ho, boan ma baju panas na hutinggalhon di si Karpus, di huta Troas; songon i angka buku, na rumingkot, i ma angka pustaha i!

¹⁴ Godang hajahaton diula si Aleksander, pande bosi i, dompak ahu; baloshonon ni Tuhan i do tu ibana, hombar tu pambahenanna i.

¹⁵ Ho pe, jaga ibana; ai dialo situtu do hatanami.

¹⁶ Di paralusanku parjolo sahali, ndang adong donganku; tung saluhutna do manadingkon ahu. Unang ma tarrajum i tu nasida!

¹⁷ Alai Tuhan i do mandongani jala margogoihon ahu, asa tulus parjamitaon i marhite sian ahu, gabe saluhut sipelebegu umbegesa; laos malua do ahu sian baba ni babiat i.

¹⁸ Roroon ni Tuhan i do ahu sian nasa ulaon hajahaton, jala paluaonna do ahu tubagasan harajaonna na di banua ginjaang i. Di Ibana ma hasangapon ro di salelenglelengna! Amen.

¹⁹ (III.) Tabingku ma di si Priska dohot si Akila, songon i di pangisi ni bagas ni si Onesiporus.

²⁰Tinggal do si Erastus di Korint; alai marsahit do hutadingkon si Tropimus di Miletus.

²¹Gumira ma ho ro, andorang so taon ngali! Manongos tabi tu ho si Eubulus, si Pudes, si Linus, dohot si Klaudia ro di dongan sasude.

²²Didongani Tuhan i ma tondimuna! Asi ni roha ma di hamu!

Titus

1 ¹ (I.) Ahu surat ni si Paulus, naposo ni Debata, apostel ni Jesus Kristus, hombar tu haporseaon ni angka na pinillit ni Debata, jala hombar tu panandaon di hasintongan, na domu tu hadaulaton,

² mangasahon pangkirimon di hangoluan na so ra suda, naung sian mula ni mulana i diparbagabaga Debata, na so margabus i,

³ gabe dipapatar do hinatahonna i di tingkina i, marhite sian parjamitaon, na pinasahatna tu ahui, mangihuthon pandokkon ni Debata, Sipangolu hita,

⁴ mandapothon si Titus, anak na tutu, taringot tu haporseaon hatopan i: Asi ni roha dohot dame sian Debata Ama dohot sian Kristus Jesus, Sipalua hita!

⁵ (II.) Umbahen na hutadingkon ho di Kreta, asa dipature, ho ulaon angka na tading i dope, dohot pabangkithon sintua di ganup huta, songon naung huaturhon tu ho.

⁶ Naeng ma nasida so hasurahan, dongan saripe ni sada parompuan, paranakkon na porsea, angka na so tarhata sineang roha manang na jungking pe.

⁷ Ai anggo sintua, sandok na so jadi hasurahan, naeng ma songon juara bagas ni Debata, unang siula roharoha, unang

parpiripiri, unang sisobur tuak, unang parbada, unang parpangomo sian na so ture!

⁸Alai na basa martamue, na las roha di na denggan, na toman, na bonar, na badia, sirajai dirina.

⁹Na marsitiopan tu hata sihaposan i mangihuthon poda i, asa margogo ibana, mangapoi marhitehite poda na tingkos i, nang maminsang angka na manggaga.

¹⁰(III.) Alai lan do angka na jengkel, angka parhata na so gabeak, na giot mangaliluhon; toropan nasida Jahudi.

¹¹Ingkon huntamon do pamangannasida, ai digaori nasida do pangisi ni angka bagas, diajarhon do na so jadi, mambuat pangomoan hailaon.

¹²Didok sahalak panurirang sian tongatonganasida: Sai tong pargapgap do halak Kreta, angka binatang pamusa, parroha butuha, angka na losok.

¹³Sintong do panindangion i. Dibahen i, gomos ma paminsangmu di nasida, asa gabe hisar nasida marhaporseaon.

¹⁴Unang dianto turiturian ni Jahudi ro di patikpatik ni jolma, angka naung manundalhon hasintongan i.

¹⁵Ias do saluhut di angka na ias; alai ndang adong na ias di parroha na ronsam, na so porsea, ai naung ronsam do rohanasida ro di panggora ni roha i.

¹⁶Dihatahon nasida do, naung ditanda Debata, alai disoadahon do Ibana di na niulanasida; ai hagigian do nasida jala na tois, na so tau tu manang dia ulaon na denggan.

2¹ (I.) Alai anggo ho, hatahon ma na domu tu poda na tingkos i:

²Naeng ma marroha na torang angka na tuatua, daulat, toman, hisar marhaporseaon, marholong jala marbenget ni roha.

³Songon i angka parompuan natuatu: Marparange na tama di na badia i, unang panihasnihasi, unang hatagian di anggur; angka sipodahon na denggan.

⁴Naeng ma apoapoannasida angka parompuan na poso, mangkaholongi sinondukna dohot anakonna,

⁵mamarangehon hatomanon, hapormanon, mangaringkoti ulaonna di bagas, marbasabasa, marunduk ni roha maradophon hamulianna be, unang hona insak hata ni Debata.

⁶Laos songon i ma apoi baoa angka na umposo, asa marhatomanon.

⁷Sandok pajongjong dirim tiruan di angka ulaon na denggan, polin di pangajarion, marhatomanon.

⁸Naeng tingkos poda i, so tarsual, asa maila na mangalo i, ala so dapot na roa sidohononna maralohon hita.

⁹Dioloi angka anak somang ma indukna be, patupahon lomo ni rohana di na saluhutna; unang ma manggagai!

¹⁰Unang ma mangahuti; dipatuduhon ma nasida haposan di sasude asa sandok marsangap poda ni Debata, Sipalua hita, dibahen.

¹¹(II.) Ai nunga tarida asi ni roha ni Debata, sibahen haluaon ni saluhutjolma.

¹²Diajari do hita, asa tasoadahon roha na so daulat ro di angka hisaphisap tano on, asa taparangehon hatomanon, hatigoran dohot hadaulaton, tagan di hasiangan on.

¹³Laos diajari do hita, paipaimahon hatuaon na tahirim i dohot hapapatar ni hasangapon ni Debata na balga i dohot Kristus Jesus, Sipalua i.

¹⁴Ai dilehon do dirina humongkop hita, asa ditobus hita sian nasa hajahaton, asa urasonna di dirina bangso, naung Ibana nampunasa, na olo mangkapadothon angka ulaon na denggan.

¹⁵I ma hatahon, paingothon jala ajarhon sian nasa gomos ni roham! Unang ma adong na marhu ni roha mida ho!

3¹(I.) Paingot ma nasida, asa marroha na unduk mangoloi panggomgomi na mangarajai, huhut ringgas tu nasa ulaon na denggan.

²Unang ma siinsahi dongan, manang na tongkar; naeng ma parroha na lambok, parroha panganju di saluhut halak.

³(II.) Ai dohot do hita najolo angka na oto, na tois, na lilu, pinarhatoban ni ragam ni hisaphisap dohot sangkapsangkap, taulahon do hajahaton dohot latelate; angka hagigian do hita jala masihosoman.

⁴Alai disi ma tarida habasaon dohot habasaron ni Debata, Sipalua hita:

⁵Ndada ala ni ulaonta hatigoran, umbahen na dipalua Ibana hita; tung sian asi ni rohana do, marhitehite pandidion pangulahion tubu dohot marhitehite Tondi Parbadia na paimbaruhon i,

⁶naung niusehonna i tu hita buas marhitehite Jesus Kristus, Sipalua hita,

⁷asa gabe tigor hita, binahen ni asi ni rohana, jala sitean hangoluan salelenglelengna, mangihuthon pangkirimon i.

⁸Haposan do hata i, jala naeng ma gomos hatindangkononmu i dipangido rohangku, asa nasida, naung gabe porsea di Debata, mangkapadothon angka ulaon na denggan. I ma na uli jala hasea di jolma.

⁹Alai pasiding ma angka sualsual haotoon i dohot hata sundutsundut ro di parsalisian dohot parbadaon siala Patik i, ai ndang marniula i jala magopo.

¹⁰Pasiding ma halak parpoda haliluon, dung jolo dipaingot ho ibana sahali manang dua hali;

¹¹ai diboto ho do, naung marbalik situtu sisongon i jala diulahon dosa, atik pe naung ditorui rohana ibana.

¹²(III.) Ia dung husuru si Artemas dohot Tikikus tu ho, pahatop ma ro mandapothon ahu tu Nikopolis, ai disi do ahu naeng mian di taon ngali.

¹³Haringkothon ma paborhathon si Jenas, siboto patik i, dohot Apollos; unang hurangan nasida di agia aha!

¹⁴Naeng ma diguruhon angka donganta, mangkapadothon angka ulaon na denggan, sumarihon na ringkot pangkeon; unang so marparbue nasida!

¹⁵Na manongos tabi tu ho saluhut donganku. Pasahat ma tabinami tu angka na marholong ni roha di hami, di bagasan haporseaon. Didongani asi ni roha i ma hamu saluhutna!

Filemon

1 ¹ (I.) Ahu surat ni si Paulus, na tarihot ala ni Kristus Jesus, nang Timoteus, dongan i, mandapothon si Pilemon na hinaholongan, dongannami saulaon,

² laos mandapothon si Appia, ibotonami, dohot si Arkippus, dongannami marungkil, ro di huria na marluhut di bagasmu:

³ Asi ni roha ma di hamu dohot dame sian Debata Amanta dohot sian Tuhan Jesus Kristus!

⁴ (II.) Na mandok mauiate do ahu tu Debatangku tongtong, marningot ho di angka tangiangku.

⁵ Ai hubege do holong ni roham dohot haporseaonmu di Tuhan Jesus dohot maradophon saluhut angka na badia.

⁶ Anggiat ma marpangkorhon hasaoron ni haporseaonmi, laho mananda nasa na denggan na di bagasan hamu, maradophon Kristus i.

⁷ Ai godang do di ahu halalas ni roha nang apulapul, dibahen holong ni roham, ai dipasabam ho do ateate ni angka na badia i, ale anggia.

⁸ (III.) Onpe, godang do nian hiras ni rohanku di bagasan Kristus, mangarodihon na tama tu ho.

⁹Alai ala ni holong ni roha i, tagonan ma ahu manglehelek. Nunga songon i ahu, Paulus, naung matua, jala tarihot nuaeng ala ni Kristus Jesus.

¹⁰Asa huelehelek ma ho; ala ni anakkonku, si Onesimus, na hutubuhon, di na tarihot on ahu.

¹¹Na so marguna do ibana najolo di ho; alai nuaeng marguna situtu do di ho, nang di ahu.

¹²Na husuru do ibana mulak tu ho; doshon rohangku do ibana huetong.

¹³Naeng do nian tioponku ibana, asa singkatmu ibana patureturehon ahu, di na tarrante on ahu ala ni barita na uli i.

¹⁴Alai ndang olo ahu mambahen agia aha, anggo so sian pamotoanmu, asa unang songon na so tarjua denggan basamu, naeng ma sian lomo ni roham.

¹⁵Atik i alana, umbahen na sirang ibana sangombas sian ho, asa gabe salelengna ibana di ho!

¹⁶Ndada be naposom ibana, tung lobi sian naposo, songon dongan na hinaholongan; lumobi di ahu, lam beha ma di ho: Mangihuthon ruhut tano on, tole di bagasan Tuhan i.

¹⁷Asa molo dietong ho ahu donganmu, jangkon ma ibana songon ahu!

¹⁸Alai molo tung adong salana manang utangna di ho, tu ahu ma i rajumi!

¹⁹Ahu, Paulus, manurathonsa dohot tanganku, paboa ahu sigarar i; unang jolo hudok tu ho, na marutang diri do ho tu ahu.

²⁰Olo tutu, anggia, naeng maruntung ahu sian ho di bagasan Tuhan i; pasabam ma ateatengku di bagasan Kristus i!

²¹(IV.) Ala pos rohangku, oloanmu ahu, umbahen na manurat ahu tu ho; ai huboto, patupaonmu do lumobi sian na hudok i.

²²Pature huhut inganan di ahu, ai dihirim rohangku, lehononna do ahu mulak tu hamu, dibahen angka tangiangmuna.

²³Manongos tabi tu ho: Si Epapras, donganku tarhurung di bagasan Kristus Jesus.

²⁴Songon i: Si Markus, Aristarkus, Demas, Lukas, angka donganku saulaon.

²⁵Didongani asi ni roha ni Tuhan Jesus Kristus ma tondimuna!

I brani

1 ¹ (I.) Jotjot jala ragam najolo pambahen ni Debata mangkuling i angka ama i marhitehite angka panurirang i.

² Alai di angka ari na parpudi on dipanghulingi do hita marhite sian Anak i. Ibana do dipabangkit gabe sitean parluhutan i, jala marhitehite Ibana do ditompa angka hasiangan i.

³ (II.) Sillam ni hasangaponna dohot suman ni hadirionna do Ibana, jala diusung do parluhutan i marhitehite hatana na marhagagoon i. Jala dung dipatupa Ibana haiason sian angka dosa, hundul do Ibana tu siamun ni Hatongamon na di ginjang i.

⁴ Songon surung ni Goarna na tineanna i, na mangatasi angka surusuruan, songon i do surung ni hasangaponna martimbangkon nasida.

⁵ Ai tu surusuruan dia ma hea didok: "Anakku do Ho; sadari on do Ho hutubuhon"? Manang: "Ahu do gabe Amana, jala Ibana gabe Anakku"?

⁶ Alai di na naeng togihononna muse tu portibi on Ibana na parjolo tubu i, disi ma didok: "Ingkon marsinggang tu jolona sude angka surusuruan ni Debata!"

⁷ Didok do nian taringot tu angka surusuruan i: "Ibana mambahen alogo surusuruanna, api na marjimburjimbur do parhaladona."

⁸ Alai taringot tu Anak i didok: "Ro di salelenglelengna do habangsami, ale Debata; tungkot hatigoran do tungkot harajaonmi!"

⁹ "Dihaholongi Ho do hatigoran jala dihagigihon Ho do hajahaton; ala ni i do dimiakkon Debatami miak halalas ni roha tu Ho, ale Debata, sumurung asa tu angka donganmi!"

¹⁰ Dung i: "Ho, ale Tuhan, paojakkon tano on di mulana i, jala jadijadian ni tanganmu do parlangitan i."

¹¹ "Mago do angka i muse, alai tongtong do mian anggo Ho; laho buruk do i saluhutna songon ulos."

¹² "Songon sampesampe balunonmu i sude, gabe muba ma; alai anggo Ho, laos tong do Ho, ndang mansohot angka taonmi!"

¹³ Alai tu surusuruan dia ma hea didok: "Hundul ma Ho tu Siamunhon, paima hubahen angka musum sidegedegean ni patmu?"

¹⁴ Nda saluhut nasida tondi parhobas, angka na sinuru, mangurupi angka sitean haluaon i?

2¹ (I.) Dibahen i, naeng ma muba gomosta, maniop hata naung tabege i, unang tung dibaorhon hita.

² Ai gari hata na hinatahon ni angka surusuruan i, gari hot do, jala nasa

pangalaosion dohot hatoison mangalap
pamaloson na hombar.

³Tagamon ma adong dapot haporusanta,
molo tatoishon haluaon na sai godang i? Pola
do Tuhan i mangkatahonsa di mulana i, jala
momos dipasahat angka na umbegesa tu
hita!

⁴Ai dohot do Debata mangkatindangkon
marhitehite angka tanda dohot halongangan
dohot ragam ni pambahenan hagagoon, nang
marhitehite Tondi Parbadia, na sinagihonna
guru lomo ni rohana.

⁵(II.) Ai ndada tu angka surusuruan i
dipagomgomhon Ibana hasiangan sogot, na
tahatahon on.

⁶Alai adong do na mangkatindangkon di
Surat i: "Aha do jolma i, umbahen na diingot
Ho Ibana; manang anak ni jolma i, umbahen
na ditatap Ho ibana?"

⁷"Otik dipaoru Ho Ibana tu toru ni angka
surusuruan. Hasangapon dohot hamuliaon
ditumpalhon Ho tu Ibana."

⁸"Saluhutna do dipatunduk Ho tutoru ni
patna." Ai di na pinatundukna i saluhutna i tu
Ibana, ndang adong tading, na so unduk tu
Ibana; alai anggo nuaeng, ndang taida dope,
naung tunduk tu Ibana saluhutna i.

⁹Alai na pinaoruna i otik tutoru ni
angka surusuruan i, i ma Jesus taida, na
martumpalhon hasangapon dohot hamuliaon,
ala nunga ditaonhon hamatean i, asa sian asi

ni roha ni Debata Ibana mangahap hamatean i humongkop saluhut.

¹⁰Ai Ibana, hapatean jala parmulaan ni nasa na adong, dung jolo ditogihon Ibana torop anak tu hasangapon, tama Ibana, parmulaan ni haluaonnasida i, dipajongjong sun denggan marhitehite sitaonon.

¹¹(III.) Ai marharoroan sian na Sada do saluhutna, na pabadianon dohot na pinabadiana i; ala ni i ndang dihailahon Ibana, manggoar nasida angka anggina.

¹²Ai ninna do: "Baritahononku do Goarmu tu angka anggingku; di tongatonga ni huria i do endehononku Ho!"

¹³Dung i muse: "Ibana do bahenonku haposanku!" Jala muse: "Dison do Ahu dohot dakdanak i, angka na nilehon ni Debata tu Ahu!"

¹⁴Asa songon dakdanak partohap di mudar dohot di sibuk, gabe suman do dohot Ibana partohap disi, asa marhitehite hamatean i dipasohot Ibana sibolis i, na marhuaso mambahen mate,

¹⁵asa dipalua sasude na pinarhatoban ni biar ni roha managam hamatean, saleleng mangolu.

¹⁶Ai apala angka surusuruan disarihon, pomparan ni Abraham i do!

¹⁷Ala ni i, ingkon gabe dos situtu Ibana tu angka anggina asa gabe parasiroha Ibana jala sintua ni malim haposan maradophon

Debata, laho pasaehon angka dosa ni bangso i.

¹⁸Ai intap naung marsitaonon Ibana di na tarunjun i, haurupan Ibana do angka na tarunjun i.

3¹(I.) Onpe, ale angka dongan na badia, partohap di panjouon na sian banua ginjang i, bereng hamu ma Jesus i, i ma apostel jala sintua ni malim na taparhatopot i!

²Haposan do Ibana maradophon na pabangkithon Ibana, songon si Musa di sandok bagasna i.

³Alai gumodang do hasangapon dietong tu Ibana, asa tu si Musa, mangihuthon surung ni hamuliaon na tu sipauli bagas asa tu bagas i.

⁴Ai ganup bagas, adong do na paulihonsa; alai sipauli saluhutna, Debata do.

⁵Anggo si Musa nian, haposan do di sandok bagasna i, songon parhobas, laho mangkatindangkon na naeng baritahononhon dope.

⁶Alai anggo Kristus i, songon Anak sigomgom bagasna; hita do bagasna, anggo gomos tatiop ro di ujungna hiras ni roha, na mangasahon ni hinirim i.

⁷(II.) Dibahen i, songon na nidok ni Tondi Parbadia i: "Sadari on, di na binegemuna soarana,"

⁸"unang ma papir hamu rohamuna, songon nasida na tangkang i di ari pangunjunan di halongonan i!"

⁹"Ai disi diunjuni angka amamuna Ahu, jala dipaujiuji, atik pe diida nasida angka ulaonki opatpulu taon lelengna."

¹⁰"Dibahen i muruk do Ahu mida na sansundut i jala hudok: Tongtong do lilu rohanasida. Alai ndang ditanda nasida angka dalanku,"

¹¹"pola maruari Ahu di rimashi: Na so tupa bongotannasida paradiananki!"

¹²Matahon hamu ma, ale angka dongan, so tung tardapot di manang ise pe sian hamu roha na jahat, na so porsea, na manundali Debata na mangolu i!

¹³Alai masiapoan ma hamu ganup ari, saleleng tardok dope sadari on, unang tung gabe pir roha ni manang ise sian hamu, hinorhon ni dosa na paototohon!

¹⁴Ai nunga gabe partohap di Kristus hita, anggo gomos tatiop ro di ujungna pos ni roha, na di hita di mulana i.

¹⁵Uju i ma didok: "Sadari on, di na binegemuna soarana, unang ma papir hamu rohamuna, songon nasida na tangkang roha uju i!"

¹⁶Ise do na patangkang rohana, atik pe dibege i? Nda saluhut nasida na tumadingkon tano Misir, tinogihon ni si Musa?

¹⁷ Angka ise do dimuruhi Ibana opatpulu taon lelengna? Nda nasida, na mardosa i! Gabe marragean do dagingnasida di halongonan i.

¹⁸ Dompak ise do Ibana maruari, na so tupa nasida masuk tu paradiananna i? Nda dompak angka na so mangoloi!

¹⁹ Asa on do taida: Ala na so porsea i nasida, umbahen na so tarbahensa bongot.

4¹ (I.) Dibahen i, biar ma rohanta, unang songon na tading manang ise sian hamu, binsan hot dope bagabaga, laho masuk tu paradiananna i.

² Ai dohot do tu hita dibaritahon i, songon na tu nasida; alai ndang marguna di nasida hata na binegenasida, ala so saor haporseaon i di bagasan nasida na umbegesa.

³ Ai na bongot tu paradianan i do hita, anggo dung gabe porsea, songon na nidokna i: "Pola maruari Ahu di rimashi, na so tupa bongotannasida paradiananki," atik pe naung sidung angka ulaon i olat ni haoojak ni portibi on.

⁴ Ai didok do sahali songon on taringot tu ari papituhon i: "Dung i maradian ma Debata di ari papituhon i sian saluhut ulaonna i."

⁵ Dung i muse: "Na so tupa bongotannasida paradiananki!"

⁶ Asa adong dope deba na tarbahen bongot tusi; alai na jumolo jinamitaan i ndang masuk, ala na so mangoloi.

⁷Ala ni i, dibuhul muse sada ari, sadari on, ninna, ai didok do marhite sian si Daud, dung salpu na sai leleng i, suman tu naung nidokna i hian: "Sadari on, di na binegemuna soarana, unang ma papir hamu rohamuna!"

⁸Ai aut si Josua pabongothon nasida, ndang hatahononna be di pudi ni i taringot tu ari na asing.

⁹Dibahen i, adong dope hirimon paradianan Sabbat di bangso ni Debata.

¹⁰Ai ibana naung bongot tu paradianan i, maradian do sian na niulana songon Debata, na maradian sian na niulanai.

¹¹(II.) Antong, taharingkothon ma mambongoti paradianan i; unang ma adong na somsam, mangihuthon na so mangoloi i.

¹²Ai na marngolu do hata ni Debata jala marpangkorhon, jala tumajom sian nasa podang siduababa, jala torus do disirang hosa dohot tondi, ringring dohot utohutokna, laos diuhumi do na sinangkap dohot na piningkir ni roha.

¹³Jala ndang adong na tinompa na onding sian jolona, tung saluhut do tedek, so adong na hungkup diida matana. Tu Ibana do hita mardabudabu!

¹⁴(III.) Onpe, dibahen naung adong di hita sintua ni malim na bolon, naung manorusi angka banua ginjang i, i ma Jesus, Anak ni Debata, gomos ma tatiop naung taparhatopot i!

¹⁵ Ai naung adong do di hita sintua ni malim na tarbahen dongan mangkilala di angka hagaleonta; tung na tarunjun do Ibana di na saluhut songon hita, alai ndang mardosa.

¹⁶ Antong, marhiras ni roha ma hita mandapothon habangsa parasiasian, asa tajalo talup ni roha, jala asa dapot asi ni roha hita bahen pangurupion, di tingki halehetanna.

5¹ (I.) Ai ganup sintua ni malim, na binuat sianjolma, dipabangkit do ala ni jolma, mangaradoti angka ulaon na tu Debata, asa dipelehon silehonlehon nang pelean, ala ni angka dosa.

² Na tarbahen do i rap mangkilala dohot angka na hurang boto nang na lilu, ai dohot do ibana partohap di hagaleon.

³ Alai ni i, ingkon mamboan pelean pardosaon ibana; ia songon i humongkop natorop, laos songon i humongkop dirina.

⁴ Jala ndang adong na mangaithon hamuliaon sisongon i tu dirina; Debata do manjou ibana tusi, songon si Aron i.

⁵ Laos songon i do nang Kristus: Nandang Ibana mangaithon sahala sintua ni malim tu dirina; Debata do, na mandok tu Ibana: "Anakku do Ho; sadari on do Ho hutubuhon!"

⁶ Songon nidokna i di na asing: "Malim do Ho ro di salelenglelengna, mangihuthon horong ni si Melkisedek!"

⁷Tagan jolma Ibana, dipelehon do angka pangidoanna dohot elehelekna, mardongan angguk bolon dohot iluilu tu na tuk paluahon Ibana sian hamatean; jadi ditangihon do Ibana, gabe malua sian hatahuton i.

⁸Ai atik pe Anak i Ibana, diguruhon do pangoloion marhite sian na tinaonanna i!

⁹Jala dung rimpas gabe sihorhon haluaon salelenglelengna do Ibana di sude na mangoloi Ibana.

¹⁰Digoar Debata do Ibana sintua ni malim, mangihuthon horong ni si Melkisedek.

¹¹(II.) Godang do nian sidohononnam i taringot tusi, jala angka na maol pajojoron, ala nunga penge pinggolmuna.

¹²Ai tumimbangkon lelengna i, nunga patut guru hamu nian, hape angka sisiasia ni hata ni Debata dope siajarhononhon tu hamu; gabe susu nama ringkot di hamu, ndada sipanganon hian.

¹³Ai ganup partohap di susu ndang marbinoto di hata hatigoran i, ai posoposo do i.

¹⁴Alai sipanganon hian do di angka na rimpas, naung pasomalsomal rohana, gabe malo mambolati na denggan sian na roa.

6¹(I.) Onpe, unang ma jolo tataringoti be poda mulamula na taringot tu Kristus; tadapothon ma na rimpas i! Unang pola taulahi pauli ojanan taringot tu na paubahon

roha, manundalhon ulaon hamatean,
mangkaporseai Debata,

²manang poda taringot tu pandidion
dohot na mangampehon tangan, taringot tu
haheheon ni angka naung mate dohot uhum
sogot.

³I ma bahenonta, molo tung diloas Debata.

⁴Ai nasida, angka naung sanga dipatiur,
angka naung mandai silehonlehon parbanua
ginjang, angka naung gabe partohap di Tondi
Parbadia,

⁵angka naung mandai hata na uli na sian
Debata ro di angka hagogoon ni hasiangan
sogot:

⁶Molo tung marbalik nasida, tung na so
tarpaimbaru do nasida, asa muba muse, ai
naung mangulahi pasilangkon Anak ni Debata
do nasida di dirina, jala dipaurak.

⁷Ai tano na mangonsop udan, na sai ro
tusi, gabe ditubuhon suansuanan na hasea di
angka na mangulasa, i do taruli di pasupasu
sian Debata.

⁸Alai na tumubuhon sihipi dohot bajora,
ndang na hasea i; bura do sitagamon ni i, jala
mosokkononna nama i di ujungna.

⁹(II.) Alai hudok hami pe songon i, ale angka
haholongan, na dumenggan i do huhirim i
hami di hamu, i ma na martohap di haluaon.

¹⁰Ai ndang na geduk Debata: Tung
halupahononna ma na niulamuna dohot
holong ni roha na pinatuduhonmuna tu

Goarna, di pangkobasionmuna di angka na badia i najolo ro di nuaeng?

¹¹Alai dipangido rohanami do, naeng patuduhonon ni ganup hamu ringkot ni roha na songon i, patasakkon pangkirimon i sahat ro di ujungna.

¹²Unang ma gabe angka na losok hamu; tiru hamu ma angka sitean bagabaga i, marhitehite haporseaon dohot lambas ni roha!

¹³Ai laho mangalehon bagabagana tu si Abraham, di dirina do maruari Debata, ala so adong na umbalga paruarianna.

¹⁴On do hatana: "Pasupasuonku situtu do ho jala patoroponku do ho, asa tung torop!"

¹⁵Jadi dipalambas do rohana; i do dalanna, gabe dapotsa na pinarbagabaga i.

¹⁶Ai anggojolma, na umbalga sian nasida do dibahen paruarianna; jala pamomoshon do uari i, papatehon nasa parsalisian.

¹⁷Ia Debata, uari do dipangke, laho patuduhon tu angka sitean bagabaga i tahina, na so olo muba i,

¹⁸asa dapotan apoapo na margogo hita, horhonon ni na dua partinandaan, na so olo muba, ai na so tarbahen Debata margabus; tusi do hita marhaporusan, laho marsitiopan tu pangkirimon na di jolonta i.

¹⁹Na songon sao di tondinta do i, na hot jala na togu, na manorusi sahat tu bagasan ni rimberimbe i.

²⁰Tusi do bongot Patujolonta, i ma Jesus, naung gabe sintua ni malim salelenglelengna, mangihuthon horong ni si Melkisedek.

7¹(I.) Anggo Melkisedek i, raja di huta Salem, malim ni Debata na tumimbo do ibana, ditomutomu jala dipasupasu do si Abraham na mulak, dung dipapatu ibana angka raja.

²Tu ibana do diturpukkon si Abraham saparsampulu sian sasudena i. Raja hatigoran do parjolo lapatan ni goarna i, angkup ni i: Raja ni Salem, na mandok: Raja sipardame.

³So marama, so marina, so marpartuturan, na so marmula arina, na so marujung ngoluna; na dipatudos do ibana tu Anak ni Debata, malim do tongtong ro di salelenglelengna.

⁴Alai bereng hamu ma sangapna i: Salang si Abraham, ompunta parsadaan, mangalehon tu ibana saparsampulu ni angka arta.

⁵Nang angka sijujung hamalimon sian angka anak ni i Lepi disuru do, asa hombar tu patik i diparsampulu bangso i, ima angka hahaangginasida, na rap pomparan ni si Abraham.

⁶Alai ibana, na so marpartuturan tu nasida, diparsampulu do si Abraham, jala dipasupasu do hasahatan ni bagabaga i.

⁷Jadi sandok ndang targaga on: Na sumangap i do mamasumasu na ummetmet.

⁸Jala jolma na olo mate do nasida, na manjalo na saparsampulu i; alai anggo ibana, mangolu do dihatindangkon.

⁹Jala tardok ma: Marhitehite si Abraham diparsampulu do nang si Lepi, sijalo na saparsampulu i nian.

¹⁰Ai di bagasan amana na sumundut i dope ibana, di na ro Melkisedek manomunomu.

¹¹(II.) Onpe, ia dipatihi pe bangso i, marpandapotan di hamalimon ni si Lepi, nda tung marhite sian i songgop harimpason i; ai aut i, boasa pola pajongjongon malim na asing, na mangihuthon horong ni si Melkisedek, na so goaron mangihuthon horong ni si Aron?

¹²Ai molo mimbar hamalimon, ndang tarbahren so mimbar nang patik.

¹³Jala ibana, na nidok ni hata on, masuk marga na asing do; ndang dung adong sian i na marhalado di langgatan i.

¹⁴Ai torang do antong: Sian Juda do martumbur Tuhanta; ndang ditaringoti si Musa hamalimon ni na samarga i.

¹⁵Jala ganda dope torangna, molo dipajongjong malim na asing, na suman tu si Melkisedek,

¹⁶na gabe malim sian pangkorhon ni ngolu na so haharharan, unang ma sian patik ni aturan sibuk.

¹⁷ Ai dihatindangkón do ibana paboa: "Malim do Ho ro di salelenglelengna, mangihuthon horong ni si Melkisedek!"

¹⁸ Disi ma dipasohot patik na jumolo i, ala so margogo jala so marguna.

¹⁹ Ai ndang tarpasun patik i agia aha; alai dipabongot do pangkirimon na dumenggan, i ma parhiteanta manjonohi Debata.

²⁰ Nandang masa i, ia so marhitehite uari; anggo nasida tutu, gabe malim do, so pola marhitehite uari.

²¹ Alai ia On, marhitehite uari do, na niuarihon ni na mandok tu Ibana: "Naung maruari do Tuhan i, jala ndang solsolanna dirina: Malim do Ho ro di salelenglelengna!"

²² Hombar tusi do sumurung padan, na hinangkungan ni Jesus.

²³ Jala torop do anggo nasida na gabe malim, ala na so diloas hamatean i nasida mian.

²⁴ Alai anggo Ibana, ala mian ro di salelenglelengna, ndang taripar hamalimonna tu na asing.

²⁵ Dibahen i, tarbahen Ibana do paluahon sandok angka na manjonohi Debata marhitehite Ibana; ai na mangolu do Ibana tongtong, laho mangondihon nasida.

²⁶ Ai sintua ni malim na songon i do tama di hita, na badia, na so marlaok, na so marlindang, na marbolat sian angka pardosa, naung gabe tumimbo sian angka banua ginjang i,

²⁷na so pola ganup ari pasahathon jumolo pelean ala ni dosana sandiri, dung i ala ni dosa ni bangso i, songon angka sintua ni malim i; ai sahali do i diulahon, di na pinelehonna i dirina.

²⁸Ai dipabangkit patik i dojolma sipargale gabe sintua ni malim; alai dipabangkit hata uari, na umpudi sian patik i, do Anak i, naung gabe rimpas ro di salelenglelengna.

8¹(I.) Asa on do na rumingkot di hata on: Adong do di hita sintua ni malim, na hundul di siamun ni habangsa Hatongamon na di banua ginjang i,

²siradoti angka ulaon na badia ro di joro na tutu i, naung dipauli Tuhan i, ndada jolma.

³Ai ganup sintua ni malim dipabangkit do, asa dipelehon silehonlehon dohot pelean; asa ingkon adong nang di Ibana sipelehonna.

⁴Aut sura di tano on Ibana, ndang suraon malim Ibana, ala adong do na mamelehon angka silehonlehon mangihuthon patik i.

⁵Diradoti nasida do tiruan dohot halinu ni na di banua ginjang i, songon na dapotan poda si Musa sian ginjang, uju naeng paulionna joro i: "Bereng ma, ninna, asa paulionmu saluhutna i tudos tu tiruan, naung di patuduhon tu ho di dolok i!"

⁶Alai dapot Ibana do tohonan na sumurung nuaeng, ai Pangulu do Ibana di parpadanan na sumurung, na niaturhonna marojahan di bagabaga na dumenggan.

⁷ Ai aut so hasurahan na parjolo i, ndang tagamon luluanna hasiatan ni na paduahon on.

⁸ Ai dihata do nasida, di na nidokna i: "Na ro ma angka ari, ninna Tuhan i, pajongjongonku ma disi padan na imbaru tu pinompar ni Israel dohot Juda!"

⁹ "Ndada suman tu padan na hupajongjong di angka amanasida, manogihon nasida ruar sian tano Misir; ai so mian nasida di bagasan parpadananki; nang Ahu pe, ndang hupasarisari nasida, ninna Tuhan i."

¹⁰ "Ai on do padan na naeng pajongjongonku tu pinompar ni Israel, dung salpu angka ari i, ninna Tuhan i: Lehononku do angka patikku tu bagasan rohanasida jala tu ateatenasida surathononku i; dung i gabe Debatanasida ma Ahu, jala nasida gabe bangsongku."

¹¹ "Jala ndang pola be diajari halak donganna sabangso manang hahaanggina pe, mandok: Tanda ma Tuhan i! Ai tandaonnasida luhutna do Ahu, angka na metmet nang angka na magodang pe."

¹² "Ai marpamuati do rohangku mida hageduhonnasida, jala na so tupa be ingotonku angka dosanasida."

¹³ Di na tinaringotanna na imbaru i, dipaburukburuk ma na jumolo i. Alai na laho salpu ma nasa naung gabe buruk jala matua.

9¹ (I.) Asa adong do nian nang di na parjolo i angka uhum ni parhaladoon, ro di joro na marrumang tano on.

²Ai dipauli do inganan jolojolo i; di bagasan i do: Parpalitoan i ro di meja dohot roti na marhadohoan; i do na margoar: Na badia.

³Alai di pudi ni rimberimbe paduahon i do inganan na margoar: Na badia situtu.

⁴Disi do langgatan pardaupaan sere dohot poti parpadanan, na nilampisan saluhut dohot sere, dibagasanna do guriguri sere na marisi manna i dohot tungkot ni si Aron na martumbur i, ro di batu panuratan padan i;

⁵jala di atasna Kerubim di hasangapon, na mangalinggomi langkop pardenggan i. Nandang tarhatahon i saonari sadasada.

⁶Dung songon i dipauli, gabe manongtong ma bongot angka malim tu bagasan inganan jolojolo i, mangulahon parhaladoon i.

⁷Alai tubagasan na paduahon i, holan sintua ni malim i do, sahali sataon, jala ndang tarbahen so mantat mudar, sipelehononna ala ni dirina dohot ala ni dosa haotoon ni bangso i.

⁸Marhitehite i do dipatuduhon Tondi Parbadia i, paboa na so dipapatar dope dalan tu na badia i, saleleng hot dope joro na parjolo i:

⁹Tudutudu tu tingki on nuaeng; ai dipelehon do disi silehonlehon dohot pelean, angka na so tuk pasonangkon situtu panggora ni roha ni na marhalado i.

¹⁰Angka sipanganon dohot siinumon ro di ragam ni pandidion sambing do i, hatigoran ni sibuk, angka na pinatikkonna, paima ro arina patingkoshon.

¹¹(II.) Alai ro do Kristus; Ibana do sintua ni malim ni angka parulian na naeng ro i. Jala na sahali i do dibongoti na sun badia i, marhite sian joro na umbalga jala na mauliutus na so pinauli ni tangan, na so sian panompaon on;

¹²ndada marhitehite mudar ni angka hambing randuk manang anak ni lembu, tung marhitehite mudarna sandiri, gabe dipatupa haluaon salelenglelengna.

¹³Ai gari mudar ni hambing randuk dohot jonggi dohot lembu, naung diparsiragongi, dipistikkon tu angka na ramun, mangkorhon haiason ni sibuk:

¹⁴Nda lam tumangkas ma mudar ni Kristus i paiashon rohamuna sian angka ulaon hamatean, laho mangoloi Debata Siparngolu i; ai dipelehon do dirina so marlindung tu Debata, marhitehite Tondi na manongtong i!

¹⁵Jadi ala ni on, umbahen na gabe pangulu di padan (testament) na imbaru Ibana: Asa dijalo angka na tarjou i bagabaga i, i ma siteanon na so olo muba i; dung jolo adong na mate, laho pasaehon angka pangalaosion, uju di padan na parjolo i.

¹⁶Ai anggo adong padan testament, ingkon tandap mate sibahen testament i.

¹⁷ Ai dung pe mate halak i, asa hot testament i; ai nda tung margogo i, saleleng mangolu dope na mambahensa.

¹⁸ Ai nang padan na parjolo i, marhitehite mudar do i dipasahat.

¹⁹ Ai dung dihatahon si Musa tu sandok natorop i nasa tona mangihuthon patik i, dibuat ma mudar ni anak ni lembu dohot hambing randuk mardongan aek, hapas na rara dohot limut isop, dipispisi ma pustaha i sandiri ro di sandok natorop i.

²⁰ Huhut ma didok: "On ma mudar ni padan na niaturhon ni Debata di hamu!"

²¹ Laos songon i ma dipispishon mudar i tu joro i dohot tu saluhut ulaula na badia i.

²² Jala hira saluhutna do diurasi marhitehite mudar mangihuthon patik i; jala holan marhitehite na mandurushon mudar tulus hasesaan.

²³ Asa ingkon songon i do diurasi na tiniru sian na di banua ginjang i; alai na di banua ginjang i hian, marhite sian pelean na ummangat do!

²⁴ Ai ndada bongot Kristus tubagasan na badia na pinauli ni tangan, gambaran ni na sintong i; tung tu bagasan banua ginjang sandiri do, laho patuduhon dirina nuaeng di adopan ni Debata, humongkop hita.

²⁵ Ndada laho mamelehon dirina jotjot, songon sintua ni malim i, na mambongoti na

badia i jojor taon marhitehite mudar ni na leban.

²⁶Aut i, ingkon jotjot ma Ibana marsitaonon, olat ni haoojak ni hasiangan on. Alai sahali do gabe patar Ibana di ujung ni angka ari on, laho pasohothon dosa i, binahen ni na pinelehonna i dirina.

²⁷Songon na ampe tujolma: Mate sahali, dung i uhum i;

²⁸songon i do nang Kristus, naung sahali dipasahat, laho mamorsan dosa ni natorop i; alai paduahalihon ndada ala ni dosa, tarida ma Ibana disi, mantat haluaon di angka na paipaimahon Ibana.

10¹(I.) Ai holan halinu ni angka parulian sogot do na di patik i, ndada anggo badanna. Ala ni i, sandok ndang tarbahen patik i mambahen sun denggan angka na sai ro tusi, mamboan pelean ganup taon.

²Ai aut i, pasadionnasida ma na mamele i, ala so adong be dosa siingoton ni nasida na marhalado i, anggo dung ias nasida sahali.

³Alai binahen ni angka pelean, mulak rata do ganup taon parningotan di dosa.

⁴Ai ndang tarbahen mudar ni angka jonggi manang hambing randuk pasaehon angka dosa.

⁵Ala ni i, ninna do di habobongotna i tu portibi on: "Ndang diparhagiot roham pelean manang silehonlehon; daging i do dipauli Ho di Ahu!"

⁶"Ndang lomo roham di pelean situtungon manang di pelean pardosaon."

⁷"Jadi ningku ma: Na ro ma Ahu mangulahon lomo ni roham, ale Debata; di pustaha i do tarsurat taringot tu Ahu."

⁸Didok jolo: "Ndang diparhagiot Ho pelean dohot silehonlehon, nang pelean situtungon manang pelean pardosaon, jala ndang lomo roham di na pinelehon mangihuthon patik."

⁹Dung i didok ma: "Na ro ma Ahu, mangulahon lomo ni roham!" Disi ma dipasohot na parjolo i, asa dipajongjong na paduahon.

¹⁰Di bagasan lomo ni rohana i gabe angka na badia hita, binahen ni daging ni Jesus Kristus, naung pinelehonna, na sahali i.

¹¹Jala ganup malim jongjong do ariari marhalado dohot manjotjoti mamboan pelean, na sandok so tarbahen pasaehon dosa.

¹²Alai anggo Ibana, sada pelean sambing do diboan, pasaehon ro di salelenglelengna angka dosa; dung i hundul do Ibana di siamun ni Debata.

¹³Na maimaima nama Ibana, rasirasa dipampeakkon angka musuna bahen sidegedegean ni patna.

¹⁴Ai hinorhon ni pelean na sasada i, sun denggan do dipajongjong Ibana, ro di salelenglelengna, angka na olo pabadiaonna.

¹⁵Alai dohot do Tondi Parbadia i mangkatindangkonsa tu hita, ai didok do:

¹⁶"On ma padan sipajongjongonku tu nasida, dung salpu angka ari i, ninna Tuhan i: Lehononku ma angka patikku tubagasan ateatenasida jala surathononku ma i tu rohanasida,"

¹⁷"jala na so tupa be ingotonku dosanasida ro di hajahatonnaasida!"

¹⁸Anggo dung sesa angka i, ndang be masa pelean pardosaon.

¹⁹(II.) Antong, ale angka dongan, adong do di hita hiras ni roha, laho bongot tu bagasan na badia i, di bagasan mudar ni Jesus;

²⁰ai dibungka do di hita dalan na imbaru jala na mangolu, sian rimberimbe i, i ma dagingna i;

²¹jala adong do di hita malim na bolon, sigomgom bagas ni Debata.

²²Dibahen i, tadapothon ma, marroha na sintong, di bagasan hagogok ni haporseaon, dung diurasi rohanta, unang be disolsoli panggora ni roha i hita, jala dung diburi dagingta dohot aek na ias!

²³Momos ma tatiop pangkirimon na taparhatopot i, ai haposan do na marbagabagahonsa!

²⁴Masiantoan ma hita, masipajujuan tu haholongon dohot tu angka ulaon na denggan!

²⁵Unang tatadingkon parpunguanta hian, songon na hinasomalhon ni na deba; tung masipaingotan ma hita, jala lam i ma nian, ala lam jonok diida hamu ari i!

²⁶Ai anggo tatuntun mardosa, dung jolo tajalo parbinotoan di hasintongan i, ndang adong be dapot pelean pasaehon dosa.

²⁷Uhum na jorbut nama sipaimaon dohot api ni haririmas, siallang angka na mangalo.

²⁸Sitompas patik ni si Musa ingkon mate do, anggo adong dua manang tolu sitindangi, so siat asi ni roha.

²⁹Timbang hamu ma: Sadia dumokdok ma uhum mangonai tu jolma, na mandegedegei Anak ni Debata jala na mansoadahon mudar parpadanan, parhitean ni habadiaonna nian, jala na manois i Tondi Parasiroha i!

³⁰Ai tatanda do Ibana, naung mandok: "Ahu do nampuna, partubolon; Ahu do mamaloshon!" Dung i muse: "Uhumon ni Tuhan i do bangsona!"

³¹Jorbutna i, madabu tu tangan ni Debata na mangolu i!

³²Alai ingot hamu ma angka ari najolo; ai dung dipatiur hamu, ditaon hamu do godang parungkilon, i ma haporsuhon.

³³Na deba sian hamu gabe sitotonduran dibahen insahinsak dohot haporsuhon; na deba gabe saor tu angka na manaon songon i.

³⁴Ai rap manaon do hamu dohot angka na tarhurung; jala nang dirampas artamu, marlas ni roha do hamu manaon i, ala diboto hamu, adong do di hamu arta na ummangat jala na mian.

³⁵Onpe, unang ma bolongkon hamu hiras ni rohamuna, ai balga do upa ni i!

³⁶Ai habengeton do na ronsot di hamu, asa tarula hamu lomo ni roha ni Debata, jala dapot bagabaga i.

³⁷Ai "saotik nari sambing nama, ro ma na giot ro, jala ndang marnalemba!"

³⁸Alai sian haporseaon ma mangolu partigor i; jala ndang lomo rohangku di halak na sumurut.

³⁹Alai ndang sumurut anggo hita, asa tu hamagoan; na marhaporseaon do, laho mangomohon tondi.

11 ¹(I.) Alai anggo haporseaon i, pos ni roha do i di angka sihirimon, jala pamotoan na tontu taringot tu na so niida.

²Di bagasan i do dapotan panindangion angka na tuatua na robu.

³Hinorhon ni haporseaon do taantusi, naung marhitehite pandok ni Debata dipaojak angka hasiangan, asa sian na so tarida manjadi na tarida i.

⁴Hinorhon ni haporseaon do dipelehon si Abel tu Debata pelean na dumenggan sian na binoan ni si Kain; marhite sian i do dihatindangkon ibana partigor, ai

dihatindangkon Debata do angka pelean na binoanna, jala marhite sian i marsoara dope ibana, atik pe naung mate.

⁵Hinorhon ni haporseaon i do tarhinsat si Henok, gabe ndang diida hamatean, jadi ndang jumpang be ibana, ala naung dihinsat Debata; ai andorang so tarhinsat, dihatindangkon do ibana, halomoan ni Debata.

⁶Alai anggo so marhaporseaon, ndang tarbahen halomoan; ai halak na mandapothon Debata, ingkon dihaporseai: Adong Debata; laos Ibana do silehon upa tu angka na manjalahi Ibana.

⁷Hinorhon ni haporseaon do dijalo si Noak poda taringot tu na so dapot idaon dope, gabe mabiar ibana, jala dipauli parau i, bahen haluaan ni nasida na sajabu; marhitehite i diuhumi ibana portibi on, jala gabe sitean hatigoran, na marguru tu haporseaon.

⁸Hinorhon ni haporseaon do mangoloi si Abraham, dung dijou bungkas tu tano sijaloonna bahen teanteanan; saut do ibana bungkas, so adong diboto sitopotonna.

⁹Hinorhon ni haporseaon do ibana hinomit di tano, naung diparbagabaga tu ibana, songon di tano ni na leban; undungundung do diingani raphon si Isak dohot si Jakkob, donganna panean di bagabaga na sasada i.

¹⁰Ai dipaimaima do huta na marojahan na hot, na pinandean jala na pinauli ni Debata.

¹¹ Laos hinorhon ni haporseaon do dijangkon si Sara gogo manubuhon pomparan maralohon timbo ni umurna, ala haposan di rohana na marbagabagahonsa.

¹² Dibahen i tubu do sian na sasada i, naung mate dohonon, na satorop ni bintang di langit, na sagodang ni rihit di topilaut, na so dapot bilangan.

¹³ Di bagasan haporseaon do mate nasida sude. Ndang sanga dijalo nasida bagabaga i; sian na dao nama ditatap jala dihalashon; na diparhatutu, panginsua jala paisolat nasida di tano on.

¹⁴ Marhitehite pandoknasida sisongon i ditariashon, panjalahi do nasida di parsambuloan.

¹⁵ Aut diingot rohanasida tano naung tinadingkonnasida i, sanga do nasida mulak tusi.

¹⁶ Alai na dumenggan do dihalungunhon nasida, i ma na di banua ginjang i. Dibahen i, ndang dihailahon Debata nasida; na olo do Ibana goaron Debatanasida, ai nunga dipauli di nasida sada huta.

¹⁷ Hinorhon ni haporseaon do dipelehon si Abraham si Isak i, di na tarunjun i ibana. Dipasahat sijalo bagabaga i do anakna na sasada i.

¹⁸ Ai taringot tu ibana do didok: "Di bagasan si Isak do targoar di ho pomparan!"

¹⁹Dirajumi rohana do, marhuaso Debata, manungguli nang sian na mate, jala mulak sian i do ibana dijalo, hira tudosan.

²⁰Hinorhon ni haporseaon do dipasupasuhon si Isak tu si Jakkob dohot tu si Esau angka na naeng masa dope.

²¹Hinorhon ni haporseaon do dipasupasuhon si Jakkob, na laho mate i, angka anak ni si Josep sadasada, jala dipaunduk dirina dompak ulu ni tungkotna.

²²Hinorhon ni haporseaon do ditaringoti si Josep di ajalna i hamumulak ni angka anak Israel jala ditonai do nasida taringot tu holiholina.

²³Hinorhon ni haporseaon do ditabunihon natoras ni si Musa ibana tolu bulan lelengna, dungkonsa tubu, ala anak na uli ibana diida; jala ndang dihabiari paksa ni raja i.

²⁴Hinorhon ni haporseaon do manjua si Musa, dung magodang, goaron ibana anak ni boru ni Firaun.

²⁵Tagonan do dipilit rohana: Rap tumaon na porsuk ibana dohot bangso ni Debata, sian na maruntung satongkin, bahenon ni dosa.

²⁶Haleaon ni Kristus i do dijujur ibana hamoraon na ummangat asa angka arta na di tano Misir; ai pamaloson i do dibereng.

²⁷Hinorhon ni haporseaon do ditadingkon ibana tano Misir, ndang dihabiari ibana rimas ni raja i, ai dapotan gogo do ibana, ala diida rohana Ibana, na so tarida hian.

²⁸Hinorhon ni haporseaon do diulahon Paska i dohot na mangusehon mudar, asa unang dihahua pangago i buhabajunasida.

²⁹Hinorhon ni haporseaon do dibolus nasida laut na rara i songon tano na mahiang; diuji halak Misir ma i, gabe mate mogap.

³⁰Hinorhon ni haporseaon do magargar parik ni huta Jeriko, dung pitu ari lelengna dihaliangi.

³¹Hinorhon ni haporseaon do, umbahen so mago si Rahab, boruboru na jahat i, raphon angka na so mangoloi; ai di bagasan dame do dijangkon angka pangkahapi.

³²Dia dope dohononku! Na so sanga pajojoronku barita ni si Gidion, Barak, Simson, Jepta, Daud, Samuel ro di angka panurirang.

³³Ai hinorhon ni haporseaon do dipatunduk nasida angka harajaon, dipatulus hatigoran, taruli di angka bagabaga, dihuntam baba ni angka babiat;

³⁴diintopi gogo ni api, malua sian baba ni podang, sumuang margogo sian hagaleon, marantu di hamusuon, ditaluhon angka parangan ni na leban.

³⁵Dijalo angka ina na matena sumuang sian haheheon. Alai na deba diparsilangkon do, so saut malua, asa anggiat taruli di haheheon na dumenggan.

³⁶Na deba muse manaonhon reherehe dohot linsinglinsing, tole ihotihot dohot hurungan:

³⁷ Didangguri, dipaporsukporsuk, digargaji, mate dibuat podang na tajom, munsatunsat do nasida marabithon bobak ni birubiru dohot haming, anturaparon, sinosahan, jinahatan.

³⁸ Hurang tama do nian portibi on mandongani nasida, gabe ditondong nasida angka halongonan, angka tor, angka liang dohot lombanglombang na di tano on.

³⁹ Saluhut nasida ndang dijalo na pinarbagabaga i, atik pe dihatindangkon, na porsea nasida.

⁴⁰ Ai na dumenggan do ditahi Debata, lehononna tu hita, asa unang sahat tu harimpason nasida, so rap dohot hita.

12¹ (I.) Dibahen i nang hita pe, ala na sai torop ni sitindangi humaliang hita, tapeakkon ma nasa na pasorathon ro di dosa na girgir mangkaliangi, jala marbenget ni roha ma hita marlojong tu bagasan paraloan, na sonson di jolonta!

² Tabereng ma induk ni haporseaon i jala na paujungkonsa, i ma Jesus, na manaonhon parsilangan i, singkat ni las ni roha, tohapna i hian, so dietong i hailaon, gabe hundul di siamun ni habangsa ni Debata!

³ Paingotingot hamu ma Ibana, na pataontaonhon paraloan sisongon i dompak Ibana sian angka sipardosa asa unang marnaloja hamu, unang mandate tondimuna!

⁴Ndang adong dope pola tiris mudarmuna, laho mangalo di parungkilon maralohon dosa i.

⁵Nunga lupa hamu di pangapulon na hinatahonna tu hamu, ala anak hamu, ai ninna do: "Ale anaha, unang tois roham di pangajarion ni Tuhan i, jala unang ho mandele, jumpa dipinsang ho!"

⁶Ai diajar Tuhan i do na hinaholongan ni rohana, jala dilinsingi do ganup anak na jinangkonna.

⁷Benget ma hamu, jumpa diajar hamu! Anakna do hamu disi, diujur Debata. Ai didia ma adong anak, na so niajar ni amana!

⁸Ai na so anak situtu ma hamu, anggo malua hamu sian na hona ajar, naung songgop tu sasudena i.

⁹Onpe, angka amanta isara di daging do pangajar di hita, jala tahabiari do nasida; nda lam marunduk ni roha ma hita tu Ama ni angka tondi, asa mangolu hita.

¹⁰Ia nasida, diajar do hita, so piga ari, marguru tu panimbangan ni rohanasida; alai anggo On, tu na marguna do: Asa partohap hita di habadiaonna i.

¹¹Nasa paminsangon tutu, anggo di hamamasana, ndada las ni roha i hilalaon, tung arsak do; alai dung salpu i, diparbuehon do hatigoran na mardame di angka naung gabe somal marhite sian i.

¹²(II.) Dibahen i, patogar hamu ma tangan na so marnangon dohot ulu ni tot na telluktelluk!

¹³Patigor hamu ma sidalanan ni patmuna, asa unang lam sitik na pangpang; asa sumuang malum ma nian!

¹⁴Ringkoti hamu ma, asa mardame hamu tu saluhut halak, huhut asa badia hamu; anggo so i, ndang adong idaonta Tuhan i.

¹⁵Matahon hamu ma, asa unang adong na paholang dirina sian asi ni roha ni Debata, unang i gabe urat na paet na martumbur, sihorhon hasusaan, gabe hodar maon torop bahenon ni i.

¹⁶Tung unang ma adong parmainan manang na ramun songon si Esau, na sumeahon sahala sihahaan ala ni sipanganon sada.

¹⁷Ai diboto hamu do: Na tartulak do ibana, di na naeng manean pasupasu i ibana muse; ndang jumpangsa hasiatan ni muba ni roha i, atik pe mariluilu ibana mangaluluisa.

¹⁸Ai ndang didapothon hamu na tarjama, na marsigorgor di bagasan api, manang hagolapon, haholomon ro di habahaba,

¹⁹manang pangkuling ni sarune dohot saringar ni hata, pola mangelehelek angka na umbegesa, unang tu nasida dipatongon hata i.

²⁰Ai ndang tartaon nasida Paksa i na mandok: Molo dais dorbiala tu dolok, ingkon mate i dangguran.

²¹ Pola didok si Musa, dibahen songkal ni na tarida i: Hatahutan do ahu jala angka dotdot!

²² Alai dolok Sion i do didapothon hamu dohot huta ni Debata na mangolu i, i ma Jerusalem na di banua ginjang i, dohot surusuruan na marloksaloksa, i ma loloan pesta bolon i,

²³ dohot huria ni na parjolo tubu, angka na tarsurat di banua ginjang i, dohot Debata, Siuhumi saluhut, dohot tondi ni angka partigor naung rimpas,

²⁴ dohot Jesus, pangulu ni parpadanan na imbaru i, dohot mudar na mangurasi i, parsoara na dumenggan unang mudar ni si Abel.

²⁵ Jaga ma hamu, so tung dijua hamu Ibana na mangkuling i! Ai molo gari so malua nasida na manjua Ibana na mamaksa di tano on, lam hita ma, anggo tatundalhon Ibana na sian banua ginjang i!

²⁶ Tano on do dihutur soarana uju i; alai anggo nuaeng marbagabaga do Ibana songon on: "Sahali nari do Ahu mangkuturi, ndada holan tano on, dohot ma banua ginjang i!"

²⁷ Alai hata na mandok sahali nari patuduhon: Na naeng muba ma na tarhuter, i ma na tinompa on, asa hot na so tarhuter i!

²⁸ Dibahen i, mauiate ma rohanta, ala tajalo harajaon na so tarhuter; marhitehite i do gabe hita parhalado halomoan ni Debata mardongan biar dohot hadaulaton.

²⁹Ai api na mangallang do Debatanta i!

13¹(I.) Manongtong ma holong ni roha di dongan!

²Unang halanggushon hamu partamueon; ai marhite sian i hea do ditamuei halak angka surusuruan, so pamotoanna.

³Ingot hamu ma angka na tarhurung, songon na rap tarhurung; songon i angka na tumaon na porsuk, ai dohot do hamu di bagasan daging.

⁴Sangap ma pardongansaripeon di na saluhut, jala unang ramun parsaoan pardongansaripeon; ai uhumon ni Debata do angka parmainan dohot pangalangkup.

⁵Unang ma marholong ni roha di hepeng pangalahomuna; hasabamhon hamu ma na adong! Ibana sandiri do mandok: "Sandok na so tadingkononku do ho; sandok na so pasombuonku do ho!"

⁶Asa tung pos rohanta mandok: Tuhan i do pangurupi di ahu, ndang mabiar ahu; aha ma bahenon nijolma tu ahu?

⁷Ingot hamu ma angka na manguhuhon hamu, na paboahon hata ni Debata tu hamu; ujung ni pardalanannasida ma bereng hamu, jala tiru hamu ma haporseaonnasida!

⁸Ia Jesus Kristus, songon i nantoari, songon i sadari on, laos i do ro di salelenglelengna!

⁹Unang ma olo hamu elaelaon ni poda na ragam jala na lain! Ai patut do marhitehite asi ni roha gabe togu roha, ndada marhitehite

parpanganon, na so marguna di angka na mangaradotisa.

¹⁰Adong do di hita langgatan; ndang marhuaso manganhon sian i angka na marhalado di undungundung i.

¹¹Ai dibalian ni parsaroan i do ditutung sibuk ni angka dorbias, dung diboan sintua ni malim mudar i tu bagasan bilut na badia, ala ni dosa.

¹²Songon i do nang Jesus: Dibalian ni harbangan i do Ibana marsitaonon, asa diparbadiai bangso i marhitehite mudarna sandiri.

¹³Dibahen i, tadapothon ma Ibana tu balian ni parsaroan i, mamorsan haleaonna i!

¹⁴Ai ndang adong di hita dison huta na hot; alai dilului rohanta do na ro sogot.

¹⁵Marhitehite Ibana ma tapelehon tongtong tu Debata pelean pujipujian, i ma parbue ni bibir, angka na marhatopothon Goarna.

¹⁶Alai unang ma lupa hamu, mambahen na denggan dohot mangulahon asi ni roha; ai dihalomohon Debata do angka pelean na songon i.

¹⁷Tangihon hamu ma angka na manguluhon hamu jala oloi hamu ma nasida! Ai nasida do manjagai tondimuna, laos nasida do maralus sogot; naeng ma marlas ni roha nasida disi, unang mardongan hoihoi, ai ndang ulimuna i.

¹⁸Tangiangkon hamu ma hami! Ai pos do rohanami, na so pola solsolan ni panggora ni

roha i hami, ala huringkoti hami marparange na denggan di na saluhut.

¹⁹Alai lam huapoi ma hamu mangulahon i, asa anggiat tumibu ahu dipatongon muse tu hamu.

²⁰Alai Debata Sipardame i, na manogihon sian angka na mate Siparmahan bolon ni angka birubiru i, marhitehite mudar ni padan sisalelenglelengna i, i ma Tuhanta Jesus;

²¹Ibana ma patauhon hamu di nasa ulaon na denggan, mangulahon lomo ni rohana, ai dipatupa do di bagasan hamu na tau lomo ni rohana marhitehite Jesus Kristus! Di Ibana ma hasangapon i ro di salelenglelengna!

Amen.

²²(II.) Alai huapoi ma hamu, angka dongan, jangkon hamu ma si paingot i; ai jempek do husurathon tu hamu.

²³Boto hamu ma, naung malua donganta, si Timoteus. Anggo tibu ibana ro, naeng rap hami marnida hamu.

²⁴Dok hamu ma tabi tu saluhut gurumuna, nang tu angka na badia saluhutna! Manongos tabi do tu hamu angka dongan na sian Italia.

²⁵Didongani asi ni roha i ma hamu saluhutna!

Yakobus

1 ¹ (I.) Ahu surat ni si Jakobus, naposo ni Debata dohot Tuhan Jesus Kristus, mandapothon na sampuludua marga, na di parserahan: Tabi ma di hamu!

² (II.) Ale angka donganku, las ni roha saming ma rajumi hamu i, anggo madabu hamu tu bagasan ragam ni pangunjunan.

³ Boto hamu ma: Na mangkorhon habengeton do pangunjunan na tu haporseaonmuna.

⁴ Alai ingkon dihorhon habengeton i do ulaon na sun denggan, asa gabe rimpas hamu, angka na so marlindung, na so marnahurang.

⁵ Ai molo adong di tongatongamuna na hurangan bisuk, dipangido ma tu Debata, na bulus mangalehon di saluhut jala ndang marpangea, dung i lehononna ma tu ibana.

⁶ Alai di bagasan haporseaon ma ibana mangido, unang marganggu ni roha; ai na ganggu roha i, tudos do tu galumbang ni laut, na pinahuturhutor jala na pinalindaklindak ni alogo.

⁷ Unang ma diparbaga roha ni halak i, jaloonna agia aha sian Tuhan i!

⁸ Ai halak na mardua roha, na gaor do i di saluhut angka dalanna.

⁹Alai dipuji dongan na toruk i ma dirina siala timbona i!

¹⁰Songon i na mora i, siala hatoruhonna; ai na laho salpu ma ibana songon bungabunga na di ladang i.

¹¹Ai binsar ma mata ni ari dohot mohopna, jadi rahar ma duhut i, marurus ma bungana, mago ma rupana na jengkar i. Songon i ma laho malos na mora i di bagasan angka dalanna.

¹²Martua do halak na manaon di pangunjunan i: Ai dung tau ibana, jaloonna ma tumpal hangoluan, naung diparbagabaga tu angka na holong roha di Ibana.

¹³(III.) Unang ma didok manang ise, jumpa tarunjun ibana: Na tarunjun do ahu sian Debata! Ai ndang masa di Debata pangunjunan tu hajahaton; ndang diunjuni Ibana manang ise.

¹⁴Alai ditaiti jala dipaelaela sangkapsangkap ni rohana sandiri do ganup, umbahen na tarunjun.

¹⁵Jadi dung manjangkon sangkapsangkap ni roha i, ditubuhon ma dosa; alai dung gok dosa i, ditubuhon ma hamatean.

¹⁶Unang ma hamu lilu, angka donganku na hinaholongan!

¹⁷Saluhutna silehonlehon na denggan, nasa ulibasa na mauliutus, i ma na ro sian ginjang, sian Ama ni na tiur, na so olo muba, na so umboto agia halinu ni hamimimbar.

¹⁸Sian tahi ni rohana do ditubuhon Ibana hita marhitehite hata hasintongan i, asa hita hira patumonaan sian angka na tinompana i.

¹⁹(IV.) Ingot hamu ma, angka donganku na hinaholongan: Ganup jolma, girgir ma ibana mananginangi, bangkol ma ibana mangkatai, bangkol ma tarrimas!

²⁰Ai ndang diulahon rimas ni jolma hatigoran ni Debata.

²¹Dibahen i, bolongkon hamu ma nasa na roa ro di hajahaton na lohot i; marlambok ni roha ma hamu manjalo hata na sinuan tu bagasan rohamuna, na tarbahen paluahon tondimuna.

²²Alai gabe siulahon Hata i ma hamu, unang holan pananginangi, angka na paotootohon dirina!

²³Ai pananginangi di hata i, anggo so diulahon, tudos ma i tu halak na paberengbereng rupa ni bohina di sorminan.

²⁴Ai dibereng do dirina, dung i laho ma ibana, gabe ndang diboto be rupana.

²⁵Alai na mamereng torus tu bagasan uhum haluaon na sun denggan i jala mian disi, i ma na martua marhite sian pangulaonna i, anggo so pananginangi na mangkalupahon, siula ulaon i tahe ibana.

²⁶Molo adong na mandok di bagasan rohana, na daulat ibana, hape ndang dirantei dilana, diansi do tahe rohana: Na magopo ma hadaulatonna i.

²⁷ On do hadaulaton na ias jala na so marlindang, di roha ni Debata Ama: Mandulo angka na so marama, so marina dohot angka na mabalu di haporsuhonnasida, huhut mangaramoti diriniba maralohon portibi on, unang marlindang.

2¹ (I.) Ale angka donganku, unang ma siidaida bohi hamu, angka na porsea di Tuhanta Jesus Kristus na marsangap i!

² Ai adong ma ro tu bagasan parguruanmuna sahalak partintin sere jala parulos na arga, ro ma huhut sahalak na pogos, marabit na humurang.

³ Jadi dibereng hamu ma na marabit na denggan, didok hamu ma: Denggan ma ho juguk dison; alai tu na pogos i didok hamu: Disan ma ho jongjong, manang hundul ma ho tu na hudege on!

⁴ Nda nunga marbagi dua rohamu disi; nda nunga manguhumi hamu mangihuthon pingkiran na jahat?

⁵ Tangihon hamu ma, ale angka donganku na hinaholongan: Nda dipillit Debata angka na pogos di portibi on, asa mamora nasida marhitehite haporseaon jala panean di harajaon, na pinarbagabagana tu angka na holong roha di Ibana?

⁶ Alai dileai hamu do na pogos i. Nda angka na mora i na paporsukporsukkon hamu jala manaratnarat hamu tu paruhuman?

⁷Nda nasida do na manginsahi Goar na denggan i, naung digoarhon tu hamu?

⁸(II.) Sibahen na denggan do hamu, antong, molo marguru tu Surat i diulahon hamu patik raja on: "Haholongi donganmi songon dirim!"

⁹Alai molo siida bohi hamu, na mangulahon dosa do hamu disi, gabe diuhumi patik i hamu songon pangalaosi.

¹⁰Ai aut sura diradotijolma saluhut patik i, alai tinggang di na sada, nunga gabe parsala ibana di saluhutna.

¹¹Ai Ibana na mandok: "Unang ma ho mangalangkup!," laos Ibana do mandok: "Unang ho mambunu!" Asa molo so mangalangkup ho, alai mambunu do, tong do ho pangalaosi di patik!

¹²Di nasa hata dohot ulaonmuna ingot hamu ma: Siuhumon do hamu, bahenon ni patik haluaon i!

¹³Ai uhum na so marasi ni roha ma tu na so mangulahon asi ni roha; na monang do asi ni roha maralohon uhum.

¹⁴(III.) Aha ma gunana, ale angka donganku, molo didok halak, di ibana do haporseaon; alai ndang adong di ibana pangulaon. Tarbahen do haporseaon i paluahon ibana?

¹⁵Molo adong dongan baoa manang boruboru, na marsaemara jala hurangan di sipanganon siap ari,

¹⁶gabe adong na mandok sian tongatongamuna: Laho ma hamu mardamedame, las ma hamu, bosur ma hamu; alai ndang dilehon hamu tu nasida na ringkot di daging, aha ma gunana?

¹⁷Haporseaon i pe songon i do: Anggo so adong pangulaonna, naung mate do hadirionna.

¹⁸Alai adong ma na mandok: Di ho do haporseaon; di ahu do pangulaon! Patuduhon ma di ahu haporseaonmu so padohot angka pangulaon, asa ahu patuduhon tu ho haporseaon sian angka pangulaonku.

¹⁹Na porsea do ho, adong Debata sisadasada. Tahoe ma i; dohot do angka sibolis porsea disi, jala angka dotdot!

²⁰Alai ho, ale jolma na rumar, naeng botoonmu, na so marguna haporseaon, anggo so marulaon?

²¹Nda gabe tigor si Abraham, amanta i, marhite sian ulaon, di na binoanna i si Isak, anakna i, tu pamelean?

²²Diida ho disi, manumpak do haporseaon i tu angka ulaonna, jala sian angka ulaon i gabe rimpas haporseaon i.

²³Jadi jumpang ma na nidok ni Surat i: "Dihaporseai si Abraham do Debata, jala i do dirajumi tu ibana gabe hatigoranna" jala targoar do ibana "aleale ni Debata."

²⁴Asa diida hamu do: Sian angka pangulaon i do gabe tigor jolma, ndada holan sian haporseaon.

²⁵Songon i do nang si Rahab boruboru na jahat i; nda sian angka pangulaon do ibana gabe tigor, di na jinangkonna i angka suruan jala dipalua do nasida sian dalan na asing?

²⁶Ai songon daging i na mate, anggo so martondi; songon i do mate haporseaon na so marulaon.

3¹(I.) Ale angka donganku, unang deak hamu gabe guru; ai taboto do, dumokdok do uhum sijaloonta.

²Ai saluhut hita jotjot marsala; molo adong na so sala di hata, i ma halak na rimpas, na tarbahen mangarantei saluhut dagingna i.

³Molo tabahen rante tu baba ni angka hoda, asa dioloi hita, tatogutogu do sandok dagingna i.

⁴Angka hopal i pe, atik pe na sai balga jala nionjar ni angka alogo na gogo, dipatongontongon do marhitehite amudi na metmet tungan lomo ni roha ni juaramudi i.

⁵Songon i do nang dila i: Ruas na metmet do i, alai godang do hatahatana; metmet pe api i, digalahi do tombak na sai balga!

⁶Api do nang dila i, portibi hageduhon; songon i do pangalaho ni dila di tongatonga ni angka ruas ni dagingta, dipahodar do sandok daging i jala dipagalak do panggulmiton ni ngolunta i, dung galak dibahen na roko.

⁷ Ai nasa ragam ni binatang, angka pidong, ulok ro di dengke tarpatunduk do, gabe tunduk dibahen hajolmaon.

⁸ Alai ndang tarpatunduk jolma anggo dila i; panjahati na so marpansadian do i, gok bisa hamatean.

⁹ I do ulaulanta mamuji Tuhan i, Amanta; laos i do tapangke mambuburahon jolma, na tinompa marguru tu rupa ni Debata.

¹⁰ Sian sada pamangan do ruar pamujion dohot pamuraion. Ale angka donganku, ndang tama masa songon i!

¹¹ Tung adong ma baba ni mual sada, na marbullakkon na tonggi dohot na paet?

¹² Ale angka donganku, tung tarparbuehon antajau ma unte, manang tubu antajau sian hau anggur? Nandang tarpapuas mual na ansim tapian na uli.

¹³ (II.) Ise hamu na bisuk jala na pantas marroha? Sian denggan ni parangena ma dipataridahon ibana angka ulaonna marhitehite halambohon ni habisuhon!

¹⁴ Alai molo ditiop hamu pangiburuon na paet dohot hatongkaron di bagasan rohamuna, unang ma puji hamu dirimuna maralohon hasintongan, huhut margabus!

¹⁵ Ndada i habisuhon na ro sian ginjang; na sian tano do i, sian roha ni jolma, sian sibolis.

¹⁶ Ai ia disi pangiburuon dohot hatongkaron, disi ma hagaoron dohot sandok ulaon hajahaton.

¹⁷ Alai anggo habisuhon na sian ginjang i, sandok na bontor do i, olo mardame, lambok, pangoloi, gok asi ni roha dohot parbue hadengganon, dao sian hagangguon nang pangansion.

¹⁸ Alai di bagasan dame do disaburhon parbue hatigoran di angka na mangulahon dame i.

4¹ (I.) Sian dia do angka parbadaon dohot parmusuon na di hamu? Nda sian hisaphisap, angka na maralo di bagasan angka ruasmuna!

² Na marsangkapi do rohamuna, alai ndang dapotan; na mambunu do hamu jala mangiburu, laos so taruli hamu. Na masialoan do hamu jala marmusu, so adong di hamu, ala so martangiang hamu.

³ Na martangiang do hamu nian; alai ndang manjalo, ala sala tangiangmuna, ai naeng pansuasaehononmuna do i di bagasan hahisaponmuna.

⁴ Hamu angka pangalangkup, ndang diboto hamu, hamusuon dompak Debata do paralealeon dohot portibi on? Asa, na naeng aleale ni portibi on, dipajongjong do dirina, gabe alo ni Debata.

⁵ Manang ninna rohamuna, gait do na nidok ni Surat i? Pangiburu do Tondi i, naung dipadiri di bagasan hamu.

⁶ Alai lam gumodang do asi ni roha dilehon; ala ni i do didok: "Dialo Debata do angka na

ginjang roha, alai dilehon do asi ni roha tu angka na serep marroha!"

⁷Antong, oloi hamu ma Debata; alo hamu ma sibolis i, dung i maporus ma ibana sian hamu.

⁸Pajonok hamu ma tu Debata, dung i pajonohonna ma tu hamu! Paias ma tanganmuna, hamu angka pardosa, jala pabontor ma rohamuna hamu angka na mardua roha!

⁹Arsakkon hamu ma jeamuna; mangangguhi jala tumatangis ma hamu; muba ma parengkelonmuna gabe partangison, nang halalas ni roha gabe arsak ni roha!

¹⁰Paserep hamu ma rohamuna maradophon Tuhan i, dung i patimboonna ma hamu.

¹¹Unang ma hamu masipahatahataan, ale angka dongan; na mangkatahata jala manguhumuhumi donganna, mangkatahata jala manguhumuhumi patik do i. Alai molo diuhumi ho patik i, panguhum do ho, ndada siula na nidok ni patik i.

¹²Sada do Sipajongjong patik jala Panguhum; i do na tarbahen paluahon dohot mangagohon. Alai ho, ise do ho, umbahen na diuhumi ho donganmu?

¹³(II.) E hamu, didok hamu do: Sadari on manang marsogot laho ma hami tu huta adui, asa disi hami sataon martigatiga jala mangomoomo.

¹⁴So adong diboto hamu na masa marsogot; ai aha do hosamuna! Suman ma hamu tu timus, na tarida satongkin, dung i gabe so haidan be.

¹⁵Singkat ni i ma nian dohononmuna: Molo na lomo roha ni Tuhan i, mangolu ma hami, jala bahenonnami ma on dohot an.

¹⁶Hape ditengatengahon hamu do hata manggang muna; na jahat do nasa panenganengahon sisongon i.

¹⁷Antong, na umboto mambahen na denggan, gabe ndang diulahon, na mardosa ma ibana disi.

5¹(I.) E hamu angka na mora, tumatangis ma hamu jala manganguhi managam haporsuhon, na naeng songgop tu hamu.

²Nunga busuk hamoraonmuna, nunga ngitngiton ulosmuna.

³Naung tasihon do sere dohot perakmuna, jala sitindangi dompak hamu do tasik i, na manggagat tu sibukmuna songon api. Dipapungu hamu do arta di angka ari na parpudi.

⁴Na maungaung do na nidobomuna, i ma upa ni angka pangula na manggotil angka haumamuna, jala panjouon ni angka panabi, nunga sahat tu pinggol ni Tuhan Sebaot!

⁵Tarlobi do pargadombusonmuna di tano on, dipamokmok hamu do dirimuna di ari pamotongan.

⁶Diuhumi dibunu hamu do Partigor i; ndang dialo Ibana hamu!

⁷(II.) Antong, pabenget hamu ma rohamuna, ale angka dongan, sahat ro di haroro ni Tuhan i! Ai parhauma i pe, dipaimaima do parbue na arga, na sian tano i, jala dihabengethon do, paima dijalo udan manogot nang bodari.

⁸Hamu pe, marbenget ni roha ma, patogu hamu ma rohamuna, ai donok do haroro ni Tuhan i.

⁹Unang marhoi hamu maralohon hamu, ale angka dongan, asa unang hona uhum hamu. Nunga jongjong di pintu i Panguhum i!

¹⁰Ale angka dongan; angka panurirang, na marjamita marhitehite Goar ni Tuhan i, ma tiru hamu di haporsuhon dohot di habengeton.

¹¹Taparhatua do angka naung marhabengeton. Dibege hamu do habengeton ni si Job, jala diida hamu do ujung na binahen ni Tuhan i; ai parasiroha bolon do Tuhan i jala partalup ni roha.

¹²Alai parjolo ni saluhutna, ale angka donganku, unang hamu manolonnolon manang tu parlangitan, manang tu tano on, manang tu panolongan na asing pe; alai hatamuna: Olo, hot ma i olo, ia hata: Nandang hot ma ndang, asa unang madabu hamu tu bagasan uhum.

¹³ (III.) Molo adong di tongatongamuna na tumaon na porsuk, martangiang ma ibana; molo adong na marlas ni roha, marende ma ibana.

¹⁴ Molo adong na marsahit di hamu, dijou ma angka sintua ni huria i; asa ditangiangkon ibana; didampol ma ibana dohot miak marhitehite Goar ni Tuhan i.

¹⁵ Dung i pangoluon ni tangiang haporseaon i ma na marsahit i, jala paheheon ni Tuhan i ma ibana; sesa ma nang dosana, molo tung adong diulahon.

¹⁶ Antong, masitopotan dosa ma hamu dohot masitangiang, asa malum hamu. Na margogo situtu do tangiang ni partigor, molo dihaburjuhon.

¹⁷ Jolma do si Elia, sabangko dohot hita; gogo do ibana martangiang, unang jolo ro udan; jala ndang ro udan di tano i, tolu taon onom bulan lelengna.

¹⁸ Dung i diulahi ma martangiang, jala dilehon langit i ma udan; dung i dipantubuhon tano i ma parbuena.

¹⁹ Ale angka donganku, molo adong di hamu naung lilu sian hasintongan, gabe adong na manogihon ibana mulak,

²⁰ diboto ma: Na paluahon tondina sian hamatean jala mangkungkupi godang dosa do halak, na manogihon pardosa mulak sian haliluonna i.

1 Petrus

1 ¹ (I.) Ahu surat ni si Petrus, apostel ni Jesus Kristus, mandapothon angka paisolat, naung tarpillit, na marserak di Pontus, Galatia, Kappadosia, Asia dohot Bitinia,

² marguru tu panandaon ni Debata Ama hian, di bagasan Tondi na pabadiahon, tu pangoloion dohot pangurasion ni mudar ni Jesus Kristus: Singkop ma di hamu asi ni roha dohot dame!

³ (II.) Pinuji ma Debata, Ama ni Tuhanta Jesus Kristus, naung manubuhon hita paduahalihon, sian godang ni asi ni rohana, marhitehite haheheon ni Jesus Kristus sian angka na mate, asa marpangkirimon na mangolu hita.

⁴ Di siteanon na manongtong, na so marlindang, na so ra malos, na sinimpan di banua ginjang di hamu.

⁵ Ai diramoti do hamu hinorhon ni gogo ni Debata marhitehite haporseaon, asa sahat tu haluaon, naung rade sipapataron di tingki na parpudi i.

⁶ I do dihalashon hamu, nang pe marsak hamu satongkin nuaeng, di bagasan ragam ni pangunjunan, molo tung ingkon i.

⁷Ai naeng jumpang do hataun ni haporseaonmuna, na andul ummarga sian sere na so manahan, nang pe diuji api i, bahen pujipujian dohot hamuliaon dohot hasangapon, di hapapatar ni Jesus Kristus i.

⁸Atik pe so dung diida hamu Ibana, dihaolongi hamu do Ibana, na hinaporseaanmuna, nang so diida hamu Ibana nuaeng, gabe mariaia do hamu, di bagasan halalas ni roha na so tarhatahon jala na tongam,

⁹gabe jaloonmuna do ujung ni haporseaonmuna, i ma haluaon ni tondimuna.

¹⁰I ma haluaon, na niluluan jala pinamanatmanat ni angka panurirang, naung manurirangkon asi ni roha na tu hamu i.

¹¹On do dipamanatmanat nasida: Manang andigan jala manang sadihari tingkina dituduhon Tondi ni Kristus i, na di bagasan nasida, na mangkatindangkon hian angka haporsuhon, na naeng songgop tu Kristus i, ro di angka hasangapon na dipudi ni i.

¹²Dipapatar pe i tu nasida, ndada di nasida sandiri, di hamu do na niradotannasida i. Laos i do na pinaboa ni angka parbarita na uli nuaeng tu hamu marhitehite Tondi Parbadia, naung sinuruna sian banua ginjang. Masihol do angka pardisurgo mamereng tu bagasanna.

¹³(III.) Dibahen i, hohosi hamu ma rohamuna; torang ma rohamuna; sandok mangkirim ma hamu di asi ni roha na tarboan tu hamu, di hapataron ni Jesus Kristus.

¹⁴Songon dakdanak sipangoloi ma hamu; unang ma paihutihut hamu be sangkapsangkap ni roha, uju di haotoonmuna najolo.

¹⁵Alai mangihuthon Nabadia i, na manjou hamu, dohot ma hamu gabe badia di nasa parangemuna!

¹⁶Ai na tarsurat do: "Badia ma hamu, ai na badia do Ahu!"

¹⁷Molo Ama digoar hamu Ibana, na so marnida rupa, laho manguhumi nasa jolma marguru tu pambahenanna, marhatahuton ma hamu marparange di tingki paisolatanmuna!

¹⁸Ai diboto hamu do: Ndada binahen ni sere manang perak, angka na olo buruk, umbahen na malua hamu sian adاتمuna na so marniula i, na tineanmuna sian angka amamuna;

¹⁹alai binahen ni mudar ni Kristus na arga i do, na songon mudar ni birubiru na so hasurahan, na so marlindang.

²⁰Naung ditodo do Ibana hian, tagan so ojak dope portibi on; alai dipapatar do di ujung ni angka tingki, ala ni hamu.

²¹Marhitehite Ibana do dihaporseai hamu Debata, na pahehehon Ibana sian angka naung mate, jala na mangalehon hasangapon

tu Ibana, asa tu Debata haporseaon nang pangkirimonmuna.

²²Paias hamu ma rohamuna, marpangoloion di hasintongan, mangeahi haholongon na so marlaok di dongan, asa masihaholongan situtu hamu sian nasa roha.

²³Ai nunga mangulahi tubu hamu, ndada sian boni na olo basebasean, sian na manongtong do: Binahen ni hata na mangolu jala na mian i, na sian Debata.

²⁴Ai "songon duhutduhut do nasa daging, songon bungabunga ni duhutduhut i do saluhut hasangaponna. Nunga malos duhutduhut i jala marurus bungabungana".

²⁵"Alai na mian do ro di salelenglelengna ia hata ni Tuhan i!" I do hata na binaritahon tu hamu.

2¹(I.) Antong, bolongkon hamu ma nasa hajahaton dohot nasa angka dohot pangiburuon nang panihaion!

²Songon posoposo na imbaru tubu, uasan ma hamu di susu na tama, na so marlaok, asa lam magodang hamu, horhonon ni i, bahen haluaon,

³molo tung naung didai hamu habasaron ni Tuhan i.

⁴Ai nunga didapothon hamu Ibana, na songon batu na mangolu, na binolongkon nijolma; alai na pinillit jala na arga, ia di Debata.

⁵Sai olo ma nang hamu paulion, songon angka batu na mangolu, gabe bagas partondion jala hamalimon na badia, laho mamboan angka pelean partondion, halomoan ni roha ni Debata, marhitehite Jesus Kristus.

⁶Ai na tarsurat do di Surat i: "Hupeakhon do di bagasan Sion sada batu parsuhi, na marpili jala na arga; ndang na tarila na porsea di Ibana!"

⁷Arga do Ibana di hamu, angka na porsea; alai di angka na so porsea i: Batu na binolongkon ni angka pande bagas i, i ma gabe batu parsuhi,

⁸jala gabe batu partuktuhan jala batu pargasipan. Ai na tartuktuk do nasida disi, ala so dihaporseai nasida hata i; ai tusi do nasida dipadiri.

⁹Alai marga na pinillit do hamu, hamalimon na raja, bangso na badia, houw na ginomgomanna, asa tung dibaritahon hamu denggan ni harohaon ni Ibana, naung manjou hamu sian na holom tu hatiuronna halongangan i.

¹⁰Hamu, angka na so bangso najolo, gabe bangso ni Debata nuaeng; angka na so niasian hamu najolo, gabe niasian do nuaeng.

¹¹(II.) Ale angka haholongan, huapoi ma hamu songon angka paisolat jala halak dagang: Orom hamu ma angka hisaphisap ni roha sibuk, na maralo dompak partondion!

¹²Marparange na denggan ma hamu di tongatonga ni angka parbegu, asa, ia adong na pahatahatahon hamu songon angka parjahat, gabe dipasangap nasida Debata di ari panuluhan i, dung diida denggan ni ulaonmuna.

¹³Unduk ma hamu maradophon nasa uhum, na sinuan di hajolmaon, ala ni Tuhan i, nang maradophon raja parhuaso parginjang,

¹⁴nang maradophon panguhum, angka na sinuruna, maminsang angka sibahen na jahat, alai mamuji ia siula na denggan.

¹⁵Ai on do lomo ni roha ni Debata: Naeng ma marhite sian ulaon na denggan pompomanmuna haotoon ni halak na hurang roha.

¹⁶Ai angka naung malua do hamu; alai unang ma pinangke haluaon i mangondingi hajahaton; songon angka naposo ni Debata ma tahe!

¹⁷Marhapantunon ma hamu tu sasude; haholongi ma angka dongan; habiari ma Debata; pasangap ma raja!

¹⁸Unduk ma angka anak somang maradophon angka indukna, huhut ma sandok dihabiari; unang holan maradophon parroha na denggan jala na basar, ingkon dohot do maradophon parroha na jungking.

¹⁹Ai i do asi ni roha, molo ditaon halak arsak ni roha dohot pambahenan na so uhum, ala ingot ibana di Debata.

²⁰Ai barita dia ma i, ia benget hamu manaon pangalinsingon, anggo tung ala ni dosamuna? Alai molo benget hamu manaon na porsuk, balos ni ulaonmuna na denggan, i do asiasi di roha ni Debata.

²¹ (III.) Ai tusi do hamu tarjou, ai dohot do Kristus manaon na porsuk humongkop hamu, tumadingkon tiruan di hamu, asa diihuthon hamu bogas ni patna:

²²"Ndang adong dosa diula Ibana; ndang jumpang angka di bagasan pamanganna."

²³Ndang manginsahi Ibana, di na hona insak, ndang mangasupi, di na manaon na porsuk; alai dipasahat do tu Panguhum sitigor roha i.

²⁴Diporsan Ibana do dosanta di bagasan dagingna tu hau i, asa malua hita sian dosa, gabe mangolu di hatigoran i: "Hinorhon ni bugangna i do gabe malum hamu."

²⁵Ai songon birubiru na lilu do hamu najolo; alai nunga didompakkon hamu nuaeng Parmahan i, na manganahon tondimuna.

3¹ (I.) Songon i ma angka parompuan: Unduk ma nasida maradophon angka harajaanna be; asa molo so porsea deba di Hata i, gabe meol rohanasida, binahen ni parange ni parompuan i, so pola mardongan hata,

²molo dibereng nasida parangemuna na bontor, na marhatahuton.

³Unang ma dipajagarjagar rupana sian duru, marhitehite na mandandani obuk manang marpangkean sere manang na mamangkemangke.

⁴Alai jolma parbagasan na buni, na tongtong martondi na lambok jala na dame, i do na arga dietong Debata.

⁵I do najolo pangkean ni angka parompuan na badia i, angka na mangkirim tu Debata; unduk do rohanasida maradophon harajaanna.

⁶Songon si Sara, dioloi do si Abraham, digoar do ibana tuan. Na gabe angka boruna do hamu, molo diula hamu na denggan, so mabiar mida songgotsonggot.

⁷Angka baoa pe songon i ma; marroha ma hamu mangangkupi nasida, ala pardaging na gumale do ina i. Sangap ma bahen hamu nasida, ala dohot do nasida dongan panean di asiasi hangoluan, asa unang tarambat tangiangmuna.

⁸(II.) Angkup ni i, saroha ma hamu saluhutna, sapangkilaan, angka na marholong ni roha di dongan, na marasi ni roha, na serep!

⁹Unang ma baloshon hamu na jat alo ni na jat, panginsahion alo ni panginsahion; lam mamasumasu ma hamu, ai naeng teanonmuna do pasupasu, umbahen na tarjou hamu.

¹⁰Ai "na holong roha di hosana jala na giot marnida ari na sonang, dipasohot ma dilana sian na roa, nang bibirna, asa unang dihatahon ansiansi."

¹¹"Dipasiding ma hajahaton diulahon ma na denggan; dilului ma dame, i ma dieahi!"

¹²"Ai tu angka parroha na tigor do mata ni Tuhan; jala tu angka pangidoannasida do pinggolna; alai bohi ni Tuhan i do alo ni angka sibahen na jat!"

¹³Jala ise do na manjahati hamu, molo diringkoti hamu na denggan!

¹⁴Alai molo tung tumaon na porsuk hamu, ala ni hatigoran, na martua do hamu disi. Unang ma gaor rohamuna, bahenon ni biar ni roha mida nasida!

¹⁵Alai parbadiai hamu ma Kristus, Tuhan i, di bagasan rohamuna; tongtong ma hobas, mangalusi ganup na manungkun hamu taringot tu na hinirim ni rohamuna; alai mardongan lambok ni roha ma dohot biar!

¹⁶Unang ma pola marlobok taroktokmuna, asa tarila nasida na manuhasnuhasi hamu, angka na manginsahi parangemuna na denggan, na di bagasan Kristus i.

¹⁷Ai tagonan do, hamu manaon haporsuhon ala ni ulaon na denggan, molo tung i lomo ni roha ni Debata; unang ma ala ni ulaon na roa!

¹⁸(III.) Ai dohot do Kristus mate sahali ala ni angka dosa, na tigor i humongkop angka

pargeduk, asa ditogihon hita tu Debata; na tarbunu do ia dagingna, alai dipangolu do anggo tondina.

¹⁹Di bagasan tondi i do Ibana laho marjamita tu angka tondi na di bagasan hurungan i,

²⁰angka na so mangoloi najolo, di na maimaima lambas ni roha ni Debata, uju di angka ari ni si Noak, di na pinaulina parau na gabe haluaan ni na otik i, i ma na ualu halak, marhitehite aek i.

²¹I do tudosan ni pandidion i, na paluahon hamu nuaeng; ndada songon na mambolongkon na rotak sian pamatang, alai na tapangido do disi tu Debata panggora ni roha, na so olo manolsoli be, hinorhon ni haheheon ni Jesus Kristus.

²²Di siamun ni Debata do Ibana, dung laho tu banua ginjang, gabe marunduk do tu Ibana angka surusuruan, angka gongoman dohot angka hagagoon.

4¹(I.) Antong, ala naung marsitaonon Kristus di dagingna, roha sisongon i ma gabe sinjata nang di hamu, ai na mansohot mardosa do halak, na mangahap di dagingna;

²asa manang piga ari nari ariarina di ngolu on, tu lomo ni roha ni Debata ma i; unang ma tu hisaphisap ni roha hajolmaon!

³Ai sae ma, antong angka ari naung salpu i, di na niulahonmuna roha hasipelebeguon, ai diulahon hamu do disi harorongan, hahisapon,

parmabuhon, parmanganon, parminumon
dohot pangoloion di ajiagian na so uhum i.

⁴Na jaluk do i di rohanasida, na so dohot
i be hamu marlojong tu pusat hamagoan i,
gabe manginsahi nasida.

⁵Alusannasida do sogot Ibana, na hobas
manguhumi angka na mangolu nang angka
naung mate.

⁶Ai umbahen na dipaboa barita na uli nang
tu angka naung mate, anggiat mangolu
nasida di tondina, marguru tu Debata, nang
pe hona uhum di dagingna, marguru tu
hajolmaonna.

⁷Alai nunga jonok ujung ni saluhutna!
Antong, marroha ma hamu, jala manangkas
ma rohamuna tu tangiang!

⁸Alai di jolo ni saluhutna, masihaholongan
situtu ma hamu, ai dihungkupi haholongon ni
roha i do godang dosa.

⁹Ringkot ma rohamuna masitamuean;
unang marungutungut!

¹⁰Masipatureturean ma hamu, ganup
marguru tu asiasi na jinalona, songon angka
juara bagas na burju di ragamragaman ni
asiasi ni Debata.

¹¹Ia adong na marjamita, naeng ma
songon angka pandohan ni Debata; ia adong
na marhobas, naeng ma sian hagagoon
na nilehon ni Debata, asa di saluhutna
i marsangap Debata, marhitehite Jesus

Kristus. Di Ibana ma hasangapon ro di salelenglelengna i! Amen.

¹²(II.) Ale angka haholongan, unang ma jaluk di rohamuna hamohopon i, na ro manguji hamu; unang ma songon na sambar i di rohamuna!

¹³Marlas ni roha ma hamu, marguru tu saormuna di angka haporsuhon na tinaon ni Kristus i, asa dohot hamu marlas ni roha jala mariaia, di na gabe patar hasangaponna i.

¹⁴Martua do hamu, molo hona insak hamu ala ni Goar ni Kristus, ala songgop tu hamu Tondi hasangapon na sian Debata.

¹⁵Unang ma adong sian hamu manaon na porsuk, ala mambunu, manang manangko manang marjahat ibana, manang ala diantoi na so ulaonna!

¹⁶Alai molo adong na manaon na porsuk, ala halak Kristen ibana, unang ma hansit rohana; alai dipasangap ma Debata, manjujung Goar i.

¹⁷Ai nunga jumpang tingki ni uhum madabu, mamungka sian bagas ni Debata. Alai molo jumolo tu hita, dia ma ujung ni angka na so mangoloi barita na uli na sian Debata?

¹⁸Jala molo sihol so malua partigor i, tudia ma tagamon halak na so daulat jala sipardosa i?

¹⁹Dibahen i, angka na marhaporsuhon mangihuthon roha ni Debata, dipasahat ma

tondina tu Panompa haposan i, marhitehite na mangulahon na denggan.

5¹ (I.) Hupaingot ma angka sintua na di tongatongamuna, ahu dongan sintua jala sitindangi di angka haporsuhon na tinaon ni Kristus, huhut partohap di hasangapon sipapataron sogot:

² Parmahan i hamu ma pungan ni Debata na di hamu, unang songon na pinaksa, sian las ni roha ma mangihuthon Debata; unang ala ni pangomoan hailaon, sian ringkot ni roha ma!

³ Unang ma songon angka na mamaksa natorop; alai gabe tiruan ma hamu di angka na pinarmahan!

⁴ Molo i, jaloonmuna ma tumpal hasangapon na so ra malos i, ia dung gabe patar Parmahan na bolon i.

⁵ (II.) Laos songon i ma hamu, angka na umposo, unduk ma hamu di angka na tumunggane! Alai saluhutna ma hamu manolukkon haserepon sama hamu, ai dialo Debata do angka na ginjang roha, alai dilehon do asiasi tu angka na serep marroha.

⁶ Antong, patutoru hamu ma dirimuna tutoru ni tangan ni Debata na gogo i, asa dipatimbo hamu di tingkina i!

⁷ Tinggangkon hamu ma nasa na hinolsohon ni rohamuna tu Ibana, ai disarihon do hamu!

⁸Torang ma rohamuna, dungo ma hamu; na maotaot do alomuna, sibolis i, songon babiat na marauang, mangalului sibondutonna.

⁹Gomos ma hamu mangalo ibana marhitehite haporseaon; ingot hamu ma: Ndang tarbahen so songgop angka haporsuhon sisongon i, nang tu angka hahaanggimuna na di portibi on.

¹⁰Alai anggo Debata, nampuna saluhut asi ni roha, naung manjou hamu tu hasangaponna na manongtong i di bagasan Kristus, pauliulionna, pahotonna jala patoguonna do hamu, dung jolo ditaon hamu satongkin haporsuhon i.

¹¹Di Ibana ma hagagoon ro di salelenglelengna! Amen.

¹²(III.) Marhite sian si Silwanus, dongan haposan i, di rohangku, hubahen surat na saotik on tu hamu, mangapoi jala mangkatindangkon, i do sintong asi ni roha ni Debata, hajongjonganmuna.

¹³Na mandok tabi tu hamu huria na di Babel, na tarpillit rap dohot hita, angkup ni si Markus, anakki.

¹⁴Masitabian ma hamu huhut masiummaan di bagasan holong ni roha. Dame ma di saluhut hamu, angka na di bagasan Kristus!

2 Petrus

1 ¹ (I.) Ahu surat ni si Simon Petrus, naposo jala apostel ni Jesus Kristus, mandapothon angka naung manjalo haporseaon na arga, rap dohot hami, marhitehite hatigoran ni Debatanta dohot Jesus Kristus, Sipalua i:

² Singkop ma di hamu asi ni roha dohot dame, marhitehite panandaonmuna di Debata dohot di Jesus, Tuhanta i!

³ (II.) Dilehon hagogoon ni hadebataonna i do tu hita nasa na tau hangoluan dohot hadaulaton marhite sian naung tatanda Ibana, na manjou hita, hinorhon ni hasangaponna dohot hadengganonna sandiri.

⁴ Marhite sian i do dilehon tu hita bagabagana angka na arga jala na balga situtu, asa hinorhon ni i gabe partohap hamu di hadebataon, dung sanga maporus hamu sian hamagoan, na di bagasan hahisapon na di portibi on.

⁵ Dibahen i, haringgashon hamu ma sian nasa gogo, manurdukkon denggan ni parange di bagasan haporseaon i, dung i habisuhon ma di bagasan parange na denggan i;

⁶ dung i pangarajaion diri ma di bagasan habisuhon i, dung i habengeton ma di bagasan pangarajaion diri i, dung i hadaulaton ma di bagasan habengeton i:

⁷ Dung i holong ni roha di dongan ma di bagasan hadaulaton i, dung i holong ni roha di na saluhutna ma di bagasan holong ni roha di dongan i!

⁸ Ai molo jumpang angka i di hamu jala ganda, ndada loasonna hamu losok jala so marparbue, laho mananda Jesus Kristus, Tuhanta i.

⁹ Alai molo so dapot i di na deba, halak na mapitung ma i, parmata na jonok, naung lupa di haiason sian dosa, na di ibana najolo.

¹⁰ Dibahen i, ale angka dongan, lam ringgas ma hamu pahothon panjouonna dohot pamillitonna di hamu; ai molo diulahon hamu i, ndang olo be hamu tinggang.

¹¹ Songon i ma buas lehononna tu hamu hamasuhon tu bagasan, harajaon salelenglelengna, na di Tuhanta Jesus Kristus, Sipalua i.

¹² (III.) Dibahen i, tongtong do hupaingothon angka i tu hamu, atik pe naung diboto hamu i jala naung togu rohamuna di bagasan hasintongan, na di hamu nuaeng.

¹³ Alai tama do, didok rohangku, ahu manungguli hamu marhitehite hata sipaingot, saleleng di bagasan balebale on dope ahu.

¹⁴ Ai huboto, tibu nama tadingkononku balebalengkon, songon naung pinabotohon ni Tuhanta Jesus Kristus tu ahu.

¹⁵ Alai huharingkothon do, asa tongtong tarbahen hamu marningot i, dung borhat ahu.

¹⁶Ai ndada huihuthon hami angka turiturian na piningkir ni na bisuk, di na hupabotohon hami tu hamu hagogoon dohot haroro ni Tuhanta Jesus Kristus; tung diida matanami do hatongamonna i.

¹⁷Ai dijalo do hamuliaon dohot hasangapon sian Debata Ama, di na masa tu Ibana sian hasangapon na tongam i soara on: "On do Anakku, haholongan ni rohangku; na lomo do rohangku di Ibana!"

¹⁸I ma soara, na hubege hami ro sian banua ginjang i, uju rap hami dohot Ibana di dolok na badia i.

¹⁹(IV.) Jadi lam hot ma, antong, hata panurirangon i di hami; jala tama marsitiopan tusi ma hamu, songon na tu palito na marsinondang di inganan na holom, paima tarida siulubalang ari i, jala binsar siboan hatiuron di bagasan rohamuna.

²⁰On ma parjolo boto hamu: Ndang dapot hatorangan ni nasa panurirangon na tarsurat, anggo sian roha ni jolma.

²¹Ai ndang dung sian tahi ni jolma haroroan ni panurirangon; alai tinogihon ni Tondi Parbadia do, umbahen na marsoara angka jolma, disuru Debata.

2¹(I.) Alai hehe do nang najolo angka panurirang pargapgap di tongatonga ni natorop; songon i nang nuaeng ro tu tongatongamuna angka guru pargapgap, siboan parsirangan hamagoan, pola do

soadahononna Tuhan na manobus nasida,
gabe lingkup do tu dirinasida hamagoan,
diaithon nasida.

²Torop na mangihuthon
pansuasaehonnasida; ala ni nasida
gabe hona insak do agama hasintongan i.

³Sian roha na marpambuat parlabahononna
do hamu marhitehite hata sipaotooto. Sian
nahinan dope ndang sulon uhum na tu nasida,
jala ndang tarlalap hamagoan di nasida.

⁴Ai gari angka surusuruan na mardosa,
ndang diolani Debata: Na didabu do nasida tu
banua toru, tu lung haholomon, paramothon
nasida tu uhum.

⁵Nang hasiangan na robi i, ndang diolani
Ibana; alai diramoti do paulu si Noak,
parjamita hatigoran i, di na tinongosna aek
na sumar i mangkungkupi portibi na jahat i.

⁶Nang huta Sodom dohot Gumora,
diparsiragongi do, laho manguhumi,
pajongjong lumbalumba taringot tu na masa
sogot tu angka na tois.

⁷Alai dipalua do si Lot na tigor i, na
niarsahan ni angka na so maruhum i
marhitehite harorongan na niulanasida.

⁸Ai marhite sian na niidana dohot na
binegena ariari diarsakkon tondi ni partigor i
do pambahenannasida na so maruhum i, di
na maringanan ibana di tongatonganasida.

⁹Diboto Tuhan i do, paluahon angka na
daulat sian pangunjuran dohot pajagahon

angka pargeduk, asa hona pinsang nasida di ari uhum i.

¹⁰Gumodang ma angka sipaolooloi sibuk, siulahon hahisapon na pahodarhon, angka parhu ni roha di panggomgomion; angka na garang do nasida jala na tois, na so mabiar manginsahi angka parhasangapon.

¹¹Gari angka surusuruan, atik pe sumurung hagagoon dohot huasonasida, gari so mandabuhon uhum paminsangon dompak nasida di jolo ni Tuhan i.

¹²Alai songon binatang na so marroha do nasida, angka sitangkupon jala sibunuon hian, umbahen na tubu; na manginsahi do nasida di na so binotonasida, gabe mago ma di hamagoannasida.

¹³Upa hageduhon i do diluahon nasida; halalas ni roha do dijujur nasida pargadombuson ariari; sap angka hahodaron dohot hagigian do nasida, na ripe mansuasaehon di bagasan hahisaponnasida, di na rap mangan nasida dohot hamu.

¹⁴Gok pangalangkupon do matanasida; na so mansadi nasida mardosa, diellemellem do roha ni angka na hurang togu, dipasomalsomal do rohana tu pangahution: Angka anak jea do nasida.

¹⁵Ditadingkon do dalan na tigor i, gabe lilu, mangihuthon dalan ni si Bileam, anak ni si Beor, na holong roha di upa hageduhon i.

¹⁶Alai hona ajar do ibana di pangalaosionna i, ai dorbina na tarrante, na so parsoara hian, i do gabe mangkuling marsoara jolma, mangalo lalaen ni panurirang i.

¹⁷Angka mual na so maraek do nasida, angka ombun na niullus ni halisungsung; holom ni na holom do dipadiri di nasida.

¹⁸Ai dihatahon nasida do haotoon na tarlobi burnang, laho mangleleala, marhitehite hisaphisap ni sibuk dohot pargadombuson, dongan na imbaru maporus dope, tumadingkon angka pardalan na di bagasan haliluon.

¹⁹Dibagabagahon nasida do haluaon, atik pe hatoban ni hamagoan i nasida; ai ia i na patunduk halak, hatoban ni i do ibana.

²⁰Ai angka naung maporus pasidingkon hahodaron ni portibi on, di na tinandanasida Tuhan Jesus Kristus, Sipalua i: Anggo mangulahi taralit jala talu, gabe jumorbut ma ujunnga sian bonana.

²¹Ai dumenggan do di nasida, aut unang ditanda nasida dalan hatigoran i, sian na tumundalhon uhum na badia, naung sahat tu nasida, naung tinandanasida i.

²²Jumpang do di nasida hata ni umpama na sintong on: Na mulak do biang tu utautana, jala na margulu do babi di na rotakna, dung mangaremba.

3¹(I.) On ma surat na paduahon, na husurat tu hamu, angka haholongan,

manungguli bontor ni roha di hamu,
marhitehite hata sipaingot,

²asa diingot hamu hata angka naung
hinatahon ni angka panurirang na badia
i, nang patik ni Tuhan jala Sipalua i, na
binaritahon ni angka apostelmuna.

³On ma na rumingkot botoonmuna: Na ro
ma di angka ari parpudi angka pangalensem,
parhata insahinsak, na mangoloi angka
hisapna sandiri;

⁴angka na mandok: Didia do harorona, na
pinarbagabaga i? Ai dung monding angka
amanta, hot do saluhutna songon i, sian mula
ni hasiangan on!

⁵Laho mandok songon i, ndang manganto
rohanasida, naung sian aek do langit nang
tano, jala marhitehite aek do hajajadina
hinorhon ni hata ni Debata.

⁶Laos marhitehite aek i do mago uju i tano
on, dilantaphon aek i.

⁷Jala marhite sian hata i do diramoti Ibana
langit dohot tano nuaeng; dipeop do, asa tu
api di ari paruhuman jala hamagaon ni jolma
angka na jahat.

⁸Alai tangkas ma ingot hamu, angka
haholongan: Sada ari do di Tuhan i songon
saribu taon, jala saribu taon songon sada ari!

⁹Ndang dipagele Tuhan i bagabaga i, songon
na nidok ni roha ni na deba; alai lambas do
rohana mida hamu, ai dipangido rohana,
naeng unang ma nian mago agia ise, naeng

ma tahe saluhutna sahat tu hamubaon ni roha.

¹⁰Alai na ro ma ari ni Tuhan i, songon panangko; mardorop ma disi langit i, laho sega; masarsar ma sisiasia ni tano on bahenon ni api; songon i nang tano i, ro di sude ulaon na di atasna, masoksok ma.

¹¹(II.) Antong, anggo masarsar do hape saluhutna on, nda lam sumurung ma parange na badia dohot hadaulaton

¹²ni angka na paimaimahon jala mangkasiholi haroro ni ari ni Debata, di na masarsar langit i disoksohi, jala malala tartutung do angka sisiasiana!

¹³Alai na maimaima do hita di langit na imbaru dohot di tano na imbaru, inganan ni hatigoran i, hombar tu bagabagana.

¹⁴Dibahen i, hamu angka haholongan, anggo i dipaimaima hamu, ringkoti hamu ma, asa didapot Ibana hamu so martihas, so hasurahan, di bagasan dame!

¹⁵Rajumi hamu ma lambas ni roha ni Tuhanta haluaonmuna, songon naung manurat tu hamu dongan haholonganta, si Paulus i, marguru tu parbinotoan, naung dilehon tu ibana.

¹⁶Songon i di saluhut angka suratna, i dipatorang; adong do deba disi na maol antusan, i ma dipalipe angka na so marroha jala na so togu rohana, nang di surat na asing pe, bahen hamagoannasida sandiri.

¹⁷Antong, hamu angka haholongan, ala naung diboto hamu i hian, jaga ma, unang tarela hamu, dibahen haliluon ni angka na so maruhum i, gabe madabu hamu maon sian haojahanmuna.

¹⁸Alai lam ganda ma di hamu asi ni roha dohot panandaon di Tuhanta Jesus Kristus, Sipalua i! Di Ibana ma hasangapon, nang nuaeng, nang ro di salelenglelengna!

1 Yohanes

1 ¹ (I.) Na adong sian mulana, na hubege hami, na niida ni matanami, na hupanotnoti hami, jala na jinama ni tangannami, taringot tu hata hangoluan i.

² Naung gabe patar do hangoluan i, nunga huida hami, gabe huhatindangkon jala hubaritahon hami tu hamu hangoluan na salelenglelengna i, naung adong hian di adopan ni Ama i, gabe dipapatar tu hami.

³ Na huida jala hubege hami, i do binaritahon nang tu hamu, asa marparsaoran nang hamu rap dohot hami. Tu Ama i dohot tu Anakna Jesus Kristus do parsaoranta i.

⁴ Umbahen na husurathon hami hata on tu hamu, asa gok halalas ni rohamuna.

⁵ (II.) On do barita, na hubege hami sian Ibana gabe binaritahon tu hamu: Panondang do Debata; ndang adong di bagasan Ibana manang aha na holom.

⁶ Molo tadok, naung saor hita tu Ibana, huhut taulahon na holom, pargabus do hita, ndang siula hasintongan hita.

⁷ Alai molo taparangehon hatiuron, songon Ibana na di bagasan na tiur, saor do hita sama hita, jala dipaias mudar ni Jesus, Anakna i, do hita sian nasa dosa.

⁸Molo tadok, na so adong dosanta, tapaotooto do dirinta, jala ndang di bagasan hita hasintongan i.

⁹Molo tatopoti angka dosanta, haposan do Ibana jala bonar, manesa dosanta jala paiashon hita sian nasa hageduhon.

¹⁰Molo tadok, na so mardosa hita, pargabus do Ibana tabahen, jala ndang di bagasan hita anggo hatana.

2¹(I.) Ale angka anaha, umbahen husurat on tu hamu, asa unang mardosa hamu. Molo tung adong na mardosa, adong do pangondianta tu Ama i, i ma Jesus Kristus, partigor i.

²Ibana do pardengganen pasaehon angka dosanta; alai ndada holan dosanta, tung dohot do dosa ni sandok portibi on.

³Sian on do taboto, naung tatanda Ibana: Molo taradoti angka patikna.

⁴Na mandok: Hutanda do Ibana; alai ndang diradoti patikna, pargabus do i, ndang adong hasintongan di bagasan ibana.

⁵Alai na mangaradoti hatana, naung tutu ma gok haholongon ni roha ni Debata di bagasan ibana. Sian i ma taboto, hita di bagasan ibana.

⁶Na mandok, mian di bagasan Ibana, ingkon diparangehon ma songon Ibana.

⁷Ale dongan, na hinaholongan, ndada patik na imbaru na husurat tu hamu, patik naung

leleng do, na di hamu sian mulana. Patik naung leleng, i do hata na binegemuna i.

⁸Tong do na imbaru patik na husurat tu hamu, sintong do i di bagasan Ibana dohot di bagasan hamu, ai na salpu ma na holom; nunga marsinondang nuaeng Panondang na sintong i.

⁹Halak na mandok di bagasan na tiur i ibana, huhut dihosomi donganna: Na tongtong dope mian i di bagasan na holom.

¹⁰Na holong roha di donganna, i do na mian di bagasan na tiur; ndang pargasipan ibana.

¹¹Alai na manghosomi donganna, di bagasan na holom do i; di bagasan na holom do dalanna. Nandang diboto, manang tudia ibana laho, ai dipapitung na holom i do matana.

¹²(II.) Hubahen surat tu hamu, angka anak, dibahen naung sesa dosamuna, ala ni Goarna i.

¹³Hubahen surat tu hamu, angka ama, ala ditanda hamu Ibana, na sian mulana i; hubahen surat tu hamu, angka dolidoli, ala naung ditaluhon hamu parjahat i; hubahen surat tu hamu, angka anak, ala ditanda hamu Ama i.

¹⁴Nunga hubahen surat tu hamu, angka ama, ala naung ditanda hamu Ibana, na sian mulana i; nunga hubahen surat tu hamu, angka dolidoli, ala margogo hamu, jala ala mian hata ni Debata di bagasan hamu, jala ala naung ditaluhon hamu parjahat i.

¹⁵Unang ma haholongi hamu portibi on, nang angka na dibagasanna! Anggo di haholongi halak portibi on, ndang di bagasan ibana holong ni roha ni Ama i.

¹⁶Ai nasa na di portibi on, i ma lomolomo ni roha ni daging, giotgiot ni roha ni mata dohot na manenganengahon sinadongan, ndada sian Ama i anggo i, tung sian portibi on do.

¹⁷Jala na laho salpu do portibi on rap dohot na pinarhagiotna; alai na mian ro di salelenglelengna do na mangulahon lomo ni roha ni Debata.

¹⁸(III.) Hamu angka anaha, tingki parpudi do nuaeng; jala songon naung binegemuna, na naeng ro Antikristus i; nunga lan gabe Antikristus; sian i do taboto, nuaeng ma tingki parpudi.

¹⁹Sian tongatonganta do nian haroroannasida, alai ndang donganta nasida; ai aut donganta nasida, udur ma nasida dohot hita; alai naeng patar ma nasida, na so donganta saluhutna i.

²⁰Naung miniahan ni Na-badia i do hamu, jala saluhut hamu umbotosa.

²¹Hubahen pe surat tu hamu, ndada ala so diboto hamu hasintongan i, ala naung diboto hamu i tahe, jala ndang sian hasintongan nasa gabus.

²²Ise do sipargabus i, ia so na mansoadahon, na mandok: Nandang Kristus i Jesus? I ma

Antikristus, na mansoadahon Ama i dohot Anak i.

²³Ganup na mansoadahon Anak i, ndang di ibana nang Ama i. Halak na marhatopothon Anak i, di ibana do nang Ama i.

²⁴Mian ma di bagasan hamu na binegemuna sian mulana i! Molo mian di bagasan hamu na binegemuna sian mulana i, mian ma nang hamu di bagasan Anak i dohot di bagasan Ama i.

²⁵Jala anggo bagabaga na pinarbagabaga na i tu hita, i ma ngolu na salelenglelengna i.

²⁶Angka i do husurat tu hamu taringot tu angka na mangaliluhon hamu.

²⁷Na mian do di bagasan hamu pamiahion, naung jinalomuna sian Ibana; ndang pola hamu ajaran ni halak. Sintong do na niajarhon ni pamiahion i saluhutna tu hamu, ndang adong gabus disi. Mian ma hamu di bagasan Ibana, songon naung niajarhon tu hamu!

²⁸Nuaeng pe, angka anaha, mian ma hamu di bagasan Ibana, asa marhiras ni roha hita, di na gabe patar Ibana, unang tarila hita maradophon Ibana di harorona i!

²⁹Molo diboto hamu, tigor Ibana, boto hamu ma: Naung tubu sian Ibana do nasa na mangulahon hatigoran i.

3¹(I.) Ida hamu ma godang ni haholongon na binasabasahon ni Ama i tu hita, ai targoar do hita angka anak ni Debata, jala

angka i do hita tutu. Dibahen i, ndang ditanda portibi on hita, ai ndang ditanda anggo Ibana.

²Hamu angka haholongan! Anak ni Debata do hita nuaeng, jala ndang dope dipapatar, manang na gabe aha hita sogot; alai taboto do: Anggo dung patar Ibana, gabe suman ma hita tu Ibana, ai idaonta do rupana sandiri.

³Ganup na mangkirim songon i di Ibana, diparbadiai ma dirina, songon Ibana na badia i!

⁴Pangalaosi do ganup na mardosa, ai pangalaosion do dosa i.

⁵Diboto hamu do, na mambuat angka dosanta do Ibana, umbahen na ro; ndang adong dosa anggo di bagasan Ibana.

⁶Nasa na mian di bagasan Ibana, ndang mardosa; ganup sipardosa, ndang dung diida jala ndang ditanda i Ibana.

⁷Hamu angka anaha, unang dipaotooto halak hamu! Siulahon hatigoran, i do na tigor, songon Ibana na tigor i.

⁸Sian sibolis do halak na mangulahon dosa, ai sian mulana do mardosa sibolis i. Laho manegai angka ulaon ni sibolis do, umbahen na ro Anak ni Debata.

⁹Ganup naung tubu sian Debata, ndang mardosa; ai na mian do di bagasan ibana boni i. Nandang tarbahensa mardosa, ai nunga tubu sian Debata ibana.

¹⁰Disi do tanda anak ni Debata dohot anak ni sibolis: Nandang sian Debata ganup halak

na so mangulahon hatigoran, jala na so marholong ni roha di donganna.

¹¹ (II.) Ai on do barita na binegemuna sian mulana: Ingkon masihaholongan hita.

¹² Unang ma songon si Kain, ai sian hajahaton do ibana, gabe dibunu do anggina. Dia do alana, umbahen na dibunu? Ala na jahat ulaonna; alai tigor do ulaon ni anggina.

¹³ Unang ma longang rohamuna, angka dongan, molo dihosomi portibi on hamu.

¹⁴ Taboto do, naung taripar hita sian hamatean tu hangoluan, ala tahaholongi angka dongan. Na so parholong ni roha, mian do di bagasan hamatean.

¹⁵ Sibunujolma do ganup na hosom roha di donganna; jala diboto hamu do, na so mian hangoluan salelenglelengna di nasa dibunujolma.

¹⁶ Sian on do tatanda haholongon ni roha: Sian ibana na mangalehon hosana humongkop hita. Hita pe, tama do talehon hosanta humongkop donganta.

¹⁷ Molo adong paradongan di tano on, ia diida hurangan donganna, gabe dihinsu ateatena maradophon halak i, tung songon dia ma mian holong ni roha ni Debata di bagasan ibana?

¹⁸ (III.) Hamu angka anaha, unang ma hatanta dohot dilanta mangkaholongi; naeng ma marhitehite pambahenan dohot hasintongan.

¹⁹Disi ma botoonta, paboa sian hasintongan hita jala tapapos rohanta di Jolona.

²⁰Molo disolsoli rohanta hita, umbalga do Debata sian rohanta jala diboto saluhutna.

²¹Hamu angka haholongan, molo so disolsoli rohanta hita, marhiras ni roha do hita maradophon Debata.

²²Jadi manang aha pe tapangido, jaloonta do sian Ibana, ala taradoti patikna jadi taula lomo ni rohana.

²³On do patikna: Naeng porsea hita di Goar ni Anakna Jesus Kristus, huhut masihaholongan, songon naung tinonahonna i tu hita.

²⁴Siradoti patikna, i do na mian di bagasan Ibana jala Debata di bagasan ibana. Jala sian on do taboto, naung mian Ibana di bagasan hita: Sian Tondi i, na nilehonna i tu hita.

4¹(I.) Hamu angka haholongan, unang ma ganup tondi haporseai hamu; unjuni hamu ma, manang na sian Debata angka tondi; ai nunga borhat torop panurirang pargapgap tu portibi on.

²Sian on ma tanda hamu Tondi ni Debata: Ganup tondi ma marhatopothon Jesus Kristus, naung ro di bagasan daging, i ma sian Debata.

³Ganup tondi na so marhatopothon Jesus i, i ma na so sian Debata. I ma pangalaho ni Antikristus, na naeng ro i, songon naung

binegemuna; jala nunga di portibi on ibana nuaeng.

⁴Sian Debata do anggo hamu, angka anaha; jala nunga ditaluhon hamu nasida, ai umbalga do Ibana na di bagasan hamu, asa na di bagasan portibi on.

⁵Sian portibi on do anggo nasida; dibahen i; sian portibi on do hatanasida, jala ditangihon portibi on do nasida.

⁶Sian Debata do ia hita. Halak na tumanda Debata, i ma na tumangihon hita; halak na so sian Debata, i ma na so tumangihon hita. Sian i do tatanda Tondi hasintongan dohot tondi sipaotooto.

⁷(II.) Hamu angka haholongan, masihaholongan ma hita, ai sian Debata do haholongon i, jala ganup na marholong ni roha, i ma naung tubu sian Debata jala ditanda do Debata.

⁸Halak na so marholong ni roha, i do na so tumanda Debata, ai haholongon do Debata.

⁹Sian on do gabe patar holong ni roha ni Debata na tu hita; sian naung sinuruna i Anakna na sasada i tu portibi on, asa mangolu hita marhitehite Ibana.

¹⁰Di bagasan on do holong ni roha i: Ndada hita mangkaholongi Debata; Ibana do mangkaholongi hita, jala disuru do Anakna, bahen pardengganen pasaehon dosanta.

¹¹ Hamu angka haholongon, anggo songon i holong ni roha ni Debata di hita, tama ma nang hita masihaholongan!

¹² Nandang dung adong halak na marnida Debata. Molo masihaholongan hita, mian ma Debata di bagasan hita, jala tipak ma holong ni rohana i di bagasan hita.

¹³ Sian on do taboto, hita mian di bagasan Ibana jala Ibana di bagasan hita: Ala naung nilehonna i tu hita sian Tondina i.

¹⁴ Huida jala huhatindangkon hami, naung disuru Ama i do Anak i, bahen Sipalua portibi on.

¹⁵ Ia i na marhatopothon, Jesus do Anak ni Debata, di bagasan ibana do mian Debata jala ibana di bagasan Debata.

¹⁶ Nunga tatanda jala tahaporseai holong ni roha ni Debata di hita. Debata do haholongon i; jala halak na mian di bagasan haholongon, i do na mian di bagasan Debata jala Debata di bagasan ibana.

¹⁷ Disi ma gabe tipak holong ni roha i di bagasan hita, pola marhiras ni roha hita di ari paruhuman i; ai songon Ibana, songon i do nang hita di portibi on.

¹⁸ Nandang adong biar di bagasan holong ni roha i; alai dipabali holong ni roha naung rimpas i do biar i. Ai na bernit do anggo biar; jala ndang rimpas holong ni roha ni halak na mabiar.

¹⁹Marroha holong ma hita, ala Ibana jumolo mangkaholongi hita!

²⁰Pargabus do halak na mandok: Holong rohana di Debata; hape dihosomi do donganna. Ai na so mangkaholongi donganna na niidana, tung songon dia ma haholonganna Debata na so niidana?

²¹On do patik na tajalo sian Ibana: Na mangkaholongi Debata, i ma na mangkaholongi nang donganna.

5¹(I.) Ganup na porsea, Jesus do Kristus, i do naung tubu sian Debata, jala ganup na mangkaholongi Ibana na manubuhon, haholongan ni i do nang na tubu sian Ibana.

²Sian on do taboto, naung holong rohanta di angka anak ni Debata: Molo tahaholongi Debata jala taradoti patikna.

³Ai on do holong ni roha di Debata; molo taradoti patikna. Ndada na dokdok patikna i.

⁴Ai nasa na tubu sian Debata do manaluhon portibi on. Haporseaonta i do naung monang manaluhon portibi on.

⁵Ise do na manaluhon portibi on, ia so na porsea di Jesus Kristus, Anak ni Debata?

⁶Ibana do i, naung ro marhitehite aek dohot mudar, Jesus Kristus; ndada holan di bagasan aek i, di bagasan aek dohot mudar, i do! Jala Tondi i do na mangkatindangkon, ai hasintongan do Tondi i.

⁷Ai tolu do na mangkatindangkon.

⁸I ma Tondi i, aek i dohot mudar i; jala sada do na tolu i.

⁹Ia panindangion sian jolma tajalo do; alai sumurung do panindangion na sian Debata, ai panindangion na sian Debata do on, na hinatindangkonna taringot tu Anakna i.

¹⁰Na porsea di Anak ni Debata, ditiop do panindangion i. Na so porsea di Debata, i ma mambahen Ibana pargabus, ala so porsea ibana di na hinatindangkoni ni Debata taringot tu Anakna i.

¹¹Jala on do panindangion i: Naung dibasabasahon Debata do tu hita hangoluan salelenglelengna, jala di bagasan Anakna do hangoluan i.

¹²Ia di ibana Anak i, di ibana do hangoluan i; ia so di ibana Anak ni Debata, ndang di ibana hangoluan i.

¹³Umbahen na husurat angka i tu hamu, angka na porsea di Goar ni Anak ni Debata: Naeng botoonmuna, naung di hamu do hangoluan na salelenglelengna!

¹⁴(II.) On do hiras ni rohanta maradophon Ibana: Molo tapangido manang aha marguru tu lomo ni rohana, tangihononna do hita.

¹⁵Jala molo taboto, tangihononna do hita di nasa na tapangido, gabe taboto, saut ma di hita angka na tapangido i sian Ibana.

¹⁶Ia diida halak donganna, mangulahon dosa na so marhapatean tu hamatean, martangiang ma ibana, dung i basabasahononna ma tu

ibana hangoluan; i ma di angka na mardosa na so marhapatean tu hamatean. Adong do dosa na marhapatean tu hamatean; ndang hudok, tangiangkononhon anggo i.

¹⁷Dosa do nasa hageduhon, jala adong do dosa na so marhapatean tu hamatean.

¹⁸Taboto do, na so mardosa nasa naung tubu sian Debata; alai na marsihohot tu Debata do halak, naung tubu sian Ibana, jala ndang tarhahua parjahat i ibana.

¹⁹Taboto, na sian Debata do hita, jala di bagasan hajahaton do nasa portibi on.

²⁰Alai taboto do, naung ro Anak ni Debata jala dilehon roha tu hita, asa tatanda Parsintong i. Di bagasan Parsintong i do hita, di bagasan Anakna Jesus Kristus. Ibana do Debata na sintong dohot hangoluan salelenglelengna.

²¹Hamu angka anaha, jaga hamu ma dirimuna maralohon debata sileban!

2 Yohanes

1 ¹ (I.) Ahu surat ni sintua i mandapothon ina soripada, naung pinillit, nang mandapothon angka anakonna, angka na huhaholongi situtu; jala ndada holan ahu, dohot do saluhut naung tumanda hasintongan i,

² ala ni hasintongan, na mian di bagasan hita, jala na mandongani hita ro di salelenglelengna:

³ Didongani asi ni roha, talup ni roha dohot dame ma hita, sian Debata Ama dohot sian Jesus Kristus, Anak ni Ama i, marhitehite hasintongan dohot haholongon!

⁴ (II.) Mansai tarhilas do rohangku, ala jumpang ahu anakkonmu deba, angka na mamarangehon hasintongan, marguru tu patik naung tajalo sian Ama i.

⁵ Na mangido ma ahu nuaeng tu ho, ale inang soripada, ndada songon patik na imbaru na sinurathon tu ho, na di hita sian mulana, i do: Naeng masihaholongan hita.

⁶ Jala on do holong ni roha i; naeng parangehononta patikna. I do patik siparangehononmuna, songon naung binegemuna sian mulana i.

⁷ (III.) Ai nunga borhat torop siulahon sipaotooto tu portibi on, angka na so

marhatopothon Jesus Kristus ro di bagasan daging. I ma na paototohon, jala i do Antikristus i.

⁸Matahon hamu ma dirimuna, asa unang mago sian hamu naung niulamuna; naeng ma upa na gok jaloonmuna!

⁹Ganup na mangalaosi na so mian di bagasan poda ni Kristus, ndang partohap i di Debata. Na mian di bagasan poda, i do partohap di Ama i dohot di Anak i!

¹⁰Molo ro halak tu hamu, na so mamboan poda on, unang ma jangkon hamu ibana tu jabu, unang ma tabi hamu!

¹¹Gari na mangalehon tabi tu ibana, saor do tu angka ulaonna na jahat i.

¹²Godang do nian sisurathononku tu hamu; alai ndang une roha, anggo marhitehite harotas dohot tinta; alai dihirim rohangku, ahu ro mandapothon hamu, asa mangkatai hita adop bohi be, asa gok halalas ni rohanta.

¹³Na manongos tabi tu ho angka anakkon ni anggim, na tarpillit i.

3 Yohanes

1 ¹ (I.) Ahu surat ni sintua i mandapothon si Gayus, haholongan i, na huhaholongi situtu.

² Ale anggia, sandok dipangido rohangku, naeng horas ho jala hipas, hombar tu horas ni tondim!

³ (II.) Tarhilas situtu do rohangku, di na ro angka dongan i mangkatindangkon hasintongan na di ho ro di parangem, na di bagasan hasintongan.

⁴ On do las ni rohangku na umbolon: Molo hubege, diparangehon angka anakkonku hasintongan i.

⁵ Na denggan do pambahenmi, anggia, na tu angka dongan, nang tu angka tamue.

⁶ Dihatindangkon nasida do holong ni roham, di jolo ni huria i. Denggan ma paborhatonmu nasida, marguru tu na tama di Debata.

⁷ Ai ala ni Goar i do nasida borhat; ndang adong dijalo nasida agia aha sian angka parbegu.

⁸ Dibahen i, tama ma hita manjangkon angka na songon i, asa gabe dongan pangula hita, pajongjong hasintongan i.

⁹ (III.) Hubahen do surat tu huria i; alai ndang dijangkon si Diotrepes hami, ai naeng ibana do na guminjang.

¹⁰Dibahen i, anggo dung ro ahu, taringotanku ma pambahenna i, na niulana manihasnihasi hami marhitehite angka hata na roa. Jala ndang sombu dope rohana disi; ai laos so dijangkon do angka dongan i, diambat do angka na ringkot roha jala dipabali do sian huria.

¹¹Unang ihuthon na roa, anggia; na denggan i ma! Sian Debata do halak na mangulahon na denggan; ia siula na roa, ndang dung diida i Debata.

¹²Dapotan panindangion do si Demetrius sian saluhutna, nang sian hasintongan sandiri; songon i do nang sian hami, jala diboto ho do, na sintong do anggo panindangion na sian hami.

¹³Godang do nian sisurathononku tu ho; alai ndang une rohangku, manurat tu ho marhitehite tinta dohot panurat.

¹⁴Alai dihirim rohangku, naeng tibu ho idaonku, dung i mangkatai ma hita adop bohi be. (1-15) Dame ma di ho! Na manongos tabi do tu ho angka dongan. Pasahat ma tabingku tu angka dongan sadasada!

Yudas

1 ¹ (I.) Ahu surat ni si Judas, naposo ni Jesus Kristus, anggi ni si Jakobus, mandapothon angka na marpili, angka haholongan di bagasan Debata Ama, jala niramotan di Jesus Kristus:

² Singkop ma di hamu asi ni roha dohot dame dohot haholongan ni roha!

³ (II.) Hamu angka haholongan, ringkot situtu do rohangku, mambahen surat tu hamu taringot tu haluaon hatopan i; ndang tarjua ahu so suratonku tu hamu hata mangapoi hamu, marungkil humongkop haporseaon, naung tolhas dipasahat tu angka na badia.

⁴ Ai adong do deba halak, naung manisipi bongot, mangonai do tu nasida uhum on, naung tarsurat hian: Angka na so daulat, angka na pabalikkon asi ni roha ni Debata tu pargadombuson, gabe disoadahon nasida do Raja i dohot Tuhanta na sasada i, Jesus Kristus i.

⁵ Alai na naeng paingotonku do hamu, angka na tangkas umboto saluhutna: Dipalua Tuhan i do nian bangsona sian tano Misir; alai dilengsehon do musengani angka na so porsea.

⁶ Angka surusuruan pe, na so mangaramoti panggomgomionna, angka na manadingkon

inganannasida hian, diparamothon do tubagasan haholomon marhitehite rante na manongtong, sahat ro di ari uhum na balga i.

⁷ Songon Sodom dohot Gumora ro di angka huta na humaliang i, angka na marharorongan suman tu nasida, paihutihut daging na leban, gabe tudosan na solpa, taringot tu api paruhuman na salelenglelengna.

⁸ Suang songon i ma antong nang nasida na tarpedem on, diramuni do sibukna, hu rohanasida di panggomgomion, diinsahi do angka parhasangapon.

⁹ Alai di na marbada Mikhael, sintua ni surusuruan i, dohot sibolis i siala bangke ni si Musa, ndang hum rohana mandabu uhum paminsangon dompak sibolis i; alai didok: Dipinsang Tuhan ma ho!

¹⁰ Alai anggo nasida, diinsahi do nasa na so binotona; alai na binotonasida sian bangkona hian songon di binatang na so marroha i, i do na mangago nasida.

¹¹ Marjea ma nasida, ai didalani do dalan ni si Kain, gabe tarboan do nasida binahen ni upa sipaotooto ni si Bileam, jala mago dibahen paraloon ni si Kora.

¹² Angka tihas do nasida, di na marsipanganon na badia hamu, angka na so mabiar gabe donganmuna sapanganan, angka na pamokmokkon dirina, angka ombun na so maraek, na niullus ni alogo, angka hau

na rahar, na so marparbue, naung dua hali mate, angka naung maborgat;

¹³angka galumbang laut na riar, na margumogumohon hailaonna sandiri, angka bintang na lilu; holom ni na holom do dipadiri di nasida ro di salelenglelengna.

¹⁴Nunga manurirangi taringot tu nasida Henok, papitusunduthon sian si Adam, ninna do: Nunga ro Tuhan i mardongan angka na badiana, na marloksaloksa,

¹⁵manguhumi saluhutna dohot maminsang saluhut parjahat, ala ni nasa ulaonnasida na jahat na binahennasida dohot ala ni saluhut hatanasida na tois, na hinatahon ni angka parjahat dampak Ibana.

¹⁶I ma angka parmungutmungut, angka siburai soro ni arina, alai huhut diulahon hahisaponnasida, dihatahon pamangannasida do hata manggang, jumpa mangellemellem marhata dampak, mambuat laba sian i.

¹⁷(III.) Alai hamu angka haholongan, ingot hamu ma hata angka naung nilumbahon ni angka apostel ni Tuhanta Jesus Kristus!

¹⁸Ai didok nasida do tu hamu: Di angka ari parpudi ro ma angka sipanginsahi, angka na mangulahon hahisapon, hajahaton ni rohanasida be.

¹⁹I ma angka pamolamola; mangolu do nian, alai ndang martondi.

²⁰Alai hamu, angka haholongan, pauliuli hamu ma dirimuna di atas haporseaonmuna

na badia situtu, jala martangiang di bagasan Tondi Parbadia!

²¹ Ramoti hamu ma dirimuna di bagasan holong ni roha ni Debata! Maimaima ma hamu di asi ni roha ni Tuhanta Jesus Kristus, asa sahat hamu tu hangoluan salelenglelengna.

²² Ajari hamu ma angka na ganggu roha i!

²³ Palua hamu ma nasida, rampas hamu ma nasida sian api; marasi ni roha ma hamu di na deba, huhut mabiar, hagigihon hamu ma nang abitna, naung niramunan ni sibukna.

²⁴ Alai hasangapon ma di Ibana na margogo mangaramoti hamu, unang tinggang, jala pajongjongkon hamu marolopolop, so martihas, tu adopan ni hasangaponna!

²⁵ Di Debata na sasada i, na paluahon hita marhitehite Jesus Kristus, Tuhanta i, di Ibana ma hasangapon, hamuliaon, hagogoon dohot parhuasoon sian mula ni mulana, nang nuaeng, nang ro di salelenglelengna! Amen.

Wahyu

1 ¹ (I.) On ma pangungkapon ni Jesus Kristus, na nilehon ni Debata tu Ibana, asa tu angka naposona patuduhononna na naeng masa tibu, gabe saut dipatuduhon, ai ditongos do marhite sian surusuruanna tu naposona, Johannes.

² Dihatindangkon ibana do hata ni Debata dohot panindangion taringot tu Jesus Kristus: Nasa na niidana.

³ Martua ma na manjaha ro di angka na umbege hata panurirangon on, angka siradoti na tarsurat dison; ai jonok do ari i!

⁴ Ahu surat ni si Johannes mandapothon na pitu huria na di Asia: Asi ni roha ma di hamu dohot dame sian Ibana na mangolu i, naung mangolu hian jala na naeng ro, nang sian na pitu Tondi na di adopan ni habangsana,

⁵ nang sian Jesus Kristus, Sitindangi haposan i, na parjolo tubu sian angka naung mate, Sigomgom angka raja ni tano on! Ibana do mangkaholongi hita jala dipalua hita sian dosanta marhitehite mudarna.

⁶ Dijadihon do hita gabe harajaon hamalimon di Debata, Amana i: Di Ibana ma hasangapon dohot hagogoon ro di salelenglelengna! Amen.

⁷Ida ma, na ro ma Ibana di bagasan ombun!
Idaon ni nasa mata do Ibana, nang angka
naung manullang Ibana, gabe mangangguhi
be ma saluhut bangso ni tano on mida Ibana.
I ma tutu. Amen.

⁸Ahu do Bonana jala Ujungna, ninna Tuhan
Debata, Debata nuaeng, Debata naung adong
hian, na naeng ro i, Sigomgom saluhutna!

⁹(II.) Ahu Johannes, donganmuna jala rap
dohot hamu partohap di haporsuhon dohot di
harajaon nang di habengeton na di bagasan
Jesus; di pulo na margoar Patmos do ahu
uju i, ala ni hata ni Debata dohot ala ni
pangkatindangkon di Jesus.

¹⁰Naung di bagasan ari ni Tuhan i do ahu
di bagasan tondi, gabe hubege di pudingku
soara na gogo, suman tu soara ni sarune.

¹¹On do didok: Surathon ma na niidam tu
sada buku jala tongos ma i tu na pitu huria,
i ma Epesus, Smirna, Pergamos, Tiatira,
Sardes, Piladelpia dohot Laodikea!

¹²Gabe humusor ma ahu marnida Parsoara,
naung mangkatai i dohot ahu. Jadi dung
humusor ahu, huida ma pitu parpalitoan sere.

¹³Jadi di tongatonga ni angka parpalitoan
i huida ma na suman tu Anak ni jolma,
na marsampesampe jala marhohos sere di
pamatangna.

¹⁴Mamontar do simanjujungna ro di obukna,
bontar songon hapas, saksak songon hapur;
jala songon nala ni api do ia matana.

¹⁵Langgo patna songon haksna na nilala di bagasan pamurunan, ia soarana songon parhasak ni aek godang.

¹⁶Ditiop do pitu bintang di tanganna siamun, jadi ruar do sian pamanganna podang siduababa na tajom; songon mata ni ari na maringaringar do ia sondang ni bohina.

¹⁷Disi huida Ibana, tinggang do ahu tujolo ni totna, songon naung mate; gabe diampehon Ibana ma tanganna siamun tu ahu, huhut ma didok: Unang ho mabiar, ai Ahu do Parjolo jala Parpudi!

¹⁸Ahu do Siparngolu; naung mate do Ahu najolo, gabe mangolu antong ro di salelenglelengna; di Ahu do anak hinsu ni hamatean dohot banua toru!

¹⁹Onpe, surathon ma na niida ni matami, i ma na masa nuaeng ro di na naeng masa, dung salpu on:

²⁰Hahomion ni bintang na pitu, angka na niidam di siamunhu, dohot parpalitoan sere na pitu i: Ia bintang na pitu i, angka suruan ni na pitu huria do i, ia parpalitoan na pitu i, i ma na pitu huria i.

2¹(I.) Surathon ma tu suruan ni huria Epesus: On do hata ni na maniop bintang na pitu i di siamunna, na mardalan di holangholang ni parpalitoan na pitu i:

²Huboto do angka ulaonmu dohot parungkilonmu ro di habengetonmu; na so tarpataontaon ho angka parjahat. Diunjuni ho

do angka na mandok, apostel nasida, hape ndang na tutu; pargapgap do nasida jumpang ho.

³Na marbenget ni roha do ho, na marsitaonon do ho ala ni Goarhu; ndang marnaloja ho.

⁴Alai adong do pangkurangi ni rohangku di ho, i ma naung tinadingkonmu holong ni roham na di mulana i!

⁵Onpe, parateatehon ma hatinggalanmi; pauba ma roham, ulahon ma angka ulaonmu na parjolo i! Ia so i, ro ma Ahu mandapothon ho, manunggalingkon parpalitoanmi sian ingananna, anggo so dipauba ho roham.

⁶Alai on do tutu hasurunganmu: Dihasogohon ho do ulaon ni halak Nikolaus; Ahu pe, huhasogohon do i.

⁷Ditangihon na marpinggol ma na nidok ni Tondi i tu angka huria: Na monang i ma bahenonku manganhon parbue ni hau hangoluan, na di Paradaiso ni Debata!

⁸Surathon ma tu suruan ni huria Smirna: On do hata ni Parjolo huhut Parpudi, naung mate najolo gabe mangolu:

⁹Huboto do haporsuhonmu dohot hapogosonmu, alai na mora do ho; huboto nang panginsahion ni angka na mandok: Jahudi nasida; hape ndang na tutu, pungan ni sibolis do nasida.

¹⁰Unang habiarhon angka haporsuhon na naeng ro! Dabuon ni sibolis ma deba sian

hamu tubagasan hurungan, asa tarunjun hamu, gabe tarsosak ma hamu sampulu ari lelengna. Sai burju ma ho rasirasa mate; dung i lehononku ma tu ho tumpal hangoluan i!

¹¹ Ditangihon na marpinggol ma na nidok ni Tondi i tu angka huria: Ndang mahua na monang i bahenon ni hamatean na paduahon i!

¹² (II.) Surathon ma tu suruan ni huria Pergamos: On do hata ni na maniop podang siduababa na tajom i:

¹³ Huboto do ingananmu mardonokkon habangsa ni sibolis i, jadi na marsihohot do ho di Goarhu, ndang disoadahon ho haporseaon di Ahu, nang uju di angka ari ni Antipas, sitindangingku haposan i, gabe dipusa do ibana di tongatongamuna, di inganan ni sibolis i.

¹⁴ Alai adong do saotik pangkurangi ni rohangku di ho: Na adong do di tongatongamuna angka na mangoloi poda ni Bileam, na mangajari si Balas mambahen gasip di jolo ni halak Israel, i ma na manganhon na pinelehon tu begu dohot na marmainan.

¹⁵ Suang songon i adong di tongatongamu angka na marsitiopan tu poda ni halak Nikolaus.

¹⁶Pauba ma roham! Ia so i, magira ma Ahu ro marmusu dompak nasida marhitehite podang ni pamanganku.

¹⁷Ditangihon na marpinggol ma na nidok ni Tondi i tu angka huria: Tu na monang i ma lehononku sipanganon manna na buni i, jala lehononku tu ibana batu na saksak dohot goar na imbaru na sinurat tu atas batu i, na so binoto ni manang ise, ia so holan na manjalosa.

¹⁸(III.) Surathon ma tu suruan ni huria Tiatira: On do hata ni Anak ni Debata, na marmata songon nala ni api, jala patna tudos tu haksa:

¹⁹Huboto do angka ulaonmu dohot holong ni roham dohot haporseaonmu ro di pangkobasionmu, nang benget ni roham; huboto, gumodang do ulaonku parpudi sian angka na parjolo i.

²⁰Alai on do pangkurangi ni rohangku di ho: Dipasombu ho do boru Izebel, na mandok, panurirang ibana, gabe diajari jala dililuhon do angka naposongku, asa marmainan nasida jala manganhon na pinelehon tu begu.

²¹Nunga hupaganjang nian arina, asa paubaonna rohana; alai ndang olo ibana paubahon rohana tumadingkon parmainanonna i.

²²Dabuonku ma ibana tubagasan parsahiton, songon i angka donganna pangalangkup

tubagasan haporsuhon godang, ia so dipauba rohana tumadingkon niulana i.

²³ Laos ragehononku ma angka anakonna asa mate, asa diboto saluhut huria; Ahu do sidodo ateate dohot roha; jala lehononku tu ganup hamu hombar tu na niulana be.

²⁴ Alai tu hamu, angka na tading di Tiatira, tu nasa na so umpeop poda ondeng, angka na so umboto hahomion ni sibolis i, songon na nidoknasida, tu hamu do hudok: Ndang be ampehononku pandokdohi na asing tu hamu:

²⁵ Asal ma ditiop hamu na di hamu i, paima ro Ahu!

²⁶ Di na monang i, anggo diradoti ulaonku sahat ro di ujung, lehononku ma huaso manggomgomi angka parbegu:

²⁷ Parmahanonna ma nasida marhitehite tungkot bosi, mangarosak nasida hira hudon tano, songon naung hujalo sian Damang.

²⁸ Lehononku ma tu ibana bintang sipaias.

²⁹ Ditangihon na marpinggol ma na nidok ni Tondi i tu angka huria!

3¹ (I.) Surathon ma tu suruan ni huria Sardes: On do hata ni Partondi na pitu na sian Debata jala Parbintang na pitu: Huboto do angka ulaonmu; na targoar do ho mangolu, hape na mate do!

² Tarsunggul ma ho jala patogu ma donganmu na tading i, angka na naeng mate. Ai ndang jumpang Ahu di angka ulaonmu, naung gok di jolo ni Debatangku.

³Antong, ingot ma, manang songon dia na jinalom dohot na binegem; i ma radoti jala pauba roham! Dibahen i, molo so tarsunggul ho, ro ma Ahu songon panangko; na so jadi botoonmu sadiharina Ahu ro manopot ho.

⁴Alai adong do di Sardes otik goar ni halak, angka na so mangaramuni abitna; nasida ma mardalan sogot rap dohot Ahu marabit na saksak, ai na tau do nasida.

⁵Songon i ma uloshononhon abit na saksak tu na monang i; na so tupa be sesaonku goarna sian buku hangoluan i, hatindangkononku ma goarna di jolo ni Damang nang angka surusuruanna.

⁶Ditangihon na marpinggol ma na nidok ni Tondi i tu angka huria!

⁷(II.) Surathon ma tu suruan ni huria Piladelpia: On do hata ni Nabadia jala Nasintong, na umpeop anak hinsu ni Daud, na mangungkap so adong na mangkinsu, jala na mangkinsu so adong na mangungkap:

⁸Huboto do angka ulaonmu. Antong, nunga hupadiri di jolom pintu naung mungkap, na so bolas hinsuon ni manang ise. Ai otik pe gogom, diradoti ho do hatangku; ndang disoadahon ho Goarhu.

⁹Huboan ma halak sian pungan ni sibolis, angka na mandok, Jahudi nasida, hape ndang na tutu, pargabus do nasida: Bahenonku ma nasida ro marsomba tujolo ni patmu, botoonnasida do, naung huhaholongi ho!

¹⁰Ai diradoti ho do hata habengeton na sian Ahu; Ahu pe, ramotanku ma ho di ari pangunjunan na naeng ro tu liat portibi on, mangunjuni angka na mangingani tano on.

¹¹Magira ma Ahu ro. Tiop ma na di ho, unang adong na mambuat tumpalmi!

¹²Bahenonku ma na monang i gabe tiang di joro ni Debatanku; na so tupa be ibana ruar sian i, jala surathononku ma tu ibana Goar ni Debatanku dohot goar ni huta ni Debatanku, i ma Jerusalem na imbaru i, na tuat sian banua ginjang sian Debatanku, nang Goarhu na imbaru i.

¹³Ditangihon na marpinggol ma na nidok ni Tondi i tu angka huria!

¹⁴(III.) Surathon ma tu suruan ni huria Laodikea: On do hata ni si Amen, Sitindangi haposan jala na sintong, mula ni na tinompa ni Debata:

¹⁵Huboto do angka ulaonmu: Na so haru ngali, na so haru las ho; aut ni haru ngali ma ho manang las nian!

¹⁶Alai dibahen na danggoldanggol sisilon ho, so haru ngali, so haru las, utahononku ma ho sian pamanganku.

¹⁷Ai didok ho: Na mora do ahui jala paradongan, ndang hurangan ahui. Ndang diboto ho, na parir do ho hape jala na dangol, na pogos, na mapitung jala na marsaemara.

¹⁸Huapoi ma ho, manuhor sian Ahu sere naung pinapita ni api, anggiat tutu mamora

ho, nang abit na saksak siuloshononmu,
unang patar hailaonmu di parsaemaraonmi,
nang miak mamiahi matami, asa marnida ho!

¹⁹Ai nasa na huhaholongi, angka i do
hupinsang jala huajar. Antong, haringkothon
ma na paubahon roha!

²⁰Ida ma, na jongjong do Ahu di jolo
pintu i manuktuhi; ia adong na tumangihon
soarangku dohot mangungkap pintu i, bongot
ma Ahu tu ibana, mangan ma Ahu rap dohot
ibana, jala ibana rap dohot Ahu.

²¹Padirionku ma tu na monang i hundulan di
habangsangku rap dohot Ahu; songon Ahu,
dung monang, hundul rap dohot Damang di
habangsana i.

²²Ditangihon na marpinggol ma na nidok ni
Tondi i tu angka huria!

4¹ (I.) Dung salpu i, hubereng ma, jadi
ida ma, ungap do sada pintu di banua
ginjang, jadi mangkuling ma soara, naung
hubege mangkatai dohot ahu di mulana i,
songon soara ni sarune, didok ma: Nangkok
ma ho tuson, asa hupatuduhon tu ho na
naeng masa, dung salpu angka ari on.

²Jadi mamintor di bagasan tondi ma ahu:
Adong ma habangsa sada di banua ginjang,
jadi adong do na mangkunduli habangsa i.

³Ia na hundul i, songon mata intan Jaspis
dohot Sardion do idaon rupana; dihaliangi
halibutongan do habangsa i, na songon mata
intan Samara rupana.

⁴Humaliang habangsa i adong ma duapulu opat habangsa, juguhan ni duapulu opat sintua, angka parabit na saksak jala martumpal sere di ulunasida.

⁵Na ruar do sian habangsa i angka hilap dohot soara na mardoromdorum dohot ronggur; galak do pitu parpalitoan api di jolo ni habangsa i, i ma na pitu Tondi ni Debata.

⁶Di jolo ni habangsa i adong ma songon laut sorminan, suman tu kristal (galas), jala di parsitongaian ni habangsa i dohot humaliang habangsa i adong ma opat parngolu, angka na marmata torop, di jolo nang di pudi.

⁷Ia parngolu parjolo suman do tu singa, ia parngolu paduahon suman tu jonggi, ia na patoluhon marbohi songon jolma, ia na paopathon suman tu pidong raja ualu na habang.

⁸Adong di ganup parngolu na opat i onom habonghabongna be, na marmata do nasida humaliang dohot di bagasan; ndang maradian nasida arian dohot borngin, mandok: Na badia, na badia, na badia do Tuhan Debata, Sigomgom saluhutna, naung adong hian, Siparngolu i, na naeng ro!

⁹Disi dilehon angka parngolu i hasangapon dohot hamuliaon dohot hamauliateon tu Ibana, na hundul di habangsa i, na mangolu ro di salelenglelengna,

¹⁰jalo ma manangkap sintua na duapulu opat i di jolo ni na hundul di habangsa i,

disomba ma Parngolu sisalelenglelengna i, dipeakkon ma tumpalnasida tujolo ni habangsa i, huhut ma didok:

¹¹ Ale Tuhan Debatanami, na tama do Ho manjalo hasangapon dohot hamuliaon dohot hagagoon, ai ditompa Ho do saluhutna; hinorhon ni lomo ni roham do, umbahen manjadi angka i jala tartompa!

5¹ (I.) Dung i huida ma di tangan siamun ni na hundul di habangsa i sada buku, naung sinuratan sian bagasan nang sian duru, naung sinahap dohot pitu sahap.

² Jadi huida ma sada surusuruan na marsahala, na marsoara na gogo mamaritahon: Ise do na tau mangungkap buku i jala mangkarhari angka sahapna i?

³ Alai ndang adong manang ise di banua ginjang nang di tano nang di toru ni tano, na tarbahen mangungkap buku i manang marnida tubagasan.

⁴ Gabe tangis situtu do ahu, ala so adong jumpang agia ise, na tau mangungkap buku i nang marnida tubagasan.

⁵ Dung i didok sada sian angka sintua i ma mandok ahu: Unang ho tangis; nunga monang Singa i, na sian marga Juda, urat ni si Daud, laho mangungkap buku i dohot sahapna na pitu i.

⁶ Jadi di parsitongaan ni habangsa i, di tongatonga ni na opat parngolu dohot angka sintua i, huida jongjong sada Birubiru, songon

naung tarbunu, pitu do tandukna jala pitu matana, i ma na pitu Tondi ni Debata, na sinuruna tu liat tano on.

⁷Dung i ro ma Ibana, dijalo ma buku i sian tangan siamun ni na hundul di habangsa i.

⁸Asa dung dijalo buku i, manungkap ma na opat parngolu i dohot na duapulu opat sintua i di jolo ni Birubiru i; ganup nasida maniop sada hasapi dohot sada saosan sere gok angka na hushus, i ma tangiang ni angka na badia.

⁹Diendehon nasida ende na imbaru, ninna ma: Na tama do Ho manjalo buku i jala mangungkap angka sahapna, ai naung tarbunu do Ho jala marhitehite mudarmu ditobus Ho do tu Debata jolma sian saluhut marga, hata, houm dohot bangso.

¹⁰Jala dijadihon Ho do nasida gabe harajaon hamalimon di Debatanta, asa manggomgomi nasida di atas tano i!

¹¹Dung i mamereng ma ma ahu, gabe hubege ma songon soara ni torop surusuruan humaliang habangsa i, nang soara ni angka parngolu i dohot angka sintua i; ia toropnasida marloksaloksa jala marriburibu.

¹²Marsoara na gogo nasida mandok: Na tama do Birubiru naung tarbunu i manjalo hagagoon dohot hamoraon dohot hapistaran dohot sahala dohot hamuliaon dohot hasangapon dohot pujipujian!

¹³Gabe hubege ma soara ni nasa na tinompa, angka na di banua gijnang, di tano,

ditoru ni tano ro di na di laut, tung saluhutna na di bagasan angka i mandok: Pujipujian dohot hamuliaon dohot hasangapon dohot hagogoon ro di salelenglelengna ma di Ibana, na hundul di habangsa i dohot di Birubiru i!

¹⁴Jadi didok na opat parngolu i ma: Amen! Laos manungkap ma angka sintua i huhut marsomba.

6¹(I.) Dung i huida ma, diungkap Birubiru i ma sada sahap sian na pitu i, jadi hubege ma sada sian parngolu na opat i marsoara songon ronggur mandok: Ro ma ho!

²Dung i hubereng, jadi adong ma hoda sihapaspili; na marsior do na mangkunduli hoda i, dilehon do tu ibana tumpal, laos borhat do ibana marhamonangan, asa monang.

³Jadi dung diungkap sahap paduahon, hubege ma parngolu paduahon mandok: Ro ma ho!

⁴Dung i ruar ma hoda na asing, na rara songon api; dilehon ma tu na mangkunduli hoda i huaso mambuat dame sian tano on, asa masiseatan, laos dilehon ma podang na balga tu ibana.

⁵Jadi dung diungkap sahap patoluhon, hubege ma soara ni parngolu patoluhon mandok: Ro ma ho! Jadi huida, adong ma hoda sada na birong; ditiop na mangkunduli hoda i do sada dasing di tanganna.

⁶Jadi hubege do songon soara di tongatonga ni na opat parngolu i mandok: Sasolup eme sahupang, jala tolu solup eme na rara sahupang; ia miak dohot anggur, unang hahua!

⁷Jadi dung diungkap sahap paopathon, hubege ma soara ni parngolupaopathon mandok: Ro ma ho!

⁸Jadi hubereng, gabe adong ma hoda sada silansat; ia goar ni na mangkunduli hoda i, hamatean do, jala mangihut do tu ibana banua toru; jadi dilehon do di nasida huaso tu saparopat ni pangisi ni tano on, mamusa nasida marhitehite podang dohot haleon dohot hamatean hian nang marhitehite binatang angka na di tano on.

⁹Jadi dung diungkap sahap palimahon, huida ma ditoru ni langgatan i tondi ni angka naung sineat, ala ni hata ni Debata dohot ala ni pangkatindangkonnasida.

¹⁰Na marsoara na gogo do nasida manjoujou, angka ninna ma: Sadia leleng nari, ale Tuhan na badia jala na sintong, asa manguhumi Ho jala mangaluluhon mudarnami tu angka na mangingani tano i?

¹¹Gabe dilehon ma tu ganup nasida abit na saksak, jadi didokkon ma nasida maimaima sangombas nari, paima tumpu nang angka dongannasida naposo, angka hahaangginasida, angka sipusaon dope songon nasida.

¹²Jadi huida, dung diungkap sahap paonomhon: Masa ma lalo bolon, gabe mamirong ma mata ni ari songon harung hori, jadi sandok bulan i songon mudar.

¹³Jala mardekdehan ma bintang angka na di langit i tu tano, songon di hau antajau, na mameuthon parbuena, ia jumpa hinutur ni alogo na gogo.

¹⁴Jadi dibalun ma langit i songon surat na binalun, meret ma nasa dolok dohot pulo sian inganannasida.

¹⁵Gabe martabuni ma angka raja ni tano on dohot angka na sangap, angka induk ni soldadu, angka na mora dohot angka na gogo, angka anak somang nang angka anak mata: Martabuni be ma tu angka liang dohot batu na di dolok.

¹⁶Gabe didok nasida ma tu angka dolok dohot batu: Tinggang i jala hungkupi hamu ma hami maradophon bohi ni na hundul di habangsa i dohot maradophon rimas ni Birubiru i!

¹⁷Ai nunga ro ari ni rimasnasida na balga i; tung ise tartahan i?

7¹(I.) Dung salpu i, huida ma opat surusuruan jongjong di na opat desa ni tano i, angka na maniop na opat alogo ni tano i, asa unang mangombus alogo di tano, nang di laut nang tu sada hau pe.

²Dung i huida ma surusuruan na asing hehe sian habinsaran ni mata ni ari, na maniop

sahap ni Debata na mangolu, jadi balga ma soarana manjouhon dompak surusuruan na opat i, angka naung manjalo sahala mangago tano dohot laut.

³Ninna ma: Unang ma ago hamu tano nang laut nang angka hau, paima husahapi hami angka naposo ni Debatanta di bohinasida be!

⁴Laos hubege do bilangan ni angka na tarsahap i: Saratus opatpulu opat ribu sian saluhut marga ni halak Israel:

⁵Sian marga Juda sampuludua ribu angka na tarsahap, sian marga Ruben sampuludua ribu, sian marga Gad sampuludua ribu,

⁶sian marga Aser sampuludua ribu, sian marga Naptali sampuludua ribu, sian marga Manasse sampuludua ribu,

⁷sian marga Simeon sampuludua ribu, sian marga Lepi sampuludua ribu, sian marga Isasar sampuludua ribu,

⁸sian marga Zebulon sampuludua ribu, sian marga Josep sampuludua ribu, sian marga Benjamin sampuludua ribu angka na tarsahap.

⁹(II.) Dung salpu i, adong ma hubereng mansai torop, na so dapot bilangan ni jolma, sian nasa bangso, marga dohot houw dohot hata, angka na jongjong diadopan ni habangsa i dohot di adopan ni Birubiru i, angka na maruloshon abit na saksak jala na maniop maremare di tangannasida.

¹⁰Gogo ma soaranasida manjoujou, angka ninna ma: Tua ma di Debatanta, na mangkunduli habangsa i, dohot di Birubiru i!

¹¹Jadi jongjong ma saluhut surusuruan i humaliang habangsa i dohot humaliang angka sintua i dohot parngolu na opat i, dung i manungkap ma nasida di jolo ni habangsa i huhut marsomba tu Debata.

¹²Ninna nasida ma: Amen! Pujipujian dohot hasangapon dohot hapistaran dohot hamauliateon dohot hagogoon dohot hatoguon ma di Debatanta ro di salelenglelengna! Amen.

¹³Dung i mangalusi ma sada sian angka sintua, didok ma mandok ahu: Ise do angka i; jala sian dia do ro angka na maruloshon abit na saksak i?

¹⁴Jadi hudok ma mandok ibana: Ale tuanku, ho do umbotosa. Gabe didok ma tu ahu: I ma angka naung ro sian haporsuhon godang; nunga diburi nasida abitnasida jala dipasaksak di bagasan mudar ni Birubiru i.

¹⁵Ala ni i sai di jolo ni habangsa ni Debata do nasida, mangoloi Ibana arian dohot borngin di bagasan jorona i, jala Ibana, na mangkunduli habangsa i, ma paulihon inganan di atasnasida.

¹⁶Ndang be male nasida, ndang be mauas, ndang be ditinggang las ni ari nasida, manang dia na mohop pe.

¹⁷ Ai parmahanon ni Birubiru na di parsitongaan ni habangsa i do nasida jadi togihononna ma nasida tu angka mual aek hangoluan, jadi apusan ni Debata nasa iluilsian matanasida.

8¹ (I.) Jadi dung diungkap sahap na papituhon i, hohom ma angka na di banua ginjang i, arga satonga jom lelengna.

² Dung i huida ma na pitu surusuruan, na jongjong di adopan ni Debata, jadi dilehon ma tu nasida pitu sarune.

³ Dung i ro ma surusuruan na asing, jongjong tondongkon langgatan pamelean i, ditiop ma pardaupaan sere, gabe dilehon ma tu ibana godang daupa, asa lehononna i tu atas langgatan sere na di jolo ni habangsa i, manambai tangiang ni saluhut angka na badia.

⁴ Gabe manaek ma timus ni daupa i, tamba ni tangiang ni angka na badia i, sian tangan ni surusuruan i tujolo ni Debata.

⁵ Dung i dibuat surusuruan i ma pardaupaan i, digohi ma i dohot api na sian langgatan i, didabu ma i tu tano i, gabe masa ma angka ronggur dohot soara na mardoromdorum, angka hilap dohot lalo.

⁶ (II.) Jadi marhobas ma na pitu surusuruan, na maniop sarune na pitu i, asa dipalu sarunena be.

⁷ Gabe dipalu na parjolo i ma sarunena, jadi masa ma ambolas dohot api saor mudar

didabu tu tano i, gabe mosok ma sapartolu ni tano i, mosok ma dohot sapartolu ni angka hau, mosok ma nang saluhut duhutduhut na rata i.

⁸Dung i dipalu surusuruan na paduahon ma sarunena, gabe didabu ma api tu laut songon dolok na balga na marsigorgor, gabe mudar ma sapartolu ni laut i.

⁹Laos mate ma sapartolu ni angka na tinompa na mangolu di laut, rendep ma sapartolu ni angka parau.

¹⁰Dung i dipalu surusuruan na patoluhon ma sarunena, gabe madabu ma sian langit sada bintang na balga, na marsigorgor songon palito, laos ditinggang ma sapartolu ni angka batang aek dohot mual.

¹¹Apsintos (hapaeton) do goar ni bintang i; jadi gabe paet do sapartolu ni aek i, laos mate do torop halak dibahen aek i, naung gabe paet.

¹²Dung i dipalu surusuruan na paopathon ma sarunena, gabe hona pungkul ma sapartolu ni mata ni ari dohot sapartolu ni bulan dohot sapartolu ni angka bintang, gabe mangkolom ma na sapartolu i, laos so marsinondang be na sapartolu i arianna, borngin i pe songon i do.

¹³Dung i hubereng, jadi hubege ma sada pidong raja ualu habang martongatonga langit; marsoara na gogo do ibana mandok: Marjea, marjea, marjea ma angka na

mangingani tano i, horhonon ni soara na tading i dope, i ma sarune ni surusuruan na tolu nari, angka na naeng marsarune dope!

9¹ (I.) Dung i dipalu surusuruan na palimahon ma sarunena. Gabe huida ma bintang sada madabu sian langit tu tano i, jadi dilehon ma tu ibana anak hinsu ni ruang parbanua toru.

²Gabe diungkap ma ruang parbanua toru i, jadi manaek ma timus sian ruang i songon timus ni pamurunan na balga, gabe mangkolom ma mata ni ari ro di parlangitan, dibahen timus na sian ruang i.

³Jadi marruaran ma angka sihapor sian timus i tu tano i, dung i dilehon ma tu nasida huaso songon huaso ni hala di tano on.

⁴Jadi dipaksa ma nasida, unang disegai duhutduhut ni tano i, manang angka na rata, manang agia sada hau, ia so holan jolma, angka na so marsahap di pardompahanna sian Debata.

⁵Dipaksa do nasida, unang mamusa; sipaporsukporsuhonna do jolma i lima bulan lelengna. Ia porsukna suman tu pangonai ni hala, jumpa didoit jolma.

⁶Luluan ni jolma ma hamatean di angka ari i, alai ndang jumpangsa; mangido do rohanasida, naeng mate nian, alai maporus do hamatean i sian nasida.

⁷Ia rupa ni angka sihapor i suman do tu hoda, naung hobas tu parmusuon; ia di

ulunasida dijujung do tumpal songon sere. Ia bohinasida songon bohi ni jolma do idaon;

⁸ia obuknasida songon obuk ni boruboru, jala iponnasida songon ipon ni singa.

⁹Marbajubaju do nasida suman tu bajubaju bosi; ia pangkuling ni habonghabongnasida songon soara ni torop hureta na tinait ni hoda, na marlojong tu tongtangan.

¹⁰Marihur nasida songon ihur ni hala na marsorop; laos di bagasan ihurnasida do huasonasida, i ma na mangago angka jolma, leleng ni lima bulan.

¹¹Ia raja na manggomgom nasida, surusuruan sada sian banua toru, na margoar Abdon di hata Heber; ia di hata Junani Apollion do goarna.

¹²Nunga salpu jea na parjolo; ida ma, na ro ma jea dua nari, dung salpu on!

¹³(II.) Dung i dipalu surusuruan na paonomhon na sarunena. Jadi hubege ma sada soara sian na opat suhi ni langgatan sere na di jolo ni Debata.

¹⁴On do hatana tu surusuruan paonomhon na marsarune i: Harhari ma surusuruan na opat na tambat di topi ni batang aek Euprat na balga i!

¹⁵Jadi malua ma surusuruan na opat i, angka naung pinarade, asa hobas di ombasna, di arina, di bulanna, di taonna, laho mambunu sapartolu ni hajolmaon.

¹⁶Ia torop ni angka parporang na mangkunduli hoda, dua loksa hali loksa do; hubege do bilangannasida.

¹⁷Songon on do huida di bagasan tondingku angka hoda nang angka na mangkundulisa: Dialithon do angka bajubaju partahanan na songon api deba, na deba angka na rara, na deba angka na gorsing songon barerang. Ia ulu ni angka hodanasida songon ulu ni singa; na puas do sian babanasida api mardongan timus dohot barerang.

¹⁸Hinorhon ni haporsuhon na tolu i tarbunu do sapartolu ni hajolmaon, ima hinorhon ni api dohot timus dohot barerang, angka na puas sian babanasida.

¹⁹Ai di bagasan angka babanasida dohot ihurnasida do gogo ni angka hoda i, ai suman tu ulok do angka ihurnasida, angka na marulu; marhitehite i do nasida mangago.

²⁰Anggo angka jolma na tading, na so binunu ni angka haporsuhon i, laos so dipauba do rohanasida, tumadingkon niula ni tangannasida, asa unang be nian marsomba nasida tu sibolis manang tu ajiajian, angka na sian sere, sian perak, tombaga, hau dohot batu, angka na so tarbahen marnida manang marbinege manang mardalan pe.

²¹Ndang dipauba nasida rohanasida tumadingkon pamunuon nang na pauli rasun nang parmainanon ro di panangkoon.

10¹(I.) Dung i huida ma surusuruan na asing na gogo, tuat sian banua ginjang; na maruloshon ombun, halibutongan do di atas uluna, songon mata ni ari do bohina, ia patna songon tiang api do.

²Ditiop do di tanganna buku sada na metmet, naung binungka; diojakkon do patna siamun tu laut, ia patna hambirang tu tano.

³Gogo ma soarana manjoujou songon singa na maungaung; jadi di na manjoujou i ibana, mangkuling ma pitu ronggur.

⁴Jadi dung mangkuling ronggur na pitu i, naeng manurat ahu; jadi hubege ma soara sian banua ginjang na mandok: Sahapi ma na hinatahon ni ronggur na pitu i; unang ma surathon!

⁵Dung i dipatoltol surusuruan, na huida jongjong di atas laut dohot tano, ma tanganna siamun dompak ginjang.

⁶Jadi manolon ma ibana tu Debata na mangolu ro di salelenglelengna, naung tumompa langit dohot isina, tano padohot isina, nang laut ro di na dibagasanna, paboa na so masa be na paginjangkon tingki:

⁷Tung di ari ni soara ni surusuruan na papituhon, di na naeng paluonna sarune i, disi ma patuluson hahomion ni Debata, songon naung binaritaonna i tu angka naposona, i ma angka panurirang i.

⁸Ia soara, naung hubege hian sian banua ginjang, mangulahi mangkulingi ahu, ninna

ma: Laho ma, jalo ma buku naung binungka i, na di tangan ni surusuruan, na jongjong di atas laut dohot tano!

⁹Dung i hutopot ma surusuruan i, hudokkon ma ibana, mangalehon buku i tu ahu. Jadi didok ma: Na, pangan ma; gabe paet ma i di butuham, alai tonggi songon situak ni loba anggo di pamanganmu.

¹⁰Jadi hujalo ma buku i sian tangan ni surusuruan i jala hupangan, gabe tonggi ma i di bagasan pamanganku songon situak ni Loba; jadi dung hubondut, gabe paet do i dihilala butuhanku.

¹¹Jala angka didok ma tu ahu: Ingkon ulahanmu dope manurirangi dompak angka marga dohot bangso dohot hata, nang dompak torop raja.

11 ¹(I.) Dung i dilehon ma tu ahu arung sada songon tungkot, huhut ma didok: Hehe ma ho, suhati ma joro ni Debata ro di langgatan i, nang angka na marsomba disi.

²Laosi ma ia alaman parduru ni joro i, unang suhati anggo i; ai nunga dipasahat i tu angka parbegu: Padegedegeonnasida do huta na badia i, leleng ni opatpulu dua bulan.

³Dung i lehononku ma tu na dua sitindangingku, asa manurirangi nasida, maruloshon hori, leleng ni saribu duaratus onompulu ari.

⁴Nasida ma na dua hau jetun jala na dua parpalitoan, angka na jongjong di adopan ni Tuhan ni tano i.

⁵Ia adong na naeng manjahati nasida, runkar ma api sian pamangannasida, mangallang musunasida; ia adong na naeng manjahati nasida, ingkon songon i do ibana mate.

⁶Na marhuaso do nasida mangkinsu langit, asa unang ro udan di angka ari panurirangonnasida; jadi na marhuaso do nasida, paimbarhon angka aek gabe mudar, jala mangkonahon nasa haporsuhon tu tano i, manang beha pe jotjotna di rohanasida.

⁷Anggo dung dipatulus nasida panindangionnasida, nangkok ma binatang i sian banua toru marmusu dompak nasida; taluhononna ma nasida jala pusaonna.

⁸Peak ma bangkenasida di alaman ni huta na balga i; ia goarna partondion Sodom dohot Misir, ai disi do naung tarpajal nang Tuhannasida i.

⁹Dung i paberengberengon ni halak sian angka bangso dohot marga dohot hata dohot houw ma bangkenasida tonga opat ari lelengna: Ndang diloas tartanom bangkenasida.

¹⁰Marlas ni roha ma angka pangisi ni tano i mida nasida jala mariaia, pola masitongosan silua saman nasida, ala naung

dipaporsukporsuk panurirang na dua i angka pangisi ni tano i.

¹¹ Jadi dung salpu tonga opat ari, songgop ma tu nasida tondi hangoluan na sian Debata, gabe diojakkon ma patnasida, jadi lalu ma hatahuton godang tu angka na marnida nasida.

¹² Jala dibege nasida ma soara na gogo sian banua ginjang, na mandok tu nasida: Manaek ma hamu tuson! Dung i manaek ma nasida di bagasan ombun tu banua ginjang, dipanotnoti angka musunasida.

¹³ Jadi di na sangombas i masa ma lalo bolon, marumpak ma saparsampulu ni huta i, mate ma di lalo i pitu ribu jolma, gabe mabiar ma angka na tading i, dipasangap ma Debata na di banua ginjang i.

¹⁴ Nunga salpu jea na paduahon; tibu ma ro jea na patoluhon!

¹⁵ (II.) Dung i dipalu surusuruan na papituhon ma sarunena; jadi masa ma soara na gogo di banua ginjang, angka dipandok: Nunga sahat tu Tuhanta i dohot tu Kristusna i harajaon ni hasiangan on; bangkit Raja ma Ibana ro di salelenglelengna!

¹⁶ Ia sintua na duapulu opat na di adopan ni Debata, angka na masihunduli habangsana be, dipatungkap ma bohinasida huhut disomba ma Debata.

¹⁷ Ninna nasida ma: Na mandok mauliate do hami tu Ho, ale Tuhan Debata, Sigomgom

saluhutna, na mangolu nuaeng nang najolo,
ala naung dialithon Ho hagogoonmu na balga
i, jala ala naung bangkit Raja Ho!

¹⁸Nunga tarrimas angka bangso, gabe ro
ma rimasmu, dapot ma tingki ni angka naung
mate asa niuhuman, huhut mangalehon upa
tu angka naposom, i ma angka panurirang i
dohot angka na badia, angka na mangkabiari
Goarmu, angka na metmet ro di angka na
balga, huhut mangago angka na mangago
tano i.

¹⁹Dung i tarungkap ma joro ni Debata
na di banua ginjang i, gabe tarida ma poti
parpadananna di jorona i, jadi masa ma
angka hilap dohot soara, ronggur dohot lalo,
nang ambolas na balga.

12¹(I.) Dung i tarida ma partinandaan na
balga di langit: I ma sada boruboru,
na maruloshon mata ni ari, bulan i do ditoru
ni patna, sampuludua bintang do tumpal ni
uluna.

²Na gabegabean do ibana, jala
manganguhi, ai pambebeonna do
tongon jala mangae laho mangintubu.

³Dung i tarida ma partinandaan na asing di
langit, i ma sada naga na bolon songon api;
pitu do uluna, sampulu tandukna, pitu tumpal
harajaon di angka uluna i.

⁴Jadi disarat ihurna i sapartolu ni angka
bintang na di langit i, gabe didabu tu tano i.
Jadi jongjong ma naga i di jolo ni boruboru,

na naeng mangintubu, asa bondutonna posoposona, dung tubu.

⁵Dung i ditubuhon ma posoposo baa, na naeng marmahanhon sogot nasa bangso marhitehite tungkot bosi. Jadi tarhinsat ma anakna i tu adopan ni Debata dohot tu habangsana.

⁶Na maporus do boruboru i tu halongonan, tu ingananna na pinarade ni Debata, asa disi dipatureture leleng ni saribu duaratus onompulu ari.

⁷(II.) Dung i masa ma hamusuon di banua ginjang, martongtang ma Mikhael rap dohot angka surusuruanna dompak naga i. Marmusu ma nang naga i rap dohot angka surusuruanna.

⁸Alai ndang manahan nasida; ndang be dapot inganannasida di banua ginjang.

⁹Jadi dipabali ma naga na balga i, ulok na robi i, na margoar sibolis dohot setan, na paototohon liat portibi on, dipabali ma ibana tu tano i, dipabali ma nang angka surusuruanna raphon ibana.

¹⁰Dung i hubege ma soara na gogo di banua ginjang, na mandok: Nunga sahat nuaeng haluaon dohot hagogoon dohot harajaon ni Debatanta dohot hamuliaon ni Kristusna; ai nunga dipabali pangasung i, na mangasungi angka hahaangginta arian dohot borngin di jolo ni Debata.

¹¹ Nunga ditaluhon nasida ibana hinorhon ni mudar ni Birubiru i dohot hinorhon ni hata na hinatindangkonnasida; ndang diparhamaol nasida hosanasida rasirasa mate.

¹² Dibahen i marlas ni roha ma hamu, angka banua ginjang dohot pangisina! Marjea ma tano i dohot laut, ai nunga tuat sibolis i tu hamu, marrimas situtu; ai diboto, otik nama tingkina!

¹³ Alai dung diida naga i, naung bali ibana tu tano, dilele ma boruboru na tumubuhon anak i.

¹⁴ Gabe dilehon ma tu boruboru i dua habonghabong ni pidong raja ualu na balga i, asa habang tu ingananna di halongonan, asa disi dipatureture sangombas dohot dua ngombas dohot satonga ombas, holang sian adopan ni ulok i.

¹⁵ Ia ulok i, dibursikkon do sian babana aek na sabatang aek sian pudi ni boruboru i, anggiat diauphon batang aek i ibana.

¹⁶ Alai diurupi tano i ma boruboru i, ai dipangangang tano i do babana, dibondut do batang aek, na binursikkon ni naga i sian babana.

¹⁷ Jadi tarrimas ma naga i mida boruboru i, gabe laho ma ibana marmusu dompak angka pomparanna na tading i, angka na mangaradoti patik ni Debata jala marsihohot di panindangion ni Jesus. Jala didapothon ma tu pasir ni laut.

13¹ (I.) Dung i huida ma ruar sian laut i sada binatang: Sampulu do tandukna, pitu uluna; diatas ni angka tandukna adong ma sampulu tumpal, jadi angka goar panginsahion do di angka uluna i.

² Suman tu babiat do binatang i huida, patna songon pat ni gompul, babana songon baba ni singa; jadi dilehon naga i ma tu ibana gogona nang habangsana dohot sahala godang.

³ Dung i huida ma sian angka uluna sada naung hona tagil, sihamatehononna hian; hape gabe malum do bugangna hamatean i. Jadi longang ma liat portibi on paidaida binatang i.

⁴ Gabe disomba nasida ma naga i, ala ibana mangalehon sahala tu binatang i; laos disomba ma binatang i, angka ninna ma: Ise ma tudos tu binatang i; ise tarbahen marmusu dompak ibana?

⁵ Dung i dilehon ma tu ibana soara mangkatahon hata na balga dohot panginsahion, jala dilehon tu ibana huaso mangulahonsa leleng ni opatpulu dua bulan.

⁶ Gabe dibungka ma pamanganna manginsahi Debata, manginsahi Goarna dohot jorona, ro di angka na maringanan di banua ginjang.

⁷ Jadi dilehon ma tu ibana huaso, marmusu dompak angka na badia ro di na manaluhon nasida; laos dilehon tu ibana sahala

manggomgomi saluhut marga dohot houw
dohot hata dohot bangso.

⁸Sombaon ni saluhut pangisi ni tano on ma
ibana, nasa na so tarsurat goarna olat ni
haojak ni hasiangan on di buku hangoluan
ni Birubiru naung tarbunu i.

⁹Ganup na marpinggol, ditangihon ma!

¹⁰Nasa na martaban, ingkon tartaban do;
nasa na mambunu dohot podang, ingkon
mate bunuon ni podang! Disi ma jumpang
habengeton dohot haporseaon ni angka na
badia!

¹¹(II.) Dung i huida ma binatang na asing
ruar sian tano i: Dua do tandukna, songon
tanduk ni birubiru; songon hata ni naga i do
ia hatana.

¹²Diulahon do nasa huaso ni binatang na
parjolo i di jolona. Disuru do tano i dohot
pangisina sumomba binatang na parjolo i,
nampuna bugang hamatean naung gabe
malum i.

¹³Diula do tanda angka na balga, pola
dipatuat do api sian langit tu tano di jolo ni
jolma.

¹⁴Dililuhon do angka na maringanan di tano
i hinorhon ni angka tanda, naung dilehon
tu ibana, sipatupaonna di jolo ni binatang
i, ai didokkon do angka na maringanan di
tano i paulihon gambaran di binatang, naung
mabugang najolo binahen ni podang, gabe
mangolu.

¹⁵Laos dilehon do huaso tu ibana, mangalehon hosa tu gambaran ni binatang i, gabe marsoara do gambaran ni binatang i, jala mambahen mate nasa na so sumomba gambaran ni binatang i.

¹⁶Jadi disuru ma saluhutna, na metmet nang na magodang, na mora nang na pogos, anak mata nang hatoban, mambahen partinandaan tu tangannasida siamun manang tu pardompahannasida.

¹⁷Asa unang tarbahen halak manuhor manang manggadis, anggo so di ibana partinandaan i, i ma goar ni binatang i manang bilangan ni goarna.

¹⁸Dison do habisuhon! Dirajumi na marroha ma bilangan ni binatang i, ai bilangan nijolma do i. Onomratus onompulu onom do bilangan i.

14¹(I.) Dung i hubereng: Jongjong ma Birubiru i di dolok Sion, adong ma donganna saratus opatpulu opat ribu, angka naung tarsurat Goarna dohot Goar ni Amana di pardompahannasida.

²Jadi hubege ma soara sian banua ginjang songon parhasak ni aek godang jala songon parlantas ni ronggur na gogo; ia soara na hubege i, suman nang tu parhasapion ni angka parhasapi, angka na mamalu hasapina.

³Diendehon nasida do ende na imbaru di jolo ni habangsa i dohot di jolo ni parngolu na opat i nang angka sintua i. Ndang targuruhon

manang ise ende i, nda holan na saratus opatpulu opat ribu, angka naung ditobus sian tano i.

⁴I ma angka na so pasaorhon dirina tu boruboru, angka na marbaju do nasida; diihuthon nasida do Birubiru i, manang tudia pe i laho. Nasida do angka na tartobus sian hajolmaon, patumonaan di Debata dohot di Birubiru i.

⁵Ndang adong jumpang gabus di pamangannasida; ndang adong agia aha lindangnasida.

⁶(II.) Dung i huida ma surusuruan na asing habang martongatonga langit, na umpeop barita na uli sisalelenglelengna, sibaritahononna tu angka pangisi ni tano i, tu saluhut bangso dohot marga dohot hata dohot houw.

⁷Gogo ma soarana mandok: Habiari hamu ma Debata jala pasangap Ibana, ai nunga dapot tingki ni panguhumonna! Somba hamu ma Ibana, Sitompa langit dohot tano dohot laut ro di angka mual aek!

⁸Dung i mangihut ma surusuruan na asing, na mandok: Nunga pesan, nunga pesan Babel na balga, na painumhon anggur harimason ni parmainanonna tu saluhut bangso.

⁹Mangihut ma tu nasida surusuruan na patoluhon, na marsoara na gogo mandok: Molo adong halak na sumomba binatang i dohot gomaranna jala na manjalo

partinandaan i tu bohina manang tu tanganna:

¹⁰Ingkon minum do ibana sian anggur harimason ni Debata, naung polin dipadiri tu panginuman ni rimasna, jala sipaporsukporsuhon do ibana di bagasan api dohot barerang diadopan ni angka surusuruan na badia i dohot di adopan ni Birubiru i.

¹¹Manaek ma timus ni haporsuhon nasida ro di salelenglelengna; ndang dapot paradianan arian nang borngin angka na marsomba tu binatang i dohot tu gomaranna, ro di angka naung manjalo partinandaan ni goarna.

¹²Disi ma jumpang habengeton ni angka na badia, angka na mangaradoti patik ni Debata dohot haporseaon di Jesus.

¹³Jadi hubege ma soara sian banua ginjang na mandok: Surathon ma: Martua ma angka na mate di bagasan Tuhan i, olat ni on! Tutu, didok Tondi i, mansohot ma nasida sian parungkilon nasida, ai na mangihut ma tu nasida niulanasida i!

¹⁴(III.) Dung i hubereng ma: Adong ma ombun sada na bontar, jadi hundul ma di atas ombun i sahalak na suman tu anak ni jolma, na martumpal sere di uluna, jadi sasabi na tajom di tanganna.

¹⁵Jadi ruar ma surusuruan na asing sian joro i, na marsoara na gogo manjouhon tu na hundul di atas ombun i: Suruhon ma sasabim

jala sabihon, ai nunga dapot tingki gotilon, ai nunga masak situtu sigotilon na di tano i.

¹⁶Gabe didabu na hundul di atas ombun i ma sasabina tu tano i, jadi disabi ma tano i.

¹⁷Laos ruar ma surusuruan na asing sian joro na di banua ginjang i; dohot do ibana maniop sasabi na tajom.

¹⁸Gabe ruar ma sian langgatan i surusuruan na asing, na marhuaso taringot tu api, jadi marsoara na gogo ma ibana manjoujou dompak sitiop sasabi na tajom i, didok ma: Suruhon ma sasabim na tajom i, gotili ma angka parbue ni hau anggur na di tano i, ai nunga malamun parbuena!

¹⁹Jadi didabu surusuruan i ma sasabina tu tano i, digotili ma hau anggur ni tano i, didabu ma tubagasan pangilangan harimason na bolon na di Debata.

²⁰Dibalian ni huta i ma didegei pangilangan i, gabe puas ma mudar sian pangilangan i sahat ro di kongkang ni angka hoda, duaratus paal daona.

15¹(I.) Dung i huida ma di banua ginjang tanda na asing na balga jala halongangan: Adong ma pitu surusuruan, na umpeop pitu haporsuhon na parpudi; ai di bagasan i do marujung rimas ni Debata.

²Jadi huida ma laut sada songon sorminan, na marsaor api; na jongjong do di topi laut sorminan i angka naung monang maralohon binatang i nang taringot tu gombaranna

dohot bilangan ni goarna, ditiop do angka hasapi ni Debata.

³Jadi diendehon nasida ma ende ni Musa, naposo ni Debata, dohot ende ni Birubiru i, angka ninna ma: Na balga jala halongangan do angka ulaonmu, ale Tuhan Debata. Sigomgom saluhutna; na tigor jala na sintong do angka dalanmu, ale Raja ni angka bangso!

⁴Tung ise ma na so mangkabiari Ho, ale Tuhan, dohot pasangaphon Goarmu? Ai sasada Ho do na badia; ai na ro ma saluhut bangso marsomba tu jolom, ai nunga gabe patar angka panguhummu na tigor i!

⁵(II.) Dung i huida ma, mungkap ma joro ni undungundung panindangion na di banua ginjang i.

⁶Jadi ruar ma sian joro i na pitu surusuruan na umpeop haporsuhon na pitu i; haen na ias na marlinanglinang do diuloshon nasida, jala marhohos sere di pamatangna.

⁷Gabe dilehon sada sian na opat parngolu i ma tu na pitu surusuruan i pitu saoran sere, angka na gok rimas ni Debata, na mangolu ro di salelenglelengna.

⁸Jadi gok timus ma joro i, dibahen hasangapon ni Debata dohot hagogoonna; ndang tarbahen manang ise mambongoti joro i, paima marujung na pitu haporsuhon, sipatupaon ni surusuruan na pitu i.

16 ¹(I.) Dung i hubege ma soara na gogo sian joro i, na mandok tu surusuruan

na pitu i: Borhat ma hamu, usehon hamu ma saosan na pitu i, inganan ni rimas ni Debata, tu tano i!

²Gabe borhat ma na parjolo, diusehon ma saosanna tu tano i. Jadi masa ma baro na roa jala na jahat di jolma, angka naung manjalo partinandaan ni binatang i, jala naung marsomba tu gombarnya.

³Dung i diusehon na paduahon ma saosanna tu laut, jadi gabe mudar ma i songon mudar ni na mate; laos mate ma nasa na marhosa di laut.

⁴Dung i diusehon na patoluhon ma saosanna tu angka batang aek dohot tu angka mual aek; laos gabe mudar ma angka i.

⁵Jadi hubege ma soara ni surusuruan, sigomgom angka aek, mandok: Na tigor do Ho, na mangolu i nuaeng nang najolo, na badia do Ho, ala songon i panguhumonmu!

⁶Ai didurushon nasida do mudar ni angka na badia dohot angka panurirang, gabe mudar do dipainumhon Ho tu nasida; patut ma i di nasida!

⁷Jadi hubege ma langgatan i mandok: Olo, ale Tuhan Debata, Sigomgom saluhutna; na sintong jala na tigor do angka uhummu!

⁸Dung i diusehon na paopathon ma saosanna tu mata ni ari, jadi dilehon ma tu mata ni ari huaso mamosohi angka jolma marhitehite api.

⁹Gabe mosok situtu ma angka jolma, jala diinsahi nasida do Debata na marhuaso manongos angka haporsuhon i, laos so dipauba nasida rohanasida pasangaphon Debata.

¹⁰Dung i diusehon na palimahon ma saoanna tu habangsa ni binatang i, gabe mangkolom ma harajaonna. Jadi dihaharati nasida do angka dilanasida dibahen hansitna i.

¹¹Gabe diinsahi nasida ma Debata Parbanua ginjang i, dibahen hansit ni baro na niaenasida; laos so dipauba rohanasida, manadingkon angka ulaonnasida nian.

¹²Dung i diusehon na paonomhon ma saoanna tu batang aek Euprat na balga i. Jadi marsik ma aekna, asa pinarade dalan ni angka raja na sian habinsaran ni mata ni ari.

¹³Dung i huida ma tolu tondi na hodar songon tohuk, ruar sian baba ni naga i dohot sian baba ni binatang i, songon i sian baba ni panurirang pargapgap i.

¹⁴Ai tondi ni angka sibolis do i, na mambahen angka tanda i; angka na borhat tumopot angka raja ni liat portibi on, laho papunguhon nasida tu hamusuon na di ari na bolon i, ari ni Debata, Sigomgom saluhutna.

¹⁵Ida ma, na ro ma Ahu songon panangko! Martua ma na dungo jala na mangaramoti abitna, asa hobas, asa unang marsaemara ibana mardalan, gabe tarida hailaonna!

¹⁶ Jadi dipaluhut ma nasida tu sada inganan, na margoar Armagedon, ia di hata Heber.

¹⁷ Dung i diusehon na papituhon ma saoanna tu aoangaoang. Jadi ro ma soara na gogo sian joro i, sian habangsa i, na mandok: Nunga saut!

¹⁸ Dung i masa ma angka hilap dohot soara dohot ronggur, masa ma dohot lalo bolon, songon na so dung masa, olat ni dung adongjolma di tano i, lalo na sai bolon i.

¹⁹ Jadi mabola ma huta na bolon i, gabe tolu ponggol; marrumpahan ma ia huta ni angka bangso. Jadi diingot Debata ma Babel na balga i, mangalehon tu ibana panginuman na gok anggur pangarimasan dohot hamuruhonna.

²⁰ Gabe maporus ma saluhut angka pulo, jadi angka dolok ndang adong jumpang be.

²¹ Jala madabu ma ambolas na balga, na sahat i dokdokna, sian langit tu angkajolma; gabe diinsahi angkajolma i do Debata dibahen porsuk ni ambolas i, ai balga situtu do bernit ni haporsuhon i.

17¹ (I.) Dung i ro ma sada sian na pitu surusuruan, na umpeop saoan na pitu i, mangkatai dohot ahu, didok ma: Ro ma, hupatuduhon ma tu ho uhum na tu boruboru na jahat, na balga, na hundul di topi ni angka aek godang!

²Donganna marmainan do angka raja na di tano i, jala naung gabe mabuk do pangisi ni tano i dibahen anggur parmainanonna i.

³Jadi diluahon ma ahu di bagasan tondi tu halongonan. Jadi huida ma sada boruboru hundul di atas binatang na rara, na gok goar panginsahion, pitu do uluna, sampulu tandukna.

⁴Haen na rara dohot haen hasumba do abit ni boruboru i, na nilampisan dohot sere nang mata intan dohot mutiha; ditiop do di tanganna panginuman sere na gok hagigian dohot hahodaron sian parmainanonna i.

⁵Na tarsurat do di pardompahanna goar hahomion: Babel na balga, ina ni angka parmainan dohot angka hagigian na di tano on.

⁶Jadi huida boruboru i mabuk, dibahen mudar ni angka na badia dohot mudar ni angka sitindangi ni Jesus, gabe longang situtu ma rohangku marnidasa.

⁷Gabe didok surusuruan i ma mandok ahu: Boasa longang roham? Hupaboa ma tu ho hahomion ni boruboru on dohot binatang na mangusung ibana, na marulu pitu jala martanduk sampulu.

⁸Ia binatang na niidami, na mangolu do i najolo, ndang mangolu be nuaeng, na nangkok ma i muse sian banua toru, asa laho tumopot hamagoan. Gabe longang ma roha ni pangisi ni tano on, nasa na so tarsurat

goarna di buku hangoluan na sian mula ni hasiangan on, di na idaonnasida binatang i, naung mangolu najolo jala ndang mangolu be nuaeng, gabe ro muse.

⁹On do lapatanna na marhabisuhon: Na pitu ulu, i ma pitu dolok, na hinundulan ni boruboru i, jala pitu raja do i.

¹⁰Nunga pesan na lima, disi dope na sada, ndang dope ro na sada nari; jala dung ro, satongkin sambing ibana mian.

¹¹Ia binatang na mangolu najolo, gabe ndang mangolu be, i do na pauluhon; laos sian na pitu ondeng do ibana, jadi na laho tumopot hamagoan.

¹²Ia na sampulu tanduk na niidami, sampulu raja do i, na so manjalo dope harajaon, alai jaloonnasida do huaso mangarajai sangombas, rap dohot binatang i.

¹³Saroha ma nasida, lehononnasida do gogo dohot huasonasida tu binatang i.

¹⁴Na marmusu ma nasida dompak Birubiru i, gabe taluhonon ni Birubiru i ma nasida, ala Ibana Tuhan ni angka tuan jala Raja ni angka raja; ia angka donganna, i ma angka na tarjou, angka na tarpillit jala haposan.

¹⁵Dung i didok ma tu ahu: Ia angka aek na niidami, inganan ni boruboru na jahat i, i ma angka bangso, angka pungan bolon, angka marga dohot hata.

¹⁶Ia tanduk na sampulu, na niidami, dohot binatang i, hosomannasida ma boruboru na

jahat i, lungunan ma bahenonnasida ibana
jala marsaemara, allangonnasida ma sibukna,
jala tutungonnasida ma ibana tu api.

¹⁷Ai dipahehe Debata do rohanasida
pasauthon tahina hian, mangulahon hasadaon
ni roha, mangalehon harajaonnasida tu
binatang i, paima saut angka hata ni Debata.

¹⁸Ia boruboru na niidami, i ma huta na
balga, na mangarajai angka raja na di tano
on.

18¹(I.) Dung salpu i, huida ma
surusuruan na asing tuat sian banua
ginjang, na marhuaso godang, gabe tiur ma
tano i dibahen hasangaponna.

²Gogo ma soarana manjoujouhon: Nunga
pesan, nunga pesan Babel na balga i, gabe
inganan ni angka sibolis jala hurungan ni
nasa tondi na hodar jala huruhuruan ni nasa
pidong na ronsam, angka hagigian.

³Ai naung minum do saluhut bangso
sian anggur pangarimasan na sian
parmainanonna, jala donganna, marmainan
do angka raja na di tano on; naung gabe
mamora do angka partigatiga ni tano on
binahen ni hagogoon ni hageduhonna.

⁴Dung i hubege ma soara na asing sian
banua ginjang, na mandok: Laho ma hamu,
ale bangsongku, ruar sian i, asa unang
partohap hamu di angka dosana, unang dohot
hamu manjalo di haporsuhonna i!

⁵ Ai nunga sahat ro di banua ginjang angka dosana; nunga marningot Debata di angka hajahatonna.

⁶ Baloshon hamu tu ibana songon naung binahenna i, silompit ma bahen hamu marguru tu angka ulaonna; silompit dua ma tahuon hamu di ibana tu panginuman na sinaorhonna i!

⁷ Manang sadia hasangapon dohot pargadombuson na niaithonna tu dirina, na sai godang haporsuhon dohot arsak ni roha ma lehon hamu tu ibana? Ai didok ibana di bagasan rohana: Na hundul do ahu mangarajai, ndang na mabalu ahu, na so tupa idaonku arsak ni roha.

⁸ Dibahen i, di bagasan na sadari ma songgop tu ibana angka haporsuhon: Hamatean dohot andung dohot haraparon; dung i tutungon ma ibana tu api. Ai na gogo do Tuhan Debata, na manguhum ibana.

⁹ (II.) Angka raja na di tano on, angka donganna marmainan jala margadombus, i ma mananangisi jala mangandungi ibana, di na idaonnasida timus ni panutunganna i.

¹⁰ Na mandaodao nama nasida jongjong dibahen biarnasida mida parniahapanna i; ia hatanasida: Na marjea, na marjea do ho, huta na balga, huta Babel na togu i, ai di bagasan na sajom do lalu uhum na tu ho!

¹¹ Tangis ma angka partigatiga ni tano on, angka naung marsak mida ibana, ala so adong be na manuhor boniaganasida.

¹² I ma angka boniaga sere dohot perak, mata intan, mutiha, haen na bontar, hasumba, surta, abit na rara dohot nasa na hushus ro di ragam ni ulaula na sian gading, sian hau na arga, sian haksa, bosi dohot batu marmar,

¹³ angkup ni i ulu mamis dohot miak na hushus, pamurpuri dohot mir dohot haminjon, anggur, miak, itak, eme, horbo, birubiru, hoda, hureta, hatoban ro di hosa nijolma.

¹⁴ Nunga munsat sian ho parbue ni hau na hinasolohon ni roham; nunga mago sian ho nasa na uli jala na tiur berengon, na so tupa be jumpang angka i!

¹⁵ Angka na martigatihon sisongon i, angka naung gabe mamora binahenna i, jongjong mandaodao dibahen biarnasida mida parniahapanna, tumatangis jala manganguhi.

¹⁶ Ninna nasida ma: Na marjea, na marjea do ho, huta na balga, na marabithon abit na bontar dohot na rara dohot hasumba, na nilampisan dohot sere nang mata intan ro di mutiha, ai di bagasan sajom do gabe suda hamoraon na songon i!

¹⁷ Na jongjong mandaodao ma saluhut juaramudi dohot angka na marparau

mangkoris topilaut dohot anak parau ro di saluhut na marulaon di laut.

¹⁸Jadi manjoujou ma nasida marnida timus ni pamurunanna, ninna ma: Dia na tudos tu huta na balga i?

¹⁹Gabe dipirpirhon nasida ma orbuk tu ulunasida, jala manjoujou ma nasida huhut tumatangis jala manganguhi, angka ninna ma: Na marjea, na marjea do ho, huta na balga i; binahenna i do gabe mamora saluhut na marparau dilaut marhite sian hamoraonna, ai di bagasan sajom do dipanepnep!

²⁰(III.) Halashon ma i, ale banua ginjang, dohot hamu, angka na badia ro di angka apostel nang panurirang; ai nunga diluluhon Debata hamu tu ibana!

²¹Jadi dihindat sada surusuruan na gogo ma sada batu na salosung na bolon, didabu ma i tu laut, huhut ma didok: Songon i sahali mandanggurhon, bolongkononhon ma huta Babel na balga i, gabe ndang jumpang be!

²²Na so tupa be tarbege di bagasan ho soara ni angka parhasapi dohot siparende dohot partulila dohot parsarune; ndang jumpang be di bagasan ho nanggo sada ragam ni siula hapandean; jala ndang be tarbege di bagasan ho pangkuling ni panduda.

²³Na so tupa be marsinondang di bagasan ho nanggo palito sada, ndang tagamon tarbege be di bagasan ho soara ni pangoli dohot oroan, ai naung dirajai angka partigatigamu

do tano on, jala marhitehite hadatuonmu do gabe lilu angka bangso.

²⁴Na jumpang do di bagasan huta i mudar ni angka panurirang dohot angka na badia, ro di mudar ni saluhut naung tarseat di tano on.

19¹(I.) Dung salpu i, hubege ma di banua ginjang soara na gogo songon sian torop halak, na mandok: Halleluya! Rimpun di Debatanta do haluaon dohot hasangapon dohot hagogoon!

²Ai na sintong jala na tigor do angka uhumna, ai nunga diuhumi Ibana boruboru na jahat, na balga i, naung mangago tano on binahen ni parmainanonna, jala diluluhon Ibana do mudar ni naposona sian tanganna.

³Dung i didok nasida ma paduahalihon: Halleluya! Na manaek do timusna ro di salelenglelengna!

⁴Jala manangkap ma sintua na duapulu opat i ro di parngolu na opat i laho sumomba Debata, na hundul di habangsa i, angka ninna ma: Amen! Halleluya!

⁵(II.) Jadi ruar ma sada soara sian habangsa i na mandok: Puji hamu ma Debatanta, hamu saluhut naposona, na mangkabiari Ibana, angka na metmet nang angka na balga!

⁶Dung i hubege ma songon soara ni natorop situtu, songon soara ni aek godang, songon soara ni angka ronggur na gogo, na mandok: Halleluya! Ai nunga mangarajai Tuhan Debatanta, Sigomgom saluhutna!

⁷ Marlas ni roha ma hita jala mariaia, jala talehon ma tu Ibana hasangapon, ai nunga jumpang hasampuran raya ni Birubiru i; nunga hobas soripadana.

⁸ Nunga dilehon tu ibana abit na saksak jala na ias sialithononna. Ia abit na saksak i, i ma hapintoron ni angka na badia.

⁹ Laos didok ma tu ahu: Surathon ma: Martua do angka na jinou tu panganon ujuan ni Birubiru i! Jala didok do tu ahu: On do angka hata na sintong na sian Debata!

¹⁰ Jadi manungkap ma ahu tujolo ni patna, sumomba ibana, gabe didok ma tu ahu: Unang ma songon i! Donganmu naposo do ahu jala dongan ni angka hahaanggim, angka naung manjalo panindangion sian Jesus. Debata do sisombaonmu! Ai panindangion taringot tu Jesus i do tondi panurirangon.

¹¹ (III.) Dung i huida ma mungkap banua ginjang, tarida ma disi sada hoda sihapaspili; ia na hundul di ginjangna margoar Haposan jala Parsintong. Marhatigoran do Ibana manguhum jala marporang.

¹² Alai songon nala ni api do anggo matana, torop do tumpal harajaon di uluna; adong do Goarna tarsurat, na so binoto ni manang ise, ia so holan Ibana.

¹³ Diuloshon do abit na tinubar tu mudar, didok do Goarna: Hata ni Debata.

¹⁴ Mangihut do tu Ibana angka parangan na di banua ginjang, angka na mangkunduli

hoda sihapaspili; haen na saksak jala na ias do abitnasida.

¹⁵Na ruar do podang na tajom sian pamanganna, asa i tampulhononna tu angka bangso. Parmahanonna ma nasida dohot tungkot bosi, jala Ibana do mandege pangilangan ni anggur pangarimasian ni muruk ni Debata, Sigomgom saluhutna.

¹⁶Na tarsurat do Goarna di ulosna nang di gontingna: Raja ni angka raja jala Tuhan ni angka tuan.

¹⁷Dung i huida ma sada surusuruan jongjong di bagasan mata ni ari, na manjoujou marsoara na gogo, didok ma tu saluhut pidong angka na habang martongatonga langit: Ro ma hamu, marpungu ma hamu tu panganon na balga, na pinarade ni Debata!

¹⁸Naeng ma allangonmu sibuk ni angka raja dohot sibuk ni angka induk dohot sibuk ni angka pargogo dohot sibuk ni angka hoda ro di na hundul di ginjangna, sibuk ni angka anak mata dohot hatoban, nang na metmet nang na balga!

¹⁹Jadi huida ma binatang i dohot angka raja ni tano on ro di angka parangannasida, nunga marluhut laho marmusu dampak na hundul di atas hoda i nang dampak angka paranganna.

²⁰Gabe tartangkup ma binatang i rap dohot panurirang pargapgap i, naung mambahen angka tanda di jolona, parhiteanna

paotootohon angka na manjalo partinandaan ni binatang i ro di angka na sumomba gombaranna. Mangolu do na dua i didabu tu laut api na marsigorgor mardongan barerang.

²¹ Ia angka na tading i dipusa do dohot podang na ruar sian pamangan ni na mangkunduli hoda i, gabe butong ma saluhut pidong dibahen sibuknasida.

20¹ (I.) Dung i huida ma sada surusuruan tuat sian banua ginjang, na maniop anak hinsu ni banua toru, jala rante na balga do di tanganna.

² Jadi ditangkup ma naga i, ulok na robi i, i ma sibolis jala setan, gabe dirante ma ibana leleng ni saribu taon.

³ Laos didabu ma ibana tu banua toru, jala dihinsu jadi disahap tu atasna, unang be dililuhon angka bangso, paima salpu na saribu taon i. Dung salpu i, ingkon paluaon ibana sangombas na jempek.

⁴ Dung i huida ma angka habangsa, angka dihunduli ma, dilehon ma tu nasida panguhumon; angkup ni i huida ma tondi ni angka na binunu ala ni panindangion di Jesus dohot ala ni hata ni Debata, i ma angka na so marsomba tu binatang i nang tu gombaranna, jala angka na so manjalo partinandaan i tu pardompahannasida pe. Na mangolu do nasida jala mangarajai rap dohot Kristus leleng ni saribu taon.

⁵Ia na mate, angka na asing, ndang mulak mangolu, paima salpu na saribu taon i. I ma haheheon parjolo!

⁶Na martua jala na badia do halak na martohap di haheheon na parjolo i; ndang marhuaso hamatean paduahon mangago nasida; na gabe malim ni Debata dohot Kristus do nasida, jala mangarajai rap dohot Ibana leleng ni na saribu taon i.

⁷Dung salpu na saribu taon i, malua ma sibolis i sian hurunganna.

⁸Jadi ruar ma ibana mangaliluhon angka bangso di na ualu desa ni tano on, i ma Gog dohot Magog, papunguhon nasida tu parmusuon; na sarihit na di laut do bilangannasida.

⁹Jala nangkok ma nasida tu adaran ni tano i, dihaliangi ma parsaroan ni angka na badia dohot huta na hinaholongan i, gabe madabu ma api sian banua ginjau; i do mangallang nasida.

¹⁰Jadi didabu ma sibolis i, na mangaliluhon nasida, tu laut api dohot barerang, tu inganan ni binatang dohot panurirang pargapgap i, asa dipaporsukporsuk arian dohot borngin, ro di salelenglelengna.

¹¹(II.) Dung i huida ma sada habangsa na balga, na bontar dohot na hundul di atasna: Na maporus do tano dohot langit maradophon bohina, so adong be jumpang inganannasida.

¹²Dung i huida ma angka naung mate i, angka na metmet nang angka na balga, jongjong di jolo ni habangsa i; jadi diungkap ma angka buku. Dung i diungkap ma sada buku na asing, i ma buku hangoluan, gabe diuhumi ma angka na mate i marguru tu na tarsurat di bagasan angka buku i, hombar tu na niulanasida be.

¹³Dung i dilehon laut i ma angka na mate na disini, dilehon nang hamatean dohot banua toru i ma angka na mate na tiniopna, gabe diuhumi ma ganup, marguru tu na niulana be.

¹⁴Dung i didabu ma hamatean dohot banua toru tubagasan laut api i. I ma hamatean na paduahon; laut api i do i.

¹⁵Manang ise na so jumpang tarsurat di buku hangoluan i, i ma didabu tubagasan laut api i.

21 ¹(I.) Dung i huida ma banua ginjang na imbaru dohot tano na imbaru, ai nunga salpu banua ginjang na parjolo dohot tano na parjolo i; laut i pe ndang adong be.

²Jala huida ma huta na badia i tuat sian banua ginjang sian Debata, i ma Jerusalem na imbaru, na pinature songon oroan na sinanggulan mandapothon harajaanna.

³Jadi hubege ma soara na gogo sian habangsa i, na mandok: On do joro ni Debata di tongatonga ni angkajolma; na maringanan ma Ibana di tongatonganasida, jala nasida

ma bangsona, jala Debata sandiri saor tu nasida!

⁴Jadi apusan ni Debata ma nasa iluilunasida sian matanasida: Ndang adong be hamatean nang arsak ni roha; nang angguhangguk, nang na hansit, ndang disi be; ai nunga salpu na parjolo i!

⁵Dung i didok na hundul di habangsa i ma: Ida ma, saluhutna do hupaimbaru! Jadi didok ma: Surathon ma i, ai haposan do angka hata on jala na sintong!

⁶Laos didok ma tu ahu: Nunga saut! Ahu do Parjolo jala Parpudi, Bonana jala Ujungna. Lehononku ma tu na mauas sian mual aek hangoluan i, so pola tuhoron!

⁷Teanon ni na monang i ma saluhutna; jala Ahu gabe Debatana, ibana gabe anakku!

⁸Alai angka na mandele jala na so porsea jala angka na ramun ro di angka pamunu dohot parmainan dohot angka na sumomba ajiajian ro di saluhut pargabus manjalo tohapna di laut na gor api dohot barerang, i ma hamatean na paduahon i!

⁹(II.) Dung i ro ma sada sian na pitu surusuruan i, naung maniop saoran na pitu, angka na marisi haporsuhon parpudi na pitu i, didok ma mandok ahu: Ro ma tuson; hupatuduhon ma tu ho oroan i, soripada ni Birubiru i!

¹⁰Jadi diboan ma ahu di bagasan tondi tu dolok na balga jala na timbo, dipatuduhon ma

tu ahu huta na badia, i ma Jerusalem, tuat sian banua ginjang, sian Debata.

¹¹Hasangapon sian Debata do di huta i. Ia sondangna tudos do tu mata intan na ummarga, songon batu Jaspis na marhillong.

¹²Balga jala timbo do parik ni huta i, sampuludua do harbanganna; sampuludua surusuruan do di atas harbanganna; ia goar angka na sinuratan disi, i ma goar ni marga Israel na sampuludua i.

¹³Tolu harbangan sian habinsaran, tolu sian utara, tolu sian dangsina, tolu sian hasundutan.

¹⁴Sampiludua do batu ojahan ni parik ni huta i; disi do na sampuludua goar ni na sampuludua apostel ni Birubiru i.

¹⁵Ditiop na mangkatai dohot ahu do sada tungkot sere, asa suhatonna huta i dohot angka harbanganna ro di parikna.

¹⁶Na maropatsuhi do hapeahan ni huta i, dos do bohagna dohot unjurna. Jadi disuhat ma huta i marhitehite tungkot i; dapot ma saribu limaratus paal: Dos do unjurna dohot bohagna dohot timbona.

¹⁷Laos disuhat ma parikna, saratus opatpulu opat asta; suhatsuhat nijolma do na di surusuruan i.

¹⁸Sian batu Jaspis do parik i dipauli, jala sere na pinapita do huta i songon sorminan na tio.

¹⁹Dipajeges do angka ojahan ni parik ni huta i marhitehite ragam ni batu na arga: la ojahan na parjolo batu Jaspis do, ia na paduahon Sapis, na patoluhon Kalkedon, na paopathon batu Samarados.

²⁰Ia na palimahon batu Sardoni, na paonomhon Sardion, na papituhon Krisopras, na pauluhon Berillos, na pasiahon Topasion, na pasampuluhan Krisopras, na pasampulusadahon Hiakintos, na pasampuluduahon batu Ametistos.

²¹Ia na sampuludua harbangan i sampuludua mutiha do; ganup harbangan sian sada mutiha. Ia alaman ni huta i sere na ias do, songon sorminan na tio.

²²Ndang adong huida joro di bagasan huta i, ai Tuhan Debata, Sigomgom saluhutna, do jorona rap dohot Birubiru i.

²³Ndang ringkot di huta i mata ni ari manang bulan, asa sondanganna; ai hasangapon ni Debata do patiurhonsa, Birubiru i do panondangna.

²⁴Na mardalani ma angka bangso di bagasan sondangna; boanon ni angka raja ni tano on ma hasangaponnasida tusi.

²⁵Ndang na hinsu harbanganna manipat ari, ai ndang masa disi borngin.

²⁶Jadi boannonnasida ma hasangapon dohot hamuliaon ni angka bangso tubagasan huta i.

²⁷Na so tupa masuk tu huta i nasa na ramun, nang siula hagigian dohot gabus,

nda holan angka naung tarsurat di buku hangoluan na di Birubiru i.

22¹ (I.) Dung i dipatuduhon ma tu ahu batang aek hangoluan na tio songon sorminan, na ruar sian habangsa ni Debata dohot Birubiru i.

²Di tongatonga ni alamanna dohot di batang aek i angkupangkup adong hau hangoluan, na marparbue sampuludua hali, na mangalehon parbuena ganup bulan; ia bulung ni hau i gabe hahisaron ni angka bangso.

³Ndang adong be na hona bura. Disi do habangsa ni Debata dohot Birubiru i; angka naposona i ma marhalado di Jolona.

⁴Idaonnasida do Bohina; di pardompahannasida do Goarna.

⁵Ndang masa be disi borngin, ndang ringkot be di nasida palito manang sondang ni mata ni ari, ai sondangan ni Tuhan Debata do nasida, jala na mangarajai do nasida salelenglelengna.

⁶(II.) Dung i didok ma mandok ahu: Haposan do angka hata on jala na sintong; disuru Tuhan Debata, nampuna tondi ni angka panurirang, do surusuruanna, patuduhon tu angka naposona angka na naeng masa tibu.

⁷Ida ma, gira do Ahu ro! Martua ma na mangaradoti angka hata panurirangon na di bagasan buku on!

⁸Ahu, Johannes, do marnida jala umbege angka on. Jadi dung hubege jala huida,

manungkap ma ahu marsomba tujolo ni pat ni surusuruan, na patuduhon angka i tu ahu.

⁹Jadi didok ma mandok ahu: Unang ma songon i! Donganmu naposo do ahu jala dongan ni angka hahaanggim, dongan ni angka panurirang dohot angka na mangaradoti hata ni buku on. Debata ma somba!

¹⁰Dung i didok ma mandok ahu: Unang sahapi angka hata panurirangon ni buku on, ai jonok ma tingkina!

¹¹Tong ma didatdati siula hajahaton mangulahon hajahaton; tong ma diramuni na ramun i dirina; tong ma diulahon na tigor i hatigoran; tong ma diparbadaia na badia i dirina!

¹²Ida ma, gira ma Ahu ro! Boanonku ma upa silehonon tu ganup, hombar tu na niulana!

¹³Ahu do Mulana jala Punsuna, Parjolo jala Parpudi, Bonana jala Ujungna!

¹⁴Martua ma angka na mamburi abitnasida, asa marhuaso nasida marjambar di hau hangoluan i jala masuk sian angka harbangan tubagasan huta i.

¹⁵Dibalian ma angka biang dohot angka siulahon rasun dohot angka parmainan dohot pamunu dohot sioloi na so Debata, ro di nasa na mangkaholongi jala na mangulahon gabus.

¹⁶Ahu, Jesus, marsuru surusuruanku, mangkatindangkon tu hamu angka on, mandapothon angka huria i. Ahu do urat

dohot marga ni Daud, bintang sipaias na marsinondang i!

¹⁷Jadi didok Tondi dohot oroan i: Ro ma Ho! Laos dohonon ni na umbegesa: Ro ma Ho! Sai ro ma na mauas; dijalo na giot roha i ma aek hangoluan i, dalan basabasa!

¹⁸Ahu mangkatindangkon di ganup, na umbege angka hata panurirangon ni surat on: Ia adong na manambai tusi, tambahan ni Debata ma tu ibana angka haporsuhon, na tarsurat di bagasan buku on.

¹⁹Jadi molo adong na mamuati angka hata ni buku panurirangon on, buatan ni Debata ma tohapna na di hau hangoluan dohot di huta na badia i, angka na tarsurat di bagasan buku on.

²⁰Didok Ibana na mangkatindangkon on; Olo, na ro ma Ahu tibu! Amen; ro ma Ho, ale Tuhan Jesus!

²¹Didongani asi ni roha ni Tuhan Jesus ma angka na badia!

Alkitab dalam Bahasa Batak Toba

Teks Perjanjian Lama diterjemahkan berdasarkan Bahasa Ibrani
Teks Perjanjian Baru diterjemahkan berdasarkan Bahasa Yunani

=====

BIBEL DOHOT ENDE

© LAI 1998

Teks Alkitab Bahasa Batak Toba

Not to be used or sold for profit.

Released for non-profit scholarly and
personal use. When making formal public
reference to the materials, permission is
required from Lembaga Alkitab Indonesia as
the copyright holder.